


Fúka Moodaanaki Kira  
Ufa Afaqínaasa Ufa



Portions of the Holy Bible in the Binumarien language of  
Papua New Guinea

**Fúka Moodaanaki Kira Ufa Afaqínaasa Ufa**  
**Portions of the Holy Bible in the Binumarien language of Papua**  
**New Guinea**  
**Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 18 Apr 2025 from source files dated 31 Aug 2023  
4a891130-f25d-5e30-a81c-882b2e037698

Contents

FRT . . . . .	1
OOSANA . . . . .	2
RAFUDOO AKARAFa . . . . .	73
ESTA . . . . .	130
IDI UFA . . . . .	141
AAQUQIRA UFA . . . . .	251
MATAIOO . . . . .	283
MAREEKOO . . . . .	347
RUKA . . . . .	383
YOOHANEe . . . . .	443
NIQIQOO FASIQAUSA . . . . .	488
ROOMMA . . . . .	545
1 KOORINTI . . . . .	573
2 KOORINTI . . . . .	601
KARATIA . . . . .	618
EEFEESUSA . . . . .	628
FIRIPI . . . . .	638
KOOROOSee . . . . .	645
1 TEESAROONIKA . . . . .	652
2 TEESAROONIKA . . . . .	658
1 TIMOOTI . . . . .	661
2 TIMOOTI . . . . .	669
TITUSA . . . . .	674
FIREEMOONA . . . . .	678
HEEBURU . . . . .	680
YAMEESA . . . . .	701
1 PEETOOROO . . . . .	707
2 PEETOOROO . . . . .	715
1 YOOHANEe . . . . .	719
2 YOOHANEe . . . . .	726
3 YOOHANEe . . . . .	727
YUDEESA . . . . .	728
UQAFIQOO UFafa . . . . .	731

## **Anutuna Ufa**

First Edition of New Testament published 1983 400 copies

This revised edition plus 5 Old Testament books published 2017 450 copies

© 2017 Wycliffe Bible Translators, Inc.

This book is a translation of the New Testament and five Old Testament books into the Binumarien language which is spoken by approximately 1000 people who live 20 nautical miles east of Kainantu in the Eastern Highlands Province of Papua New Guinea.

For this edition, a minor revision was done on the 1983 Binumarien New Testament and the 2003 publication of Genesis, Exodus, and Psalms. Proverbs and Esther, which were translated since then, are also included. In the revision process, tone makers and dashes were removed from most words for easier reading and some long words were broken into shorter words. In addition, the text has undergone minimal revisions of various kinds. New maps, illustrations, and pictures were included to aid understanding. A topical index was included for Bible study.

To date the Binumarien people continue their efforts towards completing their translation of the full Bible.

## **Amuaqira Ufa**

Ooqeennaa tamummaqaraua ufa akara rusa Heebeeru ufakiqari akara riqau. Yisufa aqbee nari ufa Arammaika ufakiqari qimarufaqa Fuka Moodaanaki Kirana akara rusa Kirika ufakiqari akara riqau. Magee kaqi Kirika ufakiqari marifaqa aiqama maqannaasa nari ufakiqari quandasee akara ridaqa. Afaqinnaasa ufakiqari faqa indaaruu akara rumasoonaa 1984 aukuannaki maraqau. Tamummaqaraua ufa moodaannai qisauku (5) buka faqa akara rumaqaafanoo maridanoo. Mifa inni dadaaqinaqa, innee Anutufa Isaraee maqannaasaki auqoo ainainausara amiqimmasee irifaranoo.

Aiqama fookufa taikeenoo, qoodaa kai kaqi uqaqaafanoo maridanoo. Maaqira ququsaki mari ufafa ( ) inni irirana dadaaqianifeera papiqa akara rimariasa uqaidaqa. Kaifaa maaqira ququsaki mari ufafa [ ] ooqai indaaruu maa papiqana akara rusa kooroo ira ufa maaqira ququsaki akara rumaqoofanoo marinau. Kirika ufakiqari sia amiqimmasee koorooina faqa mi ququsanaki koorooidaqa. Maa bukana atinni weesa nambaqa faqa buka auqu qusa uqaqaafanoo maridanoo. Mataioona qusa auqu Mat miqirafauqa faqa piksaauqa faqa Isaraee maqannaasa maqa maaqa faqa inni dadaaqianifeera akara rumaqaafanoo maridanoo.

## OOSANA AROO UFABA

*Maa maqa maaqana faqa faiqi faqa auqu ufafa.*

<sup>1</sup> Oosana kuradoo aukuanna Anutufa sia maru ainainannai mirisinnaarunna faqa maa maqana faqa oosana arasee auqinau.

<sup>2</sup> Mi aukuanna maa maqafa fifau faafau inoo marufanoo, asukuna firaafa rafaafafinoo marufanoo Anutuna maraqa fannoo nammari amuaqumau ufaira foora uqidanoo oonuree aniree imarinau.

<sup>3</sup> Mi faasaanna Anutufa qinau, kaaqa qaranara mariannee qufanoo kaaqa qarafa kambiqanau.

<sup>4</sup> Kambiqafufanoo qafamaseenoo amiqimambinoo qimaseenoo kaaqa qarana faqa asukuna faqa aadu aadu rakeemma quqanau.

<sup>5</sup> Rakeemma quqaseenoo qafamaseenoo Anutufa kaaqa qaranara faasaanee qinau, asukunara eendaki fee qinau. Miqi qimasoofanoo mikari indaaruu oosana araseenoo eendirafa naaree anireenoo aiqaroofanoo iaqarafa aniroofanoo mifa mi iaqarafa faqa mi eendirafa faqa indaaruuqaa faasaana marinau.

<sup>6</sup> Mina inaaqianaa faasaana Anutufa kaifaa qinau. Innaaruna kaqi saqanna rainafinoo nammari mirinni faqa mianni faqa aadu aadu rainanoo marianifeera qufanoo miqimminau.

<sup>7</sup> Miqi qimaseenoo Anutufa innaaruna kaqi saqanna auqu quqaseenoo nammari raina mianni faqa mirinni faqa quqanau. Quqasoofanoo doo miqinoo marinau.

<sup>8</sup> Anutufa mi kaqi saqanna auqureenoo innaarunee qinau. Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa inaaqianaa faasaana marinau.

<sup>9</sup> Qaaramoo faasaanaikufanoo Anutufa kaifaa qinau. Maqasaa nammari suqufinoo moodaanaki mandi finanoo maqa aadana koorooianifeera qimasoofanoo miqimminoo marinau.

<sup>10</sup> Anutufa aadanaikunara maqa fee qinoo auquranau. Nammari moodaanaki suqunara ooruku nammari fee qinoo auquranau. Miqi qimaseenoo doo andeeqafiifoo qimaseenoo asasinau.

<sup>11</sup> Asasammaseenoo fuka maqasaara Anutufa qinau. Andanda oosana oosana kambiqaani, oosana oosana andanda neemaru ainainna aqama faqa kambiqaanni, oosana oosana aqama ireemari saqarisa faqa kambiqaanee qufanoo miqimminau.

<sup>12</sup> Maqa fannoo, oosana oosana andanda faqa saqari faqa maqanau. Maqasoofanoo Anutufa aiquqummaseenoo doo amiqimminoo fee qimasee asasinau.

<sup>13</sup> Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaaramookinau.

<sup>14</sup> Anutufa kaifaa qinau. Innaarunai qooma oosana oosana kambiqafinana, suani faqa quqoona faqa fasau faqa iaqarana faqa asukuna faqa rainaanifeera qinau, iaqarafa faqa aukuna faqa amaana suqirana oosana areemariana uqannifiqaani fee qinau.

<sup>15</sup> Mi qoomausa innarunaindari maqasaa kaaqa qamannimaqaani qufanoo miqimminau.

<sup>16</sup> Miqi qimaseenoo Anutufa fira qomatiaqara suani faqa quqoona faqa miqanda quqanau. Fira qooma suaniara anee faasaana rakisinnimaqaannee qinau. Kaqikaa qoomara quqoonara anee eendaki rakisinnimaqaannee qinau. Fasau namu faqa auqu quqanau.

<sup>17</sup> Anutufa mi qoomausa innaarunaindari maqasaa kaaqa qaanifeera quqanau.

<sup>18</sup> Eendaki faqa faasaana faqa rakisidanoo asukuna faqa kaaqa qarana faqa rainaanifeera quqanau. Anutufa quqaseenoo aiquqummaseenoo doo amiqimmafino fee qimasee asasinau.

<sup>19</sup> Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaara faqa qaara faqaikinau.

<sup>20</sup> Anutufa kaifaa qinau. Aiqama nammari mari aainausa oosana oosana kambiqaani, maqa mirinni kaqi saqanna oosana oosana ufinuqa qumbiqafa maridaqa qaqafa nuqa.

<sup>21</sup> Miqi qimaseenoo Anutufa ooruku nammari mari fira aandausa faqa oosana oosana ainaina faqa auqu quqanau. Ufinuqa oosana oosana faqa auqu quqanau. Auqu quqaseenoo aiquqummaseenoo amiqimmiifoo qimasee asasinau.

<sup>22</sup> Miqi qimaseenoo Anutufa narí afaaqooqa qimannimaqeenoo qinau. Inni asumu moomoo kambiqafiqa ooruku nammarki qumbiqafaqqa mariaqa. Mifa ufiniuqara faqa moomoo kambiqafi mariaqee qinau.

<sup>23</sup> Miqi qimasoofanoo eendirafa aiqaroorfanoo iaqarafa aniroofanoo mi iaqarafa faqa mi eendirafa faqa moodaannai qisaukukinau.

<sup>24</sup> Miqimma fufanoo Anutufa qinau. Maqa fannoo oosana oosana kasirana faqaa aandaufa maqaani. Maqeeena aadau faqa kaasau aandau faqa firaana faqa kaqikaana faqa maqa fannoo maqaani qufanoo miqimminau.

<sup>25</sup> Miqimmaseenoo Anutufa mi aiqama ainainausa auqu quqaseenoo amiqimmafinoo qimaseenoo asasinau.

<sup>26</sup> Miqimmaseenoo Anutufa kaifaa qinau. Maasa faiqí naanna faqaasa auquanaura, maasa qimana kai maasa qeeqa fooqaana auquanaura. Misa ooruku nammariki noodaanna ainaina faqa sandaaqai qaqaamaree nimaria ufinisa faqa maqeeena aandaufa faqa kaasau aandaufa firaanauqa saa faqa kaqikaanauqa saa faqa rakisianifeera auquanaura.

<sup>27</sup> Miqi qimaseenoo Anutufa faiqí narí fooqaa irana kai auqinau. Faiqí faqa anaasee faqa naumoo faqaa qanda auqinau.

<sup>28</sup> Auquseenoo Anutufa nifaaqooqa qinoo qinau. Inniqara asumu moomoo kambiqeeqa maa maqa maaqanaki qumbiqafiqa rakisiaqa. Qinee inniqara mareeqee ooruku nammariki noodaanna faqa ufiniuqa faqa aiqama kaasau aandaufa rakisirausaika mannimaqaanaura.

<sup>29</sup> Anutufa kaifaa qinoo qinau. Inni narana sakummara foora ireemarina oosana oosana faqa oosana oosana saqari aqama faqa naaqeera nimidaqa.

<sup>30</sup> Doo qinee aiqama kaasau aandaufa faqa ufiniuqa faqa andanda faqa nariqa neemaria saqari amaneesa faqa naaqeera qinee nimidaqa. Miqi qimasoofanoo miqimminoo marinau.

<sup>31</sup> Doo Anutufa narí auqu quqasoo aiqama ainainauqa qafamaseenoo firaqoo asasinau. Miqimmaseenoo eendirafa aiqaroorfanoo iaqarafa aniroofanoo mi iaqarafa faqa mi eendirafa faqa moodaannai qisauku taikasee dinni moodaa marasee 6 faasaanaikinau.

## 2

<sup>1</sup> Miqimmaseenoo Anutufa aiqama innaaruna faqa maqa faqa auqu taikanau.

<sup>2</sup> Dinni taikasee dinni oonu qaaraqanda marasee 7 faasaana Anutufa narí ainainirana taikanau.

<sup>3</sup> Dinni taikasee dinni oonu qaaraqanda 7 faasaanara Anutufa afaaqooqa qimasee, aaduma naaquqara faasaanee qinau. Narí kadaapirirana mi faasaanna taikoonara mi faasaannara naaquqara faasaanee qimasee idooanau.

*Adamafa faqa Eewafa faqa.*

<sup>4</sup> Miqimmaseenoo Anutufa innaaruna faqa maqa faqa auqinau.

<sup>5</sup> Indaaruu karaambaiqa Anutufa maa maqana faqa miri innaaruna faqa auqu aukuanu aaku sia maqasaa quqoonara oosana oosana andanda qaqaama sia kambiqanau. Faiqí maqa apaurirafa faqa sia marinau.

<sup>6</sup> Mikamuqoo nammari fannoo maqakiqari urureenoo aiqama maqa maaqa uqeena amaqanau.

*Eedeena saqama ufa.*

<sup>7</sup> Mikari karaambaiqa Anutufa maqa qumareenoo faiqí minannoo auqinau. Auquseenoo marirana nimi maru aidoona aikaamarai fuaqasoofanoo mi fasiqafa kasirana maranau.

<sup>8</sup> Mi fasannai Anutufa suani afu oosana Eedeenna maqa maaqaki kadiqa firaana auquseenoo narí auquqoo fasiqana minaki quqanau.

<sup>9</sup> Anutufa oosana oosana amiqira saqariara qufanoo minaki kambiqafufaqa amiqira aqama iraqau. Kadiqa qambaana saqari qaaraqanda marinau. Moo saqari fannoo marirana nimi maru saqarifa marinau. Kafaa moo saqari fannoo mandainainara faqa amiqira ainainara faqa irimaria iriranna nimimarufa marinau.

<sup>10</sup> Nammari moo fannoo Eedeena maqa maaqakiqari qumureenoo kadiqa qambaana maqa uqeena uqeena ianifeera qumiqareenoo qaara faqa qaara faqaki raina fufanoo ooqufinau.

<sup>11</sup> Moo amara auqu Pisona nammari fee qiqau. Mifa Qafiraa maqa maaqa atindannai ooqu finaau.

<sup>12</sup> Miqoo koora amiqirafa maridanoo, amiqira afundi maru saqari anoonafa faqa miqoo marinau. Fira feefauru aqimaria oonifa faqa miqoo marinau.

<sup>13</sup> Kafa moo amara auqu Kiqoona nammari marinau. Mifa Kusa maqa maaqa atindanai qumifi marinau.

<sup>14</sup> Kafa moo amara auqu Taikirisa nammari marinau. Mifa Asiria maqa maaqa suani oosana qaannai atindanai qumi marinau. Moo amara auqu Eeufarateesa nammari marinau.

<sup>15</sup> Karaambaiqa Anutufa nari auquqoo fasiqana mareeqee Eedeena kadidakina quqanau. Kadidaki maqa apauridanoo aiqama ainainasaa mi kadidanaki rakisianifeera quqanau.

<sup>16</sup> Anutufa quqaseenoo mi fasiqana maaqi qimaseenoo aakapanau. Anee kadidakina aiqama saqari qaqama diqisee naannee qinai.

<sup>17</sup> Moodaa saqariara kai qinee qaoo qidaqa. Manda ainainara irirana faqa amiqira ainainara irirana faqa nimi mari saqarina kai sia naa. Anee namaseenana mikari kai kuqinnaranoo.

<sup>18</sup> Mi fasannai karaambaiqa Anutufa mi fasiqanara qinai, maa fasiqafa nariaraa marifanoo siamma andeeqaidanoo. Qinee mina aqoonnana auqusaananoo mina dadaaqiannoo.

<sup>19</sup> Anutufa maqa qumareenoo minannai aiqama aanda faqa ufiniuqa faqa auqinai. Auquseenoo aiqama naarammeeqeenoo faiqi maruqoo nuquraanifeera quqasoofanoo nana ainainee auquroofa doo mi nuquna faqaasa mariqau.

<sup>20</sup> Miqimaseenoo faiqi fannoo kooqikinaa aanda faqa kaasau aanda faqa ufiniuqa faqa nuquna rama quqanau. Miqiqqa marufanoo Anutufa mi fasiqana aqoonnanaikiranara misaki randeenoo sia paqurinau.

<sup>21</sup> Minara faiqarana faiqi aminai. Faifufanoo Anutufa mina aqaasana moodaa tatuseenoo mina amaqqinnai minaki ititanau.

<sup>22</sup> Ititaseenoo karaambaiqa Anutufa mina aqaasanannoo anaasee auqinai. Auquseenoo faiqi maruqoo afiqee finai.

<sup>23</sup> Quqasoofanoo faiqi fannoo qafamaseenoo qinai.

Doo maqee uqanna qini fooqaairafa uqanna maridanoo, amudaani qini qimudaani kinaafa, amaqi qini qimaqqinnai auqirafa, qinee minara anaasee fee qimasee auquraanau, mifa faiqi kinaafa marinara miqi qimasee auqu raanau.

<sup>24</sup> Minara kai faiqi nari anoona akoona minnisee nari anaafa faqa moodaanaki mafi moodaara foora maridaqa.

<sup>25</sup> Mi fasiqafa nari aanaaqandiri kaqisamu maruqanda mariqau, sia nariara nariara nisauri mariqau.

### 3

#### *Faiqi anaasee Anutuna ufa rukiqoo ufafa.*

<sup>1</sup> Karaambaiqa Anutufa aiqama aandaugakina auquqoona qambaanindari sakani mifa nikaru qira ufa akoofasa marinau. Mifa anaasee iramirinoo qinai. Kuqaa fee Anutufa saqariuqaki aiqama qaoo qinoo fee sia naaqee qinoo fee.

<sup>2</sup> Mi anaaseefa minara iriseenoo qimaminai. Eeo aiqama maa afuqanakinaa saqari naaqee qifaqa naidaqa.

<sup>3</sup> Kadiqa qambaanai moodaa saqariara sia naaqee sia auqaaqee qifaqa sia naidaqa. Maasa namaseeqa kuqanauranoo.

<sup>4</sup> Sakani mina ufa iriseenoo anaasee akaru qinoo qinai. Namasee sia kuqinnara unnaqidanoo, anee sia kuqinnaranoo.

<sup>5</sup> Anutufa minara iridanoo qaoo qinoo. Innee mi saqari aqamana namasee Anutufara foora maridaqa manda ainainara faqa amiqira ainainara faqa irifoora.

<sup>6</sup> Anaasee sakani ufa iriseenoo mi saqarina afu qafamasoofanoo amiqirafa marufanoo aqama faqa qafoofanoo idaaqirafa marufanoo amiqira ainainara iriranara faqa manda ainainara iriranara faqa irufanoo amiqufanoo mi saqari aqamana diqiseenoo neenoo nari afaaqi faqa amufanoo nanau.

<sup>7</sup> Miqanda namasoofanoo mikari miqanda nifusaa irirafa kambiqoofaqa nari nifaaqa qafamasee kaqisamu maridee qimaseeqa nisauruseeqa saqari amanee didiqi amanee fooqaana qumaree akunuseeqa nari nifaaqasaa ititaqau.

<sup>8</sup> Mi faasaanna eenaanianna asooaa asooaa imarufanoo Karaambaiqa Anutufa kadidai nimarufafa faiqi faqa anaasee faqa iriqaqara saqariuqaki nisaurusee kukeeqaqau.

<sup>9</sup> Karambaiqa Anutufa faiqi aaramasee anee yaifee qufanoo mifa qinau.

<sup>10</sup> Anee kadidai nuanaqa qinee iriseeqa kaqisamu mariunasa rufiseeqa saqariuqaki kukeeqaidaqa.

<sup>11</sup> Miqi qufanoo Anutufa qinau, yafee ani kaqisamu mariannanara qimaminoo fee. Anee saqari aqama qinee qaoo qunnana neenanee.

<sup>12</sup> Faiqi iriseenoo nari qimaminoo qinau. Maa anaaseefa qini faqa marifa anee qimunafa mifa qimifaqa neeqa.

<sup>13</sup> Miqi qufanoo karaambaiqa Anutufa mi anaaseena iramirinoo qinau. Anee nanaree maa oosanna mareenane. Mi anaaseefa iriseenoo qinau. Sakani fannoo anireenoo qini qikaru qifaqa neeqa.

*Anutufa manda afaaqooqa faiqi faqa anaasee faqa sakani faqa niminau.*

<sup>14</sup> Karaambaiqa Anutufa mina iriseenoo quandafinoo mi sakanina manda afaaqooqa qimamaqeenoo qinau.

Anee maa anaaseena akaru qiannanara mina akiiqara aiqama aandaqakiqari anee kai maa manda afaaqooqana mareennaranoo.

Anee maqamau amuaqundari nidana kookoomma nananua.

<sup>15</sup> Qinee qianaqa maa anaaseefa faqa anee faqa nariara fidiqaa ifaranoo.

Inniqara faiqinamu naaruara namuqaa marifaranoo.

Mi anaaseena asumu kiqari moodaa fannoo ani akiqqa radamuannoo. Anee mina asumu kinaana aiku ataa ukaqa aminnaranoo.

<sup>16</sup> Anutufa maaqi qimasee anaasee afaaqooqa qinoo qinau.

Anee amuaquqa faqa marinaqa umaara firaanaikamma amaqaanura.

Miqimmaseeqa faiqi maqaraqoo faqa aupurarana amianura. Ani aundura fannoo aneenna afaaqiara rida marinnaranoo.

Ani afaaqi fannoo ani uri aaqararafa marinana anee mina ureeqarafa marinnaranoo.

<sup>17</sup> Miqi qimaseenoo Anutufa quandafinoo faiqi afaaqooqa qinoo qinau.

Anee aneenna anaqa ufa iriseena qinee qaoo qunna saqarina qaqama naananoo.

Minara maa maqana aqurasaanana anee kadaapi ridana arirana rakeeidana maa maqanaki ummaqusee naida maria.

<sup>18</sup> Nimmuru faqa amuka faqaa ainaina faqa maqakiqari kambiqaanoo. Anee kaasau andanda neennaranoo.

<sup>19</sup> Anee tooqaamu arimarinana kadaapirumasaidana maa maqanasaa narana kambiqasaidana nana fiifinana kuqinana maqaki ani auquafannanaki finnaranoo.

Ani maqannai auquqaafanafa marianafa mariananoo. Anee maqa mariananoo kaifaa maqaikamma finnaranoo.

<sup>20</sup> Faiqi fannoo nari aanaaqara maqasaa qaraa fasiqa anaasee ninoo fee qimaseenoo auqu Eewanee qinau. (Mi auquna oosana aiqama faiqi faiqi ninoo fee qidanoo.)

<sup>21</sup> Karaambaiqa Anutufa aandau apata qumareenoo minannai qamunnara foora uaqeeqeenoo Adamana faqa nari anaqa Eewana faqa niminau.

*Anutufa Adamasa Eewasa kadidakiqari niqiqanau.*

<sup>22</sup> Miqimmaseenoo Karaambaiqa Anutufa qinau. Maqee faiqi faiqi maafa maasara foora maridaqa aqara oosanara faqa andeeqara oosanara faqa iridaqa. Maasa sia miqandara qianaqa naaru marirana nimimari saqari aqamana diqisee neefaranoo. Diqisee namaseeqa naaruara marifoora.

<sup>23</sup> Karaambaiqa Anutufa minara iriseenoo Eedeena kadidakinaana doo miqanda nifaqaseenoo qinau. Inneeqara inni auquafanna maqanasaa maridaqa maqa auqama-saidaqa narana paquriaqa.

<sup>24</sup> Anutufa Eedeena kadidakiqari Adamasa Eewasa niqiqoofaqa fufanoo suani oosana qaannai kadida atinni naaru marira saqari fainnai fimaru aannanasaa angirooquqa quqa-soofaqa ida auru arira paipana uaqeeidaqa faiqi minni fifoora ruki tataaka imariqau.

## 4

*Kainasa Abeerasa ufa.*

<sup>1</sup> Adamafa nari anaqa Eewana faqa aana numasoofanoo amuaqu qaikinoo faiqi maqaseenoo mina auqu Kainafee qinau. Maqaseenoo Eewafa qinau, Anutufa dadaaqi-faqa qinee faiqi akoonaiqi maqeeqa.

<sup>2</sup> Kafa mariufanoo faiqi moo maqaseenoo mina auqu Abeerane qinau. Abeerafa innoqafinoo kooqikinaa aandausaa rakisirafa marinau. Mina afasaafa Kainafa innoqafinoo afuqakina ainaini marufa marinau.



<sup>3</sup> Mariufanoo moo kari Kainafa narí afuqakinaa ainaina maraseeoo Anutuna tatufirana suqa aminau.

<sup>4</sup> Abeerafa mifa faqa Anutuna tatufu amiraree qimaseenoo narí firimaru aandausakinaana ooqasaa maqarana afaaqafaqaana aruseenoo amiqira afaaqa kai tatufirana suqa aminau. Abeerana tatufirana Anutufa qafeenoo amiqira fee qimasee asasinau.

<sup>5</sup> Kafaa Kainaindi qafamasee minnisana. Kainafa mina qafoofoanoo firaqoo arana qoofanoo oori runinau.

<sup>6</sup> Anutufa Kainana qafamaseenoo qimaminau, nanaree ani arana qaidanoo fee. Nanaree ani oori mianni qumidanoo fee.

<sup>7</sup> Anee amiqira ainaina auqeenanau asasa mianaiqini. Anee mandainaina auqaan-nanara numoo fannoo ani kooqiki ani amaara usinoo maridanoo. Mifa ani rafaqaq firarinana anee mina uraqaaraa.

<sup>8</sup> Miqi qimasoofoanoo Kainafa narí akaqa Abeerana qimaminoo qinau. Aninaqa aana fua. Miqanda moosaa oonureeqa Kainafa narí akaqa Abeerana kuqa arinau.

<sup>9</sup> Arusoofoanoo Anutufa Kaina iramirinoo qinau, ani akaqa Abeerafa yafee maridanoo fee. Qufanoo Kainafa qinau, Abee qinee sia iridaqa, anee qiniara narí akaqasaa rakisimarifee fee qidanee.

<sup>10</sup> Anutufa mina iriseenoo qinau. Kaina anee nanee mareenee. Anee iria, aneenna akaqa fidika maqasaa teeqiananoo. Mi fidikafa mina akiqara iannee qimasee maqak-iqari qini daaraifaqa iriqa.

<sup>11</sup> Anee aneenna akaqa fidika maa maqanasaa teeqiananoo maqa qoo raqafinaki ani akaqa fidika minaki keeqeenoo. Minara qinee ani aqurara ufa ameemaana qaquidaqa. Anee sia kaifaa maqaki narana ummaqasaida neennaranoo.

<sup>12</sup> Anee narana ummaqusainanoo maqa fannoo sia ani narana amiannoo. Minara anee maaqa siainafa maridana aiku quqirafa maaqa maaqa kaqi ninnaranoo.

<sup>13</sup> Kainafa minara iriseenoo Anutuna qimaminoo qinau. Anee qummaara firaana qini qimiananoo sia qinee amana uqeeranaura.

<sup>14</sup> Qinee maa maqanasaa ani afusaa marunnana anee diqigaanaqa qinee qiku quqir-  
rausa aiqamatinai nuanaura. Qinee maaqanna maaqanna dapikiqa nuananoo yafee qini qiqafainafa mifa kuqa daruannoo.

<sup>15</sup> Karaambaiqa minara iriseenoo qimaminoo qinau. Sia miqifara, faiqi moo fan-  
noo yafee ani arinnana qinee mina akiqara dinni taikasee dinni ani qaaraqanda marasee naruanaura. Miqi qimaseenoo karaambaiqa Kaina afaaqasaa sia aruaqee akara quqanau.

<sup>16</sup> Miqooqari Kainafa Anutuna oorisaqari finoo Eedeena kadida aqaqari suani oosana qaannai moo maqa maaqai mina auqu niku quqirausa nua maqusa fee qimarunnai finau.

### *Kainana aiku asauku nuqu.*

<sup>17</sup> Miqoo oonureenoo Kainafa narí anaqa faqa faiqi moo akoonaiqi maqaseenoo mina auqu Eenookanee qinau. Kainafa narí anaqa faiqi maqoo kari maqusa moo auquseenoo mi maqusana auqu narí amaaku amaranaikinoo Eenooka maqusa fee qinau.

<sup>18</sup> Eenookafa faiqi kammafinoo akoonaiqi Iradana maqanau. Iradafa faiqi kammafinoo akoonaiqi Meequyaerana maqanau. Meequyaerafa faiqi kammafinoo akoonaiqi Metusaerana maqanau. Metusaerafa faiqi kammafinoo akoonaiqi Rameekana maqanau.

<sup>19</sup> Rameekafa faiqi kammafinoo qaara anaasee maranau, moona auqu Adaa nammarifa moona auqu Siraa nammarifa mariqau. (Adaa nammarina auqu oosana amiqira fee qimaqoofa marinau. Siraa nammarina auqu oosana auqaana fee qimaqoofa marinau.)

<sup>20</sup> Indaruqaa anaasee auqu Adaa nammarifa faiqi moo Yabarana maqasoofanoo findifinoo aandau apatannai uqaana maqa usakasaida nimarusa nikoofa marinau.

<sup>21</sup> Yabarafa firimaru aandausaa rakisi marusa nikoofa marinau. Yabarana akaqa Yubarafa marinau. Mifa findifinoo qufireena fuaqee marusa faqa piripunna arimarusaa faqa nikoofa marinau.

<sup>22</sup> Rameekana inaaqiana anaasee moo Siraa nammarifa marinau. Mifa akoonaiqi Tubarakaina maqasoofanoo findifinoo kooapaannai faqa qainnannai faqa ainaina auqimarufa marinau. Tubarakainana auna auqu Naammaa nammarifa marinau.

<sup>23</sup> Rameekafa narí anaqaqara maaqi qimasee qimanniminau.

Adaa nammarisa Siraa nammarisa qini ufa iriaqa,

Qinee Rameekausa qini qinaaqara ufa qianaqa amiqimmasee iriaqa.

Faiqi moo fannoo kaakadi darifaqa qinee mina kuqamma ariqa.

Asauku samu qini darina akiqara mi kumaaraana kuqamma ariqa.

<sup>24</sup> Moo fannoo Kainana arinnana akiaqara Anutufa dinni taikasee dinni ani qaara marasee 7 fasiqa naruannoo. Moo fannoo qini Rameekausa darinnana akiaqara Anutufa fiqaramasee 77 fasiqa naruannoo.

*Seetana aiku asauku nuqu.*

<sup>25</sup> Adamafa kaifaa narí anaafa faiqi mara amisoofanoo amuaqa qaikinoo akoonaiqi moo maqaseenoo mina auqu Seetanee qinau. Miqi qimaseenoo mina anoofa qinau. Anutufa qini qimaaku moo qiminoo narí afasaana Abeerana amaaqa maqaanifeera qiminoo mifa Kainafa aruna amaaqa maqaannoo.

<sup>26</sup> Seetafa innooqafinoo akoonaiqi Eenoosana maqanau. Eenoosafa maru kamuqooqari oosana arasee misa Anutunara innaaru qidaqa minara naaqura Karaambaigee Yaawee fee qidaqa innaaru qimariqau.

## 5

*Adamana aiku asauku nuqu.*

*(1 Stori 1:1-4)*

<sup>1</sup> Adamana aiku asauku misa oosana maaqimmasee akaraki marinau. Anutufa indaaru narí amana kai faiqi anaasee auqinau.

<sup>2</sup> Naumoo faqaa qanda auquseenoo nifaaqooqa qima nimaqaseenoo faiqi anaasee fee qimasee nuqu ranau.

<sup>3</sup> Adamafa aukuaana 130 marasoofanoo mina amaaku Seetafa kambiqaanau. Narí akoonaa fooqaafa mina amana kai marinau.

<sup>4</sup> Seetana maqookari oosana araseenoo Adamafa 800 aukuaana maranau. Mi kamuqoo akoonaiqi maanaafa faiqi namu moomoo Adamafa maqanau.

<sup>5</sup> Adamana aukuaana aiqama 930 maraseenoo kuqinau.

<sup>6</sup> Seetafa 105 aukuaana maraseenoo akoonaiqi Eeennoosana maqanau.

<sup>7</sup> Eeennoosana maqoo kamuqooqari Seetafa 807 aukuaana maraseenoo mi kamuqoo akoonaiqi maanaafa faiqi namu moomoo maqanau.

<sup>8</sup> Seetana aiqama aukuaana 912 maraseenoo kuqinau.

<sup>9</sup> Eeennoosafa 90 aukuaana maraseenoo akoonaiqi Keennana maqanau.

<sup>10</sup> Keennana maqoo kamuqooqari Eeennoosafa 815 aukuaana maraseenoo mi kamuqoo akoonaiqi maanaafa faiqi namu moomoo maqanau.

<sup>11</sup> Eeennoosana aukuaana aiqama moodaanaki 905 maraseenoo kuqinau.

<sup>12</sup> Mina amaaku Keennafa 70 aukuaana maraseenoo akoonaiqi Maqarareerana maqanau.

<sup>13</sup> Maqarareerana maqoo kamuqooqari Keennafa 840 aukuaana maraseenoo mi kamuqoo akoonaiqi maanaafa faiqi namu moomoo maqanau.

<sup>14</sup> Keennana aukuaana aiqama moodaanaki 910 maraseenoo kuqinau.

<sup>15</sup> Mina amaaku Maqarareerafa 65 aukuaana maraseenoo akoonaiqi Yareedana maqanau.

<sup>16</sup> Yareedana maqooqooqari 830 aukuaana maraseenoo mi kamuqoo akoonaiqi maanaafa faiqi namu moomoo Yareedafa maqanau.

<sup>17</sup> Maqarareerana aukuaana aiqama moodaanaki 895 maraseenoo kuqinau.

<sup>18</sup> Mina amaaku Yaareedafa 162 aukuaana maraseenoo narí amaaku Eennookana maqanau.

<sup>19</sup> Eennookana maqooqooqari Yareedafa 800 aukuaana maraseenoo akoonaiqi maanaafa faiqi namu moomoo maqanau.

<sup>20</sup> Yareedana aukuaana aiqama moodaanaki 962 maraseenoo kuqinau.

<sup>21</sup> Mina amaaku Eennookafa 65 aukuaana maraseenoo akoonaiqi Meetuseerana maqanau.

<sup>22</sup> Eennookafa 300 aukuaana Anutuna aqoondikiranaki maridanoo akoonaiqi maanaafa faiqi namu moomoo maqanau.

<sup>23</sup> Eennookana aukuaana aiqama moodaanaki 365 aukuaana maranau.

<sup>24</sup> Eennookafa sia kuqinau. Kaafa Anutunara rimarufa marufanoo Anutufa kaqimma afiqasoofanoo sia sia inau.

<sup>25</sup> Eennookana amaaku Meetuseerafa 187 aukuaana maraseenoo akoonaiqi Rameekana amarana maqanau.

<sup>26</sup> Rameekana maqooqooqari mina akoofa Meetuseerafa 782 aukuaana maraseenoo akoonaiqi maanaafa faiqi namu moomoo maqanau.

<sup>27</sup> Meetuseerana aukuaana aiqama moodaanaki 969 aukuaana maraseenoo kuqinau.

<sup>28</sup> Meetuseerana amaaku Rameekana amarafa 82 aukuaana maraseenoo akoonaiqi maqaseenoo qinau.

<sup>29</sup> Anutufa maa maqa maaqana aquraraqoofaqa maasa kadaapi ridaqa. Maa faiqifa kadaapiriranaiki marunnana asoarana qimiannoo fee qimasee mina auqu Nooa nee qinau.

<sup>30</sup> Nooana maqooqooqari mina akoofa Rammeeekafa 595 aukuaana maraseenoo akoonaiqi maanaaqafa faiqi namu moomoo maqanau.

<sup>31</sup> Rameekana aukuaana aiqama moodaanaki 777 maraseenoo kuqinau.

<sup>32</sup> Mina amaaku Nooafa 500 aukuaana maraseenoo miqooqari akoonaiqi qaaramoo maqanau. Misa nuqu Seemmana faqa Qammama faqa Yafeetana faqa maqanau.

## 6

*Faiqi anaasee manda ainaina mareeu ufafa.*

<sup>1</sup> Mi fasannai faiqi anaasee moomoo kamambufaqa maqa maaqa itita fiqa maridaqa misa maanaaqauqa moomoo maqau.

<sup>2</sup> Maqasaa fasiqauqa Anutuna faiqi namu mi manaqausa nindafoofaqa nifu noori amiqirausauqa kai marufaqa nari nidimarusa maree mariqau.

<sup>3</sup> Miqi marufanoo Anutufa qinau. Qini maraquna naaru naaru sia faiqiki mariannoo. Misa fifau faiqi faiqi marianara kisaqa aukuaana ateeekasee qusa aukuaana nimianauro, 120 aukuaana kai nimianauro.

<sup>4</sup> Mikari faqa kasoqaqee faqa maqasaa fasiqauqa Anutuna faiqi namu faiqi niraamuna maraqa nini soofaqa faiqi maqee mariqau. Mi faiqisa nimudaani faqaasa murusaqa arirausa maa maqanasaa maridaqa nuqu faqaasa mariqau.

<sup>5</sup> Anutufa aiqama maqasaaqaraasa nindafoofaqa misa marirafa faqa irirafa faqa mandaika uqanna inoo marinau.

<sup>6</sup> Miqifa marufanoo Anutufa firaqoo misa mi manda oosannara irinau. Mifa faiqi auqa maqasaa quqoonara irufanoo aundura mandaikufanoo akooqoofanoo qinau.

<sup>7</sup> Maa oosanausa qinee auquafanausa maa maqanasaa qaraana qinee aiqama ruka aqusaanauro. Faiqi faqa ufina andau faqa aiqama ruka aqusaanauro qinee misa auquafannanara qikooqaidanoo.

<sup>8</sup> Anutufa Nooanara kai asasinu.

*Nooafa fira sipa auqu ufafa.*

<sup>9-10</sup> Nooana oosana maaqimminoo marinau. Nooafa kai sia aqarana marufa marinau, nari faqa marusakiqari nariara andeeqarafa marinau. Mifa kai Anutuna aqoondiki-ranaki marinau. Mina amaaku qarammoo namu mariqau. Misa nuqu Seemmana faqa Qammama faqa Yafeetafa faqa mariqau.

<sup>11</sup> Aiqaumasa Anutuna afusaa mandainainaki mariqau. Faiqi narari nararirafa aiqama maqa maaqaki qumbiqanoo marinau.

<sup>12</sup> Anutufa aiqama maqa maaqaki qafoofofanoo mandaika uqannaminoo marinau. Faiqi anaasee aiqama mandainainaki kai mariqau.

<sup>13</sup> Miqifa marufanoo Anutufa Nooana qimaminoo qinau. Faiqi narari nararirafa qumbiqanoo marinara qinee aiqama fasiqa anaasee naru taikaanauree qidaqa.

<sup>14</sup> Nooa, anee amiqira saqarinnai fira sipa auqua. Mina aunduraki moomoo rumma auqua. Aunduraki faqa adisaa faqa koorootaqa qumaree akusainanoo ititaani.

<sup>15</sup> Anee sipa maaqimasee auqua. Mina kisaqa fannoo Aarinnoona nammarikiqari Siara Doona nammariki amanasaa 130 metres mina kisaqa mariani. Mina qusa fannoo 22 meters sia kisaqa uqanna marinau. Mi sipana maqasaqari maaqa akiqqa amanasaa 13 metres mariani.

<sup>16</sup> Asaana qumeeqarana ameemaanai apootaana kaqi mariani 0.5 metre mariani. Sipa qaqaasanai fira kooqi auquseenana sipa aundurai maqasaa tida rua, mina murufi qambaana mo tida rua, mina maariqoo mo tida rua.

<sup>17</sup> Anutufa kaifaa Nooana qimaminoo qinau. Qinee nammari mareeqee quqasaananoo firaqoo aufigoo aiqama kasimari ainainausa naru taikaannoo. Aiqama maqasaa maria ainainausa faqa kuqu taikeefaranoo.

<sup>18</sup> Ani faqa kai moodaanaki kira ufa qianauro. Aneenna anaqa faqa aneenna faiqi namu faqa misa ninaaqmaaka faqa sipaki keeqafi mariqau.

<sup>19</sup> Anee andau oosana oosana mareeqee sipaki quqaa. Oosana oosana qaara kai qaara kai akoona faqa anaasee faqa apammasee sipaki quqasainaqqa ani faqa asumu mariqau.

<sup>20</sup> Oosana oosana ufina faqa qaara kai qaara kai mara quqasainaqqa ani faqa asumu mariqau.

<sup>21</sup> Anee oosana oosana narainaina misaindi faqa aneennaindi faqa mara sipaki quqaa.

<sup>22</sup> Nooafa Anutuna ufa iriseenoo mifa qundee kai inau.

## 7

*Nammari aufiu ufafa.*

<sup>1</sup> Karaambaiga Nooana maaqi qimasee qimaminau. Anee aneenna aiku asauku faqa sipaki keeqaa. Maqa saaqaraasakiqari anee kai aneennaraa andeeqarafa mariana qafaidaga.

<sup>2</sup> Innee qini qifusaa anukara aandau fee qimariana qisauku dinni taikasee dinni oonu qaara marasee 7 akoona faqa anaasee faqa ani faqa sipaki mareeqee quqasainaqa asumu mariaqa. Innee qini qifusaa sia anukara aandau oosana oosana akoona faqa anaasee faqa moodaa kai mareeqee minaki asumu quqasaina mariaqa.

<sup>3</sup> Aiqama ufini oosana oosana dinni taikasee dinni oonu qaara marasee 7 akoona faqa anaasee faqa mareeqee sipaki quqaa. Miqimmasainaqa aiqama aandau ufini kaifaa maa maqanasaa moomoo kiaqa.

<sup>4</sup> Dinni taikasee dinni oonu qaaraganda marasee 7 faasaana aiqarainaqa miqoo aaku maqasaa quqaanaura. Qaara fasiqa niku nisauku taikasee 40 faasaana faqa eendaki faqa aaku rida mariannoo. Miqi marinaqa qinee maqasaa aiqama naanna faqaasa qeeqa auqu nisaafanausa taika nisaanaura.

<sup>5</sup> Nooafa aiqama ainaina Anutufa qimamundee kaimminau.

<sup>6</sup> Nooafa 600 aukuaana marasoofanoo mi aukuanasaa nammari aufirafa aninai.

<sup>7</sup> Nooafa Anutuna mi ufausa iriseenoo rufiaseenoo nari faqa nari anaafa faqa nari amaaku qaaramoo namu faqa minamusa ninaaqmaaka faqa sipaki keeqaqau.

<sup>8-9</sup> Oosana oosana aandau ufini akoona faqa anaasee faqa Anutuna afusaa anukaraura faqa sia anukaraura faqa aiqama Nooana faqa sipaki keeqaqau. Anutufa ufa qumau kai keeqaqau.

<sup>10</sup> Dinni taikasee dinni oonu qaara marasee 7 faasana marinoo nammari aufinai.

<sup>11</sup> Mi aukuaana Nooafa 600 aukuaana maranau. Qaara quqoonasaa qiku dinni taikasee dinni oonu qaaraganda marasee 17 faasaanasaa mi faasaana kai nammari radiqinai. Mi faasaana kai maqa ameemaaindara nammari radiqisee urureenoo innaaruna kooqira foora atuqoofanoo aaku firaafa nammariara foora adianau.

<sup>12</sup> Qaara fasiqa niku nisauku taikasee 40 eendaki faqa faasaana faqa aaku firaafa nammariara foora adianau.

<sup>13</sup> Nammari radiqu faasaana mi faasaana kai Nooafa nari aanaaqandiri faqa nari amaaku namu Seemafa faqa Qammafa faqa Yafeetafa faqa minamusa nari ninaaqmaaka faqa sipaki keeqafiqi mariqau.

<sup>14</sup> Kaasau aandau oosana oosana faqa maaqeenaa aandau oosana oosana faqa ufini oosana oosana faqa firaa andauqa faqa kaqikaa andauqa faqa Nooana aiku asauku faqa sipaki keeqaqau.

<sup>15</sup> Aiqama oosana oosana kasimaru aandau ufnisa akoona faqa anaasee faqa Nooana faqa sipaki keeqaqau.

<sup>16</sup> Anutufa Nooana qimamu mau kai keeqa fufanoo Anutufa nari kai kooqi itita nimaqanau.

<sup>17</sup> Qaara fasiqa niku nisauku taikasee 40 faasana aaku nammariara foora adianau. Miqi ufanoo nammari qumbiqeenoo sipa uqeereeqeenoo murusaqa quqanau.

<sup>18</sup> Nammari fannoo firaqoo innooqoofanoo sipa fannoo mina amuaqumau namarinai.

<sup>19</sup> Nammari fannoo moo faqa innooqeenoo aiqama kisaafa aaqana dukuninai.

<sup>20</sup> Kaifaa innooqeenoo kisaafa aaqana oori aqaramaseenoo 7 meters amana ooru marinai.

<sup>21</sup> Miqinoo marufanoo maqasaa maru ainainausa aiqama kuqiqau. Aiqama ufiniuqa faqa aiqama andauqa faqa aiqama fasiqa anaasee faqa kuqu taikaqau.

<sup>22</sup> Aiqama aandau faqa doodaani faqa maa maqanasaa marusa kuqu taikaqau.

<sup>23</sup> Karaambaiga aiqama ainaina maqasaaqaraa ainaina taika uqanna sanau. Faiqi anaasee faqa andau faqa ufini faqa taikannisanau. Nooafa kai nari aiku asauku faqa nari sipakinaa ainainauqa faqa mipa kai asumu mariqau.

<sup>24</sup> Dinni qisauku taikasee dinni oonu qaara fasiqa maraseenoo moodaa fasiqa asaukuqara 150 faasaana nammari kaqi aufinoo marinai.

## 8

*Nammari aufirafa taikoo ufafa.*

<sup>1</sup> Marufanoo Anutufa Nooanara faqa nari aiku asauku faqa aiqama aandau mina faqa marusara faqa iriseenoo qufanoo ufai uqufanoo nammari fannoo qumi marinai.

<sup>2</sup> Maqa ameemaaindara nammari ururee maruna rafaafa finai. Rafaafaquseenoo innaaruna kooqira foora ititasoofanoo innaarunaindaraa nammari faqa sia quminai.

<sup>3</sup> Itita fufanoo maqasaa nammari fannoo ireeda kai ireeda kai ooru maree ooru maree qumiqumii ufanoo maqa koorooinau. 150 suanisaa nammari qumimarinau.

<sup>4</sup> Dinni taikaseenoo dinni oonu qaarqanda marasee 7 quqoonasaa miqi mandee quqoonna qambaana qisaukuqara faqa dinni qiku taikaseenoo dinni oonu qaara marasee 17 faasaana Nooana sipa fannoo Ararata aaqanasaa muqufi quqasoofanoo marinau.

<sup>5</sup> Miqooqari nammari uru maree ooqinufanoo qisaukuqara taikasee 10 quqoonasaa indaaruga faasaanasaa aqana atiuqa koorooinau.

<sup>6</sup> Qaara fasiqa niku nisauku taikasee 40 faasaana aiqaroofanoo Nooafa winduqa atuaseenoo ufini kaammeesa fooqaana mara aqinau.

<sup>7</sup> Ufni fannoo sia kaifaa aninau. Kaqi kai qaqanoo nimirinuu.

<sup>8</sup> Nooafa mi ufininara rakisusia sia anufanoo nakipuruna mara aquseenoo nammari qafaanifeera aqiganau.

<sup>9</sup> Aqusoofanoo nakipuruna maqara randoosianoo nammari kaqi marufanoo mi eendanaki kai kaifaa Nooafunnai sipaki aninau. Nooafa nari asaaku madaanai quqaseenoo qumara sipaki quqanau.

<sup>10</sup> Qisauku dinni taikasee dinni oonu qaara marasee 7 faasaana afeesida mariufanoo Nooafa nakipuruna kaiqaa mareeqeenoo madaanai aqinau.

<sup>11</sup> Eenee marufanoo nakipuruna fannoo oorifa saqari amanee ammunirana rakeemma aaku maree aninau. Nooafa mi saqari amaneena qafamaseenoo doo nammari ooqi maridanoo fee qinau.

<sup>12</sup> Miqooqari kaifaa dinni taikasee dinni oonu qaara marasee (7) faasaana aiqaroofanoo Nooafa nakipuruna kafa mara quqasoofanoo doo funnai fifinoo doo sia kafa aninau.

<sup>13</sup> Nooafa 601 aukua marasoofanoo indaaruga quqoonna indaaruga faasaanasaa nammari tukaqanau. Nooafa sipa ataufakaqa akuamaqoona rafaammasee qafoofanoo maqa aadana usimarinau.

<sup>14</sup> Namba 2 quqoonasaa 27 faasaanasaa aiqama nammari tukaqnamafufanoo maqa maaqa aadana uqanna marinau.

<sup>15</sup> Miqimmafufanoo Anutufa Nooana qimaminoo qinau.

<sup>16</sup> Doo sipaqiqari anee faqa aneenna anaqa faqa aneenna faiqi namu faqa misa ninaaqmaaka faqa raudaaqa.

<sup>17</sup> Aiqa ufiniuga faqa aandauga faqa nifiqee raudaaqa. Raudamafiqa maqa maaqaki daraaniqa asumu moomoo kambiaqa.

<sup>18</sup> Miqi qimasoofanoo Nooafa faqa nari anaqa faqa nari faiqi namu faqa misa ninaaqmaaka faqa sipaqiqari raudaaqa.

<sup>19</sup> Aiqa aandauga faqa ufiniuga faqa nari oosana nari oosana kai moodaanaki suqufafaqa raudamaki daraaniqau.

*Nooafa karaambaiqa tatufirana suqa aminau.*

<sup>20</sup> Nooafa rafudamafufanoo karaambaiqa tatufirana suqarara ooni qumareenoo aaku aakummaseenoo Anutuna afusaa anukara aanda faqa ufini faqa maraseenoo muduka Anutuna tatufirana suqa aminau.

<sup>21</sup> Suqoofanoo mina afunda karaambaiqa aikiambu ufanoo udirama qafeenoo asasinu. Asammaseenoo maaqi qimasee qimminoo qinau. Sia qinee kaifaa faiqi inni mandainaina akiqara aiqama maqa maaqa niquraraanauranoo. Innee faiqi saqari irirana faqa marirana faqa mandaika kai imarunara sia kaifaa unandee iqa maqa maaqa afaaqasasa maria fasiqa aanaaseesa faqa aanda doodaani faqa naru taikaanaura.

<sup>22</sup> Anutufa minara maaqi qimasee qinau.

Maa maqafa kaqi marinaqa qummaqira aukua faqa narana nara aukua faqa suara faqa aiqaiqa faqa aaku aukua faqa suani aukua faqa faasaana faqa eendaki faqa sia taika nimaqaanaura, kaqi marifaranoo.

## 9

*Anutufa Nooana faqa moodaanaki kinau.*

<sup>1</sup> Anutufa Nooana nari faiqi namu faqa nifaaqooqa qinoo qinau. Inni asumu moomoo kambiqafi aiqama maqa maaqa amana kai mariaqa.

<sup>2</sup> Aiqa aandauga faqa ufiniuga faqa noodaana faqa inniara rufiaranaki mariaqa. Misa inni afeeka ameemaanai mariaqa.

<sup>3</sup> Innee maaqooqari sia andanda kai naaqa mi aandausa namu faqa naaqa. Innee naranara foora naaqeera nimidaqa.

<sup>4</sup> Innee moodaa ainaina kai sia naaqa, fidika amaqqiki marinnana kai sia naaqa. Mifa marirana nimimarifa marinara sia naaqa.

<sup>5</sup> Faiqi moo fannoo faiqi faiqi fidika ruqqigainaqa qinee mina akiigara ummaara amianauranoo. Aandau moo fannoo faiqi faiqi kuqa narinaqa qinee mi aandauna kuqa aruanaura.

<sup>6</sup> Anutufa faiqi faiqi nari fooqaasa auquqoonara yafee moona auqu qimasee kuqa arinnana akaqausa mina akiigara nari arifaranoo.

<sup>7</sup> Innee moomoo faiqi maqasaifaqa aiqama maqa maaqaki amanaikammafi mariaqa.

<sup>8</sup> Anutufa Nooana faqa nari faiqi namu faqa kaifaa qimanniminoo qinuu.

<sup>9</sup> Maqee qinee inni faqa innisaaqari kasooaqee kambiqainausa faqa moodaanaki kira ufa qidaqa.

<sup>10</sup> Aiqama ainaina ufiniuqa faqa aiqama aandauqa faqa ani faqa sipakiqari anusa faqa moodaanaki kianaura.

<sup>11</sup> Maa ufausannoo qinee moodaanaki kira ufa inni faqa qidaqa. Qinee kuqaa qima afeekaika qidaqa sia kaifaa nammari aufirafa faiqi faqa aiqama ainaina faqa naruannoo. Sia uqanna kafa nammari aufirafa maa maqa maaqana mandaikiannoo.

<sup>12</sup> Qinee naaru marira moodaanaki kira ufa ani faqa aiqama aandauqa faqa doodaani-uqa faqa qunafa maaqi qimasee uqannifiqaanaura.

<sup>13</sup> Qinee qeega oondanda oonnamuki quqaanaura. Mifa qinee maa maqanasaaqaraasa faqa moodaanaki kirana uqannifiqaannoo.

<sup>14</sup> Yairee fee qinee oonnamunnai innaaruna itita saananoo miqoo oondanda kambiqannoo.

<sup>15</sup> Oonnamuki oondanda rafeeqna finaqa qafeeqa qinee ani faqa aiqama aandau doodaani faqa qima afeekaikira ufara irisee sia kaifaa nammari aufirafa naruannoo.

<sup>16</sup> Oondanda oonnamuki rafeeqnainaga qafamaseega naaruara qinee inni maqasaaqaraasa faqa naaru marira moodaanaki kira ufa qiafannanara irianaura.

<sup>17</sup> Minannai qinee aandauqa faqa doodaani-uqa faqa qima afeekaikiafanna ufana kooroo idaqa.

*Nooana faqa nari faiqi namuara faqa qidanoo.*

<sup>18</sup> Nooana faiqi namu sipakiqari anusa nuqu maaqimminoo marinuu. Seemmafa faqa Qammafa faqa Yafeetafa faqa mariqau. Qammafa Kannaana akoofa marinuu.

<sup>19</sup> Nooana mi faiqi qaaramoo namusa aiqama maa maqanasaaqaraasa nikaaku mariqau.

<sup>20</sup> Nooafa afuqaki ainaini marufa marinuu. Mifa indaaruu oosana arasee afuqa auqusee uainna sanda moomoo ummaqinuu.

<sup>21</sup> Mifa uainna aqama tatiseenoo moomoo neeneeseenoo furufara maseenoo nari qamunna raipaquseenoo nari uqaana maqaki kaqi samu faiqanuu.

<sup>22</sup> (Yafeetafa indaaruaafa Seemafa mina aanaaqianaafa marinuu Qammafa inaaqianaafa marinuu.) Qammafa Kannaana akoofa maridanoo anireenoo nari akoofa kaqi samu faiqaqee ufanoo oonu qafeenoo nari akaqaafasaaqara naaramaseenoo qiman-niminuu.

<sup>23</sup> Seemafa faqa Yafeetafa faqa minara iriseeqa qaoo qimasee qamunna marasee moo fannoo dinni ati nari aururusaa quqasoofanoo moo fannoo dinni ati nari aururusaa quqaseeqara ninaaqianaindari uqaana maaqaki keeqa fiqaqara nari nikoona afaqa itita amaqaqau. Miqanda noori kaqinni quqasee nisauranoo qimasee sia nari nikoona qafaqau.

<sup>24</sup> Nooafa kasooaqee irirafa kambiqafufanoo nari inaaqianaa faiqi mifa auqoo ainainnara irinuu.

<sup>25</sup> Iriseenoo maaqi qimasee aquraranuu. Qinee ani amaaku Kannaanasaa aqurara ufa quqaanaura. Anee aneenna akaqaafasaaqau saika faiqi maria.

<sup>26</sup> Miqi qimaseenoo Nooafa quandaqinoo Qammafa akaqaafasaa qarara maaqi qinuu. Karaambaqaa Seemana Anutuna amooqirana amia.

Kannaafa Seemana ainainira faiqi mariannoo.

<sup>27</sup> Anutufa qinanoo Yafeetanakiqari moomoo kambiqafiqa mina faiqi namu Seemana faiqi namu faqa moodaanaki marifaranoo.

Miqiqa marifanoo Kannaafa Yafeetana ainainira faiqi mariannoo.

<sup>28</sup> Nammari aufirafa taikoofanoo miqooqari Nooafa 350 aukuaana maraseenoo kuqinuu.

<sup>29</sup> Mina aukuaana aiqama moodaanaki 950 aukuaana maraseenoo kuqinuu.

## 10

*Nooana faiqi namu ninaiqimara nuqu.*

<sup>1</sup> Nooana faiqi namu nuqu maaqimminoo marinau. Seemmafa faqa Qammafa faqa Yafeetafa faqa mariqau. Nammari afurafa taikooqoqari misasaaqari kambiqaraua nuqu maaqimminoo mariqau.

<sup>2</sup> Yafeetana faiqi namu nuqu maaqimminoo marinau. Koommafa faqa Makookafa faqa Madaifa faqa Yafanafa faqa Tubanafa faqa Meeseekafa faqa Tirasafa faqa mariqau. Mi fasiqausa ninaiqimara nisaifaqausa nariqa ninaakusa nuqu maree mariqau.

<sup>3</sup> Koommanasaaqari kambiqoo maqannaasa nuqu Asakeenasa maqannaasa faqa Rifata maqannaasa faqa Tookaramma maqannaasa faqa mariqau.

<sup>4</sup> Yafatanasaaqari kambiqoo maqannaasa nuqu Eerisa maqannaasa faqa Sipainna maqannaasa faqa Sipurusa maqannaasa faqa Roodeesa maqannaasa faqa mariqau.

<sup>5</sup> Misa ooruku nammari afaiqara marusa faqa kaqikaa afumaki marusa faqa misa ninaakusa mariqau. Misauqa Yafeetanakiqari kambiqaraua maridaqa naadu naadu maqa maaqaki maridaqa naadu naadu ufa qimariqau.

<sup>6</sup> Qammana faiqi namu nuqu maaqimminoo marinau. Kusafa faqa Isipafa faqa Ribiafa faqa Kannaafa faqa mariqau. Mi fasiqausa ninaiqimara nisaifaqausa nari ninaakusa nuqu maree mariqau.

<sup>7</sup> Kusana faiqi namuqari kambiqoosa Seebaa maqannaasa faqa Qafiraa maqannaasa faqa Sabataa maqannaasa faqa Rammaa maqannaasa faqa Sabateeka maqannaasa faqa mariqau. Rammanasaaqari kambiqoosa Seebaa maqannaasa faqa Deedana maqannaasa faqa mariqau.

<sup>8</sup> Kusafa akoonaiqi Nimaroodana maqanau. Nimaroodafa findifinoo maa maqa maaqanaki indaaruiqa rakira karaambaiga marinau.

<sup>9</sup> Karaambaiga dadaaqufanoo mifa amudaanai qimasee uaqee marufa marinau. Miqi marunara faiqi anaasee maaqi qimasee akaqausara qimariqau. Karaambaiga fannoo ani Nimarooda fara foora kaqa amudaanai qimasee uaqee mari fara foora maisaannoo.

<sup>10</sup> Nimaroodafa Baabeera maqusa faqa Eereeka maqusa faqa Akada maqusa faqa mi maqusa namuna indaarui rakisimarinau. Mi maqusa namusa Babiroonia maqa maaqaki mariqau.

<sup>11</sup> Miqoo mariufanoo Nimaroodafa Asiria maqa maaqai oonureenoo Ninifee maqusa faqa Reehoobootaira maqusa faqa Karaa maqusa faqa Reeseena maqusa faqa auqinau.

<sup>12</sup> Reeseena maqusa fannoo Nineefee maqusa dinni marifanoo Karaa firaa taunna dinni marifanoo qambaana maridanoo.

<sup>13</sup> Isipana saaqari aruakusa Ridiaa maqannaasa faqa Anamma maqannaasa faqa Reehaba maqannaasa faqa Nafatuqa maqannaasa faqa

<sup>14</sup> Patarusa maqannaasa faqa Kasaru maqannaasa faa Kareetee maqannaasa faqa mariqau. Firistia maqannaasa Kareetee maqannaasakiqari kambiqaraua mariqau.

<sup>15</sup> Kannaana faiqi namu nuqu maaqimminoo marinau. Indaaruiqaafa Sidoonafa marinau. Mina aanaaqiannaafa Heetafa marinau. Miqanda nari ninaakusa nuqu marasee mariqau.

<sup>16</sup> Kannaafa Yeebusa maqannaasa faqa Amooru maqannaasa faqa Kirakasa maqannaasa faqa ninaakufa marinau.

<sup>17</sup> Hifita maqannaasa faqa Akaa maqannaasa faqa Sinita maqannaasa faqa mariqau.

<sup>18</sup> Arafada maqannaasa faqa Seemara maqannaasa faqa Qamata maqannaasa faqa mariqau. Kanna maqannaasa moomoo oosana rainafuafa aiqama maqa maaqaki daraanimambi mariqau.

<sup>19</sup> Mariufafa Kannaana saaqari kambiqaraua misa maru maqana dinni ati Sidoona maqusaki marufanoo suani dinni ataaqeenni Keeraa maqusa Kasaa maqusa aqa maruna raquru aminoo marinau. Miqooqari suani oosana qaannai Soodoomma maqusa faqa Koomooru maqusa faa Adama maqusa faqa Seeboima maqusa Rasaa maqusa aqa marunnai dinni ati marinau.

<sup>20</sup> Doo Qammana saaqari kambiqaraua naadu naadu maqusakiaqa rainafuafa naadu naadu ufa qimariqau.

<sup>21</sup> Seemmafa Yafeetana afasaafa Heeburu maqannaasa ninaakufa marinau.

<sup>22</sup> Seemana faiqi namu nuqu maaqimminoo marinau. Eerammafa faqa Asurafa faqa Arafakadafa faqa Rudafa faqa Arammafa faqa mariqau. Mi fasiqausa ninaiqimara nari ninaakusa nuqu maree mariqau.

<sup>23</sup> Arammama faiqi namu Qusa maqannaasa faqa Huraa maqannaasa faqa Keeteera maqannaasa faqa Meeseekaa maqannaasa faqa mariqau.

<sup>24</sup> Arafakadafa Seeraana akoofa marinau. Seeraafa Eebeereena akoofa marinau.

<sup>25</sup> Eebeerafa akoonaiqi qaaraqanda maqanau. Indaarugaana auqu Peereekafa marinau. Mina auqu oosana rainara fee qinoo marinau. Mifa maru aukuanna maqa maaqa rainanoo marufaqa minara Peereekanee qinau. Peereekana akaqa auqu Yookatanafa marinau.

<sup>26-29</sup> Yookatana faiqi namuqiari maaqimmasee maqannaasa mariqau. Aramooda maqannaasa faqa Seereefaa maqannaasa faqa Asammafee maqannaasa faqa Yeeraa maqannaasa faqa Adooramma maqannaasa faqa Qusaraa maqannaasa faqa Dikaraa maqannaasa faqa Oobara maqannaasa faqa Abimaeera maqannaasa faqa Seebaa maqannaasa faqa Oofira maqannaasa faqa Qafiraa maqannaasa faqa Yoobabaa maqannaasa faqa mariqau. Aiqamusa Yookatana anaiqimara mariqau.

<sup>30</sup> Misa maru maqa maaqafa dinni ati fannoo Meesaa maqa maaqindari Seefaraa maqa maaqai suani oosana qaannai aqana maqa maaqa dinni ati fannoo raquru aminoo marinau.

<sup>31</sup> Seemana faiqi namu miqimmiqa mariqau. Naadu naadu maqa maaqaki maridaqa naadu naadu ufa qimariqau.

<sup>32</sup> Aiqama misauqa Noonasaagari kambiqarasa mariqau. Moo maqanna mo maqanna nariqa oosana amana kai mariqau. Nammari aufirafa taikafufaqa aiqama maa maqanasaaqaraasa Nooana faiqi namuqiari kai kambiqafi mariqau.

## 11

*Babiroonnia maqusasaa kisaafa maaqa usakoo ufa.*

<sup>1</sup> Indaaru nammari taikoo kamuqoo aiqama maqasaa qaraasa moodaa ufa faqaasa maridaqa moodaa ufa kai qimariqau. Aiqama ainainara moodaa auqu kai ree mariqau.

<sup>2</sup> Misa suani oosana qaannai oonuree aniree iqa niniufaqa Babiroonnia afaasa paqurim-masee miqoo mariqau.

<sup>3</sup> Misa miqoo maridaqa maaqi qimasee nari qimami nari qimami qidaqa qiqau. Anifaqa innisaimbaqa maqa qumareeqa atakuseeqa idara saananoo afeekaikamma finaqa minannai maaqa usakaa. Maasa miqimmaseeqa aaku aakummaseeqa koorootaqa mina apootaanaki akusaananoo atukaraani.

<sup>4</sup> Miqi qimaseeqa maqee innisaimbaqa fuka maqusa indufusee kisaafa maaqa auqiqa ooru fiinaqa innaaruna amana kai ooruraanaura. Miqimmasee maasa duqu faqaasa moodaanaki maridaqa sia aiqama maqa maaqaki daraanianaura. Miqi qimaseeqa doo miqimmigau.

<sup>5</sup> Mi maqusana auquseeqa kisaafa maaqa faqa usakasooqano Karaambaiqa qumu nindafeenoo maaqi qinau.

<sup>6</sup> Maqee maasauqa moodaa maqannaasa maridaqa moodaa ufa qidaqa. Misa nari auqararee qia ainainna oosana araidaqa. Qusasaa misa nari nidimari ainainna auqefaranoo.

<sup>7</sup> Doo anifaqa inni saimbaqa ooquree misa ufa furufaramma nimaqasaanaqa sia nari ufa nari ufa iriaqa.

<sup>8</sup> Anutufa miqi qimasee misa ufa furufaramma nimaqasoofaqa misa mi maqusana auquanee quna minniseeqa maqa maaqaki daraaniqau.

<sup>9</sup> Mi maqusana auqu Babiroonnia fee qimariqau. Miqoo karaambaiqa fannoo misa ufa furufaramma nimaqoonara miqi qimasee auqu raqau. Miqoo maruna Karaambaiqa furufaramma nimaqasoofaqa aiqama maqa maaqaki daraaniqau.

*Seemana aiku asauku nuqu.*

*(1 Stori 1:24-27)*

<sup>10</sup> Seemana saagari kambiqoosa maaqimmigau mariqau. Nammari aufirafa taika fufano miqooqari qaara aukuaana aiqarama fufano Seemafa 100 aukuaana maraseenoo akoonaiqi Arafasadana maqanau.

<sup>11</sup> Arafasadana maqooqooqari Seemafa 500 aukuaana marinoo akoonaiqi maanaaqa moomoo maqanau.

<sup>12</sup> Arafasadafa 35 aukuaana maraseenoo nari faiqi Seeraana maqanau.

<sup>13</sup> Seeraana maqooqooqari Arafasadafa 403 aukuaana maraseenoo akoonaiqi maanaaqa moomoo maqanau.

<sup>14</sup> Seeraafa 30 aukuaana maraseenoo nari faiqi Eebeerana maqanau.

<sup>15</sup> Eebeerana maqooqooqari Seeraafa 403 aukuaana maraseenoo akoonaiqi maanaaqa moomoo maqanau.

<sup>16</sup> Eebeerafa 34 aukuaana maraseenoo nari faiqi Peereekana maqanau.

<sup>17</sup> Peereekana maqooqooqari Eebeerafa 430 aukuaana maraseenoo akoonaiqi maanaaqa moomoo maqanau.



- <sup>18</sup> Peereekafa 30 aukuaana maraseenoo nari faiqi Reeuna maqanau.  
<sup>19</sup> Reeuna maqooqooqari Peereekafa 209 aukuaana maraseenoo akoonaiqi maanaaqa moomoo maqanau.  
<sup>20</sup> Reeufa 32 aukuaana maraseenoo nari faiqi Seerukana maqanau.  
<sup>21</sup> Seerukana maqooqooqari Reeufa 207 aukuaana maraseenoo akoonaiqi maanaaqa moomoo maqanau.  
<sup>22</sup> Seerukafa 30 aukuaana maraseenoo nari faiqi Naqoorana maqanau.  
<sup>23</sup> Naqoorana maqooqooqari Seerukafa 200 aukuaana maraseenoo akoonaiqi maanaaqa moomoo maqanau.  
<sup>24</sup> Naqoorafa 29 aukuaana maraseenoo nari faiqi Teeraana maqanau.  
<sup>25</sup> Teeraana maqooqooqari Naqoorafa 119 aukuaana maraseenoo akoonaiqi maanaaqa moomoo maqanau.  
<sup>26</sup> Teeraafa 70 aukuaana maraseenoo Abarammana faqa Naqoorana faqa Qarana faqa maqanau.

*Teeraana aiku asauku nuqu.*

- <sup>27</sup> Teeraana faiqi namu mi oosanausa maaqimmiqa mariqau. Teeraafa Abarammana faqa Naqoorana faqa Qarana faqa nikoofa marinau. Qaranafa Rootana akoofa marinau.  
 \*

<sup>28</sup> Qaranafa Babiroonia maqa maaqaki nari maqusa Uraa maqusaki mina akoofa faqa kaqi marufanoo kuqinau.

<sup>29</sup> Abarammafa Sarai nammarina maranau. Naqoorafa Mirakaa nammarina maranau. Mirikaa nammarifa Qarana araamuna maranau. Qaranafa Isakana akoofa marinau.

<sup>30</sup> Sarai nammarifa sia faiqi maqoofa aafa anaasee marinau.

<sup>31</sup> Teeraafa nari amaaku Abarammana faqa Qarana amaaku nari anaiqi Rootana faqa Abarammana anaaga nari aanaakuqu Sarai nammarina faqa Babiroonia maqa maaqaki Uraa maqusaindari nifiqeenoo Kannaana maqa maaqai fiqau. Teeraafa nari aiku asauku faqa Kannaana maqa maaqai fuane qimasee Qarana auqu amarana maqusai oonu aana kasaqai mariqau.

<sup>32</sup> Miqoo mariiufanoo Teeraafa miqoo kuqinau. Teeraana aukuaana aiqama moodaanaki 205 maraseenoo kuqinau.

## 12

*Anutufa Abarammana aaroo ufafa.*

<sup>1</sup> Abarammana akoofa Teeraafa kuqufanoo Karaambaiqa Abarammana qimaminoo qinau. Aneenna maqa faqa aneenna aiku asauku faqa aneenna akoonaa maqa maaqakinaa ainaina faqa quqasee minniseenana maqa maaqa moo uqafiqaanana miqoo fua.

<sup>2</sup> Miqoo oonu marinaqa ani faiqi moomoo amiananoo maqa maaqa qumbiqafi marifara.

Qinee ani amiqi amiqimma amaqaasaanana anee auqu faqaafa marinnaranoo.

Miqimma finaqa anisaaqaraa amiqi amiqirana faiqi anaasee mareefaranoo.

<sup>3</sup> Aniara amiqi amiqi mariasa qinee faqa quandafiqqa misa faqa amiqi amiqi ianaura ani aqurarainausa qinee faqa quandafiqqa misa faqa niquraraanaura.

Aniaroo qimasee misa aiqama maqasaaqaraasa amiqi amiqimma nimaqaanaura.

<sup>4</sup> Abarammafa 75 aukuaana maraseenoo Qarana maqusa minniseenoo Kannaana maqa maaqai Karaambaiqa qimamundee inoo fufanoo Rootafa mina faqa finau.

<sup>5</sup> Abarammafa nari anaaga Sarai nammarina faqa nari akaqa faiqi Rootana faqa nari moomoo qumiasana ainainira faiquqa faqa nifiqeenoo Arana maqasaa mariuna nifiqeenoo Kannaana maqa maaqai finau.

<sup>6</sup> Misa Kannaana maqasaa oonuroofanoo Abarammafa oonuree aniree inoo niniufanoo Seekeemma maqa maaqaki naaquqara maqusasaa tatufirana suqee maruqoo Mooree maqa maaqaki naaquqara saqari atukaki aniranau. Mi aukuaana Kannaana maqannaasa mi maqa maaqanaki kaqi mariqau.

<sup>7</sup> Abarammafa mi maqusanai oonu marufanoo Karaambaiqa akoqoo mina afusaa kooroomaffinoo qimaminau. Qinee maa maqa maaqanara ani qimamunnana ani aiku asauku nimianaura. Miqi qimasoofanoo Abarammafa miqoo mina afusaa kooroo Karaambaiqana tatufirana suqa amira qainda auqusee tatufirana suqa aminau.

<sup>8</sup> Suqa amiseenoo Abarammafa findifinoo aqana maqa maaqai ooru finau. Beeteera maqusa fannoo suani keeqoo qaannai marufanoo suani oosana qaannai Ai maqusa marufanoo gambaanai nari uqaana maqa usakanau. Usakaseenoo miqoo Karaambaiqa aadau tatufira ooni qainda faqa auquseenoo Anutuna aaramaseenoo innaaru qimarinau.

<sup>9</sup> Miqinoo faiqanoo fifiufanoo suani afu dinni ataaqeeni Kannaana maqa maaqa dinni atinni Isipa maqa maaqa oosira qaannai oquranau. Neekeefa maqasaa oogu finau.

*Abarammafa Isipa maqa maaqai oogu fu ufafa.*

<sup>10</sup> Miqoo marufanoo aandaroo firaafa Kanna maqannaasa narinau. Abarammafa mina qafoofanoo mandaikufanoo nari aiku asauku faqa nari ainaina namu faqa Isipa maqasaa oogu finau.

<sup>11</sup> Isipa maqa maaqa adeedi rama soofanoo Abarammafa nari anaafa Sarai nammarina qimaminoo qinau. Ani afaafa amiqirafa mariananoo.

<sup>12</sup> Isipa maqannaasa nari qafamasee, oo mina aanaaqammi maqi qimasee qini darusee ani maree foora.

<sup>13</sup> Anee aneennara qiniara auna fee qinafa sia darifaqa anindiri kaqi marianau.

<sup>14</sup> Abarammafa Isipa maqa maaqai aniroofaqa Isipa maqannaasa Sarai nammarina qafamasee boo amiqira fee qiqa.

<sup>15</sup> Isipa maqannaasa rakisirafa Faraona mina faiqi namu Sarai nammarina qafamaseeqa Faraona qimamiqa qiqa, qoo amiqira manaafa fee qufanoo Faraofa qimannimufaqa Sarai nammarina ani mareegee Faraona kinna maaqaki quqaqau.

<sup>16</sup> Mina akiqara Faraofa Abarammana amiqi amiqimmaseenoo sipsipauqa faqa mimmiuqa faqa burimakauqa faqa doonkiuqa faqa kammeerauqa faqa ainainira faiqiuqa faqa maanaaqauqa faqa feefaru Abarammana aminau.

<sup>17</sup> Faraofa Sarai nammarina maroonara Karaambaiqa fannoo oosana oosana manda aurirana Faraona faqa mina maaqaki marusaki faqa quqanau.

<sup>18</sup> Faraofa mina qafamaseenoo Abarammana aaramaseenoo aqinoo qinau. Anee qini naqaa fee maqimaqeenee. Anee nanaree sia qini qinaafa fee qimasee qimaqiminanee.

<sup>19</sup> Anee nanaree qini dauna fee qianaqee qinee qeeqara qinaaqara mareegee qeeqa maaqaki quqee fee. Maa ani anaafa marinoo, doo ani afiqee fifua.

<sup>20</sup> Faraofa miqi qimaseenoo nari sundiaufa niqiqoofaqa Abarammana faqa nari anaafa faqa nari aiqama ainaina faqa nifiqa maree nari maqa atinni munusoofaqa fiqa.

## 13

*Abarammasa Rootasa naadu naadu fu ufafa.*

<sup>1</sup> Abarammafa Isipa maqa maaqakiqari suani afu dinni ataaqeeni dinni ataaqeeni Kannaana maqa maaqai qumurandee nari anaafa faqa Rootana faqa nari aiqama qumiasana faqa maree finau.

<sup>2</sup> Abarammafa ainaina faqaafa marinau. Sipsipa faqa mimmi faqa burimakau faqa sirua faqa kooru faqa faqaafa marinau.

<sup>3</sup> Mifa miqooqari quqasee fifiufanoo Beeteera maqusa amummaqa fimarinau. Mifa ooqai nari Beeteera maqusa faqa Ai maqusa faqa qambaana uigaana maqa usakaqooqoo oogu ranau.

<sup>4</sup> Ooqai mifa miqoo tatufira qainda auquqoo ooqureenoo Karaambaiqa innauru qimamaqanau.

<sup>5</sup> Rootafa faqa sipsipauqa faqa mimmiuqa faqa burimakauqa faqa faiqi anaasee faqa nari ainainira faiqiuqa faqa maanaaqauqa faqa Abarammana faqa nimiriqua.

<sup>6</sup> Miqanda moomoo aandau ainaina faqaqanda maridaqa aandauqa neemaru andandafa sia amanaikufaqa sia amana moodaanaki mariaqa inoo marinau.

<sup>7</sup> Miqifa marufanoo Abarammana aandausaa rakisi marusa faqa Rootana aandausaa rakisi marusa faqa andanda narana saara tinooriqau. Mikari Kannaana maqannaasa faqa Peerisa maqannaasa faqa mi maqanasaa kaqi mariqau.

<sup>8</sup> Abarammafa mina qafamaseenoo Rootana qimaminau. Maasa moodaa oosana maridaqa anee faqa qinee faqa sia tinooria, ani faiqi namu faqa qini faiqi namu faqa sia tinooriaqa.

<sup>9</sup> Maqa maaqa firaatamma maridanoo ania, anindiri rainaa, anee aninna aidimari maqana qafamasee utaaqamasee mi tinai finaqa qinee moo tinai fuanaura.

<sup>10</sup> Miqi qimasee qimamufanoo Rootafa afu maqaidanoo Yooradanna noopundu dinni marufanoo Soora maqusa dinni marufanoo mi qambaana nammari moomoo marinau. Karaambaiqa kadidakiara foora moomoo nammari marinau. Amiqinoo maridanoo Isipa maqa maaqara foora marinau. Mi aukunnai Karaambaiqa Soodoomma maqusa faqa Koomoora maqusa faqa sia naru kammuqoo Rootafa mi maqa maaqana qafanau.

<sup>11</sup> Rootafa qafamaseenoo aiqama Yooradanna afaasasaa oogu mariraree qimaseenoo suani oosana fimaruu aatata finau. Miqi mandeeqara rainaqa.

<sup>12</sup> Abarammafa Kannaana maqa maaqai kaqi marufanoo Rootafa Soodoomma maqusa aaga maqusauqa dinni dinni marufanoo qambaana noopunduki nari uqaana maqa usakanau.

<sup>13</sup> Soodooma maqannaasa kaaqa mandainaina maree marusa maridaqa. Karaambaiqa afusaa oosana oosana mandainaina uqanna auqee mariqau.

*Abarammafa Heebaroona maqa maaqai finau.*

<sup>14</sup> Rootafa fifufanoo Karaambaiqa Abarammana qimaminoo qinau, anee marian-naqooqari amiqimmasee aiqama atinai aiuqia.

<sup>15</sup> Anee qafaana maqa maaqana ani faqa anisaaqari kambigainausa faqa nimisaananoo naaruara naaruara innindi kamminoo mariannoo.

<sup>16</sup> Qinee ani aiku asauku asumu moomoo kambiqi nimaqaanaura. Sia amana moo fannoo asaana rirana amanaikiannoo. Nukuda aiqama amana asaana rifaranoo, ani faiqi namu kai sia amana nisaana rifaranoo.

<sup>17</sup> Doo maqee oonuree aiqama maqa maaqa qinee ani amiannana aiuqia.

<sup>18</sup> Abarammafa minara iriseenoo nari uqaana maaqa rapeemma mareenoo Heebaroona maqa maaqaki Mamareena saqariuqa atukaki ooqureenoo miqoo Karaambaiqa tatufira qainda ooninnai auquseenoo tatufirana suqa aminau.

## 14

*Rootafa namuqaaki marufanoo Abarammafa aqiqoo ufafa.*

<sup>1</sup> Mi fasannai Amarafeerafa Babiroonia maqanna karaambaiqa marinau. Mi aukuan-nai Eerasaa maqanna karaambaiqa Ariookafa faqa Eeramma maqanna karaambaiqa Keedooroomafa faqa Kooimma maqannaasa karaambaiqa Tidarafa faqa minamusa aiqama nari sundiauga moodaanaki nifiqeeqa Soodooma maqannaasa narirara fiqau.

<sup>2</sup> Misa moodaannai qisauku karaambaiqauqa faqa rakiraree qimaseeqa fiqau. Soodooma maqanna karaambaiqa Beerana faqa Koomoora maqanna karaambaiqa Birasana faqa Adama maqannaasa karaambaiqa Sinabana faqa Seeboyima maqusaanaasa karaambaiqa Seemebeerana faqa Beeraa moo auqu Soora maqanna karaambaiqa faqa mi moodaannai qisauku karaambaiqausa faqa rakiraree qimasee qumiqau.

<sup>3</sup> Mi moodaannai qisauku karaambaiqausa rufiasee Sidimma noopunduki suqiqau. Maqee mi noopundunaki ooruku nammari rafaafaq finoo marifaqa mina auqu raidaqa Kujira Nammari fee qidaqa.

<sup>4</sup> Qisaukuqara taikasee qikunni ooqu qaara marasee 12 aukuanaki Keedooroomana asauku ameemaanai mariqau. Qisaukuqara taikasee qikunni ooqu qaaramoo marasee 13 aukuanaki mina ufa rukiee mariqau.

<sup>5</sup> 14 aukuanasaa Keedooroomafa findifinoo aqoonna karaambaiqauqa faqa nari rakira fasiqauqa faqa findifiqa ooqu fiqau. Ooqu fiu faqa moo maqannaasa ooqi naru maree fiqau. Reefaimma maqannaasa Asetaroota Karanaimma maqusaki nariqau.

<sup>6</sup> Naruseeqa Susima maqusaanaa Qamma maqa maaqaki faqa nariqau. Naruseeqa Eemimma maqanna faqa Kiriataimma afaasa maqa maaqaki marusa nariqau. Miqooqari ooquree Qoora maqannaasa Eedoona aaganasaa marusa nariqau. Misa naru mareeqa Eeraparanna aadana maqa maaqa atinni munu quqaqau.

<sup>7</sup> Miqooqari oonu randeeqa Kadeeasa maqusai ooqeenaa auqu Eenamisapatee qimaru maqusaanaasa faqa nariqau. Amareekana aiku asauku misaqa maru maqusaasa aiqama rafaafaq fiqau. Rafaafaqfusee Amoorana aiku asauku Qasasoona Tamara maqusaki marusa faqa rafaafaq nimaqaqau.

<sup>8</sup> Miqimmasoofaqa Soodooma maqanna karaambaiqa faqa Koomoora maqanna karaambaiqa faqa Adamma maqanna karaambaiqa faqa Seebooyima maqanna karaambaiqa faqa Beeraa moo auqu Sooa maqanna karaambaiqa faqa mi maqusa namusa karaambaiqauqa faqa nari rakira fasiqauqa faqa moodaaqoo Sidimma noopunduki suqiqau.

<sup>9</sup> Suqufufaqa Eeramma maqanna karaambaiqa faqa Kooimma maqanna karaambaiqa faqa Babiroonia maqanna karaambaiqa faqa Eerasara maqanna karaambaiqa faqa rakirara deedaqiau. Moodaanai qisauku karaambaiqauqa qaara faqa qaara faqa karaambaiqauqa faqa rakirara deedaqiau.

<sup>10</sup> Sidimma noopunduki koorootaqa madika moomoo marinau. Soodooma faqa Koomoora maqanna karaambaiqauqa rakiranaiqari quqasee sandaani quna mi madikausaki aqufiqau. Qaaramoo karaambaiqauqa sanda maqaraasiqa aaganai akaraqau.

<sup>11</sup> Qaara faqa qaarafaqa karaambaiquauqa Soodoomma maqannaasa faqa Koomoora maqannaasa faqa aiqama ainaina uqanna maraqau. Afuqakinaa nara ainaina faqa maree fiqau.

<sup>12</sup> Rootafa Abarammana akaqa amaaku fannoo Soodooma maqusai marufaqa mina faqa mina qumiasana faqa maraqau.

<sup>13</sup> Faiqi moo fannoo rakiranakiqari sandeenoo Abarammafa Qeeburu maqannaa fasiqa fannoo Amooru maqannaa fasiqa Mamareena saqariuqa atukaki marufanoo ooru qimaminau. Mamareefa nari akaqaqara Eesakoorana faqa Aneerana faqa minamusa Abarammana agoondi mariqau.

<sup>14</sup> Abarammafa Rootana mara maree funara iriseenoo nari ainainira faiquqaki nimudaanai qimarusa nari uigaana maqusakinaasa 318 fasiqa nifiqanau. Nifiqaseenoo qimannimufaqa qaara faqa qaara faqa karaambaiquauqa nifaqamaree Dannaa maqa maaqai nianai fiqau.

<sup>15</sup> Ooruree namuqaa nindafamaseenoo nari faqa fusa rainaseenoo eendaki namuqaa maruqoo oonureeqa naru nindaqaaqa qiqau. Mifa misa nifaqa maree suani afu dinni ataaqeeni Damasakusa maqusa fiaaqaree Hoobaa maqusaki munusaqau.

<sup>16</sup> Ooru randee qumureeqa Abarammafa Rootana faqa mina qumiasana faqa aiqama aanaaseeuqa faqa rumbee fusauqa faqa aiqama nifiqee aniqau.

*Meerakiseedeekafa Abarammana amiqi amiqira ufa qimamaqanau.*

<sup>17</sup> Abarammafa Keedooroommana faqa mina aqoonna karaambaiquauqa faqa naruseenoo aniroofanoo Soodooma maqanna karaambaiqa fannoo mina qafarara Saavee noopunduki moo auqu Kinna noopunduki fee qimaruqoo paqurinau.

<sup>18</sup> Sareema maqannaasa karaambaiqa auqu Meerakiseedeekafa uriqarara Anutuna aanaiqikirafa marufa feemu faqa uainna nammari faqa Abarammana mini aminau.

<sup>19</sup> Meerakiseedeekafa amiseenoo maaqi qimaseenoo amiqi amiqira ufa qimamaqanau. Uriqarara Anutufa innaaruna faqa maqa faqa auqufa mifa kai Abarammana amiqi amiqiannoo.

<sup>20</sup> Kaaqa uriqarara Anutufa kai namuqaa mareeqee ani asaukuki quqeenoo miqinara Anutuna amoo qiaqa.

Miqi qimasee amiqi amiqira ufa qimasoofanoo Abarammafa namuqaa ainaina maraqoona qisaukuqarakai rainaseenoo moodaaki Meereekiseedeekana aminau.

<sup>21</sup> Amisoofanoo Soodooma maqannaa karaambaiqa Abarammana qimaminoo qinau. Anee rakiranaki maraanna ainainausa aneennara mareenana qini faiqi anaasee kai qimia.

<sup>22</sup> Miqi qufanoo Abarammafa asauku uqeeraseenoo qinau. Qeeqa qisauku uqeerreeqa, kaaqa uriqarara Anutuna innaaruna faqa maqa faqa auquna afusaa uqeerasee qimamidaqa.

<sup>23</sup> Sia uqanna ani ainaina kaqikaa ainaina maraanaura tiritu faqa niku aanaamu sanda faqa ririmma sia maraanaura. Anee qiniara maasa ainaina maraseenoo moomoo ainaina faqaasee qidanoo mifoo qinoora. Sia uqanna maraanaura.

<sup>24</sup> Qinee sia uqanna moo ainaina qeeqara maraanaura. Qini faqa rakiranaki fuasa misa namasaa ainainnara kai doo maree fee qidaqa. Qini qiqoodi namu Aneerafa faqa Eesakoorafa faqa Mamareefa faqa misa kai nari nimanasaa maraqa.

## 15

*Anutufa Abarammana faqa moodaanaki kira ufa qinau.*

<sup>1</sup> Rakirana taikaseenoo marufanoo Yaaweefa Abarammana afu pispasa mandeenoo qimaminau.

Abaramma anee sia rufiaa.

Qinee ani saqariara foora anisaa ititafuananoo sia moo fannoo ani aruannoo. Qinee mina akiiqara firaa ainaina ani amianaura.

<sup>2</sup> Abarammafa mi ufana iriseenoo nari qimaminoo qinau. Oo uriqarara karaambaiqa anee nana qumiasanee qini qiminnaree qinee faiqi siaisa maridaqa. Maa qini ainainira faiqi auqu Eerieseerafa Damaskusa maqusaindaraafa mifa kai maridanoo qinee kuqunanoo qini ainaina maraannoo.

<sup>3</sup> Anee faiqi asumu sia qini qimiananoo qini ainainira faiqi uqakiqari moo fannoo qini qumiasana maraannoo.

<sup>4</sup> Miqi qimaseenoo Abarammafa irufanoo kafa Karaambaiqa qimaminoo qinau. Maa ani ainainira faiqi Eerieseerafa sia ani qumiasana ainaina maraannoo. Aninna faiqi uqanna fannoo ani ainaina maraannoo.

<sup>5</sup> Miqi qimaseenoo Karaambaiqa Abarammana afiqee madaanai muquseenoo qinau. Innaarunai qafamaseenana fasau amanee anee asaana rinnaree. Aniki ani aruakinausa miqimmasee kambiqeefara.

<sup>6</sup> Abarammafa Yaaweena mi ufana iriseenoo nari saqarikirana mi ufanasaa rusisee marinau. Miqunara Karaambaiqa اساسammaseenoo Abarammana mareeqee nari aqoondikiranaki quqanau.

<sup>7</sup> Miqi qimasee Karaambaiqa Abarammana qimaminoo qinau, qinee Karaambaiqa ani Ura maqusakinaana Babiroonia maqa maaqaindaraana afiqee minisee maa maqa maaqana amiananoo anindikianifee qimasee afiqee aniqiafana.

<sup>8</sup> Miqi qufanoo Abarammafa iramirinoo qinau. Oo uriqarara Karaambaiqa qinee naqi fee masee qinindi kammianoo fee qimasee irianaaree.

<sup>9</sup> Miqi qufanoo Karaambaiqa nari qimaminoo qinau. Anee burimakau faqa mimmi faqa sipsipa faqa qaaramoo aukuaana mararasa faqa nakipuruna faqa kukuma faqa maree mini qimia.

<sup>10</sup> Miqi qimasoofanoo Abarammafa mi aandausa Anutufa maruqoo maree mini quqaseenoo minauqa qambaana kai afoommaseenoo dinni moo afooirana dinni moo afooirana qaaramau irasasaa quqanau. Ufniqara kai sia afooinau.

<sup>11</sup> Meemoonauqa mi aandausa narara aniroofanoo Abarammafa niqaaqinau.

<sup>12</sup> Suani keeqarana namu faqa eenoofanoo Abarammafa afuki qaunduarufanoo faiqaqeidanoo qaini marufanoo firaa rufiarafa faqa maparaairafa faqa Abarammana afaaqai aqufinau.

<sup>13</sup> Miqida ruftee marufanoo Karaambaiqa Abarammana qimaminoo qinau. Anisaaqari kambiqainausa aanaamuruara foora moo maqannaasa maqasaa oonu maridaqa ainainira faiqikiqa marifaqa 400 aukuanaki manda fitiqnarana nimifaranau.

<sup>14</sup> Miqi marifaqa qinee mi maqannaasa mi fitiqnarana nimimariana akiqara aupurarana nimianaara. Misa mi maqa maaqana minnisee oonurandee aniqi moomoo qumiasana maree anifaranoo.

<sup>15</sup> Aniara maaqi qiqa anee asooaqeenana asoaranaki kuqufinaqa akundaqa.

<sup>16</sup> Ani aiku asauku qaara faqa qaara faqa oosana mi rumbaranakiqari oonu randee anifaranoo. Qinee sia Amooru maqannaasa dauni naru taikaanaara. Misa kaaqa mandaika uqanna ifaqa miqoo misa naru nindaqaaqa masee ani aiku asauku miqoo quqaanaara.

<sup>17</sup> Suani keeqoofanoo eendirara mammandufanoo Abarammafa qafooofanoo qafeeki idamuna namu faqa qooma namu faqa akooqoo nari kai kambiqafinoo aandaufoomma dinni dinni quqaqoona qambaana runna finau.

<sup>18</sup> Doo aaqee mikari kai Yaaweefa Abarammana faqa moodaanaki kira ufa qinau. Qinee maa maqa maaqana ani aiku asauku nimianaaranoo. Isipa maqannaamammari dinni oosirafa ani rameeqeenoo firaa nammari dinni Eeufarateesa nammari mariannoo.

<sup>19-21</sup> Keenaa maqusanaasa maqa faqa Keennisa maqusanaasa maqa faqa Koodamoonu maqusanaasa maqa faqa Qeeta maqusanaasa maqa faqa Peerisa maqusanaasa maqa faqa Reefaimma maqusanaasa maqa faqa Amooru maqusanaasa maqa faqa Kannaana maqusanaasa maqa faqa Kirakasa maqusanaasa maqa faqa Yeebusa maqusanaasa maqa faqa miqimmasee maqannaasa maqa faqa ani aiku asauku nimianaara.

## 16

*Qakaarafa nari amaaku Isamaeerana faqa ufa qu ufafa.*

<sup>1</sup> Abarammana anaqa Sarai nammarifa mifa qaafa anaasee marinau, sia faiqi maqanau. Mina ainainira maanaaqa Isipa maqannaamannaqa marinau. Mina auqu Qakaara nammarifa marinau.

<sup>2</sup> Sarai nammarifa nari oosana maraseenoo Abarammana qimaminoo qinau, anee iria, Anutufa sia faiqi qini qiminoo. Minara maa qini ainainira maanaaqa mara sainanoo mifa ani faqa finoo aqbee faiqi maqa sainaaqa qinee qeeqara maraanaara. Miqi qufanoo Abarammafa eedoo qimaseenoo maranau.

<sup>3</sup> Abarammafa qisaukuqara taikasee aukuaana Kannaana maqa maaqai marufanoo Sarai nammarifa nari ainainira maanaaqa Qakaara nammarina Abarammana aminau.

<sup>4</sup> Abarammafa Qakaara nammarina faqa aana fufanoo faiqi maranau. Qakaara nammarifa amuaquqaika mafufanoo nasuridanoo nari aqoonnana Sarai nammarina ramoo ramaa ira ufa qimamaqanau.

<sup>5</sup> Miqufanoo Sarai nammarifa Abarammana qimaminoo qinau. Ani oosanasaa Qakaara nammarifa qini fidiqaamma qimaqidanoo. Qinee qeeqa kai mina ani amisaafananoo

amuaquqaika mafinoo qini uridaaqa raidanoo. Karaambaiqa fannoo kai anindiri ufa rainaannoo. Anee fee, qinee fee andeeqee fee.

<sup>6</sup> Abarammafa kafaa narí qimaminoo qinuu. Doo amana ani ainainira maanaaqa ani ameemaanai maridanoo. Naqaamma amaqaararee fee qimasee iridanee, doo miqia. Sarai nammarifa Akaara nammarina maqee maqee oofana qaidanoo ari aqimarunara quqasee sandanau.

<sup>7</sup> Qakaara nammarifa amaaqa firaree qimasee Suraa maqa maaqaki fimaru aatata sandee fiiufanoo aadana maqa maaqa qambaana nammari kaqikaafa ururee maruqoo Karaambaiqa angiroo fannoo Qakaara nammarina paqurimmasee qimaminoo qinuu.

<sup>8</sup> Qakaara nammari, Sarai nammarina ainainira maanaaqa, anee yaindari fee anidanee maaqooqari yai fee fidanee. Miqi qufanoo Qakaara nammarifa qinuu, qeeqa rakisirana Sarai nammarina aaqu rufiee sandaadaqa.

<sup>9</sup> Angiroo fannoo minara iriseenoo maaqi qimasee qimaminuu, doo findi finana aneenna rakisira anaasee marinnai kafaa anirandee oonureenana mina ainainira manaaqaikaa.

<sup>10</sup> Angiroo fannoo kafaa qimaminoo qinuu. Qinee moomoo asumu ani amianaqa sia amana asaana rifaranoo.

<sup>11</sup> Maqee ani aranandaki faiqi rinoo anee akoonaiqi maqeenaranoo anee mina auqu Isamaeera nee qia.

Karaambaiqa fannoo anee aquraranakiqari mina aaramasee faaqa ruannana irinara minara mi faiqina auqu Isamaeera nee qia.

<sup>12</sup> Mi faiqifa kaasau fainiara fooru mariannoo.

Mifa aiqamausa namuqaakamma nimaqainaqa misa faqa narí namuqaakamma amaqaefaranoo.

Mifa narí ainaina rakeemasee aaduma mariannoo.

<sup>13</sup> Qakaara nammarifa narí kai qimirinoo qinuu. Qinee kuqaa fee Anutuna qafamasee fee sia kuqirai kaqi maridee qimannimianauree. Miqi qimasee mina qimamu karaambaiganara niqafee mari Anutu fee qinuu.

<sup>14</sup> Miqooqari misa mi nammari dikaandana auqu reeqa kaqi marira Anutufa qini qiqafai nammari dikaanda fee qiqau. Mi nammari dikaandafa Kadeesa maqusa dinni Beereeda maqusa dinni qambaana marinuu.

<sup>15</sup> Qakaara nammarifa kafaa anirandee oonureenoo faiqi maqasoofanoo Abarammafa mina auqu Isamaeera nee qinuu.

<sup>16</sup> Mi aukuanu Abarammafa 86 aukuanu faqaafa marufanoo mina faiqi kambiqaanuu.

## 17

*Anutufa Isaraee maqannaasara nifaqaq ati aukirafa moodaanaki kira ufa kooroo imarifa maridanoo.*

<sup>1</sup> Abarammafa mariufanoo 99 aukuanu marasoofanoo Karaambaiqa mina afusa kooroo mafi qimaminuu. Qinee aiqama afeeka faqaa Anutusa maridaqa. Anee aiqama kari qini ufa qaindusidana andeeqara ainaina kai auqaa.

<sup>2</sup> Qinee ani faqa qeeqa moodaanaki kira ufa qimasee anisaqari asumu moomoo kambiqa nimaqaanau.

<sup>3</sup> Abarammafa mi ufana iriseenoo oorindari maqasaa mapamufufanoo Anutufa maaqi qimasee qimaminuu.

<sup>4</sup> Qinee maa moodaanaki kira ufana ani faqa qidaqa. Qinee kuqaa qima afeekaikidaqa. Anee moomoo maqannaasa ninaakufa marinnaranoo.

<sup>5</sup> Doo maqee ani auqu Abarammafa marina maqee fuka auqu amiqa. Abaraqaammanee qianaau. Qinee ani moomoo maqannaasa ninaakufaika maisaannanara ani auqu Abaraqaammanee qianaau.

<sup>6</sup> Qinee ani faiqi asumu moomoo amianaqa misakiqari akaqausa karaambaiqa marifara. Ani asaifaqausa moomoo maridaqa moomoo maqannaasa marifaranoo.

<sup>7</sup> Qinee qeeqa qima afeekaikira ufa ani faqa ani asaifaqausa naaru kambiqaanau faqa qiafannana naaru marira moodaanaki kira ufara fooru rakisiaanau. Qinee ani faqa ani asaifaqausa Anutusa marianaau.

<sup>8</sup> Anee asaqiraa faira fooru maa maqanasaa mariannana qinee ani faqa ani asaifaqausa faqa nimianaau. Nimiananoo aiqama Kannaana maqa maaqa fannoo ani asaifaqausa-saindi kamminoo naaru naaru marinaqa qinee misa Anutusa marianaau.

*Abarammana fuka auqu.*

<sup>9</sup> Miqi qimaseenoo Anutufa kaifaa Abaraqaammanna qimaminoo qinau. Anee faqa eedoo qimasee qini qima afeekai kira ufamau aneenna asaifaqausa naaru kambiqainausa faqa fuaqa.

<sup>10</sup> Anee faqa ani asaifaqausamara faqa aiqama eedoo qimasee akoonaiqi faiqiuqa nifaaga ati aukuaqa.

<sup>11-12</sup> Maaqooqari aiqama akoonaiqi faiqiuqa maqasaifanoo 8 faasaana aiqaramafinaqa nifaaga ati aukuaqa. Ainainira faiqiuqa inniki mariasa faiqi namu faqa nianaindaraasa feefaurumma quqaqafaqa inniki mariasa faiqi namu faqa nifaaga ati aukuaqa. Miqim-masaifanoo mifa qinee faqa innee faqa moodaanaki kirana uqannifiqaannoo.

<sup>13</sup> Miqi qimaseenoo Abaraqammafa Anutuna qimaminoo mifa inni nifaagai qini moodaanaki kira ufa naaruara marianinnanara koorooiannoo.

<sup>14</sup> Inniki qari akoonaiqi moo fannoo sia afaaga ati aukinafa marinaqa sia qini faiqi aanaaseeki mariannoo fee qianaara. Mifa qini qima afeekaikira ufamau sia finara sia inniki mariani.

<sup>15</sup> Kafaa Anutufa Abaraqaammanna qimaminoo qinau, sia aneenna aanaqara Sarai nammarinee qia. Maqee mina auqa Saraqa nammarifa mariannoo.

<sup>16</sup> Qinee Saraqa nammarina amiqi amiqi maisaanannoo faiqi akoonaiqi ani maqa amiannoo. Mifa moomoo maqannaasa ninoofa marinaqa mina faiqi namuqi qari akaqausa karaambaiqauqa marifaranoo.

<sup>17</sup> Abaraqaammafa mi ufana iriseenoo maqasaa mapamu finoo naanaidara qidanoo qinau. Amanee 100 aukuaana marara fasiqa fannoo faiqi maqaannoo fee Saraqa nammarifa faqa 90 aukuaana mararafa amanee faiqi maqaannoo fee.

<sup>18</sup> Miqi qimaseenoo Abaraqammafa Anutuna qimaminoo qinau. Naqaa saina Isamaerafa qini ainaina maraqaana ifanee.

<sup>19</sup> Miqi qufanoo Anutufa qimaminoo qinau. Ani anaaqa Saraqa nammarifa ani faiqi akoonaiqi maqasainana mina auqu Isakee nee qia. (Maasa ufakiqari Isakeena auqu naanaidara qirane qimaqoo fanoo.) Qinee ani faqa moodaanaki kira ufa quqaunafa Isakeenasaa faqa minasaaqari naaru naaru kambiqainausasaa faqa mariannoo.

<sup>20</sup> Isamaerana faqa anee qianandee, mina faqa amiqi amiqi ianaara. Mina faiqi namu moomoo uqanna kambiqeefara. Akoonaiqiuqa qisauku qara taikasee qikunni ooqu qaraqanda 12 marasee uriqararausa marifara. Mina saaqari kambiqainausa firaa maqannaa marifaranoo.

<sup>21</sup> Moo aukuaana maa quqoonnasaa kai Saraqa nammarifa ani faiqi Isakeena maqannoo. Qinee qeeqa moodaanaki kira ufa minasaa quqaqaana mariannoo.

<sup>22</sup> Anutufa aiqama maa ufana Abaraqaammanna qimamiseenoo doo quqasee finau.

<sup>23</sup> Fifufanoo Abaraqaammafa Anutuna ufa mau finoo mi faasaana kai nari faqa nari amaaku Isamaerana faqa nari ainainira faiqiuqa faqa nari ainainiranaki marida maqagoo faiqisa faqa aiqama nifaaga ati aukinau.

<sup>24-25</sup> Abaraqaammafa 99 aukuaana marinoo nari afaaga ati ateeqa aqinau. Isamaerafa 13 aukuaana marasoofanoo mina afaaga ati ateeqa aqinau.

<sup>26-27</sup> Moodaa faasaana kai Abaraqaammafa faqa nari amaaku Isamaerafa faqa nari ainainira faiqiuqa aiqama nifaaga ati ateeqaqau.

## 18

*Anutufa Abaraqaammanna faiqi amirara qima afeekai ku ufana.*

<sup>1</sup> Abaraqaammafa Mamareena arookasa atukaki suani qambaana aiqaiqa ufanoo nari uiqana maqa kooqiki ooqu faaqee marufanoo karaambaiqa maaqimasee mina afusaa kooroo inau.

<sup>2</sup> Ooqufaaqee marufaqa faiqi qaaramoo namu anufanoo Abaraqaammafa niqafamaseenoo nari oosana mareenoo findimeeqeenoo misa anuqoo sandee oonureenoo oorindari maqasaa kummarama finoo qimanniminoonoo qinau.

<sup>3</sup> Oo uriqararausa, qinee inni dadaaqirarusa maridaqa sia qini aidaqa raaga.

<sup>4</sup> Qinee qianaqa nammari minisaifaqa inneeqa niku nammari uqu seeqa maa saqarina atukaki adooaqa.

<sup>5</sup> Qinee akaqa narana nimiana namaseeqa afeeka mara mareeqa fuaqa. Qinee inni dadaaqianeera maaqoo aniafanoo. Innee mai anianannai qini duqu uqeraafanoo. Minara eedoo qifaqa narana nimia. Miqi qufaqa misa qiqau. Dufi dufi doo nimina naanee qiqau.

<sup>6</sup> Abaraqaammafa iriseenoo uiqaa maaqaki sandeenoo oonureenoo Saraqa nammarina qimaminoo. Anee kai kaqi parauqa amiqirana moodaa beeka marasee feemu suqa.

<sup>7</sup> Miqi qimaseenoo raudamaki sandeenoo burimakau maruqoo oonureenoo burimakau aanaaqi amiqirana amaqi qumooqu kirana mara rumba mareenoo nari ainainira faiqi amisooфанoo kai kaqi ufanoo arusee suqanau.

<sup>8</sup> Abaraqaammafa burimakau naamma anoona faqa naamma anoona fadameena faqa feemu faqa burimakau suqarana faqa mara maree mini nimufaqa naqau. Abaraqaam-fafa saqari atukaki misa faqa maridanoo narana nimufaqa naqau.

<sup>9</sup> Misa namaseeqa Abaraqaammama maaqi qimasee iraqau. Ani anaqa Saraqa nammarifa yai fee marinoo fee qufanoo mifa qinau. Maa uqaana maqaki maridanoo fee qinau.

<sup>10</sup> Miqi qufanoo misa qiqari moo fannoo qinau. Moo aukuaana maa quqoonnasaa kai qinee kafa aniraananoo ani anaqa Saraqa nammarifa akoonaiqi faiqi maqaannoo. Miqi qimarufanoo Saraqa nammarifa uqaana maqa kooqiki mi fasiqana aanaaqiannai oogu faaqee idanoo irimarinau.

<sup>11</sup> Miqi qufanoo Saraqa nammarisa Abaraqaamasa asooqa uqanna marufanoo Saraqa nammarifa faqa faiqi maqara aukuaana oqai taikanau.

<sup>12</sup> Saraqa nammarifa minara iriseenoo nari kai naanaidara qidanoo qinau. Qinee faqa qeeqa nauraiqindiri asooqa marida. Naqimmasee fee qeeqa qifaqi faqa aana fuanauree.

<sup>13</sup> Miqufanoo karaambaifa Abaraqaammama qimaminoo qinau. Naqaa fee ifanoo fee Saraqa nammarifa naanaidara qinoo fee. Maana qinee asooqa maridaqa naqimandee faiqi maqaanauree qinoo fee.

<sup>14</sup> Nana ainainee moo ainaina Yaaweefa sia amana auqaannoo fee mifa amana aiqama ainaina auqaannoo. Qinee anoona ufa qidaqa, moo aukuaana maa quqoonnasaa qinee kafa aniraananoo Saraqa nammarifa akoonaiqi faiqi maqaannoo.

<sup>15</sup> Saraqa nammarifa mina iriseenoo rufia mareenoo unna qimasee qaoo qinau, Qinee sia naanaidara qifa. Miqi qufanoo misa uriqararafa Karaambaifa qimaminoo qinau. Anee naanaidara qianaqa iriqa.

*Karaambaifa Soodooma maqusa aruaninnanara qinau.*

<sup>16-17</sup> Mi fasiqa qaaramoo namusa Abaraqaammama faqa oogu fiufaqa Soodooma maqusai qafee maruqoo muqunnisoofanoo Karaambaifa nari kai qimasee irinai. Qinee auqararee qunna ainaina sia Abaraqaammama umeerama amaqaanaura.

<sup>18</sup> Mina saqari kambiqainausa firaa maqanna marifaranoo. Aiqama maqannaasa Abaraqaammama saqaraanannai amiqi amiqimma nimaqaanaura.

<sup>19</sup> Abaraqaammafa nari faiqi namu faqa misasaqari kambiqainausara faqa andeeqara oosanamau kai fuageera fuki faaki ianifeera rusandeesamumasee maraqiafana. Misa miqi faqa qinee qiama afeekaiqiafanna ainainausa aiqama miqimma nisaanaura.

<sup>20</sup> Miqi qimiriseenoo Yaaweefa Abaraqaammama akooqoo kooroommasee qimaminau. Soodoomma maqusanaasa faqa Koomooru maqusanaasa faqa manda oosana fiqaranoo marifaqa akaqausa minara nikoo uqanna qaifaqa qimaqimiafaqa iriqa.

<sup>21</sup> Qinee ooqureeqa mi fasiqa anaaseesa mi oosanna auqee mariana qafaanaura kuqaa fee unna fee maridanoo fee.

<sup>22</sup> Mi qaaramoo fasiqa namusaiqari qaara qanda Soodoomma maqusai oogu fimaru-fanoo Karaambaifa Abaraqaammama faqa marinai.

<sup>23</sup> Abaraqaammafa Karaambaifa oorinni oonu reenoo iramirinoo qinai. Kuqaa fee anee andeeqaraura faqa aaqee mariasa faqa aiqamee naru taikennaree.

<sup>24</sup> Qaara fasiqa niku nisauku taikasee qini qisauku qara taikasee 50 andeeqaraura mi maqusanaki marifana anee aiqamee naru taikennaree. Kafa 50 andeeqaraura marifana mi maqusana asumu quqennaree.

<sup>25</sup> Sia amana andeeqaraura faqa mandaikirausa faqa moodaanaki narinnaranoo. Mifa sia andeeqanoo maridanoo. Andeeqaraura faqa aaqee mariasa faqa sia amana moodaa oosana kai niminnaranoo. Aiqama maa maqanasaa mariasa siaasa marianafa andeeqara oosana kai maraa.

<sup>26</sup> Karaambaifa Abaraqaammama ufa iriseenoo qimaminai. Qinee qaara fasiqa niku nisauku taikasee qini qisauku qara taikasee 50 andeeqaraura mi maqusanaki paquriqa sia mi maqusana kuridianaura.

<sup>27</sup> Abaraqaammafa mina iriseenoo kafa qimaminai. Oo karaambaifa qinee qifaqa quqasee ani qimamunna ufana mi numoona minni qisaa. Qinee faiqi faiqi maridaqa aaqammasee ani faqa moomoo kari ufa qidaqa.

<sup>28</sup> Amanee 50 sia marifana 45 kai andeeqaraura marifana moodaannai qisauku 5 minaki sia marinnanara irisee narinnaree. Karaambaifa nari qimaminoo qinai. 45 andeeqaraura mi maqusanaki marifaqa sia kuridi taikaanaura.



<sup>29</sup> Abaraqaammafa mina iriseenoo kafaa qimaminau. Oo karaambaiqa qaara fasiqa niku nisauku taikasee 40 andeeqaraua marifana aiqama narinnaree. Karaambaiqa mina iriseenoo qimaminau. Qinee qaara fasiqa niku nisauku taikasee 40 andeeqaraua paquriqa mi maqusana sia kuridianaura.

<sup>30</sup> Abaraqaammafa iriseenoo kafaa Karaambaiqa qimaminau. Qinee kaifaa ani qimamianana anee sia qiniara aanoo qia. Moodaa fasiqa aiku asauku taikasee qini qisauku qara taikasee 30 andeeqaraua marifana naqaa fee innaree. Yaaweefa iriseenoo qinau. Qinee 30 andeeqaraua paquriqa sia miqianaura.

<sup>31</sup> Abaraqaammafa kafaa qimaminau. Qinee qifaaqa quqasee ani faqa moomoo ufa qimarunnana mi numoona minni qisaa. Mi maqusanaki moodaa fasiqa 20 kai marifana naqaa fee innaree. Karaambaiqa iriseenoo qinau. Qinee 20 andeeqaraua paquriqa sia mi maqusana kuridianaura.

<sup>32</sup> Abaraqaammafa kaifaa qinau. Oo karaambaiqa sia aanoo qia. Qinee moo ufa kafaa qianaura. 10 andeeqaraua paqurimasee naqi fee innaree. Miqi qufanoo Karaambaiqa qinau. Qinee qisauku qara 10 kai andeeqaraua paquri mandee sia kuridi nimaqaanaura.

<sup>33</sup> Karaambaiqa Abaraqaammafa faqa ufa qimaseenoo doo ooqu finau. Ooqu fufanoo Abraqaammafa quqasee anirandee amaaqa finau.

## 19

*Soodoomma faqa Koomoora faqa manda oosanna maraqa.*

<sup>1</sup> Abaraqaammafa muqunnisoo gangirooqanda Soodoomma maqusai ooquree maqusa kooqiki qafoofanoo Rootafa miqoo ooqu faaqee marinau. Maridanoo Rootafa miqanda nindafeenoo maqeenoo oonu miqanda noorinni oorindari maqasaa rupaitama fufanoo maaqi qimasee qimanniminau.

<sup>2</sup> Oo qini uriqarara qanda qinee inniqara dadaaqirara maridaqa. Innee qara qini maaqaki aniree niku nammari uqusee qini maaqaki faiqaaqa. Faiqee duna kananaana findi finaqa inneeqa finnannai fuaqa. Miqi qimasoofaqa miqanda qaoo qida qiqau. Saina maa qanda maqusa gambaana faiqaanaura.

<sup>3</sup> Rootafa sandanainai qimaseenoo ufaqa miqanda mina faqa maaqaki keeqaqa. Ooru roofanoo Rootafa nari ainainira faiqiufara qufaqa misa ooruku anoona sia qai feemuna faqa amiqira narana faqa sugasee nimufaqa naqau.

<sup>4</sup> Namaseeqa faiqarara imarufaqa mi maqusaanaasa faiqi kumaaraa nauraiqi aiqama aniree Rootana maaqa fuseemma dati mambufaqa Rootana maaqi qimasee aaraqau.

<sup>5</sup> Mi faiqi qanda faasai ani maaqaki keeqaa qanda yai fee maridaqee. Anee miqanda maasa qiminaqa mi qanda manda oosana nimia.

<sup>6</sup> Rootafa misa ufa iriseenoo rauda mafinoo nari aanaaqianaindari kooqi ititasee qimanniminau.

<sup>7</sup> Qinee qaoo qira ufa inni qimannimidaqa. Sia uqanna maa manda oosanna maraqa.

<sup>8</sup> Iriaqa, qeeqa qiraamuna qaara qanda sia faiqi faqa nuuqanda inni nimisaanaqa inneeqa iriranannai kai maraqa. Maa fasiqa qanda qini maaqaki ani raafaqa aqoondi kammaqauna mariafaqa qinee amiqimmasee miqandasaa rakisidaqa.

<sup>9</sup> Miqi qimasee qimannimisoofaqa misa aiqama maaqi qiqau. Anee moo maqannaafa maasaki ani marianafa. Yafee qifanee anee maasara qaoo qidanee. Anee nimaaraa. Sia nimaarainaga sia ani aqoondiqara kai mandaikamma nimaqaanaura, ani faqa firaqoo mandaikamma amaqaanaura. Miqi qimaseeqa misa Rootana afeeqa aquseeqa mina kooqi rufadaairara iqau.

<sup>10</sup> Maaqakiqari Rootana aqoondiqara Rootana qumu rarisameeqee maaqaki aqusee kooqi ititaqau.

<sup>11</sup> Ititaseeqa mi fasiqausa madaanai marusa aiqama nifu qimbasoofaqa kooqiara randoosia minnisaga.

*Rootafa Soodoomma maqusakiqari finau.*

<sup>12</sup> Minni soofaqa Rootana aqoondi qara iramiriqa qiqau. Maa anee marianna maqusanaki ani ati akaqausa maridee. Kai kaqi aneenna araamuqmaaka faqa airaamaku oondamara faqa aneenna atiuga faqa aiqama nifiqee moosaa fua.

<sup>13</sup> Maasa maa maqusana damunamma aquanaura. Karaambaiqa maa maqusanakina oosana oosana mandainaina kambiqaiifanoo mi ufana iriseenoo maaqanda diqiqaiqaqa maa maqusana kuridirara qumidaqa.

<sup>14</sup> Rootafa iriseenoo nari araamuna qara nifaaqi qarara qutaqaamaqoo fasiqa qanda faqa qimanniminau. Doo anifaqa innisaimbaqa mootinai fuaqa. Anutufa maa maqusana damunirara qinoo. Miqi qufaqa mina airaamaku qara sia iriqau. Quteeti qidanoo mifoo qimasee kaqi mariqau.

<sup>15</sup> Iaqoo faqa kananaana angirooqara Rootana kafaa fuki faaki qi'au. Doo kai kaqinana anenna ana'aa faqa anenna araamuna qara faqa nifiqee fua. Innee faqa maa maqusana namu faqa kuridifaara.

<sup>16</sup> Rootafa iriseenoo oonauqee anauqee imarufanoo mina aqoondiqara mina asauku faqa mina ana'aa asauku faqa mina araamunaqara faqa qumaree rarisameeqee aanai ubeeka'au. Yaawee'fa Rootanara amuqusufanoo miqin'au.

<sup>17</sup> Nifiqa quqasoofanoo angiroo moo fannoo qimanniminoo qin'au. Innee sandama-fu'aa kuqifaara. Fidaqa sia quandafi qafa'aa. Afaasaa faqa sia kasooiaqa. Innee kuqifaara, aqaanai sandee ooru fua'aa.

<sup>18</sup> Rootafa iriseenoo maaqi qimasee qimamin'au. Sia anenna qiannannai dii'aa.

<sup>19</sup> Anee firaqoo qiniara amuqusifana qini kuqiranakinaana maraan'ano. Aa'ana nianai marifaqa minni fimarian'ano mi narirafa qini faqa darina'aa kuquanoo'ra.

<sup>20</sup> Anee kaqikaa maqusa muqunni qafaidanee. Mifa adeedi marifaqa amanee qinee minni sandaanauree. Kaqikaa maqusa uqanna maridanoo qinee minni oonureeqa asumu mariana'ura.

<sup>21</sup> Miqi qimasoo'fanoo angiroo moo fannoo qimamin'au. Doo amana qinee minara eedoo qida'aa. Sia qinee mi maqusana kuridiana'ura.

<sup>22</sup> Doo kai kaqi sandaa. Anee oonu raina'aa miqoo qeeqa qunna ainaina auqaana'ura. Rootafa mi maqusanara kaqikaa maqusee qunara misa mi maqusana auqu Sooara fee qida'aa.

*Karaambaiqa Soodoomma maqusa faqa Koomoora maqusa faqa kuridin'au.*

<sup>23</sup> Mi kanana'anna suani afu maqee uri marufanoo Rootafa Sooara maqusai oonu ran'au.

<sup>24</sup> Oonuroofanoo Karaambaiqa ida namu faqa koorootaqa'aaqari qeemari idanara foora irana namufa'aa quqasoofanoo aakuara foora Soodoomma maqusaa'aa faqa Koomoora maqusaa'aa faqa aqufin'au.

<sup>25</sup> Aqufinoo mi arumunaki maru maqusaa'aa faqa aiqama faiqi anaasee faqa andanda faqa naru taikan'au.

<sup>26</sup> Rootana ana'aaq nari afaaqi faqa sandee fidanoo oonu quandafinoo afu maqeenoo doo miqoo ooruku kammafi kisa'aa saqariara foora rakiganoo marin'au.

<sup>27</sup> Moo kanana'ana Abaraqaammafa findimeeqeenoo Karaambaiqa faqa ufa quqoo ooqu fin'au.

<sup>28</sup> Miqooqari Abaraqaammafa mara muami qafoofanoo Soodoomma faqa Koomoora faqa mi afaasana'aa maru maqusausaki ida muna fannoo firaafa uqanna ooru fufanoo qafan'au.

<sup>29</sup> Anutufa mi afaasana'aa maru maqusaa'aa faqa maqa maaqa faqa kurididanoo Abaraqaammanara iriseenoo Rootafa mariu maqusaa'aa naridanoo Rootana kai mareeqee kaqinni quqan'au.

*Mooabana faqa Amoona faqa niku nisauku kambiqoo ufafa.*

<sup>30</sup> Rootafa Sooara maqusara rufiseenoo nari araamuna qara nifiqeenoo amuaqu namusaa ooni aamara marunaki ooru marin'au.

<sup>31</sup> Mariufanoo mina araamuna indaaruuqaafa inaaqianaana maaqi qimasee qimamin'au. Doo maasa qikoofa asooqa maridanoo. Sia maa saqanna anindiri marasee faiqi mara qimifa'aa maqara fasiqau'aa marida'aa. Aiqama faiqi auqeeu oosana'fa sia anindiriki maridanoo.

<sup>32</sup> Doo anina'aa anindiri uainna nammari auquseeqa nari nikoona amiananoo moomoo namaseenoo furu farina'aa anindiri mina faqa sakasee faiqaa. Miqi masaifanoo anindiri nikoofa anindiri faiqi mara qimina'aa anindiri faiqi namu findifiqa maria'aa.

<sup>33</sup> Miqi qimaseeqa mi eendanaki miqanda uainna nammari moomoo nari nikoona amisoo'fanoo neeneeseenoo furufara masoo'fanoo anasa'fa naaree nari akoona faqa sakasee faiqan'au. Uainna nammari fannoo mina furu fara masoo'fanoo nari araamuna auqoo ainainara sia irin'au.

<sup>34</sup> Kanana'ana anasa'fa nari auna qimaminoo qin'au. Faasai eendaki qinee qeeqa qikoona faqa sakasee faiqeeqa. Doo fafaa eendaki anindiri uainna moomoo kaifaa amiananoo namaseenoo furu farinana anee faqa mina sakasee faiqaa. Miqimasee anindiri qeeqa qikoona faiqi maqasaana faiqi asumu kaqi maria'aa.

<sup>35</sup> Miqi qimasee doo mi eendanaki miqanda uainna nammari moomoo nari nikoona amisoo'fanoo furu faramma soofanoo auna fannoo nari akoona faqa sakaseenoo faiqan'au. Rootafa uainna nammari namseenoo furu faridanoo nari araamuna auqoo ainainara sia irin'au.

<sup>36</sup> Miqimasee Rootana araamuna qara nari nikoona faqa faiqoonannai nimuaqu qaiqi'au.

<sup>37</sup> Miqimasee marufanoo indaarugaara amana fannoo faiqi akoonaiqi maqaseenoo mina auqu Mooaba nee qinuu. Mariu fannoo Mooabafa findifinoo Mooaba maqannaasa nikoofaikamminoo marinuu.

<sup>38</sup> Auna fannoo mifa faqa faiqi akoonaiqi maqaseenoo mina auqu Beenaami fee qinuu. Mariu fannoo Beenaamifa findifinoo Amoonaa maqannaasa nikoofaikamminoo marinuu.

## 20

*Abaraqaammanna faqa Abimeereekana faqa ufa.*

<sup>1</sup> Abaraqaammanna Mamareena maqusa minni seenoo Neekeefa maqa maaqakina ooqu finuu. Mifa Kadeesa maqusa dinni Sura maqusa dinni qambaana ooqu marinuu. Marikinoo kaffaa Keeraara maqusaki ooqu marinuu.

<sup>2</sup> Keeraara maqusaki kaqi maridanoo Abaraqaammanna nari aanaaqara Saraqa nammarinara qini dauna fee qinuu. Keeraara maqanna karaambaiga mina auqu Abimeereekafa marinuu. Mifa Abaraqaammanna ufa iriseenoo Saraqa nammarinara mina auna fee qimaseenoo nari ainainira faiqiuga niqiqoofaqa Saraqa nammarina mareeqeega Abimeereekana amiqau.

<sup>3</sup> Miqoo marufanoo Anutufa Abimeereekana qaina saa kooroo qimasee qimaminuu. Anee kuqinnaranoo maa anaaseena anee maraannana moo fasiqa anaaga maridanoo.

<sup>4</sup> Abimeereekafa Saraqa nammarina sia sakasee faiqanuu. Minara iriseenoo Anutuna qimaminoo qinuu. Oo karaambaiga qinee andeeqarusa maridaqa anee qini faqa qini faiqi anaasee faqee narinnaree.

<sup>5</sup> Abaraqaammanna nari kai Saraqa nammarinara qini dauna fee qifaqa qinee iriqa. Kaffaa maa anaaseefa faqa nari afaaqiara qinoo qini qifasaa fee qinoo. Miqi qifaqa qinee mina irunanoo qini daakirafa qimaqiminoo sia aqarafa aniki mariannoo fee qifaqa maraunanoo sia aqarafa qiniki maridanoo.

<sup>6</sup> Anutufa iriseenoo kaffaa qainasaa qimaminoo qinuu. Eeoo qinee iridaqa kuqaa ani aakirafa qimamifana andeeqaananoo. Qinee kai ani qumee rafaafunana anee sia qini mandaikamma qimaqeenana mi anaaseena faqa sakasee faiqaananoo.

<sup>7</sup> Doo findi finana mi fasiqana anaaga kaiffaa nari afaaqinnai aiqainanoo fuani. Abaraqaammanna qini tamummaqara fasiqa maridanoo. Mifa aniara innaaru qinaqa iriseega siamma ani aruanuranoo. Anee sia mi anaaseena aiqainaqa ani faqa ani maqannaasa faqa aiqama naruanuranoo.

<sup>8</sup> Abimeereekafa mina iriseenoo Kananaana eendai findifinoo nari maqanna uriqararusa naaramaseenoo Karaambaiga qu ufana qimannimisoofaqa firaa qoo rufiaqau.

<sup>9</sup> Abimeereekafa kaffaa Abaraqaammanna aaramaseenoo iramirinuu. Anee nana oosanee maasa qiminanee. Nana manda ainanee maasa ani amunanee anee qini faqa qini qiku qisauku faqa firaa ummaara qiminanee. Sia auqaaqaa ira oosana maasa qimiananoo.

<sup>10</sup> Nana irirafee marifanee maaq inanee.

<sup>11</sup> Abaraqaammanna mina iriseenoo maaqi qimasee Abimeereekana qimaminoo qinuu. Qinee maaqi qimasee qimiriga maa maqannaasa sia Anutunara rufiqee mariafaqa qini daruseega qini qinaaqa maree maqi qimaseega miqi qiqa.

<sup>12</sup> Qini qinaaqa kuqaa qini dauna maridanoo qini qikoona araamuna maridanoo moo anaasee faiqi marifaqa maraqaunafa maridanoo.

<sup>13</sup> Anutufa qiniara aneenna akoonaa maqusa minnisee anaamurinni nuannee qifaqa qinee Saraqa nammarina qimamiqa maaqi qiqiafana. Anee qiniara qini uriqarara fee qinana qiniara qini qifasaa fee qia.

<sup>14</sup> Miqi qufanoo iriseenoo Abimeereekafa Saraqa nammarina kaffaa Abaraqaammanna aminuu. Mikari mifa sipsipauqa faqa burimakauqa faqa ainainira maanaaqa kumaaraaqa faqa Abaraqaammanna aminuu.

<sup>15</sup> Amiseenoo maaqi qimasee qimaminuu. Qini maqa maaqa maridanoo. Aneenna kai aidinnaqoo maria.

<sup>16</sup> Miqi qimaseenoo quanda finoo Saraqa nammarina maaqi qimaseenoo qimaminuu. Doo ani afaasana siruaa munnimma wan tauseenna (1,000) amiqa, maa ummaarafa taikainaaqaa ani faqa mariasa ani aqarana sia mariifoo qiaqeera. Kaffaa aiqamausa aniara sia mandoosana auqee maqi qiaqa.

<sup>17-18</sup> Yaaweeffa Saraqa nammarinaki kambiqoonara iriseenoo Abimeereekana, na aiku asaukukinaa aanaaseeuqa faiqi maqara aana ititasoofofa faiqi maqarara sia amanaikiqau. Miqiqa marufanoo Abaraqaammanna Abimeereekana Anutufinnai innaaru qufanoo Anutufa Abimeereekana faqa nari anaaga faqa nari ainainira maanaaqa faqa misa aurirana taikannisoofaqa kaffaa faiqi maqarana amanaikiqau.

## 21

*Isakeena maqoo ufafa.*

<sup>1</sup> Karaambaiqa nari qimaqoondée inoo Saraqa nammarina amiqi amiqimma amaganau.

<sup>2</sup> Miqimmasoofanoo Abaraqaammafa nauraiqi marufanoo Saraqa nammarifa amuaqu qaikinoo Abaraqaammama faiqi Anutufa qimaqooqoo maqanau.

<sup>3</sup> Maqasoofanoo Abaraqaammafa mina auqu Isakeenee qinau.

<sup>4</sup> Auqu ramaseenoo qisauku dinni taikasee dinni ani qaaramoo maraseenoo 8 faasaana aiqarama fufanoo Abaraqaammafa Anutufa qimamundee inoo Isakeena afaaqa ati ateeqa aqinau.

<sup>5</sup> Abaraqaammafa uan handeereeta 100 aukwana faqaafa marufanoo Isakeena maqanau.

<sup>6</sup> Saraqa nammarifa Isakeena maqaseenoo maaqi qinau. Anutufa asasirana faqa naanaidara qirana faqa qiminoo. Aiqamausa minara irinausa qini faqa naanaidara qifaranoo.

<sup>7</sup> Miqi qimaseenoo Saraqa nammarifa maaqi qinau. Yafee moo fannoo Abaraqaammama qimaminoo Saraqa nammarifa nari faiqi maqasee amana naamma amiannoo fee qiannoo fee, sia amana moo fannoo miqi qiannoo. Miqi qimariafaqa qinee asooqa namuki Abaraqaammama faiqi akoonaiqi maqeeqa.

<sup>8</sup> Isakeefa aaqoo irinoo naamma minnisoo faasaana Abaraqaammafa qoomaqa firaaqoo suqananau.

*Abaraqaammafa Qakaarana faqa Isamaerana faqa niqiqoo ufafa.*

<sup>9</sup> Miqimmasee mariufanoo moo kari Isipa maqannaa anaasee Akaara nammarina amaaku fannoo Saraqa nammarina amaaku Isaakeena faqa sarari marinau.

<sup>10</sup> Sararimarufanoo Saraqa nammarifa mina qafamaseenoo Abaraqaammama qimaminoo qinau. Maa ainainira manaqana faqa nari faiqi faqa niqainafa fuaqa. Maa anaaseena faiqi fannoo sia ani qumiasana qini faiqi mararee qinnana maraannoo.

<sup>11</sup> Isamaerafa faqa Abaraqaammama faiqi marunara Abaraqaammafa mi ufana irufanoo aundura ummaara ranau.

<sup>12</sup> Miqufanoo Anutufa Abaraqaammama qimaminoo qinau. Sia faiqi aanaaqi qisanoosara amugusiani. Anee Saraqa nammarifa qimamindee ia. Isakeena saaqari kai qinee qima afeekaikiafannandee inoo moomoo asumu kambiqeefaranoo.

<sup>13</sup> Ani ainainira anaasee faiqi faqa qinee dadaaqiananoo moomoo faiqi maqasainafa moo maqannaasara foora marifaranoo. Mifa faqa ani faiqi kai maridanoo.

<sup>14</sup> Abaraqaammafa mi ufana iriseenoo moo kananaana findifinoo feemu aafaqa faqa aandau apata taquki nammari sakaseenoo Akaara nammarina uqaruma amiseenoo faiqi aakuamaqaseenoo aiqanau. Akaara nammarifa nari amaaku afiqeenoo Beeraseeba maqa maaqaki aadana maqa maaqaki ooqu maridanoo oonuree aniree ida marinau.

<sup>15</sup> Aandau apata taqukinaa nammari aiqama taikafufanoo Akaara nammarifa nari faiqi kaqikaa saqari atukaki aisanau.

<sup>16</sup> Aisaseenoo kaqikaagoo kisaagasaa oonu ooqufaqqee idanoo nari kai qimirinai. Qinee sia amana qeeqa faiqi kuqirana qafaanauranoo. Miqi qimaseenoo miqoo ooqufaqqee maridanoo iki raqee marinai.

<sup>17</sup> Miqi marufanoo Anutufa mi faiqina iki raqarana irufanoo innaarunaindari Anutuna angiroo moo fannoo Akaara nammarina qimaminoo qinai. Akaara nammari anee nanaree ummaara maraidanee. Sia rufaa. Ani amaaku iki raqarana Anutufa doo irinoo.

<sup>18</sup> Doo findi finana oonu faiqi rafususee amiqi amiqia. Qinee mina saaqari kambiqain- ausa fira maqannaasaalki mannisaanura.

<sup>19</sup> Miqi qimaseenoo Anutufa Akaara nammarina afu maqa amufanoo nammari madika qafanau. Qafamaseenoo aandau apata taqu mara mareenoo ooqu saka nari faiqi amufanoo nanau.

<sup>20</sup> Anutufa Isamaerana rakisi amaqqee marufanoo innooqanau. Innooqafufanoo mifa Paraana aadana maqa maaqaki maridanoo uqarana akoofasa marinai.

<sup>21</sup> Paraana aadana maqa maaqaki marufanoo mina anoofa Isipa maqusaindaraa maanaaqa mara aminai.

*Abaraqaammafa Abimeereekana faqa moodaanaki kira ufa qinai.*

<sup>22</sup> Mikari Abimeereekafa Pikoarana nari rakira fasiqauqa uriqararana afiqeenoo Abaraqaammafa maruqoo oonu reeqa maaqi qimasee qimamiqa qiqau. Anee aiqama ainaina auqaannanaki Anutufa dadaaqidanoo.

<sup>23</sup> Doo maqee Anutuna afusaa qima afeekaikammasee qini faqa qini faiqi namu faqa qini saaqari naaru kambiqainausa faqa sia mandaikamma nimaqaa. Qinee ani amiqimma amaqaqiafana anee faqa miqi kai inana qima afeekaikammasee qini faqa maa maqa maaqana anee marianna maqa maaqana faqa amiqimma qimaqaa.

<sup>24</sup> Abaraqaammafa minara iriseenoo qimaminau. Qinee miqimmianauree qimasee qima afeekaikainau.

<sup>25</sup> Miqi qimaseenoo Abaraqaammafa Abimeereekana oori kandara ufakiqari qimaminau. Ani ainainira faiqiuqa qini nammari madika rakirara maseeqa mareea.

<sup>26</sup> Abimeereekafa iriseenoo qimaminau, Qoo qinee sia mina iridaqa, yafee miqinoo fee. Anee minara sia qima qimunaqa sia iriqaifana. Maqee kai iridaqa.

<sup>27</sup> Abaraqaammafa minara iriseenoo burimakauqa faqa sipsipauqa faqa mareeqee Abimeereekana aminau. Amisee miqanda moodaanaki kiqau.

<sup>28</sup> Abaraqaammafa sipsipa aanaaqiuqa dinni taikasee dinni ani qaara marasee 7 naadumasaa raina quqanau.

<sup>29</sup> Abimeereekafa mina qafamaseenoo Abaraqaammama iramirinau. Anee nanaree miqidanee.

<sup>30</sup> Miqi qimasee iroofanoo Abaraqaammafa qinau. Anee maanauqa maraa. Anee marainnanannoo qiniara maa nammari dikaandana indu finaufoo qinnarannoo.

<sup>31</sup> Misa miqoo qima afeekaika maseeqa mi maqusana auqureeqa Beeraseeba fee qiqau.

<sup>32</sup> Miqanda Beeraseeba maqa maaqaki moodaanaki kira ufa qimasoofanoo Abimeereekafa nari rakira fasiqauqa uriqararana Pikoorasandiri nari maqusai Firistia maqa maaqai fiqau.

<sup>33</sup> Miqanda fufanoo Abaraqaammafa tamarisika saqari Beeraseeba maqusai ummaquseenoo naaru naaru marira Karaambaiqa Anutunara innaaru qimarinau.

<sup>34</sup> Mi kamuqoo Abaraqaammafa kisaacaqasaa Firistia maqa maaqakina marinau.

## 22

*Anutufa Abaraqaammanara aneenna amaaku Isakeena tatufirana suqa qimianne qe ufa.*

<sup>1</sup> Mariiufanoo Anutufa Abaraqaammama amanammasee qafaanee qimasee innaarunaindari aaramasee qinau. Oo Abaraqaama qufanoo Abaraqaammafa qinau qinee maqoo maridaqa. Miqi qufanoo Anutufa qimaminau.

<sup>2</sup> Aneenna amaaku Isakeena ani amaaku moodaa, kaaqa amuqusa imariannana afiqeenana Mooraa maqa maaqai ooru rainaqa qinee aaqana moo uqafiqaanaura. Anee mi aaqannanasaa aneenna amaaku arusee qini tatufirana suqa qimia.

<sup>3</sup> Miqi qimasoofanoo kananaana findifinoo nari dookisaa ida rufariseenoo minasaa quqaseenoo nari ainaini maru faiqi qanda faqa nari amaaku Isakeena faqa nifiqeenoo findimeeqee Anutufa qimamunnai finau.

<sup>4</sup> Qaara afuru aanai fi faiqaaqau. Qaaramoo kufanoo Anutufa qimaqoo aaqannafa nianasaa marufanoo qafanau.

<sup>5</sup> Qafamaseenoo Abaraqaammafa nari ainaini maru faiqi qanda qimannimino qinau. Inneeqara maqoo marida doonkisaa rakisiaqa. Qeeqa qimaakundiri miqoo ooru Anutunara innaaru qimasee inneeqara iannai qumuanaura.

<sup>6</sup> Miqi qimaseenoo Abaraqaammafa tatufirana suqaaninna idana mareeqeenoo Isakeenasaa soofanoo maroofanoo nari ida qeemaruna akuru mandeenoo mina qumareenoo musuka faqa qumareenoo doo nari faiqi afiqeenoo Anutufa qimaqoo aaqanna kaaqa ooru finau.

<sup>7</sup> Aanai ooru fimarufanoo Isakeefa nari akoona aaramaseenoo qinau, Qipoo qufanoo Abaraqaammafa maqi qimasee qinau. Nanaree qidanee qufanoo Isakeefa qinau. Qinee qafaunana anee idati faqa ida rumbarana faqa maree fimarinanoo, yaafee tatufirana suqeeqandinna sipsipafa maridanoo fee.

<sup>8</sup> Abaraqaammafa maaqi qimasee nari amaaku qimaminau. Anutufa nari kai sipsipa aanaaqi moodaa qiminaqa tatufirana suqamianaaura. Miqi qimaseeqa miqanda moodaanaki ooru fiqau.

<sup>9</sup> Miqanda Anutufa qimaqoo aaqannanasaa ooru reeqa Abaraqaammafa ooniuga mareeqee aaku aakummaseenoo ida mina amuaaqa quqaseenoo nari faiqi Isakeena ruumbeeqeenoo rafusu idasaa rusinau.

<sup>10</sup> Rusiseenoo musuka qumareenoo nari faiqi kuqa arusaaneera inau.

<sup>11</sup> Karaambaiqa angiroo innaarunaindari aaramaseenoo qinau, Abaraqaamma, Abaraqaamma, miqi qufanoo Abaraqaammafa qinau. Qinee maa maridaqee qufanoo Karaambaiqa qinau.

<sup>12</sup> Sia faiqi arua, sia mandaikamma amaqa. Sia aneenna asaukukoo aneenna faiqi arua. Doo maqee qinee iridaqa anee Anutuna ufa qaindusidana mina ufa afaqee mariananoo. Anee aneenna amaakuara aneenna amuqusa uqannara sia qaoo qiananoo eedoo kai qiananoo.

<sup>13</sup> Miqi qufanoo Abaraqaammafa uqeerafinoo qafooфанoo andandaki sipsipa akoona saqari aanaaqiki aanai rutaqusee marufanoo qafanau. Qafamaseenoo Abaraqaammafa nari amaaku amaqa maqeenoo sipsipa akoona aruseenoo Anutuna tatufirana suqa aminau. <sup>14</sup> Miqooqari Abaraqaammafa mi aqanna auqu reenoo, Karaambaiqa nimira aaqanee qinau. Minara maqee mindaraasa maaqi qidaqa, Yaaweefa nari aaqanasaa nimidanoo fee qidaqa.

<sup>15</sup> Karaambaiqa angiroo innaarunaindari kaifaa Abaraqaammama aaramaseenoo qinau.

<sup>16</sup> Karaambaiqa aniara maqi qidanoo. Qinee qeeqa duqusa qima afeekaikammasee qidaqa. Qinee firaqoo ani amiqimma amaqaanau. Anee aneenna amaaku moodaa sia qaoo qiannanara qinee miqianauro.

<sup>17</sup> Qinee kuqaa qima afeekaikammasee anisaa ani aruakinausa ani aiku asuku innaarunai fasaura foora moomoo marifaranoo nukudara foora ani amianauranoo. Ani aiku asuku namuqaa rafaqa fusee misa ainaina maree marifaranoo.

<sup>18</sup> Aiqa maqannaasa qiniara ani aiku asuku amiqi amiqimma nimaqaafanandee masee maasa faqa amiqi amiqimma qimaqaannee qifaranoo. Anee qini aakapara ufa qaindusuannanara miqiga.

<sup>19</sup> Abaraqaammafa miqooqari nari faiqi Isakesandiri nari ainainira faiqi qara qumi nifiqee nari maru maqusanai Beeraseeba maqusai ooqu marinau.

*Naqoorana aiku asuku nuqu.*

<sup>20</sup> Mariiufanoo Abaraqaammafa irufanoo Mirikaa nammarifa Naqoorana Abaraqaammama akaqa faiqi qisauku dinni taikasee dinni oonu qarammoo marasee 8 maqee foo qigau.

<sup>21</sup> Usafa indaarugaafa Busafa mina aanaaqiannaafa marinau, mina aanaaqiannaafa Keemueerafa mifa Arammama akoofa marinau.

<sup>22-23</sup> Mina aanaaqiannaafa Keeseedafa marinau, mina aanaaqiannaafa Qasoorafa marinau, mina aanaaqiannaafa Piradasafa marinau mina aanaaqiannaafa Didarafa marinau, misa ninaaqiannaafa Beetueerafa marinau. Mifa Reebeeka nammarina akoofa marinau. Mirikaa nammarifa mi faiqi namusa Naqoorana Abaraqaammama akaqasaa maqanau.

<sup>24</sup> Reumma nammarifa Naqoorana inaaqianna anaasee fannoo Teebana faqa Kaqammana faqa Taqasana faqa Maakaana faqa maqanau.

## 23

*Saraq nammarifa kuqufanoo Abaraqaammafa akudara maqa feefauru ufa.*

<sup>1</sup> Saraqa nammarifa 127 aukua marasee kuqinau.

<sup>2</sup> Kannaana maqa maaqaki Qeeboorona maqusaki kuqufufanoo Abaraqaammafa mina kuqiranara soofari marinau.

<sup>3</sup> Abaraqaammafa nari anaqa kuqirana mafi quqasee Qeetana aiku asuku maruqoo oonureenoo maaqi qimasee iramirinoo qinau.

<sup>4</sup> Qinee moo maqannaasa inni qambaana ani maridaqa. Amanee qini maqa moo qimifaqa feefauru nimiseeqa qeeqa qinaqa minaki akundaanauree.

<sup>5</sup> Qeetana aiku asuku irisee Abaraqaammama qimamiqa qigau.

<sup>6</sup> Anee maasa ufa iria, maasa ani qafaunana anee afeeka rakisirafa marianafa mariananoo. Aneenna anaqa maasa amiqira madikaki akundaa. Maasa aiqamausa mi madikanaki akundanara asasidaqa.

<sup>7</sup> Miqi qufanoo Abaraqaammafa misa noorinni kumma ramafinoo qimanniminoo qinau.

<sup>8-9</sup> Innee eedoo qiafaqa amanee innee Eefarona, Soogarana amaaku iramirifanoo inni nifusaa Makapeera maqa maaqaki nari anaadoo atinni ooni aamara marina qiminaga feefauru amana kai amiseeqee mi maqa maaqana qeeqaindi kammasee qeeqa qiku qisauku nikundee marianauree.

<sup>10</sup> Eefaroofa nari Qeetana aiku asuku faqa faandaamura kooqiki ufa suqiranaki maridanoo iriseenoo aiqamausa iramirufanoo Abaraqaammama qimaminoo qinau.

<sup>11</sup> Oo uriqararafa iria, qinee aiqama mi maqana faqa ooni aamara minaki marina faqa ani amianauro. Maaqoo qeeqa faiqi anaasee nifusaa ani amianana aneenna anaqa minaki akundaa.

<sup>12</sup> Miqi qufanoo Abaraqaammafa Qeetana aiku asauku noorinni kumma ramafinoo Eefaroonaa aiqamausa iriaqeera firaqoo qimaminoo qinau.

<sup>13</sup> Amanee qinee iramiriananee irrinnaree. Qinee mi maqana atisaa aiqama feefaurianaaura. Qinee feefauru amianana anee eedoo qimasee marainaa qinee qeeqa qinaaqa miqoo akundaanau.

<sup>14</sup> Eefaroonafa minara iriseenoo maaqi qimasee Abaraqaammama qimaminau.

<sup>15</sup> Oo uriqararafa, maqa feefauru 400 siruaa maridanoo, mi feefauruna maasa qeeqa qambaana naqa fee masee rainaanauree. Anee aneenna anaqa kaqi minaki akundaa.

<sup>16</sup> Abaraqaammafa iriseenoo eedoo qimaseenoo sikeera maraseenoo 400 qummaara ainaina dinni quqaseenoo siruaa dinni quqasoofanoo amana kai ufanoo aminau. Eefaroonafa aiqamausa nari maqannaasa Qeetana aiku asauku nifusaa qufanoo iriseenoo miqi kai minau. Nari sikeera qummaara amana kai Eefaroonaa aminau.

<sup>17</sup> Miqimmasee Abaraqaammafa Eefaroonaa aiqama ainaina Makapeeraa maqa maaqaki suani oosana qaannai Mammareena maqusa adeedi maruna feefaurummasoofanoo Abaraqaammanaindi kinau. Mi feefaurirafa maqa faqa ooni aamara minaki maruna faqa aiqama saqariuqa mi maqana atisaa maru saqarisaa faqa aiqama moodaanaki rafaqaqafinau.

<sup>18</sup> Aiqaama Qeetana aiku asauku miqoo suqiranaki mariusa mi maqa maaqanara Abaraqaammanaindi fee qiqau.

<sup>19</sup> Miqimmaseenoo Abaraqaammafa nari anaqa Saraqa nammarina mi ooni aamaranaki Kannaana maqa maaqaki akundanau.

<sup>20</sup> Miqimmasoofanoo mi maqafa faqa ooni aamara minaki marufa Qeetana aiku asaukundi mariufa Abaraqaammanaindi kufanoo mi maqana nikundara maqaikinau.

## 24

*Isakeena anaqa mara amu ufafa.*

<sup>1</sup> Doo Abaraqaammafa kaaqa nauraiqi marinau. Karaambaiqa Abaraqaammafa aiqama auqoo ainainna amiqi amiqimma amaqee marinau.

<sup>2</sup> Abaraqaammafa nari oosana maraseenoo nari ainainirasasaa kisaqaasaa rakisi maruna aaramaseenoo qimaminoo qinau. Anee aneenna asauku qifundana ameemaanaai aususee afeekaika masee qima afeekaika.

<sup>3</sup> Qinee aniaara Karaambaiqa innaaruna faqa maqa faqa auqu Anutuna auqusaa qima afeekaikamasee sia qini qimaaku Kannaana maqannaasa anaasee mara amiannee qidaqa.

<sup>4</sup> Anee qinee kambiqaafanna maqusanai oonuree qini atikinaa maanaaqa mara maree Isakeena muqu amia.

<sup>5</sup> Miqi qimasoofanoo mi rakisirafa maaqi qinau. Doo amana, ooru raanaqa mindaraa maanaaqa irarifanoo nari maqa maaqa minnisee mai qumirara ititinaqa amanee qinee ani amaaku aiqaananoo anee qumunna maqa maaqanaai ooru fuannoo fee.

<sup>6</sup> Miqi qufanoo Abaraqaammafa qinau. Oo sia uqanna anee qini qimaaku aiqainanoo minni oorufuani.

<sup>7</sup> Yaaweefa innaarunaindaraa Anutufa qeeqa qikoona maqusaindaraana faqa qeeqa ainaina maqasaagaraana faqa mara mareenoo maa maqa maaqanasaa quqaqoosa maridaqa. Mifa qima afeekaikammasee qini faqa qini qiku qisauku faqa maa maqa maaqana nimianauree qinau. Mifa nari angiroo aiqainanoo ani afunni finana ooru qini qimaaku anaqa afiqee qumi naranoo.

<sup>8</sup> Mindaraa maanaaqa fannoo sia mai qumiraree qinana miqoo kai qima afeekaika maqanna ufanakiqari idukuananoo. Qini qimaaku sia minni afiqee ooru fua.

<sup>9</sup> Miqi qimasoofanoo mi ainainira fasiqafa nari asauku Abaraqaammama nari uriqararana afundana ameemaanaai quqaseenoo qinau, doo qinee anee qianandee ianau.

<sup>10</sup> Miqi qimaseenoo raudama kinoo Abaraqaammama kammeera, qoosa fooqaana, mina qisauku qara maraseenoo nari uriqararana ainaina amiqirana kai maraseenoo kammeerasaa quqaseenoo mareenoo finau. Abaraqaammama akaqa Naqoorafa Mesopotamia maqusa suani dinni ataageenni marunnai ooru finau.

<sup>11</sup> Aanaai faiqanoo fiffuu fanoo eenee marufanoo aanaaseeuqa nammari sakee maruqoo oonu ranau. Oonuree qafoofanoo maqusa adeedi nammari sakee maruqoo oonu reenoo miqoo nari kammeerauqa quqasoofaqa mariqau.

<sup>12</sup> Nari kammeerauqa quqaseenoo mi fasiqafa Yaaweenara innaaru qinoo qinau. Oo Anutu qini uriqararana Abaraqaammama Anutufa anee qini faqa maridana maqee qini dadaaqa. Anee qini uriqararana Abaraqaammama faqa qima afeekaika maqoonafa maqee anoonaikiani.

<sup>13</sup> Qinee nammari sakee mariana aaqa adeedi marunaqa, aanaaseeuqa nammari ani sakee mariafaqa maridaqa.

<sup>14</sup> Moo maanaaqa anirainaga qinee maaqi qimasee qimamiana. Amanee aneenna taquki nammari saka qiminaqa naanaaree. Mifa qiniara namasainaga ani kammeer-  
auqa faqa nimianaaree qinnanara minara aneenna ainainira faiqi Isakeena utaaqama  
amaqaqaanafee qiana. Mi ainainafa kambiqainaqa anee qini uriqararanasaa qima  
afeekaikunna ufanara iriana.

<sup>15</sup> Mifa miqi qimasee innaaru qimarufanoo moo maanaaqa Reebeeka nammari  
nammari taqu akumaqa aku maree aniranau. Mifa Abaraqaammama akaqa Naqoorana  
faqa mina anaqa Mirikaa nammariina faqa faiqi Betueerana araamuna marinau.

<sup>16</sup> Mina oori afiri amiqi amiqi irafa sia auqu marufa aniroofanoo qafoofanoo ooqu  
nammari saka maree urinau.

<sup>17</sup> Ururoofanoo Abaraqaammama ainainasaa rakisira fasiqa fannoo mi funnai sandee  
oonureenoo maaqi qimasee qimaminau. Amanee aneenna taqukinaa nammari  
kaqikaana qini qiminaqee naanaaree.

<sup>18</sup> Miqi qufanoo mi manaqafa qinau, eeo faiqi firaafa, doo naa qimaseenoo nammari  
taqu afiqu quqasoofanoo doo nanau.

<sup>19</sup> Namasoofanoo mi manaqafa nari kai qinau. Qinee nammari moo faqa sakasee ani  
kammeerauqa nimii saanaqa nama saifanoo nimuaqu iannoo.

<sup>20</sup> Miqi qimaseenoo nari nammari taqu kai kaqi difaaniki adiasenoo sandeenoo ooqu  
moo faqa saka mareenoo muru adia soofaqa kammeerauqa naqau.

<sup>21</sup> Kammeerauqa nammari nimi marufanoo Abaraqaammama ainainira fasiqa fannoo  
ireeda kai kasooinoo maridanoo qafaidanoo maaqi qimirinai. Doo fee Yaaweefa qinee  
kisaagasaa anunnanara anoonai kidanoo fee.

<sup>22</sup> Kammeerauqa nammari neeneese nimuaqummasee marufanoo Abaraqaam-  
mana ainainira fasiqa fannoo koorannai auqira qimmusa mi manaqana aikiki  
qusamaqaseenoo kafa koorannai auqira isaaqama qaaraqanda asaukuki usamaqaseenoo  
iramirinoo qinau.

<sup>23</sup> Anee yana araamunee maridane amanee qini qimaqimia. Amanee maasa namu  
aneenna akoona maaqa kina nifiqee finaqee faiqaanaaree.

<sup>24</sup> Reebeeka nammariina mina iriseenoo nari qimaminoo qinau. Qini qikoofa Beetueer-  
afa Naqoorana faqa Mirikaa nammariina faqa faiqi maridanoo.

<sup>25</sup> Maasa maaqa narana amana maridanoo ani faqa aniasa faqa ani kammeerauqa faqa  
narana maaqa faqa nimifaranoo.

<sup>26</sup> Miqi qimasooofanoo Abaraqaammama ainainira fasiqa iriseenoo maqasaa oorindari  
mapamu finoo Karaambaiqa nari uriqararana Abaraqaammama Anutuna amooqidanoo  
maaqi qinau.

<sup>27</sup> Oo Anutu Abaraqaammama Anutufa, anee amiqi amiqi uqana miananoo. Anee  
Abaraqaammama amiqi amiqi imariannanara sia taikeenoo kaqi fidanoo. Karaambaiqa  
fannoo qini uriqararana atiuqa iannai andeeqasee qifiqee aninoo.

<sup>28</sup> Miqi qimasee innaaru qimasooofanoo Reebeeka nammariina sandeenoo nari anoona  
maaqa oonureenoo aiqama mi ufausa qimaminau.

<sup>29-30</sup> Reebeeka nammariina afaaafa Rabanafa Reebeeka nammariina ufa iriseenoo  
koorannai auqira qimmusa qusamaqoona faqa koorannai auqira isaaqama  
qusamaqoona faqa qafamaseenoo raudamaku fanoo ooqureenoo nammari sakee  
maru madikana afainni qafoofanoo Abaraqaammama ainainira fasiqa miqoo nammari  
afainni nari kammeerauqa naqa kikiqinoo marinai.

<sup>31</sup> Marufanoo qafamaseenoo qimaminoo qinau. Qini faqa aninaqa maaqa fua.  
Karaambaiqa fannoo ani amiqi amiqimma amaqee marifa mariananoo. Nanaree anee  
maqoo maridane. Qinee ani faqara maaqa doo deedaqammasee ani kammeerauqa  
marirana faqa deedaqifa.

<sup>32</sup> Abaraqaammama ainainira fasiqa fannoo mina iriseenoo nari faqa marusa faqa  
nari kammeerauqa faqa nifiqeenoo doo maaqa finau. Maaqa oonu roofanoo Rabanafa  
kammeera saaqaraa qumaara mara maqasaa quqaseenoo narana nammari nimiseenoo  
Abaraqaammama faiqi namu nammari nimufaqa niku nammari uqiqua.

<sup>33</sup> Niku nammari uqu soofanoo Rabanafa narana nimanau. Nimufanoo Abaraqaam-  
mana ainainira fasiqa fannoo qaoo qimasee qinau. Sia qinee kaqi naana. Qinee  
qiraree qunna ufana qima nimiseeqa miqoo naana. Rabanafa minara iriseenoo  
qinau. Doo qinaqa maasa iria.

<sup>34</sup> Miqi qimasooofanoo Abaraqaammama ainainira fasiqa qima nimanoo qinau. Qinee  
Abaraqaammama ainainira fasiqa maridaqa.



<sup>35</sup> Karaambaiqa firaqoo qini uriqararana amiqi amiqimma amaqaaseenoo ainaina faqaafaikamma amaqaenoo. Karaambaiqa sipsipauqa faqa burimakauqa faqa siruaa faqa koora faqa ainainira fasiqauqa faqa maanaaqauqa faqa kammeerauqa faqa doonkiuqa faqa moomoo aminoo.

<sup>36</sup> Qini uriqararana anaqa Saraqa nammarifa asooqasaa faiqi akoonaiqi maqa-soofanoo qini uriqararafa nari aiqama ainaina mina kai aminoo.

<sup>37</sup> Qini uriqararafa qifaqa qinee afeeka ufannai qima afeekaikammaseeqa mina aamuqaqira ufa qaindusunauree qiafananoo qinau. Anee maqoo qaraasa Kannaana maqanna kinaa anaasee sia uqanna mareeqee qini qimaaku amia.

<sup>38</sup> Anee ooru qini qikoona maqannaasaki qini atikinaa maanaaqqa mara maree muqusee qini faiqi amia.

<sup>39</sup> Qinee mi ufana iriseeqa nari maaqi qimaseeqa qimamiqa. Mi manaqafa sia qini faqa quminaqa naqaa fee ianauree.

<sup>40</sup> Qunanoo mifa qinoo, qinee Karaambaiqa ufa aiqama kari afaqee marunaua maridaqa, mifa nari angiroo aiqainanoo ani faqa fidanoo dadaaqinanoo anoona kambiqaanoo. Anee qini faiqi anaqa qini maqannaasakinaana qini qikoona atikinaana marennaranoo.

<sup>41</sup> Moodaa aana kai anee idukinna aanafa maridanoo. Ooru rainaqa misa maanaaqqa moo sia qimifanoo ani qima afeekaikirafa taikainana idukira fasiqaikinnaranoo.

<sup>42</sup> Qinee Abaraqaammama mi ufana iriseeqa nammari dikaanda mariqoo ururee maaqi qimasee innaaru qiqa. Oo Karaambaiqa qini uriqararana Abaraqaammama Anutufa mariananoo, qinee auqaunna ainainna anoona kambiqaani.

<sup>43</sup> Qinee nammari dikaanda mariqoo mariana. Mariananoo maanaaqqa moo fannoo nammari sakarara anirainaqa qinee nammariara innaaru qiana. Anee qini faiqi anaqa qini maqannaasakinaana qini qikoona atikinaana marennaranoo.

<sup>44</sup> Mifa eedoo qimaseenoo qini faqa qini kammeerauqa faqa nammari nimiranoo mifa anee qini uriqararana amaaku utaaqama amaqaqaanafa mariannoo.

<sup>45</sup> Qinee qireeda kai innaaru qimarunoo Reebeeka nammarifa maqusaindari namari taqu akumaaqa akumareenoo aiqareenoo nammari sakararee qimasee fifaqa qinee maaqi qimasee qimamiqa. Amanee anee nammari qimina naanauree.

<sup>46</sup> Miqi qunanoo mifa kai kaqi nari nammari taqu akumaaqa qaraana afaimma quqaseenoo qinoo. Namasainaqa ani kammeerauqa faqa nimiana. Miqi qifaqa qinee namasaunanoo mifa kammeerauqa faqa nimifaqa neea.

<sup>47</sup> Namaseeqa qinee maaqi qimasee iramiriqa ani akoofa yafee, qunanoo mifa qimaqimino qinoo. Qini qikoofa Beetueerafa Naqoorasa Mirikaa nammarisa faiqi maridanoo. Qinee mi ufana iriseeqa koorannai auqira qimmusa usuamaqaseeqa kafa koora isaaqama asaukuki usuamaqeeqa.

<sup>48</sup> Usuamaqaseeqa doorindari maqasaa kummarama fifaqa qeeqa uriqarana Abaraqaammama karaambaiqa Anutuna amooqiqa. Mifa qini qifiqamareenoo andeeqasee qini uriqararana atiuqa iannai murusaiqa qinee misa niraamuna qeeqa uriqararana amaaku anaqa marianinnana paquriqa.

<sup>49</sup> Doo maqee uqanna Rabanna anee qima qimina qira. Anee qini uriqararana andeeqa amaqaqaree qinana qima qimia. Anee sia andeeqa amaqaqaree qinana minara faqa qima qimina qinee qeeqa ianna ainainara oonu mafi iriana.

<sup>50</sup> Rabanafa faqa mina akoofa Beetueerafa faqa nari qimamiqa qiqau. Maa ufafa Karaambaiqaindari ani marifaqa maasa naqifee masee minara ufa qinauree.

<sup>51</sup> Maa Reebeeka nammarifa marino. Afiqamaree fua. Munusainanoo mifa ani uriqararana amaaku aanaaqaikino, Karaambaiqa nari qindee iani.

<sup>52</sup> Abaraqaammama ainainira fasiqa mi ufana iriseenoo oorindari maqasaa aqufinoo Karaambaiqa amooqimamaqanau.

<sup>53</sup> Amooqimaseenoo findifinoo qamunna faqa siruaa faqa koora faqa fira feefauru aqimaru oonisa Reebeeka nammarina aminau. Mifa fira munnimma aqimaru ainainausa mina afaana faqa mina anoona faqa nimiranoo.

<sup>54</sup> Nimi seenoo nari faqa anusa saimbaqa narana faqa nammari faqa neenee seeqa faiqaqau. Faiqee iaqoofanoo kananaana Abaraqaammama ainainira fasiqa Reebeeka nammarina afaana faqa anoona faqa qima nimiranoo. Amanee qinee maqee qeeqa fira finnai funauree.

<sup>55</sup> Miqi qifaqa miqanda qiqau, saina Reebeeka nammarifa maasa faqa moodaa amaanaki fee, qisauku qara taikaseenoo afuru fee faiqeenoo fuani.

<sup>56</sup> Miqi qufanoo Abaraqaammama ainainira fasiqa fannoo qinau. Doo sia maasa rafaqa fua. Doo qinee maqee fidaqa. Karaambaiqa fannoo qinee kisaqasaa anunna saikana anoona doo kambiqasaiqa qafamaseeqa sainaqa qeeqa uriqarara finnai fua.

<sup>57</sup> Miqanda minara iriseeqa qimamiqa qiqau. Saina Reebeeka nammarina aaramasee qifanoo naqaa fee qiannoofee.

<sup>58</sup> Miqi qimaseeqa Reebeeka nammarina aaramaseeqa iramiriqa qiqau. Anee maa fasiqana faqa maqee fee finnaree. Miqi qufanoo doo maqee fuanaree qinau.

<sup>59</sup> Misa mi ufana iriseeqa Reebeeka nammarifa faqa minasaa rakisi maru anaaseefa faqa Abaraqaammana ainainira fasiqa faqa mina faqa anusa faqa doo niqiqoofaqa fiqau.

<sup>60</sup> Reebeeka nammarifa firarufaqa maa ufanannoo mina afaaqooqa qiqau. Oo maasa qisooki anikiqari aruakinausa moomoo uqanna firaqoo uqanna kambiqeefara ani aiku asauku marinausa namuqaa nari nifaqaaqa mandaida misa maqa maaqa namu faqa misa ainaina faqa maree marifaranoo.

<sup>61</sup> Miqi qimasee afaaqooqa qimasoofofanoo Reebeeka nammarifa faqa ainainira maanaaqauqa faqa kammeerasaa akaree fufaqa Abaraqaammana ainainira fasiqa namu faqa fiqau.

<sup>62</sup> Isakeefa Neekeefa maqa maaqakiqari aadana maqa maaqai nammari dikaanda maruqoo ooqu marinau. Mi nammari dikaandana auqu kaqi marirafa qini qiqafaidanoo fee qimariquau. Mifa Kannaana maqa maaqa qaannai suani afu dinni ataaqeeni marinau.

<sup>63</sup> Miqoo maridanoo Isakeefa moo eenonnai aatata nidanoo uqeera fufanoo mirinni qafoofanoo kammeerauqa qumiqau.

<sup>64</sup> Reebeeka nammarifa kammeera saaqari uqeera finoo Isakeena qafanau. Reebeeka nammarifa qafamaseenoo nari kammeera saaqari maqasaa aqufinau.

<sup>65</sup> Aqufufanoo Abaraqaammana ainainira faiqi iramirinau. Ya fasiqa fee maasa unannai anidanoo fee. Miqi qufanoo Abaraqaammana ainainira fasiqa qinau. Qini uriqararafa anidanoommi qufanoo Reebeeka nammarifa nari oosana mareenoo qamunna mafi oorisa ititanau.

<sup>66</sup> Isakeefa uru paqurimmasoofofanoo Abaraqaammana ainainira fasiqa fannoo aiqama ainaina auqoonara Isakeena qimaminau.

<sup>67</sup> Qimamisoofanoo Isakeefa Reebeeka nammarina mareeqeenoo nari maaqaki Saraqa nammarifa mariunaki quqasoofanoo mina aanaaqai kinoo marufanoo Isakeefa Rebeeka nammarinara aidi marufanoo mi aidirafa Isakeefa nari anoofa kuqunara amuqusiufa doo asooanau.

## 25

### *Abaraqaammafa moo aanaaseesaa faiqi maqoo ufafa.*

*(1 Stori 1:32-33)*

<sup>1</sup> Abaraqaammafa anaasee moo maranau. Mina auqu Keeturaa nammarifa marinau.

<sup>2</sup> Minasaa faiqi moomoo maqanau. Faiqi moo indaarugaana auqu Simaramafa marinau mina aanaaqianaafa Yookasanafa marinau mina aanaaqianaafa Meedanafa marinau mina aanaaqianaafa Midianaafa marinau. Mina aanaaqianaafa Isabakafa marinau ninaaqianaafa uqanna Suaafa marinau.

<sup>3</sup> Indaarugaana aanaaqianaafa Yookasanafa mifa Seebabana faqa Deedana faqa nikoofa marinau. Deedana aiku asuku Asuraa maqannaasa faqa Reetusimma maqannaasa faqa Reuummimma maqannaasa faqa mariqau.

<sup>4</sup> Midiana amaaku indaarugaa faiqi Eefaafa marinau, mina aanaaqianaafa Eefeefaafa marinau, misa ninaaqianaafa Qannookafa marinau misa ninaaqianaafa Abidafa marinau, misa ninaaqianaafa uqanna Eeradaafa marinau. Minamusa Abaraqaammana anaqa Keeturaa nammarina saaqari kambiqarousa mariqau.

<sup>5</sup> Abaraqaammafa nari aiqama ainaina Isakeena kai aminau.

<sup>6</sup> Amiseenoo nari kaqi maridanoo moo anaasee faiqi namu faqa amiqira ainaina oosana oosana Abaraqaammafa kaqi nimiseenoo Isakeefa maruqooqari suani oosana qaannai maqa maaqai nianai niqooofaqa mitinai oonu mariqau.

### *Abaraqaammafa kuqufufaqa akundoo ufafa.*

<sup>7-8</sup> Abaraqaammafa asooqageenoo kuqinau. 175 aukuaana marasee kuqinau.

<sup>9</sup> Kuqufufaqa mina amaaku qara Isakeesa Isamaeerasa miqanda nari nikoona iri mara maree Makapeeraa maqa maaqaki Mamaree maqusa suani oosana qaannai ooni aamaraki akundaqau. Mi maqana Eefaroono Sooqarana amaaku Heetana aiku asaukundi feefaurummaqoonaki Abaraqaammana akundaqau.

<sup>10</sup> Abaraqaammafa kaqi maridanoo Qeetana aiku asauku feefauru maqoonakina Saraqa nammarina faqa Abaraqaammana faqa nikundaqau.

<sup>11</sup> Abaraqaammafa kuqufufanoo mina amaaku Isakeena Anutufa amiqi amiqi imarinau. Isakeefa kaqi marira nammari dikaanda qini qiqafaidanoo fee qimaru nammari dikaandana aaqa marinau.

*Isamaerana aiku asauku nuqu.*

*(1 Stori 1:28-31)*

<sup>12</sup> Qakaara nammarifa Saraqa nammarina ainainira maanaaqa Isipa maqannaa maanaaqa marufa mifa Abaraqaammana amaaku Isamaerana maqoofa marinau.

<sup>13-15</sup> Isamaerana faiqi namu maaqimmiqa mariqau. Indaarugaafa Neebaiootafa marinau, mina aanaaqianaafa Keedarafa marinau, misa ninaaqianaafa Adabeerafa marinau, misa ninaaqianaafa Mibasamafa marinau, misa ninaaqianaafa Misammafa marinau, misa ninaaqianaafa Dummaafa marinau, misa ninaaqianaafa Masafa marinau, misa ninaaqianaafa Qadadafa marinau, misa ninaaqianaafa Teemafa marinau, misa ninaaqianaafa Yeeturaafa marinau, misa ninaaqianaafa Nafisafa marinau, misa ninaaqianaafa uganna Keedeemaafa marinau.

<sup>16</sup> Misa qisaukuqara taikasee qikunnooqu qaara marasee maqannaasa nikausaikiqa mariqau. Miqiqa maridaqa nariqa nuqu nariqa maqusa faqa nariqa uqaana maqusa faqa qafaafauree mariqau.

<sup>17</sup> Isamaerafa 137 aukuna maraseenoo kuqinau.

<sup>18</sup> Isamaerana aiku asauku Isipa maqusaindari suani oosana qaannai Sura maqa maaqa faqa, Qafiraa maqa maaqa faqa gambaana Asiria maqa maaqai fimaruqoo mariqau. Misa Abaraqaamana aiku asauku akaqausa maruqooqari naaduma mariqau.

*Eesausa Yookooboosa maqoo ufa.*

<sup>19</sup> Moo ufa Abaraqaammana amaaku Isakeena ufa maridanoo.

<sup>20</sup> Isakeefa qaara fasiqa niku nisauku taikasee 40 aukuna maraseenoo Beetueerana aramuna Reebeeka nammarina maranau. Rabannana asookina maranau. Beetueerafa Arameeannaindaraafa Meesooootamia maqa maaqaki ani marinau.

<sup>21</sup> Reebeeka nammarifa sia faiqi maqanau aafanaasee marinau. Isakeefa minara iriseenoo Yaaweenara innaaru qimarinau. Yaaweefa mina ufa iriseenoo dadaaqufanoo Reebeeka nammarifa amuaqu qaikinau.

<sup>22</sup> Amuaqu qaikufanoo faiqi qaara qanda mina aranandaki maridaqa raki mariqau. Raki marufanoo Reebeeka nammarifa qinau, maa ainainafa nanaree qiniki kambiqaidanoo fee qimaseenoo karaambaiqunnai oonuree anoonufa qimamianifeera innaaru qinau.

<sup>23</sup> Innaaru qufanoo Yaaweefa qimaminoo qinau.

Qaara maqannaasa ani aranandaki maridaqa.

Anee nariara nariara rairai qimariasa nikooqanda maqeenaranoo.

Moo fannoo moo uriqarara afeeka faqaafa marianno.

Akaqa fannoo afasaana rafaafa fuaninafa mariannoo.

<sup>24</sup> Reebeeka nammarina faiqi maqarafa aniroofanoo qaara qanda maqanau.

<sup>25</sup> Indaarugaana afaqa kaaqa taatuqee arinoo marinau, mina afaaqasasa asaasi aanaaqi marinau. Mina auqu Eesau nee qiqau. (Mina auqu oosana asaasi fee qiqau).

<sup>26</sup> Inaaqianaafa indaarugaana aiku ataa rakisisimma uqirafa quminau. Minara mina auqu Yakooboo nee qiqau. (Mina auqu oosana aiku ataa fee qiqau.) Isakeefa qaaramoo fasiqa niku nisauku taikaseenoo 60 aukuna maraseenoo miqanda maqanau.

*Eesaufa nari indaarugaa faiqi ainaina mina akaqa aminau.*

<sup>27</sup> Miqanda innooqafuafa Eesaufa uaqarana akoofasa maridanoo sia ooqu marufa kaqi niranara aidimarufa marinau. Miqi marufanoo Yakooboofa sia miqi marinau. Fifirafa maridanoo maqusasaa marufa marinau.

<sup>28</sup> Isakeefa Eesaunara aidi marinau. Mifa andau arusoofanoo nee marunara minara aidi marinau. Reebeeka nammarifa Yakooboonara rimarinau.

<sup>29</sup> Moo kari Yakooboofa narana suqasee auqee marufanoo mina afasaafa nandaki niniuufa aararoofanoo anireenoo qinau.

<sup>30</sup> Anee taatuqee narana auqee mariannana doo mina mara qiminaqa naa daarandee marifaqee qinau. Miqi qimasooafaqaa misa minara iriseeqa Eesaunara Eedoomee qimariqau. Mi auquna oosana taatuqee fee qimariqau.

<sup>31</sup> Yakooboofa iriseenoo qinau, aninidiri qikoofa anee indaarugaa faiqi mariananoo ani afaaqooqa qima amaqee marina qiminaqa narana ani amianaaranoo.

<sup>32</sup> Eesaufa qinau. Saa qinee daararai faqa kuqua qaammidaqa qini mi ainainausa sia qini dadaaqifaranoo.

<sup>33</sup> Yakoo boofa iriseenoo qinau, aneenna ufa qima afeekaika mandee qiminaqa qinee narana ani amianauna. Qimasoo fanoo Eesaufa Yakoo boonara qima afeekaika mandee indaaruu mina akoofa qutaqaama amaqqoo ainainna amiraree qinau.

<sup>34</sup> Miqi qima afeekaika masoo fanoo Yakoo boofa quanda fufanoo feemu faqa nara ainaina faqa nammari faqa Eesauna amufanoo namasee doo finau. Miqi maseenoo Eesaufa nari indaaruuqaa faiqi marunara akooqoo fanoo nari akaqa amisee quqasee finau.

## 26

*Isakeefa Keeraa maqa maaqai faqa Beeraseeba maqa maaqai faqa mariu ufafa.*

<sup>1</sup> Abaraqaammafa maru aukuanna aandaroo firaafa narufanoo Abaraqaammafa Isipa maqa maaqai ooqu finau. Kafaa mina amaaku Isakeefa maru aukuanna aandaroo narufanoo Isakeefa Keeraa maqusai Abimeereekana maqusai finau. Abimeereekafa Firistia maqannaasa uriqararafa Keeraa maqusai marunai finau.

<sup>2</sup> Isakeefa Keeraa maqusai oonu marufanoo Karaambaiga maaqi qimasee qimaminoo qinau. Anee sia Isipa maqa maaqai ooqu fua. Maaqqoo qinee aniara mariannee qunnaqqoo kai maria.

<sup>3</sup> Maaqqoo kai marinaqa qinee ani faqa marida amiqi amiqida dadaaqianauna. Maa maqa maaqana faqa anisaa ani aruakinausa faqa nimianauna. Qinee minara Abaraqaammama ufa qima afeekaika masee amianauroo qiafannana doo ani faqa qima afeekaikiqa amianaunanoo.

<sup>4</sup> Qinee anisaa ani aruaki kambiqainausa fasaura foora moomoo amianauna. Qinee maa maqa maaqana misa nimianauna. Aiqama maqannaasa aniree maaqi qimasee innaaru qifaranoo. Oo Anutu anee Isakeena aiku asauku amiqi amiqimma nimaqoonandee inana maasa faqa amiqi amiqimma qimaqaa.

<sup>5</sup> Abaraqaammafa ani akoofa qini sandufa faqa aamuaqira ufa faqa afaqee marunara qinee ani amiqi amiqimma amaqaanauna.

<sup>6</sup> Isakeefa Anutuna mi ufana iriseenoo eedoo qimaseenoo Keeraa maqusai maridanoo Isipa maqa maaqai sia ooqu finau.

<sup>7</sup> Keeraa maqanna fasiqauqa mina aanaaqara iramirufanoo Isakeefa qini qisooki fee qinau. Isakeefa nari anaqa Reebeekaa nammari faqa oori amiqirafa marufanoo qini darusee qini qinaaqa mareefoo qimaseenoo rufia mareenoo qini qisooki fee qinau.

<sup>8</sup> Isakeefa kaqi kaaqqoo marinoo moo kari nari anaqa Reebeeka nammari faqa madaanaa ooqu faqee narisaa narisaa mundaqa marufanoo mi maqannaasa uriqararafa nari maaqaki ooqufaaqee maridanoo qafanau.

<sup>9</sup> Qafamaseenoo Abimeereekafa Isakeena aaramaseenoo qinau. Maa anaaseefa ani anaqa uqanna maridanoo. Anee nanaree qini qisooki fee qinanee. Isakeefa qinau. Qini qinaaqa fee qianaqa darifoora miqi qiqa.

<sup>10</sup> Abimeereekafa iriseenoo qinau. Anee maasa naqaa fee maqimaqeenee. Qini maqanna mo fannoo ani anaqa sakasee faiqaifana anee mi ummaarana maasa qimianaiqini.

<sup>11</sup> Miqi qimaseenoo nari maqannaasa aiqama naarama quqaseenoo maaqi qimasee qima nimirau. Yafee maa fasiqanee mina aanaaqee mandaikamma nimaqai faqa qinee kuqa kai mina aruanauranoo.

<sup>12</sup> Mi aukuanai Isakeefa narana ummaqusoofanoo kambiqafufanoo amiqimasee anoona mafufanoo unakira aukua moomoo uqanna unakinu. Karaambaiga amiqi amiqimma amaqaasee dadaaqunara miqinau.

<sup>13</sup> Karaambaiga dadaaqufanoo mina ainaina rairaaufanoo kaaqa ainaina faqaafa marinau.

<sup>14</sup> Mifa moomoo sipsipa faqa burimakau faqa ainainira faiqiuqa faqa marunara Firistia maqannaasa niranaqee marinau.

<sup>15</sup> Ooqai Abaraqaammafa kaqi maridanoo indufuqoo nammari dikaandausa Firistia maqannaasa aiqama rafaqa fiqau.

<sup>16</sup> Moo kari Abimeereekafa Isakeena aiqama ainaina tia qafamaseenoo rufia seenoo qimaminu. Doo anee maasa uridaaqarana mariananoo. Anee maasa maqa maaqa quqasee moosaa fua.

<sup>17</sup> Isakeefa mi ufana iriseenoo mi maqa maaqana minniseenoo nari uiqaana maaqa Keeraa noopunduki usakasee miqoo kisaqaasaa marinau.

<sup>18</sup> Miqqoo ooqu Isakeefa nari akoona nammari madikauga Firistia maqanna rafaqa fuqoonaa paqurimaseenoo kafa indufuseenoo nari akoofa auquuroo auquna kai kaifaa auquranau.

<sup>19</sup> Isakeena ainaini maru fasiqausa mi arumunaki fuka madika indufiufaqa nammari paquriqau.

<sup>20</sup> Paquri masoofaqa Keeraa maqannaa sipsipasaa rakisi marusa mi nammarina qafamasee Isakeena sipsipa rakisirausa faqa rakirarida qiqau. Maa nammariifa maasaindi maridanoo. Miqi qufanoo Isakeefa mi nammari madikana auqu Tinoorira nammari madikee qinau.

<sup>21</sup> Miqi qimasoofaqa mina ainainira fasiqa namu kafaa moo indufiqa. Keeraa maqannaasa minara faqa miqi kai iqa. Isakeefa mina iriseenoo minara faqa niranaqara nammari fee kai qinau.

<sup>22</sup> Miqi qimaseenoo kafaa quqasee moosaa oonureenoo miqi kai minoo moo nammari madika indufinau. Miqoo minara sia tinoo taanoo rirafa marufanoo mi nammari madikana auqureenoo nifaaqa quqasee mana manira nammari madikee qinau. Maqee Karaambaifa fannoo mana manirana maasa qimifaqa maridaqa maaqoo aiqama ainaina masaananoo rairaaianoo.

<sup>23</sup> Doo miqoo mariufanoo miqoo minni seenoo Beeraseeba maqa maaqai finau.

<sup>24</sup> Miqoo marufanoo moo eendaki akooqoo Karaambaifa maaqi qimasee qimaminau. Qinee ani akoona Abaraqaammna Anutusa maridaqa. Sia anee rufia rufiaqia. Qinee ani faqa nidaqa. Qeeqa ainainira fasiqa Abaraqaammna faqa qima afeekaikafannanara iriseeqa ani amiqi amiqi ianaura anisaa ani aruakinausa moomoo kambiqeefaranoo.

<sup>25</sup> Isakeefa Karaambaifa mi ufana iriseenoo ooninnai qainda auquseenoo Karaambaifa aandau tatufirana minasaa suqa amiseenoo innaaru qinau. Miqoo Isakeeefa nari uiqana maqa burimakau apatannoo usakaseenoo marinau. Minaki maridanoo nari ainainira fasiqauqa niqoofaqa moo nammari madika indufiqa.

*Isakeesa Abimeereekasa eedoo qimasee moodaanakiku ufafa.*

<sup>26</sup> Abimeereekafa Keeraa maqa maaqaindari Ausafatana nari irirana amimaru fasiqana faqa nari sundiaufa uriqararana Pikoarana faqa Isakeena qafarree qimasee Beeraseeba maqusai aniqau.

<sup>27</sup> Aniroofanoo Isakeefa irimirinoo qinau. Naqi fee qifaqee qiniara nikooqoofaqa diiqamasoosa marunnannai kafaa anidanee.

<sup>28</sup> Miqi qufanoo Abimeereekafa faqa mina faqa anusa qiqau. Karaambaifa ani faqa marinara maqee maasa iridaqa. Ani faqa maasa faqa qambaana kuqaa qima afeekaikirafa marianifeera iridaqa.

<sup>29</sup> Maasa aniara qima afeekaikammasee sia maasa mandaikamma qimaqaannee qidaqa. Maasa sia ani mandaikamma amaqaafannandee inana maasa faqa sia mandaikamma qimaqaa. Maasa ani amiqi amiqimma aisaafanana anee asoaranaki finau. Maqee akooqoo uqanna Karaambaifa fannoo ani amiqi amiqimma amaqaidanoo.

<sup>30</sup> Miqi qimasoofanoo Isakeefa qoomaqa deedaqinuu. Deedaqammasoofaqa misa narana namaseeqa faiqaqau.

<sup>31</sup> Kanaanaa findi fufaqa nari qimami nari qimamimma afeekaikamasee firaa ufannai qima afeekaikamma rafaqafiqau. Miqimmaseenoo Isakeefa nimandara ufa qimasoofaqa aqoondi kammasee quqasee fiqau.

<sup>32</sup> Doo mi faasaana Isakeena ainainira fasiqa namu nammari madika indufu qoonaki nammari paqurimasee Isakeena qimamiqa qiqau. Doo maasa nammari paquriga.

<sup>33</sup> Miqi qimasee qimamufanoo Isakeefa mi nammari madikanara qima afeekaikira madikee qinau. Miqi qimaseenoo nari ufakiqari Beeraseeba maqusa fee qimasee auquranau.

*Eesaufa aanaamuru aanaaseeqara maroo ufafa.*

<sup>34</sup> Isakeena faiqi indaarufaqa mina auqu Eesaufa marinuu. Mifa qaara fasiqa aiku asauku taikasee 40 aukuaana maraseenoo Qeetaa maqannaa aanaaseeqara maranau. Moo anaasee auqu Yuditi nammari Beerina araamuna maranau. Moo anaasee auqu Baseemata nammari Eeroona aramuna maranau.

<sup>35</sup> Miqanda nari ninaakuquqara Isakeesa Reebeeka nammari sukaqara oosana nimufaqa nikooqanau.

## 27

*Yakooboofa Eesauna afaaqooqa ummuaru ufafa.*

<sup>1</sup> Isakeefa mariufanoo doo asooqaoofanoo afu mandaikinuu. Mariufanoo moo kari nari indaruqaa faiqi Eesauna aaroofanoo Eesaufa maqi qinuu.

<sup>2</sup> Foo qimasoofanoo Isakeefa Eesauna qimaminoo qinuu. Doo qinee asooqa marida, qeeqa kuqira aukuaana sia qafaida, minara ani qimamiqa.

<sup>3-4</sup> Aneenna duru feefa mareenana nandaki aandau aru maree qini didi marina mini suqa qiminaqa namseeqa ani afaaqooqa qimamaqaseeqa kuqua.

<sup>5-6</sup> Isakeefa Eesauna faqa ufa qiqiisoofanoo Reebeeka nammarifa iriseenoo qafoofanoo Eesaufa nandakinai uaqarara fufanoo quanda fufanoo Yakooboona qumee kai qimaminoo qinau.

<sup>7</sup> Doo maqee ani akoofa Eesauna maaqi qimasee qimaminoo, anee aandau arumaree mini suqa qiminaqa qinee namasee Karaambaiqa afusaa ani afaaqooqa amisee kuqua.

<sup>8</sup> Qini qimaaku doo anee qini ufa irisee qinee qianandee ia.

<sup>9</sup> Anee doo fua oonu mimmi aanaaqiuqa marianakinaana afaaqa faqaana qaaraqanda mini sainaqa qinee ani akoona aidi marina suqa saanana munu amia.

<sup>10</sup> Munu aminano namaseenoo narí afaaqooqa amiseenoo kuquani.

<sup>11</sup> Yakooboofa iriseenoo narí anoona qimaminoo qinau. Qini qifasaafa asaasi faqaafa maridanoo asaasi aadaiki marifa maridanoo. Qini qifaaqa qisauisi sia maridanoo umooqu kammidanoo.

<sup>12</sup> Abee qini qikoofa qini qifaaqa duqama qafamaseenoo iriannoo. Qiniara qikaru qidanoo fee qiannoo. Miqiqua qinee rairaiqirana qeeqa qifaaqai qifaaqooqara foora mara quqaanaura.

<sup>13</sup> Mina anoofa mi ufana iriseenoo qinau. Ani aqira ufa fannoo qinisaa kai mariannoo, sia anee minara iria, sandeenana oonu mimmi aanaaqi kaqi maree mini qimia.

<sup>14</sup> Miqi qima soofanoo Yaakoofoofa eedoo qimasee mara maree mini soofanoo mina anoofa maraseenoo narí afaaqi Isakeena aidira narana suqanau.

<sup>15</sup> Reebeeka nammarifa aandau suqaseenoo Eesauna amiqira qamunna narí maaqaki quqaqoona maraseenoo Yakooboona afisu amaqaanau.

<sup>16</sup> Afisu amaqaaseenoo mimmi aanaaqi apata qumareenoo Yakooboona afaarinni faqa asauku faqa asausi sia maruqoo afisu amaqaanau.

<sup>17</sup> Miqi mandeenoo mi adiafaaira naranna feemu namu faqa suqaqoona amufanoo narí akoo funnai maree finau.

<sup>18</sup> Oonureenoo narí akoona maaqi qimasee qimaminau. Qipoo doo qinee anireeqa, qufanoo Isakeefa qinau. Qini faiqi namuqi qari anee yafee maridanee qinau.

<sup>19</sup> Yakoofoofa qinau. Qinee ani indaaruuqaa faiqi Eesauna maridaqa. Doo anee aandaura qiannana arusee suqamaree anireeqa doo anee findi finana namasee qifaaqooqa qimia.

<sup>20</sup> Miqi qufanoo Isakeefa qinau. Oo qini qimaaku anee naqaa fee maseenane kai kaqi paqurinanee qufanoo Yakoofoofa qinau. Karaambaiqa ani Anutufa qini dadaaqi paqurimma qiminoo.

<sup>21</sup> Isakeefa minara iriseenoo Yakoobona aaramaseenoo qinau. Anee qini daaqa adeedi ani rainaqa qinee ani auqama qafaa. Kuqaa anee Eesau fee maridanee.

<sup>22</sup> Miqi qufanoo Yakoofoofa narí akoona oorinni oonu kikiqamma fufanoo Isakeefa auqama qafamaseenoo qinau. Qinee irunanoo anee ufa qianafa ani Yakooboona aunda maridanoo ani asauku auqamasee qafaunanoo Eesauna asauku maridanoo.

<sup>23-24</sup> Yakoofoofa mimmi asaasi afisuqoofanoo Eesauna asakuuara foora asaasi aanaaqi marufanoo Isakeefa sia irinuu. Isakeefa narí afaaqooqa mina amirarammaseenoo kaifaa iramirinoo qinau. Anee kuqaa Eesau fee maridanee. Miqi qufanoo Yakoofoofa qinau. Eeoo qinee Eesauna maridaqa.

<sup>25</sup> Miqi qufanoo Isakeefa qinau. Doo aneenna aandau mini qiminaqa namaseeqa afaaqooqa qimamaqaanaura. Yakoofoofa irinoo aandau aina faqa uainna nammari faqa mini amufanoo nanau.

<sup>26</sup> Namaseenoo Yakooboona maaqi qimasee qimaminoo qinau. Qini qimaaku maaqoo adeedi ani reenana qini qimooqaa.

<sup>27</sup> Qufanoo Yakoofoofa adeedi aqaa ani reenoo narí akoona amooqee marufanoo andanda unda afaaqaindari ufanoo udirama qafamaseenoo maaqi qimasee afaaqooqa qinau. Qini qimaaku afaaqai amiqira unda fannoo Karaambaiqa afaaqooqa qimamaqaqai maqana afundara foora idanoo.

<sup>28</sup> Anutufa innaarunaindaraa qifi faramu quqasainanoo ani maqa ainoo ainoom-maseenoo moomoo narana amiani.

<sup>29</sup> Moo aanaamuru marinausa ani ainainira faiqi kammambi faranoo. Maaqanna maaqanna mariasa misa ani ani qafeeqa noorindari maqasaa kummaree faranoo.

Anee aneenna akaqaafasaaquq firaafai kina marinnaranoo.

Ani anoona faiqi namu ani ani qafeeqa noorindari maqasaa kummaree faranoo.

Moo fannoo ani aqinafa mi ufafa nariki kai mariannoo.

Moo fannoo ani amiqi amiqimma amaqaainafa nariki faqa mariani.

*Eesaufa narí akoona afaaqooqara qiaqee qu ufafa.*

<sup>30</sup> Miqi qimasee Isakeefa Yakooboona afaaqooqa qimami soofanoo Yakooboofa narí akoona maaqakiqari raudamakufanoo dindanai fufanoo doo Eesaufa dindanai uaqanoo niniifafa aniranau.

<sup>31</sup> Eesaufa anireenoo adiafaa ira aanda u aina suqa mareenoo narí akoofuqoo oonu reenoo qinuu. Yipoo doo findi finana namasee qifaaqooqa qimia.

<sup>32</sup> Mina akoofa qinuu. Anee yafee. Miqi qufanoo mifa qinuu. Qinee Eesaufa indaaruuqaa faiqi maridaqa.

<sup>33</sup> Isakeefa minara iriseenoo boo qimasee tautu maseenoo aindiri aindiri imarufanoo qinuu. Yafee moo fannoo aanda arusee mini qimifaqa, namasaunana anee aniraananoo. Qinee namaseeqa doo qeeqa taikara afaaqooqa qimamaqasaunanoo naaru naaru minaindi mariannoo.

<sup>34</sup> Eesaufa mina iriseenoo firaqoo aundurau sukaqoofanoo qinuu. Oo qipoo qini faqa qifaaqooqa qimia.

<sup>35</sup> Qufanoo Isakeefa qinuu. Ani akaqa fannoo qikaru qimaseenoo doo ani afaaqooqa maree fiifinoo.

<sup>36</sup> Eesaufa minara irufanoo Yaakooboonara arana qoofanoo qinuu. Oo mina auqu Yakooboofa maridanoo narí auqu mau kaimbinoo qini ainaina qaara kari qini qikaru qimasee mareenoo. Indaaruu mifa qinee indaaruuqaa faiqi uriqararaua maraani qiafanna ainaina maroofa maqee miqi kai inoo qini qifaaqooqa qirana doo maree finoo. Miqi qimaseenoo Eesaufa narí akoona qimaminoo qinuu. Anee afaaqooqa sia fee qini faqa qiseenane.

<sup>37</sup> Miqi qufanoo Isakeefa qinuu. Doo qinee ani uriqararafa marianifee afaaqooqa amiseeqa. Kaifa mina ainaina mina ainainira faiqi kiaqee afaaqooqa faqa amiqa. Qinee oosana oosana narana faqa nammari faqa amiqa. Qini qimaaku, maqee sia moo ainaina marinaqa ani amianauranoo.

<sup>38</sup> Eesaufa narí akoona kafa kafa iki raqaidanoo iranau. Moodaa afaaqooqa marinee aminanee sia fee moo qini faqa qiminnaree.

<sup>39</sup> Isakeefa minara irinoo maaqi qimasee Eesauna qimaminuu.

Sia innaarunaindaraa qifi faramu anindi mariannoo.

Sia ainoo faqaa maqa anindi mariannoo.

<sup>40</sup> Anee duru saamu uqeerasaidana aneenna amiqira marirana paqurinnaranoo.

Miqidana anee aneenna akaqa ainainira faiqikina mariinana rakeemmaki aaduma finnaranoo.

*Isakeefa Yakooboona Qaraana maqusai aqiqoo ufafa.*

<sup>41</sup> Yakooboofa Eesauna afaaqooqa maree fifufanoo Eesaufa narí akaqara akoo gaidanoo fidiqaammii marinau. Miqi marufanoo maaqi qimasee narí kai oonu mafi iriseenoo qinuu. Kaqi kaaqoo maasa qikoofa kuqu finaqa soofaara taikaseeqa mikari qeeqa qikaqa kuqamma aruanaura.

<sup>42</sup> Reebeeka nammarifa mi ufana iriseenoo Yakooboona aaramaseenoo aaqu qimamageenoo qinuu. Iria ani afasaafa Eesaufa afaaqooqara qimammareenoo ani aruannoo.

<sup>43</sup> Qini faiqi qinee qimamianandee ia. Anee quqasee sandeenana Qaraana maqusai qini qisookifa ani anaufa Rabannafa marinnai fua.

<sup>44</sup> Anee ooru miqoo marinanoo ani afasaana arana qarafa asooainana qumua.

<sup>45</sup> Anee mina mandaikamma amaqaannanara qaunusainaa qinee akaqausa niqaaanaqa ani ooru afigee qumuaqa. Qinee qikoo inneeqara moodaafa kuqiranara irunanoo qaifaqa doo quqasee fua.

*Isakeefa Yakooboona aiqoofanoo Rabana funnai ooru finuu.*

<sup>46</sup> Miqanda ninooofa Reebeeka nammarifa oonu reenoo narí afaaqi Isakeena qimaminoo qinuu. Qinee maa Qeeta maqannaa anaasee qandara Eesauna anaqa qarara qikoo uqanna fidiqaammidaqa. Yakooboofa Qeeta maqannaa anaasee maaqirana moo marinaqa qinee kuquanauranoo.

## 28

<sup>1</sup> Isakeefa minara iriseenoo Yakooboona aaramaseenoo amandaidanoo qinuu. Oo Yakooboo sia uqanna Kannaana maqannaa anaasee maraa.

<sup>2</sup> Doo findi finana ooru fua. Aneenna aanaakuna Beetueerana maqa maaqa Meesoopootamia maqa maaqaki ooruree aneenna anauna Rabannana aaramuna maraa.

<sup>3</sup> Aiqaama afeeka faqaa Anutufa ani faqa ani anaqa faqa amiqi amiqimma ni-maqaseenoo moomoo faiqi nimisainana anee moomoo maqannaasa nikoofa marinnara.

<sup>4</sup> Anutufa Abaraqaammama amiqi amiqimma amaqoondée inoo ani faqa amiqi amiqimma aisainana anee aneenna marianna maqa maaqana Anutufa Abaraqaamama amiqoonakinaa qumiasana maraa.

<sup>5</sup> Miqi qimaseenoo Isakeefa Yakoooboona aiqoofanoo findifinoo Meesoopootamia maqa maaqai Rabanafa Beetueerana amaaku Arameea maqannaafa Reebeekaa nammarina asookifa marunnai oorufinau. Rebeekaa nammarifa Yakoooboona Eesausa ninoofa marinau.

*Eesaufa anaasee moo maranau.*

<sup>6</sup> Isakeefa Yakoooboona afaaqooqa amiseenoo Meesoopootamia maqa maaqai anaasee maraanifeera aqiqoonara Eesaufa irinau. Isakeefa afaaqooqa Yakoooboona amiseenoo Kannaana maqanna anaasee sia maraanee qunara faqa irinau.

<sup>7</sup> Yakoooboofa narí anaukoo ufa irisee Meesoopootamia maqa maaqai funara faqa Eesaufa irinau.

<sup>8</sup> Isakeefa Kannaana maqanna aanaaseera akooqee marunara Eesaufa irinau.

<sup>9</sup> Iriseenoo Isamaerafa Abaraqaammama amaaku marunnai oonuree mina araamuna auqu Maqarata nammarina maranau. Maqarata nammarina asookifa Neebaiootafa marinau.

*Yakoooboofa Beeteeree maqa maaqaki ooni qunu rumasee faiqaqee qaininau.*

<sup>10</sup> Kaifa Yakoooboofa Beeraseeba maqusaindari Qaraana maqasai firaree qimasee faiqanoo ooru fimarinau.

<sup>11</sup> Fimarufanoo eendufanoo moosaa uiquana araseenoo faiqanau. Faiqararinoo ooni fraana marasee qunu rumasee miqoo faiqanau.

<sup>12</sup> Faiqaqee idanoo qaina moo inau. Aana kisaaga maqasaaqari innaarunai ooru marufanoo angiroouqa mimau ooruree qumuree imariqau.

<sup>13</sup> Karaambaiqa Yakoooboona aakaarinni kikiqinoo maridanoo maaqi qimasee qimaminau. Qinee Karaambaiqa maridaqa, ani aanaakuma Abaraqaamama Anutusa maridaqa, ani akoona Isakeena faqa Anutusa maridaqa. Qinee maa maqa maaqana anee faiqaannana ani faqa ani aiku asaku faqa nimianauro.

<sup>14</sup> Ani aiku asaku anisaa ani aruakinausa faqa nukudara foora maa maqanasaa marifaranoo. Misa miqooqari kambiqaamaree suani oosana qaannai finanoo aramareenoo keeqee mari qaannai finanoo dinni dinni ataaqeeni finanoo miqi mambi amana kai marifaranoo. Ani faqa ani aiku asakuaroo qiqa aiqama maqannaasa amiqimma nimaqaanau.

<sup>15</sup> Karaambaiqa kafaa qimaminoo qinau. Iria, qinee ani faqa maridaqa aiqamai finannai anisaa rakisiaanau. Rakisidaqa kaifaa ani mareeqee maa maqanasaa quqaanau. Qinee sia ani minnisaanau, qinee qeeqa qima afeekaikiafanna ufafa anoona kambiqaanau quqaanau.

<sup>16</sup> Miqi qimsoofanoo Yakoooboofa tautinoo findifinoo qinau. Karaambaiqa maaqoo maridanoo. Mifa maaqoo marinara qinee sia iridaqa.

<sup>17</sup> Yakoooboofa Anutuna ufa iriseenoo rufia rufia idanoo qinau. Maa maqa maaqafa daaqqara maqa maqa maridanoo. Abee Anutuna maaqa mariannoo innaarunai fimaria kooqifa uqanna mariannoo.

<sup>18</sup> Kananaana Yakoooboofa findifinoo narí ooni qunu qumareenoo daaqoo auqaanifee qimasee maqasaa rakiqaseenoo Anutunaindi fee qimasee oorifa fadameena akuumaqanau.

<sup>19</sup> Akuumaqaseenoo mi maqanara Beeteera fee qinau. (Mi auquna oosana Anutuna maaqa fee qinau.) Ooqai miqoora misa Rusa maqusa fee qimariqau.

<sup>20-21</sup> Yakoooboofa mi maqana auqu ramaseenoo Karaambaiqara qima afeekaikinoo qinau. Qinee fimarianana anee qini faqa marida qinisaa rakisidana narana faqa qamunna faqa qiminaqa qinee amiqimmaseeqa qeeqa qikoona maaqai qumu raanana anee qini Anutufa marinnaranoo.

<sup>22</sup> Maa daaqoo auqara oonina rakiqaunnana ani naaru amooqi fandinnaqoo marianoo. Anee aiqama ainaina qiminaqa qinee qisakuqarakinaana aninna amianauro.

## 29

*Yakoooboofa Rabanana maaqai ooruranau.*

<sup>1</sup> Miqi qimaseenoo innaaru qimaseenoo Yakoooboofa suani oosana qaannai mariasa, misa maqa maaqai oonu ranau.

<sup>2</sup> Oonureenoo qafoofanoo nammari madika qusau saqanna marufanoo qaaramooki sipsipauqa mi nammari madikana afainni faiqaqeeuafaq misasaa rakisirausa miqoo



rakisimariqau. Sipsipauqa mi madikanakinaa nammari neemariqau. Firaa ooninnoo mi madikana rafaafuqoofanoo marinau.

<sup>3</sup> Sipsipauqa aiqama moodaa qoo aniroofaqa sipsipasaa rakisiraua mi oonina quanda quandamma aqusee nammari nimisee kaifaa mi oonina quanda quandamma mafi rafaafuqoofanoo mariqau.

<sup>4</sup> Yakooboofa sipsipasaa rakisi marusa oonu nindafeenoo qinuu. Qini qikaqafasaa, innee yaindaraasee maridaqee. Misa qiqau, maasa Qaraana maqusaindaraasa maridaqaa.

<sup>5</sup> Yakooboofa iriseenoo qinuu. Innee Naqoorana anaiqi Rabannanara iridee qufuqaqaa misa qiqau. Eeoo maasa minara iridaqaa.

<sup>6</sup> Miqi qufanoo Yakooboofa qinuu. Rabannafa amiqisaa fee maridanoo fee. Misa qiqau. Eeoo amiqisaa maridanoo. Mina qafaa, doo mina araamuna Raseera nammarifa mina sipsipauqa nifiqee anidanoo.

<sup>7</sup> Yakooboofa misa sipsipa oosana qafeenoo qinuu. Innee naqiffee ifaqee sipsipa suani qambaana mara quqaqafaqee maridee. Dauni nammari nimiseeqa mara quqasaifaaqaa misa fida qusau neeqa nifaaqaa maraaqaa.

<sup>8</sup> Mi maqannaasa iriseeqa qiqau. Maasa sia miqianaura. Aiqama sipsipa maaqoo aniraifaaqaa ooni quanda quandamma aqusee nammari nimifaranoo.

<sup>9</sup> Yakooboofa misa faqa ufa qimarufanoo Raseera nammarifa nari akoona Rabanna sipsipauqa nifiqee aniranau.

<sup>10</sup> Yakooboofa nari anoona Reebeeka nammarina asookina araamuna qafamaseenoo Rabanna sipsipa faqa qafamaseenoo findifinoo nammari madikaki rafaafuqoofanoo oonina quanda quandamma mafi quqaseenoo Raseera nammarina sipsipauqa nammari niminuu.

<sup>11</sup> Nammari nimiseenoo Raseera nammarina ooriki amooqaidanoo asisirafa firaaqaa minaki marufanoo iki raqanau.

<sup>12</sup> Iki raqaseenoo Raseera nammarina qimaminoo qinuu. Qinee ani akoona ati Reebeeka nammarina amaaku maridaqaa. Raseera nammarifa mina ufa iriseenoo sandeenoo oonuree nari akoona qimaminuu.

<sup>13</sup> Rabannafa nari anauqi Yakooboona ufa iriseenoo sandeenoo oonu mafi kaqaramma qumareenoo amooqaseenoo sukudaakutamasee aqifeenoo nari maaqai aninuu. Miqoo oonu maridanoo Yakooboofa Rabanna aiqama ainaina kambiqaonara qimaminuu.

<sup>14</sup> Rabannafa iriseenoo maaqi qimasee qimaminoo qinuu. Anee qini moodaa fidika mariananoo. Miqi qimasooqanoo Yakooboofa moodaa uqoona mina faqa miqoo marinuu.

*Yakooboofa Rabannana araamuna qara mararee qimasee mina ainaina imarinuu.*

<sup>15</sup> Rabannafa maaqi qimaseenoo Yakooboona qimaminoo qinuu. Kuqaa anee qini qinauqi mariananoo, sia fifau qini ainaina kai innaranoo. Maqee oosana araseeqa feefauru amiqambuanaura. Ani naqiffee mandee feefauru amianauree.

<sup>16</sup> Rabanna araamuna qara qaaraqanda mariqau, indaaruuqaafa Reea nammarifa marinuu inaaqianaafa Raseera nammarifa marinuu.

<sup>17</sup> Reea nammarifa indaaruuqaafa amiqira oori afiri faqaafa marinuu. Raseera nammarifa mina faqa arusee kaqaa amiqirafa uqanna marinuu.

<sup>18</sup> Yakooboona irirafa Raseera nammarinara kai iri marufa marinuu. Minara iriseenoo Yakooboofa Rabannana nari ainaini maruna akiqara qimaminoo qinuu. Amanee qinee Raseera nammarina maraanauree. Anee eedoo qinaqa qinee mina akiqara qisauku dinni taikasee dinni ani qaara marasee 7 aukuaana ani ainaina ianaura.

<sup>19</sup> Qufanoo Rabannafa qimaminuu. Qinee amana ani amianaaura, moo oosana nimiranara qikooqaidanoo. Doo anee qini faqa maridana ainainia.

<sup>20</sup> Rabannafa miqi qimasooqanoo Yakooboofa Raseera nammarina marararee qimaseenoo qisauku dinni taikaseenoo dinni ani qaara maraseenoo 7 aukuaana mina ainaina maisee marinuu. Yakooboofa Raseera nammarinara aidi marufanoo mi aukuaana namufa qaaramoo faasaanara foora aiqaranuu.

<sup>21</sup> Dinni taikasee dinni ani qaara marasee 7 aukuaana taikasooqanoo Yakooboofa Rabanna qimaminoo qinuu. Doo qini maanaqa qimiraree qunna aukuanafa aiqareenoo. Doo Raseera nammarina qiminaqa maraa.

<sup>22</sup> Rabannafa eedoo qimaseenoo nari araamuna amundaida oomaqa sakasee aiqama naarooqaaqaa ani naqau.

<sup>23</sup> Mi eendanaki Rabannafa nari araamuna indaaruuqaana Reea nammarina qumee Yakooboona maaqaki quqasoofanoo Yakooboofa auna Raseera nammarifa mifoo qimaseenoo mina faqa sakasee faiqanuu.

<sup>24</sup> Rabannafa miqoo qaraasa oosana mareeno narí ainainira maanaaqa moo minauqu Siripaa nammarina mareeqee narí aramuna Reea nammarina ainaina maisaanifeera aminau.

<sup>25</sup> Iaqoofanoo findifinoo Yakooboofa qafamaseenoo, boo Reea nammari fee qinau. Yakooboofa Rabanna funnai oonureenoo aqinoo qinau. Anee naqifee ifanee qini miqimma qimaqenee. Qinee Raseera nammarina marararee qimasee ani ainaina maiseeqa. Anee nanaree qini qikaru q inanee.

<sup>26</sup> Rabannafa qinau. Maasa maaqoo qaraasa oosana sia miqinoo maridanoo. In-daaruqaana naaree amundaseeqa inaaqiannaana kasooaqee inaaqianna amundaidaqa.

<sup>27</sup> Anee Reea nammarina faqa kaqi marinanoo mina oomaqirafa 7 faasaana marianoo. Taikainaqa miqoo kafa Raseera nammarina faqa amianauro. Amianana miqooqari mina akiiqara anee oosana araseenana kaifaa dinni taikasee dinni ani qaara marasee 7 aukuaana qini ainaina innaranoo.

<sup>28</sup> Yakooboofa minara iriseenoo eedoo qimaseenoo Reea nammarina faqa mariufanoo qoomaqa narana taikoofanoo Rabannafa narí aramuna Raseera nammarina faqa aminau.

<sup>29</sup> Kafa Rabannafa narí ainainira maanaaqa mina auqu Biriqaa nammarina mareeqeenoo Raseera nammarina ainainianifeera aminau.

<sup>30</sup> Amufanoo Yakooboofa Raseera nammarina faqa sakasee faiqanau. Yakooboofa Raseera nammarinara aidi marufanoo Reea nammarinara sia amiqimma aidi marinau. Miqidanoo Rabannana ainainiranaki kafa qisauku dinni taikasee dinni ani qaara marasee 7 aukuanaki marinau.

*Yakooboona faiqi namu ufa.*

<sup>31</sup> Yakooboona irirafa Raseera nammariasaa kai mundinoo marunara Reea nammarinara akoo akaa mimarinau. Miqi marunara Karaambaiqa qafeenoo dadaaqufanoo Reea nammarifamuaqu qaikinuu.

<sup>32</sup> Reea nammarifamuaqu qaikinoo mariufanoo faiqi akoonaiqi maqanau. Maqaseenoo qinuu. Karaambaiqa qiniara qimudao qinara qini qifaaqi fannoo maqee qinisaa atooqeenoo fee qianauro. Mi irirana iriseenoo mi faiqina auqu Reebeena fee qinuu.

<sup>33</sup> Reea nammarifamarikinoo kaifaa amuaqu qaikinoo mariufanoo faiqi akoonaiqi moo maqanau. Maqaseenoo qinuu. Qini qifaaqi qini ameesuqi marinaru Karaambaiqa irinoo qiniara qimudao qimaseenoo maa faiqina qiminoo. Minara mina auqu Simeeona fee qinuu.

<sup>34</sup> Reea nammarifamarikinoo kafa amuaqu qaikinoo mariufanoo faiqi akoonaiqi moo maqaseenoo qinuu. Doo maqee uqanna qini qifaaqi fannoo doo qinisaa atooqaanoo, qinee qaaramoo akoonaiqi maqaseeqa. Minara iriseeqa mi faiqina auqu Reefi nee qifa.

<sup>35</sup> Reea nammarifamarikinoo kaifaa amuaqu qaikinoo mariufanoo faiqi akoonaiqi moo maqanau. Maqaseenoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

## 30

<sup>1</sup> Raseera nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>2</sup> Yakooboofa minara irufanoo arana qoofanoo qinuu. Qinee Anutusau maridau. Anutufa kai ani itita amaqaaidanoo.

<sup>3</sup> Miqi qimasooofanoo Raseera nammarifamariufanoo qinuu. Maa qini ainaini mari manaqafa Biriqaa nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>4</sup> Raseera nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>5</sup> Miqimmasooofanoo Biriqaa nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>6</sup> Maqasoofanoo Raseera nammarifamariufanoo qinuu. Doo maqee Anutufa qini oosanara andeeqara oosana fee qimasee qini innaaru qirana iriseenoo doo akoonaiqi qiminoo. Miqi qimaseenoo Raseera nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>7</sup> Mi manaqafa Biriqaa nammarifamariufanoo qinuu doo maqee qinee Karaambaiqa amooqidaqa, maa faiqina auqu Yuda fee qidaqa. Reea nammarifamariufanoo mi kamuqoo kisaqasaa marinuu.

<sup>8</sup> Raseera nammarifa mina qafamaseenoo qinau. Qinee qeeqa qinasaana faqa firaqoo rairai qimasee qinee uriaaqareeqee qimaseenoo mi faiqina auqu Napatari fee qinau.

<sup>9</sup> Reea nammarifa faiqi maqarana taikaseenoo nari ainaini maru manaqana auqu Siripaa nammarina nari afaaqi Yakooboona mara aminau.

<sup>10</sup> Amufanoo minasaa faiqi akoonaiqi moo maqanau.

<sup>11</sup> Reea nammarifa qafamasee qinau. Oo qini amiqimma qisainara mi faiqina auqu Kadafa nee qinau.

<sup>12</sup> Siripaa nammarifa marikinoo kafaa akoonaiqi moo Yakooboona faiqi maqanau.

<sup>13</sup> Reea nammarifa mina faqa nariara maraseenoo qinau. Doo qinee firaqoo asasiidaqa. Maqee aanaaseeuqa qiniara asasirafee qimasee duqu reefaranoo. Minara iriseenoo mi faiqina auqu Aseera fee qinau.

<sup>14</sup> Reea nammarina amaaku Reeubeenafa sakumma neemaru kamuqoo andanda kinai nidanoo faiqi maqee maru andandana qaqama paqurinau. Mi aqamana auqu mandareeka marinau. Mina paqurimaseenoo mara mareenoo mini nari anoona Reea nammarina aminau. Raseera nammarifa mina qafamaseenoo Reea nammarina qimaminoo qinau. Amanee mandareeka qaqama akaqana qini faqa qiminnaree.

<sup>15</sup> Miqi qufanoo Reea nammarifa nari qimaminoo qinau. Anee qini qifaaqi marasaanafa kaifaa qini qimaaku mandareeka qaqama marararee fee qidanee. Miqi qufanoo Raseera nammarifa qinau. Ani amaaku marai mandareekana qaqama qini qiminaqa doo Yakooboona ani amiananoo ani faqa faiqaanoo.

<sup>16</sup> Eenee marufanoo Yakooboofa ainainindari aniroofanoo Reea nammarifa aanai oonu afiqeenoo anidanoo qimaminau. Doo qinee mandareeka qaqama Raseera nammarina amiqa. Mifa mina akiqara maqee eendaki aniara qini faqa faiqaannee qinoo. Miqi qufanoo Yakooboofa eedoo qimasee Reea nammarina faqa sakasee faiqanau.

<sup>17</sup> Anutufa Reeaana innaaruqirana iriseenoo dadaaqufanoo Reea nammarifa kafaa amuaqu qaikinoo faiqi akoonaiqi maqanau. Moodaanna qisauku namu Yakooboonaasaa maqanau.

<sup>18</sup> Reea nammarifa maqaseenoo qinau. Qinee qeeqa ainainira maanaqa qeeqa qifaaqi amiafannanara maa faiqina Anutufa qini qiminoo. Mifa minara iriseenoo mi faiqina auqu Isakarane qinau.

<sup>19</sup> Reea nammarifa marikinoo kafaa amuaqu qaikinoo akoonaiqi moo maqanau. Dinni ani moodaa maraseenoo Yakooboonaasaa maqanau.

<sup>20</sup> Maqaseenoo qinau. Anutufa idaaqira ainaina kaqi qiminoo. Maqee dinni qisauku taikasee dinni ani moodaa 6 maraunannara qini qifaaqi qiniara aidiannoo. Mifa minara iriseenoo mi faiqina auqu Seeburuna fee qinau.

<sup>21</sup> Mina aanaaqianna Reea nammarifa maanaqa maqaseenoo Dinnaa nammari fee qinau.

<sup>22</sup> Miqooqari Anutufa Raseera nammarina innaaru qirana iriseenoo dadaaqufanoo faiqi maqarana amanaikinau.

<sup>23</sup> Mifa amuaquqaika mafufanoo faiqi akoonaiqi maqaseenoo qinau. Anutufa qini qisaurirana taikkeenoo qini faiqi akoonaiqi qiminoo.

<sup>24</sup> Raseera nammarifa minara iriseenoo qinau. Karaambaiqa qini faiqi moo akoonaiqi qimiani. Miqi qimaseenoo mi faiqina auqu Yooseefaa nee qinau.

*Yakooboofa Rabannana faqa mina ainaini marunara ufaqu ufafa.*

<sup>25</sup> Raseera nammarifa Yooseefaana maqasoo kamuqoo Yakooboofa Rabanna maaqi qimasee qimaminoo qinau. Anee amanee qini quqasainaa qeeqa maaqai fua.

<sup>26</sup> Qinee ani ainainammasaunana qimianna anaaseesa nari faiqi namu faqa qiminaqa maree fua. Qinee amiqimmasee ani ainaina iunnanara anee minara iri mariananoo.

<sup>27</sup> Rabannafa minara iriseenoo qinau. Qini afunee fannoo aniara qima qimifaqa iriseeqa anee qini faqa marunnaqoo Anutufa qini ainaina amiqi amiqifanoo fira qoo kambiqafinoo maridanoo.

<sup>28</sup> Qinee minara iridaqa anee aneenna feefauruara qinaqa qinee ani amianaara.

<sup>29</sup> Yakooboofa mina iriseenoo kafaa qimaminau. Anee qini ainainirana oosana amiqimmasee irimariananoo. Qinee ani aanda ainasaa rakisi mariafananoo qini rakisirana ameemaani marida moomoo kambiqee iriraa imariqau.

<sup>30</sup> Qinee aniafanna kari ani ainaina oodaa kai marinau. Qinee maaqoo ani maridaqa ani ainaina aiqamai auqaunanoo Anutufa dadaaqifanoo firaanaikinoo maridanoo. Qinee maqee qeeqaree qianna ainainausa maraanaura.

<sup>31</sup> Miqi qima soofanoo Rabannafa irinoo nari qimaminau. Doo anee qiananoo naqifee masee feefauru ani amianauree. Miqi qufanoo Yakooboofa qinau. Sia anee feefauru

munnimma aina qini qimia. Qeeqa qiannana kai qimia. Qinee kaqi ani sipsipasaa rakisi marianana qini maa iriranara anee eedoo qinaqa ani sipsipasaa rakisianaura.

<sup>32</sup> Qinee maqee ani sipsipauqa mariannai oonuree aiqama takoosa takoosira sipsipauqa faqa mimmi miqiranauga faqa sipsipa aanaaqi ruduqariranauga faqa maraanaura. Mi feerunara kai qini dididanoo.

<sup>33</sup> Qinee andeeqasee maraanaura anee kasooaqee aneenna oonu reenana qafaa. Eekara arira sipsipa qinindiki marinana eekara fee dunduqarira mimmi fee qinindiki marinana qiniara qumuara miaanoo qia.

<sup>34</sup> Rabannafa mina iriseenoo asasa mandee qinau. Eeoo maasa anee qianandeemmi- anaura.

<sup>35</sup> Mi faasaanna qumee kai mimmi akoona takoosa takoosa iranauqa faqa mimmi anaasee miqiranauga faqa eekarasai runduqasai irana faqa runduqarira sipsipauqa faqa moodaanaki quqaseenoo nari faiqi namuara qufaqa misasaa rakisiqua.

<sup>36</sup> Rabannafa Yakooboona maraandoo qimasee nari mimmi sipsipa mara mareenoo nari faiqi namusaa quqasoofaqa nianai qaaramoo afuru aanai faiqee oonuraaqaa irannai munu quqasee rakisi mariqau. Maree fifufanoo Yakooboofa akaqa sipsipauqa mafisoosasaa kai rakisi marinau.

<sup>37</sup> Rabanna sipsipasaa maqusai rakisida maridanoo saqari amimiuqa ateeqaseenoo moodaa mau apata ruata aquseenoo eekara ari marutina qandaseenoo sipsipa nammari nee maruqoo rakiqanau.

<sup>38</sup> Sipsipa mimmi nammari naidaqa miqoo ani raidaqa naafeeqaambaaqaa rimariqau. Yakooboofa mi saqarisa sipsipauqa difaaniki nammari neemaruqoo rakiqaoofanoo marufaqa sipsipauqa nammari narara anireeqa mi saqarina qafaidaqa akoonauqa anaasee naafeeqaambaaqaa riaqeeera rakianau.

<sup>39</sup> Mimmiuqaindi miqoo mina qafaidaqa akoonauqa anaasee naafeeqasoofaqa akarakaurira aanaaqiuqa maqaqau.

<sup>40</sup> Yakooboofa sipsipauqa nifiqeenoo akarakaurira mimmiuqa maruqoo munusaina sipsipa akoonauqa akarakaurirana qafaidaqa anaasee sipsipa naafeeqasaifaqa miqirana maqaqeeera nifiqee finau. Miqi marunannoo Yakooboofa akarakaurira aanaaqiuqa narindiki mareeqaida aaduma quqee marufanoo moomooki marinau.

<sup>41</sup> Nifaaqauqa faqaa sipsipa faqa mimmi faqa naafee qaambaaqaa rirara ufanoo Yakooboofa mi saqari asaanausa mareeqee nammari neemaruqoo rakiqeesoofaqa minakiaqa nidaqa naafeeqee mariqau.

<sup>42</sup> Nimudaani aanaaqi ummooqukiqa nusa naafeeqara rufanoo Yakooboofa sia mi saqarisa rakiqanau. Miqimmasee maru fanoo Rabananaindi amudaani aanaaqi ummooqurafauqa kai marufanoo Yakooboonaaindi nifaaqauqa faqaasa amiqirauka kai mariqau.

<sup>43</sup> Mi oosannannai Yakooboofa moomoo akinaina faqaafa marinau. Mina sipsipa mimmi moomoo uqanna mariqau. Mina ainainira fasiqauqa faqa aanaaseeuqa faqa kammeeruqa faqa doonkiuqa faqa moomoo qumbiqauqa mariqau.

## 31

*Yakooboofa Rabanna sia qimamirai sandoo ufafa.*

<sup>1</sup> Yakooboofa irufaqa Rabanna faiqi namu misa Yakooboona ainaina moomoo qafamaseeqa aqidaqa qiqau. Yakooboofa maasa qikoonaindi aiqama mareeqee narinni quqeenoo. Yaindaraanee maa firaa qumiasanna mareenoo fee. Maasa qikoonaindi kai mareenoo.

<sup>2</sup> Yakooboofa mi ufana iriseenoo quanda fufanoo Rabanna oori qafuofanoo sia ooqai undee oori runinoo marufanoo qafanau.

<sup>3</sup> Mi kamuqoo Karaambaiqa Yakooboona qimaminoo qinau. Doo findi finana aneenna akoona faqa aneenna ainaina maqai fua. Anee finaqa qinee ani faqa marianaura.

<sup>4</sup> Yakooboofa mi ufana iriseenoo sipsipa rakisi marunnaindari Raseera nammarina faqa Reea nammarina faqa naarooafaqa oonu roofanoo qima niminau.

<sup>5</sup> Ooqai inni nikoona oori sia runinoo mariufa maqee oori runifaqa qafaidaqa. Sia qiniara amiqi amiqidanoo. Miqimmi marifaqa qini qikoona Anutufa qini faqa mariufa maridanoo.

<sup>6</sup> Inneeqara irimariafanoo, qinee qeeqa afeekannai inni nikoona ainaini mariqifana.

<sup>7</sup> Miqi mariafanano mifa qini qikaru qimaseenoo qisauku qara 10 kari qini feefauru quandaqaandinoo. Miqi marifanoo Anutufa qifanoo sia qini mandaikamma qi- maqeenoo.

<sup>8</sup> Inni nikoona ainaina iafannana feefauru mina sipsipa nifaaqa takoosa takoosa irana kai mi aukuanna maqee marufaqa qinee mareeqee qeeqaindiki quqee mariqiafana. Inni nikoofa qini feefauruara nifaaqa akara kau rirausa kai maraannee qufaqa mina sipsipauqa mi aukuannai miqi ranauqa kai maqee marufaqa mareeqee qeeqara qeeqaindiki quqee mariqiafana.

<sup>9</sup> Miqimma saafananoo Anutufa inni nikoona aandau aina mareeqeenoo qinindiki kai quqaqiseenoo.

<sup>10</sup> Mimmi sipsipa nariqa araraiki maru anaana qinee qaina qafaafananoo mimmi akoonauqa aanaaseeuqa naafeeqee marufaqa qafaqiafana. Mi akoonausa aiqama akarakau rirausa faqa nifaaqa takoosa takoosa irausa faqa anaasee naafeeqee mariqau.

<sup>11</sup> Qinee qainasaa qafaafananoo Anutuna angiroo moo fannoo qini daarooafaqa qinee maqi qiafana.

<sup>12</sup> Foo qiafananoo qinau. Qafaa maa nifaaqa takoosa takoosira akoonauqa naafeeqaidafa. Qinee Rabanafa ani mandaikamma amaqee marina qafamasee qunanoo maa ainainafa kambiqaidanoo.

<sup>13</sup> Qinee ooqai Beeteera maqa maaqai ani afusaa koorooiafanna Anutusa maridaqa. Miqoo anee aqoo auqara ooni rakiqasee oorifa fadameena minasaa adiasae qiniara qima afeekaikinau. Doo maqee indaammamaree aneenna maqusai anirandee anee kambiqoonna maqanasaa fua.

<sup>14</sup> Raseera nammarisa Reea nammarisa qimannimi soofaqa Yakooboona ufa iriseeqa qimamiqau. Sia maasa qikoona qumiasana aina kaqi marinaqa maasa maraanaura.

<sup>15</sup> Mifa maaqandara aanaamuruara foora midanoo. Doo mifa maaqandasaa feefauru mara mareenoo doo nariki kai taikkeenoo.

<sup>16</sup> Anutufa maaqanda qikoona kinaana mareeqee maaqanda faqa maaqanda faiqi namu faqa nimifanoo maasaindi kamminoo maridanoo. Anutufa ani qimamindee ia.

<sup>17</sup> Yakooboofa misa ufa iriseenoo narí akoona maqai Kannaana maqasaa firara deedaqinau. Mifa narí aanaaqmaaka faqa narí faiqi namu faqa kammeeruqa saa quqasee oogu mari fufanoo finau.

<sup>18</sup> Yakooboofa narí mimmi sipsipa doonki kammeera aiqama Meesoopootamia maqusai marida maroo ainainausa aiqama mareeqee oorinni quqaseenoo doo narí inaaqianna Kannaana maqa maaqai finau.

<sup>19</sup> Rabannafa narí sipsipa asausi moosaa oonu aukirara fifufanoo Raseera nammarifa narí akoona maaqaki keeqa fufanoo narí akoona afunee ainaina maaqaki quqaqoonna qumee kai mara mareenoo kukeeqa mareenoo Yakooboona faqa sia qimamirai doo mara mareenoo narí afaaqi faqa finau.

<sup>20</sup> Yakooboofa Rabannana akaru qimasee sia qimamirai quqasee finau.

<sup>21</sup> Yakooboofa narí ainaina namu faqa mareenoo kai kaqi ufanoo finau. Fifi ufanoo Eeufarateesa nammarí taqa mareenoo dinni afainni oonu ranau. Doo miqooqari Kiriata aaqana qaannai oori ubeekamafi finau.

*Rabannafa Yakooboona afaqee fu ufa.*

<sup>22</sup> Qaarammoo faasaana aiqaroo fanoo Yakooboofa sandoonara Rabanna qimamiqau.

<sup>23</sup> Rabannafa minara iriseenoo narí aiku asauku aiqama nifiqee Yakooboona aanaaqiana afaqee finau. Dinni taikasee dinni oonu qaara marasee 7 afuru aanai fi faiqeenoo afaqee finoo oonu Yakooboona paqurinau. Kiriata aaqana moo amuaqu namusaa paqurinau.

<sup>24</sup> Rabannafa aanai faiqaqee ufanoo mi eendanaki Anutufa qaina afunnareenoo qimaminau. Anee sia Yakooboona manda ufa amia.

<sup>25</sup> Yakooboofa aaqanasaa narí uiqaana maqa usakaseenoo marufanoo Rabannafa narí ainaina faqa oonu reenoo mifa faqa narí uiqaana maqa Kiriata amuaqu namusaa usakanau.

<sup>26</sup> Usakaseenoo Rabannafa oonu reenoo Yakooboona qimaminoo qinau. Naqi fee ifanee qini qikaru qimaseenee qini qiraamuqmaaka rakiranakiara foora rarisammaree sandeenee.

<sup>27</sup> Naqi fee ifanee sia qima qimirai qikaru qimasee qumee quqasee sandeenee. Anee qini qima qiminaqau qinee idi namu faqa asasirana namu faqa piripunna faqa dukaanaa faqa aridaqau aiqani.

<sup>28</sup> Anee sia qini qima qimianaqa qeeqa qinaiqi mara faqa qeeqa qiraamuna qara faqa nimooqa saanana nifiqee aniaqaana. Anee furufarira ainaina auqaananoo.

<sup>29</sup> Qinee ani mandaikamma amaqara afeeka marifaqa marunanoo eenda eendaki ani akoona Anutufa qini rafaafu seenoo qinoo. Anee sia uqanna Yakooboona mandaika mamaqaa qifaqa sia mandaikamma amaqaanauara.

<sup>30</sup> Qinee iridaqa anee aneenna akoona maqa maaqara oonu mafi iriananoo aundura dapikifana qini qisee sandaanano. Naqaa fee ifanee qini maaqaki rakisi maria anutusa ummuara mamaree aninane.

<sup>31</sup> Yakoofoofa iriseenoo qimaminoo qinau. Qinee aniara nari araamuna qara rafiqaan-doo qimasee rufiasee sandeeqa.

<sup>32</sup> Ani maaqaki rakisi maria anutusa marainnana paqurimmaseenana kuqa arua. Doo qini qiku qisauku nifusaa qini ainaina moodaa moodaa mara qugaseenana aneenna ainaina paqurimmasee maraa. Yakoofoofa Raseera nammarifa nari akoona Rabannana unnaqira anutusa ummuarunara sia irirai miqi qinau.

<sup>33</sup> Rabannafa Yakoofoofa uiqaana maqaki keeqa fufanoo randoosia sia paqurinau. Miqooqari Rabannafa Reea nammarina uiqaana maqaki keeqafi randoosia. Kafaa miqooqari ainainira maanaaqagara uiqaana maaqaki faqa keeqafi randasee sia paqurinau. Miqooqari Rabannafa Raseera nammarina uiqaana maaqaki keeqafinoo randanau.

<sup>34</sup> Raseera nammarifa Rabannana maaqasaa rakisi maru anutusa mareeqeenoo kam-meera saririqa maaqaki quqaqoona ugeereseenoo minaki kukeeqaseenoo minasaa ooqu faaqe marinau. Rabannafa Raseera nammarina uiqaana maqaki aiqama ainainaki randasee qafoofanoo sia marinau.

<sup>35</sup> Rabannafa randeemarfanoo Raseera nammarifa nari akoona qimaminoo qinau. Oo qipoo sia qinee findi fuanana sia qini diqia. Qinee qimaaqai qafaidaqa sia findi fidaqa. Miqi qufanoo Rabannafa aiqama ainainaki randoosia sia paqurinau.

<sup>36</sup> Sia paqurufanoo Yakoofoofa amambaina qimasee aanoo qidanoo qinau. Qinee nana aagaranee maree fee. Nana sandufee rukiasaunana aranaqaifanee qiniara randamaree qumidanee.

<sup>37</sup> Anee qini ainainaki randeesee doo fee aneenna ainaina paqurinanee. Doo mina mareeqeenana aneenna faiqi namu nifusaa faqa qini faiqi namu nifusaa faqa quqasee ufa qida qafaa, yafee andeeqeenoo fee.

<sup>38</sup> Qinee moodaa fasiqa aiku asauku taikasee 20 aukuaana ani ainaina imariqiafana. Mi kamuqoo ani sipsipa ani mimmi sia moo fannoo dapi maqee mariqau, amiqi kai mimariqau. Sia ani sipsipa akoona moo arusee naqiafana.

<sup>39</sup> Kaasau faini ani sipsipa arusoofaqa qinee mina amudaani apata siamma ani uqafiqee mariqiafana qeeqaindi kai moo mareeqee mina amaaqa maqeeqa anindiki quqee mariqiafana. Ummuara fasiqa eendaki fee faasaana fee ummuara masoofana anee qiniara qunaqa qinee qeeqaindi mareeqee anindiki quqee mari qiafana.

<sup>40</sup> Qinee moomoo kari ani ainaina imariafananoo suani darinoo eendaki suara darinoo miqi marufaqa sia faiqee mariqiafana. Miqidaqa ani ainainasaa rakisi mariqiafana.

<sup>41</sup> Yakoofoofa qimamidanoo qinau. Qinee moodaa fasiqa aiku asauku taikasee 20 aukuaana ani ainaini mariafanausa marida. Qisauku qara taikasee qikunooqu qaara faqa qaara faqa marasee 14 aukuaana ani araamuna qara mararara ani ainainiaafanausa maridaqa. Dinni taikasee dinni oonu moodaa marasee 6 aukuaana ani sipsipa mimmi mararara kaifaa ainaini qiafana. Miqi mariafanana anee qisauku qara taikasee 10 kari anee qini feefauruara qikaru maakaru qimarinau.

<sup>42</sup> Abaraqaammuna Anutufa qini qikoona Isakeena Anutufa sia qini dadaaqinanau anee qiniara kaqi samu fua qinaqau qinee kaqi samu fini. Anutufa qini ummaara faqa qini kadaapirirana faqa qiqafamaseenoo eenda eendaki nari ufa irirana ani aminoo.

*Yakoofoofa Rabannasa moodaanakiku ufafa.*

<sup>43</sup> Rabannafa Yakoofoofa mi ufana iriseenoo qinau. Maa ani anaqa qara qini qiraamuna qara maridaqa maa ani faiqi namu qini qinaiqi mara maridaqa maa ani sipsipa qinindi uqanna maridanoo, maa aiqama ainaina anee marana nuanafa aiqama ainaina maaqoo marifa qinindi kai maridanoo. Qinee sia amana qeeqa qiraamuna qara faqa qinaiqi mara faqa rafaqa fuanaura.

<sup>44</sup> Doo maqee ani faqa moodaanaki ufa qirara deedaqidaga. Anindiri ooni aaku aakumasaananoo mifa maasa moodaanaki kira ufara daaqoo auqaannoo.

<sup>45</sup> Yakoofoofa minara iriseenoo eedoo qimaseenoo ooni firaatia qumaree kuradama seenoo daaqoo auqara ooni fee qinau.

<sup>46</sup> Miqimmaseenoo Yakoofoofa nari ainainira faiquqara qufaqa ooni moomoo suqusee aaku aaku iqau. Miqimmasee mi ooni aaku aaku irana aakaarinni ooqumarifi narana naqau.

<sup>47</sup> Namaseeqa Rabannafa mi oonisa auqureenoo Yageer Sahadutaa fee qimasee nari ufakiqari auqu ramasoofanoo Yakoofoofa nari ufakiqari Gareeda fee qinau. (Mi nuquna oosana daaqoo auqara ooni fee qimasee nari ufakiqari auquraqau.)

<sup>48</sup> Rabannafa Yakooboona qimaminoo qinau. Maa ooni aaku aaku irafa anindiri daaqoo auqarafa mariannoo. Minara mi maqusana auqu Gareeda fee qianaara.

<sup>49</sup> Rabannafa kafa maaqi qinau. Karaambaiqa fannoo maaqanda daraaniananoo mina afu fannoo maasasaa mariani. Miqi qimaseenoo mi maqusana auqureenoo Misipaa fee qinau.

<sup>50</sup> Rabannafa maaqi qinau. Anee qini qiraamuna qara mandaikamma nimaqeenaree moo anaasee fee mareennaree, qinee sia minara iriananoo Anutufa anindirisa rak- isidanoo.

<sup>51</sup> Maaqoo qinee ooni aaku aaku maqaunanoo anindiri qara qambaana maridanoo. Maaqoo daaqoo auqara ooni rakiqarafa faqa maridanoo.

<sup>52</sup> Maa ooni aaku aaku irafa faqa rakiqarafa faqa anindiri daaqoo auqarafa maridanoo. Qinee sia mina fiiqaree ani aruanaara. Anee faqa sia mina aiaaqaree qini darua.

<sup>53</sup> Abaraqaammanna Anutufa faqa Naqoorana Anutufa faqa maasa qambaana andeeqa qisaannoo. Rabannafa miqi qufanoo Yakooboofa qinau. Qini qikoofa Isakeefa innaaru qimamaqee mari Anutuna auqusaa qimasee afaqaanaree qimasee qima afeekaikinau.

<sup>54</sup> Miqi qimaseenoo Yakooboofa aanda aruseenoo mi aqaannasaa Anutuna aanda tatufusee suqaminau. Suqa amiseenoo Yakooboofa nari aiku asauku naaramasoo faqa moodaaqoo ooqu mari fufaqa mi aandauna ataraasa naqau. Namasee mi aqaannasaa faiqaqau.

<sup>55</sup> Kananaana findifufanoo Rabannafa nari anaiqimara faqa araaamuna qara faqa nimooqa namasee nimandamasee amaqaq finau.

## 32

### *Yakooboofa Eesauna oori qafarara deedaqu ufafa.*

<sup>1</sup> Yakooboofa miqooqari findi fufanoo nari anaukoo unnai aanai fimaru fanoo Anutuna angirooqa aanai ani paquriqau.

<sup>2</sup> Yakooboofa nindafamaseenoo qinau. Maa maqa maaqafa Anutuna uiqaana maqusa maridanoo. Miqi qimasee mi maqusana auqureenoo Maqaannaimmee qinau.

<sup>3</sup> Yakooboofa nari faiqi namu qaaramoo ufa maree nari afasaafa Eesau funnai fuaqeeera niiqoo faqa Eedoomma maqa maaqai fiqau.

<sup>4</sup> Miqoo qini qifasaana paqurimmasee qini maa ufana qimamiaqa. Qinee Yakooboosa ani ainainira faiqi maaqi qimasee ani Eesauna qini uriqararana qimamidaqa. Qinee Rabannana faqa maridaqa anirara masaidaqa mariifaqa maqee anidaqa.

<sup>5</sup> Qinee burimmakau faqa doonkiuqa faqa sipsipa faqa mimmiuqa faqa ainainira faiqiuqa faqa faqaasa maridaqa. Qinee aniara ufa quqaidaqa qini uriqararafa qini maa ufafa ani asoamamaqaanifeera qidaqa.

<sup>6</sup> Ufa mareefu fasiqausa oonu randee aniree Yakooboona maaqi qimasee qimamiaqa qiqau. Doo maasa ani afasaana qimamisaunanoo mifa nari ainainira fasiqauqa maqi handareeta 400 namu faqa maasa inaaqianna anidanoo.

<sup>7</sup> Yakooboofa mi ufana irufanoo aaququqoofanoo moomoo irirana maranau. Miq- ufano nari sipsipauqa faqa mimmiuqa faqa burimakauqa faqa kammeeruqa faqa qaaraki raina quqanau.

<sup>8</sup> Maaqi qimasee qimirinau. Eesaufa anireenoo moo usiranaki narinaqa moo usir- anakiqari amana sandeefaranoo.

<sup>9</sup> Miqimmasee Yakooboofa maaqi qimasee innaaru qinau. Oo Anutu, qini qinaakuna Abaraqaammanna Anutufa qini qikoona Isakeena Anutufa qini innaaru iria. Karaambaiqa anee qini qima qimiananoo aneenna maqa maaqai aneenna ainainiannai finaqa qinee aiqama ainaina andeeqa aisaanuranoo fee qinau.

<sup>10</sup> Oo Anutu anee qini amiqi amiqimma qisarana faqa ani mapukira dadaaqiranara faqa irunanoo uriqarafa qinee oorudupiqa maridaqa. Qinee ooqai Yooradanna nammari qeeqa saunu kai uqirausa taqaqiafana doo maqee qinee qaaraki rainarausa faqa anidaqa.

<sup>11</sup> Qinee qeeqa qifasaana Eesauna asaukukinaana asumu mara quqaqisaanneera innaaru qidaqa. Qinee minara rufiidaqa. Mifa anireenoo maasa faiqi anaasee faqa aiqama daru taikaandoora rufiidaqa.

<sup>12</sup> Anee maaqi qimasee qiniara qima afeekaikinau. Ani aiqama ainaina andeeqamma aisaanuranoo fee qinau. Ani moomoo faiqi asumu amianaqa sia amana moo fannoo asaana ruannoo, nukudara foora sia kasoo uqanna marifaranoo fee qinau.

<sup>13</sup> Yakooboofa miqi qimaseenoo innaaru qimaseenoo mi eendanaki miqoo faiqeenoo iaqoofanoo nari aanda Eesauna amiraree qimasee raina quqanau.

<sup>14</sup> Mifa mimmi anaasee 200 faqa mimmi akoona 20 faqa sipsipa anaasee 200 faqa sipsipa akoona 20 faqa raina aaduma quqanau.

<sup>15</sup> Miqimmaseenoo kaifaa kammeera anaasee 30 faqa nári aanaaqi naamma neemarusá faqa burimakau anaasee 40 faqa akoona 10 faqa doonki anaasee 20 faqa akoona 10 faqa raina quqanau.

<sup>16</sup> Yakooboofa raineeqeenoo aandaau oosana oosana naadu naadu kai quqaseenoo nári ainaini maru faiqisa moodaa moodaa mareeqeenoo minauqasaa rakisiaqeerá quqanau. Quqaseenoo maaqi qimasee qimanniminoo qináu. Innee qini qifunni fidaqa adaaraika masaidafa niana niana maridaqa fuaqa.

<sup>17-18</sup> Miqi qimaseenoo Yakooboofa indaarufu faiqina qimaminoo qináu. Qini qifasaafa Eesaufa paquri maseenoo irainana yafee ani uriqararafa maridanoo fee yaifee anee fidanee yana aandaqqee anee maree fidanee, qinana anee maaqi qimasee nári qimamia. Maa ainausa ani ainainira faiqi Yakoobofoonaindi maridanoo. Mifa nári uriqararana Eesauna amiannee qimasee quqasaifaqa maree anidaqa. Yakooboofa nári inaaqianna anidanoo mifoo qia.

<sup>19</sup> Yakooboofa indaarufu faiqina qimamundee kai minoo mina aanaaqiana fusa faqa miqi kaimmasee qimannimináu. Innee Eesauna paqurimmasee miqi kaimmasee qimamiaqa.

<sup>20</sup> Innee maaqi qiaqa. Eeoo ani ainainira faiqi Yakooboofa inaaqianna anidanoo mifoo qiaqa. Yakooboofa nári kai oonu mafi irinoo qináu. Qinee maa ainainausa amianannannoo mina irirana quandasaaannoo qiniara amiqi amiqiani. Qinee mina paqurimasaaannoo aqbee mifa qini numoo minniqisaannoo.

<sup>21</sup> Eesauna amaqqoo ainainausa indaarufu fifufanoo doo nári miqqoo mi uiqaana maqusanaki faiqanau.

*Yakooboofa Peenieera maqa maaqai angiroo faqa nári qumaree nári qumaree qu ufafa.*

<sup>22</sup> Mi eenda amuqusanai Yakooboofa findi fufanoo nári anaafa qara faqa nári ainainira anaasee qanda faqa nári faiqi namu qisaukuqara taikasee qikunni ooqu moodaa marasee 11 nifiqamareenoo Yabooka nammari fitaqamareenoo muqu afainai munu nisanau.

<sup>23</sup> Munusee niqamasooafa fufanoo nári aiqama aandaufa faqa mara quqasoofaqa misa faqa taqaqau.

<sup>24</sup> Taqa nimaqaseenoo náriara dinni afainni kaqi marináu. Marufanoo faiqi moo fannoo anireenoo aitata fufanoo Yakooboona qumaránau. Uaqeeidanoo nári rudammiqi nári rudammiqi idamarufanoo iaqarafa adeedi ranau.

<sup>25</sup> Sia mi fasiqafa Yakoboona uraaqaranau. Miqi usianoo asauku samu Yakooboona upisuna aranaiqi arináu. Miqubaqa Yakooboona upisuna arufanoo amudaani ootuparafa aikatamafufanoo raaqee raaqee inoo nináu.

<sup>26</sup> Taqoofanoo mi fasiqafa Yakooboona qimamináu. Doo qini quqasainafa fua, doo iaqarafa adeedi reenoo. Yakooboofa iriseenoo qináu. Sia ani quqaanaura. Anee qini qifaaqqooqa qima qimaqasainafa quqaanaura.

<sup>27</sup> Mi fasiqafa Yakooboona qimaminoo qináu. Ani auqu yafee. Aneenna auqu rainafa iria. Yakooboofa qináu. Qini duqu Yakooboosa maridaqa.

<sup>28</sup> Miqi qufanoo mi fasiqafa qináu. Maqee maaqqooqari Yakooboofa taikaannoo ani auqu Isaraeerafa marinnaranoo. Anee Anutuna faqa faiqi faqa aitatafi qumaraannannoo uriqararafa marianaqa minara ani auqu Isaraeera fee qidaqa.

<sup>29</sup> Miqi qimasooofanoo Yakooboofa mi fasiqana qimaminoo qináu. Aneenna auqu qimaqimia. Miqi qufanoo mi fasiqafa qináu. Nanaree anee qini duqu irirara iraidanee. Miqi qimaseenoo Yakooboona afaqqooqa qimama qaseenoo doo quqaseenoo fináu.

<sup>30</sup> Mi fasiqafa fifufanoo Yakooboofa qináu. Qinee Anutuna oori qafamaseeqa sia kuqiqá kaqi maridee qimaseenoo miqqoo auqureenoo Peenieera fee qináu.

<sup>31</sup> Suani afu ururoofanoo Yakooboofa Peenieera maqa quqaseenoo upisuna aidafi marufanoo reetaa reetaa qinoo fináu.

<sup>32</sup> Miqqooqari oosana arasee Isaraee maqannaasa sia aandaau upisunakinaa amaqi neemariqau. Maqee faqa sia naidaqa. Anutuna angiroo fannoo Yakooboona upisunaki arunara iridaqa sia naidaqa.

### 33

*Yakooboofa Eesauna paqurinau.*

<sup>1</sup> Yakooboofa qafoofanoo Eesaufa 400 fasiqa faqa anináu. Yakooboofa mina qafamaseenoo nári faiqi namu rainasee Reea nammarina faqa Raseera nammarina faqa ainainira anaasee qaraqanda faqa nimanau.



<sup>2</sup> Nimiseenoo indaaruu narí ainainira anaasee qara faqa nári faiqi namu faqa níiqoofaqa fiqau. Misa ninaaqianna Reea nammarifa narí faiqi namu faqa finau. Inaaqianna uqanna Raseera nammarifa narí faiqi Yooseefaana faqa finau.

<sup>3</sup> Yakooboofa misa noorinni indaaruu finau. Oonu reenoo dinni taikasee dinni oonu qaara marasee kari maqasaa mapaminoo fiufufanoo narí afasaafa maruqoo oonuranau.

<sup>4</sup> Eesaufa Yakooboona oori qafamaseenoo sandammamreenoo ani kaqaramma qumaraseenoo amooqananau. Miqanda aiqama qara qiki raqqaqau.

<sup>5</sup> Qiki raqaseenoo Eesaufa quanda fufanoo Yakooboona faiqi anaasee nindafamaseenoo qinuu. Maa ani faqa aniasa yausee maridee. Qufanoo Yakooboofa qinuu. Oo uriqararafa maa faiqi anaaseenoo Anutufa qini amiqi amiqimma qimaqeenoo.

<sup>6</sup> Miqi qimarufanoo Yakooboona ainainira anaaseeqara nári faiqi namu faqa Eesauna oorisaani ninuka tuqu naumoo amisee reendeeniqau.

<sup>7</sup> Miqanda ninaaqianna Reea nammarifa narí faiqi namu faqa anireenoo miqinuu. Mina anaqaqianna uqanna Raseera nammarifa narí faiqi Yooseefaana faqa anireenoo miqikai inau.

<sup>8</sup> Miqima soofanoo Eesaufa Yakooboona maaqi qimasee qimaminuu. Faasai qafaunna aandausa oosana naqaa fee inoo maridano fee qufanoo Yakooboofa qinuu. Ani aqoondikiraree qimasee kaqi ani amidaqa.

<sup>9</sup> Miqi qufanoo Eesaufa narí qimaminoo qinuu. Qinindi moomoo maridanoo aneenaindi aneenna kai maraa.

<sup>10</sup> Miqi qufanoo Yakooboofa qinuu. Qinee ani aqoondikiqa amunna ainainausa kaqi maraa. Anee qini kaaqa aqoondi kiannanara qinee ani oori Anutuna ooriaru foora qafaidaqa.

<sup>11</sup> Qinee ani amiraree qimasee maree anunna ainainausa maraa. Anutufa qini amiqi amiqimma qiseenoo qini didimari aiqama ainainausa qiminoo. Yakooboofa maraanifeera afeekai ki marufanoo Eesaufa maranau.

<sup>12</sup> Eesaufa Yakooboona qimaminuu. Doo uqeeraina anindiri fua qinee ani oorinni fuanana anee qini qinaaqianna ania.

<sup>13</sup> Qufanoo Yakooboofa qinuu. Oo qini uriqararafa anee iria, qini faiqi namu ummooqukiqa mariafaqa qinee sipsipa faqa misa anaqaqura faqa iridaqa. Misa moodaa faasaana rarisaaq fimarianaaq aiqama aandaqa kuqifaranoo.

<sup>14</sup> Anee indaaruu finaqa qinee ani afaqee kasooaqee qeeqa aandaqa faqa faiqi namu faqa fiqinaqa Eedoomma maqa maaqaki ani paqurianauranoo.

<sup>15</sup> Miqi qufanoo Eesaufa qinuu. Doo amana qini faiqi namu akaqausa ani dadaaqi fifaranoo. Qufanoo Yakooboofa qaoo qinoo qinuu. Qinee ani aqoondikunnanara minara kai firaa ainainee qidaqa. Doo amana qeeqa kai fuanauranoo.

<sup>16</sup> Eesaufa mi ufana iriseenoo doo mi faasaana kai anirandee narí maqa maaqai Eedoomma maqa maaqai finau.

<sup>17</sup> Miqufanoo Yakooboofa Sukoota maqa maaqai oonureenoo narí maqa faqa narí aandaau uqaana faqa usakanau. Minara mi maqusana auqureenoo Sukoota fee qinuu.

<sup>18</sup> Yakooboofa Meesoopootamia maqa maaqaindaru oonurandee amiqimmaseenoo Kannaana maqa maaqai Seekeemma maqusaki anireenoo narí uqaana maqa mi maqusana adeedi usakanau.

<sup>19</sup> Usakaseenoo Yakooboofa mi maqana Amoorana Seekeemana akoona aiku asauku unnai wan handareeta 100 siruua munnimmanoo feefaurinuu.

<sup>20</sup> Feefauru maseenoo tatufirana suqara qaanda auqureenoo mi kaqikaa maqusana auqureenoo Eeraa fee qinuu. Mi auquna oosana Isaraee maqannaasa Anutu fee qinuu.

## 34

*Seekeemafa Dinnaa nammarina mandaikamma amaqaanau.*

<sup>1</sup> Moo kari Dinnaa nammarifa Yakooboosa Reea nammarisa niraamuna fannoo Dinnaa nammarifa Kanna maqanna anaaseeuqa nindafaanee qimaseenoo finau.

<sup>2</sup> Seekeemafa Amoorana amaaku Qifina aiku asaukukinaafa mi maqa maaqanaki-naasa uriqararafa Dinnaa nammarina aanai paqurimaseenoo rarisana.

<sup>3</sup> Mifa qafoofanoo Dinnaa nammarifa kaaqa amiqirafa marufanoo amuqusa mandaikufanoo amiqira ufannoo mi manaqana amuqusa reendeenianee qimasee amiqira ufauqa qinuu.

<sup>4</sup> Seekeemafa narí akoona Qamoorana qimaminuu. Anee maa manaqana feefaurumma qiminaqa qinaaqara maraa.

<sup>5</sup> Yakooboofa narí araamuna Dinnaa nammarina rarisoona iriseenoo kasoo inoo marinau. Narí faiqi namu narí aandausaa rakisi marusa nianai marufanoo nifeesi marinau.

<sup>6</sup> Seekeemmana akoofa Ammoorafa Yakooboona faqa ufa qirara finau.

<sup>7</sup> Oonuroofaqa kai Yakooboona faiqi namu aandausaa rakisiusa aniraqau. Misa Dinnaa nammarina rarisoona irufanoo sia faiqi auqaqaa ira ainaina marufaqa kaaqa niraaneenoo nifai sandurina. Seekeemmafa Yakooboona araamuna rarisoona Isaraee maqannaasa nuqu mara maree quminau.

<sup>8</sup> Qamoorafa maaqi qimasee Yakooboona qimaminau. Qini qimaaku Seekeemmana irirafa ani araamunara firaqoo aqufifaqa ani qimamidaqa. Amanee mina maraannoo fee.

<sup>9</sup> Sainafa maasa moodaanaki kira ufa qimasaanaqa kaqi ani maqanna faqa qini maqanna faqa kaqi narí maree narí maree iaqa.

<sup>10</sup> Miqi mandaanaqa innee maa maqanasaa maridaqa kaqi dapi maa maqa maaqanaki oonuree aniree idaqa maqa akausa mariaqa.

<sup>11</sup> Seekeemmafa Dinnaa nammarina akoona faqa asooqmaaka faqa qimanniminoo qinuu. Innee qini didi marindee masaifaqa inni nidi mari ainaina nimianauro.

<sup>12</sup> Inni nidi mari ainainnara qimaqimifaqa nimianauro. Firaa feefauruara qifaqa nimianauro. Innee qiniara mina maraannee qimasee innee irairandinna ainainna kai nimianauro.

<sup>13</sup> Miqi qimasooafaqa Yakooboona faiqi namu nári nisookina rarisoona iriseeqa akuru qira ufa Seekeemmana faqa mina akoona Amoorana faqa qimannimiqau.

<sup>14</sup> Maaqi qimasee qimamiiqau. Maasa sia amana qeeqa dauna nifaqa ati sia aukiraua nimianauro. Miqifaqa maasa firaqoo qisauruanoora.

<sup>15</sup> Innee maasa daanna reeqa inneeqa faiqi namu nifaqa ati aukusaifaqa minara kai maasa eedoo qianauranoo.

<sup>16</sup> Miqimmasaifaqa maasa inniara eedoo qimasee inni faqa narí maree narí maree ifaranoo. Maasa inni qambaana maridaqa inni faqa moodaa maqanna marianaoranoo.

<sup>17</sup> Innee sia mi ufanara eedoo qimasee nifaqa ati ateekaifaqa maasa qeeqa dauna afiqamaree doo fuanaura.

<sup>18</sup> Mi ufasara Qamoorafa faqa mina amaaku Seekeemmafa faqa iriseeqa amanee qiqau.

<sup>19</sup> Seekeemmafa kai kaqi uqanna inoo misa qimamundee inau. Mifa Yakooboona araamunara aidi marunara miqinuu. Seekeemmafa narí aiku asaukukiqari kaaqa uriqararafa marinuu.

<sup>20</sup> Amoorafa narí amaaku Seekeemmasandiri ufa suqimaru maqusanasaa faandaaura kooqiki oonuree nári maqusanaki marusa maaqi qimasee qimanniminuu.

<sup>21</sup> Maa fasiqausa aqoonduqa maridaqa. Saifaqa maa maqanasaa maridaqa mana mana iqa nuqa. Maa maqafa firaafa maridanoo. Misa faqa amana marifaranoo. Maasa misa niraamuqmaaka maraanaqa misa faqa maasaindi mareefaranoo.

<sup>22</sup> Maa fasiqausa maasa qambaana marirara eedoo qidaqa moodaa mariranaki mariranara eedoo qidaqa. Maasa misa naanna reeqa qeeqa faiqi namu akoonaiqiuqa nifaqa ati ateekaaqeera qidaqa.

<sup>23</sup> Maasa miqianaqa misaki sipsipa burimakau aina marifa maasaindi kammiannoo. Anifaqa eedoo qianaqa maasa qambaana mariaqa.

<sup>24</sup> Aiqama mi maqusanakinaasa Qamoorana faqa Seekeemmana faqa ufa iriseeqa eedoo qimasee aiqama akoonaiqi qisakoosa nifaqa ati auku aqiuqa.

<sup>25</sup> Qaarammoo faasaana aigaroofaqa nifaqa ati aukugoosa firaqoo nammuana nidafi marufaqa Yakooboona amaaku qara Simeeonafa faqa Reefifa faqa miqanda Dinnaa nammarina asooki qanda nári faqaana qara mara maree umee kai Seekeemma maqusai ooru reeqara aiqama faiqi kumaaraa naru taikaqau.

<sup>26</sup> Qamoorana faqa Seekeemmana faqa narusee Dinnaa nammarina Seekeemmana maaqakinaana afiqamaree doo quqasee fiqau.

<sup>27</sup> Narusoofaqa Yakooboona faiqi namu akaqausa inaaqianna oonu reeqa nári nisookina rarisoona akiqara mi maqusanakina aiqama ainaina maraqau.

<sup>28</sup> Misa sipsipauqa faqa burimmakauqa faqa doonkiuqa faqa aiqama ainaina mi maqusanaki maruna faqa mi maqusana atiqara maru ainainausa aiqama maraqau.

<sup>29</sup> Misa aiqama amiqira ainaina kai maraqau. Aiqama faiqi anaasee faqa maraqau. Aiqama maaqakinaa ainainauqa faqa maree fiqau.

<sup>30</sup> Yakooboofa miqunara irinoo Simeeonna faqa Reefina faqa maaqi qimasee qimanniminuu. Inneeqara qini ummaarakki quqaqisaafanoo. Kannaa maqannaasa faqa

Peerisaa maqannaasa faqa aiqama maa maqa maaqanaki mariasa qiniara fidiagaammifaranoo. Qini faiqi sia moomoo mariafaqa, misa aiqama moodaanaki aniree qini dariqa aiqama maasa faiqi anaasee kuridi nimaqeeffaranoo.

<sup>31</sup> Yakoofoofa miqi qufaqa miqanda nari qimamiqa qiqaau. Maasa sia qeeqa qisookina quqaqaanaqa aanasaa aanaaseera foora kaqi maraqa nifaranoo.

## 35

*Anutufa Beeteera maqusaki Yakoofoona amiqira afaaqooqa aminau.*

<sup>1</sup> Mi fasannai Anutufa Yakoofoona qimaminoo qinau. Anee doo findi finana Beeteera maqa maaqaki oonu maria. Anee aneenna afasaana Eesaunara rufiasee sandoonaqa ani afusaa kooroo iafanna Anutusa tatufirana suqaqimira qainda miqoo oonuree auqa.

<sup>2</sup> Yakoofoofa iriseenoo nari aiku asauku faqa nari faqa marusa faqa qimanniminoo qinau. Moo maqannaasa unnaqira anutusa uaqeeianauqa mara aquaqa. Mara aquseeqa inneeqa nifaqa anukamasee amiqira qamunna afisuaqa.

<sup>3</sup> Maasa maaqooqari quqasee Beeteera maqa maaqai oonureeqa qini ummaara aukuaana dadaaqi mari Anutuna qinee aiqama atinai nunanoo qini faqa mari Anutuna tatufirana suqara qainda auqanauranoo.

<sup>4</sup> Miqi qimasoofaqa misa aiqamausa iriseeqa nariqa moosaaqaraa unnaqira anutusa maraqa nuna faqa naaqooki quqee maru fidinaanuna faqa Yakoofoona amufanoo umareenoo Seekeemma maqusaki arookasa aqa maqa indufusee minaki akundanau.

<sup>5</sup> Akundamaseenoo Yakoofoofa faqa nari faiqi namu faqa doo quqasee fufanoo firaa rufiarafa mi saqanna maru maqusausaki maru fasiqausa rafaqaqafuqaqia sia nifaqasee nariqa.

<sup>6</sup> Yakoofoofa aiqama nari faiqi namu faqa fifufanoo Rusa maqusa ki Kannaana maqa maaqaki onuranau. Maqee mi maqusana auqu Beeteera fee qidaqa.

<sup>7</sup> Mifa miqoo oonureenoo tatufirana suqara ooni qainda auquseenoo mi maqusanaki Anutufa uainaina afaafau reenoo Beeteera fee qinau. Yakoofoofa oqai nari afasaanara rufiasee sandeenoo miqoo aniroofanoo Anutufa miqoo mina afusaa koorooquoo marunara auqureenoo Beeteera fee qinau.

<sup>8</sup> Miqi qimasee miqoo marufanoo Reebeeka nammarina ainainira maanaqa Deeboora nammarifa kuqufuqaqa arookasa ameemaanai suani afu ataqee qaannai Beeteera maqusa dinni atinai akundaqau. Akundamasee mi maqusana auqureenoo ikiraqara saqari fee qinau.

<sup>9</sup> Yakoofoofa Meesoopootamia maqa maaqaindari oonu randee ani marufanoo Anutufa kaifaa mina afunni kooroommafufanoo amiqira afaaqooqa qimamaqanau.

<sup>10</sup> Miqimmaseenoo Anutufa qimaminau. Ani auqu Yakoofoofa maridanoo, maqee maaqooqari oosana arasee Isaraeerafa marinnaranoo. Miqi qimaseenoo Anutufa mina auqureenoo Isaraeeranee qinau.

<sup>11</sup> Miqi qimaseenoo Anutufa kafaqa Yakoofoona maaqi qimasee qimaminau. Qinee aiqama afeeka faqaa Anutusa maridaqa qimamidaqa. Anee moomoo faiqi faqaafa maria. Akaqa maqannaasa ani aiku asaukukiqari marifaranoo. Anee karaambaiquqaqia ninaakufa marinnaranoo.

<sup>12</sup> Qinee Abaraqaammanna faqa Isakeena faqa nimiafanna maqa maaqana ani faqa ani aiku asauku kasooqaaqee kambiqainausa faqa nimianauro.

<sup>13</sup> Anutufa miqi qimaseenoo Yakoofoona qimamiseenoo doo quqaseenoo finau.

<sup>14</sup> Yakoofoofa mi maqusana Anutufa qimamuqoo miqoo ooni marasee daaqoo auqaanifee qimaseenoo rakiqaseenoo uainna nammari qumareenoo mi oonina adia amaqaaseenoo oorifa fadameena faqa adianau.

<sup>15</sup> Miqimasee mi maqusana auqu Beeteera fee qinau.

*Raseera nammarifa eeraqanu ufafa.*

<sup>16</sup> Yakoofoofa nari faiqi namu faqa Beeteera maqusa quqasee Eefarataa maqusai fuane qimasee aanai fimarufanoo Raseera nammarifa faiqi maqarafa arinau. Arufanoo firaqoo uqanna aupuranau.

<sup>17</sup> Raseera nammarina aidafirafa kaaqa mandaika uqanna ufanoo mina dadaaqi maru aanaaseefa qinau. Raseera sia rufiaa, moo akoonaiqi maqaananoo.

<sup>18</sup> Maqaseenoo Raseera nammarifa doo kuqiraridanoo aanna taikee marufanoo mi faiqina auqureenoo Beenooni fee qinau. Mina akoofa auqu reenoo Beensaminna fee qinau.

<sup>19</sup> Raseera nammarifa kuqufuqaqa Eefarataa maqusai fimarua aannana afainni akundaqau. Maqee miqoo Eefarataa maqusara Beeteereeqeemma maqusa fee qidaqa.

<sup>20</sup> Yakooboofa aaqoo auqaanifeera ooni miqoo rakiqanau. Maqee kaqi mi oonifa Raseera nammarina madika mariuqoo maridanoo mi madikanara koorooidanoo.

<sup>21</sup> Miqooqari Isaraerafa findifinoo moo maqa maaqai Eedeera kisaafa ooni maaqa usakaqoona dinni atinni nari uqaana maaqa usakanau.

*Yakooboona faiqi namu nuqu.*  
(1 Stori 2:1-2)

<sup>22</sup> Isaraerafa mi maqa maaqanaki marufanoo Reeebeennafa nari akoona anaafa Biriqaa nammarina nari ainainira maanaafa maraqoona sakasee faiqanau. Isaraerafa mi ufana irufanoo arana qanau.

Isaraeerana faiqi namu qisauku qara taikasee qikunni ooqu qaara marasee 12 mariqau.

<sup>23</sup> Reea nammarina faiqi namu maaqimmiqa mariqau. Reeebeennafa indaaruaafa Yakoooboona ooqa faiqi marinau. Mina aanaaqianaafa Simeeoonafa faqa Reefifa faqa Yudafa faqa Isakaarafa faqa Seeburunafa faqa mariqau.

<sup>24</sup> Raseera nammarina faiqi namu Yooseefaasa Beensaminnasa mariqau.

<sup>25</sup> Raseera nammarina ainainira maanaafa Biriqaa nammarina faiqi namu Dannaafa faqa Napatarifa faqa mariqau.

<sup>26</sup> Reea nammarina ainainira maanaafa Siripaa nammarina faiqi namu Kadafa faqa Aseerafa faqa mariqau. Mi faiqi namusa aiqama Meesopotamia maqa maaqai kambiaqau.

*Isakeefa kuqu ufafa.*

<sup>27</sup> Yakooboofa nari akoofa Isakeefa unnai finau, Mamareena maqusaki Qeebooroona maqusa aafa Abaraqaammafa faqa Isakeefa faqa mariuqoo finau.

<sup>28</sup> Isakeefa 180 aukuaana maranau.

<sup>29</sup> Maraseenoo kuqufufaqa mina faiqi qara Eesausa Yakooboosa akundaqau.

## 36

*Eesauna aiku asauku nuqu.*  
(1 Stori 1:34-37)

<sup>1</sup> Eesauna aiku asauku marusa maaqimmiqa mariqau. Mina moo auqa Eedoomma fee qimarqau.

<sup>2</sup> Eesaufa Kannaana maqannaa aanaaseeuqa maranau. Indaaruu maroo anaaseena auqu Adaa nammarifa marinau. Mifa Qeeta maqannaa fasiqa Eeroona araamuna maranau. Mina aanaaqiana maroo anaaseena auqu Ooqooribammaa nammarifa maranau. Mifa Qifita maqannaa fasiqa Sibeeoona amaaku Annaana namarina araamuna maranau.

<sup>3</sup> Mina aanaaqianna maroo anaaseena auqu Baseemata nammarifa marinau. Mifa Isamaeerana araamuna Neebaootana asookifa marinau.

<sup>4</sup> Eesauna indaaruaqa anaasee Adaa nammarifa faiqi Eerifasana maqanau. Moo anaasee Baseemata nammarifa Reeeerana maqanau.

<sup>5</sup> Moo anaasee auqu Ooqooribammaa nammarifa Yeeusana faqa Yaramana faqa Koorana faqa maqanau. Eesauna mi faiqi namusa miqimmasee Kannaana maqasaa kambiaqau.

<sup>6</sup> Eesaufa nari aanaaqmaaka faqa nari faiqi namu faqa nari araamuqmaaka faqa aiqama mina maaqaki mariusa faqa aiqama nari aandaufa faqa aiqama nari qumisasana Kannaana maqusai maridanoo maraqoona aiqama mara mareenoo Yakooboofa maruqoo qari nianasaa moo maqa maaqai finau.

<sup>7</sup> Eesaufa faqa Yakooboofa faqa maru maqafa sia amana misa dadaaqiaqaa qufaqa Eesaufa quqasee moosaa finau. Misa kaaqa moomoo aandau ainaina marufaqa minara sia amana moodaanaki mariqau.

<sup>8</sup> Eesaufa Eedoomma maqa maaqakina amuaqu namusaa marinau.

<sup>9</sup> Eesauna aiku asauku maaqimmiqa mariqau. Misa Eedoomma maqannaasa ninaakusa marinau.

<sup>10-13</sup> Eesauna anaafa Adaa nammarina amaaku moodaa Eerifasafa marinau. Eerifasafa moodaannai qisauku faiqi maqanau. Teemmanafa faqa Oommarafa faqa Seefoofa faqa Katammafa faqa Keenasafa faqa mariqau. Moo anaasee Timinaa nammarinasaa moodaa akoonaiqi Amareekana maqanau. Eesauna moo anaasee Baseemata nammarifa akoonaiqi moodaa Reeeerana maqanau. Reeeerafa qaara faqa qaara faqa faiqi akoonaiqi maqanau. Naqatana faqa Seeraana faqa Sammaana faqa Misaana faqa maqanau.

<sup>14</sup> Eesauna moo anaasee Ooqooribamma nammarifa Anaana aramuna marinau. Anaafa Sibeeona amaaku marinau. Mi anaaseefa faiqi qaaramoo maqanau. Yeeusana faqa Yarammana faqa Kooraana faqa maqanau.

<sup>15-16</sup> Miqimmasee Eesaunakiqari aruaki kambiqarousa mariqau. Eesauna ooqa faiqi Eerifasafa maa maqannaasa ninaakufa marinau. Teemanaa maqannaasa faqa Oomaraa maqannaasa faqa Seefoo maqannaasa faqa Keenasaa maqannaasa faqa Koora maqannaasa faqa Katamaa maqannaasa faqa Amareeka maqannaasa faqa ninaakufa marinau. Misa aiqamausa Eesauna anaafa Adaa nammarinakiqari kambiqarousa mariqau.

<sup>17</sup> Eesauna amaaku Reeueerafa maaqimmasee maqannaasa ninaakufa marinau. Naqataa maqannaasa faqa Seeraa maqannaasa faqa Sammaa maqannaasa faqa Misaa maqannaasa faqa ninaakufa marinau. Aiqaama misauqa Eesauna anaafa Basemata nammarinasaqari kambiqarousa mariqau.

<sup>18</sup> Kaifaa maa maqannaasa Eesauna anaafa Ooqooribamma nammarina aramuna Anaana nammarinasaqari kambiqarou. Yeeusa maqannaasa faqa Yaramma maqannaasa faqa Koora maqannaasa faqa mariqau.

<sup>19</sup> Aiqaama mi maqannaasa Eesaunakiqari kambiaqa mariqau.

*Seeirana aiku asauku nuqu.*

*(1 Stori 1:38-42)*

<sup>20-21</sup> Eedoomma maqannaasa miqoo maridaqa rainasee qaara maqannaasaikammiga mariqau. Misa ninaakufa Seirafa Qoora maqannaafa marufafa minasaa aruaki maaqimmasee kambiaqau. Rootanafa faqa Soobarafa faqa Sibeeonafa faqa Annaafa faqa Disoonafa faqa Eeseerafa faqa Disanafa faqa minamusa Eedoomma maqannaasa ninaakusa mariqau.

<sup>22</sup> Rootanafa Qoorina oosana faqa Qeemmana oosana faqa ninaakufa marinau. (Rootanana auna Timinaa nammarifa marianau.)

<sup>23</sup> Soobarafa Arafana oosana faqa Manaqatana oosana faqa Eebarana oosana faqa Seefoona oosana faqa Oonamana oosana faqa ninaakufa mariqau.

<sup>24</sup> Sibeeonafa akoonaiqi qaraqanda maqanau. Miqanda nuqu Aiaafa faqa Anaafa faqa mariqau. (Anaafa nari akoona Sibeeonana doonkiuqa mareenoo andanda naaqeera kaasau maqa maaqaki munusoofaqa neemarufanoo rakisidanoo ida qeemaru nammarifa maqakiqari ururee maruna paqurinau.)

<sup>25-26</sup> Anaafa Disoona faqa mina auna Ooqooriba nammarina faqa nikoofa marinau. Disoonafa Qeemadana oosana faqa Eesabana oosana faqa Itarana oosana faqa Keerana oosana faqa ninaakufa marinau.

<sup>27</sup> Eeseerafa Biriqana oosana faqa Saafana oosana faqa Akana oosana faqa ninaakufa marinau.

<sup>28</sup> Disanafa Usana oosana faqa Arana oosana faqa ninaakufa marinau.

<sup>29-30</sup> Maaqimmasee Qooranasaqari kambiqoo maqannaasa Eedoomma maqa maaqaki mariqau. Rootanana maqannaafa faqa Soobara maqannaafa faqa Sibeeona maqannaafa faqa Annaa maqannaafa faqa Disoona maqannaafa faqa Eeseera maqannaafa faqa Disana maqannaafa faqa mariqau.

*Eedoomma maqannaafa karaambaiqa nuqu.*

*(1 Stori 1:43-54)*

<sup>31</sup> Isaraee maqannaafa karaambaiqa sia maru kamuqoo maa fasiqausa Eedoomma maqa maaqaki karaambaiqauqa mariqau.

<sup>32</sup> Eedoomma maqannaasa indaru rakisi nimaqoo karaambaiqana auqu Beerafa marinau. Beeorana amaaku marinau. Mifa Dinabaa maqusanaasa karaambaiqa marinau.

<sup>33</sup> Beerafa kuqufanoo Seeraana amaaku Yoobabafa karaambaiqa marinau. Mifa Boosaraa maqusanaafa marinau.

<sup>34</sup> Yoobabafa kuqufanoo Qusamafa Teemana maqa maaqakinaafa karaambaiqaikinau.

<sup>35</sup> Qusamafa kuqufanoo Beedadana amaaku Adadafa karaambaiqaikinau. Mifa Midianna maqannaasa Mooaba maqa maaqaki naru nifaqaaqa maseenoo Adadafa Afitaa maqusaki karaambaiqa marinau.

<sup>36</sup> Adadafa kuqufanoo Samarafa karaambaiqaikinau. Mifa Masareekaa maqusaki-naafa marinau.

<sup>37</sup> Samarafa kuqufanoo Saurafa Reeqooboota maqusakiqari Eeufarateesa namhari adeedi marufa karaambaiqaikinau.

<sup>38</sup> Saurafa kuqufanoo miqooqari Akaboonana amaaku Baaraqanafa karaambaiqa marinau.

<sup>39</sup> Baaraqanafa kuqufufanoo Qadarafa karaambaiqaikinau. Mifa Pau maqusanaasa karaambaiga marinau. Mina anaaga auqu Meeqeetabeera nammarifa Maatareeda nammarina aramuna marinau. Maatareeda nammarifa Meesaqabana anaiqi marinau.

<sup>40-43</sup> Eesaufa Eedoomma maqa maaqakina maru maqusausa kinaasa ninaakufa marinau. Timina maqannaasa faqa Arafaa maqannaasa faqa Yeeteeta maqannaasa faqa Oogooribamma maqannaasa faqa Eeraa maqannaasa faqa Pinoona maqannaasa faqa Keenasa maqannaasa faqa Teemana maqannaasa faqa Mibasara maqannaasa faqa Makadieera maqannaasa faqa Iramma maqannaasa faqa ninaakufa mariqau. Misa maru maqusausa nariqa ninaakusa nuqu nifaafau ramaqoofaqa marinau.

## 37

*Yooseefaana faqa mina afasausamara faqa ufa.*

<sup>1</sup> Yakooboofa nari akoofa Isakeefa mariu maqa maaqana Kannaana maqa maaqaki miqoo kai marinau.

<sup>2</sup> Maa ufafa Yakooboona faiqi namu ufa maridanoo. Yooseefaafa kumaaraa maridanoo qisauku gara taikasee qiku dinni taikasee dinni oonu qaara marasee 17 aukuaana faqaafa maridanoo nari afasausa faqa sipsipauqasaa faqa mimmiuqasaa faqa rakisimarinau. Nari akoona ainainira anaasee qara Biriqaa nammarisa Siripaa nammarisa faiqi namu faqa nidanoo rakisi marinau. Mina afasausamara manda oosana auqoonara nari akoona qimami marinau.

<sup>3</sup> Yakooboofa aiqama nari faiqi namuara aidimaruna uraaqaramaseenoo Yooseefaana aidi marinau. Mifa asooqa namuki maqoonara kaaqa minara aidi marinau. Mifa kisaaga qamunna kisaaga asauku faqaana auqu aminau.

<sup>4</sup> Mina afasausamara qafuofanoo misa nikoofa Yooseefaana aidi marufa uriqaranoo marufaqa misa firaqoo uqanna naundura mandaiki marufaqa mina faqa ufa qimariqau.

<sup>5</sup> Moo eendaki Yooseefaafa qainammaseenoo qafanau. Minara nari afasausa mara qimannimufaqa firaqoo uqanna fidiqaamma amaqaqau.

<sup>6</sup> Yooseefaafa maaqi qimasee nari afasausamara qimannimau. Qini maa qainnana iriaqa.

<sup>7</sup> Maasa aiqamausa qafuqaki maridaqa raisa fooqaairana atekasee rumbasee narisaa narisaa mundiiqanunoo innindi fannoo maqasaa aqufifanoo qinindi fannoo andeeqasee kikiqinoo mariinoo. Innindi fannoo qinindi oosanaki aqufifanoo fiqumma datimmafinoo ammuqu namu rambaqaki oosanai quminoo.

<sup>8</sup> Miqi qimasoofaqa mina afasausamara aqiqa qiqa. Kasooaqee anee karaambaiqaika mafi maasa rakisiqimaqeenaree. Miqi qimaseeqa mifa qainunara faqa misara qunara faqa iriseeqa firaqoo fidiqaamma amaqaqau.

<sup>9</sup> Moo kari mifa kafaqa qaina maseenoo nari afasausamara qima niminu. Innee iriaqa qinee qaina moommiga. Qinee qafaunanoo suani faqa uqoona faqa qisaukuqara taikasee qikunni ooqu moodaa marasee 11 fasau namu faqa qini daumooki aniree ninuka tuqu naumoo amisee mariafaqa niqafeeqa.

<sup>10</sup> Mifa nari akoona faqa mi qainufana qimamufanoo mina akoofa aqinoo qinau. Naqaa ira qaina fee inanee. Anee aneenna anoonara faqa aneenna afasausa marara faqa qiniara faqa ani aramandunnai ninuka tuqu naumoo amisee mariaqee fee qidanee.

<sup>11</sup> Yooseefaana afasausa mara nari nikaqara nirana qeemarinu. Miqi marufanoo mina akoofa aiqama ufara kaqi kai irimarinu.

*Yooseefaana Midianna maqannaasa nimisee feefauru maroo ufa.*

<sup>12</sup> Moo kari Yooseefaana afasausa mara nari nikoona sipsipa mara maree Seekeemma maqusai karasa naaqeera nifiqee fiqau.

<sup>13</sup> Oonu marufanoo Yakooboofa Yooseefaana qimaminoo qinau. Ani afasausa mara Seekeemma maqusai mariannai fua. Miqi qufanoo Yooseefaafa qinau. Qinee firara deedaqidaqa.

<sup>14</sup> Mina akoofa maaqi qimasee qimaminu. Anee oonureenana qafaa. Ani afasausa mara kaqi fee maridafee. Aandaqqa faqa amiqiqa fee maridee. Nindafamasee anireenana qimaqimia. Mina akoofa Heeboorona noopundukiari aiqoofanoo finau. Yooseefaafa doo findifufanoo fiftiufanoo Seekeemma maqusai onuranau.

<sup>15</sup> Oonureenoo nari afasausa mararara randanoo nidanoo oonuree aniree inoo nufanoo faiqi moo fannoo qafamasee mina iramirinoo qinau. Anee nanaree randaidanee.

<sup>16</sup> Miqi qufanoo Yooseefaafa qinau. Qinee qeeqa qifasausa mara sipsipasaa rakisi mariasara randaidaqa. Amanee anee misa mariannaira qini qima qiminnaree.

<sup>17</sup> Miqi qufanoo mi fasiqafa qinau. Misa doo quqasee fiqau. Misa Dootana maqa maaqai firaree qufaqa iriqiifana. Yooseefaafa mi ufana iriseenoo nari afasausa ninaaqianna fifufanoo Dootana maqa maaqai misa oonu paqurinau.

<sup>18</sup> Mifa nianai ani marufaqa mina afasausamara qafamaseeqa mina arirara tipundaariqau.

<sup>19</sup> Misa maaqi qimasee nari qimami nari qimami qimariqau. Doo qaininoo nifa anidanoo.

<sup>20</sup> Anifaqa mina aruseeqa mina iri mareeqee maa soorausaki mooki aqua. Miqim-maseeqa maasa minara kaasau aandau ariifoo qianauro. Maasa miqimmasaanano min qaina fannoo naqaa fee iannoo.

<sup>21</sup> Reeubeenafa misa ufa iriseenoo Yooseefaana saa ititaidano qinau.

<sup>22</sup> Kaqi maa kaasau maqa maaqanaki maa nammari madikanaki aqua. Sia aidafirana amia. Mifa miqi qimasee nari kai qimiriseenoo qumee afiqamaree nari akoofunnai muni aisarara miqi qinau.

<sup>23</sup> Yooseefaafa nari afasausamara maruqoo ururoofaqa qumarasee mina kisaqaqamunna kisaqaq asauku faqaana raipaaiqau.

<sup>24</sup> Miqimmaseeqa nammari aadana usufu madikanaki aqaiqau.

<sup>25</sup> Aquseeqa miqoo ooqu faqee narana naidaqa tautummasee qafoofaqa Isamaeerana aiku asauku aniqau. Misa Kireeata maqa maaqaindari Isipa maqa maaqai fimariqau. Misa adiafaa imarufaqa neemaru ainainna faqa afundimaru saqari anoonnana faqa mara kammeerasaa quqesees Isipa maqannaasa feefauriaqeera maree fiqau.

<sup>26</sup> Yudafa nari akaqaa fasaauqa qimanniminoo qinau. Inni saimbaqa qeeqa qikaqa arusee mina fidika rafaafufusee nana dadaaqirane maraanauree.

<sup>27</sup> Anifaqa Isamaeerana aiku asauku maa aniraasa nimianaqa feefauru qimiaqa. Mifa maasa qikaqa maridanoo maasa moodaa fidika marinara sia mina aidafirana amia. Miqi qufaqa misa eedoo qiqau.

<sup>28</sup> Eedoo qimarufaqa Midianna maqusanaasa ainaina feefauri marusa aniroofaqa misa nari nikaqa Yooseefaana madikakinaana qubaqeeqee misa nimisoofaqa siruaa munnimma moodaa fasiqa aiku asauku taikasee 20 nimisee doo Yooseefaana maree Isipa maqa maaqai fiqau.

<sup>29</sup> Misa Yooseefaana nimuna Reeubeenafa sia qafanau. Mifa anireenoo madikaki ooqu qafoofanoo sia marufanoo nari qamunna anaqaana qinau.

<sup>30</sup> Miqimmaseenoo Reeubeennafa nari akaqafasaaquq unnaa oonuree qimanniminu. Yooseefaafa sia maridanoo qinee naqi fee ianauree.

<sup>31</sup> Miqi qufaqa misa mimmi arusee Yooseefaana kisaqa qammunna mina fidikaki raaraa iqau.

<sup>32</sup> Miqimmasee misa mi qammunnana mara maree nari nikoofunnai oonuree qimamiqau. Maasa maa qamunnana moosaa paquriqa, qafaa, ani amaakundi fee maridanoo fee.

<sup>33</sup> Yakooboofa mi qamunnana qafamaseenoo qinau. Qini qimaaku qamunna maridanoo. Kaasau aandau fannoo qini faiqi Yooseefaana arusee rakeekaammaseenoo fee qinau.

<sup>34</sup> Miqi qimaseenoo Yakooboofa nari qamunna anaqana qiiseenoo soofaara qamunna afisuseenoo kisaqasaa nari faiqiara soofaarida marinau.

<sup>35</sup> Marufaqa mina faiqi namu faqa araamuqmaaka faqa anireeqa nari nikoona aundura reendeenira ufa qufanoo misa nikoofa qaoo qidanoo qinau. Qinee qeeqa faiqiara iki raqaqa fuannaqbaqa kuqiqa kuqirauusa mariannai fuanaura.

<sup>36</sup> Yakooboofa miqi marufaqa Midianna maqannaasa Yooseefaana afiqamaree Isipa maqa maaqai Pootifaana ainainira faiqi kianifeera amiseeqa feefauru maraqau. Isipa maqanna kinna maaqasaa rakisi marusakiqari Pootifaafa uriqarara oofisaa marufaqa amiqau.

## 38

*Tamaara nammarifa Yudana akaru qinau.*

<sup>1</sup> Mi aukuanna Yudafa nari ainaina minniseenoo Qiraana faqa Aduramma maqusai ooqu marinau.

<sup>2</sup> Miqoo Yudafa Kannaana maqannaasiqaa Suana araamuna qafamasee maranau.

<sup>3</sup> Mariufanoo mi anaaseefa amuaqu qaikinoo akoonaiqi maqasoofanoo Yudafa mina auqu Era fee qinau.

<sup>4</sup> Kafaa mariufanoo mi anaaseefa amuaqu qaikinoo faiqi moo maqaseenoo mina auqu reenoo Oonane qinau.

<sup>5</sup> Kaifaa amuaqu qaikinoo akoonaiqi moo maqaseeoo mina auqu Seeraa fee qinau. Yudafa Keesiba maqusai marufanoo mina anaaga fannoo Seeraana maqanau.

<sup>6</sup> Yudafa nari indaruqaa faiqi auqu Eerafa innooqa fufanoo anaasee Tammaara nammarina mara aminau.

<sup>7</sup> Eerana marirafa Karaambaiqa afusaa mandaika uqanna ufanoo kuqa arinau.

<sup>8</sup> Kuqufanoo Yudafa mina akaqa Oonana qimaminoo qinau. Anee maasa oosana maareenana aneenna afasaana anaaga faqa aana finanoo faiqi maqasainanoo ani afasaana auqu sia taikaani.

<sup>9</sup> Oonanafa mina iriseenoo maaqi qimirinau. Qinee faiqi maqasaananoo sia qinindi kiandoo qimaseenoo nari afasaana anaaga faqa aana nidanoo kaqinni kai nammari adiee marinai. Nari afasaana faiqi asumu sia marianifeera miqi marinai.

<sup>10</sup> Oonanafa mi oosanna maroofanoo Karaambaiqa qafoofanoo mandaika uqanna ufanoo mina kuqamma arinai.

<sup>11</sup> Kuqufufanoo Yudafa nari aanaakuqu Tammaara nammarina qimaminoo qinai. Aneenna akoono maqa maaqai oonu adeedaana kai marinaqa Seeraafa innooqa finaqa mina faqa ani kai amianauro. Seeraafa faqa nari afasaqanda undee inoo mi anaaseena marasee kuquandooro mina akoofa miqiqinai. Miqi qufanoo Tammaara nammarifa nari akoono maaqai finai.

<sup>12</sup> Mariufanoo Yudana anaaga Suana aramuna kuqinai. Kuqufufanoo soofaara taikaseeoo Yudafa nari aqoondi Aduramma maqusanaana mina auqu Qiraana faqa Timinaa maqusai nari sipsipa asausi aukimaruna niqafarara ooru finai.

<sup>13</sup> Faiqi moo fannoo Tammaara nammarina qimaminai. Ani aanaakuqu Timinaa maqusai nari sipsipa asausi atekarara ooru fidanoo fee qinai.

<sup>14</sup> Tammaara nammarifa mi ufana iriseenoo adeedaana marida afisiu qamunnana raipaquseenoo moo qamunna afisumareenoo nari oori kaqikaa qamunnannai ititaseenoo Eenaimma maqusaki fimaru aannanasaa oofuqaqee marinai. Tammaara nammarifa Seeraafa innooqanoo marifanoo sia qimiannoo fee qimasee miqinai.

<sup>15</sup> Yudafa ani qafoofanoo qamunnannai oori rafaqaqafusee marufanoo dapi maraqa nua aanaaseefa mifoo qinai.

<sup>16</sup> Miqi qimaseenoo aana afainni mi anaaseefa marufanoo oonuree qimaminai. Ani rarisama saana mina akiqara naqumma feefauru fee maridanoo fee. Yudafa mi anaaseenara sia nari aanaakuqu fee qimasee miqi qinai. Miqiqufanoo mi anaaseefa qinai. Mina akiqara nanee qiminnaree.

<sup>17</sup> Miqi qufanoo Yudafa qinai. Qinee mimmi moo timmusa ani amaqaanaura. Miqi qufanoo mi anaaseefa qinai. Anee moo ainaina qimiqaana uqaqeeiana kasooaqee mimmi qiminna kari ainna amianauro.

<sup>18</sup> Miqi qufanoo Yudafa qinai. Nana ainainee amianauree. Miqi qufanoo mi aneeseefa qinai. Aneenna asaukukinaa isaqama faqa aneenna saunu faqa qimia. Miqi qufanoo Yudafa minauqa amiseenoo mi anaaseena faqa aana numasoofanoo amuaqu qaikinau.

<sup>19</sup> Tamaara nammarifa findi fufanoo nari maqusai oonureenoo dapi anaasee maraqanu qamunnana raipaqusee adeedaana qamunna kaifaa afisinai.

<sup>20</sup> Yudafa nari qaqoondi Qiraanasaa mimmi aanaqi timmusa quqaseenoo muni mi anaaseena amisee nari ainaina uqaqeeuna oonu mini qimiannee qufanoo oonu randoosiaa sia mi anaaseena paqurinau.

<sup>21</sup> Mifa oonureenoo Eenaimma maqusanaa fasiqauqa iramirinoo qinai. Yaiffee dapi maraqanua aanaaseefa maa aannana afainni oofuqaqeeiufa maridanoo fee. Miqi qufaqa misa qiqau. Sia maa maqusanaki dapi maraqanua aanaaseefa maridanoo.

<sup>22</sup> Miqi qufanoo mi fasiqafa kafia anirandeenoo Yuda funnai oonureenoo qimaminai. Oo qinee sia mi manaqana paquriqa. Mi maqusanakinaa fasiqauqa faqa qifa, sia oogaindari maasa maqusaki dapi maraqanua aanaaseesa marida miaafoo qia.

<sup>23</sup> Miqi qufanoo Yudafa qinai. Saina mi anaaseefa mi ainainausa uqaqee iani. Faiqi maasara naanaidara qifoora qikooqaidanoo. Minara qinee mi anaaseena feefauru amirara qunana anee oonuree sia paquriananoo.

<sup>24</sup> Qaarammoo quqoona aiqaramafufanoo Yudana qimamiqa qiqau. Ani aanaakuqu fannoo dapi maraqanua aanaaseesara foora numaseenoo maqee mifa amuaqu qaikinoo maridanoo. Yudafa mi ufana iriseenoo qinai. Mi anaaseena maree munusee idara-saifanoo qaani.

<sup>25</sup> Misa afiqee fimarufanoo nari aanaakuqu Yudanara ufa quqanau. Qinee maa ainainausa faqaa fasiqa faiqi uqa faqa maridaqa. Qafamasee iria, yana aininauqee maridanoo fee. Maa qisaqaqamafa faqa mina sanda faqa saunu faqa yanaindi fee maridanoo fee.



<sup>26</sup> Yudafa qafamaseenoo qinau. Maa anaaseefa andeeqanoo maridanoo. Qinee kai aaqeeqa. Qinee qeeqa qimaaku Seeraana amiaqaana. Miqi qimaseenoo Yudafa sia kaifaa mi anaaseena faqa aana finau.

<sup>27</sup> Mi anaaseena faiqi maqarafa aniroofaqa qafeeqa qiqa. Maa anaaseefa qaara faiqi maqaannoo fee qiqa.

<sup>28</sup> Faiqi maqarara aupuree marufaqa moo fannoo naaree asauku quqasoo qumuroofanoo mina innaammuna afeesu aanaaseefa asauku qumaraseenoo taatuqee sanda rumbaseenoo qinau. Maafa indaarugaafa maridanoo.

<sup>29</sup> Miqi qimasoofanoo asauku raqandaamma maroofanoo moo kaiqeena naaree maqanau. Maqasoofanoo innaamunai afeesu aanaaseefa qinau. Anee naqa fee ifanee kaqinnaindarii anee naaree qumidane. Minara mina auqureenoo Peereesane qinau.

<sup>30</sup> Mina inaaqianna mina akaqa taatuqee sanda asaukusaa rumberana maqanau. Maqaseenoo mina auqu Seeraa fee qinau.

## 39

### *Pootifaana anaqa faqa Yooseefaana faqa ufa.*

<sup>1</sup> Isamaeerana aiku asauku Yooseefaana afigamaree Isipa maqa maaqai muqusoofanoo Isipa maqanna karaambaiqa Faraona sundiauga rakisirafa Pootifaafa Yooseefaana feefaurinau. Pootifaafa Faraofa maruqoo rakisii maru sundiasa uriqararafa marinau.

<sup>2</sup> Karaambaiqa Yooseefaana faqa maridanoo dadaqi marufanoo aiqama ainaina auqoofanoo anoona kai kambiqee marinau. Mifa nari Isipa maqanna uriqararana maaqaki marinau.

<sup>3</sup> Pootifaafa qafooofanoo karaambaiqa Yooseefaana faqa maridanoo aiqama ainaina auqoofa anoona kambiqee marinau.

<sup>4</sup> Pootifaafa Yooseefaana arasammaseenoo uriqarara ainainira faiqikammaqoofanoo marinau. Miqimmaseenoo mifa Yooseefaana mareeqee nari maaqasaa faqa nari aiqama ainainasaa rakisirafaikamma qoofanoo marinau.

<sup>5</sup> Miqooqari Yooseefaana kai qidanoo karaambaiqa fannoo Isipa maqannaasa maaqakinaa aiqama ainaina faqa Pootifaana maaqakinaa ainaina faqa mina maqakinaa nara ainaina faqa amiqi amiqimma nimaqee marinau.

<sup>6</sup> Pootifaafa mana mana kaimmi marinau. Sia nari ainainara irimarinau, naranara kai irimarinau. Yooseefaafa amudaani tifa amiqirafa uqanna maria.

<sup>7</sup> Kaqi kaaqoo marinoona mina uriqararana anaqa fannoo Yooseefaana aidufanoo qimaminau, aniree qini faqa faqa.

<sup>8</sup> Miqi qufanoo Yooseefaafa qao qimaseenoo qimaminoo qinau. Qini uriqararafa sia maaqaki quqaqai ainainasara iridanoo. Qinee marunanoo sia iridanoo. Mifa nari aiqama ainainasaa qini quqaqifaqa rakisidaqa.

<sup>9</sup> Qinee maa maaqanaki rakisira afeeka mifa uaqeeindee kai masee uaqee idaqa. Mifa sia moo ainaina qini kulkeeqa qimaqa qaifanoo maridanoo aiqama ainaina qimiqaifanoo, ani kai sia qimiqaifanoo. Naqi fee mandee fee qinee maa manda oosanna auqamasee fee Anutuna mandaikamma amaqaanauree.

<sup>10</sup> Pootifaana anaqa fannoo aiqama faasaana Yooseefaana qini faqa faqaannee qimarufanoo Yooseefaafa sia mina faqa faqa.

<sup>11</sup> Moo faasaana Yooseefaafa nariara maaqaki ainaina auqanoo nufanoo sia moo ainainira faiqi minaki marinau.

<sup>12</sup> Nariara marufanoo mi anaaseefa mina siuta ani qumareenoo qinau. Doo ania. Aniree qini sakasee faqa. Miqi qimaseenoo Yooseefaana siutandauru qumaroofanoo mifa nari siuta kai raipaqueeqee mina asaukuki quqaseenoo rafudamakufanoo madaana sandanau.

<sup>13-15</sup> Madaana sandoofanoo Pootifaana anaqa fannoo qafamaseenoo nari maaqaki ainaini maru faiqisa naaramaseenoo qinau. Innee maana qafaqa. Maa Qeeburu maqanna fasiqana qini qifaqi fannoo maaqaki miniqaiqa maasa mandaikamma qima qaidanoo. Mifa qini rarisara rifaqa qinee fraaqoo faqa runanoo mifa nari siuta qini daqa quqasee sandeeno.

<sup>16</sup> Mifa miqi qimasee qimannimiseenoo mi siutana kaqi uaqeufannoo Yooseefaana uriqararafa aniranau.

<sup>17</sup> Aniroofanoo mi ufana kai qimaminau. Maa Qeeburu maqanna anainira faiqina anee miniqaanafa qini maaqaki keeqafi qini faqa manda oosana auqarara inoo.

<sup>18</sup> Miqifaqa qinee faqa runanoo nari siuta qini daqa raipaku quqasee madaana sandeeno.

<sup>19-20</sup> Yooseefaana uriqararafa mina irufanoo aranaqoofanoo Yooseefaana qumareeqee uriqararausa rumbara fasiqauqa marunaki quqanau. Quqasoofanoo minaki marinau.

<sup>21</sup> Marufanoo karaambaiqa Yooseefaana faqa maridanoo dadaaqida amiqi amiqimma amaqee marufanoo karabusasaa rakisi marufa Yooseefaana qafamaseenoo asasinau.

<sup>22</sup> Karabusasaa rakisi marufa Yooseefaana mareeqee karabusauqasaa rakisiranaika minau. Miqimmasoofanoo Yooseefaafa karabusa maaqaki aiqama ainaina auqee maruna rakisirafa marinau.

<sup>23</sup> Karabusasaa rakisirafa Yooseefaafa rakisi maru ainainausara sia amiqimasee iridanoo. Sia rakisi marinau. Karaambaiqa fannoo Yooseefaana faqa marunara aiqama ainaina mifa auqoofa anoona kai kambiqee marinau.

## 40

*Yooseefaafa karafusaki marusa qainuna kooroo qimaru ufafa.*

<sup>1</sup> Kaqikaqoo marinoo Isipa maqannaa karaambaiqa uainna anoona tatimaru fasiqafa faqa mina feemu suqee marufa faqa nariqa uriqararana mandaikamma amaqaqau.

<sup>2</sup> Mandaikamma amaqasoofanoo mi qandara aranaqoofanoo nari sundiauqara qufaqa qumaraqau.

<sup>3</sup> Qumaraseeqa sundiauqa uriqararana karabusa maqaki Yooseefaafa maru maqanaki quqanau.

<sup>4</sup> Mi qanda kisaqasaa karabusaki marufanoo karabusasaa rakisirafa qufanoo Yooseefaafa misasaa rakisi marinau.

<sup>5</sup> Miqoo karabusaki maridaqa moo eendaki uainna tati marufa faqa feemu suqee marufa faqa qainiqau. Uainna tati marufa mina qaina oosana aaduma marinau. Feemu suqee marufa mina qaina oosana aaduma marinau.

<sup>6</sup> Mi kananaana miqanda noori runusee marufanoo Yooseefaafa ani nindafeenoo irimirinoo qinau.

<sup>7</sup> Inneeqara nanaree kaaqa moomoo irira irida maridee.

<sup>8</sup> Qufaqa miqannda qiqau. Maaqanda qaina maqaqee idaqa qaina oosana qimannimi marifa sia marifaqa maaqanda minara oonu mafi irida maridaqa. Yooseefaafa miqanda ufa iriseenoo qima nimiranau. Anutufa kai qaina oosana qimannimirana nimiranoo. Inneeqa qaina qima qimifaqa iria.

<sup>9</sup> Miqi qimasoofanoo Faraona uainna nammari tati maru fasiqafa nari qaina maaqi qimasee Yooseefaana qimaminau. Qinee qafaunanoo uainna sanda qini doorinni marifaqa qafeeqa.

<sup>10</sup> Qaarammoo asaana minasaa marifaqa qafeeqa. Amanee ifaqa qafaunanoo afufeenaarifaqa qafaunanoo qaqama irafi akuqeenoo.

<sup>11</sup> Qinee karaambaiqa Faraona kaafa uaqeidaqa akuqamafina minaki anoona tatiisee muni amiqa.

<sup>12</sup> Yooseefaafa mina iriseenoo maaqi qimasee qimaminau. Sanda qaarammoo asaana qafaannana mina amana qaaramoo faasaana marinnara.

<sup>13</sup> Qaaramoo faasaana taikainanoo Faraoofa ani iduku aisainana kafa aneenna saikaki finnarano. Anee ooqai mina uainna tatira faiqi maridana mina uainna kaafa amunnandee inana kaifaa aminnarano.

<sup>14</sup> Anee miqimma finana qiniara qimudao qimasee karaambaiqa Faraona qimaminanoo qini dadaaqinoo iduku qisaani.

<sup>15</sup> Misa ooqai qini Qeeburu maqusaindaraana ummuara mamaree aniqau. Qinee maaqoo Isipa maqa maaqaki marida sia moo manda oosana mareeqa. Misa fifau qini karabusaki quqaqaafaqa maridaqa.

<sup>16</sup> Feemu suqee marufa nari aqoonnana qaina oosana qimamuna irufanoo amiqufanoo Yooseefaana qimaminoo qinau. Qinee faqa moo qainammiga. Qinee qaarammoo feemu difaani qumbiqarana qikiiaqa akuqee idaqa qafeeqa.

<sup>17</sup> Meeragoqarara difaaniki oosana oosana feemu ainaina uriqararanaindi marifanoo ufiniuga nee mariafaqa qafeeqa.

<sup>18</sup> Yooseefaafa mina qaina oosana iriseenoo maaqi qimasee nari qimaminau. Qaarammoo difaani qafaanafa qaarammoo faasaana maridanoo.

<sup>19</sup> Qaaramoo faasaana amana mina qaaramoo feemu difaani marifana qafaananoo. Qaaramoo faasaana aiqarainanoo Faraoofa ani ani qumareenoo munusee anuka atekasee ani iri saqarisaa dirisainaga ufiniuga ani amaqi neefaranoo.

<sup>20</sup> Miqimasee qima nimisoofanoo miqooqari mi qaaramoo faasaana aiqaroofanoo mikari Faraona maqoo aukuanafa aniroofanoo narana firaqoo suqaseenoo nari

ainainasaa rakisi marusa nimirau. Mifa narí uainna tati maruna faqa feemu suqee maru fasiqana faqa idukumaree mini narí ainainasaa rakisi marusa nifusaa quqanau.

<sup>21</sup> Idukuseenoo uainna tati maru fasiqana mareeqee ooqai mareeu saikanaki kafia quqasoofanoo uainna tatimarinau.

<sup>22</sup> Feemu suqee maruna idukuseenoo anuka atekasoofaqa sandannai mina qiri saqarisaa diriqau. Aiqama ainaina Yooseefaana ufamau andeeqaseenoo mimau kaimbinau.

<sup>23</sup> Uainna tati marufa kafia Faraona ainainidanoo Yooseefaanara siamma irinau. Qaunusee marinau.

## 41

*Yooseefaafa Faraona qaina oosana kooroo ufaa.*

<sup>1</sup> Qaara aukuaa aiqaroofanoo moo eendaki Isipa maqannaa karaambaiga Faraofa moo qaina maaqimmasee qafee fee qinau.

<sup>2</sup> Qinee Niru nammmari afainni kikiqiga marida qafaunanoo qisauku dinni taikasee dinni ani qaara marasee 7 burimakau nifaaqa faqaasa urureeqa andanda nee mariafaqa qafeeqa.

<sup>3</sup> Neemarufaqa dinni qisauku taikasee dinni oonu qaara marasee 7 nimudaani aanaaqi nammarikiqari urureeqa indaaruu qaasa naaqa nammmari afainni kikiqamma fuafaqa qafeeqa.

<sup>4</sup> Nimudaani aanaaqiqa nifaaqa faqaasa aiqama nambiqama saafaqa qafeeqa. Mi ainainasaa qainasaa qafamaseenoo karaambaiga Faraofa tauti findifinau.

<sup>5</sup> Mifa kaifaa afuki qaunduarufanoo faifufanoo moo qaininau. Sakumma moodaa oosana saa dinni qisauku taikasee dinni oonu qaara marasee 7 iranoo marufa aiqama anoona qumbi qumbiqirafa marufanoo qafanau.

<sup>6</sup> Kafia mina aanaaqianna moo qaina qafooofanoo dinni taikasee dinni ani qaaraqanda marasee 7 sakumma moodaa oosanasaa iranoo marinau. Anoona siaifa narana maaqina kinaafa mandaikirafa sia anoona marufa, ufai fannoo raudaqoo fara foora marufanoo fifau akee kai marinau.

<sup>7</sup> Anoona siai sakummafa quandaku fanoo anoona faqaa sakumma aiqama namasanau. Mi qainna maseenoo Faraofa tauti findi fufanoo Boo moo qainammidaqee qinau.

<sup>8</sup> Mi kananaanna Faraofa findi fufanoo moomoo irirana maroosia Isipa maqannaa irirana faqaasa faqa afunee fasiqauqa faqa naaranau. Naaramaseenoo narí qainuna qimannimufaqa sia moo fannoo amana mina oosana narí qimamiqau.

<sup>9</sup> Minara tutu qidaqa randee marufanoo Faraona uainna tati maru fasiqafa Yooseefaanara iriseenoo Faraona qimaminoo qinau. Oo karaambaiga maqee kai qeeqa furufarifanna oosanna oonu mafi iriseeqa kooroommasee qimamidaqa.

<sup>10</sup> Ooqai anee aanoo qimaseenana qini faqa feemu suqee maruna faqa aneenna sundia rakisirana maaqaki quqaqisanau.

<sup>11</sup> Moo eendaki maaqanda qaina qiqiafana. Mi qaina qanda naadu naadu oosana faqaa qaina qiqau.

<sup>12</sup> Minakina Qeeburu maqannaa kumaaraa moo fannoo, sundia rakisirana Pootifaana ainainira faiqi marufa maasa faqa marinau. Maasa qeeqa qaina qimamifanoo mifa mina oosana maasa qimaqiminu.

<sup>13</sup> Mifa qundee kaimminau. Anee qini saikaki kaifaa mara quqaqiseenana feemu suqee maruna d irinau.

<sup>14</sup> Faraofa mi ufana iriseenoo niqiqoofaqa Yooseefaana karabusa kinaana aqee uqanna afiqee aniqau. Mifa oosau suqaseenoo narí qamunna fuka afisumareenoo Faraona afusaa aniranau.

<sup>15</sup> Aniroofanoo Faraofa qimaminau. Qinee qainammasaunaqa sia moo fannoo mina oosana qimaqimia faqa iriqa. Anee qaina oosana kooroo qimarianafa mariannanara qimaqimiafaqa aaraidaqa.

<sup>16</sup> Miqi qufanoo Yooseefaafa qinau. Oo qini uriqararafa amiqirafa qinee qeeqa kai sia amanaikianauranoo. Anutufa kai qaina oosana qimannimirana qiminaqa qimami-anaura.

<sup>17</sup> Miqi qimasooofanoo Faraofa narí qaina oosana Yooseefaana maaqi qimasee qimaminau. Qainunnana qinee Niru nammmari afainni kikiqiga maridaqa qafeeqa.

<sup>18</sup> Qafaunanoo burimakau nifaaqa faqaasa dinni qisauku taikasee dinni oonu qaara marasee 7 nammarikiqari urureeqa andanda neemariafaqa niqafeeqa.

<sup>19</sup> Misa ninaaқиanna miqi kaimmaseeqa dinni qisauku taikasee dinni oonu qaara marasee 7 misa nimana kai nimudaani aanaaqi urureeqa kikiqamma fuafaqa nindafeeqa. Miqira mandaikira burimakauqa sia ooqai Isipa maqa maaqaki mootinai mariafaqa qafeeqa.

<sup>20</sup> Nimudaani aanaaqi burimakauqa nifaaga faqaasa namataikeea.

<sup>21</sup> Nambiqamaseeqa sia moo fannoo nifaaga mareea, ooqai mariundee kai miqa mariafaqa qafeeqa. Nindafamaseeqa tauti findi fiqa.

<sup>22</sup> Qinee moo qaina faqa masee qafaunanoo dinni qisauku taikasee dinni oonu qaara maraseenoo 7 sakuma aiqama qumbi qumbiqirafa moodaa saqarisaa marifaqa qafeeqa.

<sup>23</sup> Mina aanaaқиanna qafaunanoo kafaa moo sakuma saqarisaa dinni qisauku taikasee dinni oonu qaara maraseenoo 7 iranoo marifaqa qafeeqa. Mifa anoona siaifa ufai uqinoo rauda quqaqai fara fooro marifaqa qafeeqa.

<sup>24</sup> Ira fifaqa qafaunanoo anoonna siaifa indaaru iraina anoona sakumma nambiqa-masaafaqa qafeeqa. Qinee mi qainnana afunee fasiqauqa qima nimunaqa sia moo fannoo mina oosana qimaqimia.

<sup>25</sup> Yooseefaafa mina qaina ufa iriseenoo Faraoona qimaminoo qinau. Anee qainian-nana oosana moodaara qaraqanda qaina ianano. Anutufa auqaaninna ainainnara qainasaa ani qimaminoo.

<sup>26</sup> Dinni qisauku taikasee dinni oonu qaara marasee 7 burimakau afaaga faqaana qafaannana oosana dinni qisauku taikasee dinni oonu qaara marasee 7 aukuaana qafaananoo. Sakumma dinni qisauku taikasee dinni oonu qaara marasee 7 sakuma anoona qumbi qumbiqirana faqa qafaanafa mifa faqa miqikai inoo dinni qisauku taikasee dinni oonu qaara marasee 7 aukuaana maridanoo. Mi qaina qanda oosana moodaa maridanoo.

<sup>27</sup> Dinni qisauku taikasee dinni oonu qaara marasee 7 burimakau nimudaani aanaaqi nammariki ururaasa faqa dinni qisauku taikasee dinni oonu qaara marasee 7 sakuma anoona siaina qafaannana oosana 7 aukuanaki aandaroo firaafa mariannoo.

<sup>28</sup> Qinee qimamunandee kaimmiannoo. Anutufa nari auqaaninnanara ani uqafiqeenoo.

<sup>29</sup> Dinni qisauku taikasee dinni oonu qaara marasee 7 aukuanaki Isipa maqa maaqaki narana firaago rairaa iannoo.

<sup>30</sup> Mina aanaaқиanna kafaa miqi kai inoo dinni qisauku taikasee dinni oonu qaara marasee 7 aukuaana aandaroo naruannoo. Mi aandaroonaki mi rairaira narannara qaunifaranoo. Aandaroo fannoo maqa maaqa mandaika uqanna masaannoo.

<sup>31</sup> Mi aandaroo aukuanaki faiqi anaasee doo rairaira aukuanara qaunu uqannasee-faranoo. Aandaroo firaafa mandaika uqanna irafa marianinnanara miqifaranoo.

<sup>32</sup> Anee kaifaa kaifaa qainiannana oosana Anutufa mi ainainna kasooaqee kuqaa miqianoo.

<sup>33</sup> Minara anee aneenna maqannaasakina moo qafamaseenana irirana faqaa fasiqa mara quqasainanoo mifa Isipa maqa maaqasaa rakisiani.

<sup>34</sup> Anee akaqa rakisirausa quqasainaga moodaannai qisauku taikasee dinni oonu qaara marasee 7 rairaira aukuanakina oosana oosana narana moodaannai qisauku namu kinaana moodaa moodaa mara afeediaqa.

<sup>35</sup> Anee qimanniminaqa aiqama narana rairaira aukuanakinaana suqu quqaaqa. Anee afeeka ufa nimisainaga narana maqusa maqusaki suqu quqasee minasaa rakisiaqa.

<sup>36</sup> Mi narannafa dinni qisauku taikasee dinni oonu qaara marasee 7 aukuaana aandaroo firaafa anianinnanaki mi afeediranakinaana neefaranoo. Miqidaqa sia faiqi anaasee kuqifaranoo.

*Yooseefaafa Isipa maqannaasa uriqararafaikinau.*

<sup>37</sup> Faraoofa faqa nari uriqararausa faqa Yooseefaana iriranara eedoo qiqa.

<sup>38</sup> Miqi qimaseenoo Faraoofa qimanniminoo qinau. Maasa sia amana moo fasiqa Yooseefaana uraaqararana paqurianaura, Anutuna maraquna minaki marifa marinara saifanoo mifa kai mariani.

<sup>39</sup> Miqi qimaseenoo Faraoofa Yooseefaana qimaminoo qinau. Anutufa kai maa aiqama ainainna ani uqafiqeenoo. Anee aiqamausa urinnaaqara masee firaq irirana faqaafa akooqoo mariananoo.

<sup>40</sup> Qinee ani quqasaanana qini maqa maaqasaa rakisinnaranoo. Aiqama qini faiqi anaasee ani ufa mau kai fifaranoo. Ani afeeka fannoo qini afeeka ameemaana mariannoo.

<sup>41</sup> Miqi qimaseenoo Faraoofa kafaa Yooseefaana qimaminou. Qinee maqee ani mareeqee Isipa maqannaasa uriqararafai kammiqa.

<sup>42</sup> Miqi qimaseenoo Faraoofa narí asauku amukakinaa rinna fíraa uriqararausa rinna maruna raduku Yooseefaana asaukuki quçanau. (Yooseefaafa mi rinnanannai peennakina raaraa maseenoo papiqasaa atooqasoofaqa maqanna maqanna mina qafeeqa Faraoona rinna akara fee qimaseeqa kaaqa rufieeqa mi papiqana saaqaraa ufara eedoo kai qimariqau.) Faraoofa amiqira qamunna afisu amaqaaseenoo koorannai auqira kukukakana faqa rufu amañanau.

<sup>43</sup> Miqimmasoofanoo Faraoofa uriqararausa nifiqanoo nu qoosa karana Faraoofa Yooseefaana amisoofanoo minasaa rakisira sundiauqa mina afunni fidaqa maaqi qimasee faaqaridaqa qiqau. Amaaraqa amaaraqa. Mi oosannanannai Yooseefaana aiqama Isipa maqannaasa uriqararanaikinai.

<sup>44</sup> Faraoofa kafa Yooseefaana maaqi qimasee qimaminai. Qinee uriqararausa Faraoosa qimamidaqa. Sia amana Isipa maqanna fasiqa moo fannoo narí aidiranannai moo ainaina uqaannoo. Mifa anisaa naaree iraannoo.

<sup>45</sup> Miqi qimaseenoo Faraoofa Yooseefaana fuka auqu reenoo Safeenata Paneeanee qinai. Miqi qimasee mifa Yooseefaana anaasee aminai. Mi anaaseena auqu Aseenata nammarifa Pootifeerana araamuna marinai. Pootifeerafa Qeerioopoorisa maqusanaasa suani afuara innaaru qimarusa aanaiqikirafa marinai.

<sup>46</sup> Yooseefaafa moodaa fasiqa faqa moo fasiqa asaukuqara taikasee 30 aukuaana marasee Faraoona ainainirana oosana aranau. Oosana araseenoo Faraoona aiseenoo Isipi maqa maaqaki oonuree aniree idanoo aiqama atinai nimarinau.

<sup>47</sup> Qisauku dinni taikasee dinni ani qaara marasee aukuanaki Isipa maqa maaqaki narana moomoo kambiqafi rairaa inau.

<sup>48</sup> Mi aukuaana namunakinaa narana irairaa una Yooseefaafa mareeqeenoo maqusaiqa afeedinau. Mi moodaa moodaa maqusanaki mi maqusana fiq u fiqinoo maru maqanakinna naranna marasee mi maqusanaki afeedinau.

<sup>49</sup> Mi naranausa unakiisoofanoo ooruku nammari afaiqarara nukudara foora moomoo uqanna marufanoo Yooseefaafa asaana rusia minnisanau.

<sup>50</sup> Aandaroo aukuaana sia ani marufanoo Yooseefaana anaqa Aseenata nammarifa akoonaiqi qaara qanda maqanau.

<sup>51</sup> Maqasoofanoo Yooseefaafa qinai. Anutufa qini dadaaqifaqa qeeqa aupurarana faqa qeeqa qikoona atiara iriranara faqa auniqa. Miqi qimaseenoo mifa narí indaaruaqa faiqi auqureenoo Mannasee nee qinai.

<sup>52</sup> Kafa Yooseefaafa akoonaiqi moo maqaseenoo qinai. Anutufa maa maqa maaqanaki qinee aupurarana maree marunnanaki faiqi qiminoo. Miqi qimaseenoo mifa narí inaaqiannaai faiqi auqureenoo Eefaraimmanee qinai.

<sup>53</sup> Qisauku dinni taikasee dinni oonu qaara marasee 7 aukuanaki narana irairaa imarufaqa Isipa maqannaasa asasiufa taikanau.

<sup>54</sup> Yooseefaafa undee kai inoo qisauku dinni taikasee dinni oonu qaara marasee irairaa ira aukuaana aiqaroofanoo aandaroo kambiqanau. Aiqa maqa maaqaki aandaroo narinau. Isipa maqa maaqaki kai narana kaqi marinai.

<sup>55</sup> Mariufanoo Isipa maqa maaqaki faqa aandaroo narufaqa faiqi anaasee Faraoo funnai oonuree naranara faaqarida innaaru qufanoo mifa qinai. Innee Yooseefaa finnai oonu raifanoo mifa innandee innandee kai iaqa.

<sup>56</sup> Aandaroo firaafa Isipa maqa maaqaki aiqama atinai firaqoo narufanoo Yooseefaafa aiqama afeedira maqauqa atuqasoofaqa Isipa maqannaasa narana feefauri mariqau.

<sup>57</sup> Aiqa maqa maaqaki maru fasiqa aanaaseesa aandaroo firaafa naru faqa aiqama atinaindari narana feefaurirara Yooseefaa funnai Isipa maqa maaqaki aniqau.

## 42

*Yooseefaana afasausamara narana feefaurirara Isipa maqsai oogu fu ufafa.*

<sup>1</sup> Yakooboofa Isipa maqa maaqai narana moomoo marunara narí faiqi namu qimanmininoo qinai. Innee naqaa fee ifaqee narana minni oogu maraqaana maridee.

<sup>2</sup> Isipa maqa maaqai narana maridanoo mifoo qiafaqa iriqa. Miqoo ooqueeqa akaqa narana feefaurumma maree murusaifaqa namasee sia kuqua.

<sup>3</sup> Miqi qufaqa Yooseefaana afasausa mara moo anaasee faiqi namu qisauku gara taikasee marusa narana feefaurirara Isipa maqa maaqai oogu fiqau.

<sup>4</sup> Yakooboofa Yooseefaana akaqa uqanna Beensaminna sia aiqanau. Moo ainaina mina afaaqai kambiqandoo qimasee rufisee sia aiqanau.

<sup>5</sup> Aandaroo firaafa Kanna maqa maaqaki nári marunara Yakooboona faiqi namu faqa moomoosa faqa narana feefaurirara oogu fiqau.

<sup>6</sup>Yooseefaafa Isipa maqa maaqakinaasa uriqararafa maridanoo aiqama maqa maaqak-inaasa feefauriaqee qimasee quqaqoofaqa feefauri mariqau. Yooseefaana afasausa mara ooquree Yooseena oorinni noorindari maqasaa kummaraqau.

<sup>7</sup>Yooseefaafa nari afasausa mara noori nindafoofanoo Yooseefaana irirafa kambiqanau. Kambi qoofanoo sia misara iridanooora foora aranaiqi iramirinoo qinai. Innee yaindarifee anidee. Qufaqa misa qiqau. Maasa Kannaana maqusaindari narana feefau rirara qumidaqa.

<sup>8</sup>Miqi qufanoo Yooseefaafa misara iri marufaqa mina afasausa mara minara sia iri mariqau.

<sup>9</sup>Yooseefaana irirafa kambiga fufanoo mifa oogai nari faiqi saa qainunara oonu mafi irinai. Innee nipuraraa fasiqauqa mariafaqa nindafaida. Innee mai qumuree maasa aandaroo darifaqa ummoqokida mandaiki marunau qumu qiqafarree qimasee qumuafanoo.

<sup>10</sup>Miqi qufaqa misa maaqi qimasee nari qimamiqau. Oo uriqararafa sia maasa miqianaara. Maasa ani ainainira faiqiara foora narana feefaurirara qumidaqa.

<sup>11</sup>Maasa moodaa fasiqa faiqi namu kai maridaqa. Maasa kuqaa ufa kai qimarunaua maridaqa. Uriqararafa maasa sia nipuraraa fasiqau maridaqa.

<sup>12</sup>Miqi qimasooofanoo Yooseefaafa nariqa qima niminoo qinai. Innee unna qimariafanoo. Maasa maqa maaqa mandaikinoo sia afeekaikinoo marina qafarara qumuafanoo.

<sup>13</sup>Misa mi ufana iriseeqa kafa nari qimamiqa qiqau. Uriqararafa, maasa aiqama qisaukuqara taikasee qikunni oogu qaara marasee 12 maridaqa. Kanna maqa maaqaki moodaa fasiqa faiqi namu mariafannanakiqari moodaafa kuqinai. Maasa ninaaqian-aafa maasa nikoona faqa maqusai kaqi maridanoo.

<sup>14</sup>Yooseefaafa mina iriseenoo kafa qima niminoo qinai. Doo qinee qidaqa, innee nipuraraa fasiqauqa mariafanoo.

<sup>15</sup>Qinee maaqimmasee inni nimanammasee qafaanaara. Qinee Faraona auqusaa inni qima nimidaqa sia innee ooru fifaranoo maaqoo marifanoo inni nikaqa qumurainaqa ooruffaranoo.

<sup>16</sup>Innikiqari moo fannoo ooru inneeqa nikaqa afiqee qumuqa. Innee akaqausa sundiaufa faqa marifaqa innisaa rakisi marifaqa maasa innee qia ufana qimasee qafamasaana ooruffaranoo. Innee unna qifaqa kuqaa Faraona auqusa qimannimidaqa innee nipuraraa fasiqa marifanoo.

<sup>17</sup>Miqi qimasee Yooseefaafa qufaqa misauqa rumbeeqee karabusa maqaki quqa-soofaqa qaaramoo faasaana mariqau.

<sup>18</sup>Qaaromoo faasaanasaa marisoofanoo Yooseefaafa maaqi qimasee qima nimanai. Qinee Anutunara rufiee marunna fasiqausa maridaqa. Innee qini ufa mau fiqa amiqimmasee marifanoo.

<sup>19</sup>Inniara kuqaa qira fasiqauqee qiaqeeera inniqiqari moodaafa innee maria karabusanaki marinaqa innee akaqausa narana feefauru maqaana muru inneeqa faiqi anaasee nimifaqa naaqa.

<sup>20</sup>Innee ooruree inneeqa nikaqa innaqianaana afiqeeqa qumuqa. Qumu raifaqa qinee inniara kuqaa ufa kai qimariasee qimasee sia kuqa naruanaua. Miqi qufaqa misa aiqamausa mina ufara eedoo qiqau.

<sup>21</sup>Eedoo qimasee nari qimami nari qimami qiqau. Innisaimbaqa kuqaa qeeqa qikaqa mandaikamma amaqa qiafana. Mifa firaa ummaaraki maridanoo dadaaqiaqee qimarufaqa innisaimbaqa sia iri qiafana. Minara maasa maqee maa ummaaranaki maridaqa.

<sup>22</sup>Reeubeenafa misa ufa iriseenoo maaqi qinoo qinai. Qinee qaoo qiafana innee sia iriqau. Mifa kuquna akiiqara maasa maqee ummaara maridaqa.

<sup>23</sup>Yooseefaafa misa qimaru ufana umee kai irimarinai, miqi marunara misa sia iriqau. Misa Yooseefaana faqa ufa qianee qimasee qimarufanoo moo fasiqa fannoo misa ufa quandee marinau.

<sup>24</sup>Yooseefaafa misa ufa iriseenoo quqasee umeenni oonureenoo ikiraqa seenoo oonu randee aninai. Iki raqarafa taikoofanoo ufaqirana amanai kufanoo oonu randee aninai. Anireenoo misakina Simeeonnana qumarasee misa nifusaa rumbanau.

*Yooseefaana afasausa qumumaree Kannaana maqusai ooru fu ufafa.*

<sup>25</sup>Yooseefaafa nari ainainira faiqiuqa qimannimufaqa narana mina afasausamara uqa umbiqaseeqa misa munnimma kaifaa nariqa uqa adianai uqarumasee nimiaqa, aanai fida neefandinna narana faqa nimiaqa qufaqa eedoo qimasee miqimma nimiaqa.

<sup>26</sup> Mina afasausa mara feefaurummasoo naranna nariqa doonkisa qaqasee maree ooru fiqau.

<sup>27</sup> Yooseefaana afasausa mara narana nari doonkisa qaqasee maree fiifi ufaqa eendufaga aanai uqaana arasee faigarara imarufanoo mina afasaafa moofannoo nari doonki narana amirara nari uqa ooraqasee qafoofofanoo mina munnimma uqa adianai marufanoo qafanau.

<sup>28</sup> Qafamasee nari ainaina naaramaseenoo qinuu. Innee aniree qafaaga qini munnimma kaifaa qiga qimianfanoo qini uqaki maridanoo. Miqi qufaqa misa nimuqusa mandaikufaga rufiaidaqa qiqau. Anutufa maasa naqaa feemua qimaqeenoo fee maaqinoo fee.

<sup>29</sup> Miqi qimasee faiqaqee mariufaqa iaqoo kananaana nari nikoofa Yakooboofa marunai Kanna maqusai ooruree aigama mi ainainausa kambiqoonara qimamiqau.

<sup>30</sup> Isipa maqanna karaambaiqa fannoo aanoo qira ufa kai maasa qima qimaqeenoo. Mifa maasara innee qini maqa maaqaki nidaqa nipuree mariafanoo fee qimasee rairai qinoo.

<sup>31</sup> Miqi qifaqa maasa maaqi qimasee nari qimamiqa. Oo maasa sia nipuraraa fasiqau maridaqau. Maasa kuqaa ufa qimarunausa maridaqa.

<sup>32</sup> Maasa moodaa fasiqa faiqi namu qisauku qara taikasee qikunnooqu qaara marasee 12 maridaqa. Maasa qikaqa moo fannoo nari akoona faqa Kannaana maqusai maridanoo, moo fannoo kuqinuu.

<sup>33</sup> Maasa miqi qimasee qimamianfanoo mifa mina iriseenoo qinoo, qinee maaqi masee inni nimanida qafaanauree qinoo. Innikiqari moodaafa qini faqa marinaqa innee akaqausa sakumma aina maree muru faiqi anaasee nimiaqa.

<sup>34</sup> Nimiseeqa narana taikainaqa kafa qumiqa innee nikaqa faqa afiqee qumuaqa. Muqusaifaqa qinee mina qafamaseeqa inniara kuqaa sia nipuraraa fasiqauqee kuqaa ufakai qimariasee qimaseeqa inni faiqi iduku nimianaqa innee maqee maqee narana aina feefaurida ooruree qumuree qiga nuaqee qinoo. Misa miqi qimasee nari nikoona qimamiqau.

<sup>35</sup> Qimamiseeqa nari uqauqa idukusee ooraqasee qafoofofanoo aigamausa munnimma kaqi marinau. Misa qafamasee nari nikoona Yakooboona faqa rufiaqau.

<sup>36</sup> Yakooboofa rufiaidanoo maaqi qimasee nari faiqi namu niqinuu. Innee qini faiqi namu mandaika maqimaqee mariafanoo. Yooseefaafa doo taika fufaqa, Simeeonafa faqa taika fifaqa kafa innee Beensaminna faqa afiqee firaree qidee. Qinee ummaaraki kai maridaqa.

<sup>37</sup> Reeubeenafa nari akoona ufa iriseenoo maaqi qimasee nari akoona qimaminuu. Oo qipoo, qinee Beensaminna rakisianaura. Qinee sia mina afiqee ururaanana mina akiiqara qini qimaaku qara narua. Anee qini qisaukuki quqasainaqa qinee amiqi masee afiqaga niiniinaqa afiqee uruanaura.

<sup>38</sup> Miqi qimasoofofanoo Yakooboofa qinuu. Qini qimaaku sia uqanna inni faqa fuannoo. Mina afasaafa doo kuqu fufaqa mifa nariara maridanoo. Aanai mandainaina paqurinaqa qinee maaqiraua asooqa inni mi ummaarafa darinaqa kuquanoora.

## 43

*Yooseefaana afasausamara Beensaminna uru afiqee kaifaa Isipa maqa maaqai ooqu fu ufa.*

<sup>1</sup> Kannaana maqa maaqaki aandaroo firaafa narino mandaika uqanna inau.

<sup>2</sup> Isipa maqa maaqai feefaurummamaree murusoo naranna Yakooboona aiku asakuu nama taikasoofofanoo Yakooboofa nari faiqi namu qimanniminuu. Kaifaa ooquree kaqikaa narana feefaurumma murusaifaqa naa.

<sup>3</sup> Miqi qimasoofofanoo Yudafa qinuu. Mindaraa uriqararafa maasa oori runusee qimaqimifaqa iriqa. Innee innee nikaqa sia afiqee qumiqa sia qini qifusaa nifaranoo fee qinoo.

<sup>4</sup> Anee qini qikaqara eedoo qinaqa maasa afiqee ooquree ani narana feefaurianaura.

<sup>5</sup> Anee sia eedoo qinanoo maasa qikaqa sia ooqu finaqa sia amana fifau ooqu fuanaura. Mi maqannaasa uriqararafa qinoo inni nikaqa sia quminaqa sia qini qifusaa nifaranoo fee qinoo.

<sup>6</sup> Yakooboofa mi ufana iriseenoo qinuu. Innee nanaree moomoo ummaara qini qimidee mi uriqararana qimamiqa maasa qikaqa maridanoo fee qifee.

<sup>7</sup> Misa iriseeqa kafa qimamiqa qiqau. Mi uriqararafa maasara faqa maasa faiqi aanaaseera faqa ireenoo. Inni nikoofa kaqi fee maridanoo fee qinoo. Kafa inni nikaqa

moo maridanoo fee qinoo. Miqi qimasee maasa iraifaqa qimamiqa. Maasa naqaa fee masee maasa qikaqa afiqee qumuaqee qianinnanara irianauree. Sia maasa iriqa.

<sup>8</sup> Miqi qimasee Yudafa narí akoona maaqi qimasee qimaminau. Qipoo anee maasa qikaqa qini qisaukuki quqasainaqa maasa doo findifi ooqu fuanauranoo. Miqinaqa maasa sia daara rainaqa kuqunauranoo.

<sup>9</sup> Qinee qeeqa marirana mina amaaqa maqaanaura. Anee minara qini kikiqaqaa usua. Qinee sia afiqee andeeqasee anee iannannai uriqa qinee ani nifairirana maraanaura.

<sup>10</sup> Maasa sia ani faqa kisaqaqasaa ufa qifau, maasa amana qaara kari ooquree ururee unaiqini.

<sup>11</sup> Miqi qufanoo misa nikoofa qimanniminau. Doo amana inneeqa miqiqaa miqiqaa. Innee maa maqa maqana kinaana amiqira ainaina inneeqa uqaki rumammareeqa kaqi nimi maria ainainnara foora muqu mi maqannaasa uriqararana amiaqa. Saqari anoona qoodaa faqa ookasaasa anoona qoodaa faqa adiafaa imari saqari qaamana anoona faqa oofauna fooqaa ira ainaina anoona faqa kasa fooqaana anoona faqa maree ooqu fuaqa.

<sup>12</sup> Innee moomoo munnimma qaara kari afaqamaree ooqu fuaqa. Innee ooqai munnimma inni uqa adianai marufaqa qafaqau. Abee, aqamasee munnimma inni uqaki kafa qafaqau.

<sup>13</sup> Inneeqa nikaqa afiqee ooqurandee kai kaqi uruqa.

<sup>14</sup> Aiqama afeeka faqaa Anutufa dadaaqinanoo mi fasiqafa inniara qimudaoo qiani. Qimudaoo qimaseenoo Beensaminna faqa inni nikaqa moo faqa kafa nimiani. Qinee qini faiqi namu kakasifanoo doo saina kakasiani.

<sup>15</sup> Miqi qimasoofaqa Yakooboona faiqi namu mi saqari anoonausa faqa munnimma moomoo qaara kari mara maree Isipa maqa maaqai Beensaminna faqa afiqeeqa ooqu fiqau. Miqoo misa Yooseefaafa maruqoo ooqu kikiqa mambufanoo Yooseefaafa misa nindafanau.

<sup>16</sup> Yooseefaafa Beensaminna qafamaseenoo narí maaqakinna ainainasaa rakisi maru fasiqana qimaminoo qinau. Anee maa fasiqausa nifiqeenana qini maaqaki munu quqaa. Misa suani qambaana qini faqa narana neefaranoo. Anee aandau aruseenana deedaqia.

<sup>17</sup> Ainainira faiqi fannoo mifa qimamundee inoo misauqa nifiqee Yooseefaana maaqaki munu quqanau.

<sup>18</sup> Yooseefaana maaqai nifiqee munu quqarara fimarufaqa misa rufiadaqa oonumafi irimariqau. Indaru narana feefauriafanna munnimmana maasa mara mareeqa qimaaqai murusee mi munnimmana maasa uqaki paquriafannana akiqara maasa mai qifiqee anidanoo. Misa kai kaqi maasa darusee maasa doonkiuqa marasaifaqa maasa misa ainainira faiqikianaura.

<sup>19</sup> Misa miqi qimiriseeqa mina ainainasaa rakisi maru faiqina maaqa kooqi oonuree qimamiqau.

<sup>20</sup> Oo uriqarara amanee maasa ufa irinnaree. Ooqai maasa qeeqa maaqaindari mai qumuree narana feefauru iqiafana.

<sup>21</sup> Maasa mai feefauru mamaree ooru fiuqaqa aanai ooru faiqarara uiqaana arasee maasa qeeqa sakuma uqa sanda idukusee qafaafananoo maasa aiqamausa aquafanna munnimmafa aiqama maasa uqauqa adianai marinau.

<sup>22</sup> Maasa mi munnimmana fabaqa maasa qeeqaindari moo faqa fiqaramasee narana feefaurirara maree qumidaqa. Yafee moo fannoo maasa uqakiaqa maasa narana feefauriafanna munnimmana kafa uqarinau fee.

<sup>23</sup> Miqi qimasoofanoo Yooseefaana ainainasaa rakisi maru faiqifa iriseenoo qinau. Doo innee nifaqa quqaqa. Sia rufia rufia iqa. Inni Anutufa inni nikoona Anutufa mifa kai inni munnimma inni uqaki rinau. Doo qinee inni munnimma mareeqa. Mifa miqi qimaseenoo Simeeonna karabusaki maruna iduku eeqeenoo misaki quqanau.

<sup>24</sup> Quqaseenoo misa nifiqa mareenoo Yooseefaana maaqaki munu quqaseenoo nammari nimufaqa niku nammari uqusee mariqau. Misa doonkiuqa faqa narana nimufaqa naqau.

<sup>25</sup> Miqimmasee misa narí maree qumu ainainasaa Yooseefaafa suani qambaana anirainaga amiraree qimasee deedaqiaqau. Yooseefaafa suani qambaana inni faqa narana naanauranoo fee qimasee qimannimnara irisee deedaqiaqau.

<sup>26</sup> Yooseefaafa maaqai aniroofaqa misa narí maaqaindari maree qumu ainainasaa mara maree maaqaki mifa marunnai ooruree mina oorinni noorindari maqasaa aqufiqau.

<sup>27</sup> Miqimmasoofanoo Yooseefaafa misara amiqi fee masee maridee qimasee iramirinau. Inneeqa nikoona nauraiqiara qima qimufaqa iriafanafa maqee kaqi fee maridanoo fee.



<sup>28</sup> Qufaqa misa iriseeqa qiqau. Eeoo ani ureeqara ainainira faiqi maasa qikoofa kaqi maridanoo. Miqi qimaseeqa misa kafa Yooseefaana oorinni noorindari maqasaa aqufiqau.

<sup>29</sup> Miqimmasoofanoo Yooseefaafa nari akaqa Beensaminna qafamaseenoo qinau. Maana inneeqa nikaqara qima qimufaqa iriafanafee. Qimaseenoo Yooseefaafa qinau. Qini qimaaku Anutufa ani amiqi amiqimma amaaani.

<sup>30</sup> Miqi qimaseenoo kai kaqi findifufanoo quqasee finau. Mina amuqusa firaqqoo nari akaqara mandaikufanoo finau. Yooseefaafa misa nifusaa iki raqaaqaa ufanoo quqasee nari faiqee maru rummanai oonuree iki raqanau.

<sup>31</sup> Iki raqeseenoo nammarinnai aukunu nammari uquseenoo nari aukunu afeekaika mandeenoo doo misunnai qumureenoo nari suqee maruna qimaminau. Doo narana rakiqaannee qinau.

<sup>32</sup> Miqi qufanoo suqee marufa narana naadu naadu rakiqanau. Yooseefaana aaduma teeboorasaa rakiqa amaanau. Kafa mina afasausa mara naaduma teeboorasaa rakiqa nimaqanau. Isipa maqannaasa minaki nee marusa naaduma moo teeboorasaa rakiqa nimaqanau. Isipa maqannaasa Qeeburu maqannaasa faqa narana narara nikooqee marusa marunara naadu naadu naqau.

<sup>33</sup> Yooseefaafa nari narana suqee maru faiqina qumee kai qimamufanoo mi faiqifa misa nifasaana indaaru mara ooqu mara amaqaseenoo mina aanaaqiannaana mina muqfi ooqu mara amaqasee miqimamaree inaaqiana nikaqa fannoo atinni ooqu marinau. Misa nari ooqufaqqeuna qafamasee tautumasee nari qafee nari qafee iqau.

<sup>34</sup> Yooseefaafa nari qufanoo mina difaanikinaa narana mareeqaida misa piritakiaqa quqa mareenoo Beensaminnaidiki fiqaramasee moodaannai qisauku 5 nari narana quqanau. Quqasoofaqa narana faqa uainna nammari faqa neeneesoofanoo doo nifaaqa iduku fufaqa qufaina qiaq asasiqau.

## 44

### *Yooseefaafa nari kaafara randoo ufafa.*

<sup>1</sup> Namasoofanoo Yooseefaafa nari maaqakinaa ainainasaa rakisi maru fasiqana qimaminoo qinau. Anee misa uqa maraseenana minakiaqa narana uqa ruma qumbiqasainana maree fuaqa. Moo uqa sia apequniani. Amana kai marinaqa maree fuaqa. Misa munnimma faqa narana feefauriana nariqa uqa adianai rumasainana maree ooru fuaqa.

<sup>2</sup> Miqidana inaaqiannaana uqakina nari munnimma narana feefaurina namufaqa qini siruua kaafa faqa mina uqa adianai rua. Miqi qimasooofanoo mifa qimamundee inau.

<sup>3</sup> Kananaana keekoo qufaqa doo misa nari doonkiuqa namufaqa niqiqoofaqa ooru fiqau.

<sup>4</sup> Doo mareeqa kaqi kaaqoo maqusa quqasee nianai fufanoo Yooseefaafa nari ainainasaa rakisi maru faiqina aiqeenoo qinau. Anee kai kaqi misa ninaaqianna fua fidana oonu misa rafaqafusee maaqi qimasee qimannimia. Innee naqi fee ifaqee qinee amiqimma nimaqaunnana akiqara mandaikamma qimaqee fee. Miqi qimasee qimannimia.

<sup>5</sup> Nanaree innee qini uriqararana kaafa qummuari fee, mifa minaki kai nammari neemarina. Mifa minaki afunee qafeemari kaafana qummuariafanoo, innee manda ainaina uqanna auqaafanoo fee qia.

<sup>6</sup> Miqi qimasooofanoo mina ainainira faiqi fannoo iriseenoo nifaqee finau. Misa oonu paquri mandeenoo Yooseefaana ufa kai misa qimanniminau.

<sup>7</sup> Qimannimisooofaqa misa qiqau. Oo uriqararafa maasa ani ufa oosanara randaidaqa. Sia uqanna maasaki maaqira manda oosana maridanoo.

<sup>8</sup> Maasa ooqai indaaru narana feefauriafanna munnimmafa maasa uqaki maruna mina maasa sia qumuariqa mina Kannaana maqusaindari mara maree kafa muqu ani amiqa. Maasa miqi marunaua maridaqa naqi maseeqee ani uriqararana maaqakinaa siruua faqa koora faqa maraanauree.

<sup>9</sup> Anee maasa uqa kiaqa randasee qafa. Yana uqakiffee mi ainainafa mariannoo fee doo mifa kai kuqannoo, maasa ani ainainira faiqi kamambi marianaara.

<sup>10</sup> Yooseefaana ainainira fasiqa fannoo misa ufa iriseenoo qima niminau. Doo amana inni ufa mau kai fuanaura. Ya fasiqana uqaki fee marinafa mifa kai qini ainainira faiqi mariannoo. Innee aiqama nimaqaq fifaranoo.

<sup>11</sup> Miqi qimasooofaqa misa kai kaqi nari uqauqa afiqa maqasaa quqasee idukiqau.

<sup>12</sup> Yooseefaana ainainasaa rakisirafa indaaruqaanaindi naaree qafamaseenoo miqooqaraanaindiki miqoo qafamaseenoo kafa miqoo qaraanaindiki qafamaseenoo

miqi kai mamaree aiqamausa uqakiaqa amiqimmasee qafanoo finau. Miqi mamareenoo misa ninaaqiannaana Beensammina uqaki qafoofanoo kaafa minaki marinau.

<sup>13</sup> Beensaminnana uqaki paquri masoofaqa mina afasausa mara aiqamausa nimuqusu-faqa nári qamunna aiqamausa rakeekaa iqau. Miqooqari nári ainaina doonkisa quqasee oonu quandakufaqa maqusai aniqau.

<sup>14</sup> Yudafa narí auna akaqa faqa Yooseefaana maaqai oonuree qafoofanoo Yooseefaafa kaqi maaqaki marinau. Marufaqa misa anireeqa noorindari maqasaa aqufigau.

<sup>15</sup> Aqufuma fufanoo Yooseefaafa qináu. Innee naqi fee ifee. Innee sia fee iridee, qinee maaqira uriqararausa qeeqa afuneenoo inni ummuarirana paquriranara, sia fee irifee.

<sup>16</sup> Miqi qimasoofanoo Yudafa qináu. Oo uriqararafa maasa nana ufa fee ani qimami-anauree. Maasa naqi mandee fee maasa qeeqa andeeqaranara qianauree. Anee maasa kikiqa qusimariannana naqimmasee fee qaoo qianauree. Anutufa maasa aaqarana koorooinoo. Sia kaafa maraifa kai ani ainainira faiqi mariannoo, maasa aiqamausa ani ainainira faiqi marianaura.

<sup>17</sup> Miqi qimasoofanoo Yooseefaafa nariqa qimanniminoo qináu. Oo sia uqanna qinee miqianauranoo. Kaafa maraifa kai qini ainainira faiqi kiannoo. Innee akaqausa nimaqaq ooruree ineeqa nikoona qimamiaqa.

*Yudafa Beensaminna amaaqa maqarariu ufa.*

<sup>18</sup> Yudafa Yooseefaafa maruqoo oorureenoo qimaminoo qináu. Oo uriqararafa, anee qiniara eedoo qinaqa ani faqa qifaqa quqasee ufa qia. Anee sia qiniara aanoo qia. Anee Faraaona miqirafa mariananoo, uriqararafa mariananoo.

<sup>19</sup> Oo uriqararafa, ooqai maasa umuraafanana anee maasa iramirinana inni nikoofa maridanoo fee inni nikaqa maridanoo fee qináu.

<sup>20</sup> Miqi qunaqa maasa maaqi qimasee aninna qimamiqiafana. Maasa qikoofa asooqa maridanoo. Maasa qikaqa faqa maridanoo. Mifa asooqa namuki mi faiqina maqeenoo. Mi faiqina afasaafa kuqufufanoo nariara marifanoo maasa qikoofa kaaqa minara amuqusidanoo.

<sup>21</sup> Maasa miqi qimasee indaaru ani qimamiqiafana. Uriqararafa anee maasara afiqee muqusaifaqa qafaanee qináu.

<sup>22</sup> Miqi qunaqa maasa maaqi qimasee aninna qimamiqiafana. Oo mi faiqifa sia amana narí akoona quqaannoo. Mina faiqi fannoo miqinanoo mina akoofa kuquannoo fee qiqiafana.

<sup>23</sup> Maasa miqi qimasee ani qimamiqiafana anee maaqi qináu. Innee inneeqa nikaqa sia afiqee qumiqa sia qini qifusaa anifaranoo fee qináu.

<sup>24</sup> Maasa ani ufa iriseeqa qeeqa qikoo finnai oonuree anee qunna ufana qimamiqiafana.

<sup>25</sup> Qimamiseeqa mariafananoo maasa qikoofa maasara kaifaa ooqu narana feefauri-aqee qiqau.

<sup>26</sup> Miqi qufaqa maasa maaqi qimasee narí qimamiqiafana. Maasa qikaqa ooqu finaqa maasa ooqu fuanaura. Sia maasa qeeqaraa uriqararana afusaa ooqu fuanaura.

<sup>27</sup> Miqi qufanoo maasa qikoofa maaqi qimasee maasa qima qimináu. Innee irimmari-afanoo qini qinaaqa Raseera nammariifa qini faiqi qaaraqanda kai maqanau.

<sup>28</sup> Moo fannoo fifufaqa qinee minara kaasau aandau fannoo qini faiqi arusee rakeekaamma namaseefoo qiqiafana. Mi fasannai sia kafa minna qafeeqa. Doo mifa taikafináu.

<sup>29</sup> Innee maana qinee unnannaindaraana afiqee fifanoo moo ainaina mina afaaqai kambiqainaqa qini minara qimudao qirafa asooqa marunnaqoo qini daruannoo fee qináu.

<sup>30</sup> Yudafa Yooseefaana kaifaa qimamidanoo qináu. Maasa qeeqa qikaqa quqaseeqa oonuraanoo maasa qikoofa maasa qiqafamaseenoo doo narí faiqiara amuqusinanoo kuquannoo.

<sup>31</sup> Maasa qikoona amuqusirafa firaqoo maa faiqinaki maridanoo. Mifa asooqa uqanna maridanoo maasa maaqamma saananoo mi ummaarafa mina kuqa aruannoo.

<sup>32</sup> Qinee qeeqa qikoona maaqi qimasee qimami qiafana. Qinee qeeqa qikaqa akiqara ummaara maraanauree qiqiafana. Qinee sia mina afiqee uriqa ani nifairira ufa qinee maraanauranoo fee qiqiafana.

<sup>33</sup> Miqi qimasee qinee qeeqa qikoona qimamiqiafana. Maqee qinee qeeqa qikaqa amaaqa maqeeqa ani ainainira faiqi kiananoo qini qikaqa fannoo narí afasausa faqa ooru fuannoo.

<sup>34</sup> Qinee naqimmasee fee maa faiqifa sia qini faqa ooru finaqa qeeqaraa qeeqa qikoo finnai ooru fuanaree. Qini qikoofa manda ummaara marainaqa qafaananoo sia amiqiannoo, mandaikammianoo.

## 45

*Yooseefaafa nariara kooroou ufafa.*

<sup>1</sup> Yooseefaana aundura dapikufanoo nari ainainira fasiqauqa nifusaa ikiraqararusia minnisee sia amanaikufanoo niqi qamasoofaqa madaanai fiqau. Fifufanoo Yooseefaafa nari ainaina faqa kai maridanoo qimanniminau. Qinee inni nikaqa Yooseefaasa maridaqa.

<sup>2</sup> Yooseefaafa firaqoo iki raqaida qufaqa Isipa maqannaasa madaanai maridaqa iriseeqa oonu Faraona qimamiqau.

<sup>3</sup> Yooseefaafa nari afasausa mara maaqi qimasee qimanniminau. Qinee maana Yooseefaasa maridaa. Kuqaa fee qini qikoofa kaqi fee maridanoo fee. Miqi qufaqa mina afasausa mara tautu maseeqa naaquoofaqa sia ufa qiqa.

<sup>4</sup> Yooseefaafa kafaa qimanniminoo qinuu. Doo innee qini daaqa aniaqee qufaqa misa mina aaga aniroofanoo kafaa qimanniminoo qinuu. Qinee inni nikaqa mariafanaqa innee feefauruara mamaree qini quqasoofaqa qini qifiqamaree Isipa maqa maaqaki ainainira faiqi kamma qisaqau.

<sup>5</sup> Doo maqee innee sia qini qimu oosannara inneeqa kikiqusifanoo nimuqusiani. Anutufa kai qini diiqoofaqa innee kuqi foora indaarunni kamma nimaqasee inni dadaaqianeera qufaqa qumiqifana.

<sup>6</sup> Firaqaa aandaroo narirafa maa maqanasaa qaara aukuaana marasee aiqaraifanoo moodaannai qisauku aukuaana kaqi maridanoo. Mi kamuqoo fuka narana ummaqirafa faqa unakirafa faqa sia mariannoo.

<sup>7</sup> Anutufa kai qini mareeqee inni indaarunni kamma saifaqa inni asumu marasainafaqaa sia kuqaaqee, mi mookira oosannananai kuqaa mifa inni faqa inni niku nisauku faqa marasainafaqaa asumu marifaranoo.

<sup>8</sup> Minara sia innee fau qini diiqoofaqaqaa maa maqa maaqanaki ani maridaqau. Anutufa diiqoofaqa ani maridaqa. Mifa kai qini mareeqee Faraona oofisaauqa uriqarau-saikamma qaiqafa maridaqa. Miqimmasaifaqa qinee mina aiqama maqa maaqasaa rakisiraua maridaqa. Aiqama Isipa maqa maaqasaa rakisiraua maridaqa.

<sup>9</sup> Innee kai kaqi qini qikoo finnai ooruree ani amaaku Yooseefaafa maaqi qinoofee qimasee qimamiqaa. Anutufa qini mareeqeenoo aiqama Isipa maqa maaqasaa rakisira faika maqaiqafa maridaqa. Sia kisaqasaa maria, kai kaqi qinee unnannai qumua.

<sup>10</sup> Anee faqa aneenna faiqi namu faqa aneenna anaifiqaa mara faqa inneeqa sipsipa faqa inneeqa mimmiuqa faqa inneeqa burimakau faqa inneeqa aiqama ainaina faqa indaa mamaree qumuraifaqa Kooseena maqa nimianaqa qini daaqa mariaqa.

<sup>11</sup> Innee Kooseena maqa maaqaki innisaa rakisianaara. Moodaannai qisauku aukuaana kaqi maridanoo, mi aukuaana namunaki aandaroo ida mariannoo. Innee faqa inneeqa faiqi anaasee faqa inneeqa aandaqaa faqa naararaina kuqifoora qikoofaidanoo.

<sup>12</sup> Yooseefaafa kaifaa nari afasausa mara qima nimidanoo qinuu. Innee nifu maqasee qini qiqafaqaqaa sia moosau maridau qinee Yooseefaasa uqanna maridaqa. Doo qini qikaqa Beensaminna mifa faqa qini qiqafaani.

<sup>13</sup> Qinee Isipa maqasaa firaqoo uriqararaua marunnanara qini qikoona qimamiqaa. Aiqama ainaina qafaanara faqa qimamiqaa. Qimamiseeqa doo dauni dauni afiqee mai qumuaqa.

<sup>14</sup> Miqi qimaseenoo nari akaqa Beensaminna oonu mafi anukaki difaa difamma qumareenoo iki raqoofanoo Beensaminna faqa iki raqanau.

<sup>15</sup> Yooseefaafa quandaqaa fanoo nari afasausa mara aiqamausa nimooqaseenoo naiki raqanau. Naiki raqasoofaqa mina afasausa mara mina faqa ufa qiqa.

<sup>16</sup> Isipa maqannaasa misa miqi unara oonu Faraona qimamisooofanoo Faraofa faqa mina uriqararaua faqa iriseeqa asasammiqau.

<sup>17</sup> Faraofa Yooseefaana maaqi qimasee qimaminoo qinuu. Anee maaqi qimasee aneenna afasausa qimanniminaqa nari ummaara doonkisaa mara quqasaifaqa maree Kannaana maqusai ooru fuaqa.

<sup>18</sup> Miqoo oorureeqa nari nikoona faqa nari faiqi anaasee faqa nifiqee mai qumuaqa. Qumuraifaqa Isipa maqa maaqaki qafamasee amiqira maqa nimianaqa miqoo narana fiqaranoo moomoo marinaqa marifaranoo.

<sup>19</sup> Faraofa kafaa Yooseefaana qimaminuu. Anee qinee ufa qunnana qimanniminaqa Isipa maqusaindari qoosa rarisee mari karausa faqa daraiwaa faqa mara maree ooru fuaqa. Minakina nari ninaaqmaaka faqa nari faiqi aanaaqiuqa faqa nari nikoona faqa mara quqasai oogu marifiqa qumuaqa.

<sup>20</sup> Misa sia nari umiasana aina mafi quqasee quminnanara oonu mafi iriaqa. Isipa maqa maaqa amiqirafa aiqama misaindikammianoo.

<sup>21</sup>Yakooboona amaaku mara Faraofa qimannimundee kai iḡau. Yooseefaafa Faraoona ufa iriseenoo qoosa rarisee maru karausa mara quqasoofaqa daraiwaa namu faqa aatata neefandinna narana faqa nimufaqa maree ooru fiqau.

<sup>22</sup>Yooseefaafa nari afasausa mara qamunna moodaa kai moodaa kai nimana nimana kai niminau. Beensaminna moodaanai qisauku qamunna faqa siruaa munnimma 300 faqa aminau.

<sup>23</sup>Yooseefaafa Isipa maqannaa amiqira ainaina suquseenoo qisauku qara taikasee doonkisaa oorufusasaa amaqoofaqa mara maree muru mina akoonna amiqau. Kafaa aatata qumidanoo naaninna narana sakumana faqa feemu faqa narana oosana oosana faqa anaasee doonki qisauku qara taikaseesaa oorufusasaa quqasoofaqa maree ooru fiqau.

<sup>24</sup>Yooseefaafa nari afasausa mara Kannaana maqusai niqamasoofaqa fufanoo qima niminoo qinai. Innee aatata fidaqa sia qiniara qimasaida nari aqi nari aqiqa fuaqa.

<sup>25</sup>Misa Isipa maqa maaqa quqasee nimaqa nari nikoofa Yakooboofa marunnai Kannaana maqa maaqai ooru fiqau.

<sup>26</sup>Ooruree nari nikoona qimamiqau. Yooseefaafa sia kuqinoo kaqi maridanoo, misa miqi qimasee nari nikoona qimamiqau. Mifa Isipa maqannaa aiqamausa uriqarafa maridanoo fee qiqau. Yakooboofa mi ufana irufanoo amuqusa kaqinnaindari ufanoo misa ufara sia kuqaa fee qinai.

<sup>27</sup>Yooseefaafa qimannimu ufausa nari nikoona qimami marufanoo Yakooboofa qafooofanoo qoosa rarisee maru karausa Yooseefaafa quqasoosa Yakooboona afiqee Isipa maqa maaqai ooqu firara ururaqau. Yakooboofa mi karausa qafooofanoo aundura idukinai.

<sup>28</sup>Idukufanoo qinai. Qini qimaaku Yooseefaafa kaqi maridanoo. (Qinee kaqi maridaqa ooqu mina qafarafa mifa kai aiqama ainaina arusee uriqararafa maridanoo.) Qinee ooqu mina qafamasee kuqanauree qinai.

## 46

*Yakooboofa nari aiku asauku faqa Isipa maqusai ooqu fu ufafa.*

<sup>1</sup>Yakooboofa nari ainaina indaaii mareenoo Beeraseeba maqusai ooqureenoo miqoo nari akoonna Isakeena Anutuna aandau tatufirana suqaminai.

<sup>2</sup>Miqoo eendaki faiqaqee ufanoo Anutufa qainasaa afu nareenoo qinai. Yakooboo Yakooboo qufanoo Yakooboofa maqi qimaseenoo qinai qinee maaqoo maridaqa.

<sup>3</sup>Qufanoo Anutufa qimaminoo qinai. Qinee Anutusa ani akoonna Anutusa maridaqa. Anee sia Isipa maqasaa ooqu firaranara rufiaa. Mi maqanasaa ooqu marinaqa ani aiku asauku firaa maqanaasaikamma nisaanura.

<sup>4</sup>Qinee ani faqa Isipa maqasaa ooqu fuanura. Yooseefaafa ani faqa Isipa maqa maaqaki marinana mariinana kuqinnaranoo. Mariinaqa kasooaqee kafaa ani aiku asauku mareeqee kafaa Kannaana maqasaa quqaanura.

<sup>5</sup>Beeraseeba maqusa Yakooboofa quqasee Kannaana maqa maaqai ooqufinai. Mina faiqi namu Yakooboona faqa nari faiqi aanaaqiuqa faqa nari ninaaqmaaka faqa mareeqee qoosa rarisee maru karana Isipa maqannaa karaambaiqa Faraofa nimaqoonasaa quqasee nifiqee ooqufiqau.

<sup>6</sup>Misa nari aandau aina faqa nariqa umiasana faqa Kanna maqasaa maridaqa maqeeinaiqa aiqama maree ooqu fiqau. Yakooboofa nari aiku asauku aiqama nifiqee ooqu finai.

<sup>7</sup>Yakooboofa nari faiqi namu faqa nari anaiqi mara akoonaiqiuqa faqa nari araamuqmaaka faqa nari anaiqi mara maanaaqauqa faqa aiqama nifiqee ooqu finai.

<sup>8</sup>Yakooboona faiqi namu Isipa maqasaa ooqu fusa maaqi miqa mariqau. Yakooboona ooqa faiqi Reebeenafa marinai.

<sup>9</sup>Reebeenafa faiqi namu Qanookafa faqa Parufa faqa Qeeseeroonafa faqa Karamifa faqa mariqau.

<sup>10</sup>Simeeona faiqi namu Yeemuerafa faqa Yaminafa faqa Ooqadafa faqa Yakifa faqa Sooqarafa faqa mariqau, misa aiqamausa moodaa anaasee faiqi namu mariqau. Moo anaasee faiqi Saurafa marinai. Mina anoofa Kannaana maqannaa anaasee marinai.

<sup>11</sup>Reefina faiqi namu Keerasoonafa faqa Kooqafa faqa Meerarifa faqa mariqau.

<sup>12</sup>Yudaana faiqi namu Seeraafa faqa Peereesafa faqa Siraafa faqa mariqau. Yudaana faiqi qaaraqanda Eerafa faqa Oonanafa faqa mariufafa Oonanafa Kannaana maqasaa kuqinai. Peereesana faiqi qara Qeesaroonafa faqa Qamurafa faqa mariqau.

<sup>13</sup> Isakarana faiqi namu Toorafa faqa Puaafa faqa Yasubafa faqa Simaroonafa faqa mariqau.

<sup>14</sup> Seeburuna faiqi namu Seereedafa faqa Eeroonafa faqa Yareerafa faqa mariqau.

<sup>15</sup> Miqimmaseenoo Reea nammarifa Yakooboona faiqi namu Meesapotamia maqusai maridanoo maqanau. Maanaaqa moodaa auqu Dinnaa nammarifa mina faqa miqoo maqanau. Doo Reea nammarina faiqi namu maanaaqa akoonaiqi aiqamausa 33 mariqau.

<sup>16</sup> Kadana faiqi namu Seefoonaa faqa Qakifa faqa Sunifa faqa Eesaboonafa faqa Eerifa faqa Aroodifa faqa Areerifa faqa mariqau.

<sup>17</sup> Aseerana faiqi namu Iminaafa faqa Isauaafa faqa Isififa faqa Beeriaafa faqa misa nisookifa Seera nammarifa faqa mariqau. Beeriaana amaaku qara Qeebeerafa faqa Marakierafa faqa mariqau.

<sup>18</sup> Doo miqimmasee Yakooboona aiku asauku 16 nari ainainira maanaaqa Rabanafa Reea namarina amuna Siripaa nammarinasaa maqanau.

<sup>19</sup> Yakooboona anaafa Raseera nammarifa faiqi qaraqanda maqanau. Yooseefaafa faqa Beensaminnafa faqa mariqau.

<sup>20</sup> Yooseefaana faiqiqara qaraqanda Isipa maqasaa kambigaqau. Miqanda nuqu Mannaseefa faqa Efaraimmafa faqa mariqau. Miqanda ninoofa Aseenata nammarifa marinau. Aseenata nammarina akoonaa auqu Pootifeerafa marinau. Mi fasiqafa Qeerioporisa maqanna amaana maqasaa rakisi marufa marinau.

<sup>21</sup> Beenasaminna faiqi namu maaqimmiqa mariqau. Beerafa faqa Beekeerafa faqa Asabeerafa faqa Keerafa faqa Naamanafa faqa Eeqifa faqa Roosafa faqa Mupimafa faqa Qupimafa faqa Aratafa faqa mariqau.

<sup>22</sup> Doo miqimmasee 14 Yakooboona aiku asauku Raseera nammarinasaa qari kambigaqau. (Rabanafa Biriqaa nammarina nari ainainira maanaaqa Raseera nammarina nari aramuna amufanoo mifa mareeqeenoo nari afaaqi Yakooboona amufanoo faiqi maaqi mandee maqanau.)

<sup>23</sup> Biriqaa nammarina indaruqaa faiqi Dannafa marinau. Dannana faiqi moodaa marinau mina auqu Qusimafa marinau.

<sup>24</sup> Biriqaa nammarina faiqi moo Nafatarifa marinau. Nafatarina faiqi namu maaqi miqa mariqau. Yaqaseerafa faqa Kunifa faqa Yeeseerafa faqa Sireemafa faqa mariqau.

<sup>25</sup> Doo miqimmasee Yakooboona aiku asauku 7 nari ainainira manaafa Rabanafa Raseera nammarina amunasaa Biriqaa nammarinasaa maqanau.

<sup>26</sup> Yakooboona aiku asauku uqanna Isipa maqasaa oofufusaa aiqama moodaanaki 66 mariqau. Misa ninaakuqumaaka sia nisaanariqa.

<sup>27</sup> Yooseefaana faiqi qara Isipa maqasaa kambigaqau. Miqanda faqa Yooseefaana faqa Yakooboona faqa moodaanaki ootupamasee 70 fasiqa ooqu fiqau.

*Yakooboofa nari aiku asauku faqa Isipa maqusai maru ufafa.*

<sup>28</sup> Yakooboofa Yudana aiqoofanoo indaaru ooqu Yooseefaana qimaminanoo Kooseena maqasaa misa paquriani feera aiqanau.

<sup>29</sup> Yooseefaafa nari qoosa rarisee maru karanaki akarama fufanoo Kooseena maqa maaqai nari akoonaa paqurirara finau. Oonu paqurimmaseenoo Yooseefaafa nari akoonaa anukaki oonu mafi kaqaramma umareenoo kisaagasaa iki raqee marinau.

<sup>30</sup> Iki raqee marufanoo Yakooboofa Yooseefaana qimaminoo qinuu. Doo qinee kuqiraridaqa qinee maqee ani qafeeqa anee sia kuqina mariana kaqi mariana.

<sup>31</sup> Yooseefaafa iki raqaseenoo nari afasausa mara faqa nari akoonaa aiku asauku aiqama faqa qimanniminoo qinuu. Qinee Faraofa mariqoo ooruree inniara qimamiana. Qini qikoofa faqa qini qifasausa faqa Kannaana maqusaindari qinee marunnannai qumureeaa maqi qiana.ura.

<sup>32</sup> Qinee inniara sipsipasaa rakisi mariasa maridaqa nariqa sipsipa faqa burimakau faqa nariqa aiqama ainaina faqa maree qumiaa maqi qimasee qimamiana.ura.

<sup>33</sup> Qinee miqi qimasee qimamisaananoo Faraofa inni naaramasee innee ainaini mariana.ura irainafa maaqi qimasee qimamia.ura.

<sup>34</sup> Oo maasa uriqararafa maasa qikeeku qikaaku ooqai sipsipa kai rakisi marusa marufaqa maasa faqa maqee minasaa kai rakisidaqa. Innee miqi qimasee Faraona qimamifanoo mifa Kooseena maqa inni nimiannoo. Isipa maqannaasa sipsipa rakisiranara nikoo uqanna qaidanoo. Minara inni naaduma saa Kooseena maqa nimiannoo.

## 47

<sup>1</sup> Yooseefaafa nari afasausa moodaanai qisauku namu nifiqeenoo Faraoo fuqoo ooru finau. Oorureenoo qimaminoo qinuu. Oo Faraoo qini qikoofa faqa qini qifasausa faqa

Kannaana maqusaindari nári sipsipa burimakau aiqama faqa nári ainaina faqa maree qumidaqa. Maqee misa Kooseena maqasaa qumu maridaqa.

<sup>2</sup> Miqi qimasee narí afasausa mara Faraona oorinni murusoofanoo niqafanau.

<sup>3</sup> Faraofa Yooseefaana ufa iriseenoo mina afasausa mara iramirinoo qináu. Innee nana ainaini mariasee. Miqi qufaqa misa iriseeqa qiqau. Uriqararafa, maasa sipsipasaa rakisira ainaina imarunaua maridaqa. Maasa qikeeku qikaaku auqeeu saikana kai maasa faqa maraídaqa.

<sup>4</sup> Aandaroo firaafa uqanna Kannaana maqasaa darifanoo maasa sipsipauqa nara andanda sia marifaqa maasa maa maqa maaqanaki marirara umidaqa. Amanee eedoo qirana qiminaqa maasa Kooseena maqa maaqaki marianauree.

<sup>5</sup> Faraofa misa ufa iriseenoo Yooseefaana qimaminoo qináu. Doo ani akoofa faqa ani afasausa faqa ani faqa mariraree qidee.

<sup>6</sup> Isipa maqa maaqa misaindi maridanoo. Sainaqa Kooseena maqa maaqaki mariaqa. Kooseena maqa maaqa amiqirafa maridanoo. Ani afasausa kinaana moo qafainanoo sipsipa burimakau amiqi mandee rakisi marinnana mina mareeqeenana quqasainanoo mifa qini sipsipa burimakausaa rakisiani.

<sup>7</sup> Miqi qimasooofanoo Yooseefaana narí akoona afigeenoo Faraoo fuqoo minisoofanoo Yakooboofa miqoo anireenoo Faraona afaaqooqa qimama qanau.

<sup>8</sup> Miqi qimasooofanoo Faraofa Yakooboona aukuanara iramirináu. Ani aukuaana naqumnee maridanoo fee qufanoo Yakooboofa qináu.

<sup>9</sup> Qinee 130 aukuaana kai maa maqanasaa maridaqa. Sia kisaaqasaa fau qinee moomoo ummaara paquriqa. Qini qikeeku qikaaku kisaaqasaa uqanna mariqau. Misa aukuaana fannoo qini aukuaana fiaaqaranoo maridanoo.

<sup>10</sup> Yakooboofa miqi qimaseenoo kafa Faraona afaaqooqa qimama qaseenoo doo raudamaki finau.

<sup>11</sup> Yooseefaana narí afasausa mara faqa narí akoona faqa Faraofa uqoo Isipa maqa maqaki Rameeseesa maqusa aqa soofaqa mariqau.

<sup>12</sup> Miqiqa miqoo marufanoo Yooseefaana narí akoona faqa narí afasausa mara faqa narí akoona aiku asauku marusa faqa kaaqa aanaaqi faiqiuqa faqa narana nimi marináu.

*Aandaroo firaafa Isipa maqannaasa naru ufafa.*

<sup>13</sup> Aandaroo firaafa uqanna imarufanoo sia uqanna aiqama tinai narana marináu. Isipa maqannaasi fasiqa anaasee faqa Kannaana maqannaasi fasiqa anaasee faqa naara-roofaqa ummooquka iqa nimariqau.

<sup>14</sup> Misa narana feefauri marufanoo Yooseefaana mi munnimmana mara maree Faraofa maruqoo munusee mina ami marináu.

<sup>15</sup> Isipa maqannaasa faqa Kannaana maqannaasa faqa narana feefaurida aiqama nári munnimma taikaqau. Miqi maseeqa Isipa maqannaasa anireeqa Yooseefaana qimamiqa qiqau. Maasa munnimma doo taikaseeqa anee sia maasa afu kai qiqafaa kuquana faara narana niminaqa naa. Sia maasa narana qiminaqa maasa ani afusaa kuquanaura.

<sup>16</sup> Misa miqi qufanoo Yooseefaana maaqi qimasee nariqa qimannimináu. Inni munnimma taikainaqa inneseeqa aandau aina maree mini qumidaqa narana mina akiigara maraqa.

<sup>17</sup> Miqi qufaqa misa nariqa aandau aina Yooseefaana mini amufanoo misa qoosauqa faqa sipsipauqa faqa mimmiuqa faqa burimakauqa faqa doonkiuqa faqa mina akiigara narana nimimarináu. Doo mi aukuaana misa nári aandau aina akiigara Yooseefaana narana nimi marináu.

<sup>18</sup> Mi aukuaana taikooofa kafa moo aukuanaki Yooseefaana fuqoo anireeqa maaqi qimasee qimamiqau. Maasa naqi fee mandee moo ainaina ani afusaa kukeeqaanauree, sia. Doo maasa munnimma taika fifaqa maasa aandau aina faqa anindika kai mambifaqa kaqi maridaqa. Sia ani amira ainaina moo marifaqa. Maasa qiqqa qifaqa faqa maasa maqa faqa kai maasaki maridanoo.

<sup>19</sup> Maasa ani afusaa kuquaqaa midaqa doo saina maasa qeeqa faiqi faqa maqa faqa mina kai amisaidaqa feefauri marasaidaqa narana naa. Miqimmaseeqa maasa qeeqa faqa Faraona anainira faiqi kakai iqa maria. Maasa moodaa ainainara kai iridaqa. Narana faqa narana asumu faqa niminaqa maasa qummaqua. Narana qummaquuseeqa maasa sia kuqua.

<sup>20</sup> Yooseefaana misa ufa iriseenoo aiqama Isipa maqa maaqa feefaurumma Faraona amináu. Aiqaama Isipa maqannaasa aandaroo firaafa uqanna narunara nariqa maqa amisee feefauri marasee minannoo narana feefaurumma neemarufanoo aiqama maqa maaqa Faraonaindika minoo maarináu.

<sup>21</sup> Miqi marufanoo Yooseefaafa Isipa maqa maaqa dinni atindari dinni atinni marusa mareeqee ainainira faiqika kai masanau.

<sup>22</sup> Isipa maqannaama amaana maqasaa rakisiraua maqa kai Yooseefaafa sia feefaurinau. Faraofaa maqee maqee munnimma nimi marufaqa narana feefaurummasaida neemaruufaqa sia misa maqa feefauriqau.

<sup>23</sup> Yooseefaafa faiqi anaasee qimanniminoo qin角度. Doo innee qafaidee qinee maqee inni faqa inniqa maqa faqa feefaurumma Faraona amiqa. Maqee narana asumu nimianaga inneeqa maqa Faraona amu maqanaki kafia qummaquaga.

<sup>24</sup> Narana anoona mambinaqa moodaagoo unaku quqaseeqa aiqama moodaannai qisaukukinaana moodaa moodaa Faraona amisee akaqana inneeqa faiqi aanaaseera faqa asumuara faqa quqaaga.

<sup>25</sup> Faiqi anaasee Yooseefaana maaqi qimasee qimamiqa qiqau. Oo Yooseefaafa anee aneenna kai maasa manda ainainasaa itita qisaananoo. Anee kai maasa amiqimma qisaananoo. Uriqararafa maasa amana Faraona ainainira faiqi marianaara.

<sup>26</sup> Miqoo qari Yooseefaafa afeeka sanda ufa quqanau. Mi sanda ufana oosana maaqi minoo maridanoo. Aiqama Isipa maqa maaqakinaa narana unakusee moodaannai qisauku kinaana moodaa Faraona amiaqa. Mi ufafa maqee kaqi afeekaikinoo maridanoo. Amaana maqasaa rakisii marusa maqa kai sia Faraonaindikinoo marinau.

*Yakooboofa inaaqianna moodaa ufa iramirinau.*

<sup>27</sup> Isaraee maqannaasa Isipa maqasaa Kooseena maqa maaqaki mariqau. Miqoo mari-daqa moomoo ainaina faqaasa marufanoo misa faiqi namu faqa moomoo kambiqaqau.

<sup>28</sup> Yakooboofa qisauku qara taikaseenoo qiku dinni taikaseenoo dinni oonu qaara maraseenoo 17 aukuaana Isipa maqasaa marinau. Mina aukuaana aiqama moodaanaki 147 aukuaana marasee kuqin角度.

<sup>29</sup> Mina kuqirafa adeedi rama fufanoo Yakooboofa Yooseefaana aaramaseenoo qimaminau. Anee aneenna asauku qini qifundana ameemaana qiqaseenana sia Isipa maqasaa akundaanuranoo qimasee qimafeekaikia.

<sup>30</sup> Qini qiqqa qikausa mara nikundoonaki qikundaa. Qini Isipa maqasaqari mara maree misa nikundooqoo qikundaa. Miqi qufanoo Yooseefaafa nari qimaminoo qin角度. Anee qianandee mianaara.

<sup>31</sup> Yooseefaafa nari akoonu ufa iriseenoo eedoo qufanoo mina akoofa qin角度. Saa sia kaqi eedoo qia, kuqaa qima afeekai kinana eedoo qia. Miqi qimasoo fanoo kuqaa Yooseefaafa eedoo qima afeekai kinau. Qima afeekai kamasoo fanoo Yakooboofa nari qaarisa oogu marifi Anutunara dufi dufi qin角度. Innaaru qimasoo fanoo Yooseefaafa nari ainaini finau.

## 48

*Yakooboofa Eefaraimana faqa Mannaseena faqa nifaaqooqau ufafa.*

<sup>1</sup> Kaqikaagoo mari kufaqa misa Yooseefaana qimamiqau. Ani akoofa doo amiqimma auridanoo. Yooseefaafa mi ufana iriseenoo nari amaaku qara Mannaaseesa Eefaraimasa nindiqeenoo nari akoofunnai oogu finau.

<sup>2</sup> Misa Yakooboona qimamiqau ani amaaku Yooseefaafa ani qafarara qumidanoo fee qufanoo Yakooboofa afeekaikammasee findi fufanoo nari qaarisa oogu marinau.

<sup>3</sup> Oogu mari fufanoo Yakooboofa Yooseefaana qimaminoo qin角度. Ooqi qinee Kannaana maqa maaqaki nuafannana kinai Rusa maqa maaqaki mariafananoo Anutufa aiqama afeeka faqaafa akooqoo kooroomma fufanoo qini qifaaqooqaa qima qimaqanau.

<sup>4</sup> Mifa maaqi qimasee qini qima qiminau. Qinee moomoo faiqi asumu amiana anisaqari ani aruakinausa moomoo maqannaasaika mifaranoo. Qinee maa maqana ani aiku asauku nimiananoo naaru naaru misaindika minoo marianno.

<sup>5</sup> Ani amaaku qara Isipa maqasaa kambiqara qanda qinee Kannaana maqasaa kaqi marunaqa kambiqaa qanda Mannaseesa Eefaraimasa qini faiqi qara Reeubeenasa Simeeoonasara foora mifaranoo.

<sup>6</sup> Anee akaqa faiqi namu maqa sainsa misa anindika mambi marifara. Misa nari nifasaa qanda Mannaseesa Eefaraimasakinaa qumiasana ainaina maree faranoo.

<sup>7</sup> Qinee ani anoona Raseera nammarinara iriqa miqi qidaqa. Mifa qini firaa qimudaoo qiranaki Kannaana maqa maaqaki kuqin角度. Qinee Meesapootamia maqa maaqaindari ani mariafananoo aanai Eefarataa maqusa aqa kuqin角度. Qinee mina iri Eefarata maqusai fimaru aanna afainni akundaqiafana. (Maqee Eefarataa maqusara Beedeeree maqusee qidaqa)

<sup>8</sup> Yakooboofa miqi qimaseenoo Yooseefaana amaaku qara nindafeenoo qin角度. Maaqanda yana faiqi qaree.

<sup>9</sup> Qufanoo Yooseefaafa qinau. Qini faiqi qara Anutufa Isipa maqasaa mariafananoo qimu qanda maridaqa. Yakooboofa mi ufana iriseenoo qinau. Doo miqanda nifiqee mai qinee unnaqoo adeedi minisainaqa nifaaqooqa qima nimaqaqa.

<sup>10</sup> Yakooboofa nauraiqi marunara sia amiqimmasee afu maqee marinau. Yooseefaafa nari amaakuqara minisoofanoo oonu mafi kaqaramma qumareenoo nimooqanau.

<sup>11</sup> Nimooqa namasee Yakooboofa Yooseefaana qimaminoo qinau. Qinee sia kaifaa ani qafaanauree qunanoo Anutufa kai qifaqa ani faiqi namu niqafaidaga.

<sup>12</sup> Miqi qimasoofanoo Yooseefaafa nari akoona afundana saaqaaraana nari faiqi qara qumareeqeenoo nari akoona afunni oorindari maqasaa aqufinuu.

<sup>13</sup> Yooseefaafa nari akoona afusaa kummarama fufanoo Eefaraimmana mara munu Yakooboona asaaqai quqaseenoo Mannaseena mina asaukuannai quqanau.

<sup>14</sup> Quqasoofanoo Yakooboofa asauku qara fiqaree aiqaree mambufanoo akaqa Eefaraimana saa asauku uqannai quqeenoo afasaana Mannaseena saa asaaqai asauku quqanau.

<sup>15</sup> Miqi mandeenoo Yooseefaana afaaqooqa qimamaqeenoo qinau.

Qini qikausa mara Abaraqaammama faqa Isakeena faqa nikoofa Anutufa maa faiqisa amiqi amiqimma nimaqaani. Qini qifiqamaree maaqoo maqee miniqaiqafa marunna Anutufa misa amiqi amiqimma nimaqaani.

<sup>16</sup> Qini oosana oosana madainaina kinaana itita qimaqoo qangiroofa misa amiqi amiqimma nimaqaani.

Qini duqu faqa qini qikooqanda Abaraqaammama Isakeesa nuqu faqa maa faiqi qandasaa mariani.

Miqanda moomoo faiqi maqasaifanoo moomoo miqanda kiqari kambiqafi mariaqa.

<sup>17</sup> Yooseefaafa nari akoona asauku qafoofanoo aundura mandai kufanoo nari akoona asauku qumareenoo afasaanasaa asaaqai asauku quqaqoona mareeqee akaqasaa quqasee akaqasaa asaukuannai asauku quqaqoona mareeqee afasaanasaa quqarara qinau.

<sup>18</sup> Oo qipoo anee sia andeeqaananoo indaaruuqaafa mai maridanoo aneenna asauku uqannai asauku mina akiqasaa quqaaqaana.

<sup>19</sup> Miqi qufanoo mina akoofa qaoo qida qinau. Qini qimaaku qinee iridaqa miqidaqa. Indaaruuqaafa mifa faqa maridanoo ani afigee aninna akeeku akaaku maqasaa ooru fuannoo. Inaaqiannaana aiku asaukuqa firaa afeeka maqannaauqanna marifaranoo nari afasaana ooraagaranoo mariannoo.

<sup>20</sup> Miqi qimaseenoo mi faasaana nifaaqooqa qima nimaqeenoo qinau.

Isaraee maqannaasa nifaaqooqa qiqa anisaa qimasaida qifaranoo.

Misa maaqi qifaranoo Anutufa Eefaraimmana faqa Mannaseena undemma amaqaani.

Miqunannai Yakooboofa Eefaraimmana uqeerasee Mannaseena rafaqa finuu.

<sup>21</sup> Miqi qimaseenoo Yakooboofa Yooseefaana qimaminoo qinau. Qinee kuqirara midaqa Anutufa ani faqa maridanoo ani afigee aninna akeeku akaaku maqasaa ooru fuannoo.

<sup>22</sup> Seekeemma maqa maaqa amiqirafa maridanoo. Qinee ooqai qeeqa duru feefannoo Amooraa maqannaasa faqa rakusee maraafanna maqana ani amianaara sia ani akaqaa fasaauqa nimianaara.

## 49

*Yakooboofa nari aiku asauku taikara qafaaqooqa qimannimu ufafa.*

<sup>1</sup> Yakooboofa nari faiqi namu naaramaseenoo qima niminau. Innee aiqama maaqoo aniraiqafa kasooaqee inni kina kambiqaaninna ainainara qima nimiana iriaqa.

<sup>2</sup> Innee qini Yakooboosa faiqi namu innee qini fiq fiq mambifaqa inneeqa nikausa qini Isaraeerasa ufa iriaqa.

<sup>3</sup> Reeubeenafa anee qini ooqa faiqi mariananoo.

Anee qini afeeka indaaruuqaafa mariananoo.

Anee aiqama qini faiqi namu kiqari uriqararafa kaaqa afeekaiki marianafa mariananoo.

<sup>4</sup> Anee nammari aafindee imarianafa kaaqa afeekaiki marianafa mariananoo.

Anee sia uriqarana marinnaranoo.

Anee qini qaarisa qini ainainira anaasee sakasee faiqaanana miqinnaranoo.

<sup>5</sup> Simeeoonasa Reefisa innee qara moodaa fidika mariafanoo.

Innee qara inneeqa rakira duru saamunoo faiqi mandaikamma nimaqaqau.

<sup>6</sup> Qini irirafa sia misa kukeeqara ufaki ootupanoo maridanoo.

Qinee sia miqanda ufa suqiranaki marianaara.

Misa nirana qoofaqa faiqi anaasee narusee miqooqari nasuridaqa burimakau akoonauqa naununu ateeqaqau.



<sup>7</sup> Inniqara aannoo qiranasaa niqirafa mariannoo.

Innee kaqi fifau nári marianara minara niqirafa mariannoo.

Isaraee maqa maaqakina inniqara faiqi namu furufaramambuaqa.

<sup>8</sup> Yakooboofa miqanda nifaqooqa qimaseenoo quandafinoo Yudana afaaqooqa qinau.

Yuda, ani akaqaafasaa ani amooqifara.

Anee aneenna namuqaa ninukasaa reenana rafaafa finafa mariananoo.

Ani akoona faiqi namu ani oorinni niqoori saunu areefaranoo.

<sup>9</sup> Yuda anee kaasau aandaara foora faiqi nári marianafa mariananoo.

Anee firaa kaasau ainaina mariana, anee aanda arusee namasee faiqaqee inanoo moo

fannoo sia ani afauriannoo, rufiaannoo.

<sup>10</sup> Yudafa karaambaiga duru feefa uaqeeiannoo.

Minasaa ani aruakinausa uriqaraga maridaqa rakisi nimaqeeffaranoo.

Mifa uriqarara auqu marasee rakisi nimaqanoo fiifiinoo Siroo maqusaki oonuraannoo.

Miqoo maridanoo aiqama maqannaasa mina ameemaanai marifanoo rakisinnimaqaan-

nnoo

mina aiku oosana maridaqa mina ufa mau kai fifaranoo.

<sup>11</sup> Mifa nari doonki timmusa uainna sandasaa rumbeeno.

Uainnaugakiqari kaaqa amiqiranasaa rumbeeno.

Mifa nari qamunna fidika arira uainna anoonaki nammaruqinoo.

<sup>12</sup> Mifa uainna neemarifanoo mina afu fidikandanda inoo marifanoo mimmi naamma

anoona neemarifanoo afai eekara aridanoo.

<sup>13</sup> Miqi qimasee Yudana qimamiseenoo Seeburunana quandafi afaaqooqa qinau.

Seeburuna, anee ooruku nammari afainni marinaranoo.

Sipauqaindi nammariara rufiasee ani mandaagasee marifara.

Ani maqa maaqa oosu Sidoona maqa maaqa ati raquru aminoo mariannoo.

<sup>14</sup> Miqi qimasee Seeburuna qimamiseenoo Yakooboofa quanda finoo Isakaana

afaaqooqa qinau.

Isakaa anee afeeka doonkiara foora mafinana narana uqauqa amuaaqa faiqaqeeia.

*Yooseefaafa nari akaqaa fasaauqa aqoondikira ufa niminau.*

<sup>15</sup> Isakaafa idooara maqusa qafoofanoo amiqinoo marufanoo kummarama fufanoo

ataufakaaqa firaa ummaara quqasee maranoo nimiranau. Mifa ainainira faiqiara foora

ainainiannoo.

<sup>16</sup> Yakooboofa Isakaana qimamiseenoo quandafinoo Dannaana afaaqooqa qinau.

Dannaafa nari maqannaasa uriqararafa mariannoo.

Misa Isaraee maqannaasa foora marifaranoo.

<sup>17</sup> Anee ukadiqara foora aana afainni marinanoo qoosa fannoo aatata finana

aiku raquraminanoo maqasaa aqufinanoo faiqi minasaa marina afiqu aqusainanoo

aanaaqiannaindari aqufuani.

<sup>18</sup> Yakooboofa Dannaanara miqi qimaseenoo Anutunara innaaru qinoo qinau.

Oo Yaawee qinee ani dadaqiranaara afeesidaa.

<sup>19</sup> Miqi qimaseenoo Kadannana afaaqooqa qinau.

Kada nipuraraa fasiqauqa ani arifaranoo.

Miqifana anee quandaki nariqa nifaqee finnananoo.

<sup>20</sup> Miqi qimaseenoo Yakooboofa Aseeranara qinau.

Ani maqa maaqaki narana moomoo amiqirafa kai mariannoo.

Anee kinna ami mariandee ira narana kai neemarinnaranoo.

<sup>21</sup> Napatari anee kaasau aandaara fooqaana maridana aneenna aidiranasaa sandana

nuu.

Anee amiqira faiqi moomoo maqeenanarano.

<sup>22</sup> Yooseefaafa anee irumu miqirafa maridana nammari afainni kambiqafi aqama

moomoo ireennaranoo.

<sup>23</sup> Ani namuqaa nimudaanai qimasee nari duru feefannoo ani arirara afaqeeffaranoo.

<sup>24</sup> Miqifanoo Yooseefaana duru fannoo sia paruparuqiannoo tipu kai qinoo mariannoo.

Yakooboona Anutufa aiqama afeeka faqaafa mina afeeka aminanoo mina asauku fannoo

afeekaianni. Mi Anutufa Isaraee maqannaasa rakisirafa misa afeeka kukeeqara

maqusa maridanoo.

<sup>25</sup> Ani akoona Anutufa ani dadaqiannoo.

Aiqama afeeka faqaa Anutufa ani amiqi amiqiani.

Innaarunaindaraa aakunoo ani amiqi amiqimma amaqaannoo.

Maqakiqari ururainna nammariifa ani amiqi amiqirana amiani.

Ani burimakau aandaau faqa faiqi aanaaqiuqa faqa amiqi amiqimma nimaqaani.

<sup>26</sup> Moomoo taatuqeenauqa faqa sakummauqannoo faqa ani amiqi amiqimma amaqaani. Ooqeenaa aaganasaaqaraa amiqi amiqirafa ani amiqi amiqiannoo. Naaruura marira aaganasaaqaraa amiqi amiqirafa ani amiqimma amaqaani. Oosana oosana ainaina qinee qunna amiqi amiqirafa ani Yooseefaanasaa mariannoo. Anee aneenna afasausa kigari uriqararafa marinnanasa mi ainainausa anisaa mariannoo.

<sup>27</sup> Miqi qimasee Yooseefaana qimamisee quandafinoo Beensaminna qimaminau. Beensaminna anee kaasau fainiara foora marinaranoo. Anee kananaana faqa eendimarinaana faqa aandau arusee neennaranoo.

<sup>28</sup> Doo miqimasee Yakooboofa nari faiqi namu indaarugaana saa oosana araseenoo aiqama mafi nifaqooqa qimasana. Miqimasooafaqaa misa qisauku qara taikasee qikunooqu qaara marasee oosana faiqi namu Isaraee maqanna mariqau.

*Yakooboofa kuqufuafa akundoo ufafa.*

<sup>29</sup> Yakooboofa nifaqooqa qimannimaqaseenoo maaqi qimasee nari faiqi namu qimaniminu. Qinee kaqi kaaqoo kuqiqa qeeqa qikeeku qikaaku marianaki oonu ootupaanaura. Innee sia maaqoo qikundaaqa. Ooqai Abaraqaammama nikuudara maqa feefauru maqooqa maridanoo. Qeeta maqanna Eefarona maqaki qini qikausa nikundoonaki qini faqa qikundaaqa.

<sup>30</sup> Kannaana maqa maaqaki Makapeera maqusa Mamareena maqusa suani afu oosana qaana maridanoo. Abaraqaammama Eefarona unai mi maqana feefaurummaseenoo nikundanau.

<sup>31</sup> Miqoo misa Abaraqaammama faqa mina anaqa Saraqa nammarina faqa nikundaqau. Minakikai Isakeena faqa mina anaqa Reebeeka nammarina faqa nikundaqau. Qinee minaki inni ninoona Reea nammarina akundeeqa.

<sup>32</sup> Mi maqana faqa minakinaa ooni aamara faqa Qeeta maqannaasa unai feefauriqia. Qini minaki qikundaaqa.

<sup>33</sup> Yakooboofa nari faiqi namu qimannimi taikasee aiku raqandaammasee doo kuqinoo nari akeeku akaaku unai finau.

## 50

*Yooseefaafa nari afasausamara asooara ufa qimannimu ufafa.*

<sup>1</sup> Yakooboofa kuqu fufanoo Yooseefaafa aundura mandaikufanoo nari akoona qirisaa roofeebaaqa mambufanoo nari akoona oori amooqeenoo qiki raqanau.

<sup>2</sup> Qiiki raqaseenoo Yooseefaafa Isipa maqanna oosana mareenoo tutaqausa qimannimufaqa anireeqa sia kai kaqi mandaikianifeera marasinna oosana oosana akuamaqee mariqau.

<sup>3</sup> Misa Isipa maqannaasa oosana maraseeqa qaara fasiqa niku nisauku taikasee 40 faasaanasaa marasinna Yakooboona qiri akuamaqaaqau. Isipa maqanna qaaramoo fasiqa faqa qisaukuqara taikasee 70 faasaanasaa Yakooboona iki raqaida sofaari mariqau.

<sup>4</sup> Sofaairana taikasoo fanoo Yooseefaafa Faraona aaqa marusa uriqararasa qimannimino qinuu. Innee maa ufana mara maree munu karaambaiqa Faraona qimamiaqa.

<sup>5</sup> Qini qikoofa kuqirara idanoo qima afeekaikammasee qini qima qiminoo qinuu. Qinee kuquanana qini qiri mara maree Kannaana maqa maaqaki ooni aamara deedaqamma qaafannanaki qikundaa. Minara amanee qinee oorureeqa qeeqa qikoona minaki akundamaseeqa qumunauree.

<sup>6</sup> Minara Faraofa irisee qimaminuu. Doo ooruree aneenna qima afeekaikianandee inana aneenna akoona akundamasee qumua.

<sup>7</sup> Yooseefaafa nari akoona akundarara oorufuafa Faraona aaqa uriqararasa marusa faqa Faraona koota irimarusa uriqararasa faqa Isipa maqannaasa indaarunniki imaru fasiqausa faqa Yooseefaana faqa ooru fiqau.

<sup>8</sup> Mina aiku asauku faqa mina afasausa mara faqa mina akoona aiku asauku akaqausa faqa aiqamausa Yooseefaana faqa ooru fiqau. Misa aandau faqa faiqi aanaaqiuqa faqa kaqi kai Koosena maqa maaqaki mariqau.

<sup>9</sup> Akaqausa qoosasa ooru fiqau. Akaqausa qoosa rariseemaru karanaki ooru fiqau. Yooseefaana faqa faiqi tatufuafa ooru fiqau.

<sup>10</sup> Misa aiqamausa suani oosana qaana Yooradana nammari afainni sakuma faqa raisa adiuqa mara qaqimaru maqusanasaa ooruree misa firaqoo kisaqasaa sofaariqau. Yooseefaafa nari akoonara qisauku dinni taikasee dinni ani qaara marasee 7 faasaana sofaarinuu.

<sup>11</sup> Kannaana maqusanaasa miqoo marusa iki raqoona qafamasee qiqau. Nindafaaga Isipa maqannaa firaqoo faaqa rumasaida iki raqaida. Miqi qimaseeqa misa mi maqusana auqu Abeera Misaraima fee qimariqau. Mi auquna oosana Isipa maqannaa soofaarira maqusa fee qiqau.

<sup>12</sup> Yakooboona faiqi namu nari nikoofa qimannimundee iqau.

<sup>13</sup> Misa nari nikoona qiri mara maree Kannaana maqa maaqai ooruree Makapeeraa maqa maaqaki Mamaree maqusa suani oosana qaannai marufaqa miqoo ooni aamaraki akundaqau. Qeeta maqanaa fasiqa mina auqu Eefaroonna Abaraqaammafa feefauru maqoonaki quqaqau.

<sup>14</sup> Yooseefaafa nari akoona akundamaseenoo nari faqa fusa nari akaqaafasaaqau faqa moosa faqa kafa anirandee Isipa maqusai fiqau.

*Yooseefaafa nari akaqaa fasaauqa aqoondikira ufa niminau.*

<sup>15</sup> Yooseefaana akaqaa fasaauqa misa nikoofa kuqufufaqa Yooseefaana rufieeqa nari qimami nari qimami qiqau. Ooqai maasa Yooseefaana mandaika mamaqaafanausa marida. Mina akiqara iannoofee.

<sup>16</sup> Misa miqi qimaseeqa Yooseefaa funnai ufa quqaseeqa maaqi qimasee qimamiqau.

<sup>17</sup> Oo Yooseefaa maasa qikoofa kuqiraridanoo aniara maaqi qimasee maasa qimaqim-inau. Yooseefaa ani akaqaafasaa ani mandaika mamaqoonara qaunummasaa siamma iria. Misa ani mandaika mamaqoonara doo qinee mi ufana oosana iriqa. Maasa qikoofa miqi qunara minara maasa ani qimamidaqa. Ani akoona Anutuna ainainira faiqiuqa maasa ani mandaikamma amaqaafanna numoona minni qisaa. Miqi qufanoo Yooseefaafa minara iriseenoo iki raqanau.

<sup>18</sup> Mina akaqaa fasaauqa minara iriseeqa anireeqa nariqa Yooseefaana oorinni maqasaa kummarama fufaqa qiqau. Maasa ani ainainira faiqi kakai mambi marianaura.

<sup>19</sup> Yooseefaafa iriseenoo qinau. Innee sia qiniara rufiaaqa. Sia qinee qeeqa qifaaqa Anutuna amaaqa maqaanaura.

<sup>20</sup> Kuqaa innee qini mandaikamma qimaqaaneera tipundaarufanoo Anutufa mina mara quandasoofanoo amiqinau. Moomoo maqee kaqi mariasa marirana dadaaqiani-feera miqinau.

<sup>21</sup> Sia rufiaaqa. Qinee inni faqa inni faiqi anaasee faqa narana nimida rakisi ni-maqaanaura. Miqi qimasee Yooseefaafa nari ainaina nifaaqa quqaqeeera qima niminau.

*Yooseefaafa kuqu ufafa.*

<sup>22</sup> Miqoo Yooseefaafa Isipa maqannai nari ainaina faqa kaqi marinau.

<sup>23</sup> Mifa wan handereeta faqa qisauku qara faqa 110 maraseenoo kuqinau. Yooseefaafa miqoo maridanoo nari amaaku Eefaraimmana faiqi faqa qafanau nari anaiqi faqa nari afaqnausa faqa nindafanau. Yooseefaafa Mannaaseena faiqi Makirana faiqi namu nari afaqnausa marasee f irinau.

<sup>24</sup> Kuqiraridanoo Yooseefaafa maaqi qimasee nari ainaina qimanniminau. Qinee kuqirarammidaqa. Qinee kuqu fuananoo Anutufa innisaa rakisidanoo inni indaarunnikinaqa ooqai Abaraqaammana faqa Isakeena faqa Yakooboona faqa qima afeekaika mandee nimiraa maqanasaa inni nindiqamaree miqoo munu quqaannoo.

<sup>25</sup> Yooseefaafa minara kai kafa qimanniminau. Anutufa inni nifiqee finaqa qini qimudaani faqa mara mareeqa miqoo munu madikama qisaaqa. Innee minara qima afeekai kifafa qinee iria. Misa irisee qima afeekaikammasoofanoo Yooseefaafa kuqinau.

<sup>26</sup> Yooseefaafa Isipa maqa maaqaki maridanoo wan handereeta faqa qisauku qara faqa 110 aukuna maraseenoo kuqinau. Kuqufufaqa misa sia kai kaqi putaa ianifeera mi marasinna aku amaqaaseeqa bukisaki quqaqoofanoo marinau.

## RAFUDOO AKARAFA

*Isipa maqannaasa Isaraee maqannaasa mandaikamma nimaqaqau.*

<sup>1</sup> Yakooboon amaaku oondamara misa faqa Isipa maqusai ooqu fusa misa nuqu maqimminoo maridanoo.

<sup>2</sup> Reubeenafa faqa Simeeoonafa faqa Reefifa faqa Yudafa faqa

<sup>3-4</sup> Isakarafa faqa Seeburunafa faqa Beensaminafa faqa Dannaafa faqa Napatarifa faqa Kadaafa faqa Aseerafa faqa minamusa faqa misa faiqinamu faqa nari nikoona ninaakuna faqa Isipa maqa maaqaki ooqu fiqau.

<sup>5</sup> Moodaanaki ruqauiga ooqu fusa qaaramoo fasiqa niku nisauku taikasee moo fasiqa asaukuqara kai taikasee 70 Isipa maqa maaqaki ooqu mariqau. Yooseefaafa ooqai miqoo maruqoo marinau.

<sup>6-7</sup> Miqoo mariifafa Yooseefaafa faqa nari afasausamara faqa aiqama mi akiigausa kuqu taikafufaqa misa faiqi namu niku nisauku findifufaqa faiqi moomoo uqanna maqasoofaqa kambiqaqau. Kambiqafiqa Isipa maqa maaqa umbiqamma aqiqa mariqau.

<sup>8</sup> Faraofa Isipa maqanna rakisirafa kuqufufanoo kisaqaasaa marinoo fuka moo Faraofa kambiqanau. Mifa Yooseefaana faqa aandaroo aukuna rakisiunara faqa mina aiku asaukuara faqa sia irinai.

<sup>9</sup> Faraofa nari maqannaasa qimannimino qinai. Isaraee maqannaasa moomoo uqanna maqa maaqa umbiaqa mariafaqa maasa uridaaqaramaseeqa maasa rafaqafu qimaqeafaara.

<sup>10</sup> Rakirafa kambiqainafa misa maasa namuqaa faqa moodaanaki kammafi maasa darusee quqasee sandee foora. Inni saimbaqa naqifee mandee oonumafi irisee misa rafaqafusaanaqee misa sia moomoo kambiqeefaree.

<sup>11</sup> Miqi qimasooafa Isipa maqannaasa Isaraee maqannaasa karafusa saika nimaqau. Afeeka rakisirausa misasaa rakisi mariqau. Isaraee maqannaasa karafusaki maridaqa qaara maqusa auqigau. Moo maqusa auqu Pitoona maqusa augusee moo maqusa auqu Raqamaseesa maqusa auqigau. Mi maqusa qanda narana afeedimaru maqusa qanda mariqau. Qafee maqannai kai maaqa usakeemariqau.

<sup>12</sup> Isipa maqannaasa Isaraee maqanna kafaa kafaa ummaara nimufaqa moomoo kambiqafiqa maqa maaqa qumbiaqau. Isipa maqanna misa nindafeeqa kaaqa rufiee mariqau.

<sup>13</sup> Miqunara sia moomoo asumu kambiqaaqeeera firaa kadaapi uqanna misa nimuaaqa quqasoofaqa misa manda marira mariqau.

<sup>14</sup> Isipa maqannaasa qufaqa Isaraee maqanna qafee maqa qumaree ausirira oonira foora moomoo auquseeqa minannai maaqa usakeeqa kafaa afuqaki ainaina faqa imariqau. Miqi marufaqa sia Isipa maqannaasa misara qimudaoo qimariqau.

<sup>15</sup> Faraofa mi kadaapirana Isaraee maqanna nimiseenoo quandafinoo Isaree maqanna anaasee qaaraqanda Sifaraa nammariisa Puaa nammariisa inaamunai fusasaa rakisimaru anaasee qanda qimanniminai.

<sup>16</sup> Inneeqara innaamunai fidaqara dadaaqiqa faiqi maqaseeqa akoonaiqi aiqama aaqee uqanna rutukuqa, maanaaqa kai kaqi mariaqa.

<sup>17</sup> Mi anaaseeqanda Faraona ufa iriseeqara Anutuna ufara rufiseeqa sia akoonaiqi-uqa nari mariqau, kaqi mariqau.

<sup>18</sup> Faraofa akoonaiqi moomoo kambiqoofanoo nindafamaseenoo innaamunai nifiqaqanu aanaaseeqanda naaramaseenoo niqinoo qinai. Inneeqara naqaafee ifaqee sia akoonaiqi naridee qini ufa rukiaafanoo.

<sup>19</sup> Miqanda mina ufa iriseeqa qigau. Heeburu anaasee sia Isipa anaasee naannaraidaqa misa kaqi kaqi faiqi maqaidaqa. Maaqanda oonu raunaqa faasai faiqi maqaqaafaqa oonu nindafaidaqa.

<sup>20</sup> Anutufa mi anaaseeqanda oosana nindafamaseenoo amiqi amiqimasooafa Isaraee maqannaasa moomoo kambiqafiqa afeeka maqanna mariqau.

<sup>21</sup> Miqanda Anutunara rufioofanoo mina akiiqara Anutufa miqanda faqa faiqi asumu ninai.

<sup>22</sup> Faraofa misa nindafeenoo nari maqanna Isipa maqanna aiqamausa naaramaseenoo ufa afeeka ufa qimanniminai. Heeburu anaasee akoonaiqi maqasaifaqa innee mina mareeqee nammari firaana Niru nammariiki agusaifaqa kuquaqa. Aiqama kuquaqeeera maanaaqauqa kai kaqi mariaqeeera qinai. Miqi qimasooafa miqimmi mariqau.

## 2

*Misa sia Mooseena faiqi aanaaqi ariqau.*

<sup>1</sup> Mi kamuqoo mi aukuanna Reefina atikiqari kumaaraa moo fannoo findi finoo maanaaqa Reefina oosanaki maranau.

<sup>2</sup> Maraseenoo faiqi moo akoonaiqi maqaseenoo mina anoofa qafoofanoo amiqira faiqi marufanoo Isipa maqannaasa arifoo qimaseenoo qaaramoo quqoonasaa kukeeqa amaqaqoofanoo marinau.

<sup>3</sup> Qaaramoo quqoona aiqaroofanoo faiqi aanaaqi kaqikaagoo aaqoo irufanoo mina anoofa akoofoa rafaqaqafirara oonumafi irusia mina anoofa furaa amanee uqa kisaaga difaaniara foora auqinau. Mifa koorootaqa qumareenoo furaa uqamau sia nammari ruqiqaki keeqaanifeera akinau. Uqa auquseenoo mina anoofa faiqi aanaaqi uqaki rumaseenoo furaa moomoo nammari ammausai marunaki kukeeqaqoofanoo minaki marinau.

<sup>4</sup> Nammariki marufanoo mi faiqina anasaafa nianaindari kukeeqanoo maridanoo rakisi marinau. Nanee kambigaannoo qimasaidanoo rakisi marinau.

<sup>5</sup> Faraona aramuna nammari auqaaneera nari rakisimaru manaaqausa faqa mi nammarinai quminau. Mifa nammari auqaidanoo furaa qifoofanoo uqa marinau. Marufanoo qafamaseenoo nari ainaini maru manaaqana qimamufanoo mi uqana nammari kinaana maranau.

<sup>6</sup> Marasoofanoo Faraona aramuna asaukukinaana maraseenoo uqa oo raqasee faiqi aanaaqi qafanau. Faiqi aanaaqi ikiraqoofanoo mina irufanoo amuqusufanoo qinau. Maafa Heeburu maqannaasa faiqi akoonaiqi maridanoo fee qinau.

<sup>7</sup> Mifa miqi qimarufanoo mi faiqi anaqina anasaafa anireenoo Faraona aramuna maaqi qimasee qimaminau. Amanee Heeburu anaasee moo ooru afiqee muqusaananoo fee naamma amiannoo fee.

<sup>8</sup> Faraona aramuna eedoo qufanoo mi faiqi anaqina anasaafa ooru nari ninoona uqanna afiqee quminau.

<sup>9</sup> Qumuroofanoo Faraona aramuna fannoo maaqi qimaseenoo mi anaaseena qimaminau. Anee maa faiqi anaqina naamma amidana rakisi marinaqa qinee maqee maqee feefauru ani ami marianauranoo. Mi anaaseefa eedoo qimaseenoo nari faiqi aanaaqi uqanna nari maaqai munu qaqee idanoo rakisi marinau.

<sup>10</sup> Mi faiqi anaqifa kaqi kaqoo innooqafufanoo nari anoofa afiqeenoo Faraona aramuna maruqoo minisoofanoo nari faiqi kamambinuu. Fuka anoofa auqu rarara maaqi qinau. Qinee nammari kinaana maraunannara auqu Mooseenee qianaara.

*Mooseefa Midianna maqusai sandanau.*

<sup>11</sup> Mariiufanoo Mooseefa innooqafufanoo moo kari nari maqanna Isaraee maqannaasa oonu nindafoofaqa firaa kadaapi rimariqau. Isipa maqanna moo fannoo Heeburu maqanna Mooseena aqoonnana arimarufanoo Mooseefa qafanau.

<sup>12</sup> Aranaqoofanoo faiqira dinni dinni munu afu maqee mini afu maqee ufanoo faiqi sia marufanoo Isipa maqanna fasiqa Mooseefa kuqa aruseenoo mina iri nukuda afaqaseenoo minaki kukeeqasee akundanau.

<sup>13</sup> Iqaqoofanoo kananaana rafudamakufanoo Mooseefa nari maqanna nindafarara kafa finau. Oonuree nindafoofaqa Heeburu fasiqa qaaraqanda rariqau. Mooseefa aqoonnana arimaruna qimaminoo qinau. Anee naqaafee ifanee aneenna aqoonnana oosana siainaki fifau aridanee.

<sup>14</sup> Miqi qufanoo aru fasiqafa qinau. Yafee aniara karaambaiqee qifanee anee maasa ufa irisee andeeqaidanee. Eenda anee Isipa maqanna aruanafa kafa maqee qini faqa darinnaree qufanoo Mooseefa tautinau. Tautumandee qinau. Doo eenda arunannara aiqama kooroomminoo maridanoommifoo qimaseenoo rufianau.

<sup>15</sup> Faraofa minara iriseenoo Mooseena kuqa aruaneera ufanoo Mooseefa minara rufamareenoo Isipa maqa maaqa quqasee Midianna maqa maaqai nianai sandanau.

<sup>16</sup> Sandee oonureenoo nammari madika afaisaa ooqu marinuu. Midianna maqanna amaana maqaki aanaiqkirana mina auqu Yeetaroonaa aramuqmaaka dinni qisauku taikasee dinni oonu qaara marasee 7 mariqau. Mooseefa nammari madika afaisaa marufaqa mi manaaqausa nari nikoona sipsipauqa faqa mimmiuqa faqa nammari saka nimianee qimasee aniraqau.

<sup>17</sup> Faiqi akaqausa nari sipsipasaa rakisimarusu mi manaaqausa niqiqoofaqa anirandee fufaqa misa nari sipsipa naaree nammari nimianeera qufanoo Mooseefa findifinoo misara qaoo qimaseenoo maanaaqauqa naaroofofaqa aniroofanoo Mooseefa nari kai misa sipsipauqa faqa mimmiuqa faqa nammari saka niminuu.

<sup>18</sup> Mi manaqausa sipsipauqa nammari neeneesoofaqa nifiqee maaqai fiqau. Oonu roofanoo misa nikoofa iramirinoo qinau. Innee naqiffee ifaqee maqee faasaanasaa anidee.

<sup>19</sup> Miqi qufaqa misa qiqau. Isipa maqannaa fasiqa moo fannoo faiqi sipsipasaa rakisi mariasa oonu raafanoo misara qaoo qimaseenoo maasa sipsipauqa nari kai nammari saka qumaree nimiisaifaqa dauni anidaqa.

<sup>20</sup> Misa nikoofa mina irinoo qinau. Mi fasiqafa yaiffee maridanoo fee. Nanaree innee minni aisee anidee. Doo sandee oonu afiqaiфанoo narana ani naani. Miqi qimasooafaqa oonu Mooseena afiqee aniqau.

<sup>21</sup> Yeetaroofa Mooseenara qini faqa mariannee qufanoo eedoo qimasee marinau. Marufanoo Yeetaroofa nari araamuna Sipooraa nammarina Mooseena amufanoo maranau.

<sup>22</sup> Maraseenoo faiqi akoonaiqi maqanau. Maqaseenoo Mooseefa nari faiqi auqureenoo qinee aanaamuru maqusaki maridee qimaseenoo Keerasoomma nee qinau.

<sup>23</sup> Mooseefa miqoo moomoo aukuanaki marufanoo Isipa maqanna karaambaiqa Faraoofa kuqinau. Kuqufufaqa Isaraee maqannaasa Isipa maqannaasa afeeka rumbarana ameemaanai kaqi kai annadannada qidaqa maridaqa Anutufinnai dadaaqiani-feera innaaru qimariqau. Misa innaaru qirafa Anutufinnai ooru finau.

<sup>24</sup> Anutufa misa qiki raqarana iriseenoo Abarahaamana faqa Isakeena faqa Yakoo-boona faqa moodaanaki kira ufa qimaqoofa misa faiqinamu faqa dadaaqianifeera oonu mafi irinau.

<sup>25</sup> Anutufa misa mandainainaki marufanoo misara oonu mafi irufanoo amuqusinau.

### 3

#### *Anutufa Mooseena aaranau.*

<sup>1</sup> Moo kari Mooseefa nari airaamaku Yeetaroonna Midianna maqannaa amaana maqaki aanaiqi kirafa maruna sipsipasaa faqa mimmisaa faqa rakisi marinau. Moo kari Mooseefa nari airaamaku sipsipauqa faqa mimmiuqa faqa nifiqa mareenoo aadana maqa maaqa fiqareenoo Hooreeba naaquqara aqaanasaa muruqoofaqa andanda neemaruфанoo rakisi marinau.

<sup>2</sup> Miqi marufanoo Anutuna qangiroo Mooseena afusaa tautumma amaqaseenoo kooroomafinoo saqari amimikiqari idauru kambiqaanau. Mooseefa mina qafoofanoo idauru firaafa qaidanoo sia mi saqari amimina qanau.

<sup>3</sup> Mooseefa mina qafamaseenoo moo ainainammifoo saina aqa oonuree qafaa, nanaree saqari amimi sia qaidanoo fee qimasee aqa finau.

<sup>4</sup> Mooseefa quandakinoo aqa oonu roofanoo Anutufa minakiqari Mooseena aaraidanoo qinau. Moosee Moosee qufanoo Mooseefa iriseenoo maqi qimaseenoo qinau. Qinee maa maridaqa.

<sup>5</sup> Miqi qimasoofanoo Anutufa kafaa qimaminau Moosee sia anee adeedi ania. Aneenna aiku aanaamu raipaqusee miqoo maria. Naaquqara maqa maaqa marinara aneenna aiku aanaamu mara aqua.

<sup>6</sup> Miqi qimaseenoo Anutufa kafaa qimaminau. Qinee ani akoonna Anutusa maridaqa. Abarahaamana faqa Isakeena faqa Yakoo-boona faqa Anutusa maridaqa. Mooseefa mi ufana iriseenoo Anutuna qafaanoo qimaseenoo rufiaseenoo oorisa ititanau.

<sup>7</sup> Anutufa kaifaa Mooseena qimaminoo qinau. Qini faiqi anaasee Isaraee maqannaasa Isipa maqasaa firaa aupurarana nimi mariafaqa nindafaidaqa. Misa qiniara maasa afeeka rakisira rakisi mariasa nisaukukinaana rafia quqaannee qimasee qini daaree mariafaqa iridaqa. Qinee misa aigama aupurarana maree marianara iridaqa.

<sup>8</sup> Qinee innaarunaindari qumuree Isipa maqannaasa nisaukukinaana mareeqee firaa maqa maaqa ainoo faqaa maqa aigama ainaina rairaa imariqoo quqaanau. Mi maqanasaa Kannaana maqannaasa faqa Heeta maqannaasa faqa Amooru maqannaasa faqa Peerisita maqannaasa faqa Hifita maqannaasa faqa Yeebusa maqannaasa faqa misauqa mariaqoo quqannisaanau.

<sup>9</sup> Isipa maqannaa Heeburu maqannaa radami mariafaqa misa qiki raqee mariafa doo qini daaqoosaa rifaqa niqafaidaqa.

<sup>10</sup> Qinee ani Isipa maqannaa karaambaiqa Faraoo finnai aiqaanana oonureenana qini faiqi anaasee indaarunni kamma nimaqainaaqa Faraoonna maqa maaqakiqari quqasee aniaqa.

<sup>11</sup> Mooseefa mi ufana iriseenoo Anutunara qaoo qidanoo qinau. Akasaa qinee maaqiraua naqimaseeqee Faraoo finnai oonuree fee Isaraee maqannaasa Isipa maqa maaqaki mariana nifiqaanaaree.

<sup>12</sup> Anutufa iriseenoo qinau. Qinee anifaqa marianana anee Isaraee maqannaasa Isipa maqasaa qaraana nifiqamaree maa aaqannasaa aniree qini qimoo qifaranoo. Miqinna oosanafa qinee ani aiqaafannanara kooroo iannoo.

<sup>13</sup> Mooseefa iriseenoo kafaa Anutuna qimaminoo qinau. Anee qini diqiqaanaqa qinee Isaraee maqanna innannai oonu reeqa maaqi qianaara. Inni nisaifaqausa ninaakusa Anutufa qini diqiqaifaqa inni qimannimirara anidaqa. Miqi qianaqa misa maaqi qimasee qini ireefaranoo. Mina auqu yafee maridanoo fee qifaqa qinee naqiffee qimasee qimannimianauree.

<sup>14</sup> Anutufa iriseenoo Mooseena qimaminoo qinau. Qinee qeeqa marunausa qidaqa. Anee maaqi qimasee qimannimia. Nariara qinee qeeqa marunausee qimarifa diqiqaifaqa innee iannai anidaqa.

<sup>15</sup> Maaqi qimasee kafaa moo faqa qimannimia. Inni nikausa Abarahaammanna faqa Isakeena faqa Yakooboona faqa Anutusa Yaaweesa maridaqa ani Isaraee maqanna iannai ani aqidaqa. Qini mi duqufa naaruara mariannoo. Kasooaqee kambiqainausa qini mi duquna reefaranoo.

<sup>16</sup> Anutufa kaifaa Mooseena qimaminoo qinau. Anee ooguree Isaraee maqanna uriqararawsa suqusee maaqi qimasee qimannimia. Yaaweefa inni ninaakusa Abarahaammanna faqa Isakeena faqa Yakooboona faqa Anutusa qini qifusaa kooroo mafinoo qimaqiminoo. Misa qimannimia, qinee misa iannai aniree qafaunaqa Isipa maqannaasa qumaara moomoo nimimariafaqa qafaidaqa.

<sup>17</sup> Qinee Isipa maqa maaqakinaana maraanauree qimasee iridaqa. Misa firaa aupurarana kinaana niffeeqee ainoo faqaa maqasaa irairaa ida reemindeemiri mariqoo Kannaa maqasaa faqa Heeta maqasaa faqa Amooraa maqasaa faqa Peerisita maqasaa faqa Hifita maqasaa faqa Yeebusa maqasaa faqa quqannisaanura.

<sup>18</sup> Moosee anee Isaraee maqannaasa mi ufana qimanniminaqa irifara. Anee Isaraee maqanna uriqararawsa faqa nifiqamareenana Isipa maqanna karaambaiqa marinnai oonuree maaqi qimasee qimamia. Maasa Heeburu maqannaasa Yaaweefa maasa Anutufa maasa qifusaa kooroo mafinoo qimanniminoo. Maqee anee maasara eedoo qinaqa qaaramoo faasaana aadana maqa maaqaki oonuree maasa Yaaweena maasa Anutuna tatufirana suqa amianee qia.

<sup>19</sup> Qinee iridaqa anee qimaminanoo Isipa maqanna karaambaiqa fannoo sia inni niqainafaqaa ifaranoo. Qinee mina aidafirana amiananoo miqoo inni niqaanoo.

<sup>20</sup> Qinee qeeqa afeekannai Isipa maqannaasa oosana oosana naaquqara ainainannai fitiqnarana nimianaara. Nimiananoo Faraoofa miqoo inni idukuannoo.

<sup>21</sup> Qinee Isipa maqannaasa inniara naaquqarana nimianaqa innee Isipa maqasaqari sia kaqi ifaranoo. Ainaina nimifaqa maree ifaranoo.

<sup>22</sup> Innee firarifaqa inni ninaaqmaaka Isipa maqanna aanaaseeuqa nari naqa maria aanaaseesa faqa nariqa maaqaki mariasara faqa qifaqa qamunna faqa kooraa faqa siruaa faqa nifaqa auqi maria ainainausa faqa nimifaqa inneeqa faiqi namu niraamuqmaaka Isipa maqanna amiqira qamunna ainaina kai afisunnimaqifaqa maree fuuqa. Miqinnanannai innee Isipa maqannaasa ainaina maree fiara foora ifaranoo.

## 4

*Anutufa Mooseena oosana oosana kudifaanna auqaani feera afeeka aminau.*

<sup>1</sup> Mooseefa Anutuna ufa iriseenoo kaifaa iramirinoo qinau. Misa Isaraee maqanna sia qini ufa qaindusia, sia qini ufa iria qiniara unna fee qimasee Yaaweefa sia ani afusaa kooroo ifana unna qiaanoo qifaqa qinee naqiffee ianauree. Naqiffee ianaqee misa qini oosana qafee fee kuqaa fee qifaree.

<sup>2</sup> Miqi qufanoo Anutufa qinau. Ani asaukuki anee nanee uqirafa nidanee, qufanoo Mooseefa qinau. Saunu uqirawsa nidaqee qinau.

<sup>3</sup> Anutufa iriseenoo qinau. Doo mina maqasaa aqua qufanoo maqasaa aqusoofanoo mi saunufa sakani kambiqaa fufanoo Mooseefa mina qafamaseenoo rufisee sandanau.

<sup>4</sup> Anutufa kafaa qimaminoo qinau. Aneenna asaukunnai mara miami ameesa qumaraa qufanoo qumarooofanoo kafaa asaukuki saunu kammafinuu.

<sup>5</sup> Miqooqari Yaaweefa Mooseena qimaminuu. Anee ooqu Isaraee maqanna nifusaa miqinaqa misa qiniara Abarahaammanna faqa Isakeena faqa Yakooboona faqa misa Yaaweefa misa Anutufa kuqaa ani afusaa kooroo iifoo qifaranoo.

<sup>6</sup> Yaaweefa kafaa Mooseena qimaminuu. Anee aneenna siutaki asauku upeekaa. Miqi qufanoo Mooseefa miqimminuu. Asauku upekaseenoo radukusee qafooofanoo asaukumau aiqama namuandaundau inoo marufanoo qafanau.

<sup>7</sup> Anutufa kafia qinau aneenna asauku kafia upeekaa qufanoo upeekaseenoo radukuseenoo qafoofanoo asauku mau namuandaundau irafa sia marinau. Dinniara foora kai marinau.

<sup>8</sup> Anutufa kafia Mooseena qimaminoo qinau. Anee indaaruu saunu uqannifiqaina sia irifana innaaqiana asauku uqannifiqainaqa iriaqa.

<sup>9</sup> Misa ani mi ainaina qanda qafamasee sia ani ufa irifana anee Niru nammari saka qumareenana aadana maqasaa adiasainanoo fidika kai mandifinaqa qafaaqa.

<sup>10</sup> Mooseefa Yaaweena ufa iriseenoo qimaminau. Oo Yaawee sia qini diiqaa. Qinee ooqaindari sia amiqimmasee faiqi nifusaa ufa qunausa maridaqa. Maqee anee qini qima qimiannaqooqari sia mifa qini mareeqee ufa qimarunausaikamma qiseenoo. Qinee sia ufa qunausa ufara mamma qimarunausa maridaqa.

<sup>11</sup> Miqi qufanoo Anutufa Mooseena qimaminoo qinau. Yafee nifauru nimidanoo fee. Yafee sia ufa qiasaika faqa naaqoo qaunirusaika faqa mannisaaidanoo fee. Yafee nifu maqarana faqa nifu dimbarana faqa nimidanoo fee. Qinee Yaaweesa kai miqidaqa.

<sup>12</sup> Moosee anee doo fua. Qinee ani ufa dadaaqi aakapaanana qinnaranoo.

<sup>13</sup> Mooseefa kaifaa Yaaweena qimaminoo qinau. Oo Yaawee anee moo aqiqaianoo fuani.

<sup>14</sup> Yaaweefa mina iriseenoo aranaqoofanoo qinau. Doo amana ani afasaafa Aaroonafa Reefina atikinaafa andeeqasee ufa qimarifa marifaqa qinee iridaqa. Mifa maqee aniara randanoo anidanoo. Mifa ani paqurimandee asasiannoo.

<sup>15</sup> Anee mina qimaminanoo mifa misa qimannimiani. Qinee inniqara dadaqianaaqa ufa qimannimifaranoo. Qinee inneeqara ifandinna ainaina qimannimianaqa auqefaranoo.

<sup>16</sup> Anutufa kafia Mooseena qimaminau. Aaroonafa ani ufa mareeqee faiqi anaasee qimannimiannoo. Mifa ani oora foora marinana anee mina Anutufara foora maridana mifa auqaaninna ainaina anee aakapeennaranoo.

<sup>17</sup> Anee aneenna saunu faqa uqirafa fua. Minannai oosana oosana ainaina faiqi sia amana auqaqaa ira ainaina auqennaranoo.

*Mooseefa Isipa maqusai kafia anirandee finau.*

<sup>18</sup> Mooseefa Yaaweena ufa iriseenoo nari airaamaku Yeetaroo funnai oonureenoo qimaminoo qinau. Amanee qinee Isipa maqusai kafia anirandee oonuree qeeqa ainaina niqafaanauree. Misa kaqi fee maridee doo fee kuqia. Miqiqufanoo Yeetarooafa iriseenoo eedoo qimasee aiqanau.

<sup>19</sup> Mooseefa Midianna maqa maaqai kaqi marufanoo Anutufa kafia qimaminoo qinau. Doo findi finana kafia Isipa maqusai fua. Ani arirari marusa doo kuqia.

<sup>20</sup> Mooseefa irisee eedoo qimaseenoo nari anaafa faqa faiqi namu faqa mareeqee doonkisa qaqaseenoo finau. Anutufa maree fuannee qu saununa faqa maree finau.

<sup>21</sup> Anutufa Mooseena qimaminoo qinau. Anee Isipa maqa maaqai oonureenana misa karaambaiqa afusaa faiqi sia amana auqaqaa ira ainaina qinee amiafanna afeekanannoo auqaa. Miqi marinaqa qinee Faraona kaukaata qira irirana amiananoo sia eedoo qinaqa Isaraee maqannaasa fifaranoo.

<sup>22</sup> Anee maaqi qimaseenana Faraona qimamia. Yaaweefa maaqi qidanoo. Isaraee maqannaasa qini ooqa faiqira foora maridammiaafoo qia.

<sup>23</sup> Qinee ani qimamidaqa. Anee qini ooqa faiqiuqa Isaraee maqannaasa quqasainaaqa misa oonuree qini qimoqiaqa, qunana anee qaoo qianaqa doo maqee ani ooqa faiqi aruanaura.

<sup>24</sup> Mooseefa nari faiqi anaasee faqa fidanoo eendufanoo aanai faiqanau. Eendaki Anutufa anireenoo Mooseena kuqa arirara inau.

<sup>25</sup> Miqufanoo Mooseena anaafa Sipooraa nammariifa ooni raiqarana qumareenoo nari amaaku afaqa ati aukuseenoo minannoo Mooseena aiku auqamaseenoo maqasaa quqanau. Quqaseenoo qinau. Anee qini qifaaqi fidika aanaaqi fasiqa mariananoo fee qinau.

<sup>26</sup> Miqimmasoofanoo Yaaweefa Mooseena sia arinai.

<sup>27</sup> Miqi qimarufanoo Yaaweefa Aaroonafa qimaminoo qinau. Anee aadana maqa maaqai fidana Mooseena paquria. Aaroonafa eedoo qimasee Anutuna naaquqara aqaanai ooru Mooseena paqurinai. Paqurimasee amooqa nanau.

<sup>28</sup> Amooqasoofanoo Mooseefa Isipa maqa maaqai fuanifeera Yaaweefa qimamuna faqa oosana oosana ainainara faqa Aaroonafa qimaminai. Yaaweefa faiqi sia amana auqaqaa ira ainaina auqannee quna faqa Aaroonafa qimaminai.

<sup>29</sup> Mooseesa Aaroonasa Isipa maqa maaqai ooqureeqa Isaraee maqannaqa faiqi firaasa naarama quqaqau.



<sup>30</sup> Quqaseeqa Yaaweefa Mooseena qimamu ufausa aiqama Aaroonafa qiman-nimisoofanoo Mooseefa faiqi sia amana auqaqaa ira ainainauqa misa nifusaa auqanau.

<sup>31</sup> Isaraee maqannaasa Aaroonaa mi ufana iriseeqa kuqaa mifoo qiqaau. Misa Yaaweefa misa unnai anunara nariqa firaa aupuraranara irisee kumma ramafuqaq innaaru qiqaau.

## 5

*Mooseesa Aaroonasa Isipa maqannaasa kinna oonu qafaqau.*

<sup>1</sup> Innaaru qimasooafaqa Mooseesa Aaroonasa Faraoo funnai oonuree qimamiqa qiqaau. Oo Faraoo, Yaaweefa maasa Isaraee maqannaana Anutufa aniara maaqi qinoo. Anee qini faiqi namu idukusainaga aadana maqa maaqaki oonureeqa oomaqa mandee qiniara innaaru qidaqa qimooqiagee qinoo.

<sup>2</sup> Faraooafa miqanda ufa iriseenoo qinuu. Yaaweefa yafee. Nanaree mina ufara eedoo qimasee Isaraee maqannaasa niqaana fifaree. Sia qinee Yaaweenara iridaqa. Minara qinee sia uqaana Isaraee maqannaasa niqaanaura.

<sup>3</sup> Mooseesa Aaroonasa kafa Faraoonaa qimamiqa qiqaau. Maasa Heeburu maqannaasa Anutufa maasa qifusaa koorooinoo. Anee maasara eedoo qinaqa qaaramoo faasaana aadana maqa maaqaki oonuree Yaaweena maasa Anutuna tatufirana suqa amiana. Maasa sia miqiananoo mifa firaa manda auriranannai fee firaa dariranannai fee maasa aiqama daruannoo.

<sup>4</sup> Faraooafa iriseenoo Mooseesa Aaroonasa qimannimino qinuu, inneeqara nanaree faiqi anaasee qini ainaini mariasa nifiqee fuafaqee minnisee fidee. Saina kafa anirandee ainainiranaki fuuqa.

<sup>5</sup> Innee Isaraee maqannaasa maqee moomoo kammafi qini ainainirana minnisararee fee qidafee.

<sup>6</sup> Mi faasaana kai Faraooafa Isipa maqannaana karabusasaa rakisi marusa faqa Isaraee maqannaana niqoonausasaa rakisi marusa faqa qimanninoo qinuu.

<sup>7</sup> Innee maqee sia kafa uita asaki ateeqasee Isaraee maqannaana nimifaqa minannoo maaqa usakee maria simmeerana auqaqa. Sai faqa nari kai maraqa.

<sup>8</sup> Maraseeqa sia oorudupi masee auqaqa. Aiqama kari auqi mariana amana kai auqaqa. Misa kudiki mariasa maridaqa qiniara maasa idukusainaga maasa oonuree Yaaweena nari Anutuna tatufirana suqa amianee qidaqa.

<sup>9</sup> Miqi qidaqifaqa innee firaa kadaapi nimifaqa misa oonauqee anauqee idaqa Mooseesa Aaroonasa qinna unnufausa sia iriaqa.

<sup>10</sup> Miqi qufaqa karabusasaa rakisi marusa faqa Isaraee maqannaasa nari niqoonausasaa rakisi marusa oonuree maaqi qimasee Isaraee maqannaasa qimannimiqa. Faraooafa maasara sia uita asaki raraku mini nimiaqee qidanoo.

<sup>11</sup> Mifa inniara inneeqa kai minakinai randasee maree miniseeqa ooqai auqiu simmeerana amana kai auqaqee qinoo.

<sup>12</sup> Miqi qufaqa misa Isipa maqa maaqaki aiqamatina nidaqa uita asaki randasee suqimariqa.

<sup>13</sup> Isipa maqannaana karabusasaa rakisi marusa fuki faaki qidaqa qiqaau. Innee ooqai maasa uita asaki nimiafana auqeeundee masee mina amana kai simmeera auqaqa.

<sup>14</sup> Miqi qimaseeqa karabusasaa rakisi maru Isipa maqannaana fasiqausa Isaraee maqannaasa nari niqoonausasaa rakisiaqeeera mara quqaqoosa naruseeqa qiqaau. Innee nanaree simmeera ooqai auqiana amana sia auqidee.

<sup>15</sup> Qufaqa Isaaraee maqannaana rakisirausa Faraoo funnai oonuree qimamiqa qiqaau. Oo uriqarafa. Anee naqaa fee ifanee maasa maaqimma qimaqidanee.

<sup>16</sup> Misa sia uita asaki nimiseeqa kaqi maasara simmeera auqaqee qidaqa. Mina saara maasa daria. Sia maasa oosanasaa fau. Inneeqa oosanasaa fifau miqiafanoo.

<sup>17</sup> Faraooafa iriseenoo qimanniminuu. Innee kudiki mariasa ainainiranana nikoqaiifaqa qiniara maasa idukuqisainaga Yaaweena tatufirana suqamianee qimariafanoo.

<sup>18</sup> Doo kaqi kaqi anirandee inneeqa ainainai fuuqa. Misa sia inni uita asaki nimifaranoo. Inneeqa kai uita asaki maree miniseeqa ooqai iundee kai moomoo simmeera auqaqa. Doo fuuqa.

<sup>19</sup> Isaraee maqannaasa nari niqoonausasaa rakisi marusa Faraooafa ooqai auqiundee kai masee auqaqee qunara irisee doo maasa ummaarakai maridee qiqaau.

<sup>20</sup> Faraoo funnaindari quqasee anidaqa Mooseesa Aaroonasa misa nifeesidaqa maru-faqa ani paquriqa.

<sup>21</sup> Ani paqurimmasee qimannimiqa qiqaau. Yaaweefa inniqara oosana qafamaseenoo mina akiqara nimiannoo. Inneeqara oosana arasaafanoo minasaara Faraooafa nari

rakisirausa faqa maasa daruannoo. Inneeqara Faraofa maasa daruanifeera andaana rumasaafanoo daruannoo.

*Mooseefa aundura ummaara roofanoo Anutu funnai anunu rinau.*

<sup>22</sup> Mooseefa misa ufa iriseenoo quandakufanoo oonureenoo Yaaweenara innaaru qinau. Oo Yaawee, anee naqaafee ifanee Isaraee maqanna maa mandaikana manni-maqaidanee. Anee naqi fee ifanee qini mai diiqeenee.

<sup>23</sup> Qinee Faraoo funnai oonreeqa ani ufa qimamiafanna qooqari Faraofa Isaraee maqannaasa mandaika kai mannimaqaidanoo. Anee sia uqanna dadaaqira kari mari-anoo.

## 6

<sup>1</sup> Yaaweefa Mooseena ufa iriseenoo qimaminau. Amana doo anee maqee qini oosana qafeennaranoo. Qinee Faraona afeekaikammasee qimamiananoo qini faiqi anaasee idukusainaga fifaranoo. Sia kaqi idukuannoo qinee qiananoo idukuseenoo fuki faaki qinaqa mina maqasaqaari quqasee fifaranoo.

*Anutufa kafaa Mooseena aaranau.*

<sup>2</sup> Anutufa kafaa Mooseena qimaminoo qinau. Qinee Yaaweesa maridaqa.

<sup>3</sup> Qinee Abarahaamana faqa Isakeena faqa Yakooboona faqa misa nifusaa aiqama afeeka faqaa Anutusa qeeqa duqu kooroo iqiafana. Qinee sia qeeqa fuka naaquqara duqu Yaaweesee qirana qimannimi qiafana.

<sup>4</sup> Qinee qeeqa moodaanaki kira ufa misa faqa qidaqa Kannaana maqa maqa misa nimiraree qima afeekaikiqiafana. Misa minaki asaqira faira foora mariunaki quqan-nisaanuranoo fee qiqiafana.

<sup>5</sup> Qinee maqee Isaraee maqannaasa Isipa maqanaasa karafusaki maridaqa auppuraida annada annada imarianara iriseeqa qinee qeeqa moodaanaki kira ufara oonu mafi iriga.

<sup>6</sup> Moosee anee Isaraee maqannaasa maaqi qimasee qini ufa qimannimia, qinee Yaaweesa maridaqa. Innee Isipa maqanna rumberanaki mariana qinee inni idu-keeqe asumu mariranaki quqannisaanura. Qinee afeeka qisaukunni manda auppurana Isipa maqannaasasaa quqaanura. Quqaseeqa inni Isaraee maqannaasa asumu maraanura.

<sup>7</sup> Qinee inni qeeqa faiqi aanaaseekammaseeqa qinee inni Anutusa mariana. Qinee inni Isipa maqanna karabusa kinaana iduku nisaanaga miqoo innee qini Anutusara irifaranoo.

<sup>8</sup> Qinee inni nifiteeqee kuqaa qima afeekaikammasee Abarahaammanna faqa Isakeena faqa Yakooboona faqa nimianauree qiafannaqoo quqannisaanura. Qinee inni nimi-ananoo mi maqafa innidni kammiannoo. Qinee Yaaweesa qidaqa.

<sup>9</sup> Mooseefa Isaraee maqannaasa qima nimufaqa misa sia mina ufa iriqau. Misa firaa ummaara maree marufa mifa misa naaqoo nifu furufara masoofaqa sia iriqau.

<sup>10</sup> Anutufa kafaa Mooseena qimaminoo qinau.

<sup>11</sup> Anee Isipa maqanna karaambaifa Faraoo finnai oonuree Isaraee maqannaasara qimamia. Misa karafusaki mariana idukusaina fuuqa.

<sup>12</sup> Mooseefa mi ufana iriseenoo Yaaweenaa qimaminoo qinau. Isaraee maqannaasa ririmma sia qini ufa iria naqaa fee masee Faraofa iriannoo fee. Qinee ufa qirara mamma qimarunausa maridaqa.

<sup>13</sup> Yaaweefa Mooseena faqa Aarona faqa qimanniminoo qinau. Inneeqara Isaraee maqannaasa faqa Faraona faqa maaqi qimasee qimannimiaqa, qinee ani Mooseenara Isaraee maqannaasa Isipa maqa maaqaindaraana nifiqee fuannee qunnanara qimannimia.

*Mosseesa Aaroonasa niku nisauku nuqu.*

<sup>14</sup> Yakooboona indaaruuqa faiqi Reeubeenafa qaara faqa qaara faqa 4 faiqi maqanau. Misa nuqu Hanookafa faqa Paruafa faqa Heesaroona faqa Karamifa faqa minamusa mariqau. Misa nari nifaafaurara maqa maaqakina marusa ninaakusa mara mariqau.

<sup>15</sup> Simeeonafa qisauku dinni taikasee dinni ani moodaa marasee 6 faiqi maqanau. Misa nuqu Yeemueerafa faqa Yaminafa faqa Ooqadafa faqa Yakinafa faqa Sooqarafa faqa Sauroofa faqa mariqau. Sauroona anoofa Kannaana anaasee marinau. Misa nari nifaafau rara maqa maaqakina marusa ninaakusa mara mariqau.

<sup>16</sup> Reefifa qaara moo faiqi maqanau. Misa nuqu Keerasoonafa faqa Kooqatafa faqa Meerarifa faqa mariqau. Misa nikoofa Reefifa 137 aukuna maraseenoo kuqinau. Misa nari nifaafaurara maqa maaqakina marusa ninaakusa mara mariqau.

<sup>17</sup> Keerasoonafa qaara faiqi maqanau. Miqanda nuqu Ribinifa faqa Simeeifa faqa mariqau. Miqandasaqaari moomoo kambiaqau.

<sup>18</sup> Kooqatafa qaara faqa qaara faqa 4 faiqi maqanau. Misa nuqu Amarammafa faqa Isaqaranafa faqa Heebaroonafa faqa Usieerafa faqa mariqau. Misa nikoofa Kooqatafa 133 aukuaana marasee kuqinau.

<sup>19</sup> Meerarifa qaara faiqi maqanau. Miqanda nuqu Maqarifa faqa Musaqifa faqa mariqau. Reefina faiqi namu anaiqi mara miqimmiqa mariqau.

<sup>20</sup> Amarammafa nari akoona auna nari amaamuna Yookeebeeda nammarina maraseenoo Aaroonafa faqa Mooseena faqa maqanau. Amarammafa 137 aukuaana maraseenoo kuqinau.

<sup>21</sup> Isaqarafa qaaramoo faiqi maqanau. Misa nuqu Koorafa faqa Neefeekafa faqa Sikirifa faqa mariqau.

<sup>22</sup> Usieerafa faqa qaaramoo faiqi maqanau. Misa nuqu Misaeerafa faqa Eerasafanafa faqa Sitorifa faqa mariqau.

<sup>23</sup> Aaroonafa Aminadafana araamuna Nasoonafa asookina Eeriseepa nammarina maraseenoo minasaa Nadabana faqa Abiquna faqa Eeriasarana faqa Itamarana faqa maqanau.

<sup>24</sup> Koorafa qaaramoo faiqi maqanau. Misa nuqu Asirafa faqa Eerakanafa faqa Abiasafa faqa mariqau. Misa Kooranasaa ani aruaki kambiqainausa ninaakusa mara mariqau.

<sup>25</sup> Aaroonafa amaaku Eeriasarafa Putieerana araamuna maraseenoo Fineeasana maqanau. Miqimmasee doo Reefinakiqari ani aruaki faiqi oosana oosana mariqau.

<sup>26</sup> Yaaweefa Aaroonafa mooseesara kai qufaqa Isaraee maqannaasa Isipa maqannaasa rumbarana kinaana nifiqa maree aniaqee qimaqoo qanda mariqau.

<sup>27</sup> Miqanda kai Isipa maqannaasa karaambaiqa Faraoonafa Isaraee maqannaasa idukuani-feera qimamiqau.

*Yaaweefa Mooseena faqa Aaroonafa faqa ufa nimirau.*

<sup>28</sup> Yaaweefa Isipa maqa maaqaki maaqi qimasee Mooseena qimaminau.

<sup>29</sup> Qinee Yaaweefa maridaqa. Anee Isipa maqanna kaaraambaiqa Faraoonafa aiqama qinee qunnufana qimamia.

<sup>30</sup> Mooseefa iriseenoo Anutuna qimaminoo qinau. Qinee ufa qirara mamma qimarunau maridaqa. Faraoofa naqifee masee qini ufa iriannoo fee.

## 7

<sup>1</sup> Yaaweefa Mooseena qimaminoo qinau. Qinee ani aiqaanana anee Faraoonafa afusaa Anutufara foora marinnaranoo Aaroonafa ani afasaafa ani tumummaqara fasiqara foora mariannoo.

<sup>2</sup> Qinee aiqama ufa qimamunnana anee Aaroonafa qimaminanoo mifa Faraoonafa qimaminanoo Isaraee maqannaasa Isipa maqa maaqaki rumbaqa mariana idukusainaga mi maqa maaqana quqasee fuaga.

<sup>3</sup> Inneeqara Faraoonafa qimami marifaqa qinee kaukaata qimasee qaoo qira irirana amiananoo sia inniqara ufa iriannoo. Qinee moomoo naaquqara ainaina Isipa maqa maaqai auqaananoo sia inni ufa iriannoo.

<sup>4</sup> Qinee firaa aupurarana uqanna Isipa maqannaasa nimisee qeeqa faiqi anaasee aiqama faiqi oosaa indaarunni kiqa nifiqee fuanaura.

<sup>5</sup> Qinee Isipa maqannaasa naruseeqa Isaraee maqannaasa misa maqa maaqaki mariana nifiqee fuanaga Isipa maqannaasa qinee kai Yaaweefa marunnaara misa irifaranoo.

<sup>6</sup> Mooseesa Aaroonafa Yaaweefa ufa iriseeqa doo miqimmiqau.

<sup>7</sup> Mooseefa Faraoonafa faqa ufa quu kari Mooseefa 80 aukuaana faqaafa marufanoo Aaroonafa 83 aukuaana faqaafa marinau.

*Aaroonafa saunu.*

<sup>8</sup> Yaaweefa Mooseesa Aaroonafa qimanniminoo qinau.

<sup>9</sup> Faraoofo inni qarara moo naaquqara ainaina auqamasaiqa kuqaa anoonee qianee qinaqa Moosee anee Aaroonafa qimaminanoo mifa nari asaukukinaa saunu maqasaa Faraoonafa afusaa aqusainanoo sakanikiani.

<sup>10</sup> Mooseesa Aaroonafa Faraoo funnai oonuree Yaaweefa qimannimundee qiqau. Aaroonafa nari saunu Faraoonafa faqa mina uriqarara fasiqauqa faqa nifusaa aqusoofanoo sakani kinu.

<sup>11</sup> Faraoofo mina qafamaseenoo nari irirana faqaa fasiqauqa faqa nari afunee fasiqauqa faqa naaroofoqa anireeqa nari afunee Aaroonafa auqoo ainaina auqauqa.

<sup>12</sup> Mi afunee fasiqausa faqa nariqa saunu maqasaa aqusoofanoo sakanikinuu. Sakani kamafufanoo Aaroonafa saunu fannoo misaindi nambiqamasanau.

<sup>13</sup> Faraoofa mina qafamaseenoo Yaaweefa qundee inoo kaukaata qira irirafa kaqi minaki marufanoo sia Mooseesa Aaroonasa ufa irinau.

*Mandainaina Isipa maqannaasaki kambiqanau.*

<sup>14</sup> Sia irufanoo Yaaweefa kafaa Mooseena qimaminoo qinuu. Faraoofa kaaqa kaukaata qira irirafa minaki marifanoo idukirara akooqaidanoo.

<sup>15</sup> Duna kananaana Faraoofa Niru nammari auqarara ooqufinaqa inneeqara mina minni ooqu paquriaqa. Sakaniki mari saununa faqa mara maree nammari afainni ooqu marida minara rakisiaqa.

<sup>16</sup> Paquri maseeqa maaqi qimasee qimamiaqa. Yaaweefa Heeburu maqanna Anutufa maaqanda diqigaifaqa Isaraee maqannaasa anee idukusainaqa aadana maqa maaqai oonureeqa qiniara innaaru qiaqee qifaqa ani qimamidaqa. Anee sia iri mariananoo.

<sup>17</sup> Magee Yaaweefa aniara maaqi qidanoo. Anee qinee auqaana ainaina qafamasee anee qiniara Yaawee fee qimasee irinnanoo. Anee qafainaqa qinee nammari amuaqu maa saununannoo rukamu amiananoo nammari fannoo fidikaika miannoo.

<sup>18</sup> Miqinanoo noodaanna minakinaafauqa aiqama kuqu taikainanoo nammari faqa manda unda inaqa Isipa maqannaasa sia amana mi nammarina neefaranoo.

<sup>19</sup> Yaaweefa Mooseena kafaa qimaminoo qinuu. Anee Aaroonaa maaqi qimasee qimaminanoo nari saunu qumaree aiqama nammariuqa faqa oorakinaa nammariuqa faqa akammandira nammariuqa faqa aiqama nammari amummaqa uqeeraani. Nammari fannoo aiqama fidikaika kai mafuannoo. Aiqama Isipa maqa maaqakinaa nammariuqaki fidika kai mariannoo. Difaaniki faqa afeeki faqa sakaqainaqa faqa kai fidika aruannoo.

<sup>20</sup> Mooseesa Aaroonasa Yaaweefa qima nimundee iqau. Faraoona faqa mina uriqarara rakisirausa faqa nifusaa Aaroonafa nari saunu uqeereseenoo nammari amuaqu arufanoo aiqama mi nammarisa fidika kai arinau.

<sup>21</sup> Noodaanna aiqama nammarikinaafa kuqu taikafufanoo nammari kaaqa manda undufaqa Isipa maqannaasa sia mi nammarisa nee mariqau. Aiqama Isipa maqa maaqakinaa nammariuqaki fidika kai arinoo marinuu.

<sup>22</sup> Faraoona afunee fasiqauqa nariqa afuneenoo Aaroonafa undee iqau. Miqufanoo Faraoofa Yaaweefa qundee inoo kaukaata qinoo Mooseesa Aaroonasa ufa sia irinau.

<sup>23</sup> Faraoofa mina qafamaseenoo nari maaqai oonureenoo sia mi ainainausara irinau.

<sup>24</sup> Isipa maqannaasa nammariara randoosia Niru nammari afaiqara nukuda indufusaida amiqira nammari sakasaidaqa neemariqau. Anoonaa nammari mandaikinoo marunara sia neemariqau.

<sup>25</sup> Qisauku dinni taikasee dinni ani qaara marasee 7 faasaana nammari kaqi fidika arinoo marinuu.

## 8

*Eeqamoosauqa kambiqaqau.*

<sup>1</sup> Yaaweefa kafaa Mooseesa Aaroonasa qimanniminoo qinuu. Inneeqara Faraoo finnai oonuree maaqi qimasee qimamiaqa. Yaaweefa aniara maaqi qidanoo. Anee qini qiku qisauku idukusainaqa misa qiniara innaaru qidaqa qimooqiaqee qinoo.

<sup>2</sup> Anee qaoo qinaqa qinee eeqamoosa moomoora qianaqa anireeqa ani maqa maaqa qumbiqeefaranoo.

<sup>3</sup> Niru nammariki faqa eeqamoosa kai qumbiaqa marifaranoo miqooqari anee kooti marianna fira maaqanaki faqa keeqeefaranoo. Anee faiqee mariannanaki faqa keeqeefara. Ani qaari qamunnasaa faqa qumbiqeefaranoo. Ani faiqi firaasa faqa ani maqannaasa faqa misa onidaki faqa afeeki faqa qumbiqeefara.

<sup>4</sup> Eeqamoosa fannoo urureenoo ani faqa ani ainainirusasaa rakisi mariasa faqa ani maqannaasa faqa nifaagai akareefaranoo. Miqi qufanoo Faraoofa sia mi ufana irinau.

<sup>5</sup> Yaaweefa kafaa Mooseena qimaminuu. Anee Aaroonaa maaqi qimasee qimamia. Doo aneenna saunu uqeereseenana aiqama nammari faqa oorakinaa nammari faqa aka mandira nammariuqa faqa uqeera uqafiqasainanoo eeqamoosa fannoo moomoo urureenoo Isipa maqa maaqa rafaqa fuani.

<sup>6</sup> Aaroonafa Mooseena ufa iriseenoo saunu uqeereseenoo aiqama nammariuqa nimummaqa uqeeranuu. Uqeerasoofanoo eeqamoosauqa moomoo nammarikiqari urureeqa maqa maaqa rafaqa fiqau.

<sup>7</sup> Isipa maqannaafunee fasiqauqa misa faqa nari afunee auqusoofanoo eeqamoosa moomoo nammarikiqari Isipa maqa maaqaki qumbiqaqau.

<sup>8</sup> Faraoofa eeqamoosara akooqoofanoo Mooseena faqa Aaroonaa faqa naaramasee qimanniminuu. Inneeqara oonu Yaaweenara innaaru qimasaifanoo kafaa eeqamoosa

niiqaani. Eeqamoosa aiqama niqamasainaga qinee Isaraee maqanna karabusakinaana idukusaanaqa oonureeqa Yaaweena aandau tatufirana suqa amiaga.

<sup>9</sup> Mooseefa Faraona ufa iriseenoo qimaminau. Qinee inniara innaaru qirara asammidaqa. Aneenna kai yairee fee innaaru qiannee qinaqa qinee aniara faqa ani ainainirausasa rakisirausara faqa ani maqannaara faqa innaaru qianaara. Mi faasaana kai inni maqakiaqa qari eeqamoosauqa quqasee Niru nammariki kai oogu marifarannoo.

<sup>10</sup> Faraofa iriseenoo duna kai innaaru qiannee qufanoo Mooseefa iriseenoo qimaminau. Anee qianandee ianaura. Miqianana anee mina qafamaseenana sia moo maqasaa anutufa Yaaweena maasa Anutuna fooqaafa maridanoo fee qimasee irinnarannoo.

<sup>11</sup> Aniki faqa ani ainainiranasaa rakisirausaki faqa ani maqannaasaki faqa maria eeqamoosausa taika fuannoo. Sia uqanna moodaa faqa kaqi mariannoo. Niru nammariki kai marifarannoo.

<sup>12</sup> Mooseefa faqa Aaroonafa faqa Faraona maaqakiqari raudeeqa oonuroofanoo Mooseefa Yaawee funnai eeqamoosa Faraona faqa nari maqannaasaki faqa quqaqoona taika nisaanifeera innaaru qinau.

<sup>13</sup> Yaaweefa Mooseefa iroondee inau. Aiqaama maaqakinaa eeqamoosauqa faqa maaqa naambeeqa qara maru eeqamoosausa faqa maaqa saqama atiqara marusa faqa aiqama qufaqa kuqu taikaqau.

<sup>14</sup> Isipa maqannaasa mi eeqamoosausa kuqiranauqa mareeqaida moodaanaki quqeesoofaqa putaa iqa aiqama maqa maaqaki putaa undi marinau.

<sup>15</sup> Eeqamoosa kuqu taikafufanoo Faraofa qafamaseenoo Yaaweefa qundee inoo kaukaata qimaseenoo sia Mooseena faqa Aarona faqa ufa irinau.

#### *Aakukaqa kambiaqau.*

<sup>16</sup> Yaaweefa Mooseena qimaminoo qinau. Aarona maaqi qimasee qimamia. Aarona anee aneenna saunu qumaree maqa rupeemma aminanoo kookooma fannoo quandaki aakukaikamafi Isipa maqa maaqaki umbiqaani.

<sup>17</sup> Aaroonafa nari saunu samu kookooma rupeema amufanoo aiqama Isipa maqa maaqakinaa kookooma fannoo aakukaikinau. Mifa faiqi anaasee faqa aandaufa faqa nifaaqasasa qumbiaqa marida ukaqa nimi mariqau.

<sup>18</sup> Isipa maqannaafunee fasiqauqa Aarona oosana qafamaseeqa misa faqa nari afunee naini aakuka amanammasee qafaanee qimasee amanufanoo sia ufaqa minnisaaqau. Minnisoofaqa aakukaqau aiqama atinai amanaiqiqa mariqau.

<sup>19</sup> Afunee fasiqauqa Faraona qimamiqa qiqa. Anutufa maa ainaina auqaidanoo. Faraofa misa ufa iriseenoo Anutufa qundee inoo kaukaata qimasee Mooseesa Aarona ufa sia irinau.

#### *Faufaariuqa kambiaqau.*

<sup>20</sup> Yaaweefa Mooseena kafa qimaminoo qinau. Duna kananaana uqanna Faraofa namhari auqarara oogu fuannoo. Anee kananaana findifinana oogureenana paqurimasee maaqi qimasee qini ufa qimamia. Faraoo Yaaweefa aniara maa ufana qinoo. Anee qini qiku qisauku idukusainaga qini qimoo qiaqee qinoo.

<sup>21</sup> Qinee ani aaqu qimama qidaqa anee sia idukinaqa qinee ani faqa ani ainainiranasaa rakisirausa faqa ani maqannaasa faqa faufaarinoo aupurarana nimianaara. Isipa maqannaasa maaqauqaki faufaari kai qumbiaqannoo. Aiqaama misa maqa maaqa faqa rafaqa fuannoo.

<sup>22</sup> Miqi mafinaqa qinee Kooseena maqa maaqaki qini faiqi anaasee mariasasa ititasaana sia faufaari iannoo. Qinee miqianana anee qini Yaaweesara mi maqa maaqanaki maridanoo fee qinnarannoo.

<sup>23</sup> Qinee ani faiqi anaasee faqa qeeqa faiqi anaasee faqa rainaanaura. Mi rainarafa naaqqara ainaina duna kambiaqannoo.

<sup>24</sup> Kananaana Yaaweefa qufaqa faufaari moomoo uqanna nukudara foora anireeqa Faraona ufa irira maaqaki faqa mina ainainiranasaa rakisi marusa maaqakiaqa faqa aiqama Isipa maqa maaqaki faufaari fannoo mandaika uqanna masanau.

<sup>25</sup> Miqimmasoofanoo Faraofa Mooseesa Aarona naaramaseenoo qimanniminu. Innee maqoo Isipa maqa maaqaki moo atinai inneeqa Anutuna tatufirana suqasee innaaru qiaqa.

<sup>26</sup> Mooseefa nari qimaminoo qinau. Maasa sia amana miqianaara. Isipa maqannaasa Yaaweena maasa Anutuna tatufirana suqa amiranara nikooqandoora. Maasa maa aandausannoo tatufirana suqarafa Isipa maqannaasa nikooqarana nimianaqa maasa qiqafamaseeqa oonisamu maasa kuqa darifoora.

<sup>27</sup> Maasa qaaramoo faasaana aadana maqa maaqaki oonuree aandau tatufirana Yaaweena maasa Anutuna nari qimannimundee kai iqa suqa amianaara.

<sup>28</sup> Faraooa iriseenoo qinau. Doo amana innee aadana maqa maaqai oonu maridaqa aandau tatufirana suqasee Yaaweena inneeqa Anutuna amiaqa. Sia nianai fuaqa, adeedi maridaqa innaaru qidaqa qiniara faqa innaaru qiaga.

<sup>29</sup> Mooseefa Faraona ufa iriseenoo qimaminau. Ani maaqakiqari raudeega gumureega innaaru qianaara. Duna kananaana faufaari taikaannoo. Ani maaqaki faqa ani ainainiranasaa rakisiraua maaqaki faqa ani maqannaasa maaqaki faqa duna kananaana taikaannoo. Faraoo sia kaifaa unna qimaseenana qaoo qia. Isaraee maqannaasa Yaaweena tatufirana suqamiranara sia kafaa qaoo qia.

<sup>30</sup> Miqi qimaseenoo Mooseefa Faraona maaqaki aiseenoo raudamafinoo Yaaweena innaaru qinau.

<sup>31</sup> Yaaweefa Mooseena irara ufa iriseenoo faufaari Faraona maaqakinaana faqa mina ainainiranasaa rakisiraua maaqakinaana faqa mina maqannaasa maaqakinaana faqa aiqama taikannisanau. Sia moodaa faufaari kaqi marinau.

<sup>32</sup> Miqi marufanoo Faraooa kafaa kaukaata qimaseenoo sia Isaraee maqannaasa idukusoofaqa fiqau.

## 9

### *Isipa maqannaasa firamaru aandausa kuqiqua.*

<sup>1</sup> Anutufa kaifaa Mooseena qimaminau. Anee Faraoo finnai oonureenana maaqi qimaseenana qimamia. Oo Faraoo, Yaaweefa Heeburu maqannaasa Anutufa aniara maaqi qidanoo. Anee qini qiku qisauku idukusainaga qiniara innaaru qimaseeqa qimooqiaqee qinoo.

<sup>2-3</sup> Anee kaifaa qaoo qimasee Isaraee maqannaasa sia idukinaqa, qinee manda auriranara qiananoo ani aandau qoosauqa faqa doonkiuqa faqa kameerauqa faqa burimakauqa faqa sipsipauqa faqa mimmiuqa faqa mi aurirana nimianauranoo.

<sup>4</sup> Qinee aandau rainaanauranoo Isipa maqannaasa aadau aurirana nimianauranoo. Isaraee maqannaasaindi sia aurirana nimianaqa sia misaindi kuquanoo.

<sup>5</sup> Qinee Yaaweesa duna faasaana miqianauranoo fee qidaqa.

<sup>6</sup> Iaqqo kananaana Yaaweefa nari qundee inau. Isipa maqannaasa aandau aiqama kuqu taikaqau. Isaraee maqannaasa aandau sia moo kuqinau. Kaqi mariqau.

<sup>7</sup> Faraooa minara iriseenoo nari maqannaasa niqiqoofaqa oonu qafamasee aniree Faraona qimamiqau. Isaraee maqannaasa aandau sia uqanna moodaafa kuqinoo. Miqi qufanoo Faraooa kaukaata qimasee sia Isaraee maqannaasa idukusoofaqa fiqau.

### *Isipa maqannaasa nifaaqai abeemauqa kambiqanau.*

<sup>8</sup> Yaaweefa kafaa Mooseena faqa Aarona faqa qimannimino qinau. Moosee anee danda qoodaa asaukunoo afaqamaree Faraona oorinni oonuree innaarunai aqua.

<sup>9</sup> Miqimmasainanoo mi dandafa kookoomara foora aiqama Isipa maqa maaqakinai aqufinoo aandaufa faqa faiqi anaasee faqa nibeema naruani. Naru finoo radiqinoo namuana firaafa kambiqani.

<sup>10</sup> Mooseefa faqa Aaroonafa faqa Yaaweena ufa iriseeqa danda afaqamaree Faraoo funnai fiqau. Faraona oorinni oonu kikiqa mafufaqa Mooseefa mi dandana innaarunai aqinau. Aqusoofanoo maqasaa aqufinoo mi dandafa aandaufa faqa faiqi anaasee faqa abeema niminau. Nimisoofanoo mifa radiqinoo namuana firaafa nari marinau.

<sup>11</sup> Isipa maqannaasa afunee fasiqauqa sia amana Mooseena afusaa anirana amanaikiqau. Misa faqa aiqama Isipa maqannaasa undee kai inoo abeema nari marunara sia Mooseefa maruqoo aiqau.

<sup>12</sup> Miqufanoo Yaaweefa qufanoo Faraooa kaukaata qimasee Yaaweefa qundee inoo sia Mooseesa Aaroonasa ufa irinau.

### *Firaa aaku faqa pupusamu faqa aqufinau.*

<sup>13</sup> Yaaweefa mina qafamaseenoo kafaa Mooseena qimaminoo qinau. Inneeqara duna kananaana findifiqa oonureeqa Faraona maaqi qimasee qimamiqaa. Heeburu maqannaasa maasa Anutufa Yaaweefa aniara maaqi qidanoo. Anee qini faiqi anaasee idukusainaga misa qini qimooqiaqee qidanoo.

<sup>14</sup> Anee sia miqinaqa mikari qinee sia ani ainainiranasaa rakisiraua faqa ani maqannaasa faqa kai naruanauranoo, ani faqa aupurarana amianaauranoo. Miqianana anee irinnaranoo, sia moo fannoo qini daanna rarafa aiqama maqa maaqaki maridanoo.

<sup>15</sup> Qinee ani faqa ani maqannaasa faqa manda auriranannai amana naru taikaunaiqini.

<sup>16</sup> Qinee inni qeeqa afeeka uqannifiqarara inni minni nisaunaqa kaqi marianara qini afeeka duqu aiqama maqa maaqaki daraaniannoo.

<sup>17</sup> Faraoo, anee kaqi kai ramoo ramaa idana sia qini faiqi anaasee idukusaanaqa fidammia.

<sup>18</sup> Duna suani afu maa maqee marina amanasaa ururainaa qinee qiananoo aaku firaafa pupu samu namufaqa aqufuanoo. Miqira pupu samu Isipa maqannaasa oqai faqa maqee mariaqooqari faqa sia qafoo ainainafa maqee kai kambiqaanoo.

<sup>19</sup> Doo aneenna maqannaasa qimanniminaqa nariqa aandauqa faqa aiqama ainaina madaanai mari ainainausa faqa mareeqee maaqaki quqaaqa. Madaanai marinna andaasaa faqa faiqi aanaaseesaa faqa fira pupusamu aqufino kuqa naruannoo.

<sup>20</sup> Kinna Faraona ainainasaa rakisi marusa uriqararusa akaqausa Karaambaiqa mi ufanara rufiasee nariqa ainainira faiqiuqa faqa aandauqa faqa mareeqee maaqaki uqaqau.

<sup>21</sup> Akaqausa Yaaweena ufa irisee nikoqoosa misa nariqa ainainira fasiqauqa faqa nariqa aandauqa faqa kaqi madaanai quqaqooafaq mariqau.

<sup>22</sup> Taqoofanoo Yaaweefa Mooseena qimaminoo qinau. Aneenna asaku innaarunai uqeeraa. Uqeerasainanoo pupu samu aiqama Isipa maqa maaqakinaa fasiqa aanaaseesaa faqa aandauqasaa faqa aiqama afuqakinaa naranauqasaa faqa aqufuani.

<sup>23</sup> Miqi qufanoo Mooseefa nari saunu innaarunai uqeerasoofanoo Yaaweefa innaarunai qirana faqa aakuasaa faqa pupusamu faqa quqasoofanoo maqasaa quminau.

<sup>24</sup> Yaaweefa aaku faqa pupu samu faqa quqaseenoo aakuasaara qufanoo aiqama atinai uqi marinna. Oqai Isipa maqannaasa miqirana sia qafaqau. Mikari kai firaafa uqanna kambiqooafaqa qafaqau.

<sup>25</sup> Pupu samu fannoo aiqama Isipa maqanna maqusai quqaqoo ainainausa faqa aiqama faiqi anaasee faqa aandauqa faqa narinau. Mifa aiqama afuqakinaa narana faqa saqari qaqama nee marunauqa faqa itairi aqinau.

<sup>26</sup> Kooseena maqa maaqaki Isaraee maqanaasa maruqoo kai pupu samu sia aqufino narinau.

<sup>27</sup> Faraofa mina qafamaseenoo Mooseena faqa Aarona faqa naaramaseenoo qimannimina. Maqee qinee aqaamma seeqa. Yaaweefa andeeqarafa maridanoo. Qinee faqa qeeqa maqannaasa faqa aqee marunausa maridaqa.

<sup>28</sup> Inneeqara oonuree Yaaweenara innaaru qiaqa. Maasa innaarunai qiranara faqa pupu samuara faqa qikoo uqanna qeenoo. Qinee inni idukusaanaqa fifaranoo fee qimasee qima afeekaikidaqa. Innee sia maaqoo kisaqasaa marifaranoo.

<sup>29</sup> Miqi qufanoo Mooseefa qimaminau. Qinee ani maqusa naambeeqai oonureeqa qisauku Yaawee finnai uqeerasee innaaru qiananoo innaarunai qirafa faqa pupu samu faqa taikaannoo. Miqimmasaanana anee maa maqa maaqanara Yaaweenaindi fee qimasee irrinnanoo.

<sup>30</sup> Qinee iridaqa anee faqa ani ainainirasaa rakisirausa faqa sia Yaaweena maasa Anutunara rufiee mariafanoo.

<sup>31</sup> Mikari Isipa maqannaasa reepaa faqa raisa fooqaa ira ainaina baari faqa mandaikinau. Baari fannoo akuqamafufanoo reepaa qaqama irarara deedaqa mafufanoo pupu samu fannoo aqufino mandaika masanau.

<sup>32</sup> Sia moodaa uita fannoo mandaikinau. Mifa inaaqianna ummaqirafa maridanoo maqee uri marunara sia mifa mandaikinau.

<sup>33</sup> Mooseefa Faraona maaqakiqari raudeenoo naambeeqai qumureenoo asaku innaarunai uqeerasee Yaaweenara innaaru qinau. Innaaru qufanoo innaarunai qirafa faqa pupu samu faqa aaku faqa aiqama taikanau.

<sup>34</sup> Taikafufanoo Faraofa qafamaseenoo kafa aqaanau. Mifa faqa nari ainainirasaa rakisi marusa faqa kaqi kai kaukaataqira ani mariqau.

<sup>35</sup> Oqai Yaaweefa Mooseena qimamundee kai inoo Faraofa kaukaata qimaseenoo sia Isaraee maqannaasa idukusoofaqa fiqau.

## 10

### *Pandaqauqa moomoo kambiqauqa.*

<sup>1</sup> Yaaweefa kafa Mooseena qimaminoo qinau. Anee kafa Faraoo finnai fua. Qinee Faraona faqa mina ainainirasaa rakisirausa faqa kaukaataqira irirana nimiseeqa qeeqa faiqi sia auqaaqaa ira ainaina misa qambaana auqarara miqianaara.

<sup>2</sup> Innee inneeqa faiqi namu faqa ninaiqimara faqa, qinee Isipa maqannaasa faiqi sia auqaaqaa ira ainainannai misa mara furufarirausaika mannimaqaafannanara qimannimia. Innee aiqamausa qini Yaaweesara irifaranoo.

<sup>3</sup> Mooseefa faqa Aaroonafa faqa Faraoo funnai oonuree maaqi qimasee qimamiqa qiqau. Yaaweefa Qeeburu maqannaasa Anutufa aniara maaqi qidanoo. Kisaagasaa fee anee qaoo qidaneesia fee aneenna auqu mara maree muqufisee qini qimeemaana marinnaree. Anee qini faiqi anaasee idukusainaqa oonureeqa qiniara innaaru qiaqee qidanoo.

<sup>4</sup> Anee kaqi kai qaoo qimarinaqa qinee duna pandaaga moomoo mara quqasaanaqa ani maqa maaqaki qumbiqaannoo fee qinoo.

<sup>5</sup> Pandaaga moomoo uqanna kambiqafi maqa ititafinaqa sia maqa qafeefaranoo. Pupasamu fannoo naridanoo mafisai andandausa aiqama nama taikeefaranoo. Saqari mafisainauqa faqa neefaranoo.

<sup>6</sup> Mi pandaagausa ani ufa irira maaqaki faqa ani ainainiranasaa rakisi mariasa maaqakiaqa faqa ani maqannaasa maaqakiaqa faqa qumbiqeefaranoo. Ani akeeku akaaku maruqooqari faqa maqee anee mariannaqooqari faqa sia qafaa ainainafa mandainaina uqanna mariannoo. Miqi qimaseenoo Mooseefa raudamaki finau.

<sup>7</sup> Faraona ainainirana saa rakisi marusa Faraona qimamiqa qiqau. Maa fasiqafa Mooseefa kisaagasaa maasa ummaara qimidanoo. Isaraee maqanna idukusainaqa oonuree nari Anutuna Yaaweenara innaaru qiaqa. Anee sia fee qafaidanee Isipa maqa maqa doo mandaikidanoo.

<sup>8</sup> Miqi qufaqa Mooseesa Aaroonasa nifiqee Faraofa maruqoo minisoofanoo Faraofa qimannimino qinuu. Innee oonureeqa inni Anutuna Yaaweenara innaaru qiaqa. Inneeqa firanara faqa amiqi masee qimaqimifaqa iria. Yauyausee fifaranoo fee.

<sup>9</sup> Miqi qufanoo Mooseefa nari qimaminoo qinuu. Maasa aiqamausa fuanauranoo. Maasa qeeqa faiqi asooqa faqa fuanauranoo. Maasa qeeqa sipsipauqa faqa mimmiuqa faqa burimakauqa faqa aiqama oonuree Yaaweena oomaqa sugamianauranoo.

<sup>10</sup> Miqi qufanoo Faraofa qinuu. Qinee Yaaweena auqu ramasee qeeqa qimana aiqamasee maaqi qidaqa. Qinee sia eedoo qianaqa innee inneeqa faiqi anaasee nifiqee fifaranoo. Innee akooqoo maasa mandaikamma qimaqarara tipundaara maqaqee miqi mariafanoo.

<sup>11</sup> Minara qinee inniara faiqi kai oonureeqa innee iri mariandee Yaaweenara innaaru qimaseeqa amooqiaqa. Miqi qimasee nari sundiauqara qufaqa Mooseesa Aaroonasa niqooqafa raudee fiqau.

<sup>12</sup> Yaaweefa mina qafamaseenoo Mooseesa qimaminoo qinuu. Aneenna asaku Isipa maqa maaqa amummaqa uqerasainaqa pandaagauqa aniaqa. Anireeqa misa Isipa maqannaasa narana amanee aiqama naaqa. Pupu samu aridanoo mafisoona namataikaqa.

<sup>13</sup> Mooseefa iriseenoo nari saunu uqerasoofanoo Yaaweefa ufaira qufanoo suani oosanaindari mi faasaana faqa mi endanaki faqa uqinuu. Kananaana ufai fannoo pandaagauqa moomoo maree urinuu.

<sup>14</sup> Pandaaga moomoo nukudara foora urureeqa aiqama Isipa maqa maaqaki amanaikaqari qau. Moomoo indaaru oqbiqasee urufaqa kafa inaqiana akaqausa oqbiqasee urufaqa, miqi kai masaida moomoosa uru maqa maaqa qumbiaqau. Ooqai sia miqirana qafaqau, naaru faqa sia qafeefaranoo.

<sup>15</sup> Mi pandaagausa aiqama maqa rafaqafusoofanoo sia maqa ati faqa kooroo inuu. Maqa faqa kai kudima arinoo marinuu. Pupu samu fannoo aridanoo mafisoo andandausa faqa aiqama saqari qaqama faqa namasaqau. Sia saqari amanee arira ainaina, saqarisaa faqa ummaqira ainainasaa faqa Isipa maqa maaqaki marinuu.

<sup>16</sup> Faraofa Mooseesa Aaroonasara aniaqee qufaqa aniroofanoo qimanniminnuu. Qinee Yaaweena inni Anutuna faqa inni faqa mandaikamma nimaqeeqa.

<sup>17</sup> Inneeqara qini aqarana akiqara kafa maqee kai minni qisaqa. Minni qiseeqa Yaaweena inneeqa Anutufinnai innaaru qifanoo maa kuquaqa ira aupurarana mara aqu qisaani.

<sup>18</sup> Mooseefa iriseenoo raudamaku fanoo oonureenoo Yaawee funnai innaaru qinuu.

<sup>19</sup> Yaaweefa qufanoo ufai fannoo suani afu oosana qaannaindari uriufa mara qandasee suani afu keeqe marunnaindari afeeka ufai uqanna uqinoo aiqama pandaagauqa fuaqa Taatuqee ooruku nammardini qinuu. Sia uqanna moodaa pandaaga Isipa maqa maaqaki kaqi marinuu.

<sup>20</sup> Yaaweefa qufanoo Faraofa kaukaata qimasee sia Isaraee maqannaasa idukusoofaqa fiqau.



<sup>21</sup> Yaaweefa kafa Mooseena qimaminoo qinau. Anee aneenna asauku innaarunai uqeerasainanoo asukuna fannoo aiqama Isipa maqa maaqa rafaafuani. Asukuna firaafa misa nifaafai atooqanoo maridanoora foora inoo mariannoo.

<sup>22</sup> Mooseefa nari asauku innaarunai uqeerasoofanoo Isipa maqa maaqa asukuna firaafa qaaramoo faasaana ititannimaqana.

<sup>23</sup> Isipa maqannaasa mikari sia nari qafee imariqau. Sia aana nimariqau, maaqaki kai mariqau. Isaraee maqannaasa maruqoo kai kaaqa qee marufaqa marinau.

<sup>24</sup> Faraofa Mooseena aaramaseenoo qimaminau. Aneenna maqannaasa faqa doo oonureeqa Yaaweenara innaaru qimaseeqa amooqiaqa. Innee inneeqa faiqi anaasee faqa aiqama nifiqee fuaqa. Inneeqa aandaufa maaqoo quqasee inneeqa kai fuaqa.

<sup>25</sup> Miqi qimasooofanoo Mooseefa qinau. Maasa nariqa aandaufa faqa maree oonureeqa Yaaweenara maasa Anutuna tatufirana suqa amianaaura.

<sup>26</sup> Maasa qeeqa aandaufa maree fuanaura. Sia moodaa maaqoo kaqi mafi quqaanaura. Maasa qeeqa kai nana aandaufa aruseeqa Yaaweenara maasa Anutuna tatufirana suqa amianauree. Maasa maqee sia iridaqa. Miqoo oonuree irianaura. Nana aandaunoo fee tatufirana suqaanauree.

<sup>27</sup> Yaaweefa qufanoo Faraofa kaukaata qira irirana maraseenoo ititamaseenoo Isaraee maqannaasa idukinau.

<sup>28</sup> Miqi qimaseenoo Faraofa Mooseena qimaminau. Doo qinee qafee mariana qini qifusaqari fifua. Qinee sia kaifaa ani qafaanaura. Ani qafaanana kuqinnaranoo.

<sup>29</sup> Mooseefa mina ufa iriseenoo Faraona qimaminau. Anee kuqaa qiananoo. Anee sia kafa qini qifaqeenaranoo.

## 11

*Akoonaiqi ooga faiqiuqa kuqaaqee qiqau.*

<sup>1</sup> Miqi qimasooofanoo Yaaweefa Mooseena qimaminoo qinau. Qinee moodaa ummaara kai Isipa maqannaasa karaambaifa faqa mina maqannaasa faqa nimianaura. Miqimasaanoo mifa inni idukusainafa fifaranoo. Kuqaa uqanna mifa sia reendeenasaa inni niqaannoo. Kaukaata qidanoo niqaannoo.

<sup>2</sup> Moosee anee aneenna maqannaasa maaqi qimasee qimannimia. Misa aiqama Isipa maqannaasa nari naaqa mariasa iramirifaqa nifaafa auqi maria ainainna siruaannoo faqa koorannoo faqa auqirana nimiaqa.

<sup>3</sup> Yaaweefa qufaqa Isipa maqannaasa Isaraee maqannaasara uriqararausee qiqau. Isipa maqannaasa Faraona ainainiranasaa rakisi marusa faqa aiqama faiqi anaasee faqa Moosenara kaaqa uriqarara fee qimasee ainaina nimiraree qiqau.

<sup>4</sup> Mooseefa Yaaweenara mi ufana iriseenoo oonu Faraona qimaminoo qinau. Yaaweefa aniara maaqi qinoo. Eendamugusai uqanna qinee Isipa maqa maaqaki nuanaura.

<sup>5</sup> Isipa maqannaasa akoonaiqi ooga faiqiuqa aiqama kuqifaranoo. Ani Faraona faiqi ani amaafa maqaaninnana saaqari oosana arasee miqooqaraasa ooga faiqiuqa faqa kaaqa ureeqarusa ooga faiqiuqa faqa aiqama naru taikaannoo. Aiqama burimmakauqa ooga aanaaqiuqa faqa kuqifaranoo.

<sup>6</sup> Aiqama Isipa maqa maaqaki ikifaafau qirafa firaafa mariannoo. Oogai sia miqira iki raqarafa marinau. Kasooqaaqee faqa sia miqira qikiraqarafa mariannoo.

<sup>7</sup> Miqi marifanoo sia uqanna faini fannoo Isaraee maqannaasa faqa misa aandaufa faqa nindafeenoo kau kau qianoo. Miqinana anee qinee Yaaweesa Isaraee maqannaasa faqa Isipa maqannaasa faqa raine marunnanara irinnanaroo.

<sup>8</sup> Mooseefa kafa Faraona qimamidanoo qinau. Ani ainainiranasaa rakisi mariasa aiqama qinee iannannai anireeqa qini doorinni niqoori saunu arafiq qiniara doo aneenna maqannaasa nifiqee fuannee qifaranoo. Miqi qifaqa qinee doo fuanauranoo. Mooseefa miqi qimasee aranaqooofanoo aanoomasenoo raudanau.

<sup>9</sup> Raudamafufanoo Yaaweefa Mooseena qimaminoo qinau. Faraofa ani ufa sia uqanna iriannoo. Miqi marinaqa qinee faiqi sia auqaaqaa ira ainaina moo faqa moo faqa auqaanaura.

<sup>10</sup> Mooseefa faqa Aaroonafa faqa Faraona oorisaa mi oosana oosanna ainainna auqooofanoo mifa sia irinau. Yaaweefa qufanoo kaukaata qira irirana maraseenoo sia niqooofaqa mina maqa maaqakiqari fiqau.

## 12

*Ainnaaqarara qoomaqa oosana arasee naqau.*

<sup>1</sup> Mooseena faqa Aaroonafa faqa Isipa maqa maaqaki Yaaweefa kafa qimanniminoo qinau.

<sup>2</sup> Innee aiqama aukuanaki maa quqoonnara maasa indaaruuqaa quqoona fee qifaranoo.

<sup>3</sup> Anutufa Mooseena qimaminoo qinau. Aiqama Isaraee maqannaa maa ufana qimannimia. Maa quqoonnasaa qisaukuqara taikasee faasaanasaa moodaa moodaa fasiqa oonu sipsipa aanaaqi fee mimmi aanaaqi fee nari maaqaki mariasa naaqera maraaqa.

<sup>4</sup> Mi maqanakinaasa oodaa maridaqa sia mi aandauna nama taikaaqaa inaqa misa naaqa marinausa naaramasee misa faqa amana rainasee naaqa. Faiqi anaasee nimana nimana kai aukusee niminaqa naifanoo taikaani.

<sup>5</sup> Innee sipsipa aanaaqi fee mimmi aanaaqi fee akoona kai moodaa aukuaana marasainana, sia moo nammuana faqa aurirana faqa marinnana maraaqa.

<sup>6</sup> Mi quqoonnasaa qisaukuqara taikasee qikunni qaara faqa qaara faqa marasee 14 faasaana eenee marinaqa kai aiqama Isaraee maqannaasa mi aandausa aruqa.

<sup>7</sup> Sipsipa arusaifaqa mina fidika sakaseeqa maaqa kooqiuga dinni dinni afaimau faqa mirinni auni riranasaa faqa akuqa. Innee mi aandausa neefandinna maaqana kooqi aku amaqaqa.

<sup>8</sup> Mi eendanaki kai mi aandauna amaqi idasaa kasooqammasee sukaqee mari adasana namufaqa naaqa. Sia innooqee mari pauraqana aqira bereeta suqasee sipsipa amaqi namufaqa naaqa.

<sup>9</sup> Sia fuka naaqa. Nammariki faqa sia suqasee naaqa. Idaki kai akiifa faqa aiku faqa arada faqa suqasee naaqa.

<sup>10</sup> Eendaki mina aiqama taikaaqa. Mina ataraasa sia kananaana kaqi mariani, ida qarasinanoo taikaani.

<sup>11</sup> Innee maaqimmasee mi aandauna naaqa. Amunnanda maraseeqa niku aanaamu afisuseeqa, saunu nisaukuki qumareeqa doo kaqi kaqi naaqa. Namaseeqa maaqooqari innee mi narannara Yaaweefa ainnaaqaroo narana fee qiqa.

<sup>12</sup> Mi eendanaki qinee Isipa maqa maaqa aiqamai oonuree aniree idaqa aiqama ooqa akoonaiqi faqa ooqasaa andau akoonauqa maqarana faqa kuqa naruanaura. Qinee Yaaweesa Isipa maqannaasa unna anutusa faqa aupurarana nimianaura.

<sup>13</sup> Fidika kooqi afaisaa aku amaqaafa mifa kai innee maria maaqana koorooiannoo. Qinee Isipa maqannaasa aiqama nariqa fidaqa inni maaqa kooqisaa fidika qafamasee ainaaqaraanaura sia inni naruanaura.

<sup>14</sup> Innee mi faasaana amaana qoomaqa faasaanara foora marinaqa qinee Yaaweesa auqaafanna ainainara naaqqoo auqainaqa irisee asasifaranoo. Innee aiqama kari mi faasaanara asasifaranoo.

*Pauraqa sia quqara bereeta neemaru firaa faasaanafa.*

<sup>15</sup> Yaaweefa kaifaa maaqi qinau. Qisauku dinni taikasee dinni ani qaara marasee 7 faasaana innooqee mari pauraqana aquqaa bereeta sia naaqa. Sia pauraqa aqira bereeta kai naaqa. Oomaqa indaaruuqaa faasaana inneeqa maaqakiaqa aiqama innooqee mari pauraqana mara aqusaqa. Oomaqaki faiqi moo fannoo innooqee mari pauraqana aqira bereeta nainna fasiqanara sia Isaraee maqannaa fee qiqa.

<sup>16</sup> Oomaqa indaaruuqaa faasaana faqa qoomaqa taikara faasaanara faqa naaquqara faasaanee qimasee suqufi innaaru qiqa. Sia moo ainainirafa mi faasaana qandasaa mariani. Narana deedaqirafa kai mariani.

<sup>17</sup> Innee miqimmasee qoomaqa naida mariaqa. Mi faasaana qinee inni faiqi oosana faiqi oosana Isipa maqa maaqaindaraana nifiqee aniqiafana. Innee aiqama kari mi faasaanasaa qoomaqa sakeera foora mi faasaannara asasiaqa.

<sup>18</sup> Indaaruuqaa quqoonnasaa 14 faasaanasaa eenee marinaqa oosana arasee fiifiinaqa mi quqoonnana 21 faasaanasaa innee sia innooqee mari pauraqana aqira bereeta naaqa.

<sup>19</sup> Innee 7 faasaana qoomaqa nara faasaana innooqee mari pauraqafa sia inni maaqakiaqa mariani. Innikiqari faiqi moo fannoo fee moo aanaamuru ani marina fee innooqee mari pauraqana aqira bereeta nainaqa innee sia minara Isaraee maqannaa fee qiqa.

<sup>20</sup> Innee yai yai fee maridaqa sia innooqee mari pauraqana aqira bereeta kai naaqa.

*Indaaruuqaa ainnaaqarara qoomaqa.*

<sup>21</sup> Anutufa Mooseena mi ufana qimamisoofanoo Moosefa Isaraee maqannaasa uriqararasa qimanniminoo qinau. Innee moodaa moodaa sipsipa akoona fee mimmi akoona timmusa fee inneeqa faiqi anaasee nimana kai mara minisee aruseeqa ainnaaqaroo qoomaqa suqasee naidaqa asasiaqa.

<sup>22</sup> Aandau aruseeqa fidika difaaniki sakaqa. Innee hisoopa saqari amanee raudasee minannoo fidika difaaniki raarammasee kooqi afai dinni dinni faqa mirinni faqa akuqa. Akuseeqa innee sia raudaaqa, maaqaki kai marifanoo iqaqani. <sup>23</sup> Fafaa eendaki

Yaaweefa Isipa maqannaasa ooqa faiqi narinoo fidanoo inni kooqi mirinni faqa dinni dinni faqa fidika qafamaseenoo narinoo nimari qangiroonara qinanoo sia mi maqanaki keeqaannoo.

<sup>24</sup> Innee faqa inneeqa faiqi namu faqa naaru naaru maaqi kai iqa fuaqa.

<sup>25</sup> Innee Yaaweefa qima afeekaikamasee nimirree qimaqoo maqannaasa oonureeqa maaqimmiqa fuaqa.

<sup>26</sup> Kasooaqee inni faiqi namu mi qoomaqana qafamaseeqa mina oosanara irifaqa innee maaqi qimasee qimannimiaqa.

<sup>27</sup> Maa qoomaqafa Yaaweefa ainnaaqaroo qoomaqafa maridanoo fee qimasee qimannimiaqa. Ooqai mifa Isipa maqa maaqaki maasa ainnaaqareenoo Isipa maqannaasa ooqa faiqiuqa narinoo maasa sia darinau maqi qiaqa. Mooseefa miqi qimasooafa Isaraee maqannaasa iriseeqa aiqama kumma ramafi Anutunara susuiqau.

<sup>28</sup> Susummaseeqa misa daraanimafiqa Yaaweefa Mooseesa Aaroonasa nimu ufa mau fiqa aiqama ainaina andeeqasee deedaqiau.

*Isipa maqannaasa akoonaiqi ooqa faiqiuqa kuqiau.*

<sup>29</sup> Mi eendanaki kai eenda amuqasai Yaaweefa Isipa maqannaasa ooqa akoonaiqiuqa narinau. Faraona amaaku nari akoonaa ainaina maraaninnana saaqari oosana arasee rumbaranaki mariasa faiqi namu faqa aiqama narinau. Aandau aanaaqiuqa akoonaa ooqasaa maqaranauqa faqa Yaaweefa narinau.

<sup>30</sup> Narusoofaqa mi eendanaki Faraofa faqa nari ainainasaa rakisi marusa faqa aiqama Isipa maqannaasa faqa aiqama tauti findifiqau. Iki faafau qirafa firaafa Isipa maqa maaqaki marinau. Sia moo maqaki kaqi mariqau, aiqama maaqaki kuqirafa marunara iki raqee mariqau.

<sup>31</sup> Mi eendanaki kai Faraofa Mooseena faqa Aarona faqa naaramaseenoo qimannimiaqa. Inneeqara faqa inneeqa maqannaasa Isaraee maqannaasa faqa qini maqa maaqakiqari quqaseeqa inneeqa qiannai oonureeqa Yaaweena amooqiaqa.

<sup>32</sup> Inneeqa sipsipauqa faqa mimmiuqa faqa burimakauqa faqa doo fuaqa nani. Oonuree qini faqa amiqi amiqimma qimaqaanifeera innaaru qiaqa.

<sup>33</sup> Isipa maqannaasa faiqi anaasee misa faqa Isaraee maqannaasa niqiqeeqa qiaqa. Innee kai kaqi fuaqa. Innee kaqi marifaqa maasa aiqama kuqu taikaanoora. Innee doo fuaqa.

<sup>34</sup> Miqi qimasooafa Isaraee maqannaasa innooqee maru pauraqana sia aqira bereeta sia suqarana difaaniki qamunnasaa kukuqamma quqasee nikumaaqa akumaree fiqau.

<sup>35</sup> Isaraee maqannaasa Mooseefa qundee kai iqa Isipa maqannaasa nifaaqa auqimaru ainainara siruara faqa koorara faqa qamunnaara faqa iraqau.

<sup>36</sup> Yaaweefa qufaqa Isipa maqannaasa Isaraee maqannaasara uriqararausee qimasee misa iroo ainaina kaqi nimiqau. Miqunannai Isaraee maqannaasa Isipa maqannaasa aiqama ainaina maree fiqau.

*Isaraee maqannaasa Isipa maqa maaqa minnisee fiqau.*

<sup>37</sup> Isaraee maqannaasa sandeeqa Ramaseesa maqusa quqasee Sakoota maqusai fiqau. Misa nambaqa maaqimminoo marinau, 600,000 faiqi kai mariqau, sia faiqi anaasee nisaana riqau.

<sup>38</sup> Moomoo maqusanaasa Isipa maqa maqaki ani marusa misa faqa nari burimakauqa faqa sipsipauqa faqa mimmiuqa faqa maree fiqau.

<sup>39</sup> Misa aanai fidaqa fuka bereeta innooqee mari pauraqana sia aqirana maree funa suqa naqau. Isipa maqannaasa Isaraee maqannaasa nifaqasoonara aaqmuriqa bereeta innooqee maru pauraqana sia aqirana maree fiqau.

<sup>40</sup> Isaraee maqannaasa 430 aukuaana Isipa maqa maaqaki mariqau.

<sup>41</sup> 430 aukuaana taikarana namu faqa faiqi aiqama oosana Yaaweena aiku asauku Isaraee maqannaasa Isipa maqa maaqa quqasee fiqau.

<sup>42</sup> Eendaki Yaaweefa Isaraee maqannaasa qumee rakisidanoo nifiqee finau. Aiqama aukuanaki mi eendiranara kai Yaaweenaindi fee qimasee innaaru qidaqa rakisi mariqau.

*Ainnaaqaroo oomaqana suqara naakaparufa.*

<sup>43</sup> Yaaweefa Mooseena faqa Aarona faqa qima niminau. Ainnaaqaraafanna oomaqana suqara naakapara ufa maaqimminoo mariannoo. Moo maqanaindari ani marinafa sia amana mi oomaqana naannoo.

<sup>44</sup> Inneeqa munnimmannai feefaurummaqoo ainainira fasiqausa fainanduqu saifaqa misa amana neefaranoo.

<sup>45</sup> Ufaasu ani mariasa faqa feefauruara ainaini mariasa faqa sia neefaranoo.

<sup>46</sup> Aiqama mi aandau naranna deedaqia maqanaki kai nama taikaaqa. Sia uqanna madaana maree fuaqa. Sia aandau amudaani itairiaqa.

<sup>47</sup> Aiqama Isaraee maqannaasa mi oomaqanara asasiyaqa.

<sup>48</sup> Sia fainanduqira fasiqa fannoo sia amana naannoo. Anaamuru fasiqa inni qambaana marinafa ainnaaqaroo oomaqanara asasiidanoo Yaaweena auqu uqeerararee qinaqa innee mina maaqaki mariasa akoonaiqiuqa fainanduqu saifaqa misa faqa mi oomaqanara asasiyaqa. Miqi masaifanoo mifa Isaraee maqannaasaki kambiqara fara foora maridanoo mifa faqa oomaqa naranaki mariani.

<sup>49</sup> Innee faqa moo maqannaa inniki ani marinafa faqa moodaa sanda mau kai fuaqa.

<sup>50</sup> Yaaweefa Mooseesa Aaroonasa qima nimundee Isaraee maqannaasa iqau.

<sup>51</sup> Mi faasaanna Yaaweefa Isaraeerana aiku asauku Isipa maqasaa qaraana nifiqee finau.

## 13

*Isaraee maqannaasa akoonaiqi ooqa faiqiuqara Yaaweena amiqau.*

<sup>1</sup> Yaaweefa Mooseena qimaminau.

<sup>2</sup> Innee aiqama akoonaiqi ooqa faiqiuqa qini kai qimia. Aiqama Isaraee maqannaa ooqa faiqiuqa faqa aiqama aandau ooqasaa maqarana akoonauqa faqa qinindi marinara qini qimiaqa.

*Innooqee maru pauraqana sia aqira bereeta suqoo oomaqafa.*

<sup>3</sup> Mooseefa Isaraee maqannaasa qima niminoo qinuu. Innee maa faasaannara iriaqa. Innee karabusakiqari maa faasaanna Yaaweefa nari afeekannoo nifiqee anunara innooqee mari pauraqana aqira bereeta sia naaqa.

<sup>4</sup> Innee maqee Abiba quqoona indaruqaa faasaana marifaqa Isipa maqa maaqa quqasee ani mariafanoo.

<sup>5</sup> Yaaweefa inni nikaaku nikaaku faqa oori kandamasee qima afeekaika masee Kannaana maqa maaqa faqa Heeta maqa maaqa faqa Amooraa maqa maaqa faqa Hifita maqa maaqa faqa Yeebusa maqa maaqa faqa misa maqa maaqa inni nimiraree qinuu. Mifa inni nifiqeenoo ainoo faqaa maqa ainaina rairaa imariqoo munu sainaaqaa innee aiqama aukuaana indaruqaa quqoonasaa maa oomaqana sakasee naidaqa asasiyaqa.

<sup>6</sup> Dinni taikasee dinni ani qaara qanda marasee 7 faasaana innooqee mari pauraqana sia aqira bereeta naaqa. Innee miqimmaseeqa naidaqa mi 7 faasaanafa taikainaqa miqoo innee Yaaweenara uriqarara fee qimasee firaa oomaqa sakasee naaqa.

<sup>7</sup> Dinni qisauku taikasee dinni ani qaara qanda marasee 7 faasaana innooqee mari pauraqana sia aqira bereeta kai naaqa. Mi kamuqoo inni maaqaki faqa inni maqa maaqaki faqa innooqee mari pauraqafa faqa innooqee mari pauraqana aqira bereeta faqa sia uqanna mariani.

<sup>8</sup> Mi oomaqana nainna kari inneeqa faiqi namu maaqi qimasee qimannimiaqa. Maasa Isipa maqa maaqakinaana Yaaweefa nifiqee anunara maa oomaqana sakasee naidaqee qiaqa.

<sup>9</sup> Mooseefa kafa Isaraee maqannaa qimannimidanoo qinuu. Maa oomaqana narafa inni naaqoo auqaannoo. Nisaukuki sanda rumbeera foora faqa niqinaaqa rumbeera foora inoo maridanoo, mifa inni naaqoo auqainaqa innee Yaaweena sandufa qirana faqa mina ufa asaana rumasee irirana faqa naaqoo auqaannoo. Yaaweefa nari afeekannoo inni Isipa maqa maaqaindaraana nifiqee anunara miqiaqa.

<sup>10</sup> Aiqama aukuanaki maa faasaanna maa oomaqana sakasee naidaqa asasiyaqa.

*Akoonaiqi ooqa faiqiuqa.*

<sup>11</sup> Yaaweefa ooqai inni faqa inni nikaaku nikaaku faqa nimirara qima afeekaikamasee Kannaana maqa maaqa nimianauree qimaqoonnai nifiqee fuannoo.

<sup>12</sup> Mifa inni mi maqana niminaqa innee ooqa faiqi akoonaiqiuqa Yaaweena amiaqa. Aiqama aandau ooqasaa maqarana akoonauqa Yaaweenaindi mariani.

<sup>13</sup> Doonki ooqasaa maqarana aanaaqi minisee sipsipa aanaaqi moodaa maraseeqa doonki aanaaqi amaqa maqasaifanoo doonki aanaaqi kaqi mariannoo. Innee sia moo aandaunnai doonki aanaaqi amaqa maqaani qimasee doonki aanaaqiuqa ninuka qumaree kuridiaqa. Innee inneeqa ooqa faiqiuqa faqa Yaaweenaindikinoo marina kafa inneeqa feefauriaqa.

<sup>14</sup> Kasooqagee inni faiqi namu mi suqanara oosannara inni irifaqa innee maaqi qimasee qimannimiaqa. Yaaweefa nari firaa afeekannoo maasa Isipa maqa maaqai rumbaranakinaana qifiqee aninuu maqi qiaqa.

<sup>15</sup> Faraooqa kaukaata qimasee sia maasa idukiraree qufanoo Yaaweefa ooqa faiqiuqa akoonaiqiuqa Isipa maqa maaqakinaana aiqama narinau. Aiqama aandau akoonaa ooqasaa maqaranauqa faqa narinau. Minara maasa aiqama ooqasaa maqara aandau Yaaweena tatufirana suqa amiseeqa nari faiqi namu kafa maraidaqa.

<sup>16</sup> Maa oomaqana narafa maasa daaqoo auqaannoo. Nisauku sanda rumbeera foora faqa niqinaaqa rumbeera foora inoo maridanoo, mifa maasa daaqoo auqainaqa Yaaweefa maasa Isipa maqa maaqaindaraana nari fira afeekannoo nifiqee anunara irianaara.

*Anutufa qasuruki faqa idauruki faqa maridanoo misa nifiqee finau.*

<sup>17</sup> Faraofa Isaraee maqanna idukusoofaqa fimarufanoo Anutufa Firistianni gusa aatata sia nifiqee finau. Isaraee maqannaasa Firistia maqannaasa faqa rakiqa anirandee kaifaa Isipa maqa maaqai fifoo qimaseenoo nifiqee moo aatata finau.

<sup>18</sup> Minara iriseenoo Anutufa misa nifiqeenoo aadana maqa maaqai fiqinoo taatuqee nammari fimarunnai nifiqee fiqinau. Fidaqa Isaraee maqannaasa rakira ainaina deedaqa muqiraua fiqau.

<sup>19</sup> Ooqai Yooseefaafa kaqi maridanoo maaqi qimaseenoo Isaraee maqannaasara qufaqa noori kandamasee mina amudaani maree firara qima afeekaikiqau. Yooseefaafa maaqi qimasee qimanniminau. Kasooqaaqee Anutufa inni nifiqee finaqa innee qini qimudaani faqa maa maqusanakinaana maree fuuqa. Moosefa minara iriseenoo Yooseefaana amudaani faqa mareenoo finau.

<sup>20</sup> Isaraee maqannaasa Sakoota maqusakiqari fifiufaqa aadana maqa maaqa atinni Eetama maqasai oonuree miqoo uqaana maqauqa usakasee faiqaaqau.

<sup>21</sup> Yaaweefa faasaana oonnamuki marufanoo oonamu fannoo nifiqee fimarinau. Eendaki mifa idauruki marufanoo idauru fannoo kaaqa qamannimaqee marufaqa eendaki faqa faasaana faqa kaqi kai fimarigaau.

<sup>22</sup> Aiqama faasaana oonnamu misa noorinni fimarinau. Aiqama eendaki idauru faqa miqikai imarinau.

## 14

*Misa Taatuqee ooruku nammari taqaqau.*

<sup>1</sup> Yaaweefa Mooseena qimaminoo qinau.

<sup>2</sup> Anee Isaraee maqannaasa qimanniminaqa misa oonurandee quandaki Piqaqiroota maqusa oorinni Mikadoora maqusa dinni taatuqee ooruku nammari dinni mina qambaana Baa Seefoona maqusa aqa uqaana maqauqa usakaaqa.

<sup>3</sup> Faraofa maaqi qimasee iriannoo, Isaraee maqannaasa aadana maqa maaqaki firanara rufiqaidaqa maqa maaqaki oonuree aniree idammiaafoo qiannoo.

<sup>4</sup> Qinee Yaaweesa kaukaata qira irirana Faraona amiananoo mifa inni ninaaqiana nifaqee fuannoo. Qinee Faraona faqa mina rakira fasiqauqa faqa urinnaaqararanannai fira duqu maraanaara. Miqimmasaanaqa Isipa maqannaasa qini Yaaweesara irifarannoo. Miqi qimasooofaqa Isaraee maqannaasa Yaaweena ufa mau fiqa anirandee fiqau.

<sup>5</sup> Isipa maqanna karaambaiqa Faraofa nari ainainiranasaa rakisirausa faqa Isaraee maqanna qugasee funara kaifaa oonu mafi irufanoo sia andeeqoofanoo qinau. Maasa nana furufaree qimarunaqee Isaraee maqannaasa idukuaki quqasee fidaqee. Maasa Isaraee maqannaasa quqasaafaqa fuafanoo yafee maasa ainainira faiqi kiannoo fee.

<sup>6</sup> Miqi qimasooofanoo Faraofa nari qoosa rarisee maru rakira karana faqa nari rakira fasiqauqa faqa deedaqinau.

<sup>7</sup> Faraofa qoosa rarisee maru rakira karansa amiqiranauqa kai sikis handareeta 600 faqa Isipa maqa maaqaki maru qoosa karansa faqa minasaa rakisi marusa faqa mara quqasoofaqa Isaraee maqannaasa nifaqee fiqau.

<sup>8</sup> Yaaweefa kaukaataqira irirana Faraona Isipa maqanna uriqararana amufanoo Isaraee maqannaasa idukuakiqida fidaqa nasuriqa fimarufanoo Faraofa nifaqee finau.

<sup>9</sup> Isipa maqanna sudiauaq nariqa qoosauqa faqa nari qoosa rarisee maru karansa faqa daraiwaauqa faqa Isaraee maqannaasa nifaqeeqa Taatuqee ooruku nammari aqa Piqaqiroota maqusa dinni Baaraseefoona maqusa dinni qambaana uqaana maqa usakasee marufaqa oonu paquriqau.

<sup>10</sup> Oonuroofaqa Isaraee maqannaasa Faraona faqa mina rakira fasiqauqa faqa niqafamaseeqa tautumaseeqa rufiidaqa Yaaweefa dadaaqianifeera faaqariqau.

<sup>11</sup> Faaqaridaqa Mooseena qimamiqa qiqau. Isipa maqasaa madika sia amanaikifanee anee maasa qifiqeenanee maa aadana maqa maaqanaki kuqaneera aninanee. Anee maasa Isipa maqa maaqakinaana qifiqee anianafa quandafina qafaa.

<sup>12</sup> Ooqai maasa ani ufa qimamiqiafana maasa Isipa maqa maaqaki kaqi maridaqa maa ainainafa kambigaannoo fee qiqiafana. Maasa ani qimamiqiafana saina maasa kaqi Isipa maqannaasa ainainira faiqi kiqa marianee qiqiafana. Miqoo maridaqa misa ainainira faiqikirafa amiqirafa mariqini anee maa aadana maqa maaqanai fifau qifiqee minisaanaqa kuqanaara.

<sup>13</sup> Mooseefa misa ufa iriseenoo qimanniminoo qinau. Innee sia rufiaaqa, kaqi nimatautasee maridaqa Yaaweefa innee asumu mariaqeera itita nimaqainaqa qafeefaranoo. Maqee innee Isipa maqannaami amiqimasee nindafaafa. Innee maaqooqari sia kafaanindafeefaranoo.

<sup>14</sup> Yaaweefa inni rakirana nimaqa maqa finoo misa saimbaqa rakuannoo. Miqinaqa innee sia moo ainaina auqaqa, kaqi kai mariaqa.

<sup>15</sup> Miqi qimasoofofanoo Yaaweefa Mooseena qimaminau. Anee nanaree qiniara dadaaqiannee qimasee faaqaridane. Anee Isaraee maqannaasa qimanniminaqa noori munduqaannai fuaqa.

<sup>16</sup> Anee aneenna saunu nammari amummaqa uqeeraa. Miqimma sainaqa nammari raina finaqa Isaraee maqannaasa amana aadana maqasaa taqaqa.

<sup>17</sup> Qinee Yaaweesa Isipa maqannaasara qianaqa kaaqa firaqoo kaukaataqira irirana marasee Isaraee maqanna ninaaqianna nifaqee fifaranoo. Qinee Faraona faqa mina sundiaaqa faqa mina qoosa rarisee mari karausa faqa daraiwaaqa faqa rakirana urinnaaqararanannai fira duqu maraanaura.

<sup>18</sup> Qinee misa urinnaaqarama saanaqa misa qiniara Yaawee fee qifaranoo.

<sup>19</sup> Anutuna qangiroo fannoo Isaraee maqannaasa noorinni mariufa aiqareenoo ninaaqiannai finau.

<sup>20</sup> Mi oonnamufa Isipa maqannaasa dinni Isaraee maqannaasa dinni qambaana marinau. Mi oonnamufa Isipa maqannaasa asukuna nimisee Isaraee maqanna kaaqa qamannimaqanau. Miqinoo marufaqa mi eendanaki Isipa maqannaasa faqa Isaraee maqannaasa faqa sia nari aqa nari aqa fiqau.

<sup>21</sup> Mooseefa asauku nammari amummaqa uqeerasoofofanoo Yaaweefa suani afu urimarunnaindaraa afeeka ufaainoo ooruku nammari rainanau. Mi ufaifa mi eendanaki uqidanoo mariufanoo ooruku nammari rainasoofofanoo aadana maqa koorooinau. Miqimmafufanoo nammari rainanau.

<sup>22</sup> Miqimmafufaqa Isaraee maqannaasa ooruku nammari qambaana aadana maqasaa taqaqau. Dinni dinni nammari fannoo safasara foora inoo marufaqa fiqau.

<sup>23</sup> Isipa maqannaasa misa niqafamaseeqa misa ninaaqianna nifaqeeqa nammari qambaana oquraqau. Isipa maqannaasa nariqa qoosauqa faqa nariqa qoosa rarisee maru karausa faqa nariqa daraiwaaqa faqa Isaraee maaqanaasa nifaqee nammari oogu raqau.

<sup>24</sup> Iaqaarooka Yaaweefa oonnamuqiari faqa idauruqiari faqa Isipa maqannaasa nindafamaseenoo maparaa irana niminau.

<sup>25</sup> Yaaweefa qufanoo qoosa rarisee maru karausa misa niku utusamafufaqa firara firaqoo anuqi mariqau. Miqufaqa Isipa maqannaasa qiqau. Yaaweefa Isaraee maqannaasa saaroo qinoo maasa daridanoo. Maraifaqa quqasee fua.

<sup>26</sup> Miqimasoofofanoo Yaaweefa Mooseena qimaminau. Aneenna asauku nammari amummaqa uqeerasainanoo kafaanammari fannoo quminoo Isipa maqanna nari qoosa rarisee maru karausa faqa daraiwaaqa faqa rafaqa fuani.

<sup>27</sup> Mooseefa iriseenoo asauku nammari amummaqa uqeeranau. Miqimma soofanoo iaqaarooka nammari fannoo kafaanuurandeenoo oqai mariunde kai mafinau. Isipa maqanna sandeeqa fuaneera qufanoo Yaaweefa misa mareeqee nammari aqinau.

<sup>28</sup> Nammari fannoo kafaan quminoo Faraona rakira fasiqauqa faqa qoosa kara faqa daraiwaaqa faqa aiqama Isaraee maqannaasa nifaqee nammari ooguuroosa aiqama rafaqa finau. Sia uqanna moodaafa kaqi marinau.

<sup>29</sup> Isaraee maqanna ooruku nammari qambaana aadana maqasaa taqaqau. Nammari dinni dinni safasara foora inoo marufaqa fiqau.

<sup>30</sup> Mi faasaana Yaaweefa Isaraee maqannaasa Isipa maqannaasa nisaukukinaana maranau. Marasooafa Isaraee maqannaasa quandafi niqafooafa Isipa maqanna nammari afaigara kuqieeqee mariqau.

<sup>31</sup> Isaraee maqannaasa Yaaweena moo ainaina afeeka eeraarirana rakiranaki Isipa maqannaasa urinnaaqaroonara irufanoo naaquqooafaqa nari saqarikirana Yaaweenasaa faqa mina ainainira faiqi Mooseenasaa faqa mundiqau.

## 15

### *Mooseena Idi.*

<sup>1</sup> Mikari Mooseefa faqa Isaraee maqanna faqa maaqi qimasee Yaaweena amooqira idi raqau.

Qinee Yaaweenara idi raanuranoo.

Mifa rakiranaki uriqarainara miqianaura.

Mifa qoosauqa faqa qoosasaa marusa faqa ooruku nammariki mara aqinara idi raanaura.  
<sup>2</sup> Yaaweefa qini afeeka ititarafa maridanoo.

Mifa qini asumu maroofa maridanoo.

Mifa qini Anutufa marifaqa qinee mina amooqianaura.

Qini qikoona Anutunafa marifaqa qinee mina afeekara idi raanaura.

<sup>3</sup> Yaaweefa afeeka rakira fasiqa maridanoo.

Mina auqu Yaaweefa maridanoo.

<sup>4</sup> Mifa Isipa maqanna sundiaufa faqa misa qoosa karauqa faqa rafusu ooruku nammariki aqinoo.

Mina uriqarara sundiaufa Taatuqee Ooruku Nammariki ukuqneea.

<sup>5</sup> Ooruku nammari faruma fannoo misa rafaafa fusaifaqa misa ooniara foora meemaqoo maqasaa ooqu maridaqa.

<sup>6</sup> Oo Yaawee ani asauku uqannai asauku fannoo naaquqara afeeka maridanoo.

Mi asaukufa namuqaa naruseenoo utitigeenoo.

<sup>7</sup> Aneenna fira uriqararanannai aneenna namuqaa rafusu aquananoo.

Ani aanoo qirafa ida dudaqasaaqari qeera foora mannimaqaananoo.

<sup>8</sup> Anee ooruku nammari fuaqasaananoo nammari mandi mareenoo aaqanara foora ooru finoo.

Nammari dinni dinni innooqa maree safasara foora ooru finoo.

Nammari dinni dinni raina fufanoo maqa meemaqoo afeekaika minoo.

<sup>9</sup> Namuqaauqa maaqi qiqau.

Maasa misa nifaqasee qumaraananoo.

Misa qumaraseeqa misa amiqira ainaina maasa didimarina aiqama maraanaura.

Maasa qeeqa rakira paipanannai naruseeqa misa aiqama ainaina mararee qia.

<sup>10</sup> Miqi qiafana anee Yaaweefa moodaannai aidoo fuaqasaananoo Isipa maqannaasa ukuqneea.

Miqimma saifaqa misa ooniara foora fira difukunaki ooqu fia.

<sup>11</sup> Yaawee, yafee unna anutusakiqari ani fooqaafa maridanoo fee. Sia moo fannoo.

Yafee ani amana maridanoo kaaqa naaquqara andeeqarafa maridanoo fee.

Yafee faiqi sia amana auqaqaa ira ainaina faqa afeeka ainaina anee imarianandee masee auqaannoo fee.

<sup>12</sup> Aneenna asauku uqannannai uqeeera saananoo maqa fannoo namuqaa nambiqeenoo.

<sup>13</sup> Aneenna qima afeekaikiranasaa mapukusee maridana faiqi anaasee mandainainaki mariusa nifiqa maree fimariananoo.

Aneenna afeekannoo misa indaarunni kamma nimaqa maree aneenna naaquqara andeeqara maqasaa quqanni seennaranoo.

<sup>14</sup> Anaamuru minara irifanoo naaquqeenoo naindari raannoo,

Firistia maqannaasa iriafanoo maparaairafa misa qumareenoo.

<sup>15</sup> Idooma maqannaaka karaambaiqauqa faqa iriafanoo naaquqeenoo.

Mooapa maqannaaka afeeka fasiqauqa faqa naindari raidanoo.

Kannaana maqannaasa afeeka faqa nammari kidanoo.

<sup>16</sup> Maparaa irafa faqa fira ruftarafa faqa misaki maridanoo.

Misa ani Yaaweena afeeka qafamasee naaquqaiifaqa kaqi muquriqa mariafaqa ani faiqi anaasee karabusakinaana iduku saanausa misa nifusaa fiqaraidaqa.

<sup>17</sup> Anee misa nifiqa maree aneenna aaqanasaa munuseenana asumu ainainara foora ummaqu saananoo.

Anee Yaaweefa aneennara utaaqama qaanna maqusanaki munusaananoo.

Amaana maqa aneenna usakaqaanna maqusanaki munusaananoo.

<sup>18</sup> Anee Yaaweefa naaru naaru uriqarara karaambaiqa marinnaranoo.

*Miriamma nammarina idi.*

<sup>19</sup> Isaraee maqannaasa ooruku nammari qambaana aadana maqasaa taqaqau. Fitaqa-fufaqa Isipa maqannaasa qoosa kara faqa nari qoosauqa faqa nari daraiwaaufa faqa mi ooruku nammarinaki ooqu roofanoo Yaaweefa kaifaa nammariara qufanoo quminoo misa rafaafa finau.

<sup>20</sup> Aaroonaa anasaafa Miriama nammarifa Anutuna tamummaqara anaasee marufa marinuu.

Isipa maqannaasa nammariki kuqutaika fufanoo dukaanaa qumareenoo aridanoo idi ranau.

Anaasee aiqama qafamaseeqa nari dukaanaa maree mina faqa oonuree aridaqa niqoori raqee mariqau.

<sup>21</sup> Miriamma nammarifa maaqi qimasee idi ranau.

Yaaweenara idi raaqa.

Mifa rakirana firaagoo uraaqareenoo,  
mifa qoosauqa faqa qoosasaa nimariasa faqa ooruku nammariki rafusu aqinoo.

*Sukaqee mari nammarifa.*

<sup>22</sup> Mooseefa Isaraee maqannaas taatuqee ooruku nammarindaraana nifiqeenoo Suraa aadana maqa maaqaki quqanau. Qaaramoo faasaanasaa aadana maqa maaqaki fidaqa sia nammari paquriqau.

<sup>23</sup> Misa Maraa maqa maaqaki oonureeqa nammari moo paqurimasee noofanoo suka narufaqa sia naqau. Minara mi maqa maaqana auqu Maraa fee qiqa. Mi auquna oosana sukaqee mari fee qiqa.

<sup>24</sup> Isaraee maqannaasa Mooseena aanoo qimamaqaidaqa qiqa. Maasa nana nammari fee naanauree.

<sup>25</sup> Mooseefa iriseenoo afeekaika maseenoo Yaaweenara innaaru qinuu. Innaaru qufanoo Yaaweefa Mooseena saqari moo uqafiqoofanoo Mooseefa mi saqarina nammariki aqusoofanoo nammari amiqinuu. Miqoo Yaaweefa nari sanda ufa mi mau fuuqera nimiseenoo miqoo misa nimana masee qafanuu.

<sup>26</sup> Yaaweefa qimanniminoo qinuu. Innee qini ufa qaidusiqa qinee andeeqara ainainee qimarunnana auqeeqa kafaa qini sanda ufa mau fifaqa qinee sia manda aupurarana Isipa maqannaas nimiafannandee iqa inni nimianaara. Qinee Yaaweesa inni aurirana taikannisee marunasa maridaqa.

<sup>27</sup> Miqooqari Isaraee maqannaasa fiiuufaqa Eerimma maqa maaqaki oonuraqau. Miqoo qisaukuqara taikasee qikunni ooqu qaara marasee 12 nammari maqakiqari ururee maruna faqa fasaafana fooqaa ira saqari moomoo 70 marinau. Miqoo nammari afainni misa uqaana maqa usakasee mariqau.

## 16

*Isaraee maqannaasa mannaa faqa ufini faqa mara naqau.*

<sup>1</sup> Isaraee maqannaasa Isipa maqa maaqaindari quqasee anuqooqari inaaqiannaas quqoonaa 15 faasaanasaa Sinai aqana dinni Eerimma maqa maaqa dinni qambaana Sinnaa aadana maqa maaqaki oonuraqau.

<sup>2</sup> Misa aiqamausa aadana maqa maaqai funara Mooseesa Aaroonasa kaukaata qimannimaqasee qiqa.

<sup>3</sup> Maasa Isipa maqa maaqaki mariafannaqoo Yaaweefa daruqaana. Miqoo maasa maridaqa aanda faqa akaqa narana maasa didi maruna maasa qimana kai neemariqi-afana. Inneeqara miqooqaraana maasa qifiqeeqeeqa maa aadana maqa maaqanaki quqasaafaqa aandaroo darinaqa kuqu taikaanaara.

<sup>4</sup> Yaaweefa misa ufa iriseenoo Mooseena qimaminoo qinuu. Qinee maqee inni aiqamausa naranara qiananoo innaarunaindari aakuara foora aqufina mara neefaranoo. Faasaambaasaana narana quqasaanaqa faiqi anaasee raudamafiqa moodaa faasaana amanakai maree marifaranoo. Qinee miqimmasee misa nimanamasee qafaanaara. Misa qini ufa irifaree sia fee irifaree.

<sup>5</sup> Moodaannaas qisauku taikasee dinni ani moodaa marasee 6 faasaana qaara eenda narana anasaa mara deedaqamma quqaqa.

<sup>6</sup> Mooseesa Aaroonasa Isaraee maqannaas aiqama suqusee qimannimiqa qiqa. Maqee eenee marinaqa innee Yaaweenara Isipa maqa maaqaindari nifiqee anunara irifaranoo.

<sup>7</sup> Kananaana innee Yaaweefa maasaki maridanoo daroo daraa ida kaaqa qeemarina qafeefaranoo. Innee minara aanoo qimariana doo mifa irinoo. Innee sia maaqanda rau qimariafanoo fau. Maaqanda faiqi faiqi kai maridaqa mina naakapurufa mau fidaqa mina kai qimannimidaqa.

<sup>8</sup> Mooseefa kafaa qimanniminoo qinuu. Eendinanoo Yaaweefa aanda niminaqa neefaranoo. Kananaana bereeta fooqaana inni nimana kai nimianoo. Innee mina firaagoo aanoo qimarianara miqianoo. Innee maasara aanoo qimariana sia maasarau miqi mariafanoo, Yaaweenara aanoo qimariafanoo.

<sup>9</sup> Mooseefa Aaroonaa qimaminoo qinuu. Anee Isaraee maqannaas aiqama qima niminaqa Yaaweenaa oorinni ani kikiqiaqa. Mifa misa aanooqira ufa irinara miqiaqa.

<sup>10</sup> Aarooqa faiqi anaasee ufa qimannimi marufaqa quandafi aadana maqa maaqai qafoofoanoo oonamuki Yaaweenaa daroo daraa ira kaaqa qarafa koorooinau.

<sup>11</sup> Yaaweefa Mooseena qimaminoo qinuu.

<sup>12</sup> Qinee Isaraee maqannaas aanoo qira ufa doo iriqa. Maaqi qimasee qimannimia fafaa eendinoo mammandi marinaqa misa aanda nimananaara duna kananaana uqanna



bereeta fooqaana nári narana nimana kai nimianaúra. Nimisaanaqa innee qini Yaaweesa inneeqa Anutusara irifaranoo.

<sup>13</sup> Miqi qimasoofofanoo eendi marufanoo afidauqa moomoo qaqamaraidaqa anirameegee uigaana maqusa amanaikiqau. Kananaana qififaramu uigaana maqa aiqama fiq fiq inoo marinau.

<sup>14</sup> Qififaramu taikafufanoo adamanna ainaina kaqikaafauqa aadana maqa mau marinau. Mi ainainafa pupusamuara foora kaqikaafauqa marinau.

<sup>15</sup> Isaraee maqannaasa mina qafamaseeqa mina oosanara randeeqa nári qimami nári qimamiqa qiqau. Maana nana ainaina fee maridanoo fee qiqau. Miqi qufanoo Mooseefa maaqi qimasee qimanniminau. Yaaweefa narana naaqeera nimidannoo.

<sup>16</sup> Yaaweefa maaqi qimasee qimanniminau. Innee inneeqa faiqi anaasee faqa inneeqa nimana kai maraaqa. Inneeqa maaqaki mariasa nimana nimana kai susufinna qumbiqa quqaaqa.

<sup>17</sup> Isaraee maqannaasa irisee miqimmiqau. Akaqausa moomoo maroofaqa akaqausa goodaa maraqau.

<sup>18</sup> Aiqaмаusa suqusee nári amani nári amani masee qafoofanoo akaqausa moomoo suqufanoo akaqausa oodaa suqiqau. Moomoo suqusa namasoofofanoo nimuaqumminau. Oodaa suqusa misa faqa namasoofofanoo nimuaqu kaimminau. Aiqaмаusa nári nimana kai suqiqau.

<sup>19</sup> Mooseefa qimanniminoo qináu. Sia ataraasa duna nararee qimasee quqaaqa. Aiqaмаusa naaqa.

<sup>20</sup> Miqi qufaqa akaqausa Mooseena ufa rukiasee duna kananaana nararee qimasee quqasoofanoo putaa undufanoo qimi kai qumbiqoofanoo Mooseefa aranaqoofanoo aanoomannimaqanau.

<sup>21</sup> Aiqaма kananaana nári nimana kai suqusaida neemariqau. Kaqi mafisoofofaqa suani urureenoo ididiufanoo nammari nammarmima taikanau.

<sup>22</sup> Dinni ani moodaa marasee 6 faasaanasaa qaara kari suqarana amana kai maraqau. Miqi masoofaqa Isaraee maqannaasa uriqararasa aniree mi ainainnara Mooseena qimamiqau.

<sup>23</sup> Mooseefa iriseenoo moo ufa maaqi qimasee qimanniminau. Duna Yaaweena naaquqara idooara faasaana mariannoo. Mi faasaana minaindi mariannoo. Innee nana ainainee suqararee qinnana maqee suqaaqa. Kaqi marinna narana aaduma quqaqai fanoo marinaqa duna suqa naaqa.

<sup>24</sup> Misa Mooseefa qimannimundee iqa dunaindi kaqi maaqaki quqaaqau. Iqaqoofaqa qafoofanoo sia putaa inoo qimi marinau amiqinoo marinau.

<sup>25</sup> Mooseefa minara qimanniminoo qináu. Doo maqee mina naaqa. Maqee Sabata idooara faasaana Yaaweenaindi maridanoo. Minara innee fuka narana uigaana maqusa naambeeaqara mararafa sia mariannoo.

<sup>26</sup> Innee qisauku dinni taikasee dinni ani moodaa marasee 6 faasaana narana suqu quqaaqa. Qisauku dinni taikasee dinni ani qaara marasee 7 faasaana idooara faasaana marinaqa sia miqoo narana mariannoo.

<sup>27</sup> Qisauku dinni taikasee dinni ani qaara marasee 7 faasaanasaa akaqausa narana suqanee qimasee oonu qafoofanoo sia marinau.

<sup>28</sup> Anutufa mina qafamasee Mooseena qimaminau. Innee kisaaqasaa fee qini ufa rukiaidaqa sia qini sanda ufa afaqeefaree.

<sup>29</sup> Innee iriaqa. Qinee Yaaweesa idooara faasaana nimiqa. Miqunnnanara qinee dinni taikasee dinni ani moodaa marasee 6 faasaanasaa qinee qaara faasaana narana amana kai nimianaúra. Aiqaмаusa mi faasaana inneeqa mariaqoo kai mariaqa, sia kasiaqa.

<sup>30</sup> Faiqi anaasee minara iriseeqa dinni ani qaara marasee 7 faasaanaikufaqa sia ainaini mariqau.

<sup>31</sup> Isaraee maqannaasa mi narannara mannaa fee qimariqau. Mifa ooororana qaqaма fooqaafa eekara arirafa marinau. Mina namasoofofanoo mina adiafaa irafa ookasaasa anoonannai auqira biskitara foora imarinau.

<sup>32</sup> Mooseefa Yaaweena ufa iriseenoo maaqi qimasee qimanniminau. Yaaweefa inniara maaqi qidanoo, qinee mannaa nimmunnana akaqana afeeki mara quqaqai marinaqa inneeqa ninaiqimara nikeeku nikaaku uqannifiqaidaqa maaqi qimasee qimannimiqa. Yaaweefa Isipa maqasaqari maasa aadana maqasaa nifiqee anireenoo qimufaqa naafannanee qimasee uqannifiqaaqa.

<sup>33</sup> Miqi qimasee qimannimiseenoo Mooseefa Aarona qimaminau. Anee qafee moo mara maree mannaa suqeeqee Anutuna afusaa quqasainaqa kasooaqee kambiqainausa qafaqa.

<sup>34</sup> Yaaweefa Mooseena qimamundee inoo Aaroonafa mi naranna mara mareenoo moodaanaki kira bookisa aaqa quqasoofanoo marinau.

<sup>35</sup> Isaraee maqannaasa 40 aukuanaki mannaa neemariqau. Mi naranna naqa fifufafa Kannaana maqasaa nariqa mariraree quqoo oonuraqau.

<sup>36</sup> Mikari misa ummaara amana masee qafee marufa qaaraganda marinau. Moo fannoo moodaa kaqikaa susufinna amana marinau. Moo fannoo qisaukuqara 10 kaqikaa susufinauqa amana marinau.

## 17

*Oonikiqari nammari quminau.*  
(Namba 20:1-13)

<sup>1</sup> Yaaweena ufa mau fiqa Isaraee maqannaasa Sinnaa aadana maqa maaqakiqari quqasee fiqau. Fidaqa misa maqusa maqusa faiqafa fimariqau. Misa Reefidimma maqa maaqaki nammari sia maruqoo oonu mariqau.

<sup>2</sup> Sia marufafa misa Moosenara kaukaata qidaqa qiqau. Anee nammari nimina naanee qufanoo Mooseefa qimannimino qinau. Innee nanaree qini aanoo qima qimaqaidee. Nanaree innee Yaaweena amanammasee qafaidee.

<sup>3</sup> Isaraee maqannaasa nammariara kaaqa nidufafa Mooseena kaqi kai aanoo qimamaqee mariqau. Misa maaqi qiqau. Nanaree anee maasa Isipa maqa maaqaindaraana qifiqee mini saananoo fee nammariara didirafa maasa faqa maasa faiqi namu faqa maasa aandaauqa namufafa kuqa daruannoo fee.

<sup>4</sup> Miqi qufanoo Mooseefa afeekai kammaseenoo Yaaweenara innaaru qidanoo qinau. Oo Yaawee qinee maa fasiqa anaaseesa naqifeemma nimaqaanauree. Misa qusasaa oonisamu qini darifaranoo.

<sup>5</sup> Yaaweefa Mooseena qimaminoo qinau. Moosee anee Isaraee maqannaasa uriqararasa nifiqee indaaru fua. Ooqai anee Niru nammari arunna saununa faqa maree fua.

<sup>6</sup> Qinee Sinai aqanasaa inni noorinni oonisaa kikiqifa marianaara. Aneenna saunu samu ooni arusainanoo nammari minakiqari quminaqa faiqi anaasee naaqa. Miqi qufanoo Mooseefa Isaraee maqanna uriqarararasa nifusaa miqimandoofanoo nammari quminau.

<sup>7</sup> Misa mi maqa maaqana auqu qaara auqu raqau. Masaa faqa Meeribaa faqee qiqau. Mi auqu qanda oosana amana masee qafarafa faqa aanoo qirafa faqee qiqau. Aanoo qidaqa qiqau. Yaaweefa maasa faqa maridanoo fee sia fee maridanoo fee. Misa mi ufanannai Yaaweena amana masee qafaqau.

*Isaraee maqannaasa Amareeka maqannaasa faqa rakiqau.*

<sup>8</sup> Isaraee maqanna Reefidimma maqa maaqai marufafa Amareekana aiku asauku anireeqa misa nariqau.

<sup>9</sup> Mooseefa misa nidafamasee Yoosuaana qimaminoo qinau. Anee akaqa fasiqauqa mara quqasainaqa duna kananaana Amareekana aiku asauku faqa oonu rakuuqa. Qinee aqanasaa Anutufa marana nuannee qimasee qimaqimu saununa uqusee kikiqifa marianaara.

<sup>10</sup> Yoosuaafa eedoo qimasee kananaana iqaqoofanoo doo Amareekana aiku asauku faqa rakirara nifiqee finau. Fufafa Mooseefa faqa Aaroonafa faqa Hurafa faqa aqanai ooru fiqau.

<sup>11</sup> Mooseefa aqanasaa kikiqamambufanoo asaukuqara uqeerasoofafa Isaraee maqannaasa rakiranaki afeekaiqau. Kafaa nari asauku muqufisoofafa Amareekana aiku asauku rakiranaki afeekaiqau.

<sup>12</sup> Mooseena asauku anuda qoofafa Aaroonasa Hurasa ooni ufiqisoofanoo Mooseefa minasaa ooqu marifufanoo Aaroonasa Hurasa Mooseena asaukuqara uaqeefanoo kisaaqasaa marufanoo suani keeqanau.

<sup>13</sup> Miqimmasee uaqeunara Yoosuaafa faqa nari rakira fasiqauqa faqa Amareekana aiku asauku amiqimmasee naruqarasiqau.

<sup>14</sup> Miqimmasoofanoo Yaaweefa Mooseena qimaminau. Anee papiqaki maa rakiranara akararumma quqaa. Miqinoo marinaqa kaqi iriqa nuaqa. Yoosuaana qimamia. Qinee Yaaweesa Amareekana aiku asauku kuridi taikasaanaara.

<sup>15</sup> Rakirafa taikafufanoo Mooseefa ooniuga qumareenoo mi maqa maaqanaki qainda auquseenoo mi qaindana auqureenoo Yaaweefa qini rakira saqari fee qimasee mi qaindana auqu ranau.

<sup>16</sup> Mooseefa kafa qinau. Innee Yaaweena rakira saqari uqeeraaqa. Yaaweefa kaqi kai Amareekana aiku asauku faqa naaruara rakida mariannoo.

## 18

*Yeetooroofa Mooseena ani qafanau.*

<sup>1</sup> Yeetaroofo Midiana maqannaasa aanaiqikirafa Mooseena airaamaku marinau. Aiqama ainaina Anutufa Mooseena faqa Isaraee maqannaasa faqa dadaaƙi marunara faqa Isipa maqa maaqakinaana nifiqee anunara faqa Yeetaroofo irinau.

<sup>2</sup> Iriseenoo mifa faqa Mooseena anaafa Sipooraa nammarina maqusai quqasee anuna afiqee aninau.

<sup>3</sup> Mina faiqiƙara Keerasoommana faqa Eerieesarana faqa nifiqee aninau. Mooseefa maaqi qinau. Qinee anaamuru maqa maaqaki asaƙiraafai ani maridee qimasee narí amaaku auqureenoo Keerasoommanee qinau.

<sup>4</sup> Mooseena inaaqianaa faiqi auƙu Eerieeseerafa marinau. Mina anoofa maqasoofanoo Mooseefa qinau. Qini qikoona Anutufa qini dadaaƙinoo Faraona duru feefa ookinaana qini ititaqisainaree qinoo mina auƙu Eerieesaranee qinau.

<sup>5</sup> Yeetaroofo Mooseena anaafa faqa mina faiqi qara faqa nifiqeenoo aadana maqa maaqaki naaƙuqara aqana aqa Mooseefa uqana maqa usakasee maruqoo aniranau.

<sup>6</sup> Yeetaroofo Mooseenara ufa quƙaidanoo qinau. Oonuree maaqi qimasee qimamiaqa. Ani airaamaku faqa ani faiqi anaasee faqa anidammiaafoo qia.

<sup>7</sup> Mooseefa mi ufana iriseenoo narí airaamaku oonu aanai paqurimaseenoo mina oorinni aqoori saunu arafufanoo mina amooqa nanau. Miqi masooƙaƙa nári mariranara narí iree narí iree maseeqa doo Moosena uqana maqaki keeqaƙau.

<sup>8</sup> Minaki ooru maridanoo Mooseefa narí airaamaku oosana oosana aupurarana Yaaweeƙa Faraona faqa Isipa maqannaasa faqa nimiseenoo Isaraee maqannaasa maroonara qimaminau. Mifa Isaraee maqannaasa aanai anidaqa moomoo ummaara maree marufanoo Yaaweeƙa dadaaƙunara faqa qimaminau.

<sup>9</sup> Yeetaroofo mi aiqama ufana iriseenoo asasinau.

<sup>10</sup> Asasammaseenoo qinau. Yaaweeƙa Faraona asaukukinaana faqa Isipa maqannaasa nisaukukinaana marainara mina amooqia. Yaaweeƙa narí faiqi anaasee rumbarana kinaana idukunara mina amooqiaqa.

<sup>11</sup> Doo maqee qinee iridaqa, Yaaweeƙa aiqama unna anutusa urinnaaqararafa maridanoo. Isipa maqannaasa inni mandaikamma nimaqee marufanoo inni idaaqamma nisonannai mifa aiqama unna anutusa urinnaaqararafa maridanoo.

<sup>12</sup> Miqi qimaseenoo Yeetaroofo aandau marasee aruseenoo muduka ida aiqama qama taikara tatufirana Anutuna suqa aminau. Kafaa mifa akaqa tatufirana faqa Anutuna suqa aminau. Aaroonafa faqa Isaraee maqannaasa uriqarararusa faqa anireeqa Mooseena airaamaku faqa Anutuna amooqidaqa mi naaƙuqara qoomaƙana naqau.

*Misa akaqa siaasa mara quqaaƙau.*

(Lo 1:9-18)

<sup>13</sup> Iaqoo kananaana Mooseefa findifinoo narí maqannaasa qambaanaa oonureenoo misa kootauqa irinau. Kananaana oosana arasee kootinoo fifi ufanoo eenda kai masanau.

<sup>14</sup> Yeetaroofo Mooseena kadaapirirana qafamaseenoo maaqi qimaseenoo Mooseena qimaminau. Anee nanaree aneennaraa maa saikaua auƙaidanee. Faiki anaasee kananaana kootirara ani marida rakisi mariafanoo eendidanoo.

<sup>15</sup> Mooseefa iriseenoo qimaminoo qinau. Qinee miqianaqa faiqi anaasee qinee unnannai aniree Anutuna aidiranara irifaranoo.

<sup>16</sup> Qaara fasiqa qara ufa rainaida narí afu mau narí afu mau maseeqa qinee unnannai aniraafaqa qinee andeeƙai fasiqanara maafa andeeqee maqi qimaseeqa Anutuna sanda ufa naakapaidaqa.

<sup>17</sup> Yeetaroofo Mooseena qimaminoo qinau. Anee sia andeeqee mariananoo.

<sup>18</sup> Anee miqidana aneenna afeeka taikainaqa maa fasiqa anaasee faqa miqi kai ifaranoo. Aneennaraa sia amanaiki mariananoo.

<sup>19</sup> Anee maqee qini ufa iria. Qinee amiqira aakapara ufa ani amianaara. Anee irinanoo Anutufa ani faqa marida dadaaƙiannoo. Anee andeeqaseenana Anutuna afusaa aanaiqikina maridana faiqi anaasee ummaara Anutuna qimami mariananoo.

<sup>20</sup> Anee Anutuna sanda ufa qimannimisee andeeqara marirana oosana naamua qimasee misa ifandinna ainainara faqa qimannimia.

<sup>21</sup> Qima nimiseenana anee mina amuaaqa irirana faqaa fasiqauqa mara quqasainaqa Isaraee maqannaasa uriqarararusaikiqa mariaqa. Akaqausa wan tauseenna (1,000) fasiqa anaasee sa rakisifaqa akaqausa wan handareetasaa 100 rakisifaqa akaqausa fiftisaa 50 rakisifaqa akaqausa teennasaa 10 rakisiaqa. Misa Anutunara rufiee mariasa maridaqa misa andeeqara oosana faqausa maridaqa sia umee raqee munnimma maree marinausa mariaqa.

<sup>22</sup> Mi fasiqausa aiqama kari faiqí anaasee koota ufa irimarinausa mariaqa. Moo afeeka ainaina firaa ainaina kambiqafinaqa maree mini ani amifana anee mina andeeqaa. Kaqikaa ainaina nári kai andeeqaaqa. Misa miqimandee ani qummaara raina maraifanoo ani afaaqa ufadaani.

<sup>23</sup> Anutufa eedoo qinana qini ufa mau finana sia kudoosaapeennaranoo. Miqinaqa maa fasiqa anaaseesa aanoo qirafa taikafinaqa quqasee nimaqa fifaranoo.

<sup>24</sup> Mooseefa Yeetaroonna ufa iriseenoo mi mau kai finau.

<sup>25</sup> Mooseefa irirana faqaasa Isaraee maqannaasa kinaana mara quqasoofaqa uriqararaisaikiqau. 1,000 fasiqasaa rakisirausa faqa 100 fasiqasaa rakisirausa faqa 50 fasiqasaa rakisirausa faqa 10 fasiqasaa rakisirausa faqa mara quqasoofaqa rakisimariqau.

<sup>26</sup> Misa aiqama kari siaasara foora naaruara mariqau. Maridaqa kaqikaa kootauqa misa andeeqee mariqau. Firaa koota Moosee funnai maree fimariqau.

<sup>27</sup> Miqimmasee Mooseefa Yeetaroonna amandama soofanoo amaqa finau.

## 19

*Isaraee maqannaasa Sinai aaqana aikunni ani mariqau.*

<sup>1-2</sup> Isaraee maqannaasa Isipa maqa maaqakiqari Reefidimma maqa maaqaki ani mariufaqa miqooqari qaaramoo uqoona indaaruaqa faasaanasaa Reefidimma maqa maaqaindari Sinai aadana maqa maaqai oonu mariqau. Miqoo misa Sinai aaqana aikunni uqaana maqa usakasee mariqau.

<sup>3</sup> Mooseefa miqooqari Sinai aaqanasaa Anutuna faqa ufa qiraree qimasee ooru finau. Yaaweefa aaqana saaqari Mooseena aaramaseenoo qimaminau. Anee Yakoooonna aiku asauku Isaraee maqannaasa maaqi qimasee qimannimia.

<sup>4</sup> Innee qini oosana qafee mariafanoo. Qinee Isipa maqanna narunnana innee qafaafanoo. Qinee inni quqaumu aanaaqiara foora itateeqeeqa qiqaosasaa quqaseeqa ugeereeqee qeeqa marunannai quqaqauqaqaa mariafanoo.

<sup>5</sup> Innee qini ufa iriseeqa qini moodaanaki kira ufa mau fiqa qini faiqí anaasee marifaranoo. Aiqaama maa maqa maaqafa faqa faiqí anaasee faqa qinindi kai maridaqa innee qinee qeeqara utaaqama qaunaua mariafanoo.

<sup>6</sup> Innee qinindi uqanna maridaqa qini aanaiqi kirausa mariafanoo.

<sup>7</sup> Mooseefa irisee ooqureenoo Isaree maqanaa uriqarararusa suquseenoo aiqama Yaaweefa qimamu ufana qimanniminau.

<sup>8</sup> Faiqí anaasee Yaaweena ufa iriseeqa aiqamausa moodaa kari noo raqa maree qiqau. Yaaweefa aiqama ufa qinnana maasa irianauree qiqau. Miqi qufanoo Mooseefa misa ufa iriseenoo Yaaweena qimaminau.

<sup>9</sup> Yaaweefa misa ufa iriseenoo Mooseena qimaminoo qinau. Qinee amatooki arira oonnamukiqari anee iannannai qumuree ani faqa ufa qianaqa faiqí anaasee iriseeqa miqooqari ani ufara kuqaa fee qifaranoo. Miqi qimasoofoanoo Mooseefa faiqí anaasee quu ufana Yaaweena qimaminau.

<sup>10</sup> Qimamisoofoanoo Yaaweefa kafaa Mooseena qimaminoo qinau. Anee kafaa ooquree faiqí anaasee maaqi qimasee qimannimia. Misa aiqama maqee faqa duna faqa nári qamunna nammari uqusee nári nifaaga anukamasee qini qimooqirara deedaqiaqa.

<sup>11</sup> Deeda qimarifaqa duna kaqi mari moonna qinee Sinai aaqanasaa qumuraanaqa aiqama faiqí anaasee qini qiqaqeeffaranoo.

<sup>12</sup> Anee aaqana ameemaanaai fiqumma oosumma sainaga sia faiqí anaasee mina fiaaqaraaqa. Miqimmaseenana qimanniminaqa sia aaqanaai ooru fuaqa, sia uqanna mina aqa fuaqa. Minasaa aiku rainafa kuquannoo.

<sup>13</sup> Innee miqinna fasiqana sia uqanna nisaukunnai aruaqa, ooni samu fee feefannai fee kuqa aruaqa. Maa ufana faiqí faqa aandaara faqa qidaqa. Miqinna fasiqa fee aandaau fee kuquannoo. Ukeena fuaqaiifaqa kai faiqí anaasee aaqana aikunni ooru fuaqa.

<sup>14</sup> Mooseefa aaqanaindari qumureenoo faiqí anaasee Yaaweenara deedaqa masee amooqiaqee qimanniminau. Miqi qufaqa faiqí anaasee nariqa qamunna nammari uqiqau.

<sup>15</sup> Miqi marufanoo Mooseefa qimanninau. Duna kaqi mari moonna deedaqiaqa. Maqee oosana arasee sia anaasee sakasee faiqaaqa.

<sup>16</sup> Qaara afuru faisoofanoo qaaramookufanoo kananaana aaqanasaa ukeena firaana fuaqarana namu faqa qamatooki kira oonnamu namu faqa aakuasaa innaarunai namu faqa ufaqa faiqí anaasee uqaana maqaki mariusa aiqama naindiri roofaqa rufiaqa.

<sup>17</sup> Mooseefa faiqí anaasee aiqama uqaana maqakinaana nifiqeenoo Yaaweena paqurirara aaqana aikunni oonu kikiqino marinau.

<sup>18</sup> Yaaweefa idauruki qari Sinai aaganasaa qumu marunara ida muna fannoo aqana aiqama rafaagafinoo marinau. Mi munafa firaa ida munara foora ooru fufaqa faiqi anaasee qafooqanoo firaaqoo naindira ranau.

<sup>19</sup> Ukeena feendundaana qimarinau. Miqi qimarufanoo Mooseefa Yaaweena qimamufanoo Yaaweefa kafia innaarunai darara qiranakiqari nari qimaminau.

<sup>20</sup> Yaaweefa Sinai aaganasaa qumureenoo Mooseena aarooqanoo oorufinau.

<sup>21</sup> Ooru roofanoo Yaaweefa Mooseena qimaminoo qinau. Anee oofuree faiqi anaasee qimanniminaqa sia oosu aiaaqaree qini qiqafarara aniaqa. Misa miqifaqa moomoosa kuqifaranoo.

<sup>22</sup> Aanaiqikirausa faqa qini daaqa aniani qimasee anukamafiqa aniaqa. Sia miqifaqa misa aapurarana nimianauro.

<sup>23</sup> Mooseefa Yaaweena ufa iriseenoo qimaminoo qinau. Faiqi anaasee sia amana Sinai aaganasaa urifaranoo. Anee anaenna kai maasa daakapama seenana naaqqara aqana fiqumma amusa arasaanaqa sia urifaranoo.

<sup>24</sup> Yaaweefa iriseenoo Mooseena qimaminau. Ooqureenana Aarona faqa afiqee urua. Qini aanaiqikirausa faqa faiqi anaasee faqa sia qini qiqafararee qimasee amusa rapeemmasee uruaqa. Miqifaqa qinee misa ummaara nimianauro.

<sup>25</sup> Mooseefa iriseenoo ooqureenoo faiqi anaasee aiqama Yaaweefa quu ufana qimanniminau.

## 20

*Anutuna qisauku qara sandufa.*

*(Lo 5:1-21)*

<sup>1</sup> Anutufa maaqi qinoo.

<sup>2</sup> Qinee Yaaweese inni Anutusa maridaqa. Qinee Isipa maqasaa rumbaranaki maruna inni mareeqee mai quqaafanausa maridaqa.

<sup>3</sup> Innee sia moo anutuna amooqiaqa, qini kai qimooqiaqa.

<sup>4</sup> Innee sia innaarunai mari ainainausa faqa maqasaa mari ainainausa faqa nammariki mari ainainausa faqa nimana auqusee maasa anutufee qiaqa.

<sup>5</sup> Minara sia moo ainaina amana auqirana oorinni mapamufida innaaru qidaqa amooqiaqa. Qinee Yaaweese inni Anutusa marunnaara sia mi ainainausa nimooqiaqa. Qinee sia uqanna moo anutunara qiananoo qini qimaaqa maqaannoo. Faiqi qiniara fidiqaa inausa aapurarana nimiananoo misasaa faqa misa faiqi namu saa faqa misa ninaiqimara saa faqa nisaifaqausa saa faqa mariannoo.

<sup>6</sup> Moomoosa qiniara ridaqa qini sanda ufa mau finausa qinee misa faiqi namu kasooqee nukudara foora kambiqainausa qeeqa didirana uqannifiqaanauro.

<sup>7</sup> Innee sia qini duqunnai manda oosana auqaaqa. Qinee Yaaweese inni Anutusa qini duqa fifau faafau inausa aapurarana nimianauro.

<sup>8</sup> Innee Sabata faasaanara naaqqara faasaanee qimasee iriqa fuaqa.

<sup>9</sup> Dinni taikasee dinni ani moodaa marasee 6 faasaana inni ainainira faasaana mariani.

<sup>10</sup> Dinni ani qaara marasee 7 faasaanasaa qini Yaaweese adooara faasaana maridanoo. Mi faasaannasaa sia uqanna moodaafa faqa ainainiani. Innee faqa inni faiqi namu faqa inni ainainira faiqiuqa faqa inni aandaufa faqa aanaamuru inniki ani mariasa faqa sia uqanna ainainiaqa.

<sup>11</sup> Dinni taikasee dinni ani moodaa marasee 6 faasaana qinee Yaaweese innaaruna faqa maqa faqa ooruku nammari faqa minauqaki mari ainainausa faqa auqi qiafana. Dinni ani qaara marasee 7 faasaanasaa qinee qidooa qiafana. Minara qinee Yaaweese Sabata faasaana afaaqooqa qimasee naaqqara faasaanee qidaqa.

<sup>12</sup> Inneeqa ninausa nikausara qeerairidaqa misa ufa qaindusuaqa. Innee miqifaqa qinee nimianna maqanasaa kisaaqasaa marifaranoo.

<sup>13</sup> Innee sia faiqi anaasee nuqu qimasee naruaqa.

<sup>14</sup> Innee faiqi anaasee sia nari ummuari nari umuariaqa.

<sup>15</sup> Innee sia moona ainaina umuariaqa.

<sup>16</sup> Innee sia akaqausara unna qimasee misa kikiqa ususee ufa nimia.

<sup>17</sup> Sia moona maaqa umiasanara amuqusiani. Sia moona aanaaqara amukaani mina ainainira fasiqa anaaseera faqa misa aandaufu ainainara faqa mina aiqama ainainara faqa sia amukaani.

*Faiqi anaasee Anutunara rufiaqau.*

*(Lo 5:22-23)*

<sup>18</sup> Faiqí anaasee aiqama innaarunai qirana faqa aakuasaa faqa ukeena firaana faqa aaganasaa idamuna namu faqa qafoofanoo naindiri reenoo naaquqoofaqa nianasaa marida qafee mariqau.

<sup>19</sup> Miqí masee misa rufiasee Mooseena qimamiqa qiqau. Anutufa maasa qimaqiminaqa maasa irisee kuquanoora rufiidaqa anee kai maasa qimaqiminaqa iria.

<sup>20</sup> Mooseefa iriseenoo qimanniminau. Innee sia rufiaaqa Anutufa inni nimanamasee qafainaqa aiqama kari minara rufiasee mina ameemaanai maridaqa numoo ainaina sia auqaaqeera.

<sup>21</sup> Miqí qimasoofaqa faiqí anaasee nianai marufanoo Mooseefa kai Anutufa asukuna arira oonamuki maruna aaqa finau.

*Aidaraindaraa sandufa.*

<sup>22</sup> Yaaweefa Isaraee maqannaasa qimannimianifeera maaqi qimaseenoo Mooseena qimaminau. Qinee innaarunaindari inni faqa ufa qimarunaqa innee inneeqa nifunnai mina qafaafanoo.

<sup>23</sup> Innee sia siruaannai faqa koorannai faqa unna anutuna amana auqusee qini Yaaweesa faqbaqa masee amooqiaqa.

<sup>24</sup> Innee maqannai qainda auqusee minasaa inneeqa sipsipa faqa burimakau faqa miniseeqa ida qama taikara tatufirana suqasaifaqa faiqí anaasee qini faqa moodaanaki kiaqa. Aiqama maqusa innee qini qimooqiaqeera utaaqama qaunna maqusanaki oonureeqa miqifaqa qinee innee iannai qumuree amiqi amiqimma nimaqaanaura.

<sup>25</sup> Innee ooninnai qini aidara auqiraree qimasee sia faiqí rukamuqaa ooninannai auquaqa. Innee faiqí rukamuqaa ooninannai auquseeqa minasaa tatufirana suqa qimirafa sia amanaikiannoo.

<sup>26</sup> Innee sia aidara auqusee minni akarara irirasu auquaqa. Innee miqifaqa umee nifaqa kooroo ifaqa qafeefoora.

## 21

*Fifau ainainira faiqi kiqa mariasasaa rakisira oosana.*

*(Lo 15:12-18)*

<sup>1</sup> Anutufa Mooseena qimaminoo qinau. Anee maa sandufana Isaraee maqannaasa qimannimi.

<sup>2</sup> Innee Heeburu maqannaasa ainainira faiqi munnimmannai feefaurumasaiifanoo mifa inni faqa moodaannai taikasee dinni ani moodaa 6 marasee aukuaana ainaina masainaga dinni ani qaaraikinaqa 7 doo quqasaifanoo kaqi fuani. Idukinnana akiqgara sia feefauriani.

<sup>3</sup> Mifa adeedaana maridanoo ani ainainira faiqikinoo mariinafa amaaqa firarinoo sia anaasee maree fuannoo. Kafaa anaasee faqaafa inni ainainira faiqi kinoo mariinafa amaaqa finoo amana narí anaqa afiqee fuannoo.

<sup>4</sup> Mina feefauru mina rakisiifa anaasee aminanoo mifa faiqi maqaseenoo mariinanoo mina aukuaana taikainanoo anaasee faqa faiqi faqa miqoo quqaseenoo kaqisamu amaaqa fuani. Mi anaaseena faqa mina faiqi faqa rakisiranaindi kai marifaranoo.

<sup>5</sup> Ainainira fasiqa fannoo narí faiqi aanaaseera amuqusinanoo sia amana uqaanauree qimaseenoo

<sup>6</sup> qinee qeeqa rakisiranara didimarifaqa qimaseenoo sia qinee taikasee fuanaura kaqi rumbaranaki mariaanauree qimasainanoo mina rakisirafa mina qumareenoo amaana maaqaki munuseenoo quka qumareenoo kooqi mammaaqai aaqoo ruqiaani. Ruqia-sainanoo mi fasiqafa naaruara ainainira faiqi mariinanoo miqoo kuquannoo.

<sup>7</sup> Faiqí moo fannoo narí araamuna ainainira maanaaqaikianifeera amisainanoo sia ainainira fasiqauqa iduku nisaandee masee idukusaina fuannoo.

<sup>8</sup> Mi manaqana ainaina faqaafa feefauru meeqeenoo narí ainainiranaki quqasee qinaaqara maraanauree qimasee mariinoo akooqaiifanoo sia mareenoo. Miqinannai mi manaqana mandaikama amaqaaseenoo sia aanaamuru nimisee feefauru maraannoo. Narí akoofa kai kaifaa feefauriannoo.

<sup>9</sup> Faiqí moo fannoo narí faiqi amiraree qimaseenoo ainainira maanaqa feefauru maseenoo narí araamunara foora rakisiani.

<sup>10</sup> Faiqí moo fannoo anaasee faqaafa moo maraseenoo indaarugaana narana faqa gamunna faqa mina ainaina dadaaqirana faqa sia minnisaani, ooqai iundee kai iani.

<sup>11</sup> Mi fasiqafa indaarugaana sia mi ainainausa andeeeqa amaqaenoo mi fasiqafa mi anaaseena aiqainanoo finanoo sia feefauru maraannoo.

*Rakirana andeeqara sandufa.*

- <sup>12</sup> Faiqí moo fannoo moo fasiqa kuqarusainaga nari faqa kai kuqaruaga.
- <sup>13</sup> Faiqí moo fannoo sia moo fasiqa auqu qimasee arinafa mifa amana qinee inni utaaqama nimaqa qaunna maqusanaki keeqafinoo asumu mariannoo.
- <sup>14</sup> Yafee moo fannoo moonara aranaqainanoo auqu qimasee arinafa mifa faqa kuquani. Qini aidarai mifa oonu kukeeqafi asumu marianauree qinaqa innee mindaraana rarimasee kuqa aruaqa.
- <sup>15</sup> Yafee moo fannoo nari anoona akoona narinaqa innee mina kuqa aruaqa.
- <sup>16</sup> Faiqí moo fannoo moo fasiqa mareeqeenoo nari ainainira faiqi kee iannoo fee moo atinai nimisee feefauru fee marainnana kuqa aruaqa.
- <sup>17</sup> Yafee moo fannoo nari anoona akoona manda ufa qimannimaqainnana mina kuqamma aruaqa.
- <sup>18-19</sup> Faiqí misa tinoorammarree fidaqa faiqi moo fannoo moona ooni samu fee saamu samu fee arusainanoo sia kuqirai aurida mariinanoo findifinoo nimirinaqa innee mina akiiqara ari fasiqana sia aupurarana amiaqa. Arinna fasiqafa nari qaarisaa mariinanoo findifinoo madaanaai saunusaa ooquree ururee irana amanaikinanoo ari fasiqafa mina feefauru auriranaki mariinna faasaana amana kai feefauru amisee minasaa rakisi marinanoo findi fuani.
- <sup>20</sup> Faiqí moo fannoo nari feefaurummaqai ainainira fasiqa nee maanaqa nee saamu qumaree arusainanoo aqee kuqinaqa innee mina akiiqara nari faqa moo aupurarana amiaqa.
- <sup>21</sup> Mi ainainira fasiqa nee manaqa nee sia aqee kuqirai moodaa eenda fee qaara eenda fee kaqi mariinanoo kuqinaqa innee sia mina uriqararafa mina arinnana akiiqara amiaqa. Nari ainainira faiqirara aupurama amaqaifa nari ariranasaa ititeenoo.
- <sup>22</sup> Faiqí rakinnanaki moo fasiqa fannoo amuaqu faqaa anaasee arusainanoo kuqira faiqi maqaseenoo mina anoofa kaqi marinanoo mi anaaseena afaaqi fannoo nana feefauruaree irainanoo mi fasiqafa feefauriannoo. Siaasauqa eedoo qinna feefauruna kai amiannoo.
- <sup>23</sup> Mi anaaseefa moo aupurarana marainaga mina arinna fasiqana faqa mi aupurarana kai amiaqa. Kuqa arinaqa nari faqa kuqa aruaqa.
- <sup>24</sup> Nifu dimbasainaga nari afu faqa dimbaaqa. Nifai itairisainaga nari afai faqa itairiaqa. Nisauku raudasainaga nari asauku faqa raudaaqa. Niku itairisainaga nari aiku faqa itairiaqa.
- <sup>25</sup> Idati raquru niminaga nari faqa idati raquru amiaqa. Kaakadi narinaqa nari faqa kaakadi aruaqa. Saamu narinaqa nari faqa saamu aruaqa.
- <sup>26</sup> Faiqí moo fannoo nari ainainira maanaqa fee fasiqa fee arumareenoo afu qimbaseenoo mina akiiqara idukusee aiqainanoo amaaqa fuani.
- <sup>27</sup> Kafaa mifa nari ainainira fasiqa fee maanaqa fee arumaree afai itairiseenoo mina akiiqara idukusee aiqainanoo amaaqa fuani.
- Burimakau fannoo aaqama sainnana andeeqara ufa.*
- <sup>28</sup> Burimakau akoona fannoo faiqi fee anaasee fee kuqa narusainaga ooni samu mi burimakau akoona kuqa aruseeqa mina amaqi sia naaga. Mi burimakau akoona arusaifanoo mina akoona aupurarana amirafa sia mariannoo.
- <sup>29</sup> Mi burimakau akoonafa ooqai faiqi nari marifa maridanoo kaffaa moo fasiqa kuqa arinaqa mina akoofa sia ququsaki mara quqainanoo kaffaa narinaqa mina akiiqara ooni samu mi burimakauna kuqa aruseeqa mina akoona faqa kuqa aruaqa.
- <sup>30</sup> Kuqina akiiqara aqira feefauruara ooqai auqu ramaqaana amana kai aquseenoo nari kuqiranasaa ititaannoo.
- <sup>31</sup> Burimakau akoona moo fannoo maanaqa fee akoonaiqi fee narusainaga innee ooqai qimaqaa ufa mau kai fuaga.
- <sup>32</sup> Burimakau akoona moo fannoo ainainira kumaaraa fee maanaaqee narusainaga mi burimakauna akoofa ainainira faiqi uriqararana firaa feefauru amiannoo.
- <sup>33-34</sup> Faiqí moo fannoo madika indufuseenoo dafaafu qainanoo moo fannoo oonu mina rafaqaamma sainanoo burimakau fee doonki fee minaki aqufiqa kuqifanoo, madika afu rafaqaa ifa mi andauna akiiqara feefauru maseenoo nariara mi andauna maraanoo. Faiqí moo fannoo madika indufusee sia rafaqaq finanoo aandaqaa minaki aqufiqa kuqifanoo mi fasiqafa aandaqaa akoona feefauru amiseenoo nariara mi andauna maraanoo.
- <sup>35</sup> Moo fasiqa burimakau akoona fannoo moona burimakau akoona arusainaga burimakau akooganda kaqi mari burimakauna mareeqee moosaa quqasee feefauru marasee miqanda mi munnimmana rainaqaaraasa mandee kuqira burimakau qambaana akuqaraasa masee moo fannoo dinni maraina moo fannoo dinni maraaqa.

<sup>36</sup> Mi burimakau akoonafa ooqai nári maru burimakaua marifanoo mina akoofa sia ququsakí quqainanoo moona burimakau kuqa arusainanoo mina akiiqara moo kaqi mari burimakauna amiseenoo kuqirana nariara maraannoo.

## 22

### *Aaqarana andeeqara sandufa.*

<sup>1</sup> Faiqí moo fannoo burimakau fee sipsipa fee qummuara mamaree munu moona amisee feefauru maraina fee arusaina fee mi fasiqafa moodaa burimakau akiqara moodaannaí qisauku burimakau mina amiannoo. Moodaa sipsipa qummuarinnana akiqara qaara faqa qaara faqa sipsipa amiannoo.

<sup>2-4</sup> Mi fasiqafa narí qummuarirana akiqara feefauriannoo. Moo ainaina sia marinaqa mi fasiqana mareeqee moo maqanna nimisee mina feefauru mareeqee mifa qumuarina akiqara nimiaqa. Mi fasiqafa burimakau fee doonki fee sipsipa fee maraqainafa kaqi riri marinanoo qaraqanda mina akiqara nimiani. Eendakinai qummuarira fasiqa fannoo maaga ruiqasee keeqainafa mina qumarasee kuqa arusainafa sia mina akiqara ufa maraannoo. Faasaana miqi marinaqa kuqa arinna fasiqafa mina akiqara ufa maraannoo.

<sup>5</sup> Faiqí moo fannoo narí burimakau fee sipsipa fee andanda nee marinana sia amiqimmasee rakisinanoo moona afuqaki keeqafi narana nainanoo mina akiqara narana faqaana narí afuqakinaana amiqirana kai unaku maree munu amiannoo.

<sup>6</sup> Faiqí moo fannoo narí afuaki ida arasainanoo qamammareenoo moona afuqa qeenoo narana unaku quqaqainnana qamasainanoo mina akiqara idarai fasiqafa mina amiannoo.

<sup>7</sup> Faiqí moo fannoo munnimma moo fasiqasaa quqasaina marinanoo moo fasiqa fannoo qummuari marinaqa paquri masaifanoo mina akiqara qaara kari feefauru amiannoo.

<sup>8</sup> Qummuari fasiqana innee sia paquriqa munnimmasaa rakisi fasiqana aqimaree innaaru qimaria maqusanaki munusee irairanoo mifa narí amana aqimasee kuqaa sia qinee maree fee qiannoo.

<sup>9</sup> Aqama ainainara aanooqiranaki burimakaura faqa doonkiuqara faqa sipsipauqa faqa qamunnara faqa akaqa ainainara faqa qinindi kai fee qimasee aanoo qinna fasiqa qanda nifiqamaree innaaru qimariaqoo nifiqee aniaqa. Anutufa yanaree unnaqiifoo qinafa mifa mina akiqara qaara kai feefauru amiannoo.

<sup>10</sup> Faiqí moo fannoo moona doonki fee burimakau fee sipsipa fee moo aandau fee rakisi marinanoo moo aandau fannoo kuqinoo fee nana afaaqee mandaikinanoo fee namuqaa fee mara maraafanoo moo fasiqa fannoo sia minauqa qafeenoo.

<sup>11</sup> Mi andausa saa rakisirafa innaaru qimariaqoo oonureenoo amana aqimaseenoo qinee sia uqanna mi andausa ummuari fee qiani. Mi andausa sia ummuarifanoo aandau akoofa minara amanammifoo qimasee sia mina akiqara rakisiinafinnai feefauru maraannoo.

<sup>12</sup> Kuqaa mi fasiqafa ummuarinoo mifa aandau akoona mina akiqara feefauru amiannoo.

<sup>13</sup> Kaasau faini mi andauna aruneenoo fee mina rakisi mari fasiqafa mina asausifee amudaani fee mara mina akoona uqafiqaseenoo sia mina akiqara feefauriannoo.

<sup>14</sup> Faiqí moo fannoo moona aandau akaqa ainainirana dadaqianifeera marasainanoo kuquannoo fee amudaani itairinoo fee mi andauna akoofa uqanna sia marinanoo ufaasu marai fasiqafa feefauriannoo.

<sup>15</sup> Mi andauna akoofa uqanna mina afusaa miqifanoo sia mina akiqara feefauru aandau akoona amiannoo. Ufaasu feefauru masaafanoo ainainirana dadaqi mari andaufa kuquannoo fee amudaani itairiannoo fee feefauru maqaifa miqiannoo.

### *Akaqa sandufauqa.*

<sup>16</sup> Faiqí moo fannoo maanaaqa moo faiqí moo sia utaaqama amaqarana sararamma amaqaseenoo mi fasiqafa mararara mina akoona feefauru amiseenoo marasainanoo mina aanaaqaikinoo mariannoo.

<sup>17</sup> Mi manaqana akoofa mi fasiqanara akooqainanoo sia narí araamuna maraanee qinanoo mi fasiqafa fuka maanaaqa feefauri mariana amana kai mina akoona amiannoo.

<sup>18</sup> Aukainaina maraqanua aanaaseesa kuqa naruaqa.

<sup>19</sup> Faiqí moo fannoo aandau amuaqa akarainnana mina kuqa aruaqa.

<sup>20</sup> Qini Yaaaweesa kai aandau tatufirana suqa qimiaqa. Moo unnaqira anutuna tatufirana suqa aminnana kuqa aruaqa.



<sup>21</sup> Innee ooqai Isipa maqasaa aanaamuru marunaki mandainainaki marunnara irisee sia aanaamuru inniki marinausa mandaikamma nimaqaaqa.

<sup>22</sup> Innee adeedaana anaasee fee faiqi faiqi fee sia mandaikamma nimaqaaqa.

<sup>23</sup> Innee miqifaqa misa qini daaraifaqa qinee Yaaweesa irianaara.

<sup>24</sup> Qini qirana qainaqa rakiranaki inni kuqa naruanaura. Narusaanaqa inni ninaaq-maaka adeedaana marifaqa inni faiqi namu faiqi marifaranoo.

<sup>25</sup> Inniki qari qini Yaaweesa faiqi anaasee moo fannoo munnimmaru sarau imarinna ufaasu munnimma aminana sia ufaasu munnimma nimimariasa naanna raaqa. Misa nimiseeqa narindi akiqara maraseeqa aabaa faqa maridaqa. Innee inneeqaandi akiqara kai maraaqa.

<sup>26</sup> Innikiqari faiqi moo fannoo ani ainaina ufaasu maraseenoo kafia amianauree qimasee nari suara siuta amiseenoo minannoo nari amianinna ainainara kooroo idanoo kuqaa amianauree qidanoo. Miqi qinana anee suani afu sia keeqanoo marinana mina suara siuta kai kaqi nari amia.

<sup>27</sup> Mi suara siutafa tootooqirana amianifeera quqaqaina marifanoo nanee moo ainaina akusee faigaannoo. Anee sia aminanoo suara arinanoo qinee unnannai innaaru qinaqa qinee mina ufa irianaara. Qinee kaaqa faiqiara qimudao qimarunausa maridaqa miqianaara.

<sup>28</sup> Innee sia qini Anutusara manda ufa qiaqa. Inniqa rakisirausara faqa sia miqi qiaqa.

<sup>29</sup> Innee fuka narana afiana neeqa sakuma faqa uainna faqa oorifa fadameena faqa inneeqa ooqa faiqi faqa qini Anutusa naaree qimiaqa.

<sup>30</sup> Inneeqa burimakau sipsipa ooqasaa maqarana akoonuqa dinni taikaseenoo dinni oonu qaara marasee 7 faasaana nari anoona faqa mariseenoo dinni oonu qaaramoo 8 faasaanaikinaqa mina arusee tatufirana suqa qimiaqa.

<sup>31</sup> Innee qini faiqi anaasee marianara kaasau faini fannoo aru quqaqainna aandauna amaqi sia suqasee naqa. Faini mara nimifaqa naqa.

## 23

*Isaraee maqannaasa andeeqara oosana auqaaqa.*

<sup>1</sup> Innee aatata qaraa unna ufa iriseeqa sia moona munu qimamia. Innee sia aaqee mari fasiqana unna ufannai mina dadaaqaia.

<sup>2</sup> Kootaki oonureeqa moomoosa unna ufa qifana anee sia misa dadaaqaia. Misa ufaki kikiqa mafi andeeqara ufa mara furufarifana sia misa dadaaqaia.

<sup>3</sup> Kudi fasiqa moo fannoo kootaki kikiqa mafinana sia kudi marinnana roo qimasee dadaaqaia. Andeeqara nara kai qiaqa.

<sup>4</sup> Innee inneeqa namuqa burimakau fee doonki fee furufariqa nifaqa innee qafamaseeqa maree nari akoonu munu amiaqa.

<sup>5</sup> Mi fasiqana doonki fannoo ummaara mara maree fidanoo aanai saamurinoo mari-naqa innee oonu qafee sia fiaqaraaqa dadaaqa uqeera aisaqa.

<sup>6</sup> Kudi fasiqa fannoo kootaki marinaqa innee sia minara manda fasiqee qimasee andeeqara oosana sia mina amiaqa.

<sup>7</sup> Innee sia unna qimasee kootaki aqoonnana kikiqa usua. Sia andeeqarausa numoo siaisa fifau kuqiranaki mara quqannisaa. Qinee Anutusa mi manda ainainna auqainna kuqa aruanauranoo.

<sup>8</sup> Moo fannoo maqandanai kootaki minasaa roo qianne munnimma aminana sia uqanna maraa. Miqira munnima fannoo faiqi nifu dimbarusaikamma saifaqa sia andeeqarana qafaidaqa. Andeeqara fasiqa faqa mara furufaramma aisaidanoo.

<sup>9</sup> Innee ooqai Isipa maqasaa maridaqa aanaamuru auppurarana qafeeusa marifanoo minara innee sia quandafi aanaamuru inni faqa marinausa mandaikamma nimaqaaqa.

*Qisauku dinni taikasee dinni ani qaara marasee 7 aukuanara faqa sabatara faqa qira sandufa.*

<sup>10</sup> Inneeqa maqa ummaqu nee maria maqanaki minaki dinni qisauku taikasee dinni ani moodaa marasee 6 aukuaana ummagusaidaqa unakusaidaqa naqa.

<sup>11</sup> Miqifaq fiifi inafa qisauku dinni taikasee dinni ani qaara marasee 7 aukuanasaa saifanoo maqa fanoo idooaani. Mi maqanasaa moo ainaina kambiqaannana sia unaku naqa. Kudi fasiqauqa mina naqa. Misa naidaqa andaanuqa mafi sainnana kaasau aandaqa naqa. Inneeqa uainna afuqa faqa oorifa saqari faqa miqi kai iaqa.

<sup>12</sup> Innee moodaannai qisauku taikasee dinni ani moodaa marasee 6 faasaana ainaini-aqa. Ainainiqa fiifi inafa dinni taikasee dinni ani qaara marasee 7 faasaanasaa sia ainainiqa. Inni ainainira faiqiuqa faqa aanaamuru inni ainaini marinausa faqa inni aandaqa faqa aiqama idooaqa.

<sup>13</sup> Qinee Yaaweesa aiqama ufa qimarunnana iriaqa. Innee maa amaana ufausa amiqimasee irimaree fuuqa. Sia unna anutusara innaaru qiaqa. Sia uqanna misa nuqu raaqa.

*Qaaramoo uriqarara faasaana amaana qira faasaana.  
(Raf 34:18-26; Lo 16:1-17)*

<sup>14</sup> Aiqama aukuanaki qaarammoo kari oomaqa sakasee naidaqa qini Anutusara innaaruqiaqa.

<sup>15</sup> Innee Isipa maqa maaqaindari anu quqoonnana Abiba quqoonasaa qinee qiman-nimifannandee iqa innooqee mari pauraqana sia aqira bereeta naidaqa asasiaqa. Mi oomaqanaki 7 faasaanasaa sia innooqee mari pauraqana aqira bereeta naaqa. Innee qini qimooqiraree qimasee sia kaqi aniaqa. Qini tatufirana suqara ainaina faqa maree aniaqa.

<sup>16</sup> Fukakinaana unakusee oomaqa sakasee asasidaqa namaseeqa inneeqa narana ummaquqaana oosanarasee unaku naaqa. Saqari aqama akuqainaqqa innee mina tiqisee auqaanai maridaqa moo oomaqa sakasee naida asasiaqa.

<sup>17</sup> Aiqama aukuanaki mi qaaramoo oomaqiranakina aiqama Isaraee maqannaasaa fasiqauqa anireeqa qini Yaaweesa inneeqa Anutusa qimooqiaqa.

<sup>18</sup> Innee aandaunoo qini tatufirana suqa qimiraree qimasee sia innooqee mari pauraqana aqira bereeta namu faqa moodaanaki suqaaqa. Tatufira aanda fadameena fannoo sia faiqee kananaana kaqi mariani aaqee kai aiqama idaki aqusaifanoo qama taikafuani.

<sup>19</sup> Aiqama aukuanaki innee fukakinaasaa narana unaku maree qini Yaaweesa inneeqa Anutusa amaana maqaki maree aniaqa. Innee sipsipa aanaaqi fee mimmi aanaaqi fee arusee sia narí anoona naamma anoonnai suqaaqa.

*Anutufa Isaraee maqannaasaa naamuaqira ufa faqa qima afeekaikira ufa faqa niminau.*

<sup>20</sup> Anutufa kafaasaa qinau. Qinee qeeqa kai qeeqa Qangiroomaa aqigaananoo mifa qumuree inni indaaru nikidanoo innisaa rakisi marinaqa qinee inni deedaqamma nisaafanna maqa maaqanaki fifaranoo.

<sup>21</sup> Innee mi qangiroomaa qinnandee iaqa. Sia mina ufa rukiaaqa. Qinee mina aiqaunanoo qumu marinara sia mina ufa rukiaaqa. Mifa sia inni manda oosana akiqara nifauannoo.

<sup>22</sup> Innee mina ufa irisee andeeqasee qinee qunnufa mau kai fifaqa qinee inni namuqaauqa faqa rakuanaura.

<sup>23</sup> Qini qangiroomaa fannoo inni indaaru nikinoo nifiqee Amooraa maqa maaqa faqa Heeta maqa maaqa faqa Perisita maqa maaqa faqa Kannaana maqa maaqa faqa Hiftana maqa maaqa faqa Yeebusa maqa maaqaki mariasa faqa naru taikaseenoo inni miqoo quqannisaannoo.

<sup>24</sup> Innee miqoo oonu maridaqa sia misa unna qira anutusara niqoori saunu arafi innaaru qiaqa. Sia misa innaaru qimariandee iaqa. Innee misa unna anutusa turi taari maseeqa ooni rakiaaqee minara innaaru qimariana raudaandammeeqee aqusaqa.

<sup>25</sup> Innee qini Yaaweesa inneeqa Anutusa qimooqifaqa qinee narana faqa nammari faqa inni nimiseeqa inni auriranauqa mara aqunnisaanaura.

<sup>26</sup> Innee Yaaweena kai amooqifaqa sia aanaaseeuqa eedada faiqi maqee faranoo. Sia moo aafa anaasee mariannoo. Innee sia dauni kuqifara, kisaqaasaa marifaranoo.

<sup>27</sup> Qinee inni nifiqee fidaqa inni namuqaa qiniara rufiarana nimiseeqa inni faqa rakinausa furufarirana nimianaura. Nimiseeqa qianaqa inni namuqaauqa quqasee sandeefara.

<sup>28</sup> Qinee ukaqa nimimari doodaanina inni namuqaaki quqasaana ukaqa nimaqa naaqoo nifu furufarinaqa sandee faranoo. Innee fimarifaqa qinee Hifta maqannaasaa faqa Kannaana maqannaasaa faqa Heeta maqannaasaa faqa nifaqasaanaqa innee miqoo oonu marifaranoo.

<sup>29</sup> Qinee sia moodaa aukuanaki inni namuqaa rapatutumma aquanaura. Qinee miqimma saananoo naakunduka mafinaqa kaasau aandaqa moomoo mi maqa maaqanaki maridaqa inni narifoora.

<sup>30</sup> Qinee misara qianaqa misa moodaa kai qaara kai idaqa taikaffaqa innee moomoo kammafi amana mi maqa maaqana maree faranoo.

<sup>31</sup> Qinee inni oosu maaqimasee oosumma nisaanaura. Dinni taatuqee nammari mariannoo. Dinni Firistia ooruku nammari mariannoo, dinni aadana maqa maaqa mariannoo, dinni Eufarateesa nammari mariannoo. Qinee inni afeeka nimianaqa innee mi maqa maaqanaki fimarifaqa qinee inni namuqaa rapatutu iqa fimarianaqa innee misa maqa maaqa mareefaranoo.

<sup>32</sup> Innee sia uqanna misa ufara eedoo qimasee moodaanaki kira ufa qiaqa. Misa unna anutusara faqa sia uqanna moodaanaki kiaqa.

<sup>33</sup> Mi maqannaasa sia inni maqa maaqaki mariaqa. Innee miqifaqa misa inni mareeqee qini numookamma qimaqara tinai qugeefaranoo. Innee misa unna anutusa nimooqifanoo mifa inni ninuka ufanara foora fufinoo mariannoo.

## 24

*Yaaweefa Isaraee maqannaasa faqa moodaanaki kinau.*

<sup>1</sup> Anutufa aiqama ufauqa Mooseena qimamiseenoo kafa maaqi qinau. Moosee anee faqa Aarona faqa Nadabana faqa Abiquna faqa Isaraee maqanna rakisirausa 70 uriqararusa faqa nifiqa maree urureeqa nianasaa kummaramafinaqa qiniara innaaru qidaqa qimooqiaqa.

<sup>2</sup> Moosee anee kai adeedi ania. Sia akaqa rakisirausa qini daaqa aniaqa. Faiqi anaasee faqa sia uqanna aaqanai uruqa.

<sup>3</sup> Mooseefa ooqureenoo faiqi anaasee Yaaweena sandufa aiqama qimannimisoofaqa misa maaqi qimasee moodaa kari noo raqamaree qiqa. Yaaweefa qindee iqa maasa aiqama ainaina auqaanaura.

<sup>4</sup> Miqi qimasooфанoo Mooseefa Yaaweena sandaufa aiqama akara rinau. Akara rumaseenoo kananaana iaqoofanoo aaqana aikunni andau tutufira qainda auqinau. Auquseenoo ooni qisaukuqara taikasee qikunni ooqu qaara marasee 12 ooni maraseenoo qainda fiqumma Isaraeena faiqi namu nimana kai rakiqanau.

<sup>5</sup> Rakiqaseenoo kumaaraauqa qimannimufaqa burimakau arusee munu Anutuna tatufirana suqaqau. Mi tatufira andauna Isaraee maqannaasa faqa Anutuna faqa moodaanaki suqira tatufirane qiaqa.

<sup>6</sup> Misa arusoofanoo Mooseefa burimakau fidika akaqana difaanikiaqa sakaseenoo kaqi maruna qumareenoo aidarai rurufinau.

<sup>7</sup> Rurufa maseenoo Akiiseenoo Mooseefa Anutufa moodaanaki kira ufa qimaqoo bukana akara rumaqoona maree findifinoo aiqama minakinaa ufa asaana rumasee firaqoo faiqi anaasee qimanniminau. Misa iriseeqa qiqa. Maasa Yaaweena mi sandaufana aiqama irisee afaqaanaura.

<sup>8</sup> Mooseefa misa ufa iriseenoo difaanikinaa fidika kaqi maruna indaku faiqi anaasee kiaqa aqidanoo qinau. Anutufa maa sanda ufausa nimuqooqari maa fidikafa Anutufa inni faqa moodaanaki kuna afeekaikamma nimaqaidanoo.

<sup>9</sup> Miqi qimaseenoo Mooseefa Aarona faqa Nadabana faqa Abiqufana faqa Isaraee maqanaa uriqararusa 70 faqa nifiqeenoo aaqanasaa oorufinau.

<sup>10</sup> Oorureeqa miqoo misa Isaraee maqanna Anutuna qafaqau. Mina aiku ameemaanai innaaruna kudimandara foora ira ooniuaq mina auqu safree fee qimaru oonisa ausirirafauqa marinau.

<sup>11</sup> Misa Anutuna qafoofanoo sia misa narinau. Misa miqoo moodaanaki suqufu faqa narana nammari naqau.

*Mooseefa Sinai aaqana saa ooru finau.*

<sup>12</sup> Misa namasooфанoo Anutufa Mooseena qimaminau. Anee aaqanai qinee marunnannai urua. Ururinaqa qinee qeeqa sandufa anee faiqi anaasee naakapaanneera qaara oonisaa akara ruma amianaaura.

<sup>13</sup> Mooseefa mina iriseenoo nari dadaaqimaruna Yoosuaana faqa deedaqamma seeqa Mooseefa aaqanai Yaaweefa marunnai ooru finau.

<sup>14</sup> Ooru fidanoo Mooseefa Isaraee maqanna uriqararusa maaqi qimasee qimanniminau. Innee maaqoo uqaana maqusaki maridaqa maaqanda qifeesiaqa. Aaroonafa faqa Hurafa faqa inni faqa maaqoo marifaranoo. Akaqausaki ufa rainarafa kambiqainaqa miqanda andeeqa nimaqeeffaranoo.

<sup>15</sup> Miqi qimasee qimannimiseenoo Mooseefa aaqanai oorufufanoo qasuru fannoo aaqana rafaqa finau.

<sup>16</sup> Yaaweefa kaaqa qarafa aaqana aaqa qumuroonara Sinai aaqana saa qasuru quminau. Isaraee maqannaasa mi kaaqa qaranna qafoofanoo aaqanasaa firaa ida qeera foora qimarinau. Dinni ani moodaa marasee 6 faasaana qasuru fannoo aaqana rafaqa finoo marinau. Dinni ani qaara qanda marasee 7 faasaana Yaaweefa qasurukiqari Mooseenara mai uruannee qinau.

<sup>17</sup> Faiqi anaasee afaasasaa marusa aaqana qafeeqa naaquqara kudifaannammiifoo qiqa. Anutuna kaaqa qarafa aaqana saa firaqoo idauruara foora imarinau.

<sup>18</sup> Mooseefa aaqanai ooru fidanoo qasuruki keeqakufanoo aaqanasaa ooru qaara fasiqa niku nisauku taikasee 40 eendaki faqa faasaana faqa marinau.

## 25

*Faiqí anaasee Anutuna naaquqara uíqaana maqa usakara ainainauqa amiaqa.*  
(Raf 35:4-9)

<sup>1</sup> Mi aaqannanasaa Yaaweefa Mooseena qimaminoo qínau.

<sup>2</sup> Anee Isaraee maqannaasa qimanniminaqa misa oosana oosana ainaina qini qimiani qinnana qimiaqa. Faiqí anaasee qini qimirara nidinaqa minisainna ainaina anee mara quqaa.

<sup>3-5</sup> Maa ainainausa maree inifaranoo. Koorra faqa siruaa faqa booroosa faqa amiqira qamunna faqa dirindaasi akira sipsipa asausi faqa pannoonna akira sipsipa asausi faqa faeena akira sipsipa asausi faqa mimmi asausinnai auqira qamunna faqa sipsipa akoona apatasaa faeena akirana faqa ooruku nammariki mari firaa noodaana apata faqa akasia saqari amiqira saqari faqa maree minisaifana mara quqaa.

<sup>6</sup> Qooma qumbi maria fadameenna faqa aanaiqikirausa aki maria oosana oosana fadameenna faqa moo pauraqa ida arasaafanoo muninoo amiqira afundi mari pauraqana faqa mini amiaqa.

<sup>7</sup> Firaa feefauru aqi maria oonisa faqa aka amiqira ooniúqa faqa aanaiqikirausa eefooda qamunnasaa faqa nimuqusasaa rumbee marianasaa faqa atooqaaqa.

<sup>8</sup> Isaraee maqannaasa qimanniminaqa qini naaquqara uíqaana maqa usakasifaqa qinee misa qambaana mariana.

<sup>9</sup> Innee uíqaana maqa faqa minakinaa aiqama ainaina faqa qinee naakapaunandee miqi kai masee auquaqa.

*Innee moodaanaki kira bukisa auquaqa.*  
(Raf 37:1-9)

<sup>10</sup> Innee akasia saqari marasee minannai moodaanaki kira bookisa auquaqa. Mina kisaqa 110 centimetres amana auquaqa. Mina qusandanai faqa mina kuradarafa faqa amana amana kai 66 centimetres amana auquaqa.

<sup>11</sup> Innee amiqira koorra marasee turimmasai ausi rumafinaqa minannai kai bookisa adisaa faqa aundurái faqa ititaqa. Mi bookisana afaimau koorannai amatookika masee rafaqaquqa.

<sup>12</sup> Innee koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaaqa. Dinni aikusaa qaara qanda dinni aikusaa qaara qanda quqaaqa.

<sup>13</sup> Akasia saqari qaindusi fandinna qanda koorra turimandee ausiruma qumaree minannai kukuqiaqa.

<sup>14</sup> Kukuqa maseeqa dinni dinni amaaqa auquqainnanaki ausuaqa.

<sup>15</sup> Miqimmaseeqa sia radukuaqa, saifanoo miqinoo mariani.

<sup>16</sup> Miqimma saifaqa kasooaqee qaara oonisaa qeeqa sanda ufa akara ruma nimianaqa minaki quqaaqa.

<sup>17</sup> Bukisa afu faqa Koorannai kai auquaqa. Mina kisaqa 110 centimetres amana mariani. Mina gusa 66 centimetres amana mariani.

<sup>18</sup> Innee kooraa turimmaseeqa bukisa afu auquseeqa minannai kai dinni dinni qangiroo qaara qanda nimana auquaqa.

<sup>19</sup> Afu dinni atinni moo qangiroo amana auqusee dinni moo qangiroo amana auquaqa. Afu faqa mi qangiroo qanda nimana faqa moodaa koorannai kai auquaqa.

<sup>20</sup> Mi qangiroo qanda bukisa afusaa quqasaifaqa noori nari qafee nari qafee iaqa. Miqanda niqoosa uqeerasaifanoo bookisa afusaa ititanoo mariani.

<sup>21</sup> Qaara oonisaa sanda ufa marina mi bukisanaki quqasee afu rafaqaquqa.

<sup>22</sup> Qinee inni faqa miqoo moodaanakika mafiqá bukisa afusaa qaara qangiroo qambaana maridaqa qeeqa sanda ufa inni Isaraee maqannaasa nimiana.

*Innee aiku faqaa teeboora auqusee Yaaweena aminna feemuna miqoo quqaaqa.*  
(Raf 37:10-16)

<sup>23</sup> Innee akasia saqarinnoo teeboora auquaqa. Mina kisaqa 88 centimetres mariani. Mina qusandanai 44 centimetres mina kuradarafa 66 centimetres mariani.

<sup>24</sup> Innee amiqira koorra marasee turimmasaifanoo ausiruma finaqa minannai teeboora rafaqa fusee kafa moonnai teeboora atiqara fiqú fiqumma rafaqa fuaqa.

<sup>25</sup> Innee teeboora atiqara fiqú fiqumma 8 centimetres amana ititasee mina afaimau koorannai rafaqa fuaqa.

<sup>26</sup> Innee koorannai qaindusifandinnana amaaqa 4 auqusee teeboora aiqama aiku namusaa quqaaqa.

<sup>27</sup> Teeboora afai ameemaandanai qaindusirana amaaqa auquaqa.

<sup>28</sup> Qaindusifandinna saqari qanda akasia saqari atekasee koorannai mina kuku iaqa.

<sup>29</sup> Amiḡira koorannai kai teeboorasaa quḡeefandinna pirita kaafausa faqa kisaqa kaafauqa faqa uainna adiara pirita uḡnaurirana faqa auquqa.

<sup>30</sup> Qini ḡimifandinna bereetana mi teeboorasaa quḡaḡaifanoo aiḡama kari qini moodaanaki kira bukisa aqa mariani.

*Innee qooma qumbifandinna aikana auquqa.*

*(Raf 37:17-24)*

<sup>31</sup> Innee qooma qumbifandinna aikana amiḡira koorannai auqa. Innee kooru turiseeqa minannai kai qooma aika oosana faqa adaka faqa asaana faqa auquqa. Mi asaanausa saa mi koorannai kai taatuḡee aḡama afuḡeenaari marindee maseeqa auḡusaifanoo kaafara foora afisu amaḡanoo mariani. <sup>32</sup> Mi qooma aikausa qisauku dinni taikasee dinni ani moodaa marasee 6 mariani. Dinni qaaramoo dinni qaaramoo mariani.

<sup>33</sup> Aiḡama mi asaana namuna atimau koorannai taatuḡee aḡama afuḡeenaari marindee masee afaqa auquqa. Mi afuḡeenaarirafa teeḡnoorina aḡamara foora maruḡa mi asaana namuna saa auquqa.

<sup>34</sup> Mina adakasaa qaara faqa qaara faqa 4 saa taatuḡee aḡama teeḡnoorina aḡamara foora auquqa.

<sup>35</sup> Moodaa aḡama indaruḡaa asaana qara ameemaanai mariani. Kafa mina murufi asaana qara ameemaanai moo aḡama mariani. Kafa mina murufi asaana qara ameemaanai moo mariani.

<sup>36</sup> Amiḡira kooru turiseeqa minannai kai oosana faqa asaana faqa afuḡeenaarirana faqa auquqa.

<sup>37</sup> Miḡimmaseenana dinni taikasee dinni ani qaara qanda marasee 7 qooma auḡusee mi asaanausa ati mau quḡaa. Quḡaseenana mara quandasainanoo mi qoomausa kaaḡa qarafa sia kaḡinni fuani. Maḡa aundurai kai kaaḡa qaani.

<sup>38</sup> Mina ufaqa faqa futufita faqa amiḡira koorannai kai auquqa.

<sup>39</sup> Qooma quḡara aika amiḡira koorannai 35 kilogram ummaara amana kai marasee auquqa.

<sup>40</sup> Moosee ḡinee aaḡanasaa ani ḡimamunandee aiḡama ainaina miḡikaimmasee andeeḡasee auqa.

## 26

*Innee Anutuna uiqaana maḡa usakaqa.*

*(Raf 36:8-38)*

<sup>1</sup> Innee qini naaḡqara uiqaana maḡasaa akifandinna ḡamunna kisaqa maḡimasee auquqa. Sipsipa asaasi dirindaasi akirana faqa pannoonu akirana faqa faena akirana faqa sufusee amiḡira ḡamunna auḡusee aḡoosa faḡaa aanda amana auḡusee minasaa atooḡasee akuniyaḡa. Miḡimmasee minauḡannai innee qisaukuḡara taikasee 10 firaa ḡamunna auḡusee moodaanaki akuniyaḡa.

<sup>2</sup> Mi aiḡama ḡamunnausa amana amana kai 12 metre kisaqa mina qusa 2 metre mariani.

<sup>3</sup> Mi ḡamunnausa moodaannai qisauku 5 marasee moodaanaki ootupamasee akuniyaḡa. Dinni qisauku taikasee 5 faqa miḡi kai iaqa.

<sup>4</sup> Miḡimmaseeqa mi ḡamunna qanda atiqara dirindaasi arira ḡamunnannai anaanu auḡusee moodaanaki ootupaqa.

<sup>5</sup> Firaa ḡamunna atimau anaanu 50 auquqa. Moo ḡamunna faqa miḡi kai iqa moo ḡamunna saaqaraa aanaanu amummaḡa kai auquqa.

<sup>6</sup> Kooru ḡumaree turimandee qusa tafara foora saaeemma ḡumaree dinni dinni anaanuki upeekasaifanoo mi ḡamunna qanda moodaara maḡi inoo mariani.

<sup>7</sup> Uiqaana maḡa saa akira ḡamunna firaa mimmi asaunnai 11 auquqa.

<sup>8</sup> Innee aiḡama moodaa karirana kai auquqa. Mina kisaqa 13 metres amana mariani. Mina qusa fannoo 2 metres amana mariani.

<sup>9</sup> Mi ḡamunnausa moodaannai qisauku taikasee 5 ḡamunna akunusainanoo moodaa ḡamunnaika mafuani. Kafa moodaannai qisauku taikasee dinni ani moodaa marasee 6 narisaa narisaa akuniisaifanoo firaaḡaikiani. Miḡimma finaḡa uiqaana maḡa kooḡindaraana murufi tukaanda quḡaqa.

<sup>10</sup> Qamunna atimau anaanu 50 akuniyaḡa. Moo atimau faqa mina amummaḡa kai akuniyaḡa.

<sup>11</sup> Booroosannai tafara foora ati saaeemmasee 50 auḡusee minannoo dinni dinni anaanuki aususee ootupama saifanoo moodaa ḡamunnara foora mariani.

<sup>12</sup> Mi firaa qamunnana uigaana maaqa akuumaqa saifanoo mina ati fiqaramasee akunirafa uruanatinai naambeeqai qumiqaranoo mariani.

<sup>13</sup> Aabaa akunira qamunna fannoo uigaana maqa ati fiqaree aiqaree inoo mariani. Dinni dinni amana amana kai 50 centimetre kai mariani.

<sup>14</sup> Mina taikasee mina amuaaqa qaara qanda faqa auquaqa. Moo sipsipa akoona apata faena akiranannai auquaqa. Auquseeqa moo ooruku nammarikinaa aandau kuara fooqaa irana apatannai auquseeqa minannoo meeraqoo amuaaqa akuuqa.

<sup>15</sup> Innee akasia saqarinnai kai naaquqara uigaana maqa atuna auqusee kuradaaqa.

<sup>16</sup> Maaqi mandee maaqa atuna auquaqa. Saqari dinni dinni kuradarafa 4 metres mariani. Mina ausana qusa 66 centimetres amana kai auni ruuqa.

<sup>17</sup> Aiqaama atuna maqaki rakiqaranara irisee ati ooqiqa masee ateekaaqa. Aiqaama maaqa atuna miqi kai masee ateekaaqa.

<sup>18</sup> Innee suani afu ataaqeeni south kisaqandanai maaqa atuna 20 narisaa narisaa apamandee kuradaaqa.

<sup>19</sup> Maaqa atuna oosana sia maqaki kaqi rakiaaqa. Siruaannai amaaqa auqusee minaki maaqa atuna kuradaaqa. Siruaannai 40 maaqa atuna oosana amaaqa auqusee minaki kuradaaqa.

<sup>20</sup> Uigaana maqa suani dinni ataaqeeni north kisaqandanai maaqa atuna 20 narisaa narisaa apamandee kuradaaqa.

<sup>21</sup> Maaqa atuna sia maqaki kaqi rakiaaqa. Siruaannai 40 amaaqa auqusee minaki maaqa atuna kuradaaqa.

<sup>22</sup> Suani keeqee mari qaannai (west) uigaana maaqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auquaqa.

<sup>23</sup> Maaqa dinni dinni munu raqaranaki kafaa qaaraqanda auqusee kuradaaqa.

<sup>24</sup> Raudaranaki maaqa atuna oosanaki apammasee kuradama saifanoo amiqimasee narisaa narisaa apinoo mariani. Maaqa atuna rakiqarana oosanaki rumba atukarasee miqi kai mamaree mirinni murufisaaga. Dinni dinni munu raqaranaki miqi kaimmiaqa.

<sup>25</sup> Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusaifanoo 16 mariani.

<sup>26-27</sup> Innee qauniri fandinnana akasia saqari 15 maraaqa. Uigaana maqa ataaqee dinni dinni faqa uruanai faqa faifa faifannoo auni rumasaifanoo maaqa atukarama qumaraani.

<sup>28</sup> Mi maaqa atunna qambaana aunirira saqari fannoo maaqa amana kai dinni dinni ati mariani.

<sup>29</sup> Maaqa atuna aiqama koorannai kai rafaqa fuaqa. Maaqa atuna mau aiqama koorannai kai aananu mamaree fuaqa. Aunirifandinna saqarisa faqa koorannoo rafaqaafusee mi anaanusaki ausuaqa.

<sup>30</sup> Doo Moosee qini uigaana maaqa aaganasaa qinee qimamiefanandee masee usakaa.

<sup>31</sup> Innee sipsipa asaasi dirindaasi akirana faqa pannoonaa akirana faqa faena akirana faqa sufusee minannai amiqira qamunna auquaqa. Miqimmasee mi qamunnana saa gangiroo qaqaosa faqaana amana auquaqa.

<sup>32</sup> Akasia saqari qaara faqa qaara faqa 4 marasee koorannai aiqama rafaqa fusee mina atisaa mirinni qamunna dirifandinna amaaqa auquaqa. Miqimmasee mina kuradee fandinnana amaaqa 4 oosanaki siruaannai auqusee minaki kuradaaqa. Kaaqa naaquqara oosirana ititaanifeera kuradaaqa.

<sup>33</sup> Miqimmaseeqa mi qamunnana amaaqa auquqaanasaa dirisaifanoo amaaqa auqirana ameemaanai qamunna ati ooreeqanoo mariani. Miqimmasaifanoo mi qamunnana ititarafa ataufaka ameemaanai ooreeqanoo mariani. Mi qamunnafa ititaranaki moodaanaki kira bukisaki qaara oonisaa sandufa marina quqaqa. Mi qamunnafa naaquqara oosirana faqa kaaqa naaquqara oosirana faqa rainaannoo.

<sup>34</sup> Moodaanaki kira bukisa kaaqa naaquqara oosiranaki quqasee koorannai mina afu auqusee rafaqa fuaqa, nifauara afu minasaa rafaqa fuaqa. Dirira qamunna fannoo raina nimaqaidanoo kooqi kinaa oosiranara naaquqara maqa fee qimasee kukeeqara oosiranara uriqaramasee naaquqara maqa fee qiaqa.

<sup>35</sup> Teeboora mareeqee naaquqara oosirana maaqoo oonumafi kooqiki suani afu dinni ataaqee qaannai (north) mafi quqaqa. Qooma saqari suani afu dinni ataaqee qaannai (south) mafi quqaqa.

<sup>36</sup> Uigaana maqa kooqiki ititee fandinna qamunnana sipsipa asaasi dirindaasi akirana faqa pannoonaa akirana faqa faena akiranannai faqa marasee auquaqa. Oosana oosana sandannai mooka maakira ainainauqa mi qamunnanasaa auquaqa.

<sup>37</sup> Mi qamunnana dirifandinna moodaannai qisauku 5 akasia saqari marasee koorannai mina atimau rafaqaafusee qamunna dirifandinna anaanu auqusee

quqaaga. Miqimmasee booroosannai moodaannai qisauku 5 atuna oosana amaaqa auqusee minaki kuradaaqa.

## 27

*Innee aandau tatufi fandinna qaindana auquaqa.*

*(Raf 38:1-7)*

<sup>1</sup> Innee akasia saqari marasee minannoo tatufirana suqara qainda auquaqa. Mina kisaagandanai faqa qusandanai faqa amana amana kai mariani 2.2 metres. Maqasaaqari urirafa qaara faqa qaara faqa aiku 4 amana 1.3 metres mariani.

<sup>2</sup> Mina qaara faqa qaara faqa atisaa aanaira foora auqinoo mariani. Tatufira qainda moodaa saqari fannoo kai atimau faqa qambaanaai faqa aanai faqa moodaa saqarinnai kai auusaifanoo mariani. Mi aiqama ainainausa booroosannai rafaafa fuuqa.

<sup>3</sup> Mi tatufirana suqeemaria qaindanasaa suqee maria ainainausa booroosannai kai auquaqa. Fadameena dandaki aqufinnana afaqee maria futufitusa faqa savoorauqa faqa uqnaurira piritauqa faqa tafa fooqaa irana ati saae irana faqa ida auni afaqee maria futufitusa faqa aiqama booroosannai kai auquaqa.

<sup>4</sup> Innee fukaa asaana booroosannai auqusee booroosannai kai aanaanu faqa auqusee qaara faqa qaara faqa atinni quqaaga.

<sup>5</sup> Mi fukaa asaanafa tatufira bukisa aunduray kasaqaai ooqeeqanoo qambaanaai mariani.

<sup>6</sup> Akasia saqari tatufira qainda qaindusi fandinnana qaaraqanda maraseeqa booroosannai miqanda rafaafa fuuqa.

<sup>7</sup> Mi qaindana maree fuuqee qifaqa kai mi saqari qanda dinni dinni anaanuki aususaifaqa maree fuuqa.

<sup>8</sup> Tatufira qainda indooira saqarinnai kai aundura faqaana auquaqa. Qinee aqaanasaa ani uqafiqaa fanandee masee auquaqa.

*Innee Yaaweena uiqaana maqa fiq fiqo dapu rakiaaqa.*

*(Raf 38:9-20)*

<sup>9</sup> Innee amiqira sanda sufusee auquqaa qamunnaannoo uiqaana maqasaa ququsara foora auqu ititaaqa. Suani afu dinni ataaqeeni South mina kisaafa 44 metres mariani.

<sup>10</sup> Mi qamunnana dirifandinnana booroosannai dapu 20 auqusee mina kuradee fandinnana amaaqa miqi kai masee 20 auqusee siruaannai tafara foora mina amana kai auqusee auniri fandinna saqarina faqa minannai kai auquaqa.

<sup>11</sup> Suani afu dinni ataaqeeni iandee kai iqa dinni ataaqeeni faqa miqi kai iqa.

<sup>12</sup> Suani keeqee mari qaannai dapu qusandanai 22 metres mariani. Mina dapu saqari 10 faqa mina amaaqa auqirafa faqa 10 kai mariani.

<sup>13</sup> Kafaa suani oosana qaannai kooqi maru tinai faqa uruanai inoo marina amana kai 22 metres mariani.

<sup>14-15</sup> Suani oosana qaannai East kooqi mariani. Mi kooqina dinni dinni diri fandinna qamunnafa 6.6 metres mariani. Mi kooqina dinni dinni qaarammoo dapu faqa mina amaaqa faqa dinni dinni qaarammoo kai mariani.

<sup>16</sup> Kooqiki dirira qamunna 9 metres kisaafa amiqira sipasipa asaasi dirindaasianda faqa pannoonda faqa faenanda faqa marasee mi qamunnaasaa oosana oosana amiqira akara ruuqa. Mi qamunnana quqee fandinna saqarina qaara faqa qaara faqa 4 mariani. Mina rakiqee fandinnana qaara faqa qaara faqa ki mina amaaqa auquaqa.

<sup>17</sup> Aiqaama dapu fiq fiqo qirafa siruaannai rafaafa fuuqa saqarinaasaa ootupanoo mariani. Minasaa qamunna diri fandinnana tafara maqi iranauqa siruaannai auquaqa. Mi saqarisa rakiqee fandinnana amaaqauqa booroosannai auquaqa.

<sup>18</sup> Ququsa afuqai kisaafa kamu 44 metres mariani. Mina qusa kamu 22 metres mariani. Ququsasaa dirira qamunna mina oorufirafa 2.2 metres maqasaaqari oorufuannoo. Mi qamunnana amiqira qamunna kaqikaa sandannai sufirafa afeeka mariani. Mina dapu oosana booroosannai amaaqa auqirafa maqaki mariani.

<sup>19</sup> Uiqaana maqaki oosana oosana ainainira ainainauqa aiqama booroosannai auqirafaqa kai mariani. Uiqaana maqa ati mau apupuka arifandinna aikausa booroosannai kai auquaqa. Uiqaana maqa dapu rakiqarana qumaraanifee qimasee apupuka aqoosai faqa afuqai faqa arifandinafa aiqama booroosannai auqira apupuka kai mariani.

*Qoomauqasaa rakisira saika.*

*(Wok Pris 24:1-4)*

<sup>20</sup> Moosee anee Isaraee maqannaasa qimanniminaqa oorifa saqari qaqaamakinnaa fadameena amiqirana kai minisaifana aiqama eendirana minannoo qooma qumbia.

<sup>21</sup> Aaroonafa nari faiqi namu faqa qini Anutusa naaquqara uigaana maqaki moodaanaki kira bukisa ititee maria qamunna naaquqara oosiranaki qoomauqa quqaaqa. Miqoo qini qifusaa eendi marinaqa qumbisaifanoo qamammareenoo iaqarana kai raquru amiani. Maa naamuqira ufana Isaraee maqannaasa faqa misasaa ani arua kinausa faqa naaru naaru afaqaqa.

## 28

*Innee aanaiqi kirausa qamunna auquqa.*  
(Raf 39:1-7)

<sup>1</sup> Yaaweefa kaifaa Mooseena qimaminoo qinuu. Anee aneenna afaasaa faqa mina faiqi namu Nadabana faqa Abiuna faqa Eeriasana faqa naara masee Itammarana faqa Isaraee maqannaasa kinaana raina naaduma quqasainaa qini aanaiqi kira saika maraaqa.

<sup>2</sup> Aneenna afaasaa Aaroon misakina uriqarara aanaiqikira qamunna auqu amia. Miqimmasainanoo mi qamunnafa amiqirana faqa uriqararausee qirana faqa amiani.

<sup>3</sup> Moosee anee Aaroon qamunna akunifandinna fasiqausa irirana fiqararusa qinee irirana nimiqaunasa misa kai suqusee qimanniminaqa mina qamunna akuniaga. Akunusaifanoo mina afisusee miqooqari qini aanaiqikira saika maraani.

<sup>4</sup> Anee qimanniminaqa nimuqasasaa rufi maria ainainna faqa eefooda qamunna faqa kisaaga qamunna aikusaa faqa ititeemari qamunnana faqa akara faqaa siuta faqa akiqa rafaaga fimari qamunna faqa aranandauganna rumbarana faqa minamuna auquqa. Misa miqimmaseega uriqarara aanaiqikira qamunna ani afaasaa faqa mina faiqi namu faqa auqu nimisaifaqa misa qini aanaiqi kira saika maraaqa.

<sup>5</sup> Akunirana akoofasauqaindi sipsipa asausi dirindaasi akirana faqa pannoon akirana faqa faena akirana faqa koor tiritanda faqa amiqira tiritanda faqa mi ainainausannai aanaiqikirausa qamunna auquqa.

<sup>6</sup> Misa sipsipa asausi dirindaasi akirana faqa pannoon akirana faqa faena akirana faqa koor tiritanda faqa amiqira tiritanda faqa aiqama mi ainainausannai eefooda qamunna auquseega minasaa oosana oosana akara ruaqa.

<sup>7</sup> Eefooda qamunna anaanu qaaraqanda aururusaa aakandianinnana auqusee eefooda qamunnasaa dinni dinni rumbaaga.

<sup>8</sup> Mina ooiqanda ianinnana amiqira qamunnannai eefooda qamunna auquandee kai masee auquqa. Mifa eefooda qamunnasaa akunirafa mariani.

<sup>9</sup> Eefooda anaanusaa akumaaqa ooni qaaraqanda pupuoni marasee dinni anaanusaa moo dinni anaanusaa moo quqasee Yakoooon faiqi namu qisauku qara taikasee qikunni ooqu qaara marasee nuqu mi ooni qandasaa akara ruaqa. <sup>10</sup> Dinni pupu oonisaa dinni taikasee dinni ani moodaa marasee 6 nuqu akara ruani, dinni pupu oonisaa miqikai mandee 6 akara ruani. Aiqama nari kambigoona amana kai nuqu akara ruaqa.

<sup>11</sup> Oonisaa akara rirana akoofasa marina afiqasaifanoo mifa qaara oonisaa Yakoooon faiqi namu nuqu akara ruani. Akara rumaseenoo mi ooni qanda koor qambaana quqasainanoo atukaranoo mariani.

<sup>12</sup> Miqimmasee aururusaa eefooda qamunna aakandammassainanoo Yakoooon faiqi namu qisauku qaara taikasee qikunni ooqu qaara marasee 12 Isaraee maqannaasa kikiqusinoo mariani. Miqimasaifanoo Aaroonafa misa nuqu nari aururusaa maranoo nimirana qinee Yaaweesa qeeqa faiqi aanaaseera aiqama kari irianaura.

<sup>13-14</sup> Aururusaa qaara ooni atukaramma qumaree mari kooranasaa qaara qanda amiqira koor sainanda sufrana moo ati moo oonisaa moo ati moo oonisaa ootupaaga.

*Innee aanaiqi kirausa uriqararana amuqusa saaqaraa qamunna auquqa.*  
(Raf 39:8-21)

<sup>15</sup> Innee nimuqusa saa rufi mariana aanaiqikirausa auqu nimisaifaqa minannoo misa Anutuna iriranara aidiranara irifaranoo. Eefooda qamunna auqu ainainausannoo kai auquseega moodaa karira akara kai ruaqa.

<sup>16</sup> Qambaana tukaandasaiifanoo aiqama ati amana amana kai 22 centimetres mariani.

<sup>17</sup> Innee ooni amiqirana fira feefauru aqi mariana kai marasee qaara faqa qaara faqaki mi qamunnanasaa padiaqa. Indaaruaa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiaqa.

<sup>18</sup> Mina aanaaqiannaa padiranaki moo ooni auqu eemeerara faqa moo ooni safairee faqa moo ooni daimanna faqa minamunannai padiaqa.

<sup>19</sup> Mina aanaaqiannaa padiranaki moo ooni auqu teerakoosa faqa moo ooni agatee faqa moo ooni auqu ameeetisa faqa minamunannai padiaqa.



<sup>20</sup> Mina aanaaqiana padiranaki moo ooni auqu beerira faqa moo ooni kanirianna faqa moo ooni yasapaa faqa minamunannai padiaqa. Mi oonisa koorandannai amuqusa saa ititanoo mari qamunnasaa isooqa araaqa.

<sup>21</sup> Mi oonisa moodaa moodaa ooni fannoo Yakooboona faiqi namu qisauku qara taikasee qikunni ooqu qaara marasee 12 Isaraee maqannaasa kikiqa usinoo mariani.

<sup>22</sup> Innee nimuqusasaa rufirana anaanu amiqira koorannai auqira sanda seenandara foora auquseeqa afundasee dinni dinni atisaa qusuaqa.

<sup>23</sup> Koorannai anaanu qaaraqanda auqusee amuqusa saa rufinna qamunnana mirinni atisaaqara qusuaqa.

<sup>24</sup> Qaara ganda seennanda koorannoo afundaranannai mi anaanu qandaki qusuaqa.

<sup>25</sup> Mi sandana ati qarannai aururusaa koorandannai ooni isooqa aruqaanaki ootupaqa. Miqimmasaifanoo aururusaa eefooda qamunnasaa rumbaaqa.

<sup>26</sup> Kaffaa nimuqusa saa rufi mariana anaanu qaara qanda koorannai auqusee aunduraindari ati saa mi anaanuna rumbasaifanoo eefooda qamunna mammaaqai mariani.

<sup>27</sup> Kaffaa qaaraqanda anaanu koorannai auqusee afunni qumu mari eefooda qamunnana saa aqaasanai amiqira qamunnannai sufirana ooi qandianinnana aaqa rumbaaqa.

<sup>28</sup> Nimuqusa saa diri maria qamunnana saa anaanuki dirindaasiandannai sufira sanda qusuaki eefooda qamunna saaqaraa anaanuki qususee rumbaaqa. Miqimmasaifanoo amuqusa saa ititara qamunna sia kasi kasiani.

<sup>29</sup> Aaroonafa naaquqara maaqaki keeqafinoo mi qamunnana Isaraee maqannaasa nuqu akara rirana afisusainaa qinee Yaaweese aiqama kari qeeqa faiqi aanaaseera irianaauranoo.

<sup>30</sup> Amuqusaa ititara qamunna raqandaamasee uqara foora akunusai mariani. Mi uqanaki ooni qaaraqanda miqanda nuqu Urimma faqa Tumimma faqa Aaroonafa mi uqanaki uqarumasee qini uqaana maaqaki aniani. Miqiraree qimaseenoo aiqama kari nimuqusa saa diri maria qamunnana rufu maree anireenoo mifa qini irirana iriseenoo Isaraee maqannaasa qimannimiannoo.

*Akaqa aanaaiqikirausa qamunna auquaqa.*

*(Raf 39:22-31)*

<sup>31</sup> Innee eefooda qamunna meeqaoo qaraana auqirara dirindaasi akira sipsipa asausinnai kai auquaqa.

<sup>32</sup> Anuka amaaqa auquaqa. Qamunna raqandaammasee akunusaifanoo anuka upeekaina sia anaqani.

<sup>33-34</sup> Mina atimau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusuaqa. Dirindaasi akira sipsipa asausinnai faqa pannoonna akiranannai faqa faeena akiranannai faqa mi saqri aqamana amana auquaqa. Auquseeqa mi saqari aqamana faqa koorannai auqira biru faqa qamunna atimau moo mafi quqee moo mafi quqee iaqa.

<sup>35</sup> Aaroonafa aanaaiqikira saika auqararee qimasee mi qamunnana afisuani. Mifa naaquqara maaqaki qinee umee marunnana qifusaa aninanoo fee quqasee finanoo fee mi birusa narisaa narisaa ariqa ufa qifanoo Aaroonafa sia kuqannoo.

<sup>36</sup> Innee amiqira koor marasee aqiniandirana auqusee mina saa akara rumaasee Yaaweena ainainira faiqi fee qiaqa.

<sup>37</sup> Akiiqa aanaamu qusirana aqini saa quqasee dirindaasiandannoo rumbaaqa.

<sup>38</sup> Aaroonafa mina aqinaaqa rumbasainaa qinee Yaaweese aiqama Isaraee maqannaasa aaduma qini qimiraree qinna ainainausara eedoo qimasee maraanaura. Misa akaqa aqarana auqamasee qimifaqa qinee Aaroonafa mi aqiniandiranara irisee sia minni saanaura. Kaqi maraanaura.

<sup>39</sup> Innee amiqira sanda sufuseeqa Aaroonafa siuta auqusee mina akiiqa aanaamu faqa auqusee minannoo kai aranandaqura rumberana faqa auquseeqa minasaa oosana oosana akarannoo afaaqa auquaqa.

<sup>40</sup> Aaroonafa faiqi namu siutauqa faqa niranandaquranna rumbaa mariana faqa nikiiqa aanaamu faqa kaaqa amiqiranauqa auqu nimiaqa.

<sup>41</sup> Moosee anee maa qamunnausa mara maree aneenna afasaana Aaroonafa nari faiqi namu faqa afisu nimaqaa. Oorifa fadameena misa nikiiqa amoondunna adia nimaqasee naaduma mara quqasee mi saikana nimia. Miqimmasainaa misa qini aanaaiqikira saika maraqa.

<sup>42</sup> Innee qusa karasisa nooiqakiqari nifundana saa ooqeeqarana auqu nimiaqa. Miqimmasaifaqa misa sia nari nifaqa kooroo iaqera.

<sup>43</sup> Aaroonafa nari faiqi namu faqa qinee umee marunnanaki qini uigaana maqaki keeqafinoo qini qaindasaa naaquqara qoo aanaiqikira ainaina auqararee qimasee aiqama kari mi karausisana afisuaqa. Miqiga sia nari nifaqa kooroo iqa sia kuqifaranoo. Maa ufafa Aaroonafa qina minaa anii aruakinausa saa faqa naaruara mariannoo.

## 29

*Aanaiqi kirausa fukasaa mara quqasee naamuaqira ufa.*  
(Wok Pris 8:1-36)

<sup>1</sup> Maaqimmasee Aaroonafa qina minaa faiqi namu faqa naaduma mara quqasaifaqa qini saikaki aanaiqikirausa mariaqa. Innee burimakau akoona timmusa faqa sipsipa akoona qaaraqanda dinee teeroo siaina kai maree aniaqa.

<sup>2</sup> Amiqira parauaqa qaindirirana innooqee mari pauraana sia aqirana oorifa fadameenannai suqaaqa. Akaqana sia oorifa fadameenannai suqaaqa. Akaqana ausirira feemu auqusee oorifa fadameena akusee suqaaqa.

<sup>3</sup> Mi ainainausa nafisaa amanee uqa fooqaa iranaki rumaseeqa innee burimakau akoonannoo faqa sipsipa akoona qaara qandannoo qini tatufirana suqa qimiraree qimasee mi ainainausa namufaqa qimiaqa.

<sup>4</sup> Moosee anee Aaroonafa nari faiqi namu faqa nifiqamaree qinee umee marunna uigaana maqa kooqiki minisee qimanniminaqa amiqimmasee nammari auqaaqa.

<sup>5</sup> Miqimmasaifana anee uriqarara aanaiqikira qamunna Aaroonafa afisumaqaa. Siuta faqa kisaqa qamunna aiku ataa dukunirana faqa eefooda qamunna meeqoo afisirana faqa minaa amuaqa eefooda faqa nimuqusa saa rufi maria qamunnana faqa nooiqandi mariana faqa aiqama mi ainainausannoo afisu amaqaqa.

<sup>6</sup> Nikiqa aanaamu afisu amaqaqasee naaquqara kooroo ira fee qimasee rumbaa. Maaqi qimasee minasaa akara ruaqa. Yaaweena saikaki marifee qimasee akara ruaqa.

<sup>7</sup> Rumba amaqaqasee Yaaweenaindi fee qimasee utaaqama amaqara fadameena akiiaqa adiaqa.

<sup>8</sup> Anee Aaroonafa faiqi namu nifiqa quqasaina mi siutausa afisuaqa.

<sup>9</sup> Niranandauqanna rumbee mariana rumbasee nikiqa aanaamu faqa afisu nimaqaqa. Miqimmaseeqa Aaroonafa qina minaa faiqi namu faqa mi saikana nimia. Misa faqa misa saa aniaruakinausa qini aanaiqikira saikaki naaru naaru marifaranoo.

<sup>10</sup> Moosee anee Aaroonafa nari faiqi namu faqa qamunna afisu nimaqasainaqa burimakau akoona timmusa mara qinee umee marunna uigaana maqana kooqinni minisaifana Aaroonafa nari faiqi namu faqa qimanniminaqa minaa akiiqasaa nisauku quqaaqa.

<sup>11</sup> Miniseeqa mi burimakau akoonnana qinee umee marunna naaquqara uigaana maqana kooqiki aruaqa.

<sup>12</sup> Aruseeqa minaa fidika marasee aneenna asauku amukasaa raaraammasee qaidara qaara faqa qaara faqa atisaa aanai fooqaa iranasaa akua. Miqimmasee akaqa fidika kaqi marinauqa mara maree qaidara qainda oosanaki adiaqa.

<sup>13</sup> Miqimmasee kafaa aradanda saaqaraa ainoo aiqama maraqa. Mina annaama faqa minaa atakisa qara faqa ainoo minasaa marina faqa amaandamoona saaqaraa karo akoonnana faqa marasee tatufira qaindasaa quqasee suqa qimia.

<sup>14</sup> Burimakau akoona amaqa faqa apata faqa arada faqa inneeqa naambeeqai aqosai ida arasaifanoo qaani. Mifa aanaiqikirausa numoo maraqa niseenoo taika nimaqaannoo.

<sup>15</sup> Sipsipa akoona moodaa marasee Aaroonafa qina minaa faiqi namu faqa qimanniminaqa nisauku minaa akiqa saa quqaaqa.

<sup>16</sup> Miqimmasaifana minaa arusee minaa fidika marasee qaidara qaara faqa qaara faqa atinni mi fidikana adiaa.

<sup>17</sup> Miqimmasee mi sipsipa akoonnana kaqikaana kaqikaana aiku quqasee minaa aunduraindaraa ainaina faqa aikuqara faqa nammari uqusee minauqa mareeqee mi sipsipana akiiaqa akaqa aukiranauqa namufaqa quqaaqa.

<sup>18</sup> Mi sipsipa akoonnana aiqama afaqa qaidara qimasee qini tatufiranara foora ida araaqa. Mina afundara qinee asianaara.

<sup>19</sup> Mina ida arasee sipsipa akoona moo aanaiqikira saikaki quqee mariana mara minisaainoo Aaroonafa nari faiqi namu faqa minaa akiiqasaa nisauku quqaaqa. Quqasaafana arua.

<sup>20</sup> Aruseenana minaa fidika afeeriqiseenana Aaroonafa nari faiqi namu faqa nisauku uqannai naaqosaa akusee nisauku uqannai nisauku akoonnasaa akusee, nisauku uqannai niku akoonnana saa faqa akua. Akusee fidika kaqi marina qumaree qaidara qaara faqa qaara faqa atinni adia aquaqa.

<sup>21</sup> Qaindasaaqaraa fidika akaqana qumaree nikiiqaki aki maria fadameena namu faqa marasee Aaroonaa nari faiqi namu faqa nifaaqai faqa qamunnasaa faqa rurufida akunnimaqaaga. Miqi masai faqa Aaroonafa nari faiqi namu faqa misa fuka qamunna faqa qinindi kiani.

<sup>22</sup> Mi sipsipana ainoo ameesa saa qaraana faqa audurakinaa afaaqa saa qaraa ainoo faqa annaama ati amiqirana faqa qaara atakisa mina saa ainoo marina faqa asauku uqannai afundana faqa ateeqa aqua.

<sup>23</sup> Qini qimia nafisa amanee uqana kinaana oosana oosana narana moodaa moodaa maraaga. Oorifa fadameenannai suqarana moodaa faqa moo sia oorifa fadameenannoo suqarana moodaa faqa ausirira feemu moodaa faqa maraa.

<sup>24</sup> Mi naranausa Aaroonaa faqa mina faiqi namu faqa nisaukuki quqasainaga uriqarara kaqi nimirafa qini Anutusaindi fee qiaqa.

<sup>25</sup> Miqi maseenana kafaa nisaukukinaana mareeqeenana qaindasaa sipsipa akoona auku quqaqaana amuaaqa quqasee ida arasaifanoo qaani. Qini qimira naranara foora ida araaqa. Mina afundara qinee asasianaura.

<sup>26</sup> Moosee anee mi sipsipa akoonnana marasee qini Yaaweesa qifu saa uqeerasee qini Yaaweesa uriqarara qimira ainainee qimasee aneenna mi andauna naa.

<sup>27</sup> Innee faiqi aanaqi kirausaikamma nimaqararee qimasee qini qimia narannaki-naana sipsipa akoona ameemmeeqana marasee qini qifu saa uqeeraseeqa mina asaukuqannai afundana uqaqifiqaaqa. Miqimmaseeqa mi andauna aanaiqikirausa naaqa.

<sup>28</sup> Mi ufafa qini ufa marinaqa naaruura naaruura qini faiqi anaasee qini faqa moodaanaki suqira tatufirana suqaaqa. Mi andauna ameemmeeqana faqa asaukuqannai afundana faqa aanaiqikirausaindi mariani. Faiqi anaasee qini Yaaweesa kaqi qimira ainaina miqimminoo mariannoo.

<sup>29</sup> Aaroonafa kuqinaqa mina uriqarara aanaiqikira qamunna mina faiqi namu maraaga. Mi saikana oosana arainna faasaana mi qamunnana afisusaifaqa fadameena nikiiqaa amoondunna adiaaga.

<sup>30</sup> Aaroonaa amaaku nari akoona amaaga maqainafa uqaana maqaki qinee umee marunnnanaki keeqafinoo naaquqara oosiranaki ainainiraree qimaseenoo mi uriqarara qaanaiqikira qamunnana afisusee moodaannai qisauku taikasee dinni ani qaara marasee 7 faasaana saa mi naaquqara oosiranaki ainainiani.

<sup>31</sup> Yaaweefa kafaa Mooseena qimaminoo qinau. Anee Aaroonaa faqa mina faiqi namu faqa nikiiqaa amoodunna fadameena adia nimaqaidana suqenna sipsipa akoonnana ameemmeeqana faqa asaukuqannai afundana faqa marasee qini naaquqara oosiranaki afeeki quqasee nammari namu faqa suqaaqa.

<sup>32</sup> Qinee umee marunna uqaana maqana kooqiki mina naaqa. Nafisa amanee uqaki kaqi mari feemusa namu faqa naaqa.

<sup>33</sup> Misa namasaifana aanaiqikira saikaki keeqarana fadameena nikiiqaa amoondunna adiasainanoo misa numoo akiqara mininnisarafa mariannoo. Mi narannafa naaquqarafa marinara aanaiqikirausa kai naaqa.

<sup>34</sup> Akaqa aandau faqa feemu faqa nimuaquinaqa sia naifandinnana kananaana kaqi marinara ida araseeqa minaki aqusaifanoo amiqimmasee qama taikaani. Mi naranafa naaquqarafa marinara sia naaqa.

<sup>35</sup> Aaroonafa nari faiqi namu faqa aanaiqikira saika oosana arainna qooqari qinee ani aamua qunandee iqa moodaannai qisauku taikasee dinni ani qaara marasee 7 faasaana uqanna kai mi ainainausa auqaqa.

<sup>36</sup> Mi moodaa moodaa faasaannasaa anee burimakau akoona tatufirana suqa qiminnanoo aiqama numoo taikaannoo. Miqinanoo qini qaidara fannoo anukarafa mariannoo. Miqimmafina oorifa fadameena qaidarasaa adiasainanoo naaquqanoo mariani.

<sup>37</sup> Aiqaama kari moodaannai qisauku taikasee dinni ani qaara marasee faasaana saa miqia. Miqinanoo qini qaidara fannoo kaaqa uqanna naaquqarafa mariannoo. Moo fannoo fee moo ainaina fee mina auqainafa mina naaquqara afeeka fannoo aruannoo.

*Aiqama faasaana tatufirana suqara oosana.  
(Namba 28:1-8)*

<sup>38</sup> Yaaweefa kafaa Mooseena qimaminoo qinau. Innee sipsipa aanaaqi qaaraqanda moodaa aukuna marara qanda marasee qaidarai tatufirana suqaaqa. Naaru naaru aiqama faasaana miqi kaimmiaqa.

<sup>39</sup> Moo sipsipa kananaana tatufuuga moo eendimarina tatufuuga.

<sup>40</sup> Kananaana suqainna sipsipana namu faqa amiqira sakumannoo qaindirira paraaqa mina ummaara fannoo 1 kilogramme oodaa namu faqa amiqira oorifa fadameena

namu faqa quandasee suqa qimia. Uainna nammari oodaa 1 litre amana kai qinee Anutusa naannana adiaaqa.

<sup>41</sup> Eendi marinaqa suqainna tatufirana kananaana suqaandee kai iqa sakuma qaindiranannoo faqa oorifa fadameenannoo faqa uainna nammarinnoo faqa suqaaqa. Mifa qini Yaaweesa qimira narana maridanoo. Mina afunda fannoo qini asasirana qimidanoo.

<sup>42</sup> Naaru naaru kasooaqee maa tatufira suqarafa qinee umee marunna uigaana maqa kooqiki qini qifu saa tatufu qimiaqa. Miqifaqa miqoo qinee inni qeeqa faiqi anaasee faqa moodaanaki maridaqa ufa qima nimianaaura.

<sup>43</sup> Miqoo qinee Isaraee maqannaasa faqa mariananoo qinee umee marunna maqaanakiqari daroo daraa ira kaaqa qarafa mi saqanna naaquqainaqa sia faiqi anaasee kaiqeesa miqoo fifaranoo.

<sup>44</sup> Qinee qeeqa uigaana maqa faqa qaidara faqa naaquqara faika masaanaura. Qinee Aaroonanari faiqi namu faqa qini ainainirausa mariafaqa naaduma misa aanaiqikira saikaki quqaanaura.

<sup>45</sup> Qinee Isaraee maqannaasa qambaana maridaqa misa Anutusa marianaaura.

<sup>46</sup> Misa qini Yaaweesa nariqa Anutusa Isipa maqa maqaindaraana nifiqee aniafananara iri marifaqa qinee misa qambaana marianaaura. Qinee Yaaweesa misa Anutusa marianaaura.

### 30

*Amiqira undimari ida munana suqara qainda auquaqa.*

*(Raf 37:25-28)*

<sup>1</sup> Yaaweefa kaifaa Mooseena qimaminoo qinau. Moosee innee akasia saqari marasee amiqira afundi mari ida munana aree fandinna qaidarana auquaqa. <sup>2</sup> Mi qaidarafa dinni dinni amana kai mariani. Mina kisaqaandanai 45 centimetres mariani. Mina qusandanai miqi kai inoo 45 centimetres mariani. Maqa saqari ooru firafa 90 centimetres mariani. Mina qaara faqa qaara faqa ati moodaa saqarinnoo kai burimakau aanaira foora auquaqa.

<sup>3</sup> Mina afu faqa aanai fooqaana faqa ataaqeeqara faqa amiqira koorannai kai rafaqa-fusee koorannai mina fiqum qimma auquaqa.

<sup>4</sup> Koorannai qaara qanda aanaanu auqusee dinni moo dinni moo quqasaifanoo qaindusi fandinna saqarina atukaramma qumaraani.

<sup>5</sup> Mi qaindusira saqari qanda akasia saqarinna auqusee koorannai rafaqa fuaqa.

<sup>6</sup> Mi qaidarana mara maree naaquqara oosirana dinni qini moodaanaki kira bukisa marina oorinni quqaqa. Miqoo qinee inni faqa moodaanaki kianaaura.

<sup>7</sup> Aiqaama kananaana Aroonafa qoomauqa andeeqarara anireenoo mifa mina saa amiqira adiafaa ira afundi marina suqaani.

<sup>8</sup> Mifa kaifaa eendi marinanoo qoomauqa qumbiseenoo amiqira adiafaa imari afundana imarina suqaani. Mi oosanafa naaru naaru sia uqanna taikaannoo kaqi kai mariannoo.

<sup>9</sup> Innee sia moo mi qaidarana saa qinee qaoo qima qaunna afundirana suqaaqa. Aandau tatufiraneesakuma qaindirira tatufiranees uainna nammari adiaasee suqara tatufiranees sia minasaa suqaaqa.

<sup>10</sup> Aiqaama aukuaana moodaa faasaana kai Aroonafa mi qaidaranasaa ainainanoo qini qifusaa amiqiannoo.

*Yaaweena uigaana maqanara takisa aqira oosana.*

<sup>11</sup> Yaaweefa kafa Mooseena qimaminau.

<sup>12</sup> Moosee anee Isaraee maqannaasa nuqu marasainaqa moodaa moodaa fasiqa nariqa mariranara qini feefauru qimiaqa. Miqimmasee nuqu maree marinaqa moo ummaara sia misa saa aqufuannoo.

<sup>13</sup> Aiqaama nuqu akaraki marisa uriqararasa auqu ramaqaa munnimmana amana kai quqaqa. Aiqaama mi feefauruna aqiqa qini qimira ainaina qimifaranoo.

<sup>14</sup> Faiqi moodaa fasiqa aiku asauku taikasee 20 aukuaana faqaasa faqa mina fiqarara aukuaana faqaasa miqimmasee qini feefauru qimiaqa.

<sup>15</sup> Misa nariqa marirana maqimmasee feefauriaqa. Ainaina faqaasa sia fiqaramasee aqifaranoo. Ainaina siaisa oorudupi masee aqifaranoo. Aiqaama amana amana kai aqifaranoo.

<sup>16</sup> Mi munnimmana Isaraee maqannaasiannai marasee qinee umee marunna uigaana maqafa mandaikinana minannoo itipia. Misa nariqa mariranara mi takisana aqusaifaqa qinee misa saa itita nimaqaranara irianaaura.

*Booroosannai firaa difaani auquaqa.*

<sup>17</sup> Yaaweefa Mooseena maaqi qimasee kafaa qimaminau.

<sup>18</sup> Moosee anee nammari auqemaria difaanina firaana auqua. Booroosannai auqusee mina aiku faqa booroosannai kai auqua. Auqusee nammari minaki adiasee qini uigaana maaqa dinni marinana qaidara dinni marinana qambaana quqa.

<sup>19</sup> Aaroonaa faqa nari faiqi namu faqa minaki niku nisauku nammari uqimarifaranoo.

<sup>20</sup> Misa qini ufa suqira maaqaki keeqaane qimasee niku nisauku minaki mafi nammari uqusee qini qimifandinna narana qaidarasaa suqa qimiaqa. Miqiga sia kuqifaranoo.

<sup>21</sup> Misa nari niku nisauku nammari uquseeqa sia kuqifaranoo. Maa sanda ufana Aaroonafa nari faiqi namu faqa kasooqaqee misa saa aniaruakinausa faqa maa sanda ufana afaqee faranoo.

*Aanaiqi kirausa utaaqara fadameena auquaqa.*

<sup>22</sup> Yaaweefa kaifaa Mooseena qimaminoo qinau.

<sup>23</sup> Moosee anee makaqa anoona moomoo 6 kilograms faqa isaaqa anoona moomoo 3 kilograms faqa amiqira undi mari innupina anoona moomoo 3 kilograms faqa maraa.

<sup>24</sup> Saadapu moomoo 6 kilograms faqa maraa. Aiqaama ainaina uigaana maqa sikeera amana kai mariani. Oorifa fadameena 4 litres amana minaki adiaaqa.

<sup>25</sup> Mi naaquqara fadameena Yaaweenaindi fee qimasee nikiiqa amoondunna adiee fandinnana auqusee amiqira afundi marina namufaqa quandaqa.

<sup>26</sup> Anee mi fadameenaua auqu maree qini uigaana maqasaa akuseenana qini moodaanaki kira ufa mari bookisanasaa faqa akua.

<sup>27</sup> Aiku faqaa teeboora faqa minasaa qaraa ainainauqa faqa qooma saqari faqa minasaa qaraa ainainauqa faqa amiqira afundi mari pauraqana ida qee mari qaidarana faqa akuumaqaa.

<sup>28</sup> Tatufirana suqee mafia qaidarana faqa minasaaqaraa ainainauqa faqa akuumaqasee nammari difaani faqa mina aiku faqa akuumaqaa.

<sup>29</sup> Miqimmasee mi ainainausa aaduma saa mara quqasainanoo kaaqa naaquqanoo mariani. Moo fannoo fee moo ainainee mi ainainausa auqainafa mi ainainausa naaquqara afeeka fannoo naruannoo.

<sup>30</sup> Miqimmasee Aaroonaa nari faiqi namu faqa mi fadameenna aku nimaqa sainaqa qini aanaiqikira saikaki mariaqa.

<sup>31</sup> Moosee anee Isaraee maqannaasa maaqi qimasee qimannimia. Maa naaquqara fadameenna nikiiqa amoondunna adiee fandinnana qini ainainiranaki naaru naaru quqaqa.

<sup>32</sup> Maa fadameennafa sia kaiqee fasiqa adiannimaqee mariafa maridanoo. Innee sia moo fadameena miqirana auquaqa. Mifa naaquqara ainaina marinara innee minara naaquqara fee qimasee eerairiaqa.

<sup>33</sup> Yafee moo fannoo maa fadameennara foora auqusee moona akiaaqa adiainafa qini faiqi aanaaseeki sia mariannoo.

*Amiqira undimari munana auqimaria pauraqana oosana.*

<sup>34</sup> Yaaweefa kaifaa Mooseena qiminoo qinau. Moosee anee oosana oosana amiqira undi mari pauraqana sitakatee pauraqa faqa oonikaa pauraqa faqa karabanumma pauraqa faqa amiqira makaqa anoona faqa aiqama amana amana kai maraa.

<sup>35</sup> Maraseenana amiqira afundi marifaqa nifaaqai aki marianara foora auqamasee ida arasainanoo qeenoo amiqira muna afundiani. Ooruku faqa oodaa quqasainanoo amiqinoo naaquqara faikiani.

<sup>36</sup> Anee mina atiuqa maraseenana kaada ririisainanoo kookoomaika mafinana mara maree qinee umee marunna maqanaki muruseenana moodaanaki kira bukisa oorinni quqa. Mi amiqira undana imarinara kaaqa naaquqara fee iaqa.

<sup>37</sup> Innee sia moo miqira afudimarinnana auquaqa. Innee minara naaquqara andeeqara ainaina Yaaweenaindi fee qiaqa.

<sup>38</sup> Yafee moo fannoo miqirana amiqira undi marina afaaqai akiraree qimasee auqinafa sia qini faiqi aanaaseeki mariannoo.

## 31

*Yaaweefa uigaana maqa kinaa ainaina auqifandinna fasiqausa mara quqanau.*

*(Raf 35:30–36:1)*

<sup>1</sup> Yaaweefa kafaa Mooseena qimaminoo qinau.

<sup>2</sup> Moosee qinee innikinaana Beesareerana utaaqeeqa. Mifa Urina amaaku Hurana anaiki Yudana oosanakinaafa maridanoo.

<sup>3</sup> Qinee qeeqa maraquna afeeka aaku amaqeeqa. Qinee irirana faqa aiqama ainainirana akoofasaikira saika amiqa. Aiqama amiqira ainaina auqirana akoofasaikirana faqa amiqa.

<sup>4</sup> Mifa koorannoo faqa siruaannoo faqa booroosannai faqa oonu mafi irisaidanoo oosana oosana ainaina akoofasauqa akara rimaria irirana faqa auquani feera amiqa.

<sup>5</sup> Qinee firaa feefauru aqi maria oonina atEEKara oosana faqa saqarinnai ainaina amana auqirana akoofasaikirana faqa Basareerana amiqa.

<sup>6</sup> Qinee moo fasiqa Ooqooriabana Aqisamakana amaaku Dannana oosanakinaana mara quqasaananoo Beesareerana faqa ainainiannoo. Qinee akaqausa faqa firaa irirana oosana oosana ainaina auqirana akoofasaikirana nimiqa. Miqimma saanaqa misa qinee qimannimianna aiqama ainainna auquaqeera.

<sup>7</sup> Qinee umee marunna uiqaana maaqana faqa moodaanaki kira bukisa faqa mina afu numoo taikannisarana faqa aiqama uiqaana maqakinaa ainainauqa faqa auquaqa.

<sup>8</sup> Teeboora faqa minasaa mari ainainausa faqa ramma dirirana amiqira koorannoo auqirana faqa minasaa mari aiqama ainainausa faqa amiqira afundi mari tatufirana suqara qainda faqa auquaqa.

<sup>9</sup> Tatufirana suqee maria qaindana faqa mina suqee maria ainainausa faqa niku nisauku nammari uqimaria difaanina faqa mina oosana faqa auquaqa.

<sup>10</sup> Misa amiqira qamunnauqa Aaroonaa faqa mina faiqi namundi faqa aanaiqi kira saikaki maridaqa afisifandinnana faqa auquaqa.

<sup>11</sup> Qinindi fee qimasee akunnimaqee fandinna fadameenna faqa adiafaa ira amiqira afundimarina naaquqara oosiranakinaana faqa auqua. Misa auqidaqa qinee qunandee kaimaseeqa auquaqa.

*Sabata idooara faasaana maridanoo.*

<sup>12</sup> Yaaweefa Mooseena qimaminoo qinau.

<sup>13</sup> Moosee anee maaqi qimasee Isaraee maqanna qimannimia. Sabata qini idooara faasaana amiqimandee ireedakai mariaqa. Mi faasaanafa qini faqa inni faqa qambaana naaru naaru maridanoo qinee Yaaweesa inni mara qeeqa faiqi anaasee kunnanara quqannifiqaannoo.

<sup>14</sup> Innee qini idooara faasaana naaquqarafa marinara ireeda kai mariaqa. Faiqi moo fannoo sia ireeda marirai mi faasaanna ainaininnana kuqa aruaqa.

<sup>15</sup> Qisauku dinni taikasee dinni moodaa marasee 6 faasaana innee inneeqa ainainiaqa. Qisauku dinni ani qaara marasee 7 faasaana firaa idooara faasaana qini naaquqara faasaana maridanoo. Yafee mi faasaanna ainaininnana innee mina kuqa aruaqa.

<sup>16</sup> Isaraee maqannaasa innee faqa qinee faqa moodaanaki kunnanara mi faasaanafa uqannifiqaani.

<sup>17</sup> Mi faasaanafa inni Isaraee maqanna faqa qini faqa naaru naaru aqoondikirana kooroo mari faasaanafa mariannoo. Qinee Yaaweesa dinni taikasee dinni ani moodaa marasee 6 faasaanasaa maqa faqa innaaruna faqa auqusee dinni ani qaara marasee 7 faasaana ainainirana quqasee idooaafannanara mi faasaanafa idooara faasaana mariannoo.

<sup>18</sup> Anutufa aiqama ufa Mooseena Sinai aaqanasaa qimami taikaseenoo qaara ooni ausiriranasaa Anutufa nari asaukunnai sanda ufa akara rumaqoona aminau.

## 32

*Faiqi anaasee koorannai burimakau akoona aanaaqi auqiqau.*

*(Lo 9:6-29)*

<sup>1</sup> Mooseefa aqanai kisaaqasaa ooru marufaqa Isaraee maqanna faiqi anaasee Aaroonafa maruqoo suqumaree aniree Aaroonaa maaqi qimasee qimamiqau. Maa fasiqafa maasa Isipa maqa maaqaindari qifiqee anufa naqaafee imari faqee maasa sia iridaqa. Minara anee moo anutuna augusainanoo maasa indaarunnikamma nimaqaani.

<sup>2</sup> Aaroonafa misa ufa iriseenoo qinau. Inneeqa faiqi anaasee naaqookinaa koora faqa fidinaanu faqa tatuseeqa mini qimiqa.

<sup>3</sup> Miqi qufaqa aiqama faiqi anaasee nari naaqookinaana raduku maree mini Aroona amiqau.

<sup>4</sup> Amisoofanoo Aaroonafa mina qumareenoo idannai tasirisiri mandeenoo maqasaa burimakau akoona aanaaqi amana auqu qoonaki adiasoofanoo burimakau amana auqinau. Auquseenoo paipanannai mina atiuqa andeeqanau. Miqimmasoofaqa faiqi anaasee qiqau. Isaraee maqannaasa maafa maasa Anutufa maridanoo. Maafa kai maasa Isipa maqannaindari nindiqee anufa maridanoo.

<sup>5</sup> Aaroonafa misa ufa iriseenoo burimakau akoono amana auqirana aaga tatufira qainda auquseenoo faiqí anaasee qimanniminoo qinau. Duna aiqama suqumaree aniraiifaqa oomaqa sakasee naidaqa Yaaweena auqa uqeeraa.

<sup>6</sup> Miqí qimasooifaqa iaqoo kananaana faiqí anaasee akaqa aandau mara maree minisee qaindasaa tatufirana faqa Yaaweena faqa moodaanaki kira tatufirana faqa suqaqau. Suqamiseeqa ooqu marifiqa afeeka nammari faqa narana faqa namaseeqa findifiqa aanaaseeuqa faqa manda oosana maraqaau.

<sup>7</sup> Yaaweefa misa nindafeenoo Mooseena qimaminau. Anee kai kaqi ooqufua. Faiqí anaasee anee Isipa maqanaindari nifiqee anianausa qini minnisee aagara oosana maraidammia.

<sup>8</sup> Misa doo qinee fuaqee qimasee naamuaqiafanna aana minniseea. Misa koorannai burimakau akoono aanaaqi amana auqusee mina tatufirana suqamiseeqa minara innaaru qidaqa. Misa maaqi qidaqa Isaraee maqanaasa maasa Anutufa maafa maasa Isipa maqanaindari nifiqee anufa maridanoofee qidaqa.

<sup>9</sup> Minara qinee Yaaweesa Isaraee maqannaasa kaaqa ramoo ramaa imariafaqa iridaqa.

<sup>10</sup> Doo firaqoo qini qirana qaiifaqa misa kuridi taikasaanura. Anee sia qiniara qaoo qia. Miqimmaseeqa ani faqa anisaa ani aruakinausa faqa kai amiqi amiqimma nisaanaqa fira maqannaa marifaranoo.

<sup>11</sup> Mooseefa irinoo Yaaweena aanoo qiranara innaarukiqari qaoo qidanoo qinau. Oo Yaawee nanaree anee aneenna faiqí aanaaseera arana qaidanoo fee. Anee fira afeekannai misa Isipa maqanaindari nifiqee anianafa naqaifanee aanoo qima nimaqaidanee.

<sup>12</sup> Anee miqinaqa Isipa maqannaasa aniara nári kai qimirisee Isaraee maqannaasa nifiqee aaqana aikunni munusee naru taikarara nifiqee fiifoo qifaara. Sia arana qaani aneenna arana qara irirana quandasee sia ummaara aneenna faiqí anaasee nimia.

<sup>13</sup> Anee aneenna ainainira faiqiuqa Abarahammana faqa Isakeena faqa Yakooboona faqa kuqaa qima afeekaikira ufa qunnanara oonumafi iria. Anee misara fasaura foora mafifaqa qinee qima afeekaikiafanna maqa maaqana inni nimianauree qinau. Nimisaananoo mi maqa maaqafa innindikamminoo naaru naaru mariannoo fee qinau.

<sup>14</sup> Mooseefa miqi qufanoo Yaaweefa narí aranaqara irirana quandasee sia ummaara narí faiqí anaasee niminuu.

<sup>15</sup> Yaaweefa Mooseena qaara oonisaa akara rumamufanoo mareenoo aqanaindari afaasai narí maqanna marunnai ooqu finau. Ausirira ooniqandasaa Anutufa sanda ufa dinni dinni akara rumaqoona uqirafa ooqu finau.

<sup>16</sup> Anutufa narí kai mi oonina auquseenoo minasaa sanda ufa akara rinau.

<sup>17</sup> Yoosuafa irufaqa faiqí anaasee nariqa uiqaana maqusakiqari faqa fuisee qida qufanoo iriseenoo Mooseena qima minoo qinau. Qinee rakidaqia ufana iridaqa.

<sup>18</sup> Miqi qufanoo Mooseefa qinau. Sia qufoona rira ufa fau maridanoo fau. Sia qiki faafau qirufa fau maridanoo. Idi rarana kai iridaqa.

<sup>19</sup> Mooseefa uiqaana maqusa adeedi ooqureenoo nindafoofaqa burimakau aanaaqi amana auqirana faiqí anaasee fusakidaqa idi ree mariqau. Miqi marufanoo Mooseefa nindafoofanoo aranaqoofanoo akara rira ooniqara aaqana aikunni maqasaa aqusoofaqa miqanda rukamiqau.

<sup>20</sup> Mooseefa aranaqoofanoo burimakau aanaaqi amana auqirana qumareeqeenoo idaki aqusoofanoo tasiris irinuu. Tasirisiri maseenoo andaana rumeeqee nammariqi aqusee naaqee qufaqa Isaraee maqannaasa mi nammarina naqau.

<sup>21</sup> Miqimandeenoo Mooseefa quandakufanoo Aaroono qimaminau. Maa fasiqa anaaseesa ani naqi fee mamaqaafanee anee maa manda fira aaqarana misa nifaaqai quqeenee.

<sup>22</sup> Miqi qufanoo Aaroonafa Mooseena qimaminau. Oo qini uriqararafa anee sia qiniara aanoo qia. Anee maa fasiqa anaaseesa oosana irimariananoo. Misa kaaqa mandoosana auqarana sandanainai qimariasa maridaqa.

<sup>23</sup> Misa qiniara maaqi qia. Maasa maa fasiqafa Mooseefa maasa Isipa maqa maaqaindaraana qifiqee anunaki kambiqai ainainnara sia iridaqa. Anee moo anutuna auqu sainanoo maasa indaarunnikamma qimaqaani.

<sup>24</sup> Miqi qiafaqa qinee qimannimiqa kooro faqaasa qimiaqee qunaqa uaqee iasa akaqana qimia. Qimiafaqa idaki aqusaunanoo burimakau aanaaqi kambiqeenoo.

<sup>25</sup> Mooseefa qafooifaqa Aaroonafa eedoo qufaqa faiqí anaasee nariqa namuqaa nifusaa oosana oosana manda oosana marooifaqa namuqaa misara uteetiqiqau.

<sup>26</sup> Minara Mooseefa arana qoofanoo uiqaana maqusa kooqiki kikiqamma fufanoo maaqi qimasee nammeera qinau. Aiqaamausa yafee Yaaweenaindi kiani qinafa maaqoo aniaqa. Miqi qufaqa aiqama Reefina aiku asaku kai suqumaree miqoo ani mina fiqumma fiqau.

<sup>27</sup> Aniroofanoo Mooseefa maaqi qimasee qimanniminau. Isaraeerana Anutufa Yaaweefa maaqi qimasee aiqamausa inni naakapaidanoo mifa inneeqa rakira paipana mara maree innee uigaana maqusa dinni kooqindari dinni kooqinni oonuree aniree idaqa unna anutuna amana auqi mariana akiiqara inneeqa nikaqaafasaaauqa faqa inneeqa niqoondiuga faqa inni naaqa mariasa faqa aiqama kuqa naru taikaaga.

<sup>28</sup> Miqi qufaqa Reefina aiku asauku eedoo qimasee mi faasaanna 3,000 fasiqa nariqau.

<sup>29</sup> Narusoofanoo Mooseefa kafaa qimanniminau. Innee inneeqa faiqi namufaqa inneeqa nikaqaa fasaaauqa faqa naruanara innee Yaaweena aanaiqikirausai kiqa mari-afanoo. Miqi mariafanoo Yaaweefa nari amiqi amiqirana inni niminoo.

<sup>30</sup> Iafoofanoo kananaana Mooseefa faiqi anaasee qima nininau. Innee firaa manda aaqarana marasaafaqa aqbee qinee aaqanai kaifaa ooruree inniara Yaaweena iramiri-ananoo inni aaqarana akiiqara minninsaannoo fee.

<sup>31</sup> Miqi qimaseenoo Mooseefa Yaawee funnai aaqanai ooruree qimaminoo qinau. Maa fasiqa anaaseesa firaa manda aaqarara marasee unna qira anutuna koorannai auqusee minara innaaru qiiaafanoo.

<sup>32</sup> Amanee misa aaqarana akiiqara minninnisaa. Sia minninniseenana qini duqu ani faiqi anaasee faqa ani bukaki akararinoo marina kai rukaa.

<sup>33</sup> Yaaweefa iriseenoo qinau. Sia kaiqeesa nuqu geeqa bukakinaana rukaanaura. Qini ufa rukiee mariasa nuqukai rukaanaura.

<sup>34</sup> Doo oonuree faiqi anaasee nifiqamaree qinee qimamiafanna maqa maaqanai fua. Anee iria, qini qangiroo fannoo inni indaarunni kamma nimaqaannoo. Mi fasiqa anaaseesa aaqarana akiiqara ummaara nimianna aukuanafa anidanoo.

<sup>35</sup> Miqi qimaseenoo Yaaweefa manda aurirana mi fasiqa anaaseesa nininau. Misa Aaroonara qufanoo koorannai burimakau akoona aanaaqi auqunara miqinau.

### 33

*Yaaweefa Isaraee maqannaasara Sinai aaqana aikunni maruna minnisee fuaqera qimanniminau.*

<sup>1</sup> Yaaweefa maaqi qimasee Mooseena qimaminoo qinau. Anee faqa Isipa maqa maaqaindari nifiqee anianna fasiqa aanaaseesa faqa maa maqana quqasee qinee qima afeekaikammasee Abarahaamana faqa Isakeena faqa Yakooboona faqa misasaa ani aruaki kambiqaainausa faqa nimirree qiafanna maqanasaa fua.

<sup>2</sup> Qinee geeqa angiroo aiqaananoo inni nifu uqi marinaqa fimarifaqa qinee Kannaa maqannaasa faqa Amooro maqannaasa faqa Heeta maqannaasa faqa Peerisa maqannaasa faqa Hifita maqannaasa faqa Yeebusa maqannaasa faqa naru nifaqaaga ianaura.

<sup>3</sup> Innee ainoo faqaa maqasaa ainaina ummaqusaa fanoo reemindeemiri mari maqanasaa fifaranoo. Qinee geeqa sia inni faqa fuanaura. Innee ramooramaa imariasa mariafaqa qinee inni faqa fidaqa aanai inni naruanora.

<sup>4</sup> Isaraee maqanna Yaaweena mi ufana iriseeqa nifaaqa auqira ainaina aiqama raipagu quqasee soofaara maridara foora mafiqau.

<sup>5</sup> Yaaweefa maa ainaina auqaqeeera qimannimufaqa miqigau. Maaqi qimasee Yaaweefa Mooseena qimaminau. Innee kaaqa ramooramaa imariasa mariafanoo. Qinee inni faqa maqee fiqa inni kuridi nimaqaunaiqini. Doo maqee inneeqa nifaaqa auqirana raipagu quqasee kaqi marifaqa qinee inni naqaafee mannimaqaannanara oonumafi irianaura.

<sup>6</sup> Miqi qimasooafaqa Sinai aaqana quqasee fidaqa Isaraee maqannaasa sia nari nifaaqa auqirana afisiqau.

*Yaaweefa Mooseena faqa ufa qimaru uigaana maqafa.*

<sup>7</sup> Isaraee maqannaasa nariqa uigaana maaqauqa usakasooofanoo Mooseefa naaquqara uigaana maaqa naambeeqai nianasaa usakanau. Usakasee mina auqureenoo Yaaweefa umee mari uigaana maaqa fee qinau. Faiqi anaasee moo fannoo Yaaweena iriranara irianee qimasee mi maaqana kooqinni fimarifaqa.

<sup>8</sup> Mooseefa nari uigaana maaqai fufaqa faiqi anaasee nari uigaana maqa kooqikiaga kikiqamafi qafee maru fanoo keeqanau.

<sup>9</sup> Mooseefa uigaana maaqaki keeqafufanoo asuru qumureenoo mi kooqinaki maru-fanoo Yaaweefa minakiqari Mooseena faqa ufa qimarinau.

<sup>10</sup> Asuru uigaana maqa kooqiki qumu kasoo inoo marufaqa faiqi anaasee mina qafamasee ninuka tuqu naumoo amisee Yaaweena amooqi marifaqa.

<sup>11</sup> Yaaweefa Mooseena faqa nari oori nari oori qafaida ufa qimarinau, faiqi nari aqoondi faqa ufa qimarindee inau. Ufa taikaseenoo Mooseefa anirandee faiqi anaasee maru



uigaana maaqanai finau. Kumaaraa moo mina dadaaƙi marufa Yoosuafa Nunnaana amaaku naaƙuqara uigaana maaƙi kaƙi marinau.

*Yaaweefa naŕi faiqi anaasee faqa marianauree qimasee qima afeekaikinau.*

<sup>12</sup> Mooseefa Yaaweena qimaminoo qinau. Oo Yaawee kuƙaa anee qiniara maa fasiqa anaaseesa indaarunnikamma nimaqainaƙa mi maqanasaa fuaqee qinau. Anee sia qini faqa fidanoo qini dadaaqianinna fasiqanara qimaqimiananoo. Anee qiniara amiqimmasee iridana qiniara asasiƙa qiananoo.

<sup>13</sup> Anee kuƙaa qiniara miqidana anee qimiriannana qimaqiminaƙa qinee ani ainainiranaki maridqa maqee maqee ani asasamma amaqaanaura. Anee maanara faqa iria, maa maqannaasa ani faiqi anaasee anee utaaqama qaanausa maridaqa.

<sup>14</sup> Yaaweefa mina iriseenoo Mooseena qimaminau. Qinee ani faqa fidaqa adoarana inni nimianaura.

<sup>15</sup> Mooseefa iriseenoo Yaaweena qimaminoo qinau. Anee sia maasa faqa finana sia maasa maaqooqari diqaa.

<sup>16</sup> Anee sia maasa faqa finaqa naqaafee masee akaqausa anee qiniara faqa aneenna faiqi anaaseera faqa rimariannanara irifaranoo fee. Anee maasaki marinaƙa maa maqa maaqana kinaasakiqari naaduma moo kirausa marianaura.

<sup>17</sup> Yaaweefa Mooseena mi ufana iriseenoo qimaminau. Doo anee qianandee kaimminanura. Qinee amiqimmasee aniara irimarunnanara faqa aniara asasi marunnanara faqa miqianaura.

<sup>18</sup> Mooseefa mi ufana iriseenoo kaifaa Yaaweena iramirinoo qinau. Amanee aneenna oori daroo daraa irana uqaqifiqasainaƙa qafaanauree qufanoo Yaaweefa qinau.

<sup>19</sup> Amana qinee qeeqa amiqira areenarana quqasaananoo ani aiaaqaree afunni fuanoo. Qinee ani afusaa qeeqa naaƙuqara duqara koorooianaura. Qinee Yaaweesa qeeqa nifauarana faqa qeeqa qimudao qirana faqa qinee utaaqama qaanausa nimianaura.

<sup>20</sup> Moosee anee qini doori sia qafeenaranoo moo fannoo qini qiqafainafa sia amana kaƙi mariannoo kuqannoo.

<sup>21</sup> Moosee anee qini daakaarinni oonisaa kikiqina maria.

<sup>22</sup> Qini doori areenarafa finaqa qinee ani ooni afoo iranaki quqaseeqa qeeqa qisauku anisaa ititaseeqa fiqaramafiqa qisauku maraanaura.

<sup>23</sup> Qinee qisauku mara maraanana anee qini itaufaka kai qiqafa. Sia doori qiqafeenaranoo.

## 34

*Mooseefa kafia inaaqianna sandufa maranau.*

*(Lo 10:1-5)*

<sup>1</sup> Yaaweefa Mooseena qimaminoo qinau. Moosee anee maa aaqannasaqari ooquree ooni ausiqara atekasee maree urua. Anee indaaruuqaa qanda amana kai atekasee maree urua. Murusainaƙa indaaruu rukamunnnasaa akara ruafannufana kafia akara ruanaura.

<sup>2</sup> Anee maqee deedaqamaqai marinana duna kananaana eendai mara maree Sinai aaqanasaa ururee qini paquria.

<sup>3</sup> Faiqi moo fannoo sia ani faqa uruannoo. Sia uqanna moo fannoo aaganai fee aqana aqa fee mariani. Sia misa burimakau sipsipa faqa aqana aikuuni andanda naaqa.

<sup>4</sup> Mooseefa iriseenoo ooni ausirirana qaara qanda atekamaree kananaana Yaaweefa qimamundee inoo Sinai aaganai oorufinau.

<sup>5</sup> Yaaweefa asurukina qumureenoo Mooseena faqa kikiqa mafinoo naŕi auqara koorooinoo qinee Yaaweese qinau.

<sup>6</sup> Yaaweefa Mooseena oorinni fiqaree oonuree maaqi qimasee firaqoo qinau. Qinee Yaaweesa maridaqa. Qinee qimuqusirana faqa qimudao qirana faqa umbiqarusa maridaqa. Qinee sia kai kaƙi aanooqunau maridaqa, qinee kaqa faiqi anaaseera qimuqusi marunau maridaqa, qinee ooga marunnaqoo kai marunau maridaqa.

<sup>7</sup> Qinee qeeqa qima afeekaikira ufa kasooaqee nukudara foora kambiqainausara qima qaafanna ufana kaƙi kai iridqa, numoo faqa manda oosana akiqara faqa minnisaanau. Qinee numoo auqainna fasiqa anaaseesa faiqi namu faqa mina anaiqi mara faqa mina asafaqausa faqa afaqausa faqa sia naruanau, naruanau.

<sup>8</sup> Mooseefa mi ufausa iriseenoo kai kaƙi maqasaa oorindari mapamufufanoo Yaaweena amooqinau.

<sup>9</sup> Amooqidanoo maaqi qimasee Yaaweena qimaminau. Yaawee anee kuƙaa uqanna qiniara asasidana qinee aniara maasa faqa fuanneera iraidaqa. Maa fasiqa anaaseesa

ramooramaa idaqa anee maasa numoo akiqara minniqiseenana maasara aneenna faiqi anaasee fee qia.

*Anutufa faiqi anaasee faqa kafaa moodaanaki kinau.*

*(Raf 23:14-19; Lo 7:1-5; 16:1-17)*

<sup>10</sup> Yaaweefa Mooseena qimaminoo qinuu. Maqee qinee Isaraee maqannaasa faqa moodaanakikira ufa qidaqa. Qinee misa nifusaa firaa ainainauqa sia maa maqanasaa moo atinai faqa moo maqanna qambaana faqa auqaafanna ainainausa auqaanaura. Aiqama faiqi anaasee qinee Yaaweesa firaa ainaina auqaanaqa qafaiifanoo naaquqaano. Inni dadaaqianifeera miqianaaura.

<sup>11</sup> Qinee maqee qimannimianna sandufana amiqimasee irisee mimau fuaqa. Qinee Amooraa maqanna faqa Kannaana maqanna faqa Heeta maqanna faqa Peerisa maqanna faqa Hifita maqanna faqa Yeebusa maqanna faqa inni noorinni fidaqa misa nifaqasaana fifaranoo.

<sup>12</sup> Innee fuka maqasaa oonuree sia mi maqannaasa faqa kaqikaa ainaina ree firaa ainaina ree sia misa faqa moodaanaki kira ufa qiaqa. Misa ufaanara foora fufusaifaqa innee minaki arifoora, minara qeerairiaqa.

<sup>13</sup> Misa tatufirana suqee maria qaidarana misa ooni atekarana rakiaaqee maasa naaquqara anutunee qimariana innee mina rukamu aquaqa misa saqari ateeka rakiqasee maasa anaasee anutufa Aseeraafee qimariana minauqa faqa ateekaateekamma aqusaqa.

<sup>14</sup> Innee sia moo unna anutunara innaaru qiaqa. Qinee Yaaweesa unna anutufa qini qimaqa maqaranara rairai qimarunausa maridaqa.

<sup>15</sup> Innee fuka maqasaa oonuree sia uqanna misa faqa moo ainainara moodaanaki kira ufa qiaqa. Misa nariqa unna anutuna innaaru qidaqa tatufirana suqami mariana inniara naaqee qifaqa nee foora.

<sup>16</sup> Inni faiqi namu mi anaamuru anaaseesa maraseeqa qini minnisee moo unna qira anutusara innaaru qifoora. Mi oosanafa qini qifusaa dapi nua aanaaseesara foora maridaqa.

<sup>17</sup> Innee sia moo ainaina tasirisiri masee unna anutuna amana auqusee minara innaaru qiaqa.

<sup>18</sup> Ooqai innee Abiba quqoonasaa Isipa maqasaaqari anusa mariafanoo. Minara Abiba quqoona anirainauqa maqee maqee innee sia yis mari feemuna oomaqa sakasee maqee maqee naaqa. Dinni qisauku taikasee dinni oonu qaara marasee 7 faasaana mi oomaqana sakasee naaqa. Isipa maqasaaqari anu quqoonafa marinara miqiaqa.

<sup>19</sup> Aiqama ainaina ooqasaa aanaaqi qinindi maridanoo. Innikina ooqasaa akoonaiqi maqainafa faqa aiqama maaqeenaa aandauqa ooqasaa akoona maqainafa faqa qinindi kai mariannoo.

<sup>20</sup> Innee inni doonki aanaaqi ooqasaa maqarafa kaqi marianifee qimasee sipsipa aanaaqi mina amaaqa maqasee tatufirana suqa qimiyaqa. Innee sia miqiaqa mina anuka kuridiaqa. Innee aiqama inneeqa ooqa faiqiuqa feefauru masaifaqa kafaa inniqaindi kiaqa. Sia moo fannoo tatufirana suqara ainaina sia uqirafa qini Yaaweesa qifusaa aniannoo.

<sup>21</sup> Dinni taikasee dinni ani moodaa marasee 6 faasaanasaa inni ainainira faasaana maridanoo. Dinni ani qaara marasee 7 faasaanasaa sia ainainiaqa. Umaqira aukuanee aiqira aukuanee anirainauqa sia mi faasaana ainainiaqa, idooaaqa.

<sup>22</sup> Innee unakirana oosana arasee miqoo afiana nara oomaqa suqaaqa. Innee asumu aiq quqara oomaqa faqa sakasee naidaqa mina auqu reeqa asumu aiq quqara oomaqa fee qiaqa.

<sup>23</sup> Moodaa aukuanaki qaarammoo kari aiqama Isaraee maqannaasa moodaaqoo suqufi qini Yaaweesa Isaraee maqannaasa Anutusa qimooqiaqa.

<sup>24</sup> Qinee aanaamuru innee finnatina nifaqaseeqa misa maqa maaqa inni nimisee inni mi maqa maaqana firaanaikamma nisaanaqa innee aiqama aukuaana qaaramoo kari moodaaqoo suqufi inneeqa Anutusa qini Yaaweesa qifusaa marifanoo sia moo aanaamuru aniree inni maqa maaqa mareefaranoo.

<sup>25</sup> Innee aandau arusee tatufirana suqa qimiraree qimasee sia innooqemari paaraqana namufaqa feemu suqaaqa. Ainnaaqarara oomaqaki arusainna andauna ataraasa fannoo sia akaqafa kaqi marinanoo faiqee iaqaani.

<sup>26</sup> Aiqama aukuaana indaaruaqa narana afiana nararee qinnana Yaaweena naree maree munu amiaqa. Innee sia mimmi fee sipsipafee arusee nari anoona naamma anoonannai suqaaqa.

<sup>27</sup> Yaaweefa mi ufanara Mooseena qimaminoo qinau. Anee aiqama maa ufausa akara rua. Maa ufausa qinee ani faqa Isaraee maqannaasa faqa moodaanaki qima afeekai kamma qaunna ufana oosana maridanoo.

<sup>28</sup> Miqi qimasoofanoo Mooseefa aaganasaa Yaaweena faqa kisaqasaa marinau. Qaara fasiqa niku nisauku taikasee 40 faasaana faqa eendaki faqa nammari faqa narana faqa sia neemarinau. Yaaweena moodaanaki kira sanda ufa ooni qarasaa akara rinau.

*Mooseefa Sinai aaganaindari quminau.*

<sup>29</sup> Mooseefa Sinai aaganaindari Yaaweena sanda ufa akara rira ooniqara uqirafa quminau. Mifa Yaaweena faqa ufa qiqiunara mina oori afiri daroo daraa imarufanoo nari sia minara irinau.

<sup>30</sup> Aaroonafa Isaraee maqannaasa faqa Mooseena oori afiri daroo daraa imaruna qafamaseeqa rufiida nianasaa mariqau.

<sup>31</sup> Mooseefa misa nindafamaseenoo Aarona faqa faiqi firaasa faqa naarama quqa-soofaqa aiqama aniroofanoo ufa qima niminau.

<sup>32</sup> Adeedi aniroofanoo Yaaweefa Sinai aaganasaa aiqama sandufa Mooseena qimamu ufana qimanniminau.

<sup>33</sup> Mooseefa qimannimi taikaseenoo karo karoonaikira qamunna qumaree oorisaa rafaafinai. Mina oori qafee rufieefora miqinai.

<sup>34</sup> Mooseefa aqoosai kaqikaa uiqaana maqaki keeqafinoo qamunna uturuquseenoo Yaaweena faqa ufa qimarinau. Qimaseenoo madaana raudamafinoo faiqi anaasee Yaaweefa qimamu ufana qima niminau.

<sup>35</sup> Qima nimi marufaqa misa mina oori qafooofanoo daroo daraa ufanoo Mooseefa nari oorisaa qamunannai ititaseenoo qima nimi taikaseenoo quandaki Yaaweena faqa ufa qiraree qimasee uiqaana maaqaki keeqafinoo kaifaa qamunna uturuqinau.

## 35

*Idoora faasaanara qira sandufa.*

<sup>1</sup> Mooseefa Isaraee maqannaai faiqi anaasee aiqama suquseenoo qima niminau. Yaaweefa inniara maa ufama fuaqee qidanoo.

<sup>2</sup> Qisauku dinni taikasee dinni ani moodaa marasee 6 faasaanasaa ainainiaqee qinoo. Dinni ani qaaraiकिनoo 7 qini firaa naaquqara idoora faasaana mariannoo. Faiqi moo fannoo mi faasaana ainaininaqa innee mina kuqa aruaqa.

<sup>3</sup> Innee sia Sabata faasaannasaa inneeqa maaqaki suqa naaqa.

*Mooseefa Yaaweena uiqaana maqa usakara ainaina amiaqee qinau.*

*(Raf 25:1-9)*

<sup>4</sup> Mooseefa Isaraee maqannaai aiqama kafa maaqi qimasee qimanniminau. Yaaweefa maaqi qimasee naamua qidanoo.

<sup>5</sup> Innee Anutuna amiraree qimasee nifaqa asasinna kooira faqa siruaa faqa booroosa faqa maree aniaqa.

<sup>6</sup> Amiqira qamunna faqa sipsipa asausi dirindaasi akirana faqa pannoonaa akirana faqa faeena akirana faqa mimmi asausinnai auqira qamunna faqa maree aniaqa.

<sup>7</sup> Sipsipa akoona apata faeena akirana faqa ooruku nammariquinaa aanda apata faqa akasia saqari faqa maree aniaqa.

<sup>8</sup> Qooma qumbi maria fadameena faqa amiqira afundi mari ainainna andaana rirana idaki adiasaafanoo adiafaa ira undi marina faqa mi ainainna kai nikiqqa amoondunna adiee maria fadameenaki quqarara faqa maree aniaqa.

<sup>9</sup> Pupu ooniqqa faqa akaqa amiqira ooniqqa faqa aanaiqi kirausa uriqararasa afisi maria eefooda qamunnaasaa faqa amuqusasaa ititara qamunna saa faqa quqeeqandinna oonisa maree aniaqa.

*Mooseefa Anutuna uiqaana maqa kinaa ainaina auquaqera qimanniminau.*

*(Raf 39:32-43)*

<sup>10</sup> Inni kiqari oosana oosana ainaina auqarana akoofasauqa kai anireeqa Yaaweena uiqaana maaqaki ainaina mifa naamua qimaqaimau kai auqaqa.

<sup>11</sup> Misa uiqaana maqa faqa mina rafaafai maria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa rakiqee fandinna saqarisa faqa saqari maaqaki rakiqarana amaaqa auqirana faqa auqaqa.

<sup>12</sup> Moodaanaki kira bookisa faqa mina qaindusira saqari qara faqa mina afu faqa minasaa ititara qamunna faqa auqaqa.

<sup>13</sup> Aiku faqaa qainda faqa mina aindusira saqari qara faqa minasaa quqee maria ainainna faqa auqaqa, Anutuna amifandinna feemuna faqa uqaqa.

<sup>14</sup> Qooma saqari faqa mina qoomauqa faqa mina oosana oosana ainaina faqa mina qeemari fadameenna faqa auquqa.

<sup>15</sup> Afundi marina andaana rirana suqee maria qaidarana faqa mina qaindusi maria saqari qanda faqa faiqi nikiqa amoondunna adieemaria fadameenna faqa afundimarina andaana rirana faqa uiqaana maaqa kooqi qamunna faqa auquqa.

<sup>16</sup> Aandau tatufirana suqee maria qaidarana faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari auqara difaani faqa mina oosana faqa auquqa.

<sup>17</sup> Dapusaa diri maria qamunnana faqa dapu saqari faqa saqari kuradee mariana oosana amaaqa auqiranauqa faqa dapu kooqiki keeqee maria qamunnana faqa auquqa.

<sup>18</sup> Kafaa dapu faqa uiqaana maaqa apupukauqa faqa mina rumbee maria sanda ainaina faqa auquqa.

<sup>19</sup> Aaroonaa idaaqira qamunna faqa mina faiqi namu qamunna faqa uiqaana maaqaki naaquqara oosiranaki aanaqikira saika maraadaqa afisifandinna qamunnana faqa mi aiqama ainainna auquqa.

*Faiqi anaasee Yaawee finnai oosana oosana ainaina maree aniqau.*

<sup>20</sup> Mooseefa mi ufana qima nimisoofaqa faiqi anaasee irisee daraaniqau.

<sup>21</sup> Nifaqaqaa asasusa mi ainainausa Yaaweena mini amisoofaqa mi ainainausannai Yaaweena uiqaana maqa usakaqau. Yaaweena amooqifandinna ainainausa faqa aanaqikirausa afisifandinna qamunnausa auqifandinna ainainausa faqa maree aniqau.

<sup>22</sup> Faiqi anaasee Yaaweena amirara nidimarusa misa kai nifaqaqaa auqimaru ainainausa nikiqa asaasi rumbee maru pinnana faqa naaqoo kinaa fidinaanu faqa nisaukuki quqee maru isaqaqama faqa ninukaki rufi maru kukukakana faqa oosana oosana ainaina nifaqaqaa auqi maruna koorannai auqiranauqa mini Yaaweena amidee qiqa mini quqaqau.

<sup>23</sup> Akaqausa amiqira qamunna maqeeusa faqa sipsipa asaasi dirindaasi akiraneer pannoona akiraneer faeena akiraneer maqeeusa faqa mimmi asausinnai auqira qamunna maqeeusa faqa sipsipa akoona apata faeena akirana maqeeusa faqa ooruku nammariki maru andauna apata maqeeusa faqa maree aniqau.

<sup>24</sup> Siruaa faqa booroosa faqa Yaaweena amirara amanaikusa maree aniqau. Akaqausa akasia saqari Yaaweena uiqaana maqa usakarana amana maqeeusa maree aniqau.

<sup>25</sup> Akoofasa anaaseeuqa oosana oosana amiqira sanda sipsipa asausinnai dirindaasianda faqa faeenanda faqa pannoona ariranda faqa sufrana mini quqaqau.

<sup>26</sup> Misa mimmi asausinnai faqa sufimariqau.

<sup>27</sup> Faiqi firaasa aanaqikirausa uriqarana qamunnasaa faqa amuqusasaa faqa quqaqaeera faraafana ooniuuqa faqa firaa feefaura aqimaru amiqira oonisa faqa maree aniqau.

<sup>28</sup> Kafaa misa adiafaa imaru ainainausa oosana oosana faqa qooma qumbi maru fadameennana faqa nikiqa amoondunna adiee maru fadameennana faqa adiafaa ira afudimaru ainaina aindirirana idaki teeqimmasoofanoo adiafaa ira afundi maruna faqa maree aniqau.

<sup>29</sup> Isaraee maqannaasa faiqi anaasee Yaaweena amirara nidimarusa Yaaweefa Mooseenara auqaanifeera aakapoo ainainausa maree aniqau.

*Yaaweena uiqaana maqa usakaqaeera mara quqanau.*

*(Raf 31:1-11)*

<sup>30</sup> Mooseefa kaifaa Isaraee maqanna maaqi qimasee qima nimirau. Yaaweefa faiqi moo mina auqu Beesareerana Urina amaaku Hurana anaiqi Yudana atikinaana mara quqeenoo.

<sup>31</sup> Yaaweefa Beesareerana aiqama amiqira ainaina auqaanifeera nari maraquna afeeka umbiga amaqeenoo. Aiqama ainaina auqirana akoofasaikirana faqa amanaikirana faqa oosana oosana ainaina amana auqira irirana faqa aminoo.

<sup>32</sup> Yaaweefa Beesareerana oonu mafi irisee auqara irirana amisaifanoo mifa koorannai faqa siruaannai faqa boroosannai faqa oosana oosana ainaina auqirana akoofasa maridanoo auquanno.

<sup>33</sup> Kafaa mifa amiqira ooni ateekeemaria irirana faqa koorannai mi oonina quqarana amaaqa auqira irirana faqa saqarisaa oosana oosana ainaina amana auqira irirana faqa amiqaiфанoo auqaanno.

<sup>34</sup> Ooqooriabana Aqisamakana amaaku Dannana oosanakinaana faqa Yaaweefa inniki quqaqaiфанoo mifa faqa Beesareerana dadaaqianifeera maridanoo. Yaaweefa miqanda akaqausa uqannifiqaqee irirana faqa nimirau.

<sup>35</sup> Yaaweefa oosana oosana ainaina nisaukunnai auqarana akoofasaikirana nimaqifaqa maridaqa. Oonisaa akararirana faqa oosana oosana amiqira akara rira irirana

faqa amiqira qamunna afundara irirana faqa sipsipa asaasi dirindaasi akiranannoo faqa pannoonna akiranannoo faqa faeena akiranannoo faa akaqa qamunna auqira irirana faqa niminoo. Nimisaifaqa miqanda oosana oosana ainaina auqira irirana akoofasa qara maridaqa.

### 36

<sup>1</sup> Mooseefa Isaraee maqannaasa qima nimidanoo qinuu. Beesareerana faqa Ooqooriabana faqa miqanda dadaaqi marusa oosana oosana ainaina auqirana akoofasaikira irirana Yaaweefa nimiqoosa aiqama ainaina Yaaweefa naamua qundee kai masee naaquqara uiqaana maqa auqaaqa.

*Faiqi anaasee moomoo ainaina maree aniqau.*

<sup>2</sup> Miqi qimaseenoo Mooseefa Beesareerana faqa Ooqooriabana faqa Yaaweefa aiqama ainaina auqira irirana akoofasaikira nimimaru fasiqausa faqa naarama quqaseenoo qimanniminau. Doo innee oosana arasee auqaaqa.

<sup>3</sup> Isaraee maqannaasa Yaaweena amideequu ainainausa mini soo fanoo Mooseefa mi ainainira fasiqausa nimufaqa auqimariqau. Faiqi anaasee eedoo qimasaida aiqama kananaana Anutuna amidee quu ainainausa kaqikai maraidaqa Mooseefunnai munu quqee mariqau.

<sup>4</sup> Naaquqara maqa usakee marusa moomoo ainaina qafamasee nariqa ainainirana minnisee Moosee finnai oonuree qimamiqa qiqau.

<sup>5</sup> Faiqi anaasee moomoo ainaina aabaa faqa maree anidammia. Yaaweefa maasara auqaaqee qimaqaina amana minisee aabaa faqa minisaafannoo kaqi fifau mariannoo.

<sup>6</sup> Mooseefa mina iriseenoo ufa quqasoofaqa aiqamausa qimannimiqa qiqau. Faiqi anaasee sia moo fannoo kafaa moo ainaina naaquqara uiqaana maqa usakaaqee maree aniaqa. Miqi qimasee qimanimufaqa faiqi anaasee mina iriseeqa sia kafaa maree aniqau.

<sup>7</sup> Indaaruu mini qoo ainainausa aiqama ainaina taikarana amana faqa fiqaramasee aabaa faqa maree aniqau.

*Misa Anutuna uiqaana maqa usakaqau.*

*(Raf 26:1-37)*

<sup>8</sup> Irirana kaaqa fiqararausa kai indaaruuqaa qamunna uiqaana maqasaa akirana auqiqau. Sipsipa asaasi dirindaasi akirana faqa pannoonna akirana faqa faeena akirana faqa sufusee amiqira qamunna auqusee aqoosa faqaa aandaau amana auqusee minasaa atooqasee akuniqau. Miqimmaseeqa minauqannai qisaukuqara taikasee 10 firaa qamunna auqusee moodaanaki akuniqau.

<sup>9</sup> Mi aiqama qamunnausa amana amana kai 12 metres kisaqa mina qusa 2 metres mariani.

<sup>10</sup> Mi qamunnausa moodaannai qisauku 5 marasee ootupamasee akuniqau. Dinni qisauku taikasee 5 faqa miqikai iqau.

<sup>11</sup> Miqimmaseeqa mi qamunna qanda atiqara dirindaasi arira qamunnannai anaanu auqusee moodaanaki ootupaqau.

<sup>12</sup> Firaa qamunna ati mau anaanu 50 auqiqau. Moo qamunna faqa miqi kai iqa moo qamunna saa qaraa anaanu amummaqa kai auqiqau.

<sup>13</sup> Kooraa qumaree turimmandee qusa tafara foora saaeemma qumaree dinni dinni anaanuki upeekasoofanoo mi qamunna qanda moodaaraa maqi inoo marinuu.

<sup>14</sup> Uuqaana maqasaa akira qamunna firaa mimmi asausinnai 11 auqiqau.

<sup>15</sup> Misa aiqama moodaa karirana kai auqiqau. Mina kisaqa 13 metres amana marianoo mina qusa fannoo 2 metres amana marinuu.

<sup>16</sup> Mi qamunnausa moodaannai qisauku taikasee 5 qamunna akunusoofanoo moodaa qamunnaika mafinau. Kafaa moodaannai qisauku taikasee dinni ani moodaa marasee 6 narisaa narisaa akunusoofanoo firaanaikinau.

<sup>17</sup> Qamunna atimau anaanu 50 akuniqau. Moo atimau faqa mina amummaqa kai akuniqau.

<sup>18</sup> Booroosannai tafara foora ati saaeemmasee 50 auqusee minannoo dinni dinni anaanuki aususee ootupamasoofanoo moodaa qamunnara foora marinuu.

<sup>19</sup> Kafaa misa uiqaana maqa akuamaqara qamunna sipsipa akoona apata faeena akiranannai moo auqiqau. Inaaqianna amuaaqa akirana ooruku nammarikinnaa aandaau apatannai auqirafa marinuu.

<sup>20</sup> Misa akasia saqarinnai kai naaquqara uiqaana maqa atuna auqusee kuradaqau.

<sup>21</sup> Maaqi mandee maaqa atuna auqiqau. Saqari dinni dinni kuradarafa 4 metres marinuu. Mina ausana qusa 66 centimetres amana kai auniriqau.

<sup>22</sup> Aiqama atuna maqaki rakiqaranara irisee ati ooqiqaramasee ateeqaqau. Aiqama maaqa atuna miqi kaimasee ateeqaqau.

<sup>23</sup> Misa suani afu ataaqeenni south kisaaqandanai maaqa atuna 20 narisaa narisaa apamandee kuradaqau.

<sup>24</sup> Maaqa atuna oosana sia maqaki kaqi rakiqau. Siruaannai amaaqa auqusee minaki kuradaqau.

<sup>25</sup> Misa uigaana maqa suani dinni ataaqeenni north kisaaqandanai maaqa atuna 20 narisaa narisaa apamandee kuradaqau.

<sup>26</sup> Maaqa atuna sia maqaki kaqi rakiqau. Siruaannai 40 amaaqa auqusee minaki maaqa atuna kuradaqau.

<sup>27</sup> Suani keeqemari qaannai west uigaana maqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auqiqau.

<sup>28</sup> Maaqa dinni dinni munu raqaranaki kafaa qaaraqanda auqusee kuradaqau.

<sup>29</sup> Raudaranaki maaqa atuna oosana kisaaqandanai apammasee kuradama soofanoo amiqimasee narisaa narisaa apinoo marinau. Maaqa atuna rakiqarana oosana rumba atukarasee miqi kai mamaree mirinni murufi saqau. Dinni dinni munu raqaranaki miqi kaimmiqau.

<sup>30</sup> Miqimmaseeqa maaqa atuna 8 oosana siruaannai qaaraqanda qaaraqanda amaaqa auqusee 16 marinau.

<sup>31-32</sup> Misa aunirifandinnana akasia saqari 15 maraqau. Uigaana maqa dinni dinni ataaqee faqa uruanai faqa faifa faifannoo aunirumasoofofanoo maaqa atukarama qumaranau.

<sup>33</sup> Mi maaqa atunna aunirira saqari fannoo maaqa amana kai dinni dinni ati marinau.

<sup>34</sup> Maaqa atuna aiqama koorannai kai rafaqa fiqau. Maaqa atunamau aiqama koorannai kai anaanu mamaree fiqau. Aunirifandinna saqaris faqa koorannoo mi anaanusaki rafaqa fiqau.

<sup>35</sup> Misa sipsipa asausi dirindaasi akirana faqa pannoonna akirana faqa faeena akirana faqa sufusee minannai amiqira qamunna auqiqau. Miqimmasee mi qamunnasaa angiroo niqoosa faqaasa nimana auqiqau.

<sup>36</sup> Mi qamunnana diriane qimasee qaara faqa qaara faqa 4 atuna akasia saqari atekasee koorannai rafaqafusee kuradaqau. Mina atimau koorannai qamunna dirifandinna anaanusaa auqiqau. Mi saqaris oosana siruaannai amaaqa auqusee minakiaqa kuradaqau.

<sup>37</sup> Uigaana maqa kooqi ititeefandinna qamunnana sipsipa asausi dirindaasi akirana faqa pannoonna akirana faqa faeena akiranannai faqa marasee kooqi dirifandinna amiqira qamunna auqiqau. Oosana oosana sandannai mooka maakira ainainauqa mi qamunnasaa auqiqau.

<sup>38</sup> Mi qamunnana dirifandinna moodaannai qisauku 5 akasia saqari marasee koorannai mina atimau rafaqafusee qamunna dirifandinna anaanu auqusee quqaqau. Mi atunnana qumaraanifeera koorannai saqari kukuqamasee atimau auniriqau. Miqimmasee booroosannai moodaannai qisauku 5 atuna oosana amaaqa auqusee minaki kuradaqau.

## 37

*Innee moodaanaki kira ufa mari bookisana auquaqa.*

*(Raf 25:10-22)*

<sup>1</sup> Beesereerafa nari dadaaqi marusa faqa akasia saqari marasee minannai moodaanaki kira bookisa auqiqau. Mina kisaqa 110 centimetres auqiqau. Mina qusandanai faqa mina kuradarafa faqa amana amana kai 66 centimetres amana auqiqau.

<sup>2</sup> Misa amiqira koor marasee turimmasoofofanoo ausirumafuqa minannai kai bookisa adisaa faqa aundurai faqa ititaqau. Mi bookisana afaimau koorannai amatookika masee rafaqafiqau.

<sup>3</sup> Misa koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaqau. Dinni aikusaa qaara qanda dinni aikusaa qaara qanda quqaqau.

<sup>4</sup> Misa akasia saqari qaindusi fandinna qanda koor turimmandee ausiruma qumaree minannai kukuqiqau.

<sup>5</sup> Kukuqammaseeqa dinni dinni amaaqa auquqoonaki ausiqau.

<sup>6</sup> Bookisa afu faqa koorannai kai auqiqau. Mina kisaqa 110 centimetres amana marinau, mina qusa 66 centimetres amana marinau.

<sup>7</sup> Misa koor turimaseeno bookisa afu auquseeqa minannai kai dinni dinni qangiroo qaaraqanda nimana auqiqau.

<sup>8</sup> Afu dinni atinni moo qangiroom amana auqusee dinni moo qangiroom amana auqigau. Afu faqa mi qangiroom qanda nimana faqa moodaa koorannai kai auqigau.

<sup>9</sup> Mi qangiroom qanda bookisa afusaa quqasoofaqa noori nari qafee nari qafee iqa mariqau. Miqanda niqoosa uqerasoofanoo bookisa afusaa ititanoo marinau.

*Misa aiku faqaa teeboora auqusee Yaaweena amiraree qu feemuna miqoo quqaqau.*  
(Raf 25:23-30)

<sup>10</sup> Beesareerafa akasia saqarinnoo teeboora auqinau. Mina kisaaga 88 centimetres marinau. Mina qusa 44 centimetres marinau. Mina kuradarafa 66 centimetres marinau.

<sup>11</sup> Mifa amiqira kooraa marasee turimmasoofanoo ausiruma fufanoo minannai teeboora rafaaga fusee kafaa moonnai teeboora atiqara fiqumma rafaaga finau.

<sup>12</sup> Mifa teeboora atiqara fiqumma 8 centimetres amana ititasee mina afaimau koorannai rafaaga fiqau.

<sup>13</sup> Mifa koorannai qaindusifandinnana amaaqa 4 auqusee teeboora aiqama aiku namusaa quqanau.

<sup>14</sup> Teeboora afai ameemaanandanai qaindusirana amaaqa auqinau. Mifa mi anaanusa afai ameemaanai ququseenoo atukaranau. Atukarasainaqa aindusira saqari minaki ausuqeeera atukaranau.

<sup>15</sup> Mifa akasia saqari qaindusifandinna qanda koorannai kukuqinau.

<sup>16</sup> Mifa amiqira koorannai kai teeboorasaa quqeefandinna pirita kaafausa faqa kisaaga kaafauqa faqa Yaaweena amifandinna uainna adiaara pirita uqnaurirana faqa auqigau.

*Misa qooma qumbifandinna aikana auqigau.*  
(Raf 25:31-40)

<sup>17</sup> Misa qooma qumbira aika amiqira koorannai auqigau. Misa kooraa turiiseega minannai kai qooma qumbira aika oosana faqa adaka faqa asaanauqa faqa auqigau. Mi asaanausa saa mi koorannai kai taatuqee aqama afufeenaari marindee maseega kaafara foora afisu amaqaqau.

<sup>18</sup> Mi qooma aikausa qisauku dinni taikasee dinni ani moodaa marasee 6 marinau. Dinni qaaramoo dinni qaaramoo marinau.

<sup>19</sup> Aiqaama mi asaana namuna atimau koorannai taatuqee aqama afufeenaari marindee masee afaaga auqigau. Mi afufeenaarirafa teeqnoorina aqamara foora marufaqa mi asaana namuna saa auqigau.

<sup>20</sup> Mina adaka saa qaara faqa qaara faqa 4 saa taatuqee aqama teeqnoorina aqamara foora auqigau.

<sup>21</sup> Moodaa aqama indaaruuqa asaana qara ameemaanai marinau, kafaa mina murufi asaana qara ameemaanai moo aqama marinau. Kafaa mina murufi asaana qara ameemaanai moo marinau.

<sup>22</sup> Amiqira kooraa turiiseega minannai kai qooma oosana faqa asaanauqa faqa afufeenaarirana faqa auqigau.

<sup>23</sup> Misa amiqira koorannai qoomauqa dinni taikasee dinni ani qaara marasee 7 qooma auquseega mi asaanausa atimau quqaqau. Mina ufaqa faqa danda afaqee mariana faqa auqigau.

<sup>24</sup> Qooma quqara aika amiqira koorannai 34 kilogram umaara amana kai marasee auqigau.

*Amiqira undimari munana suqara qainda auqigau.*  
(Raf 30:1-5)

<sup>25</sup> Misa akasia saqari marasee amiqira afundi mari ida munana areefandinna aidarana auqigau. Mi aidarafa dinni dinni amana kai marinau. Mina kisaaqandanai 45 centimetres marinau. Mina qusandanai miqi kai inoo 45 centimetres marinau. Maqasaa qari ooru firafa 90 centimetres marinau. Mina qara qaara faqa qaara faqa ati moodaa saqarinna kai burimakau aanaira foora auqigau.

<sup>26</sup> Mina afu faqa aanai fooqaana faqa ataaqee qara faqa amiqira koorannai kai rafaaga fusee koorannai mina fiqumma auqigau.

<sup>27</sup> Koorannai qaaraqanda anaanu auqusee dinni moo dinni moo quqasoofanoo qaindusifandinna saqarina atukaramma qumaranau.

<sup>28</sup> Mi qaindusira saqari qanda akasia saqarinna auqusee koorannai rafaaga fiqau.

<sup>29</sup> Misa naaquqara fadameenna Yaaweenaindi fee qimasee nikiqqa amoondunna adiee fandinnana auqigau. Idaki quqasaafanoo adiafaa ira undimari pauraqara amiqira undimari fadameennara foora auqigau.

## 38

*Misa fadameena faqa pauraqa faqa amiqira ida muna undianifeera auqigau.*  
(Raf 27:1-8)

<sup>1</sup> Beesareerafa akasia saqari marasee minannai tatufirana suqara qainda auqinau. Mina kisaagandanai faqa qusandanai faqa amana amanakai 2.2 metres marinau. Maqa saaqari kuradarafa qaara faqa qaara faqa 4 amana 1.3 metres marinau.

<sup>2</sup> Mina qaara faqa qaara faqa 4 atisaa aanaira foora auquqoofanoo marinau. Tatufira qainda moodaa saqari fannoo kai atimau faqa qambaana faqa aanai faqa moodaa saqarinnai kai auquqoofanoo marinau. Mi aiqama ainainausa booroosannai rafaafaq finau.

<sup>3</sup> Mi tatufirana suqee maria qaindasaa suqee maria ainainausa booroosannai kai auqinau. Danda afaqara futufitauqa faqa savoorauqa faqa uqnaurira piritauqa faqa tafa fooqaa irana ati saae irana faqa ida qauni afaqee maria futufitauqa faqa aiqama booroosannai kai auqinau.

<sup>4</sup> Mifa fukaasaana booroosannai auquseenoo tatufira bookisa aundurairi kasaqaai ooqeeqasee qambaana quganau.

<sup>5</sup> Tatufira qainda atiqara anaanu qaara faqa qaara faqa 4 auquseeqa bookisa atiuqasaa rumbaqa. Misa aindusi fandinna saqari qanda upeekaaqee rumbaqa.

<sup>6</sup> Mifa akasia saqari tatufira qainda aindusifandinnana qaaraqanda maraseenoo booroosannai miqanda rafaafaq finau.

<sup>7</sup> Mifa akasia saqari marasee anaanu auquqoonaki ausinai. Tatufira qainda indooira saqarinnai kai aundura faqaana auqinai.

*Firaa pirita nammari auqee fandinnana auqinai.*  
(Raf 30:18)

<sup>8</sup> Uigaana maqa kooqiki dadaaqi maru aanaaseesa nariqa booroosannai auquqoo tanukana Beesareerana amufanoo minannai nammari auqara difaanina faqa mina oosana faqa auqinai.

*Yaaweena uigaana maqa dapu auqu fiqiu fiqiu iqau.*  
(Raf 27:9-19)

<sup>9</sup> Amiqira sanda sufusee auquqaa qamunnaannoo uigaana maqasaa ququsara foora auqu ititanau. Suani afu dinni ataaqeeni (south) mina kisaaga fannoo 44 metres marinau.

<sup>10</sup> Mi qamunnana dirifandinnana booroosannai dapu 20 auqusee mina kuradeefandinnana amaaqa miqi kai masee 20 auquseeqa siruaannai tafara foora mina amana kai auqusee aunirifandinna saqarina faqa minannai kai auqigau.

<sup>11</sup> Suani afu dinni ataaqeeni undee kai iqa dinni ataaqeeni faqa miqi kai miqau.

<sup>12</sup> Suani keeqee maru qaannai dapu qusandanai mina kisaaga 22 metres marinau. Mina dapu saqari 10 faqa mina amaaqa auqirafa faqa 10 kai marinau. Qamunna dirifandinnana tafarafoora iranauqa faqa aunirifandinna saqarisaa faqa siruaannai kai auqigau.

<sup>13</sup> Suani oosana qaannai kooqi marutinai aqa uruanai inoo maruna amana kai 22 metres marinau.

<sup>14-15</sup> Mi kooqina dinni dinni dirifandinna qamunnafa 6.6 metres marinau. Mi kooqina dinni dinni qaaramoo dapu faqa mina amaaqa faqa dinni dinni qaaramoo faqa mina amaaqa faqa marinau.

<sup>16</sup> Aiqaama qamunna dapusaa dirinoo marufa amiqira qamunna kai auqirafa marinau.

<sup>17</sup> Aiqaama dapu fiqiu fiqiu irafa siruaannai rafaafa fuqaa saqarinasaa ootupanoo marinau. Minasaa qamunna dirifandinnana tafara maqi iranauqa siruaannai kai auqigau. Mina dapu atimau faqa siruaannai kai rafaafa fiqau. Mi saqarisaa rakiqefandinnana amaaqauqa booroosannai auqigau.

<sup>18</sup> Kooqisaa ititara qamunna amiqirafa marinau. Misa sipsipa asaasi dirindaasi akirana faqa pannoona akirana faqa faeena akiranannai faqa sufusee mi qamunnana auqigau. Auquseeqa amiqira sandannai oosana oosana ainaina amana auqigau. Mi qamunnana kisaaga fannoo 9 metres marinau. Mina qusa fannoo 2.2 metres marinau. Mi kooqina qamunna dapu rakiqarana amana kai marinau.

<sup>19</sup> Misa mi qamunnana dapu saqari qaara faqa qaara faqa kooqiki rakiqaranasaa diriqau. Mi dapusa oosanaki booroosannai amaaqa auqusee minaki rakiqau. Mi dapusa ati rafaafaqirana faqa auni rumaqaa saqarisaa faqa tafara foora iranauqa faqa siruaannai kai auqigau.



<sup>20</sup> Uuqaana maqa atimau apupuka arifandinna aikausa booroosannai kai auqigau. Uuqaana maqa dapu rakiqarana qumaraanifee qimasee apupuka aqoosai faqa afuqai faqa aruqaafa aiqama booroosannai auqira apupuka kai marinau.

*Misa koora faqa siruaa faqa booroosa faqa marasee Yaaweena uuqaana maqaki minannai ainaini mariqau.*

<sup>21</sup> Yaaweena uuqaana maqaki qaara oonisaa qisaukuqara 10 sanda ufa akara rirafa marinau. Mi maqanaki ainaini maruna koora faqa siruaa faqa booroosa faqa marinau. Aanaiqikirana Aaroonaa amaaku Itamarafa Reefina aiku asaku qimannimi marufauqa misa mi koora ainainausa asaana rumasee akara rimariqau.

<sup>22</sup> Beesareerafa Urina amaaku Hurana anaiqi Yudana ati marufa mifa aiqama ainaina Yaaweefa Mooseena qimamundee kai masee auqinai.

<sup>23</sup> Mina dadaaqi marufa Ooqooriabafa marinau. Mifa Aasamakana amaaku Dannana ati marinau. Mifa oonisaa oosana oosana ainaina amana auqi marufa marinau. Mifa sipsipa asaasi dirindaasi akiranannai faqa pannoonaa akiranannai faqa faeena akiranannai faqa amiqira sanda sufusee amiqira qamunna auqimarufa marinau. Kafaa mifa oosana oosana ainaina amana auqirana akoofasa marinau.

<sup>24</sup> Aiqaama koorauqa naaquqara uuqaana maqa usakarara Yaaweena amidee qufa mina ummaara uuqaana maqakinaa ainainauqa amana masee qafee maru sikeerana amana 998 kilogram maree aniqau.

<sup>25-26</sup> Aiqaama fasiqauqa 20 aukwana faqaasa nuqu marasoofaqa misa nambaqa 603, 550 fasiqauqa takisa munnimma aqi mariqau. Mi takisana aqusoofaqa mi siruaana qumaree uuqaana maqa sikeeranaa diriseeqa qafoofanoo 3,430 kilograms marinau.

<sup>27</sup> Maaqa atuna oosana amaaqa auqirafa 100 marinau. Mi siruaana moodaanaki asaana rumasoofanoo 3,400 kilograms marinau. Naaquqara uuqaana maaqaki qamunna diri maru saqarisa rakiqarana amaaqa faqa maaqa atuna rakiqarana amaaqa aiqama moodaa moodaa 34 kilograms kai marinau.

<sup>28</sup> Miqimmaseeqa akaqa siruaa 30 kilograms amana kaqi marunannoo aunirira saqari faqa atuna rakiqarana ati mau faqa qamunna dirirana tafara maqi irana faqa auqigau.

<sup>29</sup> Yaaweena amu booroosana umaara fannoo 2,425 kilograms marinau.

<sup>30</sup> Mi booroosanannai Yaaweena uuqaana maqa kooqi saqari rakiqarana amaaquqa auqigau. Aandau tatufira qainda faqa mina fukaa asaana faqa minaki suqee maru ainainausa faqa minannai kai auqinai.

<sup>31</sup> Dapu saqari rakiqarana amaaquqa faqa kooqi saqari rakiqarana amaaquqa faqa uuqaana maaqa apupukaqa faqa dapu fiq fiq irana apupukaqa faqa aiqama mi booroosanannai kai auqigau.

## 39

*Aanaiqi kirausa qamunna auqigau.  
(Raf 28:1-14)*

<sup>1</sup> Misa sipsipa asaasi dirindaasi akirana faqa pannoonaa akirana faqa faeena akirana faqa marasee aanaiqikirausa naaquqara oosiranaki ainainiaqeera amiqira qamunna auqigau. Aaroonaa aanaiqikira qamunna faqa Yaaweefa Mooseena qimamundee masee auqigau.

<sup>2</sup> Misa sipsipa asaasi dirindaasi akirana faqa pannoonaa akirana faqa faeena akirana faqa koora sanda faqa sufuseeqa eefooda qamunna auqigau.

<sup>3</sup> Misa koora turiisoofanoo adamaanaika mafufaqa tiritandara foora aukiseeqa sipsipa asaasi dirindaasi akirana faqa pannoonaa akirana faqa faeena akirana namu faqa sufuseeqa amiqira qamunna auqigau.

<sup>4</sup> Eefooda qamunna anaanu qaaraganda fannoo aururusaa aakandianinnana auqusee eefooda qamunnasaa dinni dinni rumbaqa.

<sup>5</sup> Mina ooiqanda ianinnana amiqira qamunnannai eefooda qamunna auqundee kai masee auqigau. Mifa eefooda qamunnasaa akunirafa marinau. Yaaweefa Mooseena qimamundee kai iqa.

<sup>6</sup> Eefooda anaanusaa akumaaqa ooni qaaraganda pupu ooni marasee dinni aanaanusaa moo dinni aanaanusaa moo quqasee Yakooboona faiqi namu qisaukuqara taikasee qikunni ooqu qaara marasee nuqu mi ooni qandasaa akara riqau.

<sup>7</sup> Miqimmasee aururusaa eefooda qamunna aakandammasoofanoo Yakooboona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

*Nimuqusasaa rumbara qamunna auqigau.*

*(Raf 28:15-30)*

<sup>8</sup> Eefooda qamunna auqu ainainausannoo kai amuqusasaa rumbara qamunna auquseeqa moodaa karira akara kai riqau.

<sup>9</sup> Mi qamunnana tukaandasoofanoo aiqama ati amana amana kai 22 centimetres marinau.

<sup>10</sup> Misa ooni amiqirana firaa feefauru aqimariana kai marasee qaara faqa qaara faqaki mi qamunnasaa padiqau. Indaaruaa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiqau.

<sup>11</sup> Mina aanaaqianna padiranaki moo ooni auqu eemeerara faqa moo ooni auqu safairee faqa moo ooni auqu daimanna faqa minamunannai padiqau.

<sup>12</sup> Miqanda muqufi padiranaki moo ooni auqu teerakoisa faqa moo ooni auqu agatee faqa moo ooni auqu ameetisa faqa minamunannai padiqau.

<sup>13</sup> Inaaqiana atimau padiranaki moo ooni auqu beerira faqa moo ooni auqu kanirianna faqa moo ooni auqu yasapaa faqa minamunannai padiqau. Mi oonisa koorandannai amuqusasaa maru qamunnasaa isooqa araqau.

<sup>14</sup> Mi oonisa moodaa moodaa ooni fannoo Yakooboona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

<sup>15</sup> Misa nimuqusasaa rumbarana aanaanu amiqira koorannai auqira sandannai seenandara foora auquseeqa moodaanaaki quqasee afundasee dinni dinni ati saa qusiqau.

<sup>16</sup> Koorannai anaanu qaara qanda auqusee amuqusasaa rufuaninna qamunnana mirinni atisaa qara qusiqau.

<sup>17</sup> Qaaraqanda seenanda koorannoo afundaranannai mi anaanu qandaki qusiqau.

<sup>18</sup> Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasoofanoo aururusaa eefooda qamunnasaa rumbanau.

<sup>19</sup> Kafaa nimuqusasaa rufimariana anaanu qaara qanda koorannai auqusee aunduraindari atisaa mi anaanuna rumbasoofanoo eefooda qamunna mammaaqai marinau.

<sup>20</sup> Kafaa qaaraqanda aanaanu koorannai auqusee afunni qumu maru eefooda qamunnasaa aqaasanai amiqira qamunnannai sufirana ooiqandi maruna aakaariqara rumbaqa.

<sup>21</sup> Nimuqusasaa diri maria qamunnasaa anaanuki dirindaasiandannai sufira sanda usuaki eefooda qamunnasaa qaraa anaanuki ususee rumbaqa. Miqimmasoofanoo amuqusasaa ititara qamunna sia kasi kasinai. Yaaweefa Mooseena qimamundee kai iqau.

*Innee akaqa qamunna aanaiqi kirausaindi auquqa.*

*(Raf 28:31-43)*

<sup>22</sup> Misa eefooda qamunna meeaaqoo qaraana auqirara dirindaasi akira sipsipa asausinai kai qamunna kisaaga auqigau.

<sup>23</sup> Misa anuka amaaqa auqigau. Qamunna raqandaammasee akunusoofanoo anuka upeekoofanoo sia anaqinai.

<sup>24-26</sup> Mina ati mau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusiqau. Dirindaasi akira sipsipa asausi faqa pannoona akiranannai faqa faena akiranannai mi saqari aqamana amana auqigau. Auquseeqa mi saqari aqamana aqa koorannai auqira biru faqa qamunna atimau moo mafi quqee moo mafi quqee iqau.

<sup>27-29</sup> Misa sipsipa asusi dirindaasi akirana faqa pannoona akirana faqa faena akirana faqa tiritu uqanna namu faqa sufusee Aaroona nari faiqinamu siutauga faqa Aaroona uriqarara qata faqa mina faiqinamu kaqikaa qatauga faqa auqigau. Auqusee ooiqanda ianinnana minannai kai auquseeqa oosana oosana akarannoo afaaga auqigau. Miqim-maseeqa misa tarausisa tiritu uqannannai auqigau. Yaaweefa Mooseena qimamundee kai iqa aiqama ainaina auqigau.

<sup>30</sup> Misa amiqira koorannai niqinaaga rumbeemaru doodapaaninara foora auqusee minasaa Anutunaindi fee qimasee akara riqau.

<sup>31</sup> Misa doodapaani dirindaasiandannai auqirana marasee qatasaa quqasee akuniqau. Yaaweefa Mooseena qimamundee kai iqau.

*Doo aiqama saika taikanau.*

*(Raf 35:10-19)*

<sup>32</sup> Miqimasee Yaaweena uqaana maqa taikaqa. Isaraeena aiku asauku Yaaweefa Mooseena qimamundee kai aiqama ainaina iqau.

<sup>33</sup> Misa uqaana maqa faqa mina rafaaga fimaria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa

rakiqee fandinna saqarisa faqa saqari maqaki rakiqarana amaaqa auqirana faqa maree Mooseefa marunnai munu quqaqau.

<sup>34</sup> Sipsipa akoona apata faena akirana minannai uqaana maaqasaa akirana faqa ooruku nammarikinaa aanda apata uqaana maqasaa akirana faqa kaaqa naaquqara oosiranaki ititara qamunna faqa maree munu quqaqau.

<sup>35</sup> Misa moodaaniki kira bookisa qaara ooni minaki maruna faqa mina afu faqa mina qaindusira saqari qara faqa maree munu Mooseefa unnai quqaqau

<sup>36</sup> Misa aiku faqaa qainda faqa minasaa mari ainainausa faqa Anutuna afusaa quqara feemu faqa maree munu quqaqau.

<sup>37</sup> Misa amiqira koorannai auqira qooma saqari faqa mina qoomauqa faqa mina oosana oosana ainainauqa faqa mi qoomausa fadameena faqa maree munu quqaqau.

<sup>38</sup> Koorannai auqira aidara faqa Yaaweenaindi fee qimasee utaaqama amaqasee adia nimaqee maria fadameenna faqa afundi mari pauraqana faqa uqaana maqaki kooqi ititara qamunna faqa maree munu quqaqau.

<sup>39</sup> Booroosannai auqira aidara faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari adiee maria difaanina faqa mina oosana faqa maree muna Mooseefa unnai quqaqau.

<sup>40</sup> Dapu qamunna faqa dapu faqa dapu oosana amaaqa auqirana faqa dapu kooqi qamunna faqa dapu sanda faqa apupuka faqa aiqama ainaina naaquqara uqaana maaqa aundurai auqee maria ainainausa faqa maree munu Mooseena uqafiqaqau.

<sup>41</sup> Minauqa munu uqafiqaseeqa Aaroonaa naaquqara qamunna faqa nari faiqi namundi faqa naaquqara maqaki ainainidaqa afisifandinna qamunnana amiqirana munu Mooseena uqafiqaqau.

<sup>42</sup> Isaree maqannaasa Yaaweefa Mooseena qimamundee kai masee aiqama ainaina auqaqau.

<sup>43</sup> Mooseefa aiqama ainaina aiqqu masee qafamaseenoo Yaaweenaa irirana mau kai auqeeafuu qimaseenoo amiqi amiqimma nimaqanau.

## 40

### *Uqaana maqa usakasee Yaaweenaa utaaqama amaaqaa.*

<sup>1</sup> Yaaweefa Mooseena qimaminoo qinuu.

<sup>2</sup> Indaaruuqaa quqoonasaa indaaruuqaa faasaana innee qini naaquqara uqaana maqa oosana arasee usakaaqa.

<sup>3</sup> Moodaanaki kira bookisaki qisauquqara taikasee 10 sanda ufa marina kaaqa naaquqara oosiranaki quqasee ititee fandinnana firaa qamunna marasee minasaa ititaaqa.

<sup>4</sup> Aikufaqa qainda maree mini quqaseeqa minasaa ainainifandinna ainainausa minasaa mini quqaqaa. Qooma saqari faqa mini quqaseeqa mina qoomauqa mina ati mau quqaqaa.

<sup>5</sup> Quqaseeqa koorannai auqira aidara amiqira afundi mari pauraqana suqee mariana mareeqee maamiqoo oosiranaki moodaanaki kira bookisa amummaqa quqaqaa. Quqaseeqa kooqiki ititee maria qamunnana maraseeqa kooqiki diriaqa.

<sup>6</sup> Qaidara firaa aanda tatufirana suqee mariana uqaana maaqa kooqi amummaqa ququsaki quqaqaa.

<sup>7</sup> Kafaa nammari difaani mareeqee maaqa kooqi dinni firaa qaidara dinni qambaana quqasee nammari adia umbiqaqaa.

<sup>8</sup> Ququsa dapu uqaana maaqa aru fiq fiqumma datimasee kooqiki qamunna diriaqa.

<sup>9</sup> Yaaweefa Mooseena kafaa qimaminoo qinuu. Qini naaquqara fadameena maraseenana uqaana maaqa faqa minakinaa aiqama ainaina qini utaaqama qimaqaranasaa rurufa masainanoo naaquqanoo mariani.

<sup>10</sup> Miqimmaseenana firaa aidara aanda tatufirana suqee mariana faqa minasaa qaraa ainainauqasaa faqa mi fadameenna rurufa masainanoo kaaqa naaquqanoo mariani.

<sup>11</sup> Nammari difaanisaa faqa mina oosanasaa faqa miqi kai iaqa.

<sup>12</sup> Miqi masee Aaroonaa nari faiqi namu faqa nifiqamaree uqaana maqa kooqiki munusainaaqaa nammari auqaqaa.

<sup>13</sup> Auqamasaiwana aanaiqikirausa qamunna marasee Aaroonaa afisu amaqasee qini utaaqama qimaqara fadameena akiqaa amoondunna rurufammasainanoo naaquqanoo maridanoo qini aanaiqikira saikaki mariani.

<sup>14</sup> Mina faiqi namu nifiqee miniseenana aanaiqikirausa qamunna afisu nimaqaa.

<sup>15</sup> Miqi maseenana Aaroonan inana mina faiqi namu faqa fadameena nikiiqa amoonnunna rurufamma nimaqaa. Miqimmasainaqaa qini aanaiqikira saikaki mariaqa. Mi fadameenafa misa naaruara qini aanaiqikira saikaki marirana nimiannoo.

<sup>16</sup> Mooseefa aiqama ainaina Yaaweefa qimamundee kai masee auqanau.

<sup>17</sup> Isipa maqa maaqa kiqari anukari moo aukwana aiqarooqaqa moo aukwana indaaruga uqoona mina indaaruga faasaanasa Yaaweena naaquqara uqaana maaqa usakaqau.

<sup>18</sup> Mooseefa qufaqa uqaana maaqa atuna amaaqauqa maqaki quqaseeqa maaqa atuna minakiaqa kuradamasee ausana auni rumasee kooqindana'i atuna faqa rakiqau.

<sup>19</sup> Rakiqaseeqa indaaruga qamunna qairi akuseeqa mina amuaqa qaaramoo mina rafaafuunifeera qairi akiqau. Yaaweena ufamau kaimbiqau.

<sup>20</sup> Mooseefa sanda ufa akararira ooniqara bookisaki quqaseenoo mina aindusira aikaqara anaanuki upeekaseenoo mina nifauara afu rafaafinau.

<sup>21</sup> Rafaafuseenoo mi bookisana mareeqeenoo uqaana maqaki quqaseenoo qamunna qumareenoo dirisoofanoo minasaa itita maqanau. Yaaweena ufamau kai miqinau.

<sup>22</sup> Mooseefa aiku faqaa teeboora mareeqeenoo naaquqara oosiranaki suani afu dinni ataaqeeni North quqanau.

<sup>23</sup> Quqaseenoo mi teebooranasa Yaaweena amiraree qu feemuna quqaqoofanoo marinau. Yaaweena ufamau kai finau.

<sup>24</sup> Miqi maseenoo Mooseefa qooma saqari uqaana maqaki suani afu dinni ataaqeeni (South) maaqa atuna mammaaqai quqanau. Dinni taatatai aiku faqaa teeboora quqasee dinni taatatai qooma saqari quqanau.

<sup>25</sup> Yaaweefa qumi maru uqaana maqanaki qooma saqari quqasee qumbisoofanoo qanau. Yaaweefa qimamundee kai inau.

<sup>26</sup> Miqi maseenoo Mooseefa koorannai auqira qaidara mareeqeenoo uqaana maqa maamiqoo oosiranaki ititaqoo qamunnana aqa quqanau.

<sup>27</sup> Quqaseenoo mifa amiqira afundimaruna andaana rirana quqaseenoo idaranau. Yaaweena ufamau kai finau.

<sup>28</sup> Mifa uqaana maqa kooqiki qamunna d irinau.

<sup>29</sup> Diriseenoo tatufirana suqee maru qaidarana uqaana maqa kooqi amummaqa madaana'i quqanau. Quqaseenoo Mooseefa aanda'u tatufirana faqa sakuma fooqaa irana qaindi rirana faqa tatufinau. Yaaweena ufamau kai miqinau.

<sup>30</sup> Miqi maseenoo Mooseefa nammari difaani madaana'i qaidara mianni marufanoo uqaana maqa kooqi murunni marufanoo qambaana quqanau. Quqaseenoo nammari minaki adia qumbiqanau.

<sup>31</sup> Mi nammarinaki Mooseefa faqa Aaroonafa nari faiqi namu faqa mi nammarinaki niku nisauku nammari uqi mariqau.

<sup>32</sup> Misa uqaana maqaki keeqararee qimasee fee tatufira qaidara aqa firaree qimasee fee mi nammarinaki niku nisauku nammari uqusee fimariqau. Yaaweena ufamau kai miqi mariqau.

<sup>33</sup> Miqimma taikaseeqa Mooseefa qufaqa uqaana maqa faqa firaa qaidara faqa ququsa dapu fiqumma rakiqau. Rakiqaseeqa dapu kooqiki faqa qamunna ititaqau. Miqimmasee misa Mooseena faqa aiqama ainainirana taikaqau.

*Qasuru fannoo Anutuna uqaana maqa akiiqa amummaqa marinau.*

*(Namba 9:15-23)*

<sup>34</sup> Miqi masoofanoo qasuru fannoo uqaana maqa dukunimambufanoo Yaaweena kaqaqara daroo daraa irafa uqaana maqaki qumbiqa finau.

<sup>35</sup> Miqimmafuna Mooseefa sia uqaana maqa keeqanau.

<sup>36</sup> Qasuru fannoo uqeere'e fukari kai Isaraee maqannaasa nari uqaana maqa faqa Yaaweena uqaana maqa faqa aiqama ainaina faqa tatu maree fiqau.

<sup>37</sup> Qasuru fannoo kaqi miqoo marufaqa misa faqa kaqi miqoo mariqau.

<sup>38</sup> Isaraee maqannaasa fida marufanoo qasuru fannoo aiqama faasaana Yaaweena uqaana maqa akiaaqa marinau. Aiqaama eendaki idauruara foora mina akiaaqa marufaqa qafee mariqau. Miqinoo marufaqa fiifiufaqa Yaaweefa nimiraree qu maqa maaqanaki oonu raqau.

## **ESTA** **Estaana ufa**

*Kuinna Wasti nammarifa kinna Serkisisana mandaikamma amaqaanau.*

<sup>1-2</sup> Serkisisafa Peereesia maqa maaqaki kinna maru aukuaana mifa Susa maqusaki narí kinna siaqa ufiqiseenoo oogu marifinoo 127 maqa maaqa rakisi marinau. Suani afu uri maru qaannai India maqa maaqaki oosana araseenoo suanafu keeqee maru qaannai Itiopia maqa maaqaaki dinni ati oonu marinau.

<sup>3</sup> Mifa qaaramnoolo aukuanaki kinna maridanoo aiqama kiapausa faqa kaammanna uriqararusa faqa aiqama maqa maaqaki marusa faqa firaa oomaqa sakasaida nee marinau. Peereesia maqa maaqaki faqa Midia maqa maaqakinaa ammiuqa faqa mi firaa oomaqanaki ani mariqau. Rakisirausa faqa firaa fasiqauqa faqa aiqama maqa maaqaki marusa misa faqa mariqau.

<sup>4</sup> Mi naranafa qisauku dinni taikasee dinni oonu moodaa marasee 6 uqoonaki marinau. Marufanoo kinna fannoo narí aiqama munnimma faqa narí maaqa afaaqa auqirana faiqi anaasee quqannifiqanau. Quqannifiqasoo faqa misa mi ainainausa qafoofanoo kaaqa amiqirafa uriqaranoo uqanna marinau.

<sup>5</sup> Mina anaaiqiana kinna fanoo moo firaa oomaqa narí uqusaki narí maaqa adeedi sakanau. Mi oomaqafa aiqama Susaa maqusaki maru fasiqausa ainaina faqaasa faqa ainaina siaisa faqa misaindi marinau. Maru faqa misa moodaa amaana aundurái naida mariqau.

<sup>6</sup> Mitinai misa narana nee marunnai amiqira tida marinau. Ooqai faiqi misa taatuqee ooninnai faqa eekara ooninnai faqa dirindaasi arira ooni faqa kinnaa ooni uqa misa rarai fee qimasee auqu ree maruna mookira ooni tanukaida qeemaruna faqa maqasaa padimmaseeqa minasaa tida auqigau. Misa mi tidanasaa oomaqa naani qimasee eekara arira qamunnainai faqa dirindaasi arira qamunnannai faqa afaaqa auqusee amiqira sandannai rumbaqaofanoo marinau. Misa mi sandannannai siruaannai auqira rinna amiqira ooni pausasaa rumbaqaau. Misa miqoo koorannai faqa siruaannai faqa auqira kisaqaa siaqauqa ufiqisaidaqa minasaa oogu marifidaqa narana nee mariqau.

<sup>7</sup> Faiqi misa mooka maakira kooraa kaafaki nammari nee mariqau. Nee marufanoo kinna fannoo moomoo uainna mi fasiqausa nimi marinau.

<sup>8</sup> Sia misa neefandinnana asaana riqau. Kinna fannoo narí maaqaki ainaini maru faiqisa qimannimufaqa misa narí nidiranasaa moodaa moodaa fasiqa nammari nimi mariqau.

<sup>9</sup> Mikari Kuinna Wasti nammarifa aiqama anaaseeuqa faqa kinna maaqaki firaa oomaqa sakasee nee mariqau.

<sup>10</sup> Qisauku dinni taikasee dinni oonu qaaraganda marasee 7 faasanasaa mi firaa oomaqanaki kinna fannoo kaqi kaaqoo uqanna uainnasaa furufarinau, furufarinoo mifa narí maaqaki ainaini maru faiqisa qisauku dinni taikasee dinni oonu qaaraganda marasee 7 naaroo faqa aniqau. Misa nuqu maaqimminoo marinau. Meehummafa faqa Bistaafa faqa Aboonnaafa faqa Bitaaafa faqa abaktaafa faqa Seetaraafa faqa Karkasaafa faqa mariqau.

<sup>11</sup> Kinna fannoo misara kuinna Wasti nammarina afiqee aniaqee qimaseenoo qimanniminai. Kuinna Wasti nammarifa narí kuinna qafee afisu maree aniani. Kuinna Wasti nammarifa amiqira manaqa uqanna marufanoo minara kinna fannoo kiapausa faqa aiqama mina firaa oomaqaki ani marusa uqannifiqarara aaranau.

<sup>12</sup> Mi ainainira faiqisa oonu kuinna Wasti nammarina kinna qu ufana qimamufanoo kuinna fannoo sia anufanoo minara kinna firaaqoo uqanna aranaqanau.

<sup>13</sup> Mifa irirana faqaa fasiqauqa naroo faqa anireeqa kuinna faqa auqaaninna ainainara qimamiqau. Kinna fannoo irirana faqaasa iramiriseenoo misa qimamundeemmasee narí sandufaki ainaini maruna faqa faiqi anaasee oogu marirana faqa andeeqanau.

<sup>14</sup> Mi fasiqausa nuqu maaqimminoo marinau. Kareesanafa faqa Seetaraafa faqa Atmataafa faqa Tarasisaafa faqa Meeresafa faqa Maraseenafa faqa Meemukanafa faqa mariqau. Misauqa qisauku dinni taikasee dinni oonu qaaraganda marasee 7 nikiuqa fasiqauqa Peereesia maqa maaqaki faqa Midia maqa maaqaki faqa aiqama kinna rakisi maru maqa maaqanaki misa uriqarara kaammanna mariqau.

<sup>15</sup> Mifa mi fasiqausa maaqi qimasee qimanniminai. Qinee kinna Seerkisisasa eeqa maaqaki ainainimaru faiqisa niqafanaqa oonu kuinna Wasti nammarina qimamifanoo qinee qimamianna ainainausa auqaanifee qiafananoo mifa qini ufa rukioofanoo qirana

qanau. Sandufa fannoo minara naqaa fee qidanoo fee. Innisaimbaqa kuinna naqaa feemma amaqaanauree.

<sup>16</sup> Meemukanafa kinna narí oofisaa faqa maaqi qimasee qimanniminau. Rakisirafa anee iria, kuinna Wasti nammarifa sia anikai fau mandaikamma amaqaenoo fau. Mifa aiqama uriqarara fasiqauqa faqa aiqama ani maqa maaqaki maria fasiqausa faqa mandaikamma nimaqaenoo.

<sup>17</sup> Qusasaa uqanna aiqama anaaseeuqa anee rakisi marianna maqa maaqanaki mari-asa misa kuinna mi oosanna auqainara irifaranoo. Iriseeqa misa maaqi qifaranoo, kinna Seerkisisafa kuinna Wasti nammarifa oonu mina qafaanifeera qufanoo kuinna fannoo kinna ufa rukiasee sia finau. Miqi kai iqa anaaseeuqa faqa nári nifaqmaaka ufa rukieefaranoo.

<sup>18</sup> Mi faasanna kai uriqarara fasiqauqa Peereesia maqa maaqaki faqa Midia maqa maaqaki faqa marusa ninaaqmaaka kuinna mi oosanna auqoo ufana irisee misa mi ainannara nári nifaqmaaka qimannimisee mi anaseesa moomoo mandoosana faqa mandufa faqa qifaranoo.

<sup>19</sup> Rakisirafa anee irinanoo amiqinana, anee moo ufa maaqi qimasee faiqi anaasee iannai uqaa. Wasti nammarifa sia kaifaa ani ani qafaani. Mi ufana Peereesia maqa maaqakinaasa faqa Midia maqa maaqakinaasa sandufa mari papiqanaki akara ruqa. Akara rumasaifanoo mi sandufafa sia amana taikaannoo. Minara anee Wasti nammarina mara aqusee moo amiqira manaaqa mara uqasainanoo mifa kuinna mariani.

<sup>20</sup> Mikari ani mi ufafa aiqama anee rakisi marianna maqa maaqausaki daraani mafinaqa aiqama anaaseeuqa nári nifaqmaaka nuqu faqaasa faqa nuqu siaisa faqa misa ufa amiqimmasee irifaranoo.

<sup>21</sup> Kinna narí uriqarara fasiqauqa faqa misa mi ufanara nidufanoo kinna fannoo Meemukanafa gundee inau.

<sup>22</sup> Kinna fannoo narí rakisi maru maqa maaqausakiaqa papiqa quqasoofanoo fifain-inau, mifa aiqamausa nári ufakiqari papiqa akara ruma nimaqanau. Akara ruma nimaqaseenoo mifa maaqi qinau, faiqi fannoo kai narí faiqi anaasee rakisiannoo.

## 2

### *Eestaafa nammarifa kuinnaikinau.*

<sup>1</sup> Mikari kinna aranaqarafa kaqikaqoo taikoofanoo mifa kaifaa Wasti nammarifa mandaikamma amaqoo oosannara oonu mafi irinau. Iriseenoo mifa Wasti nammarina aiqamasainanoo mifa sia kaifaa kuinna mariannoo fee qu ufanara oonumafi irinau.

<sup>2</sup> Akaqa fasiqauqa mina amiqira irirana amimarusana mina aaqa ooqufaaqeeidaqa maaqi qimasee mina qimamiqau, rakisirafa anee akaqa amiqira manaaqauqa sia faiqi faqa faiqama qaasara randaannee qiqau.

<sup>3</sup> Anee rakisi marianna maqa maaqanakinaa fasiqauqa mara uqasainaaqaa misa amiqira manaaqauqa sia faiqi faqa faiqama qaasa nifiqamaree kaammanna uriqarara taunna Susaa maqusaki minisee anee manaaqauqa suqu uqee marianna maaqanaki misauqa mini uqaaqa. Uqasaifanoo Eekaifa ani ainainira faiqi ani anaqmaakasaa rakisi marifa mifa misasaa rakisiani. Rakisi marinaqa anaaseeuqa misa fadameena akunnimaqaseeqa misa nifaqa auqusaifaqa misa kaaqa amiqirauqa uqanna mariaqa.

<sup>4</sup> Marifana anee mi manaaqusa kinaana moodaa ani aidi marinnana mareeqee uqasainanoo mifa kuinnaika mafinanoo kuinna Wasti nammarina amaqa maqaani. Miqi qufanoo kinna fannoo iriseenoo mi ufanara eedoo qimaseenoo afaqanau.

<sup>5</sup> Susaa maqusaki Yuda maqanna fasiqa moo marinau, minauqu Moodeekaifa marinau mina akoonu auqu Yairafa marinau. Yairafa Kisaana amaaku Simeena anaiqi Beensamina atikinaafa marinau.

<sup>6</sup> Ooqai Babiroonnia maqannaasa kinna Neebukatneesafa Yuda maqannaasa kinna Yeeoiakina faqa Yuda maqannaasa akaqausa faqa nifiqeenoo Babiroonnia maqusai mariaqera finau. Mifa Moodeekaina aiku asauku faqa nifiqoo faqa misa faqa fiqau.

<sup>7</sup> Moodeekaifa moo manaaqa rakisi maruna minauqu Eestaa nammarifa marinau. Minauqu Heeburu ufakiqari Adasane qimariqau. Eesta nammarifa Moodeekaina akoonu akaqa araamuna marinau. Mina akoofa narí anaqa faqa kuqufufanoo Mood-eeakaifa Eestaa nammarina maraseenoo narí faiqira foora rakisi marinau. Rakisi mar-ufanoo Eestaa nammarifa kaaqa amiqira manaaqa uqanna findifi marufaqa qafuofanoo amiqirafa uqanna marinau.

<sup>8</sup> Kinna Seerkisisafa narí oofisauqara moomoo amiqira manaaqauqa nifiqamaree Susaa maqusai aniaqee qimasee ufa qufanau. Ufa uqasoofaqa misa manaaqauqa nifiqee anidaqa misa Eestaa nammarina faqa afiqee aniqau. Miniseeqa misa Eeataa

nammarina kinna uqusaki manaaqauqa maru maaqanaki uqaqau. Uqasoofanoo Eekaifa mi manaaqausasaa rakisi marinau.

<sup>9</sup> Eekaifa Eesta nammarina qafoofanoo amiqira manaaqa marufanoo minara aidi marinau. Aidufanoo mifa kai kaqi ufanoo Eestaa nammarifa afaaqa auquaninna fadameena mainainausa faqa oosana oosana amiqira narana faqa aminau. Amiseenoo mifa kinna maaqaki marusara Eesta nammarinasaa aqimimasee rakisiaqee qimaseenoo mara uqanau.

<sup>10</sup> Indaaruu Moodeekaifa Eesta nammarina qimaminau, anee sia aneenara Yuda maqanaa manaaqa maridee qimasee koorooiannee qu ufana Eesta nammarifa nari rakisi maru akoona mi ufana afaqeenoo sia qimaminau.

<sup>11</sup> Aiqaama faasaana Moodeekaifa anaaseeuqa maaqa maru uqusana kooqindanaa oonuree aniree inoo nimirinuu. Mifa Eesta nammarifa naqaa fee masee marinaqee irianauree misa Eesta nammarina naqi feemma amaqaifaqee irianauree qimasaidanoo oonuree aniree imarinuu.

<sup>12</sup> Moodaa aukuaana aunduray misa manaaqauqa rakisi marufaqa amiqirausa uqanna kambiqee mariqau. Kambiqee marufaqa misa qisauku dinni taikasee dinni oonu moodaa marasee 6 uqoonaki misa meea saqari anoonnai auquqoo fadameena amiqira afundi maruna mi manaaqausa nifaagay akunnimaqee mariqau. Akunnimaqasee moo 6 uqoonaki misa fadameena faqa ainoo faqa amiqira afundi maruna akunnimaqee mariqau. Miqimmasee inaaqianna misa aiqama manaaqauqa moodaa moodaa nifiqa maraida kinna Seerkisisafa marunnai fimariqau.

<sup>13</sup> Manaaga moo fannoo kinna maaqay fuanii qimaseenoo nari aidiranasaa afaaqa auqu mareenoo fimirinuu.

<sup>14</sup> Manaaga fannoo eendi marufanoo kinna marunnai oonu mariinoo iaqee marinuu. Iqaasoofaqa kananaana mina afqamaree anaaseeuqa maaqa mooki munu Saskasana asaukuki uqaqau. Mi moodaa fasiqafa kai kinna inaaqianna anaaseeuqasaa rakisi marinuu, rakisi marufaqa mi anaaseesa sia kaifaa kinna oonu qafee mariqau. Kinnna fannoo moonara aidinanoo mina auquramasee aarainanoo mifa amana fuannoo, sia moo aana maridanoo.

<sup>15</sup> Eesta nammarifa kinna qafaaninna faasaanafa aniranuu. Eesta nammarifa Mood- eekaina akoona akaqa Abiairana araamuna marufanoo Moodeekaifa Eesta nammarina maraseenoo nari aramunara foora rakisi marinuu. Rakisi marufaqa aiqama fasiqauqa Eesta nammarifa qafee marufanoo kaaqa uqanna minara nidi marinuu. Mikari Eesta nammarifa kinna qafarara finoo sia nari aidiranasaa qamunna afisinuu. Manaaqauqa rakisirafa Eekaifa qimamundee masee qamunna afisinuu.

<sup>16</sup> Mikari Seerkisisafa qisauku dinni taikasee dinni oonu qaara marasee 7 aukuanaki kinna marinuu. Mi aukuananaki qisakuqara taikasee 10 uqoona misa auquree Teebeeta uqoonafee qimariqau. Mi uqoonnanaki misa Eesta nammarina afiqee kinna marunnai fiqau.

<sup>17</sup> Munusoofanoo kinna fannoo firaagoo uqanna Eesta nammarinara aidinuu. Mifa sia akaqa manaaqauqara aidi marundeemmasenoo Eesta nammarinara aidinuu. Mifa Eesta nammarina qafoofanoo akaqa manaaqauqa urinnaaqaramaseenoo kaaqa amiqirafa uqanna marinuu. Sia moo manaaqa fannoo Eesta nammarifa kinna aqaararana amundee iannoo. Minara kinna fannoo mina akiiqaki kuinna qafee afisu amqanuu. Afisu amaqaasoofanoo Eesta nammarifa Wasti nammarina amaqa maqaseenoo kuinnaikinuu.

<sup>18</sup> Kinna fannoo Eesta nammarinara asaidanoo firaa oomaqa sakaseenoo nanuu. Mifa aiqama uriqarara fasiqauqa faqa kiapausa faqa naaroo faqa mi firaa oomaqanaki aniqau. Aniroofanoo mifa qinau aiqama fasiqa anaasee qini maqa maaqaki mariasa misa maa faasaana idooaidaqa. Miqi qimaseenoo kinna fannoo moomoo amiqira ainaina faiqi anaasee nimirinuu.

*Moodeekaifa kinna dadaaqufanoo mifa sia kuqinuu.*

<sup>19</sup> Mikari kai kinna fannoo Moodeekaina mara uqasoofanoo mina maaqasaa rakisira fasiqaikinuu.

<sup>20</sup> Ooqay Moodeekaifa Eesta nammarinaa qimaminuu, anee sia aneenara Yuda maqanaa manaaqa maridee qimasee faiqi qimannimia. Miqi qimaqoonaa Eesta nammarifa mi ufana afaqanuu. Mina oosana mifa aiqama kari Moodeekaina maaqaki maridanoo mina ufa afaqee marinuu.

<sup>21</sup> Mikari Moodeekaifa kinna Seerkisisana saika maroo faqa qaara fasiqa qara kinnara aanoo qimasee miqanda mina kuqa arirara ufa tipundaari mariqau. Mi fasiqa qanda nuqu Biktanafa faqa Teereesaafa faqa marinuu. Mi fasiqa qanda kinna faiqee maru maaqana kooqiki rakisimaru qanda mariqau.

<sup>22</sup> Moodeekaifa miqanda ufa iriseenoo mifa oonu kinna Eesta nammarina qimaminau. Qimamufnoo Eesta nammarifa Moodeekaina faqa mi fasiqaqanda faqa ufa iruna kinna qimaminau.

<sup>23</sup> Misa mi ufana oosana randaseeqa iriseeqa mi ufanara kuqaa fee qiqau. Kuqaa fee qimaseeqa misa mi fasiqaqanda saqarisaa dirisoofaqa kuqiqau. Kuqufufanoo kinna fannoo nari oofisauqa qimannimino qinau, mi ainainafa kambiqaina innisaimbaqa kaammanna papiqaki akara rua qufaqa misa miqimmiqau.

### 3

*Amannafa Yuda maqannaasa naru taikarara ufa rumbanau.*

<sup>1</sup> Kaqikaqoo marinoo kinna Seerkisisafa moo fasiqa mina auqu Amaannana mara uqasoofanoo mifa uriqarara kaammanna marinau. Amannafa Hammeedatana amaaku Akakana anaiqi marinau.

<sup>2</sup> Kinna fannoo aiqama kiapausara Amaannanara niqoori saunu arasee mina firaa auqu amiaqee qufaqa misa aiqamausa kinna qundee ufanoo Moodeekaifa kai sia miqinau. Moodeekaifa Amannanara aqoori saunu arara akooqanau.

<sup>3</sup> Inaaqianna akaqa kiapausa mina qafamasee mina iramiriqa qiqau anee nanaree kinna ufamau sia finanee.

<sup>4</sup> Moomoo kari Moodeekaina mi oosannanara qimami mariqau. Miqi marufanoo Moodeekaifa misa ufa irirara akooqanau. Miqufanoo Moodeekaifa misa qimannimino qinau, qinee Yuda maqannaasa maridaqa minara qinee Amannanara sia qiqoori saunu araidaqa. Miqi qufaqa kiapausa Moodeekaifa qu ufana Amannana qimamiqau. Misa Moodeekainara kaqi mi oosanna maree marinanoo Amannafa qafamasee arana qaanno fee sia fee arana qaanno fee qimasee qafee mariqau.

<sup>5</sup> Amannafa qaqfoofanoo Moodeekaifa sia minara aqoori saunu araseenoo mina amooqinai, miqufanoo mifa minara firaaqoo aranaqanau.

<sup>6</sup> Miqi marufanoo mifa mina paqurimmaseenoo qaqoofanoo Moodeekaifa Yuda maqannaasi fasiqa marunara mifa Moodeekaina mandaikamma amaqarara irinai. Sia Moodeekaina kai fau miqinai. Amannafa Yuda maqannaasa Peereesia maqa maaqaki marusa aiqama naru taikarara oonu mafi irinai.

<sup>7</sup> Qisauqara taikasee qikunni ooqu qaara marase 12 aukuanaki Seerkisisafa kinna marinai. Indaarugaqa uqoona auqu nisaanna fee qimarunasaa Amannafa purimma fee qimaru sararana masee qafaqee qinai. Ya uqoonnanaki fee ya faasaanee Yuda maqannaasi kuridi nimaqara amiqira faasaana mariannoo fee. Miqi qufaqa misa sarara masee maaqimmasee paquriqu. Adara 12 uqoona fee qimaru uqoonnanaki 13 faasaana Amannafa misa kuridi nimaqaanno.

<sup>8</sup> Amannafa oonureenoo rakisirana qimaminoo qinai. Aiqama anee rakisi marianna maqa maaqaki maria fasiqa anaaseesa akaqausa sia maaqoo mariasa naanna raidaqa, misa mooka uqanna midamma. Minara anee misa afu kai niqafee marinaqa marifanoo mifa sia ani faqa ani maqa maaqa faqa dadaaqianno.

<sup>9</sup> Minara rakisirafa ani aidinana anee aiqama faiqi anaaseera qinaqa mi fasiqa anaaseesa kuqa naruqa. Anee miqinaqa qinee maqee aniara kuqaa idaqa qinee siruaa munnimma moomoo uqanna 50 mirioonna anee munnimma afeedi marianna maaqanaki uqaisaanaura. Miqimmaseenana anee minannai kaamaanna saika mareenarano.

<sup>10</sup> Kinna fannoo nari sandufauqa qimasainnana afeekaikiani feera mina rinnasaa mina akara maridanoo. Kinna fannoo mi ufana iriseenoo asaukukinaa rinna radukuseenoo Amannana Ammeedatana amaaku Akakana atikinaana Yuda maqannaasa namuqaa aminai.

<sup>11</sup> Amiseenoo kinna fannoo Amannana maaqi qimasee qimaminai sia munnimmaria iria, anee nana ainanee maa fasiqa anaaseesaki auqararee iridanee kaqi auqaa.

<sup>12</sup> Indaarugaqa uqoona 13 faasaana Amannafa kinna kuskusauqa aiqama naarooafaqa aniqau. Aniroofanoo mifa nari ufauqa qimanniminaqa akara ruaqeeru naarooafaqa aniqau. Misa anireeqa aiqama moodaa moodaa maqannaasa nari ufakiqari akara ruma nimaqaqau. Miqimmasoofanoo mifa mi papiqana aiqama rakisirausa faqa aiqama kaammnauqa faqa aiqama kiapausa faqa nimaqanau. Aiqama papiqa Seerkisisana rinna saaqaraa akara marinai. Kinna fannoo nari uqanna papiqa akarariifoo qirana koorooinai.

<sup>13</sup> Pasa maraqa nu fasiqausa mi pasausa mara maree kinna maqa maaqakinai aiqama maqannaasi rakisirausa nimaqau. Aiqama pasauqa kiaqa maaqi qinoo marinai Adara uqoona 13 faasaana innee Yuda maqannaasi aiqama kuqa naruqee qinoo marinai.



Kumaara fasiqa anaasee faqa asooqauqa faqa faiqi anaaqiuqa faqa aiqama mi faasaana kai naru taikaaqa qiqa. Sia misara qimudao qiaqa aiqama naru taikaseeqa misa ainainauqa faqa maraqa.

<sup>14</sup> Rakisirausa aiqama oosana oosana fasiqa anaasee aiqama maqa maaqindari ani mariasa nifusaa mi pasana asaana ruaqa. Asaana rifaqa iriseeqa mi faasaanafa kambiqinaqa misa Yuda maqannaasa narirara deedaqiaqa.

<sup>15</sup> Pasa maraqa nu fasiqusa misa kaunna qimasee pasa maree aiqamai fifainiqau. Misa maa ufana faqa Susaa maqusaki faiqi anaasee iriaqera qimannimiqau. Kinna faqa Amannafa faqa miqanda kai nimuqusa amiqi marufaqa ooqu faaqee maridaqa uainna nee mariqau. Miqi marufaqa Susaa maqusakinaa fasiqa anaasee mi ufana irisee tautufanoo misa irirafa furufara uqanna minau.

## 4

*Moodeekaifa Eesta nammarinara nari dadaaqianifeera qimaminau.*

<sup>1</sup> Moodeekaifa mi ufana iriseenoo firaqoo qimudao qinau. Mina amuqusa ummaara uqanna roofanoo nari qamunna rakeekaammeeqee aqinau. Miqimmaseenoo mifa soofaara qamunnda rumbaseenoo akiqaki danda afaqa teeqinau. Mifa miqimmaseenoo maqusaki oorureenoo firaqoo faaqa rumasee ikiraqanau.

<sup>2</sup> Mifa kinna maaqaki kooqiki oonureenoo mifa sia maaqaki keeqanau. Faiqi kinna maaqaki keeqararee qinausa sia soofaara qamunna afisu mareeqa keeqeefaranoo.

<sup>3</sup> Mikari misa kinna ufa aiqama maqa maaqaki qimannimufaqa Yuda maqannaasa irufanoo naundura ummaara roofaqa firaqoo faaqa riqau. Misa sia narana naqu qimudao gira idi ramaaidafa iki faafau qimariqau. Yuda maqannaasa moomoo soofaara qamunna rakeekaa irana afisuseeqa dandaki noorindari aqufiqa mariqau.

<sup>4</sup> Eesta nammarina ainainira manaaqauqa faqa minasaa rakisi maru fasiqausa faqa Moodeekaifa auqoo oosanara qimamufanoo Eesta nammarina amuqusa firaqoo uqanna ummaara ranau. Mifa Moodeekaifa qamunna anaqirana raipaqusee amiqirana afisuani feera amaqaanau. Amaqasoofanoo Moodeekaifa akoo marara qanau.

<sup>5</sup> Miqufanoo Eesta nammarifa Atakana aaranau. Atakafa manaaqauqasaa rakisirafa marufanoo kinna fannoo Eesta nammarina ainainiani feera utaaqama amaqaanau. Miqufanoo Eesta nammarifa Moodeekaina oosana paquriani feera nana oosanaree mifa mi ainaina auqeenoo fee qimaseenoo Akatana aiqanau.

<sup>6</sup> Akatafa suqira maqusaki keeqafufanoo kinna firaq maaqa kooqiki oonu Modekaina paqurinau.

<sup>7</sup> Oonu paqurimma soofanoo Moodeekaifa aiqama ainaina nariki kambiqoonara Akatana qimaminau. Amanafa faiqi Yuda maqannaai aiqama kuqa narusaifanoo mina akiqara kinna fannoo munnimma uqemaru maaqanaki mifa naqumma munnimnee uqaaninnanara faqa qinau.

<sup>8</sup> Moodeekaifa Amannana ufa maru pasausa kinaana moo maraseenoo Akatana aminau. Mi pasanaki faiqi anaasee Yuda maqannaasa aiqama kuqa naruqee qinoo marinau. Moodeekaifa Akatanara mi pasana mara maree Eesta nammarifinnai munusee aiqama ainaina kambiqaaninnara qimamianne qinau. Akatafa Eesta nammarina qimaminanoo Eesta nammarifa kinninnai oonureenoo mifa Yuda maqannaara qimudao qimasee amuqusiani feera qimaminau.

<sup>9</sup> Miqi qufanoo Akatafa oonu Eesta nammarina qimaminau.

<sup>10</sup> Qimamufanoo Eesta nammarifa Moodeekaina qimamiani feera moo ufa Akatanasaa uqanau.

<sup>11</sup> Mifa maaqi qinau sia amana qinee oonu kinna qafaanuranoo. Kinna fannoo faiqi moo aarainanoo mifa amana mina maaqaki keeqaannoo. Sia riri aarainanoo nari iriranasaa keeqainnana misa kuqamma arifaranoo. Moodaa aana kai mi sandufana aiaaqarafa maridanoo. Faiqi moo fannoo kinna innannai kaqi fifau oonurainanoo kinna fannoo nari kooro saununnai mina afaaqai mundusainafa mifa sia kuqannoo. Aiqama kinna ainainira faiqiuqa faqa kinna rakisi maru maqa maaqanaki maru fasiqausa aiqama mi sandufanara iridaqa. Minara moodaa uqoona taikarara imarufanoo kinna fannoo sia qini daaranau.

<sup>12-13</sup> Moodeekaifa Eesta nammarina ufa qimamufanoo iriseenoo mifa nari maaqi qimaseenoo qimaminau. Kuqaa anee kinna maaqaki mariananoo anee sia Yuda maqannaasakiqari aneennara kinna maaqaki marunnaara sia ummaaraki kuqanuaree qimasee iria.

<sup>14</sup> Anee miqinna kari aneenna oo qumarainanoo akaqa ainaiana innisaimbaqa dadaaqirafa kambiqaannoo. Anee kuqinaqa ani ainaina aiqama kuqu taikaeefaranoo.

Minara innisaimbaqa sia iridaqa. Manda aukuaana innisaimbaqa Yuda maqannaasa dadaaqirara anee kuinnaika mafuananoo.

<sup>15</sup> Eesta nammarifa Moodeekaifunnai kaifaa maaqi qimasee ufa uqanau.

<sup>16</sup> Anee oonu Susaa maqusaki aiqama Yuda maqannaasa suqu uqasee qimannimia innee qaarammoo faasaana faqa eendaki faqa narana faqa nammarifaqa auramasee sia naaqa. Kaifa qinee faqa eeqa ainainira manaqauqa faqa miqi kai iqa narana faqa nammari faqa auramasee sia naanauranoo. Miqimmaseeqa inaaqianna qinee kinna innai fuanauranoo. Kaqi qinee sandufa rukiaanauranoo. Qinee miqimmasee kuquananoo sia ufa mariannoo kaqi qinee kuquanaranoo.

<sup>17</sup> Moodeekaifa Eesta nammarina ufa iriseenoo mifa kinna maaqa kooqi uqaseenoo oonureenoo Eesta nammarifa qimamundee maseenoo auqanau.

## 5

*Eesta nammrifa kinna faqa Amannana faqa firaa oomaqaki aniaqeera naaranau.*

<sup>1</sup> Eesta nammarifa qaarammoo faasaana narana auranau. Mifa qaarammoo faasaanasaa kuinna qamunna afisu mareenoo kinna maaqa maru uqusanaki keeqanau. Kinna firaa oosiranaki maruna aqa oorufinai. Kinna fannoo nari siaqasaa oogu faaqeedanoo kooqinni afu maqanau.

<sup>2</sup> Kinna fannoo Eesta nammarifa maqusai kikiqinoo marufanoo qafuofanoo mina amuqusa fannoo Eesta nammarinara amiqufanoo mifa kooru saunu uaqee mariuu asaukuna afaaqai mundinai. Miqufanoo Eesta nammarifa mina aqa anireenoo mi saununa ati auqanau.

<sup>3</sup> Kinna fannoo qinai, kuinna Eesta nammari ani nanaree aididanoo fee. Qinee ani eeqa firaa maqa maaqa dinni ati ani amianeera aidi marinaqa qinee ani amianauro.

<sup>4</sup> Miqi qufanoo Eesta nammarifa maaqi qinai. Rakisirafa amanee anee faqa Amannafa faqa maqee eendaki firaa oomaqaki anifaree.

<sup>5</sup> Miqi qufanoo kinna fannoo mi ufanara eedoo qimaseenoo mifa Amannanara kai kaqi anirainaga anindiri Eesta nammarifinnai fuanee qinai. Miqi qimaseeqa kinna faqa Amannafa faqa miqanda Eesta nammarina oomaqai fiqau.

<sup>6</sup> Misa oonu maridaqa uainna nee marufanoo kinna fannoo Eesta nammarina iramirinoo qinai. Anee nana ainainaree aidinnanara qinaqa amia. Aiqaama ainainara anee irainnanara qinee eedoo qianauro. Anee qini maqa maaqa dinni ati mararee qinaqa qinee ani amianana anee rakisinnaranoo.

<sup>7</sup> Kinna fannoo miqi qufanoo Eesta nammarifa kinna nari qimaminoo qinai, qinee maaqi qimasee ani iramiridaqa.

<sup>8</sup> Anee qiniara firaqoo asasinana qini irara ufara faqa asasinaqa duna qinee moo oomaqa deedaqamma saanaqa anee faqa Amanafa faqa ani naaqa. Nee marifaqa miqoo qinee eeqa didirana ani qimamianauranoo.

*Amannafa Moodeekaina arira ufa tipundaarinai.*

<sup>9</sup> Amannafa narana neeneeuqooqari amuqusa amiqufanoo firaqoo asasinai. Miqimaseenoo oonuree qafuofanoo Moodeekaifa kinna maaqa kooqi aqa oofuqaqee marinai. Moodeekaifa maridanoo Amannana qafamaseenoo sia findifi amandanau. Miqufanoo Amannana firaqoo arana qanau.

<sup>10</sup> Amannana aranaqarafa suka uqanna qoofanoo mifa nari amuqusa muqufiseenoo mifa sia moo ainaina auqanau.

Mifa nari maaqai oonureenoo nari agoondiuga naarooafaqa aniroofanoo nari anaqa Seereesa nammarina misa faqa mariani feera qimaminai.

<sup>11</sup> Misa maaqaki aniroofanoo Amannafa misa nifusaa nari auqu uqeranau. Mifa nari nunnimma moomoo marunara faqa umiasana faqa mina faiqi namu akoonaiqiuqa moomoo marunara faqa qimanniminai. Kinna fannoo mina firaa saika faqa firaq auqu faqa amiqoonara qimanniminai. Qimannimufaqa kinna oofisauqa akaqausa mina ameemaanai mariqau.

<sup>12</sup> Amannafa kaifaa maaqi qinai, kuinna Eesta nammarifa moo firaa oomaqa qinindi faqa kinnaindi faqa kai suqanau. Mifa sia moo fasiqa aaranau. Mifa maaqi qinai duna maqandara kaifaa mina faqa oonu narana naaqee qinoo.

<sup>13</sup> Qinee Moodeekaina qafaunanoo mifa Yuda maqanna fafiqa maridanoo. Mifa kinna kooqiki oofuqaqee marifanoo qini qimuqusa ummaara raifaqa qinee mi amiqira ainainausara fifau ainainee qimasee iridaqa.

<sup>14</sup> Seereesa nammarifa Amannana anaqa mifa nari agoondiuga faqa misa maaqi qimasee mina qimamiqau. Anee sia minara iria. Faiqi qimannimifaqa misa kisaqa saqari 26 mita amana rakiqasee duna kananaana oonu kinna iramirisee Moodeekaina

diriaqa. Anee miqimma sainanoo ani amuqusa amiqinana anee oonu narana naa. Amannafa mi ufanara asammaseenoo faiqi qimannimufaqa misa Moodeekaina dirifandinna a saqarina rakiqau.

## 6

*Kinna fannoo Moodeekaina uriqarara auqu aminau.*

<sup>1</sup> Miqum eendanaki kinna fannoo sia faiganau. Minara mifa mina maqa maaqaki aiqama ainaina kambigoonara akara rumaqoo papiqanara maree minisaifaqa misa minaki akara ufa qafaagee qinau.

<sup>2</sup> Minisoofaqa misa Biktana faqa Teereesaana faqa ufa asaana rumasee qafooafaqa miqanda kinna maaqa oosiranauqaki rakisi mariqau. Mi fasiqa qanda kinna kuqa arira aanara randee mariqau. Randee marufanoo Moodeekaifa miqanda kukeeqara irirana qafamaseenoo miqanda koota niminau.

<sup>3</sup> Minara rakisirafa qinau, innisaimbaqa nanee moo amiqira ainainannai Moodeekaifa auqai oosana akiqara amianauree. Miqi qufaqa faiqi maaqi qimasee mina qimamiqau, innisaimbaqa sia moo ainaina mina amiqa.

<sup>4</sup> Kinna fannoo misa iramirinoo qinau, qini oofisaauqa mi maqanaki mariaafanoo fee sia fee. Maqee Amannafa kinna irara anidanoo, mifa Moodeekaina saqari rakiqasee deedaqamma qaanasaa diriaqeeera qimamirara anidanoo. Minara Amannafa nari uqanna kinna maaqa mari uqusanaki keeqarara anidanoo.

<sup>5</sup> Ainainira faiqiuqa mina qafamaseeqa kinna qimamiqa qiqau, Amannafa ani maaqai maridanoo ani afeesidanoo. Mifa ani qafarara maridanoo ani afeesidanoo. Miqi qufanoo kinna fannoo qinau mina afiqee maaqaki uruaqee qinau.

<sup>6</sup> Amannafa maaqaki ooruofanoo kinna fannoo qimaminoo qinau, qinee faiqi moo firaa auqu amirara iridaqa. Qinee sia iridaqa nanee moo amiqira ainainannai fee mina andeeqa amaqaanauree. Anee iria, qinee naqaa fee ianauree qufanoo Amannafa nariara maaqi qimasee oonu mafi irinau. Aqbee kinna fannoo yana miqimma amaqraree qidanoo fee sia moo fannoo maridanoo qinee kai maridaqa.

<sup>7-8</sup> Amannafa miqi qimiriseenoo kaifaa rakisirana nari maaqi qimasee qimaminau. Aneenna afisi marianna qamunnana minisee mi fasiqana afisu amaqa. Anee goosasaa uqemaria sandiriqana faqa bakarainna faqa amiqimmasee afaqa auqusee aneenna qoosaa uqaa. Miqimmaseenana kaifaa qoosa akiqqa faqa afaqa auqusainanoo mifa kinna qoosa fee qirana koorooiani.

<sup>9</sup> Anee aneenna oofisaauqa kinaana moo misa uriqararana mara uqasainanoo mifa ani qamunnannai mina afaqa auqani. Miqimma sainanoo mi fasiqafa qoosasaa ooqu marifinanoo oofisaa fannoo mina afiqeenoo firaa suqira maqusaki fuani. Afiqee fidanoo mi oofisaafa maaqi qimasee nammeera qiani, maa fasiqana qafaqa kinna fannoo mina firaa auqu amiseenoo mina amiqimma amaqaenoo.

<sup>10</sup> Kinna fannoo mi ufana iriseenoo Amannana qimaminoo qinau anee kai kaqi oonu qamunna faqa qoosa faqa maraseenana qini saika faiqi Moodeekaina Yuda maqanna fafiqqa firaa auqu amia mi fasiqafa qini maaqa kooqiki ainaini marifa maridanoo. Aiqaama ainaina maqee aneenna qiannandee masee auqa.

<sup>11</sup> Miqi qufanoo Amannafa iriseenoo qamunna faqa qoosa faqa maraseenoo Moodeekaina afaqa auqinau. Auqusoofanoo Moodeekaifa qoosasaa ooqu marifufanoo Amannafa qafamaseenoo suqi maru maqusanai afiqee finau. Afiqee fidanoo Amannafa nammeera qimasee maaqi qimasee faiqi anaasee qimanniminu. Maa fasiqana qafaqa kinna fannoo firaa auqu amiseenoo amiqimma amaqaenoo.

<sup>12</sup> Miqi qimasooofanoo Moodeekaifa kaifaa anirandee kinna kooqinni finau. Fufanoo Amannafa asaurirana maraseenoo aundura ummaarooofanoo mifa oorisa itita mareenoo kaifaa anirandee nari maaqai finau.

<sup>13</sup> Oonureenoo mifa moo anaasee faqa nari aqoondiuqa faqa aiqama ainaina minaki kambigoonara qimanniminu. Mi anaaseefa faqa mi aqoondisa faqa irirana firana faqaasa maridaqa misa mina maaqi qimasee qimamiqau. Maqee ani afeeka faqa ani auqu faqa quminanoo Moodeekaifa ani uriaaqaranoo. Mifa Yuda maqannaafa marinara anee sia mina aana titara aana maridanoo, anee ummaara kai mareennaranoo.

<sup>14</sup> Misa ufa qida marufanoo kinna ainainira faiqiuqa aniraqau. Misa Amannana kai kaqi afiqee Esta nammarina oomaqai firara aniqau.

## 7

<sup>1-2</sup> Minara kinna faqa Amannafa faqa kaifaa oonu Estaa nammarina faqa narana naqau. Nasmaseeqa misa uainna namhari naida marufanoo kinna fannoo Estaa

nammarina iramirinoo qinau, kuinna Esta nammari ani nana ainainaree aididanoo fee anee qinaqa qinee ani amianauranoo. Ani aidinaqa qinee eeqá maqa maaqa faqa ani amianauranoo.

<sup>3</sup> Qufanoo kuinna Estaa nammarifa qimaminoo qinau. Rakisirafa anee kuqaa anee qiniara aidinana qini amiqimma qimaqararee qimaseenana kaqi miqia. Qinee ikoo eeqá faiqi anaasee faqa kuqirara qaidanoo.

<sup>4</sup> Faiqi moo fannoo qini faqa qini faiqi anaqasee faqa kuqa nariraree qimasee doo ufa rumbaqaifanoo maridanoo. Misa maasa aiqama mandaikamma qimaqararee qidaqa. Misa maasa mandaikamma qimaqasee rumbara saika maasa qimisee fifau ainainira fasiqa anaaseekiaqee qifaqa qinee sia ufa qianaauranoo. Qinee ikoo ani ummaara amirara qaifaqa misa maasa taikararee qianara minara qinee koorooidaqa.

<sup>5</sup> Kinna Serkisisafa mi ufana iriseenoo kuinna Estaa nammarina iramirinoo qinau. Ya manda fasiqafee sia miqirara rufeenoo fee, yaa fee mi fasiqafa maridanoo fee.

<sup>6</sup> Qufanoo Estaa nammarifa narí qimaminoo qinau. Qinee Amannanara qidaqa. Mifa manda fasiqa maasa namuqaa maridanoo maasa darirara deedaqidanoo. Qufanoo Amannana firaqoo aindiri roofanoo rufianau.

<sup>7</sup> Kinna fannoo mi ufana irufanoo arana qoofanoo uainna neneuna minniseenoo aqoosai narí afuqai oofufinau. Ooqufanoo Amannafa kinna oofufuna qafamasee mifa maaqi qimasee irinuu kinna fannoo qini daruannoo, qimaseenoo Amannafa maaqaki maridanoo kuinna Estaa nammarifa minara qimudao qimasee kinna qimaminanoo sia mina mandaikamma amaqaanifeera iree marinau.

<sup>8</sup> Kinna fannoo qafuqaindari kaifaa oonurandee narana nee maruqoo anireenoo mifa Amannana qafoofoanoo Estaa nammarifa ooqumarifida narana nee maru qaindanasaa faiaqee ufanoo qafamaseenoo tautinau. Faiaqee idanoo Amannafa minara qimudao qianifeera iree marinau. Ireerufanoo kinna mina qafamaseenoo faaqa rumasee qinau, aqbee maa fasiqafa kuinna qini maaqaki qini qifusaa mandaikamma amaqararee qidanoo fee, qimaseenoo kinna fannoo qufaqa misa kaunna qufaqa qamunnannai Amannana akiqia kinna fannoo (faiqi kuqa narirara rumba nimaqee marundeemmasee rumba amaqaanau).

<sup>9</sup> Ainainira faiqiuqa moo auqu Aboonafa maaqi qinau, iridafee Amannafa narí maaqa adeedi narí rakiqoo pausafa mina kisaaqa fannoo 20 mita marinau. Mifa Moodeekaina minasaa diriraree qimasee rakiqanau. Kinna Moodeekaifa ooqai ani dadaqufaqa namuqauqa sia ani kuqa ariqau. Qufanoo kinna fannoo qinau, innee Amannana narí mi pausanasaa dirisaifanoo kuqani.

<sup>10</sup> Qufaqa misa Amannafa Moodeekaina diriraree qimaseenoo rakiqoo pausanasaa narí diriqa. Misa miqimmasoofanoo kinna aranaqarafa taikanau.

## 8

*Kinna fannoo Yuda maqannaasa namuqa faqa rakuqaqera qimanniminau.*

<sup>1</sup> Mi faasaana kai kinna Serkisisafa Yuda maqannaasa namuqaa Amannana maaqa faqa aiqama mina ainaina faqa kuinna Estaa nammarina aminau. Amisoofanoo inaaqianna Moodeekaifa qini moodaa fidika maridanoo qufanoo kinna fannoo Moodeekainara qufanoo aiqama kari ani kinna qafee marinau.

<sup>2</sup> Kinna fannoo Amannafa unnai narí rinna maraseenoo kaifaa narí asaku amukaki uqaqoona Moodeekaina aminau. Mi rinnafa kinna nambaqa faqaafa marinau. Marufanoo Estaa nammarifa Moodeekaina mara uqasoofanoo Amannana aiqama ainainasaa rakisi marinau.

<sup>3</sup> Rakisi marufanoo inaaqianna Estaa nammarifa kinna marunni oonureenoo mina aikuki aqufinoo maridanoo iki raqee marinau. Mifa kinna qimaminanoo mifa faiqi mi manda oosanna auqeefoora rafaqafu sainaqa Amannafa Akakana atikinaafa Yuda maqannaasaki auqararee qimasee ufa rumboondee sia iaqa.

<sup>4</sup> Kinna fannoo narí kooru saunu Estaa nammarinasaa mundusoofanoo findifinoo qinau.

<sup>5</sup> Rakisirafa anee qiniara aidinana qini ufa irinanoo amiqinana ufa uqasainanoo fifaininaqa misa sia Amannana Ammeedatana amaaku ufa afaqaqa. Amannafa aiqama Yuda maqannaasaki fasiqa anaasee ani maqa maaqaki mariasa aiqama naru taikaqee qimaseenoo qimanniminau.

<sup>6</sup> Qinee mi mandafa qini faiqi anaaseeki sia kambiqaanifee qimasee iridaqa. Misa qini moodaa fidikaqa kuqa narusaifaqa qinee naqi fee masee amiqiaq marianauree.

<sup>7</sup> Qufanoo kinna Serkisisafa Estaa nammarina faqa Moodeekaina faqa maaqi qimasee qimanniminau. Iridaqqee qinee iriafananoo Amannafa Yuda maqannaasa

mandaikamma nimaqararee qufaqa minara qinee mina saqarisaa diriseeqa mina aigama ainaina Esta nammarina kai amiqa.

<sup>8</sup> Papiqa qini duqusaa akara rumasee qini nambaqa minasaa uqaqaana mina kai sia mara aqunauranoo. Inneeqara nana ufa fee Yuda maqannaasara akara ruani qimasee kaqi akara ruaqa. Akara rumaseeqa inneeqara mi papiqanasaa qini duqu uqasee qini nambaqa faqa uqaqa.

<sup>9</sup> Misa miqimmasee Siwa uqoona 23 faasaana Moodeekaifa aigama kinna kuskusauqa naaroofaqa aniqau. Aniroofanoo misa ufa qimannimufaqa misa mi ufausa papiqaki akara riqau. Misa mi pasana Yuda maqannaasa uriqararasa faqa kiapausa faqa aigama oofisaauqa faqa 127 maqa maaqaki marusa faqa India maqa maaqaki oosana arasee Itioopia maqa maaqai dinni ati oonuroofanoo misa akara ruma nimaqaqau. Misa mi pasana aigama mi maqa maaqausaki marusa ufakiqari faqa Yuda maqannaasa ufakiqari faqa akara riqau.

<sup>10</sup> Moodeekaifa misa kinna Serkisiana auqusaa pasa akara rumasee mina nambaqa faqa mi pasanasa uqaqeeera qimanniminau. Mi pasana maree firaree qu fasiqausa misa amiqira qoosa kinna ququsakinaana kaaqa sandee maruna maree minisee minasaa oogu marifufaqa pasauqa maree aigama maqusakiaqa fifainiqau.

<sup>11</sup> Pasaki maaqi qimasee akara riqau. Kinna fannoo qidanoo, Yuda maqannaasa misa aigama maqusakiaqa mariasa misa nari faiqi anaasee namufaqa nariraree qu fasiqausa misa ruqaummafi nari faqa naruaqa. Moo maqusakinaa fasiqauqee moo maqannaasa fasiqauqee misa mandaikamma nimaqararee qusa, Yuda maqannaasa aigama ruqaummafi misa naru taikasee misa aigama ainaina mareefaranoo.

<sup>12</sup> Mi faasaana Yuda maqannaasa aigama Peereesia maqa maaqaki mi ainainasa auqeeffaranoo. Misa 13 faasaana Adara uqoonaki auqeeffaranoo.

<sup>13</sup> Misa kinna maa sandufa aigama fasiqauqa aigama maqa maaqaki mariasa qimannimiqa. Qimannimi marifaqa Yuda maqannaasa mi faasaanafa anirainaga nari namuqaqa faqa rakirara deedaqifaranoo.

<sup>14</sup> Kinna fannoo qufaqa faiqi ufa maree fusa qoosasa oqumari kai kaqi sandee akaqa maqusakiaqa fiqau. Susa firaa maqusaki mi ufana oosana arasoofanoo aigamai fifaininau.

<sup>15</sup> Misa kinna qamunna eekara faqa panoona arirana faqa Moodeekaina afisu amaqaqau. Afisu amaqqee dirindaasi arira qamunna moo marasee mina aku amaqaqau. Aku amaqqasee inaaqianna misa kinna kooraa qafee firaana amiqira afaqa auqirana akiaaqa afisu amaqqasee afaqa auqusoofanoo mifa kinna maaqakiqari raudee maqusai oquqfinau. Ooquroofaqa Susa firaa maqusakinaa fasiqa anasee mina qafamasee firaqqoo faaqaridaqa asasiqau.

<sup>16</sup> Yuda maqannaasa nimuqusa amiqi uqanna ufaqa misa nimuqusa asoosana faqa mariqau. Maridaqa misa firaqqoo asasidaqa nariara maaqi qimasee iriqau. Maas doo uriqaramafiga sia amana kaifaa ooruupianaauranoo.

<sup>17</sup> Aigama maqa maaqaki faqa maqusaki faqa Yuda maqannaasa kinna ufa marasee moodaa faasaana utaaqamasee misa firaa narana naidaqa minara asasi mariqau. Asasi marufaqa moomoosa akaqa fasiqauqa Yuda maqannaasara rufiasee misaki ootupaqau.

## 9

### *Yuda maqannaasa nari maqannaasa mandaikamma nimaqaqau.*

<sup>1</sup> Mikari Adara uqoona 13 faasaana aniroofanoo indaaruuqaa kinna fannoo qinuu, mi faasaana kai namuqaauqa Yuda maqannaasa mandaikamma nimaqqasee naru taikaeffaranoo. Miqi qufaqa Yuda maqannaasa findifufaqa misa rafaqqafusee aigama naru taikaqau.

<sup>2</sup> Yuda maqannaasa kinna fannoo rakisi maru maqusausakiaqa faqa maqa maaqanaki marusa misa namuqaauqa misa faqa rakirara anufaqa rakirara deedaqiqau. Aigama fasiqa anaasee aigama tinaindaraasa Yuda maqannaasara rufiasee misaki sia moo ainaina auqeeffaranoo.

<sup>3</sup> Aigama maqa maaqakinaa kiapausa faqa kaammannaauqa faqa aigama kinna ainainasaa rakisi marusa faqa Yuda maqannaasa dadaaqiqau. Misa Moodeekainara rufiasee miqiqau.

<sup>4</sup> Aigama fasiqauqa kinna rakisimaru maqa maaqanakinaasa irufanoo kinna fannoo firaa afeeka faqa uriqarara auqu faqa Moodeekaina aminau. Amisoofanoo mina afeeka aigama kari uriqaranoo uqanna marinau.

<sup>5</sup> Marufaqa Yuda maqannaasa nari namuqaauqa nariqau. Misa kisaqa paipanannai rakidaqa nariqa namuqaauqa naru taikaqau.

<sup>6</sup> Susa fira maqusaki Yuda maqannaasa 500 fasiqa kuqa nariqau.

<sup>7-10</sup> Amannana faiqi namu qisaukuqara taikasee 10 mariqau. Yuda maqannaasa namuqaauqa nuqu maaqimminoo maridanoo. Parasadataafa faqa Darfoonafa faqa Asbatannafa faqa Pooratanafa faqa Adarianafa faqa Aridatanafa faqa Parmastanafa faqa Arisainafa faqa Aridainafa faqa Uaisataanafa faqa minamusa ainaina kai Yuda maqannaasa sia maraqau.

<sup>11</sup> Mi faasaana kai Yuda maqannaasa naqumma fasiqa Susa maqusaki narunara kinna qimamiqau.

<sup>12</sup> Marikinoo kinna fannoo kuinna Estaa nammarina qimaminau. Yuda maqannaasa 500 fasiqa Susa maqusakinaasa kuqa nariaafoo qinau. Misa Amannana faiqi namu qisaukuqara 10 faqa kuqa nariqau. Qinee iruna misa akaqa maqa maaqaki moomoo fasiqa faqa kuqa naria. Anee maqee nana ainainee akaqa ainaina mararee qinaqa, qinee amana ani amianauranoo. Esta anee nana ainainaree aidinna ainaina kaqi maraa.

<sup>13</sup> Estaa nammarifa kaifaa kinna qimaminoo qinau. Rakisirafa ani aidinana duna Susa maqusaindaraa Yuda maqannaasara qinaqa namuqaauqaki duna faqa maqee iandee kai iaqa. Misa Amannana faiqi namu qisaukuqara taikasee 10 mariasa mi faakannanasaa diriaqa.

<sup>14</sup> Doo kinna fannoo misara miqiaqee qimaseenoo mifa mi ufana Susaa maqusaindaraa fasiqauqa unnai afeeqoofanoo fufaqa misa Amannana faiqi namu qisaukuqara taikasee 10 marusa faakana rakiagoonasa dirimarufaqa aiqama fasiqauqa qafaqa.

<sup>15</sup> Adara uqoona 14 faasaanasaa Susa maqusai maru Yuda maqannaasa kaifaa ruqamma fufaqa 300 fasiqa mi maqusanaki kuqa nariqau, narusee sia misa ainainauqa maraqau.

<sup>16</sup> Yuda maqannaasa akaqa maqa maaqaki marusa misa faqa moodaanakika mafiqa afeeaka masee misa narusee misa amiqimmasee marifaranoo. Misara nikooqee maru namuqaasa 75,000 fasiqa anaasee kuqa nariqau. Narusee sia misa ainaina maraqau.

<sup>17</sup> Mi rakirafa maqa maaqaki 13 faasaana Adara uqoonaki kambiqanau. Kafa 14 faasaana misa sia nari namuqa nariqau. Mi faasaana misa idooaidaqa fira qoomaqa sakasee naidaqa firaqoo asasi mariqau.

<sup>18</sup> Misa miqi marufaqa Yuda maqannaasa Susaa maqusaki marusa misa 15 faasaanara idooaidaqa asasira faasaanee qimasee utaaqau. Misa namuqaauqa 13 faasaana faqa 14 faasaana faqa narusee 15 faasaana misa sia rakiqau.

<sup>19</sup> Minara kai Yuda maqannaasa kaqikaa maqusauqa uqusa sia auqiranakiaqa mariusa misa Adara uqoona 14 faasaana fira oomaqa naidaqa ainaina narami namira faasaanee qimasee utaaqau.

*Misa fira oomaqa auqureeqa Purimma oomaqa fee qimariqau.*

<sup>20</sup> Moodeekaifa mi faasaana aiqama ainaina auqoo ainaina akara rumaseenoo Yuda maqannaasa nianai marusa faqa adeedi marusa faqa kinna Serkisisafa rakisi nimaqee maru maqa maaqanakinai marusa nimaqanau.

<sup>21</sup> Misa Adara uqoonaki 14 faasaana faqa 15 faasaana faqa aiqama aukuanaki asasira faasaana utaaqaqee qimaseenoo qimanniminau.

<sup>22</sup> Mi qaara faasaana Yuda maqannaasa nari maqannaasa niaqau. Mi uqoonnaki kai misa naundura ummaara reereefa faqa aiaaee qiqiufa faqa taikooafa Yuda maqannaasa nimuqasa amiqinau. Miqufanoo Moodeekaifa mi qaara faasaanara fira oomaqa sakasee aqoondiufa faqa kudi fasiqauqa nimiaqera qimanniminau.

<sup>23</sup> Miqi qimasooafa Yuda maqannaasa Moodeekaina ufa afaqeeqa aiqama aukuanaki mi oosannana auqaidaqa asasi mariqau.

<sup>24</sup> Oqai Amannafa Amedatana amaaku Akaakana faiqi anaiqi maridanoo mifa Yuda maqannaasa namuqaakamma nimaqaseenoo mifa misa aiqama kuqa nariraree qimaseenoo satu sararidanoo misa narira faasaanara randee marinau. Misa Heeburu maqannaasa ufakiqari satura rarisaidanoo fee qimasee auqu ree mariqau. Amannafa aiqama Yuda maqannaasa naru taikaani qimasee ufa rumbee marinau.

<sup>25</sup> Ufa rumbee marufanoo Estaa nammarifa kinna unnai oonuroofanoo kinna fannoo maaqi qimasee papiqa akara rinau. Oqai Amannafa Yuda maqannaasa kuqa nariraree qinau, maqee nari kuqa aruqa qufaqa misa mina diriseeqa inaqianna mina faiqi namu faqa misa mi poosanasa kai diriqau.

<sup>26</sup> Mi oosannara kai misa mi idooqara faasaana qandara maaqi qimasee auqu raqau. Purimma faasaanee qiqau. Misa purimma fee qimaru auquna oosana satu maridanoo. Misa mi oosanna auqaidaqa mi ainainausa misaki kambiqoonara oonu mafi irimariqau. Irimarufanoo Moodeekaifa misa unnai papiqa afeeqaseenoo misa mi faasaana idooaqera qimanniminau.

<sup>27</sup> Yuda maqannasa mina mareeqee nari faqa misa ninaiqi mara inaaqianna kam-biqainausa faqa aiqama fasiqa minaki ani keeqainausa faqa sandufaika maqoofanoo marinau. Aiqama aukuaana misa mi qaara faasaanafa aniroofaqa misa Moodeekaifa qufanoo mi ainainafa kambiqoonara oonu mafi irimariqau.

<sup>28</sup> Misa maaqi qiqa aiqama Yuda maqannaasa moodaa moodaa oosana kasooaqee inaaqianna kambiqainausa faqa aiqama maqa maaqaki faqa aiqama maqusaki faqa maru fasiqa anaaseesa misa mi firaa masisa aqira faasaanara oonu mafi irisaidaqa aiqama aukuanaki miqoo kai idooaidaga asasiaqa.

<sup>29</sup> Kuinna Estaa nammarifa Abiaina araamuna Moodeekaisandiri miqanda Yuda maqanna qanda miqanda moo papiqa mi qaara faasaana misa sararu ufana akara riqau mi oosannanannai kuinna fanno indaaruaqa papiqa Moodeekaifa nariara akara rumaqoona afeekaikinau.

<sup>30</sup> Miqanda mi papiqana uqasoofanoo Peereesiaa maqa maaqaki 127 (provinsaki) Yuda maqannaasa marunakinai papiqa maaqi qimasee akara rumasoofanoo fifaininau. Inni nimuqusa ireeda marinaqa innee amiqira ooqu marirana maraaqa sia rakirafa maridanoo.

<sup>31</sup> Innee faqa inni ninaiqi mara kasooaqee kambiqainausa faqa innee afeekaikam-masee inneeqa mariaqoo mi firaa masisa sararira faasaannana umaraaqa. Innee narana aurarana faqa nimuqusa ummaarara oosana afaqararana faqa iki raqarana faqa mi sandufana uaqeefaqa qinee Moodeekaisa kuinna Estaa nammarisandiri maaqanda maa sandufana inni nimiqa.

<sup>32</sup> Estaa nammarina mi sandufana masisa sararira sandufauqa afeekaika masoofaqa misa moo papiqasaa akara rumasee uqaqoofanoo marinau.

## 10

*Kinna Serkisisafa faqa Moodeekaifa faqa firaa nuqu faqaa qanda mariqau.*

<sup>1</sup> Kinna Serkisisafa faiqi ooruku nammari afaiqara marusa faqa nari maqa maaqaki marusa faqa nifiqasoofaqa misa mifa rakisi maru maqanasa dadaaqira saika auqee mariqau.

<sup>2</sup> Aiqama amiqira ainaina faqa firaa ainaina faqa kinna fannoo auqaidanoo mifa Moodeekaina firaa auqu amimarufaqa aiqama mi oosannara ufa qimariqau. Aiqama mi ufana misa Peereesiaa maqannaasa faqa Midiannaa maqannaasa faqa kinna papiqaki akara riqau.

<sup>3</sup> Mi Yuda maqannaasa fasiqafa Moodeekaifa kinna Serkisisana namba 2 marinau. Yuda maqannaasa minara firaaqoo uqanna nidimarufaqa misa mina firaa auqu amimariqau. Amimarufanoo mifa misa dadaaqinaqa amiqimmasee ooqu mariaqeera ainaini marinau. Mifa miqimma sainaqa misa niku nisauku kasooaqee kambiqainausa misa sia moo ainainara rufieefaranoo amiqimmasee marifaranoo.

## IDI UFA Samma Papiqa

### 1

*-41 Indaaruaqafa (Book 1)*

*Idi Ufa 1-41*

*Kuqaa qira asasirafa.*

- 1 Manda oosana maree mariasa iriranamau sia  
fimariasa faqa Anutuna ufa rukiee mariasa faqa  
sia moodaanaki kimariasa faqa andeeqara  
oosanara fidiqaa imariasa faqa sia ooqu maria  
fasiqausa mi manda oosanausara rufiee  
mariasa misa asasiranaki maridaqa.
- 2 Miqi maria andeeqara fasiqa anaaseesa Anutuna  
sandufamau fuanara asasirana maraidaqa.  
Misa faasaana faqa eendanaki faqa mi sandufana  
asaana rumasee irimaree fidaqa.
- 3 Miqi maria fasiqa anaaseesa saqari nammari aqa  
ummaqirafara foora iqa mariasa maridaqa nari  
qanaa mina aqama amiqimmasee iraidanoo  
mina amanee sia kakasidanoo.
- Miqira fasiqa anaasee nana ainanee auqaafanoo  
anoonaikidanoo.
- 4 Manda oosana maree marisa sia miqidaqa.  
Misa anaqaamarara foora ufai uqinoo fuaqaqidanoo.
- 5 Yaaweena ufa rukiee marisa Anutufa nari ufannai  
rumbannimaqaseenoo nari faiqi anaasee  
mariaqooqari nianai naaduma mara  
quqannisaannoo.
- 6 Yaaweefa andeeqarausa nirana mariranasaa  
rakisidanoo itita nimaqaidanoo.  
Manda oosana maree mariasa kuridiranaki maaniki  
fifaranoo.

### 2

*Anutufa utaaqamaqoo karaambaiqafa.*

- 1 Nanaree aiqama maqannaasa fifau suqufiqa manda  
oosanara tipundaarammasee aanoo qidee.  
Nanaree faiqi anaasee anoona siai ainainara  
tipundaaridee.
- 2 Misa karaambaiqauqa faqa misa rakisi nimaqee  
mariasa faqa Yaaweefa rakisi nimaqee marinakiqari quqasee kaqinni firara tipun-  
daaridaqa.  
Yaaweefa utaaqamaqai rakisirana rakisi nimaqaranakiqari faqa quqasee kaqinni firaree  
qimasee tipundaaridaqa.
- 3 Misa maaqi qidaqa anifaqa maasa misa rakisi nimaqaranakiqari geeqa qifaaqa idukua.  
Anifaqa misa qimaqimira ufa aqusaanee qidaqa.
- 4 Yaaweefa innaarunai marifa naanaidara qimasee misa oosana siai tipundaariranara  
ataasa ataasa qimannimaqaidanoo.
- 5 Miqimmaseenoo nari aanooqiranakiqari aauqima nimaqasee nari idara foaira aanooqi-  
rana kiqari rufiarana nimidanoo.
- 6 Mifa maaqi qidanoo qinee Yaaweesa inni karaambaiqa marianinnana geeqa naaquqara  
aaqana Sioona aaqanasaa quqeeqa.
- 7 Maqasaa karaambaiqa maaqi qinau, qinee Yaaweefa qima qimu ufana kooroo ianauree  
qinau.  
Mifa qiniara maaqi qinau.  
Anee qini qimaaku mariananoo maqee faasaana ani akausaikammaqa.
- 8 Anee qini iramirinaqa qinee aiqama maqannaasa ani amianaara.  
Aiqama maqa maaqa anindi kai mariannoo.



<sup>9</sup> Anee qainna samu misa narusee nimudaani itairi nimaqeennaranoo.

Anee qafeera foora misa rukamusee andaana rumaseennaranoo.

<sup>10</sup> Innee maa maqanasaa karaambaigauqa maa auuqira ufana iriaqa.

Maa maqa maqaanakinaa rakisirausa maa irirana maaqimmasee iriaqa.

<sup>11</sup> Innee naaquqee marinaqa Yaaweena ainaina mamaqaqa.

<sup>12</sup> Naindiri ree marinaqa mina oorinni niqoori saunu araaqa.

Innee sia miqifanoo mifa aanoo qinaqa innee kuqifaranoo.

Mifa itita qimaqaanifee qimasee mifinnai fimariasa asasi mariasa maridaqa.

### 3

*Kananaana dadaaqiani fee innaaru.*

<sup>1</sup> Oo Yaawee qini namuqaa moomoo maridaqa, qini qiqaondikiqa mariusa quandaki qini namuqaakidaqa.

<sup>2</sup> Misa qiniara maaqi qidaqa.

Anutufa sia mina dadaaqianoo fee qidaqa.

<sup>3</sup> Miqi qimariafana oo Yaawee anee qini aiqama kari mandainainaki itita qimaqee marianafa mariananoo.

Anee rakiranaki uriqararana qimiseenana qini paasoosirafa taikanoo marina kaifaa qimiananoo.

<sup>4</sup> Qinee Yaaweena dadaaqianifeera aaree marunanoo nari naaquqara aqaanasaaqari iriseenoo dadaaqirana qiminoo.

<sup>5</sup> Qinee maqasaa faiqaqee unaanoo aiqama eendirana Yaaweefa qini itita qimaqaidanoo.

<sup>6</sup> Namuqaauqa nukudara foora qini fiq fiq iqa marianara sia qinee rufiidaqa.

<sup>7</sup> Qini Anutu, qini Yaawee anireenana qini mandainainaki marunnana dadaaqia.

Anee qini namuqaa aiqama aupurarana nimiseenana misa afeeka siaisaikamma sainaaq maridaqa sia qini daruqa.

<sup>8</sup> Oosana oosana ummaaraki uriqararafa ani Yaawee finaindari anidanoo.

Mifa nari faiqi anaasee amiqi amiqimma nimaqaani.

### 4

*Eneemari dadaaqiani fee innaaru.*

<sup>1</sup> Oo qini itita qimaqee marianna Anutufa qinee innaaru ufakiqari ani aaraanana qini ufa iria.

Qinee manda gumaaraki mariafannana anee dadaaqinau.

Qiniara maqee qimudao qimisee qini innaaru qirana iria.

<sup>2</sup> Kisaqaqasaa fee innee aasaandaana ufa qima qimaqeefaree.

Kisaqaqasaa fee innee anoona siai ainainnara ridaqee unnaqira ainaina afaqaqa fifaree.

<sup>3</sup> Innee iriaqa. Yaaweefa andeeqarausa nariara utaaqama qaifaqa maridaqa.

Qinee mina aaraanoo qini ufa iridanoo.

<sup>4</sup> Innee naindiri ree marinaqa rufiidaqa aaqee maria oosannana minnisaaqa.

Anee aneenna qaarisaa ireeda faiqaqee idana firaqoo minara oonu mafi iria.

<sup>5</sup> Anee Yaaweefa aidimari andeeqara tatufirana kai suqa amia Anutuna suqa amiseenana mina kai saqarikia.

<sup>6</sup> Moomoosa maaqi qimasee innaaru qidaqa.

Oo Yaawee moomoo amiqi amiqirana maasa qimia.

Maasa qiqaqamasee qimudao qimasee qimia.

<sup>7</sup> Misa miqi qimariafana anee qini asasirana qimi marianafa mifa misa mi ainainausa uriqararafa maridanoo.

<sup>8</sup> Oo Yaawee anee kai amiqimmasee ititaqisaanaqa amiqimmasee faiqaidaqa.

Qinee qeeqa qaarisaa qifaqa quqasee asoaranaki faiqaidaqa.

### 5

*Manda ainainaki rakisi amaaqaani fee innaaru.*

<sup>1</sup> Oo Yaaweefa qini ufa iria.

Qini innaaru annada annada qiranakiqari qimarunnana iria.

<sup>2</sup> Oo qini Anutufa, qini karaambaigqa qinee dadaaqiannee innaaru qimarunnana iria.

Oo Yaawee qinee aniara innaaru qidaqa.

<sup>3</sup> Oo Yaawee aiqama kananaana kananaana qini ufa iriananoo.

Suani afu ururaifaqa qeeqa innaaru qirana amiseeqa ani dadaaqiranara afeesidaqa.

- 4 Anee aaqara oosanara sia asasimarianna Anutufa mariananoo.  
 Aaqara oosana maree mariasa sia eedoo qinaqa ani afusaa marifaranoo.
- 5 Nári nimoo naamoo qimariasa misa noori niqafarara ani akooqaidanoo.  
 Anee aiqama manda oosana maree mariasara fidiqaaq imariananoo.
- 6 Unnufa qimariasa kuridiranaki anee quqannisee mariananoo.  
 Faiqi fidikanauqara faqa nikaru qimariasara faqa Yaaweefa fidiqaamma nimaqaidanoo.
- 7 Ani firaa amuqusirafa marinara qinee kaqi ani naaquqara maaqaki keeqaanaura.  
 Qinee kaqi ani naaquqara amaana maqaki keeqafi qeeqa mara maree muqusee qiqoori saunaraifi innaaru qianaara.
- 8 Oo Yaawee qini namuqaa moomoo maridaqa. Aneenna aidi mari ainainnara kai qimaqiminaqa auqaa.  
 Aneenna aana uqaqifiqainaqa mimau kai fua.
- 9 Qini namuqaa uqa ufa sia anoona mari ufana qidaqa.  
 Misa kuridiranara kai nididanoo.  
 Misa nári ufannai unna qimasee fadameenara foora akusaafanoo faiqi narirafa qumbiqanoo maridanoo.
- 10 Oo Anutu anee misa ufa nimisee aupurarana faqa nimia.  
 Misa nariqa manda tipundaarirafa nári kuridirana nimiannoo.  
 Misa moomoo aaqarafa marinara faqa misa ani ufa afaqaranara ititamasee qaoo qimarianara misa aiqama aneenna afusaqari futeeqeeqee nianai aqusaa.
- 11 Miqimmasainaqa aiqama ani saqariki mariasa asasifaranoo.  
 Misa aiqama kari ani amooqira idi raaqa.  
 Aniara rimariasa ititannimaqaa.  
 Anee mariannanara misa kuqaa uqanna asasidaqa.
- 12 Oo Yaawee ani ufamau fimariasa amiqi amiqimmannimaqaa.  
 Ani amuqusirafa rakira saqariara foora misa itita nimaqaidanoo.

## 6

### *Ummaara aukuaana dadaaqiani fee innaaru.*

- 1 Oo Yaawee aneenna aanooqiranaki qari sia qiniara qaoo qimasee minni qisaa.  
 Aneenna aanooqiranannai sia qini aupurarana qimia.
- 2 Oo Yaawee qinee kudoosaapaidaqa anee qiniara qimudaoo qia.  
 Qini afeeka taikee marifaqa kudoosaapaida marunnanara anee afeeka qimia.
- 3 Qini marirafa mudukatia firaaqoo ummaarakai maridanoo.  
 Oo Yaawee kisaqasaafee kaqi fifau maridaneer sia qini dadaaqidaneer.
- 4 Oo Yaawee anee aniree mandaki marunnana uqeereeqeena amiqiraqoo quqaqisaa.  
 Aneenna nifauaranakiqari qinee kuqiranaki marunnana dadaaqia.
- 5 Kuqirausa sia aniara iridaqa.  
 Sia moo fannoo amana miqoo ani amooqiannoo.
- 6 Qinee firaa ummaarakai maridaqa firaaqoo qimudaani rimarifaqa kudoosaapaidaqa.  
 Aiqama eenda qini qaari faiqee marunnasaa daukunu kai nammariara foora aufidanoo.
- Qiga daukunu fannoo qini qunusaa aqufidanoo putaa idanoo.
- 7 Qini namuqaa darirari marianara qiki raqee marunanoo firaaqoo qifukaumuqa innooqaiqafa qifu maqarara anuqidaqa.
- 8 Innee manda oosana maree mariasa qinee marunnaqooqari nianasaa fifuqa.  
 Yaaweefa qini qiki raqarana iridanoo.
- 9 Mifa qinee dadaaqianifeera nammeera qunnana irisee qini innaaru qirana akiqara dadaaqiannoo.
- 10 Qini namuqaa uqa manda nisaurirafa tautummasee rafaqaqfu nimaqainaqa furufariqa quqasee daraanifara.

## 7

### *Andeeqasee raina nimaqaranara innaaru qirufa.*

- 1 Oo Yaawee qini Anutu qinee ititaqimaqaanneera anee iannannai anidaqa.  
 Qini qifaqaaq nimarianakinaana qumareeqee amiqirannai kaqinni quqaqisaa.
- 2 Anee sia qini dadaaqinaqa misa kaasau fainiara foora qini daaku mareeqa fifaranoo.  
 Qini dadaaqirausa sia maria maqa maaqanaki munusee miqoo misa qini qipata anaqifoora.
- 3 Oo Yaawee qini Anutufa qinee moona mandaikamma amaqaasaanoo fee qeeqa qiqoondi oosana siainaki ueeqasaanoo fee.

- 4 Qeeqa namuqaa oosana siainaki aupurarana amiananoo fee qinee mi ainainausa akaqana auqamasaanaqau qini namuqaa qini qifaqasee qumarani.
- 5 Qini qumaraseefau kuqa darusee ateekaateeka masaifaqau kasirana siai ainainnara foora maqasaa qisaifaqau marini.
- 6 Oo Yaawee aneenna aanooqiranakiqari findifua.  
Qini namuqaa aanoo qiranara firaanara irinana findifinana ititaqisaa.  
Anee andeeqaranara rimarianafa mariannanara findifinana qini dadaaqia.
- 7 Aiqama fasiqa anaasee aneenna aaqa moodaanaki suqu quqasee innaarunai mirindari rakisi nimaqaa.
- 8 Anee aiqama fasiqa anaasee ufa andeeqannisee marianafa mariananoo.  
Qinee aaqarana siaisa marunnanara anee irimmariananoo.  
Minara anee qini ufa irisee qiniara andeeqara fee qia.
- 9 Anutuna anee andeeqarafa maridana maasa irirana faqa maasa qimuqusa faqa aiqumasee qafee marianafa mariananoo.  
Anee manda oosana maree mariasa aaqara oosana taikasainaqa mariaqa.  
Andeeqarusa amiqimasee dadaaqinaqa mapukusee mariaqa.
- 10 Anutufa qini ititaqimaqee marifa maridanoo.  
Mifa nari ufa mau fimariasa dadaaqidanoo.
- 11 Anutufa andeeqara ufasaa rakisirafa maridanoo.  
Aiqama faasaambaasaana nari aanoo qiranara manda oosana maree mariasa qimannimidanoo.
- 12 Misa sia naundura quandaifanoo Anutufa nari rakira faaqaana aaruqiannoo.  
Mifa nari duru fufuseenoo deedaqiannoo.
- 13 Mifa nari kuqa nari maria duru saamuna deedaqammasee maridanoo.  
Nari idaqemari feefana faqa deedaqammasee maridanoo.
- 14 Manda oosana maree mariasa firaqoo aaqara oosana auqarara qimiridaqa.  
Misa unna qimasee ummaara oosana uqeerarara tipundaaridaqa.
- 15 Misa akaqausa nimaara ufaana fufusee nari minaki aridaqa.
- 16 Nariqa aaqara oosaa fannoo nariqa aupurarana nimidanoo.
- 17 Qinee Anutuna andeeqaranara irisee dufi dufi qidaqa.  
Qinee firaqoo uriqarara Anutuna amooqira idi raidaqa.

## 8

*Anutuna qareenaranara faqa faiqi faiqi mariranara faqa qirufa.*

- 1 Oo Yaawee maasa Yaaweefa, ani uriqararana aiqama maa maqa maaqanaki mariasa qafaidaqa.  
Ani amooqirafa innaaruna amana kai ooru maridanoo.
- 2 Miqi qimasee faiqi aanaaqiuqaindi faqa naaqoo iriasa faqa ani amooqira idi raidaqa.  
Anee amiqiranaki marianaqa ani namuqaa sia ani arifanoo.  
Nariara uriqararausee qimariasa anee misa aana ititannimaqee mariananoo.
- 3 Qinee anee auqu quqaqoonnana quqoona faqa fasauqa faqa innaarunai qafaidaqa.
- 4 Qinee mi ainainausa qafaidaqa maaqi qidaqa,  
Faiqi nanee mariafanee anee misara iridane.  
Fifau kaqikaa ainaina maridanoo.  
Faiqi faiqi faqa nanainainee mariafanee anee misa rakisidane.
- 5 Anee Yaaweefa faiqi faiqi mareeqee aiqama ainaina urinnaaqaramasee aneenna ameemaanai  
quqaseenana miqoo qareenaranara faqa nuqu firaana faqa qatara foora afisu ni-maqaananoo.
- 6 Anee faiqira aiqama anee auquqoonna ainainausasaa rakisiaqee qimasee qinau.  
Anee aiqama ainaina auquqoonnana uriqararusa mariaqeera quqanau.
- 7 Sipsipauqasaa faqa burimmakauqasaa faqa kaasau aandausaa faqa rakisiaqeera quqanau.
- 8 Innaarunai qaqaamaree nimaria ufnisa faqa ooruku nammariiki maria noodaannausa faqa minaki  
maria aandausa oosana oosana saa rakisiaqeera faiqi quqanau.
- 9 Oo Yaawee maasa Yaaweefa ani uriqarara afeeka aiqama maqa maaqaki mariasa qafaidaqa.

## 9

*Anutuna amana amana kai andeeqaranara dufi dufi qirufa.*

- 1 Oo Yaawee qinee qeeqa qimuqusa aiqamannoo ani amooqianaura.  
Anee aiqama naaquqara ainaina auqoonnana qimannimianaura.
- 2 Qinee aniki marunnanara asasiidaqa idi raanaura.  
Aiqaama afeeka faqaa Anutunara qinee amooqira idi raanaura.
- 3 Qini namuqaa ani qafamasee quandaki fuani qiana saamuriqa kuqidaqa.
- 4 Ani ufa irirani kuqaa qirana faqa amana amana kai ira oosanannoo rainnee marianafa mariananoo.  
Anee qini ufa irisee qiniara andeeqara fee qimariananoo.
- 5 Anee ani ufa rukiee marusa ufa nimiseenana kafaa manda oosana maree marusa kuridi nimaqasoonaga naaru naaru sia kaifaa misara irifaranoo.
- 6 Anee maasa namuqaa aiqama taikaseenana misa maqusaqqa faqa kuridi nimaqanau.  
Miqimma soonaga misara kaaqa qaunuqanna saqau.  
Misara irirana faqa kaaqa qaunuqanna seefaranoo.
- 7 Miqiqaa mariafanoo Yaaweefa kai naaru naaru karaambaiqa maridanoo.  
Nari ufa irira qaari deedaqamma quqaseenoo ufa andeeqa nimaqaranara rakisidanoo.
- 8 Mifa nari andeeqaranannai maa maqa maaqanasaa mariasa rakisinimaqaidanoo.  
Mifa aiqama maqannaasa amana amana kai ufa irinnimaqaidanoo.
- 9 Oorudupiraasee qimannimaqee mariasa Yaaweefa misa afeeka ititara maqusara foora maridanoo.  
Ummaara aukuaana kukeeqee maria maqusafa Yaaweefa maridanoo.
- 10 Oo Yaawee ani oosana irimariasa ani saqarikifaranoo.  
Anee sia anee iannannai ani mariasa moonna minnisannafa mariananoo.
- 11 Sioonna maqusai marida rakisinnimaqee mari Yaaweena amooqira idirama amaqaaga.  
Mifa auqoo ainainnara aiqama maqannaasa kooroommasee qimannimiaqa.
- 12 Anutufa aupuranaki mariasara sia qaunidanoo iridanoo.  
Mifa sia misa nammeera qiranara qaunidanoo.  
Mifa misa mandaikamma nimaqee mariasa aupurarana nimidanoo.
- 13 Oo Yaawee qini namuqaauqa ummaara qimimariana qafamasee qiniara qimudao qia.  
Oo Yaawee qini kuqiranakinaana ititaqisaa.
- 14 Miqimmasainaga qinee Yeerusaree maqanna fasiqa anaasee nifusaa kikiqammafi ani amooqimarunnanara qimannimianaura.  
Anee qini asumu mariranaki quqaqisaannanara asiasanaura.
- 15 Anutunara sia iri mariasa maasa qimaara madika indufusee nari kai minaki aqufidaqa.  
Misa maasa qimaara ufaana fufusee nari kai minaki aridaqa.
- 16 Yaaweefa andeeqasee ufa raina nimaqaranannai nariara kooroo idanoo.  
Manda oosana maree mariasa nari auqee maria ainainafa quandakinoo ufaanara foora nariqa qumaraidanoo.
- 17 Aiqaama manda oosana maraqaanuusa faqa aiqama Anutuna ufa minnisee nari irirana mau nimariasa faqa kuqirafa misa maqusara foora maridanoo.
- 18 Kudi fasiqa aanaaseera Anutufa sia aiqama kari qaunuannoo.  
Ainaina siaisa sia kisaqaqasaa rafaqaqafu nimaqaqai faqa marifaranoo.
- 19 Oo Yaawee anee findifua sia faiqi faiqi ani afusaa aanoo qimasee ani ufa rukiaannoo.  
Ani ufa sia irimariasa aneenna afusaa quqasee ufa nimia.
- 20 Oo Yaawee anee misa rufiarana nimia.  
Aiqaama maqannaasa nariara faiqi faiqi kai maridee qimasee iriaqa.

## 10

### *Andeeqara oosanara innaaru qirufa.*

- 1 Oo Yaawee anee nanaree nianai maridane.  
Maasa qummaraki marunana anee nanaree kukeeqana maridane.  
2 Aaqee mariasa misa nari nimoo namoo qidaqa ainaina siaisa narunnindaqaa idaqa.  
Misa kai indufuqaa dikaandanaki ainai siaisa aqufidaqa.
- 3 Manda oosana maree mariasa nariqa manda oosana maree marianara nari nimoo naamoo qidaqa.  
Ainainara kaaqa rimarifa Yaaweena aquraraseenoo mina ameesa ubeekama amaqaaidanoo.
- 4 Manda oosana maree mariasa sia Yaaweenara qeerairidaqa.  
Nari nasuriranakiqari Anutunara sia anoonee qidaqa.
- 5 Manda oosana auqee mariasa aiqama ainaina auqaafa anoona kambiqaidanoo.  
Misa sia Anutuna iriranara iridaqa.

Misa nári namuqaa uqmairaauqmairamma nimaqaidaga.

<sup>6</sup> Misa náriara maaqi qidaqa.

Maasa sia aqufuanauree qidaqa.

Sia maasa moo ummaaraki marianauree qidaqa.

<sup>7</sup> Misa ufa qirafa niqurara ufa faqa unna ufa faqa naaquqara ufa faqa kai umbiqanoo maridanoo.

Misa kai kaqi fidaqaa ira manda ufauqa qidaqa.

<sup>8</sup> Misa aiqama maqusakiaqa kukeeqa maridaqa andeeqara fasiqauqa kuqa narirara nimaarusidaqa.

Misa afeeka siaisa nimaara kukeeqaidaga.

<sup>9</sup> Misa kaasau fainiara foora kukeeqa maridaqa rakisidaqa.

Misa miqimandee ainaina siaisara rakisidaqa.

Misa ufaana fufuqaanaki arufuafaqa oonu rarisammamaree fidaqa.

<sup>10</sup> Misasaaroo qirausa sia marisa narusaafaqa maqasaa

aqufuafaqa nikunnai radamuqaafaqara foora maridaqa.

<sup>11</sup> Manda oosana maree mariasa maaqi qimasee nariqakai qidaqa.

Anutufa qini manda oosanara fifau ainainee qidanoo.

Mifa afu tautasee sia qini qiqafaannoo fee qidaqa.

<sup>12</sup> Oo Yaawee, miqira manda oosana maree mariasa aupurarana nimia.

Kafaa aupuraranaki mariasara sia qaunua, misa faqa dadaaqia.

<sup>13</sup> Manda oosana maree mariasa naqimmasee fee Anutunara unnaqimasee maaqi qidee.

Mifa sia maasa aupurana qimiannoo fee qidee.

<sup>14</sup> Oo Anutu anee niqafee mariananoo, anee ummaaraki mariasa faqa aupuraranaki mariasa

faqa niqafaidana aiqama kari dadaaqirara deedaqi marianafa mariananoo.

Misasaaroo qirausa siaisa aniki nári nifaqa quqaidaga.

Anee ooqaindari sarau imariasa dadaaqi marianafa mariananoo.

<sup>15</sup> Manda oosana maree mariasa faqa aaqee mariasa faqa misa afeeka qumaree raqurusa.

Anee misa manda oosana auqaana akiqara aupurarana niminaqa sia kaifaa miqiaqa.

<sup>16</sup> Yaaweefa naaru naaru uriqarara Karaambaiqa maridanoo.

Aiqama unna anutusa nimooqi mariasa mina maqa maaqakiqari taikafifaranoo.

<sup>17</sup> Oo Yaawee anee oorudupirausa innaaru irinnaranoo.

Anee misa paasoosirana niminnaranoo.

<sup>18</sup> Anee faiqi faiqi faqa rafaafu nimmaqee mariasa faqa iki raqarana irinnaranoo.

Anee misa ufa irinnisainna kari misa dadaaqinnaranoo.

Miqinaqa maqasaa fasiqa rufiarana firaana nimimariasa sia kafaa miqifaranoo.

## 11

*Yaaweenaki afaqa uqara ufa.*

<sup>1</sup> Qinee Yaaweena saqarikiananoo mifa qini ititaqimaqaannoo.

Anee nana furufaree inanee qiniara ufiniara foora qaqaamaree aqanai ooru fuannee qidanee.

<sup>2</sup> Misa maaqi qimasee kaifaa unna qimasee qima qimidaqa.

Manda oosana maree mariasa nári duru rambaqa fufusee, dindaramasee andeeqarausa qumee kukeeqaindari nariraree qidaqa.

<sup>3</sup> Maa maqanasaa aiqama maasa dadaaqi maria ainainsa mandaikinaqa andeeqara fasiqauqa naqaa fee ifaree.

<sup>4</sup> Yaaweefa nari naaquqara amaana maqaki maridanoo, mina ufirira qaari innaarunai ufiqinoo marifanoo minasaa maridanoo.

Miqooqari mina afu fannoo aiqama fasiqa anaasee aiqamatina nindafaidanoo.

Misa augee marianara iridanoo.

<sup>5</sup> Yaaweefa andeeqee mariasa faqa aaqee mariasa faqa amana amana kai niuqidanoo.

Sia mina sandufa afaqee mariasara Yaaweefa nári amuqusa aiqamannoo misara fidi-aqaammidanoo.

<sup>6</sup> Mandoosana maree mariasa Yaaweefa ida qauni

namufaqa idauru fasafasi marina namufaqa nammariara foora teeqimma nimaqaidanoo.

Mifa ididimari ufainannoo misa aupurarana nimidanoo.

<sup>7</sup> Yaaweefa andeeqarafa maridanoo.

Mifa andeeqaranara aididanoo.

Miandeeqara oosanna maree mariasa misa Anutuna oorisaa marifaranoo.

## 12

*Dadaaqiani fee innaaru.*

<sup>1</sup> Oo Yaawee maasa dadaaqia, sia uqanna moodaa andeeqara fasiqa maridanoo.

Kuqaa kai qimari fasiqanara randeenana sia paqurinnaranoo.

<sup>2</sup> Misa nári niqoonausara unnufa kai qiganuusa maridaqa.

Misa fadameena akusee nikaru qidaqa.

<sup>3</sup> Oo Yaawee anee fadameena akira ufa qimaria nifauruna ititannisaa.

Nári nimooqida nári nuqu uqeeree maria nifauruna faqa ititannisaa.

<sup>4</sup> Misa maaqi qidaqa maasa qeeqa ufannai maasa didimari ainaina maraidaqee qidaqa.

Maasa didimari ufana kaqi qianaara, sia moo fannoo maasa doo ititaannoo fee qidaqa.

<sup>5</sup> Yaaweefa maaqi qidanoo. Kudi fasiqauqa rafaqaqi marianara faqa aupurarana nimiafaqa

anaadannada qimarianara faqa qinee maqee aniree misa dadaaqianauree qidanoo.

Qinee anireeqa nifaaqa quqasee mariranara rakisimariana nimianaara.

<sup>6</sup> Yaaweena qima afeekaikira ufasaa nifaaqa quqee mariafa maridanoo.

Mi ufafa amiqira siruaa qisauku dinni taikasee dinni

ani qaara marasee 7 kari tisirisiri maqaafara foora kaaqa amiqirafa maridanoo.

<sup>7</sup> Oo Yaawee anee maqee maqee maasa itifaqisaa.

Mi manda fasiqausasaa ititasainaqa sia maasa mandaikamma qimaqaqa.

<sup>8</sup> Manda oosana maree mariasa aiqamatinai maridaqa.

Aiqama fasiqa anaasee mandoosanara amiqira ainainee qimasaida asasidaqa.

## 13

*Dadaaqiani fee innaaru.*

<sup>1</sup> Oo Yaawee kisaagasaa fee anee qiniara qauninnaree.

Naaruara naaruara miqi fee imarinnaree.

Anee kisaagasaa fee qini qifusaaqari kukeeqana marinnaree.

<sup>2</sup> Kisaagasaa fee qinee aupurarana uaqee maridaqee.

Daunduraki rairai qimari umaaranara oonu mafi irianauree.

Aiqama eendaki faasaana kisaagasaa fee qini aiaaee qirafa mariannoo fee.

Kisaagasaa fee qinee namuqaa nimeemaanai marianuree.

<sup>3</sup> Oo Yaawee qini Anutu anee amiqimasee qini qiqafamasee qini ufa anoona qimaqimia.

Anee kafa qini afeeka qiminaqa sia kuqa.

<sup>4</sup> Oo Yaawee anee sia qini namuqaara qinaqa qiniara mina doo rafaqaqafusee fee qiaqa.

Anee sia qini namuqaara qinaqa qinee saamuruannanara nasuriaqa.

<sup>5</sup> Anee maqee maqee qiniara aidimariannasaa qinee mundidaqa.

Anee qini asumu marainnanara qinee asasianaura.

<sup>6</sup> Oo Yaawee anee qini amiqi amiqimma qimaqoontanara ani amooqira idi raanaura.

## 14

*Faiqi faiqi mandoosanara qirufa.*

<sup>1</sup> Furufari mariasa nári nimuqusaqiqari maaqi qidaqa sia Anutufa maridanoo fee qidaqa.

Miqi qimariasa furufarira oosana maraidaqa.

Misa kaaqa aaqara oosana uqanna auqee mariasa maridaqa.

Sia moo fannoo andeeqara oosana maraidanoo.

<sup>2</sup> Yaaweefa innaarunaindari maa maqanasaa faiqi faiqi mariasa niuqidanoo.

Mifa irirana faqaasara randaifaqa sia maridaqa.

Akaqausa qini Anutusara inaaruu qidafee qimasee randaidaqa.

<sup>3</sup> Aiqaqausa quandaki kaqi runna fidaqa.

Misoo maasoo amana amana kai mandaiki marunausa maridaqa.

Sia moo fannoo andeeqaraura maridaqa. Sia uqanna.

<sup>4</sup> Anutufa maaqi qimasee iraidanoo, misa sia fee iridafee.

Aiqama maa aaqara oosanna maree mariasa irirana siaisee maridee.

Misa qini faiqi anaasee feemuara foora nama taikaidaqa.

Misa sia qiniara aiqama kari innaaru qimariasa maridaqa.

<sup>5</sup> Miqi mariasa firaqoo ruftee faranoo.

Anutufa nári ufamau fimariasa faqa maridanoo dadaaqidanoo.

<sup>6</sup> Nári mara maree qumimarifa moo ainaina auqarara

oonu mafi irifaqa aaqemariasa itita amaqaafanoo Yaaweefa mina dadaaqidanoo.  
 7 Qinee maaqi qimasee firaqoo innaaru qidaqa,  
 Isaraee maqannaasa dadaaqirafa Sioonna maqusakiqari anianifee qidaqa.  
 Yaaweefa Isaraee maqannaasa nári maqa maaqa  
 faqa qumiasana faqa kafa rairaamma saina misa firaqoo اساسifaranoo.

## 15

*Anutuna aidi mari marirafa.*

1 Oo Yaawee, yafee ani amaana maqaki keeqaannoo fee.  
 Yafee Sioonna ani naaƣuqara aaqanasaa marida innaaru qiannoo fee.  
 2 Aiqama ainainaki ani ufa mau fimariasa faqa  
 andeeqara oosana auqee mariasa faqa nári nimuƣusa ookiqari anoona ufa kai qimariasa  
 faqa ani naaƣuqara aaqanasaa marida innaaru qifaranoo.  
 3 Sia aqoonnana manda auƣu amifa faqa sia nári  
 aqoondi mandaikamma amaqaifa faqa sia nári  
 niqoonausara munuqi miniqiasa faqa mi  
 naaƣuqara aaqanasaa marida innaaru qifaranoo.  
 4 Anutufa ameesuƣu nimaqaqaisara andeeqarawsa faqa misara fidiaqaa idaqa.  
 Yaweena ufa mau fimariasara uriqararausee qidaqa.  
 Moo fannoo nári amana aiqamasee moo ainaina auqararee qimasafanoo mi  
 faasaanna moo  
 ummaara kambiqaiifanoo afai riqiseenoo oonu  
 mi ainainna auqeenoo nári qima afeekaikira ufa taikaidanoo.  
 5 Faiqi moo fannoo nári ufaasu munnimma nimiseenoo  
 aabaa munnimma siaina narindi amana kai maree  
 marifa faqa, aaqarana siai fasiqana mara ufaki  
 quqaanifee qimasee munnimma amiafanoo  
 qeerairi mari fasiqafa faqa ani naaƣuqara aaqanasaa marifaranoo.  
 Mi aiqama ainainausa auqee maria fasiqausa misa naaruara mapukusee marifaranoo.

## 16

*Afaaqa uqasee mariranara innaaru qirufa.*

1 Qinee ani saqariki marunnanara ititaqimaqa.  
 Oo Anutu, anee qini ititaqimaqaa.  
 2 Qinee Yaaweena maaqi qimasee qimamiqa. Anee qini Yaaweefa mariananoo.  
 Aiqama ainaina anee iannannaindari kai qiniki anidanoo.  
 3 Faiqi anaasee Yaaweenaki mapukusee mariasa kaaqa andeeqarawsa maridaqa.  
 Qini firaa irirafa misa faqa marirara dididanoo.  
 4 Unna anutusa iannai sandee mariasa oosana ummaara nári nifaaqai mara  
 quqaidafa.  
 Qinee sia misa faqa aandau tatufirana suqaanaura.  
 Qinee sia misa faqa misa unnaqira anutuna amooqianaura.  
 5 Oo Yaawee, anee kai qini aiqama ainainara foora mariananoo.  
 Qini didimari aiqama ainainna anee qimimariananoo.  
 Qini marirafa ani asaukuki maridanoo.  
 6 Anee qimimarianna ainainausa amiqirafa kai maridanoo.  
 Mi ainainausa aiqama kaaqa amiqirafa kai maridanoo.  
 7 Yaaweefa qini aana muƣuni marinara mina amooqidaqa.  
 Eendaki qini daakirafa daakapaidanoo.  
 8 Qinee aiqama kari Yaaweena afusaa marunnanara iridaqa.  
 Mifa qini faqa marinara sia moo ainaina fannoo qini kasi kasimma qimaqaannoo.  
 9 Minara qinee dufi dufi qidaqa اساسidaqa.  
 Qinee kaaqa amiqiranaki marunnanara miqidaqa.  
 10 Anee kuqira afeeka ameemaanaindaraana ititaqimaqaannanara miqidaqa.  
 Anee aneenna aidimarina sia minnisainanoo mifa kuqufinoo putaaianoo.  
 11 Anee kisaqqasaa maa maqanasaa marira aana qini uqafiqeennaranoo.  
 Ani afusaa marunafa اساسirana qumbiqa qimaqaidanoo.  
 Mifa naaru naaru marira اساسirana qimidanoo.

## 17

*Aaqarana siai fasiqana innaaru.*

- <sup>1</sup> Oo Yaawee andeeqaranara innaaru qimarunnana iria.  
Qinee dadaaqianneera innaaru qimarunnana faqa iria.  
Qini kuqaa qira innaaru iria.
- <sup>2</sup> Anee andeeqaranara irimariannanara qini qifairi mariana dadaaqia.
- <sup>3</sup> Yaawee anee qini qimuqusara irimmariannanoo.  
Anee eendaki qinee unnannai anireenana qini  
qimanammasee qafaananoo sia manda irirafa qiniki maridanoo.
- <sup>4</sup> Qinee sia akaqausa naannareeqa manda ufa qidaqa.  
Qinee ani naakapara ufa qaindusidaqa sia faiqi narimariasa fimaria aatata fidaqa.
- <sup>5</sup> Qini qiku fannoo ani aatata kai fida sia munuree miniree unausa maridaqa.
- <sup>6</sup> Oo Anutu anee qini innaaru irimariannanara qinee aniara innaaru qidaqa.  
Minara anee aneenna aaqoo rammatinimambi qini innaaru qirana iria.
- <sup>7</sup> Oo Anutu aneenna firaa amuqusirana maasa uqaqifiqaseenana anee maasa asumu maraqisaa.  
Maasa ani mandaaqaaqaa maridaqa sia namuqaa dariratinai marianaara.
- <sup>8</sup> Anee aneenna afu rakisianandee kai masee qini faqa rakisia.  
Anee aneenna aumooki quqaseenana rakisi qimaqainaqa qini namuqaa sia daruaqa.
- <sup>9</sup> Qini kuqa darirara imariasa qini fiq u fiq uqa maridaqa.
- <sup>10</sup> Misa qimudaoo qirana siaisa, nari nimoo naamoo kai qimariasa maridaqa.
- <sup>11</sup> Misa qini itita qimaqaaqafaqa qinee firannai anirannaira idaqa.  
Misa qini qumara rudammiqi qaqaqeeidaqa rakisidaqa.
- <sup>12</sup> Misa kaasau fainiara foora qini qimaara usidaqa.  
Qini qumarasee rakeekaa irara miqqa maridaqa.
- <sup>13</sup> Oo Yaawee anireenana qini namuqaa noorisaa oonureenana misa narusee urin-naaqarara.  
Aneenna rakira paipanannai mandoosana maree mariasa narusee misa nisaukukinaana qini maraa.
- <sup>14</sup> Oo Yaawee maa maqanasaaqarara aiqama ainaina nariara kai maree mariasa nisaukukinaana qini mara qisaa.  
Anee misa narirara nimaara usuqaanna samu misa narua.  
Naridana mina atisamu kaqi marinana misa faiqi  
namu faqa ninaiqimara faqa kasooqaqee kambiqaifana misa faqa narua.
- <sup>15</sup> Qinee sia aaqara ainaina auqaunannara qinee ani qafaanura.  
Qinee faiqaqee iinaqa findi fuananoo ani afusaa marira oosana fannoo qini asasirana qumbiqa qimiannoo.

## 18

*Rakirana Uriaaqarara idi Dafidifa ranau.*

- <sup>1</sup> Anee qini itita qimaqee marianafa mariannanara ani Yaaweenara firaaqoo dididanoo.
- <sup>2</sup> Yaaweefa qini itita qimaqee marifa maridanoo.  
Mifa qini afeeka faandaamurara foora maridanoo.  
Qini Anutufa qini itita qimaqee marifa maridanoo.  
Minaki marunannara asumu maridaqa.  
Mifa qini rakira saqariara foora maridanoo.  
Mifa qinisaa ititaseenoo qini asumu mara quqaqisaidanoo.
- <sup>3</sup> Qinee Yaaweenara innaaru qunanoo qini  
namuqaauqa darirari mariana kinaana asumu mara quqaqiseenoo.  
Minara Yaaweena amooqiaqa.
- <sup>4</sup> Manda kuqirafa qini fiq u fiq inoo marifanoo,  
darirafa ooruku nammari amakauriara foora inoo qini rafaqaqidanoo.
- <sup>5</sup> Manda kuqirafa qini fiq u fiq inoo marifanoo, faiqi  
madika fannoo ufaanara foora qini qimaara fufinoo maridanoo.
- <sup>6</sup> Qeeqa ummaarakiqari Yaaweena aareeqa.  
Qinee qeeqa Anutuna dadaaqianifeera aareeqa.  
Nari amaana maqakiqari qini nammeera qirana irinoo.  
Qinee dadaaqianifeera nammeera qiqa.
- <sup>7</sup> Anutufa qini namuqaara aranaqainara maqa kasifanoo aaqanauqa doori doorifanoo  
firaa ooniuqa faqa kasi kasidanoo.



<sup>8</sup> Ida muna fannoo Yaaweena aikaamaraindari anifanoo aiqama ainaina qama taikara ida faqa ida qauni namufaqa mina ookiqari anidanoo.

<sup>9</sup> Yaaweefa innaaruna rakeemmafufanoo quminau.

Mina aiku ameemaanai asukuna arira oonnamu marinau.

<sup>10</sup> Yaaweefa aqoosa faqaa ainainasaara foora ooqu marifinoo qaqamaree ufaimau quminau.

<sup>11</sup> Mifa asukunannoo nari kukeeqasoofanoo, amatooki oonnamu aaku suqirafa mina fiqqu fiqqu inoo marinau.

<sup>12</sup> Pupasamu faqa idauru fasafasirafa faqa mina

oorinni aakuasaa iranakiqari qumureenoo asukuna arira oonnamu rakeeinau.

<sup>13</sup> Yaaweefa innaarunaindari innaarunai qiara foora qufaqa kaaqa uriqarara Anutuna ufa iriqa.

<sup>14</sup> Yaaweefa miqi qidanoo nari feefauqa qumaree aquseenoo namuqaa narufaqa daraaniqau.

Mina aakuasaa fannoo feefara foora aqusee narufaqa quqasee sandaqa.

<sup>15</sup> Anee aneenna namuqaauqa niqiseenana aranaqoofana rairai qimannimaqee marinau.

Miqunanoo ooruku nammari ameemaanaindaraa maqa koorooinau.

Maqa ameemaanaindaraa ooniya faqa koorooinau.

<sup>16</sup> Yaaweefa innaarunaindari qini nammari farumakinaanara foora qisauku qumaree uqeera quqanau.

<sup>17</sup> Mifa qini afeeka namuqaauqa nisaukukinaana mara kaqinni quqaqiseenoo, qiniara fidiqaa imariasa

qini uridaaqarara afeeka faqaasa nisaukukinaana faqa mara kaqinni quqaqisanau.

<sup>18</sup> Qinee ummaarakii mariafanaqa qini namuqaauqa qini darirariqau.

Miqufanoo Yaaweefa qini ititaqimaqanau.

<sup>19</sup> Mifa qiniara asasi marunara qini manda ummaarakinaana dadaaqamma qisanau.

<sup>20</sup> Qinee andeeqee marunnana akiiqara amiqi amiqimma qimaqeenoo.

Qiniki sia aaqarafa marinara miqimma qimaqaidanoo.

<sup>21</sup> Qinee Yaaweena sandufamau fimarunausa maridaqa.

Sia qeeqa Anutuna qimeesa uqusee mandoosana maridaqa.

<sup>22</sup> Qinee mina aiqama sandufamau fimarunausa maridaqa.

Qinee sia mina naamuqira ufa rukiqaunausa maridaqa.

<sup>23</sup> Qinee aaqarana siaisa marunannara mifa iridanoo.

Qinee kaqi runna fuanoo qeeqa mariranasaa rakisidaqa.

<sup>24</sup> Qinee miqunnana akiiqara faqa andeeqara oosana maraunannara faqa mifa amiqimma qimaqaidanoo.

Qinee aaqarana siaisa marunannara miqimma qimaqaidanoo.

<sup>25</sup> Oo Yaawee aniki mapukusee mariasa anee misa mapukunnimaqee mariananoo.

Kaaqa andeeqee mariasa anee amiqi amiqimma nimaqee mariananoo.

<sup>26</sup> Anee kaaqa anukarausa andeeqa nimaqee mariananoo.

Mandoosana maree mariasa mandaikamma nimaqee mariananoo.

<sup>27</sup> Nari mara maree qumi mariasa anee asumu maree mariananoo.

Nari nuqu uqeeree mariasa anee mara maree qumimariananoo.

<sup>28</sup> Oo Yaawee anee kaaqa qarana qimiananoo asukuna rakeemma qisaidanoo.

<sup>29</sup> Anee qini afeeka qimianaqa qeeqa namuqaauqa naru nindaqaaqa idaqa.

Miqimmaseeqa misa afeeka faandaamura aafeeqaramaki aqufiqa naru nindaqaaqa idaqa.

<sup>30</sup> Mi Anutuna oosana fannoo andeeqanoo maridanoo.

Mina ufasaa faiqi mundimaria ufafa maridanoo.

Mifa nari mandaqee mariasa rakira saqariara foora maridanoo, ititannimaqaidanoo.

<sup>31</sup> Yaaweefa kai Anutufa maridanoo.

Anutufa kai maasa faandaamura maridanoo.

<sup>32</sup> Mi Anutufa kai qini afeeka qimiseenoo, rakisiqimaqee marifaqa qifaaqa quqasee aana nidaqa.

<sup>33</sup> Mifa qini qiku afaidama saifaqa kaasau aandaara foora sandaidaqa.

Qinee aaqanauqakiaqa nimarunanoo mifa qini rakisi qimaqaidanoo.

<sup>34</sup> Mifa qini rakira oosana uqaqifqasaifaqa qinee afeeka duru uqanna rakisidaqa.

<sup>35</sup> Oo Yaawee anee qini itita qimaqaseenana asumu mara quqaqisaananoo.

Ani rakisi qimaqarafa qini duqu uqeereenoo.

Ani afeeka fannoo qini ititaqimaqaseenoo asumu marirana qiminoo.

<sup>36</sup> Anee qini aana amiqimmasaanaqa sandaidaqa sia qiku qamaki saamurunaqa namuqaa qini qumareea.

- <sup>37</sup> Qinee qeeqa namuqaa sia minniseeqa nifaqaqa  
fifiifaqa oonu qumarasee naruseeqa kai seeqa.
- <sup>38</sup> Qinee oonu misa naru quqasaunaqa qini qikuki aqufiqa sia findifirana amanaikidaqa.
- <sup>39</sup> Oo Anutu anee rakira afeeka qini qimiseenana qeeqa namuqaa rakiranaki urinaaqarara afeeka qimianaqa misa urinnaaqareeqa.
- <sup>40</sup> Anee qini namuqaara qianaqa misa qini daaqu rufisee sandeea.  
Sandaafaqa akaqausa qiniara fidiagaqa imariasa naru taikeeqa.
- <sup>41</sup> Misa akaqausara dadaaqaqeeera faaqaruafaqa sia dadaaqirausa maridaqa sia dadaaqaia.
- Misa Yaaweenara faqa dadaaqianifeera aaraafanoo sia misa innaaru qirana irinoo.
- <sup>42</sup> Qinee misa radamusauunaqa misa kookoommaika mafuafanoo ufai fannoo misa fuaqa aqinoo.
- Misa aataataqaraa doonara foora mariafaqa qinee misasaa qiku reeqa.
- <sup>43</sup> Anee qini aanoo qimaqimaqee mariasa nisaukukinaana  
asumu mara quqaqiseenana moomoo maqannaasa rakisirusaikamma qisaananoo.  
Miqimma saanaqa qinee sia irunna fasiqa aanaaseesa qini qimeemaana maridaqa.
- <sup>44</sup> Anaamuru qini qikuki niqoori saunu araidaqa  
Misa qini ufa irisee qini ufamau fidaqa.
- <sup>45</sup> Misa afeeka taikafifaqa nariqa afeeka faandaamura minniseeqa naindiri raifaqa qinee unannai anidaqa.
- <sup>46</sup> Yaaweefa kaqi marifa maridanoo.  
Qini ititaqimaqee marina amooqiaqa.  
Qini namuqaa nisaukukinaana asumu mara quqee mari Anutuna uriqararanara kooroo iaqa.
- <sup>47</sup> Mifa qini namuqaauqa urinnaaqarara afeeka qiminoo.  
Mifa moomoo maqannaasa qini qimeemaana mara quqeenoo.
- <sup>48</sup> Miqimmaseenoo qini namuqaa nisaukukinaana asumu mara quqaqiseenoo.  
Oo Yaawee, anee qini namuqaa urinnaaqarara afeeka qimiseenana faiqi kuqa narimari-  
asasaa ititaqisaananoo.
- <sup>49</sup> Miqiannanara qinee moomoo maqannaasa qambaaindari ani amooqidaqa.  
Qinee ani amooqira idi raidaqa.
- <sup>50</sup> Anee qini Dafidisa utaqama qaanausa aneenna sia taikaaninna amuqusirana qinisaa faqa naaru  
naaru qinisaa ani aruakinausasaa faqa quqaananoo.  
Minara Anutufa rakira afeeka qini Dafidisasaa quqeenoo.

## 19

*Oosana aroonaki Anutufa auqu quqoo ainainafa mina qareenarana koorooidanoo.*

- <sup>1</sup> Innaaruna fannoo Anutuna qareenaranara firaqoo koorooidanoo.  
Innaaruna fannoo kaifaa Anutufa auqoo ainainausara kooroo idanoo.
- <sup>2</sup> Magee faasaana fannoo Anutuna areenaranara duna faasaana qimamidanoo.  
Eendirafa miqikai qimasee moo eendirana qimamidanoo.
- <sup>3</sup> Iaqarafa faqa eendirafa faqa sia noo mari faqa sia ufa qidaqa.  
Minara maasa misa ufa qirana sia iridaqa.
- <sup>4</sup> Miqinoo marifaqa aiqama maqa maaqaindari misa Anutunara koorooimariana qafaidaqa.  
Maa maqana ati munu taikee mini taikee irannaindari misa ufa iridaqa.  
Innaaruna Yaaweefa uigaana maaqara foora usakasaifanoo suani minaki maridanoo.
- <sup>5</sup> Suani fannoo minaqiqari narí fuka anaasee amundara anaasee mararara foora asaidanoo suani qaidanoo.  
Mifa sandaranaki amani mariasara foora sandarara deedaqidanoo.
- <sup>6</sup> Suani fannoo innaaruna atisaaqari urureenoo ffiifanoo meeqa dinni keeqaidanoo.  
Sia moo ainaina fannoo mina ididiranara rufisee kukeeqaanoo.

*Yaaweena sandufara qidanoo.*

- <sup>7</sup> Yaaweena sanda ufa andeeqarafa uqanna maridanoo.  
Mifa fuka afeeka nimidanoo.  
Yaaweena naakaparufa minasaa mudi mariafa maridanoo.  
Mifa irirana siaisa irirana nimidanoo.
- <sup>8</sup> Yaaweena sandufa andeeqarafa marifaqa mi ufamau fimariasa asasidaqa.  
Yaaweena naamuqira ufa fannoo amana amana kai  
andeeqa nimaqaseenoo maasa qitikuraki irirana moo faqa moo faqa qimidanoo.

<sup>9</sup> Yaaweena oorinni nisaurusee madoodoonnara oosana fannoo kaaqa anukarafa maridanoo, naaru naaru kaqi kai mariannoo.

Yaaweena ufa irirafa andeeqarafa marifanoo aiqama kari amana amana kai rainanni-maqaidanoo.

<sup>10</sup> Yaaweena ufa irirafa amiqira koora uqanna uriaaqararafa maridanoo.

Mina adiafaairafa ookasaasa anoona adiafaairana faqa arusee uriaaqaranoo maridanoo.

<sup>11</sup> Mi ufausa qini Dafidisa ani ainainira faiqi irirana qimidanoo.

Qinee mi ufamau fimarunnana akiiqara anee Yaaweefa amiqi amiqimma qimaqaananoo.

<sup>12</sup> Sia moo fannoo nari aqara oosana iridanoo.

Oo Yaawee, qinee kukeeqara aqaranaki marunnana mara kaqinni quqaqisaa.

<sup>13</sup> Qinee iridaqa faqa aqee marunnnasaa ititaqisaa.

Sia mi aqarafa qini rakisi qimaqaani.

Miqimma qisainaga andeeqafuwanoo mandoosana fannoo sia rumba qimaqaani.

<sup>14</sup> Oo Yaawee, anee qini afeeka kukeeqara maqusa faqa qini asumu maree marianafa faqa mariananoo.

Amanee qini ufara faqa qini iriranara faqa amiqira fee qimasee eedoo qia.

## 20

*Rakiranaki uriqarara innaaru.*

<sup>1</sup> Anee ummaaraki maridana Yaaweenara innaaru qinanoo ani dadaaqiani.

Yakooboona Anutufa ani itita amaqaani.

<sup>2</sup> Mifa Sioonna aqanasaa nari naaqqara amaana maqakiqari ani dadaaqiani.

<sup>3</sup> Mifa anee aminna ainainara eedoo qimasee ani aiqama aandau tatufiranara faqa asasiani.

<sup>4</sup> Anutufa ani aidimari ainainna amiani.

Anee oonu mafi irinna ainainafa anoona kambiqaani.

<sup>5</sup> Anee rakiranaki urinnaaqaraannanara asasida faqa ruanaura.

Anee rakiranaki urinnaaqaraannanara maasa qeeqa Anutuna idi raidaqa amooqianaura.

Anee aiqama ainainara irainnana Yaaweefa iriani.

<sup>6</sup> Doo maqee qinee iridaqa Yaaweefa rakirana

uriqarara afeeka nari utaaqamaqai karaambaiqana qini Dafidisa qiminoo.

Mifa nari amiqira maqusa innaarunaindari qini innaaru qirana irinoo.

Yaaweena afeeka fannoo firaa rakiranaki uriqarara afeeka qiminoo.

<sup>7</sup> Rakiranaki akaqausa nari qoosa rarisee mari karana saqarikidaqa, akaqausa nari qoosa saqarikidaqa.

Miqi mariafaqa maasa Yaaweena maasa Anutuna mina afeeka saqarikidaqa.

<sup>8</sup> Maasa namuqaa mi rakira ainainausa saqariki

mariasa niku amaki saamurifaqa maasa kaqi afeekaikammasee kikiqiqa mari-  
anaura.

<sup>9</sup> Oo Yaawee anee rakiranaki uriqarara afeeka qini Dafidisa qimia.

Maasa ani aaraanana maasa dadaaqia.

## 21

*Rakirana urinnaaqararanara Yaaweena amooqira idi.*

<sup>1</sup> Oo Yaawee anee Dafidina afeeka amiannanara asasidanoo.

Anee mina dadaaqiananoo rakirana uriaaqarainara firaaqoo nasuridanoo.

<sup>2</sup> Anee mina amuqusaki aidimari ainainna amiananoo.

Anee mifa irai ainainna faqa amiananoo.

<sup>3</sup> Anee mifinnai anireenana firaaqoo amiqi amiqimma amaqaananoo.

Miqimmasee anee uriqararasa qata koorannai auqirana afisu amaqaananoo.

<sup>4</sup> Mifa mariranara irairana anee amiseenana mina marirana kisaqaikamma  
amaqaananoo.

<sup>5</sup> Anee Yaaweefa dadaaqiannanara mifa uriqarara auqu mareenoo.

Anee mina afeeka faqa uriqarara auqu faqa amiananoo.

<sup>6</sup> Ani amiqi amiqirafa naaru naaru mina faqa mariannoo.

Ani afusaa marirafa mina asasirana qumbiqa amidanoo.

<sup>7</sup> Dafidifa Yaaweena aiqama afeeka faqaana saqarikidanoo.

Yaaweena kaqi marira aidirafa marinara mifa aiqama ainainaki afeekaikammasee  
mariannoo.

<sup>8</sup> Dafidifa nari aiqama namuqaa rumbannimaqaannoo.

Mifa nariara fidiqaa imariasa faqa rumbannimaqaannoo.

<sup>9</sup> Mifa anireenoo idaurunnoo narí namuqaa aiqama kuridi nimaqaannoo.  
Yaaweenaa arana qarafa misa nambiqaamasannoo.

Ida fannoo misa qama taikaannoo.

<sup>10</sup> Sia uqanna misa atikiqari moo fannoo kaqi mariannoo. Dafidifa aiqama naru taikaannoo.

<sup>11</sup> Misa mina ariraree qimasee tipundaaramma saifanoo sia misa tipundaarirafa anoona kambiqaannoo.

<sup>12</sup> Mifa feefa niigamasainaa quqasee sandeefarannoo.

<sup>13</sup> Yaawee maasa ani firaa afeekara amooqidaqa. Maasa idi raidaqa ani afeekara amooqianaara.

## 22

*Ummaara faqaana iki raqarafa faqa Anutuna amooqira idi faqa maridanoo.*

<sup>1</sup> Oo qini Anutu, qini Anutu, naqifee ifanee anee qini minniqiseenanee.

Anee naqaa fee ifanee aadumai nianasaa maridana sia qini dadaaqidanee.

Anee naqaa fee ifanee sia qini ikiraqarana irinanee.

<sup>2</sup> Faasaana ani qeeqa Anutuna aaraunana sia maqi qiananoo.

Eendaki faqa aaraida maridaqa sia idooeeqa.

<sup>3</sup> Anee naaquqarafa andeeqara oosana faqaafa mariananoo.

Isaraee maqannaasa ani amooqi mariafa mariananoo.

<sup>4</sup> Maasa qikeeku qikaaku ani saqariki mariqau.

Misa ani saqari kammasoofana anee misa asumu mariaqeera maranau.

<sup>5</sup> Misa manda ainainakiqari ani auqu roonannai asumu mariqau.

Misa ani saqarikida sia nisaurirana mareea.

<sup>6</sup> Qinee oorudupirausa fifau doodaaniara foora maridaqa.

Qiniara nikooqaiqa fidaqaa midaqa.

<sup>7</sup> Misa qini qiqafeeqa uteeti qimasee nimaakiri rummiqi qimaqaidaqa.

Miqimmasee misa ninuka aqidaqa maqi qidaqa.

<sup>8</sup> Anee Yaaweenasaa mudi mariananoo nanaree mifa sia ani dadaaqidanoo fee.

Yaawee aniara aidi marifanoo nanaree mifa ani sia itita amaqaidanoo fee.

Nanaree sia ani dadaaqidanoo fee.

<sup>9</sup> Oo Yaawee anee kai qini qinoona aranandakinaana amiqimmasee qini mara akoonnai quqaqisaananoo.

Qinee aanaaqi maridaqa qeeqa qinoona naamma

neemariafanana anee qini amiqimmasee rakisi qimaqee marunaqa mariqiafana.

<sup>10</sup> Qinee qeeqa qinoona aranandakiqari

kambiqaafannaqoo qari anisaa mudiqa maridaqa.

Miqiqa marunana anee qini Anutufa mariananoo.

<sup>11</sup> Ummaara qiniki maridanoo, sia nianai maria. Sia qini dadaaqirausa maridammia.

<sup>12</sup> Namuqaa moomoo kaasau aandaara foora qini fiq fiq iqa maridaqa.

Misa Basaana maqa maqakina afeeka kaasau aandaara foora qini fiq fiq iqa maridaqa.

<sup>13</sup> Misa kaasau fainiara foora nooraqasee qini qipata anaqirara rairai qidaqa.

<sup>14</sup> Nammari maqasaa adiasaafanoo dadasindee inoo qini afeeka taikeenoo.

Qini qimudaani aiqama radukinoo maridanoo.

Qini qimuqusaki daaquqarafa maridanoo.

<sup>15</sup> Qini qimaqaara aadana usidanoo.

Qini qimaakiri qimaqaarai atooqanoo maridanoo. Anee qini kookoommaki rumaqi-maqa qaanaqa kuqirara midaqa.

<sup>16</sup> Manda oosana maree mariasa aanoo qimaria fainisara foora qini fiq fiq iqa maridaqa.

Misa qini qiku qisauku aakumaree rakee iraridaqa.

<sup>17</sup> Qini qimudaani akooqoo marifaqa misa qini kaaqa tataqaidaqa.

<sup>18</sup> Misa qini qammunna marasee rainaidaqa.

Qini siuta raipaqusee kaatara foora sararammasee mareea.

<sup>19</sup> Oo Yaawee sia anee nianai maria qini daaqa ani maria.

Kai kaqi aniree qini rukia qisaa.

<sup>20</sup> Oo Yaawee misa nookinaana qini mareeqee asumu quqaqisaa.

Maa fainisa nookinaana qini mareeqee kaqinni asumu quqaqisaa.

<sup>21</sup> Kaasau fainiuqa nookinaana mara kaqinni quqaqisaa.

Qinee kaasau aandaauqa nifusaa ititarausa sia mariafaqa maridaqa.

<sup>22</sup> Miqimma sainaqa anee auqaanna ainainnara qinee qeeqa maqannaasa qimannimi-  
anaura.

Qimannimisee qinee misa suqiranakiqari ani amooqianaura.

<sup>23</sup> Innee Yaaweena ainainira faiqiuqa mina amooqiaqa.

Innee Yakooboona aiku asaku mariasa mina auqu uqeeraaqa.

Innee Isaraee maqannaasa mina kai amooqiaqa.

<sup>24</sup> Yaaweefa sia kudi fasiqauqa sarau imarianara irisee ameesuqu nimaqaidanoo.

Sia oori rafusu kaqinni aqidanoo, mifa misa innaaru qirana iriseenoo dadaaqidanoo.

<sup>25</sup> Qinee firaa suqiranaki anee auqaanna ainainnara ani amooqianaura.

Ani amooqirara suqiga mariasa nifusaa ani amooqianaura.

Qinee qima afeekaikammasee suqa amianauree qiafanna tatufirana suqa amianauree.

<sup>26</sup> Sarau iranaki mariasa narana namasafanoo nimuaqu imarina marifaranoo.

Yaaweefinnai anirainausa mina amooqifaranoo.

Miqi mariasa naaru naaru aiqama ainaina amanaikirusa mariaqa.

<sup>27</sup> Aiqama maqannaasa Yaaweena irifaranoo.

Aiqama maqa maaqakinaasa mifinnai ubeekeefaranoo.

Aiqama fasiqa anaasee mina amooqifaranoo.

<sup>28</sup> Yaaweefa karaambaiqa maridanoo aiqama maqannaasa rakisinnimaqaidanoo.

<sup>29</sup> Aiqama ramoo ramaa imariasa mina oorinni niqoori saunu areefaranoo.

Aiqama faiqi faiqi mina oorinni niqoori saunu areefaranoo.

<sup>30</sup> Naaru kambiqaainausa mina ainainira faiqiuqa marifaranoo.

Misa kasooaqee kambiqaainausa Yaaweena qimannimifaranoo.

<sup>31</sup> Yaaweefa nari faiqi anaasee maroonara naaru kambiqaainausa qimannimifaranoo.

## 23

*Yaaweefa maasasaa sipsipasaara foora rakisirafa maridanoo.*

col <sup>2</sup> Yaaweefa qini sipsipasaara foora rakisi qimaqee marifaqa qinee sia moo ainainara  
sarau ianaura.

Mifa qini mareeqeenoo sipsipara foora quqeenara andandaki quqasaifaqa namasee  
faiqaidaqa.

Mifa qini qifiqeeqee amiqira nammari reendeenamasee ooqu fimarina afaisaa quqaqi-  
saifaqa namasee idooaidaga.

<sup>3</sup> Mifa qini fuka afeeka qimidanoo.

Mifa nari qima afeekaika maqoomau finoo qini andeeqara aatata kai qifiqee fidanoo.

<sup>4</sup> Yaawee anee qini faqa mariannanara qinee kuqira

ummaarakai asukuna titunaanu qiranakiara foora fidaqa sia moo mandainainara rufi-  
aanaura.

Ani saunu faqa unnaana samu faqa qini itita qimaqeenoo.

<sup>5</sup> Anee qini namuqaa nifusaa firaa oomaqa qini qimiananoo.

Qinee uriqarara fasiqara foora marunana qini daarama quqaananoo.

Anee amiqi amiqira ainaina namariara foora qini kaafaki adia afairaqaramma qimi-  
ananoo.

<sup>6</sup> Ani amiqi amiqirafa faqa amuqusirafa faqa qini faqa mariinoo kuquananoo kai  
taikaannoo.

Ani amaana maqa fannoo qini maaqara foora

marinaqa qinee minaki keeqee raudee iqa kuquananoo taikaannoo.

## 24

*Uriqarara karaambaiqa.*

<sup>1</sup> Maa maqa maaqafa faqa aiqama minakinaa ainaina faqa Yaaweenaandi kai maridanoo.

Maqa faqa minasaa maria fasiqa aanaaseesa faqa minaindi kai maridaqa.

<sup>2</sup> Mifa maa maqana ameemaanai maru nammarina amuaaqa auqu quqanau.

Quqaseenoo mina faakanauqa maqa ameemaanaindaraa nammariiki rakiqanau.

<sup>3</sup> Yafee amana Yaaweena aaqanasaa oorufuannoo fee.

Yafee amana mina naaquqara amaana maqaki keeqaannoo fee.

<sup>4</sup> Andeeqara oosana auqee marifa faqa amiqira amuqusa faqaafa faqa sia unna anutusa  
nimooqi mariasa

faqa sia unna qimasee nimana aiqee mariasa kai minaki keeqeefaranoo.

<sup>5</sup> Yaaweefa misa asumu mara quqasee amiqi amiqimma nimaqaannoo.

Miqimmaseenoo Anutufa misara aaqarana siaisee qiannoo.

<sup>6</sup> Miqira fasiqauqa Anutufinnai anidaqa.

Misa Yakooboona Anutuna oorinni fidaqa.

<sup>7</sup> Innee faandaamura kooqiuqa firaagoo atua aquaqa.

Innee ooqeenaa amaana maqa kooqiuqa faqa atuasaifanoo uriqarara karaambaiqa keeqaani.

<sup>8</sup> Yafee mi uriqarara karaambaiqafa maridanoo fee.

Mifa Yaaweefa afeeka faqa eeraara faqa faqaafa maridanoo.

Mifa Yaaweefa aiqama rakiranaki uriqaree marifa maridanoo.

<sup>9</sup> Innee faandaamura kooqiuqa firaagoo atua aquaqa.

Innee ooqeenaa amaana maqa kooqiuqa faqa atuasaifanoo uriqarara karaambaiqa keeqaani.

<sup>10</sup> Yafee mi afeeka karaambaiqafa maridanoo fee.

Yaaweefa aiqama maqannaa uriqarara afeeka faqaafa, afeeka karaambaiqa maridanoo.

## 25

*Rakisinnimaqaranara faqa itita nimaqaranara faqa innaaru qirufa.*

<sup>1</sup> Oo Yaawee qeeqa innaaru qirana ani amidaqa.

<sup>2</sup> Oo qini Anutu, qinee ani saqarikidaqa.

Namuqaa darifaqa qisauruanoora anee mi dariranasaa ititaqisaa.

Anee dadaaqinaqa qini namuqaa sia qiniara ataasa ataasa qiqaqa.

<sup>3</sup> Ani saqariki mariasa namuqaa rafaafafu nimaqarafa sia maridanoo.

Qusufa qimasee ani Yaaweenara kaukaata qimariasa namuqaa misa rafaafafu ni-maqaidaqa.

<sup>4</sup> Oo Yaawee anee fimarianna aanna qini uqaqifiqaina fua.

Anee fimarianna aannara qini daamuqinaqa iria.

<sup>5</sup> Anee qini Anutufa qini asumu maree marianafa

mariannanara ani anoona ufa mau firana daakapa.

Qinee aiqama kari ani saqarikidaqa.

<sup>6</sup> Oo Yaawee aneenna qimudaoo qirana faqa aneenna

naaru marira amuqusirana quqannifiqoonnanara oonu mafi iria.

<sup>7</sup> Qinee kumaaraasaa auqaafanna aaqarana akiiqara minniqisaa.

Oo Yaawee, aneenna naaru marira amuqusiranannoo

faqa aneenna amiqi amiqirannoo faqa qiniara oonu mafi iriqisaa.

<sup>8</sup> Yaaweefa andeeqara marirana faqaafa marinara aaqee mariasa andeeqara aanara naamua qidanoo.

<sup>9</sup> Nari nifaqaq mara maree qumi mariasa Yaaweefa andeeqara aatata nifqee fidanoo, nari aidiranara qimannimidanoo.

<sup>10</sup> Mina moodaanaki kira ufa faqa mina sandufa faqa afaqee mariasa Yaaweefa nari mapukusee marira

oosanannoo faqa nari amuqusiranannoo faqa nifqee fidanoo.

<sup>11</sup> Oo Yaawee, aneenna qima afeekai kiranara oonumafi irisee qini moomoo aaqarana akiiqara minniqisaa.

<sup>12</sup> Yaaweenara naaquqee marisa mifa amiqira aanara qimannimiannoo.

Qima niminaqa mi mau fifaranoo.

<sup>13</sup> Misa aiqama ainaina amanaikiranaki amiqiranaki marifaranoo.

Misa faiqi namu maqa maaqa mareefaranoo.

<sup>14</sup> Yaaweefa mina ufa qaindusi mariasa niqoondi maridanoo.

Mifa nari moodaanaki kira ufa qimaqoona kafaa qimannimidanoo.

<sup>15</sup> Qinee aiqama kari dadaaqianifeera Yaaweefinnai qifu maqaidaqa.

Miqi marunanoo mifa qini manda ainainakinaana itita qisee marifa maridanoo.

<sup>16</sup> Qinee qeeqaraa marida ummooquki marunnanara Yaawee anee qinne unannai quandafi qiniara qimudaoo qia.

<sup>17</sup> Qini qimuqusakina oosana oosana ummaarauqa maraqa qisasee qini oosana oosana ummaarakinaana mara kaqinni quqaqisaa.

<sup>18</sup> Oo Yaawee, qini aiqama aaqarana akiiqara minni qiseenana aupurarana faqa fitin-ranara faqa dadaaqia.

<sup>19</sup> Oo Yaawee anee qafaa qini namuqaa moomoo uqanna maridaqa.

Misa firaagoo uqanna qiniara fidaqaa idaqa.

<sup>20</sup> Qini titaqisaidana qini marirana mara afeedamma qisaa.

Anee itita qimaqaanneera qinee anee iannannai anidaqa.

Namuqaa qini rafaafafu qimaqee marianasaa itita qisaa.

<sup>21</sup> Qinee ani mandaaqee marunnanara qini andeeqarafa

faqa anoona qiramau firafa faqa qini rakisiqimaqaani.

- 22 Oo Anutu, Isaraee maqannaa aneenna faiqi anaasee nariqa oosana oosana ummaara kinaana mara kaqinni quqannisaa.

## 26

*Andeeqara fasiqa innaaru qirufa.*

- 1 Oo Yaawee qinee andeeqara oosana maree marunnanara faqa firaqoo ani saqariki marunnanara faqa iriseenana qiniara aaqarana siai fee qinaqa iriaqa.  
 2 Oo Yaawee, anee qini diuqummasee qimanammasee qafaa.  
 Qini didirana faqa qini irirana faqa rainasee iria.  
 3 Ani aiqama kari mari amuqusirafa qini indaarunnikamma qimaqaidanoo.  
 Aniki mapukusee marira oosana fannoo qini dadaaqidanoo.  
 4 Qinee sia fifau aatata nimariasa saimbaqa nidaqa.  
 Qinee sia qaaralki mariasa faqa moodaanaki kianaara.  
 5 Qinee aaqee mariasa faqa moodaanaki nirara fidiqaammidanoo.  
 Manda oosana auqee mariasa finnaaqa raidaqa.  
 6 Qinee qeeqa qisauku nammari uqusee qeeqara aaqarana siaisee qidaqa.  
 Miqimmasee qinee ani aidara fiq u fiq u idafa ani amooqidaqa.  
 7 Qinee aniara dufi dufi qira idi raidaqa anee firaa ainaina auqoonnanara qimannimi-  
 daqa.  
 8 Oo Yaawee qinee anee marianna maqaanara firaqoo dididanoo.  
 Ani qareenarafa mariqoora firaqoo dididanoo.  
 9 Sia aaqee mariasa namufaqa qini kuridi qimaqaa.  
 Faiqi nari mariasa darirana kinaana qini mara kaqinni quqaqisaa.  
 10 Miqi mariasa aiqama kari manda oosana faqa umeeramaisaaniffee munnimma maqee  
 maqee maree mariasa faqa nariranakinaana qini mara kaqinni quqaqisaa.  
 11 Qinee qeeqaraa andeeqara oosana auqaidaqa.  
 Anee qiniara qimudaoo qimasee qini asumu mara quqaqisaa.  
 12 Qinee aiqama manda ainainakiqari kaqinni maridaqa.  
 Qinee Yaaweena faiqi anaasee suqiranaki mina amooqidaqa.

## 27

*Anutuna amooqira innaaru.*

- 1 Yaaweefa qini qoomara foora maridanoo qini asumu maree marifa marinara qinee yanaree moonara rufiaanauree.  
 Qini marirana nirana afeeka Yaaweefa kai marinara qinee yanaree maparaa ianauree.  
 2 Manda oosana maree mariasa aanaamuru qini namuqaauqa qini makuruaanee qimasee anireeqa niku amaki saamurifara.  
 3 Qini namuqaa moomoo aniree qini maqusa uqusaifaqa sia qinee misara rufiaanaura.  
 Rakiranaki misa aniree darirarifaqa sia qinee maparaa ianaura qifaafa quqasee mari-  
 anaura.  
 4 Qinee moodaa ainaina kai Yaaweenasaa qaraana marararee qidaqa, qinee minara kai  
 randaanaura.  
 Qinee maa maqanasaa marunna kamuqoo Yaaweena uiqaana maqaki marianauree  
 qidaqa.  
 Minaki maridaqa Yaaweena qareenarana qafamasee asianauree qidaqa.  
 Mina uiqaana maqaki mina iriranara mariranara randaanauree qidaqa.  
 5 Manda aukuaana kambiqaiananoo nari mari maqanaki kukeeqa qimaqaannoo.  
 Nari uiqaana maqaki qini kukeeqaqisaanoo.  
 Mifa qini uqeereeqee aaqanasaa oonisaa amiqiraqoo quqaqisaanoo.  
 6 Doo miqoo qini namuqaa qini uqusaafanoo Yaaweefa qini mareeqee misa urinnaaqarama saifaqa marianaura.  
 Miqimmasainaqa qinee nari Yaaweena naaquqara uiqaana maqaki faafa quqasee asasammasee aanda uqatufirana suqamianaura.  
 Qinee idi namu faqa ufireena namu faqa Yaaweenara amooqira idi raanaura.  
 7 Oo Yaawee qinee qeeqa ufannai aniara nameera qimasee aaraanana iria.  
 Anee qini qifauarana qimisee kafaa anoona ufa qimaqimia.  
 8 Anee qiniara aniree qini qimooqiannee qianaqa Yaawee, qinee eedoo qimasee ani-  
 anaura.  
 9 Oo Yaawee aneenna oori afiri sia qini kukeeqa qimaqaa.  
 Sia qiniara arana qaani. Sia aneenna ainainira faiqi qiniara anirandee fuannee qia.

Anee qini dadaaƙi marianafa mariananoo.

Oo qini Manika Anutu anee qini asumu maree marianafa mariananoo,  
sia qini minniqisaa sia qini quƙaqisaa.

<sup>10</sup> Qini qinaukoo qini minniqisaifanoo Yaaweefa qinisaa rakisiannoo.

<sup>11</sup> Oo Yaawee anee qiniara auƙaannee qimarianna ainainnara daamuƙia.

Qini namuƙaa moomoo marianara irisee andeeƙara aatata amiqiraqoo qifiqee fua.

<sup>12</sup> Sia anee qini mareeqee qini namuƙaa marianaki quƙaqisaa.

Misa naaƙuƙara ufannai faƙa unna ufannai faƙa qini daridaƙa.

<sup>13</sup> Qinee maa ainainnara amiqimmasee iridaƙa,

qinee kasooaqee kaƙi mariasa faƙa maridaƙa Yaaweena amiqi amiqirana  
qafaanaura.

<sup>14</sup> Yaaweena saƙarika.

Sia ani amuƙusa ummaara raani, afeekaikammasee mina saƙarika.

## 28

### *Dadaaqiani fee innaaru.*

<sup>1</sup> Oo Yaawee anee qini dadaaqida ititaqimaqee  
marianaƙa minakiqari qinee ani aaraanana qini nammeera qirana iria.

Anee sia qini anoona ufa qima qiminaƙa qinee

kuƙira maƙa maaƙaki kuƙufida fimariasa qambaana marianaura.

<sup>2</sup> Qinee qeeƙa qisauku ani naaƙuƙara amaana maƙa

maritinai uqeerasee dadaaqianneera innaaru qianana iria.

<sup>3</sup> Oo Yaawee anee sia manda oosana maree mariasa faƙa aaqee mariasa faƙa amiqira  
adiafaa ira ufa

qimaria fanoo misa nimuƙusaki manda irirafa umbiqarausa namufaƙa qini  
rafaaqafu qimaƙaa.

<sup>4</sup> Oo Yaawee misa auqee mariana akiqara aupurarana nimia.

Nisaukunnai manda oosana auqee mariana amana kai aupurarana nimia.

Misa aiqama manda oosana maree mariana amana kai aupurarana nimia.

Misa aƙarana akiqara amanaiƙamma nimia.

<sup>5</sup> Miqi mariasa Yaaweefa auqoo ainainnara sia iridaƙa.

Mifa nari asaukunnai auƙu quqoo ainainnara sia misa

iridaƙa mina akiqara Yaaweefa misa aupurarana nimiseenoo kuridi nimaqannoo.

<sup>6</sup> Yaaweefa qinee dadaaqiani feera nammeera qunnana irinara mina amooqidaƙa.

<sup>7</sup> Yaaweefa qini itita qimaqaseenoo qini dadaaqi marifa maridanoo.

Qinee mina saƙarikidaƙa.

Mifa qini dadaaqirana faƙa asasirana faƙa qimisaiƙaƙa asasidaƙa.

Minara qinee mina amooqidaƙa asasira idi rama amaƙaƙidaƙa.

<sup>8</sup> Yaaweefa nari faiqi anaasee itita nimaqaidanoo.

Mifa nari utaƙamaƙai karaambaƙana itita

amaqaseenoo mina manda ainainakinaana mara kaqinni quƙaisaidanoo.

<sup>9</sup> Oo Yaawee aneenna faiqi anaasee manda

ainainakinaana mara kaqinni quqasee anindikiƙa mariasa amiqi amiqimma ni-  
maƙaa.

Anee misasaa sipsipasaa rakisirafara foora maridana naaruara misasaa rakisia.

## 29

### *Aakuusaa ufai uqirafa Yaaweena ufara foora maridanoo.*

<sup>1</sup> Innee innaarunai mariasa mina amooqiaƙa.

Mina afeekara faƙa qareenaranara faƙa amooqiaƙa.

<sup>2</sup> Yaaweena qareenara auƙu uqeeraaƙa.

Yaaweefa naaƙuƙarafa koorooinaƙa mina oorinni niqoori saunu arafi naaƙuƙamafi mina  
amooqiaƙa.

<sup>3</sup> Yaaweefa ufa qifaƙa ooruku nammariki aiqamaindari mina ufa iridaƙa.

Uriqarara qareenarana faƙaa Anutufa innaarunaira

foora darara qifanoo ooruku nammari aiqamai daraanifaƙa iridaƙa.

<sup>4</sup> Yaaweefa aiqama afeeka faƙa eraarirana faqaana ufa qirana irisee aiqamausa  
rufiaidaƙa.

<sup>5</sup> Yaaweena ufa fannoo firaa saƙari raudee marifa maridanoo.

Yaaweena ufa fannoo Reebanoona maƙa maaƙaki

mari saƙarisa sidaa saƙariuƙa raudee marifa maridanoo.



<sup>6</sup> Yaaweefa qifaqa Reebanoona aaqanauqa kasidaqa aandau aanaaqiara foora rafusaki rafusaki idaqa.

Qeeramoonna aaqana faqa miqi kai idanoo burimakau aanaaqi timmusara foora rafusaki rafusaki idanoo.

<sup>7</sup> Yaaweena ufa fannoo aakuusaara foora pananana qidanoo.

<sup>8</sup> Yaaweena ufa fannoo aadana maqa maaqa kasidanoo.

Mifa qifanoo Kadeesa aadana maqa maaqa faqa kasidanoo.

<sup>9</sup> Yaaweena ufa fannoo aakuusaara foora pananana qinoo saqari amanee rauqu aqidanoo.

Yaaweena maaqaki mariasa firaqoo faaqa rumasee Yaaweefa uriqarara qareenarana faqaafee qidaqa.

<sup>10</sup> Yaaweefa naaruara uriqarara karaambaiqa maridanoo aiqama nammariuqasaa rakisidanoo.

<sup>11</sup> Yaaweefa narí aiku asauku afeeka nimidanoo.

Amiqi amiqimma nimaqasee asooaranaki quqannisaidanoo.

### 30

*Dufi dufi qira innaaru.*

<sup>1</sup> Oo Yaawee, ani auqu qinee uqeeraidaqa.

Qini namuqaauga qini darusee ataasa ataasa qidaqa nasuriraree qianakinaana kaqinni mara quqa qisaannanara ani auqu uqeeraidaqa.

<sup>2</sup> Oo Yaawee qini Anutufa qinee ani dadaaqiranara aaraunana anee qini dadaaqiananoo.

<sup>3</sup> Oo Yaawee anee qini madikakinaana qumbaqi qisaananoo, qinee kuqira madikaki ooqu raunana anee qumbaqisee kaqi marirana qimiananoo.

<sup>4</sup> Oo innee Yaaweenaki mapukusee mariasa, innee mina amooqira idi raaqa.

Innee mifa auqoo ainainara oonu mafi irisee mina dufi dufi qima amaqaqa.

<sup>5</sup> Yaaweena aanooqirafa qusakamu marinoo taikaannoo.

Mina amiqirafa maa maqanasaa kisaagasaa mariannoo.

Eendaki qusasaa qikiraqarafa mariannoo, iaqainanoo kananaana asasirafa mariannoo.

<sup>6</sup> Qinee afeekaikammasee mapukiqa maridaqa qinee aaqamasee qeeqara maaqi qiqifana.

Qinee naaruara naaruara sia kasianauree qiqiafana.

<sup>7</sup> Oo Yaawee anee qini amiqimma qimaqaseenana

aaqana saaqaraa maaqara foora mariafanana qinisaa itita qimaqanau.

Anee aneenna oori kaqinni quandoonaqa qinee maparaa iranaki mariqiafana.

<sup>8</sup> Oo Yaawee qinee ani aareeqa anee dadaaqirana qimianneera aareeqa

<sup>9</sup> Qini kuqirafa sia kaqikaagaqoo faqa ani amooqirafa mariannoo.

Qinee madikaki ooquraananoo qini mi kuqirafa sia amana moo ainaina auqaannoo.

Kuqirauasa amanee ani amooqifaree. Sia amana.

Amanee misa anee kisaagasaa amiqimma nimaqee mariannanara kooroo ifaree. Sia amana.

<sup>10</sup> Oo Yaawee, anee qini innaaru irisee qimudao qimasee qini dadaaqia.

<sup>11</sup> Qinee soofarakaki marunnana anee quandasee idi rarana qimiananoo.

Anee qini ikiraqarana mara aquseenana asasirana qini fiqumma datimma qimaqaananoo.

<sup>12</sup> Miqimma qisaannanara qinee sia ufa siaina qireeda marianaura qinee ani amooqira idi raanaura.

Oo Yaawee anee qini Anutufa qinee naaruara naaruara ani dufi dufi qima amaqaanura.

### 31

*Anutuna saqarikira innaaru.*

<sup>1</sup> Oo Yaawee qinee itita qimaqaanneera anee iannannai anidaqa.

Naaruara sia qini qisauriranaki quqaqisaa.

Anee andeeqara Anutufa mariananoo qini kuqiranakinaana mara kaqinni quqaqisaa.

<sup>2</sup> Qini ufa irisee maqee uqanna qini kuqiranakinaana mara kaqinni quqaqisaa.

Anee qini faandaamura ooniara foora maridana qini itita qisaa.

Anee qinisaa ququsara foora auqu ititaseenana qini kuqiranakinaana mara kaqinni quqaqisaa.

<sup>3</sup> Oo Yaawee anee qini faandaamura ooniara foora faqa ququsara foora faqa mariananoo.

Aneenna qima afeekaikunadee inana qini qisauku qumaree aana muquninaqa fua.

- 4 Anee qini dadaaqinaqa qini qimaara fufuqaa ufaannanaki sia arua.  
Manda ainainasaa auqaanara foora qinisaa mandaqa qimaqaa.
- 5 Ani asaukuki qeeqa qimana quqaidaqa.  
Oo Yaawee anee qini kuqiranakinaana mara kaqinni quqa qiseennaranoo.  
Anee mapukusee marirana faqaa Anutufa mariananoo.
- 6 Anee unnaqira anutusara innaaru qimariasara fidiqaa imariananoo.  
Misa miqi mariafaqa qinee ani kai saqarikidaqa.
- 7 Ani maasara kisaqaasaa amuqusiranara qinee asasidaqa nasurianaura.  
Anee qini aupurarana faqa ummaara faqa qafaannanara miqianaura.
- 8 Anee sia qini mareeqee namuqaa nisaukuki quqasaanaqa qini qumareea.  
Qinee qifaqa quqasee qeeqa didimarinnai firana anee qimiananoo.
- 9 Oo Yaawee qinee qummaarakari maridaqa qiniara qimudaao qia.  
Qinee kaaqa moomoo kari iki raqee saunanoo qifukaumu innooqafinoo.  
Qini qimudaani firaqoo ummooqukidanoo.
- 10 Qini ummaara fannoo qini afeeka taikaidanoo.  
Qini iki raqarafa qini marirana qusa raidanoo.  
Qini ummaara fannoo qini afeeka taikasaifanoo qini qimudaani ummooqukidanoo.
- 11 Qini namuqaa faqa qini qiqoonasaa faqa qiniara uteeti amara auqidaqa.  
Minara kai qiniara irimariasaa naaquqaiifaqa qini daaqu rufiqaidaqa.  
Aanai qini paquri masee quqasee sandaidaqa.
- 12 Qinee kuqira foora iqa marunaqa qiniara qaunidaqa.  
Qinee rukamuffaqa aqusaa qafeesara foora maridaqa.
- 13 Qini namuqaauqa maqandanai nari qimami nari qimami masaidaqa uteeti qimari-  
afaqa iridaqa.  
Rufiarafa firaafa qini fiqum inoo maridanoo.  
Misa moodaanaki suqufiqa qini marirana taika qimaqaaneera tipundaaridaqa.
- 14 Miqi mariafaqa Oo Yaawee qini Anutu qinee ani kai saqarikidaqa.
- 15 Qinee aiqama kari ani rakisi qimaqaranaki maridaqa.  
Qini namuqaa qini darirara qifaqaqa nuanakinaana qini mareeqee amiqiraqoo quqa  
qisaa.
- 16 Qini aneenna ainainira faiqira qimudaao qidana qifaqaa.  
Aneenna sia takee mari amuqusiranaki qini mara quqa qisaa.
- 17 Oo Yaawee, qinee ani aaraunannara anee qinaqa  
qini namuqaauqa sia qini qisauriranaki quqaqisaaqa.  
Manda oosana maree mariasa kai nisauriranaki mariaqa.  
Misa ufa taikafinaqa madikaki kuqirausa faqa mariaqa.
- 18 Unna ufa qimariasaa noo qummuna mannisaa.  
Misa nari nifaqa uqeerasee akaqasaa mara maree  
qumimariasaa misa andeeqarasara manda ufa qidaqa.
- 19 Ani ameemaanai maridaqa ani ufa mau fimariasaa  
afeedamma nimaqaqaanna ainainasaa kaaqa amiqirafa maridanoo.  
Anee firaqoo amiqimma nimaqee mariannanara aiqamausa iridaqa.  
Ani saqariki mariasa anee firaqoo rakisi nimaqaidana itita nimaqee mariananoo.
- 20 Ani saqariki mariasa narirara tipundaari mariafana  
anee mareeqee aneenna afusaa amiqiranaki quqannisee marianafa mariananoo.  
Misa namuqaa nifairiranakinaana mareeqee amiqira auqaanai quqannisee marianafa  
mariananoo.
- 21 Yaaweena amooqirana amiaqa.  
Qini namuqaa qini fiqum qimma datimmafi  
daruaneerufanoo qiniara firaqoo aidufanoo itita qimaqoonara amooqiaqa.
- 22 Qinee rufiidaqa maqi qimasee iriqa, doo Yaaweefa  
qini nari afusaa marunnana mareeqeenoo kaqinni quqaqee maqi qimasee irunanoo,  
Yaaweefa qini innaaru qirana irisee dadaaqinoo.
- 23 Innee Yaaweena faiqi anaasee innee Yaaweena firaqoo nidiani.  
Yaaweefa nari ufaki mapukusee mariasa itita  
nimaqaseenoo, nari nuqu uqereee mariasa nari manda oosana akiqara nimirifa  
maridanoo.
- 24 Innee Yaaweena mapukusee mariasa inni nimuqasa fannoo aiqama kari afeekaiki-  
noo mariani.

- <sup>1</sup> Inni numoo minninsaisa faqa inni numoo rafaafafu nimaqasaisa faqa asasiyaq.
- <sup>2</sup> Yaaweena nifairiranaki sia mari fasiqafa اساسيراناكي maridanoo.  
Sia unna qimasee nikaru qimari fasiqafa faqa اساسيراناكي maridanoo.
- <sup>3</sup> Qinee qeeqa numoo sia koorooiqa iki raqaida marunanoo suani afu keeqaidanoo.  
Miqunanoo qini qimudaani ummooqukidanoo.
- <sup>4</sup> Eendaki faqa faasaana faqa Yaawe aneenna  
asaukunnai fannoo qini aupurarana qimimariananoo qini afeeka taikenoo.  
Aiqaiqa aukuaana suani firaafa qeenoo maqa aadana ususaifanoo taadairindee idanoo.
- <sup>5</sup> Qinee miqifa maridaqa qeeqa aaqarana ani Yaaweena afusaa akooqoo koorooiqa.  
Qeeqa manda oosana sia kukeeqeeqa kooroommasee ani qimamiqa.  
Qinee maaqi qifa, qeeqa aaqarana Yaaweena afusaa  
koooro qianauree qimasee kooroomma saunana  
anee Yaaweefa qini mandoosana faqa qini aaqarana akiiqara faqa minniqisaananoo.
- <sup>6</sup> Miqiananara aiqama ani ufamau fimariasa aiqama ainainara randeeqa aniara in-  
naaru qidaqa.
- Firaa ummaara nammari aifiara foora inoo sia misa rafaafa fuannoo.
- <sup>7</sup> Anee qini kukeeqara maqusa mariananoo.  
Anee ummaara aukuaana qinisaa rakisinnaranoo.  
Anee qini maree marianafa mariannanara firaaqoo idi raidaqa.
- <sup>8</sup> Yaaweefa maaqi qidanoo.  
Qinee anee finna aannanara qima amianauro.  
Qinee ani aakapamasee aamuaqianauro.
- <sup>9</sup> Anee sia qoosa doonkiara foora furufaria. Misa irirana siai ainainara foora maridaqa.  
Anee qainna  
misa nooki quqasee rarisee mariandee inaqa irifaranoo.  
Anee nookinaa qainna sia quqainaqa sia ani ufamau fifaranoo.
- <sup>10</sup> Manda oosana maree mariasa moomoo ummaara oosana oosana misaki maridanoo.  
Yaaweena saqariki mariasa mina naaru marira amuqusirafa misa kukuqinoo maridanoo.
- <sup>11</sup> Innee andeeqarasa Yaaweefa auqoo ainainausara اساسيدا nasuriaqa.  
Innee mina ufa qaindusi mariasa faqa ridaqa asasiyaq.

### 33

#### *Amooqira Idi.*

- <sup>1</sup> Innee andeeqarasa Yaaweefa auqoo ainainnara faqa ridaqa asasiyaq.  
Mina ufa mau fimariasa mina amooqiaqa.
- <sup>2</sup> Innee piripuna aridaqa Yaaweena amooqiaqa.  
Qisaukuqara taikasee sandafaqaa piripuna aridaqa Yaaweena amooqira idi raqa.
- <sup>3</sup> Innee Yaaweenara fuka idi raidaqa amooqiaqa.  
Innee amiqimmasee akoofasara foora piripuna aridaqa faqa fuisee qidaqa amooqira idi  
raqa.
- <sup>4</sup> Yaaweena ufa fannoo kuqaa anoona kai maridanoo.  
Aiqama ainaina augee marina mi mau kai uqee marifa maridanoo.
- <sup>5</sup> Yaaweefa andeeqara marirana faqa andeeqasee amana amana kai raine marianara  
faqa aididanoo.  
Maa maqa maaqanaki Yaaweena sia taikara amuqusirafa qumbiqanoo maridanoo.
- <sup>6</sup> Yaaweefa ufannai qufanoo innaaruna kambiqanau.  
Nari ookinaa aidoonnai qufanoo suani faqa quqoona faqa fasau faqa kambiqanau.
- <sup>7</sup> Yaaweefa ooruku nammari susufinnaki saka quqaandee inoo moodaannai suqu  
quqanau.  
Ooruku nammari faruma meemai uqanna quqasee afeedinau.
- <sup>8</sup> Minara maa maqa maaqanasaaqaraasa aiqama Yaaweenara innaaru qifaqa.  
Maa maqa maaqanasaa mariasa minara naaquqee marina mina ameemaani mariaqa.
- <sup>9</sup> Yaaweefa qufanoo maa maqa maaqafa kambiqanau.  
Mifa afeeka ufa qufanoo aiqama ainaina kambiqanau.
- <sup>10</sup> Yaaweefa maa maqana saaqaraasa manda ufa tipundaariefanoo titannimaqaidanoo.  
Maa maqana saa mariasa auqararee qia ainainna itita nimaqaidanoo.
- <sup>11</sup> Yaaweena qimirrafa miqinoo maridanoo naaruara naaruara afeekaikamminoo mari-  
danoo.  
Mina amuqusakinaa qimirrafa naaruara naaruara mariannoo.
- <sup>12</sup> Aiqama maqannaasa kiqari ya maqannaasee misa Anutufa Yaaweefa maridanoo fee  
asasiyaq.

Yaaweefa nariaree qimasee utaaqama qaisa asasiaqa.

<sup>13</sup> Yaaweefa innaarunaindari maqasaa mariasa aiqama niuqidanoo.

<sup>14</sup> Nari maridanoo rakisi nimaqee mariqooqari aiqama maqasaa mariasa niqafaidanoo.

<sup>15</sup> Yaaweefa aiqama maqannaasa nimuqusa auqunisaidanoo.

Misa auqee maria aiqama ainainnara iridanoo.

<sup>16</sup> Sia moo karaambiqa fannoo nari rakira fasiqa moomoonnaifau rakiranaki urigaraidanoofau.

Afeeka sundia sia nari amudaanai qiranannai fau rakiranaki namuqaa urinnaaqaraidanoo fau.

<sup>17</sup> Rakiranaki maraqa nua qoosausa sia sundiauqa dadaaqifaqa rakirana urinnaaqaree-faranoo.

Mi qoosausa firaa nimudanai qiranannai sia amana moona kuqirana titaqamaqaannoo.

<sup>18</sup> Yaaweena afu fannoo nariara rufiee mariasa dadaaqirara misasaa maridanoo.

Yaaweena naaru marira amuqusirasasaa

mundimariasa misasaa Yaaweena afu fannoo rusinoo maridanoo.

<sup>19</sup> Mifa kuqiranasaa itita nimaqaidanoo.

Mifa aandaroo aukuaana faqa rakisi nimaqaidanoo.

<sup>20</sup> Maasa qimana Yaaweenaki kai quqaidanoo.

Mifa kai maasa dadaaqirafa maasa saqari maridanoo.

<sup>21</sup> Maasa mina naaqqara andeeqara auqu saqarikunnanara firaaqoo asasidaqa.

<sup>22</sup> Oo Yaawee ani naaru marira amuqusirafa maasa faqa mariani.

Maasa anisaa mundaqa maridaqa.

## 34

*Anutuna amiqirana amooqira idi.*

<sup>1</sup> Qinee aiqama kari Yaaweenara dufi dufi qianaara.

Qinee sia mina amooqirana munu quqaanaara.

<sup>2</sup> Qinee mifa auqoo ainaina irisee mina amooqianaara.

Ummaaraki mariasa minara irisee asasiaqa.

<sup>3</sup> Innee aniraifaqa maasa Yaaweena auqu qareenaranara koorooia.

Doo aniraifaqa innisaimbaqa mina auqu uqeeraa.

<sup>4</sup> Qinee Yaaweenara innaaru qunanoo mifa qini dadaaqinoo.

Qini rufiaranakinaana iduku qiseenoo.

<sup>5</sup> Ummaaraki mariasa Yaawee finnai ubeekamafuanara misa asasidaqa.

Minara misa saqarikirafa sia kuridiannoo.

<sup>6</sup> Kudi fasiqauqa Yaaweenara innaaru qiafanoo dadaaqidanoo.

Mifa misa aiqama ummaarakinaana mareeqee kaqinni quqannisaidanoo.

<sup>7</sup> Yaaweenara rufiee mariasa mina angiroouqa misa

fiqufiquqa maridaqa mandainainakinaana maraqunnisaidafa.

<sup>8</sup> Aneenna kai Yaaweena firaa amiqiranara oonu mafi iria.

Yaaweena itita nimaqaranaki kukeeqa mariasa asasiranaki maridaqa.

<sup>9</sup> Innee Yaaweena faiqi anaasee innee Yaaweena ameemaanai mariaqa.

Mina ameemaanai mariasa sia sarauirafa misaki mariannoo.

<sup>10</sup> Kaasau faini narana sia amanaikianara naara raifaqa kudoosaapaidaqa.

Yaaweena ufa mau fimariasa sia moo amiqira ainainara sarauifaranoo.

<sup>11</sup> Innee qini faiqinamu mai aniree qini ufa irifaqa qinee Yaaweenara rufiara oosanara qimannimianaara.

<sup>12</sup> Yafee moo fasiqa fannoo kaqi mariranara ridanoo fee.

Anee kisaaqasaa maridana asasiranara aididanoo fee.

<sup>13</sup> Aidinana anee sia manda ufa qia.

Anee sia unna ufa qia.

<sup>14</sup> Manda oosana ameesuqusee amiqira oosana maraa.

Aneenna aiqama amuqusannoo asoaranara randasee faiqi anaasee faqa moodaanaki maria.

<sup>15</sup> Yaaweena afu fannoo andeeqarusasaa mundinoo marifanoo rakisi nimaqaidanoo.

Mina aaqoo fannoo misa nammeeraqiana iridanoo.

<sup>16</sup> Yaaweefa manda oosana maree mariasara akooqaidanoo.

Misa kuquafaqa miqoo kai misara qaunidaqa.

<sup>17</sup> Andeeqara oosana maree mariasa Yaaweena aaraafanoo iridanoo.

Mifa misa oosana oosana ummaarakinaana dadaaqidanoo.

<sup>18</sup> Yaaweefa ummaarakii mariasa dadaaqirara naaqa maridanoo.

Mifa kudoosaapee mariasa dadaaqinoo mara amiqiraqoo quqannisaidanoo.

<sup>19</sup> Andeeqara fasiqa anaasee ummaara oosana oosana fannoo aupurarana nimifanoo, Yaaweefa minakinaana aiqama mareeqee amiqiraqoo quqannisaidanoo.

<sup>20</sup> Yaaweefa misa aiqama nimudaanisaa rakisidanoo, sia moodaa nimudaani faqa raqanoo mariannoo.

<sup>21</sup> Manda oosana fannoo manda oosana maree mariasa kuqa naruannoo.

Andeeqara oosana maree mariasara fidiqaa

imariasa Yaaweena narira ufa ameemaana marifaranoo.

<sup>22</sup> Yaaweefa narí ainaini maria fasiqausa feefaurummasee kaffaa maraidanoo.

Mifa innai itita qimaqaanifee qimasee fimariasa sia kuridifaranoo.

## 35

### *Dadaaqiani fee innaaru.*

<sup>1</sup> Oo Yaawee qini rairai qimaqimaqee mariasa anee misa faqa rairai qimannimaqaa.

Qini darimariasa nariqa faqa narua.

<sup>2</sup> Aneenna rakira saqari faqa rakira ainainauqa namufaqa maree aniree qini dadaaqia.

<sup>3</sup> Aneenna duru feefa faqa saasuna faqa mara maree aniree qini darirara qifaqaganuusa narua.

Anee qini dadaaqiraree qimasee qima qimia.

<sup>4</sup> Qini darirari mariasa anee rafaafafu nisainaqaa nisauriranaki mariaqa.

Qini mandaikamma qimaqarara tipundaari mariasa mara quanda sainaqa furufari-ranaki mariaqa.

<sup>5</sup> Yaaweena angiroo fannoo misa nifaqaseenoo oofaafanaumuara foora utitiqameeqee aqusaina ufai fannoo aanaaqmaara fuaqa aqindee iannoo.

<sup>6</sup> Misa nimaria aanafa asukuna faqa farindarafa faqa mariani,

Yaaweena angiroo fannoo misa nifaqaani.

<sup>7</sup> Qini namuqaauqa oosana siainaki qini qimaara qufaana fufuseeqa qini qimaarusidaqa.

Misa fifaf qini qimaara madika indufia.

<sup>8</sup> Oo Yaawee anee dadaaqinaqa qini namuqaauqa sia

iri marifanoo ummaara fannoo tautummaki misasaa aqufuani.

Misa nariqa fufuqaa ufaanaki arufi nariqa ummaaraki aqufifaranoo.

<sup>9</sup> Miqimma fifafa qinee Yaaweenara asasianauranoo.

Mifa qini asumu marainara nasurianauranoo.

<sup>10</sup> Qinee qeeqa qimuqusa aiqamannoo Yaaweenara maaqi qianaara.

Sia moo fannoo ani fooqaafaa maridanoo.

Aniara afeeka siaisa afeekaimariasa nisaukukinaana rafiaana fee qianaara.

Kudi fasiqauqa mandaikamma nimaqee mariasa

nisaukukinaana faqa maree marifee qianaara.

<sup>11</sup> Manda fasiqauqa qinee sia qafaanna ainainara faqa

sia irunna ainainnara faqa fifaf qini rairai qima qimaqaidaqa.

<sup>12</sup> Qinee amiqi amiqimmannisaunnana akiqara mandaikamma qimaqee.

Miqiafanoo qini qimuqusa firaqoo ummaarareenoo.

<sup>13</sup> Qini oosana moomau fidanoo.

Qini namuqaauqa auriranaki mariafaqa qinee

misara soofaarira qamunna afisusee qeeqa mara

maree qumureeqa daararee marufaqa misara findifuaqeeera innaaru qimariqiafana.

Qinee inuka tuqu daumoo amisee findifuaqeeera innaaru qimariqiafana.

<sup>14</sup> Qini namuqaauqa auriranaki marufaqa qini marirafa maaqimminoo marinau.

Qinee misara qini qiqaondifaqa qini qikaqaafasaa

faqa qini qinoofa faqa kuqiaara foora iafaqa soofaarida kummaaraqa mariqiafana.

<sup>15</sup> Qini namuqaauqa oosana misa sia qini daanna raidaqa.

Qinee ummaaraki aqufunaqa misa qiqaqamaseeqa

asasammasee aiqama qini fiqummafiteeti qidaqa.

Qinee aanaamuru misara sia irimarunauusa qini dariqa kai maridaqa, sia idooaidaqa.

<sup>16</sup> Qinee qiku qisauku mandaikirausara foora marunaqa misa qiniara uteeti qidaqa.

Misa qiniara fidiqaa imarifaqa qini qiqaqaidaqa.

<sup>17</sup> Oo Yaawee, kisaqasaa fee anee kaqi nindafaida marinnaree.

Misa qini kuridi qimaqarara imarianasaa itita qimaqaa.

Anee maa kaasau fainisa nookinaana qini mareeqee amiqiraqoo kaqinni quqaqisaa.

<sup>18</sup> Miqimma sainaqa ani faiqi anaasee moomoosa

suqirana qambaanaindari findifi ani Yaaweenara dufi dufi qianaara.

Moomoo fasiqa anaasee firaa suqiranaki noorrinni oonuree ani amooqianaura.

<sup>19</sup> Fifau unna qimariasa qini namuqaa qini tataqaida asasifana Yaawee anee titaqisaa.

Qini qumaara qafamasee fidiqaaidaqa noorrinnai  
nifunnai unnamaanna qimariasa anee misa faqa rafaqaqafunnimaqasaa.

<sup>20</sup> Misa nifauru fannoo sia asoora ufa aqoondikira ufa  
qimarisa, misa oosana oosana unna ufauga faqa ida qai ufana faqa kai qimariasa  
maridaqa, misa

unnamaanna qiranara randasee mareeqee asoaranaki mariasa nimuaaqa aqidaqa.

<sup>21</sup> Qini namuqaauga fifau firaaqoo noo raqasee qini  
kikiqususeeqa qiniara eoo eoo maasa qifu

fannoo mina aaqarana qafee fee qidaqa unnaqidaqa.

<sup>22</sup> Misa miqi qimariafana, oo Yaawee, anee misa unnaqirana qafaanoo.

Anee sia ufa siaina maria, anee sia nianai maria, daaqa ani marida dadaqia.

<sup>23</sup> Oo Yaawee, anee faiqara see findifi qini itita qisaa.

Oo qini Anutu findifinana qini ufa afeekaikamma qimaqaa.

<sup>24</sup> Oo Yaawee, qini Anutu, anee andeeqarafa, anee qiniara sia aaqarana siai fee qia.

Anee qini dadaaqinaqa qini namuqaa qiniara ataasa ataasa qiaqa.

<sup>25</sup> Anee qinaqa qini namuqaauga sia nari nimuqusakigari maaqi qimasee qiniara qiaqa.

Eoo maasa qunnandee kai qinoo mina mandainaina doo kambiqeenoo fee qiaqa.

<sup>26</sup> Qini ummaara qafamasee nasuri mariasa anee misa aupuraranaki quqannisaa.

Anee misa nisauriranaki quqasee furufamma nimaqaa.

Anee misa nisauriranannoo faqa noori runiranannoo faqa qamunnara foora dukunimma  
nimaqaa.

<sup>27</sup> Qini andeeqaranara irisee qini iduku qimaqarara  
irimariasa kaifaa kaifaa maaqi qimasee faaqaridaqa asasiaqa.

Yaaweefa kaaqa uriqararafa maridanoo.

Yaaweefa qini nari ainainira faiqi qinee auqaunna  
ainainafa anoona kambiqainara iriseenoo asasianoo.

<sup>28</sup> Miqinaqa qinee ani andeeqaranara kananaana  
oosana arasee ani amooqianafa eedirana kai raquru amianaaura.

## 36

### *Faiqi faiqi mandoosanara qirufa.*

<sup>1</sup> Numoo fannoo manda oosana maree mariasa  
nimuqusaki maridanoo akaqa aaqara oosanara naakapaidanoo.

Anutuna minnisee sia minara rufiee marianara manda oosanara irirafa nimuqusaki  
kambiqaidanoo.

<sup>2</sup> Miqi mariasa nari kai nariara kaaqa uriqararausee qidaqa,  
Anutufa maasa aaqarana sia amana qafamasee maasa ufa qimiannoo fee qidaqa.

<sup>3</sup> Misa nookinaa ufa fannoo manda ufa faqa unnufa faqa kai maridanoo.

Misa sia iriqaraasammasee auqara oosanara faqa andeeqara oosana faqa auqaidaqa.

<sup>4</sup> Misa nari qaarisaa faiaqee idaqa manda oosanara oonumafi irida maridaqa.

Misa sia moo andeeqara oosana auqaidaqa, misa manda oosanara faqa sia qaoo qidaqa.

### *Anutuna Andeeqara Oosana.*

<sup>5</sup> Oo Yaawee, ani sia takaanninna amuqusirafa innaaruna amana kai ooru maridanoo.  
Ani mapukusee marira oosana fannoo oonnamu amana kai ooru maridanoo.

<sup>6</sup> Ani Yaaweena andeeqarafa firaa aaqananamuara foora uriqaranoo maridanoo.  
Anee maasa ufa irisee andeeqasee raina qimaqara

oosana fannoo ooruku nammari farumara foora meemai uqanna maridanoo.  
Faiqi faqa aandau faqa ani rakisinnimaqarana ameemaanai maridaqa.

<sup>7</sup> Oo Yaawee ani maasara amuqusirafa firaa feefauru aqimaria ainainnafara foora  
maridanoo.

Maasa ani aqoosa ameemaanai keeqafi mandaaqaidaqa.

<sup>8</sup> Oo Yaawee anee rairaamma nimianna naranna oomaqa sakasee naidaqa.

Anee qinaqa maasa ani andeeqara oosana nammariara foora naa.

<sup>9</sup> Anee aiqama marirana oosana mariananoo.

Anee kaaqa qarafa mariannanara maasa kaaqa qarana qafaidaqa.

<sup>10</sup> Oo Yaawee anee aneenna amuqusirana aniara irimariasa kaifaa kaifaa nimida kai  
maria.

Anee aneenna andeeqarana andeeqara aatata fimariasa nimidana kai maria.

<sup>11</sup> Anee qinaqa nari nimoo naamoo imariasa sia nikunnai qini rafaqafu qimaqaaqa.

Anee qinaqa manda oosana maree mariasa sia qini daru qifaqaaqaa iaqa.  
<sup>12</sup> Niqafaa, manda oosana maree mariasa doo saamuriqa maridaqa.  
 Misa maqasaa agufiqa sia amana kafaa  
 findiffaaranoo. Miqoo kai marifaranoo.

### 37

*Andeeqara fasiqa faqa manda fasiqa faqa mariranara qidanoo.*

- <sup>1</sup> Anee aaqara oosana maree mariasa nindafamasee  
 sia minara aiaaqee qimasee sia qinee misa dadaaqunoo sia qia.  
 Manda oosana maree mariasa nindafamasee sia minara qinee faqa sia maraunoo  
 qimasee arana qaani.
- <sup>2</sup> Misa miqi marianara amukafaqaa sanda miqirausa  
 qusasaa ateeka saifaqa qammundeefaranoo, misa  
 andanda miqirausa maridaqa qusasaa aadanusifaranoo.
- <sup>3</sup> Yaaweena saqarikida andeeqara oosana kai maraida maria.  
 Anee miqidana maa maqa maaqanaki kisaqasaa  
 kaqi marinanoo sia moo ainaina fannoo ani mandaikamma amaqaannoo.  
 Anee aneenna maqa maaqaki kai marida asoaranaki maria.
- <sup>4</sup> Yaaweenaki asasamasee marinanoo ani amuqusaki aidimari ainainna ani amiannoo.  
<sup>5</sup> Anee aneenna marirana nirana Yaaweena amisee  
 mina saqarikammasainanoo mifa maa ainainna ani amiannoo.
- <sup>6</sup> Mifa ani andeeqara oosana dadaaqinanoo suani qambaanara foora amiqimmasee  
 kaqa qaano.
- <sup>7</sup> Anee Yaaweena oorinni afaaqa quqasee ireeda maria.  
 Manda oosana maree mariasa aaqara oosanara  
 tipundaarifanoo anoona kambiqainana sia qeeqara faqa miqianee qia.  
 Sia moomoo qumiasana faqaasa niqafamasee sia qinee faqa miqiunoo qia.
- <sup>8</sup> Anee mina qafamasee sia moomoo irira iria.  
 Sia aanoo qia.  
 Mi oosanafa ummaaraki nifiqee fidanoo.
- <sup>9</sup> Manda oosana faqaasa Yaaweefa misa aiqama taikannimaqaannoo.  
 Irirana Yaaweenasaa mundimariasa maa maqanasaa amiqimmasee marifaranoo.
- <sup>10</sup> Kaqikaqoo marikinanoo doo miqoo mandoosana maree mariasa taikeefaranoo.  
 Anee misara randeenana sia paqurinnaranoo.
- <sup>11</sup> Nari mara maree qumi mariasa Yaaweefa aiqama maqa nimiannoo.  
 Misa miqoo aiqama ainaina rairaa imarinaqa asoaranaki maridaqa asasifaranoo.
- <sup>12</sup> Manda oosana maraqaanuasa andeeqarusa nariraree qimasee tipundaaridaqa.  
 Miqidaqa misa andeeqarusara fidiqaaira noori nifiri maraidaqa.
- <sup>13</sup> Yaaweefa qusasaa misa mandaikamma nimaqaaninnanara iriseenoo naanaidara  
 qidanoo.
- <sup>14</sup> Manda oosana maree mariasa kudi fasiqa anaasee  
 faqa sarauiranaki mariasa faqa andeeqara aatata  
 fimariasa faqa nariraree qimasee nari faaqaana  
 mai qumaree duru rakisisee nimaarusida maridaqa.
- <sup>15</sup> Misa nariqa rakira faaqaana fannoo nari nimuqusa raquru nimiannoo. Misa duru faqa  
 raudaannoo.
- <sup>16</sup> Andeeqee mari fasiqana ainaina oodaa mariannoo,  
 Anutuna afusaa uriqaranoo maridanoo.  
 Manda oosana maree mari fasiqana ainaina moomoo  
 maridanoo, Anutuna afusaa ureeqanoo maridanoo.
- <sup>17</sup> Minara manda oosana maree mariasa Anutufa misa afeeka mara maraannoo.  
 Andeeqee mariasa Yaaweefa itita nimaqaannoo.
- <sup>18</sup> Yaaweena ufa mau fimariasa Yaaweefa misa marirana niranasaa rakisidanoo.  
 Maa maqa maaqafa misaandikinoo naaruara mariannoo.
- <sup>19</sup> Miqi mariasa manda aukuaana anirainaqa sia aupurarana mareefaranoo.  
 Aandaroo aukuaana misa narana moomoo mariannoo.
- <sup>20</sup> Mandoosana maree mariasa kuqifaranoo.  
 Yaaweena namuqaauqa taatuqeenaa kakasindee ifaranoo.  
 Misa ida muna qusasaa marinoo taikaindee ifaranoo.
- <sup>21</sup> Manda oosana maree mariasa moosa ainaina ufaasu maraseeqa sia kafaa nimidaqa.  
 Andeeqarusa oosana moo maridanoo, misa afaarida kaqi nimimariasa maridaqa.

- 22 Yaaweefa amiqi amiqimmanimaqee marisa misa nári maqa maaqaki amiqimmasee marifaranoo.  
Yaaweefa niquraree marisa mina maqasaa mariana mara qaqusainaqa quqasee fifaranoo.
- 23 Andeeqara fasiqa niranara Yaaweefa asasi danoo dadaaqidanoo.  
Yaaweefa asasi maria fasiqa anaaseesa itita nimaqaidanoo.
- 24 Mi andeeqara fasiqafa saamurinoo maqasaa aqufinoo sia miqinoo mariannoo findi-fuannoo.  
Yaaweefa uqeerainara miqiannoo.
- 25 Qinee kumaaraa mariifanausa doo maqee asooqa maridaqa,  
Yaaweefa andeeqaraisa minninnisoona sia qinee mi kamu qafaqiafana.  
Mina faiqi namu naranara sarauida innaaru qirana faqa sia qafaqiafana.
- 26 Andeeqaraisa aiqama kari afaari mariasa maridaqa.  
Sarau imariasa irafaqa eedooo qimasee kaqi ufaasu  
nimidaqa, misa faiqi namu faqa amiqi amiqiranaki marifaranoo.
- 27 Anee manda oosanaqiqari quandakinana andeeqara oosana maraa.  
Miqinaqa ani faiqi namu ani maqasaa naaruara marifaranoo.
- 28 Yaaweefa andeeqara oosana maree mariasara  
aididanoo nári ufamau mapukusee fimariasa faqa  
sia minninnisaannoo, misasaa naaruara titannimaqaannoo.  
Manda oosana maree mariasa faiqi namu mara aqusaannoo.
- 29 Andeeqaraisa nári nikausa ninaakusa maqa maaqa  
umiasanara foora maraseeqa, minaki naaruara marifara.
- 30 Andeeqaraisa nifauru fannoo irirana faqaasa ufa kai qidanoo.  
Mina afauru fannoo qambaana andeeqara ufa kai qidanoo.
- 31 Anutuna sanda ufa andeeqaraisa nimugusaki maridanoo.  
Minara misa sia quqasee moosaa fifaranoo.
- 32 Manda oosana maree mariasa andeeqaraisa nipuraida narirara nimaarusidaqa.
- 33 Yaaweefa sia andeeqaraisa manda oosana maree mariasa nisaukuki quqasaifaqa naridaqa.  
Manda oosana maree maria fasiqausa andeeqaraisa  
ufaki quqasaifanoo Yaaweefa misa titannimaqainaqa sia narifaranoo.
- 34 Anee aneenna irirana Yaaweenaki quqasee mina ufa mau kai andeeqasee fua.  
Anee miqimarinanoo Yaaweefa ani firaa auqu  
amiseenoo ani aanaakusa akausa maqa maaqa amiannoo.  
Mifa minaki manda oosana maree mariasa mara aqusaina qafamasee kuqaa fee qinnaranoo.
- 35 Qinee Dafidisa, mandoosana maree mari fasiqana  
qafaafananoo firaa saqari miqirafa Reebanoona  
amiqira maqasaa kambiqafi ititanoo mariara foora inoo marinau.
- 36 Mifa qusasaa marinoo doo taikafifaqa qinee  
qafaunanoo sia marifaqa randeeqa sia uqanna paquriqa.
- 37 Anee ufa siai fasiqana faqa andeeqara aatata fimari fasiqana faqa niuqummasee qafaa.  
Asooara oosana reendeennammasee mariasa maa  
maqanasaa misa saaqari kambiqainausa faqa kisaaqasaa marifaranoo.
- 38 Aaqee mariasa Yaaweefa aiqama uqanna kuridi nimaqaannoo.  
Manda oosana maree mariasa niku nisauku marirana Anutufa ateekasaina sia marifaranoo.
- 39 Ummaara aukuaana Yaaweefa andeeqaraisa itita nimaqasee asumu maraidanoo.
- 40 Yaaweefa andeeqaraisa dadaaqinoo manda mariranakinaana uqeerannisaidannoo.  
Aaqee mariasa nisaukukinaana asumu mareeqee  
kaqinni quqannisaidannoo. Misa Yaaweena mandaaqee marianara asumu  
maraidanoo.

### 38

#### *Ummaaraki mari fasiqana innaaru.*

- 1 Oo Yaawee, aneenna aanooqiranakiqari sia qiniara aanooqia.  
Aneenna aranaqaranakiqari sia qini ummaara qimia.
- 2 Anee feefara foora amiqimmasee qini tapooqaananoo.  
Ani asauku fannoo firaaqoo qini radamimarifaqa ummaara maridaqa.
- 3 Anee qiniara aanooqiannanara qini qifaqa firaaqoo didafidanoo.  
Qini numoo marinara qini qimudaani umooqukinoo marifaqa sia afeekaikidaqa.



- 4 Qini aaqara ummaara fannoo qini rafaagafu qisaidanoo.  
Mifa firaq ummaara maridanoo, sia qinee amana akuanaura.
- 5 Qini furufarirafa marinara qifaaqa ateekeeqaafanoo adiara usuffanoo afundida putaaidanoo.
- 6 Qinee ummaaraki maridaqa maqasaa aqufiqa maridaqa, aiqama faasaana suani afu ururarana namu faqa soofaarida kummaraqa maridaqa iki raqaida marunanoo suani afu keegaidanoo.
- 7 Qini qifaaqa idara foora qaidanoo.  
Qinee kuqirana adeedi raqa maridaqa.
- 8 Qini qimudaani raqanoo mariara foora qumooqukiqa nidaqa.  
Qini qimuqusa firaagoo didafi marinara annadannada qida maridaqa.
- 9 Oo Yaawee qini didimari ainainausa ani afusaa akooqoo marifana iri mariananoo.  
Qini didafi marifaqa annadannadirafa ani afusaa sia kukeeganoo maridanoo.
- 10 Qini qimuqusa rundurundi marifanoo qini afeeka taikkeenoo.  
Qini afeeka doo quminoo, qini qifusaa mari kaaqa qarafa doo taikafifanoo asukuna kai titeenoo.
- 11 Qini qigoondiuga faqa qini faqa nimariasa faqa qini nammuana qafeeqa rufiasee niana tatutatuudaqa.
- Qini qigoonaua faqa miqikaimmidaga rufiqa rufiqa idaqa.
- 12 Qini darirara randee mariasa qufaana fufidaqa.  
Qini mandaikamma qimaqarara ufa qimariasa maridaqa.  
Suani afu ururarana namufaqa tipundaarida mariafanoo suani afu keegaidanoo.
- 13 Qinee daaqoo qaunirusara foora sia misa ufa iriqa doo qummunirusara foora sia qimannimidaqa.
- 14 Qinee sia ufa irimaria fasiqausara foora maridaqa,  
qeeqa dookiqari qimannimirara sia amanaikidaqa.
- 15 Oo Yaawee qinee ani kai saqarikidaqa.  
Oo Yaawee qini Anutufa anee qini ufa qima qiminnaranoo.
- 16 Oo Yaawee qini namuqaa sia qini mandaikamma qimaqasee nasuriaqa.  
Qini qiku farindamaki aqufuanaqa sia nasurida asasiaqa.
- 17 Qinee saamuruqaammidaqa.  
Qini didafirafa kisaagasaa qini faqa maridanoo.
- 18 Qinee qeeqa aaqarana akooqoo kooroomasaunanoo,  
qini numoo fannoo qini qummaara qimidanoo.
- 19 Qini namuqaauqa moomoosa nimudaanai qimariasa maridaqa.  
Qiniara fifau fidiqaa imariasa moomoosa maridaqa.
- 20 Qini amiqira oosana akiqara mandaikammaqimaqee  
mariasa misa qinee andeeqaramau fimarunaqa  
misa qini namuqaakamma qimaqaidaqa.
- 21 Oo Yaawee qini Anutu, sia qini minniqisaa, sia nianai maria, daaqaa ania.
- 22 Oo Yaawee qini asumu maree marianafa kai kaqi aniree qini dadaaqia.

## 39

*Ummaaraki mari fasiqana numoo koooroora ufa.*

- 1 Qinee Dafidisa qeeqara maaqi qiqa, qinee qeeqa nirana mariranasaa rakisianaura.  
Qini qifauru fannoo sia aaqara ufa qiannoo.  
Manda oosana maree mariasa qini daaqaa marifaqa sia qinee moo manda ufa qianaura.
- 2 Qeeqa ufa rafaagaa fusee doo qummunimmasee marunanoo mifa sia dadaaqinoo.  
Doo qummunimmasee sia amiqira ufa faqa  
qimarunanoo qini daundurakinaa ummaara firaanaikinoo.
- 3 Doo qummunimmasee marunanoo qini daundurai qimuqusaki idara foora aurinoo.  
Qinee firaagoo oonumafi irimarunanoo qini daundurai firaagoo idageenoo.  
Idagee marifaqa qinee sia doo qummunimmasee marianaura.
- 4 Oo Yaawee qinee taikaanna aukuanara qinaqa iria.  
Yairee fee qinee kuqanauree.  
Qini marirafa munu taikaaninnanara faqa qima qimia.
- 5 Anee qini marirana qusa uqanna ramasaanoo.  
Qini marirafa ani afusaa fifau ainainara foora sia maridanoora foora maridanoo.  
Aiqama fasiqa fifau naidoora foora kai maridaqa.
- 6 Aiqama fasiqauqa nimanandara foora marida nidaqa.

Miqi mariasa aiqama ainaina fifau kai kadaapi ridaqa.

Maaqoo maridaqa qumiasana suqu quqaseeqa  
kuqifanoo yafee maraannoo fee qimasaida sia iridaqa.

<sup>7</sup> Oo Yaawee qinee nana moo ainainara afeesianauree.

Qini irirafa aniki maridanoo.

<sup>8</sup> Qini aiqama numoo kinaana mareeqee kaqinni quqa qisaa.

Miqimma sainaqa furufarirausa sia qiniara naanaidara qiaqeera.

<sup>9</sup> Anee kai maa aupurarana qimi marianafa  
mariannanara qinee doo qummunimmasee  
qireeda kai maridaqa sia ufa qianaara.

<sup>10</sup> Sia kaifaa qini mandaikamma qimaqaa.

Anee qini daruanaqa kuqirara miqidaqa.

<sup>11</sup> Faiqi aaqara oosana maraasara anee Anutufa  
afeekaikaqmmasee aanoo qima amaqaasee mina  
idi mari ainainna kuridi aisee mariananoo.

Qumura mandaikindee idanoo.

Aiqama fasiqauqa ani afusaa aidoora foora qusasaa fuaqaki taikaidaqa.

<sup>12</sup> Oo Yaawee qini innaaru qirana iria.

Qini dadaaqianneera aaraunnana aaqoo rammatinimmasee irisee qini dadaaqia.

Qinee ani dadaaqiranara qiki raqaidaqa nammeera qianana dadaaqia.

Qinee qusasaa maa maqanasaa ani faqa mariqa,  
qeeqa qikeeku qikaaku naanna reeqa qusasaa kai maridaqa.

<sup>13</sup> Oo Yaawee ani oori afiriara kaaqa daaquqaidanoo  
anee kaqinni anneenna oori ubeekamasainaqa  
qinee qusasaa asasiranaki mariqa kuqua.

## 40

### *Anutuna amooqira idi.*

<sup>1</sup> Qinee Yaaweenara deendeena mandee afeesida  
marunanoo, mifa quandafi qini nammeera qirana  
amiqimmasee irisee qimudaao qimasee dadaaqinoo.

<sup>2</sup> Qinee qeeqa aaqaranaki doona doona imarina kiara  
foora faqa faurima saara foora faqa farindamaki  
kuqira madikaki faqa afundimari doonna kiara  
foora faqa marunanoo minakinaana mifa qini  
uqeereeqeenoo oonisaa kikiqammaqiseenoo.

<sup>3</sup> Miqoo mifa fuka idi qini qima qiminoo mi idifa maasa Anutuna amooqira idi maridanoo.  
Moomoosa mina qafamasee rufiasee Anutuna saqarikifaranoo.

<sup>4</sup> Yaaweenaa saqariki mariasa asasiaqa.

Tumunnai auqira anutufinnai sia ubeekkee mariasa  
faqa unnaqira anutusa sia nimooqi mariasa faqa asasiaqa.

<sup>5</sup> Oo Yaawee qini Anutufa anee moomoo afeeka naaquqara ainainannoo maasa  
dadaaqinuu.

Sia moo fannoo ani fooqaafa maridanoo.

Anee moomoo amiqira irirausa maasara aneenna iriranaki qimirisaidana dadaaqi  
mariananoo.

Qinee minauqara ufa qianee qimasee sia amana aiqamara ufa qianaara.

Mifa moomoo maridanoo.

<sup>6</sup> Andau tatufirana faqa oosana oosana ani amira ainainara faqa anee akooqananoo.

Anee aneenna aidimarianna tatufiranara ani ufamau firana qini daaqooki quqasaana  
iriala.

Aandau ida tatufirana faiqi aaqarana akiiqara amiranara faqa anee sia qimiannee  
qiananoo.

<sup>7</sup> Qinee minara iriseeqa maaqi qiqa.

Doo qinee anireeqa.

Anutuna akarakinaafa qinee aniannanara qifaqa anidaqa.

<sup>8</sup> Oo qini Anutu, ani aidirana mau firara firaaqoo dididanoo.

Ani sanda ufa qini qimuqusaki maridanoo.

<sup>9</sup> Qinee ani faiqi anaasee moomoosa suqiqa mariana  
qambaana anee maasa asumu maraannanara  
andeeqara ufa kai qimannimidaqa.

Oo Yaawee qinee sia qeeqa doo qummunianauro, kaqi qimannimianauro.

Anee minara irimmariananoo.

<sup>10</sup> Qinee sia anee qini dadaaqinana qini asumu

maraannanara qeeqa qimuqusaki rafaafa fiqa, kooroomasee qimannimiqa.

Ani mapukusee marira oosanara faqa ani asumu nimirana faqa kooroommasee qimannimiqa.

Faiqi anaasee moomoosaki anee misara amuqusirana

faqa ani kuqaa anoona ufa qirana faqa sia rafaafa fiqa, kaqi qimannimiqa.

<sup>11</sup> Oo Yaawee qinee iridaqa ani qiniara qimudao qirafa sia taikaannoo.

Ani amuqusirafa faqa ani kuqaa anoona ufa qira oosana faqa qini itita qimaqeenoo.

<sup>12</sup> Qini mandoosana moomoo sia asaanarirana amana qini Dafidisa fiq fiq inoo maridanoo.

Qini aaqarafa doo qini rafaafafusaifaqa sia qifu maqaidaqa.

Qini qikiqa qisau si moomoo maridanoo, qini

aaqarafa mina faqa uriaaqaranoo sia asaanarirana amana maridanoo.

Minara qini qimuqusa ummooquki fanoo qini afeeka taikaidanoo.

<sup>13</sup> Oo Yaawee anee qini mandainainakinaana mara quqaqisaa.

Oo Yaawee kai kaqi aniree qini dadaaqia.

<sup>14</sup> Qini marirana taika qimaqarara randeemariasa

rafaafafu nimaqasee mareeqee furufariranaki quqannisaa.

Qini aupuraranara asasimariasa mara

quandasainafa nisaaurusee quqasee sandaafa.

<sup>15</sup> Qiniara uteeti qimariasa misa nariqa nisaurirana firaafa marina qafeeqa firaqqoo tautiaqa.

<sup>16</sup> Oo Yaawee anee iannannai ani mariasa asasida nasuriaqa.

Ani asumu mariranara dufi dufi qimariasa aiqama

kari maaqi qiaqa Yaaweefa kaaqa uriqararafa maridanoo fee qiaqa.

<sup>17</sup> Qinee Dafidisa qimudaani radukiraua sarau

marunna fasiqausa marunnaara oo Yaawee anee sia qiniara qaunuananoo.

Anee qini asumu maree marianafa faqa qini Anutufa

faqa mariannanara kai kaqi aniree qini dadaaqia.

## 41

### *Aurira fasiqa innaaru.*

<sup>1</sup> Kudi fasiqa aanaaseera irisee dadaaqi mariasa asasiqa.

Ummaara aukuanaki Yaaweefa miqimariasa uqeera kaqinni quqannisaannoo.

<sup>2</sup> Kudi fasiqa anaasee dadaaqimariasa Yaaweefa

ititannimaqaseenoo misa maa maqanasaa

marirana afeekaika masainafa kisaqasaa marifaranoo.

Maa maqa maaqanasaa marirana mifa amiqi amiqimannimaqaannoo.

Sia mifa misa namuqaa nisaukuki quqaannoo.

<sup>3</sup> Miqi maria fasiqa aanaaseera auriranaki marifanoo Yaaweefa misa dadaaqiannoo.

Misa aurida marifanoo Yaaweefa misa aurirana taikannimaqaannoo.

<sup>4</sup> Qinee maaqi qidaqa, oo Yaawee qinee ani mandaikamma amaqqeeqa.

Anee qini qifauamasee qini auriranara foora taikaqisaa.

<sup>5</sup> Qini namuqaa qiniara nimuqusa ummaara reemariafa maaqi qidaqa.

Yaireefee mi fasiqafa kuqinaqa maasa minara qaunuanauranoo.

<sup>6</sup> Qinee aurimarunafa akaqausa ani qifafeeqa qisee ufoo qidaqa unnaqidaqa miqidaqa.

Misa unna ufa irisee raudamaki oonuree aiqama tinai qini qifasaasa qidaqa qimannimidaqa.

<sup>7</sup> Aiqa qiniara fidiqaa imariasa nupiqnupita kiqari nari qimami nari qimami qidaqa.

Qini mandainaina daruani fee qidaqa miqi qidaqa.

<sup>8</sup> Misa qiniara manda aurirafa aukainaina aurirafa mina arifanoo amiqimandee auridanoo mifoo qidaqa.

Doo mifa rinoo maridanoo, sia findifuanoo, kuquannoo fee qidaqa qimatundaidafa.

<sup>9</sup> Qini qifaqasaa qiqoondi, qinee minasaa

mundimarunna fasiqafa, qini faqa neeneeu

fasiqafa, mifa nari aiku qumbaqi uqeera qumaree aiku ataannai qini darinoo.

<sup>10</sup> Oo Yaawee, anee qiniara amuqusinana qini

uqeeraqisee afeeka qiminaqa mina akiqara mannimaqaa.

<sup>11</sup> Oo Yaawee qini namuqaa sia qini uridaaqaree

mariafaqa qinee mina qafamasee oo Yaaweefa  
qiniara aidimarifanoo miqidanoo fee qidaqa qimiridaqa.

<sup>12</sup> Anee qini andeeqara mariranara irisee qini uqeera qisainaga naaru naaru ani oorisaa maria.

<sup>13</sup> Yaaweena Isaraee maqannaasa Anutuna amooqia.  
Maqee faqa naaru naaru faqa amooqima amaqa.  
Kuqaa uqanna kafaa kuqaa fee qidaqa.

## Mina Anaaqianaa Papiqa (Book 2)

### 42

*Idi Ufa 42-72*

*Asaqi moosaa oonu maru fasiqana innaaru.*

<sup>1</sup> Aandau nammariara aidifanoo maqee maqee aannanai aannanai qidanoo.

Qini maraquna fannoo misa naanna raida maqee  
maqee oo Anutu ani aqa mariranara didimarifaqa  
daannanai daannanai idara foora maridaqa.

<sup>2</sup> Qini nammariara foora kaqi marira Anutunara dididanoo.

Yairee fee qinee oonuree minara innaaru qianaara.

<sup>3</sup> Qini namuqaa uqa moomoo kari qiniara yaqoo fee  
ani Anutufa marifanee qiafaqa qinee mina iriseeqa qikiraqaidaga.

Faasaana faqa eendaki faqa qeeqa daiqunu daukunu naidaga.

<sup>4</sup> Qinee ooqai iafannanara irunanoo qimuqusa mandaikidanoo.

Ooqai qinee moomoo fasiqa anaasee

indaarunnikiafanaqa Anutuna amaana maqaki fimariqau.

Oonuree faaqa fuisse qida asasida Anutunara dufi dufi qira idiuqa reemariqau.

<sup>5</sup> Nanaree qini daundura kaaqa ummaara raidanoo fee, nanaree qinee kaaqa ummaaraki maridee.

Qinee Yaaweenasaa kai irirana mundusee kaifaa mina amooqianaara.

Mifa qini asumu maree marifa faqa qini Anutufa faqa maridanoo.

<sup>6</sup> Oo qini Anutu, qinee ummaaraki maridaqa Yooradanna maqa maaqaki faqa  
Qeeramoonaa aaganasaa faqa

Misaraa aaganasaa faqa maridaqa aniara irianaara.

<sup>7</sup> Qini ummaara firaafa ooruku nammariara foora mandinoo maridanoo.

Mi nammarina qamakaurirafa narisaa narisaa arinoo sandaaqai ooru fidanoo ai ai qidaoo.

Mifa innaarunaindari oondaindariara foora aaku

quminoo maqasaa aquffinanoo firaagoo ai ai qidanoo.

Ani mi nammari amakaurirafa qini uridaaqaramafi rafaqaqafu qimaqaidanoo.

<sup>8</sup> Faasaana Yaaweefa narí sia taikara amuqusirana aiqainanoo qinisaa qumuani.

Miqinaqa eendaki qinee minara dufi dufi qira idi raanaara.

Qinee Anutufa qini mariranasaa rakisi marina innaaru qima amaqaanaara.

<sup>9</sup> Anutufa qini itita qimaqee marinara qinee minara maaqi qidaqa.

Nanaree anee qini qaunuqiseenanee.

Naqifee ifaqee qini namuqaa aupurarana qimi mariafaqee oonuree aniree iqa nidee.

<sup>10</sup> Qini namuqaa qini ataasa ataasa ufa qima qimaqee

mariafaqa kuqirafa qusaree marifaqara foora aupuraidaga.

Faasaambaasaana qiniara ani Anutufa yaiffee maridanoo fee qidaqa.

<sup>11</sup> Nanaree qini daundura kaaqa ummaara raidanoo fee.

Nanaree qinee kaaqa ummaaraki maridee.

Qinee Yaaweenasaa kai irirana mundusee kaifaa mina amooqianaara.

Mifa qini asumu maree marifa faqa qini Anutufa faqa marinara mina amooqianaara.

### 43

*Asaqi moosaa oonu maru fasiqana innaaru.*

<sup>1</sup> Anutu ani ufa sia iri mariasa qini rafaqa fidaqa,

anee qini dadaaqinaqa qifairi mariasa ufa

urinnaaqarama saanaqa qiniara andeeqara oosana faqaafee qiaqa.

Ueeqee mariasa faqa mandoosana faqaasa faqa nisaukukinaana qini maraquqisaa.

<sup>2</sup> Oo Anutu anee qini titaqimaqee marianafa mariananoo.

Nanaree qini minniqiseenanee.

Nanaree qini namuqaa aupurarana qimi mariafaqee oonuree aniree iqa nidee.

<sup>3</sup> Oo Anutu anee aneenna kaaqa qarana faqa anoona ufa qirana faqa niqiqainaqa qini aana muquniyaqa.

Mi irira qanda qini mareeqee Sioona ani naaquqara aaganasaa, mari amaana maqanaki anee mariannaqoo quqaqisaaga.

<sup>4</sup> Qinee miqoo maridaqa Anutuna qaidara mariqoo mina amooqirara fuanaura. Kaaqa asisirana faqa kaaqa nariara didirana faqa qimimari Yaaweefa miqoo maridanoo. Oo Anutu qini Anutufa qinee piripuna aridaqa ani amooqianaura.

<sup>5</sup> Nanaree qinee kaaqa doori runusee maridee.

Qinee Yaaweenasaa kai irirana mundusee kaifaa mina amooqianaura.

Mifa qini asumu maree marifa faqa qini Anutufa faqa marinara mina amooqianaura.

## 44

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, maasa qikeeku qikaaku ooqai anee auquqoonna ainainnara qimaqimiafaqa iridaqa.

Maasa qeeqa daaqoonnai misa marukamuqoo auqoonna firaa ainainnara qima qimi-afafa iriqa.

<sup>2</sup> Anee aneenna kai aanaamuru niqiqamasoona amaaramafufana maasa qikeeku qikaaku maa maqa maaqanaki mara quqanau.

Anee aanaamuru aupurarana nimisee Isaraee maqannaasa maa maqanasaa mara quqa-soonaqa

faiqi moomoo kambiqafi maa maqa maaqana amanakai maridaqa.

<sup>3</sup> Isaraee maqannaasa sia nári rakiranannaifau maa maqa maaqana maraqaau.

Sia nári afeekannaifau maraqaau.

Anee aneenna afeekannai faqa eeraariranannai faqa oori inaa inaa iranannai maa maqana mara niminau.

Anutu, anee misara ani aidi marunara miqinau.

<sup>4</sup> Anee qini karaambaiqa qini Anutufa mariananoo.

Anee aneenna maqannaasara rakiranaki namuqaa urinnaaqaraaqee qiananoo.

<sup>5</sup> Oo Anutu ani afeekannai maasa qeeqa namuqaa rafaqaafi marunausa maridaqa.

Akaqausa findifi darirariafana anee maasa faqa marianaqa maasa rakirana uraaqa raidaqa.

<sup>6</sup> Qinee sia qeeqa duru saqarikidaqa qini rakira paipana faqa sia qini dadaaqidanoo. Anee kai.

<sup>7</sup> Anee kai maasara fidiqaaimaria namuqaasa nisaukukinaana doo rafiamaree nisaurirana misa nimiananoo.

<sup>8</sup> Maasa aiqama kari Anutuna kai amooqidaqa.

Naaru naaru minara dufi dufi qianaura. Kuqaa.

<sup>9</sup> Anee maasa rakira fasiqauqa faqa nidana dadaaqiunafa maqee sia nidana, sia dadaaqi-mariananoo.

Oo Anutu, anee maasa minniqiseenana maasa ooru muqufi qisaananoo.

<sup>10</sup> Anee miqiannanara namuqaa maasa nifaqasaafaqa sandaunaqa maasa aiqama ainaina mareea.

<sup>11</sup> Anee maasa mareeqee namuqaa nimianaqa misa maasa sipsipara foora kuqa darirara idaqa.

Anee maasa aanaamurukiaqa doo daru qifaqaa qianaqa moodaa moodaa iqa maridaqa.

<sup>12</sup> Oo Anutu anee aneenna faiqi anaasee kaqikaa

munnimma aqusee maree maria ainainnara foora mariafana namuqaa nimiananoo.

Anee nimisee aabaa munnimma sia maree marianara foora nimiananoo.

<sup>13</sup> Anutu anee miqi marianaqa maasa qiqaonauusa maasara naanaidara qidaqa.

Maasa daaqa mariasa ataasa ataasa maqimaqaidafa.

<sup>14</sup> Anee sia maasa dadaaqiannanara aiqama maqannaasa maasa qisaurirana qimidaqa.

Akaqa maqannaasa maasa Isaraee maqannaasa qiqafeeqa uteeti qimasaidafa ninuka aqidaqa.

<sup>15-16</sup> Qini namuqaa faqa qiniara fidiqaa imariasa qini ataasa ataasa qima qimaqaafaqa qinee aiqama kari ummaaraki maruna qisaurirafa qini rafaqa fidanoo.

<sup>17</sup> Oo Anutu, anee fifau maasa dari mariananoo.

Maasa aniara sia qauniqa sia ani qima afeekaikira ufa rukieeqa sandanainai qidaqa.

Maa manda oosanafa fifau maasa rafaqaafu qimaqaidanoo.

- <sup>18</sup> Maasa nimumqusa sia qikooqai faqa andeedqara  
oosanasaaqari moosaa quandeedqa, kaqi mariaqoo kai maridaqa.  
Maasa qiku faqa maasa firana faqa sia ani minnisee qiku munuree miniree idaqa.
- <sup>19</sup> Anee fifau maasa qimudaani tureeraummasee  
mareeqee kaasau faini ooki quqeenanara foora masaanaqa maridaqa.  
Anee firaa asukunannoo maasa rafaqaqafu  
qimaqaananoo oosana sia marinaki fifau miqiananoo.
- <sup>20</sup> Maasa Isaraee maqannaasa Anutuna auqu qaunusaananoo fau mifa iriqini.  
Maasa unna anutunauqa uqeeranaanoo fau Anutufa minara faqa iriqini.
- <sup>21</sup> Anutufa maasa qimuqusaki kukeeqara ainainara  
irimarifa marinara mi aiqama ainaina qafaiqini.
- <sup>22</sup> Faasaambaasaana misa ani auqusaara maasa daruqifaqaaidafa.  
Misa maasara kuqifandinna sipsipausee qimasaida maasa daruqifaqaaidafa.
- <sup>23</sup> Oo Yaawee findifua nanaree faiqaidanee.
- <sup>24</sup> Anee nanaree aneenna oorisa ititasee sia maasa qiqaaidanee.  
Yaawee anee nanaree maasa aupurarana faqa ummaara qimiranara faqa qaunidanee.
- <sup>25</sup> Maasa maqasaa aqufunaqa nikusamu radamu saafaqa maqasaa riqa maridaqa.
- <sup>26</sup> Oo Yaawee anee findifi maasa dadaaqa.  
Aneenna maasara naaruara aidiranara irisee maasa mareeqee amiqiranaki quqaqisaa.

## 45

### *Maqasaa karaambaiqa amundara idi.*

- <sup>1</sup> Amiqira irirafa qini iriranaki umbiqanoo marifaqa  
karaambaiqa irianifeera maa idi ufana akara ruma amidaqa.  
Qini qifauru fannoo papiqa saiki marina amiqira kirifiara foora maa idina akara ridanoo.
- <sup>2</sup> Oo maasa maqasaa Karaambaiqa ani afaqa aiqama faiqi faiqikiqari amiqirafa mari-  
anoo.  
Ani afauru deepimaseera foora amiqira ufa adiafaa ira ufa kai ani ookiqari ururaidanoo.  
Minara naaruara naaruara Anutufa ani amiqi amiqimma amaqaaidanoo.
- <sup>3</sup> Oo uriqararafa ani afeeka faqa ani qareenarafa faqa  
ani uriqararafa faqa marinara doo aneenna duru feefa deedaqinana rakiranaki fua.
- <sup>4</sup> Anee aneenna uriqararana namu faqa doo rakiranaki finana uriqarara.  
Fimarinaqa ani anoona ufa qirana faqa andeedqarana faqa sia rafaqa fuaqeeera raki-  
ranaki fua.  
Ani rakirafa afeekaikinaqa manda oosana maree mariasa aniara firaaqoo rufieefaranoo.
- <sup>5</sup> Ani duru feefa aaruqirafa namuqaauqa nimumqusaki kai naruannoo.  
Miqiannannai moomoosa ani aikuki aquffana radamu nimaqeenanaroo.
- <sup>6</sup> Anutufa anee naaru naaru uriqarana maridana  
aneenna faiqi anaasee andeedqara oosanannoo rakisi nimaqaa.
- <sup>7</sup> Ani andeedqaranara aidinoo mandainainara fidiqaqa inoo imarifa mariananoo.  
Minara kai ani Anutufa ani utaaqamaseenoo  
asasirana ani akiqa amoondunna akaqa uriqararara adia nimaqaina faqa uraaqa  
ramasee adia amaqaenoo.
- <sup>8</sup> Ani qamunna makaqa mandeefana undidanoo ani  
karaambaiqa amiqira maaqakina aiqama  
ainainauqa eereefanta aanainnai auqira  
ainainauqa kai maridanoo.  
Minaki piripunna oosana oosanannai auqaafana anee اساسimariananoo.
- <sup>9</sup> Akaqa karaambaiqa niraamuqmaaka uriqarara aanaaseeuqa kai ani maaqaki mari-  
daqa.  
Ani karaambaiqa asauku uqannai ani anaqa uriqarara  
anaasee amiqira qamunna afisimarufa Oofiraa  
maqusaindaraa koorannoo afaqa auqusee ani asauku uqannai kikiqinoo mari-  
danoo.
- <sup>10</sup> Oo fuka amundara anaasee anee aneenna aaqoo ramatinimmafi qini ufa iria.  
Aneenna maqanna faqa aneenna ainainara faqa  
qaunuseenana aneenna afaaqi maqa maaqaki kai maria.
- <sup>11</sup> Miqimarinanoo ani afaaqi karaambaiqa ani amiqira oori afiriara firaaqoo aidiannoo.  
Mifa ani karaambaiqa maridanoo anee minara kai qeerairidana mina ufa qaindusua.
- <sup>12</sup> Teree maqusaindaraasa moo amira ainaina

nisaukuki uqirausa aniree اساسیداقا amifaranoo.

Faiqi aanaaseeqiqari ainaina faqaasa aniree ani aqoondikifaranoo.

<sup>13</sup> Moo maqannaa karaambaiqa araamuna fannoo nari afaaqauqira maqaki maridanoo nari afaaqinnai firiridanoo.

Mi manaqana qamunna koorannai auqirafa idaaqirafa kai maridanoo.

<sup>14</sup> Misa mina afigamaree nari qamunna oosana oosana akararirana namufaqa karaambaiqa munu amiafaqa qafeeqa.

Aqoonna maanaqauqa mina dadaaqi marusa mina afigee fia.

<sup>15</sup> Misa اساسیرانا namufaqa nasu nasurirana namufaqa aana muquniqa karaambaiqa amiqira maaqaki keeqaafaqa niqafeeqa.

<sup>16</sup> Maa anaaseena afaaqi karaambaiqa, ani faiqi namu kambiqaainausa ani amaqa maqee findifi karaambaiqaikiqa ifaranoo.

Aneenna faiqi namu anee kaqi maridana aiqama maqa maaqai uriqararusaika mannimaqasaina rakisi nimaqeeffaranoo.

<sup>17</sup> Qinee ani auqu uqeerasaanaqa naaru naaru aiqama kambiqaeeffandinausa minara irifaranoo.

Miqiannanara faiqi anaasee naaru naaru ani amooqifaranoo.

## 46

*Anutufa maasa faqa maridanoo.*

<sup>1</sup> Anutufa maasa kukeeqara maqusa faqa maasa afeeka faqa maridanoo.

Maasa aiqama kari ummaaraki aqufunanoo dadaaqi marifa maridanoo.

<sup>2</sup> Maasa minara irisee sia rufiaanaura.

Maqa firaaqoo kasinaqa sia maasa minara rufiaanaura.

Aaqana namu mareeqee ooruku nammari qambaana i uqasaina aqufinaqa maasa sia minara maparaa ianaura.

<sup>3</sup> Aiqama nammari aulinoo firaaqoo narisaa narisaa arinoo qaqaara qaqaarinanoo firaaqoo ufaqinaqa sia rufiaanaura.

Aaqana namu kasinaqa nammari fannoo aaqana ammitu ammitu inaqa sia rufiaanaura.

<sup>4</sup> Anutuna maqusa aqa mari nammari qumidanoo raina rainidanoo Anutuna maqusaki mariasa mi nammari fa اساسیرانا nimidanoo.

Mi maqusafa naaquqarafa marifanoo uriqarara Anutufa mi maqusanaki maridanoo.

<sup>5</sup> Anutufa mi maqusanaki marinara sia kasinoo sia aqufunanoo.

Namuqaa aniraifanoo mi kananaana kai Anutufa dadaaqiannoo.

<sup>6</sup> Aamina maqannaa tautummasee aanoo qimasee faaqa fuisee qiafaqa akaqa maqannaasa kurididaqa.

Misa miqi mariafanoo Anutufa nari ufa firaaqoo uqeerai fanoo aiqama maqa tasirisirinoo nammari kidanoo.

<sup>7</sup> Karaambaiqa aiqama afeeka faqaafa maasa faqa maridanoo. Yaakooboona Anutufa maasa afeeka kukeeqara maqusa maridanoo.

<sup>8</sup> Oo aiqamausa aniree Yaaweefa auqamasai ainaina qafaa.

Maa maqa maaqana aiqama naaquqara ainaina auqaina qafaafa.

<sup>9</sup> Mifa maa maqa maaqanasaa aiqama atiqara mari rakirana taikannimaqaidanoo.

Mifa duru feefa itairaatairidanoo.

Rakira saqari faqa idaki aqusaifanoo qama taikaidanoo.

<sup>10</sup> Oo innee kasoomafinaqa qinee Anutusa marunnanara oonumafi iriaqa.

Qinee moomoo maqannaasa qambaana i uriqara qama marianaura.

Qinee aiqama maa maqa maaqanaki uriqaramafuanaura.

<sup>11</sup> Karaambaiqa aiqama afeeka faqaafa maasa faqa maridanoo.

Yaakooboona Anutufa maasa afeeka kukeeqara maqusa maridanoo.

## 47

*Anutufa aiqama maqannaasa karaambaiqa maridanoo.*

<sup>1</sup> Oo innee aiqama maqannaasa nisauku aridaqa asasiaqa.

Innee Anutunara idi rama amaqa idaqa asasiaqa.

<sup>2</sup> Kaaqa uriqarara Yaaweefa naaquqarafa maridanoo, minara rufiaaqa.

Mifa aiqama maqa maaqasaa uriqarara karaambaiqa maridanoo rakisi nimaqaidanoo.

<sup>3</sup> Mifa aiqama maqannaa mareeqeenoo maasa Isaraee maqannaa niramandunnai quqanau.

Aiqama maqannaa oonu mafi maasa qiku ameemaana i quqasanau.

<sup>4</sup> Maasa maqa maaqa qimiraree qimasee utaaqama qimaqoona nari kai qiminau.

Anutufa mi amiqira maqa maaqana maasa Isaraee  
 maqanaasa nari aidi marusa qimufaqa maasa mi maqa maaqanara asasiidaqa.  
<sup>5</sup> Anutufa nari ufa irira qaari maruqoo ooru  
 fimarufaqa mina fiq fiqiuqa marusa faaqa ridaqa asasi mariqau.  
 Ukeena fuaqarana namufaqa Yaaweefa ooru finau.  
<sup>6</sup> Amooqira idi Anutuna ramamia. Doo ramamiaqa.  
 Maasa karaambaiqa amooqira idi ramamiaqa. Doo kafaa idi ramamiaqa.  
<sup>7</sup> Anutufa aiqama maa maqanasaa mariasa karaambaiqa maridanoo.  
 Doo innee mina amooqira idi ramamiaqa.  
<sup>8</sup> Mifa nari naaquqara qaarisa oogu marifi aiqama maqannaasasaa rakisi ni-  
 maqaidanoo.  
<sup>9</sup> Aiqama maqannaasa uriqararasa moodaaqoo  
 Abarahaammana Anutuna ufa iri mariasa namufaqa suqidaqa.  
 Misa aiqamausa Anutunaindi maridaqa.  
 Mifa firaqoo uriqarara afeeka faqaafa maridanoo.

## 48

*Sioona Anutuna maqusa maridanoo.*

<sup>1</sup> Yaaweefa firaafa uqanna maridanoo.  
 Maasa Anutuna maqusaki mina naaquqara aqanasaa mari maqusanaki maasa Anutuna  
 amooqidaqa.  
 Mina firaqoo uqanna amooqiaqa.  
<sup>2</sup> Sioona aqana Anutunaindi kaaqa uriqararafa amiqirafa maridanoo.  
 Mifa uriqarara karaambaiqa maqusa maridanoo.  
 Mi aqanafa maa maqa maaqanakinaa fasiqa anaasee asasirana nimidanoo.  
<sup>3</sup> Anutufa mi maqusanaki maridanoo faiqi anaasee  
 dadaaqidanoo, mifa rakira aukua faiqi anaasee  
 mi afeeka faandaamura ququsanaki dadaaqidanoo ititannisaidanoo.  
<sup>4-5</sup> Moomoo namuqaa karaambaigauqa suqufi mi  
 maqusana ooru qafoofanoo naindiri ree naaquqooafaqa quqasee doo sandamafiqau.  
<sup>6</sup> Naindiri rarafa misa naakufufaqa anaasee innaamunara auruandee miqau.  
<sup>7</sup> Namuqaa nariqa rakira kannuqaki oobiqasee urufanoo  
 suani oosanaindari ufai firaafa urinoo nammari  
 amakaurufanoo misa kannuqa Tarasisaa maqusanaasaindi teeqindee mannisana.  
<sup>8</sup> Maasa oqai Yaaweefa rakisi marunara iriafannana maqee maasa qeeqa qifunoo  
 qafeeqa.  
 Yaaweena aiqama afeeka faqaana maqusa marinara  
 nari Anutufa mi maqusanaki amiqimmasee  
 ititaqifanoo naaru naaru afeekaikinoo maridanoo.  
<sup>9</sup> Oo Anutu, ani naaquqara amaana maqaki keeqaifiqa  
 ani maasara firaqoo aidi marinara oonumafi iridaqa.  
<sup>10</sup> Oo Anutu, aiqama maqa maaqaki mariasa ani amooqidaqa.  
 Ani firaq auquara aiqama maa maqa maaqanakinaa fasiqa anaasee asasiidaqa.  
 Anee andeeqara oosanannoo rakisi nimaqee maridanoo.  
<sup>11</sup> Oo Anutu, ani rainara ufa andeeqarafa marinara,  
 Sioona aqanasaa mariasa asasiidaqa.  
 Yuda maqa maaqakinnaa maqusakiaqa mariasa faqa nasuriaqa.  
<sup>12</sup> Innee Anutuna faiqi namu Sioona aqana fiq fiqummmasee qafaafa,  
 ooni faandaamura auquqoono amiqimasee qafeeqa asaanaruqa.  
<sup>13</sup> Mina faandaamura ooru ree qumuree qiranakiaqa qafamaqarasammasee kasooaqee  
 inaaqianna  
 kambiqainausa mi faandaamuranara qimannimiaqa.  
<sup>14</sup> Maa Anutufa naaru naaru innisaimbaqa Anutufa maridanoo.  
 Mifa naaru naaru maasa qifiqee aana uqaqifiqanoo fuannoo.

## 49

*Munnimma qumiasana saqarikirafa furufarira oosana maridanoo.*

<sup>1</sup> Maa ufana aiqamausa iriaqa.  
 Aiqama maa maqa maaqanaki mariasa amiqimmasee iriaqa.  
<sup>2</sup> Aiqamausa uriqararasa faqa ureeqarasa faqa  
 ainaina faqaasa faqa kudi fasiqa faqa, aiqama iriaqa.



- <sup>3</sup> Eeqá dookiqari irirana faqaasa ufa kai qianauna.  
Qini daunduraindaraa irirafa andeeqara irirana maree maria irirana nimiannoo.
- <sup>4</sup> Eeqá naamuqaqira ufa quandasee qianauna.  
Qini quandara ufa piripuna aridaqa idinnai qimannimianauna.
- <sup>5</sup> Manda aukuaana aninaqa qinee sia fifau rufiaanauna.  
Mandoosana maree mariasa qini fiqú fiqú iqa  
maridaqa mandaikamma qisararifaqa sia qinee minara rufiaanauna.
- <sup>6</sup> Mi aaqara fasiqausa nári ainainasaa kai mundidaqa,  
nári moomoo munnimma ainaina faqaasa marianara nári nimoo namoo qidaqa.
- <sup>7</sup> Maasa sia amana geeqa maa maqanasaa kisaagasaa marirana feefaurianauna.  
Maasa sia amana Anutuna munnimma amisee geeqa marirana feefaurianauna.
- <sup>8</sup> Faiqí marirana feefaurirafa firaafa fiqaranoo maridanoo.  
Firaa feefauru tia aqinanoo faqa sia kai amanaikiannoo.
- <sup>9</sup> Sia amana feefauru Anutuna amisaifanoo maa  
maqanasaa kisaagasaa marida sia kuquanee qiannoo.
- <sup>10</sup> Aiqamausa maa ainainna qafaidaqa.  
Irirana faqaasa misa faqa kaqi kuqifaranoo.  
Irirana siaisa faqa furufarirausa faqa aqama amana  
amana kai kuqíqa nári ainaina mafi quqasaafaqa akaqausa maraidaqa.
- <sup>11</sup> Ooqai maqa misaindi marinau.  
Maqee faiqí madika fannoo misa maqusa maridanoo.  
Naaruara naaruara misa mi madikanaki kai marifaranoo.
- <sup>12</sup> Maasa uriqarara duqu fannoo sia amana kuqirana itita qimaqaannoo.  
Maasa kaqi aandauna foora kuquanauranoo.
- <sup>13</sup> Faiqí náriara uriqararausee qimasee náriara kai  
irimariasa, miqíra fasiqa irirafa sia andeeqanoo maridanoo.  
Misa fifau nariqa ainainara asasidaqa misa faqa aandauna foora kai kuqidaqa.
- <sup>14</sup> Misa sipsipauqara foora kuqifaranoo.  
Misa kuqu fifanoo kuqirafa misa sipsipasaa rakisirafara foora misa rakisi nimaqaannoo.  
Andeeqara oosana maree mariasa doo misa  
kanaanaanara foora findifiqa manda oosana maree mariasasaa rakisifaranoo.  
Manda oosana maree mariasa kaqi maridaqa amiqíra  
maaqaqi mariinaqa kuqíqa sia minaki marifaranoo nianai madikaki maridaqa kai  
kaqi putaa ifaranoo.
- Misa miqíqa mariafaqa qinee sia misa naanna raidaqa.
- <sup>15</sup> Anutufa qini kuqíra afeeka ameemaanaindaraana feefauru masainaqa asumu mari-  
anauna.
- <sup>16</sup> Faiqí moo fannoo firaaqoo ainaina moomoo faqaafalkinnanara sia minara irinanoo  
amuqusiani.  
Mina maaqa amiqirana firaana usakainara sia anee qinee faqa miqiaqaanee qia.
- <sup>17</sup> Mi ainainna faqaa fasiqa kuqinoo sia moo ainaina maree fuannoo.  
Mina qumiasana sia mina faqa madikaki ooqu fuannoo.
- <sup>18</sup> Mi fasiqafa kaqi maru kamuqoo moomoo amiqíra  
ainaina faqaafa maridanoo mifa fifau nariara amiqí amiqiranaki maridee qi-  
marinau.  
Mifa moomoo amiqíra ainaina faqaafa marufaqa aqamausa mina amooqi mariqau.
- <sup>19</sup> Ainaina faqaafa kuqinoo mifa faqa nári akeeku akaaku kuqíqa oonu mariaqoo  
fuannoo.  
Mifa miqoo oonu maridanoo sia kaifaa kaaqa qarana qafaannoo.
- <sup>20</sup> Maasa uriqarara duqu fannoo sia maasa kuqiranasa itita qisaannoo.  
Maasa aandauna foora kaqi kai kuqanauna.

## 50

### *Kuqaa qira innaaru.*

- <sup>1</sup> Afeeka faqaa Anutufa Yaaweefa maa maqa  
maaqanakinaasara nammeera qifaqa suqufufanoo qimannimi marifa maridanoo.  
Suani oosanaindari faqa suani keeqee marinnaindari faqa nammeera qifaqa suqidaqa.
- <sup>2</sup> Sioonna maqusa kaaqa amiqirafa qareenarafa  
marifanoo Anutufa mi maqusanaki maridanoo  
akooqoo kaaqa qaidanoo rupannoo imarifa maridanoo.
- <sup>3</sup> Maasa Anutufa anireenoo sia ufa siaina marifa maridanoo.

Ida fannoo mina afunni fidanoo fasafasimarifanoo fidanoo.

Misaqa mina fiq u fiq inoo mari ainainausa ufai  
aakuasaa innaarunai qirafa mifauqa kai firaaqoo ufa qidanoo.

<sup>4</sup> Anutufa aiqama maqannaa suqu quqaseenoo misa  
ufa andeeqaani qimasee innaaruna faqa maqa faqa naaramasainaa anireeqa  
Anutufa nari

faiqi anaasee raina nimaqaaninna ufana irifaranoo.

<sup>5</sup> Anutufa qidanoo, qiniki mapukusee maria fasiqa anaaseesa suqumaree moodaaqoo  
aniaqa.

Aandau tatufiranannai qini faqa qima afeekaikirana  
qimimariasa misa qinee marunnannai moodaaqoo suqumaree aniaqa.

<sup>6</sup> Innaaruna fannoo Anutunara maaqi qimasee kooroo idanoo.

Anutufa nari kai andeeqarafa ufa raina nimaqee marifa maridanoo.

<sup>7</sup> Anutufa kafaa maaqi qidanoo.

Oo Isaraee maqannaa qini maqannaasa irifaqa inni mandoosanara kooroommasee  
qimannimianaaura.

Qinee Anutusa inni Anutusa maridaqa qimannimianaaura.

<sup>8</sup> Innee qimi maria ainainna faqa aandau tatufi  
mariana faqa maqee maqee qimimariana sia minara aanoo qidaqa.

<sup>9</sup> Qinee sia inni aandauqa kinaana burimmakau akoonara dididanoo.

Sia inni mimmi ququsakinaana moora dididanoo.

<sup>10</sup> Nandaki maria kaasau andausa aiqama qinindi kai  
maridanoo, maqeeana aandau aiqama aaqanasaa  
faqa maqa maaqaki mariasa qinindi kai maridanoo.

<sup>11</sup> Aiqama ufiniuqa faqa qinindi kai maridanoo.

Aiqama maqa maaqaki maria andausa aiqama qinindi kai maridaqa.

<sup>12</sup> Qinee Anutusa andaura didi marinaqau sia inni qimannimunaiqini.

Maa maqa maaqana faqa aiqama minaki mari ainainausa qinindi kai maridanoo.

<sup>13</sup> Innee qiniara burimmakau akoona amaqi neemarifee fee qidaqee.

Innee qiniara mimmi fidika faqa neemari fee fee qidaqee.

Sia mina naidaqa.

<sup>14</sup> Innee dufi dufi qirana kai tatufiranara foora qini Anutusa qimiaqa.

Innee qini uriqarara afeeka faqaasara qima afeekaikammaqaa mau kai fuaqa.

<sup>15</sup> Ummaara inniki kambiqaqinaqa qini daaraifaqa qinee inni dadaaqianaqa innee  
quandakina qini qimooqiaqa.

<sup>16</sup> Aaqara oosana maree mariasa Anutufa maaqi qimasee qimannimidanoo.

Innee nanaree qini naamuqaqira ufa nikaru qimasee naakapaidee.

Innee nanaree qini moodaanaki kira ufa unnaqimasee inni nifaurusaaqari uridanoo fee.

<sup>17</sup> Qinee andeeqa nimaqararunaqa nikooqee mariasa.

Aiqama kari qini naamuqaqira ufa rukiee mariasa mariafanoo.

<sup>18</sup> Innee qummuari mari fasiqana qafamasee mina aqoondiki mariafanoo.

Innee faiqi anaasee qummuari mariasa niqafamasee innee faqa minaki ootuppee mariasa  
mariafanoo.

<sup>19</sup> Inni noo fannoo manda oosanara qiranara kai rakisidanoo.

Inni nifauru fannoo unna ufa qirara sia marammara ridanoo kaqi qimariafanoo.

<sup>20</sup> Innee inneeqa nikaqaafasaa unnufannai misa ufa nimi mariasa mariafanoo.

Innee oosana siainaki misara manda ufa qimariasa mariafanoo.

<sup>21</sup> Innee mi manda oosana oosanausa auqee mariafaqa

qinee Anutusa kaqi kasooiqa marunaqa innee qiniara Anutufa maasa daanna  
raidanoo manda

oosanara sia ufa qidanoo fee qimariafanoo.

Innee miqi qidaqa aqee mariafanoo.

Inni nifusaa akoqoo inni aaqaranara kooroomma nimianaaura.

<sup>22</sup> Innee qini Anutusara nikooqee mariasa maana iriaqa.

Qinee inni mandaikamma nimaqaanaura.

Sia moo fannoo amana inni dadaaqiannoo.

<sup>23</sup> Qini Anutusa dufi dufi qirana tatufiranara foora

suqa qimimariasa faqa qini ufamau fimariasa faqa

qinee Anutusa qeeqa asumu marirana nimianaaura.

## 51

*Numoo akiiqara mininnisaani fee innaaru.*

<sup>1</sup> Oo Anutu aneenna sia taikaaninna amugusirafa marinara irisee qini qifauama qisaa. Aneenna firaa nifauarafa marinara irisee qini aaqarana akiiqara rukaqisaa.

<sup>2</sup> Qini manda oosana findaukamaqisaa.

Qini aaqarana nammari uqu taika qisaa.

<sup>3</sup> Qinee qeeqa aaqaranara iridaqa.

Qini manda oosana fannoo naaruara doorinni marinaqa sia qaunuanaura.

<sup>4</sup> Oo Anutu qini aaqarafa ani kai mandaikamma amaqqeeqa.

Ani afusaa kai maa manda oosanna auqqeeqa.

Oo Anutu akoogoo ani qimamidaqa.

Anee qini ufa qimiannana anee kuqaa andeeqarafa mariananoo.

Anee ufa qimiannannai qini aaqarana akiiqara iananoo.

<sup>5</sup> Qini qinoofa qini maqa qisoogooqari numoo aanaaqi mariafanaua maridaqa.

Qeeqa qinoona amuaquki mariafananoo aaqarana asumu qiniki marinau.

<sup>6</sup> Oo Anutu faiqi naundarai anoona ufa kai marianifee qimarianafa mariananoo.

Qini daundurari kukeeqaranaki aneenna irirana daamuqia.

<sup>7</sup> Anee qini anukama qisainaqa qinee anukaqa maria.

Qini nammari ugusainaqa qinee eekara arira qasuruara foora qiqa maria.

<sup>8</sup> Oo Anutu anee qini aaqarana akiiqara qini qimudaani raqeera foora maqaanaqa maridaqa.

Anee qini aaqarana minni qisainanoo qini qimudaani kafaa ootupeera foora inaqa qinee asasianaura.

<sup>9</sup> Aneenna afu tautasee qini aaqarana sia qafaa.

Qini manda oosana aiqama rukaqisaa.

<sup>10</sup> Oo Anutu qini qimuqusa fuka amiqira qimuqusa auqu qisaa.

Qini daunduraki naaruara ani ufamau fira maraquna quqaqisaa.

<sup>11</sup> Sia qini mareeqee aneenna mariannaqooqari aquqisaa.

Aneenna naaquqara andeeqara maraquna qiniki marina sia maraqua.

<sup>12</sup> Qinee ani اساسira asumu mariranaki mariufaga

kaqinni ubeekaqa marunnana kaifaa mina qiminaqa asasia.

Miqianana anee kaifaa ani ufmau fira didira

maraquna qiminanoo qini dadaaqinaqa ani aidirana mau fua.

<sup>13</sup> Anee miqinaqa qinee aaqee mariasa ani andeeqara aana uqannifiqaanaura.

Manda oosana maree mariasa faqa irisee anee innannai quandaki ubeekkeefaranoo.

<sup>14</sup> Oo Anutu qini asumu marirana qimianna Anutufa mariananoo.

Anee sia qini kuqa darua, anee ititaqisainaqa qinee

firaqoo اساسida ani andeeqaranara idi raanaura.

<sup>15</sup> Oo Yaaweefa anee qini doo raqasainaqa qinee qeeqa

dookiqari ani amooqiranara kai koorooianaura.

<sup>16</sup> Qinee ani Anutuna aandau tatufirana amianee

runana anee sia didiifoo qianaqa minniseeqa.

Qinee tatufirana ani amianee runana anee minara sia asasiananoo.

<sup>17</sup> Anutufa nari amira ainainara akooqaidanoo.

Qini tatufirafa qeeqa mara maree qumirafa maridanoo.

Anee nariqa mara maree qumira oosana faqa faiqi

nari mandainainaqari quandara oosanara faqa sia akooqaidanoo.

<sup>18</sup> Oo Yaawe aneenna amiqira iriranannai Sioona

maqusanaasa amiqi amiqimmannimaqaa.

Anee Yeerusaree faandaamura kafaa auqu uqerasaa.

<sup>19</sup> Auqu uqerasainaqa miqooqari ani aminna ainainafa ani aidimarifa mariannoo.

Aandau muduka tatufirana suqarafa oosana oosana ani aidirafa kai mariannoo.

Miqoo misa burimmakau akoonauqa arusee tatufirana suqasee ani amifaranoo.

## 52

*Anutuna raina nimaqaranara faqa amiqiranara faqa qidanoo.*

<sup>1</sup> Oo amudaanai qimarianna fasiqa, anee nanaree aneenna manda oosana amooqidanee.

Anee nanaree faasaambaasaana anee Anutufa aidimari fasiqa aanaaseesa mandaikamma nisaidanee.

Anutufa mapukusee marira oosana fannoo naaruara marifa maridanoo.

<sup>2</sup> Manda fasiqa anee mandaikamma nimaqarara kai tipundaari marianafa mariananoo.

Afai keedaira foora raiqarafa unna ainaina kai inanuanafa.

<sup>3</sup> Ani manda oosanara rirafa amiqira oosanara rimariannana uriqaranoo maridanoo.

Ani unna ufa qiranara aidirafa anoona ufa qira aidirana uriaaqaranoo maridanoo.

<sup>4</sup> Anee unna ufa qirara kai aidi marifa mariananoo.

Anee faiqí mandaikamma nimaqara ufara kai aidi marianafa mariananoo.

<sup>5</sup> Anutufa kuqaa uqanna anee mariannaqoo qaraana  
ani rarisameegee naaru naaru kuridiranaki quqasaannoo.

Mifa ani maaqakinaana qumara rarisameegee ummaaraki quqaisaannoo.

Mifa maa maqa maaqakinaana ani umareekeenoo kuqiranaki quqaisaannoo.

<sup>6</sup> Anutufa manda fasiqauqa kuridinnimaqainaqa andeegee mariasa qafamasee rufiee-  
faranoo.

Misa mi manda fasiqausara naanaidara qifaranoo.

<sup>7</sup> Misa mi manda fasiqanara maaqi qimasee uteeti qifaranoo.

Maa fasiqafa sia Anutunasaa mundidanoo. Sia mina dadaaqianifee qidaqa.

Nari moomoo ainainasaa mundinoo maridanoo,

mifa nari firaa qumiasanara qini dadaaqiannoo fee qidanoo.

Mifa nari manda oosanara qini itita qimaqaannoo fee qianoo

<sup>8</sup> Qinee Davidisa sia miqimarunaua maridaqa.

Qinee Anutuna amaana maqaki fuka oorifa saqariara foora ammunidaqa.

Qinee naaru naaru Anutuna sia taikaaninna amuqusirana saqarikidaqa.

<sup>9</sup> Qinee anee auquqoonna ainaina oosana qafamasee

naaru naaru ani faiqí anaasee nifusaa dufi qianauro.

Qinee ani andeeqaranara kooroommasee qimannimianauro.

## 53

*Faiqí faiqí manda oosanara qidanoo.*

<sup>1</sup> Rufufari mariasa nari nimuqusakiqari maaqi qidaqa sia Anutufa maridanoo fee qidaqa.

Miqi qimariasa oosana mandaika minoo maridanoo.

Misa manda ainaina kai auqee mariasa maridaqa.

Sia moo fannoo andeeqara oosana maraidanoo.

<sup>2</sup> Yaaweefa innaarunaindari maa maqanasaa faiqí

faiqí mariasa nindafaidanoo maaqi qimasee qimannimidanoo.

Akaqausa amiqira irirana faqaasa maridee sia fee maridee.

Akaqausa qini Anutusara randaidee sia fee randaidee qidanoo.

<sup>3</sup> Aiqaumasa quandaki kaqi runna fidaqa.

Misoo maasoo amana amana kai mandaikiqa maridaqa.

Sia moo fannoo andeeqarafa maridanoo. Sia uqanna.

<sup>4</sup> Anutufa maaqi qimasee iraidanoo.

Manda oosana maree mariasa irirana siasee maridee.

Misa qini faiqí anaasee ainaina qumuaramasaida minasaa maridaqa.

<sup>5</sup> Miqi mariasa firaqoo rufiee faranoo.

Ooqai rufioona arusee maqee firaqoo rufiqeefaranoo.

Anutufa nari faiqí anaasee namuqaauqa naruseenoo

misa nimudaani aiqama tinai modaa moodaa aqusaannoo.

Anutufa mi namuqaasa ameesuqinaqa Isaraee maqannaasa misa naru nifaqaqifara.

<sup>6</sup> Qinee maaqi qimasee innaaru qidaqa Isaraee

maqannaasa asumu marirafa Sioona maqusakiqari aniani.

Anutufa Isaraee maqannaasa nari maqa maaqa faqa

qumiasana faqa kafa rairaamma niminaqa misa asasidaqa idireefaranoo.

## 54

*Namuqaasaa itita amaqaannee innaaru.*

<sup>1</sup> Oo Anutu aneenna afeekannai qini mara amiqiranaki quqaqisaa.

Aneenna firaa afeekannai qini rumbaranakinaana iduku qisaa.

<sup>2</sup> Oo Anutu, qini innaaru qirana iria, qini dookinaa ufa iria.

<sup>3</sup> Ramoo ramaa imariasa aniree qini dariraridaqa.

Faiqí kuqa narimariasa qini marirana taika qimaqarara midaqa.

Anutu ani ufara sia irimariasa qini dariraridammia.

<sup>4</sup> Kuqaa Anutufa qini dadaaqi marifa maridanoo.

Qini mariranasaa rakisi marifa Yaaweefa maridanoo.

<sup>5</sup> Anutufa qini namuqaqa qini mandaikamma qimaqee

maria oosannana quandasee nariqa faqa mandaikamma nimaqaani.  
 Oo Yaawee aneenna mapukusee mariranara irisee misa kuridinnisaa.  
 6 Oo Yaawee qinee aandau tatufirana ani suqa amirara dididanoo.  
 Oo Yaawee ani auqu amiqirafa marinara ani amooqianaura.  
 7 Anee qini dadaaqiananoo aiqama ummaara fannoo sia qini rafaafinoo.  
 Miqimma saanaqa geeqa qifunnai geeqa namuqaa aqufuana niqafeeqa.

## 55

*Faiqi moo fannoo mina aqoondi fannoo ueeqasoofanoo Anutufa dadaaqianifeera innaaru qinau.*

- 1 Oo Anutu qini innaaruqirana iria.  
 Qinee ani iramirianana sia aaqoosaa ititasee kaqinni oori rafusu aqua.  
 2 Anee qini ufa irisee dadaaqinnanara qima qimia.  
 Qini ummaara irirafa qini daruaqaa midanoo.  
 3 Qini namuqaa qini mandaikamma qimaqarara sandanainai qidaqa.  
 Mi manda oosanna maree mariasa qini rafaafu qimaqaidaqa.  
 Misa ummaara mareeqee qinisaa quqaidaqa.  
 Misa qiniara aanoo qimasee fidiqaamaqisaidaqa.  
 4 Qinee firaqoo rufiee marunanoo mi irirafa qini kuqirafa qimaqaa idanoo.  
 Kuquanna daaquarafa firaafa daakinoo maridanoo.  
 5 Firaqoo rufiee marunanoo daindiri raidanoo.  
 Kuqira daaquarafa qini rafaafinoo maridanoo.  
 6 Qinee nakipuruna miqiraua qiqaosa faqaasa  
 maridau qagamaree moosaa oonuree idooaranaki marini.  
 7 Qinee qagamaree nianai faiqi sia mariannai maaqa marunaiqini.  
 8 Ufainamu faqa aakuasaa namuqara foora  
 namuqaa darimariafaqa ufini maridau kai kaqi mooatnai auqaanaira foora  
 asooarannai fini.  
 9 Oo Yaawee anee qini namuqaa ufa qirana furufamma nimaqa.  
 Narirafa faqa aanooqirafa faqa qini maqusaki  
 marinara miqimmannisaaneera qinee ani iraidaqa.  
 10 Eendaki faqa faasaana faqa maqusa faandaamura  
 afaimau oonuree aniree idaqa manda ainaina faqa ummaara faqa uqeeraidaqa.  
 11 Kuridinnimaqara oosana fannoo maasa maqusaki aiqama tinai maridanoo.  
 Narira ufa faqa unna qira ufa faqa maasa maqusaki aiqama tinai qumbiqanoo mari-  
 danoo.  
 12 Qini namuqaa qifasaasa ufa qimi naqau kaqi maraunaiqini.  
 Qini namuqaa darirari faqau qinee miqooqari kukeeqafini.  
 13 Sia qini namuqaa fau miqidau anee qini fooqaa ira  
 fasiqa qini qifaqasaa qiqaondi fannoo qini qiqaonafa qiniara ueeqee mariananoo.  
 14 Maaqanda moomoosa faqa moodaanaki Anutuna  
 amaana maqaki keeqafiqa amiqira ufa nari  
 qimami nari qimami qimari qiafana.  
 15 Kuqirafa qini namuqaauqa tautumasee naruan.  
 Misa kaqi marifaqa misa mareeqee kuqiraua marianaki quqaqa.  
 Aaqarafa misa maaqaki faqa misa nimuqusaki faqa marinara miqiaqa.  
 16 Qinee Anutuna aaraanoo mifa qini asumu maraannoo.  
 17 Eeneemarinaqa faqa kananaana faqa faasaana  
 qambaana faqa qinee geeqa aupuraranakiqari aaraanoo mifa qini ufa iriannoo.  
 18 Rakiranaki moomoo namuqaa darirariafanoo  
 Yaaweefa minakinaana amiqimmasee qifiqaiqaqa oonurandee qimaqaqaa aniana.  
 19 Misauqa nari manda nirana sia minnisee andeeqarannai quandaqaa.  
 Misa Anutunara rufiarafa sia maridanoo.  
 Anutufa naaru mariranakiqari uriqararafa marifa qini innaaru iriseenoo misa aupu-  
 rarana niamiannoo.  
 20 Qini ooqeenaa qiqaondi fannoo nari aqoondiqa naridanoo.  
 Nari aqoondikira qima afeekaikira ufa rukiasee naridanoo.  
 21 Mina afaurusaa ufa fannoo fadameenara foora amiqi  
 amiqi qimarifanoo mina amuqusaki qari rakirafa kai kambiqee marifa maridanoo.  
 Mina ufa fannoo fadameenara foora farindaidanoo  
 mi ufana anoona aseema miqirafa maridanoo.

- <sup>22</sup> Aneenna ummaara Yaaweenasaa quqasainanoo mifa aufadama amaaqannoo. Yaaweefa andeeqarauusa mandainainaki aquffanoo irinoo siamma mininnisaannoo dadaaqammianoo.
- <sup>23</sup> Oo Anutu anee faiqi kuqa nári mariasa faqa unna ufa qiganuusa faqa sia asooqa qeefaranoo, fukasaa kuqifaranoo. Misa miqifaqa qinee ani kai saqarikinaura.

## 56

### *Anutuna saqarikira innaaru.*

- <sup>1</sup> Oo Anutu, anee qiniara qimudaoo qia. Faiqi moomoo nimudaanai qimasee qini daru qifaqaa qidammia. Qini namuqaa aiqama kari qini qifaqasee dariraridammia.
- <sup>2</sup> Qiniara ataasataasa qimariasa faasaambaasaana qini daru qifaqaa qidammia. Moomoosa qini dariraridaqa.
- <sup>3</sup> Qinee rufiaunna kari Oo Yaawee, qinee ani kai saqarikidaqa.
- <sup>4</sup> Qinee Anutuna saqarikidaqa sia moo ainainara rufiidaqa. Mina qima afeekaikira ufara irisee mina auqu quqeeridaqa. Faiqi faiqi nana mandaikkee maqimaqaiifaqa sia qinee rufiaanaura.
- <sup>5</sup> Aiqama faasaana qini namuqaa ummaara qimidaqa. Misa maqee maqee qini mandaikamma qimaqarara kai iridaqa maridaqa.
- <sup>6</sup> Misa qini marirana nirana qiqafamasee qini darirara kukeeqa maridaqa.
- <sup>7</sup> Oo Anutu, anee misa manda oosana akiqara apurarana nimia. Anee aneenna aanooqiranannai mimaqannaasa muqufisee rafaafunnisaa.
- <sup>8</sup> Oo Anutu qini qiki raqarana aneenna papiqaki akararua. Qini daukunu quminara papiqaki padimmasee akara rua.
- <sup>9</sup> Qinee ani aaraanana anee irisee qinaqa namuqaa sandeefaranoo. Anee miqinaqa qini Anutufa qini saaroo qidanoo fee qianaura.
- <sup>10</sup> Qinee Anutuna saqarikidaqa mina qima afeekaikira ufara amooqidaqa.
- <sup>11</sup> Qinee mi Anutunasaa kai qeeqa irirana rusidaqa. Faiqi faiqi nana mandaikkee maqimaqaiifaqa sia qinee rufiaanaura.
- <sup>12</sup> Oo Anutu qinee qima afeekaikiafanna ufanara irisee dufi dufi qirana aandau tatufiranara foora suqamianaura.
- <sup>13</sup> Oo Yaawee, qinee madika afaisaa oonuraunnana uqeeera qisaannanara dufi dufi qira tatufirana suqamianaura. Qinee farindamaki saamurirara unana qini mara findifuma qisaananoo. Qinee ani Anutuna afusaa kaqi marira kaaqa qaranasaa nuaneera mara findifuma qisaananoo.

## 57

### *Dadaaqiani fee innaaru.*

- <sup>1</sup> Qiniara qimudaoo qimisee dadaaqianne qidaqa. Oo Anutu qiniara qimudaoo qimasee dadaaqia. Qinee anee iannannai dadaaqianeera animarunnanara irisee qimudaoo qia. Qinee ani aqoosa ameemaana itita qisaina kuqirafa aiqaramafinaqa akoonnai anianaura.
- <sup>2</sup> Qinee Anutuna aiqama afeeka faqaana aaridaqa. Qini didimari aiqama ainainna qimimari Anutuna aaridaqa.
- <sup>3</sup> Mifa innaarunaindari qini innaaru qirana iriseenoo qini asumu maraannoo. Mifa qini mandaikamma qimaqee mariasa rafaafidanoo. Anutufa nari sia taikaaninna amuqusirana faqa nari mapukusee marira oosana faqa qini uqaqifiqaidanoo.
- <sup>4</sup> Qinee kaasau aandau raioonnara foora fiq fiq iqa mariana qambaana maridaqa. Misa nifai fannoo feefara foora faqa faaqaanara foora faqa kaaqa aaruqirauusa qambaana maridaqa. Misa nifauru fannoo aseemara foora raiqarafa faiqi ateekee marisa qambaana maridaqa.
- <sup>5</sup> Oo Anutu, aneenna uriqararana innaarunai uqannifiqaa. Aneenna qareenarana aiqama maqa maaqaki mariasa uqannifiqaa.
- <sup>6</sup> Qini namuqaa qini qiku ufana fufidammia. Qini daundurari rufiarafa marinara mapamidaqa.

Misa qini qimaara madika indufuseeqa nariqa sia  
irirai nari indufuqaanaki nari kai doo aqufia.

<sup>7</sup> Oo Anutu miqiga maridaqa aniara irunanoo qini qimuqusa mapukinoo maridanoo.  
Minara qinee idi raidaqa ani amooqianauro.

<sup>8</sup> Qinee findifiqa.

Qinee piripuna faqa ufireena faqa arimariananoo iaqainanoo suani afu uruani.

<sup>9</sup> Oo Yaawee qinee moomoo maqannaasa qambaana kikiqamafi amooqianauro.

Qinee moomoo fasiqa anaasee qambaana idi raida ani amooqianauro.

<sup>10</sup> Oo Yaawee ani maasara amuqusirafa firaatia innaaruna amana kai ooru maridanoo.

Ani mapukusee marira oosana fannoo kudimanda mariqoo ooru maridanoo.

<sup>11</sup> Oo Anutu, aneenna uriqararana innaarunai uqannifiqa.

Aneenna qareenarana aiqama maqa maaqaki mariasa uqannifiqa.

## 58

*Anutufa manda oosana maree mariasa aupurarana nimiani fee innaaru.*

<sup>1</sup> Innee uriqararansa andeeqasee ufa nimidee.

Innee anoona ufannai faiqi amana amana kai fee andeeqannimaqaidee.

<sup>2</sup> Innee sia miqi mariafanoo.

Inni nimuqusaki innee aaqaranara indeeindee imariafanoo.

Innee maa maqa maaqanaki faiqi narira oosana kai nimi mariafanoo.

<sup>3</sup> Aaqee mariasa maqannimaqoona kiqari kaqi runnai ubeekaqa maridaqa.

Misa maqannimaqoona kiqari aaqaranaki kai fidaqa unnufa kai qidaqa.

<sup>4</sup> Misa aaqara oosana fannoo ukadiqara foora faiqi anaasee ukaqa nimifaqa kuqidaqa.

Misa moo sakani sia ufa irimari sakani fara foora ufa sia iridaqa.

<sup>5</sup> (Akaqa maqannaasa sakani rakisi mariasa ufireena fuaqaafaqa misa ninuka aqidaqa.

Davidifa faiqi sia ufa irimariasa mi sakanina kikiqa ususee niqinoo maaqi qinau.)

Innee faiqi sakaniara foora ufireena fuaqaifaqa sia ufa irifaranoo.

Ufireena akoofasa amiqimasee fuaqaifaqa mina faqa siamma irifaranoo.

<sup>6</sup> Oo Anutu aaqee mariasa kaasau fainiara foora mariasa anee misa nifai rufidia.

<sup>7</sup> Anee aaqara oosana maree mariasa nammari

akooqoo qumida muqufi dadasindee mannisaa.

Aanasaa mari ainainna nikunnai radamuandeeamma nimaqaa.

<sup>8</sup> Oo Anutu saina aaqee mariasa qoofi kuqufi putaa iandee iaqa.

Kuqira faiqi maqasaasa sia kaaqa qarana qafaandee iaqa.

<sup>9</sup> Faiqi kaqikaa saqari atekaindee inoo kai kaqi Anutufa misa mandaikamma nimaqaanoo.

Misa kaqi marifanoo Anutufa nari fira arana qaranakiqari misa ufaira foora fuaqa aquannoo.

<sup>10</sup> Misa manda oosana akiiqara Anutufa nimaqaa,

andeeqee mariasa mina qafamasee asasammifaranoo.

Andeeqee mariasa misa fidikaki niku nammari uqifaranoo.

<sup>11</sup> Faiqi mina qafamasee maaqi qifaranoo.

Andeeqara marirana maree mariasa mi andeeqarana akiiqara nimirafa kuqaa maridanoo.

Maa maqanasaa qaraasa andeeqasee rainee mari

Anutufa kuqaa maridanoo, sia sia maridanoo.

## 59

*Namuqaa sia mandaikamma amaqaqee innaaru.*

<sup>1</sup> Oo Anutu qini namuqaauqa nisaukukinaana maraquqisaa.

Aiqama qini darirari mariasaa ititaqisaa.

<sup>2</sup> Manda fasiqa nisaukukinaana maraquqisaa.

Faiqi kuqa nari mariasa nisaukukinaana qini soodaqammaqisaa.

<sup>3</sup> Oo Anutu anee qafaa.

Misa kukeeqafi qini darirara qipuraidaqa.

Misa kaaqa aanoo qimariasa qini darirara suqidaqa.

Oo Yaawee sia qini manda oosana akiaqarau

dariraridau, kaqi fifau nariqa kai dariraridaqa.

<sup>4</sup> Qinee sia aaqara oosana maree fau.

Misa sia minara irirai kaqi fifau qini darirara deedaqidaqa.

Oo Yaawee, misa kai kaqi qini darirara deedaqidaqa rakisidaqa.

- <sup>5</sup> Oo Yaawee, aiqama afeeka faqaa Anutufa findifinana qini dadaaqia.  
Isaraee maqannaana Anutufa anee qumuree misa manda oosana aneenna afunnai qafaa.  
Findifinana Anutuna ufa sia iriasa ummaara nimia.  
Qini ueeqee mariasara sia qimudaoo qia, kaqi ummaara nimia.
- <sup>6</sup> Misa eendifaqa fainiara foora rairai qidaqa, manda  
ainaina uqeerarara qini maqusamau fiq u faiq u fiqa nidaqa.
- <sup>7</sup> Misa nookiqari nanee fididee.  
Misa nifauru nimaakiri qaseema miqirafa kai maridanoo.  
Misa nári manda ufara maaqi qidaqa. Yafee iriannoo fee qimasaidaqa kaqi fifau qidaqa.
- <sup>8</sup> Oo Yaawee, anee misa ufa irisee misara naanaidara qimariananoo.  
Anee aiqama mi manda maqannaasa ataasa ataasa qira ufa nimimariananoo.
- <sup>9</sup> Oo Yaawee, anee kai qini afeekaikamma qimaqasee rakisi qimaqee mariananoo.  
Anee Anutufa qini kukeeqara maqusara foora mariananoo.
- <sup>10</sup> Qini Anutufa qiniara amuqusi marifa qinee unnannai anireenoo dadaaqiananoo.  
Mifa qini namuqaa rafaafafu nimaqainaqa qeeqa qifunnai niqafaanaura.
- <sup>11</sup> Oo Yaawee maasa ititaqisee marianafa qini maqannaasa mi manda maqannaasara  
qaunifoora minara sia aiqama naru taikaa.  
Aneenna afeekannai mi manda fasiqausa  
narunnifaqaaqa masainaqa auigeera foora aiqama  
maqa maaqakinai oonuree aniree iqa nuaqa.
- <sup>12</sup> Misa nookinaa ufa faqa nifaurusaaqaraa ufa faqa aaqarafa kai maridanoo.  
Misa aaqara ufa faqa unna ufa faqa qimariana akiqara mandaikiyaqa.  
Misa nári noori uqeeree maria oosanafa ufaanara misa ninuka qumaraani.
- <sup>13</sup> Oo Anutu aneenna aanooqiranaki qari misa kuridi nimaqaa.  
Amiqimmasee kuridi taikasaa.  
Miqinaqa maa maqa maaqana atinni atinni mariasa  
minara iriseeqa oo Anutufa Isaraee maqannaasa rakisidanoo fee qifaranoo.
- <sup>14</sup> Eendifaqa namuqaa kafaa aniree fainiara foora  
rairai qidaqa mandainaina uqeerarara fiq u faiq u idaqa maqusamau nidaqa.
- <sup>15</sup> Misa nári naranara randaida oonuree aniree iqanida  
sia nimuaqu imarifaqa firaqoo faaqa riqanidaqa.
- <sup>16</sup> Misa miqi mariafaqa qinee ani afeekara irisee idi raanaura.  
Oo Anutu, qinee firaa ummaaraki marunnana anee  
qini afeeka kukeeqara maqusa mariannara  
qinee kananaana findifi ani maasara  
amuqusiranara idi raanaura.
- <sup>17</sup> Qinee qini Anutuna qini itita qimaqee mariannana amooqianaura.  
Anutufa firaqoo qiniara aidi marifa qini afeeka  
kukeeqara maqusa maridanoo.

## 60

*Manda ainainakinaana mara kaqinni quqaqisaannee innaaru.*

- <sup>1</sup> Oo Anutu, anee maasa minniqisaananoo. Anee maasa rafaafafu qimaqaananoo.  
Anee maasa aanoo qima qimaqaananoo.  
Oo Yaawee, kafaa maasa iannai quandafi maasa dadaaqia.
- <sup>2</sup> Anee maqa kasiananoo maqa fannoo oo raqaidanoo.  
Anee maqa oo raqafina kafaa mafi titaa.
- <sup>3</sup> Anee maa aukuanana maasa afeeka ummaara doo uqaqifiqaananoo.  
Mi ummarana manda nammariara foora nimianaqa  
namasaafanoo narifanoo nifuai nifuai inoo.
- <sup>4</sup> Oo Anutu maasa aniara daaquqee marisa namuqaa  
maasa daru qifaqaa ifaqa anee firaka uqeerainnannai sandaifanoo namuqaa duru  
feefa nammari araannoo, miqifaqa maasa sia kuridianaura kaqi marianaura.
- <sup>5</sup> Oo Yaawee maasa innaaru qirana irisee aneenna afeekannai maasa asumu maraqisaa.  
Miqimmaseenana ani aidi maria fasiqa anaaseesa  
mandainaina kinaana asumu mariaqeera maraa.
- <sup>6</sup> Anutufa nari naaquqara uigaana maqakiqari maaqi qinau.  
Qinee ufoona ridaqa Seekeemma maqa maaqa rainasee qeeqa maqannaasa nimianaura.  
Qinee Sukoota noopundu faqa miqi kai iqa qeeqa maqannaasa rainasee nimianauree  
qinau.
- <sup>7</sup> Kireeata maqa maaqa faqa Mannaseena maqa maaqa faqa qinindi maridanoo fee qinau.



Eefaraimma maqa maaqa qeeqa qikiqa afisi marunna afeeka qafeefara foora maridanoo.

Yuda maqa maaqa fannoo qini uriqarararasara uqannifiqee mari saunu fara foora maridanoo.

<sup>8</sup> Qinee Anutusa Mooaba maqa maaqa mareeqee mammari difaanirara foora masee ooru dupimma nisaanaura.

Qinee Eedooma maqa maaqa qiku aanaamu raipagu quqee marunna maqa maaqafa ooreeqarafa mariannoo, miqiannannoo qeeqaindika masaunnana kooroo ianaura.

Qinee Firistia maqannaasa urinnaaqaramasee faaqa rumasee ufoona ruanaura.

<sup>9</sup> Oo Anutu, yafee qini aana muquninaqee Eedooma maqannaasa afeeka faandaamuraki keeqafi narunaanaree.

<sup>10</sup> Oo Anutufa kuqaa fee anee maasa ameesa uquqiseenane.

Anee sia fee ooqai unnandee inana maasa rakira fasiqauqa faqa oonuree dadaqinnaree.

Anee sia maasa rakira fasiqa namufaqa fidana dadaaqi mariananoo.

<sup>11</sup> Anee maasa dadaaqinaqa maasa nari namuqaa narua.

Faiqi faiqi dadaaqirafa sia amanaikiannoo.

<sup>12</sup> Anutufa maasa dadaaqinaqa rakiranaki oonuree uriqaraanaura. Mifa maasa namuqaa rafaqafu nimaqaannoo.

## 61

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, qini iki raqarana iria, qini innaaru qiranara aaqoo rammatinia.

<sup>2</sup> Qinee moo maqa maaqai nianai oonu marunanoo qini qimuqusa mandaikimarifaqa ani aaraidaqa.

Anee qini mareeqee afeeka kukeeqara maqusaki quqaqisaina asumu maria.

<sup>3</sup> Nnaree anee qini faandaamurara foora qini ititaqimaqee marianafa mariananoo.

Anee qini faandaamura marianaqa namuqaa sia amana qini rafaqafifaranoo.

<sup>4</sup> Qinee naaru naaru ani uriqarara naaquqara uiqaana maqaki marirara dididanoo. Ani aqoosa ameemaanaira foora mandaqaanaaree qidaqa.

<sup>5</sup> Oo Anutu, qinee qima afeekaikira ufa ani qimamiafannanara anee irimmariananoo.

Anee iriseenana ani auqura rufiee mariasa nimiraree qianna ainainna qini Dafidisa faqa qimiananoo.

<sup>6</sup> Qinee Isaraee maqannaasa karaambaiqa marunnaasa Anutu anee qini aukuaana moomoo ootupamasainaqa qeeqa qinaiqimara qisaifaqausa nindafaanaura.

<sup>7</sup> Oo Anutu anee qiniara naaruara qini qifusaa maridana Isaraee maqannaasa rakisi nimaqaannee qia.

Anee aneenna amuqisirana faqa aneenna mapukusee marira oosanannoo faqa ititaqimaqaa.

<sup>8</sup> Miqimarinaqa qinee naaru naaru ani auqura amooqira idi raanaura.

Qinee ooqai aiqama faasaana ani amianaaree qimasee qima afeekaika maqaafannamau fuanaura.

## 62

*Anutuna rakisinnimaqaranasaa munduaqa.*

<sup>1</sup> Qinee Anutufa qini asumu maraani feera kai afeesida maridaqa.

Mifa kai qini asumu marirana qimidanoo.

<sup>2</sup> Mifa kai qini itita qimaqaseenoo qini asumu marirana qimidanoo.

Mifa qini afeeka kukeeqara maqusara foora marinara naaru naaru sia qini rakiranaki rafaqa fifaranoo.

<sup>3</sup> Oo qini namuqaauqa, naqumma kari fee qini darida marifaree.

Innee qiniara nauraa ququsa rafaarinoo fifaiqanoo marindee irafee qimariafanoo.

<sup>4</sup> Innee qinee uriqararaqoo marunnana qifeeqa maqasaa aqirara ufa qimariafanoo.

Inni unufara kai nididanoo.

Inni nooqiari unna qimasee Anutuna amooqira ufa qimariafanoo, inni naunduraki manda niqurara ufa kai umbiqanoo maridanoo.

<sup>5</sup> Qinee Anutuna kai mandaqaidaqa.

Qeeqa irirana minasaa kai munduqaqee maridaqa.

<sup>6</sup> Mifa kai qini itita qimaqaseenoo qini asumu marirana qimidanoo.

Mifa kai qini afeeka kukeeqara maqusara foora

marinara sia qini rakiranaki rafaqa fifaranoo.

<sup>7</sup> Qini asumu marirafa faqa qini uriqarara duqu faqa  
Anutunakiqari kai qiniki anidanoo.

Mifa kai qini itita qimaqee marifa maridanoo, mifa kai qini auqaana maridanoo.

<sup>8</sup> Innee qini qiku qisauku aiqama kari Anutuna kai saqarikaqa.

Inneeqa aiqama ummaarara mina qimamiaqa. Maasa mifinnai oonuree kai asumu  
marianaaura.

<sup>9</sup> Aiqaama faiqi faiqi fifau naidoora foora maridaqa.

Nuqu faqaasa faqa ooreeqaraura faqa moodaakariraura fifau ainainara foora maridaqa.

Anee misa uqaki rumaseenana sikeerasaa dirisee qafa, siara foorammiga maridaqa.

Naidoo ummaara fannoo misa ummaara uraaqaranoo maridanoo.

<sup>10</sup> Innee sia rakirana faqa moona ainaina ummuara mararana faqa saqarikaqa.

Inni ainaina moomoo kinaqa sia irirana minasaa rusiaqa.

<sup>11</sup> Moomoo kari Anutufa maaqi qifaqa iriqa.

Qinee Anutusa firaa afeeka faqaasa maridaqee qinoo.

<sup>12</sup> Kafaa moo ainaina anee Yaaweefa maasara amuqusi marianafa mariananoo.

Oo Yaawee anee kuqaa aiqamausa ainainirana

akiqara feefauru amana kai rainasee nimimarianafa mariananoo.

## 63

*Anutufa dadaaqianifeera indee indee idaqa.*

<sup>1</sup> Oo Anutu, anee qini Anutufa mariananoo.

Qinee doori kandamasee aniara randaidda innaaru qidaqa.

Qinee aadana maqa maaqai marunanoo nammariara didiara foora aniara dididanoo.

Miçikaimmasee qini maa qifaqaqa faqa aniara nammariara foora aididanoo.

<sup>2</sup> Ani naaquqara uqaana maqaki ani qafaanaura, ani afeeka faqa ani qareenarana faqa  
qafaanaura.

<sup>3</sup> Oo Anutu ani amuqusirafa maa maqee marunna

marirana uriaaqaranoo marinara qinee ani auqu uqeraanaura.

<sup>4</sup> Qinee maaqoo kaqi marianna kamu aniara dufi dufi qianaura.

Qinee qeeqa qisauku uqeeraseeqa ani innaaru qima amaqaanaura.

<sup>5</sup> Qeeqa qimuqusannai amiqira naranara foora

namasaananoo qini qimuqaq inaq qinee asasira idinnai ani amooqianaura.

<sup>6</sup> Anee ooqaindari qini dadaaqi marianafa

mariannanara qinee qeeqa faiqara qaarisa maridaqa aniara iridaqa.

Eendamuqusai faiqarara andee qumooridaqa aniara kai iridaqa.

<sup>7</sup> Qinee ani aqoosa ameemaanai maridaqa aniara asasira idi raanaura.

<sup>8</sup> Qinee anisaa atooqaidaqa.

Ani asauku uqannai asauku fannoo qini asumu maraidanoo.

<sup>9</sup> Qini kuqa darirara imariasa aiqama kuqufi kuqiraura maria maqa maaqaki fifaranoo.

Misa maqa ameemaanai kuqiraura faqa marifaranoo.

<sup>10</sup> Misa duru feefa ooki keeqaifanoo kaasau aanda misa nipata neefaranoo.

<sup>11</sup> Qinee Isaraee maqannaasa karaambaiga rakiranaki uriqararana qimimarinara. Anu-  
tunara asianaura.

Aiqama Anutuna auqusaa kuqaa qima afeekaiki mariasa mina amooqifaranoo.

Unna ufa qimariasa noo Anutufa ititannimaqasainaqa sia ufa qifaranoo.

## 64

*Isaraee maqannaasa Anutufa dadaaqianifeera innaaru quu ufafa.*

<sup>1</sup> Oo Anutu, qinee ummaarakai maridaqa, qini innaaru qirana iria.

Qini namuqaa darinarana rufiaidaqa, anee qini marirana dadaaqa.

<sup>2</sup> Manda oosana maree mariasa tipundaari

marisakinaana qini mareeqee kukeeqaqisaa.

Aaqee mariasa faaqa fuisee qida qini darirari marianasaa faqa ititaqisaa.

<sup>3</sup> Mi fasiqausa nari nifauru nimaakiri faaqaanara foora aaruqu maqaafanoo maridanoo.

Misa ufa fannoo feefa dindasaa quqasee rakisiandee qini rakisi qimaqaidaqa.

<sup>4</sup> Miqi maria manda fasiqausa qumee ooqa andeeqara fasiqa naridaqa.

Misa rufiarana siaisa kaqi tautumaki naridaqa.

<sup>5</sup> Misa nariqa suqufifaqa manda oosanara nari pooduqee nari pooduqee idaqa.

Misa kukeeqara ufaana fufira oosanara amiqimmasee

iriqaraasammasee maaqi qidaqa, sia moo fannoo maasa ufaana qafaannoo fee qidaqa.

<sup>6</sup> Misa manda ainaina auqarara tipundaaridaqa.

Misa nariqa tipundaariranara andeedqanoo maridanoo fee qidaqa.

Faiqi faiqi kukeeqara irirafa farumara foora meemai uqnaurinoo maridanoo.

<sup>7</sup> Anutufa mi manda faiqausa nari feefannai naruannoo.

Dauni misa naru quqasaannoo.

<sup>8</sup> Misa manda ufa akiiqara kuridi nimaqaannoo.

Aiqamausa misa mi narirana niqafamasee boo firaa ainaina kambiqee maqi qifaranoo.

<sup>9</sup> Misa aiqamausa misa narirana qafamaseeqa rufieeqa

misa Anutuna ainainiranara iridaqa kooroommasee mina ainainiranara qimannimifaranoo.

<sup>10</sup> Andeedqarousa Yaaweefa auqoo ainainara irisee asasifaranoo.

Misa Yaaweenaki amiqimmasee marirana paqurifaranoo.

Aiqama andeedqarousa mina amooqifaranoo.

## 65

*Anutuna amooqirafa faqa dufi dufi qira innaaru maridanoo.*

<sup>1</sup> Oo Anutu, anee maasa innaaru irimariannanara

maasa Sioona maqusaki andeedqasee oonuree ani amooqidaqa ani amianauree qima afeekaika maqaafanna ainainauqa ani amianaura.

<sup>2</sup> Faiqi anaasee aiqama maqa maaqaindari nari manda oosanara iriseeqa anee Anutufa iannannai ani faranoo.

<sup>3</sup> Maasa mandainaina fannoo maasa dukunimma saifana anee Anutufa mina taikaqisaannoo.

<sup>4</sup> Anutu anee rusandeesammasee maraqaanousa ani asasiranaki maridaqa.

Anee aneenna naaquqara maaqaki mariaqera nifiqa quqasainousa asasiqa.

Maasa mi amaana maqanaki marunanoo ani amiqi

amiqirafa maasaki qumbiqanoo marifaqa maridaqa.

Ani naaquqara amaana maqaki marunanoo ani

amiqi amiqirafa minaki marifa maasaki qumbiqanoo maridanoo.

<sup>5</sup> Oo Anutu, anee maasa asumu qimi marianafa mariananoo.

Anee maasa aneenna naaquqara andeedqara ainaina

auqee mariannannai maasa qimaqimi marianafa mariananoo.

Aiqama maqannaasa nianai atinni atinni mariasa

faqa ooruku nammari dinni afainni mariasa faqa ani kai saqarikidaqa.

<sup>6</sup> Anee aqanauqa aneenna afeekannai auqu eegee nari maqee mariaqoo quqanau.

Miqunnaanannoo aneenna afeeka uqannifiqanau.

<sup>7</sup> Ani afeeka fannoo ooruku nammari kasinoo amakaurirana faqa rafaqafusaifanoo mina kasirana faqa ufaqirana faqa daimafinoo.

Faiqi anaasee tutuqirana faqa taikannimaqaannoo.

<sup>8</sup> Aiqaama maqannaasa anee auqee marianna ainainna qafaafanoo naaquqaidanoo.

Suani ururee marinnai mariasa faqa suani keeqee

marinnai mariasa faqa aiqama ainaina auqee marianna ainainna qafamasee mi aiqama

maqannaasa naaquqai faqa faaqa rumasee aniara asasidaqa.

<sup>9</sup> Oo Anutu anee maa maqa maaqana rakisidana

uqeena uqeenianifeera aaku firana teeqiananoo.

Anee miqjannannannai maa maqana ainookamma saananoo.

Anutu ani nammariuqa qumbiqanoo maridanoo.

Mi nammari faqa maaqa amiqimma saifanoo amiqira narana faiqi anaasee nimidanoo.

Anee miqimmasee auqinau.

<sup>10</sup> Oo Anutu, anee qiananoo aaku firafa rinoo maqa uqeena uqeena masaifanoo afuqaki narana kambiqaidanoo.

Anee aaku dunoannannai maqa uqeena saananoo narana kambiqaidanoo.

<sup>11</sup> Ani amiqirafa narana rairaamma qimaqee marifa maridanoo.

Anee finnatinai miqikai inoo narana rairaa iannoo.

<sup>12</sup> Andandaki aiqamatina burimakau faqa sipsipa faqa umbiaqa maridaqa.

Aaqanauqa faqa kaqikaa amuqu namuqa faqa aaku rifaqa firaqoo asasidaqa.

<sup>13</sup> Firaa afaasasaa burimakau sipsipa moomoo qumbiqaidanoo.

Noopunduki faqa sakumma ainaina moomoo kambiqeenoo aiqama noopundu titaidanoo.

Aaku rifanoo aiqama ainaina asasiidaqa idi raidaqa.

## 66

*Anutuna amooqira idi faqa dufi dufi qira idi faqa maridanoo.*

<sup>1</sup> Aiqama maqa maaqaki mariasa asasiidaqa firaqoo Anutunara faaqarumasee amooqi-aqa.

<sup>2</sup> Idi raidaqa mina auqu qareenaranara kooroo iaqa.

Qareenara amooqirana mina amiaqa.

<sup>3</sup> Innee Anutuna maaqi qimasee qimamiaqa.

Anee auqu quqoonna ainainafa kaaqa naaquqarafa maridanoo.

Ani namuqaauqa ani uriqarara afeeka qafamasee

aniana firaqoo ruffeeqa ani oorinni niqoori saunu araidaqa.

<sup>4</sup> Aiqama maa maqa maqanasa qaraasa ani amooqidaqa.

Misa ani amooqira idi raidaqa ani auqu uqeeraidaqa.

<sup>5</sup> Innee aiqamausa aniree Anutufa auqeeu ainaina qafaaqa.

Mifa naaquqara ainaina faiqi anaasee qambaana auqanau.

<sup>6</sup> Mifa ooruku nammariara qufanoo aadanusufufaqa

maasa qikeeku qikaaku maqamau aandanasa funara Anutunara asasiqau.

<sup>7</sup> Anutufa naaru naaru nari afeekannai aiqama maqannaasa rakisinnimaqaidanoo.

Mina afu fannoo aiqama maqannaasa auqee maria ainainna niuqidanoo.

Ufa rukiee mariasa sia Anutuna aana itita amaqaqa.

<sup>8</sup> Innee aiqama maqannaasa maasa Anutuna amooqiaqa.

Innee mina amooqirana firaqoo uqeerifaqa nianaindari faiqi anaasee iriaqa.

<sup>9</sup> Mifa maasa marirana afeedammaqisaiifaqa kaqi maridaqa.

Mifa maasa mandainainaki aqufuanoora itita qimaqaiifaqa sia aqufidaqa.

<sup>10</sup> Oo Anutu, anee maasa qimanammasee qafaananoo.

Siruaa tasirisiri masee apaapu maraquandee iananoo.

<sup>11</sup> Oo Anutu, anee maasa mareeqee ufaanaki aruqisasee

firaq ummaara tia maasa qitaufakaaqa daaku qimaqaananoo.

<sup>12</sup> Anee namuqaara qianaqa misa nikunnai maasa qikiqa radamia.

Maasa ida qambainaira foora faqa nammari aafi marinakiara foora faqa oosana oosana ummaaraki

fimariafanana anee maasa mareeqee amiqiraqoo quqaqisanau.

<sup>13-14</sup> Qinee ummaaraki maridaqa ani Anutuna oosana

oosana qima afeekaikira ufa qimamiqiafana.

Doo maqee mi qima afeekaikira ufana qimamiamannandee ianaura.

Doo maqee qinee qima afeekaikiafanna ufanara qianaura.

Qinee aandaq tatufirana mara maree ani amaana maqaki minisee suqa amianaura.

<sup>15</sup> Qinee sipsipa tatufirana suqamianaura.

Qinee burimmakau akoona faqa mimmi faqa tatufirana suqa amianaura.

Miqiananoo muna fannoo innaarunai ani aikiambu iannoo.

<sup>16</sup> Innee Anutunara qeerairi mariasa mai aniraifaqa qini dadaaqinara qimannimia.

<sup>17</sup> Qeeqa dooqi qari dadaaqianifeera aareeqa, idinnai mina amooqiaqa.

<sup>18</sup> Qinee mandainainara fifau ainainee qimasee kaqi

auqaunanoo Anutufa sia qini innaaru qirana iriqini.

<sup>19</sup> Kuqaa Anutufa qini ufa irinoo, qini innaaru qirana faqa irinoo.

<sup>20</sup> Anutufa sia qini innaaru qirana minniseenoo.

Sia nari aiqama kari amuqusiranara qao qinoo.

Minara mina auqu uqeerasee mina amooqiaqa.

## 67

*Anutuna dufi dufi qimamaqara idi.*

<sup>1</sup> Anutu anee maasara qimudaoo qimasee amiqi amiqimmaqisaa.

Aneenna oori afiri kaaqa qarana maasiannai ubeekamasee dadaaqia.

<sup>2</sup> Miqinaqa ani oosana aiqama maqa maaqakinaasa iriaqa.

Aiqama maqannaasa ani asumu mariranara faqa iriaqa.

<sup>3</sup> Oo Anutu aiqama faiqi anaasee ani amooqiaqa.

Aiqama faiqi anaasee ani amooqiaqa.

- <sup>4</sup> Oo Anutu, anee faiqi anaasee aiqama amana amana kai andeeqasee rakisi mariannana faqa amiqimmasee naamua qimasee nifiqee fimariannanara faqa aiqama maqannaasa اساسمasee idi raidaqa.
- <sup>5</sup> Oo Anutu faiqi anaasee ani amooqiaqa.  
Aiqama faiqi anaasee ani auqu uqeeraaqa.
- <sup>6</sup> Miqifanoo maqakiqari aiqama narana kambiqaano.  
Kambiqainanoo Anutufa maasa Anutufa amiqi amiqimma qimaqaannoo.
- <sup>7</sup> Anutufa maasa amiqi amiqimma qimaqaanau.  
Aiqama maa maqanasaaqaraa fasiqa anaasee minara uriqarara fee qimasee qeerairiaqa.

## 68

### *Isaraee maqannaasa Anutufa misa dadaaqunara asasiqau.*

- <sup>1</sup> Anutufa findifinoo nari namuqaauqa mara furufaramma saifaqa daraania.  
Anutunara fidiqaa imariasa mina oorisaaqari nisaurusee quqasee sandaqa.
- <sup>2</sup> Aneenna namuqaauqa ufai idamuna fuaqa aqindeemma saina fifuaqa.  
Mandainaina maree mariasa ainoo ainaina idaki  
quqasaafanoora foora iqa Anutu ani afusaaqari tasirisirimma taikafuaqa.
- <sup>3</sup> Andeeqee mariasa asasiqaa ani Anutuna afusaa nasuriaqa.  
Misa faaqa rumasee asasiqaa.
- <sup>4</sup> Innee Anutunara idi raida mina auqu amooqirana amiaqa.  
Oonnamusaa oqumarifi nimari Anutuna aana andeeqaa.  
Mina auqu Yaaweefa maridanoo. Mina afusaa asasiqaa.
- <sup>5</sup> Anutufa nari naaquqara amaana maqaki marifa  
faiqi faiqi rakisi nimaqaidanoo, adeedaana aanaaseeuqa faqa ummaaraki itita  
nimaqaidanoo.
- <sup>6</sup> Anutufa nariaraa mariasa mareeqee moo fasiqa anaasee nari faiqi kiaqee nimidanoo.  
Mifa rumberanaki mariasa idukusee niffeegee amiqiranaki quqannisaidanoo.  
Anutuna ufa rukiee mariasa sia miqidaqa, misa manda maqa maaqaki marifaranoo.
- <sup>7</sup> Oo Anutu, anee ooqai Isaraee maqannaasa aadana maqa maaqaki nifiqee finau.
- <sup>8</sup> Sinai aqaanasaa marunna Anutufa, Isaraee maqannaasa  
Anutufa, anee ooqai Isaraee maqannaasa nifiqee funanoo maqa kasinoo aaku  
nammariara foora adianau.
- <sup>9</sup> Oo Anutu anee qunanoo aaku firaafa rufanoo ani maqa Isaraee maqa maaqa mandaikino  
marufa amiqinau.
- <sup>10</sup> Ani maqannaasa mi maqa maaqanaki oonu marufaqa akaqausa kudi marufana Anutu  
anee afaaridana misa narana nimanau.
- <sup>11</sup> Yaaweefa faiqi anaasee naamua qufaqa aanaaseeuqa  
mi ufana mara maree aiqama maaqi qimasee qimannimiqa.
- <sup>12</sup> Kannaa maqannaasa karaambaiquqa faqa sundiaquqa faqa anirandee sandama qaraasi-  
dammiaafoo qiqa.
- Miqi qufaqa Isaraee maqannaasa aanaaseeuqa oonu misa rakiranaki maraqoo ainainausa  
marasee rainaqa.
- <sup>13</sup> Mi anaaseesa siruaannnai faqa koorannai faqa nifaaqa auqusoofanoo amiqira ufiniara  
foora inoo marinau.
- Misa nifaaqa fannoo siruaara foora daroo daraa ufanoo misa niqoosara foora kooora  
fannoo kaaqa gee marinau.
- Miqi marufaqa akaqausa nanaree kaqi nariqa sipsipasaa rakisi mariqau.
- <sup>14</sup> Mi rakiranaki aiqama afeeka faqa Anutufa karaambaiquqa Saramoonaa aqaanasaa  
naru nindaqaqa ufaqa fifainufanoo fira oonamuara misaqa aiqamai itita  
aqufinau.
- <sup>15</sup> Basana aqana kaaqa uriqarara aqana maridanoo.  
Miqoo moomoo kaqikaa aqaanaqa mina aqa maridanoo.
- <sup>16</sup> Innee Basana aqaanasaa maria aqaanausa nanaree innee Sioona Anutufa mari  
aaqannara fifau ainainee qidee.  
Yaaweefa nari kai mi aqaannana utaaqamaseenoo naaruara mi aqaannasaa mariannoo.
- <sup>17</sup> Anutufa nari sundiaquqa moomoo tauseenna afeeka rakira karauqasaa ooqufaqee  
marusa faqa Sinai aqaanaindari qumuree Sioona aqaanasaa nari uqaana maaqaki  
keeqanau.
- <sup>18</sup> Anutufa Sioona aqaanasaa ooru fidanoo rumberausa aana muqunufaqa ooru fiqau.  
Mifa miqoo ooru marufaqa faiqi anaasee akaqa ainaina Yaaweena mini amiqau.  
Yaaweena ufa ooqai rukieeusa misa faqa akaqa ainaina amiqau. Mifa miqoo mariannoo.

<sup>19</sup> Yaaweena amooqimamaqaa.

Maasa Anutufa maasa asumu maree marifa marina amooqiaqa.

Mifa aiqama kari maasa ummaara dadaaqa marifa marinara mina amooqiaqa.

<sup>20</sup> Maasa Anutufa asumu marirana qimimari Anutufa maridanoo.

Yaaweefa maasa kuqiranakinaana asumu maree mari Karaambaigafa maridanoo.

<sup>21</sup> Anutufa nari namuqaauqa nikiiaqa kuqaa uqanna radandamumma saannoo.

Nari aagara oosanaki afeekaikammadee fimariasa faqa radandamumma saannoo.

<sup>22</sup> Yaaweefa maaqi qinau, inni namuqaa Basana maqa maaqaki mariana nifiqee anianaura.

Ooruku nammari farumakiara foora mariana oonu nifiqee anianaura.

<sup>23</sup> Innee inneeqa namuqaa narusaifaqa inni maqannaasa misa fidikaki niku reefaranoo.

Fainiuga nari nidiranasaa misa fidika neefaranoo.

<sup>24</sup> Oo Anutu qini karaambaigaa.

Anee moomoo fasiqa anaasee aana muqunimma maree aneenna amaana maqaki keeqararee qimarianaqa doo aiqamausa misa nindafaidaqa.

<sup>25</sup> Idi ree mariasa indaaru fimarifaqa piripunna ari mariasa inaaqianna fuafaqa qambaana temberinna ari maria manaqausa fidaqa.

<sup>26</sup> Innee Isaraee maqannaqa fasiqa anaasee suqiga marianakiqari Anutuna amooqiaqa.

Innee Yakooboona saaqari kambiqaarusa innee Anutuna amooqiaqa.

<sup>27</sup> Isaraee maqannaasa Beensamina akeeku akaaku qoodaa marusa indaaru fimarufaqa Yudana akeeku akaaku marusakiqari uriqararusa moomoosa faqa Seeburuna akeeku akaaku kiqari faiqi uriqararusa faqa Napatarina akeeku akaaku kiqari faiqi uriqararusa faqa misa ninaaqianna amaana maqai suqirannai ooru fiqau.

<sup>28</sup> Oo Anutu anee aneenna afeeka maasa uqaqifiqaa.

Oo Anutu, anee ooqai aneenna afeeka uqannifiqoonnadee kai inana maqee faqa uqannindiqaa.

<sup>29</sup> Anee aneenna uriqarara amaana maqaki Yeerusaree maqusai mariannanara, moomoo maqanaa karaambaigauqa kaqi nimimaria ainainnaa maree mini ani amifaranoo.

<sup>30</sup> Firaqa doona aqmauraqmauri marinaki mari kaasau aandaufa Isipa maqannaqa karaambaigaa Faraofa maasa darirarinana Anutu anee minara aanoo qimasee qaoo qia.

Faraaona dadaaqimaria uriqarara fasiqausa aanoo qimaria burimmakau akoonasara foora kaiqeese qambaana oonuree narirara ifana anee misara faqa aanoo qimasee qaoo qia.

Anee misa mara muqufisainaaqaa misa siruaa mara maree mini ani amiaqa.

Aiqama rakiranara rimaria maqannaasa anee misa naru nindaqaaqa masainaaqaa daraaniaqa.

<sup>31</sup> Isipa maqanaa uriqararusa Anutufinnai ubeekarara anifaranoo,

Eetopia maqannaasa nisauku uqeerasee Anutunara innaaru qifaranoo

<sup>32</sup> Oo innee maa maqanasaa mariasa innee Anutuna idi ramamaqaaqa.

Yaaweena amooqira idi raaqa.

<sup>33</sup> Anutufa ooqaindari mari innaarunasaa nimari Anutunara amooqira idi ramaqaaqa.

Mi Anutuna ufa firaafa innaarunai qiara foora qimarifa maridanoo.

<sup>34</sup> Innee Anutuna afeekara koorooiaqa.

Mina amigira uriqararafa Isaraee maqannaasa rafaqaqafu nimaqaidanoo.

Mina afeeka innaarunai maridanoo.

<sup>35</sup> Isaraee maqannaasa Anutufa nari amaana maaqaki marifa kaaqa naaquarafa marinara rufiaaqa.

Mifa uriqarara afeeka faqa eeraarirana faqa nari faiqi anaasee nimidanoo. Anutuna amooqiaqa.

## 69

*Isaraee maqannaasa Anutufa dadaaqianifeera innaaru qiqau.*

<sup>1</sup> Oo Anutu anee uqeeraqisaa.

Nammariara foora qini ummaara fannoo rafaqaqafino qinukaki ururaifaqa kaqi kaaqoo kuqanaura.

<sup>2</sup> Qinee firaqa doona poopoo qimarinakiara foora qiku utusaqa maridaqa sia afeeka maqasaa qiku raidaqa.

Qinee nammari difukunaki aniraunanoo nammari aufrafa qini dukuniqaaqaa idanoo.

<sup>3</sup> Qinee Anutufa dadaaqianifeera aaraida afeesida marunanoo qini daunda aadana usufifanoo qini ufa akieenoo.

Aniara rakisida marida qifuanda rakee iqa.

<sup>4</sup> Qiniara fidiqaa imariasa qini qikiqqa asaui faqa arusee fiqaramasee maridaqa.

Qini kuqa darirari mariasa fifau qini oosana siainaki namuqaakamma qimaqaidaqa.

Misa qiniara moo ainaina fifau unnagimasee ummuariaano qimasee mina akiiqara nimianne qimasee sandanainai qiafaqa rufiaseeqa fifau qeeqa ainaina nimiqa.

<sup>5</sup> Oo Anutu qini furufarira oosanara anee irimmarianano,

qini aaqarafa sia ani afusaa kukeeqanoo maridanoo, akooqoo maridanoo.

<sup>6</sup> Oo Yaawee, anee qini dadaaqinaqa sia moo aaqaranaki aqufuaanaqa ani ufamau fimariasa nisauruaqa.

Oo uriqarara Yaawee aiqama afeeka faqaafa anee qini dadaaqinaqa aniara innaaru qimariasara sia manda ufa qimannimaqaqa.

Oo Isaraee maqanaasa Anutufa miqimma qimaqaa.

<sup>7</sup> Oo Anutu, ani auqu raunnanara aasaandaana ufa qimi mariafaqa qini qisaurirafa qini rafaqafuqaiqa maridaqa.

<sup>8</sup> Qinee ani auqu raunnanara qeeqa qikaqaafasaa nifusaa aanaamuruara foora maridaqa.

Qeeqa qinoona faiqi namu nifusaa moo aanaamuruara foora maridaqa.

<sup>9</sup> Qinee ani Anutuna amaana maqara didirafa firaqoo idara foora qaidanoo.

Ani Anutuna aquraree maria aqurararafa qinisaa faqa aqufnoo marifaqa maridaqa.

<sup>10</sup> Qinee qeeqa mara maree muqusee narana auramasee marunaqa faiqi anaasee qini qiqafamasee aasaandaana ufa qimaqimaqaidaqa.

<sup>11</sup> Qinee manda qammunna soofaara qammunnara foora afisuqaunaqa faiqi anaasee qiqafamaseeqa qiniara ataasa ataasa qimasee naanaidara qima qimaqaidaqa.

<sup>12</sup> Aatata oonuree aniree idaqa qini qiqafee mandufa qidaqa.

Afeeka nammari namasee furufari mariasa faqa qiqafeeqa manda idi qiniara raidaqa.

<sup>13</sup> Qinee sia misa ufa irianaura aniara kai innaaru qianaura.

Oo Yaawee, aneenna qinna kari qini innaaru akiqara kafaqa qimaqimia.

Anee qima afeekaikammasee qini asumu maraanauree qunnanara irisee miqia.

Anee sia unna qimarianafa marianano.

<sup>14</sup> Doona poopoo qimarinakiara foora utusaqa maridaqa Oo Anutufa anee qini qumaree tatu qisainaqa sia minaki ooqu keeqafi minaki kuqua.

Qini namuqaa nisaukukinaana maraqqisaa.

Faruma firaanaki uqnauriranakiara foora aqufiqa marunnana umbaqi afainni quqaqisaa.

<sup>15</sup> Oo Anutu anee qinanooo sia nammari qini dukuniani.

Faruma uqnauriranaki sia qinee aqufiqa ukuqnaanaura.

Sia qinee madikakiara foora aqufuaana maqa fannoo mafi titaqisaani.

<sup>16</sup> Oo Yaawee, anee aneenna amiqiranakiqari qini innaaru iria.

Anee aneena firaq nifauaranakiqari qinee unannai oori ubeekaa.

<sup>17</sup> Oo Anutu, qinee ani ainainira faiqi marunnanara sia anee oori rafusu kaqinni aqua.

Qinee firaq ummaarak marunnanara dauni dauni qini irara ufa anoona qima qimia.

<sup>18</sup> Oo Anutu, anee qini daaqa aniree qini namuqaa nisaukukinaana mara asumu quqaqisaa.

Qini namuqaauqa darirarifana qini mareeqee kaqinni qisaa.

<sup>19</sup> Oo Anutu, qini namuqaauqa anee niqafee mariana qiniara aasaandaana qirana faqa mandaikamma qimaqarana faqa qisaurirana faqa qimi mariafana anee iri marianano.

<sup>20</sup> Qini aasaandaana ufa qimiafa qini qimuqusa raquruqiminoo marifaqa qini qifaqaki aiqama ummooqukinoo marifanoo qini qifaqa dadaaqirafa sia maridanoo.

Qinee nimuqusiranara randauna sia moo fannoo qiniara amuqusirafa maridanoo. Qinee qimudao qira ufa qima qimaqarausara randauna sia uqanna maridaqa.

<sup>21</sup> Qini daararaifaqa misa qini naranaki qumee adudu fooqaana minaki quqasee qimi-afaqa nauna suka darifaqa minniseeqa.

Qini nammariara didifaqa misa sukaqee mari nammarina qimiafaqa namasee qafeeqa minniseeqa.

<sup>22</sup> Mi manda oosanna qimimariasa nariqa narana difaani fannoo nari quandaki kuridi nimaqaani.

Misa nariqa mi firaq naaquqara oomaqafa nikuqamasaina aqufuaqa.

<sup>23</sup> Misa nifu asukunaarusaina mikiqmakiqa nuaqa.

Misa nitaufaka faqa rambaqasaina naaruara miqiqqa mariaqa.

<sup>24</sup> Oo Anutu, aneenna aranaqarana nammariara foora misasaa adiasaa.

Ani aanooqirafa idara foora misa qama taikaani.

<sup>25</sup> Misa maqa maaqa naakundu kai saaeemasaa.

Sia moodaafa faqa nariqa uigaaana maaqaki mariaqa, naakundu kai mariani.

<sup>26</sup> Anee Yaawee ani ufa rukiee mariana akiiqara anee maasa kaakadi darusaanausa namuqaa anireeqa aaqaidaqa misa kaaqmukaidaqa.

Kaaqmukamaseeqa misa nari maqusai oonureeqa anee Yaawee maasa daruannanara aupuraunaqa atasataasa qidaqa.

<sup>27</sup> Oo Yaawee anee misa aagarana akiiqara sia qaunua amiqimmasee iria.

Misa ani Anutuna asumu marirana sia uqanna kaqikaana faqa maraaqa.

<sup>28</sup> Oo Yaawee ani naaru marira papiqaki misa nuqu marina rukaa.

Aaqee mariasa nuqu sia andeeqee mariasa nuqu namu faqa moodaanaki akara rua.

<sup>29</sup> Qinee Dafidisa firaa didafirana faqa ummaara faqa maraidaqa.

Oo Anutu, anee qini uqeerasee asumu marirana qimia.

<sup>30</sup> Qinee dufi dufi qira idinnai mina auqu qareenaranara koorooianara.

<sup>31</sup> Mina mi dufi dufi qirafa burimakau sipsipannoo tatufirana suqami mariana uriaaqaranoo maridanoo.

Muduka burimakau faqa sipsipa faqa aiku namufaqa

aanai namu faqa tatufirana suqarana faqa uriaaqaranoo maridanoo.

<sup>32</sup> Kudi fasiqauqa mina qafamasee asasammifaranoo. Innee Anutunara randeemariasa inni irirana afeekaikamma nimaqaannoo.

<sup>33</sup> Yaawee kudi fasiqauqa innaaru qiana iridanoo.

Isaraee maqannaasa namuqaa rumberanaki mariafanoo Yaawee misara sia qaunidanoo misara faqa iridanoo.

<sup>34</sup> Innaarunai mariasa faqa maqasaa mariasa faqa ooruku nammariki nimaria ainainausa faqa Yaaweena amooqiaqa.

<sup>35</sup> Anutufa Sioona maqusa moo auqu Yeerusaree maqusaki mariasa misa namuqaasaa ititannimaqaannoo.

Yuda maqa maaqakinaa maqusauqa rapeepaa inoo marinauqa kaifaa itipiannoo.

Itipammāsainaqa faiqi anaasee miqoo kaifaa maridaqa aiqama maqa mareefaranoo.

<sup>36</sup> Isaraee maqannaasa Anutuna ainainira faiqiuqa,

misa faiqi namu kambiqaqinaqa mi maqusausa marasaifanoo maasaindi kamminoo marinaqa minaki marifaranoo.

Mina auquara rimariasa faqa minaki marifaranoo.

## 70

*Dadaaqiani fee innaaru.*

<sup>1</sup> Oo Anutu, anee qini mandainainakinaana mara aqūqisaa.

Oo Yaawee, kai kaqi aniree qini dadaaqia.

<sup>2</sup> Qini marirana taika qimaqarara randeemariasa rafaqaqafu saina nisauriranaki faqa furufariranaki faqa mariaqa.

Qini ummaarara irisee asamariasa mara quandasainaqa nisauruqa

<sup>3</sup> Qiniara uteeti qimariasa nariqa nisaurirana firaafa marina qafaifanoo firaqoo naaqaqaani.

<sup>4</sup> Oo Yaawee anee iannannai ani mariasa asaidaqa nasuriaqa.

Ani asumu mariranara nidimarisa, maaqi qiaqa.

Yaawee uriqararafa maridanoo fee qiaqa.

<sup>5</sup> Qinee Dafidisa qimudaani radukirausa marunausa sarau marunna fasiqausa marunnanara oo Yaawee anee sia qiniara qaunuananoo.

Anee qini asumu maree marianafa faqa qini Anutufa faqa mariannanara kai kaqi aniree qini dadaaqia.

## 71

*Faiqi firaana innaaru.*

<sup>1</sup> Oo Yaawee, anee itita qimaqaanneera anee iannannai anidaqa.

<sup>2</sup> Anee andeeqarafa mariannanara qini dadaaqinana mareeqee kaqinni quqaqisaa.

Aneenna aaqoo qinee iannannai rammatinimmandee irisee qini asumu maraa.

<sup>3</sup> Oo Anutu, anee qini ooni faandaamurara foora faqa auqaanara foora faqa auquqisaina qinee minaki keeqafi asumu maria.

Anee qini ititee marianna oonifa faqa qini afeeka kukeeqara maqusa faqa mariananoo.

Anee qinaqa qinee amiqimmasee mariana.

<sup>4</sup> Oo qini Anutu, manda oosana maree mariasa nisauku kinaana faqa eendaandi mariasa nisauku kinaana faqa fitiqnarana qimimariasa nisauku kinaana faqa maraqaqisaa.



- 5 Oo uriqarara Yaaweefa, qinee aniara kai aambeembeesida marunausa maridaqa.  
Kumaaraasaa qari ani kai saqarikii aafanausa maridaqa.
- 6 Qini maqoonakiqari qinee anisaa mundaqa mariafanausa maridaqa.  
Qini qinoofa maqaqisooqooqari anee kai qinisaa rakisina aniifana maqee aniraananoo,  
minara qinee maqee maqee ani amooqianausa.
- 7 Moomoosa qini faqa qiniki kambiqoo ainainna faqa qafamasee iriqau.  
Minara anee kai qini afeeka kukeeqara maqusara foora mariananoo.
- 8 Aiqama faasaambaasaana qinee ani amooqidaqa ani qareenaranara koorooidaqa.
- 9 Oo Anutu, qinee asooqa qaanana sia qini maraqqisaa.  
Qini afeeka taikainana sia qini minniqisaa.
- 10 Qini namuqaauqa qini darirarammidaqa.  
Qini dariraree qimasee ufa suqidaqa tipundaaridaqa.
- 11 Misa qinlira maaqi qidaqa.  
Anutufa mina minnisaifanoo sia moo fannoo mina dadaaqirafa maridanoo, anifaqa mina  
afaqaseeqa qumaraanee qidaqa.
- 12 Oo Anutu, sia nianasaa maria.  
Oo qini Anutu dauni aniree qini dadaaqia.
- 13 Qini darirari mariasa anee Yaaweefa misa rafaqaqafu nimaqasee kuridi taikannisaa.  
Qini aupurarana qimirari mariasa nisauriranaki faqa aupuraranaki faqa mariaqa.
- 14 Qini irirafa naaru naaru aniara kai aambeembeesida mariannoo.  
Qinee kaifaa kaifaa ani amooqima amaqaanaura.
- 15 Qini doo fannoo ani Anutuna andeeqarana faqa asumu mariranara faqa faasaam-  
baasaana kooroo ianaura.  
Qinee mi andeeqarafa faqa asumu marirafa faqa fiqaranoo marifaqa ati kai iridaqa mina  
oosana faqa ammuquara faqa sia iridaqa.
- 16 Oo uriqarara Yaaweefa qinee anee amudaana qimasee auqunna ainainausara kooroo  
ianaura.  
Qinee ani andeeqaranara kooroo ianaura. Anindiara kai kooroo ianaura
- 17 Oo Anutu, anee qini kumaaraasaaqari oosana arasee aneenna oosana uqaqifiqana ani  
mariananoo.  
Qinee miqooqari anee firaa ainaina auqoonnara faiqi anaasee kaqi kai qimannimiqa  
fidaqa.
- 18 Oo Anutu maqee qinee nauraiqi aandau aanaaqi maridaqa sia qini minniqisaa.  
Anee qini faqa marinaqa qinee naaru kambiqainausa faqa qimanimia.
- 19 Oo Anutu, ani andeeqarafa maqasaaqari innaaruna auqanoo maridanoo.  
Anee firaa ainaina auqunafa mariananoo.  
Oo Anutu yafee ani fooqaafa maridanoo fee.
- 20 Oo Yaawee, anee oosana oosana ummaara faqa aupurarana faqa qimimariananoo.  
Kasooqaqee anee kaifaa qini marirana ooqai mariundeemma qiseennaranoo.  
Anee qini kuqa dariranasaa itita qimaqeennaranoo.
- 21 Anee qini firaqqoo uqera murufi qiseennaranoo.  
Anee kaifaa qini amiqi amiqimma qima qeennaranoo.
- 22 Oo qini Anutu, ani mapukusee marira oosana piripunna aridaqa ani amooqianausa.  
Oo Isaraee maqannaasa naaqqara Anutufa, qinee piripunna aridaqa ani amooqira idi  
raanaura.
- 23 Qinee piripunna arida ani amooqira idi ridaqa firaqqoo asianausa.  
Anee qini mandainainakinaana kaqinni mara quqaqisaannanara asidaqa.
- 24 Qinee faasaambaasana ani andeeqaranara qimannimianausa.  
Qini didafirana qimirari mariasa anee rafaqaqafu nimaqasee mandaikamma nimaqaan-  
nanara irisee ani andeeqaranara qimannimianausa.

## 72

*Maqasaa karaambaifaq fannoo dadaaqianifeera innaaru qinuu.*

- 1 Oo Anutu anee Isaraee maqanna karaambaifaq aneenna amiqimmasee ufa irira oosana  
amia, aneenna andeeqara oosana faqa mina amia.
- 2 Mifa andeeqaranannai ani Anutuna faiqi anaasee ufa andeeqannisaani.  
Nari maqanna nuqu siai fasiqa anaaseesa faqa amana amana kai andeeqasee ufa raina  
nimaqaani.
- 3 Miqi marinaqa misa maqa maaqa ainoo kinoo aiqama ainaina rairaiiani.  
Mi maqanasaa mariasa andeeqara oosana mareefaranoo.
- 4 Mi karaambaifaqa kudi fasiqa anaasee amana amana kai raina nimaqaani.

Ainaina siaisa faqa ummaaraki marianasaa ititannimaqaani.

Mifa nariara uriqararausee qimasee akaqausa rafaqafi mariasa radamusaani.

<sup>5</sup> Ani faiqi anaasee suani afu kaqi qeemarinaqa ani amooqiaqa.

Quqoona faqa kaqi qeemarinaqa ani amooqiaqa.

<sup>6</sup> Mi karaambaiqafa aakuara foora fuka afuqaki rifanoo aiqama andanda afu amifanoo raambandaarara foora iani.

Mifa aakuara foora rinoo maqa uqeenuqeeniani.

<sup>7</sup> Mi karaambaiqafa marianinna aukuaana faiqi anaasee andeeqara oosana kai maraqa.

Quqoona kaqi qeemarinanoo reemindeemirirafa kai mariannoo.

<sup>8</sup> Mina rakisinnimaqarafa dinni ooruku nammarinni oosanarasee dinni ooruku nammarinni amanasaa rakisinnimaqaani.

Dinni ati fannoo Eeufarateesa nammarindari maqa maaqa atinni amanasaa rakisinnimaqaani.

<sup>9</sup> Aadana maqa maaqaki mariasa karaambaiqa aninaqa mina oorinni kummarama fifaranoo.

Mina namuqaa faqa mina qafamasee maqasaa aqufifaranoo.

<sup>10</sup> Sipeena maqanna karaambaiqauqa faqa kaqikaa afuma kiaqa maria karaambaiqausa faqa amiqira ainaina mara maree Isaraee maqannaasa karaambaiqa mini amifaranoo.

Seebaa faqa Sibaa maqanna karaambaiqauqa faqa amifaranoo.

<sup>11</sup> Aiqama maqanna karaambaiqauqa maasa uriqarara fee qimasee mina oorinni niqoori saunu areefaranoo.

Aiqama maqannaasa mina ainainira faiqikamma fifaranoo.

<sup>12</sup> Mifa kudi fasiqauqa nammeera qiafanoo iriseenoo dadaaqidanoo.

Kudiki mariasa faqa dadaaqirana siaisa faqa misauqa aiqama dadaaqiannoo.

<sup>13</sup> Mifa kudiuqa faqa ainainirana sia amanaiki marifaqa ummooquki mariasara faqa qimudaoo qimasee dadaaqi marifa mariannoo, sarau imariasa nimana faqa kuqiranakinaana maree marifa mariannoo.

<sup>14</sup> Mi karaambaiqafa mi kudi fasiqausa faqa ummooquki maria fasiqausa faqa kuqa narirari maria fasiqausa nisaukukinaana mara kaqinni quqannisaannoo.

Mifa misara uriqarara ainainee qimasee miqidanoo.

<sup>15</sup> Mi karaambaiqafa kisaaqasaa mariani.

Seebaa maqannaasa nariqa kooro mi karaambaiqana amiaqanani.

Aiqamausa maqee maqee Anutufa mi karaambaiqana dadaaqiani feera innaaru qima-maqaaganani.

Aiqama faasaana Anutufa mina amiqimma amaqaani.

<sup>16</sup> Mi karaambaiqafa marinna kamuqoo mi maqa maaqanaki sakuma faqa uita faqa moomoo rairaa inoo mariani, kaqikaa amuaqu namuqasaa faqa narana kai itita fuani.

Mina qaqama fannoo Reebanonna maqa maaqakinaa saqari aanna reenoo moomoo qaqama ireenoo rairaaiani.

Mi maqusausa kiaqa faiqi qumbiaqa mariaqa.

Mi sakummana qaqama faqa uita qaqama faqa andandara foora sia kasoo mariani.

<sup>17</sup> Mi karaambaiqana auquara naaru naaru sia aunuaqa.

Mina uriqararafa aiqama kari suani afuara foora uridaa kai mariani.

Aiqama maqannaasa mi karambaiqana amiqa amiqimma amaqoonandee inana maasa faqa amiqi amiqimma qimaqaannee qimasaidaqa qifaranoo.

<sup>18</sup> Isaraee maqannaasa Anutufa moo auqu Yaaweefa, mina amooqimamaqaqa.

Mifa nariara maa idaaqira ainainausa auqee marifa maridanoo.

<sup>19</sup> Mina areenara auqu naaru naaru amooqiaqa.

Maa maqa maaqanakina aiqamai mina qareenarafa qumbiqanoo mariani.

Kuqaa uqanna.

<sup>20</sup> Qini Dafidisa Yeeseena amaaku marunausa doo qini innaaru qirafa taikeenoo.

### **Mina Anaqianna Papiqa (Book 3)**

## **73**

*Idi Ufa 73–89*

*Anutuna andeeqannimaqarafa.*

<sup>1</sup> Oo kuqaa Anutufa Isaraee maqannaasa amiqi amiqi marifa maridanoo.

Anukara nimuqusa faqaasa amiqi amiqimma nimaqaannoo.

2-3 Manda oosana maree mariasa aiqama ainaina amiqifaqa nári nimoo naamoo qiafaqa qinee qafaunanoo qirana qaiifaqa Yaaweena minnisaaqaa unanoo Yaaweenaki mapukiqa marunafa taikaaqaammidanoo.

4 Miqi mariasa sia nidafrana maraidaqa.

Misa nifaafa afeeka marifaqa sia dinee teeroo maraidaqa.

Amiqirausa maridaqa.

5 Misa sia akaqausa naanna raidaqa, sia ummaara oosana oosana faisa maridaqa.

6 Misa noori uqeerasee ramooramaairafa misa ninukakinaa kukukakanara foora maridanoo.

Faiqi narirana misa qamunnara foora nári nifaagai afsuaqee maridaqa.

7 Misa nimuqusa kiqari oosana oosana manda oosana kambiqaidanoo.

Misa iriranaki oosana oosana manda ainainara oonu auqee ani auqee idanoo.

8 Misa akaqausara naanaidara qidaqa mandainainara ufa qidaqa.

Misa nári nimoo naamoo qidaqa akaqausa uriqaramafi rakisi nimaqaanauree qimasee tipundaaridaqa.

9 Misa innaarunai mari Anutuna manda ufa qimamaqaidaqa.

Misa nári ufamau fuaqeeera aanoommasee maqasaa fasiqauqa qimannimidaqa.

10 Minara Anutuna faiqi anaasee misiannai quandaifiqa aqaqaidaqa misa ufara anoonee qidaqa.

11 Mi manda oosanna maree mariasa maaqi qimasee unnaqidaqa.

Anutufa maasa oosana sia iriannoo.

Uriqarara Anutufa sia manda oosana paquriannoo fee qidaqa.

12 Doo qafaa. Mi manda oosanna maree mariasa oosana miqimminoo maridanoo.

Misa maaqimmiqa maridaqa misa moomoo ainaina faqaasa maridaqa aiqama kari moo faqa moo faqa mara usidaqa.

13 Qinee misa nindafamaseeqa maaqi qimasee manda irirana qiqa.

Fifau qinee andeeqaidee qidaqa.

Qinee fifau aaqara oosana qeerairi marunaasee qidaqa.

14 Oo Anutu anee faasaambaasaana qini apurarana qimimariananoo.

Aiqama kananaana kananaana ummaara kai daridanoo.

15 Qinee mi manda aaqara ufana qidaqau ani Anutuna faiqi anaasee naanna sia raunaiqini.

16 Qinee mi oosana oosana marirana oosana irianeera oonu mafi irunanoo kadaapi daridanoo.

17 Miqiqa maridaqa ani Anutuna amaana maqaki keeqafifaqa mi manda oosanausa maree mariasa nifaagai kambiqaaninna ainainara iriqa.

18 Oo Anutu, anee mi manda oosanna maree mariasa mareeqee farindara maqasaara foora quqeenaranoo.

Anee qinaqa misa mareeqee kuridiranaki aqifaranoo.

19 Misa tautummaki mandainainaki kuridiranaki aqufidaqa.

Miqi mariasa manda kuqiranaki ooqu fidaqa.

20 Aaqee mariasa qainammasee findifinana qaunuannandee inoo misa marirafa kai kaqi taikaanoo.

Oo Yaawee aneenna mariannaqooqari findifuaqaqa misa mina qafamasee miqooqari doo sia siammafia.

21 Qinee manda oosana maree mariasa moomoo qumiasanara irunanoo qini irirafa suka qaifanoo qini qimuqusa mandaikino.

22 Qinee kaasau aandaara foora ani afusaa irirana siaisa furufarirausa maridaqa.

23 Miqiqa maridaqa ani aaqa aiqama kari marunana, anee qini qisauku uqannai qisauku qumaree qisaadaku imarianafa mariananoo.

24 Anee aneenna aamuaqira ufannai qini daamua qimaseenana qini itita qisammaree munusee kasooaqee innaarunai qifiqa quqaseenana uriqarara duqu qimisainafa ani faqa marianaara.

25 Yafee moo fannoo innaarunai qini qiqaonni maridanoo fee, sia moo fannoo maridanoo, anee kai.

Qinee ani Yaaweena maraafannaqooqari nannee moo maa maqa maaqanasaaqaraa ainainara didiannoo fee.

Aniara didirafa aiqama minauqa uriaaqaranoo maridanoo.

26 Qini irirana faqa qini qifaafa faqa ummooquki marifanoo Anutufa qini afeeka maridanoo.

Mifa qini faqa marifaqa qinee aiqama kari amanaikidaqa.

27 Ani nimeesa uqusee kaqinni fimariasa anee mandaikamma nimaqeenaranoo.

Ani ufaki sia mapukusee kisaagasaa mariasa anee misa aiqama kuridi nimaqeennaranoo.

<sup>28</sup> Qinee sia miqidaga, Anutuna aaga mariranara qinee kaaqa amiqira fee qidaga. Qinee uriqarara Yaaweenara mara qeeqa afeeka kukeeqara maqusaikammiqa. Anee auqoonna ainainara aiqama kooroommasee qimannimianura.

## 74

*Anutufa Isaraee maqannaasa manda ainainakinaana dadaaqiani fee innaaru.*

<sup>1</sup> Oo Anutu, anee nanaree maasa maaqi uqanna masee minniqisaidanee.

Anee kisaagasaafee aneenna faiqi aanaaseera aanooqinnaree.

<sup>2</sup> Oo Anutu, anee ooqai Isaraee maqannaasa rusandeesammumasee maroonasara, misara amiqi mandee oonumafi iria.

Anee maasa feefaurummasee aneenna maqannaasaika maqoona marianara oonumafi iria.

Sioona aaganasaa anee marunafa mariananoo, minara faqa oonumafi iria.

<sup>3</sup> Anee mai aniree Yeerusaree maqusa rapeepaa iranauqa qafaa.

Maasa namuqaauqa ani amaana maqa faqa rapeepaammasee.

<sup>4</sup> Namuqaauqa aniree kaasau fainiara foora faqa ridaqa aiqama ainaina auku usidaqa.

Misa ani biraka raipaqu quqasee nariqa biraka uqeera quqasee nariara uriqararusee qirana kooroo ianifeera miqiqau.

<sup>5</sup> Namuqaa ani Anutuna amaana maqaki anireeqa nandakinaa saqari ateekeera foora ani amaana maqa ateekaateekamma quqasee.

<sup>6</sup> Misa saasuna qamma firaana faqa mara mareeqa ani amaana maqaki keeqafifaqa aiqama amiqira akara mari saqarisa ateekaa teekamma aquseeqa.

<sup>7</sup> Misa ani naaquqara amaana maqa ida arasaafanoo aiqama qama taikeenoo.

Misa ani Anutuna innaaru qimamaqee mariana faqa, rapeemsaafanoo mandaika mafino.

<sup>8</sup> Mi manda fasiqausa nariqa maaqi qimasee qimiriqa qiqa.

Doo maasa misa amiqiuqanna masee radamusaanura.

Aiqama maqusa maqusa Anutuna amooqi maria amaana maqausa misa idarasoofoanoo gama taikanau.

<sup>9</sup> Maasa Yaaweenara daaqoo auqee mari ainainausa aiqama mandaikamma aqusaqau.

Tamummaqara fasiqauqa qima qimirausa faqa sia maridaqa aiqama taikafia.

Minara maasakiqari sia moo fannoo maa manda aukuanafa taikaaninnanara iridanoo.

<sup>10</sup> Oo Anutu, kisaagasaa fee namuqaa aniara naanaidara qifaree.

Naaru naaru namuqaa ani auqara manda ufa kai fee qimarifaree.

<sup>11</sup> Oo Anutu, nanaree anee maasa dadaaqirara akooqaidanoo fee.

Nanaree aneenna asauku raqandaammasee maridanee.

<sup>12</sup> Oo Anutu anee maasa ooqeenna karaambaiqa mariananoo.

Anee maa maqa maaqanaki maasa moomoo kari mandainainakinaana mareeqee amiqiraqoo quqaqisee marunafa mariananoo.

<sup>13</sup> Oo Anutu, anee aneenna afeekannai ooruku nammari qambaana rakeeunafa mariananoo.

Ooruku nammari mari firaa aandauna akiqauqa anee rukaminau.

<sup>14</sup> Anee ooruka nammarikinaa firaa aandauna mina auqu Reefiatanee qimaruna mina aiqama akiqauqa rukamuseenana aadana maqa maaqaki maru aandauna mina amaqi nimunaqa naqau.

<sup>15</sup> Anee qunanoo maqakinaa nammari faqa nammariuqa faqa quminau.

Anee aneenna afeekannai firaa nammariuqa aadanusunafa mariananoo.

<sup>16</sup> Asukuna faqa faasaana faqa auqunafa mariananoo.

Suani faqa quqoonna faqa anee kai quqoonafa mariananoo.

<sup>17</sup> Oo Anutu anee maqa maaqaki aiqama oosiranauqa quqanau.

Aiqaiqa dumudumu qira aukuna faqa suara aukuna faqa anee kai auqu quqasoonafa maridanoo.

<sup>18</sup> Oo Yaawee namuqaa aniara uteeti naakada qimarianara iria.

Kisaagasaa furufari mariasa aniara fifau ainaina fee qimasee ani auqu aquraraidaga.

<sup>19</sup> Oo Anutu, aneenna faiqi anaasee namuqaa nimimaria ummaaranaki kisaagasaa mariasara sia misara qaunau.

Aneenna faiqi anaasee namuqaa nimimaria ummaaranaki kisaagasaa mariasara sia misara qaunau.

<sup>20</sup> Aneenna ooqai qima afeekaikunnanara minara maqee irisee maasa dadaaqia.

Maa maqa maaqanaki narari nararirafa aiqama amannaunai faqa asukuna arirannai faqa qumbiqanoo maridanoo.

<sup>21</sup> Oo Anutu anee ummaara ameemaanai mariasa dadaaqinaqa sia nisauriqa oofikiyaqa. Kudi fasiqa anaasee faqa sarau imariasa faqa ani auqu amooqiaqa.

<sup>22</sup> Oo Anutu, findifinana aneenna auqusaa titaa.

Furufari maria fasiqausa faasaambaasaana ani oosanara uteeti naakada qidaqa.

<sup>23</sup> Sia anee aneenna namuqaa ani auqura fidiqaammasee faqa fuisee qimarianara irisee qaunua, amiqimmasee iria.

Ani namuqaauqa aniara tutuqirafa kaqikai fida marinara sia qaunua, amiqimmasee iriaa.

## 75

*Anutuna raina nimaqarafa.*

<sup>1</sup> Oo Anutu, maasa aniara dufi qidaqa ani auqu uqeeraidaqa.

Maasa anee uriqararafa mariannanara kooroommasee qimannimisee kaifaa anee naaquqara uriqarara ainaina auqoonnanara faqa aiqamausa qimannimidaqa.

<sup>2</sup> Anutufa maaqi qidanoo.

Qinee ufa irira faasaana utaaqamaqaunanoo maridanoo, qinee andeeqasee amana amana kai raina nimaqara oosanannoo raina nimaqaanaura.

<sup>3</sup> Maa maqa maaqanakinna aiqama ainaina rufieeqa naindiri raifanoo maqa faqa kasinaqa qinee Anutusa kai mina oosana atukaramma qumaraanoo sia kaaqa mandaikiannoo.

<sup>4</sup> Qinee manda oosana maree mariasa sia ramoo ramaa iaqera qimannimidaqa.

<sup>5</sup> Qinee maaqi qimasee qimannimidaqa. Innee sia inneeqa nuqu uqeeraseeqa qiniara sia fee qiaqa.

<sup>6</sup> Raina nimaqara oosana fannoo sia suani oosanaindari fau sia suani keeqee marinnaindari fau sia dinni dinni ataaqeedari fau anidanoo fau.

Sia moo fannoo suani dinni dinni ataaqeedari amana faiqi raina nimaqaannoo.

<sup>7</sup> Anutufa kai faiqi rainee marifa maridanoo.

Mifa kai moo mara maqasaa muqufi quqaidanoo, moo uqerasaifanoo uriqaraidanoo.

<sup>8</sup> Yaaweefa nari asaukuki nari aanooqira nammari taqu uaqee idanoo.

Mi taqufa afeeka wainna mina aanooqirafa qumbiqanoo marina uaqee idanoo.

Mifa mi nammarina adiasaifaqa aiqama manda oosana maree mariasa namaseeqa mandainainaki maridaqa.

Misa aiqama nama taikaidaqa, sia atiti taquki kaqi mariannoo.

<sup>9</sup> Qinee Yakooboona Anutunara naaruara naaruara koorooqia fuanaura.

Qinee Yakooboona Anutunara idi raidaqa amooqianaura.

<sup>10</sup> Mifa manda oosana maree mariasa afeeka aiqama rauda nimaqaannoo.

Andeeqara oosana maree mariasa afeeka moo faqa moo faqa nimiannoo.

## 76

*Anutufa rakirana uriqaree marifa maridanoo.*

<sup>1</sup> Yuda maqannaasa Anutuna auqura iridaqa,

Isaraee maqa maaqakina mariasa mina auqu uqeeraidaqa.

<sup>2</sup> Anutuna uqaana maqa Yeerusaree maqusaki maridanoo.

Mifa Sioona aaqanasaa maridanoo.

<sup>3</sup> Miqoo Yeerusaree maqusaki Anutufa namuqaa duru feeqa saqari raudaandamma aqinau.

Mifa saqari faqa saamu faqa oosana oosana rakira ainaina faqa aiqama itairaatairamma aqinau.

<sup>4</sup> Oo Anutu, anee firaqoo qareenarafa mariananoo.

Anee aaqanasaa aneenna namuqaa rafaqafuseenana aneenna uriqarara rupannoo irana namu faqa oorurandee qumuananoo.

<sup>5</sup> Oo Anutu, anee ufa qunaqa sundiaqqa nimudaanai qimarusa doo kuqufufaqa akaqausa misa aiqama ainaina raipaqu maraqau.

Misa aiqama doo saara faiqaidaqa sia kafaa findi fifara.

Misa aiqamausa rakira afeeka faqa akoofasaikirafa faqa sia nariqa dadaaqufaqa kuqiuqa.

<sup>6</sup> Oo Yakooboona Anutu, anee aanoo qianaqa rakira qoosauqa faqa qoosaa ooqu marifi nimariasa faqa rakira afeeka taikafaqa maqasaa aqumi kuqiuqa maridaqa.

<sup>7</sup> Oo Anutu, aiqamausa aniara rufiee mariafa mariananoo.

Anee aanooqinaqa sia amana moo fannoo ani afusaa kikiqiannoo.

- <sup>8</sup> Oo Yaawee, anee innaarunaindari andeeqa nimaqara ufa qunaqa maqasaa fasiqauqa rufiasee ufa sia qirai madoodoonnama fiqau.
- <sup>9</sup> Akaqausa uriqararanannai rafaagafu nimaqaafaqa aiqama maa maqanasaa anee misa dadaaqiraree qimasee findifi andeeqara ufa qunaqa aiqama irisee daimmafiqau.
- <sup>10</sup> Faiqí faiqí aanoo qirafa quandaki ani Yaaweena amooqirana moo faqa moo faqa amidanoo.
- Akaqausa mi rakiranaki sia kuqinausa ani ufa suqiranaki ani amooqifaranoo.
- <sup>11</sup> Innee inneeqa Anutuna Yaaweena amiraree qimasee qima afeekaika maqaa ainaina sia minnisaa, kuqaa mina amia.
- Adeedi maria anaamurusa innee faqa aqoondikira ainaina mina amiaqa.
- Anutufa qifaqa aiqama faiqí anaasee minara rufiadaqa.
- <sup>12</sup> Mifa nári nuqu uqeeree maria uriqararansa mara muqufi rafaqaqifidanoo.
- Mifa maa maqanasaa maria uriqarara karaambaiqausa naindiri rarana nimidanoo.

## 77

### *Ummaara aukuana Anutuna dadaaqiranara innaaru qirafa.*

- <sup>1</sup> Qinee Anutunara dadaaqiannee qimasee faaqa riqa.
- Qinee faaqa rimarunanoo mifa iridanoo.
- <sup>2</sup> Qinee ummaaraki maridaqa Yaaweenara innaaru qidaqa.
- Eendaki kisaqaasaa qisauku uqeerasee innaaru qidaqa, sia daundura asoosara mareeqa.
- <sup>3</sup> Qinee Anutunara iridaqa aiaaee qidaqa.
- Qinee minara oonu mafi irunanoo qini daundura ummaara reenoo.
- <sup>4</sup> Eendaki Anutufa sia qini faiqarana qimifaqa qinee oonu mafi irunanoo ummaarafaqa sia qini ufa qirafa maridanoo.
- <sup>5</sup> Qinee ooqai mariaafannanara iridaqa, mi aukuana amiqimmasee mariaafannanara oonu mafi iridaqa.
- <sup>6</sup> Eendaki qinee iriqarasida maridaqa.
- Qinee maaqi qimasee oonu mafi iriranakiqari qeeqa iridaqa.
- <sup>7</sup> Anutufa naaruaree maasa minniqisaannoo fee.
- Sia fee kafaa naaruara mifa maasara aidiannoo fee.
- <sup>8</sup> Kuqaa fee maasara aidirafa taikeenoo fee.
- Mina maasara qima afeekaikirafa doo fee taikeenoo fee.
- <sup>9</sup> Anutufa nari nifauaranara doo fee qaunuseenoo fee.
- Mina aanoo qirafee mina maasara amuqusirana amaaqa maqanoo maridanoo fee.
- <sup>10</sup> Qinee mina iriseeqa maaqi qimiriga.
- Maa ainainafa qini daundura ummaara qimidanoo,
- Yaaweena afeeka doo taikanoo mariifoo qidaqa.
- <sup>11</sup> Anee firaa ainainauqa auqoonnanara qinee oonu mafi irianauro.
- Qinee mifa faiqí sia amana auqaaqaa ira ainaina auqoonara irianauree qidaqa.
- <sup>12</sup> Oo Anutu, qinee anee aiqama ainaina auqoonnanara indee indee ianauranoo.
- Anee amudaanai qimasee auqoonnanara qinee oonumafi irianauro.
- <sup>13</sup> Oo Anutu, ani oosana fannoo kaaqa naaqqarafa andeeqarafa maridanoo.
- Unna anutusa sia maasa uriqarara Anutufara foora uriqarafa maridaqa.
- <sup>14</sup> Oo Anutu, anee faiqí sia amana auqaaqaa ira ainaina auqunafa mariananoo.
- Anee aneenna afeeka aiqama maqannaasaki uqeera akooqoo kooroommasaanaqa qafeea.
- <sup>15</sup> Aneenna afeekannai aneenna aiku asauku ummaarakinaana maraananoo.
- Anee Yakooboosa Yooseefaasa nikeeku nikaaku maraananoo.
- <sup>16</sup> Oo Anutu, nammari fannoo ani qafamaseenoo rufiaseenoo, rakeenoo.
- Ooruku nammari faruma meemai ooqu marifa faqa ani qafamasee aindirireenoo.
- <sup>17</sup> Oonnamu fannoo ani Anutunara rufiasee maqasaa aaku nammariara foora adianau.
- Innaarunai qirafa fraaqoo darara qufanoo aakuasaa fannoo idauruanda kai qifuki munu raqee mini raqee inoo.
- <sup>18</sup> Ufai namufaqa aaku namu faqa ifanoo ani Anutuna innaarunai qirafa minaki kambiqaiqaq iriqa.
- Ani aakuasaa fannoo aiqama maqa maaqai kaaqa qamannimaqeenoo, maqa fannoo aindiri raifanoo kasinoo.
- <sup>19</sup> Anutu ani aana firaa nammari ameemaanai maridanoo.
- Ani aana firaa nammari ameemaanai marifana mi aatata fuanaqa sia ani aiku amaaqa qafeeqa.

<sup>20</sup> Mooseesa Aaroonasa rakisiraqanda maridaqa ani  
Anutuna faiqi anaasee sipsipasaa rakisirausara foora iqa nifiqee fiqau.

## 78

*Anutuna faqa nari faiqi aanaaseera faqa qidanoo.*

- <sup>1</sup> Oo qini maqannaasa, innee amiqimmasee qini ufa iriaqa.  
Amiqimmasee naaqoo quqasee qini ufa iriaqa.
- <sup>2</sup> Qinee quandara ufannai inni qimannimianaaura.  
Qinee ooqeennaasa ufa oonukeeqee anikeeqee qirana qimannimianaaura.
- <sup>3</sup> Maasa ooqai iriafanna ufana maasa qikausa qimaqimu ufana qimannimianaaura.
- <sup>4</sup> Yaaweefa amiqira ainaina auqoonara faqa mina afeeka faqa mina naaquqara ainaina auqoona faqa maasa faiqi namu naaru kambiqainausa faqa qimannimianaaura sia kuqeeqaanaura.
- <sup>5</sup> Yaaweefa nari sanda ufa nari faiqi anaasee Isaraee maqannaasa nimisee,  
Yakooboona aiku asauku nari auqira ufa niminau.  
Miqimmaseenoo maasa qiikeeku qikaaku afeekaikammaseenoo qimannimino qinau.  
Innee inneeqa faiqi namu sanda ufa qimannimiaqa.
- <sup>6</sup> Innee inneeqa faiqi namu qimannimifaqa misa inaaqiana kambiqainausa quandafi qimannimiaqa, kafaa misa miqi kai iqa nari ninaaqianna kambiqainausa quandafi qimannimifaqa, misa aiqamausa qini sanda ufa iriaqa.
- <sup>7</sup> Miqinnannai nari irirana Anutunasaa kai mundifaranoo, misa Anutufa auquqoo ainainnara sia qaunuaqeera mina sanda ufa kai afaqaqeera.
- <sup>8</sup> Miqidafaqaa sia nari nikausa naanna raaqeera.  
Misa nikausa ufa rukiasee ramoo ramaa imarusa mariqau.  
Sia misa nari irirana Anutunasaa mundiqau.  
Misa sia Anutuna ufaki mapukusee mariqau.
- <sup>9</sup> Miqimarunara Eefaraimmana akeeku akaaku duru feefa mareeqa rakiranaki oonureeqa, fifau rufiasee oonurandee sandaqau.
- <sup>10</sup> Misa Anutuna moodaanaki kira ufamau sia andeeqasee fiqau.  
Mina sanda ufara nikoqoofaqa minnisee kaqi runna fimariqau.
- <sup>11</sup> Anutufa auqoo ainaina qaunuseeqa, mifa naaquqara ainaina uqannifiqoonara faqa qaunusaqau.
- <sup>12</sup> Misa nikeeku nikaaku nikausa noorisaa faiqi sia amana auqaaqaa ira ainaina uqannifiqanau,  
Isipa maqa maaqaki moo maqusa auqu Sooana mi maqusanaki maru afaasanasaa uqannifiqoonara faqa qaunusaqau.
- <sup>13</sup> Anutufa taatuqee ooruku nammari rakeemasee misa nifiqee aadanasaa finau.  
Mifa nammari rakeemandoofanoo, dinni dinni aqaanara foora inau.
- <sup>14</sup> Faasaanasaa mifa asurukiqari misa nifiqee finau.  
Eendaki ida fannoo kaaqa qamannimaqee marufaqa fiqau.
- <sup>15</sup> Misa nammari siaisaqa fimarufanoo Anutufa ooni afoommandeenoo nammari farumakinaanara foora moomoo nimufaqa naqau.
- <sup>16</sup> Anutufa oonikiqari nammariara ooqfuannee qufanoo nammari quminau, firaq nammari anoonara foora quminau.
- <sup>17</sup> Misa sia minara irirai kaqi kai aqara oosana Anutuna afusaa maree mariqau.  
Misa aadana maqa maaqaki fidaqa uriqarara Anutuna afusaa ititammasee nari iriranamau mandainainaki kaqi fimariqau.
- <sup>18</sup> Misa Anutuna amanamasee qafaanee qimasee nariqa nidimari naranara innaaru qimariqau.
- <sup>19</sup> Sia mina kai, misa Anutunara firaqoo amanammasee qafaidee qimasee maaqi qiqau.  
Amanee maa aadana maqa maaqanaki Anutufa narana qimiannoo fee.
- <sup>20</sup> Kuqaa Anutufa ooni arufanoo nammari firaafa quminau.  
Mi nammari firaq nammariara foora quminau.  
Kafaa amanee mifa narana faqa aandaq faqa maasa nari maqannaasa qimiannoofee.
- <sup>21</sup> Yaaweefa misa ufa iriseenoo firaqoo aanoo qinau.  
Aanooqidanoo ida radiqisoofoanoo Yakoooboona faiqi namu narinau.  
Mina aanooqirafa firaanaikinau.
- <sup>22</sup> Misa Anutunasaa sia nari irirana rusiqau.  
Misa Anutunara sia amana mandainainakinaana maasa asumu maraannoo fee qiqau.
- <sup>23</sup> Mifa sia minara irinau kaqi qasuru qimamufanoo innaruna kooqi atuanau.

- 24 Atuaseenoo mannaa feemu innaarunaindaraa narana sakuma fooqaana aakuara foora teeqimasoofofaa naqau.
- 25 Mikari Anutufa angirooüqa neemaru naranna nimufaqa naqau. Anutufa misa sia amana nama taikaaqairra narana nimirau.
- 26 Anutufa narí afeekannai qufanoo suani afu oosanaindari faqa dinni ataaqendari faqa ufai uqinai.
- 27 Mifa ufiniüqa kookoommara foora misa teeqimma nimirau. Ooruku nammari afaigaraa nukudara foora ufini misa nimirau.
- 28 Anutufa qufanoo ufiniüqa misa uiqaana maqusa qambaana faqa naambeeqaqara faqa teeqi teequfaqa naqau.
- 29 Teeqi teeqimmasoofofaa marasee noofanoo moomoo uqanna kaqi marinai. Misa faaqa rimarufanoo Anutufa moomoo uqanna nimufaqa misa namasoofofanoo nimuaqu inau.
- 30-31 Mi ufini naranausa neemarufanoo sia nimuaqu inau, kaqi naida marufanoo Anutuna arana qoofanoo misa afeeka fasiqauqa kuqa narinai. Mifa Isaraee maqanna amiqira kumaaraaüqa narinai.
- 32 Misa mi aiqama ainaina tianaki Anutuna afeeka qafamasee sia mina saqari kiqau, kaqi aaqaranaki fimariqau. Misa Anutufa sia faiqi auqaqaa ira naaquqara ainaina auqoonara irisee sia misa irirana Anutunasaa rusimariqau.
- 33 Mina akiiqara misa maa maqanasaa marirana naidoora foora fuaqasoofaqa kai kaqi taikaqau. Misa mandaikamma nimaqasoofaqa kuqirafa tautummasee misa qumaroofaqa kuqiqau.
- 34 Anutufa misa kuqa narufaqa kaqi marusa misa quandaki Anutufinnai ubeekaqau. Mifa misa kuqa narufaqa kaqi marusa noori runusee mifunnai ubeekamafi innaaru qimariqau.
- 35 Anutufa misa kuqa narufaqa narí oonu mafi iriseeqa, kuqaa Anutufa maasa ititaqi-maqee mari fee qiqau. Uriqarara Anutufa maasa mandainainakinaana feefaurummasee dadaaqi marifammifoo qimariqau.
- 36 Misa sia nimuqusa ookiqarifau miqi qiqau. Misa fifau nookiqari kai Anutuna amiqi amigidaqa miqi qimariqau. Misa narí nifaurunnai unnufa kai qimariqau.
- 37 Misa sia kuqaa uqanna Anutuna ufa afaqee marinai. Misa sia Anutuna faqa moodaanaki kammaqoo ufanasaa mapukusee mariqau.
- 38 Anutufa misa manda oosana qafamaseenoo, mina amuqusirafa qumbiqanoo marunara misa manda oosana akiiqara minnisanau, sia narinai. Moomoo kari narí aanooqirana rafaqaqafuseenoo sia narí aanooqirana aiqama uqeeranau.
- 39 Mifa misara faiqi faiqi kai fee qimaseenoo irinai, misara kaqikaa ufai fuaqaifaqa kai kaqi taikkee mariasee qinai.
- 40 Misa aadana maqa maaqaki naqumma kari fee naakapara ufara nikooqoofaqa aanooqimariqau, moomoo kari miqimariqau. Naqumma kari Anutuna amuqusa mandaikirana amimariqau fee. Moomoo kari miqimariqau.
- 41 Misa moomoo kari Anutuna amanammasee qafaqau. Misa Isaraee maqanna naaquqara andeeqara Anutuna amuqusa mandaikirana kaifaa kaifaa amimariqau.
- 42 Misa Anutuna afeekara qauniqau. Mifa misa firaa ummaara ameemaanai mariuna kinaana maroonara faqa qauniqau.
- 43 Anutufa Isipa maqa maaqaki narí oosana uqannifiqoofaqa qafaqau. Moo maqusa auqu Soona mi maqusanaki maru afaasanasaa faqa narí oosana uqannifiqoofaqa qafaqau.
- 44 Anutufa qufanoo nammari uqanna fannoo quandaki fidikaikinai. Miqimmafufaqa Isipa maqannaasa nammari naranara randoosia minnisaga.
- 45 Mifa qufanoo faufaari oosana oosana kambiqafufaqa Isipa maqannaasa ukaqa nima-daga aupurarana nimirariqau. Mifa eeqamoosara qufaqa anireeqa misa maqa maaqa mandaikamma nimaqaqau.
- 46 Anutufa qufanoo pandaaga moomoo aniree misa ainaina aiqama nama taikaqau. Mifa qufanoo misa kadaapi rirafa aammaadi oo aamarai kaimbinau.
- 47 Anutufa qufanoo pupusamu aqufinoo misa waina sanda afuqakinaana ariisoofofanoo aiqama aadana usu taikanau.



Firaa suara namu faqa pupusamu namu faqa aninoo misa saqari qaqama neemaruna faafisa fooqaa irana aiqama mandaikammasanau.

<sup>48</sup> Mifa qufanoo misa burimakau aina pupusamu aqufinoo aiqama narinau.

Kafaa aakuasaa fannoo aiqama firimaru aandausa oosana oosana narinau.

<sup>49</sup> Anutufa narí aanoo qirana faqa narí kaukaata qirana faqa narí aranaqaranara faqa faiqí nári maru qangiroosa faqa idara foora niqiqoofaqa qumuree Isipa maqannaasa nariqau.

<sup>50</sup> Mifa narí aanoo qirana sia rafaafaq finau.

Misa nimana kuqiranaki firarufanoo sia rafaafaq finau.

Mifa Isipa maqannaasa manda auriranaki quqasoofaqa kuqi mariqau.

<sup>51</sup> Mi angiroofa Isipa maqannaasa ooqa faiqiuqa aiqama naru raurukanau.

<sup>52</sup> Anutufa narí maqannaasa Isaraee maqannaasa sipsipara foora nifiqee finau.

Mifa sipsipara foora aadana maqa maaqaki misa andeeqasee indaarunnikamma ni-maqanau.

<sup>53</sup> Anutufa amiqimmasee rakisi nimaqee marufaqa sia narira ainainara rufiaqau.

Taatuqee nammari fannoo misa namuqaa aiqama dukuninau.

<sup>54</sup> Anutufa misa nifiqamaree Kannaa maqa maaqai narí naaquqara maqa maaqai nifiqee oonuranau.

Narí afeekannai maroo aaqannasaa quqannisanau.

<sup>55</sup> Mi maqa maaqanakinaa aanaamuru damunamma aquseeqa maqa maaqa oosuseeqa Isaraee maqannaasa faiqí oosana faiqí oosana rainannimufaqa maqa maaqa marasee nariqau maqasaa ooqu mariqau.

<sup>56</sup> Misa mi aiqama ainainna qafamaseeqa quandakiqa uriqarara Anutunara amanam-masee qafaqau.

Misa sia mina naamuaqira ufa afaqaqau.

<sup>57</sup> Misa quandaki nári ninaakusa naanna raida ufa rukiee mariqau.

Misa eendaandira feefaraa foora aqusoofanoo fuadakamaki kaqinni fimariqau.

<sup>58</sup> Isaraee maqannaasa unnaqira anutusa tatufirana suqa nimidaqa minannai Anutuna uqanna arana fundakiqau.

Náriqau tumunnai auqira unna anutunannai mina arana qarana amiqau.

<sup>59</sup> Anutufa misa oosana qafamasee misa aanoomma nimaqasee misa miniseenoo ameesa uqunnisanau.

<sup>60</sup> Rakeemmeeqee aquseenoo Anutufa narí naaquqara uiqaana maaqa Siroo maqusaki maruna faqa minnisanau.

Narí maasa qambaana mariu maqana minnisanau.

<sup>61</sup> Mifa narí qima afeekaikira bookisa narí afeeka maruna namuqaa nisaukuki quqasoofaqa maree fiqau.

Mifa narí bookisa narí afeeka areenarafa maruna mareeqeenoo namuqaa nisaukuki quqasoofaqa maree fiqau.

<sup>62</sup> Mifa narí maqannasa Isaraee maqannaasa aanoomannimaqaseenoo misa namuqaara qufaqa akaqausa kuqa nariqau.

<sup>63</sup> Misa kumaaraauqa rakiranaki kuqufufaqa maanaaqauqa marara fasiqa sia mariqau.

<sup>64</sup> Misa amaana maqasaa aanaikirausa duru saamu ookina keeqafufaqa misa ninaaq-maaka rakirafa kaqi kai marufaqa náriara faqa rufiasee sia iki raqee mariqau.

<sup>65</sup> Miqooqari Yaaweefa faiqaranakiara foora tautuma findifinai.

Mifa afeeka fasiqa wainna nammari namasee afeeka marasee findi fuandee inau.

<sup>66</sup> Findifinoo narí namuqaauqa narunifaqaaqaa masoofaqa fiqau.

Anutufa naru nifaqasoofaqa naaru marira nisaurirana marasee sia kafaa rakiqau.

<sup>67</sup> Yaaweefa Yooseefaana narí amaaku Eefaraimmana faqa misa nikeeku nikaaku sia rusandeesamummasee maranau.

<sup>68</sup> Yudana akeeku akaaku rusandeesamummasee maranau.

Anutufa misa maqa maaqaki maru aaqanna misa auqu faqaa aaqanna Sioona aaqana narí aidi maru aaqanna faqa maranau.

<sup>69</sup> Migoo Sioona aaqanasaa Yaaweefa narí innaarunai maru naaquqara amaana maqana fooqaairana usakanau.

Maa maqanara foora naaruara mapukusee marira maaqa usakanau.

<sup>70</sup> Anutufa narí ainainira faiqí Dafidina rusandeesamummasee maranau.

Mifa sipsipasaa rakisi marunakinaana maranau.

<sup>71</sup> Anutufa Dafidina sipsipasaa rakisi marunakinaana mareeqeenoo Isaraee maqannaasa karaambaiqaika masanau.

Anutu faiqí aanaaseesa sipsipara foora faqa rakisianifeera mara quqanau.

<sup>72</sup> Miqooqari Dafidifa nari andeeqara iriranannai faqa nari akoofasaikiranannai Isaraee maqannaasa sipsipara foora indaarunnikamma nimaqanau.

## 79

*Anutufa Isaraee maqannaasa manda ainainakinaana dadaaqiani fee innaaru.*

<sup>1</sup> Oo Anutu, aamina maqannaana aniara sia iri mariasa maasa maqa maaqaki doo aniree maasa ani faiqi anaasee faqa rakidaqa.

Misa ani naaquqara amaana maqa putaammamaqee. Yeerusaree maqusa rapeepaam-maseea.

<sup>2</sup> Misa ani aiku asauku aiqama narusee quqasoofaqa ufiniuqa aniree misa iri naqau.

Kaasau aandaufu faqa ani maqannaasa naru quqasoosa nipata naqau.

<sup>3</sup> Misa fidika Yeerusaree maqusamau nammariara foora umbiqanau.

Misa nikundara fasiqa sia mariqau.

<sup>4</sup> Maasa daaqa mariasa faqa maasa fiqumma mariasa faqa mina qafamasee maasara ataasataasa qimaseeqa naanaidara qidaqa.

<sup>5</sup> Oo Yaawee, ani aanoo qirafa naaruaree mariannoo fee.

Ani rairai qirafa naaru idara fooree qaannoo fee.

<sup>6</sup> Oo Yaawee, aneenna aanoo qirana aamina maqannaasa, sia ani auqu amooqi mari-asasaa teeqia.

Akaqa maqannaasa sia aniara innaaru qimariasa misasaa teeqiaqaana.

<sup>7</sup> Misauqa maasa ani faiqi anaasee kuqa daridaqa.

Misa ani maqa maaqa furufaridaqa.

<sup>8</sup> Oo Yaawee, sia maasa qikeeku qikaaku aaqarana akiiqara maasa aupurarana qimia.

Aneenna nifauara reendeeniranannoo kai kaqi maasa dadaaqia.

Maasa oonumafi irirafa oorudupinoo marinara maasa dadaaqia.

<sup>9</sup> Oo Anutu maasa asumu maree marianafa anee aneenna auqu qareenaranara irisee maasa aaqarana akiiqara minniqisainaqa maasa ani amooqianaura.

<sup>10</sup> Nanaree akaqa maqannaasa maasara yaifee inni Anutufa maridanoo fee qifoora.

Aneenna aiku asauku fidika akiiqara qimasee maasa qifusaa aupurarana niminaqa maasa qafaa.

Misa ani ainainira faiqiuqa naruana akiiqara miqia.

<sup>11</sup> Oo Yaawee, maasa qiku qisauku namuqaa rumbaranaki mariasa faaqari mariana iria.

Namuqaa naruaneera ifana anee aneenna afeeka asaukunnai misa ititannimaqasee mara asumu mariranaki quqannisaa.

<sup>12</sup> Oo Yaawee maasa daaqa mariasa ani manda ufa ami mariasa anee mina akiiqara dinni taikasee dinni ni qaaraqanda marasee kari misa nimia.

<sup>13</sup> Anee miqimmasainaqa maasa ani faiqi namu, ani sipsipara foora aniara naaru naaru dufi dufi qianaura.

Naaru kambiqainausa faqa ani amooqirana amifaranoo.

## 80

*Isaraee maqannaasa kaifaa sooqbaandumma moodaaqoo uqara innaaru.*

<sup>1</sup> Oo Yaawee, anee Isaraee maqannaasa sipsipasaa rakisirafara foora mariannanara maasa ufa iria.

Anee maasa sipsipara foora rakisi marianafa mariannanara maasa ufa iria.

Anee angiroouqa niqoosa faqaasa mariaqoo seerubimma mariaqoo miqoo anee Yaaweeffa ooqu marifi marianafa mariannanara anee maasa ufa iria.

<sup>2</sup> Eefaraimmana akeeku akaaku faqa Beensaminnana akeeku akaaku faqa Mannaseena akeeku akaaku faqa nifusaa koorooia.

Aneenna afeekannai findi finana mai aniree maasa ummaaraki marunnana uqeeraqisaa.

<sup>3</sup> Oo Anutu, anee kafaa maasa uqeera quqaqisaa.

Anee maasara qimudaoo qinaqa maasa kaqi asumu marianaaura.

<sup>4</sup> Oo Yaawee, aiqama afeeka faqaa Anutufa, anee kisaagasaa fee aneenna faiqi anaasee innaaru qiranara aanoo qinnaree.

<sup>5</sup> Anee maasa naukunu kai naranara foora nimianaqa neeqa.

Anee naukunu qumbiqanoo mari difaanina qimianaqa nammariara maqi neeqa.

<sup>6</sup> Anee qianaqa maasa daaqa mariasa faqa maasa maqasaara tinoo taanoo ridaqa.

Maasa namuqaa maasa qiqafeeqa ataasataasa qima qimaqaidanoo.

<sup>7</sup> Oo Anutu anee kafaa maasa uqeera quqaqisaa.

Anee maasara qimudaoo qinaqa maasa kaqi asumu marianaaura.

<sup>8</sup> Oo Anutu, anee maasa Isaraee maqannaasa wainna sandara foora Isipa maqa maaqak-inaana maasa asumuanara mamaree anireenana maaqoo aiqama maqannaasa futeeqa aqusee misa maqasaa ummaquqoonausa maridaqa.

<sup>9</sup> Anee saikammasee miqoo ummaqusoona mariifanoo kambiqafinoo maa maqa maaqana amanaikinoo.

Mina atuka fannoo maqaki meemai uqanna keegeenoo.

<sup>10</sup> Mi sandafa firaanaikufanoo amuaqu namuqa faqa mina auqaanai mariqau.

Firaa sidaa saqariuqa faqa mi sandana auqaanai kai mariqau.

<sup>11</sup> Mi sandana dinni asaana fannoo firaa ooruku nammari mediteereena afainni ooqu finau.

Dinni asaana fannoo firaa nammari Eufarateesa nammari afainni amana kai finau.

<sup>12</sup> Oo Anutu, anee nanaree mina ququsa rakeemmasanaaqee aatata fiqaree aiqaree inausa mina qaqama tiqinfaree.

<sup>13</sup> Kaasau kuara fannoo nandakiqari aniree mi sandana nikunnai radamuseea.

Kaasau aandaufu faqa aniree mina naidaqa.

<sup>14</sup> Oo aiqama afeeka faqaa Anutufa, anee maasa iannannai quanda.

Innaarunaindari maasa qiqafaa. Ani wainna sanda marunaua qiqafamasee dadaaqia.

<sup>15</sup> Anee qummaquqoonna afuqana qumuree qafaa.

Ani wainna sanda anooka aneennara ummaquqoonafa afeekaikinoo maridanoo, qumu qafamasee dadaaqia.

<sup>16</sup> Maasa namuqaa maasa Isaraee maqannaasa ani wainna sanda asaanara foora mariafaqa atekasee idara saafanoo doo qamafinoo.

Anutu anee aanoo qimasee misa kuridi nimaqaa.

<sup>17</sup> Anee rusandeesamummasee maraqoonausa aneenna asaukunnai misa ititannimaqaa.

*Isaraee maqannaasa anee afeeka nimisoonaqa namuqaa mandaikamma nimaqasoonaa anee kaifaa uqeerasee afeekaikamma nimaqaa.*

<sup>18</sup> Miqimmandaina sia maasa anikiqari quandaki kaqinni sandaauranoo.

Anee marirana qiminaqa maasa kafaa findifi ani auqu ramasee ani amooqianaura.

<sup>19</sup> Oo Yaawee aiqama afeeka faqaa Anutufa, anee kafaa maasa qifiqee aneenna iannannai ania.

Anee maasara qimudaoo qinaqa maasa sia kuqaa kaqi asumu maria.

## 81

*Asasira qoomaqa sakasee nara idi.*

<sup>1</sup> Anutufa maasa dadaaqi marifa marinara faaqa rumasee asasida idi rama amaqaqa.

Yakooboona Anutuna amooqira idi raaqa.

<sup>2</sup> Idi oosana arasee, temberinna namu faqa piripuna namu faqa ufireena namu faqa marasee aridaqa asasira idi raaqa.

<sup>3</sup> Fuka quqoonna anirainuqa sipsipa aanainnooka ufireena fuaqaaqa.

Kafaa mi quqoonafa rufatee fatinaqa oomaqa sakasee naida ukeena fuaqaaqa.

<sup>4</sup> Mi qoomaqa sakarafa Isaraee maqannaasa sanda ufara foora marinaqa aukuaana aukuaana naaru naaru miqifaranoo.

Yakooboona Anutufa maasa qimu sanda ufafa maridanoo.

<sup>5</sup> Anutufa Isipa maqannaasa naruseenoo mi sandufana Isaraee maqannaasa nimanau.

Qinee sia qafeemarunna fasiqana aunda irida.

<sup>6</sup> Mifa maaqi qimasee qimanniminau.

Qinee inni Isaraee maqannaasa nikumaqaa firaa ummaara akunnimaqaaqoonaa afaimее- qee quqeeqa.

Qinee inniara qunaqa inneeqa ummaara maqasaa afaimma quqaafanoo.

<sup>7</sup> Innee manda aupuraranaki maridaqa qini Anutusa daaroofaqa qinee minakinaana inni mareeqee kaqinni quqannisa qiafana.

Qinee qeeqa kukeeqara maqusa oonnamukiqari inni dadaaiqiafana.

Innee Meeribaa nammari maruqoo marufaqa qinee inni nimanammasee qafaqiafana. (Meeribaa mi nammarina auqu oosana tinoo taanoo rira nammari fee qinau.)

<sup>8</sup> Oo qini maqannaasa qinee inni auqira ufa qimannimianaqa iriaqa.

Oo Isaraee maqannaasa innee qini auqira ufa iriaqa.

<sup>9</sup> Innee sia moo unna anutuna amooqiaqa.

Qini kai qimooqiaqa.

<sup>10</sup> Qinee Yaaweesa inni Anutusa maridaqa.

Qinee inni Isipa maqa maaqaindaraana nifiqee aniafanausa maridaqa.

Innee minara iriseeqa qinee unnannai kai noo raqasaifaqa qinee kai inni narana nimianaaura.

<sup>11</sup> Qinee mi ufana amiqimasee qeeqa maqannaasa qimannimiafanaqa sia mi ufana iriqau.

Isaraee maqannaasa sia qini Anutusa ufamau fiqau.

<sup>12</sup> Qinee misa mumuqira oosana qafamaseeqa misa rafuseeqee nári nidimaru mandoosanaki aqíqiafana.

Doo miqooqari misa nári nidimaru manda iriranamau fiqau.

<sup>13</sup> Oo qini maqannaasa naqaa qini ufa iriaqaana.

Isaraee maqannaasa qini aatata fuaqaana.

<sup>14</sup> Misa miqifaqau qinee kai kaqi misa namuqaa rafaafusani.

Misa qini ufa irifaqau misa namuqaauqa narini.

<sup>15</sup> Isaraee maqannaasa qini ufa irifaqau qini Yaaweesara fidiqaa imariasa qini doorinni firaqoo rufiidaqa niqoori saunu araaqini.

Miqoo misa narirafa naaruara mariqini.

<sup>16</sup> Innee Isaraee maqannaasa qini Anutusa ufa amiqimmasee irifaqau qinee amiqira narana sakumma ainaina nimunaigini.

Innee qini ufamau fifaqau qinee oonikinaana ookasaasa anoona adiafaa imarina nimunaigini.

## 82

### *Anutufa uriqarara rakisirafa.*

<sup>1</sup> Anutufa innaarunai suqiranaki uriqaranoo maridanoo misa ufa andeeqanni-maqaidanoo.

Oosana oosana rakisirausa suqiranaki Anutufa nari irirana misa qimannimidanoo.

<sup>2</sup> Innee Isaraee maqannaasa manda rakisirausa innee manda koota masaida sia amiqim-masee ufa rainee maria oosanna miqoo taikaaqa.

Innee sia manda oosana maree mariasa manda oosana auqaaqeeera fadameena akuaqa, miqi mariana taikaaqa.

<sup>3</sup> Innee sarau imariasa faqa faiqi faiqiuqa faqa ititannimaqaaqa.

Sarau imariasa faqa aupuraranaki mariasa faqa misa amiqimmasee mariaqeeera dadaaqi-aqa.

<sup>4</sup> Manda oosana maree mariasa nisaukukina mariana mara kaqinni quqannisaqa.

<sup>5</sup> Maa maqanasaa maria siaasausa innee irirana siaisa eendaandirana oosana uqanna maraidaqa asukunakiara foora kai nimariafanoo.

Inni mi manda oosannara andeeqara oosana fannoo maa maqa maaqanaki taikanoo maridanoo.

<sup>6</sup> Qinee Anutusa misara maaqi qidaqa.

Innee faiqi anaaseesaa rakisira saika auqee mariasa Anutusara foora maqasaa uriaraqau maridaqa faiqi anaaseesaa rakisi mariafanoo.

Innee aigamausa qini uriqarara Anutusa faiqi namu mariafanoo.

<sup>7</sup> Innee faiqi faiqi naannaree kaqi kuqifaranoo.

Inni marirafa maqasaa karaambaigauqa faiqi namu kuquafanoo misa marirafa taikaindee inoo inni marirafa taikaannoo.

<sup>8</sup> Oo Anutu, aigama maqannaasa ani faiqi anaasee marianara anee aniree misasaa rakisi nimaqaa.

## 83

### *Anutufa Isaraee maqannaasa namuqaauqa rafaafu nimaqaani fee innaaru.*

<sup>1</sup> Oo Anutu, sia ufa siaina kasoo ina maria.

Sia anee kaqi muqurina maria.

<sup>2</sup> Qafaa ani namuqaa rakirana uqeeraidaqa.

Aniara fidiqaa imariasa ninuka uqeerasee ani ramoo ramaamma amaqaaidaqa.

<sup>3</sup> Misa umee tipundaarammasee ani faiqi anaasee nariraridaqa.

Anee itita nimaqee marianausa narirara tipundaaridammia.

<sup>4</sup> Misa maaqi qidaqa.

Anifaqa Isaraee maqannaasa naru raurukamasaanaqa sia mariaqa.

Sia moo fannoo misara kaqikaqoo iriaqeeera doo naaruara misara qaunu saqa.

<sup>5</sup> Misa tipundaarammasee moodaa iriranasaa maridaqa.

Misa ani Anutuna futeeqa aqiraree qimasee moodaanaki kidaqa.

<sup>6-7</sup> Maaqimmasee maqannaasa suqu fifaqa namuqaakidaqa.

Eedooma maqannaasa faqa Isamaeera maqannaasa faqa Mooba maqannaasa faqa Hakari maqannaasa faqa Keebara maqannaasa faqa Amoonna maqannaasa faqa Amareeka maqannaasa faqa Firistia maqannaasa faqa Tiree maqa maaqaki mariasa faqa moodaanaki kammافیفاقا misa Isaraee maqannaasa futeeqararee qidaqa.

<sup>8</sup> Asiria maqannaasa Amoonna maqannaasa faqa Mooba maqannaasa ooqeenaa niqoolndi mariusa aniree misaki ookaammافیفاقا Rootana aiku asauku dadaaqiqa Isaraee maqannaasa namuqaa kamma nimaqaaqau.

<sup>9</sup> Oo Anutu, anee Midianna maqannaasa faqa Siseera maqannaasa faqa Yabina maqannaasa faqa Kisoona nammari afainni narunnandee maseenana misa aiqama naru taikaa.

<sup>10</sup> Misa Eendoora maqa maaqaki fufana anee Isaraee maqannaasara qunaqa nifaqasee narusee sia nikundaqau.

Doo kaqi miqoo quqasoofaqa putaa iqa madaapee kammافیفاقا.

Oo Anutu, maqee maasa darirari mariasa miqi kai mandee narua.

<sup>11</sup> Midianna maqannaasa Isaraee maqannaasa narirarufanoo Gideeonafa misa naru nifaqasee misa karaambaiqaqara Ooreebana faqa Seepana faqa miqanda narundee kai inana maqee maasa darirari mariasa Anutu anee narua.

Mi maqannaasa uriqarara karaambaiqaqara Seepana faqa Saramuna faqa narundee kai masee maasa darirari mariasa narua.

<sup>12</sup> Misa maaqi qimasee manda ufa qiqau.

Maasa Anutuna aiku asauku Isaraee maqannaasa maqa maaqa qeeqara maraanauree qimasee oonuroofana anee misa uriqararawsa narutaikanau.

<sup>13</sup> Oo maasa Anutu, maasa darirara imariasa kookoommara foora fuaqa aqusainaqana nianai fuaqa. Ufai fannoo andanda fuaqa aqindee masaa.

<sup>14</sup> Ida fannoo nanda qaindee inana maasa darirari mariasa nifaqasaina sandaaqa.

Usau aaqana qumbiaramasaafanoo akara qaindee inana maasa namuqaa nifaqasainaqana sandaaqa.

<sup>15</sup> Oo Anutu, anee aakuasaa faqa innaarunai darara qirana namu faqa nifaqasaina sandaaqa.

Firaa ufai uqiranannai rufiarana niminaqa rufiasee sandamafuaqa.

<sup>16</sup> Oo Yaawee, anee nisaurirana firaa naaku nimaqainaqana mina qafamasee quandaki ani afeekara anoonee qiaqa.

<sup>17</sup> Maqee maasa darirari mariasa naaru naaru rafaqaqafu nimaqasee rufiarana misa nimia.

Misa firaa nisauriranaki maridaqa kuquaqa.

<sup>18</sup> Oo Yaawee anee miqinaqa maasa darirari mariasa anee kai Yaawee mariannanara iriaqa.

Aniara maa maqa maaqana firaa uriqarara rakisirafa maridanoomifoo qiaqa.

## 84

*Anutuna maaqara indee indee ira innaaru.*

<sup>1</sup> Oo aiqama afeeka faqaa Yaaweeefa, ani amaana maqara kaaqa dididanoo.

<sup>2</sup> Qinee ani Yaaweena amaana maqaki marirara dididanoo.

Qinee Yaaweena amaana maqaki marirara indee indee idaqa.

Qini qimuqusa faqa qifaqa faqa ani kaqi marira Anutunara asasira idi raidaqa.

<sup>3</sup> Oo aiqama afeeka faqaa Yaaweeefa qini karaambaiqa qini Anutufa ufini moo fannoo saanoona fooqaafa ani Anutuna amaana maqaki keeqafinoo ani andau tatufira qainda aqa aanaamu usakaseenoo anaqi maqaidanoo.

<sup>4</sup> Oo Yaawee ani amaana maqaki mariasa firaaqoo asasidaqa aiqama kari ani amooqima amaqaqidaqa.

<sup>5</sup> Oo Anutu, anikinaa afeeka maree maria fasiqa anaseesa asasiranaki maridaqa.

Ani amooqirara Sioonna aaqanai ooru firara nidi marisa misa asasiranaki maridaqa.

<sup>6</sup> Yeerusaree maqusai ooru firaree qimasee afeeka aatata aadana aatata Bakaa noopundu runna ooru fufanoo mi maqa maaqafa moomoo nammari maqakiqari ururee marufaika mafinau.

Aaku dunoonna ufanoo madikaki nammari mandi marinau.

<sup>7</sup> Miqimmasee fimariasa afeekaika mafiqaa Sioonna maqusa moo auqu Yeerusaree maqusai Anutufa aiqama unnaqira anutusa uriqararafa marina qafeefaranoo.

<sup>8</sup> Oo Yaawee Anutufa, aiqama afeeka faqaa Anutufa, qini innaaru qirana iria.

Oo Yakooboona Anutu anee aaqoo quqasee iria.

- <sup>9</sup> Oo Anutu, anee maasa Isaraee maqannaasa karaambaiqa maasa rakiranaki saqariara foora ititaqimaqee mari fasiqana amiqi amiqimma amaqa.  
Anee mina rusandeesamummasee maraqoonafa maridanoo.
- <sup>10</sup> Moodaa faasaana ani amaana maqaki marirafa uriqararafa maridanoo.  
Wan tauseena faasaana kaqinni marirafa oorudupirafa maridanoo.  
Qinee qeeqa Anutuna amaana maqa kooqiki keeqarara dididanoo.  
Manda oosana maree mariasa maaqaki mariranara qikooqaidanoo.
- <sup>11</sup> Yaaweefa qareenara karaambaiqa maasa itita qimaqee marifa maridanoo.  
Mifa narí amiqira dadaaqirana faqa maasa duqu uqeerarana faqa mi qandannai amiqimma qimaqaidanoo.
- Andeeqara aatata fimariasa moo ainainara irafanoo sia amiqira ainaina nimiranara qaoo qiannoo.
- <sup>12</sup> Oo aiqama afeeka faqaa Yaaweefa ani saqariki mariasa firaa asasiranaki maridaqa.

## 85

### *Narí maqannaasa rakisinnimaqaani fee innaaru.*

- <sup>1</sup> Oo Yaawee, ani maqa maaqara ani amuda qanau.  
Anee Isaraee maqannaasa kafaa reemindeemirimma nisanau.
- <sup>2</sup> Anee aneenna maqannaasa mandoosana akiqara minninnisanau.  
Misa aaqarana akiqara aiqama rukannisanau.
- <sup>3</sup> Anee ooqai aanoo qiqiunnana faqa aneenna qarana qarana idara foora qeeqeeuna faqa maqee minnisaananoo.
- <sup>4</sup> Oo maasa asumu marirana qimi marianna Anutufa, anee kaifaa maasa sooqbaan-dumeeqee quqaqiseenana aneenna oori runirana maasasaa marina taikaa.
- <sup>5</sup> Anee naaru naaru maasara aanoo qinnaree.  
Ani aanoo qirafa sia fee dauni taikaannoo fee.
- <sup>6</sup> Anee maasa kafaa afeekaikamma qimaqasainaqa maasa ani maqannaasa ani amooqianaara.
- <sup>7</sup> Oo Yaawee, aneenna maasara naaru naaru aidirana uqaqifiqaseenana aneenna dadaaqirana qiminaqa asumu marirana maraa.
- <sup>8</sup> Qinee Yaaweena Anutuna ufa iridaqa.  
Mifa maasa narí aiku asaukuara sia inneeqa ooqeennaa furufarira aatata kafaa fifaqa qinee qeeqa asoosana inni nimianauree qidanoo.
- <sup>9</sup> Yaaweefa nariara naaquqai faqa qeerairi mariasa kuqaa asumu mararara deedaqinoo maridanoo.  
Miqinoo marifanoo mina dadaaqira marirafa maasa maqa maaqaki aiqama atinai mariannoo.
- <sup>10</sup> Miqimmafinanoo Anutufa maasara aidirafa faqa maqasaa qaraa fasiqqa mapukusee marira oosana faqa moodaanaki kifaranoo.  
Yaaweena andeeqara oosana faqa maqasaaqaraasa asoosara faqa narí difaa difaa narí difaa difaa ifaranoo.
- <sup>11</sup> Maqasaaqaraasa Anutuna ufasaa nifu mundusee firafa innaarunai ubeekaifanoo innaarunaindari Anutuna andeeqarafa qumuree misa dadaaqinoo.
- <sup>12</sup> Miqimmafinanoo Yaaweefa maasa amiqi amiqimanimaqaannoo.  
Maasa maqa maaqaki nara ainaina rairaa inoo reemindeemiriannoo.
- <sup>13</sup> Andeeqara oosana fannoo faiqi moora foora Yaaweena afunni fidanoo mifa fuaninna aana afisidanoo.

## 86

### *Dadaaqiani fee innaaru.*

- <sup>1</sup> Oo Yaawee, qinee afeeka siaisa, dadaaqirana siaisa marunnanara anee qini innaaru qirana irisee dadaaqinnanara anoona ufa qimaqimia.
- <sup>2</sup> Qinee qifu mundusee ani ufamau kai fimarunaua marunnanara kuqiranakinaana mara kaqinni quqaqisaa.  
Qinee ani ainainira faiqi ani saqariki marunnanara qini asumu mara quqaqisaa.
- <sup>3</sup> Anee qini Anutufa mariananoo, anee qini qifauama qimaqa.
- <sup>4</sup> Qinee faasaambaasaana aniara innaaru qimamaqaidaqa.
- <sup>4</sup> Qini innaaru qirafa anee iannannai kai oorufi marinara oo Yaawee, aneenna ainainira faiqi qini asasirana qimia.
- <sup>5</sup> Oo Yaawee, anee maasa amiqimma qisaseenana maasa numoo minni qisee mariananoo.  
Aniara innaaru qimariasara ani misara amuqusirafa firaafa maridanoo.

<sup>6</sup> Oo Yaawee, qini innaaru qirana iria.

Dadaaqianeera nammeera qimarunnana irisee dadaaqia.

<sup>7</sup> Anee qini innaaru iri mariannanara qinee ummaarakii maridaqa ani aaraidaqa.

<sup>8</sup> Anaamuruki unna anutusa moomoosa maridaqa sia moo fannoo misa qambaanaani ani fooqaafa uriqararafa maridanoo.

Sia moo unnaqira anutufa anee auqoonna ainainausa auqaannoo.

<sup>9</sup> Oo Yaawee, aiqama maqannaasa anee auqu quqoonna maqannaasa, aiqamausa aniree ani afusaa niqoori saunu arafi ani amooqifaranoo.

Misa ani auqu qareenarana amooqifaranoo.

<sup>10</sup> Anee kai firaa afeeka faqaafa mariananoo naaquqara ainaina auqee marianafa mariananoo.

Aneennaraa kai Anutufa mariananoo.

<sup>11</sup> Oo Yaawee, anee qiniara auqaannee qimarianna ainainna qima qimia. Miqimma sainaa qinee ani ufamau mapukusee fua.

Qini daamua qinaqa kaaqa andeeqasee ani ainainiranaki maria.

<sup>12</sup> Oo Yaawee, qini Anutufa, qinee qeeqa qimuqusa aiqamannai ani amooqianaura.

Qinee naaru naaru ani auqu qareenarana amianaura.

<sup>13</sup> Anee qiniara amuqisirafa firafa maridanoo.

Anee qini maqa ameemaanaani faiqi madikakinaanara foora marunnana mareeqee kaqi mariranaki quqaqisaananoo.

<sup>14</sup> Oo Anutu, ramooramaa imariasa qini dariraridaqa.

Kaaqa fidika ruqiee mariasa suqufifaqa qini kuqa darirara randaidaqa.

Miqi mariasa sia ani Anutunara iridaqa.

<sup>15</sup> Oo Yaawee, anee kaaqa amuqusi marianna Anutufa faqa kaaqa afaari marianafa faqa mariananoo.

Anee sia dauni aanoo qimarianafa mariananoo. Ani maasara amuqisirafa faqa aniki mapukusee marirafa faqa fiqaranoo maridanoo.

<sup>16</sup> Oo Anutu, qinee unannai quandafi qifauarana qimia.

Qini qinoofa iundee kai iqa qinee faqa ani ainainira faiqi marunnnanara aneenna afeeka faqa asumu marirana faqa qimia.

<sup>17</sup> Oo Yaawee, anee qini amiqi amiqimma qimaqee mariannanara moo ainaina auqainnanannai uqaqifiqainaa qafaa.

Anee qini amiqi amiqirana faqa dadaaqirana faqa qiminaqa qiniara fidiqaa imariasa nisaaurifaranoo.

## 87

### *Yeerusaree maqusa amooqiiqau.*

<sup>1</sup> Sioona aqaanasaa naaquqarana saa Yaaweefa nari maqusa auqusee maridanoo.

<sup>2</sup> Yaaweena Yeerusaree maqusara aidirafa aiqama Isaraee maqa maaqakinaa maqusauqara aidirna uriaaqaranoo maridanoo.

<sup>3</sup> Oo Anutuna maqusa iria, mifa aniara amiqira ufa kai qidanoo.

<sup>4</sup> Qinni ufa irimariasa nisaanariqa Firistia maqannaasa faqa Tiree maqannaasa faqa Eetioopia maqannaasa faqa mara Yeerusaree maqannaasa namufaqa moodaanaki quqasee nisaana ruanaura.

<sup>5</sup> Sioona maqusara maaqi qifaranoo.

Aiqama maqannaasara mi maqusaanaasee qifaranoo.

Miqi qifanoo uriqarara afeeka faqaafa mi maqusana afeekaikamma saannoo.

<sup>6</sup> Anutufa aiqama fasiqa anaasee nuqu nari papiqaki akara ruannoo.

Misakiqari akaqusara nari ufa irimariasa Sioona maqusanaasa namufaqa nisaana ruannoo.

<sup>7</sup> Sioona maqusaki maria fasiqa anaaseesa maaqi qimasee idi reefaranoo.

Maasa aiqama amiqi amiqirana oosana Sioona maqusa maridanoo.

## 88

### *Isaraee maqannaasa Anutufa dadaaqianifeera innaaru qiqau.*

<sup>1</sup> Oo Yaawee, anee qini asumu maree marianna Anutufa mariananoo.

Faasaana anee dadaaqianneera innaaru qidaqa iki raqaidaqa. Eendaki faqa aniara innaaru qidaqa.

<sup>2</sup> Qini innaaru qirana iria.

Dadaaqianneera innaaru qimarunnana iria.

<sup>3</sup> Qini oosana oosana ummaara darimarifaqa qusasaa kuqanaura.

4 Qinee kuqirari mariasa naanna raidaqa.

Qini afeeka aiqama taika finoo.

5 Qini kuqirausa namu faqa rarisameeqee quqaqaafaqa maridaqa.

Qinee faiqi kuqa naruqaasara foora madikaki maridaqa.

Anee faiqi kuqufuasara sia iridana sia dadaaqaq mariananoo.

Qinee misara foora maridaqa.

Ani rakisi qimaqaranakiqari nianai maridaqa.

6 Oo Anutu, anee qini mareeqeenana meemaqoo maqa ameemaanai madikakiara foora aqu qisaananoo.

Asukunaki meemai uqanna aqu qisaananoo.

7 Ani aanooqirafa firaqoo qini radandamu masaananoo, ooruku nammari amakau rinoora foora qini rafaqaqafinoo.

8 Anutu anee qini daaqa qiqaonduqara qianaqa qini minniqiseea.

Anee qini mandaika uqanna maqisa saanaqa qini qiqaonduqa qiniara rufieea.

Qinee rumberanakiara foora maridaqa sia amana idukuaki sandaanaura.

9 Aupuridaqa qiki raqee marunanoo qifu mandaikidanoo.

Oo Yaawee, aiqama kari qinee qisauku anee iannannai uqeerasee dadaaqianeera innaaru qidaqa.

10 Oo Anutu, aneenna naaquqara ainaina naqimmasee kuqirausa uqannifiqeenaree.

Kuqirausa amanee findifi ani amooqifaree. Sia miqifaranoo.

11 Madikaki mariasa ani naaru marira amuqusiranara ufa qida fee. Sia ufa qidaqa.

Maaniki mariasa ani mapukusee marira oosana ufa qidee. Sia ufa qidaqa.

12 Ani naaquqara ainaina asukunaki mariasa qafaidee. Sia qafaidaqa.

Kuqiranaki finausa ani andeeqarana qafeefaree. Sia qafeefaranoo.

Minara anee qini titaqisainaqa sia kuqua.

13 Oo Yaawee, anee qini dadaaqianneera aaraidaqa.

Aiqama kananaana qinee aniara innaaru qidaqa.

14 Oo Yaawee nanaree anee qini minni qisaidanee.

Nanaree aneenna oori afiri qini qiqaafanoo qimasee kukeeqaidanee.

15 Qinee kumaaraasaqari manda ummaara darinoo aniifanoo maqee doo kuqirana afaisaa minisaifaqa maridaqa.

Anee moomoo aupurarana qimiananoo mifa qini qimudaani ummooquka maseenoo.

16 Ani firaq aanooqirafa doo qini rafaqaqafinoo.

Ani manda darirafa qini mandaikamma qimaqeenoo.

17 Anee miqi mariana aiqama faasambaasaana manda fasiqauqa qini fiqfi fiqfi tookusiqa maridaqa nammari mandinoo maridanoora foora iqa maridaqa.

Mi ummaarasa firaq nammari amakauriara foora inoo firaqoo qini rafaqaqafu qimaqeenoo.

18 Qini qifaaqasaa qiqaonduqara anee qianaqa qini minniqisaafanoo asukuna fannoo kai qini daaqa qaraa qikaqaafasaara foora maridanoo.

## 89

*Aiqama maqa maaqaki ummaara kambiqaiifaqa ree maria idifa.*

1 Yaaweena naaru naaru maasara firaq amuqusiranara qinee faqa naaru naaru idi raanaura.

Qinee ani mapukusee marira oosana naaru naaru kooroommasee qimannimianaaura.

2 Qinee aniara maaqi qimasee iridaqa.

Ani maasara amuqusirafa naaru naaru afeekaikinoo mariannoo.

Ani mapukusee marira oosana fannoo innaarunara foora atukaranoo marinara qimannimianaauranoo.

3 Anee Anutufa maaqi qinau qinee qeeqa moodaanaki kira ufa qinee rusandeesamu masee maraafanna fasiqanasaa Dafidinasaa quqeefee qinau.

Qinee qeeqa ainainira faiqi Dafidinara qima afeekaikiqa.

4 Mifa maaqi qinau. Qinee anisaqari rakisira saika oosana arasaanaqa naaru naaru ani aiku asuku kambiqainausa miqikai iqa fifaranoo.

Naaru naaru ani aiku asuku kai rakisirausaikamma nimaqaanaura.

5 Oo Yaawee, innaarunai maria angiroosa ani amiqira ainainiranara idi raidaqa amooqi-daq.

Innaarunai naaquqarausa mariasa faqa ani mapukusee marira oosana idi raidaqa amooqidaqa.

6 Sia moo fannoo innaarunai marifa ani Yaaweena fooqaafa maridanoo.



Sia innaarunai mari ainainausaikiqari moo ainaina fannoo ani fooqaafa maridanoo.

<sup>7</sup> Innaarunai suqiranaki mariasa aniara firaagoo rufiidaqa.

Mina fiqū fiqumma mariasa firaagoo minara naaquqaiqa rufiidaqa.

<sup>8</sup> Oo Yaawee, aiqama afeeka faqaa Anutufa mariananoo.

Sia moo fannoo ani afeeka fooqaafa maridanoo.

Oo Yaawee anee aiqama ainainaki afu munduqaannaqoo kai fimarianafa mariananoo.

<sup>9</sup> Oo Anutu, anee ooruku nammari aanooqira amakaurirana rakisi marianafa mariananoo.

Ooruku nammari firaagoo aanoo qinoo amakaurifana anee Yaaweefa rafaafafi marianafa mariananoo.

<sup>10</sup> Anee ooruku nammariki mari firaa naaquqara aandauna radamunafa mariananoo.

Anee aneenna afeeka asaukunnai aneenna namuqaa furufara mandaana rakee mafiqā moodaa moodaa mafia.

<sup>11</sup> Innaaruna anindi maridanoo.

Maa maqa maaqafa faqa anindi kai maridanoo.

Maa maqa maaqafa faqa minaki mari ainainausa faqa anee kai quqaqoonafa maridanoo.

<sup>12</sup> Anee Yaaweefa suani afu dinni dinni ataaqeeni auqu quqaqoonafa maridanoo.

Qeeramoonna aaqana faqa Taboora aaqana faqa faiqiara foora ani Yaaweena auqu irisee asasira idi raidaqa.

<sup>13</sup> Oo Anutu, anee firaa afeeka faqaafa marianafa mariananoo.

Anee uriqarara afeeka faqaafa mariananoo.

<sup>14</sup> Ani rakisinnimaqarafa andeeqaranasaa faqa amana amana kai raina nimaqaranasaa faqa mundinoo maridanoo.

Faiqi aanaaseera nimuqusirafa faqa mapukusee marira oosana faqa anee Anutufa auqaanna aiqama ainainnaki maridanoo.

<sup>15</sup> Faiqi anaasee ani Yaaweenara idi raranannai ani amooqimariasa misa firaagoo asasiranaki maridaqa.

Oo Yaawee misa ani afusaa ani eedoo qiramau fimariasa misa asasiranaki maridaqa.

<sup>16</sup> Misa faasaambaasaana ani auqara asasidaqa.

Misa ani andeeqaranara irisee firaagoo nasuridaqa.

<sup>17</sup> Anee kai maasa afeeka qimianaqa maasa firaagoo aniara asasidaqa.

Anee aneenna aidiranannai maasa firaa afeeka nimianaqa maasa qeeqa namuqaa urinnaaqareeqa.

<sup>18</sup> Oo Yaawee, anee maasa ititaqimaqaaninna fasiqana rusandeesamummasee mara qiminai.

Anee Isaraee maqannaasa naaquqara andeeqara Anutufa maasa maqasaa karaambaiqa qimunafa mariananoo.

<sup>19</sup> Oo Yaawee ooqai anee qainasaa aniki mapukusee maru ainainira faiqisa maaqi qimasee qimanniminai.

Qinee moo amudaanai qimari rakira fasiqana dadaqirana amiqa.

Qinee mi kumaaraana faiqi anaasee qambaanaindaraana rusandeesamummasee marasee Isaraee maqannaasa rakisira afeeka amiqa.

<sup>20</sup> Qinee qeeqa ainainira faiqi Dafidina naaquqara fadameenannai akiqa amoondunnai adiaunannannai uriqararanaikamma amaqqeeqa.

<sup>21</sup> Qini Yaaweesa afeeka fannoo aiqama kari mina faqa mariannoo.

Qini afeeka fannoo mina afeekaikamma amaqaannoo.

<sup>22</sup> Mina namuqaauqa sia uqanna rakiranaki mina rafaafafu amaqqeeqaranoo.

Manda oosana maree mariasa faqa sia amana mina ooru muqufi seefaranoo.

<sup>23</sup> Qinee Yaaweesa mina namuqaa radamusaanura.

Minara fidiqaa imariasa qinee kuqa kai narusaanura.

<sup>24</sup> Qinee minara didimarinaga mina faqa naaruara marianaura.

Rakiranaki qinee mina dadaqiananoo uriqaranoo.

<sup>25</sup> Mina maqa maaqa dinni oosu Mediteranea ooruku nammari mariannoo, dinni oosu Eufarateesa firaa nammari mariannoo.

<sup>26</sup> Mifa maaqi qimasee qini Yaaweesa qimaqimiannoo.

Anee qini qikoofa mariananoo.

Qini Anutufa mariananoo, anee qini asumu qimi marianafa, qini ititee marianna ooni faandaamura fara foora mariananoo.

<sup>27</sup> Qinee mi fasiqana Dafidina utaaqama saananoo qini ooqa faiqiara foora mariannoo.

Aiqama maa maqa maaqanakinaa karaambaiquqa uriqarara karaambaiqa mariannoo.

<sup>28</sup> Qinee qeeqa qima afeekaikira ufa mi fasiqana Dafidinasaa quqasaanoo naaru naaru mariannoo.

Qini moodaanaki kira ufa mina faqa naaruara mariannoo.

<sup>29</sup> Innee Dafidinasaa aruaki oonu marinausa naaruara karaambaiqaiki faranoo.

Misa innaarunara foora naaruara maridaqa Isaraee maqannaasa rakisi nimaqeeffaranoo.

<sup>30-31</sup> Dafidina faiqi namu qini sanda ufa minnisee qini irirana mau sia fiqa misa qini naakapara ufa rukiasee, sia qumaraifaqa aupurarana nimianauro.

<sup>32</sup> Qinee misa aaqarana akiigara aupurarana nimianauro.

Qinee qianaqa misa nari aaqarana akiigara nidafrana mareeffaranoo.

<sup>33</sup> Qinee misa aaqarana akiigara ummaara nimiqa sia qini Dafidinara qimuqusirana taikaanura, kaqi mariannoo.

Qinee qeeqa qima afeekaikirana sia minnisaanura kaqi kai mariannoo.

<sup>34</sup> Qinee moodaanaki kira ufa mina faqa qiafannana sia aikatamasee kaqinni fuanauro.

Qeeqa dookiqari qiafanna ufana sia moo mafi quqaanura, miqoo kai marianauro.

<sup>35</sup> Qinee moodaa kari qeeqa naaquqara andeeqara oosanara iriseeqa qinee minara kuqaa fee qimasee maaqi qiqa, sia unnufa Dafidina qimamianauree qiqa.

<sup>36</sup> Miqianaqa Dafidinasaa aru akinausa naaruara marifara.

Qinee misasaa naaruara suaniara foora qaida rakisi nimaqaanura.

<sup>37</sup> Quqoona fannoo miqoo naaru naaru maridanoo, qinee auquafanna ainainara kooroo imarindee inoo qinee Dafidinara qima afeekaikiafanna ufana miqinoo mariannoo.

<sup>38</sup> Oo Yaawee, anee miqi qimasee qima afeekaikammaseenana kafaa aneenna rusandeesammasee maraqqonna fasiqausa qini Dafidisara arana qaifana minni qisaananoo.

Anee qini firaqqoo ameesuqu qimaqaananoo.

<sup>39</sup> Anee aneenna ainainira faiqi qini faqa moodaanaki kira ufa qimaqqonnana ruki-aananoo.

Anee qini uriqarara qafee qimunnana qumareeqee kookoomaki aqusaananoo ikairi reenoo.

<sup>40</sup> Anee qini faandaamura aiqama rakeekaa iananoo.

Anee qini afeeka maaqauqa rapeemma saananoo naakundu kammafinoo.

<sup>41</sup> Akaqausa qinee marunnaqqoo aiqaree fidaqa qini ainaina ummuaramamaree fidaqa.

Qini qiqqoonausa minara uteeti qidaqa.

<sup>42</sup> Yaawee, anee qini namuqaa dadaaqianaqa misa rakiranaki uriqaree.

Anee namuqaa dadaaqianaqa misa asasidaqa.

<sup>43</sup> Anee qini duru saamu nammari arasaanoo.

Anee qianaqa rakiranaki misa qini rafaqa fia.

<sup>44</sup> Anee qini karaambaiqa duqu marina maraananoo.

Miqimmaseenana anee qini ufa irimarunna qaarina maqasaa aquseenana uti-tigaananoo.

<sup>45</sup> Anee qini kumaaraa marirana ateeqa qusaramasaanaqa dauni asooqaikunana qisaurirana qamunnara foora dukunimma qimaqaananoo.

<sup>46</sup> Oo Yaawee, kisaqqasaa fee kukeeqana marinnaree.

Ani aanooqirafa kisaqqasaa fee idarafoora qaida mariannoo fee.

<sup>47</sup> Qini marirafa qusaranoo maridanoo anee minara iria.

Anee maasa aiqama kuquanausa auquqisaannara iria.

<sup>48</sup> Yafasiqa fee sia kuquannoo fee.

Yafasiqa fee kaqi maridanoo nari afeekannai nari madikaki firanara qeerairiannoo fee.

Sia moo fannoo miqirafa mariannoo.

<sup>49</sup> Oo Yaawee, yaafee anee ooqi qiniara aidimariannana kooroo imari ainainafa maridanoo fee.

Anee Dafidinara qima afeekaikammaqqonafa yaifee maridanoo fee.

<sup>50</sup> Oo Yaawee, ani ainainira faiqi ataasa ataasa qimamaqee marianara anee sia qaunua.

Aiqama maqannaasa manda aasaandaana ufa qimimariafaqa marunannara, anee minara faqa sia qaunua.

<sup>51</sup> Oo Yaawee anee rusandeesammasee maraqqonna karaambaiqanara aasaandaana ufa qidaqa.

Mifa aiqama tinai nifaqa qafamasee ataasa ataasa qidaqa.

<sup>52</sup> Naaru naaru amooqirafa Yaaweenaindi mariani. Kuqaa kafaa kuqaa.

## **Mina Anaqiannaa (Book 4)**

- 1 Oo Yaawee, ooqai uqanna maasa qikeeku qikaaku qifaqnausa faqa maasa faqa maaqara foora ina marunafa mariananoo.
- 2 Ooqai aaqana faqa maa maqa maaqafa faqa sia marufana anee marinau. Anee ooqai mariunna Anutufa kafaa naaru faqa marinna Anutufa mariananoo.
- 3 Anee Yaaweefa faiqi mareeqee kafaa maqaiki marianafa mariananoo.
- 4 Anee qinana faiqi faiqi kafaa quandaki maqaikammaiqee qimarianafa mariananoo.
- 5 Anee wan tauseenna aukuanara moodaa faasaanee qimariananoo. Anee minara eenda faasaana aiqaree maqi qimariananoo.
- 6 Anee Yaaweefa nammari aulinoo faiqi maree findee imariananoo, misa qainasaara foora qusasaa mariqa kai kaqi taikaidaqa. Faiqi nimmuru kananaana amiqi amiqindee iifanoo eendifanoo ammundaidanoo.
- 7 Kananaana kambiqafinoo amiqi amiqidanoo. Eendimarifanoo doo aadanusinoo rooraiqidanoo.
- 8 Ani Anutuna aanooqirafa maasa faiqi faiqi turaurinoo. Ani tikooru maasa firaqoo rufiqaidaqa.
- 9 Maasa aaqarana aneenna afusaa aiqama quqasee qafee marianafa mariananoo. Maasa kukeeqafi maraunna mandoosanafa ani afusaa kaaqa qaranaki akoosaqa maridanoo.
- 10 Ani aanooqirafa maasa marirana qusarama qimaqaidanoo. Maasa qeeqa maa maqanasaa marunna aukuanana moodaannai daannamma neera foora iqa taikaidaqa.
- 11 Maasa marianna aukuanafa qaaramoo fasiqa niku nisauku taikasee qisaukuqara taikasee 70 aukuaana kai marianaara. Afeekaikiasa ootupamasee qaara faqa qaara faqa fasiqa niku nisauku taikasee 80 aukuaana maraidaqa. Maasa miqimmasee aukuanaki maridaqa ummaaraki faqa kadaapiki faqa maridaqa. Maasa miqimmasee aukuanaki marunanoo mi aukuanafa kai kaqi taikaifanoo maasa marirafa faqa kai kaqi taikaidanoo.
- 12 Oo Anutu, yafee ani firaa aanoo qira afeekana oosana iriannoo fee. Sia moo fannoo iriannoo. Yafee faiqi anaasee anee aanoo qimariana rufiee marianara iriannoo fee. Sia moo fannoo iriannoo.
- 13 Oo Yaawee, maasa qeeqa maa marirafa qusaranoo marinara qima qiminaqa iria. Miqimmasainaqa maasa irirafa irirana faqaasa iriranara foora mariani.
- 14 Oo Yaawee, anee maasara aanooqirafa kisaqaasaa fee mariannoo fee. Maasa aneenna ainainira faiqiuqara amuqusiani.
- 15 Oo Yaawee, aneenna naaru naaru marira amuqusirana aiqama kananaana maasa umbiqa nimia. Miqimma niminaqa maasa kaqi marianna aukuaana asasira idi raidaqa nasurianaura.
- 16 Oo Yaawee, anee moomoo aukuaana dariunnana amana kai asasirana maqee qimia. Mandaikamaqimaqee unna aukuaana amana kai asasirana qimia.
- 17 Oo Yaawee anee kaaqa idaaqira ainaina auqu quqoonnana maasa aneenna ainainira fasiqauqa nifusaa koorommasee uqannifqaa. Aneenna areenara afeeka faqa maasa faiqinamu qinaiqi mara uqannifqaa.
- 18 Yaaweefa anee maasa Anutufa, ani amiqi amiqirafa maasaa mariani. Maasa aiqama ainaina auqee marunnana anee anoonaka maqisaa. Eeoo, maasa ainainirana mapukunnisaa.

## 91

*Anutufa maasa itita qimaqee marifa maridanoo.*

- 1 Yafee Yaaweefa itita qimaqaani fee qimasee fimarifa faqa yafee aiqama afeeka faqaa Anutuna itita nimaqaranaki maridafee.
- 2 Misa Yaaweenara maaqi qifaranoo, mifa maasa afeeka kukeeqara maqusa maridanoo fee qidaqa. Mifa maasa Anutufa marifaqa minakai saqarikidaqa.
- 3 Mifa namuqaa umee mandainainakinaana ani asumu maraannoo. Manda kuqira auriranakinaana mareeqee kaqinni quqaannoo.
- 4 Mifa kookooraanara foora nari aqoosannai ani itita amaqaannoo. Anee mina aqoosaki keeqafinana itita amaqarana paqurinnaranoo. Mina mapukusee marira oosana fannoo ani saqari kamma amaqeenoo ani faandaamurara foora mariannoo.

- <sup>5</sup> Anee miqina maridana eendaki rufiee maria ainainausara sia rufieennaranoo.  
 Faasaana tautummasee ani mandaikamma amaqara ainainnara faqa sia rufieennaranoo.
- <sup>6</sup> Eendaki faiqi narimari auriranara faqa sia rufieennaranoo.  
 Faasaana narimari manda ainainnara faqa sia rufieennaranoo.
- <sup>7</sup> Ani aaqa wan tauseenna fasiqa kuqaki aqufifaranoo kafaa ani asauku uqannai maria fasiqausa ten tauseenna kuqiranaki fifaranoo.  
 Mi narirafa faqa sia uqanna ani aaqa aniannoo.
- <sup>8</sup> Aneenna afunnoo manda oosana maree mariana akiiqara narirana qafeennaranoo.
- <sup>9-10</sup> Anee uriqarara Anutunara itita qimaqee mari fee qiannanara faqa Yaaweenara qini afeeka kukeeqara maqusa fee qimasee keeqafuannanara sia moo manda ainaina anisaa aqufuannoo, sia moo ummaara ani maaqa aaqa aniannoo.
- <sup>11</sup> Anee miqinanoo Anutufa nari qangeerooqara qinaqa misa ani marirana niranasaa rakisi amaqeeffaranoo.
- <sup>12</sup> Mi qangiroosa nari nisaukunnai ani qumaraifana sia oonisaa aiku rupaurinnaranoo.
- <sup>13</sup> Anee raioona faqa manda sakani faqa nimuaqa aiku reennaranoo.  
 Raioona firaana faqa ukadiqa faqa aikunnai radamusainaga sia ani arifaranoo.
- <sup>14</sup> Anutufa maaqi qidanoo, qinee qiniara nidimarisa manda ainainakinaana qumareeqee kaqinni quqaanaura.  
 Qiniara karaambaiqee qimasee irimarisa qinee itita nimaanaura.
- <sup>15</sup> Misa qini daaraifaqa maqi qimasee kaifaa qimamianaura.  
 Misa ummaarak marifaqa misa faqa maridaqa dadaaqammianaura.  
 Qinee misa mandainainakinaana uqerasee uriqarara nuqu nimianaura.
- <sup>16</sup> Qinee misa marirana kisaqaikamma nimaqasee manda ainainakinaana mareeqee kaqinni quqaanaura.

## 92

### *Anutuna amooqira idi.*

- <sup>1</sup> Oo Yaawee ani amooqirafa firaqoo uriqararafa amiqira oosana maridanoo.  
 Ani uriqarara auquara irisee idinnai ani amooqirafa amiqira oosana maridanoo.
- <sup>2</sup> Aiqama kananaana ani amuqusirana kooroo irafa amiqira oosana maridanoo.  
 Ani mapukusee marira oosana faqa aiqama eendaki kooroo irafa amiqira oosana mariannoo.
- <sup>3</sup> Piri-punnannai ani amooqira idi rarafa amiqirafa maridanoo.  
 Ufireena fuaqaida amiqira naundasaa idi raidaqa ani maasara amuqusirana kooroo idaqa.
- <sup>4</sup> Oo Yaawee, anee auqonna afeeka ainainausa qini asasirana qimidanoo.  
 Qinee anee asaukunnai auqonna ainaina qafamasee ani amooqira idi raidaqa.
- <sup>5</sup> Oo Yaawee, anee auqonna ainainafa firaafa uqanna maridanoo.  
 Ani irirafa firaafa farumara foora meemai maridanoo.
- <sup>6</sup> Irirana siaifa maa ainainnara sia iridanoo.  
 Furufari marifa mifa faqa sia iridanoo.
- <sup>7</sup> Maa ainainnara faqa sia iridaqa. Aaqara oosana maree mariasa amiqira andandara foora dauni kambiqaidafa.  
 Manda oosana maree mariasa reemindeemiriranaki maridaqa.  
 Misa miqiga mariinaqa naaru amiqi uqanna masee kuridifaranoo.  
 Irirana siaisa minara sia iridaqa.
- <sup>8</sup> Oo Yaawee anee naaru naaru kaaqa uriqararafa mariannanara kuridi nimaqeenaranoo.
- <sup>9</sup> Oo Yaawee maasa iridaqa ani namuqaauqa kuqaa uqanna kuqifaranoo.  
 Aiqama manda oosana maree mariasa anee rafaqafu nimaqeenaranoo.
- <sup>10</sup> Kaasau burimakau akoona afeeka amana kai qini faqa qimimariananoo.  
 Anee asasiranannai qini amiqi amiqimma qimaqaananoo.
- <sup>11</sup> Qini qifu fannoo qini namuqaa rafaqafu nimaqarana qafeenoo.  
 Manda oosana maree maria namuqaasa qeeqa daaqoonnai misa faqa rirana iriqa.
- <sup>12</sup> Andeeqee mariasa asumu saqari kambiqeenoo amanee muna munindee idaqa.  
 Misa innooqa fiqa. Rebanonna maqa maaqakina mari sidaa saqariara foora kisaqa marifaranoo.
- <sup>13</sup> Mi andeeqara fasiqausa Yaaweena amaana maqa naambeeqaqaraa saqariara foora amiqimmasee kambiqaidafa.  
 Misa Anutuna amaana maqa naambeeqaira foora kambiqafi moomoo kidaqa.
- <sup>14</sup> Mi andeeqara fasiqa anaaseesa asooaqeeqa saqariara foora kaqi qaama ireefaranoo.

Misa fuka saqariara foora afeekaikiqa maridaqa amanee muna muna ifaranoo.

<sup>15</sup> Miqianannoo Yaaweefa andeeqarafa marinara kooroo idanoo.

Yaaweefa qini afeeka itita qimaqee mari ooni fara foora maridanoo.

Sia moo aaqarafa minaki maridanoo.

## 93

*Anutufa karaambaiqa maridanoo.*

<sup>1</sup> Yaaweefa karaambaiqa maridanoo.

Mina afeeka faqa kaaqa uriqarara andeeqara oosana faqa mina qamunnara foora afisinoo maridanoo.

Maa maqa maaqafa mapukinoo maridanoo sia amana furufariannoo.

<sup>2</sup> Oo Yaawee, ani ufa irira qaari ooqai oosana arooqooqari afeekaikinoo maridanoo.

Maa maqa maaqafa sia marunaki anee ooqai naaru naaru mariranaki marunafa mariananoo.

<sup>3</sup> Oo Yaaweefa, ooruku nammari fannoo amakauridanoo firaagoo ufa qidanoo.

Mi amakaurirafa firaagoo narisaa narisaa arinoo darara qidanoo.

<sup>4</sup> Uriqarara Yaaweefa fira afeekannoo innaarunaindaraa ainaina rakisidanoo, ooruku nammari amakaurirana faqa arusee uriqararafa uqanna maridanoo.

Ooruku nammari firaagoo amakauri mari afeekana Yaaweefa uraaqarafa maridanoo.

<sup>5</sup> Oo Yaawee, ani sanda ufa naaruara marifa maridanoo.

Ani amaana maqa naaquqarafa naaru naaru marianinafa maridanoo.

## 94

*Anutufa aiqamausa raina nimaqee marifa maridanoo.*

<sup>1</sup> Oo Yaawee, anee manda oosana akiqara imarianna Anutufa mariananoo.

Anee miqi mariannanara aneenna arana qarana kooroommasainaqaa qafaqaa.

<sup>2</sup> Oo Yaawee, maasa maa maqa maaqanasaaqaraasa ufa rainee marianafa, anee findi fua.

Doo findi finana nari noori uqereee mariasa miqi mariana akiqara nimia.

<sup>3</sup> Oo Yaawee, kisaaqasaa fee manda oosana maree mariasa asasida marifaree.

Kisaaqasaa fee misa nasu nasurifaree.

<sup>4</sup> Ummuari mariasa kisaaqasaa fee ramoo ramaa ida nari manda oosana maree mariana amoo amoo qifaree.

<sup>5</sup> Oo Yaawee, miqi mariasa ani faiqi anaasee radamidaqa.

Ani aiku asauku mariasa nari uriqararanannai misa rafaqaa fidaqa.

<sup>6</sup> Mi manda oosanna faqaasa adeedaana faqa asaqaaraafai faqa narimariasa maridaqa, faiqi faiqi maasa maqa maaqaki ani mariasa faqaa kuqa nari mariasa maridaqa.

<sup>7</sup> Miqi mariasa Yaaweenara quandaki maaqi qidaqa.

Yaaweefa sia maasa qiqafaidanoo.

Isaraee maqannaasa Anutufa sia minara iridanoo, mana mana kai midanoo.

<sup>8</sup> Qini faiqi anaasee naqaa fee ifaqee maa furufarira oosana auqee fee.

Innee furufarira irirana faqaasa mariasa mariafanoo.

Yairee fee innee irirana maree faree.

<sup>9</sup> Naaqoo auqu quqoo fasiqanara Anutunara innee minara sia ufa irimarifee fee qidafee.

Inni nifu auqu quqoo fasiqanara Anutunara innee minara sia qafee marifee fee qidafee.

<sup>10</sup> Aiqama maqannaasa Anutufa rakisi nimaqaidanoo innee minara sia misa andeeqaannoo fee fee qidafee.

Mifa irirana uqannifiqee mari fasiqafa maridanoo Anutunara innee minara sia irirana faqaafee fee qidafee.

<sup>11</sup> Yaaweefa aiqamausa umee irirana iridanoo.

Misa irirafa dapikira irirafa kai marinara faqa mifa iridanoo.

<sup>12</sup> Oo Yaawee anee irirana maraanifeera qima ami marianna fasiqafa asasiani.

Anee aneenna sanda ufa uqafiqee marianna fasiqafa mifa faqa asasiani.

<sup>13</sup> Anee misa ummaara maraafana asooarana nimimariananoo.

Miqidana anee manda oosana maree mariasara madika deedaqi mariananoo.

<sup>14</sup> Yaaweefa nari faiqi anaasee sia ameesuqu nimaqaannoo.

Mifa sia uqanna narindikiqa mariasa ameesuqu nimaqaannoo.

<sup>15</sup> Mikari ufa andeeqa nimaqee mariasa kaifaa andeeqa nimaqee faranoo.

Aiqama andeeqara marirana faqaasa misa mi andeeqa nimaqara ufana qafamasee amiqirafee qimasee pooduqee faranoo.

<sup>16</sup> Qinee findifiqa manda oosana mareeusa qini darirarufaqa itita nimaqaaneera iafanaqa yafee moo fannoo qini dadaaqinau. Sia moo fannoo qini dadaaqinau.

- Qinee findifiqa aaqee mariasa qaoo qianee riafanaqa yafee moo fannoo qini dadaaqinau.  
 Sia moo fannoo qini dadaaqinau.  
 17 Yaaweefa sia qini dadaaqinaqau qini darusaifaqau qinee kai kaqi kuqirausa ufa siaisaki marunaqini.  
 18 Qinee aqufuanaaree qunana Yaawee aneenna naaru marira amuqusiranannai qini gumaraanoo.  
 19 Qini daunduraki ummaara darimarifaqa moomoo irirana irimarunana anee Yaaweefa qini daundura uqbiqasee asisirana qimi mariananoo.  
 20 Oo Yaawee anee eendaandira siaasauqa faqa sia amana misa faqa moodaanaki ainaini mariananoo.  
 Misa aaqee maria sandufausa marasee unna qimasee maasa andeeqara sanda ufee qianara aqaqidaqa.  
 21 Miqi maria manda siaasausa moodaanaki suqufiqa andeeqarusa mandaikamma nimaqarara tipundaaridaqa.  
 Mi manda siaasausa aaqarana siaisa mara kuqiranaki quqidaqa.  
 22 Misa miqi marifanoo Yaaweefa qini afeeka kukeeqara maqusa maridanoo.  
 Qini Anutufa qini itita qimaqara ooniara foora marifaqa qinee minaki kukeeqaidaqa.  
 23 Yaaweefa mi manda siaasausa nariqa aaqarana akiqara nimiannoo.  
 Misa aaqarana akiqara Yaaweefa kuridi nimaqaannoo. Yaaweefa maasa Anutufa misa kuridi nimaqaannoo.

## 95

### *Anutuna amooqira idi.*

- 1 Doo aniaqa, aniraifaqa Yaaweena amooqira idi ramamaqaa.  
 Mifa maasasaa ititee marifa marinara firaaqoo asasira idi raqa.  
 2 Doo aniaqa, aniraifaqa dufi dufi qirana namu faqa mina afusaa oonu raa.  
 Asasammasee amooqira idi namu faqa mina afusaa oonu raa.  
 3 Yaaweefa afeeka faqaa Anutufa maridanoo.  
 Mifa aiqama unna anutusa rafaqafu nimaqaseenoo afeeka karaambaiqa maridanoo.  
 4 Mifa aiqama maa maqa maaqana rakisirafa maridanoo.  
 Mifa maqa ameemaanai ooni aamarauqa faqa kisaqa aqaqanaqa faqa rakisi marifa maridanoo.  
 5 Mifa ooruku nammari faqa maqa faqa nari auquqoona minaindi marifanoo minasaa rakisidanoo.  
 6 Doo aniaqa, aniraifaqa mina oorinni kummara mafi amooqia.  
 Yaaweefa maasa auqunara maasa mina oorinni qiqoori saunu arafi mina amooqia.  
 7 Mifa maasa Anutufa maridanoo.  
 Maasa mina sipsipara foora maridaqa.  
 Maasa mina sipsipara foora mina rakisi nimaqaranaki maridaqa.  
 Oo maqee uqanna mina ufa iriaqa.  
 8 Inni nikeeku nikaaku Meeribaa maqasaa undee sia iaqa.  
 Innee sia misa naanna ramasee inneeqa nimuqusaki qini ufara ititiaqa.  
 Inni nikeeku nikaaku Masaa aadana maqasaa qini Anutusa kafaa kafaa qimanammasee qafoondee sia iaqa.  
 9 Misa migoo aadana maqa maaqaki marida qinee firaa ainaina auqaafannana qafamasee sia iriqau, kaqi qimanammasee qafaqau.  
 10 Qaara fasiqa niku nisauku taikasee 40 aukuanaki qinee Isaraee maqannaasara qikoo uqanna qoofaqa qinee Anutusa misara maaqi qiqiafana.  
 Maa maqannaasaa kaaqa qaara irirana mau fimarisa maridaqa.  
 Misa qini sanda ufa minnisee moosaa fimariasa maridaqa.  
 11 Minara qinee Anutusa qeeqa aanoo qiranakiqari maaqi qimasee qima afeekaikiqa.  
 Misa qini idooara maqusaki sia uqanna keeqeefaranoo.

## 96

### *Anutufa uriqarara karaambaiqa maridanoo.*

- 1 Innee fuka idi Yaaweena rama amaqaqa.  
 Aiqama maa maqanasaaqaraasa Yaaweena idi rama amaqaqa.  
 2 Innee Yaaweenara idi raqa. Mina auqu amooqiaqa.  
 Mifa maasa kuqiranakinaana asunu marainara aiqama faasaana mi amiqira fasaasa ufana koorooiaqa.  
 3 Mina areenaranara maa maqanasaa mariasa qimannimiaqa.

Mifa firaa afeeka naaquqara ainaina auqoonara aiqama faiqi anaasee qimannimiaqa.

<sup>4</sup> Yaaweefa firaafa uriqararafa marinara mina amooqirafa faqa miqikai masee uriqararafa mariannoo.

Aiqama fasiqa anaasee unnaqira anutusara naaquqee marina minisee Anutuna uqannara firaagoo naaquqaani.

<sup>5</sup> Anaamuru mariasa unnaqira anutusa fifau nariqa auqusee amooqidaqa.

Miqi mariafanoo maasa Yaaweefa innaaruna faqa minakinaa ainaina faqa auqu quqoofa uriqaranoo maridanoo.

<sup>6</sup> Kaaqa qara areenarafa faqa uriqararafa faqa mina fiqy fiqy iqa maridaqa.

Amudaanaiqirafa faqa kaaqa idaaqirafa faqa mina amaana maqaki qumbiqanoo maridanoo.

<sup>7</sup> Innee aiqama maqannaasa Yaaweena afeeka faqa areenarana faqa amooqima amaaqa.

<sup>8</sup> Yaaweena areenara auqu amooqiaqa.

Innee amaana maqaki keeqaani qimasee dufi dufi qima amaqee fandinna ainaina uqirafa keeqaa.

<sup>9</sup> Naaquqara karaambaiqa kooroo inaga aiqama maa maqanasaaqaraasa mina oorinni naindiri reemarinagaaniqoori saunu araaqa.

Aiqama maqannaasa mina afusaa rufaida naindiri raani.

<sup>10</sup> Innee Yaaweefa uriqararafa marinara aiqama maqannaasa qimannimiaqa.

Maa maqa maaqafa afeekaikamma mapukinoo marinara sia amana rundoorundiannoo.

Mifa aiqama maqannaasa andeeqasee amana amana kai andeeqa nimaqaannoo.

<sup>11</sup> Innaarunai maria ainainausa Yaaweenara asasiaqa.

Maqa faqa minakinaa ainainauqa faqa asasiaqa.

Ooruku nammari anee faqa minakinaa noodaanna ainaina faqa Yaaweenara faaqa ridaqa amooqiaqa.

<sup>12</sup> Usau maqa maaqa faqa minaki maria ainainausa faqa aiqama asasiaqa.

Nandaki saqariuqa faqa nasuridaqa asasifaranoo.

<sup>13</sup> Yaaweefa maqasaaqaraasa rakisi nimaqarara anireenoo andeeqaranannai faqa amana amana kai ira oosannannai faqa rakisi nimaqaannoo.

## 97

### *Anutufa uriqarara rakisirafa.*

<sup>1</sup> Yaaweefa karaambaiqa marinara maa maqa maaqafa asiasiani.

Ooruku nammari mari afumausa faqa asasiaqa.

<sup>2</sup> Eekara oonnamu faqa asukuna faqa Yaaweena fiqy fiqy inoo maridanoo mina kukeeqa amaqaaidanoo.

Mifa andeeqaranannai faqa amana amana kai raina nimaqararannai faqa faiqi anaasee rakisi nimaqaaidanoo.

<sup>3</sup> Ida fannoo mina oorinni fidanoo mina namuqaa mina fiqy fiqy imariasa qamataika nimaqaaidanoo.

<sup>4</sup> Mina aakuasaa fannoo aiqama maqa maaqaki kaaqa qamannimaqaifanoo, maa maqafa qafeenoo rufiaifanoo aindiri raidanoo.

<sup>5</sup> Aiyama maqa maaqa quqoo Karaambaiqana Yaaweena afusaa aaqanauqa tasirisirimma taikaidaqa.

<sup>6</sup> Innaaruna fannoo Yaaweena andeeqaranara kooroo ifaqa aiqama maqannaasa mina areenarana qafaidaqa.

<sup>7</sup> Nisaukunnai auqimaria unna anutusa nimoo qimariasa Anutufa uqanna misa mareeqee nisauriranaki quqaaidanoo.

Unna anutusauqa aiqama quandaki Yaaweena oorinni kummarama fuaqa.

<sup>8</sup> Yaaweena andeeqa nimaqara ufa marinara Sioona maqusanaasa faqa Yuda maqannaasa faqa asasidaqa.

<sup>9</sup> Oo Yaawee, anee aiqama afeeka faqaafa aiqama maqa maaqaki mariasa rakisi nimaqee marianafa mariananoo.

Aiqama unnaqira anutusa faqa firaagoo urinnaaqararafa uqanna mariananoo.

<sup>10</sup> Yaaweefa mandoosanaa fidiqaaq imariasara aididanoo.

Mifa nari ufamau fimariasa misa mariranasaa rakisida ititannisaidanoo.

Mifa manda oosana maree mariasa nisaukukinaana mara kaqinni quqannisaidanoo.

<sup>11</sup> Kaaqa qarafa andeeqarausasaa kaaqa qaidanoo.

Andeeqara marirana faqaasaki asasirafa maridanoo.

<sup>12</sup> Innee andeeqaramau fimariasa, Yaaweefa auqoo ainainara irisee asasiaqa.

Naaquqara Anutufa auqoo ainainara oonumafi irisee dufi dufi qima amaaqaqa.

## 98

*Anutufa maa maqa maaqakinaa fasiqa anaasee rakisirafa.*

- <sup>1</sup> Yaaweefa moo kamaakira amiqira ainaina auqoonara innee fuka idi rama amaqaaga. Mifa nari afeekannai faqa kaaqa naaquqara afeekannai faqa nari namuqaauqa naruseenoo urinnaaqarama finau.
- <sup>2</sup> Miqimmaseenoo Yaaweefa rakiranaki nari uriqararana koorooinau. Aiqama maqannaasa nifusaa Yaaweefa mandainainakinaana mara kaqinni quqeemari afeekana kooroo inau.
- <sup>3</sup> Yaaweefa Isaraee maqannaasara sia taikaaninna amuqusirana faqa mapukusee marira oosanara faqa nimianauree qimasee qimaqoona sia qauninau kaqi afu mundusee fimarinau. Aiqama maqa maaqa ati ati marusa rakiranaki maasa Anutuna afeeka doo qafaqau.
- <sup>4</sup> Maa maqa maaqanaki mariasa innee aiqama Yaaweena asasira idi ramamaqaaga. Innee firaqoo asasira idi faqa amooqira idi faqa ramamaqaaga.
- <sup>5</sup> Innee amooqira idi Yaaweena ramamaqaaga. Piripunna aridaqa mina amooqiaqa.
- <sup>6</sup> Ufireena faqa sipsipa aanainnai auqira ukeenannoo faqa fuaqaidaqa, Yaaweena maasa karaambaiqa fee qidaqa mina oorinni mi namunannai asasamma amaqaaga.
- <sup>7</sup> Ooruku nammari faqa minakinaa aiqama ainaina faqa Yaaweena irisee faaqaruqa. Maqa maaqa faqa minakina maria fasiqa aanaaseesa faqa aiqama ainainauqa faqa faaqa fuisee iqa asasiaqa.
- <sup>8</sup> Nammari uqanna faqa Yaaweena oorisa nisauku aridaqa asasiaqa. Amuaqu namuqa faqa moodaanaki kammafi Yaaweena oorisa susummamaqaaga.
- <sup>9</sup> Yaaweefa maa maqa maaqanaki mariasa ufa andeeqa nimaqarara quminara asasamma amaqaaga. Nari andeeqaranannai faqa amana amana kai andeeqaranannai faqa maqasaa qaraasa andeeqannisaannoo.

## 99

*Anutufa uriqarara karaambaiqa.*

- <sup>1</sup> Yaaweefa karaambaiqa marifaqa aiqama fasiqa anaasee rufiaafanoo naindiri raidanoo. Mifa angirooqa oorinnaaqaree meeraqoo nari ufa irira qarisaa oofuafaqee marifanoo maqa kasidanoo.
- <sup>2</sup> Yaweefa Sioona maqusaki afeeka faqaafa maridanoo. Aiqama maqannaasi fasiqa anaasee urinnaaqaramafi maridanoo.
- <sup>3</sup> Minara aqamausa mina firaa uriqarara auquara amoo qifaranoo. Mifa kaaqa naaquqarafa maridanoo.
- <sup>4</sup> Afeeka faqaa karaambaiqa anee andeeqaranara kai aidimarifa maridanoo. Anee andeeqarana kai Isaraee maqa maaqaki quqaananoo. Anee andeeqarana faqa amana amana kai rainannimaqarana faqa maree mini quqaananoo.
- <sup>5</sup> Yaaweena maasa Anutuna amooqiaqa. Mina ufa irira qaari aqa oonuree minara innaaru qiaqa. Mina andeeqarafa naaquqarafa maridanoo.
- <sup>6</sup> Mooseesa Aaroonasa mina aanaiqikira fasiqaqara mariqau. Samueerafa faqa Anutunara innaaru qimarufa marinau. Minamusa Yaaweena innaaru kiqari aaroonanoo iriseenoo nari qimanniminai.
- <sup>7</sup> Yaaweefa onnamuqiqari misa ufa qimanniminai. Misa mina naamuqira ufa faqa sanda ufa faqa iriseeqa mimau kai fimariqua.
- <sup>8</sup> Oo Yaawee maasa Anutu ani faiqi anaasee aniara innaaru qiafana anee qimannimi-ananoo. Anee aqarana akiqara minninnisee marianafana mariannana misa uqannifiqaa. Anee misa aqarana akiqara apurarana nimi mariannana faqa uqannifiqaa.
- <sup>9</sup> Minara innee Yaaweena maasa Anutuna amooqiaqa. Mina naaquqara aqanasaa mina amooqiaqa. Yaaweefa maasa Anutufa andeeqarafa naaquqarafa maridanoo.

## 100

*Anutuna amooqira idi.*



<sup>1</sup> Aiqama maa maqanasaa mariasa Yaaweenara asasira idi ramamaqaaqa.

<sup>2</sup> Asasirana namufaqa Yaaweenana amooqiaqa.

Innee asasira idi ramammaree mina oorinni aniaqa.

<sup>3</sup> Innee sia Yaaweenara aunuaqa, mifa kai Anutufa maridanoo.

Mifa kai maasa auqinau, maasa minaindi maridaqa.

Maasa mina faiqí anaasee mina sipsipara foora maridaqa.

<sup>4</sup> Innee mina amaana maqa faandaamura kooqiki oonuree dufi dufi qimammareeqa keeqaqa.

Oorureeqa amaana maqa kooqiki faqa dufi dufi qidaqa amooqiaqa.

<sup>5</sup> Yaaweefa andeeqarafa maridanoo, mina faiqí anaaseera amuqusirafa naaru naaru marifa maridanoo.

Mina mapukusee marira oosana naaru naaru marifa maridanoo.

## 101

*Karaambaiqa Dafidina qima afeekaikira ufa.*

<sup>1</sup> Ani sia taikara amuqusira oosanara faqa amana kai nimira oosanara faqa idi raidaqa.

Oo Yaawee, ani idi rama amaqaيداqa.

<sup>2</sup> Qini marirafa andeeqasee ufa siaisa marianaura.

Miqiqa marianana oo Yaawee anee yairee fee qinee marunnannai qumuree dadaaqinna-ree.

Qinee anukara marira qeeqa maaqaki marianaura.

<sup>3</sup> Sia qinee naaruura moo manda aaqara oosanara eedoo qianaura.

Anutuna ufara nimeesa uqimariasa oosanara qinee fidaqaammidaqa.

Sia misa manda oosana kaqikaqoo faqa keeqaanaura.

<sup>4</sup> Qinee unna oosana faqaasa futeeqa nianai auqanaura.

Qinee sia manda oosana maree mariana kaqikaqoo faqa dadaaqianaura.

<sup>5</sup> Nári niqoonausara unnufa qimasaida nupiqnupita qimaria fasiqa anaaseesa qinee misa taika nimaqaanaura.

Nári noori uqereee mariasa faqa aanoo masee nári iriranamau fimariasa faqa sia qini daaqa marifara nianasaa futeeqa aquanaura.

<sup>6</sup> Anutuna ufasaa nifu mundusee fimariasa qinee misara didiannoo.

Misa qini faqa qini maaqaki marifaranoo.

Aaqarana siaisa andeeqara mau kai fimariasa misa qini ainainira fasiqa anaasee marifaranoo.

<sup>7</sup> Unna ufa qimariasa sia uqanna qinee marunnanaki marifaranoo.

Qaara iriramau fimariasa faqa sia qini qifusaa marifaranoo.

<sup>8</sup> Qini maqa maaqaki aaqara oosana maree mariasa qinee aiqama kari randasee misa taika nimaqaanaura.

Anutuna maqusaki manda oosana maree mariasa qinee niqqaanaura.

## 102

*Ummaaraki mari kumaaraana innaaru.*

<sup>1</sup> Oo Yaawee qini innaaru qirana iria.

Qini qikiraqarafa anee dadaaqianneera anee marianannai fimarina iria.

<sup>2</sup> Qinee mandainainaki marianana sia aneenna oori kaqinni rafusu aqua.

Aneenna aaqoo rammatini mambi iria.

Qinee ani aaraanana dauni maqi qimasee qimaqimia.

<sup>3</sup> Qinee auriranaki faqa namuqaa dariranaki faqa marunanoo qini marirafa munara foora dauni taikararidanoo.

Qini qifaaqa idara foora muqurinoo maridanoo.

<sup>4</sup> Qinee aadana andanda maqamau faiqeera foora maqasaa aqufiqa, qinee naranara qikooqaiqa daarara fidaqa.

<sup>5</sup> Daarara marunanoo qini qifaaqa asaqufifaqa qimudaani aanaaqi maridaqa, firaqoo annadannada qidaqa maridaqa.

<sup>6</sup> Kaasau ufini faiqí sia maria maqa maaqanaki marindee qinee iqa maridaqa.

Qinee karoondara foora ooqeenna naakunduki kukeeqa maridaqa.

<sup>7</sup> Qinee qeeqaraa ufini maaqa ataufakaaqa mariara foora iqa ummaaraki maridaqa.

Sia faiqeega kaqi andeequmoorida maridaqa.

<sup>8</sup> Qini namuqaauqa faasaambaasaana manda ufa kai qimidaqa.

Qini ataasa ataasa qima qimaqee mariasa qini duqunnai akaqausa niquraraidaqa.

- 9-10 Anee qini aanoo qima qimaqee mariananoo qini narana fannoo dandara foora marifaqa naidaqa.  
Qeeqa daiquni daukunu namu faqa nammari naidaqa.  
Anee qini mareeqee nianai aqu qisaanaqa maridaqa.
- 11 Qini maqee marirafa nimanandara foora mariifanoo eendifanoo taikeera foora qinee iqa maridaqa.  
Qinee nimmuruara foora aadanusiqa rooraiqidaqa.
- 12 Kafaa anee Yaaweefa, naaruara uriqarara karaambaiqa marianaqa naaru kambiqaain-  
ausa kaqi aniara iriqa fifaranoo.
- 13 Anee findifinana Sioonna maqusanaasara qimudao qinnaranoo.  
Mi maqusanara qimudao qira aukuaana doo anireenoo.  
Maa maqee uqanna nari aukuaana maridanoo.
- 14 Ani ainainira fasiqauqa Isaraee maqannaasa Sioonna maqusara ridaqa.  
Mandaikinoo naakundukinoo marifaqa kaqi minara qimudao qidaqa.
- 15 Aiqama maqannaasa Sioonna maqusa dadaaqirana qafamasee Yaaweena auquara rufieefaranoo.  
Aiqama maa maqanasaaqaraa karaambiqaqaq misa Yaaweena mi areenara afeekanara naaquqaannoo.
- 16 Yaaweefa Sioonna maqusa kafaa usakasee miqoo nari uriqarara afeeka kooroo iannoo.
- 17 Mifa qumureenoo Isaraee maqannaasa fasiqa anaasee sarauirusara irinoo misa innaaru qirana faqa iriseenoo dadaaqiannoo.
- 18 Yaaweefa auqoo ainainara papiqasaa akara rumasainaqa naaru anisaa ani aruaki kambiqaainausa qafamasee mina amooqiaqa.
- 19 Yaaweefa nari sandaaqai naaquqarannai marunnaindari maqasaa mara miami qafanau.  
Mifa innaarunaindari maqasaqaraasa mara miami niuqinuu.
- 20 Kuqiranaki fuaqeeera karabusaki quqaqoosa annadannada qimarufanoo mifa iriseenoo iduku nisanau.
- 21 Miqinaqa Sioonna maqusaki misa Yaaweena auqu kooroommasee qimannimifaranoo.  
Sioonna moo auqu Yeerusaree maqusaki misa mina amooqifaranoo.
- 22 Moomoo maqannaasa moodaanaki Yeerusaree maqusaki suqufiqa Yaaweena amooqifaranoo.
- 23 Qinee kumaaraa fasiqa marunanoo Yaaweefa qini afeeka taika qiseenoo qini marirana mara qusa reenoo.
- 24 Miqimmasaifaqa qinee maaqi qiqa.  
Oo qini Anutu qinee kumaaraa fasiqa maridaqa, sia qini mara aquqisaa.  
Oo Yaawee, anee naaru naaru marianafa mariannoo.
- 25 Ooqai kuradoo aukuaana anee maa maqa maaqana poosauqa faakanara foora atukaranau.  
Aneenna asaukunnai innaaruna auqu quqoonafa mariananoo.
- 26 Anee aiqama ainaina auquqoonafa taikafuannoo.  
Aneenna kai kaqi marinnaranoo.  
Mi aiqama ainainausa nauraa qammunnara foora anaqi anaqiannoo.  
Anee mi nauraa ainainausa ooqeenaa qamunnara foora aqusainaqa taikafifaranoo.
- 27 Anee Yaaweefa naaru naaru miqi kai ina marinanoo ani marirafa sia taikarafa mariannoo.
- 28 Maasa ani ainainira fasiqauqa marunaqa maasa faiqi namu ani asumu mariranaki marifaranoo.  
Misasaa ani aruakinausa ani ititannimaqarafa misa fiq fiq inoo mariannoo.

## 103

### *Anutuna aidirafa.*

- 1 Oo qini qimana, Yaaweena amooqia.  
Qini daunduraki marianna aiqama ainainafa Yaaweena amooqia.
- 2 Oo qini maraquna, Yaaweena amooqia.  
Mifa paapaa qida qimimarinara sia qaunua.
- 3 Mifa aiqama qini aaqarana akiqara minni qisee marifa maridanoo.  
Mifa qini aurirana aiqama taikaqisee marifa maridanoo.
- 4 Yaaweefa qini madikakinaana uqeeera qiseemarifa maridanoo.  
Mifa amuqusiranannai faqa nari qimudao qiranannai faqa qini amiqi amiqimma qimaqaidanoo.

- <sup>5</sup> Yaaweefa qini mariranaki amiqira ainainannai qumbiqa qimaqaidanoo.  
Miqimmasaina qini marirafa aneesara foora fuka qisausi kambiqafinaqa kumaaraara foora kafa marianaara. (Dafidifa quqamuara qifaqa maasa ufa sia miqinoo marifaqa aneesara kai qiqqa.)
- <sup>6</sup> Uriqararasa nimeemaanai ummaarak mariasa Yaaweefa misa ufa irisee dadaaqianoo.  
Mifa misa nari ainaina andeeqasee nariqa kai nimidanoo.
- <sup>7</sup> Yaaweefa nari qimiruna Mooseena kooroommasee uqa fiqanau.  
Nari firaa afeeka ainainna auqoona Isaraee maqannaasa uqannifiqasoofaqa qafaqau.
- <sup>8</sup> Yaaweefa qimudaoo qirana faqa amuqusirana faqa faqaafa maridanoo.  
Mifa sia kai kaqi aanooqidanoo.
- Mina naaru marira amuqusirafa firaafa qumbiqanoo maridanoo.
- <sup>9</sup> Yaaweefa sia kisaagasaa inni manda oosanara nifairiannoo.  
Kafa mina aanooqirafa sia naaruara mariannoo.
- <sup>10</sup> Mifa sia maasa aagarana amana kai daridanoo, oorudupimasee daridanoo.  
Sia maasa aagarana akiqara mina amana kai daridanoo, ureeqasee darinoo.
- <sup>11</sup> Maqasaaqari innaarunai kisaagasaa marina amana kai Yaaweefa nari amuqusirana nariara rufiee mariasa nimidanoo.
- <sup>12</sup> Suani ururee marina faqa keeqee marina faqa nianasaa marifanoo mina amanasaa Yaaweefa maasa mandainaina mara agu qisaidanoo.
- <sup>13</sup> Faiqi nikausa faiqiara firaaqoo nimuqusidaqa.  
Miqikai inoo Yaaweefa nariara rufiee mariasara firaaqoo amuqusidanoo.
- <sup>14</sup> Yaaweefa maasa auqunara iridanoo, maasa maqannai taikaaninna ainairannai auqunara iridanoo.
- <sup>15</sup> Maasa faiqi faiqi marirafa maaqimminoo maridanoo.  
Maasa fifau adandara foora maridanoo.  
Maasa marirafa andandara foora urureenoo afufeenaara mafifanoo amiqi amiqinoo
- <sup>16</sup> marifanoo ufai fuaqasaifanoo kai kaqi taikaidanoo.  
Taikafinana sia kaifaa qafeennaranoo.
- <sup>17</sup> Yaaweenara eerairida mina ufa qaindusi mariasasaa mina amuqusirafa naaru naaru mariannoo.  
Mina andeeqarafa misaki faqa misa faiqi namuki faqa misa ninaiqimaraki faqa misa nifaqnausaki faqa mariannoo.
- <sup>18</sup> Yaaweena moodaanaki kira ufamau fimariasa faqa sia mina sandaufa minnisee kaqi mi sanda ufamau fimariasa faqa, misasaa faqa mina andeeqa nimaqarafa mariannoo.
- <sup>19</sup> Yaaweefa nari rakisi nimaqara qaari innaarunai quqaqaiifanoo afeekaikinoo maridanoo.  
Mifa aiqama maqannaasa uriqararafa maridanoo.
- <sup>20</sup> Yaaweena afeeka qangeeroouqa mina ufara eedoo qimariasa innee Yaaweena qimannimira ufa irimariasa innee Yaaweena amooqiaqa.
- <sup>21</sup> Innee innaarunai angeeroouqa moomoo maridaqa mina ainaini mariasa mina aidiramau fimariasa innee aiqamausa Yaaweena amooqiaqa.
- <sup>22</sup> Yaaweefa auqu quqoo ainainausa, mifa aiqama atinai rakisi nimaqee marisa innee faqa mina amooqiaqa.  
Qini maraquna anee faqa Yaaweena amooqia.

## 104

### *Aiqama ainaina auquna amooqirafa.*

- <sup>1</sup> Oo qini qimana anee Yaaweena amooqia.  
Oo Yaawee, qini Anutu, anee firaafa uqanna mariananoo.  
Anee qammunnara foora kaaqa qareenarana faqa uriqararana faqa afisirafa mariannoo.
- <sup>2</sup> Yaaweefa anee kaaqa qarana qumaree qamunnara foora afisi marianafa mariananoo.  
Kafa anee innaaruna qumareeseera maaqara foora usakaanano.
- <sup>3</sup> Yaawee anee aneenna maaqa innaaruna maarinni mari nammariinasaa usakaanano.  
Asuru fannoo ani rakira karara foora marifana anee minaki nimariananoo.  
Anee ufai qaqoosasaa ooqu marifi nimarianafa mariananoo.
- <sup>4</sup> Anutu anee ufai faiqiara foora niqiqanaqa ani ufa mara maree fidanoo.  
Aakuasaa faqa ani ainainira faiqiara foora maridanoo.
- <sup>5</sup> Yaawee anee maa maqa maaqana maaqa poosara foora rusisoonanoo afeekaikinoo maridanoo naaruara sia kasiannoo.

- 6 Oo Yaawee, oogai anee ooruku nammari quqasoonano aiqama maqa maaqa qa-munnara foora dukuninau.  
 Aiqama aaganauqa faqa rafaauqa finau.
- 7 Anee aanoo qimasee qaoo qunaqa nammariuqa rufiasee sandaqa.  
 Ani innaarunai qirana iriseeqa doo sandamaqaraasa mafiqau.
- 8 Mi nammalisa anusaa qari qumuree anee mariaqee qimaqoonna noopundunaki kai maridaqa.
- 9 Oo Anutu, anee oosuqoonnamau nammari fannoo marida naaru naaru sia fiaaqararana amana mariannoo.  
 Mi oosirafa nammari ititasainano sia kafa maqa maaqa rafaauqa fuannoo.
- 10 Yaawee anee qunaqa maqakiqari nammari uqa urureeqa noopundu runna qumidaqa.  
 Mi nammalisa aqana aikundanai fiq u aiqidaqa oofufidaqa.
- 11 Oosana oosana aandaqa faqa mi nammalisa naaqeera qumidaqa.  
 Kaasau doonkiuqa faqa mi nammalisa nimaqaara aadanusi marina quqeenaaqeera qumidaqa.
- 12 Ufniuuqaindi mi nammarina afaiqara saqariki aanaamu usakasee minaki maridaqa ufa qidaqa.
- 13 Anutu anee aneenna onnamukiqari aaku adiaananoo aaganauqa saa aqufifanoo ani amiqi amiqirafa maqa maaqaki qumbiqaidanoo.
- 14 Anutu anee aaku adiasaanano aandaqa neefandinna andandausa kambiqaidanoo.  
 Mi aakufa faiqi neemaria narannana afu amifanoo kambiqaidanoo.  
 Miqimasafanoo faiqi nari nara ainaina ummaqaidanoo.
- 15 Faiqi fannoo wainna qaqaama ummaqusee tiqisee tatisee wainna anoona naifanoo mina amuqusa fannoo asaidanoo. Mifa oorifa fadameena ooriki aku usaifanoo oori amiqi amiqidanoo.  
 Mifa feemu uquseenoo naifanoo amuaquinoo afeekaikidanoo.
- 16 Yaaweefa Sidaa saqariuqa Reebanoona maqa maaqaki ummaqusoofanoo marufaqa Yaaweena saqari fee qimariqau.  
 Aaku moomoo mi saqarisasaa aqufifaqa amiqi amiqidaqa.
- 17 Mi saqarisaki ufniuuqa aniraida aanaamu usakaidaqa.  
 Noonaafeesoona fooqaa ira ufi faqa miqoo moo saqari tookuseena fooqaa ira saqariki aanaamu usakaidaqa.
- 18 Kaasau mimmiuqa uriqarara aqanasaa misa quqaqoo qoo maridaqa.  
 Mi aqannasaa mataqooma fooqaa ira aandaqa ooni afooiranauqa aundurai maridaqa.
- 19 Anee Yaaweefa quqoonna auqu quqaqoonano aukuaana rainaidanoo.  
 Suani faqa auqu quqaqoonano aiqama kari nari keeqaaninnanara iridanoo mimau kai fidanoo.
- 20 Oo Yaawee, anee eendirafa mariannee qunanoo eendirafa anifanoo nandakinaa kaasau aandaq aana nidaqa.
- 21 Kaasau aandaq auqu raioona Anutufa amu narannara faaqariqanidaqa randaidaqa.
- 22 Suani ururafaqa mi aandausa oonu maree ani maree nari faiqee mariana kiaqa faiqaidaqa.
- 23 Faiqaafaqa faiqi anaasee kafa findififaqa nari ainainirannai oonuree ainainiqa fima riafanoo eendidanoo.
- 24 Oo Yaawee, anee moomoo ainainatia auqu quqoonafa mariananoo.  
 Aneenna amiqira iriranannai kai aiqama ainaina auqu quqoonafa mariananoo.  
 Anee moomoo kasi mari ainainna auqu quqaqoonafa maa maqa maqana qumbiqanoo maridanoo.
- 25 Ooruku nammari dinni dinni fiq fiq firaana quqaqoonafa maridanoo.  
 Minakinaa aandaq ainaina kasimarina firaana faqa kaqikaana faqa moomoo uqanna usidaqa sia amana nisaana rirana amana maridanoo.
- 26 Miqifaq mariafaqa sipauqa mi nammarina amuaqumau oonuree aniree idaqa.  
 Moo fira aandaq anee auqusee ooruku nammari sararianee qimasee auquqoonafa maridanoo.  
 Mina auqu Reeviatanna maridanoo.
- 27 Mi aiqama ainainausa ani Yaaweenara narana nari nee marianara qiafana nimimariananoo.
- 28 Anee Yaaweefa misa narana nimianaqa mara naidaqa.  
 Anee nimianaqa naafanoo nimuaqu idanoo.
- 29 Oo Yaawee anee misa ameesa uqunnimaqasaanaqa misa rufiidaqa.  
 Anee misa naidoo taikannimaqaanaqa misa kuqifa kafa maqaikidaqa.
- 30 Anee aidoo aiqama ainaina nimianaqa misa kasirana maraidaqa.

Maa maqa maaqanasaa aiqama atinai mari ainainausa fukaikamanimaqee mariananoo.  
<sup>31</sup> Yaaweena areenarafa naaru naaru marida kai mariani.  
 Nari auqu quqoo ainainausara asasiani.  
<sup>32</sup> Mifa maqasaa mara miami qafainara maqa fannoo rufiasee kasidanoo.  
 Asaukunnai aaqana ati auqainara idamuna ururaidanoo.  
<sup>33</sup> Qinee Dafidisa kaqi marunna kamuqoo Yaaweenara idi raanaura.  
 Qini daanna kaqi mari kamuqoo qeeqa Anutuna amooqira idi raanaura.  
<sup>34</sup> Qini asasirafa Yaaweefa marinnaindari qumi marinara qinee idi raannanara mifa asasiani.  
<sup>35</sup> Aaqee marinausa maa maqa maaqanakigari taikaaqanani.  
 Manda oosana faqaasa sia mariaqanani.  
 Oo qini maraquna Yaaweena amooqia.  
 Yaaweena amooqia.

## 105

*Anutunara faqa nari faiqi aanaaseera faqa qidanoo.*

- <sup>1</sup> Oo innee, Yaaweena dufi dufi qimamaqaa.  
 Mina uriqararanara kooroo iaqa.  
 Innee mifa auqoo ainainnara aiqama maqannaasa kooroomma nimiaqa.  
<sup>2</sup> Innee Yaaweena idi ramamaqaida mina amooqia.  
 Mifa idaaqira ainaina auqoonara qima nimiaqa.  
<sup>3</sup> Maasa Yaaweenaindi marunnanara asasiaqa.  
 Innee minara amooqi mariasa asasiaqa.  
<sup>4</sup> Innee dadaaqiranara Yaaweena qafai fanoo nimiani.  
 Innee maqee maqee mina amooqiaqa.  
<sup>5-6</sup> Innee Yaaweena ainainira fasiqa Abarahaamana akeeku akaaku mariasa mariafanoo.  
 Anutufa rusandeesamummaqaisa Yakoo boona faiqi namu mariasa, innee mifa amiqira ainaina auqoonara faqa sia faiqi auqaaqaa ira ainaina auqoonara faqa mina naamuaqira ufara faqa iriaqa.  
<sup>7</sup> Yaaweefa maasa Anutufa maridanoo.  
 Mina naamuaqira ufa aiqama maqa maaqaki mariasa iriaqee maridanoo.  
<sup>8</sup> Yaaweefa nari moodaanaki qima afeekaikira ufa sia aunuannoo, kaqi mina naaru naaru irinoo fuanoo.  
 Wan tauseenna oosana kambiqainausara Yaaweefa nari qima afeekaikira ufa sia aunuannoo naaru naaru misasaa mariannoo.  
<sup>9</sup> Yaaweefa nari moodaanaki kira ufa Abarahaamana faqa qimasee amuna sia minnisaannoo mimau kai fuannoo.  
 Isakeena faqa qima afeekaikira ufa amuna faqa sia minnisaannoo kai mimau fuannoo.  
<sup>10</sup> Yaaweefa Yakoo boona moo auqu Isaraeerana moodaanaki kira ufa amufa naaru naaru mariannoo.  
<sup>11</sup> Yaaweefa misa faqa moodaanaki kira ufa maaqi qinau, qinee Kannaana maqa maaqa ani amiananoo mifa ani faiqi namu anaiqimaraindi kammianoo.  
<sup>12</sup> Ooqai Yaaweena aiku asauku Isaraee maqannaasa oodaa maridaqa Kanna maqa maaqaki anaamuruara foora misa qambaana mariqau.  
<sup>13</sup> Isaraeerana akeeku akaaku maaqa maaqa aiqama maqusa oonuree aniree iqa nimirigau.  
<sup>14</sup> Miqi marufaqa qinee Yaaweesa qumee misa rakisi nimaqee mariafana sia moo fannoo misa ummaara nininau.  
 Qinee misa saara karaambaigauqa aanoommasee qaoo qimannimaqaaqafana.  
<sup>15</sup> Qinee Yaweesa maaqi qimasee mi karaambaigausa qimannimiqa.  
 Innee sia qini qisauku munduqaunaua nuqaaqa.  
 Sia qini tamummaqara fasiqauqa faqa mandaikamma nimaqaa.  
<sup>16</sup> Yaaweefa qufanoo aandaroo firaafa inoo misa narana aiqama taikanau.  
<sup>17</sup> Yaaweefa Isaraeena aiku asaukukinaana mina auqu Yooseefaana misa noorinni aqi qoofanoo Isipa maqa maaqai finau.  
 Misa Yooseefaana Midianna maqannaasa nimisee feefauru mara maroofaqa mina afitamaree Isipa maqa maaqai quqaqoofanoo moo fasiqa ainainira faiqikinau.  
<sup>18</sup> Isipa maqannaasa karabusa maaqaki quqasee sainnandannai aikuqara rumbaqa.  
 Misa qainnannai faqa mina anukaki rumbaqa.  
<sup>19</sup> Yooseefaafa karabusaki kaqi maridanoo qaina oosana qimannimufa anoona kambiqoofaqa qafamasee Yooseefaana idukiqau.

Yaaweena ufa fannoo Yooseefaafa miqunara kuqaa fee qinau.

<sup>20</sup> Isipa maqannaasa uriqararafa qufaqa Yooseefaana idukiqau. Moomoo maqannaasa uriqararafa maridanoo idukinau.

<sup>21</sup> Faraoofa Yooseefaana qumareenoo nari uriqarararusa nikiifa fasiqaikinoo maridanoo mina maqa maaqa faqa rakisianiffee qimasee karaambaiqaikinau.

<sup>22</sup> Miqimmaseenoo Faraoofa Yooseefaana anee qini uriqarararusa nikiifa fasiqaikina maridana qini irirana qimi mariasa anee naakapaa.

<sup>23</sup> Miqimmasoofanoo Yakoofoofa Isipa maqa maaqai oonuree miqoo marinau.

<sup>24</sup> Miqoo marufanoo Anutufa moomoo faiqi asumu nari faiqi anaasee Isaraee maqannaasa nimiseenoo misa nari namuqaa urinaaqarara afeeka faqaasaikamanisanau.

<sup>25</sup> Miqifa marida mikamuqoo Anutufa qumee misa iriranaki naakapoofaqa Isipa maqannaasa Anutuna ainainira faiqiuqa Isaraee maqannaasara fidiqaaidaqa nikaru qi mariqau.

<sup>26</sup> Miqifa marufanoo Anutufa nari ainainira fasiqa Mooseena misunnai aiqanau. Anutufa rusandeesamumaqoo fasiqana Aarona mareeqee seenoo Mooseena faqa niqiqoofaqa isipa maqusai fiqau.

<sup>27</sup> Oonuree miqanda Isipa maqa maaqaki maridaqa Anutuna naaquqara uqannifiqara ainaina Isipa maqannaasa Anutuna moo kira ainaina uqannifiqau.

<sup>28</sup> Mikari Anutufa Isipa maqa maaqaki asukuna quqasoofanoo asukuna misa rafaafaqafinau.

Sia fifau miqinau. Misa mina ufara aanoommasee rukiqoonara miqinau.

<sup>29</sup> Mifa Isipa maqannaasa nammari fidikaikamandoofaqa misa noodaanna aiqama kuqu taikaqau.

<sup>30</sup> Misa maqa maaqaki eeqamoosa moomoo misa uriqararusa maaqakiaqa faqa qumbiqaqiaqau.

<sup>31</sup> Anutufa qufanoo faufaari sia kasoo anireenoo maaqa maqusa ititanau.

Nunuka faqa miqikaimminoo misa maqa maaqa aiqama atinai qumbiqanau.

<sup>32</sup> Anutufa kafaa qufanoo aaku rirara foora mandee pupusamu qumuroofanoo aakuasaa quqasoofanoo aiqama atinai daraaninau.

<sup>33</sup> Mi ainainna qandannai Anutufa Isipa maqannaasa wainna sanda faqa saqari qaama faqa nee maruna faqa misa fifau saqariuqa faqa aiqama raudaandammasanau.

<sup>34</sup> Yaaweefa kafaa qufanoo aammaadi moomoo nukudara foora teeqimafufaqa sia amana nisaanarirana amana, maqa maaqa umbiqaqa mariqau.

<sup>35</sup> Aammaadi misa andanda faqa qafuqakinaa narana faqa aiqama nama taikaqau.

<sup>36</sup> Doo mi ainainausa taikaseenoo Anutufa quandakufanoo Isipa maqannaasa ooqa faiqi akoonaiqiuqa aiqama narinau.

<sup>37</sup> Yaaweefa Isipa maqannaasa ooqa faiqi akoonaiqiuqa naruseenoo Isaraee maqannaasa nifiqamareenoo misa Isipa maqannaasa kooru siruannai auqira ainainauqa mara maroofanoo Isipa maqa maaqakiqari nifiqee finau.

Sia moo fannoo teeroo quqoofa mariqau aiqamausa amiqirausa kai fiqau.

<sup>38</sup> Isipa maqannaasa Isaraee maqannaara rufiarafa firaqoo marunara misa fufaqa Isipa maqannaasa minara asasiqau.

<sup>39</sup> Anutufa Isaraee maqannaasa nifiqee fidanoo asurunnai faasaana auqaana aru nimaqeenoo eendaki idauru miqirafa kaaqa qamannimaqee marinau.

<sup>40</sup> Nifiqee fimarufaqa Isaraee maqannaasa Anutunara naranara iroofanoo afida faqa innaarunaindaraa narana manna feemu faqa naaqeera niminau.

<sup>41</sup> Mifa ooni afoomandoofanoo nammari radiqisee firaafa quminau.

Mi nammari faadana maqa maaqaki fira nammari foora ooqu finau.

<sup>42</sup> Yaaweefa misa nifiqee fidanoo nari ooqai qima afeekaikira ufa nari ainainira faiqi Abarahaammama amu ufanara irinau.

<sup>43</sup> Isaraee maqannaasa nari rusandeesamu mandoosa nifiqee fidanoo asasirana nimu-faqa mina namufaqa fidaqa faqa rumasee asasiqa fimarigaqau.

Anutuna rusadeesamu iranaki maridee qimasee idi ramasee fiqau.

<sup>44</sup> Yaaweefa moomoo maqannaasa maqa maaqa Isaraee maqannaasa mara nimisoofaqa misa miqooqaraasa naru nifaqasee misa narana andanda aiqama ainaina neemariqau.

<sup>45</sup> Yaaweefa sia fifau miqinau.

Isaraee maqannaasa mina aamuqira ufa faqa sanda ufa faqa maraaqee qimasee miqinau.

Innee aiqamausa Yaaweena amooqiaqa.

## 106

*Anutufa narí faiqí anaasee amiqimma nimaqaidanoo.*

<sup>1</sup> Yaaweenara amooqiaqa.

Innee Yaaweefa amiqirafa marifanoo mina amuqusirafa naaru naaru marinara mina dufi dufi qimamaqaaqa.

<sup>2</sup> Yafee moo fannoo mifa firaa ainaina auqoonara amana kooroommasee qiannoo fee.

Sia moo fannoo amanaikiannoo.

Yafee moo fannoo mina amana kai amooqirana amiannoo fee.

Sia moo fannoo amanaikiannoo.

<sup>3</sup> Mina naamuaqira ufa qaindusi mariasa faqa aiqama kari andeeqara oosana maree mariasa faqa misa asasidaqa.

<sup>4</sup> Oo Yaawee, anee aneenna maqannaasa dadaaqidana qiniara faqa iria.

Anee misa mara niseenana qini faqa mara qisaa.

<sup>5</sup> Miqimasainaqa ani faiqí anaasee ainaina rairaa inaga qinee kaqi maridaqa qafamaseeqa misa saimbaqa asasidaqa ani aiku asauku mariasa faqa nasu nasuriqa nua.

<sup>6</sup> Maasa qeeqa qikeeku qikaaku naannaa reeqa aaqara oosana maree marunausa maridaqa.

Maasa aaqara oosana faqa firaa manda aaqara oosana faqa maree marunausa maridaqa.

<sup>7</sup> Ooqai anee Anutufa Isipa maqa maaqaki naaquqara ainaina auqamasoonaga maasa qikeeku qikaaku qafamasee sia ani oosana iriqau.

Anee misa moomoo kari amuqusamma nimaqoonnana sia misa minara iriqau, qaunuseeqa misa Taatuqee nammari afaisaa oonuree ani aiqama afeeka faqaanara nimeesa uqusee nári nidiramau fimariqau.

<sup>8</sup> Yaaweefa narí amudaanai qimaru afeekanara kooroo ianifeera narí qima afeekaikira ufa mau finoo misa ummaarakinaana uqeera nisanau.

<sup>9</sup> Yaaweefa Taatuqee nammariara qufanoo aadanusinau.

Aadanusufanoo mifa misa aana muqunufaqa aadana maqasaa taqaqau.

<sup>10</sup> Yaaweefa Isaraee maqannaasara fidiqaa imarusa nisaukukinaana rafiqanau.

Mifa namuqaa nisaukukinaana maranau.

<sup>11</sup> Miqimmasoofaqa Taatuqee nammari fannoo misa namuqaa rafaqafinau.

Sia moodaa kaqi mariqau, aiqama taikaqau.

<sup>12</sup> Miqimmasoofaqa Isaraee maqannaasa mina qafamaseeqa Yaaweena qima afeekaikiranara kuqaa fee qimasee mina amooqira idi raqau.

<sup>13</sup> Miqidaqa misa Yaaweefa auqoo ainainnara kai kaqi auniqau.

Misa sia mina naakapara ufara afeesiqa.

Nári iriranamau kai fiqau.

<sup>14</sup> Oonureeqa misa aadana maqa maaqaki nidaqa nári Isipa maqa maaqai maru narana ainainausara firaqoo nári nidi maru narannara aiaaee qimariqau.

Miqidaqa misa firaqoo Yaaweena akooqara oosanannai amanammasee qafaqau.

<sup>15</sup> Miqiufanoo Yaaweefa misa amanira osana iriseenoo akooqoofanoo misa qu ainaina eedoo qimasee nimiseenoo manda aurirana namu faqa nimufaqa auri mariqau.

<sup>16</sup> Misa Isaraee maqannaasa miqoo aadana maqa maaqaki maridaqa Moosenaarai rairai qimariqau.

Misa Aaroonara Yaaweena naaquqara ainainira fasiqara faqa rairai qimariqau.

<sup>17</sup> Misa miqi qimarufanoo Yaaweefa qufanoo maqa fannoo oo raqafufanoo faiqí moo auqu Datannana nambiqanau.

Abirammana faqa mina aiku asauku namu faqa nambiqama rafaqa finau.

<sup>18</sup> Rafaafusoofofanoo Yaaweefa qufanoo manda oosana auqee mrusa akaqausa kaqi marusa idauru fannoo misakiaqa fasafasufanoo mi manda fasiqa qanda ufa iri marusa idauru fannoo aiqama qama taikasanau.

<sup>19</sup> Isaraee maqannaasa Sinai maqa maaqaki oonureeqa koorannai tasirisirimasee burimakau akoonaa aanaaqi amana auqiqau.

Misa mina auqu quqaqaqee Yaaweenara foora amooqimamaqee mariqau.

<sup>20</sup> Misa Yaaweena amiqira areenarana faqaana mafi nimeesa uquseeqa fifau andanda neemaru ainaina burimakau akoonaa aanaaqi amana auqirafa marunnai ubeekamafiqa amooqi mariqau.

<sup>21</sup> Isaraee maqannaasa Isipa maqa maaqaki marufanoo Yaaweefa naaquqara ainaina firaa ainaina auqamaseenoo Isaraee maqannaasa rafioo Anutunara misa qauniqau.

<sup>22</sup> Misa miqimmasee Isipa maqa maaqaki marufanoo Yaaweefa mookira ainaina firaatia auqamasoofaqa qafaqau.

Taatuqee nammari aaqa marufanoo Yaaweefa kaifaa naaquqara ainaina auqamasooafaqa misa minara faqa qauniqau.

<sup>23</sup> Yaaweefa misa manda oosana nindafamaseenoo qinau.

Qinee misa aiqama kuridi taikasaanauree qinau.

Mooseefa Anutufa qutaaqamaqoofa maridanoo Yaaweefa arana qoofanoo narirree qunasaa ititasoofanoo sia narinau.

<sup>24</sup> Misa aadana maqa maaqaki kaqi maridaqa Isaraee maqanaasa fuka idaaqira maqa maaqara Kanna maqa maaqaki fifandinnanara fidiqaammasee Yaaweena qima afeekaikira ufara faqa unna fee qiqau.

<sup>25</sup> Nari uqiqaana maqakiaqa maridaqa ninunu ridaqa Yaaweena ufa rukiee mariqau.

<sup>26</sup> Miqufanoo Yaaweefa nari asauku uqeeraseenoo maaqi qimasee qimannimaqanau.

Qinee qianaqa innee aiqama maa aadana maqa maaqanaki kuqu taikeefaranoo.

<sup>27</sup> Misa niku nisauku marinausa naru nindaqaaqa ianaqa aanaamurukinai furufariqa moodaa moodaa iquq mariqau.

Qinee aiqama niana maqa maaqakiaqa quqannisaanaqa miqoo kuqifaranoo.

<sup>28</sup> Isaraee maqannaasa aaqamasee Peeoora maqannaasa unna qira anutuna Baarana amooqi marunaki ootupaqau.

Peeroora maqannaasa andau tatufirana nari unnaqira anutusa suqasee nimisee nariara faqa akaqana neemarufaqa Isaraee maqannaasa aaqamasee misaki ootupaqau.

<sup>29</sup> Misa nari manda aaqara oosannai Yaaweena arana fundakiqau.

Misa miqi marufanoo Yaaweefa qufanoo misaki manda aurirafa kambiqafufaqa moomoosa kuqi mariqau.

<sup>30</sup> Miqiqqa nufanoo misaikiqari faiqi moo andeeqara fasiqa mina auqu Fineeqasafa findifinoo Isaraee maqanaasa manda oosana akiqara narufanoo mi manda aurirafa taikanau.

<sup>31</sup> Doo miqooqari Fineeqasanara andeeqara fasiqa fee qiqau, maqee faqa naaru naaru faqa minara andeeqara fasiqee qifaranoo.

<sup>32</sup> Isaraee maqannaasa Meeriba maqa maaqaki maru nammarinaki maridaqa Yaaweena amanammasee qafaidaqa arana qarana ami mariqau.

Miqiufanoo Mooseefa misa aaqaranasaa qaraana maraseenoo nari faqa moo aaqarana maranau.

<sup>33</sup> Isaraee maqannaasa Mooseena qarana fundakufanoo Mooseena ookiqari aaqara ufa kambiqanau.

<sup>34</sup> Yaaweefa Isaraee maqannaasa qimanniminau.

Innee Kanna maqannaasa manda oosana maree mariasa naru taikaaqee qufaqa sia misa miqiqau.

<sup>35</sup> Misa Yaaweena ufa rukiaseeqa sia narirai misa faqa maanaqa nari ami nari ami idaqqa misa saimbaqa moodaanaki kammafi maridaqa misa manda aaqarana faqa mara nari nifaaqai quqee mariqau.

<sup>36</sup> Anutuna faiqi anaasee unnaqira anutuna amana auquqoonauqa nimooqimannimaqee mariqau.

Misa miqiqqa nidaqa nari ufaanaki ninuka nari nari mariqau.

<sup>37</sup> Misa moo manda oosana maraqau.

Misa nari faiqi namu akoonaiqi faqa manaqa faqa marasaidaqa Kanna maqannaasa unnaqira anutusa noorinni munusaida tatufirana suqa nimimariqau.

<sup>38</sup> Isaraee maqannaasa nari faiqi aanaaqiuqa qikairi nisakadiki sia marusa nariqau.

Narusooofanoo mi fidikafa fifau teeqinoo mi fuka maqa maaqana putaa inoo maridanoo manda afundi marinau.

<sup>39</sup> Misa mi oosanna maroo mandoosanafa nari putaa mannimaqee marinau.

Misa Anutuna uqanna minniseeqa moo unnaqira anutusasaa mundidaqa sia Anutuna uqanna saa mapukusee mariqau.

<sup>40</sup> Miqunara Yaaweefa nari faiqi aanaaseera arana qoofanoo fidiqaa uqannaminau.

<sup>41</sup> Yaaweefa misauqa mareeqee moo maqanna aaqee marusa nisaukuki quqanau.

Quqasoofaqa misa namuqaa misasaa manda rakisi rakisinnimaqee mariqau.

<sup>42</sup> Mi namuqaasa nisaukuki marufaqa misa nariqa uriqaranannai rafaafuqoofofaqa misa niramundunai ummaarakiki mariqau.

<sup>43</sup> Miqi marufanoo Yaaweefa moomoo kari nari faiqi anaasee ummaarakinaana mareeqee kaqinni quqanau.

Miqidaqa nariqa kai qimasee Yaaweena naakaparanara aanoo qimasee ititiqau.

Miqidaqa misa mandainainaki keeqa qaraasaa mafiqau.

<sup>44</sup> Misa mi mandainainaki maridaqa quandaki Yaaweenara iki raqoofanoo Yaaweefa misa iki irinau.



Iriseenoo Yaaweefa misa aupuraranaki maruna amiqimmasee irisee niqafeenoo dadaaqinau.

<sup>45</sup> Niqafamaseenoo misara qimudao qimaseenoo nari moodaanaki kira ufara iriseenoo nari firaa amuqisirafa marunara faqa iriseenoo nari aanooqirana minnisanaau.

<sup>46</sup> Yaaweefa misa rumbannimaqee marusa naundura quandasoo faqa qimudao qimasee reendenammasee rakisinnimaqee mariqau.

<sup>47</sup> Oo Yaawee maasa Anutufa anee maasa ummaara mariranakinaana mara kaqinni quqannisaa.

Maasa aiqama maqannasa qambaana moodaa moodaa iqa marunnana sooqbaandum-meegee kaifaa qeeqa maqasaa quqaqisaa.

Miqi mannisainaqa maasa kaifaa ani naaquqara andeeqara auquara maasa dufi dufi qimamaqaqeeera miqimma qimaqaa.

Maasa ani amooqimamaqaidaqa maasa daundura areenee marinaqa asianaaura.

<sup>48</sup> Isaraee maqannaasa Anutuna Yaaweena amooqiaqa.

Maqee faqa naaru naaru faqa mina amooqiaqa.

Faiqi anaasee aiqama minara kuqaa fee qiaqa.

Yaaweena amooqiaqa.

## Mina Anaqianna Book 5

### 107

*Idi Ufa 107-150*

*Anutuna amiqira oosana amooqia.*

<sup>1</sup> Yaaweefa andeeqarafa marinara mina dufi dufi qima amaqaqa.

Mifa maasara amuqisirafa naaru naaru marifa maridanoo.

<sup>2</sup> Yaaweefa inni namuqaa nisaukuki umaaraki marusa maroosa innee kafaa kafaa dufi dufi qimasee amooqiaqa.

<sup>3</sup> Mifa inni aanaamuru maqa maaqakinaana nifiqee aninau.

Suani afu dinni dinni ataageendari faqa suani ururee marinnaindari faqa keeqee marinnaindari faqa nifiqee aninau.

<sup>4</sup> Akaqausa aadana maqa maaqanaki aana sia marunakinai auiaqa nimariqau.

Misa nariqa marifandinna maqusanara randasee sia paquriqau.

<sup>5</sup> Misa miqiga nimarufanoo naarareenoo nammariara nidufaqa misa nari mariranara sia kaqi marianauree qiqau.

<sup>6</sup> Misa nariqa ummaaraki maridaqa Yaaweena aaraqau.

Aaroo fanoo mifa iriseenoo misa ummaarakinaana mareeqeenoo amiqira qoo uqan-nisanau.

<sup>7</sup> Yaaweefa misa andeeqara aatata nifu uqu mareenoo misa mari fandinna maqusanaki quqannisanau.

<sup>8</sup> Miqi marisa Yaaweena sia taikaaninna amuqisirana dufi dufi qimamaqaqa.

Mifa faiqi sia auqaqaaira ainaina dadaqino auqoonara faqa dufi dufi qimamaqaqa.

<sup>9</sup> Mifa nammariara nidimarisa amanaikamma nimaqaseenoo naararee marisa amiqira nara ainainannai nimuaqumma nimaqainara dufi dufi qimamaqaqa.

<sup>10</sup> Akaqausa rumbaranaki marufaqa niku nisauku sainnandannai rumbaqafofaqa aupu-raidaga asukunaki firaa ninunuriranaki mariqau.

<sup>11</sup> Misa aiqama afeeka faqaa Anutuna ufara aanoommasee ititunara faqa mina naa-muaqira ufa minnisoonara faqa mi mandainainaki mariqau.

<sup>12</sup> Misa minaki marufanoo Anutufa firaa kadaapi rirana nimufanoo misa afeeka taikanau. Minaki maridaqa misa niku amaki saamu rufanoo sia moo fannoo misa uqeerarafa miqoo marinau.

<sup>13</sup> Misa mi aupuraranaki maridaqa misa quandaqqa Yaaweena aaroo fanoo misa aupu-rarana kinaana uqeerannisanau.

<sup>14</sup> Yaaweefa misa niku nisauku rumbara sainnanda rakeemma aanaaqi aanaaqim-maqusee asukunaki faqa firaa ninunuriranaki faqa maruna mareeqee kaaqa garaqoo quqannisanau.

<sup>15</sup> Miqi marisa Yaaweena sia taikaaninna amuqisirana dufi dufi qimamaqaqa.

Mifa faiqi sia auqaqaaira ainaina auqoonara faqa dufi dufi qimamaqaqa.

<sup>16</sup> Yaaweefa namuqaauqa karabusa kooqiuqa kooqaannai auqira kooqiuqa rakeemmasee qainnannai auqira kairi kooqi ititee maruna qumaree itairi andaanandaana rumuqusanau.

<sup>17</sup> Akaqausa nari ufa rukiqaranannai aupuraidaga furufariraisaikiqa mariqau. Nariqa aaqarana akiqara mi aupuraranaki mariqau.

- 18 Misa mi apuraranaki maridaqa nikoo nikaaidaqa narana faqa sia neemariqau.  
Misa miqidaqa kuqirana afaisaa mariqau.
- 19 Misa miqiqqa maridaqa nári apuraranakiqari Yaaweena aaramasaidaqa innauru qimariqau.  
Miqi qimarufanoo Yaaweefa nariqa apuraranakinaana uqeereeqee amiqiraqoo quqannisanau.
- 20 Mifa narí ufannai misa aurirana taikannimaqanau.  
Mifa madika afaisaaqaraana uqeereeqee kaqini quqannisanau.
- 21 Miqi marisa Yaaweena sia taikaaninna amuqusiranara dufi dufi qimamaqaaqa. Mifa faiqí sia auqaaqaa ira ainaina dadaaqinoo auqoonara faqa dufi dufi qimamaqaaqa.
- 22 Miqidaqa misa Yaaweenara dufi dufi qira aandau tatufirana suqa amiaqa.  
Amiseeqa misa asasira idinnai Yaaweefa amiqira ainaina auqoonara aiqamausa qiman-nimiaqa.
- 23 Doo akaqausa sipaki ooruku nammari amuaqumau nidaqa aanaiqira foora nidaqa ainaina munu nimi mini nimi idaqa feefauru maree mariqau.
- 24 Misa ooruku nammari farumaki fidaqa Yaaweefa faiqí sia auqaaqaa ira ainaina auqamaqoona qafaqau.
- 25 Yaaweefa qufanoo ufai firaafa aniree uqufanoo nammari amakau rinoo aaqanara foora inau.
- 26 Amakaura firaqoo idanoo misa sipa uqeera innaarunai seenoo muqufi maqai rumaseenoo imarinau.  
Miqi marufaqa minaki marusa misa paasosirafa taikafufaqa naaquqeenoo naindiriranau.
- 27 Misa sipa teeqi taaqufaqa minakinaasa firara munari minari idaqa nammari namaqaaqee furufari mariasa naannaree mariqau.  
Misa miqiqqa nufanoo misa sipa akoofasaikirafa sia nimanaukufaqa furufariqau.
- 28 Misa miqiqqa maridaqa nári apuraranakiqari Yaaweena aaramasaidaqa innauru qimariqau.  
Miqi qimarufanoo Yaaweefa nariqa apuraranakinaana uqeereeqeenoo amiqiraqoo quqannisanau.
- 29 Yaaweefa amakauriranara qaoo qufanoo daimafinau.  
Firaa amakaura rirafa taikafufanoo reendeninai.
- 30 Ooruku nammari fannoo kasoo inoo dai qimafufaqa sipaki mariusa nimuqusa uqbiqafufaqa asasiqau.  
Miqi marufanoo Yaaweefa misa mareeqeenoo nári fuanee qunnai ubeekamasoofaqa fiqau.
- 31 Miqi marisa Yaaweena sia taikaaninna amuqusiranara dufi fufi qimamaqaaqa.  
Mifa faiqí sia auqaaqaa ira ainaina dadaaqinoo auqoonara faqa dufi dufi qimamaqaaqa.
- 32 Misa faiqí suqiranaki maridaqa Yaaweena uriqararanara kooroo iaqa.  
Faiqí rakisirausa suqinnanaki mina faqa amooqiaqa.
- 33 Yaaweefa qufanoo nammari amiqimmasee aadanusinai.  
Kaqikaa nammariuqa faqa maqakiqari ururee marifaqa faqa tukaqnanau.
- 34 Mi maqa maaqanaki mariusa mandoosana akiqara Yaaweefa misa maqa ainoo faqaana kafa mara indirí maqaika masanau.
- 35 Kafa Yaaweefa aadana maqa maaqa mareeqeenoo nammari namu faqa uqeena uqeenira maqaikinai.  
Mifa aadana maqa maaqa mareeqeenoo nammari aanaaqi aanaaqi moomoo qumi maru maqanaikinai.
- 36 Miqiuqanoo Yaaweefa naranara sarauimarusa nifíeeqeenoo miqoo uqannisanau.  
Misa miqoo maridaqa maqusa indufusee miqoo mariqau.
- 37 Misa miqoo maridaqa oosana oosana narainaina faqa wainna sanda faqa ummaqimariqau.  
Ummaqusofanoo aiqama narainaina fannoo kambiqeenoo, rairaa rairaa inoo didisamu rimarinai.
- 38 Yaaweefa mi fasiqa anaaseesa narí aiku asauku amiqi amiqimma nimaqoofaqa misa miqoo moomoo kambiqeeqa aramaree fimariqau.  
Misa firinee maru aandausa mifa dadaaqufanoo sia oodaa mariqau.  
Misa faqa moomoo kambiqeeqa aramaree fimariqau.
- 39 Misa miqi marufaqa namuqaa manda fitiqnarana nimufaqa firaqoo apuraqau.  
Miqimmasee Yaaweena faiqí anaasee rafaqafusee nisaurirana nimiqau.
- 40 Yaaweefa misa rafaqafu nimaqee marusara fidiqaammaseenoo misa aadana maqa maaqakinai aana sia marunnai aqusoofaqa nimariqau.

<sup>41</sup> Mifa nari aiku asauku ainainara sarau imarusa nari noori runiranakinaana uqeereeqee amiqira qoo quqannisanau.  
 Kaifaa misa faiqi namu kambiqeeqa sipsipara foora moomoo kambiqafi aramaree fiqau.  
<sup>42</sup> Andeeqara oosana maree marusa mina qafamasee asasufaqa manda oosana maree marusa mina qafamaseeqa noo qumunamasee mariqau.  
<sup>43</sup> Naaqoo fainausa Yaaweena mi oosanna qafamasee amiqimasee iriaqa.  
 Yaaweena naaru marira amuqusiranara oonumafi iriaqa.

## 108

*Namuqaa sia dadaaqiani fee innaaru.*

<sup>1</sup> Oo Anutu qini qimuqusa aiqama anisaa mapukusee mundinoo maridanoo.  
 Minara qinee idi raidaqa ani amooqianaara.  
 Qini qimana anee findifua.  
<sup>2</sup> Qini piripunna faqa ufireena faqa findi fifaqa inniqaranai suani afu ooqu findifu-maisaanaura.  
<sup>3</sup> Oo Yaawee qinee aanaamurukiaqa ani dufi dufi qimamaqaanauranoo.  
 Qinee faiqi anaasee qambaanaani ani amooqianaara.  
<sup>4</sup> Ani aiqama kari amuqusirafa inaaruna ooraqaranoo maridanoo.  
 Ani mapukusee marira oosana fannoo qasuru ooru uqanoo maridanoo.  
<sup>5</sup> Oo Anutu, aneenna uriqararana innaarunaki uqannifiqainaqa maasa qafa.  
 Aneenna areenarana aiqama maqa maaqaki quqasainaqa qafaqa.  
<sup>6</sup> Oo Yaawee qini innaaru qirana irisee aneenna afeekannai maasa asumu maraqisaa.  
 Miqimmaseenana ani aidi maria fasiqa aanaaseesa mandainaina kinaana asumu mari-  
 aqera maraa.  
<sup>7</sup> Anutufa nari naaquqara uiaqana maqakiqari maaqi qinau.  
 Qinee ufoona ridaqa Seekeemma maqa maaqa rainasee qeeqa maqannaasa nimianaara.  
 Qinee Sukoota noopundu faqa miqi kai iqa qeeqa maqannaasa rainasee nimianaara.  
<sup>8</sup> Gireeadana maqa maaqa faqa Mannaseena maqa maaqa faqa qiqaindi maridanoo.  
 Eefaraimmana maqa maaqa faqa qeeqa qikiqa itita qimaqee mari ainaina fara foora  
 maridanoo.  
 Yuda maqa maaqa fannoo qini uriqararausara uqannifiqee mari saunu fara foora  
 maridanoo.  
<sup>9</sup> Qinee Anutusa Mooaba maqa maaqa mareeqee qeeqa qiku nammari uqi marunna  
 difaaniara foora masee ooru dupimma nisaanaura.  
 Qinee Eedooma maqa maaqa qiku aanaamu raipagu quqee marunna maqa maaqafa  
 ooreeqarafa mariannoo.  
 Qinee Firistia maqannaasa urinnaaqaramasee faqa rumasee ufoona ruanaura.  
<sup>10</sup> Oo Anutu, yafee qini aana muquninaqee Eedooma maqannaasa afeeka faandaamuraki  
 keeqafi narunauree.  
<sup>11</sup> Oo Anutu kuqaa fee anee maasa ameesa uquqiseenanee.  
 Anee sia fee oogai unnandee inana maasa rakira fasiqauqa faqa oonuree dadaaqinnaree.  
<sup>12</sup> Anee maasa dadaaqinaqa maasa nari namuqaa narua.  
 Faiqi faiqi dadaaqirafa sia amanaikiannoo.  
<sup>13</sup> Oo Anutu anee maasa dadaaqinaqa rakiranaki fuanana aneenna kai maasa namuqaa  
 rafaqafu nimaqaa.

## 109

*Ummaaraki maru fasiqana anunurira ufa.*

<sup>1</sup> Oo Yaawee, qinee ani amooqi marunafa mariananoo anee sia kaqi muqurina maria.  
<sup>2</sup> Manda oosana maree maria fasiqausa faqa nikaru qimaria fasiqausa faqa qini  
 namuqakamma qiadaqa.  
 Misa qiniara unna ufa qimariasa maridaqa.  
<sup>3</sup> Misa qini fidiqaamma qimaqee maria ufanannai qiniara qidaqa.  
 Misa sia oosana marifaqa kaqi fifau qini namuqaakamma qimaqaidaqa.  
<sup>4</sup> Qinee misara rimarunnana akiiqara misa fifau qini qifairidaqa.  
 Qinee misara innaaru qimarunaqa misa sia minara iridaqa kaqi qifairidaqa.  
<sup>5</sup> Qinee misa amiqi amiqimma nimaqee marunnana akiiqara misa manda oosana qini  
 qimidammia.  
 Qinee misara didi marina akiiqara qini fidiqaamma qimaqaidaqa.  
<sup>6</sup> Oo Yaawee aqee mari siaasana utaaqamasainanoo qini namuqaa koota amiani.  
 Anee qinanoo mina moo namuqaa fannoo mina kikiqa usuani.

- 7 Mi kootanaki mi fasiqanara aaqee mari fasiqafee qiaqanani.  
Mi manda fasiqana innaaru qiranara faqa aqara oosana fee qiaqanani.
- 8 Mi manda fasiqana marirafa qusasaa taikainanoo moo fannoo mina amaaqa maqafinoo mina saika maraani.
- 9 Mi fasiqana faiqi namu faiqi marifanoo mina anaaqa faqa adeedaana mariani.
- 10 Mina faiqi namu maaqa siaisa naranara aiqama maaqakiaqa innaarumma naqanuusa mariaqanani.  
Misa miqiga nidaqa ooqeenaa naakunduki rambairira maaqaki mariana, nifaqasaifaqa fifuaqanani.
- 11 Mi manda fasiqafa ufaase munnimma marasee mariufa kuqufinanoo ufaasu munnimma amu fasiqafa anireenoo mina ainaina aiqama nariara maraani.  
Moo maqannaasa anireeqa mifa kadaapi ririqoo ainainna nariara maraaqanani.
- 12 Sia moo fannoo mi manda fasiqanara amuqusiani.  
Sia moo fannoo mina faiqi faiqiara amuqusiani.
- 13 Saifaqa mina faiqi namu anaiqiqmara aiqama kuquaqanani.  
Akaqausa faqa sia mina auquara iriaqanani.
- 14 Mi manda fasiqana akeeku akaaku manda oosanara Yaaweefa oonumafi iriani.  
Mi manda fasiqana maqoo aanaaseena aaqarana akiqara naaru naaru sia minnaisaani.
- 15 Mi manda fasiqana akeeku akaaku aaqarana akiqara Yaaweefa aiqama kari iriani.  
Aiqamausa misara qaunuqanna saaqanani.
- 16 Mi manda fasiqafa faiqi anaaseera qimudao ira irirafa sia mina iriranaki maridanoo.  
Mifa ainaina siaisa faqa sarau imariasa faqa naundura ummaara reemariisa faqa oosana oosana ummaara niminoo kuqa narinau.
- 17 Mi manda fasiqafa niqurara ufa qiranara kai aidimarifa marinara anee mina akiqara aqurara ufa kai amia.  
Mi manda fasiqafa amiqi amiqimma nimaqaranara fidiaqaa imarinara sia moo fannoo mina amiqi amiqimma amaaqaaqanani.
- 18 Mi manda fasiqafa niqurara ufa afaaqa quqasee qamunnara foora afisirafa nidanoo.  
Mina nari niqurara ufa fannoo nari nammari naindee inoo nariki kai keeqaani.  
Mina niqurara ufa fadameenara foora nifaqasaa akusaafanoo keeqaindee nari mi manda fasiqanaki keeqaani.
- 19 Mi manda fasiqana niqurara ufa fannoo oonurandeenoo qamunnara foora narikai kukuqinoo mariani.  
Pikapara foora mina niqurara ufa fannoo aiqama kari nari kai rumbamaqanoo mariani.
- 20 Oo Yaaweefa qini namuqaa miqimmasee aupurarana nimia.  
Mi namuqaasa qiniara manda ufa qimariasa aupurarana nimia.
- 21 Oo uriqarara Yaaweefa aneenna qima afeekaikiranara iriseenana qini dadaaqia.  
Aneenna sia taikaaninna amiqira amuqusiranannai qini namuqaa nisaukukinaana mara aqumisaa.
- 22 Qinee Dafidisa ainaina siaisa sarau irausa maridaqa.  
Qini qimuqusaki dariara foora aupuraidafa.
- 23 Suani afu keeqaifanoo qini qimananda taikaindee inoo qini marirafa taikararamidanoo.  
Qini marirana aammaadiara foora ufai fuuqa aqindee qusasaa taikararidaqa.
- 24 Narana sia naunnanara qini qikuqara indindidanoo doori ummooqukidanoo.  
Qinee qifaqa asaquinoo marifaqa qimudaani aanaaqi maridaqa.
- 25 Faiqi anaasee qini qiqaqamasee uteeti naakada qidaqa.  
Misa qini qiqaqaidafa ninuka aqidaqa atasataasa qidaqa.
- 26 Oo Yaawee qini Anutufa anee qini dadaaqammaqisa.  
An i sia taikaaninna amuqusirafa marinara qini mareeqee asumu mariranaki quqaqisaa.
- 27 Oo Yaawee anee miqinaqa qini namuqaa iriqa ani Yaaweenara qini dadaaqidanoommifoo qimasee iriqa.
- 28 Qini namuqaauqa qini diqurara ufa qimifana anee amiqi amiqimma qimaqeenananoo.  
Qini aupurarana qimimariasa anee misa rafaqafu nimaqaa.  
Miqimmasainaqa qinee ani ainainira faiqi asasianauranoo.
- 29 Qini namuqaa nisaurirana dukunimma nimaqaa.  
Misa nisaurirana qamunnara foora kukuqiaqanani.
- 30 Qinee Dafidisa qeeqa dooqiari Yaweenara firaqoo dufi dufi qianaara.  
Faiqi moomoosa suqi marinnanaki mina amooqimamaqaanaura.
- 31 Yaaweefa mifa ainaina siaina itita amaqaaseenoo mina kuqa arirari mariasa nisaukukinaana marainara dufi dufi qianaara.

**110**

*Yaaweefa faqa mifa utaaqamaqoo karaambaiqafa Dafidifa faqa.*

<sup>1</sup> Yaaweefa maaqi qimasee qini karaambaiqa qimaminau.

Anee qini daaqa qisauku uqannai ooqu mari finaqa qinee ani namuqaauqa mareeqeeqa ani aramandunnai quqasaanaura.

<sup>2</sup> Yaaweefa ani urinnaqarara rakisirana Sioona maqusasaqari fraanaikamasainana aiqamatinaï rakisi nimaqeennaranoo.

Mifa qinoo anee aneenna namuqaauqa faqa rakisi nimaqeennaranoo.

<sup>3</sup> Anee nammeera qimasee namuqaa faqa rakunaaree qinaqa ani rakira fasiqauqa ani ufara eedoo qimasee afeekaikammasee rakifaranoo.

Kananaana suani oosana qaannaindari ani kumaaraauqa sia kasoo, qifi faramu andandasa mandinoo marindee moomoo aaqana uqasaa suqifaranoo.

<sup>4</sup> Yaaweefa qini karaambaiqara (Yisunara) qima afeekaikuna sia amana kaifaa moosaa fuannoo.

Mifa maaqi qimaseenoo qima afeekaikinau.

Anee naaruara naaruara aanaiqikirafa marinnaranoo.

Anee Meerakiseedeekafara foora maridana naaru naaru aanaiqikina marinnaranoo fee qinau.

<sup>5</sup> Qini karaambaiqa Yaaweena asauku uqannai maridanoo, mifa aanoo qinanoo maqasaa karaambaiqauqa urinnaaqa raannoo.

<sup>6</sup> Mifa maa maqanasaaqaraasa urinnaaqaramasee moomoo narueeqaida quqaannoo.

Mifa aiqama maa maqanasaa uriqararawsa rafaqafuannoo.

<sup>7</sup> Mifa rakiranaki maridanoo kaqikaa nammari aana afainni qumi marina namasee rakiranaki afeekaikamasee urinaaqaraannoo.

**111**

*Yaaweena amooqia.*

<sup>1</sup> Yaaweena amooqiaqa.

Qinee qeeqa qimuqusanai mina faiqi anaasee suqiranaki Yaaweenara dufi dufi qianaura.

<sup>2</sup> Yaaweefa auqoo ainainausa naaquqarafa maridanoo.

Mifa auquqoo ainainausa qafamasee asasi mariasa mi ainainausa oosanara iriraree qidaqa.

<sup>3</sup> Aiqama ainaina Yaaweefa auqoo ainainafa areenarafa faqa uriqarara amiqi amiqirafa faqa kai maridanoo.

Mina andeeqarafa naaru naaru marifa maridanoo.

<sup>4</sup> Yaaweefa narï naaquqara ainaina auqamasee maasara sia qaunuaqee qidanoo.

Mifa paapaa idanoo nifauee marifa maridanoo.

<sup>5</sup> Yaaweenara qeerairida mina ufa qaindusi mariasa mifa narana nimidanoo.

Mifa narï moodaanaki kira ufa sia qauni marifa naaruara irimarifa maridanoo.

<sup>6</sup> Mifa anaamuru maqa maaqa narï faiqi anaasee nimirannai narï afeeka uqan-nifqanau.

<sup>7</sup> Mina aiqama ainaina auqaranaki mifa narï mapukira oosana faqa Yaaweefa narï asaukunnai auqai ainainafa mapukirafa faqa andeeqarafa amana amana kai rainara oosana faqaafa maridanoo.

Mina aiqama naamuaqira ufa fannoo anoona ufa faiqi minasaa mundufi mariaqee ufa maridanoo.

<sup>8</sup> Mi naamuaqira ufausa anoona ufa qiranasaa faqa andeeqara mariranasaa faqa mundinoo maridanoo, naaru naaru afeekaikinoo mariannoo.

<sup>9</sup> Yaaweefa narï faiqi anaasee rumbararakinaana idukuseenoo naaru marira moodaanaki kira ufa misa faqa qinau.

Kaqa naaquqara andeeqarafa faqa uriqarara afeeka faqaafa faqa marifa maridanoo.

<sup>10</sup> Irirana faqaafa mariraree qimaseenana Yaaweenara eerairida mina ufa qaindusua.

Mina naamuaqira ufara eedoo qimasee mi mau fimariasa mifa andeeqasee rainara oosana nimidanoo.

Naaru naaru amooqirafa minaindi mariani.

**112**

*Andeeqara fasiqa anaasee asasirafa.*

<sup>1</sup> Yaaweena amooqiaqa.

Yaaweenara eerairammasee mina ufamau fimarifa faqa mina sandufara asasammasee afaqee marifa faqa asasiranaki maridanoo.

<sup>2</sup> Andeeqara fasiqa faiqi namu nariqa maqa maaqaki nimudaanai qimarinausa marifaranoo.

Minasaa aruakinausa amiqi amiqiranaki marifaranoo.

<sup>3</sup> Mi andeeqara fasiqana faiqi namu ainaina faqaasa arifaranoo.

Mina ainaina faqa naaruara rairammida mariannoo.

<sup>4</sup> Andeeqaraura faqa nifauee mariasa faqa qimudao qimariasa faqa asukunaki kaaqa garanakiara foora miqi mariasa maridaqa.

<sup>5</sup> Eedoo qimasee ufaasu munnimma nimimarifa faqa nari bisinisa kuqaa qira irirana mau kai auqee mari fasiqafa faqa asasiranaki maridanoo.

<sup>6</sup> Andeeqee marifa sia kuridiannoo.

Faiqi anaasee minara naaruara irifaranoo.

<sup>7</sup> Mi andeeqara fasiqafa manda ufaugaindi irinoo sia rufiannoo.

Mifa Yaaweena saqarikirafa afeekaikinoo marinara sia rufiannoo.

<sup>8</sup> Miqi marifa sia kaaqa amuqusifanoo rufiaidanoo.

Mifa mariinoo nari namuqaa rafaqaqafu nimaqainnana qafaannoo.

<sup>9</sup> Mi andeeqara fasiqafa afaaridanoo sarauimariasa nimidanoo.

Mina qimudao qirafa sia taikaannoo mi fasiqafa afeeka faqaafa marinaqa mina ufa ameemaanai keeqee faranoo.

<sup>10</sup> Miqi marifaqa manda oosana maree mariasa mina qafaafanoo niranaqaidanoo.

Misa noori kadamasee fidiqaamma amaqasee quqasee fidaqa.

Manda oosana maree mariasa misa mi andeeqara fasiqana andaikamma amaqarara tipundarimariafa naaruara taikafuannoo.

## 113

*Anutuna andeeqara oosana amooqia.*

<sup>1</sup> Yaaweena amooqiaqa.

Innee Yaaweena ainainira faiqiuqa mina amooqiaqa.

Yaaweena auqu amooqiaqa.

<sup>2</sup> Magee faqa naaru naaru faqa Yaaweena auqu amooqirafa kai mariani.

<sup>3</sup> Suani ururee marinnai mariasa faqa suani keeqee marinnai mariasa faqa aiqamausa Yaaweena auqu amooqimamaqaaqa.

<sup>4</sup> Mifa Yaaweefa aiqama maa maqa maaqanaki mariasa urinnaaqaranoo maridanoo rakisi nimaqaidanoo, mina qareenarafa innaaruna uriaaqaranoo maridanoo.

<sup>5</sup> Sia moo fannoo Yaaweena maasa Anutuna fooqaafa maridanoo.

Mifa meerai innaaruna uraqqaranoo maridanoo.

<sup>6</sup> Miqooqari mifa mara miami innaaruna faqa maqa faqa qafaidanoo.

<sup>7</sup> Yaaweefa ainaina siaisa nikuqara madaanai marisa uqereeqeenoo amiqiraqoo quqan-nisaidanoo.

Mifa sarau imariasa nari aupuraranakinaana uqeerrannisaidanoo.

<sup>8</sup> Uqeerasenoo misa mareeqee uriqararaura faiqi namu aqoondikamma nimaqaidanoo.

Uqeerasaifaqa Yaaweena faiqi anaasee (Isaraee maqannaasa) uriqararaura misa aqoondi kidaqa.

<sup>9</sup> Aafaikinoo marinna anaaseena Yaaweefa amiqimma amaqaseenoo.

Faiqi aanaaqi aranandaki rumasaifanoo minara asasidanoo.

Yaaweena amooqiaqa.

## 114

*Ainnaaqarara qoomaqa suqa naidaqa ree maru idifa.*

<sup>1</sup> Isaraee maqannaasa Yakooboona akeeku akaaku aanaamuru maqa maaqa Isipa maqa maaqakiqari quqasee aniqau.

<sup>2</sup> Miqiqqa ani marufanoo Yudana akeeku akaaku Yaaweena naaquqara fasiqa anaasee kammiqa mariqau.

Isaraee maqannaasa Yaaweenaindi kammiqa mariqau.

<sup>3</sup> Yaaweenaindi kiqa marufanoo Taatuqee Nammari misa nindafamasee quqasee sandanau.

Yooradanna nammari faqa misa nindafeenoo kasooinau.

<sup>4</sup> Maqa kasufanoo aqaanauqa faqa mimmi aanaaqiara foora kooripoo kooripoo imariqau. Kaqikaa amuaqu namuqaindi faqa sipsipa aanaaqiuqara maqi rafusaki rafusaki imariqau.

- 5 Oo maa Taatuqee nammari naqaa fee ifanee quqasee sandeenanee.  
 Oo Yooradanna nammari anee faqa naqaa fee ifanee kasoo inanee.  
 6 Oo aaqana namuqa naqaa fee ifaqee mimmi anaqiara foora kooripoo kooripoo ifee.  
 Oo amuaqunamuqaindi innee faqa naqaa fee ifaqee sipsipa aanaqiara foora rafusaki rafusaki ifee.  
 7 Maa maqa maaqafa mina quqoofa qumiranara aindiri raani.  
 Yakooboona Anutufa qumu marinara aindiri aindiri raani.  
 8 Mi Anutufa ooniara qufanoo quandaki nammari farumaikinau.  
 Mifa qufanoo afeeka ooniuga aanaaqi nammariuga kammafi qumi mariqau.

## 115

### *Anutufa kai kuqaa qirafa.*

- 1 Oo Yaawee sia maasa duqusaa qareenarafa mariani.  
 Ani auqusaa kai qareenarafa marani.  
 Ani sia taikaanina amuqisirafa faqa ani mapukusee marira oosana faqa marinara qareenarafa ani auqusaa mariani.  
 2 Aiqama maqannaasa nanaree maasara inni Anutufa yaiffee maridanoo fee qimasee iraaidee.  
 3 Maasa Anutufa innaarunai maridanoo.  
 Mifa nari aidiramau fidanoo nari aidi ainanna auqaidanoo.  
 4 Misa aiqama anaamuru mariasa unnaqira anutusa faiqi faiqi nisaukunnai koori faqa siruaannoo faqa auquqaafa maridanoo.  
 5 Misa noo aamara marifaqa sia ufa qidaqa.  
 Misa nifu faqa marifaqa sia qafaidaqa.  
 6 Misa naaqoo faqa marifaqa sia ufa iridaqa.  
 Misa naikaamara faqa marifaqa sia udi ramasee qafaidaqa.  
 7 Misa nisauku faqa marifaqa sia auqama qafaidaqa.  
 Misa niku faqa marifaqa sia nidaqa, sia kasi kasidaqa.  
 Misa nisananda faqa marifaqa minakiqari sia ufa qidammia.  
 8 Mi ainainausa auqusee mina saqariki mariasa nariqa sia kasi mari anutuna aannaraqa mariaqanani.  
 9 Oo Isaraee maqannaasa innee Yaaweena mandaaqaaqa.  
 Mifa inni dadaaqinoo itita nimaqaidanoo.  
 10 Oo Isaree maqannaasa aanaiqikirausa nikaaku mariasa innee Yaaweena mandaaqaaqa.  
 Mifa dadaaqinoo itita nimaqaidanoo.  
 11 Aiqama innee Yaaweena amooqi mariasa mina saqarikiqa.  
 Mifa inni dadaaqinoo itita nimaqaidanoo.  
 12 Yaaweefa maasara iridanoo amiqi amiqimma qimaqaannoo.  
 Mifa Isaraee maqannaasa amiqi amiqimma niseennoo.  
 Kafaa mifa aiqama nari aanaiqikirausa faqa amiqi amiqimma nimaqaannoo.  
 13 Yaaweenara naaqqaiifaqa mina ufa ameemaanaa keeqee mariasa mifa amiqi amiqimma nimaqaannoo.  
 Mifa uriqararausa faqa oorudupirausa faqa amana amana kai amiqi amiqimma nimaqaannoo.  
 14 Yaaweefa ani faqa ani akeeku akaaku faqa faiqi asumu nimiani.  
 15 Yaaweefa maa maqa maqana faqa innaarunna faqa auqu quqoofa mifa inni amiqi amiqimma nimaqaanni.  
 16 Innaaruna Yaaweenaindi kai maridanoo.  
 Maa maaqana Yaaweefa faiqi faiqnimufa maridanoo.  
 17 Kuqufuusa sia Yaaweena amooqidammia.  
 Ufa taikafifaqa madikaki kuqiqa mariasa sia Yaaweena amooqidaqa.  
 18 Maasa kaqi marunausa Yaaweena dufi dufi qimamaqaanura.  
 Maqee faqa naaru naaru faqa miqianaura.  
 Yaaweena amooqiaqa.

## 116

### *Kuqiranakinaana mara asumu quqasoofa Anutuna amooqinau.*

- 1 Yaaweefa qini innaaru qirana iri marinara qinee minara ridaqa.  
 2 Mifa qini ufa aaqoo rammatinimmasee irimarinara qinee kaqi marunna kamu minara innaaru qianaura.

- <sup>3</sup> Kuqirafa qini fiqumma datinoo marinau.  
 Kuqiranara rufiarafa qini qumara kuqiranaki quqararinau.  
 Qini rufiarafa faqa qinunurirafa faqa qumbiqanoo marinau.
- <sup>4</sup> Qinee miqiqqa maridaqa Yaaweena qeeqa qimuqusiranakiqari maaqi qimasee innaarukiqari qimamiqiafana.
- Oo Yaawee anee qini asumu mara quqaannee qidaqa.
- <sup>5</sup> Yaaweefa mifa nifauara oosana faqaafa faqa andeeqara oosana faqaafa faqa maridanoo.  
 Maasa Anutufa faiqi faiqiara amuqusirafa qumbiqanoo marifa maridanoo.
- <sup>6</sup> Soodaa qirausa siaisa Yaaweefa ititannimaqaidanoo.
- Qinee kuqaqaa ira ummaaraki marunanoo Yaaweefa qini mareeqee amiqiraqoo quqaqiseenoo.
- <sup>7</sup> Yaaweefa qini amiqimma qimaqainara qini qimuqusa anee kafa paasoosida afaqa quqasee maria.
- <sup>8</sup> Yaaweefa qini kuqiranakinaana kaqinni mara quqaqiseenoo qini daukunu aadanusu qimaqaseenoo qini rafaqaqafu qimaqarariana ititaqimaqeenoo.
- <sup>9</sup> Miqimmasainara qini aiqama marirafa maa maqanasaaqaraasaki mariasa faqa maridaqa Yaaweena afusaa kai maridaqa.
- <sup>10</sup> Qinee qeeqara namuqaa kaaqa qini radamuseeafoo qimasee kaqi kai Yaaweena saqarikidaqa.
- <sup>11</sup> Qinee qeeqa rufiaranakiqari maridaqa maaqi qiqa.  
 Sia faiqi faiqi moo saqariki mariafa maridanoo.
- <sup>12</sup> Yaaweefa qini amiqimma qimaqaina akiqara nana ainainee amianauree.
- <sup>13</sup> Yaaweefa qini asumu marainara dufi dufi qimamaqara wainna nammari tatufiranara foora amianauree.
- <sup>14</sup> Mina faiqi anaasee suqirana qambaana qinee amiraree qimasee qima afeekai kammaqaafannana amianauree.
- <sup>15</sup> Yaaweena ufamau fimariasa kuquafanoo Yaaweefa firaqoo aiaaeeqidanoo.
- <sup>16</sup> Oo Yaawee qinee ani ainainira faiqi maridaqa.  
 Qinee qini qinoofa undee kai iqa ani ainainira faiqi maridaqa.  
 Anee qini kuqiranaki quqaqoona mara qisoona maridanoo.
- <sup>17</sup> Qinee dufi dufi qirana faqa qeeqa innaaru qirana faqa aandau tatufiranara foora amianauree.
- <sup>18-19</sup> Ani faiqi anaasee nifusaa ani naaquqara maaqa maqusasaa Yeerusaree maqusa gambaana Yaaweena amirara qima afeekaikiafanna ainaina amianauree.  
 Yaaweena amooqiaqa.

## 117

### *Yaaweena amooqia.*

- <sup>1</sup> Innee aiqama maqannaasa Yaaweena amooqiaqa.  
 Innee aiqama fasiqa anaasee mina amooqiaqa.
- <sup>2</sup> Mina maasara aidirafa afeekaikinoo maridanoo.  
 Mina mapukusee marira oosana naaru naaru marifa maridanoo.  
 Yaaweena amooqiaqa.

## 118

### *Rakirana uriaaqaroonara dufi dufi qira innaaru.*

- <sup>1</sup> Yaaweefa andeeqarafa marinara mina dufi dufi qimamaqaaqa.  
 Mina faiqi aanaaseera aidirafa naaru naaru marifa maridanoo.
- <sup>2</sup> Isaraee maqannaasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>3</sup> Anutuna aanaaiqirausa mariasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>4</sup> Aiqama mina amooqimariasa maaqi qiqa.  
 Yaaweena faiqi aanaaseera aidirafa naaru naaru marifa maridanoo.
- <sup>5</sup> Qeeqa teerookiqari Yaaweena aaraafananoo mifa iriseenoo qini oosana oosana teerookinaana idukuqisanau.
- <sup>6</sup> Yaaweefa qini faqa marinara sia qinee rufiaanauree.  
 Moo fannoo sia amana mandaikamma qimaqaannoo.
- <sup>7</sup> Yaaweefa dadaaqi marifa marinara qinee Yaaweefa qini namuqaauqa rafaqaqafu nimaqee marina qafaanauree.
- <sup>8</sup> Yaaweena saqarikirafa amiqirafa uriqarafa maridanoo.



Faiqi faiqisaa mundirafa ureeqanoo maridanoo.

<sup>9</sup> Yaaweena saqarikirafa amiqirafa uriqararafa maridanoo.

Faiqi faiqi uriqarararasaa mundirafa ureeqanoo maridanoo.

<sup>10</sup> Moomoo namuqaauqa qini darirara fiqumma fufaqa qinee Yaaweena afeekannai misa naru taikaqiafana.

<sup>11</sup> Misa qini fiqumma aiqamai datimma fufaqa qinee Yaaweena afeekannai misa naru taikaqiafana.

<sup>12</sup> Qini namuqaauqa nunukara foora qini fiqumma fiqumma fufaqa qausana qoomara foora fasa fasi marufaqa qinee Yaaweena afeekannai misa naru taikaqiafana.

<sup>13</sup> Qini namuqaauqa qini darusee rafaqa firarufanoo Yaaweefa qini dadaaqi uqeeranau.

<sup>14</sup> Yaaweefa qini afeekaikirana faqa nimudaanai qirana faqa qimidanoo.

Mifa qini mandainaina kinaana uqeerana qiseenoo.

<sup>15</sup> Yaaweena rakira fasiqauqa uqaana maqaki اساسida qufoona rida qiana iriaqa.

Yaaweena uriqarara afeeka fannoo miqidaqinoo iriaqa.

<sup>16</sup> Yaaweena afeeka fannoo rakiranaki uriqararana maasa qiminou.

Mina uriqarara afeeka maasa dadaqifaqa rakirana uriqareeqa.

<sup>17</sup> Qinee sia kuqanaura.

Qinee kaqi maridaqa Yaaweefa dadaaqi oosanara koorooianaura.

<sup>18</sup> Yaaweefa qini firaa ummaara qimiseenoo qini kuqiranasa ititaqiseenoo.

<sup>19</sup> Naaquqara amaana maqa kooqiuga atuaqisaaga.

Qinee minaki keeqafi Yaaweenara dufi dufi qianaura.

<sup>20</sup> Mi kooqifa Yaaweeffinnai fimaria kooqifa maridanoo.

Andeeqarasa kai minaki keeqeefaranoo.

<sup>21</sup> Anee qini innaaru qirana irisee dadaaqi mariannanara ani Yaaweena amooqidaqa.

Anee rakirana uriqararana qimiannanara ani amooqidaqa.

<sup>22</sup> Maaqa usakee mariasa afeeka sabeena minnisoofta innaaqianna aiqama sabeenauqa uriqararafa marinou.

<sup>23</sup> Yaaweefa kai mi ainainna auquqoofta qafaidaqa idaaqira ainainee qidaqa.

<sup>24</sup> Yaaweefa maa faasaana rakiranaki uriqaree mari faasaanafa maridanoo.

Miqunara maasa اساسidaqa idi raaganani.

<sup>25</sup> Oo Yaawe maasa mareeqee amiqira qoo quqaqisaa.

Anee qiqama ainaina anoonaikamma qimia.

<sup>26</sup> Yaaweena auqusaa animari fasiqana Yaaweefa amiqi amiqimmamaqaani.

Maasa Yaaweena naaquqara amaana maqakiqari inni amiqi amiqimma nimaqaidaqa.

<sup>27</sup> Yaaweefa mifa Anutufa maridanoo.

Mifa maasa amiqimma qisee marinou.

Innee aiqamausa suqufiqa saqari amanee raudasee uqirasa اساسammamaree amaana maqaki keeqafi aidara fiqumma fiqumma iqaqa.

<sup>28</sup> Oo Yaawe anee qini Anutufa marianaqa minara qinee ani dufi dufi qimamaqaidaqa.

Qinee ani uriqararanara kooroo ianaura.

<sup>29</sup> Yaaweefa andeeqarafa marinara mina dufi dufi qimamaqaaqa.

Mina faiqi anaaseera aidirafa naaru naaru marifa maridanoo.

## 119

### *Yaaweena sandufa.*

<sup>1</sup> Aaqara oosana sia mari marirana faqaasa اساسidaqa.

Yaaweena sanda ufamau fimariasa faqa اساسidaqa.

<sup>2</sup> Yaaweefa naamuaqira ufamau fimariasa اساسidaqa.

Nariqa nimuqusannai mina ufa afaqee mariasa اساسidaqa.

<sup>3</sup> Miqi marinausa sia moo aaqara oosana maraidammia.

Misa Yaaweena aatata fimariasa maridammia.

<sup>4</sup> Oo Yaawe anee aneenna sanda ufa maasa qimiseenana mapukusee andeeqasee aiqama afaqaqee qimasee qimanniminou.

<sup>5</sup> Qinee ani naamuaqira ufa afaqaidaqa mapukusee marianauree qidaqa iridaqa.

<sup>6</sup> Qinee ani sanda ufa aiqama kasoommami iriaraasidaqa.

<sup>7</sup> Qinee ani andeeqara rainannimaqaranara iriseeqa qeeqa anukara qimuqusannai ani amooqianauranoo.

<sup>8</sup> Qinee ani naamuaqira ufa mau fuanaura.

Anee Yaaweefa sia qini minniqisaa.

<sup>9</sup> Naqi masee fee kumaaraa fannoo nari marirana maqee maqee anukaida mariannoo fee.

Ani Yaaweena ufamau fimarianannai miqiannoo.

<sup>10</sup> Qinee qeeqa qimuqusannai ani ufa qaindusiraree qidaqa amanidaqa.

Ani sanda ufa rukiaranasaa anee qini ititaqisaa.

<sup>11</sup> Qinee ani naamuaqira ufa qumareeqa qeeqa qimuqusaki quqaseeqa sia ani mandaikamma amaqaanaura.

<sup>12</sup> Oo Yaawee qinee ani amooqidaqa.

Aneenna oosanara qimaqimia.

<sup>13</sup> Anee qimunna sanda ufausa kafaa kafaa firaqoo nameera qidaqa qimannimianaura.

<sup>14</sup> Qinee ani sanda ufamau firanara didimarifaqa asasi marunafa moomoo umiasana ainainara asasimarunnana faqa uraaqaranoo maridanoo.

<sup>15</sup> Ani naakapara ufa qinee aiuqimarunausa maridaqa.

Ani qimannimira ufauqa amiqimmasee asooki rimarunausa maridaqa.

<sup>16</sup> Qinee ani sanda ufara asasidaqa.

Qinee ani naamuaqira ufara sia qaunusee mana mana ianaura.

<sup>17</sup> Qinee kaqi maridaqa ani qimannimira ufamau fuaneera aneenna ainainira faiqi qini amiqimma qisaa.

<sup>18</sup> Oo Yaawee ani naaquara anoona ufa qirana ani sanda ufaki marina irianeera qini irirana atuqasainaqa irianaura.

<sup>19</sup> Qinee maa maqanasaa qusasaa marianauranoo.

Sia aneenna sanda ufa qini kukeeqa qimaqaa.

<sup>20</sup> Qinee qinunu rimarunanoo didafdanoo.

Ani rainannimaqara ufara aiqama kari iriraree qimasee aupuraidaqa.

<sup>21</sup> Oo Yawee nári nimoo naamoo qimariasa anee aanoommasee qaoo qimarianafa mariananoo.

Ani naamuaqira ufa rukiasee kaqi runna fimariasa ani niqurara ufa ameemaanai maridaqa.

<sup>22</sup> Qinee ani sanda ufauqa afaqee marunausa marunannara misa ataasa ataasa qima qimaqaranakinaana faqa aasaandaana ufa qima qimaqaranakinaana faqa iduku qisaa.

<sup>23</sup> Uriqararausa moodaanaki sugufiqa qini mandaikamma qimaqarara tipundaari mari-afafa qinee sia minara irianaura kaqi ani naakapara ufa asaana rumasee iri-anaura.

<sup>24</sup> Ani naakapara ufauqa qini didirana qimidammia.

Mi ufausa qini daakapee mariasa maridaqa.

<sup>25</sup> Qinee kookoommaki rafaafa fusaafaqa kuqiraridaqa.

Anee aneenna qima afeekaika maqoonandee inana qini uqeera qisaa.

<sup>26</sup> Oo Yawee qinee qeeqa mariranara kooroommasee qimamunana anee iriseenana qima qimiananoo.

Aneenna oosana qima qimia.

<sup>27</sup> Qini dadaaqinaqa ani sanda ufa oosanara amiqimasee iria.

Anee miqinaqa qinee ani naaquqara naakapara ufara indee indee ida marianaura.

<sup>28</sup> Oo Yaawee qiqa qimudao qirafa qiqa rafaafidanoo.

Aneenna qima afeekaikamma qoonandee inana afeeka qimia.

<sup>29</sup> Anee unnaqira aatata fira oosana ititaqisaa.

Aneenna amiqi amiqira nakiqari aneenna sanda ufa daamuaqia.

<sup>30</sup> Qinee andeeqara aatata kai fuanaree qimasee utaaqeeqa.

Qinee ani rainannimaqara ufa amiqimmasee iriqa.

<sup>31</sup> Qinee ani Yaaweena naakapara ufa afaqee marunausa marunannara anee sia qisauri-ranaki quqaqisaa.

<sup>32</sup> Anee irirana moo faqa moo faqa qimiannanara ani naamuaqira ufa mau asasamasee fidaqa.

<sup>33</sup> Oo Yaawee aneenna sanda ufa oosana daamuaqinaqa qinee naaru naaru mi mau kai fuanaura.

<sup>34</sup> Anee irirana qiminaqa ani sanda ufa oosana irisee mi mau fuanaura.

Qeeqa aiqama qimuqusannoo afaqaanaura.

<sup>35</sup> Anee dadaaqinaqa ani sanda ufa kooroo imari aatata fua.

Qinee minaki asairana paquri marunannara minaki fuanaura.

<sup>36</sup> Anee qini didirana mareeqeenana aneenna sanda ufamau firatinai ubeekama qisaa.

Moomoo qumiasana faqaasaikiqa marira oosanai sia ubeekama qisaa.

<sup>37</sup> Oo Yaawee anee qini dadaaqinaqa anoona siai ainainaki sia fua.

Anee qima afeekaikunandee inana amiqi amiqimma qisaa.

- 38 Oo Yaawee ani ufa mau fimariasara qima afeekaikunandee kai inana qini aneenna ainainira faiqi mi qima afeekaikirana qinisaa faqa quqasainanoo anoonaikiani.
- 39 Qini aasaandaana ufa qimi mariafaqa rufiaqa nimarunnaakinaana anee uqereeqee kaqinni quqaqisaa.  
Ani andeeqara rainannimaqara ufa naaquqarafa maridanoo.
- 40 Oo Yaawee ani naamuaqira ufa mau firara dididanoo.  
Anee andeeqarafa mariannanara fuka marirana qimia.
- 41 Oo Yaawee ani qiniara firaqoo aidi marina uqaqifiqainaqa qafaa.  
Aneenna qima afeekammaqoonandee inana qini mandainainakinaana uqeera amiqi-raqoo quqaqisaa.
- 42 Miqimma sainaqa qini aasaandaana ufa qimimariasaa qimannimianauro.  
Qinee ani ufa saqariki marunnaana qimannimianauro.
- 43 Anee afeeka qiminaqa anoona ufa kai aiqama kari qia.  
Qini irirafa ani rainannimaqara ufasaa mundinoo marinara miqianauro.
- 44 Aiqama kari qinee ani sanda ufamau naaruara naaruara fuanauro.
- 45 Qinee ani naakapara ufamau firara amanamasee qafee marunnaana qinee adaarasaqanna idukiranaki marianauro.
- 46 Qinee ani naamuaqira ufa uriqararusa kooroommasee qimannimianauro.  
Qinee miqi qimasee qimannimidaqa sia qisauruanauranoo.
- 47 Qinee ani naamuaqira ufara didimarinara mimau fidaqa asasirana paquridaqa.
- 48 Qinee ani naamuaqira ufara didi marifaqa qeerairidaqa.  
Qinee miqidaqa ani naakapara ufara maqee maqee indee idaaqa.
- 49 Anee qini aneenna ainainira faiqiara qima afeekaika maqoonnanara oonumafi iria.  
Mi ufafa qini pooduqama qimaqeamarifa maridanoo.
- 50 Ani qima afeekaikira ufa fannoo qini kaqimarirana qimi marinara qeeqa aupuraranaki maridaqa qifaqa asooarana mareeqa.
- 51 Nári nimoo naamoo qimariasaa aiqama kari ataasa ataasa ufa qima qimaqaidammia.  
Miqi mariafaqa qinee ani sandufa sia minnisee moo saa fiqa.
- 52 Oo Yaawee ooqai aneenna rainannimaqara ufara qunaqa kaqi iridaqa.  
Mi ufafa qini qifaqa asooarana qimidanoo.
- 53 Mandoosana maree mariasaa ani sanda ufa rukiaafaqa qinee niqafaunanoo qirana qarafa qiniki qumbiqaidanoo.
- 54 Qeeqa qusasaa maa maqanasaa mariranaki ani naamuaqira ufasaa quandasee idiraidaaqa.
- 55 Oo Yaawee eendaki aniara iridaqa.  
Ani sanda ufara faqa iridaqa.
- 56 Ani naamuaqira ufamau funnanannoo asasirana paquridaqa.
- 57 Oo Yaawee qini aiqama didirafa anee kai mariananoo.  
Qinee ani sanda ufa afaqaanauree qimasee qima afeekaikiqa.
- 58 Qinee qeeqa aiqama qimuqusanoo anee qima afeekaikunandee inana qifauama qimaqaanneera iridaqa.
- 59 Qinee qeeqa marira oosanara oonumafi iriseeqa quandaki anee qimannimira ufa mau firaree qimasee qima afeekaikidaqa.
- 60 Qinee ani naamuaqira ufamau firaree qimasee sia manoo maanaa idaaqa kai kaqi idaaqa.
- 61 Manda oosana maree mariasaa qini qiku ufana fufusee qiniara minaki aruanifee qiafaqa qinee ani sanda ufa sia qauniqa mimau kai fidaqa.
- 62 Enda amuqusai qinee findifiqa ani andeeqara rainannimaqara ufara amooqidaqa.
- 63 Qinee ani ainaini mariasaa faqa ani sanda ufamau fimariasaa niqoondi maridaqa.
- 64 Oo Yaawee ani sia taikaaninna amuqusirafa maa maqa maaqana qumbiqanoo maridanoo.  
Miqinoo marinara anee aneenna naamuaqira ufa daamuaqia.
- 65 Oo Yaawee anee aneenna qima afeekaikira ufa mau finana qini amiqi amiqimma qimaqaananoo.
- 66 Qinee ani sandufa saqariki marunnaana anee oosana oosana irirana rainara iriqaraasirana faqa oonumafi irirana faqa qimia.
- 67 Qinee indaaru kaqirunna fimariafanana anee Yaaweefa anee firaq ummaara qimunaqa maqee qinee quandaki ani ufamau fidaqa.
- 68 Anee kaaqa andeeqarafa mariannanara aiqama ainaina imarianna ainainafa faqa kaaqa andeeqarafa mariananoo.  
Aneenna naamuaqira ufa daamuaqia.
- 69 Nári nimoo naamoo qimaria fasiqausa qiniara unna ufa qimariafaqa qinee qeeqa aiqama qimuqusanoo ani qimannimira ufa mau fidaqa.

- 70 Mi fasiqausa irirana siaisa mariafaqa qinee ani sanda ufaki asasirana paquridaqa.
- 71 Oo Yaawee dufi dufi qiqa manda oosana akiqara darimarianafa mifa qini dadaaqinara ani naamuaqira ufa oosana iridaqa.
- 72 Anee qimianna sanda ufanara didirafa oosana firaafa fiqarara fee qidaqa.  
Maa maqanasaa aiqama munnima marina uraaqaranoo maridanoo.
- 73 Anee qini auquseenana qini afeedamma qisaanoo.  
Anee irirana oosana qiminaqa ani sandufa irianauro.
- 74 Qinee ani qima afeekaikira ufa saqariki marunnaara aniara qeerairida ani ufa qaindusi mariasa qini qiqaqamasee asasifaranoo.
- 75 Oo Yaawee ani rainannimaqara ufa andeeqarafa marifaqa qinee iridaqa.  
Anee mapukusee marira oosana faqaafa mariannanara anee aupurarana qini manda oosana akiqara qimiananoo.
- 76 Aneenna ainainira faiqi qinisaa qima afeekaikamma qoonnamau finanoo ani sia taikaaninna amuqusirafa qini qifaqa asooama qimaqaani.
- 77 Qinee ani sanda ufara asasimarunnaara qifauama qimaqaa.
- 78 Nári nimoo naamoo imariasa unna qimasaida qini kiki qusi marianara nisauriranaki mariaqanani.  
Qinee qeeqaraa ani qimannimira ufara indee indee ianaura.
- 79 Ani Yaaweenara qeerairida ani ufa qaindusi mariasa faqa ani naamuaqira ufa irimariasa faqa qinee unnannai aniaqanani.
- 80 Qinee andeeqasee ani naamuaqira ufamau fuaqaana, miqi mariaanoo aqara qisaurirafa sia qini rafaqafu qisaani.
- 81 Oo Yaawee qinee ani dadaaqiranara kisaqaqasaa rakisunaisia kudoosaapaidaqa.  
Qinee qeeqa saqarikirana ani ufasaa rusidaqa.
- 82 Ani qima afeekaikiranara qinee rakisida marunanoo qifu anauru idaqaenoo.  
Qinee iraanana anee yairee fee qini dadaaqinnaree.
- 83 Qinee mimi apatannoo nammari sakee mariana auquqaafa anaqinoo mandaikinoo marindee irausa maridaqa.  
Qinee miqiqa maridaqa sia ani naamuaqira ufa aunidaqa kaqi maraqa fidaqa.
- 84 Qinee kisaqaqasaa fee rakisianauree.  
Yairee fee anee qini dari mariana akiqara ummaara niminnaree.
- 85 Nári nimoo naamoo imaria fasiqausa sia ani sanda ufamau fimariasa qini qumararara dikaanda indufidaqa.
- 86 Ani aiqama naamuaqira ufa nifaqa quqee maria afeeka ufafa maridanoo.  
Faiqi misa unna qimasee darirari marianara anee qini dadaqia.
- 87 Misa qini darirara qimeekaidaqa.  
Misa miqi mariafaqa qinee ani naamuaqira ufa sia minnisaidaqa.
- 88 Ani sia taikaaninna amuqusirafa marinara anee amiqi amiqimma qimaqaa.  
Qinee ani sandufamau fuaneera miqimma qimaqa.
- 89 Oo Yaawee ani ufa naaru naaru marifa maridanoo.  
Innaarunai faqa naaru naaru marifa maridanoo.
- 90 Ani mapukusee marira oosana fannoo miqikai inoo naaru naaru mariannoo.  
Anee maa maqa maaqana quqaqoonnaqoo kai maridanoo.
- 91 Ani naamuaqira ufa marinara aiqama ainaina maqee kaqi maridanoo.  
Mi aiqama ainainausa ani ainainira faiqiara foora marianara maqee kaqi maridaqa.
- 92 Ani sanda ufa sia qini asasirana oosana marinaqau qinee qeeqa umaara ameemaanai kuqunaigini.
- 93 Qinee sia ani naakapara ufa qaunuanaura.  
Mi ufafa marinara minannai qini kaqi marirana maa maqanasaa qimiananoo.
- 94 Oo Yaawee qinee anindi maridaqa, qini dadaqia.  
Qinee ani naamuaqira ufamau firaree qidaqa amanidaqa.
- 95 Mandoosana maree maria fasiqausa qini darirara qimaarusidaqa.  
Misa miqi mariafaqa qinee ani sanda ufara kai indee indee idaqa.
- 96 Oosana oosana aiqama ainaina taikaaninafaqa kai marifaqa iridaqa.  
Miqinoo marifanoo ani naamuaqira ufa andeeqarafa sia taikaaninafa marifa maridanoo.
- 97 Oo Yaawee ani sandufara qinee firaqoo ridaqa.  
Qinee faasaambaasaana minara kai iridaqa.
- 98 Ani naamuaqira ufa fannoo qini faqa aiqama kari maridanoo.  
Qini amiqira irirana qimiseenoo qini namuqaa irirana uriqararusaikamma qi-maqaidanoo.
- 99 Qinee ani qimannimira ufa indee indee imarunnaara qeeqa daakapee mariasa faqa urinnaaqaramasee iridaqa.

- 100 Qinee ani Yaaweena naamuaqira ufa mau fimarunnanara qini irirafa faiqí firaasa irirana urinnaaqaraidanoo.
- 101 Qinee ani ufamau firaree qimaseeqa aiqama mandainainara qeerairammasee amaaraidaqa.
- 102 Oo Yaawee anee aneenna kai qini daakapee marianafa mariannanara qinee sia ani naakapara ufa qimeesa uqidaqa.
- 103 Ani naakapara ufa kaaqa adiafaaimarifa maridanoo.  
Mi adiafaairafa ookasaasa anoona kaaqa adiafaa imarina faqa arusee uriqaranoo maridanoo.
- 104 Qinee ani sanda ufa irisee minannai amiqira irirana maraidaqa.  
Miqinoo marinara aiqama kaqi runna fimaria aanausara qini fidiqaamma qi-maqaidanoo.
- 105 Ani ufa fannoo qini qikuki qoomara foora kaaqa qee marifaqa fidaqa.  
Ani mi ufafa kai qini aana kaaqa gama qimaqee marifaqa fidaqa.
- 106 Qinee ani andeeqara sandufara doori runusee qima afeekaikammasee naaru naaru mimau fuanauree qiafannana, maqee kuqaa mi mau kaimbuanaura.
- 107 Oo Yaawee qinee firaa aupuraranaki maridaqa anee aneenna qima afeekaikunnandee inana maa maqanasaa kaqi marirana qimia.
- 108 Oo Yaawee, qini dufi dufi qira innaaru qiranara eedoo qimasee aneenna naamuaqira ufa qima qimia.
- 109 Qinee aiqama kari kuqirana afaisaa maridaqa taikaranara deedaqidaqa.  
Miqiqa maridaqa qinee sia ani sanda ufara qaunidaqa.
- 110 Mandoosana maree mariasa misa qini qimaara ufaanara foora fufusaafaqa qinee sia rufiamaree ani naamuaqira ufasaqari kaqini fiqa.
- 111 Ani naamuaqira ufa qini naaru marira qumiasanara foora maridanoo.  
Mi ufausa qini qimuqusa asasirana qimi maria ufausa maridaqa.
- 112 Qinee ani sanda ufa mau fuanauree qimasee iridaqa.  
Ani sandufa mau fifi inaqa qeeqa kuqiranaki munu taikaanura.
- 113 Ani sandufamau sia aiqama kari fimariasara qinee fidiqaammidaqa.  
Miqidaqa ani sandufara kai qinee ridaqa.
- 114 Oo Yaawee anee qini itita qimaqee marianafa mariananoo.  
Minara qinee qeeqa irirana ani qima afeekaikiranasaa rusisee maridaa.
- 115 Innee mandoosana maree mariasa qini daaqaqari nianasaa fifuqa.  
Qinee qeeqa Anutuna naamuaqira ufamau fuanaura.
- 116 Oo Yaawee anee qima afeekaikunandee qinana afeeka qiminaqa kaqi maa maqanasaa marianaura.  
Anee dadaaqinanoo qini daundura anisaa mundirafa sia taikaannoo.
- 117 Anee qini qumaree uqeera qisainaqa qinee amiqiraqoo marianaura.  
Anee miqimma qisainaqa qinee aiqama kari ani naamuaqira ufasaq irirana rusianaura.
- 118 Ani sanda ufa rukiee mariasa anee mininnisee mariananoo.  
Misa ueeqarara tipundaarirafa fifau sia anoona marifa maridanoo.
- 119 Anee maa maqanasaa mandoosana maree mariasa madaapeera foora damunamma aqi marianafa mariananoo.  
Qinee minara ani naakapara ufara dididanoo.
- 120 Qinee aniara rufiidaqa.  
Qinee ani andeeqasee rainannimaqaranara irunanoo rufiarafa qini qumbiqa qi-maqaidanoo.
- 121 Qinee andeeqara oosana faqa amiqira oosana faqa maree marunausa maridaqa.  
Anee minara iriseenana sia qini minni qisainaqa namuqaa qini mandaikamma qi-maqaqa.
- 122 Anee kuqaa qima afeekaikammasee aneenna ainainira faiqi qini dadaaqa.  
Ramoo ramaa imariasa sia qini nári uriqaranannai rafaqaqafu qimaqaqa.
- 123 Oo Yaawee qinee ani asumu mara qimaqaranara kisaqaqasaa rakisidaqa marunanoo qifuki qaunduaridanoo.  
Anee qini namuqaa nisaukukinaana rafiaranara qima afeekaikamma qoonnanara afeesi marunanoo qifuki qaunduaridanoo.
- 124 Oo Yaawee aneenna sia taikaaninna amuqusirana amana kai qini amiqimma qi-maqasee aneenna naamuaqira ufa daamua qia.
- 125 Oo Yaawee qinee ani ainainira fasiqa maridaqa anee irirana oosana qiminaqa qinee ani naamuaqira ufa oosana irianaura.
- 126 Oo Yaawee faiqí anaasee ani sandufa rukieemarianara anee oosana uqannifiqara akuwana doo kambiqaidanoo.

- 127 Ani naamuaqira ufara qini didirafa kooru uraaqaranoo maridanoo.  
Kaaqa amiqira kooru uqanna faqa uraaqaranoo maridanoo.
- 128 Minara qinee ani aiqama naakapara ufa afaqaidaqa aiqama aaqara oosanara fidaqaqaa idaqa.
- 129 Ani naakapara ufa kaaqa amiqirafa marifaqa qinee qeeqa qimuqusa aiqamannoo afaqaidaqa.
- 130 Ani naakapara ufa oosana qimannimirafa kaaqa qarana nimidanoo.  
Mi ufafa sia iri mariasa irirana nimidanoo.
- 131 Ani naamuaqira ufa aniranara kisaqasaa rakisidaqa doo raqasee daannanai daannanai qida maridaqa.
- 132 Anee aniara rimamasara misa nifauee marianafa mariananoo.  
Anee qinee unnannai quandafi qini faqa qifauama qisaa.
- 133 Aneenna qima afeekaikunandee qinana qini saamuriranasaa itita qisaa.  
Anee qinanoo aaqara oosana fannoo sia qini rafaqa fu qimaqaani.
- 134 Faiqi misa nari uriqararanannai qini rafaqaqidammia, anee minakinaana qini mara qisaa.  
Miqimma sainaqa qinee ani naamuaqira ufa mau fuanaura.
- 135 Anee aneenna oori afu amiqi amiqiranannai qini miqimma qimaqasee aneenna sanda ufa daamuaqia.
- 136 Faiqi anaasee ani sandufa mau sia fuanara qini daukunu fannoo nammariara foora adiaidanoo.
- 137 Oo Yaawee anee kaaqa andeeqarafa mariananoo.  
Ani sandufa faqa aiqamausa amana amana kai andeeqa nimaqee marifa maridanoo.
- 138 Ani aataata fuqaee ufa fannoo kaaqa amana amana kai andeeqa nimaqee marifa maridanoo.
- 139 Qini namuqaa ani naamuaqira ufa minnisee mana mana imarianara qini aanoo qirafa idara foora qini qitaku qidanoo.
- 140 Ani qima afeekaikira ufa kaaqa mapukirafa maridanoo.  
Minara qini kaaqa dididanoo.
- 141 Qinee oorudupirausa marunaqa misa qiniara fidaqaqaidaqa.  
Miqi mariafaqa qinee sia ani naamuaqira ufara mana manamasee qaunidaqa.
- 142 Oo Yaawee ani andeeqarafa naaru naaru mariannoo.  
Ani sandufa faqa aiqama kari kuqaa anoona maridanoo.
- 143 Ummaara faqa inunurirafa faqa qiniki qumbiqaidanoo.  
Miqi marifanoo ani naamuaqira ufa fannoo asasirana qimidanoo.
- 144 Ani naakapara ufa aiqama kari amana amana kai andeeqannimaqee marifa maridanoo.  
Minara iriseenana anee irirana oosana qiminaqa maa maqanasaa kaqi marianaura.
- 145 Oo Yaawee qinee qeeqa qimuqusannai ani aaraidaqa.  
Qini nammeera qiranara qima qiminaqa qinee ani naamuaqira ufa mau fuanaura.
- 146 Qinee ani aaraidaqa qini mandainainakinaana uqeeera qisainaqa qinee ani sanda ufa afaqaanaura.
- 147 Suani afu maqee urimarinana, anee qini dadaaqianneera aaraidaqa.  
Qinee qeeqa irirana ani qima afeekaikira ufasaa quqasee maridaqa.
- 148 Maqee eendirana namu faqa kaqi marunanoo qifu faqbaqa iaqaqaiqaqa ani naakapara ufaqara oonu mafi iridaqa.
- 149 Oo Yaawee ani sia taikaaninna amuqusirafa marinara qini innaaruqirana iria.  
Aneenna nifauarana uqaqifiqasee qini marirana afeedamma qisaa.
- 150 Nidafirana faqa narirana faqa qimi mariasa adeedi anidaqa.  
Misa ani sanda ufa sia afaqee mariasa maridaqa.
- 151 Miqi mariafana anee Yaaweefa qini daaqa mariananoo.  
Ani aiqama naamuaqira ufaqa naaruara marifa maridanoo.
- 152 Qinee ooqai ani naakapara ufa iriqiafana.  
Mi ufaua anee qunaqa naaru marira ufaquaiqa mafiqua.
- 153 Qini aupurarana qafamasee minakinaana qini maraqisaa.  
Qinee sia ani sandufa qaununnana miqimma qisaa.
- 154 Qinee ufaki marunnana ititaqimaqasee qini idukuqisaa.  
Anee aneenna qima afeekaikunandee inana qini amiqiraqoo mara quqaqisaa.
- 155 Manda oosana maree mariasa misa ani sanda ufa mau sia fimariasa anee sia mareeqee amiqira qoo quqanniseennaranoo.
- 156 Miqi mariafana oo Yaawee anee qiniara amudaao qirafa firaaqoo marinara aneenna nifauarana uqaqifiqasee mareeqee amiqiraqoo quqaqisaa.

- 157 Qini namuqaauga ummaara qimi mariasa moomoo maridaqa.  
Misa miqiga mariafaqa qinee sia ani sandufasaaqari quandaki moosaa fiqa kaqi mi mau kai fidaqa.
- 158 Ani sanda ufa minnisee ueeqee mariasa qinee niqafamasee fidiqaamma ni-maqaidaqa.  
Sia ani naamuqaira ufa mau fimarianara miqidaqa.
- 159 Oo Yaawee doo qafaa, ani naakapara ufara firaqoo dididanoo.  
Ani aidirafa sia moosaa fimarinarara mariqoo kai marinara qini marirana afeedamma qisaa.
- 160 Ani sanda ufa oosana anoona maridanoo.  
Marifanoo ani aiqama andeeqara rainannimaqara ufafa naaru naaru marirafa maridanoo.
- 161 Misa faiqi uriqararawsa misa fifau qini mandaikamma qimaqaidaqa.  
Misa miqi mariafaqa qinee ani sanda ufara kai qeerairammasee qaindusidaqa.
- 162 Qinee ani qima afeekaikira ufara firaqoo asasidaqa.  
Mee faiqi moo fannoo koorara paqurimmasee asasindee qinee faqa miqi kai masee ani ufara asasidaqa.
- 163 Qinee aiqama unna ufara qikooqeenoo fidiqaa uqanna qidaqa.  
Miqi marunanoo ani sanda ufara kai dididanoo.
- 164 Qinee aiqama faasaana moodaanai qisauku taikasee dinni oonu qaaraqanda marasee kari ani andeeqara rainannimaqaranara dufi dufi qimamaqaidaqa.
- 165 Ani sandufara nidi marisa asooaranaki maridaqa.  
Sia moo ainaina fannoo nikuama niminaqa saamurifaranoo.
- 166 Oo Yaawee anee qini asumu mara qisaanneera afeesidaqa anee daamuaqianna mau kai fidaqa.
- 167 Qinee ani naakapara ufa mau fidaqa.  
Qinee qeeqa aiqama qimuqusanoo minara dididanoo.
- 168 Qinee ani naamuqaira ufa faqa ani naakapara ufa mau fidaqa.  
Qinee aiqama ainaina auqee marunnana anee qafee mariananoo.
- 169 Oo Yaawee qini nammeera qirafa anee iannannai oorufuani.  
Aneenna qima afeekaikunandee inana irirana oosana qimia.
- 170 Qini innaaruqirana irisee aneenna qima afeekaikammaqoonnana amana kai mara amiqira qoo quqaqisaa.
- 171 Anee aneenna sanda ufa qima qimiannanara qinee aiqama kari ani amooqianauro.
- 172 Ani naamuqaira ufa aiqamausa andeeqasee raina nimaqee marifa marinara ani sanda ufara idi raanaura.
- 173 Qinee ani naamuqaira ufa afaqee marunnanara aiqama kari qini dadaaqirara deedaqina maria.
- 174 Oo Yaawee qinee ummaarakki marunnanara firaqoo ani afeedamma qimaqaranara rakisidaqa.  
Qinee asagirana ani sandufaki paquridaqa.
- 175 Anee maqee marirana qiminaqa amana qinee ani amooqianauro.  
Ani naakapara ufa fannoo qini dadaaqamma qimaqaani
- 176 Qinee auwara sipsipara foora auiaqa nidaqa.  
Qinee sia ani sandufa qimeesu uqimarunnanara anee aniree qini aneenna ainainira faiqi randasee paquria.

## 120

### *Dadaaqiani fee innaaru.*

- 1 Qinee manda ummaarakki maridaqa Yaaweena aaraunanoo mifa eedoo qimasee dadaaqinoo.
- 2 Oo Yaawee unnaqimariasa faqa ueeqee mariasa faqa nisaukukinaana mareeqee kaqinni quqaqisaa.
- 3 Innee unna qimariasa Anutufa inni naqaa fee mannimaqaannoo.  
Mifa naqimmaseenoo fee inni aupurarana nimianoo fee.
- 4 Sundia rakira feefannoo faqa fidika arira idaurunnai faqa naruannoo.
- 5 Inni qambaana marirafa kaasau maqannaa aamina maqannaasa qambaana foora mandaikiqa maridaqa.
- 6 Qinee asooaranara fidiqaa imariasaki kisaagasaa uqanna mariaafanausa maridaqa.
- 7 Qinee asooaranara qimarunaqa misa rakiranara kai qidaqa.

**121**

*Yaaweefa maasa itita qimaqee marifa.*

<sup>1</sup> Qinee aaganai qifu maqasee, qini dadaaqirafa yaindari fee aniannoo fee qidaqa.

<sup>2</sup> Qini dadaaqirafa Yaawee finaindari kai aniannoo.

Maa maqana faqa innaaruna faqa auqu quqoo finnaindari kai aniannoo.

<sup>3</sup> Mifa sia aniara qinana aqufinnaranoo.

Ani rakisi amaqee marifa aiqama kari afu maqaida maridanoo.

<sup>4</sup> Isaraee maqannaasasaa rakisinnimaqee marifa sia moo kari qaunduarinoo sia faigaidannoo.

<sup>5</sup> Yaaweefa ani rakisi amaqannoo.

Mifa ani itita amaqarara ani aqa maridanoo.

<sup>6</sup> Suani fannoo faasaana sia naruannoo.

Kafaa eendaki quqoona fannoo sia naruannoo.

<sup>7</sup> Yaaweefa aiqama mandainainaki innisaa ititamma nimaqaannoo.

Mifa inni nariranasaa itita nimaqasee innisaa rakisiannoo.

<sup>8</sup> Mifa kai inni firannai anirannaira rakisi nimaqaannoo.

Maqee faqa naaru naaru faqa rakisi nimaqaannoo.

**122**

*Yeerusaree maqusa amooqia.*

<sup>1</sup> Yaaweena amaana maaqai firaree qimasee qimaqimiafaqa qinee asasiqa.

<sup>2</sup> Maqee maasa maaqoo Yeerusaree faandaamura kooqiki keeqafi afuqaki maridaqa.

<sup>3</sup> Yeerusaree maqusa usakasoofoano kaaqa amiqirafa atiuqa amana amana kai inoo maridanoo.

<sup>4</sup> Isaraeena akeeku akaaku miqimmasee aniree Yaaweena naamuaqira ufa amana kai dufi dufi qirana amidaqa.

<sup>5</sup> Maaqoo Yeerusaree maqannaa karaambaigauqa nariqa faiqi anaasee ufa andeeqa nimaqararee qimasee ooqu mariqau.

<sup>6</sup> Yeerusaree maqusa asooaranaki marianifeera innaaruqiqa.

Yeerusaree maqusara rimariasa aiqama ainaina rairaa iani

<sup>7</sup> Oo Yeerusaree maqusa ani faandaamura afuqaki asoorafa kai mariani.

Ani karaambaigauqa nari maaqaki amiqimmasee mariaqa.

<sup>8</sup> Qeeqa ainainara faqa qeeqa qiqoondiuqara faqa irisee Yeerusaree maqusara maaqi qidaqa.

Asoorafa aniki mariani.

<sup>9</sup> Yaaweena maasa Anutuna amaana maaqara irisee inni Yeerusaree maqannaasee irairaamma nimaqaranara innaaru qidaqa.

Anutufa qimudaoo qirana amiani fee innaaru.

**123**

<sup>1</sup> Oo Yaawee qinee anee iannannai qifu maqaidaqa.

Innaarunai anee rakisi nimaqee mariannannai qifu maqasee dadaaqianneera innaaru qidaqa.

<sup>2</sup> Ainainira faiqi nariqa rakisirasasaa nifu mudi mariandee iqa kafa faqa ainainira maanaaqa miqikai inoo nari rakisira aanaaseesaa mundidanoo.

Oo Yaawee maasa Anutufa maasa miqi kai iqa ani qafaqa maridaqa anee maasara qimudaoo qirana qimianneera afeesidaqa.

<sup>3</sup> Oo Yaawee maasara qimudaoo qimasee qifauama qimaqaa.

Maasa moomoo aasaandaana ufa qima qimaqaidaqa.

<sup>4</sup> Ainaina faqaasa kisaaqasaa maasara uteeti qidaqa.

Kafaa nari nimoo qimariasa nari mara maree uriranannai maasa rafaqaqafusee ataasa ataasa qima qimaqaidaqa.

**124**

*Anutufa nari faiqi anaasee itita nimaqee marifa maridanoo.*

<sup>1</sup> Yaaweefa maasa sia dadaaqinaqau naqaa fee unaiqini.

Oo Isaraee maqannaasa minara qima qimifaqa iria.

<sup>2-3</sup> Yaaweefa maasa sia dadaaqinaqau namuqaa nari aanoo qiranannai maasa qumarasee kaqi kasi marunaqa nambiqaa qini.

<sup>4</sup> Miqinanooofau nammari aufirafa maasa maree fiqini.



Kaifaa nammari maasa rafaqaqafu qisaiqini.

<sup>5</sup> Nammari aufinoo firaqoo ai ai qimarifa maasa ukuqnama qimaqaiqini.

<sup>6</sup> Yaaweefa maasa namuqaara qifaqa sia maasa mandaikamma qimaqaanara maasa mina dufi dufi qimamaqaa.

<sup>7</sup> Maasa ufniara foora faiqi ufini ufanaki arurudukaki fiara foommiga.

Mi fasiqana ufaana raudafifaqa maasa qifaaga quqasee mana mana idaqa.

<sup>8</sup> Maasa dadaaqirafa Yaawee finnaindari anidanoo.

Maqa faqa innaaruna faqa auqu finnaindari anidanoo.

## 125

*Anutuna faiqi aanaaseesa rakisirafa.*

<sup>1</sup> Yaaweena saqariki mariasa Sioona aaqanara foora maridaqa.

Sia amana kasi annoo sia moo fannoo mina mareeqee moosaa quqaanno.

<sup>2</sup> Aaqanauga Yeerusaree maqusa fiqumma datinoo marindee inoo Yaaweefa nari faiqi anaasee fiqumma ititannimaqasee maqee faqa naaru faqa rakisi nimaqaidanoo.

<sup>3</sup> Mandoosana maree mariasa sia amana andeeqarusa maqasaa aiqama kari rakisifaranoo.

Misa miqifaqa andeeqarusa misasaaqaraa aaqara oosana maree foora.

<sup>4</sup> Oo Yaawee andeeqara oosana maree mariasa amiqi amiqimmannimaqaa.

Ani naamuqaira ufamau fimariasa amiqi amiqimma nimaqaa.

<sup>5</sup> Miqidana anee manda oosana maree mariasa aupurarana nimidana ani ufa minnisee kaqi runna fimariasa faqa aupurarana nimia.

Asoorafa Isaraee maqannaaki mariani.

Manda ainainakinaana mara kaqinni uqannisaani fee innaaru.

## 126

<sup>1</sup> Yaaweefa maasa Yeerusareenni qifiqee anufa qainasaara foora marinau.

<sup>2</sup> Maasa firaqoo naanidara qida asasida idiree mariqau.

Miqi mariafanaqa akaqa maqannaasa maasara maaqi qiqau.

Yaaweefa firaa ainaina dadaaqinoo fee qiqau.

<sup>3</sup> Kuqaa mifa firaa ainaina maasa dadaaqufaqa maasa minara firaqoo asasiqiafana.

<sup>4</sup> Aadaturunna aaku rifanoo nammari qumi marindee inana kaifaa maasa amiqi amiqimma qimaqaa.

<sup>5</sup> Naukuna namu faqa ummaqi mariasa asasira idi namu faqa unakuqaqanani.

<sup>6</sup> Asumu ainaina ummaqiraree qimasee naukunu namufaqa maree munu ummaqusee mariifaqa nara aukuna unaku maree asasira idi namu faqa maree anifaranoo.

## 127

*Anutuna amiqira oosana amooqia.*

<sup>1</sup> Yaaweefa sia maaqa usakaifanoo, usakara saika fannoo anoona siaifa mariqini.

Yaaweefa sia maqusasaa ititee marifanoo aufari mari fasiqafa kikiqinoo marida rakisi mari oosanafa sia amanaikiqini.

<sup>2</sup> Fifau kananaana eendai uqanna findifi ainaina kadaapirina fifina eendi mariananoo.

Yaaweefa nari aidi marisa faiqaqee iafanoo narana nimidanoo.

<sup>3</sup> Faiqi asumu Yaaweefa kaqi nimi mari ainainafa maridanoo.

Mifa kaaga afaaramasee amiqi amiqimma qimaqaidanoo.

<sup>4</sup> Kumaaraasaa maqainna faiqisa nari nikoona asaukuki rakira fasiqauqa duru feefara foora maridaqa.

<sup>5</sup> Miqira fasiqa moomoo faiqi duru feefara foora mina asaukuki karariqa mariafanoo asaidanoo.

Mifa ufa iriranaki mina namuqaauqa sia mina rafaqaqafu fifaranoo.

## 128

*Yaaweena ufa qaindusi mariana akiqara nimirafa.*

<sup>1</sup> Yaaweena ufamau fimariasa asasidaqa.

Mina naamuqaira ufasaa mariasa faqa asasidaqa.

<sup>2</sup> Anee miqi marianafa aiqama kari ani kadaapirirafa narana ainaina amianno.

Ani ainaina reemindeemirinoo marinana asasinnarannoo.

- <sup>3</sup> Ani anaqa fannoo wainna sandara foora maaqaki mariranaki moomoo qaqama iraanoo.  
Ani akoonaiqi faiqiuqa oorifa amiqira saqariara foora ani narana nee marianna difaana fiq fiqiuqa marifaranoo.
- <sup>4</sup> Faiqi Yaaweena ufamau fimarifa miqimmaseenoo kaaqa amiqi amiqiannoo.
- <sup>5</sup> Yaaweefa Sioonna maqusakiqari inni amiqi amiqimma nimaqaani.
- <sup>6</sup> Inneeqa kaqi marinna kamu Yeerusaree maqusaki aiqama ainaina reeminddee mirirana qafaqaqanani.
- <sup>6</sup> Innee kisaqaasaa marida inneeqa ninaiqimara niqafaqaqanani.  
Asoorafa Isaraee maqannaasaki mariani.

## 129

*Isaraee maqannaasa nariqa namuqaauqa mandaikamma nimaqaani fee innaaru qiqau.*

- <sup>1</sup> Innee Isaraee maqannaasa innee kumaaraasaa maruqooqari inni namuqa ummaara nimi maree ani marianara qima qimiaqa.
- <sup>2</sup> Qinee kumaaraa mariafannaqooqari qini namuqaauqa niranaqee marufaqa qini mandaikamma qimaqee mariqau.  
Miqidaqa sia qini uridaaqaree mariqau.
- <sup>3</sup> Maqarumasee afuqaki oora ateekee mariandee iqa namuqaauqa qini kaakadi qitaufaka runna oorara foora meemai uqanna ateekee mariqau.
- <sup>4</sup> Miqi marufanoo Yaaweefa andeeqarafa maridanoo rumbaranakinaana iduku qisanau.
- <sup>5</sup> Aiqama Sioonna maqusara fidiqaa imariasa rafaqa fusaifaqa anirandeeqa sandee-farannoo.
- <sup>6</sup> Misa maaqasaa ururee mari andanda fara foora urureenoo aadana usidanoo.
- <sup>7</sup> Sia moo fannoo mina suqu moodaanaki quqaidaqa sia rumbamaree fidaqa.
- <sup>8</sup> Aiqaaree fimariasakiqari sia moo fannoo Yaaweefa amiqi amiqimma amaqaanifee qifaranoo.  
Maasa Yaaweena auqusaa amiqi amiqimma amaqaidee qidaqa.

## 130

*Dadaaqiani fee innaaru.*

- <sup>1</sup> Qini qimuqusa mandaikirafa faruma uqnauriara foora inoo marifaqa oo Yaawee qinee ani innaaru kiqari aaraidaqa.
- <sup>2</sup> Oo Yaawee anee qini nameera qirana iria.  
Anee aaqoo rammatinimmaseenana qini qiki raqarana iriseenana dadaaqia.
- <sup>3</sup> Oo Yaawee anee maasa aaqarana papiqaki kaqi akara rumasaina marinanoo yafee ani ufa nimiranaki fiqaraannoo.
- <sup>4</sup> Maasara aneenna afusaa naaquqamasee mariaqeera maasa manda oosana akiqara minninnisee marianafa mariananoo.
- <sup>5</sup> Qinee Yaaweena dadaaqiranara asasida afeesidaqa. Mina ufa saqarikidaqa.
- <sup>6</sup> Qinee Yaaweena dadaaqiranara asasida afeesi marunafa aufari maria fasiqausa suani afu uriranara rakisi mariana uraaqaranoo maridanoo.
- <sup>7</sup> Yaaweena sia taikaaninna amuqusirafa marinara faqa mifa maasa mandainainakinaana dadaaqirara aidi marinara faqa irisee, Isaraee maqannaasa Yaaweena saqarikiaqa.
- <sup>8</sup> Mifa nari faiqi anaasee Isaraee maqannaasa nari aiqama aaqaranakinaana dadaaqian-noo.

## 131

*Anutuna saqarikammasee innaaru qira oosana.*

- <sup>1</sup> Oo Yaawee qinee qeeqa qimooqirana minniseeqa.  
Qeeqa ramoo ramaa irana faqa minnisee qimeesa uquseeqa.  
Qinee sia firaa ainainauqara oonu mafi iridaqa, qinee sia amanaiki marunna ainainara faqa sia iridaqa.
- <sup>2</sup> Qinee sia miqidaqa, qinee asoaranaki qifaqa quqasee maridaqa.  
Faiqi aanaaqi nari ninausa nifundanasaa ireeda faiqaqee iandee iqa marunanoo qini qimuqusa fannoo ireeda qiniki maridanoo.
- <sup>3</sup> Oo Isaraee maqannaasa maqee faqa naaru faqa Yaaweena kai saqari kiaqa.

**132***Anutuna amaana maqara amooqia.*

- <sup>1</sup> Oo Yaawee anee sia Dafidinara qaunua.  
Mifa oosana oosana aupurarana maroonara faqa sia qaunua.
- <sup>2</sup> Oo Yaawee Dafidifa qima afeekaikunara iria.  
Mifa ani afeeka faqaa Anutuna Yakooboona Anutuna faqa qima afeekaikunara iria.
- <sup>3</sup> Qinee sia qeeqa faiqara maaqai funaura.
- <sup>4</sup> Qinee sia idooeeqa faiqeeqa ianauranoo.
- <sup>5</sup> Qinee afeeka faqaa Anutuna Yakooboona Anutuna maqusa deedaqammaseeqa inaaqianna faiqaanaura.
- <sup>6</sup> Maasa Beeteereeqemma maqusaki maridaqa moodaanaki kira bookisara irisee Yeearimma afaasasaa paqurimmasee qafaqiafana.
- <sup>7</sup> Maasa maaqi qiafana. Anifaqa maasa Yaaweena amaana maqai oonuree mina ufa irira qaari oorinni oonuree amooqiaqa.
- <sup>8</sup> Oo Yaawee moodaanaki kira bookisa namu faqa mara maree aneenna naauqara uigaana maaqaki ania.  
Mi moodaanaki kira bookisafa ani afeekara kooroo imarina faqa maree aniree maaqoo naaruara maria.
- <sup>9</sup> Ani aanaiqikirausa aiqama kari andeeqara ainaina kai auqaaqanani.  
Ani faiqi anaasee faaqa fuisee qidaqa asasiaqanani.
- <sup>10</sup> Oo Yaawee aneenna ainainira faiqi Dafidinara qima afeekaikinau.  
Sia aneenna utaaqamaqaanna karaambaiqana minni aisaa.
- <sup>11</sup> Anee oori kandamasee Dafidinara qima afeekaikinau.  
Sia kaifaa mi qima afeekaikirana rukaanauranoo fee qimasee qima afeekaikamasee maaqi qinau.
- Qinee ani faiqi namukinaana moo karaambaiqaiqa masaananoo anee kuqu finanoo mifa Isaraee maqannaasasaa rakisiannoo.
- <sup>12</sup> Ani faiqi namu qini moodaanaki kira ufamau andeeqasee fiqa qini naamuaqira ufa nimunnana mau andeeqasee fifanoo misa faiqi namu faqa anee kuqinaqa ani amaaqa maqasee karaambaiqa marifaranoo.
- <sup>13</sup> Yaaweefa nari faiqara maaqaikianifeera Sioona maqusa utaaqanau.
- <sup>14</sup> Maaqoo qinee naaruara maridaqa rakisinnimaqaanaura.
- <sup>15</sup> Qinee Sioona maqusanaasa nidi mari ainainausa aiqama nimianaura.  
Mi maqusanakinaasa kudi mariasa naranannoo amiqimma nimaqaanaura.
- <sup>16</sup> Qinee mi maqusanakina aanaiqikirausa mariasa auqainna aiqama ainainna amiqi amiqimma nisaanaqa minakinaa fasiqa anaasee asasira idi raidaqa faaqa fuisee qifaranoo.
- <sup>17</sup> Mi maqusanaki qinee Dafidina akeeku akaakukinaana afeeka karaambaiqaiqa masaanaura.  
Mi maqusanaki qinee qeeqa utaaqamaqaunna karaambaiqana rakisinnimaqarana afeedamma aisaanaura.
- <sup>18</sup> Qinee mi karaambaiqana namuqaauqa nisaauriranannoo rafaqaafu nisaanauranoo.  
Mina rakisinnimaqaranaki mariasa amiqiranaki marifanoo aiqama ainaina irairaa iannoo.

**133***Akaqaafasaara rira oosana aidia.*

- <sup>1</sup> Anutuna faiqi anaasee moodaanaki marida nari amiqi nari amiqirafa kaaqa amiqirafa maridanoo.
- <sup>2</sup> Mi amiqi amiqirafa Aaroonaa akiaaqa oorifa fadameena amiqirana adiasoofanoo qumu rameeqee oosamau qumundee ira amiqi amiqirafa maridanoo.
- <sup>3</sup> Mi amiqi amiqirafa Qeeramoonaa aqaanasaaqaraa qifi faramu Sioona aqaanasaa aqufino aiqama ainaina asoosama nimaqaaindee idanoo.  
Yaaweefa miqi qimasee nari amiqi amiqirana nimirree qimasee qima afeekaikinau.  
Mi amiqi amiqirafa kisaqa marirafa maridanoo.

**134***Anutuna amooqira nameera qirafa.*

- <sup>1</sup> Innee Yaaweena naauqara amaana maqaki eendaki ainaini mariasa innee aiqama aniree Yaaweena amooqiaqa.

- <sup>2</sup> Amaana maqaki inneeqa nisauku uqeerasee innaaru qidaqa Yaaweena amooqimma amaqaqa.  
<sup>3</sup> Yaaweefa maa maqana faqa miri innaarunna faqa auqu quqoofa Sioona maqusakiqari inni amiqi amiqimma nimaqaani.

## 135

### *Anutuna amooqira idi.*

- <sup>1</sup> Yaaweena amooqiaqa.  
 Yaaweena auqu mina ainainira faiqiuqa amooqiaqa.  
<sup>2</sup> Innee Yaaweena naaquqara amaana maqaki ainaini mariasa innee Yaaweena amooqiaqa.  
<sup>3</sup> Yaaweefa andeeqarafa marinara mina amooqima amaqaqa.  
 Mifa maasara qimudao qimarinara mina auquara amooqira idi ramamaqaqa.  
<sup>4</sup> Mifa nariara Yakooboona utaaqanau.  
 Mifa mina akeeku akaaku Isaraee maqannaasi fasiqa anaasee narindi kiageera utaaqanau.  
<sup>5</sup> Maasa Yaaweefa aiqama unna qira anutusa firaqoo uriqararafa marinara iridaqa.  
<sup>6</sup> Innaaruna ameemaana faqa maqasaa faqa ooruku nammariki faqa mina aundurari faqa Yaaweefa nari aidiranannai kai imarifa maridanoo.  
<sup>7</sup> Mifa nari kai qifanoo asuru nannamu ira oonamu maqa dinni atindari uridanoo.  
 Asukuna arira oonamuki Yaaweefa aakuasaa quqasaifanoo aaku namu faqa qumidanoo.  
 Mifa nari afeedira maaqaki qariara foora ufaira qifanoo uqidanoo.  
<sup>8</sup> Yaaweefa Isipa maqannaasa ooqa faiqiuqa faqa misa aandau ooqa anaaiqiuqa faqa moodaa karammasee narinau.  
<sup>9</sup> Miqoo mifa misa karaambaifa faqa misa faiqi firaasa faqa aaqarana akiqara aupurarana nimirree qimasee misaki faiqi sia auqaaqaa ira ainaina faqa naaquqara ainaina faqa auqanau.  
<sup>10</sup> Mifa moomoo maqannaasa mandaikamma nimaqasee misa afeeka karaambaifa kuqa narinau.  
<sup>11</sup> Amooru maqannaasa karaambaifa mina auqu Sioonana faqa Basanna maqannaasa karaambaifa mina auqu Ookana faqa Kanna maqannaasa karaambaifa kuqa narinau.  
<sup>12</sup> Naruseenoo misa maqa maaqa rafleeqeenoo nari faiqi anaasee Isaraee maqannaasa niminau.  
<sup>13</sup> Oo Yaaweefa faiqi anaasee aiqama kari aniara Anutu fee qimasee koorooifaranoo.  
 Aiqama naaru kambiqaanausa aniara irifaranoo.  
<sup>14</sup> Yaaweefa nari faiqi anaasee ititannimaqasee nari ainainira faiqiuqara qimudao qiannoo.  
<sup>15</sup> Anaamuru mariasa misa unna qira anutusauqa koorannai faqa siruannai faqa faiqi nisaukunoo auquqoofauqa maridanoo.  
<sup>16</sup> Misa noo aamara marifaqa sia ufa qidaqa, nifu marifaqa sia qafaidaqa.  
<sup>17</sup> Misa naaqoo marifaqa sia ufa iridaqa.  
 Misa naikaamaraindari sia uqanna kaqi kaaqoo naannamma naidaqa.  
<sup>18</sup> Mi unnaqira anutusa auqu quqoosa faqa mina saqariki mariasa faqa mi sia kasi mari ainainnara foora mariaqanani.  
<sup>19</sup> Oo Isaraee maqannaasa innee Yaaweena amooqiaqa.  
 Innee aanaiqikirausa Aaroonu faiqi namu innee faqa Anutuna amooqiaqa.  
<sup>20</sup> Innee Reefina aiku asauku mariasa Yaaweena amooqiaqa.  
 Aiqama innee minara innaru qimariasa Yaaweena amooqiaqa.  
<sup>21</sup> Sioona maqusakiqari Yaaweena amooqiaqa.  
 Yaaweena amooqiaqa.

## 136

### *Anutuna dufi dufi qimamaqara idi.*

- <sup>1</sup> Yaaweefa andeeqarafa marinara dufi dufi qimamaqaqa.  
 Mina amuqusirafa naaru naaru marifa maridanoo.  
<sup>2</sup> Aiqa unnaqira anutusa uriqararana dufi dufi qimamaqaqa.  
 Mina amuqusirafa naaru naaru marifa maridanoo.  
<sup>3</sup> Aiqa karaambaifa afeeka urinnaaqararana dufi dufi qimamaqaqa.  
 Mina amuqusirafa naaru naaru marifa maridanoo.  
<sup>4</sup> Mifa kai fira naaquqara ainaina auqi marifa maridanoo.  
 Mina amuqusirafa naaru naaru marifa maridanoo.

- 5 Mifa narí amiqira iriranannai innaaruna auqufa maridanoo.  
 Mina amuqusirafa naaru naaru marifa maridanoo.
- 6 Mifa maa maqana auqeeqee nammari faruma amuaaqa quqanau.  
 Mina amuqusirafa naaru naaru marifa maridanoo.
- 7 Mifa suani faqa quqoona faqa auqinau.  
 Mina amuqusirafa naaru naaru marifa maridanoo.
- 8 Mifa suaniara anee iaqaranasaa rakisiannee qimasee auqinau.  
 Mina amuqusirafa naaru naaru marifa maridanoo.
- 9 Mifa quqoona faqa fasauqara faqa eendirana saa rakisiaqee qinau.  
 Mina amuqusirafa naaru naaru marifa maridanoo.
- 10 Mifa Isipa maqannaasa ooqa faiqiuqa narinau.  
 Mina amuqusirafa naaru naaru marifa maridanoo.
- 11 Mifa Isaraee maqannaasa Isipa maqusaindaraana aana muqunufaqa fiqau.  
 Mina amuqusirafa naaru naaru marifa maridanoo.
- 12 Mifa misa narí afeeka asaukunna nifiqee finau.  
 Mina amuqusirafa naaru naaru marifa maridanoo.
- 13 Mifa Taatuqee nammari qambaana rakeeinau.  
 Mina amuqusirafa naaru naaru marifa maridanoo.
- 14 Mifa narí faiqí anaasee minaki aana muqunufaqa fiqau.  
 Mina amuqusirafa naaru naaru marifa maridanoo.
- 15 Fitaqa fufanoo Isipa maqannaasa karaambaiqa narí rakira fasiqauqa faqa  
 oonuroofanoo ukuqnama nimaqanau.  
 Mina amuqusirafa naaru naaru marifa maridanoo.
- 16 Mifa narí faiqí anaasee nifu uqufaqa aadana maqa maaqaki fiqau.  
 Mina amuqusirafa naaru naaru marifa maridanoo.
- 17 Mifa maqasaa afeeka faqaa karaambaiqauqa narinau.  
 Mina amuqusirafa naaru naaru marifa maridanoo.
- 18 Mifa firaa nuqu faqaa karaambaiqauqa narinau.  
 Mina amuqusirafa naaru naaru marifa maridanoo.
- 19 Amooro maqannaasa karaambaiqa mina auqu Siqoonnana arinau.  
 Mina amuqusirafa naaru naaru marifa maridanoo.
- 20 Basanna maqannaasa karaambaiqa mina auqu Ookana faqa arinau.  
 Mina amuqusirafa naaru naaru marifa maridanoo.
- 21 Yaaweefa mi maqannaqanda maqa maaqa rafieeqeenoo narí faiqí anaasee Isaraee  
 maqannaasa niminau.  
 Mina amuqusirafa naaru naaru marifa maridanoo.
- 22 Nari ainainira faiqiuqa Isaraee maqannaasa niminau.  
 Mina amuqusirafa naaru naaru marifa maridanoo.
- 23 Maasa namuqaa rafaqafu qimaqoofanoo mifa maasara sia qauninau.  
 Mina amuqusirafa naaru naaru marifa maridanoo.
- 24 Mifa maasa namuqaa rumberanakinaana idukuqisanau.  
 Mina amuqusirafa naaru naaru marifa maridanoo.
- 25 Mifa kai faiqí faqa aiqama aandau auqu rarana faqa doodaani auqu rarana faqa narana  
 nimidanoo.  
 Mina amuqusirafa naaru naaru marifa maridanoo.
- 26 Anutufa innaarunai marina dufi dufi qimamaqaaqa.  
 Mina amuqusirafa naaru naaru marifa maridanoo.

## 137

*Isaraee maqannaasa Babilonia maqa maaqaki maridaqa iki raqoo ufafa.*

- 1 Maasa Yuda maqannaasa Babiroonia maqannaasa rumberanaki maridaqa Babiroonnia  
 nammariuqa afainni oqufaaqee idaqa Sioonna maqusara irisaidaqa iki raqee  
 mariqafana.
- 2 Maasa miqoo maridaqa doori runusee nariqa piripunna saqari asaanasaa diri qiafana.  
 3 Maasa rumbaqaqeeqee marusa maasara qidaqa idi raqee qiqau.  
 Idi raidaqa maasa اساسirana qimiaqee qiqau.  
 Sioonna maqusara rara idi rama nimiaqee qiqau.
- 4 Misa miqi qufaqa maasa maaqi qiqafana.  
 Maasa naqimasee fee aanaamuru maqa maaqakiaqa Yaaweena amooqira idi raanauree.  
 Sia amana.

- <sup>5</sup> Qinee Yeerusaree maqusara qaunuseefau qinee sia kaifaa naaruara piripunna amana aruanaura.
- <sup>6</sup> Qinee ani Yeerusaree maqusara sia aiqama kari irifau sia amana kaifaa naaruara idi raanaura.
- Anee qini uriqarara asasirafa mariannanara qaunusee sia amana kaifaa idi raanaura.
- <sup>7</sup> Babiroonnia maqannaasa Yeerusaree maqusa faandaamura rakeemmasee keeqoo faqa Eedoomma maqannaasa namuqaa fuki faaki qidaqa Yeerusree maqusa rapeepaa iaqera qunara Yaawee anee iriseenana mina akiiqara ia.
- Oo Yaawee anee misufara iriqaraasammasee sia qaunua.
- <sup>8</sup> Oo Babiroonnia maqannaasa innee kuridi fifaranoo.
- Maasa Isaraee maqannaasa saaroo qinana Babiroonnia maqannaasa narinafa asasianoo.
- <sup>9</sup> Inni Babiroonnia maqannaasa faiqi aanaaqiuqa qumaree maasa Isaraee maqannaasa saarooqi oonisaa rutukinafa asasiannoo.

## 138

*Anutunara dufi dufi qira innaaru.*

- <sup>1</sup> Oo Yaawee qinee qeeqa qimuqusa ookiqari dufi dufi qimamaqidaqa. Unna anutusa nifusaa ani Yaaweena amooqira idi raanaura.
- <sup>2</sup> Qinee ani naaquqara amaana maqa maritina'i ubeekamafi qi'qoori saunu arafi ani auqu amooqianaura.
- Ani sia taikaaninna amuqusiranara faqa ani mapukusee marira oosana faqa marinara ani amooqianaura.
- Anee aneenna auqu faqa aneenna naamuaqira ufa faqa aiqama ainaina urinnaaqararana uqannifiqoonnanara ani auqu amooqianaura.
- <sup>3</sup> Oo Yaawee qinee aaraunana iriseenana anee qimaqimiananoo. Aneenna afeekannai qini afeekaikamma qimaqaananoo.
- <sup>4</sup> Aiqama maa maqa maaqanaki maria uriqararaua ani Yaaweena ufa irianara ani amooqifaranoo.
- <sup>5</sup> Misa anee auqoonna ainainara faqa ani firaa afeekara faqa irisee idi reefaranoo.
- <sup>6</sup> Anee kaaqa mirinni uriqarana maridana ureeqarausasaa rakisiniamaqee mariananoo. Faiqi nari nimoo naamoo qimariasa sia amana ani afusaqari kukeeqeefaranoo.
- <sup>7</sup> Manda ummaara qini fiqumma datinoo marifana anee minakinaana qini amiqimma qimaqaananoo.
- Qini namuqaauqa aanoo qiafana aneenna afeekannai misa nindaqaa qimarianafa mariananoo.
- <sup>8</sup> Anee aiqama ainaina qima afeekaikamma qoonnandee innaranoo. Oo Yaawee ani amuqusirafa naaru naaru marifa maridanoo. Anee maasa Isaraee maqanaasara dadaaqiraree qunnana sia qaunusee minnisaa.

## 139

*Anutufa innisaimbaqara amiqimmasee iriseenoo amiqimmasee rakisidanoo.*

- <sup>1</sup> Oo Yaawee anee qini qimuqusaki diuqummaseenana qiniara irimariananoo.
- <sup>2</sup> Qini ooqu marirana faqa findifirana faqa aiqama ainaina auqee marunnanara faqa anee irimariananoo.
- Anee nianaindari qini
- Anee nianaindari qini qitukurakin
- Anee nianaindari qini qitukurakinaa
- Anee nianaindari qini qitukurakinaa iriranara irimariananoo.
- <sup>3</sup> Anee qinee ainaini marunnana faqa idooee marunnana faqa diuqimariananoo. Anee qinee aiqama ainaina auqee marunnanara irimariananoo.
- <sup>4</sup> Oo Yaawee qinee moo ufa qianeerunana anee faasai mi ufana aiqama irimarianafa mariananoo.
- <sup>5</sup> Anee qini fiqumma ina datina aiqamatina'i mariananoo. Anee aneenna afeekannai qini itita qimaqee mariananoo.
- <sup>6</sup> Ani qiniara irirafa kaaqa firaafa uriqaranoo maridanoo. Ani mi irirafa qini irirana faqa fiaaqaranoo maridanoo.
- <sup>7</sup> Qinee ani Yaaweena maraquna minnisee yaifee moosaa fuanauree. Qinee ani afu saaqari yaifee moosaa fuanauree.
- <sup>8</sup> Qinee innaarunai ooru firaree qianana anee minni faqa marinnaranoo. Qinee kuqiraua mariannai firaree qianana anee minni faqa marinnaranoo.

- <sup>9</sup> Qinee qaɣamaree suani afu ururee marina ooɣiaaɣarama fuanana anee minni faɣa marinnaranoo. Suani keeqee marina fiaaɣaraanana anee miqoo faɣa marinnaranoo.
- <sup>10</sup> Qinee mitinai marianana anee miqoo maridana qini aana muqunimma qisarara faɣa miqoo marinnaranoo.
- <sup>11-12</sup> Qinee asukunara kukeeqa qimaɣaannee qimasee kaaɣa qarafa qini fiq u fiq inoo marifa quandaki asukunaikiannee qiananoo asukuna fannoo sia ani afusaa asukunara foora maridanoo.
- Asukuna fannoo faasaanara foora kaaɣa qaannoo.
- Asukuna faɣa kaaɣa qarafa faɣa ani afusaa amana kai maridanoo.
- <sup>13</sup> Anee Yaaweefa kai qini daundurakinaa ainaina aiɣama auqunafa mariananoo. Anee qini qinoona aranandaki qini qifaaɣa moodaanaki ootupama qisaananoo.
- <sup>14</sup> Aniara ruftee mariafa mariannanara ani amooqidaɣa.
- Anee aiɣama ainaina auqee marianafa mookira ainaina naaɣuɣara ainaina auqee marianafa mariananoo.
- Qinee minara qeeɣa aiɣama qimuɣusannoo iridaɣa.
- <sup>15</sup> Qini qimudaani moodaanaki ootuppee marufana anee ireeda qini qinoona aranandaki moodaanaki quqaqisanau.
- Qinee miqoo kukeeqaranaki innooqee mariafanana anee qinee mariafannanara iri marinau.
- <sup>16</sup> Anee sia kambiqaaɣa mariafana qiqafanau.
- Qinee naaru moodaa moodaa faasaana auqaana ainainara ani papiqaki akara rinoo maridanoo.
- Mi moodaa moodaa faasaanafa sia kambiqanoo marufanoo miqoo ani papiqaki akararinoo maridanoo.
- <sup>17</sup> Oo Anutu ani iriranara irunanoo firaaqoo ummaara darinoo.
- Moomoo uqanna maridanoo.
- <sup>18</sup> Qinee asaana ruananoo nukuda faɣa arusee fiqaranoo mariannoo.
- Qinee faiɣaqee marii findi fiqa ani mi iriranara kaqi kai irimaree fidaɣa.
- <sup>19</sup> Oo Anutu anee mandoosana maree mariasa narinnaranoo fee qidaɣa.
- Faiqi fidika ruqiɣee mariasa qini quqasee fififaɣa qeeqaraa marianauree qidaɣa.
- <sup>20</sup> Misa manda ufa ani qimamaqaidaaɣa.
- Misa oosana oosana manda ufa ani auquara qidaɣa.
- <sup>21</sup> Oo Yaawee aniara fidiqaa imariasa qinee misa fidiqaaɣamma nimaqaidaaɣa.
- Ani ufamau firanara ititamasee aanoo qimariasara qinee firaaqoo qikooqaidanoo.
- <sup>22</sup> Qinee miqimariasara kaifaa firaaqoo uqanna fidiqaaɣamma nimaqaidaaɣa.
- Qinee misara qini namuqaauqee qidaɣa miqidaɣa.
- <sup>23</sup> Oo Anutu qini diuqummasee qini iriranara iria.
- Anee qini qimanammasee qini irirana oosanara iria.
- <sup>24</sup> Qini daunduraki manda ainaina qafamaseenana naaru marira aanaindari qinisaa rakisiqisaa.

## 140

*Isaraee maqannaasa Anutufa dadaaqiani fee quu ufa.*

- <sup>1</sup> Oo Yaawee mandoosana maree mariasa nisaukukinaana qini maraɣuqisaa.
- Faiqi nariqanuwasaa faɣa ititaqisaa.
- <sup>2</sup> Misa aiɣama kari mandainainara tupundaaridaɣa.
- Misa aiɣama kari aanoo qirana kai uqeeridaɣa.
- <sup>3</sup> Misa nifauru nimaakiri kuqimaria sakanifara foora maridanoo.
- Misa nookinaa ufa fannoo ukadiqa manda marasinnara foora maridanoo.
- <sup>4</sup> Oo Yaawee manda oosana maree mariasa afeeka ameemaaindaraana qini ititaqisaa.
- Faiqi nariqanuasa qini qiku gama qimifaɣa aqufuaneeera misa tipundaridaɣa.
- Minara anee misa saa ititaqisaa.
- <sup>5</sup> Nári nimoo naamoo imariasa qini qimaara ufaanara foora fufidaɣa.
- Misa nári ufaana aatataa qini qimaara fufidaɣa.
- <sup>6</sup> Oo Yaawee qinee maaqi qimasee aniara qidaɣa.
- Anee qini Anutufa mariananoo.
- Oo Yaawee anee qini dadaaqianneera aaree marunnana iria.
- <sup>7</sup> Oo qini uriqarara Yaaweefa, anee qini amudaana qimasee itita qimaqee marianafa mariananoo.
- Rakiranaki anee qini ititaqimaqaananoo.

<sup>8</sup> Oo Yaawee sia anee mandoosana maree mariasa nidi mari ainaina nimia.

Anee misa tipundaarirana ititannisainanoo sia anoonaikiani.

<sup>9</sup> Anee qinaqa qini namuqaauqa sia rakiranaki uriqaraaqa.

Anee qinanoo misa darirari maria ufafa quandaki nariqa naruani.

<sup>10</sup> Miqi mariasasaa fidika arira ida auru adia nimaqaa.

Misa dikaandaki agusaina sia kaifaa minakiqari uruaqa.

<sup>11</sup> Niqoonausara unna qimasee misa kikiqusi mariasa aiqama ainainirafa sia anoonaikiani.

Mandainaina fannoo faiqi kuqa nariqanuusa rafaqaqafuseenoo mandaikamma nimaqaani.

<sup>12</sup> Oo Yaawee anee kudi fasiqa anaasee kootaki itita nimaqaannanara qinee iridaqa.

Anee sarau imariasa amana amana kai itita nimaqaannanara faqa iridaqa.

<sup>13</sup> Andeeqarausa kuqaa uqanna ani amooqifaranoo.

Misa ani afusaa marifaranoo.

## 141

### *Eendaki innaaru.*

<sup>1</sup> Oo Yaawee qinee ani aaraidaqa qini maqee dadaaqa.

Qinee ani aaraanana iria.

<sup>2</sup> Qini innaaru qirana amiqira afundimari ida munanara foora maraa.

Qinee qisauku uqeerasee innaaru qirana eeneemari suqee maria tatufiranara foora maraa.

<sup>3</sup> Oo Yaawee anee qini doosaa rakisianinna quqasainanoo rakisi marinanoo qini dooqiari sia manda ufa ururaani.

<sup>4</sup> Qini mandainaina auqarara didi marina ititaqisaa.

Manda fasiqauqaki ootupamafi misa manda oosana mararanasaa ititaqisaa.

Qinee sia misa qoomaqa dadaaqa naanaura.

<sup>5</sup> Andeeqara fasiqa fannoo qini aqaqarana akiqara qini dadaaqianifee aupurarana qiminaqa qinee minara qini amiqi amiqimmidanoo fee qianauro.

Aaqee mariasa qiniara uriqarara fee qifaqa qimooqirana sia maraanaura.

Qinee maqee maqee misa manda oosannara taikaannee qimasee innaaru qimarunnanara misa qimooqirana sia maraanaura.

<sup>6</sup> Andeeqara uriqararousa manda oosana maree mariasa misa uriqararousa rafuseeqee maaninni aqusaifaqa faiqi anaasee qini ufara kuqaa anoonee qifaranoo.

<sup>7</sup> Mi manda uriqararousa nimudaani saqari araira foora moomoo madika afaiqara irairaa inoo mariannoo.

<sup>8</sup> Oo Uriqarara Yaawee qinee kaqi ani saqarikidaqa.

Qinee ani itita imaqaranara randaidaqa.

Anee qiniara qaoo qinaqa sia kuqanauro.

<sup>9</sup> Qini qimaara qinukufana fufuqaanasaa ititaqisaa.

Manda oosana maree mariasa qiku ufana fufuqaanasaa ititaqisaa.

<sup>10</sup> Manda oosana maree mariasa nariqa ufaanaki aru fifaqa qinee amiqimmasee fua-nauro sia minaki aruanaura.

## 142

### *Dadaaqiani fee innaaru.*

<sup>1</sup> Qinee dadaaqianifeera Yaaweena aaraidaqa.

Qinee qiki raqaidaqa minara innaaru qidaqa.

<sup>2</sup> Qinee qeeqa aiqama inunu rira ufauqa mina amidaqa.

Qinee qeeqa aiqama ummaara mina qimamidaqa.

<sup>3</sup> Qinee minnisara runanoo qinee andeeqasee qianna ainnainnara mifa iridanoo.

Qinee fimarunna aannanasaa qini namuqaa qini qimaara kukeeqasee ufaana fufidaqa.

<sup>4</sup> Qinee qeeqa inaaqiannai dadaaqiranara qafaunanoo sia maridanoo.

Sia moo fannoo qini ititaqimaqaaninafa maridanoo.

Sia moo fannoo qiniara qimudao qidanoo.

<sup>5</sup> Oo Yaawee anee dadaaqianneera aaraidaqa.

Anee Yaaweefa qini itita qimaqee marianafa mariananoo.

Maa maqanasaa mariranaki maridaqa aniara kai ridaqa.

<sup>6</sup> Oo Yaawee qinee dadaaqianneera qiki raqee marunnana iria.

Manda ummaara fannoo qini nammariara foora ukuqnama saifaqa kuqiraridaqa.



Qini namuqaa kaaqa afeeka faqaasa marianara qini misa nisaukukinaana mara kaqinni quqaqisaa.

<sup>7</sup> Qini teerookinaana iduku qisainaga ani faiqi anaasee suqiranaki ani amooqianaura. Anee qini amiqimma qimaqaannanara ani amooqianaura.

## 143

*Dadaaqiani fee innaaru.*

<sup>1</sup> Oo Yaawee qini innaaruqirana iria.

Aneenna andeeqaranakiqari qini afeeka innaaruqirana iria.

Aneenna mapukira oosanakiqari qini ufa anoona qima qimia.

<sup>2</sup> Sia moo fannoo maa maqanasaa qaraafa ani afusaa andeeqarafa maridaqa.

Minara anee sia qini aneenna ainainira fasiqa mareeqee aneenna kootaki quqasee qimanammasee qafaa.

<sup>3</sup> Qini namuqaa qini qifaqasee firaqqoo uqanna qini rafaafa fidaqa.

Mifa qini asukuna rumbaranaki quqasaifaqa qinee ooqai kuqusara foora maridaqa.

<sup>4</sup> Miqimmasaifaqa qinee minnisarara deedaqidaqa.

Qini qimuqusa fannoo munara minari marifaqa kaaqa kuquqaa idaqa.

<sup>5</sup> Qinee indaaru mariaafanna mariranara oonu mafi iridaqa.

Qinee anee aiqama ainaina iannanara iridaqa.

Anee aiqama ainaina auqaannanara qeeqa iriranaki minisee iridaqa.

<sup>6</sup> Qinee innaarukiqari qeeqa qisauku anee iannannai uqeeraidaqa.

Aadana maqara foora qini qimana fannoo aniara nammariara foora aididanoo.

<sup>7</sup> Oo Yaawee qini marirafa taikaaqaammidanoo.

Qini ufa irisee mina anoona qimaqimia.

Sia qini qiqafamasee kukeeqaa.

Anee miqinaqa qinee kuqirausa fimariannai fuanaura.

<sup>8</sup> Aiqama kananaana anee daqqoo auqainaga ani sia taikaaninna amuqusiranara irisee qeeqa saqarikirana aniki quqaanaura.

Qini innaaru qirafa anee iannannai ooru fidanoo.

Anee qiniara fuannee qinnaqqoo uqaqifiqainaga fua.

<sup>9</sup> Oo Yaawee ititaqimaqaanneera anee iannannai fidaqa.

Qini namuqaa nisaukukinaana mara kaqinni quqaqisaa.

<sup>10</sup> Anee qini Anutufa mariannanara aneenna aidira ainaina qima qiminaqa auqaa.

Qini amiqimma qisaseenana amiqira aanasaa ititaqimaqainaga fua.

<sup>11</sup> Oo Yaawee aneenna qima afeekaikunandee inana qini namuqaa nisaukukinaana maraqa qisaa.

Aneenna andeeqaranakiqari qini ummaarakinaana mara quqaqisaa.

<sup>12</sup> Anee qiniara aidi mariannanara qini namuqaa kuqa narua.

Qinee ani ainainira fasiqa marunnanara nari uriqararanannai qini rafaqaqafi mariasa aiqama kuridi nimaqaa.

## 144

*Davidifa rakirana uriaaqaroonara Anutunara dufi dufi qinau.*

<sup>1</sup> Qini itita qimaqee marina Yaaweena amooqia.

Mifa rakira oosana uqaqifiqaseenoo qini rakiranaki firana deedaqamma qisaidanoo.

<sup>2</sup> Mifa qini aiqama kari itita qimaqee marifa maridanoo.

Mifa qini auqaanara foora qini asumu maree marifa maridanoo.

Qini amiqimma qisaanifeera mina saqarikidaqa.

Mifa faiqi anaasee mareeqeenoo qini qiramandunnai quqaidanoo.

<sup>3</sup> Oo Yaawee faiqi anaasee nana ainainee mariafanee anee misara iridanee.

Faiqi anaasee nana ainainee fifau ainaina mariafanee anee misa rakisi nimaqaidanee.

<sup>4</sup> Faiqi misa naidoora foora fuaqasaafanoo dauni taikera foora irausa maridaqa.

Mina marirafa nimanandara foora kaqi kaqi mandaaqee marifa maridanoo.

<sup>5</sup> Oo Yaawee anee innaaruna rakee maseenana qumureenana aqaanauqa auqama-sainanoo ida muna minakiqari ururaani.

<sup>6</sup> Miqimmaseenana aneenna aakuasaa panana qirana quqasainanoo qumureenoo ani namuqaauqa furu faramma nimaqaannoo.

Aakuasaa aneenna feefara foora dindai qinaqa quqasee sandaaqa.

<sup>7</sup> Oo Yaawee anee innaarunaindari qini mara miami anaamuru nisaukuki nammari faruma kiara foora marunnana uqeereeqee kaqinni quqaqisaa.

Anaamuru afeeka ameemaanai marunnana mareeqee kaqinni quqaqisaa.

- <sup>8</sup> Mi anaamurusa nifaurusaa unnufa kai qumbiqanoo marifaqa misa kuqaa ufa qiraree qimasee nimana aiqamasee unna ufa kai qidaqa.
- <sup>9</sup> Oo Anutu qinee aniara fuka idi ramamaqaanaura.  
Qinee piripunna aridaqa ani idi ramama qaanaura.
- <sup>10</sup> Anee kai karaambaiqauqa rakirana uriqarara afeeka nimimarianafa mariananoo.  
Anee aneenna ainainira fasiqa qini Davidisa namuqaa nisaukukinaana maree marianafa mariananoo.
- <sup>11</sup> Anee fitiqnarana qimi maria namuqaasa nisaukuki marunnana anee mara kaqinni quqaqisaa.  
Anaamuru afeeka ameemaanai marunnana mara kaqinni quqaqisaa.  
Mi anaamurusa nifaurusaa unna ufa kai qumbiqanoo maridanoo.  
Misa kuqaa ufa qiraree qimasee nimana aiqamasee unnufa kai qidaqa.
- <sup>12</sup> Maasa faiqi namu aanaaqisaaqari findifiqa ummaqira saqariara foora afeekaikam-masee ururaqa.  
Maasa qiraamuqmaaka faqa maqasaa karaambaiqa maaqakina amiqira afaaqa auqira sapatariara foora maridaqa maasa asasirana qimiqa.
- <sup>13</sup> Maasa afeedira maaqaki oosana oosana nara ainaina qumbiqanoo mariani.  
Maasa maqeeena aandau sia kasoo anaaqiuqa uqanna maqaaqa.
- <sup>14</sup> Maasa maqeeena aandauqa kaifaa moomoo kiqa faiqi maqasaifanoo sia eedadaikinaqa kuquqa.
- Maasa maqusaki sia teeroo faqa qiki raqarafa faqa mariani.
- <sup>15</sup> Miqi maria fasiqa anaaseesa amiqiranaki asasiranaki marifaranoo.  
Yaaweefa maasa Anutufa marifaqee qimaria fasiqa anaaseesa asasiranaki maridaqa.

## 145

### *Anutuna amooqira idi.*

- <sup>1</sup> Qini Anutu qini Karaambaiqa, qinee anee uriqararafa mariannanara kooroo ianaura.  
Qinee ani naaruara naaruara dufi dufi amooqianaura.
- <sup>2</sup> Aiqama kari ani dufi dufi qimamaqaanaura.  
Qinee naaruara naaruara ani amooqianaura.
- <sup>3</sup> Yaaweefa uriqararafa marifaqa mina uriqaramasee amooqi mariafa maridanoo.  
Mina uriqararafa firaafa irirafa munu taikarana fiqaranoo maridanoo.
- <sup>4</sup> Anee auqoonna ainainnara maqee mariasa faqa naaru kambiqaainausa faqa ani amooqifaranoo.  
Misa anee auqoonna afeeka ainainnara kooroo ifaranoo.
- <sup>5</sup> Misa ani qareenaranara faqa ani afeekara faqa ufa qifaranoo.  
Qinee ani naaquqara ainaina auquqoonnara maqee maqee indee indee iqa fuanaura.
- <sup>6</sup> Faiqi anaasee afeeka ainaina anee auqee mariannanara ufa qimariafaqa qinee ani uriqararanara kooroo ianaura.
- <sup>7</sup> Misa ani andeeqaranara qima nimisee ani amiqi amiqiranara idi reefaranoo.
- <sup>8</sup> Yaaweefa aidi marifanoo nifauaidanoo.  
Mina aranaqarafa kasooaqee kasooaqee qimarifanoo mina sia taikaaninna amuqusirafa qumbiqaidanoo.
- <sup>9</sup> Mifa aiqamausa amiqi amiqimma nimaqaseenoo nari aiqama auqu quqaqoo ainainausara amuqusi marifa maridanoo.
- <sup>10</sup> Oo Yaawee anee aiqama aandau doodaani auquqoonnaua ani amooqifaqa aiqama ani faiqi anaasee dufi dufi qirana ani amifaranoo.
- <sup>11</sup> Misa ani karaambaiqa afeeka areenaranara ufa qidaqa ani amudaanai qiranara qifaranoo.
- <sup>12</sup> Miqimmasaifaqa aiqamausa anee afeeka ainaina auqoonnana irifaranoo.  
Misa ani afeeka areenara ququsara faqa irifaranoo.
- <sup>13</sup> Ani rakisi nimaqarafa naaru naaru marifa marifana anee naaruara karaambaiqa mariananoo.  
Yaaweefa nari qima afeekaika maqoo ufanasa mapukinoo marifa maridanoo.  
Nari aiqama ainaina imarina nifauarana namu faqa idanoo.
- <sup>14</sup> Mifa ummaaraki mariasa dadaaqidanoo.
- <sup>14</sup> Mifa rafaqafu nimaqee mariasa uqeera nisaidanoo.
- <sup>15</sup> Aiqama kasi maria ainainausa narana nimianneera nifu mundusee ani kai qafaafana narana nimi mariananoo.
- <sup>16</sup> Anee misa nimana kai niminana aiqamausa nidirana amanaikiananoo.
- <sup>17</sup> Yaaweena aiqama ainaina auqaranaki andeeqarafa maridanoo.

Narí aiqama ainaina imarina nifauarana namu faqa idanoo.

<sup>18</sup> Mifa narí aaree mariasa naaqa maridanoo.

Mifa nariqa nimuqusa ookiqari aaree mariasa naaqa faqa maridanoo.

<sup>19</sup> Mifa nariara naaquqee marifaqa mina ufa qaindusi mariasa dadaaqira ainainauqa nimidanoo.

Mifa misa qiki raqarana iriseenoo misa ummaarakinaana mara kaqinni quqanni-saidanoo.

<sup>20</sup> Mifa nariara rimariasa itita nimaqasee mandoosana maree mariasa kuridi nimaqaanoo.

<sup>21</sup> Qinee aiqama kari Yaaweena amooqianaura.

Mifa auqu aiqama ainainausa mina naaquqara andeeqara auqu naaru naaru amooqima amaqaaga.

## 146

### *Dadaaqira fasiqa Anutuna amooqia.*

<sup>1</sup> Yaaweena amooqia.

Oo qini qimana Yaaweena amooqia.

<sup>2</sup> Qinee kaqi marunna kamuqoo Yaaweena amooqianaura.

Qeeqa aiqama kari maa maqa maaqanasaa mariranaki qeeqa Anutuna idi rama-maqaanaura.

<sup>3</sup> Sia aneenna saqarikirana maqasaa qaraa uriqarararasaa quqaa.

Sia faiqi faiqi amana ani dadaaqianoo.

<sup>4</sup> Maqasaa uriqararasa kuqufiqa kookoommaika mafidaqa.

Mi faasaannasaa misa oosana oosana ainainara tipundaarammaqaafa taikaidanoo.

<sup>5</sup> Yakooboona Anutunara dadaaqirana qimianne qimari fasiqafa faqa Yaaweena nariqa Anutunasaa mundi mariasa faqa asasidaqa.

<sup>6</sup> Innaaruna faqa maqa faqa ooruku nammari faqa minaki maria ainainausa faqa aqunasaa mundi mariasa asasidaqa.

Mifa aiqama kari narí qima afeekaikiranasaa afu rusisee maridanoo.

<sup>7</sup> Mifa uriqararanannai rafaqa fuqaasa narí ufa iriranaki dadaaqidanoo.

Naararee mariasa faa narana nimidanoo.

Yaaweefa fifaw rumberanaki mariasa iduku nisaidanoo.

<sup>8</sup> Iduku nisaseenoo nifu imbarausa nifu maqa nisaidanoo.

Mifa aqufiqa mariasa uqera nisaidanoo.

Mifa narí andeeqara fasiqa aanaaseera aididanoo.

<sup>9</sup> Yaaweefa asaqiraafai maasa maqa maaqaki mariasasaa itita nimaqaidanoo.

Mifa adeedaana anaaseeuqa faqa faiqi faiquqa faqa dadaaqidanoo.

Kafaa mifa manda oosana maree mariasa nariqa kuridiranaki quqa nisaidanoo.

<sup>10</sup> Yaaweefa naaruara uriqararafa maridanoo.

Oo Sloona maqusa ani Anutufa aiqama kari rakisi amaqaannoo.

Yaaweena amooqia.

## 147

### *Anutuna aiqama afeeka faqaana amooqia.*

<sup>1</sup> Yaaweena amooqia.

Maasa Anutuna amooqira idi rarafa amiqira oosana maridanoo.

Mina amooqirafa andeeqarafa adiafaairafa maridanoo.

<sup>2</sup> Yaaweefa Yeerusaree maqusa kaifaa usakaidanoo.

Isaraee maqannaasa narufaqa anaamurukiaqa moodaa moodaa iqa mariusa Yaaweefa kafaqa suqeeqee quqaidanoo.

<sup>3</sup> Mifa nimuqusa mandaiki marusa amiqimma nisaidanoo.

Misa kaakadi narirana rumbannisaidanoo.

<sup>4</sup> Mifa aiqama fasuqara iriseenoo asaana rirana amana kai quqaseenoo naadu naadu nuqu ranau.

<sup>5</sup> Maasa Yaaweefa firaafa marida amudaana qimarifa maridanoo.

Mina amiqira irirafa sia oosana faqa ammuqu faqa marifa maridanoo.

<sup>6</sup> Mifa narí mara maree qumi mariasa uqerannisaidanoo.

Kafaa mandoosana maree mariasa maqa mammaaqai radamidanoo.

<sup>7</sup> Amooqira idi Yaaweenara rama amaqaaga.

Piripunannai aridaqa maasa Anutuna idi rama amaqaaga.

<sup>8</sup> Mifa onnamu innaarunai rainaidanoo.

Mifa aaku quqasaifanoo rifanoo amuaqu namusaaqaraa andandauqa ururaidanoo.

<sup>9</sup> Mifa aandauga narana nimisee ufini aanaaquiqa naranara qiafanoo misa faqa nimidanoo.

<sup>10</sup> Mifa qoosauqa afeekara sia ridanoo.

Mifa afeeka sundiauga rakiranaki paasoosi mariasa afeekara faqa sia ridanoo.

<sup>11</sup> Mifa nariara naaquqaiqa rufiee mariasara aididanoo.

Misa nari irirana Yaaweena sia taikaaninna amuqusiranasa rusimariasa misara aididanoo.

<sup>12</sup> Oo Yeerusaree maqusaki mariasa innee Yaaweena amooqiqa.

Oo Sioona maqusaki mariasa inneeqa Anutuna kai amooqiqa.

<sup>13</sup> Mifa inni maqusa faandaamura kooqi afeekaikammasee ititaidanoo.

Mifa minaki maria fasiqa anaaseesa amiqi amiqimma nimaqaidanoo.

<sup>14</sup> Mifa inni Isaraee maqannaa oosusaa rakisidanoo amiqira narana inni nimana kai nimidanoo.

<sup>15</sup> Mifa nari naamuaqira ufa maa maqana qimamisaifanoo mifa qii ainainafa kai kaqi kambigaidanoo.

<sup>16</sup> Mifa qaisara qifanoo aqufinoo qamunnara foora maqasaa rafaqa fidanoo.

<sup>17</sup> Mifa innaarunaidari pupusamu oonisamuara foora aqidanoo.

Sia moo fannoo mifa nimi mari suaranaki amana kikiqianoo.

<sup>18</sup> Mifa pupusamuara qifanoo tasirisirinoo nammarikidanoo.

Kafaa mifa ufaira qufanoo ufai uqufanoo qaisa fannoo firaa nammari kammafi ooqu finau.

<sup>19</sup> Mifa nari ufa nari faiqi anaasee nimidanoo.

Mifa nari sandufa faqa nari naakaparufa faqa Isaraee maqannaasa nimidanoo.

<sup>20</sup> Mifa mi ainainna auqoona sia moo maqannaasa mina sanda ufa sia iri mariasarau auqinoo fau.

Yaaweena amooqia.

## 148

*Aiqama innaarunaidaraa ainaina faqa maqasaaqaraa ainaina faqa Anutuna amooqidaqa.*

<sup>1</sup> Yaaweena amooqia.

Innaarunai mirinni mariasa Yaaweena amooqiqa.

<sup>2</sup> Mina aiqama qangeeroouqa mina innaarunaidaraa rakira fasiqauqa mina amooqiqa.

<sup>3</sup> Innee suani faqa quqoona faqa aiqama fasau firaqoo kaaqa qeemariasa faqa aiqama mina amooqiqa.

<sup>4</sup> Innaaruna meerai uqanna marianafa anee faqa Yaaweena amooqia.

Innee mirinni innaarunai maria nammarisa innee faqa mina kai amooqiqa.

<sup>5</sup> Misa aiqamausa Yaaweena amooqiaqanani.

Mifa qufaqa misa kambigau.

<sup>6</sup> Mina ufannoo misa kambigafi nariqa mariaqoo naaru naaru maridaqa sia amana Yaaweena ufa rukieefaranoo.

<sup>7-8</sup> Maqasaaqaraa ainainauqa faqa ooruku nammariki maria firaa aandausa faqa nammari ameemaana mariasa faqa aakuasaa faqa pupusamu faqa qaisa faqa oonnamu faqa afeeka ufai Yaaweena naakapara ufa mau fimari ufaira faqa innee aiqamausa Yaaweena amooqiqa.

<sup>9-10</sup> Innee aaqanauqa faqa amuaqu namuqa faqa qaqama iree maria saqarisa faqa aiqama nandauqa faqa aiqama aanda maqqeena faqa kaasau faqa nimuaqundari nimariasa faqa qaqamaree nimaria ufinisa faqa innee aiqama mina amooqima amaqaqa.

<sup>11-12</sup> Aiqa maqasaaqaraa karaambaiquqa faqa aiqama maqannaasa faqa uriqararusa faiqi namu faqa aiqama maqannaa rakisirausa faqa kumaaraauqa faqa maanaaqauqa faqa asooqa fasiqa anaasee faqa faiqi uqaindi faqa innee aiqamausa Yaaweena amooqiqa.

<sup>13</sup> Misa aiqama misoo maasoo Yaaweena auqu amooqiqa. Mina auqu fannoo aiqamausa nuqu uriqararafa maridanoo.

Mina areenarafa maa maqa maaqana faqa innaaruna faqa urinaaqaranoo maridanoo.

<sup>14</sup> Mifa Yaaweena nari maqannaasa afeekaikamma nisaiqa mina faiqi anaasee mina amooqiaqeeru.

Isaraee maqannaasa mina afaaqasaa aqoondiqa maridaqa mina amooqidaqa.

Yaaweena amooqia.

**149***Anutuna amooqira idi.*

<sup>1</sup> Yaaweena amooqia.

Yaaweena fuka idi ramamaqaaqa.

Mina ufa mau fimariasa ufa suqiranaki mina amooqimamaqaaqa.

<sup>2</sup> Isaraee maqannaasa inni auqu nisoona irisee asasiaqa.

Sioona maqusaki mariasa inneeqa karaambaigara susumma amaqaaqa.

<sup>3</sup> Innee idi raida niqoori raqaranannai faqa dukaanaannai faqa piripunnannai faqa mina auqu amooqiaqa.

<sup>4</sup> Yaaweefa nari faiqi aanaaseera asidanoo.

Nari mara maree qumimariasa rakirana uriqaranannai amiqimma nimaqaidanoo.

<sup>5</sup> Yaaweena faiqi anaasee nariqa rakiranara qufoonaridaqa asasira idi eendaki raqa fifi iaqaaqa.

<sup>6</sup> Misa firaaqoo faaq rumasee Anutuna amooqiaqa.

Misa nisaukuki dinni dinni raiqarana rakira paipana kaqi marinaqa mina namu faqa amooqiaqa.

<sup>7</sup> Kaqi marifaqa misa minannai aanaamuru rafaqa firara uaqee idaqa.

Anaamuru fasiqa anaasee narirara uaqee idaqa.

<sup>8</sup> Misa karaambaigauqa sainandannai rumberana uaqee idaqa.

Misa karaambaigauqa qainna sainandannai rumberara uaqee idaqa.

<sup>9</sup> Anutufa naamuqundee iqa moo maqannaasa narirara uaqee idaqa.

Anutuna faiqi anaasee rakirana uriqararafa miqimmino maridanoo.

Yaaweena amooqia.

**150***Yaaweena amooqia.*

<sup>1</sup> aaweena amooqia.

Anutuna naaquqara amaana maqaki mina amooqiaqa.

Mina uriqarara afeeka innaaru nai marina amooqiaqa.

<sup>2</sup> Mifa afeeka ainaina auqoo nara amooqima amaqaaqa.

Mina amiqira uriqaranara amooqiaqa.

<sup>3</sup> Ukeena fuaqaidaqa minannai mina amooqiaqa.

Kaqikaa piripunnannai faqa firaa piripunnannai faqa mina amooqiaqa.

<sup>4</sup> Dukaanaannai faqa idi raida niqoori raqaranannai faqa mina amooqiaqa.

Piripunnannai faqa ufireenannai faqa mina amooqiaqa.

<sup>5</sup> Innee qumiandau qaqama kaqikaa qanda faqa firaa qanda faqa qumaree narisaa narisaa ramoo ramoo idaqa Yaaweena amooqiaqa.

<sup>6</sup> Aiqama naanna faqaa ainaina Yaaweena amooqiaqa. Yaaweena amooqia.

## AAQUQIRA UFA

<sup>1</sup> Maa aaquqira ufafa Soroomoonna ufa maridanoo. Dafidina amaaku Isaraee maqanna karaambaigaa ufa maridanoo.

<sup>2</sup> Maa aaquqira ufafa ani dadaaqinana amiqira irirana faqa andeeqara naamuqira ufa faqa irisee mina oosana farumara foora meemai uqanna marina faqa irinnaranoo.

<sup>3</sup> Irirana faqaa nira marirana uqannifiqara ufa maridanoo. Anoonna ufa kai qira oosana faqa andeeqara oosana amana amana kai raina nimaqara oosana faqa nimianifeera maa ufafa maridanoo.

<sup>4</sup> Maa ufafa irirana siaisa irirana nimidanoo kumaaraa maanaaqa irirana naakapama saina amiqira nira marirana faqaasa mariaqeera maa ufafa maridanoo.

<sup>5</sup> Maa aaquqira ufafa irirana faqaasa irirana moo faqa moo faqa nimimarifa maridanoo. Amiqira irira aanara randee mariasa nimimarifa maridanoo.

<sup>6</sup> Uqannifiqaafaqa aaquqira ufa oosana kukeeqarana faqa irirana faqaasa kukeeqara mariranaaqa faqa irifara.

<sup>7</sup> Anee irirana faqaafa mariraree qimasee Yaaweena ameemaana mari. Furufari mariasa sia iriranara naaquqaidanoo irirana mararanara faqa nikoqaidanoo.

*Kumaaraa maanaaqa naakapara ufa.*

<sup>8</sup> Qinee qimaaku anoofakoona ufa iria.

<sup>9</sup> Ani anoonna akoona aamuqira ufa fannoo ani amiqira fasiqaikamma amaqaannoo, amiqira sarandaraqara foora aqinaaqa rumbasee kukukakana anukaki rufu amaqeera foora masainana amiqirafa marinnaranoo.

<sup>10</sup> Qini qimaaku manda oosana maree mariasa ani amanifana sia misa ufa iria.

<sup>11</sup> Misa anira maaqi qifaranoo. Anee maasa faqa anirinaaqa maasa faiqi kuqa narua. Aninaqa kukeeqafi qeeqa didirana taikeeqa oosana siaisa kuqa narua.

<sup>12</sup> Misa kaqi marida amiqiga marifaranoo maasa misa paqurimmasaanaqa kuqifaranoo. Amiqira fasiqa faqa manda fasiqa faqa dapi naruanauranoo.

<sup>13</sup> Misa naruseeqa misa qumiasana oosana oosana mareeqee maasa nari maaqaki quqasaanoo maasa maaqa qumbiqaani.

<sup>14</sup> Anee maasa faqa aninaqa maasa ummuara masainna aiqama ainaina ani faqa naida amianaara.

<sup>15</sup> Qini qimaaku sia miqira fasiqa faqa fua. Misa mariaqooqari nianai maria.

<sup>16</sup> Misa mandainaina aqarara sia anuqidaqa. Misa aiqama kari fidika ruigarana deedaqiga maridaqa.

<sup>17</sup> Anee ufini ufana fufinana sia aruani qinna ufinina afusaa fufua. Mifa qafamasee rufaanoo.

<sup>18</sup> Miqi maria fasiqausa nari nimaara ufaana fufidaqa. Nariqa ninuka arusee kuqifandinna ufanna fufidaqa.

<sup>19</sup> Faiqi nari marusa mi oosana nariuundee inoo ummuari mariasa mi ummuarira oosana nari naruanoo.

*Amiqira irirafa naaraidanoo.*

<sup>20</sup> Iriaqa, amiqira irirafa irirana faqaa anaas eera foora aana kindooraki faqa faiqi suqi mariaqoo maridanoo nammeera qidanoo.

<sup>21</sup> Faandaamura ququsa kooqiki faiqi suqi mariaqoo maridanoo firaqoo nammeera qidanoo.

<sup>22</sup> Innee furufariraua innee kisaagasaa fee furufarida marifaree, innee kisaagasaa fee irirana faqaasa iriranara uteeti qifaree. Sia fee innee minara irifaree.

<sup>23</sup> Innee qini aaquqira ufa amiqimmasee iriaqa. Qinee qeeqa amiqira naakapara ufa faqa qeeqa irirana faqa inni nimianaara.

<sup>24</sup> Inni naarauna sia irimariafanoo. Innaqee qunaqa innee qini ufa irisee mana mana imariafanoo.

<sup>25</sup> Innee qini naamuqira ufa nimeesuqusee qini andeeqa nimaqaranara sia nididanoo.

<sup>26</sup> Qinee iriraua innee umaaraki aqufi saamurifaqa qinee inniara naanidara qianaara. Innee mandainainaki aqufifaqa qinee ataasa ataasa qima nimaqaanaara.

<sup>27</sup> Mandainaina fannoo fira aaku ufaira foora anireenoo inni nifu mara ookeendaandaa meegeenoo aqusaanoo. Nidafirafa faqa ummaara faqa inni rafaafafu sainaqa qinee naanidara qianaara.

<sup>28</sup> Innee mi mandainainna kiqari iriranara qini irirana faqaasa daaraifaa qinee sia irianaara. Innee firaqoo qiniara aiqamai randeeqa sia paqurifaranoo.

- <sup>29</sup> Innee iriranara mandainainee qimasee sia Yaaweena ufa qaindusi mariafanoo.  
<sup>30</sup> Innee qini naamuqira ufara sia nididanoo. Qini andeeqa nimaqaranara sia nididanoo.  
<sup>31</sup> Innee inneeqa mandoosana akiqara feefauru marasaifanoo inni auriranara foora nimiannoo.  
<sup>32</sup> Irirana siaisa amiqira irirana nimeesa uqaanara kuqidaqa. Furufari mariasa amiqira irirafa sia marinara mandaikidaqa.  
<sup>33</sup> Yafasiqa fee qini irirausa ufa irinanoo mi ufafa minasaa rakisi amaqaanoo. Mifa asumu marinanoo sia mandainainara rufiara oosana mariannoo.

## 2

- <sup>1</sup> Qini qimaaku iria qinee auqaannee qimasee qimamianna ufana sia qaunua.  
<sup>2</sup> Amiqira ufa amiqimmasee iriseenana minara oonumafi iria.  
<sup>3</sup> Eeoo amiqira irirafa anee iannannai anianinnanara iramirisee iria.  
<sup>4</sup> Amiqira iriranara siruaa maqaki marifaqa randee mariandemmasee randaa. Kukeeqara amiqira iriranara akaqa ainaina maqaki kukeeqaqaafaqa randee mariandemmasee randaa.  
<sup>5</sup> Miqinana anee Yaaweenara rufiara oosana iriseenana Anutunara irinnaranoo.  
<sup>6</sup> Yaaweefa kai amiqira irirana nimidanoo. Mifinnaindari kai irirafa faqa oonumafi irirafa faqa anidanoo.  
<sup>7</sup> Kuqaa anoona ufa kai qimariasa faqa andeeqara oosana maree mariasa faqa Anufufa dadaaqida itita nimaqaidanoo.  
<sup>8</sup> Anutufa faiqi amana amana kai amiqimma nimaqee mariasa faqa mina ufa mau maqee maqee fimariasa faqa Anutufa itita nimaqaidanoo.  
<sup>9</sup> Qini qimaaku anee qini ufa irinana amiqira ainainara faqa andeeqara oosana amana amana kai rainara oosana faqa irinnaranoo. Anee aneenna auqainna amiqira oosana faqa irinnaranoo.  
<sup>10</sup> Anee moomoo amiqira irirana marasainanoo mi irirafa ani اساسirana amiannoo.  
<sup>11</sup> Ani amiqimmasee marirafa faqa amiqira irirafa faqa anisaa itita amaqaanoo.  
<sup>12</sup> Mifa kai anee manda ainaina auqaranasaa itita amaqaanoo. Ummaara kambigaa-ifeera qimariasa ufasaa itita amaqaanoo.  
<sup>13</sup> Miqi maria fasiqausa andeeqara marirana minnisee numoo asukunaki maridaqa.  
<sup>14</sup> Oosana oosana manda oosana nidi marisa faqa amiqira irirana sia mari manda oosana اساسimariasa faqa furufara foomboo rimaria fasiqausa ufara faqa eerairiaqa.  
<sup>15</sup> Miqi maria fasiqausa oosana sia andeeqanoo maridanoo. Misa eerairi mariasa maridaqa.  
<sup>16</sup> Anee qini andeeqara ufa irinanoo moo fasiqa anaafa fannoo narí fadameena akira ufannai aniara anirainafa manda oosana auqaanee qinanoo mi amiqira irirafa ani itita amaqaanoo.  
<sup>17</sup> Miqira anaasee fannoo narí afaaqiara sia irirai Anutuna afusaa naaquqara qima afeekai kirufa qimaqoonara qaunuseenoo narí afaaqi minnisaidanoo.  
<sup>18</sup> Anee miqi mari anaaseena maaqai finana anee kuqirannai fimaria aatata finnanoo. Minni finana kuqirausa maria maqa maaqanakiara foora finnanoo.  
<sup>19</sup> Mi anaaseefinnai finafa sia kafa oonurandee aninnaranoo. Anee sia kafa oorurandee kaqi marira aanasaa aninnaranoo.  
<sup>20</sup> Anee amiqira irirana marirana mareenana andeeqara fasiqauqa naanna reenana amiqira marira marinnaranoo.  
<sup>21</sup> Andeeqara fasiqa anaasee faqa oosana siai fasiqa anaaseesa maqa maaqanara maasaindi fee qimasee minaki marifaranoo.  
<sup>22</sup> Miqiqa marifanoo Anutufa mi maqa maaqanaki manda oosana maree mariasa ummaqira ainainara foora raraku aquannoo.

## 3

### *Kumaaraa maanaafa naakapara ufa.*

- <sup>1</sup> Qini qimaaku qinee qimamianna ufana sia qaunua. Qinee qimamianna ufana aiqama kari iridana qinee qimamunnandee ia.  
<sup>2</sup> Qinee qimami marunna ufafa ani kuqirana kisaqaqasaa sainana maridana amiqiranaki reemindeemi riranaki marinnaranoo.  
<sup>3</sup> Mapukusee marirana faqa fisoo fisoo irana faqa mi ainainna qanda mareeqee saufauruara foora rumbasaina anukaki mariani, aneena amuqusaki akara rumaqaina mariani.  
<sup>4</sup> Anee miqinnanannai faiqi faqa Anutufa faqa aniara nidifaranoo.

<sup>5</sup> Aneenna amuqusa aiqamannai karaambaiqa saqarikia. Sia anee aneenna iriranara amanammifoo qimasee minasaa mundua.

<sup>6</sup> Anee aiqama ainaina auqeenanana Yaaenara ani aaqooki marinana kai auqaa. Miqimmasee finanoo mifa andeeqara aana ani uqafiqaanoo.

<sup>7</sup> Sia anee aneennara irirana faqaasee qimasee mana mania. Karaambaiqa ufa mau fidana manda oosana auqarara qeerairia.

<sup>8</sup> Anee miqinnanannai amiqira marasinnara foora ani afaaqai nammuana qunuseenoo aidafirana taika sainana amiqirafa mariannandee ina marinnaranoo.

<sup>9</sup> Anee aneenna nara ainana amiqirana kai aneenna maqakinaana unakuseenana Anutuna tatufirana suqa amia.

<sup>10</sup> Anee miqinanoo Yaaweefa ani ainaina moomoo afuqaki rairaamma amiannoo. Anee miqinanoo Yaaweefa quandaki ani narana nammari moomoo rairaamma aminana afeedira maqaki quqararee qimasee sia amanai kinnaranoo.

<sup>11</sup> Oo qini qimaaku Yaaweefa ani andeeqainana sia anee minara akooqaani, Yaaweefa aaquqira ufa qimidanoo fee qimasee amiqimmasee iria.

<sup>12</sup> Yaaweefa nari aidi marisa aaqee foora andeeqa nimaqaidanoo. Faiqi anoofa akoofa nari faiqi andeeqaindee inoo miqidanoo.

<sup>13</sup> Amiqira irirana faqaasa faqa andeeqara irirana faqaasa faqa اساسداقا.

<sup>14</sup> Irirafa siruaa faqa kooa faqa uriaaqararafa maridanoo.

<sup>15</sup> Mi irirafa firaa feefauru qusee maree maria oonina faqa ani kaaqa aidi mari amiqira ainaina faqa uraaqararafa maridanoo.

<sup>16</sup> Irirafa kisaaqasaa marirana ani amidanoo. Mi irirafa ainaina faqaasaikirana faqa uriqarara auqu aniamiannoo.

<sup>17</sup> Amiqira irirafa ani marirana amiqimma amaqaaseenoo ani amiqimmasee afiqee fuannoo.

<sup>18</sup> Amiqira irirana faqaasa اساسداقا, amiqira irirafa misa marirana nimiannoo.

<sup>19</sup> Yaaweefa nari amiqira iriranannai innaruna faqa maqa faqa auqinau. Oonumafi iriranannai innaaruna murufi atukaranau.

<sup>20</sup> Yaaweena amiqira irirafa qufanoo nammari quminau, kafa oonamuara qufanoo aaku suqufufanoo maqasaa aqufinau.

<sup>21</sup> Oo qini qimaaku anoona ufa faqa amiqira irirana faqa sandee foora atukaramma qumarasee sia uqaa.

<sup>22</sup> Anee miqinanoo mi ainaina qanda ani marirana amisee ani amiqira doodapaaniara foora marifaranoo.

<sup>23</sup> Anee miqinana aneenna aatata amiqimmasee finnarannoo sia aiku rupauraki saamurinnaranoo.

<sup>24</sup> Anee faqeenana sia rufieennaranoo amiqimmasee afu rirainana faiqeennaranoo.

<sup>25</sup> Manda oosana maree mariasasaa tautummasee kambiqara ummaara firaafa firaa aaku oonnamuara foora kambigoondee iranara sia rufieennaranoo.

<sup>26</sup> Yaaweefa ani ummaarasaa itita amaqaannoo. Mifa anisaa rakisinaana sia ufaanaki arinnaranoo.

<sup>27</sup> Oo qini qimaaku faiqi moo fannoo moo ainainara dadaaqiannee qinana sia qaoq qia. Mi ainaina marinana kaqi dadaaqia.

<sup>28</sup> Sia aneenna aqoonnara finana duna ani marannee qia. Aniki marinana aaqee kai amia.

<sup>29</sup> Aneenna aqoonnara sia oonumafi manda irirana iria mifa ani aaqa marifa nari afaqa aniki quqee marifa marinara sia manda irirana minara iria.

<sup>30</sup> Ani sia mandaikamma amaqaannana sia fifau aanoo qima amaqa.

<sup>31</sup> Anee sia faiqi narimarasa naanna raa. Misa oosana qafammasee sia qinee faqa miqiuunoo qia.

<sup>32</sup> Manda oosana maree mariasara Yaaweefa fidiqaa midanoo. Andeeqara oosna faqaasa Yaweena afaaqasaa aqondi mariafanoo misara aididanoo.

<sup>33</sup> Yaaweefa nari manda niqurara ufa manda oosana maree maria fasiqausa maaqasa uqaidanoo. Andeeqara oosana maree maria fasiqausa maaqasaa nari amiqi amiqirana uqaidanoo.

<sup>34</sup> Faiqi nari nifaqa nari nuqu uqeeqee fasiqausa Yaaweefa misara akooqaidanoo. Fisoofisoo idaqa nari mara maree qumi mariasara Yaaweefa aididanoo.

<sup>35</sup> Irirana faqaasa nuqu uqeerarana mareefaranoo. Furufari marisa nari mi furufarirafa nari nisaurirana nimiannoo.



<sup>1</sup> Oo qini faiqi namu inneeqa nikausa qini naamuaqira ufasaa irirana rusisee oonumafi irira oosana mareefaranoo.

<sup>2</sup> Qinee qimannimianna ufafa amiqira ufa maridanoo. Minara aiqama aiqamara iria.

<sup>3</sup> Qinee faqa oogai kaqikaa faiqi mariaafanausa maridaqa. Qinee qeeqa qinaukoo moodaa faiqi mariaafanausa maridaqa.

<sup>4</sup> Qini qikoofa maaqi qimasee qini qimaqiminau. Qinee qimamianna ufana sia qaunua aiqama kari iria. Qinee auqaannee qianna ainaina auqeenana sia kuqinnaranoo.

<sup>5</sup> Anee amiqira iriranara faqa oonumafi iriranara faqa randasee maraa. Qinee qimamianna ufana sia irisee qaunua.

<sup>6</sup> Sia amiqira irirana minnisaa minara rinanoo ani faqa maridanoo mifa anisaa rakisiannoo. Anee minara rinanoo mifa anisaa itita amaqaannoo.

<sup>7</sup> Irirafa kuqaa firaa ainaina maridanoo mina kai randasee maraa. Anee nana oosana oosana ainainee maraseenana oonumafi irirana sia aunua mina faqa maraa.

<sup>8</sup> Anee amiqira iriranara aidinana rakisi qumarainanoo mifa ani firaa auqu amiannoo. Anee irirana oonumafi rakisi qumarainanoo ani auquara naaquqarana faqa qeerairirana faqa nimiannoo.

<sup>9</sup> Anee irirana marasainanoo ani aqinaaqa amiqira faini afaira foora mariannoo. Mifa uriqararaua qafeera foora ani akiqqa afisu amaqaanoo mariannoo.

<sup>10</sup> Oo qini qimaaku anee oori kandamasee qini ufa irisainanoo ani marirafa kisaagasaa mariannoo.

<sup>11</sup> Qinee amiqira iriramau fimaria aanna aamuqaqi marunaua maridaqa.

<sup>12</sup> Anee mimau finanoo sia moo ainaina fannoo ani aana ititaannoo. Anee mimau finana sia aiku rupaurinnaranoo.

<sup>13</sup> Anee aamuqaqira ufa rakisi qumaraa. Sia uqaa. Aneenna ufa minasaa atukarama qaina mariani ani marirafa maridanoo.

<sup>14</sup> Aaqee mariasa fimaria aatata sia fua. Sia manda oosana maree mariasa naanna raa.

<sup>15</sup> Anee misa aatata faqa sia fua. Minniseenana aneenna aatata kai fua.

<sup>16</sup> Mandoosana maree mariasa akaqausa mareeqee sia nari mandoosanaki uqaseeqa sia maqasaa faiqeeffaranoo. Misa akaqausa rarisameeqee minaki uqaseeqa maqasaa faiqeeffaranoo.

<sup>17</sup> Misa manda oosana faqa faiqi kuqa narirafa faqa misa narana nammariara foora maridanoo.

<sup>18</sup> Andeeqaraua nimari aanafa kaaqa qara aana uqanna maridanoo.

<sup>19</sup> Manda oosana maree mariasa aana asukuna miqirafa maridanoo. Misa nanasee fee niku amaki saamrida fee, sia qafaidaga.

<sup>20</sup> Oo qini qimaaku amiqimmasee qinee qunna ufana iria. Qini ufa amiqimmasee iria.

<sup>21</sup> Sia amiqira irirana minnisaina fuani. Aneenna amuqusaki quqasaina mariani.

<sup>22</sup> Amiqira irirafa faqa oonumafi irirana faqa sia kuqirana faqa nifaaqa amiqi amiqirana faqa nimidanoo.

<sup>23</sup> Maa firaa ainainnara qimamianaaura. Aneenna amuqusasaa rakisia. Aiqama marirana oosana amuqusaki qari ururaidanoo minara aneenna amuqusa amiqimmaseenana rakisia.

<sup>24</sup> Sia unna ufa qia. Unna ufa faqa eendaandira oosanrafa faqa sia qia.

<sup>25</sup> Aneenna firaree qinnaqoo amiqimmasee aiuqummasee kuqaa qimaseenana fua. Sia aneenna akiqqa asauriranaki quqaa.

<sup>26</sup> Aneenna nimarianna aannana andeeqasainanoo amiqinoo marinana nua.

<sup>27</sup> Anee aneenna aatata fidana sia dinni quandee dinni quandee ia. Andeeqasee manda oosanara qeerairammasee ani aiku fannoo ani aatata kai fuani.

## 5

*Sia moona anaaga ummuaria.*

<sup>1</sup> Oo qini qimaaku qini aakapara ufa amiqimmandee aaqoo uqasee iria. Qinee amiqira irirana faqa aakapara ufa faqa ani qimamidaqa.

<sup>2</sup> Anee andeeqara oosana mau finanoo ani aiqama ufaqirafa irirana faqaasa ufara foora mariannoo.

<sup>3</sup> Moo fasiqa anaaga ufa fannoo kaaqa adiafaa iannoo. Ookasaasa anoona adiafaa imarina faqa uriaaqaranoo mariannoo. Mina ookinaa ufa fannoo fadameena miqirafa maridanoo.

<sup>4</sup> Mifa taikainanoo mifa ani quqasee finanoo qisaaqa suka miqirafa faqa aidafirafa faqa mariannoo. Aseema miqirafa afai raiqarafa ani afaaqa ateeqaanoo.

<sup>5</sup> Mi anaaseefa ani afiqeenoo kuqira maqa maaqaki fidanoo. Mina nira aana kuqirafa maridanoo.

<sup>6</sup> Mifa sia kaqi marira aatatau fidanoo fau. Mifa fimari aanafa eendaandirafa maridanoo sia minara irimarifa kaqi mi aatata fimarifa maridanoo.

<sup>7</sup> Qini faiqi namu qini ufa iria sia qinee qimannimianna ufana qaunuaqa.

<sup>8</sup> Anee mi anaaseefa mariqooqari nianai maria. Sia mina kooqi aaqa faqa fua.

<sup>9</sup> Anee mina kooqi aaqa finana aneenna andeeqaree auqu aiqamausa nifusaa maqasaa uqaminanoo aqufuannoo. Anee nimudao qirana siaisa nisaukuki oonu rainaqa kuqa arifaranoo.

<sup>10</sup> Anaamuru anireeqa ani ainaina kaqi mareefaranoo. Ani kadaapi rirafa moosaindika miannoo.

<sup>11</sup> Anee aneenna faiqara qaarisaa annadannadidana kuqina marinaqa ani amaqi faqa aununu faqa fifau ainainauqa namaseefaranoo.

<sup>12</sup> Miqidana annadannadidana maaqi qinnaranoo. Oo qinee nanaree aaquqira ufasa fidiagaqaa iqiafane. Qini qimuqusa fannoo aamuqira ufara fidiagaqaa imariafanausa maridaqa.

<sup>13</sup> Qinee sia ufa qima qimusa ufa iriafanausa maridaqa. Qinee aaqafana andeeqa qimaqoosa ufa sia iriafanausa maridaqa.

<sup>14</sup> Qinee maqee aiqamausa nifusaa tautummasee qisauriranaki firiridaqa.

<sup>15</sup> Anneenna nammari kai naa. Aneenna taquki kai sakasee naa.

<sup>16</sup> Moomoo aanaaseesaa faiqi maqasainausa sia ani andeeqa amaqeeffaranoo.

<sup>17</sup> Anee moo aanaaseesa maqasainna faiqifa mi anaaseena oosanaki mariannoo. Sia ani faqa mariannoo.

<sup>18</sup> Aneenna anaqa kumaaraasaa maroonnana mina faqa amiqidana اساسammasee maria.

<sup>19</sup> Mina afaqa amiqirafa eeqaku miqirafa ummooqurirafa maridanoo. Mina faqa maqee maqee maria. Anee maqee maqee mina naammara kai aidiyani. Mina aidirafa maqee maqee ani qumaraani.

<sup>20</sup> Oo qini qimaaku nanaree anee moo aanaaseera ridanee. Anee nanaree moo fasiqa anaqa naammara ridanee.

<sup>21</sup> Anee aiqama ainaina auqaannana Yaaweefa qafaidanoo. Anee yaifee fuananoo Yaaaweefa anisaa rakisidanoo.

<sup>22</sup> Manda oosana maree mariasa nári mandainaina fannoo ufaanara foora nári ninuka qumaraidanoo.

<sup>23</sup> Mi fasiqausa sia nariqa nirana mariranasaa rakisira irirafa marinara kuqidaqa.

## 6

<sup>1-2</sup> Oo qini qimaaku akaqausa dinnaa munnimma maraifana misa faqa qima afeekaika maseenana qinee mina akiqra ianauree qimasee sia miqinana aneenna qima afeekaikianna ufanaki ufaana kiara foora aruananoo.

<sup>3</sup> Oo qini qimaaku anee maaqi qimasee mi fasiqana ufaanakinaana aneenna faaqa mara kaqinni quaa. Doo anee aneenna afaqa aneenna aqoonnana asaukuki quqaananoo kai kaqi moodaaqoo oonureenana mi ufana taikasaa.

<sup>4</sup> Anee sia faiqaa sia kisaaqasaa adooaida maria.

<sup>5</sup> Anee kaasau kuara miqirafa maria ufaanaki arufinoo munari minarindee dauni ratoofusee mina faqa ufa qima taikaa. Ufina ufaanaki aiku arindee ia, dauni aruratoofua.

<sup>6</sup> Oo kudi fasiqauqa tarika mariqoo oonuree mina oosana qafaaqa. Innee mina oosana qafamaseeqa oonumafi iriseeqa irirana faqasaikifaranoo.

<sup>7</sup> Sia tarika rakisirafa moo maridanoo sia misa fukifaaki qimarifa moo maridanoo, sia moo fannoo misa aranaiqi qimannimifaqa ainainai fidaqa.

<sup>8</sup> Suani aukwana misa nári kai nári narana moomoo afeedidaqa. Aaku aukwana narana taikainaqa nararee qimasee miqidaqa.

<sup>9</sup> Oo kudi fasiqa kisaaqasaa fee innee miqoo faiqaqee ifaree. Yairee fee innee findi fifaree.

<sup>10</sup> Innee maaqi qimariafanoo maasa qusasaa faiqaanauree qimariafanoo. Maasa qeeqa qisauku raqandaammasee kaqikaqoo idooanauree qimariafanoo.

<sup>11</sup> Innee faiqaafanoo inni faiqarafa ummuara fasiqara foora inni aiqama ainaina ummuara maraanoo.

<sup>12</sup> Mana oosana maree mariasa unnufa qiqa nidaqa.

<sup>13</sup> Nikaru qiraree qimasee nifu quandaqaandi mariasa misa niku munuree miniree imariasa maridaqa.

<sup>14</sup> Misa nimuqusaki nikaruqirafa qumbiqarasa maridaqa. Maqee maqee mandainainara kai ufa qimariasa maridaqa. Misa aiqamatina nidaqa ummaara kambigaanifeera kai andaana riqa nidaqa.

<sup>15</sup> Miqi marianara firaa ummaara sia aaquqima nimaqarai tautummasee misa naruanoo.

<sup>16</sup> Yaaweefa qisauku dinni taikasee dinni oonu qaara marasee ainaina auqaanara kaaqa fidiiaanoo.

<sup>17-19</sup> Maa ainainnara fidiqaa idanoo. Oori uqeeranara faqa unna qimari afaurunara faqa fifau fidika ruigee marinara faqa manda oosanara nari iriranaki tipundaari mariana faqa mandainainaki dauni niku ree mariana faqa kootaki unnufa qimariana faqa nari nikaqaafasaa ummaara nimimaria oosannara faqa Yaaweefa fidiqaa idanoo.

<sup>20</sup> Oo qini qimaaku ani akausa qimamunnandee inana aneenna anoona ufa sia qaunua.

<sup>21</sup> Aiqama kari aneenna anaukoo ufa sia quqaa, aneenna amuqusaki quqasee atukaraa.

<sup>22</sup> Misa qimaminna ufa ani indaarunnikamma amaqaanoo. Eendaki anisaa itita amaqaaseenoo faasaana niranaki ani aakapaanoo.

<sup>23</sup> Ani anaukoo aakapara ufa qoomara foora kaaqaqaidanoo. Misa andeeqara ufa fannoo ani maa maqanasaa marirana andeeqa amaqaaidanoo.

<sup>24</sup> Mi ufafa dapi maraqa nua anaasee finnai firanasaa itita amaqaanoo. Akaqa fasiqauqa ninaaqmaaka fadameena akira ufasaa itito amaqaanoo.

<sup>25</sup> Sia anee misa amiqira nifaqara rua. Afunnai ani mareeqeenoo ufaanaki aruaneera quqainana sia minara iria.

<sup>26</sup> Dapi maraqa nua anaaseefinnai finana kaqika feefauru narana maree mariana amana kai aqinnaranoo. Faiqi moo anaqa faqa finana firaa feefauru faqa aneenna aiqama ainaina faqa aqinnaranoo.

<sup>27</sup> Amanee anee ida auri marina qumaree amuqusasaa uqasainanoo qamunna sia qaannoo fee. Ani qamunna faqa afaaqa faqa aiqama ida qaannoo.

<sup>28</sup> Amanee anee ida auruki aiku reennaree sia amana reennaranoo. Aiku turuqaanoo.

<sup>29</sup> Doo miqi kai inoo faiqi moo fannoo nari aqoonnana anaqa faqa sia faiqaanoo. Miqinafa aupurarana maraanoo.

<sup>30</sup> Faiqi moo fannoo aararainanoo ummuara masainanoo sia minara firaaqoo ufa qifaranoo.

<sup>31</sup> Akaqausa mifasiqana paqurimmasaifanoo moodaa ainaina ummuarinnana akiqara dinni taikasee dinni ani qaara marasee 7 ainaina amiannoo. Mifa nari uaqeei ainaina aiqama amiannoo.

<sup>32</sup> Narana ummuari fasiqanara miqimminoo marifanoo anaasee ummuari marinara maaqimminoo maridanoo. Moo fasia anaqa faqa manda oosana auqee marifa nari kai nari kurididanoo.

<sup>33</sup> Mi fasiqafa arirana faqa aqirana faqa maraidanoo. Mi fasiqafa naaruara asauringanaki mariannoo.

<sup>34</sup> Mi anaaseena afaaqi paqurinanoo rairai qirafa idara foora atakuqaanoo. Minara ufa qifanoo sia kaqi irinoo minnisaanoo, arana qarafa kisaagasaa mariannoo. Sia kai kaqi taikaanoo.

<sup>35</sup> Sia mifa feefauruara iriannoo munnimma ainaina oosana oosana aminanoo siamma iriannoo sia doo fee qiannoo.

## 7

<sup>1</sup> Oo qini qimaaku qinee qimamianna ufana iria. Qinee auqaannee qianna ainainnara sia qaunua.

<sup>2</sup> Anee qinee qunnandee inana amiqimmasee marinaranoo. Qini aamuaqiira ufa aneenna afu rakisinnandee amiqimmasee rakisia.

<sup>3</sup> Qini aakapara ufa aiqama kari uaqeeina ani faqa mariani. Aneenna amuqusasaa akara rumasaina mariani.

<sup>4</sup> Oo qini qimaaku anee aiqira iriranara qini qisookifee qia. Oonumafi iriranara qifaaqa saa qiqoondi fee qia.

<sup>5</sup> Anee miqinanoo mi irirafa moona anaqa faqa firanasaa aitita amaqaanoo. Mi anaaseesa fadameena akira ufasaa itita amaqaanoo.

<sup>6-9</sup> Qinee qeeqa maaqaki ooqufaqee qeeqa kooqirunna qafaunanoo dapi kumaarauqa marianakiqari moo furufarira kumaara fannoo ummuarimari anaaseena maaqa marindanai ubeekaidanoo mina kooqindanai fidanoo doo mina naambeeqandanai finoo suani keeqaifanoo sisisasa qeenoo fee eendaki fee asukunai fee doo mifinnai fidanoo.

<sup>10</sup> Mi anaaseefa doo oonu afiqararee qimasee anidanoo. Aatata nua anaaseesa qamunna afisusee anidanoo.

<sup>11</sup> Mi anaaseefa kambaaramasee ufa qimarifa asaurirana siaifa maridanoo. Mifa aiqama kari fifau aatata oonuree aniree inoo nifa maridanoo.

<sup>12</sup> Anee aanai finana miqoo qafeennaranoo. Anee maqusa qambaanaa finana mina miqoo qafeennaranoo. Mifa aiqama aana kindooraki oonureenoo afu munu maqee mini maqee iannoo.

<sup>13</sup> Mi kummaaraana paqurimandee asauku qaqusee qumaseenoo amooqa namaseenoo afuki kai qafanoo maridanoo qiannoo.

<sup>14</sup> Doo qinee maqee amaana maqaki keeqafiga tatufirana suqeeqee qiannoo. Doo qinee tatufirana suqaidaqa aandau ati maree mini quqasee anidaqee qiannoo.

<sup>15</sup> Qinee qeeqa maaqakiqari raudamaki aniara randamaree doo ani paquriqa.

<sup>16</sup> Doo qinee qeeqa qaari amiqirana ufiqiseeqa. Isipa maqanna qamunna amiqirananoo minasaa ufiqiseeqa.

<sup>17-18</sup> Qinee minasaa fadameena afundi marina adieesee makaqa anoona faqa saadapu anoona faqa adieeseeqaa doo anee anirana maaqooqari oosana arasee nariara nariara nidira nammari neenee iaqasaa.

<sup>19-20</sup> Qini qifaaqi sia maridanoo nianai fifinoo mifa munnimma moomoo maree finoo mifa qaara amaana minni maraannoo sia kai kaqi aniannoo.

<sup>21</sup> Mi anaaseefa nari naammanna minna qumaraseenoo ummooqifira ufannai mina rarisaiddanoo.

<sup>22</sup> Mi anaaseena ufa fannoo mi kumaaraana afu dapikammasaifanoo aandau miqirafa sia irirai kuqiranaki kaqi fidanoo.

<sup>23</sup> Kaasau kuara ufaanaki arinoo marifanoo faiqi oonu qafeenoo doo amuqusa arifanoo kuqidanoo. Mifa ufiniara foora sia irirai ufini ufanaki keeqafinoo kuquannoo. Mifa nari marirafa manda marinara sia iridanoo.

<sup>24</sup> Oo qini faiqi namu innee amiqimmasee qinee qianna ufana iriaqa.

<sup>25</sup> Inni nimuqusa fannoo sia mi anaaseena faqa firara findifuani. Sia kambaaramasee mi anaaseefa marinnai fuaqa.

<sup>26</sup> Mifa moomoo fasiqa mandaikamma nimaqaseenoo kuqirana niminoo. Sia amana nisaana rirana amana kuqa narimarifa maridanoo.

<sup>27</sup> Anee mi aanaaseena maaqai finana anee kuqira aatata fimariananoo. Mi aanafa kuqirannai fimaria aanafa qusa aana maridanoo.

## 8

<sup>1</sup> Iriaqa, amiqira irirafa irirana faqaa aanaaseera foora nammeera qidanoo. Oonumafi irirafa dadaaqinoo firaqqoo naaraidanoo.

<sup>2</sup> Amiqira irirafa aaqana namusaa fee aanasaa fee aana kindooraki fee kikiqinoo maridanoo nammeera qidanoo.

<sup>3</sup> Maaqusa kooqiki fee maqusa atinni fee kikiqinoo maridanoo maaqi qimasee nammeera qidanoo.

<sup>4</sup> Inni aiqamausa qimannimidaqa, inni aiqama maa maqa maaqana saaqaaraasa naaraidaqa.

<sup>5</sup> Innee irirana siaisa irirana maraaqa. Furufariransa inneeqa furufarirana kiqari nifu maqasaa qafamasee iriaqa.

<sup>6</sup> Qini amiqira ufa iriaqa, aiqama qinee qimannimi marunna ufafa kuqaa kai maridanoo.

<sup>7</sup> Qinee qimarunna ufafa kuqaa anoona maridanoo. Qinee unna ufara fidiqaa midaqa.

<sup>8</sup> Qini aiqama ufa kuqaa kai maridanoo. Sia unna qirafa faqa eendaandirafa faqa minaki maridanoo.

<sup>9</sup> Irirana faqaafa qini ufara aiqama iriannoo kaaqa qara ufa fee qiannoo. Irirana faqaasa qini ufara kuqaa anoonee qifaranoo.

<sup>10</sup> Innee siruaa minnisee qini naakaparanara amiqira ainainee qimasee maraaqa. Innee kooru munnimara rimariana minnisaqa, irirafa mifa naaru naaru marirafa maridanoo mina maraaqa.

<sup>11</sup> Qinee amiqira iriransa maridaqa qinee nifaqa auqi maria amiqira ainainausa faqa uriaqararansa maridaqa. Sia moo ainaina innee rimariafa qini qimana maridanoo.

<sup>12</sup> Qinee iriransa ufa raina nimaqarana akausa maridaqa. Qinee iriransa akooqoo irirana auqi marunansa maridaqa.

<sup>13</sup> Yaaweenara qeerairida mina ufa qaindusiraree qimasee manda oosanara fidiqaa ia. Qinee ramoo ramaa iranara faqa nari nuqu uqeerara oosanara faqa manda oosanara faqa unnufa qiranara faqa fidiqaamidaga.

<sup>14</sup> Qinee ainaina auqararee qimasee qeeqa iriranaki qima irisee auqaanura. Qinee oonu mafi irirana faqaasa maridaqa qinee afeeka maridaqa.

<sup>15</sup> Qinee uriqararausa faqa rakisirausa faqa dadaaquanaqa amiqira irirana qimasee maqa maaqaki rakisi nimaqaidaqa.

<sup>16</sup> Aiqama maa maqanasaa qaraa rakisirausa qini dadaaqirananoo rakisi nimaqaidaqa. Uriqararausa miqi kai idaqa.

<sup>17</sup> Qiniara rimariasara qinee faqa misara ridaqa. Nimudaanai qimasee qiniara randee mariasa misa qini paqurifaranoo.

<sup>18</sup> Qinee moomoo munnimma faqa uriqarara auqu faqa uaqeeidaqa nimianauro. Aiqama ainaina auqainafa anoona kambiqaarana faqa reemindeemirirana faqa nimi-anauro.

<sup>19</sup> Qini ainaina maraafa kooru uraaqararafa maridanoo. Mina amiqirafa kaaqa amiqira siruaa faqa uriaqararafa maridanoo.

<sup>20</sup> Qinee andeeqara aatata kai fidaqa. Qinee ufa amana amana kai raina nimaqara aatata fidaqa.

<sup>21</sup> Qiniara rimariasara moomoo qumiasana nimidaqa misa maaqaki qumiasana qumbiqannisaidafa.

<sup>22</sup> Ooqai Yaaweefa aiqama ainaina auquane qimaseenoo qini irirana naaree auqinuu.

<sup>23</sup> Ooqai uqanna aiqama ainaina sia auquqoo qini irirausa naaree auqinuu. Maa maqa maqana sia auquaqee idanoo qini naaree auqinuu.

<sup>24</sup> Ooqai ooruku nammari sia maruqoo qinee naaree kambiqaafanauro maridaqa. Maqakiqari nammariuqa sia ururee marufaqa qinee naaree kambiqaqiafana.

<sup>25</sup> Aaqanauqa faqa amuaqu namuqa faqa sia maruqoo qinee naaree kambiqaafanauro maridaqa.

<sup>26</sup> Yaaweefa maqa maaqa faqa kookoomma faqa sia auqu aukuaana qinee irirausa naaree mariafanauro maridaqa.

<sup>27</sup> Qinee faqa mariafananoo Yaaweefa innaaruna auqu quqanau. Qinee faqa mariafananoo Yaaweefa ooruku nammari fiqufiqumma auqu quqanau.

<sup>28</sup> Qinee faqa mariafananoo Yaaweefa oonnamu auqu quqanau. Qinee faqa mariafananoo Yaaweefa ooruku nammari maqakiqari ururee maruna auqu quqanau.

<sup>29</sup> Qinee irirausa Yaaweena faqa mariafananoo Yaaweefa ooruku nammari mandiranara maa oosirana amana kai mandianne qufanoo miqinninuu. Qinee faqa mariafananoo Yaaweefa maa maqana maaqa atunara foora rakiasoofanoo maridanoo.

<sup>30</sup> Yaaweefa mi ainainausa auqi marufaqa qinee amiqira irirausa mina aaqa faiqi aanaaqiara foora mariaafanauro maridaqa. Qinee mina afusaa maridaqa aiqama kari asasirana amimariqiafana.

<sup>31</sup> Aiqama maqa maaqai asasiqa niniaafanauro maridaqa. Qinee faiqi faiqi faqa asasiqa niniaafanauro maridaqa.

<sup>32</sup> Doo maqee kumaaraa fasiqa anaasee qini ufa iriaqa. Qinee qiannandee iqa innee asasifaranoo.

<sup>33</sup> Innee qini naakapara ufa iriaqa, sia minnisaaqa. Iriseeqa irirana faqaasa mariaqa.

<sup>34</sup> Qini ufa irimariasara asasifaranoo. Qini kooqiki aiqama kari mariasa faqa eeqa maaqai fimarunna aanna afainni maridaqa qiniara rakisi mariasa asasifaranoo.

<sup>35</sup> Faiqi moo fannoo qini irirausa paqurinafa kaqi marirana faqa paquriannoo.

<sup>36</sup> Faiqi qini irirausara sia randee mariasa nariqa kai nariqa mandaikamma ni-maqaidaqa. Qini irirausara fidiqaa imariasara kuqiranara nididanoo.

## 9

<sup>1</sup> Irirafa nari maaqa atuna qisauku dinni taikasee dinni ani qaara marasee 7 pausasaa usakaseenoo.

<sup>2</sup> Irirafa nari aandauro arusee suqeenoo. Narana faqa uainna nammari faqa deedaqamma narana neemaria qainanasaa oomaqa saka quqanau.

<sup>3</sup> Mifa nari ainainira maanaaqauqa niqiqoofaqa maqusasaa aaqanaikiraqoo ooruree nammeera qiaqee niqiqoofaqa fiqau.

<sup>4</sup> Innee ooruree maaqi qimasee nammeera qiaqa. Innee irirana siaisa mai aniree qoomaqa naaqee qiaqa. Furufarirausara maaqi qimasee nammeera qiaqa.

<sup>5</sup> Mai aniree qini narana nammari naaqee qiaqa.

<sup>6</sup> Inneeqa furufarirana minnisee kisaaqusaa mari faranoo. Amiqira iriranamau fuuqa.

<sup>7</sup> Anee nariara maasa amiqirausee qimaria fasiqausa qaoo qinaqa misa ani namuqaaka mifaranoo. Nariara andeeqarausee qimariasara aaqaranara qaoo qinaqa misa ani arifaranoo.

<sup>8</sup> Anee ufa rukiee maria fasiqausara qaoo qinaqa misa aniaara fidiqaa mifaranoo. Anee irirana faqa fasiqa andeeqa amaqaianoo ani ufara eedoo qimasee ani ameemaanai keeqannoo.

<sup>9</sup> Nana ainainaree irirana faqaana qimaminanoo mifa misa kaaqa firaqoo irirana faqaasaikamma nimaqaannoo. Andeeqara fasiqauqa qimanniminaqa misa moo faqa moo faqa irirana mareefaranoo.

<sup>10</sup> Yaaweenara rufeenana irirana faqaafa mariannaranoo. Anutuna naaquqara ainainara irinanoo mifa ufa irirana oosana amiannoo.

<sup>11</sup> Amiqira irirafa faiqi marirana maa maqanasaa kisaqa kamu rarisama nimaqaidanoo.

<sup>12</sup> Anee irirana faqaafa marinanoo mi irirafa ani moomoo amiqirana amiannoo. Anee mi irirana minnisainanoo aypurarafa aniki mariannoo.

<sup>13</sup> Furufarirafa asaurirana sia anaaseefara foora maridanoo. Firaqoo faaqa quqasee ufa qimari anaaseefara foora maridanoo.

<sup>14</sup> Miqira anaasee fannoo nari maaqa kooqi afaisaa oqumarifinoo aiqama maqusa mirinni urinnaaqaramafa maridanoo.

<sup>15</sup> Akaqausa nari qimaqaannai nari ainainai aiqaree fimariasa misa naarama nari maaqaki quqaidanoo.

<sup>16</sup> Mi anaaseefa maaqi qimasee furufarirauusa qimannimidanoo. Irirana siaisa doo mai aniaqee qidanoo. Furufarirauusara maaqi qidanoo.

<sup>17</sup> Ummuarira nammari adiafaa irafa maridanoo. Ummuarira feemu narafa adiafaa midanoo.

<sup>18</sup> Mi anaaseefinnai fimariasa kuqimarianara furufarirafa fasiqa fannoo sia iridanoo. Mi anaaseena maaqaki keeqoosa maqee kuqira maqa maaqaki maridaqa.

## 10

<sup>1</sup> Maana Sooroomoonnana aaquqira ufa maridanoo. Irirana faqaasa nari rukausa mara asasirana nimidaqa. Furufarirauusa nari ninausa nisaurirana nimidaqa.

<sup>2</sup> Unna qira aatata marainna ainainafa sia ani dadaaqiannoo. Anoonna qira aatata marainna ainainafa ani marirana dadaaqiannoo.

<sup>3</sup> Anutufa sia andeeqara fasiqauqa naarararana nimiannoo. Manda oosana maree mariasa nari nidimari ainainna mararanasaa Anutufa itita nisaidanoo.

<sup>4</sup> Kudoosaaparafa kudikirana amiannoo. Kadaapi rirafa ani ainaina faqaa faikamma aisaidanoo.

<sup>5</sup> Irirana faqaafa narana qaanaakifaqa afeedidaqa. Moo fannoo narana unnakara aukuana faiaqee idanoo sia narana deedaqafi asauriranaki mariannoo.

<sup>6</sup> Andeeqara fasiqa anaasee amiqi amiqirana mareefaranoo. Manda oosana maree marina ufa fannoo mina manda irirana kukeeqasaifanoo akaqausa mandaikamma nisaidanoo.

<sup>7</sup> Amiqira fasiqa kuqufinaqa amiqira ainainara foora iriranaki kaqi minara oonu mafi irifaranoo. Manda oosana maree mari fasiqafa kuqufinaqa misa mi fasiqanara kai kaqi qaunuseefaranoo.

<sup>8</sup> Irirana faqaasa amiqira naamuaqira ufa iriseeqa nari nimuqusaki mara quqaidaqa. Fifau faafau iqa nuasa kuridifanoo.

<sup>9</sup> Kuqaa qira oosana fannoo faiqi mareeqeenoo andeeqaranaki quqaannoo. Unna qira oosana fannoo faiqi mareeqeenoo maaniki aquannoo.

<sup>10</sup> Noorinnai nifunnai imariasa ummaara kambiqaanifeera miqidaqa. Aiqama nifufsaa paasoosammandee manda oosana qaa qinafa mifa asooarana nimidanoo miqidanoo.

<sup>11</sup> Amiqira fasiqa ufa fannoo nammariara foora, maqakiqari urureenoo kaqi marirana nimidanoo. Mandoosana maree mari fasiqana ufa fannoo nari irirana kukeeqa saifanoo nari aqoonausa mandaikamma nimaqaidanoo.

<sup>12</sup> Faqiqi anaaseera fidiqaa ira oosana fannoo ummaara kambiqaidanoo. Faqiqi anaaseera nidira oosana fannoo aiqama misa aqarana minninnisaidanoo.

<sup>13</sup> Irirana faqaa fasiqa afaurusaa amiqira ufa kai ururaidanoo. Furufarirafa fasiqa arirafa kai maridanoo.

<sup>14</sup> Irirana faqaasa irirana oosana oosana moodaasaqa maridanoo. Furufarirafa fasiqa ufa qinanoo ummaara sia nianai mariannoo aqa uqanna mariannoo.

<sup>15</sup> Ainaina faqaana nari ainaina fannoo itita amaqaaidanoo. Kudi fasiqa fannoo ainaina sia marinara kuridiannoo.

<sup>16</sup> Amiqira oosana auqaana akiqara kaqi marirafa maridanoo. Numoo fannoo nifiqeenoo firaa numooki kai fidanoo.

<sup>17</sup> Naakapara ufa iri mariasa sia kuqifaranoo. Naakaparanara nikooqee mariasa manda aatata fifaranoo.

<sup>18</sup> Faqiqi moo fannoo faqiqi anaaseera ookiqari amiqi amiqidanoo umee fidiqaa imarifa unnaqi marifa maridanoo. Munuqi miniqinoo nifa furufari marifa maridanoo.

<sup>19</sup> Ufa moomoo qinana moomoo aaqarana mareennaranoo. Anee irirana faqaafa maridana qireeda marinnaranoo.

<sup>20</sup> Amkiqira fasiqa ufa fannoo amiqira siruaara foora maridanoo. Mandoosana maree mari fasiqana irirafa maannukuara foora maridanoo.

<sup>21</sup> Amiqira fasiqa ufa fannoo moomoosa dadaaqidanoo. Furufari marifa narí furufari-rannanai narí kai aridanoo.

<sup>22</sup> Anutuna amiqi amiqiranannai kai ainaina faqaafaikinnaranoo. Ani kadaapirirafa sia amana minaki ookaa iannoo Anutufa kai amiannoo.

<sup>23</sup> Furufarirafa manda oosana auqarara kai asaidanoo. Amiqira irirana faqaafa amiqira oosana auqee marinara kai asaidanoo.

<sup>24</sup> Andeeqaraisa nári nidimari ainainna mareefaranoo. Mandoosana maree mariasa kaaqa rufiee maria ainainna mareefaranoo.

<sup>25</sup> Deedeefaa ufai firaafa uqinanoo mandoosana maree mariasa fuaqamma aqusaannoo. Andeeqaraisa sia fuaqa aquannoo. Misaki kaqi marifaranoo.

<sup>26</sup> Anee kudoosaapara fasiqa sia aneenna ainainiani feera afiqaa. Afiqasainanoo kudoosapee marinana afai sandurinafaara. Ida muna aninna afuki keeqeenoorra foora iandoora sia afiqaa.

<sup>27</sup> Yaaweena ufa qaindusinana sia dauni kuqinnaranoo kisaqasaa marinnaranoo. Manda oosana maree mariasa kuqirafa kisaqasaa marifaqa kasaqai kuqidaqa.

<sup>28</sup> Andeeqara fasiqa anaasee nidimari ainainafa kuqaa kambiqaínaqa asasifaranoo. Manda oosana maree mariasa sia moo ainaina mareefaranoo.

<sup>29</sup> Kuqaa qira oosana faqaasasaa Anutufa faandaamurara foora misa itita nimaqaidanoo. Miqimmaseenoo quandaki mandoosana maree mariasa kuridi nimaqaidanoo.

<sup>30</sup> Andeeqara oosana maree mariasa sia amana atoosaa ususee kumbaimmaqifaranoo, misa doo miqoo mapukiqa maridaqa. Manda oosana maree mariasa sia mi maqa maqaanaki marifaranoo.

<sup>31</sup> Andeeqara oosana maree mariasa amiqira ufa kai qidaqa. Manda ufa qimari fasiqana afaurusaa ititeefaranoo.

<sup>32</sup> Andeeqaraisa ufa qimannimidaqa narí oonu mafi iriseenoo mina ookiqari amiqira ufa kai qidanoo. Manda oosana maree mariasa aiqama kari narira ufa kai qidaqa.

## 11

<sup>1</sup> Sia andeeqara sikeerara foora imariasara Yaawefa fidiyaqa midanoo. Mifa andeeqara sikeerara aidifanoo asaidanoo.

<sup>2</sup> Faiqi moo fannoo narí afaaqa amooqi marifa qusasaa asauriranaki aqufuannoo. Moo fannoo narí afaaqara reendeeni marifa irirana faqaafa mariannoo.

<sup>3</sup> Ainainara kuqaa qimariasa misa nári kuqaa qira oosana fannoo manda ainainasaa itita nisaidanoo. Sia Yaaweena saqarikinausa nariqa unnaqira oosana fannoo nariqa kuridi nimaqaidanoo.

<sup>4</sup> Ani moomoo ainaina fannoo sia ani kuqiranasaa itita amaqaanoo. Aneeqara oosana fannoo ani itita amaqaanoo.

<sup>5</sup> Kuqaa qira oosana fannoo andeeqara fasiqa marirana amanaikamma amaqaidanoo. Sia saqariki mariasa nariqa mi oosanafa nári nikuqama nimifaqa aqufidaqa.

<sup>6</sup> Andeeqaraisa nári andeeqarafa idukunnisaidanoo. Sia saqariki mariasa nári mi manda oosanafa nári ufaanara foora ninuka aridanoo.

<sup>7</sup> Manda oosana maree mariasa nári kuqira faasaana nári nidi marifaqa mararee qimaria ainainafa mi faasaanna taikaannoo. Manda oosanannai ainaina marararee qimariasa mi faasaanna nári ainaina mararafa taikaannoo.

<sup>8</sup> Amiqira oosana maree marina mandainaina anifanoo Anutufa itita amaqaifanoo mi mandainainafa aiqareenoo mandainaina maree mariasa nifaaqai aqufidanoo.

<sup>9</sup> Anutunara nikoqee mariasa ufa fannoo ani mareeqee mandaki quqaisaannoo. Andeeqara oosana maree mariasa irirafa ani mareeqee amiqiraqoo quqaannoo.

<sup>10</sup> Andeeqee maria misa aiqama ainaina andeeqaiyaqa faiqi anaasee mina qafamasee asasiyaqa. Manda oosana maree mariasa kuridifaqa asasifaranoo.

<sup>11</sup> Andeeqee mariasa maqusa amiqi amiqinoo maridanoo. Manda oosana maree mariasa ufa fannoo nári maqusa naakunduka midanoo.

<sup>12</sup> Irirana siaifa narí aqoonasaa raiqara ufa qimannimaqaidanoo. Irirana faqaafa sia miqira ufa qidanoo oo qummunimmasee maridanoo.

<sup>13</sup> Munuqi miniqimarifa aqaqaidanoo kukeeqarana kooroo imarifa maridanoo. Amiqi mari fasiqafa mifa kukeeqarana rafaqaqidanoo.

<sup>14</sup> Moomoo irirana faqaasa marinna maqusafa sia aqufuannoo. Irirana sia marinna maqusafa aqufuannoo.

<sup>15</sup> Anee moo maqannaa dinnaakira munnimmara dadaaqianee qinana dadaaqinanoo doo ani munnimma kuridiranaki finanoo ani afaaqa mandaika uqanna iannoo. Anee aanaamuru feefauru dadaaqiranara akooqee marinanoo ani munnimma kaqi mariannoo anee amiqiraqoo kaqi marinnaranoo.

<sup>16</sup> Afaaridanoo fifamari anaaseefa amiqirafa aiqamausa mi anaaseena amooqi mariafa maridanoo. Manda oosana maree mari anaaseenara fidiqaaq midanoo. Kudoosaapee maria fasiqa anaaseesa sia ainaina moomoo mareefaranoo. Nimudaanaa qimaria fasiqa anaaseesa ainaina qumiasana moomoo marisa maridaqa.

<sup>17</sup> Afaarimari fasiqafa nari afaarimarifa nariki kai maridanoo nari dadaaqidanoo. Kaqi narimari fasiqafa mi narirafa quandaki nari aridanoo.

<sup>18</sup> Manda oosana maree mariasa maree maria qumiasana ainainafa sia misa dadaaqidanoo. Andeeqara oosana maree mariasa maree maria ainainafa akooqoo afeeka ainaina mariannoo.

<sup>19</sup> Yafee andeeqara oosana aiqama kari auqaae marifa sia kuquannoo kaqi mariannoo. Manda oosanara sandanainai qimarifa dauni kuqirana paquriannoo.

<sup>20</sup> Yaaweefa manda irirana faqaasara fidiqaaq midanoo. Andeeqee mariasara Anutufa ridanoo.

<sup>21</sup> Anee irimmariananoo manda oosana maree maria fasiqa anaaseesa aupuraranaki fifaranoo. Andeeqara oosana maree mariasa sia mi aupuraranaki marifaranoo.

<sup>22</sup> Amiqira afaaqa faqaa anaasee maridanoo irirana furufari marifa kuara aanna raidanoo. Amiqira afaaqa faqaafa fifau maridanoo.

<sup>23</sup> Andeeqara oosana maree mariasa moo ainainara nidifaqa marasaafanoo amiqirafa maridanoo. Manda oosana maree mariasa nari nidi mari ainainna marasaafaqa aiqamausa aanoo qidaqa.

<sup>24</sup> Faiqi moo fannoo afaarinoo nimi marifanoo mina ainaina marirara kai idanoo. Faiqi moo fannoo manda fasiqa kaaqa ainainara tatamaqidanoo rakisi qumaraifa sia mina ainaina moomoo kidanoo.

<sup>25</sup> Afaarinanoo ani ainaina moomoo mariannoo. Anee aneenna ainaina akaqausa dadaaqinana niminaqa ani faqa dadaaqiqa amifaranoo.

<sup>26</sup> Faiqi moo fannoo aandaroo narimarifanoo nari narana moomoo marifanoo saina munnimma nambaqa meeraqoo auqu ramasaanaqa qimiae qimarinaru faiqi anaasee mi fasiqa anaaseena aquramma araidaqa. Kaqi feefauriaqee qimari fasiqana amooqidaqa.

<sup>27</sup> Fainqi moo fannoo amiqira oosanara afeekaikammasee randainafa mi fasiqafa nari amooqirana faqa paquriannoo. Faiqi moo fannoo manda oosanara randanoo fimarifa mi manda ainaina paquriannoo.

<sup>28</sup> Nari qumiasanasaa mundi mariasa ufai firaafa uqnoo saqari amanee rauqu aqusaifafanoo maqasaa aqufindee mifaranoo. Andeeqara oosana maree mariasa misa sia fuka saqari amanee rafoora amiqi amiqi faranoo.

<sup>29</sup> Faiqi moo fannoo faiqi anaaseera manda ufa qimarinaqa faiqi anaasee findimeeqee daraani mambifanoo nariara quanda quandidanoo. Furufarira fasiqauqa irirana faqaasa ainainira faiqi marifaranoo.

<sup>30</sup> Andeeqee maria oosanafa kaqi marirana nimidanoo. Mandoosana maree mariasa kasaqaqanda midaqa.

<sup>31</sup> Amiqi maria fasiqausa maa maqanasaa nari andeeqasee marinnana akiqara mareefaranoo. Manda oosana maree mariasa misa faqa maqee kamuqoo nari manda oosana akiqara firaqoo aupurarana mareefaranoo.

## 12

<sup>1</sup> Faiqi moo fannoo aqamasainanoo moo fannoo qimaminanoo eedoo qimasee irinafa irirana faqaafa mariannoo. Aakapara ufara akooqee marifa furufarira fasiqa maridanoo. <sup>2</sup> Yaaweefa andeeqara fasiqa anaaseera asaidanoo. Manda iriranara tipundaari mariasara akooqidanoo.

<sup>3</sup> Mandoosana fannoo sia amana itita nimaqaannoo. Andeeqarusa sia amana kasi kasifaranoo atuka araqa marifaranoo.

<sup>4</sup> Irirana faqaa anaasee afaaqi fannoo mina amooqida asaidanoo. Manda oosana maree mari anaaseefa nari afaaqi asaurirana amisaiifanoo amudaani rumafifanoo aurinoora foora inoo maridanoo.

<sup>5</sup> Kuqaa anoona ufa qimariasa aiqama ainaina andeeqa nimaqeeffaranoo. Manda oosana maree mariasa inni nikaru qiranara kai iridaqa.



<sup>6</sup> Manda oosana maree mariasa misa ufaana fufidaqa ufannai faiqi naridaqa. Faiqi andeegere mariasa misa ufaana kinaana andeegara ufannai idukidaqa.

<sup>7</sup> Manda oosana maree mariasa kuqifanoo misasaa ani aruakinausa sia marifaranoo. Andeegara fasiqa aiku asauku sia dauni kuqifaranoo kaqi marifaranoo.

<sup>8</sup> Anee irirana faqaafa marinaqa faiqi anaasee ani amooqifaranoo. Anee irirana siaifa marinaqa faiqi anaasee noori runifaranoo.

<sup>9</sup> Kaqi fifau fasiqa nari ainainiranannai narana naidanoo amiqiranaki maridanoo. Moo fannoo nariara unnaqimasee karaambaiqee qimasee oonuree aniree inoo nidanoo naranara sia, marifanoo aarara nidanoo.

<sup>10</sup> Andeegara fasiqauqa nari aandau kuara faini nimuqusi marifaqa rakisidaqa. Manda oosana maree marifa kuara faini kaukaata qimannimaqaidanoo.

<sup>11</sup> Kaqaq ainaini mari fasiqana narana moomoo marifanoo naidanoo. Fifau unnaqira ainaina auqvanoo nifa narana sia marifa maridanoo.

<sup>12</sup> Manda oosana maree mariasa manda ainainara kai randaidaqa. Andeegere mariasa misa atukaraqa maridaqa.

<sup>13</sup> Mana oosana maree mariasa nari ufaki ufaanakiara foora aridaqa. Anoona qira oosana maree mariasa misa rakeemmaki kaqinni maridaqa.

<sup>14</sup> Aneenna ufa qimariannana akiiqara faqa aneenna asaukunoo uqee mariannana akiiqara faqa mareennaranoo. Aneenna auqaannana amana kai aiqama ainaina mareennaranoo.

<sup>15</sup> Furufarira fasiqauqa aiqama kari nariara amiqimmidee qidaqa. Irirana faqaasa naamuaqia ufana amiqimmasee iridaqa.

<sup>16</sup> Irirana siaifa kaqikaa ufa iriseenoo tautummeeqeenoo aanoo qidanoo. Irirana faqaafa iriseenoo mafi rafaafusee mana mana fidanoo.

<sup>17</sup> Faiqi moo fannoo andeegarafa anoona ufa kai qidanoo andeegara ainaina uqeeraidanoo. Unnaqi mari fasiqafa unna qira ainaina kai uqeeraidanoo.

<sup>18</sup> Sia irirana irisee qimaria ufafa aseemara foora faiqi atekaidanoo. Irirana faqaasa nifauru fannoo ufaanakuru ununnisaidanoo.

<sup>19</sup> Kuqaa anoona ufa qimari afai afaurufa kisaagasaa maa maqanasaa mariannoo. Unna qimari afai afaurufa qusasaa taikaannoo.

<sup>20</sup> Manda ainainara tipundaari mariasa naundurui suka sanda itaranda maridanoo. Faiqi anaasee amiqiranaki mariaqere qimasee ainaini mariasa asasifaranoo.

<sup>21</sup> Andeegara fasiqa afaaqai sia mandainaina auqufuanoo. Mandainaina maree mariasa sia moo ainaina uaqeidaqa misaki ummaara kai qumbiqanoo maridanoo.

<sup>22</sup> Yaaweefa unnaqi maria afauru afainara fidiqaa midanoo. Andeegara ufa mau fimariasara Yaaweefa asaidanoo.

<sup>23</sup> Irirana faqaasa nari iria ufana rafaafusee maridaqa. Furufariraua nari furufarirana faqa quqasaida nimidaqa.

<sup>24</sup> Kadaapi rumasee ainainirafa ani afeeka amiannoo. Kudoosaaparafa ani moona ainainira faiqika maisaannoo.

<sup>25</sup> Moo ainainara amukee marifa ani asasirana aruannoo. Reedeenira ufa fannoo ani asooama amaqaannoo.

<sup>26</sup> Andeegere mari fasiqafa nari aqoondiqa amiqira aana uqannifiqaidanoo. Manda oosana maree mariasa nari mandoosana fannoo nari mareeqee kaqirunna ubeekaidanoo.

<sup>27</sup> Anee ainainirara kudoosaapeenana sia aneenna masaree qimarianna ainainna mareennaranoo. Anee amudaanai qimasee ainaininana aneenna aiki mari ainainna mareennaranoo.

<sup>28</sup> Kaqi marirannai fimaria aanafa andeegara oosana maridanoo. Kuqirannai fimaria aanafa mandoosana maridanoo. Aaquqira Ufa.

## 13

<sup>1</sup> Irirana faqa faiqiuqa nari ninausa nikausa ufa amiqimmasee iridaqa. Ufa rukiee mariasa sia moo fannoo qaoo qinnana iriannoo.

<sup>2</sup> Amiqira fasiqa fannoo amiqira ufa qinnana akiiqara maraannoo. Kaqi runna fimariasara nariranara kai naararaidanoo.

<sup>3</sup> Aneenna ufasa rakisina aneenna mariranasaa faqa rakisinna anoo. Fifau faafau ufa qimarifa nari kai nari aridanoo.

<sup>4</sup> Kudiki maria fasiqausa ainainara firaqoo amuqusi marifanoo sia maraannoo. Amudaanai qimasee ainaini marifa aiqama ainaina nari aidi ari aininausa maraannoo.

<sup>5</sup> Andeegara fasiqauqa unna ufara fidiqaa midaqa. Mandoosana maree mariasa marirafa nisaurirana faqa manduqarana faqa nimidanoo.

<sup>6</sup> Andeeqara oosana fannoo aaqarana siasa itita nimaqaidanoo. Manda oosana fannoo mandoosana maree mariasa mandaikamma nimaqaidanoo.

<sup>7</sup> Akaqausa ainaina siasa ainaina faqaasa naanna raidaqa sia ainaina marifaqa fifau miqidaqa. Akaqausa ainaina siasa naanna raidaqa noori kandamasee nidaqa misa moomoo ainaina faqaasa maridaqa.

<sup>8</sup> Ainaina faqaafa arirariafanoo narí ainaina moomoo nimifaqa sai aridaqa. Ainaina siasa sia minara rufaidafa manoo manaa idaqa.

<sup>9</sup> Amiqira oosana maree mariasa qoomara foora kaaqa qaidaqa. Manda oosana maree mariasa qimbarari mari qoomafara foora maridaqa.

<sup>10</sup> Narí amoo kai qidanoo mandufa kai ugeeree marifa sia moo ainaina auqaidanoo ummaara kai ugeeraidanoo. Reedeeni mariasa misa irirana nimiaqeera kai iraidafa.

<sup>11</sup> Unna iriranannai maree maria ainainafa kai kaqi taikaannoo. Kadaapi rumasee marainafa moomooka miannoo.

<sup>12</sup> Faiqí mo fannoo moo ainainara kisaagasaa afeesida marifanoo sia anifanoo amuqusa mandaikifanoo akoqaidanoo. Aidi mari ainainnara afeesida mariifanoo anirraifanoo asaidanoo.

<sup>13</sup> Faiqí mo fannoo naamuaqira ufara fidiqaa imarifa mandainaina ummaara aaraidanoo. Naamuaqira ufa reendeena mandee irimari fasiqa anaaseefa asairana maraidanoo.

<sup>14</sup> Irirana faqassa naamuaqira ufa fannoo kaqi marirana nimira nammariara foora maridanoo. Ani kuqiranakinaana dadaaqifana kaqinni ubeekeennaranoo.

<sup>15</sup> Irirana faqaana aqoonausa mina ufa qaindusidaqa minara ridaqa. Unna ufa qida mandaiki mariasa kuridira aatata fidaqa.

<sup>16</sup> Amiqira irirana faqaa fasiqa anaasee andeeqara irirana iriseeqa mimau kai fidaqa. Furufarira fasiqa anaasee faiqí nifusaa nári furufarirana uqeera uqannifiqaidafa.

<sup>17</sup> Aanaiqi fannoo unna ufa aatata qinoo nifa faiqí anaasee manda ummaarakí mara quqaidanoo. Kuqaa ufa qimarina ufa fannoo asoosama nimaqaidanoo.

<sup>18</sup> Aakapara ufa sia irimarifa kudikinoo asuruannoo. Aakapara ufa irimari fasiqafa urigaraidanoo.

<sup>19</sup> Moo ainainara kisaagasaa rakisiinanoo anirainanoo amuqusa amiqiannoo. Irirana siai fasiqa anaaseesa manda ainaina minnisee amiqira ainaina auqarara nikooqaidanoo.

<sup>20</sup> Anee irirana faqaasa faqa finana irirana mareennaranoo. Anee furufarirausa aqoondikinana kuridinnaranoo.

<sup>21</sup> Manda oosana maree mariasa fimariafanoo ummaara fannoo misa nifaqanoo nidanoo. Andeeqara oosana maree mariasa mi andeeqarana akiiqara amiqira ainaina mareefaranoo.

<sup>22</sup> Andeeqara fasiqauqa kuqifaqa misa faiqi namu ninaiqi mara misa qumiasana mareefaranoo. Mandoosana maree mariasa qumiasana andeeqarausa iannai kai fuannoo.

<sup>23</sup> Fuka maqaki kudi fasiqauqa narana ummaqusaafanoo moomoo marifa sia andeeqee mari siaasafa mi kudi fasiqausa ufa sia irinoo sia mina narana andeeqaisaifaqa fifau dapi mara taikaidafa.

<sup>24</sup> Anee sai aneenna faiqi aaqarana akiiqara arinana sia aneenna faiqiara aidinnaranoo. Anee aneenna faiqiara aidinana saamu qumasee arusee andeeqaa.

<sup>25</sup> Andeeqarausa narana moomoo marifaqa naidaqa. Manda oosana maree mariasa aiqama kari naararaidanoo.

## 14

<sup>1</sup> Amiqira irirana faqaa anaaseeuqa maaqa usakaseenoo amiqimmasee rakisidanoo. Furufari maria anaaseesa mi maaqana rapeepamma aqidaqa.

<sup>2</sup> Andeeqara aatata fimariasa Yaaweenara qeerairidaqa miqidaqa. Manda aatata fimariasa Yaaweenara nikooqeemari faqa miqidaqa.

<sup>3</sup> Narí amoo aanoo qida kaaqa ufa qimarina ufa fannoo saamu kamambi narí aridanoo. Irirana faqaana afauru fannoo narí itita amaqaaidanoo.

<sup>4</sup> Tarakasaa siai fasiqana narana oodaa mariannoo. Taraka faqaasa narana moomoo maridanoo.

<sup>5</sup> Ainaina qafamasai fasiqafa kuqaa anoona ufa qimari fasiqafa kootaki sia nikaru qiannoo. Ainainara unna qimari fasiqafa unna ufa kai mina ookiqari ururaidanoo.

<sup>6</sup> Kaukaata qimaria fasiqausa iriranara randaasia sia paquridaqa. Irirana faqaasa sia kadaapiridaqa dauni paquriqa irifaranoo.

<sup>7</sup> Anee sia furufarira fasiqauqa naaqa maria qeerairamandee nianai maria. Misa sia amiqira irirana ani qimamifaranoo.

<sup>8</sup> Nanaree aiqama ainaina akoofasa fannoo irirana faqaafaikidanoo fee. Mifa ainaina auqarana iri marinara miqidanoo. Nanaree irirana siai fasiqafa furufarira fasiqaikinoo fee. Mifa iridamunoo qinara miqidanoo.

<sup>9</sup> Furufariraua sia aaqaranara qeerairidaqa. Andeeqaraua aaqamaseeqa mi aaqarafa kai kaqi taikaanifeera oonu mafi iridanoo.

<sup>10</sup> Ani asasirafa anindi kai maridanoo. Ani sukaqarafa anindi kai maridanoo. Sia moo fannoo mina maraannoo.

<sup>11</sup> Manda oosana maree mariasa maaqa rapeemma fuannoo. Andeeqaraua maaqa sia rapeeiannoo kaqi mariannoo.

<sup>12</sup> Faiqi moo aana qafamaseeqa amiqira aanee qimariana aaqaidaqa sia qafaranaki kuqira aana marifaqa miqi qidaqa.

<sup>13</sup> Akaqausa naanaidara qimariafanoo misa naunduraki kaqi rumbanoo maridanoo. Asasirafa taikaifanoo noori runirafa kambiqaaidanoo.

<sup>14</sup> Manda aatata fimariasa miqi mariana akiiqara mareefaranoo. Andeeqara oosana maree mariasa miqianannai nari feefauru mareefaranoo.

<sup>15</sup> Furufari mari fasiqafa unufara faqa anoona ufara faqa kuqaa fee kai qidanoo. Irirana faqaafa sia miqidanoo mifa nari aiku amarususee reemari fa maridanoo.

<sup>16</sup> Irirana faqaafa mandainaina ummaaraki marirara qeerairidanoo. Irirana siaifa mifa furufarinoo aanoommasee kaqi pasoosammasee fidanoo.

<sup>17</sup> Qusa ufa qimasee kai kaqi aanoo qimarifa furufarira ainaina kai auqaidanoo. Irirana faqaasa qireeda kai maridaqa.

<sup>18</sup> Irirana siaisa misa aiqama ainainirafa furufarirafa kai maridanoo. Irirana akoofasauqa mariana akiiqara feefauru amiqira irirafa maridanoo.

<sup>19</sup> Mandoosana maree mariasa andeeqaraua noorinni kumma ramafi nari mara maree qumuree qimudao qima nimaqaaqera iridaqa.

<sup>20</sup> Kudi fasiqa sia aqoondi faifa maridanoo, mina aqoonausa faqa miqi mariasara nikooqaidanoo. Ainaina faqaafa moomoo aqoondi faqaafa maridanoo.

<sup>21</sup> Faiqi moo fannoo moonara akooqainafa aaqaidanoo. Anee asasiraree qimaseenana kudi fasiqa idaaqamma amaqa.

<sup>22</sup> Manda oosana randee marifa aaqaidanoo. Anee amiqiranara randeenana ufa qaindusiranara faqa saqarikirana faqa paqurinnaranoo.

<sup>23</sup> Kadaapi rinana amiqira marirana mareennaranoo. Ufa kai qina nidana fifau ooguamarindundina nidana kudi marinnaranoo.

<sup>24</sup> Irirana faqaasa mariana akiiqara moomoo qumiasa maraidaqa. Irirana siaisa furufarira oosana aiqamausa iridaqa.

<sup>25</sup> Kootaki nari afu qafai ainainara andeeqasee quqaa kai qimarifa faiqi mariranasaa itita nimaqaidanoo. Unna ufa qimarifa faiqi ueeqaidanoo.

<sup>26</sup> Yaaweenana ufara rufiarafa ququsa kiara foora maridaqa. Miqira fasiqa fannoo nari faiqi anaasee faqa ququsaki maridanoo.

<sup>27</sup> Anee kuqirana aiaaqarareefee fee qidane. Yaaweenara rufiarafa kaqi marirana nimi marifa maridanoo.

<sup>28</sup> Karaambaiqa uriqararafa mina aiku asauku moomoo mariafanoo raikisi nimaqee marinara miqidanoo. Mina aiku asauku sia marifanoo mina karaambaiqa auqu fifau mariannoo.

<sup>29</sup> Anee sia dauni aanoo qinana reedeeni marinafa firaa irirana faqaafa marinnaranoo. Qusa ufa qimari fasiqafa nari furufarirana kai uqera uqannifiqee marifa maridanoo.

<sup>30</sup> Asooara irirafa mina afaaqa amiqirana amidanoo. Rairai qira oosana fannoo manda auriranara foora maridanoo.

<sup>31</sup> Kudi fasiqara kaukaata qinana mina auqu fasiqana Anutunara faqa kaukaata qimariananoo. Kudi fasiqara amuqusinana dadaaqinna anee Anutuna amooqidana mina auqu uqereee mariananoo.

<sup>32</sup> Manda ainaina kambiqaifaqa mandoosana maree mariasa kuridiranaki fidaqa. Andeeqara fasiqauqa nariqa andeeqarafa misa itita nimaqaidanoo.

<sup>33</sup> Irirana fannoo irirana faqaasa iriranaki maridanoo. Furufariraua irirafa sia kaifaafa faqa maridanoo.

<sup>34</sup> Andeeqara oosana fannoo mi maqannaasa nuqu uqera firanaikidanoo. Nari een-daandira mandoosana fannoo mi maqannaasa mareeqee nari nisauriranaki aqidanoo.

<sup>35</sup> Kaiqee fasiqa irirana faqa fasiqa maridanoo. Karaambaiqa minara aidianoo. Mi kaiqee fasiqafa asaurirana karaambaiqa amimari fasiqafa aanoo qirana kai maraannoo.

## 15

<sup>1</sup> Reedeenira ufa aminanoo aanooqirafa taikaani. Raiqara ufa fannoo aanooqirana uqeeree marifa maridanoo.

<sup>2</sup> Irirana faqaasa ufa qiafaqa akaqausa mina iriseeqa irirafa amiqira ainainee qidaqa. Irirana siaisa nooqiari furufarira ufa kai fididaqa.

<sup>3</sup> Yaaweefa aiqamai kambiqee mari ainainna qafaidanoo. Maasa andeeqara ainainee mandainainee auqaunanoo mifa maasasaa afu rufisee maridanoo.

<sup>4</sup> Nifaaga amiqianifee ufafa marirana nimidanoo. Aanoo qimaria nifaurufa faiqi naunduraindaraana narimarifa maridanoo.

<sup>5</sup> Nari anoona akoona ufara fidiqaa imaifa furufarirafa maridanoo. Naakaparufa irimarifa irirana faqaafa maridanoo.

<sup>6</sup> Andeeqara fasiqa anaasee maaqaki qumiasana oosana oosana maridanoo. Manda oosana maree mariasa munnimma marasaafanoo mifa misa mareeqee mandainainaki quqaidanoo.

<sup>7</sup> Irirana faqaasa irirana aqamara foora doo aiqamai aaqaidaqa. Sia furufari mariasa miqidaqa.

<sup>8</sup> Mandainaina maree mariasa aandau arusee tatufu amiafanoo Yaaweefa qafamaseenoo misa tatufiranara fidiqaa midanoo. Aneeqee maria fasiqa anaaseesa innaaru qiranara Yaaweefa aididanoo.

<sup>9</sup> Yaaweefa manda oosana maree mariasa niqafamasee misa oosanara fidiqaa midanoo. Andeeqara oosanara rimariasara Yaaweefa aididanoo.

<sup>10</sup> Anee aqara ainaina auqeenana afeeka nariranaki finnarano. Anee aakapara ufara qidoo fee qinana kuqinnarano.

<sup>11</sup> Kuqirausa mariannai ririmma Yaaweena afusaa akooqoo maridanoo. Kaqi mariasa naqi fee masee fee Anutuna afusaa nari irirana kukeeqeefaree akooqoo qafaidanoo.

<sup>12</sup> Kaukaata qimari fasiqafa aakapara ufara akooqaanoo. Mifa sia irirana faqaasiannai oonuree iriranara iraanoo.

<sup>13</sup> Faiqi anaasee asasiafanoo noori inaa inaa idanoo. Nimuqusa ummaara raifanoo nifaaga faqa rumbaidanoo.

<sup>14</sup> Irirana faqaasa irira ainainara kai randaidaqa. Furufarirausa sia miqidaqa. Nari furufariranara maasa qimana maridanoo fee qidaqa.

<sup>15</sup> Kudi fasiqa marirafa naaruara ummaarakai kai maridanoo. Asasi mariasa aiqama kari misa marirafa nasunnasura kai midaqa.

<sup>16</sup> Kudi fasiqa maridana Yaaweenara aaquqee marinana marinafa moomoo qumiasana nari ummaara namu faqa uraaqarana marinnarano.

<sup>17</sup> Ani aidi mariasa saimbaqa aadana adasa naidana anee amiqira aandaura nikooqee marisa saimbaqa neemarina uraaqararafa mariananoo.

<sup>18</sup> Qusufa qimasee aanoo qimari fasiqafa aanoo qirana uqeeraidanoo. Reendeenimari fasiqafa asoosana nimidanoo.

<sup>19</sup> Ainainirara nikoo nikaai imariasaa misa aiqama niranaki ummaara paquridaqa. Anee kuqaa qira oosana auqeenana sia ummaara mareennarano.

<sup>20</sup> Irirana faqaa faiqiuqa nari nikausa nifaaga asarirana kai nimidaqa. Furufarirausa nari ninausamarana fidiqaammidaqa.

<sup>21</sup> Irirana siaisa nari furufariranara asasa midaqa. Irirana irimari fasiqafa andeeqara ainaina auqaidanoo.

<sup>22</sup> Anee moo ainaina auqararee qimasee aakapara ufa marasee auqainanoo anoona kambiqeenoo andeeqaanoo. Aakapara ufa mau sia finana sia mina anoona paqurinnarano.

<sup>23</sup> Moo fannoo ufa qinnanaki anoona ufa irisee qimarifa nari ufara asaidanoo.

<sup>24</sup> Irirana faqaasa ameemaira foora ooru fidaqa naaru marirannai ooru fidaqa. Misa kuqirannai ooqufirara nikooqifaqa miqidaqa.

<sup>25</sup> Nari nifaaga amooqi mariasa Yaaweefa misa maaqa rapeeianoo. Adeedaana anaasee aiqama ainainasaa Yaaweefa rakisi nimaqaidanoo.

<sup>26</sup> Manda oosana maree mariasa oonu mafi iriranara Yaaweefa fidiqaa midanoo. Anukara irirana faqaasara mifa asaidanoo.

<sup>27</sup> Aiqama ainaina nariara kai fatusi marifa nari faiqi anaasee ummaarakai quqaidanoo. Manda oosana maraaqee qimasee feefauru nimiafaqa qaoo qimariasaa kisaqaasaa maa maqanasaa marifarano.

<sup>28</sup> Andeeqara oosana maree mariasa moona ufa iriseeqa andeeqara ufara oonu mafi iriseeqa nari qimamidaqa. Manda oosana maree mariasa moona ufa iriseeqa kai kaqi nari qimamidaqa ummaara uqeeridaqa.

<sup>29</sup> Andeeqee mariasa innaaru qirana Yaaweefa iridanoo. Manda oosana maree mariasara Yaaweefa akooqaiifanoo nianasaa maridanoo misa innaaru qirana sia iridanoo.

<sup>30</sup> Moo fannoo ani qafamasee naanaidara qimasee amandaifanoo ani amuqusa amiqidanoo. Moosaqari amiqira ufa aninana irinanoo ani amuqusa amiqi miannoo.

<sup>31</sup> Qaoo qira ufa irisee eedoo qimari fasiqafa irirana faqaafa maridanoo.

<sup>32</sup> Anee aakaparufa irirara akooqainafa aneenna kai aupurarana aneennaki mara quqee mariananoo. Anee faiqi aakapara ufa aminnanara eedoo qimasee qaindusinanoo ani irirafa uriqaraannoo.

<sup>33</sup> Yaaweenara qeerairrafa amiqira irirana ani amiannoo. Reendeenira oosana naaree maraseenana inaaqianna uriqarafaikinnaranoo.

## 16

<sup>1</sup> Faiqi ainaina auqarara tipundaaria fanoo Yaaweefa minara irisaiifaqa kai auqaidaqa.

<sup>2</sup> Faiqi nári mariranara andeeqaiidee qifanoo Yaaweefa aiqamausa naundurái irirana oosana rainasee qafaidanoo.

<sup>3</sup> Aneenna tipundaarianna ufana Yaaweenara amiqi amiqimma qimaqaannee qinanoo anoona kambiqaannoo.

<sup>4</sup> Yaaweefa aiqama ainaina auqufa taikeefandinnanara iridanoo. Manda oosana maree mariasa inaaqianna kuqiranaki taikee fandinnanara faqa iridanoo.

<sup>5</sup> Ramoo ramaaida nári nifaaqa mara maree uri mariasara Yaaweefa fidiqaa midanoo. Misa narirafa sia niqaannoo kaqi naruanno.

<sup>6</sup> Anee aiqama kari Yaaweena ufasaa mapukusee marinanoo mifa ani numoo taikaannoo. Yaaweena ufasaa mundufi finanoo sia moo mandainaina aniki kambiqaannoo.

<sup>7</sup> Ani marirafa nirafa andeeqanoo marinanoo Yaaweefa minara asasinoo ani namuqaa aqoondi kamma amaqaannoo.

<sup>8</sup> Anee qoodaa qumiasana andeeqara aatata maraseenana andeeqara oosana mau finanoo ani marirafa firaa qumisana faqaana marirana uriqaranoo mariannoo.

<sup>9</sup> Anee moo ainainara aneenna iriranaki qimirinanoo Yaaweefa nári irimarinnai ani mara ubeekaannoo.

<sup>10</sup> Yaaweefa maqasaa uriqararana dadaaqifanoo andeeqara ufa nimidanoo. Mina ufa qirafa aiqama kari kuqaa kai marirannoo.

<sup>11</sup> Yaaweefa aiqama sikeerara andeeqara sikeera kai marinaqa aiqama feefauru faqa andeeqarafa kai mariani fee qidanoo.

<sup>12</sup> Uriqararansa manda oosanara fidiqaammidaqa. Kaamanna fannoo andeeqara oosana marainnana mi andeeqara oosannanannai mina mapuku amaqaannoo.

<sup>13</sup> Uriqararafa kuqaa anoona ufa qimariasara aididanoo. Kafa mifa anoona uf qimariasara asammasee dadaaqidanoo.

<sup>14</sup> Uriqararafa aanoo qimasee kuqaa naruannoo. Irirana faqaafa narí irira ufannai mina aanooqirana asoosama amaqaannoo.

<sup>15</sup> Uriqararafa naanaidara qinanoo aiqamausa nimuqusa amiqimma nimaqaannoo. Uriqararana asarirafa aukuanai aakuara foora aiqama amiqi amiqimma nimaqaidanoo.

<sup>16</sup> Anee amiqira irirana marasainafa mifa koora faqa siruaa faqa uraqaaranoo marianoo.

<sup>17</sup> Andeeqara aatata fimariasasa misa manda oosana maree mariasasa aanara qeeraira midaqa. Niku raanaki qafamasaida nimariasasa misa kaqi marifaranoo.

<sup>18</sup> Nári nifaaqa mara maree uri mariasasa kuridiranaki ooqu fidaqa. Ramoo ramaa imariasasa aqufi marianaki aqú fidaqa.

<sup>19</sup> Sarauidaqa nári mara maree qumi mariasasa misa uriqararanaki maridaqa. Kafa manda oosana maree mariasasa ramoo ramaairana faqa moosa ainaina ummuara marasee raina nimimariasasa ureeqaransa maridaqa.

<sup>20</sup> Ani aakapainna ufana amiqimmasee irinanoo ani marirafa amiqiannoo. Yaaweena saqarikinana anee asainnaranoo.

<sup>21</sup> Irirana faqaa fasiqara amiqirafa irirana faqaafee qifaranoo. Irirana faqaa fasiqa ufa fannoo adiafaa inoo irirana pooduqaidanoo.

<sup>22</sup> Faiqi moo fannoo amiqira irirana faqaafa marifanoo mi irirafa maqakaqari ururee mari nammari fara foora amiqira irirana mi fasiqana amidanoo. Furufari mariasasa nári furufarirafa nári naridanoo.

<sup>23</sup> Irirana faqaa fasiqa ufa qirara oonumafi irisee ufa qidanoo. Mi ufana iriafanoo adiafaa inoo iriaqaa kai midanoo.

<sup>24</sup> Amiqira ufa fannoo adiafaa ira ainainara foora faiqi naundurái adiafaa irana faqa amiqi amiqirana faqa nimidanoo.

<sup>25</sup> Faiqí anaasee moo aanara andeeqara aanammifoo qimariafanoo mifa kuqi maria aanafa maridanoo.

<sup>26</sup> Ainaini mari fasiqafa daara raandoo qimasee ainainidanoo. Narí aararanara iriseenoo ainainidanoo.

<sup>27</sup> Manda oosana maree mariasa akaqausa mandaikamma nimaqara aanara kai randaídaqa. Misa ufa fannoo idara foora nitakuqidanoo.

<sup>28</sup> Manda oosana maree mariasakiqari munuqi miniqirafa kambiqafi daraanidanoo. Miqi mariasa mi ufanannai amiqira aqoondi rakeemma aqídaqa.

<sup>29</sup> Faiqí narimari asa nári niqoondi nikaruqimasee rarisameeqeenoo mandainainaki quqaidanoo.

<sup>30</sup> Afu atindari maqee marifa mandoosana kambiqaanifeera miqidanoo. Afauru uqmairí marifa mandainaina kambiqaanifeera miqidanoo.

<sup>31</sup> Aandau akiqqa faqaana akiqqa fannoo uriqararaua qatara foora maridanoo. Andeeqara mariranannai kai mi ainainna paqurídaqa.

<sup>32</sup> Moo fannoo narí aanoo rafaqafusee reendeenira ufa kai qimarifa maqasaa karaambaíqa uraaqaranoo maridanoo. Narí mariranasaa rakisi marifa moo maqannaasa narusee misa maqa maaqa maree marina uraaqaranoo maridanoo.

<sup>33</sup> Kaatara foora sarammasee Anutuna aidiranara iriraree qiafanoo Anutufa narí kai akooroomma nimidanoo.

## 17

<sup>1</sup> Aadana narana narí aqoondi faqa reendeenamasee neemarifa uriqararafa maridanoo. Firaa qoomaqa sakasee nári tinoo taanoo rirana namu faqa nee mariasa oorudupiraua marídaqa.

<sup>2</sup> Moo fasiqa ainaina faqaana faiqi fannoo narí akoona asaurirana ami marinanoo mina amiqira ainainira faiqi fannoo mi faiqina iraaqaranoo maridanoo rakisi amaqaannoo. Kaasooaqee mi fasiqana faiqi namu nári nikoona qumiasana rainaídaqa mina andeeqara ainainira faiqi faqa raina amifaranoo.

<sup>3</sup> Koora faqa siruaa faqa tasisisiri mandee qafaandee inoo Yaaweefa faiqi nimuqusa nimanammasee qafaidanoo.

<sup>4</sup> Manda oosana maree mariasa manda ufauqa kai irídaqa. Unnufa qimariasu unnufa kai irídaqa.

<sup>5</sup> Anee kudi fasiqauqara uteeti qinana mi kudi fasiqausa auquna Anutunara faqa uteeti qinnaranoo. Moo fannoo moo mandainainaki aqufinana anee minara naanaidara qinana sia kaqi marinnaranoo Anutufa ani aruannoo.

<sup>6</sup> Ninaaku nitaatoosa nári ninaiqimarara nasuriandee iqa faiqiuqa nári ninausa nikausara nasurídaqa.

<sup>7</sup> Amiqira fasiqa anaasee sia unnufa qídaqa. Kuqaa ufa sia furufarirausaindi maridanoo.

<sup>8</sup> Umee raqera nimimaria feefaurufa fadueera foora dadaaqifaqa auqararee qiana kaqi auqeeferanoo fee qídaqa.

<sup>9</sup> Anee faiqi anaasee aniara ruaqera ani mandaikamma amaqaifana minninnisaa. Misa ani mandaikamma amaqaifana kaqi mina irina fidana anee aqoondikirana rakeem-minnaranoo.

<sup>10</sup> Anee irirana faqaa fasiqa moodaannai qimaminanoo mifa kai kaqi iriannoo. Anee quandakinana furufarira fasiqa saamu qumaree moomoo wan handeereeta kari arusee qimaminanoo mifa siamma qiriannoo.

<sup>11</sup> Kuqirafa faiqi narimari fasiqafara foora aiqama kari mandainaina uqereee maria fasiqa anaaseesa naridanoo.

<sup>12</sup> Anee kaasau faini aanaaqi rausumaree aanai oonu mina anoona paquri masainanoo ani rufiarafa mariannoo. Furufarira fasiqa narí furufarira aatata fimarina paquri maseenana firaa mandainainaki marinnaranoo.

<sup>13</sup> Moo fannoo amiqira ainaina moona amifanoo qumareenoo mina akiqara manda ainaina amifanoo minara mandainaina kai mi fasiqana maaqaki naaruara mariannoo.

<sup>14</sup> Tinoo rira oosana fannoo aandaani tatiara foora idanoo. Tinoo rirafa kambiqainana kai kaqi rafaqafu sainanoo sia kambiqaaani.

<sup>15</sup> Manda oosana maree mari fasiqana idukiranara faqa andeeqara fasiqa fifau rumberanara faqa Anutufa mi oosana qandara fidiqaa midanoo.

<sup>16</sup> Faiqí moo fannoo irirana sia maraifa nanaree fifau sukura feefauridanoo fee mina irirafa sia maridanoo.

<sup>17</sup> Amiqira aqoondi fannoo aiqama kari aniara aididanoo. Faiqí ani ainaina sia fifau marídaqa anee unmaarakai aqufinaqa ani dadaqirara marídaqa.

- <sup>18</sup> Akaqausa amiqira irirana siaisa kai moona aaqarana akiqara idaqa.
- <sup>19</sup> Faiqí moo fannoo numoo kambiqaara oosana aidi marifa mifa rakirana kambiqaranara faqa aididanoo. Aneenna afaaqa amooqinana anee ummaarara randaida miqimariananoo.
- <sup>20</sup> Manda irirana faqa mandufa faqa kai qimarifa sia amiqirana paquriannoo kuridirana kai paquriannoo.
- <sup>21</sup> Moo fasiqa faiqí namu furufarira ainaina auqaiifaqa misa ninaukoo naundura ummaara faqa aiaaee qirana faqa kai maridaqa.
- <sup>22</sup> Anee asasi mariananoo mifa anee marasinna namasaananoo foora maisaidanoo. Faiqí moo fannoo afaaqa rumbanoo marifa aiqamausa nifaafa rumbaidanoo.
- <sup>23</sup> Manda oosana maree mari siaasafa umeenni umeeremaria feefauruna maraseenoo sia amiqimmasee ufa rainaidanoo.
- <sup>24</sup> Irirana faqaa fasiqa fannoo irirana narí oorisa kai quqaqifanoo maridanoo. Irirana siai fasiqafa aiqama aanai afu munu maqee mini maqee ifanoo sia amanaikidanoo.
- <sup>25</sup> Furufarira faiqiuqa nári nikoona oori runirana amidaqa. Nári ninooona sukaqarana amidaqa.
- <sup>26</sup> Andeeqara fasiqa fifau arirana rumberana amiafanoo sia andeeqaidanoo. Andeeqara rakisiraua narirafa aaqara oosana maridanoo.
- <sup>27</sup> Irirana faqaasa moodaa moodaa ufa kai qidaqa. Uqbiqasee mariasa irirana faqaasa maridaqa.
- <sup>28</sup> Furufarira fasiqa narí ooki kadara masainaqa faiqí anaasee minara irirana faqaa fee qifaranoo. Mi fasiqafa narí ooki amiqimmasee ititasaiifaqa misa minara akeepamasee irimari fasiqa fee qifaranoo.

## 18

- <sup>1</sup> Faiqí sia nári niqoonausa faqa moodaanaki kiasa náriara kai iridaqa. Nana ainainaree aiqamausa andeeqarafee qimasee irimarianara mi fasiqausa sia asaidaqa.
- <sup>2</sup> Furufarira fasiqa amiqira oosana sia irinara sia minara iridanoo. Mifa aiqama kari narí amiqirafa marina uqannifiqarara kai aididanoo.
- <sup>3</sup> Numoo faqa nisaurirafa faqa moodaanaki fidaqa. Ummuarira oosanaki keeqafinara asaurirafa mina afaaqasaa kambiqaidanoo.
- <sup>4</sup> Faiqí ookinaa ufa faruma firaafara foora mandinoo maridanoo. Mina irirafa qumi mari nammarifara foora asooaidanoo rukukuqnama amaqaaidanoo.
- <sup>5</sup> Manda oosana maree mariasa kootaki dadaaqinana aaqara oosana mareennaranoo. Andeeqara oosana maree marina fifau kootaki quqeenana mina faqa aaqara oosana kai mareennaranoo.
- <sup>6</sup> Furufariraua aanoo qirana oosana arasee nariqa nariranara innaaru qidaqa.
- <sup>7</sup> Furufarira fasiqa ookinaa ufa fannoo narí kuridi amaqaaidanoo. Mifa narí ufaki ufaanakiara foora aridanoo.
- <sup>8</sup> Munuqi miniqira ufa fannoo kaaqa adiafaaira narana miqirafa maridanoo maasa kaaqa mina nambiqarara dididanoo.
- <sup>9</sup> Ainainafanoo raindaani mari fasiqafa ainaina deedeepinoo turitaari marina aanna reemarifa maridanoo.
- <sup>10</sup> Yaaweefa afeeka faandaamurara foora maridanoo. Andeeqara fasiqa anaasee minaki kukeeqafi sia kuridifaranoo.
- <sup>11</sup> Ainaina faqaasa nári qumiasanara maasa kisaafa faandaamura fee qimasee fifau nári ainaina saqarikidaqa.
- <sup>12</sup> Sia kaqi moona ameemaanai keeqeefara mifa narí mara maree quminaqa mina ameemaanai keeqeefaranoo. Nári nimoo qimariasa kuridira aataa fidaqa.
- <sup>13</sup> Moona ufa amiqimmasee irisee ufa qia, sia miqinana furufariranaki faqa manda asauriranaki aquffinnaranoo.
- <sup>14</sup> Ani kaqi marira aidirafa anee aurinanoo ani poduqaannoo. Anee sia miqinanoo ani mi oosanafa taikafuannoo.
- <sup>15</sup> Irirana faqaasa maqee maqee fuka irirana irirara deedaqidaqa.
- <sup>16</sup> Anee uriqarara fasiqa qafaanee qimasee moo ainaina mina amira ainaina mara maree finanoo amanaika miannoo.
- <sup>17</sup> Faiqí kootaki qimannimisaafaqa irisee kuqaa fee qidaqa. Moo fannoo mi ufana quandaqi qimanniminaqa indaaruuqaa ufara boo narí kai narí amooqidanoo mifoo qifaranoo.
- <sup>18</sup> Afeeka fasiqauqa moo ainainara aanooqidaqa narafumau narafumau idaqa masisara foora quandasee qafeeqa doo dinni dinni asooqaidaqa.

<sup>19</sup> Aneenna akaqaafasauqa dadaaquinaqa misa afeeka faandaamurara foora anisaa itita amaqefaranoo. Anee misara aanoo qinaqa misa nâri kooqi itita saifana sia keeqeennaranoo.

<sup>20</sup> Faiqi moo fannoo narî ookinaa ufannai narana paqurinanoo amuaqu ianno. Narî afauru saaqaraa ufa fannoo amuaqu iannoo.

<sup>21</sup> Afai afauru qaaraiki maridanoo mifa kai faiqi narirdanoo kafa faiqi dada qidanoo. Aneena ufa qimaseenana mi ufafa qiqa fawa qumaraannoo fee qimaseenana iria.

<sup>22</sup> Adeedaana kumaara fannoo adeedaana maanaaqa paqurimmasee marainanoo Yaaweefa irinoo asasa miannoo.

<sup>23</sup> Ainaina siaifa kudi fasiqa fifimmasee ufa qimari fasiqafa maridanoo. Qumiasana tiafa kaukaata ufa kai qimarifa maridanoo.

<sup>24</sup> Moomoosa aqoondiki marinafa sia kisaagasaa mi aqoondikirafa mariannoo. Moodaa moodaa amiqira aqoondi afaagasaa aqoondi marifa mi fasiqana mi amiqira aqoondina oosana fannoo narî moodaa fidika faqa amiqi marina arusee uraaqaranoo maridanoo.

## 19

<sup>1</sup> Kudi fasiqa fannoo andeeqara aatata fimarifa maridanoo mifa uriqararafa maridanoo. Ufa rukiee marifa furufari marifa ureeqanoo maridanoo.

<sup>2</sup> Sia oonu mafi irirana maraifa aagamaki kaqiruna ubeekaidanoo. Kai kaqi fimarifa kaqi runna fiaikatee finoo aqaaidanoo.

<sup>3</sup> Akaqausa sia irirana maraa oosanafa kai nariqa mandaikamma nimaqaifaqa fifau quandaki Anutuna qoomma amaqaidaqa.

<sup>4</sup> Qumiasana faqaana aqoondiuqa moomoo maridaqa. Kudi fasiqa aqoondi moodaafa ani qafeenoo ainaina siai fee qimasee anirandee fuannoo.

<sup>5</sup> Kootaki unna ufa qinana rumbaranaki finnarannoo. Unnufa qinana sia ummaara fiaaqareennaranoo.

<sup>6</sup> Aiqamausa uriqarara fasiqa aqoondikiranaki keeqeefaranoo. Ainaina nimi mari fasiqanara aiqamaus minara unna qimasee qini qiqoondi fee qidaqa amooqidaqa.

<sup>7</sup> Kudi fasiqa aiku asauku mina minnisaidaqa mina aqoondiuqa faqa firaqqoo minara nikooqaidanoo. Narî nammeera qimasee naaraifaqa sia iridaqa.

<sup>8</sup> Faiqi moo fannoo irirana maraifa amiqi amiqidanoo. Amiqira iriranara aidi mari fasiqafa aiqama ainaina auqainafa anoonaikammianoo.

<sup>9</sup> Kootaki unnufa qimari fasiqafa sia rumbaranaki sia fuannoo fuannoo. Unnufa qimarifa narî kuqirana paquriannoo.

<sup>10</sup> Furufarira fasiqa qumiasana qambaana maridanoo manda marira maridanoo. Faiqi moo fannoo ureeqararafa faiqi firaasa uriqararafaikinoo maridanoo mandaikamminoo maridanoo.

<sup>11</sup> Amiqira irirana faqaafa sia qusufa qimasee aanoo qidanoo narî aanoo qirana rafaafa fidanoo. Miqi mari fasiqafa moo manda ufa qimamifanoo sia irinoora foora inara narî afaaqa qareenarane qidanoo iridanoo.

<sup>12</sup> Karaambaiqa fasiqa aanoo fannoo kaasau fainiara foora rairai qifaqa faiqi anaasee rufiidaqa. Mina asasirafa qifi faramuara foora asooama nimaqaaidanoo.

<sup>13</sup> Furufarira fasiqauqa narî ninaukoo nisauriranaki quqannisaidaqa. Anaasee moo fannoo mina aanoo qirafa namudisaa kapatuara foora kapi kapida maridanoo.

<sup>14</sup> Qumiasana saqama narî nikausa saaqaraana maraidaqa. Yaaweefa kai irirana faqaa anaasee faiqi nimidanoo.

<sup>15</sup> Kudoosaapee maria oosanafa faiqarana kai amidanoo. Ainaina sia inafa aandaroo aruannoo.

<sup>16</sup> Anee Anutna aakapara ufa mau finana kisaagasaa marinnaranoo. Anee aakapara ufara qikoofee qinana kuqinnaranoo.

<sup>17</sup> Anee kudi fasiqa anaasee narana aina nimidana Yaaweena amiara foora imarianoo kasooaqee Yaaweefa mina akiqara ani faqa amiannoo.

<sup>18</sup> Aneenna faiqi namu ufa irirana amanasaa marifana miqoo naakapaa anee sia miqinana anee misa dadaaqianaqa mandaki aqufidaqa.

<sup>19</sup> Qusufa qimasee aanoo qimari fasiqafa ariranaki aqufuannoo. Anee minakinaana feefauru masainanoo mifa kafa kai mi ummaarana auqaannoo.

<sup>20</sup> Aakapara ufa faqa iria. Anee miqinana kasooaqee irirana faqaafa marinnaranoo.

<sup>21</sup> Faiqi atikuraki irirana oosana oosana marifanoo firannaira iridanoo. Yaaweena irirafa kuqaa anoona kambiquannoo.

<sup>22</sup> Faiqi moo kaaqa ainainara rimaria oosana faqaafa asaurirana maraidanoo. Qumiasana siaifa andeeqara fasiqa fannoo unna ufa qimari fasiqana uraaqaranoo maridanoo.



<sup>23</sup> Yaaweenara rufieenana maa maqanasaa kisaaqasaa mainnaranoo. Yaaweenara ruffainanoo sia mandainaina ani afaaqai aqufuannoo.

<sup>24</sup> Akaqausa kaaqa kudoosaapee mariasa difaaniki narana qumaraseeqa nooki quqarara nikooqaidanoo.

<sup>25</sup> Aanoo qimari fasiqana arinanoo irirana siaisa mina qafeeqa irirana mareefaranoo. Irirana faqaana aakapainanoo dauni irirana moo faqa maraannoo.

<sup>26</sup> Manda irirana faqaa faiqi fannoo kai nari akoona mandaikamma amaageenoo nari anoona aiqamasai fanao fi faqa mi oosanausa nisaurirana firaana maraidaqa.

<sup>27</sup> Oo qini qimaaku naamuqaira ufa iriseenana akooqafana finana anee irisaanna ufana minnisee furufara minnaranoo.

<sup>28</sup> Ufa qimarianaki unna quandara ufa qimarifa andeeqara koota oosana akooqaidanoo. Manda oosana maree mariasa aqara oosana adiafaa iranara ridaqa.

<sup>29</sup> Andeeqaranara nikooqee marisa sandufa misa nimaarusirafa maridanoo. Qunnaana samu furufari mariasa narirafa maridanoo.

## 20

<sup>1</sup> Moomoo biaqa nammari neemarianafa ani fufufarirana faqa faqaa fuisee qirana faqa amiannoo. Nammari moomoo narana irirana sia marifa maridanoo.

<sup>2</sup> Karaambaiga aanoo qirafa kaasau fainiara foora rairai qidanoo. Faiqi moo fannoo mi karaambaigana aranaqarana amirafa kuquannoo.

<sup>3</sup> Faiqi moo fannoo nari maraqqanara irisee tinoorirana faqa rakiranara faqa qeerairidanoo. Furufariransa qusufa qimasee rakiranaki faqa aanooqiranaki faqa aqufidaqa.

<sup>4</sup> Kudoosaapee mari fasiqafa saikira aukuaana sia ainainifa aiqira aukuaana naranara randainanoo aararaannoo.

<sup>5</sup> Faiqi irirana faqaana irirafa faruma difukunara foora maridanoo. Faiqi irirana faqaafa kai mi fasiqana irirana meemaindaraana uqeeera koorooliannoo.

<sup>6</sup> Faiqi moomoosa fifau nariara faiqiara nimuqisirana faqaasa maridee qidaqa moodaa moodaa kai miqiransa maridaqa.

<sup>7</sup> Andeeqara fasiqa amiqira oosana auqai faqa mina faiqi namu asasi daqa.

<sup>8</sup> Karaambaiga fannoo nari qarisaa oqumarifi faiqi anaasee andeeqa nisaidanoo nari afunnoo kai mandainaina qafaidanoo.

<sup>9</sup> Yafee faiqi moo fannoo kuqaa qinee anukarausee qiannoofee. Yafee faiqi moo fannoo qini mandainaina ruka taikeenoo fee qiannoo fee. Sia moo fannoo kuqaa miqi qiannoo.

<sup>10</sup> Furufarira sikeera faqa furufarira amanira taqu faqa maridanoo. Yaaweefa aiqamaqarara fidiqaa midanoo.

<sup>11</sup> Faiquqaindi nari auqee maria oosnafa nari marirana kooroo idanoo. Anee misa andeeqaranara faqa amiqiranara faqa iri mariananoo.

<sup>12</sup> Aaqoo irimarina faqa afu qafeemarina faqa Yaaweefa maasa auqu nimaqanau.

<sup>13</sup> Anee faiqarafa faiqarafa ina nidana kudi marinnaaranoo. Ainaina inanoo moomoo narana marinana neennaranoo.

<sup>14</sup> Ainaina feefauru firaafa marinara feefauri mariasa moomoo ufa qidaqa. Mifa mi ainaina feefaurummasee doo oonu dupira feefauru aqusee marainara nari amooqidanoo.

<sup>15</sup> Ami qira irirana faiqi anaasee qimannimi marifa koora faqa siruaa faqa uraaqaranoo maridanoo.

<sup>16</sup> Anee moo maqannaana ufaasu ainainee feefauru aminana anee furufarirafa maridana amiananoo. Miqimari fasiqafa moo anaasee aanai paquri masainanoo anianne qinanoo mifa furufarira oosana faqaafa maridanoo kaqi fuannoo.

<sup>17</sup> Qunna qimasee maree mari ainainafa aaqee adiafaa irafa mariannoo inaaqianna oommaaniara foora ooki kammu kammu qiannoo.

<sup>18</sup> Anee ami qira aakapara ufa iriseenana ainaina auqainanoo anoona kambiqannoo. Anee rakiranaki finana irirana faqaasa ufa iriseenana fua.

<sup>19</sup> Munuqi miniqi marifa kukeeqara ainainara mandaika midanoo kooroo idanoo. Anee kaaqa ufa qimariasara qeerairia sia misa naaqandandia.

<sup>20</sup> Faiqi moo fannoo nari anoona akoona aqurarainafa qausana qoomara foora dauni dimbaannoo.

<sup>21</sup> Maqa fee qumiasana fee kai kaqi marainafa aaqee amiannoo marikinoo doo mandaika miannoo.

<sup>22</sup> Faiqi moo fannoo mandoosana ani aminana anee sia nari miqianauree qia. Ani irirafa Yaaweenasaa mundusainanoo mifa ani dadaqiannoo.

<sup>23</sup> Unnaqira amanira ainainara Yaaweefa fidiqaa midanoo. Unnaqira sikeerara faqa mifa akooqaidanoo.

<sup>24</sup> Yaaweefa maasa qiku amaaga uqafiqaidanoo daamua qidanoo. Faiqí naqimmasee narí aiku amaaqara iriannoo fee sia amana.

<sup>25</sup> Faiqí moo sia oonumafi iriranaki moo ainaina Anutuna auqu ramasee asauku uqeerasee tatufirana amianauree qimarifa mandaika midanoo. Kasooaqee irisee narí aaqaranara oonumafi iriseenoo akooqaannoo.

<sup>26</sup> Irirana faqaa karaambaiqa fannoo aiuqummasee yafee aaqainnana qafamasee mina rumbaidanoo sia minasa qimudaoo qidanoo.

<sup>27</sup> Faiqí maraquna Yaaweena qooma maridanoo. Faiqí naundurái qaidanoo narí mariranasa niranara randaidanoo narí amanidanoo.

<sup>28</sup> Uriqararafa faiqí aanaaseera amuqusirana faqa anoona ufa qirana faqa mi oosana qanda fannoo mi uriqararana mapuku amaaqaannoo.

<sup>29</sup> Kumaaraauqa nári nimudaanai qiranara nári nimooqidaqa. Nauraiqiuga nári aandaunamu qafaida nári nimooqidaqa.

<sup>30</sup> Aaqee mari fasiqa anaaseena arinana afaaga ateeke seenana aakirana afaimma sainanoo andeeqasee mariáni. Ariisainafa mina aunduraki faqa amuqusaki faqa findaukama saannoo.

## 21

<sup>1</sup> Yaaweefa maqasaa karaambaiqa irirana kaikaa nammariara foora ireeda kai minni fua mai ania qifanoo miqidanoo.

<sup>2</sup> Anee aneenna marirana niranara andeeqanoo maridanoo fee qinanoo Yaaweefa ani qafamaseenoo ani amanammasee qafaannoo.

<sup>3</sup> Faiqí anaasee amiqira oosana auqaranafa tatufirana suqa amirana umaqqaranoo maridanoo.

<sup>4</sup> Manda oosana maree mariasa nári noori uqeerarafa faqa nári nimooqirafa faqa misa nifiqee fimarifaqa misa aaqaidaqa.

<sup>5</sup> Manda oosana maree mariasa nári faiqí narirafa nári rarisameeqee nári nariranaki quqaidanoo. Misa amiqira oosana auqarara nikooqaidanoo.

<sup>6</sup> Unnaqira aatata marasainna ainainafa sia kisaagasaa ani faqa mariannoo. Mi ainainafa kai kaqi ani kuqiranaki quqaannoo.

<sup>7</sup> Manda oosana maree mariasa nári faiqí narirafa nári rarisameeqee nári nariranaki quqaidanoo. Misa amiqira oosana auqarara nikooqaidanoo.

<sup>8</sup> Aaqara oosana faqaa fasiqa aana eendaandiraa aana maridanoo. Aaqarana siaisa andeeqara oosana auqaidaqa.

<sup>9</sup> Tiqeera maqaki maridana amana marinnaranoo. Firaa maqa amiqira maqa tiaki rairai qimari anaaseena faqa maridana manda marira marinnaranoo.

<sup>10</sup> Manda oosana maree mariasa aaqara oosana auqarara naararee rafoora idanoo. Akaqausara faqa niqoonausara faqa sia nimudaoo idaqa.

<sup>11</sup> Ufa rukiee mari fasiqana arifaqa irirana siaisa mina qafamasee irirana maree-faranoo. Aamuqaira ufa irirana faqaana qimaminanoo irirana moo faqa moo faqa maraannoo.

<sup>12</sup> Andeeqara Anutufa manda oosana maree mariasa nári maaqaki auqee maria ainainara iridanoo. Mifa manda oosana maree mariasa kuridiranaki quqannisaannoo.

<sup>13</sup> Kudi fasiqa fannoo dadaaqiaqeera nammeera qinana anee sia irinana kasooaqee anee faqa nammeera qinaqa sia moo fannoo iriannoo.

<sup>14</sup> Faiqí moo fannoo ani faqa aanoo qimarinana anee kukeeqasee ainaina amisainanoo mina aanoo qirafa taikaannoo.

<sup>15</sup> Amiqira ainaina kambiiqifaqa andeeqara fasiqa anaasee asaidaqa. Manda fasiqa anaasee mina qafamasee ummaara maraidaqa.

<sup>16</sup> Amiqira irirana minnisee auianoo nifa kuqirafa mina afeesidanoo.

<sup>17</sup> Faiqí moo fannoo amiqira ainaina faqa amiqira mariranara faqa rimarifa sia ainaina marifa mariannoo.

<sup>18</sup> Andeeqara fasiqauqa ummaaraki aqufirara iafaqa manda oosana maree maria fasiqausa misa nimaaga maqaidaqa.

<sup>19</sup> Aadana maqa maaqaki aneennaraa maridana amana marinnaranoo. Aanoo qida rairai qimari anaaseena faqa maridana mandaika minnarannoo.

<sup>20</sup> Irirana faqaasa maaqaki moomoo amiqira ainaina faqa fadameena faqa maridanoo. Irirana siaisa nári ndi aaqee nama taikasee kaqi maridaqa.

<sup>21</sup> Kuqaa qira oosana faqa amuqusira oosana faqa auqeenana maa maqanasaa kisaagasaa marinnaranoo. Akaqausa aniara andeeqara fee qimasee uriqarara auqu amifaranoo.

<sup>22</sup> Irirana faqaa karaambaiqa fannoo nimudaanai qimariasa faandaamura narisaa ititaqaana ooruree rapeepammasee narunifaqaaqaa iannoo.

<sup>23</sup> Anee sia ummaaraki aqufiraree qimasee aneenna afaurusaa amiqimmasee rakisia.

<sup>24</sup> Aanoo qimarifa faqa ufa itairi marifa faqa faiqi moora uteeti qidaqa. Mifa nari amooqiranara kai afeekaiki marifa maridanoo.

<sup>25</sup> Aininirara raindaani marifa ainainirara akooqaidanoo. Nari mi oosanafa nari kuqaa aridanoo.

<sup>26</sup> Miqira fasiqauqa ainaina qimiaqee kai qimasaida iridaqa. Andeeqarusa sia miqidaqa afaarida kaqi nimidaqa.

<sup>27</sup> Manda oosana maree mariasa tatufirana suqaranara Yaweefa fidiqaaqaa midanoo. Manda iriranannai tatufirana suqaa fanoo Yaaweefa fidiqaaqaa idanoo.

<sup>28</sup> Kootaki unnufa qimarifa nari kuridiannoo. Anoonu ufa kai andeeqasee qimarina ufa asammasee iridaqa.

<sup>29</sup> Manda oosana maree mariasa fifau andeeqarusa naanna raqa nidaqa. Andeeqarusa nari marirana niranara oonumafi irisee nidaqa.

<sup>30</sup> Faiqi faiqi irirana faqa amiqira irirafa faqa sia ani dadaaqiannoo. Anee Yaaweena namuqaakiannanara sia dadaaqiannoo.

<sup>31</sup> Misa fifau rakiranaki firara qoosauqa deedaqidaqa. Yasaweefa nari kai rakirana uri qararana nimidanoo.

## 22

<sup>1</sup> Andeeqara auqu amirafa moomoo ainaina faqa munnimma faqa uriqararafa maridanoo. Siruaa faqa koorra faqa ureeqarafa maridanoo.

<sup>2</sup> Ainaina faqaafa faqa kudi faqa amanaqarakai maridaqa. Yaweefa miqanda auqu quqanau.

<sup>3</sup> Irirana faqaafa moo ummaara anifanoo qafeenoo amaanaidanoo. Irirana siaifa kaqi minaki fidanoo mi ummaarana maraidanoo.

<sup>4</sup> Yaaweena ufa mau fidana aneenna mara maree quminana moomoo qumiasana munnimma faqa uriqarara auqu maraseenana kisaagasaa marinnaranoo.

<sup>5</sup> Aneenna mariranara amuqusinana anee manda oosana maree mariasa nari aatata fidaqa arimaria ufaannaki aruanoo qimasee rufia.

<sup>6</sup> Faiqi aanaaqisaa amiqira aana aamuqinanoo mifa faiqi firaanaikinoo mimau kai fuani.

<sup>7</sup> Kudi fasiqa fannoo ainaina faqaana ainainira faiqi maridanoo. Dinnaa munnimma maree marifa munnimma nimi marina ainainira faiqi maridanoo.

<sup>8</sup> Anee unnaqira oosana ummaqusainanoo mandainaina minakiqari kambiqa finoo quandaki ani aruannoo. Anee sia kaifaa faiqi mandaikamma nimaqeenanaroo.

<sup>9</sup> Afaarinana aneenna narana kudi fasiqauqa naiad nimia. Miqinana anee amiqi amiqirana mareennaranoo.

<sup>10</sup> Andeeqara oosana fidiqaaqaa imari fasiqana mara aqusainanoo aanooqirafa faqa rairai qirafa faqa taikaannoo.

<sup>11</sup> Anee anukara amuqusara faqa amiqira ufa qiranara faqa rinanoo maqasaa ani uriqarafa ani aqoondi mariannoo.

<sup>12</sup> Yaaweefa amiqira iriranara faqa anoonu ufa qiranara faqa rakisida nindafaida maridanoo. Unna qimariasa ufa Yaaweefa akooqoo kooroomma sainaqa aiqamausa irifaranoo.

<sup>13</sup> Ainainirara raindaani marifa maaqaki ooqufaaqee maridanoo fifau unna qimasee kaasau faini madaanai marida ooquraana daruandoo qimasee maaqaki kai maridanoo.

<sup>14</sup> Aatata nimari anaaseena maraqa nirafa ufaanara foorra maridanoo. Yaaweefa arana qeemarisa mi ufaannanaki aridaqa.

<sup>15</sup> Faiqi aanaaqiuga furufammasee nari aatata fifana unnaa samu narinanoo misa furufarirafa taikaannoo.

<sup>16</sup> Ani ainaina moomoo kianifeera kudi fasiqauqa mandaikamma nimaqeenana kaffaa ainaina moomoo faqaana munnimma aminana anee faqa kudi marinnaranoo. Moodaa fasiqa aiku asaku taikasee moo fasiqa asaku qara taikasee 30 irirana faqaa ufa.

<sup>17</sup> Irirana faqaasa ufa qimannimiana iriaqa. Misa qimannimira ufa amiqimmasee iriaqa.

<sup>18</sup> Mi ufafa ani iriranaki marinana afaurusaaqari moona qimamidana asasia.

<sup>19</sup> Yaaweena saqarikiqeeera maa ufana inni qimannimidaqa.

<sup>20</sup> Qinee moodaa fasiqa aiku asaku taikasee moo fasiqa asakuqara oonu marasee 30 amiqira naamuaqira ufa faqa irirana faqa akara ruma nimaqeeqa.

<sup>21</sup> Miqimmasee anee anoona ufara amiqimmasee irinnaranoo. Faiqi aniara anoona ufara randaannee qifana anee amiqimmasee paqurimmasee qimannimnaranoo.

<sup>22</sup> Sia kudi fasiqeee qimasee mina ainaina kaqi maraa. Sia kootaki mina rafaqaqafia.

<sup>23</sup> Yaaweefa kudi fasiqa dadaaqinoo misa ufa iriannoo. Misa mandaikamma nimaqain-  
ausa nariqa faqa mandaikamma nimaqaannoo.

<sup>24</sup> Anee sia qusufa qimasee kai kaqi aanoo qimari fasiqana aqoondikia.

<sup>25</sup> Anee mina oosana irisee sia amana mi oosanna minniseennaranoo, arinnaranoo.

<sup>26</sup> Moo fannoo ufaasu munnimma maraseenoo sia amana mina akiqara feefauru iraree  
qinana sia anee amana aiqamasee mina akiqara ianauree qia.

<sup>27</sup> Anee faqa mina akiqara sia amanaikinana sia feefauru niminaqa misa aniree ani  
aiqama ainaina marasee faiqara qaari faqa mareefaranoo.

<sup>28</sup> Inni nikeeku nikaaku ooqai maqa oosummaqoona sia rapatutumma mafisaa.

<sup>29</sup> Amiqira ainaina imarifa karaambaiqa ainainiranaki mariannoo. Miqira fasiqa  
fannoo sia oorudupira fasiqa auqu siaina ainainira faiqikiannoo.

## 23

<sup>1</sup> Anee uriqarara fasiqa faqa ooqu marifi narana naidana aneenna iriranaki mifa  
narana aminara iria.

<sup>2</sup> Anee moomoo narana neemarianafa maridana aneenna aidirana rafaqaqafia.

<sup>3</sup> Anee sia mina amiqira naranara aqaara raani. Mifa ani akaru qiandoora sia  
irimariananoo.

<sup>4</sup> Anee sia moomoo munnimma ainaina mararee qimasee afeeka taikaa.

<sup>5</sup> Anee moomoo munnima marasainanoo kai kaqi taikaannoo. Mi munnimmafa aqoosa  
arufinanoo uqaumura foora aqamaree sandaannoo.

<sup>6</sup> Anee tatamaqimari fasiqana narana sia naa. Sia mina amiqira naranara amukaani.

<sup>7</sup> Miqira fasiqa fannoo unna qimasee fifau aniara moo faqa moo faqa naannee qidanoo.  
Aunduraki aniara qoodaa naannee qidanoo fifau afauru fannoo kai miqi qidanoo.

<sup>8</sup> Anee mina narana namaseenana raudamaki finana fidinnaranoo. Anee fifau mina  
faqa amiqira ufa qiananoo.

<sup>9</sup> Anee sia furufarira fasiqa ufa amia. Mifa ani ufara sia asasiannoo.

<sup>10</sup> Sia maqa ooqai oosu maqoona mafi moosaa quqaa. Fiaiqi faiqi maqa faqa sia maraa.

<sup>11</sup> Yaaweefa misa afeeka itita nimaqarafa maridanoo. Mifa misa saaroo qinoo ani ufa  
amiannoo.

<sup>12</sup> Ani qimami mari fasiqafinnai aaqoo quqasee amiqimmasee iria.

<sup>13</sup> Faiqi aanaaqi ariranara sia amuqusinana minnisaa. Saamunnai kaqi arua sia  
kuquannoo.

<sup>14</sup> Miqiannanannai anee misa marirana asumu mara quqaananoo.

<sup>15</sup> Qini qimaaku anee irirana faqaafa marinaqa qinee asasianaura.

<sup>16</sup> Anee irirana faqaasa ufa qinaqa qinee iriqa nasurianauranoo.

<sup>17</sup> Anee sia manda oosana maree mariasa oosanara aidiani. Anee aiqama kari  
Yaaweena ameemaanai kai maria.

<sup>18</sup> Anee miqinana kasooaqee ani marirafa amiqimmiannoo.

<sup>19</sup> Qini qimaaku qini ufa iriseenana irirana faqaafa maria. Aneenna nirana mariranara  
amiqimmasee iria.

<sup>20</sup> Sia moomoo nammari neemariasa faqa moomoo narana neemariasa faqa  
moodaanakikia.

<sup>21</sup> Nammari moomoo neemariasa faqa moomoo narana neemariasa faqa qusasaa  
ainainara sarau ifaranoo. Narana namasee faasaana faiqaqee marifa qusasaa qamunna  
anaqi anaqirana afisusee mariannoo.

<sup>22</sup> Aneenna akoona ufa iria. Sia mina ufa irinana sia amanaikinnaranoo. Ani anoofa  
asooqainana amiqimmasee rakisaa, sia akooakaa ia.

<sup>23</sup> Kuqaa anoona qira ufa faqa amiqira irirana faqa afeekaikammasee maraa. Firaa  
ainaina marinara sia uqasaina moo fannoo feefauriani.

<sup>24</sup> Irirana faqaa faiqi anoofa akoofa firaqqoo asasiidaqa. Misa asisirana oosana maifaqa  
asasiidaqa.

<sup>25</sup> Miqinaqa ani anoofa faqa akoofa faqa aniara asasiidaqa. Aneenna anoona afaafa  
amiqirana aminanoo asasiiani.

<sup>26</sup> Qini qimaaku qini ufa amiqimmasee iria. Saina qini marirafa ani quqafiqaaani.

<sup>27</sup> Dapi maraqa nua aanaaseefa faqa moo fasiqa anaafa faqa dikaanda miqirafa  
meemaqqoo maridanoo. Faiqi minaki kuqira ufaanakiara foora aridaqa.

<sup>28</sup> Misa ummuarira fasiqara foora maridaqa aniara rakisidaqa. Mi anaaseefa moomoo  
fasiqa furufara masaifaqa nariqa faiqi anaasee faqa mariana rakeeidaqa.

<sup>29</sup> Yausee noori runusee marifaree. Yausee aanooqiranaki numudaqee marisa maridee. Yausee muamunda faqaasa maridee. Yausee fidika nifu namu faqa maridee.

<sup>30</sup> Uainna nammari kisaqaasaa neemariasa kai mi ainainausa maraidaqa. Osana oosana nammari amanammasee qafeemariasa mi mandainainausa qafaidaqa.

<sup>31</sup> Sia mi nammarina kaafaki adiasaina taatuqee arinanoo qaqaara raani. Mi nammarifa qaqarinnanara sia ani qaqaara raani. Masaanndai adiasaina fadameenara foora farindeenoo oogu finanoo sia qaqaara raani.

<sup>32</sup> Mi nammarina nama taikasainanoo ukadiqara foora ani ukaqa amiannoo.

<sup>33</sup> Anee namasainanoo ani afu mookamma finana sia ainaina amiqimmasee qafeenarananoo. Ani atikuraki irirafa furufara mafinana sia amiqimmasee irirafa aniki kambiqainana sia amiqimmasee ufa qinnaranoo.

<sup>34</sup> Anee namaseenana sipakiara foora ooruku nammariki fimariandee idana teeqe taaqimminaranoo. Sipa faakanasaara foora faiqararidana meemai nammari qafainanoo amuqusammiannoo.

<sup>35</sup> Amuqusinana anee maaqi qinnaranoo. Misa qini daruafaqa sia aupuraidaqee qinnaranoo. Misa saamu samu qini daruafanoo sia didafinoofee qinnaranoo. Qinee faisee findifinaqa moo faqa naanauree qinnaranoo.

## 24

<sup>1</sup> Sia manda oosana maree mariasa oosanara rua. Sia misa aqoondikia.

<sup>2</sup> Misa iriranaki faiqi mandaikamma nimaqarara kai randaidaqa. Misa aiqama kari ummaara kambiqaanifeera kai ufa qidaqa.

<sup>3</sup> Amiqira iriranannai faqa oonu mafi iriranannai faqa maaqa atunara foora aruseeqa usakaidaqa.

<sup>4</sup> Amiqira irirafa mari maaqanaki amiqira ainainauqa qumbiqanoo maridanoo.

<sup>5</sup> Irirana faqaa marirafa afeeka faqaa marirana uriaaqaramasee maridanoo. Amiqira irirafa afeeka faqaasa kaaqa urinnaaqaranoo maridanoo.

<sup>6</sup> Anee moo maqannaasa faqa rakirarinana irirana faqaasiannai irirana mara mareenana rakirannai fua. Moomoo irirana faqaa fasiqa ufa iriseenana rakirana uriqareenaranoo.

<sup>7</sup> Amiqira irirafa firaa farumara foora marifaqa furufarirausa sia iridaqa. Misa firaa ufa suqiranaki oonuree sia ufa qiaqaa ifaqa noo qumunimmasee maridaqa.

<sup>8</sup> Maqee maqee mandainainara randee mari fasiqanara ummaara oosana aree marifee qidaqa.

<sup>9</sup> Furufarirausa mandainaina auqarara kai iridaqa. Aiqama misa auqee maria ainainausa numoo ainaina kai maridanoo. Faiqi ramoo ramaa imari fasiqanra manda fasiqee qimasee qafaidaqa.

<sup>10</sup> Ufarurira aukuaana anee kudoosaapeenana anee afeeka siaifa marinnaranoo.

<sup>11</sup> Kootaki faiqi quqasee fifau kuqa ariraree qifana anee minakinaana mareeqee kaqini quqaa.

<sup>12</sup> Sia ani ainaina marida fee qia. Anutufa iridanoo mifa kai ani marirana rainaannoo fee qia. Mifa anisaa rakisidanoo, mifa iridanoo anee auqee mariannana akiqara mifa amiannoo fee qia.

<sup>13</sup> Oo qini qimaaku anee ookasaasa anoona naa. Mifa amiqirafa maridanoo afaurusaa quqasainanoo adiafaa iannoo.

<sup>14</sup> Anee maana faqa iria. Amiqira irirafa ookasaasa anoonara foora adiafaa irafa maridanoo. Anee mina qumareenana kasooaqee amiqiranaki marinnaranoo.

<sup>15</sup> Sia manda oosana maree mariasa naanna reenana andeeqarasa maaqa rapeemasee minakinaa ainaina ummuariraree qimasee tipundaa ria.

<sup>16</sup> Andeeqarasa moomoo kari aqufiqa misa amana findiffaranoo. Mandainaina fannoo manda oosana maree mariasa narusainaga kuridifaranoo.

<sup>17</sup> Ani namuqaa mandainainaki aqufifana sia asasia. Mifa aiku rupauraki saamurinana sia nasuria.

<sup>18</sup> Anee asasinanoo Yaaweefa ani qafainanoo akooqaannoo nari aranaqarana rafaqaqafusee sia naruannoo.

<sup>19</sup> Anee sia manda oosana maree mariasa marirana qinee faqa miqiraree qimasee iria. Sia misa mariranara rua.

<sup>20</sup> Manda oosana maree mariasa sia misa kasooaqee marirafa mariannoo. Misa qausana qooma dauni maqa raquraminoo dimbaannoo.

<sup>21</sup> Oo qini qimaaku, anee Yaaweena ameemanai faqa (maqasaa karaambaiqa nimeemaanai faqa maria). Ufa rukiee mariasa faqa sia moodaanakikia.

<sup>22</sup> Miqi maria fasiqausa kai kaqi uqanna mandaikifaranoo. Moo mandainaina Anutufa faqa maqasaa rakisirafa faqa misasaa quqefaranoo. Akaqa amiqira ufa maaqoo maridanoo.

<sup>23</sup> Irirana faqaasa maa ufana faqa qimannimiqa. Siaasa fannoo kootaki akaqausa dadaaqinoo akaqausa rafaafaqo finanoo sia andeeqaannoo.

<sup>24</sup> Siaasa fannoo aqee mariasara sia aqarana marisee qinaqa faiqi anaasee aiqama mi siaasanara fidiqaa ifaranoo.

<sup>25</sup> Siaasa fannoo aqee mariasara sia rufiarai kaqi ummaara niminafa reemindeemirirana maridanoo amiqira mariranaki اساسا mariannoo.

<sup>26</sup> Kuqaa anoona ufa qimaminafa ani aqoondi uqanna maridanoo.

<sup>27</sup> Anee ququsa auquseenana ainaina masainanoo anoona koorooinana miqoo kai maaqa usakasee maria.

<sup>28</sup> Anee kootaki oonuree sia aqarana siasara unna qimasee rafaafaqo fua. Sia ani afauru fannoo unnufa qiani.

<sup>29</sup> Sia maaqi qia, mifa ummaara qimindee kai iqa nari faqa ummaara amianee qia. Sia maaqi qia, qinee maa fasiqana nari mandainaina akiqara kai aruannauree qia.

<sup>30</sup> Qinee furufarira fasiqa ainainirara raindaani mari fasiqana afuqaki nidaqa qafeeqa.

<sup>31</sup> Amuka faqaafa faqa firaa andanda faqa mina rafaafaqo marifaqa qafeeqa. Ooni faandaamura mi afuqanasee auquqaafa rapeemmaki aqufinoo marifaqa qafeeqa.

<sup>32</sup> Qinee mina qafaيداqa oonu mafi iriqa. Oonu mafi iridaqa irirana mareeqa.

<sup>33</sup> Ainainirara raindaani mariasa maaqi qidaqa. Maasa kaqikaqoo faiqarree qidaqa. Maasa kaqikaqoo idoomasee findifuauree qidaqa.

<sup>34</sup> Doo misa miqianara misa aiqama ainaina fannoo taikafuannoo. Sarau irafa faiqi nari mari fasiqafara foora ani aruannoo.

## 25

<sup>1</sup> Maa aaquqira ufafa Sooroomoonna akaqa aaquqira ufa maridanoo. Yuda maqanna karaambaiga Heeseekaiiaafa fuka bukaki akara rumaqoofa maridanoo.

<sup>2</sup> Maasa Anutuna auqu qeere marunafa mifa moomoo ainaina nari iriranaki kukeeqee marinara miqidaqa. Minara maasa mina uriqarara auqu amidaqa. Maqassaa karaambaigaqo mina oosana maasa qima qimianara maasa misa firaa nuqu nimidaqa. Miqi kai masee maqasaa karaambaiga irirafa firafa marinara sia amiqimmasee irirana.

<sup>3</sup> Maasa sia innaarunai mari ainainnara faqa ooruku nammari meemai mari ainainnara faqa iriana.

<sup>4</sup> Faiqi siraa tasirisirimasee apaapa mara aqusee anoona amiqirana kai uqasaifanoo ainaina akoofasa fannoo mara maree munusee auqidanoo.

<sup>5</sup> Maqasaa karaambaiga manda ufa aakapee mariasa mara aqusaifanoo mina rakisi amaqarafa afeekaianoo.

<sup>6</sup> Maa maqasaa karaambaiga afusaa oonuree sia aneennara faiqi firaasee qia. Sia aneennara uriqararasee qia.

<sup>7</sup> Anee sia faiqi firaasa nimaqa maqasee misa qannusaa ooqu maria nari anirainaga ani aiqaifanoo sia andeeqaannoo. Minara anee kaiqeesa faqa marinaqa nariqa kai ani aaraifana oonu faiqi firaasa faqa ooqu maria.

<sup>8</sup> Anee aneenna aqoonnana moo ainaina qafamasee sia aqumuraaqmura inana kootai munu koorooia. Moo fasiqa mi ainainnara amiqimmasee irimarifa aniree ani ufa rafaafaqo sainana anee naqaa fee innaree.

<sup>9</sup> Anee aneenna aqoonnana faqa ufa rainaidana kai kaqi mi fasiqafinai oonuree mi ufana andeeqa taikaa. Anee moo kukeeqara ufa iriseenana sia mi ufana koorooia.

<sup>10</sup> Anee minauqa kooroo inano mi fasiqafa asaurinaqa faiqi aniara sia umee ufa kukeeqafee qimasee asaurirana amifarahnoo.

<sup>11</sup> Faiqi moo fannoo amiqira ufa qinafa amiqira ainaina koorannai auqusee siruaannai afaafa auquqaafara foora mina ufa maridanoo.

<sup>12</sup> Faiqi moo fannoo irirana faqaa fasiqa auquma nimaqara ufa irisee eedoo qinafa koorannai auqira fidinaanu naaqooki uqee mariana faqa uraqararafa maridanoo.

<sup>13</sup> Ufa maree fuani feera aiqainafa andeeqasee nari rakisirafa qinna ufana qimanninano misa mi ufafa asasirana nimiannoo. Faiqi afuqaki narana unaki marifanoo suani arifanoo fuka nammari naindee iannoo.

<sup>14</sup> Faiqi moo fannoo moo ainaina nimirree qimasee qima afeekaikammaseenoo sia nimifa aadana oonnamuara foora maridanoo. Mifa ufai uqinoo oonnamu rakee ifanoo aaku sia rindee idanoo.

<sup>15</sup> Reendenira ufa fannoo amudaani raqa ummooquka midanoo, miqimmasainaqa rakisirausa faqa ani ufa irifaranoo.

<sup>16</sup> Anee ookasaasa anoona kaaqa adiafaa imari ainainna paqurimmasee aneenna amana kai naa. Moomoo namasee fidinafaara.

<sup>17</sup> Sia aneenna aqoonna maaqai maqee maqee namummaqaa, miqinanoo mifa aniara akooqainanoo fidiagaammianoo.

<sup>18</sup> Nari aqoonnanara unnufa qimarifa qaseemara foora faqa aaruqira feefannaira foora nari aqoonnana aridanoo.

<sup>19</sup> Anee manda aukuaana unna qimari fasiqanasaa dadaaqiani fee qimasee mundinana anee afai rufidira fara foora narana neemariananoo. Anee aiku pipisaaga usirafara foora aana fimiriananoo.

<sup>20</sup> Oori runusee marina aaga oorureenana asasira idi rainanoo akooqaannoo. Suaraki faiqi moo fannoo qamunna akusee marifana rafaqaamma maraana suara arindee innaranoo. Moona afaaga aurimarinaki ooruku anoona adieera foora iananoo.

<sup>21</sup> Ani namuqaa aararainana narana amia. Nammariara aidinana nammari aminanoo naani.

<sup>22</sup> Anee miqinanoo mina asaurirafa idara foora qaannoo. Yaaweeffa mina akiqara ani amianoo.

<sup>23</sup> Munuqi miniqirafa noori runirana maree anidanoo. Suani ataaqendari ufai fannoo aaku maree anindee idanoo.

<sup>24</sup> Tiqeeru maqaki maridana amana marinnaranoo. Fira maqatiaki rairai qimari manda anaaseena faqa maridana mandainainaki marinnaranoo.

<sup>25</sup> Nianaindari ainna amiqira ufana asoora nammariara foora nainanoo rukukuqama amiaqaannoo.

<sup>26</sup> Manda oosana maree mariasa andeeqara fasiqara anee maa manda oosanna marannee qimasee sandanainai qifanoo eedoo qimasee auqeenoo mifa faqa mandaikamianoo. Amiqira namhari mookoofa amanee kai randaida qumimarina neemarianaki dumuna kai qumbiqanoo mariannoo andeeqara fasiqa mandaikirausa ufara eedoo irafa miqinoo maridanoo.

<sup>27</sup> Anee adiafaa ira ainaina neeneesainanoo mandaika miannoo. Anee aneennara uriqararanara randainanoo mifa faqa mandaika miannoo.

<sup>28</sup> Faiqi moo fannoo nari aranaqarara sia qumaraifa maqusa faandaamura rapee inoo marifaqa akoosa mariafaqa namuqaa keeqaaqaa inoo mariara foora inoo maridanoo.

## 26

<sup>1</sup> Furufarira fasiqa mareeqee uriqararafaikinanoo sia andeeqaannoo. Suani aukuaana aaku riara foora midanoo. Nandi aiqira aukuaana aaku rindee midanoo.

<sup>2</sup> Aaqarana siai fasiqafa unna qimasee aqurarainna ufafa sia mina qumaraannoo. Mi ufafa ufniara foora kaqi aqanoo oonuree aniree inoo nidanoo, sia saqariisaa uqaidanoo.

<sup>3</sup> Qoosa sana samu aridaqa. Qainna doonki ooki quqasee mi sanda atina qumaraafanoo nifiqee fidanoo. Miqi kai iqa furufari mari fasiqana unnaanna samu arinanoo iriannoo.

<sup>4</sup> Sia anee furufarira fasiqa fannoo ani manda ufara irainana mina faqa ufa qia. Ani faqa mi furufarirafa aaku finana miqinafaara.

<sup>5</sup> Furufarira fasiqa fannoo furufarira ufa ani qimaminana anee mina ufa rukiasee saa manda ufa qiaanoo qia. Anee sia miqinanoo mifa nariara irirana faqaasee qinoo nari amooqiandoora.

<sup>6</sup> Anee furufarira fasiqa moo ufara aiqeenana aneenna aiku ateekeera foora innaranoo. Anee ummaarara randee mariananoo.

<sup>7</sup> Furufarira fasiqa ookiqari irirausa ufa qinafa sia mi ufafa nari dadaaqiannoo, aiku mandaikirafara foora maridanoo.

<sup>8</sup> Anee futufeetiki ooni quqasee aqusainanoo sia mariannoo fuannoo. Anee furufarira fasiqa mareeqee uriqararanaika masainanoo futufeetikiara foora aqinnaranoo.

<sup>9</sup> Faiqi moo bialqa namhari amiqimma namasainnana amukafaqaa ainaina asaukuki quqasainanoo kaqi qumarainanoo asauku tapooqainanoo sia iriannoo. Anee irirana faqaasa ufa furufarira fasiqa qiaminanoo mifa miqi kai inoo nari afaaga aruannoo.

<sup>10</sup> Faiqi moo fannoo furufarira fasiqa fee kaqi nimari fasiqanee mareeqee nari ainainiranaki quqainafa aiqamaua naridanoora foora idanoo.

<sup>11</sup> Furufarira fasiqa fannoo ooqai furufarira ainaina auqeeundee inoo kaifaa auqaidanoo. Fainiara foora fidisee quandafi kaifaa naidanoo.

<sup>12</sup> Furufarira fasiqa kaqikaqqoo amanaikiano. Nariara irirana faqaasee qimarifa sia amnaikiannoo. Furufarira fasiqa ooreeqarafa uqanna maridanoo.

<sup>13</sup> Ainainirara raindaanimari fasiqana unna irirafa maaqimminoo maridanoo. Kaasau faini aanai maridanoo kaaqa ukaqee marifa marifaqa daruandooree qidanoo sia ainainai fidanoo.

<sup>14</sup> Ainainirara raindaanimarifa nari qaarisa faiaqeeidanoo quanda qaandida maridanoo. Mifa kooqi qainnara foora quanda qaandida maridanoo.

<sup>15</sup> Kudoosaapee marifa narana mareeqee ooki quqarara akoqaidanoo.

<sup>16</sup> Ainainirara raindaani marifa nari iriranara uriqarara fee qidanoo. Qisauku dinni taikasee dinni qaaa marasee (7) irirana faqaasa irirana urinnaaqaraqa maridaqee qidanoo.

<sup>17</sup> Sia tinooriranaki aqufua. Anee miqinana faini aaqoora foora qumarainanoo ukaqa amiannoo.

<sup>18-19</sup> Faiqi moo fannoo unna qinanoo moo fannoo kuqaamifoora mandainainaki aqufuanoo. Aqufifanoo mifa maaqi qiannoo oo qinee fifau unna qiqa uteeti qunannara anee mandainainaki aqufuananoo fee qiannoo. Miqi mari furufarira fasiqafa ida qemari duru feefana indaamma uqirafa nidanoo narinaa nidanoo.

<sup>20</sup> Ida ati taikaifanoo doo ida imbaidanoo. Munuqi miniqirufa miqi kai inoo taikainanoo aanoo qirafa taikaanoo.

<sup>21</sup> Ida kudima idaunisaa quqasainanoo dauni atooqafinoo qaannoo. Ida aadana faqa idaki quqasainanoo firaaqoo qaannoo. Manda ainaina oosana areemarifa ummaara kambigaani feera miqidanoo.

<sup>22</sup> Munuqi miniqirufa fannoo adiafaa ira narana miqirafa mina aranandaki maridanoo.

<sup>23</sup> Amiqira ufa qimari fasiqafa aundurai mandaikirafa maridanoo, mi fasiqafa qafee miqirafa apatasaa anukarafa akara faqaafa aundurai kudima arirafa maridanoo.

<sup>24</sup> Qaara irirana mau fimarina ufa fannoo amiqirafa maridanoo. Aundurakiqari nikaru qidanoo miqidanoo.

<sup>25</sup> Mi fasiqafa amiqira ufa ani qimaminana sia mina ufa iria. Mina aunduraki manda ufa oosana oosana qumbiqanoo maridanoo.

<sup>26</sup> Mi fasiqafa nari fidiqaa ira mandufa amiqira ufannai dadapaani maseenoo mimau amiqi amiqi marinaqa aiqamausa mifa manda ainaina auqee marina qafeearanoo.

<sup>27</sup> Faiqi moo fannoo madika indufuseenoo moo fannoo minaki aqufuani fee qimarifa nari aqufidanoo. Faiqi moo fannoo oonitia umbaqi aminanoo moo fasiqa aruani fee qifanoo oonu aruakinanoo nari aruanoo.

<sup>28</sup> Unna qimari afaurufa kuqaa anoona ufara fidiqaa midanoo. Unna qimasee amiqi amiqi marifa mifa mandaikamma nimaqaidanoo.

## 27

<sup>1</sup> Anee duna auqararee qinna ainainnara sia qimasee aneenna amooqia. Anee maqee kambigaaninna ainainnara sia irimariananoo.

<sup>2</sup> Sia aneenna amooqia, saina moo aanaamuru fannoo ani amooqiani.

<sup>3</sup> Furufarira fasiqa fannoo firaa umaarara ainaina auqaidanoo. Mi ummaarafa ooni umaara faqa nukuda umaara faqa uriaaqaranoo maridanoo.

<sup>4</sup> Aanoo qirafa faqa aranaqarafa faqa mandainaina maridanoo. Aqoonnana rairai qirafa misa firaaqara maridanoo.

<sup>5</sup> Manda ainainaki mari fasiqanara qaoo qirafa minara aidirana uriaaqaranoo maridanoo. Mifa sia ani aidirana qafaani.

<sup>6</sup> Anee aaqamasainanoo ani aqoondi fannoo ufannai aidafuma aminafa mifa ande-qara aqoondi mariannoo. Namuqaa fannoo unnaqimasee amooqira ufa moomoo anisaa quqaannoo.

<sup>7</sup> Faiqi moo fannoo amuaqu inoo marinanoo kaaqa adiafaa imarina ookasaasa anoona aminanoo minnisaannoo. Faiqi moo fannoo aarara marifa sukaqee mari narannara adiafaa irafee qimasee kaqi naannoo.

<sup>8</sup> Faiqi moo fannoo nari maaqa quqasee aiqama tinai nimarifa ufina aanna raidanoo nari aanaamukiqari quqasee furufara inoo aiqamai nidanoo.

<sup>9</sup> Afundimari ainainna afaaqai akusaananoo afunda afaaqai ifanoo aundura asaidanoo. Aneenna aqoondi amiqira aamuaqira ufa qiaminanoo mi aamuaqira ufafa amiqira afundara foora ani rafaafuannoo.

<sup>10</sup> Aneenna aqoondi faqa aneenna akoona aqoondira faqa sia qaunua. Anee umaaraki aqufinana sia aneenna nianai mari akaqaafasaanara dadaaqiannee qia. Aneenna adeedi mari aqoondifinnai oonurainanoo mifa ani dadaaqianoo.

<sup>11</sup> Qini qimaaku anee irirana faqaafa marinaqa qinee asianaaura. Yafee aniara qini diqifaqa ani irirana mau fiqa misa rafaafuanauree qinanee.



<sup>12</sup> Irirana faqaafa mandainaina anifanoo iriseenoo amaraidanoo. Irirana siaifa kaqi onurama minaki aqufinoo ummaara maraidanoo.

<sup>13</sup> Anaamurundari sia irimarinna fasiqafa aniree qinana munnimma aminana anee furufarirafa mariananoo. Miqimari furufarira fasiqafa dapi maraqa nua aanaaseena munnimma amisee maraanoo.

<sup>14</sup> Anee aneenna aqoondi kanaanana afaurirna findifinana firaqoo faaqa rumasee amandeenana mina aquraree mariananoo.

<sup>15</sup> Aaku rikari kapatu fannoo aqufidanoo sia taikaidanoo. Manda anaasee fannoo mina kaukaata qirafa kapatu aanna raidanoo.

<sup>16</sup> Anee ufai qumaneerafa rafaafa fidanee anee fadameena aki mariana asaukuki qumaraidanee, sia. Miqi kai inana sia amana mi aanaaseena kaukaata qirana rafaafa finnanoo.

<sup>17</sup> Qumi faqa saasuna faqa marasee narisaa anrisaa anainanoo afaidaannoo. Faiqi moo fannoo nari aqoondi faqa moodaaqoo marida nari qimami nari qimamifanoo ufa fannoo nari dadaaqi nari dadaaqinoo andeeqaannoo.

<sup>18</sup> Anee murisaa amiqimmasee rakisinanoo irainana anee tiqisee neennaranoo. Miqi kai inoo ainainira faiqi fannoo nari uriqararana ainainasaa amiqimmasee rakisinafa uriqarafa mariannoo.

<sup>19</sup> Faiqi moo fannoo nammari afainni kikiqammafi nari oori afiri nammariqi qafaidanoo. Mifa nari mariranara faqa iriranara faqa iriseenoo miqirafa maridanoo fee qiannoo.

<sup>20</sup> Faiqi moo moo kuqimariafanoo sia kuqira maqa maaqa umbiqaidanoo, kaqi kai kuqida maridaqa. Miqi kai inoo sia amana faiqi nari aidirana aiqama afaqanoo muni taikaannoo.

<sup>21</sup> Idannai kooraa faqa siruaa faqa tasirisirimmasee amanammasee qafaidaqa. Miqi kai iqa faiqi marirafa kai faiqiara kooroo idanoo.

<sup>22</sup> Anee furufarira fasiqa kuqa ariara foora masainanoo sia mina furufarirafa minaki marifa taikaannoo kaqi mariannoo.

<sup>23</sup> Anee aneenna sipsipasaa faqa burimakasaa faqa amiqimmasee rakisaa.

<sup>24</sup> Ani munnimma fannoo sia kisaagasaa mariannoo. Maqasaa karaambaiqa aiku asauku sia kisaagasaa marifaranoo.

<sup>25</sup> Ani andanda kisaagaikinana ateekasainanoo fuka andanda kambiqaaani.

<sup>26</sup> Anee aneenna sipsipa asausinnoo aneenna qamunna auqa. Anee aneenna mimmi akaqana nimisee minasaqaraa munnimma marasaannanoo maqa feefauria.

<sup>27</sup> Aneeenna mimmi akaqafa kaqi marina naamma anoona tatisee anee faqa aneenna faiqi namu faqa aneenna dadaaqi maria manaqausa faqa naaqa.

## 28

<sup>1</sup> Manda oosana maree marifa sia moo arirafa marifanoo kaqi fifau sandaidanoo. Andeeqara oosana faqaafa kaasau faini raioonnara foora pasooisidanoo.

<sup>2</sup> Ufa rukiee maria maqanaasa misa uriqararaisa qusasaa mariqa moo fannoo mina maraqusee kikiqidanoo. Irirana faqaafa irirana rainee marifa mifa andeeqa nimaqaidanoo kisaagasaa mariannoo.

<sup>3</sup> Kudi fasiqauqa manda rakisira rakisii nimaqee marifa aaku firaafara foora rinoo narana aina madaikamma aqimarifa maridanoo.

<sup>4</sup> Andeeqara ufara nikoqee marisa ufa rukiee mariasa dadaaqidaqa. Andeeqara ufa mau fimariasa ufa rukiee mariasa itita nimaqaidanoo.

<sup>5</sup> Manda oosana maree mariasa sia andeeqara oosanara iridaqa. Yaweenara inaaru qimariasa misa andeeqara oosanra amiqimmasee iridaqa.

<sup>6</sup> Moonoo ainaina faqaafa eendaanidira aatata nimarifa ureeqarafa maridanoo. Kudi fasiqa andeeqaraqoo kai nimarifa mina urirarafa maridanoo.

<sup>7</sup> Sanda ufamau fimarifa kumaaraafa iriana faqaafa maridanoo. Moo kumaara fanoo kaqa narimari fasiqana aqoondiki marifa nari akoona asaurirana amidanoo.

<sup>8</sup> Faiqi moo fannoo nari munnimma ufaasu nimiseenoo mina akiqara firaqoo ootupamasee maree marifa sia mi munnimmana uaqeeiannoo. Mi munnimmafa aiqaree kudi fasiqauqara amuqusi mari fasiqafinnai fuannoo.

<sup>9</sup> Faiqi moo fannoo Yaaweena sandufa ameesuqinafa Yaaweenara inaaru qinanoo Yaaweefaa mina innaaru irinoo fidiqaammianoo.

<sup>10</sup> Andeeqaraisa rarisameeqee manda ainaina auqarafaki uqemarifa nari ufaanaki nari aridanoo. Asakadiki ikariri sia marifa Anutufa mina akiqara amianoo.

<sup>11</sup> Ainaina faqaafa unnaqimasee nariara irirana faqaasee qidanoo. Kudi fasia fannoo kuqaa irirana faqaafa maridanoo mifa misa oosanara amiqimmasee iridanoo.

<sup>12</sup> Andeeqara fasiqa uriqarafaikinaqa faiqi anaasee aiqamausa firaqoo asasifaranoo. Manda oosana maree marifa uriqararafaikifaqa faiqi anaasee rufiaasee kukeeqefaranoo.

<sup>13</sup> Faiqi anaasee moo fannoo nari aaqarana kukeeqee marifa sia amiqirana maraannoo. Kooroommasee minnisainnana Anutufa afuaannoo.

<sup>14</sup> Aiqamakari Yaaweena ufa mau finana اساسiranaki marinnaranoo. Ufa rukieenana mandainainaki marinnaranoo.

<sup>15</sup> Manda oosana maree mari karaambaiqafa kudi fasiqa anaasee manda rakisira rakisinnimaqee marifa kaasau kuarara foora faqa kaasau fainiara foora faqa maridanoo.

<sup>16</sup> Nari maqannaqa mandaikamma nimaqee mari urirqararafa irirana oorudupirafa maridanoo. Unna qira oosana akooqee marifa kisaqaasaa rakisi nimaqannoo.

<sup>17</sup> Faiqi kuqa arinafa nari madika indufidanoo. Sia moo fannoo mina dadaaqiannoo.

<sup>18</sup> Kuqaa qira oosana mareenana amiqimmasee marinnaranoo. Sia kuqaa qifa oosana mareenana kai kaqi tautummaki manda ainainaki aquffinnaranoo.

<sup>19</sup> Maqa auqee mari fasiqafa mina narana moomoo maidanoo. Fifau faafau inoo nifa kudi mariannoo.

<sup>20</sup> Kuqaa qira oosana faqaasa Anutufa firaqoo amiqi amiqimma amaqaannoo. Kai kaqi moomoo munnimma ainaina faqaasa mariraree qimariasa aupuraranaki aquffaranoo.

<sup>21</sup> Kootaki moo fasiqa dadaqinara moo fasiqa mandaikamma amaqarafa manda oosana maridanoo. Akaqa siaasauqa noo rafaqaqafia munnimma maraseeqa miqidaqa.

<sup>22</sup> Kaqa ainainara tatamaqi mari fasiqafa kai kaqi moomoo ainaina maranaa qidanoo, miqi marifanoo sia irirai miqi mari kudikirafa doo mina amarusinoo maridanoo.

<sup>23</sup> Anee faiqi moo manda oosana marainara qaoo qinanoo mifa minara kasooqee dufi dufi qinanoo mina dufi dufi qira ufa fannoo fadameena akira ufa uraqaaranoo maridanoo.

<sup>24</sup> Faiqi moo fannoo nari anoofa akoona ainaina ummuarammasee sia manda oosana maree fee qinafa mifaa faiqi ainaina mandaike mariasa naanna raidanoo.

<sup>25</sup> Ainainara tatamaqi mari fasiqafa ummaara uqeeraidanoo. Yaaweenasaa mundi mari fasiqafa moomoo ainaina faqaafa maridanoo amiqimmasee mariannoo.

<sup>26</sup> Faiqi moo fannoo nari irirana mau fimarifa fufufarirafa maridanoo. Faiqi moo fannoo irirana faqaasa aatata fimarifa asoaranaki maridanoo.

<sup>27</sup> Faiqi moo fannoo kudi fasiqauqa nimimarifa mifa sia sarau iannoo. Kudi fasiqauqa sia nimimarina faiqi aquraraidaqa.

<sup>28</sup> Manda oosana maree mariasa uriqararaisai kiafaqa faiqi anaasee kukeeqaidaqa. Mi manda oosana maree mariasa kuqifanoo andeeqaraisa kaifaa rakisi nimaqeeqefaranoo.

## 29

<sup>1</sup> Kaukaata qimari fasiqana moomoo kari andeeqaafanoo sia irimarifa qusasaa radamu saifanoo mina andeeqara aana sia mariannoo.

<sup>2</sup> Andeeqaraisa rakisirausaikiafaqa aiqama fasiqa anaasee اساسidaqa. Manda oosana maree mariasa rakisirausaikiafaqa aiqama faiqi anaasee ummaara maraidaqa.

<sup>3</sup> Irirana faqaafa marinanoo ani anoofa akoofa اساسiannoo. Dapi maraqa nua aanaaseefinnai fimarifa nari munnimma aiqama aqu taikaidanoo.

<sup>4</sup> Maqasaa karaambaiqafa fannoo andeeqara oosananoo maa maqa maaqana rakisifanoo afeekaikinoo maridanoo. Munnimmara iridanoo rakisifanoo mifa rakisimari maqa maaqafa maaniki aquffidanoo.

<sup>5</sup> Faiqi moo fannoo nari aqoonnana fadameena akira ufa ami marifa nari mina ufaana fufidanoo.

<sup>6</sup> Manda oosana maree mariasa nari aaqarafa nari ufaana fufuffaqa aridaqa. Andeeqee mariasa اساسammasee idiana faqa fidaqa.

<sup>7</sup> Amiqira fasiqa fannoo kudi fasiqa ummaarara faqa iridanoo. Manda oosana maree marifa sia miqira ainainara iridanoo.

<sup>8</sup> Ufa rukiee mariasa nari maqannaasa nirana fundakida aanooqirana uqeeera nimi-daqa. Irirana faqaasa aanooqirana asoama nimaqaidaqa.

<sup>9</sup> Irirana faqaafa furufarirana afiqee kootai munusaifanoo furufarirafa aanooqimasee uteeti qidanoo.

<sup>10</sup> Faiqi fidika ruiqarara rimariasa andeeqara fasiqara fidiqaa midaqa. Andeeqara fasiqauqa misa marinasaa itita nimaqaidaqa.

<sup>11</sup> Irirana siaisa nariqa aanooqirana akooqoo kooroidaqa. Irirana faqaasa nari naundurai kai nari ufa rafaqa fidaqa.

<sup>12</sup> Uriqararafa unna ufa irimarifa marinaqa aiqama mina dadaaqimariasa unna ufa qimariasa kai marifaranoo.

<sup>13</sup> Kudi fasiqa faqa minasaa rakisi marina faqa Yaaweefa kai nifu nimiqaifanoo.

- <sup>14</sup> Uriqararafa kudi fasiqa andeeqaranara qimarifa naaru naaru rakisi nimaqaannoo.
- <sup>15</sup> Faiqi aanaaqi arusee andeeqainafa amiqianoo. Faiqi aanaaqi uqa nári irirana mau fiqa nári ninausa nisaurirana nimifaranoo.
- <sup>16</sup> Manda oosana maree mariasa uriqararaisai kifanoo mandoosana fannoo fi-raafaikiannoo. Andeeqaraisa manda oosana maree mariasa saamurifaqa qafeefaranoo.
- <sup>17</sup> Aneenna faiqi namu andeeqara ufa naakapainaga misa andeeqara atata fifana anee asasinnaranoo.
- <sup>18</sup> Anutuna itita nimaqarafa sia mari maqa maaganaki sia mina sandufa maridanoo. Anutuna sandufa mau fimariasa اساسiranaki maridaqa.
- <sup>19</sup> Anee ufannai kai ainainira faiqi ufa qimaminanoo siamma iriannoo. Mifa ani ufa amiqimmasee irisee sia mimau fuannoo.
- <sup>20</sup> Irirana siaifa kaqikaqoo amana maridanoo. Sia irirana irisee ufa qimarifa mandaika uqanna inoo maridanoo.
- <sup>21</sup> Anee aneenna ainainira faiqi faiqi aanaaqisaaqari aidi maru ainainna amisainanoo kaqi kaqoo marinoo mi ainainira faiqifa ani aiqama ainaina maraannoo.
- <sup>22</sup> Qusufa qimarifa moomoo aanoo qirana faqa ummaara faqa uqeeraidaqa.
- <sup>23</sup> Narí auqu uqeeree marifa asaauriranaki aqufuannoo. Narí mara maree qumi marifa uriqarara auqu maraannoo.
- <sup>24</sup> Ummuarira fasiqa dadaaqinara aneenna kai aneenna namuqaakinnaranoo. Kootaki oonuree anoona ufa qinaqa mina akiqara misa aupurarana amifaranoo. Mifa kukeeqainanoo Anutufa mina aqurara ufa qiannoo.
- <sup>25</sup> Anee faiqjara rufieenana aneenna ufaana fufi mariananoo minaki aneenna arinrananoo. Yaaweena saqariki marifa amiqiranaki maridanoo.
- <sup>26</sup> Aiqausa maqasaa uriqararana oorisa oonuree andeeqaranara iraidaqa. Sia minannai nári andeeqaranara mareefaranoo Yaawee finnaidaraana mareefaranoo.
- <sup>27</sup> Andeeqaraisa manda oosana maree mariasara fidiqaa midaqa. Manda oosana maree mariasa andeeqaraisara fidiqaa midaqa.

### 30

- <sup>1</sup> Maa ufana Akurafa Yakeena amaaku fannoo Itieerana faqa Ukarana faqa akararuma nimanau. Mifa maaqi qinau, Anutufa sia qini faqa maridanoo, Anutufa sia qini faqa marifaqa sia qini dadaaqiraisa maridaqa.
- <sup>2</sup> Qinee aandaara foora maridaqa. Faiqi irirafa sia qiniki maridanoo.
- <sup>3</sup> Qinee sia amiqira iriranara iridaqa. Qinee sia uqanna Anutunara iridaqa.
- <sup>4</sup> Yafee innaarunai ooreenoo fee uminau. Yafee ufai narí asaukunoo afapita qumareenoo fee. Yafee nammari qamunnasaa sakasee qumaraannoo fee. Yafee aiqama maqa atiuqa auquseenoo fee atukaramma quqanau. Mina auqu yafee. Yafee mina amaaku auqu. Anee iridana qimaqiminaqa iria.
- <sup>5</sup> Anutuna ufa aiqama anoona kai kambiqaidanoo. Mifa qi ufafa anoona kai kambiqaidanoo. Mifinnai fimariasa mifa rakira saqariara foora itita nimaqaidanoo.
- <sup>6</sup> Sia innee mina iriranasa inneeqa irirana ootupaaqa. Mifa inni ootupara ufara unna fee qimaseenoo niqiannoo.
- <sup>7</sup> Qinee qaara ainainara Anutuna iraidaqa. Qinee kaqi maa maqanasaa marunaqoo qiminaqa marasee kuqua.
- <sup>8</sup> Nikaru qirana faqa unnufa faqa nianai futeeqa quqaa. Kaaqa kudikirana sia qimia, kaaqa moomoo ainaina faqa sia qimia. Qiqa qimana kai qimia.
- <sup>9</sup> Qinee moomoo ainaina faqaasa maridaqa aniara sia irianoora. Qinee ainaina siaisa maridaqa moosa ainaina ummuariqa qeeqa Anutuna auqu rafaqa fuanoora.
- <sup>10</sup> Innee moo fasiqa ainainira faiqjara sia mandufa qiaqa. Mina rakisirafa irisee quandafti inni niqinaqa manda mareefaara.
- <sup>11</sup> Akaqa fasiqa anaasee narí nikausa manda afaaqooqa nimisee narí ninausa sia amiqimma nimaqaidaqa.
- <sup>12</sup> Akaqausa náriara ikairi siaisee qidaqa. Misa numoo marifaqa misa Anutuna afusaa ikairi faqaasa maridaqa.
- <sup>13</sup> Akaqausa náriara amiqirausee qidaqa. Misa náriara kaaqa amiqirausee qidaqa.
- <sup>14</sup> Akaqausa nifauru keedai miqirafa maridanoo. Misa nifauru musuka miqiraisa maridaqa, minannai ainaina siaisa nambiqeefaranoo. Minanna kai kudi mariasa rukeefaranoo.
- <sup>15</sup> Tumooka qaara manaqa faqaafa maridanoo. Aiqama qara moodaa nuqu faqaasa maridaqa. Miqanda nuqu Qini Qimia. Qaara faqa qaara faqa ainaina fannoo sia doo amanee qidanoo. Kaqi moo faqa moo faqa qimiaqee qidanoo.

<sup>16</sup> Moo kuqirausa maqa maaqara qidanoo, Moo anaasee narí afaaqi faqa moomoo kari faiqeenoo sia faiqi maraidanoo. Moo aadana maqa maaqa fannoo aakuara aididanoo. Moo ida fannoo fifau faafau qaidanoo.

<sup>17</sup> Faiqi moo fannoo narí akoonara uteeti qimaseenoo narí anoona asooqa ufa rukiainafa duee dueena fannoo mina afu qimbaannoo. Mina amaqi meemoonauqa rapeefaranoo.

<sup>18</sup> Qinee qaara faqa qaara faqa ainaina oosanara randaidaqa sia iridaqa.

<sup>19</sup> Moo meemoona fannoo innaarunai qaqanoo nimari oosanna faqa moo sakani fannoo oonimau nimari oosanna faqa moo oosana sipa fannoo nammari amuaqumau nimari oosanna faqa moo faiqi faqa maanaaqa faqa nariara nariara rimaria oosannara sia iridaqa.

<sup>20</sup> Dapi maraqa nua aanaaseesa maaqimidaqa moo ainaina qumee namaseenoo oorindanaindaraana rukaseenoo sia qinee ummuari marunausee qidanoo.

<sup>21</sup> Qaara faqa qaara faqa ainaina maqa fannoo akooqainara maa maqafa kasidanoo.

<sup>22-23</sup> Moo ainainira faiqi fannoo karaambaiqaiki marina faqa moo furufari mariasa moomoo narana neeneesaafanoo nimuaqu imarina faqa moo fidiqaa imaria aanaaseefa faiqi maree marina faqa moo ainainira maanaaqa fannoo narí rakisira aanaaseena uriqararafaikirana mi ainainausara maqa fannoo akooqainoo kasidanoo.

<sup>24</sup> Maa maqanasaa qaara faqa qaara faqa ainaina kaqikaa ainaina maridaqa misa irirafa firaafa maridanoo.

<sup>25</sup> Moo ainaina tarika mifa afeeka siai ainainafa maridanoo. Suani aukuaana narana suqu quqasee aaku aukana mina naidaqa.

<sup>26</sup> Moo ainaina qiroosa maridaqa misa faqa afeeka siaisa maridaqa. Misa nári maaqa firaa ooniuga qambaana usakaidaqa.

<sup>27</sup> Moo ainaina pandaqa maridaqa misa uriqarafa sia maridanoo sia qimannimidanoo misa nariqa kai andeeqasee irasasaa kai fidaqa.

<sup>28</sup> Moo ainaina rufeeka maridaqa. Mifa kaqikaa ainaina maridanoo amana asaukunna qumareennaranoo. Faiqi firaasa uriqararausa maaqaki kaqi nimarifa maridanoo.

<sup>29</sup> Kafaqa qaara faqa qaara faqa ainainausa amiqimmasee nimariasa maridaqa.

<sup>30</sup> Moo raioonna aiqama aandau urinnaaqarara afeeka faqaafa sia moo aandauro rufiee maridanoo.

<sup>31</sup> Moo ainaina kookooraana akoono fannoo anaasee kookooraana qambaana kaqi sumoosumidanoo. Moo ainaina mimmi akoono fannoo moomoo indauro nifiqanoo nidanoo. Moo ainaina maqasaa karaambaiqa fannoo ufa nimi marifa maridanoo.

<sup>32</sup> Anee furufammasee aneenna auqu uqeereenana kafaqa oonu mafi iriseenana aneenna oo rafaafa fua. Anee manda oosanara tipundaarinana aneenna oo rafaafa fua.

<sup>33</sup> Anee burimakau naamma anoona tatisee minannai adiafaa imari ainainna pataqa auqinnaranoo. Anee faiqi aikiru rumasainanoo fidika qumuannoo. Miqi kai masee aanooqirana uqerasainanoo rakirafa kambiqaannoo.

## 31

<sup>1</sup> Maa ufausa karaambaiqa Reemueerana anoofa qimaqoofa maridanoo.

<sup>2</sup> Anee qini didira qimaaku qinee aniara innaaru qiafana kambiqaonafa mariananoo. Qinee nana ufa fee ani qimamianauree.

<sup>3</sup> Sia aneenna afeeka aanaaseesaa taikaa. Sia aneenna munnimma aiqama aanaaseesaa taikaa. Anaaseeuqa karaambaiqauqa faqa narimaria ainainausa maridaqa.

<sup>4</sup> Reemueera maa ufana iria. Karaambaiqauqa sia uainna nammari naaqa. Sia afeeka nammariara indaandi qiaqa.

<sup>5</sup> Misa mina nammasee sandufa qaunifoora. Faiqi nimeemaanaai oorudupiqa mariasa ufa sia irisee mandaikamma nimaqeefoora.

<sup>6</sup> Afeeka nammari faiqi qusasaa kuqifaninausa ainaina maridanoo. Firaqa ummaaraki mariasa ainaina maridanoo.

<sup>7</sup> Kuqifandinausa amana namaseeqa narí kudikiranara aunuaqa. Misa namaseeqa noori runiranara aunuaqa.

<sup>8</sup> Anee ufa qiranaki ufa mammaqi mariasa aneenna kai dadaaqi andeeqannisaa. Anee dadaaqirana siaisa ufa qiranaki dadaaqiaqa.

<sup>9</sup> Anee ufa qiranaki misa dadaaqira ufa qinana andeeqara rakisirafa marinnaranoo. Anee kudi fasiqauqa faqa ainaina siaisa faqa itita nimaqainaqqa andeeqaranaki mariaqa.

<sup>10</sup> Amiqira anaasee andeeqara irirana faqaa anaasee mararafa kaaqa kadaapi maridanoo. Mina feefauru amiqira oonda faqa uraaqararafa kaaqa firaa feefauru maridanoo.

<sup>11</sup> Mina afaaqi irirafa mi aanaaseenasaa kai mundinoo marifanoo sia moo ainainara sarau iannoo.

- <sup>12</sup> Mi anaaseefa mari kamuqoo narí afaaqi amiqi amiqi kaimma amaqaيدanoo.
- <sup>13</sup> Mi anaaseefa sipsipa asausinnai faqa amiqira sandannai faqa moomoo qamunna auqidanoo.
- <sup>14</sup> Mi anaaseefa sipara foora nianaindaraa narana maree anidanoo.
- <sup>15</sup> Kananaana eendai findinoo narí maaqaki mariasa narana suqasee narí ainainira maanaaqauqa auqee fandinna saikanara qimannimidanoo.
- <sup>16</sup> Mi anaaseefa amiqira maqa qafamasee feefauridanoo. Narí ainaina nimisee maraqai munnimmanannai feefaurummaseenoo narí asaukunnai anukamasee adiafaa ira ainaina uainna ummaqidanoo.
- <sup>17</sup> Mi anaaseefa oori minaki munduseenoo amudaanai qimasee ainainidanoo. Mifa afeeka anaasee kaaqa amudaanai qimarifa maridanoo.
- <sup>18</sup> Mi anaaseefa narí ainainara anoona kai fee qidanoo. Qooma qumbiqaidanoo qeemarifanoo ainaininoo fiifiifanoo eenda amuqusai munu taikaidanoo.
- <sup>19</sup> Mi anaaseefa narí sanda sufuseenoo narí qamunna auqidanoo.
- <sup>20</sup> Mi anaaseefa kudi fasiqauqa faqa ainaina siaisa faqa afaarinoo nimidanoo.
- <sup>21</sup> Suara aaku aukuana mi anaaseefa faasai deedaqammaqaina asausi faqaa qamunna narí maaqaki mariasa aiqama nimifaqa afisusee amiqimmasee maridaqa.
- <sup>22</sup> Mi anaaseefa faiqara qaarisaa ufiqira qamunna auqidanoo. Mifa aakianda amiqira sandannai auqira qamunna kai afisidanoo.
- <sup>23</sup> Aiqama uriqararausa mina afaaqiara uriqararafee qidaqa. Mi fasiqafa maqusa qambaanaí faiqi firaasa faqa marida ufa qimarifaqa aiqamausa mina ufa iridaqa.
- <sup>24</sup> Mi anaaseefa qamunna faqa nooiqandi mariana faqa auqi marifaqa ainaina faqaasa ani feefauridaqa.
- <sup>25</sup> Mi anaaseena afeeka faqa andeeqarana faqa mifa qamunnara foora afisinoo maridanoo. Mifa kasooaqee kambiqaaninna mandainainnara sia rufiaidanoo paasoosidanoo.
- <sup>26</sup> Mina ookiqari firaa amiqira irirafa kai uridanoo.
- <sup>27</sup> Mi anaaseefa narí faiqi namu faqa narí afaaqi faqa ainainasaa rakisidanoo. Sia kudoosaapaidanoo.
- <sup>28</sup> Mi anaaseena faiqi namu nári ninoonara asasiafanoo mina afaaqi fannoo faqa mina amooqidanoo idiki keeqaidanoo maaqi qidanoo.
- <sup>29</sup> Moomoo anaasee amiqira ainaina auqee mariasa maridaqa, anee misa narusee uriqararafa mariananoo.
- <sup>30</sup> Moo anaasee fifau reendeenirafa maridanoo. Amiqira afaqa faqaafa mina amiqirafa dauni taikaannoo. Yaaweena ufa mau fimari aanaaseena kai amooqiaqa.
- <sup>31</sup> Mifa auqai ainaina akiqara uriqarara auqu amia. Mifa auqai ainainna fannoo mina auqu uqeerarana amidanoo.

## **MATAIOO**

### **Yisuna amiqira fasaasa ufa Mataioofa akara rinau.**

*Yisuna akeeku akaaku marusa.*  
(Ruk 3:23-38)

<sup>1</sup> Maa akarafa Anutuna asauku mundirana Abarahaamana ati Yisunara qidanoo. Karaambaiqa Dafidina ati maridanoo. Mina akeeku akaaku mina oosana maaqimminoo maridanoo.

<sup>2</sup> Abarahaamafa Isakeena akoofa marinau. Isakeefa Yakooboona akoofa marinau. Yakooboofa Yudana faqa mina akaqaafasaa faqa nikoofa marinau.

<sup>3</sup> Yudafa faqa Peeresana faqa Seeraana faqa nikoofa marinau. Miqanda ninoofa Tamaafa marinau. Peeresafa Qeeseerona akoofa marinau. Qeeseeronafa Aramana akoofa marinau.

<sup>4</sup> Aramafa Aminadafana akoofa marinau. Aminadafa Naasoonaa akoofa marinau. Naasoofa Saramoonaa akoofa marinau.

<sup>5</sup> Saramoonafa Boosina akoofa marinau. Boosina anoofa Raqabafa marinau. Boosifa Oobeetana akoofa marinau. Oobeetana anoofa Rusioofa marinau. Oobeetafa Yeeseena akoofa marinau.

<sup>6</sup> Yeeseefa karaambaiqa Dafidina akoofa marinau. Dafidifa Sooroomoonaa akoofa marinau. Sooroomoonaa anoofa Quriana anaafa Dafidifa rafiaqoofa marinau.

<sup>7</sup> Sooroomoonafa Reeqooboamana akoofa marinau. Reeqooboonaafa Abisaana akoofa marinau. Abisaafa Asaana akoofa marinau.

<sup>8</sup> Asaafa Yeeqoosafatana akoofa marinau. Yeeqoosafatafa Yooramana akoofa marinau. Yooramafa Usiana akoofa marinau.

<sup>9</sup> Usiifa Yootamana akoofa marinau. Yootamafa Aqasana akoofa marinau. Aqasafa Qeeseekiana akoofa marinau.

<sup>10</sup> Qeeseekiafa Manaseena akoofa marinau. Manaseefa Amoonaa akoofa marinau. Amoofa Yoosiana akoofa marinau.

<sup>11</sup> Yoosiafa Yeekooniaana faqa mina akaqaafasaa faqa misa nikoofa marinau. Babiroonia karaambaiqa fannoo nari maqusaindarii anireenoo nari sundiafa qiman-nimufaqa Yuda maqannaasa akaqausa naru taikeneoo akaqausa Babiroonia maqa maaqai nifiqasee karabusaki quqasoofaqa Yeekooniaana faqa mina akaqaafasaa faqa karabusa marunaki kambiaqau.

<sup>12</sup> Babiroonia maqusaindaraa karabusa taikaseefa nari maqusai anireenoo Yeekooniaafa Seearatieena maqanau. Seearatieefa Seerubaabeerana akoofa marinau.

<sup>13</sup> Seerubaabeerafa Abiutana akoofa marinau. Abiutafa Eeriakimana akoofa marinau. Eeriakimafa Asoorana akoofa marinau.

<sup>14</sup> Asoorafa Sadookana akoofa marinau. Sadookafa Aakimana akoofa marinau. Aakimafa Eeriudana akoofa marinau.

<sup>15</sup> Eeriudafa Eerisarana akoofa marinau. Eerisarafa Matana akoofa marinau. Matanafa Yakooboona akoofa marinau. (Mi Yakooboofa moo marinau.)

<sup>16</sup> Yakooboofa Yooseefaana akoofa marinau. Yooseefaafa Mariana afaaqi marinau. Mariafa Anutuna asauku mundirana Yisuna anoofa marinau.

<sup>17</sup> Maaqimmasee Abarahaanasaqari qisaukuqara taikasee qikunni ooqu qaara faqa qaara faqa marasee oosana kambiaqafufanoo Dafidinaki ootupanoo maridanoo. Dafidifa misa Isaraee maqannaasa karaambaiqa marinau. Karaambaiqa Dafidinasaqari oonu arufufanoo miqi kai inoo qisaukuqara taikasee qikunni ooqu qaara faqa qaara faqa marasee oosana kambiaqafufanoo minaqiqari Babiroonia karaambaiqa fannoo karabusa mareenoo narino inau. Babiroonia karaambaiqa karabusa oosana raquramifufanoo miqooqari kafa miqikai inoo qisaukuqara taikasee qiku qaara faqa qaara faqa ooqu marasee oosana kambiaqafufanoo misaki Anutuna asauku mundirafa ootupa mafi kambianau.

(Yisufa kambiaqoo aukuaana faiqi anaasee siara irannimimarufa maaqimminoo marinau. Kumaaraa maanaafa ninausa nikausa utaqaama nimaqaqoofaqa marida nariara nariara nianasaa rufiasee mariqau. Miqia maridaqa maanaafa faqa akoon-aiqi faqa innoqafufaqa misa ninausa nikausa narana suqasee naidaqa susumasee doo fraaqoo kooroomasoo faqa miqanda kaqi naadu naadu mariqau. Miqimmasooqooqari doo moodaa aukuaana aqaramafufanoo doo moo aukuanasaa amundee-qee faiqi faqa moodaanaki quqasoofaqa mariqau. Yooseefaana Mariasa miqimmasee

firaqoo kooroomasoofaqa naadu naadu marunakina Anutuna maraqunannai Yisufa Mariana aranandaki kambiqaanau.)

*Yisufa kambiqaoo ufafa.*  
(Ruk 2:1-7)

<sup>18</sup> Ooqai Anutuna asauku mundirafa Yisufa mina maqoo ufafa maaqimminoo maridanoo. Mina anoofa Mariafa faqa mina aqoonafa Yooseefaafa faqa qutaagama amaqarafa mariqau. Miqanda naadu naadu mariqau. Miqinoo maridanoo Mariafa amuaquqaikinau. Anutuna kaaqa areenara maraquna fannoo Mariana aranandakina anoonaikufanoo amuaquqaikinau.

<sup>19</sup> Yooseefaafa andeeqara faiqi Anutuna ufa irimarufa marinau. Sia Mariana mifa faiqi mara aminau. Minara iriseenoo Yooseefaafa Marianara amuqusufanoo ufa firaana faiqi Mooseena sandufamau fiqa Mariana arifoo qimasee qumee kai minnisararee qinau.

<sup>20</sup> Miqi qimaseenoo Yooseefaafa irisee fimarufanoo karaambaiqa qangiroo fannoo qainasaa akooqoo qimaminau. Yooseefa, anee Dafidina mi oosanafa mariananoo. Anee aneenna aqoonnanara sia rufia, sia qumuarimari manaqafa maridanoo mifa amuaquqaiki ainainafa Anutuna kaaqa areenara maraquna fannoo quqasaifanoo anoonaikinoo. Sia minnisaa kaqi maraa.

<sup>21</sup> Mariafa mari inanoo faiqi akoonaiqi maqaannoo. Maqasainana anee mina auqu Yisunee qia. Mina auqu oosana maaqimminoo mariannoo. Furufiranakinaana qumbaqi uqeerannisaaninafa mariannoo. Mifa kasooqagee nari maqannaasa nariqa mandainaina numookinaana qumbaeeqeenoo amiqiraqoo quqaannoo. Minara anee Yisu nee qia.

<sup>22</sup> Qangiroo miqi qufanoo ooqai Anutufa tamummaqara fasiqa qimannimu ufafa anoonaikinau. Mi tamummaqara fasiqafa maaqi qimasee qimaqoofa.

<sup>23</sup> Maanaaqa moo fannoo mari inanoo amuaquqaikiannoo. Amuaquqaikinoo faiqi maqaannoo. Mina auqu Imanueera nee qifaranoo.

Mi auquna oosana maasa ufakiqari maaqimminoo maridanoo. Anutufa doo maqee maasa faqa maridanoo.

<sup>24</sup> Miqi qimasoofanoo qainasaa Yooseefaana afunni aroofanoo tautinoo findifinoo karaambaiqa qangiroo ufa kai maranau. Minara misa amundeeqee nari afaaqi amufanoo doo nari anaukoo maaqaki mara quqanau.

<sup>25</sup> Mara quqaseenoo amuaquqaiku kamuqoo sia ameesaaqusinoo ninau, kaqi marinau. Miqi marufanoo Mariafa nari amaaku maqasoofanoo Yooseefaafa mina auqu Yisu nee qinau.

## 2

*Suani oosaindani anu fasiqausa.*

<sup>1</sup> Eeroodeefa rakisimaru aukuanai Yisufa Yuda maqa maaqaki moo maqusaki Beetareeqeemma maqusai kambiqaanau. Yisufa kambiqaofaqa irirana faqaasa fasau asaana rimarusa, fasau asaana rumasoofanoo uqannifiqoofaqa suani afu oosana qaaindani nianaindani faiqaqa anuufaqa Yeerusareenni aniqau. Misa aniree Yeerusaree maqannaasa irammiriga qiqau.

<sup>2</sup> Inni Yuda maqannaaka karaambaiqai kianinafa kambiqaana, yamaqusanaki fee maridanoo fee maasa qeeqa maqusai nianai maridaqa nari karaambaiqa maqooqoo fasau irafufaqa qafamaseeqa mi faiqinari dufi dufi qimamaqarara anidaqa.

<sup>3</sup> Miqi qufanoo rakisirafa Eeroodeefa mi ufana iriseenoo maa fuka karaambaiqafa qini maqa maaqa maraandoo qimaseenoo aranaqoofanoo tautinai. Tautumasooafaqa Yeerusaree maqannaasa misa aiqama naaquqanau. Misa Eeroodeenara rufiaqau. Fuka karaambaiqa namufaqa maasa faqa daruandoo qimasoofanoo naaquqanau.

<sup>4</sup> Eeroodeefa tautumaseenoo aiqama amaana maqasaa rakisimarusa misa uriqararusa kai Anutuna sandufara irimarusa faqa aiqama suqu quqaseenoo irammirinoo qinai. Tamummaqararusa akarakinana yamaqusanai fee Anutuna asauku mundirafa kambiqaannoo fee qufaqa misa qiqau.

<sup>5</sup> Yuda maqa maaqa Beetareeqeemma maqusai kambiqaannoo. Anutuna tamummaqara fasiqa ooqai maaqi qimasee qimaqoofa Beetareeqeema maqusara akara rumaqoofa maridanoo.

<sup>6</sup> Inni Yuda maqannaaki kaqikaa maqusa auqu Beetareeqeemma maridanoo kasooqagee auqu firaqa maqusa uriqarara maqusa mariannoo.

Mi kaqikaa maqusanakiqari karaambaiqa firaafa kambiqaqinoo mariannoo.

Mifa qini Anutuna faiqi anaasee Isaraee maqannaasa rakisinnimaqaannoo.

Mi ufana Anutuna tamummaqara fasiqa qimaseenoo akara rinai.

<sup>7</sup> Eeroodeefa mi ufana iriseenoo fasau asaana rimarusa qumee naaramma quqaseenoo irammirinoo qinau. Mi fasauna innee indaaru qafoofanoo kambiḡoo kamuḡoo mina oosanara idaaqamasee andeeqasee qimaqimiaḡee qinau.

<sup>8</sup> Irammiriseenoo misa niḡiqaidanoo unna qimaseenoo qimanniminoo qinau. Innee Beetareeqeemma maḡusai oonu mi faiḡinara amiḡiuḡanna masee randasee paḡurimasee oonurandee aniree qini faḡa qimaqimifaḡa qinee faḡa miḡi kai iḡa oonu amooḡianaura.

<sup>9</sup> Mifa miḡi qufaḡa misa findimeeḡee Beetareeqeemma maḡusai fiḡau. Aanai fimaru-fanoo fasau fannoo aana amummaḡa uḡannifiḡanau. Mi fasaufa misa nariḡa maḡusai suani oosaindara maridaḡa qafoo fasaufa kai mi fasaufa kai nifiḡanoo fifufanoo faiḡi aanaaḡi maruḡoo mina amummaḡa kasoo inoo marinau. <sup>10</sup> Misa mi fasaufa faiḡi aanaaḡi maruḡoo kasoo inoo marufaḡa qafamaseeḡa nimuḡusa idaaḡufaḡa nimudaani itairi fufaḡa susumamaḡaḡau.

<sup>11</sup> Misa onureeḡa maaḡaki keeḡafufaḡa faiḡi aanaaḡi kaḡikaḡoo afeekaikinoo nari anoona Mariana faḡa marufaḡa ireeda rufia iḡaḡa ooru keeḡafi qafaḡau. Mi fasiḡausa naaḡuḡoofaḡa ooḡumarifufaḡa noorindara maḡasaa kummara mafufaḡa amooḡimamaḡaida susumamaḡaḡau. Misa Yisunara amooḡimaseeḡa karaambaḡa nimimaru ainaina minammamiḡau. Sia kaiḡeesa nimimaruna Yisuna amiḡau. Amiḡira ainaina idukusee koora munnimma aabaa kai amiḡau. Kaifaa afundimaru saḡari anoona makaḡa anoona fooḡaana misa mina faḡa aabaa amiḡau nari maḡusai firaa feefaurummamaree anuna maree mini aabaa amiḡau. Kaifaa moo saḡari anoona afundi maruna faḡa, mandeefana anoona fooḡaafa miḡi kai iḡa aabaa mina amiḡau.

<sup>12</sup> Miḡimmasee marufanoo qaina nifu narooḡa Eeroodeefa marinnai sia kafaa anirandee fuaḡa. Anutufa miḡi qufaḡa misa moo aatata qumee nimaḡaḡa fiḡau.

*Eeroodeena asaukukiḡari Isipa maḡusai sandanau.*

<sup>13</sup> Fasau asaana rimarusa misa fufanoo Anutuna ḡangiḡoo moo fannoo Yooseefaana ḡainasaa afunnareenoo qinau. Eeroodeefa faiḡi aanaaḡiara randasee rutukirara ḡi-daḡinoo. Anee faiḡi ḡisanoosa nifiḡeenana Beetareeqeemma maḡusara rufiasee Isipa maḡusai oonu marinaḡa kasooḡaḡee qinee ḡianana ooḡurandee urua.

<sup>14</sup> Miḡi ḡufanoo Yooseefaafa findifinoo eendamuḡusai faiḡi ḡisanoosa nifiḡeenoo sandeenoo Isipa maḡannai ooḡuree marinau.

<sup>15</sup> Eeroodeefa kaḡi marufanoo minni marinau. Maaḡi qimasee Anutuna ooḡeenaa ufa nari tamummaḡara fasiḡasaa qimaḡoofa anoona kambḡanau. Maaḡi qimasee mi fasiḡafa qinau. Qinee ḡeeḡa qimaaku Isipa maḡanaindaraana aaraanauranoo qinau.

*Eeroodeefa faiḡiuḡaindi rutukinau.*

<sup>16</sup> Eeroodeefa fasau asaana rimarusa nifeesida marusianoo akaru qimasee moo aatata fifufanoo Eeroodeefa minara irinoo aranaḡeenoo sia kaiufanoo nari firisuaḡiḡaḡa niḡiḡoofaḡa misa Beetareeqeemma maḡusa faḡa dinni dinni marusa faḡa akoonaiḡi aanaaḡi kai aiḡama rutuku taikanau. Eeroodeefa fasau asaana rimarusara mi fasaunara irammirusara minara oonu mafi iriseenoo faiḡi naridaḡa Yisuna faḡa aruaḡeera minaramma irinau. Minara irisee ḡaara aukuaana mararusa faḡa ḡambaana aukuaana mararusa faḡa aanaaḡi maḡee maḡarusa faḡa minara iriseenoo akoonaiḡi kai aiḡama rutuku taikanau.

<sup>17</sup> Faiḡi aanaaḡi aiḡama rutuku taikasooḡanoo Anutuna tamummaḡara fasiḡa auḡu Yeereemaia mina ufa anoona kambḡanau. Mifa qinau.

<sup>18</sup> Innee iriaḡa, Rama maḡusai aanaaseeḡa ufa anoona kambḡaanno.

Ikifaafau faḡa faaḡa fuisse faḡa marianno. (Yuda maḡannaa anaaseera Raseerana araamummaakee qimariḡau.)

Raseerana araamummaaka nari faiḡi aanaaḡiara ikiraḡeefara moosa aniree nuḡa maseeḡa idaaḡidaaḡa maseeḡa misara doo taikaḡee qifaḡa siamma irifara.

Misa nimuḡusa mandaiki marifaḡa miḡiḡa maridaḡa misa faiḡiuḡaindi sia mariafaḡa miḡidaḡa.

Tamummaḡara fasiḡa ufa miḡi qimasee akara rinau.

*Isipa maḡusaindara oonurandee aninau.*

<sup>19</sup> Yooseefaafa Isipa maḡusai kaḡi marufanoo Eeroodeefa kuḡufufanoo Anutuna ḡangiḡoo moo fannoo Yooseefaana ḡainasaa afunnareenoo akooḡoo qimaminau.

<sup>20</sup> Findifi doo fua. Faiḡi ḡisanoosa nifiḡee kaifaa Isaraee maḡusai ooru fua. Ooḡai faiḡi ariraru fasiḡafa doo kuḡinoo.

<sup>21</sup> Miḡi ḡufanoo Yooseefaafa irinoo faiḡi ḡisanoosa nifiḡeenoo kaifaa anirandeenoo Isaraee maḡasaa ooru finau.

(Isaraee firaa maḡa maaḡa marunaki minaki dinni atinai Yuda maḡa maaḡa marinau.)



<sup>22</sup> Yuda maqasaa oonureenoo Eeroodeena mina amaaku auqu Aakeerausifa doo mifa narí akoona ainaina afapita qumareenoo rakisirafa marinau. Yoosefaafa minara iriseenoo rufiee marinau. Qainasaa afunnarroofanoo Isaraee maqa maaqa dinnatinni Kariree maqa maaqaki onuu marinau.

<sup>23</sup> Miqoo kaqikaa maqusai Nasareeteenni naaruara marinau. Miqi qunara Anutuna ooqai maru tamummaqara fasiqauqa misa ufa kambiqaanu. Yisufa sia kambiqaoo kamuqoo ooqai maaqi qimasee minara akara riqau. Misa minara Nasareetee fasiqa fee qifaranoo fee qiqau.

### 3

*Yoohaneefa nammari nimimarufa qimannimi ufana.*  
(Mak 1:1-8; Ruk 3:1-18; Yoh 1:19-28)

<sup>1</sup> Yisufa kumaaraa marufanoo mi fasannai Yoohaneefa nammari nimimarufa kooroomafinoo afeekaikamaseenoo Anutuna ufa faiqi anaasee maqusa maqusa qimanniminoo ninau. Yuda maqannaasa aadana maqannai faiqi oodaa marunnai Yoohaneefa miqoo oonureenoo qimannimimarinau.

<sup>2</sup> Mifa maaqi qimasee fuki faaki qidanoo qimannimimarinau. Anutuna ququsa qusasaa innisaa ititafuannoo. Minara innee aiqamausa inneeqa mandainainara quqasee quandaafina Anutufinnai noori ubeekaaqa.

<sup>3</sup> Yoohaneefa miqi qimasee qimannimimarufanoo ooqai Anutuna tamummaqara fasiqa Eesaia mifa qimaqoo ufafa anoona Yoohaneenaki kambiqaanu. Mifa maaqi qimasee akara rinau.

Faiqi moo fannoo faiqi sia marunnaindari aadana maqannaindari ufa fifi qimasee faiqi anaasee maaqi qimasee qimannimidanoo.

Karaambaiqa anianifeera mina aana afisuaqa. Aana eendirana andeeqasaifanoo karaambaiqa fuani.

Miqi qimasee akara rinau.

<sup>4</sup> Mi fasiqafa Yoohaneefa qamunna sia amiqirana afisimarinau. Aadaika aadaikirafa kammeera kisaaga asausinnai auqirana afisirafa nimirinau. Tamummaqara fasiqa naanna ramasee miqimmasee marinau.

(Kammeera fannoo fira aanda uqosara foora maridanoo. Asausi kisaqaqandauqa maruna mina marasee sufusee qamunna auquqagee afisimariqau.)

Yoohaneefa aanda apatannai qamunanda rafaqaqu rumbanau. Mina narana sia narana uqanna. Ookasaasa anoona faqa kaasau oofaafana faqa mina auqu pandaqa oofaafana mina kai neemarinau.

<sup>5</sup> Misa Yeerusaree maqusanaasa faqa Yuda afumakinaasa faqa Yooradanna nammari dinni dinni afainni marusa faqa aiqama Yoohaneefa maruqoo suqiqa marida Yoohaneena ufa irimariqau.

<sup>6</sup> Suqumaraidaqa misa narí mandainainara akooroomaseeqa minnisarara kooroo qimarufanoo Yoohaneefa nammariqi rufusu ooqu marinnimaqasee marufaqa rumannimaqoo faqa nammariqiari findifiqau.

<sup>7</sup> Farisai amaana ufa qimariasa faqa Sadikai amaana ufa qimariasa misa faqa nammari mararara aniroofanoo Yoohaneefa niqidanoo qimanniminau. Innee sakani faiqi ukadiqa faiqi namuara foora narí narinarana rufiamaree sandee mariafanoo. Yafee innee qumee aaquqima nimaqaiqagee innee Anutuna aranaqaranara rufiamareeqa unna qimasee nammari rumannimaqaannanara qinisaa mandaageefaree.

<sup>8</sup> Innee kuqaa naundura quandarusee maridaqee. Unna qimariafanoo. Andeeqara oosana maraifaqa gafeeqa inniara kuqaa naundura quandarusee qianaara.

<sup>9</sup> Yoohaneefa kaifaa qimanniminau. Innee inneeqara maasa Abarahaana aiku asaku maridaqee sia Anutufa daruannoo fee qimariasa. Maasara amiqirusee qimariasee qimariafanoo. Miqi qimaria ufana sia qiaqa. Qini ufa iriaqa Anutufa maa fifau oonuqara qinanoo amana Abarahaana aiku asaku kambiqaefaranoo. Nanaree innee fifau maasa Abarahaana aiku asaku maridee qida fee. Fifau faafau ufa dapi ufa qimariafanoo.

<sup>10</sup> Doo Anutuna saasunara foora saqari atuka ateeqarara rauqiaqee idanoo. Sia naundura quandaanausa Anutufa narirafa qusandaannoo. Yasaqari fee sia andeeqasee qaqamma irainafa kudi saqari Anutufa mina ateeka idaraannoo.

<sup>11-12</sup> Kuqaa qinee Yoohaneesa nammari kai inni rumannimaqaida. Inniqa mandainaina minnisee Anutuna ufamau firanara koorooianifeera fifau nammari kai rumannimaqaida. Kasooqagee qini qinaaqiannai moo fannoo kambiqaannoo. Mifa qini uridaaqaraannoo. Qinee ooreeqarusa mina ameemaana marianaura. Naqimmasee fee qinee mina dadaaqianauree mifa firaafa qini faqa uridaaqararafa maridanoo. Mifa

sia fifau nammarrinnai kai inni ooqumarinimaqaannoo. Mifa Anutuna kaaqa areenara maraquina inni naakunnimaqaannoo. Mifa kudimakirana idaqaanifeera idannai faqa inni rumannimaqaannoo Yoohaneefa oofaafana kikiqa usuna maa maqanasaaqaraasara qidanoo qinau. Innee Yisuna asaukuki faiqi anaasee oofaafanara fooru doo maridaqa. Kaqikaqoo utitiqamanniseenoo mina adi fuaqa aquannoo. Anoonu nari mareeqeenoo nari maaqaki quqaseenoo aanaaqmaara mandoosana maree mariasa idaraannoo. Ida firaana sia dimbeemari idanaki araannoo.

*Yisufa nammari maroo ufafa.*  
(Mak 1:9-11; Ruk 3:21-22)

<sup>13</sup> Mi fasannai Yisufa Karidaiaandari qumureenoo Yooradanna nammari afainni Yoohaneefa nammari rumamaqaanifeera quminau.

<sup>14</sup> Qumuroofanoo Yoohaneefa saa qimaseenoo Yisuna qimaminau. Qinee ani nammari rumamaqaananoo siamma amanaikiannoo. Anee qini rumaqimaqainanoo amana mariannoo.

<sup>15</sup> Miqi qufanoo Yisufa maaqi qimasee qimaminoo qinau. Maqee kaqi rumaqimaqaa, Anutuna ufamau kai fidaqa maaqanda andeeqaanuranoo. Miqi qufanoo Yoohaneefa irinoo eedoo qimaseenoo Yisuna nammari ukuqnamaseenoo mara uqeeranau.

<sup>16</sup> Yoohaneefa Yisuna nammari keeqa amaqasoofanoo findifufanoo mikari kai innaaruna rakeefanoo Anutuna naaquqara andeeqara mara fannoo Yoohaneefa qafuofanoo nakipurunara fooru mambufanoo qumureenoo Yisunasaa quqanau.

<sup>17</sup> Quqamafufanoo innaarunaindaraa ufa maaqi qimaseenoo akoogoo Yisunara qinau. Maa fafiqafa kaaqa qini qimuqusira qimaaku marifaqa minara qini qimuqusa asooaifaqa susuidaqa.

## 4

*Sadannafa Yisuna amanufafa.*  
(Mak 1:12-13; Ruk 4:1-13)

<sup>1</sup> Miqooqari nammari mara mareenoo Anutuna maraquina fannoo Yisuna rarisameeqeenoo fifau saqanna aadana maqasaa oonikinai quqasoofanoo marinau. Sia fifaufau. Afaannauqa firaafa amanammasee qafaanifeera quqasoofanoo marinau. Oonu marufanoo afaannauqa firaafa Yisuna amanammasee qafaanee qimaseenoo anireenoo maaqi qimaseenoo amanammasee qafanau.

<sup>2</sup> Yisufa sia narana marufanoo, qaara fafiqa niku nisauku taikasee eenda faqa faasaana faqa aiqarooofanoo aararanau. Miqimmasee faasaana taikoofanoo firaqoo aararooofanoo kudoosaapanau.

<sup>3</sup> Kudoosaapee marufanoo afaannauqa firaafa mandainainara amanammasee qafarara anireenoo Yisuna qimaminoo qinau. Anee kuqaa Anutuna amaaku mari inana maaqi qimasee kooroo inaqa qafaa, maa oonisara qinanoo feemu kamambinana nainanoo amuaqu inaqa qafaa.

<sup>4</sup> Yisufa iriseenoo afaannauqa firaana qimaminau. Anutuna akarakina minara maaqimminoo maridanoo. Faiqi narana kai namasee sia amana marifara. Anutuna ookinaa ufa namufafa namaseeqa neeqa amana marifaranoo. Qinee mina Anutuna ufamau kai fuanaura. Ani ufa siamma irianaura.

<sup>5</sup> Miqi qufanoo afaannauqa firaafa Yisuna afiqeenoo Yeerusareenni amaana maqa, Isarae maqannaa naaquqara firaqa amaana maqa meeraqoo sandaaqai maruna mina ataufakaqaa faakana kisaqaa atisaa muru quqasee qimaminau.

<sup>6</sup> Kuqaa anee Anutuna faiqi fee sia fee. Kuqaa Anutuna faiqi mari inana maaqooqari rafusakinana maqasaa meemai aqufinaqa aiqamausa ani qafaqaa Anutuna akara moo minara maaqimminoo maridanoo.

Anutufa nari qangiroouqa niqiqainaqa misa nisauku qufiqisaifana minasaa aqufinaqa rafusifaranoo, sia oonisaa aiku rupaurinnaranoo.

Minara anee maaqooqari rafusaki aqufinaqa misa ani dadaaqifana sia maqasaa arinnaranoo. Faiqi anaasee qafamasee kuqaa anee Anutuna asauku mundira fee qifaranoo.

<sup>7</sup> Afaannauqa firaafa miqi qimasooofanoo Yisufa qimaminau. Anutuna akara kafa maaqimminoo maridanoo.

Anee aneenna karaambaiqa Anutuna sia amanammasee qafeennaranoo. Sia uqanna.

<sup>8</sup> Yisufa miqi qimasooofanoo afaannauqa firaafa mina iriseenoo kaqi afeekaikamaseenoo Yisuna kafa afiqamareenoo aqana kisaqasaa afiqee muruseenoo aiqama maqa maaqa maqusa maqusa misa nari areenaranaki marina Yisuna uqafiqaseenoo qimaminoo qinau.

<sup>9</sup> Anee maqasaa oorindari rupaitamafinana qini Anutusara foora qimooqinaqa qinee maa aiqama ainainna uqafiqasauunnana ani kaimmianaura.

<sup>10</sup> Yisufa mi ufana iriseenoo kaifaa qimaminoo qinau. Sadanna see maree fua. Anee iria. Anutuna akara moo maqimminoo maridanoo. Innee inneeqa Anutuna kai amooqiaqa. Karaambaiqa Anutufa mifa qinnandee kai iaqa. Qinee mina ufa kaimma irianaura.

<sup>11</sup> Yisufa miqi qimasoofanoo Sadannafa quqasee finau. Fufanoo qangiroouqa Yisufinnai qumureeqa narana aina amidaqa amiqi amiqiqau.

*Yisufa nari saika oosana aroo ufafa.*  
(Mak 1:14-15; Ruk 4:14-15)

<sup>12</sup> Mi kamusaqa rakisirafa Eeroodeefa Yoohaneena nammari rumannimaqee maruna karabusakina rumba quqanau. Yisufa minara iriseenoo Karidaia maqusai finau. Miqoo oonureenoo kaqikaa maqusa moo auqu nari maqusai Nasareetee, miqoo oonu marinau.

<sup>13</sup> Kaqikaaqoo miqoo marinoo quqaseenoo Kapeeranauma maqusai Karidaia faruma atinni mi maqusanai oogu marinau. Kapeeranauma maqusai Seepuruna maqa maaqa faqa Napatari maqa maaqa faqa miqoo Kapeeranauma maqusa maridanoo.

<sup>14</sup> Yisufa Kapeeranauma maqusai oogu marufanoo Anutuna tumummaqara fasiqa auqu Eesaia, mina ooqeenaa ufa anoona kambiganau.

<sup>15-16</sup> Mifa qinau.

Seepuruna maqa maaqaki mariasa faqa Yooradanna nammari dinnafai mariasa faqa faruma dinni, ooruku nammari dinni gambaana maqa maaqaki mariasa faqa Kariree maqa maaqaki aanaamuru oosana oosana mariasa faqa innee aiqama faiqi anaasee asukunaki mariasa maqee kaaqa qarana qafeefaranoo. Kuqiranakiara foora asukunaki mariasa inniki maqee kaaqa qarafa radiqifinoo mariannoo.

Taumummaqara fasiqa miqi qinau.

<sup>17</sup> Yisufa Kapeeranauma maqusai oogu maridanoo maa ufana oosana arasee faiqi anaasee maaqi qimasee qimannimimarinau. Innaaruna ququsa adeediranoo maridanoommi, innee inneeqa mandainaina kiqari quandasee Anutufinnai noori ubeekaaqa.

*Noodaanna maree marusa naaroo ufafa.*  
(Mak 1:16-20; Ruk 5:1-11)

<sup>18</sup> Yisufa Kapeeranauma maqusai maridanoo moo faasaana Kariree faruma afaiqara fidanoo qaara fasiqa nari qisafasaasa paqurinau. Miqanda nuqu Peetooroosa Andurusa mariqau. Miqanda firaa pateeuqa nammariqi aqimariqau. Misa noodaanna kai arimarusu mariqau. Misa ainaina doo mi ainainna faqaasa mariqau.

<sup>19</sup> Yisufa miqanda paqurimasee qimanniminoo qinau. Inneeqara qini faqa aniaqa. Inneeqara maqee maqee noodaanna maree mariaqanda mariafanoo qini faqa anireeqa faiqi noodaannara foora mareeqee Anutuna ququsaki quqefaranoo.

<sup>20</sup> Miqanda mi ufana iriseeqa nari pateeuqa ainaina faqa quqasee findimeeqee Yisuna faqa fiqau.

<sup>21</sup> Yisufa miqanda nifiqeenoo miqooqari faruma afaiqara fidanoo kaifa qaaraiqisa fasasa paqurinau. Miqanda nuqu Yameesa Yoohaneesa miqanda nikoona auqu Seebeedi. Sia nammari nimimaru Yoohaneefa marinau, mina amarafa marinau. Miqanda nari nikoona faqa kanuqaki ooqumaridaqa fafaa eendaki nari pateeuqa nammariqi aqusee noodaanna maraane qidaqa deedaqimariqau. Misauqa faqa noodaanna ainainirana faqaasa mariqau.

<sup>22</sup> Yisufa naaramasoofaqa miqanda findifufaqa nari kanuqa faqa nari nikoona faqa minnisee Yisuna faqa fiqau.

*Kariree maqannaasa aurirausa andeeqannisoo ufafa.*  
(Ruk 6:17-19)

<sup>23</sup> Mifa Karidaia maqa maaqa aiqama fiqau fiqau inoo nidanoo innaaruna ququsara fuka ufa qimanniminoo ninau. Aurimarusu faqa oosana oosana ainaina maree marusa faqa teeroouqee marusa faqa idaaqamannimaqee marianu.

<sup>24</sup> Miqi marufanoo mina auqu aiqamai daraaninau. Siria maqannaasa faqa aiqama iriqau. Iriseeqa amiqi marusa misa aiqama oosana oosana aurirana maree marusa faqa kaaqa nidafi marusa faqa faiqi fueena naundurari keeqeemarusu faqa fuseenasana nari marusa faqa niku nisauku aadanusi marusa faqa aiqama Yisufinnai maraida munu quqee marufanoo Yisufa andeeqannisee marinau.

<sup>25</sup> Mifa maqusa maqusa fimarufaqa faiqi anaasee moomoo suqumaree mina faqa fimariqau. Karidaia maqa maaqaindaraasa faqa qisaukuqara taikasee maqusa marunaki

marusa faqa Yeerusaree maqannaasa faqa Yuda maqa maaqa afumaki marusa faqa Yooradanna nammari dinnafai marusa faqa suqu maree mina faqa fiqau.

## 5

*Amuaqunamusaa maridanoo qimannimu ufafa.*

<sup>1-2</sup> Mi fasannai mi aukuanna Yisufa faiqi anaasee moomoosa nari faqa fimarusa niqafamaseenoo qufaqa kaqikaa amuaqunamusaa ooru nari faiqi namufaqa faiqi anaasee faqa fiqumma ooqu marifufanoo ufa maa qimaria amaana ufana qimanniminai.

*Anoona asasirafa.*  
(Ruk 6:20-23)

<sup>3</sup> Faiqi moo fannoo nariara qinee qeeqara sia amanaikidee qimasee dadaaqa marifa dadaaqa naqa minannai kai andeeqasee marianauree qimarifa mifa uqanna anoona asasiranaki maridanoo. Innaaruna ququsara Anutufa amianinnanara asasidanoo.

<sup>4</sup> Noori runusee soofari mariasara foora marifa nari aaqaranara faqa faiqi aanaaseera faqa irisee oori runusee marifa mifa uqanna anoona asasiranaki mariannoo. Anutufa amiqi amiqirana amianinnanara asasidanoo.

<sup>5</sup> Reendeeni mariasa misa uqanna anoona asasiranaki marifaranoo. Anutufa nari innaarunai qumiasana nimianinnanara asasidaqa.

<sup>6</sup> Faiqi anaasee andeeqasee Anutuna iriranamau firaa iriranara aiqama irirana arusee uriqarara irirane qimasee mi mau fimariasaa misa uqanna anoona asasiranaki maridaqa. Anutufa misa dadaaqa naqa mi mau kai fifaranoo. Minara asasidaqa.

<sup>7</sup> Niqoonausara qimudaoo qimasee nifau ee mariasa misa uqanna anoona asasiranaki maridaqa. Anutufa misara faqa qimudaoo qimasee nifauama nimaqaaninnanara asasidaqa.

<sup>8</sup> Anaqaqai faiqira foora nisakadiki sia ikairi marisa misa uqanna anoona asasiranaki maridaqa. Anutufa nari oori faqa nari marirana faqa uqannifiqaaninnanara asasidaqa.

<sup>9</sup> Tinoo taanoo rirana uqeerafaqa asoosara nimida fafaa qimariasaa misa uqanna anoona asasiranaki marifaranoo. Anutufa misara qini faiqi namu fee qianinnanara asasidaqa.

<sup>10</sup> Anutuna iriranamau firana akiaqara narinausa misa firaa asasiranaki marifaranoo. Anutufa nari innaaruna ququsa nimianinnanara asasidaqa.

<sup>11</sup> Faiqi anaasee qini duqu saara inniara fidiqaaidaga naridaqa mandaikamma nimaqaaidaga oosana oosana mandainainara inniara unna qimarifaranoo. Miqifaqa innee anoona asasiranaki mariaqa.

<sup>12</sup> Qini ufa saara arirana akiaqara Anutufa innaarunnai firaa feefaurutia quqanni-maqaifanoo maridanoo. Minara irisee sia noori runuqaqa, firaqoo asasiqaqa. Sia inni kai narirafa maridanoo. Ooqai Anutuna tamummaqara fasiqaqa faqa miqi kaimmidaga narimariqau.

*Ooruku anoona faqa kaaqa qarana faqa mi ufafa.*  
(Mak 9:50; Ruk 14:34-35)

<sup>13</sup> Qinee sia fifau inni maa ufana qimannimidaqa. Innee qini ufa irimariasaa maa maqa maaqanasaa oorukuara foora mariafanoo faiqi anaasee aiqama adiafaamma nimaqaanifeera. Innee qini maa ufana rukiaifaqa faiqi anaasee yai fee adiafaairana paqurifaree. Ooruku indeemariasaa amiqira ooruku indasee maaqaki quqaidaga. Manda ooruku indasee qafaafanoo mandaikifaqa doo aqusaafanoo madaapeekammidanoo. Innee qini maa ufana rukieeqa manda oorukuara foora marifara, manda oorukuara foora madaapeeki aqusaifaqa marifara.

<sup>14</sup> Innee qini ufa irimariasaa maa maqa maaqanasaa qoomara foora mariafanoo. Maqusa moo fannoo aqaanasaa maridanoo faiqi anaasee aiqamausa arumundari qafaqaqaa sia kukeeqanoo maridanoo, akooqoo maridanoo. Innee qoomara foora miqikai iqa, kaaqa qaidaga akooqoo mariafanoo, qaidaga arumuki faqa kaaqa qeemariafanoo.

<sup>15</sup> Faiqi moo fannoo rambi qumbiseenoo sia kukeeqarannai quqaani, uqeeraraqoo quqaqainanoo aiqama maaqakinaasa faqa kaaqa qamannimaqaannoo.

<sup>16</sup> Innee miqi kai iqa rambi fooqaana niqoonausaki kaaqa qamannimaqaifaqa misa inni andeeqaranara qafamasee quandafinaqa inneeqa innaarunnai nikoona susuiaqeera.

*Mooseena sandufa kooroo ufa.*

<sup>17</sup> Innee iriaqa. Mooseena sandufa irimariafa faqa nikoona tamummaqara fasiqauqa ufa irimariana faqa, sia mina rukiaraaru qumidau. Mi ufafa anoonaikianifeera qinee qumidaqa.

<sup>18</sup> Simai, qini ufa iriaqa innaaaruna faqa maqa faqa firaa ainaina maridanoo. Mooseena sandufa faqa firaa ufa maridanoo sia dauni taikaannoo. Ati faqa kaqikaafa faqa sia uqanna taikaannoo kaqi uqanna mariannoo. Mooseena sandufa fifi inoo anoonaikinnaqoo miqoo innaaaruna faqa maqa faqa mi sandufana faqa doo miqoo kai taikaannoo.

<sup>19</sup> Faiqi moo fannoo Mooseena sandufa aiqama muduka uqeeraidanoo ati kai rukiainafa faiqi moo aakapeenoo anee faqa miqiannee qinafa mifa innaaaruna maqusa ureeqarafa mariannoo. Faiqi moo fannoo Mooseena sandufamau fidanoo naakapainafa mifa innaaaruna maqusa uriqararafa mariannoo.

<sup>20</sup> Innee iriaqa Mooseena sandufa akoofasauqa faqa Farisai amaana ufa qimariasa faqa misa irirafa sia andeeqanoo maridanoo sia uqanna innaarunnai fifaranoo. Innee faqa inneeqa andeeqara osana misa nimana kai ooreeqaqa maridaqa sia amana innaarunai fifaranoo. Inni andeeqara marirafa misaindi firaaqoo oorinaaqaramasee marinaqa innee amana innaaaruna ququsaki fifaranoo.

*Aanoo iranara Yisufa qimannimu ufafa.*

<sup>21</sup> Yisufa kaqi qimannimidanoo qinau. Maasa Yuda maqannaasa qikeeku qikaaku ufa maaqimminoo maridanoo. Sia innee faiqi naruannee qimasee kuqa naruqa. Ya fee faiqi moo fannoo faiqi naruannee qimasee kuqannarinafa kootai maridana ufa mareennaranoo.

<sup>22</sup> Mi ufafa miqimminoo marifaqa qinee minara maaqi qidaqa. Ya fee faiqi moo fannoo sia firaa ainaina kaifau koota maridanoofau, fifau nari akaqaafasara aanoo inafa maqusai kootaki ufa maraannoo. Ya fee faiqi moo fannoo fifau nari akaqara furufara midanoo mifoo qinafa mifa firaa kootaki maridanoo ufa maraannoo. Ya fee faiqi moo fannoo fifau nari akaqara manda ufa qimamaqainafa karaambaiqa marinannai oonuraina ani idaki mara aquandoora.

<sup>23</sup> Yisufa moo ufa qimanniminu. Innee inneeqa Anutuna amira ainaina aandau fee ooni fee nana ainaina fee Anutuna amianauree qimasee amaana maqaki munuseeqa inniqa nikeeku nikaaku Mooseena sandufa afaqaidee qimasee imarundee iqa, Anutuna amianee qimaseenana aneenna akaqaafasaa faqa ani aqiranara irisee sia kaqi Anutuna amiaqa.

<sup>24</sup> Aandau aina mina quqaseeqa oonurandee inneeqa nikaqaafasaa faqa moodaaqoo ufa qimaseeqa reendeenamma finaqa doo miqoo kai aandau aina Anutuna qaindasaa quqaa.

<sup>25</sup> Yisufa moo ufa maaqi qimasee qimannimidanoo qinau. Faiqi moo fannoo aniaara mandaikamma qimaqaannee qimasee ani kootai aqfee finana aanai munu dauni andeeqa taikkeenana aqoondikia. Sia andeeqa taikainanoo ani mareeqeenoo kiapana munu amiannoo.

<sup>26</sup> Mifa ani mareeqee firisuaiqa aminanoo ani rumbaannoo. Simai, qini ufa iriaqa. Anee rumberanaki marinanoo ani numoo akiaqa aiqama uqanna taikafinana mikari kai misa ani iduku aiseefaranoo.

*Faiqi anaasee ummuarira ufa.*

<sup>27</sup> Maasa Yuda maqannaasa ufa maaqimminoo maridanoo. Innee sia moo fasiqa anaqa ummuariaqa. Mi ufafa miqinoo marifaqa qinee minara maaqi qidaqa Maasa Yuda maqannaasa qikeeku ufa maaqimminoo maridanoo. Innee sia moo fasiqa anaqa ummuariaqa. Mi ufafa miqimminoo marifaqa qinee minara maaqi qidaqa.

<sup>28</sup> Qine e kuqaa ufa qimannimidaqa faiqi moo fannoo moo anaasee qafamasee iriranakiqari umee kai mina mararee qinafa anee doo aaqamaseenana mina faqa aneenna amugusakiqari manda o osana auqaananoo.

<sup>29</sup> Ani asaukuannai afu fannoo ani aaqaranaki quqaisainana mi afuna pitaqima aqua. Moodaa afaqa taikafinanoo amiqirafa mariannoo. Anutufa aiqama afaqa idaki aqusainanoo manda mariannoo.

<sup>30</sup> Ani asaukuannai asauku fannoo ani aaqaranaki quqaisainana mi asaukuna ateeqa aquasaa. Moodaa afaqa taikafinanoo amiqirafa mariannoo. Aiqaama afaqa Anutufa idaki aqusainanoo manda mariannoo.

*Faiqi anaasee minnisara ufa.*

*(Mat 19:9; Mak 10:11-12; Ruk 16:18)*

<sup>31</sup> Maasa Yuda maqannaasa qikeeku qikaaku ufa maaqimminoo maridanoo. Faiqí moo fannoo narí anaaga minnisaanuree qimasee sia fifau minnisaannoo. Papiqasaa maa anaaseefa qini qinaaga mariuna doo minniseeqa miqi qimaseenoo mi papiqanasaa akara rumeeqeenoo mi anaaseena amiannoo. Amiseenoo doo aqiqaannoo.

<sup>32</sup> Mi ufafa miqimminoo maridanoo, qinee Yisusa minara maaqi qidaqa. Faiqí moo fannoo narí anaaga aqíqee mariana sia ummuari mari anaaseena amiqimari anaaseena fifau aqíqee marifa mi fasiqafa narí anaaga mareeqeenoo ummuariranaki quqaidanoo. Quqasaifanoo faiqí moo fannoo mi anaaseena maraifa mifa faqa ummuarammidanoo.

*Ufa rukiarana faqa nimana aqiqaranara faqa mi ufafa.*

<sup>33</sup> Maasa Yuda maqannaasa qikeeku qikaaku ufa maaqimminoo maridanoo. Faiqí moo fannoo Anutuna afusaa ainainiani qinafa kuqaa mi ainainna ia. Sia Anutuna afusaa unna qia.

<sup>34</sup> Mi ufafa miqimminoo maridanoo, qinee minara maaqi qidaqa. Sia Anutuna afusaa ufa afeekaikamandee asauku uqeraaqa. Sia mi oosanna araaga.

<sup>35</sup> Sia innaarunaira qimasee amana aqiqa. Miqoo Anutufa ufaqira qaari miqoo ufiqinoo maridanoo. Sia maa maqa maaqanara qimasee nimana aqiqaaga. Maa maqa maaqanakinana Anutufa aiku ramaqai maqa maaqafa maridanoo, naaquqaani sia nimana aqiqaaga.

<sup>36</sup> Sia Yeerusareera qimasee nimana aqiqaaga. Yeerusaree firaa karaambaiqa Anutuna maqusa maridanoo, qimasaida qimariana minnisaaga. Inneeqa nikiaga kikiqa ususaida nimana aqíqee mariana sia miqiaqa. Innee amanee inneeqa kai moo fannoo eekara nikiaga auqida fee moo fannoo dunduqarira nikiaga auqida fee, sia amana auqifara. Anutufa kaimmauqinau. Naaquqaani sia nimana aqiqaaga.

<sup>37</sup> Minara innee eedoo qiaqera eedoo kai qiaqa. Innee qaoo qiaqera andeeqasee qaoo kai qiaqa. Anee moo ainaina kikiqa usinana aneenna amuqusa ookiqari mandainaina marinakiqari moo ainaina kikiqa ususee unna qiananoo.

*Akiaqara akiaqara qira ufa.  
(Ruk 6:29-30)*

<sup>38</sup> Ooqeenaa Mooseena sandufa maaqi qimaqoofa marida qinee iridaqa. Faiqí moo fannoo moonaa afu dimbaqaiqaqa, faiqí firaasa ufa qimasee mina aru fasiqana narí afu dimbeefara. Kafaa moo fannoo asaukusamu moo oori arifanoo afai rufidifaqa faiqí firaasa ufa qimasee aru fasiqana narí afai rufidifaranoo.

<sup>39</sup> Mi ufafa miqimminoo maridanoo, qinee Yisusa minara maaqi qidaqa. Moo fannoo mandaikammamaqainana anee sia kaifaa quandafi narí mandaikammamaqaa. Moo fannoo ani aapaasa arinana sia aanoo ia, sia qaoo qia, dinni faqa kai quandasainanoo dinni faqa aruani.

<sup>40</sup> Faiqí moo fannoo kootai ani aqíqee munuseenoo kootammamaqaseenoo ani siuta raipaqa marainana sia oori runua, moo faqa amiqirana raipaueeqee kaqi aabaa mina faqa amia.

<sup>41</sup> Faiqí moo fannoo qafee faqaa fee sundia fee kiapa fee aniara qini faqa qini ainaina faqa sia feefauru amianaara kaqi qifiqeenana moo maqusai munuqisaannee qinana anee oori quqaseenana sia feefauru ariseenana oori runua, mi maqusana fiaaqaree moo maqusai eedoo qimasee munaisaa.

<sup>42</sup> Faiqí moo fannoo munnimma fee qamunna fee qinana kaqi amia. Sia qaoo qia. Faiqí moo fannoo ani moo ainaina ufaasu qimiannee qinana sia qaoo qia, kaqimmamia.

*Namuqaara sia fidiagaani, nimuqusiani.  
(Ruk 6:27-28,32-36)*

<sup>43</sup> Misa ufa maaqinoo maruna iridaqa. Inneeqa niqoondia ni muqusaki nidiani. Inneeqa namuqaara fidiagaamiani. Misa ufa miqimminoo marifaqa minara qinee iridaqa maaqi qidaqa.

<sup>44</sup> Inneeqa namuqaara faqa nimuqusaki nidiani. Innee qini ufa irinausa mina saara narifaqa misara faqa quandafi innaaru qiaqa. Anutufa misa amiqi amiqianifeera innaaru qimannisaaga.

<sup>45</sup> Miqiaqa kai Anutufara foora marifaranoo. Mifa Anutufa miqiranara kai mifa qifanoo suani fannoo aiqamausa Anutuna namuqaaki mariasa faqa aqoondiki mariasa faqa aiqamatinaa kaaqa qamannimaqaidanoo. Miqiranara kai Anutufa qifanoo aaku ridanoo andeeqarusa faqa sia andeeqarusa faqa ainaina ummaqusaafanoo kambiga nimaqaidanoo.

<sup>46</sup> Innee inni nidinausa kai nidinaqa innee naqimmasee Anutufa mina akiaqara maasa feefauru qimiannoo fee qifaree. Sia nimiannoo. Innee miqinaqa unna qira takisa maree mariasa naanna reemariasa mariafanoo.

<sup>47</sup> Innee inni nidirausara kai nidinaqa amana amana kai mariafanoo. Innee sia aanaamuru urinaaqaraida. Misa faqa narí aidi narí aidirana amana amana kai mariafaqa minara qínee inni qimannimiqa. Inni namuqaara faqa nimuqusaki nidiani sia aqoondiarai kai nidiani.

<sup>48</sup> Inni innaarunnai nikoofa andeeqarana fiqararafa maridanoo. Sia namuqaa fee qidanoo, sia maana qini qiqoondi fee qidanoo aiqamausa amiqi amiqimannimaqaidanoo. Innee faqa miqi kai iqa mina aanna raaqera qidaqa.

## 6

### *Amuqusinana qumee nimira ufa.*

<sup>1</sup> Yisufa narí faiqi namufaqa faiqi anaasee faqa maaqi qimaseenoo qimanniminoo qinau. Innee qini ufa irimariasa Anutunara iriseeqa moo amaana saika fee aqoonausa dadaaqira fee mina auqarara sia aiqamausa nifusaa auqaaqa. Kukeeqasee reendeenasee auqaaqa. Aiqamausa nifusaa mi ainainna auqainafa minara faiqi anaasee aiqamausa qiqafaqera miqinnaranoo. Miqinana Anutufa siamma innaarunai mina akiaqara ani feefauru amaqaannoo. Qumee kai aiqama ainaina narí Anutuna afusaa kai dadaaqinanoo Anutufa doo narí qafaida mina akiaqara ani feefauru innaarunai quqammamaqaannoo.

<sup>2</sup> Qaaraike mariasa misa moo amiqira ainaina dadaaqinoo aqoonausee Anutunee nimiani qimaseenoo maqusa qambaana oonuree ukeena fuaqasee faiqi anaasee nifusaa dadaaqinaqa qiqafamaseeqa qimooqiaqera qimariasa doo nariqa miqoo taikaida miqidaqa. Innee sia misa naanna raaqa.

<sup>3</sup> Innee moo amiqira ainaina dadaaqammamianeera qumee kai maqandanai amia, faiqi nifusaa qafee foora.

<sup>4</sup> Qumee kai amimarinanoo inni nikoofa aiqama qumee ainaina qafee marifa mina akiaqara ani feefauru quqammamaqaannoo.

### *Innaaru qira ufa oosana iroo ufafa.*

*(Ruk 11:2-4)*

<sup>5</sup> Innee innaaru qidaqa misa qaaraike mariasa naanna sia raaqa. Misa amaana maqaki kikiqamafidaqa qimariasa maqusa qambaana kikiqama fidaqa qimariasa innaaru qidaqa. Faiqi anaasee aiqama qiqafaqee qidaqa miqidaqa. Qínee anoona ufa uqanna inni qimannimidaqa. Doo misa miqiana akiaqara doo faiqi nimooqirana kai maraídaqa. Miqoo taikaida miqidaqa.

<sup>6</sup> Innee innaaru qidaqa inneeqa maaqaki inneeqa kai keeqafinana kooqi ititaseenana qumee kai inneeqa nikoofa faiqi anaasee aiqama ani auqara uriqaramasee naaquqaani.

<sup>7</sup> Innee innaaru qidaqa aanaamuru mariasa naanna sia raaqa. Misa sia ufara randaidaqa ufa fannoo urirara kai urirara kai qidaqa. Misa Anutufa maasara amiqimasee irianifeera qimasaida miqidaqa.

<sup>8</sup> Misa naanna sia raaqa. Inni nikoofa sia innee irammiriaqoo kai iridanoo. Ooqai mifa irimarifa maridanoo. Minara fifau ufa urirara kai urirara kai qidaqa sia innaaru qiaqa.

<sup>9</sup> Innee innaaru qirara maaqi qimasee innaaru qiaqa.

Oo innaarunai qikoofa faiqi anaasee aiqama ani auqara uriqaramasee naaquqaani.

<sup>10</sup> Ani innaarunai ququsa maa maqanasaa kambiqaaani, innaarunai ani aiku asauku mariasa ani iriranamau kai andeeqasee fimariasa maridaqa maasa maa maqanasaa qaraasa misa naanna ramasee mi iriranamau kai fuqaana.

<sup>11</sup> Anee maqee faasaana maasa qimanasaa narana qimia.

<sup>12</sup> Akaqausa maasa manda ainaina qimimariana maasa minnisaanana miqikai inana anee faqa maasa manda ainaina akiaqara maraqa qisa.

<sup>13</sup> Sia anee maasa rarisameeqeenana afeeka nimaniraqoo quqaqisaa. Manda fasiqa asaukuki marunnana anee Anutufa uqeereeqee kaqinni amiqiraqoo quqaqisaa.

<sup>14</sup> Yisufa mi ufanara kaifaa maaqi qimasee qimanniminoo qinau. Innee inneeqa niqoonausa faqa aanaamuru faqa manda oosana akiaqara mininnisaifanoo innaarunai nikoofa inni manda oosana akiaqara faqa minnisaannoo.

<sup>15</sup> Innee inneeqa niqoonausa faqa aanaamuru faqa manda ainaina sia mininnisaifanoo inni nikoofa miqi kai inoo sia innindi faqa mara aqunnisaannoo.

*Aararee marina innaaru qira oosana mi ufafa.*

<sup>16</sup> Innee narana minnisee naararee marinaqa innaaru qidaqa qaaraikimariasa naana sia raaqa. Misa narana minnisee innaaru qiaqeera noori runusee doona akiiseega maridaqa faiqi anaasee sia narana naidammiafoo qiaqeera miqidaqa. Qinee anoona ufa uqanna inni qimannimidaga. Misa miqoo kai taikaida miqidaqa.

<sup>17-18</sup> Innee narana minnisee innaaru qiaqeera sia miqi iaqa. Innee nammari auqamasee qamunna amiqirana afisusee nikiaqa auqamaseega naanaidara qidana faiqi anaasee ani qafamasee maaqi qifara, maafa sia narana minnisaidanoo innaaru qidanoo miqi qiaqeera miqinnaranoo. Anutufa kai inni nikoofa aiqama qumeendaraa ainaina faqa qafee marifa mifa kai qafamasee mina akiaqara animmamaqaannoo.

*Oosana oosana qumiasana innaarunai kai afeedira ufa.*

*(Ruk 12:33-34)*

<sup>19</sup> Innee maa maqa maaqanasaa sia aiqama qumiasana oosana oosana mareeqee quqaseega afeediaqa. Taafi aruani, atauku aruani, qooqoosa aukuani, ummuara fasiqa aniree ummuara mareefaara.

<sup>20</sup> Innaarunai kai qumiasana oosana oosana afeedi iseenana miqoo marinanoo sia taafi aruanoo sia qooqoosa aukuanoo sia ummuara fasiqa mareefara amiqira qoo kaqi mariannoo.

<sup>21</sup> Inni irirafa inni nimuqusa inniqa qumiasana mariqoo kai miqoo kai irirafa mariannoo. Minara innaarunai kai qumiasana afeediaqeera qidaqa. Inni irirafa miqoo kai mariannoo.

*Afu afaqa qoomarafoora maridanoo.*

*(Ruk 11:34-36)*

<sup>22-23</sup> Faiqi nifiriki niqafeemarifa afaqa kaaqa qarafa maridanoo nari ainainara sia tatamaqifa kaqi paapaa idanoo nimimarifa. Faiqi moo fannoo oori akooqarafa nari ainaina kaaqa tatamaqimarifa maridanoo. Inni noori nifu miqifaqa innee asukunakinai mariafanoo.

*Nifaqasaaqaraa ainainara indee indee irana qaoo qira ufa.*

*(Ruk 16:13; 12:22-31)*

<sup>24</sup> Moodaa fasiqa fannoo sia amana qaara rakisiraqanda moodaa kari ainainamma nimaqaannoo. Mifa indaarugaa rakisiranara akooqaannoo moo rakisiranara aidianoo. Sia miqinoo mifa moo rakisiranasaa atooqaannoo moo rakisirana minnisaannoo. Innee miqi kai iqa mariafaqa sia amana Anutunara faqa maqasaa qumiasanara faqa moodaanaki sia amana ainainamma nimaqeennaranoo.

<sup>25</sup> Minara qinee qimannimidaqa. Innee sia inneeqa kaqi mariranara nimuqusiaqa. Inni narana neemariana faqa nammari neemariana faqa qamunna afisimarianara faqa sia minara yai fee maraanau yai fee maraanau qiaqa. Qamunna narana oorudupirafa marinara sia minara irinanoo umaara raani. Anee sia kuqimariananoo kaqi mariananara minara kai asasiaqa. Aneenna kaqi mariannanara mina akiaqara firaa ainaina maridanoo narana faqa nammari faqa qamunna faqa oorudupirafa maridanoo.

<sup>26</sup> Innee kaaqa qamunna naranara rimariasa qinee nindafaidaqa. Qufini sia narana ummaqidaqa sia aiqidaqa, sia afeedidaqa, kaqi narana naidaqa. Anutufa misa nimidanoo. Anutufa ufni ririmma kaqikaa ainaina dapi ainaina narana niminoo inani. Innee faiqi firaa ainaina mariafanoo uriqaraqa mariafanoo inni faqa nimiannoo.

<sup>27</sup> Amanee anee aneenna kuqirana amuqusiranannai aneenna marirana firarisamasee kisaqasaa marinnaree. Sia amana. Doo nanaree fifau naranara ummaara raidanoo fee.

<sup>28</sup> Nanaree fifau qamunnara yai fee maraanau yai fee maraanau qidanee. Innee nandaki kaasau taatuqee tamookeena qafamasee minara iriaqa sia ainainidaqa sia qamunna akunusee afisidaqa. Anutufa taatuqee qamunnara foora afisuamaqaidanoo.

<sup>29</sup> Ooqai Sooroomoonafa mifa amiqira qamunna qaeesa reemaru qamunnana afisimarufa, kooro ainaina faqa afisimarufa, sia mifa maa kaasau taatuqeen a fufeenaara imarindee sia mina qamunna uriqararafa marinau, mina qamunna ureeqarafa marinau, doo saa qamunnara ummaara raranara doo minnisaqa.

<sup>30</sup> Kaasau qusau ainaina Anutufa qamunnara foora nimidanoo. Sia mina kisaqasaa marira ainainau nimidanoofau. Maqee kasidanoo duna ateekeesee ida araseefandinna ainainafa maridanoo. Innee faiqi sia miqirausa. Innee kisaqasaa inni aukuana marifara. Anutufa qusau ainaina ririmma qamunna nimidanoo inni faiqi figaramasee nimiannoo. Innee faiqi qamunna ainara kai nimuqusimarianara Anutunara kaqikaqoo kai irirana Anutunasaa rusi mariafanoo, aaqaida miqimariafanoo.

<sup>31</sup> Innee sia nimukaina maaqiaqa nana qamunnee afisunauree nana naranee naanaree, nana nammari fee naanauree. Sia miqi qiaqa.



<sup>32</sup> Anutuna ufa sia irimariasa misa miqi qidaqa. Innee sia misa naanna raaqa. Innee inni innaarunai nikoona kai iriaqa. Mifa faasai inni narana inni qamunna ainainara faasamma iridanoo.

<sup>33</sup> Innee Anutuna ququsara faqa inni andeeqarafa Anutuna andeeqara fara foora marinaqa mi irirafa kai marinanoo niqinaaqa mara quqaseeqa fifanoo maasa narana aina faqa qamunna ainaina faqa Anutufa qimiannoo.

<sup>34</sup> Minara qinee inni qimannimidaqa maqeera kai iriaqa. Duna faasaana ainainara sia irinanoo ummaara raani. Duna nari kai nari aiqama kambiqaaninna ainainara rakisiannoo. Faasaambaasaana maqee ainainara kai iriqa fuaqa qidaqa.

## 7

*Niqoonausa fifau nimanira oosanara qaoo qira ufa.*

*(Ruk 6:37-38,41-42)*

<sup>1</sup> Yisufa qinau sia inneeqa niqoonausa aaqaranara maqee maqee misa niqiaqa. Anee miqinanoo Anutufa miqi kai inoo ani aaqaranara ani faqa aqianoo.

<sup>2</sup> Anee mi aikana kai raquru niminaqa Anutufa mi aikannai kai ani faqa raquru amiannoo. Anee nana aqira ufa faiqi anaasee akaqausa nimiranoo Anutufa mi ufanannai kai aninna rafaafafu amaqaannoo.

<sup>3</sup> Anee nanaree aneenna akaqaafasaa afuki saqari arai marifanee ufa qidanee. Mee ani afuki muduka saqari akatia marinara anee sia fee iridanee.

<sup>4</sup> Aneenna akaqaafasaa nana oosana maraidanee mai anirinaqa mee ani afuki saqari arai marina mara aquanee qidanee. Aneenna afuki firaa saqari akatia marinara siamma iri mariananoo.

<sup>5</sup> Qaaraiiki marianafa mandaiki marianafa. Aneenna naaree aneenna afukina mee firaa saqari akatia marina mara aquseenana andeeqaseenana afu maqaseenana miqoo quandaqinana aneenna akaqaafasaa afuki kaqikaa saqari arai marinnana mara aqinanoo andeeqara oosana mariannoo.

<sup>6</sup> Innee amiqira narana faini nimidee. Sia nimimariafanoo. Faini sia mi amiqira naranna aminnanara iriannoo amina namaseenoo kaqi quandaqinoo ani ukaqa amiannoo. Aneenna afaaqa auqira ainaina kuarauqa nimidee, sia nimi mariafanoo rakeekaaminoo doona ramasaannoo. Miqi kai masee innee furufarira fasiqa anaasee irimari ainaina sia nimiaqa. Sia irifaranoo. Faini kuara rakeekaa inoo doona ramasaani.

*Sarauqimaria ainainara innaaru qinanoo amiannoo mi ufaqa.*

*(Ruk 11:9-13)*

<sup>7</sup> Anee ainainara sarauqinana Anutunara innaaru qinanoo ani amiannoo. Ainainara sarauqinana Anutufinai randainanoo mifa uqafiqani. Ainainara sarauqinana Anutuna kooqi arinanoo mifa kooqi rafaqaamasee ani amiani.

<sup>8</sup> Aiqaama ireemariasa mareefaranoo. Randeemariasa paqurifaranoo. Kooqi arimarifa mifa kai kooqi paqurinoo maaqaki keeqafinoo irai ainaina maraannoo.

<sup>9-10</sup> Innee faiqi nikausa qimannimidaqa inneeqa nimaaku aniara naranara innaaru qifaqa ooni nimifaree. Sia ooni nimifaranoo inneeqa nimaaku noodaannara innaaru qifaqa amanee innee manda sakani nimifaree. Sia sakani nimifaranoo.

<sup>11</sup> Innee manda oosana maree mariasa mariafanoo inneeqa faiqi namu innaaru qifaqa amiqira ainaina kai nimimariafanoo. Innaarunai nikoofa amiqirafa uqanna maridanoo minara innaaru qimarinausa minara nari firaaqoo amiqirana amana kai amiqira ainaina kai nimiannoo.

<sup>12</sup> Anee nana oosanaree aididanoo fee faiqi anaasee ani amifaree, anee amiqira oosana kai qimia qee qimariananoo. Doo anee naaree miqira amiqira oosana kai faiqi anaasee maqee maqee kaqi nimia. Mooseena sandufa faqa tamummaqaraura ufa faqa misa ufa anoona mi ufanaki kooroo inoo maridanoo.

*Tiqeera kooqira faqa firaa kooqira faqa minara qirafa.*

*(Ruk 13:24)*

<sup>13</sup> Innee innaaruna aatata fiqa tiqeera kooqiki keeqafi fuaqa. Idaki fimaria kooqifa firaafa maridanoo. Mi aanafa faqa firaafa kai maridanoo. Nianasaa mafi aqirafa firaqoo maridanoo. Faiqi anaasee moomoosa maqee maqee miqoo fimariaqoo maridanoo.

<sup>14</sup> Kaqi marira kooqi tiqeeraikinoo maridanoo, mi aanafa faqa tiqeeraikinoo maridanoo, afeeka aatata maridanoo. Faiqi anaasee moodaa moodaa mi tiqeera kooqina paqurida fimariafa maridanoo. Innee miqoo kai fuaqa.

*Unna amaana ufa qimariasa oosana qira ufa.*

*(Ruk 6:43-44)*

<sup>15</sup> Innee unna qira amaana ufa qimannimira fasiqauqara eerairiaqa. Misa maaqeena faini reendenira faini apata afisirafa aniraannoo, minara rufiaaqa. Aundurai kaasau faini miqirafa maridanoo. Ukaqa nimiandoora minara rufiaaqa.

<sup>16</sup> Maaqimmasee misa oosana iriaqa. Naqimmasee saqari qafararee. Anee oonureenana qaqqamma kai qafaa. Moo saqari qafainanoo qaqqamma iranoo marinara amiqira fee qinnaranoo. Moo saqari fannoo amiqira amanee maridanoo qaqqamma siaifa, adusa maridanoo. Unna amaana ufa qimannimimaria fasiqausara miqi kai inoo saqari kikiqa usirafa maridanoo. Kamukamuna qaqqamma fannoo amuka faqaa sandasaa iranoo marinanee diqinnaree. Sia miqoo iranoo mariannoo. Faafisa qaqqamma fannoo reereeroondaanasaa iranoo marinanee tiqinnaree. Sia miqoo iranoo mariannoo.

<sup>17</sup> Amiqira saqari fannoo amiqira qaqqamma kai iraidanoo. Mina dinni manda saqari fannoo manda qaqqamma kai iraidanoo.

<sup>18</sup> Amiqira saqari fannoo sia amana manda qaqqamma iraannoo. Kafaa mina dinni manda saqari fannoo sia amana amiqirana iraannoo.

<sup>19</sup> Saqari moo fannoo manda qaqqamma adusa irifaqa ateeka idaraidaqa.

<sup>20</sup> Amaana ufa qimannimimaria fasiqausa saqariara foora mariannoo. Minara qinee inni qimannimida. Amaana ufa qimannimimaria fasiqausa naaqa oonuree misa marinna oosana nimirinna oosana qafaa. Qafamasee andeeqee mari fasiqanara amiqira amaana ufa qimari fee qiaqa. Mina dinni aaqee mari fasiqanara manda amaana ufa qimari fee qiaqa.

*Fifau Yisunara karaambaiee qimariana.*

*(Ruk 13:25-27)*

<sup>21</sup> Yisufa kafaa maaqi qimasee qimanniminau. Faiqi fifau misa nookiqari qiniara karaambaiee karaambaiee qimariasa sia innaaruna ququsaki fifaranoo. Qini innaarunai qikoona iriranamau fimariasa misa kai innaaruna ququsaki keeqeefaranoo.

<sup>22</sup> Innaarunai keeqeemaria aukuanafa kambiqaqinaqa moomoosa maaqi qimasee qimaqimifaranoo. Oo karaambaiee karaambaiee. Maasa maqasaa maridaqa aniara maasa ani amaana ufa qimannimiaafanausa maridaqa. Maasa fueenasana aruna ani auqu ramaasida innaaru qimasee mara aqunniseeunausa maridaqa. Maasa miqi mariafanausa maridaqa. Doo maasa ani auqu ramaseeqa moomoo firaa afeeka ainaina auqimariafanausa maridaqa, doo anee minara irisee maasa faqa innaaruna ququsaki mara quqaqisaa.

<sup>23</sup> Misa miqi qifaqa qinee maaqi qimasee misa nifusaa qimannimianausa. Qinee sia uqanna inniara irimariafanausa. Doo qini qifusaaqari fuaqa. Inni oosana eendaandirafa maridanoo. Doo fuaqa.

*Qaara maqara quandara ufa.*

*(Ruk 6:47-49)*

<sup>24</sup> Faiqi moo fannoo qini dookinaa ufa iriseenoo sanafaunaana anoona qinee qimaqau-namau kai andeeqasee fimarifa, mifa nana ainaina fooqaa fee maridanoo fee. Mifa amiqirafa irira fasiqa fooqaafa maridanoo. Narí maaqa atuna meemai ooniki mapukusee arusaifa maridanoo.

<sup>25</sup> Mi maqafa marifanoo aaku firaafa riri ifanoo nammari maaqa ameemaanai taatarunna mandi maree ooqufinoo ufai firaafa uqinoo sia mi maqana rapee inoo. Ooniki maaqa usakaqoonara sia rapeeinau. Faiqi moo fannoo qini ufa irimarifa mi maqana akoofara foora mariannoo.

<sup>26</sup> Faiqi moo fannoo maa ufana maa qinee qunnufana qini dookinaana iriseenoo minnisee marifa mifa nukudasaa maaqa usakeemari fasiqafara foora maridanoo.

<sup>27</sup> Mi maqafa marifanoo aaku firaafa riri ifanoo nammari aqinoo maaqa ameemaanai taatarunna mandinoo ooqufinoo ufai firaafa uqinoo maaqa arinoo rapeepaa inoo maqasaa pauta qifanoo maqa rakeemaseenoo aqufinoo. Qini ufa irisee minnisee reereeroondaana arakana afeena faiqi mariasa mi maqana akoofara foora marifaranoo.

*Yisufa nariara Anutufara foora qimannimi ufafa.*

<sup>28</sup> Yisufa mi ufausa qimaqoosa faiqi anaasee moomoosa irufanoo naaquqee marufaqa qiqau.

<sup>29</sup> Maa fasiqafa sia maasa uqannifiqee mari fasiqausara foora maridanoo. Maafa nariara Anutufara foora maridee qidanoo qimannimidanoo.

## 8

*Yisufa karoora arimaru fasiqana andeeqanau.*

*(Mak 1:40-45; Ruk 5:12-16)*

<sup>1</sup> Yisufa amuaqu namusaa faiqí anaasee ufa qimannimiseenoo qumuroofaqa faiqí anaasee moomoo anireeqa Yisuna faqa aanaaqiana rumberausa fimariqau.

<sup>2</sup> Fimarufanoo faiqí moo fannoo karoora arimarufa Yisuna oorinni ani mapamufufanoo Yisuna qimaminau, oo maasa rakisirafa ani afeeka amana maridanoo qinee minara iridaqa. Aneenna irirafa eedoo qimaseenana qini karoora rukaqisaa.

<sup>3</sup> Yisufa mi ufanara iriseenoo narí asauku minasaa rukumaseenoo asasammasee qinau. Eeoo doo qiananoo amana qiqa irirafa eedoo qidanoo rukammaisaanaura.

Miqí qimasoofanoo miqoo kai mina karoora taikanau.

<sup>4</sup> Mina karoora taikasoo fanoo Yisufa qimaminau. Simai sia uqanna moodaa fasiqa qimamia. Findifinana muna amaana maqasaa aanaiqikirana aneenna afaaqa karoora arimaruna uqafiqainanoo aiqumamasainana Mooseefa ufa qimaqoomau ainaina mara maree amaana maqaki qaindasaa suqarana tatufinana Anutuna amia. Faiqí anaasee qafamasee doo mina karoora taikeefoo qimasee sia aniara eerairiaqeera.

(Ooqai Mooseefa karoora narinausa sia maqusai aniaqee qimaqoofa. Andandakinai kai nuagee qimaqoofa. Faiqí moo fannoo narí karoora taikaseenoo amaana maqaki ani kikiqamafufanoo amaana maqasaa rakisirausa qafamasoofanoo doo maqusai fuannee qufanoo doo kaifaa maqusai finau. Kaqikaa ainaina amaana maqaki Anutunara dufi dufi qimasee nimiseenoo doo maqusai kaifaa finau.)

*Roomma maqannaa Saideena ainainira faiqí andeeqoo ufa.*

*(Ruk 7:1-10)*

<sup>5</sup> Yisufa miqooqari Kapeeranauma maqusai finau. Miqoo oonu marufanoo Roomma maqannaa sundia saideena moo fannoo Yisu finnai anireenoo dadaaqiranara iramirinau.

<sup>6</sup> Oo rakisirafa qini ainainira fasiqa maaqaki faiqaqee aurimarifaqa, minara ani qimamidaqa. Mifa aiku asauku pipisaaqa usuffanoo kuqiara foora inoo marifaqa. Aurirafa firaafa arimarifaqa, apuree marifaqa. Amanee anee qini ainainira fasiqa idaaqamaqisaa.

<sup>7</sup> Miqí qimasoofanoo Yisufa qinau. Amana qinee minni oonureeqa idaaqammianaura.

<sup>8</sup> Roomma maqannaa sundia saideena fannoo Yisuna findifinoo mina maaqai firanara iriseenoo qaoo qinau. Sia fua. Sia qini manda maaqaki anee keeqanneera. Qinee aanaamuru fasiqa ooreeqaraura maridaqa. Anee qini uriqararafa qini maaqaki keeqafinaqa qisauruanoora.

<sup>9</sup> Qini uriqarara sundiaqqa moomoosa mariafaqa qinee misa nimeemaanai maridaqa misa ufamau fidaqa. Qinee akaqa sundiaqqa rakisirausa maridaqa. Qinee ufa kai moora fuannee qimarunanoo mifa doo fidanoo. Moora ufannai kai qimamimarunanoo mi ainaina auqaidanoo. Anee Yisufa faqa maqasaa ainaina faqa aurirana oosana oosana ainaina faqa uriqararafa marianaqa qimamidaqa. Minara anee miqooqari kai maridana ufannai kai aurirafa taikaannee qinanoo qini ainainira fasiqa aurirafa taikaannoo.

<sup>10</sup> Yisufa mi ufana iriseenoo tautufanoo aaquqoofanoo faiqí anaasee mina faqa rumberausa fifusa qimanniminau. Qini ufa iriaqa. Maa Roomma maqannaa fasiqafa firaqoo qini saqarikidanoo qinee Isaraee maqannaasaki qeeqa maqannaasaki maqusa maqusa nidaqa sia moo maaqira amiqira fasiqa paquriqa, aanaamuru maridanoommi.

<sup>11</sup> Kaifaa minara qianauro qini ufa iriaqa. Suani oosainindari faqa amuqundari faqa nianaindari faiqí anaasee moomoo aanaamuru aniree innaaruna ququsaki keeqafi Abarahaamana faqa Isakeena faqa Yakooboona faqa ooqumarifi Anutuna qoomaqa sakasee neefaranoo.

<sup>12</sup> Maa Isaraee maqannaasa innee Abarahaamana aiku asauku marunasa kaqi innaarunai keeqaanauree qimariasa maqee sia keeqeefaranoo Anutufa inni nifaqeeqeenoo madaanai asukunaki aqunnisaannoo. Miqoo innee niranaqainaqa firaqoo faaqa quqasee nifai sandurifaranoo.

<sup>13</sup> Miqí qimaseenoo Yisufa faiqí anaasee qimanniminoo quandafinoo sundia saideena qimaminau. Doo aneenna maaqai fua. Aneenna irirana qinisaa rusisaannanara doo ani ainainira faiqí andeeqafinoo. Doo anirandee amaqa fua.

Miqí qimasoofanoo mi kamuqoo kai mi aurira fasiqafa moosaa mariufa doo findifinau.

*Yisufa faiqí anaasee moomoo andeeqannimaqoo ufa.*

*(Mak 1:29-34; Ruk 4:38-41)*

<sup>14</sup> Yisufa miqooqari Peetooroona maaqai finau. Oonuree qafoofanoo Peetooroona airaamaku anaasee aurimarinau. Afaaqa ididi marufanoo aurida faiqaqee marufanoo.

<sup>15</sup> Yisufa mina qafeenoo asauku qumaranau. Asauku qumaroofanoo aurirafa taikanau. Taikafufanoo mi anaaseefa aaqee findifinoo narana aina Yisuna aminau.

<sup>16</sup> Mi eenoonnai mi maqusaanaasa nári aurimarusa faqa fueenaikimarusa moomoosa faqa nifíqee Yisufinnai minni quqee mariqau. Minni quqasoofanoo Yisufa ufannai fueena niqíqoofaqa quqasee fiqau. Aurusa Yisufa misa aurirana faqa taikannisanau.

<sup>17</sup> Taikaseenoo ooqeenaa tamummaqara fasiqa moo auqu Eesaia mina ufa anoona kambiganau. Mifa ooqai Yisufa sia kambiqooqoo maaqi qimaseenoo Yisunara akara rinau.

Mifa maasa auriranara faqa maasa kudoosaaparana faqa mara aquannoo. Maasa aurira ummaara nári kai mina uqeera qumaraannoo.

Miqi qimasee akara rinau.

*Yisuna faqa fifandinausara maa ufana qinau.*  
(Ruk 9:57-62)

<sup>18</sup> Moo faasaana nammari afainni marufaqa faiqí anaasee aiqama suqu maree Yisuna qafaanee qimasee ani marida qafee mariqau. Yisufa faiqí anaasee moomoo tatusee animarufanoo nindafeenoo nári faiqi namu qimanniminau. Doo uqeeraaqa doo inni saimbaqa kanuqaki keeqafi nammariki fitaqa maree muqafainai nianai fida innisaimbaqa kai mariaqa.

<sup>19</sup> Misa findifi uqeeree marufanoo faiqí moo fannoo Mooseena sandufa irimarufa Yisufuqoo anireenoo qimaminoo qinau. Oo qini karaambaíqaa anee yatinaí fee maqusa maqusa finaqa qínee faqa ani faqa fuanaura, sia minnisaanaura.

<sup>20</sup> Miqi qufanoo Yisufa nári maaqi qimasee qimaminau. Anee qiniara amiqira maaqaki faiqee mari fee qídanee qini faqa firaree qídanee. Kaasau fainuqa oonaamarai faiqee mariasa maridaqa ufíniuqa aanaamuki faiqeemariasa maridaqa. Qínee faiqí nimaaku yai fee qeega qíkíaqaa rumasee fee faiqaanauree sia faiqara qoo marisa maridaqa. Doo qini faqa finnaree.

<sup>21</sup> Miqi qimasoofanoo Yisuna faiqí namuqíqari moo fannoo anireenoo qinau. Qínee ani faqa fuanaura kaqíkíaa qoo mariseeqa qini qíkoofa kuqirarammi marifaqa. Mifa kuqufínaqa akundamasee ani faqa fuanaura. Amanee qínee miqianauree.

<sup>22</sup> Yisufa mina ufa iriseenoo maaqi qimasee qimaminau. Maqee uqanna qini faqa ania. Naaruara kuqiranaki fifandinausa misa kai nári niqoonnana akundeefaranoo.

*Yisufa ufai faqa nammari faqa qaoo qufanoo taikanau.*  
(Mak 4:35-41; Ruk 8:22-25)

<sup>23-24</sup> Yisufa miqi qimaseenoo kanuqaki akaramafufaqa mina faiqí namu mina aanaaqiana akaraqau. Akaramafufaqa kanuqaki nammari amuqumau fimarufanoo Yisufa minaki afaqa umooqukufanoo faifufanoo nammari qumabaanai onuroofanoo ufai firaafa uqínoo nammari amakaurinoo kanuqa aundurái keeganau. Kanuqa teeqi taqufaqa Yisuna faiqí namu mina qafamasee kanuqa namufaqa nammariki ukuqnaana qimasee kaaqa rufíaqau. Yisufa sia minara irinau mana mana faiqaqee marinau.

<sup>25</sup> Mina faiqínamu rufiamaree Yisufinnai oonuree afauramasee faaqa ridaqa qimamiqau. Oo maasa karaambaíqaa maasa nammariki ukuqnaidaqa kuqirarammidaqa. Anee maasa qumaree qumbaqinnisaa.

<sup>26</sup> Yisufa misa ufa iriseenoo qimanniminau. Oo kaaqa innee fifau rufíee mariasa. Sia qínisaa irirana rusimariasa mariafanoo. Miqi qimaseenoo findifufanoo ufai faqa nammariara faqa qaoo qufanoo nammari faqa ufai faqa kasoomafinoo dai qimafinau.

<sup>27</sup> Miqi qufaqa ufai faqa nammari faqa firaqoo uqíuufa kasoomafufaqa mina faiqínamu naaquqoofaqa qíqau. Maa fasiqafa naqira fee maridanoo fee. Ufai faqa nammari faqa mina ufa irisee eedoo qidaqa.

*Faiqí aunduraindaraa afaannauqa niqíqoofaqa kuarauqa naundurái keeqaqau.*  
(Mak 5:1-20; Ruk 8:26-39)

<sup>28</sup> Miqooqari nammari dinnafainai nianai Kadareenee maqa maaqa munu kanuqa fannoo raquraminau. Maqasaa aqufufaqa mi maqusanaindari faiqí qaaraqanda aníqau. Faafasaaqa fueena miqanda naundurái maruqanda, faiqí madíkee marunnai maruqanda, faiqí anaasee aiqama miqandara rufíee maruqanda mariqau. Faiqí narimaruqanda mariqau. Faiqí anaasee miqanda maruqoo sia fimarusa, kaaqa miqandara rufíee mariqau.

<sup>29</sup> Miqanda Yisufunnai aniroofanoo naundurakiqari afaannauqa fannoo maaqi qimasee faaqa rumasee Yisuna qimamiqau. Anee Anutuna amaaku marianafa anee nanaree anidane anee nanaree maasa soodaaidanee anee nanaree kaqíqoo kasaaqai anireenane maasa idaki aquqiseennaree.

<sup>30-31</sup> Kaqikaaqoo nianai akoosaqa kuarauqa eemani naida moomoosa misaqa naidaqa mariqau. Afaannaqa faiqi naundurakiqari kuarauqara Yisuna qimamiqau. Anee maasa diqiqainaqa amanee kuarauqaki keeqaanauree.

<sup>32</sup> Miqi qufanoo Yisufa qinoo. Eeoo amana, doo innee misaki keeqafuqa. Yisufa niqiqoona iriseeqa aiqamausa mi fasiqaganda naunduraindari rafudamakufaqa doo kuarauqaki keeqafiqau. Keeqafuqa kuarauqaindi munari minari ufaqa ameemai sandee ooqu fiqa nammari farumaki bururu qufaqa aqufufaqa aiqama kuqu taikaqau.

<sup>33</sup> Kuarasaa rakisimaru fasiqausa mina qafamaseeqa naaquqoofaqa quqasee sandamaqaraasiqa maqusai kaimbiqau. Maqusai anireeqa Yisunara faqa afaanna naundurai keeqemaru faiqi qandara faqa kuarauqara faqa faiqi anaasee aiqama qimannimiqau.

<sup>34</sup> Misa iriseeqa mi maqusaanaasa faiqi anaasee aiqama tatufaqa nammarafainni Yisufuqoo ooqureeqa Yisuna qafamaseeqa qiqa. Doo maasa maqa maaqaki sia ania. Doo see moosaa fua. Maasa aniara rufiadaqa.

## 9

*Yisufa aiku asauku pipisaqa usirana andeeqa aisanau.*

*(Mak 2:1-12; Ruk 5:17-26)*

<sup>1</sup> Miqi qufanoo Yisufa nari faiqi namufaqa sipaki kafa keeqafufanoo nammariki fifufanoo nari maqusai Kapeeranauma nammari amuaqumau oonuranau.

<sup>2</sup> Oonuroofaqa faiqi mi maqusanaindari moo auruna aiku asauku pipisaqa usufufanoo maruna aindusu mareeqa Yisufuqoo maree aniqau. Misa irirafa Yisunaki marunara Yisufa mina qafamaseenoo quandafinoo aurira faiqi qimaminau. Sia rufiaqa rufiaqa ia. Afaqa quqaa. Doo qinee ani mandainaina numoo minniseeqa.

<sup>3</sup> Mooseena sandufa irimarusa miqoo marusa mi ufana iriseeqa maaqi qimasee nari qimami nari qimami qiqa. Maafa nariara Anutusa maridee qidanoo. Akasaa. Maasa faiqi firaasa faiqi miqi qiasa kuqa nari marunasa maridaqa.

<sup>4</sup> Yisufa misa ufa iriseenoo quandafinoo maaqi qimasee qimannimau. Naqi fee qifaqee mi manda irirana inneeqa nitikuraki maraqa nidee.

<sup>5</sup> Innee qiniara maa fasiqafa sia numoo taikarana amana fee qidee. Qinee moo firaa afeekainaina inni nifusaa iananoo anoona kambiqaqainaqa qafamaseeqa qiniara kuqaa faiqi numoo taikarana amanammifoo qifaranoo sia kambiqaqainaqa unnammifoo qiqa.

<sup>6</sup> Anutufa kuqaa uqanna numoo taikarana qini qiminoo. Miqi qimaseenoo quandafinoo pipisaqa qusirana qimaminoo qinuu. Aneenna qindasaqaqari findifinana aneenna qaari qamunna raqandaammamareenana doo akumaree amaaqa fua.

<sup>7</sup> Miqi qufanoo mi aurira fasiqafa findimaqee nari amaaqai doo finau.

<sup>8</sup> Faiqi anaasee misa mina qafamaseeqa niminaandi raqeeqa nisausi kambiqaqainaqa nimudaani qumooqumambufuqa miqoo Anutufa nari afeeka Yisuna amunara minara oonumafi irisee amooqidaqa asasiqau.

*Mataioona aaroofanoo Yisuna faqa finau.*

*(Mak 2:13-17; Ruk 5:27-32)*

<sup>9</sup> Yisufa miqooqari moosaa fimarufanoo faiqi moo fannoo mina auqu Mataioo nari oopisaki marufanoo Yisufa qafanau. Mi oopisana takisa aqimaru oopisanaki marinuu. Takisa maree maru fasiqausa ummuari marusa misa moomoo maraseeqa akaqana nariara quqasee dinni ati kaamanna amimariqau. Minara faiqi anaasee kaaqa nikoqeeqee marinuu. Mataioofa mi munnimma ainainna maree marufa marinuu. Yisufa Mataioona qafeenoo aaramaseenoo qinuu. Doo qini faqa ania. Mataioofa Yisuna ufa iriseenoo findimeeqeenoo mina faqa finau.

<sup>10</sup> Yisufa marikinoo Mataioona maaqai mina faqa narana narara finau. Yisufa nari faiqi namufaqa mina maaqaki ooqumarifi narana neemarufaqa faiqi maqusa maqusa munnimma takisa maraqanusa faqa oosana oosana mandainaina maraqanusauqa faqa Mataioona faqa ani ooqumarifufaqa narana naqau.

<sup>11</sup> Ooqumarifufaqa narana nee marufanoo Farisai amaana ufa qimarusauqa anirama qafamasee Yisuna faiqi namu qumee naaramasee qimannimiqau. Naqi fee qifanoo fee inni rakisirafa manda fasiqaqa faqa ummuariqanusa faqa naidanoo fee.

<sup>12</sup> Yisufa misa ufa iriseenoo quandafinoo maaqi qimaseenoo nari qimannimau. Sia amiqirausa tutaqa finnai fidaqa aurimariasaa kai tutaqa finnai fidaqa. Maa namusa auruasara foora maridaqa qinee tutaqausara foora maridaqa.

<sup>13</sup> Innee tamumqara fasiqa akara anoonara oonu randasee qafaqa. Mifa maaqi qimasee akara rinuu. Qinee Anutusa sia tatufira aandau aina fee oosana oosana ainaina fee qimiranara dididanoo, faiqi anaasee nariara nariara nimuqusifaqa nifauqee mariana

minauqara qini dididano, Anutufa miqi qimaqoofaqa qinee Yisusa mimau fidaqa maaqi qidaqa. Sia qinee andeeqee mariasa naarararee qimasee qumu maridaqa innee manda fasiqa anaasee fee qimasee nifaqee mariasa misa Anutufinnai ubeekaaqeeera naarararee qimasee qumuafanausa maridaqa.

*Naarara maridaqa innaaruqira oosanara irammiriqau.*

*(Mak 2:18-22; Ruk 5:33-39)*

<sup>14-15</sup> Mi kamusaqa Yoohaneefa nammari nimimaruna faiqinamu Yisufinnai anireeqa irammiriqa qiqau. Maasa Yoohaneefa nammari nimimaruna faiqi namufaqa Farisai amaana ufa irimariasa misa faiqi namufaqa nari narana minniseeqa naararee marifaqa Anutunara innaaru qidaqa. Ani faiqi namu naqi fee ifaqee sia miqidee kaqi narana naidee qufanoo Yisufa iriseenoo qimanniminu. Amundara fasiqa faqa aqoondi namufaqa maqusai ani marinaqa naqimasee naararee marinee kaqi marifaree, sia miqifaranoo اساسمasee narana suqasee neefaranoo. Minara qini faiqi namu qini faqa amundara fasiqara fooqaasa maridaqa اساسمasee qini faqa naidaqa maridaqa. Kaqikaa qoo mi anaaseena afaaqi qini rumbamaree munu darusaifaqa mikari kuqaa nimuqusa mandaikinaqa naararee marinaqa innaaru qifaranoo. Yisufa Yoohaneena faiqi namu kaqi qimannimidanoo qinau.

<sup>16</sup> Ooqeenaa qamunna anaqinoo marina fuka qamunna ati qumaree sia nauraa qamunnasaa akunirafa maridanoo. Fuka qamunna ati fannoo nauraa qamunna doo firaagoo anaqiannoo.

(Yisufa maqasaa maru aukuaana misa uainna nammari tatisee aandau apatannai auqira taquki adiasee kisaagasaa maaqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammari marinau. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

<sup>17</sup> Yafee faiqi moo fannoo nauraa tunda taqu maraseenoo fee fuka nammari adiaannoo fee. Sia miqiannoo. Ruqia finanoo aiqama nammari qumiqaraandora. Fuka taqu andasee fuka nammari minaki adiasainanoo mina amana mariannoo.

(Yisufa nari fuka ufa fuka taquara faqa qamunnara faqa mina kikiqa usinau. Farisai amaana ufa faqa Yoohaneena amaana ufa faqa amana maridanoo ooreeqanoo maridanoo. Qini fuka ufa uriqararafa maridanoo. Misaindi sia amana qinindi fabaqa irafa mariannoo.)

*Yuda maqanna uriqararana aramuna andeeqaisanau. Kisaaqandaika imaru anaasee Yisuna qamunna ati auqanau.*

*(Mak 5:21-43; Ruk 8:40-56)*

<sup>18</sup> Yisufa Yoohaneena faiqi namu ufa qimannimi marufanoo amaana maqasaa rakisirafa moo fannoo Yisufinnai anireenoo oorindari mapamufufanoo Yisuna qimaminu. Doo qini qiraamuna maqee uqanna doo kuqinoo. Anee anireenana aneenna asauku minasaa mundusainanoo mifa findifuani.

<sup>19</sup> Miqi qufanoo Yisufa findifinoo nari faiqi namufaqa mina faqa finau.

<sup>20</sup> Fimarufanoo anaasee moo fannoo aanaaqianaindari oonureenoo mina qamunna ati ireeda auqanau. Mi anaaseefa kisaaqandaikufa qisaukuqara taikasee qikunni ooqu qaaraqanda aukuaana marasoofa marinau.

<sup>21</sup> Mi anaaseefa nari kai qimminirau. Qinee oonuree mina qamunna atikai umee auqamasanaanoo qini fidika taikaannoo. Miqi qimasoofa maridanoo oonuree mina aanaaqianaindari faiqi anaaseekiaqa qumee oonuree mina qamunna ati kai ireeda auqaanau.

<sup>22</sup> Mina qamunna auqamasoofanoo Yisufa quandafinoo qafamaseenoo qinau. Qini qiraamuna sia rufia afaqa quqasee maria anee aneenna irirana qinisaa rusiranannai kai ani aurirafa doo taikkeenoo, mifa kai. Miqi qimasoofanoo miqoo kai mi anaaseena aurirafa taikanau.

<sup>23</sup> Taikafufanoo Yisufa miqooqari fifufanoo amaana maqasaa rakisirana maaqa marunnai mina araamuna kuqinoo maru maqanaki oonureenoo faiqi anaasee moomoosa tutuqidaqa ikifaafau qidaqa ufireena aina fuaqaidaqa iki raqeamarufanoo Yisufa oonu nindafanau.

<sup>24</sup> Onurama nindafeenoo qimanniminu. Doo raudamaki fuaqa, aiqama fifainiaqa maa manaaqafa sia kuqinoofau faiqaqee idanoo. Miqi qimaseenoo quandara ufa qimannimisoofaqa misa quandafiqqa naanaidara uteeti qidaqa qiqau. Unna qia. Doo kuqinoo maridanoo.

<sup>25</sup> Yisufa misa aiqama niqimaseenoo mina maaqaki keeqafinoo mi manaaqana asauku qumarooofanoo doo findifinuu.

<sup>26</sup> Miqooqari aiqama maqusa maqusa fiqiu iqa marusa Yisufa mi manaqana findifumasoo ufafa aiqamai daraanufaqa iriqau.

*Nifu qimbaraqanda andeeqannisanau.*

<sup>27</sup> Mi manaqana findifufanoo Yisufa moosaa fimarufanoo faiqi qaraqanda nifu dimbaraqanda aanaaqiana fidaqa faaqariqa fida qiqau. Oo Dafidina ati anee maaqanda qiqafainanoo ani amuqusinana maaqanda dadaaqia.

<sup>28</sup> Yisufa maaqaki keeqafufaqa mi fasiqaqanda mina aanaaqiana keeqaqau. Keeqafufanoo Yisufa irammirinoo qinau. Inneeqara qini afeekara nanee fee qidee. Inniqara nifu andeeqaranara qiniara amaneefee fee qimasee anidee, sia amanaikiannoo fee qidee qufaqa miqanda qiqau. Eeoo maaqanda aniara amanafee qidaqa.

<sup>29</sup> Yisufa mi ufana iriseenoo qimanniminau. Inneeqara qiniara amanafee qianara miqi qianara sia nipatiani andeeqannisaanau.

<sup>30</sup> Miqi qufanoo mikari kai miqanda nifu andeeqannisanau. Miqanda nifu maqsoofanoo Yisufa maaqi qimasee qimanniminau. Nimambaina qimaseenoo qimanniminau. Doo inneeqara sia uqanna faiqi anaasee akaqausa qimannimiaqa. Maa ufana kukeeqammasaaqa.

<sup>31</sup> Miqanda mi ufana iriseeqa minufa rukiaasee maqusai oonureeqara faiqi anaasee aiqama atinai qimannimiqaniqau.

*Ufa ititarana ufa rakeemma aisanau.*

<sup>32</sup> Miqanda fufanoo mi maqusanaasa moo fasiqa afigee aniqau. Ufa sia qimaruna aanna apeeunirana afaanna faqa mina aundurai maruna afigee aniqau.

<sup>33</sup> Minisoofanoo Yisufa mina aundurakinaa afaanna aqiqamasoofanoo afaanna fannoo raudamakufanoo mi fasiqafa ufa andeeqasee qinau. Miqiufaqa faiqi anaasee mina qafamasee nimudaani qumooqummafinoo nifaaqa sia qumaroofaqa mina qafeeqa qiqau. Isaraee maqannaa sia ooqai maa ainainafa maruna, maqee kai.

<sup>34</sup> Miqi qufaqa Farisai amaana ufa irimarusa minara kaukaata qimaseeqa qiqau. Yisufa afaannauqa firaanannai faiqi naundurakinaa afaannauqa niqiqaidanoo.

*Maqusa maqusa nidanoo Anutuna ququsara qimanniminau.*

<sup>35</sup> Miqooqari Yisufa maqusa maqusa kaqikaa maqusa firaa maqusa amaana ufa innaaruna ququsaki fimaria ufana qimanniminooninau. Kaqikaa aurirana faqa firaa aurirana faqa andeeqannisanooninau.

<sup>36</sup> Yisufa faiqi anaasee nindafamaseenoo firaqoo amuqusufanoo qinau. Boo faiqi anaasee sia rakisirafa marisa, kaqi fifau tia maridaqa. Sipsipauqa fooqaasa rakisirana siaisa maa fasiqa anaaseesa maridaqa. Kaasau fainiara foora marida, aukuaana aukuaana sia amiqimmasee marida, mi manda kaasau faininara rufiaqa rufiaqa kaimmidaqa, aukuaana aukuaana miqi kaimmida marida, dadaaqirana siaisa rakisirana siaisa maridaqa.

<sup>37</sup> Yisufa mi ufana qimaseenoo quandafinoo maaqi qimaseenoo ufa qinau. Doo afuqakinaa narana tatafinoo rairainoo maridanoo. Dadaaqi aiqira fasiqa sia amanaiki mariafaqa.

<sup>38</sup> Minara innee suana akoofinnai innaaru qiaqa. Innaaru qifanoo Anutufa aiqifandinaua niminaqa dadaaqiqa suana aiquaqeeera. Dadaaqiqa innaarunai ufa qimannimifaqa innaaruna ququsaki fuaqeeera suana kikiqa usuqoofanoo maridanoo.

## 10

*Qisaukuqara taikasee qiku qaraqanda marasee naaramammareembinau.  
(Mak 3:13-19; Ruk 6:12-16)*

<sup>1</sup> Yisufa nari faiqinamu qisaukuqara taikasee qikunni ooqu qaraqanda naaramma quqaseenoo Anutuna afeeka nimufaqa faiqi anaasee naunduraki maru afaannausa faqa misa aurirana oosana oosana faqa teeroouqee marusa faqa aiqama aiqaraanifee qimasee afeeka niminau.

<sup>2</sup> Mina faiqi namu qisaukuqara taikasee qikunni qaraqanda ooqu marasee misa nuqu maaqimmasee mariqau. Indaaru Simoona mina auqu moo Peetooroofa faqa mina akaqa Andurufa faqa moo fasiqa Yameesafa faqa mina akaqa Yohaneefa faqa miqanda nikoofa Seebeedifa marinau.

<sup>3-4</sup> Moo fasiqa Firipifa faqa moo fasiqa Paatooroomaiufa faqa, moo fasiqa Toomasifa faqa moo fasiqa Mataioofa faqa mifa takisa maree marufa faqa moo fasiqa Yameesana amarafa mifa Arifaiusana amaaku faqa moo fasiqa Tadiusafa faqa, moo fasiqa Simoonafa

sia indaaruaqaa Simoonafa mina amarafa (mifa nári Isaraee maqanna nári kaamanaiki-aqera qimaru fasiqafa) mifa faqa moo fasiqa Yudasifa faqa, mifa Keerioota maqusain-daraafa mifa kai Yisunara qumee queeqaaninafa maridanoo.

*Yisufa niqiqoofaqa maqusa maqusa qimannimiqa fiqau.*  
(Mak 6:7-13; Ruk 9:1-6)

<sup>5</sup> Maa namusa qisaukuqara taikasee qikunni oogu qaaraqanda marasee Yisufa Isaraee maqa maaqaki minakina niqigeenoo qimanniminau. Anaamuru maqusai sia fuaqa. Samaria maqusai faqa sia fuaqa.

<sup>6</sup> Isaraee maqannaaki kai fuaqa. Misa sipsipara foora fifau fafafu qiqanuusa misaki kai fuaqa.

<sup>7</sup> Innee fidaqa maaqi qimasee qimannimiqa. Innaarunai ququsa fannoo adeediranoo maridanoo.

<sup>8</sup> Miqi qimasee qimannimiseeqa misa aurirana taikannisaaga misa kuqiraua findifumannisaaga karoora faqaasa rukannisaaga afaanna naunduraki marisa afaqannisaaga. Sia innee feefaurummasee maraasa. Kaqi maraasa. Doo miqi kai iqa kaqi nimiaqa.

<sup>9</sup> Munnimma sia aakauqaki rua. Kaqi fua.

<sup>10</sup> Sia uqa tafu maree fua. Sia qaara siuta maraaga. Sia niku aanaamu maraaga. Sia saunu maraaga. Ainainira faiqiuqa ainainidaqa minakinaa narana marasee naidaqa. Minara innee ainaini mariafanoo minakinaana naaqa. Sia narana ainaina maree innee faqa fuaqa. Kaqi samu fuaqa.

<sup>11</sup> Innee moo maqusai oonureeqa irammiriaqa yafasiqa fee amana maridanoo maasa mina faqa marianauree qiaqa. Misa qimannimifaqa mi maqusanaki marinna kamuqoo mi fasiqana faqa kai mariaqa.

<sup>12</sup> Mi fasiqana maaqaki keeqafinana qimamia. Anutuna amiqi amiqira asooarafa inni faqa mariani.

<sup>13</sup> Mi maqanakinaasa amiqi amiqifana ani ufa sainanoo misa faqa mariani. Sia amiqi amiqifana aneenna afaaqooqa qira ufa oonurandee maree ania.

<sup>14</sup> Yamaqusanai fee yamaqannaaki fee sia inni ufa irisee sia inni amiqi amiqifaqa innee mi maqusanakiqari raudamaki fiqa kookooma afaqa qumaree ninaamarasee fuaqa.

<sup>15</sup> Qinee mi maqusanaasara anoona ufa qimannimidaqa. Numoo aukuaana aninaqa inni ufa sia irifandinna maqusanaasa Anutufa naridanoo sia nifauaanoo firaqoo naruannoo. Soodooma maqusa faqa Koomoora maqusa faqa misa naridanoo kaqikaqoo nifauaanoo narirafa ooreeqanoo mariannoo.

*Yisuna ufasaara narirana faqa rumarana faqa kambiqaaani fee ufa.*  
(Mak 13:9-13; Ruk 12:12-17)

<sup>16</sup> Iriaqa, qinee inni niqigaanaqa innee sipsipara foora kaasau faini qambaana inni niqiqaidaqa. Faiqi ooda mariafanoo faiqi moomoosa inni narusee naaqaammidammia. Minara innee sakani maasgo aanna reeqa reendeenamasee nuaqa. Nakipurunara foora kaqi muquriga marida, reendeenamida mariaqa.

<sup>17</sup> Innee qini ufa maraqa nidaqa faiqira rufiaaga. Misa qini ufasaara innikinaana akaqausa mara maree Kansoora marinnannai munu quqasee inniara manda fasiqa fee qimaseenoo kootamannimaqeefera. Akaqausa amaana maqaki inniara Anutuna ufa rukiee mariafaqee qimasee sandasamu moomoo kari inni nifaaga ateekeefaranoo.

<sup>18</sup> Misa inni akaqausa kiapafinnai maree fifaranoo, mandaikammida ufa rukiee marifaqee unna qimasee nifiqee kiapafinnai fifaranoo, karaambaiqa marinnai kootara inni maree fifaranoo. Qini duqusaara miqifaranoo. Misa oosana oosana mandainaina qini ufa taikaanifeera miqimma nimaqeeferanoo. Anutufa qumee misa faqa aanaamuru mariafa qiniara iriaqera miqimannimaqaannoo.

<sup>19</sup> Misa inni rumbamaree nári mariannai nifiqee fifaqa naqi fee qianau naqi fee qianau sia qiaqa. Mikari kai qini qikoona maraquina fannoo qimannimina ufana mi ufana kai qimannimiqa.

<sup>20</sup> Nana ufa fee innee miqoo qifaree sia innindi inni nikoona maraquina fannoo innikiqari ufa qiannoo.

<sup>21</sup> Misa inniara qinisaa atooaranara fidiqaammifaranoo. Nári nikaqaafasauqa kuquaqera narí uqeeqee narí uqeeqee ifaranoo. Nári qisakoosa faqa narí uqeeqee narí uqeeqee ifaranoo. Faiqiuqaindi quandasee nári ninausa nikausa kuquaqera uqeeqeeferanoo.

<sup>22</sup> Qini duquara aiqamausa inni fidiqaama nimaqaannoo. Yafa yafee kaqi maraqa fifi iqa taikara aukuaana paqurinausa, qinee mikari misa qumara asumu mariranaki quqaanaura.



<sup>23</sup> Misa inni moo maqusaki narifaqa innnee moo maqusai sandeeqa qiniara miqoo qimannimiaqa. Qinee anoona ufa qimannimidaqa. Innee Isaraee maqusa maqusa aiqama qiniara qimannimimarifaqa sia aiqama qimannimi taikainnaqoo qinee faiqi nimaaku kaifaa innaarunaindari qumuanaura.

<sup>24</sup> Faiqi moo fannoo sia nari uqannifiqemaria fasiqana amana maridanoo sia mina uriqararafa maridanoo ureeqarafa maridanoo. Ainainira fasiqa faqa sia mina rakisirana uriqaranoo maridanoo ureeqanoo maridanoo.

<sup>25</sup> Faiqi qinee uriqararawsa ufa qimannimi marunawsa daruseeqa miqi kaimmiqa qini faiqi namu qini ureeqarawsa inni narifaranoo. Faiqi misa rakisirana arusee mina faiqi namufaqa miqi kai iqa narifara. Misa nikoonara afaannee qimasee faiqi namuara faqa miqi kai iqa afaannee qifaranoo. Misa mi manda ainainna oosana oosana qini qimifara, miqi kai iqa inni faqa nimifaranoo.

*Sia nifaaqa arimariasara rufiaaqee ufafa.  
(Ruk 12:2-7)*

<sup>26</sup> Minara sia misara rufiaqa. Aiqama ainaina maqee rafaqaqafinoo marifa kasooqaqee Anutufa innaarunai aiqama kooroo iannoo. Aiqama kukeeqara ainaina faqa kasooqaqee Anutufa aiqamausa nifusaa kooroo iannoo. Minara sia maqee faiqi anaasee inniara mandufa qifandinnanara rufiaqa.

<sup>27</sup> Qinee asukunai kukeeqafi qimannimunnana mi ufana faasaana paasoosamasee qimannimiaqa. Nupinupi qimasee qimannimunnana findi fiqa mi ufana fifi qimasee firaqoo qimannimiaqa. Sia faiqira rufiaqa.

<sup>28</sup> Faiqi nipata kuqa narifandinausa sia misara rufiaqa. Misa inni naunduraindaraa nimana sia amana kuqa narifaranoo. Moo fannoo Anutufa inni nipata faqa nimana faqa amana idaki kuqa narirana amanaiki marifa minara kai rufiaqa. Faiqi nipata kai narifandinnanara sia rufiaqa.

<sup>29</sup> Manda ufina ririmma moomoo maridanoo. Kaqikaa ainaina fifau ainaina maridanoo. Mina feefauru sia maridanoo. Mi kaqikaa ufinifa sia fifaufau maqasaa aqufidanoofau, innaarunai nikoofa irimarifanoo maqasaa aqufidanoo.

<sup>30</sup> Innee sia fifau rufiaqa. Inni nikiqaqa asaasi ririmma Anutufa nisaana rumaqaisa mariafanoo.

<sup>31</sup> Minara sia rufiaqa. Inni feefauru uriqaranoo maridanoo. Dapi ufina feefauru sia maridanoo.

*Yisunara faiqi nifusaa kooroo imariasara qinau.  
(Ruk 12:8-9)*

<sup>32</sup> Yafa yafee qini Yisusara faiqi nifusaa sia rufieenoo qinee Yisunaindi fee qinafa qinee minara innaarunnai qikoona afusaa qinindi fee qianaaura.

<sup>33</sup> Yafa yafee qiniara faiqi anaasee nifusaa asaurusee sia qinee Yisunaindi fee qimasee kukeeqainafa qinee minara faqa innaarunnai qikoona afusaa kukeeqamma amaqaanaura.

*Asooarafa sia mariannoo aanoo irafa mariannoo.  
(Ruk 12:51-53; 14:26-27)*

<sup>34</sup> Innee qiniara tinoorirana asooarana mara maree maasa maqasaa fasiqa anaasee qimiannoo fee qida fee. Qinee sia tinoorirana asooararau qumidau duru feefara qumidaqa.

<sup>35</sup> Faiqi namu nari nikoonara ameesa uqiranara qumidaqa. Fuka aanaaseeuqa nari ninoonara ameesa uqiranara qumidaqa. Fuka anaaseeuqa nari ninaakuquara nimeesa uqiranara qumidaqa.

<sup>36</sup> Nari faqa moodaa maqaki mariasa nari mi fasiqana firaa namuqaa marifaranoo.

<sup>37</sup> Yafa yafee mina anoona akoonara firaqoo aididanoo fee qiniara ooreeqara fee qidanoo fee, mifa sia qini qimanasaa, sia amana qini faqa fifaranoo. Yafa yafee mina amaaku faqa araamuna faqa firaqoo aididanoo fee qiniara ooreeqara fee, mifa faqa sia qini qimanasaa sia amana qini faqa fifaranoo.

<sup>38</sup> Kasooqaqee misa aunirira saqarisaa qini darifaranoo. Yafee qini ufasaara qini dariranaki paasoosamandee fuaninafa, mifa qini qimanasaa mariannoo, qini faqa fuannoo. Faiqi anaasee moo fannoo qinee kuquannanaki rufiasee sia finafa, mifa sia qini qimanasaa mariannoo sia qini faqa fuannoo.

<sup>39</sup> Faiqi anaasee moo fannoo nari kaqi mariranara tatamaqamandeenoo rakisi qumarainafa mi marifafa kai kukupamaki aqufuannoo. Faiqi anaasee moo fannoo qiniara iriseenoo nari maqee marirana aquaninafa nari maqee marirana maraannoo.

*Niqoonausara nimuqusimariana akiaqara Anutufa quqannimaqaannoo.  
(Mak 9:41)*

<sup>40</sup> Faiqi anaasee yafee moo fannoo inni dadaaqinafa mifa qini faqa qiçoondikidanoo. Qini dadaaqinafa qini qikoona qini diqiqoona mina faqa aqçoondikidanoo.

<sup>41</sup> Faiqi anaasee yafee moo amaana ufa nimimarinna fasiqanara oo Anutuna ufa qimannimimari fee qimaseenoo dadaaqinafa Anutufa amaana ufa nimimarina akiaqara innaarunai feefauru amiannoo. Faiqi anaasee yafee moo fannoo andeeqara fasiqara oo andeeqara fasiqa mari fee qimasee dadaaqinafa Anutufa minara andeeqara fasiqa mina feefauru innaarunai amaqaannoo.

<sup>42</sup> Faiqi anaasee yafee moo fannoo maa faiqi anaqisa asooara nammari neemariana niminaqa qinisaa atooemariasa minara irisee amiqi amiqimmasee niminaqa, kuqaa anoona ufa qimannimidaqa, mifa sia uqanna mina akiaqara sia maraannoo. Anutufa amiannoo.

## 11

*Yoohaneefa nammari nimimarufa nari faiqi namu Yisufinnai niqiqanau.  
(Ruk 7:18-35)*

<sup>1</sup> Yisufa mina faiqi namu qisakuqara taikasee qikunni ooqu qaaraqanda marasee mi ufana oosana oosana qimannimiseenoo miqooqari misa maqusa maqusa nidanoo qimannimimarinau.

<sup>2</sup> Yoohaneefa nammari nimimarufa karabusaki maridanoo asauku mundirana oosana oosana irinai. Iriseenoo amiqimmasee irianau qimaseenoo nari faiqi namu Yisufinnai niqiqanau.

<sup>3</sup> Yoohaneena faiqi namu Yisufa maruqoo oonuree irammiriga qiçau. Anee ooqai tamummaqara fasiqa kambiqaannoo fee qimaqoofa anee mifee maridane. Anee Anutuna asauku mundira fee maridane. Maasa mooree afeesianauree.

<sup>4</sup> Qimasooфанoo Yisufa qinai. Maaqoo innee animariaqoo ainaina auqaunnaana faqa ufa qimannimunnana faqa minara kai oonuree Yoohaneena qimamifanoo mifa qiniara iriannoo.

<sup>5</sup> Nifu dimbarausa maqannisaidaqa, niku eendiraua amiqimmannisaunaqa nidaqa. Karoora narimariasa rukannisaidaqa. Naaqoo auniraua ufa iridaqa. Kuqimariasa findifumannisaidaqa. Kudi fasiqauqa qinee amiqira fuka ufa innaarunai ququsa ufa misa qimannimidaqa. Mi ufana oonuree Yoohaneena qimamifanoo mifa qiniara iriannoo.

<sup>6</sup> Moo fannoo sia qiniara qaara irirana irimarifa mifa asasimarifa mariannoo. Qinisaa mikimmaki marifa sia asasiannoo. Mi ufana faqa Yoohaneena qimamiqa.

<sup>7</sup> Yoohaneena faiqi namu fifufanoo Yisufa faiqi anaasee Yoohaneena qimannimarinai. Fifau maqa maaqa kaasau aadana maqa maaqa innee Yoohaneena qafarara fiqa innee nana qafararee fiqee iqau. Fifau andanda kasinaree fiqee iqau. Sia uqanna minara fiqau.

<sup>8</sup> Innee nana qafararee andandai fiqee iqau. Faiqi amiqira qamunna afisimarina mina qafararee fee qimasee fiqee iqau. Oo sia uqanna minara fiqau. Miqiraua sia kaasau maqa maaqaki maridaqa karaambaiqa maaqaki amiqiranaki maridaqa.

<sup>9</sup> Nana qafararee innee fiqee iqau. Anutuna tamummaqara fasiqa qafararee fee qimasee fiqee iqau. Kuqaa Yoohaneefa Anutuna tamummaqara fasiqafa marufa ooqu qafaqau. Sia misa kai, Yoohaneefa tamummaqaraua uriqaramasee tamummaqarafa marifaqa innee qafaafanoo.

<sup>10</sup> Ooqeenaa akara minara kai qidanoo. Mi akaranaki Anutufa maaqi qimasee Yoohaneenara qidanoo.

Iriqa. Qinee qini ufa maree marinnana ani Anutuna asauku mundirana ani oorinni aqqaanaaranoo mifa ani aana ani oorinni afisumaree finana anee mi mau fuanneera.

<sup>11</sup> Akarakinaa ufa miqi qinoo marinara qinee Yisusa anoona ufa qimannimidaqa. Anaasee faiquqaindi moomoo maridaqa. Yaanaasee fee Yoohaneena uriqararana maqanoofee inai. Sia moo fannoo mina uriqararana maqanau. Innaaruna ququsa mariasa ureeqaraua misa kai Yoohaneena uriqararaua maridaqa.

<sup>12</sup> Qinee anoona ufa qimannimidaqa. Yoohaneefa nammari nimimari aukuanaindari faiqi anaasee rakiranannoo maqusa maree mariandee miqi kaimasee nimudaanai qimasee innaaruna ququsaki keeqaraki qimasee innaaruna ququsa maree mariasa maridaqa.

<sup>13</sup> Anutuna ooqeenaa tamummaqeemaru fasiqausa faqa Mooseena sandufa faqa misa ooqai oosana arasee kasooqaqee kambiqaaninnanara tamummaqasee fifufanoo Yoohaneenasaa taikaqau.

<sup>14</sup> Misa Eeriaafa anirarammifoo qufanoo doo Yoohaneefa mifa ani maridanoo, innee mi ufanara nidinaqee irifaree sia fee nidinaqee sia irifara.

<sup>15</sup> Aaqoo fainafa iriaqa, sia aaqoo fainafa sia iriaqa.

<sup>16</sup> Maqee marunausa nanara foora maridaqee fee qianauree. Misa maqusaki faiqi uqaindiara foora maridaqa. Misa moosara maaqi qimasee naraqi naraqi qidaqa.

<sup>17</sup> Maasa ukeena fuaqunaqa innee faqa sia dadaaқи idi ree mariafanoo. Kaifaa maasa quandafiga iki anai fakiki raunaqa sia mina faqa dadaaқи mariafanoo. Innee dapikammi mariafanoo.

<sup>18</sup> Misa miqi qimasee miqi qiafaqa qinee Yisusa minara maaqi qidaqa. Maa maqee marunausaki miqimminoo maridanoo. Yoohaneefa anireenoo uainna nammari faqa narana uqanna faqa sia nanau, dapi narana kai noofaqa innee minara afaanna keeqafifanoo miqidanoommifoo qiqau.

<sup>19</sup> Qinee faiqi nimaaku anireeqa narana faqa nammari faqa naunaqa innee qiniara manda fasiqa narida, kaaqa neemarifa, kaaqa nammari neemarifa, kaaqa ummuari-maria takisa munnimma mareemariasa niqiqeemariasa aqoondiki marifa, mandoosana mareemariasa aqoondiki marifa. Innee qiniara miqi qimariafaqa qinee minara maaqi qidaqa. Yoohaneefa nammari nimimarifa faqa qinee faqa maaqanda Anutuna iriramau andeeqasee fimarunanoo mina anoona koorooidanoo. Innee maqee mariasakiqari sia inni ufa fannoo anoonaikidanoo, qaaraikammida miqimariafanoo.

*Qaara maqusanaasa sia ufa irimarunara niqinau.*

*(Ruk 10:13-15)*

<sup>20</sup> Mifa miqi qimaseenoo mi maqusa maqusana misaki nimarufaqa misakina aurirana andeeqannisanoo nidanoo firaa naaquqara ainaina firaa ainaina auqeeamarufaqa qafeemariqau. Qafamasee irisee sia naundura quandaqau. Mi maqusa maqusana maaqi qimasee Yisufa nuqu ramasee niqinau.

<sup>21</sup> Koorasinna maqannaasa maqusa maaqa namufaqa qinee inniara qimudago qidaqa inni narirafa firaafa mariannoo. Beetasaida maqannaasa maqusa maaqa namufaqa inniara faqa qimudago qidaqa. Inni narirafa faqa firaafa mariannoo. Taia maqusa faqa Sidoonna maqusa faqa aanaamuru aamina mariasa qinee misakina miqimandee faiqi sia amanaiki maria ainaina misakina auqaanaqau naundura dauni quandaqini. Misa danda doona nifaaqai nikaqaki akuseeqa nari mandoosana ikiraqasee minniseefau dauni quandasee qini ufamaу fini.

<sup>22</sup> Qinee kuqaa anoona ufa inni qimannimidaqa. Firaа numoo aukuaana anirainanoo Anutufa Taia maqusanaasa faqa Sidoonna maqusanaasa faqa naridanoo kaqikaqoo afauaanno. Innee Koorasinna maqusanaasa faqa Beetasaida maqusanaasa faqa sia afauaannoo firaqoo inni naruannoo.

<sup>23</sup> Kapeeranaumma maqusanaasa innee inneeqara uriqararausee qimasee inni maqusara faqa unna qimasee innaaruna amana kai maridee qimariasa. Kasooqaqee Anutufa ani mindari rarissamseeqeenoo idaki aqunnisaannoo. Soodooma maqusanaasa mandoosana maree marufanoo Anutufa narinau. Qinee Soodooma maqusaki faiqi sia amanaiki mari ainaina inni Kapeeranaumma maqusaki auqaafanandee iananoofau maqee mi maqusafa kaqi mariqini.

<sup>24</sup> Firaа koota aukuaana Soodooma maqusanaasa narirafa mariannoo kaqikaqoo rauqi nimaqaannoo. Kapeeranaumma maqusanaasa inni narirafa firaatia uqanna sia rauqi nimaqaannoo. Qinee inniki maridaqa qinee qunufana sia irimarianara inni narirafa firaafa mariannoo.

*Naundura asooarana faqa idooarana faqa nimiraree qinau.*

*(Ruk 10:21-22)*

<sup>25</sup> Mikari Yisufa innaaru qimasee qinau. Qini qikoofa, maa maqana faqa innaaruna faqa rakisirafa dufi dufi ani ufa qinee maqee maqee maa ufana qimannimimarunnana irirana faqaasa nifusaa rafaafafunniseenana kaiqeesa nifusaa kooroo mannimaqee mariananoo.

<sup>26</sup> Eedoo dufi dufi anee qini qikoofa ani aidirafa miqimminoo maridanoo.

<sup>27</sup> Aiqama ainaina qini qikoofa qiminau. Yafa yafee amaakuara iridanoo fee sia moo fannoo. Akoofa kai minara iridanoo. Yafa yafee akoonara iridanoo fee, sia moo fannoo amaaku kai minara iridanoo amaaku fannoo nari kai irisee uqannifiqarusa misa minannai qini qikoonara iridaqa.

<sup>28</sup> Aiqama kadaapiri mariasa faqa naudura qumaara firaana maree mariasa faqa, qinee unnannai anirafaqa qinee naundura idooarana nimianauranoo.

<sup>29</sup> Qini qumaara qainda dinni gumaree nifaariki rusisee qini dookinaa ufa maraaga. Qinee reendeenirausa qimuqusa muqufi ubiqarausa maridaqa innee qini ufa oosana marasaifaqa naundura asooarana adooarana nimianauro.

<sup>30</sup> Qini qumaara qainda siamma akumu aruannoo sia qumaara marinara asooarana adooarana paqurifaranoo.

## 12

*Nári amaanasaa Yisuna faiqi namu sakuma ruqoosasee naqau.*  
(Mak 2:23-28; Ruk 6:1-5)

<sup>1</sup> Mi aukuanna moo Saririqasaa Yuda maqannaasa amaana faasaanasaa Yisufa nari faiqi namu faqa maqusamau uita ququsa qambaana fimarufanoo mina faiqi namu naararee marusa nari oosana marasee uita ruqoosasee rafarisee fuka naqa fimariquau. Miqunara sia ummuarammidammiafoo qimariqau, aiqamausa nari sandamau fida miqimmi mariqau. <sup>2</sup> Farisai amaana ufa qimarusa misa nindafamasee Yisuna ufa amianneera ufa quandasee qimamiqa qiqau. Qafaa ani faiqi namu Saririqa sandufa rukiaidaqa narana unaku naidaqa Mooseefa minara qaoo qinau. Naqi fee ifaqee miqi fee.

<sup>3-4</sup> Yisufa iriseenoo qinau. Innee aqaida miqi qimariafanoo Dafidina akara sia fee asaanari fee. Mifa faqa mina faiqi namufaqa naararooafaqa misa Anutuna amaana maaqaki Nooba maqusai marunaki keeqafufaqa amusarara feemu Anutuna amimaru feemuna naqau. Misa miqi mandee sandufa rukiqaqau. Mi feemuna Anutuna maaqaki rakisirausa kai naaqee qimaru feemuna marasee naqau. Innee sia fee mina asaanari fee.

<sup>5</sup> Innee ooqeenaa sandufa moo sia fee asaanari fee. Anutuna maaqaki aanaiqiki mariasa misa Saririqa sandufa maqee maqee rukiaidaqa amaana maqaki ainainidaqa mariasa numoo siaisa maridaqa miqidaqa.

<sup>6</sup> Qineemma ufa qimannimidaqa. Qinee Anutuna amaana maqa uriqararausa maaqoo maridaqa. Misa qini ufa irisee sakuma ruqoosasee naifanoo amana mariannoo.

<sup>7</sup> Akara moo maaqimminoo maridanoo. Qinee Anutusa inniara inneeqa niqoonausara nimuqusinaqa nifauaqa minara qini didiannoo. Qaindasaa maqee maqee aandau tatufirana qimiranara qini qikooqaidanoo.

Mi akarana miqi qimasooafaqa qinee Yisusa maaqi qidaqa innee mi akarana oosanara irifaqau qeeqa faiqi namuara naararee marinara innee nimuqusifaqau sia niqini.

<sup>8</sup> Qinee faiqi nimaaku amaana faasaana faqa mina sandufausa faqa uriqararausa maridaqa. Qinee amaana faasaana sandufa sia rukiaraqee qunaqa sia rukiaidaqa. Qinee qunaqa naidaqa numoo sia maridanoo.

*Nári amaanasaa asauku sufirana andeeqanau.*  
(Mak 3:1-6; Ruk 6:6-11)

<sup>9</sup> (Mooseena sandufa nari amaana Saririqa sia kaqikaqoo ainainiqee qinau. Yisuna aukuaana misa mi mau kai fimariquau.) Yisufa sakumara qimannimiseenoo miqooqari Yisufa misa faqa misa amaana maqaki keeqanau.

<sup>10</sup> Minaki asauku sufirafa misa faqa keeqafi marinau. Farisai amaana ufa irimarusu mi asauku sufiranara Yisuna irammiriqa qiqau. Maasa amaana Saririqa sandufa amanee amaana Saririqasaa faiqi moo fannoo mandaikirana andeeqaanauree aqaida miqianauree. Misa Yisunara eedoo qinaqa Mooseena sandufa rukiaidanoo fee qimasee qumarasee ruaneee qimaseeqa miqi qiqau.

<sup>11</sup> Yisufa minara iriseenoo qimanniminau. Saririqasaa firira aandau madikaki aqufi-faqa innee umbaqidee sia fee umbaqidee. Sia amaana irisee kaqi umbaqi mariafanoo.

<sup>12</sup> Nana fannoo fee uriqaranoo maridanoo fee. Aandau fee faiqi fee. Aandau sia uriqaranoo maridanoo, faiqi kai uriqaranoo maridanoo. Minara maasa sandufa fannoo mandaiki marifa aurimarifa Saririqa amaanasaa amiqi amiqimannimaqarana amana maridanoo qidanoo. Miqi qimaseenoo asauku sufirana qimaminau. Asauku uqau.

<sup>13</sup> Miqi qufanoo mi fasiqafa asauku uqinau. Uqusoofanoo asauku amiqinau, dinni asakuara foora miqinau.

<sup>14</sup> Farisai amaana ufa qimarusa qafamaseeqa misa aanoomandee raudamafufaqa suqufi nari qimami nari qimami qiqau. Naqimmandee maasa Yisuna aruanauree qimariqau.

*Anutufa rusadeesamumasee maroo fasiqanara qidanoo.*

<sup>15</sup> Yisufa mi ufana iriseenoo findimeeqee moosaa finau. Faiqi anaasee aiqama mina faqa fufanoo aurimarusu mandaikimarusu aiqama andeeqannisanau.

<sup>16</sup> Andeeqanniseenoo aranaiqi qimaseenoo qimanniminau. Qumee uqannandaaga kukee uqanna saaga sia qinee andeeqasaunannara kooroo qiaqa.

<sup>17</sup> Miqi qimasoofanoo tamummaqara fasiqa Eesaia mina ufa anoona kambiyanau.

<sup>18</sup> Mifa oogai maaqi qimasee Yisunara akara rinau.

Qafaa, qini dadaqira faiqi, qinee mina utaaqamamaqaunafa. Qinee minara qimuqusi-danoo qini daundura minara asaidanoo. Qini maraquna mina aakufuannoo. Mifa aanaamuru mariasa faqa kiapausara foora andeeqannisaannoo. Sia Isaraee maqanna kai.

<sup>19</sup> Mifa sia dapi ufa oosana oosana firaqoo qiannoo. Sia faaqa rumasaida qiannoo. Maqusaindari sia mina ufa irifaranoo.

<sup>20</sup> Mifa eendira saka sia ramooramaa mamaree raudaannoo. Amannaikiasa mandainaina rafaaga fimarinarana sia mifa aanoommasee qimannimifa fiffimandee reendeenamandee naakapee marifa. Mifa miqimmamaree reendeenamamaree fifi inanoo numoo aukuaana raquramiseenoo miqoomma uriqaraannoo.

<sup>21</sup> Minaki maqusa maqusa aanaamuru mariasa minaki doo irirana rusifaranoo.

Eesaiafa miqi qimasee Yisufa sia qumu maru aukuaana Yisunara akara rumaqoofa maridanoo.

*Unnaqimaseeqa Beeraseeburanannai afaanna afaqaidee qiqau.*

*(Mak 3:20-30; Ruk 11:14-23)*

<sup>22</sup> Faiqi moo faafasaaga aundurai marufanoo afu dimbeegeenoo ufa faqa sia qimaruna faiqi anaasee afeeqa Yisufinnai minisoofanoo andeeqanau. Andeeqasoofanoo mi fasiqafa afu maqeenoo ufa qinau.

<sup>23</sup> Faiqi anaasee aiqama qafamasee naaquqoofaqa qiqau. Maanaree maasa afeesi marunafa mifee. Dafidina atikiqari findifuanina fee qimaqoofa doo maana mifee.

<sup>24</sup> Farisai amaana ufa qimarusa mi ufana iriseeqa qiqau. Maafa afaanna rakisirana Beeraseebura minannai afaanna faiqi naunduraki marina aqiqaidanoo.

<sup>25</sup> Yisufa misa ufa iriseenoo qimanniminau. Moo maqusanaasa furufariqa raina rainiraua, doo mi maqa maaqafa dapikammianoo. Moodaa oosana mariasa mi oosanausa rainarainiqa maqasaa aqufifaranoo.

<sup>26</sup> Sia Sadannafa nari kai quandaki nari aqiqaanoo. Miqidanoofau nari raineenoofau mina afeeka fannoo maqasaa aqufifini. Miqinanoo naqimmasee mina aiku asauku afeekaikamandee marifaree. Sia afeekaikifara furufariqa dapikammifaranoo.

<sup>27</sup> Innee Farisai amaana ufa qimariasa inni faiqinamu Sadannanannai fee afaanna aqiqaida fee Anutunannai fee afaanna aqiqaida fee. Anutunannai kai afaanna aqigeemariafanoo. Inni faiqi namu miqianannai inni manda ufa qaoo qidanoo. Qinee Beeraseeburanannai quandaifi afaanna nari niqoonausa niqiqaanoo siamma-manaikiannoo. Qinee Anutuna maraqunannai kai afaanna aqiqeeqa.

<sup>28</sup> Qinee Anutuna maraqunannai afaanna aqiqaanoo doo Anutuna amiqira ququsa fannoo doo innisaa radiqiseenoo ititannimaqeenoo.

<sup>29</sup> Naqimandee moo fannoo Sadanna maaqakinana ainaina indaa iraree. Maaqa akoona naaree rumbasee mina ainaina indaa ia. Maa aaqoo afu furufarirana maaqa akoona doo qinee rumbaseeqa mi maqanakinaana doo qinee mareeqa.

<sup>30</sup> Faiqi moo fannoo sia qini qiqoondi marirafa mi fasiqafa qini namuqa maridanoo. Sia qini dadaaqida oonu suqu ani suqu imarifa mareeqaida aquaaruki marifa maridanoo. Miqi kai inoo faiqi moo fannoo innaaruna ququsara sia faiqi anaasee suqu quqainafa, mifa furufarammida nifaqanoo nidanoo. Qinee suqu ququnaqa innee Farisai amaana ufa irimariasa furufaramida nifagee mariafanoo.

<sup>31</sup> Misa Yisunara Sadannanannai afaanna niqiqeefoo qunara, Yisufa minara iriseenoo qimannimidanoo qinau. Oosana oosana manda marirana faqa manda ufa faqa Anutufa amana mina numoo faiqi mininnisaannoo nari maraqunara aqirana minara kai sia mininnisaannoo.

<sup>32</sup> Anutuna maraquna aqira ufa mina akiaqara Anutufa sia mininnisaannoo. Maa kamusaqa marira aukuaana faqa naaru kamusaqa marira aukuaana faqa sia uqanna amana Anutufa mina akiaqara mininnisaannoo. Qinee faiqi nimaakuara diqira ufara minara Anutufa amana mininnisaannoo.

*Faiqi ufa fannoo naundurakinana oosana kooroo idanoo.*

*(Ruk 6:43-45)*

<sup>33</sup> Saqari amiqirafa maridanoo mina qaqamma faqa amiqirafa kai maridanoo. Saqari mandaikirafa maridanoo mina qaqamma faqa mandaikirafa kai maridanoo. Saqari qaqamma fannoo kai saqari anoona kooroo idanoo. Miqi kai iqa inni Farisai amaana ufa qimariasa inni manda ufa oosana manda saqari qaqamara foora maridanoo.

<sup>34</sup> Innee sakani faiqi miqirausa inni naundura mandamuqanoo maridanoo. Inni naundurakai moomoo ainaina marinakiqari ufa uridanoo. Minara naqi fee mandee inni naundurakiqari amiqira ufa uruannoo fee. Sia amana miqirafa. Faiqi afauru fannoo narí amuqusaki mari ainainara kai ufa qidanoo.

<sup>35</sup> Amiqira fasiqa mina amuqusa gumiasanakiqari amiqira ainaina maree uridanoo. Manda fasiqa mina amuqusa ookiqari mandainaina oosana oosana kambiqaidanoo.

<sup>36</sup> Qinee qimannimidaqa numoo aukuaana anirainaga faiqi misa nariqa aiqama dapi ufa oosana oosana Anutuna afusaa kooroommasaifanoo minara ufa qiannoo.

<sup>37</sup> Maqee marira aukuaana ookinaa ufa Anutufa iridanoo. Numoo aukuaana anirainanoo inni maqee maria aukuaana ufa fannoo inni mareeqeenoo amiqiranaki fee quqaannoo fee Anutuna nariranaki fee mara quqaannoo fee.

*Yisunara misa faiqi sia amana auqaaqaa ira ainaina auqaina qafaa.  
(Mak 8:11-12; Ruk 11:29-32)*

<sup>38</sup> Miqi qimasoofaqa Mooseena sandufa irimarusa faqa Farisai amaana ufa qimarusa faqa misa Yisuna akaru qiraree qimasee qimamiqau. Ufasaa rakisirafa anee moo ainainara qinanoo mookinaqa maasa mina qafeeqa aniara kuqaa Anutuna asauku mundira fee qianaara.

<sup>39</sup> Yisufa quandafi qimanniminau. Innee maqee mariasa manda oosana maree mariasa Anutunara nikoofaifaqa minnisee mariasa innee kai moo ainainara qifanoo kambiqaina qafaanee qidaqa. Sia qinee moo fuka ainaina auqaana qafeefara. Nauraa ainaina Yoonaafa tamummaqara fasiqa oqai firaa noodaana aranandaki marunara foora miqirana maqee qafeefaranoo.

<sup>40</sup> Yoonaafa firaa noodaana aranandaki qaaramoo faasaana faqa eendaki faqa marinau. Miqi kai iqa qinee faiqi nimaaku qaaramoo faasaana faqa qaaramoo eendaki faqa maqee aundurakai madikaki marianaara.

<sup>41</sup> Ninee fa maqusa marusa numoo aukuaana anirainaga misa findifi inni maqee mariasa niqifaranoo. Misa Yoonaaana ufa iriseeqa nári mandainaina maqasaa quqasee quandaf-ufaqa Anutuna afusaa reendenammigau, maqee qinee Yoonaaana uriqararasa inni maridaqa innee sia inneeqa mandainaina minnisaidaga minara misa inni niqifaranoo.

<sup>42</sup> Seebaa maqusaindari anaasee rakisirafa moo fannoo numoo aukuaana anirainanoo mifa faqa Ninee fa maqusanaasa faqa findifiqaa maqee mariasa niqifaranoo. Mifa nianaindari Sooroomoona mina irirana iriannee qimasee aninau. Maqee qinee Sooroomoona uriqararasa animaridaqa innee sia qini ufa irimariafanoo, minasaara mi anaasee rakisirafa numoo aukuaana anirainanoo inni niqiannoo.

*Faiqi naundurakinaa afaanna oonu aqoonausa nifiqamareenoo kaiqaa ani keeqanau.  
(Ruk 11:24-26)*

<sup>43</sup> Maa maqee mariasa kaifaa maaqimminoo mariannoo. Innee manda faafasaaga faiqi naundurakai marifara foora marifara. Mi faafasaagafa mi fasiqana aundurakiqari raudamakinoo fifi inoo fiq fiq inoo aadana maqa maaqa oombura maqa maaqaki aakaqaki adooaranara randaisianoo fiq fiq imarinau.

<sup>44</sup> Fiq fiq idanoo sia paqurinoo narí kai oonumafi iriseenoo qinau. Qinee qeeqa ooqueenaa maaqaki kaifaa keeqaanaara. Qinee qeeqa oqai mariafanna fasiqana aundurakai kafa keeqaanaara. Miqi qimaseenoo mi fasiqa finnai anireenoo qafanau. Fifau maaqara foora maridanoo, damunammينو maridanoo, rapeeiranaki ititanoo maridanoo aiqama ainaina andeeqanoo maridanoo.

<sup>45</sup> Mifa mina qafamaseenoo oonureenoofaana moodannai qisauku dinni oonu qaaraqanda maraseenoo narí manda oosana uriqararasa kai nifiqee anireenoo mi fasiqana aundurakai aiqama keeqafufafa minaki mariqau. Mi fasiqana inaaqiana manda marirafa fiqaramaseenoo firaaqoo mandaikinoo marinau. Oqai mi fasiqafa moodaa manda faafasaaga maru aukuaana kaqikaqoo mandainainaki marinau. Innee maqee manda marira mariasa miqikai mandee marifaranoo.

*Narí ufa irimarusara qini qinausa qikaqaafasaa fee qinau.  
(Mak 3:31-35; Ruk 8:19-21)*

<sup>46-47</sup> Yisufa miqikaimmasee faiqi anaasee ufa qimannimi marufafa Yisuna narí anoofa faqa mina akaqaafasaa ufa faqa aniree naambee qai kikiqamafufafa qimamianee qufanoo faiqi moo fannoo mina irisee maaqaki oonu Yisuna qimaminau.

<sup>48</sup> Mifa iriseenoo mi fasiqana qimaminau. Naqi fee ifanee anee qini qinoofa faqa qini qikaqaafasaa ufa faqa madaana mariiafoo q inanee.

<sup>49</sup> Maa mariaa qimaseenoo narí faiqi namu asauku mundinoo qinau. Maaqaimme mariasa misa qini qikaqaafasaa qini qinausara foora maridaqa.

<sup>50</sup> Faiqí anaasee yausee innaarunai qini qikoona iriranamau fimariasa misa kai qini qikaqa faqa qini dauna faqa qini qinausa faqa maridaqa.

## 13

*Qaqama aaqasoofanoo kambiqoonara qinau.*

*(Mak 4:1-9; Ruk 8:4-8)*

<sup>1</sup> Mi faasaanna Yisufa mi maqanakiqari raudamakufanoo firaa taatarunna afainni ooqu reenoo miqoo ooqu marinau.

<sup>2</sup> Ooqu marifufaqa faiqí anaasee fifau andandara foora ruqufu aqufi ititafufanoo mifa kanuqaki akaramafinoo ooqu marifinoo minakiqari qimannimufaqa faiqí anaasee nammari afainni maridaqa mina ufa irimariqau.

<sup>3</sup> Mifa kanuqakiqari oosana oosana quandara ufa qimanniminu. Mifa maaqi qinau. Faiqí moo fannoo Yuda maqannaafa nári oosana maraseenoo raisa fooqaana ummaqirara maqa rumaqoonaki qaqama kaqi aaqee marinau.

<sup>4</sup> Mi fasiqafa aaqee marufanoo qaqamma akaqafa aanasaa niku ree maruqoo faqa aagamaki aqufufanoo ufinuqa aniree mina kai naqau kaqindaraana sia naqau.

<sup>5</sup> Akaqafa aagamaki oonisaa aqufinau. Maqa sia moomoo marufanoo maqa tootooqi marunara dauni kambiqanau.

<sup>6</sup> Kambiqafufanoo suani urureenoo arusoofanoo maqa eeraqoo marufanoo atuka sia meemai keeqoonara suani arufanoo aadanusinoo kuqinau.

<sup>7</sup> Akaqafa amuka faqaa ainaina marunaki aqufufanoo amuka faqaa ainaina fannoo urureenoo rafaqaqafinoo arusanau.

<sup>8</sup> Akaqafa amiqira maqasaa aqufufanoo qaqamma moomoo iranau. Akaqafa urureenoo qambaana irara iranau. Akaqafa urureenoo oodaa iranau.

<sup>9</sup> Aaqoo faqaafa irinana anee kai andeeqasee iria.

*Yisufa nári quandara ufa oosana nári faiqi namu qimanniminu.*

*(Mak 4:10-12; Ruk 8:9-10)*

<sup>10</sup> Yisuna faiqí namu mina ufa iriseeqa mariufaqa mifunnai anireeqa irammiriqau. Naqaifanee quandara ufa kai qimannimidanee, akooqoo kooroomasee qimannimi-aqaana.

<sup>11</sup> Yisufa iriseenoo qinau, innee innaaruna maqusa qumee irirana iriaqeera, misa sia iriaqeera quandara ufa qimannimidaqa.

<sup>12</sup> Faiqí anaasee moo fannoo innaaruna maqusa irirana irinanoo Anutufa moo faqa mina amifanoo minaindi moomoo kammiannoo, faiqí anaasee moo fannoo innaaruna maqusa irirana siaifa moodaa marinnana Anutufa mina aiqama maree finanoo kaqisamu mariannoo.

<sup>13</sup> Misa nifu maqaidaqa sia qafaidaqa, misa naaqoo marifaqa sia iridaqa, minara qinee quandara ufa qimannimidaqa sia iriaqeera qimannimidaqa.

<sup>14</sup> Misara tamummaqara fasiqa Eesaia mina ufa anoona kuqaa kambiqeenoo. Minara qimasee akara rumaqoonaa anoona kambiqanau. Mifa minara maaqi qimasee qinau.

Kuqaa innee naaqoonnai qini ufa iriseeqa naunduraki sia irifaranoo. Kuqaa innee nifunoo qinee auqee marunna ainaina tataqafi qafamaseeqa naaqoonnai siamma irifaranoo.

<sup>15</sup> Maa maqannaasa nimuqusa kudoosaapanoo maridanoo. Misa naaqoo auninoo maridanoo, misa nári nifu nári tautasee maridaqa. Misa nifunnai qafamasee irifoora misa naaqoonnai irifoora. Misa naundura iriaraasifoora. Misa quandafinaqa qinee ianannai anifaqa qinee misa amiqianoora.

Tamummaqara fasiqa ufa miqimminoo maridanoo.

<sup>16</sup> Innee qini faiqí namu inneeqa nifu qafee mariana inniqa naaqoo irimariasa marianara asasiqa, inneeqa kai qafaidaqa, inneeqa asasikanaki mariafanoo inneeqa qini ufa oosana iridaqa.

<sup>17</sup> Qinee anoona ufa inni qimannimidaqa. Tamummaqara fasiqauqa faqa reendeenirafa andeeqara fasiqauqa faqa misa ooqai maridaqa innee maqee maqee qafeemarianara kaaqa nimuqusufaqa minara qafaqaa kaimmasee sia qafaqau. Misa innee maqee qini ufa irimariana kaaqa nimuqusifaqa iriraree qimasee iriaqaa kai qimariqau. Sia iriqau.

*Yisufa aaqee maru qaqamara oosana kooroo inau.*

*(Mak 4:13-20; Ruk 8:11-15)*

<sup>18</sup> Qaqamma aaqee mari fasiqana quandara ufa oosana irisaifaqa qimannimianauro.

<sup>19</sup> Moo fannoo qini ququsakinaa ufa iriseenoo sia irinoo manoo manaa imarifa, qaqamma mina amuqusaki kakasammasaifanoo manda faiqi fannoo animaree fifinoo. Maafa qaqamma fooqaana aanasaa kukupee marifanoo siara foorammidanoo.

<sup>20-21</sup> Oonisaa kukupanoo marifa mina oosana maaqimminoo maridanoo. Misa Anutuna ufa irisaidaga asammasee mi ufana maraifanoo sia atuka misaki amiqimmasee ausinoo kaqi meeraqoo rusinoo maridanoo, qusasaa qimasee minnisaidaga. Mi ufanasaara narirafa kambiqaiifaqa misa quqasee fuaniqiana saamuridaqa.

<sup>22</sup> Amuka faqaanaki aqufu qaqqammafa moo fasiqara foora maridanoo. Mifa Anutuna ufa irinoo maqasaa kadaapirirana faqa kaaqa ainainara munnimmara amuqusirana faqa mi ainainafa mi ufana anukaki kukuqinoo sia qaqqamma iraidanoo, sia anoona kambiqaidanoo.

<sup>23</sup> Qaqqamma amiqira maqasaa kakasinoo moo fasiqara foora maridanoo. Mifa mi ufana iridanoo oosana amiqimandee iridanoo. Mifa kuqaa qaqqammara foora iraidanoo. Moo uriqararafa amiqimma qaqqamma irafinoo irairammidanoo. Moo qambaana marifa nari amanasaa iraidanoo. Moo ureeqarafa miqi kaimidanoo nari amanasaa iraidanoo.

*Namuqaa moona afuqaki manda qaqqama aaqee marunara qinau.*

<sup>24</sup> Quandara ufa moo Yisufa faiqi anaasee noorinni mara quqanau. Manda oosana maree marusara faqa amiqira oosana maree marusara faqa misauqara quandasee qimanniminu. Innaaruna maqusai faiqi moora foora maridanoo. Mifa nari ququsaki amiqira qaqqamma ummaqinau.

<sup>25</sup> Faiqi misa faiqaqeeufanoo mina namuqaa fannoo anireenoo kukura asumu sakuma maruqoo ummaquuseenoo finau.

<sup>26</sup> Sakuma urureenoo uri rupipoosufaga kukura faqa qafaqau.

<sup>27</sup> Mina dadaaqira faiqiuga ququsa akoona oonu qimamida qiqa. Rakisirafa, anee kuqaa fee ani amiqira qaqqamma kaiffee ummaqinee. Nanaindari fee kukura kambiqaidanoo fee.

<sup>28-29</sup> Mifa iriseenoo qinau. Imboo namuqaa fannoo kai ummaqinoo. Qimasooafaqaa mina faiqi namu qiqa. Amanee maasa oonuree rarakuanauree qimasooofanoo mifa qinau. Sia innee kukura rarakuuqa, sakuma faqa rarakifoora.

<sup>30</sup> Saina kaqi mariani. Miqanda moodaa karammiqa mariafaqa. Aiqama akuqama-finaqa qinee qimannimianaqa innee kukura indaaru ateeke rumbasee ida araaqera. Inaaqiana sakuma ateeke qini maaqaki quqaqa.

*Yisufa kaqikaa qaqqama kikiqammusinau.*

*(Mak 4:30-32; Ruk 13:18-19)*

<sup>31</sup> Yisufa moo quandara ufa misa noorinni quqanau. Innaaruna ququsaki fifandinausa qumini qaqqama miqiraua maridaqa. Faiqi mina qaqqama nari ququsaki ummaqinau.

<sup>32</sup> Mina qaqqama kaqikaana uqanna maridanoo. Mifa urureenoo qambaana oorufoono firaa saqarara foora aiqama aakaaqakinaa andanda uriqararafa maridanoo. Miqinoo marifaqa ufiniuqaindi anireeqa mina asaanai aanaamu usakaidaqa.

*Yisufa ooruku anoona kikiqammusinau.*

*(Ruk 13:20-21)*

<sup>33</sup> Mifa quandara ufa moo qimanniminu, Anutuna ufa aiqamai daraaniranara qimanniminu. Innaaruna ququsaki fimariasa ooruku anoona foora maridanoo. Anaasee mina marasee feemuki adiasaafanoo aiqama ati qaidanoo.

*Yisuna ufa mina kikiqa usira ufa oosana.*

*(Mak 4:33-34)*

<sup>34</sup> Maa ufana faiqi anaasee moomoo marufanoo Yisufa quandara ufakiqari kai qimanniminu.

<sup>35</sup> Yisufa maaqi qimannimisoofanoo ooqeenaa tamummaqara fasiqa mina ufa anoona mikari kambiqanau. Tamummaqara fasiqa qinau.

Qinee doo raqasee quandara ufa kai qianaara. Maqa quqoo aukua kukeeqoo ufana kukeeqanoo mariifa qinee mi ufana maqee quandara ufakiqari kooroo qimannimianaara.

Tamummaqara fasiqa ufa miqi qimaqoo ufafa maridanoo.

*Yisufa manda qaqqama kikiqa usira ufa oosana kooroo inau.*

<sup>36</sup> Yisufa faiqi anaasee qimannimiseenoo minniseenoo maaqaki keeqanau. Mina faiqi namu mifunnai oonureeqa qiqa. Kukurara quandara ufa qimannimianaqa iriaqa.



<sup>37</sup> Miqí qufanoo mifa qinau. Faiqí nimaaku qinee amiqira qaqamma ummaqi marunausa maridaqa.

<sup>38</sup> Ququsaki maa maqanasaa mariasa maridaqa. Amiqira qaqamma karaambaíqa aiku asauku mariasa maridaqa. Kukura manda faiqí mina aiku asauku mariasa maridaqa.

<sup>39</sup> Namuqaa kukura ummaqinafa Sadannafa kai maridanoo. Sakuma atekara aukuaana, maa maqee marira kamuqoo taikara aukuaana maridanoo. Sakuma atekara fasiqauqa misa qangiroouqa maridaqa.

<sup>40</sup> Kukura atekasee rumbeegee idaki aqifanoo taikara aukuaana miqimminoo mariannoo.

<sup>41-42</sup> Mi aukuaana qinee faiqí nimaaku geeqa qangiroouqa niqigaanaqa misa Anutuna ququsakinaana manda findi fira findi fimariasa narí oosana uqannifiqanoonifa faqa manda oosana mariasa faqa maramaree auru firaafa imarinnanaki minaki aqifaranoo. Miqoo faiqí misa qikindaqeefera nifai riqifaranoo.

<sup>43</sup> Miqooqari andeeqaraua suaniara fooru kaimmifaranoo. Innaarunnai narí nikoona maqusaki maridaqa kaaqa qeeffaranoo. Naaqoo faqaasa mariafanoo inneeqa kai andeeqasee iriaqa.

*Koorakinaa maqa feefaurira ufa quandara ufa.*

<sup>44</sup> Innaaruna ququsaki keeqeemaria ufafa kooru miqirafa maqaki kukeeqanoo maridanoo. Faiqí moo fannoo paqurimasee qafeenoo kaifaa kukeeqaannoo. Kukeeqaseenoo asammaseenoo narí ainaina oosana oosana akaqausa nimiseenoo mina akiaqara munnimma maraseenoo quandaki kooru mari maqa maaqana feefaurummasee mi koorana indufuannoo.

*Oonda feefaurimaruna quandara ufa.*

<sup>45</sup> Kafaa innaaruna ququsaki keeqeemaria ufafa faiqí moora fooru maridanoo. Mi fasiqafa kooru aina feefaurimarifa koorara maqusamau randanoo nidanoo.

<sup>46</sup> Oonda fira feefaurimaria oondana paqurimaseenoo narí ainaina aiqama moosa nimiseenoo minasaaqara munnimma maraseenoo nariara mi firaa oondana maraanoo.

*Noodaanna reemaria rainara quandara ufa.*

<sup>47</sup> Kaifaa Yisufa minara qinau. Innaaruna maqusa pateeree maria uqara fooru maridanoo. Misa mi pateeuqana nammariki ramasee noodaanna oosana oosana minaki uqaridanoo.

<sup>48</sup> Pateeuqa qumbiqafifaqa uqereeqee afainni quqaidaqa. Quqaseeqa misa ooqu marifiqa amiqira noodaanna taquki mara upeekasee manda noodaanna mara teeqimmaqidaqa.

<sup>49</sup> Maa marira aukuaana taikafinanoo miqimminoo mariannoo. Qangiroouqa rafudamafiq manda oosana maree mariasa faqa amiqira oosana maree mariasa faqa raineefara.

<sup>50</sup> Misa mandaikiraua ida fira auru mara aqifara, minaki iki raqaidaqa nifai riqifara.

*Ooqeenaa anoona ufa faqa fuka ufa faqa mina akoofasara qinau.*

<sup>51</sup> Miqí qimaseenoo Yisufa narí faiqí namu irammirinau. Innee maa ufana oosana irida fee. Miqí qufaqa misa eedoo qiqau.

<sup>52</sup> Yisufa iriseenoo kaifaa maaqi qimasee qimanniminu. Mooseena sandufa irimari fasiqafa moo fannoo Anutuna ququsaki mariranara irimarifa maridanoo mifa faiqí firaafara fooru maridanoo narí maaqakiqari ooqeenaa amiqira irirana faqa fuka amiqira irirana faqa marasee ani uqafiqannoo.

*Nasareete maqannaasa Yisunara nikoqanau.*

*(Mak 6:1-6; Ruk 4:16-30)*

<sup>53-54</sup> Yisufa maa quandara ufausa taikaseenoo mi maqusana minniseenoo narí maqusai uqanna oonureenoo misa amaana maqaki keeqafinoo qimanniminu. Misa mina ufa irisoofanoo naaquqoofaqa qiqau. Yai fee maa fasiqafa maa irirana faqa maa idaaqammannisarana faqa irinoo fee.

<sup>55</sup> Maa fasiqafa kamundaa amaaku maridanoo. Mina anoofa Mariafa maasa faqa maaqooqaraafa maridanoo. Mina akaqaafasaa Yameesana amarafa faqa Yooseefaana narí akoona amarafa faqa, Simoonafa faqa, Yudasina amarafa faqa maasa faqa maridaqa.

<sup>56</sup> Mina asooqmaakamara faqa kaqi misa maaqoo maridaqa. Maa fasiqafa yai fee maa amiqira irirana mareenoo fee. Maasa minara qikooqaidanoo.

<sup>57</sup> Miqi qimasoofaqa misa minara oonumafi irisee oimariqau. Yisufa misa ufa iriseenoo qimanniminau. Tamummaqara fasiqa maqusa maqusa mina fidanoo faiqi anaasee minara naaquqaiqaqa ufa iriaqaa kai idaqa. Nari maqusanaasa uqanna faqa nari ainaina faqa sia irifara nikoo nikaa ifaranoo.

<sup>58</sup> Yisufa miqi qimasoofaqa misa sia minaki irirana rusiqoonara Yisufa sia moomoo firaa ainaina naaquqara ainaina miqoo auqinau.

## 14

*Eeroodeefa Yoohaneena akiaqa tuqinau.*

*(Mak 6:14-29; Ruk 9:7-9)*

<sup>1</sup> Mi aukuanna Eeroodeefa Karidaia maqannaa uriqararafa fraafa marinau. Roomma maqannaa kiapana ameemaanai ureeqanoo marida rakisinoo marinau. Faiqi anaasee misa Yisuna amooqimammaree anufanoo Eeroodeefa irinoo nari aiku asaku maaqi qimasee qimanniminau.

<sup>2</sup> Maafa Yisufa Yoohaneefa nammari nimimarufa kuqiranakiqari findifinoo Yisunaiki-noo maridanoo, maa afeeka firaa ainaina auqidaqinoo fee qinau.

<sup>3-4</sup> Eeroodeefa nari akaqa anaqa auqa Eeroodia nammarina maroofa mi anaaseefa qufanoo iriseenoo Yoohaneena rumbeeqeenoo karafusaki quqasoofofanoo marinau. Yoohaneefa Eeroodeena nari akaqa anaqa Eeroodia nammarina maroonara aqinoo qinau. Anee sandufa rukieenana mi anaaseena maraanano. Miqi qufanoo mi ufanara aranaqoofanoo Eeroodia nammarina ufara karafusaki rumba quqanau.

<sup>5</sup> Eeroodeefa Yoohaneenara kuqaruani qinaqa faiqi anaasee minara irifooro. Misa aiqama Yoohaneenara Anutuna tamummaqara fasiqa fee qufanoo Eeroodeefa minara oonumafi iriseenoo minara rufieenoo sia arinau minnisee kaqi rumbanau.

<sup>6</sup> Eeroodeena maqoo aukuanafa kindaarambufanoo miqoo faiqi anaasee suqu maree oomaqammanee mariqau. Eeroodia nammarina araamuna fannoo sukuraki maridanoo aaduma idi rama akoofasa quqamaqoofa maridanoo qoomaqammanee maruna qambaanai faiqi anaasee nifusaa findifi idi ranau. Eeroodeefa mi manaqafa idi roona qafoofanoo kaaqa amiqi amiqinau.

<sup>7</sup> Afaqa amiqi amiqufanoo nari amana aqiqeenoo mi manaqana qimaminoo qinau. Anee nanaree aidinana qimaqiminaqa qinee minakaimmiamianaura idi raannana akiqara amianaura.

<sup>8</sup> Mi manaqafa Eeroodeena ufa iriseenoo sandeenoo nari anoona Eeroodia nammarina oonu qimamisoofanoo irinau. Yoohaneefa Eeroodeena faqa mi anaaseena faqa niqunara mi manaqana anoofa aranaqee marufanoo mariufa mari maridanoo nari araamuna fannoo oonuree nari anoona qimamufanoo mina anoofa mikari Yoohaneena arira irirana paqurinau. Oo doo maqee mifa qini diqufa kuqunoo. Miqi qimaseenoo Eeroodia nammarina nari araamuna qimaminau. Anee oonuree qinanoo Eeroodeefa Yoohaneena akiaqa ituqu piritasaqa saka amiani qufanoo mi manaqafa mi ufana iriseenoo ani randeenoo Eeroodeefinnai oonureenoo nari anoona ufa kai qimaminau.

<sup>9-10</sup> Eeroodeefa mi ufana irisoofanoo aundura mandaikinau. Faiqi anaasee nifusaa qeeqa qimana aqiqamasauannanara oonumafi iriqa qisauruanoo qimaseenoo eedoo kai qinau. Eedoo qimasee nari firisuaiqauqa niqiqanau, oonuree Yoohaneena akiaqa tuqumaree mina amiaqee qufaqa firisuaiqauqa misa iriseeqa karafusa maaqaki ke-qafiqqa Yoohaneena akiaqa tuqiqau.

<sup>11</sup> (Mi maqannaasa mina fidika maqasaa aqufuanoo qimaseeqa piritaki sakaqau sia nararau miqiqau. Kaqi fifau fidika aqufuanoo qimasee miqiqau.) Yoohaneena akiaqa misa tuqu piritasaqa sakamaree mi manaqana mina amiqau. Amisoofanoo mifa maree munu nari anoona aminau.

<sup>12</sup> Yoohaneena faiqinamu mifa kuqunara iriqa ani karafusa maqakinaana ani mina iri mara mareeqa munu madikaqau. Madikamaseeqa misa Yisufunnai oonureeqa mi ufana qimamiqau.

*Yisufa feemu faqa noodaanna faqa moomoosa niminau.*

*(Mak 6:30-44; Ruk 9:10-17; Yoh 6:1-14)*

<sup>13</sup> Yisufa mi ufana Yoohaneen arunara iriseenoo ummaararoofanoo nammariki ooquree kanuqaki nari faiqi namufaqa akaramafufanoo nariara faiqi sia marutinai finau. Faiqi anaasee Yisuna sipa fannoo nammariki fimarufaqa qafamasee faiqi anaasee maqusa maqusa tatufufaqa maqamau afaindanai miqoombiqau.

<sup>14</sup> Yisufa kanuqakiqari maqasaa aqufinoo nindafoofaqa moomoosa ani marufanoo. Oonureenoo misara amuqusufanoo misaki aurimarusa aurirana taikannisanau.

<sup>15</sup> Eendi marufaqa mina faiqinamu mina ufa irimarusa anireeqa Yisuna qimamiqau. Maa maqa maaqanaki faiqi siai maqa maaqaki, suani doo keeqaidanoo. Anee faiqi anaasee niqiqainaqa maqusa maqusa narana feefaurummasee namasee faiqaaqa.

<sup>16</sup> Yisufa iriseenoo maaqi qimasee narí faiqi namu qimanniminau. Innee fifau niqiqeefaara. Inneeqa kai narana nimiaqa.

<sup>17</sup> Miqi qimasooafaqa misa qiqau. Maasaki feemu rumberafa moodaannai qisauku kai maridanoo. Noodaanna qaaraqanda kai maridanoo.

<sup>18</sup> Yisufa iriseenoo qinau. Doo mina kai qini qimiaqa.

<sup>19</sup> Miqi qimaseenoo faiqi anaasee aiqama qimanniminau. Aiqama andanda ra-soonookammasee oqumariaqa.

Miqi qimaseenoo mifa feemu moodaannai qisaukunamu faqa noodaanna qaaraqanda faqa qumareenoo innaarunnai oori uqeeraseenoo Anutunara dufi dufi qimaseenoo feemu ruqi ruqimaseenoo narí ufa irimarusa nisaukuki quqasooafaqa misa qumareeqa faiqi anaasee nimiaqa.

<sup>20</sup> Faiqi anaasee aiqama namasooafaqa nimuaqufaqa Yisuna ufa irimarusa uqa qumareeqa misa oqau maruqoo fiqú fiqú idaqa narana andaanauqa uqariqau. Qisaukuqara taikasee qikunni qaaraqanda uqa qumbiqasee maraqa.

<sup>21</sup> Mi naranna noosa faiqi kai ooni saqari maqusa manda samu muqiiqa mariqau. Faifa tauseenna mariqau. Anaasee faqa faiqi faqa ootupa mafufaqa maaqa maaqa qumbiqa maqiaqa.

*Yisufa nammari amuaqumau aiku ramasee finau.*

*(Mak 6:45-52; Yoh 6:15-21)*

<sup>22</sup> Namasoofanoo Yisufa narí ufa irimarusa niqiqeenoo qinau. Innee sipaki qini doorinni nammari dinni afainni fimarifaqa qinee faiqi anaasee niqiqamasee kasoo fuanaura.

<sup>23</sup> Mifa faiqi anaasee niqiqamaseenoo nariara aaqanai innaaru qiraree qimasee akaramafinoo innaaru qinau. Mi eendanaki aaqanai naríara marinau.

<sup>24</sup> Yisufa aaqanai marufaqa mina faiqi namu sipaki faruma qambaanai oonuroofanoo ufai firaafa noorindari uqinoo nammari amakaurinoo mina ufa irimarusa sipaki kadaapirida fimarigau.

<sup>25</sup> Iqaqarafa qusaramafufanoo Yisufa nammari amuaqumau aiku ramammaree misa unnaí finau.

<sup>26-27</sup> Nammari amuaqumau fimarufaqa mina faiqi namu qafamasee afaanna fee qimaseeqa kaaqa rufiamaree faaqariqau. Yisufa iriseenoo qimanniminau. Sia rufiaaqa. Inneeqa nimuqusa ubiqaqa. Qinee maridaqa.

<sup>28</sup> Peetooroofa Yisuna ufa iriseenoo qinau. Karaambaiqa kuqaa anee maridana qinaqa anee íanannai nammari amuaqumau qinee faqa fuanaura.

<sup>29</sup> Yisufa iriseenoo qinau. Doo ania. Peetooroofa iriseenoo sipakiqari raudamakufanoo nammari amuaqumau Yisufunnai finau.

<sup>30</sup> Fimarufanoo ufai firaafa uqufanoo rufiamareenoo doo nammariki ukuqnanau. Nammariki ukuqnaidanoo faaqarumaseenoo Yisuna aaraidanoo qinau. Karaambaiqa qini qumaraa.

<sup>31</sup> Yisufa iriseenoo dauni mina asauku qumareenoo qinau. Anee nanaree qaara aundura irinanee. Anee sia qinisaa irirana rusi mariananoo.

<sup>32</sup> Miqi qimaseenoo miqanda sipaki akaraqa. Akaramafufanoo ufai taikanau.

<sup>33</sup> Sipaki kaqi marusa misa mina qafamaseeqa naaquqoofaqa Yisuna oorinni anireeqa noorindari mapamufufaqa Yisuna amooqiqa qiqau. Kuqaa anee Anutuna amaaku mariananoo qiqau.

*Keenesareeta maqannaasa auriraua andeeqannisanau.*

*(Mak 6:53-56)*

<sup>34</sup> Misa sipaki nammari dinni afainni taqakufaqa Keenesareete maqusai oonu raqau.

<sup>35</sup> Mi maqusaanaa fasiqauqa oonuree mina oori qafamaseeqa maafa auruaa andeeqee marifa qimaseeqa ufa quqasooofanoo maaqa maaqa maqusa maqusa ufa finau. Auri-marusa aiqama suqeeqeeqa Yisufunnai quqau.

<sup>36</sup> Aurimarusa misa anireeqa maasa moomoosa marida Yisufa sia maasa aiqama andeeqaisaandoora qamunna atikai amanee maasa kaqi auqaananoo aurirafa taikaannoo fee qufanoo Yisufa eedoo qimasooafaqa mina qamunna ati auqamasoosa aurirafa aiqama taikeenoo amiqi uqannammannisanau.

## 15

*Sia nisaauqirai narana noonara ufa kambiqanau.*  
(Mak 7:1-13)

<sup>1</sup> Farisai amaana qimarusa faqa Mooseena sandufa irimarusa faqa Yeerusareendari Yisufa maruqoo irammiriqau.

<sup>2</sup> Nanaree ani faiqi namu ooqeenasa faiqi firaasa sandufa rukiee fee sia narana nisaauqusee nee fee.

<sup>3</sup> Yisufa iriseenoo qimanniminau. Innee faqa nanaree Anutuna sandufa rukiasee fee inneeqa sandufa kai afeekaikidee.

<sup>4</sup> Anutufa maa sandufana quqanau. Inneeqa ninausa nikausara اساسamandee amiqidaqa misa nuqu uqeeraaqa. Kaifaa moo quqanau, faiqi moo fannoo nari anoona akoonara manda ufa qinanoo arusaina kuquannoo.

<sup>5</sup> Anutufa mifa miqi qimasoofaqa innee maaqi qimasee mi ufana moomau fimari-afanoo. Faiqi moo fannoo mina anoofa akoofa sarauida mandaikida amiqiannee qinna sandufanara doo qinee Anutuna amiseeqa sia ani amana amianauro. Miqi qimaria fasiqa anaaseesara innee doo andeeqaidammiafoo qimariafanoo mifa nari anoofa akoono sia dadaaqianifeera qidaqa aaqee mariafanoo.

<sup>6</sup> Miqi kai mandee fifau inniqa ufa fannoo Anutuna sandufa arimariafanoo.

<sup>7</sup> Innee kaqaqa ufa qimannimisaida maqandanai manda oosana maraqanuasa. Anutuna tamummaqara fasiqa Eesaia, kuqaa uqanna inniara qimasee akara rinau. Mifa maaqi qinau.

<sup>8</sup> Maa maqannaa fasiqa anaaseesa nifauru fannoo kai unnaqimasee qini duqu uqeereemariasa, nimuqusa kaqinni ubeekarusa mariafanoo.

<sup>9</sup> Misa faiqi qimaria sandufana qumaree unnaqimasee Anutuna sandufammifoo qimaseeqa faiqi anaasee naamuaqidaqa. Miqi qimasaidaqa Anutunara innaaru qifanoo siammiriannoo.

Tamummaqara fasiqa Eesaiaafa inniara miqi qimasee akara rinau.

*Nookiqari urimari mandufafa faiqi putaamma nimaqaidanoo.*  
(Mak 7:14-23)

<sup>10</sup> Miqi qimaseenoo Yisufa faiqi anaasee aiqama naaramaseenoo qimanniminau. Farisai amaana ufa qimariasa nari faiqi namuara sia nisaauqusee neeafoo qunara qimanniminau. Iriaqa, innee maa ufana oosana iriaqa.

<sup>11</sup> Nooki fimari naranainainafa sia faiqi putaamma nimaqaidanoo. Nooki qari urimari mandufafa mifa faiqi putaamma nimaqaidanoo.

<sup>12</sup> Miqi qimasoofaqa mina faiqi namu anireeqa qimamiqau. Sia fee iridanee. Farisai amaana ufa qimariasa misa ani ufa iriseeqa noori runidammia.

<sup>13</sup> Misa miqi qufanoo Yisufa qimanniminau. Aiqama ainaina innaarunai qikoofa sia ummaqu ainaina moo fannoo qummaquqaifanoo Anutufa rarakuannoo. Sia misara rufiaaqa, Anutufa rarakuannoo.

<sup>14</sup> Saina misa kaqi mariaqa. Misa nifu qimbarausa nisaadaki mariasa. Afu qimbarafa kai afu qimbarana asaadakinoo fifi inoo aiqamaqara kai madikaki aquffifaranoo.

<sup>15</sup> Peeteeroofa qinau. Maa quandara ufana qiannana qimaqiminaga irianauro.

<sup>16</sup> Yisufa iriseenoo qimaminau. Aneenna faqa irirana siai fee maridanee.

<sup>17</sup> Aiqama ainaina ooki quqasaananoo aranandaki ooqureenoo umiqaree fimarinaro sia fee iridanee.

<sup>18</sup> Aiqama ookiqari urimari mandufafa amuqusakiqari uridanoo. Mi mandufausa kai faiqi anaasee putaamma nimaqaidanoo. Mi ufanara qidaqa.

<sup>19-20</sup> Amuqusakiqari manda irirana faqa faiqi narirana faqa moona anaasee maree mariafa faqa maanaqa kumaara rarisee mariafa faqa ummuari mariafa faqa fifau akaru qimasee quandasee qimariafa faqa aqoonnanara mandufaqiranara faqa mifauqa kai faiqi putaamma nimaqaidanoo. Sia nisaaqumaseeqa narana neemariafa sia mifa faiqi anaasee putaamma nimaqaidanoo.

*Anaasee moo fannoo nari araamunara andeeqaqisaanifee qimaseenoo sandanainai qimarinau.*

(Mak 7:24-30)

<sup>21</sup> Yisufa miqooqari Taia maqa maaqa faqa Sidoonna maqa maaqa faqa marutinai finau.

<sup>22</sup> Miqooqari Kannaana maqannaa anaasee fannoo aanaamuru anaasee anireenoo Yisuna qimaminau. Anee Dafidina ati karaambaiqa mariananoo. Anee qiniara amuqusiiani. Qini qiraamuna ooqeena aakinoo marifaqa ooqeena fannoo maqee maqee qini qiraamuna mara furufari marifaqa aurirana amimarifaqa minara ani qimamidaqa.

<sup>23</sup> Yisufa iriseenoo sia irinoora foora kaqi finau. Mina faiqi namu anireeqa Yisuna fukifaaki qiqaau. Anee mina aqiqa maqee maqee mifa maasara faaqari marifanoo qikooqaidanoo.

<sup>24</sup> Misa maaqi qimasooфанoo Yisufa qimanniminau. Dapikamambiqa Isaraee maqanna sipsipara foora mariasa, misara kai dadaaqirara qumidaqa.

<sup>25</sup> Qimasooфанoo mi anaaseefa mina oorinni ani oqumarifufanoo qiki raqaida qimaminau. Karaambaiqa anee qini dadaaqia.

<sup>26</sup> Yisufa iriseenoo qimaminoo qinuu. Kamaa suqasee faiqiuqaindi nimirree qimasee sia quandaki faini nimia, sia mi oosanafa miqinoo maridanoo.

<sup>27</sup> Qimasooфанoo mi anaaseefa qinuu. Kuqaa qiananoo. Kuqaa ani dadaaqira ainaina Isaraee maqannaasaindi maridanoo. Kuqaa qinee moo maqannaasa fainiara foora maridaqa. Anee iria, faini fannoo nari akoofa kamaa naida kakasamasaina andaana suqunaidaga. Anee andaana kai qiminnanoo qini qiraamuna dadaaqiani.

<sup>28</sup> Yisufa mi ufana iriseenoo qimaminau. Imboo maa anaaseego Anee qinisaa irirana rusirana firaafa marianafa. Anee anaenna innainaina mifa kai kambiqaannoo. Miqi qimasooфанoo mi anaaseena araamuna mikari kai nianai marunnai ooqeena taikasooфанoo mi manaqafa amiqinoo marinuu.

*Yisufa moomoo auriraua andeeqannisanuu.*

<sup>29</sup> Yisufa miqooqari findimeeqeenoo Kariree nammari afaiqara ooru finoo aqanai akaranau. Akaramafufanoo oogu marinuu.

<sup>30</sup> Faiqi anaasee qafamasee moomoosa mina afaqee ooru fiqau. Misa niku arirutimarusa faqa misa nifu qimbarausa faqa niku eendiraua faqa sia ufa qusa faqa oosana oosana teeroomaree marusa faqa maree oorureeqa Yisuna aikusaqa quqasooфанoo mifa aiqama misa aurirana andeeqa taikannisanuu.

<sup>31</sup> Faiqi anaasee mina qafamaseeqa naaquqanuu. Sia ufa qusa ufa qufaqa niqafamaseeqa arirutimarusa nimarufaqa niqafamaseeqa nifu qimbarausa faqa nifu maqasooфаqa niqafamaseeqa maa faiqi anaaseesa ooqai mandaikimarusa maqee amiqiqa maridaqa misa niqafamaseeqa naaquqooфаqa misa aiqama Isaraee maqannaa Anutunara asasiqau.

*Faiqi anaasee kafa moomoosa narana nimanuu.*

*(Mak 8:1-10)*

<sup>32</sup> Yisufa nari faiqi namu naaramasee qimanniminuu. Qinee maa maria fasiqa anaaseesara qimuqusiifaqa narana sia marifaqa qaaramoo faasaana mariaasa. Qikoo misa fifau niqiqarara aanai kudoosaapee foora.

<sup>33</sup> Mina faiqinamuu iriseeqa qimamiqau. Yaqoo fee narana marinaqee misa nimianau-ree andandakinai marifaqa moomoosa marifaqa.

<sup>34</sup> Yisufa iriseenoo irammirinuu. Naquma feemu fee innee maqee idee qufaqa misa qiqaau. Qisauku dinni taikasee dinni ani qaaraqanda marasee feemu marifaqa noodaanna faqa kaqikaafa qaaraqanda marifaqa.

<sup>35</sup> Mifa iriseenoo faiqi anaasee aiqama maqasaa oqumariaqee qufaqa ooqu mariqau.

<sup>36</sup> Ooqu marifufanoo Yisufa feemu dinni qisauku taikaseenoo dinni ani qaaraqanda maraseenoo (7) mi feemuna faqa noondaana faqa maraseenoo Anutuna dufi dufi qimaseenoo ruqi ruqi maseenoo nari faiqi namu nisaukuki quqasooфаqa qumareeqa faiqi anaasee nimiqaau.

<sup>37</sup> Faiqi anaasee noofanoo nimuaquqinuu. Nimuaqumambufaqa Yisuna faiqi namu andaanauqa suqeeqee uqaki riqaau. Dinni qisauku taikasee dinni oonu qaara marasee uqa (7) qumbiqaqau.

<sup>38</sup> Faiqi neemarusaa ooni saqari auqiqa maqi tauseena (4,000) mariqau. Anaasee faqa faiqi faqa ootupamafufanoo meeraqoo marinuu.

<sup>39</sup> Yisufa misa niqiqamaseenoo sipaki keeqafinoo Makadana moo maqusanai finuu.

## 16

*Yisufa faiqi sia amana auqaaqaa ira ainainara qaoo qinuu.*

*(Mak 8:11-13; Ruk 12:54-56)*

<sup>1</sup> Farisai amaana ufa qimarusa faqa Sadikai amaana ufa irimarusa faqa misa Yisunara kuqaa Anutuna amaaku fee maridanoo fee qianeera uneemaana qimasee amanammasee

qafaaneera qiqau. Fira ainaina mookira ainaina innaarunaindaraa ainaina uqaqifiqasainaga qafamasee kuqaa aniara Anutuna faiqi fee qianauranoo.

<sup>2</sup> Yisufa minara iriseenoo qimanniminau. Eendifanoo innaaruna taatuqeendifaqa duna ufidaannoommifoo qidaqa qimariafanoo.

<sup>3</sup> Iqaqaiфанoo kananaana asukuna arifaqa aaku rirammifoo qimariafanoo. Innee innaaruna qafadaqa irimariafanoo maqee maa aukuanna qinee marunna aukuanne minna qafamasee sia irimariafanoo. Innee nanaree miqi qimariafaqee.

<sup>4</sup> Mandainaina mareemariasa faqa maqee maqee inneeqa Anutuna minnisee mariasa miqi mariasa innaarunaindaraa ainaina faiqi sia amanaiki maria ainaina auqamasee uqaqifiqainaga aniara kuqaa mindaraa fee qianauree qimariafanoo. Qinee fuka innaarunaindaraa ainaina sia uqannifiqaanaura. Nauraafa ooqai kuqu fasiqafa Yoonaanaindi mifa kai kaqi maridanoo mifa qaaramoo faasaana faqa qaaramoo eendaki faqa noodaanna firaana aranadaki marinau. Mi ufana qimaseenoo quqasee finau.

(Yisufa nari kuqufinoo qaaramoo eenda faqa faasaana faqa madikaki marianinnanara quandaseenoo miqi qinau.)

*Unna ufara manda ooruku anoonara foora eerairiaqa.*

*(Mak 8:14-21)*

<sup>5</sup> Yisufa nari faiqi namufaqa nammari faruma dinnafainni kanuqaki oonu raqau. Mina faiqi namu feemuara randoosia qiqau. Oo doo aunusee kaqi samu aniga.

<sup>6</sup> Miqi qimasoofanoo Yisufa qimanniminau. Innee Farisai amaana ufa qimariasa faqa Sadikai amaana ufa irimariasa faqa misa atiqee mari ooruku anoonara foora rufieeqa eerairiaqa.

<sup>7</sup> Misa iriseeqa nari qimami nari qimamimasee qiqau. Oo maasa feemuara randuannoo mifa ooruku anoonara qidaqinoo.

<sup>8</sup> Yisufa mi ufana iriseenoo qimanniminau. Innee qinisaa irirana rusirana sia amana maridanoo. Innee nanaree sia feemu maraanara nari qimami nari qimami qidee.

<sup>9</sup> Innee sia fee iridee. Moodaannai qisauku (5) feemu faqa faifa tauseena (5,000) fasiqa noonara, doo aunidee sia fee iridee. Mikari naquma ataraasa uqa fee riqau.

<sup>10</sup> Kafaa moo kari moodaannai qisauku taikasee dinni oonu qaaramarasee (7) feemu faqa maqi tauseena (4,000) fasiqa faqa noonara doo innee minna faqa aunidee sia fee iridee. Mikari naquma ataraasa uqa fee riqau.

<sup>11</sup> Innee nanaree sia qini oosannara iridee, sia qinee feemuara qunaqa. Farisai amaana ufa irimariasa faqa Sadikai amaana ufa qimariasa faqa misa manda oosannara rufiaaqee qimasee ooruku anoonara qiaqa.

<sup>12</sup> Misa mi ufana iriseeqa mi ufa oosanna doo naaqooki iriqau. Mifa sia ooruku anoonara eerairiranara qinau. Farisai amaana ufa qimariasa faqa Sadikai amaana ufa qimariasa faqa misa manda irirana uqannifiqaranara quandasee ooruku anoona kikiqa usinau.

*Peetooroofa Anutuna asauku mundiranara koorooinau.*

*(Mak 8:27-30; Ruk 9:18-21)*

<sup>13</sup> Yisufa Seeseeria Firipai maqa maaqaki oorureenoo nari faiqi namu irammirinau. Faiqi misa faiqi nimaaku qiniara nana fasiqee fee qidee.

<sup>14</sup> Misa iriseeqa qimamiqau. Moo fannoo aniara Yoohaneefa nammari nimimarufa kuqiranakiqari findifinoo marifa maridanoommifoo qidaqa. Moo fannoo tamummaqara fasiqa Eeriaa fee qidaqa. Moo fannoo tamummaqara fasiqa Yeerimaiaa fee qidaqa. Moo fannoo Anutuna tamummaqara fasiqauqakiqari moo fannoo fee qidaqa.

<sup>15-16</sup> Yisufa misa ufa iriseenoo quandafinoo nari faiqi namu irammannimaqanau. Innee qiniara yafasiqanee fee qidee qimasoofanoo Simoona moo auqu Peetooroofa Yisuna qimaminau. Anee ooqai Anutuna asauku mundirafa mariananoo anee kaqi marira Anutuna amaaku mariananoo.

<sup>17</sup> Yisufa iriseenoo nari qimaminau. Oo Simoona Yoonaana amarana amaaku, maqasaa fasiqa sia miqi qimasee ani qimamiaqini. Innaarunai qini qikoofa mifa kai ani aaqoosaa rinoo. Minara anee asasimarianafa mariananoo ani qimaminoo.

<sup>18</sup> Qinee ani qimamidaqa. Anee Peetooroofa ani auqu oosana oonifa mariananoo. Qini qikoofa qiniara uqafiqainasaa mi ufafa firaa ooniara foora marinara qinee mi firaa ooninasaa qini amaana maqa usakaanaura. Qini saqariki mariasa qumareeqa qeeqa amaana maqaikamandaanaura. Mi ooninasaa qini maaqa usakaanaura. Kuqirafa sia amana mi amaana maqana rafaqa fuannoo.

<sup>19</sup> Peetooroofa, qinee innaaruna kooqi atuasee keeqeemariana kiqa anoonara foora ani amianaura. Anee maa maqanasaa moo ainainara anee iriseenana mandaikammi ifoo

qinaqa qinee faqa innaarunna miqi kai iqa mandaikammiifoo qianauro. Anee amiqi ifoo qinaqa qinee faqa innaarunna miqi kai iqa amiqimmi ifoo qianauro.

<sup>20</sup> Miqi qimaseenoo Yisufa nari faiqinamu qimanniminau. Afeekaikamasee qumee uqannandaaga. Qinee ooqai Anutuna asaku mundira fasiqa marunasa minara sia moosa qimannimiaqa, kukeeqaaga.

*Yisufa nari kuquaninnanara kooroo inau.*  
(Mak 8:31-9:1; Ruk 9:22-27)

<sup>21</sup> Mikari oosarasee miqooqari nari kuquaninnanara qimannimi maree finau. Mifa Yeerusareenni ooru firanara faqa qimanniminau. Faiqi firaasa faqa amaana maqasaa rakisimarusa faqa Mooseena sandufa uqannifiqee marusa faqa misa fira dinee miqoo nari Yisuna amiranara qimanniminau. Kuqariranara faqa qaaramoo faasaana findi fuaninnanara faqa qimanniminau.

<sup>22</sup> Peetooroofa maa ufana iriseenoo Yisuna kaqinni mareeqee quqaseenoo aqooki qaoo qinoo qimaminau. Oo karaambaiqa, saa. Ani kuqiranara Anutufa qaoo qiannoo maa ainainausa siamma ani arifaranoo.

<sup>23</sup> Yisufa iriseenoo quandaseenoo Peetooroona qimaminau. Sadanna see maree fua, qinaaqianna aiqaree fua anisaa qikuamaki aqufuanoora. Anee sia Anutuna irirana maree marianafa, fifau faiqi irirana maree marianafa.

<sup>24</sup> Qinee aunirira saqarisaa kuqanaura. Faiqi anaasee moo fannoo qini iriranamau finafa miqi kai iannoo. Nari marira ainaina mai uturuqu quqaseenoo qiqa duqusaara qiqa ufasaara, qiqa daanna ramasee kaqi kuqariranaki keeqaani.

<sup>25</sup> Moo fannoo nari kaqi mariranara tatamaqianinafa nari kaqi marirana taikaannoo. Moo fannoo qiniara nari maaqoo marirana minnisainafa mifa nari kaqi marirana kasooqagee paquriannoo.

<sup>26</sup> Faiqi moo fannoo aiqama maqa maaqa nariara maraseenoo aiqama minaki mari ainaina nariara kai afapitee marifa kuqinoo nari aunduraindaraafa kuridiranaki finanoo nari uriqaraidanoo fee. Oo sia uqanna uriqaraidanoo. Kuqiranakiqari mi fasiqafa nana feefauru Anutuna amiseenoo kaifaa nari ainainannoo fee nari aunduraindaraana idakinaana kaifaa maraannoo fee. Sia amana maraannoo.

<sup>27</sup> Minara qinee faiqi nimaaku qumuanaura, qini qangiroo namufaqa qini qikoona kaaqa arenaranaki qumuanaura, aiqama faiqi anaasee misa saika auqee mariana akiaqara nimirara qumuanaura.

<sup>28</sup> Kuqaa anoona ufa qinee qimannimidaqa innikiqari faiqi qaaramoo sia kuqirai kaqi marifaqa qinee faiqi nimaaku qeeqa innaaruna ququsa uriqarara ququsa namufaqa inni nifusaa qumuanaura.

## 17

*Aaqanasaa Yisuna afaaqa mookinoo kaaqa qamaqinau.*  
(Mak 9:2-13; Ruk 9:28-36)

<sup>1</sup> Miqi qimaseenoo qisauku dinni taikaseenoo dinni oonu moodaa marasee faasaana taikaseenoo Yisufa Peetooroona faqa Yameesana faqa mina akaqa Yoohaneena faqa minamusa nifiqeenoo aaqanai nariaraa naadumai ooru fiqau.

<sup>2</sup> Miqoo misa ooru roofanoo Yisufa moo afaaqa amiqira afaaqa maranau mina afiri suaniara foora kaaqa amaqinau mina qamunna faqa eekara aruaqinau nifu qafoofanoo nifu faqa daroodaraa inau.

<sup>3</sup> Miqi masoofanoo ooqai taikaseeqa Anutuna faqa innaarunai maruqanda Mooseefa faqa Eeriaafa faqa akooqoo maqasaa misa nifusaa anireeqa Yisuna faqa ufa qiqa.

<sup>4</sup> Peetooroofa qafamasee Yisuna qimaminau. Karaambaiqa, dufi dufi anee maasa qifiqee adiafaa irannai mai uruananoo. Anee qinaqa kaqikaa uigaana maqa qaaramoo auquanaura. Anindi moo, Mooseenaindi moo, Eeriaanaindi moo.

<sup>5</sup> Peetooroofa kaqi qimarufanoo kaaqa qarana asuru fannoo aiqama rafaqa finau. Ufa moo, asurukiqari Yisunara qimanniminau. Maafa qini qiimaaku qini kaaqa minara qimuqusidanoo. Qini didirafa minasaa maridanoo, mina ufa iriaqa.

<sup>6</sup> Yisuna faiqi namu mi ufana iriseeqa kaaqa rufieeqa noorindari maqasaa aqufiqau.

<sup>7</sup> Maqasaa mapamiqa marufanoo Yisufa anireenoo asaku misasaa mundinoo qinau. Findi fuaqa sia rufiaqa.

<sup>8</sup> Miqi qufaqa misa kaqi kaaqoo uqerafufaqa murufi Yisuna kai qafaqau sia faiqi moo marinau.

<sup>9</sup> Misa miqooqari Yisuna saimbaqa aaqanaindari qumimarufanoo Yisufa maaqi qimasee afeekaikamasee qimanniminau. Innee aaqanasaa mee qafaa ainaina sia innee

moosa qimannimiaqa. Qinee faiqí nimaaku kuqiranakiqari findi fuañaqa miqoo kai qimannimiaqa.

<sup>10-11</sup> Miqí qimasoofaqa mina faiqí namu iraida qiqau. Maasa Mooseena sandufa uqannifiqee mariasa ooqeenaa tamummaqara fasiqauqa akara asaanarumasee moo fasiqara Eeriaana aanna ree marifa Anutuna asauku mundirana afunni aniannoo fee qidaqa. Misa yafasiqanaree miqí qidee qufanoo Yisufa qimanniminoo qinau. Misa kuqaa qidaqa. Eeriaana aanna ree marifa asauku mundirauusa qini qifunni aiqama ainaina andeeqaanifeera indaaru aniannoo.

<sup>12</sup> Qinee qimannimidaqa, iriaqa. Kuqaa Eeriaana aanna ree marifa qini qifunni doo aninoo. Aniroofaqa misa minara sia irirai nari iriranannai kai dapikamasoofanoo kuqinau. Miqí kai mandee qinee faiqí nimaaku kaqikaagoo misasaa farindamaki aqufuanaura.

<sup>13</sup> Miqí qimasoofaqa mina faiqí namu iriseeqa Yisufa Yoohaneefa nammari nimiranara Eeriaana kikiqa ususeenoo qidaqinoo qiqau.

*Yisufa qumureenoo kumaaraa aunduraki afaanna maruna afaqanau.*

*(Mak 9:14-29; Ruk 9:37-43a)*

<sup>14</sup> Misa aqaanaindari qumureeqa faiqí anaasee suqíqa maruqoo qumuroofanoo faiqí moo fannoo Yisuna oorinni rufaidanoo ani aqoori saunara finoo tootoonasaa oogu marifinoo qiki raqaidanoora foora Yisuna qimaminau.

<sup>15</sup> Oo karaambaiqa, qini qimaakuara amuqusinana dadaaqia. Mifa fuseenasana arimarifaqa amiqimmasee auri marifaqa. Maqee maqee kaqi idaki aqufidanoo maqee maqee nammariqi aqufidanoo.

<sup>16</sup> Qinee qeeqa qimaaku aqiqeeqa ani faiqí namu mariaqoo munusaunaqa sia amana misa mi aurirana taikaafaqa, minara ani qimamidaqa.

<sup>17</sup> Yisufa mina iriseenoo aiqamausa qimanniminau. Innee qini ufasaa irirana rusirafa siaisa mariafanoo kaaqa foomboo rimariasa mariafanoo. Qinee kisaaqasaa inniki marunaqa innee sia dauni irimariafaqa. Kisaaqasaa fee ubiqafi inni manda oosana ummaara maraqa fuanauree. See mi kumaaraana maree mai aniaqa qufaqa miqimmiqau.

<sup>18</sup> Yisufa mi afaannana aqiqoofanoo fufanoo mi kumaaraana mikari kai miqoo kai andeeqa aisanau.

<sup>19</sup> Yisuna faiqí namu kaqikaagoo marikiqa oonurandee gumee kai anireeqa Yisuna qimamiqau. Maasa nanaree afaanna aqiquaunanoo fee sia finoo fee.

<sup>20</sup> Yisufa qinau. Innee qinisaa irirana rusirafa kaqikaafa marinara kai miqiafanoo. Qinee kuqaa anoona ufa qimannimidaqa. Inneeqa irirana rusirafa maqana qaqaama miqirafa kaqikaafa marinaqau maa aqaannara qifanoofau meeqai fini. Innee miqí marifaqau aiqama ainaina amanammifoo qini.

*Yisufa kafia nari kuquaninnanara qimanniminau.*

*(Mak 9:30-32; Ruk 9:43b-45)*

<sup>22</sup> Yisuna faiqí namu Kariree maqa maaqai moodaarunna moodaasaa suqíqa maridaqa nimarufanoo Yisufa maaqi qimasee qimanniminau. Faiqí nisaukuara qinee faiqí nimaaku fuanaura.

<sup>23</sup> Misa qini kuqa darifaqa qaaramoo faasaana kaqi mariqa findi fuanaura. Miqí qimasoofaqa Yisuna faiqí namu minara oonumafi irufanoo nimuqusa mandaikinau.

*Amaana maqa takisa nimiriana noodaanna ookinaana marasee niminau.*

<sup>24-25</sup> Misa Kapeeranaumma maqusa oonuroofaqa amaana maqa takisa maree marusa misa Yisunara nisauruseeqa Peetooroofa maruqoo oonuree iraidaqa qiqau. Ani fraafa amaana maqa takisa sia fee aqidanoo fee qimasoofanoo Peetooroofa eeo aqidanoo qinau.

Miqí qimaseenoo kaqikaagoo maaqaki keeqoofanoo Yisufa mina moo auqu ramasee qimaminoo qinau. Simoona maa maqanasaaqaraasa misa oosana maaqimminoo maridanoo. Moo maqannaasa namuqaa afeekaikamasee narirarammasaida namuqaandi kai fee takisa maraida fee, nariní nari maqannaasaindi fee kai maraidee qufanoo Peetooroofa mina iriseenoo qinau.

<sup>26</sup> Namuqaandi kai maraidaqa. Nari maqannaasa uriqararauusa mariafanoo sia uqanna misaki maraidanoo.

Yisufa iriseenoo qinau. Kuqaa qiananoo, miqí marifaqa uriqararauusa niku nisauku nifaqa quqasee maridaqa. Maasa uriqararana Anutuna aiku asauku marunausa marida. Nanaree fifau Anutuna amaana maqa takisiaanaree.

<sup>27</sup> Sia niminaqa maasara noori runifoora. Saina anee tafa mara maree nammariqi ooquee aquseenana indaaruaqa noodaanna rarisamaseenana oo raqaseenana qafaa.



Moodaa munnimma minaki mariannoo. Anee qiniara faqa aneennara faqa mi munnimmana mareegeena amaana maqa takisa maree mariasa niminanoo ufa taikaani.

## 18

*Faiqi aanaaqiara maqi reendeenirafa innaaruna ququsaki uriqararafa mariannoo.*  
(Mak 9:33-37; Ruk 9:46-48)

<sup>1</sup> Mi aukuanna mina faiqi namu Yisufuqoo aniree irammirida qiqau. Innaaruna ququsaki yafee uriqararafa maridanoo fee.

<sup>2</sup> Mifa iriseenoo faiqi aanaaqi moo miqoo maruna aaroofanoo aniroofanoo mareegeenoo nari faiqi namu qambaana qugaseenoo qimannimau.

<sup>3</sup> Qinee kuqaa anoona ufa inni qimannimida. Innee sia oonu quandakinaqa sia kafaa aanaaqi aanaaqi kammafinaga innaaruna ququsaki sia fifaranoo.

<sup>4</sup> Moo fannoo nari kai maa kaqikaa faiqiara foora fifimandeenoo marinafa mifa innaaruna ququsaki uriqararafa mariannoo.

<sup>5</sup> Yafee moo fannoo qini ufara iriseenoo quandafinoo faiqi aanaaqi maaqaairana asammasee aqoondikinafa mina faqa qini faqa miqi kai inoo qiqoondikiannoo.

*Yisuna mandaaqa saannakinaana faiqi aanaaqi mandainainaki quqasainafa numoo mariannoo.*

(Mak 9:42-48; Ruk 17:1-2)

<sup>6</sup> Faiqi moo fannoo qinisaa atooqee mari kaqikaa faiqina mandoosana uqafiqainanoo mi faiqifa saamurinanoo, mi fasiqana mi mandoosanna uqafiqeemari fasiqana mina numoo uriqaranoo mariannoo mandainainaki maridanoo. Faasai mi fasiqafa ooni firaaatia qumareenoo nari anukaki ususeenoo nammariki aqufinoo nari kai nari arinoofau nari numoo oorudupinoo mariqini. Mi faiqi anaqina manda oosanna uqafiqainanoo mi numoofa firaafa mariannoo.

<sup>7</sup> Maa maqanasaa manda ainaina moomoo minaki mariannoo. Mi manda ainainna aukuaana aukuaana sia taikaanoo kaqi mariannoo, faiqi mara quqaidanoo. Minara numoo firaatia mari ifoo qidaqa qimudago qidaqa. Mandainaina oosana oonu rarisainafa mi fasiqanaki faqa firaaf numoo tia mari ifoo qidaqa. Minara qinee qimudago qidaqa.

<sup>8</sup> Ani asauku fannoo fee, aiku fannoo fee ani ani rarisameegeenoo manda oosanaki quqeamarinnana mina ateeqa aqua. Aiku asauku siainafa marira maqaki keeqafinana amana marinnaranoo. Aneenna aiku asaukuara amuqusinana kaqi manda oosana marasee mari inafa mifa naaruara marira idaki rafuseeqee aqusainafa sia amana marinnaranoo. Mandaikamminnaranoo.

<sup>9</sup> Ani afu aaqoo fannoo fee ani rarisameeqee manda oosanaki quqaidanoo fee mina diqi aqua. Anee moodaa afu aaqoo faqa kaqi mariranaki keeqarafa amana marinnaranoo. Aiqama afu aaqooqara kaqi maridanoo ani rafuseeqee idaki aqusainana sia andeeqeenaranoo. Mandaikamminnaranoo.

*Sipsipa aanaaqi auianoo mari quandara ufa.*

(Ruk 15:3-7)

<sup>10</sup> Innee aufariaqa. Sia uqanna faiqi aanaaqi moo fannoo maaqirafa akoo uqannaqaani. Innee mi oosannara eerairiaqa. Minara qimannimianaara. Innaaruna maqusai qangiroouqa maqasaaqaraa faiqi aanaaqi misa naadu naadu rakisinnimaqara qangiroouqa qini innaarunaindaraa qikoona oorisaa kikiqidaqa nari faiqi aanaaqi maa maqanasaaqaraasa rakisinnimaqaranara Anutuna qimamidaqa mina oorisaa maridaqa.

<sup>12</sup> Innee maaqianna ufana nana irarane irifaree. Faiqi moo mina sipsipa moomoo marida moodaanna qisauku fasiqa arusee marufanoo misakiqari moodaa kai auianau. Misasaa rakisi maru fasiqafa aiqama sipsipa anusaa suqu quqaseenoo misakiqari moodaa auianoo marunara randarara finau. Qinee kuqaa ufee qida fee. Kuqaa, aiqama sipsipasaa rakisi mari fasiqausa miqifaranoo.

<sup>13</sup> Mi fasiqafa mi sipsipana paqurimaseenoo kaaqa minara asasiannoo. Moomoo sia auianoo mariasara mana maniannoo.

<sup>14</sup> Miqi kai mandee qini innaarunai qikoofa faiqi aanaaqi moo kuridiranara akooqaidanoo. Aiqama uqanna kaqi naaruara mariranara innaarunai nikoofa aidi-danoo.

*Ani akaqaafasaa ani mandaikammamaqaina ufafa.*

<sup>15</sup> Ani aqoonafa ani mandaika mamaqainana anee mi finnai oonuree nari mandoosana qimamia. Inneeqara kai mariaqa sia moo fannoo mariani. Mifa ani ufa irisainana doo anee aneenna aqoonnana kafaa aqoondikina marinnaranoo.

<sup>16</sup> Mifa ani ufa sia irinana anee Mooseena sandufamau finana faiqí qaara fee moodaa fee nifigeenana aqoonna finnai fua. Misa maasa faqa ani mandainaina qafee fee qiaqeera, ani dadaaqiaqeera ani ufa anoonaikianifeera.

<sup>17</sup> Mifa misa ufa faqa sia irinana amaana maqaki keeqeemariasa qimannimiaga. Amaana maqaki keeqeemariasa ufa sia irifaqa aamina maqannaara foora mamaqaa sia mina faqa ufa qia, manda takisa maree maria fasiqasara foora fidiqaa mamaqa.

*Moo ainainara Anutunara innaaru qinanoo amiannoo.*

<sup>18</sup> Qinee anoona ufa inni qimannimidaqa. Innee maa maqanasaa moo ainainara iriseenana mandaikammiifoo qiafaqa qinee faqa innaarunai miqi kai iqa mandaikammiifoo qianaara. Innee amiqimmiifoo qiafaqa qinee faqa innaarunai miqi kai iqa amiqimmiifoo qianaara.

<sup>19</sup> Qinee kaifaa moo ufa qimannimidaqa. Qaara fasiqa maa maqanasaa maqasaaqaraa nana ainainaree moodaaqoo naundura quqasee irifanoo innaarunai qini qikoofa mi ainainna nimiannoo.

<sup>20</sup> Yai fee qaraqanda fee qararamoo fee qini duqara iriseeqa suqíqa misa qambaana qeeqa faqa qumee maridaqa inniki marida dadaaqianaara.

*Mandainainira faiqira quandara ufa.*

<sup>21</sup> Qimasoofanoo Peetooroofa anireenoo qinau. Oo karaambaiqa naquma kari fee qini qiqoonafa manda oosana qiminaqee mina akiaqara minnaisaanauree. Moodaa qisauku taikasee dinni oonu qaara marasee kari fee minnaisaanauree.

<sup>22</sup> Yisufa qimaminoo qinau. Sia moodaa qisauku taikasee dinni oonu qaara marasee kari fee qidaqa. Moodaa fasiqa aiku asauku taikasee moo fasiqa oonu moodaannai qisauku taikasee fasiqa aiku asauku miqumma kari aqoonnana manda oosana akiaqara minnaisaaneera qidaqa. Fiqaramasee moomoo kari minnaisaaneera qidaqa.

<sup>23</sup> Minara qinee moo ufa qimamianaara. Innaaruna maqusa maaqimminoo maridanoo. Fira rakisirafa moo marinau. Mi rakisirafa nari dadaaqi maru fasiqausa suqusee ufaasu nimiafanna munnimmana andeeqaanauree qimasee suqinau.

<sup>24</sup> Suqusee ireemarufanoo misakiqari moo fannoo nari karaambaiqa munnimma moomoo fiqaramasee nariara fira munnimma moomoo rafaafinau.

<sup>25</sup> Mi fasiqafa sia amana nari karaambaiqa amufanoo nari faiqi namu qimanniminau. Moosa mina anaqa faqa faiqi namufaqa nimisee innee minasaqaraa feefauru mareeqe qimiaga, mi munnimmana akiaqariani.

<sup>26</sup> Mi fasiqafa iriseenoo amuqusufanoo oorindari maqasaa rupaita mafufanoo qiki raqaidanoo iranau. Oo qini karaambaiqa, qiniara kasooinaqa qinee aiqama ani munnimma amianaara.

<sup>27</sup> Mina karaambaiqa iriseenoo amuqusufanoo mina aika tatuseenoo idukuseenoo quqaisanau.

<sup>28</sup> Mi dadaaqira fasiqafa raudamakufanoo maqusai ooqureenoo aqoonna dadaaqira fasiqa qafeenoo anukaki qumareenoo qinau. Qinee munnimma kaqikaana amiafannana kaqi kaqi mara qimia.

<sup>29-30</sup> Miqi qufanoo mina dadaaqimaru fasiqafa maqasaa aqufnoo reendeenamandee qinau. Oo qiniara kasoo inaqa qinee ani munnimma amianauree qimasoofanoo mina aqoonafa afeekaikamaseenoo mi fasiqana karafusaki quqanau. Qini kaqikaa munnimma qiminaqa idukuane qinau.

<sup>31</sup> Karafusaki quqasoofaqa mina aqoonausa qafoofanoo nimuqusa kaaqa mandaifuqa misa nari karaambaiqinnai oonuree aiqama mifa auqoo oosana oosana qimamiqau.

<sup>32</sup> Karaambaiqa fannoo iriseenoo mina dadaaqira fasiqa aaramaseenoo qimaminau. Anee manda dadaaqira fasiqa mariananoo. Anee qini reendeenamasee qima qimianaqa ani aika aiqama tatu aqíqa.

<sup>33</sup> Naqaa fee ifanee sia fee anee miqikai inana aneenna aqoonnanara amuqusinanee. Qinee aniara miqunandee iaqaana.

<sup>34</sup> Miqi qimaseenoo aranaqoofanoo arira maqaki quqasee qinau. Misa miqoo ani ariisaifana kaifaa qini fira munnimma qiminaqa idukuanaara.

<sup>35</sup> Yisufa mi ufana qimaseenoo nari faiqi namu maaqi qimasee qimanniminau. Innee faqa sia inneeqa niqoonausa inneeqa naundurannoo misa nikiqara mi aikana sia tatiqa aunifanoo qini innaarunai qikoofa faqa miqi kai inoo inni aika sia tatuannoo.

## 19

*Yisufa faiqí anaasee nariara nariara minnisaranara qimanniminau.  
(Mak 10:1-12)*

<sup>1</sup> Yisufa maa ufausa taikaseenoo Kariree maqa maaqa minniseenoo Yudeea maqa maaqai ooqu finoo Yooradanna nammari dinni afainni marinau.

<sup>2</sup> Miqoo oonu marufaqa faiqí anaasee moomoo afaqee oonu roofanoo misa aurirana taikannisanau.

<sup>3</sup> Farisai amaana ufa qimarusa misa miqoo anireeqa Yisuna ueeqasee amanammasee qafararee qimasee qimamiqa qiqau. Amanee faiqí fannoo oosana oosana ainainara qimaseenoo nari anaqa minnisaannoo fee, Mooseena sandufa rukiaseenoo fee miqiannoo fee.

<sup>4</sup> Yisufa iriseenoo qinau. Sia fee innee Mooseena akara asaanaridee. Oosana arooqooqari Anutufa oosana araseenoo misa auqinau. Faiqí faqa anaasee faqa oosaraseenoo auqinau. Sia fee innee mi akaranara iridee.

<sup>5</sup> Anutufa minara maaqi qinau, qinee oosana arooqooqari faiqí faqa anaasee faqa auquafannanara faiqí nari anoona akoona minnisee nari anaqa faqa moodaanakikianoo. Miqoo nariqa miqanda moodaa marifaranoo.

<sup>6</sup> Yisufa minara kaifaa qimanniminau. Miqanda sia qaaraqanda marifaqa moodaa amaqiara foora marifaranoo. Anutufa moodaanaki aquminafa sia uqanna faiqí idukuaqa.

<sup>7</sup> Farisai amaana ufa qimariasa mina iriseeqa qiqau. Mooseefa sandufa akara ruma quqaqoofa marida. Minnisara papiqa akara rumeeqee anaasee amisee aqiqaa. Mooseefa miqi qimaqaiwana Yisu anee naqi fee qidanee.

<sup>8</sup> Yisufa iriseenoo qinau. Inni irirana mandaikinara inni nimumusa sia amaqi marifa afeekaikinoo amatooki marinara minara kai Mooseefa akooqee marufanoo inneeqa ninaaqara minnisaqee qinau. Indaaru kuradoo aukuaana sia miqinoo marinau. Miqoo Anutufa miqandara apiqa mariaqee qinau.

<sup>9</sup> Qinee qimannimidaqa, faiqí yafee nari anaqa sia ummuarimari anaaseena andeegara anaasee kaqi minniseenoo moo anaasee marinafa, mi fasiqafa qumuarammidanoo.

<sup>10</sup> Mina faiqí namu aniree qimamidaqa qiqau. Faiqí anaasee miqiqa maridaqa amana faiqí nariqa kai maridaqa adeedaana mariaqaana. Maasa andeeqaidee sia fee andeeqaidee.

<sup>11</sup> Yisufa misa ufa iriseenoo qimanniminau. Faiqí aiqama maa inni ufa sia amana maraaqeera. Anutufa miqiannee qinausa misa kai adeedaana amana marifara, sia aiqama miqifaqa.

<sup>12</sup> Nifaandama itirausa misa maqookari kai nifaandama siaisa misa sia amana anaasee maraaqeera. Kaifaa akaqausa nifaandama itirausa faiqí kai nifaandama itinnimaqasoosa maridaqa. Misa faqa sia amana anaasee maraaqeera. Kaifaa anaasee siaisa moo, misa innaaruna maqusara kai irisee nariqa kai anaasee siaisa maridaqa. Andeeqasee marianauree qimasee Anutunara kai irisee miqidaqa. Misa faqa sia amana anaasee maraaqeera. Yafee mi sandufana amana marinafa mifa kai maraani.

*Yisufa faiqi aanaaqiuqa nifaaqooqa qinau.  
(Mak 10:13-16; Ruk 18:15-17)*

<sup>13-14</sup> Misa faiqí anaasee, nári faiqí aanaaqiuqa moomoo nifiqee Yisufuqoo aniqau. Yisunara mina asauku misasaa munduseenoo innaaru qianifeera nifiqee aniqau. Yisuna faiqí namu faiqí anaasee nári faiqí aanaaqi farafara qiaafoo qimasee niqiqamasoofanoo Yisufa qinau. Saifaqa maree aniaqa. Sia rafaqaqfunnisaaqa. Innaaruna maqusa miqirausaindi maridanoo.

<sup>15</sup> Miqi qimaseenoo nari asauku misasaa nikaqa munduseenoo nifaaqooqa qimaseenoo findimeeqeenoo moosaa finau.

*Ainainafaqaa kumaaraa innaaruna aanara iranau.  
(Mak 10:17-31; Ruk 18:18-30)*

<sup>16</sup> Faiqí moo fannoo Yisufinnai anireenoo qimamidanoo qinau. Qufasaa rakisirafa nana amiqira saika auqamamaqaananoo fee Anutufa innaarunai naaruara marirana qimiannoo fee.

<sup>17</sup> Yisufa iriseenoo qimaminau. Anee naqaa ifanee qiniara amiqira ainainara iraidanee. Moodaafa kai Anutufa mifa kai amiqirafa maridanoo. Sia moo amiqirafa maridanoo. Anee naaruara mariranaki keeqararee qidanee. Doo amana, anee Mooseena sandufa asaana rumasee mi mau kai fua.

<sup>18</sup> Miqi qimasoofanoo mi fasiqafa iraidanoo qinau. Nana sandufee maraanauree. Yisufa qimaminoo qinau. Innee sia kuqa naruqa, sia faiqi anaasee ummuariaqa, sia ainaina ummuariaqa sia kootaki moosara unna ufa qiaqa.

<sup>19</sup> Aneenna anoona akoona nuqu uqeeraidana nimuqusa idaaqammannisaa. Anee aneennara amuqusianandee kai inana aqoonausara amuqusiani.

<sup>20</sup> Mi kumaaraafa iriseenoo qinau. Anee qianandee mi sandufausa doo aiqama maraqaunaua maridaqa. Nana saika fee moo faqa qinee auqamasaanoo fee Anutufa naaruara marirana qimiannoo fee.

<sup>21</sup> Yisufa iriseenoo qimaminau. Anee innaarunai atisaa kai mariananoo. Anee aiqama maraanee qimaseenana aneenna qumiasana aiqama mara mareenana moo atinai nimiseenana feefauru maraseenana kudifasiqauqa nimisainanoo ani qumiasana ani afeesara innaarunai mariannoo. Miqinana doo ania, qini faqa fua.

<sup>22</sup> Mi kumaaraafa mi ufana iriseenoo oori akoogaamaseenoo finau. Nari ainaina moomoo marunara minara oonumafi iriseenoo oori akoogaamaseenoo finau.

<sup>23</sup> Mifa fifufanoo Yisufa nari faiqi namu maaqi qimasee qimanniminau. Kuqaa ufa anoona ufa qinee qimannimidaqa. Faiqi moo fannoo ainaina faqaafa innaaruna maqa maaqaki keeqaneera anuqinnara mammaqamminnaranoo.

<sup>24</sup> Qinee kafia qianaurea. Amanee qoosa fannoo uka aamarai keeqannoo fee. Sia amana fuannoo titiqiannoo. Doo miqi kai masee ainaina faqaa fasiqa innaaruna kooqiki keeqarara anuquannoo.

<sup>25</sup> Mina faiqi namu mi ufana iriqa tautiqa qiqau. Ani ufa miqinoo marinanoo fee, yafee moo fannoo amana innaarunnai ooru fuannoo fee sia amana fuannoo.

<sup>26</sup> Yisufa quandaftinoo misa nari nindafamasee qimanniminau. Faiqiki maa ainainnafa sia amana maridanoo. Anutufa aiqama ainaina amana marifa maridanoo.

<sup>27</sup> Peetooroofa iriseenoo qimaminoo qinau. Maasa qiqafa. Maasa aiqama ainaina quqasauana ani faqa fidaqa. Minara Anutufa nana ainainee maasa qimiannoo fee.

<sup>28</sup> Yisufa iriseenoo misa qimanniminau. Qinee kuqaa anoona ufa inni qimannimidaqa. Fuka maqa maaqa Anutufa kasooqaqee auqusainaqa qinee faiqi nimaaku qini firaa kaaqa qara ufirira qarisaa, qaari ufiqisee minasaa ooqu mari finaqa faiqi aanaaseesaa rakisi marianaqa innee qini faqa fimariasaa innee qisaukuqara taikasee qikunni ooqu qaara marasee nari ufirira qarisaa qini faqa ooqu mariffaranoo. Innee miqooqari Isaraee maqannaa qikunni ooqu qaara marasee oosana Yakooboona faiqi namu atikiqari kambiqarusa misa niku nisaukusaa rakisifaranoo.

<sup>29</sup> Yafee moo fannoo qini duqara iriseenoo nari maaqa faqa nari akaqaafasaaqqa faqa nari asooqmaaka faqa nari anoona akoona faqa nari faiqi faqa nari saqamainaina faqa aiqama minnisainaqa sia mina akiaqara kai amianaurea. Fifau faqa amianaurea innaarunai naaruara marirana faqa amianaurea.

<sup>30</sup> Moomoosa maqee uriqararusa mariasa misa innaarunnai ooruree ureeqarusa marifaranoo. Moomoosa maqee ureeqarusa mariasa misa innaarunai ooruree uriqararusa marifaranoo.

## 20

*Ainaina faqaafa afaaramaseenoo ainainira faiqiuqa nimu quandara ufana.*

<sup>1</sup> Minara Yisufa qimanniminau. Anufufa innaarunai mariasa maaqi qimasee rakisinnisaidanoo maaqoo uriqararusa miqoo ureeqarusa marifaranoo kafia maaqoo ureeqarusa miqoo uriqararusa marifaranoo. Qinee mina rakisira oosana ainaina faqaa fasiqa kikiqa usanaura. Iriaqa. Faiqi ainaina faqaafa moo fannoo faiqi uainna qaqama ummaqimaru fasiqafa moo fannoo nari uainna qaqama akuqanoo marufanoo iqaqoofanoo raudamafinoo maqusai qumureenoo nari uainna qaqama diqi marusara randanau. Moodaa suanisaa ainainimaru fasiqausara ufaasu ainainimariasara randanau. (Mi aukuanna misa oosana maaqimminoo marinau. Qaqama akuqamafufanoo mi ainainna akoofa kananaana maqusai oonureenoo akaqausa qimanniminau. Innee qini qaqama tiqi qimifaqa maqee faasaanara kai eendi marinaga moodaa faasaanara mi munnimmana kai nimianaurea.)

<sup>2</sup> Mi fasiqafa paqurimandeenoo ainainira fasiqauqa faqa ufaasu ainainimarinana akiqara mi munnimmanara ufa qimariqau. Ufa qiqiseeqa andeeqaseeqa doo nari ainaini marunnai niqiqoofaqa fiqau. Misa moodaa faasaana ainainiuna akiaqara moodaa munnimma deenariasee qimarusa minara andeeqaseeqa ainaini fiqau. Kananaana saarisufa namufaqa ainaini fimariqau.

<sup>3</sup> Suani kaqikaaqoo urureenoo keekooqufanoo ainaina faqaa fasiqa fannoo maqusai kafia oonureenoo nindafoofaqa faiqi moomoosa kai ooqu faaqee iqau.

<sup>4</sup> Nindafamaseenoo qimanniminau. Innee faqa qini uainna ququsaki fifaqa fafaa eenainaga inni ainainirana akiaqara kai nimianauro. Qimannimisoofaqa eedoo qimasee fiqau.

<sup>5</sup> Suani qambaana aiainaina faqaafa kaifaa maqusai oonureenoo akaqausa qimannimisoofaqa misa faqa ainainirannai fiqau. Suani afu muqunni mara ubeekoofanoo kafaa oonureenoo kaifaa miqi kai masee akaqausa qimannimisoofaqa misa faqa fiqau.

<sup>6</sup> Eenoofanoo mi fasiqafa kafaa maqusai oonuree nindafoofaqa faiqi akaqausa kaqi ooqufaagee marufanoo nindafeenoo qinau. Naqaa fee ifaqee innee kaqi kai maa faasaana mariafanoo, doo eeneenoommi.

<sup>7</sup> Misa iriseeqa qiaqu. Faiqi moo fannoo sia qifaqa maasa mareeqa kaqi maridaqa. Miqi qimamufanoo mifa misa faqa nari ainainai nifiqee finau.

<sup>8</sup> Eendufanoo mi fasiqafa nari rakisira fasiqa aaramaseenoo qinau. Anee maqee ainainiasa nifiqee miniseenana ainainiaana akiaqara feefauru nimia. Inaaqianna fimariasa misa indaaru nimia. Misa nifunni fimariasa misa ninaaqianna nimia. Kaifaa suani qambaanaikifaqa fuasa misa ninaaqianna nimia. Suani keekooqifaqa fuasa misa ninaaqianna nimia. Maqee iqaqifaqa fuasa misa ninaaqianna uqanna nimiaqee qimasoofofanoo miqimminau.

<sup>9</sup> Eeneemaru inaaqianna fuasa misa aniroofanoo deenariasa munnimma moodaa moodaa niminau. Miqi kai masee aiqamausa niminau.

<sup>10</sup> Maqee iqaqoo fimarusa mina qafamasee misa nariara firaqoo mararara qiaqu. Misa aniroofanoo rakisirafa moodaa deenariasa munnimma kai niminau.

<sup>11</sup> Misa maraseeqa noori runiqa naundaufa naundaufa qidaqiaqu.

<sup>12</sup> Maasa maqee iqaqifaqa oonu maridaqa ainaini marunanoo suani dari marifaqa kadaapiridaqa qidaqa. Minara maasa munnimma moomoo qimia. Eenee marifaqa fuasa misa ainaina imariana amana oonu dupimasee nimia.

<sup>13</sup> Ainaina faqaafa iriseenoo qimanniminau. Qini qigoonduqa sia qinee furufaramannisaida nimidaqa. Andeeqasee nimidaqa. Faasai kananaana innee faqa qinee faqa andeeqagaunaqa innee moodaa deenariasee qiana kai doo mina kai nimidaqa.

<sup>14</sup> Doo innee mina kai maraqa, inneeqaindi uqanna doo maree fuqa. Qinee indaaru maqee iqaqai fuasa faqa inaaqianna eeneemari fuasa faqa qeeqa kai irisee amana amana kai nimiqauna.

<sup>15</sup> Munnimma qinindi uqanna marifaqa nimidaqa. Sia moonaindifau. Qeeqa kai iriseeqa amana afaaramma nimaqaanura. Innee qini afaariranara minaree inni nikoo gaidanoo fee.

<sup>16</sup> Yisufa minara nari faiqi namu qimanniminau. Miqi kai masee Anutuna ququsaki indaaru fimariasa misa nari ainainirana akiaqara marasee ureeqarusara fooqiara marifaranoo. Ninaaqianna fimariasa miqi kai masee nari akiaqara mareefaranoo misa uriqararusara foora marifaranoo. Aiqamausa amana amana kai mareefaranoo.

*Yisufa qaaramookufanoo nari kuquaninnanara qimanniminau.*

*(Mak 10:32-34; Kuk 18:31-34)*

<sup>17</sup> Yisufa Yeerusaree maqusai oorufinau. Ooru fidanoo nari faiqi namu qisaukuqara taikasee qikunni ooqu qaara marasee faiqi namu faqa ooru finau. Faiqi anaasee aana ititafufanoo Yisufa nari faiqi namu nifiqeenoo faiqi anaasee irifoo qimaseenoo aanafaiqara fidanoo nari faiqi namu qimanniminau.

<sup>18</sup> Maqi qimasee qimanniminau. Innee iriaqa. Maasa Yeerusareenni ooru fidaqa, ooruranaanoo faiqi moo fannoo munnimma mamareenoo qiniara uqeeqasainaqa amaana maqasaa rakisirausa faqa Mooseena sandufa irimariasa faqa qini qumareefaranoo. Misa qini qumareeqee kuqiranaki quqaqimaqee faranoo.

<sup>19</sup> Misa qini qumareeqee Roomma maqannaasa kiapafa faqa nari sundiaqra faqa qini mara nimifara. Misa qiniara naanaidara qidaqa uteeti qidaqa qiniara amarau qidaqa raitasaa qainna ateesa rumbeeqoo samunannai amiqimandee daridaqa qifaqa radiqisai fanoo fidika qumuannoo. Miqimaseeqa misa qini mara maree aunirira saqarisaa quqaseeqa pirimma darusaifaqa kuqanura. Kuqiranaki qaaramoo faasaana mariqa doo findi fuanaura.

*Yameesa Yoohaneesa ninoofa Yisuna irammirinau.*

*(Mak 10:35-45)*

<sup>20</sup> Seebeedina amaakuqara Yameesa Yoohaneesa miqanda ninoofa Yisuna faqa fimarufanoo miqoo anireenoo asauridanoo reendeenidanoo kaqika ainainara qianeera qinau.

<sup>21</sup> Yisufa iriseenoo qinau. Nana ainainee ani amianauree qimasoofofanoo mi anaaseefa qinau. Amanee anee fira karaambaiqaikinana qini faiqiara mareeqeenana aneenna

aaqa moo fannoo dinni moo fannoo dinni quqasainaqara mi qanda ani faqa karaambaikaikiqa marifaqa mi qanda nuqu uqeeranoo mariani.

Miqi qimasooфанoo Yisufa maaqi qimaseenoo nari qimaminau.

<sup>22</sup> Anee iraannanara mi oosannara siammiri mariananoo minarammiridaqa.

Miqi qimaseenoo mi fasiqaqanda maaqi qimasee irammirinau. Qinee manda namari naannanara qiqa inneeqara faqa amanee namasee inneeqara qini faqa nipatara aupurefaree.

Mi qanda iriseeqa qiqa. Eedoo maa qanda amana naanaura.

<sup>23</sup> Yisufa iriseenoo qimanniminau. Kuqaa inneeqara qinee naanna nammarina neefaranoo minara qinee iridaqa. Qini daaqa quqannimaqee fandinnanara sia qini saika sia qinindi, qini qikoofa mifa kai mi ainaina faqaafa maridanoo. Kasooqagee qinee innaarunai karaambaikaikiqanaqa ya fasiqanaree qini qikoofa qini daaqa marianee qinafa mifa kai qini daaqa mariannoo. Ooqai qini qikoofa nari kai irisee qimaqoosa kai misa kai qini daaqa quqannimaqannoo.

<sup>24</sup> Qisaukuqara taikasee fasiqa kaqi marusa mi ufana irufanoo miqandara niraqanau.

<sup>25</sup> Yisufa minara iriseenoo aiqama naarama quqaseenoo qimanniminau. Anaamuru mariasa nari karaambaikaika nari aanoonnai kaiqeesa rakisinnimaqasaifaqa nari uriqararawsa amiqimmasee misa uriaaqarama nimaqaidaqa. Nari faiqi firaafa ufa nimisaifaqa sia auqaafanoo naridanoo. Ufa nimifaqa misa kaqi ainaina auqemariasa. Anaamuru mariasa miqimmida maridaqa.

<sup>26</sup> Inniki sia miqinoo marianifeera qidaqa. Yafasiqa fee inni karaambaikaikiraree qinafa mifa inni ainainira faiqi kamambinoo mariannoo.

<sup>27</sup> Yafasiqa fee inni uriqararafa mariraree qinafa mifa inni dadaaqira saika maree marinafa mariani.

<sup>28</sup> Innee qini daanna raaqa innee qini qiqaafaqa. Qinee faiqi nimaaku firaasa maridaqa, sia faiqi anaasee qini ainainamma qisaaqeerawu qumidau. Qinee inni ureeqarawsa inni ainainamma nimaqararee qimasee qumiqa. Qeeqa kuqiranannai moomoosa aaqarana akiqara idukiraree qimasee minara faqa qumiqa. Minara innee narinni narinni qini daanna raaqa.

*Yisufa qaaraqanda nifu qimbaraqanda andeeqannisanau.*

*(Mak 10:46-52; Ruk 18:35-43)*

<sup>29</sup> Misa Yeerikoo maqusakiqari findifufaqa Yeerusareenni ooru fimarufanoo faiqi anaasee moomoosa mina faqa fimarigaqa.

<sup>30</sup> Aana afainni qaara fasiqaqara nifu dimbaraqanda oogu faaqee marufanoo. Yisufa moomoosa faqa mi aatata fimarufaqa miqanda misa nikufa iriseeqa Yisunara faqa rumasee nameera qiqa. Oo, Dafidina ati marianafa maasa mandaikiqa marida maasara ani amuqusinana dadaaqa.

<sup>31</sup> Miqi qimasee faqa rumasee nameera qufaqa faiqi anaasee aiqama miqanda aanoo imasee nimambaina qimasee qaoo qiqa. Nimambaina qimasooфаqa miqanda siammiriqau firaqoo uqanna nameera qiqa. Oo Dafidina amaaku faiqi firaafa maasara ani amuqusinana dadaaqa.

<sup>32</sup> Yisufa misa maruqoo ooru kasoomafinoo iramma nimaqanau. Naqi fee innigara mannisaanauree.

<sup>33</sup> Qimasooфаqa miqanda qiqa. Faiqi firaafa anee maaqanda qifu maqannimia.

<sup>34</sup> Miqi qimasooфанoo Yisuna kaqa amuqusufanoo asauku nifusaa mundinuu. Mikari kai misa nifu maqasoofaqa miqanda Yisuna faqa fiqa.

## 21

*Yisufa doonkisa Yeerusaree maqasai ooru finuu.*

*(Mak 11:1-11; Ruk 19:28-40; Yoh 12:12-19)*

<sup>1</sup> Misa Yeerusaree maqusa adeedi ramasoofanoo kaqikaa maqusa moo auqu Beetapaisa mi maqasafa aqanasaa maridanoo, mi aaqanna auqu Oorifa aqana, miqoo oorureenoo nari faiqinamukiqari qaaraqanda naaramaseenoo qimanniminau.

<sup>2</sup> Inneeqara kaqikaa maqusaki oonureeqa muqutinai mi maqusanaki doonki maridanoo, nari aanaaqindiri maridanoo oonureeqara miqanda ninukaki sanda rumbaqoona idukuseeqa miqanda nifiqeeqa aniaqa.

<sup>3-4</sup> Faiqi moo fannoo inni irainaa maaqi qimasee qimamiaqa. Karaambaika maa doonkiqanda maraanee qifaqa maaqanda maraidaqa. Miqi qimasee qimamifanoo mifa maree fuaqee qiannoo. Mi ufana qufanoo ooqeenaa tamummaqara fasiqa ufa anoona kambiaanifeera miqi qinuu.

<sup>5</sup> Mi tamummaqara fasiqafa ooqai Yisufa sia marukamuqoo maaqi qimasee papiqaki akara rinau.

Sioonna maqusanaasa maa ufana qimannimiaqa. Inni karaambaiga innee iannai uridanoommi. Reendeenamasee doonkisa uridanoommi doonki aanaaqi akoonasaa ooqu marifinoo uridanoommi.

Tamummaqara fasiqa akara miqimminoo maridanoo.

<sup>6</sup> Yisuna faiqigara Yisufa qimaqoo doonkina nari faiqi faqa nifiqee Yisuffinai fiqau.

<sup>7</sup> Nifiqee munusoofaqa nári qamunna doonki aanaaqi ataufakaqa ufiqisoofanoo Yisufa minasaa oqumarifufanoo Yeerusareenni ooru finau.

<sup>8</sup> Faiqi anaasee nári karaambaiga miqi mandaida anianinna oosana marasee misa qamunna qumareeqa aatata ufiqimarufaqa akaqausa saqari asaana amanee namufaqaana ateeka ufiqi maree fiqau. Doonki fannoo mi mau fuanifeera miqiqau.

<sup>9</sup> Faiqi anaasee moomoo indaarufanoo aanaaqiana anufanoo mifa qambaanambinau. Misa aiqama Yisunara fifi faaqariqa kaanina mareeqa maaqi qimasee idi ramamaqaaqau. Anee Dafidina ati marianafa Anutufa ani amiqi amiqimaisaani. Anutufa qufanoo animarifa Anutufa ani amiqi amiqiani. Innaarunai marinausa faqa ani amiqi amiqiaqa. Miqimmamareenoo Yeerusaree maqusaki Yisufa ooru keeqanau.

<sup>10-11</sup> Yisufa Yeerusaree maqusai ooruroofaqa faiqi anaasee mi maqannaasa tutuqida qiqau. Maana yafee qufaqa mina faqa ooru fusa qiqau, ooqeenaa akara tamummaqara fasiqa maanara qinau maana mifa maridanoo. Mina auqu Yisufa Nasaretee maqusaindaraa fasiqa maridanoo. Nasaretee maqusai Kariree maqa maaqaki marifa maridanoo.

*Amaana maqaki keeqafinoo mandainainauqa niqiqanau.*

*(Mak 11:15-19; Ruk 19:45-48; Yoh 2:13-22)*

<sup>12</sup> Yisufa Yeerusareenni oorureenoo Yeerusaree firaama maqaki keeqanau. Keeqafufanoo aiqamai aiquginau. Ainaina nimidaqa feefauru maree marusa faqa munnimma nimidaqa ainaina maree marusa faqa Yisufa nindafa masee aiqama rapatutu meegeenoo nifaqasoofaqa fiqau. Kaqi munnimma qumareeqee amaana maqasaa munnimma kafia nimimarusaa Yisufa misa nindafamaseenoo misa qainda munnimma namufaqa teeqimma quqanau. Anutuna qaindasaa tatufira nakipuruna mini nimisaida munnimma maree marusa faqa misa ainaina faqa teeqimma quqanau. <sup>13</sup> Miqidanoo maaqi qimasee qimanniminau, ooqeenaa ufa maa amaana maqanara Anutufa maaqi qimasee akara rumaqoofa maridanoo. Qini maaqa faiqi anaasee qiniara innaaruqira maqa marianifee qimaqoofa maridanoo. Anutufa miqi qimaqoofaqa innee ummuarira maaqa aannandaafanoo innaaru qira maaqa mara quandeeqee ummuarira maqaikamandaafanoo.

<sup>14</sup> Yisufa amaana maqaki kaqi marufaqa nifu dimbarausa faqa naununu apirirausa faqa Yisufa maruqoo aniree marufanoo nifu maqanniseenoo niku andeeqannimaqeenoo imarinau.

<sup>15</sup> Miqi marufaqa faiqiuqaindi anikeeqafufaqa Yisunara maaqi qimasee idi raqau. Dafidina ati Anutu anee amiqi amiqimmanda.

<sup>16</sup> Amaana maqasaa rakisi marusa misa Yisuna qafoofanoo, faiqi anaasee amiqi amiqimmanniseenoo faiqiuqaindi idi ramamaqoofanoo minara irufanoo niranaganau. Niranagoofaqa Yisuna qimamida qiqau. Anee maa idina iridane, sia fee iridane. Miqi qufanoo Yisufa iriseenoo nariqa qimanniminau. Eeoo qinee iridaqa, ooqeenaa akara ufa sia fee innee faqa iridee. Mifa maaqi qinau.

Anee faiqi aanaaqiuqa nári nimariasa faqa sakasee mariasa faqa nári nookiqari anoona nimooqira ufa uridanoo.

Sia fee innee mi ufana iridee.

<sup>17</sup> Mifa miqi qimaseenoo misa faqa Yeerusaree maqusa faqa minniseenoo Beetani maqusai ooqu faiganau.

*Yisufa faafisa fooqaa saqari aqufanoo aadanusinau.*

*(Mak 11:12-14,20-24)*

<sup>18</sup> Iqaqoofanoo aatata ooqurandee kafia Yeerusaree maqusai urimarufanoo aaranau.

<sup>19</sup> Aararooofanoo aana afainni saqari misa nee maria saqari faafisa fooqaana qafamaseenoo qaqamara randoofanoo sia marinau, amanee kai marinau. Qafamaseenoo fifau saqari maaqi qimasee aqinai. Naaru naaru siamma anisaa qaqaama iraani. Miqi qufanoo mikari kai mi saqarifa aadanusinau.

<sup>20</sup> Mina faiqinamu mina qafamasoofanoo naquqoofaqa qiqau. Naqi fee mandee kaqi kaqi mandee aadanusinoo fee.

<sup>21</sup> Yisufa minara iriseenoo qimanniminau. Qinee anoona ufa inni qimannimidaqa. Innee Anutunasaa irirana rusiseeqa minara moodaa irirafa marinaqa innee sia oonumafi irifanoo sia qaara irirafa marinanoo, maa faafisana qunnandee kai iqa innee faqa miqi kai ifaranoo firaa ainaina faqa innee miqifaranoo. Maa firaa aaqana oorifa aaqanara faqa qifanoo uqeerakinanoo ooruku nammariki aqufuanoo.

<sup>22</sup> Kaifaa anee nanainanaree Anutunara iraidanee anee aneenna irirana Anutunasaa rusisainafa marinana anee moo ainainara innaaru qinanoo mifa mi ainainna kai ani amiannoo.

*Yisunara yafee ani aqiqaenoo fee qimasee irammirinau.*

*(Mak 11:27-33; Ruk 20:1-8)*

<sup>23</sup> Miqi qimannimiseenoo mifa Yeerusareenni ooru finau. Oorureenoo amaana maqaki kaffaa keeqanau. Keeqafinoo faiqi anaasee qimannimimarufanoo amaana maqasaa rakisimarusa faqa Yuda maqannaasa faiqi firaasa faqa anireeqa maaqi qimasee quandasee Yisuna irammiriqau. Ya fasiqa fee aniara qifanee maasa ainaina maa amaana maqanakinaa teeqi taaqi maqi nanee. Yafee ani dadaaqifanee anee faiqi anaasee faqa andeeqannimaqaidanee.

<sup>24</sup> Misa miqi qimasoofanoo Yisufa nariqa qimanniminau. Qinee inni moodaa ufa iraanaga innee mina oosana qimaqimifaqa qinee faqa innee qini iraanara qini diqiqoo oosanara inni qimannimianauro.

<sup>25</sup> Yisufa maaqi qimasee irammannaqanau. Yoohaneefa nammari nimimarufa faiqi anaasee moomoo rumannimaqarana Anutuna ufamau fee rumannimaqeenoo fee faiqi moo ufamau fee rumannimaqeenoo fee innee minara nanee fee qidee.

Misa minara quandaufafa Yisunara iriandoo qimasee naundaindari nari qimami nari qimami qiqau. Maasa Yoohaneena nammari nimiranara Anutuna ufamau fimaru fee qifanoo Yisufa maasara nanaree innee mina iriaqaanna sia iriqau. Miqi qiandoo.

<sup>26</sup> Kaffaa maasa Yoohaneena nammari nimimari fasiqanara faiqi ufamau fimaru fee qianaqa faiqi anaasee afeeka ufa maasa qimiqa darifoora, Yoohaneenara Anutuna kuqaa tamummaqara fasiqee qimariasa mariafaqa maasa darifoora.

<sup>27</sup> Misa miqi qimaseeqa quandasee akooqoo Yisuna qimamiqa qiqau. Sia maasa ani irarufa iridaqa. Yisufa minara iriseenoo qimanniminau. Qinee iraanunara sia innee kooroomasee qini qimaqimiafaqa qinee faqa innee iraanara qini diqiqoonara sia kooroomasee inni qimannimianauro.

*Faiqi moo mina amaakuqandara quandarufa.*

<sup>28-29</sup> Yisufa maa ufana kaffaa faiqi firaasa faqa amaana maqasaa rakisimarusa faqa quandasee qimanniminau. Qinee moo ufa inni qimannimianaqa innee irisee mi oosanna qini qimaqimiaqa. Faiqi moo marinau, mina amaaku qaaraqanda mariqau. Mi fasiqafa nari amaaku indaarugaa faiqi qimaminau. Qini uainna qaqama afuqaki aqufinana ainaina qimasoofanoo indaarugaa faiqi fannoo qaoo qimaseenoo minnisee mariufanoo kaffaa oonumafi iriseenoo doo ainainai finau.

<sup>30</sup> Mina akoofa qufanoo qaoo qufanoo quandaufanoo inaaqianaa faiqi qimaminau. Anee fua, ainainai fua. Miqi qufanoo mifa eedoo kai qimasee aanai oonureenoo oonumafi iriseenoo minnisanau.

<sup>31</sup> Mi fasiqaqanda indaarugaa fee inaaqianaa fee nari nikoona ufa aindusinoos fee qifaqa qinee irianauro.

Misa iriseeqa qiqau. Indaarugaafa mifa nari akoona ufa aindusinau innaaqianaafa sia aindusinau.

Yisufa minara iriseenoo maaqi qimasee misara akooqoo qimanniminau. Miqi kaim-maseeqa kaaqa faiqi maraqanua anaaseesa faqa ummuarira takisa munnimma maree mariasa faqa misaqa Anutuna ufara eedoo qimasaidaqa inni indaaru kamannisee Anutuna ququsaki keeqaidaqa.

<sup>32</sup> Yoohaneefa nammari nimimarufa inniara amaana maqasaa rakisirausara inniqa mandainaina ninaaqiannai quqasee nimeesuqusee noori Anutufinnai noori ubeekaqa. Yoohaneefa miqi qimaseenoo inni qimannimisoofaqa innee siamma iriafanoo ummuarira takisa munnimma maree mariasa faqa kaaqa faiqi maraqanua anaaseesa faqa misa kaimma Yoohaneena ufa irisee Anutufinnai quandaqifaqa andeeqasee fiqau. Kaifaa innee amaana maqasaa rakisirausa misa andeeqasee fuana nikooqafaqa Anutufinnai noori ubeekaranara qaoo qimasee mina ufara nikooqafaqa inneeqa qimaqaamau kai fimariafanoo.

*Uainna qaqamasaa ufaasu rakisimariasa quandara ufa.*

*(Mak 12:1-12; Ruk 20:9-19)*



<sup>33</sup> Yisufa mi ufana qimannimiseenoo kafaa moo ufa quandafufanoo maaqi qimasee qimanniminau.

(Yisufa nariqa munnimma maree maru saikanara irisee uainna sanda ummaqirana kikiqa ususeenoo nari arifandinnanara qimanniminau. Maaqoo maasa sia uainna saikara iridaqa. Maasa munnimma maree maria saikafa koofi kai marinara Yisuna uainna kikiqira ufara maasa quandasee koofi kikiqa usuanaura.)

Yisufa qimanniminoo qinau. Iriaqa, faiqi moo fannoo ainainafaqaafa ququsa auquseenoo koofi asumu ummaquseenoo nari oosana maraseenoo koofi qambaana qainda afeeka meeraqoo sandaaqai auquseenoo minni maridanoo ummuarira fasiqara kaasau aanda uainnara rakisiaqera qainda auqinai. Koofi nammaruqi maria difaani firaana faqa auqinai. Koofi innooqafufanoo mina akoofa rakisira fasiqausa qufaasu niminoo qinai. Innee qini koofisaa rakisiqisee marifaqa qinee qambaana oosusaanaqa innee dindanai rafarisee nimiseeqa ooni maraqa dindanai rafarisee nimiseeqa ooni mara qini qimaqaaqa qinee moosaa fuanauree qimasee moosaa finau.

<sup>34</sup> Aiqama koofi anoona mafufanoo ainaina akoofa nianaindari nari ainainira faiqiuqa niqiqeenoo qinai. Innee ooquree qini oosukinaa koofi qini oondaraana tiqisee maree mini qimiaqa.

<sup>35</sup> Mina ainainira faiqiuqa ooquroofaqa ququsasaa rakisimarusa mandoosana marasee misa nariqau. Moo saamu samu ariqau moo ooni samu ariqau moo kuqa ariqau.

<sup>36</sup> Ainaina akoofa minara iriseenoo moomoo niqiqamasee qimanniminai. Innee ooqu qini oondaraa koofi itiqimaree mini qimiaqa qufaqa misa ooquroofaqa kaifaa narinau.

<sup>37-38</sup> Koofi akoofa naqi fee masee qianaqee qini koofi marefaree minara irusiano. Inaaqiana uqanna nari amaaku uqannara iriseenoo qimaminai. Anee ooqu maree mini qimia. Misa aniara rufaaqera qimasoofoanoo mina amaaku ooqu roofaqa ququsasaa rakisimarufa faqa mina aiku asaku faqa mina amaaku qafamasee qiqau. Maafa maa koofina akoona amaaku anireenoo marai mina faqa kuqarusaa, fafaa mifa maa maqana maraandoora mina arusee maasa kai maraanaura.

<sup>39</sup> Misa miqi qimaseeqa mi faiqina qumareeqa rariseeqa aqoosai munusee kuqamma ariqau. Yisufa nari arifandinnanara qidanoo koofi akoona amaakuara qinoo.

<sup>40</sup> Yisufa mi ufana qimannimiseenoo amaana maqasaa rakisirausa irammirinoo qinai. Ququsa akoofa miqoo ooqurainna kari naqi fee masee ainainira rakisirausara iannoo fee.

<sup>41</sup> Misa minara iriseeqa qiqau. Mifa qumureenoo mi fasiqausa rairai qimannimi-aqeenoo aanoo imannimaqeenoo kuqannaruannoo. Kafaa randaseenoo moo amiqira fasiqa mara quqasainanoo mifa ququsasaa andeeqasee rakisiannoo. Qaqama ireenoo akuqainna kari, ququsa akoofa nari oosaaqaraanara nari qinoo maramamee mini qimia qinanoo tiqisee mara maree munu amiannoo.

<sup>42</sup> Misa miqi qimasoofoanoo Yisufa mina iriseenoo misa nari arifandinnanara iriseenoo kafaa quandaseenoo nariqa qimanniminai. Ooqeenaa akara maaqi qimasee qimaqoofa marida.

Faandaamura auqi maria fasiqausa sabeena moo marasee qafamasee mandaikira fee qimasee minnisagau, moo faandaamura auqimarusa mi sabeenna kai mara maree amiqira fee qimaseeqa faandaamura afeekaikamma umaraaninnana rakiqau. Boo qafaqa, Anutufa amiqira ainaina auquseenoo.

Ooqeenaa akara miqimminoo maridanoo sia fee innee asaana ridee. Doo aunidee.

<sup>43</sup> Miqi kai inoo Anutufa nari ququsa inni Isaraee maqannaakinaana mara maree moo maqannaaki quqasaifaga mi maqannaasa amiqimmasee Anutuna ufamau fifaranoo. [ <sup>44</sup> Maa ufana 44 gusa kamu sia ooqeenaa papiqaki marunara sia maaqoo akara riqau.]

<sup>45-46</sup> Amaana maqasaa rakisimarusa faqa Farisai amaana ufa irimarusa faqa iriseeqa maasara quandaiddanoommifoo qimaseeqa niranaqee marufaqa Yisunara rumbara ufa qimariqau. Faiqi anaasee moomoosa mina aqa marufaqa misa minara Anutuna tamummaqara fasiqa maridanoo maasa minara rumbaanaqa faiqi anaasee maasa diqiaq tutuqi foora. Miqi qimasee minnisee sia Yisuna rumbaqa.

## 22

*Faiqi uriqararafa nari amaaku amundara qoomaqa quandara ufa.*

*(Ruk 14:15-24)*

<sup>1</sup> Yisufa kafaa faiqi anaasee qimanniminai. Quandara ufa kai maaqi qimasee qimanniminai.

<sup>2</sup> Anutufa nari ququsakinaasara maaqi qimasee rakisidanoo. Firaq karaambaiga moo kikiqa usuanaura. Mi firaq karaambaigafa mina amaaku amundararee qimasee firaq qoomaqa suqanau.

<sup>3</sup> Suqaseenoo narí faiqi namu niqigeenoo qinau. Maqusa maqusa fifainiqa eenda qimannimunausa nifiqee minisaifaqa narana naaqa. Qimasooafaqa fifainiqa. Faiqi oonu naaramasoofaqa misa qaoo qimasee minnisaqau.

<sup>4</sup> Karaambaiqa fannoo mina iriseenoo kafaa akaqausa niqigeenoo qinau. Eenda qimannimunausa innee oonu nifiqaqa. Narana faqa oosana oosana aandau faqa oonidakinaana faqa doo aiqaqa. Kaqi kaqi iaqa. Doo aiqama deedaqinoo maridanoo.

<sup>5</sup> Qimannimunausa maqusa maqusa mariasa qimannimisoofaqa iriseeqa naanaidara qimasee minnisaqau. Moo fannoo narí ainainnai finau. Moo fannoo narí burimakau ququsa auqiraree qimasee finau. Moo fannoo narí situaqai finau.

<sup>6</sup> Moo maqusanaasa mina faiqinamu saamu samu nariqau, manda oosana nimiqau, kuqa nariqau.

<sup>7</sup> Karaambaiqa fannoo minara iriseenoo narí faiqi namu maaqi qimasee qimannim-inau. Innee findifuaqa, maqusa maqusa qini faiqi namu narimariasa aiqama naru taikasee misa maaqa idaraaqa miqi qufaqa misa miqimmigau.

<sup>8</sup> Miqimasee aniroofanoo karaambaiqa qimannimunau. Amundarana qoomaqa deedaqinoo marida. Faiqi anaasee qinee indaaruu naaramaanaqa misa oosana sia andeeqanoo marifaqa sia ania.

<sup>9</sup> Doo innee kaifaa fuuqa. Aana kindooraki mariasa faqa aana fimariasa faqa uigaana mariasa eenda sia qimannimunausa kai nifiqee aniaqa.

<sup>10</sup> Mina faiqi namu minara iriseeqa faiqira randarara fifainiqa. Amiqirausa faqa mandaikirausa faqa paqurinausa misa nifiqee aniaqa. Miqi qufaqa misa fiqau. Miqi kai iqa karaambaiqa maqusai faiqi anaasee qumbiaqa mariqau. (Mi aukuanu amundara qoomaqa sakaseenoo amundara qamunna kooqikinaana maraseenoo nimufaqa afisusee keeqafufaqa neemariqau.)

<sup>11</sup> Faiqi anaasee mi qoomaqanaki ooqu marifufanoo karaambaiqa fannoo anireenoo faiqi anaasee nimandanoo fidanoo oonu qafooofanoo moo fannoo sia karaambaiqa qamunna afisirafa kooqisaa amu qamunna sia afisirafa kaqi ooqu marinau.

<sup>12</sup> Oonurama qafeenoo qinau. Qini qiqoondi, naqi fee ifanee sia qinee qamunna kooqiki qamunna amunnana sia afis inanee. Naqi fee ifanee sia amundara qamunna afis inanee. Nanaree fifau ooqu marinanee. Miqi qufanoo mi fasiqafa kaqi kasoomafinau, sia ufa qinau.

<sup>13</sup> Minara karaambaiqa fannoo qafamaseenoo aranaqoofanoo quandafinoo narí faiqi namu qimanniminau. Innee sanda qumaree maana aiku asauku rumbbeeqee aqoosai asukunai aquaqa. Aqoosai minni asukunai aquusaifanoo minni ooqumaridanoo iki riqaidanoo afai riqidanoo aupuraidanoo mariani. Aiqaqa aqoosai mariasa miqi kaimnidaqa.

<sup>14</sup> Yisufa mi ufana maaqi qimasee rafaqaqafinoo qinau. Anutufa moomoo naaramasaifaqa. Misa aniraifanoo Anutufa misakinaana moodaa kai moodaa kai nariara maraidanoo. Moomoosa sia amanaikidaqa.

*Takisa munnimma kaamanna nimira ufa.*

*(Mak 12:13-17; Ruk 20:20-26)*

<sup>15</sup> Yisufa mi ufana faiqi anaasee qimannimisoofaqa Farisai amaana ufa irimarusu narí faiqi namu naaramaseeqa suqu quqaseenoo Yisuna rumbara ufa maaqi qimasee oonumafi irimariqau. Maasa irarufara fuseemmasee umaraanaura, oosana oosana ufara mina irammirifanoo mifa moo kaqikaa ufa manda ufa qinaqa doo miqoo tautumandee rumbaanauree qiqau.

<sup>16</sup> Miqi qimaseeqa misa nári faiqi namu faqa Eeroodeena aqoondi mariasa faqa moodaanaki Yisufinnai oonu reeqa unna qimasee amiqira aqoondiaru foora mafufaqa noori quqasee reendeenamaseeqa maaqi qimasee irammiriqau. Oo ufasaa rakisirafa, anee andeeqara ufa qimarianafa, sia unnufa qimarianafa anee sia moonara amiqira fee qimasee amiqira ufa qimamianafa, sia moonara mandaikira fee qimasee mandufa qimamianafa, aiqamaqara anona ufa kai qimannimarianafa andeeqarafa mariananoo.

<sup>17</sup> Maasa iraanana anee iriseenana mina oosana maasa qimaqimia. Maasa maqee maqee Roomma maqanna kaamanna takisa munnimma amimarunausa maridaqa. Maasa miqidaqa Mooseena sandufa rukiwidee sia fee rukiwidee.

<sup>18</sup> Misa Yisuna ufa iriseeqa mina rumbaaneera qufanoo Yisufa narí faasai misa mandoosana iriseenoo maaqi qimasee niqinoo qinau. Innee qaara ufa qimariasa mariafanoo mandaiki mariasa mariafanoo. Faiqi anaasee innee naamua qimasee quandafi mandoosana maree mariasa mariafanoo. Innee nanaree fifau qini qifusaa itaidee qinee inni nindafaida.

<sup>19</sup> Inneeqa takisa munnimma mini qini qimifaqa qafaa. Miqi qimasooafaq misa takisa munnimma marasee amiqau.

<sup>20</sup> Misa takisa munnimma amufanoo Yisufa mi munnimmana maraseenoo amiqi maseenoo aiqumaseenoo qinau. Maanasaa yana oori amanee maridanoo fee. Yana auqu fee mina amana ameemaana akara rinoo maridanoo fee qufaqa misa qiqau.

<sup>21</sup> Roomma maqannaa rakisirafa mina auqu Sisa mina amana faqa mina auqu faqa maridanoo. Miqi qufanoo Yisufa qimannimau. Doo Sisaana auqu minasaa akara rinoo marinara minaindi uqanna maridanoo doo narí ainaina doo narí amiaqa amisee quandaifiqa Anutuna ainaina doo mina faqa narí amiaqa.

<sup>22</sup> Miqi qufaqa misa tautumaseeqa mi ufana oosnara randasee quqasee fiqau.

*Kuqiranakiqari findifuanninanara iraqau.*

*(Mak 12:18-27; Ruk 20:27-40)*

<sup>23</sup> Mi faasaanna Sadikai amaana ufa irimarusa anireeqa Yisuna irammiriqau. Misa maaqi qimasee qimarusa. Faiqi kuqidanoo sia minakiqari findifidanoo, akundamasaafanoo doo minaki taikaidanoo. Sadikai amaana ufa irimarusa miqiqa marunara maaqi qimasee Yisuna irammiriqau.

<sup>24</sup> Oo maasa uqannifiqara fasiqa. Mooseefa maaqi qimasee faiqiara akara rinau. Faiqi moo fannoo faiqi sia maqarai kuqinanoo mina akaqa fannoo mina anaqa maraannoo. Maraseenoo minasaa faiqi maqasainafa findifinoo indaarugaa akoono qumiasana maraseenoo mina maqa maaqaki fuannoo. Mooseefa miqimmasee maasara akara rumaqoono maridanoo anee minara irinaqa maasa moo ufa ani qimamianaara.

<sup>25</sup> Faiqi moo fannoo qisauku dinni taikasee dinni oonu qaara marasee faiqi namu maqasoofanoo indaarugaafa innooqafinoo aanaaseesaa amundasooofanoo sia faiqi maqarai kuqinau. Kuqufufanoo mina aanaaqianaafa mi anaaseena kai kafaa maranau.

<sup>26</sup> Mifa faqa mi anaaseena maraseenoo sia faiqi maqarai kuqinau. Kuqufufanoo misa ninaaqianaafa mi anaaseena kai maraseenoo sia faiqi maqarai kuqinau. Miqi kai inoo fifufanoo faiqi qisauku dinni aiqama taikasee dinni oonu qaara maraseenoo mi anaaseenasaa sia faiqi maqarai kuqinau.

<sup>27</sup> Kuqufanoo mi anaaseefa faqa kuqinau.

<sup>28</sup> Aiqaama fasiqa anaasee kuqiranakiqari findifira aukuaana findiffanoo mi fasiqausa faqa mi anaaseefa faqa findifinanoo yana aanaaqee mariannoo fee. Qisauku dinni taikasee dinni oonu qaara marasee mi anaaseena maroosa mariqau. Yana aanaaqee mi anaaseefa mariannoo fee.

<sup>29</sup> Yisufa mi ufana iriseenoo niqidanoo qimannimau. Innee Sadikai amaana ufa irimariasa aaqee mariafanoo. Innee ooqeenaa tamummaqarusa akarakinaa ufa faqa Anutuna afeeka faqa sia irisaidaga aaqee mariafanoo.

<sup>30</sup> Aiqaama findiffandinna aukuaana findifiqa faiqi afaqa faqa anaasee afaqa faqa taikaannoo aiqamaqara amanamana kai qangiroora foora kai afeeka marifaranoo. Qangirooqaa sia faiqi faqa anaasee faqara foora marifaranoo mookiraua idaaqiraua maridaqa faiqi anaasee kuqufiqa innaarunai oorureeqa qangiroora foora mafiqa sia amana narí maree narí maree ifaranoo.

(Ooqai Abarahaafa faqa Isakeefa faqa Yakooboofa faqa maa maqanasaa maru kamuqoo Anutuna ufamau fimarunara Anutufa nariara minamusara Anutusee qinau. Minamusa kuqufiqa findifiqa doo Anutuna faqa innaarunnai ooru mariqau. Innaarunai Anutuna faqa kisaagasaa marikufanoo Anutuna tamummaqara fasiqa moo fannoo Anutuna ufa minamusara quna iriseenoo akara rinoo qinau. Qinee minamusa Anutusa maridaqee qinau.)

<sup>31</sup> Yisufa mi tamummaqarana aufakiana iriseenoo Sadikai amaana ufa qimariasa kaifaa maaqi qimaseenoo qimanniminoo qinau. Innee aaqamasee kuqiranakiqari sia findifiraree qiasa. Minara Anutufa inni qimannimiqoono sia fee innee mi akarana asaana rida fee.

<sup>32</sup> Mifa kuqufusa findifi mina faqa marianara maaqi qinau. Qinee Abarahaana faqa Isakeena faqa Yakooboona faqa misa Anutusa qinee marunaua maridaqa. Anutufa sia ooqai misa maaqoo maru kamuqoo misa Anutusa mariafannaqee qinau. Ooqai kuqufusa doo findifiqa Anutuna faqa maqee marianara mi ufana misa Anutusa marunaua maridaqee qinau. Minara Abarahaana faqa Isakeena faqa Yakooboona faqa sia misara kuqiqa mariaafoo qiaqa. Kaqi Anutuna faqa innaarunai maridammiafoo qiaqa. Anutufa sia kuqiraua Anutufa maridanoo. Kaqi mariasa misa Anutufa maridanoo. Innee minara sia fee asaana rumasee irida fee.

<sup>33</sup> Minara faiqi moomoosa iriseeqa mi ufanara anoona ufa fee qimasooofanoo naaquqanau.

*Aiqama sandufakiqari uriqarara sandufa kooroo inau.*

*(Mak 12:28-34; Ruk 10:25-28)*

<sup>34</sup> Yisufa Sadikai amaana ufa irimarusa ufa arusoofaqa Farisai amaana ufa irimarusa minara iriseeqa minara ufa suquseeqa anireeqa Yisuna irammiraneeqe qiqau.

<sup>35</sup> Misakiqari sandufa oosana irimaru fasiqafa anireenoo Yisuna amanammasee qafaa-nee qimasee ufa quqanau.

<sup>36</sup> Faiqi uqannifiqee marianna fasiqafa, Mooseena sandufa oosana oosana maridanoo. Nana sandufafee aiqama sandufa narusee urinaaqaranoo maridanoo fee.

<sup>37</sup> Yisufa iriseenoo qinau. Uriqarara ufa maaqaamminoo maridanoo. Inni faakana Anutufa innee minara inneeqa nimuqusa nimana irirana mudukannoo minara nidinaqa minara ruaqa.

<sup>38</sup> Mi ufafa aiqamufausa urinaaqaranoo maridanoo.

<sup>39</sup> Mina aanaaqiana mina fooqaafa maaqimminoo maridanoo. Innee inneeqa nipatasaa amiqimmasee rakisidaqa rimariafanoo doo innee miqi kai iqa niqoonausara faqa rakisidaqa ruaqanani.

<sup>40</sup> Mi ufaqandasaa aiqama ufa oosana oosana mi qandasaa mundidanoo. Ooqai Mooseena sandufa faqa Anutuna tamummaqarasa ufa faqa mi qandasaa faakana fooqaafa maridanoo mi qandasaa mundinoo maridanoo.

*Asauku mundirafa Dafidina ati marunara qimanniminau.*

*(Mak 12:35-37; Ruk 20:41-44)*

<sup>41</sup> Farisai amaana ufa irimarusa miqoo suqiqa marufanoo, Yisufa misa nikiaaqa maa ufana qinau.

<sup>42</sup> Ooqai asauku mundiranara innee minara nanee fee qida fee. Yana ati fee qidee. Miqi qimasoofaqa misa qiqau.

<sup>43</sup> Dafidina ati fee qidaqa qufanoo Yisufa iriseenoo quandafinoo misa qimanniminoo qinau. Innee kuqaa Dafidinara Anutuna tamummaqara fasiqa fee qimariafanoo Anutuna maraquina fannoo Dafidina aakufufanoo maaqi qimasee akara rinau.

<sup>44</sup> Anutufa maaqi qimasee qini karaambaiqa qimaminau. Anee qini Anutusa qisauku uqannai qini daaqa ooqumarifi marinaqa qinee ani namuqaauqa naru taikaseeqa ani aramandunna quqasaanana maria. Miqi qimasee Dafidifa akara rinau.

<sup>45</sup> Yisufa mi ufana qimannimiseenoo kaifaa maaqi qimasee irammirinai, Dafidifa Anutuna asauku mundiranara qini karaambaiqa fee qunara naqimmasee asauku mundirafa moodaanaki Dafidina karaambaiqa faqa mina ati faqa mariannoo. Dafidifa andeeqaidanoo fee innee fee andeeqaidaqee aiqamaqara innee andeeqaidee.

<sup>46</sup> Yisufa mi ufana qimannimufaqa sia mi ufana ati raqeeqee nari qimamiqau. Miqooqari nisaurusee sia kaifaa moo ufa Yisunara irammiriqau.

## 23

*Mooseena sandufa akoofasauqa mandoosanara eerairiaqee qinau.*

*(Mak 12:38-39; Ruk 11:43,46; 20:45-46)*

<sup>1</sup> Miqi gukari Yisufa nari faiqi namufaqa faiqi anaasee moomoo faqa maaqi qimasee qimanniminai.

<sup>2-3</sup> Mooseena sandufa akoofasauqa faqa Farisai amaana ufa qimarusa faqa Mooseena sandufa qimannimiranara qutaqaama nimaqarasa marida. Innee minara misa ufa amiqimandee iriseeqa mi mau kai andeeqasee fidaqa misa iandee kai sia iaqa. Misa nookiqari faiqi anaasee aana quqannifiqaidaqa quandafi moomau fimariana mi mau innee sia fuafa.

<sup>4</sup> Farisai amaana ufa qimariasaa faqa Mooseena sandufa akoofasauqa faqa misa amus-ufa moomoo fira qumaarara fooqiara arapeeda arueeqeenoo faiqi anaasee nimidanoo nariara sia kaqikaqqoo nari nisauku amukannoo dadaaqidaqa misa iandee innee sia miqi iaqa.

(Mi aukunna Isaraee maqannaasa Mooseena sandufamau fidaqa qisaqaqamara foora ususeeqa minaki Mooseena sandufa papiqasaa akara rumasee ummauruara foora ususee nuaqee imariqau. Nariqa qamunna atisaa faqa faakasaa peepeenaana auquandee masee usuqirasa nimariqau. Kaqiqaesa faqa aiqamausa faqa miqimandee nimariqau. Farisai amaana ufa qimarusa firaatia auqusee qiqafaqee qimasee qisaqaqamasaa faqa qamunnaasaa faqa firaatia auqu uqirasa nimariqau. Miqi marunara Yisufa maaqi qimasee niqinoo qinai.)

<sup>5</sup> Misa faiqi aiqamausa nifusaa aiqama ainaina auqaidanoo fifau tasimiramandaida auqaidaqa. Qisaqaqama firaana ususee Mooseena sandufa akara minaki usuqirasa nidaqa qamunna kisaqaqamaseeqa faiqi nifusaa tasimiramandaida fidaqa.

<sup>6</sup> Faiqí qoomaqa sakasee naidaqa Mooseena sandufa akoofasauqa faqa Farisai amaana ufa qimariasa faqa misa amiqira qoo kai ooqu marifidaqa naidaqa. Amaana maqaki faqa amiqira qoo kai faiqí nifusaa ooqu maridaqa faiqí anaasee qiqaafaqee qimasee miqimmidaga.

<sup>7</sup> Faiqí anaasee suqidaqa makeeti marunakina narí anufaqa uqera qafeeqa, Oo maasa faiqí firaafa anee fee anidanee miqi qufanoo narí fifau sumoo summidanoo. Misa aatata fidaqa maqusa maqusa nimarufaqa faiqí misa nindafeeqa, oo maasa ufasaa rakisirafa misa miqi qunara kaaqa nidufaqa اساسميداqa. Misa iandee innee sia miqi iaqa.

<sup>8</sup> Faiqí anaasee inniara maasa uqannifiqara fasiqa fee qiqaqa qaoo qimasee qiqaqa. Innisaimbaqa amanamana kai maridee qiqaqa ooreeqarusa nikaqaafasaa kai maridee qiqaqa. Anutufa kai innisaimbaqa uqannifiqara fasiqa maridanoo fee qiqaqa.

<sup>9</sup> Miqi kai iqa sia maqasaaqaraasara qikoo fee qimasee nimandaqa. Innaarunai Anutunara innisaimbaqa aiqamausa qikoo fee kai qiqaqa. Miqiqqa innee amanaiqa kaimmifaranoo.

<sup>10</sup> Inni saimbaqaki sia moonara karaambaqee qiqaqa minara minnisaqa. Inni karaambaqa moodaa Anutuna asauku mundirafa mifa kai maridanoo.

<sup>11</sup> Moo fannoo inniki uriqararafa marinafa narí kai eedoo qimaseenoo misa dadaqiqa ainainira fasiqa marianoo.

<sup>12</sup> Faiqí anaasee náriara uriqararausee qimariasa Anutufa misa farindamaki saamuriqa nisaauriranaki quqaannoo. Faiqí anaasee nariara oorudupirausee qimariasa misa faakanaikamma nimaqaannoo.

*Mooseena sandufa akoofasauqa aaraikira ufa oosanara niqinau.  
(Mak 12:40; Ruk 11:39-42,44,52; 20:47)*

<sup>13</sup> Yisufa kaifaa misa qimannimino qinau. Innee Farisai amaana ufa qimariasa faqa innee Mooseena sandufa akoofasauqa faqa inni narirafa firaafa marinara qinee oonumafi iriqa qimudago qidaqa. Innee faiqí amaana ufa qimannimisaidaga maqandanai inneeqa kaqi ummuari mariasa. Faiqí anaasee akaqausa innaaruna ququsaki keeqarariafaqa innee rafaqaqafunnimaqaida innee faqa sia keeqefaranoo.

<sup>15</sup> Inni narirana firaafa marinara minara qinee firaqqoo qimudago qidaqa. Innee amaana ufa qimannimisaidaga maqandanai mandainaina oosana oosana maree mariana. Innee mandoosana maree mariasa. Innee maqusa maqusa faiqira randaidaga inni ufa iriaqaainnana mina paqurimasee inneeqa ufa oosana qimamisafanoo irinoo mi fasiqana mandoosana inni mandoosana uraaqaranoo maridanoo.

<sup>16</sup> Nifu dimbarausa maasa aana quqannifiqee marunausee qimasee innee faqa nifu dimbarausa kai mariafanoo. Inni narirana firaafa marinara inniara firaqqoo qimudago qidaqa. Innee maaqi qimasee aqamasee qimariasa. Faiqí moo fannoo narí amana Yeerusaree amaana maqasaa qimasee aqiqaqamasee moo ainaina auqararee qinafa mifa fifau ufa fee qimasee, siamma auqaannoo. Innee minara aqee mariafanoo. Faiqí moo fannoo narí amana amaana maqaki kooro marinanaki aqiqaqamasee moo ainaina auqararee qinafa kooro uriqarara ainaina marifaqee qimasee kaqi auqaannoo, sia minnisaannoo. Minara faqa innee aqee maqi qimariasa.

<sup>17</sup> Innee nifu qimbarausa maridaqa furufari mariafanoo. Innee amaana maqakinaa koorara uriqarara ainanee qimariafa aqee mariafanoo. Kooro fee amaana maqa fee uriqararafa maridanoo fee. Amaana maqa naaquqara amaana maqa marinara fifau kooro minaki marifa naaquqarafa maridanoo. Anee amaana maqasaa qimasee aneenna amana aqiqaqinafa kaqi auqa naaquqarafa amaana maqa maridanoo.

<sup>18</sup> Innee kaifaa maaqi qimasee aqamasee qimariasa. Faiqí moo fannoo amaana maqakinaa qaindasaa qimasee narí amana aqiqaqamasee moo ainainara auqararee qinafa kaqi fifau dapi qainda fee qimasee sia auqaannoo. Faiqí moo fannoo amaana maqakinaa qaindasaa quqeeamarinanaki narí amana aqiqaqamasee moo ainaina auqararee qinafa kuqaa mi ainainna auqaannoo. Innee miqi qidaqa aqee mariafanoo.

<sup>19</sup> Innee nifu dimbarausa naqqoo nifu furufarirausa miqi qimariafanoo. Qini ufa iriaqa. Nana ainanee uriqararafa maridanoo fee qainda fee minasaa Anutuna amianinna ainaina quqeeamaria fee uriqararafa maridanoo fee. Innee qaindasaa Anutuna amida quqee mari ainainara uriqarara fee qimariana aqee mariafanoo. Qainda naaquqara ainaina marinara minasaa quqee mari ainainafa faqa naaquqaidanoo. Minara qainda uriqararafa maridanoo. Anee amaana maqakinaa qaindasaa aneenna amana aqiqaqamasee moo ainaina auqararee qinanoo mifa kuqaa ani afaqa rumbasaannoo. Innee aqaqaida sia rumbaidanoo fee qimariafanoo.

<sup>20</sup> Faiqí moo fannoo amaana maqakinaa qaindasaa narí amana aqíqainafa sia fifau qaindara kai qidanoo. Aiqama ainaina qaindasaa marinnanara faqa minara faqa qidanoo.

<sup>21</sup> Faiqí moo fannoo Yeerusaree amaana maqaki narí amana aqíqainafa sia fifau amaana maqara kaifau qidanoofau. Mi amaana maqanaki marifa Anutunara faqa qidanoo.

<sup>22</sup> Faiqí moo fannoo innaarunai narí amana aqíqeemarinafa sia innaarunaira kai qidanoo. Anutuna maqusa maridanoo. Miqoo Anutufa karaambaiqa qaari ufiqiraqoo ooqu marifi maridanoo naaquqara maqusa maridanoo, sia fifau maqusa Anutufa narí mari maqusafa maridanoo.

<sup>23</sup> Innee Mooseena sandufa akoofasauqa faqa Farisai amaana ufa qimariasa faqa inni Anutufa narirana firaanara qinee qimudaoo qimannimaqaidafa. Innee faiqí anaasee uqannifiqaidafa kafa quandaifi maqandanai mareemariasa. Innee inneeqa qafuqakinaana oosana adiafaaira ainaina, kaqikaa fifau ainaina maqee maqee raineegee ati Anutuna amimariasa, innee mi kaqikaa ainannara fifau munari minarida, firaa ainaina Mooseena sandufakinaa anoona ainaina innee minnisaidafa. Andeeqara oosanara faqa faiqí aanaaseera nimudaoo qira oosana faqa anoona ufa kai qira oosanara faqa mi firaa akooqooqaraa ainannana innee minnisaidafa. Innee mi firaa ainannatia namufaqa iaqaana, kaqikaa ainaina namufaqa iaqaana.

<sup>24</sup> Innee nifu dimbarausa nisauku qumaree aana uqannifiqaidée qimariasa, innee faqa nifu dimbarausa mariafanoo. Innee kaqikaa fifau ainainara fifau munari minaridaqa nammariki nunuka fooqaafa marifaqa naandoo qimasee mara aquseeqa kaifaa quandaifi faqa firaa ainaina akooqoo ainaina qoosara foora firaa aandaui tia sia irirai kaqi nambiqee mariasa.

<sup>25</sup> Farisai amaana ufa qimariasa faqa Mooseena sandufa akoofasauqa faqa inni Anutuna narirana firaafa marifaqa minara qinee inniara qimudaoo qidaqa. Inni marirana kaafara foora maridanoo, innee kaafara foora adisaa kai findaukarausa aunduraki madaapee usirausa mariafanoo. Innee faiqí nariranannai misa ainaina maree mariafanoo. Innee inneeqa fanandiranannai minannai inneeqara kaaqa moomoo ainaina afaqa usimarianara inni naunduraki madaapee usirausa mariafanoo.

<sup>26</sup> Farisai amaana ufa qimariasa nifu dimbarausa kai mariafanoo. Innee naaree kaafa aunduraira foora findaukamasee mariaqaana. Miqi qimasai faqau aiqama kaafa aundura faqa adisaa faqa findaukarausa mariaqaana. Innee sia miqifa faqa.

<sup>27</sup> Farisai amaana ufa qimariasa faqa Mooseena sandufa akoofasauqa faqa inni narirana firaafa marifaqa qinee inniara qimudaoo qidaqa. Innee faiqí madikara fooqaana mariafanoo aunirira saqariara fooqaana apatasaa amiqira qumisa akusaafaqa faiqí misa mina qafamasee boo amiqira fee qidaqa. Innee miqi mariafanoo faiqí nifusaa amiqirausa mariafanoo inni naundura madikaki faiqí putaainoo nimudaani fannoo mandaikinoo maridanoo, kudi makirana oosana oosana inniki maridanoo.

<sup>28</sup> Innee miqirausa mariafaqa faiqí inni niqafamasee maasauqa andeeqarausa mari-dammiafoo qidaqa inneeqa naundurai sia qafee mariafanoo, naunduraki putaainoo maridanoo, maqandanai maree maria oosana faqa ufa rukiarana oosana faqa doo afai raqaramminoo maridanoo.

*Mooseena sandufa akoofasauqa naruaninnanara koorooinau.  
(Ruk 11:47-51)*

<sup>29</sup> Farisai amaana ufa qimariasa faqa papiqa akara rimariasa faqa inni narirana firaafa maridanoo minara qinee inniara qimudaoo qidaqa. Inni nikaaku nikaaku nisaifaqausa Anutuna tamummaqara fasiqauqa narusee nikundaqau. Kaifaa innee misa faiqí namu quandaifi faqa misa madikamaqoosa rukiseeqa qumisa qumaree saqarisaa fee onisaa fee maqee maqee akusee amiqimariafanoo. Innee akidaqa maaqi qimasee qimariafanoo.

<sup>30</sup> Maasa qikeeku qikaaku maru aukuaana maridaqau sia maasa tamummaqara fasiqa naruafanaiqini misa fidika sia mariqini.

<sup>31</sup> Oo innee miqi qidaqa inneeqa nikaaku Anutuna tamummaqara faiqí nariusa misa faiqinamu maridee qimariafanoo.

<sup>32</sup> Doo amana, inneeqa nikaaku nikaaku naanna raaqanani. Misa maroo mandainaina innee firaanaika masaqaanani.

<sup>33</sup> Innee sakani faiqí namu mariafanoo ukadiqa faiqí namu mariafanoo Anutufa inni idaki aqiraree qinoo. Innee naqi fee masee umbaqaki fifaree. Sia amana miqifaranoo.

<sup>34-35</sup> Yisufa kafa Farisai amaana ufa qimarusa qimanniminau. Qinee tamummaqara fasiqauqa faqa Anutuna ufa irimariasa faqa Anutuna ufa uqannifiqeemariasa faqa qinee marunannai mariasa innee iannai niqiaanaura. Innee misa nindafamaseeqa

akaqausa aunirira saqarisaa narifaranoo. Akaqausa innee inni amaana maqaki raitasaa qainna ateeekasaida rumbeeqoo samunannai nitaufakaaqa nariisaifanoo fidika radiqinoo qumuannoo. Akaqausa maqusa maqusa nifaqasaifaqa sandeefaranoo misa fidika faqa inni nikeeku nikaaku narusa misa fidika faqa inniki marianifeera, oogai indaarua Abeerana fidika fifau kaqinni adianau. Miqooqari anidanoo moomoosa fidika fifausaqa adianoo ani ifanoo Seekariaafa Barakiana amaaku Yeerusaree amaana maqaki Anutuna naaqqqara oosirana dinni marufanoo dinni qainda marufanoo, mi qambaana fifau arusoofanoo kuqinau. Mi kamusaqa fidika moomoo fifau adianoo maridanoo.

<sup>36</sup> Mi fidikafa inniki kai mariannoo inni nikeeku nikaaku nisaifaqausa misa maru kamuqoo numoo fifau faiqi nariu numoofa innee maa kamu saqa mariasaki mi numoofa inniki qumaara ramafuannoo.

*Yisufa Yeerusaree maqannaasara amuqusimarinau.*  
(Ruk 13:34-35)

<sup>37</sup> Oo Yeerusaree Yeerusaree firaa maqusa aniki mariasa Anutuna tamummaqara fasiqauqa narusa mariafanoo. Anutufa faiqi faiqi niqiqoosa ooni saamu narimarusa. Moomoo kari sia asaanarida qinee kookooraanara fooqiara qiqoosa qairisee Yeerusa-reenni faiqi namu mafi sakaanee runaqa misa rukiee mariasa.

<sup>38</sup> Doo mina akiaqara kasooqaqee inniqa maqusa faqa amaana maqa faqa sia faiqi mari maqa maqafa naakundu maqa maqafa mariannoo.

<sup>39</sup> Innee qini ufa iriaqa. Doo sia kafa qini qiqafeefaranoo. Innee naaru kasooqaqee qiniara, Oo amiqirafa Anutunakinaafa maasaki qumidanoo fee qifaranoo. Mi aukuanna kai kafa innee qini qiqafeefaranoo.

## 24

*Yisufa Yeerusaree amaana maqa rapee ianinnanara qimanniminau.*  
(Mak 13:1-2; Ruk 21:5-6)

<sup>1</sup> Yisufa Yeerusareenni naaqqqara amaana maqakiqari raudamakufanoo moosaa fimarufuqa mina faiqi namu Yeerusaree amaana maqa ooni maqa minakinaa amiqira usakara usakaqoona oosana oosana uqafiqee mariqau.

<sup>2</sup> Yisufa misa ufa iriseenoo quandafinoo qimanniminau. Innee maa ooninannai afeeka usakara usakaqoona qafaiidee, innee qini ufa iriaqa. Kaqikaaqoo sia uqanna maa ooniqaa aaku aaku irafa maqee marindee iannoo sia moodaa kaqi mariannoo aiqama qumbaqi aquseefaranoo. Miqi qimasee quqasee moosaa nifiqee finau.

*Kasooqaqee kambiaqaninna deedeepa oosanara qimanniminau.*  
(Mak 13:3-13; Ruk 21:7-19)

<sup>3</sup> Yisufa Oorifa aaqanasaa ooru oogu marifufaqa mina faiqi namu oorureeqa nariara marufaqa ooru irammiriqau. Anee faasai amaana maqara qiannana yairee fee miqian-noo fee. Maasa anee qumira aukuanana nana ainainee qafamasee fee oo Yisufa qumira aukuanana doo adeedi reenoo fee qianauree. Maasa maa aukuanna maqi fee inaqee maasa miqoo qafee fee maa marunna aukuanafa taikaannoo fee qianauree.

<sup>4-5</sup> Yisufa iriseenoo maaqi qimasee qimanniminau. Innee rufiaaqa moo fannoo unna ufa inni qimannimisee kaqi runna mara quqaani. Moomoosa anireeqa unna qimasee maasa asaku mundirausa maridee qifaranoo. Faiqi anaasee moomoosa misa ufa iriseeqa eedoo qimaseeqa fifaqa rarisameeqee kaqitinau ubekeefaranoo.

<sup>6</sup> Innee nianaindaraa rakira ufa irifaranoo adeedi rainnaqoo rakirana tutuqirana innee irifaranoo. Mi ufana iriseeqa siamma qiniara qumira aukuanana doo aiqaree maqi qiaqa. Rakirafa kuqaa maqusa maqusa kambiaanifeera qidaqa. Maa marira aukuanafa sia dau ni taikaannoo kaqikaaqoo kisaqaqasaa mariannoo.

<sup>7</sup> Maqusa maqusa firaa maqusa faqa kaqikaa maqusa faqa findifinaqa narari narari ifaranoo. Maqusa maqusa aandaroo naruannoo maqusa maqusa maqa kasiannoo.

<sup>8</sup> Mi ainainausa mandaukuana oorisa kai mariannoo kasooqaqee firaafa mariannoo.

<sup>9</sup> Mina aanaaqiana faiqi anaasee maqusa maqusa maqusa iniara Yisuna faiqi namu fee qimasaida fidiqaamma nimaqeeefaranoo. Aiqama maa maqa maaqanaki mariasa inni nidafrana nimisee inni kuqannarifaranoo.

<sup>10</sup> Moomoosa mina qafamasee rufisee qini Yisusaki mariasa quqasee minniseefaranoo. Moomoosa nari ueeqee nari ueeqee qifaranoo nari akooqee nari akooqee ifaranoo.

<sup>11</sup> Faiqi moomoo misa nariara Anutuna tamummaqara fasiqa fee qimariasa misa findifinaqai faiqi anaasee qumareeqee kaqitinau ubekeefaranoo.

<sup>12</sup> Aiqama ainaina qumuarirana oosana oosana deedeepirana oosana oosana kambiaqaninna qumbiqeenoo maqa maaqa amana kai mariannoo. Miqi kai inoo moomoosa

nariara nariara amuqusirana minniseeqa quandafinaqa narí ueeqee narí ueeqee ifaranoo.

<sup>13</sup> Yafa uqannee narí akoona faiqi uqanna mi manda aukuanua aiqama ainaina kambiqainanaki finnaaqara masenoo fifi inanoo taikara kooqi uqanna raquramisainafa mina akoofa Anutufa qumareeqeenoo asumu mariranaki quqaannoo.

<sup>14</sup> Maa amiqira fasaasa ufana qini innaaruna ququsa ufa maqusa faiqi anaasee aiqama qimannimisaifaqa misa aiqama irisaifanoo mi kamuqoo taikara aukuanua anianoo.

*Kaaqa fidiqaa imari manda ainainara Yeerusaree amaana maqaki kambiqaaninnara aaquqimannimaqanau.*

*(Mak 13:14-23; Ruk 21:20-24)*

<sup>15-16</sup> Misa kaaqa fidiqaa imaria manda ainaina qumareeqeeqa Yeerusaree naaquqara amaana maqakina quqasaifaqa Anutuna tamummaqara fasiqa auqu Danieerafa mifa minara akara rinau. Innee mina asaana rumasee amiqimmasee iriaqa. Misa mi mandainainna quqasaifaqa innee Yuda maqa maaqaki mariasa quqasee sandamaqaraasamasee aaqana aaqana daraaniaqa.

<sup>17</sup> Faiqi maqusasaa mariasa sia nári maaqaki keeqafinaqa nári ainaina mareefaranoo náriara kai quqasee sandeefaranoo.

<sup>18</sup> Afuqaki mariasa sia nári uqainara randasee maraaqa. Kaqi quqasee sandaqa.

<sup>19</sup> Nimuaqu uqafaqa anaaseeuqa faiqi aanaaqi faqaasa faqa misa mi aukuanua mandaikammifaranoo. Naqimmasee amiqimmasee sandeefaree.

<sup>20</sup> Innee maaqi qimasee innaaru qiaqa. Oo Anutufa sia mi sandara aukuanafa amaanasaa kambiqaini. Aaku aukuanua faqa sia kambiqaini.

<sup>21</sup> Yisufa mi aukuanara qimanniminoo qinuu. Mi manda aukuanafa aninna aukuanua aupurarana inaakufa kambiqaanoo. Ooqai aupurara aukuanua faqa kasooqagee aupurara aukuanua faqa sia mi manda aupurarana amana mariannoo, ooreeqanoo mariannoo mifa uriqaranoo firaqoo rafaqafusee mariannoo.

<sup>22</sup> Doo Anutufa mi manda aupurara aukuanua doo qusa mariannoo fee qinuu. Sia qusaikinanoo faiqi anaasee sia amana kaqi marifara, aiqama kuqifara. Anutufa narí qutaqaqamaqosara narí ufamau fimariasara irinoo, misa sia kuqageera qusa kamu ramannisaannoo.

<sup>23</sup> Mi aukuanua faiqi moo fannoo inniara mai qafaqa Anutuna asauku mundirafa miqinni mari mirinni mari fee qinana siamma iriaqa, mina unnaqiannoo.

<sup>24</sup> Mi aukuanua unna nisauku mundiraua faqa unnaqi maria tamummaqira fasiqausa faqa moomoo kambiqeefaranoo. Misauqaindi aninna aukuanua misa qaini qainiqira ainaina mookira ainaina naaquqara ainaina auqamasee uqannifiqasainaqa Anutuna qutaqaqamasee mina ufamau fimariasaa nikaru qimasaana qinindi kiaqeeera miqifaranoo.

<sup>25</sup> Yisufa mi aukuanara mi unna fasiqausara maaqi qimasee narí faiqi namu qimanniminuu. Innee mi aukuanara oonumafi iriaqa, eerairiaqa rufiaqa. Doo maqee kamu doo kooroomma nimaqaunnana iriaqa.

<sup>26</sup> Faiqi moo fannoo maaqi qimaseenoo ani qimaminoo. Asauku mundirafa aadana maqusa maridanoo, qinana siamma oonu qafaqa minnimasaqa, unna qidanoo. Faiqi moo fannoo asauku mundirafa maaqoo kukeeqanoo mari ifoo qinana sia uqanna oonu qafa. Anee minara unna qiifoo qia.

<sup>27</sup> Qinee faiqi nimaaku sia kukeeqasee qumuanura. Aakuasaara foora aiqamai innaarufa rakeemamaree fifaininanoo qinee faiqi nimaaku miqirafa tautumasee kaifaa qumuanura, aiqama qiqafaqeeera.

<sup>28</sup> Aandau kuqinoo maridanoo afundifaqa meemoonauqa sia minniseefara kuqaa uqanna dauni uqanna qumureeqa mi andauna naidaqa.

(Qini ufa irimariasaa maqusa maqusa yatinaí fee marifaree sia qiniara randeefaranoo. Qinee qumidaqa misa marifandinaqoo qeeqa kai irisee tautumasee akooqoo qumuree misa uqeraanura.)

*Faiqi nimaaku innaarunaindari qumuaninnanara qimanniminuu.*

*(Mak 13:24-27; Ruk 21:25-28)*

<sup>29</sup> Nimoosau maasau ira aukuanua mi aukuanua taikasainanoo suani qimbafinanoo asukuna aruannoo. Quqoonu faqa asukuna aruamaqannoo. Fasau aiqama innaarunaindari kakasammifaranoo. Fasau faqa quqoonu faqa maruqoo ooqeenaa marirafa rapikamafuannoo.

<sup>30</sup> Mi kamu qoo qinee qumuanua kari innaarunai moo kira ainaina uqannifiqara ainaina quqasaanaqa mina naaree qafaiqa qumuanura. Faiqi anaasee aiqama maqasaa fasiqa anaasee aiqama qafamaseeqa nisaaurusee ikifaafau qimarifaranoo.



Mikari qinee asuruki qeeqa kaaqa qarananamu faqa qeeqa afeeka firaana faqa qumua-naqa faiqi anaasee maqusa maqusa aiqama qini qiqaqamasee qiniara rufiasee ikiraqee-faranoo.

<sup>31</sup> Mikari qinee ukeena fira qoo fuaqaanaqa qini qangiroouqa daraanifara, aiqama maa maqa maaqana faaqaasasa qini qiku qisauku qinee qutaagama nimaqaafanausa suqeeqeeqa moodaa saqa qinee marianannai suqu quqeeqefaranoo.

*Saqari amanee ammuni quandara ufa.*

*(Mak 13:28-31; Ruk 21:29-33)*

<sup>32</sup> Yisufa kaifaa minara qimanniminoo qinau. Innee faafisa ammuni marina qafaaqa sia kaqinni ammunidanoo, nari aukuaana narana aukuaana ammunidanoo.

<sup>33</sup> Aiqama ainaina qinee qimannimiqaunandee faafisa fooqaafa aiqama ainaina kambigainaqa doo qinee kaifaa qumira aukuaana adeedi afaisaammifoo qiaqa.

<sup>34</sup> Maqee maria fasiqa anaaseesa akaqausa kaqi maridaqa aiqama ainaina qinee qimannimifannandee kai inoo kambigaannoo.

<sup>35</sup> Innaaruna faqa innaarunakinaa ainaina faqa maqa faqa maqasaaqaraa ainaina faqa aiqama taikafuannoo. Qini dookinaafa sia taikarana amana naaru naaru anoona uqanna mariannoo miqi kaimminoo mariannoo.

*Sia moo fannoo mifa qumuaninna faasaanara iridanoo.*

*(Mak 13:32-37; Ruk 17:26-30,34-36)*

<sup>36</sup> Qinee qumira aukuaanee qinee qumira faasaanee sia uqanna faiqi moo fannoo irimariafanoo. Innaarunai qangiroouqa faqa Anutuna amaaku qinee faqa siamma iridaqa, qini qikoofa nari kaimma qinee qumira aukuanara iridanoo.

<sup>37</sup> Qinee faiqi nimaaku qumira aukuaana Nooana aukuaana fooqaasa mariaura.

<sup>38</sup> Nammari samu naruna ataufakai mina maariqoo faiqi anaasee qoomaqandauru uqi mariqau. Miqida faiqi anaasee naramundee naramundee ida mariqau. Misa miqimma-maree fubaqa Nooana fira sipaki keeqeemaru faasana misa miqikaimmimariqau.

<sup>39</sup> Misa mana mana idaqa amiqi amiqidaqa marufanoo nammari radiqinoo ooqi misa fatikaneenoo ooqufinau. Qinee qumuanna aukuaana miqimmifaranoo. Mana mana imarifaqa kaqi qinee tautumannimaqaanaura.

<sup>40</sup> Mikari moodaa afuqaki qaara fasiqa ainainimarifaranoo qinee tautummanni-maqasee moo qumaree innaarunai ooru fuanaura moo quqasaanaura.

<sup>41</sup> Qaara anaasee sana qaindi rimarifaqa qinee tautummannimaqasee moo qumaree innaarunai ooru fuanaura moo quqasaanaura.

<sup>42</sup> Minara qinee inni qimannimidaqa. Deedaqida mariaqa. Sia kaqi mariaqa. Qinee inni karaambaiqa qumira aukuanara sia irimariafanoo. Minara innee deedaqiaqera qidaqa.

<sup>43</sup> Ummuari mari fasiqafa maaqa kooqi atuaseenoo ainaina ummuaramammaree fidanoo. Maaqa akoofa mifa ummuarira aukuaana iriseenofau rakisini. Sia irisai fanoo tautummamaqasee doo ummuaramammaree fifinoo.

<sup>44</sup> Innee minara iriseeqa rakisida mariaqa. Innee qiniara faiqi nimaaku sia qumiraram-mifoo qimasee manoo manaa imarifaqa qinee tautumasee qumuaanaura.

*Andeeqasee ainainasaa rakisimari fasiqanara quandara ufa.*

*(Ruk 12:41-48)*

<sup>45</sup> Ainaini mariasasaa rakisirafa amiqira fasiqa oosana maaqimminoo maridanoo. Mina firaafa minara qinoo. Anee qini ainainira faiqiuqasaa rakisida narana ainaina andeeqasee amiqimmasee nimisee rakisi marinaqa qinee moosaa fuanaura.

<sup>46</sup> Mi ainainira fasiqausasaa rakisirafa nari firaana ufamau andeeqasee fimarinanoo mina firaafa ani paqurinanoo sia mina afusaa asauruannoo asasiannoo.

<sup>47</sup> Iriaqa qinee anoona qimamidaqa mi fasiqana firaafa mina andeeqarana qafamaseenoo, nari aiqama ainainasaa rakisira saika mina amiannoo.

<sup>48-49</sup> Ainaini mariasasaa rakisirafa moo manda fasiqa nari firaafa moosaa finanoo mifa minara sia dauni aniannoo fee qimasee nari ainainira faiqi namu sia amiqimmasee narana niminoo, misa narinoo misa kaukaata qimannimaqaidanoo quandafinanoo nariara qoomaqanduquseenoo faiqi akaqausa naaramaseenoo misauqa faqa namafinoo afeeka nammari moomoo misa saimbaqa namafidanoo furufaramma qafeenoo.

<sup>50</sup> Miqi marinanoo sia rakisi marinna aukuaana mina firaafa tautummamaqaseenoo anirama qafeenoo arusee ateeka atekamma aqusaannoo.

<sup>51</sup> Mi manda ainainira fasiqafa qaaraiki mariasa namufaqa mandainainaki mariannoo. Mifa miqoo misa faqa maridanoo ikifaafau qidaqa nifai riqidaqa marifaranoo. Qinee Yisusa qumira aukuaana miqimminoo mariannoo. Tautummannimaqaanaura.

## 25

*Qisaukuqara taikasee maanaaqauqa misara quandara ufa.*

(Yisufa maru aukuaana maanaaqa moo amundararee qimasee kaqi aqoonnanaikam-maqoo fasiqafa mina aqoonafa nari maqusai kaqi marufanoo mi fasiqafa nari akoona maqusai nariara maaqa usaka taikaseenoo nari aqoonnana maqusai tautumannimaqararee qimasee oonureenoo nari anaqa afiqeenoo doo nari maqgai afiqee finau. Misa oosana miqinoo marunara Yisufa iriseenoo maa ufana qimanniminau.)

<sup>1</sup> Qinee qumuanna aukuaana anirainanoo innaaruna ququsa maaqimminoo marianoo. Qisaukuqara taikasee maanaaqa mariqau. Misa nari rambi uqirausa maqusasaa asukuna rakisi marufanoo amundara fasiqa anufaqa misa faqa firaa maqaki narana naani qimasee afeesimariqau.

<sup>2-3</sup> Moodaannai qisaukunamu furufari marusa maridaqa nari rambi kai uqusee marida afeesimariqau.

<sup>4</sup> Moodaannai qisaukunamu irirana faqaasa rambi faqa minaki adiee maria nammarina faqa uqusee maridaqa afeesimariqau.

<sup>5</sup> Amundara fasiqa sia dauni ani marufaqa, afeesimarufanoo nifuki aunduarufaqa mandaiki mariqau.

<sup>6</sup> Eenda amuqusaikufanoo faiqi moo fannoo fifi qimaseenoo qimanniminau. Doo amundarafa ani ifoo.

<sup>7</sup> Doo deedaqiaqee qufaqa, mi manaqausa findifufaqa qooma quumbeeqee rambisaa muqurusoofofanoo qanau.

<sup>8</sup> Rambi nammari siaisa quandafiga nammari faqaasara innaaru qiqau. Maasa faqa adia qimia, maasa qooma qimbafifaqa nammari sia marifaqa.

<sup>9</sup> Nammari faqaasa misa qaoq qimasee qiqau. Sia amana inni adia nimianauro inni adia nimiseeqa maasa faqa randaanoora innee sandeeqa sutuaqai oonu feefauriaqa. Miqi qufaqa misa eedoo qimasee sutuaqai nammariara fiqau.

<sup>10</sup> Misa fufanoo amundara fasiqa irirana faqaasa maruqoo anireenoo ai misa nifiqeenoo firaa maqaki keeqaqau. Keeqafufaqa misa kooqi ititaseeqa narana neemariqau.

<sup>11</sup> Neemarufaqa furufari maru manaqausa anireeqa naaraqau. Oo karaambaiqa kooqi atuasainaqa maasa faqa keeqafi naanaura.

<sup>12</sup> Miqi qufanoo mifa iriseenoo qimanniminau. Sia qinee inniara iridaqa innee yai mariaasee, doo see fuaqa doo kooqi ititaseeqa.

<sup>13</sup> Yisufa maanaaqauqa kikiqa qususeenoo nari faiqi namu qimanniminau. Innee sia qinee qumira aukuanara irimariafanoo sia deedaqifoora. Minara inni qimannimidaqa innee iridaqa qiniara rakisiaqa.

*Qaaramoo ainainira fasiqauqa misa quandara ufa.*

*(Ruk 19:11-27)*

<sup>14</sup> Mi ufana taikaseenoo Yisufa innaaruna ququsara moo ufa kikiqa usinoo qinau. Innaaruna ququsa maaqimminoo maridanoo. Ainaina faqaafa moo atinai fuani qimaseenoo nari ainainira fasiqauqa suguseenoo ufaasu nari ainaina faqa maqa maaqa faqa misasaa quqaseenoo rakisiaqee qinau.

<sup>15</sup> Moo fasiqa nari ainainirana amana moodaannai qisauku koondaa amanee firaana aminau. Moo fasiqa nari ainainirana amana qaaraqanda koondaa amanee oorudupirana aminau. Moo fasiqa oorudupimasee nari ainainirana amana moodaa koondaa amanee amiseenoo qimanniminau. Innee maa munnimmana qumareeqa minannai inneeqa ainainirana uqeeraaqanani. Kasooqaqee aniraanaqa mina anoona munnimma faqa mina ati munnimma faqa qimiannee qimasee moo saa finau.

<sup>16</sup> Moodaannai qisauku koondaa amanee qumaroofa minannai aiqama ainainirana nimisaidanoo nimimarufanoo dinni qisauku amanee mi ainainiranasaa aniranau. Moodaanakikufanoo qisukuqara amanee marasee marinau.

<sup>17</sup> Qaara koondaa amanee maroofa miqi kai inoo kafaa qaara faqa qaara aniranau.

<sup>18</sup> Moodaa koondaa amanee maroofa mifa siarooma ainaininai. Mifa madika indufuseenoo munnimma minaki quqasee kukeeqasanau sia furufarianifeera idaaqinoo marianifeera kukeeqanau.

<sup>19</sup> Naaru kasooqaqee misa rakisirafa anireenoo naaramaseenoo munnimma oosana oosana irammirinai.

<sup>20</sup> Moodaannai qisauku koondaa maroofa anireenoo nari rakisirana maaqi qimasee qimaminai. Oo qini rakisirafa anee moodaannai qisauku koondaa kai qimunnana. Minannai ainainammasaunanoo dinni qisauku faqa mina ati munnimma faqa aniraifaqa doo qisaukuqara animmamiqau.

<sup>21</sup> Mina rakisirafa minara iriseenoo doo qimaseenoo irinau. Iriseenoo maaqi qimasee narí ainainira fasiqa qimaminau. Oo anee amiqira fasiqa oori runuseenana ainaini marianafa andeeqara fasiqa uqanna, anee kaqikaa ainainasaa faqa andeeqasee rakisi-marianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira faiqifau marinnandia. Anee qini faiqiara foora marinnaranoo. Anee faqa qinee faqa moodaanaki asasirausa marianaura.

<sup>22</sup> Miqi qimasoofanoo qaara koondaa amanee maroofa anireenoo narí rakisirana maaqi qimasee qimaminau. Oo rakisirafa anee qaara amanee qimunaqa minannai ainainammaaanoo qaara faqa qaara faqaikamafifaqa, doo animmamiqa.

<sup>23</sup> Narí rakisirafa mina ufa iriseenoo qimaminau. Oo anee faqa amiqira fasiqa oori runusee ainaini marianafa andeeqara fasiqa uqanna, anee kaqikaa ainainasaa faqa andeeqasee rakisi marianafa mariananoo. Minara qinee firaa ainaina aiqama ainainasaa rakisirana anisaa kai quqaanaura. Sia anee kaqi ainainira fasiqafau marinnandia. Anee qini faiqiara foora marinnaranoo.

<sup>24</sup> Miqi qimasoofanoo moodaa koondaa amanee maroofa anireenoo narí rakisirana maaqi qimasee qimaminau. Oo rakisirafa qinee ani oosana iridaqa. Kaaqa anee munnimmaru rimarianaga qinee qafamaqaunausa.

<sup>25</sup> Qinee ani koondaa amaneenai ainainammaaanoo ani munnimma furufarian-doo qimasee minara rufisee madika indufuseeqa minaki quqaqaunanoo mariina doo mina kai anamiqa.

<sup>26</sup> Mina rakisirafa mina ufa iriseenoo raiqasee qimaminau. Anee manda fasiqa uqanna mariananoo, kudi uqanna aarara marianafa mariananoo. Anee qiniara kaaqa munnimmaru rimariana fee q inanee.

<sup>27</sup> Anee qini oosana miqinoo marinana anee qini munnimma naqaa fee ifanee qini munnimma beenaki quqaqaana. Anee beenaki quqasainanoofau qini munnimma faqa ati munnimma faqa marinaqau qeeqa marani. Anee madikaki kai akundoonnanara kudi uqanna mariananoo.

<sup>28</sup> Rakisirafa miqi qimaseenoo ainainimaru fasiqa namusa qimanniminau. Innee mina moodaa koondaa amanee mareeqee qisaukuqara mareemari fasiqana mina amiqa.

<sup>29</sup> Moo fannoo ainaina uaqee innana moo faqa amifanoo rairaa inoo mariani. Ainaina siainnana sia akaqa ainaina amifara, minaki oodaa marinnana mina rafia maraifanoo kaqi mariani.

<sup>30</sup> Doo maa manda kudi fasiqana rarisameeqeenoo madaanai asukunaki aqusaaqa. Mi asukunanaki maridanoo ikiraqaidanoo afai riqidanoo mariani.

*Taikara faasaana ufa irira faasaana mi ufana.*

<sup>31</sup> Qinee faiqi nimaaku qumuanna kari qeeqa rakisira afeeka namufaqa qeeqa qangiroo namufaqa maa maqanasaa qumuanaura. Qumureeqa ufaqira qaari amiqira qaari ufiqisee eekara ariranasaa ooqu marifinaqa maqasaaqaraasa ufa irisee andeeqanni-maqaanaura.

<sup>32</sup> Qinee ooqumari fuanaqa maqusa maqusa aiqama suqeeqee qeeqa doorisaa quqasee nindafeeqa qeeqa iriranannai inni rainannimaqaanaura. Qinee sipsipasaa rakisirausa fooqaasa marida. Misa sipsipa raineeqee aaduma quqaidaga mimmi raineeqee aaduma quqaidaga. Qinee qumuanna aukuanna qinee miqianaura.

<sup>33</sup> Qinee sipsipa fooqaasa raineeqee qisauku uqannai quqaanaura. Mimmi fooqaasa qisaaqai raineeqee quqaanaura.

<sup>34</sup> Rainannimaqaseeqa qinee firaa karaambaiga quandafinaqa qisauku uqannain-daraasa maaqi qimasee qimannimianaura. Qini qikoona amaakummara mariasa aniaqa anireeqa aiqaree mina amiqira ququsaki keeqafi mariaqa. Ooqai maa maqa maaqafa sia marufanoo mi ququsana inniara quqaqoofa maridanoo.

<sup>35</sup> Qini daararofaqa narana qimusa mariafanoo. Qini nammariara didimarufaqa nammari qimusa mariafanoo. Qinee aanaamuru fooqaasa mariafana innee qini aqoondikiusa mariafanoo.

<sup>36</sup> Qinee kaqisamu mariafana innee qamunna qimusa mariafanoo. Qinee aurimari-fana innee aniree qini qiqafee sukudaakutiqa, qimudao qimaqimaqeeusa mariafanoo. Qinee karafusaki mariafana innee qini undara anireeqa aiaaee qimaqimaqoosa mari-fanoo. Qinee minara iriseeqa inniara Anutuna amiqira ququsaki fuaqee qidaqa.

<sup>37</sup> Miqi qianaqa misa qisauku uqannaindaraasa maaqi qimasee ufa qini qimaqim-ifaranoo. Oo karaambaiga mina anee fee yairee fee ani aararee marufaqqee narana amiqiafana. Nammariara aidufaqa yairee fee ani amiqiafana. Maasa sia ani qafaqiafana.

<sup>38</sup> Yairee fee anee aanaamuru fooqaafa marunaqee ani aqoondikiqiafana. Yakari fee kaqisamu marunaqa qamunna ani amiafannanara qidanee.

<sup>39</sup> Yairee fee aurimarunaqee maasa oonu ani qafaqiafana. Yakari fee anee karafusaki marunaqee maasa oonu ani qafaqiafana. Anee qinaqa maasa iriaqa.

<sup>40</sup> Qinee misa ufa iriseeqa quandafiqā kooroo qimannimianauro, maa qini qikaqaafasauqa misaki ureeqarusa innee misa amiqimmannimaqaidaqa qini faqa amiqimmaqimaqee marusa mariafanoo minara amiqira ququsaki keeqaaqeeera qimannimidaqa.

<sup>41</sup> Qinee misa qimannimiseeqa quandafinaqa qisaqaqaindaraasa maaqi qimasee qimannianauro. Innee Anutuna aqira ufa innisaa marisa innee idaki aqufuaqa. Anutufa Sadannanara faqa nari manda qangiroouqa faqa afaannauqa faqa ida aqufuanifeera auquqoofa maridanoo naaru naaru qeemari idafa sia qimbeemari idafa, innee minaki aqufuaqa.

<sup>42</sup> Qini daararee marufana naranara qaoo qimasee sia qimusa mariafanoo. Qini nammariara didufaqa qaoo qimasee sia qimusa mariafanoo.

<sup>43</sup> Qinee aanaamuru fooqaasa mariafana innee qini aqoondikiranara qaoo qusa mariafanoo. Qinee kaqisamu mariafana, qaoo qimasee sia qini qamunanda qimusa mariafanoo. Qinee aurida mariafana innee sia oonu qini qifafoosa mariafanoo.

<sup>44</sup> Qinee miqi qimasee misa qimannimianaqa misa quandasee maaqi qimasee qini qimaqimifaranoo. Oo karaambaqā yakari fee naranara aararanoofee inau nammariara aidinoo fee inau. Yairee fee aanaamuru fooqaafa marunaqee kaqi samu marinee inau. Yairee fee aurimarinee inau. Yairee fee anee karafusaki marinee inau. Anee yakari fee miqunaqee maasa sia amiqi amiqiafana. Anee qinaqa maasa irianauro.

<sup>45</sup> Qinee misa ufa iriseeqa maaqi qimasee kooroommasee qimannimianauro. Maa qini qikaqaafasauqa misaki ureeqarusa sia innee amiqimmannimaqaidaqa qaoo qunara mi fasannai qini faqa sia amiqimmaqimaqoonara, qaoo qunara minara qinee inniara idaki fuqaqee qidaqa.

<sup>46</sup> Miqi qimasaina misa naaru naaru nariranaki keeqafina marifaranoo. Andeeqee mariasa misa naaru naaru mariranaki keeqafi marifaranoo.

## 26

*Yisuna ariraree qimasee ufa tipundaariqau.*

*(Mak 14:1-2; Ruk 22:1-2; Yoh 11:45-53)*

<sup>1</sup> Yisufa maa ufana oosana oosana qimannimi taikaseenoo maaqi qimasee nari faiqinamu qimanniminau.

<sup>2</sup> Qaara faasaana taikainanoo maasa Yeerusaree maqusai ooruree ainnaaqarara qoomaqa sakasee naanauro. Anutufa maasa qifaqnausa qikeeku qikaaku Isipa maqa maaqai marufanoo sia narinau ainnaaqaramasee Isipa maqannaasa kai narinau. Minara maasa Yeerusaree maqusai ooruree afaarurumaanaanauro. Miqoo faiqi moo fannoo qini uqeeqainaqa aunirira saqarisaa pirimmannoo qini darifaranoo.

<sup>3</sup> Yisufa mi ufana nari faiqi namu qimannimimarufaqa amaana maqasaa rakisimarusa faqa Yuda maqanna faiqi fraasa faqa moo atinai Kaiafasana maaqaki ufa suqidaqa Yisuna arira ufa suqidaqa qimmiriqau.

<sup>4</sup> Ireeda qumee kai Yisuna qumaree ariraree qimmirimariqau.

<sup>5</sup> Maaqoo Yeerusaree maqusai ainnaaqara qoomaqa suqa neemarinnana qambaana sia Yisuna qumaraanauro. Faiqi anaasee moomoo suqiga mariasa qifafamaseeqa ufa fraana qidaqa tutu qifoora.

*Anaasee moo fannoo Yisuna fadameena adiamaganau.*

*(Mak 14:3-9; Yoh 12:1-8)*

<sup>6</sup> Mikari Yisufa Beetani maqusai Simoona amarafa karoora arimarufanoo Yisufa taikaisoona mina faqa naidanoo mina maaqaki marinau.

<sup>7</sup> Maridanoo Yisufa misauqa faqa narana neemarufanoo anaasee moo fannoo mifa maru maqanaki keeqafinoo firaa munnimma aqimaru fadameena idaaqira taqukinaana amiqira afundimaruna Yisufa narana nee marufanoo akiaqa amoondunna kaqi adiamaganau.

<sup>8</sup> Yisuna faiqi namu mina qafeeqa tautufanoo niranaqoofaqa qiqa. Maa fifau faafau ira anaaseefa naqi fee ifanee fifaunni rairaa inanee.

<sup>9</sup> Naqi fee ifanee munnimma fainausa nimiseenana mina akiaqara firaa munnimma maraseenana kudi fasiqa anaaseeuqa nimiaqaana.

<sup>10</sup> Yisufa misa ufa iriseenoo quandafinoo nari faiqi namu qaoo qimannimaqaidanoo qinau. Nanaree mi anaaseenara qaoo qida fee. Qifaqā idaaqa uqannamma qimaqaani-feera adiaqimaqeenoo.

<sup>11</sup> Inniki kudi fasiqa anaaseeuqa naaru naaru marifandia. Innee amana moomoo kari misa amiqi amiqifaranoo qinee sia kisaqasaa inniki marianaara, kaqikaa qoo fuanaura minara mifa qini adiaqimaqeenoo.

<sup>12</sup> Qini qifaafa madikaki fuaninnanara minara mifa maasa faiqi kuqirana oosana mareenoo qini qifaafa kuquaninnanara deedaqidanoo fadameena adiaqimaqeenoo.

<sup>13</sup> Mi anaaseenara Yisufa kaifaa qimanniminau. Naaru naaru maqusa maqusa maaqa maaqa maa qinee marunna kamuqooqaraa ufa, amiqira ufa, faiqi anaasee qimannimidaqa maa anaaseenara fadameena adiaqimaqoona sia aunifara mina faqa qimannimifaranoo. Minara faqa qimannimidaqa sia faafaa qiaqa, sia qao qiaqa.

*Yudasifa munnimmara rumammareenoo Yisuna uqeeqararee qinau.*

*(Mak 14:10-11; Ruk 22:3-6)*

<sup>14</sup> Yudasia Keerioota maqusaindariafa, Yisuna faiqi namuki marufa, mi fasannai amaana maqasaa rakisi marusunnai oorureenoo irammirinoo qinau.

<sup>15</sup> Innee naqi fee mandee feefauru qimifaqee Yisunara ueeqanauree. Irammirisoofaqa misa ooni amiqau. Moodaa fasiqa aiku asauku taikasee moo fasiqa asaukuqara taikasee miqi mandee ooni amiqau.

<sup>16</sup> Miqooqari faasaambaasaana Yudasifa Yisuna qumee misa nisaukuki quqaanifeera apuree marinau. Fiqu faiqu fidanoo apuranoo nimarinau.

*Ainnaaqarara qoomaqa sakasee naqau.*

*(Mak 14:12-21; Ruk 22:7-14,21-23; Yoh 13:21-30)*

<sup>17</sup> Yuda maqannaasa misa aiqama Yeerusaree maqusai suqumaree Anutuna qangiroo misa nikeeku nikaaku ainnaaqarara qoomaqa afaaurumasaida qaaramoo faasaana mi feemuna neemariqau. Ooruku siai feemuara fooqaana neemariqau. Mi indaaru faasaana Yisuna faiqi namu Yisufuqoo anireeqa irammiriqau. Ya maqanaki fee maasa Anutuna qangiroo ainaaqaroo afaauririra naranna ooruku siai feemu suqaanauree.

<sup>18</sup> Yisufa iriseenoo qimanniminau. Innee Yeerusaree maqusai oorureeqa muqutinai moo fasiqa oonu paqurimasee maaqi qimasee qimamiaqa. Ufasaa rakisira fasiqa ani maaqaki ainnaaqarara qoomaqa suqasee naannoo. Nari aukuaana adeediraifanoo ani maaqaki nari faiqinamu faqa narana naanee qinoo. Miqi qimasee qimamifanoo nari maaqa inni nimiani.

<sup>19</sup> Mina faiqi namu iriseeqa miqimmiqau, miqoo ooru qoomaqirara deeda iqau.

<sup>20</sup> Mi eendanaki Yisufa faqa nari faiqi namufaqa mi maqanaki ooqu marifufaqa eendaki narana neemariqau.

<sup>21</sup> Misa neemarufanoo Yisufa maaqi qimasee qimanniminau. Qinee anoona ufa inni qimannimidaqa innikiqari faiqi moo fannoo qini ueeqaaninafa maridanoo.

<sup>22</sup> Misa minara irisoofanoo suara naakinu. Suara naakufaqa moodaa moodaa Yisuna irammiriqau qiqau. Moo fannoo Yisu qinee fee mi ufana qifee. Moo fannoo miqi qinoo qinee fee qifee. Miqi qimasee aiqamausa Yisuna irammiriqau.

<sup>23</sup> Yisufa iriseenoo kaifaa nariqa qimanniminau. Innikiqari moo fannoo maa difaani-nakina asauku aqusee mara neemariqa qini ueeqaannoo.

<sup>24</sup> Tamummaqara fasiqauqa akara fannoo qiniara faiqi nimaakuara doo kuqani fee qinoo maridanoo. Kuqaa qinee kaqikaa qoo kuqanaura ueeqasainaqa kuqanaura. Qini ueeqaaninna fasiqafa kuqaa maaqi qimasee nariara iriannoo. Nanaree qini qinoofa qini maqaqisoofaqee maridee. Qini numoo firaafa maridanoo fee qiannoo.

<sup>25</sup> Miqi qimasooofanoo Yudasifa Yisunara irammirinoo qinau. Oo qini qafee faqaafa qiniaree ueeqee maqi qidanee qimasooofanoo Yisufa qinau. Aneenna kai qiananoo.

*Yisufa aafaqa oosana arasee noo ufafa.*

*(Mak 14:22-26; Ruk 22:14-20; 1Kor 11:23-25)*

<sup>26</sup> Misa nee marufanoo Yisufa feemu maraseenoo Anutunara dufi dufi qimaseenoo ruqiruqi maseenoo nari faiqi namu niminoo qinau. Maana marasee naaqa. Maana qini qifaafa qimaqi kikiqisira feemu maridanoo.

<sup>27</sup> Nimiseenoo uainna nammari mara mareenoo miqooqaraasa maqee maqee neemaru nammarina Yisufa mi uainna kaafana uainna minaki qumbiqarana maraseenoo Anutunara dufi dufi qimaseenoo nari faiqi namu niminoo qinau. Innee aiqama maanaki marasee naaqa.

<sup>28</sup> Maa uainnafa qini fidika kikiqisira uainna nammari maridanoo. Qini fidikan-nai uqanna Anutufa moomoosa numoo aununnisaanifeera maa qini fidika raannoo. Maana qini fidika fannoo Anutuna nariara faqa faiqi anaaseera faqa noori runiranaki marunara fukasaa moodaanaki kira ufa mapukueeqeenoo doo rafaafusai fidikafa maridanoo.

<sup>29</sup> Innee iriaqa. Qinee anoona ufa uqanna inni qimannimidaqa. Sia maa marunna aukuaana maa uainnana kaifaa naanaura. Kasooqagee qini qikoona ququsaki innaarunai innee faqa qinee faqa moodaanaki maridaqa fuka uainnara foora ququfiqa naanaura.

<sup>30</sup> Yisufa miqi qimasee qimannimisoofaqa misa namaseeqa Anutunara idi ramaseeqa raudamakufaqa asukunai Oorifa aqanai ooru fiqau.

*Yisufa Peetooroofa qaoo qianinmanara qinau.*

*(Mak 14:27-31; Ruk 22:31-34; Yoh 13:36-38)*

<sup>31</sup> Miqoo ooru maridanoo Yisufa nari faiqi namu qimanniminau. Fafaa eendaki qini qumaraifandinnanara innee rufiasee quqasee sandeefaranoo. Anutuna tamummaqara fasiqa ooqai minara maaqi qimaqoofa maridanoo.

Anutufa sipsipa rakisirana arinaqa sipsipa aiqama quqasee furufarifaranoo qimaqoofa maridanoo.

<sup>32</sup> Yisufa minara kaifaa qimanniminau. Qinee kuqiranakiqari findimeeqee Kariree maqusai inni nifunni fuanaura. Innee qini qinaaqiana oonuraifaqa miqoo inni nindafaanaura.

<sup>33</sup> Yisufa innee quqasee furufarifandia maqi qimaqoona Peetooroofa minara iriseenoo qinau. Qinee sia sandaanaura. Misa aiqama quqasee sandaifaqa qinee sia sandaanaura, ani faqa apamma fuanaura.

<sup>34</sup> Yisufa mi ufana iriseenoo qimaminau. Fafaa eendaki kookooraana sia ufa qinana anee qaaramookinana irafana qiniara sia qinee mina qafaidee qinnaranoo. Miqi qinanoo kookooraana ufa qianoo.

<sup>35</sup> Peetooroofa minara iriseenoo qinau. Qaoo, sia qinee aniara sia qafaidee qinaura ani faqa kuqanaura. Yisuna faiqi namufaqa misa aiqama miqi kai qiqau.

*Yisufa Keetaseemane saqamaki innaaru qinau.*

*(Mak 14:32-42; Ruk 22:39-46)*

<sup>36</sup> Miqooqari Yisufa nindiqeenoo saqamai asukunaki finau. Mi saqamana auqu Keetaseemane saqama marinau. Miqoo mifa nari faiqi namuara ooqumarifi rakisiaqee qimaseenoo nariara kaqikaa qoo finoo nariara innaaru qiraree qinau.

<sup>37</sup> Qimaseenoo mifa Peetooroona faqa Seebeedina amaakuqara Yameesa Yoohaneesa minamusa faqa kaqikaa qoo saqamaki nifiqamaree fidanoo nari kuquaninnanara irimarufanoo aundura mandaikimarufanoo akoo akaa imarufanoo miqi marinau.

<sup>38</sup> Miqidanoo minamusa qimanniminau. Innee maaqoo saqama qambaana marida nifu maqaidaqa qinisaa faqa rakisi qimaqaaqa. Qini qikoofa qini minniqisaaninnanara firaa qoo qimuqusimarifaqa, mi qimuqusirafa daruannoo fee qidaqa.

<sup>39</sup> Miqi qimaseenoo mifa kaqikaa qoo nariara oonu oorindari mi saqamanaki maqasaa aqufufanoo innaaru qinoo qinau. Oo qini qikoofa amanee anee sia qini minniqisainagee sia kuqanauree. Sia qeeqa didiranara iridaqa ani aidiranara dididanoo, anee qinaqa kuqanaura.

<sup>40</sup> Miqi qimasee innaaru qimaseenoo doo findifinoo qaaramoo namu maruqoo anireenoo nindafoofanoo misa nisuku kaaqa faiqaqau. Ani nindafamaseenoo Peetooroona aaramaseenoo qinau. Peetooroo anee sia fee kaqikaa qoo qiniara rakisinanee.

<sup>41</sup> Rakisdana innaaru qidana maria sia kaqi maria. Aneenna iriranannai kai qini dadaaqi marianafa, aneenna uqanna sia amanaiki mariananoo miqi marifana kudoosaapee marianaqa qafaidaqa.

<sup>42</sup> Miqi qimaseenoo Yisufa kaifaa kaqikaa qoo oonureenoo innaaru qinoo qinau. Oo qini qikoofa anee amanee sia kuqana nammarina qiminnaree anee sia minniqisainagee sia kuqanauree. Sia qeeqa iriranannaifau qidau anee qinandee, qinaqa miqimmiqa kuqanaura.

<sup>43</sup> Miqi qimaseenoo kaifaa nari faiqi namu unnai oonu nindafoofaqa misa kafia nisuku faiqee mariqau. Misa nifuku aunduari marufaqa faiqagee mariqau.

<sup>44</sup> Nindafamaseenoo ani quandakufanoo kafia oonureenoo kafia qaaramookinoo innaaru qinau. Indaaru qundee kai kaifaa miqi kai inoo innaaru qinau.

<sup>45</sup> Innaaru qimaseenoo findimeeqeenoo nari faiqi namu maruqoo anireenoo nindafeenoo qimanniminau. Innee faiqagee maridee idooaidee. Qini mareeqee manda oosana maree mariasa nisaukuki quqaaninna eendirafa doo anireenoo.

<sup>46</sup> Doo findifi qafaaqa. Qini ueeqee mari fasiqafa doo ani maridanoo.

*Misa Yisuna qumaraqau.*

*(Mak 14:43-50; Ruk 22:47-53; Yoh 18:3-12)*

<sup>47</sup> Mikari kai mi ufana qimarufanoo eendufanoo asukunai nari faiqi namukiqari faiqi moo auqu Yudasifa aninau. Faiqi moomoo mina saimbaqa duru feefa saamu faaqaana

indaaii maree aniraqau. Yuda maqannaasa faiqi firaasa rakisirausa niqiqoofaqa Yudasina faqa aniraqau.

<sup>48</sup> Faasai Yudasifa qimannimiseenoo innee asukunai aaqee foora qinee oonuree amooqaanaqa qafeeqa innee mina kai qumaraaqa.

<sup>49</sup> Doo maqeeufanoo Yisufuqoo oonu reenoo oo qini qafee faqaafee qimaseenoo Yudasifa Yisuna amooqanau.

<sup>50</sup> Miqi marufanoo Yisufa maaqi qimasee qimaminau. Oo qini qiqoondi anee nanaree aninanee. Miqi qimasoofaqa faiqi Yudasina faqa anusa aniree doo Yisuna amiqimmasee rakisisimma qumaraqau.

<sup>51</sup> Qumaree marufanoo Yisuna faiqi namuqiari moo fannoo nariqa rakira kisaqa paipana moo qumareenoo nariraree qimaseenoo moo fasiqa aaqoo dindanai aiqama ateeqa aqinau. Amaana maqasaa rakisirana ainainira faiqi mina aaqoo ateeqanau.

<sup>52</sup> Yisufa mina qafamaseenoo qinau. Doo rakira paipana quqaa. Aiqama rakira ainainannai narimariasa minannai kai nari narifaranoo. Minara rakira paipana quqaa saina qini kai daruaqa.

<sup>53</sup> Qinee qeeqa qikoonara iraananoo qangiroouqa nukudara foora qiminaqa dadaaqifaqa sia kuqunaura. Anee minara sia fee iridanee. Doo aneenna rakira paipana quqasaa.

<sup>54</sup> Qini qikoofa nari qangiroouqa qiminaqa dadaaqifaqa naqi fee masee qinee kuqananoo Anutuna tamummaqara fasiqa ufa kambiqaannoo fee.

<sup>55</sup> Yisufa miqi qimasee nari faiqira qaoo qimaseenoo quandaqfinoo nari qumaree marusa qimanniminoo qinau. Qinee maqee maqee inni amaana maqaki qimannimi mariafannaqoo innee mikari miqoo qini qumaraaqaana. Maqee eendaki innee qumeke kai duru saamu namufaqa qini qumaree mariafanoo. Qinee qumuari maruna fasiqausara maqi marunaqa innee asukunaki qini qumaree mariafanoo.

<sup>56</sup> Misa mi oosana oosana ainainna Yisunara amisoofanoo ooqeenaa Anutuna tamummaqara fasiqauqa ufa anoona kambiqaanau. Yudasina faqa anusa Yisuna qumaroofaqa mina faiqi namu aiqama mina qafamasee quqasee daraaniqa sandaqa.

*Kaiafasana maaqaki misauqa Yisuna iree mariqau.*

*(Mak 14:53-65; Ruk 22:54-55,63-71; Yoh 18:13-14,19-24)*

<sup>57</sup> Sandamafufaqa Yisuna qumaree marusa kaqi qumareeqa Kaiafasana maqasai maree fiqau. Kaiafasafa amaana maqasaa rakisirafa firaafa marunnai maree fiqau. Yuda maqannaasa faiqi firaasa misa faqa Kaiafasana maaqaki faasai suqimaruqoo miqoo maree fiqau.

<sup>58</sup> Misa Yisuna afigee fimarufanoo Peetooroofa ninaaqianna rufeenoo asukunai nifaqmee nifaqmee inoo finau. Misa Kaiafasana maaqaki Yisuna afigee keeqafufanoo Peetooroofa naambeeqi aadumasaa sundiauqa saimbaqa ooqumari fiqau. Misa Yisunara iridanoo imarinau. Misa arifaree naqi fee ifaree rumbeefaree, miqi qidanoo nindafee marinau.

<sup>59</sup> Miqi marufaqa amaana maqasaa rakisimarusaa firaasauqa faqa Yuda maqannaasa kasoorauqa faqa miqoo suqiqa marida unna ufara randee mariqau. Miqidaqa qiqau. Ya fasiqa fee moo ufa oosana arasainaqee mina maree fee munu kiapana qimamifanoo fee aruannoo fee.

(Mooseena sandufa maaqi qimaqoofa, moodaa fasiqa fannoo qinnufafa sia anoonaiqiannoo. Qaara fasiqa fannoo kikiqamafi qinafa mifa anoonaiqiannoo. Misa minara iriseeqa faiqi qaaraqanda mi ufana qifaqa Yisuna ariraree qiqau.)

<sup>60</sup> Faiqi moomoosa maridaqa unna ufa oosana oosana qimariqau. Miqidaqa Yisuna ufara randee mariqau.

<sup>61</sup> Randee marufanoo qaara fasiqa moodaa ufa andeeqaqau. Miqanda maaqi qimasee qimannimiqa. Yisufa maaqi qimasee qufaqa maaqanda iriqafana. Qinee Anutuna amaana maqa Yeerusaree naaquqara amaana maqa aiqama rambairi aqusee qaaramoo faasaana amana qinee kaifaa usakaanauree qufaqa iriafannaqanda maridaqa.

<sup>62</sup> Amaana maqasaa aanaiqikirausa misa uriqararafa mi ufana iriseenoo findifinoo Yisuna aaramaseenoo irammirinau. Anee miqanda ufa iridanee. Miqanda kuqaa fee qida fee.

<sup>63</sup> Miqi qimasoofanoo Yisufa kaqi kasooinoo marinau. Amaana maqasaa aanaiqikirausa misa uriqararafa Yisuna qafamaseenoo nari afusaa qimaminoo qinau. Kuqaa maaqanda Anutuna afusaa marunausa marida. Anee anoona ufa kai qini qimaqimia. Kuqaa fee anee Anutuna asaku mundirafa uqannee maridanee, Anutuna amaaku uqannee maridanee.

<sup>64</sup> Miqi qimasoofanoo Yisufa qinau. Anee qiniara qiannana, qini ufa iria, maa maqee innee qini qiqafee mariafanoo. Kasooqaqee sia maa qirausau marianau qiqafeefarau.

Uriqararana Anutuna asauku uqannai mina aaqa oqumarifi marianauna, mari inaqa kasooqaaqee asurukina qumuauna. Innee qimaseeqa qini faiqi nimaaku qiqafeefaranoo.

<sup>65-66</sup> Amaana maqasaa rakisimarusa firaafa Yisufa miqi qufanoo irufanoo niranaqee marusa oosana maraseenoo nari qamunna parara qinoo anaqi aquseenoo aiqama suqiqa marusa darara qimasee qimannimino qinau. Doo innee aiqamausa mina manda ufa iridee. Nariara Anutuna amaaku fee qinoo iridee. Sia maasa kafa arira ufara randaanauna. Doo aneenna qimannimianaqa innee minara nanee fee qidaqee. Misa aiqamausa doo kuquanifee ufa kai qima afeekaikiqau.

<sup>67</sup> Misa mi ufana qimaseeqa Yisuna oorinni anireeqa niqaara fidiamagaqau. Fidia-maqaseeqa asukunakiqari misa nisauku samu oori aridaqa qiqau.

<sup>68</sup> Anee tamummaqara fasiqa mari inana aneenna kai tamummaqasee qinaqa iria, yafee ani arinoo fee.

*Peetooroofa Yisunara qaoo ufa.*

*(Mak 14:66-72; Ruk 22:56-62; Yoh 18:15-18,25-27)*

<sup>69</sup> Amaana maqasaa rakisimarusa uriqarafa Kaiafasafa nari maaqa ainainirafa firaafa marunara ainainira maanaaqauqa akaqausa nifiqa quqasoofaqa ainainimariqau. Peetooroofa aadumai sukinni oofuqaqeeufanoo ainainira maanaqa moo fannoo Peetooroona paqurimaseenoo qimaminoo qinau. Anee faqa mi kariree fasiqana Yisuna faqa nimirianauna marianauna.

<sup>70-71</sup> Miqi qufanoo, Peetooroofa iriseenoo aiqamausa nifusaa mi manaqana qimaminoo qinau. Sia ani ufa oosana iridaqa. Qinee sia mina faqa nunausee qimaseenoo naambeeqai ququsa kooqi marunnai oquroofanoo maanaqa moo fannoo kooqisaa rakisimarufa qafeenoo miqoo marusa qimannimino. Maa fasiqafa Yisuna Nasareeteendaraana faqa marifaqa qafee marunafa.

<sup>72</sup> Peetooroofa mi ufana iriseenoo kaukaata qimasee qaoo qinoo qinau. Sia qinee mi fasiqanara iridaqa.

<sup>73</sup> Kafa kaqikaa qoo marikamasoofaqa faiqi miqoo marusa anireeqa Peetooroona qimamiga qiqau. Kuqaa anee mi fasiqana faiqi namuki marianauna. Anee faqa mifa faqa kuqaa moodaa ufa qimariaqanda mariafanoo.

<sup>74</sup> Peetooroofa mi ufana iriseenoo kaukaata qimaseenoo darara qimaseenoo niqinoo qinau. Sia uqanna qinee mi fasiqanara iridaqa. Nanaree unna qida fee. Miqi qimasoofanoo kookooraana ufa qinau.

<sup>75</sup> Kookooraana ufa qimasoofanoo Peetooroofa Yisufa ufa qimamunara irinau. Yisufa qinoo. Qaaramoo kari ani irifaana anee qiniara sia fee qinanoo kookooraana ufa qiannoo. Peetooroofa mi ufanara oonumafi iriseenoo oo doo Yisuna ufa qiniara qifa anoona koorooinoo, qimaseenoo raudamakufanoo asauruseenoo firaqoo ikiraqa mareenoo finau.

## 27

*Yisuna afiqammaree Piratoofunnai fiqau.*

*(Mak 15:1; Ruk 23:1-2; Yoh 18:28-32)*

<sup>1</sup> Mi eendanaki iqaqoofaqa amaana maqasaa aanaiqirausa misa uriqararaura faqa Yuda maqannaai faiqi firaasa faqa suqusee Yisuna arira ufa qiqau.

<sup>2</sup> Arira ufa andeeqaseeqa unna qimasee fifau sainanda qumarasee Yisuna asauku rumbamaree Roomma maqannaai kiapafa Piratoofa marunnai afiqee fiqau. (Firaqoo mandoosana maraidanoo uriaqee marufa marufa qara foora sainandanni rumbamaree afiqee kiapafinnai fiqau.)

*Yudasifa nari ataakiroo ufana.*

*(NiFa 1:18-19)*

<sup>3</sup> Piratoofinnai maree firari marufanoo Yudasifa Yisufa kuquaninnanara irufanoo nari afaaqakina akooqoofanoo Yisuna akiaqara munnimma amaana maqasaa rakisimarusa faqa faiqi firaasa faqa marunnai Yudasifa moodaa fasiqa aiku asauku taikasee moo fasiqa asaukuqara taikasee ooni mareenoo kafa nimiraree qimaseenoo qinau.

<sup>4</sup> Oo qinee furufaramaseeqa. Andeeqara fasiqara asakadiki sia ikiri marinara kuquanifeera qinee dapikamandeeqa oosana arannanara. Minara qinee kafa inni munnimma nimidaqa. Miqi qufaqa misa qiqau. Anee kai qianaqa maasa amiqa, aneenna kai minara iria.

<sup>5</sup> Miqi qufanoo Yudasina aundura dapikufanoo munnimma mareenoo amaana maqakina aranaiqi teeqimmaquseenoo sandanau. Sandeefanoo moosaa nari sanda anukaki ataakireenoo doo kuqinau.



<sup>6</sup> Amaana maqasaa rakisimarusa Yudasina munnimma maraseeqa minaramma ufa qimariqau. Maasa maa munnimmana sia amaana maqaki quqaanaura, Mooseena sandufa miqimminoo maridanoo, fidika munnimma marifaqa.

<sup>7</sup> Misa minara ufa qiqi andeeqaseeqa mi munnimmana qumareeqee nammari sakasee nee maru qafeena auqimaru fasiqana kaqikaa maqa maaqa minaindi feefauriqau. Misee náriara mi maqana maraseeqa misa moo maqannaasa maasaki kuqifaqa mi maqanaki nikundaanee qimasee maraqa.

<sup>8</sup> Minara miqimasooqooqari mi maqanara fidika maqa fee qimariqau.

<sup>9-10</sup> Miqimaseeqa ooqeenaa tamummaqara fasiqa moo mina auqu Yeereemaia mina ooqeenaa ufa anoona kafa maqee kambiganau. Mifa maaqi qimasee akara rinoo qinau. Isaraee maqannaasa faiqi akiaqara munnimma maraseeqa qafee auqimaru fasiqana maqa maaqa feefaurumasee mareefara. Moo fasiqa taikasee moo fasiqa asaukuqara taikasee aqusee mareefara. Qinee Anutuna ufa irisee maraunaqa misa miqiqau. Yeereemaiafa ooqai akara rumaqoo ufafa miqinoo marufaqa sia irirai misa mi mau kai fidaqa mi maqana maraqa.

*Piratoofa Yisuna iroo ufafa.*

*(Mak 15:2-5; Ruk 23:3-5; Yoh 18:33-38)*

<sup>11</sup> Misausai maree fiqau. Yisufa Piratoona koota maqaki kikiqinoo marufanoo Piratoofa anireenoo Yisuna irammirinoo qinau. Anee kuqaa Yuda maqanna karaambaiqa fee maridane. Miqi qufanoo Yisufa anee qiannana qinee miqimmiqa maridaqee qinau.

<sup>12</sup> Amaana maqasaa aanaiqikirausa misa uriqararusa faqa Yuda maqanna faiqi firaasa faqa minara iriseeqa Yisunara ufa oosana oosana qidaqa kiapana qimami mariqau. Miqi qimarufanoo sia Yisufa ufa qimarinau, kaqi kasoo inoo marinau.

<sup>13</sup> Piratoofa minara mina qafamaseenoo qimaminau. Misa oosana oosana ufa aniara qimariafana anee naqi fee imarifanee sia ufa qidane.

<sup>14</sup> Miqi qimarufanoo Yisufa sia uqanna misa ufa itairiseenoo rukianau. Ufa sia qinau kaqi kasoo inoo marufanoo kiapafa qafeenoo aaquqoofanoo qafanau.

*Piratoofa innee Yisuna aruaqee qu ufafa.*

*(Mak 15:6-15; Ruk 23:13-25; Yoh 18:39-19:16)*

<sup>15</sup> Mi kamusaqa kiapausa faiqi anaasee Anutuna qangiroo ainnaaqarara qoomaqa neemarufanoo karafusa fasiqa moo idukusoofaqa minara faqa asiaqeeera. Kiapausa oosana mi oosanna maqee maqee miqimmimariqau.

<sup>16</sup> Mikari faiqi moo fannoo karafusaki marinau. Mina auqu Barabasifa. Sia kai fifaufau mina karafusa quqaqau. Faiqi akooqooqaraafa auqufaqaafa marufa karafusinau.

<sup>17</sup> Piratoofa minara faqa iriseenoo Yuda maqannaasa miqoo suqiqa marusa naaramasooofaqa suqumaree moodaaqoo aniroofanoo qimanniminoo qinau. Qinee maa kari Barabasinee idukunauree, Yisuna inni karaambaiqee idukunauree.

<sup>18</sup> Yuda maqannaasa uriqararusa Yisunara sia anoona marunara fifau mina afairiqa nimarusa marunara Piratoofa misa miqi qimaruna iridanoo Yisunara idukuanee qinau.

<sup>19</sup> Piratoofa ufa irira maqaki ooguqumari marufanoo nari anaafa fannoo nari maaqak-iqari pasa akara rumaseenoo moo fasiqasaa quqasoofanoo minisoofanoo Piratoofa asaana rumaseenoo qafanau. Nari anaafa fannoo qinoo. Sia Yisuna arua. Asauku raqandaamasee ireeda maria. Qaina daaquqara qaina qini qifunnareenoo. Mi andeeqara fasiqanara qainammaqaunoo daunduraki mandaiki marifaqa. Sia anee mina aruane qimasee akara rinau.

<sup>20</sup> Amaana maqasaa aanaiqikirausa faqa Yuda maqanna faiqi firaasa faqa Piratoofa Yisuna idukiraree quna iriseeqa quandafufaqa faiqi anaasee fukifaaki qiqa Piratoona qimamiqeeera qiqau. Barabasina kai idukuani Yisufa kuquani.

<sup>21</sup> Piratoofa kaifaa faiqi anaasee aiqama irammirinoo qinau. Miqandakina yanee qinee idukunauree. Miqi qimasooofaqa misa aiqama qiqau. Barabasina kai idukua.

<sup>22</sup> Piratoofa minara iriseenoo kaifaa qimanniminoo qinau. Qinee Barabasina idukiqa asauku mundirana Yisunara nane fee qianauree. Qimasooofaqa misa aiqamausa aunirira saqarisaa aruane qiqau.

<sup>23</sup> Piratoofa kaifaa misa irammirinoo qinau. Nana mandainanee marinaqee qinee aruanauree qimasooofaqa misa aiqamausa darara qimasee qiqau. Aunirira saqarisaa arua.

<sup>24</sup> Misa ufa firaqoo qidaqa tutuqimarufanoo Piratoofa misa sia qini ufa irifaqammu qimaseenoo qafee maraseenoo nammari saka uqeera mareenoo misa nifusaa quqaseenoo asauku nammari uqinoo qinau. Maa fasiqana aruannanara doo qisauku nammari uqiqa. Mina fidika sia qini qisakadiki mariani. Doo innikina mariannoo doo.

<sup>25</sup> Miqi qimasoofoaqa faiqi anaasee moodaa kari faaqa quqasee qimamiqau. Doo mina fidika maasaki faqa maasa faiqi namuki faqa mariannoo.

<sup>26</sup> Piratoofa minara iriseenoo Barabasina idukueeqeenoo niminoo Yisuna mareeqeenoo nari sundiauaqa nimufaqa misa miqoo nariqa maqusasaa quqasee raitasaa qainna rumbeeqoo samuna ataufakaqa aru ummooqukamaseeqa doo afiqee aunirira saqarisaa ariraree qimasee deedaqiqau.

*Sundiauaqa Yisuna amukafaqaqa qa fee afisuamaqaqa.*

*(Mak 15:16-20; Yoh 19:2-3)*

<sup>27-29</sup> Piratoona sundiauaqa miqoo naambeeqai Yisuna ariiseeqa kafa anirandee kipaana maaqaki munuseeqa aiqama sundiauaqa niqoonausa naaroofoaqa moodaaqoo anireeqa maridaqa Yisuna qamunna raipaqusee moo qamunna Roomma maqannaa sundia qamunna taatuqee qamunna afisuamaqasee saatunanda fooqaana maraseeqa saaeemma qumaree Roomma maqannaa rakisirana qafeera foora saaeemma qumaree Yisuna akiaqasaa aranaiqi afisu amaqoofanoo akiaqa tapooqaanifeera miqiqau. Afisu amaqaseeqa Roomma karaambaiga qunaana fooqaana Yisuna asauku uqannai quqamaqaseeqa noorindari fataafimafufaqa ataasataasa qidaqa qiqau. Oo Yuda maqannaa karaambaiga. Maasa uriqararafa.

<sup>30</sup> Miqi qimaseeqa firaqoo ataasa ataasa qidaqa misa niqaara fidamaqaseeqa mina qunaana asaukuki naana rafia qumaree akiaqakinai ariqau.

<sup>31</sup> Ataasataasa qiqi amaqaseeqa mina taikaseeqa taatuqee qamunna kaifaa raipaquseeqa kafa nari qamunna afisu amaqaseeqa aunirira saqarisaa arifandinaqoo afiqee fiqau.

*Yisuna aunirira saqarisaa ariqau.*

*(Mak 15:21-32; Ruk 23:26-43; Yoh 19:17-27)*

<sup>32</sup> Afiqammaree aanai fidaqa sundiauaqa Sireenee maqusanaindaraa fasiqa mina auqu Simoona amarana moo Simoona aanai paqurufaqa misa nari oosana mareeqa nari faaqaana uqafiqaseeqa Yisuna aunirira saqari aku amaqeeqa afeekaikamasee qiqau. Maree maasa faqa ania. Miqi qufanoo misa faaqaanara rufiamareenoo Yisuna aunirira saqari akumaree finau.

<sup>33</sup> Yisuna afiqee fifiufaqa Koorookata maqa maaqaki ooru fiqau. Koorookata mi ufana oosana faiqi akiaqa amudaani aaqana maridanoo.

<sup>34-35</sup> Sundiauaqa miqoo oorureeqa misa uainna nammariki sukaqee maru saqari anoona afaaqa iri quqaanifeera uainna nammariki adiasaqe Yisunara maana marasee naannee qufanoo Yisufa afaurusaa kai quqaseenoo qumboommasee qafeenoo minniseenoo sia noofaqa misa mina qumarasee aunirira saqarisaa rummamaqasee pirimma aru atukarasee uqera rakiqaseeqa mina qamunnanda faasai raipau quqaqoona qumaree kaatara foora sararamandeeqa doo nariara nariara mi qamunnausa maraqau.

<sup>36</sup> Qamunna mara taikaseeqa misa ooqu marifufaqa rakisimariqau.

<sup>37</sup> Misa Yisuna arira ufa raufiqira saqarisaa akara rumaseeqa Yisuna akiaqai aunirira saqarisaa quqaseeqa pirimmanai ariqau. Maaqi qimasee akara riqau. Maa fasiqafa Yuda maqannaa karaambaiga maridanoo fee qinau.

<sup>38</sup> Moo qumuarimaru fasiqana Yisuna dinni atinni nari aunirira saqarisaa pirimmanoo aruseeqa uqera rakiqaqau. Kafa moo qumuari maruna nari aunirira saqarisaa Yisuna dinni atinai pirimmanoo aruseeqa uqera rakiqaqau.

<sup>39</sup> Faiqi anaasee mina aqa fiqaree aiqaree imarusa misa Yisuna murufi qafaidaga ataasataasa idaqa qufoonaridaqa qiqau. Anee fee amaana maqa moodaa faasaana rapeemasee qaaramoo faasaana kafa usakararee qimariana fee.

<sup>40</sup> Anee kuqaa fee Anutuna amaaku maridane. Mina amaaku maridana aneenna kai tatuakinana quminaqa maasa ania kuqaa Anutuna amaaku fee qianaara.

<sup>41</sup> Amaana maqasaa aanaiqikirausa uriqararausa faqa Mooseena sandufa akoofasauqa faqa Yuda maqannaa faiqi firaasa faqa misauqa faqa miqi kai masee ataasataasidaqa qufoonaridaqa qiqau.

<sup>42</sup> Maafa faiqi anaasee mareeqee Anutuna asumu mariranaki mara quqannisaannee qimarifa nariara sia amanaikino. Kuqaa fee anee Isaraee maqannaa karaambaigee maridane. Kuqaa miqinana anee karaambaiga maridana maqee maqasaa tatuaki aqufinaqa maasa ania kuqaa karaambaigee qianaara.

<sup>43</sup> Mifa nariara Anutuna amaaku fee qimarifa Anutunasaa afaqa quqarafa marifanoo Anutufa minara iridanoo fee sia fee iridanoo fee. Iridanoofau qumureenoo mina dadaaqinoofau asumu mariranaki quqani.

<sup>44</sup> Qumuari maru fasiqaqanda dinni dinni nari aunirira saqarisaa maruqanda miqi kai qimaseeqa Yisuna ataasa ataasa qimamaqee mariqau.

*Yisufa kuqu ufafa.*

*(Mak 15:33-41; Ruk 23:44-49; Yoh 19:28-30)*

<sup>45</sup> Mi faasaanna kai asukuna firaafa aiqama maqa maaqa ititannimaqanau. Suani afu urureenoo uriufanoo mina akiaga amummaqa qambaanai ururoofanoo asukuna arunnimaqanau. Suani muqunni qubeekoofanoo asukuna taikoofanoo suani fannoo kafaa kaaqa qanau.

<sup>46</sup> Suani afu muqunni qubeekoofanoo asukuna kaqi marufanoo Yisufa firaa kari faagarinoo qinau nari ufakiqari qinau. Eeri eri rama sabakatani. Mina oosana maaqimminoo maridanoo. Qini Anutu, qini Anutu, naqi fee ifanee anee qiniara minniseenane.

<sup>47-48</sup> Miqi qufaqa faiqi anaasee mi saqa marusa Eeriaana aaraidanoommi maqi qima-soofanoo moo fannoo paadura au fooqaana atekamareenoo maara maaqanufasiqausa manda uainna nammariki raaraamaseenoo aika maraseenoo qundaqiseenoo minaki rutaquseenoo mara muru Yisuna ooki aakuamaqanau. Qumbifiqamma naanifeera afaurusaa quqasoofanoo qumbifiqamma nanau.

<sup>49</sup> Miqi marufaqa akaqausa qiqa. Saa. Eeriaafa qumureenoo dadaaqianoo fee. Kaqi kasooiqa marida qafaqa.

<sup>50</sup> Mikari Yisufa firaa kari faaqa quqaseenoo kuquqaraasinau.

<sup>51</sup> Mifa kuqufanoo aaqee kai Yeerusaree amaana maqakina ititaqoo qamunnafa naaquqara maqasaa ititaqoo qamunnafa mirindari aiqama raaqumareenoo muqufi aqinau. Firaafa maqa kasinau, firaa ooniuga afoo afaainau.

<sup>52</sup> Faiqi madika faqa oo raqanau. Oo raqasoofanoo ooqai kuqusa Anutuna ufa irimaru fasiqa anaaseesa maqee kuqiranakiqari findifumafi miqoo mariqau.

<sup>53</sup> Yisuna kuqiranakiqari findifufaqa mi kuqiraua akooqoo Yeerusaree maqusai oonuroofaqa faiqi anaasee moomoosa nindafaqa.

<sup>54</sup> Maara maaqanu fasiqausa Yisunasaa rakisidaqa ooqumari fufaqa rakisiusa asukuna qoofaqa maqa kasufaqa qafamasoofaqa nimuqusufaqa kaaqa rufiaqau. Rufeemarufaqa qiqa. Oo kuqaa uqanna maafa Anutuna amaaku uqanna mariifa kuqinoo.

<sup>55</sup> Yisufa aunirara saqarisaa marufaqa Kariree maqa maaqaindaraa aanaasee uqa ururee Yisunara dadaaqiannee qimasee uru anaaseesa nianai uru kikiqiqa marida qafee mariqau.

<sup>56</sup> Misakiqari Yisuna anoona amaraqanda mariqau, moo amarafa Makadara maqusaindariifa faqa moo amarafa qaara kumaaraqara Yooseefaasa Yameesasa ninoofa faqa (Maa Yooseefaafa sia Yisuna akoofau mina amarafa kumaaraa marinau) moo anaasee Seebeedina anaqa faqa mi anaaseesa faqa miqoo ani kikiqiqa maridaqa Yisuna kuqirana qafee mariqau.

*Yisuna ooni aamaraki akundoo ufafa.*

*(Mak 15:42-47; Ruk 23:50-56; Yoh 19:38-42)*

(Yisuna aukuaana nari maqannaasa maaqimmasee madika indufusaida kuqufusa nikundee mariqau. Misa ooni firaana kasaqa aamara auquseega minaki keeqafufaqa dinni dinni moomoo aamara auqiiseega kuqusa minakiqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>57</sup> Mi eenoonnai Aramatia maqusanaafa Yooseefaana amarana mifa faiqi firaafa ainaina faqaafa. Mifa Yisuna ufa irira faiqi kammafinoo kukeeqanoo marufa marinau.

<sup>58</sup> Mifa Piratoona oopisai oonureenoo Yisuna iriara oonureenoo Piratoona iramirinau. Amanee Yisuna iri qinee marasee fee akundaanauree qufanoo Piratoofa irinoo nari maara maaqanu fasiqausa qimanniminoo qinau. Innee maa fasiqana Yisuna iri mara amifanoo akundaani.

<sup>59</sup> Yooseefaana amarafa iriseenoo oorureenoo Yisuna iri auniriranasaa aruqoona tatuseenoo fuka qamunnasaa kukuqinau.

<sup>60</sup> Kukuqamaseenoo Yuda maqannaasa oosana mareenoo nari ooni aamarakina quqanau. Yooseefaafa nariara kuquana misa qini iri minaki akundamaqisaaqeeera ooni aamara auquqoonaki Yisuna iri minaki quqanau. Quqaseenoo firaa ooni quanda quandamseeqee aamarasaa ititaqau.

<sup>61</sup> Miqi marufaqa aanaaseeqara oonaamara adeedi ooqu marida qafee mariqau. Miqanda nuqu moodaa nuqufaqaqanda Mariana amaraqanda kai maruqanda mariqau. Miqanda madikee marufaqa ooqumarida qafeeufaqa eendufaqa maqusai fiqau.

*Firisuaiqauqa Yisuna madikasaa rakisiu ufafa.*

<sup>62</sup> Yuda maqannaasa narana ainaina deedaqamaqoo faasaana taikoofaqa mi eenoonnai amaana maqasaa aanaiqikirausa uriqararusa faqa Farisai amaana ufa irimarusa faqa suqufufaqa rumbarausa Piratoo finnai nari oopisai oorureeqa irammiriqa qiqaq.

<sup>63</sup> Oo amiqirafa mi unna fasiqafa kaqi maridanoo qaaramoo faasaana mariqa findi-fuaqee qinoo.

<sup>64</sup> Amanee aneenna maara fasiqausa niqiqainaqa ooni aamarasaa qaaramoo faasaana rakisiaqa. Mina faiqi namu ani gummuarammeeqee quqaseeqa unna qifoora. Doo findimmeeqee Anutufinnai fiifoo qimasee faiqi anaasee unna qimasee qimannimi foora. Indaaruu unnaqimarifa marifaqa minara Yisuna faiqi namu kafaq unnuqa qifanoo mi ufafa fraafaikiandoora. Minara ani qimamidaqa misa rakisiaqera.

<sup>65</sup> Piratoofoa minara iriseenoo quandaqfinoo aanoomasee qimanniminuu. Innee qini Roomma maqanna rakisimaria maara fasiqausa maraqa. Misa kai amiqimmasee rakisiaqa.

<sup>66</sup> Miqi qufaqa amaana maqasaa aanaiqikirausa ooni aamara maruqoo oonureeqa qima ainaina qumaree ooni kooqisaa faqa kooqi afainni faqa atukaraseeqa ititaqau. Moo fannoo mi ooni kooqina mara aquqafaqa qafaanee qiqa mi qimana quqaqau. Miqimaseeqa maara fasiqausa miqoo quqasee amaana maqasaa aanaiqikirausa doo nimaaga fiqau.

## 28

*Yisufa kuqiranakiqari findifu ufafa.*

*(Mak 16:1-10; Ruk 24:1-12; Yoh 20:1-10)*

<sup>1</sup> Nariqa amaana faasaana saririqa taikoofanoo iqaqoo kananaana amaanasaa eendai qaara anaaseeqanda moodaa nuqu faqaaqanda Mariana amaraqanda miqanda sia Yisuna anoqanda moo fannoo Makadana maqusaindaraafa moo fannoo moo maqusaindaraafa miqanda Yisuna akundoo ooni aamara qafaanee qimasee fiqau.

<sup>2</sup> Oonuree qafoofoanoo miqoo kai maqa fraafa kasufanoo innaarunindari Anutuna qangiroo moo fannoo qumureenoo ooni kooqi ititaqoona quanda quandammeeqeenoo kaqini quqaseenoo nari minasaa oogu marifi marinuu.

<sup>3</sup> Mina oori afiri aakuasaa idauru miqirafa marinuu. Mina qamunna kaaqa eekara kaaqa qarafa marinuu.

<sup>4</sup> Maara fasiqausa rakisiusa Anutuna qangiroo qafeeqa kaaqa rufiseeqa aiqama naindiri roofaqa noorindari maqasaa kuqiara foora mambiqau.

<sup>5</sup> Maqasaa noorindari faiqaqeeufanoo qangiroo fannoo anaasee oonuroosa maaqi qimasee qimannimino qinau. Innee sia rufia rufiaqiqa. Innee Yisuna aunirira saqarisaa pirimmanoo aruqaanara randaidaqa qinee iridaqa.

<sup>6</sup> Kaqi maridanoo inni qimannimi undeemmino maridanoo. Sia maaqoo maridanoo. Doo kuqiranakiqari findifinoo doo finoo. Innee mai anireeqa mifa mariiqoo qafaqa. Sia maridanoo.

<sup>7</sup> Innee qafamaseeqa sandee oonu mina faiqinamu maaqi qimaseeqa qimannimiqa. Yisufa kuqiranakiqari findifinoo doo Kariree maqa maaqai inni noorinni fidanoo innee miqoo qafeefaranoo miqoo mariannoo. Doo mi ufana kai inni qimannimiqa doo fuaqa.

<sup>8</sup> Anaaseeqanda qangiroo qafeeqa mina ufa iriseeqa kaaqa naaquqanau. Yisunara kuqiranakiqari findifu ufana irufanoo naundurai asasinoo naaquqoofaqa mi anaaseeqanda mina faiqi namu ufa qimannimianee qimasee fidaqa.

<sup>9</sup> Yisufa aanai mi anaaseeqanda tautummannimaqasee kikiqinoo marida nimandanau. Miqi qimasee qimannimisoofaqa misa naaquqoofaqa mina aiku qumaree noorindari maqasaa faifufaqa qimudago qidaqa amooqira ufa qimamiqau.

<sup>10</sup> Miqi marufanoo Yisufa maaqi qimasee qimanniminuu. Innee sia rufiaqa. Sandee oonu qini faiqi namu qimannimifaqa Kariree maqasai ooru fiqa miqoo qiqaqafeefaranoo.

*Yisuna madikasaa rakisiusa findifunara qumeeraqau.*

<sup>11</sup> Mi anaaseesa Yisuna ufa iriseeqa fiqau. Misa fimarufaqa maara fasiqausa ooni aamaraki rakisimarusa misa faqa rufiseeqa kuqiara foora iqa mariusa findimeeqee Yeerusaree maqasai oorureeqa amaana maqasaa aanaiqikirausa aiqama ufa qimannimiqau. Qangiroora ooni kooqi ititarana rafaqaanara qimannimiqau.

<sup>12</sup> Amaana maqasaa aanaiqikirausa misa Yuda maqanna faiqi fraasa faqa suqufufaqa minara ufa qimasee iriqau. Ufa qiqa andeeqaseeqa misa mi maara fasiqausa naaramaseeqa munnimma fraatia uqanna nimiseeqa maaqi qimasee qimannimiqau.

<sup>13</sup> Faiqi anaasee inniara Yisunara irifaqa innee maaqi qimasee qimannimiqa. Maasa eendakina kaaqa faiqaqeeunaqa Yisuna faiqi namu anireeqa ooni kooqi atuaseeqa

Yisuna iri qaindusu mareeqa doo kukeeqamaseeqa. Miqi mandaafaqa iqaqaiifaqa amaaqa kai qafeeqa.

<sup>14</sup> Miqi qimasee qimannimiaqa. Kiapafa firaafa Piratoofa mifa irisainaqa maasa oonureeqa andeeqaanaura sia mifa inni naruannoo.

<sup>15</sup> Mi maara fasiqausa misa eedoo qimaseeqa munnimma mara maree miqi qimasee faiqi anaasee qimannimi maree fiqau. Yuda maqannaa faiqi anaasee mi ufana kai Yisunara qimariqau.

*Yisufa nari faiqi namu nifusaa kooroo inau.*

*(Mak 16:14-18; Ruk 24:36-49; Yoh 20:19-23; NiFa 1:6-8)*

<sup>16</sup> Yisuna faiqi namu qisaukuqara taikasee qikunni ooqu moodaa marasee Kariree maqa maaqai fiqau. Yisufa kaqi maridanoo mi aaqannara qimannimiqoonara mi aaqannasaa ooru fiqau.

<sup>17</sup> Miqoo oorureeqa Yisuna qafeeqa reendeenamasee amooqira ufa qimamiqau. Moodaa moodaa qaara irirana iri mariqau. Mifee, yafee, afaanna fee.

<sup>18</sup> Mina faiqi namu miqoo ooru miqiqa marufanoo Yisufa adeedi anireenoo maaqi qimasee qimanniminau. Innaaruna faqa maqa faqa fira uriqararana Anutufa qini qiminoo. Moo fannoo sia qini uriqarafa mariannoo. Doo qinee kai.

<sup>19</sup> Innee minara irisee maqusa maqusa aiqama daraani mafiqa qimannimifaqa misa faqa qini qiku qisauku kammafi mariqeeera. Misa qini qiku qisauku kammafi marifaqa innee misa nammari auqamannimaqaaqa. Nammari auqamannimaqaseeqa maaqi qimasee qiaqa. Akoona faqa amaaku faqa Anutuna naaquqara andeeqara maraquna faqa misa nuqusaa nammari auqamannimaqaidaqa. Innee Yisuna aiku asauku kam-mafuanara minara mapuku nimaqaanifeera nammari auqamannimaqaidaqa. Doo miqi qiaqa.

<sup>20</sup> Aiqama ufa qimannimifannana misa faqa mi ufana aiqamausa uqanna qimannimifaqa iriseeqa mi ufana qumaraaqeera, mi ufanamau kai fuaqa. Innee maqusa maqusa fifaqa qinee faqa qumee inni faqa fuanaura. Innee miqi marifaqa qinee qumee kai inni faqa nuanaura. Sia inni mininnisaanaura kasoo innaaruna faqa maqa faqa taikara aukuaana inniqa saimbaqa moodaanaki kianaura.

## **MAREEKOOFA**

### **Yisuna amiqira fasaasa ufa Mareekoofa akara rinau.**

*Yoohaneefa nammari nimimarufa Yisuna aana afisufa.*

*(Mat 3:1-2; Ruk 3:1-18; Yoh 1:19-28)*

<sup>1</sup> Maa akarafa asauku mundirana Yisunara Anutuna amaakuara amiqira fasaasa ufa qidanoo.

<sup>2</sup> Anutuna ooqeenaa tamummaqara fasiqa auqu Eesaiaafa Yoohaneefa nammari nimarunara maaqi qimaseenoo akara rinau. Iriaqa qinee qini ufa maree marinnana qini Anutusa qisauku mundirana ani oorinni aqigaananoo fidanoo ani aana afisunnanoo.

<sup>3</sup> Aadana maqa maaqakiqari moo fannoo maaqi qimasee fi fi qinoo faaqaridanoo faiqi anaasee qimamidanoo. Innee karaambaiqa fuaninna aanna afisuaqa, andeeqara qoo kai karaambaiqa nuani.

<sup>4</sup> Mi tamummaqara fasiqana ufamau kai maaqimasee oosana araqaau. Yoohaneefa nammari nimi marufa aadana maqa maaqakiqari findifinoo faiqi anaasee nammari rumannimaqaidanoo maa ufana qimanniminau. Inneeqa mandainainakiqari quandaki nammari marasaifanoo Anutufa inni mandainaina akiaqara mininniseenoo sia naruanoo.

<sup>5</sup> Yudeea maqa maaqaki marusa faqa Yeerusaree maqusaki marusa faqa mi saqa marusa moomoosa Yoohaneefa marunnai Yooradanna nammari afainni marunnai ooqu reeqa nari mandainainara kooroomasoofanoo Yoohaneefa Yooradana nammariki mara quqasee keeqamannimaqasee uqeerasoofaqa findifiqa miqooqari fifainiqau.

<sup>6</sup> Yoohaneefa sia amiqira qamunna afisinau tamummaqara fasiqa naanna ramasee aadaika aadaikirafa, kameera asausinnai auqira qamunna afisusee aandau apatannai auqira pikapa qamunna rafaafufuseenoo marinau. (Kameera qoosa fooqaa ira aandau maridanoo.) Yoohaneena narana naafaa oofaafana nariqa minara pandaaqa oofaafanee qimaruna faqa ookasaasa anoona faqa kai nee marinau.

<sup>7</sup> Yoohaneefa maaqi qimasee faiqi anaasee qimanniminoo qinai. Qini qinaaqiannai kambiqaaninnafa qini firaqoo uriqararafa mariannoo. Qinee Yoohaneesa kasooqaqee kambiqaaninna fasiqana mina kaaqa ureeqaraua maridaqa. Naqimasee fee qinee mina dadaaqianauree ureeqara ainainira fasiqauqakiqari ureeqararaua maridaqa sia amana mina dadaaqianauree.

<sup>8</sup> Qinee nammarinna kai rumannima qaidaqa mifa naaquqara maraqunannai inni ruma nimaqaannoo.

*Yisufa nammari maroofa. Sadanafa Yisuna amanufa.*

*(Mat 3:13-4:11; Ruk 3:21-22; 4:1-13)*

<sup>9</sup> Yoohaneefa miqimmasee kaqikaqoo marikufanoo Yisufa Kariree maqa maaqakiqari Nasareete maqusaindari Yoohaneefa maruqoo ooquroofanoo Yooradana nammariki Yisuna nammariki tupamamaqanau.

<sup>10</sup> Yisufa nammarikiqari findifinoo qafoofanoo innaaruna rakeemafufanoo Anutuna maraquna fannoo nakipurunara foora Yisunasaa qumu quqanau.

<sup>11</sup> Quqamafufanoo innaarunaindaraa ufa moo maaqi qimasee Yisunara qinai. Anee qigaindi uqanna qimuqusira qimaaku marianafa qinee aniana amiqimasee qigaara raidanoo. <sup>12</sup> Doo miqooqari uqanna Anutuna maraquna fannoo Yisuna aqiqeenoo aadana maqa maaqaki kaasau maqa maaqaki sia faiqi marunnai nianai fuannee qufanoo finau.

<sup>13</sup> Mifa miqoo oonu maridanoo qaara fasiqa niku nisauku faasaana marisoofanoo Sadannafa anireenoo manda oosana maraanifee qimaseenoo amanamasee qafosianoo. Kaasau aandaqa miqoo marufanoo Yisufa marikufanoo aararoofanoo kudoosaapoofaqa qangiroouqa qumureeqa dadaaqiqau.

*Yisufa aaqee eera siammaa faiqi namu nifiqanau.*

*(Mat 4:12-22; Ruk 4:14-15; 5:1-11)*

<sup>14</sup> Yuda maqannaasa karaambaiqa Eeroodeefa Yoohaneena nammari nimimaruna karafusaki rumbasoofanoo miqooqari Yisufa Kariree maqa maaqaki oonuree faiqi anaasee Anutuna amiqira fasaasa ufa qimannimida maaqi qimasee qimannimi marinau.

<sup>15</sup> Andeeqara kamu doo ani maridanoo Anutuna rakisira ququsa doo adeedi ranoo maridanoo. Innee inneeqa mandainainakiqari quandakinaqa amiqira fasaasa ufa irisee inni irirana minasaa rusiaqa.

<sup>16</sup> Moo kari Yisufa nammari farumma firaana Kariree maqa maaqaki maru nammarina afaimau fidanoo noodaanna mi nammarinaki maree maru fasiqanda nári qisafasaasa nindafanau. Miqanda nári oosana maraidaqa firaqa pateeuqa nammariki aqusaída noodaannauqa rumafi marufaqa maree mariqau. Moo fasiqa auqu Simoonafa marinau, mina akaqa mina faqa maruna auqu Andurufa marinau.

<sup>17-18</sup> Yisufa miqanda nindafamasee qimanniminoo qinau, inneegara qini faqa aniraifaqa faiqí anaasee noodaannara foora mareeqee Anutuna ququsaki quqefaranoo fee qufaqa miqanda nári pateeuqa miqoo quqasee Yisuna faqa fiqau.

<sup>19</sup> Yisufa miqooqari kaqikaqoo nammari afaiqara fidanoo qaaraqanda qisafasaasa paqurinau, miqanda Seebeedina amaakuqara mariqau. Miqanda nuqu Yameesana faqa nári akaqa Yoohaneesandiri mariqau. Sia nammari nimimaru Yoohaneefa marinau, mina amarafa marinau. Miqanda nári kanuqaki ooqu maridaqa fafaa eendaki nári pateeuqa nammariki aqusee noodaanna maraane qidaqa deedaqi mariqau.

<sup>20</sup> Yisufa miqanda niqafamasee naarooafaqa nári nikoona Seebeedina faqa nári ainainimarusa faqa quqanniseeqara Yisuna fi afaqee fiqau.

*Yisufa faiqí aundurái afaanna afaqanau.*  
(Ruk 4:31-37)

<sup>21</sup> Minamusa Yisuna faqa fi fiufaqa Kapeeranaumma maqusai oonu raqau. Yuda maqannaasa amaana saririqa sabatee qimarunasaa Yisufa nariqa amaana maaqaki keeqafinoo faiqí anaasee amaana ufaa naakapanau.

<sup>22</sup> Mina ufa irimarusa firaqoo naaquqanau. Sia Mooseena sandufa akoofasauqara foora qimanniminau, nári Anutufara foora qimannisoofanoo naaquqanau.

<sup>23-24</sup> Yisufa qimannimi marufanoo faiqí moo aundurái faafasaaqa marufa amaana maqaki keeqafi faqa quqasee Yisuna qimaminau, Yisu anee Nafaretee maqusanaafa anee nanaree maasa soodaaqidanee, anee maasa daru taikararee anidanee, qinee aniará iridaqa anee Anutuna naaquqara ufa maree marianafa mariananoo.

<sup>25-26</sup> Yisufa mina aundurakináa afaanna amambaina qimasee qimaminau anee ufaseenana mi fasiqanakiqari rafudamaki fua, qufanoo mi faafasaaqafa mi fasiqana qumaree udamudami firaqoo masee firaqa kari aqnaakinakiqari faaqa quqaseenoo rafudamaki sandanau.

<sup>27</sup> Faiqí anaasee mina qafamasoofanoo naaquqooafaqa nári qimami nári qimamiqa qiqau. Maa fasiqafa Yisufa nane maridanoo, nana fuka naakaparufa qinoo fee. Maa fasiqafa nári Anutufara foora nári afeeka ufannai kaasau afaannauqa qimannimifaqa eedoo kai qimasee rafudamaki fiqa.

<sup>28</sup> Miqunara Kariree maqa maaqaki Yisuna aufakiana fannoo kaqi kaqi ufanoo aiqamai daraaninau.

*Yisufa oosana oosana aurirana taikannisanau.*  
(Mat 8:14-17; Ruk 4:38-41)

<sup>29</sup> Misa mi amaana maqanakiqari rafudamakufaqa Simoonasa Andurusa maaqaki fiqau. Yameesa Yoohaneesa misa faqa fiqau. Yoohaneefa nammari nimimaruna amarafa Yisuna aiku asaukukirafa marufa misa faqa finau.

<sup>30</sup> Simoonaa airaamaku anaasee aidafi marufanoo afaaqa ididi marufanoo faiqaqee marinau. Yisufa maaqaki keeqafufaqa mi anaaseenara Yisuna qimamiqau.

<sup>31</sup> Yisufa iriseenoo mifa marunnai oonureenoo asauku qumareenoo uqeeroofanoo mina afaaqa ididiufa taikoofanoo aqee findifinoo narana ainaina niminau.

<sup>32</sup> Eeneemarufanoo suani keeqoofanoo miqoo marusa nári faiqí anaasee auri marusa faqa fueena faafasaaqa marusa faqa aiqama nifiqee

<sup>33</sup> Yisuffinnai minisoofanoo aiqama mi maqusanaki marusa mi maqannaasa ani mara uqusee miqoo suqi mariqau.

<sup>34</sup> Yisufa moomoo aurirana oosana oosana aurirana andeeqanniseenoo faafasaaqa marusa moomoosa miqimma quqannimufaqa rafudamaki sandaqau. Misakina faafasaaqauqa Yisufa Anutuna amaaku marunara irisee kooroo iandoo qimasoofanoo Yisufa misa ufaa qaoo qufaqa sia ufa qirai kaqi rafudamakidaqa sandaqau.

*Yisufa Kariree maqa maaqaki nimiranau.*  
(Ruk 4:42-44)

<sup>35</sup> Mi eendanaki faiqee kananaana uqanna eendai Yisufa findifinoo maaqakiqari raudamakinoo maqusai ooqureenoo ooqiqaaree faiqí sia maru maqa maaqanai oonu maridanoo Anutunara innaaru qimarinau.

<sup>36-38</sup> Simoonafa faqa mina aqoondiufa faqa randaqa nida Yisuna paqurimasee qimamiqa qiqau, aiqamausa aniará randaidaqee qufanoo Yisufa qinau, maasa maa maqa

maaḡanaki maḡusa maḡusa moo maḡusai fuanauranoo. Anutufa misauḡaki faḡa ḡimannimiane ḡimasee diḡiḡaisa maridaḡa.

<sup>39</sup> Miḡi ḡimaseenoo Yisufa Kariree maḡa maaḡaki oonuree aniree idanoo nári amaana maaḡakiḡa keeḡafida ḡimannimidanoo naundurairi faafasaḡa marusa niḡiḡee maru-faḡa rafudamakida fimariḡau.

*Yisufa karoora arimaru fasiḡana ruukaisanau.*

*(Mat 8:1-4; Ruk 5:12-16)*

<sup>40</sup> Manda namuana karoora ari maru fasiḡafa moo fannoo Yisuna oorini aḡoori saunara fufanoo firaaḡoo innaaru ḡinoo ḡinau. Oo karaambaiḡa anee aidinana ḡini karoora darimarina rukaḡisaina taikaani. (Mi aukuanḡa misa mi auriranara firaaḡoo rufiasee mina narimarusana naadumasaa nianasaa ḡuḡee mariḡau.)

<sup>41-42</sup> Yisufa mi fasiḡana ḡafoofanoo amuḡusa mandaikufanoo asauku uḡeerasee mina afaaḡasaa munduseenoo ḡinau, eeoo ḡini dididanoo doo rukafua ḡufanoo doo miḡoo uḡanna aḡee miḡi ḡimarufanoo karoora ruka taikanau.

<sup>43-44</sup> Ruka taikafufanoo Yisufa amambaina ḡimasee ḡimaminau, aniki kai taikafuani, sia moo fasiḡa ḡimamia. Anee andeeḡasee amaana maaḡaki mari anaikikirana uḡafiḡasainanoo ani afaaḡa karoora arimarina aiḡuḡummaseenoo aniara anukanoo mariaanoo ḡiannoo. Miḡi ḡinana anee karoora nári marisa taikarasa aandanu tatufirana Mooseena sandufamau fidana Anutuna tatufirana suḡa amia. Suḡamisainaḡa aiḡamausa ani karoora rukarana ḡafamasee sia aniara eerairiḡeera. Miḡi ḡimasee Yisufa mi fasiḡana aiḡiḡoofanoo finau.

<sup>45</sup> Mi fasiḡafa karoora taikafufa sia Yisuna ufa irisee umee ranau miḡooḡari fidanoo aiḡamai ḡimanniminoo finau. Firaaḡoo ḡimannimi marufaḡa moomoosa umbiḡoofanoo Yisufa aadumai marufaḡa faiḡi anaasee moomoosa mifunnai fimariḡau.

## 2

*Yisufa aiku asauku pipisaaḡa usirana andeeḡaisanau.*

*(Mat 9:1-8; Ruk 5:17-26)*

<sup>1-2</sup> Qaaraḡanda fee qaaramoo faasaanee aiḡaroofanoo Yisufa nári maḡusai Kapeer-anaumma maḡusai anireenoo nári maaḡaki keeḡafufaḡa faiḡi anaasee minara iriseeḡa mi maḡanaki moomoo keeḡee ḡumbiḡafufanoo kooḡiki faḡa naambeeḡai faḡa ḡumbiḡaḡufufanoo Yisufa maaḡaki maridanoo Anutuna ufa ḡimannimi marinau.

<sup>3</sup> ḡimannimimarufaḡa faiḡi qaara faḡa qaara faḡa moo fasiḡa aiku asauku kuḡirana ḡaindusumaree mina ainaina faḡa aniree Yisuna uḡafiḡaane rufaḡa faiḡi ititafufaḡa keeḡarara anuḡusia misa maaḡamau akaramafiḡa.

<sup>4</sup> Yisuna akiaḡa amummaḡa nári eefeeda maaḡa asaana rapeemandeeḡa mi fasiḡana nári ḡainda namufaḡa minaki upeekasee ḡuiḡa ḡuiḡa ufanoo meemaí Yisuna aaḡa ḡuḡaḡau.

<sup>5</sup> Misa irirafa firaaḡoo Yisunasaa atoḡoonara Yisufa ḡafamasee aiku asauku kuḡirana ḡimaminoo ḡinau. ḡini ḡimaaku ani mandainaina akiaḡa minnaisaidaḡa.

<sup>6</sup> Mooseena sandufa akoofasauḡa miḡoo ooḡumarifi irufanoo nikoḡoofaḡa nári naundurairi oonu mafi iriḡa ḡiḡau.

<sup>7</sup> Maa fasiḡafa naḡifeemasee unna ḡimasee paasoosidanoo Anutuna amaaḡa maḡaidanoo fee mi ufana ḡidanoo fee. Sia faiḡi moo fannoo amana faiḡi mandainaina taikannisaannoo Anutufa kai amana miḡiannoo.

<sup>8</sup> Miḡi ḡimasoofanoo Yisufa aḡee uḡanna misa naundurakinaana iriseenoo quandaki ḡimanniminau. Innee naḡi fee ḡifaḡee inneeḡa naaḡookinaana mi mandufana ḡidee.

<sup>9-10</sup> ḡinee maa fasiḡanara mandainaina numoo minnaisaidee ḡunnana innee ḡiniara sia amanaikiaanoo fee ḡidee, ḡinee faiḡi nimaaku maa maḡanasaa maridaḡa faiḡi mandainaina taikarana ḡini afeeka marinara kooroomma nimaḡaanaura maa firaa afeeka ainainannai kooroomma nimaḡaanaura ḡinee maa fasiḡanara aneenna ḡain-dasaḡari findifinana mi ḡaindanara maree amaaḡa fua ḡianaḡa ḡinee mandainaina taikannisaana afeeka ḡafeefara. Miḡi ḡimannimiseenoo quandaki mi aiku asauku kuḡirana ḡimaminoo ḡinau.

<sup>11</sup> Ani ḡimamidaḡa anee findifinana aneenna ḡainda mara maree amaaḡa doo fua.

<sup>12</sup> Miḡi ḡimasoofanoo aiḡamausa nifusaḡari mi fasiḡafa findifinoo nári ḡainda mara ḡumareenoo doo amaaḡa kaḡi kaḡi finau. Misa ḡafamasoofanoo firaaḡoo naaḡuḡoofaḡa Anutuna amooḡidaḡa ḡiḡau. Maasa sia uḡanna maaḡira ainaina ḡafaunasa maridaḡa.

*Yisufa Reefina afiḡanau.*

*(Mat 9:9-13; Ruk 5:27-32)*



<sup>13</sup> Yisufa kafaan anirandee Kariree firaa farumma maruqoo fufaqa faiqi anaasee moomoo mina afaqee oonuroofanoo Anutuna ufa qimannimimarinau.

<sup>14</sup> Mifa mi saqa oonuree aniree idanoo faiqi moo nari maqannaasa takisa munnimma mareeqeenoo Roomma maqanna nimimaruqa paqurinau. Mi fasiqana auqu Reefifa mina akoofa Arafaiusafa marinau. Reefifa nari oopisaki oqumarifi marufanoo Yisufa mina qafamasee aniree qimaminoo qinau. Anee qini faqa fua qufanoo, Reefifa iriseenoo aaqee findifinoo Yisuna faqa finau.

<sup>15</sup> Yisufa marikinoo moo kari Reefina maaqaki keeqafi narana nee marufanoo manda oosana maree marusa faqa takisa munnimma maree marusa faqa Yisuna faqa nimarusa misakiqari akaqausa Yisufa nari faiqinamu faqa Reefina maaqaki oogu marifi narana nee mariqau.

<sup>16</sup> Mooseena sandufa akoofasauqa Farisai amaana ufa qimarusa anirama qafamaseeqa Yisufa manda oosana maree mariasa faqa takisa munnimma maree mariasa faqa naidanoo fee qimasee Yisuna faiqi namu umee irammiriqa qiqau. Naqaa fee qifanoo fee takisa munnimma maree mariasa faqa manda oosana maree mariasa faqa narana naidanoo fee asaurirana sia fee marifanoo.

<sup>17</sup> Miqi qufanoo Yisufa misa ufa irisee qimanniminu. Faiqi anaasee amiqimasee mariafaqa sia tutaqausiannai fidaqa, aurimariasa kai tutaqa finnai fidaqa. Sia qinee andeeqarusa naararara qumuafanausa maridaqa, faiqi anaasee innee manda oosana maree mariasee qimasee nifaqee mariasa misara Anutufinnai ubeekaaqera naaraaqeera qinee qumuafanausa maridaqa.

*Narana auramasee innaaru qufa.*

*(Mat 9:14-17; Ruk 5:33-39)*

<sup>18</sup> Moo kari Yoohaneefa nammari nimimaruqa aiku asauku faqa Farisai amaana ufa qimarusa niku nisauku faqa Anutufa maasa ufa irianifee qimasee narana marufaqa mina minniseeqa naararee marufaqa innaaru saika kai qimariqau. Akaqausa Yisufunnai oonuree irammiriqau, naqi fee qifaqee ani aiku asauku sia misa naanna raida Yooha-neena aiku asauku faqa Farisai amaana ufa qimariasa niku nisauku faqa narana sia narai naararee marifaqa innaaru qidaqa, ani aiku asauku nanaree sia miqidee qufanoo

<sup>19</sup> Yisufa qimanniminoo qinau, nimundara goomaqa sakasee naidaqa suqimariasa naararee maridee miqidee. Oo sia uqanna miqifara. Amundara fasiqa miqoo maridaqa asasira faasaana marifaqa narana naida maridaqa.

<sup>20</sup> Kasooqagee moo aukuaana misa amundara fasiqa qini misakinaana rumbamaree munu darusaiqa mikari qini qiku qisauku narana minniseeqa naarara maridaqa innaaruqifaranoo.

<sup>21</sup> (Yisufa Farisai amaana ufa qimarusa faqa Yoohaneena nammari mareemarusa faqa misara ooqeenaa Mooseena sandufa nari niku nisauku qimannimi marunakinara kikiqususee gamunnara faqa uainna nammariara faqa mina kikiqammusinau. Kafaan nari qumu fuka ufana nari faqa nimarusa qimannimunara fuka uainna faqa fuka qamunna faqa kikiqusinoon maaqi qimasee qimanniminu.)

Sia faiqi moo fannoo fuka qamunna ati ateeqarana marasee nauraa qamunnasaa itaane qimasee akunuanoo. Miqinanoo fuka qamunna ati fannoo ooqeenaa qamunna afauqarafa rakeeinoo firaqoo anaqianoo.

<sup>22</sup> Yafee faiqi moo fannoo nauraa tunda taqu maraseenoo fee fuka nammari adiaannoo fee. Sia miqiannoo. Ruqia finanoo aiqama nammari qumiqaraandoora. Fuka taqu andasee fuka nammari minaki adiasainanoo mina amana mariannoo.

(Yisufa maqasaa maru aukuaana misa uainna nammari tatisee andau apatannai auqira taquki adisee kisaqasaa maaqaki quqasoofanoo marinau. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammari faqinau. Mifa andau apatannai auqira taquara qufaqa, maasa qeeqa ufakiqari taqu uqannee qidaqa.)

*Sabatasa qumma ruqoosa noofa.*

*(Mat 12:1-8; Ruk 6:1-5)*

<sup>23-24</sup> Yisufa moo faasaana Saririqasaa Yuda maqannaasa amaana faasaana nari faiqi namufaqa maqusamau nidanoon sakuma ummaquqoo ququsanaki fidanoon mina faiqi namu fi sakuma rasau fu maree naqafufanoo Farisai amaana ufa qimarusa nindafamasee Yisuna qimamiqau. Ani faiqi namu Mooseena sandufa, Saririqa sandufa rukiaidaqa sakuma ruqoosaidaqa ainainidaqa.

<sup>25-26</sup> Yisufa mina iriseenoo quandaqi maaqi qimasee qimanniminu. Innee Dafidina oosana sia fee innee asaana ridee. Ooqi Saurooofa mina arirarufanoo sandeenoo aararee marufanoo Anutuna amaana maqaki Nooba maqusai marunaki keeqafinoo

Anutuna amimaru feemuna marasee akaqana marasee narí faiqí namufaqa nimufaqa naqau. Mooseena sandufa rukiasee nanau, aanaiqikirausa kai nee maria feemuna marufanoo sandufa rukiasee kaqiqeefa nanau. Mi aukuanna Abiatarafa aanaiqikirausa uriqararafa marinau. Innee moomoo kari mina asaana rimariafa mina oosana innee sia fee minara iridee.

<sup>27</sup> Anutufa narinaindari faiqí dadaaqi mari ainainee qimasee Saririqa amaana faasaana auqeeqeenoo faiqí nimirau. Sia kaqinaindari Saririqa amaana faasaanara irisee faiqí auqeeqeenoo amaana faasaana aminau.

<sup>28</sup> Minara qinee faiqí nimaaku amaana faasaana faqa mina sandufausa faqa uriqararusa marunausa maridaqa qinee misara naaqee quanaqa naidaqa miqi marifanoo sia numoo mariannoo.

### 3

*Yisufa asauku sufirana andeeqoofa.*

*(Mat 12:9-14; Ruk 6:6-11)*

<sup>1</sup> Yisufa moo faasaana kafaa mi amaana maqanaki keeqafi qafoofanoo faiqí moo asauku sufirafa faiqí anaasee moomoo namufaqa keeqafi marinau.

<sup>2</sup> Akaqa fasiqa anaasee Yisunara ufa qianee qimasee amaarusidaqa asauku sufirana faqa Yisuna faqa amiqimasee ninda fee mariqau. Yisufa Saririqasaa fee faiqí asauku sufirana andeeqannoo fee Mooseena sandufa rukiannoo fee qidaqa qafee mariqau.

<sup>3-4</sup> Yisufa amaana maqaki faiqí anaasee amaana ufa qimannimidanoo asauku sufirana aaramasee qinau anee mai aniree aiqamausa nifusaa kikiqia qimaseenoo quandaki faiqí anaasee irammirinoo qinau. Mooseena sandufa Saririqa faasaana sandufa fannoo maasara naqi fee qidanoo maasa minasaa faiqí anaasee dadaaqafee ianauree kuridi-anauree maasa faiqí marirana asumufee marannimianauree kuridi taikannimaqaanau-ree miqi qufaqa misa sia ufa qiqau kaqi kasoomafigau.

<sup>5</sup> Yisufa mina qafamasee raiqara oori maraseenoo faiqí anaasee aiqama munu ninda fee mini ninda fee maseenoo misa aaqarana afeeka irirana nindafa masoofanoo misara amuqusinau. Amuqusufanoo mi asauku sufira fasiqana qimaminoo qinau aneenna asauku ratutaa qufanoo asauku ratutasoofanoo mina asauku amiqinau.

<sup>6</sup> Farisai amaana ufa qimarusa minaki marusa qafamaseeqa amaana maqakiqari rauda makufaqa Eeroodeena ufa irimarusa faqa suqufufaqa Yisuna arira ufa qimariqau.

*Yisufa kanuqakiqari aiqama maqannaasa ufa qimanniminau.*

<sup>7-8</sup> Miqooqari Yisufa Kariree farumma firaa farumma tia marunnai oofufufaqa faiqí anaasee moomoosa afaqa maree oogu fiqau. Akaqausa Kariree maqa maaqakiqari aniqau, akaqausa Yudeea maqa maaqakiqari aniqau akaqausa Yeerusaree maqusakiqari aniqau akaqausa Idumeea maqa maaqakiqari aniqau akaqausa Yooradana nammari dinni afainni marusa aniqau, akaqausa Tiree maqusakiqari faqa Sidoonna maqusakiqari faqa misaqa marusa faqa aniqau. Doo mi fasiqa anaaseesa moomoosuganna tatufufaqa Yisufa imaru ainainausara iriseeqa qafararee qimasee ani suqiqau. Faiqí anaasee moomoosa Yisuna auqaidaqa radamuqaammimariqau.

<sup>9-10</sup> Yisufa misakinaana moomoo aurimarusa andeeqannisee marunara faiqí anaasee aiqama oosana oosana aurirana maraqanusa nisaukukoo Yisuna auqaananoo maasa aurirana taikaanifee qimasaida Yisuna auqaidaqa radamuqaqa imariqau. Yisufa minara iriseenoo narí faiqinamu qimanniminau innee kanuqa rarisama daaqa nammariki quqaaqa misa qini radamifaqa kanuaki akaraanaga sia radamuqa qufaqa misa miqim-niqau.

<sup>11-12</sup> Faiqí anaasee faafasaaqa naunduraki marusa Yisuna qafamasoofaqa naunduraki maru faafasaaqausa faasai misa Yisuna qafamaseeqa faaqa quqasee koorooiqa qiqau. Anee Anutuna amaaku mariana fee qufanoo Yisufa nimambaina qimasee qaoo qinoo qinau sia innee afaannauqa qiniara kooroo iqa.

*Yisufa qikuni oogu qaara marasee fasiqa narí faiqí namukiaqeera maranau.*

*(Mat 10:1-4; Ruk 6:12-16)*

<sup>13-14</sup> Mi fasannai Yisufa amuaqu namusa oorureenoo narí aiku asauku marianeese qimarusa naara masoofaqa aniroofanoo Yisufa misakinaana qisaukuqara faqa qiku oogu qaara marasee nuqu reenoo qini faqa mariaqee qimasee nuqu reenoo niqiqoo fasiqausee qimasee qimanniminoo qinau, qinee inniara rusandeesamumasee mareeqa qinee inni niqigaanaqa maqusa maqusa nidaqa qimannimiaqa.

<sup>15</sup> Faiqí anaasee faafasaaqa naunduraki marina aqiqee marunna afeekana nimianaqa aqiqeeferanoo.

<sup>16-17</sup> Maanamusa Yisufa rusandeesamumandee maranau.

Simoonna Yisufa moo auqundanau Peetooroonee qimasee rusandeesamumandee mina faqa narí faiqi namuki quqanau.

Seebeedina amaakuqara Yameesafa faqa narí akaqa Yoothaneena faqa miqanda Yisufa moo nuquranau Booaneeraqeesafa mi nuquna oosana innaarunai qimarina fooqaqandee qimasee miqanda faqa rusadeesamumasee narí faiqi namuki quqanau.

<sup>18</sup> Andurufa faqa

Firipifa faqa

Baratooroomeeufa faqa

Mataioofa faqa

Toomasifa faqa

moo Yameesafa Arafaiusana amaaku maruna faqa

Tadeusafa faqa

moo Simoonafa narí kaamannaikiaqera qimarufa.

<sup>19</sup> Yudasifa Keerioota maqusaindaraafa Yisunara kasooqaqee uqeeqaaninafa mina faqa misauqa faqa mareeqeenoo narí faiqi namuki quqanau.

*Beeraseeburanannai afaanna aqiqaidee qiqau.*

*(Mat 12:22-32; Ruk 11:14-23, 12:10)*

<sup>20</sup> Miqooqari Yisufa narí maaqai Kapeeranaumma maqusai maaqaki keeqafufaqa faiqi anaasee moomoo uqanna maaqaki ani umbiqafufanoo narana naani quna minniseenoo narí faiqi namufaqa sia nanau.

<sup>21</sup> Faiqi anaasee Yisunara doo furufara mandeaafooo qufaqa mina atiuqa niraqaooqafaqa Yisuna oonu rarisee anirara deedaqiau.

<sup>22</sup> Mooseena sandufa akoofasauqa akaqausa Yeerusaree maqusaindari qumusa Yisunara maaqi qimasee qimarigau. Mifa afaannauqa uriqararafa Beeraseeburafa mina aundurai marifa maridanoo fee qiqau. Akaqausa Yisunara afaanna uriqararaua afeeka amimariafanoo minannai afaannauqa niqigaidanoo fee qimarigau.

<sup>23</sup> Yisufa minara iriseenoo faiqi anaasee naaramma quqasoofaqa aniroofanoo moo ainaina kikiqa ususeenoo quandara ufa kai qimanniminoo qinau. Naqimasee Sadannafa quandaki Sadannana aqiqaannoo fee sia amanaikianoo.

<sup>24</sup> Moo maqannaasa narinni narinni rakiqa rakeekaa iqa doo mi maqannaasa taikee kuridifaranoo.

<sup>25</sup> Moodaa oosana moodaa maaqaki mariasa rakuakiqa doo misa faqa taikeefaranoo.

<sup>26</sup> Sadannafa narí ququsakinaasa faqa miqikai inoo rakuakinanoo sia amana kisaqaqasaa mariannoo moodaa moodaa inoo taikaannoo.

<sup>27</sup> Ummuarimari fasiqafa naqimandee afeeka fasiqa maaqa rapeemaseenoo mina ainaina ummuariannoo fee sia amanaikianoo. Mi ummuari mari fasiqafa anireenoo sanda gumareenoo mi afeeka fasiqana rumba quqaseenoo miqoo mina maaqaki keeqafi mina ainaina ummuariannoo. Qinee Anutuna afeekannai Sadannana rumba quqaseeqa mina afaannauqa faiqi nauduraki mariasa niqigaidaqa.

<sup>30</sup> Misa Yisunara afaanna mina aundurai maridanoo mifoo qimarunara mi ufana qinau.

<sup>28</sup> Maa ainainara kai iriaqa sia aunuqa. Faiqi anaasee oosana oosana mandainaina faqa oosana oosana manda ufa qirana faqa moomoo kari qimariana faqa Anutufa minauqa akiqara amana mininnisaannoo.

<sup>29</sup> Moo fannoo Anutuna naaqqara maraqunara manda ufa qinanoo Anutufa mina akiqara sia uqanna minnaisaannoo mi ufana qimarifa naaru naaru fimaria idanaki aaqarana marasaifanoo sia uqanna Anutufa minnaisaannoo.

*Anutuna ufamau fimariasa qini ainaina maridaqa.*

*(Mat 12:46-50; Ruk 8:19-21)*

<sup>31</sup> Yisufa miqida maaqaki ufa qimannimimarufanoo mina akaqaafasaa mina anoona saimbaqa naambeeqai ani kikiqiga maridaqa Yisuna qimamianeerufanoo sia amanaikufaqa faiqi moo aqiqee oonu Yisuna qimaminanoo aniani fee qiqau.

<sup>32-35</sup> Maaqaki Yisuna fiq fiqiuqa ooqu mariqa marusa mi ufana irisee qimamiqau ani anoofa faqa ani akaqaafasaa faqa madaana maridaqa ani aareea maqi qufanoo Yisufa iriseenoo miqoo marusa irammirinoo qinau. Yafee qini qinoo fee yafee qini qikaqaafasaa fee qimaseenoo narí faqa marusa munu ninda fee mini ninda fee maseenoo qinau. Qafaqa, maaqoo qini qinausa qini qikaqaafasaa maridaqa, qini qikoona iriranamau fimariasa misa kai qini qikaqaafasaa qini dauna qikaqa qini qinausa maridaqa.

## 4

*Qaqama aaqee mari ufafa.*

*(Mat 13:1-9; Ruk 8:4-8)*

<sup>1</sup> Yisufa kaifaa Kariree nammari afainni ooqu maridanoo Anutuna ufa miqoo suqi marusa qimannimi marinau. Faiqi anaasee moomoo mina ufa iriraree qimasee aiqama anireeqa Yisuna ititasoonara mifa kanuqaki akaramafufanoo nammariki afiga quqaqoofanoo munu kasoomasee maridanoo minakiqari nammari afaisaa faiqi anaasee marusa Anutuna fasaasa ufa qimannimimarinau.

<sup>2</sup> Yisufa sia akooqoo qimanniminu, quandara ufakiqari qimannimidanoo maaqi qimasee qimanniminu.

<sup>3</sup> Innee amiqimmasee iriaqa faiqi moo fannoo maasa Yuda maqannaasa oosana mareenoo maqa rumaseenoo raisa fooqaana ummaqirara mina qaqama marasee minaki aaqasoofanoo ururanau.

<sup>4</sup> Mifa miqoo aqaaidanoo akaqa qaqama fannoo aatata niku ree mariaqoo faqa aqufufafa ufinuqa aniree mina kai namasaqau.

<sup>5-6</sup> Akaqa qaqama ooni meemai maqaki marufanoo minasaa maqa oodaa marunasaa aaqasoofafa sia moomoo maqa marunara maqa tootooqi marunara dauni ururamafi marufanoo suani firaafa qoofanoo mina atuka sia meemai keeqoonara suani arufanoo aadanusinau.

<sup>7</sup> Aaqasoofanoo akaqa qaqama amuka faqaafa marunaki aqaakinoo aqufinoo kambiqafufanoo amuka faqaa ainaina fannoo mina arusaifanoo mandaikinoo marida sia qaqama ireenoo.

<sup>8</sup> Akaqa qaqama fannoo amiqira maqasaa aqufufanoo maqakiqari urureenoo kambiqafinoo doo qaqama ireenoo, akaqafa oodaa ireenoo akaqafa amiqimasee ireenoo akaqafa fiqaramasee ireenoo.

<sup>9</sup> Yisufa mi ufana qimannimidanoo maaqi qinuu. Innee naaqoofaqaasa kai maa ufana qimannimunnana iriaqa.

*Yisufa quandarufa qimanniminu.*

*(Mat 13:10-17; Ruk 8:9-10)*

<sup>10</sup> Qimannisooafa fufaqa Yisufa nariara marufaqa akaqausa mina faiqi namu qisauku qara taikasee qikunni ooqu qaara mararausa faqa aniree quandara ufa oosana irrofanoo qimanniminoo qinuu.

<sup>11</sup> Anutufa nari ququsakinaa qumee irirana qimannimiannee qimasai faqa qimannimidaqa akaqausa aqoosai mariasa quandara ufa kai qimannimunaqa iridaqa.

<sup>12</sup> Tamummaqara fasiqauqa misara maaqi qimasee akara riqau. Misa maqee maqee qafaidaqa sia qafeefaranoo.

Misa iriqaarasamasee siamma irifaranoo. Misa irifau Anutufinnai ubeekama fifanoofau misa mandainaina akiaqara minninnisani.

Minara qinee Yisusa quandara ufa kai qimannimidaqa.

*Qaqama aaqara ufa oosana kooroofa.*

*(Mat 13:18-23; Ruk 8:11-15)*

<sup>13</sup> Yisufa nari faiqi namufaqa faiqi akaqausa faqa qaqama aqaranara irammirufanoo maaqi qimaseenoo akooqoo kooroomasee qimanniminu. Innee sia fee mi quandara ufana oosana iridee. Innee sia mina iriqa naqi fee mandee aiqama quandara ufa irifaree.

<sup>14</sup> Qaqama aaqee mari fasiqafa Anutuna ufa qaqamara foora aqaaidanoo.

<sup>15</sup> Moo kari akaqa ufa faiqi naunduraki aanasaara foora aqasaafanoo iriafanoo Sadannafa ufiniara foora mina aaqee uganna aakueeqee aqidanoo.

<sup>16-17</sup> Akaqa fasiqa anaasee naunduraki ooni maqasaara foora qaqama fannoo aqufidanoora foora mi ufana irisee asasamasee marasaafanoo sia meemai anoona ooqu finara sia kisaagasaa maridanoo, mi ufana saara ummaara fee, arirane, kambiqafifaqa dauni minnisaidaqa.

<sup>18-19</sup> Akaqa fasiqa anaasee amuka faqaa ainainaki aaqee maria qaqamara fooqaana maridaqa. Misa Anutuna ufa iriseeqa maaqoo maria ummaara kadaapirirafa faqa munnimara rimariafa faqa oosana oosana ainainara rimariafa faqa mi ufausa kai Anutuna ufa radamusaifanoo sia qaqama iraidanoo.

<sup>20</sup> Akaqa fasiqa anaasee amiqira maqasaa aaqee maria fara foora maridaqa, misa Anutuna ufa irisee maraanara qaqammara foora iraidanoo akaqafa oodaa iraidanoo akaqafa amiqimasee iraidanoo akaqafa fiqaramasee iraidanoo.

*Qooma qumbirana quandarana kikiqa usirafa.*

*(Ruk 8:16-18)*

<sup>21</sup> Yisufa kaqi qimannimidanoo qinau. Faiqi moo fannoo qooma qumbimaree difaani ameemaanai sia minni quqaidanoo beeta ameemaanai sia minni quqaidanoo akooqoo quqaqaiifanoo kaaqa qaanifeera.

<sup>22</sup> Miqikaimmasee kasooqaqee aiqama kukeegee mari ainaina oosana oosana Anutufa mareegee akooqoo quqaanno aiqama rafaafa fimari ainaina faqa akooqoo quqaanno.

<sup>23</sup> Innee naaqoo faqaasa iriaqa.

<sup>24</sup> Yisufa kafaamaaqi qimasee qimanniminou, innee naaqoo irimari ufanara amiqimandee rakisiaqa. Anee nana ufa fee faiqi anaasee nimanoo Anutufa mi ufanannai kai ainna rafaafafu amaqaanno sia aneenna qinnana amana kaifau ani rafaafafu amaqaanno fau fiqaramasee ani rafaafafuamaqaanno.

<sup>25</sup> Faiqi moo ainaina uqaqee marinnana moo faqa Anutufa amianno. Faiqi moo fannoo ainaina siainnana kaqikaa ainaina marinnana Anutufa mara marainanoo kaqi samu uqanna marianno.

*Qaqama nari kai kambiqarana kikiqa usirafa.*

<sup>26</sup> Yisufa kaifaa qimanniminoo qinau. Anutuna ququsa maqasaa fasiqa anaaseeki sia akooqoo kambiqaidanoo kukeeqanoo mari ifa kambiqeenoo akooqoo idanoo, mifa faiqi moo fannoo nari afuqaki qaqama aqaaidanoora foora kambiqaidanoo.

<sup>27</sup> Mi fasiqafa qaqama aqaasee eendaki faiqeenoo faasaana nari ainainai oonuree aniree miqi marifanoo doo qaqama aqaqaiifa doo kambiqafinoo. Mi fasiqafa sia kambiqarana oosana irifanoo nari kai doo kambiqafinoo.

<sup>28</sup> Maqa fannoo naamma amifanoo kambiqafinoo qaqama iraidanoo. Indaru ummaqusainanoo radiqifinoo afumu kambiqafinoo doo urureenoo afufeenaarinoo doo qaqama ireenoo qaqama anoona kambiqaidanoo.

<sup>29</sup> Qaqama akuqamafifanoo mi fasiqafa paipana qumaree ateeka maree munu maaqaki quqaidanoo.

*Qumini qaqamara foora radiqifinoo firaafaikidanoo.*

*(Mat 13:31-32, 34; Ruk 13:18-19)*

<sup>30</sup> Yisufa kaqi qimannimidanoo moo quandara ufa qimannimidanoo irammirinoo qinau. Anutuna maqasaa ququsakina faiqi anaasee mariasa nanara fooree maridee. Nana quandara ufannai fee kooroo ianaaree.

<sup>31-32</sup> Qinee maaqi qimasee qimannimianaura, qumini qaqama fooqaana kaqikaana faiqi moo fannoo mina maramareenoo ummaqusainanoo kambiqafinoo firaafaa tia saqarirara foora aiqama aakaqakinana andanda uriqararafa maridanoo. Mina asaana firaanaikinanoo ufini aniree mina asaana auqaanai aanaamu usakaidafa.

<sup>33</sup> Yisufa nari ufa oosana oosana quandara ufakiqari faiqi anaasee nari irirana amana kai qimanniminou.

<sup>34</sup> Sia sia quandara ufakiqari qimanniminou quandara ufakiqari kai qimannimi marinou. Mifa nari faiqi namuafa naaduma marunnai minni mi quandara ufana oosana kooroommanniminou, maqee maqee miqimmi marinou.

*Yisufa ufannai ufai amakaura taikanau.*

*(Mat 8:23-27; Ruk 8:22-25)*

<sup>35</sup> Mi faasaana eenoofanoo Yisufa nari faiqi namu qimanniminoo qinau. Doo anifaqa sipaki akaramafinaqa Kariree farummaki fitaqamareeqa muqafainni nianai fuaqa.

<sup>36</sup> Misa eedoo qimasee faiqi anaasee minnisee Yisufa oogu marunaki akaramafuafaq Yisuna afiqee farumaki fiqau, akaqausa mariqa kanuqaki misa saimbaqa fiqau.

<sup>37</sup> Misa faruma qambaana fimarufanoo ufai firaafa uqinoo nammari amakaurufanoo sipaki nammari teeqinoo qumbiqararinou.

<sup>38</sup> Yisufa kanuqa atinni akiaqa qunusaa rumasee faiqaqeeufaqa mina faiqi namu rufiasee aniree afaurida qiqau ufasaa rakisirafa findifua maasa kaqi kaaqoo nammari ukuqnaidaqa kuqirarammidaqa anee sia fee maasara iridanee.

<sup>39</sup> Yisufa findifinoo ufaira doo saa qimasee nammariara amakaura doo taikaa qufanoo ufai uqirafa taikkeenoo nammari amakaurirafa taikafinoo doo firaqoo dai qimafinou.

<sup>40-41</sup> Dai qimafufanoo Yisufa quandakinoo nari faiqi namu niqidanoo qimanniminoo qinau Innee nanaree rufiaidee. Innee qini saqarikirafa siasee maridee qufaqa misa firaqoo rufiasee naquqooafaqa nari qimami nari qimami qiqau. Maa fasiqafa nanee, sia faiqi faqa afaannuafa qafa kai mina ufara eedoo qidaqa, ufai faqa nammari faqa mina ufara eedoo kai qidaqa.

## 5

*Faiqí aunduraindaraa afaannauqa kuara aundurái keeqaqau.*  
(Mat 8:28-34; Ruk 8:26-39)

<sup>1</sup> Doo miqooqari kanuqa fannoo Kariree farummaki fiifiufanoo nammari dinnafai nianai Keerasa maqannaasa maqa maqa munu raquru aminau.

<sup>2</sup> Yisufa kanuqakiqari maqasaa aqufufanoo faiqí moo faafasaaqa aunduraki marufa Yisufinnai aniranau.

<sup>3-5</sup> Mi fasiqana maqannaasa faiqí iri mara maraida ooni aamarai akundee mariqau. Mi fasiqafa mi ooni aamaranaki faiqee marufa marinau. Moomoo kari misa mina qumareeqa sainandannai mina aiku asauku rumba quqasoofanoo afeekaikamandeenoo asaukusaaqaraa sainanda rakeemma aquseenoo aiku rumbaqqoo sainanda turi mandee mina rakeemma aqusoofaqa sia amana mina qumaree mariqau. Mina afeeka uriqaranoo marunara misa sia amanaiqiqa minnisoofanoo faiqí madikamaqoonakiqaa faqa aqana aaqanakiqaa faqa faqa quqanoo nidanoo oonisamu qumaraidanoo narí afaaqa atekaanoonufa marinau.

<sup>6-7</sup> Yisufa kanuqakiqari aniroofanoo mi fasiqafa ooni aamaraki nianaindari Yisuna qafamaseenoo sandee anireenoo Yisuna oorinni aqoori saunara finoo oorindari firaa kari faaqa quqaseenoo Yisuna aaramaseenoo qinuu. Oo Yisufa anee firaqqoo uriqarara Anutuna amaaku mariananoo. Anee nanaree maasa soodaa qidanee. Qinee afeekaikamandee ani qimamidaqa. Anee Anutunara irisee sia qini darua.

<sup>8</sup> Mi fasiqafa sia fifau miqi qinuu. Yisufa mina aundurakinaa afaannara anee manda afaanna maa fasiqana aundurakiqari rafudamaki fua qunara mi fasiqafa miqi qinuu.

<sup>9</sup> Yisufa mina ufa iriseenoo irammirinuu ani auqu yafee qufanoo mi fasiqana aunduraindari afaanna fannoo qinuu. Maasa moomoosa qusidaqa marunannara maasa duqu qusiraasee qidaqa.

<sup>10-13</sup> Miqi qimasooofanoo afaannauqa faqaa fasiqaa fannoo narí aundurakinaa afaannauqara kafa kafa Yisuna qimaminuu. Sia maa maqa maaqanakiqari misa niqiqaa. Miqi qimaseenoo Yisuna qimamimarufanoo. Mi nammarina afainni ameemai adeedi kuara moomoo andanda neemariqau. Mi fasiqana aundurakimari afaannauqa kuaraqara Yisunara afeekaikiqaa qiqau maasa diqiqannee qimasee diqiqainaa kuaraqaa naunduraki fua qufanoo Yisufa doo fuagee qufaqa mi afaannausa mi fasiqana aundurakiqari rafudamakufaqa kuaraqaa naunduraki keeqaqau. Kuaraqaa naunduraki keeqoofaqa mi ameemanaindari sandamaqaraasufaqa farummaki bururu qufaqa aiqama kuqu taikaqau. Mi kuarausa tu tauseenna (2,000) kuara mariqau ooni saqari auqiqa mariqau nukudara foora mariqau.

<sup>14-15</sup> Mi kuarausasa rakisi maru fasiqausa mi kuarausa nindafamasee quqasee sandamaqaraasamasee maqusai marusa faqa uqaana maaqakiqaa marusa faqa qimannimiqau. Qimannimisoofaqa aiqama qafararee qimasee aniree qafoofanoo moomoo afaanna aunduraki mariu fasiqafa andeeqasee qamunna afisusee irirana marasee miqoo ooqumari fi marufaqa ani qafoofanoo naaqqeet naindiri ranau.

<sup>16-17</sup> Faasai mariusa Yisufa afaanna niqiqoona faqa kuara nammariki aqufunara faqa qafooosa misa maqusaindari aniroosa aiqama ainainara qimannimisoofaqa misa iriseeqa Yisunara rufiseeqa mifinnai ooquree kafa kafa irammiridaqa qiqau maasa maqa maaqakiqari amanee anee finnaree qiqau.

<sup>18</sup> Yisufa eedoo qimasee kanuaki akareemarufanoo afaanna aunduraki mariu fasiqafa Yisunara afeekaikamaseenoo irammirinoo qinuu amanee qinee ani faqa funauree qimasee fuki faaki qinuu.

<sup>19</sup> Yisufa irisee qaoo qimasee qimaminoo qinuu. Anee aneenna maaqai anirandee oonureenana aneenna anoona akoona atiuqa qinee karaambaiqa ani firaqqoo dadaaqqunannara faqa firaqqoo aniara amuqusunnara faqa qimannimia.

<sup>20</sup> Miqi qimasooofanoo anirandee narí maqa maaqai oonuree qisaukuqara taikasee maqusanaasee qimarusa aiqama qimannimimaree fiqqu fiqqu qidanoo Yisufa dadaaqqunara qimanniminoon ninarinuu. Aiqamausa mi ufana irimarusa firaqqoo naaqqoofaqa naindiri roofaqa oo kuqaa fee miqinoo fee qiqau.

*Kisaaqandaikimaru aanaaseena andeeqanau. Yisufa qufanoo Iairusana araamuna findifinuu.*

(Mat 9:18-26; Ruk 8:40-56)

<sup>21</sup> Yisufa miqooqari kanuqaki akaramafufanoo nammari taqamaree dindanai kafaannai finuu. Miqoo oonuroofaqa faiqí anaasee moomoosa Yisuna ani mara ititasaqau.

<sup>22</sup> Mi maqusanaki amaana maqasaa rakisimaru fasiqafa mina auqu Iairusafa anireenoo Yisuna oorini maqasaa aqufufanoo afeekaikamandee fuki faaki qinoo iramirinau.

<sup>23-24</sup> Qini qiraamuna kaqikaa qiraamuna aurimarifaqa amanee anee anireenana aneenna asauku minasaa quqasainanoo findifuanu kuquandoora qufanoo Yisufa mina faqa findifi finau. Fimarufaqa moomoosa titiqimafufaqa fidanoo misa rusadeesamumandee fimarinau.

<sup>25-26</sup> Miqoo misaki anaasee moo marinau. Qisaukuqara taikasee qikuni ooqu qaara marasee aukuaana kisaqaqandaikimaru anaaseefa marinau, mifa moomoo tutaqausunnai fimarufanoo sia andeeqoofanoo firaa teeroo quqaranaki marinau. Mi anaaseefa tutaqausunnai nari munnimma maqee maqee aqii taikasooofanoo sia mina aurirafa taikanau maqee maqee firaanaikinau.

<sup>27-29</sup> Mi anaaseefa Yisuna afeekara iriseenoo faiqi aanaaseekiaqa gumee mina aanaaqiannai oonuree maqi qimasee irinau, qinee oonuree mina qamunna kai auqamasaaananoo mina afeeka fannoo qini aurirana taikaqisaannoo.

Miqi qimasee faiqi anaasee titiqimafufanoo aanaaqianindari misakiaqa rusanadesamu mandeenoo ani mina qamunna ati kai auqamasooofanoo nari aundurakiqari fidika reereeuqa taikanau, nari aurirafa taikaranara nari irinau.

<sup>30-31</sup> Yisufa nari faiqi andeeqara afeeka narisaaqari funara iriseenoo faiqi anaasee qambaana qandafi irammirinau yafee qini qamunna auqeenoo fee qufaqa nari faiqi namu qimamiqa qiqau, moomoosa ani ititafuanakina nanaree anee yafee qini qamunna auqee maqi qidanee moomoosa ititafuanaki fimarinanoo.

<sup>32</sup> Yisufa sia misa ufa irinau kaqi randee marinau.

<sup>33</sup> Mi anaaseefa nari aurirafa taikoonara iriseenoo aindirireenoo aaquqoofanoo Yisuna aikuki oorindari ani kummaramafufanoo aiqama anoona ufa kai qimaminau.

<sup>34-35</sup> Yisufa iriseenoo qimaminoo qinau Oo qini qiraamuna aneenna irirana qinisaa rusimarianafa mifa kai ani andeeqeenoo doo asoaranaki fua ani aurirafa doo taikkeenoo.

Miqi qimarufanoo Iairusana maaqaki marusa aniree Iairusana qimamiqau sia ufasaa rakisirana kadaapi arua doo ani araamuna kuqufinoo.

<sup>36-37</sup> Yisufa sia misa ufa irinau. Iairusana qimaminoo qinau, Sia rufiaa, qinisaa kai aneenna irirana mundua qimasooofaqa aiqama mina faqa aniusa aiqama Iairusana maaqaki keeqararufanoo Yisufa qaoo qimaseenoo nari faqa Peetooroona faqa Yameesafa faqa mina akaqa Yoohaneefa faqa doo minamusa kai Iairusana faqa nifiqamareenoo Iairusana maaqaki ooru fiqau.

<sup>38-39</sup> Misa Iairusana maaqaki oonuroofanoo Yisufa faiqi anaasee ikifaafau qirana faqa faaqa fuisee qirana faqa munari minari qirana faqa nindafamaseenoo maaqaki keeqafinoo qimanniminoo qinau. Nanaree munari minari ida fee qikiraqaid ee maa faiqifa sia kuqinoo maridanoo faiqaqee idanoo.

<sup>40</sup> Misa minara irisee Yisunara naanaidara qimasee uteeti qufanoo Yisufa aiqama niqimamaseenoo faiqi anaukoo faqa mina aiku asauku qaaramoo faqa maanaaqau kuqiraqoo nifiqee keeqanau.

<sup>41-42</sup> Yisufa mi kuqira manaqana asauku qumareenoo nari ufakiqari kaqikaa manaqaa qinee ani qimamidaqa doo findi fua qimasooofanoo mifa aaqee findifinoo doo ninau. Minaki marusa mina qafamasooofanoo naaqqeenoo naindiri ranau. Mi manaqafa qisaukuqara taikasee qikunni ooqu qaara aukuaana marasoo maanaaqafa marunara naaqqanau.

<sup>43</sup> Yisufa afeekaikamasee qimanniminu innee maa manaqana andeeqaqaunnufana umeeraaqee qimasee quandaki maanaaqara qinau maa manaqana narana amifanoo naani qimasooofaqa miqimmiqau.

## 6

*Yisufa nari maqusai Nasareeteenni namummaqaanau.*

*(Mat 13:53-58; Ruk 4:16-30)*

<sup>1</sup> Yisufa mi manaqana mara findifummaseenoo miqooqari findifinoo nari maqusai Nasareetinni finau, nari faiqi namufaqa mina faqa fiqau.

<sup>2</sup> Nasareete maqusai Yuda maqanna marunara nariqa amaana Saririqasaa amaana maqaki keeqafufanoo Yisufa Anutuna ufa qimannimi marufaqa misa irisee tautumasee qiqau. Maafa maa amiqira iriranna yai fee mareenoo fee, yafee maa irirana aminoo fee naqimasee faiqi sia auquaqaqaa ira ainaina auqidanoo fee.

<sup>3</sup> Maasaki kamundaa mariifa mifa kai maridanoo, mina anoofa Mariafa maridanoo maaqooqaraa anaasee faiqi maridanoo, mina akaqaafasaaqaa Yameesana amarafa faqa

Yooseesa faqa Yudasina amarafa faqa Simoona amarafa faqa maaqooqaraasa marifanoo Yisufa misakinaafa maridanoo. Mina asooqmaaka faqa maaqookai maridaqa. Misa minara miqi qimasee nikoo fee qiqau.

<sup>4</sup> Yisufa mina iriseenoo maaqi qimasee qimanniminau. Tamummaqara fasiqa moo fannoo maqusa maqusa fidanoo qimanniminaqa misa iriseeqa mina ufara kuqaa fee qifaranoo nari maqannaasa faqa nari ainaina faqa nari moodaa fasiqa anaasee faiqi faqa mina ufa siamma irifaranoo.

<sup>5-6</sup> Yisufa nari maqannaasara miqimmidammia maqi qimasee sia amana moo fasiqa anaasee mandaikirausa andeeqannimaqararee qinau. Qaaramoo aurusasaa kai asauku quqasoofaqa findifiqau. Nari maqannaasa nari irirana sia minasaa mundunara irisee firaqoo tautinau.

*Yisufa nari faiqi namu niqiqoofaqa qimannimiqa.*

*(Mat 10:5-15; Ruk 9:1-6)*

Yisufa miqoo nari maqusai Nasareeteendari dinni dinni fiqummarusa misa qimannimimarinau.

<sup>7-9</sup> Qimannimiseenoo nari faiqi namu naarama quqaseenoo manda afaanna faiqi anaasee naundurai marusa misa niqiqara afeeka nimiseenoo qaaraqanda qapamandee qaaraqanda qapamandeenoo qimannimino qinau, Sia moo ainaina maree fuaqa saunu kai gara maree fuaqa, feemu faqa uqa faqa munnimma faqa sia maree fuaqa, niku anaamu afisumareeqa siuta moodaa afisumaree sia aabaa moo maraqa.

<sup>10</sup> Innee maqusa maqusa fidaqa moo maqusaki oonu raifanoo mara quqainna maaqanaki quqasaina sia namummaqaga nuaqa minaki kai faiqaida nuaqa, minakiqari moo maqusa fiqa fuaqa.

<sup>11-12</sup> Innee moo maqusai fifaqa misa sia inni mara quqeeqa sia inni ufa irifaqa innee fidaqa kookoomma afaqa ninaamarasee fuaqa. Innee miqiqa Anutuna naruaninnanara misa aaquqima nimaqeeqaranoo. Yisufa miqi qimaseenoo niqiqoofaqa maqusa maqusa fidaqa faiqi anaaseera nari mandainainara nimeesuqaqera qimannimiqa fiqau.

<sup>13</sup> Qimannimidaqa moomoosa naunduraki afaanna faafasaaqa marusa niqiqamannimi marufaqa rafudamakida fimariqau. Miqiqa fidaqa aurusa nikiaqa sauna fadameenara fooqaana adiasoofaqa findifi mariqau.

*Eeroodeefa Yoohanee nammari nimimaruna akiqa tuqinau.*

*(Mat 14:1-12; Ruk 9:7-9)*

<sup>14-15</sup> Yisuna aufakiana ufa fannoo aiqama atinai daraanimambunara Eeroodeefa mi ufana faqa iriseenoo tautinau. Akaqausa Yisunara Yoohaneefa nammari nimimarufa kuqiranakiqari findifinoo fira ainaina auqeemari fee qufaqa akaqausa Yisunara Eeriaafa ooqeenaa tamummaqara fasiqa mifa kaifaa kambiqanoo maridanoo fee qufaqa akaqausa ooqeenaa tamummaqara fasiqa fooqaafa kambiqanoo maridanoo fee qiqau.

<sup>16</sup> Eeroodeefa mi ufausa iriseenoo nari qinau, Qinee ooqai Yoohaneena nammari nimimaruna anuka atekasaafanafa mifa kai kuqiranakiqari anida qinoo.

<sup>17</sup> Ooqai Eeroodeefa nari kai qimannimufaqa sundiaqau Yoohaneena nammari nimimaruna rumbamaree karabusa maaqaki quqaseeqa fira sainanda qumareeqa rumba quqasoofanoo marinau. Eeroodeefa sia fifau Yoohaneena mareeqee rumbaranaki quqanau.

<sup>18</sup> Yoohaneefa nammari nimimarufa maqee maqee anaasee qummuarunasaara aqunara rumba quqanau. Eeroodeefa nari akaqa Firipina anaqa Eeroodia nammarina kaqi nari afaaqi faqa marufanoo qummuarunara Yoohaneefa qimaminoo qinau Anee aneenna akaqa anaqa Eeroodia nammarina qummuaramminana maraanano Anutuna ufa rukiasee miqianoo.

<sup>19</sup> Eeroodia nammarifa Yoohaneena ufa irisoofanoo afaaqai kaqi ati qanoo marufanoo maridanoo mina ariranara randee marufanoo Eeroodeefa qao qufanoo sia arinau.

<sup>20</sup> Eeroodeefa Yoohaneenara irirana andeeqara qikairi siai fasiqa fee qimasee minara rufiseenoo karafusaki seenoo ititasoofanoo sia Eeroodia nammarifa arinau. Eeroodeefa maqee maqee Yoohaneena faqa ufa qiranara aidi marufanoo maqee maqee Yoohaneena aaramasee ufa qimamimarinau. Yoohaneena ufa fannoo Eeroodeefa maqee maqee Yoohaneena faqa ufa qufanoo Yoohaneena ufa fannoo Eeroodeena raquramufanoo aqu ufafa afaaqai ati qanoo marunara siamma irimarinau kaqi maqee maqee Yoohaneena karabusaki marunna aaramasaida ufa nari qimami nari qimami qimariqau.

<sup>21</sup> Doo anaasee Eeroodia nammarifa rakisinoo fifufanoo aruaninna faasaana paqurinau. Mi fasaanna faiqi Eeroodeefa Eeroodia nammarina afaaqi nari anoofa nari maqoo faasaannara iriseenoo qoomaqa firaana suqaseeno kaamanna uriqararasa faqa



sundiauga uriqararaua faqa Kariree maqa maaqaki faiqi firaasa faqa naaramasoofaqa anireega nee mariqau.

<sup>22-25</sup> Misa nee marufanoo anaasee Eeroodia nammarina araamuna fannoo anireenoo misa noorinni idi amiqirana raidanoo aqoori raqee marinau. Aqoori raqee marufaga misa irufanoo adiafaa qufanoo Eeroodeefa qoomaqa nimuufa mi manaqana aaramasee aigamausa nifusaa qimaminau, ani amiqira idi akiqara nana ainainee qinaqee amianauree qinau. Sia kai ufa kai qinau narí amana naaree aqigamaseenoo qimaminau, Anee nana ainainaree aididanoo fee anee qinaqa mi ainainna ani amiana. Anee Kariree maqa maaqa dinni rakisianee qinaqa qinee qambaana oosusee dinni ani amianana anee misasaa rakisia qufanoo narí anoofinai oonureenoo qinau, nanaree qimamianauree qufanoo mina anoofa maqee Yoohaneefa nammari nimi marifa kuquanifee qimasee Eeroodeenara qikaru qiandoo qimaseenoo akiaga tupumma maree minisaifaqa geeqa qifunnoo mina qafamasee kuqaa kuqiifoo qianauree qimasee narí araamuna qimaminau. Yoohaneefa nammari nimimarina mina anuka ateeda maree mina akiaga mini qimiqaqera kai qia qufanoo mina araamuna fannoo anirandeenoo sandee oonureenoo Eeroodeena qimaminoo afeekaikamandee qimaminau anee maqee uqanna Yoohaneefa nammari nimimarina anuka tuqusee fidika maaqamau iandoora qimasee saqari difaaniki akiaga quqasee mini qimiannee qufanoo Eeroodeefa firaqoo uqanna akooqamafinuu.

<sup>26-28</sup> Akoqoofanoo sia amana qaoo qinau. Aiqamausa nifusaa narí amana aqiqamasonnara asaruseenoo narí sundia moo aqiqoofanoo karafusa marunaki oonureenoo Yoohaneena anuka ateeseenoo saqari difaaniki mina akiaga quqaseenoo maree mini Eeroodia nammarina araamuna amufanoo mifa mareeqeenoo narí anoona aminau.

<sup>29</sup> Yoohaneefa nammari nimimaruna faiqi namu mifa kuqunara irisee ani mina iri maree munu akundaqau.

*Yisufa feemu namufaqa noodaanna faqa nimufa.  
(Mat 14:13-21; Ruk 9:10-17; Yoh 6:1-14)*

<sup>30</sup> Yisufa narí faiqi namu niqiqoofaqa maqusa maqusa nidaqa qimannimunara faqa auqoonara faqa Yisuna mini qimamiqau.

<sup>31-32</sup> Qimamimarufaqa faiqi anaasee moomoosa aniree qumbiqafunara narana narafa sia amanaikufanoo Yisufa narí faiqi namu maaqi qimasee qimanniminuu. Aniaqa innisaimbaqa faiqi sia mariannai oonuree idooaqa. Miqi qimaseenoo narí faiqi namufaqa nammari afainni ooquree kanuqaki akaramafufaqa nammari amuaqumau fiqau.

<sup>33</sup> Faiqi anaasee moomoosa nindafamaseeqa oo Yisufammi maqi qimasee nári maqusaki nári maqusakiqari oonu maree ani mareeufaqa Yisuna kanuqa fannoo munu maqanamu raquru amufanoo nindafoofaqa faiqi anaasee moomoosa faasai afainni qusi mariqau.

<sup>34</sup> Yisufa kanuqakiqari maqasaa aqufinoo faiqi anaasee moomoo nindafamasoofanoo firaqoo amuqusufanoo qinuu. Oo maaqoo mariasa sipsipa aandaufafoora rakisirafa siaisa mariafanoo fee qimaseenoo Anutuna ufa oosana oosana ainainara qimanniminuu.

<sup>35-38</sup> Eenoofaqa Yisuna faiqi namu Yisuna qimamiqau, doo eendidanoo anee niqiqainaga kaqikaa maqusakiaga narana feefauriaqa maaqoo faiqi siaiqoo maridanoo fee qufanoo Yisufa qinuu inneeqa kai narana nimiaqa qufaqa misa qiqau, maasa sia amanaikianaura maasa moomoo ooni mareeqa oonu moomoo feemu feefaurumasee minisee nimianaqa naifanoo sia amanaikiannoo, maasa sia amanaikidaqa qufanoo Yisufa qinuu. Inni feemu naqumme maridanoo oonu qafaqa qufaqa misa oonu qafamaseeqa aniree qimamiqau, maasa feemu moodaanai qisaukunamu, noodaanna qaaraqanda faqa maridanoo fee qufanoo.

<sup>39-40</sup> Yisufa qimanniminoo qinuu. Innee faiqi aanaaseera qifaqa misa raina rainamafinaqa naadu naadu ruumbaku finaqa qusau rasoonookamasee ooqumari maree fuaqa qufaqa faiqi anaasee eedoo qimasee ruumbakiranakiqari padimambufaqa ooqu mariqau. Akaqa ruumbakiranakiqari wan handareeta mariqau akaqa ruumbakiranakiqari qaara fasiqa niku nisauku taikasee qisaukuqara taikasee fasiqa anaasee mariqau.

<sup>41-42</sup> Ooqu marifufanoo Yisufa mi moodaanai qisauku feemuna qumaree noodaannaqara faqa qumaree sandaaqai oori uqeerasee Anutunara dufi dufi qimaseenoo mi feemuna ruqi ruqi mandeenoo narí faiqi namu nisaukuki quqasoofaqa faiqi anaasee ooqu mariranakiaga nimi maree fimariqau. Yisufa miqikai inoo noodaanna faqa ruqi ruqi mannimufaqa mina faqa nimi maree fufaqa noofanoo nimuaqufaqa akaqana kaqi quqaqau.

<sup>43</sup> Yisuna faiqi namu mina ataraasa qumaree qisaukuqara taikasee qikunni ooqu qaara marasee uqa qumbiqaqau.

<sup>44</sup> Mi naranna nee marusa faifa tauseenna fasiqa mariqau, anaasee faqa faiqiuqaindi faqa mariqau. Ooni saqari auqusee moomoo uqanna mariunara faifa tauseenna fee qinoo maridanoo.

*Yisufa nammari amuaqumau finau.*

*(Mat 14:22-23; Yoh 6:15-21)*

<sup>45</sup> Yisuna faiqi namu narana ataraasa mara maroofanoo Yisufa nari faiqi namuara afeekaikamandee fuki faaki qinoo niqiqoofaqa misa mina afunni kanuqaki akaramafi Beetasaida maqusai nammari dinni afainni fiqau.

<sup>46</sup> Misa fimarufanoo Yisufa faiqi anaasee niqiqamasoofaqa fufanoo mifa nari faiqi namu nimanda maseenoo nariara amuaqunamusaa ooru maridanoo Anutunara innaaru qimarinau.

<sup>47-49</sup> Eendufanoo Yisuna faiqi namu kanuqaki nammari gambaana nimarufanoo Yisufa nariara maqasaa maridanoo misa nindafoofanoo ufai fannoo misa noorindari anidanoo kanuqa mara furufimarufaqa purannai puridaqa kadaapindi mariqau. Inaaqiana kookooraana ufaqi maru kamuqoo Yisufa misunnai fidanoo nammari amuaqumau aiku ramasee finau. Mifa kanuqakinaasa finnaaqareera foora fimarufaqa Yisuna faiqi namu afaanna fee qimasee rufiasee faaqariqau.

<sup>50-51</sup> Misa faaqarumasoofoanoo Yisufa qimannimino qinuu. Sia maparaa iaqa nifaqa quqasee kasooiaqa qineemma anidaqa. Yisufa miqi qimaseenoo misa faqa kanuqaki akaramafufanoo misaki oqumari fufanoo ufai fannoo taikafinau. Taikafufaqa Yisuna faiqi namu maparaa iqa naundurra faqa furufariqau.

<sup>52</sup> Yisufa moodaanai qisauku feemu ruqi ruqi mandee nimufaqa noofanoo amanaikunara mina faiqi namu sia mina anoonara andeeqasee irusa maridaqa nammari amuaqumau anunara faqa sia iriqau.

*Yisufa Keenesareeta maqusanaasa aurirana taikannisanau.*

*(Mat 14:34-36)*

<sup>53-55</sup> Misa miqooqari kanuqaki nammari amuaqumau fiqa munu maqa raquramu-faqa fitaqa mareeqa mafi kanuqa qususeeqa doo Keenesareeta maqa maaqanmifoo qimaseeqa kanuqakiqari aqufiqa maqasaa oorufufaqa misaqa marusa miqooqaraasa Yisufammifoo qimaseeqa sandeeqa maqusa maqusa qimannimufaqa nariqa aurimarusa qaarisa rumba maraidaqa yatinnai fee Yisufa fuannoo fee qimasaida aurimariasa qaarisaa rumba maraidaqa Yisuna oorinni mini quqee mariqau.

<sup>56</sup> Yisufa ya maqusanai fee ya taunnaki fee ya ainaini marunaki fee finau nari aurimarusa nifiqa maraidaqa mifa funnai munu makeetaki firaa saqa marunaki quqasee Yisunara nari nimuqusa ookiqari firaqoo qimamiqau. Maasa sia kadaapi amirara qimamidaqa aurimariasa ani qamunna ati kai auqamasaida findififara qidaqee qufanoo Yisufa eedoo qufaqa mina qamunna auqee marusa amiqi mandee findifi mariqau.

## 7

*Yisufa Farisai amaana ufa qimarusa niqinau.*

*(Mat 15:1-9)*

<sup>1-2</sup> Farisai amaana ufa qimarusa faqa Mooseena sandufa akoofasauqa faqa faiqi anaasee narana nararee qimasaida nisauku nammari uqidaqa miqi fee maaqi fee qimasaidaqa fifau sandufa oosana oosana quqee mariasa mariqau. Misa Yeerusaree maqusaindari qumuree ani mara Yisuna uqufufaqa nindafoofaqa Yisuna faiqi namu narana neemariqau sia Farisai amaana ufa qimarusa nisauku nammari uqirainni kaqi nee mariqau.

<sup>3</sup> Farisai amaana ufa irimarusa faqa Yuda maqannaqa aiqamausa faqa nari ninaaku ni-taatoosa naanna raidaqa aiqama kari nisaaqusaida narana nee mariqau, sia nisaaqusee sia narana nee mariqau.

<sup>4</sup> Makeetaki maree maru ainaina nammari uqusee suqasee nee mariqau, misa sia minara kaifau miqi qimariqau oosana oosana ainainara miqi qimariqau. Misa kaafauqa faqa susufinauqa faqa disauqa faqa faiqara qaari faqa nisauku faqa miqimasee maaqi-masee nammari uquaqee qimarufaqa miqiqa fidaqa akeekamasaida miqi mariqau.

<sup>5-6</sup> Farisai amaana ufa qimarusa faqa Mooseena sandufa akoofasauqa faqa kaaqa firaqoo minauqara fuki faaki qimarusa marunaki Yisuna faiqi namu sia nisaauqirai kaqi narana noofaqa qafamasee Yisuna aqiqa qiqau. Naqee fee qifaqee ani faiqi namu maasa qikeeku qikaaku oosana minnisee sia nisaauqirai kaqi narana naida fee qufanoo Yisufa

qimannimino qinau. Ooqeenaa tamummaqara fasiqa Esaiiafa andeegasee inniara tamummaqaseenoo inniara manda qaara irirana maree mariasee qinau.

Mifa inniara maaqi qimasee Anutuna ufa akara rinau. Maa fasiqa anaaseesa nifauru fannoo kai unnaqimasee qini duqu uqeeree mariasa, nimusa kaqinni ubeekarusa mariafanoo.

<sup>7</sup> Misa faiqi qimaria sandufana qumaree unnaqimasee Anutuna sandufammifoo qimasee faiqi anaasee naamuqidaqa. Miqi qimasaidaqa Anutunara innaaru qifanoo siammiriannoo.

<sup>8</sup> Yisufa mi tamummaqara fasiqana ufa qimannimiseenoo nari maaqi qimasee qimannimino. Innee Anutuna ufa mafi quqaseeqa faiqi aaquqira ufamau kai fimariasa mariafanoo.

<sup>9</sup> Innee inneeqa kaaqa iriqaraasamandee iriranannai inneeqa faiqi faiqi ufa faiqi anaasee qimannimiane qimaseeqa Anutuna ufa mareeqee ninaaqiannai quqaseeqa.

<sup>10</sup> Mooseefa Anutuna ufa qimannimidano maaqi qimasee qimannimino. Inneeqa ninaukoora اساسmandee amiqida misa nuqu uqeeraaqa. Faiqi moo fannoo nari anoona akoonara manda ufa qinnana mi fasiqana kuqammarusaqa.

<sup>11-13</sup> Innee minara maqee maaqi qimasee aaqee mariafanoo faiqi moo fannoo nari anoona akoona dadaaqimarina nimianauree qimasee kafaa oonu mafi irisee sia nimidano amaana maqaki quqasee Anutuna amidee qimaria fasiqanara sia aaqaida andeegaidee qimariafanoo. Miqidaqa Anutuna ufa mafi quqaseeqa inneeqa ufa kai uqeeree mariafanoo. Doo innee Farisai amaana ufa qimariasa miqira aaqara ainaina moomoo uqeeree mariafanoo.

*Faiqi naunduraindaraafa faiqi putaa idanoo.  
(Mat 15:10-20)*

<sup>14</sup> Yisufa miqi qimaseenoo Farisai amaana ufa qimarusa niqiseenoo miqoo faiqi anaasee moomoo marusa kafaa naaramaseenoo aniaqee qufaqa aniroofanoo qimannimino qinau. Innee aiqamausa qini ufa irisee amiqqimasee iriaraasiaqa.

<sup>15</sup> Sia moo ainaina fannoo faiqi anaasee ooki namasainanoo mifa maaqinaki putaamma amaqaannoo faiqi anaasee naunduraindari urimari manda ufafa mifa faiqi putaamma nimaqaidano.

<sup>16</sup> Innee naaqoo faqaasa kai naaqoo iriani.

<sup>17</sup> Doo miqooqari Yisufa nari faiqi namu faqa faiqi anaasee mininniseenoo maaqaki keeqafufaqa mina faiqi namu ooruree mi ufana qimannimunna oosanara iraqau.

<sup>18-19</sup> Iroofanoo Yisufa qimannimino. Inni irirafa faiqi anaasee irirafa oorudupirausa mariafanoo. Sia fee innee mi ufa oosanna iri fee sia moo ainaina ooki quqasaanoo aundurai oofufi marifa sia mifa faiqi putaamma nimaqaannoo, sia aunduraki oogureenoo amuqusakifau keeqaidanoofau sia miqidanoo aranandaki oogureenoo umiqaraidano. Mi ufana qunannai Yisufa aiqama naranara idaaqira fee kai qinau.

<sup>20</sup> Yisufa minara kafaa nari faiqi namu qimannimidano qinau. Faiqi nari naundurakiqari urimari manda ufafa kai faiqi putaamma nimaqaidano.

<sup>21-23</sup> Faiqi aunduraki amuqusa ookiqari manda irirafa kambiqaidano faiqi rarisameeqeenoo mandainaina mararanaki quqannisaidano, mifa kai rarisameeqeenoo aqaranaki faqa ainaina ummuariranaki faqa faiqi kuqa nariranaki faqa faiqi anaasee nari ummuari nari ummuariranaki faqa moosa ainainara rirana faqa oosana oosana mandoosana faqa nari nikaruqirana faqa nari nifaqa kooroo irana faqa nariara nariara rairai qirana faqa nariara nariara munuqi miniqirana faqa nari afaqa amooqirana faqa furufarira oosana faqa mifauqaindi faiqi naundurakiqari ururee marifa mifauqa kai faiqi anaasee putaamma nimaqaidano.

*Yisufa aamina maqanna anaasee aramuna findifufa.  
(Mat 15:21-28)*

<sup>24-25</sup> Yisufa mi maqa maaqana minniseenoo moo maqa maaqa Tiree maqa maaqaki oonureenoo moo maqaki faiqi anaasee maqee maqee qinee funnanai anunannai ititee mariafaqa sia qiqafaqee qimasee qunee ireeda keeqanau. Sia mifa amana kukeeqaranaki marinau. Anaasee moo fannoo nari aramuna aundurai qooqeenaa faafasaqa marufanoo Yisufa ani marunara iriseenoo aniree Yisuna amuqusa ookiqari dadaaqiranara dadaaqinanoo findifuanifeera mina aikuki maqasaa rumafinai.

<sup>26</sup> Mi anaaseefa Siria maqa maaqakiqari Fooenisia maqusaki kambiqarafa aanaamuru anaasee marufa anireenoo Yisunara qini qiraamuna aunduraki mari qooqeenaa faafasaqa aqiqainanoo rafudamaki fuani fee qufanoo Yisufa qimaminoo qinau.

<sup>27</sup> Maasa Isaraee maqannaa Anutuna faiqi namuara fooraa mariasa misa naaree narana nimirafa andeeqanoo maridanoo. Faiqiuqaindi narana marasee fainiuga aqu nimirafa sia andeeqanoo maridanoo fee qufanoo mi anaaseefa qinuu.

<sup>28</sup> Oo maa fasiqa faiqiuqaindi naidaqa ataraasa fainiuga aniree neemariasa maridaqa. Kuqaa qinee aanaamuru fainiara fooraa maridaqa ataraasara kai qinee innaaru qidaqa.

<sup>29-30</sup> Miqi qufanoo Yisufa qimaminoo qinuu anee mi ufana qiannana akiaqara doo ani maaqai fua. Doo ani faiqi aundurindari doo faafasaaqaa rafudamaki finoo qufanoo mi anaaseefa nari maaqai oonuree qafuufanoo doo mina araaqumma qaarisa faiqagee marufanoo kuqaa faafasaaqaa rafudamaki fiffinuu.

*Yisufa aaqoo aunnirana andeeqanuu.*

<sup>31-32</sup> Miqooqari Yisufa Tiree maqa maaqaki minniseenoo Sidoona maqusai keeqafi fiqummakufanoo Kariree farumma afainni ooqu ranuu. Ooqu fidanoo qisaukuqara taikasee maqusa misaqa marusa finnaaqareenoo fimarufaaqaa akaqausa faiqi moo aaqoo aunnirana ufa qirara mammaqi maruna afiqamaree mini Yisufa maruqoo mini quqasee aranaiqi qimamiqau. Anee maa fasiqanasaa aneenna asaku mundusainanoo andeeqaani.

<sup>33-34</sup> Miqi qimasooqanoo Yisufa mi fasiqana mareeqeenoo faiqi anaasee moomoo marunara iriseenoo kaqi atinai quqaseenoo nari asaku amuka faiqi aaqoo aamarai upeekaseenoo qaqaara fidiseenoo mi fasiqana amaakiri asaukunna auqamaseenoo oori innaarunai uqeeraseenoo nupi nupi qimaseenoo nari ufakiqari qimaminoo qinuu eefafata maasa ufakiqari doo ruiqaannee qinuu.

<sup>35</sup> Miqi qimasooqanoo aaqee kai mina aaqoo ititarafa ruqiafufanoo mina amaakiri rumbarafa idukufufanoo andeeqasee ufa qinuu.

<sup>36</sup> Ufa qimasooqanoo Yisufa aiqamausa aranaiqi qimanniminoo qinuu, sia maanara moosa qimannimiqa qinuu. Yisufa kafaa kafaa qaoo qimarufaaqaa misa moo faqa moo faqa qimannimiqa fimarifiqau.

<sup>37</sup> Aiqamausa mi fasiqana andeeqoonara irufanoo naaquqamasooqaaqaa maaqi qiqau. Doo qafaqaa mifa amiqqimandee idaaqamandee aiqama ainaina oosana oosana aunnirana andeeqaidanoo. Mifa naaqoo auni mariasa faqa andeeqannisaidanoo ufa sia qiasa faqa ufa qirana nimidanoo.

## 8

*Yisufa kaifaa feemu ruisee nimufa.*

*(Mat 15:32-39)*

<sup>1</sup> Yisufa Kariree nammari afainni kaqikaqqoo ooqu marikufaaqaa faiqi anaasee suqumaree miqoo ani Yisufa maruqoo usufufanoo ufa qimannimamarufanoo qaaramoo faasaanaikufanoo misa narana taikafufanoo Yisufa nari faiqi namu naarama qimanniminoo qinuu.

<sup>2</sup> Qinee maa fasiqa anaaseesara qimuqusammidaqa qaaramoo faasaana qini faqa mariafanoo maqee doo narana misaindi sia maridanoo.

<sup>3-5</sup> Qinee sia narana nimirai kaqi niqqaanaqa fidaqa aanai kudoosaapee fooraa, akaqausa nianaindarii ani maridaqa qufaqa mina faiqi namu irammiriqa qiqau. Maa aadana maqa maaqanaki maridaqa yai fee narana paqurimandee maa moomoo fasiqa anaaseesa nimana nimianauree qufanoo Yisufa irammirinoo qinuu inni feemu naqumme maridanoo fee qufaqa misa moodaannai qisaku dinni ani qaara marasee feemu maridanoo fee qiqau.

<sup>6-7</sup> Yisufa faiqi aanaaseera maqasaa aiqama ooqu mariaqee qufaqa aiqama ooqu marifufanoo mi feemuna dinni qisaku taikaseenoo dinni ani qaaraqanda marasee feemu (7) maraseenoo Anutunara dufi dufi qimaseenoo ruqi ruqi maseenoo nari faiqi namu nisaukuki quqasooqaaqaa aiqama fasiqa anaasee amana kai nimimaree fiqau. Noodaanna kaqikaanaqaa akaqana marasee dufi dufi qimaseenoo mina faqa nari faiqi namu nimisooqaaqaa nimiqaau.

<sup>8</sup> Aiqamausa neeneesoofanoo nimuaqumminuu. Foo tauseenna (4,000) fasiqa anaasee nukudara fooraa miqoo mariusa nimuaqu inuu.

<sup>9-10</sup> Misa namammaree soona ataraasa Yisuna faiqi namu dinni taikasee dinni ani qaaraqanda (7) marasee uqa rumasooqanoo Yisufa faiqi anaasee niqiqooqaaqaa daraanimambufanoo Yisufa nari faiqi namufaaqaa sipaki akaramafufanoo nammari amuaqummau moo maqa maaqai Daramanuta maqa maaqai finuu.

*Innaarunai firaa ainaina uqaqifiqaanee qirufa.*

*(Mat 16:1-4)*

<sup>11</sup> Miqoo Farisai amaana ufa qimarusa Yisuna faqa raiqara ufa oosana araquu. Misa Yisuna ufaanara foora fufusee aruanifeera qimasee Yisunara faiqi sia auqaqaa ira ainaina auqamasainaqa maasa aniara kuqaa Anutuna faiqifee qianaara.

<sup>12</sup> Miqi qimasoofanoo Yisufa nari aundurai qimiridanoo qinau. Akasaa yairee fee inni manda oosana taikaannoo fee, qimaseenoo akooqoo qimanniminoo qinau, nanaree maqee mariasa mookira ainainara maqee maqee findifinaqa qafaanee qida fee, doo qinee qimannimidaqa sia qinee miqimandee Anutuna afeekara kooroomasee uqannifiqaanauranoo.

*Ooruku anoona kikiqa usiranara rufiaaqa.*  
(Mat 16:5-12)

<sup>13-14</sup> Miqi qimasee Yisufa kanuqaki akaramafinoo Kariree nammari amuaqumau dinni afainai fidaqa kaqi kaqoo nammari qambaana oonuree mina faiqi namu aafaqara aunusoonara moodaa feemu kai marufaqa aiaaee qiqau.

<sup>15-16</sup> Yisufa naranara aiaaee qunara iriseenoo moo ainaina kikiqa ususeenoo qimanniminou, Innee amiqimmasee auforiaqa, Farisai amaana ufa qimariasa faqa Eeroodeena faqa minauqa feemu ooruku ati qaranara rufieqa auforiaqee qufaqa mina faiqi namu iriseeqa tautumasee nari qimami nari qimamiqa qiqau maasa aafaqa sia maree anunnanara mi ufanara Yisufa qidaqinoo fee qiqau.

<sup>17</sup> Yisufa faasai misa ufa iriseenoo qimanniminoo qinau. Innee nanaree aafaqa sia marinara nari qimami nari qimami qidee Innee sia fee iridaqee. Inni irirafa kaqi fee ummaara raidanoo fee

<sup>18</sup> Innee nifu faqaasa sia fee qafaidee, innee naaqoo faqaasa sia fee iridee.

<sup>19</sup> Qinee moodaannai qisauku (5) feemu ruqi ruqimmasee faifa tauseenna (5,000) fasiqa anaasee nimiafannara sia fee innee naaqooki oonumafi iridee, innee mikari naqumma uqee ataraasa uqariqee iqau, qufaqa misa qiqau qisauquqara taikasee qikunni ooqu qaara marasee (12) uqa riqiafana.

<sup>20</sup> Miqi qimasoofanoo Yisufa kafaam irammirinoo qinau kafaam qinee dinni taikasee dinni ani qaara marasee (7) feemu ruqi ruqimmasee maqi tauseena fasiqa (4,000) sia kasoo fasiqa moomoo fasiqa uqanna nimiafanaqa naqumma uqee mina ataraasa riqee iqau qufaqa misa qiqau dinni taikasee dinni ani qaara marasee (7) uqa riqiafana.

<sup>21</sup> Miqi qimasoofanoo Yisufa qimanniminoo qinau. Innee mina qafamasee sia fee qini afeekara iridee. Moodaa feemu marifa doo mina mandee nimiana amanaikammianoo.

*Beetasaida maqanna Yisufa afu maqaisanau.*

<sup>22-25</sup> Misa Beetasaida maqusai aniroofaqa faiqi moo afu dimbaranana afiqee anireeqa Yisuna aaramaseeqa qiqau, amanee afu dimbaranana auqainanoo fee afu maqaannoo fee qufanoo Yisufa mi afu dimbara fasiqana asauku qumareenoo rarisameeqeenoo maqusa aqoosai quqaseenoo aqaara afuki fidiseenoo asaukuqara minasaa rusiseenoo irammiridanoo qinau, anee akaqa ainaina qafaidanee qufanoo mi fasiqafa oori uqeraseenoo qinau faiqi qini qifusaa saqariara foora nidaqee qufanoo Yisufa kafaam nari asaukuqara mina afusaa quqasoofanoo mi fasiqafa afu maqasoofanoo mina afu amiqufanoo aiqama ainaina amiqimasee qafanau.

<sup>26</sup> Yisufa qimaminou doo aneenna maaqai fua sia maqusai faiqi anaasee moomoo mariaqoo fua kaqinni andandandanai fua qufanoo doo finau.

*Peetooroofa Yisunara Anutuna asauku mundira fee qinau.*  
(Mat 16:13-20; Ruk 9:18-21)

<sup>27-28</sup> Yisufa nari faiqi namu faqa miqooqari Seesaree Firipi maqusa, mina maqa maaqaki maru maqusanakiqaa finau. Aanai fidanoo nari faiqi namu iranau, innee iriaqa faiqi anaasee qiniara ya fasiqanee fee qidee qufaqa misa qiqau akaqausa aniara Yoohaneefa nammari nimi mari fee qidee qidaqa akaqausa aniara ooqeenaa tamummaqara fasiqa Eeriaa fee qidaqa, akaqausa aniara ooqeenaa tamummaqarausakiqari moo fannoo kuqiranakiqari findifinoo maridanoo fee qidaqa.

<sup>29</sup> Miqi qufanoo Yisufa nariara qinau innee qiniara nanee fee qidee qufanoo Peetooroofa qinau anee Anutuna asauku mundirafa mariananoo.

<sup>30</sup> Miqi qufanoo Yisufa afeekaikamandee qimanniminou. Doo kuqaa uqanna qiananoo. Sia innee minara qiniara akaqausa qimannimiaqa, umeendaqaa.

*Yisufa nari kuquaninnanara qimanniminou.*  
(Mat 16:21-28; Ruk 9:22-27)

<sup>31</sup> Miqi quqooqari nari kuquaninnanara oosana arasee nari faiqi namu qimannimidanoo maaqi qinau. Qinee faiqi nimaaku firaa aupurarana maraanaura. Faiqi firaasa

aanaiqikirausa uriqararausa faqa Mooseena sandufa akoofasauqa faqa misa qini min-niqisee nikooqaannoo. Misa qini kuqa darusaifanoo qaaramoo faasaana aiqarainanoo Anutufa mara qini findifumaqisaannoo.

<sup>32-33</sup> Yisufa akooqoo uqanna nari kuqiranara qimannimunara Peetooroofa irufanoo akooqoonara Yisuna mareeqee aaduma quqaseenoo qaoo qunara Yisufa quandaki nari faiqinamu nindafamaseenoo Peetooroona aqinoo qinuu. Oo Peetooroo anee Sadannafa anee see fua, ani irirafa faiqindi maridanoo sia Anutunaindi.

<sup>34</sup> Miqi qimaseenoo nari faiqinamu faqa naarama quqaseenoo qimanniminoo qinuu, moo fannoo qini faqa fuani qinafa nari maaqoo mariranara minniseenoo qini ufa saara qini daanna ramasee eedoo qimasee kuqiranaki fuannoo.

<sup>35</sup> Moo fannoo nari marirana amiqimasee rakisianee qinafa mifa nari marirana kakasiannoo moo fannoo qini saara qini amiqira fasaasa ufa saara kuqarinafa mifa nari marirana asumu maraannoo.

<sup>36</sup> Moo fannoo aiqama maqa maaqa rakisiranatia kammafinanoo nariara minakinaa aiqama ainaina maraseenoo nari aunduraindaraana kuridiranaki finoo nana ureeqara fasiqa mariannoo sia uriqararafa mariannoo.

<sup>37</sup> Faiqi anaasee kuqufifaqa nana maqasaa taikaaninna ainaina Anutuna amisee naundurakinaana kuridiranakinaana mareeqee asumu mariranakina quqaannoo fee sia amana kaifaa maraannoo.

<sup>38</sup> Faiqi anaasee moo fannoo maa maqee maria manda aukuanasaa qiniara faqa qini ufara faqa faiqi nifusaa asaurusee nikooqainausa qinee faiqi nimaaku qeeqa qikoonaa areenarana namufaqa naaquqara andeeqara qangiroouqa faqa innaarunaindari qumureeqa mi fasiqa anaaseesara faqa qisaurusee qikooqaannoo.

## 9

<sup>1</sup> Yisufa kaqi qimannimidanoo maa ufana faqa qimanniminoo qinuu, innee iriaqa innee maaqoo mariasakiqari akaqausa sia kuqirai kaqi marina kamuqoo Anutuna ququsa afeekaikamandee qumirana innee mina qafeefaranoo. Sia taikara faasaanara qidaqa kaqi kasaaqaindari qumiranara qidaqa.

*Aaqanasaa Yisufa innaaruna afiri maranau.*

*(Mat 17:1-13; Ruk 9:28-36)*

<sup>2</sup> Doo miqooqari dinni qisauku taikasee dinni ani moodaa marasee afuru faiqeenoo doo findimeeqeenoo Yisufa Peetooroona faqa Yameesana faqa Yoohaneena faqa doo minamusa faqa aaqana kisaagaasaa nifiqamaree oorureenoo aadumasaa sia faiqi maruqoo oorureenoo miqoo misa nifusaa Yisuna afaaqa qamunna moo kammafinau.

<sup>3</sup> Mina qamunna aiqama dupuqa aruaqufufanoo aiqama eekara aruaqufufanoo nifu faqa daroo daraa inau. Sia maqasaaqaraa fasiqa amana qamunna miqimandeeqa nammari uqusaifanoo eekara arinoo dupuqara maqi aruaquannoo.

<sup>4</sup> Eeriaasa faqa Mooseesa faqa oofai tamummaqara fasiqaqanda maridaqa kuqiga ooru fuqanda miqoo aaqanasaa Yisuna faiqinamu nifusaa kooroomafufaqa Yisuna faqa ufa qimarufaqa Yisuna faiqinamu nindafaqau.

<sup>5-7</sup> Nindafaidaqa firaqoo maparaaida ruftaaidaqa ufa qiranara randee marufanoo Peetooroofa Yisuna aaramaseenoo qinuu Oo ufasaa rakisira maasa maaqoo marunanoo amiqimminoo amanee maasa maaqoo uqigaana maqa qaaramoo auqanauree, aniara moo Mooseenara moo Eerianara moo usakaanauree. Ruftaqa ruftaigidanoo ufa qiranara randoosia miqi qinuu. Miqi qimasooofanoo asuru fannoo anireenoo aiqama misa dukunimaqasoofanoo asurukiqari ufa moo kambiqeenoo maaqi qinuu. Maafa qini qimuqusira qimaaku marifa, innee mina ufa kai iriaqa.

<sup>8</sup> Yisuna faiqinamu mi ufana iriseeqa kaqi kaqi miqoo munu randee mini randee ufanoo, sia faiqi miqoo marufanoo Yisufa kai miqoo misa faqa marinau.

<sup>9</sup> Mi ainainafa taikooofaqa misa Yisuna saimbaqa mi aaqannasaqari oofu fimarufanoo Yisufa maaqi qimasee afeekaikamandee qimanniminuu. Innee meerai aaqanasaa qafaanara ooquree sia uqanna qimannimiaqa. Qinee faiqi nimaaku kuqiranakiqari findi fuannaqoo miqoo kai qimannimiaqa.

<sup>10-11</sup> Mi faiqinamusa eedoo qimasee sia qimannimiqa, Yisufa kuqiranakiqari findi-fuaninnara minara kai nari qimami nari qimami umee kai qimariqau. Misa miqi qidaqa Yisuna iramiriqa qiqau, Mooseena sandufa akoofasauqa minakiqari maaqi qidaqa. Faiqi moo fannoo Eeriaafarafo qira fasiqa mifa naaree findifumafinanoo miqooqari Anutuna asauku mundirafa kambiqaanoo fee qidaqa. Misa miqi qidaqa nanee fee qidee miqi qidee qufanoo Yisufa maaqi qimasee qimanniminoo qinuu.

12-13 Kuqaa Eeriaafara maqi kambiqaafinoo asauku mundirausa qinee aniannanara deedaqinoo. Doo qinee inni qimannimidaqa. Doo Eeriaafara maqi moo auqu Yoohaneefa nammari nimirufa doo ooqai kambiqaafi marufaqa faiqi anaasee akaqausa sia irirai tamummaqararusa ufamau fiqa nari manda nidiranakoo mareeqee mina kuqarusaqau. Qinee kafaa innimma irammirianaura tamummaqara fasiqauqa nanaree misa faiqi nimaakuara aupurarana firaana amiseeqa mareeqee aquseefaree.

*Yisufa kumaaraa aundurai afaanna aqiqanau.*

*(Mat 17:14-21; Ruk 9:37-43)*

14 Misa miqi qimammaree aaganasaaqari ooqu fiufaqa Yisuna faiqi namu akaqausa sia ooru fusa maruqoo ooqu paqurimasee faiqi anaasee moomoosa suqimarufaqa ooqu nindafaqau. Mooseena sandufasaa rakisimarusa akaqausa miqoo faqa maridaqa Yisuna faiqi namu faqa ufa rainee mariqau.

15 Faiqi anaasee Yisuna qafamasee tautumasee sandee mifunnai oonureeqa amandaqau.

16-17 Yisufa anireenoo nari faiqi namu qimanniminoo qinau, nana ufaree innee Mooseena sandufasaa rakisi mariasa faqa ufa rainaidee qufanoo faiqi moo fannoo faiqi aanaaseekiqari Yisuna qimaminau. Qinee qeeqa qimaaku afixee anee ianannai anidaqa. Manda afaanna fannoo mina aunduraki keeqafi marifanoo siamma ufa qidanoo.

18 Mi afaannafa mi faiqina arifanoo maqasaa kuqaki kuqaki aquffinanoo aiku asauku pipisaaga qusuffinanoo amaqaqini datimambifanoo ookiqari qaqaara kai aniraidanoo. Qinee ani faiqi namu maqoo mariasara afaanna afaqaqee qunaqa misa miqiafanoo sia amanaikifaqa ani qimamidaqa.

19-20 Yisufa iriseenoo aiqama faiqi anaasee qimanniminu. Inni firaqoo uqanna sia irirana qinisaa rusimarifanoo qinee kisaqaasaa fee inni manda furufarira ummaara dadaaqiqa nuanauree. Mi kumaaraana afixamaree mai aniaqa qufaqa misa mi kumaaraana afixee munusoofanoo minakinaa afaanna fannoo Yisuna qafamaseenoo mi kumaaraana mareeqeenoo fuseenasana aaku amaqaaseenoo maqasaa rutuku quqasoofanoo mi kumaaraafa maqasaa aquffinoo quanda qaandi marufanoo qaqaara ookiqari ururama teeqinau.

21 Yisufa mina akoona irammirinoo qinau maafa kisaqaasaa maaqinoo mari fee qufanoo mina akoofa qinau Eeoo faiqi aanaaqisaaqari miqi marinau.

22 Moomoo kari mi afaannafa mina kuqaruane qimaseenoo idaki fee nammariki fee kaqi mara aqi marufa maridanoo. Anee amanaikinana maasara amuqusinana dadaaqia.

23 Yisufa iriseenoo qinau sia qiniara amanaikiannee qia aneenna kai qinisaa irirana rusiranara kai iria. Faiqi Anutunasaa irirana rusimarifa aiqama ainaina amanaikamminanoo.

24-26 Mi kumaaraana akoofa mina iriseenoo faqa quqaseenoo Yisuna qimaminoo qinau eeoo qinee anisaa irirana rusimarunausa maridaqa sia amanaikidaqa anee dadaaqia qufanoo Yisufa faiqi anaasee dindari dindari ani usufufanoo nindafeenoo misa qini ititaqimaqeefoo qimaseenoo mi kumaaraana aundurakinaa afaanna amambaina qimamiseenoo qinau. Qinee ani qimamidaqa mi kumaaraana aundurakiqari rafudamaki sandamafinana sia uqanna kafaa ani keeqaa qufanoo mi afaannafa faqa quqaseenoo firaqa fuseena sana mi kumaaraana aaku amaqaaseenoo maqasaa rutuku quqaseenoo doo raudamaki sandamafufanoo mi kumaaraafa kuqiara foora maqasaa rumafufanoo aiku asauku pipisaaga qususeenoo kuqiara foora mambinau. Miqi mambufaqa faiqi ani qafee doo kuqiifoo qiqau.

27 Miqi qufanoo Yisufa mina asauku qumaroofoanoo doo findi finau.

28-29 Miqooqari Yisufa moo maqaki keeqafufaqa mina faiqi namu kukeeqasee aniree irammiriqa qiqau. Maasa nanaree mi kumaaraana aundurakinaa afaanna aqiqarara anuqi fee qufanoo Yisufa qinau Anutunara innaaruqirafa kai miqira afaannauqa niqiqaina fifaranoo sia moo ainainannai niqiqeefaranoo.

*Yisufa nari kuquaninnanara qimanniminu.*

*(Mat 17:22-23; Ruk 9:43-45)*

30-31 Misa mi maqusanaindara quqasee Kariree maqa maaqaki nari faiqi namu faqa faiqi anaasee sia iriaqee qimasee nari faiqi namu oosana oosana ufa qimannimiani qimaseenoo fidanoo Kariree maqa maaqakiaqa fidanoo qimanniminoo finau. Mifa maaqi qimasee qimanniminu. Faiqi misa qini faiqi nimaaku qumareeqee faiqi nisaukuki quqaqisaifaqa misa qini kuqa darusaifanoo qaaramoo faasaana aiqarainanoo Anutufa kuqiranakiqari qini mara findifumaqisaannoo.

32 Mina faiqi namu mi ufana iriseeqa sia mina oosanara iriqau irammirirana faqa sia irammiriqau rufiasee kaqi mariqau.

*Yisuna faiqi namu yafee maasaki uriqararafa maridanoo fee.*

*(Mat 18:1-5; Ruk 9:46-48)*

<sup>33-34</sup> Misa Kapeeranaumma maqusai anireeqa maaqaki keeqafufanoo Yisufa nari faiqi namu irammirinoo qinuu. Maasa aanai animarunaqa innee nana raigara ufee qifee misa nisaurusee sia qimamiqau. Misa narikiqari yafee uriqararafa mariannoo qimasee minara raigeeqa nisaurusee sia Yisuna ufa qimamiqau.

<sup>35</sup> Yisufa oogu marifinoo nari faiqi namu aiqama naaramasee mai aniaqee qimasee maaqi qimasee qimanniminau. Faiqi moo fannoo maqasaa mariasaki uriqararafaikinafa mifa nari kai ureeqaranaki fuannoo mifa aiqamausa dadaaqidanoo amiqira saika faqa nikooqemari saikana faqa dadaaqiannoo.

<sup>36</sup> Yisufa miqi qimaseenoo faiqi aanaaqi moodaa mareeqee misa noorinni kikiqamaseenoo asaukunnai mina kaqaramma qumareenoo qimanniminoo qinuu.

<sup>37</sup> Faiqi anaasee moo fannoo maaqira kaqikaa faiqi qini ufara irisee oonu asasamasee aqoondikinafa sia irirainni qini Yisusa faqa qiçoondikidanoo. Yafee moo fannoo qini oonu qiçiqainafa sia qini kai qifiqannoo qini diqiçoona faqa oonu aqifaidanoo.

*Moo fannoo Yisuna auqusaa afaanna aqiqanau.*

*(Ruk 9:49-50)*

<sup>38</sup> Yoohaneefa Yisuna qimaminoo qinuu, Oo ufasaa rakisirafa faiqi moo fannoo moosaa manda faafasaaqa naundurai mariasa ani auqusaa qimasee niqiqeemaru qafaqiafana, mifa sia maasaki nimarufa marunara qaoo qiçiafana.

<sup>39</sup> Yisufa mina iriseenoo maaqi qinuu sia minara qaoo qia. Mifa qini duqusaa moo firaa ainaina auqamaseenoo sia amana quandaki qini diqianoo.

<sup>40</sup> Maasa aana ititee mariasa maasa namuqaa maridaqa. Sia maasa aana ititee mariasa sia namuqaa maridaqa maasa qifeeqaree mariasa maridaqa minara sia mi fasiqanara qaoo qia.

<sup>41</sup> Innee maa ufana iriaqa Innee nammariara nidinaqa innaaru qifanoo faiqi moo fannoo inniara asauku mundirana faiqi namu mariafanoo fee qimaseenoo nammari inni nimananoo Anutufa mina akiaqara mi fasiqana innaarunai quqamaqaannoo.

*Kaқи runna mareeqee quqarafa mina akiaqara uriqararafa.*

*(Mat 18:6-9; Ruk 17:1-2)*

<sup>42</sup> Miqi qimaseenoo Yisufa mi kaqikaa faiqina faasai misa noorinni kikiqunara kafaa qimanniminoo qinuu, maaqira kaqikaa faiqi irirana qinisaa rusimarinafa moo fannoo mina mandoosana uqafiqainafa mi fasiqafa Anutuna firaa aqurarana ameeamaanai mariannoo. Misa miqinna fasiqana qumaree firaa oonitika anukaki quqasee rumbasee afeeqa amifanoo ooruku nammariqi aqufinoo kuqinoo oonu dupira arirafa mariannoo. Kaqikaa faiqi qinisaaqarara irirana moosaa ubeekke marinafa firaa arirafa mariannoo.

<sup>43</sup> Aninna asauku fannoo anirarisameeqeenoo mandoosanaki ubeekke marina mina ateeqa aqua. Moodaa asauku faqaafa naaru asumu mariranaki firafa amana maridanoo. Aiqama asaukuqara faqaafa naaru naaru sia qimbeemari idanaki firafa mandaikirafa maridanoo. [ <sup>44</sup> Miqoo naaru naaru kadiaru sia kuqidanoo kaqi maridanoo ida faqa sia dimbee marifa kaqi qaida mariannoo.]

<sup>45</sup> Aninna aiku fannoo ani rarisameeqeenoo mandoosanaki ubeekainnana mi aikuna ateeqa aqua. Anee moodaa aiku faqaafa naaru asumu mariranaki firafa amana maria. Aiqama aikuqara faqaafa idaki aqufirafa sia andeeqanoo mariani. [ <sup>46</sup> Mi idanaki faiqi neemaria kadiarusa sia kuqidaqa ida fannoo faqa sia qimbaidanoo.]

<sup>47</sup> Aninna afu aaqoo fannoo ani mareeqee Anutuna ufamau firanakiqari kaqinni ubeekke marina mina imbasaa. Anee moodaa afu aaqoo faqaafa Anutuna ququsaki keeqarana amana maria. Qaara afu aaqoo faqaafa idaki aqufirafa sia andeeqanoo mariani.

<sup>48</sup> Miqoo faiqi neemaria kadiarusa naaru naaru sia kuqidaqa ida faqa naaru naaru sia dimbaida kaqi qaida maridanoo.

<sup>49</sup> Anutufa ida qumareenoo nimanamandee qafarana ooruku anoonara foora aiqama qusasaa adia nimaqainaqa Anutuna ufasaa mapukufi mariaqera nimaniannoo.

<sup>50</sup> Ooruku amiqira ainaina maridanoo mina adiafaa irafa taikafinanoo naqimmasee adiafaairana maraannoo fee sia amanaikiannoo. Innee inneeqa naunduraki narinni narinni ooruku faqaasara foora maridaqa narinni narinni asoaranaki mariaqa.

## 10

*Faiqi anaasee nariara nariara minnisarana qaoo qirafa.*

*(Mat 19:1-12; Ruk 16:18)*



<sup>1</sup> Yisufa mariu maqusana minniseenoo Yudeeaa maqa maaqaki ooqu finau. Yooradanna nammari taqamareenoo dinni afainni fufaqa faiqi anaasee moomoosa mifa maruqoo aniroofanoo nari oosana maraseenoo ooqu marifinoo Anutuna fasaasa ufa qimannimimarinau.

<sup>2</sup> Farisai amaana ufa qimarusa akaqausa Yisufa maruqoo aniree ufaanara foora fufusee Yisunara minaki aruanifeera maaqi qimasee narikai nari qimami nari qimami qiqaq, Maasa faiqi nari anaaga minnisarana irammirifanoo Yisufa minara aagara ufa qinaqa mina ummarasee aruanaura. Miqi qimasee akooqoo Yisuna qimamiqau, Oo Yisu maasa Mooseena sandufa faiqi moo fannoo nari anaaga minnisaralara eedoo qidanoo fee sia fee eedoo qidanoo.

<sup>3-4</sup> Miqi qufanoo Yisufa iriseenoo irara ufa kai qimanniminoo qinau Mooseefa minara nana aaquqira ufa qimanniminoo fee qufaqa misa qiqaq, Mooseefa nari ninaaqmaaka aqigara papiga akara rumeeqee nimiseeqa niqigaaqee qidanoo.

<sup>5</sup> Yisufa mina iriseenoo maaqi qimasee qimanniminoo Mooseefa inni irirafa mandaikinara inni nimuqusa sia amaqi marifa ooni miqirafa amatooki marunara iriseenoo akoo akaa maseenoo inniara inneeqa ninaaqmaaka minnisaqee qinau.

<sup>6-8</sup> Ooqai indaaruu Anutufa aiqama ainaina auqu quqaqoo aukuaana sia miqinoo marinuu. Miqoo akee faqaana faqa afaamu faqaana faqa auqu quqanau, miqi maqoonara kai faiqi aiqama nari anoofa akoona minniseenoo nari aanaaqasaa atooqafinanoo moodaafaikamambi marifaranoo minara sia kafaa misa qaarai kamambi marifaranoo moodaafaikamambi marifaranoo.

<sup>9</sup> Miqinoo marinara Anutufa atooqaaqoo ainaina sia uqanna faiqi rakeeiaqa.

<sup>10</sup> Yisufa maaqaki keeqafufaqa mina faiqi namu aniree anaasee minnisaralara qunara iroofanoo mifa qimanniminoo qinau.

<sup>11</sup> Faiqi moo fannoo nari anaaga minnisee moo anaasee marainafa mi indaaruaqaa anaaseena mandaikammamaqeenoo nari mi fasiqafa ummuarirana mariannoo.

<sup>12</sup> Miqi kai inoo anaasee moo fannoo nari afaaqi minnisee moo fasiqa marainafa ummuarirana mareenoo miqianoo.

*Yisufa faiquqaindi nifaaqooqa qinau.*

*(Mat 19:13-15; Ruk 18:15-17)*

<sup>13</sup> Faiqi anaasee akaqausa nari faiqi aanaaqiuqa nifiqee Yisufa nari asauku faiqi nikaqasaa quqasee nifaaqooqa nimianifeera nifiqee aniroofaqa Yisuna faiqi namu misa farafara qifoo qimasee niqigau.

<sup>14</sup> Yisufa miquna qafamaseenoo nari faiqi namu aanoommasee qimanniminuu. Saina faiqi aanaaqiuqa qinee marunannai aniaqa. Sia misara qaoo qiaqa Anutuna ququsa miqirausaindi marinara sia qaoo qiaqa.

<sup>15</sup> Innee maa ainannara kai irisee sia aunuqa, faiqi anaasee moo fannoo sia kaqikaa faiqi naanna ramasee Anutuna ququsa marainafa naaru naaru mariranaki sia uqanna keeqeefaranoo.

<sup>16</sup> Yisufa miqi qimasee nari faiqi namu qimannimiseenoo faiqi aanaaqiuqa oonumafi aripimma qumareenoo aiqamausasaa asauku quqaseenoo nifaaqooqa qinau.

*Ainaina faqaa kumaaraa Yisuna faqa ufa qinau.*

*(Mat 19:16-30; Ruk 18:18-30)*

<sup>17</sup> Yisufa moosaa fidanoo aanai fimarufanoo faiqi moo fannoo afaqanoo fifufanoo aanai oonu Yisuna paqurimandeenoo mina oorinni oonu aqoori saunara fufanoo qimaminuu Oo amiqira andeeqara ufasaa rakisirafa nana kadaapi fee Anutuna rumaqaananoo fee naaru marirana qimiannoo fee.

<sup>18</sup> Miqi qufanoo Yisufa qinau anee nanaree qiniara fee qidane. Sia moo andeeqarafa maridanoo Anutufa kai andeeqarafa maridanoo.

<sup>19</sup> Anee Mooseena sandufa irimariananoo mi sandufafa maaqi qidanoo sia anee faiqi anaasee moodaa faqa kuqarua sia anaasee ummuaria sia ainaina ummuaria sia siaasinnai oonu moonara unnufa qia, sia moosa ainainara amuqusinana unnaqimasee maraa, aneenna anoofa akoonara amiqimasee ufa qimasee misa nuqu uqeraa.

<sup>20</sup> Miqi qimasoo fanoo mi fasiqafa Yisuna qimaminoo qinau, Oo ufasaa rakisirafa qinee ooqai faiqisaa mi ufana irisee mi mau fimarunaua maridaqa.

<sup>21-22</sup> Mi fasiqafa miqi qufanoo Yisufa minara aidufanoo andeeqasee mi fasiqana oori qafamasee qinau. Anee moodaa ainainara kai sia auqaananoo. Anee aneenna ainaina aiqama marasee faiqi akaqausa nimisee minasaa munnimma maraseenana kudi fasiqausa nimisainanoo ani qumiasana ani afeesara innaarunai mariannoo, miqinana doo ania, doo qini faqa aniree fua qufanoo mi fasiqafa mina iriseenoo nari moomoo ainaina marunara amuqusufanoo oori runusee finau.

<sup>23</sup> Mifa fufanoo Yisufa quandakinoo nari faiqi namu qimanniminoo qinau, ainaina moomoo faqaasa Anutuna ququsaki keeqaranara anuqifaranoo.

<sup>24</sup> Yisuna faiqi namu ainaina faqaasa innaarunai fifaranoo fee qiqiusa mi ufana iriseeqa tautufanoo Yisufa kafaa qimanniminoo qinau. Oo qini faiqi namu Anutuna ququsaki keeqaranara kadaapiri mariafa maridanoo.

<sup>25</sup> Kameera qoosa fooqaa aandau uka aamarai keeqarara anuquannoo, ainaina faqaasa Anutuna ququsaki keeqaranara fiqaramasee anuqaa mareefaranoo. <sup>26</sup> Yisuna faiqi namu mina irisee firaqoo tautumafuafaqaa naaquqooafaqa nari qimami nari qimamiqau, Ainaina faqaasa sia innaarunai fifaqa yafee asumu mariranaki fuannoo fee sia moo fannoo amanaikiannoo.

<sup>27</sup> Yisufa mina iriseenoo andeeqasee misa noori qafamaseenoo qimanniminoo qinau. Mi ainainna sia faiqi amanaikimari ainainafa maridanoo Anutufa kai amana aiqama ainaina amanaiki marifa maridanoo.

<sup>28</sup> Peetooroofa mina iriseenoo Yisuna qimaminau. Qafa, maasa aiqama ainaina quqaseeqa kaqi samu uqanna ani faqa fidaqa qufanoo Yisufa nari qimaminoo qinau.

<sup>29-30</sup> Kuqaa qiananoo, qinee maa ainainnara faqa qimannimidaqa moo fannoo qiniara faqa qini amiqira fasaasufara faqa nari maaqa fee nari akaqaafasaa fee nari asooki-nee nari anoonee nari akoonee nari faiqi namu fee nari maqa maaqa fee minauqa minisainafa mifa maqee maria kamuqoo moomoo maraannoo. Maaqauqa faqa akaqaafasaa faqa asoommaaka faqa anausa faqa faiqi namu faqa maqa maaqa faqa moomoo fiqaramasee firaqoo maraannoo, qini ufasaara arirana faqa maraannoo. Maqee kamu miqimasee maraannoo naaru anianinna kamuqoo naaru asumu marirana faqa maraannoo.

<sup>31</sup> Maqee maria kamuqoo moomoo uriqararausa kasooqaqee innaarunai ureeqarausa marifaranoo. Maqee maria kamuqoo moomoo ureeqarausa misa kasooqaqee innaarunai uriqararausai kifaranoo.

*Yisufa kaiqaa nari kuquaninnanara qimanniminnau.*

*(Mat 20:17-19; Ruk 18:31-34)*

<sup>32</sup> Yisufa nari faiqi namu faqa Yeerusareenni ooru fidanoo indaaru fufaqa mina faiqi namu mina aanaaqiana ooru fidaqa Yeerusareenni faiqi firaasa Yisuna ariraree qimaru ufana nari iriaqeeida rufia rufiammiqa ooru fimariqau. Faiqi anaasee namufaqa ooru fusa misa faqa nimukee marufaqa ooru fiqau. Ooru fidanoo nari faiqi namu qisaukuqara taikasee qikunni ooqu qaara mararausa naaduma mara quqasee nariki kambiqaaninna oosannara nari kuquaninnanara qimanniminoo qinau.

<sup>33</sup> Innee iriaqa maasa Yeerusaree maqusai ooru raanaqa faiqi misa faiqi nimaaku qini qumareqeeeqa amaana maqasaa aanaiqikirausa uriqararausa faqa Mooseena sandufa akoofasauqa faqa misauqa nisauskuki qini quqeeefaranoo. Misauqa qiniara ufa qimaseeqa kuqiranaki qini mara quqaseeqa miqooqari mareeqee aanaamuru nisaukuki quqeeefaranoo.

<sup>34</sup> Anaamuru qini mara quqaseeqa ataasa ataasa qima qimaqaidaqa niqaara qini qifaaqai fidisaida qini qummai qima qasaida, uaiqa samu qumaree qini firaqoo qini qifaqaqaa ateekeese kuqa darifaranoo. Qaaramoo faasaana aiqarainanoo Anutufa qini mara findi fuannoo.

*Seebeedina amaakuqara innaarunai uriqarara qiqau.*

*(Mat 20:20-28)*

<sup>35-37</sup> Seebeedina amaakuqara Yameesasa Yoohaneesa Yisufa maruqoo anireeqa qiqau. Oo ufasa rakisirafa moodaa ainaina maasa aniara qimianne qinauree qufanoo Yisufa nana ainanee qufaqa misa qiqau, anee aneenna areenarana innaaruna ququsaki keeqafina aneenna qaraisaa ooqumari finaqa maaqanda ani aaga moo fannoo dinni moo fannoo dinni amanee ani aaga uqanna ani afaaqasaa aqoondi kammafi fee maaqanda faqa uriqararausaikiqa marianauree, qufanoo Yisufa qimanniminoo qinau.

<sup>38</sup> Innee inneeqa iraa ainainara sia irimariafanoo fifau faafaummi mariafanoo. Qinee manda nammari naannana innee faqa amanee neefaree. Qinee kuqira nammari kuqira ruanaqa innee faqee amanee rifaree qufaqa miqanda qiqau amana maaqanda ruanauree qufanoo

<sup>39</sup> Yisufa qinau Inneeqara kuqaa qini manda kuqira nammari neefaranoo, qini kuqira nammari rumaqimaqee fandinnana inneeqara faqa rifaranoo.

<sup>40</sup> Qini daaqa uqanna qini qifaqasaa qiqoondi innaaruna ququsaki dinni dinni ooqu marirafa sia qinindi, Anutufa akaqausaree qimasee deedaqamaqoosa mifa kai misa nimiannoo.

<sup>41</sup> Yameesasa Yoohaneesa mi ufana ooru Yisunara iroonara akaqausa qisaukuqara fasiqa mina iriseeqa miqandara aanoo iqau.

<sup>42</sup> Yisufa mina iriseenoo aiqamausa naarama narí unnai quqaseenoo qimanniminau, innee maa maqasaaqaraasa oosana irimariafanoo faiqí misara uriqararausee qimariasa nári aanoonnai faiqí anaasee kaiqeesara rakisi nimaqee mariasa. Misa uriqararausee ureeqarausee amiqimmasee misa uriaaqarama nimaqaidaqa.

<sup>43</sup> Misa oosana miqimminoo maridanoo Inniki sia miqinoo mariannoo, Inniki moo fannoo uriqararafaikiraree qimarifa mifa aiqamausa dadaaqidanoo amiqira saika faqa nikooqemari saikana faqa dadaaqamannimaqee marifa mariannoo.

<sup>44</sup> Innikiqari moo fannoo narí kai indaaruu nikiqaikiane qinafa mifa narí kai eedoo qimasee aiqamausa dadaaqira karabusa saiki marifara foora aiqamausa dadaaqidanoo miqí marifa mariannoo.

<sup>45</sup> Innee qini qiqafaqa, qinee faiqí nimaaku sia faiqí anaasee qini ainaina maqimaqaseeruu qumuafanausau maridaqau, qinee faiqí anaasee moomoosa ainainamma nimaqaseeqa misa Anutuna nariranakiqari feefauriraree qimasee qeeqa marirana misara kuqiranaki quqarara qumidaqa.

*Yeerikoo maqanna afu qimbarana andeeqanau.*

*(Mat 20:29-34; Ruk 18:35-43)*

<sup>46</sup> Yeerikoo maqusa Yooradanna nammari dinni afainni afaasasaa maridanoo. Yisufa Yeerusaree maqusai ooru fidanoo fiquakufanoo Yeerikoo maqusai aniranau. Miqooqari findifi narí faiqí namufaqa faiqí anaasee moomoosa faqa ooru fida maqusa atinni aanasaa ooru qafoofanoo aanai faiqí moo afu qimbarana mina auqu Baratimaeusafa Timaeusana amaaku fannoo nári oosana marasee miqimarusa aanasaa maridanoo faiqí anaasee fiqaree aiqaree imarusara narana maree maria munnimmara innaaru qimarufa marinau.

<sup>47-50</sup> Mi afu imbara fasiqafa Yisunara Nasareeteendaraa fasiqa animariifoo qufanoo kafa kafa faqa quqasaida nammeera maaqí qimasaida nammeera qimarinau. Oo Yisufa Dafidina ati marianafa anee qiniara irinanoo amuqusinana dadaaqia qufaqa moomoosa mina aqia qiqau doo ufasaa farafara qia qufanoo mi fasiqafa misa guna irinoo sia minnisanau misa agurareeqee firaqoo ambufuamufanoo firaqoo faqa quqaidanoo maaqí qinuu, Oo Yisufa Dafidina ati marianafa anee qiniara irinanoo amuqusinana dadaaqia. Yisufa mina iriseenoo aanasaa kasoomambinoo qinuu aaraifanoo aniani qufaqa misa qimamiqa qiqau. Doo asasia Yisufa aniara aniannee qidanoo qufanoo afu qimbarafa mina iriseenoo narí qamunna akuqoona mi saqanna afaqimma aquseenoo doo findi finoo Yisufinnai finau.

<sup>51-52</sup> Oonuroofanoo Yisufa irammirinoo qinuu. Anee qiniara naqimaqisaanifee fee q inanee qufanoo afu qimbarafa qinuu. Oo ufasaa rakisirafa anee kaifaa qifu maqa qisaanneera qidaqa qufanoo Yisufa qimaminoo qinuu. Doo fua ani aundura qinisaa rusirafa doo ani andeeqamaqanoo maridanoo. Miqí qufanoo doo aaqee uqanna mi fasiqana afu qimbarafa maqafaranoo doo Yisuna faqa aanai finau.

## 11

*Yisufa doonkisaa Yeerusaree maqusai ooru finau.*

*(Mat 21:1-11; Ruk 19:28-40; Yoh 12:12-19)*

<sup>1</sup> Yisufa narí faiqí namufaqa faiqí anaasee faqa Yeerusaree maqusa aaqa ooruree qaara kaqikaa maqusa nuqu Beetapaisa faqa Beetani faqa mi maqusa qanda naaqa ooruree Oorifa aaqana aaqa ooru raqau. Oorureenoo narí faiqí namukinaana qaaraqanda Yisufa narí niqiqeenoo indaaruu fuaqee qimasee qimanniminau.

<sup>2</sup> Inneeqara fimaria maqusafa marinaki oonureeqa fuka doonki akoona afaandama itirana saqarisaa sandannai anukaki qususee saqarisaa qusuqaafanoo marina paqurifaranoo. Sia faiqí moo fannoo mina ataufakasaa ooqu marifi fia kaqí maridanoo, innee mina sanda idukusee mi doonkina maree aniaqa.

<sup>3</sup> Faiqí moo fannoo inniqarara naqí fee ida fee miqida fee qifaqa inneeqara maaqí qimasee qimamiqa, maasa uriqararafa maa doonkina saika maridanoo taikasainanoo aaqee uqanna muqu nimiannoo fee qifaqa ani maraidaqa.

<sup>4-5</sup> Yisufa miqí qimasee qimannimufaqa miqanda oonuree qafoofanoo doonki akoona afaandama itirana paquriqau, mifa maqusasaa moo maaqa kooqiki mari saqarinasaa qusuqoofanoo marinau. Miqanda oonu qafee iduki marufanoo akaqausa maqusasaa marusa aniree qiqau,

<sup>6</sup> Naqiraree maraidee qufaqa miqanda Yisuna ufa kai qimannimufaqa doo maree fuaqee qiqau.

<sup>7</sup> Miqanda mi doonkina mara maree Yisufuqoo miniseeqa nári oosana marasee nári qamunna mina ataufakaqa ufiqisoofanoo Yisufa minasaa ooqu marifinoo Yeerusareenni ooru finau.

<sup>8-9</sup> Faiqi anaasee moomoosa Yisuna qafamaseeqa nári karaambaiqa imaru oosanna mareeqa nári siuta raipaqqeeqee aanasaa ufiqimarufaqa akaqausa saqari asaana amanee namufaqaana dinni dinni anaadookina saqari ateekeqee aanasaa ufiqisoofanoo mi mau doonki fannoo finau. Fimarufaqa moomoosa inaaqiannai faqa oorinni faqa fidaqa maaqi qimasee faaqaridaqa asadaqa qiqau Anutuna firaqoo amooqiaqa.

<sup>10</sup> Maasa qikooka Dafidina ququsaki marianinna karaambaiqana Anutufa amiqi amiqiani. Karaambaiqa Anutuna auqusaa Yisufa uridanoo. Anutuna firaqoo amooqiaqa.

<sup>11</sup> Miqi qidaqa afiaqa ooru fiufaqa Yeerusaree taunnaki keeqafufanoo Yisufa misa amaana maqa firaanaki keeqafufanoo aiqama ainaina aiqquqiseenoo doo rafudamakufanoo doo eendidanommifoo qimaseenoo nari faiqi namu qisaukuqara taikasee qikunni ooqu qaara marasee nifiqamareenoo kafia Beetani maqusai ooqu finau.

*Yisufa faafisa fooqaa saqari aqinau.*  
(Mat 21:18-19)

<sup>12-13</sup> Misa faiqee iqaqoofaqa Beetani maqusaindari Yisufa Yeerusareenni ooru fidanoo aararoofanoo Yisufa qafoofanoo faafisa fooqaa ira saqari nianai marufanoo qaqama iranoo fee marinoo sia fee marinoo qimaseenoo aqa oonuree qafoofanoo amanee kai marufanoo qaqama iree maru aukuaana sia marunara sia iranau.

<sup>14</sup> Yisufa mina qafamaseenoo mi faafisana aqinau anee maqee maaqooqari naaru naaru anisaaqaraana sia faiqi moo fannoo ani qaqama naannoo. Miqi qu ufana Yisuna faiqi namu iriqau.

*Yisufa amaana maqaki makeeti marusa niqiqanau.*  
(Mat 21:13-17; Ruk 19:45-48; Yoh 2:13-22)

<sup>15</sup> Misa kafia Yeerusaree maqusai ooru keeqafufanoo Yisufa misa amaana maqa fiqumma ququsa auquqoonaki keeqafufanoo minaki faiqi ummuari maru makeeti marusa ooru rapatutummeeqeenoo nifaqasoofaqa rafudamaki fifainiqau. Minaki marusa faiqi anaasee kaqi munnimma marasaida amaana maqakinaa munnimma faiqi anaasee nimisaidaqa minasaa qaraana ati munnimma ookaa mandee ummuaramasee maraaneera miqi mariqau. Yisufa misa qaindaufa faqa misa munnimma minasaa quqaqoonauqa faqa aiqama ooru qumaree teeqi taqimaseenoo nakipuruna faiqi anaasee bisinisaiiki marusa faqa misa ooqumari maru siaqausa faqa mareeqee teeqi taqi maqinau.

<sup>16</sup> Akaqausa ummaara maree mariasa amaana maqa fiqumma auqira ququsa firuqiaki fimarusa faqa qaoo qufaqa minaki sia fiqau.

<sup>17</sup> Miqimaseenoo Yisufa quandakinoo miqoo marusa maaqi qimasee qimanniminoo qinau. Ooqeenaa tamummaqara fasiqauqa akaraki Anutufa maa maqanara maaqi qimasee qimaqoofa maridanoo. Qinee faiqi anaasee qini maaqara innaaru qira maqa fee qiaqee qidaqa. Anutufa miqi qimaqoofaqa qinee mimau maaqi qidaqa, innee maqee mariasa maa amaana maqana qumareeqa unmuari mariasa kukeeqara maqaikammi mariafanoo.

<sup>18</sup> Amaana maqakina aanaiqikirausa uriqararasa faqa Mooseena sandufa iriqaraasi marusa faqa Yisufa miqi qunara aanoomasee iriseeqa Yisuna kuqarira aanara randee mariqau. Faiqi anaasee muduka uqanna moomoosa Yisuna ufa irufanoo naaquqoonara aanaiqikirausa Yisunara rufiee marunara ariranara randaqau.

<sup>19</sup> Mi eenaaniannai Yisufa Yeerusaree maqusasaqari nari faiqi namu nifiqee moosaa finau.

*Faafisa fooqaaira saqari aadanusinau.*  
(Mat 21:20-22)

<sup>20</sup> Faiqee iqaqoofaqa fidaqa misa kafia mi faafisana fooqaaira saqari aqa fidaqa qafoofanoo ammuqundari aiqama muqufi oosana amisee aiqama aadanusinoo marinau.

<sup>21-22</sup> Peetooroofa mina qafamasee tautumasee Yisufa mi saqarina aqunara iriseenoo Yisuna aaramaseenoo qimaminoo qinau. Oo ufasa rakisirafa anee qafaa anee aqisaananoo doo kuqinoo marinoo qufanoo Yisufa nari faiqi namu qimanniminoo qinau.

<sup>23</sup> Innee maa ufana irisee sia aunuaqa inni irirafa Anutunasaa rusinoo marinaqa innee qifandinna ainainara kuqaa kambiqaanoo fee qiaqa sia naunduraki qaara irirana iridaqa innee maa amuaqunamunara rafauruaki ooruku nammariki aqufua qifanoo Anutufa kuqaa aniara miqiannoo.

<sup>24</sup> Minara qinee inni maa ufana faqa qimannimidaqa innee moo ainainara innaaru qi-daqa inni irirafa doo mareera foora miqiunoo qimasee irirana Anutunasaa rusisaifanoo aiqama innaaru qimariana Anutufa inni nimiannoo.

<sup>25-26</sup> Innee inneeqa mandoosana Anutunara minniqisaanee innaaru qidaqa inni mandaikamannimaqaasa misa ummaara aniki marina minnisee aunusaifanoo inni innaarunai nikoofa inni manda oosana akiaqara faqa mininnisaani. [Inni niqoonausa inni mandaikamma nimaqaifaqa inni mina irisee sia mina minnisee kaqi irimaree fifanoo Anutufa faqa innindi faqa miqi kaimmiannoo.]

*Yisunara yafee qifanee afeekaikidanee qiqau.*

*(Mat 21:23-27; Ruk 20:1-8)*

<sup>27</sup> Yisufa kafaa nari faiqi namu faqa Yeerusareenni oorureenoo firaa amaana maqa fiq qifura ququsaki keeqafinoo nimarufaqa minakinaana aanaaiqikirausa uriqararausa faqa Mooseena sandufa akoofasauqa faqa aniree irammiroqa qiqau.

<sup>28</sup> Oo Yisu anee maa maqanaki bisinisaiki mariasa nifaqasaana fuanara anee uriqarara fee maridanee miqidanee. Yafee aniara qifanee maanaki mariasa nifaqeenee qufanoo Yisufa nari qimannimino qinuu.

<sup>29</sup> Qinee faqa inniara modaa ufa iramannimaqaanara. Innee qimaqimifaqa qiniara iraaufana faqa qimannimianaauranoo.

<sup>30</sup> Yoohaneefa nammari nimimarufa yafee minara nammari nimianee qufanoo nimimarinuu, Anutu fee faiqi fee qufanoo nimimarinuu.

<sup>31</sup> Yisufa miqi qimasooafaqa narinni narinni raiqara ufa nari qimami nari qimami qiqau. Maasa naqi fee qianauree. Maasa Yoohaneenara Anutufa qimamiifoo qiananoo mifa maasara nanaree innee Yoohaneena ufara Anutuna ufa fee qimasee mi mau fuaqaana miqidee qiandoora.

<sup>32-33</sup> Maasa Yoohaneenara faiqi kai qimamiaafoo qianaqa faiqi anaasee kaqi qeesa maasa darifoora misa Yoohaneenara Anutuna tamummaqara fasiqee qimariafa marifaqee qimasee Yisuna qimamiqa qiqau, maasa sia ani ufa anoona irida fee qiqau. Miqi qimasooafanoo Yisufa kafaa nari qimanniminuu, Doo amana innee qinindira sia qimaqimifaqa qinee faqa innee qiniara yafee qimaminoo fee qianara sia qimannimianaaura.

## 12

*Ainainasaa manda rakisira rakisunara quandara ufa.*

*(Mat 21:33-46; Ruk 20:9-19)*

<sup>1</sup> Yisufa miqi qimaseenoo quandara ufaiqari qimannimino qinuu.

(Yisufa Yuda maqannaasa mandoosana qimanniminnaree qimasee nari munnimma maree marianara uainna qaqamara qimanniminuu. Maasakina sia uainna qaqama maridanoo koofi kai marinara mina kikiqusuanaura.)

Faiqi moo fannoo koofi asumu ummaquseenoo ququsa auqu ititaseenoo koofi nammari uqimaria difaaninai firana auquseenoo kisaqa qainda auquseenoo aufarira fasiqa fannoo mi qaindanasaa akaramaifanoo maridanoo rakisida aufaridanoo. Mi saikafa taikaifanoo ququsa akoofa moo maqusai niannai firaree qimaseenoo akaqa fasiqauqasaa nari koofi ququsa niqiqamaseenoo maaqi qimasee qimanniminuu. Innee qini koofi ququsa rakisidaqa qaqama irainna aukuaana innee akaqana innee qara mareeqa qini koofi akausa akaqana qimiaqee qimasee doo quqasee moosaa finuu.

<sup>2-3</sup> Koofi qaqama tiqi maru aukuaana aniroofanoo koofi akoofa nari ainainira faiqi nianaindara aqi qoofanoo anireenoo koofi ququsasaa rakisida marusa qimanniminuu. Innee uriqararana oondaraa koofi qaqama diqisee qimia qufaqa misa mandoosana marasee mina qumaree saamu samu ari ariiseeqa aqi qoofanoo kafaannai anirandee kaqisamu finuu.

<sup>4</sup> Kaqi samu oonuroofanoo afuqakoona qafamasee moo ainainira fasiqa aqi qoofanoo kafaa aninuu. Aniroofaqa mina faqa miqi kai mandee ariisee saamu qumaree akiaqa rukamusee mina afaaqasaa asaurirana mara amufanoo anirandee maree nari akoofinnai finuu.

<sup>5</sup> Oonuroofanoo qafeenoo moo aqi qoofanoo aniroofaqa mina kuqammariqau. Ququsa akoofa mina iriseenoo akaqausa kafaa niqiqanuu. Aniroofaqa akaqausa kaakadi nariqau akaqausa kuqa nariqau.

<sup>6</sup> Mi fasiqana ainainira faiqiuqa doo taikasooafanoo nari amaaku uqanna doo moodaa nari amuqumarufa mifa kai kaqi marinuu. Ququsa akoofa maaqi qinuu misa qini qimaakuara iriseeqa rufiasee koofi amifaranoo qimaseenoo mina aqi qanuu.

<sup>7-8</sup> Mina amaaku fannoo oonuroofaqa koofisaa rakisi marusa mina qafamasee maaqi qimasee nari qimami nari qimami qiqaau, maafa ququsa akoona amaaku maridanoo doo aniaqa anifaqa arusaananoo maa ququsafa maasaindi kai mariani qimasee mina amaaku qumareeqa kuqaruseeqa rafuseeqee ququsa aqoosai aqusaqau.

<sup>9</sup> Yisufa kaqi qimannimidanoo qinau, mi ququsana akoofa aniree naqi fee iannoo fee mifa aniree mi manda fasiqausa kuqa naruseenoo andeeqara fasiqauqasaa mi ququsana mara quqasee kafaa anirandee fuannoo.

<sup>10</sup> Innee maaqoo mariasa tamummaqara fasiqauqa akara sia fee innee asaana ridee misa maaqi qimasee qiniara qidaqa sabeena kikiqusususeeqa maaqi qimasee akara riqau. Faandaamura auqimaria fasiqausa sabeena moo marasee qafamasee manda saqari fee qimasee aqusoofanoo Anutufa mina kai urinnaaqarara fee qimasee faakanaikinoo maridanoo.

<sup>11</sup> Karaambaiga minnisoo sabeena marasee faakanaikinau. Oo amiqira faakana maridanoo.

<sup>12</sup> Yuda maqannaasa Yisuna mi ufana iriseeqa oo maasara quandaidaqinoo manda koofi ququsasaa rakisirausara maasara qidaqinoo qimasee aanoommasee Yisufa mifa maasara amiqira sabeena aqusoosa maridee qidaqinoo, qimasee Yisuna rumbara ufa qidaqa faiqi aanaaseera rufiasee Yisuna minnisee moosaa fiqau.

*Takisa munnimmara iroofanoo qimanniminau.*

*(Mat 22:15-22; Ruk 20:20-26)*

<sup>13</sup> Farisai amaana ufa qimarusa akaqausa faqa Eeroodeena ufa irimarusa akaqausa faqa aniree irarufara fusee ianee qimasee qimamiqa qiqaau.

<sup>14</sup> Oo ufasaa rakisirafa maasa aniara andeeqara ufa qimarianna fasiqa fee qidaqa sia anee faiqi ufara eerairamasee misiannai fimarianafa, anee sia faiqi nindafamaseenana miqimmiafaqee maaqoosimiafaqee qimarianafa mariananoo anee Anutuna anoona ufamau firanara paasoosimarianafa mariananoo. Doo anee maasa qimaqimia maasa Roomma maqannaau uriqararana takisa munnimma aukuaana aukuaana amidaqa. Mooseena sandufamau fee fidee miqidee, aqaidee miqidee. Maasa aquanauree sia fee aquanauree qufanoo Yisufa misa akaru qira oosana qafamaseenoo qimanniminoo qinau,

<sup>15-17</sup> Innee nanaree qini fusee irara idee siruaa munnimma moo marasaifaqa qafaa qufaqa misa siruaa munnimma moo maree mini uqafiqaqau. Mifa qafamaseenoo qinau, yana oori amana faqa yana auqu amana faqee maa munnimmanasaa akara rinoo maridanoo fee qufaqa misa qiqaau. Roomma maqannaau uriqaranaindi maridanoo fee qufanoo Yisufa qinau, doo amana qiafanoo mina auqu faqa mina oori faqa maa munnimmanasaa maridanoo sia moo naindi maridanoo narindi uqanna akooroodanoo minara doo narindi maridanoo doo mifa qimiaqee qinaqa mina amiaqa Anutunaindi faqa doo nari Anutuna faqa amiaqa qufaqa misa mina iriseeqa kuqaa qimaseeqa firaqoo Yisunara naaquqee marinau.

*Kuqiranakiqari findifiranara iroofanoo qimanniminau.*

*(Mat 22:23-33; Ruk 20:27-40)*

<sup>18</sup> Sadikai amaana ufa qimarusa akaqausa Yisufinnai aniraqau. Sadikai amaana ufa qimarusa faiqi anaasee kuqufiqa sia findi fifandiafoo putaammifandiafoo qimarusa mariqau. Miqi qimarunara misauqa akaqausa Yisufinnai aniree irammirida qiqaau,

<sup>19</sup> Oo ufasaa rakisirafa Mooseefa maa sandufana akara rinoo qinau, faiqi moo fannoo anaasee maraseenoo sia faiqi maqarai kuqufinanoo mina akaqa fannoo mi anaaseena maraseenoo faiqi maqasainanoo findifinoo indaaruu akoofa kuquna qumiasana saqamasaa rakisiannoo.

<sup>20</sup> Moo aukuaana moo fasiqa faiqi namu qisauku dinni taikasee dinni ani qaara marasee mariqau. Nifasaafa anaasee marasee sia faiqi maqarai kuqinau.

<sup>21</sup> Kuqufufanoo mina aanaaqianaafa mi anaaseena marasee mifa faqa sia faiqi maqarai kuqinau. Miqanda ninaaqianaafa kafaa mi anaaseena marasee miqikai inoo sia faiqi maqarai kuqinau.

<sup>22</sup> Kafaa miqooqaraasa mina marasaida kuqi kuqi taikafufanoo doo mi anaaseefa faqa doo kuqinau.

<sup>23</sup> Doo kuqiraua findififandinna aukuaana mi faasaannasaa aiqama dinni taikasee dinni ani qaara marasee mi anaaseena afaammaaka maridaqa yanaindikee iannoo fee qufanoo.

<sup>24</sup> Yisufa maaqi qimasee qimanniminau. Innee firaqoo aqee mariasa inneeqa aqee mariana oosana iridee sia fee iridee. Innee maanara aqee mariafanoo, tamummaqarausa akarakinaa ufa faqa Anutuna afeeka faqa sia irimarianara aqee mariafanoo.

<sup>25</sup> Faiqí anaasee findififandinna aukuanna sia misa faiqí anaasee naanna ramasee nari maree nari maree mandee marifaranoo. Faiqí afaaqa faqa anaasee afaaqa faqa taikaseenoo qangiroora foora mambiqa idaaqiraua marifaranoo.

<sup>26</sup> Kuqiraua findifiranara sia fee innee Mooseena sandufa asaana rumasee iridee. Mooseefa ooqai sipsipasaa rakisi maru aukunnai moo ainaina minaki qafoofanoo ida fannoo sasamimiki qeemarufanoo qafamaseenoo ooruroofanoo Anutufa minaqiari ooqai kuqusara Mooseena qimaminoo qinau.

Qinee Anutusa maridaqa Abarahaamana faqa Isakeena faqa Yakooboona faqa Anutusa maridaqa.

Akarakinaa ufa ooqai kuqufusara miqi qinoo marinara sia fee innee amiqimandee asaana ridee.

<sup>27</sup> Mi ufana oosana maaqimminoo maridanoo Abarahaamafa faqa Isakeena faqa Yakooboona faqa ooqai kuqufusara Anutufa mi ufanannoo misa naunduraindaraanara sia taikee maqi kaqi maridaqa qini faqa mariaafoo qidanoo, qinee misa Anutusa maridee qidanoo. Naqimasee kaaqa taikafuusa misa Anutusa maridee qiannoo fee. Sia amana miqi qiannoo. Kaqi mariasa Anutusa maridee qidanoo. Minara innee Sadikai amaana ufa qimariasa firaqoo uqanna aaqaidaqa kuqimariasara kaaqa taikambiaafoo sia findifidammia maqi qimariafanoo.

*Sanda ufakinaana uriqarara sanda ufa qara kooroo inau.*

*(Mat 22:34-40; Ruk 10:25-28)*

<sup>28</sup> Mooseena sandufa uqannifqee marifa moo fannoo Yisufa Sadikai amaana ufa qimariasa faqa ufaqi marufanoo Mooseena sandufa akoofasa fannoo faasai irinau. Yisufa Sadikai amaana ufa qimarusa nari ufannai misa ufa amiqimasee rafaafusoonara qafamaseenoo oo amiqira fee qimaseenoo nari faqa moo ufa Yisuna qimamianauree qimaseenoo qimaminau. Oo Yisu Mooseena sandufa meomoo kinaana nana sanda ufee uriqaranoo maridanoo fee qufanoo Yisufa qinau.

<sup>29</sup> Maa ufafa aiqamausa urinnaaqararafa maridanoo. Isaraee maqannaasa iriaqa Karaambaiqa maasa Anutufa moodaa Karaambaiqa nariara maridanoo.

<sup>30</sup> Innee faiqí faiqí inneeqa karaambaiqa inneeqa Anutunara inneeqa nimuqusa nimana nitukura irirana afeeka mudukannoo Anutunara nididaqa ruaqa. Mi ufafa uriqararafa maridanoo.

<sup>31</sup> Mina aanaaqianaafa maaqimminoo maridanoo. Anee aneenna aqoonnana aninna afaaqara foora aidindee aidiani. Sia sandufa moo miqanda uriqaranoo maridanoo miqanda kai.

<sup>32</sup> Mi fasiqafa Mooseena sandufa akoofasa fannoo Yisuna mi ufana iriseenoo qinau. Oo ufasaa rakisirafa amiqimandee andeeqasee qiananoo anee qianandee kuqaa karaambaiqa mifa kai Anutufa maridanoo, sia moo Anutufa maridanoo mifa kai maridanoo.

<sup>33</sup> Minara nari amuqusa aiqamannai faqa nari irirana aiqamannai faqa nari afeeka aiqamannai faqa Anutunara aidiani, nari aqoonnana faqa nari afaaqara foora aidindee aidiani. Mi ufa qandannai finanoo uriqararafa mariannoo, tatufira aandau qaindasaa Anutuna suqamirafa faqa oosana oosana ainaina amimariafa faqa oorudupirafa mariannoo.

<sup>34</sup> Yisufa mi fasiqana ufa iriseenoo oo irirana faqaa fasiqa fee qimasee qimaminoo qinau. Anee Anutuna ququsa adeedirana atisaa mariananoo. Miqooqari Yisunara naaquqoo faqa sia moo ufa iraqau.

*Naqimaseenoo fee asauku mundirafa Dafidina amaaku faqa mina karaambaiqa faqa mariannoo fee.*

*(Mat 22:41-46; Ruk 20:41-44)*

<sup>35</sup> Yisufa Yeerusaree fira amaana maqaki faiqí anaasee amaana ufa qimannimidanoo moo ainainara irammirinoo qinau. Mooseena sandufa akoofasauqa asauku mundiranara Dafidina ati maridanoo fee qimariafaqa qinee minara, naqimandee Dafidina ati mariannoo fee qidaqa.

<sup>36</sup> Anutuna naaquqara andeeqara maraquna fannoo Dafidina dadaaqufanoo maaqi qimasee akara rinau.

Firaa karaambaiqa fannoo qini karaambaiqara maaqi qimasee qimaminau. Anee maaqoo qini Anutusa qini daaqa qini qisauku uqannai ooqu marifinaqa ani namuqauqa narueeqee ani aramandunnai quqaanaura.

<sup>37</sup> Dafidifa mi akaranaki asauku mundiranara qini karaambaiqee qinau, naqi fee masee Dafidina karaambaiqa faqa mina ati faqa aiqamaqara moodaa karinoo mariannoo fee. Innee minara irida naqi fee qidee.

*Yisufa sandufa akoofasauqa oosana kooroomandee niqinau.*

*(Mat 23:1-36; Ruk 20:45-47)*

<sup>38</sup> Faiqi anaasee moomoo uqanna aniree اساسانده Yisuna ufa iriqau. Yisufa ufa qimannimidanoo maqi qimasee moo ufa qimanniminau. Innee Mooseena sandufa akoofasauqa misa mandoosana aufariyaqa. Misa kisaqa qamunna afisuseeqa maqusamau fee makeetaki fee nimirifaqa faiqi anaasee amiqimandee nimandaranara randaqa nidaqa kisaqa qamunna afisuqirausa nidaqa.

<sup>39</sup> Misa amaana maqaki keeqafidaqa naadumasaa amiqira siaqasaa oqumari mariasa maridaqa, omaqaki faqa amiqira qoo kai oqumari mariasa maridaqa.

<sup>40</sup> Misa adeedaana anaaseeuqara faiqi siaisa mariafaqee qimasaida misa maqa maqusa saqama noopundu maqa aiqama ummuaramasee umarasee quandakiqa faiqi nifusaa faiqi qiqaqafee qimasee kisaqasaa innaaru qimariasa maridaqa. Mina akiqara misa narirafa naaru fiqaramasee mariannoo.

*Adeedaana anaasee nari kaqikaa munnimma Anutunara quqanau.*

*(Ruk 21:1-4)*

<sup>41-42</sup> Yeerusaree firaa amaana maqakinaa difaani moo marufaqa faiqi anaasee minaki Anutuna amidee qimasaida munnimma minaki aqi mariqau. Yisufa mi difaanina aqa oqumarifi rakisi marufaqa faiqi anaasee minaki munnimma moomoo aqi mariqau. Ainaina faqaasa aniree nari munnimma moomoo minaki aqiqau, miqoo adeedaana anaasee moo ainaina siaifa kudi anaasee fannoo anireenoo nari munnimma qaraqanda idaqa munnimma ataaqana fooqaana mi difaaninaki aqinau. Mi munnimmaqanda fannoo moodaa tooeaa amana kai oodaa uqanna marinau.

<sup>43-44</sup> Yisufa nari faiqi namu naarama moodaaqoo quqasee qimanniminoo qinau. Qinee mi kudi anaaseenara qimannimianaara, mifa aiqamausa urinnaqaramasee munnimma aqinoo. Akaqausa nari moomoo munnimmakinaana ati ati aqia, maa kudi anaaseefa ainaina siaifa marifa nari aiqama munnimma narana aina feffaurianee qi munnimmana faqa aiqama aqinoo. Minara qinee mi anaaseenara firaaqoo aiqamausa naruseenoo aqinoo qidaqa.

## 13

*Yeerusaree amaana maqa rapee ianinnanara qinau.*

*(Mat 24:1-2; Ruk 21:5-6)*

<sup>1</sup> Yisufa amaana maqakiqari rafudamaki fufanoo mina faiqi namuqiari moo fannoo Yisuna qimaminoo qinau. Oo ufasaa rakisirafa maa maqana qafaa, amiqira ooninnai auquqaa maqafa maridanoo.

<sup>2</sup> Yisufa irisee qimaminoo qinau. Innee maa firaa amiqira maqana usakarana qafaidee, kasooqafee aiqama rapeepamma furufaramambuannoo sia moo ooni nari amuaaqa nari amuaaqa maqee marindee inoo mariannoo.

*Yisuna ufa irimarusa nikooqaranara qinau.*

*(Mat 24:3-14; Ruk 21:7-19)*

<sup>3</sup> Yisufa Yeerusaree firaa amaana maqakiqari raudamaki Oorifa aqana amaana maqa adeedi marufanoo miqoo ooru oogu marinau. Ooqu marifufaqa mina faiqi namuqiari Peetooroofa faqa Yameesafa faqa Yoohaneefa faqa Andurufa faqa minamusa qumee kukeeqaku nari maruqoo aniree qimamiqau.

<sup>4-5</sup> Oo Yisu anee amaana maqa rapee ianinnanara anee qiannana yairee fee amaana maqa rapeepaa iannoo fee nana ainaina kambiqaqina qafee fee oo doo mina rapeeia aukuanafa adeedi ree maqi qianauree qufanoo Yisufa minara naamuqira ufa oosana arasee qimanniminau. Innee aufarida mariaqa, sia moo fannoo inni nikaruqiani.

<sup>6</sup> Moomoosa aniree nariara unnaqimasee moo fannoo qinee asaku mundirausee qifanoo moo fannoo anireenoo qinee asaku mundirausee qimasee moomoosa misa nikaruqifaranoo.

<sup>7</sup> Innee rakira daambeenda adeedi iriqa nianai marinara ufa kai iriqa sia munari minari furufari iaqa. Miqira ainaina kuqaa kambiqannoo, kambiqafinaqa sia taikara aukuaana aiqaree maqi qiaqa.

<sup>8</sup> Moo maqannaasa nianaindari aniree moo maqannaasa faqa rakifaranoo, moo karaambaqa fannoo adeediqari ani mara moo karaambaqa aruannoo. Maqa kasirafa aiqamai mariannoo aandaroo faqa mariannoo. Mi ainainausa manda marira aurirana oorisa kai mariannoo anaasee faiqi maqarara innaamunai aupuraandeemmiannoo.

<sup>9</sup> Innee qini ufa irimariasa aufarida mariaqa, faiqi misa poorisa ufa qimannimifaqa inni rumbeeqee kootaki quqefaranoo. Misa inni mareeqee amaana maqaki quqasee



saamusamu narifaranoo. Innee qini amiqira fasaasa ufa qimannimiaqeera qini ufasaara karaambaiaquqa faqa faiqi firaasa rakisirausa faqa nifusaa innee kikiqifaranoo.

<sup>10</sup> Qini amiqira fasaasa ufa aiqama maqannaasaki naaree kooroo inoo marinanoo taikarafa inaaqianna kambiqaanoo.

<sup>11</sup> Misa inni rumbasee mareeqee kootaki quqasainaqa innee sia naqi fee qianau naqi fee qianau naaree qiaqa. Koota kambiqafina Anutufa qimannimu ufana mina kai qimannimiaqa. Ani ookinaa ufa sia anindi mariannoo Anutuna naaquqara maraquana fannoo nari ufa inni niminaqa mina kai qifaranoo.

<sup>12</sup> Faiqi misa nari nikaqaafasaaquqa mareeqee kuqiranaki quqefaranoo. Faiqi misa nari niku nisauku faqa mareeqee kuqiranaki quqefaranoo faiququaindi quandakiqa nari ninausa nikausa mareeqee kuqiranaki quqefaranoo.

<sup>13</sup> Aiqama maqannaasa inniara Yisunaindi fee qimasee fidiqaa mannimaqefaranoo. Innee minaki maridaqa fidaqa qini uaqee ida fifi inafa kuqira fee Yisufa qumira aukuanee paqurinafa asumu marirana maraannoo.

*Yeerusaree maqusai narirafa kambiqaaninnanara qinaw.*

*(Mat 24:15-28; Ruk 21:20-24)*

<sup>14</sup> Kasooqagee innee naaquqara fidiqaaaimari mandainaina qafeefaranoo mifa sia mariaqaa iraqoo Yeerusaree amaana maqaki kikiqinoo marina qafeefaranoo. Innee maa ufana asaana rimariasa mi ufana oosana amiqimandee iriaqa. Mi naaquqara mandainainafa kikiqa mambinaqa innee Yudeeaa maqa maaqaki mariasa quqasee aaqana aaqana sandamafuqa.

<sup>15</sup> Mi kamuqoo faiqi moo fannoo maaqa kooqi oorisa mariinafa mi ainainafa kambiqafinana sia aneenna ainaina maaqaki maraane qia doo miqooqari afiaki sandaa.

<sup>16</sup> Faiqi moo fannoo afuqaki mariinana sia maaqai aniree aneenna qamunna aakuqa maraannee qia doo miqooqari kai quqasee ququsa rakeemandee sandaa.

<sup>17</sup> Mi manda aukuanna nimuaqu uqa faqaa aanaaseeuqa faqa faiqi aanaaqi faqaasa faqa mandaiki marifaranoo sandaranara anuqifaranoo.

<sup>18</sup> Innee maaqi qimasee innaaru qiaqa Oo Anutu sia mi manda aukuanafa suara aukuna kambiqaanii qiaqa sandaranara anuqi foora.

<sup>19</sup> Mi manda aukuanafa anirainafa aiqamausa aupuraranaki firaanaki marifaranoo. Ooqai indaaruu Anutufa aiqama ainaina auqunakiqari kaqiqaa aupurara oosana oosana marinaw, maqee faqa miqikai idanoo kaqiqaa aupurara maridanoo. Kasooqagee firaafa uqanna kambiqaanoo. Mifa taikainna kari sia miqirafa kambiqaanoo.

<sup>20</sup> Mi manda aupurara aukuanna Anutufa qusandaannoo, sia qusarainanoo aiqama kuqu taikkee foora. Anutufa nari rusandeesamumasee maroosara iriseenoo mi aukuanna qusaramannisaannoo.

<sup>21</sup> Mi manda aukuanna faiqi moo fannoo inniara mai qafaqa, asauku mundirafa mai marinoo moo fannoo asauku mundirafa muanni marinoo qinnana sia mi fasiqana ufa iriaqa mina unnaqidanoo.

<sup>22</sup> Unnaqimaria asauku mundirafa faqa unnaqi maria tamummaqara fasiqausa faqa miqira aukuna moomoo kambiqeefaranoo. Misa Anutuna rusandeesamumandee maraqoo fasiqa anaaseesa nikaru qiani qimaseenoo naaquqara ainaina faqa sia faiqi amanaikimari ainaina faqa auqusaifanoo kambiqaanoo. Mi ainainannai nikaruqiani qimasaiifanoo sia amanaikiannoo.

<sup>23</sup> Qinee inniqa qini faiqi namu mi ainainna sia kambiooqoo qimannimiqa minara aularida kai mariaqa.

*Yisufa nari innaarunaindari qumuaninnanara qimanniminaw.*

*(Mat 24:29-31; Ruk 21:25-28)*

<sup>24-25</sup> Mi manda aupurara aukuanafa taikafinoo asukuna fannoo suani aruannoo aiqamai asukuna kai arufuannoo quqoona faqa sia kafa kaaqa qaannoo fasauqa faqa inaarunaindari aiqama kapikeefaranoo. Innaarunai fasau faqa quqoona faqa nimari aanafa dapikammafanoo.

<sup>26</sup> Miqoo qinee faiqi nimaaku asuruki kooroo ianaw, qinee firaa afeeka namufafa firaa arenarana namufafa minaki kooroo ianaw.

<sup>27</sup> Mikari qinee qeeqa qangirooquqa niqiqaanafa misa aiqama maqa maaqa ati atinni oonuree aniree mandeeqa Anutuna rusandeesamumandee maroosa maramaree qinee mariannai nifiqee anifaranoo.

*Nari qummarinnanara saqari ammuni kikiqa usinaw.*

*(Mat 24:32-35; Ruk 21:29-33)*

<sup>28</sup> Yisufa kaqi qimannimidanoo narí faiqi namu qimanniminoo qinau. Innee faafisa fooqaa ira saqari qafamasee mina oosana iriaqa, mi saqarifa ammuni mambinaqa innee minara saika aukuanee qifaranoo.

<sup>29</sup> Innee miqi kai masee mi oosana oosana ainainnara qunafa kambiqainaqa taikara aukuna adeedi afaisaammi maqi qiaqa.

<sup>30</sup> Innee maana faqa irisee sia aunuqaqaa maa ainainnausara aiqama qunafa maa maqee maria fasiqa anaaseesa akaqausa kaqi maria kamuqoo kambiqaanoo.

<sup>31</sup> Innaaruna faqa maqa faqa aiqama fatikamafi aqusaannoo qini dookinaa ufa fannoo kai naaru naaru sia taikaannoo, kaqi mariannoo.

*Narí qummuannannara afu maqaida rakisianee qinau.*

*(Mat 24:36-44)*

<sup>32</sup> Mi taikara aukuanafa anianinnannara sia moo fannoo iridanoo mi faasaannara faqa suani yaqoo kamuqoo marinanoo fee kambiqaanoo fee, innaarunaindaraa qangirooquqa faqa qinee Anutuna amaaku faqa siamma iridaqa qini qikoofa narí kai mina iridanoo. Innee mi faasaannara sia irimariafanoo.

<sup>33</sup> Innee minara aufaridaqa rakisidaqa qafaqa.

<sup>34</sup> Mi faasaanna faiqi moora foora ainaina faqaafara foora mariannoo. Mi fasiqafa narí ainainirana oosana oosana narí ainainira faiqiuqa aadu aadu nisaukuki quqaseenoo eendaki aufarira fasiqa qimaminoo anee aiqama ainainasaa amiqimasee rakisia qinee moosaa fidaqa qimasee finau.

<sup>35</sup> Innee miqikai mandee amiqimandee aufarida mariaqa. Inni uriqararafa kaiqaa anianinnannara sia iri mariafanoo mifa eendaki aniannoo fee eenda amuqusai fee maqee kaari maqarana namufaqee aniraannoo fee suani maqee ururainanoo fee aniraannoo fee.

<sup>36</sup> Mifa tautummamaqasee ainainimarinna kamuqoo faiqaqee innanaki qumurainana mandaikamminnaranoo.

<sup>37</sup> Minara maqee qinee inni qimannimidaqa aiqamausa qimannimidaqa innee aiqamausara aufariaqee qidaqa qinee qumiranara rakisida mariaqa.

## 14

*Yisuna ariraree qimasee tipundaarimaria.*

*(Mat 26:1-5; Ruk 22:1-2; Yoh 11:45-53)*

<sup>1</sup> Yuda maqannaasa firaa qoomaqa suqarara qaaraqanda ainnaaqarara qoomaqa faqa ooruku siai feemu qoomaqa faqa suqarafa adeedi ramafinuu. Qaara faasaana kaqi mariqa qaaramookufanoo qoomaqa suqarafa qusaramafufaqa suqaqau. Mi qoomaqaafa adeedi ramafufaqa aanaiqikirausa uriqarararusa faqa Mooseena sandufa akoofasauqa faqa suqufufaqa maasa naqimasee qumee faiqi anaasee sia irifaqee Yisuna umarasee aruanauree qiqa.

<sup>2</sup> Misa qiqa maasa sia qoomaqaqi Yisuna aruanaura faiqi anaasee aanoo mandee maasa faqa dari foora.

*Afundimaru fadameena Yisuna akiaqa adianau.*

*(Mat 26:6-13; Yoh 12:1-8)*

<sup>3</sup> Yisufa Beetani maqusai Yeerusaree maqusa adeedi marufaqa manda namuana karoora arimaru fasiqana maaqaki marinau. Mi fasiqana auqu Simoona amarafa marinau. Yisufa mina karoora rukasoofanoo amiqimasee marinau. Yisufa mi maqanaki narana nee marufanoo anaasee moo mi maqanaki keeqanau. Mifa amiqira afundi maru fadameenna, moo sanda minauqu narada mina atuka rarakusee fadameenna tatiqoofa afundimaruna firaa munnimma aqimaria fadameenna mi sandana anoona kai kaaqa amiqirafa maruna mina idaaqira ooninnai andina fooqaana auquqoonaki maru fadameenna uqirafa Yisufa maru maqanaki keeqafinoo mi fadameenna taquna oosaa raudaseenoo mi fadameennana Yisuna akiaqa amoondunnaqa adianau.

<sup>4-5</sup> Faiqi anaasee akaqausa miqoo mariusa mi anaaseena qafamasee aanoommasee narí qimami narí qimami qiqa, nanaree maa fadameenna amiqira afundi marinna fifau rairaa inoo fee. Mifa mi fadameenna mareeqee moo fasiqa amiseenofau tiri handareeta munnimma maraseenofau kudi fasiqa anaasee nimini. Miqi qimasee afeekaikamandee mi anaaseena aqiqu.

<sup>6</sup> Yisufa mi ufana iriseenoo qinau, See innee minnisaaqa, nanaree innee fifau mi anaaseena aqidee. Mifa amiqira idaaqira ainaina adia qimaqeenoo.

<sup>7</sup> Kudi fasiqa anaasee naaru naaru inniki moomoo marifaranoo, innee inneeqa kai oonu mafi irisee mi kudi fasiqa anaaseesa dadaaqiaqa, qinee sia kisaqaasaa marianaura.

<sup>8</sup> Maa anaaseefa kaqikaqoo nari amanasaa qini dadaaqinoo. Mifa mi fadameenna qini qikundarana oorisa qini irisaa adiaqimaqeenoo.

<sup>9</sup> Maa ainannara qimannimianaqa iriaqa sia aunuaqa, maa amiqira fasaasa ufana faiqi anaasee aiqama maa maqana afaaqasasa fidaqa qimannimidaqa maa anaaseefa maqee fadameenna qini adia qimaqainara qimannimifaqa sia maa anaaseenara aunifaranoo.

*Yudasifa Yisuna ueeqaaninna munnimmana maranau.*

*(Mat 26:14-16; Ruk 22:3-6)*

<sup>10</sup> Yisuna faiqi namu qisaukuqara taikasee qikunni ooqu qaara marasee faiqi namu misakiqari moo fannoo mina auqu Yudasifa Isakarioota maqusaandaraafa Yisuna maree-gee misa nisaukuki quqararee qimaseenoo raudamaki aanaiqikirausa uriqararausunni qumee kukeeqaki finau.

<sup>11</sup> Misa Yudasina ufa iriseeqa اساسamasee munnimma amiraree qufanoo Yudasifa miqooqari Yisuna ueeqaaninna faasaanara rakisinau.

*Yisufa nari faiqi namukinaana ueeqaaninnanara qumee kai qimannimisee rafaaqafinau.*

*(Mat 26:17-25; Ruk 22:7-14, 21-23; Yoh 13:21-30)*

<sup>12</sup> Yuda maqannaasa ooruku siai feemu qoomaqa aniroofaqa misa ainnaaqarara sip-sipa aanaaqiuqa aruaninna faasaanasaa Yisuna faiqi namu aniree Yisuna irammiriqau, Maasa yamaqanaki yatinai fee ainnaaqarara qoomaqa deedaqianauree qufanoo Yisufa maaqi qimasee naamuaiqinau

<sup>13-14</sup> Innee Yeerusaree maqusai oorureeqa qafaifanoo faiqi moo fannoo qafeeki namari qumbiqasee aku maree finaqa mina faqa qisaukuqara mifa keeqainna maqanaki mina faqa mi maqanaki keeqaaqa. Keeqafiqa mi maqana akoona maaqi qimasee irammiriaqa, Ufasaa rakisirafa aniara maaqi qinoo, moo rumma qinee faqa qeeqa faiqi namu faqa ainnaaqarara qoomaqa naanna rummafa yai fee maridanoo fee qifanoo qinaqamma iriaqa.

<sup>15</sup> Mi fasiqafa firaa rumma maaqa meeraqoo maru rummana firaa rummana narana quqee maru qaindafa faqa ooqumari maru siaqausa faqa deedaqira rumma inni uqannifiqaannoo. Innee minaki aiqama ainaina maasara deedaqamma qimaqaaqa qufaqa miqanda

<sup>16</sup> Yeerusaree maqusai ooruree Yisuna ufa anoona kai kambiqafufaqa mimau kai fiqau.

<sup>17-18</sup> Mi eenonnai Yisufa nari faiqi namu faqa qisaukuqara taikasee qikunni ooqu qaara marasee faiqi namu faqa ooru keeqafi nee mariqau. Nee marufanoo Yisufa maaqi qimasee nari faiqi namu qimanniminau, qinee maa ainannara qimannimianaورانoo, innikiqari moo fannoo qiniara ueeqaaninafa qini faqa naidanoo.

<sup>19</sup> Mina faiqi namu mina irisoofanoo misa naundura furufarufaqa naadu naadu Yisuna irammiri mariqau, moo fannoo qinoo anee qiniaree q inanee qinee fee qifee moo fannoo moo fannoo miqi kai qimariqau.

<sup>20</sup> Yisufa misa irarufa iriseenoo qinau, Innikiqari qisauku taikasee qikunni ooqu qaara mararusakiqari maa qini difaanikinaana asauku aqusee feemu marasee nee marifa mifa kai qiniara ueeqaannoo.

<sup>21</sup> Qinee faiqi nimaaku tumummaqarausa akara ufamau qinee kuqunaaura qini ueeqaaninna fasiqana numoo firaa mariannoo. Mi fasiqafa sia kambiqainanoofau amana marini.

*Yisufa aafaqa neemariana oosana aranau.*

*(Mat 26:26-30; Ruk 22:15-20; 1Kor 11:23-25)*

<sup>22</sup> Misa ooqumarifi nee marufanoo Yisufa nariqa maqee maqee neemaru feemuna moo marasee dufi dufi qimaseenoo ruqi ruqi maseenoo nari faiqi namu niminoo maaqi qimanniminau. Innee maana marasee naaqa, qini qimaqi kikiqusira feemu maridanoo.

<sup>23</sup> Miqi qimaseenoo kaafa moo maqee maqee nee maru uainna nammarina maruna maraseenoo minara Anutunara dufi dufi qimaseenoo nari faiqi namu nimufaqa aiqamausa mina qumaree minakinaana naqau. Yisufa nari faiqi namu mi uainna nammarina nimidanoo maaqi qimasee qimanniminau,

<sup>24</sup> Maafa qini fidika kikiqusira nammarifa moomoosa adia nimaqeeefandinafa maridanoo, qini fidika maafa Anutuna faqa faiqi anaasee faqa moodaanakikira ufa mapukun-nimaqaaninafa maa fidikafa maridanoo.

<sup>25</sup> Qinee qimannimidaqa sia kafa uainna maaqoo maqasaa naanauranoo Anutuna ququsaki innaarunai ooru fidaqa fuka uainna amiqirana naanauranoo.

<sup>26</sup> Miqi qimaseeqa misa moo amaana idi ramaseeqa maaqikiqari raudamaki asukunaki fiqa Oorifa aaqana ameemaanai ooru mariqau.

*Peetooroofa Yisunara sia qafaidee qianinnanara kooroo inau.*

*(Mat 26:31-35; Ruk 22:31-34; Yoh 13:36-38)*

<sup>27</sup> Misa miqoo oonuroofanoo Yisufa qimanniminoo qinau. Tamummaqarawsa akara ufa fannoo maaqi qimasee qiniara qidanoo, Anutufa sipsipa rakisirana arusaifaqa mina sipasipauqaindi miqooqari quqasee daraan- ifaranoo.

(Minara inni qimannimidaqa innee qini quqaqisee aiqama sandamafifaranoo.)

<sup>28</sup> Qinee kuqiranakiqari findifiqa inni noorinni Kariree maqa maaqi fuanauranoo.

<sup>29-30</sup> Peetooroofa Yisuna ufa iriseenoo qinau, Qinee sia uqanna ani minnisaanaura. Aiqamausa ani minnisaifaqa qinee sia minnisaanauree qufanoo Yisufa narí qimaminoo qinau. Oo Peetooroo anee iria, Fafaa eendaki irafana anee qaaramoo kari qiniara siamma iri fee qinnaranoo. Miqi mandainanoo kookooraana qaara kari ufa qianoo.

<sup>31</sup> Peetooroofa mina iriseenoo Yisuna afeekaikamandee qimaminoo qinau, Qinee sia uqanna aniara sia iridee qianaura ani faqa kuqanaura. Miqi qimasooifaqa aiqama Yisuna faiqi namu miqikai qiqau.

*Yisufa narí kuqaninnanara ummaara arufanoo saqamaki innaaru qinau.*

*(Mat 26:36-46; Ruk 22:39-46)*

<sup>32-33</sup> Miqooqari misa Keeseemanee maqa maaqaki Oorifa aaqana ameemaanaí marunaki asukunaki aniroofanoo Yisufa narí faiqi namu qimanniminoo qinau. Innee maaqoo ooqu marifi marifaqa qinee saqamaki oorureeqa innaaru qianauree qimaseenoo minamusara innee kaqi maaqoo marifaqa maa namusa kai qini faqa ooru fuaqa. Miqi qimaseenoo mifa Peetooroona faqa Yameesana faqa Yoohaneena faqa nifiqeenoo saqamai ooru fidanoo narí afaaqasaa quqeeqandinna ainainara irimarufanoo firaqoo amuqumarufanoo aundura fifau fafau ufanoo minamusa qimanniminoo qinau.

<sup>34</sup> Qini qimuqusaki qimuqusirafa firaqoo maridanoo mi qimuqusirafa daruannoo fee qidaqa innee maaqoo maridaqa rakisiaqa.

<sup>35</sup> Miqi qimasee Yisufa kaqikaqoo oonureenoo narí kai maqasaa aqufinoo narí afaaqai anianinna apuraranara sia keeqaanifee qimasee maa innaaruna qinau.

<sup>36</sup> Oo qini qikoofa qini qikoofa, anee aiqama ainaina amanaikimarianafa mariananoo, qinee manda nammari naannanara anee qinisaaqaraana mareeqee kaqinni aqusa. Sia qeeqa didiranara iria, aneenna aidinna ainaina kai qifaqai quqaa.

<sup>37-38</sup> Yisufa miqi qimasee innaaru qimaseenoo kafaanaí aniree narí faiqi namu qaaramoo marunau aniree nindafoofaqa misa nisuku kaqa faiqaqeeiqau. Yisufa Peetooroona moo auqu Simoona auqamasee qimaminau Simoona anee faiqaqee idanee anee sia fee amana qusasaa kai afu tautasee rakisinnaree. Innee aufaridaqa innaaru qida mariaqa innee miqidaqa sia nimaniranaki aqufifaranoo, inni irirafa kai afeeka marifaqa inneeqa uqanna kudoosaapee mariafanoo.

<sup>39-40</sup> Yisufa miqi qimasee qimannimiseenoo kafaa anirandeenoo indaaru gundee kai inoo innaaru qinau. Innaaru qimaseenoo oonu nindafoofaqa mina faiqi namu kafaa nisuku faiqaqeeiqau misa nifu fannoo ummaarareenoo sia findi fuaqaa ufaqa findifi Yisuna kafaa qafamaseeqa nári faiqaranara nisaurusee ufara randaqau.

<sup>41</sup> Yisufa kafaa oonu innaaru qimasee anireenoo narí faiqi namu qimanniminoo qinau. Innee kaqi fee faiqaidee kaqi fee idooaidee. Doo saa doo apurara aukwana doo anireenoo, doo qafaqaqaa manda oosana maree mariasa nisaukuki ueeqaaninna fasiqafa qini mara quqaannoo.

<sup>42</sup> Doo findi fifaqa fua. Doo qafaqaqaa qini ueeqee mari fasiqafa doo anidanoo.

*Misa Yisuna qumaraqau.*

*(Mat 26:47-56; Ruk 22:47-53; Yoh 18:3-12)*

<sup>43</sup> Yisufa kaqi misa faqa ufa qimarufanoo Yisuna faiqi namuqi qari qisaukuqara taikasee qikunni ooqu qaara mararanakiqari mina auqu Yudasifa aniranau. Amaana maqa aanaiqikirausa uriqararawsa faqa Mooseena sandufa akoofasauqa faqa Yuda maqannaasa faiqi firaasa faqa maqusai kaqi maridaqa faiqi moomoo Yudasina faqa niqoofofaqa rakira duru saamu qumareeqa Yudasina faqa asukunaki aniqau.

<sup>44</sup> Faasai Yudasifa qimanniminau, asukunaki innee aaqee foora qinee oonureeqa mi fasiqana amooqaanamma qafaqaqa, mee innee randeemaria fasiqana amooqaanaura. Innee mina rumbamaree amiqimandee rakisisee maree fuaqa.

<sup>45</sup> Yudasifa anireenoo Yisufinnaí oonureenoo oo ufasaa rakisira fee qimasee amooqanau.

<sup>46</sup> Amooqooifaqa mina faqa anusa mina qafamaseeqa qumarasee rumbamaree amiqimasee rakisi qumara maree maree fiqau.

<sup>47</sup> Faiqi moo fannoo miqoo kikiqinoo mariufa mina qafamaseenoo narí rakira paipana qumareenoo nariraree qimaseenoo moo fasiqa aanaiqikirausa uriqararana ainainira faiqi aaqoo ateesa aqusanau. Yisufa qimannimino qinau.

<sup>48</sup> Innee qiniara mandaikamma nimaqee mari fasiqa fee qimasee duru saamu indaaiqa aniree qini qumaraidee.

<sup>49</sup> Faasaambaasaana moomoo kari akooqoo amaana maqaki keeqaidaqa faiqi anaasee ufa qimannimimarunausa maridaqa naqaa innee miqoo qini qumaraaqaana mariaasee. Tamummaqara fasiqauqa akara anoona doo mimau kambiqaaani. Doo qini qumaree fuuqa.

<sup>50</sup> Yisuna faiqi namu mina qafamasee quandaki miqooqari sandama qaraasa mam-biqau.

<sup>51-52</sup> Misa Yisuna mara maree fufannoo moo kumaaraa fannoo qamunna kai narí afaqa ititaseenoo misa ninaaqiana fimarufuqa misa mina qafamasee mina faqa rumbaane qimasee qumararufannoo mi kumaaraafa mafi narí qamunna rakeemma aquseenoo kaqisamu sandamaqaraasamminau.

*Misa Yisuna ufa suqiranaki quqasee iraqau.*

*(Mat 26:57-68; Ruk 22:54-55, 63-71; Yoh 18:13-14,19-24)*

<sup>53</sup> Misa Yisuna mara mareeqa aanaiqikirausa uriqararana maaqaki quqaaqau. Mi maqanaki aanaiqikirausa uriqararafa faqa Mooseena sandufa akoofasauqa faqa Yuda maqannaai faiqi firaasa faqa minaki faasai eendaki suqqa mariqau.

<sup>54</sup> Peetooroofa misa ninaaqiana nianasaa qumee oonureenoo aanaiqikirausa uriqararana maaqa naambeeqai ooru keeqafinoo rakisimaru fasiqausa faqa ida aqa ooqu marifi qaani marinau.

<sup>55</sup> Aanaiqikirausa uriqararafa maaqaki maridaqa Yisuna kuqaruaneera mina um-maarara randoosia sia paquriqau.

(Mooseena sandufa maaqi qimaqoofa, moodaa fasiqa fannoo qinnufafa sia anoon-aikiannoo. Qaara fasiqa fannoo kikiqamafi qinafa mifa anoonaikiannoo. Misa minara iriseeqa faiqi qaaraqanda mi ufana qifaqa Yisuna ariraree qiqau.)

<sup>56</sup> Moomoosa aniree Yisunara unnufa qufannoo sia misa ufa fannoo moodaa karinoo marinau. Misa ufa fannoo naadu naadu qufannoo sia amanaikinoo marinau.

<sup>57-59</sup> Miqoo akaqausa findi fufuqa Yisunara unnufa maaqi qimasee qiqau, mifa maaqi qimasee qifaqa maasa iriqa qinee firaa amaana maqa faiqi usakaqoona aiqama rapeep-amma aquseeqa qaaramoo faasaana aiqarainaga sia faiqi nisaukunnai usakaqairana usakasaanaaree qifaqa iriqa qufuqa misauqa faqa sia amana amana kai mi ufana qiqau.

<sup>60-62</sup> Misa miqi qimasoofoano aanaiqikirausa misa uriqararafa aiqamausa nifusaa findifinoo Yisuna iranau. Misa ufa oosana oosana aniara qiafana ani ufa sia fee maridanoo fee qinaqa iriqa qufannoo Yisufa sia ufa qinau, kaqi kasooinoo marinau, Miqi masoofoano aanaiqikirausa misa uriqararafa qimaminau, anee kuqaa fee Anutuna asaku mundirafa maridane, anee kuqaa Anutuna amaaku amooqimaria fee maridane qufannoo Yisufa qinau eeo qinee mina amaaku marunausa maridaqa, kasooqagee innee qini faiqi nimaaku qifafeefarannoo, qinee uriqararana Anutuna aqa asaku uqannai ooqufaqqee mariana qifafeefarannoo mari inaga kasooqagee innaarunaindari asuru namufuqa qumunaqa mikamuqoo faqa innee qini qifafeefarannoo.

<sup>63-64</sup> Aanaiqikirausa uriqararafa mina iriseenoo aanoommaseenoo narí qamunna parara qima quqaseenoo qinau, maasa fifau faiqi ufara randaidaqa, doo mina manda ufa iriafanoo innee minara naqi fee qidee qufuqa misa aiqama qiqau mifa manda oosana fiqararafa maridanoo nariara Anutuna amaaku fee qidanoo, kuqiranaki kai fuani.

<sup>65</sup> Miqi qimasoofoqa akaqausa Yisuna niqaara fida amaqqaseeqa qamunnannai afu ruumbamaqqaseeqa nisaukusamu oori aruseeqa iraqau, mina yafee ani arinoo fee qinaqa iria. Miqi qimasoofoqa minasaa rakisimaru maara fasiqausa mina mara mareeqa nisaukusamu oori ariqau.

*Peetooroofa Yisuna sia qafaidee qinau.*

*(Mat 26:69-75; Ruk 22:56-62; Yoh 18:15-18, 25-27)*

<sup>66-67</sup> Misa maaqaki Yisuna arira ufa qimarufannoo Peetooroofa maaqa kooqinni sundi-uuqa faqa idaki ooqufaqqee ufanoo aanaiqikirausa uriqararana ainainimaru manaqafa aniree Peetooroona miqoo ida qaani marufannoo qafamaseenoo mi manaqafa mina oori aiqumaseenoo qimaminoo qinau anee Nasareeteendaraafa Yisuna faqa nuanafa mariananoo.

<sup>68</sup> Peetooroofa mina iriseenoo qaoo qinoo qinau, qinee sia minara iridaqa sia anee qiannufana oosana iridaqqee qimaseenoo findufumakufannoo mi maaqana ququsa kooqi marunnai fufannoo kookooraana ufa qinau.

<sup>69-70</sup> Ufa qufanoo mi ainainira manaqafa Peetooroona kafa a ooqu qafamaseenoo miqoo marusa qimanniminu Innee maana qafaaga Yisuna faqa nimarifa maridanoo fee qufanoo Peetooroofa kaifaa qaoo qinau. Kaqikaqoo marikufaqa miqoo mi fasiqausa marusa Peetooroona afeekaikamasee qimamiqa qiqau. Anee Yisuna faiqi namu marianafa mariananoo, anee naqi fee mandee qaoo qidanee, ani ufa fannoo ani kooroomaqaifaqa iridaqa, anee Yisuna maqannaafa Kariree maqanna marianafa mariananoo.

<sup>71-72</sup> Peetooroofa mina irisee nari amana aqigamasee qinau, qinee sia anoona ufa qimamiananoo Anutufa daruani. Qinee anee qiannanara sia uqanna minara iridaqee qufanoo miqi quqoo kai kookooraana kafa ufa qinau. Peetooroofa mina ufa irisoo fanoo aaqoo ruqianau Yisufa maaqi qimaqoo ufanara oonumafi irinau. Fafaa eendaki anee qaaramoo kari qiniara sia fee qinanoo kookooraana qaara kari ufaqiannoo. Peetooroofa mina iriseenoo asauruseenoo ikiraqamaree quqasee finau.

## 15

*Misa Yisuna qumaree munu Piratoona ufaki quqaqau.*  
(Mat 27:1-2, 11-14; Ruk 23:1-5; Yoh 18:28-38)

(Ooqai Mooseena sandufa fannoo sia asukunai ufa oosana oosana qinnufafa sia anoona kambiqaannoo fee qimaqoofa marufaqa misa mina rukiaseeqa asukunai ufa qiqau.)

<sup>1</sup> Iqaqoo kananaana aanaiqikirausa misa uriqararusa faqa Yuda maqannaasa faiqi fraasa faqa Mooseena sandufa akoofasauqa faqa aiqama uriqararusa faqa maasa asukunai qunnufafa sia anoonaikidanoo fee qimaseeqa iqaqoofaqa Yisuna kaqi kaqi ufa suquseeqa nariqa Yisuna arifandinna ufana kaifaa andeeqaseeqa. Misa ufa andeeqaseeqa Yisuna mara maree sainandannai rumbamareeqa afiqa mareeqa Roomma maqanna kiapana Piratoona amiqau.

<sup>2</sup> Amisoo fanoo Piratoofa Yisuna irammirinau. Anee kuqaa fee Yuda maqanna karaambaiqa fee maridanee qufanoo Yisufa qinau anee qianandeemmiqa maridaqa.

<sup>3</sup> Aanaiqikirausa uriqararusa aniree moomoo unnufa Yisunara qimariqau.

<sup>4-5</sup> Piratoofa mina iriseenoo Yisuna kafa irammirinoo qinoo, misa moomoo mandainainara aniara qidaqa, ani ufa sia fee marifanee anee sia fee qinnaree qufanoo Yisufa sia ufa qufanoo Piratoona aaquqanau.

*Misa Yisuna Piratoona kootaki quqaqau.*  
(Mat 27:15-26; Ruk 23:13-25; Yoh 18:39-19:16)

<sup>6-7</sup> Aukuana aukuana aiqama aukuana Piratoofa ainnaaqarara qoomaqa saara moo adiafaaira ainaina Yuda maqannaasa nimianauree qimasee rumbaranakinaana moo iduku niminau. Nari nidimaruna uqanna idukunniminau.

<sup>8</sup> Mi aukuana Yisuna ufa irimaria faasaana faiqi anaasee moomoo Piratoona oopisaki aniree qiqau. Anee ooqai aukuana aukuanasaa faiqi moo idukusee qimariannana maqee maa aukuana faqa moo idukusee qimia. Karafusa marina moo iduku qimianee qimasaida farafara imariqau.

<sup>9</sup> Piratoofa qinau, Amanee qinee Yuda maqanna karaambaiqa Yisuna iduku niminauree qinau.

<sup>10</sup> Piratoofa aanaiqikirausa uriqararusa sia anoona marunara fifau rairai qidaqa Yisuna mareeqee Piratoona amunara irinau. Minara kai Piratoona amanee qinee Yisuna iduku nimianauree qinau.

<sup>11</sup> Aanaiqikirausa minara iriseeqa faiqi anaasee fuki faaki qufaqa misa Barabasinara iduku nimiannee qiqau. Mi aukuana faiqi moo auqu Barabasifa karabusaki marinau. Mifa akaqausa saimbaqa rakiranaki faiqi moo kuqannarusoo faqa karafusaki quqaqau.

<sup>12-15</sup> Misa Barabasinara qufanoo Piratoofa kafa aiqamausa qimanniminoo qinau. Yuda maqannaasa karaambaiqa qimariana minaree naqi fee ianauree qufaqa misa moomoosa kafa faaqa quqasee qimamiqa qiqau, pirimmannai aunirira saqarisaa aru- annee qufanoo Piratoofa misa irammirinoo qinau mifa nana manda oosana maraifaqee aruanauree qufaqa misa firaqoo uqanna faaqa quqasee qiqau, pirimmannai aunirira saqarisaa aruaqee qufanoo Piratoofa faiqi anaasee moomoosa nidirana nimianee qimaseenoo Barabasina iduku nimiseenoo Piratoofa nari maara fasiqauqa nimisee maasa Roomma maqannaasa oosana marasee raitasaa qainna rumbeeqoo samu mina ataufakaqa aru umooqumasee aqigamareeqa muru aun irina saqarisaa pirimmannoo aruaqee qinau.

*Amuka faqaa qafee auqusee afisumaaqau.*  
(Mat 27:27-31; Yoh 19:2-3)

<sup>16-18</sup> Piratoofa miqi qimasoofofaq sUNDIAUQA iriseeqa Yisuna afiqamareeqa koota maqakiqari rafudamakufafa miqoo Piratoona firaa amiqira maqa naambeeqai raitasaa qainna rumbeeqoo samuna Yisuna ataufakaaqa aru umooqukamaseeqa ataasa ataasa naaree qimasee fafaa aunirira saqarisaa aruanaaree qimasee kiapana firaa maqa naambeeqai munusee aiqama sUNDIAUQA naaramasoofofaq anireeqa qamunna moo maara fasiqa misa qamunna taatuqee arirana afisuamaqasee amuka faqaa sanda saatunanda fooqaana mara maree karaambaiqa qafee fee qimasee Yisuna akiaqa aranaiqi afisuamaqasee nisauku niqinaaqa quqasee kiapana amandee mariandee mandee amandamasee qimamiqau, Oo Yuda maqanna karaambaiqa sia dauni kuqinnaranoo kisaaqasaa marinnaranoo.

<sup>19</sup> Miqi qidaqa sasamimi atekarasamu qumaree mina akiaqa rupeemma amidaqa firaqoo ataasa atasidaqa mina fafaaqai niqaara fidiamaqasee mina oorinni niqoori saunarafufafaq ataasa ataasa qimariqau.

<sup>20</sup> Misa ataasa ataasa qirana taikafufafaq misa saasaakoonaa arira qamunna raipaqusee nari qamunna afisuamaqasee aunirira saqarisaa firimmannai arifandinnaqoo afiqee fiqau.

*Misa Yisuna afiqee Koorookata aqaanai fiqau.*

*(Mat 27:32-44; Ruk 23:26-43; Yoh 19:17-27)*

<sup>21</sup> Maqusai ari iseeqa Yisuna doo afiqee fimarufanoo kudoosaapeenoo nari aunirira saqari sia amanaikufafaq maara fasiqauqa faiqi moo nari maqaqindari aniroona aanai paqurimasee mina auqu Simoonaa amarafa. Sia Yisuna faiqi namukinaafau mina amarafa moo fannoo mifa Sireenee maqusaindariafa Areekasandeerana faqa Rufusana faqa nikoofa marinau. SUNDIAUQA minara Yisuna aunirira saqari aku maree fua qimasee arirarufanoo mifa misa faaqaanara rufiasee aku maree finau.

<sup>22</sup> Miqimasee misa Yisuna afiqaa maree fifi ufaqa Koorookata amuaqunamusaa afiqee fiqau. Mi maqa maaqana auqu faiqi nikiqaa amudaani fee qiqau.

<sup>23</sup> Yisuna miqoo munu quqasee uainna nammari marasee moo marasinna minaki quqasee minara naanneera fuki faaki qufanoo qaoo qimasee sia nanau.

(Mi marasinnana nari ufakiqari meerafee qimariqau. Mi marasinnafa namasainafaq sia fafaqa aidafuanifeera amufanoo aidafirana maraane qimaseenoo sia mi marasinna nanau.)

<sup>24</sup> Marasinnara qaoo qimasoofofaq misa mina qumaree aunirira saqarisaa rummaqaqasee pirimmannai aruseeqa uqereeqeeqa rakiqau. Rakiaseeqa mina qamunnaqaa faasai raipaqu quqaqoonaa mara maree kaatara foora sararamandee yafee maraannoo yafee maraannoo qimasaida maraqau.

<sup>25</sup> Suani maqee ururoofafaq naina kirooma aunirira saqarisaa ariqau.

<sup>26</sup> Yisuna arira oosana raufiqira saqarisaa akara rumasee aunirira saqari akiaqai aiqama qafaqgeera atukaraqau. Maaqi masee akara rinau. Maa fasiqafa Yuda maqannaasa karaambaiqa maridanoommi qimasee akarinau.

<sup>27</sup> Maara fasiqauqa karafusakinaana faiqi mandaikamannimaqee maruqanda rumba quqaqoonaa minakiqari mara maree Yisuna aqa minisee nariqa auniriranasaa arusee Yisunaindi qambaanai rakiqasee miqanda aunirirana dinni dinni rakiqau. [<sup>28</sup> Miqimasooфанoo ooqeenaa tamunmaqara fasiqauqa akara anoona kambiqanau, misa qiqau, misa mina mareeqee manda oosana maree mariasaki quqefaranoo.]

<sup>29</sup> Yisufa aunirira saqarisaa dirinoo marufafaq faiqi anaasee moomoosa figaree aiqaree idaqa qufoonaridaqa ataasa ataasa qimasee manda ufa qida qiqau, anee maasa firaa amaana maqa rapeemasee qaaramoo faasaana kafa usakeennaree.

<sup>30-31</sup> Amana maqee aneenna kai tatuakinana maqasaa aqufinana asumu maria qimaru faqa aanaiqikirausa uriqararasa faqa Mooseena sandufa akoofasauqa faqa ataasa ataasa qidaqa nari qimami nari qimami qiqau, Mifa moomoosa asumu marirana nimirarimarifa nariara sia asumu mariannoo.

<sup>32</sup> Doo maqee Anutuna asauku mundirafa maasa Isaraee maqannaasa karaambaiqa auniriranasaaqari tatuuki aqufinaqa maasa irirana minasaa rusisee kuqaa Anutuna amaaku fee qianaara. Manda fasiqaqara dinni dinni nari saqarisaa aruaqanda miqanda faqa Yisunara ataasa ataasa qimariqau.

*Yisufa kuqinau.*

*(Mat 27:45-56; Ruk 23:44-49; Yoh 19:28-30)*

<sup>33</sup> Suani qambaana akiaqa amummaqa ururoofanoo mi maqa maaqana aiqamai asukuna rafaafinau. Suani afu safasasaa mundufanoo asukuna taikafufanoo kafa suani qanau.

<sup>34-36</sup> Asukuna taikararimarufanoo Yisufa faaqa rumasee Eeburu ufakiqari qinau Eeri Eeri rama sabakatani maasa ufakiqari qini Anutu qini Anutu, naqaa fee ifanee qini minni qiseenee qimasoofaqa akaqa fasiqa anaasee miqoo marusa mandirira iriseeqa qiqau, Doo iriaqa mifa Eeriana aaraidaqinoo qufanoo faiqi moo fannoo Yisuna aunirira saqari atukaki sandee oonureenoo paadura au fooqaana maraseenoo maara fasiqauqa nari maqee maqee neemaru uainna nammari naki raaramaseenoo aika maraseenoo minasaa rutaquseenoo Yisuna nammari naanifee qimasee uqeereeqe Yisuna afaurusaa quqasoofanoo qumbifiqamma namasooofanoo amu fasiqafa qinau, Doo maasa rakisia, Eeriaafa anireenoo aunirira saqarisaaqaraana tatuannoo fee sia fee tatuannoo.

<sup>37</sup> Yisufa mi nammari qumbifiqamma namaseenoo firaa kari faaqa rumaseenoo doo kuquaraasinu.

<sup>38</sup> Kuqufanoo aqee kai Yeerusaree firaa amaana maqakinaa qamunna dirirafa ammuqundari qambaana kai raquumaree muqufi aqusanau. Mi qamunnafa naaquqara maqasaa ititara qamunna marinau. Minaki faiqi sia keeqeemaria maqa marinau. Aukuana aukuaana Anutuna aanaiqikirausa uriqararafa kai minaki sipsipa anaqa fidika mara maree mi maqanaki raaraa imarinau. Doo maqee qamunna anaqinoo marifaqa faiqi anaasee Anutuna aqa fimaria aana ititee marifa doo maqee atuanoo maridanoo.

<sup>39</sup> Maara fasiqauqa uriqararafa aunirira saqarisaa rakisimarufa Yisufa faaqaruna faqa kuquna faqa qafamaseenoo aaquqoofanoo qinau, kuqaa maa fasiqafa Anutuna amaaku maridanoo.

<sup>40</sup> Yisufa aunirira saqarisaa marufaqa anaasee akaqausa miqoo maridaqa nianasaa maridaqa rakisi mariqau. Misakiqari Saroomeefa faqa Mariana amarafa Makadara maqusaindari anufa faqa, Mariana moo amarana faqa mifa kumaaraa Yameesa Yoosesa ninoofa marufa marinau.

<sup>41</sup> Mi anaaseenamusa Kariree maqusaindari Yisuna dadaaqimarusa mina faqa afaqaaqaa anusa mariqau. Sia misa kai, moomoo aanaaseeuqa faqa Yisuna faqa Yeerusaree maqusai aniroosa ani marida aunirira saqarisaa rakisi mariqau.

*Yisuna ooni aamarai akundaqau.*

*(Mat 27:57-61; Ruk 23:50-56; Yoh 19:38-42)*

(Yisuna aukuaana nari maqannaasa maaqimmasee madika indufusaida kuqufusa nikundee mariqau. Misa ooni firana kasaqa aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Yisufa kuqufanoo suani dupufanoo Arimatea maqusaindaraafa mina auqu Yooseefaana amarafa aniranau.

<sup>43-45</sup> Mi fasiqafa Yuda maqanna ufa suqiranaki keeqeemarufa marinau, aiqamausa minara kaaqa andeeqara fasiqa fee qimarufa marinau, maqee maqee Anutuna ququsa innaarunaindari maqasaa kambiqaaninnanara rakisi marufa marinau. Yisufa kuqu faasaana sabata deedaqira faasaanee qimarunasaa Yooseefaafa Yisuna iri duna sabata faasaana aunirira saqarisaa kaqi dirinoo mariandoo qimaseenoo anireenoo paasosamasee Piratoona maaqaki kaqi keeqa finoo Yisuna iriara qufanoo Piratoofa Yisufa dauni kuqunara tautumasee maara fasiqauqa misa uriqararana aaramaseenoo iranau. Yisufa kisaqasaa fee kuqinoo fee qimaseenoo mi sundiana ufa iriseenoo Yooseefaana doo maraannee qufanoo

<sup>46</sup> Yooseefaafa raudamaki qamunna firana moo feefaurumamaree oonuree Yisuna iri saqarisaaqaraana tatu quqaseenoo qamunnasaa kukuqa mandee aku mareenoo ooni aamara auquqoo madikanaki Yisuna iri quqaseenoo ooni firana quanda quandammeeqeenoo ooni aamarasaa ititanau.

<sup>47</sup> Mariana amarafa Makadara maqusaindaraa anaaseefa faqa Mariana moo amarafa faqa Yoosesana anoofa miqoo rakisida iri quqaranara qafee mariqau.

## 16

*Anaaseeuqa madikaki oonu qafaqau.*

*(Mat 28:1-8; Ruk 24:1-12; Yoh 20:1-10)*

<sup>1</sup> Yisuna iri kaqi ooni aamaraki marufaqa Mariana amarafa Makadara maqusaindaraafa faqa Mariana moo amarafa Yameesana anoofa faqa moo anaasee Saroomeesa faqa Sabata faasaana aiqaroofaqa kuqimariasa akunnimaqee maria marasinna feefaurumamaree Yisuna irisaa akuanee qimasee mi eendanaki deedaqiau.



<sup>2</sup> Kanaanana iqaqoofanoo suani maqee ururoofaqa mi anaaseesa Yisuna akundoo ooni aamaranaki fiqau.

<sup>3-4</sup> Aanai fidaqa misa narí qimami narí qimami qiqau, firaa oonitia fannoo ooni aamara ititanoo marifaqa yafee dadaaqinaqee umbaqi quqasee fee marasinna aku amaqqeefaree qimasee oonu qafoofanoo ooni faasai quanda quandammeeqee mafi aquqoofanoo marinau.

<sup>5</sup> Misa ooni qafamasee ooni aamaraki keeqafi qafoofanoo asauku uqannai kumaaraa moo fannoo qamunna eekara arirana afisusee ooqu marifufaqa qafamasee tautumasee kaaqa rufiaqau.

<sup>6-7</sup> Tautumasee rufioofanoo mi kumaaraafa qimannimino qinau sia tautumasee rufiaaqa. Innee Yisu Nasareetee maqusaindariana aunirira saqarisaa pirimmannai aruanara randee mariafanoo, mifa sia maaqoo maridanoo findi finoo maridanoo. Doo qaafaqa, maaqoo misa mina iri quqeeaa. Doo fuaqa maa ufana narí faiqi namufaqa Peetooroona faqa qimannimiqa. Yisufa inni noorinni Kariree maqa maaqai finoo, innee miqoo oonureeqa narí qundee kai iqa mina qafeefaranoo.

<sup>8</sup> Mi anaaseeuqa mina iriseeqa ooni aamarakiqari rafudamakufaqa sandamaqaraasammiiqau. Kaaqa rufiarana faqa naindiri roofaqa sandaqau. Misa maqusai oonureeqa kaaqa rufiasee sia moosa qimannimiqa.

<sup>9</sup> Yuda maqannaasa Saririqara amaanasaa fee qimasee amaanasaa indaaruaa faasaanee qimariqau. Mi indaaruaa faasaana sandoo anaasee namusa anu faasaanasaa Mariafa Makadara maqusaindariana naaree Yisufa findifuna qafanau. Ooqai Yisufa kaqi maru kamuqoo faafasaaga narí anoona amarana mi Mariana aunduraki faafasaaga qisauku dinni taikasee dinni ani qaara marasee marufanoo Yisufa kaqi maruqoo mina aunduraindaraa faafasaaga niqiqoofaqa rafudamaki sandamafiqau. Yisufa mi anaaseena afusaa narí kuqiranakiqari findifuna indaaruu kooroo inau.

<sup>10</sup> Yisufa mi anaaseena afusaa kooroomambunara Yisuna aiku asauku oonu maaqi qimasee qimanniminau,

<sup>11</sup> Yisufa kuqiranakiqari findifinoo marifaqa qinee qafeeqee qufaqa misa kaqi minara soofaaridaqa ikiraqee maruqoo marufaqa mi anaaseenara unna qiifoo qiqau.

*Yisufa kuqiranakiqari findifinoo narí faiqi namukiqari qaaraqanda kooroo inau.*  
(Ruk 24:13-35)

<sup>12-13</sup> Yisufa kafaa moo oosana maraseenoo narí faiqi namukina qaaraqanda nifusaa kooroo inau. Miqanda Yeerusaree maqusaindari moo maqusa kaqikaa maqusai fimarufanoo Yisufa aanai nifusaa kooroomambufaqa miqanda oonurandee aniree Yisuna aiku asauku qimannimufaqa unna fee qiqau.

*Yisufa narí faiqinamuki kooroo inau.*

(Mat 28:16-20; Ruk 24:36-49; Yoh 20:19-23; NiFa 1:6-8)

<sup>14</sup> Yisufa mina inaaqiana narí faiqi namu qisaukuqara taikasee qikunni ooqu moodaa mararausa narana nee marufanoo kooroo inau. Kooroomafinoo misa mina qafee marusa unna fee qunara niqinoo qinau, inni irirafa ufa rukiee marisa mariafanoo sia qiqafee mariasa ufara innee irimariafanoo.

<sup>15</sup> Yisufa miqi qimasee qimannimiseenoo kafaa maaqi qimasee qimanniminau. Innee maa maqa maaqana afaaqasaa aiqama maqanna iannai uqanna oonureeqa qini amiqira fasaasa ufa qimannimiqa

<sup>16</sup> Qinisaa irirana rusimariasa irirana rusidaqa nammari maree mariasa misa innaarunai naaru marira asumu mareefaranoo. Qinisaa sia irirana rusimariasa misa nariranaki fifaranoo.

<sup>17</sup> Qinisaa irirana rusimariasa maa afeeka ainainna misaki marinaqa qafeefaranoo, misa faiqi naundurakinaa faafasaaga qini duqusaa niqqeefaranoo misa moo maqannaasa ufa sia narí iri marianakiqari qifaranoo.

<sup>18</sup> Faiqi kuqannarimari sakanifa ukaqanimisainaqa sia mandaikifaranoo. Misa ufaqaq namasee sia kuqifaranoo. Misa narí nisauku aurimariasasaa rusisaifaqa findi fifaranoo.

*Yisufa innaarunai ooru fu ufafa.*

(Ruk 24:50-53; NiFa 1:9-11)

<sup>19</sup> Yisufa narí faiqi namu faqa ufa qiqisoofanoo Anutufa mina uqereeqeenoo innaarunai narí aaga asauku uqannai quqasoofanoo miqoo ooqu marinau.

<sup>20</sup> Yisufa innaarunai ooru fufaqa mina faiqi namu aiqamai fifainidaqa Yisuna amiqira fasaasa ufa qimannimiqa niqau. Misa miqi marufanoo Karaambaiqa qumee dadaaqufanoo faiqi anaasee misa ufara kuqaa fee qiaqeera faiqi sia auqaaqaa ira afeeka nimufaqa auqoofanoo anoona kambiqee marinau.

## **RUKA**

### **Yisuna amiqira fasaasa ufa Rukaafa akara rinau.**

*Rukaafa akara oosana aranau.*

<sup>1-2</sup> Oo maa fasiqa Tioofirusa maasaki Yisunasaaqari kambiqoo ainainara moomoo fasiqauqa amanamasee akara riqau, Yisufa kambiqooqooqari minara qimannimimarusa misa qimannimufaqa akara riqau.

<sup>3</sup> Oo Tioofirusa qinee Rukaasa Yisufa kambiqooqooqari mifa niniunara randoorandaa-masee amiqimasee iriseeqa qinee faqa padimasee akara ruanauree qimaseeqa akara rummamaqaidaqa.

<sup>4</sup> Anee kuqaa anoona ufa tia irianneera akara rumamaqaidaqa.

*Yoothane nammari nimi maruna maqaaninna ufafa.*

<sup>5</sup> Mi ufana oosana maaqimminoo marinau, Eeroodeefa Yudeeaa maqa maaqaki karaambaiga maru kamuqoo Yisufa kambiqanau, mi aukuanna Yeerusaree amaana maqasaa rakisirafa moo mina auqu Seekariafa marinau. Amaana maqasaa rakisi marusa faiqi oosana oosanakiqari mariqau, nuqufaqaasa mariqau, Seekariafa Abiaana oosanakiqari marinau. Mina anaqa Aarona akeeku akaaku mina auqu Eerisabeeta nammarifa marinau.

<sup>6</sup> Mi qafaqiganda Seekariafa Eerisabeetasa andeeqasee Anutuna ufamau fimaruqanda mariqau. Aiqama karaambaiga Anutuna aaquqira ufa faqa naamuaqira ufa faqa mi mau fimaruqanda mariqau.

<sup>7</sup> Eerisabeeta nammarifa aafanaasee marunara miqanda asooqaqeeqa faiqi siaiqanda mariqau.

<sup>8</sup> Moo kari nari saika faasaana Seekariafa Yeerusaree amaana maqaki keeqafinoo nari amaana maqasaa rakisira saika Anutuna afusaa mina saika qimari fee qimarufanoo maree marinau. Amaana maqasaa rakisi marusa misakiqari yafee amiqira unda imari nammarina amaana maqaki suqemaria qaindanasaa suqaannoo fee qimasee masisa rutukiara foorammasee Seekariana uqannifiqasoofanoo findifinoo mi amiqira undana imaru nammarinaki ida qumbiaramasoofanoo qeemarufaqa mikari faiqi anaasee moomoo amaana maqa naambeeqai maqusai suqufufaqa innaaru qimariqau. Amiqira unda imari nammarina qumbiaramasoofanoo qaidanoo mina muna fannoo faiqi anaasee innaaru qimariafa mi ida munnara foora ooru fidanoo Anutuna aiki ambuidanoo misa innaaru koorooidanoo.

<sup>9-11</sup> Seekariafa mi nammarinaki ida qumbi marufaqa faiqi anaasee madaana innaaru qimarufanoo Seekariafa nariara amaana maqaki marifanoo mi nammarifa qeemaru qaindana aaqa Karaambaiga Anutuna qangiroo moo fannoo miqoo kai kambiqafufanoo Seekariafa miqoo marufanoo qafanau.

<sup>12-13</sup> Seekariafa mina qafeenoo tautinoo rufianau. Tataqanoo marufanoo mi qangiroofa Seekariana qimaminoo qinuu. Seekariafa sia rufiaa, Anutufa ani innaaru qirana irinoo ani anaqa Eerisabeetana dadaaqinanoo ani amaaku maqaannoo, Maqasainana anee mina auqu Yoothaneene qia.

<sup>14</sup> Mi faiqina maqasainaga ani faqa moomoosa asasifaranoo.

<sup>15</sup> Anutufa minara amiqira fasiqa auqufaqa fee qiannoo, uainna nammari fee afeeka nammari fee sia naannoo mina maqainnaqooqari Anutuna naaquqara maraquna fannoo aakufi mariannoo.

<sup>16</sup> Mifa Isaraee maqannaa moomoosa Anutuna ufa minnisee kaqirunna fimariasa kafiaa naarameeqee nariqa karaambaiga Anutuna aramandunnai quqaannoo.

<sup>17</sup> Mifa Anutuna ufa marasee qimannimimarifa mifa maqasaa fasiqa uriqararafa afeeka Anutuna tamummaqara fasiqa oqai maruna Eeriaana fooqaafa afeeka mariannoo. Mifa faiqi nikausamara faiqi minnisee furufari mariasa quandakina nari faiqi namuara nimuqusinaga moodaanaki kifarannoo. Ufa rukiee mariasa faqa mareeqeenoo andeeqee mariasa mariranaki quqaannoo. Miqi marifanoo mi fasiqafa faiqi anaasee mareeqee karaambaiga qumiranaki amanakianno.

<sup>18</sup> Mi qangiroofa miqi qufanoo Seekariana aaquqoofofanoo mi qangiroona qimaminoo qinuu, naqimasee mi ainainafa kambiqanoo fee, Sia amana, qinee nauraiqi maridaqa, qini qinaqa faqa asooqa maridanoo.

<sup>19</sup> Mi qangiroofa mina ufa iriseenoo quandafi qimaminoo qinuu, Qinee Kabarieerasa maridaqa Anutuna afusaa kiki iqa marunau maridaqa. Mifa kai qini diqaiqafa maa

amiqira ufana ani faiqí asumu faiqi aanaaqi maqemaria faasaana kambiqaanoo fee qunana sia iriananoo.

<sup>20</sup> Anee qini ufa sia iriannana akiaqara ani ufa akia finana mariinana maa qimamunna ainainafa kooroomafinanoo ani ufa rakeeiannoo.

<sup>21</sup> Seekariafa faqa qangiroo faqa Yeerusaree amaana maqaki mi ufana narí qimami narí qimamidaqa marufaqa faiqí anaasee maqusai Seekarianara kisaaqasaa afeesida marusia qiqau nanaree kisaaqasaa amaana maaqaki maridanoo fee qimarufanoo Seekariafa amaana maqakiqari raudeenoo qimannimirara oo raqoofanoo sia amanufanoo asaukunoo qimanniminau.

<sup>22</sup> Faiqí anaasee mina ufa akiafuna qafamasee oo amaana maqaki Anutuna kooroo irana moo qafeenoo fee qiqau.

<sup>23</sup> Miqooqari Seekariafa amaana maqaki ainainirana taikasoofofanoo moo fannoo mina amaaqaki aniroofanoo Seekariafa doo amaaqa finau.

<sup>24</sup> Miqoo marufanoo mina anaafaq Eerisabeeta nammarifa amuaqu uqaikufanoo moodaannai qisauku quqoonasaa maaqaki kai marinau.

<sup>25</sup> Eerisabeeta nammarifa qinau, doo maqee Anutufa faiqí anaasee nifusaa qinee kisaaqasaa marunna sia faiqi maqaunna qisaurirana taikaqiseenoo.

*Kabarieerafa Yisuna maqaaninnanara kooroo inau.*

<sup>26</sup> Eerisabeeta nammarifa amuaqu uqaikinoo marufanoo dinni taikasee dinni ani moodaa quqoona aiqaroorofanoo Anutufa narí qangiroo moo auqu Kabarieerana aqigoofanoo Kariree maqa maaqaki kaqikaa maqusa Nasareete maqusai oofufinau.

<sup>27</sup> Mifa maanaaqa uqanna ufa qimamiraree qimaseenoo oofufinau. Mi manaaqana auqu Mariafa. Yooseefaafa karaambaiga Dafidina ati maraanifeera utaaqama amaaqoofanoo maru maanaqana Mariana qimamiraree qimasee oofufinau.

<sup>28</sup> Mi qangiroofa Mariafa maruqoo anireenoo amandeenoo qinau. Asoarafa aniki mariani, karaambaiga ani faqa kukeeqanoo maridanoo dadaaqidanoo doo firaqoo ani amiqi amiqinoo.

<sup>29</sup> Mariafa mina ufa iriseenoo tautinoo mina ufa anoonara firaqoo randanau.

<sup>30</sup> Miqufanoo qangiroo fannoo qimaminoo qinau, Oo Maria sia rufiaa doo Anutufa narí afaarirana anisaa quqeenoo.

<sup>31</sup> Anee amuaqu uqaikinana akoonaiqi maqaseenana mina auqu Yisunee qinnaranoo.

<sup>32-33</sup> Mifa uriqararafaikinaga misa minara firaqoo uriqarara Anutuna amaaku fee qifaranoo. Karaambaiga Anutufa Yisuna mareeqeenoo mina akeeku akaaku Dafidina aanna ramasee uriqarara karaambaigaikiannoo. Yakooboona atiuqa Isaraee maqanaaasa naaru naaru misa karaambaigaikiannoo, naaru naaru sia taikaannoo miqinoo mariannoo.

<sup>34</sup> Mariafa mi qangiroona ufa iriseenoo qinau, Qinee maanaaqa uqanna maridaqa naqimasee anee qianandee faiqi maqaanauree.

<sup>35</sup> Qangiroo fannoo iriseenoo qimaminoo qinau, Anutuna naaquqara andeeqara maraquna fannoo ani aakufinanoo Anutuna afeeka anisaa mariannoo, minara misa mi naaquqara faiqi anaqinara Anutuna amaaku fee qifaranoo.

<sup>36-37</sup> Maria aneenna ati Eerisabeetanara iria asooqa faiqi maqarana sia amana marifa doo maqee dinni taikasee dinni ani moodaa quqoona aundurai amuaqu uqaikinoo maridanoo, minara ririmma miqinoo Anutufa sia moodaa ainaina sia amanaikiannoo doo aniara faqa qunnana amanaikiannoo.

<sup>38</sup> Mariafa qangiroo ufa iriseenoo qimaminoo qinau. Qinee Anutuna ufamau firarunna maridaqa anee qianna ainainafa amana qiniki kambiqaanoo, miqi qufanoo qangiroo fannoo quqasee finau.

*Mariafa Eerisabeeta nammarifa marunnai fu ufafa.*

<sup>39</sup> Mariafa miqoo kaqikaqoo marinoo unnaaqa mammareenoo Nasareete maqusaindari Yudeeaa maqamaaqai Seekariana maqusai kisaaqasaa faiqanoo fiufufanoo oorureenoo

<sup>40</sup> Seekariana maaqaki keeqafinoo Eerisabeeta nammarina amandanau.

<sup>41</sup> Eerisabeeta nammarifa Mariana amandarana irufanoo mina aranandakinaa faiqi fannoo kasinau. Kasufanoo Anutuna naaquqara maraquna fannoo Eerisabeetana aakufufanoo narí Mariana amuaqu uqaikianinnanara sia irufanoo maraquna fannoo mina qimamufanoo firaqoo Mariana qimaminoo qinau.

<sup>42</sup> Aiqama aanaaseekina Anutuna firaqoo amiqi amiqi ianinafa mariananoo, anee maqenna faiqi anaqina Anutufa amiqi amiqi ianinafa mariannoo.

<sup>43</sup> Oo qini karaambaiga anoofa uriqararafa nanaree anee qini qiqafarara aninane qinee oodupirausa maridaqa.

<sup>44</sup> Anee qini qimandaanoo qini faiqi qiranandakiqari asasinoo kooripoo inoo.

<sup>45</sup> Karaambaigari ani qimamu ufana irisee kuqaa fee qimasee iriannana akiqara mifa ani amiqi amiqiannoo.

*Mariana asasira ufa.*

<sup>46-47</sup> Mariafa mi ufana iriseenoo asasammaseenoo qinau,

Qini qimuqusa karaambaigari amooqidanoo,

qini daunduraindari Anutunara asidanoo innaarunai asumu marirana qimimari-fammi.

<sup>48-49</sup> Qinee oorudupimasee mina ufa irimarunaua marunanoo kaqi qiniara irinoo,

firaa afeeka faqaa Anutufa firaa ainaina qiniki qinara,

maaqqooqari aiqama maqasaa fasiqa anaasee qiniara amiqi amiqi qifaranoo.

Mifa naaquqara andeqara auqu faqaafa maridanoo, mina ufara ruftee mariasa nifaurana nimidanoo.

<sup>50</sup> Maqee mariasa faqa miqoo kambiqainaua faqa naaru kambiqainaua faqa nifaurana nimianoo.

<sup>51</sup> Nari amudaanaiqimari asaukuna uqeeraseenoo aanoo

imaria fasiqa anaaseesa nari firannaira irimariasa raurukamasanau.

<sup>52</sup> Mifa uriqaree maria karaambaigari qumara muqufi quqaseenoo ureeqaraua qumaree uqeeranau.

<sup>53</sup> Mifa naararee mariasa amiqira narana ainaina nimuaqu mannimaqaseenoo moomoo narana faqaasa kaqisamu fuaqera niqiqanau.

<sup>54</sup> Mifa maasa Isaraee maqannaa nikeeku nikaaku ufa qimannimuna anoonaikamma nimaqanau,

Mifa nari ainainira faiqi Isaraee maqannaasa dadaaqinau.

<sup>55</sup> Abarahaamanara faqa iriseenoo amuqusufanoo dadaaqinoo mina aiku asauku faqa naaru naaru dadaaqianoo.

<sup>56</sup> Mariafa mi ufana qimaseenoo qima taikaseenoo qaarammoo quqoona miqoo Eerisabeeta nammarina faqa marinoo quqasee nari maqusai Nasareeteenni finau.

*Nammari nimimaru Yoohaneena maqoo ufafa.*

<sup>57</sup> Mariafa nari maqusai fufanoo Eerisabeeta nammarifa marikinoo innaamunai oonureenoo akoonaiqi maqanau.

<sup>58</sup> Maqasoofanoo mina maqusanaasa faqa mina ainaina faqa iriseeqa oo Anutufa maa asooqana amiqi amiqi inoo fee qimasee mina faqa asasiqau.

<sup>59</sup> Maqasoofanoo mi faiqifa moodaa amaana marasoofaqa misa anireeqa Yuda maqannaasa oosana mareeqa nari fainanduidaqi nipata aukuannee qimasee mi faiqi anaqina apata aukusee nari akoonaa amaranaikiraree qimasee aniusufiqau.

<sup>60</sup> Miqi qufanoo mina anoofa Eerisabeeta nammarifa qinau, sia nari akoonaa amaraaikiaqa mina auqu Yoohaneefa mariannoo.

<sup>61-63</sup> Misa iriseeqa qiqau, Oo ani atiuqaki sia mi nuqufa maridanoo, naqimasee fee mina auqu raanauree qimaseeqa faiqi aanaaqi akoonaa Seekariana ufa akirana nisaukunoo iramirufanoo Seekariafa papiqa faqa kirifi faqa asaukunoo qimiaqee qufaqa amufanoo maa faiqina auqu Yoohaneefa mariannoo fee qimasee akara rinau. Akara rumasoofaqa aiqamausa qafamasee tautiqau.

<sup>64-65</sup> Miqimaseenoo Seekariana ufa akirafa rakeeinau. Rakeemafufanoo Anutuna amooqira ufa aiqamausa nifusaa qimarufaqa aiqamausa qafamasee rufieeqa niqoonausa qimannimufanoo miqqooqari aiqamai Yudeeaa aqana maqa maaqaki daraaninuu.

<sup>66</sup> Aiqama mi ufana irusa mi faiqi anaqinara innooqafinoo nana firaa saikey maraanno fee qimasee randaqau, karaambaigari afeeka minaki akooqoo marifaqa qafaidaga.

*Seekariana maraquna aakufufanoo ufa qimanniminuu.*

<sup>67</sup> Seekariana ufa rakeemafufanoo Anutuna naaquqara maraquna fannoo mina aakufufanoo tamummaqaseenoo ufa qinuu.

<sup>68</sup> Isaraee maqannaa Anutufa anireenoo nari faiqi anaasee idukunnisainara minara karaambaigari dufi dufi qianaua.

<sup>69</sup> Mifa amudaana qimasee asumu maraaninnana nari ainainira faiqi Dafidina atikiqari uqereeqeenoo.

<sup>70</sup> Minara ooqai nari naaquqara tamummaqara fasiqauqannai maasa maa ainainnara qimanniminuu.

<sup>71</sup> Mifa maasa namuqaasaa ititannimaqasee aiqama maasara fidiqaa imariasa afeeka rafaqqa fuannoo.

72-75 Mifa narí qimaqoo ufanara irianauree qeeqa naaquqara moodaanaki kira ufa iriseeqa mimau dadaaqianauree qinau.

Mifa oori runusee Abarahaamana qimaminau, minaki mifa maasa namuqaa nisaukukinaana mareeqee paasoosiranaki quqaqisainaqa maasa kaqi marianna kamuqoo mina naaquqara andeeqara fasiqa anaasee mariannanara qimaminau.

76 Oo qini faiqi aanaaqi misa aniara firaa uriqarara Anutuna tamummaqara fasiqa fee qifaranoo.

Anee karaambaiqa afunni fidana mina aana afisinnaranoo.

77-79 Anutufa maasara amugusi marifa nifau ee marifa maridanoo maasa innaarunai marira asumu mararafa doo suani qamannimaqeenooa foora inoo maridanoo innaarunaindari maasa kuqiranakiqara foora asukunaki

mariasasaa qaannoo maasa asoora aatata niku raannanara qaannoo.

Qini faiqi minara anee karaambaiqa faiqi anaasee qimannimia, nariqa mandainaina ikairi karaambaiqinnai maree aniraifanoo mininnisaannoo, minannai Anutufa innaarunai asumu marirana nimiannoo, Seekariafa doo mi tamummaqara ufana taikanau.

80 Seekariasa Eerisabeeta nammarisa faiqi aanaaqi fannoo innooqeenoo uriqarara maraquna faqaafa findifinau, Isaraee maqanna nifusaa kikiqiranara deedaqidanoo kumaaraasaa kaasau maqa maaqaki kai marinau.

## 2

*Yisufa kambiqoo ufafa.*  
(Mat 1:18-25)

(Mi aukuanna Roomma maqannaasa aiqama aanaamuru rafaqaqfusee misa kai maaqanna maaqanna kaqikaa kiapausaikammafi rakisi nimaqee mariqau, aiqama kaqikaa kiapausa uriqarara kiapafa Roomma maqusai maridanoo miqooqari mifa aiqamai rakisi nimaqee marinau.)

<sup>1</sup> Mi aukuanna mi uriqarara kiapana auqu Aukustusafa marufaqa mina asauku ameemaanai aiqama aanaamuru mariqau, Aukustusafa narí asauku ameemaanai marusara nariqa nikeeku nikaaku maqusaki suqufiqa Roomma maqanna kiapana papiqaki nuqu akararuane qufaqa miqimmiqau.

<sup>2</sup> Roomma maqannaasa indaaru nuqu maroo kari Kiriniusafa Siria maqa maaqaki kaqikaa kiapafa marinau.

<sup>3</sup> Aiqama maqannaasa Aukustusana ufa iriseeqa andeeqasee nariqa nikeeku nikaaku maqusai nuqu maraaqeeera suqi mariqau.

<sup>4</sup> Yooseefaafa ooqeenaa Isaraee maqanna karaambaiqa Dafidina ati marufa Kariree maqa maaqakiqari kaqikaa maqusa Nasareete marufa miqooqari Yudeeaa maqa maaqaki kaqikaa maqusa Beetareeqeemma maqusai Dafidifa mariu maqusanaki auqu maraanifeera ooqu finau.

<sup>5</sup> Mariafa Yooseefaana utaaqama amaqarafa amuaqu uqafaqa maridanoo Yooseefaana faqa ooqufinau.

<sup>6</sup> Miqanda ooqu Beetareeqeemma maqusai ooquroofanoo Mariafa innaamunai firafa kambiqoofanoo narí ooqa faiqi akoonaiqi maaqimaseenoo maqanau.

<sup>7</sup> Miqanda Beetareeqeemma maqusai ooquree faiqara maaqara randoosia faiqi anaasee moomoo suqufufaqa aiqamaki qumbiqafunara burimakau faiqee maru maqana qafamaseenoo Mariafa narí faiqi minaki maqanau, maqaseenoo suara aruandoo qimaseenoo qamunna kisaqa anaqiranannai kukuqammeeqeenoo burimakau difaaniki faiqamaqanau.

*Qangiroouqa sipsipasaa rakisimarusa kooroomannimiqau.*

8-9 Mi eendanaki faiqi akaqausa maqusa dinni atinai nariqa sipsipasaa rakisida marufanoo karaambaiqa qangiroo misa maruqoo kooroomafufanoo karaambaiqa kaqa qarafa qoomara foora misa maruqoo rupannoo ufaqa firaqoo rufioofanoo mi qangiroofa qimanniminoo qinau.

<sup>10</sup> Sia rufiaaqa, amiqira fasaasa ufa aiqama maqa maaqakinaasa firaa asasira ufatia qimannimirara qumidaqa.

<sup>11</sup> Maqee eendaki, inni innaarunai mareefandinnana asumu maraaninafa Anutuna asauku mundirafa karaambaiqa fannoo Dafidina maqusaki kambiqeenoo.

<sup>12</sup> Maaqimasee paquriqa mifammifoo qiaqa, burimakau faiqee maria maqanaki faiqi aanaaqi mina anoofa qamunna kisaqa anaqiranannai kukuqammeeqeenoo burimakau narana amimaru difaaniki faiqama amaqaqafanoo innee oonuree qafeefaranoo.

<sup>13</sup> Miqi qufaqa innaarunaidaraa qangiroo moomoosa uqanna tautumasee koorooma-fufaqa Anutunara اساسira idi raidaqa maaqi qiqau.

<sup>14</sup> Innaarunai sandaaqaindaraa Anutuna amooqirana amia, maqasaaqaraasakiqari Anut-ufa aidimarisaki naundura asooarafa misaki mariani.

<sup>15-18</sup> Qangirooqqa mi idina ramaseeqa innaarunai oorufufaqa sipsipasaa rakisiraua narí qimami narí qimamiq qiqau, doo maree Beetareeqeemna maqusai oonuree karaambaqqa fannoo qimannimi ainainara qafaa, qimasee sandee oonuree Yooseefaana faqa Mariana faqa faiqi aanaaqi burimakauqa difaaniki faiqaaqee maruna faqa paquriqau, paqurimasee Yooseefaana Mariasa qangiroo maa faiqinara qimannimu ufana qimannimufaqa akaqausa mi ufana ati irimarusa irufanoo naaquqanau.

<sup>19</sup> Mariafa mi ufana iriseenoo aundura quqaseenoo minara firaqqoo iridanoo randaanau.

<sup>20</sup> Sipsipasaa rakisiraua anirandee fidaqa nariqqa irunara faqa qafoonara faqa qangiroo ufamau fiqa paqurunara faqa اساسira idi raqau.

*Yisuna fainanduqu ufafa.*

<sup>21</sup> Dinni taikasee dinni ani qaaramoo faasaana aiqarooqqa Yuda maqannaasa narí fainanduqira oosana marasee akoonaiqi aanaaqi afaqa ati auku aqusee auqu raqau. Misa Yisuna faqa miqiraree qimasee miqimasee auqu rararee qiqau, sia kaqi auqu raqau, Mariafa kaqi marukamuqoo qangiroo fannoo qimamu auquna Yisunee qiqau.

*Amaana maqaki Yisuna asai neeqa aandau tatufunaqau.*

<sup>22</sup> Ooqai Mooseena sandufa akara maaqi qimasee qimarinau. Aiqaama anaasee faiqi maqasee innaamuna unda taqafufaqa amaana maqai ooruraida Anutuna aandau tatufirana suqa amiaqee qiqau. Aiqaama ooqa faiqi akoonaiqiuqara faqa karaambaqqa utaaqama amaqaqee amaana maqaki muru amiaqee qinuu.

<sup>23-24</sup> Mariana afaaqi innaamuna unda taikafufanoo Yooseefaana Mariasa Anutuna sandufamau fidaqa Anutuna aandau tatufirana sia amanaikifaqa kudi fasiqauqa tatufirana qaara nakipuruna maramaree Yeerusaree amaana maqaki ooruree Mariana tatufirana suqamisee mikari kai faiqi aanaaqi Anutuna amiraree qimasee ooruree keeqaqau.

<sup>25</sup> Moo nauraiqi auqu Simeeonafa mi aukuaana Yeerusaree maqusai amaana maqaki ainainimarufa maridanoo kaaqa Anutuna ufara rimarufa Isaraee maqannaasa asumu maraaninnanara afeesara marinuu.

<sup>26</sup> Anutuna naaquqara maraquina fannoo mina aakufufanoo qimaminuu. Anee karaambaqqa Anutuna asaku mundirafa kambiqainana anee qafamaseenana kuqin-naranoo, sia kaqi kuqinnaranoo.

<sup>27</sup> Moo faasaana mi maraqunafa Simeeona aakapoofanoo amaana maqaki keeqanau, mikari kai Yooseefaana Mariasa Yisuna rafusu maree amaana maqaki keeqafiqqa Mooseena ufamau firaree qimasee keeqaqau.

<sup>28</sup> Keeqafufanoo Simeeonafa anireenoo mi faiqina rafususenoo Anutunara اساسira ufa qinoo qinuu.

<sup>29</sup> Oo karaambaqqa maqee anee qimaqimunna ufafa anoona kambiqeenoo maqee amana qinee ani ainainira faiqi marunaua asooaranaki kuqanaura.

<sup>30-31</sup> Maqee qini qifu fannoo maqasaaqaraasa asumu maraaninnana qafeenoo maasa asumu maraaninnana anee aiqama maqannaasa qafaqaqera deedaqiannana qini qifu doo qafeenoo.

<sup>32</sup> Mifa ani maqannaasa Isaraee maqannaasa ani areenarana nimianinafa maridanoo, qoomara foora qeenoo aanaamuru ani aana uqannifiqaaninafa marifaqa qeeqa qifunnai qafeeqa.

<sup>33</sup> Yisuna anaakoo Simeeona ufa iriseeqa tautiqa narí qafee narí qafee iqau.

<sup>34-35</sup> Simeeonafa Yisuna afaaqooqa qira ufa qimamiseenoo quandaki mina anoona Mariana qimaminoo qinuu.

Anutufa maa faiqi anaqina narí kambiqaaninna ainaina uqannifiqaanifeera uqeereeqeenoo quqeenoo.

Moomoo Isaraee maqannaasa mina qafamasee nikoqaiqafaqa maaniki aqu fifaranoo kaifaa moomoosa mina qafamasee findifiqa asumu marirana mareefaranoo.

Akaqausa mina qafamasee nikoo qaiqafa minara aqira ufa qimasafanoo doo minannai narí naunduraindaraa manda irirana kooroo iannoo.

<sup>36-37</sup> Mi faasaanna anaasee asooqa moo mina auqu Anaa nammarifa Yakooboona amaaku Aseerana atikiqari kambiqarana Fanueerana araamuna marinuu. Mifa maanaqasaaqari faiqi marasee dinni taikasee dinni ani qaaraqanda marasee aukuaana marinoo mina afaaqi kuqufufanoo miqooqari aukuaana qaara faqa qaara faqa fasiqa arusee moo fasiqa qaara faqa qaara faqa moomoo aukuaana adeedaana marinuu. Mifa

amaana maqakiqari sia raudee finau, eendaki faasaana minaki kai maridanoo Anutuna amooqira ufa qimamidanoo aarara maridanoo innaaru qimarinau.

<sup>38</sup> Simeeonafa Mariana qimamimarufanoo Anaa nammarifa anireenoo Yisunara Anutunai dufi dufi qimasee doo miqooqari mi faiqi anaqina Anutufa asumu marirana nimianinafa ani maridanoo fee qimasee aiqama Yeerusaree maqannaasaki akaqausa Anutuna asumu marirana afeesimariasa qimanniminoo ninau.

*Nasareetee kaifaa ani mariqau.*

<sup>39</sup> Yooseefaasa Mariasa Yeerusaree amaana maqaki aiqama Karaambaiqa sandufa taikasee Kariree maqa maaqai nari maqusa Nasareetee maqusai anirandee fiqau.

<sup>40</sup> Miqoo marufanoo Yisufa innooqeenoo nari nidanoo amudaani afeekaikufanoo Anutuna amiqi amiqirafa minasaa marufanoo irirana fiqararafa marinau.

*Yisufa amaana maqaki marufaqa randaqau.*

<sup>41</sup> Ooqai Isaraee maqannaasa Isipa maqasaa mandainainaki marufanoo Anutufa nari qangiroo moo aqigoofanoo Isaraee maqanna ainnaaqareenoo Isipa maqanna ooga faiqi aiqama naru taikanau. Isaraee maqannaasa minara irisee miqooqari aukuaana aukuaana ainnaaqarara qoomaqa sakasaidaqa neemariqau. Aukuana aukuaana Yisuna anoofa akoofauqa Yeerusaree maqusai ooruree ainnaaqarara qoomaqa sakasee neemariqau.

<sup>42</sup> Yisufa (12) qisaukuqara taikasee qikunni ooqu qaara marasee aukuaana marasoofaqa mina anaukoo Isaraee maqannaasa oosana marararee qimasee mina faqa afiqeeqa Yeerusaree maqusai ooru fiqau.

<sup>43</sup> Misa miqoo ooruree moomoo afuru faiqaidaga qoomaqa sakasee neemariqau. Qoomaqa taikaseeqa miqanda Yooseefaasa Mariasa nari aqoonausa faqa Yisunara doo fiifoo qimasee findimaqee nariqa maqusai fiqau. Yisufa Yeerusaree maqusai kaqi mariufanoo amaana maqaki kafaa keeqanau.

<sup>44</sup> Yisuna anaukoo moodaa faasaana fimarufanoo eenoofaqa nari ainainaki faqa niqoonausaki faqa Yisunara randee mariqau.

<sup>45</sup> Randoosia sia marufaqa kafaa anirandee Yeerusaree maqusai randararee qimasee ooru fiqau.

<sup>46</sup> Qaara faasaana miqoo randaqa niniufaqa qaaramoo faasaana amaana maqaki keeqafi paquriqau, mifa Yuda maqannaasa amaana ufa akoofasauqa faqa minaki maridanoo misa ufa iriseenoo quandafi oosana oosana ufara misasaa irammiri marinau.

<sup>47</sup> Irammiri marufaqa miqoo marusa oo irirana fiqararafammifoo qimasee rufaqau.

<sup>48</sup> Mina anaukoo qafeeqa tautiqa qiqa, maaqanda qimaaku anee nanaree maaqanda mandaikamma qimaqeenanee ani akoosandiri qimuqusimarifaqa aniara randaqa niniifaqa paquriqa.

<sup>49</sup> Yisufa iriseenoo qinau, oo inneeqara sia fee iridee qinee naqimasee moosaa mari-anauree sia amana, qinee qeeqa qikoona maaqaki kai marianausa maridaqa. Inneeqara minara iriaqaana.

<sup>50</sup> Miqi qufaqa miqanda sia mi ufana oosana iriqau.

<sup>51</sup> Miqooqari Yisufa nari anaukoo faqa Nasareetee maqusai ooqu maridanoo nari anoona akoona ufa ameemaanai marufanoo mina anoofa Mariafa mi ufausa aundurai kai iridanoo marinau.

<sup>52</sup> Yisufa miqoo marufanoo mina irirafa faqa amudaani faqa innooqee marufanoo Anutufa faqa faiqi anaasee faqa Yisunara nidi marinau.

### 3

*Nammari nimimaru Yoohaneefa Anutuna ufa qimanniminau.*

*(Mat 3:1-12; Mak 1:1-8; Yoh 1:19-28)*

<sup>1</sup> Tibeeriusafa Roomma maqannaasa firaa kiapafa (15) qisaukuqara taikasee qikunni ooqu moodaannai qiku taikasee aukuaana maru kamuqoo mi fasannai Yudeeaa maqannaasa kaqikaa kiapafa qaara auqu faqaafa marinau, Poontiusafa moo auqu Piratoofa marinau, Mi fasannai Kariree maqannaasa kaqikaa kiapafa Eeroodeefa marinau, Itureea maqannaasa faqa Tarakoonitisa maqannaasa faqa misa kaqikaa kiapafa Firipina amaraafa Eeroodeena akaqa marinau, Abireenee maqannaasa kaqikaa kiapafa Risanasafa marinau.

<sup>2</sup> Yeerusaree maqusai Anutuna aanaiqikiraqanda Annasafa faqa Kaiafasafa faqa mariqau. Mi aukuaana Seekariana amaaku Yoohaneefa kaasau aadana maqa maaqaki

marufanoo Anutuna ufa fannoo Yoohaneena aakufufanoo findifinoo Yooradanna nammari afaiqara marusaki oonuree aniree idanoo Anutuna ufa faiqi anaasee qimanniminoo nidanoo qinau.

<sup>3</sup> Inneeqa manda marirana minnisee Anutufinnai ubeekaifaqa nammari ruma ni-maqaanaura miqi masaifanoo Anutufa inni mandainaina mininnisee sia naruannoo.

<sup>4</sup> Yoohaneefa nauraa tamummaqara fasiqa akara rumaqoona ufamau finoo miqi marinau, mi tamummaqara fasiqafa maaqi qimasee akara rinau.

Kaasau maqa maaqakiqari faiqi moo maaqi qimasee nammeera qidanoo faiqi anaasee qimannidanoo karaambaiqa anianinna aanna afisuaqa mina aana eendaandirana andeeqaa.

<sup>5</sup> Arumukiranaki maqa apauru quqaina qumbiqaani amuaqunamu faqa aaqana faqa apaurinanoo afaasaikiani.

<sup>6</sup> Eendaandira aana aiqama andeeqaa mandaikiranaki anukamasaina raununukaani miqimasaiifaqa aiqama anaamuru Anutufa asumu maraaninnana qafeefaranoo.

<sup>7</sup> Miqi qimasee tamummaqara fasiqa ooqai qimasee akararinau. Faiqi anaasee moomoosa uqanna Yoohanee finnai Yooradana nammari marunnai ooqureeqa nammari mararara ooqu fiqau. Yoohaneefa rumannimaqararee qimaseenoo misa nikaruqiranara irisee qimannimidanoo qinau, Innee ukadiqa faiqinamuara foora Anutufa nariranara rufiasee inneeqa manda oosanaqiqari kambaaramasee asukaki qinee marunnaqoo aniree fee unna qimasee nammari marararee qidee. Anutuna aanoo irana innisaa aqufuaninafa yafee inni aaquqima nimaqaiifaqee minakiqari sandee qinee unnaqoo aniree nammari nimirarunnana mandaqaidee.

<sup>8</sup> Innee maasa Abarahaamana atiuqa marunsa maridee qimasaida Anutufa asumu marirana kaqi qimianifee qimariafanoo, aqaqida miqi qimariafanoo. Inneeqa mandoosana minnisee andeeqara oosana maraifaqa qafeeqa inniira kuqaa naundura quandarausee qimasee amiqira saqari qaqamara foora iraidagee qianauro. Innee fifau Abarahaamana ati fee qimariasa, mifa fifau ainaina maridanoo, iriaqa Anutufa amana qifanoo maa fifau ooniugasaqari faiqikammafi Abarahaamana atiuqasaa amana ootupaqa mariannoo. Innee Abarahaamara ati fee qimariana fifau ufa kai qimariafanoo.

<sup>9</sup> Anutufa saasunara foora atekarana doo rauqisee maridanoo, sia naundura quandainausa Anutufa narirafa qusandaannoo aiqamausa saqariara foora sia amiqira qaqama iraianoo ateeqa idaki aquannoo.

<sup>10</sup> Faiqi anaasee Yoohaneena aaquqira ufa iriseeqa qiqau.

<sup>11</sup> Oo Yoohanee maasa ani ufara naqi fee ianauree qufanoo Yoohaneefa qimanniminoo qinau, qaara siuta faqaafa siuta siaina moo amia narana faqaafa rainasee narana siaina amia.

<sup>12</sup> Roomma maqannaa takisa munnimma maree mariasa faqa Yoohaneefa marunnai anireeqa iramiriqau, oo ufasaa rakisirafa maasa naqi fee ianauree qufanoo Yoohaneefa qinau.

<sup>13</sup> Innee andeeqasee takisa munnimma kai maraqaqaa sia qummuarirana ootupamasee maraqaqaa.

<sup>14</sup> Miqi qimasee qimannimisooifaqa Roomma maqannaa sundiaufa aniree iramiriqau, maasa faqa naqi fee ianauree anee maasara nanee fee qinnaree qufanoo Yoohaneefa qinau, Innee sia aanoo iranannai moosa munnimma qummuariaqa, sia unnufannai kootamasee moosa munnimma aina qummuariaqa. Inneeqa saika akiqara feefauru marasee sia minara manda ufa qimasee ninunu ruaqa. Minara amana fee qimasee nifaqaqaa quqaqaa.

<sup>15</sup> Faiqi anaasee moomoosa Isaraee maqannaasa Yoohaneenara iriseeqa qiqau, ooqai Anutuna tamummaqara fasiqauqa Anutuna asauku mundirafa kambiqaannoommifoo qimaqoofa mifee qimasee misa naundura uqeeraqau.

<sup>16</sup> Yoohaneefa minara iriseenoo qimanniminoo qinau, qinee fifau nammarinnai inni rumannimaqaidafa, moo fannoo firaqoo qini uriqararafa aniannoo, naqimasee fee qinee mina dadaaqianauree. Qinee fifau ainainara foora marianauro, mifa kaaqa uridaqaqaramasee uriqararafa mariannoo. Mifa Anutuna maraqunannai faqa idannai faqa rumannimaqaannoo.

<sup>17</sup> Maraqunannai rumannimaqarafa faqa kudimakirana qaaninna idannai rumannimaqarafa faqa minara oofaafana anoona faqa aanaaqmaara faqa kikiqa usidanoo. Mifa faiqi anaasee oofaafanara foora asaukunoo utitiqa maseenoo aanaaqmaara fuaqa aquseenoo anoona mara maaqaki quqeenoo aanaaqmaara ida firaafa sia dimbeemari idanaki araannoo.

<sup>18</sup> Yoohaneefa amiqira fasaasa ufa faiqi anaasee qimannimidanoo oosana oosana ufannai misa fuki faaki qimarinau, Anutuna ufamau fuaqeera qimannimarinu.



<sup>19-20</sup> Kariree maqa maaqaki kaqikaa kiapafa Eeroodeefa nari akaqa anaqa minaa auqu Eeroodiasa nammarina ummuara maraseenoo oosana oosana mandainaina faqa maree marinau. Yoohaneefa Eeroodiasa nammarina maroonara qaoo qufanoo Eeroodeefa nari mandainaina oosana fannoo uriqaroonara Yoohaneena rumbaranaki quqanau.

*Yoohaneefa Yisuna nammari rumamaqanau.*

*(Mat 3:13-17; Mak 1:9-11)*

<sup>21-22</sup> Yoohaneefa kaqi maru aukuanai faiqi anaasee moomoosa nammari mareesofoanoo Yisufa faqa aniroofanoo Yoohaneefa minaa faqa nammariki mara keeqaseenoo Yisufa nammarikiqari findifinoo innaaru qimarufanoo innaaruna rakeemafufanoo Anutuna naa quqara andeegara maraquna fannoo nakipurunaika mafinoo Yisunasaa aqufufanoo innaarunaindarii ufa moo kambiqeenoo qinuu. Anee qini qimuqusimarianna qimaakufa mariananoo firaqoo aniaara dididanoo.

*Yisuna akeeku akaaku nuqu.*

*(Mat 1:1-17)*

<sup>23</sup> Yisufa (30) qini qiku qisauku taikasee moo fasiqa asauquqara taikasee aukuanai maraseenoo nari saika oosana aranau. Aiqama fasiqa anaasee sia minaa oosana irirai minara Yooseefaana amaaku fee qimariqau. Yooseefaafa Eerina amaaku marinau.

<sup>24-26</sup> Eerifa Matatana amaaku marinau.

Matatafa Reefina amaaku marinau.

Reefifa Meerakina amaaku marinau.

Meerakifa Yanaina amaaku marinau.

Yanaifa moo Yooseefaana amaaku marinau.

Yooseefaafa Matataiasana amaaku marinau.

Matataiasafa Amoosana amaaku marinau.

Amoosafa Naqummana amaaku marinau.

Naqummafa Eesirina amaaku marinau.

Eesirifa Nakaina amaaku marinau.

Nakaifa Maatana amaaku marinau.

Maatafa moo Matataiasana amaaku marinau.

Matataiasafa Seemeena amaaku marinau.

Seemeenafa Yooseekana amaaku marinau.

Yooseekafa Yoodana amaaku marinau.

Yoodafa Yooannana amaaku marinau.

<sup>27</sup> Yooannafa Reesana amaaku marinau.

Reesafa Seerubabeerana amaaku marinau.

Seerubabeerafa Seearatieerana amaaku marinau.

Seearatieerafa Neerina amaaku marinau.

<sup>28</sup> Neerifa Meerakina amaaku marinau.

Meerakifa Adina amaaku marinau.

Adifa Koosamana amaaku marinau.

Koosamafa Eeramadamana amaaku marinau.

<sup>29</sup> Eeramadamafa Yoosuana amarana amaaku marinau.

Yoosuafa Eerieeseerana amaaku marinau.

Eerieeseerafa Yoorimana amaaku marinau.

Yoorimafa Matatana amarana amaaku marinau.

Matatafa Reefina amarana amaaku marinau.

Reefifa Simeeona amarana amaaku marinau.

<sup>30</sup> Simeeonafa Yudana amarana amaaku marinau.

Yudafa Yooseefaana amarana amaaku marinau.

Yooseefaafa Yoonamana amaaku marinau.

Yoonamafa Eeriakimana amaaku marinau.

<sup>31</sup> Eeriakimafa Meereena amaaku marinau.

Meereenafa Meennana amaaku marinau. Meennafa moo Matatana amaaku marinau.

Matatafa Natannana amaaku marinau.

Natannafa Dafidina amaaku marinau.

<sup>32</sup> Dafidifa Yeeseena amaaku marinau.

Yeeseefa Oobeedana amaaku marinau.

Oobeedafa Boosana amaaku marinau.

Boosifa Seeraana amarana amaaku marinau.

Seeraafa Naasoona amaaku marinau.

Naasoofa Aminadabana amaaku marinau.

Aminadabafa Adimina amaaku marinau.  
<sup>33</sup> Adiminafa Aranina amaaku marinau.  
 Aranifa Qeesaroonaa amaaku marinau.  
 Qeesarooafa Peereesana amaaku marinau.  
 Peereesafa Yudana amaaku marinau.  
<sup>34</sup> Yudafa Yakooboona amaaku marinau.  
 Yakooboofa Isakeena amaaku marinau.  
 Isakeefa Abarahaamana amaaku marinau.  
 Abarahaamafa Teeraana amaaku marinau.  
 Teeraafa Naqoorana amaaku marinau.  
 Naqoorafa Seerukana amaaku marinau.  
<sup>35</sup> Seerukafa Reeuna amaaku marinau.  
 Reeufa Peereekana amaaku marinau.  
 Peereekanafa Eebeerana amaaku marinau.  
 Eebeerafa Seeraana amaaku marinau.  
 Seeraafa Kainnana amarana amaaku marinau.  
<sup>36</sup> Kainnafa Arafadana amaaku marinau.  
 Arafadafa Seemana amaaku marinau.  
 Seemanafa Nooana amaaku marinau.  
 Nooafa Rameekana amarana amaaku marinau.  
 Rameekafa Meetuseerana amaaku marinau.  
<sup>37</sup> Meetuseerafa Eenookana amaaku marinau.  
 Eenookafa Yareedana amaaku marinau.  
 Yareedafa Maqarareena amaaku marinau.  
 Maqarareefa moo Kainnana amaaku marinau.  
 Kainnafa Eenoosana amaaku marinau.  
<sup>38</sup> Eenoosafa Seetana amaaku marinau. Seetafa Adamana amaaku marinau.  
 Adamafa Anutuna amaaku marinau.  
 (Anutufa nari kambiqarafa marinau.)

## 4

### *Sadannafa Yisuna amanufa.* (Mat 4:1-11; Mak 1:12-13)

<sup>1</sup> Yoohaneefa Yisuna nammariiki tupamasoofanoo findifufanoo Anutuna andeegara naaquqara maraḡana Yisunaki qumbiqafufanoo mi maraḡanafa Yisuna rarisamee-geenoo kaasau aadana maḡa maaḡaki quḡasoofanoo miḡoo afaannauḡa firaafa qara fasiḡa niku nisauku taikasee faasaana Yisunara mandainainaki aaqaranaki fuaniffee qimaseenoo maara maḡaseenoo amanamasee qafosianoo.

<sup>2</sup> Qara fasiḡa niku nisauku taikasee faasaana mikari Yisufa narana sia nanau, mi moomoo faasaanafa aiqaroorofanoo Yisuna firaagoo aaranau.

<sup>3</sup> Firaagoo aararoorofanoo afaannauḡa firaafa mina qafamasee Yisuna qimaminoo qinau. Anee kuḡaa Anutuna amaaku maridana mee aḡa mari oonisara qinaḡa feemu kammafinana naa.

<sup>4</sup> Yisufa iriseenoo qimaminau, Anutuna akarakinaa ufa maaḡi qinoo maridanoo faiḡi sia narana kai namasee amana mariannoo. Anutuna ufamau fimariafa mifa kai naranara foora maridanoo, qinee sia ani ufamau fiḡa ooniara qiananoo feemu kianoo.

<sup>5</sup> Miḡi qufanoo afaannauḡa firaafa Yisuna uqeereseenoo maa maḡa maaḡanasaaqaraana aiḡama karaambaiḡauḡa faḡa misa quḡusakinaasa faḡa dauni uḡafiḡaseenoo qimaminoo qinau.

<sup>6</sup> Maa aiḡama afeeka ainaina faḡaasa maḡasaa faḡa misa fira qumiasana faḡa Anutufa qini qimiḡaifanoo qinindi maridanoo, qeeḡa kai irisee moo fasiḡa amana amianauro.

<sup>7</sup> Anee qini doorinni aḡoori saunarafi deendeenamafi qini Anutusara foora qimooqi-naḡa maa aiḡama adiafaa ira qumiasana aiḡama ani amianauro.

<sup>8</sup> Yisufa mina ufa iriseenoo kaifaa qimaminoo qinau, Anutuna akarakinaa ufa maaḡi qidanoo, anee karaambaiḡa aneenna Anutuna kai amooqimasee mina ainaina kaimma-maḡaa. Minara irisee sia ani ufamau fuanaura.

<sup>9</sup> Miḡi qufanoo afaannauḡa firaafa kafa Yisuna qumareeḡeenoo Yeerusaree fira amana maḡa ataufakai faakana kisaḡa atisaa quḡaseenoo qimaminoo qinau, anee Anutuna amaaku maridana maaḡooqari rufusaki meemai maḡasaa aḡufua sia mina amaaku maridana sia aḡufua.

<sup>10</sup> Anutuna akarakināa ufa fannoo minara maaqi qidanoo Anutufa narí qangiroouqa niqiqaināa anisāa rakisifaranoo.

<sup>11</sup> Kafaā moo akaraki maaqi qidanoo misa narí nisaukunoo qumaraifana sia oonisaa anee aiku rupaurinanoo aidafuannoo.

<sup>12</sup> Yisufa qafeenoo iriseenoo afaannaūqa firaana qimaminoo qinau, Anutuna akarakināa ufa fannoo minara maaqi qidanoo anee sia karaambaiqa aneenna Anutuna amanamasee qafaannee qidanoo. Minara irisee sia maaqooqari aqufuanaura.

<sup>13</sup> Afaannaūqa firaafa aiqama karidanoo Yisuna akari maqaseenoo, Yisuna mafi quqaseenoo minnaiseenoo doo finau.

*Yisufa Anutuna ufa qimannimirana oosana aranau.*

*(Mat 4:12-17; Mak 1:14-15)*

<sup>14</sup> Yisufa Kariree maqa maaqai kafaā aniroofanoo Anutuna naaūqara maraūna fannoo mina faqa afeekaikamasee maridanoo dadaaūnara, mina aufakiana fannoo Kariree maqa maaqaki aiqamai daraaninau.

<sup>15</sup> Yisufa misa amaana maqakiaqa maqusa maqusa fiqū fiqū inoo nidanoo qimannimimarufaqa aiqamausa mina amooqi mariqau.

*Nasareetee amaana maqaki amaana ufa qimanniminau.*

*(Mat 13:53-58; Mak 6:1-6)*

<sup>16-17</sup> Yisufa Kariree maqa maaqaki niniufanoo Nasareetee maqusai narí aanaaqisaa mariu maqusanaki oonureenoo Isaraee maqannaasa amaana Saririqasaa narí oosana maraseenoo amaana maqaki keeqanau. Keeqafinoo Anutuna ufa asaanarirree qimaseenoo findifufaqa misa Anutuna tamummaqara fasiqa Eesaiaana nauraa akara amifanoo airiseenoo maa ufana paqurimasee asaanarinau.

(Ooqai misa papiqa akara rumasee qaara aikasaa kukuqa maqoona Yisufa duku dukumasee minaki maa ufana paqurimasee asaana rinau.)

<sup>18-19</sup> Karaambaiqa maraūna fannoo qini daakinoo maridanoo, mifa kudi fasiqauqa amiqira fasaasa ufa qimannimiannee qimasee asauku qinisaa mundinau,

rumbaqa mariasa idukuaki fuaqeera qini diqiqanau,  
nifu dimbarausa faqa nifu maqannisaaneera faqa qini diqiqanau,  
moo maqannaasa ani mara moo maqannaasa aupurarana nimimariana minakinaana idukuaneera faqa qini diqiqanau,  
karaambaiqa narí maqannaasa mandainainakinaasa maraaninna aukuanara qimannimirara qini diqiqai faqa ani maridaqa.

<sup>20</sup> Yisufa mi ufana asaana rumasee papiqa qaara aikannoo kukuqamasee rakisi maru fasiqana amiseenoo ufa qimannimirara qimasee ooqu marinau, mi amaana maqanaki Nasareetee maqusai marusa aiqamausa nifu Yisuna kai tataqa fiqau.

<sup>21</sup> Yisufa maqee asaana rumasee qimannimi ufanasaqaraana qimanniminoo qinau, maa ufana akarakināana asaana rumasee qimannimimaruna mina anoona doo maqee uqanna kambiqeenoo.

<sup>22</sup> Misa mina adiafaaira ufausa iriseeqa tautumasee narí qimami narí qimami qiqau, maafa Yoosēfaana amaaku kai maridanoo fee qimasee nikoqanau.

<sup>23</sup> Yisufa irisee qimanniminoo qinau, innee ooqeenaasa naamuaqira ufa qimaqimiqa maaqi qifaranoo oo tutaqafa anee aneenna aurirana aneenna marasinnanai kai aneenna aurirana taikaa kafaā qiniara maaqi qifaranoo anee Kapeeranaumma maqusai oosana oosana ainaina faiqi sia amanaike mari ainaina auqaananara maasa iridaqa maqee aneenna maqusaki maasa qifusaa mi ainainna auqaa.

<sup>24</sup> Qinee minara maaqi qimasee inni qimannimidaqa, Anutuna tamummaqara fasiqauqa sia moo fannoo narí maqusanaasa nifusaa uriqarara fasiqa mariannoo moo maqusanaasa minara uriqarara fasiqa fee qimasee mina ufa irifaranoo.

<sup>25</sup> Innee qini ufa iriaqa ooqai Eeriaafa maru aukuaana qaaramoo aukuaana faqa (6) qisauku dinni taikasee dinni ani moodaa marasee quqoona faqa aaku sia uqanna rufanoo aandaroo firaafa aiqamai narí marinau,

<sup>26</sup> Mi aukuaana Isaraee maqannaadeedaana anaasee moomoo marufanoo sia misa dadaaqinau Sidoona maqa maaqaki Sareefata maqusaki maru aanaamuru adeedaana anaaseena kai Anutufa Eeriaana aqiqoofanoo dadaaqinau,

<sup>27</sup> Anutuna tamummaqara fasiqa Eerisaafa maru aukuaana narí maqannaasa Isaraee maqa maaqaki karoorā narí marusa moomoo mariqau, Eerisaafa sia misa karoorā taikannisanau, aanaamurua Siria maqusanaasa uriqararana auqu Naamana mina karoorā kai taikamaqanau. Innee qiniara sia tamummaqara fasiqa fee qimariafanoo

qiniara nikooqee mariafanoo qinee faqa miqi kai iqa qeeqa maqusanaasa inni sia amana dadaaqianaara.

<sup>28-30</sup> Misa Nasareetee maqusai amaana maqaki marusa mi ufana iriseeqa aanoomasee Yisuna rarisammaree Nasareetee maru aaqanasaa afiqeeqa rarisaaqaa ooruree ameemai aguaneerufanoo kuquani fee qimasooфанoo Yisufa misa qambaana kaqi fiqareenoo narí saikai finau.

*Kapeeranauma maqusai faiqi aundurakinaa afaanna aqiqanau.*  
(Mak 1:21-28)

<sup>31</sup> Yisufa Kariree maqa maaqaki Kapeeranauma maqusai oqureenoo Saririqasaa amaana maqaki faiqi anaasee Anutunara naamuqinuu.

<sup>32</sup> Mina ufa irimariasa mina ufara naaquqanau, mifa narí Anutufara foora maridanoo qimannimufaqa doo tautiqa minara nidinau.

<sup>33</sup> Qimannimi marufanoo mi amaana maqanaki faiqi moo kaasau afaanna aunduraki marufa Yisuna ufa irisee firaa kari faaqa rumasee qimaminoo qinuu.

<sup>34</sup> Oo Yisufa Nasareetee maqusanaafa anee nanaree maasa soodaa qidane, maasa daru taikararee anidane qinee aniara iridaqa anee Anutuna naaquqara ufa maree marianafa mariananoo.

<sup>35</sup> Yisufa iriseenoo amambaina qimaseenoo qinuu, anee ufaseenana mi fasiqana aundurakiqari raudamaki see fua, miqi qufanoo mi afaannafa aiqamausa nifusaa mi fasiqana maqasaa mafi aqusee sandeenoo sia aupurarana aminuu.

<sup>36</sup> Aiqamausa mina qafeeqa tautumasee narí qimami narí qimami qiqa qiqau, maa fasiqana ufa nana ufa fee maridanoo narí Anutufara foora afeekufannai kaasau afaanna qimannimifaqa eedoo kai qimasee raudee sandaafanoo naaquqaidanoo.

<sup>37</sup> Miqooqari mi ufana munuqi miniqi ufanoo aiqamai daraaninau.

*Yisufa oosana oosana aurirana andeeqannisanau.*  
(Mat 8:14-17; Mak 1:29-34)

<sup>38</sup> Yisufa amaana maqakiqari raudamaki Simoona maaqaki keeqanau. (Simoonafa Yisuna ufa irira fasiqa mina faqa nimarufa marinuu.) Simoona mina airaamaku anaasee auri marufanoo afaaqa firaqoo ididimarufaqa minara Yisuna qimamiqau.

<sup>39</sup> Mifa iriseenoo mina qaari aaga oonureenoo mi auriranara qaoo qufanoo taikoofanoo mi anaaseefa aaqee findifinoo narana deedaqamasee niminuu.

<sup>40</sup> Suani afu keeqoofanoo asooaa asooaa imarufaqa mi maqusaanaasa nariqa niqoondi-uqa aurira fasiqa anaaseeqa maraida minisee marufanoo Yisufa asauku aiqamausa nifaaqai quqasoofanoo aurirafa taikanau.

<sup>41</sup> Afaannauqa faqa niqiqee marufaqa moomoosa naunduraindari raudamaki faaqana faqa sandaidaqa qiqau, anee Anutuna amaaku mariananoo fee qufanoo Yisufa miqooqari qaoo qinoo sia ufa qiaqee qinuu, mi afaannausa Yisuna Anutuna asauku mundirafa marunara irimarusa marunara, minara mifa misa nimambaina qinuu, innee ufaseeqa qufaqa misa sandamafiqau.

*Yisufa Yudeeaa maqa maaqai qimanniminoo ninuu.*  
(Mak 1:35-39)

<sup>42</sup> Mif eendanaki Yisufa faiqee iqaqoofanoo kananaana mi maqusanakiqari findimaqee faiqi sia marunnai Anutu finnai innaaru qirara finuu, faiqi anaasee findifi minara yai fee finoo fee qimasee randamaree oonu paqurimasee sia moosaa fuannee qufanoo Yisufa qimanniminoo qinuu.

<sup>43</sup> Qinee Anutuna innaaruna ququsakinaa fasaasa ufa sia maaqoo kai qimannimirara, Anutufa qinlira aiqamai qimannimianne qimasee diqiqamaqoosa maridaqa.

<sup>44</sup> Miqi qimaseenoo mifa Yudeeaa maqa maaqai oqureenoo aiqama maqusakiaqa fifainidanoo Anutuna ququsara qimannimi marinuu.

## 5

*Yisufa narí indaaruqaa faiqi namu nifiqanau.*  
(Mat 4:18-22; Mak 1:16-20)

<sup>1</sup> Moo kari Yisufa Keenesareeta farumma afainni kikiqinoo maridanoo Anutuna ufa qimannimi marufaqa faiqi anaasee moomoosa aniree irirara narí futeeqee narí futeeqee imariqau,

<sup>2-3</sup> Noodaanna reemaru fasiqaqanda nariqa noodaanna reemaru kanuqaqanda mafi nammari afainni quqasee nariqa pateeuqa mareeqa moosaa oonu maridaqa akuni mariqau, Yisufa faiqi anaasee moomoosa niqafaidanoo kanuqa qafamaseenoo Simoon-aindiki akaramafinoo qimamufaqa kaqi kaaqoo afeeqoofanoo nammari amuaqusaa

oonuroofanoo Yisufa minaki ooqumarifinoo faiqi anaasee aiqamausa mina oorinni ani usufufanoo naamua qimarinau.

<sup>4</sup> Ufa qimannimi taikaseenoo Yisufa Simoona qimaminoo qinau, kanuqa maree farummaki oonuree pateeuqa ramasee noodaanna umbaqla.

<sup>5</sup> Miqi qufanoo Simoonafa qinoo akasaa maasa uriqararafa, maasa maqee eendaki nammariki patee moomoo kari ramasee sia uqanna moodaa noodaanna mareeqa anee qiannanara kaifaa raanaura.

<sup>6</sup> Misa nariqa pateeuqa nammariki ramasoofanoo noodaanna moomoo mi pateeuqanaki umbiqafinoo pateeuqa rakeekaa inau.

<sup>7</sup> Miqufaqa misa qafeeqa moo kanuqaki marusara nisauku aqufaqa misa aniree dadaaqla noodaanna mareeqee kanuqaki umbiqasoofanoo kanuqaqara faqa nammariki ukuqnaaqaa imariqau.

<sup>8</sup> Simoona moo auqu Peetooroofa mina qafamasee Yisunara rufieenoo mina oorinni aqoori saunarafinoo qinau, oo karaambaiqa sia qini faqa maria qinee mandainaina maree marunausa maridaqa.

<sup>9</sup> Yoohaneefa faqa Yameesafa faqa miqanda Seebeedeena amaakuqara miqanda Simoona dadaaqidaqa noodaanna reemaruqanda maridaqa noodaanna moomoo rama-soona qafoofanoo naaquqanau.

<sup>10</sup> Naquqoofanoo Yisufa Simoona qimaminau, anee sia rufiaa maaqooqari anee sia noodaanna reemarrannanoo anee faiqi anaasee kai Anutuna ququsaki pateeuqakiara foora mara quqee marinnanoo.

<sup>11</sup> Miqooqari misa nariqa kanuqa rarisameeqee afainni quqasee nariqa noodaanna saika maree maruna aiqama ainaina minnisee Yisuna faqa fiqau.

*Yisufa karoora arimaru fasiqana andeeqanau.*

*(Mat 8:1-4; Mak 1:40-45)*

<sup>12</sup> Moo kari Yisufa moo maqusai marufanoo karoora aiqama afaaqai arimaru fasiqafa moo fannoo anireenoo maqasaa aqufinoo irammirinoo qinau, oo maa fasiqa ani aidirafa qinana amana anee qini karoora ruqaqimaqeenanoo.

<sup>13</sup> Yisufa iriseenoo nari asauku uqeerasee minasaa munduseenoo qinau, Eeoo qini irirafa ani dadaaqiraree qidaqa, doo rukafinana maria qufanoo aaqee kai mina karoora rukafinau.

<sup>14</sup> Yisufa mi fasiqana amambaina qimaseenoo qinau, anee sia maa ainainnara moona qimamia andeeqasee amaana maqaki aanaiqikirana aaqa oonu rainanoo mifa ani afaqa aiqququmaseenoo aniara anukanoo mariaanoo qiannoo, miqi qinana anee karoora nari-marisa taikarasa aandau tatufirana Mooseena sandufamau fidana Anutuna suqamia, miqimasainafa aiqamausa ani anukarana qafamasee sia aniara eerairifanoo.

<sup>15</sup> Minara Yisuna afeeka aufakiana sia taikanau, firaqoo fifainufaqa faiqi anaasee moomoosa suqu maree Yisufunnai anireeqa mina ufa irufanoo misa aurirafa taikaanifeera aniqau.

<sup>16</sup> Yisufa moodaakari moodaakari faiqi sia maruqoo oonureenoo Anutunara kisaqaqasaa innaaru qimarinau.

*Yisufa aiku asauku pipisaaqa usirana andeeqanau.*

*(Mat 9:1-8; Mak 2:1-12)*

<sup>17</sup> Moo faasaana Yisuna moo maaqaki maridanoo faiqi anaasee Anutunara naamuqida marufanoo Farisai amaana ufa qimarusa faqa Mooseena sandufasaa rakisirausa faqa mi maqanaki ooqu marifiqa irimariqau, Kariree maqa maaqakiqari faqa Yudeeaa maqa maaqakiqari faqa Yeerusaree maqusaindari faqa moomoosa ani maridaqa iri mariqau. Aurirana taikara afeeka karaambaiqa Anutufinnaindari Yisunasaa marufanoo aurusa andeeqannimaqee marinau.

<sup>18-19</sup> Yisufa maaqaki qimannimi marufaqa faiqi anaasee akaqausa nari niqoonnana aiku asauku pipisaaqa qusirana qaindusu maree aniree maaqaki keeqafi Yisuna aaqa quqararee qimasee qafoofanoo faiqi anaasee moomoosa ititafufaqa sia amanaikiqa, quandaki naammaraaqa akaramafufaqa namudi rainasee mi fasiqana nari qaindasaa quqasee sanda quiqa quiqa ufanoo maaqaki faiqi anaasee qambaana Yisuna aaqa quqaqau.

<sup>20</sup> Yisufa misa irirana narisaa firaqoo mundunara iriseenoo mi pipisaaqa qusira fasiqana qimaminoo qinau, qini qiqaonndi ani mandainaina numoo doo minnaisaidaqa.

<sup>21</sup> Miqi qufaqa Mooseena sandufa akoofasauqa faqa Farisai amaana ufa qimarusa faqa nariqa naunduraindari kai qidaqa qiqau, maa fifau fasiqafa unnaqi masaidanoo nari ufannoo Anutuna amaaqa maqaidanoo faiqi sia amana moona mandainaina numoo taikarana amana maridanoo Anutufa kai amana miqiannoo.

<sup>22</sup> Yisufa misa naunduraindaraa ufa iriseenoo qimanniminoo qinau, innee naqi fee qifaqee mi mandirirana inneeqa naunduraki iridee.

<sup>23-24</sup> Qinee maa fasiqanara ani mandainaina numoo minnaisaidee qunnana innee qiniara sia amanaikiannoo fee qidee qinee faiqi nimaaku maa maqanasaa maridaqa faiqi aaqarana akiqara mininnisara afeeka faqaasa marunausa marinara maa firaa afeeka ainainannai kooroomma nimaqaanaura qinee maa fasiqanara aneenna qaindasaqari findifinana mi qaindana maree amaaqa fua qiananoo miqinaqa qini mandainaina numoo minnaisara afeeka qafeefara. Miqi qimannimiseenoo quandaki mi aiku asauku kuqirana qimaminoo qinau. Doo findifi aneenna qaari mareenana amaaqa fua.

<sup>25</sup> Miqi qufanoo mi fasiqafa findifinoo aiqamausa nifusaa nari faiqee maru qaarina mareenoo Anutunara dufi dufi qimammareenoo amaaqa finau.

<sup>26</sup> Aiqamausa minaki marusa mina qafamasee firaaqoo tautiqaa maaqi qimasee Anutuna asasiqau, maqee faasaana maasa maa fasiqana qafaunanoo nifaaqa qumooqukinoo.

*Yisufa Reefina afiqanau.*

*(Mat 9:9-13; Mak 2:13-17)*

<sup>27-28</sup> Miqooqari Yisufa raudamaki moosaa fidanoo Roomma maqannaa kiapana takisa munnimma maree maru kuskusafa mina auqu Reefina amarafa nari oopisaki marufanoo Yisufa mina qafamaseenoo qimaminoo qinau, aniree qini faqa fua qufanoo Reefifa findifinoo aiqama ainaina minniseenoo mina faqa finau.

<sup>29</sup> Moo kari Reefifa Yisuna narana suuqamiraree qimaseenoo Yisuna faqa nari aqoonausa takisa munnimma maree marusa faqa faiqi anaasee akaqausa faqa naaramasoofaqa mina maaqaki anireeqa firaa qoomaqa sakasee nee mariqau.

<sup>30</sup> Neemarufanoo Farisai amaana ufa qimarusa faqa nari niqoonausa Mooseena sandufa akoofasauqa faqa Yisuna faiqi namu niqiga qiqau, innee nanaree ummuara takisa munnimma maree mariasa faqa manda oosana maree mariasa faqa narana nammari naidee, nisauruqa.

<sup>31</sup> Yisufa mina iriseenoo qimanniminoo qinau, amiqimaria fasiqa anaaseesa sia tutaqafinnai fidaqa, aurimariasa kai tutaqafinnai fidaqa.

<sup>32</sup> Qinee sia amiqimaria fasiqa anaaseesara nariqa mandainaina minnisee Anutufinnai ubeekaaqeera qumu maridaqa, innee manda fasiqa anaasee fee qimasee nifaqee mariasa misara kai Anutufinnai ubeekaaqeera naarararee qimasee qinee qumafanausa maridaqa.

*Naararee maru innaaruqira oosanara iraqau.*

*(Mat 9:14-17; Mak 2:18-22)*

<sup>33</sup> Akaqausa Yisuna qimamiqa qiqau, Yoohaneefa nammari nimimaruna ufa irimariasa moomoo kari narana maridanoo mina minnisee naarara innaaru qidaqa, Farisai amaana ufa qimariasa misa ufa irimariasa faqa miqidaqa ani ufa irimariasa sia uqanna miqidaqa, narana nammari naida maridaqa.

<sup>34</sup> Yisufa iriseenoo qimanniminou, maanaaqa amundara qoomaqaqi suqimaria fasiqa anaaseesara naarara mariaqee qifaqa sia ani ufa irifaranoo amundara fasiqa marinara qoomaqa sakasee neefaranoo.

<sup>35</sup> Misa mi anaaseena afaaqi qini rumbamaree munu darusaiqaqa mikari kuqaa nimuqusa mandaikinaqa narana minnisee naarara innaaru qifaranoo. (Yisufa nari kuquaninnanara maanaaqa amundarana afaaqi kikiqa usinau. Yisufa nari kuqinanoo mina faiqi namu nimuqusa mandaikinaqa naarara maridaqa innaaru qifaranoo fee qinau.)

<sup>36</sup> Yisufa moo quandara ufa qimanniminou, faiqi nauraa siuta akunirara sia amana fuka qamunnasaaqarara ati anaqisee minasaa akunuannoo miqinanoo nauraa qamunna faqa fuka qamunna faqa mandaikiandoora, mina nauraa qamunna maridanoo minnisaa. (Nauraa qamunnara Yisufa Mooseena sandufara mina kikiqa ususee qimanniminou. Fuka qamunnara nari fuka ufara qinau.)

<sup>37</sup> (Yisufa maqasaa maru aukuaana misa uainna nammari tatisee aandau apatannai auqira taquki adiaasee kisaagaasaa maqaki quqasoofanoo marinou. Marikinoo amiqinoo marufaqa mina mara maree maqee maqee neemariqau. Uainna nammari misa maqee maqee nee maru nammari faqarinou. Mifa aandau apatannai auqira taquara qufaqa, maasa qeeqa ufakiqari taqu uqannee qidaqa.)

Yisufa minara iriseenoo quandara ufa moo qimanniminou, faiqi fuka nammari sia amana nauraa taquki adiaannoo, rukamufinanoo aiqama nammari rairaa iandoora.

<sup>38</sup> Fuka nammari fuka taquki adiaannoo amanaikiannoo.

<sup>39</sup> Faiqi nauraa uainna nammari namasee sia amana fuka uainna nammari naannoo. (Yisufa faiqi anaaseera Mooseena sandufa ooqeenaa uainnara foora mina akoofasa

mariafaqa qini ufa fuka uainnara foora marifaqa nikooqeeferanoo.) Ooqeenaana adiafaairafa uriqaranoo maridanoo fuka adiafaairafa oorudupinoo maridanoo.

## 6

*Amaanasaa sakuma ruqoosoo ufa.*  
(Mat 12:1-8; Mak 2:23-28)

<sup>1</sup> Moo kari Yuda maqannaasa Saririqa amaanasaa Yisufa narí faiqi namufaqa maqusamau nidanoo sakuma ummaqiranaki fimarufaqa mina faiqi namu sakuma ruqoosasee rafarisaidaqa neemariqau.

<sup>2-4</sup> Farisai amaana ufa irimarusa maridaqa niqafeeqa niqidaqa qimannimiqau, innee nanaree Mooseena sandufa rukiadee maasa amaana Saririqasaa ainainidee qufanoo Yisufa qimanniminoo qinau. Innee sia fee karaambaiqa Dafidina oosana iridee mifa aararofanoo Mooseena sandufa rukiasee Anutuna naaquqara amaana maqaki keeqafinoo Anutuna amaqee maru feemuna mara namaseenoo narí faiqi namufaqa akaqana maree muqu niminau, Mooseena sandufaki mi feemunara kaqiqeesa sia naaqee qidanoo aanaiqikirausa kai naaqee qu feemufa marinau.

<sup>5</sup> Yisufa misa qimanniminoo qinau, qinee faiqi nimaaku uqanna amaana faasaana faqa mina sandufauqa faqa mina uriqararawsa maridaqa. Qinee qeeqa faiqi namuara sakuma ruqoosa naaqee qiana amana misa neefaranoo.

*Yisufa asauku pipisaaqa usirana amaanasaa andeeqoo ufa.*  
(Mat 12:9-14; Mak 3:1-6)

<sup>6</sup> Moo kari Isaraee maqannaasa Saririqa amaanasaa faasaana moo maqusai amaana maqaki keeqafi Anutuna ufa qimannimi marufanoo faiqi moo asauku uqannai asauku karaaduqarafa faiqi anaasee faqa maridanoo Yisuna ufa irimarinau.

<sup>7</sup> Mooseena sandufasaa rakisirawsa faqa Farisai amaana ufa qimariasa faqa misa faqa maridaqa Yisuna arirara aiquci mariqau, mi fasiqana asauku karaaduqarana andeeqasainaaqa Mooseena sandufa rukiasee saikidanoo fee qimasee uneemaana qimasee mina rumbarara qimarufanoo.

<sup>8</sup> Yisufa misa naundurakinana manda irirana iriseenoo mi asauku karaaduqarana aaramaseenoo qinau, anee findifi mai aniree aiqamausa nifusaa kikiqia qufanoo miqiminau.

<sup>9</sup> Kikiqa mafufanoo Yisufa misa qimanniminau, qinee moodaa ainainara inni iram-mirianaara, innisaimbaqa sandufa Saririqa amaana naqi fee qidanoo, maasara faiqi dadaaqaqee qidanoo fee faiqi kuridiaqee qidanoo fee, maasa faiqi mariaqera asumu mara nimaqaanauree faiqi sia mariaqera naru taikannimaqaanauree.

<sup>10</sup> Miqi qimasee Yisufa aiqamausa nifuki nifuki idanoo mi fasiqana asauku karaaduqarana qimaminoo qinau, anee aneenna asauku uqua qufanoo mi fasiqafa miqufanoo mina asauku amiqinau.

<sup>11</sup> Amiqufanoo farisai amaana ufa qimarusa faqa Mooseena sandufa irimarusa faqa firaqoo aanoo qimasee Yisuna uneemaana qimasee ariranara randaqau.

*Yisufa qikunni ooqu qaara marasee fasiqa nifiqanau.*  
(Mat 10:1-4; Mak 3:13-19)

<sup>12</sup> Mi fasannai Yisufa innaaru qirara amuaqu namusa ooruree mi eendanaki innaaru saika imarufanoo iqaqanau.

<sup>13</sup> Iqaqoofanoo misaki rusandeesamumasee (12) qisaukuqara taikasee qikunni ooqu qaara marasee fasiqa nifiqaseenoo misa nuqu niqiqara fasiqauqee qinau.

<sup>14</sup> Misa nuqu moo Simoonafa moo auqu Peetooroofa faqa mina akaqa Andurufa faqa Yameesafa faqa Yoohaneefa faqa Firipifa faqa Baratooroomeeufa faqa,

<sup>15</sup> Mataioofa faqa Toomasifa faqa moo Yameesafa Arafaiusana amaaku faqa Simoona amarafa kaaqa nári kaamannara rimarufa faqa Yudasina amarafa Yameesana amaaku faqa moo Yudasifa

<sup>16</sup> Keerioota maqusaindaraafa kasooqaqee Yisuna uqeeqaaninafa faqa mariqau.

*Faiqi anaasee moomoosa Yisuna afaqee fiqau.*  
(Mat 4:23-25)

<sup>17</sup> Yisufa misa nifiqa quqaseenoo niqiqara fasiqauqee qimaseenoo mina ufa irimarusa moomoosa faqa amuaqu namusaaqari qumureenoo afaasai marufaqa faiqi anaasee moomoosa ani mariqau.

<sup>18</sup> Yisuna ufa iriananoo aurirafa taikaanifee qimasee Yudeeaa maqa maaqaindari faqa Yeerusaree maqusaindari faqa Tiree maqusaindari faqa Sidoona maqusaindari

faqa moomoosa aniree usufufanoo Yisufa ufa qimannimidanoo aurirana taikannisee marinau. Faafasaaqa naundurái marusauqa aniroofanoo afaqa niseemarinau.

<sup>19</sup> Anutuna afeeka fannoo Yisuna afaaqaindari fidanoo faiqí anaasee andeeqannisee marufaqa aiqamausa nisaukunnai Yisuna afaaqa auqamasoofanoo aurirafa taikanau.

*Yisufa asasirana oosana uqannifiqanau.*

*(Mat 5:1-12)*

<sup>20</sup> Yisufa narí faiqí namu nindafamasee qimanniminoo qináu.

Innee kudimariasaa Anutufa firaasasirana inni nimidanoo Anutuna innaaruna ququsa innindi maridanoommi.

<sup>21</sup> Innee maqee aandaroo narí marisa Anutufa asasirana inni nimidanoo Anutufa inni nimuquqirana nimiannoommi.

Innee maqee ikiraqee mariasaa Anutufa firaasasirana nimidanoo, Anutufa naanaidara qirana inni nimiannoo.

<sup>22</sup> Faiqí akaqausa faiqí nimaaku uqanna qinisaara inniara fidiqaa iqa nifeeqeeqa aasaandaana ufa faqa oosana oosana manda ufaqa faqa inni qima nimifanoo Anutufa firaasasirana inni nimiannoommi.

<sup>23</sup> Misa miqimmannimiqaifaqa innee minara asasammaseeqa idi raidaqa nasuriaqa, mina akiaqara innaarunai firaas qumiasana innindi afeediranaki maridanoommi, maasa qikeeku qikaaku ooqai maru tamummaqara fasiqara mi manda oosanna nimiusa maqee faqa miqí kai iqa inni faqa nimifaranoo.

*Yisufa noori runira oosanara qináu.*

<sup>24</sup> Innee maqee qumiasana faqaasaa mariasaa inni apurarafa firaafa mariannoo, innee adiafaaira marirafa doo aiqaraannoo.

<sup>25</sup> Innee maqee nimuquqirana imariasaa inni apurarafa firaafa mariannoo, inni aandaroo naruannoo, innee maqee naanaidara qimariasaa inni apurarafa firaafa mariannoo, innee noori runirafa faqa qikifaafau qirafa faqa mariannoo.

<sup>26</sup> Faiqí anaasee aiqamausa inni amiqí amiqira ufa qimannimi mariasaa faqa nimoqí mariasaa faqa inni apurarana firaana Anutufa nimiannoo ooqai maasa qikeeku qikaaku unnaqira tamummaqara fasiqauqara miqí kai idaqa nimoqimarufanoo Anutufa apurarana nimirana.

*Yisufa inneeqa namuqaara nimuqusinaqa ruaqa.*

*(Mat 5:38-48; 7:12)*

<sup>27</sup> Innee qini ufa irimariasaa qimannimidaqa innee inneeqa namuqaara nimuqusi marinaqa misara ruaqa, inniara nikooqee mariasaa amiqimmasee misara amiqí amiqimmannimaqaaqa.

<sup>28</sup> Inni niquraree mariasaa misa nimoqira ufa qimannimidaqa inni mandaikamma nimaqee mariasara Anutufa idaqaqamanisaanifeera innaaru qiaqa.

<sup>29</sup> Moo fannoo ani apaasaa arinana dinni faqa quandasainanoo aruani, faiqí moo fannoo ani saketa maree finana siuta faqa mina amia,

<sup>30</sup> Faiqí moo fannoo nana ainainaree ani iramirinana anee mina amia, moo fannoo ani ainaina ummuaramamaree finana sia kafaas oonu maraa.

<sup>31</sup> Anee nana oosanaree aididanoo fee faiqí anaasee ani amifaree, anee amiqira oosana kai qimiaqee qimariananoo. Doo anee naaree misa ani amira aidira oosana kai faiqí anaasee maqee maqee kaqi nimia.

<sup>32</sup> Faiqí anaasee aniara aidimariasara kai nidinanoo nanaree fifau Anutunara mina akiaqara qini qimiannoo fee, sia ani amiannoo manda oosana maree mariasaa naanna reemariananoo misa miqimmidadaqaa nariara nariara nididanoo.

<sup>33</sup> Ani amiqí amiqí imariasara kai amiqí amiqinanoo Anutufa mina akiaqara sia ani amiannoo, manda oosana maree mariasaa naanna reemariananoo misa miqí kai idaqa nariara nariara amiqí amiqidaqa.

<sup>34</sup> Ani amimariasaa kai ainaina nimirana Anutufa mina akiaqara sia ani amiannoo, anee miqinana sia manda oosana maree mariasaa urinnaqa reennaranoo misa kasoqaaqee mina akiaqara mina amana kai qimiaqee qimasee niminnaranoo.

<sup>35</sup> Innee sia misa naanna raqa, inneeqa namuqaara nimuqusi marinaqa misa amiqimmannimaqaaqa ufaasu ainainara innaaru qimariasaa nimiseeqa sia mina akiaqara nifu maqaaqa innee miqidaqa firaas uriqarara Anutuna faiqí namu marifaranoo mina akiaqara firaas qumiasana Anutufa inni nimaqaannoo. Anutufa miqí marifa manda oosana maree mariasaa faqa minara auni mariasaa faqa amiqí amiqimmannimaqee marifa maridanoo, innee mina aanna raqa.



<sup>36</sup> Inni nikoofa aiqamausara amuqusi marifanoo nifauaidanoo innee faqa miqi kai iqa faiqi anaaseera nimuqusinaqa nifauaaqa.

*Yisufa nimuqusiranara faqa afaariranara faqa qinau.*  
(Mat 7:1-5)

<sup>37</sup> Innee niqoonausa sia niqurara ufa nimiaga miqifanoo Anutufa inni faqa sia niquraraannoo, inneeqa niqoonausa kaukaata sia qimannimaqaaqa miqifanoo Anutufa inniara faqa sia kaukaata qiannoo, innee inneeqa niqoonausa inni mandaikamma nimaqee mariana minnisaifanoo Anutufa innindi faqa minnisaannoo.

<sup>38</sup> Innee faiqi anaasee kaqi nimifanoo Anutufa inni faqa kaqi nimiannoo, mifa firaqoo qumbiqasee rairaamasee inni nimiannoo, innee faiqi anaasee niminnandee kai maseenoo Anutufa inni faqa nimiannoo. Anee faiqi anaasee nimira oosana Anutufa qafamasee mi nimira oosanamau kai inni nimiannoo.

<sup>39</sup> Yisufa quandara ufa moo maaqi qimasee faiqi anaasee qimanniminu, afu dimbarafa sia amana aqoonnana afu dimbarana asaadakinoo aana fuannoo, afiqee fuani innana aiqamaqara madikaki aqufifaranoo.

<sup>40</sup> Akara maqaki keeqemari kumaaraafa sia amana nari uqafiqee marina uraaqaraanoo, akara maaqaki keeqarafa taikaseenoo mikari nari uqafiqeemari fasiqana amanasaa mariannoo.

<sup>41</sup> Yisufa kaqi qimannimidanoo qinau, anee nanaree aneenna akaqaafasaa afuki mari saqari araifa marifanee ufa qidanee. Mee ani afuki muduka saqari akatia marinara anee sia iridanee.

<sup>42</sup> Anee naqimasee aneenna akaqaafasaa mai anirainaqa mee ani afuki saqari arai marina maraqaunaree qidanee, ani afuki muduka saqari akatia maridanoo anee nikaru qimarianafa aneenna afuki naaree firaa saqari akatia marina maraquseenana andeeqasee afu maqeenana aneenna akaqaafasaa afuki kaqikaa saqari arai marina mara aqua. (Innee sia moo fannoo manda ainaina marainaqa aquraraaqa maqasaa fasiqa anaasee aiqamausa innisaimbaqaindi firaa saqari akatiara foora maridanoo.)

*Yisufa andeeqara oosanara saqari qaqama kikiqa usinau.*  
(Mat 7:16-20; 12:33-35)

<sup>43</sup> Amiqira saqari fannoo sia manda qaqama iraannoo, kafa minna dinni manda saqari fannoo sia amiqira qaqama iraannoo.

<sup>44</sup> Saqari qaqama fannoo saqari oosanara koorooinana anee irinnaranoo aiqama saqari qaqama irafinoo oosanara koorooidanoo. Anee naqi fee masee reereeroondaana sandasaaqaraana faafisa qaqama tiqinnaree sia minasaa iraannoo. Kaifaa naqi fee masee kaakuna sandasaa kamukamuna qaqama tiqinnaree sia minasaa iraannoo.

<sup>45</sup> Faiqi faqa saqari faqa moodaa karidaqa amiqira fasiqa fannoo nari amuqusakinaa amiqira afeediranakiqari amiqira ufa qimannimiannoo, manda fasiqa fannoo nari mandamuqasa afeediranakinaana manda ufa qimannimiannoo, faiqi nari amuqusakimari ainainara kai ufa qidanoo.

*Yisufa nari ufamau fimarusara maaqa kikiqa usinau.*  
(Mat 7:24-27)

<sup>46-47</sup> Innee nanaree qini Yisunara karaambaiqee karaambaiqee qidaqa qini ufa sia irida fee, faiqi moo fannoo qinee marunannai anireenoo qini ufa irimarifa mina oosana maaqimminoo marida.

<sup>48</sup> Mi fasiqafa maaqa akoona fooqaafa maridanoo, mi fasiqafa maqa amiqimasee meemaqoo indufuseenoo faakana oonisaa munduseenoo minasaa maaqa afeekaikamasee usakanau, nammari aufinoo mi maaqana arufanoo sia kasinau, faakana amiqimasee afeekaikinoo marinai.

<sup>49</sup> Faiqi moo fannoo qini ufa iriseenoo mimau sia finafa moo maqa akoofara maqi maridanoo mi furufarira fasiqafa aanda maqasaa maaqa usakeenoo sia faakana afeekaikinau, nammari aufinoo mi maaqana arufanoo rafauraki maqasaa aqufinoo firaqoo kurusinau.

## 7

*Saideena ainainira faiqi Yisufa andeeqanau.*  
(Mat 8:5-13)

<sup>1</sup> Yisufa mi ufausa aiqama faiqi anaasee qimannimiseenoo findimaqee Kapeeranaamma maqusai finau.

<sup>2</sup> Ooquroofanoo Roomma maqanna sundiaua uriqararana ainainira fasiqa kaaqa aidi maru fasiqafa kuqira aurira aurimarinau.

<sup>3</sup> Sundia uriqararafa Yisufa anunara iriseenoo Yuda maqannaa uriqararausa niqiqeenoo qinau.

<sup>4-5</sup> Innee oonuree Yisuna iramiriaqa mifa amanee mai aniree qini ainainira fasiqa andeeqaannoo fee qufaqa misa Yisufinnai oonuree reendeenamasee fuki faaki qiqau, maasa diqqaifasiqa Roomma maqannaa fasiqa kaaqa maasa Yuda maqannaara rimarifa amaana maqa maasa usakaqimufa ani dadaaqirana amana marifa amanee dadaaqinna-ree.

<sup>6-7</sup> Yisufa misa ufa iriseenoo eedoo qimaseenoo misa faqa sundia maaqai finau, aatata fiufufanoo maaqa adeedi ramasoofanoo mi fasiqafa nari aqoondiuga niqiqeenoo qinau, innee oonuree maaqi qimasee Yisuna qimamiaqa, oo uriqararafa anee fifau aiku rurina mai ani mariananoo, nanaree anee firaa uriqararafa mai aniree qini manda maaqaki keeqafinaqa qisauruanoora, qinee ani afusaa firanara faqa sia amanaikidaqa qinee oorudupirausa maridaqa.

<sup>8</sup> Qini uriqarara sundiauga moomoosa mariafaqa qinee misa nimeemaanai mari- daqa misa ufamau fidaqa, qini qimeemaanai moomoo sundiauga faqa mariafaqa qinee moonara fuannee qunanoo fidanoo moonara aniannee qunanoo anidanoo qeeqa ainainira fasiqara maa ainainna auqaa qunanoo auqaidanoo, anee Yisufa uriqararafa mariananoo anee miqooqari kai aurirafa taikaannee qinanoo qini ainainira fasiqa fannoo findifuaani.

<sup>9</sup> Misa mi ufana Yisuna qimamufanoo tautumaseenoo faiqi anaasee moomoosa mina faqa anusa quandaki qimanniminu. Maa Roomma maqannaa fasiqafa firaqqoo qini saqarikidanoo Isaraee maqannaa qeeqa maqannaasa maqusa maqusa nidaqa sia miqira amiqira fasiqa qafeeqa, aanaamuru maridanoommi.

<sup>10</sup> Miqi qufaqa misauqaindi niqiqoosa anirandee nariqa uriqararana maaqaki keeqafi qafoofofanoo mi fasiqana ainainira fasiqa findifinoo amiqimasee marinuu.

*Yisufa adeedaana anaasee amaaku kuqiranakinaana mara findifinuu.*

<sup>11-12</sup> Marikinoo Yisufa moo maqusai mina auqu Nainna maqusai nari faiqi namufaqa faiqi anaasee moomoosa mina faqa finau, maqusa naambeeqai oonuree qafoofofa mi maqusaanaasa faiqi kuqirana qaindusu maree akundarara ikifaafauna faqa anigau, adeedaana anaasee amaaku moodaa marufa kuqufufaqa faiqi anaasee moomoosa faqa mina anoofa faqa akundarara maree anufanoo Yisufa niqafoofofanoo firaqqoo amuq-ufanoo mina anoona qimaminoo qinuu. Sia ikiraqaqee qimaseenoo asaukunnoo oonu mi qaindana auqoofofa maree aniusa kasoofufanoo Yisufa kuqira kumaaraa qimaminuu.

<sup>13</sup> Oo maa kumaaraa qinee ani qimamidaqa doo findifua qufanoo mi kuqira ku- maaraafa rutaqinoo findifinoo ufa qinuu.

<sup>14-16</sup> Yisufa mina afiqamareenoo nari anoofinnai munaisoofaqa faiqi anaasee firaqqoo naaquqoofofa Anutuna amooqidaqa qiqau. Uriqarara tamummaqara fasiqa doo maasaki akooqoo kooroomafinoo maridanoo fee qufaqa akaqusa maaqi qiqau. Anutufa doo nari maqannaasa oooqi qimaqoo dadaaqianinafa doo ani maridanoo.

<sup>17</sup> Mi ufana Yisuna aufakiana fannoo miqooqari Yudeeaa maqa maaqaki mariasaki faqa mina atiqara mariasaki faqa fifaininuu.

*Nammari nimimaru Yoohaneena faiqi namu Yisuna irammiriqau.*

*(Mat 11:2-19)*

<sup>18</sup> Yoohaneefa nammari nimimaru faiqi namu Yisuna naaquqara aufakiana Yooha- neena qimamufanoo iriseenoo nari ainainira faiqi qaaraqanda naaramasee qimannimi- noo qinuu.

<sup>19</sup> Inneeqara karaambaiqinnai oonuree maaqi qimasee iramiriaqa qinee anianinna- nara qiafanafa anee mifee maridane moonaree rakisianauree, miqi qimasee qiman- nimisee niqiqoofofa miqanda Yisufinnai oonuree iramiriaqa qiqau.

<sup>20-21</sup> Yoohaneefa nammari nimimarufa maasa diqqaifafaqani iraidaqa mifa asuku mundirafa aniannoommifoo qimaqoofofa anee mifee maridane moonaree maasa rak- isianauree qufanoo, Yisufa mikari faiqi anaasee moomoosa aurimarusa faqa oosana oosana teeroo maree marusa faqa faafasaaqa naundurari marusa faqa nifu dimbarausa faqa andeeqanniseenoo Yoohaneena faiqiqara qimanniminoo qinuu.

<sup>22</sup> Inneeqara Yoohaneefinnai anirandee oonuree maqee maaqoo qafaida maria ainaina qinee Yisufa auqaunannara qimamiaqa, nifu dimbarausa maqanniseeqa niku eendi- rausa andeeqannisaunaqa nidaqa karoora narimarisa rukanniseeqa naaqoo aunirausa ruiqanniseeqa kuqirausa findifumanniseeqa, kudi fasiqa anaaseeqa amiqira fasaasa ufa innaarunaira qimannimiqa mi ainainausara oonuree aiqama Yoohaneena qimam- ifanoo mifa qiniara iriannoo, oooqi aniraree qimaqoofofa doo misamma ani maridaqa.

<sup>23</sup> Maa ufana faqa qimamiaqa, qiniara sia qaara irira irimariasa Anutufa اساسirana nimiannoo.

<sup>24</sup> Miqi qufaqa miqanda irisee fufanoo Yisufa faiqi anaasee moomoosa miqoo mariusa qimanniminoo qinau, Yoohaneefa nammari nimimarufa kaasau aadana maqa maaqanaki marufaqa innee mina ufa iriraree qimasee nana ainaina qafararee fee qimasee ooqu fi fee iqau, fifau andanda ufai fannoo kasimarina qafararee fee qimasee ooqu fi fee iqau. Yoohaneefa sia miqimarifa marinau.

<sup>25</sup> Innee nana qafararee fee qimasee ooqu fi fee iqau, faiqi moo amiqira qamunna afisimarina qafararee fee qimasee ooqu fi fee iqau. Yoohaneefa sia miqimarifa, amiqira qamunna afisimariasa sia kaasau maqa maaqaki maridaqa uriqarara karaambaiga maaqaki maridaqa.

<sup>26</sup> Innee Anutuna tamummaqara fasiqa qafararee fee qimasee ooqu fiqau. Eeoo innee tamummaqara fasiqa ooqu qafaqau, sia kaqi tamummaqara fasiqafau ooqu qafaqau, tamummaqara fasiqauqa uriqarafa marunara onu qafaqau.

<sup>27</sup> Ooqeennaa akaraki Yoohaneenara maaqi qimasee akara rinoo maridanoo. Iriaqa, qinee qini ufa qimannimianinafa ani oorinni aqiqaananoo ani oorinni fidanoo ani aana afisuannoo.

<sup>28</sup> Yoohaneenara miqi qimaqoofaqa qinee Yisusa minara maaqi qidaqa maa maqanasaa kambiqaosakiqari mifa uriqaranoo marifa maridanoo, mina dinni innaaruna ququsaki mariasa ureeqarausa misa Yoohaneena uriqararausa maridaqa.

<sup>29</sup> Faiqi anaasee kaiqeesa faqa ummuarimari takisa munnimmana maree mariasa faqa Yisuna ufa Yoohaneenara quna amiqimasee iriqau, misa ooqai Anutuna andeeqara ufamau fidaqa, Yoohaneefinnai nammari maree marusa maridaqa Yisuna ufa amiqimasee iriqau.

<sup>30</sup> Farisai amaana ufa qimariasa faqa Mooseena sandufasaa rakisirausa faqa misara Anutufa andeeqara aana naamua qufaqa misa rukiasee sia Yoohaneena nammari maroosa maridaqa Yisuna ufa faqa sia iriqau.

<sup>31-32</sup> Yisufa misara iriseenoo maaqi qimasee faiqi anaasee qimanniminoo qinau, maa fasannai mariasa nana fooqaasee maridee, misa faiqiuqa maqusa qambaana sararida mariasa fooqaasa maridaqa misa maaqi qimasee nari aqi nari aqidaqa maasa اساسira idi raunaqa innee sia dadaaqi idi ree mariafanoo maasa quandaki qiki anai fakiki raunaqa innee mina faqa sia dadaaqiafanoo innee furufari mariasa mariafanoo.

<sup>33</sup> Yoohaneefa nammari nimimarufa anireenoo uainna nammari sia nanau narana uqanna faqa sia nanau. Ookasaasa anoona faqa pandaqa oofaafana faqa kai noofaqa innee minara qafamasee afaanna aundurai keeqafifanoo miqidanoommifoo qiqau.

<sup>34</sup> Qinee faiqi nimaaku uqanna aniree uainna nammari faqa narana faqa naunaqa innee qiniara maa fasiqana qafaa kaaqa narana nammari namufaqa neemariifa maridanoo, ummuarimaria takisa munnimma maree mariasa faqa maasa qikooqaiqaq niqiqee mariasa faqa niqoondiki marifa maridanoo qiniara miqi mari fee qimariafanoo.

<sup>35</sup> Irirana faqaasa irira ufa kai qimariafaqa innee ufa qaara ufa qimariasa marianara innee irirana siaisa mariafanoo.

*Yisuna aikusaa fadameena adianau.*

<sup>36</sup> Farisai amaana ufa irimarufa moo fannoo narana suqaseenoo Yisuna aaramasee aniree qini maaqaki narana naannee qufanoo Yisufa eedoo qimaseenoo mina maaqaki keeqafinoo ooqu marifinoo narana neemarinau. (Mi aukuanna mi maqusaanaasa narana quqee maru qaindana qambaana marufaqa misa mina fiqumma taatata afuru faiqaqee idaqa narana nee mariqau. Niku uquseeqa faiqaqee nee mariqau.)

<sup>37</sup> Mi maqusanakiqari moo anaasee kisaaqasaa mandainaina maree marufa Yisufa Farisai amaana ufa irimaruna maaqaki narana neemaruunaki marufanoo mi anaaseefa minara iriseenoo amiqira afundimaru fadameenna idaaqira taquki maruna mareenoo minaki anireenoo Yisuna aanaaqiannai anireenoo mifa aiku uquqoonnai kikiqinau.

<sup>38</sup> Kikiqammafinoo qikiraqee marufanoo mina aukunu fannoo Yisuna aikusaa aqufufanoo nari akiqaqa asausi kisaaqannai mina aikusaaqarara aukunu rukaseenoo mina aiku amooqaseenoo afundi maru fadameena mi taqunakinaana mina aikusaa adianau.

<sup>39</sup> Farisai amaana ufa irimarufa Yisuna aaroofa mina qafamaseenoo nari aundurai kai Yisunara maaqi qimasee qimmirinau, maa fasiqafa kuqaa Anutuna tamummaqara fasiqa maridanooqau maa anaaseefa mina aiku amooqainara iriqini, mifa kisaaqasaa manda oosana maree marunara iriseenooqau qaoo qini.

<sup>40</sup> Yisufa mina irirana iriseenoo mina aaramasee qimaminoo qinau, Simoonna qinee moo ainainara ani qimamidaqa, Simoonafa iriseenoo qinau, eeoo ufasaa rakisirafa doo qinaqa iria qufanoo Yisufa qinau, faiqi moo fannoo moomoo munnimma faqaafa

maridanoo maqee maqee ufaasu munnimma akaqausa nimisaidanoo mina akiaqara faqa aabaa faqa maree marifa marinau. Mi fasiqafa faiqi qaaraqanda ufaasu munnimma niminau.

<sup>41</sup> Moo fasiqa 500 munnimma moomoo aminau, kafaa moo fasiqa 50 munnimma oodaa kai aminau, nimufaqa maraqa niniufaqa aukuana aiqaramafufaqa kaifaa mi munnimmana nari amiraree qimasee sia amanaikufanoo mi munnimmana akoofa iriseenoo miqandara amuqusufanoo mina akiaqara sia maranau minnisanau.

<sup>42</sup> Simoona anee miqandara nanee fee qidanee miqandakiqari yafee firaqoo mi munnimmana akoonara aidiannoo fee firaa munnimma aabaa maroo fee kaqikaa munnimma aabaa maroo fee.

<sup>43</sup> Simoonafa mina iriseenoo Yisuna qimaminoo qinau, abee firaa munnimma aabaa maroofa mifa kai minara aidiannoo fee qufanoo Yisufa qinau, anee andeeqasee qiananoo qimaseenoo quandafi mi manda anaaseefinnai oori ubeekamaseenoo qinau, Simoona anee maa anaaseena qafaidanee, qinee anoona ufa ani qimamidaqa maa anaaseena firaa mandainaina akiaqara doo minnisaunannara koorooidanoo firaqoo qiniara aidimari-fanoo amiqi amiqimmaqimaqaidanoo kaqikaa aaqarana akiaqara minni aisainafa minni aisainanoo mi kaqikaa aaqara fasiqafa kaqikaa qoo minni aisainna fasiqanara aidiannoo.

<sup>44</sup> Qinee ani maaqaki aniraunnana anee sia maasa oosana mareenana nammari-nai qiku nammari uqunanoo, maa anaaseefa nari aukununnai qini qiku nammari uquseenoo nari akiaqa asaasi kisaaqannai rukeenoo.

<sup>45</sup> Qinee ani maaqaki aniraunnana anee sia maasa oosana mareenana qimooqaananoo maa anaaseefa aniree qini qiku qimooqaifa maridanoo.

<sup>46</sup> Qinee aniraunnana anee sia maasa oosana mareenana makaqa anoona qikiaqaki adiaananoo maa anaaseefa amiqira afundimaru makaqa anoona qini qikusaa adiaifanoo qikusaa adiaqimaqeenoo.

<sup>47</sup> Ani kaqikaa mandainaina akiaqara sia rukaananoo sia qiniara aidinana sia amiqi amiqimma qimaqaananoo maa anaaseena firaa mandainaina tia rukaunanoo firaqoo qiniara aidifanoo amiqi amiqimmaqimaqaidanoo.

<sup>48</sup> Yisufa miqi qimaseenoo quandafi mi anaaseena qimaminoo qinau, Oo anaasee ani mandainaina akiaqara arirana doo qinee minni aiseeqa qufaqa akaqausa miqoo mariusa nariqa naundurairi qimirigau.

<sup>49</sup> Maana yafasiqa fee nariara faiqi mandainaina akiaqara arirana minnisee marunau-see qidanoo fee.

<sup>50</sup> Yisufa mi anaaseena kafaa qimaminoo qinau, oo maa anaasee anee aneenna aunduraindari qinisaa rusimarianafa mifa kai ani innaarunai marira asumu aminoo doo asoaranaki fua.

## 8

### *Anaaseeuqa Yisuna dadaaqiqau.*

<sup>1</sup> Kaqikaaqoo marikinoo Yisufa kaqikaa maqusakiaqa faqa firaa maqusakiaqa faqa oonuree aniree inoo nidanoo Anutuna innaaruna ququsara amiqira fasaasa ufa qiman-niminoo ninau. Mina faiqi namu qisaukuqara taikasee qikunnooqu qaara marasee fasiqa faqa anaasee akaqausa faqa mina faqa fiqau.

<sup>2</sup> Sia fifau aanaaseeuqa mina faqa fiqau. Yisufa aurirana taikannisoosa faqa faafasaqa faqaasa maraqunnisoo anaaseesa kai mina faqa fidaqa nariqa narana faqa munnimma faqa minannai Yisuna faqa mina faqi namufaqa fidaqa dadaaqimariqau.

<sup>3</sup> Mi anaaseesa nuqu Yisuna anoona amarafa Mariafa Makadara maqusaindaraafa Yisufa mina aundurakinaana dinni qisauku taikasee dinni ani qaaraqanda faafasaqa nifaqoofa faqa moo anaasee Eeroodeena maqasaa rakisirana Tusaana anaqa mina auqu Yooanna nammari faqa moo anaasee Susaanna nammari faqa moomoo aanaaseeuqa mina faqa fiqau.

### *Qaqama aaqee maruna kikiqa usirana.*

*(Mat 13:1-9; Mak 4:1-9)*

<sup>4</sup> Yisufa fimarufaqa faiqi anaasee aiqamaindari moomoosa ani usufufanoo Yisufa quqandara ufa qimanniminoo qinau.

<sup>5</sup> Innee amiqimasee iriaqa faiqi moo fannoo maasa Yuda maqannaasa oosana mareenoo maqa rumaseenoo raisa fooqaana ummaqirara mina qaqama marasee minaki aaqasoofanoo ururanau. Mifa miqoo aaqaidanoo akaqa qaqama fannoo aatata niku ree mariaqoo faqa aqufufaqa ufniyuqa aniree mina kai namasaqau. <sup>6</sup> Akaqafa ooni amuaaqa maqa oodaa marunasaa aqufufanoo kambiqeenoo dauni aadanusinai, maqa afeekasaa nammari siainasaa kambiqeenoo aadanusinai.

<sup>7</sup> Akaqafa reereeroondaana marunaki aqufufanoo reereeroondaana namufaqa kambigoofoanoo reereeroondaana fannoo rafaqaqafu fufanoo aadanusinau.

<sup>8</sup> Akaqafa amiqira maqasaa aqufinoo firaafa kambiqeenoo qaqama moomoo uqanna iranau, Yisufa kafa qimanniminoo qinau, naaqoo faqaasa amiqimasee qini ufa iriaqa.

(Mi aukuanna mi maqannaasa kaqikaa ainaina qaqama raisa fooqaana neemariqau, mina auqu uita, misa maqa rumasee nisaukunnoo mi qaqamana afaqa qumaraida aaqasoofoanoo kambiqee marinau, qaqama irafufaqa atEEKamaree munusee aindirumasee feemu uqusaidaqa neemariqau. Misaindi uita, raisa fooqaafa maasaindi sakuma maridanoo.)

*Yisufa quandara ufa faiqi anaasee qimanniminau.*

*(Mat 13:10-17; Mak 4:10-12)*

<sup>9</sup> Yisufa faiqi anaasee qimannimufaqa mina faiqi namu nariqa kai iramiriqa qiqau, sakuma fooqaana qaqamara quandara ufa qimannimiannana mina oosana maasa sia iridaqa qimaqiminaqa iria.

<sup>10</sup> Yisufa iriseenoo qinau, Anutuna ququsakinaa qumee irirana Anutufa inniara qimannimianee qinau, faiqi anaasee sia kooroomasee qimannimia quandasee qimanniminaqa nifu qafamasee sia paqurifara naaqoonnai irisee sia naundurai quqee fara.

*Qaqama aaqee maru ufana oosana kooroo inau.*

*(Mat 13:18-23; Mak 4:13-20)*

<sup>11</sup> Raisa fooqaana qaqamasaa quandara ufa oosana maaqimminoo maridanoo, raisa fooqaana qaqama Anutuna ufa maridanoo.

<sup>12</sup> Raisa qaqama niku reemariaqoo aqufifa maaqimmidanoo, Anutuna ufa irisaafanoo manda afaanna fannoo misa naunduraindaraana ufiniarafoo ani namammaree fifaqa qini saqarikirana faqa asumu mariranasaa faqa ititaanifeera.

<sup>13</sup> Raisa qaqama ooni amuaaqa maqasaa aqufifa maaqimmidanoo, faiqi anaasee akaqausa Anutuna ufa irisee sia naundurai meemaqoo iriaraasidaqa aaqee kai irisee nimanamasee qafara aukwana kambiqafifaqa misa minnisaidaqa.

<sup>14</sup> Raisa qaqama amuka faqaa ainainaki aqufifa maaqimmidanoo, faiqi anaasee akaqausa Anutuna ufa iriseeqa maqasaa adiafaaimari ainainara faqa oosana oosana qumiasana faqa munnimma maree mariana faqa ummaara narimari ainaina faqa amuka faqaa ainainara foora minasaa kukuqammafinoo radamifanoo adusa qaqama iraidanoo.

<sup>15</sup> Raisa qaqama amiqira maqasaa aqufifa maaqimmidanoo, faiqi anaasee akaqausa Anutuna ufa irisee qumareeqa nari amiqira nimuqusaki ufa irisee eedoo qiranaki quqasee minaki maqeeiafanoo mariifa qaqama iraidanoo. Faiqi moo fannoo Anutuna ufa iriseenoo faiqi anaasee qimannimidanoo nari marirana faqa kooroo imarifa qaqama iraidanoo.

*Yisufa quandara ufa qooma kikiqa usinau.*

*(Mak 4:21-25)*

<sup>16-17</sup> Yisufa kafa qimannimidanoo qinau, faiqi moo fannoo qooma qumbiseenoo sia difaaninnai rafaqa fuannoo, sia beeta ameemaanai quqaidanoo, faiqi anaasee mina maaqaki keeqafifa amiqimasee qafaqaqee qimasee qaindasaa diridanoo. Kasooqaqee faqa aiqama kukeeqara ainaina Anutufa kooroo iannoo aiqama rafaqaqafira ainaina faqa Anutufa paqurimasee mareeqee akooqoo quqaannoo.

<sup>18</sup> Innee Anutuna ufa irimariasaa amiqimasee irisee maraqa aiqama kaqikaa irirainaina faqaasa Anutufa moo faqa nimianoo, irirainaina siaisa ati marina Anutufa rafifa mara marinaqa kaqi marifaranoo. Innee minara Anutuna ufa iriseeqa rakisi qumaraaqa.

*Yisufa nari anoona uqanna kikiqammusinau.*

*(Mat 12:46-50; Mak 3:31-35)*

<sup>19</sup> Yisufa miqoo faiqi anaasee qimannimimarufaqa mina anoofa faqa mina ainaina faqa aniree Yisuna faqa ufa qiraree qimasee qafoofoanoo faiqi anaasee moomoo maaqaki umbiqafufaqa sia amana keeqaqau.

<sup>20</sup> Faiqi moo fannoo mina qafamasee Yisuna qimaminau, ani anoofa faqa ani akaqaafasaa uqa faqa misa ani faqa ufa qiraree qimasee madaana kikiqifa maridammia.

<sup>21</sup> Yisufa mina iriseenoo aiqamausa qimanniminau, Anutuna ufa irisee eedoo qimasee mi mau mariasaa misa qini qinaukoo qikaqaafasaa uqanna mariafanoo.

*Yisufa nammari faqa ufai faqa qaoo qufanoo kasoomminau.*

*(Mat 8:23-27; Mak 4:35-41)*

<sup>22</sup> Moo kari Yisufa nari faiqi namufaqa nammari afainni noodaanna reemaru kanuqanaki akaramafinoo qimanniminu, innisaimbaqa maa nammariina muqu afainai nianai fuanaura miqi qufaqa misauqa aikannai furufanoo kanuqa fannoo finau.

<sup>23</sup> Misa fimarufanoo Yisufa kanuqaki faiqaqee marinau, faiqaqee marufanoo ufai firaafa uqufanoo nammari amakaurinoo nammari fannoo kanuqaki qumbiqeenoo ukuqnaaqaa ufaqa rufiee mariqau.

<sup>24</sup> Yisuna faiqi namu Yisufinnai oonuree afauriqa qiqau, oo uriqararafa, uriqararafa, maasa doo ukuqnaidaqa kuqirarammidagee qufanoo Yisufa findifinoo ufaira faqa nammariara faqa qaoo qufanoo kasooinoo firaqoo dai qimafinau.

<sup>25</sup> Miqi qimaseenoo Yisufa quandafi nari faiqi namu niqinoo qinau, innee qini saqarikirana yai fee quqee fee sia marifaqa rufiee mariafanoo qufaqa misa aiqamausa naaquqoofaqa rufiadaqa nari qimami nari qimami qidaqa qiqau. Maana yafasiqa fee maridanoo mifa ufaira faqa nammari amakauriranara faqa qimannimifaqa mina ufa irisee eedoo qimasee kasoomafia.

*Faiqi aundurakinaa afaannauqa kuaraki fiqau.*

*(Mat 8:28-34; Mak 5:1-20)*

<sup>26</sup> Misa miqooqari kanuqaki nammari amuaqumau fiufuqa muqafainai nianai Keerasa maqannaasa maruqoo oonuraquraminu, mi maqannaasa Kariree maqa maaqa dinni atinai mariqau.

<sup>27</sup> Yisufa kanuqakiqari maqasaa aqufufanoo faiqi moo fannoo faafasaaqa mina aundurai marufa aniranau, mi fasiqafa kisaagasaa kaqisamu nimirinai, sia nari maaqai marufa faiqi madikai marufa aniranau.

<sup>28-29</sup> Faiqi anaasee moomoo kari sainnadannai mi fasiqana aiku asauku rumba-soofanoo faafasaaqa fannoo mi fasiqana afeekaikufanoo mi sainandana rakeema-soofanoo sandeenoo kaasau aadana maqa maaqai fimarinau. Mi fasiqafa Yisuna qafama-soofanoo faafasaaqa afaanna mina aundurai marufa faaqarinu. Yisufa mi faafasaaqana aqigaaninnanara iriseenoo faaga rumasee Yisuna oorinni maqasaa aqufinoo aranaiqi qimaminu, Yisu anee firaqoo uriqarara Anutuna amaaku marianaroo anee nanaree maasa soodaa idanee, qinee firaqoo ani iraidaqa, sia qini ambufuqa.

<sup>30</sup> Yisufa mi faafasaaqana iramirinoo qinai, ani auqu yafee qufanoo mi faafasaaqafa qinai, maasa moomoosa maa fasiqana aundurai marunaua marunnanara maasa duqu qusirausee qidaqa.

<sup>31-33</sup> Miqi qimasee Yisuna aranaiqi iramiriqa qiqau, anee sia maasa idaki niqiqaa qimasee qafoofoanoo ameemai kuarauqa andanda naidaqa marufaqa Yisunara afeekaikiqa qiqau amanee maasa kuarauqa naundurai keeqaanauree qufanoo Yisufa doo fuagee qufaqa mi fasiqana aundurakiqari raudamaki kuarauqa naunduraki keeqafuqa mi kuaraua tautumaki ameemindari sandaqa nammari afainni ooquree rafusaki nammariki aqufiqa ukuqnamafiqa kuqu taikaqau.

<sup>34</sup> Kuarasaa rakisimarusa mina qafeeqa sandee ooruree maqusai marusa faqa uigaana maaqakiqa marusa faqa qimannimiqi fiqau.

<sup>35</sup> Faiqi anaasee moomoosa maasa faqa qafararee qimasee Yisufinnai nammari afainni sandee ooqu fiqau, ooquree qafoofoanoo faafasaaqauqa aundurakiqari fifu fasiqafa irirana maraseenoo gamunna rumbaseenoo Yisuna aikuki ooqufaaqee marufaqa qafoofoanoo naaquqanau.

<sup>36-37</sup> Keerakeeseenee maqannaasa maqusauqakiqari moomoosa suqumaree aniroofanoo Yisufa faafasaaqauqa niqiqoofaqa qafeeusa misauqa qimannimufaqa iriseeqa firaqoo naaquqoofaqa Yisuna ireeda kai ireeda kai fuki faaki qida irammiriqa qiqau, amanee anee maaqooqari moosaa finnaree qufanoo Yisufa kanuqaki akaramafinoo mootinai finau.

<sup>38-39</sup> Yisufa firarufanoo faafasaaqa aundurai mariu fasiqafa Yisuna aranaiqi irammirinoo qinai, amanee qinee ani faqa fuanaree qimasee fuki faaki qufanoo Yisufa mina aqiqeenoo qinai, aneenna maaqai oonuree Anutufa ani andeeqainara misa qimannimia miqi qufanoo mi fasiqafa nari maqusai oonureenoo Yisufa mina andeeqoonara aiqamai qimanniminoo ninai.

*Kisaqaqandaikimaru anaaseefa Yisuna qamunna auqanau.*

*(Mat 9:18-26; Mak 5:21-43)*

<sup>40-42</sup> Yisufa anirandee kafaannai oonuroofaqa faiqi anaasee moomoosa minara rakisida mariusa asasammasee Yisuna aqiaqau, Yisufa kanuqakiqari maqai aqufufanoo miqoo amaana maqasaa rakisirafa mina auqu Iairusafa anireenoo Yisuna aikuki maqasaa aqufinoo aranaiqi iramirinoo qinai, amanee anee qini maaqai aniree dadaaqia, qini qiraamuna moodaa qisaukuqara taikasee qikunni ooqu qaara aukuaana kai marasaifa

kuqiraridanoo. Yisufa eedoo qimasee fimarufaqa faiqí anaasee moomoosa fidaqa nari afeeqee nari afeeqee idaqa Yisuna faqa fiqau.

<sup>43</sup> Anaasee moo fannoo qisauku taikasee qikunni ooqu qaaraqanda aukuana kisaagandaiki marufa tutaqausa moomoosa feefauru masaida mareemaru marasinna amufanoo sia taikanau, miqi marufanoo mina munnimma taikafufanoo kaqi marinau.

<sup>44</sup> Yisufa faiqí anaasee namufaqa fimarufanoo mi anaaseefa Yisuna aanaaqiannai moomoosa ititafunakiqa aniree qumee kai mina qamunna ati qumee auqamasoofanoo mina kisaagandaikirafa aqee uqanna taikanau.

<sup>45</sup> Yisufa irammirinoo qinau, yafee qini duqeenoo fee qufaqa aiqamausa qaoo qufanoo Peetooroofa qinau, uriqararafa faiqí anaasee moomoosa ani afeeqaidammia qufanoo Yisufa kafaa qinau,

<sup>46</sup> Moo fannoo qini duqai fanoo faiqí andeeqara afeeka qinikiqari fifaqa iriqammunani qinau.

<sup>47</sup> Miqi qufanoo mi anaaseefa oo doo qini qiqafeenoommifoo qimaseenoo aindiri aindiri ufanoo Yisuna aikuki maqasaa aqufinoo aiqamausa nifusaa nari auriranara faqa mina qamunna auqoonara faqa aurirafa aqee kai taikoonara faqa kooroo inau.

<sup>48</sup> Yisufa mina ufa iriseenoo qinau, oo qini qiraamuna anee irirana qinisaa rusiannara ani aurirafa taikleenoo, doo asoaranaki fua.

*Yisufa Iairusana araanuna andeeqanau.*

<sup>49</sup> Yisufa miqi qimasee mi anaaseena qimamimarufanoo amaana maqasaa rakisirana maaqaindari faiqí moo fannoo anireenoo Iairusana qimaminau, anee Yisuna sia kadaapi amia, ani araanuna doo kuqufinoo.

<sup>50</sup> Yisufa mina iriseenoo Yairusana qimaminau Iairusa anee sia rufaa, qinisaa kai ani irirana mundinanoo ani araanuna amanai kiannoo.

<sup>51</sup> Yisufa Yairusana maaqai onureenoo aiqamausa keeqararufanoo qaoo qimaseenoo Peetooroona faqa Yoohaneena faqa Yameesana faqa mi manaaqana anoona akoona faqa minamusa kai nifiqeenoo maaqaki keeqanau.

<sup>52-53</sup> Keeqafufanoo niqafuofaqa mi maqanaki moomoosa maridaqa ikifaafau qimarufanoo Yisufa qimanniminau, Sia ikiraqaaqa maanaqa sia kuqinoo faiqaqee maridanoo qufaqa aiqamausa mi manaaqanara kuqaa kuqinoo fee qimasee Yisunara naanaidaraqiqqa uteeti qiqaau.

<sup>54</sup> Yisufa mi manaaqafa rinoo marunnai onureenoo mina asauku qumareenoo qimaminau, qini qiraamuna findi fua.

<sup>55</sup> Miqi qufanoo aunduraindaraafa onurandee ani keeqafufanoo aqee uqanna findifufanoo Yisufa mina anaukoo qimanniminoo qinau, narana ani araanuna amiaqee qufaqa amufanoo nanau.

<sup>56</sup> Mina anaukoo firaqoo naaquqoofanoo Yisufa qimanniminau. Sia uqanna maa ainainnara moona qimamiaqa, kukeeqaaqa.

**9**

*Yisufa nari faiqi namu niqiqoofaqa innaarunaira qimannimiqaau.*

*(Mat 10:5-15; Mak 6:7-13)*

<sup>1</sup> Yisufa nari faiqi namu (12) qisaukuqara taikasee qikunni ooqu qaara marasee naarama moodaaqoo quqaseenoo Anutuna afeeka faafasaaqa afaqara afeeka faqa aurirana oosana oosana taikara afeeka faqa niminau.

<sup>2-3</sup> Nimiseenoo maaqanna maaqanna niqiqamaseenoo qimanniminau, innee Anutuna innaaruna ququsara faiqí anaasee qimannimidaqa misa aurirana taika nimaqaaqa, innee sia moo ainaina maree fuaqa saunu faqa aakauqa faqa narana faqa munnimma faqa aabaa qamunna faqa sia maree fuaqa kaqi fuaqa.

<sup>4</sup> Maqusaki onurafaqa moo fannoo aqoondi kamannisainaqa mina maaqaki kai mariiqa minakiqari kai fuaqa.

<sup>5</sup> Yamaqusanaasee inniara qaoo qifaqa Anutufa naruaninnanara aaquqimanni-maqasee kookoomma afaqa ninaamarasee fuaqa.

<sup>6</sup> Yisuna faiqí namu maqusa maqusa fidaqa amiqira fasaasa ufa faiqí anaasee qimannimisaidaqa aiqamai aurusa faqa taikannisee mariqau.

*Eeroodeefa Yisunara Yoohaneefee qinau.*

*(Mat 14:1-12; Mak 6:14-29)*

<sup>7</sup> Eeroodeefa Kariree maqa maaqaki uriqarara kiapafa mi ainainnara iriseenoo firaqoo randeenoo furufarinau. Akaqausa qiqaau, Yoohaneefa nammari nimimarufa

Eeroodeefa arusoofa kuqiranakiqari findifinoo mi naaquqara ainainna auqaidanoommi maqi qufanoo Eeroodeefa mi ufana iriseenoo randanau.

<sup>8</sup> Ooqeenaa tamummaqara fasiqauqakiqari Eeriaa fee moo fannoo fee kafaa findi finoo fee akaqausa qufanoo Eeroodeefa qinau,

<sup>9</sup> Yoohaneefa nammari nimimaruna akiaqa qinee atekasaafananoo kuqinoo maridanoo. Maa fasiqafa Yisuna oosana oosana ainainara iridaqa mina yafee maridanoo. Miqi qimaseenoo Eeroodeefa Yisuna qafarara randanau.

*Yisufa noodaanna faqa feemu faqa moomoosa niminau.*

*(Mat 14:13-21; Mak 6:30-44; Yoh 6:1-14)*

<sup>10</sup> Yisuna faiqi namu maqusa maqusa niniufaqa anireeqa nariqa nidaqa auqoo ainainara Yisuna qimamiqau. Yisufa misa nifiqeenoo faiqi sia marunnai Beetasaida maqusa aqa fiqau.

<sup>11</sup> Faiqi anaasee moomoosa iriseeqa afaqee minni oonu paquriqau. Yisufa misa naaramaseenoo Anutuna innaaruna ququsara qimannimiseenoo misaki aurusa andeegannisanau.

<sup>12</sup> Eenoofaqa Yisuna faiqi namu qisaukuqara taikasee qikunni ooqu qaaraqanda marasee aniree Yisuna qimamidaqa qiqau, anee faiqi anaasee niqiqainaqa maqusa maqusa uqaana maqakiaqa fifainidaqa narana feefaurumasee naaqa, maana faiqi sia mariasaqa maridaqa.

<sup>13</sup> Miqi qufanoo Yisufa qimanniminau, inneeqa kai narana nimifaqa naaqa, qufaqa misa qiqau, Maasa feemu moodaannai qisauku faqa noodaanna qaaraqanda faqa maqeeidaqa, faiqi anaasee moomoosa uqanna maridaqa amanee maasa situuqai oonuree narana moomoo feeraurianauree.

<sup>14-15</sup> Miqi qufanoo Yisufa nari faiqi namu qimanniminoonoo, innee faiqi anaasee qimannimifaqa raina raina mafi qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa kafaa qaara faqa qaara faqa fasiqa niku nisauku taikasee qisaukuqara faqa (50) moosaqa ooqu mariaqa miqi kai mafi ooqumari maree fuaqa qufaqa mina faiqi namu qimannimifaqa faiqi anaasee miqi mafi ooqumari maree fiqau. Misakiqari faiqi kai (5,000) faifa tauseenna mariqau, ooni saqari auqiaqa mariqau.

<sup>16</sup> Ooqu mari fufanoo Yisufa feemu moodaannai qisauku faqa noodaanna qaaraqanda faqa qumareenoo innaarunai oori uqeeraseenoo Anutufinnai dufi dufi qimasee asaukunoo feemu faqa noodaanna faqa ruqi ruqimasee nari faiqi namusaa soofaqa misa qumareeqa faiqi anaasee nimiqaau.

<sup>17</sup> Nimufaqa noofanoo nimuafuqaqara ataraasa minnisooofaqa Yisuna faiqi namu minauqa suqusee uqaki rufanoo qisaukuqara taikasee qikunni ooqu qaaraqanda (12) uqa qumbiqanau.

*Peetooroofa Yisunara Anutuna asauku mundiranara qinau. Yisufa nari kuquaninnanara qimanniminau.*

*(Mat 16:13-28; Mak 8:27-9:1)*

<sup>18-19</sup> Moo kari Yisufa nariara oonuree innaaru qimarufafaqqa mina faiqi namu oonuroofanoo irammirinoonoo qinau, faiqi anaasee qiniara nana fasiqa fee qidee qufaqa misa qiqau, akaqausa Yoohaneefa nammari nimimarufa kuqiranakiqari findifinoo fee qidaqa, akaqausa aniara ooqai kuqufufa Eeriaafa findifinoo fee qidaqa, akaqausa Anutuna ooqeenaa tamummaqara fasiqauqakiqari moo fannoo kuqiranakiqari findi finoo fee qidaqa.

<sup>20-22</sup> Yisufa mina iriseenoo irammirinoonoo qinau misa miqi qiafaqa innee qiniara nanee fee qidee qufanoo Peetooroofa qinau, anee Anutuna asauku mundirafa mariananoommi qufanoo Yisufa aranaifi qimanniminau innee mi ufana sia moo fasiqa qimamiqa qinee faiqi nimaaku uqanna marunausa marianaqa faiqi firaasa faqa Anutuna aanaiqikirausa uriqararausa faqa Mooseena sandufasaa rakisirausa faqa firaqa aupurarana qimiseeqa qiniara nikoqamasee kuqa darusaifaqa qaaramoo faasaana aiqarainanoonoo Anutufa qini mara findifu masee kuqi marirana qimiannoo.

<sup>23</sup> Yisufa quandaki aiqamausa qimannimidanoonoo qinau, faiqi moo fannoo qini faqa firaree qimasee qini ufamau finafa nari marirana minniseenoo faasaambaasaana qini ufasaara kuqa dariranara amanakidee qinafa qini faqa fidanoora foora qini ufamau fuannoo.

<sup>24</sup> Qinee minara maaqi qimasee qimannimidaqa. Faiqi moo fannoo qinisaara kuqiranara amuqusi marinanoo nari marirana afeedi inafa mifa nari marirana kakasiannoo. Moo fannoo qiniara nari marirana maaqoo minnisainafa nari marirana asumu maraanoo.



<sup>25</sup> Faiqí moo fannoo maa maqanasaa uriqarara faikamafinoo aigama ainaina maqee idanoo mari inafa marikinoo kuqinoo narí aunduraindaraana kuridiranaki finanoo mi qumiasanafa fifau kadaapirumasee maroofa mariannoo.

<sup>26</sup> Faiqí anaasee moo fannoo qiniara faqa qini ufara faqa faiqí nifusaa asaurusee akooqainafa marinaga qinee faiqí nimaaku naaru inaarunaindari qeeqa areenarana faqa qeeqa qikoona areenarana faqa naaquqara andeeqara qangiroouqa faqa misa areenarana faqa minauqa namuufaqa qumureeqa mi fasiqa anaaseesara faqa qisaurusee qikooqaannoo.

<sup>27</sup> Innee maa ainainnara faqa iriaqa innee maqee mariasakiqari akaqausa sia kuqirai kaqimarifanoo Anutuna innaarunaindaraa ququsa qafeefaranoo.

*Aaqanasaa Yisufa innaaruna afiri maranau.*

*(Mat 17:1-8; Mak 9:2-8)*

<sup>28</sup> Yisufa mi ufana qimannimiseenoo dinni qisauku taikasee dinni ani qaaramoo faasaana aiqaroofanoo Yisufa Peetooroona faqa Yoohaneena faqa Yameesana faqa nifqeenoo moo aaqanai innaaru qirara ooru fiqau. Yisufa nariara innaaru qimarufaqa mina faiqí namu kaqi faiqaqee ufanoo.

<sup>29-31</sup> Yisufa miqoo innaaru qidanoo moo oori afiri maroofanoo mina qamunna kaaqa eekara rinoo nifu daroodaraa inau. Qaara fasiqa tautumaki kooroomafufaqa Yisuna faqa ufa qimariqau. Miqanda Moosesa Eeriaasa oofai kuquqanda tautumaki miqoo maqasaa misa nifusaa innaaruna areenaranaki kooroomafiqa Yisufa qusasaa Anutuna ufamau finoo Yeerusaree maqusai kuquaninnanara Yisuna faqa ufa qimariqau.

<sup>32</sup> Peetooroofa narí faqa maruqanda faqa faiqaqee mariufanoo findifiqa Yisuna kaaqa qarana faqa mi fasiqaqanda faqa niqa fee mariqau.

<sup>33</sup> Mi fasiqaqanda Yisuna aisee firarufanoo Peetooroofa narí oosana sia irirai Yisuna qimaminoo qinau. Ufasaa rakisirafa, maasa maaqoo marunanoo amiqidanoo. Maasa qaaramoo uigaana maaqoo usakaanaura, aniara moo Moosenara moo Eeriaa-nara moo usakaanaura.

<sup>34-35</sup> Peetooroofa kaqi ufa qimarufanoo oonamu fannoo anireenoo misa ititannimaqa-soofaqa rufiaqau. Rufioofanoo oonamukiqari ufa moo maaqi qinau. Maana qini qimaaku maridanoo qinee rusandeesamumasee maraafanafa, innee mina ufa kai iriaqa.

<sup>36</sup> Mi ufafa taikafufanoo misa qafoofanoo Yisufa nariara kai miqoo marinau. Miqooqari Yisuna faiqí namu miqoo mariusa mi ainainna qafoonara sia uqanna kooroo iqau. Kaaqa umeeraqau.

*Yisufa kumaaraa aundurai afaanna maruna aqiqanau.*

*(Mat 17:14-18; Mak 9:14-27)*

<sup>37-38</sup> Faiqee iqaqoofaqa minamusa aqanasaaqari ooquroofaqa faiqí anaasee moomoosa Yisuna ani paqurimasooofanoo misakiqari faiqí moo fannoo faaqa rumasee Yisuna qimaminoo qinau. Ufasaa rakisirafa qinee qeeqa qimuqusannai ani irammiridaqa anee anireenana qini qimaaku moodaa kai maqaqaunnana qafaa.

<sup>39-40</sup> Faafasaaqa moo fannoo maqee maqee faaqa rumasee mina aakufifanoo rafusee-qee maqasaa aqusaifanoo teendaarooni marifanoo ookiqari qaqaara faka fakidanoo, maqee maqee miqidanoo sia adooaidanoo. Qinee ani faiqí namu maaqoo mariasasaa qeeqa qimuqusannai irammirunaqa amaniafanoo sia amana afaqee.

<sup>41-42</sup> Yisufa iriseenoo qimaminau, innee qini ufara sia anonee qimariasa kaqi runna fimariasa mariafanoo. Qinee kisaqaqasaa fee inni faqa marianauree kisaqaqasaa fee inni ummaarara foora akuqeeqee ianauree. Miqi qimasee mi fasiqana qimaminau, aneenna amaaku maree mai ania qufanoo mi kumaaraafa ani marufanoo faafasaaqa fannoo mina arurutukueqeenoo maqasaa aqusoofanoo teendaarooninoo qaqaara faka fakinau. Yisufa mi faafasaaqana amambaina qufanoo fifufanoo Yisufa mi faiqina andeeqaseenoo narí akoona kafaa aminau.

<sup>43</sup> Faiqí anaasee mina qafamasee Anutuna naaquqara afeeka qafamasee rufiaqau.

*Yisufa narí kuquaninnanara kafaa qimanniminau.*

*(Mat 17:22-23; Mak 9:30-32,44-45)*

<sup>44-45</sup> Faiqí anaasee Yisufa auqoo ainainara naaquqoofaqa narí qimami narí qimami masooofanoo, Yisufa quandaki narí faiqí namu qimanniminoo qinau, innee maa qimannimianaqa sia aunuaqa amiqimasee iriaqa. Qinee faiqí nimaaku uqanna Anutufa qini mareeqee faiqí faiqí nisaukuki quqaqisainaga darifaranoo fee qufaqa sia mi ufana oosana iriqau, Anutufa misa irirana ititasooofaqa sia iriqau, Yisuna irammirianee rusia minnisaqau.

*Yisuna faiqi namuki yafee uriqararafa maridanoo fee qiqau.*

*(Mat 18:1-5; Mak 9:33-37)*

<sup>46</sup> Moo kari Yisuna faiqi namu maasakiqari yafee uriqararafa maridanoo qimasee narinni narinni ufa rainaqaau.

<sup>47-48</sup> Yisufa narikai misa ufa iriseenoo akooqoofanoo faiqi aanaaqi moo maraseenoo nari aqa kikiqamasee mina kikiqa ususeenoo nari faiqi namu qimannimainau. Yafee moo fannoo qiniara irisee maa kaqikaa faiqina oonudupirana oonu asasammasee amiqi amiqimma aisainafa qini uqanna qiqoondikidanoo, kafaa yafee moo fannoo qini oonu asasammasee qiqoondikinafa qini diqiqoona Anutuna aqoondikidanoo. Innikiqari oorudupirafa mifa inni uriqararafa maridanoo.

*Moo fannoo Yisuna auqusa faafasaaqa aqiqanau.*

*(Mak 9:38-40)*

<sup>49</sup> Yoohaneefa mi ufana akiqara Yisuna qimaminoo qinau. Oo maasa uriqararafa, innau moo fasiqa fannoo moosaa ani auqunnai manda faafasaaqa faiqi aundurakinaana aqiqee marufaqa maasa qafamasee qaoo qiqiafana, mifa sia maasa faqa nimarunara qaoo qiqiafana.

<sup>50</sup> Yisufa mina iriseenoo qimaminau sia minara qaoo qiaqa, sia namuqaa maridanoofau miqini maasa qiqoondi maridanoo miqidanoo.

*Moo Samaria maqannaasa Yisunara moosa fuannee qiqau.*

<sup>51</sup> Yisufa Kariree maqa maaqaki niniufanoo innaarunnai oorufuaninna aukuaana adeedi roofanoo Yeerusareenni oori quandanau.

<sup>52</sup> Samaria maqa maaqaki faiqanoo fidanoo faiqi akaqausa niqiqoofaqa indaaru Samaria moo maqusaki faiqaaninnanara deedaqiaqeera qimannimirara niqiqanau.

<sup>53</sup> Oonuree mi maqusaanaasa qimannimufaqa misa qiqau maasa namuqaa maqusai Yeerusaree maqusai fidanoo fee qimasee qaoo sia maaqoo faiqaannee qiqau.

<sup>54-56</sup> Mina faiqigara Yameesasa Yoohaneesa miqanda minara iriseeqa niranaqoofaqa Yisuna qimamiqau, Karaambaqa amanee maasa innaarunaindaraa idara qinanoo qumuree misa qama taikaanoo fee qufanoo Yisufa quandaki miqanda nimambaina qimasee qaoo qimaseenoo aiqareenoo moo maqusai finau.

*Yisufa nariara qinau, qinee qinaamu siaisee qinau.*

*(Mat 8:19-22)*

<sup>57</sup> Misa aanai fimarufanoo faiqi moo fannoo Yisuna qimaminoo qinau. Anee yai fee maqusa maqusa finaqa qinee ani faqa fuanaura.

<sup>58-60</sup> Yisufa iriseenoo qimaminoo qinau. Kaasau fainiuqa oonaamarai faiqaasa maridaqa ufnuqa faqa ninaamu faqaasa maridaqa, qinee faiqi nimaaku yai fee qeeqa qikiqaqa rumasee fee faiqaanauree, faiqara maqa siaisa maridaqa, qini faqa finnaree. Miqi qimasee qimamiseenoo Yisufa fidanoo moo fasiqa aaranau, anee aniree qini faqa fuannee qufanoo mi fasiqafa qinoo qini qikoofa kuqirarammi marifaqa mifa kuqufinaqa akundamasee ani faqa fuanaura amanee qinee miqianauree qufanoo Yisufa qinau. Saina naaruara kuqiranaki fifandinausa kai nariqa kuqinausa nikundaaqa. Anee Anutuna ququsaki keeqara ufa faiqi anaasee qimanniminanau.

<sup>61</sup> Faiqi moo fannoo Yisuna qimaminau uriqararafa qinee ani faqa firaridaqa qeeqa maqusai naaree oonuree qeeqa qikaqaafasaa nimanda masee anianauree qufanoo Yisufa qimaminau.

<sup>62</sup> Faiqi moo fannoo saunu qumareenoo nandi aumuru arumaree munu kasaqai quqemarifa miqimaria fasiqausa sia amana innaaruna ququsa saika amana mareefaranoo.

## 10

*Yisufa nari fuaninna maqusa maqusanai niqiqoofaqa fiqau.*

<sup>1-2</sup> Marikinoo Yisufa faiqi moomoosa rusandeesamumaseenoo qaara kai qaara kai niqiqeenoo maaqanna maaqanna Yisufa nari fuaninnannai indaaru fuaqeera niqiqamaseenoo qimannimainau afuqakinaa nandi aiqi marianara foora tatafinoo rairainoo maridanoo moomoo fasiqa anaasee maridaqa aiqum innaarunai quqemariasa oodaa maridaqa. Innee suana akoofinnai innaaru qifanoo aiqifandinausa niminaqa dadaqiqqa suana aiquaqeera.

<sup>3</sup> Doo fuaqa, qinee qini sipsipa aanaaqi kaaqa reendeenimariasa kaasau faini qambaanaa inni niqiqaidaqa.

<sup>4</sup> Innee afunee uqa aakauqa fee niku aanaamu fee sia maree fuaqa, aanai fidaqa faiqí sia nimandaaga. Innee maqusai oonuree faiqí moona maaqaki keeqarara maaqí qiaqa Anutuna asoosara maa maqanaki mariani.

<sup>5-6</sup> Asooaranara rimari fasiqafa minaki marinana ani afaaqooqa qirana minasaa mariani, sia asooaranara rimari fasiqafa minaki marinana anee afaaqooqa qira ufa qimamiannana kafa maraa.

<sup>7</sup> Innee maqusa maqusa fidaqa yaqoo maaqaki fee keeqafiqá minaki maridaqa mifa niminna narana nammarina kaqí naaqa. Innee inniqa saika imari fasiqana kadaapirirana akiaqara amimariafanoo, doo innee faqa saika fasiqauqa mariafanoo, misa narana nimifaqa kaqí naaqa inni kadaapirirana akiaqara maridanoo. Sia aiqama maaqakiaqa keeqafida naqa nuaqa, moodaa maaqaki kai mariaqa.

<sup>8-9</sup> Innee maqusa maqusa oonuraifaqa misa inni niqoondikidaqa narana nammari nimifaqa kaqí naaqa, namasee mi maqusanakina aurinausa andeeqannimaqasee maaqí qimasee qimannimiaqa. Anutuna innaaruna ququsa fannoo inni rafusu quqarirara adeedi ranoo maridanoo.

<sup>10</sup> Innee moo maqusaki oonuraifaqa misa sia inni amiqí amiqimannimaqaiifaqa innee maqusa qambaana maridaqa maaqí qimasee qimannimiaqa.

<sup>11</sup> Inni maqusa kookoomma fannoo maasa qifaqai atooqafifaqa maasa rukeegee inniqa nifaaqai aqíqa, maa ufana amiqimasee iriaqa Anutuna innaaruna ququsa fannoo inni naaqa ani marifaqa minnisaafanoo.

<sup>12</sup> Qini faiqí namu qinee Yisusa inni qimannimidaqa kasooqagee Anutufa faiqí anaasee ufa irira faasana anirainanoo innee kookoomma nimaqagoosa Anutufa sia rauqí nimaqaannoo Soodooma maqusanaasa manda oosana maree maruna akiaqara Anutufa kaqikaqoo rauqí nimaqaannoo kookoomma akunnimaqaasa sia rauqí nimaqaannoo, kuqa naruannoo.

*Yisufa qaara maqusanaasa niqíqanau.*

*(Mat 11:20-24)*

<sup>13-14</sup> Oo Koorasinna maqannaasa maqusa maaqa namufaqa qinee inniara qimudaoo qidaqa inni narirafa firaafa mariannoo. Beetasaida maqannaasa maqusa maaqa namufaqa inni narirafa faqa firaafa mariannoo. Tíree maqusanaasa faqa Sidoona maqusanaasa faqa aanaamuru aamina mariasa qinee mi maqusaqandaki faiqí sia amanaikimari ainaina moo misaki auqaanaqau misa dauni dauni iriseeqau misa doona danda kookoomma afaqa nariqa nifaaqai akusee ikifaafau qifau nariqa manda oosana minnisee dauni quandasee qini ufamau fini. Kooroosinna maqusanaasa faqa Beetasaida maqusanaasa faqa inniki moomoo naaquqemari ainaina auqaafannaqa sia inneeqa manda oosana minnisaqau. Fíraa ufa irira aukuaana anirainanoo Anutufa Tíree maqusanaasa faqa Sidoona maqusanaasa faqa naridanoo kaqikaqoo nifauaannoo. Innee Kooroosinna maqusanaasa faqa Beetasaida maqusanaasa faqa sia nifauaannoo fíraaqoo inni naruannoo.

<sup>15</sup> Kapeeranaumma maqusanaasa inniara faqa qianaara inneeqa nifaaqara mara maree urimariana inni maqusara faqa unnaqimasee innaaruna maqusa fooqaa fee qimariafanoo mina akiaqara Anutufa inni maqusa namufaqa mindari rarisameeqeenoo idaki aqumisaannoo.

<sup>16</sup> Yisufa quandafi nari faiqí namu qimanniminoo qináu. Ya fasiqa anaasee fee inni ufa irianinafa qini ufa uqanna iriannoo. Ya fasiqa anaasee fee inni ufa rukiainafa qini futeeqaannoo, ya fasiqa anaasee fee qini ufa sia irinafa qini diqíqaina Anutuna futeeqaannoo.

*Sia afaannauqara asiasaqa innaarunai fífindinnanara asiasaqa.*

<sup>17-19</sup> Yisufa niqíqoo fasiqausa maqusa maqusa niniufaqa anireeqa fíraaqoo asasamasee Yisusa qimamiqau. Oo karaambaíqa fíraa ainaina faafasaaqa maasa ani auqu ramasee niqíqauanaqa doo faiqí naunduraindari raudamaki sandeea. Yisufa irisee qimanniminau eeo qinee Sadanna qafeeqa mifa innaarunaindari aakuasara foorá maqasaa aqufinau. Innee iriaqa qinee afeeka inni nimunaqa sakanisaa fee farukasaa fee niku ramasaifanoo sia ukaqa nimiannoo inni namuqaa Sadannana oosana oosana afeeka fannoo sia inni naruannoo.

<sup>20</sup> Doo miqinoo marifaqa maa anoona ainaina qimannimidaqa, faafasaaqa inni ufa irisee eedoo qimarianara sia minara asiasaqa maa ainainnara asiasaqa, inni nuqu innaaruna ququsaki mari papiqanaki akararinoo maridanoo, minara kai asiasaqa.

*Irirana faqaasa ititannimaqasee kaiqeesa kooroo inau.*

*(Mat 11:25-27; 13:16-17)*

<sup>21</sup> Yisufa mi ufana qimannimisoofanoo Anutuna naaquqara maraquna fannoo Yisuna asasirana amufanoo Anutunara maaqi qimasee innaaru qinau. Oo qini qikoofa innaaruna faqa maa maqana faqa karaambaiqa dufi dufi anee qinee maqee maqee qimannimunnufana irirana faqaasa nifusaa rafaafunniseenana irirana siaisa qini faiqi namu kooroomannimaqee mariananoo. Eeoo qini qikoofa aneenna aidirafa miqimminoo maridanoo.

<sup>22-23</sup> Yisufa kaqi innaaru qidanoo nari akoona qimaminau, qini qikoofa aiqama ainaina qini kai qimiqaifa maridanoo, faiqi moo fannoo sia ani amaakura amiqimasee iridanoo anee qini qikoofa kai amiqimasee qiniara irimariananoo kafia faiqi moo fannoo sia qini qikoonara iridanoo amaaku fannoo kai aniara iridanoo qinee qeeqakai irisee quqannifiqee marunaua faqa aniara irifaranoo. Miqi qidanoo innaaru qimasee quandafi nari faiqi namu umeenni qimanniminau. Inni aiqama amiqira ainaina faiqi sia amanaikimari ainainauqa uqannifiqaunaqa qafamasaafanoo inni asasirafa firaafa maridanoo.

<sup>24</sup> Qinee inni qimannimidaqa ooqai tamummaqara fasiqauqa faqa karaambaiqauqa faqa innee maqee qafeemaria ainainaua faiqi sia amanaikimaria ainainaua faqa qafaqaa imarufuqa sia qafaqau, misa innee maqee qini ufa irimaria ufausa iriaqaa imarufuqa sia iriqau.

*Aiqama sandufauqa uriqararanara qimanniminau.*

<sup>25-26</sup> Yisufa miqi qimarufanoo Mooseena sandufa akoofasa fannoo anireenoo Yisuna akari maqararee qimasee qimaminoo qinau. Ufasaa rakisirafa qinee nana saika fee marasee naaru naaru mariranaki fuanauree qufanoo Yisufa qimaminau, ooqai tamummaqara fasiqauqa akarakinaa ufa anee asaana rumasee nana ufa fee irinane.

<sup>27</sup> Mi fasiqafa iriseenoo Yisuna qimaminau, maa ufana asaana riqa, innee inneega nimuqusa nimana afeeka faqa irirana faqa mi tiana aiqamannai iriranannai faqa karaambaiqa Anutunara nidimarinuqa nimuqusiani. Kafaa maaqi qimasee moo asaana riqa anee aneenna aqoonasara aninna afaaqara fooru misara aidinoo amuqusiani.

<sup>28</sup> Yisufa mi ufana iriseenoo mi fasiqana qimaminau, doo ani ufa anoona maridanoo mi ufamau kai fidana naaru naaru marirana paqurinnaranoo.

<sup>29-30</sup> Mi ufana Yisuna qimamufa mi fasiqana Mooseena sandufa akoofasa asaurirana amiseenoo nariara andeeqaranaki marianauree qimaseenoo nari amoo qimaseenoo Yisuna kafia irammirinau. Yafee qini qiqoonafa maridanoo fee qufanoo Yisufa qimaminau faiqi moo fannoo Yeerusareendari Yeerikoo maqusai ooqu fimarufanoo ummuarimaria fasiqausa aanai mina paqurimasee doo aru quqasee mina afaqa ainaina maree fifufanoo kuqira fooru miqoo rinoo marinau.

<sup>31</sup> Mi faasaana amaana maqasaa aanaiqikirafa mi aatata ooqu fidanoo aru quqaqoo fasiqana qafeenoo dinni aana afaindaqa fiqa ranau.

<sup>32</sup> Miqi kai inoo amaana maqaki ainainimarifa moo Reefina ati fannoo mi aatata ooqu fidanoo oqurama qafamasee dinni aana afaindanai ooqiaaqaree finau.

<sup>33-34</sup> Mina aanaaqiana faiqi moo fannoo Isaraee maqannaasa namuqaa marufa Samaria maqannaafa mi aatata ooqu fidanoo aru quqaqoo fasiqana misa namuqaa Isaraee maqannaasa qafamaseenoo firaqoo amuqusufanoo uainna nammari faqa fadameena faqa mina afaqa atekaranaki akuseenoo banisannai rumbaseenoo mi fasiqana rauseeqeenoo nari doonkisaa quqaseenoo afiqeenoo maqusai oonureenoo pasindiaqa maaqaki quqaseenoo minaki maridanoo rakisi marinau.

<sup>35</sup> Faiqee iqaqoofanoo mi fasiqafa maaqasaa rakisirana qaaraqanda munnimma amiseenoo qimaminau anee maa munnimmama maraseenana maanasaa rakisimarinanoo munnimma sia amanaikinaqa anireeqa moo faqa ani amianauree qimaseenoo quqasee finau.

<sup>36-37</sup> Yisufa mi ufana Reefina ati maru fasiqana qimamiseenoo irammirinau yafee aru fasiqana aqoonafa maridanoo fee qufanoo Reefina ati fannoo qinau, minara amuqusi-mari fasiqafa kai, qufanoo Yisufa qinau doo anee faqa fidana miqikai ia.

*Maratafa moomoo narana suqeenoo oonu auqee ani auqee kaukaata qinau.*

<sup>38</sup> Miqooqari Yisufa nari faiqi namu faqa fidanoo moo maqusai oonuroofanoo anaasee moo mina auqu Maratafa Yisuna afiqeenoo nari maaqaki munuseenoo amiqi amiqimaganau.

<sup>39</sup> Maratana anasaafa Yisuna anoona amarafa Mariafa mifa faqa maridanoo Yisufa Anutuna ufa qimannimamarufanoo Mariafa Yisuna aqa ooqufaaqeedanoo mina ufa irimarinau.

<sup>40-41</sup> Yisufa faqa mina faiqi namufuqa marunara Maratafa nariara narana suqeenoo deedaqinoo imarufanoo aundura dapikufanoo Yisuna qimaminau karaambaiqa qini

qinasaafa aiqama saika kadaapi qini kai qiminoo sia fee minara iridanee, qimaminanoo aniree dadaqiani qufanoo Yisufa qimaminau oo Marata, Marata, ani oosana oosana narana suqaranara amuqumarifanoo aundura dapiki marifana aaqee mariananoo.

<sup>42</sup> Anee moodaa narana suqaaqaana mifa amanaikinoo maridanoo ani anasaafa Mariafa andeegara ainaina mareenoo Anutuna ufa reendeenamafinoo iridanoo, qinee sia mi ainainna minasaqaraana rafaanaura.

## 11

*Yisufa innaaru firaana uqannifiqanau.*

*(Mat 6:9-13; 7:7-11)*

<sup>1-2</sup> Moo kari Yisufa moo atinai maridanoo innaaru qimarufanoo mina faiqi namukiqari moo fannoo oonureenoo qimaminau, Karaambaiga Yoohaneefa nammari nimi marufa nari faiqi namu innaaru qira oosana uqannifiqoondee inana anee faqa maasa uqannifiqaa qufanoo Yisufa eedoo qimasee qinau, innee innaaru qirara maaqi qimasee qiaqanani.

Qipoo ani auqu naaquqarafa uriqararafa mariani,

Ani innaarunai ququsa maa maqanasaa kambiqaani

<sup>3-4</sup> Maasa maqee maqee naanna narana qimia.

Aiqamausa manda oosana maasa nimiafaqa mina akiaqara mininnisaidaqa minara anee maasa naanna ramasee mina amana kai maasa manda ainaina akiaqara minni qisaa,

Anee sia maasa mareeqeenana afeeka nimaniranaki quqannisaa.

<sup>5-6</sup> Miqi qimaseenoo Yisufa kafaa nari faiqi namu qimanniminau faiqi moo fannoo eenda amuqusai nari aqoonde maaqai oonuree qimamiannoo, Oo qini qiqoonde anee qaaramoo feemu qiminaqa qinee maree munu qeeqa qiqoonde amia, mifa nianaindari ani marifanoo qini narana sia marifaqa.

<sup>7</sup> Miqi qinanoo mina aqoonde fannoo maaqi qiannoo Oo naqimasee findi fuanauree faiqi anaasee namufaqa faiqaqee idaqa kooqi ititanoo maridanoo.

<sup>8</sup> Mi fasiqafa naqi fee iannoo narana amiranara akooqaidanoo mina aqoonde marianninara faqa sia amana findifi mara amiannoo. Anee faqa ani aqoonde marinana sia asaurinnaranoo fuki faaki qimarinanoo ani fuki faaki qirana taikaanifeera findifi mara amiannoo.

<sup>9</sup> Qinee minara irisee inni qimannimidaqa innee faqa miqikai iqa Anutunara innaaru qifanoo innee sarauinna ainaina inni nimiannoo, innee Anutufinnai randeeqa anoona paqurifara innee Anutuna kooqi arifanoo atuasee nimiannoo.

<sup>10</sup> Aiqaama innaaru qimariasa mareefaranoo randee mariasa paqurifaranoo kooqisaa kukusimariasa kukusifanoo atuannoo.

<sup>11</sup> Qinee faiqi nikausa inni qimannimidaqa inneeqa nimaaku noodaannara qifaqa manda sakani nimifaree, sia nimifara noodaanna nimifara.

<sup>12</sup> Misa kookooraana auruara qifaqa innee faruka nimifaree sia nimifara.

<sup>13</sup> Innee manda oosana maree mariasa marifanoo inneeqa faiqi namu innaaru qiafaqa amiqira ainaina kai nimimariafanoo. Innaarunai nikoofa amiqirafa uqanna maridanoo minara innaaru qimarinausa minara firaqqoo amiqirana amana kai nari naaquqara andeegara maraquna nimiannoo.

*Beeraseeburanannai afaanna aqiqarana oosana qimanniminau.*

*(Mat 12:22-30; Mak 3:20-27)*

<sup>14-15</sup> Moo kari Yisufa faiqi aundurakinaa faafasaaqa aqiqarara imarufanoo, mi faafasaaqafa mi faiqina ufa rafaqaqufanoo sia ufa qimarinau. Yisufa faafasaaqa aqiqamasoofanoo mi fasiqafa ufa qinau. Faiqi anaasee mina qafamasee naaquqoofaqa rufiasee akaqausa Yisuna aqidaqa qiqau, afaannauqa uriqararafa mina auqu Beeraseeburafa afeeka Yisuna amifanoo qandaki faafasaaqa nifaqaidanoo.

<sup>16</sup> Akaqausa mina ueeqararee qimasee qiqau Yisunara faiqi sia amanaikimari ainaina auqusainaga maasa aniara kuqaa Anutufinaindari qumu fee qianaura.

<sup>17-18</sup> Yisufa faasai misa naundurakinaa irirana iriseenoo nari afaannauqa afeekannai faafasaaqa aqiqoonara akooqoofanoo niqinoo qinau. Moo maqannaasa nariqa maqannaasa faqa oonu rakee ani rakeemafi rakidaqa sia kisaqaqasaa marifara, dauni kuqifaranoo. Moodaa maqaki mariasa faqa oonu rakee ani rakee iqa qusasaa moodaa moodaa makidaqa furufarifaranoo. Sadannana ququsakinaasa miqikai iqa oonu rakee ani rakeemafiqa naqimasee afeekaikifaree. Innee qiniara afaannauqa uriqararana mina auqu Beeraseeburanannai faafasaaqa aqiqeenoo fee qimasaida unna qimariafanoo.

<sup>19</sup> Qinee minannai faafasaaqa nifaqaanaqa innee yanee auqu ramasaidaqa faafasaaqa nifaqaidee, innee sia Beeraseeburana auqu ramasee miqi mariafanoo innee andeegasee Anutuna auqu ramasee afaanna nifaqee marifanoo. Miqi marianara inniqa faafasaaqa nifaqee mariafa inni ufa fannoo qini diqira ufa qimariana atekaidanoo.

<sup>20</sup> Qinee sia Beeraseeburana afeekannaifau faafasaaqa nifaqaidau Anutuna naaquqara afeekannai nifaqee marunausa marunnanara akooqoo maridanoo. Miqi marunnanara Anutuna ququsa inniki doo animarinara kooroo idanoo.

<sup>21-22</sup> Afeeka fasiqa Sadannafa amudaanaiqi marifa duru saamu deedaqamasee marifanoo mina aiqama ainaina amiqinoo mariannoo, sia moo fannoo ummuariannoo. Afeeka fasiqa Sadannana uriqararafa uqanna qinee Yisusa anireeqa mi fasiqana radamuseeqa mina faakana duru saamu ainaina mareeqeeqa qeeqa qiku qisauku nimianauranoo.

<sup>23</sup> Faiqi moo fannoo sia qini qiigoondi marinafa qini namuqaa maridanoo sia qini dadaaqida onnu suqu ani suqu imarifa, mareeqaida aquraaruki marifa maridanoo.

*Afaanna nari aqoonausa nifiqeenoo nari marunaki keeqarana kikiqa usinoo marida.*  
(Mat 12:43-45)

<sup>24-26</sup> Yisufa kaqi qimannimidanoo qinau. Manda faafasaaqa faiqi aundurakiqari maaqakiqari foora raudee aadana maqa maaqa oombura maqa maaqaki aakaaqaki oonuree aniree inoo nidanoo adooaranara randaisianoo maaqi qimasee oonumafi irinoo qinau sainaga qinee qeeqa quqasee aniafanna fasiqana aunduraki kaffaa fua, qimaseenoo oonuree qafoo fanoo mi fasiqana aunduraki maaqara foora damuinoo maridanoo andeeganoo marufanoo qafamasee oooo qimasee kaffaa oonurandee ani agoonna faafasaaquqa aiqamausa misa mandainaina uriqarararusa kai dinni qisauku taikasee dinni ani qaaraganda marasee (7) nifiqamareenoo mi fasiqana aunduraki keeqafi mariqau. Marufanoo ooqai moodaa faafasaaqa marufanoo mi fasiqafa kaqikaqoo mandainainaki marinau, maqee firaqoo mandaikuqanna inoo maridanoo.

*Anutuna ufamau fimariasa anoona asasirausa maridaqa.*

<sup>27</sup> Yisufa mi ufana qimannimufanoo anaasee moo fannoo faiqi anaasee qambaaindari findifi qimaminoo qinau. Ani maqaseenoo naamma amimari anaaseefa aniara amiqira qimaaku fee qimaseenoo firaqoo asasira anaasee maridanoo.

<sup>28</sup> Miqi qufanoo Yisufa quandafi mi ufana qaoo qinoo qinau, abee Anutuna ufa irisee mi mau fimariasa misa kai firaqoo asasirausa maridaqa.

*Yisufa nari kuquaninnanara Yoonnaana kikiqa usinau.*  
(Mat 12:38-42)

<sup>29</sup> Faiqi anaasee moomoosa Yisuna rafusu quqarumafufanoo Yisufa kaqi qimanniminoo qinau, Maa maqee aukuaana maria fasiqa anaaseesa firaqoo manda oosana maree mariasa misa Anutufinnaindari qiniara faiqi sia amanaikimari ainaina auquanaqa kuqaa Anutufinnaindari anifeeqianauro fifau miqi qimariasa misa mi irirafa manda oosana nimidanoo.

<sup>30</sup> Sia innaarunai kooroo ira ainaina fuka uqannifiqaanaura nauraafa Yoonaanaindi mifa kai kaqi maridanoo, Yoonaafa ooqai Nineefee maqusanaasa Anutuna ufa kooroomannimainau, miqi kai iqa qinee faiqi nimaaku uqanna maqee mariasa Anutuna ufa kooroomma nimaqaanaura.

<sup>31</sup> Kasooqagee naaru Anutufa faiqi anaasee ufa irira faasaanasaa Seebaa maqannaasa uriqarara anaasee fannoo findifi maa maqee mariasa inni niquraraannoo. Mi anaaseefa nianaindari Sooroomoonnana irirana faqaa ufa iriraree qimasee aninau. Doo maqee faasaanaga qinee Sooroomoonnana uriqarararusa animaridaqa innee sia qini ufa irimariafanoo minasaara mi anaaseefa inni niquraraannoo.

<sup>32</sup> Kasooqagee naaru Anutufa faiqi anaasee ufa irira faasaanasaa Nineefee maqusanaasa findifi maqee mariasa inni niqurareefaranoo, misa ooqai Yoonaanakiqari Anutuna ufa iriseeqa nariqa manda ainaina maqasaa quqasee Anutuna afusaa reen-deenammiqau. Maqee qinee Yoonnaana uriqarararusa animarunaqa innee sia qini ufa irimariafanoo minasaara Nineefee maqusanaasa inni niqura reefaranoo.

*Yisufa rambiaru quandara ufa kaffaa qimannimainau.*  
(Mat 5:15; 6:22-23)

<sup>33</sup> Yisufa kaqi qimannimidanoo qinau, faiqi moo fannoo qooma qumbisee difaaninnai sia rafaqaqufannoo akooqoo quqasainanoo kaaqa qeemarinaga faiqi anaasee maaqaki keeqafi amiqimasee qafaqqee qimasee akooqoo quqaidanoo.

<sup>34</sup> Anee paapaaira oosana faqaafa mariananoo afu aundura kaaqa qarafa marifa mariananoo. Anee tatamaqira oosana faqaafa mariananoo afu aundura asukuna arinoo maridanoo.

<sup>35-36</sup> Inneeqa kai minara rakisiyaq inni nifu naundura kaaqa qarana tatamaqira oosana fannoo rafaafuandoora, inni nifu naunduraki tatamaqira oosana kaqikaafa faqa sia marinaqa inni naunduraki marifa faqa innee nimaria oosana faqa kaaqa arenaannoo.

*Yisufa Farisai amaana ufa qimarusa niqiqanau.*

*(Mat 23:1-36; Mak 12:38-40)*

<sup>37</sup> Yisufa ufa qimannimi taikasooфанoo Farisai amaana ufa qimarufa Yisunara aniree qini maaqaki oonuree narana naanee qufanoo eedoo qimasee mina maaqaki mina faqa oonuree ooqu marifi narana nanau.

<sup>38</sup> Farisai amaana ufa qimarufa Yisuna oosana qafamasee tautinoo qinau, maa fasiqafa sia maasa oosana mareenoo asaaqirai naidanoo kaqi naidanoo ufa rukiee marifa maridanoo.

<sup>39</sup> Karaambaiqa narí kai mina irirana iriseenoo qimaminoo qinau, Qini ufa iria, innee Farisai amaana qimariasa inni marirana pirita kaafa fooqaafa mariafaqa adisaa kai findaukee mariafanoo aunduraki faiqi narirana faqa mandainaina oosana oosana faqa ikairi faqa inni naundura qumbiqanoo maridanoo.

<sup>40</sup> Innee furufari mariafanoo innee Anutunara pirita kaafa adi kai auqimarifee fee qidee aundura sia auqifee fee qidee mifa aundura faqa auqusee qafee marifa maridanoo

<sup>41</sup> Innee inneeqa naundura anukamasaifanoo inni nifaafa aiqama anukanoo marianoo.

<sup>42</sup> Oo Farisai amaana ufamau fimariasa inni narirafa firaafa mariannoo, innee inneeqara maasa Anutuna ufamau fidaqa afuqakinaana oosana oosana adiafaaira ainaina rainasee akaqana Anutuna amidaqee qimasee quandaki andeeqara marirana faqa Anutunara riranara faqa minnisee mariasa mariafanoo.

<sup>43</sup> Oo Farisai amaana ufa qimariasa inni narirafa firaafa mariannoo inni mandoosana maaqimminoo maridanoo. Innee amaana maaqaki keeqaidaqa noorisaa ooqu mariranara firaqoo rimariasa mariafanoo, innee makeetakiqa fimariafaqa faiqi anaasee inni nooriara rufisee amiqimasee nimandaranara rimariasa mariafanoo.

<sup>44</sup> Inni nariranara irifanoo naaquqaani, innee faiqi madika sia qafosara foora mariafanoo faiqi sia qafarai kaqi mi mau fidaqa inniara amiqira fasiqafee qimasaidaqa inni naunduraki putaa iranara sia irimariasa.

<sup>45</sup> Yisufa miqi qufanoo Mooseena sandufa akoofasa moo fannoo qimaminoo qinau, Oo ufasa rakisirafa anee mi ufanannai maasa faqa mandaikamma qimaqaanoo.

<sup>46</sup> Yisufa iriseenoo mina faqa qimaminau, innee Mooseena sandufasaa rakisirausa inni narirafa faqa firaafa maridanoo naaquqaani. Innee inneeqa faiqi faiqi maqasaa sanda ufana oosana oosanannai niqoonausa ummaara narimari ummaarana faiqi anaasee nifaariki nimisee sia kaqikaqoo dadaaqidaqa inneeqa nisauku amuka faqa sia quqasee minannai ummaara kaqikaqoo dadaaqi mariasa mariafanoo.

<sup>47</sup> Inneeqa nariranara irifanoo naaquqaani, inni nikausa Anutuna tamummaqara fasiqauqa kuqa narusee nikundee marufaqa, innee misa faiqi namu oonuree inni nikausamara nariusa madikasaa amiqira ooni fee saqari fee taatuqee andanda faqa ummaqi mariasa mariafanoo.

<sup>48</sup> Innee inneeqa nikausa mandoosanara amiqira oosanee qimasee miqi mariafanoo misa tamummaqara fasiqauqa narusoofa innee misa madikai amiqi amiqimariasa mariafanoo.

<sup>49</sup> Anutufa minara iriseenoo narí iriranannai maa ufana qinau, qini tamummaqara fasiqauqa faqa qini ufa mara nimimariasa faqa Isaraee maqannaasa mariannai niqiqifaqa misa akaqausa kuqa narusee akaqausa apurarana nimifaranoo.

<sup>50</sup> Ooqai Abeerana ariranasaaqari nariqa aniifaqa Seekariana ariranasaa naaquqara amaana maqaki tatufira qainda dinni naaquqara oosirafa dinni qambaana Seekariana ariqau.

<sup>51</sup> Mi aiqama kuqannarirana akiqara qinee aiqama mareeqee maqee mariasasaa quqaanaura.

<sup>52</sup> Innee Mooseena sandufa akoofasauqa inni narirafa firaafa marinara naaquqaani, innee innaarunai fimaria irirafa kooqi kiqara foora inneeqa rafaafusee sia atuasee keeqeefaranoo faiqi anaasee mi kooqinaki keeqarara imariafaqa innee rafaafafi mariasa mariafanoo.

<sup>53</sup> Yisufa mi maqusana minnisoofofa Mooseena sandufa akoofasauqa faqa Farisai amaana ufa qimariasa faqa Yisuna ariraree qimasee oosana oosana ufannai ufaanara foora fufi mariqau.

<sup>54</sup> Misa aranaiqi oosana oosana ainainara irammiriana aqaqinaqa rumbaanauree qimariqau.

## 12

*Yisufa aaquqira ufa faqa pooduqara ufa faqa qimanniminau.*

*(Mat 10:26-27)*

<sup>1</sup> Mikari faiqi anaasee moomoosa uqanna Yisufinnai ani suqufufaqa narisaa narisaa faqa niku ree mariqau. Yisufa ufa qimannimiraree qimaseenoo nari faiqi namu naaree qimanniminoo qinau. Innee Farisai amaana ufa qimariasa misa atiqeemari ooruku anoonara foora rufieeqa eerairiaqa misa ooruku maaqimmidanoo misa faiqi anaasee amaana ufa qimannimisaida nariqa maqandanai mandainaina maraidaqa misa miqimaria ooruku anoonara foora innee eerairiaqee qidaqa.

<sup>2</sup> Aiqama rafaqaqifira ainaina kasooqaqee Anutufa aiqusaina akooqoo mariannoo aiqama kukeeqara ainaina faqa kasooqaqee kooroomafinoo akooqoo mariannoo. Farisai amaana ufa qimariasa qaaraikirana faqa kooroo iannoo.

<sup>3</sup> Inni faqa qimannimidaqa innee asukunaki faiqi anaasee qimannimira ufa kasooqaqee Anutufa aiqamausa nifusaa faasaana kooroo inaqa irifaranoo. Nana ufa fee maaqaki moona aaqooki qimaminna ufana maaqa ataufakaqara foora miqooqari fi fi qimasee aiqamausa qimannimifaranoo.

*Sia nifaaqa arimariasara rufiaaqee ufa.*

*(Mat 10:28-31)*

<sup>4</sup> Qini qiqaonduqa inni qimannimidaqa inni nipata kai kuqa narusee miqooqari moo mandainaina sia amana niminausara misara sia innee rufiaaqa.

<sup>5</sup> Innee rufieefandinnanara qimannimiana qini ufa iriaqa, Anutunara innee rufiaaqa. Mifa amana inni nipata naruseenoo naunduraindaraa nimana faqa amana mareeqeenoo idaki aqirana amanaiki marifa, eeo qinee minara qimannimidaqa minara kai innee rufiaaqa.

<sup>6</sup> Kaqikaa ufni ririmma fifau ainaina sia feefauru imariafa maridanoo, mi fifau ainannara Anutufa sia moodaa aunidanoo aiqamausara iridanoo rakisidanoo.

<sup>7</sup> Inni nikiyaqa asaasi faqa Anutufa aiqamara iridanoo nisaana rumaqaisa mariafanoo ufni faqa inni nikiyaqa asaasi faqa fifau ainaina marifanoo rakisidanoo innee fraatia anoona ainaina mariafanoo inni feefauru uriqaranoo maridanoo amiqimasee innisaa rakisianoo, minara sia rufia rufiaqiaqa.

*Yisunara faiqi nifusaa kooroo imariasara qinau.*

*(Mat 10:32-33; 12:32; 10:19-20)*

<sup>8</sup> Qinee maanara faqa inni qimannimidaqa yafasiqa anaasee fee moo fannoo faiqi anaasee nifusaa paasoosamasee nariara qinee Yisunaindi fee qinafa qinee faiqi nimaaku mi fasiqa anaaseesara Anutuna qangirooqqa nifusaa misara faqa qinindi fee qianauro.

<sup>9</sup> Yafasiqa anaasee fee moo fannoo faiqi anaasee nifusaa asaurusee sia qinee Yisunaindi fee qinafa qinee faiqi nimaaku mi fasiqa anaaseenara Anutuna qangirooqqa nifusaa minara faqa sia qinindi fee qianauro.

<sup>10</sup> Faiqi anaasee moo fannoo faiqi nimaaku qini manda ufa qimaqiminafa qinee mi ufana akiyaqa minnaisaanauro. Faiqi anaasee moo fannoo Anutuna naaquqara maraunara manda ufa qinafa Anutufa sia mina minnaisaanno.

<sup>11-12</sup> Kasooqaqee misa qini ufasaara inni qini ufa irimariasa rumbamaree amaana maaqaki fee siaasinnai fee nariqa uriqarara finnai fee munusaifaqa inni ufa iriraree qifaqa inneeqa nifaaqa ititara ufara faqa qimannimira ufara faqa sia randaqa. Anutuna naaquqara maraquna fannoo qimanniminna ufana miqoo kai inni naakapaanno.

*Yisufa maaqoo ainaina afeediranara qaoo qinau.*

<sup>13</sup> Faiqi moo fannoo faiqi anaasee qambaaindari findifinoo Yisuna qimaminoo qinau, oo ufasa rakisirafa maaqanda qikoofa nari ainaina maaqandasaa quqasee kuqifanoo qini qifasaafa nariara maraidanoo anee qini qifasaana qimaminanoo andeeqasee raina qimiani.

<sup>14</sup> Yisufa mina ufa iriseenoo qimaminau, oo maa fasiqa yafee qiniara siaasa saika maraanee qinaqee qinee inniqara ainaina rainaanauree.



<sup>15</sup> Miqi qimaseenoo quandafi faiqi anaasee minara qimanniminoo qinau, innee aiqama ainainara fanandiranara eerairiaqa. Faiqi anoona marirafa sia qumiasanasaa mundinoo maridanoommi.

<sup>16</sup> Yisufa kaqi qimannimidanoo maa ufana quandara ufa qimanniminoo. Faiqi moo fannoo moomoo ququsa faqaafa narana amiqimasee moomoo kambiqanau, mi fasiqafa mina qafamaseenoo nari kai qimirinoo qinau.

<sup>17</sup> Qini narana moomoo uqanna marifaqa yai fee quqaanauree qimasee qimmiriseenoo qinau.

<sup>18</sup> Qinee maaqianaura, narana unaku quqasee afeedimaria maaqafa kaqikaafa marifaqa qinee mina rapeemasee firaana usakaanaura.

<sup>19</sup> Usakaseeqa qeeqa narana faqa qumiasana faqa minaki quqaseeqa qeeqaraa maaqi qianaura, Oo qinee maqee amiqiranaki maridaqa, qini amiqira ainaina moomoo aukuaana amanaikinoo maridanoo, qinee narana nammari namasee amiqimasee a-fadaranaki marianaaura.

<sup>20</sup> Miqi qufanoo Anutufa mi fasiqanara maaqi qinau, anee furufari marianafa maqee eendaki anee kuqinanoo ani marirafa taikaannoo. Miqooqari yafee ani fira qumiasana maraannoo fee.

<sup>21</sup> Yisufa mi ufana rafaqaqafinoo qinau, maqasaa moomoo ainaina suqimariasaa in-naarunai naaru naaru marirana siaisa mi fasiqana aanna raida moomoo ainaina fifau suqidaqa furufaridaqa.

*Qamunnara naranara sia indee indee ida maria.*

*(Mat 6:25-34)*

<sup>22</sup> Yisufa nari faiqi namu kaqi qimannimidanoo qinau, qinee faasai qimannimunna ufanara irisee maaqi qidaqa innee kaqi marira naranara sia nimuqusiani inneeqa nifaqai afismaria qamunnara faqa sia nimuqusiani.

<sup>23</sup> Inni marirafa uriqarara ainaina maridanoo narana oorudupirafa maridanoo. Inni nifaqa uriqarara ainaina maridanoo qamunna oorudupirafa maridanoo.

<sup>24</sup> Kaammeesa qafaqa mifa sia narana asumu ummaqidanoo sia narana aiqifa sia maaqa usakasee minaki afeedifa, Anutufa kai narana misa nimidanoo. Innee sia ufiniara foorau mariafanoo uriqarara ainaina mariafanoo inni faqa nimiannoo.

<sup>25</sup> Innikiqari moo fannoo nari kuqiranara amuqusiranannai amanee nari marirana firarisamasee kisaqasaa mariannoo fee, sia amanaikinaranoo.

<sup>26</sup> Innee mi kaqikaa ainainnara sia amanaikiqa nanaree naranara qamunnara nimuqusidanoo fee.

<sup>27</sup> Innee nandaki kaasau taatuqee tamookeena qafamasee minara iriaqa, mifa sia ainainidanoo sia nari qamunna akunusee afisidanoo qinee minara qimannimidaqa ooqai karaambaiqa Dafidina amaaku Sooroomoonafa kaaqa ainaina faqa munnimma faqa moomoo maree marufa sia tamookeena amanasaa marinau mina qamunna amiqirafa uqanna sia tamookeena qamunnara foora idaaqirafa marinau, oorudupirafa marinau.

<sup>28</sup> Kaasau usau Anutufa kai misa qamunnara foora nimidanoo maqee kasidanoo duna atekasee ida areemaria ainainafa maridanoo. Anutufa misa nimidanoo sia fee fira ainaina tia inni faqa nimiannoo fee, nimiannoo. Innee Anutuna mandaagarafa kaqikaafa kai maridanoo, fifau narana qamunnara nimuqusi mariafanoo.

<sup>29</sup> Minara irisee maasa nana narana fee nammari fee maqee maqee naanauree qimasee minara sia nimuqusiani.

<sup>30</sup> Maa maqanasaa Anutuna ufa sia irimariasaa misa mi ainainausara kai maqee maqee randaidaqa, inni nikoofa inni narana qamunna ainainara faasai iridanoo nimiannoo.

<sup>31</sup> Innee Anutuna ququsakinaa marirana irirana niqiniandamasee mi mau firanara naaree irifanoo Anutufa inni marira ainaina nimiannoo.

*Oosana oosana qumiasana innaarunai kai afeedira ufa.*

*(Mat 6:19-21)*

<sup>32</sup> Oo innee qini faiqi namu, innee qini aanda ufa aanaaqi firimariasara foora mariafanoo sia rufiaqa inni innaarunai nikoofa اساسamasee innaaruna ququsa inni nimiraree qidanoo.

<sup>33</sup> Innee inneeqa qumiasana moosa nimisee feefauru maraseeqa kudi fasiqa anaasee nimiseeqa, mi andeeqaranannai innee sia afaquqaaninna munnimara foora maraseeqa afeediaqa inneeqa aiqama qumiasana innaarunai kai afeediaqa, miqoo sia oorudupiannoo sia ummuara fasiqa fannoo maraannoo sia qooqoosa aukuanoo.

<sup>34</sup> Inni qumiasana mariqoo kai miqoo kai inni nimuqusa ubeekanoo mariannoo. Innaarunai kai qumiasana afeediaqa.

*Yisufa qumiranara aambeembeesidaqa maria.*

<sup>35</sup> Innee deedaqiga mariaqera qimannimidaqa, inneeqa qamunna atukarasee nooiqandamaseera foora qooma qumbinoo maridanooora foora deedaqiga mariaqa.

<sup>36</sup> Innee ainaina faqaana ainainira faiqiara foora deedaqiga mariaqa. Misa uriqararafa amundara qoomaqaara fifinoo mindari oonurandee anianinnanara rakisida marifara, mifa anireenoo kooqi arinaqa dauni atuasaifanoo keeqaannoo, innee misa naanna ramasee deedaqiga mariaqa.

<sup>37</sup> Amiqimasee afeesimariasa asafaranoo misa uriqararafa anireenoo amiqimasee ainaini mariasee qimaseenoo nari qamunanda atukaramaseenoo narana suqaseenoo rakiqa nimiannoo.

<sup>38</sup> Misa uriqararafa eenda amuqusai fee iqaqarooka fee anirainaqqa amiqimasee rakisi inausa firaago asafaranoo.

<sup>39</sup> Innee maa ufana faqa iriaqa, maaqa akoofa ummuarira fasiqa anianinnanara iriseenoofau rakisinanooofau sia kooqi rakeemasee ainaina maraiqini.

<sup>40</sup> Qinee inni faqa qimannimidaqa, innee faqa deedaqiga mariaqa, qinee faiqi nimaaku innee sia qiniara aniannoo fee qimarifandinna kamuqoo aniraanura.

*Qinee rainarara qumuafanausa maridaqa.*

*(Mat 24:45-51)*

<sup>41</sup> Yisufa miqi qufanoo Peetooroofa qinau. Oo karaambaqqa anee mi quandara ufana aiqamausaree qidanee maasara kai fee qidanee.

<sup>42</sup> Karaambaqqa fannoo iriseenoo ainainimaru fasiqana kikiqusinoo qimaminau, ainaina faqaana ainainira faiqi irirana faqaafa andeeqasee rakisimarifa marinau.

<sup>43</sup> Ainaina faqaafa mi andeeqara ainainira fasiqanara qimaminau anee qini maaqakinaa ainainasaa rakisisee ainainira faiqiuqa narana aandau andeeqasee nimiannee qimaseenoo moosaa finau.

<sup>44</sup> Mi ainainira fasiqafa nari uriqararafa anianinna kamuqoo andeeqasee maridanoo firaago asasiannoo. Qinee Yisusa qimannimiana iriaqa, mi ainaina faqaafa nari miqira ainainira fasiqa andeeqarana qafamasee miqira fasiqa fee qimaseenoo nari aiqama ainainatiasaa rakisiranaikammama qannoo.

<sup>45-46</sup> Moo kari ainaina faqaafa nari ainainira fasiqara qini ainainasaa rakisi mari-naqa namummaqarara fuanee qimasee fifanoo mi ainainira fasiqafa quandaki narana faqa afeeka nammari faqa neeneeseenoo furufarinoo nari aqoonna ainainira fasiqa anaaseeuqa narinoo furufarinoo nimiranoo mina uriqararafa sia aniannoommifoo qimaru kamuqoo sia irirai mana mana imarinanoo anirama qafeenoo ufa rukiee mariasa nari mariandeemaseenoo mina ateka atekamasaannoo.

<sup>47</sup> Ainainira faiqi fannoo nari uriqararana ufa iriseenoo sia findifinoo mina ufamau finafa miqinna fasiqana saamu samu amudaani tureeraumasaannoo.

<sup>48</sup> Ainainira faiqi moo fannoo nari uriqararana ufa sia irirai aruaninna manda ainaina marainanoo mina arirafa aufadarafa mariannoo, maqasaa fasiqauqa moomoo ainaina amimari fasiqanara minasaaqari moomoo ainaina mareefaranoo, Anutufa faqa miqikai iannoo, maqasaa fasiqauqa uriqarara ainaina amimari fasiqanara minasaaqari uriqarara ainaina aabaa faqa mareefaranoo, Anutufa faqa miqikai iannoo.

*Qinee rainarara qumuafanausa maridaqa.*

*(Mat 10:34-36)*

<sup>49</sup> Yisufa faiqi anaasee qimannimidanoo qinau. Qinee maa maqanasaa mariasaki idara foora ufa raiqeeqa namuqaakirana oosana araanauree qimasee qumiqiafana, doo faasai ida arasaanoo qaida mariaqaana.

<sup>50</sup> Qinee kuqira manda nammariara foora marasee naanura, mina afeesara marunanoo qifaaqa rumbanoo maridanoo.

<sup>51</sup> Innee qiniara tinoorimarianaki maa asoarana mara maree maqasaa fasiqa anaasee nimiannee fee qida fee, sia uqanna miqianura, qinee maqasaa fasiqa anaasee ufa rainarana nimirara qumidaqa.

<sup>52</sup> Maaqooqari qini ufasaara moodaa maaqaki moodaanai qisauku marinausa rainaki qaarammoo dinni fiqa namuqaakifara qaaraqanda miqikai iqa dinni fiqa namuqaakifara.

<sup>53</sup> Qini ufasaara nikausa nari faiqi namu namuqaakamma nimaqeeefara kafia dinni kumaaraauqa nari nikausa namuqaakamma nimaqeeefaranoo. Ninausa nari niraamuqmaaka namuqaakamma nimaqeeefara kafia dinni fuka anaaseeuqa nari ninausa namuqaakamma nimaqeeefaranoo. Anaaseeuqa nariqa ninaakuqmaaka faqa rainafi namuqaakamma nimaqeeefara kafia dinni fuka anaaseeuqa nari ninaakuqmaaka anaaseeuqa namuqaakamma nimaqeeefaranoo.

*Innee qinee kambiqauna kamunara sia irimariafanoo.*

*(Mat 16:2-3)*

<sup>54</sup> Yisufa faiqí anaasee qimannimidanoo qinau, innee aaku qoonnamu suani kee-qeemari qaannaindari urinaqa qafeeqa oo aaku ruannoo fee qifanoo doo aaku ruannoo.

<sup>55</sup> Maarooosa ookeesa ufaí uqifaqa innee minara aiqaiqimari aukuannee qimariafanoo doo kuqaa qimariafanoo.

<sup>56</sup> Innee mandaikirausa qaara irirana maree mariasa, innee innaaruna faqa maqa faqa qafamasee andeeqasee kambiqaaninna ainainara andeeqasee iri mariafanoo, maqee qinee qumimarunna kamuqoora nanaree sia iridee qida fee.

*Ani kootai afitqee fimari fasiqana faqa dauni mina faqa moodaa ufa qia.*

*(Mat 5:25-26)*

<sup>57</sup> Innee sia inneeqa kai andeeqara ufa irisee mi mau fuafanoo nanaree miqidee.

<sup>58</sup> Faiqí moo fannoo ani afitqeenoo kootai finana anee aanai fidana mi ufana aanai taikaaqee qia, sia miqinanoo mi fasiqafa ani afitqeenoo siaasa aminanoo mifa mareeqeenoo foorisa aminanoo mifa mareeqeenoo rumbaranaki quqaannoo.

<sup>59</sup> Anee minaki marinanoo ani mandainaina akiaqara taikafinana mikari kai raudeenaranoo. (Innee minara irisee qinee qumu marunna kamuqoo inneeqa mandainainara qini faqa ufa qidaqa mi ufana andeeqa taikaaqa, sia miqiqqa Anutufinnai fifaranoo.)<sup>12</sup> | 59 | RUKA

## 13

*Innee sia quandafti Anutufinnai ubeekееqa kuridifara.*

<sup>1</sup> Mi fasannai faiqí anaasee akaqausa anireeqa Yisuna qimamiqa qiqau, akaqa Kariree maqannaasa Anutuna tatufira aandau suqa amimarufanoo Piratoofa narí sundiauga niqiqoofaqa anireeqa miisa naru taikaaqau. Miqimasoofanoo aandau fidika faqa faiqí fidika faqa moodaanaki quminau.

<sup>2</sup> Yisufa mi ufana iriseenoo qimanniminoo qinau, innee mi Kariree maqannaasa akaqausa kuqanara nári maqannaasa urinnaaqaramasee manda oosana maroona akiaqara kuqiaa maqi fee qida fee.

<sup>3</sup> Sia minarau kuqiaa, qinee minara inni qimannimidaqa, Innee faqa inneeqa manda oosana minnisee Anutufinnai ubeekaaqa, sia miqiqqa innee faqa miqi kai iqa kuqifaranoo.

<sup>4</sup> Qinee Yeerusaree maqusanaasara faqa qimannimidaqa, miqoo ooni maqa kisaqa Sirooamma ooni maqa fee qimariana fannoo rapeemaki aqufinoo faiqí (18) qisaukuqara taikasee qikunni ooqu dinni taikasee dinni ani qaaramoo marasee fasiqa kuqa narinau. Innee mi fasiqausara Yeerusaree mariasa nári niqoonausa manda oosana urinnaaqaramasee maroona akiaqara kuqiaa maqi fee qida fee.

<sup>5</sup> Sia minarau kuqiaa, Qinee inni qimannimidaqa, innee sia inneeqa manda oosana minnisee Anutufinnai ubeekееqa innee faqa miqi kai ifaranoo.

*Faafisa fooqaa saqariara quandara ufa qinau.*

(Anutufa sia manda oosana akiaqara aqee uqanna naridanoo, kisaqasaa naaraidanoo mai andeeqara aatata aniaqee qidanoo, sia irifanoo miqoo naruannoo.)

<sup>6</sup> Yisufa kafia maa quandara ufana qimanniminoo qinau, faiqí moo fannoo narí afuqaki faafisara foora qaqama tiqisaidaqa neemaria saqarifa marinau, moo faasaana mi fasiqafa mina qaqama tiqi nararee qimasee oonuree qafoofofanoo sia qaqama iroofanoo oori runuseenoo narí ainainira fasiqa qimaminoo qinau,

<sup>7</sup> Qinee qaarammoo aukwana maa saqarina qafaunanoo sia qaqama ireenoo mifa fifau maqa ainoo naidanoo doo ateeka aqua qufanoo mi ainainira fasiqafa qinau.

<sup>8</sup> Saina kaqi marinaqa moodaa aukwana qinee mina atukaki oora indufusee madaapee quqasee miqoo qafaanee qinau.

<sup>9</sup> Sia irainaqa mikari kai ateeka aquanaura.

*Ataufaka anidira anaasee Yisufa andeeqaisanau.*

<sup>10-11</sup> Moo Saririqa Yuda maqannaasa amaana qimaru faasaana Yisufa ufa suqira maqaki keeqafi Anutuna ufa qimannimimarufanoo moo anaasee fannoo faafasaaqa mina aunduraki marufanoo (18) qisaukuqara taikasee qiku dinni taikasee dinni oonu qaaramoo marasee aukwana kummaranoo kai marufa ataufaka rakisirara sia amanai-kimarufa miqoo amaana maqaki ani marinau.

<sup>12</sup> Yisufa mi anaaseena qafamasee aaramaseenoo qimaminoo qinau. Oo maa anaasee doo aneenna teeroo quqaranakiqari amiqina maria.

<sup>13</sup> Miqi qimaseenoo Yisufa narí asauku minasaa quqasoofanoo aqee kai ataufaka rakisufanoo findifinoo Anutunara dufi dufi qimarinau.

<sup>14</sup> Amaana maqasaa rakisi marufa mina qafamaseenoo Yisufa amaanasaa mi anaaseena andeeqoonara aanoommaseenoo faiqi anaasee qimanniminou. Mooseena sandufaki maasara 6 faasaana ainainiaqee qinau, doo innee mikari kai aniree inneeqa aurirana taikaaga, maasa amaanasaa sia aurirana taikaaga.

<sup>15</sup> Miqi qufanoo karaambaiqa fannoo quandaifi qimaminoo qinau, innee unna qima-saidaqa qaaraiiki mariasa, amaanasaa innee inneeqa mimmi burimakau sipsipa ainaina nifiqidaqa nammarinni muqusee mariafaqa nammari naidaqa.

<sup>16</sup> Maa anaaseefa Abarahaamana ati marifanoo Sadannafa kisaagaasaa (18) aukuna karabusaki quqaqafanoo aupuraranaki marina, burimakau mimmi sipsipa uriqarara ainaina fee maridanoo fee mina kai amaanasaa idukirafa andeeqanoo maridanoo fee.

<sup>17</sup> Miqi qufaqa Yisuna aqi marusa mi ufana iriseeqa nisauri marufaqa faiqi anaasee kaiqeesa Yisufa oosana oosana amiqira ainaina auqoonara asasiqariqau.

*Qumini fooqaa saqari qaqama quandara ufa.*

*(Mat 13:31-32; Mak 4:30-32)*

<sup>18</sup> Yisufa faiqi anaasee qimanniminoo qinau, Anutuna maqasaa ququsaki faiqi anaasee mariasa nana ainaina fooqaa fee maridanoo fee, qinee minara nana kikiqee usunauree.

<sup>19</sup> Qinee maaqi qimasee mina kikiqusuanaura. Mifa qumini qaqama fooqaafa marianoo, faiqi moo fannoo qaqama mara mareenoo nari ququsaki ummaqusainanoo firaafa saqariara foora kambiqaqafinanoo ufiniuqa mina asaanasaa ninaamu usakeefaranoo. Anutuna ququsaki keeqafuusa miqidaqa mi saqarina fooqaana auqaana idooaaidaqa.

*Ooruku anoona ati qeemarina quandara ufa.*

*(Mat 13:33)*

<sup>20</sup> Yisufa kafaa qimanniminoo qinau, qinee Anutuna innaaruna ququsaki keeqafuusa nana ainaina kikiqa usunauree, misa ooruku anoona fooqaasa maridanoo.

<sup>21</sup> Anaasee moo fannoo sana qaindi anasee ooruku anoona minaki adiasainanoo aiqamai amiqimmasee ati qaanno.

*Innee tiqeera kooqiki keeqaaqa.*

*(Mat 7:13-14,21-23)*

<sup>22</sup> Yisufa Yeerusaree maqusai oorufidanoo kaqikaa maqusauqakiaqa Anutuna ufa qimanniminoo oorufinau.

<sup>23</sup> Ooru fimarufanoo faiqi moo fannoo irammirinoo qinau, Oo uriqararafa faiqi anaasee moodaa kai moodaa kai innaarunai asumu mariranaki keeqeefaree, qufanoo Yisufa qimaminou.

<sup>24</sup> Anee tiqeera kooqiki afeekaikamasee amanammasee keeqaa, qinee minara qimannimidada iriaqa, faiqi anaasee moomoo amanidaqa sia amana keeqeefaranoo.

<sup>25</sup> Mi maqana akoofa findifinoo kooqi atukarasainaqa misa madaanaindari kooqi aridaqa maaqi qifaranoo, kooqi atuaqisainaqa keeqaane qifanoo maaqa akoofa maaqi qimasee qimannimiannoo.

<sup>26</sup> Innee yaindaraasee qinee inniara sia iridaqa qinaqa misa maaqi qifara, anee maasa maqusai Anutuna ufa qimannimarianafa mariananoo maasa ani faqa narana nammari nee marunasa maridaqa maasara irimarianafa mariananoo.

<sup>27</sup> Maaqa akoofa mina iriseenoo kafaa qimannimiannoo, innee yaindaraasee maridee, innee manda oosana maree mariasa mariafanoo innee qini daqa mariaqooqari moosaa fifuqa. Yisufa mi ufanannai innaaruna kooqi kikiqa usinoo kafaa maa ufana miqoo marusa qimanniminou.

<sup>28</sup> Qinee inniara maqee mariasara qidaqa kasooqaqee innee Abarahaamana faqa Isakeena faqa Yakooboona faqa Anutuna tamummaqara fasiqauqa aiqamausa faqa Anutuna innaaruna ququsaki marifaqa innee maqee qini faqa narana nammari nee marinausa aqoosai maridaqa niqafamasee innee firaqoo nifai sandurinaqa ikiraqee-faranoo.

<sup>29</sup> Faiqi anaasee suani oosaindari faqa amuqundari faqa dinni dinni ataaqendari faqa aniree Anutuna innaaruna ququsaki ooqu marifi moodaanaki mina qoomaqa sakasee neefaranoo.

<sup>30</sup> Mikari maqee maqasaa inaaqianna mariasa mikari misa uriqararusa marifaranoo, maqee aukuna uriqarafa marinausa mikari ureeqararusa marifaranoo.

*Yisufa Eeroodeenara kaasau faini fee qinau.*

<sup>31</sup> Mikari Farisai amaana ufa qimarusa Yisufinnai aniree qimamiqa qiqau, anee maaqooqari findimmaqee moosaa fua, karaambaiqa Eeroodeefa ani kuqa ariraree qinoommi.

<sup>32</sup> Yisufa iriseenoo qinau. Eeroodeefa faiqí nikaruqimasaida ueeqasaida narimarifa maridanoo innee maaqí qimasee qiniara qimamiaqa, qínee maqee faqa duna faqa faiqí anaasee naunduraki faafasaaqa nifaqeeqa aurinausa andeeqannisee ianaura, moona qeeqa saika taikaanaura, miqí qimasee Eeroodeena qimamiaqa.

<sup>33</sup> Maqee fi fi inaqa duna faqa fi fi iqa Yeerusaree maqusai ooruraanaura Anutuna tamummaqara fasiqauqa aiqama Yeerusaree maqusaki kai narusee marufaqa kuqí mariqau, qínee nanaree minakiqari radukaki moosaa kuqanauree sia amana, qínee faqa Yeerusaree maqusaki kai oonuraanaqa misa narundee kai masee qini faqa dari-faranoo.

*Yisufa Yeerusaree maqannaasara qimudaoo qinau.*  
(Mat 23:37-39)

<sup>34</sup> Oo Yeerusaree, Yeerusaree innee Anutuna tamummaqara fasiqauqa kuqa narusee mifa niqíqoosa oonisamu qumaree narimariasa. Qínee moomoo kari ani faiqí anaasee marasee kookooraanara foora sakarara imarunaqa innee qaoo qiafanoo.

<sup>35</sup> Doo qusasaa inni maqusa faqa amaana maqa faqa faiqí anaasee sia marifanoo naakundu mariannoo, qínee kuqaa inni qimannimidaqa innee maaqooqari sia kafaa qini qiqafeefaranoo kasooqagee innee qiniara maafa karaambaiqa aqíqaiфанoo anidanoo fee Anutufa mina amiqí amiqianinafa qimasaidaqa mikari kai qini qiqafeefaranoo.

## 14

*Yisufa autura arimaru fasiqana sabatasaa andeeqanau.*

<sup>1</sup> Yuda maqannaasa amaana faasaana moo Saririqa Farisai amaana ufa qimarusa misa uriqararana maaqaki Yisufa mina faqa narana nararee qimasee keeqafufaqa aqoonna Farisai amaana ufa qimarusa Yisuna qumarararee qimasee amiqimasee apuree mariqau.

<sup>2</sup> Yisufa mi maqanaki ooqu marifufanoo aurimaru fasiqafa afaaqa autura ari maru fasiqafa Yisuna oorinni marinau.

<sup>3</sup> Yisufa mina qafamasee miqoo marusa Farisai amaana ufa qimarusa faqa Mooseena sandufa akoofasauqa miqoo marusa faqa irammirinoo qinau, Qínee inni iraidaqa Mooseena sandufa fannoo inni amaanasaa faasaana faiqí aurinausa andeeqaranara eedoo qidanoo fee, qaoo qidanoo fee.

<sup>4</sup> Misa mi ufana iriseeqa sia ufa qiqau, kaqi Yisuna kai tataqaqa mariqau, miqíqa marufanoo Yisufa mi aurira fasiqana qumareenoo mina aurirana taika amaqaaseenoo aqíqoofanoo mifa fufanoo quandafi miqoo marusa qimannimau.

<sup>5</sup> Yafee moo fannoo innikiqari mina amaaku fee burimakau fee madikaki aqufinoo marinanoo amaanasammifoo qimasee sia fee qumbaqiannoo fee. Sia uqanna amaana irisee minnisee fara kaqi minakinaana qumbaqifaranoo. Doo qínee faqa maa aurira fasiqana madikakinaanara foora amaanasaa qumbaqiara maqi idaqa sia aaqaidaqa.

<sup>6</sup> Misa Yisuna ufa irisee kuqaammifoo qimasee ufa qirara irusia sia ufa qiqau.

*Sia amiqira qoo naaree ooqumaria.*

<sup>7</sup> Mi Farisai amaana qimarufa narana firaqoo suqaseenoo moomoosa naarooqafaqá mina maaqaki ani keeqafufaqa amiqiraqoo ooqu mariranara randee marufanoo Yisufa niqafamasee misa aiqamausara qinau ufa see qini ufa iriaqa qimaseenoo akooqoo ufa maaqí qimasee qimannimau.

<sup>8</sup> Faiqí moo fannoo amundara qoomaqa suqasee ani aarainana oonu reenana sia aaqee oonuree amiqiraqoo kai ooqu maria.

<sup>9</sup> Ani uriqararafa anirainanoo qoomaqa akoofa ani qafeenoo aqíqamasee uriqarara fasiqara miqoo ooqu mariannee qinana anee asauriranaki maridana mandaikiraqoo kai ooqu marinnaranoo.

<sup>10</sup> Innee sia amiqira qoora randaqa, faiqí moo fannoo inni naarainaga maaqimmi-aqa, Innee mina qoomaqaki keeqafíqa kaiqeesa ooqumari mariaqoo kai ooqumariaqa, Qoomaqa akoofa anirama ani qafeenoo aníara oo qini qíqoondi mai ururee amiqiraqoo ooqumaria, Miqí qinana anee aiqamausa nifusaa uriqararafaikinana asasinranoo.

<sup>11</sup> Nariqa kai qínee uriqararausee qimariasa Anutufa nisaauriranaki quqaannoo, nariqa kai qínee ureeqararausee qimariasa Anutufa misa uriqararanaki quqaannoo.

<sup>12</sup> Miqí qimasee Yisufa quandaki mina aaroo fasiqana qimaminoo qinau, anee qoomaqa suqaseenana sia aneenna aqoondiqa faqa akaqaafasaa faqa aneenna ainaina faqa aneenna ainainafaqaa aqoondiqa faqa misauqa sia naaraa. Anee misa naarainaga misa faqa miqí kai iqa ani faqa aaramasee amana kai amifaranoo.

<sup>13</sup> Anee qoomaqa suqaseenana kudi fasiqauqa faqa niku nisauku mandaikiraua faqa arirutiga nimariasa faqa nifu dimbarausa faqa misauqa kai naarama quqasainano Anutufa mina akiqara inni amiqi amiqi iannoo.

<sup>14</sup> Misa sia amana kafaa mina akiqara ani amifaranoo minara kasooqaqee Anutufa amiqira oosana mareemaria fasiqa anaaseesa kuqiranakiqari mara findifu maseenoo mikari mina akiqara ani faqa amiannoo.

*Qoomaqa sakararee qimasee mandaikiraua naara.*

*(Mat 22:1-10)*

<sup>15</sup> Faiqi moo fannoo mi qoomaganaki maridanoo Yisuna ufa iriseenoo qimaminau, Anutuna innaaruna ququsaki keeqafi minaki narana nee mariasa firaqqoo asafaranoo.

<sup>16</sup> Yisufa mina ufa iriseenoo kafaa quandara ufa qimaminau, faiqi moo fannoo qoomaqa firaana sugarara deedaqamaseenoo faiqi anaasee moomoosa naaranau.

<sup>17</sup> Suqaidanoo nari ainainira faiqi aqiqqeenoo anee figu figu idana faiqi anaasee qinee naaraunaua nifiqee minisainaga qoomaqa naaqa doo aiqama ainaina deedaqqinoo maridanoo.

<sup>18</sup> Mina ainainira faiqi fannoo qimanniminoo nufanoo moo fannoo qinau, Qinee maqa doo feefaurumaqaqee idaqa mina qafarara fidaqa sia amana fuanaura.

<sup>19</sup> Miqi qufanoo moo fannoo qinau, qinee qisaukuqara (10) purimakau ummaara rarisee marina feefaurumaqaqee idaqa mina amanamasee qafarara fidaqa sia amana fuanaura.

<sup>20</sup> Miqi qufanoo moo fannoo qinau, qinee maqee kai anaasee amunda qimiqaafaqa sia amana fuanauree qufanoo ainainira faiqi fannoo misa ufa iriseenoo nari firaafinnai oonuree qimaminau. Mifa iriseenoo firaqqoo aanoommaseenoo qimaminau.

<sup>21</sup> Anee dauni dauni sandeenana firaa aatata faqa kaqikaa aatata faqa maqusa qambaana faqa oonureenana kudi fasiqa anaasee faqa mataammataakiqa nimariasa faqa nifu dimbarausa faqa arirutiga nimariasa faqa mandaikiraua aiqama nifiqee qini qoomaqai ania qufanoo mina ainainira faiqi fannoo miqqimminau. Misa nifiqee mini quqaseenoo nari firaafinnai oonureenoo qimaminau.

<sup>22</sup> Doo ani ufamau fiqa nifiqamaree mini quqasaunanoo narana moomoo maridanoo faiqi anaasee sia amanaikidammia qufanoo qoomaqa akoofa qinau.

<sup>23</sup> Doo findimmaqee oonuree nianai afuqakiaqa mariasa nifiqamaree qini qoomaqa amana kai minisainaga naaqqanani.

<sup>24</sup> Innau, eenda naarauna sia aniasa sia uqanna qini narana kaqikaaqqoo nifaurusaa quqefaranoo.

*Yisuna ufara kuqiraree qimarusa kai mina faiqi namu kifaranoo.*

*(Mat 10:37-38)*

<sup>25</sup> Yisufa moosaa fimarufaqa faiqi anaasee moomoosa mina faqa fidaqa maasa faqa Yisuna faiqi namukiraree qufanoo Yisufa quandafi qimanniminau.

<sup>26</sup> Faiqi moo fannoo qini faqa firaree qinna fasiqafa nari anoona akoona faqa faiqi anaasee faqa nari akaqaafasaa faqa asoommaaka faqa nariara faqa fidiqaa maseenoora foomaseenoo qini faqa aniani.

<sup>27</sup> Faiqi moo fannoo qini ufasaara sia eedoo qimasee nari aunirira saqari akuma-reenoora foora sia eedoo qimasee qini ufasaara kuqiranaki finafa sia mifa amana qini faiqi namuki keeqaannoo.

<sup>28</sup> Faiqi moo fannoo maaqa usakararee qimaseenoo maaqa usakara ainainauqara naaree amiqqimasee irinanoo sia amanaikina sia usakaani.

<sup>29</sup> Mifa maaqa atuna faqa faakana faqa kai rakiqasainanoo aiqama ainaina sia amanaikina mina aqoonaua qafamasee naanaidara qimasee maaqi qifoora.

<sup>30</sup> Maa fasiqafa maaqa usakarana oosana araseenoo mafi taikarana sia amanaikinoo.

<sup>31-32</sup> Namuqaa karaambaifa moo fannoo nari rakira fasiqauqa moomoosa faqa aniree nariranara iriseenoo maaqqoo qaraa karaambaifa fannoo mina moomoo rakira fasiqauqara iriseenoo narindi oodaa marinara irinoo amanaikkee ianauree sia amanaikkee ianauree sia amanaikinaqana narirara imari karaambaifaqana faqa ooqumari fi ufa qimasee reendeeniananoo asoofara mariani.

<sup>33</sup> Miqi qimaseenoo Yisufa minara qimanniminau, miqi kai masee innee faqa qini faqa firanara amiqqimasee iriaraasamaseeqa inneeqa aiqama ainaina minniseeqa qini faqa aniaqa. Sia miqigaqia sia amana qini faiqi namukifaranoo.

*Innee inneeqa ainaina minniseeqa qini faiqi namukiaqa.*

*(Mat 5:13; Mak 9:50)*

<sup>34</sup> Miqi qimaseenoo Yisufa kafaa maa ufana qimanniminau, innee ooruku indee mariana sia adiafaa inaqa naqi fee masee kafaa adiafaairana quqeenbaree, sia amanaikin-naranoo.

<sup>35</sup> Sia adiafaa inna ooruku andanda atukaki teeqimasainanoo mi andandafa faqa mandaikammianoo. Innee kaqinni aquaqaana. Mandainaina maridanoo. Innee qini faqa fifandinausa sia amiqimasee mi kadaapi oosanna irirainni kaqi firarianara qaoo qidaqa kasaqaqi kudoosaapee marifanoo maaqa usakaaninafa maaqa faakana rakiasainaga sia amanaiki foora, innee ooruku adiafaa siaina aanna ree foora kaqinni aqua noora. Innee naaqoofaqaasa mi ufana iriaqa.

## 15

*Manda oosana maree marusa suqusee Yisuna ufa iriaqu.*  
(Mat 18:12-14)

<sup>1</sup> Moo kari ummuarira takisa munnimma maree marusa faqa Yuda maqannaasa nikooqee marufaqa nifaqasoosa faqa Yisufunnai anireeqa mina ufa iriraree qimasee mina aaga ani usimariqau.

<sup>2</sup> Farisai amaana ufa qimarusa faqa Mooseena sandufa akoofasauqa faqa misa niqafamasee noori runusee muquriqa maridaqa naundaufa naundaufa qidaqa qiqau. Maa fasiqafa Yisufa maasa nifaqasoosa aniraafanoo misa faqa amiqi amiqi idanoo, sia miqikai idanoo misa faqa narana naidanoo miqidanoo.

<sup>3</sup> Yisufa misa ufa iriseenoo quandara ufa moo maaqi qimasee qimanniminau.

<sup>4</sup> Faiqi moo fannoo moodaannai qisauku fasiqa namu niku nisauku taikasee (100) sipsipa rakisi marinanoo moodaafa kai auia mafinanoo naqi fee iannoo, mi fasiqafa aiqama sipsipa kaqi quqaseenoo moodaara randaannoo.

<sup>5-6</sup> Randanoo nini inoo paqurimaseenoo asamasaseenoo rafusu akumareenoo mini maqusai quqaseenoo nari aqoonausa naaramasee qimannimiannoo, aniree qini faqa asasiqee qianoo. Aiqama sipsipasaa rakisimari fasiqausa miqifaranoo.

<sup>7</sup> Innaarunai mariasa mi fasiqana aanna reefaranoo momoo (99) andeeqara fasiqa anaaseera sia asafifaranoo moodaafa furufaridanoo mandainaina maranoo nini inafa quandaki Anutufinnai ubeekainnana minara firaqoo asafifaranoo.

<sup>8</sup> Moo anaasee fannoo qisaukuqara taikasee siruaa munnimma firaana maqee inanoo moodaafa maaqaki furufaramafinanoo mi anaaseefa naqi fee iannoo, mi anaaseefa qooma qumbisee damuna maraseenoo maaqaki aiqamai damunidanoo aiqama atinai amiqimasee randanoo ni ni inanoo paqurimaseenoo maraannoo.

<sup>9</sup> Maraseenoo nari aqoonausa faqa aqoondiuga faqa naaramaseenoo qimannimiannoo. Innee aniree qini faqa asasiqaa, qini siruaa munnimma furufaramambina doo paquriqa.

<sup>10</sup> Qinee qimannimidaqa, Anutuna qangiroouqa mi anaaseena aanna reefaranoo moodaafa mandainaina maranoo ni ni inafa quandaki Anutufinnai ubeekainaga minara firaqoo asafifaranoo.

*Auianoo nu kumaaraana quandara ufa.*

<sup>11</sup> Yisufa kaqi qimannimidanoo qinau. Faiqi moo fannoo qaara faiqi faqaafa marinau, inaaqiannaafa nari akoona qimaminoo qinau.

<sup>12</sup> Oo qipoo kuqiraridane aneenna aiqama ainaina rainasee maaqanda qiminnaree doo maqee kai rainasee qiminaqa maree funnee qanoo mina akoofa eedoo qimaseenoo nari aiqama ainaina rainasee miqanda nininau.

<sup>13</sup> Nimisoofanoo indaaruaqaafa kaqi maqee inau inaaqiannaafa nari ndi makeeta maseenoo munnimma kai mara mareenoo doo quqaseenoo niana maqusai oonu reenoo furufariranaki maridanoo nari munnimma aiqama fifaunni aqu taikanau.

<sup>14</sup> Aqu taikasooofanoo mi aukuanna aandaroo firaafa mi maqa maaqanaki aiqamatinau nari marufanoo mi fasiqana munnimma faqa narana faqa sia marufanoo aararee marinau.

<sup>15</sup> Mifa mi maqusanakinaa fasiqasaa atooqafufanoo mi fasiqafa mina aqiqeenoo anee qini kuarauqasaa rakisiannee qimasee narana sia amufanoo aararee marufanoo mi kuarasasaa rakisidanoo kuarauqa kunda nimidanoo nariara faqa nararee qimasee irufanoo sia Yuda maqannaasa nee marunee qimasee asauruseenoo minniseenoo aarara marinau.

<sup>16</sup> Miqi marufanoo mi fasiqana irirafa kambiqoofanoo nari kai qimirinoo qinau.

<sup>17</sup> Oo qini qikoona ainainira faiqiuqa misa nariqa nimana kai narana neemariafaqa qinee maaqoo daarara maridaqa kuqiraridaqa.

<sup>18</sup> Qinee findifi geeqa qikoofinnai oonureeqa maaqi qimasee qimamianaara oo qipoo qinee Anutuna ufa faqa ani ufa faqa rukiee marunausa maridaqa.

<sup>19</sup> Qinee sia amana ani amaakuara foora marianaure, amanee ani ainainira faiqi kammafi marianauree.

<sup>20</sup> Miqi qimaseenoo mi fasiqafa findifinoo aanai aqufufanoo narí akoofinnai finau, aanai meeaqoo ani marufanoo mina akoofa maqusasaagari mara meeqa qafamaseenoo amugusufanoo sandeenoo oonu mara narí amaaku aripimma qumareenoo amooqanau.

<sup>21</sup> Miqufanoo mina amaaku fannoo maaqi qimasee narí akoona qimamidanoo reen-deeninau. Qinee Anutuna ufa faqa ani ufa faqa rukiee marunausa maridaqa sia maqee amana ani amaaku marianaure.

<sup>22</sup> Mina akoofa quandaifi narí ainainira faiqiuga naaramaseenoo qimanniminoo qinai, sia ainainira fasiqa qamunna ainaina amia, qini qimaaku marianifeera qamunna ainaina kai amia, dauni dauni amiqira qamunna mara mareeqa mini afisuamaqaqa, rinna faqa asaukuki upeekasee aiku aanaamu faqa afisuamaqaqa.

<sup>23</sup> Miqimaseeqa oonu amiqira burimakau aanaaqi ainoo faqaana arusee deedaqamasee qoomaqa suqaqa.

<sup>24</sup> Qini faiqi maafa kuqi noora foora mafifa kaqi maridanoo anireenoo auiganoo mariifa anireenoo. Miqi qufaqa qoomaqa sakasee neemariqau.

<sup>25</sup> Miqi marufanoo indaarugaa amaaku fannoo suanai mariufa maqusa naambeeqi anireenoo piripunna ufa faqa idi faqa irinoo narí akoona ainainira faiqi moo aaramasee irammirinai.

<sup>26</sup> Mina naqi fee qidaqia qufanoo mifa qimaminai.

<sup>27</sup> Ani akaqa fannoo narí akoona maaqaki aniraifanoo ani akoofa minara qini faiqi doo andeeqasee ani maridanoo fee qimasee purimakau aanaaqi amiqirana aruseenoo suqasee afaaru ridanoo.

<sup>28</sup> Indaarugaa amaaku fannoo mi ufana iriseenoo aanoommaseenoo marufaqa aarofanoo ititinai. Ititammaseenoo marufanoo mina akoofa qumureenoo aaranau, aniree maaqaki keeqaa qufanoo mifa qinai.

<sup>29</sup> Iria qinee moomoo aukunaa karabusara foora ani ainaini marunausa maridaqa sia moodaa kari ani ufa rukiaunau, anee miqi marunana nana ainainee qiminanee sia burimakau aanaaqi amiqira ainaina aruseenana sia fifau mimmi aanaaqi qimianaqa arusee qeeqa qigoondiuga faqa qoomaqa sakasee naunau.

<sup>30</sup> Ani manda faiqi fannoo ani aiqama ainaina mara mareenoo munu dapi maraqanua anaaseesasaa aqu taikaseenoo, aniraifana anee purimakau aanaaqi amiqirana arusee suqasee amiananoo.

<sup>31</sup> Miqi qufanoo mina akoofa qimaminoo qinai, oo qini faiqi anee aiqama kari qini faqa mariananoo aiqama ainaina anindi maridanoo anee aneenna ainainaki ainaini mariananoo.

<sup>32</sup> Ani akaqa fannoo kuqi noora foora inoo mariifa kaqi maridanoo auiganoo mariifa aniraifaqa minara maqee maasa qoomaqa sakasee asasidaqa naunanoo amanaikino. Yisufa miqi qimaseenoo kaffaa maaqi qimasee qimanniminai. Doo maa ufana anoona faasai qunnana maaqimminoo maridanoo. Innaarunai mariasa mi kumaaraana akoona aanna reefaranoo. Moomoo andeeqara fasiqa aanaaseera sia asasifaranoo, moodaafa mandainaina maranoo ni ni inoo quandaiki Anutufinnai ubeekainnana asasifaranoo.

## 16

*Irirana faqaa manda ainainira faiqi mina quandara ufa.*

<sup>1</sup> Yisufa narí faiqi namu qimanniminoo qinai, faiqi moo fannoo ainaina faqaafa narí ainainasaa rakisianinnana moo mareeqee quqasoofaqa misa mi fasiqana ainaina faqaana qimamiqau.

<sup>2</sup> Ainainasaa rakisirafa ani munnimma fifau rairaa idanoo fee qufanoo ainaina faqaafa mi fasiqana aareenoo anee munnimma aqi mariannana amiqi masee papiqasaa akara rumasee qiminaqa qafamasee ani aqiqaanau anee sia kaffaa ainainasaa rakisinnaranoo.

<sup>3</sup> Miqi qufanoo mina ainainasaa rakisi marufa narí kai qimirinoo qinai, qini uriqararafa qini diqiqrara qimarifaqa nana ainainee ianauree qinee afeeka siaisa maridaqa madika indufirana sia amanaikidaqa kudi fasiqa maridaqa qigoonausiannai narana innaaru qiranara qisauridaqa sia amana mi oosanna maraanaure.

<sup>4</sup> Doo iridaqa qini qigoondi moomoosaikiageera maa saikana taikasee misiannai firara maaqimmianaure.

<sup>5</sup> Qinee qeeqa uriqararana faqa bisinisaikida marusara moo deedeepianauree qimaseenoo maaqimminai.

<sup>6-7</sup> Mifa moo fasiqa aaramasee irammirinai, anee qini uriqararana ufaasu munnimma naqummee maqee idanee qufanoo mifa qinai, qinee moodaannai qisauku fasiqa niku



nisauku taikasee (100) firaa tinna oorifa fadameena (sauna anoona fooqaana) mina akiaqara sia amiqiafana, kaqi maqee idaqa, miqi qufanoo ainainasaa rakisirafa qimaminau, anee qaara fasiqa niku nisauku taikasee qini qisaukuqara taikasee (50) munnimma kai qiminaqa ani munnimma akiaqara taikasee fee qimasee bukaki ateekaanauree qimaseenoo kafia moona aaramasee irammirinoo qinau, anee qini uriqararana ufaasu munnimma naqumme maqee idanee qufanoo mifa qinau, qinee moodaannai qisauku fasiqa niku nisauku taikasee (100) raisa beeka akiaqara sia amiqiafana kaqi maqee idaqa, miqi qufanoo ainainasaa rakisirafa qimaminau, anee qaara faqa qaara faqa fasiqa niku nisauku taikasee (80) akiqara kai qiminaqa ani munnimma akiaqara taikasee fee qimasee bukaki ateekaanauree qinau, miqunannai mi fasiqafa narí firaa ana akuru qiranannai misa aqoondikinau.

<sup>8</sup> Ainaina faqaafa mina unnaqira oosana qafamaseenoo oo irirana faqaa fee qinau, minara Yisufa qimannimidanoo qinau, maa maqanasaaqaraa fasiqa aanaaseeuqa nariqa munnimma ainaina maree mariana irirana faqaasa mariafanoo Anutuna ufa qoomasaa andeeqasee nimariasa irirana oorudupiraua sia misa irirana amanasaa maridaqa.

<sup>9</sup> Qinee inni qimannimidaga, maa maqanasaaqaraa nári afeeka iriranannai kaaqa afeekaikamasee maaqoo mariranara iridaqa munnimma aina afeedidaqa. Innee faqa misa naanna ramasee kaaqa afeekaikamasee naaru marira afeedira ainainakiara munari minari masee inneeqa maaqooqaraa manda munnimmannai sarau imariasa dadaaqiqa innaarunai asumu mariranaki moomoo ainaina afeediaqa.

<sup>10</sup> Yafee moo fannoo kaqikaa fifau ainainasaa amiqimasee rakisinafa firaa ainainatiasaa faqa amiqimmasee rakisiannoo, yafee moo fannoo kaqikaa ainainara unnaqi marifa firaa ainainatiara faqa unna qiannoo.

<sup>11</sup> Anee maa maqanasaaqaraa munnimma qumiasana furufaramasee rakisinanoo naqi fee masee innaarunai finanoo Anutufa innaarunai mari firaa qumiasana munnimma anisaa quqasee rakisiannoo qiannoo fee.

<sup>12</sup> Anee moona ainaina furufara masee rakisinanoo yafee anindi amisee rakisiannoo qiannoo fee.

<sup>13</sup> Ainainira fasiqa moo fannoo sia amana qaara rakisiraqanda moodaa kari ainainamma nimaqaannoo, sia amana. Mifa indaaruaqanara akooqaannoo moo rakisiriranara aidiannoo. Mifa moo rakisiranasaa atooqeenoo inaaqianaana minnisaannoo, miqi kai iqa innee faqa Anutunara faqa maqasaa qumiasanara faqa moodaanaki sia amana ainainamma nimaqeenanaranoo.

*Farisai amaana ufa qimarusa munnimmara runara niqinau.*

*(Mat 11:12-13; 5:31-32; Mak 10:11-12)*

<sup>14</sup> Farisai amaana ufa qimarusa mi ufana iriseeqa misa kaaqa munnimmara rimarusa maridaqa Yisunara uteeti qimariqau.

<sup>15</sup> Yisufa iriseenoo qimanniminu, innee inneeqa kai maqasaa fasiqauqa nifusaa andeeqarausee qimariasa mariafanoo, Anutufa inni naunduraki qafee marifa maqasaa fasiqauqa amiqira ainainee qimarianara Anutufa mandainainee qidanoo.

<sup>16</sup> Mooseena sandufa faqa tamummaqara fasiqauqa akarakinna ufa faqa oosana arooqooqari misa ufa afeeka fannoo aiqamausa rafaafufusee fi fi inoo Yoohaneefa nammari nimimaru aukuanna mini raquramiqoo taikanau. Miqooqari innaaruna ququsakinaana Anutuna amiqira fasaasaa ufa fannoo kai misa qimanniminoo fifaini marifaqa aiqamausa innaaruna ququsaki nimudaanai qimasaida keeqararidaqa.

<sup>17</sup> Innaaruna faqa maqa faqa tautumaki taikarafa amana mariannoo, Mooseena sandufa faqa tamummaqara fasiqauqa ufa faqa kaqikaa ati kai sia amana taikaannoo afeeka mariannoo.

<sup>18</sup> Faiqi moo fannoo narí anaqa minnisee moo anaasee marainafa qummuarimari fasiqafa mariannoo, faiqi moo fannoo minnisainna aanaaseena marainafa mifa faqa qummuarimari fasiqafa mariannoo.

*Ainainafaqaafa faqa ainaina siaifasiqafa faqa miqandara quandara ufa.*

<sup>19</sup> Yisufa Farisai amaana ufa qimarusa oosana kaaqa munnimmara qamunna amiqiranara rimarusa marunara iriseenoo maa ufana qimanniminoo qinau, faiqi moo fannoo ainaina fiqararafa maridanoo moomoo munnimma aqimaria qamunnana kai afisimarifa maridanoo, aiqama kari amiqiranaki kai marinau.

<sup>20</sup> Kudi fasiqa moo fannoo mina auqu Rasarusana amarafa afaaqa namuana aanaaqi maqee maqee ainaina faqaana kooqiki ani raidanoo mina narana ataraasa tidaamarai aqufuna suqu nararee qimasee ani maridanoo mandainainaki marufanoo fainiuqa anireeqa mina namuana umboomasoofanoo marinoo kuqinau.

<sup>21</sup> Mi kudi fasiqafa kuqufufaqa qangiroouqa mina afiqa maree innaarunai Abarahaamana aaga quqasoofanoo firaa qoomaqa sakasee neemarinau.

<sup>22-23</sup> Ainaina faqaa fasiqa faqa kuqufufaqa akundamasoofanoo idaki finau. (Mi idana auqu Aadeesaa ida fee qidaqa, kuqimariasa maqa maaqa taikara aukuanara afeesimaria idafa maridanoo fee qidaqa.) Ainaina faqaafa firaa aupuraranaki maridanoo afu murufi maqaseenoo nianai Abarahaamana faqa Rasarusana amarana faqa amiqiranaki oofuqaqee marufanoo niqafanau.

<sup>24</sup> Niqafamasee nammeera qimaseenoo qinau, oo qini qikoofa Abarahaama anee Rasarusana qimaminanoo nari asauku amukannai nammariki raaraamasee maree muqu qini qimaakiri qifaurusaa quqasainanoo asooaani qinee idaki firaa aupuraranaki maridaqa.

<sup>25-26</sup> Abarahaamafa iriseenoo qimaminau, oo qini qimaaku anee maqasaa marunna kamuqoo amiqira ainainaki marunanoo Rasarusafa mandainainaki marinau, maqee Rasarusafa maaqoo asairanaki marinana anee aupuraranaki mariananoo, innisaimbaqa qambaanaai maani firafa maridanoo, maaqoo marinausa sia amana minni fifaranoo mindari faqa sia amana mai anifaranoo.

<sup>27-28</sup> Ainaina faqaafa Abarahaamana ufa iriseenoo qimaminau, qinee fifimasee ani qimamidaqa, amanee anee Rasarusana aqiqainanoo qini qikoona maaqai oorureenoo qini qikaqaafasaauga moodaanaai qisauku (5) maridammia, misa aaquqimannimaqainaqqa sia maa aupurara maqusanaki aniaqa.

<sup>29</sup> Abarahaamafa iriseenoo qimaminau, Mooseena akara faqa tamummaqara fasiqauqa akara faqa ani akaqaafasaauga aaquqima nimiqaidanoo misa minaki kai iriaqa.

<sup>30</sup> Ainaina faqaafa mi ufana iriseenoo Abarahaamana qimaminau, oo qini qikoofa Abarahaama, mi akarafa sia amanaikidanoo moo fannoo kuqiranakiqari findifinoo qimanniminaqa misa nariqa manda oosana minnisee sia maa aupurara maqusanaki anifaranoo.

<sup>31</sup> Abarahaamafa qinau, ani akaqaafasaauga Mooseena faqa tamummaqara fasiqauqa ufa faqa sia iriqa kuqiranakiqari findi finna fasiqana ufa faqa sia irifaranoo.

## 17

*Faiqi aanaaqi Yisuna ufamau fimarina mareeqee kaqi runna ubeekee mariana mi ufana. (Mat 18:6-7, 21-22; Mak 9:42)*

<sup>1-2</sup> Moo kari Yisufa nari faiqi namu maaqi qimasee qimanniminau. Faiqi anaasee mandoosanaki mara quqannimaqee fandinausa kuqaa uqanna kambiqeefaranoo mi manda oosana uqeerainna fasiqana arirafa firaaqoo uqanna mariifoo qidaqa qimudaoo qidaqa. Ooruku nammariki faiqi rafusu aqirafa firaa oonisanda rumbaseeqa anukaki ususee minaki aqirafa kaqikaa aupuraraq mariannoo, mi fasiqafa qini ufa irimari kaqikaa faiqina aqiqasee manda aana uqafiqainafa mina arirafa firafa uqanna mariannoo.

<sup>3</sup> Minara innee amiqimasee inneeqa mariranasaa rakisiaqa. Ani akaqa fannoo manda oosana marainana anee qaoo qinanoo mifa aundura quandasee andeeqaraqoo finana anee mina manda oosanara sia kafa aqia.

<sup>4</sup> Mifa dinni taikasee dinni ani qaaraqanda (7) kari ani mandaikammamaqasee quandakinoo aniara qini mandainaina minnisaannee qinana eedoo qimasee minnisaa.

*Maasa anisaa naundura mundirana afeekaikiaqa.*

<sup>5</sup> Yisufa niqiqoo fasiqausa minara Yisuna qimamiqa qiqau, oo karaambaiqa maasa daundurannai anisaa mundirana firaanaikamaqisaa qufanoo karaambaiqa fannoo maaqi qinau.

<sup>6</sup> Innee qinisaa mundirana sia maridanoora foora maridanoo kaqikaa ainaina maqana qaqama miqirafa kaqikaafa kai marinaqau, innee minannai firaa ainaina auqini. Innee firaa saqari keefaadiara foora anenna kai rafauru akinana ooruku nammariki aqufi kambiqaannee qifanoo mifa eedoo qimasee miqini. Innee qinisaa mundirana siara foora maridanoo sia amanaikifaranoo.

*Innee inneeqara maasa ainainira faiqi fee qiaqa.*

<sup>7</sup> Yisufa nari miqoo qaraasa oosanara iriseenoo ufa qimannimidanoo qinau, Innikiqari moo fannoo mina ainainira fasiqa fannoo ani afuqai ainainiinoo fee firimaria andausaa fee rakisiinanoo fee eendimarinanoo anirainana anee sia minara kaqi kaqi aniree anenna narana naannee qinnaranoo.

<sup>8</sup> Maaqi qinnaranoo, anee narana suqarara afisimaria qamunnana afisusee qini narana suqasainaga qinee narana faqa nammari faqa namasaanana anee inaaqianna suqasee aneennara naa.

<sup>9</sup> Ani ainainira faiqi fannoo ani ufamau finana anee sia minara dufi dufi qinnaranoo mi fasiqafa faqa dufi dufi qira ufara sia randaannoo nari feefauru saikey qinnaranoo.

<sup>10</sup> Innee faqa miqikai iqa mina aanna raaqa, aiqama qinee Yisusa qimannimunna ufana afaqaga fi fi iqa mafi taikasee sia qini dufi dufi qira ufara randaaga, maaqi qiaqa maasa fifau ainainira fasiqauqa maridaqa feefauru mararara fooru ainaini marunausa maridaqa.

*Qisaukuqara taikasee (10) karoora nari marusa ufa.*

<sup>11-13</sup> Yisufa Yeerusaree maqasai firara Kariree maqa maaqa dinni marufanoo Samaria maqa maaqa dinni marufanoo Yisufa qambaanai fidanoo moo maqusaki firaree qimasai fimarufanoo karoora narimaru fasiqausa qisaukuqara taikasee (10) karoora nari mariasa naannareeqa naadumasaqa kikiqammafiqa nammeera qimasee Yisuna qimamiqa qiqau, oo Yisu maasa uriqararafa anee maasara amudaqaani.

<sup>14-16</sup> Yisufa misa niqafamasee qimanniminau, innee amaana maaqaki Anutuna aanaiqiki mariasa inneeqa nifaaqa ooruree uqannifiqai faqa inni nifaaqa aiqum-maseenoo inniara anukarausee qifaranoo, miqi qinaqa innee aiqamausa nifusaa anukaqa maridee qifaranoo. Miqi qufaqa misa eedoo qimasee aanai fimarufanoo misa karoora taikafuqa nariqa nifaaqa qafamaseeqa fufanoo moodaafa quandaki firaqoo Anutunara dufi dufi qimammaree anireenoo Yisuna aikuki maqasaa aqufufanoo Yisunara dufi dufi qimamaqanau, mi fasiqafa Yuda maqanna namuqaa, Samaria maqanna marinau.

<sup>17-18</sup> Yisufa mi fasiqana asasirana iriseenoo miqoo marusa qimanniminau. Qisaukuqara fasiqa karoora nari marisa rukanniseeqa, dinni taikasee dinni ani qaara faqa qaara faqa marasee fasiqauqa yai fee fiaa, sia fee misa faqa aniree Anutunara dufi dufi qifaree sia Yuda maqannaasa ania Samaria maqannaafa kai aniree dufi dufi qidanoo.

<sup>19</sup> Miqi qimasee Yisufa mi fasiqana qimaminau, doo findifi fua, anee qini saqarikian-nanannai kai amiqiananoo.

*Anutuna ququsa sia akooqoo marina.*

*(Mat 24:23-28, 37-41)*

<sup>20-21</sup> Farisai amaana ufa qimarusa Yisuna iramiriqa qiqau, Anutuna ququsa yairee fee maqasaa kambiqaafinoo faiqi aanaaseesaa Anutufa rakisiannoo fee qufanoo Yisufa qimanniminau, Anutuna ququsa fannoo sia akooqoo ainainara fooru kambiqaannoo, sia moo fannoo maaqi qiannoo doo qafaa maaqoo kambiqaenoo doo qafaa meeqai kambiqaenoo Anutuna ququsa fannoo inni naundurari mari ainainafa maridanoo.

<sup>22</sup> Miqoo Yisufa nari faiqi namu qimanniminau, kasooqaqee innee qinee anianna faasaanasaa qafaaqaa idaqa sia qafeefaranoo.

<sup>23</sup> Akaqausa qini ququsa kambiqaaninnanara maaqi qifaranoo, meera qafaa miqoo maridanoo, maaminni qafaa minni maridanoo misa miqi qifaqa samma oonu qafaaqa.

<sup>24</sup> Qini ququsa sia qumee kambiqaannoo aakuasaa uqinanoo innaaruna aiqama atinai kaaqa qamaquannoo, qinee faiqi nimaaku qumuanna faasaana aakuasaa aanna ramasee qumuanaqa tautumaki aiqamai daraaninaqa qiqafeefara.

<sup>25</sup> Maqee mariasa firaa aupurarana qimisee diqiqeefaranoo.

<sup>26</sup> Qinee faiqi nimaaku qumuanna faasaanafa Nooana aukuanara fooqaafa mariannoo.

<sup>27</sup> Mi aukuanna faiqi anaasee idoo faakoo idaqa maanaqa amundaيداqa narana nammari naidaqa mana mana imarufanoo Nooafa nari sipa firaanaki keeqafufanoo nammari fannoo tautumannimaqaseenoo faiqi anaasee aiqama naru taikanau.

<sup>28-29</sup> Qinee qumuanna faasaana Rootana aukuanara fooru mariannoo, mi aukuanna faiqi anaasee aiqamausa sia Rootana ufa iriqa narana nammari naidaqa makeetidaqa feefauru narami narami idaqa maaqa usakeeqa suana ummaqiqa mana mana idaqa marufanoo Rootafa Soodooma maqusakiqari findimaqee sandoofanoo innaarunaindari idauru fasafasimarufa qumureenoo aiqama naru taikanau.

<sup>30</sup> Qinee faiqi nimaaku qumira faasaana maqasaa fasiqa anaasee mi furufara irirana maree marifaqa tautumasee qumuanaura.

<sup>31</sup> Mi faasaanna akaqausa nariqa kooqiki mariinausa sia naamuki keeqafi ainaina indaafaranoo, miqi kaimmasee akaqausa anaadoonni mariinausa sia maqusai aniree nari ainaina mareefaranoo.

<sup>32</sup> Rootana anaqa fannoo asumu marirannai sandanoo fidanoo oonu kasoo mafinoo quandafi aanaaqiannai afu maqaidanoo kuqinau.

<sup>33</sup> Yafee moo fannoo narí mariranara amuqusinafa mina marirafa taikaannoo, yafee moo fannoo narí marirana minnisainafa mina marirana maraannoo.

<sup>34</sup> Qinee qimannimidaqa, mi eendanaki faiqí qaaraqanda moodaanaki faiqaqee mari-faqa qinee tautumasee moo innaarunai uqeerasee moo minnisaanura.

<sup>35</sup> Anaasee qaaraqanda sana aindi anee marifanoo tautumasee moo mareenoo moo minnisaannoo. [ <sup>36</sup> Faiqí qaaraqanda anaadooki marifaqa tautumasee moo mareenoo moo minnisaannoo.]

<sup>37</sup> Yisuna faiqí namu mina ufa iriseeqa iramiriqa qiqau, yatinaí fee anee qianna ainainafa kambiqaannoo fee qufanoo Yisufa quandara ufa qimanniminau, aandau kuqinoo mariqoo kai quqaumu moomoosa minaki usidaqa.

(Qini ufa irimariasa yai yai fee maridaqa sia qiniara randeefaranoo. Qinee qumiqa innee marifandinnaqoo irisee akooqoo tautumasee qumuree inni uqeeraanura.)

## 18

### *Anaasee maqee maqee siaasa qimamimaru quandara ufana.*

<sup>1</sup> Yisufa narí faiqí namuara sia nikoo nikaa masee innaaru qiranara minnisaaqee maqee maqee afeekaikamasee innaaru qiaqeeera quandara ufa qimanniminau.

<sup>2</sup> Moo maqusaki siaasa marinau, mifa manda fasiqa maridanoo sia Anutunara aaquqamasee andeeqara siaasa saika maranau, sia faiqí aanaaseera amuqusa imarinau.

<sup>3</sup> Mi maqusanaki kai adeedaana anaasee moo marinau, mina afaaqi kuqufufa nariara kadaapiriranaki marinau, mifa maqee maqee siaasinnai oonuraidanoo sandanainai qimarinau, oo siaasa anee dadaaqinana qini mandaikamaqimaqee mariasara qaoo qia.

<sup>4</sup> Siaasa fannoo kisaqaasaa mi adeedaana anaaseena ufa irinoo fidanoo narí kai qimirinoo qinau, Qinee sia Anutunara rufiqaunusa faiqí aanaaseera sia qimuqusimarisa maridaqa.

<sup>5</sup> Maa anaaseefa narí ainaina ummuari mariafanoo narí ainainara qini daruqaammii-noo saina dadaaqiananoo taikaani.

<sup>6</sup> Karaambaiqa Yisufa mi manda fasiqanara narí faiqí namu qimanniminoo qinau, Innee mi manda siaasana ufa irida fee.

<sup>7</sup> Anutufa sia miqí marifa, amiqirafa maridanoo mifa narí faiqí anaasee eendaki faasaana misa ikiraqarana iriseenoo sia anuquannoo qinee qimannimida dauni dauni dadaaqiannoo.

<sup>8</sup> Minara sia innaaruqiranara nikoo nikaa masee minnisaaqa, afeekaikamasee innaaru qiaqa, qinee faiqí nimaaku kafa qumuree qafaanaqa faiqí anaasee Anutuna saqariki-daqa innaaru kaqi fee ida marifaree sia fee ida marifaree.

### *Narí amooqimaruna faqa narí reendenimarufa faqa miqandufa.*

<sup>9</sup> Faiqí anaasee akaqausa náriara andeeqarusee qimasaidaqa niqoonasara mandaiki-rausee qimasaidaqa fidaqaa imarianara Yisufa niqafamasee maa quandara ufana qimanniminau.

<sup>10</sup> Faiqí qaaraqanda Yeerusaree maqusai naaquqara amaana maaqaki innaaru qiraree qimasee keeqaqau, moo fannoo Farisai amaana ufa qimarufa moo fannoo qummuarira takisa munnimma maree marufa miqanda keeqaqau.

<sup>11-12</sup> Farisai amaana ufa qimarufa innaaru qiraree qimaseenoo narí kai narí amoo qidanoo qinau, oo Anutuna qinee sia ainainara rimarunusa maridaqa sia unna ufa qunusa sia anaasee qummuarunusa sia aiqamausa naana raunusa maridaqa. Oo dufi dufi sia maa umuaria takisa munnimmana maree marina aanna raunusa maridaqa, aiqama amaana aundurái qaara faasaaana narana minniisee daarara innaaru qimarunusa maridaqa qeeqa munnimma aiqama rainasee dinni qisauku taikasee dinni ani qaara faqa qaara faqa (9) munnimma qeeqaraa maridaqa moodaa munnimma ani amidaga, oo Anutu dufi dufi qinee miqí marunusa maridaqa.

<sup>13</sup> Ummuarira takisa munnimma maree marufa innaaru qirara firaqoo asauridanoo aadumasaa kikiqammafinoo sia innaarunai oori uqeereenoo kummaramafinoo narí aaqaranara aiaaee qidanoo asauku rootee rootee kidanoo narí aaqaranara asauruseenoo qinau, oo Anutufa qinee aaqee marunusa maridaqa anee qiniara amuqusia.

<sup>14</sup> Yisufa mi fasiqaqandara narí faiqí namu qimanniminoo qinau, ummuarira takisa munnimma maree maruna mandainaina Anutufa taika aisoofanoo andeeqasee finau, Farisai amaana ufa qimarufa sia andeeqanau kaqi finau, nariara uriqararusee qimariasa Anutufa asauriranaki quqaannoo, nariara ureeqararusee qimariasa Anutufa uriqararanakama nimaqaannoo.

*Yisufa faiqi aanaaqiuqa nifaaqooqa qinau.*

*(Mat 19:13-15; Mak 10:13-16)*

<sup>15</sup> Faiqi anaasee akaqausa nariqa faiqi namu nifiqamaree Yisufinnai munusaana misa nifaaqai nari asauku quqasee nifaaqooqa qimannimaqaanifeera nifiqee aniqau. Aniroofaqa Yisuna faiqi namu misa farafara qifoo qimasee niqigau.

<sup>16</sup> Yisufa misa niqira ufa iriseenoo qaoo qimasee faiqiuqaindi naaraifaqa mai aniaqee qimasee nari ufa irimariasa qimanniminu, faiqi aanaaqiuqa sia rafaafa fuaqa, saifaqa mai aniaqa Anutuna ququsa miqirusaindi maridanoo.

<sup>17</sup> Innee maanara kai irisee sia aunuqa yafee moo fannoo sia kaqikaa faiqi naanna ramasee Anutuna ququsa marainafa sia uqanna minaki keeqaannoo, faiqi aanaaqi naanna ramasee Anutuna ququsa marainausa misa kai minaki keeqefaranoo.

*Qumiasana faqaafa naaru mariranara iranau.*

*(Mat 19:16-30; Mak 10:17-31)*

<sup>18-19</sup> Moo kari Yuda maqannaasa uriqararusaqiqari moo fannoo Yisuna irammirino qinau, Oo ufasaa rakisirafa andeeqarafa nana saikkee auqamamaqaanoo fee Anutufa naaru naaru marirana qimiannoo fee qufanoo Yisufa qinau, anee nanaree qiniara andeeqara fee qidanee sia moo fannoo andeeqarafa maridanoo Anutufa kai andeeqarafa maridanoo.

<sup>20</sup> Anee sandufa akara irimariananoo mimau finana maaqimma anee sia anaasee ummuaria, anee sia faiqi anaasee kuqannarua anee sia ainaina ummuaria anee sia unna ufa qia aneenna anoona akoonara aidimarinana miqanda nuqu uqeeraidana amiqimasee rakisinnimaqaa qufanoo mi fasiqafa iriseenoo qinau.

<sup>21</sup> Qinee mi ufausa kumaaraasaaqari aiqama mi ufamau fuafanausa maridaqa.

<sup>22</sup> Yisufa iriseenoo qimaminu, moodaa ainaina kai anee sia amanaikianoo anee aneenna qumiasana moomoo marina makeetamasee munnimma maraseenana kudi fasiqa aanaaseeuqa nimisainanoo ani qumiasana ani afesara innaarunai mariani, miqimaseenana anee qini faqa ania.

<sup>23</sup> Qufanoo mi fasiqafa iriseenoo mina qumiasana moomoo marunara firaqoo oori runusee finau.

<sup>24</sup> Yisufa mina oori runirana qafamaseenoo qimanniminu, qumiasana moomoo faqaasa Anutuna ququsaki keeqarara firaqoo anuqidaqa.

<sup>25</sup> Qoosa fannoo ukaamaraki ruqiqaki firafa sia amanaikianoo, qumiasana moomoo faqaafa innaaruna ququsaki firara miqi kai inoo sia amanaikianoo.

<sup>26-27</sup> Miqoo marusa mi ufana irisee tautumasee Yisuna iramiriqa qiqau, anee qianandee ainaina faqaasa sia innaarunai fifaqa yafee moo fannoo innaarunai asumu mariranaki amana keeqaannoo fee sia moo fannoo amanaikianoo, qufanoo Yisufa qinau, maqasaa fasiqa anaasee sia amanaikimaria ainaina Anutufa amanaiki marifa maridanoo.

<sup>28</sup> Peetooroofa iriseenoo Yisuna qimaminu, maasa qeeqa maqusaina minnisee ani faqa nidaqa anee maasara naqi fee qidanee.

<sup>29-30</sup> Yisufa qimanniminu, qinee maa ufana ani qimamidaqa, moo fannoo nari maaqa fee nari anaafa fee akaqafasaa fee nari anoona akoonee nari faiqi namu fee Anutuna ququsa saikaramaree minnisainafa mifa maqee maria kamuqoo aabaa faqa maraannoo kasoogaqee anianinna aukwana naaru asumu marirana maraannoo.

*Yisufa nari kuquaninnanara qimanniminu.*

*(Mat 20:17-19; Mak 10:32-34)*

<sup>31</sup> Yisufa nari faiqi namu nifiqamaree aadumai oonureenoo qimanniminu, Innee iriaqa innisaimbaqa Yeerusareenni ooru fidaqa, miqoo marianaqa oqai mariu tamummaqara fasiqauqa faiqi nimaaku qiniara akara rumaqoo ufafa anoonaikianoo.

<sup>32</sup> Qini maqannaasa qini mareeqee aanaamuru nisaakuki quqaqaisaifaqa qiniara ataasa ataasa ufa faqa manda ufa faqa qidaqa niqaara fidi qimaqefaranoo.

<sup>33</sup> Misa qini uaiqa samu firaqoo qifaaqa atekaseeqa munu kuqa darifaranoo, daru-saifanoo qaarammoo faasaana aiqarainanoo Anutufa qini mara findifuma qimaqaannoo.

<sup>34</sup> Yisuna faiqi namu mi ufana iriseeqa sia minara iriqau. Mi ufana anoona Anutufa kukeeqama nimaqaqaiifaqa sia iriqau.

*Afu qimbarana Yisufa afu maqaisanau.*

*(Mat 20:29-34; Mak 10:46-52)*

<sup>35</sup> Yisufa faiqi anaasee moomoosa faqa Yeerikoo maqusaki firaree qimaseenoo aanasaa fimarufanoo naambeeqai aana afainni faiqi moo afu qimbarafa oqufaaqee maridanoo faiqi anaasee fiqaree aiqaree imarufanoo narana mara nee maru munnimmanara innaaru qimarufa marinau.

<sup>36</sup> Mifa faiqi anaasee moomoosa fiqaree marufanoo niku ai iriseenoo iramirinoo qinau, maana nana ainainee kambiqaidanoo fee qufaqa misa qiqau.

<sup>37</sup> Yisufa Nasareetee maqusaindaraafa doo aiqaraidanoommifoo qufanoo mi fasiqafa iriseenoo faaqa rumasee qinau.

<sup>38</sup> Oo Yisu Dafidina ati marianafa anee qiniara amuqusinana qini dadaaqlia.

<sup>39</sup> Faiqi anaasee indaaruu fusa mina faaqarirana irisee mina aqiqa qiqau, anee ufasaa qufanoo mifa firaqqoo fi fi qimasee qinau, oo Dafidina ati marianafa anee qiniara amuqusinana dadaaqlia qufanoo.

<sup>40</sup> Yisufa kasoomafinoo mi fasiqana maree mai aniaqee qufaqa afiqamaree mini Yisuna aqa quqasoofanoo Yisufa iramirinau,

<sup>41</sup> Anee qiniara naqimma aisaanauree qidanee qufanoo mi fasiqafa qinau. Oo uriqararafa anee qini qifu maqaqisaanneera qidaqa qufanoo

<sup>42</sup> Yisufa qimaminau, doo aneenna afu irirana qinisaa rusiananannoo amiqianano.

<sup>43</sup> Miqi qimarufanoo aqee kai mi fasiqana afu amiqimafufanoo Yisuna faqa fidanoo Anutunara dufi dufi qimammaree finau. Faiqi anaasee moomoosa Yisuna faqa fiiuusa mina qafamasee misa faqa Anutuna amooqimamaqau.

## 19

### *Sakiusana ufa.*

<sup>1-2</sup> Yisufa Yeerikoo maqusamau fiqaree marufanoo faiqi moo ummuarira takisa munnimma maree marusa uriqararafa fira qumiasana faqaafa mina auqu Sakiusafa Yeerikoo maqusaki marinau.

<sup>3-4</sup> Mifa Yisuna qafarara kikiqufanoo sia amanaikinau, qusa fasiqa maridanoo faiqi anaasee ititafunara sia qafaanauree qimaseenoo faiqi anaasee finnaaqareenoo sandeenoo Yisufa fuaninna aannai oonureenoo saqariki akaramafinoo rakisi marinau. <sup>5</sup> Yisufa saqari atukaki oonureenoo murufi afu maqaseenoo Sakiusana qafamasee qimaminoo qinau, Sakiusa dauni dauni qumurainaga maqee ani maqaki oonuree ani faqa marianauro.

<sup>6</sup> Sakiusafa maqai qumureenoo firaqqoo asamaseenoo Yisuna afiqeenoo nari maqai munusoofanoo marinau.

<sup>7</sup> Yisufa mina maqaki marufaqa faiqi anaasee aiqamausa noori runusee ninunuridaqa qiqau, maa fasiqafa manda oosana mareemari fasiqana maqaki keeqafinoo adooaidanoo.

<sup>8</sup> Sakiusafa nari maqaki maridanoo findifinoo karaambaiqa Yisuna qimaminau Oo uriqararafa qini ufa iria, qinee qeeqa aiqama qumiasana qambaana rainasee dinni kudi fasiqa anaasee nimianauro, qinee faiqi anaasee nikaru qimasee misa munnimma ummuarira takisa maraafannana akiaqara kafaa nimisee aabaa qaara faqa qaara faqa kari nimianauro.

<sup>9</sup> Yisufa irisee qimaminau, maqee faasaana naaru naaru asumu marirafa ani maqaki ani maridanoo anee faqa Abarahaamana ati mariananoo.

<sup>10</sup> Qinee faiqi nimaaku miqiuqa auuqaqa nuasara randasee nifiqa quqasee asumu marirana nimiraree qimasee qumu maridaqa.

### *Yisufa ainainira munnimma kikiqa usuqoofa.*

(Mat 25:14-30)

<sup>11</sup> Sakiusana maqaki mariiusa Yisufa Sakiusana qimamu ufana iriseeqa mina faqa Yeerusaree maqusai ooru fidaqa maaqi qimasee unna qimasee qiqau. Anutuna innaaruna ququsa maqee uqanna maqasaa Yeerusaree maqusai kambiqaanoo fee qimarufanoo Yisufa misa aqara irirana iriseenoo qimannimminau.

<sup>12-13</sup> Faiqi moo fannoo uriqararafa maridanoo niana maqusai fira karaambaiqa marinnai oonuraananoo ooru dupira karaambaiqa qafee qiminaqa qeeqa ququsakinaasa rakisinnimaqaanee qimaseenoo firaridanoo nari ainainira faiquqa qisaukuqara taikasee (10) naaramasee kooru munnimma naadu naadu nimiseenoo qimannimminau, qinee oonu marianna kamuqoo innee maa munnimmanannai ainaini marifaqa anireeqa maraanauro.

<sup>14-16</sup> Mi fasiqafa fufaqa mina maqannaasa minara fidiqaaqaa imarusa faiqi moo aqiqqeeqa anee inaaqiana oonuree fira karaambaiqa qimamia mifa maasa rakisi qimaqararara maasa qikooqaidanoo, miqi qimasee qimamiseenoo oonurandee ani marifanoo mi uriqarara fasiqafa karaambaiqa qafee mara mareenoo oonurandee anireenoo nari ainainira faiquqa munnimma nimusa naaramaseenoo qimannimminau, innee mai anireeqa qini munnimmanai saikiaanara qima qimiaqa qufanoo indaaruaqafa

anireenoo qimaminau. Anee moodaa kooora munnimma qimunaqa qinee minannai ainaina maseeqa qisaukuqara taikasee munnimma mareeqa doo amidaqa maraa.

<sup>17</sup> Miqi qufanoo mina uriqararafa qimaminau. Oo amiqirafa anee amiqira ainainimarianafa mariananoo anee kaqikaa ainaina amiqimasee rakisiannana akiaqara qinee qisaukuqara taikasee maqusa ani amianana misasaa rakisinnaranoo.

<sup>18-19</sup> Mifa fufanoo mina aanaaqiannaafa anireenoo uriqararana qimaminau, oo uriqararafa anee moodaa munnimma qimunaqa qinee minannai ainainamasee moodaannai qisauku munnimma mareeqa doo aninna amidaqa maraa, qufanoo mina uriqararafa qinuu, anee aneenna saika akiaqara moodaannai qisauku maqusai rakisinnaranoo.

<sup>20</sup> Ainainira faiqi moo fannoo anireenoo uriqararana qimaminau. Oo uriqararafa anee moodaa munnimma qimunnana kaqi maridanoo qinee mina kai aninna amidaqa qinee qamunnasaa sakasee raqandaamma kukeeqaqaunnana aninna amidaqa qinee sia minannai ainainiqa anee afeeka fasiqa marianaqa aniara rufieeqa kaqi quqaqaunnana.

<sup>21</sup> Anee sia aneenna ainaina maree marianafa anee sia ummaqira ainaina aiqimarianafa moosaindi ummuari marianafa.

<sup>22-24</sup> Miqi qufanoo mina uriqararafa qimaminau, anee mandainainimarianafa fasiqafa mariananoo, qinee aninna ufasamu aninna aruanaura, anee qiniara afeeka fasiqa fee qimarianausa qinee moosaindi ummuari marunausa moosa ummaquqaana aiqi marunausa maridaqa anee miqi qimarianafa nanaree sia qini munnimma mareeqee beenaki quqeenanee anee miqimasaanaqa qinee aniree qeeqa munnimma faqa mina ati faqa maraunaiqini qimasee uriqarara fasiqa fannoo miqoo marusa qimanniminuu, innee mina moodaa munnimma mara maree qisaukuqara taikasee munnimma maqeeina munu amiaqa qufaqa misa qiqau.

<sup>25</sup> Oo uriqararafa mifa moomoo faqaafa maridanoo qufanoo mifa qinuu.

<sup>26</sup> Qinee anoona ufa qimannimiana iriaqa, aiqama ainaina moomoo faqaasa moo faqa ootupana nimifara, ainaina siainaindi oodaa maqeeina rafiqeefaranoo.

<sup>27</sup> Magee qiniara fidiqaa imariasa qiniara sia mifa maasa rakisirafa marianifee qimariasa mareeqee qini qifusaa quqasee kuqa naruqa.

(Maa ufana Yisufa nariara quandasee qimaqoofa maridanoo, nari uriqarara karaambaiqa kasooqaqee marianinnanara mi ufana qinuu. Yisufa sia aaqee uqanna Isaraee maqannaasa uriqararafaikiannoo kasooqaqee innaarunaidari qumureenoo maasa saiki marunnana qafamaseenoo mina akiaqara maasa qimiseenoo quandafi minara fidiqaa imariasa naru taikaannoo.)

*Yisufa doonkisa Yeerusareenni ooru finuu.*

*(Mat 21:1-11; Mak 11:1-11; Yoh 12:12-19)*

<sup>28</sup> Yisufa mi ufana qimannimiseenoo nariara moomoosa noorinni indaaruu Yeerusaree maqusai ooru finuu.

<sup>29</sup> Beetapaisa maqusa faqa Beetani maqusa faqa mi maqusa qanda moodaaqoo maruqanda Yeerusaree aaqa mariqau, Yisufa ooru fidanoo mi maqusa qanda adeedi ramaseenoo nari faiqi namukiqari qaaraqanda naaramasee qimanniminuu.

<sup>30</sup> Inneeqa noorinni mari maqusanaki oorureeqa maqusai firuqiaki oorureeqa doonki aanaaqi asaandaruu quqaqaana, faiqi sia minasaa ooqu mariana paqurimasee mina iduku maree muqu qimiaqa.

<sup>31</sup> Faiqi moo fannoo inniqarara nanaree idukidee qinaqa maaqi qimasee qimamiaqa, maasa uriqararafa minasaa ainainirara qidanoo.

<sup>32-33</sup> Miqi qufaqa miqanda oorureeqa Yisuna ufamau kai fiqa paqurimasee iduki marufanoo mi doonkina akausa niqafamasee irammiriqa qiqau, inneeqara naqiraree idukidee qufaqa miqanda qiqau.

<sup>34</sup> Maasa uriqararafa minasaa ainainirara qifaqa idukidaqa qimasee idukumaree Yisufinnai munuseeqa nariqa qamunna minasaa ufiqisee

<sup>35</sup> Yisuna dadaqufanoo minasaa ooqu marifinoo Yeerusaree maqusai ooru finuu.

<sup>36</sup> Aatata ooru fimarufaqa faiqi anaasee karaambaiqa miqi mandaidda afiqee marundeemasee nariqa siuta raipaqusaida aatata ufiqisoofanoo doonki fannoo mi mau ooru finuu.

<sup>37</sup> Yeerusaree maqusa adeedi ramaseenoo Oorifa aaqanai ooru fimariaqooqari Yisuna faiqi namu faqa faiqi anaasee moomoosa faqa Yisufa aiqama ainaina firaa ainaina auqee marufaqa qafeeusa firaaqoo kaanina mareeqa Anutuna amooqidaqa minara dufi dufi qidaqa qiqau.

<sup>38</sup> Karaambaiqa ufara animari uriqararana Anutufa amiqi amiqi iani. Innaarunai asooarafa mariani. Anutuna amooqirafa faqa mariani.

<sup>39</sup> Farisai amaana ufa qimarusa faiqí aanaaseekiaqa fidaqa faiqí anaasee amooqira ufa iriseeqa Yisuna qimamiqa qiqau. Ufasaa rakisirafa aneenna faiqí namuara qaoo qinaqa ufa saaqa qufanoo

<sup>40</sup> Yisufa qimannimianau, Qinee qaoo qianaqa tamummaqara fasiqauqa akara misa miqifandiafoo qimaqoona misa ufa taikainanoo maa aatata mari oonisaa faiqira foora kaanina mareefaranoo.

*Yisufa Yeerusaree maqusara qimudaoo qinau.*

<sup>41</sup> Yisufa Yeerusaree maqusa adeedi ramaseenoo mi maqusanara faqa faiqí anaasee minaki mariasara faqa ikiraqanau.

<sup>42</sup> Misa kuridifandinanara iriseenoo ikiraqeenoo qinau, Oo Yeerusaree anee maqee asooraanaki marinna oosanara iriaqaana, doo maqee anee sia amana qafeennaranoo.

<sup>43</sup> Qusasaa ani namuqaa anireeqa maara maqaseeqa ani aana kooqi ititaseeqa ani faandaamurasaa saqari kuradamaseeqa minasaa akara mafiqa maqusai aquffifaranoo.

<sup>44</sup> Misa ani maqusa faqa faiqí anaasee faqa aiqama naru taikaseeqa ooni maqa moomoo marinna rapeepaamaseefaranoo, sia moo ooni narisaa narisaa mariannoo. Qinee marunna kamuqoo Anutuna inni asumu marirana nimiraree qifaqa innee sia irirai mana mana imarianara inni narirafa kambigaanoo.

*Yisufa amaana maqaki feefaurimarusa niqiqanau.*

*(Mat 21:12-17; Mak 11:15-19; Yoh 2:13-22)*

<sup>45</sup> Yisufa Yeerusaree maqusaki oorureenoo misa naaquqara amaana maqaki keeqafinoo minaki ummuarira bisinisa auqee marusa rapatutummeeqee quqaseenoo qimannimianau.

<sup>46</sup> Anutuna tamummaqara fasiqauqa ooqeenaa akaraki maa maqanara maaqi qimaqoofa maridanoo. Anutufa qinau maa maqafa qini maaqa maridanoo, qinee minara innaaruqira maaqa mariannoo fee qidaqa. Anutufa miqi qimaqoofaqa qinee mi mau fidaqa maaqi qidaqa, innee mi amaana maqana qumareeqa ummuarimaria fasiqausa kukeeqara maqaikamaqaafanoo maridanoo. Miqi qimaseenoo Yisufa niqiqanau.

<sup>47</sup> Miqooqari Yisufa maqee maqee mi amaana maqanaki faiqí anaasee naamua qinau.

<sup>48</sup> Miqi marufaqa mi amaana maqanaki aanaiqikirausa faqa Mooseena sandufa akoofasauqa faqa faiqí firaasauqa faqa Yisuna kuqarira aanara randoofanoo sia amanaikufaqa, faiqí anaasee aiqamausa maqee maqee Yisuna ufasaa kai naundura quqaseeqa moodaa ufa sia irianoo qimasee kaaqa irimariqau.

## 20

*Rakisirausa Yisuna iraqau, yafee qifanee maaq inanee.*

*(Mat 21:23-27; Mak 11:27-33)*

<sup>1</sup> Moo kari Yisufa faiqí anaasee mi amaana maqanaki Anutuna amiqira fasaasa ufa faiqí aanaaseeuqa qimannimimarufaqa amaana maqasaa aanaiqikirausa misa uriqararusa faqa Mooseena sandufa akoofasauqa faqa suqumaree Yisufinnai aniree iramiriqa qiqau.

<sup>2</sup> Anee maa maqanaki bisinisaika imariasa nifaqaannana faqa aiqama oosana oosana ainaina auqimariannana faqa yana ufaree miqidanee yafee miqiannee qinoo fee.

<sup>3-5</sup> Yisufa misa ufa iriseenoo qimanniminoo qinau, Qinee faqa innisaa moo ufara irammirianaura, Yoohaneefa nammari nimianifeera aqiqarana yaindari fee aninoo fee Anutufinnaindari fee aninoo fee maqasaa fasiqakiqari fee aninoo fee qufaqa misa narinni narinni ufa raineeqa qiqau, maasa Anutufinnaindari fee qifanoo Yisufa maaqi qiannoo innee nanaree sia mina ufa iri fee qiannoo.

<sup>6</sup> Maasa Yoohaneenara maqasaa fasiqakiqari fee qianaqa faiqí anaasee Anutuna tamummaqara fasiqa fee qimasee oonisamu maasa kuqa darifoora.

<sup>7</sup> Misa miqi qimasee qumee maqandanai qi qiseeqa quandafi akooqoo Yisuna qimamiqa qiqau, Yoohaneena aqiqoo fasiqanara maasa sia iridaqee qiqau.

<sup>8</sup> Yisufa iriseenoo mina akiaqara qimannimianau, qinee yana ufasaa maa ainainna auqaidee minara faqa sia inni qimannimianaura.

*Yisufa mandainainira faiqí kikiqammusinau.*

*(Mat 21:33-36; Mak 12:1-12)*

(Yisuna aukuaana nari maqannaasa munnimma saika maraaqee qimasee uainna sanda ummaquseeqa mina qaqaama tiqisee anoona tatisaidaga minasaa munnimma maree mariqau. Mi oosannara maasa sia iridaqa koofi oosana maasa iridaqa. Mina aanna ramaseeqa koofisaa maasa munnimma maraidaqa. Maa ufana Yisufa uainna kikiqusuqoona mifa maasaki sia marinara maasa minara koofi fee qidaqa.)



<sup>9</sup> Miqoo Yisufa faiqi anaasee quandara ufa moo maaqi qimasee qimanniminau. Faiqi moo fannoo koofi asumu moomoo ummaquseenoo marikufaqa nari maqannaasa akaqausa ufaasu nimisee qimanniminau. Innee qini koofisaa rakisiqisee marifaqa qinee qambaanaa oosusee inni dinni qeeqaraa dinni maraanaura. Mi ququsana akoofa miqi qimannimiseenoo doo nianai oonureenoo kisaagasaa marinau.

<sup>10</sup> Koofi qaqama akuqee maru kamuqoo mi ququsana akoofo nianaindari ainainira faiqi moo aqiqeenoo qinau, anee oonuree qini koofi qaqamasaa rakisimariasara qinaqa qiga oosaqaraana qimaqaifana maree ania mini qimia qimasee aqiqoofanoo oonuroofaqa mi ququsanasaa rakisimarusa mandoosana maraseeqa mi ainainira fasiqana qumareeqa unnaana samu ariisee aqiqoofanoo kaqisamu anirandee finau.

<sup>11</sup> Ququsa akoofa mina qafamaseenoo kafaa moo fasiqa aqiqoofanoo oonuroofaqa ququsasaa rakisimarusa miqi kai iqa mina faqa ari iseeqa mandaikammamaqasee asaurirana amiseeqa aqiqoofanoo kaqisamu anirandee finau.

<sup>12</sup> Ququsa akoofa mina qafamaseenoo kafaa ainainira faiqi moo aqiqoofanoo oonu roofaqa misa mina faqa ariiseeqa rarisama aqiqau.

<sup>13</sup> Ququsa akoofa mina qafamasee anunurumaseenoo qinau, qinee naqi fee ianauree, qinee qeeqa didira qimaaku aqiqaanoo oonu rainaqa minara rufiasee koofi qaqama amifaranoo.

<sup>14</sup> Miqi qimaseenoo nari amaaku aqiqoofanoo oonu roofaqa misa qafamasee nari qimami nari qimami qiqau, maafa ququsa akoona amaaku maridanoo, doo maree mina kuqa arusaananoo maa ququsafa innisaimbaqaindi mariani.

<sup>15</sup> Miqi qimaseeqa misa mina rafuseeqee aqoosai aquseeqa kuqa ariqau, Yisufa mi ufana qimannimiseenoo kafaa qimanniminoo qinau, mina amaaku arusaifanoo mi ququsana akoofa naqaa fee iannoo.

<sup>16</sup> Mifa sia kaqi mariannoo oonu reenoo mi fasiqausa kuqa naruseenoo amiqira fasiqauqaindi mi ququsana nimiannoo. Faiqi anaasee mi ufana irufanoo naaquqoofaqa qiqau, oo mi mandoosannafa sia kambiqaani.

<sup>17-18</sup> Yisufa iriseenoo misa niqafamaseenoo qinau, tamummaqara fasiqauqaindi ufa akara maaqi qinoo maridanoo, minoosanara randasee qafaqa mi mandoosannara kai qidanoo, mifa maaqi qidanoo. Faandaamura auqi mariasa sabeena moo marasee qafamasee manda sabeena fee qimasee aqusoofanoo Anutufa mi sabeennana quandaki amiqira afeeka faakana fee qimaseenoo uriqarara faakanainkinoo marianifeera rakianau. Mi tamummaqara fasiqafa qiniara miqi qimaqoofaqa qinee minara maaqi qidaqa yafee moo fannoo mi sabeennanasaa turuqaki aqufinafa mi sabeennafa mi fasiqana ateekaa teeka masainanoo kuqanaroo. Mi sabeena samufa moonasaa aqufinoo kuqa arusaananoo kookoomaikamafuannoo.

*Sisaafa takisa munnimara innaaru qinana kaqi amia.*

*(Mat 22:15-22; Mak 12:13-17)*

<sup>19</sup> Mooseena sandufa irimarusa faqa amaana maqasaa aanaiqikirausa faqa Yisufa maasara mi ufana qidanoo fee qimasee miqoo kai qumaree rumbaree qimasee faiqi aanaaseera rufiasee kaqi kasoomafiqi mina qumararanara rakisi mariqau.

<sup>20</sup> Rakisidaqa faiqi akaqausa feefauru nimiseeqa qimannimiqau, innee oonuree amiqira fasiqauqara foora oosana oosana ufara irifanoo aqara ufa qinaqa maasa rumbeeqee Roomma maqannaa kiapana asaukuki quqaanaura.

<sup>21</sup> Miqi qufaqa mi fasiqausa oonuree Yisuna maaqi qimasee qimamiqau, Oo ufasaa rakisirafa ani ufara iridaqa ani naamuqira ufa andeeqasaidana qima nimimarianafa mariananoo anee sia faiqi nifaqa niqafamasee oosana oosana ufa qimarianafa, anee Anutuna aanai fimaria ufana anoona kai qimarianafa mariananoo.

<sup>22</sup> Anee maa ainainnara qimaqimia maasa maqee maqee takisa munnimma Roomma maqannaa uriqararana amidaqa, maasa Mooseena sandufa rukiidaqee miqidee qufanoo,

<sup>23</sup> Yisufa misa ueeqaranara iriseenoo qimanniminau.

<sup>24</sup> Innee maasa siruaa munnimma moo mara uqaqifiqaaqa qufaqa uqafiqaqau, Yisufa qafamasee qinau, ya fasiqana oori amanee maanasaa maridanoo fee yana auqu fee maanasaa akara rinoo maridanoo fee qufaqa misa qiqau.

<sup>25</sup> Roomma maqannaa uriqararanaindi fee qufanoo Yisufa qinau, faiqi moo fannoo sia moona ainainasaa nari auqu akara ridanoo ainaina faqaafa nari ainainasaa nari auqu kai quqaidanoo maa munnimmana Roomma maqannaa karaambaqaindi maridanoo mina amana faqa mina auqu faqa maanasaa maridanoo doo mifa qimiannee qinaqa innee narindi nari kai amiaqa kaifaa Anutunaindi faqa nari kai amiaqa.

<sup>26</sup> Misa mina ufa irufanoo naaquqoofaqa kaqi kasoomafiqau, sia miqoo faiqi nifusaa ufannai kai ueeqasee qumarararee qiqau.

*Yisufa kuqiranakiqari findifinausara qangiroora maqi marifara.*

*(Mat 22:23-33; Mak 12:18-27)*

<sup>27</sup> Sadikai amaana ufa qimarusa faiqi kuqiranakiqari sia findifaranoo fee qimarusa mariqau. Miqiga marunara misakiqari akaqausa Yisufinnai anireeqa ueeqararee qimasee iramiriga qiqau.

<sup>28</sup> Oo ufasaa rakisirafa Mooseena sandufa fannoo maaqi qimasee maasa qimaqimidanoo. Faiqi moo fannoo sia faiqi maqarai kuqifanoo mina akaqa fannoo mina anaqa maraseenoo faiqi maqasainanoo indaarugaa fasiqa qumiasana maraannoo.

<sup>29-30</sup> Mooseefa miqi qimaqoofaqa minara maasa ani iraidaqa. Moodaa fasiqa faiqi namu dinni qisauku taikasee dinni oonu qaraqanda (7) mariqau, indaarugaafa anaasee marasee sia faiqi maqarai kuqufufanoo mina aanaaqiannaafa mi anaaseena maraseenoo doo mifa faqa sia faiqi maqarai kuqinau.

<sup>31</sup> Mina aanaaqiannaafa miqikaimasee mi anaaseena maraseenoo kuqinau.

<sup>32</sup> Miqooqari mi oosanausa aiqamausa mi anaaseenasaa sia faiqi maqarai kuqutaikaqau, inaaqiannaafa uqanna mi anaaseena faqa kuqinau.

<sup>33</sup> Oo Yisu faiqi anaasee kuqiranakiqari findifandinna faasaana mi anaaseefa ya fasiqana anaqa fee mariannoo fee, mi oosanausa aiqama mi anaaseena kai maraqau.

<sup>34</sup> Yisufa iriseenoo qimanniminu, maqee mariaqoo maa aukuanu kai faiqi anaasee nari maree nari maree idaqa.

<sup>35</sup> Anutufa faiqi anaasee qini faqa innaarunai amanaiki mariasee qimariasa kuqiranakiqari mara findifu mannimaqasee innarunai quqasaifaqa sia kuqifaranoo naaru marifandinausa marinara sia nari maree nari maree ifaranoo.

<sup>36</sup> Misa faiqi nifaafa faqa anaasee nifaafa faqa taikaseenoo qangiroora fooqaasa indaagiraua maridaqa kuqiranakiqari findifi mariasa marianara Anutuna amaakuqmara maridaqa.

<sup>37</sup> Mooseefa faqa akooqoo faiqi anaasee kuqiranakiqari findifi mariranara qimanniminu, ooqai Mooseefa kaasau maqa maaqaki marufanoo sasamimiki ida qee marufanoo Mooseefa oonu qafamasoofanoo Anutufa minakiqari ooqai kuqusara Mooseena qimaminu, Qinee Abarahaamana faqa Isakeena faqa Yakooboona faqa misa Anutusa maridaqee qufanoo Mooseefa mi ufana iriseenoo kasooqagee akara rinu.

<sup>38</sup> Anutufa sia kaaqa kuqi mariasa nikoofau maridanoofau Anutufa kaqi mariasa faqa kuqiranakiqari findifi mina faqa mariasa nikoofa maridanoo. Anutufa kuqufusara faqa kaqi mariasara faqa kaqi mariaafoo qidanoo. Minara Anutufa Abarahaamana faqa Isakeena faqa Yakooboona faqa nikoo fee qidanoo minamusa ooqai kuqusa kuqiranakiqari findifi qini faqa mariaafoo qimasee mi ufana qinuu. Qinee Yisusa minara inni qimannidaqa, kuqiranakiqari sia sia findifidammia, findifidaqa.

<sup>39</sup> Mooseena sandufa akoofasauqa akaqausa mi ufana iriseeqa Yisuna amooqiqa qiqau, Oo ufasaa rakisirafa amiqira ufa qiananoo.

<sup>40</sup> Misa kafia miqooqari Yisuna irammiranara rufiasee kaqi kasooiqau.

*Naqimasee Dafidifa nari atiara qini karaambaiqee qianoo.*

*(Mat 22:41-46; Mak 12:35-37)*

<sup>41</sup> Kasoomafufanoo Yisufa misasaa ufa moora iramirinoo qinuu. Tamummaqara fasiqauqa akara fannoo Anutuna asaku mundiranara kasooqagee kambiqafinoo Dafidina atikiqari kambiqaanoo fee qidanoo mifa naqi fee masee andeeqaannoo fee.

<sup>42</sup> Dafidifa nari idi papiqaki minara maaqi qimasee akara rinuu.

Karaambaiqa Anutufa qini karaambaiqa maaqi qimasee qimaminu. Anee aniree qini daaqa qini qisauku uqannai ooqumaria.

<sup>43</sup> Maaqoo marinaqa qinee ani namuqaa mareeqee ani aramandunnai quqasaanana anee misasaa rakisia.

<sup>44</sup> Dafidifa mi idi papiqanaki Anutuna asaku mundiranara qini karaambaiqee qidanoo minara iriseeqa iraidaqa, Anutuna asaku mundirafa naqi fee masee Dafidina karaambaiqa faqa mina ati faqa aiqamaqara moodaa kari noo mariannoo fee.

*Yisufa Mooseena sanda akoofasauqara qaaraiqi mariasee qinuu.*

*(Mat 23:1-36; Mak 12:38-40)*

<sup>45</sup> Yisufa mi ufana qimannimimarufafa faiqi anaasee moomoo iri marufanoo Yisufa misa nifusaa quandafinoo nari faiqi namu qimanniminu,

<sup>46</sup> Innee Mooseena sandufa akoofasauqara rakisi marifaqa aniraifaqa misa oosanara aufaridaqa eerairiaqa misa qamunna amiqirana kisaqa afisusee faiqi nifumau nasuridaqa aatata fee faiqi suqiranaki fee faiqi anaasee misa reendenamasee nimandaranara rimariasa maridaqa, misa amaana maqaki fee qoomaqanduqiranaki fee faiqi anaasee noorisa kai oogu marifi nari nifaqa mara maree urimariasa maridaqa.

<sup>47</sup> Misa faiqi anaasee nifusaa kisaqasaa innaaru qidaqa maqandanai adeedaana anaasee saqama fee maqa fee maaqa fee ummuari mariasa mariafanoo mina akiaqara narirafa fiqaramasee mariannoo.

## 21

*Adeedaana anaasee ataaqana munnimma aqinau.*

*(Mak 12:41-44)*

<sup>1-3</sup> Yisufa Yeerusaree firaa amaana maqaki maridanoo nindafoofaqa faiqi anaasee Anutuna ataaka munnimma quqee mariqau. Ainaina moomoo faqaasa firaa munnimma aqimarufanoo qafee marufanoo misakiqari adeedaana anaasee moo fannoo ainaina siaifa kudi uqanna marufa anireenoo idaqarana ataaqana munnimma qaraqanda kaqikaana aqusoofanoo Yisufa qafamaseenoo nari faiqi namu qimanniminoo qinau, Oo innee qafaqa, maa kudi adeedaana anaaseefa aiqamausa urinnaaqara maseenoo mi anaaseefa aqinooi.

<sup>4</sup> Ainaina faqaasa nari munnimma moomoo marunakinaana qumaree aqifa, maa adeedaana anaaseefa kaaqa kudi uqanna marifa nari narana feeraurira munnimma aiqama uqanna moodaa marina doo aqinoo miqinara qinee urinnaaqaramasee aqinoomifoo qidaqa.

*Yeerusaree maqusa furufarianinnanara Yisufa qinau.*

*(Mat 24:1-2; Mak 13:1-2)*

<sup>5</sup> Yisufa nari faiqi namu faqa Yeerusaree firaa amaana maaqaki nimarufaqa misa aiqama ainaina firaa ainaina Anutuna amimaru ainainausa faqa amiqira ooninnai usakaqoona minauqa qafaqa nidaqa nari qimami nari qimami qimariqau.

<sup>6</sup> Miqi qimarufanoo Yisufa qimanniminoo qinau, Innee maa amiqira ainainausa qafaidee, moo aukuaana anirainanoo moomoosa anireeqa maa oonisa aaku aaku irana aiqama rapeemmeeqee maqasaa kai aqifaranoo sia moo ooni moonasaa aakinoo maqee marindee inoo mariannoo, aiqama maqasaa kaimmaqufuannoo.

*Taikaaninna aukuanara Yisufa qimanniminau.*

*(Mat 24:3-14; Mak 13:3-13)*

<sup>7-9</sup> Miqi qufaqa Yisuna faiqi namu irammiriqa qiqau, Oo ufasaa rakisirafa yairee fee mi ainainafa kambiqanoo fee, nana ainainee mi aukuaana kooroo ira ainaina qafamasee fee oo mi ainainna kambiqanoo fee qianauree.

Miqi qufanoo Yisufa qimanniminoo qinau. Innee amiqimandee aiquliaqa, moo fannoo nikaru qiandoo qimasee minasaa rakisiaqa. Moomoosa anireeqa qinee asauku mundirauusa Yisusee qifaranoo, akaqausa doo Anutuna aukuaana ani mariifoo qifaranoo. Innee mina irisee sia mi mau fuaqa. Innee firaa rakiranara faqa maqusa maqa maaqa furufarirana faqa qafamasee sia minara rufiaqa sia minara iriaqa sia doo maqa taikarafa anireefoo qiaqa, miqira ainaina mi oosana oosana naree kambiqaaninnanara siamma rufiaqa.

<sup>10-11</sup> Moo maqannaasa findifi moo maqanna faqa rakifaranoo, moo karaambaiqa findifi moo karaambaiqa faqa rakuannoo maqa kasirafa firaafa moomoo naaquqarafa kambiqanoo aandaroo aurirana oosana oosana maqa afaaqasasa kambiqanoo naaquqara ainaina faqa maqa taikaaninna ainaina kudifanara maqi asurukiqari kooroo iannoo.

<sup>12-13</sup> Misa inni naaree qini ufasaara ruumbeegee aupuraranaki quqefaranoo. Misa qini ufasaara inni mareeqee firaa uriqararauusa nifusaa faqa kaqikaa uriqararauusa nifusaa faqa quqasaifaqa mikari inni ufa qimannimimari aukuaana mariannoo.

<sup>14</sup> Misa miqifaqa innee maaqi qiaqa oo maqee misa faqa amiqira fasaasa ufa Yisunara qimannimianauree qiaqa. Misa inni mara maree uriqararauusa nifusaa quqasaifaqa sia innee minara oonumafi irisee firaqoo naqi fee qianau naqi fee qianau qiaqa.

<sup>15</sup> Mikari qinee qeeqa kai qumee dadaaqianaqa innee irirana faqaasa ufara foora qimannimifaqa inni namuqaakiqari moo fannoo sia amana inni ufa rukiasee qaoo qifara.

<sup>16</sup> Mi aukuaana qini ufasaara inniqa ninausa nikausee inniqa nikaqaafasaa fee inni ati fee inni niqoondi fee misa inni uneeamaana qimasee mareeqee kuqiranaki quqannimaqefaranoo.

<sup>17-18</sup> Qiniara aiqamausa inni fidiqaa mannimaqeeffaranoo. Miqi marifaqa minaki fimarifanoo inni nikiyaqa asausi sia moodaa fannoo kakasiannoo Anutufa inni nifaagasaa faqa rakisianoo.

<sup>19</sup> Innee mi mandainainaki maridaqa sia aquraranara rufiasee qini duqu minnisaaqa, kaqi finnanannai kai inni marirana afeedifaranoo.

*Rakira fasiqauqa Yeerusaree maqusa fuseemasaiqaqa aaqana aaqana akareefara.*  
(*Mat 24:15-21; Mak 13:14-19*)

<sup>20-21</sup> Innee moo maqanna rakira fasiqauqa moomoosa anireeqa Yeerusaree maqusa puseemafifaqa innee irirana maaqi qiaqa oo maqee Yeerusaree maqusa taikarafa anireenoo fee qimasee Yudeeaa maqa maaqaki mariasa aaqanaaqana akareeqa sandeeffaranoo, maqusai marinausa qafeeqa quqasee sandeeffaranoo, ainainai finausa sia kafaa maqusai anifaranoo, doo mindari kai sandeeffaranoo.

<sup>22</sup> Anutuna ooqeenaa tamummaqara fasiqauqa ufa anoona kambiqaanifeera Anutufa narimari aukuaana kambiqanoo maridanoo fee qiaqa.

<sup>23</sup> Mi aukuaana nimuauqa uqafaqaa anaaseeuqa naaquqaranaki mandainainaki marifaranoo, sandaranara anuqifaranoo faiqi aanaaqifaqa anaaseeuqa miqikaimasee naaquqaranaki kadaapiriranaki marifaranoo. Anutuna aranaqarafa maa maqa maaqanaki marianara naaquqarafa aupurara firaqoo mariannoo.

<sup>24</sup> Moo maqannaasa sundiauqa anireeqa maa maqannaasa aseemannai naruseeqa akaqausa ruumbeegee aiqama maqa maaqai quqasaifaqa daraanimambifaqa Anutunara sia irimariasa aniree Yeerusaree maqusa maqee maqee nikunoo radamuseffaranoo Anutufa qumee eedoo qira aukuaana kai miqifaranoo Anutufa taikaannee qinaqa doo miqoo taikeeffaranoo.

*Yisufa nari qumuaninnanara oosana kooroo inau.*  
(*Mat 24:29-31; Mak 13:24-27*)

<sup>25-26</sup> Mi aukuaana suanafusaa faqa quqoona fasau nifusaa faqa maqa taikara ainaina kudifaanna kooroo irafa kooroomma nimaqasaanaqa qafeeffaranoo. Mi aukuaana maqasaa fasiqa anaasee aiqama maqannaasa ooruku nammari ufa qiranara faqa firaa nammari amakauranara faqa irisee rufiaseeqa maa maqa maaqana afaaqasasa kambiqaaninna aupuraranara faqa afeesidaqa rufiaqa rufiaqa idaqa kuquaqaa imarina marifara. Quqoona fasau mariqoo oogai mari marirafa furufaramambinoo moo kamaakinuqa mina qafaifanoo maqasaa kambiqaaninna mandainainara afeesidaqa rufiaqa rufiaqa idaqa nari nimuqusa kuqifaqa kuqifaranoo.

<sup>27-28</sup> Mi ainainausa oosana arasee kooroomambinaqa innee findifiqa ninuka uqeerasee qafaaqa inni innaarunai asumu marirafa adeedi ramafuannoo. Mikari qinee faiqi nimaaku innaarunaindari asuruki firaa afeeka faqa firaa areenarana faqa kooroomambi qumanaura.

*Yisufa nari qumuaninnanara faafisa kikiqa usinau.*  
(*Mat 24:32-35; Mak 13:28-31*)

<sup>29-30</sup> Yisufa mi ufana qimaseenoo maa quandara ufana qimanniminu, innee faafisa faqa aiqama saqari faqa ammuni faqa qafeeqa oo doo aukuanai aniree maqi qimariifanoo.

<sup>31</sup> Innee miqikai iqa maa qimannimuna ainainafa kooroo mambinaqa maaqi qiaqa, oo Anutuna innaaruna ququsa adeedi ramafiifoo qiaqa.

<sup>32-33</sup> Doo innee maa ufana faqa iriaqa maaqoo mariasa kaqi marifanoo mi aiqama ainainausa kambiqeeffaranoo. Maqa faqa innaaruna faqa doo aiqama taikafuannoo qiaqa dookinaa ufa sia taikaannoo kaqi mariannoo.

*Yisufa nari qumuaninnanara indee indeeida mariaqee qinau.*

<sup>34</sup> Innee minara irisee inneeqa mariranara rakisiaqa. Inni aaquqimannimaqaidaqa. Sia maqee maqee qoomaqamasaida naidaqa sia nammari namasee furufariaqa sia maaqoo maria ummaarana faqa minara kai mammaree fimarifaqa qinee innaarunaindari qumira aukuaana tautuma nimaqaanafaara.

<sup>35</sup> Mi faasaana maa maqa maaqana afaaqasasa maria fasiqa anaaseesa tautuma nimaqaanaqa ufaanara foora naruanauranoo.

<sup>36</sup> Innee maqee maqee augarida maridaqa innaaru qimasaida mariaqa. Innee inneeqa afeeka afeekaikamasee qimannimunna mandainainausaki afeekaikamandee fiqaree qini faiqi nimaaku qifusaa amiqimandee kikiqiaqeeera innaaru qiaqeeera qidaqa.

<sup>37</sup> Mi fasannai Yisufa faasaambaasaana firaa amaana maqaki faiqi anaasee minaki qimannimiiseenoo eenoofanoo rafudamakufanoo Oorifa aqanasaa akara mafufanoo miqoo faiqanau.

<sup>38</sup> Aiḡama kananaana faiḡi anaasee aiḡama suḡumaree firaa amaana maḡaki Yisuna ufa irianee ḡimasaida keeḡee mariḡau.

## 22

*Yudasifa Yisuna ueeḡaaninna munnimmana maranau.*

*(Mat 26:1-5; Mak 14:1-2; Yoh 11:45-53)*

<sup>1</sup> Yisufa miḡi marufanoo ḡoomaḡa Yuda maḡannaasa firaa ḡoomaḡa ainnaaḡarara ḡoomaḡa adeedi ranau. Mi ḡoomaḡana auḡu moo sia ooruku ḡai feemuna ḡoomaḡa nee imariḡau. (Mi ḡoomaḡanaki moomoo fasiḡa anaasee aukuaana aukuaana suḡumareeḡa Yeerusareenni mi ḡoomaḡana suḡa nee mariḡau.)

<sup>2</sup> Amaana maḡasaa aanaḡikirausa misa uriḡarararusa faḡa Mooseena sandufa akoofasauḡa faḡa Yisuna kuḡa ariranara ḡumee randee marufaḡa faiḡi anaasee Yisunara amiḡira fasiḡee ḡufaḡa minara rufeeḡa sia ariḡau.

*Yudasifa munnimmara ḡufiḡamareenoo Yisuna ueeḡararee ḡinau.*

*(Mat 26:14-16; Mak 14:10-11)*

<sup>3-5</sup> Misa miḡida randee marufanoo Yudasifa Keerioota maḡusaindaraafa Yisuna faiḡi namukina ḡisaukuḡara taikasee ḡikunni ooḡu ḡaara marasee misaki marufa, mina aunduraki kai Sadannafa keeḡafufanoo ḡumee oonureenoo amaana maḡasaa aanaḡikirausa uriḡarararusa faḡa amaana maḡasaa rakisirarusa faḡa ḡumee suḡinau. Yisuna ueeḡa nimianinnanara moodaanaki ufa ḡimannimimarufaḡa uneemaana munnimma amifandinanara ḡimamiḡau.

<sup>6</sup> Yudasifa eedoo ḡimaseenoo miḡooḡari faiḡi anaasee nifusaa ḡumee ramaseenoo kukeeḡaseenoo Yisuna misa nisaukuki ḡuḡararee ḡimasee ueeḡarara randanau.

*Ainnaaḡarara ḡoomaḡa deedaḡiḡau.*

*(Mat 26:17-25; Mak 14:12-21; Yoh 13:21-30)*

<sup>7-8</sup> Sia ooruku ḡai feemuna neemaru faasaana ainnaaḡarara ḡoomaḡara sipsipa aanaaḡi aru faasaanasaa Yisufa Peetooroona faḡa Yoohaneena faḡa niḡiḡamasee ḡimanniminoo ḡinau. Inneeḡara Yeerusaree maḡusai ooruree maasara faḡa ainnaaḡarara ḡoomaḡa deedaḡifaḡa ooru naanaura.

<sup>9-12</sup> Miḡi ḡufaḡa miḡanda ḡiḡau yai fee ya maḡanaki fee maaḡanda deedaḡianauree ḡufanoo Yisufa ḡinau, doo amiḡimasee iriaḡa, inneeḡara Yeerusaree maḡusaki ooruree fidaḡa ḡafaifanoo faiḡi moo fannoo nammari ḡafee maree keeḡainnanaki keeḡafi mi maḡana akoona maaḡi ḡimasee ḡimamia ufasaa rakisirafa aniara maaḡi ḡinoo, moo rumma ḡinee faḡa ḡini faiḡinamu faḡa ainnaaḡarara ḡoomaḡa naanna rummafa yai fee maridanoo fee ḡifanoo ḡinamma iriaḡa. Miḡi ḡimasee ḡimamifanoo mina sandaaḡai moo rummaki uḡannifiḡainaḡa minaki deedaḡamasaiḡa innisaimbaḡa fafaa eendaki minaki naanaura.

<sup>13</sup> Miḡanda iriseeḡa Yeerusaree maḡusai oorureeḡa Yisufa ḡimaḡoondē kai mi fasiḡana faḡa maaḡa akoona faḡa nindafamaseeḡa Yisufa ḡundee kai maseeḡa aiḡama ainaina deedaḡamaḡaḡanoo.

*Yisufa aafaḡa oosana aranau.*

*(Mat 26:26-30; Mak 14:22-26; 1Kor 11:23-25)*

<sup>14</sup> Doo eendufaḡa Yisufa nari faiḡi namu faḡa keeḡafufaḡa ḡainda firaa fiḡu fiḡumma ooḡu marifiḡau. (Nari oosana marasee aiḡamausa ḡainda fiḡu fiḡumma fufaḡa nisaataa saunu areefufaḡa ainnaaḡarara aafaḡa naḡau.)

<sup>15</sup> Misa miḡi mambufanoo Yisufa nari faiḡi namu maaḡi ḡimasee ḡimanniminu. Maa ainnaaḡarara ḡoomaḡana inni faḡa narara firaaḡoo dididanoo aupurarana oorisaa maridaḡa.

<sup>16</sup> ḡinee sia maḡee inni faḡa kafa naanaura, Anutuna innaaruna ḡuḡusa kambifaḡinaḡa maa ainnaaḡarara ḡoomaḡana anoona oosana uḡanna kambifaḡinaḡa miḡoo kafa naanaura.

<sup>17-18</sup> Miḡi ḡimaseenoo Yisufa firaa kaafa maraseenoo nariḡa maḡee maḡee neemaru uaina nammarina umbiḡarana nari faiḡi namu niminoo ḡinau, Maana maraseeḡa namataikaḡa ḡinee anoona ufa ḡimannimidaḡa, ḡinee sia kafa maḡee inni faḡa naanaura, Anutuna ḡuḡusa kambifaḡinaḡa mikari miḡoo innaarunai naanaura.

<sup>19</sup> Miḡi ḡimaseenoo feemu moo maraseenoo Anutunara dufi dufi ḡimaseenoo ruḡi ruḡi maseenoo nari faiḡi namu niminoo ḡinau. Maa feemufa ḡini ḡifaḡa kikiḡusira feemufa maridanoo kuḡiranaki inniara ḡuḡannimaḡaanaura. Innee maḡee maḡee naidaḡa ḡiniara naaḡoo iridaḡa naaḡa.

<sup>20</sup> Namasoofanoo Yisufa miqi kai inoo uainna adiara nafisa maraseenoo narí faiqi namu nimiseenoo qinau. Maa nafisanakinaa nammari qini fidika maridanoo. Anutufa inniara noori runiranaki marunara narí fuka moodaanaki kira ufa quqaidanoo, qini fidika inni adiannimaqaranaki maridanoo.

<sup>21</sup> Yisufa kafa qimanniminoo qinau innee doo qafaaqa maa qaindana fiq u fiq u iranaki inniki qiniara ueeqee marifa maridanoo.

<sup>22</sup> Anutufa oogai qumau kai qinee faiqi nimaaku kuquanaura, qini ueeqemari fasiqafa firaa numoo minasaa aqufuannoo.

<sup>23</sup> Yisufa miqi qimasooafaq mīna faiqi namu narí iree narí iree qiqau yafee miqiannoo yafee miqiannoo, qiqau.

*Yisuna faiqi namuqi qari yafee maasa uriqararafa mariannoo fee qiqau.*

<sup>24-25</sup> Miqidaqa maaqi qiqau, yafee maasaki uriqararafa mariannoo fee mi ufana qidaqa raiqara ufa qiqau, miqi qimarufanoo Yisufa qimanniminoo qinau, maa maqanasaaqaraa karaambaigauqa nari maqannaasa urinaaqara maseenoo fifau nariara faiqi anaasee dadaaqi marunausee qidanoo.

<sup>26</sup> Innee, qini faiqi namu mi oosanafa mariannoo, inniki uriqararafa innaaqianaa-fara foora mariannoo, inniqa karaambaigauq fannoo inni ainainira faiqiara foora mariannoo.

<sup>27</sup> Yafee uriqaranoo maridanoo fee, qoomaqaki oqumarifi neemari fasiqa fee, narana rakiqasee nimimari fasiqa fee uriqaranoo maridanoo fee. Narana rakiqasee nimimarifa mifa kai uriqarara fasiqa maridanoo, doo qinee narana nammari rakiqasee nimirunana maridaqa sia inni rafaafu nimaqasee uriqararaisai kidaqa inni ainainira faiqiara maqi maridaqa inni dadaaqidaqa. Doo innee qini daanna raaqa.

<sup>28</sup> Innee qini faiqi namu qini moomoo ummaara kadaapirana dadaaqi mariasa mariafanoo.

<sup>29</sup> Doo mīna akiaqara qini qikoofa qiniara uriqarara karaambaigee qimarindee kai iqa qinee faqa inniara qinee qeeqa karaambaigau ququsaki keeqafinaqa narana faqa nammari faqa inniara qini saimbaqa neefandiafoo qidaqa.

<sup>30</sup> Miqoo innee qini faiqi namu Isaraee maqannaasa ufa irira qaindasaa oogu marifi qisaukuqara taikasee qikunni oogu qaara marasee Yakooboona faiqi namu atikiqari kambiqaraisa Isaraee maqannaasa misasaa innee andeeqefaranoo.

*Peetooroofa Yisunara qaoo qianinnanara kooroo inau.*

*(Mat 26:31-35; Mak 14:27-31; Yoh 13:36-38)*

<sup>31</sup> Miqi qimaseenoo Yisufa Simoona moo auqa Peetooroona qimaminoo qinau. Simoona anee qini ufa iria, Sadannafa aniara sandanainai qidanoo ani mareeqeenoo narí manda ququsaki quqararee qidanoo ani rarisamasee amanamasee qafaidanoo.

<sup>32</sup> Oo Simoona qinee aniara innaaru qimaseeqa anee qini saqarikirafa sia taikaani. Anee kaqirunna oonureenana oonu quandakinana aneenna akaqaafasaaauqa pooduamannisaa, qufanoo Peetooroofa qinau.

<sup>33-34</sup> Oo karaambaigau anee rumberanaki fee kuqiranaki fee finaqa qinee faqa minaki fuanaree qufanoo Yisufa qimaminoo qinau Oo Peetooroo qinee anoonufa ani qimamidaqa fafaa eendamusai anee qaaramoo kari qiniara asaurusee sia qiniara Yisusara iridee qinanoo doo miqoo kai kookooraana ufa qianoo.

*Misa rakira paipana mara maree Oorifa aaqanasaa ooru fiqau.*

<sup>35-36</sup> Yisufa miqi qimaseenoo quandafufanoo aiqama qimanniminoo qinau, Oogai qinee inni niqiqamasaafanaqa innee munnimma fee rusaka fee niku aanaamu fee sia maree fiqau, innee mikari moo ainainara sarau fee iqau qufaqa misa qiqau, Oo sia moodaa ainainara sarauqimariafanausa maridaqee qufanoo Yisufa qimanniminoo qinau, munnimma pausa marina mīna maqee maraaqa rusaka marina mīna maqee maraaqa, rakira paipana siainafa narí asausi faqaa siuta moonā amisee mīna akiaqara rakira paipana maraaqa.

<sup>37</sup> Qinee maa ufana faqa qimannimidaqa. Anutuna tamummaqara fasiqauqa qiniara akara rumaqoofa doo maqee kambiqaidanoo. Doo maa akarafa faqa kambiqaanoo. Misa qiniara maaqi qidaqa misa mīna mara maree manda oosana maree mariasa namufaqa aruannee qidaqa.

<sup>38</sup> Miqi qimasooafaq Yisuna faiqi namu maaqi qimasee qimamiqau, Oo karaambaigau qafaa, rakira paipana qaaraqanda maaqoo maridanoo fee qufanoo Yisufa qinau doo ufa quqasee uqeeraaq.

*Yisufa innaaru qidaqa.*

*(Mat 26:36-46; Mak 14:32-42)*

<sup>39</sup> Yisufa miqi qimaseenoo doo narí faiqi namu faqa findifinoo narí maqee maqee fimaruqoo Oorifa aaganasaa ooru finau.

<sup>40</sup> Oorureenoo narí faiqi namu maaqi qimasee qimanniminau, innee maaqoo maridaqa innaaru qidaqa sia manda nimaniranaki keeqaqa.

<sup>41-42</sup> Miqi qimaseenoo mifa fiqareenoo aambaaka aqinoora foora naríara fiqaree Anutunara aqoori saunara finoo narí kuqirafa adeedi roofanoo minara innaaru qinoo qinau, Oo qini qikoofa anee eedoo qinaqa qinee manda nammari naannana mara aqusainaqa sia naa, sia qeeqa iriranamau fuanaura, aninna iriranamau kai fuanaura. [<sup>43-44</sup> Miqi qimaseenoo Yisufa afeekaikamandee innaaru qimasoofoanoo tooqaamu fannoo fidikara foora aqinaaqa anireenoo maqai aqufufanoo kuquaqaamminau. Aqufufanoo innaarunaindari qangiroo moo fannoo akooqoo qumureenoo afeeka amufanoo afeekaikinau.]

<sup>45-46</sup> Yisufa miqi qimasee innaaru qimaseenoo findifinoo narí faiqi namu qaaramoo marunnai oonu nindafoofaqa nimudaani rumafufaqa nisuku kaaqa faiqaaqee mariqau. Yisufa oonu nindafamaseenoo qimanniminoo qinau, Innee naqaa fee ifaaqee faiqaaqee findi fiqa innaaru qiaqa, manda nimaniranaki aquffaara.

*Yisuna umaroo ufafa.*

*(Mat 26:47-56; Mak 14:43-50; Yoh 18:3-11)*

<sup>47-50</sup> Yisufa miqi qimaseenoo narí faiqi namu qimannimamarufanoo misaikiqari Yudasifa faiqi moomoo asukunai nifiqeenoo anireenoo Yisuna amooqara rufanoo Yisufa qimaminau, Yudasi qini faiqi nimaakuara qimooqaranannai fee ueeqaidanee qufaqa Yisuna faiqi namu Yisuna qumarararufanoo qafamasee Oo karaambaiqa maasa rakira paipanannoo narunaauree qimasoofoanoo misaikiqari moo fannoo Yisufa qu ufana sia irirai rakira paipana qumareenoo moona akiaqa aaqamakufanoo asauku uqannai aaqoo ateeqa aqinau. Mi fasiqafa amaana maaqaki aanaiqikirausa uriqararana uqanna ainainimaruna aaqoo ateeqa aqinau.

<sup>51</sup> Ateekasoofanoo Yisufa qafamaseenoo qinau, Doo amana, doo saa qimasee mi fasiqana aaqoo aqamasoofoanoo andeeqamma amaqanau.

<sup>52-53</sup> Andeeqaseenoo Yisufa quandakinoo, aanaiqikirausa uriqarararusa faqa amaana maqasaa uriqarararusa faqa misa poorisauqa faqa faiqi firaasa faqa aiqama Yudasina faqa anusa aiqama qimanniminoo qinau, nanaree innee rakira paipana saamu indaam-mamareeqa manda oosana mareemari fasiqanara foora qiniara qumararara anidee, qinee faasaambaasaana inni faqa firaqa amaana maqaki marunaausa marunaqa innee sia miqoo qumararai. Doo maqee eendaki innindi faqa asukunaki nimari afaanausaindi faqa maa eendafa innindi mandoosana maraaninafa maridanoo.

*Peetooroofa Yisunara qaoo qu ufafa.*

*(Mat 26:57-58, 69-75; Mak 14:53-54, 66-72; Yoh 18:12-18, 25-27)*

<sup>54-55</sup> Miqi qimasoofoqa misa mina qumareeqa afiqa maree aanaiqikirausa uriqararana maaqaki quqaqau. Misa Yisuna maree fufanoo Peetooroofa rufiasee inaaqiana nifaamme nifaammee inoo fiufufanoo Yisuna quqoo maaqana naambeeqai faiqi akaqausa idarasee aani marufanoo mifa minaki oonuree aaninau.

<sup>56</sup> Aani marufanoo mi maqanaki ainainimaru manaaqafa aniree andeeqasee Peetooroona oori qafamaseenoo oo maafa Yisuna faqa nimarifammi qimaseenoo quandafinoo miqoo marusa qimanniminau, maa fasiqafa Yisuna faqa marifa maridanoo mina faqa qumaraaqa.

<sup>57</sup> Peetooroofa iriseenoo qaoo qinoo qinau, Oo maa manaaqa sia qinee minara iridaqa.

<sup>58-60</sup> Kaqikaqoo marikufanoo faiqi moo fannoo qafamaseenoo qinau anee Yisuna faiqinamuki mariana fee qufanoo Peetooroofa qaoo qimaseenoo qinau. Oo maa fasiqa qinee sia minakinaasau maridau qufanoo kaifaa marikufanoo faiqi moo fannoo anireenoo afeekaikamandeenoo qinau. Maa fasiqafa kuqaa Yisuna faqa marifa, Kariree maqannaa moodaa maqannaafa maridanoo fee qufanoo Peetooroofa qimaminoo qinau, Oo maa fasiqa sia ani ufa anoonara iridaqa. Miqi qimarufanoo kai kookooraana ufa qinau.

<sup>61-62</sup> Ufa qufanoo Yisufa narí maruqooqari maaqakiqari quandafi Peetooroona qafoofanoo Yisuna narí Peetooroonara anee maqee eendaki qaaramoo kari qiniara sia iridee qinanoo kookooraana ufa qiannoo qimaqoona kookooraana ufa qufanoo Peetooroofa iriseenoo firaqoo asauruseenoo rauda makufannoo aundurai sukaqoofanoo firaqoo ikiraqa maree finau.

*Yisuna umaroosa ataasa ataasa imariqau.*

*(Mat 26:67-68; Mak 14:65)*

<sup>63-65</sup> Mi eendanaki Yisunasaa rakisi marusa ataasa ataasa qimasaida ari mariqau. Aridaqa qamunna qumaree mina afusaa ititasee ariqa qiqau, yafee ani aridanoo fee qiqau. Misa oosana oosana manda ufa faqa qimamaqee mariqau.

*Yuda maqanna a uriqararawsa Yisuna ufa iriqau.*

*(Mat 26:59-66; Mak 14:55-64; Yoh 18:19-24)*

<sup>66-68</sup> Iqaqoo kananaana Yuda maqannaasa uriqararawsa faqa aanaiqikirausa uriqararawsa faqa Mooseena sandufa akoofasauqa faqa moodaanaki suqufufaqa Yisuna mareeqee misa suqiranaki quqaseeqa irammiriqa qiqau, anee maasa qimaqimia, kuqaa anee Anutuna asauku mundira fee maridane qufanoo mifa qinau qinee qimannimianaqa sia inne qini ufa irifara qinee faqa moo ufara inni iranaqa sia qimaqimifaranoo.

<sup>69</sup> Doo maqee maaqooqari qinee faiqi nimaaku uriqarara Anutuna asauku uqannai mina aqaqooqari marifi marianauree qufaqa misa aiqamausa qiqau.

<sup>70-71</sup> Doo kuqaa fee anee Anutuna amaaku fee maridane qufanoo Yisufa qinau Innee qimariandee qimarunause qufaqa misa qiqau, doo maqee maaqooqari sia maa fasiqana manda ufa irimarusara randaanura, doo maqee uqanna nari ookinaa manda ufa maasa daaqooki keeqaifaa iriqa.

## 23

*Misa Yisuna afiqee Piratoona kootaki quqaqau.*

*(Mat 27:1-2, 11-14; Mak 15:1-5; Yoh 18:28-38)*

<sup>1-2</sup> Miqi qimasoofaqa misa aiqama findifiqa Yisuna afiqeeqa Roomma maqanna kiapafa Piratoofinnai afiqee munusee Yisuna arira ufa maaqi qimasee qimamiqau, Maa fasiqafa faiqi anaasee kaqi runna mara quqee marifa Roomma maqanna karaambaifa takisa munnimma sia aquaqee qimarifa nariara unnaqimaseenoo Anutuna asauku mundirafa qeeqaraa karaambaifa maridee qimarifaqa irisee afiqee anidaqa.

<sup>3</sup> Piratoofa misa ufa iriseenoo quandaifi Yisuna qafamaseenoo irammirinoo qinau, Kuqaa fee anee maa maqannaasa karaambaifa maridane qufanoo Yisufa qinau, anee doo qimariananoo.

<sup>4</sup> Piratoofa mina iriseenoo kafa aanaiqikirausa misa uriqararawsa faqa faiqi anaasee moomoosa faqa qimanniminoo qinau. Qinee maa fasiqanaki qafauna sia mina ummaara marifaqa iridaqa.

<sup>5</sup> Yuda maqannaasa mina iriseeqa afeekaikamasee Piratoona qimamiqa qiqau, mifa qimannimu ufanannai rakirana uqeeraidanoo, mifa Kariree maqa maaqaindari oosana arasee mindari anufa aiqama Yudeeaa maqa maaqaki miqimmamaree aniufa maqee maasaki Yeerusaree maqusai anireenoo miqikai idanoo.

*Misa Yisuna afiqee Eeroodeena kootaki quqaqau.*

<sup>6-7</sup> Piratoofa mina iriseenoo qinau, kuqaa fee maa fasiqafa Kariree maqanna fee anidanoo fee qufaqa misa eedoo qufanoo Piratoofa oo Eeroodeena ququsakiqari ani maridanoo qimaseenoo Eeroodeefa maa kari Yeerusareenni animarinoo qimaseenoo Yisuna aqiqoofanoo mina sundiauqa afiqee Eeroodeefinnai fiqau.

<sup>8</sup> Eeroodeefa Yisuna qafamasee asasinau. Ooqai kisaqaqasaa Yisuna aufakiana kai iriufa kisaqaqasaa mina qafaaneerufa, saina kasooqagee sia faiqi amanaikimari ainaina qini qifusaa auqainaqaa qinee faqa qafaa, qimasee Yisuna qafamasee asasinau.

<sup>9-10</sup> Yisufa oonuroofanoo Eeroodeefa oosana oosana ainainara iroofanoo sia ufa qinau, kaqi marinau. Amaana maqasaa aanaiqikirausa faqa Mooseena sandufa akoofasauqa faqa Eeroodeena aqaqaaqaaqaa anireeqa unna ufa afeekaikamandee Yisunara Eeroodeena qimamiqau.

<sup>11</sup> Eeroodeefa faqa nari sundiauqa faqa ataasa ataasa qimasee mandufa qimamaqaaqau. Misa ataasa ataasa qimamaqaidafa karaambaifa qamunna afisuamaqasee afiqee Piratoofinnai kafa anirandee finau.

<sup>12</sup> Ooqai Piratoosa Eeroodeesa namuqaqara mariuqanda mikari Yisuna aqiqoofanoo Eeroodeefinnai fu kamuqoo miqanda naraqoondi naraqoondi qiqau.

*Misa kafa Yisuna Piratoona kootaki quqaqau.*

*(Mat 27:15-26; Mak 15:6-15; Yoh 18:39-19:16)*

<sup>13-14</sup> Yisuna kaifaa afiqee anirandeeqa Piratoofinnai oonuroofanoo Piratoofa aanaiqikirausa uriqararawsa faqa faiqi firaasa faqa faiqi anaasee moomoosa faqa naarama quqaseenoo qimanniminau, inne maa fasiqana afiqee qinee unannai aniana, faiqi anaasee kaqirunna mara ubeekke marifaqee qimasee afiqee anianara qimannimidaqa, qinee inni nifusaa oosana oosana ainainara irammirunanoo manda oosana oosana qiana sia paquriqa.



<sup>15-16</sup> Eeroodeefa faqa iramasee qafaifanoo sia mandainaina minaki marifanoo kaifaa aqiqaifanoo aninoo, qinee faqa minara maa fasiqanara sia moo numoo minaki maridanoo fee qidaqa, minara qinee sundiaufara akumbau akumbau auqira uaiqaq samu qumaree amiqimma firaqoo ari ari isaifaqa idukuane qidaqa. [<sup>17</sup> Piratoofa nari oosana mareenoo ainnaaqarara qoomaqaqi aiqama aukuaana karabusaki moo maruna iduku nimiseenoo kafiaa maa aukuaana Yisunara miqi kai ianauree qimasee mi ufana qinuu.]

<sup>18</sup> Faiqi anaasee minara iriseeqa aiqamausa faaqa rumasee qiqau. Mina kuqaruqa, Barabasina kai iduku qimaa.

<sup>19</sup> Barabasifa Yeerusaree maqusaki rakirana uqeeroonara faiqi kuqa narunara faqa karabusa mariufa marinuu, minara idukuqa qee qiqau.

<sup>20-21</sup> Piratoofa Yisuna idukuqa qeera faiqi anaasee kafiaa naarooafaq misa irisee faaqa quqasee qiqau. Mi fasiqana aunirira saqari saa arua, aunirira saqari marinna fuani.

<sup>22</sup> Piratoofa kafiaa qaaramoo kinoo qimanniminuu. Maa fasiqafa nana manda oosana mareenoo fee. Qinee sia kuqira ainaina minaki paquriqa,

<sup>23-25</sup> Qinee akumbau akumbau auqira uaiqaq samu firaqoo arusee idukuanauree qufaqa faiqi anaasee firaqoo faaqa quqasee qiqau. Yisuna aunirira saqarisaa pirimannai aruane qimarufanoo misa ufa fannoo Piratoona rafaafusoo fanoo Yisuna aruqaera eedoo qimaseenoo Barabasina idukinuu. Barabasifa rakiranara faqa faiqi narunara faqa rumbaranaki maruna idukinoo Yisuna mareeqee misa nari iriranamuu fuaqee qimasee nari sundiaufara nimufaqa doo arirara, maree fiqau.

*Yisuna aqi qee Koorookata aqaana fimarufaqa aanaasee uqa ikiraqoofa.*

*(Mat 27:32-44; Mak 15:21-32; Yoh 19:17-27)*

<sup>26</sup> Misa arirara maree fidaqa faiqi moo auqu Simoonaa amarafa mifa nianaindari ani marufa Sireene maqusaindaraafa mindari Yeerusaree maqusa aatata animarufaqa sundiaufara paquri mandee mina aranaiqi qumareeqa Yisuna aunirira saqari aku amaqqoo fanoo Yisuna aanaaqiana maree finuu. Sia amana mi fasiqafa qaoo qianoo misa faaqaana qafeenoo kuqiranara rufisee aruqaau fanoo kaqi eedoo qimasee doo maranuu.

(Yisuna faiqi namuqi qari Peetooroofa marufa mina moo auqu Simoonafa sia mifau Yisuna aunirirana aku maranuu, mina amarafa moo fasiqa fannoo Sireene maqusaindaraafa aku maranuu.)

<sup>27-28</sup> Sundiaufara Yisuna aqiqa maree fimarufanoo Yeerusareendaraa aanaasee uqa Yisuna ufa irimarusa moomoosa mina aanaaqiana oobiqasee ikifaqa quqasee ikiraqaaq fimarifaq. Miqi mamaree fimarufanoo Yisufa quanda fi ninda fee kasoomambinoo qimanniminuu. Sia qiniara ikiraqaaqa inneeqara faqa inneeqa faiqi namuara faqa ikiraqaaqa.

<sup>29</sup> Kasooqaqee naaru anianinna aukuanafa innisaa firaa narirafa aupurara marianoo. Faiqi siaisa amiqirafa marifaranoo. Faiqi aanaaqi siaisa sia naamma nimimariasaa misa amiqimasee afaadamasee sandeefaranoo fee qifaranoo, faiqi faqaasa qumaara reeqa manda kuqira kuqifaranoo.

<sup>30</sup> Mi firaa narirafa kambiqafinaqa aqana ameemaanaai oonuree aqana qimamiqa anee maasa rafaafusainaa kuqufuananoo sia maa mandainainafa daruani fee qifandinausa.

<sup>31</sup> Innee iriaqa, Roomma maqannaasa maqee qinee sia aaqee marunausa, fuka saqarirara maqi marunausa, maaqi mandee darusaifaqa kasooqaqee Yuda maqannaasa manda oosana aagarafa firaatia marinara inaakuna manda narirafa Roomma maqannaasa inni narifaranoo, minara qinee qimannimidaqa innee inneeqara kai ikiraqaaqa.

<sup>32</sup> Sundiaufara mandainaina maree maruqanda qaaraqanda Yisuna faqa moodaakari nariraree qimasee miqanda Yisuna faqa nifiqee fiqau.

<sup>33</sup> Nifiqee fiufufaqa kaqikaa amuaqu namusaa faiqi nimudaani fee qimaruqoo munuseeqa Yisuna pirimannai aunirira saqarisaa aruseeqa uqeereeqee kuradaqau, faiqi manda oosana maree maruqanda asauku uqannai aakaarinni moo nari auniranasaa arusee uqeereeqee kuradaqau. Asaaqaitinnai moo miqikaimasee nari auniranasaa ariqau. <sup>34</sup> Misa Yisuna arimarufanoo Yisufa innaru qinoo qinuu, Oo qini qikoofa misa mandainaina qini qimimariana minninnisaa sia mina akiaqara ia, misa nari imarianara sia iridaqani. Sundiaufara Yisuna aruseeqa kaatara foora sararamaseeqa mina qamunna raina rainisee maraqaq.

*Misa Yisuna ataasa ataasa qiqau.*

<sup>35</sup> Miqi marufaqa faiqi anaasee kikiqiqqa mafufaqa qafaidaqa misa uriqararaua Yisuna ataasa ataasa nari qimami nari qimami qiqau, Oo maa fasiqafa faiqi anaasee asumu nimimari fee qimarifa maana mifee doo maqee aneennaraa asumu marainna qafa. Mifa

Anutuna asauku mundirafa rusandeesamu mandee maroofa maridanoofau doo maqee nariara asumu maraiqini.

<sup>36-37</sup> Sundiauqa faqa ataasa ataasa qimamaqasee Yisuna uainna nammari amianee qimasee qiqau, anee kuqaa Yuda maqannaa karaambaiqa maridana minasaqari asumu maria.

<sup>38</sup> Yisuna aunirira saqarisaa akiaqai akara moo akara rinoo marinau, maaqi qimasee akara rinoo marinau, maa fasiqafa Yuda maqannaa karaambaiqa maridanoo.

*Qumuarimaru fasiqafa Yisuna faqa innaarunai fuaninna ufana qinau.*

<sup>39-41</sup> Manda ainaina maree maruqanda nari auniriranasaa Yisuna aaqa maridaqa moo fannoo maaqi qimasee Yisuna aqinau, kuqaa fee anee Anutuna asauku mundira fee maridane doo amana anee aneenna faqa maaqanda faqa mara aqumaisainaqa asumu maria, qufanoo moo fannoo nari aunirira saqarisaaqari mina aqinoo qinau. Qusasaa anee faqa mifa faqa Anutuna afusaa kikiqifara anee sia fee Anutunara rufaidanee mi manda ufana q inanee doo maasa namu Roomma maqannaa moodaa ufa ameemaanai maridaqa, maqee kuqanaura. Maaqanda kuqirafa andeeqanoo maridanoo, anindiri qeeqa ummaarara kuqanaura maa fasiqafa mandainaina siafa kuqanno.

<sup>42-43</sup> Miqi qimaseenoo mi fasiqafa quandaki Yisuna qimaminoo qinau, Oo Yisu, anee aneenna ququsaki karaambaiqai kinana sia qiniara aunua, iria, qufanoo Yisufa qimaminoo qinau, Doo ani qimamidaqa maqee faasaana anee qini faqa innaarunai marinnaranoo.

*Yisuna kuqira ufa.*

*(Mat 27:45-56; Mak 15:33-41; Yoh 19:28-30)*

<sup>44</sup> Suani gambaanai akiaqa amummaqa suani qarafa taikafufanoo aiqama maqa maaqai asukuna arufanoo suani afu fannoo amannauna arufufanoo asukuna taikafufanoo suanifannoo kafia qanau.

<sup>45</sup> Asukuna kaqi marufanoo Yeerusaree naaquqara amaana maqaki ititara qamunna firaafa qambaana nari kai anaqinau.

<sup>46</sup> Yisufa faqa miqoo kai firaa kari faqa quqasee qinoo qinau, Oo qipoo qeeqa qimana ani asaukuki quqeeqa qimasee doo kaaqa kuqinau.

<sup>47</sup> Sundiauqa rakisirafa miqoo maridanoo mi aiqama ainaina qafamaseenoo Anutuna amooqidanoo qinau, Oo maa fasiqafa amiqira fasiqa mariifa kuqinoo.

<sup>48</sup> Faiqi anaasee moomoosa ani qafaida mariusa Yisufa kuquna qafamaseeqa anirandee nimaagai fidaqa nimuqusi marufafa ikifaafau iqa fidaqa mandaikammigau.

<sup>49</sup> Moomoosa Yisunara amiqi mandee irimarusa faqa aanaaseeuqa Kariree maqa maaqaindari Yisuna faqa anusa faqa sia dauni fifainiqau kaqi marida nianai marida qafee mariqau.

*Yisuna akundoo ufafa.*

*(Mat 27:57-61; Mak 15:42-47; Yoh 19:38-42)*

<sup>50</sup> Faiqi moo Arimateea maqusaindariafa Yeerusareenni animarufa mina auqu Yooseefaafa, sia Yisuna akoofau, mina amarafa.

<sup>51-53</sup> Mifa amiqira fasiqa kaaqa andeeqara fasiqa, Anutuna ququsa innaarunaindari maqasaa kambigaaaninnanara afeesara marufa marinau. Mifa Yuda maqannaa ufa suqiranaki keegeemarufa Yisuna arirara qufanoo qaoo qimarufa marinau. Yisufa kuqufanoo mi fasiqafa andeeqasee Piratoona oopisaki keeqafinoo irammirinoo qinau, amanee qinee Yisuna iri mara quqaanauree qufanoo Piratoofa irisee eedoo qinau.

(Yisuna aukwana nari maqannaasa maaqimase madika indufusaida kuqufusa nikundee mariqau. Misa ooni firaana kasaqa aamara auquseeqa minaki keeqafufafaq dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikoofanoo kaifaa moo fannoo kuqufafa miqi kai imariqau; Sia moodaa karifau nikundee mariqau. Moo kari moo kari nikundee mariqau.)

Piratoofa eedoo qufanoo nari akoona amarafa oonuree Yisuna iri aunirira saqarisaaqaraana maraseenoo qamunnannai kukuqamaseenoo mara maree ooni aamara indufirafa fuka marunaki sia moo minaki akundarafa marunaki minaki Yisuna iri quqanau.

<sup>54</sup> Mooseena sandufa faiqi aunirira saqarisaa dirirara amaana faasaanara qaoo qinoo marunara mi eenonnai nariqa amaana faasaana adeedi ranoo marufanoo dauni dauni Yisuna iri mareeqeenoo ooni aamaraki quqanau.

<sup>55-56</sup> Karireendaraa aanaaseeuqa Yisuna faqa anusa Yooseefaana amarana faqa ooni aamaraki quqemarufafa qafamaseeqa oonurandee aniree nari oosana mareeqa nari

marasinna fadameena oosana oosana Yisuna irisaa aku ama qarara anirandee oonu deedaqigau. Saririqasaa misa Mooseena sandufamau fiqa nari amaana fee qimasee adooaqau.

## 24

*Yisufa findimaqee ffufafa fiqau madikakai qafoo ufafa.*

*(Mat 28:1-10; Mak 16:1-8; Yoh 20:1-10)*

<sup>1</sup> Mi anaaseesa nari maqannaasa amaana faasaana Saririqa adooamaseeqa faiqee duna kananaana maasa amaanasaa kananaana eendai mi fadameenna marasinna ainaina deedaqamaqoona mareeqa Yisuna akundoo oonina aamaraki keeqarara fiqau.

<sup>2-5</sup> Oonureeqa qafoo fanoo nari kai ooni firaatia kooqisaa ititaqoofa qanda qandameeqee kaqinni quqaqoofaqa qafamaseeqa kaqi keeqafi Yisuna iriara randoosia qafoo fanoo sia marufaqa kaqi kikiqiga maridaqa naqi fee ianaura naqi fee ianauree qidaqa tautu masee qafoo fanoo qaara fasiqa kaaqa areenee maru qamunna afisira qanda misa naqa kambiqafiqa kikiqigau. Kikiqamafufaqa nindafeeqa qifu qafaanoo qimaseeqa ninuka tuqu naumoo amisoo faqa mi faiqiganda qimannimiqa qigau, innee nanaree findifimari fasiqanara kuqirusakiqa randaidee.

<sup>6-7</sup> Mifa sia maagoo maridanoo, mifa findifinoo doo mifa finoo maridanoo. Mifa ooga Kariree maqa maagaki maridanoo inni qimannimimarufaqa innee irusaa sia fee iridee minara randaidee. Mifa maagi qimasee inni qimanniminai, qinee faiqi nimaaku qini mareeqee manda fasiqa nisaukuki quqee faranoo. Quqasaifaqa aunirira saqarisaa pirimmannai darusaifanoo qaaramoo faasaana inanoo Anutufa qini uqera qisaanoo fee qufaqa innee sia irusee.

<sup>8-9</sup> Miqi qimasee qimannimufaqa misa Yisuna ufara iriseeqa oonurandee maqusai anireeqa Yisuna faiqi namu qisaukuqara taikasee qikunni oogu moodaa marasee marusa faqa faiqi anaasee akaqausa faqa mi ainaina ooni aamaraki oonu qafoonara qimannimiqa.

<sup>10-11</sup> Mi anaaseesa nuqu Mariana amarafa Makadara maqusaindaraafa faqa, Yooannafa faqa Mariana amarafa moo Yameesana anoofa faqa akaqausa mi ainainausara Yisuna faiqi namu qimannimufaqa furufarufa maasa qimaqimiaafoo qimasee sia amiqimasee iriqau.

<sup>12</sup> Peetooroofa misa ufa iriseenoo findimeeqee quqasee sandeenoo ooni aamaraki kummaramafufanoo mara meera qafoo fanoo Yisuna iri kukuqu qamunnafa kai minaki marufanoo qafamaseenoo oonurandee aatata nari amaqaqi fidanoo minauqaindiara irinoo finau.

*Eemausa maqusai fimaru aanaki Yisufa paqurinau.*

*(Mak 16:12-13)*

<sup>13-14</sup> Mi faasaannakai Yisuna faiqi namuqi qari Yeerusareendari Eemausa maqusai fidaqara Yisuna arusoofanoo sia madikaki marunara nari qimami nari qimami qiqa fiqau.

<sup>15-16</sup> Miqi qiqa fidaqa nari qimami nari qimami qimarufanoo Yisufa nari uqanna anireenoo miqanda faqa fimarufaqa miqanda qafamasee sia naagoo irinau.

<sup>17-20</sup> Yisufa qimanniminoo qinau, innee qara aatata fidaqa nanaree nari qimami nari qimami qiqa fidee qufaqa miqanda irisee kasoomambufafa noori runusee moo fannoo Kareeopasafa Yisuna qimaminoo qinau, maa eenda ufana Yeerusaree maqusai ufa firaafa kambiqaina anee kai fee sia irinee qufanoo Yisufa qinau, nana ainainee kambiqeenoo fee qufaqa miqanda qiqa Yisuna Nasareete maqusaindaraana arunara maqanda qidaqa. Mi fasiqafa Anutuna tamummaqara fasiqa marufaqa Anutufa faqa faiqi anaasee faqa mina ufara faqa mifa auqoo ainainara faqa uriqararafa afeqa fee qimarufa marufaqa maasa aanaiqikirusa uriqararausa faqa maasa faiqi firaasa faqa Roomma maqannaara aruaqee qufaqa aunirira saqarisaa pirimmannai ariqau.

<sup>21</sup> Mi fasiqafa maasa Isaraee maqanna karaambaiqa Roomma maqanna nisaukukinaana maasa qumaraaninna fee qidaqa asasi mariafanana marufaqa kuqa ariqau, Maqee faasaanaqari mifa kuquqoo qaaramookifaqa maridaqa.

<sup>22-24</sup> Maasakiqari anaasee akaqausa nari akundoo ooni aamaranai oonu qafaafanoo sia mina iri mari qafeeqa nifu pisipasa mandoofaqa qangiroom kai qafaafanoo qimanniminoo qinoo Yisufa kuqiranaki findifinoo qiafaqa maasakiqari akaqausa ooni aamarai oonu qafaifanoo anaasee indee kai inoo Yisuna kai sia qafeeqa.

<sup>25</sup> Yisufa miqi quna iriseenoo kafa miqanda maagi qimasee qimanniminai. Oo furufarira qanda mariafanoo Innee sia dauni Anutuna tamummaqara fasiqa ufa iri mariafanoo kaaqa innee qara anuqi mariafanoo.

<sup>26-27</sup> Anutuna tamummaqara fasiqauqa asauku mundiranara mi oosana oosana aupuraranara marasee miqooqari nari areenaranaki keeqaannoo fee qimaqoofanoo naqimasee fee sia kambiqaarara, kambiqaannoo. Miqi qimaseenoo Yisufa Mooseena sandufa akarakinanasaa oosana araseenoo tamummaqara fasiqa aiqama akarakinana nariara akara rumaqoonara miqanda qimanniminoo aatata fimarinau.

<sup>28</sup> Miqinoo ufa qinoo fifiufanoo Eemausa maqusa aedeedi ramaseenoo Yisufa kaqi finoora foora ufaqa miqanda rafaqa fidaqa qiqaau.

<sup>29</sup> Doo suani keeqaifanoo asukunaikidanoo anee maasa faqa ani maria qufanoo Yisufa eedoo qimasee misa faqa oonu marinau.

<sup>30-31</sup> Miqanda narana deedaqi isee ooqu marifi naaneerufanoo Yisufa feemu maraseenoo Anutunara dufi dufi qimaseenoo ruqi ruqi maseenoo nimufaqa misa irirafa misa nifu faqa kambiqaofaqa oo Yisufammifoo qufanoo Yisufa doo miqooqari taikafinau.

<sup>32</sup> Taikafufaqa miqanda nari qimami nari qimamiqa qiqaau maaqanda aanai ani marunanoo mifa maaqanda faqa anidanoo akarakinana maaqanda qimaqimimarinanoo maaqanda daundurai idara foora qamafi qimbafi imarifaqa maaqanda sia minara iriqaau.

<sup>33</sup> Miqi qimaseenoo miqanda aaqee quqasee Yeerusareenni kafaa fiqau.

<sup>34-35</sup> Oonureeqa miqanda Yisuna faiqi namu qisaukuqara taikasee qikunni ooqu moodaa marasee marusa akaqausa namufaqa moodaaqoo marunaki miqanda oonureeqa mina faiqi namu qimannimiqa qiqaau. Doo karaambaqa kuqiranakiqari findfiinoo Simoonafa doo qafeenoo qufaqa miqanda nariqa aanai fi paquri funara faqa feemu marasee ruqi ruqi mandee nimufanoo nifu faqa naaqoo faqa irunara nari qimannimiqaau.

*Yisufa nari faiqi namu kooroomannimaqanau.*

*(Mat 28:16-20; Mak 16:14-18; Yoh 20:19-23; NiFa 1:6-8)*

<sup>36-37</sup> Miqanda nari qafoonara qimannimimarufanoo karaambaqa nari uqanna tautumannaqasee nifusaa kikiqamambinoo qinau, innikina asoorafa mariani qufaqa aiqamausa tautumandee afaannee qimasee firaqoo rufiqaau.

<sup>38-39</sup> Yisufa nindafamaseenoo qimanniminau. Naqi fee ifaqee qaara irirafa inni naaqoosaa rinoo fee qini qisauku faqa qiku faqa pirimma daruqoona qafaqa qinee qeeqa uqanna maridaqa. Innee aniree qini duqamasee qafaqa qimaqi faqa qimudaani faqa kaqi maridanoo afaanna fannoo sia miqirafa maridanoo.

<sup>40-43</sup> Miqi qimasooafaqa firaqoo اساسamasee oo doo kuqaa narimmifoo qimasee kafaa afaannasaqari ani maridanoo fee qimasaida quqasaida rufiee mariqaau. Miqi marufanoo Yisufa uqannifiqararee qimaseenoo irammirinoo qinau inni narana moo marinaqa qimifaqa naa qufaqa misa noodaanna aafaqa mareeqee amufanoo aiqamausa nifusaa qumaree nanau.

<sup>44</sup> Namaseenoo maaqi qimasee qimanniminau qinee inni faqa kaqi maridaqa maa dariranara kuqiranara findifiranara qimannimiaafanausa maridaqa. Mooseena sandufa faqa tamummaqara fasiqauqa ufa faqa Dafidina idi akaraki faqa qiniara akara rumaqoo ufafa naqimasee sia kambiqaararee doo mina anoona kambiqaarana qafaafanoo.

<sup>45-47</sup> Miqi qimasee Yisufa misa tamummaqara fasiqa ooqeenaa akara iriaqeera misa irirana quandaseenoo qimanniminoo qinau maaqimminoo akara oosana maridanoo, Anutuna asauku mundirafa aupurarana maraseenoo qaaramoo faasaana marinoo kuqiranakiqari findifinoo miqooqari Yisuna ufa irimariasa faiqi anaasee fuki faaki qimasee qimannimimarifaqa nari mandainainara nikooqamaseeqa Anutufinni quandaki nari mandainaina akiqara asauku mundirana auquara qimamifanoo minninnisaani, miqiqa ufa qimannimirafa faqa mandainaina minnisarafa faqa Yeerusaree maqusai oosana araseenoo aiqama maqa maaqai qimannimirafa daraanianno.

<sup>48</sup> Innee qini qiqaonduqa mi ainainausa qafee marusa mariafanoo.

<sup>49</sup> Qini qikoofa Anutufa nari maraquna afeeka nimimari maraquna inni nimiraree qimasoona qeeqa kai oorureeqa niqiqaanaqa qumuree inni afeekaikamma nimaqaannoo. Innee sia Yeerusaree maqusa minnisaqa maaqoo kai marifanoo naakufinaqa fifainiaqa.

*Yisufa innaarunai ooru fu ufafa.*

*(Mak 16:19-20; NiFa 1:9-11)*

<sup>50-51</sup> Yisufa nari faiqi namu faqa nari aqoonduqa faqa Yeerusaree maqusaindari nifiqeenoo Beetani maqusa amummaqa oonureenoo nari asaukuqara uqeraseenoo nifaaqooqa qimannimaqaidanoo nari faiqi namu minniseenoo uqerakinoo innaarunai ooru finau.

<sup>52-53</sup> Miqoo marusa mina qafamasee Anutuna amooqimasee quandaki nimuqusaki asasirafa qumbiqafuqa Yeerusareenni kafa oonu maridaqa faasaambaasaana naaquqara amaana maqaki keeqafidaqa Anutunara dufi dufi qimamaqee mariqau.

## YOOHANEE Amiqira Fasaasa Ufa Yoohaneefa Akararinau.

*Naaru naaru marira ufa.*

<sup>1</sup> Ooqai maa maqa maqafa sia marunakinai Anutuna afeeka ufara foora Yisufa marinau. Mi afeeka ufara foora Yisufa Anutuna faqa marinau. Mi afeeka ufafa Anutufa kai marinau.

<sup>2</sup> Oosana aroonakina mi ufafara foora Yisufa Anutuna faqa marufa marinau.

<sup>3</sup> Mi ufanannai Yisunannai aiqama ainaina kambiqaqoofanoo maridanoo. Sia moo ainaina sia minannai kambiqanau. Aiqama ainaina mina Yisunannai kai kambiqanau.

<sup>4</sup> Aiqama kambiqoo ainaina mina Yisunasaqaraa marirana maraseenoo doo maridanoo. Mi marirafa maa maqanasaaqaraa fasiqa anaasee naundurai qoomara foora aurau rimarifa maridanoo.

<sup>5</sup> Mi aurau rirafa asukunaki qaidanoo. Mi aurau rira qoomana asukuna fannoo sia amana qumaree rafaqa fuannoo.

<sup>6</sup> Anutufa qumee dadaaqufanoo maqasaa fasiqa moo nammari nimiru Yoohaneefa kambiqafufanoo Anutufa qini saikaki fuannee qufanoo nari saikaki ani marinau.

<sup>7</sup> Yoohaneefa kooroo irafa animarinau. Mi qoomana Yisunara kooroo irara aninau. Aiqama fasiqa anaasee mina ufa irisee Yisunara kuqaa anoonee qiaqeera aninau.

<sup>8</sup> Mifa Yoohaneefa sia mi qoomafau marinau. Kaqi mi qoomanara kooroo ianifeera animarinau.

<sup>9</sup> Anutuna ufa fannoo Yisufa anoona aurau rirafa marinau. Mi aurau rirafa faiqi aiqamausa naunduraki qeemarufa maridanoo maqasaa faiqi aanaaqi kammafinoo maa maqa maaqanaki quminau.

<sup>10</sup> Anutuna maa maqa maaqanaki ani marinau. Anutufa mi ufana Yisunannai maa maqa maaqanakinnaa fasiqa anaasee auqu quqasoofanoo misaki akooqoo qumu marufaqa sia minara iriqau.

<sup>11</sup> Mifa nari auqu maqa maaqanaki aniroofaqa mina maqannaasa minaki mariasa mina mareeqee aqusee minnisagaqau.

<sup>12</sup> Akaqausa asasammasee maroosa Anutuna ufa Yisufa misara innee Anutuna faiqi kamambi mariaqee qira ufa nimirau. Minara kuqaa Anutunee qimasee naundura amimarusa mina faiqi kamambi mariaqee qira ufa nimirau.

<sup>13</sup> Anutuna faiqi miqimariasa kambiqafi mariasa sia maa maqa maaqanaki mariasakiqari kambiqagaqau. Sia faiqi faiqi imariandeeafau mafi kambiqagaqau. Sia faiqi nari iriranannaifau Anutuna faiqi kammafi kambiqagaqau. Anutuna iriranannai kai kambiqafufaqa mina faiqi namukiqau.

<sup>14</sup> Mi ufafa Anutuna anoona ufa Yisufa faiqi faiqi kamambinoo maasaki qumu marinau. Qumumarufaqa mina afeeka eeraarirana maasa mina faiqi namu kuqaa qafaqau. Mifa nari akoona amaaku moodaa marunara nari akoonasaqaraa afeeka eeraarirana faqa kaqi afaarirana faqa kuqaa anoona ufa qirana faqa maraseenoo qumbiqanoo maruna qafaqau.

<sup>15</sup> Yoohaneefa nammari nimirufa minara Yisunara kooroo inau. Mifa maaqi qimasee faiqi anaasee qimanniminoo qinau. Ooqai qinee qimannimiqia. Moo fannoo qini qinaaqianna aniannoo. Qinee kambiqaafannaqoo mifa ooqai mariufa marifaqa qini uriqarara fee qiafanafa maana Yisufa mifa maridanoo. Yoohaneefa miqi qimaseenoo minara qimanniminau.

<sup>16</sup> Yisufa maaqoo qumu maridanoo narisaqaraa amiqi amiqirana amuaqa amuaqa qoomoo maasa aiqamausa qimufaqa mareemariqiafana.

<sup>17</sup> Anutufa Moosenannai nari sandufa nari amusufa maasa qiminau. Asauku mundirana Yisunannai nari kaqi اساساندمه nimirufa faqa kuqaa anoona ufa qirana faqa maasa qiminau.

<sup>18</sup> Sia moo fannoo Anutuna qafee marufa marinau. Nari amaaku moodaa nari akoona amuqusa uqanna mifa kai nari akoona faqa marida qafamaseenoo maa maqanasaa maasa qimannimirara quminau.

*Yoohaneefa nammari nimiru ufafa.  
(Mat 3:1-12; Mak 1:1-8; Ruk 3:1-18)*

<sup>19</sup> Yoohaneefa Yisunara kooroo qu ufafa maaqimasee animarinau. Yuda maqannaasa amaana maqa aanaikiqirau faqa amaana maqaki dapi saika maree marusa misara Reefina aiku asauku fee qimarusa misa faqa Yeerusareenni suqufufaqa ufa qimaseeqa

faiqi akaqausa nifeeqasee niqiqoofaqa Yoohaneenara irarara oofufiqau. Yoohaneefa nammari nimirufunnai Yooradanna nammariinni oofureeqa maaqi qimasee iraqau.

Oo Yoohanee, Anutuna tamummaqara fasiqauqa kambiqaaninna tamummaqara fasiqanara akara rumaqoofa anee maana miffee yafee.

<sup>20</sup> Yoohaneefa misa ufa iriseenoo sia kaqi ufa qinuu akooqoo kooroo qimasee qimanniminuu. Qinee sia asauku mundirausau maridau.

<sup>21</sup> Misa minara iriseeqa kafia iraqau. Anee Eeriaafee maridanee. Maasa qimaqimia. Miqi qufanoo Yoohaneefa qinuu sia qinee misau. Miqi qufaqa misa iraqau. Anee mi tamummaqara fasiqanara akara rumaqoo fee maridanee.

Miqi qufanoo Yoohaneefa sia fee qinuu.

<sup>22</sup> Sia fee qimasooqaa misa quandaki qiqau. Maasa niqigaasa nana ufa fee aniana qimannimianauree. Anee yafee. Anee aneennara naqi fee qidanee.

<sup>23</sup> Yoohaneefa misa ufa iriseenoo maaqi qimaseenoo qimanniminuu. Anutuna tamummaqara fasiqa Eesaiaafa oqai maaqi qimasee qiniara akara rinuu.

Qinee karaambaiqara nammeera qimasee qimannimira fasiqausa maridaqa. Kaasau maqa maaqakiqari maaqi qimasee nammeeraqidaqa. Innee karaambaiqara anianinna aanna andeeqaseeqa afisuaqa.

<sup>24</sup> Yeerusareendari niqiqoosa misa Farisai amaana ufa qimarusa misa mina iriseeqa kafia irammiriqau.

<sup>25</sup> Oo Yoohanee, anee sia asauku mundirafa maridana. Anee sia Eeriafa maridana sia anee mi tamummaqara fasiqafa maridana. Anee sia misa maridana naqi fee idanee nammarikee qimannimaqaidanee.

<sup>26</sup> Yoohaneefa misa ufa iriseenoo maaqi qimasee qimanniminuu. Qinee nammarike faiqi anaasee keeqannimaqaidaqa. Inni qambaana mo fannoo maridanoo innee minara sia irimariafanoo.

<sup>27</sup> Mifa qini qinaaqianna anianinafa qini uriqararafa mariannoo. Naqimasee fee qinee mina dadaaqianauree. Qinee kuqaa ooreeqararasa uqanna maridaqa.

<sup>28</sup> Yoohaneefa Yooradanna nammarike Beetani maqusai dinni afainni nammarike keeqannimaqee marufaqa misa aniree miqi qimasee iree mariqau.

*Anutufa auiqaaninna sipsipa anaqina ufa.*

<sup>29</sup> Iqaqoofanoo kananaana Yisufa Yoohaneefunnai oofu fimarufanoo Yoohaneefa qafeenoo nari faqa marusa maaqi qimasee qimanniminoo qinuu. Innee qafaqa maa fasiqafa Anutufa nifaueemari aandau aanaaqi nari qaindasaa kuquaninna andaufa maasa aiqamausa maa maqanasaqaraasa mandainana minanna maraqqiseenoo Anutufa darira ufa ateeqaiqaaninafa maridanoo.

<sup>30</sup> Eenda qinee minara maaqi qunafa maafa qinee sia mariafanna kamuqoo marunara qini uriqararafa maridanoo qini qinaaqianna kambiqafi aniraannoo qunafa maana mifa maridanoo.

<sup>31</sup> Qinee minara sia irimariafanausa maridaqa. Isaraee maqannaa nifusaa kooroo qiaqera nammari auqamannimaqaa anidaqa.

<sup>32</sup> Yoohaneefa maaqi qimasee Yisunara qinuu. Qinee Anutuna maraquina qafaunanoo mifa nakipurunaika mafinoo innaarunaindari qumureenoo Yisunasaa quqeenoo.

<sup>33</sup> Qinee qeeqa kai asauku mundiranara sia amana miffee qianaara. Maa saikanaara diqiqoofa Anutufa maaqi qimasee qimaqiminuu. Anee faiqi moo qafainanoo qini maraquina fannoo akooqoo minasaa mundifinnanara minara faiqi anaasee qini naaqqara maraqqannai rumannimaqaanina fee qinnaranoo.

<sup>34</sup> Maafa Anutufa rusandeesamu masee maroofa nari amaaku uqanna maridanoo. Qinee qeeqa qifunnai qafeeqa inni kooroomannimaqaidaqa.

*Yisufa indaaru oofasaa nifiqoo faiqi namusa.*

<sup>35</sup> Kananaana iqaqoofanoo Yoohaneefa nammari afainni nari ufa irimaru fasiqa qanda faqa marufanoo Yisufa aiqaranau.

<sup>36</sup> Aiqaroofanoo Yoohaneefa amiqi mandee aiqumqumaseenoo qinuu. Innee maana qafaqa Anutuna aandau aanaaqiara foora qaindasaa maasara kuqaninafa aiqqaaidanoo.

<sup>37</sup> Yoohaneena ufa irimaruqanda mi ufana irisee Yisuna doo afaqee fiqau.

<sup>38</sup> Afaqee fimarufanoo Yisufa quandafi nindafeenoo qinuu. Inneeqara nanaree qini qifaqee anidee qufaqa miqanda qiqau. Ufasaa rakisira anee yai fee maridanee.

<sup>39</sup> Yisufa iriseenoo qimanniminuu doo aniree qafaqa qufaqa miqanda mina faqa oonu mina maaqa qafamasee eenaanianna oonu qafamaseeqa mina faqa kaqi kaaqoo mariqau.

<sup>40</sup> Mi fasiqaganda Yisuna maaqa oonu qafamasee mina faqa maruqanda miqandak-igari moo fannoo Andurufa marinau. Mifa Simoona moo auqu Peetooroona akaqa marinau.

<sup>41</sup> Andurufa narafasaana Simoona moo auqu Peetooroona kaqi kaqi paqurimaseenoo qimaminoo qinuu. Maasa Anutuna asauku mundira fasiqa kambigaannoo fee qimaqoofa doo maasa paquriqa qimaseenoo mina afigammaree Yisufinnai finau.

<sup>42</sup> Oonuroofanoo Yisufa Simoona aiqumumaseenoo qinuu. Anee Yoothaneena amaaku Simoonafa mariananoo. Qinee aniara Keefasane qianauree qinuu. Mi auqu oosanna ooni fee qinoo maridanoo.

*Yisufa Firipina faqa Natanaeerana faqa naaroo ufafa.*

<sup>43</sup> Moo kananaana Yisufa Kariree maqamaaqai fuaneera aanai Firipina paquriman-deenoo qimaminoo qinuu. Doo Firipi qini faqa doo aniannee qinuu.

<sup>44</sup> Firipifa faqa Andurufa faqa Peetooroona faqa Beetasaida maqusaindari moodaa maqusanaasa mariqau.

<sup>45</sup> Firipifa Natanaeeranara randasee paqurimaseenoo qimaminuu. Mooseefa Anutuna sandufasaa faqa tamummaqara fasiqausa faqa kambigaaninna fasiqanara ooqai akara rumaqoona maasa paquriqa. Mifa Yisufa Yooseefaana amaaku Nasaretee maqusain-daraafa maridanoo.

<sup>46</sup> Natanaeerafa qinuu, Akasaa naqimasee amiqira ainaina Nasaretee maqusaindari kambiqararee, sia kambigaannoo. Miqi qufanoo Firipifa qinuu aniree doo oonu qafa.

<sup>47</sup> Firipifa mina afiqeenoo oonu roofanoo Yisufa Natanaeerana qafamaseenoo qimaminoo qinuu. Oo maafa Isaraee maqannaa faiqi uqanna anidanoo. Sia qunna ufa minaki marifa andeeqarafa kai marifa maridanoo.

<sup>48</sup> Natanaeerafa minara iriseenoo tautumaseenoo maaqi qimasee Yisuna qimaminuu, anee naqi fee masee qiniara iridane. Yisufa iriseenoo maaqi qimasee qimaminuu. Natanaera faasai Firipifa sia ani paquriqoo anee aneenna maqusi aneenna faafisa atukaki nianai marianaqa qinee ani aundurakinaa oosana faasai qafeeqa.

<sup>49</sup> Natanaeerafa iriseenoo tautumakufanoo qinuu. Ufasaa rakisirafa anee Anutuna amaaku marianafa. Anee Isaraee maqannaa karaambaiqa marianafa mariananoo.

<sup>50</sup> Miqi qimasoofanoo Yisufa qinuu. Qinee faasai faafisa atukaki mariana qafaunnaara minara qunnaara anee minaree qiniara Anutuna amaaku fee qidanee. Qini ufa iria. Maqee kaqikaqoo uqafiqauwana qafaanaroo. Kasooqagee anoona firaqoo uqannifiqaanaura.

<sup>51</sup> Miqi qimasee mina faqa marusa qimanniminoo qinuu. Qinee anoona ufa qiman-nimidaqa kasooqagee innee innaarunai kudimanda rakee inaga qafaifanoo qangirooqqa faiqi nimaaku qini qimummaqa ooraini qumaini imarifaqa nindafeefaranoo.

## 2

*Kannaana maqusai faiqi faqa anaasee faqa nimundoo ufafa.*

<sup>1-2</sup> Qaara faasaana aigaroofanoo Kanna maqusai Kariree maqa maaqaki moo maqusaki maanaqa amundarafa marinuu. Yisuna anoofa Mariafa mi qoomaqanaki dadaaqidanoo marinuu. Qoomaqa suqoosa Yisuna faqa nari faiqi namu faqa naarooafaqai fiqau.

<sup>3</sup> Mi maqannaasa oosana maaqimminoo maridanoo. Maanaqa nimundaree qimasaidaqa narana faqa uainna nammari nari maqee maqee nee maria nammari faqa namammaree munusaida nimundee mariqau. Mi qoomaqanaki uainna nammari namammaree kasaqa munu taikasooofanoo Mariafa nari amaaku Yisuna qimaminoo qinuu. Qini qimaaku doo uainna nammari taikanoo maridanoo.

<sup>4</sup> Yisufa mi ufana iriseenoo nari afeeka kooroomma nimaqaaninnanara iriseenoo qimaminoo qinuu. Oo qinnaqeefoo nanaree anee qini iridane. Kasooqagee qinee fira ainaina oosana oosana faiqi sia auqee mariana auqanaura anee maqee kasaqai qimariananoo.

<sup>5</sup> Yisuna anoofa mina iriseenoo quandafinoo qoomaqa dadaaqimaru fasiqausa mara quqaqoosa maaqi qimasee Yisunara qimanniminuu. Nana ainainaree maafa qinaqa mifa qinandee kai laqa.

<sup>6</sup> Mi maqanaki ooni qafee firaafauqa dinni qisauku taikasee dinni ani moodaa marasee marinuu. Yuda maqannaasa nari imarudeemasee minakina nammari marasee nisaaqumasaida narana neemariqau. Aiqaama ooni qafee tintaramma miqirafa firaafauqa marinuu. Nammari moomoo saka adiee marusauqa mariqau.



<sup>7</sup> Yisufa qoomaqa suqara faiqiuqa mara quqaqoosa qimannimino qinau. Innee nammari sakasee maa ooni qafeesaki adiee marifanoo afaisaa kai uruani. Yisufa miqi qimasooafaqa misa aiqama mi ooni qafeesaki saka adioofanoo afaisaa qumbiqaqau.

<sup>8</sup> Saka adia qumbiqasooofanoo Yisufa qimannimino qinau. Innee minakinaana sakamaree qoomaqasaa rakisimarina amifanoo namasee qafaani.

<sup>9</sup> Miqi qimasooafaqa misa miqimniqau. Qoomaqasaa rakisirafa mi nammari uainnaikamafuna oosana siamma irinau. Qoomaqa suqeemaru ainainira fasiqausa misa kai iriqau. Qoomaqasaa rakisirafa namasee qafooofanoo amundoo aanaaseena afaaqi aaramaseenoo qinau.

<sup>10</sup> Aiqama qoomaqa suqee mariasa amiqira uainna naaree indaaruu nimiafaqa naidaqa. Neeneesaafaqa inaaqianna manda uainna nimidaqa. Anee sia miqiananoo amiqira uainna uqanna kai inaaqianna nimiananoo.

<sup>11</sup> Miqinoo Kariree maqa maaqaki Kannaana maqusai Yisufa nari saika oosana araseenoo faiqi sia auqoo ainaina amiqira oosana auqamasooafaqa faiqi anaasee qafaqau. Mifa mikari nari afeeka firaana uqannifiqooafaqa mina ufa irimaru fasiqausa Yisunara kuqaa Anutuna amiqira afeeka uqannifiqee mari fee qiqau.

<sup>12</sup> Miqooqari Yisufa nari anoona faqa nari akaqaafasaa faqa nari ufa irimarusaa faqa Kapeeranaumma maqusai ooqu fiqau. Miqoo ooquree qaaramoo faasaana kaqi marinuu.

*Yisufa Yeerusaree naaquqara amaana maqaki keeqoo ufafa.*

*(Mat 21:12-13; Mak 11:15-17; Ruk 19:45-46)*

(Ooqai Anutuna qangiroo moo fannoo Isaraee maqannaasa ainnaaqareenoo Isipa maqannaasa ooqa faiqiuqa kuqa narufaqa Isaraee maqannaasa quqasee sandaqa.)

<sup>13</sup> Isaraee maqannaasa mi ainnaaqarara qoomaqana suqarara deedaqufanoo Yisufa minni Yeerusaree maqusai ooru finau.

<sup>14</sup> Oorureenoo Yisufa naaquqara amaana maqaki keeqafinoo oonurama nindafoofaqa faiqi mi naambeeqanai marida Anutuna tatufirana suqararee qidaqa burimakau sipsipa nakipuruna narinni narinni feefaurimariqau. Miqidaqa fira munnimma maraidaqa qummuaraikammi mariqau. Faiqi anaasee kaamanna munnimma mara maree munu nimufaqa misa naaquqara maqakinna munnimma nari nimimariqau. Mina faqa amaana maqasaa rakisiraua nari faqa qummuaraikammi mariqau.

<sup>15</sup> Yisufa anirama nindafeenoo sanda kukuqamma qumareenoo mi samuna burimakau sipsipa faiqi naru nifaqaauafaqa quqasee sandaqa. Munnimma kukuqimaru qaindausa ani qumareenoo teeqi maqusoofanoo mi munnimmausa maqandanandanamminau.

<sup>16</sup> Mina miqimaseeno nakipuruna feefauri maree marusa maaqi qimasee qimanniminau. Maa ufinisa maanakinana maanakiqari kai doo maree fifuafa, sia mariaqa. Qini qikoona maqa maa maqafa maridanoo. Innee sia mina marasee dapi feefauri maqa fee qiaqa.

<sup>17</sup> Miqi qimasooafaqa Yisuna faqa nimarusa ooqeenaa Anutuna tamummaqara fasiqauqa akarakinna ufara oonumafi irisee qiqau. Ani maaqara qiaq didirafa idara foora qaidanoo fee qiqau. Yisuna faiqi namu minara iriqa maaqi qiqau. Ooqeenaa ufa anoona doo maqee Yisunaki kambiqeenoo fee qiqau.

<sup>18</sup> Yisufa aandaufa amaana maqa naambeeqaindaraana niqiqamasooafaqa Yuda maqanna uqirararaua quandaqi Yisuna aqidaqa qiqau. Anee kuqaa karaambaiqa maridana faiqi sia amana auqemaria ainaina fira ainaina moo uqaqifiqainaqa maasa kuqaa anira karaambaiqammifoo qianaara.

<sup>19</sup> Yisufa mi ufana iriseenoo qinuu. Amana, innee maa amaana maqana rapeema-saifaqa qinee qaaramoo faasaana kafa uqera kuradaanaara.

<sup>20</sup> Yuda maqannaasa uqirararaua minara iriseeqa qiqau. Akasaa maa maqana ooninnai auqimariafa firaafa maridanoo. Maasa qikeeku qikaaku (46) qaara fasiqa niku nisaaku taikasee dinni taikasee dinni ani moodaa marasee aukuna auundurui maa afeeka maqana auquqoofa maridanoo. Anee naqimasee qaaramoo faasaana uqera kuradarara qidane.

<sup>21</sup> Yisufa sia naaquqara maqara irinau. Nari afaaqara Anutuna naaquqara maqa fee qufaqa misa sia iriqau.

<sup>22</sup> Yisuna faiqi namu faqa sia aaqee mi ufana oosana iriqau. Kasooqaqee Yisufa kuqiranakiqari findifufaqa miqoo Yisuna ufa irisee miqoo anoonara oonumafi iriqau. Miqoo faqa misa tamummaqara fasiqa akarara faqa Yisunara faqa kuqaa fee qiqau.

*Yisufa aiqama fasiqa naundurui nindafoo ufafa.*

<sup>23</sup> Mi fasannai ainnaaqarara qoomaqa kamuqoo Yisufa Yeerusareenni marufaqa moomoosa mina sia faiqi amana auqemaria ainaina qafamasee kuqaa Anutuna asauku

mundira fee qimariqau. Maa fasiqafa Anutuna afeeka eeraarirana kooroo imarifa maridanoo fee qimariqau.

<sup>24</sup> Yisufa minara irinoo sia misaki paasosamandee afaaqa quqanau. Mifa faiqi naunduraki irufanoo sia amanaikufanoo.

<sup>25</sup> Sia moo fannoo faiqi naundurakinaana qimamiqau. Nari kai amiqimandee aiqamausa naundura mandirirana niqafamaseenoo misaki sia afaaqa quqanau.

### 3

*Yisufa Nikoodeemusandiri ufaqu ufafa.*

<sup>1</sup> Farisai amaana ufa qimarusakai faiqi moo auqu Nikoodeemusafa Yuda maqannaasa uriqararafa moo fannoo marinau.

<sup>2</sup> Mi fasiqafa moo eenda asukunaki kukeeqakufanoo Yisufa maruqoo anireenoo qimaminoo qinau. Oo ufasaa rakisirafa anee Anutufinaindari anianafa ufasaa rakisirafa marianaqa maasa minara iridaqa. Sia fifau fasiqa narikai qinanoo faiqi teeroo ainaina aaqee taikaannoo, anee ianandee qiananoo taikaannoo. Anutufinaindari anianafa mariannanara mi afeeka ainaina auqimarianaqa maasa iridaqa. Anee nanufa fee maasa qimaqiminnaree.

<sup>3</sup> Yisufa iriseenoo nari qimaminoo qinau. Qinee anoona ufa ani qimamianausa. Faiqi Anutufinaindari kafaa fukasaa aanaaqi aanaaqi kamafinausa kai Anutuna ququsaki keeqefaranoo. Kaqi marinausa sia amana fifaranoo.

<sup>4</sup> Nikoodeemusafa mi ufana iriseenoo kafaa Yisuna irammirinoos qinau. Naqimasee faiqi firaafa kafaa aanaaqi kamambinoos fee, nari anoona aranandaki keeqafinanoo fee kafaa maqaannoo fee. Yisu sia amana, sia minara qimariananoo.

<sup>5</sup> Yisufa iriseenoo qimaminoo qinau. Qinee anoona ufa ani qimamidaqa. Faiqi kaqimarinanusa sia uganna Anutuna ququsaki keeqefaranoo. Anaasee aranandaki kambiqainausa quandafi Anutuna maraqunannai faqa fukasaa aanaaqi kamafinausa kai Anutuna ququsaki keeqefaranoo.

<sup>6</sup> Faiqi nimaqifaqaasa quandaki nimaqifaqaasa maqefaranoo. Anutuna maraquna fannoo quandaki maraquna faqaasa Anutunara irirana faqaasa maqaannoo.

<sup>7</sup> Qinee aniara kafaa fukasaa aanaaqikinana kambiqaannee qunana sia anee minara irisee tautia.

<sup>8</sup> Ufai oosana iria. Yaindari anidanoo fee. Yai fee fidanoo fee. Nari iriranamau fifana anee ufa kai irimariananoo. Anutuna maraqunannai faiqi moo fukasaa aanaaqi kirausa miqi kai idaqa. Anee sia mina oosana qafeennaranoo.

<sup>9</sup> Nikoodeemusafa mi ufana iriseenoo Yisuna qimaminau. Naqimasee maa ainainnafa anee qianandee iannoo fee. Sia qinee minara iridaqa.

<sup>10</sup> Yisufa iriseenoo maqi qimasee nari qimaminau. Anee Isaraee maqanna rakisirafa firaafa moo fannoo marianafa mariananoo anee naqimaseenee maa ufana oosana sia iridane.

<sup>11-13</sup> Qinee kaifaa anoona ufa ani qimamidaqa. Maasa irunna ufana kai ani qimamidaqa. Maasa qafee marunna ainainara kai inni qimannimiafaqa innikina moo fannoo sia maasa ufa irimariafanoo. Sia moo fannoo innaarunai ooru fimariasa maridaqa. Qinee faiqi nimaaku kai innaarunaindari qumuafanousa mindaraa ainainara irida maridaqa. Qinee maa maqanasaaqaraa ainainara ani qimamianana sia irinana naqimasee innaarunai ainainara qimamianana irinnaree.

<sup>14-15</sup> Yisufa kafaa Nikoodeemusana qimamidanoos qinau. Ooqai aadana maqa maaqaki sakaniuqaindi Isaraee maqannaasa moomoo ukaqannimisoofaqa kuqimariqau. Mooseefa mina qafamasee koopaa saunu naaree auquseenoo mina aanaaqianna minanai kai sakani auquseenoo mi saununasaa kukukukuqamaseenoo doo uqeerasoofaqa kuqirarimarusa mina qafamaseeqa sia kuqigau findifiqau. Qini faiqi nimaaku miqi kai masee qini darusee aunirira saqarisaa uqeera quqefaranoo. Qinee miqoo airiqa marianaqa aiqamausa qini qiqafamasee irirana qinisaa rusirausa Anutufa nari naaru marirana nimiannoo.

<sup>16</sup> Anutufa maa maqanasaa mariasara amuqusa firaqoo qunara nari amaaku moodaa uqanna amiqirana maqasaaqaraasa nimuna mina saqarikinausa sia kuridiranaki fifaranoos Anutuna naaru mariranaki fuaqeera nari amaaku niminuu.

<sup>17</sup> Anutufa sia maa maqanasaaqaraa fasiqa anaasee nari ufa firaanaki mara aquanifeerau nari amaaku maa maqanasaa quqannisanau. Mifa faiqi anaasee nariranakinaana qumbaqqee naaru asumu mariranaki quqannisaanifeera Yisuna quqanau.

<sup>18</sup> Maqasaa fasiqa anaasee Anutuna faiqi namukinausa mina saqarikinausa Anutuna narirafa sia misasaa maridanoo. Sia Anutuna faiqi namukinausa sia mina saqarikinausa

doo ooqai Anutuna narirafa misasaa maridanoo. Misa Anutuna moodaa faiqara sia misa nâri irirana minasaa rusirai Anutuna narirafa minarakai doo misasaa maridanoo.

<sup>19</sup> Anutuna narira oosana maaqimminoo maridanoo. Anutuna kaaqa qara qoomara foora Yisufa maa maqanasaa doo ani maridanoo. Faiqí nâri oosana mandainaina maree marifanoo minara irinoo kaaqa qara qoomara Yisunara akooqai fanoo asukunara ridanoo.

<sup>20</sup> Faiqí moo fannoo mandainaina maree marifa mifa kaaqa qaranara fidiqaa imarifa sia faasaana kooroo iannoo. Narí manda oosana kooroo qianoo qimasee asukunaki kaqi maridanoo.

<sup>21</sup> Yafa yafee moo fannoo anoona oosana marainafa mifa suanisaa qooma mariqoo aninafa narí Anutuna ufamau fimari oosanna akooqoo kooroo ianifeera akoosaqa anidanoo.

*Yisufa Yoohaneena nammari nimimaruna faqa ufaqu ufafa.*

<sup>22</sup> Mi aukuanai Yisufa nari faiqí namufaqa Yudeeaa maqa maaqaki ooquree marikinoo Yisufa qufaqa mina faiqí namu faiqí anaasee nammarikee qamannimaqee mariqau.

<sup>23</sup> Yoohaneefa nammari nimimarufa mifa faqa mi aukuanna moosaa faiqí anaasee nammarikee qamannimaqee marinau. Mifa Saarimma maqusa aqa Aeenoonna nammarikee qamannimaqee marinau. Miqoo nammari moomoo mandinoo marunara faiqí anaasee moomoo suqíqa marufanoo Yoohaneefa nammari auqamannimaqee marinau.

<sup>24</sup> Yoohaneefa mi kamuqoo kaqi maru kamuqoo nammarikee qamannimaqee marinau. Eeroodeefa sia karabusaki quqoo kamuqoo miqi marinau.

<sup>25</sup> Yoohaneena faiqí namu faqa Yuda maqanna fasiqa moo fannoo faqa Yuda maqanna nammari keeqannimaqee maru oosannara ufa rainaqa.

<sup>26</sup> Miqidaga Yoohanee funnai oonuree qimamiqa qiqau. Oo ufasaa rakisirafa. Ooqai anee Yooradanna nammari dinni afainni qimannimuna fasiqafa Yisufa doo Yeerusa-reendari qumureenoo faiqí anaasee nammari auqamannimaqee marifaqa minni faiqí anaasee moomoo fidaqa.

<sup>27</sup> Yoohaneefa mina iriseenoo maaqi qimasee qimanniminu. Sia moo fannoo kaqi iannoo. Anutufa aminafa kai miqiannoo.

<sup>28</sup> Innee mi fasiqanara qini ufa qiafannanara irimariusa mariafanoo. Qinee minara maaqi qiafanafa. Qinee sia asaku mundiraua maridaqa. Qinee mina oorinni aniafanaua kai maridaqa.

<sup>29</sup> Aqoondi fannoo amundara fasiqa aqa maridanoo mina ufa iriseenoo asasidanoo. Narí aqoondi anaasee maree marinara asasidanoo. Qinee Yoohaneesa Yisunara iriseeqa asasidaqa. Mifa amundara fasiqara foora marifaqa qinee mina aqoondiarara foora maridaqa mina ufa iriseeqa qini asasirafa firaafa maridanoo.

<sup>30</sup> Mifa maqee maa fasannai uriqararafaikamambi mariannoo. Qinee qeeqa ooru dupirauaika mafi marianauro.

*Innaarunaidari qumu fasiqana ufa.*

(Yoohaneefa nammari nimimarufa mi ufana Yisunara qimasoo fanoo maa papiqana akara rimarufa mina amarafa Yisuna faiqí namukinaa moo Yoohaneefa narí amarana ufa iriseenoo akara rumaseenoo kafa nari ufa Yisunara maaqi qimasee akara rinoo qinuu.)

<sup>31</sup> Mirindari qumifa mifa aiqamausa uriqararafa maridanoo. Maa maqanasaa qaraafa maa maqanasaa qaraanara kai qidanoo. Innaarunaidari qumifa mifa aiqamausa uriqararafa maridanoo.

<sup>32</sup> Yisufa innaarunaidari qumifa minni maridanoo mindaraa ainainara nari afu qafainara nari aqoo irinara qimannimariifaqa sia irimariafanoo.

<sup>33</sup> Mi ainainna qimannimina irisee kuqaa anoonee qimasee marainna fasiqa aanaaseesa Anutunara kuqaa fee qimariasa maridaqa.

<sup>34</sup> Anutufa innaarunaidari aqiqamasai fa Anutuna ookinaa ufa kai qimannimidanoo Anutufa nari maraquna muduka amiqai fanoo miqidanoo.

<sup>35</sup> Yisuna akoofa Anutufa nari amaakuara amuqusifanoo minara ridanoo aiqama ainaina mina aramandunnai quqaidanoo.

<sup>36</sup> Anutuna amaaku ufa irisee mara mina saqarikinafa doo mifa Anutuna naaru marirana marasee minaki maridanoo. Anutuna amaaku ufa irisee rukiainafa Anutuna firaqoo aanoqirafa minasaa naaru mariannoo.

## 4

*Yisufa Samaria maqanna anaasee faqa ufaqu ufafa.*

<sup>1</sup> Faiqi anaasee moomoosa Yisufunnai fimariafanoo nammariki keeqamannimaqee marinau.

<sup>2-3</sup> Yisufa sia narifau keeqamannimaqee marinau. Mina faiqi namu mina ufasaa kai keeqamannimaqee mariqau. Yisufunnai moomoosa fimarufanoo Yoohanee funnai moodaa moodaa kai fimariqau. Farisai amaana ufa qimarusa mi ufana iriseega munuqi miniqira ufa uqeeraraqaa ufanoo Yisufa iriseenoo Yudeeaa maqa maaqa mminniseenoo Kariree maqa maaqaki kafaa finau.

<sup>4</sup> Yudeeaa maqa maaqa minnisee Kariree maqa maaqaki fidanoo Samaria maqa maaqa namuqaa maruna qambaanaai oonuranau.

<sup>5</sup> Miqoo fidanoo Yisufa moo maqusa auqu Sikara mi maqusana paqurinau. Ooqai Yakooboofa miqoo maridanoo nammari sia marufanoo madika indufuseenoo minakinaa nammari neeneefanoo nari amaaku Yooseefaana amu nammarifa marinau. Meemai uqanna indufu maree nammari paqurinau. Sikara maqusa mi nammari madikana aqa marinau.

<sup>6</sup> Yisufa kisaaga aatata fifi isoofanoo amudaani rufanoo miqoo Yakooboona nammari madika paqurimaseenoo mina afainni ooqu marinau. Suani qambaanaikufanoo madika afainni ooqu marinau.

<sup>7</sup> Yisufa ooqu marifi marufanoo Samaria anaasee moo fannoo Yakooboona madikaki nammari sakarara ooqu finau. Ooquree nammari madikaki sakeemarufanoo Yisufa innaaruqinoo qinau. Maa anaasee anee nammari qini qimina naa.

<sup>8-9</sup> Yisuna faiqi namu narana feefauriraree qimasee maqusai oorufufanoo Yisufa nariara mi nammari afainni ooqufaaqee marida qafuofanoo mi anaaseefa nammari sakararee qimasee quminau. Qumuroofanoo Yisufa nammariara qufanoo mi samaria maqanna anaaseefa tautinoo qinau.

<sup>10</sup> Akasaa Yuda maqannaafammia. Sia Yuda maqannaasa Samaria maqannaasa kaafa piritaki naidammia. Qinee Samaria maqanna maridaqammu. Anee naqi fee qidnee nammari qiniara qiniara innaaru qidnee. Yisufa minara iriseenoo maaqi qimasee nari qimaminau. Anee Anutuna nimira ainainara faqa qiniara faqa irimarinafa maridanau qiniara irinaqau naaru marira nammari ani amini.

<sup>11</sup> Mi anaaseefa mi ufana iriseenoo kafaa qimaminoo qinau. Oo maa fasiqa ani nammariandaana faqa nammari rarisara sanda faqa sia maridanoo. Maa madikafa meemai kisaagasaa maridanoo. Anee qianandee yaindaraanee naaru marira nammari mareennaree.

<sup>12</sup> Maasa qisaifaqafa Yakooboofa ooqai maa madikana maasa indufu qisoona marifaqa maasa sakaidaqa. Nari faqa nari faiqi namu faqa nari sipsipauqa faqa maa madikanakinaa nammari neeneeusa mariqau. Anee aneennaraa Yakooboona uriqararausee qidnee.

<sup>13</sup> Yisufa mi ufana iriseenoo kafaa qimaminoo qinau. Aiqamausa maa madikanakinaa nammari namasafanoo kaifaa kaifaa sakasaida neemarifanoo. Qinee nimianna nammari naifandinausa sia kaifaa nammariara nidiannoo.

<sup>14</sup> Qinee nimianna nammari namasainafa mina aunduraindari naaru marira nammari maqee maqee uridanoo naaru marirana amianoo.

<sup>15</sup> Mi anaaseefa mi ufana iriseenoo Yisuna qimaminoo qinau. Maa fasiqa maqee kai mi nammari qimina namasaanoo taikafinaqa sia maqee maqee qumu nammari saka, ireeda maria.

<sup>16</sup> Yisufa mi ufana iriseenoo maaqi qimasee mi anaaseena qimaminau. Anee ooru anenna afaaqi afiqee qumua.

<sup>17</sup> Miqi qufanoo mi anaaseefa qinau, qinee faiqi siaisa maridaqa.

<sup>18</sup> Miqi qufanoo Yisufa kafaa qimaminoo qinau. Oo doo anee ooqai moodannai qisauku fasiqa maroonafa mariananoo. Maqee maraqaanna fasiqafa sia ani afaaqifau maridanoo moona afaaqi maridanoo. Anee kuqaa anoona ufa kai qimaqimiananoo.

<sup>19</sup> Mi anaaseefa mi ufana iriseenoo tautumaseenoo qinau Boo anee Anutuna tamummaqara fasiqa mariananoo qinee qafaidaqa.

<sup>20</sup> Maasa Samaria maqannaasa maa aqannasaa Anutunara innaaru qidaqa amooqidaqa. Innee Yuda maqannaasa Yeerusarenniara Anutuna amooqimaria maqusa fee qidaqa.

<sup>21-22</sup> Mi anaaseefa miqi qufanoo Yisufa qimaminoo qinau. Innee Samaria maqannaasa fifau amooqi mariafanoo sia minara irimariafanoo. Maasa Yuda maqannaasa Anutuna amooqimarianara irimarunaua maridaqa. Anutufa Yuda maqannaannaai aiqama aanaamuru Anutuna nariranakinaana uqeereeqeenoo nari aqoondikiranaki quqannisaannoo. Oo maa anaasee amiqimasee qini ufa iria. Qusasaa anira aukuaana faiqi anaasee sia maa

aaqannasaa fee Yeerusareenni fee Anutunara innaaru qifaranoo, fifau aiqamatina'i qini qikoonaa amooqifaranoo.

<sup>23</sup> Qusasaa anira aukuaana doo maqee animaridanoo, faiqi anaasee kuqaa anoona Anutuna amooqimariisa kuqaa nári maraquna namufaqa kuqaa anoona ufa namufaqa amooqifaranoo. Anutufa miqiasara kai nariara qimooqidammiafoo qimaseenoo aidi-danoo.

<sup>24</sup> Anutufa maraquna oosana faqaafa maridanoo. Minara Anutuna amooqimariisa nári maraqunannai faqa nári nimuqusa ookiqari faqa Anutuna amooqifaranoo.

<sup>25</sup> Yisufa mi ufana mi anaaseena qimamufanoo mi anaaseefa quandafinoo Yisuna maaqi qimasee qimaminau. Anutuna asaku mundirafa mifa qumureenoo aiqama ainainara maasa qimaqiminaqa irianaara, qinee iridaqa.

<sup>26</sup> Miqi qufanoo Yisufa qinau. Qinee misa maridaqa. Qinee ani faqa ufa qimarunausa misa maridaqa.

<sup>27</sup> Yisufa miqi qimarufanoo doo mina faiqi namu Sikara maqusaindari qumuraqau. Qumuree qafoofanoo Yisufa Samaria anaasee faqa ufa qimarufaqa tautumaseeqa qumeekei qafee mariqau. Misa Yisunara nanaree randaidanee mina faqa ufa qidanee qianeerusia minnisaqau.

<sup>28</sup> Yisuna faiqi namu maqusaindari qumufanoo mi anaaseefa nári nammariana miqoo quqaseenoo kaqisamu maqusai ooruree nári maqannaa akaqausa qimanniminoo qinau.

<sup>29</sup> Innee qumuraifaqa muqusaanaqa qafaafa. Ooqai aiqama ainaina qinee maree mariafanna ainainara kooroo ifaqa irunna fasiqafa Anutuna asaku mundira fee maridanoo fee. Doo mai qumuree qafaafa.

<sup>30</sup> Misa mina irisee doo nári maqusaindari ooqu Yisuna qafararee qimasee ooqu fiqau.

<sup>31-32</sup> Mi anaaseefa maqusai oorufufaqa Yisuna faiqi namu Yisuna qimamiqau ufasaa rakisira doo narana naa qufanoo mifa nariqa qimanniminoo. Qini narana moo maridanoo innee minara sia irimariafanoo.

<sup>33-34</sup> Miqi qufaqa misa nári qimami nári qimami qiqau. Moo fannoo narana mina aminoo fee qufanoo Yisufa qinau. Qini narana narafa qini diqiqoonna Anutuna ufamau firafa maridanoo. Mina saika taikarafa qini narana maridanoo.

<sup>35</sup> Innee maaqi qimariafanoo. Quqoonna qaara faqa qaara faqa aiqarainaqa suana aiqunaaree qidaqa. Qinee minara maaqi qidaqa. Innee oonu afuqaki qafaafa doo maqee narana anaa maridanoo. Aiqira aukuaana doo ani maridanoo.

(Yisufa miqooqarara fasiqa anaasee Anutuna ufa qimannimifaqa irifandinanara aiqirana kikiqusinoo maridanoo.)

<sup>36</sup> Yisufa minara kaifaa nári faiqinamu qimanniminoo qinau. Faiqi moo fannoo narana aiqimarifa mifa mina akiqara maraidanoo. Naranara foora faiqi anaasee suqeeqeenoo innaarunai quqasainqa naaruara marirana maraaqera. Misa naaruara marirana marasaifanoo ummaqimarifa faqa aiqimarifa faqa moodaanaki asasifaranoo.

<sup>37</sup> Maasa ufakiqari maaqi qidaqa. Moo fannoo ummaqidanoo moo fannoo aiqidanoo.

<sup>38</sup> Qinee Yisusa inniara faiqi anaasee aiqaaqera foora innaarunaanai ubeekaaqera niqiqeeqa. Mi afuqanaki innee sia mina ummaqimariafanoo. Akaqa fasiqa anaasee Anutuna naaru marira asumu mi afuqanaki ummaquqoofaqa innee kaqi unakusee misa kadaapisaa innee fifau faiqi anaasee mareeqee naaru mariranaki quqannisaafaqa fifau feefauru mareefaranoo.

<sup>39</sup> Yisufa nári faiqi namu faqa ufa qimarufanoo mi Samaria anaaseefa nári maqusai oorureenoo aqoonausa maaqi qimasee Yisunara qimanniminoo. Mifa qinee ooqai maraafanna ainainara qimaqimifaqa iriqa. Miqi qufaqa mi maqannaasa moomoosa Yisunara kuqaa Anutuna asaku mundira fee qiqau.

<sup>40</sup> Miqi qimasee ooqureeqa Yisunara maasa faqa ani marianneera afeekaika mandee fuki faaki qimasoofofanoo Yisufa misa faqa qaara faasaana marinau.

<sup>41-42</sup> Miqoo moomoosa Yisuna ookinaa ufa iriseeqa kuqaa anoonee qimasee quandaf-ufaqa mi anaaseena qimamiqa qiqau. Doo maqee maasa sia ani ufara kaifau anoonee qifarau. Nári ookinaa ufa iriseeqa minara kuqaa aiqama maa mafa maaqanakiinaasa mandainainakinaana mareeqee asumu mariranaki quqannisaanina fee qidaqa.

*Yisufa uriqarara fasiqa faiqi andeeqaisoo ufafa.*

<sup>43</sup> Yisufa Sikaa maqannaa faqa qaara faasaana marinoo quqaseenoo Kariree maqa maaqai nári maqa maaqai finau.

<sup>44</sup> Yisufa nári maqa maaqara maaqi qinau. Tamummaqara fasiqa maqusa maqusa fidanoo faiqi anaasee minara aaquqai fanoo mina ufa iriaqaaifaranoo. Nári mina maqusanaasa nikoo nikaa masee sia minufa irifaranoo.

<sup>45</sup> Yisufa Kariree maqa maaqai oonuroofaqa miqooqaraasa qafamaseeqa asasi-daqamma minufa iriqa. Kariree maqannaasa akaqausa faqa Yeerusaree maqusai oorureeqa ainaaqarara qoomaqaki miqoo Yisuna qafamaqoosa faiqi sia auqaaqaa ira ainaina auqusoofaqa qafamaseeqa oorurandee qumu marufanoo Yisufa Kariree maqa maaqai qumuroofaqa asasamasee uru afigee muquseeqa faiqi anaasee amiqimaseeqa minufa iriqa.

<sup>46</sup> Yisufa Kariree maqa maaqakinaa kaqikaa maqusa auqu Kannaana maqusai oqai nari uainna nammari taikafufanoo nammarinnai auqu maqusanaki oonuranau. Mi maqusanaki faiqi firaafa uriqararafa moo marinau. Mina amaaku kuqira aurira auridanoo Kapeeranaumma maqusai maridanoo kuqirari marinau.

<sup>47</sup> Mi fasiqafa Yisunara Yudeeaa maqa maaqaindari Kariree maqa maaqaki animarunara iriseenoo miqoo oonureenoo Yisuna irammirinoo qinai. Oo ufasa rakisirafa amanee anee qini faqa Kapeeranaumma maqusai oonuree qini qimaaku kuqira aurira aurimarina andeeqaisaa.

<sup>48</sup> Yisufa mina iriseenoo maaqi qimaseenoo nari qimaminai. Inniki sia moo fannoo qiniara kaqi kuqaa fee qimasee qinikina irifaranoo. Innee fira ainaina faiqi sia amana auqaaqaa ira ainaina auqamasaanaqa qafeeqa kai qinikina irifaranoo.

<sup>49</sup> Mi uriqarara fasiqafa minara iriseenoo qinai. Oo qini karaambaiqa qini faiqi kuqirarammidanoo doo qini faqa ania.

<sup>50-51</sup> Yisufa iriseenoo maaqi qimasee qimaminoo qinai. Doo findifi fua ani maqusai doo ani amaaku findifuannoo. Mi fasiqafa mi ufana iriseenoo doo kuqaa fee qimasee doo quqaseenoo quandakufanoo aatata fidanoo qafoofaqa mi uriqarara fasiqana saika faiqiuga aanaani paqurimandee qimamiqa qiqa. Doo ani amaaku findifinoo, sia kuquannoo.

<sup>52</sup> Mina akoofa mina iriseenoo findifuna oosana irammirufaqa misa qiqa. Eenda suani qambaana mariifanoo miqinni qumifanoo doo ani faiqi afaaq doo asoeeenoo.

<sup>53</sup> Mina akoofa Yisunara onumafi iriseenoo qinai. Oo mi kamu qoo kai ani faiqi findifuannoo fee qifaqa irunna qoo kai doo findifinoo. Doo mi uriqarara fasiqafa nari faiqi anaasee faqa nari aiku asauku faqa Yisunara kuqaa Anutuna amaaku fee qimasee kuqaa mina saqarikiqa.

<sup>54</sup> Doo Yisufa qaara kari Yudeeaa maqa maaqaindari anireenoo Kariree maqasaa qaara ainaina fira ainaina kooroomasoofaqa qafaqa.

## 5

*Yisufa farumma afainni faiqi moo andeeqaisoo ufaa.*

<sup>1</sup> Yisufa Kariree maqamaaqai kaqikaqoo marinoo doo miqooqari findimaqeenoo Yuda maqannaasa amaana qoomaqirafa firaafa kambiqaaninnanara qufanoo Yisufa irisee minni ooru finau.

<sup>2</sup> Yeerusaree maqusa faandaamura kooqi sipsipa kooqi fee qimarufa marinai. Mi kooqina aqa nammari farumma firaafa marinai. Mi farummana afainni aana fiqumarunnai qaindairi moodaanai qisauku qaindaira marinai. Mi farummana auqu Beetasata farummee qimariqa.

<sup>3</sup> Mi qaindairana ameemaana auqaana aurirana oosana oosana maree marusa misa mina ameemaana oqumari maree mi farummana afaiqara figummambi mariqa. [ <sup>4</sup> Karaambaiqa qangiroo moo fannoo inaaronaindari nari kai iriseenoo moodaa kari moodaa kari aqufufanoo mi nammarina auqeesoofanoo indaaru mi nammarinaki keeqoofa mifa keeqafufanoo nari aurirana taikasee fimarinau. Miqi marunara misa aurimarusa moomoosa Beetasata nammari afainni rakisida mariqa.]

<sup>5</sup> Faiqi moo kisaagasaa aurimarufa misaki marinai. Moo fasiqa aiku asauku taikasee moo fasiqa asaukuqara taikasee dinni aiku taikasee dinni oonu qaaramoo marasee (38) aukuana dinee uqee marufa marinai.

<sup>6</sup> Yisufa mi fasiqana qafoofanoo maqasaa faiqaeqe ufanoo Oo kisaagasaa aurimari fee qimaseenoo mi fasiqana maaqi qimasee irammirinau. Anee findifirara aididanoo fee.

<sup>7</sup> Mi dinee fasiqafa mina iriseenoo maaqi qimasee qimaminai. Oo rakisirafa, Anutuna qangiroo maa nammarina auqamasaifaqa yafee qini mareeqee minaki quqaannoo fee qinee anuqi marunaqa moo fannoo kai kaqi kaqi aqufida taikasaida fidaqa.

<sup>8</sup> Yisufa mina iriseenoo quandaki qimaminoo qinai. Doo findi finana aneenna qaari raqandaamamareena doo fua.

<sup>9</sup> Doo mi fasiqafa aqee uqanna doo mikari kai doo findi finoo nari qaari maramaree finau. Mi faasaana Yisufa andeeqasoo faasaana Yuda maqannaasa Saririqa misa amaana faasaana marinai.

<sup>10</sup> Yuda maqannaasa uriqararusa mi fasiqana aurimaruna qafamasee aqíqá qíqau. Maana amaana faasaana maridanoo maasa sandufa rukieenana aneenna qaari aakai maqeenana nanaree sandufa rukiaidanee.

<sup>11</sup> Mi fasiqafa qínau, qini andeeqáqisaifa aneenna qaari raqandaamamaree fuannee qífaqa qeeqa qaari daakai maqa maree fidaqa.

<sup>12-13</sup> Misa mina iriseeqa irammiríqau. Yafee aniara aneenna qaari raqandaainana fuannee qifanee mi fasiqafa sia Yisuna auqu irináu. Faiqí anaasee moomoo marufanoo misaki kukeeqafufanoo mi fasiqafa sia amiqímasee qafanáu.

<sup>14</sup> Kasooqáqee marikinoo amaana maqaki mi fasiqana paqurimandee Yisufa maaqi qímaseenoo qímamináu. Doo fee maqee qafeenee Doo findifuananoo doo maqee aneenna mandainaina minnimasaa. Sia miqinanoo kafaa mandainaina firaafa uqanna anisaa aqufuannoo.

<sup>15</sup> Mi fasiqafa mina iriseenoo oonuree Yuda maqanna rakisirausa paqurimaseenoo qimannimino qínau. Yisufa kai qini amiqi mandaífaqa findi fiqa.

<sup>16</sup> Rakisirausa mina iriseeqa doo miqooqari Yisuna arira ufa qimariqau. Yuda maqanna amaana faasaana andeeqaisoonara arirariqau.

<sup>17</sup> Yisufa mina iriseenoo rakisirausa maaqi qímasee qimannimínau. Qini qíkoofa sia moo faasaana minnisaidanoo aiqama faasaana ainainidanoo. Qínee faqa miqíkaimmi-auranoo.

<sup>18</sup> Yuda maqannaasa mi ufana iriseeqa doo kuqa ariraree qíqau. Misa Yisunara amaana faasaana sandufa rukiasaífaqee qimariqau. Sia minara kai mifa Anutunara narí akoo fee qunara minara faqa arirari mariqau. Mifa Anutunara qini qíkoo fee qunara misa nanaree maqasaa fasiqa fannoo unna qídana Anutuna amanakai maridee qídanee qímasee arirariqau.

*Anutufa narí amaaku Yisuna aiqama ainaina afeeka amu ufafa.*

<sup>19</sup> Yisufa kafaa qimannimínau. Qínee kuqaa anoona ufa inni qimannimídaqa. Qínee sia moo ainaina qeeqaraa auqáidaqa qeeqa qíkoona qafamasee mifa indeekai idaqa. Akoofa moo ainaina auqaifanoo amaaku miqíkaimmidanoo.

<sup>20</sup> Qini qíkoofa narí amaaku qiniara kaaqa amuqúsisanoo minara qiniara ridanoo narí aiqama ainaina auqaina qini faqa kai uqaqífiqaidanoo. Maqee maa fasiqafa fíraa teeroo maraidanoo aukuaana aukuaana apatara aupuree marifanoo qini qíkoofa dadaaqífaqa andeeqasauana innee mina qafee fee. Kasooqáqee qini qíkoofa fíraa ainaina dadaaqínaqa auqaanaqa qafee tautifanoo naaquqeenoo nimudaani faqa kai qumooqúkamasannoo.

<sup>21</sup> Qini qíkoofa kuqíra fasiqauqa findifumannisaidanoo. Qínee faqa miqíkai iqa qeeqa didiranannoo kai kaqi marirana akaqausa nimianaúra.

<sup>22</sup> Qini qíkoofa sia maa maqanasaaqaraasa mandufa irisee andeeqannisaannoo. Narí amaaku qini qimíqaiqafa qeeqa qíkoona Anutuna iriramau misa manda ufa andeeqannisaanúra.

<sup>23</sup> Aiqamausa qini qíkoona Anutunara naaquqaanifeera miqínau. Qiniara naaquqaíndee kai iqa qini qíkoonara naaquqaanifeera miqínau. Faiqí moo fannoo moona amaaku sia mina aqoondikinafa mina akoona faqa miqíkai inana miqanda qisakoosa sia nigoondikinnaranoo.

<sup>24</sup> Yisufa Yuda maqanna rakisirausa kaqi qimannimidanoo qínau. Qínee kuqaa anoona ufa inni qimannimídaqa faiqí moo fannoo qini ufa irisee qini diqíqamaqoona saqaríkinafa mifa doo naaru mariranaki maridanoo. Miqinna fasiqafa sia Anutuna arirufaki mariannoo. Anutuna narirana doo maa maqee aiqaqareenoo kaqi mariranaki doo keeqanoo maridanoo.

<sup>25</sup> Qínee anoona ufa inni qimannimídaqa. Moo aukuaana doo adeedi ranoo marida doo animaridanoo maa maqanasaa kaqi marídaqa Anutuna nariranaki mariusa kuqufusa Anutuna amaaku qinaqa iriseeqa doo narirafa ainaaqarainaqá kaqi mariranaki keeqefaranoo.

<sup>26</sup> Kaqi marira oosana qini qíkoonaki kai marifanoo faiqí anaasee nimidanoo. Miqíkai inoo naramaaku qini faqa kai kaqi marira nimira oosana doo qini qimíqaisa marídaqa.

<sup>27</sup> Mifa Anutufa narí amaakuara faiqí nimaaku fee qímasee faiqí anaasee mandainaina andeeqannisarana narí amaaku qinisaa quqaqaisa marídaqa.

<sup>28</sup> Innee qini mi ufana irisee sia tautiaqa. Kasooqáqee moo aukuaana anirainaqá aiqama madíkaki kuqírausa mariasa misa faqa Anutuna amaaku qini ufa iriseeqa madíkakiqari findi fifaranoo.

<sup>29</sup> Akaqausa andeeqara oosana maree marusa findifi kaqi mariranaki fifaranoo. Akaqausa manda oosana maree mariusa misa findi fiqa Anutuna ufa firaanaki aqufifaranoo.

*Yisuna oosana akooroou ufafa.*

<sup>30</sup> Yisufa kaqi qimannimidanoo qinau. Sia qeeqaraa moo ainainiana. Anutufa dadaaqinaqa faiqi anaasee ufa irisee andeeqannisaana. Sia qeeqa iriranamau afeekaikamandee fidaqa. Qini qikoofa qini diqiqamaqaimau kai fidaqa.

<sup>31</sup> Qinee qeeqaraa ufa qimannimianaqa siamma irifaranoo narikai qidaqinoo unna qidaqiifoo qifaranoo.

<sup>32-33</sup> Anutufa qini dadaaqimarifa maridanoo mifa anoona ufa kai qiniara qimarifa maridanoo, sia qeeqa kai qiana ufa mifa dadaaqianoo. Innee Yuda maqanna rakisir- ausa ufa anoona iriannee qimasee faiqi niqiqaiifaqa Yoohaneefa nammari nimimarifun- nai oquree iriqau.

<sup>34</sup> Qinee sia maqasaa fasiqa moo qini dadaaqiranara randaifaqa Yoohaneenara qidaqa. Innee naaru mariranaki fuaqee qimasee maa ufana qimannimidaqa.

<sup>35</sup> Yoohaneefa nammari nimimarifa qoomara fooqaana marinoo kaaqa qaidanoo rupannoo inau. Innee mina kaaqa qaranaki qusasaa kai keeqaifiqa asasiida mariqau.

<sup>36</sup> Yoohaneefa nammari nimimaruna ufa anoona maru fanoo qinindi minaindi arusee uriqaranoo maridanoo. Qinee aniree faiqi sia amana auquaqaa ira ainaina qini qikoofa qimuna auqaqa fimarunna ainainna fannoo qini duqu firaqoo uqeeraannoo. Uqeerainaqa qafamasee qiniara Anutufinaidari qumu fee qifaranoo.

<sup>37</sup> Sia qinee auqee marunafa kai qini duqu uqeeraidanoo. Qini qikoofa qini diqiqa- maqaiifa mifa faqa qiniara ufa qidanoo dadaaqidanoo. Innee Yuda maqanna uriqara- rausa oqaindari sia mina ufa irimariafanoo. Innee sia mina afiri qafaanara sia uqanna mina iriranamau firanara irimariafanoo.

<sup>38</sup> Innee qini qikoofa diqiqoonara sia mina irimariafanoo minara inniki sia mina ufa maridanoo.

<sup>39</sup> Innee Mooseena sandufa faqa Anutuna tamummaqara fasiqauqa akarakinaa ufa asaana ridaqa naaru marira aanara randaifaqa mi sandufafa kai qiniara qimannimi- marifaqa sia irimariafanoo.

<sup>40</sup> Innee minara iridaqa sia qinee unnannai aniree naaru marirana maree mariafanoo.

<sup>41</sup> Yisufa Yuda maqanna rakisirausa kaqi qimannimidanoo qinau. Qinee sia inni naanna raida faiqi qimooqiaqee qirainainara randaifaqa.

<sup>42</sup> Qinee inni irirana amiqimasee iridaqa niqafauna inni naundura nimuqusaki Anutu- nara rirafa sia maridanoo

<sup>43</sup> Qini qikoofa Anutufa qini diqiqoofaqa qumu marunaqa sia innee qiniara irisee asasamasee qifiqee animariafanoo. Moo fannoo kasoqaaqee nari manda aidiranafaqaafa anirainafaqa innee mina asasamasee oonu afiqee anifaranoo.

<sup>44</sup> Innee kaaqa naramooqirana naramooqiranara ridaqa Anutuna amooqiranara sia rimariafanoo.

<sup>45</sup> Innee qiniaree quandafinoo Anutufinnai maasa darira ufa qiannoofee fee qidee sia qiana. Mooseefa mifa kai inniara nimaarusirufa qianno. Innee maasa minasaa kai mundimariasee qimariafanoo.

<sup>46</sup> Innee Mooseena sandufa fifau asaana rimariafanoo mina ufa iridaqau qiniara irini, qiniara akara rumaqoofa maridanoo.

<sup>47</sup> Innee mina ufa ririmma sia irimariafanoo naqimasee qini ufa irifaree. Sia amana irifaranoo.

## 6

*Yisufa faifa tauseenna fasiqa narana nimu ufafa.*

*(Mat 14:13-21; Mak 6:30-44; Ruk 9:10-17)*

<sup>1</sup> Yisufa Yuda maqanna rakisirausa mi ufana qimannimiseenoo miqooqari Kariree firaa farumma dinni afainni finau. Mi farummana auqu moo marinau, Tibeeriasa farummee qiqau.

<sup>2</sup> Faiqi anaasee Yisufa amiqi amiqiunara aurimarusa findifunara iriseeqa moomoosa uqanna afaqee fiqau.

<sup>3</sup> Yisufa nammari afainni kaqikaa amuaqunamusaa nari faiqi namu faqa ooruree ooqumarinau.

(Ooqai Isaraee maqanna nikaaku Isipa maqanna karafusaki marufanoo Mooseefa qufaqa sipsipa aanaaqiuqa arusee mina fidikauqa tatiiseeqa nari kooqimau raaraamasoofanoo Anutuna qangiroo fannoo narirara anireenoo fidika qafamasee ainaaqareenno Isipa maqannaasa kai ooqa faiqiuqa narinau. Miqooqari Isaraee maqan- naasa oosana arasee Anutuna qangiroo ainaaqaroo qoomaqana sakasaida neemariqau.)

<sup>4</sup> Mi ainaaqarara qoomaqana Yeerusaree maqusai qusasaa kambiqararee qimarufanoo mi fasannai Yisufa Kariree nammari afainni marinau.



<sup>5-6</sup> Yisufa nindafoofaqa faiqi anaasee moomoo nari marunnai amuaqunamusaa urimarufanoo nindafeenoo Firipina irammirinoo qinau. Yisufa faasai Firipifa ianinnanara iriseenoo Firipina kaqi amanamasee qafarara maaqi qimasee iranau. Firipi faiqi anaasee moomoo nianaindari uri mariafaqa yai fee misa narana feefauru mandee nimianauree.

<sup>7</sup> Firipifa mi ufana iriseenoo maaqi qimasee qimaminoo qinau. Faiqi anaasee muduka moomoo mariafaqa moomoo ooni maramaree oonu feemu moomoo feefauru mamaree minisaifanoo sia misa nimana mariannoo. Moodaa moodaakai namasee naarara fifaranoo.

<sup>8</sup> Yisuna faiqi namukiqari moo mina auqu Andurufa, Simoona moo auqu Peetooroona akaqa marufa mifa mina iriseenoo qinau.

<sup>9</sup> Kumaaraa moo kaqikaafa mai maridanoo nari sakuma feemu moodaanai qisauku faqa noodaanna qaraqanda faqa uaqee idanoo. Amanee mina mareennaree. Oodaa sia amanaikiannoo.

<sup>10</sup> Yisufa mina iriseenoo qinau. Innee faiqi anaasee qimannimifaqa qusau ra-sooqnookamasee ooqumariafaqa. Qusau moomoo misaqa marinau. Faiqi anaasee mina iriseeqa aiqama ooqumariqau. Faifa tauseenna fasiqa mariqau. Ooni saqarimma auqiqa mariqau.

<sup>11</sup> Ooqu marifufanoo Yisufa mi kumaaraana sakuma feemu qumareenoo Anutunara dufi dufi qimaseenoo doo ruqi ruqimmeeqeenoo faiqi anaasee niminau. Noodaanna qaara faqa miqikaimasee niminau. Nimisoofaqa namasoofanoo aiqama nimuaqu inau.

<sup>12</sup> Aiqama nimuaqumasooofanoo Yisufa nari faiqi namu qimanniminoo qinau. Ataraasa mareeqee uqa ruaqa sia kaqikaana rairaaiani.

<sup>13</sup> Misa irisee eedoo qimasee ataraasa rumasee asaana rumasee qisaukuqara taikasee qikunni ooqu qaraqanda marasee uqa qumbiqanoo marinau. Mi ataraasana moodaanai qisauku sakuma feemusaqaraana uqariqau.

<sup>14</sup> Mi fasiqa anaasee mina qafoofanoo sia faiqi undeeufanoo naaquqanau. Naaquqamasoofaqa qiqaqau ooqai tamummaqara fasiqaqau moo tamummaqara fasiqa kambigaaninnanara akara rumaqoofa doo maana narimma animaridanoo.

<sup>15</sup> Yisufa misa irirana iriseenoo misa afeekaikamasee qini qumareeqee maa maqana saaqaraa karaambaiqaika maqimaqee foora qimasee quqaseenoo doo nariara quqasee aaqanai ooruree miqoo marinau.

*Yisufa nammari amuaqumau fu ufafa.  
(Mat 14:22-23; Mak 6:45-52)*

<sup>16-17</sup> Yisufa aaqanai fufaqa mi eendanaki sia kafia qumunara mina faiqi namu Kariree nammari afainni ooqureeqa sipaki akarama fiqa nammari dinni afainai Kapeeranaumma maqusai nammari amuaqumau fitaqararee qiqaqau.

<sup>18-19</sup> Misa kanuqaki fidaqa aikannai nammari ruakairisaidaqa fimarufaqa qaara maqusa fiaaqarana amanasaa kaiqaqoo kisaagasaa oonuroofanoo ufai firaafa uqinoo nammari faqa misa kanuqa faqa amakaurinau. Amakaurufaqa qafoofanoo Yisufa nariara misunnai kanuqaqa animarinau nammari amuaqumau aiku ramasaida aninuu. Misa mina qafamasee tautumasee kaaqa naaquqoo faqa rufiaqau.

<sup>20</sup> Rufioofanoo Yisufa nindafeenoo qinau. Sia rufiaqa, qinee maridaqa.

<sup>21</sup> Misa Yisuna mareeqee sipaki quqasee firaree qu maqusanai aaqee kai dauni oonuraqau.

*Faiqi anaasee Yisunara randoo ufafa.*

<sup>22</sup> Yisufa nimu feemuna noosa nimuqoo kai faiqaqau. Kananaana iqaqoo faqa findifi sipara randoosia moodaakai miqoo maruna.

<sup>23-24</sup> Yisuna faiqinamu moo kanuqaki fufaqa Yisunara sia misa faqa fiifoo qimasee Tibeeriasa maqusai maqee maqee namaru kanuqausa aniroofaqa doo minauqaki akaramafufaqa Kapeeranaumma maqusai Yisunara randarara minauqaki fiqau.

*Yisufa nariara naaru naaru naranara maqi mariranara qimaqoo ufafa.*

<sup>25</sup> Misa Kariree nammari fitagee muqu afainai oonureeqa Yisuna paqurimasee maaqi qiqaqau. Oo ufasaa rakisirafa anee yairee fee mai anireenee.

<sup>26</sup> Yisufa iriseenoo quandaki qimanniminoo qinau. Qinee kuqaa anoona ufa inni qimannimidaqa. Qinee qeeqa afeeka uqannifiqaunannara innee sia minara kai irisee qiniara randaidaqa. Innee feemu namasaafanoo nimuaqinoo maqee qumiqaraaninna ainainara innee minara kai qiniara randee mariafanoo. Yisufa kaifaa quandafufanoo qimanniminoo qinau.

<sup>27</sup> Innee sia dauni putaa ira naranara ainainiaqa. Naaru marirana nimira naranara minara ainainiaqa. Qinee maa naranna qinee faiqi nimaaku inni nimianauree. Qini

qikoofa Anutufa qiniara aidimarifanoo nari aiqama ainaina qini daaku qimaqasaina inni amana mi naaru marira naranna nimianauro.

<sup>28</sup> Misa minara iriseeqa Yisuna irammiriqa qiqau. Nanee qimasee Anutuna ainaini-nauree.

<sup>29</sup> Yisufa iriseenoo maaqi qimasee qimanniminau. Innee maaqimasee Anutuna ainainamaisaaga. Nari aqiqainna fasiqana mina saqarikiqa minasaa naundura rusiaqa. Anutuna ainainirafa miqimminoo maridanoo.

<sup>30</sup> Misa mi ufana iriseeqa kaifaa irammiriqa qiqau. Anee nana moo ainaina firaa ainaina auqainaga maasa qafamasee aniara kuqaa Anutuna asauku mundira fee qianau-ree anee nana ainainee auqinnaree.

<sup>31</sup> Maasa qisaifaqausa aadana maqa maaqaki pupusamuara foora aqufuna narana neemariqau. Mooseena akara minara maaqi qinau. Innaarunaidaraa feemu narana mifa minau maqi qinau.

<sup>32</sup> Miqi qimasoofoano Yisufa kafaa qimanniminoo qinau. Mooseefa maru aukuanua pupusamuara maqi ira narana sia mifau nimimarinau. Anutufa innaarunaidari nimimarinau. Sia anoona narana nimimarinau. Doo maa aukuanua qinee qumu marunnaqoo qinisaaqari anoona naranara foora inni nimidanoo.

<sup>33</sup> Anutufa nimunnaranna innaarunaidari qumu maridanoo maa maqanasaa mariasa naarura marirana nimidanoo.

<sup>34</sup> Mi fasiqa anaaseesa iriseeqa qiqau mi feemuna naaru naaru maasa qiminaqa naa.

<sup>35</sup> Yisufa kaifaa qimanniminau. Qinee kaqi marira nimira narana marunaua mari-daqa. Faiqi moo fannoo qinee marunannai anireenoo qini saqarikinafa mifa sia kafaa naranara foora aararaanoo sia kafaa nammariara foora aidianoo.

<sup>36</sup> Faasai inni qimannimundee kai innee imariafanoo innee qini qiqafaidaqa sia anoonee qimasee qinisaa naundura rusimariafanoo.

<sup>37</sup> Qini qikoofa eedoo qira irirana niminausa misa qinee unnannai nari naundura ubeekama qimaqefaranoo. Miqi mariasa qinee ianannai animariasa sia niqiqanaqa fifaranoo.

<sup>38</sup> Qinee qeeqa qikoona iriranamau innaarunaidari sia qinee qeeqa qumiqa, qi-paqeena ufara mina ainainirara qumiqa minara qinee sia moona aqiqaanano fuannoo.

<sup>39</sup> Mina ainaina auqarafa maaqinoo marina qini qiminau. Aiqama qini qikoofa qini qutaqama qimaqaqaisa kai sia moo fannoo kaqinni fuannoo. Aiqama uqanna taikara faasaana qinee misa uqereeqee qeeqa naaru mariranaki quqaanaura.

<sup>40</sup> Qini qikoofa maanara ridanoo. Mina amaaku qiqafee mariasa minasaa irirana rusimariasa mi kamuqoo kai naaru marirana mareefaranoo. Taikara faasaana qinee misa uqereeqee naaru mariranaki quqannisaanaua.

<sup>41</sup> Yuda maqannaasa uriqararaua mi fasiqa anaaseesaki mariasa misa Yisuna ufa irisee mifa nariara innaarunaidari qumuafanausa maridee qidanoo. Miqi qimasee dapi dapi ufa qimariqau.

<sup>42</sup> Misa maaqi qiqau maafa Yisufa Yooseefaana amaaku maridanoo. Mina anaua akausara maasa iridaqa. Naqi fee qidanoo fee nariara innaarunaidaraasee qidanoo fee. Akoqooqaraafa maridanoo.

<sup>43</sup> Yisufa iriseenoo qinau sia innee narinni narinni qiniara manda ufa qiaqa.

<sup>44</sup> Sia faiqi moo fannoo kaqi qinee ianannai anifaranoo. Qini qikoofa rarisameeqee quqainna fasiqa anaaseesa misa kai qini naundura ubeekama qimaqefaranoo. Misa miqifaqa taikara faasaana misa uqereeqee naaru mariranaki quqannisaanaua.

<sup>45</sup> Ooqai tamummaqara fasiqa maaqi qimasee akara riqau. Anutufa aiqamausa naumuqira ufa qimannimiannoo. Qinee mi ufana iridaqa maaqi qimasee inni qimannimidaqa. Aiqamausa qini qikoona ufa iriseeqa mina aamua qira ufa irimariasa qinee ianannai anidaqa.

<sup>46</sup> Sia moo fannoo qini qikoona qafeenoo. Anutufinaidari qumufa kai mifa kai qini qikoona qafeenoo.

<sup>47</sup> Qinee anoona ufa uqanna qimannimidaqa faiqi moo fannoo irirana qinisaa rusi-marinafa naaru marirana doo mareenoo.

<sup>48</sup> Qinee kaqi marira feemuara foora marunaua maridaqa.

<sup>49</sup> Ooqai inni nikeeku nikaaku Mooseena faqa kaasau maqa maaqakina namaru aukuanua innaarunaidaraa feemu minauqa manna fee qimariqau. Mi feemufa ufaasu marifandinna feemuna namasaida kisaqaqasaa moomoo aukuanua mariufaqa kaqi kuqimariqau.

<sup>50</sup> Maa qinee kaqi marira feemuara foora maridee qimarunaua faiqi namasee sia kuqifandinna feemusa maridaqa.

<sup>51</sup> Qinee kaqi marira feemu innaarunaindari qumu marunausa maridaqa. Faiqi anaasee moo fannoo qinee amianna feemuna namasainafa naaru naaru mariannoo. Qinee nimianna feemufa qini qimaqi maridanoo. Maa maqa maaqana afaaqasasa mariasa kaqi mariaqeera nimidaqa.

<sup>52</sup> Yisufa miqi qimasoofaqa Yuda maqannaasa nari afumau nari afumau aanoo qidaqa qiqau. Naqimasee maa fasiqafa nari amaqi maasa qiminaqa naanauree qidaqinoo fee.

<sup>53</sup> Yisufa iriseenoo qimanniminoo qinau. Qinee kuqaa anoona ufa qimannimidaqa. Innee qini faiqi nimaaku qimaqi fidika sia naifanoo sia kaqi marirafa inniki mariannoo.

<sup>54</sup> Moo fasiqa anaasee fannoo qini qimaqi faqa qini fidika faqa namasainafa naaru marirana doo mareenoo, marinara taikara faasaana mina uqeeraanura.

<sup>55</sup> Qini qimaqi narana uqanna maridanoo qini fidika nammari uqanna maridanoo.

<sup>56</sup> Faiqi anaasee moo fannoo qini qimaqi fidika neemarifa qiniki maridanoo qinee minaki faqa maridaqa.

<sup>57</sup> Qini qikoofa Anutufa kaqi marira oosana faqaafa qini diqiqoofaqa maaqoo maridaqa minasaaqaraa marirana maridaqa. Miqi kai inoo qini namasainafa qinisaaqaraa marirana maraannoo.

<sup>58</sup> Doo qinee innaarunaindaraa naranara foora maridaqa. Sia inni nisaifaqausa neemaru naranasara foora maridaqa. Misa mina namasee mariiqa aiqama faiqi faiqi oosanamau fiqa kuqimariqau. Maa naranna namaseeqa naaru naaru kaqi marifarannoo.

<sup>59</sup> Yisufa mi ufana Kapeeranaumma maqusai ufa suqira maqaki qimanniminu.

*Naaru naaru mariranaki fifandinna ufausa akiaqa.*

<sup>60</sup> Yisuna faiqi namu akaqausa mi ufana iriseeqa qiqau. Oo yafee maa ufana amana iriannoo fee. Irisee sia auqaaqaa ira ufa maridanoo.

<sup>61</sup> Misa miqi qimasee noori runusee randoofanoo Yisufa nari kai iriseenoo qimanniminoo qinau. Innee qini amiqira afeeka ufara rufiasee qini minnisararee qidee.

<sup>62</sup> Qinee kafaqa uqeeree qumuafannannai ooru fuanaqa innee mina qafamasee naqi fee ifaree. Mikari qini ufara kuqaa anoonee qimasee firaqqoo rufieefaranoo.

<sup>63</sup> Amaqira qunnana amaqi fifau ainaina maridanoo sia mina naaqee qiqa maraquna fannoo kai anoona maridanoo mifa kaqi marirana nimidanoo. Qinee qeeqa dookinaa ufa qimannimimarunafa mifa maraquna maridanoo kaqi marirana anoona maridanoo.

<sup>64</sup> Doo qinee akooqqoo kooroomasee qimannimunaqa innee akaqausa siamma irimari-afanoo. Yisufa nari faiqi namu oosana faasai irinau. Misaki akaqausa mina ufa sia irusa faasai Yisufa nindafanau. Misaki moodaa fannoo ueeqaninnana faasai qafanau.

<sup>65</sup> Yisufa minara maa ufana atiki kafaqa qimanniminu. Qinee minara faasai qunnana sia amana moo fannoo nari kai qinee ianannai aniannoo. Qini qikoofa dadaaqinanoo kai qinee ianannai aniannoo.

<sup>66</sup> Miqi qimasoofaqa Yisuna faiqi namu moomoo Yisuna minnisee sia kafaqa mina faqa firara qiqau.

<sup>67</sup> Yisufa miquna nindafamasee quandafi nari faiqi namu (12) qisaukuqara taikasee qikunnoo ooqu qaara marasee faiqi namu maaqi qimasee qimanniminoo qinau. Innee faqa misa naanna reefaree qini minniqiseeqa fifaree.

<sup>68</sup> Simoonna moo auqu Peetooroofa mina iriseenoo Yisuna qimaminoo qinau. Oo karaambaiqa ani minnisee yanasaa fee atooqaanauree. Naaru marirana nimira ufa anee kai marananuananoo.

<sup>69</sup> Doo magee maasa aniara kuqaa anoonee qidaqa aniara Anutufinaindari naaqqarafa mariifoo qidaqa.

<sup>70</sup> Yisufa iriseenoo kafaqa qimanniminoo qinau qinee qeeqa kai qisaukuqara taikasee qikuqara marasee fasiqa naarauna qini faqa nimariafanoo. Moo fannoo inniki afaanna maridanoo.

<sup>71</sup> Yisufa afaannee quna Yudasinara nari qumee qimirinau. Yudasifa Keerioota maqusanaafa moo fasiqa Simoonna amaaku marinau. Yudasifa Yisuna (12) qisaukuqara taikasee qikunni ooqu qaara marasee faiqinamu misaki marufa marinau. Kasooqagee mi fasiqafa Yisuna uqeegasainaga aunirira saqarisaa arifandinanara Yisufa minara oonu mafi iriseenoo afaanna fee qinau.

## 7

*Yisufa nari ainaina faqa ufaqu ufafa.*

<sup>1</sup> Miqooqari Yisufa Kariree maqa maaqaki nimarinau. Sia Yudeeaa maqa maaqai finau. Yuda maqannaasa miqoo mina arira ufa qimarunara sia finau.

(Ooqai Isaraee maqannaasa Isipa maqusaindari qaara fasiqa niku nisauku taikasee aukuaana nifuru faiqaga uqiqaana maaqaki fimarufanoo Anutufa innaarunai maridanoo

nari afeekannai Isaraee maqannaasa maqasaaqaraasa qumee dadaaqidanoo aandau narana nimimarufaqa naqafimariqau. Kaasau maqa maaqai nini iusa oonu randee nari maqasaa Isaraee maqasaa animaridaqa aukuaana aukuaana Yeerusareenni suqufidaqa uqiqaanarasaida faiqeeunara iriseega minara afaarurumanaida nari naambeeqa nari naambeeqa uqiqaana maqa usakasaida dinni qisauku taikasee dinni ani qaara marasaida (7) faasaana minaki faiqaida qoomaqa sakasaida namasaida minara susu imariqau.)

<sup>2</sup> Yuda maqannaasa qoomaqa firaafa uqiqaana maqa qoomaqa adeedi roofaqa Yisuna akaqaafasaa Yisuna qimamiqa qiqau.

<sup>3</sup> Maa Kariree maqa maaqa minniseenana Yudeeaa maqa maaqaki fua. Oonurinaqa miqoo ani ufa irimariasa firaa ainaina auqee mariannana misa faqa uqannifiqaa.

<sup>4</sup> Faiqi moo fannoo nari auqu uqeeraanee qimasee sia moo ainaina auqee mariana kukeeqaidanoo aiqama ainaina kooroomasainaqa aiqamausa mina qafaqa, anee faqa miqiaqaana. [ <sup>5</sup> Yisuna akaqaafasaa sia Yisunara irimariqau. Fifau maqasaa fasiqa fee qimariqau.]

<sup>6-7</sup> Yisufa iriseenoo qimannimino qinau. Qini anoona aukuaana sia adeedi ranoo maridanoo. Innee faiqi faiqi aiqama faasaanara maasa aukuanee qimariasa mariafanoo. Maa maqa maaqanasaaqaraasa sia inniara fidiqaaidanoo. Qiniara kai fidiqaaidanoo. Qinee maqee maqee misa manda ainainara kooroomannimaqaunaqa minara kai qiniara fidiqaamaqimaqee mariafanoo.

<sup>8</sup> Yisufa nari akaqaafasaa kaqi qimanniminau. Innee kai Yeerusareenni ooru fuuqa. Qinee sia mi qoomaqanara inni naanna ree akooqoo ooru fuanauara qini anoona aukuaana sia qusa raidanoo.

<sup>9</sup> Yisufa miqi qimaseenoo miqoo Kariree maqa maaqaki kaqi marinau.

*Yisufa uqaana maqaki qoomaqa neemaru ufafa.*

<sup>10</sup> Mina akaqaafasaa Yeerusaree qoomaqai ooru fufanoo Yisufa inaaqianna qumee moo aatata ooru fina.

<sup>11</sup> Yeerusaree maqusa qoomaqaki Yuda maqanna rakisirausa Yisunara randoosia nari qimami nari qimami qidaqa qiqau. Mifa yai fee marinoo fee.

<sup>12</sup> Qimasooafaqai faiqi anaasee Yisuna aufakiana qumee nari qimami nari qimami qimariqau. Akaqausa Yisunara amiqira fasiqee qimariqau. Akaqausa faiqi anaasee nikaru qimari fee qimariqau.

<sup>13</sup> Sia moo fannoo Yisunara akooqoo qimariqau. Nari Yuda maqanna uriqararousara rufiasee qumee kai qimariqau.

<sup>14</sup> Qoomaqa taikarara imarufanoo Yisufa Yeerusaree amaana maqaki keeqafinoo faiqi anaasee ufa qimanniminau.

<sup>15</sup> Yuda maqanna faiqi firaasa mina qafamasee firaqoo tautiqa qiqau. Maa fasiqafa sia sukuraki keeqemarifa. Naqi fee mandeenoo firaa irirana iridanoo fee.

<sup>16</sup> Yisufa minara iriseenoo aiqamausa qimannimino qinau. Qinee qimannimira ufa sia qeeqaindi maridanoo qini diqiqoofa Anutufa mina ufa qimannimidaqa.

<sup>17</sup> Qini ufa Anutunaindi fee qinee qeeqa fee qidee. Faiqi moo fannoo Anutuna iriranamau firirimarifa qini ufara Anutufa fee qiannoo.

<sup>18</sup> Faiqi moo fannoo nari ufa kai qidanoo nari auqu kai uqeeraidanoo. Faiqi moo fannoo nari aqiqainna fasiqana auqu uqeerararee qimarifa mifa kuqaa ufa qidanoo, sia nikaruqirafa minaki maridanoo.

<sup>19</sup> Mooseefa sandufa akara rumaqoona inni nimufaqa innee mina qumaree mi mau fimarunausee qimasaidaqa fifau qidaqa inniki moo fannoo sia mi mau fimariafanoo. Innee moo mau fidaqa qini kuqa darirara qimariafanoo.

<sup>20</sup> Yisufa miqi qimasooafaqai misa aiqama maaqi qimasee nari qimamiqau. Ani aunduraki afaanna marifana anee miqi qimariananoo. Yafee moo fannoo ani kuqaruannoo fee sia moo fannoo.

<sup>21</sup> Miqi qimasoofanoo Yisufa maaqi qimasee nari qimanniminau. Qinee faiqi sia auqaqaa ira ainainna moodaa auqaunaqa innee aiqama tautiafanoo.

<sup>22</sup> Mooseefa faiqi aanaaqiqaqa nipata aukimaranara fainanduqu nisaqee qimarinau, innee minara irisee maasa amaana Saririqasaa miqimariafanoo. Sia Mooseefau mi oosanna aranau. Nari akeeku akaakundi mareenoo miqi qinau.

<sup>23</sup> Innee Mooseena sandufa rukiaanoo qimasee faiqi aanaaqiqaqa maasa amaana Saririqasaa fainanduqidaqa nipata aukimariafanoo innee amaana Saririqasaa kaqi faiqi nipata aukidaqa nanaree Saririqasaa aurimari fasiqana idaaqamasauannanara innee aanoo qida fee.

<sup>24</sup> Innee fifau dapi iriranasaa faiqi ufa nimimarifanoo mina minnisaqa. Kuqaa anoona iriranannai kai faiqi andeeqaqa.

*Faiqi anaasee Yisunara asauku mundira fee qimasee iroo ufafa.*

<sup>25</sup> Yeerusaree maqusanaasa Yisuna qafamasee mina ufa iriqa maaqi qiqa. Maana misa kuqariraree qidaqa.

<sup>26</sup> Qafaa mifa faiqi qambaana faiqi nifusaa kikiqamambi ufa qimannimimarifaqa sia misa mina qumaraannee qidaqa. Abee maasa uriqararawsa faqa minara kuqaa Anutuna asauku mundirafee fee qidee.

<sup>27</sup> Anutuna asauku mundirana oosana maasa siamma irianaara. Kaqi tautumanni-maqaannoo. Maasa maa fasiqana oosana iridaqa, Nasareeteendaraafa maridanoo.

<sup>28</sup> Yisufa firaq amaana maqaki faiqi anaasee qimannimidanoo mi ufana iriseenoo maaqi qimasee firaqoo qimannimianau. Kuqaa fee innee qiniara iridee. Qinee yaindaraasee marunaqee innee kuqaa qiniara irida fee. Sia qinee qeeqa kai animaridaqa qini diqiquaifa mifa kuqaa anoona maridanoo. Innee kuqaa minara sia irimariafanoo.

<sup>29</sup> Qinee minara iridaqa qinee mindari qumuafanausa mifa qini diqiquoofaqa qumumaridaqa.

<sup>30</sup> Yuda maqanna qurqararawsa mi ufana irisee qumarararee qimasoosa minnisagaq. Yisuna kuqira aukwana sia adeedi roofanoo Anutufa qumee misa ititannisoona minnisagaq.

<sup>31</sup> Faiqi anaasee moomoosa Yisuna kuqaa Anutuna asauku mundira fee qiqa. Misa maaqi qimasee nari qimami nari qimami qidaqa qiqa. Asauku mundirafa anireenoo naqi fee mandeenoo maa fasiqana uraqaqarainanoo fee moomoo faiqi dadaaqimari firaq ainainna uqannifiqaannoo fee. Sia amana. Doo maana mifa uqanna maridanoo.

*Amana maqasaa rakisimarsa nari frisuaiqauqa Yisuna rumbaaqera niqiqoo ufafa.*

<sup>32</sup> Faiqi anaasee miqi qimasee nari qimami nari qimami qimarufaqa Farisai amaana ufa qimarusa iriseeqa tautumasee amaana maqasaa rakisimarusunnai oonuree qimannimiqa qiqa. Qimannimisoofaqa misa amaana maqasaa rakisimaru poorisawsa qimannimiqa. Innee ooru Yisuna rumbasee maree aniaqa.

<sup>33</sup> Misa oonuroofanoo Yisufa maaqi qimasee faiqi anaasee qimannimarinanau. Qinee qusasaa inni faqa marianaara. Quqaseeqa qusasaa qini diqiquoofinnai fuanaura.

<sup>34</sup> Innee qiniara randee sia paqurifaranoo qinee fuanannai sia innee amana fifaranoo.

<sup>35</sup> Yuda maqanna qurqararawsa mi ufana iriseeqa nari qimami nari qimami qiqa. Mifa yai fee finaqa maasa sia amana fuanaree. Mifa aanaamuru Kirisa maqanna mariannai fee fuannoo fee. Yuda maqannaasa miqoo mariasa faqa maridaqa Kirisa maqannaasa nari ufa qimannimiraree fidanoo fee qida qinoo fee.

<sup>36</sup> Mifa qinoo innee qiniara randasee sia paqurifaranoo. Qinee fuanannai innee sia fifaranoo. Mina ufoosana sia maasa iridaqa.

*Arumufaqa nammariara maqi qumirarakai imarina mina ufa.*

<sup>37-38</sup> Uqigaana maqa qoomaqa taikara faasaana uriqarara faasaanee qiqa. Mi faasaana Yisufa findifinoo faiqi anaasee firaq kari qimannimianau. Yafasiqa anaasee fee nammariara aididanoo fee qinee iannaqoo nammari uqanna ani naa Anutuna tamummaqara fasiqa moo ooqai maaqi qimasee akara rinanau. Kaqi marirana nimira nammari misa nimuqusa ookiqari ururee fuannoo fee qinonau. Yafasiqa anaasee fee qiniara kuqaa anoonee qinafa misa nimuqusa ookiqari mi nammari ururee fuannoo.

<sup>39</sup> Yisufa nammariara quna Anutuna maraqunara nammari kikiqa usinanau. Kasooqaqee Yisunara kuqaa Anutuna faiqi fee qifandinausa misa mi maraqunna mareefaranoo. Mi aukwana Yisufa kaqi maru aukwana sia maraquna nimirafa marinanau. Yisufa kuqiranaqigari findifinanoo afaqa areenainanoo miqoo nari afeeka maraquna nimiranoo fee qinonau.

*Faiqi anaasee mina Yisunara ufa rainoo ufafa.*

<sup>40</sup> Faiqi anaasee Yisuna ufa iriseeqa qiqa. Maafa Anutuna tamummaqara fasiqa kambigaannoo fee qufa maafa mifa maridanoo.

<sup>41</sup> Akaqausa minara maafa Anutuna asauku mundira fee qiqa. Akaqausa maaqi qimasee furufaramasee qiqa. Anutuna asauku mundirafa sia Kariree maqusakiqari kambigaannoo.

<sup>42</sup> Tamummaqara fasiqa akara minara Anutuna asauku mundirafa Dafidina ati marinonoo. Dafidina ooqeenaa maqusaki Beetareeqeemma miqoo kambigaannoo fee qiqa.

<sup>43</sup> Faiqi anaasee misa rainafufaqa akaqausa moo ufa qufaqa akaqausa moo ufa qufaqa qimariqa.

<sup>44</sup> Akaqausa doo Yisuna qumarasee rumbaannee qimasee sia qumaree rumbaqa.

*Yuda maqanna faiqi firaasa Yisunara sia Anutuna faiqi fee qu ufafa.*

<sup>45</sup> Amaana maqasaa rakisira poorisauqa Yisuna ufa kaqi irisee amaana maqasaa rakisiraua faqa Farisai amaana ufa qimariasa faqa maruqoo oonuroofaqa iridaqa qiqau. Naqaa fee ifaqee sia rumbasee maree anidee.

<sup>46</sup> Poorisauqa qiqau, sia moo fasiqa ufa fannoo maa fasiqana aanna raidanoo.

<sup>47-48</sup> Farisai amaana ufa qimarusa mina iriseeqa niqidaqa qiqau. Doo mi fasiqafa inni faqa nikaruqinoo fee. Maasa uriqararaukigari moo fannoo mina ufa irinoo fee. Farisai amaana ufa qimarifa moo fannoo irinoo fee. Sia uqanna iria. Maasa Mooseena sandufa irimarunaua maridaqa.

<sup>49</sup> Maaqooqaraasa kaqiqee fasiqa anaasee Mooseena sandufa sia irianara Yisunara anonee qidaqa. Anutuna aqira ufa misasa maridanoo.

<sup>50</sup> Nikoodeemusafa mifa faqa misaki marinau. Mifa ooqai qumee Yisufinnai fimarufa marinau.

<sup>51</sup> Mifa misa Yisuna aqira ufa iriseenoo Yisuna saaroo qinau. Mooseena sandufa maaqimminoo maridanoo. Sia fifau faiqi moo arirafa maridanoo. Mina ufa naaree irisee mina mandainaina marinaqa minara qimasee aruananoo amana mariannoo qinau.

<sup>52</sup> Misa mi ufana iriseeqa Nikoodeemusana aqidaqa qiqau. Anee faqa Kariree maqanna fee maridane. Anee tamummaqara fasiqauqa akarauqakiaqa asaanarumasee iria. Sia moo tamummaqarafa Kariree maqasaa kambiqannoo. Miqi qimasee aiqama daraani mambufanoo Yisufa amaana maqakiqari raudamakufanoo Oorifa aaqanai oorufinai.

## 8

*Anaasee moo fannoo ummuarimaruna paquru ufafa.*

<sup>1-2</sup> Oorifa aaqanai kaqimma ooru faiqeenoo iqaqoofanoo Yisufa Yeerusaree firaa amaana maqaki kaifaa ooquee keeqafufaqa faiqi anaasee moomoosa suqufufaqa mina fiqumma marufanoo oqumarifi Anutuna ufa qimannimarinai.

<sup>3</sup> Mooseena sandufa akoofasauqa faqa Farisai amaana ufa qimarusa faqa anaasee moo fasiqa qummuari marufaqa aaqee oonu qafamasee qumaree doo maree aniqau. Yisufa maruqoo mini quqaseeqa maaqi qimasee qimamiqau.

<sup>4</sup> Oo ufasaa rakisira maa anaaseefa qummuari marifaqa maasa qafamasee qumaree anidaqa.

<sup>5</sup> Mooseena sandufa miqiasara oonisamu kai nariqa nini iqa kuqa narusaaqee qinoo maridanoo. Anee minara nana ufee qidanee.

<sup>6</sup> Misa mi ufanannai puteera foora fufidaqa qiqau. Yisufa aruanifeera qimasaida miqi marufanoo Yisufa nari iriseenoo fifau kummaramafufanoo asakunnoo maqa akara rinai.

<sup>7</sup> Mifa maqa fifau akara rimarufaqa misa fuki faaki qidaqa mi anaaseena oonisamu aruanauree sia fee aruanauree ritidaqa ireemariqau. Kaqikaaqoo marikinoo Yisufa findifi qimanniminai. Yafee inniki moo fannoo numoo siainafa mifa kai oonisamu indaaruu aunaa atufinoo maa anaaseena aruannoo fee.

<sup>8-9</sup> Yisufa miqi qimaseenoo kafa kummaramafinoo maqa akara rimarufaqa doo misa moodaa kai qaara kai idaga nari aqaranara nisaurusee findimeeqaida doo fifainimariqau. Faiqi fraasa naaree fufaqa kafa miqoo oorudupiraua fufaqa kumaaraa inaaqianna doo fiqau. Misa fifufanoo mi anaaseefa kai miqoo kikiqinoo marinai.

<sup>10</sup> Yisufa findifinoo mi anaaseena irammirinai, misa yai fee fifee. Sia fee moo fannoo ani kuqira ufa amianinafa maridanoo fee. Aiqama fifee.

<sup>11</sup> Mi anaaseefa qinai. Oo rakisira sia kuqira ufa moo fannoo qimimarifa maridanoo. Yisufa iriseenoo qinai. Doo qinee faqa sia kuqira ufa ani amiana. Doo fua, sia kafa manda oosana maraa.]

*Yisufa maa maqa maaqanaki qoomara foora qu ufafa.*

<sup>12</sup> Moo kari Yisufa Yeerusaree amaana maqaki faiqi anaasee maaqi qimasee qimanniminai. Qinee maqasaaqaraasa qooma maridaqa. Yafasiqa aanaaseesa qini faqa finausa misa kaqi marira qooma mareefaranoo sia uqanna asakunaki fifaranoo.

<sup>13</sup> Farisai amaana ufa qimarusa mina iriseeqa qimamiqa qiqau. Anee aneennara kai ufa qidana aneenna auqu uqereee mariananoo. Miqianna ufafa sia anoonaikidanoo. Fifau ufa kai qimariananoo.

<sup>14</sup> Yisufa mina iriseenoo qinai. Kuqaa qinee qeeqaraa ufa qidaqa. Qinee miqi qidaqa anoona ufa kai qidaqa. Qinee qeeqa kambiqafi aniafannanara iridaqa qeeqa fuannanara iridaqa. Innee sia qinee kambiqaaqannanara irimariafanoo.

<sup>15</sup> Innee faiqi faiqi ufa irisee dapi iriranannai faiqi anaasee rainannimaqee mariafanoo. Sia qinee moo fasiqa aanaaseera rainannimaqee marunaua maridaqa.

<sup>16</sup> Qinee akaqausara rainannimaqidaqau andeeqasee rainannisaunaigini. Sia qeeqaraafau maridaqau ufa nimidaqau. Qeeqa qikoofa qini diqiqamaqoona faqa maridaqa dadaaqi marifaqa ufa qimannimidaqa.

<sup>17</sup> Inni sandufa akara ufa moo maaqimminoo maridanoo. Qaara fasiqa moo ainaina nari nifunnai qafamasee munu kooroo qimasaiifaqa aiqamausa minara anoona ufa fee qifaranoo.

<sup>18</sup> Qinee qeeqaraa ufa qidaqa qini qikoofa qini diqigoofa mifa faqa qini dadaaqifaqa anoona ufa tia qimannimidaqa.

<sup>19</sup> Miqi qimasooifaqa Farisai amaana ufa qimarusa maaqi qimasee irammiriqau. Ani akoofa yai fee maridanoo ani dadaaqidanoo fee qufanoo Yisufa qinau. Innee qiniara faqa qini qikoonara faqa sia irimariafanoo. Innee qiniara irifau qini qikoonara faqa irini. Innee sia maaqandara irimariafanoo.

<sup>20</sup> Yisufa maa ufausa Yeerusaree firaa amaana maqaki qimannimarinau. Mi amaana maqanaki oosirafa moo marinau. Amaana maqaki quqee maru munnimma difaanifa minaki marufanoo mi oosiranaki Yisufa maridanoo mi ufausa qimanniminu. Misa Yisuna qumaraanee qimasee sia qumaraqau. Sia mina kuqira aukuaana adeedi ranoo marunara Anutufa qumee rafaqaqafusoofaqa sia qumaraqau.

*Yisufa qinau, qinee fuanannai innee sia fifaranoo qimaqoo ufafa.*

<sup>21</sup> Moo kari Yisufa maaqi qimasee Yuda maqanna uriqararasa qimanniminu. Qinee moosaa fuaqa qiniara randainaisia inneeqa mandainainaki kuqifaranoo. Qinee fuannaqoo innee sia amana fifaranoo.

<sup>22</sup> Yuda maqannaasa uriqararasa mi ufana iriseeqa nari qimami nari qimami qiqau. Mifa maasara sia nari innai fuageera qidaqino. Maasa sia mina ufa iridaqa. Mifa nari fee nari aruannoo fee miqi qidanoo fee.

<sup>23</sup> Yisufa iriseenoo qimanniminu. Innee maindaraasa mariafanoo qinee mirindaraasa maridaqa. Innee maa maqanasaaqaraasa mariafanoo qinee sia maa maqanasaaqaraasau maridau.

<sup>24</sup> Qinee minara qunnana innee inneeqa mandainainaki kuqifaranoo. Innee sia qinee marunannara anoonee qimariafanoo minara kuqaa innee inneeqa mandainainaki kuridifaranoo.

<sup>25</sup> Misa uriqararasa mina iriseeqa qiqau. Anee yafee maridane qufanoo Yisufa qinau. Indaaruu qimannimianausa misa kai maridaqa.

<sup>26</sup> Qinee moomoo ainainara inniara qimannimianaura. Qini diqiqamaqoofa mifa anoona ufa kai qimarifa mifnaindaraana kai inni maa maqanasaa mariafa qimannimidaqa.

<sup>27</sup> Yisufa nari akoona aufakiana qimannimimarufaqa siamma irimariqau. Minara Yisufa kaifaa maaqi qimasee qimanniminu.

<sup>28</sup> Kasooqagee innee qini faiqi nimaaku uqeeqeeqee aunirira saqarimisa qugaqisaseeqa mikamuqoo qinee mariaafannanara irifaranoo. Qini qikoofa qimaqimiqoo ufana kai inni qimannimidaqa. Mikari innee minara faqa amiqimasee irifaranoo.

<sup>29</sup> Qini diqigoofa qini faqa maridanoo. Qinee mina aidira oosanamau kai fidaqa minara sia minniqisaifaqau qeeqaraafau maridaqau. Mifa qini faqa maridanoo.

<sup>30</sup> Faiqi anaasee moomoosa mi ufana iriseeqa Oo kuqaa mifa Anutuna asauku mundira fee qimasee minasaa mundiqau.

*Rumbarausara faqa idukirausara faqa qimaqoo ufafa.*

<sup>31</sup> Yisufa minara iriseenoo qimanniminu. Innee qini ufa qimannimunnana irisee mi mau maqee maqee fifaqa kuqaa qini faiqi namu marifaranoo.

<sup>32</sup> Innee kuqaa anoona ufa kai irifaranoo. Anoona ufa fannoo inniqa mandainainakiqari inni idukuannoo.

<sup>33</sup> Misa mi ufana iriseeqa qiqau. Maasa Abarahaamana ati maridaqa, sia moona rumbaranaki maridaqa. Nanaree anee maasara idukuagee qidane.

<sup>34</sup> Miqi qufanoo Yisufa kafa qimannimino qinau. Qinee kuqaa anoona ufa inni qimannimidaqa. Faiqi moo fannoo mandoosana maree marifa mi manda oosanafa mina rumbaqaifa maridanoo.

<sup>35</sup> Faiqi moo fannoo moona ainaina iinoo oosana oosana ainaina narindiara foora iinoo. Kasooqagee doo ainaini taikaseenoo mi aiqama ainainna nari amiseenoo doo kaqisamu fuannoo. Mi ainainna faqaana faiqi fannoo sia amana taikaannoo kaqi nari akoona amaaku mariannoo kaqi nari akoona amaqa maqa finoo mina qumiasana maraseenoo sia ainainira faiqi naanna reenoo taikaannoo, kaqi miqoo mariannoo.

<sup>36</sup> Qinee Anutuna amaaku maridaqa. Qinee inniqa manda oosanaqiqari idukusaanaqa innee kuqaa iduqiqa marifaranoo.

<sup>37</sup> Innee Abarahaamana ati mariafaqa qinee minara iridaqa sia innee mina aanna reemariafaqa, qini ufa sia marararee qidaqa qini dariraree qimariafanoo. Abarahaamafa sia miqi marufa minara innee sia Abarahaamana faiqi namu uqanna mariafanoo.

<sup>38</sup> Qini qikoofa qini uqaqififoona kai inni qimannimidaqa. Innee mina minniseeqa inneeqa nikoona moo Sadannana ufa irimariafanoo.

<sup>39</sup> Misa mi ufana iriseeqa maaqi qiqau. Maasa qikoofa Abarahaamafa maridanoo. Yisufa minara qinau. Innee Abarahaamana faiqi namu maridaqau mina ufamau fini.

<sup>40</sup> Qinee qeeqa qikoonasaqarara ufa kai inni qimannimimarunaqa innee quandaqifa qini darirara qimariafanoo Abarahaamafa sia mi oosanna maranau.

<sup>41</sup> Innee inneeqa nikoona uqanna oosana maraidaqa miqi mariafanoo. Misa mi ufana iriseeqa qiqau. Maasa sia qummuara faiqifau maridaqau. Maasa moodaa fasiqa faiqi Anutufa nari uqanna maasa qikoofa maridanoo.

<sup>42</sup> Yisufa misa ufa iriseenoo maaqi qimasee qimanniminau. Anutufa inni nikoofa marinaqau kuqaa innee qiniara rini. Qinee Anutufinaidari maaqoo qumumaridaqa. Qinee sia qeeqafau qumiqau mifa diqiqoofaqa qumiqiafana.

<sup>43</sup> Innee naqaa fee ifaqee sia qini ufa oosana iridee. Innee qini ufa iriafanoo nikoofaidanoo miqidaqa sia irimariafanoo.

<sup>44</sup> Afaanna nikoofa Sadannafa maridanoo. Innee mina faiqi namu maridaqa mina aanna ree mariafanoo. Ooqaindari faiqi kuqannarimarufa maridanoo. Sia anoonufakifau mapukinoo maridanoofau. Anooa ufa sia uqanna minaki marifa maridanoo. Mifa unna ufa qinoo nari oosanamau kai fidanoo. Mifa unna ufa qimarifa maridanoo unna ufa qimariasa nikoofa maridanoo.

<sup>45</sup> Qinee kuqaa anoona ufa kai qimannimi marunnanara innee sia irimariafanoo.

<sup>46</sup> Qini manda oosana moodaa maridanoo fee sia fee maridanoo. Innee qafee qiga qimaqimiyaqa. Qinee kuqaa anoona ufa kai inni qimannimunaqa naqi fee ifaqee innee sia minara anoonee qidee.

<sup>47</sup> Anutufa dadaaqifaqa mina faiqi namu araamuqmaakaiki mariasa kai Anutuna ufa irifaranoo. Innee sia Anutunaindaraasau mariafanoo ufa sia qini ufa irimariafanoo.

*Yisufa Abarahaamanara qimannimu ufafa.*

<sup>48</sup> Yuda maqannaa uriqararasa Yisuna ufa iriseeqa aqiga qiqau. Anee manda Samaria maqannaa mariananoo afaanna moo ani aunduraki marifa mariananoo. Maasa kuqaa fee qidee, sia fee.

<sup>49</sup> Yisufa iriseenoo qinau. Afaanna sia qiniki maridanoo. Qinee qeeqa qikoona auqu uqeeraidaqa innee qini duqu maqasaa quqemariafanoo.

<sup>50</sup> Qinee sia qeeqa duqu uqeeraranara randaidaqa. Moo fannoo qini duqu uqeerafa maridanoo. Innee qini duqu maqasaa quqemariafanoo Anutufa kai qini dadaaqinoo inni rafaqa fuannoo.

<sup>51</sup> Yafasiqa anaasee fee qini dookinaa ufa irisee marainafa mifa sia kuquannoo nauru mariannoo.

<sup>52</sup> Yuda maqannaa uriqararasa mi ufana iriseeqa qiqau. Doo maasa ani oosana iriseeqa anee kuqaa afaanna faqaafa mariananoo, Abarahaamafa maasa qikoofa doo ooqai kuqinau. Anutuna tamummaqara fasiqauqa doo kuqiqau. Anee naqi fee masee maa ufana qidane qini ufa irimariasa sia kuqifaree qidane.

<sup>53</sup> Maasa qikoofa Abarahaamafa kuqinau. Anee mina uriqarara fee maridane qidane. Anutuna tamummaqara fasiqauqa maqasaa fasiqauqa kuqufufana anee aneennaraa naqira fasiqee maridee qidane.

<sup>54</sup> Miqi qimasoo fanoo Yisufa qimanniminau. Qinee qeeqa duqu fifau uqeerasaana sia anoonai kiannoo, fifau mariannoo. Qini qikoofa Anutufa qini duqu uqeeraidanoo dadaaqidanoo, innee unna qimasee minara maasa Anutunee qimariafanoo.

<sup>55</sup> Innee ooqaindari sia mina auqu irimariafanoo. Qinee mina auqu iridaqa. Qinee minara sia iridau inni naanna reemaruusa unna ufa qimarunaasee qini. Qinee qeeqa qikoonara iridaqa mina ufamau fimarunausa maridaqa.

<sup>56</sup> Inni nikoofa Abarahaamafa ooqai kaqi maridanoo qinee maqee marunnanara kaaqa qafaqaqaa imarufa marinau. Doo qiqafamaseenoo asasinu.

<sup>57</sup> Yuda maqannaa uriqararasa mi ufana iriseeqa maaqi qiqau. Anee kumaaraa mariananoo. Anee naqimasee Abarahaamana qafanee inau, ooqai mariufa maridanoo.

<sup>58</sup> Yisufa minara maaqi qimasee qimanniminoo qinau. Abarahaamafa sia kambiqoo aukuanna qinee maa marunausa mikamuqoo mariqiafana.

<sup>59</sup> Yuda maqannaasa mina iriseeqa oo maa fasiqafa nariara Yaawee fee qidaqinoo qimasee aanoomasee oonisamu qumaree aruaneerufanoo mifa kukeeqakinoo amaana maqakiqari raudamaki moosaa finau.



## 9

*Yisufa innaamunaindari afu qimbarana afu maqaisoo ufafa.*

<sup>1</sup> Yisufa aatata fidanoo moo fasiqa mina anoofa innaamunai afu dimbarana maqaqoona qafanau.

(Mi aukuanu nifu niku mandaikirusauqa mai mariandee sia amana ainainamasee naaqaa imariqau. Faasaana kaqi marida narana feefaurira munnimmara ireemarufaqa nimirufaqa marasaida neemariqau misa nuqu iramasaida neemariasee qiqau.)

<sup>2</sup> Yisuna faiqinamu mi afu qimbarana qafamasee Yisuna irammiriqa qiqau. Oo ufasaa rakisirafa maa fasiqafa yana mandainainasaa fee maaqinoo afu dimbanoo maridanoo fee. Nari akoona anoona mandainainasaa fee narindisaa fee miqinoo maridanoo fee.

<sup>3</sup> Yisufa iriseenoo qimannimino qinau. Sia nari anoona akoonasaa qaraanau, sia narindisaafau afu dimbanoo maridanoofau. Anutuna afeeka kasirana qinikiqari kooroo ianifeera mina afu dimbanoo maridanoo.

<sup>4</sup> Qini diqiqoofa qini qimiqoo ainainirana sia amana asukunaki auqaanaura maasa faasaana auqaanaura. Doo kaqikaqoo eendinaqa sia miqoo faiqi moo fannoo auqaanoo.

<sup>5</sup> Qinee maa maqa maaqanaki maridaqa misa qooma maridaqa, kaaqa qamanni-maqaanaura.

<sup>6</sup> Miqi qimasee Yisufa maqasaa aqaara fidaquseenoo asaukukoo doonaikamaseenoo afu dimbara fasiqa afusaa akuseenoo qimaminoo qinau.

<sup>7</sup> Doo fua. Doo oonu Sirooamma farummaki aneenna oori afuakai ruquanee qinau. Sirooamma farumma auqu oosana niqiqamaqai farumma fee qinoo marinau. Mi afu qimbara fasiqafa eedoo qimasee oonu nari oori afuakai ruqufanoo afu aiqamaqara amiqimasee qoofanoo oonu quandakufanoo sandee kafaaninau.

<sup>8</sup> Mi fasiqana aqoonausa mina qafamasee moomoosa mina qafeemarusu mina qafamasee qiqau. Maa fasiqafa maaqoo maridanoo narana munnimmara ireemari fasiqa fee mifee.

<sup>9</sup> Akaqausa doo mifa kai fee qiqau, akaqausa moo fannoo mina fooqaa fee qiqau. Mi fasiqafa nari irisee qinau. Qinee qifu dimbarausa maaqoo marunausa maridaqa.

<sup>10</sup> Misa mina iriseeqa iraqau. Naqimasee afu maqeenee qufanoo mifa qinau.

<sup>11</sup> Faiqi moo mina auqu Yisufa qaqara fidiseenoo doonaikamaseenoo qini qifuki akuseenoo doo fua Sirooamma farummaki oori nammari uqua qufaqa miqi qifaqa nammari uqusaunanoo doo qifu maqeenoo.

<sup>12</sup> Miqi qimaasoofaqa misa qiqau. Miqimasai fa yai fee finoo fee qufanoo mifa sia qinee irida fee qinau.

*Farisai amaana qimarusa Yisufa afu qimbarana afu maqaisoonara randoo ufafa.*

<sup>13</sup> Miqi qimasooofaqa misa mi fasiqana afiqeeqa Farisai amaana ufa qimarusa uqannifiqanau.

<sup>14</sup> Mi faasaanna Yisufa mi fasiqana afu maqoo faasaana misa amaana Saririqa marunara Farisai amaana ufa qimarusa marunnai afiqee fiqau.

<sup>15</sup> Farisai amaana ufa qimarusa mi fasiqana afu maqoonara iroofanoo qinau. Mifa doona qini qifusaa akusaiqara doori nammari uqunanoo qifu maqeenoo.

<sup>16</sup> Farisai amaana ufa qimariasa akaqausa Yisunara maaqi qiqau. Maa fasiqana afu maqai fa sia Anutunaindarifau amaanasaa ainainimarifa manda fasiqa maridanoo. Akaqausa mina iriseeqa qiqau. Naqimasee mandainaina maree marinafa maa firaa ainainna amiqira ainaina auqararee sia amana fee qimasee mi ufanannai rainaqau.

<sup>17</sup> Miqi qimasee Farisai amaana ufa qimarusa afu qimarusa irammiriqa qiqau. Anee mi fasiqana ani afu maqainaree qidanee. Anee minara nana ufee qidanee. Afu dimbarafa mina iriseenoo qinau. Mifa Anutuna tamummaqara fasiqa maridanoo fee qinau.

<sup>18-20</sup> Yuda maqannaasa uriqararausa mina iriseeqa maaqi qiqau. Maana sia afu dimbarafau moo fasiqa maridanoo qimaseeqa misa mina anoona akoona naaramasee irammiriqa qiqau. Maa fasiqafa inniqara faiqi fee. Kuqaa fee anee mina maqoonna kari afu dimbaranee maqanau. Naqimasee maqee afu maqeenoo fee qufaqa mina anoofa akoofa uriqararausa amaana maqaki keeqemariana qaoo qimaqiseefoo qimasee rufieeqa qimannimiqa qiqau. Maa fasiqafa maasa qimaaku maridanoo maasa minara iridaqa. Ooqai aanaaqisaa innaamunai miqirana maqaafanafa maridanoo maasa minara faqa iridaqa.

<sup>21</sup> Mina afu maqainara yafasiqa fee mina afu maqeenoo fee siamma iridaqa faiqi maridanoo irammirifanoo qimannimiannoo.

<sup>22</sup> Yuda maqanna a uriqararaua Yisunara faasa maaqi qimariqau. Faiqi moo fannoo Yisunara Anutuna asauku mundira fee qinnana maasa amaana maqakiqari aqiiqaanoo raudamaki aqoosai finoo sia kaifaa keeqaannoo.

<sup>23</sup> Mi ufanara afu dimbarana anoofa akoofa doo faiqimmifoo nari iraaqee qiqau. Misara rufiasee miqi qiqau.

<sup>24</sup> Yuda maqanna a uriqararaua mina iriseeqa afu dimbarana kafa aaramasee qiqau. Anee Anutuna afusaa kuqaa anoona ufa kai maasa qimannimia. Ani afu maqaifa mifa mandainaina maree marifa maridanoo.

<sup>25</sup> Afu dimbarafa mina iriseenoo qimanniminu. Mi fasiqafa mandainaina maree mari fee sia qinee mina oosana iridaqa. Moodaa ainainara kai qinee iridaqa qinee qifu dimbaraua mariafanausa maqee qini qifu maqee marifaqa maridaqa minara kai qinee amiqimasee iridaqa.

<sup>26</sup> Misa mina iriseeqa kaifaa irammiriqa qiqau. Mi fasiqafa nana ainainee auqu amifanoo ani afu maqeenoo fee.

<sup>27</sup> Afu qimbarafa niqinoo qinuu. Doo faasai qimannimisaunaqa sia irimariafanoo. Nanaree innee kaifaa qiana irifaree innee faqee mina faiqinamukifaree.

<sup>28</sup> Misa mina iriseeqa aanoomasee mina aqiqa qiqau. Anee mi fasiqana ufa irimarianafa mariananoo. Maasa Mooseena ufa irimarunaua maridaqa.

<sup>29</sup> Anutufa Mooseenannai maasa qimaqimufaqa maasa iridaqa. Mi fasiqafa Yisunara maasa sia mina oosanara iridaqa.

<sup>30</sup> Afu dimbarafa mina iriseenoo niqinoo qinuu. Innee moo irirana maree mariafanoo mifa qini qifu maqaqisaiifaqa innee nanaree mi fasiqanara yaindari fee anidanoo fee qidee.

<sup>31</sup> Anutufa sia manda oosana maree mariasa dadaaqidanoo. Faiqi anaasee minara rimariasaa mina ufa irimariasaa misa kai Anutufa dadaaqidanoo.

<sup>32</sup> Ooqai oosana aroo aukuanasaaqari sia faiqi moo fannoo afu dimbarana nifu maqannisanuu, maqee kai.

<sup>33</sup> Maa fasiqafa sia Anutufinaindari aninaqau naqimandee maa firaa ainainna auqararee, siamma amanaikiannoo.

<sup>34</sup> Yuda maqanna a uriqararaua mina iriseeqa qimamiqa qiqau. Anee mandainainaki kambiqoonafa mandoosanaki findifuanafa doo see fiiuannee qimaseeqa misa amaana maqakiqari aqiiqoofanoo raudamaki finuu, sia kafa anianifeera doo ateeqaqau.

*Faiqi naundura nifu qimbaranara Yisufa qimaqoo ufafa.*

<sup>35</sup> Misa afu qimbarana aqiiqoonara Yisufa iriseenoo paqurimasee irammirinuu. Anee faiqi nimaakuara Anutuna asauku mundira fee fee qidanee minasaa irirana rusidanee.

<sup>36</sup> Mi fasiqafa Yisuna sia qafoofa maridanoo maaqi qinuu. Doo mina uqaqifiqainaaq minara anoonee qimasee minasaa atooqaanaua.

<sup>37</sup> Yisufa qinuu doo anee qafaananoo doo mina faqa ufa qimariananoo.

<sup>38</sup> Mi fasiqafa mina iriseenoo qinuu. Oo Karaambaiqa aniara kuqaa Anutuna amaaku fee qidaqa qeeqa qimuqusa irirana aniki rusidaqa qimuqusanoo ani amooqima-maqaidaqa. Miqi qimaseenoo mi fasiqafa Yisuna oorinni maqasaa kummaramafinoo amooqinuu.

<sup>39</sup> Yisufa mina qafamasee miqoo marusa qimanniminoo qinuu. Qinee maa maqanasaaqarasaa rainannimaqarara qumuafanausa maridaqa. Qinee nifu dimbaraua maqaaneera qumuafanausa nifu maqaraua dimbaaneera qumuafanausa maridaqa.

<sup>40</sup> Farisai amaana ufa irimarusaa miqoo marusa mina iriseeqa iramiriqa qiqau anee maasara faqee nifu dimbarausee qidanee.

<sup>41</sup> Yisufa qinuu. Inni nifu dimbanoo marinaqau inni numoo sia marini innee unna qimasee maasa qifu kaqi marifaqee qimarianara inni numoo kaqi maridanoo nifu dimbarausara foora mariafanoo.

## 10

(Yuda maqannaasa firi maru aandaufa sipsipa marinuu. Misa akaqana arusaida neemarufa marinuu. Moomoo rakisidaqa asaasi aukusaidaqa minannai qamunnaina auqimariqau. Sipsipa reendeenimarufa sia aanoo imarufa marinuu. Anee mina asaasi aukidanee mina kuqarinanoo fee sia ufa qiannoo kaqi muqurinoo mariannoo. Mi aukuanna sipsipasaa rakisimarufa nifunni fufaqa aiqama sipsipa mina afaqee fiqau. Isaraee maqannaasa sipsipa kaqi miqidaqa. Misasaa rakisimarifa indaaru fifaqa sipsipauqa mina aanaaqianna fidaqa.

Sipsipasaa rakisirafa ooni moomoo marasee aaku aaku maseenoo ququsa auqusee eendaki sipsipa minaki quqasee kooqisaa nari faiqaidanoo. Kaasau faini fee qumnuarimari

fasiqa fee arunaandoora rakisidanoo. Sipsipa nikoofa nuqu ramaqaisa kai maridaqa. Kananaana findifinoo nuqu raifaqa kai anireeqa andandara randaidaqa.

Sipsipa rakisimariasa nari sipsipara ridaqa rakisidaqa nari sipsipasaara kuqifaranoo. Sipsipauqa faqa nari rakisimariasa ufa iridaqa minara ridaqa. Akaqausa moodaanaki ooni ququsa auqusee minaki nari sipsipa aiqama eendaki ququsaafanoo faiqi moo fannoo kooqisaa rakisidanoo. Kananaana iqaqai fanoo sipsipasaa rakisirafa moo fannoo aniraifanoo kooqisaa rakisirafa atuasaifanoo sipsipa akoofa nari sipsipa nuqu ramaifaqa nari sipsipauqa kai iriqa raudamaki andanda narara fidaqa.)

*Sipsipa faiqee mariana mina kikiqisira ufa.*

<sup>1</sup> Yisufa kafa miqooqaraasaa qimannimidanoo sipsipara qinoo faiqira qinau. Qinee anoona ufa qimannimidaqa. Faiqi moo fannoo sia sipsipa ququsa kooqi keeqemarifa kaqinaindari ququsasaa akaremarifa mifa qummuarimari fasiqafa mariannoo.

<sup>2</sup> Sipsipa kooqi keeqe marifa mifa sipsipasaa rakisimarifa maridanoo.

<sup>3</sup> Sipsipa nikoofa moo fannoo anirainanoo kooqisaa rakisirafa kooqi atuasaifanoo sipsipa akoofa nari sipsipa nuqu ramasee naarainaqa mina ufa iriseeqa raudamaki nari faqa nifiqainaqa andanda narara fifaranoo.

<sup>4</sup> Sipsipauqa nari rakisimarina ufa iriqa raudee qumuraifanoo mifa indaarufifaqa misa mina aanaaqianna fidaqa.

<sup>5</sup> Sipsipa sia moo fasiqa afaqee fifaranoo mina ufa irisee moo fannoo fee qimasee sandeefaranoo.

<sup>6</sup> Yisufa mi quandara ufana qimannimufaqa siamma iriqau.

*Yisufa amiqira sipsipasaa rakisirafa mi ufafa.*

<sup>7</sup> Minara iriseenoo kafa kooroomasee qimanniminoo qinau. Qinee kuqaa anoona ufa qimannimidaqa qinee qeeqa kai sipsipa kooqi maridaqa.

<sup>8</sup> Ooqi qini doorini indaarufifaqa anusa qummuari maru fasiqausa kai animariqau. Sipsipauqa sia misa ufa iriqau.

<sup>9</sup> Qinee Anutuna ququsa kooqi maridaqa yafasiqa aanaaseefee kooqisaarafoo qinisaa keeqe marinafa Anutufa mi fasiqanaaseesa kuqiranakinaana marasee innaaruna asumu mariranaki quqaannoo. Mi fasiqanaaseesa Anutuna ququsaki sipsipara foora keeqe raudeeida narana neemarifaranoo.

<sup>10</sup> Qummuarimari fasiqafa qummuaramasaina taikaanifeera fifau fafau qummuarianifeera faqa kuqannaruaniifeera faqa kuridi nimaqaanifeera faqa aniannoo. Qinee faiqi anaasee asumu marirana nimianera anidaqa. Sia kaqi dapi mariranaru qidau. Asumu marirana amiqirana moo faqa moo faqa rairairana nimirara mina kai nimiraree qimasee qumidaqa.

<sup>11</sup> Qinee sipsipasaa amiqimasee rakisimarunausa maridaqa. Sipsipasaa amiqimasee rakisimarifa nari sipsipasaara kuqaannoo.

<sup>12</sup> Feefauruara ainainimarifa sia miqiannoo kaasau faini anirainanoo rufiasee sandaannoo. Sandamafinanoo kaasau faini anireenoo sipsipa qumarainaqa daraanifaranoo.

<sup>13</sup> Feefauruara ainainimarifa sia sipsipara amuqusiannoo feefauruara kai rakisidanoo.

<sup>14</sup> Qinee sipsipasaa amiqira rakisirafa maridaqa. Qini qikoofa qiniara iridanoo. Qinee miqi kai iqa qeeqa qikoonara faqa iridaqa.

<sup>15</sup> Miqi kai iqa qeeqa sipsipara iridaqa misa faqa qiniara faqa iridaqa. Qinee qeeqa sipsipasaara amana kuqanaaree qidaqa.

<sup>16</sup> Sia maqooqaraasa kai qini ququsaki mariaqeera. Qini ququsa fannoo moomoo maqusanaasaka faqa maridanoo. Minakinaasauqa faqa nifiqa quqaanura. Misa faqa qini ufa irisee eedoo qifaranoo. Miqoo moodaanaki marifaranoo moodaa rakisirafa misasaa mariannoo.

<sup>17</sup> Qeeqa sipsipara qimuqusina qeeqa marirana misa nimaqa maqaseeqa kuqirinaki quqasee kaifaa qeeqa marirana minakiqari maraanaura. Qinee miqiraree qunnaara qini qikoofa qiniara ridanoo asacidanoo.

<sup>18</sup> Sia moo fannoo nari afeekannai qini marirana maraannoo. Qinee qeeqakai qeeqaraa irisee qeeqa marirana kuqiranaki quqaanura. Qini qikoofa qinaqa qeeqa marirana kuqiranaki quqararee qimasee quqaanura. Quqasee kafa marararee qimasee maraanauranoo. Qini qikoofa miqi qimasee ufa qimaqimifaqa iridaqa.

<sup>19-20</sup> Yuda maqannaasa miqooqaraasa Yisuna mi ufana iriseeqa rainafufaqa akaqausa qiqau. Maa fasiqana audurai afaanna maridanoo, marifanoo dapi dapi ufa qidanoo, nanaree innee mina ufa iridee.

<sup>21</sup> Miqi qimasooqafa akaqausa misa qimannimiqa qiqau. Akasaa afaanna aunduraki marinafa sia maa fasiqafa indeemasee ufa qiannoo. Afaanna fannoo amanee afu dimbarana maqaiseenoo fee sia amanaikiannoo.

*Yuda maqannaasa Yisuna minnisoo ufafa.*

<sup>22</sup> Mookari Yuda maqannaasa Yeerusaree maqusai suqufufaqa amaana maqara qoomaqammasaida neemariqau. (Ooqai namuqaa amaana maqaki mini madaapee quqasoofaqa mina anukamaquseeqa doo miqooqari aukuaana aukuaana anukara qoomaqaqee qimasaida sakasaida neemariqau.) Suara aukuaana mi qoomaqana imariqau Yeerusaree maqusai.

<sup>23-24</sup> Yisufa Yeerusaree maqusai oorureenoo amaana maqa atisaa tida auquqoonasaa aakuara rufisee minaki nimarinau. (Faiqi anaasee moomoo aaku suarara rufiseeqa minaki kai mariqau.) Amaana maqa atimau tidasaa kisaafa firaqoo marinau. Yisufa Sooroomoona amarana maqa atimau tidasaa nimarufaqa Yuda maqannaasa uriqararasa ititaseeqa irammiriqa qiqau. Anee sia quandaqaandia, amiqimandee akooroomasee maasa qimaqimia, kuqaa fee Anutuna asauku mundira fee maridane.

<sup>25</sup> Yisufa maaqi qimasee qimanniminau. Doo qimannimuna siamma irimariafanoo. Qinee moomoo qeeqa qikoofnaindaraa ainaina auquseeqa minannoo inni uqannifiqau-nausa maridaqa.

<sup>26</sup> Innee sia qinee firimarunna aandau sipsipauqau mariafanoofau minara sia qiniara anoonee qimariafanoo.

<sup>27</sup> Qini sipsipauqa qini ufa iridaqa qinee misara faqa iridaqa, misa minara aiqama qini faqa fidaqa.

<sup>28</sup> Qinee naaru naaru marirana nimidaqa sia kuqifaranoo. Sia amana moo fannoo qini qisaukukinaana rafieefaranoo.

<sup>29</sup> Qini qikoofa qini sipsipauqa qimufa aiqamausa uriqararafa maridanoo, sia moo fannoo mina asaukukinaana rafieefaranoo.

<sup>30</sup> Qini qikoofa faqa qinee faqa moodaa marunnanara sia amana rafieefaranoo.

<sup>31</sup> Yuda maqannaasa mi ufana iriseeqa aanoomasee oonisamu qumaree Yisuna arirarfanoo qinau.

<sup>32</sup> Qinee moomoo amiqira ainaina auqaidaqa qini qikoofa qimu ainaina auqaidaqa innee nana amiqira ainainara irisee fee minasaara oonisamu qini darirara qidee.

<sup>33</sup> Yuda maqannaasa uriqararasa mina iriseeqa kafa aranaiqi qimamiqa qiqau. Sia amiqira dadaaqira ainaina auqaananarau ariraridau. Aneenaraa Anutuna mandaikam-mamaqaidana anee aneennaraa maqasaa fasiqa marianafa anee Anutufaikina mariananara ariraridaqa.

<sup>34</sup> Yisufa mina iriseenoo qinau. Inni sandufa akaraki Anutufa qinau. Innee faiqi faiqi Anutunaikammida mariafanoo.

<sup>35</sup> Sandufa andeeqanoo maridanoo naaru naaru sia aaqee mariafanoo, innisaimbaqa minara iridaqa. Anutufa nari ufa misasaa quqaseenoo misara Anutu fee qinau.

<sup>36</sup> Anutufa qini maraseenoo maa maqa maaqanaki diqiqamaqoonaki maridaqa. Qinee qeeqaraa Anutuna amaaku fee qunnanara naqimasee fee minannai Anutuna mandaikamma amaqaanauree sia amanaikiannoo.

<sup>37</sup> Qinee qini qikoofa auqamaqai ainaina auqaanaqa qafamasee kuqaa anoonammifoo qiaqaana. Qini qikoofa sia auqamaqai ainainna auqaanaqa qafamasee unnammifoo qiaqaana.

<sup>38</sup> Innee qeeqaraa ufa qunnanara unna fee qimasaida qinee faiqi sia auqaaqaa ira ainainna auqaanaqa qafamasee qiniara kuqaa anoona fee qimasee kuqaa mina akoofa minaki marinara miqidanoo fee qiaqaana kaifaa mifa faqa nariki marinara miqidanoo fee qiaqaana.

<sup>39</sup> Yisufa miqi qimasoofaqa misa qumaraaneerufanoo kaqimbinau.

<sup>40</sup> Yisufa Yooradanna nammariinni ooqueenoo ooqitaqa mareenoo ooqai Yoohaneefa maridanoo nammari nimiugoo miqoo ooqu marinau.

<sup>41</sup> Faiqi anaasee moomoosa suqufufaqa Yisufa maruqoo maridaqa nari qimami nari qimami maaqi qiqau. Yoohaneefa nammari nimirufa sia moo ainaina firaa ainaina auqanau. Yoohaneefa maa fasiqanara qufa doo aiqamainaina anoonaikidanoo.

<sup>42</sup> Miqoo faiqi anaasee moomoosa Yisunara kuqaa Anutuna faiqi fee qimasee mina saqarikiqau.

## 11

*Rasarusafa kuqu ufafa.*

<sup>1</sup> Faiqi moo auqu Rasarusafa mifa Beetani maqusaindaraafa aurida marinau. Rasarusafa nari asookiqanda Mariana amarana faqa Maratana faqa misa Beetani maqusaindaraasa mariqau.

<sup>2</sup> Mariafa maafa kasooqaaqee amiqira afundimaru fadameena Yisuna aikusaa adiseenoo nari akiaga asausi kisaqaannai rukaaninafa maana mi Mariafa maridanoo. Sia Yisuna anoofau mina amarafa marinau.

<sup>3</sup> Mi Mariana afaasafa Rasarusafa kuqira aurira maroofaqa mina asookiiganda qafamaseeqa faiqi moo aiqeeqa anee Yisuna oofu afiqee uruannee qufanoo oofu finau. Mifa maaqi qinau ani afaaqasaa aqoondi Rasarusafa kuqira aurirana maraidanoo.

<sup>4</sup> Yisufa mi ufana iriseenoo nari faiqi namu qimanniminau. Rasarusafa aurida maridanoo. Sia kuqiranaki firarau Rasarusafa mi aurirana maraidanoofau mina auriranannai Anutufa nari amaaku qini duqu uqeeraanifeera mi aurirana maraidanoo.

<sup>5</sup> Yisufa miqanda qisanasaasa faqa misa nisookinara faqa kaaqa misara rimarinau. Yisuna afaaqasaa aqoondi marunara rimarinau.

<sup>6</sup> Rasarusana auriranara iriseenoo sia dauni finau qaara afuru faiqanau.

<sup>7</sup> Qaara afuru faiqee iqaqoofanoo nari faiqi namu qimanniminau. Uqeeraifaqa innisaimbaqa kafa qumurandee Yudeea maqa maaqai Rasarusafa aurida qina ooru qafa.

<sup>8</sup> Miqi qufaqa misa tautumandee maaqi qiqau, Oo ufasaa rakisirafa innau kai Yuda maqanna uriqararawsa oonisamu ani arirara qufana kafa fee miqoo fidanee.

<sup>9</sup> Yisufa iriseenoo qinau, iqaqai fanoo kai suani urureenoo kaaqa qaidanoo. Faiqi miqi mariqoo nidaqa sia saamuridaqa. Misa maa maqanasaa kaaqa qarafa marifaqa qafaida sia saamuridaqa.

<sup>10</sup> Faiqi moo fannoo asukunai nidanoo oonisa aikuamaki saamuridanoo, sia kaaqa qarafa minaki marinara miqidanoo Anutufa qi faasaana ooru fiqa sia saamuruanaura kaaqa qeemarina ooru fuanaura.

<sup>11</sup> Yisufa maaqi qimasee qimanniminau. Rasarusafa maasa qiqoondi doo faiqaqee ifaqa qinee oorureeqa afaurianaura.

<sup>12</sup> Mina faiqi namu mina iriseeqa qiqau. Oo karaambaiqa mifa fifau faiqaqee idanoo findifuanoo amiqirafa.

<sup>13</sup> Yisufa kuqiranara faiqeefoo qimasoo faqa misa sia iriqau.

<sup>14</sup> Minara Yisufa kooroo qimasee qinau. Rasarusafa doo kuquaraasinoo maridanoo.

<sup>15</sup> Dufi dufi sia qinee miqoo maridaqa inniara iridaqa kasooqaaqee Anutuna afeeka qafeeqa kuqaa qiniara Anutuna amaaku fee qifaranoo doo uqeeraifaqa fua Rasarusafinnai.

<sup>16</sup> Toomasina auqu qaara auqu marinau. Moo auqu Toomasifa moo auqu Qaaraqanda maqara fee qimariqau. Toomasifa Yisufa Yudeeaa maqa maaqai ooru firanara iriseenoo qinau. Doo uqeeraifaqa maasa ufasaa rakisirana faqa Yeerusareenni oorureeqa moodaanaki kuquanauree qimasoo faqa misa aiqama Yisuna faqa Yooradanna nammarindari ooru fiqau.

*Yisufa kuqiranakiqari findifirana faqa kaqi marirana faqa faqaafa maridanoo mi ufafa.*

<sup>17</sup> Nari Yisufa iriseenoo Beetani maqusai ooruroofaqa qimamiqau Rasarusafa doo innau kuqufufaqa akundamaqaafanoo qaara faqa qaara faqa eenda madikaki faiqaqee idanoo.

<sup>18</sup> Beetani maqusa Yeerusaree aqa uqanna maridanoo. (Beetani maqusa Ubandeenara foora marida Yeerusaree maqusa Faarumaagaira foora marinau.)

<sup>19</sup> Yeerusaree adeedi marunara moomoo mindaraasa qumuree Maratasa Mariasa dadaaqi ikifaafau qida rooipee mariqau. Nari nifasaafa Rasarusafa kuqunara ikiraqee mariqau.

<sup>20</sup> Maratafa Yisufa ani qu ufana iriseenoo raudamakufanoo oonu afiqaidanoo minara qimamirara fufanoo Mariafa kaqi maaqaki marinau.

<sup>21</sup> Maratafa Yisuna qafamasee qimaminoo qinau, Oo Karaambaiqa anee anirainanoofau sia qini qifasaafa kuqiqini. Qaara faqa qaara faqa faasaana doo kuqufufaqa akundamasee maridaqa.

<sup>22</sup> Miqinoo marifaqa maridaqa, aneenna kai maqee nana ainainaree Anutufinnai nana ainainaree innaaru qinanoo ani amiannoo.

<sup>23</sup> Maratafa nari asookifa kuqunara iridanoo miqi qimasee qimaminau. Yisufa irisee qimaminoo qinau, Anutufa ani afaasaana kaifaa mara findifumaiseenoo kaqi marirana amiannoo.

<sup>24</sup> Maratafa mina iriseenoo qinau maa maqa maaqafa taikara faasaana Anutufa qini qisookina uqeerasee kaqi marirana amiannoo qinee minara iridaqa.

<sup>25</sup> Yisufa qimaminau, kuqiranakiqari mara findifirafa qiniki maridanoo. Kaqi marirana marirafa qiniki maridanoo. Yafasiqa anaasee fee qini saqarikinoo kuqinoo kaqi mariannoo kuqiranakiqari findifirafa qiniki marinara kaqi mariannoo.

<sup>26</sup> Yafasiqa anaasee fee kaqi maridanoo qini saqarikinoo naaru sia kuquannoo kaqi marirana marirafa qiniki marinara naaru naaru sia kuquannoo. Marata anee minara kuqaa fee qidanee.

<sup>27</sup> Maratafa iriseenoo qinau, eeo karaambaiqa anee ooqai maa maqa maaqanaki qumaneera asauku mundirafa Anutuna amaaku uqanna marianafa marianaqa qinee minara kuqaa iridaqa.

*Yisufa ikiraqoo ufafa.*

<sup>28</sup> Maratafa miqi qimaseenoo quandaki maqusai oonureenoo qumee kai Mariana aaramasee qimaminau. Ufasaa rakisirafa anidanoo ani aaraidanoo.

<sup>29</sup> Mariafa mi ufana iriseenoo kaqi kaqi findimeeqee kaqi unnaqufanoo oonu afiqarara finau.

<sup>30</sup> Yisufa sia maqusai aninau. Aanai Maratafa paquruqoo miqoo kai kaqi marinau.

<sup>31</sup> Mariafa raudamaki kaqi unnaqufanoo fufaqa Yuda maqannaasaa mina faqa mariusa mina qafamasee minara madikai ikiraqarara fidanoommifoo qimasee afaqee fiqau.

<sup>32</sup> Mariafa Yisufa marunnai oonu qafeenoo oorindari maqasaa aqufinoo ufa qimaminau. Oo karaambaiqa anee animariananoofau sia qini qifasaafa kuqiqini.

<sup>33</sup> Yisufa Mariana ikiraqarana qafoofanoo amuqusinoo mina aunduraki mandaikinau faqa ikiraqoona qafoofanoo amuqusinoo mina aunduraki mandaikinau.

<sup>34</sup> Miqimasee Yisufa irammirinoo qinau. Innee yai fee Rasarusana akundee fee qufaqa misa qiqau Karaambaiqa doo mai aniree qafa.

<sup>35</sup> Miqi qufanoo Yisufa faqa ikiraqanau.

<sup>36</sup> Yeerusaree maqusanaasa miqoo mariusa mina ikiraqarana qafeeqa qiqau. Oo qafa mifa minara kaaqa rimarifa ikiraqaidanoo.

<sup>37</sup> Miqi qufaqa akaqausa niqira ufa qiqau. Mifa nifu dimbarausa amiqimannisee marifa nanaree Rasarusana qaoo qinanoo sia kuquaqana.

*Yisufa Rasarusana kuqiranakinaana uqeroo ufafa.*

<sup>38</sup> Yisufa nari kai misa miqi qu ufanara akooqoofanoo nari aunduraki mandaikufanoo mi ufanara aiaaee qimaseenoo madikai oonuranau. Rasarusana iri ooni aamaraki quqasee ooni firaatia qumaree ititaqoofanoo marinau.

<sup>39</sup> Yisufa qimanniminoo qinau. Innee maa oonina rafaqaameeqeeqa quanda quandamma aquaqa. Miqi qimasooafa Maratafa Rasarusana auna qinau, Oo karaambaiqa mifa qaara faqa qaara faqa afuru faififa marifa fafunda mandaikammimarifaqa.

<sup>40</sup> Yisufa iriseenoo qimaminau. Qinee faasai qimamunnana anee qini saqarikinana anee Anutuna afeeka eeraarirana qafeennaranoo.

<sup>41</sup> Misa mina iriseeqa ooni firaatia afeeqeeqee mafi quqasoofanoo Yisufa nari oori uqeraseenoo Anutunara akooqoo innaaru qinoo qinau, Oo qini qikoofa dufi dufi anee qini ufa irimarianafa mariananoo.

<sup>42</sup> Anee maqee maqee qini innaaru qirana irimarianafa marianaqa. Maaqoo mariasa iriaqera innaaru qidaqa. Maaqoo mariasa anee qini diqiqamaqoonnana iriaqera innaaru qidaqa.

<sup>43</sup> Yisufa miqi qimaseenoo innaaru qimaseenoo firaa kari kuqirana aareenoo qinau. Rasarusana minakiqari rauda.

<sup>44</sup> Miqi qimasooofanoo qamunna afaqa kukuqamaqoofa kaqi marufanoo Rasarusafa findifinoo raudee qumuranau. Mina akiaqa faqa qamunna rumbaqoonarandee qumuranau. Yisufa qimanniminoo qinau. Doo qamunna idukusaifanoo fuani, qimasooofa miqimandoofanoo andeeqasoofanoo finau.

*Yisuna arirara tipundaaru ufafa.*

*(Mat 26:1-5; Mak 14:1-2; Ruk 22:1-2)*

<sup>45</sup> Yeerusaree maqusanaasa moomoosa Rasarusana ikiraqeeusa misa Yisufa Rasarusana findifumasoonaa qafeeqa kuqaa Anutuna faiqi fee qimasee minasaa mundiqaa mariqau.

<sup>46</sup> Misakiqari akaqausa Farisai amaana ufa qimarusa nimaqai Yeerusareenni ooruree Yisufa Rasarusana findifunara niranaqarufa qimannimiqau.

<sup>47</sup> Misa mina iriseeqa Farisai amaana ufa qimarusa faqa amaana maqasaa rakisimarusa faqa aiqama faiqi firaasa rakisirausa faqa moodaa qoo suqufi ufa qidaqa qiqau. Maasa naqi fee masee mina Yisuna rafaqafuanauree. Maa fasiqafa Yisufa moomoo firaa ainaina naaquqara ainaina auqaidanoo.

<sup>48</sup> Maasa mina afauaidafa faiqi anaasee maasa minnisee minasaa kai atooqeefoora. Miqifanoo Roomma maqannaasundiaqaa anireeqa maasa faiqi anaasee faqa daru

taikaidaqa maasa naaquqara amaana maqa faqa rapeepamma aqifaranoo. Miqifaqa maasa Yuda maqanna kuridianaura.

<sup>49</sup> Misakina uriqararana auqu Kaiafasafa mifa qimannimino qinau. Inniki moo fannoo sia irirana fisa mariafanoo.

<sup>50</sup> Faiqi anaase maasa aiqama kuqanoora moodaa fannoo aiqamausara kuqifaqa amana maasa amiqimandee mariana. [ <sup>51-52</sup> Kaiafasafa sia narí kaifau mi ufana qimannimino. Anutufa qimamunara kai mi ufana qimannimino. Kaiafasafa Yisunara Yuda maqannaasa nikiqara kuquanno Anutuna faiqi namu mina ufa irimarinausara faqa moodaa iriranasaa mariaqera kuquanno fee qinau.]

<sup>53</sup> Doo mi faasaannasaqari Yuda maqanna uriqararaura Yisuna arira ufa oosarasee deedaqigau.

<sup>54</sup> Yisufa mina iriseenoo miqooqari sia Yudeea maqa maaqaki akooqoo nimirau. Maqusa moo auqu Eefaraimma maqusai narí faiqi namufaqa ooqu marinau. Eefaraimma aadana maqa maaqa atisaa marinau.

<sup>55</sup> Yisufa Eefaraimma maqa maaqaki marufanoo Yuda maqanna qoomaqa fira qoomaqa ainnaaqarara qoomaqa adeedi ranau. Aukuana aukuaana Yuda maqanna oosana ainnaaqarara qoomaqa adeedi ramafufaqa faiqi anaase aiqama suqumaree miqoo Yeerusaree maqusai ooruraidaqa nári mandainaina findaukee mariqau. Aukuana aukuaana miqimariqau.

<sup>57</sup> Amaana maqasaa rakisimarusa faqa Farisai amaana ufa qimarusa faqa Yisunara faiqi anaase qimannimiqau. Innee ninnabaqa Yisuna paqurimasee dadi oonurandee mini qimaqimifaqa maasa mina qumaraanaura.

<sup>56</sup> Faiqi anaase fira amaana maqaki Yeerusareenni suqufufaqa Yisunara randaidaqa maaqi qimasee narí qimami narí qimami qigau. Yisufa fira qoomaqa anifeeraanoo sia fee aniraanno. Innee minara nana iriree iridee.

## 12

*Beetani maqusai anaasee moo fannoo Yisuna aikusaa amiqira afundimaru fadameena adia amaqqoo ufafa.*

*(Mat 26:6-13; Mak 14:3-9)*

<sup>1</sup> Mi ainnaaqarara qoomaqa Yeerusaree maqusai adeedi reenoo dinni qisauku taikasee dinni ani moodaa faasaana aiqaqainanoo mi qoomaqa kambiqaarara imarufanoo Yisufa Beetani maqusai oonuranau. Yisufa Rasarusana kuqiranakinaana findifu maqusanaki aniranau.

<sup>2</sup> Yisufa aniroofaqa (Rasarusana mara findifunara iriseeqa mina akiqara qoomaqa firaana suqasee naida amiqau.) Maratafa qoomaqa sakeeqaida nimimarufanoo Rasarusafa Yisuna faqa ooqumarifi narana nanau.

(Misa oosana maaqimminoo marinau. Misa qaindasaa fifandirifiqa nisaataa saunarsaida niku uqusaida neemarusa marida miqimandee neemariqau.)

<sup>3</sup> Neemarufanoo Rasarusana asookifa Mariafa Yisuna anoona amarafa fadameena taqu firaana fira feefauru aqusaida mareemaruna qumareenoo amiqira afundimaru fadameena mina auqu narada fadameena Yisuna aikumau adia amaqqanau. Adia amaqqaseenoo narí akiqaa asausi kisaqaa qumareenoo minannai utitiganau. Miqima-soofanoo afunda firaafa misa maru maqqanaki qumbiqanau.

<sup>4</sup> Yisuna faiqi namuqi qari moo fannoo mina auqu Yudasifa Keerioota maqannaafa Yisuna ueeqaaninna fasiqafa marinau. Mi fasiqafa Yudasifa amiqira afundimaru fadameena moomoo qafamaseenoo maaqi qinau.

<sup>5</sup> Maa fadameenna fira feefauru mareemaria fadameenafa. Nanaree fifau adieenee. Saina marinana qumiasana faqaana amiseenana moomoo munnimma 300 maraqaana. Maraseenana kudi fasiqa anaaseeqa kaqi nimiaqaana. (Mi aukuaana Yuda maqannaasa Mooseena ufa qaindusidaqa kudi fasiqauqa aiqama ainana dadaaqiqa nimimariqau.)

<sup>6</sup> Yudasifa sia kudi fasiqara irimarufa kaqi fifau ufa marunara miqi qinau. Mifa ummuarimarufa marinau Yisuna faiqi namu pausakinaana kaqi ummuarimarufa mifa maridanoo miqi qinau.

<sup>7</sup> Yisufa mina iriseenoo narí maaqi qimasee qimaminau. Marianara sia miqi qia. Saina miqiani. Afundi fadameenna ataa kaqi marina qinee kuquananoo qini qifaaqai akuqimaqaani.

<sup>8</sup> Anee kudi fasiqa anaaseeqara qianandee. Kudi fasiqa aanaaseeqa naaru naaru inniki marifaranoo. Qinee sia kisaqasaa mariana qusasaa taikaanura. Saina fadameena adiaqimaqaani.

*Rasarusana arirara tipundaaru ufafa.*

<sup>9</sup> Yisufa Beetani maqusai animarufaqa Yeerusaree maqusaindari moomoosa qafarara ooqu fiqau. Kuqiranakiqari findifuna Rasarusana faqa qafararee qimasee ooqu fiqau.

<sup>10-11</sup> Faiqí anaasee moomoosa Yeerusareendari Yisunasaa atooqaidaqa moomoo ooqu fiqau. Miqíufaqa amaana maqasaa rakisimarusa oommasee qíqau. Rasarusafa kuqiranakiqari findifunara irisee misa Yisunasaa atooqarara ooqu fimarifaqa saina Rasarusana faqa aruanauree qimasee deedaqíqau.

*Yisufa Karaambaiqa iundee toonkisa Yeerusaree maqusai keeqoo ufafa.*  
(Mat 21:1-11; Mak 11:1-11; Ruk 19:28-40)

<sup>12</sup> Faiqí anaasee ainnaaqarara oomaqara maqusa maqusaindari Yeerusaree maqusai suqusee mariusa Yisufa aanai urufaqa afiqarara moomoosa ooqu fiqau.

<sup>13</sup> Ooqu afiqarara ooqu fidaqa koopeena amanee fooqaana moomoo atEEKamaree ooqu fiqau. (Misa nariqa qimiriqa Yisunara maaqí qíqau. Ooqai Anutuna asauku mundirafa kambiqanoo marifa uridanoo. Mifa maasa qíqa karaambaiqaikirara uridanoo.) Misa ooqu fidaqa maaqí qimasee firaa kari faaqariqau. Anutuna amooqía mina auqu uqeeraa. Anutufa qufanoo kambiqarafa uridanoo, Anutufa mina amiqí amiqiani, Anutufa Isararee maqanna Karaambaiqa amiqí amiqiani.

<sup>14</sup> Yisufa doonki moo maqee innooqee marunnasaa paqurimasee minasaa akaramafi oqumari finoo Yeerusareenni ooru finau. Miqíuna ooqai tamummaqara fasiqa akara rumaqoomau ooru finau.

<sup>15</sup> Yeerusaree maqusa moo auqu Sioona maqusee qimarinau. Minara ooqeenaa tamummaqara fasiqafa maaqí qimasee akara rinau. Innee Sioona maqusanaasa sia rufiaaqa. Inni karaambaiqa innee iannai uridanoommi, doonkisa ooqu marifi uridanoo.

<sup>16</sup> Yisuna faiqí namu faiqí anaasee qambaana Yisuna faqa ooru fiqau. Misa tamummaqara fasiqa akara iridaqa anoonara sia iridaqa fiqau. Kasooqaqee Yisufa kuqiranakiqari findifufaqa misa oonumafi iriseeqa qíqau. Maasa ooqai akara rumaqoomau Yisuna faqa Yeerusareenni ooru fiqafana.

<sup>17</sup> Yisufa Rasarusana aarofanoo findifuna qafeusa Yeerusaree maqusaki suqíqa marusa Rasarusanara qimannimiqau.

<sup>18</sup> Faiqí anaasee moomoo mi ufana iriseeqa maaqí qíqau. Firaa ainaina auqeemarina ooqu afiqamaree uruqaqee qimasee ooqu afiqee uríqau.

<sup>19</sup> Farisai amaana ufa qimarusa oomasee maaqí qíqau. Qafaa doo maasa kadiqaidaqa faiqí anaasee minnikai quandaídaqa.

*Kirisa maqannaasa Yisuna qafararee qu ufafa.*

<sup>20</sup> Yeerusareenni ainaaqarara qoomaqara suqimarusakí Kirisa maqannaasa nianai nári maqusaindari anusa faqa miqoo Yuda maqannaasa faqa animariqau. Misa faqa Anutuna qoomaqa sakasee namasee Anutuna amooqiraree qimasee animariqau.

<sup>21</sup> Kirisa maqannaasa aniree Firipina irammiriqa qíqau. Oo maa fasiqa, Yisuna qafararee qidaqa amanee maasa qifiqee finaqa qafaanauree. Firipifa Beetasáida maqusaindaraafa Kariree maqa maaqakinaafa marufa.

<sup>22</sup> Firipifa Anduruna paqurimasee misandiri Yisufuqoo oonuree Kirisa maqannaasara qimamiqau.

<sup>23</sup> Yisufa misara iriseenoo qimanniminoo qinau. Anutufa faiqí nimaaku qini duqu firaaqoo uqeerara aukuaana doo animaridanoo. Sia maa maqee imariasa imariandeeffau masenoofau qini duqu uqeeraanoofau. Qini firaa aupurara kuqiranannai qini duqu uqeeraanoo arenaanoo.

<sup>24</sup> Qinee anoona ufa inni qimannimídaqa. Nandi asumu nariara kaqí maridanoo aaduma maridanoo. (Yisufa nari kuqiranara qidanoo nandi asumu kikiqá usinau.) Mifa maqaki ummaqusaifanoo putaa inanoo moomoo kambiqaanoo sia nariraa mariannoo.

<sup>25</sup> Yafasiqa anaasee fee maaqoo nari mariranara rimarifa nandi asumuara foora sia kafa kambiqaanoo mifa nari marirana kukupaanoo. Yafasiqa anaasee fee maaqoo maa maqanasaa nari mariranara akooqainafa maqaki ummaqusainanoo nari marirana afeediiseenoo naaru marirana maraanoo.

<sup>26</sup> Innee Kirisa maqannaasa qimannimia. Yafasiqa anaasee fee qini ainainira faiqikiraree qimaseenoo aufadeemarifa mifa nari maaqoo marirana quqasee qini faqa finafa qinee fuannannai mifa faqa miqoo oonu marida qini dadaaqiannoo. Yafasiqa anaasee fee qini duqu uqeeraanoo mina auqu faqa qini qikoofa uqeeraanoo.

*Yisufa nari kuquaninna ufana qimannimu ufafa.*

<sup>27</sup> Yisufa Yeerusareenni oorufidanoo nari aqa marusa qimanniminu. Maqee qini daundura fifau fafau inoo marifaqa nana ufee qianauree. Qinee naqimasee qeeqa



qikoonara qiana qini kuqiranara qaoo qiannoo fee. Qinee firaa aupurarana marasee maa maruandee fuka kuquanaree qimasee qumuafanusa maridaqa doo qusasaa maridaqa naqimasee qaoo qiraree sia qaoo qianauro.

<sup>28</sup> Miqi qimasee nari aaqa marusa qimannimiseenoo Yisufa quandaqinoo nari akoonara Anutunara innaaru qinoo qinau. Oo qipoo, aneenna auqu amooqirana uqeeraa. Miqi qimasoofoanoo Anutuna ufa inaarunaindari quminoo qinau. Doo qinee qeeqa duqu amooqirana uqeereeqa doo kafaa uqeeraanauree qinau.

<sup>29</sup> Miqi qimasoofoaqa faiqi anaasee moomoo Yisuna faqa Yeerusareenni ooru fimarusa mi ufana iriseeqa qiqau. Innaarunai qiifoo qufaqa akaqausa qiqau. Qangiroomoo fannoo mina faqa ufa qidanoommi.

<sup>30</sup> Yisufa misa ufa iriseenoo qimanniminoo qinau. Sia qiniarau qidaqinoo inniara qidaqinoo.

<sup>31</sup> Doo maqee Anutufa maa maqa maaqanakinaasa qini darifandinanara nari aanooqira ufa nimiannoo. Doo maqee maa maqa maaqanaki uriqararafa Sadannafa taikaannoo.

<sup>32</sup> Qini daruseeqa auniriranasaa quqaseeqa maqaki rakiqasee uqeeraqisaifaqa maqasaa aiqamatinaidaraasa suqu moodaaqoo qeeqa daaqa quqaanaura.

<sup>33</sup> Miqimasee Yisufa nari kuquaninna oosana qimanniminoo.

<sup>34</sup> Qimannimufaqa misa qiqau. Maasa sanda akarakinnaa ufa asauku mundiranara naaru naaru mariannoo fee qidaqa. Anee faiqi nimaaku aunirira saqarisaa kuqiraree qimariannana, naqi fee qidane miqi qidane. Faiqi nimaakuara anee qianafa yafee mifa maridanoo fee.

<sup>35</sup> Miqi qimasoofoanoo Yisufa mina iriseenoo qinau. Kaaqa qarafa inniki qusasaa mariannoo. Kaaqa qarafa mariqoo mi kaaqa qaranasaa kai mariaqa. Miqimasee marifanoo asukuna fannoo sia rafaqaqfuannoo. Asukunaki nimarifa sia aana qafaidanoo kaqimbidanoo.

<sup>36</sup> Kaaqa qarafa mariqoo innee minara riqa anoonee qimasee mi mau fuaqa miqiga innee kaaqa qaranafaqaasa mariaqa.

*Yuda maqanna faiqi firaa Yisunara sia Anutuna faiqi fee qu ufafa.*

Miqi qinoo qimannimiseenoo nariara moosaa finau. Miqoo oonu kukeeqanau.

<sup>37</sup> Yisufa oosana oosana firaa ainaina faiqi anaasee nifusaa auqemarinau. Sia misa minara oonumafi iriqau.

<sup>38</sup> Ooqai Anutuna tamummaqara fasiqa moo auqu Eesaia mifa misa oosana akara rumaqoofa maridanoo. Mifa maaqi qimasee akara rinau.

Oo karaambaiga, yafee moo fannoo maasa ufa irinoofeeinau sia moo fannoo. Karaambaiga nari afeeka yau yausee uqannifiqoofaqee anoonee qidee. Sia moo fannoo kuqaa fee qinau.

<sup>39</sup> Miqi qimasee ooqai akara rumaqoofa marufaqa umimmaqidaqa sia Yisunara anoonee qiqau. Eesaiaafa misara kaifaa maaqi qimasee akara rumaqoofa maridanoo.

<sup>40</sup> Anutufa misa nifu dimbaqaifaqa maridaqa. Mifa misa nitikura ititaquqaifaqa mariaqera. Misa nifu sia qafaqera misa naaqoo sia iriaqera. Qinee unnannai faqa sia quandaqifaqa sia amiqimannisaaqera.

<sup>41</sup> Eesaiaafa sia fifaufau maa ufana qimasee akara rumaqoofau maridanoofau. Mifa ooqaindari Yisufa sia kambiyoqoo afu pisipasamafinoo Yisuna afeeka eeraarirana qafaidanoo akara rimarufa maridanoo.

<sup>42</sup> Kuqaa moomoosa Anutuna tamummaqaraura ufama fidaqa Yisunara sia iriqau. Miqidaqa Yuda maqanna uriqararaura akaqausa moomoosa Anutuna tamummaqaraura ufama fidaqa Yisunara sia iriqau. Miqidaqa Yuda maqanna uriqararaura akaqausa kukeeqasee Yisunara iri mariqau. Farisai amaana ufa qimarusa amaana maqakiqari maasa diqiqamasaiifaqa sia kaifaa keeqaanauroo qimasaida qumeeree mariqau.

<sup>43</sup> Misa sia Anutuna afusaa eedoo qiranara rimariqau. Faiqi nifusaa eedoo qiranara kai kaaqa rimarunara Yisunara kukeeqee mariqau.

*Taikara aukwana Yisuna ufa fannoo faiqi anaasee rainanimaqara ufa qimariannoo.*

<sup>44</sup> Yisufa kafaa moo kari faiqi anaasee qimanniminoo qinau. Yafasiqa anaasee qini saqarikidanoo fee. Mifa sia qini kai, qini diqiqamaqoona mina faqa saqarikidanoo.

<sup>45</sup> Yafasiqa anaasee fee qini qiqafaidanoo fee mifa qini diqiqamaqoona mina faqa qafaidanoo.

<sup>46</sup> Qinee kaaqa qaraura maa maqa maaqanaki animaridaqa. Qiniki mariasa sia asukunaki mariaqera animaridaqa.

<sup>47</sup> Yafee moo fannoo qini ufa irisee sia auqainnana sia qinee qeeqa ufa amianauro. Sia qinee doori runira ufa nimiraree qimasee qumuafanusa maridaqa. Qinee faiqi anaasee

Anutuna nifairirana kinaana qumarasee asumu marirana nimianeera qumuafanausa maridaqa.

<sup>48</sup> Yafee moo fannoo qini minnisainafa qinee ufa qimarunnana minnisainafa sia qeeqa ufa mina amianauna. Kasoo taikara faasaana Anutufa qini dookinaa ufa maqee qimannimmarunnana maraseenoo minannoo naruannoo.

<sup>49</sup> Qinee sia qeeqa iriranannai ufa qimannimidaqa qini diqiqamaqoona qini qikoona uqaqifiqoo ainaina kai qimannimidaqa uqannifiqaidafa.

<sup>50</sup> Qinee qeeqa qikoona ufa iridaqa mina ufa fannoo kai naaru naaru marirana nimidanoo. Qinee minara iridaqa qeeqa qikoona ufa kai qimannimidaqa.

## 13

*Yisufa nari faiqi namu niku namari uqu ufafa.*

<sup>1</sup> Anutuna ainnaagarara qoomaqa adeedi ramafufanoo Yisufa maa maqana quqasee doo nari akoofinai firafa adeedi reemarufanoo minara Yisufa irimarinau. Maa maqa maaqanakinaasa narisaa atooqemariasara amuqusufanoo ridanoo kaqi misara aidi-marufanoo fidanoo kasaagai munu kuqinau.

<sup>2</sup> Yisufa narana eendaki sakasaida nari faiqi namufaqa neemarinau. Yudasifa Keerioota maqusaindaraafa indaruqaa Simoona amarana amaaku mifa Yisuna faiqi namufaqa miqoo marufa faasai Sadannafa mina dadaaqufanoo Yisunara ueeqararee qidanoo deedaqimarinau.

<sup>3</sup> Anutufa aiqama afeeka innaaruna faqa maqa faqa Yisuna aramandunnai quqaqoofanoo marufanoo Yisufa mina irida marinau. Nari Anutufinaindari qumufa iridanoo marinau. Nari kaifaa Anutufinnai ooru firafa adeedi ranoo marufanoo minara faqa irida marinau.

<sup>4-5</sup> Yisufa nari faiqi namufaqa narana namaseenoo findifinoo nari siuta raipaqusee taura qumareenoo nari aranandauqanna rumbaseenoo difaani maraseenoo nammari minaki adiasenoo nari faiqi namu niku nammaruqusaiddanoo taurannai rukanni-maqemarinau.

(Yisufa maru aukuaana mina maqanna oosana maaqimminoo marinau. Faiqi moo fannoo moo maqusaindari nari aqoondi qafararee qimasee ani mina maaqaki keeqafinano maaqa akoofa mi fasiqana qafeenoo nari ainainira fasiqa ureeqarana aaramasee qimaminoo anee maa fasiqana aiku nammaruquseenana taura qumaree rukasainanoo ooqumariani. Mi oosanna niku nammaruqira saika sia uriqararawsa maree mariqau ureeqarawsa faaqa fasiqa fooqaasa miqimariqau.)

<sup>6</sup> Yisufa Simoona moo auqu Peetooroona aiku nammaruqirarufanoo Simoona moo auqu Peetooroofa qinau. Oo Karaambaiga kuqaa fee anee qini qiku nammaruqiraree qidane. Sia miqia, anee uriqararafa mariananoo.

<sup>7</sup> Yisufa qinau, Eeoo nammari uquanaura anee maqee sia qini oosana irimariananoo kasooqaqee irrinnaranoo.

<sup>8</sup> Peetooroofa qinau, anee maasa uriqararafa mariananoo naaru naaru sia uqanna qini manda qiku nammaruqaa.

Yisufa mina iriseenoo qinau. Qinee ani aiku sia nammari uquanana maaqooqari anee sia qini faiqikinnaranoo.

<sup>9</sup> Simoona moo auqu Peetooroofa mi ufana iriseenoo qinau. Oo karaambaiga sia qiku kai nammaruqaa qisauku faqa qikiqaa faqa aiqama nammari uqaa.

<sup>10</sup> Yisufa mina iriseenoo qinau. Faiqi nammari auqemariasaa aiqama nifaaga amiqinoo maridanoo niku kai doona kookoomma akinoo maridanoo. Innee aiqama amiqiaq mariafanoo moodaa fannoo mandaikinoo marifaqa qafaidafa.

<sup>11</sup> Yisufa faasai nari ueeqee maruna qafaidanoo miqi qinau. Inni nifaaga aiqama nammari uqinoo maridanoo. Moodaa fannoo kai sia nammari auqara fee qinau. Nari ueeqaaninnanara iriseenoo miqi qinau.

<sup>12</sup> Yisufa nari faiqi namu niku nammari uquseenoo kafa nari siuta afisumaree kafa misa faqa ooqumari finoo qimannimino qinau. Qinee inni niku nammari uqunnanara iridee sia fee iridee.

<sup>13</sup> Doo maqee mina nammari uqunnana oosana kooroo ianaura. Innee qiniara ufasaa rakisira fee karaambaigee qimariafanoo. Doo mina kuqaa qimariafanoo qinee miqirausa maridaqa.

<sup>14</sup> Qinee inni ufasaa rakisirausa inni karaambaiga maridaqa ureeqarawsa saika mareemariana misa naanna ridaqa inni niku nammari uqidaqa innee miqi kai iqa qini daanna reeqa ureeqara fasiqa anaaseera foora nari dadaaqi nari dadaaqiaqa.

<sup>15</sup> Qinee uqannifiqaunnana qafeeqa qinee unandee kai iaqanani.

<sup>16</sup> Qinee kuqaa anoona ufa inni qimannimidaqa. Ainainira fasiqa fannoo sia nari rakisirana uriqararafa maridanoo. Ufa maree fimari fasiqafa sia aqiqeemarina uraaqararafa maridanoo.

<sup>17</sup> Innee maqee maa ufana anoona naaqooki irimariafanoo. Innee maa ufana irisee auqaiifanoo asasirafa mariannoo.

<sup>18</sup> Yisufa kaifaa nari faiqi namu maaqi qimasee qimanniminau. Anutuna tamum-maqara fasiqauqa ooqeenaa akara oosana maaqimminoo maridanoo.

Inniqiqari moodaa fannoo qini narana qini faqa neemarfifa mifa qini namuqaakinoo aranaiqi daruannoo.

Maa akarana oosana inniki kambiqaannoo, sia inni aiqamara qidaqa. Qinee oonu mareeqee qeeqaindika maqaunusa mariafanoo moodaa fannoo kai.

<sup>19</sup> Qinee maqeesaa qimannimidaqa sia kambiqa kamuuqoo qimannimidaqa. Kambiqainga innee qiniara irifaranoo. Qinee qeeqaraa ufa qunausa doo misaki maridaqa.

<sup>20</sup> Qinee anoona ufa kuqaa qimannimidaqa. Faiqi anaasee moo fannoo qinee inni niqiqamaqaanusa niqoondikinafa qini faqa qiqoondikidanoo. Faiqi anaasee moo fannoo qini qiqoondikamma qimaqainafa qini diqiqamaqoona faqa kai aqoondikidanoo.

*Yisufa nari uqeeqeeqefandinna ufana kooroo u ufafa.*

*(Mat 26:20-25; Mak 14:17-21; Ruk 22:21-23)*

<sup>21</sup> Yisufa minara qimanniminsoofanoo nari aunduraki oonumafi irufanoo amuqusu-fanoo kaffaa kooroomasee qimanniminau. Qinee anoona ufa qimannimidaqa inniqiqari moo fannoo qiniara ueeqaannoo.

<sup>22</sup> Yisuna faiqi namu mi ufana iriseeqa tautumakufaqa nari qafee nari qafee idaqa randaqau.

<sup>23</sup> Yisuna afaaqasaa aqoondi fannoo mina aqa ooqumarifi marinau.

<sup>24</sup> Simoonna moo auqu Peetooroofa mi fasiqana auqamaseenoo qinau anee karaambaiga irammirisee iria. Yafasiqanaree qidanoo fee yafee ani ueeqaannoo fee.

<sup>25</sup> Miqi qufanoo mi fasiqafa Yisuna aqa firambaqafufanoo maqandanai irammirinau Karaambaiga yafee ani ueeqaannoo fee.

<sup>26</sup> Yisufa qinau, qinee feemu rakeemandeeqa sauna anoona fooqaanaki raaraamandee amianana qafa. Mifa kai qini ueeqaannoo. Miqi qimasee Yisufa feemu rakeemaseenoo sauna anoona fooqaanaki raaraameeqeenoo Yudasifa Keerioota maqannaa Simoonna amarana amaaku aminau.

<sup>27</sup> Yudasifa mi feemuna qumarasee namasoofofanoo doo Sadannafa mina aundurai keeqanau. Miqufanoo Yisufa Yudasina qimaminoo qinau. Doo anee aneenna inna ainaina doo dauni dauni ia.

<sup>28</sup> Miqoo marusa sia Yisuna ufa oosana iriqau.

<sup>29</sup> Yudasifa Yisuna faiqi namu munnimmasaa rakisimarufa marufanoo Yisufa aqiqoofaqa misa narana aina fi fi maraanifeera aqiqee maqi qiqau. Kudi fasiqauqa munnimma nimiannoo fee qiqau.

<sup>30</sup> Yudasifa mi feemuna mara namaseenoo findimeeqeenoo aaqee kai eendaki raudamaki finau.

*Yisufa fuka aaquqira ufa qimannimu ufafa.*

<sup>31</sup> Yudasifa fufanoo Yisufa kaifaa nari faiqi namu qimanniminoo qinau. Doo maqee faiqi nimaaku qini amiqi amiqira afeeka eeraarirafa doo kooroo inoo maridanoo.

<sup>32</sup> Anutuna afeeka eeraarirafa qinisaa kooroo inoo maridanoo, Anutufa nari uqanna quandaki qini qifaqa firaqoo areenaannoo, qusasa maqee uqanna miqianoo.

<sup>33</sup> Qini faiqi namu sia kisaaqasaa inniki marianaara. Yuda maqannaa qimannimi-afannandee kai inni qimannimidaqa. Innee qiniara randee sia paqurifaranoo. Qinee fuannaqoo sia innee amana fifaranao.

<sup>34</sup> Doo maqee qinee qimannimidaqa. Innee nariara nariara nimuqusidaqa nariara nariara ruaqa. Qinee inniara qimuqusufaqa inniara rimariqia innee faqa qini daanna raaqa nariara nariara ruaqa.

<sup>35</sup> Innee nariara nariara rimarifaqa aiqamausa inni nindafeeqa inniara boo Yisuna faiqi namu miqidammiafoo qiaqa.

*Yisufa Peetooroofa nariara qaoo qianinna ufana kooroo u ufafa.*

*(Mat 26:31-35; Mak 14:27-31; Ruk 22:31-34)*

<sup>36</sup> Yisufa miqi qimasoofofanoo Simoonna moo auqu Peetooroofa irammirinoo qinau, Oo Karaambaiga anee yai fee finaqqee maasa sia ani faqa fuanaaree.

Yisufa iriseenoo qinau, Qinee maqee fuannannai anee sia amana qini faqa finnaranoo, kasooqaaqee anee qini faqa finnaranoo.

<sup>37</sup> Simoona moo auqu Peetooroofa iriseenoo qimaminau, Karaambaiqa anee naqi naqee qinee sia ani faqa fuanauree. Qinee aniara kuqanauranoo.

<sup>38</sup> Yisufa mi ufana iriseenoo qimaminoo qinuu, Kuqaa fee anee maqee qiniara kuqinnaree, qinee anoona ufa ani qimamidaga fafaa eendaki kookooraana sia ufa qinnakamuqoo anee kuqiranara rufiaseenana qaaramoo kari qiniara sia qafaunausee qinanoo kookooraana ufa qiannoo.

## 14

*Yisufa nariara nari akoofa marinnai fimaria aanausa qinee maridee qu ufafa.*

<sup>1</sup> Yisufa miqi qimaseenoo aiqama qimanniminoo qinuu. Innee sia nimukee marinaqa maparaaiaga. Innee Anutuna saqariki mariafanoo doo qini faqa saqarikiaga.

<sup>2</sup> Qini qikoona innaaruna maqusaki moomoo maqa nari aaga nari aaga maridanoo. Qinee maindari ooruree innee ooru fifandinna maqana auqirara ooru fidaqa. Minara qinee kuqaa anoona ufa kai inni qimannimidaga. Sia anoona marinaqau sia qimannimu-naiqini. Kuqaa anoona marifaqa qimannimidaga.

<sup>3</sup> Qinee innaarunai oorureeqa innee ooru fifandinna maqusana deedaqamasee qumu nifiqee minni murunnisaanura. Innee qini faqa mariaqeera miqianura.

<sup>4</sup> Innee qinee marunnannai fimaria aanara irimariafanoo.

<sup>5</sup> Toomasifa mi ufana iriseenoo qinuu, Anee fimariannanara maasa sia iridaqa. Naqimasee fee mi aannara irianauree.

<sup>6</sup> Yisufa iriseenoo maaqi qimaseenoo qimaminoo qinuu, qinee mi aanausa maridaqa. Qinee kuqaa anoona ufa maridaqa. Naaru naaru marirafa qiniki maridanoo qinee misa maridaqa. Sia moo fannoo kaqi qini qikoofinnai fidanoo qinimau kai fifaranoo.

<sup>7</sup> Innee qiniara irifau qini qikoona faqa irini. Maqee mariaqooqari qini qikoonara iriqa qini qikoona qafee mariafanoo.

<sup>8</sup> Firipifa mi ufana iriseenoo Yisuna qimaminoo qinuu, Oo karaambaiqa aneenna akoona uqaqifiqainaga qafamasee doo fee qianura.

<sup>9</sup> Yisufa mina iriseenoo akooqoofanoo raiqaseenoo qinuu. Firipi qinee kisaagasaa inni faqa mariafanaua marunana anee sia irirana irimariananoo. Yafasiqa anaasee fee qini qifafainafa doo qini qikoona qafaidanoo. Innee nanaree qiniara aneenna akoona uqaqifiqaannee q inanee.

<sup>10</sup> Firipi anee sia fee qini ufara anoonee qidanee. Qinee qipaqaenaki faqa maridaqa mifa qiniki faqa maridanoo sia fee anee mi ufana iridanee. Yisufa kafa nari faiqi namu aiqama qimanniminoo qinuu. Qinee inni ufa qimannimimaru nafa sia qeeqa daundurakinaana qimannimidaga. Qini qikoofa qiniki marifa nari irirana iriseenoo qifaqa nari qimau kai fidaqa qimannimidaga.

<sup>11</sup> Innee maa ufana irisee anoonee qiaqa. Qinee qeeqa qikoonaki maridaqa mifa qiniki faqa maridanoo. Innee qini ufara sia fee qimasee qinee auqaannainaina faiqi sia auqaqaa ira ainaina nifunoo qafamasee Anutufa mina faqa maridanoo fee qiaqa.

<sup>12</sup> Qinee anoona ufa qimannimidaga faiqi anaasee moo fannoo qini saqarikinafa qinee ianandee iannoo. Qinee qeeqa qikoofinnai fuannanara qini saqarikinafa sia qini daanna kai raannoo qini saika uraaqaranoo mariannoo. Mina oosana maaqimminoo maridanoo.

<sup>13</sup> Innee innaaru qidaqa qini duqusaa qimasee innaaru qifaqa nimianura. Sia moo ainana sia nimianura innaaru qifaqa nimianura. Qini qikoona afaaqa areenarafa qinisaqari faqa areenanifeera nimianura.

<sup>14</sup> Innee qini duqusaa qimasee innaaru qifaqa qinee mi ainainna miqimannisaanura-noo.

*Yisufa naaquqara maraquna nimiraree qu ufafa.*

<sup>15</sup> Yisufa nari faiqi namu kaqi qimannimidanoo qinuu. Innee qiniara riqa qinee qimannimafannufana andeeqasee qumareefaranoo. Sia qiniara riqa sia qinee qiafannufana qumareefaranoo.

<sup>16</sup> Qinee inni minnisee ooru fiqa qeeqa qikoona irammiriananoo Anutuna dadaqira afeeka maraquna nimiannoo. Mifa kuqaa anoona ufa giroosana maraquna qumu mariannoo, mi maraqunafa naaru naaru inni faqa mariannoo.

<sup>17</sup> Maa maqanasaa mariasa sia qini Yisusa mandaaqee marinausa sia amana mi maraqunna mareefaranoo. Misa sia mina qafaidaqa sia minara irimariafanoo minara sia mareefaranoo. Mifa inni faqa mapukusee maridanoo kuqaa inni naundurui anoona mariannoo. Mifa inni faqa marifaqa innee mi maraqunna oosana irimariafanoo.

<sup>18</sup> Qinee sia inni mininnisaanura qinee oorureeqa Anutuna maraquna aqiqaananoo qumuree inni faqa marida dadaqianoo.

<sup>19</sup> Kaqikaagoo maa maqanasaagaraa irirana faqaasa sia qini qiqafeefaranoo. Innee kai qini qiqafeefaranoo. Qinee kaqi marirausa maridaqa minara innee kaqi marirana mareefaranoo.

<sup>20</sup> Qinee qeeqa qikoonaki maridaqa kafaa innee qiniki mariafanoo qinee inniki maridaqa. Anutuna maraqa qumuaninna faasaana mi faasaanna mi ufana oosana amiqimandee irirafano.

<sup>21</sup> Yafasiqa anaasee fee qinee qimannimifanna ufana irisee maree marifandinausa misa kai qiniara rifandinausa marifara. Qiniara rimarina fasiqa anaaseesara qini qikoofa misara faqa ruannoo qinee faqa mi fasiqa anaaseesara ruanaura qeeqaindi anoona afeeka uqannifiqaanaura.

<sup>22</sup> Yudasina amarafa Yisuna irammirinoo qinau, Oo Karaambaiga naqimaseenanee anee maasa qifusaa kai kooroo innaree maa maqa maaqanasaagaraa irirana faqaasa nifusaa kukeeqararee qidanee.

<sup>23</sup> Yisufa iriseenoo qinau. Yafasiqa anaasee fee qiniara rimarinafa qini ufa maree mari fasiqa anaaseefa mifa qiniara rimarifa mariannoo. Miqinna fasiqa anaaseena qini qikoofa Anutufa minara faqa ruannoo. Mifa faqa qinee faqa mi fasiqa anaaseesa innannai oonuree umee mina faqa marianaura, miqimaseeqa maasa inni nifusaa kai koorooianaura. Maqasaaqaraa irirana faqaasa nifusaa kukeeqaanaura.

<sup>24</sup> Yafasiqa anaaseesee sia qiniara rinausa misa qini ufa sia irifara. Qinee qimannimira ufa innee irimariafanoo, sia qinindi maridanoo, qini qikoofa qini diqiqamaqainaindi minaindi maridanoo.

<sup>25</sup> Qinee maa ufausa inni faqa kaqi maridaqa qimannimidaqa.

<sup>26</sup> Inni fuka dadaaqirafa naaquqara maraqa qini qikoofa kasoqagee nimianinnafa mifa aigama ainainara qimannimiannoo. Qinee faqa aigama ufa qimannimifannana mifa minara inni naaqoo auqainaqa oonumafi irirafano.

<sup>27</sup> Qinee naundura asoarana inni nimidaqa. Qinee qiniki mari naundura asoarana inni nimidaqa. Maa maqanasaa mariasa sia misa naanna ramasee inni nimida. Amiqimandee qeeqa asoarana nimianaura. Sia inni naundura rapikiani sia rufiaqa rufiaqiaqa.

<sup>28</sup> Qinee maqee maaqooqari kafaa ooru fuanaura oorureeqa marikaqa oorurandee gumureeqa inni faqa marianaura. Sia qinee ooru fuannanara innee minara rufiaqa. Innee kuqaa qiniara ridau qinee qeeqa qikoofinnai fuannanara susummaqimaqani. Qini qikoofa qini uriqararafa maridanoo minara susummaqimaqani.

<sup>29</sup> Qinee maqee sia kambiquauna kamuqoo aigama ainainara qimannimidaqa. Kambiqafinaqa innee qiniara iriaqeraa qimannimidaqa.

<sup>30</sup> Qinee sia amana inni faqa kisaqaqasaa ufa qianaura. Maa maqanasaa rakisirafa Sadannafa doo anidanoo qini afeeka fannoo mina afeeka uraaqaranoo maridanoo.

<sup>31</sup> Maa maqanasaaqaraasa qinee qeeqa qikoonara rimarunnana minara iriaqeraa mina ufamau andeeqasee fidaqa qinee qeeqa kai irisee Sadanna asauku ameemaanaai oonuree kuqunaura. Miqi qimaseenoo Yisufa nari faiqi numara doo uqeraifaqa maaqooqari moosaa fuane qimasee uqereenoo moosaa finau.

## 15

*Yisufa nariara qinee uainna sanda anoonanda maridee qu ufafa.*

<sup>1</sup> Yisufa fidanoo maa ufana nari faiqi namu qimanniminau. Qinee saunara foora qinee marunna saqarisa maridaqa. Qini qikoofa sauna saqamasaa rakisimarifa maridanoo.

<sup>2</sup> Qini qikoofa Anutufa mi sauna saqarina sia irainanoo ateka idaraannoo. Ireemari oosana amiqimandee iraani fee qimasee anukamasaidanoo amiqimasee rakisidanoo.

<sup>3</sup> Qinee qimannimimarunnufana innee irisee maraifanoo doo inni mandainaina rukannisaifaqa anukaraqoo mariafanoo.

<sup>4</sup> Innee saqari asaana foora qinisaa ariqa maridaqa. Innee sia qinisaa ariqa maridaqa sia qini amiqira marira nirana mareefaranoo.

<sup>5</sup> Qinee saqari anoona maridaqa. Innee asaana miqirausa mariafanoo sia anoonasaa arufinafa sia sauna iraannoo. Qiniki marinausa qinee faqa misaki mariananoo saunara foora moomoo ireefaranoo. Innee inneeqaraa marinausa kudi marifaranoo qini faqa marinausa sauna amiqimasee ireemarifaranoo. Innee minara iriseeqa amiqimasee qinisaa atooqafaqa qinee faqa inniki marianaura.

<sup>6</sup> Faiqi moo fannoo sia qiniki marinafa sauna asaana miqirafa aadanusidanoo marinanoo saunasaa rakisimarifa asaana qafamasee aadanusinausa aigama atekasee suqeeqeenoo idaki aqusainanoo qamataikaannoo.

<sup>7</sup> Innee qiniki marirara kai idaqa marifaqa qinee qimannimunna ufafa inniki marirara kai imarinaqa innee nana ainainaree qiniara irifaqa nimianaura.

<sup>8</sup> Innee andeegara marirana qaqaammara foora moomoo irifanoo minannai qini qikoona amiqira afeeka eeraarira areenarana kooroomannimaqaannoo. Miqiuqanna iqa qini faiqinamuka mafifaranoo.

<sup>9</sup> Qini qikoofa qiniara firaqoo ridanoo qinee faqa miqikai iqa inniara firaqoo ridaqa doo sia innee moo fannoo minakiqari aiaki fuaqa. Kaqi kai qini didiranaki mariaqa.

<sup>10</sup> Innee qinee qimannimuna ufana irisee qumareeqa qini didiranaki marifaranoo. Qinee miqikaimasee qeeqa qikoona ufa iriseeqa qumareeqa mina aidiranaki maridaqa.

<sup>11</sup> Qinee sia kaqi qimannimidaqa qini susuirafa inniki marianifeera inni susuirafa anoonaikeifeera qimannimidaqa.

<sup>12</sup> Qinee ufa moo aaquqira ufa qimannianaura irifaqa Innee qini daanna ramasee nariara nariara ridaqa nidiana.

<sup>13</sup> Faiqi moo fannoo nari aqoondi amaaqa maqasee kuqinna fasiqafa mina aidirafa aiqama nidirana arusee uriqaramaqaraasa uqanna inoo mariannoo.

<sup>14</sup> Maqee maqee qini aaquqira ufa irisee mi mau fimariasa misa kai qini qiqoondiuqa maridaqa.

<sup>15</sup> Qinee sia maaqooqari inniara qini ainainira faiqi fee qianaura. Rakisirafa nari fuaninnanara faqa auqaaninnanara faqa maraaninnanara faqa sia ainainira faiqiuqa qimannimidanoo miqimmianauree maaqimmianuree qidanoo nari kai. Ainainiaqee ufa kai qimannimidanoo. Qinee sia fifau saikira faiqi fee qidaqa inniara qini qiqoondi fee qimasaidaqa qinee qini qikoofa auqaaninna saika ufanara aiqama inni kooroomannimidaqa.

<sup>16</sup> Sia innee qini rusandeesamumandee qini qumaraafanoo. Qinee naaree inniara rusandeesamumandee inni qumareeqa. Inni marirafa nirafa qini daanna ramasee mariaqera qinindikiageera qimasee inni mareeqa. Mi marira oosanafa sia putaa iannoo afeeka kai mariannoo. Innee minara irisee nana sarauimari ainainaree qini qikoofinnai innaaru qimasee qini duqusaa innaaru qimasaifanoo nimiannoo.

<sup>17</sup> Doo qeeqa aaquqira ufa maaqi qimasee qimannimidaqa. Innee nariara nariara ridaqa nidaqa.

*Maa maqanasaaqaraasa Yisuna ufa irimarinausa fidiqaamannimaqee fandinnanara qimaqoo ufafa.*

<sup>18</sup> Maa maqanasaaqaraasa inniara fidiqaammifaranoo maanara irifaqa indaaru qini Yisusara fidiqaaiiasa mariafanoo innindi inaaqianna fidiqaairafa mariannoo.

<sup>19</sup> Innee qini faiqi namu maa maqa maqanasaaqaraasa faqa moodaa irirana faqaasa marifaqau misa inniara maasaindi fee qimaseefau inniara rini. Qinee inni maa maqa maaqanakinaasa rusandeesamumasee qumaraqaunaasa mariafaqa maqee sia misaindi marianara minara kaukaata qimannimaqaidaqa.

<sup>20</sup> Maa ufana qimannimunnana kaifaa irifaqa ainainira fasiqa sia nari rakisirana uriqararafa maridanoo. Misa qini inni rakisirana dariqa quandaki inni faqa qini ufa irimariasa faqa narifaranoo, misa qini ufa irifa quandaki inni ufa faqa irifaranoo.

<sup>21</sup> Innee qinindi marianara oosana oosana mandainaina maa maqanasaaqaraasa inni nimifaranoo. Misa sia qini diqiqoonara Anutunara iridaqa miqifaranoo.

<sup>22</sup> Qinee maa maqanasaaqaraasa mandainainara sia kooroomma nimaqaananoo fau sia misa manda numoo mariqini. Doo qinee misa mandoosanara kooroomasee misa qimannimiqaua iridaqa Anutuna narira ufa ameemaana maridaqa sia amana unnu-fannai mina ititeefaranoo, narirafa kaqi naruanoo.

<sup>23</sup> Faiqi moo fannoo qiniara fidiqaammidanoo qini qikoonara faqa fidiqaamma-danoo.

<sup>24</sup> Qinee misa nifusaa faiqi sia auqaqaa ira ainaina auqaafannana sia maqasaa fasiqa moo fannoo mi ainainna auqoofanoo anoona kambiqaanau. Qinee sia miqimaseeqa mi ainainna auqaanoofau misa numoo sia mariqini. Qinee oosana oosana ainaina auqaunaqa misa sia amiqimasee maaqanda qisakoosara irirai maaqandara fidiqaamma qimaqaidaqa.

<sup>25</sup> Mooseena sandufa ooqai misara akara rumaqoofa maridanoo. Mifa maaqi qimasee akara rinau.

Misa kaqi fifau miqidaqa qiniara fidiqaaida marifara.

Anutuna ufa miqinoo maridanoo naqimasee moosaa fifaree. Minara misa qiniara fidiqaaidaqa.

<sup>26</sup> Yisufa kaqi nari faiqi namu qimannimidanoo qinau. Qinee ooru fuananoo fuka dadaaqirafa qumuannoo. Mifa kuqaa anoona ufa qira oosana maraquna mariannoo

qini qikoofinaindaraafa mariannoo. Qinee qeeqa qikoofinaindaraana aqiqaananoo qumureenoo mifa qiniara qimannimiannoo.

<sup>27</sup> Mifa inni naakinaqa innee faqa qiniara ufa qifaranoo. Innee oosanakiqari qini faqa niniyaasa maridaqa qiniara ufa qifaranoo.

## 16

<sup>1</sup> Innee aanai fiqa niku rupauraki saamuriqa qini minnisee foora minara naamua qimarunausa maridaqa.

<sup>2</sup> Kasooqaqee faiqi misa nariqa amaana maqakiqarifee ufa suqira maqakiqarifee aanoommasee inni niqiqeefaranoo. Kasooqaqee nariqa aaqamasee kuqaa Anutuna dadaaqidee qiqa inni kuqa narifaranoo.

<sup>3</sup> Misa qini qikoona Anutunara faqa qiniara faqa sia iridaqa miqifaranoo.

<sup>4</sup> Maqee maa kamuqoo qinee marunnaqoo maa ainainnausara qimannimimariana irimarifanoo kasooqaqee kambigainaqa inneeqa naaqoonnai oonumafi iriaqeeera qidaqa. Qinee indaaruu sia qimannimiqa qinee inni faqa kaqi maridaqara qiqa sia qimannimifanausa qinee qusasaa firaridaqa qimannimidaqa.

*Naaquqara maraquuna fannoo qumureenoo auqaaninna ainainara kooroo qimaqoo ufafa.*

<sup>5</sup> Maqee qini qikoofa qini diqiqamaqoonnai ooru firaridaqa innikiqari moo fannoo sia qini iraidanoo anee yai fee fidanee miqidanee.

<sup>6</sup> Doo qinee firara inni qimannimunaqa inni naundura qumaara raifaqa noori runusee mariafanoo.

<sup>7</sup> Qinee anoona ufa qimannimidaqa qinee ooru fuanaga innee amiqiranaki mariaqeeera ooru fuanara. Qinee sia ooru fuananoo fuka dadaaqirafa sia qumuree inni dadaaqiannoo. Qinee ooruree fuka dadaaqirana aqiqaananoo qumu inni faqa maridanoo dadaaqiannoo.

<sup>8</sup> Fuka dadaaqirafa qumu maridanoo inni maqasaaqaraasa irirana aqaqidanoo fee qiannoo inni andeeqaranara faqa manda oosanara faqa Anutuna narira ufa nimianinanaara faqa aqee mariafanoommifoo qimasee qimannimiannoo.

<sup>9</sup> Maqasaa fasiqauqa qiniara sia irifaqee qidaqa minara nari manda oosanara amiqira oosana fee qimasaidaqa aqaqidaqa.

<sup>10</sup> Qinee qeeqa qikoofinai ooru firaridaqa maqasaaqaraasa sia kaifaa qini qiqafeefaranoo, minara fuka dadaaqirafa maqasaaqaraasa andeeqara oosanara aqee mariafanoo fee qiannoo.

<sup>11</sup> Maa maqanasaaqaraa rakisirana aakaqaindaraa fasiqa doo Anutuna arira ufa doo mi manda fasiqanasaa maridanoo. Minara Anutuna narira ufa fannoo maa maqanasaaqaraa fasiqa aanaaseesaa faqa maridanoo minara faqa misa sia andeeqasee iridaqa aqaqidaqa.

<sup>12</sup> Qinee moomoo ainainara qimannimianaqa qumaara rainaqa siamma irifaranoo.

<sup>13</sup> Miqimarianara kuqaa anoona ufa qira maraquuna fannoo qumureenoo inni mareeqeenoo anoona ufa mariranaki mara quqaannoo. Sia mi maraqunafa nari kai ufa qimannimiannoo qini dookinaana kai irinoo inni qimannimiannoo. Mifa kasooqaqee kambigaaaninna ainainara tamummaqasee iriseenoo inni qimannimiannoo.

<sup>14</sup> Mifa qini irira ufa mareeqee inni niminaqa minannai qini Yisuna asasirana qimimarifaranoo.

<sup>15</sup> Qini qikoona Anutuna ainaina aiqama qinindi kai maridanoo. Minara qinee inni maana qimannimiqa kafaa qimannimidaqa. Qinee qeeqa irirana marasee anoona ufa qira maraquuna qimamiananoo mifa quandaki inni qimannimiannoo.

*Noori runira ufa faqa asasira ufa faqa qimaqoo ufafa.*

<sup>16</sup> Yisufa nari faiqinamu kaqi qimannimidanoo qinuu. Kaqikaqoo innee sia qini qiqafeefaranoo kaqikaqoo marikiqa kaifaa qini qiqafeefaranoo.

<sup>17</sup> Yisuna faiqi namu mina irisee akaqausa maaqi qiqau. Maa ufana nanaree qidanoo fee. Mifa nariara kaqika qoo sia qini qiqafeefaranoo fee qidanoo. Kaifaa kaqikaqoo marikiqa qini qiqafeefaranoo fee qidanoo. Kaifaa nariara qeeqa qikoofinai firaree qidaqee qidaqinoo.

<sup>18</sup> Mifa kaqika qoo fee qidaqinoo mi ufana oosanara maasa randaidaqa. Maasa sia mina ufa oosanara iridaqa naqi fee qidaqinoo fee.

<sup>19</sup> Yisufa misa randaranara irisee maaqi qimasee qimanniminuu. Qinee qiqa. Kaqikaqoo sia qini qiqafeefaranoo. Kaqikaqoo marikiqa qini qiqafeefaranoo. Innee minaree nari qimami nari qimami qidee.

<sup>20</sup> Qinee anoona ufa qimannimiana. Qinee kuquanna kamuqoo innee ikifaafau qifaranoo. Innee miqimariafaqa maqasaaqaraasa qiniara sia irimariasa susuifaranoo. Innee noori runusee marifaranoo qinee kuqiranakiqari findi fuañaqa kafia mi noori runirana minnisee quandakinaqa asafaranoo.

<sup>21</sup> Anaasee moo fannoo amuaqu uqafaqa maridanoo oori runusee maridanoo, doo aupurafa aidafirafa minaki marinara miqidanoo. Miqidanoo mariifanoo faiqi maqasaifanoo doo aupurafa faqa aidafirafa faqa taikkeefoo qimaseenoo doo qini faiqi kambiqaifaqee qimasee aidafiranaa aunusee asafidanoo.

<sup>22</sup> Innee mina aanna reefaranoo. Maqee kamuqoo noori runusee marifaranoo. Kasooqaaqee qini qiqafamasafanoo miqoo inni nimuqusaki asafirafa firaqoo qumbiqanoo mariannoo. Mi asafirana sia moo fannoo mareemaria asafirafa mariannoo. Afeeka asafirafa amiqirafa kaqi mariannoo.

<sup>23</sup> Qinee kuqiranakiqari findifiqa qeeqa qikoofinnai oori marianaqa innee sia kafia qiniara moo ainanara irammirifaranoo. Qinee anoona ufa qimannimidaqa. Innee qiniara faiqi namu maridee qimasee qini qikoona irammirifanoo irafandinna ainana oosana oosana nimiannoo.

<sup>24</sup> Maa maria kamu sia moo ainanara qiniara aqoondi fee qimasee Anutufinnai innaaru qimarianano. Irammiriaqa. Irammirifanoo nimiani. Innee asafirafa anoonaaikianifeera Anutufa nimiannoo.

*Yisuna ufa irimariasa maa maqanaasa marirana uriqararanara qimaqoo ufafa.*

<sup>25</sup> Qinee kukeeqara ufannai inni qimannimi mariafannana. Qusasaa sia qinee kukeeqaanaura kooroomandee qeeqa qikoona Anutunara akoqoo qimannimiana.

<sup>26</sup> Mi faasaana anirinaqa qini duqusaa Anutunara innaaru qifaranoo. Innee innaaru qifaqa qinee sia qeeqa qikoona afusaa oonuree mi ainannara inni fifau dadaqiana.

<sup>27</sup> Qini qikoofa nari kai inniara aidimarifanoo irafandinna ainana eedoo qimasee nimmiannoo. Innee qiniara nidimarinaqa Anutuna faiqi fee qifanoo inniara faqa Anutufa aididanoo irafandinna ainana nimiannoo.

<sup>28</sup> Qinee qeeqa qikoofinaindari maqasaa qumuafanausa maridaqa doo maqasaa taikkeeqa qeeqa qikoofinai oori fuañaura.

<sup>29</sup> Yisuna faiqi namu mi ufana iriseeqa qiqau. Doo iria, doo maqee maasa kooroomasee qimqimimarianano.

<sup>30</sup> Doo maqee maasa aniara aiqama ainana irimariana fee qidaqa. Anee ufa qiananoo moo fannoo sia ani dadaaqimarifana aneennaraa kai qimannimimarianana maasa minara irisee kuqaa aniara Anutufinaindari qumi fee qidaqa.

<sup>31</sup> Yisufa mi ufana iriseenoo kafia qimanniminau. Doo innee maqee fee iriqaraasidee.

<sup>32</sup> Doo moo aukuna adeedi ranoo maridanoo misa kai inni mara furufaramma nimaqeeqaranoo. Innee inneeqa maqa maqa daraanimbifaqa qinee qeeqakai mariana. Sia qinee kaqa qeeqaraa maridaqa. Qini qikoofa qini faqa maridanoo.

<sup>33</sup> Innee qinisaa atooqa marifandinnaanai asoaranaki marifaranoo. Maa maqanasaaqaraa irirana mareemariasa aupurana oosana oosana nimianinnanara maa ufana qimannimidaqa. Sia rufiaqa rufiaqiaqa doo qinee maa maqanasaaqarasa doo rafaafuseeqa, minara kaqi paasooqiaqa.

## 17

*Yisufa nari faiqi namuara Anutunara rakisinnimaqaannee qu ufafa.*

<sup>1</sup> Yisufa mi ufausa nari faiqi namu qimanniminau. Qimannimiseenoo oori innaarunai uqeeraseenoo nari akoona Anutuna innaaruqinoo qinau. Oo qipoo doo qini kuqira aukuna adeedi ranoo maridanoo. Anee aneenna amaaku qini qifaqa areenarana qimia. Qinee kafia quandaki kaifaa ainna amianeera qimia.

<sup>2</sup> Oo Anutu, anee aiqamausa rakisianneera afeeka eeraarira mara quna qiniki quqaqaanano. Anee faiqi anaasee qumee rariseeqaidana qimimarianana qinee misa naaru naaru marirana nimianeera mi afeekana qimiqaanano maridanoo.

<sup>3</sup> Naaru naaru marirafa maaqimminoo maridanoo. Maqasaa fasiqa anaasee misa ani moodaa kuqaa Anutunara irisee mi iriranamau firafa kafia qini Yisusa ani asaku mundirausara anee diqiqoonasara miqikaimasee irisee mi iriranamau firafa, mifa kai naaru naaru marirafa maridanoo.

<sup>4</sup> Qinee maa maqanasaaqaraasa doo ani afaqa areenarana uqannifiqeeqa. Anee ainainirana qimiannana doo qinee taikaseeqa.

<sup>5</sup> Oo qipoo qini mareeqeenana aneenna marianaqoo mara quqaqisee qifaqa areenarana qimia. Ooqai oosana aroo aukunna maa maqa maaqafa sia marunaki qifaqa areenarana qimunnana mina kai kafia qimia.



<sup>6</sup> Anee maa fasiqausa qini faiqi namu maqasaaqaraa sakinaana qimimarianaqa aniara kooroomanniqa. Misa anindi maridaqa. Anee misa qimimarianafa mariananoo. Misa ani ufa irisee eedoo qimariasa maridaqa.

<sup>7</sup> Doo maqee misa qini aiqama ainaina anisaqaraana doo iriqa.

<sup>8</sup> Anee qimunna ufana qimannimunaqa irisee doo mareea. Qinee anikiqari qumuafannanara faqa misa kuqaa fee qidaqa. Anee qini diqiqoonnana faqa anoonee qidaqa.

<sup>9</sup> Qinee anee ianannai misara dadaaqianeera innaaru qidaqa, sia kaqigeesa maqasaaqaraasarau innaaru qidaqau. Anee qimianausara kai anindi maridaqara innaaru qidaqa.

<sup>10</sup> Oo qipoo qini aiqama ainaina anindi maridanoo. Kafaa ani aiqama ainaina qinindi maridanoo. Qini qifaaqa areenarafa qini faiqi namusaaqari kooroo idanoo.

<sup>11</sup> Doo maqee qinee anee mariannaqoo ooru firaridaqa doo qinee maa maqanasaa taikasee minni ooru fuauranoo. Misa kaqi maa maqanasaa marifaranoo. Oo naaquqara qikoofa. Ani auqu afeeka eeraarirana misasaa ititannimaqaani. Anee mi auquna afeeka eeraarirana qini qimunafa mifa misasaa ititaani. Ititannimaqasanaqa maaqanda daanna ramasee moodaanakikiqa mariaqeera.

<sup>12</sup> Ani auqu afeeka eeraarirana qimiannana minannai maa kamuqoo misa faqa maridaqa amiqimandee qeeqa faiqi namu rakisidaqa marunaqa maridaqa. Qinee misa ititannimaqeeqa, sia moo fannoo dapikiaqeera. Maaniki fimari fasiqafa Yudasifa mifa kai dapikinoo maridanoo. Sia kaqi dapikinoo, ani ooqeenaa akara anoona kooroo ianifeera dapikinoo.

<sup>13</sup> Doo qinee anee ianannai ooru firaridaqa. Qinee maaqoo kaqi marunnaqoo ufa oosana oosana qimannimidaqa qimannimianaqa misa nimuqusakina asarirafa qumbiqanoo marianifeera qimannimidaqa.

<sup>14</sup> Qinee ani aufakiana qeeqa faiqi namu qimannimunaqa qimannimiafaqa maa maqanasaaqaraasa akaqausa sia qini ufa irimariasa misa iriseeqa qini faiqi namu fidiqaaqamma nimaqaidadaqa. Qini faiqi namu ani ufa irisee maqasaaqaraasakinaa iriranara nikoqaidanoo innaarunaindaraa irirana marasaafaqa maqasaaqaraasa minara misa fidiqaaqamma nimaqaidanoo. Misa qini daanna raidaqa sia maaqooqaraasau maridau.

<sup>15</sup> Oo qipoo qinee aniara sia qini faiqinamu mareeqee moosaa quqaanneera qidaqa. Maaqoo maqasaa mariaqoo kai rakisianeera qimamidaqa, aakaqaindaraa fasiqa fannoo misa qumaraandoora qimamidaqa.

<sup>16</sup> Qinee sia maa maqanasaaqaraasaindi maridaqa, misa faqa qini daanna reeqa sia maa maqanasaa qaraasaindiara foora maridaqa.

<sup>17</sup> Oo qipoo aneenna anoona ufannai misa mareeqee aneenaidikia. Ani ufa fannoo andeeqara ufa anoona maridanoo.

<sup>18</sup> Anee qini maqasaa diqiqoonnana qinee faqa miqikai iqa quandaki misa maaqanna maaqanna niqiqaidadaqa.

<sup>19</sup> Qinee misaroo qiqa qeeqa qifaaqa ani amidaqa. Misa faqa nari marirana nirana kuqaa anindi fee qiaqeera miqidaqa anindi mariaqeera miqidaqa.

<sup>20</sup> Sia qinee qeeqa faiqi namu maa mariasara kaifau innaaru qidau, maaqanna maaqanna aiqamai misa ufa irisee qiniara irifandinausa misara faqa innaaru qidaqa.

<sup>21</sup> Anee faqa qinee faqa moodaanaki marunandee misa faqa maaqanda faqa moodaanaki mariaqeera innaaru qidaqa.

<sup>22</sup> Maa maqanasaaqaraasa mina qafamaseeqa qiniara oo kuqaa innaarunaindaraa fee qiaqeera. Anee qifaaqa areenara eeraarirana qimiannana qinee mina maramaree misa faqa nimunaqa misa anindiri qisakoosa daanna reeqa moodaanaki mariaqeera.

<sup>23</sup> Qinee misaki marianneera anee qiniki maria, miqimasainaqa kuqaa uqanna moodaanaki mariaqa. Miqimasanaqa maa maqanasaaqaraasa niqafamasee Oo kuqaa Anutufa Yisuna aqiqanau foo qiaqeera, nari amaaku Yisunara faqa mina faiqi namuara faqa amanamana kai amuqusinoo aididanoommifoo qiaqeera.

<sup>24</sup> Yisufa kaqi nari akoonara innaaru qidanoo qinuu. Oo qipoo, maa qini faiqi namu anee qimunausa kasooqaqee qini faqa mariaqoo kai mariaqeera didifaqa innaaru qidaqa. Ooqai maa maqa maaqana sia maru aukuanna anee qiniara aidunara anee qifaaqa areenara eeraarirana qimunnana qini faiqi namu kasooqaqee mari iqa ooreeqa qafaaqeera innaaru qidaqa.

<sup>25</sup> Oo andeeqara qikoofa maa maqanasaaqaraasa ani ufa sia irimariasa sia aniara iridaqa. Qinee kai aniara iridaqa maa qini faiqi namu anee qini diqiqamaqoonnana misa iridaqa.

<sup>26</sup> Anee qiniara amuqusidana aidimarina qini faiqi namu naundurui faqa marianifeera qimasee aniara maqee kooroo qimasaida qimannimiaafanausa maqee kafaa kafaa qimannimianausa. Maqee qinee faqa misa naundurui marianinnanara innaaru qidaqa.

## 18

*Yisuna qumaroo ufafa.*

*(Mat 26:47-56; Mak 14:43-50; Ruk 22:47-53)*

<sup>1</sup> Yisufa miqi qimasee innaaru qimaseenoo nari faiqi namu asukunai Yeerusaree maqusaindari nifiqeenoo Kidaroono noopundu fitaqeenoo dinni afainni saqamakina auqaana andanda ummaqiranaki idooararee qimasee nari faiqi namu faqa oonu marinau.

<sup>2-3</sup> Ooqai moomoo kari Yisufa Yeerusaree maqusaindari fimaruqoo fiqau. Yudasifa minni fimarunara irimarufa maridanoo Yisuna ueeqaaninafa mi saqamanara faqa irimarufa miqoo finoo fee qimasee sundiauga faqa amaana maqasaa rakisimaria firisuaiqauqa faqa Yudasifa eendaki nifiqee finau. Misa uriqararaua faqa, Farisai amaana ufa qimarusa faqa niqiqoofaqa saamu faqaana indaaiqa asukuna marufaqa qooma qumaroofanoo Yudasifa mi saqamanaki Yisuna qumaraaqee qimaseenoo nifiqee finau.

<sup>4</sup> Yisufa aiqama ainaina nariki kambiqaaninnanara irimarufa marufaqa misa oonuroofanoo Yisufa misa noorinni anireenoo iranau. Innee yafasiqanaree randaidee, qufaqa misa qiqau.

<sup>5</sup> Yisuna Nasareete maqannaanara randaidaqa qufanoo Yisufa qinau. Maa qinee misa maridaqa. Yudasifa Yisuna ueeqaaninafa misaki kikiqinoo marinau.

<sup>6</sup> Yisufa miqi qimasee nariara kooroomasoonara misa tautumasee rufiseeqa ninaaqianaindari oonurandeeqa maqasaa aqufiqau.

<sup>7</sup> Yisufa kafaa irammirinoo qinau, innee yanaree randaidee qufaqa misa qiqau Yisuna Nasareete maqannaanara randaidaqa.

<sup>8</sup> Miqi qufanoo Yisufa kafaa qinau doo qinee kooroo iqa maana misa maridaqa. Innee qiniara kai randeaaafanoo, maa qini faiqi namu mariasa minnisaiifaqa fuqa.

<sup>9</sup> Yisufa nari innaaru qimarau ufafa anoona kambiqaanifeera mi ufana qimanniminau. Mifa maaqi qimasee faasasaa innaaru qinau. Oo qipoo aiqamausa anee qimimarinaua sia misakiqari moo fannoo furufarianifeera. Faasasaa mi innaarunna qinau doo maqee mina anoona kambiqaana misa minnisee qini kai maraaqee qinau.

<sup>10</sup> Simoona moo auqu Peetooroofa misa saamu faqaana qafamaseenoo darifoo qimaseenoo mifa nari rakira paipana kisaaga qumareenoo amaana maqasaa rakisirana ainainira faiqi aaqamasee asauku uqannai aqoo aiqama atufu aqinau. Mi ainainira fasiqana auqu Marakusafa marinau.

<sup>11</sup> Yisufa mina qafeenoo Peetooroona qimaminoo qinau. Saa, aneenna paipana nari anaamuki upeekaa. Qini qikoofa manda nammari naannee qimaqoosa anee qiniara sia naannee fee qidanee. Qinee naanaua.

*Yisufa Annasana oorini kikiqu ufafa.*

<sup>12</sup> Yisufa miqi qimasooafa Roomma maqanna sundiauga faqa misa uriqararafa faqa Yuda maqanna firisuaiqauqa faqa anireeqa Yisuna qumareeqa sandannai asauku rumbasee afiqeeqa.

<sup>13</sup> Kaiafasana maaqaki quqau. Kaiafasafa mi aukunnai amaana maqasaa Anutuna aanaiqiki marusa uriqararafa marinau. Annasafa Kaiafasana airaamaku mina maaqaki marunaki munu minaki quqasoofanoo Annasafa ufa indaaru irinau.

<sup>14</sup> Ooqai Kaiafasafa narikai tamummaqaseenoo Yuda maqannaasa qimanniminoo qinau Yuda maqannaasa maasakina moodaa fannoo maasa aiqamausa misa nikiqara kuqinaqa amiqianauree qinau. Mina maaqaki Yisuna quqasoofanoo Annasafa naaree mina ufa irinau.

*Peetooroofa Yisunara sia qinee qafaidee qu ufafa.*

*(Mat 26:69-70; Mak 14:66-68; Ruk 22:55-57)*

<sup>15</sup> Misa Yisuna rumbaree fufanoo Simoona moo auqu Peetooroofa faqa Yisuna faiqi namuqiqari faiqi moo fannoo faqa misa ninaaqiana nifaqee fiqau.

<sup>16</sup> Misa Yisuna afiqee amaana maqasaa aanaiqikirana maaqaki keeqoofanoo nifaqee anu fasiqafa amaana maqasaa aanaiqikirana aqoondi maridanoo kaqi mi maaqanaki keeqanau. Misa Yisuna afiqee mi maqanaki munuseeqa mi sandana idukuseeqa kaqi quqasoofanoo marinau. Peetooroofa maqusai kooqi afainni aqoosai marinau. Nifaqee anu fasiqafa kafaa raudamakinoo kooqisaa rakisimaru manaaqana qimamufanoo kooqi atuasooofanoo Peetooroofa faqa keeqanau. Keeqafufanoo maaqa kooqi adeedi ooru maridanoo qafeemarinau.

<sup>17</sup> Maqusa kooqisaa rakisuu manaqafa Peetooroona qafamaseenoo irammirinoo qinau. Anee Yisuna aqoondi fee qufanoo Peetooroofa qao qimasee sia fee qinau.

<sup>18</sup> Suara narufaqa ainainimaru fasiqausa faqa firisuaiqauqa faqa Kaiafasana maaqa kooqinni maqusa saqanna idarasee fiqumma ida tookusiqa marufanoo Peetooroofa misaki oonu keeqafinoo ida qaani marinau.

*Annasafa Yisuna irammiru ufafa.*

*(Mat 26:59-66; Mak 14:55-64; Ruk 22:66-71)*

<sup>19</sup> Amaana maqasaa Anutuna aanaiqiki marusa uriqararafa Annasafa mifa Yisuna faiqi namuara faqa Yisufa faiqi anaasee qimannimira ufausara faqa mi ufanaramma Annasafa maaqaki Yisuna iree marinau.

<sup>20</sup> Yisufa mina ufa iriseenoo maaqi qimasee Annasana qimaminau. Qinee faiqi anaasee moomoo suqimaruqoo kai ufa qimannimariqia. Suqira maaqaki fee naaquqara amaana maqaki fee faiqi anaasee moodaaqoo suqiraqoo fee miqoo kai qinee naamuqira ufa aiqama ufa qimannimariqia. Sia qinee moo ufa kukeeqaranaki qimannimiqiafana. (Innee aaqamasee qini kukeeqaranaki irama qimaqee mariafanoo.)

<sup>21</sup> Annasa anee nanaree qini iraidanee. Qini ufa irimariasa irammirinaqa qimamiaqa. Misa qini ufa oosana iridaqa.

<sup>22</sup> Miqi qimasoofanoo poorisa moo fannoo asaukusamu Yisuna oori arinoo qinau. Anee nanaree amaana maqasaa rakisirana miqi qimasee qimamidanee.

<sup>23-24</sup> Miqi qimasoofanoo Yisufa qimaminoo qinau. Qinee aaqara ufa moo qianana maaqoo mariasa aiqama kooroomasee qimannimia. Qinee andeeqara ufa qunnanara nanaree qini daridanee. Miqi qimasoofanoo Annasafa qinau, innee maana kafia rumbamaree Kaiafasafinnai afiqee fuaqa. Kaiafasafa amaana maqasaa Anutuna aanaiqikirafa marufaqa mifa maruqoo moo maaqaki minni Yisuna afiqee fiqau.

*Peetooroofa kaifaa Yisunara sia qinee qafaidee qu ufafa.*

*(Mat 26:71-75; Mak 14:69-72; Ruk 22:58-62)*

<sup>25</sup> Peetooroofa naambeeqai kaqi ida qanimarufanoo faiqi moo fannoo mina iramirinau. Anee Yisuna faiqi namuqiqari marianafee kuqaa fee. Miqi qufanoo Peetooroofa sia fee qinau.

<sup>26</sup> Amaana maqasaa aanaiqikirana ainainira faiqi Peetooroofa Marakusana aaqoo atekoona mina ati fannoo Peetooroona qafamaseenoo qimaminau. Faasai anee saqamai Yisuna faqa marianaqa ani qafaunasa.

<sup>27</sup> Peetooroofa mina iriseenoo kafia qaoo kai qinau. Qaoo qimasoofanoo kookooraana ufa qinau.

*Yisufa Piratoona oorinni kikiqu ufafa.*

*(Mat 27:1-2, 11-14; Mak 15:1-5; Ruk 23:1-5)*

<sup>28</sup> Kananaana iqaqoofanoo saarisufa namufaqa misa Yisuna Kaiafasana maaqakinaana afiqee Roomma maqannaa kiapana maaqaki munu quqaqau. Yuda maqannaasaa sia kiapana maaqaki keeqaqau. Duna iqaqainaqa maasa Anutuna qangiroo ainnaaqarara qoomaqa naannaqoo fee qimasee kiapafa moo maqannaafa marufaqa afaaqasaaqarara aisoora maasa qifaqasaa aqufinaqa qifaqa mandaikinaqa sia naannoo qimasee rufiee sia mina maaqaki keeqaqau, kaqi naambeeqai madaanai kai mariqau.

<sup>29</sup> Roomma maqannaa kiapafa Piratoofa misa nindafeenoo rauda mafufanoo Yisunara irammirinau. Innee nanaree fee qimasaidée maa fasiqanara ufa qidee.

<sup>30</sup> Yuda maqannaasa iriseeqa qiqau, mifa sia manda oosana marainaqau sia maree mini ani amiaqini.

<sup>31</sup> Miqi qufanoo Piratoofa qimanniminoo qinau, innee inneeqa kai inneeqa sandufamau mina maramaree fuaqa. Yuda maqannaasa mina iriseeqa qiqau, maasa sandufa fannoo maaqinna fasiqausa kuqannaruqee qinoo maridanoo. Aunirira saqarisaa faiqi nariranara innee Roomma maqannaasa maasara qaoo qimasaidaga inneeqa kai miqi mariafanoo. Minara maasa Yisuna Piratoo anisaa quqaidaqa.

<sup>32</sup> Indaaru Yisufa nari kuqiranara nari faiqi namu qimannimuna mina anoona maqee kambigeenoo.

<sup>33</sup> Piratoofa misa ufa iriseenoo nari koota maqaki kaifaa keeqeenoo Yisunara mai uruannee qimasoofanoo Yisufa Piratoona koota maqaki keeqafufanoo Piratoofa Yisuna irammirinau. Kuqaa fee anee Yuda maqannaasa Karaambaqee maridanee.

<sup>34</sup> Yisufa iriseenoo qimaminoo qinau. Anee aneenna kai fee mi ufana qidanee moo fannoo ani qimamifaneee qidanee.

<sup>35</sup> Piratoofa minara Yisuna qimaminoo qinau. Anee qiniara Yuda maqannaa fee qimaqimidanee. Sia qinee inni oosana iridaqa. Ani maqannaasa Anutuna aanaiqikirausa uriqararasa misa kai qini maaqaki quqasaafana mariananoo. Anee nana mandoosana maraanaqee miqi fee.

<sup>36</sup> Yisufa qinau, qini ququsa sia maa maqa maaqanasaagaraa ququsa maridanoo. Qini ququsa maa maqanasa marinaqau qini faiqinamu rakifaqau qini mareeqeefau idukuqisani. Sia qini ququsa maa maqanasaagaraafa maridanoo.

<sup>37</sup> Piratoofa mina iriseenoo kafa Yisuna irammirinoo qinau, Kuqaa fee anee karaambaiga moo maridane. Yisufa mina irisee maaqi qinau. Anee qianandee kuqaa qinee Karaambaiga maridaqa. Kuqaa anoona ufa kai qimannimirara qinee maa maqanasa kambiqafi maridaqa. Kuqaa anoona ufara randeemaria fasiqa anaaseesa misa qini ufa iridaqa.

<sup>38</sup> Piratoofa mina iriseenoo maaqi qinau, kuqaa anoona ufa qirafa mifa nanee maridanoo. Miqi qimaseenoo Piraatoofa raudamakufanoo Yuda maqannaasa naaramasee maaqi qimasee qimanniminau. Maa fasiqanaki sia arira ainaina moo marifaqa iridaqa.

*Piratoofa Yisuna arifandinna ufana eedoo qu ufafa.*

*(Mat 27:15-31; Mak 15:6-20; Ruk 23:13-25)*

<sup>39-40</sup> Piratoofa kaqi qimannimidanoo qinau. Aukuana aukua Anutuna qangiroo ainnaaqarara qoomaqa faasaana qini rumbaranaki mariasa aukua aukua moodaakai moodaakai karabusakinaana iduku nimirunusa maridaqa. Maa aukua Yuda maqanna karaambaiga idukunnimianauree qufaqa fira kari faaqarumasee qimamiqa qiqau, sia maana idukua. Barabasina kai idukua. Barabasifa faiqi narinoo rakinoo imarifa karabusaki maridanoo. Mina kai idukua.

(Roomma maqannaasa faiqi narirana oosana maaqimminoo marinau. Sanda moomoo saamu atisaa qusi iqoona marufanoo mi sandana atinni arooqa aandau amudaani rukamirana raigaranaqa qususee rumbaqoosamuna mi samunannai aigamausa rumbosa narimaruna. Misamuna naaree Yisuna ari isoofanoo inaaqianna Piratoofa nari maaqaki mara quqasee mina ufara iranau.)<sup>18</sup> | 39-40 | YOOHANEE

## 19

<sup>1</sup> Piratoofa Yuda maqannaasa ufa irisee Yisuna mareeqee nari sundia niminoo qimanniminau. Innee saamu atisaa sanda qusiranannai afaqa turii umooqukamasaqa qufaqa eedoo qimasee miqoo kai miqiqau.

<sup>2</sup> Afaqa turii qumooqumaseeqa saatunanda fooqaana aukuseeqa saaeemma qumaree kukuqumasee Yisuna karaambaiga qafee fee qimasee afisuamaqau. Qafee afisusee misa saasaakoon arira qamunna sundia qamunna fee qimasee afisuamaqau.

<sup>3</sup> Sundiaqa nariqa sundia qamunna afisuamaqaseeqa anireeqa ataasa qimamaqee maaqi qiqau. Yuda maqanna karaambaiga afeeka anee mariana sia dauni kuqaa miqidaqa ataasa qimariqau. Miqi qimasee misa nisaukusamu oori ariqau.

<sup>4</sup> Misa miqi isoofanoo Piratoofa raudamakufanoo nari naambeeqi Yuda maqanna moomoo marunnai qumureenoo qinau. Qinee Yisuna mareeqee inni nifusaa quqaanura. Kuqira ainaina sia moo minaki marifaqa qinee qafaidaqa.

<sup>5</sup> Miqi qimasooofanoo Yisufa saatunanda qafee afisirafa saasaakoon arira qamunanda rumarafa raudamaki misa nifusaa kikiqinau. Piratoofa aigama naaramasee qimanniminau. Innee qafaqa. Doo mi fasiqafa maridanoo.

<sup>6</sup> Amaana maqasaa Anutuna aanaiqikirausa urigararusa faqa misa poorisauqa faqa Yisuna qafamasee firaakari faqariqa qiqau, aunirira saqarisaa pirimma aruaqee qidaqa moomoo kari qimariqau. Piratoofa mina iriseenoo maaqi qimasee qimanniminau. Doo inneeqa kai mara maree aunirira saqarisaa pirimmannai aruaqa. Qinee mina qafaunanoo sia moo numoo minaki marifaqa qafaidaqa.

<sup>7</sup> Yuda maqannaasa Piratoona ufa iriseeqa maaqi qimasee qimamiqa. Maasa sandufa maaqinna fasiqafa kuquanno fee qidaqa. Mifa nariara Anutuna amaaku fee qimarifa marifaqa mina akiqara arusaifanoo kuquanno.

<sup>8</sup> Piratoofa Yisunara Anutuna amaaku maridanoommi qimaseenoo firaqoo rufianau.

<sup>9</sup> Mifa kaifaa Yisuna afiqeenoo nari maaqaki oorureenoo irammirinau. Anee yaindari anuna fee qimaseenoo iroofanoo Yisufa sia ufa qimanninuu.

<sup>10</sup> Piratoofa mina qafamasee Yisuna kaifaa qimaminoo qinau. Anee sia fee qini qimaqiminnaree. Firimmannai aunirira saqarisaa arira aanoo qinindi maridanoo. Ani idukira aanoo irafa qinindi maridanoo. Anee sia fee minara iridane.

<sup>11</sup> Yisufa mina iriseenoo maaqi qimasee Piratoona qimaminau. Anee qiniara aanoo iannana sia aneennafau, Anutufa qinara kai maqee ani ufa ameemaana quraqisaifaqa maridaqa. Qinee minara maaqi qidaqa, qini qumareeqee ani asaukuki quqemariasa misa numoo firaafa maridanoo anindi kaqikaafa.

<sup>12</sup> Piratoofa Yisuna ufa iriseenoo firaqoo mina aunduraki Yisuna idukiraree qimasee irinau. Yuda maqannaasa mina iriseeqa firaqoo faaqarumasee qiqau. Anee maa

fasiqana idukinaqa maasa aniaara Roomma maqanna karambaiqinnai oonureeqa qimamianaara. Faiqi moo fannoo nariara karambaiqee qimarifa Roomma maqanna karambaiqa namuqaa mariannoo.

<sup>13</sup> Piratoofa misa ufa iriseenoo Yisuna afiqee madaana ufa irimaru qaindanasaa ooqumarifinoo ufa irimaru qaindana aaqa ooni ausirirafa moomoo maruqoo qumu ooqumarifi ufa irimarinau. Yuda maqannaasa minara Kabatee qimariqau. Maasa ufakiqari ooni padirane qidaqa.

<sup>14</sup> Duna Anutuna qangiroo ainnaaqarara qoomaqa suqarafa mariannoo. Maqee suani qambaana marufanoo Piratoofa ufa irira qaindasaa ooqumarifi Yuda maqanna qimannimainau. Doo maafa inni karambaiqa maaqoo maridanoo.

<sup>15</sup> Misa irisee faaqa quqasee kuqariraree kai qiqau. Aunirira saqarisaa firimmannai ariraree qiqau. Piratoofa mina iriseenoo Yisuna ariraree qusa qimanniminoo qinuu. Innee kuqaa inneeqa karambaiqa aunirira saqarisaa pirimmannai ariraree fee qidee. Miqi qufafa amaana maqasaa Anutuna aanaiqikirausa uriqararasa Piratoona ufa irisee faaqa quqasee qiqau, maa fasiqafa sia maasa karambaiqa maridanoo. Maasa karambaiqa Roomma maqanna karambaiqa moodaa maridanoo mina auqu Sisaafa.

<sup>16</sup> Piratoofa mina iriseenoo Yuda maqannaasa nisaukuki Yisuna quqanau. Inneeqa maree munusaifaqa sundiauga aunirira saqarisaa pirimmannai aruaqa. Miqi qimasooafaqa misa Yisuna maree fiqau.

*Misa Yisuna pirimmannai aunirira saqarisaa aru ufafa.*

*(Mat 27:32-44; Mak 15:21-32; Ruk 23:26-43)*

<sup>17</sup> Yisufa Yeerusaree maqusaindari nari aunirira saqari akumaree fimarinau.

<sup>18</sup> Fifiufanoo Eeburu ufakiqari faiqi nikaqa amudaani fee qimaru amuaqunamusaa Koorookata amuaqunamusaa ooruree aunirira saqari maqai rumasee minasaa Yisuna mara airisee firimmannai Yisuna nari aunirira saqarisaa aruqapiriqau. Aruseeqa faiqi qaaraqanda mandainaina maraqaunqanda miqanda faqa nari aunirira saqarisaa dinni dinni naruaqapiriqau. Naruseeqa uqereeqeeqa maqa aamara auquqoonaki rakiqau. Qaraqanda dinni dinni Yisuna qambaana rakiqau.

<sup>19</sup> Piratoofa moo raufigira saqarisaa ufa akara rumeeqeenoo nari rakira fasiqa moo amufanoo oorureenoo Yisuna akiaqa aunirira saqarisaa pirimmannai arinau. Mina akara oosana maaqimminoo marinau.

Maa fasiqafa Yisufa Nasareeteendaraafa Yuda maqannaasa karambaiqa maridanoo.

<sup>20</sup> Yisuna aru maqa maaqafa Yeerusaree aaqa adeedi marufaqa faiqi anaasee moomoo mina akara qafaida asaana rimariqau. Mi akarafa Yuda maqannaasa ufa moo auqu Eeburu ufakiqari faqa Roomma maqannaasa ufa moo auqu Ratinna ufakiqari faqa Kirisa maqannaasa ufakiqari faqa akara rinoo marufaqa asaana rimariqau.

<sup>21</sup> Yuda maqannaasa amaana maqasaa Anutuna aanaiqikirausa uriqararasa mi akarana asaana rumasee Piratoona maqasai oorureeqa maaqi qimasee aaqara ufa qimamiqau, saa sia Yuda maqannaasa karambaiqe fee qimasee akara rua. Kaqi nari kai Yuda maqannaasa karambaiqee qimari fee qimasee akara ruaqana.

<sup>22</sup> Piratoofa irisee maaqi qimasee kaukaataqimasee qimannimainau. Qinee akara runafa doo saina mifa kai mariani.

<sup>23-24</sup> Roomma maqannaasundia qaara faqa qaara faqa Yisuna aunirira saqarisaa aruseeqa mina qamunna anaqi anaqi iseeqa nimana kai rainaqa. Yuda maqannaasa kisaaga qamunna moodaa afsirana sia afu aina marufa marufaqa kaqi uqara foora amiqimasee auqirafa marufaqa sundiauga mina qafeeqa doo amiqirafa marifaqa sia anaqia, kaqi kaatara foora sararamasee uriqarainafa maraani. Miqi qimasoofoano ooqeenaa tamumqararasa akara anoona mikari kambiqaana. Mi ooqeenaa akarafa minara maaqi qimaqoofa.

Misa qini qamunna raina rainamasee nariara nariara mareefaranoo. Kisaaga qamunna moodaa mina sararamasee mareefaranoo.

<sup>25</sup> Yisufa aunirira saqarisaa kuqirarifanoo mina aunirira saqari atukaki mina anoofa faqa nari auna qini qinoona faqa moo anaasee Karoopasana anaaga Mariana amarafa Mariafa faqa moo anaasee Makadara maqusaindaraa Mariana amarafa Mariafa faqa minamusa miqoo kikiqiga mariqau. (Qaramoo anaasee Mariana amarausa kikiqiga mariqau.)

<sup>26</sup> Mirindari Yisufa qafoofanoo nari Yisuna faiqi namukiqari nari afaaqasaa aqoondi faqa qaramoo anaasee mina anoona amarausa faqa kikiqiga mariqau. Yisufa kuqiraridanoo nari anoona qafamaseenoo qimaminoo qinuu. Oo qinnaqeefoo maa fasiqafa Yoohaneefa ani amaaku mariannoo qinee kuquanano anisaa rakisiani.

<sup>27</sup> Miqi qimaseenoo Yisufa quandakinoo nari afaaqasaa aqoondi maaqi qimasee qimaminau. Maafa ani anoofaikinoo marinana qinee kuqanana anee minasaa rakisia. Doo miqooqari mi fasiqafa Yisuna anoona afiqeenoo nari maaqaki soofanoo marinau.

*Yisufa kuqu ufafa.*

*(Mat 27:45-56; Mak 15:33-41; Ruk 23:44-49)*

<sup>28</sup> Yisufa nariara irufanoo aiqama ainaina doo maqee anoonaikufanoo moodaa ooqeenaa akara nammariara qimaqoofa mifa kai sia anoona kambiqaifaqee qimasee minara maaqi qinau.

<sup>29-30</sup> Qinee nammariara didimarifaqee qufanoo miqoo uainna nammari taqu sundiauga misa manda uainna nammari sukaqee maru nammari mifoo maruna faiqi moo fannoo eeqaufooqaana aateekasee minaki raaramasee qisoopa saqari asaana undaqiseenoo minasaa rutaqeeqee mara muru Yisuna afaurusaa mundusoofanoo qumbifiqia namaseenoo qinau. Doo qini ainainirafa taikkeenoo qimasee aunirira saqarisaa anuka rooraiqinoo doo kuquqaraasinau.

*Faaqaana atoofeesaqaanda Yisuna aqaasanaki raquramu ufafa.*

<sup>31</sup> Kuqufufanoo Yuda maqannaasa uriqararawsa Piratoofa nari maaqai marunnai oonuree maaqi qimasee qimamiqau. Duna sabata naaquqara sabata mariannoo. Maqee kai aunirira saqarisaa mariasa niku itairisaana dauni kuqufifaqa nikundamasee duna amiqimandee sabata maraanaura.

<sup>32</sup> Piratoofa eedoo qufaqa sundiauga oonureeqa Yisuna aaga dinni marunna aiku itairisee moo dinni maruna Yisuna faqa kuquna aiku itairisaqau.

<sup>33</sup> Yisuna aiku itairianee qimasee qafooofanoo doo kaaqa kuqinoo marufaqa sia aiku itairiqau.

<sup>34</sup> Sundia moo fannoo faaqaana qumareenoo Yisuna aqaasanasaa raquraminau. Raquru amufanoo fidika faqa nammari faqa minaiqari aniranau.

<sup>35</sup> Aniroofanoo mi ainainna qafee marufa minara akara rinau. Mifa nari ufara kuqaa anoonee qidanoo innee faqa kuqaa anoonee qiaqeeera akara rinau. Yoohaneefa afaqanoo nidanoo miqaa maaqaa imarufanoo qafeemarinau. (Yoohaneefa maa akarana akara rumaseenoo nari auqu sia kooroo iraree qimaseenoo maa akaranaki nariara Yisuna afaaqasaa aqoondi maridee qinau.)

<sup>36</sup> Maa ainainnausa Yisuna arunara ooqeenaa akara anoonaikianifeera kambiqanau. Mi ooqeenaa akarafa maaqi qimaqoofa maridanoo.

Sia mina amudaani moo fannoo raqaannoo. Sia uqanna moodaa raqaannoo. Miqi qimaqoo ufafa anoonaikufaqa sia mina aiku raqaqau.

<sup>37</sup> Ooqeenaa akara moo maaqimminoo maridanoo.

Faiqi moo fannoo faaqaanannai asaaku mundirana raquramisainaqaa faiqi anaasee kikiqamambinaqa qafeefaranoo.

Mi ufafa faqa aunirira saqarisaa kambiqanau.

*Yisuna akundoo ufafa.*

*(Mat 27:57-61; Mak 15:42-47; Ruk 23:50-56)*

<sup>38</sup> Sundiauga Yisuna raquramisooofanoo Yooseefaana amarafa Arimateea maqusaindaraafa Piratoona maaqai oonureenoo Yisuna iri aunirira saqarisaaqaraanara innaaru qinau. Mi Yooseefaafa Yisuna ufa irimarufa maridanoo nari aundurai kai iriseenoo sia faiqi nifusaa kooroo inau, kaqi marinau. Yuda maqannaasa uriqararawsa irifoo qimasee rufiamaree kukeeqakufanoo Yisuna iriara Piratoofunnai nariara oonureenoo innaaru qinau. Amanee qiminaqa maree munu akundaanauree qinau. Miqi qufanoo Piratoofa eedoo qimaseenoo aqiqoofanoo Yooseefaafa Yisuna iri aunirira saqarisaaqaraana tatu-mareenoo finau.

<sup>39</sup> Nikoodeemusafa ooqai indaaruu asukunaki Yisuna faqa ufa qiqiufa maridanoo mifa Yooseefaana dadaqinuu.

<sup>40</sup> Mifa faiqi akunnimaqasaida nikundee maru marasinna moomoo uqanna maraseenoo qamunnasaa adieeseenoo minannai Yisuna afaaqaa kukuqiqau. Miqanda nari maqannaasa oosana maraseeqa kukuqamasee akundaqau.

<sup>41</sup> Yisuna aruqoo mina aaga saqama marinuu.

(Yisuna aukuaana nari maqannaasa maaqimasee madika indufusaida kuqufusa nikundee mariqau. Misa ooni firaana kasaaga aamara auquseeqa minaki keeqafufaqa dinni dinni moomoo aamara auqiiseeqa kuqusa minakiaqa naadu naadu nikundee mariqau. Moodaa kai moo kari akundeeqa mina afunda taikooofanoo kaifaa moo fannoo kuqufaqa miqikai imariqau. Sia moodaa karifau nikundee mariqau. Moo kari moo kari nikundee mariqau.)

<sup>42</sup> Mi saqamanaki ooni aamara fuka marunaki sia moo akundoonaki. Mi ooni aamarafa adeedi marufaqa duna maasa Yuda maqannaasa sabata naaquqarafa mariannoo qimasee kaqi kaqi ufaqa Yisuna iri ooni aamaraki munu akundaqau.

## 20

*Yisufa findimaqee fufuafa fufau madikakai qafoo ufafa.*

*(Mat 28:1-8; Mak 16:1-8; Ruk 24:1-12)*

<sup>1</sup> Akundamasoofaqa mariqa amaanasaa kananaana eendai Mariana amarafa Makadara maqusaindaraafa Yisuna ooni aamaraki akundamaqoona qafaanee qimasee finau. Oonuree qafooфанoo mina aamaraki ititaqoo oonina firaana mareeqee kaqinni quqaqoofanoo marida qafanau.

<sup>2</sup> Mariafa mina qafamaseenoo anirandeenoo sandeenoo oonureenoo Simoona moo auqu Peetooroona faqa Yisuna afaaqasaa aqoondi qini faqa qimanniminoo qinau. Misa Karaambaiqa iri ooni aamarakinaana mara maree moosaa fifa. Sia maasa qafeeqa.

<sup>3</sup> Yisuna faiqi namuqiari Peetooroofa faqa qinee Yoohaneesa faqa mina iriseeqa qafaanee qimasee sandaqaafana.

<sup>4</sup> Maaqanda sandaidafa qinee Yoohaneesa kaaqa sandeeqa Yisuna madika kooqinni oonuraqafana.

<sup>5</sup> Qinee sia keeqaqafana kaqi oonu maridafa aamaraki qafeemariafana. Miqoo maridafa Yisuna kukuqamaqoo qamunnana mina kai qafee marigafana. <sup>6</sup> Simoona moo auqu Peetooroofa aidaaqareenoo kaqi oonaamarai keeqanau. Mifa Yisuna kukuqamaqoo qamunna miqoo quqaqoona qafamaseenoo.

<sup>7</sup> Mina akiaqa rumbaqoo qamunnana uturuqeeqeenoo aaduma kukuameeqee quqaqoofanoo marinau.

<sup>8</sup> Qinee Yoohaneesa Peetooroona aanaaqiana keeqafi qafamaseeqa doo kuqaa findifiifoo qiqiafana. [ <sup>9</sup> Yisufa kuqiranakiqari findifuaninna akananara sia amiqimandee iriqiafana. Mana manammimariqiafana.]

<sup>10</sup> Maaqanda qafamasee doo nimaqaq anirandee fiqiafana.

*Yisufa Makadara maqanna anaasee kooroomamaqoo ufafa.*

*(Mat 28:9-10; Mak 16:9-11)*

<sup>11-12</sup> Mariana amarafa Makadara maqusaindaraafa ninaaqiana kafa ooni aamara kooqinni oonu kikiqinoo marida ikiraqee marinau. Miqidanoo ooni aamaraki kummaramafi qafoofanoo qaara qangirooqara eekara qamunna afisiraqanda moo fannoo Yisuna akiaqa maruqoo oofuqaqee marufanoo moo fannoo Yisuna aiku maruqoo oofuqaqee marufanoo nindafanau.

<sup>13</sup> Nindafoofaqa miqanda qiqau. Oo maa anaasee anee nanaree ikiraqaidanee. Mariana amarafa qinau. Misa qini karaambaiqa mara maraafaqa sia misa quqaqoona iridafa ikiraqaidafa.

<sup>14</sup> Mariana amarafa miqi qimaseenoo quandaki qafoofanoo Yisufa mina aanaaqiannai kikiqinoo marufanoo mifa sia Yisunee qinau.

<sup>15</sup> Yisufa maaqi qimasee Mariana amarana qimaminoo qinau, Oo maa anaasee anee nanaree ikiraqaidanee, yanaree randaidanee. Mariana amarafa Yisunara maa saqamanasaa rakisirafammifoo qimasee qimaminoo qinau, Oo maa fasiqa anee yai fee iri maanakinaana mara quqeenee. Anee qimaqiminaqa qinee mina maramaree fua.

<sup>16</sup> Yisufa mina iriseenoo mina auqu ramaseenoo qinau, Maria, qufanoo Mariana amarafa tautumma quandaki qafeenoo Oo ufasa rakisirafee qinau. Eeburu maqannaasa ufakiqari qinau, Rabooni, maasa ufakiqari ufasa rakisira fee qinau.

<sup>17</sup> Miqi qimasoofanoo Yisufa qinau, sia qeeqa qikoofinnai oru fiqa minara anee sia qini qifaaqa qumaraa. Anee oonuree qini qikaqafasaaauqa qimannimia. Qinee qeeqa qikoofinnai faqa inni nikoofinnai faqa qeeqa Anutufinnai faqa inni Anutufinnai faqa ooru fidaqa.

<sup>18</sup> Mariana amarafa mina iriseenoo sandee oonureenoo mina faiqi namu maaqi qimisee qimanniminu. Doo qinee karaambaiqa qafaunanoo mifa mi ufana qini qimaqiminoo.

*Yisufa nari faiqi namu kooroomannimaqoo ufafa.*

*(Mat 28:16-20; Mak 16:14-18; Ruk 24:36-49)*

<sup>19</sup> Mi faasaanna mi eendanaki Yisuna faiqi namu maasa moo maaqaki keeqafuafa Yuda maqannaasa doo Yisuna ariqa maasa faqa darifoo qimasee maasa misara rufiasee kooqi amiqimasee ititasee marufanoo Yisufa tautumannimaqeenoo maasa qambaanai kooroomaafinoo qimanniminoo qinau. Sia rufiaaqa asoofara inniki mariani.

<sup>20-21</sup> Miqi qimaseenoo Yisufa narí asauku aqumusaa pirimma aruna kai fidika reemaruna uqannifiqeenoo aqaasanasaa faaqaana raquru amuna afaaqa ateeqaona faqa uqannifiqoofaqa maasa qafamasee doo kuqiranakiqari findifuananoo fee qimasee kaaqamma asasiqiafana Yisufa kafaa qimanniminoo qinau, inni sia maparaa iaqa asoosara inniki mariani. Qini qikoofa maa maqanasaa qini diqiqamaqoosa qinee miqikai iqa innee maaqanna maaqanna qini ufa qimannimaqeeru inni faqa niqiqaidaga.

<sup>22</sup> Miqi qimaseenoo Yisufa aidoo maasa fuaqaqimaqaseenoo qinau doo innee naaquqara Anutuna marauna maraaga.

<sup>23</sup> Innee faiqi mandainaina numoo mininnisaifanoo Anutufa faqa mininnisaannoo. Sia mininnisaifanoo Anutufa faqa sia mininnisaannoo.

*Yisufa Toomasina kooroomamaqoo ufafa.*

<sup>24</sup> Yisuna faiqi namuqiqari Toomasifa mifa qaara qapirafa maqagoofa marufa moosaa mi eendanaki maridanoo sia Yisufa tautumasee maasaki kooroo una sia mifa qafanau.

<sup>25</sup> Maasa Yisuna qafaafanausa Toomasina qimamiqafiafana maasa Karaambaiqa qafaunasa maridaqa. Miqi qufanoo Toomasifa qinau, innee unna qimariafanoo qinee mina asakusaaqaraa pirimma aamaraki fidika reemarinaki auqama qafeeqa mina aqaasanasaqaraana faqa auqama qafeeqa kuqaa fee qianauna sia auqama qafeeqa unna fee qianauna.

<sup>26</sup> Mi amaanafa aiqarofanoo moo amaana eendaki maasa Yisuna faiqi namu faqa Toomasina faqa maaqaki keeqafi kooqi mundusee ititasee Yuda maqannaasa maasa dari maqi qimasee mariqiafana. Marufanoo Yisufa kafaa maasaki kambiqanau. Anireenoo qinau, sia rufiaaqa asoosara inniki mariani.

<sup>27</sup> Miqi qimaseenoo quandaki Toomasina qimaminoo qinau, aneenna asauku qini qisauku aqumusaa maaqoo quqasee pirimma aamara auqamma qafa. Aneenna asauku qini qiqaaanasaa faqa quqasee auqama qafa, aneenna maparaairana taikaa, kuqaa fee kai qia.

<sup>28</sup> Toomasifa mina qafamaseenoo qinau. Qini karaambaiqa qini Anutufa.

<sup>29</sup> Yisufa kafaa Toomasina qimaminoo qinau. Anee qini qiqafamaseenana kai qiniara kuqaa fee qidanee. Akaqausa sia qini qiqafaidaga qini ufara kuqaa fee qifanoo Anutuna asasirafa misasaa mariannoo.

*Maapapiqanaki akara oosana kooroo qu ufafa.*

<sup>30</sup> Yisufa moomoo firaa ainaina narí faiqi namu nifusaa kooroomasoofaqa sia maa papiqanasaa akara riqa. Akaqana kai akara riqa.

<sup>31</sup> Maa ainainnausara akara rumaseeqa inneeqa Yisunara kuqaa asauku mundira fee qimasee Anutuna amaaku fee qimasee mi iriranannai mina auqunnai innee naaru naaru marirana maraageera akara rumannimaqeeqa.

## 21

*Yisufa narí faiqi namu qisauku dinni taikasee dinni qaaraqanda marasee misa nifusaa kooroomannimaqoo ufafa.*

<sup>1</sup> Inaaqiana moo kari Yisufa kooroomambufafa maasa mina faiqi namu qafaqau. Tibeeriasa nammari mandirana afainni maaqimandee kooroomandee uqannifiqanau.

<sup>2</sup> Simoona moo auqu Peetooroofa faqa Toomasifa qaara qapirafa faqa Natanaeer-afa Kannaana maqusa Kariree maqa maaqaindaraafa qini qikoona Seebeedeena amaakuqara faqa moodaanaki mariqiafana.

<sup>3</sup> Marufanoo Simoona moo auqu Peetooroofa naríara qinee noodaanna pateeraanauree qufaqa maasa ani faqa funauree qimasee mina faqa fiqiafana. Maasa miqi qimasee kanuqaki akaramafi nammari qambaanaai oonuree pateeuqa quqasaida uqeerasaida qafeemarufanoo iqaqanau. Sia uqanna moodaa noodaanna uqarinau.

<sup>4-5</sup> Kanaanaana suani maqee ururoofanoo Yisufa nammari afainni kikiqinoo marufaqa maasa sia minara irisee Yisu fee qigau. Yisufa maasa nammeera qimasee qimannim-inau, Oo kumaaraauqa noodaanna maraidee qufaqa maasa qigau, sia uqanna moodaa maraidaqa.

<sup>6</sup> Yisufa iriseenoo maaqi qimasee qimanniminau, innee nisauku uqannai pateeuqa quqaseeqa noodaanna paqurifaranoo. Misa mina iriseeqa nariqa firaa pateeuqa nisaukuqannaindari aqusoofanoo noodaanna moomoo minaki qumbiqafufaqa raris- arara anuqimariqiafana.

<sup>7</sup> Yisuna afaaqasaa aqoondi qinee Yoohaneesa Peetooroona qimamiqa qiqiafana Karaambaiqa muqufa maasa qimaqimifa maridanoo. Simoona moo auqu Peetooroofa



mina iriseenoo narí qamunna quqaqoona qumareenoo aranandauqanna rumbamareenoo nammariki oqurama aqufufanoo immapamamaree Yisufunnai finau.

<sup>8-9</sup> Maasa Yisuna faiqi namu kanuqaki kaqimariaafanausa pateeuqaki noodaanna qumbiqanoo marufaqa rarisafa aniuafaqa afainni anireeqa. Maasa sia nianai marufaqa aambaaka maaqooqari aqimariana amanasaa marufaqa miqoo oonureeqa maasa sipa-qiari maqasaa aqufufaqa miqoo idaraqoona qafaafannaqoo idarasee noodaanna suqaida feemu kaqi quqaqoofaqa qafaqiafana.

<sup>10</sup> Yisufa maasa qimanniminai, noodaanna maqee maree anianakinaana akaqana maree aniaqa.

<sup>11</sup> Simoona moo auqu Peetooroofa sipaki akaramafinoo noodaanna pateeuqa rarisama maqasaa quqanau. Quqasoofaqa maasa noodaanna asaana rumasee (153) moomoo uqanna firaafa kai marufanoo sia pateeuqa rakeeinai.

<sup>12</sup> Yisufa maasa narí faiqi namu naaranau, doo aniree narana naaqa. Maasa minara yafee qianneerusia. Doo karaambaiga akooqoo maridanoo qimasee sia iraqau, kaqim-biqiafana.

<sup>13</sup> Maasa aniraafananoo Yisufa feemu faqa noodaanna faqa mareeqee niminai.

<sup>14</sup> Yisufa kuqiranakiqari findifuqooqari qaara kari maasa narí faiqi namu koorooman-nimaqanau. Doo qaaramookufanoo noodaanna qumbaqira faasaanasaa fee qimasee kooroo inau.

*Yisufa Peetooroona faqa ufa qu ufafa.*

<sup>15</sup> Maasa miqoo namasaafananoo Yisufa Simoona moo auqu Peetooroona qimaminoo qinai, Simoona, Yoohaneena amarana amaaku, anee qiniara aneenna amuqusakiqari fee aididanoo fee qini faiqi namu qiniara nidimarina ani qiniara aidirafa urinnaaqaranoo fee maridanoo fee. Peetooroofa iriseenoo maaqi qimasee qimaminoo qinai, eeo Karaambaiga qinee aniara dididanoo anee minara irimarianoo. Yisufa iriseenoo kaifaa qimaminoo qinai, anee qini faiqi namusaa asumu aandauro foora naranara foora nimia.

<sup>16</sup> Miqi qimaseenoo Yisufa kaifaa Simoona moo auqu Peetooroona qimaminoo qinai. Simoona Yoohaneena amarana amaaku, kuqaa fee anee qiniara aneenna amuqusakiqari fee aididanoo fee. Simoona moo auqu Peetooroofa qinai, Eeo Karaambaiga aniara didimarifana anee minara irimarianoo. Miqi qimasoofoanoo Yisufa qinai, anee qini ufa irimariasasaa sipsipara foora rakisinnimaqaa.

<sup>17</sup> Miqi qimasee Yisufa qaaramookufanoo Peetooroona irammirinoo qinai, Simoona Yoohaneena amarana amaaku kuqaa fee anee qiniara aidinoo fee. Peetooroofa Yisufa qaaramoo kari iroonara aundura rapikufanoo maaqi qimasee qimaminai, Oo Karaambaiga anee aiqama ainainara irimarianafa qinee aniara didimarinara anee irimarianoo. Yisufa iriseenoo qinai, anee qini ufa irimariasasaa naranara foora nimia.

<sup>18</sup> Qinee anoona ufa kai ani mimamidaqa. Anee kumaaraa maridana qamunanda anee rumbasee aneenna aidiranasaa nimarianoo, kasooqaqee anee nauraiqi quqainanoo faiqi moo fannoo ani asauku dinni dinni ratutasee rumbasee afiqee sia fuaqaannai ani akooqainnannai kuqinnanara afiqee fuannoo.

<sup>19</sup> Yisufa mi ufanannai Peetooroofa aunirira saqarisaa kuquaninnana Peetooroofa mi kuqiranaki afaaqa areenarana Anutuna amiannoo. Yisufa Peetooroona qimami taikaseenoo mifa findifi fidanoo Peetooroonara doo anee qini qinaaqianna anianne qimasee indaaru Yisufa finau.

*Yisufa narí afaaqasaa aqoondi faqa ufa qu ufafa.*

<sup>20</sup> Peetooroofa Yisuna faqa fidanoo quandaki Yisuna afaaqasaa aqoondi qini Yoohaneesa qiqafanau. Ooqi Yudasifa ueeqoo eendanaki narana neemarufanoo Yisuna aafa marufa ueeqaaninnanara iroo fasiqafa qinee Yoohaneesa mi fasiqafa Peetooroona aanaaqiana fimariafananoo.

<sup>21</sup> Peetooroona Yisuna iraidanoo qinai, Oo Karaambaiga maa fasiqafa Yoohaneefa naqifeemasee kuquannoo fee.

<sup>22</sup> Yisufa qimaminoo qinai, Peetooroo sia mi fasiqana ainainirafa ani saikafau maridanoofau, qinindi maridanoo. Qinee mi fasiqanara sia dauni kuqaa, kasooqaqee qinee kafaqa qumuanna aukuaana ani paqurianauree qiananoofau miqimmiqini. Peetooroo sia ani saika maridanoo. Ani saika maafa maridanoo. Anee qini faqa fuannee qidaqa.

<sup>23</sup> Yisufa miqi qimasoofaqa mina faiqi namu maaqi qimasee qini Yoohaneenara narí qimami narí qimami aqamasee qiqau. Oo mi fasiqafa Yoohaneefa sia kuquannoo afeeka fee mariannoo. Yisufa sia minara sia kuquannoo fee qinai. Yisufa maaqi qinai, qinee mi fasiqanara kaqi marinaqa qinee qumuanna aukuaana qumu paquriananoofau miqimmiqini misaikana sia anindi, qinindi fee qinai.

<sup>24</sup> Mi fasiqafa maa ainainna ufana qidaqa akara rimarunausa maridaqa. Maasa mina ufara kuqaa fee qimasee iridaqa.

*Maa papiqanakinaa akara rafaaqafu ufafa.*

<sup>25</sup> Yisufa kuqaa moomoo ainaina auqinau, sia maa akaranakinaana kaifau auqinau. Maasa sia Yisufa auqoo ainaina aiqama akara riqa. Papiqa maa maqa maaqana qumbiqaandoora, oodaa kai akara riqa.

## YISUFA NIQIQOO FASIQAUSA

### Yisufa narí faiqinamu Yuda maqasaaqari niqiqoofaqa daraanimafufaga auqoo ainainafa.

<sup>1</sup> Oo qini qifasaafa Teeoofirusafa, Yisufa indaaruu narí saika oosana araseenoo miqooqari mina ufa oosana oosana faqa mifa auqu ainaina faqa Anutufa mareeqee innaarunai quqoonara faqa qinee indaaruuqaa papiqaki qinee Rukaasa akara ruma-maqaafanafa maridanoo. Maqee maanaki dinnatinnai fuka akara rumamaqaidaga.

<sup>2</sup> Anutufa Yisuna mareeqee innaarunai quqoo kamuqoo mi indaaruuqaa akarana taikaqiafana. Yisufa kaqi maridanoo Anutuna naaquqara maraqqunnannai narí rusa-sandeesamumasee maroo fasiqausa naamuqaira ufa oosana oosana qimanniminau.

<sup>3</sup> Yisufa narí kuqiranakiqari findifinoo miqooqari qaara fasiqa niku nisauku taikasee faasaana maridanoo narí faiqi namu maruqoo moomoo kari kooroomambinoo misa faqa ufa qidanoo Anutuna innaaruna ququsakinaa mariranara ufa qimannimmarinuu. Miqqimandeenoo narí kuqiranakiqari findifinoo akoqoo mariranara uqannifiqanau.

<sup>4</sup> Mi fasannai mi kamuqoo mina faiqi namu mina ufa irimarusa moodaanaki suqufufanoo Yisufa misa faqa maridanoo maaqi qimasee ufa qimanniminuu. Qinee innaarunai ooru funaqa innee maa maqusana Yeerusaree maqusa sia quqasee fifainiaqa kaqi mariaqa. Qini qikoofa moo afeeka nimianinnanara qinee qimannimiamannana minara maaqoo kai marida rakisiaqa.

<sup>5</sup> Yoohaneefa nammari rumannimaqee marifa kaqi fifau nammari uqannaki moomoosa rumannimaqee marinuu. Anutufa qusasaa aonona ainainaki narí naaquqara andeeqaa maraqqunnaki inni rumannimaqaannoo.

*Yisufa innaarunai ooru finuu.*

<sup>6</sup> Yisuna afaaqasaa aqoondiuga mina faqa nimarusa misara niqiqoo fasiqausee qimariqau. (Yisufa maru akuuanna Roomma maqanna kaamanna faqa sundiauga faqa rakisinnimaqee marufanoo Yuda maqannaasa nikoqanau. Naqimasee Roomma maqanna niqiqamasee fee maasa qeeqa rakisianauree qimariqau.)

Minara Yisuna afaaqasaa aqoondiuga Yisuna faqa suqufiqa irammiriqa qiqau. Oo Karaambaiga maa akuuannee yairee fee anee Roomma maqanna kaamanna aqimaseenee Isaraee maqanna maasa nári kaamanna quqeennaree.

<sup>7</sup> Yisufa mi ufana iriseenoo qimanniminoo qinuu. Oosana oosana ainaina naaru kam-biqaaninna akuuannai sia innidifau maridanoo. Qini qikoofa narí afeeka rakisirana quqaseenoo, sia inniara iriaqee qinuu.

<sup>8</sup> Maanara kai iriaqee qinuu, qini qikoona naaquqara andeeqara maraquna fannoo qumuree inni naakufinaqa innee qini qiqafara fasiqauqa qiniara aiqamai qimannimimaree fifaranoo Yeerusaree maqusai mariasa faqa Yudeeaa maqa maaqaki mariasaki faqa Samaria maqa maaqaki mariasaki faqa nianai aiqama atinnai mariasaki faqa qini qiqafara fasiqauqa qiniara kooroo ifaranoo.

<sup>9</sup> Yisufa miqi qimaseenoo misa nifusaa miqooqari Anutufa kukeeqaranakiqari Yisuna akoqoo uqeerasoofanoo innaarunai oorufimarufanoo asuru fannoo qumu dukuni-maseenoo misa nifusaa kai qumu afiqee ooru finuu.

<sup>10</sup> Misa miqookai tataaqa marufanoo qaara fasiqa eekara qamunna afisiraqanda miqoo misaki dadi findifufafaqara kikiqiqau.

<sup>11</sup> Miqanda maaqi qimasee aiqamausa qimannimiqau. Oo Kariree maqannaasa Innee nanaree innaarunai noori uqeerasee tataaqa maridee, innee fifau miqi mariafanoo. Anutufa Yisuna maqee inni nifusaa uqeereeqeenoo innaarunai muru quqeenoo doo Yisufa maqee innaarunai ooru findee kai miqikai inoo kasoqaaqee kafa qumuanoo.

*Mataiasafa Yudasina amana kambiqanau.*

<sup>12</sup> Miqanda miqi qimasooofaqa Yisuna faiqi namu quqasee Oorifa aaqanasaaqari Yeerusaree maqusai kafa oogu keeqaqau. Oorifa aaqana sia nianai maridanoo.

(Moodaa kirometera maaqiraqoo maridanoo dinni Qufoorai miqiraqoo Yeerusaree maqusa maridanoo.)

<sup>13</sup> Misa kafa Yeerusaree maqusaki keeqafiqa maqee maqee nariqa kai suqimaru maqanaki keeqaqau. Maarinni sandaaqai rummaki suqiqau. Misa nuqu Peetooroofa faqa Yoohaneefa faqa narí afasaafa Yameesafa faqa Peetooroona akaqa Andurufa faqa Firipifa faqa Toomasifa faqa Baratooroomeeufa faqa Mataioofa faqa Yameesana amarafa

Arafaeusana amaaku faqa Simoona amarafa moo misa minara nariqa kaamanaiki-  
aqeera sandanainai qimaru fee qimariqau. Mifa faqa moo Yudasina amarafa faqa mifa  
Yameesana amaaku.

<sup>14</sup> Minamusa anaasee namufaqa Yisuna anoona Mariana faqa Yisuna akaqaafasaa  
namufaqa maqee maqee suqufida moodaa naundurasa fidaqa innaaru qimarusa  
mariqau.

<sup>15</sup> Qaaramoo faasaana aiqarofaqa Yisuna ufa irimarusu suqufufaqa ufa suqirara  
qiqau. Misa nisaanarafa maaqinoo maridanoo. Qisauku dinni taikasee dinni ani  
moodaa marasee fasiqa niku nisauku taikasee fasiqa anaasee suqimariqau. Misa  
suqimarufanoo Peetooroofa misakiqari findifinoo maaqi qimasee qimanniminu.

<sup>16</sup> Oo qini qiqoonausa. Ooqeenaa akara anoona maasaki doo anoonaikinoo Yudasifa  
sundia mareeqeenoo soofaqa Yisuna arunara anoonaikinoo. Ooqai naaquqara andee-  
qara maraquna fannoo Dafidina qimamifanoo Yudasinara akara rumaqoofa doo maqee  
mina anoona maasaki kambiqeenoo.

<sup>17</sup> Yisufa Yudasina rusandeesamumandee maasa faqa ainainianifeera mareeqee  
maasaki quqasoofanoo marinau.

[<sup>18</sup> Yudasifa Yisuna qumaraseenoo Yuda maqannaasa nisaukuki quqasoofaqa misa  
mina akiqara feefauru amiqau. Amufanoo mifa mi feefauruna mara mareenoo moo  
maqa feefaurumandeenoo miqoo saamurufanoo amuaqu radiqufanoo arana kukupama-  
fufanoo kuqinau.

<sup>19</sup> Yeerusaree maqannaasa minara iriseeqa mi maqanara fidika maqa maaqee qidaqa.  
Yeerusaree maqannaasa nari ufakiqari mi maqanara Akeeradama fee qidaqa.]

<sup>20</sup> Dafidifa nari idi papiqaki maaqi qimasee Yudasinara ooqai Yudasifa sia kam-  
biqooqoo maaqi qimasee akara rinau.

Mina maqa maaqa kaqi mariannoo

Moo fannoo sia amana minaki marinnaranoo.

Kafaa Dafidifa moosaa maaqi qimasee Yudasinara akara rinau.

Moo fannoo mina amanasaa findifinafa mina amaaqa maqafi mariannoo.

<sup>21-22</sup> Peetooroofa Dafidina ooqeenaa ufa kikiqa ususeenoo maaqi qimasee nari  
aqoonausa miqoo suqiqa marusa qimannimidanoo qinau. Maasaki qisaukuqara taikasee  
qiku nooqu qaara marasee mariafanausa maridaqa. Yudasifa doo kuqinoo moo fannoo  
mina amaaqaki kambiqaa. Sia kai fifau fasiqa fannoo miqianoo. Ooqai oosanaree  
Yoohanee nammari nimimarufa marunaki maru fasiqafa miqooqari Yisuna faqa maasa  
faqa fifufanoo Karaambaiga Yisufa innaarunai ooru funa irufa mina qafoo fasiqafa kai  
Yudasina amaaqaki kambiqaanoo.

<sup>23</sup> Peetooroofa miqi qimasofaqa misa qaara fasiqa utaaqau. Miqanda nuqu  
Yooseefaana amarafa faqa Matiasafa faqa Yooseefaana amarafa moo auqu Barasabasifa  
kafaa moo auqu Yustusafa marinau.

<sup>24-25</sup> Miqoo suqimarusa miqanda nuqurama quqaseeqa minee maraanau maanee  
maraanau qidaqa Anutunara maaqi qimasee innaaru qimariqau. Oo Karaambaiga  
Yudasifa ani ufa irimariasaki mariifa doo nari manda nammari namaseenoo nari sanda  
arinoo maridanoo. Oo Karaambaiga maasa qaaraqanda mareeqee quqaseeqa, anee  
miqandakinaana yafasiqa fee ani aididanoo fee Yudasina aikuki kambiqaanoo fee.  
Anee aiqama fasiqa naundurai irimarianafa minara maasa uqaqifiqa.

<sup>26</sup> Miqi qimasee innaaru qimaseeqa masisa quandeera foora ufanoo Matiasana uqan-  
nifiqanau. Uqannifiqasoofaqa Matiasana mareeqee Yudasina aikukina mara quqaqau.

## 2

*Anutuna naaquqara andeeqara maraquna qumuree naakinu.*

(Ooqai Sinai aqanasaa Anutufa Mooseena aamua qimaqoo suqirafa marinau. Yuda  
maqannaasa faqa Yuda maqannaasa aanaamuruki oonu marusa faqa aukuaana aukuaana  
mi fasannai suqira qoomaqammandaida Yeerusareenni suqu maree ururee neemariqau.  
Misa mi qoomaqanara aiqum quqara qoomaqa fee qiqau. Anutufa nari sandufa Sinai  
aqanasaa Mooseena amu ufanara faqa mi qoomaqana sakasee namaseeqa nari ufak-  
iqari Peendeekoossee qimariqau.)

<sup>1</sup> Yisufa innaarunai oorufu kamuqoo mina faiqi namu moomoo Peendeekoosa  
qoomaqira faasaanasaa misa aiqama Yeerusaree maqusai moodaa maaqaki nariqa kai  
keeqafimariqau.

<sup>2</sup> Marufanoo kaqi kaqi ufanoo innaarunaindari firaa ufai uqidanoora foora  
qumureenoo mi maqanaki qumbiqa aqinau.

<sup>3</sup> Uqimarufanoo idauru miqirafa qumureenoo raina rainamaki aiqamausa nikiaaqa aqufufaqa qafaqau.

<sup>4</sup> Idauru miqirafa Yisuna ufa iri marusasa aquufufanoo Anutuna naaquqara andeeqara maraquna naakufufaqa naundura qumbiqanoo marinau. Qumbiqafinoo Anutuna maraquna fannoo anonaikufaqa moo maqannaa ufa nári sia irimaru ufausa qimariqau.

<sup>5</sup> Mi fasannai Yuda maqannaasa kaaqa Anutunara rimarusa aanaamurunni daraaniqa mariusa oonurandee anireeqa Yeerusaree maqusai qoomaqa suqanarara qusimariqau.

<sup>6</sup> Yeerusareenni suqimarusa ufai uqira ufa iriseeqa moomoosa Yisuna faiqi namu maruqoo suqiqa mariqau. Anaamurukiqari ani marusa Yisuna faiqi namu ufa iriseeqa akasaa qeeqa maqannaa ufa qidee qimasoofanoo naaquqanau.

<sup>7</sup> Naaquqoofaqa randeeqa narí qimami narí qimami qiqaau, Maa ufa qimaria fasiqausa Kariree maqannaasa kai maridaqa.

<sup>8</sup> Misa maasa ufakiqari andeeqasee kai qida qiafaqa iridaqa. Naqi fee mandee maasa ufa iridee, sia maasa maqusai mariaasa maasa ufauqa qidaqa. Maasa moomoo maqa maaqaindari anunausa maridaqa.

<sup>9</sup> Maasa akaqausa Paratia maqusaindari anunausa.

Akaqausa Meedia maqa maaqaindari anunausa.

Akaqausa Eeramma maqa maaqaindari anunausa.

Akaqausa Meesoopootamia maqa maaqaindari anunausa.

Akaqausa Yudeeaa maqa maaqaindari anunausa.

Akaqausa Kapadoosia maqa maaqaindari anunausa.

Akaqausa Poontiusa maqa maaqaindari anunausa.

Akaqausa Asia maqa maaqaindari anunausa.

<sup>10</sup> Akaqausa Firikia maqa maaqaindari anunausa.

Akaqausa Pamafiria maqa maaqaindari anunausa.

Akaqausa Isipa maqusaindari faqa,

Ribia maqa maaqa Sireenee aaqa mariasakiqari faqa aniqa.

Akaqausa Roomma maqusaindari anunausa.

<sup>11</sup> Yuda maqannaasa faqa aanaamuru Yuda amaana ufa irimariasa faqa anunausa. Akaqausa Kareete maqa maaqaindari anunausa.

Akaqausa Arabia maqa maaqaindari aniqa.

Maasa moomoo maqusaindari daadu daadu ufa qimarunaua ani maridaqa nári ufakiqari andeeqasee qiafaqa iridaqa. Misa Anutuna fira aainaina auqunara qiafaqa iridaqa.

<sup>12</sup> Misa aiqama naaquqeenoo naundura dapikufaqa narí qimami narí qimami qiqaau. Maana nana oosanee kambiqaiddanoo maaqiddanoo fee. Maasa mina oosanara randaidaqa.

<sup>13</sup> Akaqausa Yisuna faiqinamuara naakada qiqaau. Maa fasiqausa nammari moomoo neeneese furufarida fifau fafau aiqama maqannaa ufa qidaqa sia misa ufa iriaqa.

*Peetooroofa findifinoo amiqimasee aiqamausa qimanniminau.*

<sup>14</sup> Peetooroofa mina iriseenoo Yisuna faiqi namusaimbaqa qisaukuqara taikasee qiku nooqu qaara marasee qirausaimbaqa findifufanoo firaqqoo nammeera qimasee maaqi qimasee suqiqa marusa qimanniminau. Qini maqannaa Yuda maqannaasa inne aiqama Yeerusareenni ani mariasa qini ufa iriaqa. Qinee maqee qimannimianaga amiqimandee iriaqa.

<sup>15</sup> Maa fasiqausa sia nammarifau namasee furufaridau. Innee qafaqa kananaana maridanoo suani maqee ururaidanoo. Minara sia amana nammarifau namaqaeqee miqidafau ia.

<sup>16</sup> Maa amiqira fuka ainainafa kambiqaana Anutuna tamummaqara fasiqa Yooerafa ooqai akara rumaqoofa mina anoona doo maqee inni nifusaa kambiqaenoo. Yooerafa maaqi qimasee ooqai akara rumaqoofa.

<sup>17</sup> Anutufa qinau, Taikainna faasaana maa ainainna quqaanaura.

Qinee qeeqa maraquna faiqi aiqamausa nifaaqai nammariara fooraa teeqimanni-maqaanaura.

Mi afeekanannai inni faiqinamu niraamuqmaaka naaru kambiqaaninna ainainara maqee qimasainanoo naaru kambiqaannoo.

Inni kumaaraauqa faqa qaina anoona qaina qafeefaranoo.

Faiqi asooqa nauraasa qaina misa nifunni areefaranoo.

<sup>18</sup> Mi fasannai qinee Anutusa kaiqeesa ainainimariasa faiqi faqa aanaaseeuqa faqa nifaaqasaa qini maraquna adiaama nimaqasaanaqa misa tamummaqeeffaranoo.

19 Qinee mirinni innaarunai moo ainaina oosana oosana uqannifiqasaanaqa maqasaqaari qafeefaranoo.

Maa maqanasaa moo naaquqara firaa ainaina auqusaanaqa qafamasee qini afeeka oosana qafeefaranoo.

Fidika faqa ida faqa ida muna firaa faqa mariannoo.

20 Asukuna fannoo suani afu aruannoo.

Fidika andandirafa quqoona ititaannoo.

Karaambaiqa firaa kaaqa qara faasaana radiqisee qumuraannee qinna kamuqoo maa ainainnausa kambiqaannoo.

21 Mi fasannai yafa yafee Karaambaiqa auquara fifimasee aaree mariasa misa kai Karaambaiqa asumu mareefaranoo.

Yooerafa mi ufausa akara rumaqoofa maridanoo.

22 Peetooroofa Yooeerana ufa qimannimiseenoo maaqi qimasee aiqamausa suqiqa marusa qimanniminau. Innee Isaraee maqanna faasiqauqa aiqama qini ufa iriaqa. Anutufa Yisuna Nasareetee maqanna nari asauku mundirana inni nifusaa utaaqamaqoofa maridanoo. Anutufa dadaaqufanoo Yisufa faiqi inni qambaana maridanoo inni nifusaa afeeka ainaina faqa naaquqara ainaina faqa uqannifiqara ainainauqa faqa auqusoofanoo minannai innee Yisunara innaarunaindaraa fee qiaqera uqannifiqanau.

23 Anutufa faasai iriqaraasamaseenoo nari amaaku maqasaa mariasa nisaukuki quqasaanaqa misa mina arifaranoo fee qimaseenoo misa miqimmasee maaqimmasee aruaqee qimasee nari qimiriqoomau kai fuaqera qimaseenoo inni nisaukuki Yisuna quqasoofaqa sia irirai mifa aamua qimaqoomau kai fidaqa mina maree kuqammarigau. Innee mina qumaree manda oosana maree maru faasiqausa nimisoofaqa misa qumareeqa aunirira saqarisaa pirimmannai arusoofanoo kuqinai.

24-25 Kuqufufanoo Anutufa sia minnisana, kuqiranakinaana uqera quqanau, kuqira aupuranakinaana rakeemaseenoo uqera quqanau. Kuqirana uriqararafa marunara kuqirafa sia amiqimasee amana kisaqasaa qumaraannoo Dafidifa minara maaqi qimasee akara rumasoofanoo maridanoo.

Karaambaiqa qini qifusaa faasaambaasaana marufaqa qafeemariqia.

Mifa qini daaqa qini qisauku uqannai marinara sia qinee rufiaanaura.

26 Qinee minara irunano qini ufa asasirafa kai maridanoo qeeqa daunduraki asasirafa qumbiqanoo maridanoo.

Qini qifaaqa faqa sia maparaa iannoo, Karaambaiqa afeesidanoo asasiannoo.

27 Anee sia qini qimana kuqiranaki minniqiseennara qifaaqa quqaidaqa sia maparaa ianaura.

Aneenna naaquqara andeeqara fasiaqaa faaqa madikaki akundamasainana anee qaoo qinano mina amaqi sia putaa iannoo.

28 Anee kaqi marira aana doo uqaqifiqeenaranoo.

Anee qini faqa mariranannai qini daunduraki asasirana qumbiqa qiminnaranoo.

29 Peetooroofa Dafidina ufa qimannimiseenoo maaqi qimasee nari qimanniminau. Oo qini qiqoonausa iriaqa. Dafidifa sia nariarau akara rinau, nari ati Yisunara akara rinau. Dafidifa maasa qikeeku qikaaku marifaqa minara innee amiqimasee iridaqa marianara qifaaqa quqasee amiqimasee maaqi qimasee qimannimianaura. Dafidifa kuqufufaqa akundaqau. Mina madika kaqi maridanoo maasa faqa.

30 Dafidifa Anutuna tamummaqara fasiaqa marufa marinara. Anutufa maaqi qima afeekaikamandee qimaminau. Qinee Anutusa, anatikiqari kasoogaqee moo amiananoo Karaambaiqaiannoo, ani aana reenoo karaambaiqaiannoo.

31 Dafidifa Anutufa kasoogaqee auquaninna ainainara iriseenoo narati asauku mundirafa kuqiranakiqari findifuaninnanara maaqi qimasee akara rinau.

Anutufa sia suqiraua marianaki minninnisaannoo.

Sia mina amaqi putaa iannoo.

32 Anutufa Dafidina ufamaa maa Yisuna kuqiranakinaana findifumasaiqa maasa magee inni nifusaa kikiqimariasa mina qafeemarusa maridaqa.

33 Anutufa Yisuna uqereeqeenoo nari aqa asauku uqannai quqaseenoo nari naaquqara maraquna ooqai utaaqa amamaqoona Yisuna amifanoo mifa kafa qandakino maasa adiaa qimaqaifaqa maa maqee kambiqeemari ainaina innisaimbaqa qafaidaqa.

34 Dafidifa sia innaarunai ooru finau nari ati Yisufa ooru funara maaqi qimasee akara rinoo qinai.

Anutufa qini Karaambaiqa qini atiara maaqi qimasee qimaminoo qinai.

35 Anee qini daaqa ooqai marifinaqa qinee ani namuqaa mareeqee ani aramandunnai quqasaana anee rafaqafusaa.

<sup>36</sup> Minara innee aiqama Isaraee maqannaasa maa ainannara aiqama amiqimasee iriaqera qidaqa. Maa Yisuna innee aunirira saqarisaa aruna Anutufa mina kai mareegeeno Karaambaiqa asauku mundiranai kamandaifanoo maridanoo.

<sup>37</sup> Miqoo suqufi mariasa aiqamausa mi ufana iriseeqa Oo maasa firaqoo aaqeeqa qimasoofanoo naundura dapikufaqa Peetooroona faqa Yisuna faiqi namu faqa irammiriga qiqau. Oo qiqoonasa naqi fee maasa ianauree.

<sup>38</sup> Peetooroofa iriseenoo qimanniminoo qinau. Inni aiqamausa uqanna inneeqa mandainaina nimeesa uqusee Yisuna asauku mundiranaki keeqafiq nammari rumanimaqaaqa. Miqi mandaifanoo Anutufa inni mandainainara minninnisaannoo nari naaquqara andeeqara maraquina inni nimiannoo. Sia feefauru qirafa kaqi nimirafa maridanoo.

<sup>39</sup> Anutuna ooqai qima afeekaikamaqoonara nari maraquina inni faqa inni niku nisaukuara faqa aanaamuru mariasa faqa aiqama Anutufa naarainaga aniannee qinausa faqa nari maraquina nimianuroo qinau.

<sup>40</sup> Peetooroofa mi ufausa faqa ufa oosana oosana ufa faqa miqoo suqimarusa aaquqima nimaqaidanoo qimanniminau. Maa maqee mariasa mandoosanara narirara qumuannoo inni faqa naruanu rufiasee Yisuna saqarikiaga.

<sup>41</sup> Miqi qimasoofaqa mi suaninasaakai faiqi anaasee moomoosa Peetooroona ufara kuqaa anoonee qimasee Yisunaindi kamambi nammari maraqa. Qaaramoo tauseenna fasiqa anaasee mi suaninasaakai nammari marasee Yisuna faiqi namuki atooqaaqa.

<sup>42</sup> Miqoo miqimandee nammari maroosa Yisuna afaaqasaa indaaruuqaa faiqi namu ufa maqee maqee irisee mi mau fimariqau. Misa maqee maqee Yisuna faiqi namu faqa moodaanaki kamambi maridaqa moodaa maqaki nariqa narana suqaqoona namaseeqa Yisuna aafaqa namaseeqa raudamaki fira amaana maqaki keeqa fidaqa Anutunara innaaru qimariqau.

*Yisuna faiqi namu amiqimasee moodaanaki mariranara qimariqau.*

<sup>43</sup> Yisuna afaaqasaa faiqi namu moo nuqu Yisufa niqiqoo fasiqaasee qimariqau. Anutufa Yisufa niqiqoo fasiqausannai sia amana faiqi auqaaqaa ira ainaina naaquqara ainaina auqusoofaqa faiqi anaasee qafamasee Anutuna afeekara fira ainainee qimaseeqa naaquqana.

<sup>44</sup> Yisuna ufa irimarusa aiqamausa faasaambaasaana moodaanaki marida aqoondikai mariqau. Misa miqidaqa nari qumiasana nari ami nari ami imariqau.

<sup>45</sup> Misa maqa faqa nari ainaina oosana oosana faqa mootinai nimisee feefauru marasee nariki faiqi akaqausa ainaina saisa marusa misa sarau imaru ainaina doo nimimariqau.

<sup>46-47</sup> Faasaambaasaana Yeerusaree naaquqara amaana maqaki keeqafida innaaru qimariqau. Nari maaqakiaqa faqa maqee maqee suqufida narana neemariqau. Misa afaaramasee narana naida nimisee moodaanaki suqusee naidaqa Anutunara asasidaqa dufi dufi qidaqa aiqama faiqi anaasee amiqi amiqimannimaqaranara irisee asasi-mariqau. Maqee maqee faiqi anaasee akaqausa misa faqa Yisunara kuqaa anoonee qimarisa Anutufa qumee misa mareeqee ooqeenasa faqa moodaanaki kamanni-maqaidanoo.

### 3

*Peetooroosa Yoohaneesa aiku mandaikirana andeeqaisaqa.*

<sup>1</sup> Misa miqi marufanoo moo faasaana Peetooroosa Yoohaneesa Yeerusaree naaquqara amaana maqaki innaaru qirara ooru fiqau. Yeerusaree maqannaasa eeneemarufaqa amaana maqaki keeqafi innaaru qimariqau.

<sup>2</sup> Peetooroosa Yoohaneesa eeneemaru innaaru qiraree qimasee kooqiki ooru keeqafi faiqi moo qafaqa. Ooqai maqasoonakiqari aiku mandaikirafa sia ainainirana amana marufaqa naratiuqa aindusumaraidaqa maqee maqee amaana maqa kooqiki quqasee marufanoo miqoo maridanoo munnimmaru innaaru qimarufaqa akaqausa moodaa moodaa amimariqau. Qimudaoo qusa qaarqanda amisoofanoo minannai naranaina feefaurumma neemarinau. Amaana maqa kooqiuqa moomoo marinau. Nuqafaqa kooqiuqa mariqau. Mi fasiqana quqee maru kooqinara amiqira kooqi fee qimariqau.

<sup>3</sup> Mi aiku mandaikirafa mi amiqira kooqinaki oogu marifufanoo Peetooroosa Yoohaneesa minaki keeqafufanoo mi fasiqafa miqandara munnimmaru qimiaqee qinau.

<sup>4-5</sup> Innaaru qufaqa miqanda mi fasiqana ooriki qafamaseeqa Peetooroofa qinau. Anee maaqanda dooriki qiqafaa qufanoo mifa ainaina qimidaqiaafoo qimaseenoo miqanda nooriki nindafanau.

<sup>6</sup> Nindafamasoofanoo Peetooroofa kafa qimaminoo qinau. Sia qinee munnimma marisa maridaqa. Qinee moodaa ainaina marisa mina kai ani amiana. Yisufa asauku

mundirafa Nasareetee maqusaindaraafa qini qimuna mina ani amidaqa mina auqusaa ani qimamidaqa anee findimeeqee fua.

<sup>7</sup> Peetooroofa miqi qidanoo mi fasiqana asauku uqannai asauku qumareenoo dadaaq-ufanoo aagee uqanna mina aiku faqa mina aiku aummeena faqa afeekaikufanoo rutaqinoo findifumakufanoo oonuree aniree inau.

<sup>8</sup> Miqimakufanoo Peetooroosa Yoohaneesa faqa amaana maqaki keeqaidanoo Anutunara susuqira idi raidanoo rafusaki rafusaki idanoo nidanoo keeqeemarinau.

<sup>9-10</sup> Faiqi anaasee miqoo moomoosa mariusa mi fasiqana qafamaseeqa mina nirana faqa Anutunara susuqira idi rarana faqa qafamaseeqa qiqau, Oo amiqira kooqiki oofuqaqee munnimmara innaaru qimari fasiqafa doo findifinoo amiqimasee nidanoo. Miqi qimasee tautufanoo naaquqoofaqa mina andeeqara oosanara randaqau.

*Peetooroofa mi fasiqana andeeqaisoo oosanara qimanniminau.*

<sup>11</sup> Mi fasiqafa Yoohaneesa Peetooroosa firaqoo dufi dufi qimaseenoo miqanda qumareenoo miqanda faqa maaqa tida atimau Sooroomoaindi fee qimaru maqana atimau akaraqau. Faiqi anaasee moomoosa mina qafamasee sandeeqa oonu mi atimau rafusu uqarumasee mina qafeemarufanoo naaquqanau.

<sup>12</sup> Peetooroofa moomoosa nindafamasee maaqi qimasee qimanniminau. Isaraee maqanna fasiqauqa. Innee maa ainanna qafamasee nanaree tautiqa maasa tataqaidde. Innee maasara nariqa afeekannai fee nariqa andeeqaranannai fee maa fasiqana findifumaseeafoo qidee. Oo sia uqanna.

<sup>13-16</sup> Abarahaamana faqa Isakeena faqa Yakooboona faqa misa Anutufa maasa qikeeku qikaaku Anutufa maa fasiqana uqeereeqeenoo nari afaqa areenarana nari ainainira faiqi Yisuna amifa maridanoo. Innee mina mareeqee maasa faiqi firaasa nimufaqa misa mareeqee Piratoona amufaqa innee miqoo aruaqee qiqau. Piratoofa idukiraree qufaqa innee afeekaikamasee aruaqee qiqau. Yisufa mifa aaduma amiqimandee andeeqarafa uqanna marufaqa innee faiqi narimarunara Piratoonara iduku qimiseenana Yisunara kaqi kuquanifee qusa. Innee miqi qimasee asumu marira oosana faqaana arusaqau. Anutufa mina kuqiranakinaana uqeera quqasoonaa maasa qafeemarunaua maridaqa. Maa Yisuna auqu afeeka fannoo kai maa fasiqana afeeka amifanoo findifinoo nidanoo. Innee maqee qafeemaria ainaina Yisuna auqu faqa nari auqusaa irirana rusiranannai faqa kambiqeenoo. Yisunasaa irirana rusiranannai maa fasiqana andeeqasaifanoo aiqamausa nifusaa findimeeqee nidanoo.

<sup>17</sup> Qini qiqoonausa innee faqa inni faiqi firaasa faqa sia irirana iriqa Yisuna ariqau.

<sup>18</sup> Ooqai uqanna Anutufa nari tamummaqara fasiqauqa ufannai nari asauku mundirana kasoogaqee aupuraannoo fee qimaqoonaa doo inni nisaukuki quqasoofaqa mina ufa anoonaiqiqa Yisuna ariqau.

<sup>19-20</sup> Innee minara irisee inneeqa mandainainara nimeesuqusee Anutufinnai noori ubeekaifanoo inni mandainaina numoo rukannisainaga innaarunaindaraa asoosana Karaambaiqa afusaqaraana inni nimiannoo. Ooqai Anutufa inniara iriseenoo nari asauku mundirana Yisuna mareenoo kaifaa kasoogaqee innee iannai aqiqaianoo qumuannoo.

<sup>21</sup> Mifa Yisufa asauku mundirafa kaqi innaarunai mariannoo. Kasooqaqee Anutufa aiqama ainaina fuka kambiqaaninna aukuanai mi kamuqoo Anutuna tamummaqara fasiqauqa ooqai qimaqoomau kai asauku mundirafa kafa qumuannoo.

<sup>22</sup> Ooqai Mooseefa maaqi qimasee qimaqoofa maridanoo.

Karaambaiqa inni Anutufa inni tamummaqara fasiqa moo nimiannoo. Qini Mooseesa daanna reenoo innikiqari kai moo fannoo kambiqaanoo. Kambiqainaga innee mina ufara eedoo kai qiaqa.

<sup>23</sup> Innikiqari moo fannoo sia mi tamummaqara fasiqana ufa irifanoo faiqi anaaseekinaana qumaree kaqinni quqasee miqoo kuqaruannoo.

Peetooroofa Mooseena ufa miqi qimannimiseenoo nariara quandafinoo maaqi qinai.

<sup>24</sup> Ooqai Anutuna tamummaqara fasiqauqa moomoo marufaqa naaru kambiqaaninna ainainara tamummaqasee akara riqau. Misakinaana moo tamummaqara fasiqa Samueerafa faqa marufanoo, nari faqa naraanaaqiana kambiqoosa faqa moodaa kari ufa qunannai maa maqee kambiqeemari ainainara kooroo inau.

<sup>25</sup> Anutufa nari tamummaqaranauqannai maasa qikeeku qikaaku qima afeekaikirana oosana oosana nimiqoofa maridanoo. Sia misara kaifau quqanau. Maasa faqa naida qimidanoo. Anutufa maaqi qimaseenoo Abarahaamanasaa qima afeekaikinoo qinai. Ani aiku asauku misannai maa maqa maaqanaki maamaqanasaaqaraasa misannai amiqi amiqimannisaanaura.



<sup>26</sup> Miqi qimasee Anutufa Abarahaamana faqa qimafeekaikunara irinoo narí ainainira faiqi Yisuna mara mareenoo inni maqanniminau. Aiqama maqasaaqaraasakina inniki naaree quqasee inneeqa mandainaina nimeesuqaqera amiqi amiqirana faqa nimianifeera.

## 4

*Peetooroosa Yoohaneesa Kansoorauqa nifusaa kikiqamafuqa mi ufanara iramiriqau.*

<sup>1</sup> Peetooroosa Yoohaneesa faiqi anaasee miqi qimasee Sooroomoona tida atinni firaamaana maqaki maruna qimannimarufaqa amaana maqasaa aanaiqikirausa faqa amaana maqa poorisauqa faqa Sadikai amaana ufa irimarusa faqa anireeqa irimariqau.

<sup>2-3</sup> Peetooroosa Yoohaneesa Yisufa kuqiranaiqari findifunara faqa faiqi anaasee faqa findifandinnanara faqa amiqimasee faiqi anaasee qimannimarufaqa Yuda maqanna rakisirausa aniree iriseeqa tautumaseeqa qiqau, faiqi anaasee Yisuna kuqiranaiqari findifunara iriseeqa maasa dari foora qimaseeqa aanoomasee Peetooroosa Yoohaneesa ruumbeeqee karabusa maqaki quqaqau. Eeneemarufaqa doo suani atisaa marufanoo duna ufa irianee qimasee mareeqee karafusaki quqaqau.

<sup>4</sup> Faiqi anaasee moomoosa sia rakisirausa ufara eedoo qiqau. Peetooroona ufa iriseeqa moomoosa uqanna Yisunasaa irirana rusisoosa minasaa atooqaqau. Faifa tauseenna nukudara foora ira fasiqa anaasee mikari minasaa atooqaqau.

<sup>5</sup> Faiqee iqaqoo kananaana Isaraee maqanna faiqi uriqararusa faqa faiqi firaasa faqa Mooseena sandufa akoofasauqa faqa Yeerusaree maqusaki ufa suqimarua maqanaki suqimariqau.

<sup>6</sup> Annasafa aanaiqikirausa uriqararafa faqa Kaiafasafa faqa Annasana aiku asauku faqa indaaruuqa Yoohaneena amarana faqa Areekasandeerafa faqa misa aiqama Yuda maqanna faiqi firaasa faqa miqoo suqimariqau.

<sup>7</sup> Misa miqanda Yisufa niqiqoo fasiqaqanda karafusakinaana mareeqee nári noorinni quqaqoo faqa aano imasee irammiridaqa qiqau. Inneeqara naqi mandaafanoo fee aiku mandaikirafa findifinoo fee. Nana afeekannai fee miqi fee, ya fasiqana ufa fee iri fee maqi fee.

<sup>8</sup> Peetooroofa naaquqara maraquna minaki qumbiqafunara findifinoo paasoosamandee maqi qimasee misa qimanniminau. Oo maa fasiqausa faiqi firaasa faqa rakisirausa faqa qini ufa iriaqa.

<sup>9</sup> Innee maasa aiku mandaikirana dadaaqi findifumasaunannara innee minaree maasa iraidee.

<sup>10</sup> Innee faqa Isaraee maqannaasa aiqama irifaqa mina oosana qimannimiana. Maa fasiqafa kisaqasaa aiku mandaikinoo marufa marifaqa maqee amiqirafa inni nifusaa kikiqinoo maridanoo. Yisufa Anutuna asauku mundirafa Nasareeteendaraa fasiqa innee aunirira saqarisaa pirimmannai arusoofanoo Anutufa mina kuqiranakinaana uqera quqasoofa mina auqu afeekannai maa fasiqafa findifinoo maridanoo.

<sup>11</sup> Tamummaqara fasiqa akara Yisunara maaqi qimasee akara rumaqoofa maridanoo. Innee maaqa usakeemarusaa faakanara fidiqaamasee tatu aqusoofa Narí kai sabeena afeeka faakana fannoo findifinoo rakiqanoo maridanoo.

Tamummaqara fasiqa ufa miqimasee Yisunara akara rumaqoona innee sia irirai mi mau kai fidaqa mina arusoofanoo nari findifinoo maridanoo. (Mi aukuanna ooninnai kai usakee mariqau. Maasa sabeenannai maaqa usakee maruna marifaqa ooniara sabeena kikiqusidaqa.)

<sup>12</sup> Innaarunai firana Yisuna moodaa nariara minannai kai innaarunai firafa maridanoo. Anutufa sia moo fasiqa maa maqanasaa quqaseenoo minannai innaarunai ooru fuagee qinau. Sia uqanna, Yisufa kai.

<sup>13</sup> Miqoo suqimarusa faiqi firaasa Peetooroosa Yoohaneesa ufa irisooofanoo naaquqooofaqa tautumaseeqa qiqau maaqanda sia sukuraki keeqeemaruqanda kaqi maruqanda maridaqa kaaqa paasoosamandee ufa qimariaqanda maridaqa Yisuna faqa nimariaqanda miqidammia maqi qiqau.

<sup>14</sup> Faiqi aiku mandaikirafa miqoo Peetooroona faqa Yoohaneena faqa amiqimasee kikiqinoo marufaqa faiqi ufa qimarusa mina qafeeqa naqi fee qimasee qaoo qianau qimasee ufara randeemariqau.

<sup>15</sup> Mi rakisirausa suqimarusa Peetooroosa Yoohaneesa niqiqamasoo faqa moosaa faqa nári miqoo maridaqa narinni narinni ufa qimariqau.

<sup>16</sup> Misa maaqi qiqau, Maasa maa fasiqaqandara naqimasee fee miqandara qaoo qianaaree. Yeerusaree maqusanaasa faqa aanaamuru misaki ani mariasa faqa aiqama

maa moo ainaina firaa ainaina auqunara iridaqa maasa faqa sia amana mi ufanara qaoo qianaura akooqoo marifaqa.

<sup>17</sup> Maasa miqanda sia kaqi idukuanauranoo aaquqimannimaqasee idukuanaura maasa miqanda naaramaseeqa qumeeraaqee qianaura maa ufana sia fifainianifeera qianaura maagoo kai kaaqa taikaanifee qianaura.

<sup>18</sup> Miqi qimasee misa Yoohaneesa Peetooroosa naaramaseeqa qaoo qiqa. Sia uqanna Yisuna auquara faqa mina ufara faqa sia kafaa kooroo qiaqa. Qumee uqanna raaqee qiqa.

<sup>19</sup> Peetooroosa Yoohaneesa misa ufa iriseeqa qiqa. Innee inneeqa kai Anutuna afusaa andeeqara ainainara irimariasa mariafanoo. Maaqanda inni ufamau fee fuanauree mina ufamau fee fuanauree. Maasa inni ufamau sia fuanaura Anutuna ufamau fuanaura.

<sup>20</sup> Maasa Yisunara qafee marunna ainainara daaqoo iri marunna ainainara naqi fee masee kukeeqaanauree sia kukeeqaaqaa ira ainaina maridanoo.

<sup>21</sup> Miqi qimasoo faqa miqoo suqimaru rakisirausa afeekaikamandee qaoo qimasee idukiqu. Misa naqimandee miqanda nariraree, sia amana. Faiqi anaasee aiqama qafamaseeqa Anutunara asasiqafa idi reemariqau.

<sup>22</sup> Mi moo ainainna auqaisoo fasiqafa aiku mandaikirafa sia kumaaraafau qaara fasiqa niku nisauku taikasee aukuaana aiqaroo faqa andeeqaaqau, faiqi firaana andeeqoonara asasiqafa minara idi reemariqau.

*Yisuna faiqi namu suqufiqa paasoosiranara Anutunai innaaru qimariqau.*

<sup>23</sup> Misa miqanda idukusoofaqa Peetooroosa Yoohaneesa nari niqoondunnai Yisuna ufa irimarusa marunnai fidaqa faiqi firaasa faqa rakisirausa faqa misa qaoo qirufa oosana oosana qimannimiqa.

<sup>24-26</sup> Miqoo marusa irisee aiqamausa moodaanaki Anutunara اساسamandee innaaru qiqa qiqa. Oo Karaambaiga, Anee innaaruna faqa maqa faqa ooruku nammari faqa minaki mari ainaina oosana oosana faqa quqoonafa mariananoo. Anee aneenna naaquqara andeeqara maraquinannai aneenna ainainira faiqi Dafidinannai ani namuqaara qimannimiqoonana Dafidifa ooqai minara maaqi qimasee akara rinau. Naqi fee qidee anaamuru aanoo idee,

Naqi fee qidee faiqi anaasee unnamaanna qidee, Maa maqanasaa karaambaigaqa irirana deedaqidaqa.

Rakisirausa suqufi Anutuna faqa nari asauku mundirana faqa kuridiraree qidaqa.

Dafidifa miqi qimasee ani Anutuna namuqaara akara rinau.

<sup>27</sup> Kuqaa maa maqusanai Yeerusareenni Eeroodeesa Piraatoosa aanaamuru faqa Isarae maqanna faqa suqufiqafa Anutufa ani aaduma amiqira ainainira faiqi ani asauku mundirana ariraree qiqa.

<sup>28</sup> Anee ooqeenana aneenna afeekannai aneenna iriranannai kambigaaninnanara qunafa misa sia irirai anee qimaqoonna ufamau kai deedaqamandee ariqau.

<sup>29</sup> Oo Karaambaiga misa maasara sia faiqi anaasee aniara qimannimianee qia. Anee misa aaquqirufa maasa qimaqimimarifana anee faqa iriananoo. Anee maasa dadaaqinaqa maasa ani ainainira fasiqausa paasoosamandee Yisunara faiqi anaasee qimannimianaqa iriaqeera.

<sup>30</sup> Oo Anutu aneenna asauku maasa qifaqaqi quqaseenana aneenna naaquqara faiqi Yisuna auqunnai maasa naaquqara ainaina faqa faiqi aurinausa andeeqannisarana faqa auqusaanaqa qafamasee aniara anoonee qifaranoo.

<sup>31</sup> Misa miqi qimasee innaaru qimasoo fanoo misa maru maqafa faqa kasinuu. Kasunakina Anutuna naaquqara maraquina fannoo miqoo marusa naunduraki qumbiga-funara paasoosamandee Anutuna ufa faiqi anaasee qimannimimariqau.

*Yisuna ufa irimarusa nari ainaina narami imariqau.*

<sup>32</sup> Yisuna ufa irimarusa moodaa iriranasaa moodaa naundurasa mariqau. Sia moo fannoo moo ainainara qinindi fee qinau. Kaqi aiqama ainaina aiqamausaindi fee qinoo marinuu.

<sup>33</sup> Yisuna afaaqasaa aqoondi namu amiqimandee afeekaika uqannamandee Yisufa kuqiranakiqari findifuna aufakiana qimannimimariqau. Miqimarunara Anutufa dadaaqufaqa misa nariara nariara amiqi amiqidaqa afaarimarufaqa faiqi anaasee misara amiqimariasee qidaqa eedoo qimariqau.

<sup>34-35</sup> Sia moo fannoo misaki narainaina sarauimarufa marinuu. Faiqi akaqausa maqa fee maqa fee moosa nimisee minasaa feefauru maraseeqa Yisufa niqiqoo fasiqausa nimufaqa misa miniseeqa raina rainamasee sarauimarusa nimana kai nimimariqau.

<sup>36</sup> Miqi marufanoo faiqi moo auqu Yoosafa Yisuna akoona amarafa mifa ooqeenaa fasiqa Yakooboona amaaku Reefina nianasaaqaraa ati marinuu. Mifa Sipurusa afumaki

kambiçoofa marinau. Yisufa niqiqoo faiqi namusa mi fasiqanara moo auqu Baranabasi fee qimariqau. Mi auquna oosana faiqi anaasee pooduqara fasiqee qimariqau.

<sup>37</sup> Baranabasifa narí maqa moona amiseenoo minasaa feefauru maraseenoo Yisufa niqiqoo fasiqausa nimuafaqa misa narana mareemaria munnimmana siaisa qumaree rainasee nimiqaau.

## 5

*Aniasafa faqa Safiraa nammarifa faqa narí munnimmara unna qimasee kuqiquau.*

<sup>1-2</sup> Yisuna ufa iri marusakiqari faiqi moo auqu Aniasafa marinau. Mina anaaga auqu Safiraa nammarifa marinau. Aniasafa narí maqa moosa nimiseenoo feefauru minasaa maraseenoo naríara qumee dinni raina quqaseenoo dinni mareenoo Yisuna faiqi namu niqiqoosa nimida maaqi qimasee unna ufa qinau, aiqama munnimma nimidaqee qinau. Narí anaagaqandira moodaa ufa qimasee miqi qinau.

<sup>3</sup> Anutufa dadaaqufanoo Peetooroofa faasai iriseenoo mi munnimmana qafamaseenoo qinau Aniasana nanaree anee eedoo qiananoo fee Sadannafa ani amuqusa qumaraifanee unna ufa qidanee. Anee Anutuna naaqqara maraquna unna ufa qimamiananoo aneenna munnimma ati unna qimaseenana kukeeqasaannanara.

<sup>4</sup> Mi maqafa anindi maruna nimunanoo kafia mi munnimmafa anindi kai maridanoo. Anee aneennara munnimma ati rafaqqafinanoo amana andeeqanoo maridanoo. Aneenna aaqeenana anee unna ufa qimasee aiqama nimi fee qiannana, nanaree aneenna aunduraki mandainanara irinane. Anee sia faiqifau unna ufa qimannimiananoofau. Anutuna unna ufa qimamiananoo.

<sup>5</sup> Aniasafa mi ufana irinoo doo miqookai tautumasee kuqinau. Moomoosa mi ufana iriqa kaaqa rufiaqau.

<sup>6</sup> Kumaaraauqa mi maqanaki keeqafuafa qamunannai Aniasana iri kukuqamama-ree mara maree maqaki akundaqau.

<sup>7</sup> Kaqikaqoo marinoo Aniasana anaaga Safiraa nammarifa Peetooroofa maru maqanaki urureenoo sia narí afaaqi kuqunara irinau.

<sup>8</sup> Maaqaki ururoofanoo Peetooroofa iramaseenoo qinau. Kuqaa fee ani maqasaa munnimma ani afaaqi aiqamee qiminoo fee. Miqi qufanoo Safiraa nammarifa mifa faqa kai unna qinoo qinau eoo aiqama uqanna inni niminoo.

<sup>9</sup> Peetooroofa mina iriseenoo qinau. Naqaa fee ifanee aneenna afaaqi faqa moodaa ufa qimasee fee unna qimasee Anutuna maraquna amanidanee. Miqiannanara doo kumaaraauqa uru maridaqa. Ani afaaqi doo maqee kuqufifaqa doo muqu akundamaseeqa anee faqa maqee kuqinaqa miqoo mina aqaa akundeefara.

<sup>10</sup> Miqi qimasoofofano Safiraa nammarifa Peetooroona aikunni doo tautumasee kuqinau. Mi kumaaraasa miqoo urureeqa uru mina qafeeqa mara mareeqa narí afaaqi aqaa kai akundaqau.

<sup>11</sup> Miqimasoofaqa Yisuna faiqi namu faqa akaqausa namuafaqa minara iriufanoo kaaqa naaqqee marinau.

*Yisuna faiqi namu faiqi anaasee amiqimannisaqau.*

<sup>12</sup> Yisuna afaaqasaa aqoondiuqa niqiqoo fasiqausa misa moomoo ainaina mookira mookira ainaina faiqi dadaaqira ainaina kai auqimarufaqa misa qafeemariqau. Yisuna ufa irimarusa moodaaqoo naaqqara amaana maqa aqaa Sooroomoona tida atinni maqee maqee innaaru qirara suqimariqau. Sooroomoona tida atinni kisaqaa marunara faiqi moomoo suqimariqau.

(Sooroomoonafa ooqai kuqufinau. Yeerusaree amaana maqakina mina auqu quqaqoo tida atinni kaqi marufaqa minaki keeqafi qusimariqau.)

<sup>13</sup> Yeerusaree maqusanaasa faiqi anaasee kaiqeesa Yisuna ufa irimarusa amiqiraussee qimasaidaqa Yuda maqanna uriqararusara rufiasaida maasa faqa dari maqi qimasee sia Yisuna ufa irimarusunna misa maruqoo animariqau.

<sup>14</sup> Faiqi faqa anaasee faqa moomoosa faasaambaasaana Yisunasaa irirana rusisoosa sia uriqararusara rufiaqau nifaqa quqaseeqa niqiqoo fasiqausasaa atooqafi nimariqau.

<sup>15</sup> Yisufa niqiqoo fasiqausa moomoo faiqi dadaaqira ainaina auqee marufaqa faiqi anaasee mina qafamasee nariqa maaqakiaqa faiqi aurusa faqa mandaikusa faqa di-nee quqoosa faqa qaindusumaree aanasaa qaari qamunna ufiqiseeqa miqoo quqee mariqau. Miqimasoofofano Peetooroofa aatata fimarufanoo mina amana fannoo misa mandaqoofofa aurirafa teeroo taikaani fee qimasee mini quqee mariqau. Peetooroofa moomoo andeeqannisaidanoo oonauqee anauqee maasaindi sia amanaikiandoora qimasee aanasaa quqee mariqau.

<sup>16</sup> Faiqi anaasee Yeerusaree dinni dinni marufaqa nári auri marusa faqa fueenaiki marusa faqa nifiqaida niqiqoosa maruqoo quqasoofaqa aiqama uqanna idaaqamannisee mariqau.

*Amaana maqasaa rakisiraua Yisuna faiqi namu unnaanasamu nariqau.*

<sup>17</sup> Amaana maqasaa aanaiqikirafa uriqararafa Sadikai amaana ufa qimarufa nari aqoonausa faqa Yisufa niqiqoo fasiqausa auqu ainainara kaaqa rairaa qidaqa misa maaqi qiqau faiqi anaasee maasa minnisee misiannai atooqaidaqa. Sainaaq maasa misa rumbaanaura.

<sup>18</sup> Miqi qimaseeqa misa Yisuna faiqi namu niqiqoo fasiqausa mareeqee karabusaki quqaqau.

<sup>19</sup> Miqimasooфанoo eendakina Anutuna qangiroo moo fannoo qumureenoo ireeda karabusa kooqi atuaseenoo niqiqoo fasiqausa aiqama mareeqeenoo madaana quganau.

<sup>20</sup> Quqaseenoo maaqi qimasee qimanniminau. Innee fafaa iqaqinaqa naaquqara firaa amaana maqaki keeqafi kikiqiaqa. Miqi mambiqa maa fuka mariranara Yisuna ufamau firanara faiqi anaasee naamuaqimannimiaqa.

<sup>21</sup> Niqiqoo fasiqausa iriseeqa eedoo qimasee iqaqoofaqa amaana maqaki keeqafuafaqa faiqi anaasee Yisuna fasaasa qimannimiqau. Qimannimimarufanoo amaana maqasaa rakisirafa aanaiqiki marufa mifa faiqi firaa kanasoorauqa faqa moomoo aiqama suqu quqaseenoo Yisuna faiqi namu karabusaki kaqi mariaa maqi qimasee amaana maqasaa rakisi maru poorisaua niqqeenoo innee karabusakinaasa Yisuna faiqi namu niqiqoo fasiqauqa idukusee nifiqee uruqa.

<sup>22</sup> Poorisa karabusa maaqai oquree randasee qafoofanoo sia mariqau. Ooqurandee kansoorauqa suqimarunaki keeqafinoo qimanniminau.

<sup>23</sup> Maasa karafusa maaqaki oquree amiqimasee qafaunanoo kooqi amiqimandee mundinoo mariinoo kooqiki maria poorisaua faqa kikiqiaq maridaqa rakisidaqa. Maasa kooqi atuasee qafaunanoo sia faiqi moo fannoo minaki maridanoo.

<sup>24</sup> Amaana maqa poorisauqa rakisirafa faqa aanaiqiki marusa faqa mina iriseeqa misara oonu mafi iriseeqa randaqau.

<sup>25</sup> Misa miqimasee randee marufanoo faiqi moo fannoo anireenoo qimanniminau. Innee iriaqa eenda karabusa maaqaki quqaasa misa amaana maqaki kikiqiaq maridaqa faiqi anaasee naamuaqira ufa qimannimidaqa.

<sup>26</sup> Miqi qimasooфаqa poorisa rakisirafa nari poorisauqa faqa amaana maqaki oonuree oonu ireeda kai niqiqoo fasiqauqa amaana maqakinaana nifiqee aniqau. Aranaiqi oonu misa nifiqee anianaqa faiqi anaasee minaki marusa oonisamu ainnasamu qumaree darifoo qimasee ireeda kai oonu nifiqee aniqau.

<sup>27</sup> Nifiqamaree mini suqimaru kansooraua nifusaa kikiqamasauqa. Amaana maqasaa aanaiqiki marusa uriqararafa misa mara quqasee qimanniminau.

<sup>28</sup> Maasa amiqimandee andeeqasee inni qimannimunaqa sia mi fasiqafa Yisufa kuqunara qimannimiaqee qunaqa doo innee maasa ufa rukiseeqa aiqama qimannimifaqa. Innee Yeerusaree maqannaasa aiqama qimannimisaafaqa misa aiqamausa quandakiqa mi fasiqana aruana akiaqara mina numoo maasaki quqararee qimariafaqa.

<sup>29</sup> Peetooroofa mi ufana iriseenoo maaqi qimasee qimanniminau. Inni faiqi ufamau sia fuanaura. Maasa Anutuna ufamau kai fidaqa faiqi anaasee qimannimianaura.

<sup>30</sup> Innee Yisuna aunirira saqarisaa pirimmannai kuqarusooфанoo maasa qikeeku qikaaku misa Anutufa mina kuqiranakinaana mara findifumasooфанoo maridanoo.

<sup>31</sup> Anutufa miqooqaraana mareeqeenoo nari aqa innaarunai quqasoofanoo maasa Isaraee maqanna rakisirana faqa asumu mareemarina faqa maridanoo. Anutufa Isaraee maqannaara nári mandainainara nimeesuqusee rukaaqeera miqinau.

<sup>32</sup> Anutuna ufa irisee mi mau fimariasa Anutufa nari naaquqara andeeqara maraquna kaqi misa nimidanoo. Mi naaquqara andeeqara maraqunna faqa maasa faqa Yisuna findifuna qafaafanausa maridaqa qimannimidaqa.

<sup>33-34</sup> Ufa suqimarusu faiqi firaa misa Peetooroona ufa iriseeqa firaa aanoommaseeqa naruaneeera ufanoo misakiqari moo fannoo Mooseena sandufa akoofasa fasiqa mina auqu Kamarieerafa faiqi anaasee minara kaaqa irirana faqaa fee qimariqau. Mi fasiqafa ufa suqimarunakiqari findifinoo narirana qao qimaseenoo maasa nári kai ufa qianauree qimasee Yisuna faiqi namu niqiqoofaqa moosaa fiqau.

<sup>35</sup> Misa fufanoo Kamarieerafa ufa suqimarusu maaqi qimasee qimanniminau.

Isaraee maqanna fasiqauqa innee iriaqa. Maa fasiqausa sia aaqee narirariaqa iriseeqa miqoo andeeqaaqa. Moomoo ufa rukiee mariasa maasaki mariusa marufaqa innee misa oosana irimarusu mariafanoo.

<sup>36</sup> Ooqai faiqí moo auqu Teeudasafa mifa nariara firaasee qimasoofaqa 400 (maqi handareeta) fasiqa moomoo fasiqa minasaa atooqagau. Rakiranaki mi fasiqafa taikoofaqa mina aiku asauku miqooqari daraanimambufanoo taikanau.

<sup>37</sup> Miqooqari Roomma maqannaasa aiqamausa nuqu maroo aukuaana faiqí moo auqu Yudasifa Yudasina amarafa Kariree maqannaafa mifa faiqí moomoo maraseenoo Roomma maqanna kaamannara qikooqai faqee qimasee misakinaana rakeianauree qimaseenoo, rakiranaki kuqufaqa mina aiku asauku miqooqari daraanimambiqa.

<sup>38</sup> Kafaa maqeera inni qimannimidaqa. Sia maa fasiqausa naruaqa. Saifaqa kaqi mariaqa. Misa ufa misa marirafa misa nirafa fifau faiqí ufa marinoo nari kai taikaani.

<sup>39</sup> Anutuna ufa marinoo innisaimbaqa sia mina amana rafaqa fuanaura. Innee Anutuna faqa rakifoora.

<sup>40</sup> Misa aiqamausa Kamarieerana ufa iriseeqa mi maukaimbiqau. Misa Yisuna faiqí namu kafa naaroo faqa aniroofaqa Yisuna aufakiana qimannimiranara qaoo qimasee unnaana samu moomoo kari nariiseeqa idukusoofaqa fiqau.

<sup>41</sup> Yisufa niqiqoo fasiqausa nidafimarufaqa fidaqa sia noori runiqau اساسammiqau. Misa Yisuna aruandemasee maasa faqa daruafanoo Anutufa minannai maasa mareeqeenoo Yisuna amanakai mundusaifaqa minara maasa اساسidaqa. Yisunasaara maasa daruafaqa اساسidaqa.

<sup>42</sup> Miqooqari Yisufa niqiqoo fasiqausa sia taikееqa faasaambaasaana firaa amaana maqaki faqa maaqakiqa faqa Yisuna asauku mundirana Yisuna aufakina amiqira fasaasa ufa suqusaida qimannimimariqau.

## 6

*Dinni qisauku taikasee dinni qaaraqanda ani marasee fasiqa Yisuna faiqinamu dadaaqiqau.*

<sup>1</sup> Miqooqari kaqikaagoo kisaagasaa maridaqa faiqí anaasee moomoo uqanna Yisuna ufasaa atooqagau. Misakiqari Kirisa ufa qimaru Yuda maqannaasa faqa nari Yuda maqannaasa faqa tinoo taanoo rida mariqau. Niqiqoo fasiqausa maqee maqee munnimma rainasee sarauimarusa nimidaqa Kirisa ufa irimarusa nari adeedaana aanaaseeqa sia andeeqasee munnimma nimunara ufa qiqau. Maqee maqee munnimma rainasee nimunnara ufa qiqau.

<sup>2</sup> Qisaukuqara taikasee qikunni ooqu qaara marasee Yisufa niqiqoo fasiqausa ooqenaasa Yisuna ufa irimarusa aiqama suqusee qimannimiqi qiqau. Maasa Anutuna ufa qimannimira saika minnisee quandaki munnimma raina nimira saika mararafa sia andeeqanoo mariannoo.

<sup>3</sup> Oo maasa qiqoonausa inniki qisauku dinni taikasee dinni ani qaara marasee fasiqara randaqa. Irirana faqaasa, andeeqara fasiqausa Anutuna naaquqara marauna qumbiqarasa kai mara mini qimifaqa maasa munnimma rainara saika misasaa quqanaura.

<sup>4</sup> Maasa qeeqa Anutuna ufa nimirana faqa innaaru qirana faqa mi moodaa saikana maasaindi mariannoo.

<sup>5</sup> Aiqamausa mi ufana iriseeqa amiqira fee qimaseeqa nari rusandeesamumandeeqa qisauku dinni taikasee dinni qaara marasee fasiqa quqasaqau. Misa nuqu moo fasiqa auqu Sateefeenafa firaagoo Yisunasaa irirana rusimari fasiqafa naaquqara andeeqara marauna qumbiqarafa marufa marinau. Moo fasiqa auqu Firipafa, moo fasiqa auqu Parookoorusafa, moo fasiqa auqu Nikanoorafa, moo fasiqa auqu Timoonafa moo fasiqa auqu Parameenasafa moo fasiqa auqu Nikoorausifa Antiooka maqusaindaraafa aanaamuru fasiqa misaki animarufa marinau.

<sup>6</sup> Miqimandee fasiqa namu maree mini niqiqoo fasiqausa naqa mini quqasoofaqa misa innaaru qimasee nisauku nikiaqa quqaseeqa nifaagooqa qimasoofaqa nariqa saika munnimma raine maru saikanai fufaqa niqiqoo fasiqausa nari saika Anutuna ufa qimannimira saikai fiqau.

<sup>7</sup> Miqimandoofanoo doo Anutuna ufa aiqamai daraaninau. Yeerusaree maqusai Anutuna ufa irimarusa moomoo kamambiqa fimariqau. Amaana maqasaa aanaiqikirausa faqa moomoo Yisuna ufara kuqa anoonee qimasee minasaa atooqee mariqau.

*Sateefeenana rumboo ufana.*

<sup>8</sup> Sateefeenafa naaquqara andeeqara marauna fannoo minaki qumbiqafunara Anutuna ufa firaagoo dadaaqufanoo faiqí aanaaseeki oosana oosana amiqimannimaqara ainaina naaquqee maru ainaina faiqí aanaaseeki auqee marufaqa qafeemariqau.

<sup>9</sup> Yuda maqannaasa Yeerusaree maqusaki akaqausa aaduma sukuraki keeqemariasa nariara maasa aufadara irirana faqaasee qimariqau. Misa akaqausa Yuda maqannaasa

Sireenee maqa maqaaindani mi sukuranaki keeqeemariqau akaqausa Areekasandiria maqusaindari ani keeqeemariqau. Akaqa Yuda maqannaasa kaiqeesa Sirisia maqusaindari anusa faqa akaqausa Asia maqannaindari anusa faqa moodaaqoo suqufufaqa Sateefeenana ufara qaoo qimasee ufa rainee mariqau.

<sup>10</sup> Anutuna maraquana fannoo Sateefeenana ufa irira dadaaqunara sia mina ufa rafaqaqafirana amana.

<sup>11</sup> Mi aufadara irira fasiqausa mina qafamaseeqa minafasaasa qimaseeqa qumee firaa munnimma auqusee ummuarira fasiqausa nimiqa qiqau. Sateefeenara innee unna ufa oosana oosana uqeeraaqa qufaqa misa Sateefeenana unna qimasee maaqi qiqau. Mifa Mooseena sandufara faqa Anutuna ufara faqa qaoo qidaqa qifaqa maasa iridaqa.

<sup>12</sup> Miqunara faiqi anaasee faqa faiqi firaasa faqa Mooseena sandufa irimarusa faqa nirananoofaqa aanoomasee Sateefeena oonu qumareeqa amaana maqa rakisirausa ufa suqimarunakina mini quqaqau.

<sup>13</sup> Quqasoofaqa unna ufa qimaru fasiqausa nifiqee aniroofaqa maaqi qimasee Sateefeenara unna qiqau. Maa fasiqafa maasa naaqqara amaana maqara faqa Mooseena sandufara faqa maqee maqee manda ufa qimarifa maridanoo.

<sup>14</sup> Mifa maaqi qufaqa maasa iriafanafa maridanoo. Mifa maaqi qinuu. Maa Yisufa Nasaretee maqusaindariafa maa amaana maqana rapeepamma aqusee Mooseena sandufa oosana oosana maasa qimu ufana mareeqee aadumai quqasainaqa maasa moomau fuanoo qidaqa.

<sup>15</sup> Aiqamausa suqiqamarunakiqari noori Sateefeena funnai kai ubeekamafi qafaqau. Mina oori aiki qangiroo ooriara foora kaaqa qeemarufaqa qafaqau.

## 7

### *Sateefeenafa faiqi firaasa aiqamausa qimannimu ufafa.*

<sup>1</sup> Amaana maqasaa aanaiqikirafa uriqararafa Sateefeena irammamaqeenoo qinuu. Maa ufana kuqaa anoonee qidaqaa.

<sup>2-3</sup> Sateefeenafa misa aiqamausa qimanniminoo qinuu. Oo qini qikausa qifasausa qini ufa iriaqa. Ooqai Abarahaamafa sia Qarana maqa maaqai oorufunaki kaqi Meesoopootamia maqusai marufanoo Anutufa kooroomambinoo qimaminuu. Aneenna aiku asauku faqa aneenna maqa maaqa faqa minniseenana qinee aamua qianna maqanasaa fua.

<sup>4</sup> Abarahaamafa mina iriseenoo eedoo qimasee Karadeea maqa maaqa minniseenoo Qarana maqusai oorureenoo miqoo marinuu. Abarahaamana akoofa miqoo kuqufufanoo Anutufa qufanoo Abarahaamafa maa maasa marunna maqa maaqanaki Yuda maqa maaqai aninuu.

<sup>5</sup> Anutufa mi aukuanna sia maa maqa maaqana aminuu. Sia kaqikaqoo faqa aminuu. Kaqi kasooqaaqee qima afeekaikamasee ani faqa ani aiku asauku ani atiuqa nimianauree qinuu. Qima afeekaikira aukuaana Abarahaamana faiqi siaifa marufanoo mina aiku asaukuara qimaminuu.

<sup>6</sup> Anutufa maaqi qimasee qimaminuu. Ani aiku asauku aanaamuru maqusai karafusaki marifaranoo, (400) maqi handareeta aukuaana kisaqa aukuaana karafusaki marifaranoo. Mi anaamurusa firaa ummaara manda saika ani aiku asauku nimirifaranoo.

<sup>7</sup> Miqi marifaqa qinee Anutusa mi anaamurusa naruaanuree qinuu. Naruseeqa ani aiku asauku Isaraee maqannaasa niffeeqee maa maqa maaqanaki quqasanaqa maridaqa maa maqa maaqanakiqari Isaraee maqa maaqakiqari qini Anutusa qimooqifaranoo.

<sup>8</sup> Miqooqari Anutufa nari fainanduqira oosana Abarahaamana uqafiqanuu. Abarahaamafa minara irisooqoo Isakeena anoofa maqasoofanoo dinni qisauku taikasee dinni ani qaaramoo marasee faasaana aiqarroofanoo mina akoofa mina fainanduqinuu. Isakeefa faiqi kamafinoo Yakooboona maqaseenoo doo mina faqa fainanduqinuu. Yakooboofa faiqi kamambinoo qisaukuqara taikasee qiku qaraqanda ooqu maraseenoo faiqi namu maasa qikeeku maqaseenoo misa faqa fainanduqu nimaqanuu.

<sup>9-10</sup> Yakooboona faiqi namu nari nikaqa Yooseefaanara rairai qimamaqasee qumaraseeqa ruumbeegeeqa Midianna maqanna nimiseeqa feefauru munnimma marasoofaqa Midianna maqannaasa afiqamaree Isipi maqannaasa munnimmaru muqu nimiqa. Miqoo Yooseefaafa karafusaki marufanoo Anutufa dadaaqunara aiqama kadaapirirana oosana oosana fidanoo andeeqasee fimarinau. Yooseefaafa Isipa maqanna karaambaiqa Faraona oorisaa kikiqamafuafanoo Anutufa Yooseefaana irirana faqa mina afaqa oori faqa amiqirana aminuu. Faraoofa Yooseefaanara andeeqara fasiqee qimasee mareeqeenoo nari maqa maaqa faqa Isipa maqa maaqa

aiqama faqa narí aiqama ainainasaa minauqasaa Yooseefaana anee rakisiannee qinau.

<sup>11</sup> Miqoo aandaroo firaafa Isipa maqannaasa faqa Kannaana maqannaasa moo auqu Isaraee maqannaasa faqa narinau. Maasa qikeeku qikaaku naranara randee mariqau.

<sup>12</sup> Isipa maqusai sakuma moomoo marufanoo Yakooboofa Yooseefaana akoofa Yooseefaana sia uqanna irirai naranara kai iriseenoo narí faiqi namu maasa qikeeku qikaaku niqifoofaqa indaaru ooquree sakuma maraseeqa nári nikaqa Yooseefaana qafamasee sia mina ooriara iriqau.

<sup>13</sup> Innaaqianna ooqu fu kari Yooseefaafa narí afasasanamuara nariara koorooman-niminau. Miqimasoofanoo Faraofa faqa Yooseefaana aiku asaukuara miqoo irinau.

<sup>14</sup> Isipa maqusaindari Yooseefaafa narí akoofa Kannaana maqa maaqaki maruna ufa quqasoofanoo aiqamausa Isipa maqusai ooqu fiqau. Qaramoo fasiqa niku nisauku taikasee moo fasiqa qisaukuqara taikasee moodaanai qiku ooqu marasee fasiqa anaasee Isipa maqusai ooqu fiqau.

<sup>15</sup> Yakooboofa Isipa maqusai ooqu marinoo kaqikaaqoo marikinoo kuqinau. Mina faiqi namu maasa qikeeku qikaaku miqoo mari maree fiqa kuqiqau.

<sup>16</sup> Misa kuqufiqa niqoonausa misa iri mara mareeqa nári maqa maaqa Kannaana maqa maaqai Seekeemma maqusa aaqa nikundee mariqau. Ooqai Abarahaamafa munnimmannai Qamoorana aiku asauku feefauru amiqoonaki mi maqa maaqanaki misa iri nikundee mariqau Sateefeenafa kaqi ufa suqunakiaqa ufa qimanniminoo ninau.

<sup>17</sup> Anutufa ooqai Abarahaamana Kannaana maqa amiraree qimasee qima afeekaikamasoofanoo doo mina aiku asauku amira aukwana adeedi roofanoo maasa qikeeku qikaaku Isipa maqasaa moomoo kamambiqi fimariqau.

<sup>18</sup> Misa miqiqi maridaqa moomoo marufanoo Isipa maqanna karambaiqi moo kambiqanau. Mifa Yooseefaafa aandaroo aukwana Isipa maqannaasa firaqoo dadaaqi marunara sia irimarufanoo Isipa maqanna karambaiqi kambiqanau.

<sup>19</sup> Mi fuka karambaiqafa minauqu Faraofa maasa qikeeku qikaaku nikaru qimasee firaqoo mandaikamannimaqee marinau. Mi karambaiqafa qufaqa maasa qikeeku qikaaku nári faiqi aanaaqi maqasee maaqakiqari aqusee marufaqa kuqi mariqau.

<sup>20-21</sup> Miqimaru aukwana Mooseefa kambiqanau. Mifa faiqi aanaaqi amiqirafa kambiqanau. Mina anaukoo qaramoo quqoonasaa narí maaqaki rakisiisee kaqinni andandai quqasoofanoo Faraona araamuna paqurimasee nariara maraseenoo narí amaakuara foora f irinau.

<sup>22</sup> Firimarufaqa Isipa maqannaasa irirana aiqama qimamisoofanoo irinoo innooqafinoo irirana faqaafa maridanoo aiqama ainaina oosana oosana uqeeree marufa maridanoo afeeka ufa qimarufa marinau.

<sup>23</sup> Mooseefa qaara fasiqa niku nisauku aukwana maraseenoo faiqi firaafaikamafinoo narí maqanna Isaraee maqanna miqoo Isipa maqanna karabusaki marusa niqafanee qimasee finau.

<sup>24</sup> Misaki nidanoo nindafoofanoo Isipa maqanna moo fannoo Isaraee maqanna narí aqoonnana mandaikamma maqoofanoo Mooseefa narí maqannaana dadaaqiane qimasee mi Isipa maqanna fasiqana kuqammarinau.

<sup>25</sup> Isaraee maqannaasa qini qiqafamaseeqa oo Anutufa maa fasiqanannai maasa maqee Isipa maqanna karabusaki mariasa idukuunoo fee qimasee qini Moosesara nidianifeera. Sia Isaraee maqanna mina iriqau. Mana manammimariqau.

<sup>26</sup> Faiqee iqaqoofanoo kananaana Mooseefa narí maqanna Isaraee maqanna nindafaida qafooofanoo Isaraee maqanna qaaraqanda moodaa maqannaqanda rakimariqau. Rakimarufanoo Mooseefa soodaa qianee qimaseenoo qinau. Inneeqara moodaa maqanna mariafanoo nanaree rakidee.

<sup>27-28</sup> Isaraee maqanna narí aqoonnana arimarufa Mooseena afeeqaseenoo aqinoo qinau. Yafee aniara maasa karambaiqi ufa irimari fee qinoo fee. Eenda anee Isipa maqanna kuqaruanafa miqi kai inana qini faqa darinnaree.

<sup>29</sup> Mooseefa mi ufana iriseenoo doo kooroo qinoo maridanoo Faraofa mina akiaqara qini faqa daruandoo qimasee rufisee quqasee sandeenoo Midianna maqa maaqai nianai oonu kisaqasaa marikinoo anaasee marasee qaara faiqi maqanau.

<sup>30</sup> Miqoo oonu maridanoo qaara fasiqa niku nisauku taikasee aukwana moomoo aukwana aiqaroofanoo Mooseefa faiqi firaafa marufanoo Anutuna qangiroo moo fannoo qumee sasamimiki idaqee marunakiqari ufa kai Mooseena qimamufanoo irinau. Sinai aaqana aaqa aadana maqa maaqai qee marinau.

<sup>31</sup> Mooseefa tautumasee mi idauruna qafanau. Aaqa oonuroofanoo idaurukiqari Anutufa ufa moo qimaminoo qinau.

<sup>32</sup> Oo Moosee qinee ani aanaakuna asaifaqana Abarahaamafa faqa Isakeefa faqa Yakoofoofa faqa misa Anutusa maridaqa. Mooseefa Anutuna ufa iriseenoo aindiri aindiri ufanoo qafarara faqa eeraira eerairinau. Miqi marufanoo Anutufa kafia qimaminoo qinau.

<sup>33</sup> Aneenna aiku aanaamu uturuqu quqaa. Maa maqafa naaquqara maqa maaqa maridanoo. Ani aiku aanaamu maa maqana putaaidanoo.

<sup>34</sup> Anee qini Anutusa ufa iria. Qinee qini faiqi namu Isarae maqannaasa Isipa maqasaa mariasa misa mandainainaki mariana faqa misa aupurarana faqa qafamasee misa qikiraqarana iriseeqa qumu misa nifiqaannanara irisee ani qimamidaqa. Doo findifi fua ani aqiqaidaga Isipa maqasai kafaannai fua.

<sup>35</sup> Satefeenafa kaqi suqunakiaqa ufa qimanniminoo nidanoo qinau. Isaraee maqannaasa nari maqannaara Mooseenara akooqoofanoo nianai afeeqaqidaqa qiqau. Yafee aniaara maasa Karaambaiga ufa irimari fee qinoo fee qiqau. Anutufa nari qangiroo sasamimiki ida qeemaruna aqiqoofanoo mi Mooseena dadaaqufanoo nari maqannaasa Isipa maqanna nisaokukiqari rafia qumaraseenoo moo maqasaa rakisinnimaqee marinau.

<sup>36</sup> Mifa nari maqanna Isipa maqa maaqakinaana amiqimasee nifiqeeqeenoo Sinai aadana maqa maaqaki finau. Nifiqee fidanoo Isipa maqa maaqaki faqa Taatuqee nammariqi faqa aadana maqa maaqasaa faqa moo kamaakira oosana oosana ainaina uqannifiqanoo fimarinau. Qaara fasiqa niku nisauku taikasee aukuaana kisaaqasaa miqimminoo fimarinau.

<sup>37</sup> Maa Mooseefa Anutuna tamummaqara fasiqa kasoogaqee kambiqaaninnanara maaqi qinoo qimanniminoo. Anutufa nari tamummaqara fasiqa moo inni nimiannoo. Mifa qinee Mooseesara foora inniqaqiqari kambiqafi mariannoo, inni dadaaqiannoo.

<sup>38</sup> Maa fasiqafa Mooseefa aadana maqa maaqaki Isaraee maqannaasa oobiqasee fimarunaki Mooseefa misa saimbaqa fimarinau. Misa Sinai aqana aqa marufanoo misa faqa nimarinau. Qangiroo fannoo Mooseena faqa aqanasaa ufa qimarinau. Mooseefa kai Anutuna naaru marira ufa iriseenoo maasa qimaqimimarinau.

<sup>39</sup> Maasa qikeeku qikaaku Mooseena ufa sia iriqa ruki aquseeqa Mooseena mafi aqusee kafia Isipa maqasaa fuaneera qimariqau.

<sup>40</sup> Mooseefa Sinai aqanasaa ooru marufaqa misa Mooseena afasaana Aarona aaramaseeqa qiqau. Mi fasiqafa Mooseefa maasa qifiqee anifa yai fee finoo fee. Anee Anutuna fooqaira ainaina auqusainanoo mifa maasa indaaru fida aana uqannifiqaina fua.

<sup>41</sup> Aaroonafa misa ufa iriseenoo mi fasannai kai burimakau aanaaqi koorannai auqsoofaqa minara maasa Anutu fee qimasee innaaru qimasee qoomaqamasee taturana suqamisee nari nisaukunoo auquqoonara asamasasee qoomaqa sakasee naqau.

<sup>42</sup> Anutufa mi manda oosanna qafeenoo misa marunnai ameesa uquseenoo qinau. Saina misa innaarunaindaraa fifau fasau ainara innaaru qiaqee qimasee mininnisanau. Miqi qimasoofanoo tamummaqara fasiqa ufa kooroo inau. Tamummaqara fasiqa maaqi qimasee akara rinau.

Oo Isaraee maqannaasa

Innee qaara fasiqa niku nisauku taikasee aukuaana kisaaqasaa aadana maqasaa niniunara sia qiniarau innaaru qiqau. Unna innaaru qimariqau. Sia qiniarau tatufira aandau suqaqau.

<sup>43</sup> Sia innee qini naaquqara uqiqaana maqa maree fimarunara irimariafanoo. Innee moo unna anutuna minauqu Moorookanara unna qimasee irimaree fidaqa unna qimasee qini kikiqa usimariafanoo. Innee inneeqa moo unna Anutuna minauqu Reefanna fee qimariafanoo. Mina fasau innaarunai maridanoo mina aana inneeqa nisaukunoo auqufa maqasaa mari Reefanafa marifaqa innee minara innaaru qimariafanoo. Miqiana akiaqara qinee Anutusa doo inni futeeqeeqee Babiroonia maqa maaqa meemai misa nisaukuki quqaanaua.

Tamummaqara fasiqa ufa miqi qinoo maruna mina kooroo qinau.

<sup>44</sup> Satefeenafa ufa suqunaki kai qimanniminoo ninau. Ooqai maasa qikeeku qikaaku aadana maqasaa nidaqa Anutuna sandufa qimannimira uqiqaana maqa misaki marinau. Mi uqiqaana maqafa Anutufa Mooseena qimamundee kai mi uqiqaana maqana usakee mariqau.

<sup>45</sup> Mina maariqoo aukuaana maasa qikeeku qikaaku taikafufaqa misa faiqi namu findifufaqa mi uqiqaana maqana kaqi maraqa nimarigau. Anutufa Yoosuaana dadaaqufanoo Isaraee maqanna maasa qikeeku qikaaku faqa mi uqiqaana maqana faqa mareeqee Kannaana maqa maaqai oqureeqa naru nifaqaseeqa nari uqiqaana maqa miqoo usakaqau. Miqoo marikinoo Dafidifa kambiqafinoo karaambaikaikinau.



<sup>46</sup> Anutufa Dafidina andeeqara oosana qafamaseenoo minara rufanoo Dafidifa Anutunara irammirinoo qinau. Oo Yakoo boona Anutu, ani maaqa uqiqaana maqa kai maridanoo. Amanee qinee ani afeeka maaqa usakaqaanane minaki marinnaree.

<sup>47</sup> Anutufa sia Dafidinara qinau. Mina amaaku Sooroomoonara qufanoo mifa afeeka maqa usakanau.

<sup>48</sup> Innee aiqama iriaqa firaqoo uqanna uriqarara Anutufa maridanoo. Sia amana faiqi nisaukunnoo usakara maqaki amana mariannoo. Tamummaqara fasiqa Anutuna ufa minara maaqi qimaqoofa maridanoo fee qinau.

<sup>49</sup> Innaarunai qini maaqa maridanoo qinee rakisinnimaqara maqusa maridanoo. Maqasaa innee mariafa qini qiku reemarunafa kaqikaa ainaina fifau ainaina maridanoo.

Innee nana maqee qiniara usakeefaree. Qini qimana idooara maqusa yai fee maridanoo fee.

<sup>50</sup> Aiqama maaqa auqimaria ainaina qeeqa kai auquafanausa maridaqa.

<sup>51</sup> Sateefeena tamummaqara fasiqa ufa qimannimiseenoo niqidanoo qinau. Innee maaqoo suqimariasa qini ufa iriaqa. Innee aamina fasiqa miqirausa mariafanoo ooni mariafanoo naaqoo auniraua sia Anutuna ufa irimariafanoo. Inneeqa nikeeku nikaaku ninaakusa miqirausa mariafanoo Anutuna maraquna fannoo inniki anirarimarifaqa inneeqa qaoo qimariasa mariafanoo.

<sup>52</sup> Inni nikeeku naaku sia moodaa tamummaqara fasiqa sia mandaikamannimaqanau. Aiqama mandaikamannimaqee mariqau. Ooqai Anutuna andeeqara ainainira faiqi Yisunara kooroo imaru tamummaqara fasiqauqa faqa nari mariqau. Doo maqee faqa innee mina uqanna ueeqasee kuqa nari mariasa mariafanoo.

<sup>53</sup> Innee Anutuna sandufa qangiroo asaukukinaana maree mariasa sia minara irimariafanoo kaqirunna fimariafanoo.

*Faiqi firaasa Sateefeena ufa irisee oonisamu ariqau.*

<sup>54</sup> Miqi qimasoo faqa faiqi suqimarusa mina Sateefeena ufa irufanoo minara niraanaqeenoo nifai sandurinau.

<sup>55</sup> Anutuna naaquqara andeeqara maraquna Sateefeena aaku funara oori uqeeraseenoo qafoofanoo innaaruna rakeeufanoo Anutuna kaaqa qarana afaaqa areenarana akooqoo marufanoo qafanau. Yisufa Anutuna aqa mina asauku uqannai kiqiqinoo marufanoo qafanau.

<sup>56</sup> Sateefeena qafaidanoo naaramaseenoo qinau. Innee qafaqa innaaruna rakeemambifaqa faiqi nimaaku Anutuna aqa asauku uqannai kiqiqinoo marifaqa qafaidaqa.

<sup>57-58</sup> Misa miqoo marusa aiqamausa mina iriseeqa irianoo qimasee firaakari faqa rumaseeqa nisauku naaqoo aamara upeekaseeqa aiqamausa findimeeqee sandeeqa Sateefeena qumareeqa rarisammareeqa mina rafusu qumaree aqoosai aqiqau. Aqoosai aquseeqa faasai kootaki Sateefeena unna qimarusa misa kai oonisamu oonu qumaree ani qumaree ufaqa mi samuna mina arimariqau. Misa nari siuta qamunna nisauku rakisi qumaraandoo qimaseeqa raipaqueeqee moo kumaaraa Sauroona aikusaa aqusee Sateefeena arimariqau.

<sup>59</sup> Misa oonisamu arimarufanoo Sateefeena karaambaiqara innaaru qimasee faqa ridanoo qinau. Oo Karaambaiqa Yisufa qinee kuquanana anee qini qimana qumareeqee aneenna marianannai quqaa.

<sup>60</sup> Miqi qimaseenoo Sateefeena aqoorisaa oorindari kummaramafufanoo firaq kari faqa quqeenoo qinau. Oo karaambaiqa misa mandainaina qimiana sia misaki mi numoofa mariani, anee aunusaa. Doo miqi qidanoo kuqinau. Sauroofa misa qamunnasaa qummuarifoora rakisidanoo Sateefeena arunara eedoo qimasee marinau.

## 8

*Sauroofa Yisuna ufa qimarusa narinoo ninau.*

<sup>1</sup> Mi faasaana kai oosana araseenoo Yeerusaree maqusaki amaanasaa rakisimarusa uriqararaua Yisuna ufa irimarusa narunnifaqaairana uqeerqau. Yisuna afaagasaa aqoondiqa qisaukuqara taikasee qikunni ooqu qaara marararusara niqiqoo fasiqausee qimariqau. Miqimandee fasiqa Yeerusareenni kaqi mariqau. Kaiqeesa moomoosa rufisee miqooqari daraaniqau. Akaqausa Yudeea maqa maaqai fiqa akaqausa Samaria maqa maaqai sandaqa.

<sup>2</sup> Anutunara irimarusa andeeqaraua akaqausa Sateefeena iri ani mareeqa munu akundamaseeqa firaqoo uqanna ikiraqaseeqa soofari mariqau.

<sup>3</sup> Miqooqari Sauroofa oosana areenoo Yisuna ufa taikaani fee qimaseenoo Yisuna ufa irimarusa narirara aanoommasee manda ufa qidanoo rairai qimarinau. Miqidanoo maqusasaa oorureenoo aiqama maaqakiaqa keeqafidanoo Yisuna ufasaara nariraramasaidanoo nisauku qumaraidanoo maqamau rarisaidanoo munu karafusa maaqaki quqemarinau. Sia faiqi kai anaasee faqa qumaree rarisameeqaidanoo karafusa maqaki quqemarinau.

*Firipifa Samaria maqa maaqaki Yisuna ufa qimannimimarinau.*

<sup>4</sup> Miqufaqa Yisuna ufa irimarusa mina irisee miqooqari quqasee moo maqusa moo maqusa daraaniqa mariqau. Miqunnai fidaqa Yisuna aufakiana qimannimimariqau.

<sup>5</sup> Firipifa Yeerusaree maqusaindari sandoonaindari aanaamuru maqannaasaki ooqu finoo Samaria maqannaasa firaa maqusai ooqureenoo Anutuna asauku mundira fasiqara Yisunara qimanniminu.

<sup>6</sup> Samaria maqannaasa moomoosa Firipina ufa andeeqasee iriqau. Mifa moo ainaina faiqi dadaaqimari ainaina auqamasoofaqa mina qafamaseeqa amiqimmasee mina ufa irimariqau.

<sup>7</sup> Firipifa qufanoo afaannaufa faiqi naunduraki marusauqa faaqarumasee rafudamaki sandee mariqau. Kaqi niku nisauku uqiranauqa faqa arirutu marusa faqa andeeqannisee marinau.

<sup>8</sup> Miqimmasoofaqa Samaria maqannaasa firaaqoo اساسimariqau.

<sup>9-10</sup> Mi maqusaanaana auqu moo Simoonaa amarafa mifa Samaria maqannaafa marinau. Mifa afunee ainaina faqaa fasiqa marinau. Moomoo aukuaana afuneennai nari maqannaasa uqannifiqasoofaqa misa mina qafamasoofanoo naaquqee marinau. Simoonafa miqimarunara nariara uriqararausee qimasoofaqa aiqama tia uqanna minara kuqaa irirana faqaa fee qimasee minara kaqa rimariqau. Miqidaqa mina maqannaasa minara Anutunaindaraa firaa afeekainainee qimariqau.

<sup>11</sup> Mifa kisaagasaa nari afuneennai nari maqanna unna qimasee qimannimisoofaqa kaqaqaa mina ufa irimariqau.

<sup>12</sup> Miqi marufanoo Firipifa qumureenoo Anutuna ququsara amiqira fasaasa ufa faqa Yisuna Anutuna asauku mundiranara qimannimufaqa faiqi anaasee iriseeqa kuqaa fee qimasee mina qumaraqau. Qumaroofoanoo nammari rumannimaqee marinau. Faiqi faqa anaasee faqa rumannimaqee marinau.

<sup>13</sup> Simoonafa nari faqa Yisunara iriseenoo kuqaa fee qimaseenoo nammari maranau. Nammari maraseenoo Simoonafa Firipina aqa maridanoo mina faqa oonuree aniree imarinau. Firipifa oosana oosana firaa ainaina faiqi sia auqaaqaa ira ainaina faiqi anaasee dadaaqimaria ainaina auqufanoo Simoonafa mina qafoofanoo aaquqoofanoo marinau.

<sup>14</sup> Yisuna afaagasaa aqoondiufa moo nuqu niqiqoo fasiqausa misa Yeerusaree maqusai maridaqa Samaria maqannaasara Anutuna ufara irida fee qimasee Peetooroona faqa Yoohaneena faqa niqiqamasoofaqa Yeerusaree maqusaindari Samaria maqannaasunnai oofuqau.

<sup>15</sup> Ooqureeqa Samaria maqanna Yisuna aufakiana fukasaa irimarusa innaaru qimariqau. Naaquqara andeeqara maraquna fannoo misa faqa naakuanifeera qimasee innaaru qimariqau.

<sup>16</sup> Samaria maqannaasa Karaambaiqa Yisuna auqusaa kai nammari maraseeqa sia naaquqara andeeqara maraquna maraqau. Minara naaquqara maraquna fannoo sia misaki marinau.

<sup>17</sup> Peetooroosa Yoohaneesa minara iriseeqa innaaru qimasee misa faiqi anaasee nikumu qumaree mapuku nimaqasoofanoo naaquqara andeeqara maraquna naaki-marinau.

<sup>18-20</sup> Simoonafa afunee fasiqa fannoo miqanda oosana nindafamasee qinee faqa marasee miqianee qimaseenoo munnimma maraseenoo Peetooroosa Yoohaneesa nimanaga naaquqara maraquna qimifaqa qeeqa maqanna miqimannisaanee qimasoofanoo Peetooroofa maaqi qimasee aqinoo qinau. Anee anee faqa aneenna munnimma namufaqa ida aqufua. Anee Anutuna kaqi nimira ainainara feefauru qiannanara minara aneenna munnimma namufaqa ida aqufua.

<sup>21</sup> Maasa funnaqoo anee sia maasa faqa moodaa runna fuananoo. Ani irirafa ani amuqusaki Anutufa qafaifanoo sia andeeqanoo maridanoo.

<sup>22</sup> Anee aneenna manda iriranakiqari quandakinana Anutunara innaaru qinanoo maa ani maa manda irirana akiaqara minnaisaani.

<sup>23</sup> Qinee ani aundurai oosana qafaidaqa tuka amaneera foora sukaqarafa maridanoo. Aninna mandainaina fannoo naaqanara foora ani rumbanoo maridanoo.

<sup>24</sup> Simoonafa mi ufana iriseenoo tautumaseenoo Peetooroosa Yoohaneesa minara qimanniminoo qinau. Oo inneeqara amanee inneeqara Anutunara innaaru qifanoo sia mandainaina oosana oosana innee qiandee sia qinisaa kambiqaani.

<sup>25</sup> Peetooroosa Yoohaneesa Karaambaiqa aufakiana qimannimiseenoo qumurandee Yeerusareenni kafaa ooru fiqau. Ooru fidaqara Samaria maqusa kaqikaa kaqikaa maqusakiaqa Yisuna amiqira fasaasa ufa qimannimimaree ooru fiqau.

*Firipifa Eetioopia maqannaa uriqararana Yisuna ufa qimaminau.*

<sup>26-27</sup> Anutuna qangiroo moo fannoo Firipina qimaminoo qinau. Anee doo deedaqia. Aana moo Yeerusaree maqusaindari aadana maqa maaqa aana fannoo qambaana fidanoo Kaasa maqusai oogu fimari aana. Anee oonuree mi aannara randasee paquria. Doo uqeeraa qufanoo Firipifa mina iriseenoo deedaqi imaree doo miqoo finau. Firipifa fitufanoo mi aanna paqurimaseenoo Eetioopia maqusaindari fasiqa moo mi aannari fimarufanoo paqurinau. Mi Eetioopia maqusaanaa fasiqa dunduqarirafa marinau. Nari maqannaa anaasee rakisirana uriqararana munnimma aina rakisimarufa uriqararafa marinau.

(Afaandama itirafa marinau. Ooqai uqanna anaasee rakisirausa uriqararansa akaqausa nari ainaina dadaaqimarusa nifaandama itimariqau. Maqee sia mi oosanafa maridanoo. Ooqai uqanna marinau.)

<sup>28</sup> Eetioopia maqannaa anaasee rakisirana auqu Kandaseenammarifa marinau. Minasaa rakisimaru fasiqafa afaandama itirafa kaaqa Anutunara rimaru fasiqafa, mifa Yeerusaree maqusai nari qoosa rarisee maru karanaki Yeerusareenni ooru Anutunara innaaru qimaseenoo ooru randeenoo amaaqai qumimarufano Firipifa paqurinau.

<sup>29</sup> Naaquqara andeeqara maraquna fannoo Firipina qimaminoo qinau. Anee mina kara fimariqoo onuraina qafaa. Eetioopia fasiqafa nari qoosa rarisee maru karanaki fidanoo ooqai tamummaqara fasiqa Eesaiaafa akara rumaqoona asaana rinoo fimarinau.

<sup>30</sup> Fimarufanoo Firipifa sandee oonureenoo mina kara asaukunnai qumareenoo mi karana uqirafa aakaariqara sandanoo fidanoo iriseenoo irammirinau. Oo maa fasiqa, anee asaana rimariannana oosana iridaneesie feesie iridaneesie.

<sup>31</sup> Miqi qufanoo mi Eetioopia fasiqafa qinau. Moo fannoo kooroo inaqa irini siammiridaqa. Miqi qimasee Firipinara qini faqa uru ooguqumariannee qimasooqanoo Firipifa mina qoosa rarisee maru karanaki kaqi fimarufanoo akaramafufanoo mi fasiqana aqa ooguqumarinau.

<sup>32</sup> Mi Eetioopia fasiqafa Eesaiaana maa akarana asaana rimarinau.

Misa mina qumareeqee sipsipa aandaara foora mareeqee ariranaki quqaqau.

Misa sipsipa aanaaqi asausi aukimarufanoo sia dudeepenoo faaqarimarifa maridanoo sipsipa aanaaqi qummaarumuara fooqaana ari marufanoo kai mumuqida marinau.

Anutuna sipsipa aanaaqi arimarufanoo mumuqida marinau. Sia moodaakari ufa qinoo faaqarinau.

<sup>33</sup> Misa firaagoo asaurirana amiqau. Mina andeeqara ufa siamma iriqau. Doo mifa nariara kuqufinau.

Mina anaiqi mina aiku asauku sia mariafa maridanoo sia minara ufa qifaranoo. Doo nari kai marufa doo kuqinau.

<sup>34-35</sup> Mi Eetioopia fasiqafa mi ufana asaana rumaseenoo Firipina irammirinau. Tamummaqara fasiqa fannoo kuqu ufana qimaruna nariaree qimarinau feesie moonaree qimarinau feesie, qinaqa iria qufanoo Firipifa mi tamummaqara fasiqana ufasaa oosana araseenoo miqooqari finau. Miqooqari finoo Yisuna amiqira fasaasa ufa qimaminau.

<sup>36</sup> Doo miqi qida nari qimami nari qimami aataa oogu fidanoo Firipina qimaminau. Doo maana nammari adeedi maridanoo. Amanee anee Yisuna augusaa qini nammari keeqaqimaqeenaree. [ <sup>37</sup> Firipifa mi ufana iriseenoo qinau. Anee aneenna amuqusa ookiqari Yisunara kuqaa anoonee qianaqa amana ani keeqamaqaanaura. Mi Eetioopia fasiqafa qinau. Qinee Anutuna asauku mundiranara Yisunara kuqaa Anutuna faiqifee qidaqa. Anee kaqi keeqaqimaqaa. ]

<sup>38</sup> Miqi qimasooqanoo qoosa rarisee maru karana daraiuaana qimamifanoo kara rafaafufusoofaqa Firipifa faqa mi Eetioopia fasiqafa uriqararafa faqa nammari qambaana ooguqumareenoo Firipifa mi fasiqana qumareeqeenoo nammari keeqamaqasaana. Keeqamaqaseenoo asauku qumareenoo uqeerasana.

<sup>39</sup> Miqanda nammariqari afainni uru akaramafufanoo Anutuna maraquna fannoo Firipina afaqamarooqanoo sia miqooqanoo minna faqa marinau. Mi eetioopia fasiqafa uriqararafa sia kafaa Firipina qafanau, asamandeenoo nari karaki akaramafufanoo doo amaaqa finau.

<sup>40</sup> Anutuna maraquna fannoo Firiipina mareeqeenoo Asadooda maqusai munu quqa-soofanoo miqooqari Yisuna amiqira fasaasa ufa qimannimino maqusa maqusa fifu-fanoo Seesareea maqusai finau.

## 9

*Sauroofa Damasakusa maqusai fimarufanoo kaaqa qarafa rafaafa finau.*

<sup>1</sup> Yisuna faiqi namu mina ufa qimannimiqa nimarufaqa minasaara Sauroofa firaqoo aanoo idanoo narirara rumbarara qidamarinau. Miqidanoo Sauroofa amaana maqasaa aanaiqikirausa misa uriqararana oonu qimaminoo qinau.

<sup>2</sup> Anee papiqa akara rumaqiminaqa qinee Damasakusa maqusai ooruree Yuda maqanna ufa suqinnanaki keeqafi Yisuna aatata fimariasa paqurimasee sia faiqi kai faiqi faqa anaasee faqa rumbamaree Yeerusaree maqusai karafusaki muqu quqaanaaree qimasoo fanoo eedoo qimaseenoo mi eedoo qira papiqana akara rumaminau.

<sup>3</sup> Sauroofa Damasakusa maqusai mi papiqana uqirafa fidanoo nari sundia namufaqa fidanoo Damasakusa maqusa adeedi rama-soofanoo innaarunaindari kaaqa qarana amananda fannoo tautumma amaqaaseenoo Sauroona fiqumafinau.

<sup>4</sup> Sauroofa kaaqa rufiaseenoo maqasaa aqufumafufanoo irufanoo innaarunaindaraa ufa moo qinau Sauroo Sauroo anee nanaree qini daridane.

<sup>5</sup> Miqi qufanoo Sauroofa maaqi qinau. Oo Karaambaiga anee yafee maridane qufanoo maaqi qimasee qimaminau. Qinee Yisusa anee qini darimarianausa maridaqa.

<sup>6</sup> Doo maqasaqari findifinana fua maqusaki ooru rainanoo miqoo moo fannoo maridanoo, mifa ani aanara aamua qinana fua.

<sup>7</sup> Sauroona faqa fusa sundia uqa Sauroofa maqasaa aqufufaqa qafamasee innaarunaindaraa ufa iriseeqa sia moo ainana qafoofanoo naaquqoofaqa nimuqusamafufaqa sia ufa qiqau kaqi kasoomambiqau.

<sup>8</sup> Sauroofa maqasaqari findifufanoo afu dimbafufanoo sia moo ainana qafanau. Mina sundia uqa mina asauku qumaree rarisameeqee Damasakusa maqusai quqaqau.

<sup>9</sup> Sauroofa nari afu dimboonara faqa innaarunaindaraa ufa irunara faqa irufanoo aundura mandaikufanoo qaaramoo faasaana sia narana nanau sia nammari nanau sia afu maqanau.

<sup>10-11</sup> Damasakusa maqusai Yisuna ufa irimarufa moo fannoo marinau. Mina auqu Ananiasafa marinau. (Sia Yeerusaree maqanna Ananiasafau. Damasakusa maqusaindaraafa mina amarafa.) Mi fasannai qaina Ananiasana afunnaanau. Karaambaiga fannoo mi qainnaki Ananiasana aaroofanoo qinau. Ananiasa qufanoo Ananiasafa qinau Oo Karaambaiga maa qinee maridaqa qufanoo Karaambaiga maaqi qimasee qimaminau. Ananiasa doo deedaqi fua. Anee andeeqara aatatee qimariana mi mau oonuree Yudasina maaqara randasee qafa. (Sia Yisuna ueeqoofau. Damasakusa maqusaindaraafa mina amarafa.) Mina maaqaki Tarasusa maqusaindaraafa Sauroofa maridanoo.

<sup>12</sup> Doo mifa qainamaseenoo maridanoo. Mifa ani Ananiasana qafeenoo maridanoo. Qainasaa qafaifana anee oonureenana mina akiaqasa asauku munduseenana mina afu maqarana amiananoo irisee innaaru qidanoo maridanoo.

<sup>13</sup> Ananiasafa mi ufana iriseenoo rufiaseenoo qinau. Oo Karaambaiga faiqi moomoosa mi fasiqanara qini qimaqimifaqa iridaqa. Mifa Yeerusaree maqusai ani aiku asauku anufa irimariasa mandoosana maranoo nifa maridanoo.

<sup>14</sup> Mifa Yeerusaree amaana maaqa aanaiqikirausa misa uriqararana papiqa mara-maree Damasakusa maqusai maasa aniara innaaru qimariasara rumbamaree Yeerusa-reenni ooqu fuanee qimasee urifa maridanoo.

<sup>15</sup> Karaambaiga mina ufa iriseenoo Ananiasana qimaminoo qinau. Sia anee minara rufiaa anee kaqi fua. Qinee mi fasiqanara rusandeesamumandee mareeqa. Mifa qini ainainira faiqi kamambi mariannoo. Mifa qini duqura qini daufakiana aanaamuru maqannaasa faqa nari karaambaiguu faqa Isaraee maqannaasa faqa qimannimino nuannoo.

<sup>16</sup> Qinee qeeqa oosana uqafiqaanaura. Qini ufasaara kasooqaqee arirana faqa dinee faqa maraannoo.

<sup>17</sup> Ananiasafa mi ufana iriseenoo maaqa paqurimandee qafoofanoo Sauroofa minaki marufanoo keeqafinoo asauku mina akiasaa munduseenoo qinau. Sauroo qini qikaqaafasaa Karaambaiga Yisufa nari uqanna anee aanai uridana anee qafaananoo mifa kai qini qimaqimifaqa anee ianannai anidaqa. Afu kafa maqaaneera faqa naaquqara andeeqara maraquna aniki qumbiqaaninnanara faqa diqiqai faqa anidaqa.

<sup>18</sup> Ananiasafa miqi qimasoofanoo Sauroona afusaa ititanoo mariufa saqari apata fooqaafa rafoomakufanoo maqai aqufufanoo doo mina afu maqanau. Afu maqafufanoo nammariki keeqammamaqanau.

<sup>19</sup> Keegamma amaqasoofanoo Sauroofa narana namaseenoo doo afaaqa amiqufanoo Yisuna faiqi namu faqa qaaramoo faasaana Damasakusa maqusai maridanoo misa dadaaqinuu.

<sup>20</sup> (Damasakusa maqusanaasa misa moo unna Anutunara qimarusa mariqau.) Yuda maqannaa akaqausa mi maqusanaki faqa mariqau. Minaki maridaqa naaduma amaana maqa usakasee minaki keeqafi Mooseena sandufa asaana rumasaidafa anoona Anutunara innaaru qidaqa Yisunara sia iriqau. Sauroofa findifinoo andeegaseenoo Yuda maqannaa amaana maqaki keeqafinoo Yisunara kuqaa Anutuna amaaku fee qinoo naamuqufafa iriqau.

<sup>21</sup> Irisoofanoo naaqqoofafa qiqau. Maa fasiqafa Yeerusaree maqusaki Yisuna aiku asaku narinoonufa maridanoo, miqooqari aanaiqikirausa uriqararana papiqa akara rumasoofanoo mareenoo maasa maqusai urufa Yisuna ufa irimarusa rumbamaree Yeerusareenni muqu quqaannee qufa maa mi fasiqafa ani maridanoo Yisuna ufara uqeeraanauree qidaqinoo. Misa Sauroonara naqaa fee fanoo fee qaara iriranamau fidaqinoo qimasee misa mi ufana qiqau.

<sup>22</sup> Sauroofa faasaambaasaana andeegaseenoo faiqi anaasee Yisunara qimannimidanoo nari irirana faqa maqee maqee firaanaikinuu. Mifa Yisufa kuqaa Anutuna asaku mundirafa maridanoo fee qimaseenoo quandakinoo ooqeenaa tamummaqara fasiqauqa akarakinaana amiqimasee akooqoo kooroomasee uqannifiqoofafa qafeeqa misa irirafa dapikufafa misa qaara iriranamau fiqau.

<sup>23</sup> Sauroofa moomoo faasaana Yisuna ufa qimannimarufafa Yuda maqannaa miqoo Damasakusa maqusanaasa misa Yisuna ufara nikoqeemarufafa aanoomasee moodaanaki suqufiqa Sauroona arira ufa qiqau.

<sup>24</sup> Damasakusa maqusa ooni faandaamura firaafa ititanoo marinuu. Kooqiki kai fimariqau. Yuda maqannaasa Sauroonara kooqiki rakisimariqau. Eendaki faqa faasaana faqa rakisimarufanoo miqoo oonuraina qumarasee aruanauree qidaqa rakisimariqau. Moo fannoo Sauroona aqoondi misa ufa irinoo Sauroona kooroo qimasee qimaminuu.

(Mi maqusanasaa faandaamura fiqo fiqinoo marufafa mi faandaamurana afuqaindari maaqa mi faandaamuranasaa rusisaida usakee mariqau. Sauroona aqoondi maaqa faqa minaki marufanoo mi maqafa faandaamura atisaa kaqikaaqoo ruqianoo marinuu. Faiqi minaki keeqarana amana marinuu. Aqoosaindari sia amana anifara. Afuqaindari amana fifara.)

<sup>25</sup> Sauroona aqoondiufa mina ufa irimarusa eendaki qumee Sauroona mareeqeeqa faandaamura afuqaki maru maqanakiqari meerai mi ruqjaranakiqari firaa afeeka uqaki rumaseeqa mi aamaranaki ruqieeqee maaminni quqaseeqa sanda quiqu quiqu ufanoo ooqufufanoo maqasaa ooqureenoo uqeekekufanoo quqasee Yeerusareenni sandee fidanoo faiqanoo oorufufanoo ooruranuu.

*Sauroofa Yeerusaree maqusai ooru finuu.*

<sup>26</sup> Yeerusareenni oorureenoo Yisuna aiku asaku marunaki oonu keeqafufanoo dadaaqineerufafa misa mina qafeeqa maasa darimari fee qimasee rufiasee daraaniqau. Mifa Yisuna ufara doo irida fee qufafa misa minara unna qimaseenoo maasa qumaraandoo qimasee rufiasee sandaqa.

<sup>27</sup> Baranabasifa anireenoo Sauroona dadaaqinoo aniqumareeqeenoo Yisuna afaaqasaa aqoondiufa niqiqoo fasiqausee qimarusa qiqanuu. Baranabasifa Sauroonara aanai ooru fimarufanoo karaambaiqa Yisufa mina afusaa kooroo inoo qu ufana faqa qimanniminuu. Sauroofa Damasakusa maqusaki Yisuna aufakiana afeekaimandee andeegasee qimannimuna minara faqa qimannimisoofafa kuqaa fee qiqau.

<sup>28</sup> Miqooqari Sauroofa Yisuna faiqi namu faqa Yeerusaree maqusai marinuu. Miqoo maridanoo paasoosamandeenoo Karaambaiqa aufakiana misaqa marusa qimanniminoo ninuu.

<sup>29</sup> Kirisa maqannaasa ufa qimaru Yuda maqannaasa Mooseena sandufa qimarusa irirana faqaasa Yeerusareenni animarufanoo Sauroofa Yisunara misasaimbaqa nari qimami nari qimami qidaqa afeekaimariqau.

<sup>30</sup> Miqidaqa misa aanoomasee Sauroona arirufafa Yisuna faiqi namu mina iriseeqa Sauroona mareeqee Seesaree maqusai quqasoofanoo doo miqooqari nariara Tarasusa maqusai nari maqusai finuu.

<sup>31</sup> Doo miqooqari Yisuna ufa irimarusa Yudeeaa maqa maaqaki marusa faqa Kariree maqa maaqaki marusa faqa Samaria maqa maaqaki marusa faqa asoaranaki mariqau.

Faiqi anaasee moomoosa Yisuna ufara eedooqimasee minasaa atooaqau. Anutuna naaquqara andeegara maraquna fannoo dadaaqunara misa nimana mapukinau. Misa aiqamausa Karaambaiqara naaquqoofaqa mina ufamau fimariqau.

*Peetooroofa Rida maqusaindaraa fasiqa aiku mandaikirana andeeqaisanau.*

<sup>32</sup> Mi aukuanna Peetooroofa aiqama atinnai Anutuna faiqi namu marusa fiqū fiqū nindafee marinau. Moo kari Rida maqusai Yisuna faiqi namu nindafarara oofufinau.

<sup>33</sup> Miqoo faiqi moo auqu Aeeniasafa aiku asauku kaqi uqirafa doo miqoo naaruara faikaisee marufa marinau. Qisauku dinni taikasee dinni ani qaaramoo marasee aukuanna marinau.

<sup>34</sup> Peetooroofa mi fasiqana qafamaseenoo qimaminoo qinau. Aeeniasa Yisufa asauku mundirafa ani amiqimaisaidanoo. Doo anee findifinana qaari raqandaaiia. Miqi qimasoofanoo Aeeniasafa findifinoo qaari raqandaainau.

<sup>35</sup> Rida maqusanaasaa faqa Saroonna maqusanaasaa faqa aiqamausa ani mina uqufufaqa qafamasee Oo qimasee quandaki Karaambaiqasaa kai atooqafiqau.

<sup>36</sup> Moo maqusa auqu Yoopa mi maqusafa Rida maqusa aaqa maridanoo. Yoopa maqusai anaasee moo mina auqu Tabitaa nammarifa maridanoo. Yisuna ufa irimarufa marinau. Kirisa ufakiqari mi anaaseena auqu Doorakasa nammarifa marinau. Mi auquna oosana aandaufee qimariqau. Mi anaaseefa kaaqa kudi fasiqa anaasee afaarida nimimarufa aiqama kari maqee maqee misa nimimarufa marinau.

<sup>37</sup> Miqimarufa maridanoo aurirana marasee kuqinau. (Misa maaqaki tida moo maqasaa marinau kafa tida moo sandaaqai afeekaikirafa marufanoo minasaa faiqee mariqau. Ooninnai irirasu auquqoonasaa akaramafufaqa sandaaqai tida afeeka auquqoonnai ooru fiqau.) Tabitaa nammarifa kuqufufaqa aanaaseeuqa mina iri marasee nammari rumamaqasee sandaaqai tidasaa quqasee kasooqaqee akundararee qimasee quqau.

<sup>38</sup> Yoopa maqusa faqa Rida maqusa faqa naraaqa naraaqa adeedi mariqau. Yoopa maqanna Yisuna aiku asauku Peetooroofa Rida maqusai qumumarufaqa iriseeqa qaara fasiqa niqiqoofaqa qiqau. Oo Peetooroo maasa unnanai kaqi kaqi qumua.

<sup>39</sup> Peetooroofa eedoo qimasee deedaqamamaree miqanda faqa oofu finau. Yoopa maqusai oofuroofaqa mina afiqee maaqaki mirinni sandaaqa tidasaa muruquqasoofanoo nindafamaseenoo adeedaana anaasee moomoosa ikiraqeeusa findufufaqa Peetooroonna uqusee mi anaaseefa auqu nimu siutana faqa asausi faqaa siuta faqa auqu nimuna Peetooroonna uqafiqaida ikiraqee mariqau.

<sup>40</sup> Peetooroofa mina iriiseenoo aiqama sufafaqa aqusoofaqa madaanaai oofufiqau. Oofufufanoo Peetooroofa tidasaa aqoorisaunara fufanoo Anutunara innaaru qinau. Innaaru qiqiseenoo Tabitaa nammarina iri marutinai quandafinoo qinau. Tabitaa nammari doo anee findifua. Miqi qimaseenoo Tabitaafa afu maqaseenoo Peetooroonna qafamaseenoo rutaqinoo findifinau.

<sup>41</sup> Peetooroofa mina asauku qumareenoo dadaaqi findifumasanau. Findifumasooofanoo Peetooroofa Yisuna ufa irimarusa faqa adeedaana anaaseeuqa faqa naaramasee uqan-nifiqanau.

<sup>42</sup> Doorakasa nammarina findifumasoo ufana Yoopa maqusai aiqamai daraanufaqa iriqa moomoosa karaambaiqara kuqaa fee qimasee minasaa mundiqau.

<sup>43</sup> Peetooroofa moomoo faasaana Yoopa maqusai marinau. Peetooroonna moo auqu Simoonafa marinau. Mifa Yoopa maqusai moo fasiqa nari amarana Simoonna mina faqa marinau. Simoonafa sipsipa burimakau mimmi minamusa narusaaidanoo nipata asukusaaidanoo aurumma afeekaikamasaidanoo nimisaaidanoo feefauru maree marinau.

## 10

*Kooraneeriusafa qainamasee Peetooroonara qufaqa afiqaqau.*

<sup>1</sup> Mi aukuanna mi fasannai Seesaree maqusai faiqi moo uriqararafa mina auqu Kooraneeriusafa marinau. Mifa Roomma maqanna ammi kiateenna marinau. Nari faqa nari sundiaufa faqa Itari maqanna sundia fee qimariqau.

<sup>2</sup> Kooraneeriusafa kaaqa Anutunara rimaru fasiqafa marinau nari faqa nari faiqi anaasee faqa Anutunara innaaru qimarusa mariqau. Mifa Yuda maqanna kudi fasiqauqa maqee maqee dadaaqidanoo narana ainaina nimimarufa marinau.

<sup>3-4</sup> Moo faasaana mariufanoo eenoofanoo Kooraneeriusana afu kai pisipasamandooofanoo Anutuna qangiroo moo amiqimandee qafanau. Qangiroo mifa maaqaki anireenoo auquramasee aaranau Kooraneeriusa qufanoo tautumandeenoo rufiaseenoo mina kai tataqafinoo qinau. Oo qini uriqararafa nanaree randaidanee. Qangiroo

mina iriseenoo maaqi qimasee qimaminau. Anutufa ani innaaruqirana faqa anee kudi fasiqauqara qimudaoo qimariannanara faqa qafaidanoo iridanoo aniara aididanoo.

<sup>5-6</sup> Kooraneeriusa anee faiqi akaqausa niqiqainafa Yoopa maqusai ooqu fuaqa faiqi moo ooqu afigaa. Mina auqu Simoona moo auqu Peetooroofa ooruku nammari afaiqaannai faiqi moo aandau apata aurimari fasiqana nari amarana Simoona faqa maridanoo.

<sup>7-8</sup> Qangiroo fannoo miqi qimasee qimamisee doo finau. Doo fufanoo Kooraneeriusafa mina ufamau finoo nari maaqai ainainimaru faiqiqanda faqa nari sundia moo faqa Anutuna ufa irimaruna nari ureeqarana naaramasee qangiroo qu ufana qimannimiseenoo Yoopa maqusai niqiqoofaqa Peetooroona afigarara ooqu fiqau.

(Miqooqaraasa maaqa usakasaidaqa maaqa tida aaku aakummasee qaaramoo tida marinau. Maqasaa moo tida marinau, mina maariqoo moo tida marinau. Meeraqoo maaqa ataufakaaga moo tida annuara maqi auquqoonasaa oqumarifi asoarana faqa suara faqa mareemarufa marinau.)

<sup>9</sup> Kooraneeriusana sundia faqa ainainira faiqiqara faqa Yoopa maqusai fidaqa aanai fi faiqee fimarufanoo suani qambaanaikinau. Mikari Peetooroofa suani qambaana maaqa ataufakaaga innaaru qianee qimasee oorufinau.

<sup>10</sup> Peetooroofa innaaru qimarufanoo aaroorofanoo misa narana suqee marufanoo afu pisipasamandoofanoo moo ainaina qafanau.

<sup>11-12</sup> Innaaruna rakeemambufanoo seera firaana dinni dinni sanda qusuqoona mi seeranaki aandau sakani ufini oosana oosana minaki uqarumaseenoo innaarunaindari mi seera sandana quqa quqaufanau.

<sup>13-14</sup> Peetooroona aaga qumuroofanoo innaarunaindaraa ufa moo maaqi qinoo qimaminau, Peetooroo findifina maa seeranakinaa andausa narusee naa, qufanoo Peetooroofa qafamaseenoo qinau. Oo Karaambaiqa akasaa. Maasa Yuda maqannaasa sia neemaru ainainafa kai maridanoo. Sia anukarafauqa maridanoo. Sia qinee amana naanara.

<sup>15</sup> Miqi qimasooofanoo innaarunaindaraa ufa moo maaqi qimasee qimaminau. Anutufa anukamaqai ainainara sia sia anukara fee qia.

<sup>16</sup> Maa ainainnara qaaramoo kari qufanoo sia irufanoo kafia qumu aiqama rarisamee-qee innaarunai kafaannai quqanau.

<sup>17</sup> Peetooroofa mi qainna oosanara randee marufanoo aundura mandaikinau. Randee marufanoo Kooraneeriusana faiqi namu Yoopa maqusai aniree Simoona maaqa paqurimasee kooqisaa aniree nammeera qiqau.

<sup>18-19</sup> Simoona moo auqu Peetooroofa mai maridanoo fee qufanoo, Peetooroofa maaqa ataufakaaga kaqi maridanoo qaina oosanara randeemarufanoo Anutuna maraquna fannoo qimaminau. Anee iria. Qaaramoo fasiqa aniara randaidaqa.

<sup>20</sup> Anee findifi ooqi deedaqinana misa faqa fua. Sia oonumafi iria kaqi afaaqa quqasee fua. Qinee misa niqiqaunaua ani afigarara anidaqa.

<sup>21-22</sup> Peetooroofa ooqureenoo qimanniminau. Innee qiniara randee mariasa maana misa maridaqa. Innee nanaree qiniara randaidee qufaqa misa qiqau, Roomma maqanna sundia kiateena maasa uriqararafa mina auqu Kooraneeriusafa maasa diqiqaiqaqa anidaqa. Mifa andeeqara fasiqa Anutuna amooqimarifa amiqira fasiqa maridanoo. Yuda maqannaasa aiqama kaaqa minara rimariafa maridanoo. Anutuna qangiroo moo fannoo aniara oonu afigee nari maaqakiara anirainafa ufa moo qimamianee qifaqa anidaqa.

<sup>23</sup> Peetooroofa misa ufa iriseenoo mareeqee maaqaki quqasoofaqa faiqeenoo iqaqoofanoo Peetooroofa faqa Yoopa maqannaqa qaaramoo namu Yisuna ufa irimarusa Kooraneeriusana faiqi namu faqa fiqau.

<sup>24</sup> Minamusa fifuufaqa aanai fifaiqee fifuufaqa Seesareea maqusa oonuraqau. Kooraneeriusafa nari atiuqa nari akaqaafasaa faqa nari maaqaki suqu quqasoofaqa maridaqa Peetooroona afeesimariqau.

<sup>25-26</sup> Peetooroofa Kooraneeriusana kooqiki oonuree keeqararufanoo Kooraneeriusafa rafudamakufanoo mina aikuki qumi maree oorindari rumafinoo Anutufara maqi miqimaseenoo innaaru qiraree qufanoo Peetooroofa mina asauku qumaree uqereenoo qinau, Doo findifua, qinee faqa sia Anutusa maridaqa faiqi faiqi maridaqa.

<sup>27</sup> Peetooroofa Kooraneeriusana qimamidanoo maaqaki keeqanau. Keeqafi qafooofanoo faiqi anaasee aanaamuru moomoosa minaki mariqau. Minaki ooruree misa faqa maaqi qimasee qimanniminau.

<sup>28</sup> Innee aiqamausa maasa Yuda maqannaasa oosana irimariafanoo. Maasa Yuda maqannaqa aanaamuru maaqaki sia uqanna keeqafi misa faqa aqoondiki mariasa. Maasa amaana ufa minara firaqoo qaoo qinoo maridanoo. Sia anukarausee qidaqa. Doo maqee Anutufa qiniara sia moo aanaamuruara sia anukara fee qimasee rufiaa, kaqi aqoondi kiannee qidanoo.

<sup>29</sup> Qinee mina ufa irisaunnana anee qiniara aniannee qianaqa qinee sia inniara rufiteeqa kaqi aniga. Anee nanaree qini daareenane.

<sup>30</sup> Kooraneeriusafa mina iriseenoo qinau. Innau qinee qeeqa maaqaki eeneemarufaqa innaaru qimariafananoo faiqi moo fannoo mina qamunna kaaqa areenara qamunna faqaafa qini qifusaa kikiqamambinoo qimaqiminau.

<sup>31</sup> Kooraneeriusa Anutufa ani innaaruqirana irinoo ani kudi fasiqauqa qimudao qimasee dadaaqimariannanara irinoo qafeenoo aniara aididanoo.

<sup>32</sup> Doo anee faiqi niqiqainaqa Yooqa maqusai fuaqa. Faiqi miqoo mina auqu uqanna Simoona moo auqu Peetooroofa maridanoo. Mifa nari amarana Simoona faqa aandau apata aurimari fasiqana faqa maridanoo, ooruku nammari afai qaannai mina maaqa maridanoo fee qinau.

<sup>33</sup> Qinee mi ufana iriseeqa aaqee uqanna aniara oonu afiqee aniaqee qiqa. Anee amiqimminana andeeqasee aniananoo. Doo maasa aiqama maa maqanaki ooqumarifi marunanoo doo Anutufa qiqafaidanoo. Karaambaiqa ani qimami ufana irianeera anidaqa.

*Peetooroofa Kooraneeriusana aiku asauku qimanniminau.*

<sup>34</sup> Kooraneeriusafa miqi qimasee Peetooroona qimamisoofanoo mifa maaqi qimasee misa qimanniminau. Doo qinee maqee maa ainainna oosanara iridaqa. Anutufa sia maasa Yuda maqannaasara kai aididanoo kuqaa aiqama maqannaasa amanamana kai iaqera aididanoo.

<sup>35</sup> Aiqaamausa Anutunara naaquqee marinaqa andeeqara oosana maraidaqa miqi-marifandinausara qinindi fee qiannoo. Aiqaama maqusanaasa amanamana kai iaqera qidanoo.

<sup>36</sup> Anutufa Isaraee maqannaai amiqira fasaasa ufa asoora ufa asauku mundirana Yisunannai qimanniminau. Mifa aiqama maqannaai Karaambaiqa.

<sup>37</sup> Yudeeaa maqa maaqai firaqoo kambiqoo ainainara Yoohaneefa nammari nimiru aukuna oosanaraseenoo kambiqanoo maridanoo. Kariree maqa maaqaki oosanaraseenoo miqooqari aiqama Yudeeaa maqa maaqakina fifaininai. Innee maaqoo mariasa minara Yisunara doo irimariafanoo.

<sup>38</sup> Anutufa nari naaquqara maraquina Yisuna Nasareete maqusaindaraanasaa adia-maqasoofanoo Anutuna afeeka mareenoo aiqamai oonuree aniree inoo qimudao qinoo Sadannana auraarai mariusa qumareenoo aurimarusa faqa kaqi marusa faqa aiqaamausa idaaqamannisanau. Anutufa qumee mina faqa nidanoo dadaaqufanoo mi oosanna oosanna ainainna auqeeamarinai. Innee minara faqa doo irimariafanoo.

<sup>39</sup> Yuda maqannaai maqusa faqa Yeerusaree maqusaki faqa Yisuna auqoo ainaina qinee faqa akaqausa faqa qifunnai qafaafanausa maridaqa. Misa mina mara maree pirimmannai aunirira saqarisaa ariqau.

<sup>40</sup> Qaaramoo faasaana aiqaroorofanoo Anutufa kuqiranakinaana mina uqera findifinai. Findifinoo maasa qifusaa kooroomambinai.

<sup>41</sup> Sia aiqaamausa qifusaa kooroo inau. Anutufa maasa rusandeesamumandee maroosa maasa qifusaa kai kooroo inau. Anutufa kuqiranakiqari uqerasoofaqa maasa mina faqa narana nammari naafanausa maridaqa.

<sup>42</sup> Mikamuqoo maaqi qimasee maasa naamuqinoo qinau. Innee qiniara maana faiqi anaasee noori kandamasee qimannimiaqa. Anutufa qini Yisusara kaqi mariasa faqa kuqiraua faqa misa rainasee idaki fee innaarunai fee quqannisaanausee qinau. Minara faqa inni aiqaamausa maa maqee mariasa faqa qimannimidaiqa.

<sup>43</sup> Peetooroofa mi ufana Kooraneeriusana aiku asauku qimannimiseenoo maaqi qinau. Anutuna tamummaqara fasiqausa aiqama Yisunara qidaqa akara rimariqau. Maaqi qimariqau. Aiqaamausa mina saqarikinausa Anutufa mina auqu afeekannai misa mandainaina numoo mininnisaannoo.

*Anutuna maraquina fannoo Kooraneeriusana aiku asauku naakinai.*

<sup>44</sup> Peetooroofa miqi qimarufanoo Anutuna naaquqara andeeqara maraquina fannoo innaarunaindari qumureenoo aiqaamausa Peetooroona ufa irimarusasaa rafaafuqafu manimaqanau.

<sup>46</sup> Maraquina fannoo naakufufaqa dadaaqufaqa moo maqannaai ufa sia irimaru ufausa qimariqau. Anutuna firaanaikiranara faqa firaqoo amooqimariqau.

<sup>45</sup> Yuda maqannaasa qaaramoonamu Peetooroona faqa Yooqa maqusaindari qumusa mi ainainna qafamaseeqa naaquqooofaqa qiqa. Oo Anutufa nari naaquqara maraquina anaamuru faqa nimidanoo. Sia Yuda maqannaasa kai nimidanoo.

<sup>47</sup> Peetooroofa miquna nindafamaseenoo Yuda maqannaasa nari faqa anusa qiman-niminoo qinau. Maa fasiqausa Anutuna naaquqara andeeqara maraquina doo mareea,



maasa Yuda maqannaasa iafanandeemmiafanoo. Yafasiqa fee moo fannoo nammari nimiranara qaoo qiannoo fee sia amana moo fannoo qaoo qiannoo. Doo nimia.

<sup>48</sup> Miqi qimasoofoqa Anutuna asauku mundirana Yisuna auqusaa nammari maraqa. Miqimasoofofanoo Kooraneeriusafa asaidanoo Peetooroonara kaqikaqoo marianne qufanoo eedoo qimaseenoo misa faqa qaaramoo faasaana marinau.

## 11

*Peetooroofa Kooraneeriusana qimamufanara narí aqoonausa Yeerusareenni ooru qimanniminau.*

(Isaraee maqannaasa aiqama Anutuna ufara maasaindi fee kai qimariqau. Anaamuru mariasara sia misaindi maridanoo fee qimariqau. Anaamuruara sia anukarafauqa marinara sia misa maaqaki keeqaa, sia misa narana naaqee qimariqau.)

<sup>1</sup> Yisufa niqiqoo fasiqausa Yeerusareenni marusa faqa Yisuna ufa irimarusa Yudeeaa maqa maaqai marusa faqa aanaamuru marusa misa faqa Anutuna ufa mareeaa maqi qiqau.

<sup>2</sup> Peetooroofa Seesareea maqusaindari Kooraneeriusana maqusaindari Yeerusareenni ooru fufaqa miqooqaraasa Yuda maqannaasa Yisuna ufa irimarusa Mooseena sandufara rimarusa misa aiqama Peetooroona aqidaqa qiqau.

<sup>3</sup> Anee aanaamuru maaqaki misa faqa mariaanafa misa faqa neeneeanafa animariananoo. Sia Yuda maqannaa fainandugiraua faqa mariaananoo. Naqaa fee ifanee miqinanee. Maasa Yuda maqannaasa sandufa rukieenana miqiananoo.

<sup>4</sup> Peetooroofa mina iriseenoo oosanaindari aiqama ainainara qimannimino qinau.

<sup>5-6</sup> Firaa seera moo dinni atinai moo dinni atinai qaara faqa qaara faqa atinai sanda rumbanoo marufanoo innaarunaindari moo fannoo mi sandausa quaqee idanoo quqaaqaa imarufanoo qini daaqa quqasoofaqa minakinaa ainaina amiqimasee qafaqifana.

<sup>7-9</sup> Innaarunaindaraa ufa moo qimaqimino qinau. Peetooroo doo findifi arusee naa qufaqa qinee maaqi qiga. Oo Karaambaiqa sia uqanna. Sia sia anukara aandau qinee moo neemariqia. Maqee maana sia naanauree qimasaunanoo innaarunaindaraafa qinoo, Anutufa maa ainainnara anukarafauqa maridanoo fee qimasaifana anee sia minara sia anukara fee qia.

<sup>10</sup> Mi ainainnara qaaramoo kari qaoo qunanoo doo qumu rarisama innaarunai quqeenoo.

<sup>11</sup> Miqi marunanoo kai Seesareea maqusaindari qaaramoo fasiqa niqigaasa aniree qinee marunna maqana kooqiki aniree qiniara randeaa.

<sup>12</sup> Anutuna maraquina fannoo qiniara kaqi rakeemasee misa faqa fuannee qinoo. Maa mariasa qikaqaafasaa qisauku dinni taikasee dinni ani moodaa marasee qini faqa Seesareea maqusai oogu fiqau. Maasa aiqama ooguqree Kooraneeriusana maaqaki keeqaqau.

<sup>13</sup> Keegafufanoo Kooraneeriusafa Anutuna qangiroo qafoonara maasa qimaqiminau. Mi qangiroofa mina maaqaki kikiqamambi qimaminoo qinau. Kooraneeriusa anee faiqi akaqausa niqiqainaga Yoopa maqusai ooguqree faiqi moo mina auqu uqanna Simoona moo auqu Peetooroo mina oogu afigee uruqa.

<sup>14</sup> Mifa urureenoo ufa qimannimisainaga anee faqa ani aiku asauku faqa innaaruna asumu marirana oosana irifaranoo fee qinau.

<sup>15</sup> Mi qangiroofa fufanoo Kooraneeriusafa narí ainainira faiqiuqa aqiqoofaqa qini qifigee Kooraneeriusana maaqaki quqaqisoofaqa qinee Peetooroosa ufa qimannimirara oosana arasaunanoo naaquqara andeeqara maraquina fannoo ooqai indaaru maasa daakinoo mariufa maasa undee Kooraneeriusana maaqaki mariasa naakinau.

<sup>16</sup> Miqi marufaqa qinee oonumafi iriseeqa Karaambaiqa maasa faqa maasaki maridanoo maasa qimaqimino qinau. Yoohaneefa nammariqi keeqannimaqaidanoo kasoogaqee qinee maraqunaki keeqannimaqaanara qufaqa iriafannana. Qinee mi ufana iriseeqa Kooraneeriusana maaqaki naakirana qafamaseeqa iriseeqa minara inni qimannimidaqa.

<sup>17</sup> Maasa Yisuna asauku mundirana saqarikiafanoo Anutufa narí kaqi nimira ainaina narí naaquqara andeeqara maraquina maasa qiminou. Miqi kai masee Seesareea maqusai aanaamuru faqa kaqi nimino. Qinee yausee maridee Anutunara qaoo qianauree. Sia amana.

<sup>18</sup> Yeerusaree maqannaa Yisuna ufa irimarusa mi ufana iriseeqa doo ufa Peetooroona aqimaruna taikasee quandaki Anutunara asaidaga qiqau. Oo Anutufa aanaamuru

naundura quandarana faqa naaru naaru marirana faqa doo misa faqa niminoo. Sia maasa Yuda maqannaasaindi kaifau. Miqi qufanoo mi ufafa doo taikanau.

*Antiooka maqusaindaraasa Yisuna ufa irimarusa mi ufana.*

<sup>19</sup> Mi ufa suqirana sia kambiqooqoo Sateefeenana arukari doo miqooqari Yisuna ufa irimarusa quqasee aanaamuru maaqa maaqa daraanimambiqau. Akaqausa Fooeenisia maqa maaqai fiqau. Akaqausa Antiooka maqusai fiqau. Akaqausa Sipurusa maqa maaqai fiqau. (Sipurusa ooruku nammari qambaana amuaqunamu maridanoo. Faiqi anaasee moomoo miqoo mariqau.) Miqimasee aanaamuru maqusa marufaqa Yuda maqanna misaki animarusa misakai Yisunara qimannimimariqau.

<sup>20</sup> Akaqausa Sipurusa maqannaasa faqa Sireenee maqannaasa faqa Antiooka maqusai oonu maridaqa aanaamuru marusa asauku mundirana Yisuna amiqira fasaasa ufa aanaamuru qimannimimariqau.

<sup>21</sup> Karaambaiqa afeeka dadaaqunara Antiooka maqannaasa aanaamuru moomoosa uqanna Karaambaiqa ufara asasamasee iriqa aiqamausa minasaa kaimma atooqaqau.

<sup>22</sup> Antiooka maqanna ufa fannoo Yeerusareenni ooruroofaqa misa irisee Baranabasina aqifoofanoo Antiooka maqusai ooqu finau.

<sup>23</sup> Ooqreenoo niqafooofanoo Anutufa mimaqusaanaasa dadaaqimarunara ooqu niqafamaseenoo asasinoo qimannimidanoo qinau. Innee inneeqa nimuqusa ookiqari kuqaa karaambaiqasaa mundufuaqa naaru naaru miqookai noori runuseeqa fuuqa.

<sup>24</sup> Baranabasifa andeeqara fasiqa marinau. Naaquqara andeeqara marauna minaki qumbiqarafa marufa. Yisunasaa kaaqa mundirafa marinau. Mi fasannai faiqi anaasee Antiooka maqusanaasa moomoo karaambaiqasaa atooqeemariqau.

<sup>25</sup> Baranabasifa Antiooka maqusaindari Tarasusa maqusai ooruree Sauroonara randarara finau.

<sup>26</sup> Paqurimaseenoo afiqeenoo Antiooka maqusai animaridaqara faiqi anaasee moomoo Anutuna fasaasa ufa qimannimimariqau. Moodaa aukuaana miqoo maraqau. Antiooka maqannaasa miqooqari oosana araseeqa Yisuna ufa irimarusara fuka nuqu Kristiannee qimariqau. (Maasa ufakiqari asauku mundirana aiku asauku kamambiqa mariasee qimariqau.)

<sup>27</sup> Mi aukuaana Yeerusaree maqusaindari fuka tamummaqara fasiqauqa Antiooka maqusai ooqu fiqau.

<sup>28</sup> Miqoo maridaqa misakiqari moo fasiqa auqu Akabusafa findifinoo Anutuna maraqunannai maaqi qimasee qimanniminoo qinau. Kasooqaqee aandaroo aiqama maqa maaqaki naruannoo. (Kasooqaqee Karaudiusafa Roomma maqanna uriqarara kiapafa maru aukuaana mi aandaroofa kambiqafinoo narinau.)

<sup>29-30</sup> Antiooka maqanna Yisuna aiku asauku nari niqoonausa Yudeeaa maqusai marusa aandaroo narunara dadaaqiaqeera qiqau. Aiqamausa nari nimana nimana kai munnimma qumaree Baranabasina faqa Sauroona faqa nimufaqa Yudeeaa maqa maaqai nimirara ooru fiqau.

## 12

*Eeroodeefa Yameesana kuqaruseena Yoohaneena karabusaki quqanau.*

<sup>1</sup> Mi aukuaannai mi fasannai Eeroodeefa Yudeeaa maqa maaqai faqa Kariree maqa maaqai faqa Peereea maqa maaqai faqa Samaria maqa maaqai faqa misa kiapafa firaafa Eeroodeefa maridanoo Yisuna ufa irimarusa narirana oosana arasee narimarinau.

<sup>2</sup> Eeroodeefa Yoohaneena afaana Yameesana qumaree rumbaseenoo rakinoo nu paipanannai anuka ateeqa aqinoo kuqammarinau. Yuda maqannaasa Yisuna ufara nikooqemarusa miqunna qafamasee asasammiqau.

<sup>3</sup> Minara asafanoo Eeroodeefa miqiaqoo fee qimasaida kafa miqianauree qimaseenoo Peetooroona faqa qumararee qimarinau. Ooruku siai feemu qoomaqunaki Peetooroona maaqimasee qumaranau.

<sup>4</sup> Yameesana aruseenoo Eeroodeefa kafa miqooqari ooruku siai feemu qoomaqunaki Peetooroona qumaraseenoo rumbeeqeenoo karafusa maqaki quqasoofaqa sundiauqa moomoo rakisimariqau. Qisauquqara taikasee qiku dinni taikasee dinni ani moodaa marasee sundiauqa eendaki faqa faasaana faqa rakisimariqau. Ainnaaqarara qoomaqa taikafinaqa mina maariqoo aiqamausa nifusaa aruanauree qinau.

<sup>5</sup> Yisuna ufa irimarusa minara iriseeqa Anutunara maqee maqee firaqqoo Anutunara innaaru qimariqau. Peetooroona sia aruanifeera miqimariqau.

*Qangiuro eendaki qumureenoo Peetooroona karafusakinaana mareeqeenoo kaqinni quqanau.*

<sup>6</sup> Moo faasaana Eeroodeefa duna iqaqaranasaa faiqi nifusaa Peetooroona afiqaseeqa faiqi nifusaa aruanaree qimasoofoano mi eendanakina Peetooroofa sandaandoo qimaseenoo firaa sainanda qaaraqandannai rumbaseenoo karabusa maqaki quqanau. Sundia qaaraqanda minasaa rakisimarufanoo Peetooroofa miqanda dinni dinni qambaanaai faiqanau. Moo fannoo Peetooroona dinni asauku namu faqa nari asauku namufaqa moo sainanda rumbanau. Kafaa dinni asauku namufaqa moo sundia asauku namufaqa moo sainandannai rumbanau. Akaqa sundiauqa kooqiki rakisimariqau.

<sup>7</sup> Mi eendana qambaanaai miqiga marufanoo karafusa maaqaki qangiroo moo kikiqinoo marufannoo kaaqa qarafa firaafa qeemarufanoo qangiroo fannoo Peetooroona afaurinoo findifua qufanoo tautumma uqera qafoofanoo sainanda asaukuqarasaaqaraa sainanda nari kai idukuaki maqasaa aqufiqau.

<sup>8</sup> Aqufufanoo qimaminau, aneenna pikapa atukarasee aneenna aiku aanaamu upeekasee rumbasee aneenna asausi faqaa siuta afisumaree findifi doo qini faqa ania.

<sup>9</sup> Peetooroofa mina iriseenoo aiqama ainaina mifa undee undeamareenoo doo mina faqa maqusai raudanau. Peetooroofa qangiroo faqa fidanoo qinasasaa miqidee qinau.

<sup>10</sup> Misa kooqi afaisaa rakisimaruqoo qumureenoo quminnaaqareenoo doo miqoo madaanaai marusakiaqa qumureenoo doo miqoo firaa kooqi qainnannai ititara kooqiki madaanaai kooqiki qumuroofanoo narikai mi qainna kooqifa atuafufanoo miqanda maqusai raudamaki fiqau. Aatata ooqufidaqa kaqikaqoo kisaacaqasaa ooqufimarufanoo qangiroo fannoo mafi aisaseenoo tautumakinoo taikafufanoo Peetooroofa nariara kai kikiqinoo marinau.

<sup>11</sup> Doo nari kai kikiqinoo maridanoo nari aundurannai kai irinoo qinau. Doo qinee maqee oonumafi iridaqa sia qainau. Anutuna qangiroo fannoo qini mareeqee Eeroodeena asaukukinaana mareeqee karafusakinaana idukueeqeenoo madaanaai quqeenoo. Yuda maqannaasa qiniara kuquanifeera asasiaanakinaana mareeqee kaqinni quqagiseenoo.

<sup>12-15</sup> Miqi qimaseenoo Peetooroofa nari marianinnanara iriseenoo Yoohaneena amara fa moo auqu Marakafa mina anoona Mariana amarana maaqai finau. Sia Yisuna anooqau mina anoona amarana mina maaqai finau. Yisuna ufa irimarusa moomoosa suqiga marida Peetooroofa sia kuquanifeera innaaru qimarufanoo Peetooroofa madaanaai aniree asukunai kooqi arinai. Arimarufanoo ainaini maru manaaqafa mina auqu Roodanammari fa kooqi atuararee qimasee ooquroofanoo Peetooroofa faandaamura kooqiki aqoosaindara kooqi arinoo kooqi atuaanee qufanoo mi manaaqafa Peetooroona ufa kai iriseenoo firaqoo asamasenoo sia kooqi atuanau, kaqi quqasee sandeenoo faiqi marunnai sandee ooreenoo qimanniminai. Oo Peetooroofa madaanaai kikiqinoo maridanoo fee qufaqa misa qiqau saa anee furufarida qira saa mifa karabusaki maridanoo.

Miqi qufanoo Rooda nammari fa asaidanoo kooripoo kooripoo qidanoo qimannimufaqa misa qiqau. Saa mina amana mina qangiroo maridanoo fee qiqau. (Ooqai mi kamuqoo Yuda maqannaasa nari faiqi anaasee faiqi namu mai marufanoo misa qangiroo innaarunaindaraasa rakisi nimaqee mariafaqee qimariqau.)

<sup>16</sup> Misa miqi qidaqa nari qimami nari qimami marufanoo Peetooroofa kaqi aqosai maridanoo kooqi arimarinai. Miqidaqa qumu kooqi atuasee Peetooroona qafoofanoo kaaqa naaquqanau.

<sup>17</sup> Peetooroofa ururee asaukunnaai misa ufara qaoo qimaseenoo Anutufa nari karabusakinaana maroo ufana qimannimiseenoo moo Yameesana faqa nari aiku asauku Yisuna ufa irimarusa faqa qimannimiqaqee qimasee uriqaree Eeroodeefa maaqoo paqurimasee daruandoo qimasee moosaa kukeeqarannai finau.

<sup>18</sup> Iqaqoo faqa kananaana Peetooroonasaa sundiauqa rakisiusa qafoofanoo sia marufaqa firaqoo tutuqida randee mariqau.

<sup>19</sup> Eeroodeefa minara iriseenoo randaaqee qufaqa randaqanusia sia paquriqau. Eeroodeena aranaqoofoanoo nari sundiauqa rakisiusa minara ireeseenoo aiqama misa naru taikanau. Miqooqari Eeroodeefa Yudeeaa maqa maaqaindari Seesareea maqusai ooqu marinai.

### *Eeroodeefa kuqu ufana.*

<sup>20</sup> Tiree maqusanaasa faqa Sidoona maqusanaasa faqa mi maqusaqanda Eeroodeena ququsaki maridaqa Eeroodeena maqasaaqaraa narana marasaida neemariqau. Nari maqa mandaikunara miqi mariqau. Eeroodeefa mi maqusaqanda rairai qimannimiqaqee marufaqa misa naranara irisee maasa naranara fimarunna aana iitaandoo qimasee moodaanaki suqufufaqa Eeroodeena faqa asoora ufa qianee qimasee qumiqau. Ooqureeqa Eeroodeena maaqasaa rakisimaru fasiqana mina auqu Baratasa

mina aqoondikamasee munnimmaina amisee anee maasara amiqira ufa kai ooquree qimami marinaqa maasa innaaqiana ooquree mina faqa ufa qianauree qimasee mina aanaaqiana ooqureeqa Eeroodeena faqa ufa qiqau.

<sup>21</sup> Ufa qu faasaana Eeroodeefa nari kiapausa qammunna amiqirana afisuseenoo amiqira siaqa kiapausaindi mina muqu quqasee minasaa marida ufa qimannimimarinau.

<sup>22</sup> Ufa qimannimisoofaqa mi maqusaanaaqanda fifau unna qidaqa amooqidaqa faaqa quqasaida qimariqau. Maa fasiqafa Eeroodeefa sia faiqi faiqifau moo anutufa maridanoo.

<sup>23</sup> Miqi qimarufanoo Anutuna qangiroo fannoo qumee Eeroodeena kuqammarusanau Eeroodeefa misa amooqira ufa irisee sia qao qimasee Anutuna amooqiaqee qira ufa sia qimannimuna akiqara doo mina kuqammarin角度. Mina aundurai qimi moomoo neeneesoofanoo kuqin角度.

<sup>24</sup> Eeroodeefa kaqi maru aukuaana Yisuna ufa taikaanifee qimasaidanoo mina ufa irimariusa narinoo rumbeenoo imarinau. Anutuna ufa fannoo sia taikeenoo sia kaqi maruqoo kai marin角度. Firaqoo daraaninoo doo fifainin角度.

<sup>25</sup> Baranabasifa faqa Sauroofa faqa Antiooka maqusanaasa Yisuna ufa irimarusa munnimma auqusoona muru Yeerusaree maqannaasa nimisee Yeerusaree maqusaindari kafa ururandee Antiooka maqusai kafa ooqu fiqau. Miqanda moo kumaaraa qaara auqufaqaana moo auqu Yoohaneena amarafa moo auqu Maraka mi kumaaraana faqa afiqee Antiooka maqusai ooqu fiqau.

## 13

### *Baranabasisa Sauroosa Yisuna ufa qimannimirara niqiqoofaqa fiqau.*

<sup>1</sup> Antiooka maqusai Yisuna ufa irimarusakii Anutuna tamummaqara fasiqa akaqausa mariqau. Anutuna ufara qimannimimarusaa akaqausa mariqau. Misa nuqu Baranabasifa faqa Simeeonara dundugarira fee qimarufa faqa mariqau. Rukiusafa Sireenee maqusaindaraafa moo fannoo marin角度. Manaenafa Eeroodeefa nari maaqaki firimarufa moo fannoo marin角度. Sauroofa faqa marin角度. <sup>2-3</sup> Mi namusa moodaanaki marufaqa maridaqa qusasaa narana minnisee naarara maridaqa Anutunara innaaru kai qida mariqau. Miqi marufanoo naaquqara andeeqara maraquna fannoo qimanniminoo qin角度. Innee Baranabasina faqa Sauroona faqa mara quqasai naaduma quqasaifaqa miqanda naaduma qinee moo saika nimianauranoo qufaqa misa mi ufana irisee sia narana narai kaqi innaaru qimariqau. Innaaru qimasee Sauroona faqa Baranabasina faqa nisauku misasaa quqasee doo niqiqaqau.

### *Baranabasisa Sauroosa Sipurusa qafumaki fiqau.*

<sup>4</sup> Baranabasifa faqa Sauroofa faqa naaquqara maraquna fannoo niqiqoofaqa Seereeu-sia maqusai ooquree sipaki akaramafufaqa Sipurusa maqa maaqai fiqau.

(Sipurusa maqannaasa aanaamuru naaduma ufa qimarusa mariqau. Yuda maqannaakaqausa misaki onu mariqau. Baranabasifa mindaraa Yuda maqannaafa maridanoo nari maaqai finau.)

<sup>5</sup> Sipa fannoo Sipurusa maqusa moo auqu Saramisa maqusai munu quqasoofaqa miqanda sipakiqari maqasaa aqufufaqa Yuda maqannaakaqausa miqoo marusa ufa suqira maqaki keeqafufaqa Anutuna fasaasa qira ufa miqoo Yuda maqannaasa qimannimimariqau. Mi kumaaraafa moo fannoo misa faqa fufa Yoohaneena amarafa moo auqu Marakafa mifa faqa dadaaqidanoo qimannimimarin角度.

<sup>6</sup> Sipurusa maqa maaqa ooruku nammari fiq fiq inoo marufanoo firaa afuma marufaqa faiqi anaasee maqusa moomoo marin角度. Sauroona faqa Baranabasi faqa, misa Saramisa maqusaindari maqamau fifufaqa mi maqa maaqana dinni ati Paafosa mi maqusanai fiqau. Mi maqusanaki afunee fasiqa moo paquriqau Yuda maqannaafa marufa marin角度. Mina auqu Barayisunee qimariqau. Mifa nariara tamummaqara fasiqa fee qimarufa unna qirafa marin角度.

<sup>7-8</sup> Mi maqa maaqanaki maru kiapana auqu qaara auqu faqaafa marin角度. Moo auqu Seerakiusafa moo auqu Paurusafa marufanoo uriqarara kiapafa marufanoo mi afunee fasiqafa mina aqoondi marin角度. Mi kiapafa irirana faqaafa marufa mifa Baranabasina faqa Sauroona faqa naaramasee qin角度. Aniree Anutuna ufa qifaqa iria qufanoo afunee fasiqa fannoo minasaa ititeemarin角度. Kiapafa sia Yisunara irianifeera miqi marin角度. Mi afunee fasiqana moo auqu Kirisa ufakiqari Eerimasa marin角度.

<sup>9</sup> Sauroona moo auqu Pauroonee qimariqau. Pauroofa Eerimasana rafaqaqafiranara qafamasoofanoo naaquqara maraquna fannoo aakufunanoo afunee fasiqa ooriki qafamaseenoo qimamin角度.

<sup>10</sup> Anee Sadannana amaaku marianafa mariananoo anee aiqama ainaina andeeqara ainaina namuqaa marianafa mariananoo. Anee mandainaina nikaru qira ainaina aniki qumbiqanoo marifa mariananoo. Anee maqee maqee Anutuna kuqaa anoonufa qumareenana uqaa iqammeeqeenana nimimarianna fasiqafa mariananoo.

<sup>11</sup> Doo maqee Anutuna asauku fannoo ani rafaqaa fuannoo. Ani afuqara dimbafinana sia suani kaqaa qarana qafeennaranoo. Miqi qimasooфанoo afu aiqamaqara dimbanau asukuna arufufanoo miqoo miki makamminau. Yafee qini qisauku qumareenoo aana uqaqifiqaaanoofee qinau.

<sup>12</sup> Kiapafa mi fasiqana afu dimbarana qafamaseenoo Karaambaiqa fasaasa ufa irisooфанoo aaquqoofanoo kuqaa anoona fee qimasee irinau.

*Baranabasisa Sauroosa Antiooka maqusa amarana maqusai fiqa Yisuna ufa qimannimiqau.*

<sup>13</sup> Pauroofa nari aqoonausa faqa Paatoosa maqusaindari maqamau ooruku nammari afainni oqureenoo sipaki akara mafufanoo nammari amuaqumau Pamafrica maqa maaqaki Peeraka maqusai mi sipanaki finau. Miqoo oonureenoo Yoohanee moo auqu Marakafa akooqoofanoo quqaseenoo Yeerusareenni anirandee kafaa moo sipaki finau.

<sup>14</sup> Baranabasisa faqa Pauroosa faqa Peereeka maqusaindari Pisidia maqa maaqai moo Antiooka maru maqusa maqamau fiqau. Miqoo oonuree marikiqa Yuda maqanna misaki animarusa ufa suqira maqaki keeqafi oqumariqau. Saririqasaa nari amaanasaa keeqafi oogu mariqau.

<sup>15</sup> Yuda maqanna amaana maqasaa rakisirausa Mooseena sandufa faqa tamummaqara fasiqauqa ufa faqa asaana rumaseeqa Baranabasina faqa Pauroona faqa qafamasee qimannimidaqa qiqau. Oo maasa qikaqaafasaa inneeqara aamua qira ufa inniqaraki marinaga faiqi anaasee qimannimifaqa maasa iriaqa.

<sup>16</sup> Pauroofa findifinoo asaukunna misa rafaqaa finoo qinau. Doo qinee qimannimianaura. Miqi qimaseenoo findifi maaqi qimasee qimanniminau. Oo qini qiqoonausa Israaee maqanna faqa aanaamuru mariasa faqa maa maqanaki Anutunara innaaru qimariasa qini ufa iriaqa.

<sup>17-18</sup> Israaee maqannaasa Anutufa maasa qikeeku qikaaku rusandeesamu mandeenoo nari maqusa minnisee Isipa maqa maaqai oqureeqa faiqi asumu areeqa moomoosa kambiqaqau. Anutufa nari afeekannai nifiqeeqeenoo aadana maqasaa quqaseenoo qaara fasiqa niku nisauku taikasee aukuanasaa misa faiqi anaasee qummaara Anutuna arufanoo sia narinau, faiqiara maqi aakuseenoo rakisi nimaqeeamarinau.

<sup>19-20</sup> Miqooqari Kannaana maqa maaqaki marusa qisauku taikasee dinni ani qaara marasee maqannaasa naru taikaseenoo Israaee maqanna mi maqana Anutufa nimisoofaqa 450 aukuaana kisaaqasaa moomoo aukuaana minaki mariqau. Doo miqooqari faiqi anaasee rakisiaqeera Anutufa faiqi moomoo saika mafufaqa maridaqa rakisinnimaqee mariqau. Misa marikufanoo tamummaqara fasiqa Samueerafa kambiqanau. Siaasaiuqa fifiufaqa doo Samueeranasaa munu taikanau doo miqooqari tamummaqara fasiqauqa mariqau.

<sup>21</sup> Maasa qikeeku qikaaku moo karaambaiqaikamma sainaqa maasaki mariani fee qufanoo Anutufa Beesaminna ati Sauroona amarana Kisana amaaku mina nininau. Sauroona amarafa qaara fasiqa niku nisauku taikasee aukuaana rakisinnimaqeeqee marinau.

<sup>22</sup> Anutufa mina mafi afeeqasee Dafidina karaambaiqaikinau. Karaambaiqaika maseenoo Anutufa maaqi qimasee Dafidinara qinau. Dafidifa Yeeseena amaaku marifa qinee minara dididanoo. Mifa qini iriranamau fimarifa maridanoo naaru miqikai inoo qini iriramau fuannoo.

<sup>23</sup> Dafidina ati moo fannoo Yisuna Anutufa mareeqeenoo Israaee maqanna asumu maree marianinnanara quqanau. Nari tamummaqara ufamau kai Yisuna quqanau.

<sup>24</sup> Yisufa aniree qimannimira aukuaana adeedi roofanoo Yoohaneefa nammari nimimarufa aiqama Israaee maqannaasa maaqi qimasee qimanniminau. Inneeqa mandainaina minnisee Anutunai ubeekamafiqa mina ufa irisee nammari marasee mariaqa.

<sup>25</sup> Yoohaneefa nammari nimimarufa mina saika aukuaana taikaidanoo maaqi qimasee faiqi anaasee qimanniminau. Innee qiniara yafasiqanee fee qidaqee. Sia qinee innee afeesimaria fasiqausau maridau. Doo mifa qini qinaaqianna rakisasaa aniraannoo. Mifa andeeqarafa mariannoo. Qinee mina ureeqarusa uqanna maridaqa, sia amana mina kaqikaqoo dadaaqianaaura.

<sup>26</sup> Oo qini qiqoonausa Abarahaamana akeeku akaaku mariasa aanaamurundari aniree innaaru qimariasa faqa Anutufa maasa qumaraaninna ufana qiqaki quqeenoo.

<sup>27</sup> Yeerusaree maqusanaasa tamummaqara fasiqa ufa asaana rumasee sia mina oosana amiqimandee irisee Yisuna qafamasee sia maasa asumu qumaraaninna fee qimasee tamummaqara fasiqa ufamau Yisuna arirariqau.

<sup>28-29</sup> Misa mina arirufara randoosia Piratoofunnai afigee munusoofanoo qufaqa ariqau. Aruseeqa tamummaqara fasiqa ufa undee undee kaimma taikaseeqa doo mina iri aunirira saqarisaa qaraana tatusee doo akundaqau.

<sup>30</sup> Qaaramoo suanisaa marinoo Anutufa mina kafaa mara findifinuu.

<sup>31</sup> Findifumasoo faqi faiqi anaasee moomoosa kaqi maru kamuqoora mina faqa Kariree maqa maaqaindari Yeerusareenni nidaqa qafamaqoosa findi funa qafamaseeqa mifa findifunara Isaraee maqanna qimannimidaqa kooroo idaqa.

<sup>32</sup> Maasa mi amiqira fasaasa ufana mai aniree inni qimannimirara anidaqa. Ooqai maasa qiikeeku qikaaku qima afeekaikamaqoona anoona kuqiranakinaana uqeera findi finannai maasa kooroomaqiminoo.

<sup>33</sup> Dafidina idi akara firaa kamu 2 Anutuna ufara maaqi qinau.

Anee qini qimaaku mariananoo

Maqee qinee ani akausaikidaqa.

<sup>34</sup> Kafaa Anutufa Yisunara kuqiranakiqari findifuaninnanara faqa sia putaaianinnanara faqa maaqi qinau.

Qinee oosana oosana naaquqara amiqi amiqirana Dafidinasaa qima afeekaikamma qaafannana mina anisaa quqaanaura.

<sup>35</sup> Minara Anutufa kafaa maaqi qidanoo.

Anee aneenna kaaqa andeeqara fasiqa sia mina amaqi putaa irana amaqeenaranoo.

<sup>36</sup> Dafidifa nari maru aukuanai Anutuna ainainirafa marinoo doo kuqinau. Kuquf-ufaqa mina iri mareeqee nari akeeku akaaku marunaki akundaqau. Miqimasooofanoo amaqi putaa inau.

<sup>37</sup> Moo fannoo kuqiranakinaana Anutufa mara findifumasainafa mina amaqi sia putaa iannoo. Dafidifa minara akara rumaqoofa maridanoo.

<sup>38-39</sup> Maa qini qikaqaafasaa Antiooka maqusai mariasa maa ufana amiqimandee iriaqa Innindi maridanoo. Inni numoo arirana minninnisarafa Yisufa maridanoo minara marifaqa maasa inni qimannimidaqa. Mooseena sandufa sia faiqi anaasee amana nari mandainaina sandara foora rumbannimaqaoofa sia amana idukifaranoo. Aiqamatia Yisunara irirana rusiranannai kai minannai kai inni numoo akiaqa taikannisaannoo inni mandainaina sandara foora rumbarana idukunnisaannoo.

<sup>40</sup> Innee maqee amiqimandee rakisiaqa ooqai Anutuna tamummaqara fasiqa moo fannoo aaquqimannimaqaoofa innisaa kambiqaandoo. Mifa maaqi qimasee akara rumasee qinau.

<sup>41</sup> Innee iriaqa, inni kuqaa naruaninna ainainara qimannimiafaqa innee mafi uteeti qimasaidaqa amarau qimariasa. Mi ainainna inni nifusaa kambiqaainafa qafamasee tautumasee kuqifaranoo. Innee maria kamuqoo qinee moo ainaina firaa ainaina auqusaananoo moo fannoo minara qimanniminafaqa innee minara unna fee qifaranoo.

(Pauroofa mi tamummaqara fasiqana ufannai aaquqimanniminoo qinau. Innee maqee ooqeenasa naana ramasee Anutuna ufara unna fee qifoora. Innee maqee aukuanu Yisunara unna fee qifoora.)

<sup>42</sup> Pauroosa Baranabasisa Antiooka maqusai ufa suqira maqakiqari raudoofaqa faiqi anaasee maaqi qimasee qimannimiqau. Amanee inneeqara kafaa oonurandee moo Saririqa kafaa aniree qimannimiaqa.

<sup>43-44</sup> Eedoo qimasee miqanda fuafaqa Yuda maqanna faiqi anaasee moomoosa faqa aanaamuru Yuda maqanna amaana ufa irimarusaa misa faqa miqanda nifaqee firariqau. Mi niqiqoo fasiqaqanda mi fasiqa anaaseesa fuki faaki qimasee qimannimiqau. Innee maqee maqee Anutuna kaqi nimiranaki mariaqee qimasee marikinoo moo Saririqasaa Yuda maqanna amaana maqaki keeqafufaqa mi maqusaanaasa aiqama Anutuna ufa iriraree qimasee keeqaqa.

<sup>45</sup> Yuda maqannaasa moomoo aanaamuru nindafamaseeqa misa naundurai kaukaataqirafa qumbiqafufaqa Pauroona ufa rukiaidaqa manda ufa sukufa kai qimariqau.

<sup>46</sup> Pauroosa Baranabasisa mina iriseeqa paasoosamandee ufa qimannimiqau. Anutufa nari ufara Yuda maqannaasa naaree qimannimiaqee qimaqoona doo inni qimannimiqanaqa innee minara qaoo qimasee ititee mariafanoo. Innee inneeqara sia amana naaru naaru marirana maraanauree qidaqee miqidaqa ititeemariafanoo. Innee miqianara inni minniseeqa quandaki aanaamuru qimannimianaara.

<sup>47</sup> Karaambaiga fannoo maasa maa ufaana qimaqimifaqa mai anidaqa aanaamuru qimannimianaaura.

Qinee inni niqiqeeqa aanaamurukiya qoomaikiyaqera kaaqa qaranara qimannimia. Aiqama aanaamuru maqa maqaaki mariasa innee misa innaarunai fimaria aannanara qimannimiaqera niqiqaidaqa.

<sup>48</sup> Miqoo aanaamuru marusa mi ufana iriseeqa asasammaseeqa karaambaiga fasaasa ufara dufi dufi qidaqa amiqira ufa fee qimariqau. Misakina Anutufa rusandeesamumandoosa doo Yisuna saqarikiya naaru mariranaki keeqaranara oosana araqa.

<sup>49</sup> Miqimasooqano miqooqari misaqa dinni dinni marusakina doo karaambaiga ufa fannoo daraaninau.

<sup>50-51</sup> Yuda maqannaasa miquna qafamaseeqa aanoomaseeqa mi maqusanai faiqi firaasauqa faqa aanaamurukina Yuda maqannaasa amaana ufa irimaru anaasee uriqararasa faqa nirana fundakusooqafa Baranabasina faqa Pauroona faqa mareeqee aqoo-sai aqusaqau. Aqusoofaqa miqanda findifufaqa kookoomma afaqa qumareeqa misa ninaamu araseeqa quqasee Antiooka maqusaindari Ikooniumma maqusai fiqau.

<sup>52</sup> Miqanda fufaqa mi maqusaanaasa Antiooka maqusaanaasa Yisuna ufa irimarusaa naaquqara maraqauna fannoo naakinoo qumbiqafufaqa asasimariqau.

## 14

### *Baranabasisa Sauroosa Ikooniumma maqusai fiqau.*

<sup>1</sup> Pauroosa Baranabasisa Ikooniumma maqusai oonuroofano Antiooka maqusai kambiqoo ainainafa mina amana kai Ikooniumma maqusai faqa kambiqanau. Miqanda Yuda maqannaasa amaana maqaki keeqaqau. Keeqafiqa amiqimasee qimannimunara Yuda maqannaasa faqa aanaamuru marusa faqa moomoo uqanna Yisunasa mundiqau.

<sup>2</sup> Yuda maqannaasa akaqusa ufa rukiaseseeqa aanaamuru qimannimidaqa ueeqasooqafa iriseeqa misa faqa Pauroosa Baranabasisa ufara manda ufa fee qimaseeqa ufa rukiaqau.

<sup>3</sup> Miqunara miqanda kisaqqasaa mi maqusanaki maridaqa paasoosamandee karaambaiga dadaaqunara afeeka nimufaqa faiqi sia auqaaqaa ira ainaina faiqi anaasee dadaaqi maru ainaina oosana oosana auqusoofaqa faiqi anaasee qafeeqa tautumasee qiqau. Oo kuqaa uqanna miqandakina karaambaiga kaqi nimira ufa kuqaa anoona maridanoo fee qiqau.

<sup>4</sup> Mi maqusaanaasa qambaana rainaqa. Rainafiqa akaqafa Yuda maqannaasasaa atooqaaqau. Akaqafa niqiqoo fasiqausasaa atooqaaqau.

<sup>5-6</sup> Anaamuru ufa rukiee marusa faqa Yuda maqannaasa faqa nari faiqi firaasa faqa moodaanaki suqufufaqa ufa qi qisee oonisamu Pauroosa Baranabasisa naruane qufanoo moo fannoo aauqimannimaqooqafa miqanda mi ufana iriseeqa quqaseeqa rufiamareeqa Rikaoonia maqa maqai sandaqa. Rikaoonia maqa maqaki maqusaauqa moomoo marufaqa qaara maqusa moodaaqoo maruqanda moo maqusa auqu Ristara, moo maqusa auqu Deerabee marufaqa doo miqanda Ristara maqusai naaree fiqau.

<sup>7</sup> Miqoo oonu maridaqa Ristara maqusaki faqa Deerabee maqusai faqa misaqa maru maqusausakiya faqa amiqira fasaasa ufa misa faqa qimannimimariqau.

<sup>8</sup> Ristara maqusaki faiqi moo aiku mandaikirafa marinau. Maqookari mi kamuqooqari miqinoo marufa marinau, sia aana nufa.

<sup>9-10</sup> Mi fasiqafa Pauroona ufa kaaqa irimarufano Pauroofa oonurama qafanau. Qafamasee maqi qimirinuu. Maa fasiqana irirafa Yisunasa rusinoo marifa amanai- kirafa maridanoo amana findifuannoo qimaseenoo mi fasiqana oori qafamaseenoo firaa kari maqi qimasee qimaminoo qinuu. Anee findifua. Andeeqaseenana rutaqina findi fua. Miqi qufanoo mi fasiqafa rutaqi findifinoo doo maqusamau oonuree aniree inau.

<sup>11</sup> Faqi anaasee mina qafamaseeqa faaqa fuisse qidaqa tutuqidaqa nari ufakiqari Rikaoonia ufakiqari maqi qiqau. Anutuqanda faiqikamambi doo maasaki qumu maridaqa nidaqa, Yisufa niqiqoo fasiqaqandara Anutuqandee qiqau.

<sup>12</sup> Mi maqusaanaasa Anutufara maqi unnaqira anutuqanda nimana auquqooqa misaki mariqau. Moo fannoo ureeqarafa ufa akoofasa mina auqu Eerameesafa marinau. Mi maqusaanaasa aiku mandaikirafa findifirana qafamaseeqa Pauroosa Baranabasisara maasa anutuqanda qumu maridammia maqi qimasee Baranabasinara anee maasa uriqarara anutufa ani auqu Seeusanee qiqau. Pauroonara anee ufa akoofasa maridana maasa ureeqara anutufa ani auqu Eerameesanee qiqau.

<sup>13-16</sup> Misa firaa Anutuna Seeusana amaana maqa mi maqusana naambeeqi marinau. Mi amaana maqanasaa aanaiqikirafa Baranabasisa Pauroosa niqafamaseenoo tatufira aandau suqasee nimisee innaaru qiagee qimaseenoo burimakau akoonauqa rarisamam- maree minisee mina anukaki kukuqamma quqasee rarisammareeqa faandaamura

kooqiki munusoofaqa faiqi anaasee aiqama suqusee aniroofanoo Baranabasisa Pauroosa misa tatufirana suqafimidee qimasoofofanoo nikoqofofanoo kakeenna qaoo qiqau. Kakeenna qaoo qufaqa sia irufaqa miqanda nari qamunna qumaree rakeemmaqusee faiqiki oonuree aniree faaqa quqasee qimannimiqau. Maaqanda faiqi faiqi maridaqa. Inni fooqaasa maridaqa, sia anutusa maridaqa. Maasa anoona Anutuna amiqira fasaasa ufa qimannimirara anidaqa. Innee maa maaqiana fifau dapi ainaina maridanoo mina minnisee quandakinaqa kaqi marira Anutunara iriaqeera anidaqa. Mi kaqi marira Anutufa mifa kai innaaruna faqa maqa faqa ooruku nammari faqa minakimari ainaina oosana oosana faqa auqu quqanau. Ooqai mifa faiqi aanaaseera inneeqa manda iriramau kaqi fuaqee qimarinau.

<sup>17-18</sup> Mi kaqi marira Anutufa innaarunaindaraa aaku faqa narana oosana oosana nari aukuanasaa moo narana nari aukuanasaa moo narana nimirifa maridanoo. Innee mina qafamaseeqa innee faqa maraseeqa minara kai asasmariafanoo. Mi ainainna miqimarianannai nari marina kooroomannimidanoo. Innee mina qafeeqa minara kai asasiyaqa. Faiqi anaasee mi ufana iriseeqa kaqikaqoo indee indee qidaqa kafa kaqikaqoo mara mara ridaqa tatufira aandau nimianeera qimariqau.

<sup>19</sup> Antiooka maqusa amarafa Pisidia maqa maaqaki moo Antiooka maqusa marinau. Mindaraa Yuda maqannaa akaqausa faqa Ikooniumma maqusanindari akaqausa faqa moodaanaki suqufufaqa Ristara maqusai oonureeqa miqooqaraasa faqa ufa qi qiseeqa Pauroona qumareeqa maqamau rarisqa fifuufaqa faandaamura aqoosai aquseeqa oonisamu suqu qumaree misamuna Pauroona arimariqau.

<sup>20</sup> Doo kuqinoommifoo qimasee quqasee fufanoo Pauroofa Yisunara ufa qimannimarufafa Yisuna ufa irimarusa mina aqa anifiq fiq mambufanoo Pauroofa nari kai misa qambaana findifinoo doo quqasee maqusai kafa keeqanau. Iqaqoofanoo kananaana Pauroosa Baranabasisa findimaqee Deerabeera maqusai fiqau.

*Baranabasisa Sauroosa oonurandeeqara Antiooka maqusa uqannai aniqau.*

<sup>21</sup> Miqoo Deerabeera maqusai oonu maridanoo amiqira fasaasa ufa qimannimi marufafa moomoosa Yisuna aiku asauku kamambiqau. Deerabeera maqusanindari Pauroosa Baranabasisa oonurandee aniree kafa Ristara maqusai oonisamu aru maqusanai kafa ani kaqikaqoo marikiqa quqasee Ikooniumma maqusai kafa ooqu fiqau. Miqoo faqa kaqikaqoo mariqa quqasee Pisidia maqa maaqaki moo Antiooka maqusai kafa fiqau.

<sup>22</sup> Mi maqusausakiya nidaqa Yisuna ufa irimarusa fuki faaki qimaseeqa qiqau. Innee Yisuna ufasa mundufiqa kuqaa anoonaikiya. Maasa aiqama moomoo mandainainaki maraqa kadaapiriqa fifi iqa Anutuna ququsaki keeqaanauree qidaqa. Minara innee faqa sia minnisaaqa kaqikai fuaqa.

<sup>23</sup> Aiqa maqusakiya nidaqa Pauroosa Baranabasisa Yisuna ufa irimariasakinaana qumareeqaida rakisirausai mariqau. Quqasaida narana minnisee innaarukai qiaqee qimasaida maqee nariqa fukasaa karaambaiqasaa irirana rusimariasara misara rakisiaqee qimasee quqau.

<sup>24</sup> Pauroosa Baranabasisa Pisidia maqa maaqaki oonuree aniree maseeqa Pamafria maqa maaqai kafa anirandee fiqau.

<sup>25</sup> Miqoo miqanda Peeraka maqusai Yisuna fasaasa ufa qimannimiseeqa ooruku nammari Ataria maqusai ooqu fiqau.

<sup>26</sup> Ataria maqusanindari sipaki akaramafufaqa Antiooka maqusai kafa fiqau. Ooqai indaar Antiooka maqusai oosana araqa. Miqoo Yisuna aiku asauku miqanda raineeqee Anutuna asaukuki quqasoofaqa Inneeqara karaambaiqa ufa maraqa nuaqee qimasoofofa mi saikana maraqa nimariqau.

<sup>27</sup> Baranabasisa Pauroosa Antiooka maqusai anireeqa Yisuna ufa iri marusa aiqama suqu quqaseeno Anutufa miqandannai aiqama ainaina naamuqinoo uqannifiqeenoo qimaseeno Anutufa miqandannai aanaamuru kooqi atuasoofaqa misa faqa Yisunara iridaqa.

<sup>28</sup> Miqi qimannimiseeqa miqoo Antiooka maqusai kisaqasaa mariqau.

## 15

*Pauroosa Baranabasisa Yeerusareenni ooruree Yisuna aiku asauku irammirara oorufiqau.*

<sup>1</sup> Yudeeaa maqa maaqakinaasa Yisuna ufa irimarusa akaqausa Antiooka maqusai ooqureeqa Yisuna ufa irimarusa maaqi qimasee unna qidaqa naamua qiqau. Innee Yisuna ufamau kai fidaqa sia Mooseena sandamau fimariafanoo sia fainanduqirasa sia innaarunai asumu mareefaranoo fee qiqau.



<sup>2</sup> Pauroosa Baranabasisa mi Yudeea maqanna fasiqausara qaoo qimasee mi ufanara firaqoo ufa qi qisee ufa rainaqau. Miqi qimaseeqa misa moodaa ufa qimaseeqa qiqau Pauroosa Baranabasisa akaqausa maaqooqaraasa saimbaqa Yeerusareenni ooru fuuqa. Oorureeqa Yisuna afaaqasaa aqoondiuqa qimannimifaqa maa ufanara naqaa naqaa fee qifaqa oorurandee qumuree qifaqa iria.

<sup>3</sup> Antiooka maqusanasaa Yisuna ufa irimarusa misa niqiqamasoofaqa Yeerusareenni ooru fidaqa ooriqaree Foeeenisia maqa maaqai faqa Samaria maqa maaqai faqa Pauroosa Baranabasisa nariqa niniunara faqa aanaamuru moomoosa quandaki Anutufinnai ubeekoonara faqa qimannimiqa fimariqau. Yisuna ufa irimarusa minara iriseeqa firaqoo asasiqau.

<sup>4</sup> Yeerusareenni minamusa ooruroofaqa Yisuna ufa irimarusa miqoo marusa faqa nari faiqi firaasa faqa Yisuna afaaqasaa aqoondiuqa minamusa ooqu nifqeeqee quqa-soofaqa maridaqa Baranabasisa Pauroosa nari niniuna oosana oosana aamina maqanna moomoosa Yisunasaa atooqeuna mi fasaasausa qimannimimariqau.

<sup>5</sup> Farisai amaana ufa qimarusa akaqausa Yisuna ufa irisee mina aiku asauku faqa miqoo Yeerusareenni mariqau. Misa faqa Baranabasisa faqa Pauroona faqa ufa irisee findifiqa maaqi qiqau. Anaamuru mariasa Yisuna ufara eedoo qidaqa sia kaqi mariaqa maasa Yuda maqanna fainanduquseeqa Mooseena sandamau fidaqa innaaruna aana mareefaranoo.

<sup>6</sup> Yisuna faiqi namu niqiqoo fasiqausa moomoosa misa faiqi firaasa faqa minara iriseeqa moodaanaki suqufufaqa ufa qimariqau.

<sup>7</sup> Kisaaqasaa mi ufana qida mariqau. Miqi marufanoo nindafoosia Peetooroofa findifi maaqi qimasee qimanniminoo mi ufana rafaafafinau. Qini qikaqafasaa Anutufa sia maasa kaifau, aanaamuru faqa amiqira fasaasa ufa irisee eedoo qiaqee qimaseenoo innikinaana qini qumareenoo, anee oosana areenana aanaamuru qimannimia qufaqa miqimmiqiafana.

<sup>8</sup> Anutufa faiqi aiqama nimuqusa naundura irimarifa maridanoo. Mifa aanaamuruara faqa eedoo qimaseenoo naaquqara maraquna maasa undee miqikai inoo misa faqa nimanau.

<sup>9</sup> Sia maasa faqa misa faqa raineenofau qinau, amanamana kai fee qimasee misa mandainaina numoo nariqa Yisuna saqarikiranannai mininnisanau.

<sup>10</sup> Anutufa miqimmaqaifaqa innee nanaree firaa qumaara mareeqee fifau misa nifaariki quqaidee. Mooseena sandufa qaaraikinoo maridanoo amiqirafa faqa ummaara nimarifa faqa marinara maasa qikeeku qikaaku maasa faqa qumaara tafirana sia amanaiki mariafanausa maridaqa.

<sup>11</sup> Innee sia miqiaqa. Maasa Yisuna saqarikamasoofanoo Karaambaiqa Yisufa nari afaariranannai maasa utaaqeenoo. Anaamuru miqi kai masaafanoo doo misa faqa miqikaiminoo utaaqamannimaqeenoo.

<sup>12</sup> Peetooroofa miqi qimasooofaqa aiqama daimambi irimarufanoo Baranabasisa Pauroosa nari niniunara oosana oosana qimannimufaqa iriqau. Miqanda aanaamurukiaqa nimarufanoo Anutufa miqandannai faiqi sia auqaaqaa ira ainaina auqusoofaqa faiqi anaasee qafoonara mi ufana miqoo Yeerusareenni sugimariasa qimannimimariqau.

<sup>13</sup> Baranabasisa Pauroosa ufa taikasooofanoo Yameesafa findifinoo ufa moo qimannimianau. Oo qini qikaqafasaa qini ufa iriaqa.

<sup>14</sup> Anutufa aanaamuruara amuqusufanoo misakinaana akaqausa mareeqeenoo nariara narindikiaqeera maranau. Mi ainainna oosana Peetooroofa faasai maasa doo qimaqiminoo.

<sup>15</sup> Doo miqunaki ooqai tamummaqara fasiqa akara kooroo inau. Minara maaqi qimaqoona.

<sup>16</sup> Qinee kasooqaqee kafaa qumuaanaaree qinau.

Qumureeqa Dafidina aiku asauku maaqa rapeeiera maqi inoo marifaqa kafaa qumuree usakaanaura.

Mina maqusa urisinoo marifaqa mina faqa rukianaaura.

<sup>17</sup> Miqianaqa maaqanna maaqanna karaambaiqara randaqeera.

Aiqama maqannaasa naaraanausa qini ufara anifaranoo.

<sup>18</sup> Qinee karaambaiqa ooqai maa ufausa kooroo qiafanausa maridaqa.

<sup>19</sup> Yameesafa mi tamummaqara ufana qimannimiseenoo nariara qinau. Qinee maa ainainnara irunafa maaqimminoo maridanoo. Anaamuru mariasa moo maqannaasa quandaki Anutufinnai ubeekemariasa sia kadaapi fifau ruanaura.

<sup>20</sup> Sia misa miqifaqa maasa akara kai rumeeqee misa nimianaaura. Akaqa ufa maa ufausa kai uqannifiqaanaura. Faiqi moo fannoo narana maraseenoo moo unnaqira Anutunara innaaru qimasee aminana miqira narana sia naaqa. Faiqi anaasee nari

ummuari narí ummuarinnanara sia mina maraaqa. Aandau moo anukaki ataakirarana fidika kaqi maaqinaki marinnana siamma naaqa. Fidika kaqinni tati aqusee amaqi kai naaqa, fidika sia mina naaqa. Doo miqi kai qimasee qimannimiaqa.

<sup>21</sup> Aiqama maaqanna maaqanna mariasa aiqama Saririqa Yuda maqanna amaana maqakina Mooseena sandufa ooqaindari aukuaana aukuaana aanaamuru asaana rumasidaqa qimannimariafaqa Mooseena sandufa oosana amana irifaranoo. Maasa miqi kai iqa anoona ainaina kai qimannimianauro.

*Yisufa niqiqoo fasiqausa pasa akara rummeeqee maqusa maqusa nimaqanau.*

<sup>22</sup> Yisuna ufa irimarusa aiqama Yeerusaree maqusakinaasa Yisuna faiqi namu niqiqoosa faqa faiqi firaasa faqa Yameesana ufa irisee eedoo qimaseeqa qiqau. Maasa qeeqakina akaqausa suqumareeqa Baranabasina faqa Pauroona faqa Antiooka maqusa niqifaifaqa ooqureeqa mi ufana qimannimiaqeera. Miqi qimaseeqa faiqi moo auqu Yudasifa mina moo auqu Barasabasi mina faqa Sirasina faqa mara quqaqau. Aiqamausa miqandara amiqira fasiqa andeegaragandee qimarusa mariqau. Misa miqanda mareeqee Sauroosa Baranabasisa nimiseeqa papiqa akara rumeeqee nimiqau.

<sup>23</sup> Mi papiqanaki ufa maaqimminoo marinau.

Innee Antiooka maqanna faqa Siria maqanna faqa Sirisia maqanna faqa sia innee Yuda maqannaafau mariafanoo, aanaamuru mini maqaqoosa mariafanoo maasa Yisuna faiqi namu mifa niqiqoosa faqa faiqi firaasa faqa maasa inni nikaqafasaa nifasausamara inni nimaqandaqa.

<sup>24</sup> Maasakiqari faiqi akaqausa narí kai innee unnai ooqureeqa fainandugira ufa faqa Yuda maqannaasa sandufa oosana oosana faqa qimannimufaqa iriseeqa qaara irirana maraqau. Sia maasa niqifaafanau ooqu fiqau. Nari iriranannai ooqu fiqau.

<sup>25</sup> Maasa minara iriseeqa moodaanaki suqufiqa ufa qimaseeqa Baranabasina faqa Pauroona faqa qaara fasiqa mara quqasaafaqa miqanda faqa innee iannai ooqufifaranoo. Minamusa inni ufa qimannimiaqeera.

<sup>26</sup> Baranabasisa Pauroosa sia kuqiranara rufeemariasa kai paasoosamasee Karaambaifa Yisuna asauku mundirafa mina saika uqeeree mariasa maridaqa.

<sup>27</sup> Maasa indaaruga Yudasina amarana faqa Sirasina faqa innee iannai niqifaanaqa ooqureeqa papiqakinaa ufa nookiqari qimannimifaqa iriaqa.

<sup>28</sup> Anutuna naaquqara maraquna fannoo maasa faqa moodaa karakaimmidanoo. Sia maasa moomoo sandufa innisaa quqaanaura. Maa qaaramoo sandufana kai innisaa quqaanaura. Maa qaaramoo firaa ufa namuna kai inni nimianauro.

<sup>29</sup> Faiqi moo fannoo narana maraseenoo nari moo unnaqira anutunara dufi dufi qimaseenoo inni niminafa sia mina naaqa minnisaaqa. Innee aiqama aandau fidika sia naaqa. Ataakirara aandau sia mina amaqi naaqa. Faiqi anaasee narinni narinni ummuarirana sia maraaqa. Innee maa qinee qunnainaina sia mareeqa amiqiranaki marifaranoo. Doo maa ufana taikeenoo.

<sup>30-31</sup> Yisuna faiqi namu Yeerusaree marusa mi akarana rumeeqee ufa maree marusa nimufaqa mareeqa Antiooka maqusai ooqu fiqau. Antiooka maqusai ooqureeqa Yisuna ufa irimarusa suquseeqa papiqakinaa ufa asaana rufaqa irufanoo amiqikaimminau. Mina iriseeqa firaqoo asasamaseeqa qiqau. Maa ufafa maasa pooduqara ufa maridanoo fee qiqau.

<sup>32</sup> Yisuna ufa irimarusa nariara nariara qikaqaafasaa fee kai qimariqau. Yudasina amarafa faqa Sirasafa faqa Anutuna tamummaqara fasiqaqara maruqanda. Miqanda kisaqaasaa nari nikaqaafasaa faqa maridaqa pooduqara ufa faqa qimannimimariqau.

<sup>33</sup> Yeerusarendari qumusa mariufaqa Antiooka maqanna Yisuna ufa irimarusa susummasee nimaqandafoofaqa Yeerusareenni kafaannai ooru fiqau.

<sup>35</sup> Pauroosa Baranabasisa miqanda sia Yeerusaree maqusai ooru fiqau kaqikaqoo kisaqaasaa Antiooka maqusai mariqau. Miqanda faqa akaqausa namufaqa karaambaifaqa ufa oosana oosana ufa asaana rumasee naamua qimannimimariqau.

*Pauroosa Baranabasisa rainakiqa naadu naadu fiqau.*

<sup>36</sup> Mariufanoo Pauroofa Baranabasina qimaminoo qinau. Doo findifinaqa anindiri ooqai niniaafannakinai maaqanna maaqanna nidaqa niuqia.

<sup>37</sup> Baranabasifa eedoo qimaseenoo Yoohanee amarana moo auqu Maraka kafia afiqararee qimasoofoanoo Pauroofa qaoo qinau.

<sup>38</sup> Ooqai maasa faqa finoo Pamafria maqusaindari oonurandee anufa saina kaqi mariani. Sia maasa faqa aiqamai ninoo kasaqaaindari oonurandee anufa.

<sup>39</sup> Miqi qinoo Baranabasisandiri ufa rainaqau. Ufa rainasee rakeemaki naadu naadu fiqau. Baranabasifa Marakana afiqamaree sipaki akaramafufanoo Sipurusa afumai nari maqa maaqai finau.

<sup>40</sup> Antiooka maqanna nikaqaafasaa marusa Pauroosa Sirasisa mara quqasee innaaru qimasee qiqau. Anutuna afaarirafa inneeqara Anutuna saika maree marifanoo inniqara rakisinnimaqaani.

<sup>41</sup> Qimasoo faqa miqanda Siria maqa maaqaki faqa Sirisia maqa maaqaki faqa oonuree aniree idaga Yisuna ufa irimarusa afeekaika mannimaqee mariqau.

## 16

*Pauroosa Sirasisa Timootina aqiqasee nimariqau.*

<sup>1</sup> Pauroosa miqooqari Deerabee maqusai faqa Ristara maqusai faqa finau. Mi maqusa qanda nari aaga nari aaga adeedi marinau. Miqoo Pauroofa Yisuna ufa irimaru kumaaraana moo paqurinau. Mina auqu Timootifa. Mina anoofa Yuda maqanna anaasee marinau mina akoofa Kirisa maqusaindaraafa aanaamuru marinau.

<sup>2</sup> Ristara maqusai nikaqaafasaa marusa faqa Ikooniumma maqusai nikaqaafasaa marusa faqa aiqama Timootinara amiqira kumaaraa fee qimariqau.

(Yuda maqannaasa aiqama Mooseena sandufamau fidaqa Isaraee maqanna fee qiaqeera fainanduqimariqau. Miqunara fainandammuidee qimariqau.)

<sup>3</sup> Pauroofa Yisuna ufa maqusa maqusa qimannimiraree qimaseenoo Timooti anirainaga innisaimbaqa fidaqa Yisuna ufa qimannimiqa fiq fiqia. Misaqa fiq fiqumma marusa Yuda maqannaasa aiqama Timootina akoonara aanaamurufee qida irimarusa mariqau. Pauroofa Yuda maqannaasa Timootinara qaoo qifoo qimasee Yuda maqannaasa fainanduqumaqaseeqa afiqee fimariqau.

<sup>4-5</sup> Misa maqusakiaqa oonuree aniree maseeqa Yeerusareenni maru niqiqoo fasiqusa faqa faiqi firaasa faqa misa sandufa suquseeqa papiqasaa akara rumaqoona mi ufana qimannimidaqa qiqau. Innee sia Yuda maqannaasa sandufa oosana irisee qumaara naruaani. Yisuna faiqi namu niqiqamaqoo fasiqusa misa sandufauqa minamuna kai rakisi qumaraaqee qufaqa miqimmimariqau. Miqi marufanoo maqusa maqusa Yisuna ufa irimarusa afeekaikamandee mapukusee mariqau. Faiqi moomoosa faasambaasaana iriseeqa doo misasaa atooaqau.

*Pauroofa qainasaa Maseedoonia fasiqa ufa irinau.*

<sup>6</sup> Pauroosa Sirasisa miqooqari Firikia maqa maaqaki faqa Karatia maqa maaqaki faqa oonuree aniree idaga qimannimimariqau. Miqooqari misa Asia maqa maaqai fuaneerufanoo naaquqara maraquna fannoo misa rafaafufusoofaqa oonurandaqau. Sia minaki qimannimianneera miqinau.

<sup>7-8</sup> Misa miqooqari Misia maqa maaqindari oosirana fllaqaree Bitinia maqa maaqa firaree qufanoo Yisuna maraquna fannoo rafaafufufaqa oorurandee Misia maqa maaqa qambaana ai aikatee Tarooasa maqusai ooruku nammari atinni mariqau.

<sup>9</sup> Misa miqoo Tarooasa maqusaki marufanoo Pauroona qaina afu naranau. Qainaki Maseedoonia maqannaasi fasiqa qafanau. Mi fasiqafa Pauroona fuki faaki qidaqa qainasaa aaramasee qinau. Anee mai Maseedoonia maqa maaqai aniree maasa dadaaqia.

<sup>10</sup> Miqi qufanoo Pauroofa maasa qimaqimufaqa maasa minara Anutufa maasa Maseedoonia maqa maaqai amiqira fasaasa ufa qimannimiaqeera qidaqi qimasee doo deedaqiafannana.

*Firipi maqusai Ridia nammari fa Yisuna ufa irinau.*

<sup>11</sup> Maasa Tarooasa maqusaindari sipaki akaramafi andeeqasee Samootarakee maqusai oonuraafannana iqaqoofanoo kananaana Neeapoorisa maqusai Maseedoonia maqa maaqaki maru maqusana mi sipanaki fiqiafana.

<sup>12</sup> Miqoo maasa sipakiqari maqasaa aqufufaqa Firipi maqusai adeedi maru maqusai maqamau fiqiafana. Firipi maqusa Maseedoonia maqa maaqakinaa maqusauqa moomoo marinau. Aiqaama maqusauqa aruseenoo Firipi maqusa mifa uriqarara maqusa firaafa marinau. Roomma maqanna kiapausa kaamanna fira taunna marinau. Roomma maqanna sundiaqa kiapausa faiqi anaasee miqoo moomoo ani mariqau.

<sup>13</sup> Moomoo taunnakiaqa Yuda maqannaasa miqoo asaqi ani marusa nari amaana maqa usakee mariqau. Akaqa taunnakiaqa sia usakee mariqau. Saririqasaa Yuda maqannaasa raudamakufaqa nammari afainni ooqu ooqumarifufaqa miqoo nariara amaana qimasaidaga ooqu randee maqusai urimariqau. Maasa Firipi maqusai ani marikammasee Yuda maqannaasa innaaru qirana oosana iriseeqa Saririqasaa Firipi maqusaindari raudamakiqa nammari afainni Yuda maqannaasara ooqu randaqiafana. Paqurimasee Yuda maqanna aanaaseeuqa kai marufaqa misa faqa ooqu marifi ufa qimannimiqiafana.

<sup>14</sup> Mi anaaseesakiqari moo fannoo mina auqu Ridia nammarifa sia Yuda maqanna anaasee Tiatira maqanna anaasee marinau. Mifa qamunnasaa akimaru qumisana mi ainainiranaki maru anaaseefa maridanoo Yuda maqannaasa amaana ufa qimarufa marinau. Pannoonna arira qumisa ainainiranaki marufa maridanoo firaa munnimma aqimaru ainainasaa rakisimaru anaaseefa marinau. Mi anaaseefa Anutunara rimarufa marinau. Anutufa kukeeqasee dadaaqunara Pauroona ufa amiqimasee irinau.

<sup>15</sup> Mi anaaseefa faqa mina maaqaki akaqausa marusa faqa iriseeqa nammari maraqau. Nammari maraseenoo maaqi qimasee sandanainai qidanoo maasa qimaqiminu. Innee qiniara kuqaa Karaambaiqa saqarikidanoo fee qimasee innee aiqamausa qini maaqaki ani amiqimasee mariaqee qufaqa doo maasa miqimmiqifana.

*Pauroosa Sirasisa maanaaqa aundurakinaa faafasaaqa aqiganau.*

<sup>16</sup> Moo faasaana kafia innaaru qirree qimasee nammari afainni ooqfumariafanoo moo maanaaqa fannoo maasa aana paqurinau. Mi manaqafa faafasaaqa aakimarufa marufanoo mi faafasaaqafa dadaaqufanoo mi manaqafa kasoogaqee kambiqaaninna ainainara maqee maqee tamummaqaseenoo doo mifa quqoo kai mina anoona kambiqee marinau. Moomoosa mi manaqafa funnai oonureeqa qimamidaqa qiqau. Feefauruma-saifana maasaki kasoogaqee kambiqaaninna ainainara akooroomasee qimanniminaqa mina akiaqara feefauru amianauree qufaqa mi manaqanasaa rakisimarusaa miqi qufaqa firaa munnimma auqu ramaasida maree mariqau.

<sup>17</sup> Maasa Pauroona faqa fufanoo mi manaqafa maasa faqa fimarinau. Fidanoo faafasaaqa dadaaqufanoo firaa kari faaqarumaseenoo maaqi qimasee nari tamummaqasee misaqanna marusa aiqamausa qimanniminau. Maa fasiqa namusa firaa Anutuna uriqararana saika faiqi namu maridaqa innaarunai fimari aana uqannifiqarara ani mariasa maridaqa.

<sup>18</sup> Faasaambaasaana moomoo kari mi ufana qimanniminoo nimirinai.

Miqi marufanoo Pauroofa qafoofanoo akoogoofanoo quandaki minakinaa faafasaaqa qimaminoo qinau. Yisufa Anutuna asauku mundirafa qimaqimifaqa qimamidaqa anee maa manaqana aunduraindari rafudamaki fua.

Miqi qufanoo miqookai mi faafasaaqafa raudamaki sandanau.

*Mi maqannaasa Pauroosa Sirasisa rumbaqa.*

<sup>19</sup> Mi manaqana rakisirusa mina qafamasee boo qimasee naqimasee maasa minasaagaraana munnimma firana maraanauree. Miqi qimasee aanoomasee Pauroona faqa Sirasina faqa qumareeqa rarisammaree kiapana oopisaki quqaqau. Mi oopisafa sia kaqinni marinai, makeeta qambaana marufaqa misa Pauroosa Sirasisa rarisamasee mi oopisanaki quqasee aiqama kiapausa naaramasee unna qimasee qiqau.

<sup>20</sup> Maa fasiqa qanda Yuda maqannaqaqanda maasa taunnaki anireeqa mandainaina oosana oosana uqeeridaqa.

<sup>21</sup> Misa nari sandufa qimaqimifaqa kaqi runna kai ubeekamaqimaqaidaqa. Maasa Roomma maqanna sandufa ameemaana maridaqa nanaree kaqi runna ubeekamaqimaqaida fee.

<sup>22</sup> Faiqi anaasee aiqama minara kuqaa kuqaa qufaqa kiapausa iriseeqa niranaqoofaqa Pauroosa Sirasisa qamunna uturuqusee miqanda mara quqasee sundiaufa qimannimifaqa unnana samu naruqaqee qufaqa amiqimandee firaqoo nariqau.

<sup>23</sup> Naruseeqa karabusa maqaki quqasee minasaa rakisimaruna qimamiqau.

<sup>24</sup> Anee amiqimasee maaqanda rumbaa qufanoo mifa karabusa qambaana oosiranaki quqaseenoo niku nisauku saqari mammaaqai quqasee rumbanau. (Miqanda quqasee sandaifanoo misasaa rakisiinafa mifa kuqannoo. Karabusa rakisirafa nari kuqiranara rufaseenoo amiqimasee ummarasee rumbanau.)

<sup>25</sup> Eendamugusai Pauroosa Sirasisa nifaaqa nidafimarufaqa aupuraidaqa sia mi aupurarannara iriqau kaqi innaaru qidaqa Anutunara amooqidaqa minasaa asasira idi reemarufaqa karabusauqaindi moomoosa irimariqau.

<sup>26</sup> Miqi marufanoo firaqoo tautumafufanoo maqa inaaqafa kasi kasinau. Mi maqafa kasinoo karabusa maqa faqa aiqama kasi kasimma quqasoofanoo karabusa kooqiuga narikai atuafufanoo karabusa rumbeeqoo sainandausa faqa nari kai idukuakidanoo nari kai maqasaa aqufinau.

<sup>27-28</sup> Karabusa rakisirafa kaaqa kai tiqinoo mariufa tautinoo findifinoo qafoofanoo karabusa kooqi atuanoo marufanoo qafeenoo Oo aiqama karabusa fasiqa doo sandamambi misa miqiana akiaqara firaasauqa qini darifoora saina qeeqa kai qeeqa darusee kuqanee qimaseenoo nari rakimaru paipana qumareenoo minannai nari raquru amianeerufanoo Pauroofa rumbara maqakiqari mina qafamaseenoo firaakari

faaqa rumasee qimaminau. Sia anee aneenna asumu kuridia, maasa aiqama kaqi maridaqa.

<sup>29</sup> Karabusa rakisirafa mina iriseenoo qoomara nameeraqufaqa qooma qumbi amufanoo qumareenoo sandeenoo rumbara maqaki Pauroosa Sirasisa kuqaa anoonaufa qimariagandee qimasee aaquqeenoo aindiriroofanoo miqanda nikukina ooqi mareenoo maqasaa aqufinau.

<sup>30</sup> Miqooqari findifinoo miqanda mi maqanakinaana nifiqeenoo madaanai oopureenoo irammirinoo qinau. Inneeqara qini naqimasaifaqee innaarunai asumu marianauree.

<sup>31</sup> Miqi qufaqa miqanda qiqau karaambaiqa Yisunasaa munduseenana doo minaki keeqaa. Miqinana innaarunai asumu marinnaranoo. Anee faqa ani maaqaki mariasa faqa miqinaqa miqiaqa.

<sup>32</sup> Miqi qimasee Karaambaiqa ufa oosana oosana mi fasiqana faqa mina maaqaki marusa faqa qimannimiqa.

<sup>33</sup> Karabusasaa rakisirafa miqanda ufa iri iseenoo mi eendamugusanaki Pauroona faqa Sirasina faqa maramareenoo saamu nariiqoona nammarinnaidika auqeeseenoo nari faqa nari aiku asauku faqa aiqamausa amaana nammari maraqa.

<sup>34</sup> Miqooqari karabusa rakisirafa Pauroona faqa Sirasina faqa nifiqee nari maaqaki murusee narana nimisoofaqa naqau. Karabusasaa rakisimarufa nari aiku asauku faqa doo maqee Anutunaki keeqafuafanoo maasaki asasirafa uriqaranoo maridanoo fee qiqau.

<sup>35</sup> Iqaqoofanoo kananaana Roomma maqannaa kiapafa poorisa niqiqoofaqa Innee oonuree qifanoo karabusasaa rakisirafa eenda rumbaqaiganda idukisainaqa fuafa.

<sup>36</sup> Karabusasaa rakisirafa mina iriseenoo Pauroona qimaminoo qinau. Maasa kiapausa ani faqa Sirasina faqa idukuqee qiafaqa doo inneeqara amanammi doo fuafa. Kaqi ireeda kai amiqimasee fuafa.

<sup>37</sup> Miqi qufanoo Pauroofa mina iriseenoo maaqi qimasee Poorisa qimanniminau. Maaqanda Roomma maqannaasa ququsaki marunausa maridaqa. Misa nariqa sandufa rukiaasa. Sia andeeqasee maaqanda fuanaura. Iria, kaqi fifau sia ufa iriranaki aiqamausa nifusaa maaqanda dariisee karabusaki maaqanda quqaannanara. Doo magee fee misa maaqanda ireeda kukeeqaki gumee fuqee qida fee, sia fuanaura. Misa nariqa kai akooqoo aniree maaqanda idukusaifaqa fuanaura.

<sup>38</sup> Poorisa mi ufana maree munu kiapausa qimannimufaqa iriseeqa Roomma maqannaa ququsaki maruqandara iriseeqa Roomma maqannaa firaa kiapafa minara iriseenoo maasa daruandoo qimasee kaaqa rufiaqa.

<sup>39</sup> Rufiaseeqa misa karabusa maqaki oonureeqa Pauroosa Sirasisa qimudao qimasee reendenamasee nifieeqeenoo madaanai quqasee qimannimiqa. Doo inneeqara raudamakiqa Firipi maqusaindari moosaa fuafa.

<sup>40</sup> Miqi qimasoofaqa Pauroosa Sirasisa eedoo qimasee raudamaki Ridia nammarina maaqaki keeqaqa. Miqoo misa Yisuna ufa irimarusaa paqurimasee pooduqara ufa oosana oosana qimannimiseeqa doo quqasee moosaa fiqau.

## 17

### *Pauroosa Sirasisa Teesaronika maqusai fiqau.*

<sup>1</sup> Pauroosa Sirasisa Firipi maqusaindari findifi fidaqa Amafiqoorisa maqusa faqa Apooroonika maqusa faqa fi aikateeqa Teesaronika maqusai oonuraqa. Mi maqusanaki Yuda maqannaa amaana maqa marinau.

<sup>2</sup> Pauroofa naroosana mareenoo minaki keeqafinoo misa faqa ufa qinau. Tamummaqara fasiqauqa akarakinaana asaana rumaseenoo minakinaa ufa qimannimufaqa nari qimami nari qimami qimariqa. Qaaramoo Saririqasaa miqimarinau.

<sup>3</sup> Pauroofa tamummaqara ufakinaana qumareenoo asauku mundirafa aupuramasee kuqunara faqa Anutufa mina kafaa mara findifunara faqa qimannimimarinau. Miqidanoo Pauroofa qimanniminoo qinau Maa fasiqafa Yisufa qinee qimannimunafa mifa kai ooqai Anutuna asauku mundirafa maridanoo.

<sup>4</sup> Yuda maqannaa iriseeqa akaqausa Pauroofunnai fiqau. Kirisa maqannaasa Anutunara rimarusaa moomoosa iriseeqa misa faqa misasaa atooqaqa. Uriqarara aanaaseeuqa moomoosa faqa iriseeqa kuqaa fee qimasee misa faqa atooqaqa.

<sup>5-7</sup> Yuda maqannaa akaqausa nikooqee marusa rairai qimasee aanaamuru moomoo nifiqidanoommifoo qimasee manda fasiqauqa kudi fasiqauqa naaramasoofaqa moodaanaki suqufiqa taunna qambaanaai oonuree aniree masee aanoo fraana uqeeraqa. Misa suqufufaqa Yasoonaa maaqa oonu upukamaseeqa Pauroosa Sirasisara maridammiafo qimasee rapeemasee nindafo qau faqa sia marufaqa Yasoonaa faqa

Yisuna ufa irimarusa akaqausa kai mi maqanakinaana paqurimasee maqamau rarisee kiapausunnai munuseeqa maaqi qiqau. Nindafa maa fasiqausa aiqama maqusa maqusa mandufa uqeeraqa niniaasa ifaqa maa maqusanaki faqa aniraafanoo Yasoonafa mareeqeenoo nari maaqaki quqasaifaqa faiqeeqa. Misa maasa Roomma maqannaa karaambaiqa sandufa aiqama rukiaidaqa misa maasa Roomma maqannaa karaambaiqa minauqa Sisaana arusee nari karaambaiqa moo mina auqu Yisufa mina auqu uqeeraidaqa miqidaqa.

<sup>8</sup> Miqi qimasooafaqai faiqi anaasee aiqamausa kiapausa faqa mi fuka karaambaiqafa kambiqafinanoo maasa Roomma maqannaa qeeqa karaambaiqa namuafaq daruandoo qimasee firaqoo tautiqau.

<sup>9</sup> Kiapausa Yasoonaa saimbaqa Yisuna ufa irimarusa faqa aiqama munnimmara qufafaq nimisooafaq idukiqau.

*Pauroosa Sirasisa Beereea maqusai fiqau.*

<sup>10</sup> Yisuna ufa irimarusa marufanoo eendufaqa Pauroosa Sirasisa nifiqa quqasoofafaq asukunai Beereea maqusai fiqau. Mi maqusanai oonureeqa Yuda maqannaasa amaana maqaki keeqaqau.

<sup>11</sup> Beereea maqusanasa sia Teesaroonika maqannaa naanna ree marusa misa irirana irimarusa mariqau. Misa faasaambaasaana afeekaikamandee karaambaiqa fasaasa ufa iriqau. Misa tamummaqara fasiqauqa ufa akarakinaana randasee qafee mariqau Pauroona ufara kuqaa anoonee sia fee anoonee qimasee akarakinaa ufauqara randaqau.

<sup>12</sup> Miqidaqa Yuda maqannaasa faqa Kirisa maqannaasa faiqi firaasa moomoo faqa Kirisa maqannaa aanaaseeqa moomoo faqa misa aiqama Yisunara kuqaa anoonee qimasee irimariqau.

<sup>13-14</sup> Teesaroonikai maru Yuda maqannaasa minara iriseeqa Beereea maqusai oonuree faiqi anaasee aiqama nirana fundakusoofafaq Yisuna ufa irimarusa faiqi firaasa nifasau-saikiraua Pauroona umee aqifoofanoo ooruku nammari afainni finau. Sirasifa faqa Timootifa faqa kaqi miqoo mariqau.

<sup>15</sup> Pauroona afiqee fusa Ateensa maqusai munu aiseeqa oonurandee anireeqa Sirasisa Timootisa qimannimiqqa qiqau. Pauroofa inniqara naaraidanoo doo Ateensa maqusai fuafaq.

*Pauroofa Ateensa maqusai finau.*

<sup>16</sup> Pauroofa Ateensa maqusai Timootisa Siraasisa nifeesidanoo nindafoofafaq Ateensa maqusanasa maqannai faqa ooninnai faqa saqarinnoo faqa oosana oosana ainaina nimana auqusee maasa Anutu fee qimasee innaaru qimariqau. Pauroofa mina qafama-soofanoo akooqanau.

<sup>17</sup> Firaqoo akooqoofanoo akooqeenoo apatufanoo Yuda maqannaa amaana maqaki keeqafufanoo Yuda maqannaasa faqa aanaamuru minaki anikeeqeemarusa faqa Yisunara ufa qimarinau. Maqusa qambaana faqa faiqi anaasee faqa aiqamai ufa qinoo ninau.

<sup>18</sup> Ateensa maqusai irirana fiqararusa maqee maqee suqida marunaki suqimariqau. Oosana oosana sukuraki keeqeusa Ateensa maqusai maqee maqee suqimariqau. Eepikurianna sukura tisaaqqa moo iriranamau fimariasa faqa Sitookika sukura tisaaqqa misa moo iriranamau fimariasa faqa Pauroona ufa atikai iriseeqa noori uqeeraseeqa Pauroonara maaqi qimasee uteeti qidaqa qiqau. Maa iriranna siai fasiqafa nari afaaqqa fifau amooqida nana ufee qidanoo fee. Akaqausa maaqi qiqau. Mifa aanaamuru Anutusara qidanoo. Pauroofa Yisufa kuqiranakiqari findifunara qimannimufaqa misa tautumasee dapi ufa qidaqa uteeti qimariqau.

<sup>19</sup> Misa miqi qimasee Pauroona afiqamaree firaa akara maaqa mina auqu Areeoopakusa mi maqanaki fiqau. Firaa irirana faqaasa kai minaki suqimarunaki afiqee fiqau. Minaki suquseeqa Pauroonara irammiriqa qiqau. Anee fuka ufa qimannimianafa maasa mina irirara suqidaqa.

<sup>20</sup> Mi ufana qiannanaki maasa akaqainainara randaidaqa. [ <sup>21</sup> Ateensa maqusanasa faqa aanaamuru animarusa faqa oosana oosana fuka irirana iranee qidaqa minara kai irimaree fimariqau. Misa minara Pauroona irammiri mariqau.]

<sup>22</sup> Pauroofa mina iriseenoo misa noorinni findifinoo qimanniminoo qinau. Oo innee Ateensa maqusanasa qinee mai anidaqa inni oosanara qafaidaqa iridaqa kaaqa innee Anutuna oosana oosana ainainannai nimana auquseeqa maasa Anutusee qimasaidaqa innaaru qiganuasa.

<sup>23</sup> Qinee inni maqusai oonuree aniree niniqa inneeqa aandau arusee tatufimari qaindausa qafeeqa. Innee moomoo Anutusara oosana oosana innaaru qimariasa mariafaqa qinee qafeeqa. Aiqaqa qaindauqasaa mi anutusa nuqu akara rinoo mariafaqa

qafeeqa. Mooqaindasaa akara kai rinoo marifaqa qafeeqa. Sia maasa irunna Anutunee qimasee akara kai rumaqaafaqa qafeeqa. Mee innee sia irimaria Anutuna minara innaaru qimarianara mina auqu oosana koorooianauro.

<sup>24</sup> Anutufa innaaruna faqa maqa faqa aundurakinaa ainaina marina minauqa auqu Anutufa maridanoo. Mifa innaaruna faqa maqa faqa auqufa mi ainainna karaambaiga maridanoo. Sia faiqi nisaukunna auqueeqee amaana maqaki quqaqaafau maridanooafau.

<sup>25</sup> Mifa nari kai naanna faqa marirana faqa faiqi faiqi nimimarifa maridanoo. Mifa nana ainainaree sarauimarifa marinaqee maasa qeeqa iriranannai kadaapirumeeqee amianauree, sia amana. Aiqama ainaina nari kai auquqoofa kai maridanoo.

<sup>26</sup> Mifa kai moodaa fasiqa auquqoonasaaqari kai aiqama maqanna kambiaqa maridaqa. Mifa narikai oosana aroonakiqari aiqama aanaamuru quqannisaqoosa kai maridaqa. Mifa qufaqa misa marirana oosumma nimaqoonakiaqa kai marimaree fimariafanoo.

<sup>27</sup> Sia fifau, ooqai Anutufa miqinau. Asukunaki maridaqa Anutunara mikimmakidaqa randaidaqa paqurinafa paquriaqee qimaqoona miqimaqoona miqi mariafanoo. Sia Anutufa faiqi nianai marifa maridanoo. Faiqi naaqa maridanoo.

<sup>28</sup> Mina mariranaki kasiranaki maasa maridaqa. Inni ufasaa rakisirausa misa faqa minara maaqi qimariafanoo maasa faqa mina faiqi namu kai maridaqee qidaqa.

<sup>29</sup> Misa miqi qimaqoona qinee minara minakina ookaamasee qinee maaqi qidaqa. Maasa Anutuna faiqi namu maridaqa naqimasee maasa quandakina qeeqa qikoona amana koorannai siruaannai ooninnai mina ammeemee rianauree. Sia andeeqanoo maridanoo.

<sup>30</sup> Ooqai faiqi misa Anutunara randaidaqa asukunakinai mikimaki anidaqa mariqau. Anutufa mi kamuqoora doo aunuseenoo sia misa furufarirana akiaqara narinau maqee maa kamuqoo aiqama aanaamuru nari mandainainakiqari quandakiaqa Anutufinai ubeekaagee qidanoo.

<sup>31</sup> Mifa aiqama maqannaasa moodaa faasaana ufa irisee nari andeeqaranannai andeeqannisaannoo. Doo mifa utaaqamaqaifanoo mi faasaannafa maridanoo. Ufa irimari fasiqafa faqa utaaqamaqaifa maridanoo. Mi ufana irimari fasiqana Anutufa kuqiranakinaana mara findifunannai kooroo inoo maridanoo.

<sup>32</sup> Irirana faqaasa suqimarusa kuqiranakiqari findifunara qimannimufaqa akaqausa naanaidara qimariqau. Akaqausa kafa mo kari irianee qiqau.

<sup>33</sup> Miqi qimasooфанoo Pauroofa raudamakinoo finau.

<sup>34</sup> Fufanoo faiqi akaqausa minasaa atooqafi mina ufa irimariqau. Moo fasiqa auqu Dioonisiusafa ufa suqira maqa Areeoopakusa suqira maqaki keeqee marufa marinau. Anaasee moo auqu Damariasa nammari mifa faqa faiqi anaasee akaqausa misa faqa Pauroona ufara kuqaa fee qimasee minasaa atooqaqau.

## 18

### *Pauroofa Ateensa maqusaindari Koorinti maqusai finau.*

<sup>1</sup> Pauroofa Sirasina faqa Timootina faqa nifeesu sianoo Ateensa maqusa quqaseenoo Koorinti maqusai finau.

<sup>2</sup> Koorinti maqusai qi qoo adeedi marufanoo oonureenoo faiqi moo paqurinau. Mina auqu Akuiraafa marinau. Akuiraafa Poontiusa maqa maaqai kambiqoofa Itari maqa maaqai oonu marinau. (Itari maqa maaqaki Roomma maqasaa firaa kiapafa miqoo marufanoo mina maqusa marinau.) Itari maqa maaqai mariufanoo firaa kiapafa minauqu Karaudiusafa Yuda maqanna aiqama asaquunnimaqasoofaqa quqasee daraaniqau. Akuiraafa Yuda maqanna marufanoo asaqusoofanoo nari anaqa Pirusira nammari sandiri Koorinti maqusai finau.

<sup>3</sup> Oonu marufanoo Pauroofa mina paqurimaseenoo mina faqa maridanoo dadaaqidanoo burimakau apatannai uqiqaana maaqa usakee marinau. Akuiraafa Pauroosa mi ainainnirana akoofasaqara marida usakeemariqau.

<sup>4</sup> Pauroofa aiqama kari Saririqasaa Yuda maqanna ufa suqira maaqaki keeqafidanoo naamuaqira ufa Yisunara qimannimarinu. Yuda maqanna faqa Kirisa maqanna faqa qimannimarinu.

<sup>5</sup> Sirasisa Timootisa Maseedoonia maqusaindari aniroofanoo Pauroofa sia Saririqa kai aiqama faasaambaasaana Anutuna asaku mundirana Yisunara Yuda maqannaasa naamuaqima nimaqee marinau.

<sup>6</sup> Miqimarufanoo nikooqoofaqa Yuda maqannaa Pauroona mandufa sukufa qima-maqaqau. Miqi qufanoo Pauroofa rutaqi findifinoo doo nari asaukunna nari afaaqain-daraa kookoomma aisoora fatikeeqee Yuda maqannaa ninaamu aranau. Inneeamma dapikirana oosana araafanoo. Qinee amiqirannai inni mara quqaunaqa inneeqa kai mandaatata fimariafanoo doo innindi kai, sia qinindifau maridanoo. Doo maqee maagoqari doo qinee inni Yuda maqannaa minnisee aanaamuru qimannimianaura.

<sup>7</sup> Pauroofa miqi qimaseenoo misa minniseenoo aanaamuru fasiqa maaqaki oonu marinau. Mi fasiqana auqu Titiusa moo auqu Yusatusafa maridanoo mina maaqa Yuda maqannaa ufa suqira maaqa adeedi marufanoo Pauroofa minaki marinau. Titiusafa moo auqu Yusatusafa Anutunara innaaru qimaru fasiqafa aanaamuru maridanoo Yuda maqannaasa amaana ufa irifa maqee Yisuna ufa irimarufa marufanoo Pauroofa mina faqa oonu marinau.

<sup>8</sup> Yuda maqannaa ufa suqira maqasaa rakisirafa minauqu Kirisipusafa maridanoo Yisuna ufara kuqaa fee qimarufa nari faiqi anaasee faqa Koorinti maqannaasa moomoosa faqa kuqaa fee qimasee nammari maraqau.

<sup>9</sup> Pauroofa moo eendaki faiqagee ufanoo qainasaa maaqimasee afunnaranau. Qainaki Anutufa Pauroona qimaminoo qinuu. Pauroo sia anee maagoqaraasara rufaa. Anee kaqi ufa qida maria. Sia anee minnisaa.

<sup>10</sup> Qinee ani faqa kukeeqai maridaqa dadaaqidaqa. Maa Koorinti maqusanakina faiqi anaasee moomoo qinindi maridaqa qinee ani namuqaaki mariasa rafaafa fuaanaqa sia misa aidafirana ani amifaranoo.

<sup>11</sup> Pauroofa mina iriseenoo afaafa quqasee miqoo marinau. Maridanoo Anutuna ufa qimannimimarinau. Miqidanoo aukuaana moodaa maraseenoo moo aukuaana qambaanasaa finoo taikanau.

<sup>12-13</sup> Pauroofa miqoo Koorinti maqusai kaqi marufanoo Kirisa maqasaa rakisimaru kiapafa taikafufanoo Roomma maqannaa kiapafa firaafaikirafa moo fuka kiapafa aqiqaofanoo ooqeenanaa amaaqaki animarinau. Mi kiapana auqu Karioofa marinau. Miqoo maria Yuda maqannaasa Pauroona namuqaa fuka kiapafa animariqoo fee qimasee Pauroona qumaree rariseeqa fuka kiapafinai munuseeqa maaqi qimasee unna qimasee qimamiqau. Kiapa, maa fasiqafa maasara Roomma maqannaa sandufa rukiaranaki maasa qifeeqaidanoo. Mifa maasara inneeqa naaruqaa oosana minniseeqa maqee qini fuka oosana qimannimunnana mi mau fidaqa Anutunara innaaru qiaqee qidanoo ufa rukiaranaki maasa qifeeqaidanoo.

<sup>14</sup> Miqi qufanoo Pauroofa ufa qianeerufanoo Karioofa Yuda maqannaasa maaqi qimasee qimanniminnau. Maa ufana sia sandufa rukiarafa maridanoo sia moo mandainaina maraidanoo. Miqinoo marinaqau inni ufa andeeqaseefau irini.

<sup>15</sup> Maa ufana fifau ufa kai oosana oosana ufa faqa nuqu faqa inni sandufa kai maridanoo. Qinee miqira fifau ainana sia qinee irianaura inneeqa kai.

<sup>16-17</sup> Miqi qimaseenoo kiapafa aanoomasee fukifaakiufaqa koota maqakiqari Yuda maqannaasa raudamakufaqa miqooqaraasa, Yuda maqannaa amaana maqasaa rakisirana mina auqu Soosateeneesana qumara maree mini kiapana kooqiki quqasee unnaanasamu firaqoo ufafiqaaqau. Karioofa mina qafoofanoo akooqoofanoo sia minara irinoo mana manamminnau.

*Pauroofa Koorinti maqusaindari Antiooka maqusai sipaki finau.*

<sup>18</sup> Miqooqari Pauroofa Koorinti maqusai faiqi firaasa nifasausaikiraua misa saimbaqa kaqikaqoo kisaqaasaa marinau. Koorinti maqusai kaqi maridanoo minniseenoo mina dinatinni Keenakareea maqusai oonu mi maqusanaki maridanoo Yuda maqanna naanna raanee qimaseenoo moo ainainara qima afeekaikamandeenoo akiqa maqanamu faqa indufu aquseenoo quqaseenoo sipaki akaramafufanoo Pirsira nammarina faqa Akuirana faqa miqanda qisafaaqi faqa Siria maqa maaqai finau.

<sup>19-21</sup> Sipa fannoo ooruku nammari taqamareenoo Siria maqa maaqai fidanoo Efeesusa maqusai naaree oonuranau. Oonureenoo Pauroofa Yuda maqannaa ufa suqira maqaki keeqafufanoo Yisunara naamuqimasooafaqa misa qiqau anee kisaqaasaa maridana maasa qimaqimia qufanoo Pauroofa maaqi qimasee nari qimanniminnau. Anutufa qiniara kafaa aniannee qinnanara kafaa oonurandee anianaura. Miqi qimaseenoo Pirsira nammarina faqa Akuirana faqa miqoo Efeesusa maqusai quqanniseenoo sipaki akaramafufanoo Isaraee maqa maaqai Seesareea maqusai finau.

<sup>22</sup> Sipa fannoo Pauroona afigee Seesareea maqusai munaisoofanoo afuqakufanoo maqamau Yeerusareenni ooru finau. Oorureenoo nari Yisuna ufa irimariasa nari akaqaafasakiraua nindafeenoo kaqikaqoo misa faqa marinoo oorurandee Antiooka maqusai indaaruu mariunnai kafaa finau.



<sup>23</sup> Antiooka maqusai kaqikaqoo marinoo kafaa findifinoo Karatia maqa maaqaki faqa Firikia maqa maaqaki faqa oonuree anireenoo Yisuna ufa irimarusa pooduqara ufa qimanniminoo nufaqa Yisuna ufara afeekaikiqau.

*Apooroosafa Efeesusa maqusai Yisuna ufa irimarusa dadaaqinau.*

<sup>24</sup> Yuda maqanna fasiqa moo auqu Apooroosafa Areekasandiria maqusai kambigoofa mi fasiqafa Efeesusa maqusai ani marinau. Mifa amiqimandee kaaqa ufa qimarufa. Mooseena sandufara faqa tamummaqara ufa akara faqa kaaqa mi ufausa amiqimandee irimarufa marinau.

<sup>25</sup> Yisuna ufa irimarusa mi fasiqana Yisuna ufa amiqimasee qimamisoofanoo irimarufa marinau. Mifa maqee maqee andeeqasee Yisunara faiqi anaasee qimannimidanoo kaaqa fuki faaki qimarufa marinau. Mifa ooqai Yoohaneefa nammari nimiru nammarina maroofa Yisuna nammariara sia irinau.

<sup>26</sup> Apooroosafa mifa Efeesusa maqusai anireenoo Yuda maqanna ufa suqira maqaki paasoosamandaida qimannimimarufanoo Akuirafa faqa Pisisira nammari faqa mina ufa iriseeqa nari maaqaki mara quqaseeqa andeeqasee Anutuna aanara mariranara Apooroosana aamua qimariqau.

<sup>27</sup> Apooroosafa Kirisa maqa maaqai firaree qimasoo faqa Efeesusa maqusannaasa Yisuna ufa irimarusa mina akaqaafasaakiraua dadaaqira ufa pasaki maaqi qimasee akarariqau. Innee Kirisa maqannaasa innee amiqimasee maa fasiqana oonu afiqeeqee quqaaqa. Miqimasee akara rummamufanoo mareefinau. Kirisa maqa maaqai maridanoo Apooroosafa Yisuna ufa irimarusa firaaqoo dadaaqinau moomoosa Anutufa kukeeqasee dadaaqufaqa Yisunara irisee minasaa mundimariqau. Miqirausa Apooroosafa dadaaqimarinau.

<sup>28</sup> Yuda maqannaasa faqa akooqoo maqusa qambaana Apooroosafa oori runuseenoo Yuda maqannaasa Yisunara afeekaikamasee qimannimufaqa moomoosa Yisunara doo kuqaa anoonnee qimariqau. Apooroosafa Mooseena sandufakinaana tamummaqara fasiqa akarakiinaana Anutuna asaku mundirafa kuqaa Yisufa marinara uqannifiqa-soofaqa moomoosa iriqa kuqaa Yisufa Anutuna asaku mundira fee qimariqau. Apooroosafa mi maqusanaki maridanoo Yisuna ufa irimarusa pooduqamannimaqanau.

## 19

*Pauroofa Efeesusa maqusai Yisunara amiqimasee qimanniminau.*

<sup>1</sup> Apooroosafa Koorinti maqusai marufanoo Pauroofa Asia maqa maaqai anireenoo maqusa maqusa maqamau oonuree aniree Yisuna aufakiana qimanniminoo ninau. Miqidanoo Efeesusa firaa taunnakina ooqu fina. Ooqureenoo Yisuna ufa irimarusa akaqausa paqurimasee irammirinoo qinau.

<sup>2</sup> Innee indaaru Yisunasaa mundiqau, mikari naaquqara andeeqara maraquna maraqeeiqau. Misa mi ufana iriseeqa qiqau. Maasa sia naaquqara maraqunara iridaqa. Maridanoo fee sia fee maridanoo fee, sia maasa minara iridaqa.

<sup>3</sup> Pauroofa minara iriseenoo kaifaa irammirinoo qinau. Innee indaaru nana nammari fee maraqau. Qufaqa misa qiqau. Maasa Yoohaneefa nammari nimiruna nammarina maraafanausa maridaqa.

<sup>4</sup> Pauroofa mina iriseenoo maaqi qimasee qimanniminau. Yoohaneena nammari fannoo nari mandainainasaaqari quandee marifa maridanoo. Yoohaneefa nammari nimirufa kaqi maru aukuaana Isaraee maqannaasa maaqi qimasee qimanniminoo qinau. Qini qinaaqianna kambiqainna fasiqafa minasaa kuqaa mundufuqa. Yoohaneefa miqi qinoo Yisunara qinau.

<sup>5</sup> Mi Efeesusa maqannaasa Pauroona mi ufana iriseeqa doo Karaambaiqa Yisuna nammari maraqau.

<sup>6</sup> Nammari marasoofanoo Pauroofa misasaa asaku mundusoofanoo naaquqara maraquna fannoo misa naakufufaqa aanaamuru ufa sia irimaru ufana qimariqau. Misa Anutuna ufara faqa qimariqau.

<sup>7-8</sup> Miqi qimarusa qisaku taikasee qikunni ooqu qaara marasee Efeesusa maqanna ufa oosana qimarusa mariqau. Naaquqara maraquna fannoo misaki aqufufanoo Pauroofa maridanoo qaaramoo quqoonasaa Yuda maqannaasa Efeesusa maqusai ani misa faqa mariasa nari naaduma ufa suqira maqaki keeqafi paasoosamasee Anutuna ququsara naamuaqima nimaqee marinau.

<sup>9</sup> Akaqausa Pauroona ufa iriseeqa karaambaiqa Yisuna ufamau firanara nikooqoofaqa sukufa manda ufa kai aqamatia qiqau. Pauroofa miqi quna iriseenoo Yisuna ufa irimarusa nari akaqaafasaakiraua nifiqamareenoo misa Yuda maqannaasa rakeemma quqaseenoo raudamaku fannoo mi taunnanaki kai moo ufa suqira maqaki keeqanau,

mi ufa suqira maqana akoofa minauqu Tiranusafa marinau. Aiqama faasaambaasaana Pauroofa mi ufa suqira maqanaki faiqi anaasee nifiqumareenoo minaki murusaidanoo Yisuna aufakiana nari qimami nari qimami qimariqau.

<sup>10</sup> Pauroofa miqimammaree fimarufanoo qaara aukuaana aiqaroonara Asia maqa maaqaki marusa Yuda maqanna faqa Asia maqanna faqa misaqa marusa faqa aiqama Karaambaiga ufa iriqau.

*Faiqi naunduraki maru faafasaaqana aqiqaosakai nari isoofaqa quqasee sandaqa.*

<sup>11</sup> Anutufa Pauroonakinaana faiqi sia amana auqaaqaa ira ainaina faiqi nifaafaq andeeqee mariana naaquqara ainaina misa nifusaa auqusoofaqa qafeeqa Yisunara kugaa anoona fee qiqau.

<sup>12</sup> Faiqi anaasee aurimarusa nikaqaafasaa Pauroona ankisa fee qamunna fee ani mara maree aurimarusa nimufanoo aurirafa taikkee marinau, faafasaaqa naakirafa rafudamaki sandeemarinau.

<sup>13</sup> Yuda maqannaasa akaqaasa misa faqa faafasaaqa naakimarusa niqiqeemarusu mariqau. Miqi qimasee aanoomasee Pauroona faqa Sirasina faqa qumareeqa rarisammaree kiapana oopisaki quqaqau. Mi oopisafa sia kaqinni marinau, makeeta qambaana marufaqa misa Pauroosa Sirasisa rarisamasee mi oopisanaki quqasee aiqama kiapasa naaramasee unna qimasee qiqau. Moodaa fasiqa faiqinamu qisauku dinni taikasee dinni ani qaraqanda marasee faafasaaqa niqiqee marusa mariqau.

<sup>14-15</sup> Misa nikooona auqu Sikeefaafa marinau Yuda maqannaasa Anutuna aanaiqiki-rausa uriqararafa marinau. Mi fasiqana faiqi namu Pauroona oosana qafeeqa maasa faqa mina oosana amanamasee qafaanauree qimaseeqa, faiqi moo faafasaaqa aakimaruna oonuree auqamaseeqa qiqau. Anee Yisuna auqu Pauroofa qimannimarinu irisee anee raudamaki see fifu qufanoo faafasaaqa fannoo maaqi qimasee nari mi fasiqana aunduraindari misa qimanniminu. Ee, maa, qinee Yisunara iridaqa Pauroonara faqa iridaqa innee yau yausee maridee qinee sia inniara iridaqa.

<sup>16</sup> Miqi qimaseenoo faiqi nari agoondiki maru fasiqana dadaaqufanoo findifinoo firaqoo uqanna misa nari nari iseenoo misa qamunna anaqi maroofaqa kaqisamu maaqakiqari rafudamaki quqasee sandaqa.

<sup>17</sup> Efeesusa maqusa marusa faqa Yuda maqanna animarusu faqa mi ufana irisooфанoo kaaqa naaquqoofaqa Karaambaiga Yisuna auqu firaqoo uqeeraqau.

<sup>18</sup> Yisuna ufa irimarusa miquna iriseeqa Pauroofunai suqumaree anireeqa nariqa mandainaina oosana oosana kooroo iqau.

<sup>19</sup> Yisuna ufa irimarusakiqari aukainaina mandainaina afunee ainaina maraqa nusauqa nariqa manda ufa akaraki quqaqoona moodaanaki suquseeqa aiqamausa nifusaa firaqoo idaraqau. Idaqoo papiqana feefaurimaruna moodaanaki asaana rumasooфанoo maaqimminu. Fira munnimma tia (K50,000) aqimaruna ida raqau.

<sup>20</sup> Doo miqimasooфанoo Karaambaiga ufa aiqama atinai daraanimambufanoo doo afeekaikamafinoo atukaramafinuu.

*Deemeetirusafa Efeesusa maqusai firaqoo tutuqirana uqeeranau.*

<sup>21</sup> Mi ainaina taikasooфанoo mina maariqoo Pauroofa qinuu. Qinee maaqooqari Maseedoonia maqa maaqai faqa Kirisa maqa maaqai faqa oonuree anireemaseeqa Yeerusareenni kafa ooru funaura. Miqoo ooru maridaqa Roomma maqusa oonu qafaanaura.

<sup>22</sup> Miqi qimaseenoo Pauroofa Timootina faqa Eerasatusana faqa niqiqoofaqa Maseedoonia maqa maaqai indaaru fiqau. Pauroofa Asia maqa maaqai kaqi mariufanoo ninaaqiana finuu.

<sup>23</sup> Efeesusa maqusai kaqi marufanoo moo mandainaina Karaambaiga ufamau fimarusaki kambiqanuu. Mi aukuaana misa Yisuna ufara Karaambaiga aana fee qimariqau.

<sup>24</sup> Asia maqannaasa nari moo unna anutunara anaasee anutufa marinuu maqi qimariqau. Mi anaaseena auqu Arateemisa nammarifa marinuu. Mi anaasee anutuna amana Efeesusa maqusa fira amaana maqaki marinuu. Ooninnai auqira amaana maqa firaatia amiqirafa uqanna marinuu. Efeesusa maqusai faiqi moo auqu Deemeetirusafa maridanoo mi amaana maqana qafaidanoo mina amana kai siruaauqa maraseenoo idaki tasirisirimaseenoo moomoo kaqikaanauqa auqiiseenoo faiqi anaasee nimufaqa feefaurummasaidaqa maraidaqa nari maaqaki munu quqasaidaqa innaaru qimariqau. Deemeetirusafa siruaa auqimarusa uriqararafa marufaqa misa aiqama mi saikanannai munnimma maree mariqau.

<sup>25</sup> Deemeetirusafa siruaa auqimarusa naarama moodaanaki quqaseenoo qimannimino qinuu.

Oo maa fasiqausa maasa saikasaqari munnimma kambiqaidanoo.

<sup>26</sup> Innee mi fasiqana Pauroonara iridaqa mina oosana irimariafanoo. Maasa qisaukun-nai auqimarunnanara sia Anutufa uqannee qidanoo. Mifa Efeesusu maa maqusanaki faqa Asia maqa maaqaki aiqamai faqa Yisunara qimannimifaqa misa kuqaa fee qimasee maasa Arateemisa nammarina minnisaidaqa.

<sup>27</sup> Miqidaqa maasa saika munnimma maree marunnana qusasaa mandaikian-noo. Maasa uriqarara anaasee anutuna Arateemisa nammarina amaana maqa faqa mandaikiannoo. Maasa anutufa Arateemisa nammarifa mifa faqa ureeqaannoo. Asia maqannaasa faqa aiqama maqannaasa faqa Arateemisa nammarinara innaaru qimari-ana doo taikeefaranoo.

<sup>28</sup> Faiqi anaasee mi ufana irisoofanoo niranaqoofaqa firaqqoo faaqa fuisee qimaseeqa qiqau. Efeesusu maqanna Arateemisa nammarifa firaatia uriqararafa maridanoofee qiqau.

<sup>29</sup> Mi ufafa aiqama atinnai daraanufaqa faiqi anaasee suqu fiqa dadaaqiaqee qi-masee Maseedooniandaraa qanda Pauroona aqoondiqaara Kaiusana faqa Aristarakusana faqa Pauroona faqa Efeesusu maqusai animaruqanda qumareeqara rarisammaree sandeeqa firaa ufa suqira maqaki keeqafi minaki mi fasiqaqanda quqaaqau.

<sup>30-31</sup> Pauroofa misa nindafamaseenoo minaki keeqaaneerufaqa Yisuna ufa irimarusu mina rafaafusaqau. Asia maqa maaqaki marusa uriqararusa Pauroona aqoondiqa ufa moonasaa quqasoofanoo mini qimaminoo qinau anee sia minaki keeqaa, kuqi-nafaara.

<sup>32</sup> Faiqi anaasee moomoo uqanna firaa ufa suqimaru maqanaki keeqafufaqa firaqqoo faaqa fuisee qimariqau. Akaqausa moo faaqariqau akaqausa moo ainaina faaqariqau. Muduka tia nanaree maasa fifau faaqarida fee qimasee siamma iriqau, kaqi fifau faaqarimariqau.

<sup>33-34</sup> Yuda maqannaasa Areekasandeeranara anee findifi qimannimianee qufaqa faiqi anaasee mina qafamaseeqa oo mifee manda fasiqa marifaqee minaree faaqa fuisee qi qi ifee. Areekasandeerafa findifinoo asaukunoo ufa rafaafafinoo qaoo qimasoo faqa misa aiqama mina qafamasee Yuda maqanna moo anutunafaqaa fee qimasee faaqa rida qiqau. Efeesusu maqanna Arateemisa nammarifa uriqarara Anutufa maridanoo. Misa mi ufana kai firaqqoo faaqa fuisee qidaqa mari mariufaqa kisaqqasaa uqanna faaqa quqaida mariqau.

<sup>35</sup> Efeesusu maqusa uriqararafa moo fannoo rafaafafinoo miqinoo fubaqa rafaafa-fuseenoo qimanniminu.

Efeesusu maqanna fasiqauqa qini ufa iriaqa. Efeesusu maqusa Arateemisa nam-marifa rakisimari maqasafa maridanoo. Sia moo fannoo minara qaoo qinoo maridanoo. Mina naquqara ooni innaarunaindari aqufuna maasa mina faqa mina amaana maqa faqa rakisidaqa.

<sup>36</sup> Sia moo fannoo amana mi ainainnara qaoo qiannoo. Minara innee doo asooaqa sia furufaramasee moo ainaina auqaaqa.

<sup>37</sup> Maa fasiqa qanda innee maramaree aniana sia moo amaana maqakinaana qum-muari mariaqanda sia maasa anaasee anutunara moo ufa qia. Nanaree fifau nifiqee ani fee.

<sup>38</sup> Deemeetirusafa faqa nari moodaa saika faqaasa faqa moo fasiqa ufa amiraree qinanoo maasa ufa irira suqirafa maridanoo ufa andeeqee maria fasiqausa miqoo maridaqa misa miqookai nari ufa andeeqaaqa.

<sup>39</sup> Ufa andeeqee mariasa sia amanaikifanoo faiqi anaasee ufa suqirafa nari qaanaa kai ufa suqaaqa.

<sup>40</sup> Roomma maqannaasa maa fifau tutuqirana iriseeqa maasa diqifaara, misa maasara irifaqa nana ufa fee qimannimianuree sia ufa oosana maridanoo.

<sup>41</sup> Miqi qimaseenoo aiqamausa niqiqoofaqa fifainiqau.

## 20

*Pauroofa Maseedoonia maqa maaqai faqa Akaia maqa maaqai faqa finau.*

<sup>1</sup> Efeesusu maqusaki firaa tutuqirafa taikoofanoo Pauroofa Yisuna ufa irimarusu suqu quqaseenoo pooduqara ufa qimannimiseenoo nimandamaseenoo doo quqasee Maseedoonia maqa maaqai finau.

<sup>2</sup> Maseedoonia maqa maaqaki oonuree aniree idanoo Yisuna ufa irimarusu pooduqara ufa maqee maqee qimannimimarinu. Miqoo qaraasa pooduqama nimaqaseenoo quqasee Kirisa maqa maaqai ooqueenoo miqooqari moo quqoona maranau.

<sup>3</sup> Pauroofa Kirisa maqa maaqaindari sipaki akaramafufanoo Asia maqa maaqai firaree qufaqa Yuda maqannaasa irisee mina arirarufanoo moo fannoo iriseenoo Pauroona qimamufanoo rufiaseenoo kafaa Maseedoonia maqa maaqakinai fiqummakufanoo Tarooasa maqusai firaree qinau.

<sup>4</sup> Soopateerafa Piriqisana amaaku Beereea maqusaindaraafa Pauroona faqa finau. Aristarakusafa faqa Seekundurafa faqa Maseedoonia maqannaaganda Pauroona faqa fiqau. Deerabee maqusaindaraafa Kaiusafa faqa finau. Tikikusafa faqa Taroofimusafa faqa Asia maqannaaganda Timootifa faqa minamusa Pauroona faqa fiqau.

<sup>5</sup> Minamusa indaaruu sipaki akaramafufafa Tarooasa maqusai oonu marida maasara qifeesimariqau.

<sup>6</sup> Maasa Firipi maqusai ooruku siai feemu qoomaqamasee namammaree Tarooasa maqusai Pauroona faqa fiqiafana. Maasa moodaannai qisauku afuru sipaki faiqee fifiufafa Tarooasa maqusai oonuree maasara qifeesimarusa oonu paquriqiafana. Miqoo Tarooasa maqusai maasa aiqamausa qisauku dinni taikasee dinni oonu qaara marasee faasaana mariqiafana.

*Pauroofa Tarooasa maqusai eendaki Yisuna ufa qimannimarufanoo kumaaraa aqufinau.*

<sup>7-8</sup> Saririqa eendaki maasa faqa Yisuna ufa irimarusa aiqamausa faqa moo maaqaki suqufiqa Yisunara afaarurira narana naqau. Pauroofa kananaana fuane qe eendanaki kisaagasaa qimannimarinau. Mi maqanaki tida moo maqasaa marinoo kafaa tida moo sandaaqai auquqoofa maridanoo eefeeda mirinni akinoo maridanoo. Mi maqanaki suqimarunaki eendaki qooma moomoo qeemarinau.

<sup>9</sup> Faiqi anaasee sandaaqai tidasaa suqimarufanoo Pauroofa mi eenda amuqusanaki ufa kisaagasaa qimarufanoo kumaaraa moo fannoo uinduaqa parangasaa akaramafinoo ooqufaaqeida ufa irimarinau. Mi kumaaraana auqu Eeutikusafa marinarau. Pauroofa kisaagasaa ufa qimarufanoo Eeutikusafa afu aunduarufanoo kaaqa faifinoo sia ufa iridanoo uinduaqasaaqari aunduaramakufanoo saamurinoo maqasaa pautaqinoo aqufinau. Aqufufafa misa ooqu mina uqeerasee qafoofanoo doo kaaqa kuqinoo marinarau.

<sup>10</sup> Pauroofa ooqurama mi kumaaraana amuaaqa aakufufanoo oonumafi kaqaramma qumareenoo qinau sia qisee qufoo qiaqa kaqi maridanoo.

<sup>11-12</sup> Miqi qimasooqafa misa qumurandee ooruree Yisunara afaaruruma naqau. Afaaruruma namasoofofanoo Pauroofa kafaa qimanniminoo fifiufanoo iqaqoofanoo quqasee Asoosaa maqusai maqamau finau. Fufaqa misa mi kumaaraana doo kasi maru-faqa afigamaree maaqaki munu quqasoofofanoo misa nifaqa asasinoo amiqi amiqinau.

*Pauroofa Efeesusa maqusanaasa naarooqafa aniroofanoo naamuaqinau.*

<sup>13</sup> Maasa Pauroona faqa nimarusa Pauroona mi maqusanai aiseeqa faasai sipaki akaramafifaqa Tarooasa maqusaindari Asoosaa maqusai nammari amuaqumau fiquakifaqa miqoo oonureeqa Pauroona afigarara fiqummakufafa fiqiafana. Pauroofa nariara faiqi anaasee qimannimisee kananaana maqamau Asoosaa maqusa oonuree inni faqa sipaki fuanauranoo maasara qimasooqafa maasa miqiqau.

<sup>14</sup> Maasa sipa fannoo Asoosaa maqusai oonuroofafa Pauroona fi afiqeeqa Mitireena maqusai fiqiafana.

<sup>15</sup> Miqooqari findimeeqee sipaki fifiufafa kananaana Kioosa maqusai oonu raqiafana. Oonu miqoo mariqa quqaseeqa kafaa eendaki sipaki fifiufafa kananaana Samoosa maqusai oonu raqiafana. Doo miqooqari fiqaree eendaki sipaki fifiufafa kananaana Mireetusa maqusai oonu raqiafana.

<sup>16</sup> Pauroofa sia Asia maqa maaqai kisaagasaa kasooiraree qinau. Sia Efeesusa maqusai kasooqianee qimasee fiqaree Yeerusareenni kaqi kaqi firaree qimasee miqoo Peendeekoosa qoomaqa nararee qimasee kaqi fiqarararee qinau.

*Pauroofa Efeesusa maqannaasa naamua qufa.*

<sup>17</sup> Sipa fannoo Mireetusa maqusai oonuroofanoo Pauroofa moo fasiqasaa ufa quqaseenoo anee maqamau oonuree Efeesusa maqusanaasa Yisuna ufa irimariasa qini qikaqafasaa kirausa rakisirausa mai qumu Mireetusa maqusai qumu irisaiqafa fuanauree qufanoo finau.

<sup>18-19</sup> Efeesusa maqusanaasa mi ufana iriseeqa Mireetusa maqusai ooquroofanoo Pauroofa maaqi qimasee qimanniminoo qinau.

Ooqai indaaruu qinee Asia maqa maaqai oosana arasaafannaqooqari innee qini oosana qafeemarusa mariafanoo qinee reendeenamandee inniki Anutuna saika faiqi maridaqa inniki saikimariqiafana. Yuda maqannaasa misa qini qimaarusiranannai qikiraqarana faqa daukunu rarana faqa inniki saiki mariafannanara qini qimimariqau.

<sup>20</sup> Qinee inniqa maqakiya faqa maqusa qambaana faqa Yisunara qimannimi mari-fanana maridaqa. Qimannimidaqa sia moo dadaqira ufa qeeqa daundurui sia kaqi maridanoo aiqama qimannimiyaqafana.

<sup>21</sup> Qinee Yuda maqanna faqa aanaamuru faqa amanamana kai doori runusee qimannimimariyaqafana. Inneeqa mandainainara rufiasee quandakinaqa Anutufinnai noori ubeekamaseeqa Karaambaiqa Yisuna asauku mundirana saqarikiya. Miqi qimasee aauqimannimaqee mariyaqafana. Innee minara faqa irimariasa mariafanoo.

<sup>22</sup> Doo maqee qinee Yeerusareenni oorufidaqa nana ainanee qiniki kambiqannoo fee, sia qinee mina iridaqa.

<sup>23</sup> Qinee maqusa maqusa nimarunoo naaquqara maraquna fannoo miqooqaraasa qimannimisoofaqa misa quandaki qini qimaqimufaqa. Anee Yeerusareenni ooru rainaqa rumbarana faqa qini qifaqai ifitiqnarana faqa qimifaranoo fee qimarinau.

<sup>24</sup> Qinee minara iriseeqa qeeqa mariranara fifau ainanee qimaseeqa Karaambaiqa Yisufa qimu saikanara mina taikarara kai kuqaa anoonee qidaqa qeeqa mariranara siamma iridaqa. Anutuna afaarira amiqira fasaasa ufa faiqi anaasee kooroomannimirana mina kai Yisufa qimu saikafa maridanoo.

<sup>25</sup> Qinee innikiyaqa Anutuna ququsaki marira firaanara qimannimiyaqafana ninafaana marida. Maqee sia innee kafa qini doori qiqafeefaranoo.

<sup>26</sup> Doo qinee maqee maa suaninasaa doori runusee inni qimannimidaqa. Innikiqari moo fannoo Yisuna ufara dapikinafa narindikai mariannoo sia qinindi.

<sup>27</sup> Anutuna irirana aiqama uqanna qimannimiseeqa sia kaqikaana qeeqa qumareeqa aiqama nimiseeqa.

<sup>28</sup> Innee faiqi anaasee Yisuna ufa iri mariasasaa rakisimariasa mariafanoo. Innee asumu aandauree fooqana rakisimariasa mariafanoo Innee inneeqa marirana amiqimasee rakisiinaqa inneeqa asumu firira aandauree foora amiqimasee faiqi anaasee rakisiyaqa. Anutuna naaquqara andeeqara maraquna fannoo inni nisaukuki rakisirana quqaranara amiqimasee rakisiyaqa. Anutufa nari amaaku uqanna fidikannai maqee maa maqanasaa adiaseenoo minannai Yisuna ufa irimariasa feefaurummaseenoo doo narindikino, innee mi asumu aandauree firidaqa reendeenamandee rakisiyaqa.

<sup>29</sup> Qinee fuanaga kaasau fainiara foora kaaqa afaidee mariasa aniree asumu aandauree sia rauqi nimaqeeefaranoo kaqi naruneefaranoo.

<sup>30</sup> Inneeqa rakisirusakinaana akaqausa unnufa qimasee inneeqa nikaqaafasaa mareeqee kaqirunna ubeekafaara.

<sup>31</sup> Innee amiqimasee mi ainainnara rakisiyaqa. Qinee qaaramoo aukuaana faasaana eendaki daukunu reemaruqaqa inni aiqama amiqimasee naamua qimariyafana maridaqa.

<sup>32</sup> Doo qinee maqee Anutuna asaukuki mina afaarira ufaki mara inni quqeeqa. Mi ufana afeeka fannoo amana innisaa rakisinnimaqaidanoo afeekaikirana nimiseenoo inni mareeqeenoo Yisunaindikiyaqafana mariasaka misa saimbaqa ookaamaseenoo Yisufa misa nimira saqama gumiasana mirinni innaarunai inni faqa misa faqa nimiannoo.

<sup>33</sup> Qinee inniki maridaqaqafana sia qinee moona amiqira qamunnafee siruaa fee akaqainainafee sia qini qimuqusimarusa maridaqa.

<sup>34</sup> Qinee maa qeeqa qisaukunnai ainaina masaidaqa narana mareemaria munnimmana marasaidaqa qifa faqa nusa rakisinnimaqaidaqa maasa sia innindi maraqafana. Innee minara amiqimasee irimarifanoo.

<sup>35</sup> Qinee unandee kadaapiranannai mandaikimarusa amiqi amiqiyafana Yisufa minara maqi qinau. Amiqira asasirafa sia ainaina maree marianakifau maridanoo. Ainaina dadaqirana nimiranaki anoona asasirafa minaki maridanoo. Innee sia unuqaqafana moosa dadaqirara kai iaqa.

<sup>36</sup> Pauroofa mi ufana qimannimino maqasaa niqoori saunaraaqee qufaqa aiqamausa miqimafufanoo Anutunara innaaru qinau.

<sup>37</sup> Innaaru qimasooofaqa aiqamausa ikiraqeeqa Pauroona oonumafi kaqaramma qumareeqa amooqafau.

<sup>38</sup> Pauroofa sia qini kafa qiqafeefaree qunara firaqoo noori kandeeqa ikiraqafau. Misa miqidaqa Pauroona afiqeeqeeqa sipaki quqafau.

## 21

*Pauroofa Mireetusa maqusaindari quqasee Yeerusareenni finau.*

<sup>1</sup> Pauroofa maasa faqa sipaki akaramafufaqa maasa Efeesusa maqannaasara nimudaoqidaqa nimandamaseeqa doo mafi rakeemma quqasee sipaki fiqiyafana. Maasa andeeqasee fiufafaqafana Koosa maqusai oonu kasoommasee miqoo faiqeeqa. Iqaqoofanoo

kananaana kafaaf fiifiifaqa Roodeesa maqa maaqai oonuree kaqi fiqareeqa Patara maqasai fiqiafana.

<sup>2</sup> Patara maqusai maasa sipa moo paqurimasee Fooeenisia fimaru sipana paqurimasee minaki akaramafi fiqau.

<sup>3-4</sup> Patara maqusaindarii fiifiifaqa Sipurusa afuma qafamaseeqa mina aikundanai fiakateeqa andeeqasee Siria maqa maaqai fiqiafana. Siria maqa maaqai fidaqa misa maa ummaara ainainna Tiree maqusai quqaaqee quna fidaqa doo mi Tiree maqusana paqurimasee miqoo kasooiqau. Miqoo sipa maree fu ummarana minakinaana mareeqee maqasaa quqeemarufaqa maasa Tiree maqusai Yisuna ufa irimarusara randasee paqurimasee amaana moodaa misa faqa mariqia. Misa faqa marufaqa miqooqaraasa maraquina fannoo qimannimufaqa Pauroonara sia Yeerusareenni ooru fuannee qimariqau.

<sup>5-6</sup> Doo misa faqa mariqia findifi sipaki aniafanaqa faiqi anaasee faqa narii faiqi namufaqa moomoosa aniree ooruku nammari afainni oondaanisaa niqoori saunarafufaqa innaaru qimasooafaqa misa nimandamaseeqa sipaki akaramafufaqa misa narii maqusai ooru fiqau.

<sup>7</sup> Sipaki Tiree maqusaindarii maasa Tooreemaisa maqusai oonu raqiafana. Miqoo oonuree Yisuna ufa irimarusa miqoo marusa niqafamasee moodaa faasaana misa faqa mariqiafana.

<sup>8</sup> Miqooqari sipaki fiqa kananaana Seesareea maqusai oonu raqiafana. Oonureeqa Firipina maqa maru qaannai ooru mina faqa mariqiafana. Firipifa Yisuna fasaasa qimanniminoo nufa marinau. Ooqai Yeerusareenni marufaqa niqiqoo fasiqausaki maridanoo mina mareeqee quqasoofanoo qisauku dinni taikasee dinni ani qaara marasee marusaki maridanoo munnimmaina raina nimimarufaqa mariufa Firipifa marinau.

<sup>9</sup> Firipina aramuna qaara faqa qaara faqa maanaaqa mariqau. Anutuna maraquina fannoo mi manaqausa naakufufaqa Anutuna ufa faiqi anaasee qimannimirana akoofa-saikidaqa maridaqa qimannimariqau.

<sup>10</sup> Maasa Firipina faqa qaaramoo faasaana mariafananoo Yudeeaa tamummaqara fasiqa moo fannoo mina auqu Akabusafa Yudeeaa maqa maaqaindarii qumuranau.

<sup>11</sup> Mifa maasunnai anireenoo Pauroona pikapandauru ani qumareenoo minannai narii aiku asauku kukuqamma rumbaseenoo qinau. Anutuna naaqqara maraquina fannoo maaqi qimasee qidanoo. Maa pikapana akoofa Yeerusareenni ooru rainaqa maaqimmasee rumbeeqee aanaamuru nimifaranoo.

<sup>12</sup> Maasa mi ufana iriseeqa maasa aiqama miqoo mariafanaua afeekaikamaseeqa sia uganna Yeerusareenni oorufuani arifaranoo fee qiqiafana.

<sup>13</sup> Pauroofa mi ufana iriseenoo qinau. Innee nanaree miqimasee ikiraqaidde miqi qiafanoo qini qimuqusa mandaikamma qimaqaidde. Qinee Yeerusareenni ooru raanaqa Karaambaiqa Yisunara qini rumberana faqa qini darirana faqa doo qinee sia rufiidaqa minara deedaqamma uqiraua nidaqa.

<sup>14</sup> Pauroofa miqi qimasooafaqa maasa qaooqirana minniseeqa maasa faqa Anutuna iriramau kai fidaqa sia ititaanaua sai kai fuanifee qiqiafana.

<sup>15</sup> Maasa miqoo Seesareea maqusai kaqikaqoo mariqa maasa qeeqa ainaina deedaqamamaree Yeerusareenni maqamau ooru fiqiafana.

<sup>16</sup> Seesareea maqusaindarii maasa qikaqaafasaa kirausa akaqausa maasa faqa ooru fiqau. Misa maasa ooruree marianna maqana uqaqifiqarara maasa faqa ooru fiqau. Maasa Masoonaa maaqaki marifaree qiqau. Masoonafa ooqai indaaru Yisuna ufa irimarufa marufaqa Sipurusa maqusaindaraafa marinau.

*Pauroofa Yeerusaree maqusai maridanoo Yameesana faqa ufa qinau.*

<sup>17</sup> Maasa Yeerusareenni ooruraafannanoo Yisuna aiku asauku qumu amiqi amiqi-mandee qumu qifiqee ooru fiqau.

<sup>18-19</sup> Maasa miqoo ooru faiqaafananoo iqaqoofanoo Pauroofa Yameesana qafarara finau. Yisuna ufa irimarusa aiqama miqoo marufanoo Pauroofa nimandamaseenoo narii aanaamuru maaqa maaqa nimarufanoo Anutufa narii Pauroonannai aiqama ainaina auqeeunara qimanniminuu.

<sup>20</sup> Misa aiqamausa Pauroona ufa iriseeqa Anutunara aiqamausa dufi dufi qimasee asasiqau. Asamasee Pauroona qimamiqa qiqau. Oo maasa ati, maaqoo Yuda maqannaasa Yeerusareenni mariasa misa fasaasa ufa qimamianaua. Yuda maqannaasa moomoo tauseenna doo Yeerusareenniara ridaqa. Misa Mooseena sandufasaa kaqaq minara faqa Yisunara faqa ridaqa. (Yuda maqannaasa Mooseena sandufa iridaqa maasa fainanduqirane qidaqa.)

<sup>21-22</sup> Pauroo misa aniara maaqi qidaqa, anee aanaamuru maqusa maqusa nidana Yuda maqanna minakiaqa mariasauqa anee misara Mooseena sandufa minniseeqa maasa

fainanduqirana minnisaaqee qimariannanara Yuda maqannaa oosana minnisaaqee qidanoommifoo qidaqiafaqa maasa iridaqa. Aniara Yeerusareenni aniifoo qifaqa misa aniara iriseeqa aanoo qifaranoo.

<sup>23</sup> Minara iriseeqa maasa qimamiannaqoo kai fua. Maaqoo qaara faqa qaara faqa fasiqa maridaqa. Misa maasa Yuda maqannaa oosana marasee doo qima afeekaikamasee nikiaga maqa namufaqa indufu aqiranara nisauku uqeeraseeqa Anutuna afusaa qima afeekaikamandee maridaqa.

<sup>24</sup> Misa firaa amaana maqaki keeqafi nári aanaamuru mandainaina nipatasaa marina rukaseenana anee misa faqa keeqafi aneenaindi faqa rukasainanoo Anutuna afusaa anukanoo marinnaranoo. Findaukamasee anee aneenna munnimma faqa misa munnimma faqa aqua. Aqusaifana anee minamusa faqa nári nikiaga asaasi maqanamu faqa indufu aquaqa. Miqi masainaqa aiqamausa ani qafamaseeqa anee Mooseena sandufa rukiarana aniara qunara unna qiaafoo qiaqeera. Misa aniara kuqaa Mooseena sandufamau fimarifa maridano qiaqeera ani aruannee qinausa sia ani arifara.

<sup>25</sup> Yisuna ufa irimarusa uriqararusa Yameesana maaqaki Pauroonara qimaseeqa maaqi qiqau. Maasa aanaamuruqa mariasa Yisuna aiku asauku kamambuusa pasa akara rumasee maaqi qimasee qimannimiqia. Innee narana moo unna anutunaree afaannaree misara dufi qimariana mina minnisaaga. Aandau fidika faqa sia naaqa. Ufaanaki arira aandau fidikana qusinoo marina mina faqa minnisaaga faiqi anaasee nári ummuari nári ummuarimariana faqa minnisaaga.

<sup>26</sup> Pauroofa misa ufa iriseenoo qaara faqa qaara faqa fasiqa namu nifiqamareenoo iqaqoofanoo kananaana amaana maqaki keeqafinoo misa saimbaqa Mooseena sandufa andeeqasee finoo aanaamuru mandainaina nári apatasaa maruna rukanau. Miqi-maseenoo Pauroofa amaana maqaki keeqafinoo Anutuna aanaiqikirusa qimannimianu. Qisauku moodaannai taikasee dinni ani qaaraqanda marasee faasaana maasa qifaqasaa mandainaina anukee mariana. Mina maariqoo mina taikasaanaqa mina maariqoo miqoo innee aanaiqikirusa aandau aruseeqa Anutunara tatufirana suqaiifanoo maasa rukasaunnana taikaani.

*Pauroofa amaana maqaki Yeerusareenni marufaqa qumaree arirariqau.*

<sup>27</sup> Pauroofa mi fasiqa namusa faqa amaana maqaki dinni qisauku taikasee dinni ani qaara marasee faasaana amaana maqaki marinoo taikoookari Asia maqasaa Yuda maqannaa marusa amaana maqaki Pauroona qafamasee aiqamausa nirana fundakuseeqa faaga fuisee qiqa Pauroona kari qufaqa aniqumaraseeqa qiqau.

<sup>28</sup> Isaraee maqannaa fasiqauqa anidadaaqaqa. Maa fasiqafa maaqa maaqa maqusa maqusa nidanoo unnaqi noo nifa maridanoo. Isaraee maqannaara manda ufa qimarifa, Mooseena sandufara qaoo qimarifa maa amaana maqanara faqa ufa manda qimarifa maridanoo. Doo mifa maqee aanaamuru maree maa amaana maqanaki mini quqasaifanoo doo maa amaana maqafa putaa inoo maridanoo.

<sup>29</sup> Misa Eefeesusa maqannaa aanaamuru fasiqa Tarooifumusana Pauroona faqa madaanai maqasai marufaqa qafamasee mina faqa amaana maqaki mari ifoo qimasee sia qafarainni faaga rumasee Pauroona arirara qiqau.

<sup>30</sup> Mi ufafa amaana maqakiqari radiqifufanoo dinni dinni daraaninau. Aiqama dindari dindari moodaanaki anireeqa Pauroona amaana maqakiqari qumaree maqamau rarisameeqee kooqinni aqusoofaqa amaana maqasaa aanaiqikirusa amaana maqaki mandaikiandoo qimasee kaqi kaqi ufaqa amaana maqa kooqi ititasaqau. Faiqi anaasee moomoosa usufufaqa Pauroona saamu uqafiqee mariqau. Kuqa aruanee qimasaida miqi mariqau.

<sup>31-32</sup> Moo fannoo sandee oonureenoo Roomma maqannaa saideena qimaminoo qinau Yeerusaree maqannaasa aiqama suqiqa tinoorirafa firaafa maridanoo fee qimasoofoano Saideena fannoo nári sundiauqa namufaqa sandamaqaraasinoo misa usi marunakina aniramasoofaqa Pauroona ariuna minnisee náriara kai rakeeiqau.

<sup>33-34</sup> Saideena fannoo Pauroofuqoo anireenoo ani mina qumaraseenoo nári sundiara qaara sainandannai rumbaane qimaseenoo ariusa irammirinau. Maa fasiqafa nana ainaina mandainainee maraqifaqee innee arii fee qufaqa moo fannoo moo ufa qufanoo moo fannoo moo ufa qufanoo Roomma maqannaa Saideena dindari dindari ufa fifau faafau ufa kai qufanoo Saideena fannoo sia ufa anoona irinoo Pauroona mareenoo nári ququsaki munu quqasoofanoo marinau.

<sup>35-36</sup> Roomma maqannaa sundiauqa Pauroona afiqee fimarufaqa Yuda maqannaasa aanoomaseeqa Pauroona kooqi aaqa ooruroofaqa aruanneerufaqa sundiauqa mina aindusueeqeeqa uqeereeqeeqa maarinni ququsa qambaani quqaqau. Faiqi anaasee sandee fidaqa Pauroonara doo kuqarua kuqarua qimariqau.

*Pauroofa nari ufannai nari afaaqasaa ititanau.*

<sup>37-38</sup> Sundiauga nari ququsaki quqaanneerufano Pauroofa Saideena irammirino qinau. Amanee faiqi anaasee qimannimianauree qufano Saideena fannoo tautumaseeno qinau. Anee Kirisa maqannaasa ufa irimariana fee. Qinee oogai aniara Isipa maqannaafa rakirana uqeeraseeno 4,000 fasiqauqa Kaammanna faqa ufa rainee marusa nifiqee muna aadana maqa maaqai faiqi sia marunnai uqoona fee maridanee.

Miqi qufano Pauroofa qaoo qimasee qinau.

<sup>39</sup> Qinee Yuda maqanna maridaqa. Qinee Sirisia maqa maaqaki Tarasusa maqusai uriqarara maqusai kambiqaarasa maridaqa. Amanee qinee faiqi anaasee qimannimia.

<sup>40</sup> Saideena fannoo mina iriseeno eedoo qufano Pauroofa kooqi irirasusa akaramafufano asaukunnai misa ufa guna qaoo qimasoofaqa misa mina iriseeqa kasoomafufano Pauroofa nari Yuda maqannaasa ufakiqari qimannimino qinau.

## 22

<sup>1</sup> Pauroofa nari maqannaasa qimannidanoo nari afaaqasaa ititeeno maaqi qimasee qimanniminau. Oo maa fasiqausa qini qikaqaafasaa qini qikausamara. Innee qini ufa irisai faqa qeeqa irirana nimia.

<sup>2</sup> Qaara auqu, moo auqu Heeburu maqanna ufa moo auqu Yuda maqanna ufa marinau. Misa Pauroonara Heeburu maqanna ufa nari ufa qidaqinoo fee qimasee aiqama dai qimafigau. Miqimambufano Pauroofa qimannimino qinau.

<sup>3</sup> Qinee Yuda maqanna fasiqa maridaqa Sirisia maqa maaqaki Tarasusa maqusai kambiqaafanausa maridaqa. Oogai qinee kumaaraasa maridaqa maa maqusanaki Yeerusaree maqusaki Kamarieerana sukuraki kisaaqasaa mariaafanausa maridaqa. Qinee Kamarieerana sukuraki maridaqa maasa qikeeku qikaaku sandufa amiqimasee aiqama iriaraasiafanausa maridaqa. Innee maqee Anutunara afeekaikamandee minara rimariafaqa qinee maqee nindafaidaga. Qinee inni naanna reereea fanausa maridaqa.

<sup>4</sup> Oogai Yisunasaa atooqee marusa kuqa kai nari mariafanausa maridaqa. Qinee faiqi faqa anaasee faqa rumbasee karabusaki aqimarifanausa maridaqa.

<sup>5</sup> Amaana maqasaa aanaiqikirausa misa uriqararafa mifa qini ufa anoona iridanoo. Amaana maqa kansoorauqa faqa qini ufara kuqaa fee qifaranoo. Misa kai pasa akara rumasee Damasakusa maqusai maria Yuda maqannaasa nimiannee qufaqa qinee mi pasana maramaree Damasakusa maqusai ooru Yisuna ufa irimarusu rumbamaree nifiqee muqu Yeerusareenni quqaaneera ooru fuafanausa maridaqa.

*Pauroofa nari Yisuna qafoonara qimanniminau.*  
(NiFa 9:1-19; 26:12-18)

<sup>6-9</sup> Qinee mi pasana mara maree Damasakusa maqusa adeedi ramasaafananoo suani qambaana marufano innaarunaindari idauru kaaqa qarafa qumureeno qini fiqumma aiqama rafaqaqafuqisoofaqa qinee maqasaa aqufiqiafana. Innaarunaindari ufa moo qufaqa iriqia. Sauroo anee nanaree qini dariraridandee qufaqa qinee Oo Karaambaiqa anee yafee qiafananoo mifa qinau. Qinee Yisuna Nasareeteendaraasa maridaqa. Anee darunausa maridaqa. Mina ufa fannoo miqi qimasee qini qimaqimufafa qini faqa fimarusa kaaqa qarana qafaqau ufa sia iriqau.

<sup>10</sup> Qinee mina irammiriqa qiqiafana Oo Karaambaiqa qinee naqi fee ianauree qiafananoo Karaambaiqa innaarunaindari qinau. Anee findifinana Damasakusa maqusaki fua. Miqoo oonu rainanoo faiqi moo fannoo Anutufa qinara ani qimamiani.

<sup>11</sup> Kaaqa qarana fannoo qini qifu dimbasoofaqa qini faqa fusa qisauku qumaroofaqa Damasakusa maqusai fiqiafana.

<sup>12</sup> Damasakusa maqusaki faiqi moo auqu Ananiasa Mooseena sandufamau fimarufa Yuda maqanna miqoo marusa minara andeeqara fasiqa fee qimarufa.

<sup>13</sup> Mifa qinee mariafannaqoo anikikiqamambufano Oo Sauroo, qini qikaqa, anee afu maqaa, qufano kai qifu maqasee mina qafaqiafana.

<sup>14</sup> Maasa qikeeku qikaaku Anutufa aniara rusandeesamumandee aniara mina irirana-mau fuanneera mina ainainira faiqi andeeqarana Yisuna qafaanneera mina Yisuna ufa irianeera qinoo.

<sup>15</sup> Pauroo anee Yisuna afunnai qafoonafa mariananoo minara afu qafoonnanara aiqamausa qimannimia aaqoo irunnara aiqamausa qimannimia.

<sup>16</sup> Nanaree kaqi maridandee doo findifinana nammari maraa. Yisuna aaramasee irammirinanoo ani mandainaina rukaannoo.

<sup>17-18</sup> Ananiasafa miqi qimasoofaqa qinee Damasakusa maqusaindari maaqoo Yeerusa-reenni ani maridaqa amaana maqaki innaaru qimariafananoo qifu kai pipipasamandee



Karaambaiga akooqoo qimaqimino qinau. Doo kaqi kaqi maa Yeerusaree maqusaindari quqasee moosaa fua. Anee maqooqaraasa qiniara qimannimina qia sia irifaqa.

<sup>19</sup> Miqi qimaqoofofa qinee maaqi qimamiqia. Oo Karaambaiga qinee ani ufa irimarusa ufa suqira maaqakiaga keeqafida rarisamasee nariisee karabusaki quqee mariafanausa maridaqa. Maaqooqaraasa minara amiqimasee qini oosana iridaqa.

<sup>20</sup> Misa Seeteefeena arimarufa qinee faqa miqoo maridaqa dufiaree aridee qimasee arimaru fasiqausa qamunnasaa rakisi mariafanausa maridaqa.

<sup>21</sup> Karaambaiga qini mi ufana iriseenoo qimaqimino qinau. Doo anee findifua maaqooqari aanaamuru nianai mariasaki ani aqiqaidaqa.

<sup>22</sup> Pauroofa Yeerusaree maqannaasa nari saamu uqafiqee marusa qimannimidanoo aanaamuru nuquroofaqa misa mina iriseeqa aanoomaseeqa fifau faafau ufa qiqa faaqa quqasee mi ufana qima rukiyaqau. Misa maaqi qiqau doo maree munusee mina aru aquaqa. Mina marirafa sia amana maridanoo.

<sup>23</sup> Miqi qidaqa Yuda maqannaasa faaqa rumaseeqa niranaqoofofa nari qamunna qumareeqa minannai rutatidaqa kookoomma afaqeeqee mina aanaamu raqau.

<sup>24</sup> Roomma maqannaa kiateenna fannoo nari sundiaufa maaqi qimasee qimannim- inau, innee maa fasiqana inneeqa ququsaki quqasee uaiyaqa samu ariisaifanoo nari mandainaina kooroo iani. Yuda maqannaa faaqaaruana oosana kooroo iani.

(Roomma maqannaasa maqa maaqai kambiqoosa mi ququsanaki marunausee qi- marunara sia moo sundia fee firisuaiga fee amana kai rumberana, arirana sia amana mina rumbeefaree arifaree. Moo maqannaasa Roomma maqannaasa rakisinnimaqee mariasa kaqi rumbeefaree kaqi arifaree. Moo maqannaafa firaa feefaurumasee Roomma maqannaasa ququsaki keeqaffanoo mi sandufana mina afaaqasaa ititaannoo.)

<sup>25</sup> Sundiaufa Pauroona rumbasoofofanoo uaiyaqasamu arirara deedaqufanoo Pauroofa kuboora qimaminoo qinau Innee amanee Roomma maqannaa ququsakinaa fasiqa arifaree, sia amana arifaree kootaki qini ufa sia amiqimasee rainasee iriafanoo kaqi fifau darirari mariafanoo.

<sup>26-27</sup> Kuboora fannoo iriseenoo Saideena oonu qimamidanoo qinau. Anee sia mi fasiqana arua. Roomma maqannaa ququsakinaafa maridanoo, qufanoo, Saideena iriseenoo rufiteenoo Pauroo finnai oonuree iranau. Kuqaa fee anee Roomma maqannaa ququsakinaa fee maridane. Pauroofa eedoo qinau.

<sup>28</sup> Saideena kaifaa qinau. Qinee firaa munnimma aquseeqa Rooma maqannaa ququsaki fuafanausa maridaqee qufanoo Pauroofa qinau. Sia qinee munnimma aquafanausa maridaqa qini qikoofa minaki marunara qinee Roomma maqannaa ququsaki kambiqarausa maridaqa.

<sup>29</sup> Sundiaufa mi ufana iriseeqa nisauku raqandaa mamaraqau. Saideena faqa mi ufana iriseenoo Oo qinee Roomma maqannaa sandufa rukiasee sia ufa irirainni sainandannai rumbaafanausee qimasee qini uriqararafa minara irisee qini faqa daruandoo qimasee nariara rufianau.

*Pauroofa Yuda maqannaasa uriqararawsa nifusaa kikiqinau.*

<sup>30</sup> Saideena fannoo Yuda maqannaasa firaaqoo amoosau maqaranara oosana iria- nee qimasee iqaqoofofanoo kananaana Pauroona sainanda idukuseenoo amaana maqa aanaiqiki marusa uriqararawsa faqa misa kansoorauqa faqa naarama quqaseenoo Pauroona mareeqee misa noorinni quqana.

## 23

<sup>1</sup> Saideena fannoo Pauroona mareeqeenoo misaki quqasoofofanoo misa noori andee- qasee nindafamasee qimannimino. Qini maqooqooqari sia mandainaina fannoo qini qumaraidanoo Anutuna afusaa maridaqa.

<sup>2</sup> Aanaiqikirausa misa uriqararafa Ananiasafa mina iriseenoo Pauroona aqa marusara nisaukusamu oori itairi amifanoo unna ufa taikaani qufanoo aqa mariufa oori rukam- inau.

<sup>3</sup> Arufanoo Pauroofa Ananiasana kafa qimaminau. Anutufa ani faqa aruannoo anee qaaraiki marianafa marianano. Anee qini ufa iriseenana Mooseena sandufa qaanna qini qimani marianano Mooseena sandufa faiqi sia ufa irirai sia aruannee qimarifana anee Mooseena sandufa ammuqundari fidana mi fasiqanara qini daruannee qimarianano.

<sup>4</sup> Pauroofa miqi qimasoofofanoo Pauroona aqa marusa qiqau. Anee nanaree Anutuna aanaiqikirausa misa uriqararana manda ufa qimamidane qufanoo Pauroofa qinau.

<sup>5</sup> Oo qini qikaqaafasaa mifa aanaiqikirausa uriqararanara siamma iridaqa. Tamum-maqara akara fannoo maaqi qinoo maridanoo Innee sia inneeqa maqannaasa uriqarar-  
rausa manda ufa qimannimaqaaga.

<sup>6</sup> Miqi qimasee qimannimidanoo miqoo suqjusa nindafaidanoo narikai oonumafi  
irinau, maa suqimariasa qaarasaa fimariasa nariara nariara rairai qimariyaqanda, dinni  
mariasa Farisai amaana ufa qimariasa maridaqa dinni mariasa Sadikai amaana ufa  
qimariasa mariafanoo. Minara iriseenoo kaifaa firaa kari qimanniminoo qinau. Oo  
qini qikaqaafasaa qini qikoofa Farisai amaana ufa qimarufa marifaqa qinee faqa minaki  
qidaqa. Faiqi moo kuqiranaki findifunara qinee minara kai maa kootanaki maridaqa.

<sup>7</sup> Miqi qimasooafaqa Farisai amaana ufa qimarusa faqa Sadikai amaana ufa qimarusa  
faqa ufa rainaqaau.

<sup>8</sup> Sadikai amaana ufa qimarusa sia kuqirauusa findifidammiafoo qimarusa qangirooma  
faqa sia maridanoo fee qimarusa faiqi nimana faqa sia maridanoo fee qimariqau. Farisai  
amaana ufa qimarusa mi ainainanamunara kuqaa maridanoo fee qimarusa mariqau.

<sup>9</sup> Misa Pauroofa Farisai amaana qunara iriseeqa suqidaqa miqoo kai firaqqoo nari  
aqi nari aqimariqau. Farisai amaana ufa qimarusa sandufa akoofasauqa findifiqa  
afeekaikamandee maaqi qiqaau. Maasa sia moo mandainaina maa fasiqa anasaa marifaqa  
paquriqa. Qangirooma amanafee qimamifanoo fee maaqi qidanoo fee.

<sup>10</sup> Miqi qimasooafaqa Farisai amaana ufa qimarusa faqa Farisai amaana ufa qimarusa  
faqa firaqqoo ufa rainarafa kambiqaanau. Miqi marufanoo Roomma maqanna Saideena  
fannoo nari sundiauga qimanniminoo, innee Pauroona mareeqee inneeqa ququsaki  
quqasaaqa, misa mina qambaana rammisiseefaara, qufaqa misa nari sundia ququsaki  
quqasee rakisimariqau.

<sup>11</sup> Miqi qimasooafanoo mi eendanaki Karaambaiqa qangirooma moo fannoo qumureenoo  
Pauroona oorisa akaqqoo kikiqinoo maridanoo ufa qimaminoo qinau. Pauroo sia rufaa,  
paasoosia, anee maaqqoo Yeerusareenni qiniara kooroo qianandee Roomma maqusai  
miqikai innaranoo. Qangirooma miqi qimaseenoo Pauroona qimamisooafanoo taikanau.

*Yuda maqanna akaqausa Pauroona arirara ueeqoo ufana.*

<sup>12</sup> Iqaqqoo kananaana Yuda maqanna akaqausa Pauroona arira ufa nari qimami nari  
qimami suqiqau. Ufa andeeqaseeqa qima afeekaikamasee nammari faqa narana faqa  
auramasee Pauroona aruanee qiqaau. Aruseeqa mikari kai narana nammari naanee  
qiqaau.

<sup>13</sup> Qaara fasiqa niku nisauku taikasee Yuda maqanna fasiqauga kai narana auramasee  
Pauroona ariraree qiqaau.

<sup>14</sup> Auramaseeqa misa nari amaana maqa aanaiqikirausa faqa uriqarararusa faqa unnai  
oonuree qimannimiqa qiqaau. Maasa narana auramasee Pauroona aruseeqa innaaqiana  
narana naanauranoo.

<sup>15</sup> Innee faqa kansoorauqa faqa Roomma maqanna Saideena maaqi qimasee uaqee  
iaqa anee Pauroona mara maree kansoorauqa maaqaki quqasainaga maasa Yuda  
maqannaasa amiqimasee Pauroona oosana irianaara. Innee miqi qifanoo Saideena  
fannoo afigee finaqa maasa aanai maara maqaseeqa Pauroona aruanaara.

<sup>16</sup> Miqi qimarufanoo Pauroona anauqi mina auna faiqi fannoo qumee iriseenoo sundia  
ququsaki keeqafinoo Pauroona qimaminau.

<sup>17-19</sup> Pauroofa nari arifandinna ufana iriseenoo kuboora qimaminau. Anee maa  
kumaaraana afigamaree Saideennai munusainoo ufa qimamiani. Miqi qufanoo  
kuboora fannoo afigeenoo Saideennai muni quqaseenoo qinau Pauroofa qiniara maa  
kumaaraana afigee munusainoo moo ufa qimamianifee qifaqa afigee anidaqa qufanoo  
Saideena fannoo mi kumaaraana afigeenoo umeenni munuseenoo irammirinau. Nana  
ufaree anidane.

<sup>20</sup> Miqi qufanoo mi kumaaraafa qimaminau. Yuda maqannaasa duna Pauroonara  
amiqimandee mina ufa oosana iriraree qia. Misa aniara afigee muni quqararammifoo  
qidaqa.

<sup>21</sup> Anee sia misa ufa iria, qaara fasiqa niku nisauku taikasee fasiqa aanai maara  
maqafiq Pauroona arirara qia. Misa qima afeekaikamandeeqa doo narana aua-  
maseeqa aruseeqa nararee qia. Doo misa maqee deedaqidaqa ani ufamma afeesida  
maria.

<sup>22</sup> Saideena fannoo mina iriseenoo maaqi qimasee nari qimaminau. Anee maa ufana  
qini qimaqimiannanara sia moo qimamia saina anikikai mariani. Miqi qimaseenoo mi  
saideennafa mi kumaaraana aqiqanau.

*Roomma maqanna sundia fannoo Pauroona Seesaree maqusai aqiqanau.*

<sup>23-25</sup> Aqiqamaseenoo Saideena fannoo quandakinoo qaara kubooraqanda mara quqaseenoo qimanniminau. Inneeqara maaqimandee sundiauga deedaqiaqa. Sundia maqamau fifandinausa qisaukuqara fasiqa niku nisauku taikasee fasiqa (200) minamusa deedaqiaqa. Qoosasaa akaramafi fifandinausa qaaramoo niku nisauku taikasee moo fasiqa asaukuqara taikasee fasiqa (70) faqa qoosauqa faqa deedaqiaqa. Qisaukuqara fasiqa niku nisauku taikasee (200) faqaana faqaasa maqamau fifandinausa faqa deedaqiaqa. Doo maqee eendakina doo Seesareea maqusai Pauroona afiqee ooqu fuaqa. Qaaramoo qoosa deedaqiaqa Pauroofa fuaninnana. Innee andeeqasee maasa firaa kiapafa Feerisafa marinnai Seesareea maqusai Pauroona afiqee fuaqa. Miqi qimasoo faqa misa mina iriseeqa deedaqiaqa.

<sup>26-28</sup> Miqi qimaseenoo Saideena fannoo Feerisana maaqi qimasee Pauroonara pasaki amaananau. Oo maasa amiqirra kiapafa Feerisafa, Qinee Karaudiusasa moo duqu Risiasasa ani amandaidaqa. Yuda maqannaasa maa fasiqana qumaree ariraree qiafaqa qinee minara Roomma maqanna qususakinaa fee qimasee ooqu rafiaege qeeqa sundiauga ququsaki quqeeqa.

<sup>29</sup> Qinee misa mina amoosau maqaana oosana randeeqa misa kansoorakina quqasaunanoo sia rumarafa arira ainaina marifaqa Yuda maqanna nari oosana maridanoo miqianannai kai mina arirara qidaqa.

<sup>30</sup> Misa qumee maara maqasee mina arirara qiafanoo moo fannoo qumee qimaqimi-faqa anee ianannai aqiqaidaqa. Qinee mina amoosau maqaasara ani afusaa innee faqa mifa faqa andeeqaaqee qidaqa.

<sup>31</sup> Saideena fannoo mi ufana akara rumaseeqa sundiauga nimisoo faqa Pauroona afiqeeqa qoosasaa akaramafu faqa mi eendanaki Antipatiriasa maqusai ooqu fiqau.

<sup>32</sup> Iqagoo fanoo kananaana nikumau fusa ooqurandee Yeerusareenni uriqau. Qoosasaa fusa Pauroona afiqeeqa Seesareea maqusai ooqu fiqau.

<sup>33</sup> Misa Seesareea maqusai ooquree Saideena papiqanamuu faqa Pauroona faqa firaa Kiapana amiqau.

<sup>34</sup> Firaa kiapafa mi papiqana asaana rumaseenoo Pauroona irammirinau anee yain-daraa fee qufanoo mifa qinau. Qinee Sirisia maqasaa kambigaafanausa maridaqa.

<sup>35</sup> Firaa Kiapafa mi ufana iriseenoo Pauroona qimaminau. Ani amoosau maqaasa qumuraifaqa ani ufa iriana. Miqi qimaseenoo poorisa qimaminoo qinau. Maa fasiqana mareeqee Eeroodeena firaa maaqaki quqasaifanoo marinaqa eendaki faasaana rakisiaqa.

## 24

*Ananiasafa Seesareea maqusai ooquree Pauroona arirufa qinau.*

<sup>1</sup> Pauroofa moodaannai qisauku namu faasaana nari ufa afeesara marufanoo doo amaana maqa aanaiqikirausa misa uriqararafa Ananiasafa Yuda maqanna faiqi firaasa faqa moo fasiqa Roomma maqanna sandufa faqa ufoosana faqa amiqimasee irimarufa mina auqu Teeraturusafa misa aiqamausa Seesareea maqusai Yeerusaree maqusaindarii ooqu fiqau.

<sup>2</sup> Ooqureeqa firaa kiapana afusaa Pauroona amoosau maqoo ufana qimamiqau. Misa Teeraturusana aaroofanoo firaa kiapana afusaa kikiqamambinoo maaqi qimasee Pauroonara qinau.

Oo Feerisafa anee idaaqirafa amiqirafa uqanna mariananoo. Anee aneenna iriranannai maasa rakisimariananara maasa amiqimandee maridaqa. Anee fuka sandufa moomoo quqaidana maasara amiqimasee mariaqee miqimariananoo.

<sup>3</sup> Maasa maqee maqee ani irirana qumareeqa dufi dufi qidaqa.

<sup>4</sup> Qinee kisaaqasaa ufa qiananoo ufa aukuaana aiqaraandoora qusasaa qidaqa. Amanee anee maasa ufa kaqikaana iria.

<sup>5</sup> Maa fasiqana manda oosana fannoo sabeena aada miqirafa maasa raquru qimimarifaqa fataidaqa. Pauroofa aiqama maqusa maqusa fidanoo Yuda maqannaasa nirana fundakinoo nidanoo. Nasareetee maqusanaa fasiqa irirana uriqararafa maridanoo.

<sup>6-7</sup> Sia minara kaifau, maa fasiqafa Pauroofa maasa naaquqara amaana maqa Yeerusareenni putaaifaqa maasa mina qumareeqa maasa sandufannai andeeqee marunanoo Roomma maqanna Saideena fannoo firaa aanoo iranannai maasa qisaukukinaana rafieenoo.

<sup>8</sup> Saideena fannoo mina auqu Risiasafa maasara ani afusaara mi kootana andeeqaaqee qifaqa qumu qimamidaqa. Anee maa fasiqana irammirinanoo mifa maasa ufa anoona qiannoo.

<sup>9</sup> Teeraturusafa miqi qufaqa Yuda maqannaasa aiqama kuqaa anoonee qiqau.

*Pauroofa Feerisana oorisaa narí afaaqasaa ititanau.*

<sup>10</sup> Firaá kiapafa Teeraturusana ufa iriseenoo doo Pauroona asaukunnai aaranau. Doo anee findifi aneenna ufa qia qufanoo Pauroofa findifi Feerisana qimaminoo qinau.

Oo Feerisafa anee kisaagaasaa qini maqanna Yuda maqanna ufa andeeqee marianafa mariannanara qinee dufi dufi ani afusaa qidaqa.

<sup>11</sup> Innaunni kai qinee Yeerusaree maqusai Anutunara innaaru qiraree qimasee ooru fiqiafana.

<sup>12</sup> Qinee amaana maqaki sia aanoo ufa moo qimannimiqiafana. Faiqí nirana sia qinee fundakiqiafana. Amaana maqaki fee nári faiqí suqunaki fee sia qinee Yuda maqannaasa nirana fundakunaqa misa qiqafeeaa.

<sup>13</sup> Misa maqee ani mariasa qini qimoosau maqee mariana sia mina anoona paqurimasee kooroo ifana irinnaranoo.

<sup>14</sup> Qinee moodaa ainainara kai kooroomasee ani qimamianauro. Qinee maa fuka aatatau fidaqa minannaikai maasa qikeeku qikaaku Anutunara innaaru qidaqa. Mi aannara Yuda maqannaasa mi aannara kaqirunna fiaanoo qidaqa qini qimoosau maqaidaqa dariraridaqa. Qinee Mooseena sandufa akara aiqama iridaqa mi mau fidaqa tamummaga fasiqauqa akara faqa iridaqa mi mau fidaqa.

<sup>15</sup> Maa Yuda maqannaasa faqa qinee faqa maasa moodaa iriranamau fidaqa ka-sooqaqee Anutufa aiqama fasiqauqa andeeqarau faqa mandaikirausa faqa kuqiranakinaasa faqa mara findifumanniseenoo misa ufa iriannoo.

<sup>16</sup> Qinee Pauroosa Yuda maqannaasa naanna raida moodaa ainainara afeekaikidaqa, Anutuna afusaa faqa faiqí nifusaa faqa aiqama kari mandoosana maraaqaa imarifaqa eerairidaqa sia mi mandoosanna ummaarafa qini daakuanifeera aaufadara mara quna kai aiqamausa nifusaa qini daakuanifeera.

<sup>17-19</sup> Pauroofa Feerisana kaqi qimamidanoo qinau. Qinee moomoo anaamuru maqusai niniifaqa moomoo aukuaana maraseeqa qinee munnimma maramaree Yeerusaree maqusai ooruree qeeqa maqannaasa nimiraree qimasee aandaau taturifana suqasee Anutuna amiraree qimasee amaana maqaki keeqafi mariqiafana. Sia moomoosa faqa mariqia, sia aanoo iranaki mariqia amiqimasee mariafananoo Asia maqanna Yuda maqannaasa mi maqanaki qini qiqafamaseeqa unnaqimasee maa manda oosana uqeeraqau. Misa kai mai qumureeqa ani afusaa qini qimoosau maqoo ufana qiaqaana.

<sup>20</sup> Qinee Yeerusaree maqanna kansoora nifusaa kikiqiafannana maa qumu mariasa maridaqa qini ufa iriqa. Misa qini manda oosana kooroo iaqaana.

<sup>21</sup> Qinee kansoorauqa nifusaa kikiqamafu faqa moodaa ufa kai qinee qiafanaqa misa qini darirariqa. Kuqiranakiqari findiffandiafoo qiafannanara qini darirariqa.

<sup>22-23</sup> Feerisafa Yisuna aanara irimarufa maridanoo Pauroona ufa iriseenoo maaqi qimasee qimaminau. Anee kaqi marinanoo Saideena Risiisafa qumurainaga ani ufa andeeqaanaura. Miqi qimaseenoo mi kootana rafaqa fnoo Poorisa qimaminoo qinau, Anee Pauroona afiqeeqee rumbaranaki quqasee rakisia. Mina qimaminoo qinau, Anee Pauroona rakisimarinaqa mina agoondi fee akaqaafasaa fee kaqi anireeqa mina faqa ufa qiaqa narana amiaqa sia qaoo qia.

*Feerisafa faqa narí anaqa Durusira nammarifa faqa Pauroona ufa irufanoo naaquqanau.*

<sup>24</sup> Feerisana anaqa mina auqu Durusi nammarifa Yuda maqanna anaasee marinau. Qaaramoo faasaana aiqaroofanoo Feerisafa narí aanaaqandiri anireenoo Pauroona aaramasee asaku mundirana Yisuna ufara iroofanoo amiqimandee qimaminau.

<sup>25</sup> Pauroofa faiqí anaasee aiqamausa andeeqasee niroosanara faqa mandoosana fannoo dindari oonu rarisee anirarisee ifaqa minniseeqa maasa qiga qimanara iriseeqa mi mau kai firanara faqa oonumafi irisee minnisaaninnanara Anutuna koota firaafa marianinnanara faqa qimamimarufanoo Feerisafa narí mandoosana firaanara iriseenoo Anutunara rufiammaree qaoo qinau. Saina kaqimarinaqa saika sia marinaqa aniraana qimaqimia.

<sup>26</sup> Feerisafa Pauroonara narí qumee kai qimirinoo qinau. Pauroofa munnimma qiminaqa idukuanauree qimaseenoo maqee maqee karabusakinaana aaramasaida ufaqi-marufanoo Pauroofa sia amufanoo kaqi karabusaki marinau.

<sup>27</sup> Miqi marufanoo qaara aukuaana aiqaroofanoo Roomma maqanna kiapafa Feerisana anee moosaa finanoo moo kiapafa ani amaqa maqaannoo. Feerisafa minara iriseenoo Yuda maqannaasa maaqoo qaraasa qiniara misa niqoondi fee qiaqera Pauroona narí maaqa uqannakinaana mara maree karabusaki rumbaseenoo quqasee fufanoo fuka kiapafa Poorakiusafa moo auqu Feestusafa mifa anireenoo Pauroona rumbaranaki paqurinau.

## 25

*Fuka kiapafa Feestusafa kafa Pauroona ufa irinau.*

<sup>1</sup> Fuka kiapafa Feestusafa qaaramoo eenda faiqeenoo Seesareea maqusaindari Yeeruserree maqusai oori quqarara ooru finau.

<sup>2-3</sup> Yeeruserreeni ooru marufaqa amaana maqasaa aanaiqikirausa firaasa faqa Yuda maqannaasa faiqi firaasa faqa Pauroona ufa oosana amoosau maqeeunara qimamiqau. Miqi qimasee maaqi qimasee Feestusana qimamiqau, Oo maasa kiapafa amanee anee Pauroona mareeqee Yeeruserreeni quqasainaqa ufa irianauree. Misa aanai maara maqasee aruanneera quandasee miqi qimasee qimamiqau.

<sup>4</sup> Feestusafa misa ufa iriseenoo qinau. Pauroofa Seesareea maqusai karabusaki maridanoo. Qinee qusasaa ooqu fuanaura.

<sup>5</sup> Inni faiqi firaasa qini faqa ooquraifaqa miqookai Pauroona nana mandoosana maraqainaqa misa qifaqa qinee irianaura.

<sup>6-7</sup> Feestusafa miqi qimaseenoo qisaukuqara taikasee afuru faiqeenoo doo Seesareea maqusai kaifaa ururandee ooqu finau. Iqaqoofanoo kananaana ufa irimaruna maaqaki keeqafi nari qaindasaa ooqu marifinoo Pauroona aarofanoo aniroofaqa Yeeruserree maqannaasa Pauroona fiqiu fiqiu mambufaqa mandufa uqanna oosana oosana Pauroonara qimasee sia mina anoona paquriqau.

<sup>8</sup> Misa taikooofanoo Pauroofa nari oosanara Feestusana qimaminau. Oo fira kiapafa qinee sia Yuda maqannaasa sandufa rukieeqa. Sia naaquqara amaana maqa putaa mannieeqa maasa Roomma maqannaasa fira Kiapana sandufa sia rukieeqa.

<sup>9</sup> Feestusafa mina iriseenoo nariara Yuda maqannaasa aqoondikianee qimaseenoo Pauroona irammirino qinau. Amanee anee Yeeruserreeni oorureenana Yuda maqannaasa faqa qini qifusaa misa ani amoosau maqeeaanara andeeqeenaree.

<sup>10-11</sup> Pauroofa mina iriseenoo Feestusana qimaminau. Maa ufa irimaria maqafa sia anindi kai Roomma maqannaasa firaana ufa irira maqa maaqoo maridanoo mina sandufa maaqoora qidanoo maaqoo andeeqaaqana. Qinee sia Yuda maqannaasa mandaikamma nisaunaua maridaqa anee mi ufana amiqimasee irimariananoo. Qinee moo sandufa rukiaanaqau moo mandainana auqeeqau sia qinee kuqiranara rufiaunaqini. Misa qini qimoosau maqara ufa oosana sia maridanoo sia moo fannoo qini mareeqee misa nisaukuki quqaannoo. Qinee Roomma maqusai mari kiapana firaana minauqu Sisaanasaa mina afusaa oonuree qianaura.

<sup>12</sup> Miqi qimasooofanoo Feestusafa quandaki nari ufa irimarusa faqa ufa qi qiseenoo Pauroona qimaminoo qinau. Anee Sisaana afusaa ufa andeeqararee qiananoo. Anee Sisaana afusaa ufa andeeqararee qiannanara, doo qinee aqiaqanana minni finnananoo.

*Karaambaiqa Akaripafa faqa Beeranisa nammarifa faqa Pauroona ufa iriqau.*

(Mi aukuaana Seesareea maqusaindari sipaki akaramafufaqa fiufufaqa Itari maqa maaqai Roomma maqusai fimariqau.)

<sup>13</sup> Ufa taikaseenoo Pauroofa karabusaki maridanoo sipa afeesara marinau. Marikufanoo moo kiapafa nari anasaasandiri fuka kiapana auqu Akaripaafa marufa aninau, mina anasaana auqu Beeranisa nammarifa marinau.

<sup>14</sup> Miqanda ani marikufanoo Feestusafa Pauroona ufa oosana oosana qimaminoo qinau.

Indaaruu mariu kiapafa Feerisafa maaqoo marufanoo moo fasiqa karabusa marufaqa karabusa rumbaqaqa kaqi maridanoo.

<sup>15</sup> Qinee Yeeruserreeni oonuraafanaqa amaana maqa aanaiqikirausa misa uriqararusa faqa faiqi firaasa faqa mi fasiqanara mandufa oosana oosana qimaqimisee mina aruannee qiqau.

<sup>16</sup> Qinee mina iriseeqa Roomma maqannaasa sanda sia miqinoo maridanoo. Nari amoosau maqainnanara sia fifau nimianaqa arifara. Maasa Roomma maqannaasa sandamau fidaqa miqanda moodaaqoo kikiqamambi ufa dinni dinni andeeqasee iriseeqa miqoo aqaranana marinaqa nimianaqa arifara sia marinaqa sia nimianaauranoo.

<sup>17-19</sup> Misa mai Seesareea maqusai qumuraafaqa qinee sia furufariqa iqaqaiqaqa kananaana mi fasiqana karabusakinanaaana aaraafananoo aniroofaqa mina amoosau maqoosa findifiqa dapi dapi ufa qiqau. Qinee minara moo ainaina mandaikammanni-maqee foora irunanoo sia marifaqa. Misa nari amaana sandufara kai iridaqa maana amoosau maqaidaqa arirara qidaqa. Misa faiqi moo mina auqu Yisufa minara kuqinuu maqi qiafanoo Pauroofa minara doo findifiqoo qifaqa mina saara mina arirara qidaqa.

<sup>20-21</sup> Miqi qiafaqa qinee Pauroonara amanee ani faqa Yeeruserreeni afiqee murasaanaqa mi ufana qini qifusaa andeeqeeqaree qunanoo Pauroofa Sisaana afusaa iraree

qimaseenoo maaqoo qinee rumbaranaki mariiqa kasooqaqee Sisaa finnai qeeqa ufa mina afusaa andeeqararee qifaqa eedoo qimasaunanoo kaqi karabusaki maridanoo.

<sup>22</sup> Akaripaafa Feestusana ufa iriseenoo qinau amanee qinee mina ufa irianaaree. Miqi qufanoo Feestusafa qinau, Oo amana duna kananaana iria.

<sup>23</sup> Iqaqoofanoo kananaana Akaripa faqa nari anasaana Beeranisa nammarifa faqa aniree maqi qimasee miqooqaraasa faiqi firaasa faqa sundiaa faqa qammani auqamasee nifaaga anukamasee amiqira ainaina nifaaga nifaaga iiseega aiqama aniree padi mafufanoo mi qambaana miqanda rafudamakufaqa ufa irimaru maqanaki keeqaqau. Keeqafufanoo Feestusafa sundia moo aqiqoofanoo Pauroona karabusa maqakinaana afiqee mini quqanau.

<sup>24-25</sup> Quqasoofanoo Feestusafa aiqama maaqi qimasee qimanniminau, Oo Karaambaiqa Akaripa innee aiqamausa maaqoo ani mariasa qini ufa iria. Maa fasiqanara ufa qidaqa. Yuda maqannaasa maaqooqaraasa faqa Yeerusaree mariasa faqa aiqama maa fasiqana amoosau maqee mariafanoo. Misa minara kuqanifeera firaqoo faaqa quqaida maridaqa. Qinee mina iriseega kuqannaruannina ainainara randauna sia maridanoo narikai Roomma maqusanaa firaana mina auqu Sisaana auquraifaqa qinee doo amana fee qiqa.

<sup>26</sup> Qinee mina aqiqeeqa nana ufa fee pasakina akara rumamiana maree fuannoo fee, sia marifaqa, randaunaisia. Qinee minara mina mareeqee inni nifusaa maaqoo quqeeqa Karaambaiqa Akaripa ani faqa afusaa quqasaanana anee mina ufa irisee qimaqiminaqa qinee mina ufa oosana irisee akara rumma fira Kiapana Sisaana amaqaanura.

<sup>27</sup> Naqi fee mandee qinee fifau aqiqaanauree. Qinee Yuda maqannaasa Pauroona amoosau maqemaria ufana andeeqasee akooqoo papiqasaa akara rumasaanoo andeeqaannoo.

## 26

*Pauroofa Akaripana faqa Beeranisa nammarina faqa nifusaa ufa qinau.*

<sup>1</sup> Karaambaiqa Akaripaafa iriseenoo quandaki Pauroona qimaminau, Aneenna ufa qinaqa iria. Pauroofa mina iriseenoo asauku uqeeraseenoo maaqi qimasee narufa qinonunara qinau.

<sup>2</sup> Oo Karaambaiqa Akaripa, ani afusaa ufa qiannanara dufi dufi qidaqa. Yuda maqannaasa qimoosau maqee maria ufana qimamianauree.

<sup>3</sup> Anee Yuda maqannaasa mariana faqa misa oosana oosana ufa qimariana faqa anee irimarianafa marianaqa qinee minara ani ufa qimamirara dufi dufi fee qidaqa. Amanee anee qini ufa iria. Aiqama Yuda maqannaasa qinee kumaaraasaqari findifuafannana irimariafanoo.

<sup>4</sup> Qinee sia kaqi nimarunausau maridau qeeqa maqusaki faqa Yeerusaree maqusaki faqa mariafanausa marunaqa Yuda maqannaasa minara faqa iridaqa.

<sup>5</sup> Qinee Farisai amaana ufa qimariafanausa marunaqa Yuda maqannaasa misa minara iridaqa qumee raidaqa. Farisai amaana ufa qimariasa misa kaaqa Anutuna ufara afeekaikimariasa maridaqa.

<sup>6-8</sup> Qinee naaru kasooqaqee kambiqaaninna ainainara irimaree fidaqa. Ooqai Anutufa maasa qiikeeku qikaakusaa qimafeekaikunara qini maqannaasa eendaki faqa faasaana faqa Anutunara innaaru qidaqa maridaqa. Kasooqaqee kambiqaaninna ainainara Anutufa qimafeekaikunara maasa irimaree fidaqa. Mi ainainafa inaaqiana kambiqaaninnanara minara Yuda maqannaasa qini qimoosau maqaidaqa. Mi ainainafa Anutufa kuqiranakinaana mara findifira ainaina mina maridanoo. Yuda maqannaasa nanaree sia iridee unna fee qidee.

<sup>9</sup> Ooqai qinee faqa Yisuna Nasaretee maqusaindaraana auqu taikaanifee qimasee qaini qainiqa imariqiafana.

<sup>10</sup> Minara Yeerusaree maqusai ooruree aanaiqikirausa misa uriqararana ufa irisee Anutuna faiqi namu moomoo rumbannisee mariafanausa maridaqa. Miqimaqoosa akaqausa narufaqa qinee faqa dufi dufi amiqimmiaafoo qiafanausa maridaqa.

<sup>11</sup> Qinee Yuda maqannaasa ufa suqira maaqaki keeqafufaqa Yisuna ufasaara narimariafanausa maridaqa. Misa qumareeqa Yisuna ufara minnisaqee qimasee narimariqiafana. Qinee misa minara firaqoo aanoomaseeqa moo maqusai nianai fimariafanausa maridaqa.

*Pauroofa nari Yisuna ufa iru oosannara qimanniminau.*  
(NiFa 9:19; 22:6-16)

<sup>12-13</sup> Qinee Yeerusareenni ooruree aanaikikirausa misa uriqararana pasa mara reeqa Damasakusa maqusai ooruree Yisuna ufa irimarusa rumbarara ooru fimari-afananoo suani qambaanai innaarunaindari idauru miqirafa suaniara foora firaatia qini faqa fusa aiqama rafaqaqafusanau.

<sup>14</sup> Miqimasoofaqa maqasaa aqfufafananoo minaikiqari ufa moo Heeburu ufaiqari maaqi qinau. Sauroo Sauroo anee nanaree qini darina nidanee. Qinee faqaannanai ani kaqikaagoo ani afaaqai mundunara anee anenna kai faqaana aaru pooduqaani qiannana arumaraanoo firaagoo aidafidanoo.

<sup>15</sup> Qinee miqi qufaqa irammiriqa qiqiafana. Oo Karaambaiqa anee yafee qiafananoo mifa qinau.

Qinee Yisusa anee darunausa maridaqa.

<sup>16</sup> Doo anee findifinana fua. Qinee aniara qini ainainira faiqikianneera ani afusaa kooroo iqa. Anee maqee qafaannanara faqa kasooqaqee kambiqaaninnanara faqa aiqamai qimannimianeera ani afusaa kooroo idaqa.

<sup>17</sup> Qinee Yuda maqannaasaki faqa aanaamuru maqannaasaki faqa ani aqiqaanaura. Misa ani arirarifaqa rafaqaq fuaanuranoo.

<sup>18</sup> Anee misa nifu maqannimaqeeera foora asukunakinaana mareeqeenana kaaqa qaranaki quqannisaaneera, anee misa Sadannana rafaqaqafiranaakinaana mareeqee Anutunaindi kianneera, misa qini saqarikiranannai misa numoo taikannisaananoo Anutufa nari rusandeesamu masainausaki quqasainaqqa misa faqa minaki marifaranoo.

*Pauroofa nari qimannimu ufana oosannara Akaripana qimaminau.*

<sup>19</sup> Oo Karaambaiqa Akaripa qinee aanasaa qifu pisipasamandai innaarunaindaraa ainaina qafaafanna ainaina sia mi ufana rukiaafanausa maridaqa.

<sup>20</sup> Indaaru Damasakusa maqusai oosana arasee Anutuna fasaasa ufa qimannimi-afana. Miqooqari Yeerusaree maqusai faqa Yudeeaa maqa maaqai faqa aanaamuru marusa faqa qimannimidaqa maaqi qimasee qimannimiqia. Inneeqa manda nirana marirana nimeesuqusee quandakina Anutufinai ubeekamafifaqa Anutufinnai marirana nirana marasainaqqa kuqaa Anutuna aanai ubeekamafiaafoo qiaqeeera.

<sup>21</sup> Minara kai qinee Yeerusaree naaquqara amaana maqaki marunaqa dariraridaqa.

<sup>22</sup> Anutufa qini dadaaqimarinara maqee inni nifusaa kikiqiaqa maridaqa uriqararusa faqa ureeqarusa faqa nifusaa Yisunara kooroomannimidaqa. Ooqai tamummaqara fasiqauqa faqa Mooseefa faqa qimarundee kaimmidaga misa maaqimmiqau. Anutuna asauku mundirafa Yisufa teeroo firana mareeufanoo kuqinoo mi kuqiranakiqari findifinoo findifirana indaaru nikamannisaannoo.

<sup>23</sup> Miqinnanannai asauku mundirana Yuda maqannaqa faqa aanaamuru maqannaqa faqa maa anutuna ufa fannoo qoomara fooqaana doo innikina doo anireenoo. Misa miqi qimaqoonna marifaqa qinee faqa minara kai qidaqa.

<sup>24</sup> Pauroofa miqi qimasee nariara ufa qimarufanoo Feestusafa quandakufanoo faqa quqaseenoo qimaminau. Akasaa doo anee furufarammiananoo. Ani irirana firaafa ani mandainainaki afeeqamifana aqufuananoo.

<sup>25</sup> Pauroofa mina iriseenoo maaqi qimasee qimaminau Oo Feestusa uriqararafa, qinee sia furufarau qidau miqidau. Noori runusee kuqaa anoonainaina qimaria ufana qidaqa.

<sup>26</sup> Oo Karaambaiqa Akaripa qinee ani afusaa paasoosamasee maa ainannara kooroo idaqa anee sia sia irimarianafa mariananoo, irimarianafa mariananoo. Anee maa ainanna qafaidana oonumafi irimarianafa mariananoo. Sia kukeeqaranaki maa ainainafa marifa akooqoo marifa maridanoo.

<sup>27</sup> Oo Karaambaiqa Akaripa anee tamummaqarusa ufa irisee kuqaa anoona fee qidanee anee miqi qimarianaqqa qinee iridaqa.

<sup>28</sup> Akaripaafa mi ufana iriseenoo Pauroona qimaminoo qinau. Anee maa qusa ufanannoo qiniara Yisuna faiqiqi quqee fee qidanee.

<sup>29</sup> Pauroofa mina iriseenoo Akaripaana qimaminoo qinau. Qusa ufa fee kisaqa ufa fee sia qinee minara iridaqa. Qinee aniara faqa maa qoo maridaqa qini ufa irimariasara faqa innaaru qidaqa aiqamausara qinee imarunandee iqa Yisuna saqari kiaqeeera qidaqa, sainandannoo rumbaqqimaqarafa kai sia.

<sup>30-31</sup> Pauroofa miqi qufaqa Akaripaafa faqa firaq kipaafa faqa Beeranisa nammarifa faqa findimeeqee raudamaki fiqau. Fidaqa nari qimami nari qimami maaqi qiqau. Maa fasiqafa sia karabusa ainaina qafeemarifa sia kuqannarira ainaina qafeemarifa maridanoo.

<sup>32</sup> Akaripaafa minara maaqi qinau Pauroofa nari sia Sisaana auqureenoofau doo iduqiini, Sisaana auquramaseenoo saina minni fuani.

## 27

*Pauroofa kaqi rumberanaki maridanoo Roomma maqusai sipaki finau.*

(Itari firaa maqusa auqu Roomma. Miqoo kiapafa firaafa marinau. Mina auqu Sisaafa Roomma maqannaa kiapausa uriqararafa firaafa marinau. Pauroofa Roomma maqusai Sisa finnai firaree qufanoo Feustusafa karabusaki quqasee minni fimaru sipanara afeesimarinau.)

<sup>1</sup> Sipa Itari maqusai fimaru sipafa moo fannoo aniroofanoo Feustusafa nari sundi-auqara ufaqa misauqa Pauroona faqa karabusa akaqausa faqa mi sipanasaa quqanau. Saideena auqu Yuriusafa nari sundiauqa namufaqa mi sipanaki Pauroona saimbaqa nifiqee finau. Mi saideenna aiku asaukuara Augustoona ammi suqira fee qimariqau.

<sup>2</sup> Maasa Pauroona faqa fuanna sipafa Adaramitiuma maqusaindaraa sipa marinau. Mi sipafa nari qumaara ainaina deedaqamaseenoo Asia maqa maaqandana firaree qufaqa doo maasa akaramafufananoo qifiqee finau. Faiqi moo Aristarakusafa Maseedonia maqa maaqaindaraafa Teesaroonika maqusaindaraafa doo maasa faqa finau.

<sup>3</sup> Fifuufaqa eendaki faqa fimariqau. Iqaqoofanoo Sidoona maqusai oonuraqau. Saideena Yuriusafa reendeenidanoo Pauroona amiqimasee qimaminau. Anee Sidoona maqusai ani agoondiuga marifana misa faqa oonu faiqainaqa naranaina amifana sipaki akaramafi maree fua qufanoo doo miqimminau.

<sup>4</sup> Sidoona maqusai mariqa sipaki akaramafufaqa fufanoo ufai kaqinaindari anufanoo sipa sia andeeqasee fuaqaaufaqa Sipurusa afuma qaannai ooru fiqumaki fiqiafana.

<sup>5</sup> Maasa Sirisia maqa maaqaikundanai fifuufaqa Risia maqa maaqaki firaa taunna auqu Miraa miqoo oonuraqiafana.

<sup>6</sup> Oonuroofanoo Saideena fannoo sipa moo paqurinau. Areekasandiria maqusaindaraa sipa Itari maqa maaqai fimaru sipafa marufanoo Saideena maasa aiqama mara quqa-soofaqa fiqau.

<sup>7-8</sup> Miraa maqusaindari moomoo faasaana eendaki mi sipanaki anuqiqa fimariqau. Fidaqa Nidusa maqusa amummaqa oonuraafananoo ufai kaqinaindari aimaree anufaqa quandakufaqa ooruku nammari amuaqumau Kareetee afuma oquree mina auqaanaia sia ufai uqunnai mindanaia fiqiafana. Miqoo Saramoonee maqa Iroosa Oorikiraqoo fee qimaruoqoo fiqummakufaqa anuquseeqa Raseea maqusa amummaqa oonuraqau. Oonuree firaa farumma qafamasee minaki kiateenna fannoo nari sipa maree minaki keeqafi marufanoo ufai faqa ooruku nammari faqa sia arinau. Miqunara mi farummana auqu mandaqa farummee qiqau.

<sup>9</sup> Ufai fannoo kaqinaindari anufaqa maasa kisaagasaa miqoo maridaqa Itarinni fuanee qu aukuna taikanau. Anutuna faqa moodaanaki qoomaqa suqaani qu aukuanafa doo ainnaaqaramafinoo sia amana fifaranoo. Pauroofa mina qafeenoo maaqi qimasee naamuqinau.

<sup>10</sup> Oo maa fasiqausa maasa maaqooqari fuananoo mandaikammianoo. Sipa faqa sipakinaa qumiasana faqa maasa faqa kuridi taikaanau.

<sup>11</sup> Saideena fannoo sia Pauroona ufa irinau sipa akoonu faqa kiateenna faqa misa ufa kai irinau.

<sup>12</sup> Misa maru farummefa sia kisaagasaa qaaramoo quqoona amana marufaqqee qimasee saina maasa sipaki moo farumma Kareetee maqa maaqaindaraa farumma moo mina auqu Finisa miqoo amanamasee qafaanau. Miqoo fuaninna farummefa amiqirafa marifaqa ufai sia ani marunnaia amiqimasee mandaqai kisaagasaa mariannee qiqau. Aiqaumasa eedoo qufaqa moodaa moodaa maramaririqau.

*Sipaki fimarufanoo ufai faqa aaku faqa narinau.*

<sup>13-14</sup> Misa Finisa farummaki fuanee qufanoo ufai fannoo mitinai ubeekoofaqa misa asamaseeqa ankaqa oogu rarisameeqee sipaki quqasee Kareetee maqa mammaaqandanaia fiqau. Misa fimarufanoo fimarunaindari ufai firaa tia uqanna maqamau aninau.

<sup>15</sup> Mi ufaiqa sipa ooru arufaqa mara ubeekoofanoo sia amanaikufanoo quqaseeqa ufai namufaqa kaqi fiqau.

<sup>16-17</sup> Sipa fannoo kaqikaa maqanamu mina auqu Kauda mina fiqumarufaqa mina mandaqa maridaqa kaqikaa kanuqa sandannaia rarisee maruna kadaapi rumeeqee sipasaa amuaqundari fataafimamaqasee rumbaqa. Misa sipa nammari kasi kasinoo qambaana afooiandoora qimasee sanda firaana qumaraida qambaana qambaana rumbee mariqau. Misa ufai fannoo fuaqa aminanoo Ribia maqasaa aruando qimasee seera sandaaqai maruna idukueeqeeqa sipaki quqasee doo kaqi ufai namufaqa fiqau.

<sup>18-19</sup> Ufai firaafa uqinoo nammari amakaurufanoo sipa teeqi taaqufaqa rufiasee sipa ummaara maridanoo ukuqnaandoo qimasee sipakinaa ummaara aiqama nammariki aqusoofanoo sipa fannoo aufadanau. Iqaqoofanoo kananaana kai sipa ummaara



raidanoo qimasee minakinaa ainaina oosana oosana aiqama mareeqee ooruku nammariki aqusaqau.

<sup>20</sup> Moomoo eendaki faasaana sia suani fasau qafaqau minara misa firanara randoosia. Ufai firaafa uqanna uqimarufuqa maasa qeeqa marirafa doo taikeefoo qiafannana.

<sup>21-23</sup> Sipakinaasa moomoo eendaki faasaana sia narana neemariqau, naarara kai mariqau. Minara Pauroofa misa qambaana findifinoo qimannimino qinau. Innee qini ufa iriaqaana Kareetee maqusaki kai mariaqaana. Miqimaseefau sipakinaa ainaina firaa feefauru aqimariana sia aqunaiqini kaqi mariqini. Doo maqee qinee inni fuki faaki qidaqa doo paasoosiaqa. Sia inneeqa moodaa kuqifaranoo, sipa kai kuquannoo. Qinee Anutunaindi maridaqa mina ainainira faiqi maridaqa. Eenda eendaki Anutuna qangiroo moo fannoo qinee marunannai aniree qimaqimino qinau.

<sup>24</sup> Pauroo sia rufiaa, anee kuqaa Roomma maqannaa firaa kiapana oorisa kikiqinnarano. Anutufa narí amiqira oosana uqereeqeenoo aiqama sipakimariasa ani aminoo, sia moo fannoo kuquannoo.

<sup>25</sup> Doo maa faiqisa sia nimuqusa tiakiaqa, paasoosiaqa. Anutufa qimaqimindee kai iannoo. Qinee mina irisee mina saqarikidaqa.

<sup>26</sup> Kaqikaa qoo ufai fannoo maasa sipa maramaree kaqikaa maqanamu raquramianoo.

<sup>27-28</sup> Maasa qisaukuqara taikasee qikunni ooqu qaara faqa qaara faqa eendaki faasaana Meediteeraneena ooruku nammari amuaqumau fimarufuqa booskurauga oonumafi iri iseeqa eenda amuqasai Oo maasa moo maqa maaqa adeedi anireeqa qimaseeqa sanda kisaaga marasee ummaarano ainaina mina atisaa qususee nammariki aqusee qafaqau. Nammari 120 amana meemai faruma difukunaki marufuqa qafaqau. Kafaa moosaa oonuree kafaa aquseeqa qafaqau. Nammari 90 amana kaqikaa faruma ausaanaikiranaki kai marinau.

<sup>29</sup> Booskurauga mina qafamasee eendaki oonisaa aruani qimaseeqa sipa araqemusaaqari qaara faqa qaara faqa qankaqa quqasoofanoo maqa qumaroofaqa misa iqaqaranara innaaru qimarigau.

<sup>30-32</sup> Booskurauga maasa sipa oorinni qankaqa quqaidee unna qimasee kanuqa mareeqeeqa nammariki quqasee minaki aqufi quqasee sandaneera imarufanoo Pauroofa qafamasee Saideena faqa sundiauga faqa qimannimino qinau booskurauga sia marifaqa innisaimbaqa aiqama kuquanaurano. Booskurauga kanuqaki quqasee fidamia qufanoo sundiauga kanuqa sanda atekamufanoo kanuqa nammariki pautaqi aqufinoo kaqisamu finau.

<sup>33</sup> Iqaqarara kaarimaqoofanoo Pauroofa fuki faaki qidanoo qinau. Innee qisaukuqara taikasee qikunni ooqu qaara faqa qaara faqa eendaki faasaana sia nee mariasa marifanoo. Kisaaga kamusaqa innee sia moodaa ainaina naafanoo.

<sup>34</sup> Qinee inni fuki faaki qidaqa doo narana marasee namasee sia kuqua. Sia inniki moo fannoo abandiakaannoo. Innee kaqi rumbaqa marifaranoo.

<sup>35-36</sup> Pauroofa miqi qimaseenoo feemu maraseenoo ruqi ruqimaseenoo innaaru qimaseenoo noofaqa tautumma qafeeqa amiqimmi ifoo qimaseeqa maasa faqa aiqamausa naqau.

<sup>37</sup> Maasa mi sipanaki marusa nisaanarirafa maaqimminoo marinau 276 fasiqa moomoo uqanna mariqau.

<sup>38</sup> Aiqama namasee nimuaqu mambufaqa raisa fooqaira narana mina auqu uita misa mina mareeqee ooruku nammariki teeqimasoofanoo sipa aufadanau.

*Sipa fannoo Marata maqa munu raquru amufanoo sipa rakeekaa inau.*

<sup>39</sup> Iqaqoo kananaana maqa afaisaa maridaqa yamaqa maaqanai fee marida fee qida sia irimariqau. Booskuraugu qafoofanoo nammarimuqufi rainee maruqoo oonureeqa dinni kaqi ooqu fimarunna minniseeqa dinni farumma oonu mandi marunaki keeqararee qimasee amanamandee qafaanee qiqau.

<sup>40</sup> Miqi qimasee ankaqa sanda atekasoofanoo aiqama nammariki aqufiqau. Sipa sitiaga ainaina rafaqaq fimarur sandana aukusoofanoo akaqausa mina ati qumaroofanoo seera sipa oorisa uqeerasoofanoo ufai fannoo mina arinoo rariseenoo oorindari finoo mi farummanaki keeqafiqqa maqa raquramianee qiqau.

<sup>41</sup> Sipa fuaneera maseenoo aagamakufanoo nukuda raquraminoo oorindari utusamafi kasooinoo marinau. Araqemu nammarimuqufi firaqoo aridanoo rukakamumasana.

<sup>42-44</sup> Sundiauga karabusa fasiqauqara nammari amuaqumau fimariasa quqasee sandee maqi qimasee aiqama naru taikaaneerufanoo Saideena fannoo Pauroonara amuqusufanoo qaoo qimaseenoo qinau. Nammari amuaqumau fimariasa sipasaqari nammariki aqufi nammarimuqumau maqee fuaqa. Sia nammarimuqumau fimariasa sipa

rufadaairana ati aina qumareeqa minasaa ooqu marifi fuaqa. Doo maasa miqimandeeqa aiqamausa maqasaa fiqau.

## 28

*Marata maqusanaasa amiqimasee rakisinnimaqaaqu.*

<sup>1</sup> Maasa aiqama nammarikiqari afainni akaramafufaqa qafaafana aiqama amiqimandeeq mariqiafana. Miqooqaraasa iroofaqa mi maqana auqu Marata fee qiqau.

<sup>2</sup> Marata maqannaasa maasa amiqi amiqimaqisaqau. Aaku rufaqa suara darufaqa misa idaraseeqa mara quqaseeqa maasa qiqaondikiqau.

<sup>3</sup> Pauroofa ida asaida maramareenoo idaki aqusoofanoo sakani minaki kukeeqanoo mariufa asauku aakusee miqoo dirinoo marinau.

<sup>4</sup> Marata maqannaasa mina qafeeqa maaqi qimasee unna ufa qiqau, maa fasiqafa faiqi narimarifa marifanoo. Misa nimana fannoo mi sakanina aundurai keeqafifanoo nararidanoo. Ooruku nammariki sia kuqunara sakani fannoo mina aridanoo.

<sup>5</sup> Pauroofa asauku rutatufanoo sakani idaki aqufufanoo Pauroofa sia aurinau.

<sup>6</sup> Marata maqannaasa mina qafamasee qiqau kaqi kasooiqa maridaqa qafa mifa innooqaannoo fee maqasaa aqufinoo kuquannoo fee qimasee kisaaqasaa fifau qafee mariqau.

<sup>7</sup> Pauroofa sia kuqufaqa misa minara moo anutu fee qiqau. Maasa sipa maqasaa raquru amuqoo karaambaiqa auqu Pubariusafa mina afuqa anaadoo aaga raquraminau. Pubariusafa Marata maqannaasa karaambaiqa marinau. Mifa maasa qumu qifiqeenoo murusoofaqa qaaramoo faasaana mina faqa mariqiafana.

<sup>8</sup> Pubariusana akoofa aurinoo marinau. Mina aurirafa afaaqa idididanoo aratootooki marinau. Pauroofa minara iriseenoo mina maaqaki keeqafinoo innaaru qimaseenoo nari asauku mina afaaqasaa mundusoofanoo aurirafa taikanau.

<sup>9</sup> Miqimasooofaqa qafamaseeqa mi maqannaasa mi saqanna marusa nari aurirausauqa naakidaqa minisee marufanoo aurirana taikannisee marinau.

*Marata maqa maaqindari moo sipaki Roomma maqusai fiqau.*

<sup>10-11</sup> Maasa qaaramoo quqoona Marata maqasaa mariqiafana maasa sipa moo mina auqu Moodaa Karira Anutuqanda maasa mina paquriqiafana. Areekasandiria maqannaasa sipa fannoo Itari fimaru sipafa ufaira rufiasee Marata maqasaa faasai ani kukeeqanoo marinau. Maasa mi sipanaki akaramafuafanaqa Marata maqannaasa narana faqa oosana oosana ainaina faqa aanasaa naaqee qimasee quqasoofaqa maasa mareeqa Itari maqa maaqai fiqiafana.

<sup>12</sup> Fifiufaqa Sisiri afuma firaannai oonuree fira taunnaki Sirakusee maqusai raquramisee qaaramoo afuru miqoo faiqaaqiafana.

<sup>13</sup> Doo miqooqari sipaki nammari amuaqumau fiifiufaqa Itari maqa maaqa atisaa fira taunna Reekiumma maqusai kasooiqaqiafana. Iqaqoo kananaana ufai maasa inaaqinaindari uqinoo seera fuaqoofanoo dadaaqaqiafa kaqi kaqiuufaqa qaara faasaana kai Puteeoori maqusai sipa kasooinau. Puteeoori maqusa Roomma maqusa Kaamanna maqusai marinau. Aiqa sipauqa Puteeoori maqusasaa munu afiqusee marufaqa maqamau Roomma maqusai fimariqau.

<sup>14</sup> Puteeoori maqusaki Yisuna ufa irimarusa paqurimasee misa faqa moodaa amaana mariqiafana. Doo miqooqari andeeqasee Roomma maqusa andeeqasee maqamau fiqiafana.

<sup>15</sup> Roomma maqusai Yisuna ufa irimarusa akaqausa marusa ooqai Pauroofa animarunara iriseeqa aanai kaqikaa maqusa Apiusana makeeta faqa qaaramoo pasindiaqa maqa maqusa faqa maruqoo Yisuna ufa irimarusa qumu qifiqee Roomma maqusai ooru fiqau. Pauroofa misa nindafoofanoo amugusaki idaaqufanoo Anutunara dufi dufi qimasee doo misa faqa Roomma maqusai oorufinau.

*Pauroofa Roomma maqusai kisaaqasaa maru ufana.*

<sup>16</sup> Maasa Roomma maqusai ooruroofanoo Kiapafa Pauroonara aaduma moo maqaki marinanoo sundia kai rakisianifee qinau.

<sup>17</sup> Pauroofa mi maqanaki qaaramoo afuru faiqeenoo Roomma maqusai maru Yuda maqannaasa uriqararusa naaramasoofaqa suqumaree Pauroona maaqaki aniroofanoo Pauroofa ufa qimanniminoo qinau.

Oo qini qikaqaafasaa, sia qinee moo ainaina qeeqa maqannaasaindi mareeqa sia maasa qeeqa qikeeku qikaaku sandufa rukiaafanausa maridaqa Yeerusaree maqannaasa qini ruumbeeqeeqa Roomma maqannaasa nimia.

<sup>18-19</sup> Kiapausa Seesaree maqusai qini mandainainara randoosia sia moo kuqira ainaina qiniki marinau. Minara misa qini idukuane qufaqa Yuda maqannaa afeekaikamandee aanoo ufaqa qinee quandaki Sisaana auqureeqa sia qeeqa maqannaasa ufa nimirree qimaseefau maa ufana oosana areefau nariqa kai.

<sup>20</sup> Minara qinee inni qimannimianeera naaraida. Anutuna asauku mundirafa anianinnanara Isaraee maqannaasa irimaree fidaqa minara kai qini qisauku maa sainandafa rumbanoo maridanoo.

<sup>21-22</sup> Yuda maqannaa uriqararausa mi ufana iriseeqa Pauroona qimamiqa qiqau. Maasa sia Yudeeaa maqannaa ufa moo aniara iriqa, sia moo fannoo pasa akara ruma aniara maasa qimaqeenoo. Sia moo fannoo mindari aniree aniara manda ufa qia. Maa fuka ufana Yisunara aiqama maqa maaqaki mariasa nikoo fee qidaqa, maasa minara ani ufa irianauree qidaqa.

<sup>23</sup> Miqi qimaseeqa moo suaniara utaaqamasoofanoo mi faasaannasaa Yuda maqannaa moomoo aniree Pauroona maaqaki keeqafufanoo Pauroofa Anutuna ququsa ufara naamua qimarinau. Kananaana oosana araseenoo eendirana paqurinau. Pauroofa tamummaqara fasiqausa akarakinaa ufa faqa Mooseena sandufa faqa minakinaanannai Yisunara naamua qinau.

<sup>24</sup> Akaqausa Pauroona ufa irisee kuqaa anoonee qimasee iriqa. Akaqausa sia iriqa.

<sup>25</sup> Pauroofa mina qafamaseenoo qimannimino qinau. Anutuna naaqqara maraquina fannoo tamummaqara fasiqa Eesaiaana ooqai aakufinoo dadaaqufanoo inni nikeeku nikaaku naaru kambiqaaninna ainainara qimanniminau.

<sup>26</sup> Mifa maaqi qinau.

Eesaiaa anee oonureena Isaraee maqannaasa maaqi qimasee qini ufa qimannimia. Innee kisaagasaa qini Anutusa ufa iridaqa sia ufa irifaranoo. Innee kisaagasaa qini ufa nifunnai qafee marifanoo sia mina anoona paqurifaranoo.

<sup>27</sup> Innee maa maqannaasa nitikura ummaarandanoo maridanoo ooni miqirafa maridanoo. Misa nariqa naaqoo nisaukunnai ititeemariasa maridaqa. Misa narikai nari nifu dimbeemariasa maridaqa. Misa nari nifunnai qafeefoora naaqoonnai irifoora nitikurannai oonumafi irifoora. Misa qini Anutu finnai quandeefoora, qinee misa amiqimannisaannoora.

<sup>28-29</sup> Pauroofa miqimasee qimannimiseenoo maa ufanannai rafaqafinoo qinau. Anutufa inniara maa ufana iriaqee qinau. Doo Anutuna faiqi mareeqee nari asumu mariranaki quqeamaru ufafa doo aanaamuru maaqa maaqai daraaninoo. Misa irifara innee sia irimariafanoo. Miqi qimasooafaqa Yuda maqannaasa Pauroona maaqakiqari raudamaki fidaqa narinni narinni ufa rainaqa fiqau.

<sup>30-31</sup> Pauroofa maru maqana ufaasu maqaki marinau maqee maqee munnimma aqusaida marinau. Qaara aukuaana mi maqanaki marufaqa moomoosa aniree marufanoo naarama quqasaidanoo Anutuna ququsara qimannidanoo Karaambaiga Yisufa asauku mundiranara faqa paasoosamasee naamua qimarinau. Sia moo fannoo qaoo qimarinau. Eedoo kai qimariqa.

## **ROOMMA**

### **Pauroofa Roomma maqannaA akaranimaqoo ufafa.**

<sup>1</sup> Qinee Pauroosa Anutuna asauku mundirana Yisufa mara firiqai faiqisa maridaqa mina ainaina dadaaqimaruna faiqisa maridaqa. Anutufa qini maqasaa fasiqa Anutufa faiqi aanaaseekinaana rusandeesamumasee nari amiqira fasaasa ufara qimannimianne qimaqoosa maridaqa.

<sup>2</sup> Mi amiqira fasaasa ufana naaru kambiqaaninnanara Anutufa oqai uqanna nari tamummaqara fasiqauqa nari ookiqari qimannimisoofoqa quandafiga faiqi anaasee qimannimisee quandakiqa naaquqara akaraki quqaqoofa maridanoo.

<sup>3-4</sup> Mi amiqira fasaasa ufana nari amaaku nari asauku mundirana Yisunara maasa karaambaigara qidanoo. Mifa Dafidinakiqari kambiqaanara maasa maqasaa fasiqee qidaqa. Anutufa nari firaa afeekannai kuqiranakinaana Yisuna mara findifumaseenoo minannai uqannifiqasoofoqa iriseeqa misa minara Anutuna amaaku innaarunaindaraafa naaquqarafee qidaqa.

<sup>5</sup> Yisuna minannai Anutufa qini amiqi amiqinoo qimannimira fasiqaikamambi maridana aiqama maqanna naarama minisee Yisuna amiqira fasaasa ufa qimannimisainaga iriseeqa mi mau fiqa Yisuna auqu uqeeraaqeera qiniara qimaqoosa maridaqa.

<sup>6</sup> Aiqama maqannaasara qidaqa inni Roomma maqannaasara faqa qidaqa Anutufa inni nari asauku mundirana Yisunaindi kiaqeera qimaqoofa maridanoo.

<sup>7</sup> Anutufa inni Roomma maqannaasara faqa naarameeqeenoo qini qiku qisauku kiaqeera qimaqoosa mariafaqa. Qinee Pauroosa minara iriseeqa inni akara rumannimaqaunafa maridanoo. Anutufa maasa kikoofa faqa nari asauku mundirana Yisuna maasa karaambaigara faqa nari amiqi amiqira oosana faqa nari aundura asoarana faqa inni nimiani.

*Pauroofa Roomma maqannaasara Anutu finnai dufi dufi qidanoo.*

<sup>8</sup> Maa ufanannai inni qimannimiranara qianaara Anutuna asauku mundirana minannai qinee Pauroosa inni Roomma maqannaasara Anutu finnai dufi dufi qimamaqidaqa. Aiqama maqannaasara innee Yisuna saqarikiranara irimarifaqa minara qinee Pauroosa innaaru qimamaqidaqa dufi dufi qidaqa.

<sup>9</sup> Qinee aiqama kari maqee maqee inni Roomma maqannaasara iridaqa Anutufinnai maqee maqee innaaru qimarunannara minara Anutufa iridanoo. Qinee qeeqa qimuqusa ookiqari qeeqa iriranannai Anutunara eedoo qira dadaaqira ainainiranakina maridaqa. Maridaqa nari amaaku amiqira fasaasa ufa faiqi anaasee qimannimidaqa. Qinee inni nari Roomma maqannaai faiqi aanaaseera innaaru qidee qunanoo Anutufa kuqaa fee qiannoo.

<sup>10</sup> Qinee oqaindani inni maqusai oonuree inni nindafarara irida marunannara maqee Anutufa qini dadaaqinaqa inni maqusai oonu mariannanara minara faqa innaaru qidaqa.

<sup>11</sup> Qinee firaaqoo inni nindafarara qidaqa innaarunaindaraa amiqi amiqirana moo inni naida nimianaqa innee Anutunaki afeekaikamafi mariaqeera iridaqa.

<sup>12</sup> Qinee minara maaqi qidaqa qinee faqa innee faqa nari dadaaqi nari dadaaqirara innee Yisuna saqarikirana faqa qinee faqa Yisuna saqarikirana faqa nari dadaaqi nari dadaaqiqa.

<sup>13</sup> Innee Roomma maqannaasara maa ufana iriaqa. Qinee inni maqusai moomoo kari firari mariafananoo moo ainaina rafaqaqafinau. Qinee moomoo maqusanaasaki sia Yuda maqannaasaki nimariafanausa miqidaqa misakinaana oonu rarisameeqee Yisunaki quqeeamarunausa inniki faqa oqaindani miqianee qidaqa.

<sup>14</sup> Aamina maqannaai faqa irirana faqaasa faqa aikara foora daruqoofanoo maridanoo. Misa aiqama Yisunufa qimannimianaqa irifanoo mi aikana darirafa tatinoo qifaqa afadaannoo.

<sup>15</sup> Mi aikana tatiranara irisee qinee inni Roomma maqannaasara faqa Anutuna amiqira fasaasa ufa qimannimiraree qidaqa.

*Anutuna afeeka ufa asumu mariranaki quqannisee marifa.*

<sup>16</sup> Anutuna amiqira fasaasa ufa Anutufa faiqi mareeqee asumu mariranaki quqemari afeekafa maridanoo minannai Yuda maqannaai naaree aanaamuru mariasa innaaqiana irisee mi mau finausa Anutufa asumu mareeqee quqaannoo. Minara qinee mi amiqira fasaasa ufanaki qeeqa daundura firaaqoo mara quqidaqa.

<sup>17</sup> Anutufa faiqi anaasee aqee mariasa nari namuqaaki mariasa sia naruseenoo mareeqeenoo nari aqoondikidanoo nari amiqira fasaasa ufa minara kooroo idanoo. Maasa Yisuna saqarikirana mifa kai Anutunara aqoondikirana nimidanoo. Ooqeenaa

tamummaqara fasiqauqa akara minara maaqi qinoo maridanoo. Faiqi anaasee Anutuna saqarikiranannai mina aqoondikinausa misa kai naaru naaru marirana mareefaranoo.

*Faiqi faiqi mandoosana fannoo Anutufa nariranaki quqannisaidanoo.*

<sup>18</sup> Faiqi anaasee mandainaina faqa kudimakirana faqa miqanda Anutuna anoona ufa rafaqaqifaqa sia irida maridaqa, minara Anutuna aanoo qirana narirafa inaarunaindari akoogoo misasaa qumu maridanoo.

<sup>19</sup> Maanara Anutufa misa naridanoo. Faiqi faiqi Anutunara irimari ainainafa akoogoo maridanoo. Anutufa nari kai uqannifigasoofanoo marifaqa sia irimariafanoo.

<sup>20</sup> Ooqai Anutufa maa maqa maaqana auquqooqari mina kukeeqarana idaaqirana faqa mina naaru naaru marira afeeka faqa innaarunaindaraa andeeqara marirana faqa nari auqu quqoo ainainaki akoogoo marufa maridanoo. Faiqi faiqi Anutufa auqu quqoo ainainaki qafamasee sia Anutunara irida fee qifaranoo. Miqi qimasaidaqa unna qimarifanoo Anutufa mi ufana sia irianoo kaqi naruannoo.

<sup>21</sup> Misa Anutunara iridaqa sia minara dufi dufi qidaqa, kafa sia mina auqu uqeeraidaqa. Misa quandaki nari irirafa firaqoo furufariranaki kai maridaqa misa nitikura fifau maridanoo asukuna kai qumbiqanoo maridanoo.

<sup>22</sup> Misa nariara irirana faqaasee qimasaida unna qimasaidaqa furufariranaki maridaqa.

<sup>23</sup> Misa Anutuna naaru naaru marira areenarana mafi quqasee Anutuna innaaruqirana faqa amooqirana faqa mafi quqasee fifau faiqi faiqi amanauqirana faqa ufina amanauqirana faqa aanda amanauqirana faqa amuqundari maqamau nimarina amanauqirana faqa marasee maasa Anutu fee qimasee minara innaaru qidaqa amooqidaqa.

<sup>24</sup> Faiqi misa nari furufarirafa miqinoo firaafa marifanoo Anutufa misa mareeqeenoo nariqa nimuqusimari mandainainaki quqasaifaqa faiqi narinni narinni ira ainainara nisaurira ainaina kai maridaqa.

<sup>25</sup> Misa Anutuna anoona ufa mareeqee kaqinni quqaseeqa unna ufa mareeqee nifusaa quqasee minara kuqaa fee qidaqa. Naaru naaru amooqimaria Anutuna aiqama ainaina auqu quqoo Anutunara minnisee quandaki Anutufa auqu quqoo ainainara fifau ainainara innaaru qimasee maasa Anutu fee qimasee mi mau fidaqa.

<sup>26</sup> Anutufa faiqi anaasee nari manda niranara qafamasai fanoo akooqaifanoo kaqi minaki nifeeqaidanoo. Minara aanaaseeuqa faqa nari nifaaqmaaka minnisee andeeqara oosana minnisee narinni narinni oosana oosana manda marirana maridaqa.

<sup>27</sup> Faiqi miqi kai iqa nari ninaaqmaaka faqa amiqira oosana minnisee nariara nariara ridaqa idara foora nitakuqidanoo. Faiqi misa narinni narinni nisaurira ainaina maraseeqa mina akiqara nari nifaaqasaa aurirana aidafirana marasee aupuraidaqa.

<sup>28-31</sup> Faiqi anaasee Anutuna anoona ufara nikooqaifanoo Anutufa misa mareeqeenoo mandainainakina sia fuqaqa ira mandainainakina quqasaifaqa minaki fidaqa. Miqiana maa manda ainaina oosana oosana qumbiqaidanoo, manda oosana faqa, kaaqa ainainara rimarina faqa nariara nariara fidiqaa imariana faqa nariara nariara rairai qirana faqa faiqi kuqannarirana faqa nari afumau nari afumau irafa faqa nari ueeqee nari ueeqee imariana faqa manda oosana oosana faqa nariara nariara munuqi miniqi imariana faqa misa Anutunara fidiqaa imariana faqa kaukaata qimariana faqa nari nifaaqa nimooqirana faqa nariara kai firaqoo ufaqi marina faqa maqee maqee mandoosana randeemariana faqa nari ninaukoo ufa rukiee mariana faqa sia nari andeeqaramau firanara uriqarane qimariasaa, faqa nariqa qimannimira ufa rukiee mariana faqa sia nari nikaqafasara amuqusirana faqa mi manda ainainausaki fimariasaa maridaqa.

<sup>32</sup> Anutufa minaki fimariasara kuqiranaki fimariaa maqi qida qifaqa iridaqa kaqi minaki fidaqa. Sia minakaifau miqidau fira manda oosana marasee akaqausa mi mandainainaki dadaaqimariasara misara faqa eedoo qimaseeqa asasidaqa.

## 2

*Aiqamausa Anutufa narira ufa ameemaanai maridaqa.*

<sup>1</sup> Oo qini qiqaondi sia anee akaqausara aqeeaafoo qinana anee faqa mi aqarana maree marianafa mariananoo. Anee faqa naqimasee Anutuna arirana eerairinnaree, Anee akaqausara miqinana anee faqa mi manda oosanna kai maree mariananoo aninna qaoo qira ufa fannoo aninna aruannoo.

<sup>2</sup> Faiqi anaasee mi manda oosanna maree marifanoo Anutufa kai misara narira ufa qiannoo. Anutufa sia aqaqidanoo andeeqaidanoo misa narira ufa ameemaanai quqannisaannoo.

<sup>3</sup> Qini qiqoondi anee sia amana akaqausara qaoo qinnaranoo, anee qaoo qidee qidana anenna faqa minaki fimarianafa mariananoo. Anee miqi mariannanara naqimandee-nee Anutuna ariranara eerairinnaree, sia amana eerairinnaranoo.

<sup>4</sup> Inniara Anutufa aneenna mandainainakiqari mifinnai ubekeefandinnanara reen-deenamasee rakisidanoo maridanoo. Innee minara Anutufa reendeenira oosana marainara innee minara furufarira oosana fee fee qimaseeqee kaqi mi mandoosannaki marida fee. Anutufa inniara reendeenira oosana fannoo sia furufarira oosanafau maridanoo. Inneeqa mandainaina minnisee quandaki narinnai ubeekaaqee qimari oosana maridanoo innee sia fee minara iridaqee.

<sup>5</sup> Inni naaqooki ooni ititanoo marifaqara foora sia ufa irimariafanoo. Miqianara Anutuna andeeqara ufa faqa mandainaina akiaqara narira ufa faqa kooroo inna faasaana mikari inniqa mandainaina fannoo inniqa narira ufa firaqoo uriqaramafuannoo.

<sup>6</sup> Mi faasaana Anutufa aiqama fasiqa anaasee nari maree mariana akiaqara kai nimiannoo.

<sup>7-8</sup> Akaqa fasiqa anaasee amiqira oosana kai maraqa nidaqa innaarunai areenarana faqa innaarunai nuqu uqeerarana faqa naaru naaru mariranara faqa randaidaqa. Miqi mariasa Anutufa naaru marirana nimiannoo. Akaqausa nari nifaqara kai ridaqa andeeqarana futeeqaidaqa aqaranaki kai fidaqa. Misasa Anutufa nari aanoo qirana faqa nari aranaqarana faqa nammariara foora adiannimaqaannoo.

<sup>9-10</sup> Nidafirana faqa aupuranara faqa Anutufa aiqama mandoosana maree mariasa misa nimiannoo. Yuda maqannaasa naaree nimiseenoo innaaqiana aanaamuruqa nimiannoo. Anutufa miqi kai inoo aiqama andeeqara oosana maree mariasa nimoqirana faqa nuqu uqeerarana faqa nimuqusaki asooarana faqa nimiannoo. Yuda maqannaasa naaree nimisee innaaqianna aanaamuru mariasa nimiannoo.

<sup>11</sup> Miqimasee Anutufa aiqama maqannaara amana amana kai nari maree mariana akiaqara nimimarifa maridanoo nimiannoo.

<sup>12</sup> Anutufa nari sandufa Mooseena qimamufanoo mifa quandasee Yuda maqannaasa qimannimisoofaqa misa mi sandufana qumarasee marusa maridaqa, misa mandoosana maraifanoo Anutufa Mooseena sandufannai misa qumaree naruannoo. Anaamuru mariasa Anutufa Mooseena amu sanda ufana sia mina aemeaanai maridaqa kaqinni maridaqa, misa mandainaina oosana minni kaqinni marinannai naruannoo.

<sup>13</sup> Sia Mooseena sandufa naqoonnai irimariana sia minau Anutufa narafusaa andeeqaranaki faiqi anaasee quqaidanoofau, mi sandufana marasee imariana andeeqasee auqee marianannai kai Anutufa nari andeeqaranaki quqannisaannoo.

<sup>14-15</sup> Misa Yuda maqannaasa Mooseena sandufa maree mariasa maridaqa aanaamuru mariasa Mooseena sandufa siaisa mariasa maridaqa misa nari iriranannai Mooseena sandufara sia irirai kaqi mi mau fidaqa, doo Anutuna ufamau fimariasa maridaqa. Mi oosana Anutuna sandufa naunduraki akara rinoo marifaqara foora kooroo ifaqa miqidaqa. Anaamuru mariasa Anutuna ufa sia irimariasa nariqa kai moo oosana manda oosane qimasee moo oosana amiqira oosane qimasee qimariafa mifa kai Anutuna sandufa ooqai kukeeqasee quqaqoofa naundurakiqari kooroo idanoo.

<sup>16</sup> Kasooqaqee anianinna faasaana Anutufa nari asauku mundirana Yisunannai faiqi anaasee aiqama naunduraki kukeeqarana kooroomaseenoo rainannimaqaannoo, Qinee Pauroosa Anutuna amiqira fasaasufa faiqi anaasee qimannimiqa nidaqa minara qiman-nimidaqa.

*Yuda maqannaasa Mooseena sandufa afeekaikidaqa.*

<sup>17-20</sup> Innee Yuda maqannaara qidaqa anee Yuda maqanna mariananoo anee Mooseena sandufa saqariki marianafa mariananoo, anee Anutuna fifau iridee qimasee firaqoo ufa qidana anenna auqu uqereee marianafa mariananoo, anee Anutuna andeeqara aanara irimarianafa mariananoo. Anee Mooseena sandufakinaana amiqira aanara faqa manda aanara faqa rainasee irimarianafa mariananoo, anee aneennara nifu dimbarausa aana uqannifiqee marunausee qimarianafa mariananoo anee aneennara asukunaki mariasa misa qooma maridee qimarianafa mariananoo, anee aneennara furufariraua irirana nimimarunaua qimarianafa mariananoo faiqiuqaindi amiqira aana uqannifiqee marunausee qimarianafa mariananoo. Anee Mooseena sandufa minakiqari aiqama irirana faqa anona ufara faqa qinee irida fee qimarianafa mariananoo.

<sup>21</sup> Doo qinee anira qianaura, anee uqannifiqee marianafa mariananoo, nanaree sia aneennara faqa mina mareenee. Anee misara sia ummuariaqee qimaseenana doo anenna ummuari marianafa mariananoo.

<sup>22</sup> Anee misara sia faiqi anaasee nari ummuari nari ummuari iaqee qidana, anee faqa sia fee ummuaridane. Ooninnai saqarinnai unna qira Anutunara foora mina

amana auqimarianara fidiqaa imariananoo fee anee fee mi unnaqira anutuna amaana maqakina keeqafida minakinaa amiqira ainainara fifau ainainee qimaseenane kaqi maraidanee.

<sup>23</sup> Anee aneennara Anutuna sandufa qumaree marunaasee qidana aneenna auqu firaqoo uqeeree marinafa, aneefee Anutuna ufa rukiaseenane asaurirana amidanee.

<sup>24</sup> Ooqeenaa tamummaqaraua akarakina inniara maaqi qidanoo. Anaamuru inni Yuda maqanna mandoošana qafamasee quandaki Anutunara manda ufa qidaqa.

<sup>25</sup> Innee Yuda maqannaasee innee qara fainanduqirausee qidaqa miqianara Anutuna faiqi namufee qimariafanoo. Qinee Pauroosa minara maa ufana qidaqa. Innee miqi mariasa Mooseena sandufamau amiqimandee fidaqa inni fainanduqirafa amiqira ainaina mariannoo, mina ufa rukiaseeqa fifau nipata aukirafa, sia Anutuna faiqi namu mariafanoo aamina aanaamuara foora marifaranoo.

<sup>26</sup> Aamina aanaamuru mariasa sia Yuda maqannaasee fainanduqimarusa misa nari kai sia irirai Mooseena sandufamau andeeqaramau fimarifanoo Anutufa mina qafamaseenoo Yuda maqannaara foora mariaafoo qiannoo.

<sup>27</sup> Anaamuru mariasa sia Yuda maqannaasee fainanduqimarusa misa andeeqaseeqa Anutuna ufamau fifaqa innee Yuda maqanna fainanduqimarusa Mooseena sandufa inni ufakiqari akara rirana rukisaifanoo aanaamuru aamina maqanna nari andeeqarafa inni Yuda maqannaasee mariranara mandainainee qiannoo.

<sup>28</sup> Yafee Yuda maqanna uqanna Anutuna aiku asauku uqanna maridanoo fee, apatasaa kooroo irafa mifee anoona maridanoo fee. Anutuna ufamau fimariasa mi fee anoona maridanoo fee.

<sup>29</sup> Sia apatasaafoou anoona maridanoo naundura nimuqusakiqari Anutuna ufamau fimariasa misa anoona maridanoo fainanduqirausara foora maridaqa. Sia Mooseena sandufa irirana irirafa mifau Anutuna aiku asauku kamannimaqaidanoofau. Anutuna maraquna naundurai saikisa misa kai Yuda maqanna uqannara foora Anutuna aiku asauku maridaqa. Miqifandinna fasiqausa sia faiqi nimooqiranafau maraidau, Anutuna amooqiranara ridaqa randasee maraidafa.

### 3

<sup>1</sup> Qinee minara irammirisee qimannimianaura Yuda maqannaasee aanaamuru urinnaaqarafa maridee kaqi fifau fee miqiqa marida fee. Misa fainanduqiraua misee aanaamuru urinnaaqaradee kaqi fifau fee miqi qida fee.

<sup>2</sup> Oo sia fifau miqi qidaqa misa uriqararafa firaafa maridanoo. Doo qinee oosanarasee maaqi qimasee qimannimianaura, Anutufa nari ufa Yuda maqannaasaa quqaqoofanoo marinau.

<sup>3</sup> Akaqausa sia narisaa quqaqoonara irisee andeeqaramau fiqa rukiasee kaqi runnambiqau. Anutufa misa furufarirana qafamaseenoo qinee faqa misa qima afeekalkamma nimiafanna ufana qinee faqa misa naanna reeqa rukiaanauree qianauree.

<sup>4</sup> Qinee Pauroosa minara maaqi qidaqa. Oo sia uqanna Anutufa mi mandoosanna maraannoo anoona ufa kai qimarifa maridanoo. Faiqi anaasee unnufa kai qimariasa kai mariafanoo sia Anutufa miqianoo andeeqasee anoona kai qiannoo. Ooqeenaa akara Anutunara maaqi qinoo maridanoo.

Ani ookinaa ufara aiqamausa anoona ufa fee qifaranoo. Misa ani ufara amanamandeeq irifanoo anoonaikammianoo.

Daqidina akarakinaa ufa Anutunara miqimminoo maridanoo.

<sup>5</sup> Misa faiqi faiqi unna qimasee maaqi qimasee Anutuna andeeqaranara qidaqa. Maasa faiqi faiqi qiga aaqarafa quandaki Anutuna andeeqarana mara maree kooroomeeqeenoo uqeerainafa maasa qeeqa aaqaranara amiqira ainainee qianauree. Miqooqari maasa maaqi qianauree mandainaina akiaqara maasa Anutufa darinaqa maasa maaqi qianauree Anutufa aaqaidanoo daridanoo fee qianauree.

<sup>6</sup> Qinee Pauroosa minara maaqi qidaqa. Oo sia uqanna Anutufa aaqaidanoo. Anutufa sia uqanna aaqaidanoo, nari andeeqarafa marinara maasa andeeqaqisaannoo mina andeeqarafa sia marinanoofoou sia amana maasa aiqama maqannaasee ufa iriseenoo andeeqaisaiqini.

<sup>7</sup> Misa faiqi faiqi unna qimasee maaqi qimasee Anutuna anoona ufara qidaqa, maasa qiga unna ufa fannoo Anutuna anoona ufa kooroomafi uqeerainanoo qiga unna ufa amiqirafa maridanoo nanaree Anutufa qiga unna ufa akiaqara qiga daruannoo fee.

<sup>8</sup> Qinee mi manda ufanara eedoo qaanaqau maaqi qiaqini, Doo aniaqa maasa manda marirana uqeeraseeqa minannai amiqira marirana kambiqasaanee qiaqa. Mi manda ufana uqeereemaria fasiqausa Anutufa misa mara mareenoo nari nariranaki quqaannoo. Sia aaqaidanoo miqidanoo, andeeqaidanoo miqidanoo. Mi aaqara ufana qimariasa qini

Pauroosara faqa unna qimasee Pauroofa maasara manda marirana uqeerasee minannai amiqira marirana kambijaanifeera qimasee minannai qini diqidaqa aaqee mariafanoo.

*Aiqamausa nári mandainaina ameemaanai maridaqa.*

<sup>9</sup> Doo qinee kafaa Pauroosa minara maaqi qimasee iridaqa, Anutufa maasa Yuda maqannaasee, aanaamuru mariasee, uriqaraida fee qidanoo amana amana kai fee maridee qidanoo. Qinee Pauroosa oo sia moo uriqarara fee qidanoo doo qinee faasai qimannimiqa sia moo fannoo uriqararafa mariaafoo qidaqa aanaamuru faqa maasa Yuda maqannaasa faqa nári mandainaina ameemaanai ureeqaqa mariaafoo qidaqa.

<sup>10-11</sup> Ooqeenaa tamummaqara fasiqausa akara minara maaqi qinoo maridanoo.

Aiqama maa maqa maaqanaki mariasakiqari moodaa fasiqa sia uqanna andeeqarafa maridanoo, aiqamausa miqirausa kai maridaqa. Misakiqari sia moodaa fasiqa Anutuna aanara randaaidanoo.

<sup>12</sup> Aiqama fasiqa anaasee uqanna Anutuna afusaqari quandaki kaqi runnamma ubeekamasee aqaranaki fimariafanoo. Sia moodaa fannoo amiqira oosana maraiddaqa sia uqanna.

<sup>13</sup> Misa noo aamara faiqi madikara foora oo raqanoo marifaqa faiqi kurididaqa. Misa ufa fannoo sakani ukaqa

nimiranara foora inoo maridanoo faiqi kuqannaruqaqa ufa kai qimariasa.

<sup>14</sup> Misa nooqiari sukufa kai qidaqa niquraree mariasa.

<sup>15</sup> Misa dauni faiqi kuqannarirana aupurarana nimimariasa.

<sup>16</sup> Miqi mariasa fimariaqoo kai faaqa fuisee qirana faqa aiqama ainaina kuridi kaaridiga turi taariqa fidaqa.

<sup>17-18</sup> Misa sia asoora aana qafeeqa sia Anutunara naaquqaranara irimariasa maridaqa.

Ooqeenaa tamummaqara fasiqauqa akara Yuda maqannaara faqa aanaamuru mariasara faqa amana amana kai miqi mariasee qimaqoofa maridanoo.

<sup>19</sup> Mooseena sandufakina mina ameemaanai mariasara qidanoo qimarifaqa maasa minara iridaqa. Faiqi anaasee aiqama maa maqannaasa nariara andeeqarusee qimaria ufaana oosana oosanauqa aruseeqa aiqamausa mareeqee Anutuna narira ufa ameemaanai quqaqeeera Mooseena sandufa ani maridanoo.

<sup>20</sup> Sia faiqi anaasee moo fannoo Mooseena sandufannai andeeqara fasiqaikamambi Anutuna afusaa mariannoo. Sia minarau Mooseena sandufa ani maridanoofau. Faiqi anaasee maasa aaqee marunausee qiaqeeera Mooseena sandufa ani maridanoo.

*Anutuna afusaa andeeqasee marirafa kooroo inoo maridanoo.*

<sup>21</sup> Doo maqee kamuqoo Anutuna afusaa andeeqafi marira oosana doo kooroo inoo maridanoo. Sia Mooseena sandufarau qidau, aaduma moo ufara qidaqa. Mooseena sandufa faqa tamummaqarausa ufa faqa doo minara kooroomasee maaqimminoo maridanoo.

<sup>22-23</sup> Faiqi anaasee nari Anutuna asauku mundirana saqarikiranannai Anutufa mareeqee nari afusaa andeeqaranaki quqaidanoo. Aiqamausa asauku mundirana Yisuna ufa irisee minasaa rusimariasa miqi qimariasa aiqama maqannaasa Anutufa mareeqee nari afusaa andeeqaranaki quqaidanoo sia raina rainiannoo.

<sup>24</sup> Aiqama maqanna fasiqa anaasee aaqoonara Anutuna innaaruna asumu marianasaaqari nianai mariafanoo minara Anutufa nari afaariranakiqari kaqi nimira ainaina nari asauku mundirana Yisunannai misa mareeqeenoo nari afusaa andeeqaranaki quqanniseenoo nari mandainainakinaana idukunnisanau.

<sup>25</sup> Anutufa Yisunannai faiqi anaasee mandainaina akiaqara mininnisaaninafa kambijaanifee qimasee Yisuna aqiqamasee nimufaqa aunirira saqarisaa ariqau. Mi fasiqa anaaseesa nariqa Anutuna andeeqaranaki sia amanaikiqa Yisuna saqarikidaqa. Minaki keeqaranannai Anutufa misa mandainaina taikannisaidanoo. Anutufa nari andeeqara oosana kooroo ianifeera qimaseenoo nari asauku mundirana aunirira saqarisaa quqaseenoo minannai faiqi anaasee mandainaina akiaqara nari maranau. Ooqi maru aukuaana Anutufa faiqi anaasee sia mandainainara narimarinau kisaaqasaa kasooينو marida nifauee marinau.

<sup>26</sup> Maqee mari aukuaana dauni ufa qimasee andeeqannisaidanoo nari andeeqarana kooroo ianifeera faiqi anaasee mareeqee nari afusaa innaaruna andeeqaranaki quqaidanoo. Anutufa Yisuna mareeqeenoo aunirira saqarisaa aruseenoo minannai maasa mandainaina taikaqisanau. Miqiranannai Anutufa qara ainaina kooroo idanoo, nari andeeqarana faqa Yisuna ufusaa irirana rusisee mi mau fimariasa mareeqee nari afusaa andeeqaranaki quqannisarana faqa kooroo idanoo.

<sup>27</sup> Yuda maqannaasa Mooseena sandufamau fidaqa nariara andeeqarausa maridee qimasee nari nipatara nimooqida maridaqa. Sia sandufa miqinoo maridanoo Anutuna



ufasaa irirana mundinoo marifa nari mina mandaagee marinafa mifa kai andeeqarafa maridanoo. Mifa kai Anutuna innaaruna andeeqaranaki quqaqisaidanoo.

<sup>28</sup> Minara maasa maaqi qidaqa Yisuna saqarikiranannai kai Anutuna innaaruna andeeqaranaki keeqafi mariannoo, sia Mooseena sandufamau finnanannai innaaruna andeeqaranaki keeqeefaranoo.

<sup>29</sup> Anutufa Yuda maqannaa Anutufa kai fee maridanoo, aanaamuru mariasa Anutufa faqa maridanoo fee. Doo Yuda maqannaa faqa aanaamuru aiqamausa faqa Anutufa maridanoo.

<sup>30</sup> Anutufa moodaa maridanoo, moodaamau fimarifa maridanoo. Yuda maqannaasa Yisuna saqarikiranannai Anutufa mareegeenoo nari afusaa andeeqaranaki quqannisaannoo aanaamuru faqa nari afusaa andeeqaranaki quqannisaannoo anaamuru mariasa faqa miqi kai masee Yisuna saqarikinnanannai nari andeeqaranaki quqaannoo.

<sup>31</sup> Miqunannai maasa Yisuna saqarikidaqa sia minannai Mooseena sandufa mareeqee aqidaqa, sia miqidaqa maasa minannai Mooseena sandufa uqeeraidaqa mi mau fidaqa, minara mi sandufana anoona paquridaqa.

## 4

*Abarahaamafa Anutunasaa nari irirana rusinau.*

<sup>1-3</sup> Innee Roomma maqannaasaki Yuda maqannaa akaqausa maridaqa. Maasa Yuda maqannaa qikeeku qikaaku Abarahaamafa naqaafeinuu. Mifa andeeqara mariranannai fee Anutuna afusaa andeeqarafa maridanoofeinuu. Sia minannaifau miqinuu Abarahaamafa miqinoo maridanoofau Anutuna afusaa nari andeeqaranara asasiini. Sia amana nari asasirafa marinuu, Mooseena akarakinuu ufa minara maaqi qinoo maridanoo.

Anutufa Abarahaamanara qinuu anee moomoosa nikausaikina marinnaranoo.

Miqi qunara Abarahaamafa iriseenoo oo kuqaa kambigaannoo fee qimasee nari irirana Anutuna mi ufanasaa rusiseenoo afaqa quqasee kisaaqasaa rakisi marinuu. Anutufa mina qafamaseenoo Abarahaamanara oo Abarahaamafa qini ufasaa ani irirana rusimarianafa mariananoo andeeqarafa mariananoo fee qinuu, minara Abarahaamafa sia nari andeeqaranara narasasirafa marinuu.

<sup>4-5</sup> Faiqi moo fannoo moo fasiqa ainainama isainanoo ainaina akoofa mina feefauru amiannoo. Aminanoo sia kaqi fifau qimiifoo qiannoo, nari mina ainaina kadaapirina akiaqara aminoo. Faiqi moo fannoo sia nari kadaapiriranasaa andeeqaranara maraidanoo kaqi nari irirana Anutuna ufasaa mundimarina Anutufa miqi mari fasiqana kaqi mareegeenoo nari afusaa andeeqaranaki quqaidanoo. Anutufa faiqi faiqi aagee mariasara andeeqarausee qimarifa maridanoo faiqi aanaaseeuqa sia nariqa kadaapirifa, kaqi mi ufanasaa nari irirana ruisainna fasiqa anaaseesa Anutufa nari andeeqaranaki mara quqannisaannoo.

<sup>6</sup> Anutufa aagee maru fasiqa anaaseesa sia narinau, misara andeeqara fasiqa anaaseera foora kaqi mareeqee nari andeeqaranaki quqanuu. Dafidifa minara maaqi qimasee akara rinuu.

<sup>7</sup> Anutufa mandainaina akiaqara mininnisoo fasiqa anaaseesa firaagoo asasiidaqa. Nari mandainaina Anutufa rafaagafusoonara asasiidaqa.

<sup>8</sup> Anutufa nari mandainaina akiaqara sia irisee naruannoo, mina akiaqara aunusee sia kafa minara ufa qiannoo. Miqira fasiqa anaaseeuqa minara irisee asasiidaqa. Doo Dafidifa miqimmasee akara rinuu.

<sup>9</sup> Dafidifa mi asasirausara Yuda maqannaasara kai fee fee qinuu. Sia miqinoo maridanoo. Anaamuru mariasa faqa asasifandia maqi qinuu. Qinee Pauroosa faasai Mooseena akarakinana Abarahaamanara qunafa maaqimminoo maridanoo. Abarahaamafa Anutuna ufa irisee nari irirana minasaa ruisoonara Anutufa minara kai irisee mina mareegeenoo nari andeeqaranaki quqanuu.

<sup>10-11</sup> Yairee fee Anutufa nari andeeqaranaki quqanoo fee inuu. Abarahaamana fainanduqu sooqoo fee miqinuu sia fainanduquagoo fee miqinuu. Sia fainanduqira qoo mi fasannai mareeqee quqanuu. Abarahaamafa Anutuna ufasaa nari irirana ruisoonara Anutufa mareegeenoo nari andeeqaranaki quqaseenoo mina kooroo ianifeera Abarahaamanara fainanduqannee qufanoo miqinuu. Miqi kai inoo Abarahaamafa aiqama Anutuna ufasaa irirana rusiranannai Anutuna andeeqaranaki keeqee marusa nikoofaikinoo marinuu. Miqi kai inoo sia fainanduqiraua nari irirana Anutuna ufasaa ruisoosa Abarahaamafa misa nikoofaikinuu.

<sup>12</sup> Sia fainanduqiraua faqa fainanduqiraua faqa nikoofaikinoo marinuu. Fainanduqiraua Yuda maqannaasa sia minara irisee Anutuna andeeqaranaki keeqaidaqa,

misa nári níkeeku níkaaku Abarahaamafa mariundee kai íqá sia nári fainanduqiranara iriseeqa nári irirana Anutuna ufasaa rusisoosa Anutuna andeeqaranaki keeqeefaranoo. Abarahaamafa sia fainanduqiraqoo nári irirana Anutuna ufasaa rusinau. Maqee fainanduqirafa mifa mariundeemmiaga.

*Abarahaamafa nári irirana Anutuna saa rusisoonara qima afeekaikirana maranau.*

<sup>13</sup> Anutufa maa maqa maaqanara Abarahaamafa nári aiku asauku saimbaqa maqa maaqa fee qinoo qimafeekaikinau. Sia Abarahaamafa Anutuna sandufamau andeeqasee finoofau mina akiaqara maqa maaqara qima afeekaikirana maranqofauinau. Mifa Anutufa ufasaa nári irirana rusisoonara minara kai Anutufa mina mareeqeenoo nári afusaa andeeqaranaki quqaseenoo maqara qimafeekaikinau.

<sup>14</sup> Anutufa nári nimianinna ainaina Kannaana maqa maaqa faqa asumu marirana faqa nári sandufamau kadaapirumasee fimariasaa kai nimiranoofau faiqí nári irirafa mina ufasaa mundirafa fifau kamambuannoo Anutuna ufa qima afeekaikira ufa faqa fifau maridanoo sia dadaqaiannoo.

<sup>15</sup> Sandufa fannoo Anutuna aranaqarana mareeqeenoo faiqisaa quqaidanoo. Sandufa marinnaqoo kai sandufa rukiarafa mariannoo. Sandufa sia marinnaqoo mina rukiarafa faqa sia miqoo mariannoo.

<sup>16</sup> Qinee Pauroosa Abarahaamana kafia qidaqa. Anutufa nimianinna ainainara Kannaana maqa maaqa faqa asumu marirana faqa qima afeekaikirafa Abarahaamafa Anutuna ufasaa irirana rusisoona minasaa mundinoo maridanoo. Miqunara Anutufa nimianinna ainaina maa maqana faqa asuma marifandinana faqa Abarahaamana nári aiku asauku faqa misasaa oonu aruakinausa faqa kaqi nimira ainainara foora mariannoo. Sia Anutuna ufaki kadaapirumasee fimariasaindi kai mi ainainausa marifaranoo Abarahaamana aanna ree mariasa, Anutuna ufasaa kaqi irirana rusimariasaa misaindi faqa mi ainainausa mariannoo. Maasa Anutuna ufasaa rusimariasaa nikoofa Abarahaamafa maridanoo. Maasa mina aanna ree mariasa kai mina aiku asauku maridaqa.

<sup>17</sup> Anutuna ooqeenaa akara minara faqa maaqi qinoo maridanoo.

Qinee ani Abarahaamana mareeqeeqa moomoo maqannaasa nikoofaikianeera quqeeqa.

Doo maasa mi ufana iriseeqa maaqimmidaqa, Abarahaamafa nári irirana rusisoo Anutufa nári qimafeekaikunara anoonee qidanoo. Mi Anutufa kuqirausakinaana mareeqee kaqi mariranaki quqee marifa maridanoo mina ufa fannoo qufanoo sia maru ainainafa kambiqaanu.

<sup>18</sup> Abarahaamafa nauraiqi kuqira foora inoo marufanoo Anutufa moomoo maqannaa nikoofaikianeera qimamufanoo Abarahaamafa mina ufasaa irirana rusiseenoo sia asasiqaa iraqoo asammaseenoo afeesinau.

Minara mifa kuqaa moomoo maqanna nikoofaikamambinau.

Ooqeenaa akara minara maaqimminoo maridanoo.

Anisaa aniaruakinausa moomoo marifaranoo.

<sup>19</sup> Anutufa mi ufana Abarahaamana qimamu aukua kuqirana adeedi ramasee wan handeereeta aukua adeedi ramasee marinoo nári anaqa Saraqana faqa faiqi maqara aukua oqai uqanna taikafufanoo marunara amiqimasee iriseenoo, Anutufa faiqi aanaaqira qimamunara iriseenoo sia Anutuna ufa afaimma quqanau, kaqi mina irirafa mina ufasaa irirana rusisee kuqaa kambiqaannoo fee qimaseenoo marinau.

<sup>20</sup> Abarahaamafa nári Anutunasaa nári irirana rusiqoofa sia quqasee finau, sia mifa Anutuna ufara qaara aundura irinau. Abarahaamafa nári irirana Anutunasaa rusisoofanoo quandakinoo Abarahaamana afeeka amufanoo faiqi kambiqaaninnanara Anutunara asasinu.

<sup>21-22</sup> Anutufa qimamu ufanara Abarahaamafa afeekaikamandeenoo Anutunara kuqaa afeeka maridanoo qimiannoo fee qimasee asasinu. Anutufa Abarahaamana mi irirana qafamaseenoo doo minara Abarahaamana mareeqeenoo andeeqara fasiqa fee qinuu, Abarahaamafa nári irirana Anutunasaa rusisoonara minara andeeqarafee qinuu.

<sup>23-24</sup> Andeeqara fee qu ufafa sia Abarahaamana kaifau miqi qimasee akara rinuu, maasara faqa akara rinuu. Maasa Karaambaiqa Yisufa kuqiranakinaana uqeeroonasaa irirana rusimarinuu maasara faqa akara rinuu. Maasa Anutufa mareeqeenoo andeeqara fasiqa anaasee kianinausa maasarammakara rinuu.

<sup>25</sup> Anutufa Yisuna mareeqeenoo maasa aaqee marunnaara faiqí nisaukuki nimisoofaqa kuqariqau. Maasa Anutuna afusaa andeeqaraua mariaqee qimasee kuqiranakinaana Yisuna uqeeranuu.

## 5

*Anutuna afusaa andeeqaranaki marirafa.*

<sup>1</sup> Maasa qeeqa irirana Anutunasaa rusiseega marianara doo maqee sia Anutuna aranaqaranaki aanoo iranaki maridaqa Anutufa narí andeeqaranaki quqaqisoofaqa minara doo maqee mina asoaranaki amiqiranaki maridaqa. Anutuna asauku mundirana maasa karaambaiqa Yisufa minannai kai mi asoaranaki maridaqa.

<sup>2</sup> Yisufa maasara kuqiranannai faqa maasa qeeqa Yisuna ufusaa irirana rusisaunannannai faqa Yisufa maasa mareeqee Anutuna kaqi afaariranaki quqasaifaqa maasa maqee minaki kikiqifa maridaqa. Minaki maridaqa, kasooqaqee innaarunai areenarana naida qimiannoo minara iridaqa asasidaqa afeesidaqa susuidaqa.

<sup>3</sup> Sia minara kai asasidaqa maqee marianaki ummaara oosana oosanakina maridaqa minaki faqa asasidaqa. Mandainaina ummaara darinaqa mi ummaarafa sia amiqimasee daruannoo minasaaqari afeeka marasee sia dauni Anutuna ufamau firarana kudoosaa-paanaura.

<sup>4</sup> Maasa oosana oosana ummaarakina sia umooqukida kaqi fimariananoo Anutufa mina qifafamaseenoo eedoo qiannoo. Mina eedoo qira ufa fannoo quandaki maasa qifeeqarainafa maasa Anutuna narí areenarana qimianinnanara asasamasee afeesidaqa maridaqa.

<sup>5</sup> Mi asasirana afeesirafa sia qisaurirana qimiannoo Anutufa narí naaquqara maraqauna kaqi qimimarifa maridanoo. Anutufa narí naaquqara maraqaunannai maasa naunduraki nammariara foora narí aidirana maasa naunduraki adiaqimaqeenoo narí areenarana naida qimiannoo.

<sup>6</sup> Ooqai maasa Anutuna andeeqaranara sia amanaiqiqa oorudupiqa mariafananoo Anutuna andeeqara aukuanasaa Yisufa maasa mandoosana maree mariafanansara maasara kuqunnimaqanau.

<sup>7</sup> Faiqi moo fannoo sia moo fasiqara qimudao qimasee mina amaaqa maqasee fifau kuquannoo, abee sia fee faiqi moo fannoo moo fasiqara amiqira fasiqara qimudao qimasee mina amaaqa maqasee kuquannoo fee.

<sup>8</sup> Yisufa sia maasara amiqirausee qimaseenoo maasa qimaaga maqaseenoo kuqinuu. Maasa qeeqa mandainainaki kaqi mariafananoo asauku mundirafa maasara kuqunnimaqanau. Miqunannai Anutufa narí kaaqa maasara amuqisirana aidirana kooromaseenoo maasa uqaqifiqanau.

<sup>9</sup> Asauku mundirafa maasa mandainaina nariara mareenoo kuqinoo narí fidika teeqinoo maasa mandainaina akiaqara taikoonannoo Anutufa minannai maasa daundurakinaana mareeqee narí andeeqaranaki innaaruna mara quqaqisanau. Anutufa mina kuqiranara irisee taikara faasaana narí aranaqaranakinaana kuqaa uqanna asumu mareeqeenoo quqaqisaannoo.

<sup>10</sup> Maasa Anutuna namuqaa marufanoo mifa narí amaaku maasa mandainaina arirana maroonara iriseenoo mina kuqiranannai aqoondi kamma quqaqisaifaqa maridaqa. Asauku mundirafa kuqunannai Anutuna aqoondi kamambi maridaqa kafaqa Yisuna kaqi mariranannai mifa taikara aukuaana Anutuna aranaqaranakinaana kuqaa uqanna maasa mina aqoondiuqa mareeqee asumu mariranaki quqaqisaannoo.

<sup>11</sup> Sia mina kai, Anutufa maasa aqoondi kamma qimaqoonara irisee Anutunara dufi dufi qidaqa asasidaqa. Anutuna asauku mundirafa Yisufa maasa karaambaiqa minannai maasa Anutuna aqoondi kiqa asasidaqa.

*Adamanasaaqaraafa kuqirafa Yisunasaaqaraafa findifirafa.*

<sup>12</sup> Ooqai indaaru moodaa fasiqasaaqaraafa Adamanasaaqaraafa maa maqa maaqanaki aaqarafa aninuu. Doo mi aaqarana akiaqara kuqirafa moodaa kari ani marinuu. Moodaa fasiqa Adamanasaaqari aiqama maa maqana afaaqasana maria fasiqa anaaseesa mifa aaqoona akiaqara misasaa faqa kuqirafa rafaafa finoo marufa maridanoo.

<sup>13</sup> Aiqaamausa aaqoonara rafaqaafinoo maridanoo Mooseena sandufa sia ani marukamuqoo aaqarafa doo ani marufa maridanoo. Mi aukuaana mi fasannai sandufa akara rirana sia marunara Anutufa sia misa rukiaranara irinuu.

<sup>14</sup> Indaaruuqaa fasiqa Adamana saaqari mi kamusaqa kuqirafa aniufanoo mini Mooseena raquraminuu. Mi kamusaqa misa aaqarana Anutufa sia irinuu, kuqirafa kaqi kai aiqama maqanna kaqi kai rafaqaafunnimaqanoo marinuu. Sia aiqaamausa Adamana aanna ramasee Anutuna ookinaa ufa rukiaqau. Nariki moo aaqarafa kaqi marunara kuqirafa kaqi kai rafaqaafunnimaqanoo marinuu. Adamafa kasooqaqee kambiqaanina fasiqana Yisuna kikiqisirafa marinuu.

<sup>15</sup> Miqanda sia amana amana kai maridaqa Anutuna kaqi nimira ainaina Yisufa sia Adamana aaqarafara foora maridanoo, mifa aaduma maridanoo. Dinni kuqaa faiqi

moomoosa mi moodaa fasiqana Adamana aaqaranaki kuqiqau. Mina dinni Anutuna kaqi afaarirafa Adamana aaqarana uraaqaranoo maridanoo. Anutuna kaqi nimira naaru marirafa moomoosa nimufa moodaa fasiqannai afaaramandee naaru marirana nimufa mifa faqa Adamana aaqarana uraaqararafa maridanoo. Mi moodaa fasiqafa Anutuna asaku mundirafa Yisufa maridanoo.

<sup>16</sup> Anutufa afaaramandee naaru marirana nimianinnafa moodaa fasiqa Adamana mina aaqarana uraaqaranoo maridanoo. Mi ooreeqarana faqa mi uriqarafa faqa miqanda rainarafa maaqimminoo maridanoo, dinni mi moodaa fasiqana nari moodaa kari aaqamasoona akiaqara Anutufa nimaarusira ufa quqaqoofa maridanoo mina dinni faiqi anaasee moomoosaki aaqarafa kambiqafi marufanoo Anutufa sia minara narinau, kaqi nari afaarinoo niminoo qinau, doo andeeqarausa mariafanoo nimaarusira ufa doo taikeneo fee qinau.

<sup>17</sup> Qinee kuqaa anoona ufa qimannimianauro. Kuqaa moodaa fasiqa faiqi Adamana mina aaqarana akiaqara kuqirafa kambiqeenoo aiqama maa maqa maaqana afaaqasasa mariasa kuqirafa oosana araseenoo manda rakisira rakisinnimaqaidanoo marifa maridanoo. Mi ufana dinni kuqaa moodaa fasiqasaaqaraa ainainirafa asaku mundirafa Yisufa mina ainainirafa Adamana uraaqaranoo maridanoo. Faiqi anaasee Anutuna rairairafa afaarirana faqa mina kaqi nimira andeeqarausa faqa maree mariasa misa Yisufa asaku mundiranannai sia Adamana kuqiranaki marifaranoo innaarunai kaqi mariranaki afeekaikirausa marifaranoo.

<sup>18</sup> Dinni moodaa fasiqa Adamana oosana maaqimminoo maridanoo, mi moodaa fasiqana aaqaranasaa faiqi anaasee aiqamausa kuqira ufa ameemaanai maridaqa. Mina dinni miqi kai masee moo fasiqa Yisuna moodaa kari andeeqaina akiaqara kuqira ufakinaana idukueegenoo kaqi mariranaki quqaidanoo.

<sup>19</sup> Dinni moodaa fasiqa ufa rukiarana akiaqara faiqi anaasee moomoo aaqaranaki aqufiqau. Mina dinni miqi kai masee moodaa fasiqa Yisufa Anutuna ufamau firana akiaqara moomoo fasiqa anaasee Anutuna andeeqarausaikiga marifaranoo. Minara qinee Pauroosa qiqa, (Yisufa ooqeenaa Adamana kikiqisirafa marinau maqi qidaqa.)

(Mooseefa sia kambiqoo kamuqoo mina sandufa sia marufanoo faiqi anaasee nari mandainainara mana mana imariqau.)

<sup>20</sup> Anutufa nari sandufa nimaarusira ufa Mooseenasaa nimufaqa nari mandainainara irufanoo firaanaikinau, miqinoo firaanaikianifeera Anutufa aminau. Faiqi anaasee mandainaina firaqoo ooru fimarufanoo Anutuna afaarirafa mina aakaarinni ooraqaarenoo ooriqaranoo marinau.

<sup>21</sup> Dinni aaqarafa kuqiranannai aiqama maasa rafaqa fidanoo mina dinni miqi kai masee Anutuna afaarirafa Yisuna andeeqaranannai maasa rakisiqimaqaidanoo qifiqeeqeenoo innaaruna asumu mariranaki quqaqisaidanoo. Anutuna asaku mundirana maasa karaambaqa Yisunannai qifiqeeqee quqaidanoo.

## 6

### *Mandainainakiqari kuqira fooramidaqa.*

<sup>1</sup> Anutufa nari afaarirana maasa qimunara minara naqi fee qianauree. Maasa maaqi qimasee aaqamasee qianauree, maasa mandainaina aaqaranaki kaqi mariananoo Anutufa mina minnisaina afaarirafa firaanaikiee iannoo fee qianauree.

<sup>2</sup> Oo sia uqanna maasa miqi qianauro Yisufa aunirira saqarisaa kuqinau, maasa mina faqa kuqiira foora iqa marunnaara maqee maria mandainainakiqari kuqiira foora iqa maridaqa. Naqimasee maqee mari mandainainaki fuanauree doo kuqira foora iqa maridaqa.

<sup>3</sup> Innee maa ainainnara amiqimasee iridee sia fee iridee. Maasa Asaku mundirana Yisuna auqusaa nammari maraafannaqoo maasa Yisuna saimbaqa nari kuqiranaki keeqeeqa nammari mina kikiqa ususeeqa mareeqa.

<sup>4-5</sup> Maasa nammari maraafannannai maasa Yisuna namufaqa qikundeera foora iqa nari kuqirana naida qimidanoora foora qinoo, mina akoofa nari kaaqa areenara afeekannai nari asaku mundirana kuqiranakinaana mara findifuna, maasa miqi kai masee maasa fuka mariranaki mariaqeeera qinoo maasa kuqiranakiqariara foora findifumaqisanau. Maasa Yisuna faqa kuqiqa moodaanaki kammidaqa miqikaimasee mina faqa findi fiqa mina moodaa kaqi mariranaki marianauro.

<sup>6</sup> Maasa maa ainainna iridaqa, maasa manda marira nirana ameemaanai maridaqa. Doo maasa minakiqari idukuaniifeera Anutufa maasa mareeqeenoo asaku mundirana faqa aunirira saqarisaa kuqannarinau. Maasa sia kaifaa ooqeenaa marirana maraqa nuaqeerau miqinau.

<sup>7</sup> Miqinoo marifaqa maasa minara maaqi qidaqa, faiqi moo fannoo kuqinanoo mina manda marira nirana mina afaaqasaaqaraafa idukuannoo sia kafaa amana minaki nuannoo. Maasa Yisunasaimbaqa kuquafannanara miqi qidaqa.

<sup>8</sup> Maasa Yisuna faqa kuqiranaki keeqaafanausee qidaqa maasa mina faqa findifi mariraree qidaqa.

<sup>9</sup> Maasa asaku mundiranara doo kuqiranakiqari findifinoo sia kafaa kuquannoo miqunara kuqirana afeeka sia kaifaa rafaafuannoo fee qidaqa.

<sup>10</sup> Mina kuqirafa mandainaina akiaqara arirafa moodaa kari kuqunara sia kaifaa maa maqanasaaqaraa mandainaina fannoo mina rafaafuannoo. Doo maasa mandainaina mina rafaafirana faqa, kuqirana faqa doo taikkeenoo. Doo maqee findififa mina marirafa Anutuna faqa maridanoo.

<sup>11</sup> Innee mi irirana marasee maaqimandee iriaqa. Maasa mandainainaki maridaqa kuqufifa doo sia minaki maridaqa maasa faqa kuqirausa maridaqa doo maqee asaku mundirana Yisuna faqa kuqiranakiqari findi fiqa mina faqa Anutuna kaqi mariranaki maridaqee qidaqa.

<sup>12</sup> Minara maqee manda marira nirana fannoo sia maasa qifaaqa rakisiqimaqaannoo, qaoo qiaqa. Sia maasa faiqi faiqi manda nidiranamau fuaqa.

<sup>13</sup> Manda oosana moo inni qumarinaqa sia inniqa nifaaqa minakina eedoo qimasee quqaafa. Sia miqiaqa maaqiaqa, innee kuqiranakiqari findifi mariasara foora aiqama nifaaqa eedoo qimasee Anutuna aramandunnai rumafifanoo mina inni nifaaqa mareegeenoo narí andeeqara saikaki quqaanifeera mina aramandunnai inneeqa nifaaqa quqaafa.

<sup>14</sup> Maqee innee sia Mooseena sandufa nimaarusira ufa ameemaanai mariafanoo innee Anutuna afaairana ameemaanai mariafanoo minara mandainaina fannoo sia inni rafaafa fuannoo.

*Andeeqara oosanaki rumbaqa maridaqa.*

<sup>15</sup> Maasa sia Mooseena sandufa nimaarusira ufa ameemaanai maridaqa Anutuna mandainaina minnisara afaairana ameemaanai maridaqara qifa manda oosanaki kaqi qifaaqa quqasee maraanauree. Oo sia uqanna.

<sup>16</sup> Innee maanara iridaqa maasa Yuda maqannaa ooqeenaa oosana irimariafanoo, maasa akaqausa karafusara foora moo fasiqa qeeqa qifaaqa amisee mina ainaina auqamaisaidaqa. Yafasiqanee ainaina maisaanauree, mi fasiqana qeeqa qifaaqa mina aramandunnai quqasaanoo mifa qini rakisi qimaqainaga mina ufara eedoo kai qianaara. Qinee manda oosanara faqa Anutuna ufa iriranara faqa miqandara qidaqa. Inneeqa nifaaqa mara maree manda oosana ameemaanai quqasaifanoo inni mareegeenoo kuqiranaki quqannisaannoo, miqooqari mina dinni Anutunai ubeekamafi minufara eedoo qimasaifanoo mifa narí andeeqaranaki quqannisaannoo.

<sup>17-18</sup> Oo Anutunara dufi dufi qiaqa. Innee ooqai mandainaina ufa ameemaanai marusa mariafanoo maqee innee inneeqa aiqamausa naundurannai qinee Pauroosa qimannimuna naamuaqira anoona ufa ameemaanai mariafanoo minara innee manda rumberanaki marufanoo Anutufa idukunnisoofaqa mina andeeqara rumberanaki fuafanoo.

<sup>19</sup> Inneeqa faiqi faiqi sia afeeka irirana faqaasa mariasa mariafaqa qinee Pauroosa kaqi maa ufana inneeqa irimariana amana kai qimannimianaqa iriaqeera qimannimidaqa. Ooqai innee inneeqa nifaaqa faiqi faqa anaasee faqa nariara nariara fanandirana faqa oosana oosana mandainaina faqa moo faqa moo faqa aaku aakummaffafa mariafanoo mina aramandunnai kai inneeqa nifaaqa quqasaafanoo doo maqee miqi kai iqa inneeqa nifaaqa aiqama andeeqara oosanamau fimariana aramandunnai quqasee maqeeidaqa naaquqara andeeqara mariranaki mariaqeera.

<sup>20</sup> Ooqai innee manda oosana rumberanaki maridaqa sia andeeqara ummaara ameemaanai mariqau sia minara irimariafanoo.

<sup>21</sup> Mi manda ummarafa ooqai mariunara maqee nisauri mariafanoo. Innee mi mandainainaki maridaqa minakiqari nane mo amiqira ainaina mareeusee. Maqee minara iriseeqa ooqai maraafannainainara nisaurirainaina maraqiafanoo qidaqa. Mi manda oosanamau fiifiufa kuqiranai kai ubeekke marinau.

<sup>22</sup> Doo maqee innee mandainainakiqari idukiqa mariafanoo Anutuna rumberanaki keeqafi mariafanoo. Doo innee miqunara inni marirafa aiqama doo minaindi kakai mafi mariinaqa taikara aukwana innaarunai marirana inni nimiannoo.

<sup>23</sup> Dinni manda oosana fannoo narí ainainimariasaa naarama quqaseenoo narí ainainirana akiaqara feefauru nimidanoo mi feefaurufa kuqirafa kai maridanoo. Kafaa mina dinni Anutuna kaqi nimira ainaina innaarunai naaru marirafa sia ainainirana akiaqara

maridanoo, mina asaku mundirafa maasa karaambaiga Yisufa mina faqa moodaanaki kiqa maridaqa mina namufaqa innaarunai naaru marirana kaqi nimirafa mariannoo.

## 7

*Mandoosanakiqari maqee Yisuna findifiranaki maridaqa.*

<sup>1</sup> Oo qini qikaqaafasaa Roomma maqanna mariasa qinee Pauroosa maqee ufa qimannimirara innee amiqimasee irimaru ufana qimanniana. Faiqi anaasee sandufa faqa Mooseena sandufa faqa faiqi anaasee kuqiqa mi sandufana sia irifaranoo. Kaqi maru kamuqoo misa mina irisee mina ameemaanai maridaqa.

<sup>2</sup> Nimundara fasiqa anaaseera foora sanda ufa ameemaanai maridaqa. Mi anaaseena afaaqi kaqi marinanoo mi anaaseefa nari afaaqindiri sanda ufa ameemaanai maridanoo nari afaaqisaa atooqanoo mariannoo, afaaqi kuqu finanoo mina anaqa fannoo kaqi fifau mariannoo sia sandufa ameemaanai mariannoo sia nari afaaqisaa atooannoo.

<sup>3</sup> Mi anaaseena afaaqi kaqi marinanoo quandaki moo fasiqa marainnanara qummuari-mari anaasee fee qifaranoo. Mina afaaqi kuqufinanoo sandufasaaqaraafa doo idukinoo maridanoo, quandakinoo moo fasiqa marainnanara sia minara ummuarimari anaasee fee qifaranoo.

<sup>4</sup> Doo innee qini qikaqaafasaa innee faqa Mooseena sandufa ameemaanai mariasa doo innisaimbaqa qifaqa fannoo Yisuna saimbaqa kuqinau. Doo mi kuqiranakiqari mina Yisuna namufaqa findifiqa minaindikiqa Anutuna ainainiranaki andeeqasee anoona ainaina imarinakina mariaqera mariafanoo.

<sup>5</sup> Ooqai maasa qeeqa faiqi faiqi iriranamau manoo manaa iqa fimariafananoo Mooseena sandufa anireenoo maasa manda oosana afaurammeeqee mara uqeera kikiqa maseenoo quandakinoo mareeqeenoo kuqirana ameemaanai quqaqisanau. Minara Mooseena sandufa nimaarusira ufa fannoo maasa karafusara foora rumbaqimaqanau.

<sup>6</sup> Doo maqee iriaqa, maasa Yisuna faqa kuqira foora iqa maridaqa maasa karafusa rumbaqa marianasaaqari idukuaki maridaqa sia kafa oqeenaa mariranaki fuanaura. Maasa Mooseena sandufamau fuannana mifa maasa mandainaina mara uqeera quqaanoo minara mi mau sia fuanaura, fukamau Anutuna maraqauna aatata fuanaura.

*Sandufa fannoo paqurimma qimifaqa qeeqa mandainaina kaqi maridaqa.*

<sup>7</sup> Minara maasa Mooseena sandufara mandainainafee qianauree. Oo sia miqinoo maridanoo. Mooseena sandufa innee moosa ainainara sia nimuqusanifee qidanoo sia miqinoo marinaqa qinee moosa ainainara qimuqusimarina mina aqee unoo qunara sia irini mana mana kaimmunaiqini. Minara Mooseena sandufakinaafa doo kooroomandee mandainainara qimaqimifaqa qisauriqa.

<sup>8</sup> Mooseena sandufa fannoo moosa ainainara sia nimuqusiaqee qinoo marifanoo qini manda irirafa irisee quandakinoo firaqoo moosa ainainara amuqusidanoo. Minara sandufa sia maru kamuqoo mandoosanara oonumafi irirafa kuqinoo marufaqa mana mana imariafannana.

<sup>9-10</sup> Mooseena sandufa sia maru aukuaana sia faiqi anaasee narufaqa sia kuqira foora imariqau kaqi maridaqara foora imariqau. Mooseena sandufa nimaarusira ufa kambiqafufaqa misa naundurui manda oosana uqeera nimiranau. Miqimandaifanoo Anutuna kaqi marira nimira ufa fannoo kuqirana kai nimiranoo.

<sup>11</sup> Misa naunduraki mari mandainaina fannoo misa narirara rakisinoo marifanoo Anutuna sandufa aniraifanoo mina qumareenoo minannai misa naru quqeenoo.

<sup>12</sup> Mooseena sandufa faqa Anutuna naamuaqira ufa faqa andeeqarafa naaquqarafa amiqirafa maridanoo.

<sup>13</sup> Amiqira ainaina fannoo fee misa kuqa narinoo fee qianauree. Oo sia miqinoo maridanoo. Misa naundurakinaa mandainaina fannoo kai amiqira ainaina mara mareenoo minannai misa narinoo. Miqi mandainanoo misa naundurakinaa anoona mandainaina akooqoo kooroo ianifeera miqinoo. Doo mi mandainainafa Mooseena sandufa saaqari innooqeenoo firaanaikinoo maridanoo.

*Maasa qiqa daunduraindaraa irirafa oonu rarisee ani rarisee idanoo.*

<sup>14</sup> Qinee Mooseena sandufara kuqaa innaarunaindaraa ainainee qidaqa. Qini daundurakinaa mandainaina fannoo ainainara fasiqara foora qini feefaurummeeqeenoo nararamandunna quqaqisaqaisa mina rumbara saikaki maridaqa.

<sup>15</sup> Qinee mi saikanaki maridaqa qeeqa auqee marunna saikoosana faqa sia iridaqa. Qinee amiqira oosana didimarina mararee qidaqa sia maridaqa. Qinee dapi manda oosana fidiqaaira oosana kai maridaqa.

<sup>16</sup> Qini irirafa qikooqemari mandoosanna maraidaqa Mooseena sandufa fannoo qiniara aaqee mariifoo qimasaifanoo qini irirafa faqa mina irirafa faqa moodaaqoo apinoo marifaqa. Oo Mooseena sandufara anoona mariifoo qidaqa.

<sup>17</sup> Miqidaqa sia qeeqa maraqunafau mi manda oosanna maraidau. Mandainaina fannoo qini daundurak marifa mifa qini qifeeqaraifaqa mi manda ainainna maraidaqa.

<sup>18</sup> Qeeqa daundurakinaafa amiqira oosanna maraanee qifaqa qini irirafa anuqidanoo sia amanaikidanoo. Mina irdaqa maaqi qidaqa qiga faiqi faiqi qimuqusaki amiqiroosanna sia minaki marifanoo fee qidaqa.

<sup>19</sup> Amiqiroosanna auqararee qimasaidaqa miqooqari quandakifaqa qikooqemari mandoosanna kai auqaidaqa.

<sup>20</sup> Qinee qini qikooqemari mandainaina auqaananoo sia qeeqafau auqaidau qini daundurakinaa mandainaina fannoo mina auqaidanoo.

<sup>21</sup> Qinee amiqira ainaina iraree qunanoo mandainaina kai qini doorinni aniraifaqa mina kaimma auqaidaqa. Mi sandafa kai qini daundurak irirana qimidanoo.

<sup>22-23</sup> Qini qimuqusa ookina Anutuna sandufara asaidanoo qiga faiqi faiqi mari manda ainaina mifa kai qini raineeqeenoo nari rumberanaki quqaidanoo.

<sup>24</sup> Qiga manda qifaqa fannoo qiga daundura mareeqeenoo kuqiranaki quqaidanoo. Oo qinee nanaree kaaqa mandainainaki maridee firaqoo doori runidee. Qeeqa qifaqa qimana namufaqa kuqiranaki fuananoo yafee aniree minakinaana qini qimana mareeqee kaqi naaru mariranaki quqaqisaannoo fee.

<sup>25</sup> Oo dufi dufi Anutufa nari asaku mundirana Yisuna maasa karaambaqannai qini mareeqeenoo naaru mariranaki quqaqisaannoo. Doo maqee qinee minara maaqi qidaqa. Qini marirafa maaqimminoo maridanoo qeeqa qimuqusa daundurakinaa irirafa Yisunannai kai Anutuna sandufamau fidaqa qeeqa faiqi faiqi manda nirana marirana mandainaina sandamau fidaqa.

## 8

*Anutuna maraquna fannoo maasa daundurak dadaaqifaqa andeeqasee maridaqa.*

<sup>1-2</sup> Maasa Anutuna asaku mundirana Yisuna faqa moodaanaki marifanoo Anutuna maraquna fannoo kaqi marirana niminoo kuqirana manda sanda faqa manda oosana faqa minaki marunnana idukuqisaifaqa maridaqa. Minara maqee asaku mundirana Yisuna faqa moodaanaki mariasa sia Anutuna kuqira ufa ameemaanai maridaqa.

<sup>3</sup> Mooseena sandufa nimaarusira ufa sia amana maasa uqereeqeenoo maasa faiqi faiqi maasa marirafa kudoosaapaunanoo minara sia maasa uqeraaqiseenoo. Mooseena sandufa kadiqoofanoo miqoo Anutufa moo oosanannai anoonaikinai. Mifa nari amaaku aqigoonannai maasa faiqi faiqi naundurakinaa mandainaina arinau. Yisufa faiqi faiqi naundurakinaa manda ainaina maraqunifeera nari faiqi faiqi fooqaanaikamasee aqigoofanoo quminai.

<sup>4</sup> Maasakiqari akaqausa sia faiqi faiqi iriranamau fimariasa Anutuna maraquna sandufamau fimariasa maasara Anutufa qigafeenoo sia maasa andeeqarafa Mooseena sandufa amana ooru maridanoo, ooreeqanoo maridanoo. Anutufa mina qafamaseenoo maasa andeeqarafa Mooseena sandufa amana kai ooru fuanifee qimasee nari amaaku aqigoofanoo quminai.

<sup>5</sup> Faiqi faiqi naundurakinaa manda iriranamau fimariasa nari naundurakinaa irirafa nariqafa rafaqafunnisaifaqa mi mau fidaqa. Anutuna maraquna ufamau fimariasa maraquna aidimari ainainafa misa nitikuraki keeqafi rakisi qumaraifaqa mi mau fidaqa.

<sup>6</sup> Faiqi faiqi nidimari manda ainainafa ani atikuraki rakisinaa kuqirannai ubeekanoo maridanoo kafaq mina dinni Anutuna maraquna fannoo nari aidirafa ani atikuraki rakisinaa mifa ani mareeqeenoo kaqi mariranaki faqa asoaranaki faqa ubeekama amaqaannoo.

<sup>7</sup> Faiqi faiqi manda nidirafa nitikuraki rakisimarisa Anutuna namuqaakammiqa maridaqa, sia Anutuna sandufamau fidaqa, fidaqau sia amanaikiaqini.

<sup>8</sup> Nari faiqi faiqi iriranamau fimariasa sia amana Anutuna aidiramau fifaranoo.

<sup>9</sup> Innee Roomma maqusai mariasa qini qikaqaafasaaqqa innee sia miqimariasa Anutuna maraquna fannoo innikina marifaqa innee sia faiqi iriranamau fimariasa marifanoo innee maraquna ufamau fimariasa mariafanoo. Asaku mundirana maraquna siaifa sia minaindi maridanoo.

<sup>10</sup> Asaku mundirafa inni naundurak namummaqainaqa mina maraquna fannoo inni nifaqa mandainaina fannoo narinoo marinnana sia minara iridanoo qafaidanoo Yisuna kuqiranara iriseenoo kaqi marirana inni nimana kaqi nimidanoo.

<sup>11</sup> Anutuna maraquna fannoo Yisufa kuqiranakinaana marafindifinau. Yisuna mara findifu maraqunafa kai inni faiqi nifaaqa kuqiga marifanoo kasooqagee mi kuqirana uqeereeqeenoo kaqi marirana nimiannoo, nari maraquna inniki marinnanannai miqian-  
noo.

<sup>12</sup> Oo qini qikaqaafasaauga maasa moo ummaara ameemaanai maridaqa maasa faiqi faiqi manda nidirana ameemaanai sia maridaqa. Yisuna maraquna ummaara ameemaanai maridaqa.

<sup>13</sup> Innee maqee faiqi faiqi iriranamau fiqa doo kuqifaranoo. Anutuna maraquna ufa irisee minannai innee inneeqa manda oosana kuqaruseeqa innee sia kuqifaranoo kaqi marifaranoo.

<sup>14</sup> Anutuna maraquna fannoo nifiqee fimarisa Anutuna faiqi namu maridaqa.

<sup>15</sup> Anutufa nari nimimari maraqunafa sia inni manda rumberanaki quqaseenoo rufi-  
arana nimiannoo, mifa sia miqidanoo maaqimmiannoo inni mareeqeenoo inni Anutuna  
faiqi namu kammasaanaqa mina afeekannai kai qifaaqa quqasee maasa Anutunara  
maasa qikoonee qidaqa.

<sup>16</sup> Anutuna maraquna fannoo aniree maasa qeeqa maraquna minasaa ootupamasaan-  
nana maasa maraquna qimamida maaqi qidanoo innee Anutuna faiqi namu mari-  
fanoo fee qidanoo.

<sup>17</sup> Anutufa nari faiqi aanaaseera amiqi amiqira ainaina afeeda maqimaqaina maasa  
mina faiqi namu marianara minara maasa mifa innaarunai quqannimaqagai qumiasana  
kasooqagee maraanaura. Anutufa nari asauku mundirana amaqagai qumiasana faqa  
maridanoo mifa mina faqa maasa mirinni innaarunai naida qimiannoo. Maqee maria  
aukuana asauku mundirana kuqira aupurana dadaaqa maraanoo innaarunai mina  
kaaqa areenarana faqa naida qimiannoo.

*Maasa aupuraranaki maridaqa Yisuna kaaqa qarana afeesida maridaqa.*

<sup>18</sup> Maqee mari aukuaana Yisuna kuqu aupurana dadaaqa marainafa faqa maasa  
oosana oosana ummaara marainnana faqa kaqikaafa maridanoo, kasooqagee in-  
naarunai nari areenarana naida qimianinafa qafaananoo firaafa uqanna mariannoo sia  
maqee aupuraranara qianaara fifau ainainara foora maridanoo.

<sup>19</sup> Anutufa auqu quqoo ainainausa innaarunaindaraana faqa maqasaaqaraana faqa mi  
ainainausa aiqama moodaanaki kaaqa aupurana maridaqa Anutuna faiqi namu faiqi  
faiqi misa kuqiranakiqari findifiranara afeesidaqa. Misa kaaqa firaqoo minara afeesida  
maridaqa. Maasa Anutuna faiqi namu saimbaqa putaa iranakiqari idukuaqee qimasee  
kaaqa afeesidaqa.

<sup>20</sup> Innaarunai faqa maqasaa faqa mari ainainafa aiqama putaa inoo mandaikinoo  
rakeenoo madaapeekammidanoo. Sia nari kai miqidanoo Anutufa nari qimaqoomau  
fidanoo miqidanoo. Anutufa minauqa faqa faiqi narira ufa ameemaanai quqagoosa  
maridaqa madaapeekidaqa. Mi putaa marirafa qumaarandanoo maridanoo mina  
aufadara ufa faqa maridanoo maaqimminoo maridanoo.

<sup>21</sup> Aiqama mari ainainafa nari putaa kiqari kasooqagee idukufuannoo. Idukufi-  
nnoo Anutuna faiqi namu nari idukiranaki faqa idaaqira areenaranaki faqa keeqafi  
moodaanaki marifaranoo.

<sup>22</sup> Oosanasaaqari aiqama Anutufa auquqoo ainainafa anaasee innaamunai aupuraida  
ikiraqee marianara foora maqee putaa irafa ummaarandanoo maridanoo.

<sup>23</sup> Sia auquqoo ainainafa kai aupuraidanoo maasa faqa qeeqa faiqi faiqi manda  
marira nirana aupurana aupuraidaqa, kasooqagee Anutufa fira qumiasana maasa  
innaarunai qimiannoo, maqee oosana arasee nimira ainaina nari maraquna nimiqoosa  
maridaqa. Maasa Anutunara afeesidaqa aupuraidaqa mifa maasa aiqama qipatasaa  
marirana iriranakinaana idukusainafa nari faiqi namu kamambiqa innaaruna ququsaki  
mariaqee minara qeeqa faiqi faiqi manda marira nirana aupuraranara aupuraida  
afeesida maridaqa.

<sup>24</sup> Maasa Yisunasaa irirana rusiseeqa minara asasammasee afeesidaqa minannai  
innaaruna asumu marirana mareeqa. Asasamandee afeesimaria ainainafa anirainafa  
qafamasee maasa sia afeesianaura. Sia moo fannoo nari qafeemari ainainara afeesi-  
danoo, doo ani maridanoo.

<sup>25</sup> Maasa sia qafaa ainaina kambiqaanoommifoo qidaqa ubiqafi reendeenamandee  
asasamasee afeesidaqa.

<sup>26</sup> Miqikai inoo Anutuna maraquna fannoo anireenoo maasa Yisuna saqarikiranara ku-  
doosaapee mariasa dadaaqidanoo. Maasa nana innaaru fee qianauree qimasaidaqa nana  
ainaina kikiqususaidaqee innaaru qianauree qimarufanoo Anutuna maraquna fannoo  
maasa ooreeqara innaaru qirana qafeenoo innaarunai ooru maasara Anutunai firaqoo



dadaaqidanoo pisoopisoo mandee innaaru qidanoo, faiqi faiqi ufa sia amanaikifanoo ammaqasaidanoo firaqoo Anutufinnai maasara innaaru qidanoo.

<sup>27</sup> Anutuna maraquna fannoo Anutuna faiqi aanaaseera Anutunnai firaqoo pisoopisoo mandee innaaru qidanoo, sia fifau, Anutuna iriramau kai misara innaaru qidanoo. Anutufa faiqi nimuqusaki mari ainainara faasai qafee marifa marinara maraquna ireefandinna ainainara faqa faasai iridanoo moodaa irirana marinara maraquna maasara ireemari ainainara iridanoo.

<sup>28</sup> Maasa maa iriranna iridaqa faiqi faiqikinaana nari asumu mariaqeera qimasee nari rusandeesamumandee maroosa Anutunara nidimarisara Anutufa misasaa rakisidanoo oosana oosana ummaara mandainainna misasaa quqeemarina misa dadaaqida fee qidanoo misasaa quqaidanoo.

<sup>29</sup> Anutufa faiqi faiqikinaana rusandeesamumandee maroosa sia fifaufau maranau. Misa nari amaaku Yisunaikamambi mifara foora mariaqeera misa rusandeesamumasee mareeqeenoo utaaqama nimaqasoofaqa mariqau. Miqimasainanoo Anutuna amaaku fannoo moomoosa maqasaqaraasa mina akaqaafasaara foora maridaqa mifa misa oogu faiqi nifasaafara foora mafinoo marianifeera utaaqamma amaqanau.

<sup>30</sup> Anutufa nari maraqoosa naaramasoofaqa aniroofanoo mareeqeenoo nari mariranaki quqanau. Anutufa sia fifau naarama quqanau, naaramasee nari afusaa andeeqaranaki quqanau, minaki quqaseenoo innaarunai kaaqa areenarana faqa naida nininau.

*Sia moo ainaina maasa Yisunasaaqaraana amana rakee iannoo.*

<sup>31</sup> Maasa maa ufana aiqama irisee Anutunara naqi fee qianauree. Anutufa maasa dadaaqimarifa marinanoo yafee maasa amana rafaqa fuannoo. Sia amana moo fannoo maasa amana rafaqa fuannoo.

<sup>32</sup> Anutufa sia nari amaakuara irinau kaqi maasara qimudaoo qimasee kuqiranaki quqanau. Mifa nari amaaku uqanna rirrimma kaqi qiminanau nana ainainee moo ainaina sia qimiannoo, aiqama ainaina kaqi afaarida qimiannoo.

<sup>33</sup> Yafee Anutufa rusandeesamumasee maroo fasiqa aanaaseera mandainainara qimammaree nifairiannoo fee sia moo fannoo miqiannoo Anutufa nari uqanna misara mandainaina siaisee qidanoo.

<sup>34</sup> Yafee moo fannoo mina faiqi namu kuqira ufa nimiannoo fee. Sia moo fannoo amana miqiannoo. Anutuna asaku mundirafa Yisufa doo kuqufufanoo Anutufa kuqiranakinaana mara findifumasee kaqi mariranaki quqasaifanoo doo maqee Anutuna aqa asaku uqannai maridanoo maasara Anutuna oorisa innaaru qidanoo.

<sup>35</sup> Yafee moo fannoo asaku mundirana amuqusiranakinaana maasa rakeemasee kaqinni quqaannoo fee. Sia uqanna moo fannoo amanaikiannoo. Amanee mandainaina oosana oosana fannoo mina amuqusiranakinaana rakee iannoo fee qimuqumimari ummaara fee amanee Yisuna amuqusiranakinaana rakee iannoo fee Yisuna ufasaara narirafa mifee amana rakee iannoo fee. Aararee marinee amanee rakee iannoo fee kudikira fee rakee ianno fee ariranara deedaqirafa amanee rakee iannoo fee kuqirafa amanee mina amuqusiranakinaana rakee iannoo fee. Sia moo ainaina amana rakee iannoo.

<sup>36</sup> Tamummaqara fasiqa akaraki minara maaqi qidanoo.

Maasa Anutuna ufamau fimariasa faasaambaasaana aiqama kari Anutunasaara darirannara eerairidaqa. Anutuna ufa siaisa misa maasa kuqiranaki fimaria sipsipausara foora maasa maaqimma qidaqa, kuqa dariraridaqa.

<sup>37</sup> Tamummaqara fasiqauqa miqi qimaqoofaqa qinee Pauroosa mi aiqama ainainausara qinee maaqi qidaqa. Sia moo manda ainaina fannoo Yisufa maasara amuqusiranakinaana ani mara rakee iannoo mi mandainaina oosanna oosannafa maasa darirari marifanoo mi dariranna sia rafaqa fuannoo. Maasara amuqusimarifa asaku mundirafa maasa mareeqee uriqararanaki quqaqaisa maridaqa.

<sup>38</sup> Qinee Pauroosa maa ainainnara amiqimandee mapukusee iridaqa, sia moo innaarunaindaraa rakisira fee moo afeeka fee maqee mari ainaina fee kasooqaquee kambigaaninna ainaina fee kuqa dariranees kaqi mariranees.

<sup>39</sup> Innaarunai mari ainaina fee maa maqanasaa mari ainaina fee, Anutufa auqu quqaqoo ainainakiqari sia amana moo ainaina fannoo Anutuna amuqusiranakinaana ani qumaree rakee iannoo. Anutuna asaku mundirafa Yisufa maasa karaambaiqa fannoo maasa mareeqeenoo minaki quqaqaisa maridaqa sia moo ainaina fannoo minakinaana ani qumaree rakee iannoo.

## 9

*Pauroofa Isaraee maqannaasara qimudao qidanoo naiki raqeenoo qimanimu ufafa.*

<sup>1</sup> Qinee Pauroosa anoona ufa kai qimannimidaqa. Qinee asaku mundiranaindi maridaqa sia unna ufa qimarunasa maridaqa. Qini daakirafa Anutuna naaquqara andeeqara maraquna fannoo mifa rakisimarifaqa sia qinee unna ufa qianauro. Qinee qeeqa maqannaasa Isaraee maqannaara qimannimianauro.

<sup>2</sup> Misara firaagoo qimuqusimarifaqa qikiraqaidaqa qeeqa maqannaasa qeeqa moodaa qimaqi moodaa fidika rainarana raina niqiqoosa mariafanoo. Anutufa nari moodaanaki oonumafi iriqa ikiraqaidaqa.

<sup>3</sup> Misa Isaraee maqannaasa asaku mundiranasaaqaraana rakeemmiqa maridaqa. Anutuna narira ufa ameemaanai marianara qinee rakeemseeqa minni misa nimaqaqa maqanaqa misa aiqaree asaku mundiranasaa atooqafiqa naaru kaqi mariranaki mariaqaana.

<sup>4</sup> Misa Isaraee maqannaasa Anutufa aiqama maqannaasakinaana rusandeesamumandee Isaraee maqanna maroosa mariafanoo, Anutufa misa mareeqeenoo nari faiqi-namukamasee nari areenarara raina niniqiqoosa mariafanoo. Anutufa nari moodaanaki kira ufa oosana oosana moomoo nimiseenoo nari sandufa faqa Mooseenasaa quqasoona faqa niminau, misa Anutuna amooqirafa anoonamau fimariasa, misa Anutuna qima afeekaikira ufa moomoo maree marusa.

<sup>5</sup> Misa ooqeenasa faiqi nuqufaqaasa Abarahaamana faqa Isakeena faqa Yakoo-boona faqa misauqa faiqi namu niku nisauku mariasa, misa asaku mundirafa mi maqannaasaki qumu kambiqafufaqa moodaa maqanna marusa maridaqa. Anutufa aiqamausara rakisidanoo, naaru naaru mina amooqiaqa. Kuqaa.

<sup>6</sup> Qinee Isaraee maqannaasara irisee sia Anutuna qima afeekaikira ufara kadiqee maqi qidaqa. Anutufa sia aiqama Isaraee maqannaasa rusandeesamumandee nari faiqi namu mariaqee qimasee maranau.

<sup>7</sup> Abarahaamana aiku asaku atiufa faqa sia aiqama Anutuna aiku asaukukiqau. Minara qidaqa, Anutufa maaqi qimasee Abarahaamana qimaminau. Ani faiqi namukinaana Isakeena aiku asaku kai ani aiku asaku fee qianauro.

<sup>8</sup> Mi ufana Anutuna qimamira ufara qinee maaqi qidaqa. Abarahaamana dapi anaasee Qakaarana kaqi fifau maroona faiqi namu sia Abarahaamana aiku asaku fee qinoo maridanoo. Anutufa qima afeekaikiranannai maqoo faiqina mina aiku asaukuara Abarahaamana aiku asaku anoona uqannee qidaqa.

<sup>9</sup> Anutuna qima afeekaikira ufa maaqimminoo marinau. Qinee qeeqa andeeqara aukuaana aniree Saraqana dadaaqiananoo faiqi maqannoo.

<sup>10</sup> Sia mifa kai, maana faqa Reebeekana faqa qimannimianauro, Reebeekafa qaara faiqifaqaafa marinau, miqanda nikoofa maasa qikeeku qikaaku Isakeefa marinau.

<sup>11-12</sup> Reebeekafa faiqi maqaaninnaqanda mi faiqiqanda nuqu indaarugaa faiqi auqu Eesaufa mariannoo fee qinau. Mina innaaqianna maqaaninna faiqina auqu Yakoo-boonee qinau. Miqanda sia kambiqaraqoo Anutufa indaarugaa faiqira innaaqianaa faiqi mina ainainamma aisaaninna fee qimasee afaaqooqa qinau. Sia miqanda kambiqara maridaqau mandoosana fee amiqira oosana fee maraidammiafoo qimaseenoo fau mi ufana quqana. Anutufa moodaa maroo oosanafa Anutufa miqandara afaaqooqa quna sia nariqaqara oosanasaarau afaaqooqa qinau, nari irirana aidiranasaa mundunifeera indaarugaafa Eesaufa quandaki innaaqianaana mina ainaina maisannoo fee qinau.

<sup>13</sup> Ooqeenaa akarakinna ufa maaqimminoo minara maridanoo.

Qinee Yakoooonara dididanoo Eesaunara qikooqaidanoo fee qinau.

<sup>14-15</sup> Miqandara irisee Anutunara naqi fee qianauree Anutunara sia andeeqee maqi qianauree. Oo sia uqanna miqi qianauro andeeqanoo marifa Anutufa maaqi qimasee Mooseena qimaminau.

Qinee qeeqa iriranannai kai faiqi anaasee akaqausa narusee akaqausa nifuaanauro, qeeqa iriranannai kai

akaqausara qimuqusianaqa marasee amiqi amiqianauro.

<sup>16</sup> Minara aiqama ainaina sia faiqi nidiranasaa mundinoo maridanoo Anutuna amugusiranasaa mundinoo maridanoo.

<sup>17</sup> Ooqeenaa akaraki Mooseefa Faraona maaqi qimasee qimaminau.

Qinee Anutusa ani Faraona mareeqee Isipa maqanna karaambaiqi kianneera quqaqifana, qinee Anutusa ani Faraofa qini ufa rukioonara ani kuqaruanauro. Minannai qinee qeeqa afeeka faqa qeeqa duqu faqa aiqama maqa maaqa afaaqasasa mariasa iriaqee qimasee ani quqaqifana.

<sup>18</sup> Doo maqee maasa mi ufana iriseeqa Anutunara maaqi qidaqa. Anutufa narí kai irisee akaqausara amuqusifanoo amiqi amiqimmidanoo kafaa Anutufa narí kai iriseenoo akaqausa ufa rukiara oosana nimidanoo.

*Anutufa maqa qafeera foora maasa auquqisanau.*

<sup>19</sup> Innee mina iriseeqa quandaki maaqi qimasee aagamasee qini qimaqimifaranoo. Ani ufa miqinoo marinaqa maasa mandoosana maraananoo naqimasee Anutufa maasara aaqee mariasee qiannoo fee. Naqimasee maasa Anutufa auquqisoo mandoosana iriseeqa rakeemaki amiqira oosanamau fuanauree.

<sup>20</sup> Qinee mina iriseeqa maaqi qimasee ani qimamianaara, Anutufa aniara aaqee mariaanoo qimasee afairirana anee yafee maridane qandaki narí qimaminnaree anee kaqikaafa mariananoo. Qafee auqiranara iria. Faiqi moo fannoo maqa maraseenoo qafee auqimarifanoo mi qafeefa sia quandakinoo mi fasiqanara aqidanoo anee nanaree qini maaqimasee auqidane, sia qafee fannoo miqi qidanoo.

<sup>21</sup> Mi fasiqafa qafee auqimarifa narí iriranannai kai maqa qumaree turi iseenoo atakuseenoo mi maqana rainasee akaqana qumareenoo narí iriranannai kai amiqirana akara rirana auqidanoo kafaa mina dinni ati quqaqoona raina qumareenoo narí iriranannai kai moo kaqi dapi qafee kai auqidanoo.

<sup>22</sup> Anutufa miqikai maseenoo maasa auquqimagaganau. Maasaki akaqausa manda qafeera foora maasa akaqausa auquqimagaseenoo idaki fifandinausee qidanoo. Sia aaqee kai minara naruannoo naaru kasoogaqee mina akiaqara naruannoo. Kisaqasaa narí aanoo irana rafaqaqafusee mari inanoo naaru naruannoo. Migoo narí aanoonnai faqa narí afeekannai faqa miqoo mandoosana maree mariasa kuridi nimaqaannoo.

<sup>23</sup> Kafaa mina dinni amiqira qafeera foora kasoogaqee maasa mina kaaqa areenarana mareefandinausa akaqausa auquqisanau, mina amuqusa maasa ubeekanoo marisa maasasaa kai mina idaaqira moomoo areenarafa kooroo ianifeera maasasaa nammariara foora narí areenarana adiannimaqaganau.

<sup>24</sup> Doo maasa daaree mariasa doo misa kai doo maa maridaqa sia Yuda maqannaasakigari kaifau, aanaamurukigari faqa Anutufa daaree marisa maridaqa.

<sup>25</sup> Ooqai tamummaqara fasiqa moo auqu Qooseaafa mifa minara maaqi qimaqoofa. Sia qeeqa maqannaasa naarama quqasee qini faiqi anaasee fee qianaara. Qini qikooqemari maqannaasara qinee quandaki misara qini didimariasee qianaara.

<sup>26</sup> Akaqausara innee sia qini faiqi namu fee qimaria maqusakinaasa doo qimaria maqusanaasara kai misara kaqi marira Anutuna faiqi namu fee qifaranoo.

Doo Qooseeaana ufa miqinoo maridanoo.

<sup>27</sup> Isaiaafa Isaraee maqannaara maaqi qimasee akara rinau.

Isaraee maqannaasa nukuda moomoora foora iqa mariafanoo misakinaana Anutufa oodaa kai mareeqeenoo asumu mariranaki quqaannoo.

<sup>28</sup> Mi aukuanna mikari Anutufa dauni dauni mandainaina akiaqara marasee aiqama maqannaasa minannai naruannoo Anutufa faiqi aanaaseera kisaqasaa nifeesida mariranasaa doo taikееfo qimasee aiqamausa tautumasee naruannoo. Minara Isaraee maqannaasa oodaa kai Anutuna saqarikamandainanoo oodaa kai asumu mariranaki mara quqaannoo.

<sup>29</sup> Isaiaafa kafaa Isaraee maqannaara maaqi qimasee akara rinau.

Karaambaiaqa uriqararafa sia maasa ati oodaa mara quqasainanoofau Soodooma maqusa faqa Koomoora

maqusa faqa naanna ramaseenooofau aiqama taikasani, daridanoo oodaa mafi quqasoosa qaaramoo maridaqa.

*Isaraee maqannaasa Yisunasaa faandi ooniaru maqi farindamaki aqum fiqau.*

<sup>30</sup> Doo minara maasa naqi fee qianauree. Maana kai qianaara. Anaamuru mariasa sia Anutuna afusaa andeeqaranaki keeqararee qidaqa sia amani mariasa doo misa narí irirana Yisunasaa rusisee minannai mina andeeqaranaki keeqafi maridaqa.

<sup>31</sup> Misa miqiaq marifanoo Anutufa rusandeesamumasee maroo fasiqanaaseesa Isaraee maqannaasaa misa Mooseena sandufakiaqa randasee mi iriranannai Anutuna andeeqaranaki fuanauree qidaqa aana sia minaki marinara sia irirai munari minaridaqa aagamaki kaqi runnambiqau.

<sup>32</sup> Naqi fee mandee sia paquriqau. Misa Anutufinnai firana nári kadaapiriranasaa kai mundinoo maridanoo sia saqarikirafa minasaa mundinoo maridanoo. Misa anoona aana Yisunamau fimarianara qaoo qimasee Yisunara oonisaara foora niku amaki saamuriqau.

<sup>33</sup> Ooqeenaa tamummaqara fasiqa akarauqa mi ooninara maaqi qiqau.

Qinee Anutusa mi oonina Sioona maqusai quqaqaanaqa faiqi anaasee mi ooninasaa niku rupaurifaranoo. Faandi ooni miqirana qinee mi oonina quqasaanaqa minasaa

farindamaki saamurifaranoo. Moo fannoo narí irirana minasaa rusiqainafa sia kadooparaannoo.

Tamummaqarawsa Yisunara miqimmassee ooqai akara riqau.

## 10

<sup>1</sup> Oo qini qikaqaafasaa uqa Roomma maqusai mariasa. Qeeqa qimuqusa ookiqari qeeqa maqannaasa Isaraee maqannaasara Yisufinnai aniree mina asumu marirana maraaqera firaqqoo qimuqusidanoo. Qinee Pauroosa misara Anutufinnai firaqqoo innaaru qidaqa.

<sup>2</sup> Misa Anutunara aidiranaki keeqaranara rirafa firaqqoo marifaqa qinee nindafaunaqa sia anoona iriranamau fida Anutunara ridaqa, kaqi runnambidaqa.

<sup>3</sup> Misa Anutufa faiqi mareeqeenoo narí afusaa andeeqara oosanaki quqaranara sia irimariafaqa nariqa kai narí firosana nariqa kai uqeerasee mi mau fidaqa, sia Anutuna andeeqaranaki fimaria osana iriseeqa sia mina ameemaani keeqaidaqa.

<sup>4</sup> Anutuna asaku mundirafa Mooseena sandufamau Anutuna andeeqaranaki amanimariana aru taikkeenoo narí Yisunasaa naqqoo rusimariasaa kai Anutuna andeeqaranaki keeqaidaqa.

*Asumu marira ufa sia nianai maridanoo, daaqa maridanoo.*

<sup>5</sup> Anutuna andeeqara oosanaki faiqi finara maaqi qimasee Mooseefa akara rinau. Faiqi moo fannoo aanaaqisaa findifunakiqari andeeqasee Mooseena sandufamau fidanoo sia moo kari aaqainafa amiqisaa finafa kuqino innaaruna asumu marirana maraannoo.

<sup>6-7</sup> Kafaa mina dinni asaku mundirana saqarikiranannai asumu marirafa maaqimminoo maridanoo. Mooseefa kafaa minara maaqi qidanoo. Innee Mooseena sandufamau fimariasaa fifau firaqqoo munari minari mariasa innaarunai asumu mariranaki firree qimariasaa. Innee innaarunai ooruree asaku mundiranara randasee paqurimasee afiqee qumu dadaaqianifee qimariana fifau sia amanaikimari ainainara fifau kadaapirumasee maree mariafanoo. Asaku mundirafa doo qumu marinoo. Innee fifau maqa ameemaani ooqu keeqafi asaku mundiranara paqurimandee afiqee murusaifanoo mifa dadaaqianifee qimariafanoo fifau sia amanaikimari ainainara fifau kadaapiri mariafanoo. Asaku mundirafa doo kuqiranakiqari findifinoo maridanoo.

<sup>8</sup> Akara fannoo maasa inni qimannimira ufara maaqi qidanoo. Anutuna qimannimira ufa inni naqa maridanoo inni nifaurusaa maridanoo inni nimuqusaki maridanoo. Miqimmassee Mooseefa maasa faiqi anaasee qimannimimari ufanara Yisunasaa irirana mundiranara qidanoo.

<sup>9</sup> Maaqi qimasee qimannimidaqa, anee aneenna afaurunna Yisufa kuqaa karaambaiga maridanoo fee qimasee, aneenna amuqusa ookiqari kuqaa Anutufa Yisuna kuqiranakinaana uqeeranau maqi qimasainanoo Anutufa narí asumu mariranaki ani mara quqaannoo.

<sup>10</sup> Maasa qeeqa qimuqusannai Anutuna andeeqaranaki fidaqa qeeqa qifaurunnai mina kooroo iranannai Anutuna asumu mariranaki fidaqa.

<sup>11</sup> Tamummaqarawsa ufa minara maaqi qidanoo. Anutunasaa irirana rusirafa sia mi rusiranarau kadooparaannoo.

<sup>12</sup> Mi ufana aiqamausara qidanoo Yuda maqanna faqa aanaamuru faqa sia rainarafa maridanoo Anutufa aiqamausa narí aaree mariasa dadaaqirafa maridanoo. Aiqamausa amana amana kai Anutufa narí aaree mariasa firaqqoo naundura marirana amiqi amiqimannimaqaannoo.

<sup>13</sup> Tamummaqara fasiqa akarakinaafa minara maaqi qidanoo. Aiqamausa karaambaiga dadaaqianifeera aareemariasaa misa Anutuna asumu mariranaki fifaranoo.

<sup>14</sup> Naqimasee faiqi anaasee karaambaigara sia irirana minasaa rusimarinausa aareefaree sia amana aareefaranoo. Sia karaambaigara irimariasaa naqimandee fee irirana minasaa rusifaree. Moo fannoo oonu qimanniminaqa irifaranoo sia oonuree qimannimifaqa sia irifaranoo.

<sup>15</sup> Naqi fee maseenoo fee moo fannoo oonu qimannimiannoo fee moo afeeqaseeqa mina ati uaqeeifanoo amana oonu maridanoo qimannimiannoo. Tamummaqara fasiqa minara maaqi qimasee akara rumaqoofa maridanoo.

Amiqira fasaasa ufa maree animariasaa anirafa amiqirafa maridanoo.

Tamummaqara fasiqa miqi qimaqoofa maridanoo.

<sup>16-17</sup> Misa amiqira fasaasa ufa mini qimannimisoofaqa sia aiqamausa iriqau akaqausa kai iriqau. Eesaiaafa minara maaqi qimasee akara rinau. Oo karaambaiga maasa qimannimira ufa yausee iriaa, akaqausa moodaa kai iriaa. Eesaiaafa miqi qimasoofoofa

qinee Pauroosa minara maaqi qidaqa. Faiqi anaasee sia fifau kaqi Yisuna saqarikidaqa, mina aufakiana naaree irisee miqoo Yisuna saqarikidaqa, Yisuna aufakiana sia fifau naaqooki kambiqaannoo, faiqi qimannimiafanoo naaqooki kambiqaqifafa saqarikidaqa.

<sup>18</sup> Qinee Pauroosa minara iraidaqa Yuda maqannaasa ooqaindari sia fee Anutuna ufa irideeaa. Eeoo kuqaa misa iriaa, akarakinaafa misara maaqi qidanoo.

Misa ufa fannoo aiqama maqa afaaqasasa Yuda maqannaafimaruoqoo daraaninau. Misa ufa fannoo maqa dinni dinni ati munu raquraminau.

<sup>19</sup> Qinee Pauroosa kafaa iraidaqa, Isaraee maqannaaf Anutuna ufa iriqee iqau sia fee iriqau. Mooseena ooqai akarakinaa ufa dauni qimaqimida maaqi qidanoo.

Qinee Anutusa qumee Isaraee maqannaasa naunduraisaikiafanaqa fifau moo maqannaasara Anutuna ufa iridammiafoo qimasaidaqa rairai qimannimaqaidaqa. Qinee Anutusa qumee fuki faaki qunaqa furufarira maqannaasa qini ufa irisaifaqa qini faiqi namu Yuda maqannaasa mina qafamasee mi maqannaasara rairai qimasee doo mi rairai qiranannai nari faqa qini ufa irifaranoo.

<sup>20</sup> Mooseefa miqi qimasoofoano Eesaiaafa aranaiqi kooroomasee mi furufarira maqannaasa aanaamuruara maaqi qinau.

Qinee eedoo qimasaunaqa sia qiniara randeemaria fasiqa anaaseesa qini Anutusa paquriqa. Sia qini daaree mariaasa nifusaa qinee oonu kikiqiqa.

<sup>21</sup> Miqi qimaseenoo Isaraee maqannaasara maaqi qinau.

Qinee faasaambaasaana inni rafusira runaqa innee ufa rukieeqa kaqirunna fimarisa maqannaasa maridaqa rafusiranara ruflee mariafanoo.

## 11

*Anutufa Isaraee maqannaaf asumu mariaqeera akaqausa kai maraannoo.*

<sup>1-2</sup> Qinee Pauroosa kafaa Isaraee maqannaaf iraidaqa, kuqaa fee Anutufa Isaraee maqannaasara qao qimasee minnisanau. Oo sia uqanna minnisanau. Qinee Pauroosa Isaraee maqannaaf faqa maridaqa qinee Abarahaamana aiku asaku marunausa maridaqa, qinee Yakoooonaa amaaku Beesaminna ati maridaqa marunnanara Anutufa sia nari Isaraee maqannaaf qao qimasee minnisanau. Ooqai oosanaraseenoo maa maqa maaqanakina rusandeesamumandee maroosa mariafanoo. Ooqeenaa tamummaqarasa akarakinaana Eeriaafa Isaraee maqannaasara nifairidanoo niqidanoo afeekaikamandee Anutunara innaaru qinoo qinau.

<sup>3</sup> Oo karaambaiqa Isaraee maqannaasa ani ufara minniseeqa furufariqa ani tamummaqara fasiqauqa kuqa naruseeqa ani aandaufatufira ooni qaindauqa rapeepamma aqiqa. Qinee Eeriaasa qeeqarara kai ani ufamau fimarunaqa misa minara irisee qini faqa kuqa dariraree qimariafaqa ani qimamidaqa.

<sup>4</sup> Eeriaafa miqi qimasoofoano Anutufa qimaminoo qinau,

Oo sia aneennara kai qini ufamau fimarianaafa mariananoo. Qinee qisauku dinni taikasee dinni oonu qaarafaqa tauseenna fasiqa anaasee moomoosa uqanna utaaqamaqausa maridaqa sia unna Anutuna Baaranara innaaru qimariaasa qiniara kai innaaru qimariaasa maridaqa.

<sup>5</sup> Eeriaana aukuaana miqinoo marinau maqee aukuaana Isaraee maqannaasaki miqiminoo maridanoo, Anutufa misakinaana akaqausa utaaqamasoofoano nari amuqusiranannai utaaqamasoosa maridaqa.

<sup>6</sup> Minamusa Anutufa sia misa nirana marirana oosana qafamasee amiqira fee qimasee utaaqamannimaqanau, nari amuqusiranannai kai misa utaaqamannimaqanau. Anutufa faiqi utaaqamannimaqara oosana fannoo misa nimariana misa mariranasaa mundinoo marinanoofau sia anoona amuqusiranasaa mundinoo marini, minasaa kai mundinoo maridanoo.

<sup>7</sup> Isaraee maqannaasara nanee fee qianauree, maaqi qianauree, Isaraee maqannaasakinaana akaqausa Anutufa utaaqama nimaqagoosa kai Anutufa naaroo ufana irisee mifinnai fiqau. Aiqaama tia naaqooki ooni ititarausa maridaqa sia nari randee maruaana paquriqa.

<sup>8</sup> Tamummaqara fasiqausa misara maaqi qiqau.

Anutuna nimuqusaki faqa nitikuraki faqa ummaararana nimisoofaqa mi kamuqooqari aunduaridaqa kudoosaapaida maridaqa nifu qafaida sia qafaidaqa, naaqooki faqa sia iridanoo.

<sup>9</sup> Dafidifa faqa maaqi qimasee misara akara rinau.

Misa qoomaqa sakasee ooqai mariffanoo namuqaa anireeqa misa ititaannoo. Misa miqoo kuridiqa nari mandainaina akiaqara mareefara.

<sup>10</sup> Misa sia qafaagee qimasee Anutufa misa nifusaa ititaannoo. Nári ummaara fannoo aiqama kari nári nitaufakaaqaa mariraika kai idanoo nitaufaka saaeemminoo maridanoo. Miqimasee Dafidifa misara akararinau.

<sup>11</sup> Qinee Pauroosa Isaraee maqannaara maaqi qimasee iraidaqa, Yuda maqannaasa Yisunasa farindamaki saamuriqa kuridiranaki taikaranaki aguqqee iqau. Sia uqanna miqigau. Isaraee maqannaasa aqoonara Anutuna asumu marirafa aanaamurusaa aqufinau, Yuda maqannaasa aanaamuruuara rairaiqaaqee miqinau.

<sup>12</sup> Yuda maqannaasa aqaranara Anutuna firaa amiqi amiqirana aanaamuru aiqama maqa afaagasasa mariasa niminau. Yuda maqannaasaaqaraana aanaamuru amiqi amiqirana maraqa, kasooqaaqee taikara aukuaana Yuda maqannaasa Anutufa aiqama mareeqeenoo aanaamuru nimuna akiaqara firaa amiqi amiqiranaki uriqaranaki Yuda maqannaasa quqaannoo.

*Anutufa Isaraee maqannaasa minniseenoo aanaamuru anireeqa Anutuna aqoondik-iqau.*

<sup>13</sup> Qinee Pauroosa Yuda maqannaara inni qimannimiseeqa kafaa maqee inniara aanaamuru qimannimidaqa, Anutufa aanaamuru qimannimiranara diqiqoosa maridaqa inniki ainainimarunnanara asaidaqa.

<sup>14</sup> Anaamuru qimannimi marunaqa Yuda maqannaasa inniara Anutuna ufara iridammifoo qimasee rairai qimasee misa faqa irisee irirana mi ufanasaa rusiaqeeera asaidaqa.

<sup>15</sup> Yuda maqannaasa Anutufa mininnisooqaaqaa aanaamuru aniree Anutuna aqoondik-iqau. Kasooqaaqee Anutufa quandaki Yuda maqannaasa kafaa marinaqa kuqiranakiqari findifiara foora ifaranoo.

<sup>16</sup> Maasa Yuda maqannaasa Anutuna amira ainainara maaqi qidaqa. Innee feemu adiana kai raqeeqee Anutuna amifanoo mi feemufa aiqama minaindikakaimminoo mariannoo, kafaa innee saqari oosana amifanoo mi saqarifa minaindikai mariannoo.

<sup>17-18</sup> Doo qinee mi iriranamau fidaqa minara maaqi qidaqa. Oorifa saqari asumu saunara foora maridanoo. Asumu saqari ammuqu akaqafa raqanoo marifanoo kaasau oorifa saqari asaana raqeeqee minakina mini ookaamandee ummaqusainanoo minakiqari kambigaannoo. Innee aanaamuruuara kaasau oorifara foora mariafanoo. Yuda maqannaasa oorifa saqari asumu oosana maridaqa. Anutufa inni aanaamuru mariasa kaasau oorifa asaana foora asumu oorifa minaki ookaamasaifanoo kambiqaffaqa innee maqee Yuda maqannaasa akaqausa faqa misaindi oosana amiqi amiqiranasaaqaraana animaree mariafanoo. Innee aanaamuru mariasa asumu oorifa ammuqu raqaranaki innee ookaairausa mariafanoo, sia misara raqara asaana fidiqaaqaa iqa. Innee naqimaseeqee noori uqeeraseeqa inneeqara amiqirausee qidee innee ammuqu mariafanoo, sia ammuqu fannoo saqari oosana pooduqaidanoo, oosana fannoo ammuqu pooduqaidanoo, minara sia innee oosana mariasara Yuda maqannaasara fidiqaaqaa iqa.

<sup>19</sup> Innee minara irisee maaqi qifaranoo Anutufa maasa aanaamuara iriseenoo asumu saqari ammuqu raqafufanoo maasara kai iridanoo fee qifaranoo.

<sup>20</sup> Qinee Pauroosa minara maaqi qidaqa Innee doo kuqaa qiafanoo, Anutufa Isaraee maqannaasa sia irirana mina ufasaa rusimarufanoo aadana asaana foora raqanau, innee irirana mina ufasaa rusimarunara inni mareeqee minaki ookaa inau. Innee minara irisee sia noori uqeeraaqaa, rufiaaqa.

<sup>21</sup> Anutufa mi saqarina narindi Yuda maqannaasara sia amuqusinau sia Yisunara irisoonara kaqi ateekanau innee faqa rufiaaqa kaqinni faqa ateekaannoo, kaasaummia.

<sup>22</sup> Maanara amiqimasee iria sia aunuqa Anutufa nari qaara oosana maaqimminoo maridanoo mina dinni kaaqa faiqi anaaseera amuqisirafa maridanoo kafaa mina dinni manda ainainara aanoo irafa maridanoo. Mifa mandainainaki saamurimariasara aanoo irafa kai maridanoo, innee kaqi mina afaariranaki maqee maqee fimarifanoo mifa inni nifauamaseenoo amiqi amiqiannoo, minnisaifanoo inni faqa Yuda maqannaara foora aadana asaana foora inni rauda aqusaannoo.

<sup>23</sup> Yuda maqannaasa nariqa dapi nirana minnisee quandaki kafaa aniraifanoo Anutufa misa qumaree nari nimaqaqaki kafaa ookaa iannoo, Anutufa mina faqa amanaikamianoo.

<sup>24</sup> Asumu saqari asaana ateekasee nari amaaqakina ookaamandainanoo dauni ururaannoo, mi oosanafa sia kadaapirirafa maridanoo. Kaasau saqari asaana ateekasee asumu maraqa nua oosanaaki ookaa inanoo sia dauni dauni kambigaannoo kadaapiruannoo. Minara irisee Anutufa Yuda maqannaasa oorifa saqari asaana foora raqaaqaa mariasa amana mareeqee nari amaaqakina kaifaa ookaa inoo sia kadaapiruannoo. Innee aanaamuru mariasa kaasau oorifa saqari foora mariafanoo asumu saqarikina innee ookaamaqaifaqa mariafanoo. Innee sia Anutufa kafaa Yuda maqannaasa ookaa

ianinnanara sia amanee qiaqa, doo Anutufa amana sia kadaapi maridanoo, kaqimma ookaa iannoo.

*Anutufa aanaamuru naaree marasee miqoo Yuda maqanna naundura quandaannoo.*

<sup>25</sup> Oo qini qikaqaafasaauqa moo kukeeqara ufa inniara iriaqeera qimannimiana, innee maa ufana iriseega inneeqa noori uqeerarana mara maqaruseega miqooqari reendeenamandee marifaranoo. Mi anoona ufafa maaqimminoo maridanoo. Isaraee maqannaasa naaqooki ooni ititarafa sia naaruara miqinoo mariannoo. Anutufa qinoo aanaamuru marinausakiqari qinee qeeqa qiafanausa misa kai Yisufinnai irirana ubeekaifaqa Yuda maqanna naaqooki ooni ititarana tatusaanaqa misa faqa anifaranoo.

<sup>26</sup> Maaqimmasee aiqama Isaraee maqannaasa Anutuna asumu marirana mareefaranoo. Tamummaqara fasiqauqa maa ufamau mareefaranoo. Asumu maree marifa Sioona maqusai moo auqu Yeerusaree mi maqusanaindari aniree asumu marirana

nimiannoo. Mifa Yakooboona aiku asaku mina atiuqa mariasa mandainaina aiqama rukannisaannoo.

<sup>27</sup> Mikari qinee Anutusa Yuda maqannaasa aaqarana akiqara mara aqunniseega qinee Anutusa qeeqa moodaanakikirafa ufa Abarahaamana faqa Isakeena faqa Yakooboona faqa ufa qiafannana mikari mi ufana anoona doo anoonaikiannoo.

Tamummaqarausa ufa miqinoo marinara qinee Pauroosa maaqi qidaqa.

<sup>28</sup> Yuda maqannaasa Yisuna amiqira fasaasa ufa minnisonara Anutuna ufaasu namuqaa kammiaq maridaqa. Sia fifau, inni aanaamuru mariasara iriseenoo Anutufa miqimma nimaqasoofaqa miqidaqa. Anutufa Abarahaamana Isakeena Yakooboona iriseenoo, aiqama aanaamurukinaana rusandeesamumandee maroonara iriseenoo misa aruakinausa misa amiqimma nimaqoonara iriseenoo Isaraee maqannaasara qini qiigoondi fee qidanoo.

<sup>29</sup> Anutufa nari rusandeesamumasee maree mariasara faqa nari amiqi amiqimma nimaqee mariasara faqa sia qaara iriranaikidanoo andeeqaidanoo sia kaaqa Isaraee maqanna namuqaakino, ufaasu kai.

<sup>30</sup> Innee aanaamuru marusa oqai ufa rukiee marusa mariafanoo doo maqee Yuda maqannaasa ufa rukioonara faqa innee mina ufa irunara Anutuna nifauarana maree mariasa mariafanoo.

<sup>31</sup> Miqi kaimmasee innee aanaamuru Anutuna nifauarana maree mariafanoo Yuda maqannaasa faqa Anutuna nifauarana maraqqeera ufa rukiaranaki quqasoofaqa mariafanoo.

<sup>32</sup> Anutufa aiqama maqannaasa nari nifauara oosana uqannifiqaanifeera aiqama maqannaasa ufa rukiarana ameemaanai mara quqasoofaqa Anutuna nifauarana oosana qafaaqeera.

*Pauroofa Anutuna amooqu ufafa.*

<sup>33</sup> Oo Anutuna irirafa ainaina faifa firaqqoo maridanoo. Mina irirafa faqa auqarafa faqa firaqqoo farummara foora meemai unaurinoo maridanoo. Mina naamuqira ufa oosana yafee mina iriannoo fee, sia amanaikidaqa. Mina nirana yafee iriannoo fee.

<sup>34</sup> Tamummaqara fasiqauqa minara maaqi qiqau.

Yafee karaambaiqa irirana faasai iriannoo fee yafee fuki faaki iannoo fee.

<sup>35</sup> Yafee moo ainainara qufiqeenoo qimianifee qimasee amiannoo fee. Sia moo fannoo amanaikiannoo.

Doo tamummaqara fasiqa ufa miqimminoo maridanoo qinee Pauroosa minara maaqi qidaqa.

<sup>36</sup> Naqimasee moo fannoo Anutuna moo ainaina amiannoo fee nari kai aiqama ainaina auqafa minaindi kai maridanoo. Aiqama ainaina minasaa qaraafa kai afeekaikino maridanoo. Aiqama areenarafa naaru naaru Anutunaindi kai mariannoo. Kuqaa.

## 12

*Pauroofa andeeqasee nirana mariranara naamuqinuu.*

<sup>1</sup> Oo qini qikaqaafasaauqa, Anutufa inniara amuqusirana faqa amiqi amiqirana faqa firaqqoo marinara afeekaikamandee qeeqa qimuqusa ookiqari inni qimannimidaqa innee inneeqa marirana nipata aanda u tatufiranara foora Anutuna amiaqa, Anutuna ufamau fidaqa mina aidira ainaina andeeqasee marirana mina mina amiaqa. Miqiqqa inniqa Anutunara innaaru qirafa amooqirafa anoonaikiannoo.

<sup>2</sup> Minara irisee maaqimmiyaqa sia maa maqa maaqanasaa mariasa naanna raaqa. Innee eedoo qifanoo Anutufa inni nitikura amiqimmasee firaqqoo quandanniseenoo

naunduraki nirana faqa quandannisaannoo. Innee miqimmaseeqa Anutuna irirana faqa Anutuna aidirana faqa amiqiranee qimariana faqa idaaqiranee qimariana faqa amiqimandee irifaranoo.

<sup>3</sup> Qinee Pauroosa Anutufa afaarida nimimari ainainara irisee maaqi qidaqa. Innee sia inneeqara amiqirausee qimasee firaqoo inneeqa nimoogiaqa innee andeeqasee reendeenamaseeqa inneeqa nimana kai irirana iriaqa. Aiqamausa nariara qidaqa Anutufa faiqi anaasee dadaaqira nimirana irisee mina amana kai nariqa kai iriaqa, sia noori uqeerasee inneeqara firaqoo irirana faqaasee qiaqa.

<sup>4</sup> Maasa qipata moomoo ati ootupanoo maridanoo. Mi ootupara atisa naadu naadu ainaina quqee mariasa maridaqa.

<sup>5</sup> Maasa miqirausa maridaqa asaku mundiranasaa ootupaqa marunausa moomoosa naadu naadu nipata atiara foora mariasa moodaa qipata foora mafiqa Yisunaindi maridaqa narisaa narisaa atooaqa maridaqa narisaa narisaa mundiqa mariaqeera.

<sup>6</sup> Minara maasa aiqamausa irisee nariara nariara aadu aadu akoofasaiki marinna ainaina marasee minannai Anutufa nimuna akoofasaikirana amana kai minannai kai aiqamausa nari dadaaqi nari dadaaqiaqa. Anee Anutunaindaraa ufa irisee faiqi anaasee ufa qimannimi marianafa maridana, Anutufa nari saqarikirana amuna mina amana kai qimannimia.

<sup>7</sup> Anee dadaaqimarianafa akoofasa maridana doo misa dadaaqia. Anee ufa akoofasa maridana doo mina ati qimannimia.

<sup>8</sup> Anee reendeenamandee fuki faaki qirana akoofasa maridana doo miqimmia. Faiqi anaasee moo fannoo nari akaqa nimira ainaina akaqausa raina nimidanoo sia akoo akaa ida nimia, oori inaa inaa ida nimia. Anee faiqi anaasee rakisi marinafa maridana anee faqa eeraaramasee ainainia. Faiqi aanaaseera qimudaoo qimasee dadaaqi mariasa sia nikoo nikaa mandeeqa miqia, اساسmandee oori inaa inaa idana dadaaqiaqa.

<sup>9</sup> Inniki nariara nariara nimuqusirafa inniqa nimuqusannai kai nariara nariara nimuqusiaqa. Innee aiqama manda mariranara fidaqaamasee amiqira marirana kai rakisissimma qumaraaqa.

<sup>10</sup> Innee aiqama asaku mundirana mandaqaqa mariasa minara irisee nariara nariara qikaqaafasaa fee qimasee nariara nariara nifaaqasaa aqoondiara foora nariara nariara andeeqasee ridaqa asasiaqa. Inneeqa niqoonnanara maasa uriqararannee qimasee maqee maqee mina auqu kooroo qia.

<sup>11</sup> Innee inneeqa oosana oosana ainainiranaki maridaqa nimudaanai qimaseeqa kadaapiruaqa sia kudoosaapaqa. Inniqa nimuqusaki karaambaiqara nidirafa qumbiqanoo marinaqa mina ainainammidee qidaqa اساسmandee mi kadaapina riqa fuaqa.

<sup>12</sup> Innee Yisufa qumuaninnanara afeesidaqa اساسidaqa kai mariaqa, maqee maria kadaapirira ummaarafa rafaqaafinaqa naundura asoamasee kasoogaqee ubiqaifaqa reendeenamasee kaqi kai minaki fuaqa, maqee maqee innee aiqamausara faqa aiqama ainainara faqa innaaru qimannisaaqa.

<sup>13</sup> Innee niqoonausa Yisuna ufa irimariasa nana ainainaree sarau imariasa inneeqaindi misa faqa rainasee naida nimiaqa. Sia qafee marinna aanaamurufa faqa anirainana amiqi amiqimandee maaqa aminanoo tootooqiranaki fuani.

<sup>14</sup> Faiqi anaasee akaqausa Yisuna ufasaara nari niqifaqa innee quandakinaqa sia minara iriaqa amiqi amiqira afaaqooqa kai qimannisaaqa, sia niquraraaqa amiqi amiqima nisaqa.

<sup>15</sup> Faiqi anaasee akaqausa اساسifaqa innee faqa dadaaqiqa اساسiaqa. Faiqi anaasee akaqausa ummaara narinaqa ikiraqaifaqa innee faqa dadaaqiqa ikiraqaqa.

<sup>16</sup> Aiqama narinni narinni maridaqa moodaanaki kiqa maridaqa aqoondikidaqa mariaqa. Sia innee inneeqara uriqararausee amiqirausee qimasee noori uqeeraaqa. Kaqiqa ooreeqararausa faqa aqoondi kiaqa. Sia misa ooreeqararausara noori runusee noori uqeeraaqa.

<sup>17</sup> Moo fasiqa anaasee fannoo ani mandaikammamaqainana sia anee mina akiqara mina mandaikammamaqa, aiqama fasiqanaasee amiqira oosannee qimariana, mi oosanna amanamasee mi oosanamau kai fuaqa.

<sup>18</sup> Anee aiqama fasiqa anaasee faqa asoaranaki kai mariaqa, misa sia amanaikifana aneennakai kafaa kafaa amanida qafaa.

<sup>19</sup> Moo fannoo ani arinoo mandaikammamaqainana sia anee mina akiqara arua, Taikara aukuaana Anutuna aanoo irafa minasaa mariannoo fee qimasee miqoo minnisaa. Tamummaqara fasiqa akara minara maaqi qinoo maridanoo.

Karaambaiqa maaqi qinoo qinee mandainaina akiqara nimianaura, ani arifaqa qeeqa kai mina akiqara qianaura.



<sup>20</sup> Kafaa moo fannoo maaqi qinoo.

Ani namuqaa fannoo aararee marinana narana kaqi amia.

Nammariara mifa aidinana kaqi amia. Anee miqinana aneenna amiqira iriranannai asaurirana mina aminnaranoo.

Qinee Pauroosa minara mi tamummaqara fasiqana ufamau fuaqeera qimannimidaqa.

<sup>21</sup> Faiqi anaasee mandainaina fannoo sia inni rafaafa fuani, inneeqa amiqira oosannanai misa mandoosana rafaafuafaqa.

## 13

*Aiqama uriqararawsa Anutufa kai quqaqoosa maridaqa.*

<sup>1</sup> Aiqaama kaamanauqa faqa uriqararawsa faqa Anutufa kai quqaidanoo. Sia moo fannoo nari kambiqaidanoo, Anutufa eedoo qinara kai kambiqafi maridaqa. Minara irisee innee aiqamausa misa ufamau kai fuaqa.

<sup>2</sup> Faiqi anaasee moo fannoo kaamanauqa ufa rukiee marinafa Anutufa quqaqai fasiqausa ufa rukiee mariafa marinnaranoo. Anutufa quqaqoo fasiqausa ufa rukiainafa mi fasiqausa saaqaraa aanoo irana aneenna kai mareeqeena aneenna afaariki rusimariananoo.

<sup>3</sup> Manda oosana maree mariasa kai kaamanna rakisirausara rufiaaqa, amiqira oosana mareemariasa sia misara rufiaaqa. Anee kaamanna fasiqa fee uriqarara fee misa nifusaa mana mana kai iraree fee qidanee doo amana andeeqara oosana marasee miqia. Miqinanoo mifa amooqira ufa kai ani amiannoo.

<sup>4</sup> Kaamanna uriqararafa Anutuna saikira fasiqa maridanoo ani amiqimmasee marianneera ainainidanoo, anee manda oosana mareenana minara rufiaa mina akiqara ani arirasamu doo asaukuki uaqeidanoo. Mifa mandoosana maree mariasasaa Anutuna aanoo irana mareeqeenoo misasaa quqeemarifa maridanoo.

<sup>5</sup> Innee minara irisee uriqararawsa ufara aiqama eedoo eedoo kai qiaqa, sia Anutuna aanoo iranara kai iriseeqa eedoo qiaqa, aneenna aakiranara andeeqanoo marifaqee qimasee eedoo qiaqa.

<sup>6</sup> Kaamanna fasiqauqee kansoorauqee uriqararausee, misa aiqama Anutuna ainainiranaki maridaqa faiqi anaasee andeeqannisaida maridaqa minara inneeqa takisa munnimma nimirana eedoo qimasee nimiaqa, minannoo ainainidammia.

<sup>7</sup> Inneeqa takisa munnimma aiqama aquaqa, kaqikaa takisa kansooraa takisa faqa kaamanna firaa takisa faqa aquaqa, aiqama uriqararawsara amiqira fasiqee qimasee misa noorinni rufiaqa rufiaqa idaqa fuaqa.

*Nariara nariara amiqira oosana kai maraaqee qirufa.*

<sup>8</sup> Sia moona ummaara ameemaanai keeqana maria aufadaranaki kai maria. Moodaa ummaara ameemaanaki kai keeqaqa mariaqa. Nariara nariara nidimarinaga mi moodaa ummaaranaki kai keeqaqa mariaqa. Faiqi anaasee moo fannoo nari aqoonna fasiqanaaseera amuqusinannoo Mooseena sandufa doo qumareenoo mi sandufana anoona paqurinoo kooroo idanoo.

<sup>9</sup> Mooseena sandufakinaafa akaqafa maaqimminoo maridanoo.

Sia faiqi anaasee nari ummuari nari ummuariaqa.

Faiqi faqa anaasee faqa faiqi faqa sia kuqannaruqa misa fidika sia ruqiaaqa.

Sia nari ainaina nari ainaina ummuariaqa.

Sia moona ainainara amuqusinana marara aqoo iria. Mi sandufausa faqa akaqa sandufauqa faqa moodaa ufa fannoo mi sandufausa aiqama rafaafafinoo maridanoo mi moodaa ufafa maaqimminoo maridanoo.

Anee aneennara amuqusi marianandee maseenana mi amuqusirafa kai aqoonnanara amuqusiani. Mi ufafa aiqama sandufa aruseenoo mifa anoonakidanoo.

<sup>10</sup> Faiqi anaasee moo fannoo aqoonna fasiqa anaaseera amuqusi marinafa naqimaseenoo moona mandaikammamaqaannoo fee, sia miqiannoo. Minara qinee qiqa, aqoonnanara amuqusi marifa aiqama Mooseena sandufamau fimarifa maridanoo.

<sup>11</sup> Innee mi fasiqana aanna raqa. Doo maa aukuanna iqaqara aukuna maridanoo faiqaranakiqari findifira aukuna doo ani maridanoo. Ooqai innee inneeqa irirana Yisuna ufasaa rusisoofa doo ani aniifanoo doo inneeqa asumu marira aukuna doo adeedi ramasee ani maridanoo. Minara faiqaranakiqari findi fira aukanee qidaqa.

<sup>12</sup> Doo asukuna taikararidanoo, iqaqarafa qusasaa aniannoo, maasa asukunaki ni-mariafanna manda oosanna oosanna mafi taikaseeqa faasaana amiqira oosana amiqira marirana duru feefara foora indamma qumaraaqa.

<sup>13</sup> Maasa faasaanasaa nidara foora aiqamausa nifusaa andeeqarawsaikkakai mambi mariaqa. Sia mandainaina maraani qimasee moodaanaki suqaaqa. Sia nammari

namasee furufariaqa, sia faiqí faqa anaasee faqa narinni narinni ummuariaqa. Faiqí faqa anaasee faqa sia narí afaaqa narí afaaqa kooroo iqa. Sia rakuqa, sia nariara nariara rairai qiaqa.

<sup>14</sup> Innee inneeqa faiqí faiqí manda iriranamau fidaqa fanandimariana minniseeqa mi aanausa oonu ititee ani ititeemta atukaraseeqa quandaki Anutuna asauku mundirafa Yisufa maasa karaambaiqa mina andeeqaranaki fimariana mina qumareeqa mi duru saamunannai maasa faiqí faiqí manda marirana manda nirana faqa rakuqa.

## 14

*Unna Anutunara dufi dufi qimaria narana ufafa.*

<sup>1</sup> Qinee Pauroosa Roomma maqusanaasa Yisuna ufa irimariasa qimannimidaqa. Innikina oosana oosana fasiqa anaasee mariafanoo. Akaqausa afeekaikamasee Yisuna mandaqaqa maridaqa irirana minasaa kai mundusee fimariasa maridaqa, akaqausa irirafa sia Yisunasaa mapukimariasa mi fasiqausa irirafa oorudupiraua maridaqa. Innee sia amiqira irirana faqaasa kai mara maree inni suqiranaki quqaqaq irirana oorudupiraua faqa mareeqee kaqi moodaanaki quqaqaq. Sia misa moo iriranara rairaiqiaqera mareeqee quqaqaq. Misa faqa Yisuna ufa irimariasa mariafaqa kaqi quqannisaqa.

(Ooqai Pauroofa maru aukuannta aandau aruseeqa unna Anutunara tumunnai auqira afaannara dufi dufi qimaseeqa makeetimariqau. Yisuna ufa irimarusa namasaifanoo unna Anutuna maraquna kafia daakuandoo qimasee rufieemariqau.)

<sup>2</sup> Faiqí moo fannoo narí iriranannai sia minara iridanoo kai aiqama narana aandau naidanoo, sia Anutuna ufa rukiaida miqidanoo. Faiqí moo fannoo irirana oorudupirafa aandau namasee qeeqa irirana kuridianoo qimasee narana kai naidanoo.

<sup>3</sup> Innikina aiqama aandau narana neemarifa sia quandaki aandau sia nainnanara fidiqaamasee qinee qeeqaraa ani uriqararausee sia qia, Kafaa aandau sia nainnafa sia quandaki kaqi neemarinara qaoo qimannisaqa.

<sup>4</sup> Innee aiqamausa Yisuna ainainimariasa mariafanoo. Innee naqi fee mandee moo fasiqa ainainirana aqifaree. Mi fasiqafa moo fasiqa Yisuna ainainirafa maridanoo, mina uriqararafa kai mina oosana irisee mara uqereeqee narí andeeqarana amanakai kikiqammasaannoo karaambaiqa fannoo amana mina dadaaqinanoo anoonaikiannoo.

<sup>5</sup> Faiqí moo fannoo moo faasaanara uriqarara faasaanee qidanoo. Faiqí moo fannoo aiqama faasaanara amanamana kai fee qidanoo. Aiqaqausa naadu naadu narí irirana mapukusee irisee doo mi mau fuqaq.

<sup>6</sup> Moo fannoo moo faasaanara uriqarara faasaanee qimarifa karaambaiqa auqu uqeeraidanoo miqi qidanoo. Moo fannoo aiqama aandau narana neemarifa karaambaiqa auqu uqeeraiidee qidanoo miqidanoo, Anutunara dufi dufi qidee qida neemarifa miqidanoo. Akaqa ainaina sia neemari fasiqafa mifa faqa minannai Anutuna auqu uqeeraiidee qidanoo miqidanoo, Anutunara dufi dufi qida sia neemarifa miqidanoo.

<sup>7-8</sup> Maasa qeeqa mariranaki maridaqa sia qeeqa qeeqa rakisida maridaqa, maasa kuqirana faqa sia qeeqa rakisidaqa karaambaiqa fannoo kai rakisidanoo, maasa kaqi maridaqa karaambaiqa ainainiranaki maridaqa maasa kuqiqqa karaambaiqaindi maridaqa mifinnai fidaqa. Doo qinee minara kooroo idaqa maasa kaqi maridee kuqidee karaambaiqaindi maridaqa.

<sup>9</sup> Asauku mundirafa kuqiraua faqa kaqi mariasa faqa karaambaiqa marianifeera anuiranasaa kuqinoo minakiqari findifnau.

<sup>10</sup> Qinee Pauroosa minara irisee iridaqa. Anee yafee maridane qoonnana oosana qafammaseenee aqinane. Anee yafee maridane qoonnana akooqaidanoo fee. Maasa aiqaqausa Anutuna afusaa kikiqammafuananoo mifa maasa oosana qafammaseenoo raina qimaqaannoo, minara sia qoonnana aqisee akooqaani, anee ureeqarafa mari-ananoo.

<sup>11</sup> Ooqeenaa tamummaqara fasiqausa minara maaqi qidaqa. Anutufa qinau. Qinee kaqi marira Anutusa uriqararaua marunnanara qini ufa amiqimasee iriaqa. Aiqaqausa qini doorisaa noorindari aqufiqa qimoofifaranoo. Aiqaqausa qiniara Anutu fee qifaranoo.

<sup>12</sup> Doo qinee Pauroosa minara maaqi qidaqa. Maasa aiqaqausa qeeqa nirana, marirana, qirana Anutuna afusaa kooroo ianara. Minara iridaqa qoonnana ireeda kai qiaqa.

*Ani akaqaafasaa fannoo anee imarianna ainainasaa farindamaki saamuruandoo qia.*

<sup>13</sup> Nariara nariara ireeda kai marida sia munuqi miniqi qidaqa sia aaqara ufa nariara nariara qiaqa, sia maasa miqiaqa, maaqiaqa, maasa Yisuna ufa irimarunauasakina

maridaqa moo ainaina maraananoo qini qiçoonafa qiçafamaseenoo doo narí faqa mareenoo aaqaranaki aqufinaqa doo qínee mi ainainnara sia maraanaura rufiaanaura.

<sup>14</sup> Qínee Pauroosa Karaambaiqa Yisunasaa atooaqa marunnanannai aiqama naranara anukara fee kai qimasee naidaqa. Faiqí anaasee moo fannoo moo ainainara sia anukara fee qinafa mina amuqusakinaafa mi ainainnara rufiaannoo.

<sup>15-16</sup> Anee moo narana amiqira naranee qimasee namasainanoo ani akaqaafasaa ani qafamaseenoo mifa faqa neenoo minasaa farindamakinoo moo mandainainaki aqufinana anee mina afaasuaa qiananoo mifa mandainaina numooki aqufinoo. Anee miqinana sia aneenna akaqaafasaa amuqusinana dadaaqiananoo. Asauku mundirafa akaqaafasaa minara faqa kuqinau anee nanaree fifau amiqira naranara neemariannoo mandoosanaki quqeenanee. Anee miqinaqa faiqí anaasee ani oosana oosana naranara kaqí nifaqa quqasee neefandinnanara mandoosanee qifaranoo.

<sup>17-18</sup> Anutuna ququsaki mariasa maasa nirana marirana sia narana nammariisaafau mundinoo maridanoofau. Anutuna naaquqara maraquina nimimari ainainausa andeeqarana faqa asoosana faqa asasirana faqa minamusasaa maasa marirana nirana mundinoo maridanoo. Faiqí anaasee moo fannoo asauku mundirana ainainidanoo narí akaqaafasaaquqara amuqusimarifanoo dadaaqinoo rakisinanoo Anutuna amooqirafa faqa faiqí faiqí eedoo qirana faqa maraannoo.

<sup>19</sup> Maasa minara irisee Yisuna aiku asaukuki nidaqa maasaki asoosana faqa narí afeekaiiki narí afeekaiqiqa Anutuna ufamau fuaqee qimasee mi mau fuaqa.

<sup>20</sup> Anutufa maasa moomoosa Yisuna moodaanaki quqaqoofaqa maasa sia mina kuridiqa furufariaqa. Aiqama narana amana nee mariafa maridanoo maasa moo amiqira narana namasaananoo maasa qikaqaafasaa moo fannoo qiçafamasee quandaki aaqaranaki aqufinanoo maasa mi narana naunannara aaqarafa maridanoo fee qianaura.

<sup>21</sup> Andeeqasee nimariaanafa maaqimminoo maridanoo akaqa narana nammari fee namasaananoo qini qikaqaafasaa moo fannoo fee qini qiçafamaseenoo minasaa aiku amakinanoo kuridiranaki aqufuandoo mi narana nammari narara rufiaanaura. Nana ainainasaa fee qini qikaqaafasaa aiku amaki kuridiranaki aqufuannoo fee qimasee mi ainainara rufiaanaura.

<sup>22</sup> Aninna irirafa narana nammariara sia faiqí aanaaseeki kooroomandee minasaa aanoo irafa raiqarafa kambigaani Anutusandiri kai kukeeqasee iriaqa. Faiqí moo fannoo narana nammari nainara mina aakirafa sia qaoo qinafa mifa amiqira fasiqa asasiranaki mariannoo.

<sup>23</sup> Kafaa mi fasiqafa moo ainaina namaseenoo oonumafi iridanoo Anutufa minara andeeqeefoo qiannoo fee sia andeeqeefoo qiannoo fee qimasee qaara aundura irirafa mi fasiqafa mi narana nammari namasainnara Anutufa aaqee maqi qiannoo, sia Yisuna saqarikiranara irisee neenoo irirana furufaramandee neenoo, miqinnanara Anutufa aaqeenoo fee qiannoo. Maasa moo ainainana andeeqara fee mariannoo fee aaqara fee mariannoo qimasee qaara daundura irisee kaqi oonu qumarainafa aaqarafa maridanoo.

## 15

*Sia aneenna aidiramau fua.*

<sup>1</sup> Maasa Yisuna saqarikiranaki afeekaiiki mariasa quandaki ureeqarausa qumaara dinni ati dadaaqi akumaraa, sia maasa qeeqa didiranamau kai fua.

<sup>2</sup> Maasa naadu naadu qeeqa qikaqaafasaa narí Yisuna saqarikirana dadaaqiananoo afeekaiikiani. Sia aneennara iria, aneenna akaqaafasaa amiqi amiqianifeera minara irisee dadaaqia.

<sup>3</sup> Asauku mundirafa ririmma, sia narí aidiramau finoo, narí akoona Anutuna aidiramau finoo tamummaqara fasiqa minara maaqi qimasee akara rinau.

Faiqí anaasee Anutuna aqira ufa mandufa qimarifa qinisaa aqufinoo.

Tamummaqara fasiqa mi ufana qimasee akara rinau.

<sup>4</sup> Aiqama tamummaqara fasiqauqa akarakinaa ufa sia fifau akara riqau maasa naamuqidee qimasee akara riqau, maasa mi akaranakinaa ufa dadaaqidaqa fuki faaki qirana faqa ubiqafi marirana faqa marasee miqandannai Yisunara asasammasee afeesirana maraqaqera akara riqau.

<sup>5-6</sup> Anutufa ubiqafi marirana akoofa faqa dadaaqira fuki faaki qirana akoofa faqa maridanoo. Miqi mari Anutufa inni dadaaqinaqa innee asauku mundirana Yisuna aanna ramaseeqa innikina sia aanoo irafa mariannoo moodaa irirafa mariannoo. Moodaa irirafa innikina marinaqa aiqamausa moodaa ufa kai qimasee asauku mundirana maasa karaambaiqa Yisuna akoona Anutuna amooqiaqa.

*Anaamuru misa Isaraee maqanna faqa Anutunara dufi dufi qifaranoo.*

<sup>7-9</sup> Asauku mundirafa inni qumaroonara irisee innee nariara nariara aqoondikifaqa faiqi anaasee inni nindafamasee amiqira oosana maraidammiafoo qimaseeqa inni Anutuna amooqiageera. Anutufa nari qimaqoo ufamau fuanifee qimasee asauku mundirafa Yuda maqanna mara firira faiqiara foora ainainammannimaqara faiqi kamambinoo marinau. Anutufa Abarahaamana aiku asauku faqa qima afeekaikammasoonara kambigaanifeera qimasoofoano asauku mundirafa Yuda maqannaasa ainainammannimaqara faiqi kamambinau. Anaamuru mariasa anireeqa Anutufa misara amuqusufanoo nifauaranara faqa Anutuna auqu uqeerasee amooqiageera asauku mundirafa minara faqa Yuda maqannaasa ainainammannimaqara faiqi kinau. Tamummaqarasa akarakinaana minara maaqi qinau.

Qinee aanaamuru namufaqa maridaqa misa saimbaqa aniara dufi dufi qianaara.

Migooqari anauqu uqeeraseeqa idi raida ani amooqianaara.

<sup>10</sup> Tamummaqarasa akarakinaafa moo maaqi qidanoo.

Innee aanaamuru mariasa Anutufa utaaqama nimaqee marisa Yuda maqannaasa saimbaqa dufi dufi qimasee asasiaga.

<sup>11</sup> Moo tamummaqarafa maaqi qinau.

Aiqama aanaamuru mariasa karaambaiqa amooqiaga.

Aiqama maqannaasa firaqoo mina amooqiaga.

<sup>12</sup> Kafa maaqi tamummaqarafa maaqi qinau.

Yeeseena atiki moo kambiqannoo, mifa findifinoo aanaamuru rakisiannoo, misa quandaki nari irirana minaki rusifaranoo.

Tamummaqarasa ufa Yisunara miqimmigau.

<sup>13</sup> Anutufa maasa innaarunaira afeesirana oosanafaqaafa maridanoo, mifa kai innee mina saqarikiranannai aiqama asasirana faqa asooarana faqa innikina qumbiqanni-maqaannoo, Anutuna naaquqara andeeqara maraquna afeeka fannoo inni dadaaqinanoo innaarunaira asasammasee afeesirafa mi asasirafa qumbiqeenoo teeqiannoo.

*Pauroofa afeeka ufa Roomma maqannaasa akara rumannimaqoonara qinau.*

<sup>14</sup> Oo qini qikaqaafasaaqqa qinee Pauroosa inni Roomma maqusai mariasara qidaqa. Qinee inniara amiqirafa faqa irirana faqa qumbiqarausee qidaqa innee Roomma maqusanaasa amiqira irirana nari uqafiqee nari uqafiqee qimariasa amana mariafanoo.

<sup>15</sup> Innee miqi marifaqa qinee maa pasanakina sia reendeenamandee inni naaqoo auqeeqa oosana oosana ainainara inni naaqoo firaqoo auqeeqa.

<sup>16</sup> Anutufa amiqira ainainirana qini qiminau. Qinee asauku mundirana Yisunara saikaki quqaqisaiifaqa maridaqa aanaamuru qimannimiranaki maridaqa.

(Mooseena uqiqaana maaqakina Anutuna aanaiqikira fasiqauqa sipsipa aanaaqi amiqirana kai faiqi anaaseendi mara maree mini ooninai auqira qaindasaa quqasee arusee aandau tatufirana Anutuna suqa amimariqau.)

Qinee aanaamuru faqa Anutuna faqa aanaiqikirausara foora marunnanara maa akaranaki afeeka ufa inni nimiqa, kaqiqeesa marifaqau sia afeeka ufa qimannimini ireeda kai qimannimini inni aanaiqikirausa maridaqara afeeka ufa qimannimidaqa. Anutuna naaquqara andeeqara maraquna fannoo aanaamuru mariasara Anutunaindi fee qimasee misauqa marirana nirana Anutuna aidirana amana kai mariaqeera minara kai Anutunai aanaiqi kirausaikidaqa maridaqa.

<sup>17</sup> Qinee asauku mundirana Yisunasaa moodaanaki kamambi maridaqa maqasaa mi saikanaki marunanoo didimarifaqa asasiaga.

<sup>18-19</sup> Asauku mundirafa naaquqara maraquna qimifanoo dadaaqifaqa qeeqa ufannai faqa qeeqa kadaapiriranannai faqa sia faiqi maraaqaa ira ainainannai faqa minauqannai qinee aanaamuru Anutuna ufa qimannimariafanaga iriqa mi mau fidaqa, asauku mundirafa dadaaqinara firaqoo qifaqa quqasee afeekaikamandee qimannimianaara. Qinee miqidaqa amiqira fasaasa ufa asauku mundiranara aiqama ufatia qimannimiqa Yeerusaree maqusa dinni Iririkumma maqusa dinni mi qambaana saqanna mariasa aiqamausa qimannimimaree fifainidaqa.

<sup>20</sup> Asauku mundirana aafakiana sia irimariasa kai qimannimiqa, qeeqa ufa moona ufa amuaaqa rusianoora saina sia irimariasa kai qimannimia, ooqai indaaru doo qinee mi iriramau fidaqa. Mi mau fidaqa tamummaqara fasiqa ufamau fidee qidaqa.

<sup>21</sup> Ooqai mi tamummaqara fasiqana ufa minara maaqi qinoo maridanoo.

Sia minara qimannimusa mina qafeefaranoo.

Sia irusa minara naaqoo irifaranoo.

*Pauroofa Roomma maqusai fraree qimasee qimaqoo ufafa.*

<sup>22-24</sup> Qinee Pauroosa moomoo kari inni Roomma maqusai fuaneerunanoo oosana oosana ainainirafa rafaqafufaqa doo maqee maa saqa saika taikasee moomoo aukwana innee iannai fuane qimarunausa doo maqee qusasaa firaridaqa. Qinee Sipeena maqusai fidaqa inni Roomma maqusanaasa faqa namummaqeeqa inni faqa asasammasee marikammaanaqa innee Sipeena maqusai fuannana qiku auqirana dadaaqaqee qidaqa.

<sup>25</sup> Inni maqusai fuani qunauusa doo maqee Yeerusaree maqusai fuanaura oonureeqa oonurandee aigareeqa inni maqusai fuanauranoo. Yeerusaree maqusai ooru fidaqa miqoo Anutuna ufa irimariasa dadaaqianaaura.

<sup>26</sup> Maseedoonia maqa maaqakinaasa faqa Kirisa maqa maaqakinaasa faqa Yisuna ufa irimariasa nariqa munnimma aigamausa ruaummasaafaqa Yeerusareenni Anutuna ufa irimarusa ainaina naranara sarairausa mi munnimmana nimiraree qimasee qinisaa saafaqa maree ooru firarammidaga.

<sup>27</sup> Maseedoonia maqa maaqaki mariasa faqa Kirisa maqa maaqaki mariasa faqa nariqa kai ruaummasee Yeerusaree maqusanaasa nimiraree qidaqa, sia qineefau qiqau. Indaaruu Yuda maqannaasa nari innaarunai fira amiqira ufa Yisuna ufara aanaamuru naida nimisoonara mi aikana narinoo marina mi aikana tatiqa maqasaa amiqi amiqira ainainara munnimma nimifaranoo. Anaamuru mariasa miqiaqaana andeedqara oosana maridanoo.

<sup>28</sup> Qinee maaqooqaraasa suquseeqa nimira munnimma mareeqa Yeerusaree maqannaasa aigama uqanna munnimma nimiseeqa oorurandeeqa inni Roomma maqannaasa faqa qumu maridaqa asasidaqa amiqidaqa marianaaura, doo marikiqa Sipeena maqa maaqaki oonuree misa faqa Yisunara qimannimianauranoo.

<sup>29</sup> Qinee inni Roomma maqannaasa iannai oonuree maa ainainnara iridaqa. Qinee asauku mundirana afaaqooqa qiranasa fidaqa mina amiqi amiqirana inni nimianaaura.

<sup>30</sup> Oo qini qikaqaafasaa qinee Pauroosa afeekaikamasee inni qimannimidaqa. Innee qiniara Anutufinnai innaaru qiranannai qini dadaaqaqa, Inneeqa nimuqusa ookiqari afeekaikamandee qiniara innaaruqiaqa. Innee faqa qinee faqa asauku mundirafa Yisufa maasa karaambaifaq minasaa atooqafi marunausa maridaqa minara irisee qiniara innaaru qiaqa. Anutuna naaquqara andeedqara marauna fannoo nariara nariara nimuqusirana maasa firaqoo qimuna innee minara faqa iriseeqa qiniara innaaru qiaqa.

<sup>31</sup> Qinee maindari Yeerusareenni ooruree misa nimiraree qia munnimmana nimianaqa Anutuna ufa irimariasa minara asasiqeeqa innaaru qiaqa. Miqoo Yeerusareenni qinee marianaqa innee Anutunara innaaru qimaqimaqaqa Yeerusareenni mariasa Anutuna ufa sia irimariasa qini darirarammidammia. Innee misara innaaru qiaqa qini sia daruaqee innaaru qiaqa.

<sup>32</sup> Qinee Yeerusaree maqusaindari amiqimandee oorurandee qumuraananoo Anutufa qinnanara inni Roomma maqannaasa faqa kaqikaqoo idooamaseeqa asasammaseeqa aigaree fuanaura.

<sup>33</sup> Anutufa maasa asoora oosana fannoo inni aigama Roomma maqannaasa faqa mariani. Kuqaa.

## 16

### *Pauroofa nari aqoondiuqa nimandaianoo.*

<sup>1</sup> Oo qini qigoondiuqa Roomma maqusai mariasa anaasee moo fannoo Keenakareea maqusai Yisuna ufa irimariasa dadaaqimari anaaseefa maasa nisookifa mina auqu Foeebee nammarifa qusasaa innee iannai Roomma maqusai fuannoo.

<sup>2</sup> Mifa andeedqara anaasee marinoo oonurainaga innee Anutuna faiqi namu naanna ramasee karaambaifaqa ufa irimari anaasee fee qimasee amiqimandee qumaree rakisidaqa mi anaaseefa moo ainaina ummaara moo bisinisa Roomma maqusai auqainaqa innee kaqi dadaaqaqa. Mi anaaseefa moomoo fasiqa anaasee dadaaqirafa qini faqa dadaaqira qigoondi maridanoo.

<sup>3-4</sup> Inni Roomma maqusai maria fasiqa anaaseeqanda, anaasee auqu Pisisikaa nammarifa maridanoo afaaqi auqu Akuiraafa mi qafaqiganda qini dadaaqirana nari kuqiranara paasosamandee moomoo kari nimeekaranaki fidaqa qini dadaaqimariasa maridaqa, asauku mundirana Yisuna ainainirana dadaaqi mariaqanda maridaqa. Sia qini kai dadaaqimariaqanda aigama aanaamuru Yisuna ufara suqufi qimariasa misa faqa dadaaqimariaqanda marianara misa faqa qinee faqa miqandara dufi dufi qidaqa. Qinee maa pasanaki mi qafaqisa nimandaia.

<sup>5</sup> Mi qafaqisa maaqaki Yisuna ufara suqufi qimariasa amaana maqa sia marinara suqufida qimariasa misa faqa maa pasanaki nimandaiaqa. Qini qifaaqasaa

qigoondi auqu Epeaeneetusafa aigama Asia maqannaakina indaaruru asauku mundirana aqoondikufa, qinee maa pasanaki mina faqa amandaidafa.

<sup>6</sup> Moo anaasee auqu Maria nammarifa (sia Yisuna anoofau mina amarafa) firaqoo inni Roomma maqusanaasara kadaapirufa maridanoo qinee mina faqa amandaidafa.

<sup>7</sup> Qini maqannaa Yuda maqannaa fasiqa anaasee qini faqa karabusaki maruqanda nuqu Andaroonikusafa faqa Iunia nammarifa faqa mi qafaqisa naaree Yisuna saqariki maruqanda maridafa qinee innaaqianna. Yisufa niqiqoo fasiqausa amiqimandee miqandara iri mariqau. Qinee miqandara faqa maa pasanaki nimandaidafa.

<sup>8</sup> Qini qifaqasaa qigoondi moo auqu Ampariatusafa mifa faqa maasa faqa karaambaifa ufaki maasa faqa moodaanaki mariufa inni faqa marifaqa mina faqa maa akaranakiqari amandaidafa.

<sup>9</sup> Asauku mundirana ainainiranakina maasa faqa moodaanaki mariufa. Urabanusana faqa inni faqa marina amandaidafa, Qini qifaqasaa qigoondi moo auqu Sarakisafa inni faqa marina amandaidafa.

<sup>10</sup> Apeereesana faqa amandaidafa, mifa aukuaana aukuaana asauku mundiranasaa atooqafinoo mina ainainirana faakanaikirafa marifa. Aristoborusana faqa mina aiku asauku faqa nimandaidafa.

<sup>11</sup> Qini qigoonna Yuda maqannaa Eeroodioonana mina faqa amandaidafa. Narakisusana nari aiku asaukikiqari Yisuna ufa iri mariasa nimandaidafa.

<sup>12</sup> Anaasee gaaraqanda asauku mundirana ainainiranaki maru aanaaseeqanda nuqu Tirifae nammarifa faqa Tirifoosa nammarifa faqa miqanda faqa nimandaidafa. Anaasee moo qini qifaqasaa qigoondi Karaambaifa saika firaqoo uqanna maree marifa mina auqu Peerasisa nammarina faqa amandaidafa.

<sup>13</sup> Karaambaifa saikaki mariasakiqari amiqirafa mina auqu Rufusafa mina anoofa faqa qinee faqa mina amaakuara foora marunnanara miqanda qisanoosara nimandaidafa.

<sup>14</sup> Maa fasiqa namusa nuqu raanara. Asinakaritusafa faqa Fareekoonafa faqa Qeerameesafa faqa Pataroobasafa faqa Qeeramasafa faqa minamusa faqa aigama Yisuna ufa irimariasa faqa misa nimandaidafa.

<sup>15</sup> Firoorookusafa faqa Iuriafa faqa Neereusafa nari asookisandiri faqa Oorimpasafa faqa aigama Anutuna ufa irimariasa faqa misa faqa mariasa faqa nimandaidafa.

<sup>16</sup> Innee suqidaqa nariara nariara nikaqafasara foora nari sukukee nari sukukee iaqa. Aigama maqusa maqusa asauku mundirana ufara suqufi qimariasa misa faqa inni Roomma maqannaa nimandaidafa.

*Akaqausa rainee mariasa mi ufanara eerairiaqa.*

<sup>17</sup> Oo qini qikaqaafasauqa qeeqa qimuqusa ookiqara afeekaikamandee inni qiman-nimidaqa. Akaqausa rainara ufa oosana areemarisara eerairiaqa. Misa Yisuna saqariki mariasa akaqausa kuridi nimaqaidafa innee maroo andeeqara ufana atekaidafa, misara rufisee nianai mariaqa.

<sup>18</sup> Miqi mariasa sia maasa karaambaifa asauku mundirana ainainau idau, misa nari nidimari mandainainara kai randaida iridaqa. Misa nari nimanira ufannai faqa nari nifaurunnai kai susumma nimaqaranannai faqa amiqira fasiqa anaasee iriranara uneemaana qidaqa.

<sup>19</sup> Aigama maqannaasara inni Roomma maqannaasara iridaqa innee Yisunasaa atooqaq marianara irimariafaqa qinee faqa iridaqa asasidaqa. Qinee inniara oosana oosana amiqira oosana akoofasauqa mariaqee qidaqa, oosana oosana mandoosanara aaminiaqee qidaqa.

<sup>20</sup> Anutufa maasa asoosana oosana faqaafa qusasaa Sadannana inni niku ameemaanara foora mareeqeenoo quqasee radamusannoo. Karaambaifa Yisuna afaarirafa inni faqa mariannoo.

<sup>21</sup> Maaqoo qini faqa mariasa nari nimandarana inni nimidaqa misa nuqu Timootifa qini moodaa ainainirana dadaaqi marifa inni nimandaidanoo Rukiusafa faqa Iasoonafa faqa Soosipateerafa faqa misa aigamausa qini maqannaa Yuda maqannaa mariasa misa faqa inni nimandaidafa.

<sup>22</sup> Qinee Teeratusausa Pauroona ookinaana iridaqa maa pasana akara rimarunausa maridafa, maqee qinee faqa Yisuna ufa irimarunausa maridafa inni nimandaidafa.

<sup>23</sup> Yisuna ufara suqufi qimariasa Kaiusana maaqaki maqee maqee suqidaqa, qinee Pauroosa faqa mina maaqaki marunanoo mi fasiqafa Kaiusafa inni Roomma maqannaasara nimandaidanoo. Qeeqa maqee marunna maqusanaasa munnimma kansoorra munnimma rakisimarifa mina auqu Eerasatusafa faqa maasa qikaqaafasaa Kuaratusafa faqa inni nimandaidafa.

<sup>24</sup> Maasa karaambaiqa asauku mundirafa Yisufa mina afaarinoo kaqi nimira oosana inni aiqamausa faqa mariani.

*Ufati taikarufa.*

<sup>25</sup> Doo maasa Anutuna areenarana amia, Ooqai oosana aroonakiqari kukeeqara anoona ufa Isaraee maqannaasa faqa aanaamuru maqannaasa faqa Anutufa asumu mariranaki quqaaninna ufana kukeeqanoo mariufa maqee Yisunaki koorooinoo maridanoo. Mi kooroo ira ufafa inni Yisuna saqariki mariana minaki inni amana mapuku nimaqaannoo. Amiqira fasaasa ufa asauku mundirana Yisunara qinee qimannimiqa nunnana, inni Yisuna saqarikirana mi ufanasaa mundinoo maridanoo. Amana Anutufa inni Yisunaki saqarikirana mapukusee quqannisaano.

<sup>26</sup> Ooqai mi kukeeqara anoona ufafa maqee naaru naaru marira Anutufa ufa qufanoo mi kukeeqara ufafa aiqamausakina akoosaqa kooroomafifanoo marifaqa qafaidaqa iridaqa. Anutufa ufa qufanoo Yisufa sia kambiqooqoo tamummara fasiqauqa Yisuna aufakiana kooroo iqau. Maqee faqa aiqama maqanna qimannimiafaqa mi ufanasaa irirafa rusiffaqa iridaqa eedoo qimasee mi mau fuageera.

<sup>27</sup> Moodaa mari Anutufa nariara aiqama ainainara irimarifa, mina asauku mundirana Yisunannai naaru naaru areenarafa minaindi mariani. Kuqaa.

## 1 KOORINTI

### Pauroofa Koorinti maqanna akararumannimaqoo ufafa.

<sup>1</sup> Qinee Pauroosa maa pasana akara rumannimaqaidaga Anutufa nari iriranannai qini maqasaa fasiqa daaramaseenoo nari asauku mundirana Yisufa niqiqoo fasiqausaki qini quqaqoosa maridaqa maa pasana akara rumannimaqaidaga. Maasa qikaqaafasaa Soosateeneesafa maa pasanaki mifa faqa qinee faqa nianaindari inni nimandaidaga.

<sup>2</sup> Innee Koorinti maqusai Anutuna ufara suqimariasa akara rumannimaqaidaga Anutufa inniara nari aiku asauku mariaqeeru utaaqamaqaisa mariafanoo, innee mina asauku mundirana Yisunasaa atooqaanara Anutunaindi kammiga mariafanoo, Anutufa nari faiqi namu mariaqeeru nari innai fuuqeeru inni naareenoo, sia innee kai minaindi mariafanoo, aiqama maqanaa maasa karaambaifa asauku mundirana Yisuna aaree mariasa misa faqa innee faqa minaindi mariafanoo. Yisufa misa faqa maasa faqa karaambaifa maridanoo.

<sup>3</sup> Maasa qikoofa Anutufa faqa maasa karaambaifa asauku mundirafa Yisufa faqa miqanda kaqi afaarirana faqa naundura asoarana faqa inni Koorinti maqannaasa nimiani.

*Pauroofa Roomma maqannaasara dufi dufi qidanoo.*

<sup>4</sup> Anutufa innee mina asauku mundirana Yisuna saqarikianara nari afaarirana inni niminoo.

<sup>5</sup> Innee Yisunaki marianara Anutufa oosana oosana amiqira ufa qirana faqa oosana oosana amiqira irirana faqa mi ainainaqanda moomoo nimunara qinee Pauroosa minara iriqa qeeqa Anutunara inniara maqee maqee dufi dufi qidaqa.

<sup>6-7</sup> Innee maasa karaambaifa asauku mundirana Yisunara innaarunaindaraafa kooroo iranara afeesimariafanoo asauku mundirana amiqirana aufakiana inni naunduraki mapukusee marinara Anutufa moomoo nari dadaaqa nari dadaaqirana akoofa-saikirana niminuu.

<sup>8</sup> Anutufa maa mariaqooqari amiqimmandee rakisinoo fifi inaqa sia kasaqaqi kuridifaranoo taikara aukuna andeeqasee paqurifaranoo. Miqunara mikari maasa karaambaifa asauku mundirana Yisufa qumira faasaana Anutufa maasa niuqummasee moo aaqarana sia paquriannoo.

<sup>9</sup> Anutufa inniara nari amaaku nari asauku mundirana maasa karaambaifa Yisuna faqa aqoondikiqeeru inni naaree marifa marinara sia inni nikaruqimasee kasaqaqi mininnisaannoo innee minasaa nifaqa quqee mariafa maridanoo.

*Pauroofa misaki raiqaranara aaqee mariafanoo fee qinuu.*

<sup>10</sup> Qini qikaqaafasaa Koorinti maqanna mariasa, maasa karaambaifa asauku mundirafa Yisufa inni qimannimira saika qimunara irisee inni reendenamandee kai qimannimidaqa, inneeqa sia raina rainida furufariaqee qimasee moodaa ufa qimasee moodaanaki mariaqa kuqaa uqanna moodaanaki mariasa maridaqa moodaa irirana faqa moodaanai firana faqa mariaqa.

<sup>11</sup> Moo anaasee auqu Karooeena nammari mina aiku asauku innikina manda ainaina, raiqara ainaina qafamasee akooqoo qimaqimafiafa iriqa.

<sup>12</sup> Misa akooqoo qimaqimafiafa doo qinee akooqoo inni qimannimianaara. Inniki naadu naadu moona ufa iriqa moona ufa iriqa ufa moo qimariana qambaana raiqarafa aaqarafa maridanoo. Moo fannoo qinee Pauroona aiku asauku marunaasee qiafanoo moo fannoo qinee Apooroosana aiku asauku marunaasee qiafanoo moo fannoo Petooroona aiku asauku marunaasee qiafanoo moo fannoo asauku mundirana aiku asauku maridee qimasaida miqira raiqara ufa aaqarafa maridanoo.

<sup>13</sup> Qinee Pauroosa minara maqaqi qidaqa asauku mundirafa nari apata auku moodaa moodaa maqaisee maridee sia aukaakinoo marunara innee faqa sia rakeekaa iaqa. Qinee Pauroosee inniara aunirira saqarisaa kuqi fee qiqiafana. Sia kuqafannanara sia qini kikiqusuqa. Innee nammari maraqau qini Pauroosa duqusaa fee nammari maroosee maridee. Asauku mundirana auqusaa qimasee nammari maroonara mina aiku asauku kai mariaqa.

<sup>14</sup> Qinee sia innikina nammari moomoo rumannimaqaaqiafana minara Anutunara dufi dufi qidaqa.

<sup>15-16</sup> Qinee Kirisipusana faqa Kaiusana faqa nammari rumannimaqaafannana. Doo daaqoo irifaqa Sateefanasana faqa nari aiku asauku faqa inamusa kai nammari keeqannimaqaaqiafana. Akaqausa faqee nammari keeqannimaqaafannee doo maqee



aunusee sia iridaqa, minara sia moo fannoo qiniara aiku asauku kammambi nammari mareeunoo qifaranoo.

<sup>17</sup> Asauku mundirafa sia qiniara nammariki keegannimaqaannee qimasee diqiqaenoo amiqira fasaasa ufa qimannimiannee qimasee qini diqiqaenoo sia faiqi faiqi iriranamau qimannimiannee qinoofau qini diqiqaenooofau. Qinee faiqi faiqi iriranamau qimannim-iqa asauku mundirafa auniriranasaa kuqu afeeka ufana ureeqanoo marina sia irifooraa.

*Anutuna irirafa aadumamaumbidanoo, maqasaa fasiqa irirafa moomau fidanoo.*

<sup>18</sup> Asauku mundirafa aunirira saqarisaa kuqu ufana kuridiranaki fimariasa irisee furufarira ufa fee qidaqa. Maasa asumu mariranaki fimariasa sia miqi qidaqa mi ufanara Anutuna afeeka mi ufanara kai mari ifoo qidaqa.

<sup>19</sup> Ooqai tamummaqara fasiqauqa minara maaqi qimasee akara riqau. Irirana faqaasa Anutunara sia irimaria irirana qinee qeeqa Anutusa kuridinni-maqaanaura. Aiqaama firaa irirana irimariasa aiqaama misa maa maqanasaaqaraa irirana rukasaanauranoo.

Tamummaqarasa ufa oosana miqiminoo maridanoo.

<sup>20</sup> Qinee Puroosa minara kafaa maaqi qidaqa. Irirana faqaasa iriranara minara naqi fee qianauree. Uriqarara sukuraki keeqee mariasara naqi fee qianauree. Maa maqa maaqanasaaqaraa ufa akoofasauqa iriranara naqi fee qianauree. Misara maaqi qianauree, doo Anutufa ooqai uqannifiaqoofa kooroo inoo maridanoo qimaqiminoo. Maa maqa maaqanakinaasa irirafa Anutunara furufarirafa maridanoo.

<sup>21</sup> Anutufa nari firaa iriranaki maridanoo quandakinoo sia misa nari iriranannai qiniara iriaqee qimaseenoo faiqi auqu quqanau. Miqooqari maasara Yisuna aufakiana qimannimifaqa, misa minara furufarira ufa qimariafa, qimannimifaqa iriseeqa misa irirana minasaa rusumariasa asumu marirana Anutufa nimianifee qinuu.

<sup>22</sup> Yuda maqannaasa faiqi sia amana auqaqaaqaa ira ainaina uqaqifiqasainaga ani ufara kuqaa fee qiraree qimariasa. Anaamuru Kirisa maqannaasa firaa iriranakinaa irirana qimaqimifaqa kuqaa fee qianaureenoo.

<sup>23</sup> Maasa sia mi maqannaagaanda naanna raidaqa, maasa asauku mundirafa aunirira saqarisaa kuqunara minara kai qimannimifaqa Yuda maqannaasa mina irisee aanoo qiafaqa aanaamuru irisee furufarira ufee qimariafanoo.

<sup>24</sup> Anutufa utaaqamannimaqaisa mi ufana iriseeqa Yuda maqannaasakiqari faqa aanaamurukiqari faqa mi ufanara asauku mundirana kuqirafa Anutuna firaa irirana faqa mina uriqarara afeeka faqa maridanoo fee qidaqa.

<sup>25</sup> Anee Anutuna irirana iriseenana minara furufarammi ifoo qinanoo Anutuna mi irirafa faiqi irirana urinaaqaranoo maridanoo. Anee Anutuna moo ainainara sia afeeka ainainammiifoo qinanoo Anutuna mi sia afeeka ainainafa faiqi afeeka urinaaqaranoo maridanoo.

<sup>26</sup> Oo Koorinti maqannaasa, maanara naaqooki iriaqa inni Anutufa naaroo aukuanana Yisuna saqariku aukuanafa innee mikari irirana faqaasa moomoosee mariqee iqau. Faiqi faiqi irirana faqaasa sia moomoo inniki mariqau. Faiqi faiqi afeeka faqaasa sia moomoo inniki mariqau, sia faiqi uriqararasa moomoo inniki mariqau.

<sup>27</sup> Anutufa faiqi faiqi irirana faqaasa nisauriranaki quqaannee qimasee misakiaqa furufari mariasee qimariasa Anutufa mi furufarira fasiqa anaaseesara faqa nari irirana faqa qumareenoo minara qini amiqira irirana faqaasee qidanoo. Anutufa maqasaaqaraa afeeka faqaasa nisauruaqee qimasee faiqi faiqi akaqausara sia afeekee qimariasa Anutufa mi sia afeeka fasiqa anaaseesa faqa nari irirana namufaqa qumareenoo minara qini afeeka faqaasee qinuu.

<sup>28</sup> Anutufa faiqi faiqi uriqarara fasiqa anaasee fee qimariasa kuridianifeera misa nikooqee maria fasiqa anaaseese qimariasa faqa misa fidiqaa imaria fasiqa anaaseese qimariasa faqa nari irirana namufaqa misakinaana nariara rusandeesamusee qumareenoo uriqarara ainainee qidanoo.

<sup>29</sup> Miqunara sia faiqi moo fannoo Anutuna oorisa nari irirana amooqiannoo.

<sup>30-31</sup> Anutufa inni mareeqeenoo asauku mundirana Yisunasaa atooqaseenoo asauku mundirana qumareenoo maasa irirane qimaseenoo maasa mareeqeenoo nari andeeqaranaki qiseenoo nari aiku asauku uqannaikamma qimaqeenoo maasa manda ainainakinaana idukuqisoofaqa marunnanara maasa tamummaqara fasiqa ufamau kai fuannanara minara maaqi qimasee mifa akararinuu.

Faiqi moo fannoo nana ainainaree moo ainaina amooqianauree qimasee sia nari amooqirana uqeeraani karaambaiqara kai amooqiani.

## 2

*Asaku mundirafa auniranasaa kuqunara minara kai qimannimainau.*

<sup>1</sup> Oo qini qikaqafasaa uqa qinee Pauroosa Koorinti maqusai oonuree Anutuna anoona ufa sia ooqai irirana faqaasa ufannai faqa sia uriqarara iriranannai faqa qimannimiqi-afana.

<sup>2</sup> Qinee qeeqa maaqi qimasee qimiriga, qinee Koorinti maqannaasa qimannimidaqa qeeqa irirana aunusee asaku mundirana Yisunara kai qimannimianauro, mifa auniri-ranasaa kuqunara firaqoo qimannimianauree qiqa.

<sup>3-4</sup> Qinee minara iriseega innee iannai oonureega qeeqa ummooukiranara iriseega maparaa idaqa daindiri ree marinaqa sia faiqi faiqi irirana faqaasa ufa faqa naufakiana faqa Yisunara qimannimifannana. Qimannimi mariafananoo Anutuna maraquina afeeka fannoo amiqimasee qini ufa anoona uqannifiqanau.

<sup>5</sup> Innee minara iriga inneeqa Yisuna saqarikirana sia irirana faqaasa iriranasaa fau mundinoo marinau. Anutuna afeekasaa mundinoo maridanoo.

*Anutuna maraquina fannoo Pauroona dadaaqufanoo qimannimainau.*

<sup>6</sup> Qinee sia faiqi irirana marasee aiqamausa qimannimidaqa, akaqausa Anutunara firaqoo mapukusee irimariasa kuqaa qinee irira ufa misa qimannimidaqa. Sia maa maqanasaaqaraasa iriranau misa qimannimidau, sia maa maqanasaa rakisimari afeekausa iriranau qimannimidau doo misa afeeka taikaidanoo.

<sup>7</sup> Qinee qimannimi marunna irirafa Anutuna ooqai kukeeqara irirana innaarunai asumu nimimarina qimannimidaqa mi irirana faiqi sia nifu qafaafa. Maa maqa maaqafa sia maru kamuqoo Anutufa mi irirana utaaqamaseenoo minannai maasa nari areenaranaki innaaruna ququsaki keeqaaqera utaaqanau. Qinee mi irirana misa qimannimidaqa.

<sup>8</sup> Ooqai maa maqa maaqanasaa rakisiraua sia mi irirana iriqau. Iriqau innaaruna areenaranakinaa karaambaiqa sia qumareefau aunirira saqarisaa arini.

<sup>9</sup> Ooqai tamummaqara fasiqa minara maaqi qimasee akara rinau.

Faiqi sia qafee maru ainainnara sia iri maru ainainara sia faiqi moo fannoo minara kambiqaanoo fee qimaru ainainnara, miqira ainaina kai Anutufa deedaqam-maseenoo nariara rimariasa kai nimiannoo.

<sup>10</sup> Qinee Pauroosa minara maaqi qidaqa. Maasa inni saimbaqa Roomma maqannaasa namufaqa Anutufa nari maraquinannai nari ooqai kukeeqara irirana qiminou. Anutuna maraquina fannoo aiqama ainainara randasee aiqumumasee qafaidanoo. Sia akooqoo ainaina kai qafaidanoo Anutufa nauru kambiqaaninna kukeeqara ainaina farumara foora unaurinoo marina mina faqa aiqumumasee irimarifa marunara Anutufa nari ooqai kukeeqaqoo irirana inni saimbaqa qiminou.

<sup>11</sup> Faiqi naundurakinaa maraquina fannoo mi fasiqana aundurakinaa irirana aiqama iridanoo. Miqi kai inoo Anutuna maraquina fannoo Anutuna aundurakinaa ainainara aiqama iridanoo.

<sup>12</sup> Inni saimbaqa sia maa maqa maaqanasaaqaraa maraquina maroosa maridaqa. Inni saimbaqa Anutufa niqiqoo maraquina maroosa maridaqa Anutufa minannai innaarunai asumu mareemariana faqa minasaaqaraa naundura adiafaairana faqa nimirana.

<sup>13</sup> Qinee minara irisee maaqi qimasee qimannimidaqa, maasa sia faiqi irirana uqan-nifiqee maria iriranau qimannimidau, Anutuna maraquina maasa uqaqifiqoo ufana inni qimannimidaqa. Maasa innaarunaindaraa ainainara Anutuna maraquina maroo fasiqa anaaseesa qimannimidaqa mi ufana kai inni qimannimidaqa.

<sup>14</sup> Anutuna maraquina siai fasiqa anaaseesa sia amana Anutuna maraquina faiqi anaasee dadaaqimari afeekana nimimarina sia amana mareefaranoo. Misa mi ainainna qafamaseeqa sia minara iridaqa furufara ainainee qidaqa. Sia mina oosana iridaqa maraquina maree mariasa kai amana mina oosana aiqumumaseeqa irifaranoo.

<sup>15</sup> Maraquina maree maria fasiqanaaseesa innaarunaindaraa ufa aina aiqama raina raina masee irimarifaranoo. Maraquina siaisa kaiqeesa sia amana maraquina faqaasa maree mariana oosana irifaranoo.

<sup>16</sup> Ooqeenaa tamummaqara fasiqa minara maaqi qimasee akara rinau.

Yafee moo fannoo Karaambaiqa iriranakinaana iriannoo fee. Yafee moo fannoo Karaam-baiqa aamuaqira ufa amana amiannoo fee, sia amana moo fannoo miqiannoo.

Tamummaqara fasiqa ufara qinee Pauroosa minara maaqi qidaqa. Sia moo fannoo amana aamuaqira ufa Anutuna amiannoo mifa nimimarifa marinara. Maasa kai asaku mundirana irirana doo mareeqa.

## 3

*Aiqamausa Anutunaindi kai maridaqa.*

<sup>1</sup> Oo Koorinti maqannaasa qini qikaqaafasaa oqai qinee inni maqusai mariaafanausa, innee sia maraḡuna faḡaasara foora faiḡi faiḡi iriranamau fimarufaḡa qinee sia maraḡuna iriramau inni qimannimiḡiafana. Inni irirafa maa maḡa maaḡanasaaḡaraa irirafa inniki marinara Yisuna saḡarikiranaki innee sia faiḡiara foora mariafanoo faiḡi aanaaḡiara foora aamina mariafanoo.

<sup>2</sup> Innee sia faiḡiara foora mariafanoo faiḡi aanaaḡiuḡa irirana fooḡaasa marufaḡa qinee sia narana uḡanna nimiḡiafana naammara foora inni nimiḡiafana, innee narana uḡanna sia amanaikufaḡa ninuḡiḡiafana. Doo maḡee aukuaḡa faḡa sia amana innee narana naaḡaa inoo maridanoo.

<sup>3</sup> Innee maa maḡa maaḡanasaaḡaraasa naanna ree mariasa aaqaida miḡimarifanoo, innee nariara nariara rairai qidaḡa ufa rainee marianannai maa maḡa maaḡanasaaḡaraasa naanna ree mariana aaqarafa kooroo idanoo.

<sup>4</sup> Innikiḡari Koorinti maqusanaa Yisuna ufara suḡimariasakiḡari moo fannoo qinee Pauroona aiku asauku marida mina ufamau fida fee qidanoo kafaḡa moo fannoo qinee Apooroosana aiku asauku marida mina ufamau fidee qimasaida aaqaida miḡi qimarifanoo sia fee mi oosanafa innikina maḡasaaḡaraasa naanna ree mariana kooroo idanoo fee. Doo kooroo idanoo.

<sup>5</sup> Apooroosa faḡa Pauroosa faḡa maaḡanda uriḡararaḡandee maridee sia uriḡararaḡanda marisa maridaḡa. Maaḡanda fifau Anutuna ainainira fasiḡaḡara kai maridaḡa, inni rarisameeḡee Yisuna saḡarikiranaki quḡee mariaḡanda kai maridaḡa. Maaḡanda karaambaiḡa saika aadu aadu nimimarunnaḡanda kai maridaḡa.

<sup>6</sup> Qinee Koorinti maqusai inni iriranaki ḡaḡammara foora aḡasaaḡananoo Apooroosafa aniree nammariara foora adiasoofanoo Anutufa kambiḡarana aminau.

<sup>7</sup> Aaḡee mari fasiḡafa faḡa nammari adiee mari fasiḡafa faḡa kai fifau maridanoo, Anutufa kambiḡarana amufa mifa anoona maridanoo.

<sup>8-9</sup> Aaḡee mari fasiḡana saika faḡa nammari adiee mari fasiḡana saika faḡa amana amana kai maridanoo. Anutufa naadu naadu narí ainaini marina akiaḡara feefauru kasooḡaḡee nimiannoo. Maaḡanda moodaanaki Anutuna ainainiranaki maridaḡa ainainidaḡa innee afuḡa ḡambaanaí Anutuna ainainirafa mariafanoo. Qinee Pauroosa moo ainaina kikiḡa usanaura, innee Koorinti maqannaasa Anutuna maaḡa mariafanoo.

<sup>10</sup> Anutufa maaḡa usakee maria iriranna qini qimusa maridaḡa maaḡa usakarana akoofasa qinee faakana faḡa maaḡa atuna faḡa arusaunanoo moo fannoo asaainanoo. Qinee andeeḡasee maaḡa atuna arusaunanoo moo fannoo sia fifau maaḡa asaainanoo andeeḡee mari fasiḡafa ireeda amiḡimaseenoo kai maaḡa asaainanoo.

<sup>11</sup> Anutufa narí asauku mundirana Yisuna doo moodaa faakana narí maaḡaki rak-iḡeenoo, sia amana moo faakana rakiarafa mariannoo doo mifa kai mariannoo.

<sup>12</sup> Oosana oosana maaḡa usakee mariasara foora maridaḡa akaḡausa amiḡimasee faiḡi anaasee dadaaḡidaḡa mapuku nimaḡaidaḡa, akaḡausa sia amiḡimasee mapuku nimaḡaidaḡa moo fannoo kooro fooḡaa iranannai maaḡa asaainimarifa amiḡirafa maaḡa asaainimarifa maridanoo, moo fannoo mina oorudupirana siruaannai maaḡa asaainimarifa maridanoo. Moo fannoo mina oorudupirana firaa munnimma aḡimaria ooninannai asaainimarifa maridanoo. Moo fannoo mina oorudupirana saḡarinnai asaainimarifa maridanoo. Moo fannoo mina oorudupirana eefeedannai maaḡa asaainimarifa maridanoo. Moo fannoo misa oorudupirafa fiaarunnai maaḡa asaainimarifa maridanoo. Inni Koorinti maqannaasa Yisunara qimannimiḡi maaḡa atuna rakiḡannimaḡaannee ḡiafanausa mariafanoo maaḡa asaana imariasara ḡunnana misa miḡooḡari innikina ookaamandee maaḡa asaanaara foora moo faḡa moo faḡa qidaḡa.

<sup>13</sup> Asauku mundirafa ḡumaninna aukuanḡai maaḡa asaainira oosana aiḡamausa nifusaa kooroo iannoo. Mi faasaannana Anutuna ida fannoo aiḡama fasiḡa ainainirana ḡamaḡinoo kooroo iannoo. Mi idafa aiḡamausa ainainirana amanamandainanoo mina anoona kooroo iannoo.

<sup>14</sup> Faiḡi moo fannoo maaḡa atunasaa ookaamandee usakee marina ida sia ḡama taikasainanoo Anutufa mina ḡafamaseenoo mi fasiḡanara amiḡimmandee usakee maḡi ḡimasee feefauru amiannoo.

<sup>15</sup> Faiḡi moo fannoo mandainainannai usakee marina, ida ḡama taikasainanoo sia feefauru amiannoo. Mi fasiḡafa mifa kaḡisamu innaarunai asumu mariranaki fuannoo maaḡakiḡari raudamakinoo idauro aanaaḡi ainaina sia uḡirafa kaḡi sandaannoo.

<sup>16</sup> Innee maana iridee sia fee iridee innee Yisuna ufara suqimariasa Anutuna amaana maqara foora mariafanoo, Anutuna maraquna fannoo narí maaqara foora inniki maridanoo.

<sup>17</sup> Moo fannoo Yisuna ufa suqimarinanaki misa raiqara ufee oosana oosana manda ufa niminaqa raindaanifanoo Anutuna maaqara foora rapee inanoo Anutufa mi fasiqana kuridisaannoo. Anutuna amaana maqa naaquqarafa anukarafa maridanoo innee misa mi maqafa mariafanoo.

<sup>18</sup> Sia moo fannoo narí narí akaru qiannoo. Inniki moo fannoo nariara maqasaa fasiqaki irirana faqasee qimarifa narí maqasaa irirana amooidanoo sia anoona irirana faifa, mi fasiqafa nariara ureeqafinoo reendenamafinanoo miqoo amana anoona irirana oosana araannoo.

<sup>19</sup> Maqasaa fasiqauqa irirane qimariana Anutufa minara furufara qidammiafoo qidanoo. Ooqeenaa tamummaqara fasiqa minara maaqi qimasee akara rinau.

Anutufa irirana faqaasa qumaree nári firaa iriranaki ufaanakiara foora naridanoo.

<sup>20</sup> Tamummaqarafa moo fannoo minara maaqi qimasee akara rinau.

Karaambaiqa firaa irirana faqaasa iriranara fifau ainaina maridanoo fee qidanoo.

<sup>21-23</sup> Innee Koorinti maqannaasa minara irisee sia moo fannoo faiqi irirafa afeekainainara irisee amooqiannoo. Innee Koorinti maqannaasa Yisuna ufara suqimariasa kaaqa rakeekaamasee akaqausa Pauroosanaindifee qidaqa akaqausa Apooroosaindifee qidaqa akaqausa Peetooroonaindifee qidaqa aaqaida miqi qimariafanoo. Innee sia misaindi mariafanoo misa innindi maridaqa. Aiqama maa ainainna inni dadaaqi mari ainainausa maridanoo. Pauroona faqa Apooroosana faqa Peetooroona faqa maa maqa maaqafa faqa kaqi marirana faqa kuqirana faqa maqee mariana faqa naaru marinnana faqa aiqama maa ainainausa inni dadaaqi mari ainainausa maridaqa innee asauku mundiranaindi mariafanoo kafa asauku mundirafa Anutunaindi maridanoo. Innee minara irisee fifau ammuqundari qidaqa Pauroonaindi fee Apooroosaindi fee Peetooroonaindi fee qimariafanoo Anutunaindi maridammia.

## 4

*Pauroofa nariara asauku mundirana ainainira fasiqee qinuu.*

<sup>1</sup> Innee Koorinti maqannaasa maasara maaqi qiaqa. Asauku mundirafa Yisufa maasa mina ainainira faiqiuqa Anutuna ooqai kukeeqara anoona ufara rakisiaqee qimaqoosa maridaqa.

<sup>2</sup> Ainaina faqaafa narí ainainasaa rakisi mari fasiqanara akooqoo andeeqara fasiqa kai maraannoo. Narí ainainasaa amiqimasee rakisi marina kai narí ufa irimari faiqina kai mara quqaannoo. (Qinee Pauroosa Anutuna rakisira faiqiara foora maridaqa. Qinee inniki ainainidaqa qeeqa irirana qeeqa uriqararanasaa rusisee inniki ainaini mariqiafana.)

<sup>3</sup> Qinee inniki ainaini marunaqa innee qini ainainirana amanifaqa sia inni qimani-ranara irianauro uriqararafa Anutuna ufa kai irianauro maqasaa fasiqa moo fannoo iriranannai qini ainainirana amanifaqa qeeqa uriqararana mina ufara kai irianauro. Qinee qeeqa faqa qeeqa ainainiranara andeeqaida fee sia fee andeeqaida fee qimasee sia qeeqa iriranara irianauro qini ainainirana andeeqee mari uriqararafa kai mina iriranara kai irianauro.

<sup>4</sup> Innee qiniara qiafanoo qiaqa daakirafa sia ummaara darifaqa kaqimbidaqa. Qini daakirafa qini darinoo fee sia fee darinoo sia qiniara andeeqara ainainira fee qidanoofau Karaambaiqa mifa kai qini saikara iridanoo ufa qiannoo.

<sup>5</sup> Innee minara irisee sia maasara kasaqaqindari ufa qiaqa. Karaambaiqa innaarunain-dari quminna faasaana kai taikara ufa qimannimirafa mariannoo. Mikari karaambaiqa sia ooqai akooqoo mariu irirana kukeeqara irirana oosana oosana irirana minakinaana uqeereeqeenoo aiqamausa nifusaa kooroomannimaqannoo. Aiqama fasiqa anaasee naundurakinaa oosana auqeeqandiannana deedaqirana akooqoo aiqamausa nifusaa mara quqasainaga qafeefaranoo. Mikari aiqama fasiqa anaasee nári maqasaa andeeqara nirana marirana amana kai Anutuna amooqirana mareefaranoo. Mikari Anutufa maasa saika oosana aiqumumasee minara ufa qiannoo. Maasa mina ufamau fimariafanausa marunnanara innee sia ufannai maasa saika kasaqaqindari aruaqa.

<sup>6</sup> Oo qini qikaqaafasaa mariasa innee aiqamausa andeeqasee Anutuna akara ufamau fuagee qimasee Apooroosasandiri maaqanda kikiqisusee qimannimiaqera maaqanda qimannimiranara qiaqa. Anutuna ufa inni indaarunnikamma nimaqee mariasara sia moora amiqira fee qimasee moora manda fee qimasee rairaiqiaqa sia miqiaqa.

<sup>7</sup> Inniki akaqausa náriara uriqararausee qimariana unna qimariasa mariafanoo. Yafee mi uriqararana niminoo fee, Inniki mari ainainna aiqama Anutufa kai niminai. Innee minara iriaqa, naqaa fee qifaqee qeeqa kai maraafanausa firaqoo uriqaraqa maridee qidee. Anutufa kai aiqama ainaina niminai.

<sup>8</sup> Innee Koorinti maqannaasa unna qimasee aiqama ainaina maraafanausee qimariafanoo, innee inneeqara unna qimasee ainaina faqaasee qimariafanoo, doo innee unna qimasee karaambaigara foora mariafaqa maasa sia. Innee Koorinti maqannaasa karaambaiga mariaqaana. Innee kuqaa karaambaiga marifaqau maasa maqee mandainainaki marunnana taikaseefau inni faqa kuqaa karaambaigaikiqa marini.

<sup>9</sup> Maasa Yisufa niqiqoo fasiqausa Anutufa ureeqarana nimiqoosammia maqi qimasee qeeqa kai oonu mafi iridaqa nimiqaifaqa maasa minaki maridaqa. Maasa namuqaa nisaukukiara foora marianaqa aiqamausa faiqi faqa qangiroo faqa nifusaa ataasa ataasa qidaqa darifandinausa miqiraua maasa maridaqa.

<sup>10</sup> Maasa niqiqoo fasiqausa asauku mundirana ufasaara furufarirausee qimariafaqa innee Koorinti maqanna Yisuna ufara suqimariasa asauku mundirana ufakina innee inneeqara irirana faqaasee qimariafanoo. Maasa Yisuna ufa qimannimi marunausa kudoosaapeera foora unaqa innee nimudaanai qidaqa afeeka mariafanoo. Maasa faiqi nifusaa fidiqaa imariasara foora maridaqa innee misa nifusaa uriqararasa mariafanoo.

<sup>11</sup> Maasa Yisufa niqiqoo fasiqausa ooqai faqa maqee marunnana faqa daara raidanoo nammariara sia amanaikidanoo maasa manda qamunna rakeekaa irana afisidaqa, misa maqee maqee unnaananasu oonisamu saamusamu maasa daridaqa maasa maqa siaisa kaqi maqusamau faiqaa nidaqa.

<sup>12</sup> Maasa qeeqa kadaapiriranannai tooqaamu dariranana minannai ainainamasee naidaqa. Faiqi maasa diquraraafaqa maasa amiqi amiqimmannimaqaidafaqa. Misa mandaikamma qimaqaafaqa maasa kaqi kai mina maraqa fidaqa.

<sup>13</sup> Misa mandufa maasara qiafaqa maasa amiqira ufa kai misa qimannimidaqa. Maasa maa maqa maaqanakinaasa madaapeera foora maridaqa ooqai miqiqaa aniusa maqee faqa aiqama maqannaasa madaapee aqi maria madikara foora marisa maridaqa.

<sup>14</sup> Qinee Pauroosa inni Koorinti maqusanaasa sia nisaurirana nimiaqeera mi ufana qimannimisee akara ridaqa, qeeqa qimuqusa qeeqa faiqi namu mariafaqara foora naamua qidaqa.

<sup>15</sup> Innee asauku mundirana ufamau fidaqa inni ufasa rakisiraua fuki faaki qimariasa nukudara foora mariafaqa qinee moodaa inni nikausara foora maridaqa. Ooqai indaaru qinee amiqira fasaasa ufa maree aniree inni Koorinti maqanna nimiafanaqa irisee asauku mundirana Yisuna ufamau fimariafaqa miqiafannanara inniqa nikausaiqiqa maridaqa.

<sup>16</sup> Qinee minara irisee qeeqa qimuqusa ookiqari reendeenamandee inni qimannimidaqa innee inni nikausa qini daanna raqa.

<sup>17</sup> Innee qini daanna raanee qimasee Timootina aqigaananoo innee iannai fuannoo. Maaqanda karaambaiga ainainiranaki maridaqa mifa qini qimuqusa andeeqara qimaakuara foora maridanoo. Mifa innee iannai oonuree qini fuka marirana asauku mundirana Yisunaki marira oosana qimannimiannoo. Aiqa maqusa maqusa nidaqa Yisuna ufa irimariasa suqusaida naamuaqimaqaafannana Timootifa mi ufana inni naaqoo auqaannoo.

<sup>18</sup> Innikiqari akaqausa qini Pauroosara sia kafa mai aniree maasa qiqafaannoo qifoo qimasee noori uqeerarausa nimariafanoo.

<sup>19</sup> Karaambaiga eedoo qinaqa innee iannai oonu nindafaanura. Oonureeqa innikina noori uqeere mariasa sia misa náriara fira ufa qinnanara oonu qafaanura misa auqi maria ainainna kai marinaqa qafaanura. Anutuna afeeka misaki marinaqa auqemarinnana kai qafaanura Anutuna afeeka sia misaki mari ifoo qidaqa.

<sup>20</sup> Anutuna innaarunai ququsaki fimariasa maa maqanasaa marirana sia fifau ufasa mundinoo maridanoo Anutuna afeeka dadaaqinoo auqiranasaa mundinoo maridanoo.

<sup>21</sup> Oo Koorinti maqannaasa Yisuna ufa irimariasa auqemariana inneeqa kai iriaqa, unnaananasamuara foora uqirausee anianauree inniara qimuqusirana faqa reendeenirana faqa miqandee uqiraua anianauree. Inneeqa kai irisee inneeqa marirana andeeqasee mariaqa.

## 5

*Yisuna ufara suqimarunakina mandoosana kambiqanau.*

<sup>1</sup> Oo Koorinti maqanna Yisuna ufara suqimariasa inni ufa moo iriqa firaa manda oosana inniki marifa aamina maqannaasa firaqoo mandoosana maree mariasa faqa sia maree maria oosana mareenoo inniki Yisuna ufa irimariasaki moo fannoo narí anoona aqoonnana narí akoonna anaafaq mareenoo.

<sup>2</sup> Mi ainainafa inniki marifaqa naqi fee mandee noori uqeerasee inneeqa nifaafaq amooqidee minara innee nisauruaqa, inni naunduraki soofaarai kinoo mariani, mi fasiqana innee qakinaana naqiraree kaqi maridanoo, innee suqimarianakiqari mi fasiqana aqiqaafa.

<sup>3</sup> Qinee qeeqara qianaara kuqaa qinee moosaa nianai marida qini maraquna inni faqa maridanoo miqoo marifaqa karaambaiqa Yisuna auqusaa doo mandoosana marai fasiqana aqiqaara ufa qiqa qinee inni faqa maridaqara foora doo aqiqaara ufa qiqa.

<sup>4-5</sup> Innee moodaanaki suqimarifanoo qini maraquna faqa inni saimbaqa suquannoo, Karaambaiqa Yisuna afeeka miqoo maasa faqa marinaqa innee mi manda fasiqana mareeqee inni suqiranakiqari aqiqaifanoo mi aiqaranannai Sadannana amifanoo mina apata kuridinanoo karaambaiqa quminna faasaana mina aundurakinaana kai asumu maraannoo.

<sup>6</sup> Oo Koorinti maqusanaasa innee innee qara kaaqa andeeqarusee qimasaida inni noori uqeerara oosana sia andeeqanoo maridanoo. Innee maa ooqeenaa ufana iridaqa maaqimminoo maridanoo. Narana moodaa qoo suqu quqasainanoo kaqikaafa moodaa putaa inanoo aiqamafa minasaqaraana putaa iannoo.

<sup>7</sup> Innee qakinaana mi manda fasiqana maraqusaifanoo aiqama andeeqanoo mariani. Miqoo innee amiqira naranara foora mariaqa. Mi manda fasiqana aqiqaaranara qidaqa ooqai Mooseena aukuaana ainnaaqarara qoomaqa maruna kikiqisusee sipsipa aanaaqi Anutuna suqa amisee nariqa ooruku fooqaa ira ainaina nariqa maaqakinaana aiqama doo maraquseeqa ainnaaqarara qoomaqa sakasee neemariqau. Doo maqee maria aukuaana asauku mundirana aunirira saqarisaa sipsipa aanaaqarara foora doo kuqa arusee Anutuna amisaafanoo doo maasa mandoosana taikaqiseenoo maasa marirana faqa andeeqa qiseenoo maasa putaaira oosana taikaqisaifanoo aidaaqareenoo minara maasa aidaaqarara qoomaqa deedaqinoo marifoo qidaqa.

(Isaraee maqannaasa ooqai ainnaaqarara qoomaki ooruku siai feemu kai neemariqau. Maasa ooruku moo maqee maridanoo misaindi moo marinau.)

<sup>8</sup> Doo maqee maasa ainnaaqarara qoomaqa foora suqufi naannana suqufi ooruku siai feemuara foora naanaura. Naranaki mari oorukufa manda oosana faqa faiqi anaasee narí ummuari narí ummuari imariana faqa kikiqusidanoo. Ooruku siai feemu kikiqusimariafa Yisuna ufamau fidaqa nisakadiki ikairi sia marirana faqa anoona ufa qimariana faqa minara qidanoo. Maasa putaaira oosana faqa taikaqisoo faqa maqee amiqira naranara foora putaaira oosana faqa aqara oosana faqa taikasee nisakadiki ikairi siaisa anoona ufa qimariasa naanna ramafi marianaara.

<sup>9</sup> Qinee Pauroosa ooqai inni Koorinti maqannaasa Yisuna ufara suqimarusa pasa akara rumannimaqaafannana. Mi pasanaki inniara faiqi anaasee narí ummuari narí ummuari mariasa faqa sia aqoondikamma nimaqararee qimasee misara eerairiaqee qimasee akara rumannimaqaqiafana.

<sup>10</sup> Innee akaqausa qini mi ufana irisee aqaafanoo maqee qinee qiafannufana kafa kooroo ianaura. Innee Koorinti maqusanaasaki sia Yisuna ufa irimariasaki kai maridaqa aaminauqaindi faqa moomoosa maridaqa. Qinee sia inniara aamina fasiqa anaasee narí ummuari narí ummuariqimariafa faqa anaaseeuqa faqa kaaqa ainainara rimaria fasiqa anaaseesa faqa unna ufa qimasaida ummuari maria fasiqa anaaseeuqa faqa tumunnai auqi maria afaannara innaaru qimaria fasiqanaaseeuqa faqa sia mi aiqama ainainna maree mariasara eerairiaqee qiqa, innee eerairiani qinnana moomoosa maa maqa maaqanasaa marianara fasauki fee quqoonasaa fee ooru atoqafi foora.

<sup>11</sup> Sia qinee miqi qiafana maaqi qiafana. Inniki moo fannoo nariara Yisuna ufa irimarinafa inni nikaqaafasaa maridee qinafa faiqi anaasee ummuari mari fee kaaqa ainainara rimari fee tumunnai auqira afaannara innaaru qimari fee mandufa qidanoo faiqi anaasee niqi mari fee nammari namasee furufari mari fee unna qimasaida ummuari mari fee miqira fasiqa aanaaseera Yisuna ufa iri marianaki maria fasiqa anaasesara eerairidaqa misa faqa sia ooqu marifi narana naaqa, misasaqaraafa innisaa aqufuandoora.

<sup>12-13</sup> Yisuna ufa sia irimariasaki aqoosai mariasa sia narira ufa qinee nimmianaara mi saikafa sia qini saika maridanoo. Anutufa kai misa narira ufa nimiannoo. Inneeqa kai inneeqa nikaqaafasaa kimariana Yisuna ufara suqimariasa aqaifaqa ufa nimirafa innindi mariannoo. Ooqai tamummaqara fasiqa moo fannoo minara maaqi qimasee akara rinau.

Inniqa suqiranakiqari mandoosana maree marina aaduma mara quqaqee qidanoo.  
Qinee Pauroosa minara inniki mandoosana maree mari fasiqana aqiqaqee qidaqa.

## 6

*Yisuna ufa irimarusaa kaqi qee siaasinnai fimariqau.*

<sup>1</sup> Innee Koorinti maqanna Yisuna ufa irimariasa inneeqa nikaqaafasaa kimariana mara maree kai qee siaasinnai mara maree fimariafanoo. Inneeqakiqari aneenna akaqaafasaa kimariannana faqa ufa raineenana, Yisunara sia irimarinna siaasi finnai sia maree fua, sia uqanna miqiaqa aqaqida miqi mariafanoo. Anutuna ufa irimariasa kai mina andeeqaqaana.

<sup>2</sup> Kasooqaqee Yisufa gumuaninna aukuaana maqee mariaqoo Anutuna faiqi namu mi aukuaana aiqama maa maqa maaganakinaasa siaasiuqa marifaranoo sia fee minara innee iridee. Mi aukuaana innee Yisuna ufa irimariasa aiqama maa maqa maaganasaqaraasa aqarana oosana oosana aqarana andeeqanniseefaranoo, doo maqee inni ufa suqiranaki aqarana marasaifaqa aiqama maa maqa maaganasaqaraasa andeeqannisee fandinausa mariafanoo inneeqa kai amana andeeqefaranoo.

<sup>3</sup> Mi aukuaana maasa siaasa maridaqa qangiroo ufa faqa irianauro, sia fee innee minara iridee. Doo maasa miqidaqa maqee marunna aukuaana aqarana marasaifaqa amana irianauro.

<sup>4</sup> Innee miqi mariana inniki moo mandufa kambiqaqafinaqa innee mina mareeqee aqosai mariasa nimifaree.

<sup>5</sup> Nisauruqa, sia fee inni Yisuna ufara suqiranaki moodaa ufa andeeqarana akoofasa maridanoo fee, inniki maridanoo sia fee mi fasiqafa amana ufa raine mariaqanda ufa andeeqaanoo fee maridanoo amana andeeqannisaanoo.

<sup>6</sup> Innee Yisuna ufara iri mariasa sia andeeqannisee mariafanoo, inneeqa nikaqaafasaa kimariasa mara maree sia Anutuna ufa iriasaki quqee mariafanoo aqaqida miqi mariafanoo.

<sup>7</sup> Inniki koota ufa marinaqa kaqi siaasinnai maree fimariafa innee Yisuna ufamau fimariana minasaqari aikatamaki kaqinni aqufuanara kooroo idanoo. Yisuna ufa irimarifa moo fanoo mandufa aminana kaqi iriaqaana Yisuna ufa moo fannoo irimarifa ani ainaina ummuarinnana kaqi minnisaqaana.

<sup>8</sup> Inni sia andeeqasee maridaqa kaqi maree mariafanoo narinni narinni aqamannimaqee mariafanoo narinni narinni ainainamma ummuaramasaidaqa siaasinnai maree fidaqa, innee kaiqeesa miqimannimaqee marifanoofau mifa faqa aqarafa marini, inneeqa nikaqaafasaa kimariasa kai miqimannimaqee mariafanoo firaqoo aqaqida miqimariafanoo.

*Mandoosana maree mariasa sia uqanna innaarunai fjaranoo.*

<sup>9-10</sup> Anutufa narí ququsaki naaru marirana sia mandoosana maree mariasa nimianoo sia fee innee minara iridee. Innee sia inneeqa nikaruqimasee mandoosana maraqa nidaqa innaarunai firaree qiaqa. Dapi maraqa nua fasiqa anaaseesa faqa tumunnai auqira afaannara innaaru qimariasa faqa moona afaaqi anaqaq narí ummuari narí ummuari mariasa faqa faiqi anaasee aqoonna fasiqa anaasee aafeeqaidanoo mi oosanna maree mariasa faqa ainaina ummuari mariasa faqa kaqa ainainara rimariasa faqa nammari namasaida maqee maqee furufari mariasa faqa manda ufa qimariasa faqa unna qimasaida ummuari mariasa faqa mi oosanausa maraqa nuasa faqa sia uqanna Anutuna innaaruna ququsaki keeqefaranoo.

<sup>11</sup> Koorinti maqannaasa innee akaqausa miqi marusa marufanoo inni mi manda ainainafa doo rukanoo maridanoo, nári nifaaqara Anutuna amidee qimariasa mariafanoo. Asauku mundirafa Yisufa maasa karaambaigaq minasaa rusiranannai faqa Anutuna naaquqara andeeqara maraqunannai faqa miqandannai innee Anutuna afusaa andeeqaranaki mariafanoo.

*Inni nifaaqa fannoo Anutuna amooqiranaki andeeqaranaki mariani.*

<sup>12</sup> Moo fannoo nariara maaqi qianoo qinee amana maridaqa aiqama ainaina mandainainee qimariana faqa amana maraanauro, anee miqi qianaqa qinee minara maaqi qidaqa kuqaa anee aiqama ainaina mareennaranoo moomoo ainaina sia ani dadaaqianoo ani kuridiannoo. Qinee qiqa irirafa maaqi qimasee qimmiridaqa qinee akooqoo marida aiqama ainaina amana maraanauree qimmiridaqa qinee minara maaqi qianauro. Moo mandainaina fannoo qini mareeqee narí marinaki quqaqisaifanoo mi maraqunafa daakufuandoora rufee sia mina maraanauro.

<sup>13</sup> Faiqí moo fannoo anaasee ummuaraneera qimasee mina kikiqa maaqi qimasee usuannoo narana fannoo aranaqumundi maridanoo. Kafaa arana fannoo naranaindi maridanoo. Mi ufana saaqari mifa unna qimasee maaqi qimasee ookaa iannoo, anaasee faiqíndi marifaqa kaqi maraanauree qiannoo. Qinee Pauroosa minara maaqi qidaqa Anutufa narana faqa arandaa faqa naríndi naríndi quqasoofa kasooqaaqee miqanda kuridiannoo maasa faiqí qifaafa sia ummuariranaindi maridanoo Karaambaiqaindi andeeqaranaindi maridanoo kaffaa karaambaiqa maasa qipatasaa rakisiqimaqeenoo amiqimmaqimaqaidanoo andeeqara marirana nimimarifa marinara andeeqara oosana kai maraaqa.

<sup>14</sup> Anutufa narí afeekannai maasa karaambaiqa kuqiranakinaana uqeera quqoofa mifa kai maasa qifaafa faqa kuqiranakinaana uqeera quqaaninnanara inniqa nifaaqaki andeeqara oosana kai maraaqa.

<sup>15</sup> Inniqa nifaaqa asauku mundirana afaafa atiuqa maridanoo. Amanee asauku mundirana afaafa ati mareeqee dapi maraqa nua aanaaseena afaaqasaa quqaanauree oo sia uqanna amana miqianaara.

<sup>16</sup> Faiqí moo fannoo narí afaafa mareenoo dapi maraqa nua anaasee finnai finnoota mi fasiqana afaafa fannoo mi anaaseena afaaqandiri moodaanaki atooqafuannoo. Oo innee sia minara irimariafannoo. Ooqeenaa akara minara maaqi qimasee akooqoo qidanoo Miqanda moodaa nifaaqaikamambi maruqanda marifaranoo.

<sup>17</sup> Qinee Pauroosa minara maaqi qidaqa moo fannoo karaambaiqasaa apamambi marinafa karaambaiqa amuqusanndiri moodaanaki apainoo mariannoo.

<sup>18</sup> Faiqí anaasee narummuari narummuariranara eerairiaqa. Moo fannoo oosana oosana mandainana marainafa mi manda ainainafa sia narí afaafa mandaikamamaqaannoo. Faiqí moo fannoo moo anaasee ummuarinoo narí afaafa uqanna mandaikamma maqaidanoo.

<sup>19</sup> Innee sia fee maanara iridee, innee doo irimariafaqa qimannimidaqa inni nifaaqa Anutuna naaquqara andeeqara maraqauna amaana maqa miqirafa maridanoo. Anutufa narí maraqauna innikina quqasoofannoo marinara innee inneeqa nifaaqa Anutuna amooqira mariranaki quqasaifannoo mariani. Inni nifaaqa sia innindi maridanoo.

<sup>20</sup> Anutunaindi mariafanoo. Mifa narí amaakunnai firaa feefaurumasee inni marasee nariara quqaqoosa mariafanoo minara innee inniqa nifaaqa Anutuna amooqira mariranaki quqasaifannoo mariani.

## 7

*Faiqí faqa anaasee faqa sia narí minnisee narí minnisee iaqa.*

<sup>1</sup> Innee Koorinti maqannaasa pasa akara rumasee oosana oosana ainaina qiniara iree mariafanoo. Maqee innee akaraki iree maria ufana qinee inniqa qimannimianaara.

Inneeqa faiqí anaasee nimundaranara qiafaqa maaqi qimannimianaara. Faiqí nariara adeedaana maridanoo andeeqarafa mariannoo.

<sup>2</sup> Kafaa mina atiki maaqi qianaara. Faiqí anaasee narí ummuari narí ummuarirafa moomoo marinara aiqama fasiqauqa nári ninaaqa maraaqa, aiqama aanaaseeuqa nári nifaaqmaaka marasee andeeqasee mariaqa.

<sup>3</sup> Afaaqi fannoo narí anaafa aidimarina amiani miqikai inoo anaasee fannoo narí afaaqi aidimarina amiani. Aiqaamaqara nariara nariara nidimari ainainna narí ami narí ami iaqa.

<sup>4</sup> Anaasee fannoo sia narí afaafa rakisirafa maridanoo narí afaaqi fannoo mina afaaqasaa rakisidanoo, miqi kai masee faiqí fannoo sia narí afaafa rakisirafa maridanoo narí anaafa fannoo mina afaaqasaa rakisidanoo minara qinee qidaqa nariara nariara nidimari ainainna narami iaqa.

<sup>5</sup> Minara irisee sia innee nariara nariara qaoo qiaqa. Anutunara kisaqaasaa amiqimasee innaaru qianne qimasee faiqí faqa anaasee faqa moodaaqooqara ufa qimaseenana naquma amaane marasee akeeka masee aura masee maraanauree qimaseenana aadu aadu mambinana Anutunara kisaqaasaa innaaru qiaqa. Innaaru qimaseenana kaffaa moodaanaki kiaqa kisaqaasaa aadu aadu ina mariannanara Sadannafa nimanamandee qafaina sia afeeka marina eedoo qifoora minara kaffaa moodaanaki kiaqa.

<sup>6</sup> Faiqí nári ninaaqa mararanara faqa anaasee nári nifaaqmaaka mararanara faqa qunana sia aranaiqi afeekaikamandee qiaqa kaqi qimannimidaqa marararee qimaseenana doo maraa.

<sup>7</sup> Qiaqa irirafa maaqimminoo maridanoo. Aiqaamausa qini daanna ree adeedaana mariaqaana. Anutufa narí irirananaí naadu naadu marirana nimifaqa maridaqa



faiqí moo adeedaana marinanee, faiqí moo anaasee faqaafa marinanee Anutufa kai nimidanoo.

<sup>8</sup> Doo maqee maanaaqa kumaaraa uruna mariasa faqa faiqí anaasee kuqufuafaqa adeedaana mariasa faqa inni qimannimidaqa innee qini daanna ree adeedaana mariqa amiqirafa marifaranoo.

<sup>9</sup> Innee sia adeedaana amanaikiqa doo amundaaga. Anaaseera faiqíara ani aundurái idara foorá atakuqinana doo sia amanaikinoo amundarafa idara foorá atakuqirana uriqararafa maridanoo.

<sup>10</sup> Qínee nimundararusara naamuqíra ufa qimannimianaura sia qeeqaindifau karaambaigaindi qimannimianaura. Amundara anaasee moo fannoo sia amana narí afaaqi minnisarafa maridanoo.

<sup>11</sup> Minniseenoo adeedaana kai mariani. Adeedaana mari naisia quandaki narí afaaqi kai kaifaa maraannoo. Faiqí faqa miqikai inoo sia narí anaaga minnisaani.

<sup>12</sup> Doo adeedaana ufa qimaseeqa doo akaqausa qimannimianaura, sia karaambaíqa ufafau qimannimianaura qeeqa ufa qimannimianaura. Faiqí moo fannoo Yisuna ufa irimarífa mína anaaga sia Yisuna ufa irimarífa maridanoo mi anaaseefa narí afaaqi faqa amiqímasee marinanoo sia mína afaaqi fannoo aqíqaannoo mína faqa mariannoo.

<sup>13</sup> Anaasee moo fannoo Yisuna ufa irimarínafa marinanoo mína afaaqi sia Yisuna ufa irínafa maridanoo kaqí narí anaaga faqa amiqímasee maridanoo mi anaaseefa sia narí afaaqi aqíqaannoo.

<sup>14</sup> Yisuna ufa irimari anaaseefa narí afaaqindiri moodaa fara maqí mafuanara mi anaaseefa narí afaaqi mareeqeenoo Anutuna aqoondikiranaki quqaidanoo miqídanoo. Kafaa Yisuna ufa irimari fasiqífa narí aanaaqandiri moodaa fara foorá mafuanara narí anaaga sia amaana ufa irimarífa maramareenoo Anutuna aqoondikiranaki quqaidanoo miqídanoo. Sia miqínoo marinanoo fufau miqanda faiqí namu aamina maqannaara foorá mariqíni, maqee Anutufa mísa faqa aqoondi kiannoo.

<sup>15</sup> Faiqí fee anaasee fee sia Yisuna ufa irínafa narí kai minnisee finafa amana saina fuani, sanda moo fannoo sia inniara sia rakisisimma umaraaqee qídanoo. Anutufa inniara sia kaukaataqíranaki mariaqee qídanoo asooaranaki mariaqeeera naarameeqee narí ququsaki quqaqífaqa mínara qimannimidaqa, saifanoo fuani marínoo mariani.

<sup>16</sup> Yisuna ufa irimari anaaseefa ani afaaqi ani faqa maridanoo mífa faqa innaaruna asumu marirana paquriannoo fee sia fee paquriannoo. Kafaa Yisuna ufa irimari fasiqífa ani anaaga ani faqa maridanoo mífa faqa innaaruna asumu marirana paquriannoo fee sia fee paquriannoo.

*Innee Yisuna ufa iriraree qimasee anukamuqooqari doo minaki kai mariaqa.*

<sup>17</sup> Qínee Pauroosa aígama maqusa maqusa nídaqa maa ufana Yisuna ufara suqímariasa qimannimidaqa. Innee aígamausa sia moo saika auqaaqa Karaambaíqa inniara mariaqee inna saikana kai maraaqa, Anutufa inni naarooafaqa Yisuna ufa irirara anukamuqoo maroo saikana kai maraaqa sia moo kíaqa mi saikanaki kai mariaqa, sia maqee moo kíaqa.

<sup>18</sup> Yuda maqanna fasiqa fannoo Anutuna ufa irisee Yisufinnai anirínafa sia míni narí Yuda maqannaasa fainanduqirana sia asauruani saina kaqí mariani. Anaamuru fasiqa moo fannoo Yuda maqannaasa fainanduqirana siaífa Anutuna ufa irisee anínafa sia quandaki fainanduquani saina kaqí mariani.

<sup>19</sup> Fainanduqíra fee sia fainanduqíra fee mína fifau ainaina mariannoo. Anutuna naamuqíra ufamau eedoo qimasee finafa mífa anoona maridanoo.

<sup>20</sup> Aígama fasiqa Anutufa naarooafaqa eedoo qu kamuqoo maru marírafa mífa doo sai kaqí mínaki mariani.

(Pauroona aukuaana akaqausa faaqa fasiqausa nári ainainirana sia amanaikiqa ainaina faqaana karabusara foorá ainaina máisee mariqau. Sia feefauru maree mariqau. Kadaapírumasee narana faqa maaga faqa kai maree mariqau. Misa nuqu ainainira fasiqee qímaríqau. Mi aukuaana ainaina faqaasa akaqausa faqa faaqa fasiqauqa faqa Yisuna ufa iríqau. Pauroofa mínara irisee maa ufana qimannimínau.)

<sup>21</sup> Anutufa ani aaroo kamuqoo anee moona ainainira fasiqa marúnafa saina kaqí maria, sia quqasee moosaa fua kasooqaqee idukírafa kambíqainana miqoo kai idukúsainana fua.

<sup>22</sup> Faiqí moo fannoo ainainimarínafa marinanoo karaambaíqa aarainanoo mi ainainiranaki kaqí maria Karaambaíqa idukíra fasiqára foorá marínanoo. Miqíkai másee asauku mundírafa idukíra fasiqa aarífanoo kaqí narí ainainiranaki mariani asauku mundírana ainainira fasiqára foorá mína ainainiranaki marínanoo.

<sup>23</sup> Innee Yisuna ufa irimariasa Anutufa firaa feefauru aqusee inni maroonara irisee sia moo fasiqa ainainiranakiara foora keeqafinaqa mandoosana ufa ameemaanai mariaqa kaqi idukiqa mariara maqi idaqa Anutuna ufamau fuaqanani.

<sup>24</sup> Oo qini qikaqaafasaa innee aiqama Yisuna ufa irirara anukamuqoo marirana minaki kai maridaqa Anutuna aqoondikiranaki maqee maqee mariaqa.

*Kumaaraa maanaaqa adeedaana misa nimundaranara qidanoo.*

<sup>25</sup> Doo maqee anaasee siaisa faqa faiqi siaisa faqa qimamianaara. Qinee Karaambaiqa amuqusirana maree marunasa marunnaara qini ufa irisee minasaa munduaqa, sia qinee karaambaiqa ufara inni qimannimidaqa qeeqa ufa qimannimidaqa.

<sup>26</sup> Innee Koorinti maqannaa Yisuna ufa irimariasa innee maqee aukuaana Yisuna ufasaara firaa mandainaina nariranaki mariafaqa minara irisee qimannimidaqa, aiqama fasiqa maqee maria mariranaki kai mariaqa.

<sup>27</sup> Ani anaqa maridanoo fee sia mina minnisaa, anee adeedaana maridaneer sia aanaaseera randasee maraa.

<sup>28</sup> Anee anaasee maraseenana sia aqaananoo. Maanaaqa moo fannoo kumaaraa mareenoo sia aqaannoo. Maqee maria deedeepira aukuaana Yisuna ufasaara faiqi anaasee faqaasa firaa ummaarakai mariafanoo minara irisee innee maqee Koorinti maqusai mari ummaarana sia maraaqee kaqi kasooiqa mariaqee qidaqa.

<sup>29</sup> Oo qini qikaqaafasaa qinee ufa qunnana anoona maaqimminoo maridanoo. Innee Koorinti maqusai ummaarakai marianara moomoo faasaana sia kaqi marifaranoo sia moomoo kari Anutuna ainainiranaki marifaranoo. Innee minara irisee anaasee faqaasa adeedaanara foora mariaqa kaqi kai ainainamamaree fuaqa.

<sup>30</sup> Innee iki raqee mariasa sia iki raqeeera maqi iaqa kaqi kai Anutuna ainainirana ainainiqa fuaqa. Innee naanaindara qimariasa sia naanaindara qidara maqi mariaqa kaqi kai Anutuna ainainirana ainainiqa fuaqa. Innee ainaina feefauru mariasa faqa sia anindira foora mariani.

<sup>31</sup> Innee maqasaa ainaina feefauru nimisaida ainaina maree mariasa sia kaqa minara afeekaikaqa, mana mana imariasara foora mariaqa. Maa maqa maaqafa maaqoo marinafa sia kisaagasaa mariannoo. Qusasaa taikaannoo.

<sup>32</sup> Innee ummaara siaisa mariaqeeera qimannimidaqa. Anaasee siaifa karaambaiqa ainainiranara kai irimaree fidanoo karaambaiqa eedoo qiranara kai irinoo fidanoo.

<sup>33-34</sup> Anaasee faqaafa maa maqanasaaqaraa ainainara kai irimaree fidanoo maqee maqee nari aanaaqara aidimari iriramau fidanoo, qaara irirana faqaafa maqasaaqaraa irirana faqa Karaambaiqa irirana faqa minaki maridanoo. Adeedaana aanaaseeuqa faqa maanaaqauqa faqa karaambaiqa saikara kai irimaree fidaqa. Misa nari naundura faqa nifaqaara faqa karaambaiqaindi fee kai qimasee karaambaiqa saikara kai iridaqa. Faiqifaqa anaasee fannoo nari afaaqi aidimari iriramau fidanoo maqasaa ainainara kai iridanoo.

<sup>35</sup> Sia qinee sandannaifau inni rumbaidau. Maa manda deedeepa aukuanara iridaqa. Inni dadaaqiraree qidaqa maa ufana qidaqa. Qinee inniara andeeqara aatata ufamau fuaqeeera kai qidaqa naakapaidaga. Innee sia kaqikaana raina quqaaqeeera muduka uqanna karaambaiqa saikaki mariaqeeera qimannimidaqa.

<sup>36</sup> Kumaaraa maanaaqa utaaqaraqanda nimundaranara qaoo qimasee mi kumaaraafa kafa quandakinoo aanaaseera aidirafa afeekaikifanoo mi kumaaraafa doo maraanaree qimaseenoo doo amana maraanoo sia aqaaidanoofau miqidanoo.

<sup>37</sup> Faiqi moo fannoo Yisuna ufasaara nariranara irisee miqinafa sia moo fannoo qaoo qinoo kai nari uqanna sia qini utaaqa maqimaqarana maraanaree qinafa mina irirafa kuqaa afeekaikinafa nari aundurakigari amiqimmandee qaoo qinafa sia mi manaqana maraanoo andeeqaidanoo miqiannoo.

<sup>38</sup> Kumaaraa nari utaaqamamaqara manaqana marainafa andeeqaidanoo miqiannoo. Moo kumaaraa fannoo mina nari utaaqamamaqara manaqana sia marararee qifa mifa firaaqoomma uriqareenoo.

<sup>39</sup> Anaaseeuqa nari nifaqmaaka faqa kaqi marianara sia oonuree aniree iqanuaqa. Nari nifaqmaaka kuqufuaqaa miqoo nari nidimari fasiqana amana mareefara. Moodaa ainaina kai mariannoo, Yisuna ufa irimirinna anaaseefa Yisuna ufa irinnana kai maraanoo.

<sup>40</sup> Mi anaaseefa kaqi adeedaana maridanoo aufadaranaki mariannoo. Qinee mi ufana qunnana qeeqaindi qeeqa irirana maaqi qidaqa Anutuna maraquna fannoo dadaaqidanoo fee qidaqa.

## 8

*Unna tumunnai auqira afaannara dufi dufi qimasee narana aandauro qidanoo.*

<sup>1</sup> Innee Koorinti maqusanana Yisuna ufara suqimariasa unnaqira afaanna naranara irafaqa inni minara qimannimianauro.

(Inni maqannaasa Yisuna ufa sia irimariasa misa tumunnai auqira afaanna amaana maqaki aandauro arusee suqasee unnaqira afaanna amaana maqaki qoomaqa naida tumunnai auqira afaannara dufi dufi qimasee animma amidagee qimasee nari neemariafaqa innee akaqausa misa dadaaqidaqa mi oosannara qini iree mariafanoo. Innee Yisuna ufa irimariasa akaqausaki nariara maasa aqaqidaqa miqira aandauro naida fee qimariafanoo, mi aandauro maasa daundurakinaana kuridiandoo qimasaidaga qimiridaqa naida fee qimariafanoo. Akaqausa nariara maasa irirana faqaasa noori uqeerasee fifau tumunnai auqira afaanna marifaqa kaqi naanauree qimariafanoo.)

Qinee Pauroosa minara kuqaa fee qidaqa moo irirana minasaa ookaqidaqa maaqi qidaqa. Miqira irirafa nari aidirafa nari aundurari umbiqafnara oori uqeeraidanoo nasuridanoo nari kai nari kurididanoo. Moo irirafa amiqirafa maaqi qidanoo. Faiqi nariara nariara amuqisira irirafa mi irirafa sia kurididanoo faiqi anaasee nifeeqareenoo pooduqafanoo anoonaikidanoo.

<sup>2</sup> Moo fannoo nariara aiqama ainainara irimarunasee qimarifa sia anoonaikira irirana irimarifanoo Anutufa mi iriranara akooqaidanoo.

<sup>3</sup> Faiqi anaasee moo fannoo Anutunara aidimarifanoo Anutufa amiqimmandee misara iridanoo aididanoo.

<sup>4</sup> Yisuna ufa sia irimariasa tumunnai auqira afaannara innaaru qimasee aandauro narana neemariafaqa innee Yisuna ufa irimariasa mi naranna naanara irafaqa qinee Pauroosa minara maaqi qidaqa. Tumunnai auqira afaanna oosana innisaimbaqa iridaqa mifa sia mari ainanna kikiqisirafa maridanoo fifau ainana kai maridanoo. Maasa moodaa Anutufa marinarana minara kai amiqimmandee iridaqa.

<sup>5</sup> Maa maqa maaqanaki faqa innaarunai faqa moomoo oosana oosana afaannee qimariafa maridanoo. Mi afaanausa misa uriqararasa faqa Karaambaqauqa faqa unna qimasee maridammiafoo qidaqa.

<sup>6-7</sup> Sia maasa misaqara iridaqa maasa Yisuna ufa irimariasa Anutufa aiqamausa nikoofa moodaa kai marifaqee qidaqa, aiqama ainana auqu quqoo fee qidaqa maasa mi Anutuna ainainammisaranara maridaqa. Sia moo karaambaqa maridanoo maasa karaambaqa, asaku mundirafa Yisufa mifa kai marifaqee qidaqa. Minannai Anutufa sia maru ainainanna aiqama ainana auquqoofa maridanoo, maasa minasaqarara mariranasaa maridaqa. Minara maasa aiqama narana amana naanara. Kaqi narana faqa fifau afaanna aandauro faqa aiqamaqara namasee mina neemariafa sia aqarafa maridanoo. Moo ainana aqarafa maaqimminoo maridanoo. Aiqama Yisuna ufa irimariasa sia maa qunnanara iridaqa. Akaqausa oooqindari sia Yisunara iru aukuanindari mi fifau afaanna amaana maqanaki maqee maqee keeqafiqqa narana namasee mi narannara mi afaannaindi fee qimariqau, kafa maqee faqa Yisuna ufa iridaqa sia afaannara innaaru qidaqa kaqi keeqafi namasaidaga unna qimasaida afaanna marifaqee qimasaidaga kaqi mi narannara Anutuna namuqaandi fee qimasee boo Anutuna namuqaa aqoondikidaqa aqaidee qimasaidaga nari maraquna nari naakirafa ummaara nimifaqa maasa daunduraki putaairana qimifaqee qidaqa.

<sup>8</sup> Qinee Pauroosa minara maaqi qidaqa. Sia fifau narana fannoo maasa mareeqee Anutuna aqoondikiannoo. Maasa sia neeqa sia Anutuna oorudupianauro kaqi neeqa sia ooraqaraanauro. Narana fifau ainana maridanoo maasa iridaqa.

<sup>9</sup> Innee afaanna amaana maqakinaa naranara mana mana imariasa minara eerairiqa. Mi narannara akaqausa rufiee mariasa irirana oorudupimariasa ani mana mana iranasaqari arufarindamaki mandainainaki aqufifaara.

<sup>10</sup> Anee irirana afeeka faqaafa tumunnai auqira afaanna amaana maqaki keeqafi mana mana mandee narana nainanoo ani akaqafasaa moo fannoo irirana amannaikimarifa fukasaa Yisuna ufa irimarifa ani qafamaseenoo afaanna amaana maqaki keeqafi narana nainanoo mina aundurakinaana akamummasainanoo mi fifau afaanna finnai kaifaa minni ubekeenoo aqoondikiandoora.

<sup>11</sup> Oorudupimasee iri mari fasiqafa afaanna naranara rufiee mari fasiqafa maridanoo. Mi fasiqafa afaanna narana mana mana mamaree neemaria fasiqausa oosana qafamaseenoo nari faqa namaseenoo minasaa arufarindamaki kuridiranaki aqufidanoo. Fifau kuridiranaki aqufuannoo asaku mundirafa minara faqa kuqufammi.

<sup>12</sup> Innee mana mana irirana faqaasa inneeqa nikaqaafasaa oorudupira irirana ari-mariafanoo, miqi marianannai inneeqa nikaqaafasaa mandaikamma nimaqaidaqa, miqianannai asauku mundirana faqa mandaikammamaqee mariafanoo.

<sup>13</sup> Qinee Pauroosa minara maaqi qidaqa qinee afaannara dufi dufi qira narana aandau namasaanoo qini qikaqaafasaa qini qifafeenoo minasaagaraana mandainainaki aq-finaga qinee naaru naaru sia uqanna afaanna aandau naanaura qini qikaqaafasaa sia aqfuanifee qimasee sia naanaura.

## 9

*Pauroofa nari kadaapisaagaraa narana kai neemarinau.*

<sup>1</sup> Qinee Pauroosa kuqaa Yisufa diqiqoo fasiqausa maridaqa kuqaa qinee Yisuna maasa karaambaiqa qafaafanasa maridaqa qinee sia moona karabusaki maridaqa qinee qeeqa iriranannoo maa saikana maraidaqa. Qinee Karaambaiqa saika inniki maraafannana mina anoona innee Yisuna ufa uqeeraafanoo.

<sup>2</sup> Akaqausa qini Pauroosara sia Yisufa aqiqoo fasiqafee qimariafaqa innee Koorinti maqusanaasa sia qiniara miqi qimariafanoo. Innee Karaambaiqa ufa irisee mi mau fimariefanoo mifa kai Yisufa qini diqiqoonara kooroidanoo.

<sup>3</sup> Faiqi anaasee akaqausa qini saikoosanara diqiafaqa maaqi qimasee qeeqasaa ititaidaqa misa qimannimidaqa.

<sup>4</sup> Qinee Yisuna ufa maqusa maqusa oonuree aniree idaqa Yisunara qimannimimarunnana akiaqara mi maqannaasa narana nammari kaqi qimifanoofau andeeqarafa mariqini.

<sup>5-6</sup> Yisuna niqiqoo fasiqausa Yisuna akaqaafasaa ufa faqa Peetooroona faqa nari ninaaqmaaka Yisuna ufa irimaria anaaseeuqa nindiamaree misa faqa maqusa maqusa nidaqa. Yisuna ufa qimannimifaqa neeqa kaqi narana nimifaqa naidaqa. Qini Pauroosa miqifau andeeqaraqoo marini, sia miqidaqa Baranabasisandiri maaqanda kai fee ainainammasaida naidee. Maaqanda qeeqa ainainammasaida feefauru marasaidaqa naidaqa Yisuna ufa qimannimiqanidaqa.

<sup>7</sup> Sundia moo fannoo fee ammi fee rakiranaki fidaqa ainainamandaida naidee sia fee. Sia uqanna miqidaqa. Uainna qaqamma ummaqamari fasiqafa nari naaree diqisee namaseenoo inaaqianna moosa nimidanoo. Sipsipasaa rakisimarifa nari kadaapiriranasa minna naamma anoona naidanoo. Doo qinee faqa maqusa maqusa nidaqa Yisunara qimannimimarunnana narana nammari kaqi qimifanoofau qeeqa kadaapi akiaqara nani, sia miqidaqa.

<sup>8</sup> Sia qinee faiqi ufamau kai fidaqa Yisuna ufa qimannimimarunnana akiaqara narana narara qimannimidaqa.

<sup>9</sup> Mooseena sandufa miqinoo marifaqa qidaqa. Mifa maaqi qimasee akara rinoo maridanoo.

Inneeqa sakuma maqusasaa teeqimasee burimakau mareeqee miqoo quqasaifanoo burimakau fannoo oonuree aniree idanoo aikunnai rafarimarinaga sia mina oori arooriaqa, sia mina oori rumbaaqa, saifanoo akaqana naidanoo rafariani.

Qinee Pauroosa minara maaqi qidaqa. Anutufa burimakaura kai fee iridanoo fee miqi qinuu, maasara faqee miqi qinuu.

<sup>10</sup> Oo sia misarau miqi qinuu, maasara irinoo miqi qinuu. Ummaqimarifa faqa aiqi marifa faqa minakinaana nararee qidanoo ainainidanoo.

<sup>11</sup> Baranabasisandiri inni Koorinti maqusanaasa naunduraki innaarunaindaraa asumu ummaqusaafananoo kambiqaiddanoo. Sia fee maqee mi kadaapirirana akiaqara maqasaa narana kaqi qimifaqee naanauree.

<sup>12</sup> Akaqausa inniki kaqikaqoo kadaapiri maruna akiaqara kaqi narana nimifaqa naidaqa, maasa fiqaramasee inniki kadaapiri marunnana akiaqara inni narana marasee naunaiqini sia kaqi marasee naidaqa. Anutufa amanannifoo qifaqa maasa sia miqidaqa. Asauku mundirana Yisuna amiqira fasaasa ufa inni naundurai sia keeqaandoo qimasee daara rarana faqa kadaapirirana faqa oosana oosana saika augee marunnanara faqa qimannimiqafana.

<sup>13</sup> Anutuna firaa amaana maqa Yeerusaree maqusa marinaki ainaini mariasa misa minakinaana nariqa narana maraidaqa. Faiqi anaasee sipsipa arusee aandau tatufu Anutuna amaana maqaki amimariana minaki ainainimariasa aanaiqiki mariasa nariara akaqana marasee naidaqa innee minara amiqimasee irimariafanoo.

<sup>14</sup> Karaambaiqa Yisufa miqi kai masee nari ufa qimannimi mariasara qimannimiqafa fidaqa misakinaana narana marasee naaqee qinuu.

<sup>15</sup> Mi andeegara oosanafa marifaqa qinee sia miqiqa maa pasana akara runnana innee narana sia kaqi qimiaqee qidaqa akara rumannimaqaidaqa. Akaqausa qini maa ufanara fifau dapi ufammifoo qifooro sia inni narana marasee kaqi naanaura kuqiranaki fuanaura, qeeqa kadaapinnoo feefaurirafa amana. Miqi marifaqa Anutuna ufamau fiqaramasee funnana qeeqa qimooqidaqa. Sia moo fannoo mi ainainniannanara qimooqirana aruannoo. Ainainamaseeqa feefaurumasee naanaura.

<sup>16</sup> Kuqaa qinee Pauroosa Yisuna amiqira fasaasa ufa oonuree aniree idaqa qimannimi marunausa maridaqa, sia miqiannanara qeeqa qimooqidaqa qeeqa duqu uqeeranaura. Yisufa qimaqimunara miqidaqa. Sia miqianaqau mandainaina qambaana mariaqini.

<sup>17</sup> Qinee qeeqa kai qimannimira saika mareefau feefauruara qunaqini. Anutufa daakapainara ainainidaqa mina akiaqara sia feefauruara innaaru qidaqa qimira saika marifaqa kaqi maraيداqa.

<sup>18</sup> Qeeqa saika akiaqara nana feefauru fee maraidee, Anutufa amana kadaapi akiaqara narana marasee naannee qifaqa qinee sia miqidaqa amiqira fasaasa ufa sia feefauruara irisee kaqi didifaqa qimannimunafa mifa qini feefaurirafa maridanoo. Kaqi qimamidaqa qeeqa andeegara kadaapirirana akiaqara sia maraيدا kaqi qimannimira asasirafa mifa qini amiqira feefauru maridanoo.

<sup>19</sup> Qinee sia moo fasiqa ainaini marunausara foora maridaqa kaqi fasiqara foora maridaqa Yisufinnai moomoosa aniaqeeru aiqamausa ainainira faiqi kammambi maridaqa.

<sup>20</sup> Qinee Yuda maqannaasaki Mooseena sandufa ameemaana mariasaki ainainidaqa misa naanna ramafi misa marirana maraيداqa. Qinee sia Mooseena sandufa ameemaana maridaqa, misa sandufa ameemaana mariasa moomoosa Yisuna ufara aniaqeeru qinee faqa mina ameemaana maridara foora naaraيداqa.

<sup>21</sup> Miqi kai iqa aanaamuruki ainainidaqa aanaamuru moomoosa Yisuna ufara aniaqeeru aanaamuara foora Yuda maqannaasa sandufara nianasaa tatiqa maridaqa qimannimidaqa. Miqunnanannai sia Anutuna sandufa rukiida miqidaqa. Qinee asauku mundirana sandufa ameemaana qinee kuqaa maridaqa.

<sup>22</sup> Qinee Yisuna ufara sia andeegasee saqariki mariasaki ainainidaqa misa faqa moomoosa aniaqee qimasee misa naanna ramafi maridaqa. Qinee oosana oosana qaini qaini qiranannai faiqi anaasee maraannee qimasee aiqama fasiqa anaasee naanna ramafiqa misa naaraيداqa.

<sup>23</sup> Qinee maa ainainniranaki maridaqa moomoo oosana oosana ummaara kaqi maraيداqa qinee faqa innee faqa mi amiqira fasaasa ufanasaqaraa naundurakina adiafaairana maraannanara miqidaqa.

<sup>24</sup> Inni maqusai Koorinti maqusai faiqi moomoosa suqufiqa nari amani nari amani sandeemariana maqee maqee kambiqee marifaqa qafeemariafanoo. Sandee mariasaki moomoo sandaيداqa moodaa fannoo kai urinaaqareenoo qafee maraيدanoo. Innee faqa misa naanna ramasee Yisuna aatata sandee fidaqa uriqarara qafee marararee qimasee sandaqa.

<sup>25</sup> Aiqaama sandee maria fasiqausa ooqaindari amanidaqa kaqi qoo afeekaikamandee mariqa sandara aukwana anirainaga kaqi sandeefaranoo. Misa sia mi kadaapiriranara iridaqa, uriqarara qafeeroo kai qimasaida kaqi qoo afeekaikamasee nimanida sandaيداqa. Misa dauni afauqaqee mari qafeenara kisaqasaa kadaapiridaqa. Maasa misa naanna ramasee kisaqasaa kadaapiridaqa, sia afauqaqee mari qafeenaranoofau idau miqidau, naaru naaru marira qafeeroo qidaqa kadaapiridaqa andeegaidaqa.

<sup>26</sup> Minara iriseeqa sandeeqa taikee aniaqoo andeegasee fidaqa. Qinee bookseena akooqasa fasiqara foora sia fifau faafau qisauku aqidaqa andeegasee kai qisauku aqira foora idaqa.

<sup>27</sup> Qeeqa qifaqa qini ufa amiqimmandee iriaqeeru firaaqoo qeeqa qifaqa dariara foora idaqa, qeeqa qimudaani faasasaa afeekaikidaqa. Qinee aiqamausa naaramasee aniree bookseenara foora amaniaqee qimaseeqa qeeqa faqa amaniqee qimasee ooruupianoo Anutufa manda saikammiaano qimasee diqiqaandoo qimasaidaqa faasasaa afeekaikidaqa.

## 10

*Tumunnai auqira afaanna iriranara aaquqirafa.*

<sup>1</sup> Oo Koorinti maqusanaasa qini qikaqaafasaaqaa ooqai Mooseefa Isipa maqusaindari maasa Yuda maqannaasa qikeeku qikaaku nifiqee nari maqai fiqau. Qinee minara qimannimianaura. Misa Isipa maqusaindari sandeemarufanoo namuqaa nari maqi qimasee Anutufa qufanoo qoonnamu fannoo misa ninaaqiannai aiqamausa ititafuqa amiqimasee aniree Taatuqee nammari taqamareeqa fiqau.

<sup>2</sup> Mi goonnamunaki faqa mi nammarina Taatuqee nammari taqoonara amaana nammari kikiqusidanoo faqa Mooseefa mi nammarinaki misa aiqama ukuqnamaseenoo uqeeraseenoora foora masoofaqa aiqamausa Mooseenaindi kammambiqau.

<sup>3-4</sup> (Misa miqooqari kaasau maqa maaqaki fimarufanoo Anutufa aiqama kananaana kananaana narana maqasaa quqasoofaqa marasaidaqa neemariqau. Nammariara nidufanoo Anutufa Mooseenara qufanoo oonikiqari nammari qumufaqa naqau.) Qinee Pauroosa minara maaqi qidaqa. Misa aiqamausa innaarunaindaraana moodaa feemu naqau, aiqamausa innaarunaindaraa nammari moodaa naqau. Mi nammarifa innaarunaindaraa oonikiqariara foora qumimarufaqa naqau. Mi oonifa asauku mundirafa misa faqa kukeeqasee nimarufa marinau.

<sup>5</sup> Misa miqiqqa fidaqa sia minara irirai moomoosa uqanna mandoosana marasoofanoo Anutufa qufaqa misa kuqufanoo misa iri fannoo mi aadana maqa maaqanaki furufaramminau.

<sup>6-7</sup> Mi aiqama ainainausa maasa aaquqimaqimaqarafa maridanoo, maasa faqa mina irisee sia misa naanna raanaura, sia manda nidi mari ainainnara randaanauranoo sia misa naanna reeqa tumunnai auqira afaannara faqa innaaru qianaura. Mooseena akara minara maaqi qimasee qidanoo.

Faiqi anaasee oqumari fi narana neeneese nammari moomoo neeneese mandidi raanaaree qimasee findi fiqa idi ree mariqau.

<sup>8</sup> Qinee Pauroosa miqunara qimannimianaura maasa sia misa naanna ramasee faiqi anaasee nari ummuara nari ummuarianaura. Misa miqimarunara moodaa faasaana (tuenti tiri tauseena) nukudara foora teeqiqau moomoosa uqanna raurukaqau.

<sup>9</sup> Maasa sia misa naanna reeqa karaambaiqa amanamandee qafaanuranoo. Misa akaqausa miqimarunara sakani fannoo narimarufaqa kuqimariqau.

<sup>10</sup> Innee sia misa naanna reeqa Anutunara ninunuruuqa. Misa miqi marunara kuqira gangiroom fannoo aniree moomoo narinau.

<sup>11</sup> Mi aiqama ainainausa akaqausa aaquqima nimaqaaqeeera misasaa kambiqanau. Maasa maqee mariasa aaquqimaqimaqaaqeeera Anutufa qumee dadaaqufaqa miqooqaraafa moo fannoo akararinau. Maasa taikara aukuaana adeedi rainaqa marinara aaqaranara rufaaqeeera aaquqidaqa.

<sup>12</sup> Faiqi moo fannoo nariara qeeqa afeekaikiranannai kikiqiqqa maridee qinafa rufiaa, anee Isaraee maqannaasa naanna ramasee aqufinafaara.

<sup>13</sup> Aiqa nimanirafa innisaa aqufinafa aiqama maqannaaki maqee maqee kambiqee mari ainainafa maridanoo. Anutufa minara iridanoo nari dadaaqira ufara kai iriannoo. Iridanoo firaa nimanirafa anireenoo inni urinaaqareenoo rafaqaqafinafa anirainanoo Anutufa afeeka niminaqa innee amana mi nimariranaki mari inaqa mina uriaaqaree faranoo. Anutufa ititaseenoo fimariaana uqafiqainana fi ruuqakinana finnaranoo.

<sup>14</sup> Oo qifaaqasaa qini qiqoondiuqa tumunnai auqira afaannara innaaruqiranara nianasaa rufiaqa.

<sup>15</sup> Innee Koorinti maqusanaasa ooqeeanaasa irirana faqaasa mariafanoo. Inneeqa kai qini ufa irisee oonumafi rainasee iriaqa.

<sup>16</sup> Maasa aafaqa naidaqa kaafakinaa nammariara Anutunara dufi dufi qimasaidaqa mi kaafanakinaana naidaqa asauku mundirana fidika naida fee qimasaidaqa maasa kaqikaa feemu faqa ruqi ruqimasee naidaqa maasa asauku mundirana amaqi naida qimifaqa naidee qidaqa mi feemuna naidaqa.

<sup>17</sup> Moodaa feemu kai marina maasa moomoosa ruqi ruqimasee neemarianara moodaara foora maridaqa.

<sup>18</sup> Qeeburu maqannaasa moo nuqu Isaraee maqannaasa nariqa aandau tatufira oosana iriaqa. Faiqi anaasee moo fannoo aandau maramaree Anutuna aanaiqiki maru fasiqana amisoofanoo aandau tatufinoo nariara akaqana marasee neemarufanoo aandau akoofa nari aiku asauku faqa muduka nanau. Misa qiqau, maasa Anutuna tatufira qaindasaa qaraana naida qimifaqa naidaqa mina faqa moodaanaki maridee qimariqau.

<sup>19</sup> Doo qini ufa oosana naqi fee inoo maridanoo fee doo maqee mi ufana koorooianaura. Inni maqusanaasa narana maraseeqa tumunnai auqira afaanna amidee qimasee tatufimariafanoo. Mi tumunannai auqimaria afaannana amana sia anoonau kaqi fifau tumu kai maridanoo. Mi narana tatufirafa faqa sia anoonau, kaqi narana kai maridanoo.

<sup>20</sup> Sia Yisunara irimaria fasiqauqa mi fifau naranna marasee sia Anutunau amisee dufi dufi qidau, afaannauqa nimisee dufi dufi qidaqa miqidaqa. Innee Yisuna ufa irimariaa afaanna naida nimimaria naranara innee sia mina naaqeeera qidaqa qikoqaidanoo.

<sup>21</sup> Innee karaambaiqa aafaqa naidaqa Yisuna kaafakinaana nammari namasee sia amana quandakina afaannauqa kaafakinaa nammari neefaranoo, innee Yisuna aafaqa

naidaqa karaambaiqa qaindasaagaraa feemu namasee sia quandaki afaannauqa qaindasaagaraa feemu neefaranoo.

<sup>22</sup> Innee Yisuna aafaqa namasee quandaki afaannauqa aafaqa namasaifanoo karaambaiqa Yisuna qafamaseenoo rairaiqiannoo. Innee Yisufa inniara rairaiqianiffee qimasaida fata fata idee miqidee, innee maasara karaambaiqa uraaqaraidie qida fee miqidee, sia amana karaambaiqa uriqareefaranoo firaa nariranaki aquffoora.

<sup>23</sup> Akaqausa minara maaqi qidaqa. Maasa amana aiqama oosana amiqirana faqa mandaikirana faqa minauqa maraanauree qifaqa qinee Pauroosa minara maaqi qidaqa. Kuqaa aiqama nana ainaina amana maraanaura, sia aiqama ainaina amiqirafa maridanoo. Akaqausa maaqi qidaqa aiqama oosana amana maraanauree qifaqa qinee minara aiqama oosana sia faiqi anaasee dadaaqimaria oosanafa marifanoo fee qidaqa akaqana kuridirafa maridanoo.

<sup>24</sup> Sia moo fannoo nari aidi mari ainainna nari iriranaki uriqaranoo mariani aqoonausa nidimari ainaina kai nari iriranaki uriqaranoo mariani.

<sup>25</sup> Innee Koorinti maqusanaasa aandaau maree makeetai fimariana akaqaandau arusee aukusee tumunnai auqira afaannara dufi dufi qimasee makeetaki quqasaafa feefauridaqa. Akaqaandau kaqi arusee auku quqasaafa feefauridaqa. Innee Yisuna ufa irimariasa makeetaki keeqafi inneeqa aandaau marararee qimasee oonuree sia tumunnai auqira afaannara dufi dufi qinannara iramasee eerairiaqa kaqi mana mana maraaqa. Aninna karaambaiqa saqarikiananoo aninna aakirafa marina sia minara irisee eerairiaqa, kaqi maraaqa.

<sup>26</sup> Ooqeenaa tamummaqara fasiqauqa akara minara maaqi qinoo maridanoo. Maa maqa maaqafa faqa minaki aiqama ainaina marifa faqa karaambaiqaindi kai maridanoo.

<sup>27</sup> Qinee Pauroosa minara aiqama ainaina kaqi naaqee qidaqa. Inni Koorinti maqusanaasaki Yisunara sia irimariasa moomoo maridaqa. Misakiqari moo fannoo aniara mai aniree qini faqa narana naanee qinana aidinana kaqi mina faqa oonuree mina faqa narana naa. Anee mi naranna aandauna naaneera aneenna aakiranara kaqi kaaqoo oonumafi irinana sia eerairia kaqi naa.

<sup>28</sup> Anee mi naranna naanee qinanoo moo fasiqa fannoo qimaminoo tumunnai auqira afaannara dufi dufi qira narana maridanoo qinana anee ani qimami fasiqana aakiranara irisee sia naa.

<sup>29</sup> Sia aninna aakiranarau qidau ani qimami fasiqana aakiranara qidaqa. Innikiqari moo fannoo maa qunnuwana irisee maaqi qiannoo, nanaree qinee moona aakiranara iriananoo fee mifa qini ititaqimaqaannoo fee.

<sup>30</sup> Doo qinee qeeqa naranara Anutunara dufi dufi qimaseeqa nanaree moo fannoo aniree qini narana aandaara qaoo qiannoo fee.

<sup>31</sup> Qinee Pauroosa minara maaqi qidaqa Innee narana nammari aiqama ainaina neemarianara sia fee naanauree, naanauree, nana ainaina innaree, Anutuna amooqira ufa kambiqa marimau kai fuaqa.

<sup>32</sup> Inni marirafa kaqi mana manifafa nindafamaseeqa Yuda maqannaasee aanaamuru fee Yisuna ufa iri mariasee inni niqafamasee noori runifaara. Innee minara irisee mi oosannara eerairiaqa.

<sup>33</sup> Innee qini daanna raaqa sia qinee qeeqa didirana qeeqa qifaaqa amiqi amiqiranara iridaqa aiqamausara iriseeqa misa nidiranamau fidaqa, aiqamausa innaaruna asumu maraaqeera miqidaqa.

## 11

*Amaana maqaki keeqee maru anaaseesa nikiyaq rumbarausa keeqee maria ufana.*

<sup>1</sup> Qinee asauku mundirana Yisuna aanna raidaqa innee miqikai iqa qini daanna raaqa.

<sup>2</sup> Oo Koorinti maqannaasa innee qiniara maqee maqee irisee Yisuna ufa irimariasa sandufa qinee qimamianana ufamau fimarianara inni nimoqidaqa.

<sup>3</sup> Qinee maa moodaa ainainnara kai inniara iriaqera qimannimidaqa, aiqama fasiqa nari ninaaqmaaka urinaaqararausa maridaqa kafa asauku mundirafa aiqama fasiqa urinaaqararafa maridanoo. Anutufa asauku mundirana uraaqararafa maridanoo.

(Pauroofa nari maqanna anaasee oosana qimaqoofa sia maasaki maridanoo. Anaaseeuqa nariqa andeeqara oosana marasee nari nifaaqmaaka nimeemaanaai oorudupi mambunara kooroo ianifeera qamunnannai nikiyaq rumbarausa amaana maqaki keeqee mariqau. Sia nikiyaq rumbasaidaqa keeqee marusa nisaurirana mara nimimariqau. Ummuari mari anaaseena paqurimasee asaurirana maraanifee qimasaida akiya maqa namufaaq indufu aqimariqau.)

<sup>4</sup> Qinee Pauroosa faiqí nari anaqa uraaqaranara irisee maaqi qidaqa. Faiqí moo fannoo akiqa rumbarafa amaana maqaki keeqafi aiqamausa nifusaa innaaru qina fee Anutuna ufa qimannimina fee asaku mundirana asaurirana amiannoo.

<sup>5</sup> Anaasee moo fannoo amaana maqaki keeqafi Anutuna ufa qimannimiannoo fee innaaru qiannoo fee akiqa sia rumbarafa mi anaaseefa nari afaaqi asaurirana amidanoo ummuari mari anaaseena amanakai maridanoo, akiqa maqa faqa indufira anaasee amana amana kai maridaqa. Saina akiqa qamunnannoo rumbasee amaana maqaki keeqafinoo innaaru qiannoo fee Anutuna ufafee qimannimiannoo fee, andeeqanoo mariani.

<sup>6</sup> Anaasee moo fannoo sia akiqa rumbarafa amaana maqaki keeqaina see munusee akiqa maqa faqa indufu aqusaa. Anaasee akiqa maqa faqa indufirafa asaurinoo akiqa qamunannai rumbarafa amaana maqaki sia asaurirainni kaqi keeqaannoo.

<sup>8</sup> Indaaru Anutufa sia aanaaseesaa qaraana faiqí auqinau, faiqisaaqaraana anaasee auqinau.

<sup>9</sup> Anutufa sia anaasee dadaaqianifee qimasee faiqí auqinau, faiqiara iriseenoo anaasee auqinau.

<sup>7</sup> Faiqí Anutuna amana faqa Anutuna areenarafa faqa minaki marifa marinara sia akiqa rumbarafa amaana maqaki keeqaannoo. Anaasee faiqí areenarafa minaki marifa marinara akiqa rumbarafa mariani.

<sup>10</sup> Qangiroora maasa qiqaafaidammiaafoo qimasee nári nifaaqmaaka ureeqarusa marianara koorooianifeera nikiqaq rumbara anaasee amaana maqaki keeqaqa.

<sup>11</sup> Maasa karaambaiqa ufamau fidaqa maa irirafa kai mariani, anaasee nariara aadumai marianinafa fifau mariani, faiqí miqikai masee aadumai marianinafa fifau mariani.

<sup>12-15</sup> Indaaru anaasee faiqisaaqari kambiqanau miqikai inoo miqoogari faiqí fannoo aanaaseeqari kai kambiqaidanoo doo mi aiqama ainainaqanda Anutunakiqari kai kambiqanoo maridanoo. Faiqí fannoo akiqa asaasi kisaaga marinaqa faiqí anaasee nari kai nariara nariara irisee mandainainee qimasee nisaurifaranoo. Anaasee kisaaga akiqa asausifaqaanara sia miqidaqa amiqiranee qidaqa mi anaaseefa minara firaqoo nasuridanoo. Anutufa anaasee kisaaga akiqa asaasi inni nikiqaq paranna rafaqaqafuani-feera niminau. Inneeqa kai iriaqa, anaasee sia akiqa rumbara anaasee fannoo aiqama nifusaa amaana maqaki innaaru qirafa andeeqaidanoo fee sia fee andeeqaidanoo. Sia andeeqaidanoo. Innee minara irimariafanoo.

<sup>16</sup> Faiqí moo fannoo yafee ufa rainaani qimasainaqa maa ufana kai qimamianaara, maasa maaqooqaraasa faqa Anutuna ufara maqusa maqusa suqimariasa faqa mi ufamau kai fidaqa sia moo oosana maraidaqa.

*Karaambaiqa aafaqa neemaria naamuaqirafa.*

<sup>17</sup> Innee Koorinti maqusanaasa Anutuna ufara suqidaqa sia amiqimmandee suqimariafanoo mandainaina kai kambiqaidanoo, minara maa ufana sia nimooqidafau qimannimidaqau.

<sup>18</sup> Innee Anutuna ufara suqidaqa raina rainidaqa aanooqimariafaqa qimaqimiafaqa qinee iriqa akaqanara kuqaa fee qidaqa. [ <sup>19</sup> Aaqarusa faqa andeeqarusa faqa moodaanaki marifanoo kuqaa rainarafa kambiqaannoo. Miqimasainanoo aaqee mari-asa faqa andeeqarusa faqa kooroo ifaranoo.]

(Pauroona akara rumannimu aukuaana Yisuna ufa irimarusa sia maqee maasa imarunandee aafaqa neemariqau, misa nári ainainirana taikasee eendaki aafaqa nararee qimasee nári narana deedaqammamaree mara maree moodaa maqaki mini quqasee qoomaqa sakasee namasee inaaqianna feemu marasee ruqi ruqi masee uainna nammari misa maqee maqee neemaru nammarina namufaqa innaaru qimasee namasee fifaini mariqau. Faiqí anaasee oosana oosana suqigau. Ainaina faqaasa faqa kudi fasiqa faqa oosana oosana ainaini mariasa faqa nariqa ainainirana taikasee eendaki aniree moodaanaki suqigau. Akaqausa furufara maseeqa narana moomoo namataikasoonara ninnaaqiana anusa naararanau. Akaqausa uainna nammari moomoo neeneesee sipa-qiqa furufariqau. Pauroofa minara iriseenoo maaqi qimasee akara rumannimaqanau.)

<sup>20</sup> Innee Koorinti maqannaasa Karaambaiqa qoomaqa suqufi naani qimasee innee sia kuqaa suqufi mina nararee qimaseefau aniafanooofau furufaridaqa naidaqa moosaindi faqa neemariafanoo.

<sup>21</sup> Akaqausa nári maree ania naranna sia naida nimidaqa nariqa kai naafaqa akaqausa naarara maridaqa, akaqausa uainna nammari moomoo naida furufarida. Miqiafanoo mi qoomaqa faqa sia karaambaiqaaindi maridanoo.



<sup>22</sup> Innee maaqa siaisee maqee maqee neemaria narana nammarina sia minaki naidee, innee Anutuna ufara suqimariasa fidiqaamma nimaqaiddee miqidee, innee nara ainaina siaisa nisaurirana nimianee fee qidee miqidee. Innee minara irisee qiniara nana ufee qimaqimiannoo fee qidee. Abee nimoofee qianauree. Oo sia uqanna nimoqianaura.

<sup>23-24</sup> Ooqai qinee karaambaiqa ufa irisee qimannimifanna sandufana maqee faqa kafa qimannimiana, karaambaiqa Yisufa Yudasifa ueeqoo eendanaki feemu asaukunna qumareenoo Anutunara dufi dufi qimaseenoo, ruqi ruqi maseenoo maaqi qimasee nari faiqi namu qimanniminu. Maa feemufa qini qimaqi kikiqa usinoo maridanoo innimma kuqiranaki quqannimaqaanaura. Qinee kuquannanara aunifoora oonumafi iridaqa feemu maqee maqee naqafuaqa.

<sup>25</sup> Misa mi feemuna namaseeqa kaifaa miqoo narana namasoofanoo Yisufa uainna maru kaafana nariqa maqee maqee neemaru nammarina qumareenoo maaqi qimasee qimanniminu. Maa kaafanaki mari uainna qini fidika kikuqusinoo maridanoo. Anutufa maqasaa fasiqa anaaseera qini faqa moodaanaki kira ufa marifanoo qini fidika fannoo mi ufana mapukira fidika maridanoo. Innee mina naqa fidaqa qiniara irisaidaga naqa fuaqa. Yisuna ufa miqiminoo marifaqa qinee Pauroosa minara maaqi qianaura.

<sup>26</sup> Maa maqee kamuqoo Karaambaiqa sia kafa qumi mari kamuqoo innee mina yakamuqoo fee maa feemuna faqa maa uainnana faqa naqa fidaqa innee Karaambaiqa kuqiranara kooroo idaqa.

<sup>27</sup> Qinee minara irisee maaqi qidaqa faiqi moo fannoo mina oosana furufarira fasiqa fannoo Karaambaiqa feemu fee mina kaafakinaa uainna fee furufara mandee namaseenoo karaambaiqa amaqi faqa fidika faqa mara maree furufara mamaqaidanoo naannoo.

<sup>28</sup> Aiqaama fasiqa anaasee nariqa kai nari naundura marirana irirana aiqumumasee oonumafi irirana iriseeqa feemu faqa kaafakinaa uainna faqa naqa.

<sup>29</sup> Karaambaiqa afaaqa oosana sia irimarifa kaqi fifau feemu faqa uainna faqa neemarifa Anutufa aruaninna ufana nari naidanoo nari afaaqai mafi quqaidanoo.

<sup>30</sup> Innee Koorinti maqannaasa miqianara moomoosa aurimariafanoo kudoosaapee mariafanoo akaqausa doo kuqiqa maridaqa.

<sup>31</sup> Maasa indaaruu qeeqa daundura marirana qimanammandee andeeqasee naananoo fau sia Anutuna darira ufa ameemaanai marunaiqini.

<sup>32</sup> Maa maqanasaaqaraasa Yisuna ufa sia irimariasa kuridiranaki fidaqa maasa misa faqa fuanoora maqee kamuqoo karaambaiqa niuqumumasee naridanoo.

<sup>33</sup> Qini qikaqaafasaauga maa ufana iriseeqa karaambaiqa qoomaqa naani qimaseeqa qinaaqiana aninausara nifeesamasai faqa anirifaqa doo moodaa kari oonuree naqa.

<sup>34</sup> Moo fannoo aararainafa aeenaa maaqaki oonu namasee ania. Miqimandee moodaanaki keeqafifanoo Anutuna narira ufa fannoo sia innisaa mariani. Doo qina kai qimannimiqa qinee innee iannai fiqa akaqa ufa qimaqimuna andeeqaanaura.

## 12

*Anutuna naaquqara andeeqara maraquna oosana oosana dadaaqiranara qimannimidanoo.*

<sup>1</sup> Doo maqee qinee Anutuna naaquqara andeeqara maraquna nimimari ainainnara qimannimiana. Qini qikaqaafasaauga qinee minara anoona ufa iriaqee qidaqa qimannimidaqa.

<sup>2</sup> Ooqai innee aamina maru kamuqoo manda fasiqa fannoo inni rarisameeqee sia ufa qimaruu tumunannai auqira afaannunnai ubeekee marufaqa mina ufa ameemaanai fimariqau.

<sup>3</sup> Doo maqee innee maanara irimariafanoo Anutuna maraquna fannoo rakisimari fasiqafa sia amana Yisuna aqurarara ufa amiannoo kafa mina dinni kai Yisufa karaambaiqa maridanoo fee qimariasa Anutuna naaquqara andeeqara maraquna fannoo misa dadaaqinara miqi qidaqa.

<sup>4</sup> Oosana oosana innaarunaindaraa ainaina faiqi anaasee dadaaqianifeera nimirafa marifanoo moodaa maraquna fannoo kai aiqama mi aiqama ainainna maqasaa fasiqa anaasee nimidanoo.

<sup>5</sup> Maasa Anutuna ainainirafa oosana oosana ainainirafa maridanoo moodaa karaambaiqa ainainammidaqa.

<sup>6</sup> Anutuna ufara suqimariasa dadaaqirafa oosana oosana maridanoo moodaa Anutufa kai aiqama aadu aadu akoofasaikirana faiqi anaasee nimifaqa minannai quandaki nari dadaaqi nari dadaaqiaqeeera.

<sup>7</sup> Anutufa Yisuna ufa irimariasaki aiqama fasiqa anaasee naadu naadu narí maraquna koorooianifee afeekana nimufaqa quandaki minannai narí dadaaqi narí dadaaqiaqera nimidanoo.

<sup>8</sup> Anutuna maraquna fannoo moo fasiqa irirana faqaana ufa qimannimimarina amidanoo kafa mi maraqunafa moo fasiqa aiqama ainainara irirana amidanoo.

<sup>9</sup> Mi moodaa maraqunafa kai Yisuna mandaqarana moo fasiqa amidanoo, moo fasiqa mi maraqunafa faiqi anaasee aurirana taikannisara afeeka amidanoo.

<sup>10</sup> Anutuna maraquna fannoo faiqi sia amana auquaqa ira ainaina afeeka moo fasiqa amifanoo mi fasiqafa afeeka ainaina auqaidanoo, moo fasiqa Anutuna afeeka amifanoo Anutuna ufa afeekaikamandee qimannimidanoo. Mi maraqunafa moo fasiqa afeeka amifanoo maraquna nimimariasafa faqa moo unna qira maraquna nimimarina faqa mi fasiqafa kai rainasee nindafaidanoo. Mi maraqunafa moo fasiqa afeeka amifanoo aanaamura ufakiqari sia narí iri maru ufanakiqari amaana maqaki ufa qimannimidanoo. Mi maraqunafa kai faiqi moo afeekaikamma amifanoo aanaamura ufakiqari narí sia iri mari ufanakiqari faiqi anaasee qimannimisai fanoo moo fasiqa fannoo sia mi ufana oosana irirainni maraquna fannoo kai mina qimamifanoo mifa indee kai idanoo mina oosana qimannimidanoo.

<sup>11</sup> Mi oosana oosana ainainna nimimarifa moodaa maraquna kai maridanoo. Mifa narí kai narí aidiramau raina raina mandaida aadu aadu dadaaqira akoofasaikirana nimidanoo.

*Maasa Yisuna atiki marunausara qidanoo.*

<sup>12</sup> Asauku mundirana afaaqa moodaara foora maridanoo mina atiuqa moomoo mari-daqa afaaqa sia rainanoo maridanoo moodaa maridanoo.

<sup>13</sup> Miqikai masee maasa aiqama Yuda maqannaasa faqa aanaamuru moomoo maqan-naa mariasa faqa karabusaki ainainimariasafa iduki mariasa faqa maasa aiqama moodaa maraqunannai nammari marasee moomoo atiuqa moodaana apataika kai iqa mariasa Yisuna apata mariafanoo Anutufa moodaa maraquna nammariara foora nimifaqa naunannara miqidaqa.

<sup>14</sup> Faiqi moo adaka sia muduka maridanoo moomoo afaaqa ootupanoo maridanoo.

<sup>15</sup> Mi fasiqana aiku fannoo qinoo sia qinee asauku mariaqana minara qinee sia maa fasiqana afaaqau maridau. Qinee Pauroosa minara maaqi qiqqa kuqaa aiku fannoo sia asauku kinoo sia mi ufana qinnanannai moona afaaqaikianau kaqi mi fasiqana afaaqa mariannoo.

<sup>16</sup> Mi fasiqana aaqoo fannoo qinoo qinee sia maa fasiqana afu marunannara sia mina afaaqau maridau. Qinee Pauroosa minara maaqi qidaqa kaqi mi aaqoofa sia afukinoo sia mi ufana qinnanannai moona afaaqai kiannoo kaqi mi fasiqana afaaqa mariannoo, sia sia miqiannoo.

<sup>17</sup> Mi fasiqana aiqama afaaqa afu kai marinanoofau naqi fee mandee ufa iriannoo fee. Mina afaaqa aaqoo kai marinanoofau naqi fee mandee udiraannoo fee.

<sup>18</sup> Anutufa kai narí iriseenoo narí aidiranannai faiqi afaaqa aiqama ainaina afaaqa quqaqoofa maridanoo.

<sup>19</sup> Aiqaqa ainaina moodaa ainaina kai marinanoofau sia faiqi afaaqa marini.

<sup>20</sup> Doo miqinoo moomoo afaaqa atiuqa moodaa afaaqara foora ootupanoo maridanoo.

<sup>21</sup> Faiqi afaaqaindaraa afu fannoo sia amana asakuara anee fua sia qini dadaaqi marianna ainainafa mariananoo, sia qiannoo. Kafaakiqqa fannoo sia aikuara anee fua sia qini dadaaqi marianna ainainafa mariananoo. Sia miqi qiannoo.

<sup>22</sup> Maasa qeeqa qifaafa ati dauni nidafidanoo unmoqoqi mari atiuqara fifau ainainee qiananoo sia marinaqa naqi fee inauree.

<sup>23</sup> Maasa qeeqa qifaafa atiuqa ureeqara atiuqee qimariana maasa misasaa firaqoo amiqimmandee misasaa rakisidaqa. Nifu qafaafaqa nisaurimaria atiuqa maasa amiqim-mandee rakisidaqa qamunnannai ititaidaqa.

<sup>24</sup> Nifu qafaafanoo nidi mari atisa sia amiqimmandee ititaidaqa kai akooqoo mari-danoo. Anutufa kai narí iriranannai maasa qifaagasaa atiuqa maaqimasee ootupanau, Ureeqara atiuqa uriqarara rakisirana maraane qimasee ootupanau.

<sup>25</sup> Miqi marianara sia maasa qifaafa rainarafa maridanoo aiqama aadu aadu qifaafa ati fannoo nariara nariara amanamana kai amuqusidanoo narinni narinni rakisidanoo.

<sup>26</sup> Moodaa qifaafa ati didafifanoo aiqama qifaafa didafidanoo, kafaqa mina dinni moodaa qifaafa amooqifanoo aiqama qifaafa asaidanoo.

<sup>27</sup> Qinee Pauroosa inni Koorinti maqannaara qidaqa innee Yisuna ufara suqimariasafa aiqama asauku mundirana afaaqara foora mariafaqa aiqama mina afaaqasaa afaaqa fannoo narí amaqaq narí amaqaqaki kai mariafanoo.

<sup>28</sup> Innee Yisuna ufa iridaqa nuasa suqiranaki Anutufa miqikai inoo inni faiqí anaasee mareegeenoo maaqimmasee quqannisoofaqa mariafanoo. Anutufa Yisufa niqiqoo fasiqausa inniki uriqararausaikinau, miqooqari misa ureeqarusa Anutuna ufa faiqí anaasee maqusa maqusa qimannimimarusa faqa inniki quqanau. Doo misa ureeqarusa ufasaa rakisirausa maqusaki qimannimimarusa Anutufa inniki quqanau. Kafaa miqooqari faiqí anaasee oosana oosana ainainirausa quqanau.

Akaqausa faiqí sia amana auquaqaa ira ainaina auqimariasa quqanau.

Akaqausa aurirausa andeeqee marusa quqanau.

Akaqausa faiqí anaasee narí dadaaqi narí dadaaqi marusa quqanau.

Akaqausa ufa suqirausasaa amiqimmandee rakisirausa quqanau.

Akaqausa aanaamuru ufakiqari nari sia irimaru ufanakiqari Yisuna ufa suqiranaki qimannimimarusa Anutufa quqanau.

<sup>29</sup> Innikiqari sia aiqamausa Yisufa niqiqoo fasiqausa mariafanoo, sia aiqamausa maqusa maqusa qimannimiqanusa maridaqa. Sia aiqamausa maqusai naamuaqira ufa qimannimariasa maridaqa. Sia aiqamausa faiqí sia amana auquaqaa ira ainaina auqimariasa maridaqa.

<sup>30</sup> Sia aiqamausa aurirana taikanniseemaria fasiqausa maridaqa. Sia aiqamausa aanaamuru ufakiqari nári sia irimaria ufanakiqari qimannimariasa maridaqa. Mi anaamuru ufanakiqari nári sia irimariafanoo marauna afeeka fannoo dadaaqifaqa mi ufana oosana sia aiqamausa irimariana kooroo ifaranoo.

<sup>31</sup> Innee inneeqa irirana Anutuna afeekannai narí nimira afeeka oosana oosana faqa akoofasaikirana oosana oosana faqa misauqakinaana uriqararana kai ummarararee qimasee afeekalkiaqa. Doo qinee mi firaa uriqarara oosana uqanna maaqoo kooroo ianaura.

## 13

*Nariara nariara nimuqusira oosanara qidanoo.*

<sup>1</sup> Mi firaaqoo uriqarara oosana koorooirafa maaqimminoo maridanoo, faiqí anaasee aiqamausa nariara nariara uriqarara ainainee qimasee misara nimuqusirafa mifa mina maridanoo. Qinee qeeqa Anutuna marauna afeekannai aanaamuru moomoo maqannaa ufakiqari sia iria maria ufanakiqari faqa qangiroo ufakiqari faqa Yisuna ufara suqiranaki qimannimunanoo qeeqa qimuqusaki faiqí aanaaseera uriqarara ainainee qimasee misara nimuqusirafa sia marifaqa qeeqa kai qeeqa firaa ufatia fifau kamme qidaqa.

<sup>2</sup> Anutuna marauna fannoo oosana oosana afeeka qiminaqa qinee qeeqa kai Anutuna ufa amiqimasee qimannimianaqee qinee aiqama ainainara irisee aiqama kukeeqara ainainara irisee fee, qinee qeeqa Yisuna saqarikirafa afeeka marinaqee aaqana moo mafi moosaa quqaanauree, mi aiqama ainaina afeekafa qiga daundurái afeekalkifanoo faiqí aanaaseera uriqarara ainainee qimasee misara qimuqusirafa sia marifaqa qinee sia maridara foora maridaqa.

<sup>3</sup> Qinee qeeqa aiqama ainainatia mareeqee ainaina siaisa kaqi nimiqee qeeqa qifaaqa faqa mareeqee idaki aquanauree miqidaqa faiqí aanaaseera uriqarara ainainee qimasee misara qimuqusirafa sia qini daundurái marifaqa mi ainainaqanda sia qini dadaaqianara miqidaqa.

<sup>4</sup> Faiqí aanaaseera uriqarara ainainee qimasee misara qimuqusirana qinee Pauroosa kooroo ianaura. Faiqí aanaaseera nimuqusirafa maaqimminoo mariannoo, reendeenamandee ubiqafi misa ufa irirafa mariannoo, fifimmasee faiqí aanaaseera qimannimirafa mariannoo. Faiqí aanaaseera nimuqusirafa sia rairaiqirafa mariannoo, sia nariara oori uqeerasee mariannoo, sia narí amooqirafa mariannoo.

<sup>5</sup> Faiqí aanaaseera nimuqusirafa sia adi namufaqa marifa maridanoo sia nariara kai irimarifa maridanoo, sia dauni kaukaatufa qimarifa maridanoo, sia akaqausa mandaikammamaqaanara irimaree fimarifa maridanoo.

<sup>6</sup> Faiqí aanaaseera nimuqusirafa sia mandoosanara asaidanoo kuqaa anoona ufa qiranara asaidanoo.

<sup>7</sup> Faiqí aanaaseera nimuqusirafa sia minnisee finanoo akooqaidanoo, misa mina mandaikamma maqaafanoo kaqi kai irisee minni saidanoo, faiqí aanaaseera amiqira irirana irimaree fimarinafa faqa aaqainausakiara sia misara taikkee maqi qirafa faqa oosana oosana ainaina amiafanoo reendeenamambi ubiqafi kaqi mi manda oosanna fee amiqira oosana fee kaqi mara maree fimarifanoo amuqusirafa miqimminoo maridanoo.

<sup>8</sup> Faiqí aanaaseera nimuqusirafa naaru naaru marira ainaina maridanoo sia taikarafa maridanoo. Maqee kamuqoo Anutuna marauna akaqausa naakifaqa amiqimasee

qimannimirafa maqee maridanoo ufaasu ainaina kai maridanoo. Akaqausa sia nári irimaria ufana qimannimirafa maridanoo mifa faqa taikaannoo, amiqira irirafa maridanoo marinoo aiqaraannoo.

<sup>9</sup> Anutufa maqee qimimari irirafa faqa qimimarifaqa faiqi anaasee qimannimira ufa faqa maqee atisaa maridanoo.

<sup>10</sup> Kasooqaqee Yisufa qumira aukuaana firaafa anirainanoo maqee atisaa marirafa taikafuannoo.

<sup>11</sup> Qinee Pauroosa faiqi aanaaqi mariafanna kamuqoo qini ufa faqa qini didirafa faqa qini irirafa faqa faiqi aanaaqindi marinau, maqee faiqi kammambunanoo faiqi aanaaqi irirafa doo taikafinoo. Yisufa qumuaninna aukuaana miqikai iannoo.

<sup>12</sup> (Pauroofa maru aukuaana manda tanuka kai marinau. Mi manda tanukana kikiqusidanoo maa ufana qinau.) Maasa tanukaki qeeqa doori qafaidaqa sia amiqimmandee qeeqa qimana qafaidaqa. Maasa maqee qafee marunafa miqirana ati kai qafaidaqa, Yisufa quminna aukuaana maasa mina faqa nari oori nari oori andeeqasee qafaanura. Maqee marunna irirafa ati kai maridanoo, Yisufa quminna aukuaana maasa irirafa anoona mariannoo. Miqoo maasa irirafa Anutufa maasara amiqimasee irindee kai inoo anoona irirafa maasaki faqa mariannoo.

<sup>13</sup> Doo maqee kamuqoo maa qaaramoo ainaina kai maridanoo. Yisunasaa irirana rusirana faqa naaru kambiqaaninnanara اساسamandee afeesirana faqa faiqi aanaaseera faqa Anutunara faqa uriqarara ainainee qimasee misara nimuqusirana miqamufa kai maqee kamuqoo kaqi maridaqa misaqiqari nimuqusirafa kai uriqararafa maridanoo.

## 14

*Kafaa amiqimmasee Anutuna maraquna dadaaqiranara qidanoo.*

<sup>1</sup> Faiqi aanaaseera nimuqusirafa uriqararafa maridanoo fee qidaqa minara inni Koorinti maqannaasa qimannimidaqa, Innee minara irisee faiqi aanaaseera nimuqusirafa maraanauree qimaseeqa mina mararara kai kadaapiruaqa. Anutuna maraquna nimi mari afeeka oosana oosana faqa akoofasaikirana oosana oosana faqa, minauqa faqa innee inneeqa irirana ummarararee qimasee afeekaikiaqa. Miqidaqa faiqi anaasee Anutuna ufa qimannimira afeeka minara uriqarara fee qimasee firaqoo randasee maraaqa.

<sup>2</sup> Faiqi moo fannoo nari sia irinna aanaamurusa ufakiqari qimannimimarifa sia faiqifau qimannimidanoofau Anutuna faqa ufa qidanoo. Faiqi sia mina ufa iridaqa moosa ufa marifaqa. Mifa Anutuna maraquna afeekannai kukeeqara anoona ufa qidanoo.

<sup>3</sup> Faiqi moo fannoo Anutuna maraquna fannoo dadaaqifanoo Anutuna ufa nari ufakiqari qimannimifanoo nimuqusaki mandaikisa mina ufa iriafanoo dadaaqirana faqa pooduqarana faqa amiqi amiqirana faqa maraidaqa.

<sup>4</sup> Moosa ufakiqari nari sia iri maria ufanakiqari qimannimimari fasiqafa nari kai nari dadaaqidanoo, Anutuna ufa nari ufakiqari qimannimimarifa aiqama Yisuna ufara suqimariasa dadaaqidanoo uqeeraidanoo.

<sup>5</sup> Qinee inniara aanaamuru ufakiqari sia irianakiqari aiqamausa minakiqari ufa qiaqee qidaqa. Mi oosanna uriqararafa maaqimminoo maridanoo Anutuna ufa nari ufakiqari qimannimirafa Anutuna maraquna nimimarifa qinee inniara minara firaqoo qiaqee qidaqa ridaqa. Anutuna ufa nari ufakiqari qimannimimarifa uriqararafa maridanoo, aanaamuru ufakiqari sia iria ufanakiqari qimarifa ureeqarafa maridanoo, mi moo ufanakiqari qimarinnana faiqi moo fannoo aniree nari ufakiqari mi ufana qimannimianoo andeeqasee irifanoo amana mariannoo miqimasee Yisuna ufara suqimariasa dadaaqirana mareefaranoo.

<sup>6</sup> Oo qini qikaqaafasaa kasooqaqee innee iannai onureeqa aanaamuru ufakiqari qimannimisee naqimandee dadaaqianauree. Sia dadaaqirafa mariannoo. Anutuna maraquna fannoo aamuqaira ufa qimannimira fee, qimannimiranee, irira ufa fee Anutuna maraquna dadaaqira ufa qimannira fee naamuaqira ufa fee nari ufakiqari qimannimianaqa aiqamausa dadaaqirana mareefaranoo. Moosa ufakiqari sia dadaaqirana mareefaranoo.

<sup>7</sup> Fifau sia kasi mari ainainna ufireena faqa kookaanauru faqa piripunna faqa mari-faqa sia minauqakiqari amiqimmandee fuaqaidaqa minakiqari idi sia amiqimmandee fuaqifanoo idirainna fasiqa anaaseesa naqi fee mandee irifaree, sia irifara.

<sup>8</sup> Rakira karaambaiqa fannoo sia amiqimandee kaanina uqeeraifaqa naqimandee rakirana aiqamausa uqeereefaree, sia uqeereefaranoo.

<sup>9</sup> Innee miqikai iqa maraquana fannoo naakinaqa aanaamuru ufakiqari sia irianakiqari ufa qifaqa naqimasee ani ufa oosana irifaree sia uqanna irifaranoo. Ani ufa fannoo fifau ufaira foora uqidanoo.

<sup>10</sup> Maa maqa maaqanakina moomoosa ufa maridanoo aiqamausakina misa ufa anoona maridanoo.

<sup>11</sup> Anaamuru moo fannoo findifi nári ufakiqari qini qimaqimifaqa qinee siamma irianauro. Qinee mi fasiqanara aanaamuru fee qiana mifa qiniara aanaamuru fee qiannoo.

<sup>12</sup> Innee Koorinti maqannaasa kaaqa Anutuna maraquana fannoo nimimari afeekanara kai firaqoo rimariasa mariafanoo. Mi afeeka iriranakiqari maanara kai afeekaikiqa. Yisuna ufara suqimariasa misara dadaaqiqa firaqoo uqeeree maria ainainnara kai nidinaqa uqeeraaqeera qidaqa.

<sup>13</sup> Faiqi moo fannoo maraquinannai aanaamuru ufakiqari qimannimidanoo narí faqa faiqi anaasee faqa sia irifanoo kafiaa Anutunara innaaru qinanoo moo afeeka aminanoo sia irimaria ufanakiqari qimarina anoona irisee quandasee kooroommasee kafiaa nári ufakiqari qimanniminaqa doo iriaqeera.

<sup>14</sup> Maraquana fannoo dadaaqinaqa sia iria ufanakiqari innaaru qinanoo qini qimana fannoo kai kuqaa innaaru qiannoo qiqa irirafa sia innaaru qiannoo.

<sup>15</sup> Qinee minara naqi fee qianauree qinee maaqimmianauro, qinee qeeqa qimana faqa qeeqa iriranannai faqa innaaru qianauro. Qinee Anutunara idi raidaqa qeeqa qimanannai faqa qeeqa iriranannai faqa Anutunara idi raanauro.

<sup>16</sup> Innee Yisuna ufara suqimariasa suqimarifanoo moo fannoo Anutuna maraquana fannoo aakinanoo narí amana fannoo kai aanaamuru ufakiqari innaaru qinanoo moo kaqiqee fasiqa fannoo ani marida iridanoo naqimasee mifa iriseenoo Anutunara mifa faqa eedoo qiannoo fee. Mifa sia uqanna amana ani ufa oosana iriannoo.

<sup>17</sup> Ani Anutunara dufi dufi qira ufa amiqimmasee qinanoo moo fasiqa fannoo sia amiqimasee irinanoo ani ufa fannoo sia mina dadaaqiannoo.

<sup>18</sup> Qinee Pauroosa maanara Anutunara dufi dufi qidaqa, qinee firaqoo moomoo kari inni fiqaramasee aanaamuru ufakiqari daadumai maridaqa innaaru qidaqa.

<sup>19</sup> Yisuna ufara suqimariasaki suqidaqa qinee sia miqidaqa. Misaki maridaqa nári ufakiqari misa naamuqianee qidaqa moodaannai qisauku ufa kai amana kai qusa qimannimiranara dididanoo. Moosa ufakiqari misa sia iri maria ufanakiqari kisaagasaa qimannimianaqa sia irifoorra qikooqaidanoo.

<sup>20</sup> Oo qini qikaqaafasaa sia inni irirafa faiqi aanaaqi iriranara foora mariani, faiqi firaasa iriranara foora mariani. Oosana oosana mandainainara minara kai inni irirafa faiqi aanaaqindiara foora nisakadiki qikairi siaisa mariaqa.

<sup>21</sup> Tamummaqara fasiqauqa minara maaqi qimasee akara riqau.

Karaambaqa qinoo qinee maa maqannaasa qimannimianauro.

Qinee aanaamuru ufa qimariasa niqqaanaqa qimannimifaranoo.

Qinee aanaamuru nifaurunnai qimannimianauro.

Qini qiku qisauku aiqama mi ufana irisee nikooqainaqa sia irifaranoo.

Tamummaqara fasiqa ufa miqimminoo marifaqa qinee Pauroosa minara maaqi qidaqa.

<sup>22</sup> Qinee maraquinannai aanaamuru ufa qiranara maaqi qidaqa Yisunara sia irimariasa irisee minara kuqaa fee qiaqee qimasee náriara Anutuna narira ufa ameemaanaí marianara iriaqeera mi ufafa maridanoo. Yisunara doo irimariasara sia misarau maridanoo, doo misa iridaqa. Maraqannai Anutuna ufa nári ufakiqari qimannimiraafa Yisuna ufa irimariasa iriaqee ainainna maridanoo, mina ufa sia irimarinausa sia mina irifaranoo mina anoonara randee faranoo.

<sup>23</sup> Yisuna ufara suqimariasa aiqama suqusee maridaqa aiqamausa moodaa kari aanaamuru ufakiqari dapi dapi ufa qimarifanoo kaiqee fasiqa fee aamina fasiqa fee minaki ani keeqafiqa inniara furufari mariasee qimasee sandaannoo.

<sup>24</sup> Aiqamausa suqidaqa Anutuna ufa nári ufakiqari narí qimami narí qimami qimari-fanoo kaqiqee fasiqa fee aamina fasiqa fee inniki keeqafinoo irinoo narí mandoosanaura aundurái oonumafi iriannoo. Narí irinnufafa narí raquru amianoo.

<sup>25</sup> Narí mandirirafa aundurái kukeeqanoo marinafa aiqama kooroomambinanoo mifa anuka kummarammafinoo Anutuna amooqidanoo maaqi qiannoo kuqaa Anutufa maaqoo inni faqa maridanoo fee qiannoo.

*Yisunara suqiranaki andeeqaaqeera qidanoo.*

<sup>26</sup> Oo qini qikaqaafasaa uqa, maa qinee qunna ufana anoona koorooianauro. Innee innaaru qiraree qimasee suqidaqa moo fannoo idi moo oosana araannoo moo fannoo

naamuaqira ufa oosana araannoo, moo fannoo Anutunaindaraa ufa irisee qimannimianoo moo fannoo aanaamuru ufakiqari qimannimisainanoo moo fasiqa maraquna fannoo dadaaqinanoo mi ufana anoona kooroomannimiannoo. Aiqama ainaina Yisuna ufara suqimariasa dadaaqirafa kai mariani.

<sup>27</sup> Misa aanaamuru ufakiqari qimannimiani qimasee qaaraganda kai fee qaaramoo kai findifinana moodaa moodaa fannoo kai qimannimiaqa, miqooqari moo fannoo misa ufa anoona nari ufakiqari kooroommasee qimannimiani.

<sup>28</sup> Yisuna ufara suqiranaki koorooimarinna fasiqafa sia marinana sia aanaamuru ufakiqari qimannimiani. Nari kai nari aundurakiqari Anutuna faqa ufa qinafa amana nari kai qiani.

<sup>29</sup> Qaaraganda fee qaaramoo fee Anutufa ufa niminnana qifaqa aiqamausa suqimariasa irisee misa ufa raina rainammasee iriaqa.

<sup>30</sup> Inni ufa suqiranaki faiqi moo fannoo ooqu marinafa Anutunaindaraa ufa marasainanoo ufa qimanniminna fasiqafa ooqu marinanoo mifa findifi qimannimiannoo.

<sup>31</sup> Innee aiqama amana Anutuna ufa qimannimiaqa moodaa kai moodaa kai findifidaqa amana qimannimifaranoo. Miqimandaifaqa aiqamausa misa irirana iriseeqa dadaaqirana mareefaranoo.

<sup>32</sup> Maraquna fannoo inni naakifaqa Anutuna ufa qimannimirana dadaaqirana nimaifaqa sia dapi dapi furufariaqa innee inneeqa kai inneeqa nifauru naundurasa rakisi-mariasa marianara amiqimasee rakisiaqa.

<sup>33</sup> Anutufa sia maasara dapi dapi furufariranaki mariaqera daarama quqeenoo asooranaki andeeqasee mariaqera daarama nari ufa iriranaki quqeenoo. Anutuna ufara suqimariasa maqaana maaqana moodaa oosana qimannimifanaqa maree mariafaqa inni faqa qimannimidaqa.

<sup>34</sup> Yisuna ufara suqiranaki anaasee sia findifi ufa qimannimiaqa, kaqi ooqufaaqee mariaqa. Yuda maqannaasa sandufamau kai fiqa faiqi ufa ameemaanai kai mariaqa.

<sup>35</sup> Anaasee moo ainanara irarree qimaseenoo sia paamma qimasee iraanoo, kasoogaqeenoo maaqaki oonureenoo nari afaaqisaa iraanoo. Yisuna ufara suqiranaki anaasee findifi ufa qinafa asaurirafa mariannoo.

(Koorinti maqannaasa akaqausa Pauroona ufara sia anoona ufa fee qimasee nari iriranamau fimarufanoo Pauroofa minara maaqi qimasee qimanniminoo qinau.)

<sup>36</sup> Oo Koorinti maqannaasa Anutuna ufa fannoo innikiqari fee indaaru kambiqeenoo fee innee inneeqara maasa kai mareeunoo fee qidee.

<sup>37-38</sup> Innikiqari moo fasiqa fannoo nariara Anutuna tamummaqara fasiqausee qimaseenoo fee maraquna qimimari afeekana faqaasee qimaseenoo fee mi fasiqafa qinee Pauroosa akara rumannimunnufanara kuqaa Anutuna naamuaqira ufa fee qinafa anoona mariannoo. Qini maa ufanara sia iridee qinafa innee minara unna qira fasiqa maridanoo fee qimasee mina ufa faqa sia iriaqa.

<sup>39</sup> Oo qini qikaqaafasaa Koorinti maqannaasa inneeqa Anutuna ufa faiqi anaasee qimannimiranara maraanauree qimasee afeekaikida mina mararara kai kadaapiruaqa, akaqausa sia irimaria ufanakiqari maraqunannai qimannimifaqa sia qaoo qiaqa.

<sup>40</sup> Innee ufa suqiranaki iriranamau kai andeeqasee maqee maqee faqa.

## 15

*Yisufa kuqiranakiqari findifunara kooroidanoo.*

<sup>1</sup> Oo qini qikaqaafasaa ooqai qinee Pauroosa Yisuna amiqira fasaasa ufa qimannimifannana, innee mina irisee maqeeiafanoo inni irirafa minasaa rusisoofa mapukinoo marinara inni naaqoo auqaidaqa.

<sup>2</sup> Yisuna amiqira fasaasa ufa qimannimifannana, innee mina rakisi mapuku qumareeqa innaarunai asumu marirana maree mariafanoo. Abee innee indaaru kuqaa fee iriqee iqau unna qimasee iridee qifaara.

<sup>3</sup> Qinee sia qinee qeeqa ufa kaifau qimannimifannanau. Yisuna aiku asauku mariannaindari anu ufana firaqqoo uriqarara ufa qimannimifannana. Mi ufana oosana maaqimminoo maridanoo. Asauku mundirafa tamummaqara fasiqauqa akarakinaa ufamau finoo maasa mandainainara kuquqimaqanau.

<sup>4</sup> Kuqufufaqa misa mina iri akundamasoofanoo qaaramoo faasaana marinoo tamummaqara fasiqa akarakinaa ufamau finoo kuqiranakiqari findifinuu.

<sup>5</sup> Findifufanoo Peetoorona afusaa koorooinoo miqooqari qisaukuqara taikaseenoo qikunni ooqu qaaraganda mareenoo niqiqaaninna fasiqausa aiqama nifusaa kooroofaqa qafaqa.

<sup>6</sup> Qafamasoofanoo miqooqari nari ufa irimarusa faifa handareeta fasiqa anaesee moomoo uqanna nifusaa moodaa kari kai kooroo inau. Misauqakiqari akaqausa asooqaqee kuqufufaqa, moomoosa kaqi maridaqa.

<sup>7</sup> Miqooqari Yisufa Yameesana afusaa kooroomambinoo miqooqari niqiqaaninna fasiqausa nifusaa kooroomambinoo qimanniminau.

<sup>8</sup> Inaqaiana uqanna qini Pauroosa qifusaa faqa kooroinau. Qinee daaduma uqanna moo oosanakiqari amaneendarasa eedadara foora mariafanausa maridaqa Yisufa qini qifusaa kambigoofaqa qafaqafana.

<sup>9</sup> Qinee Yisufa niqiqoo fasiqausakina ureeqarusa maridaqa. Qinee Anutuna ufara suqimariasa aupurarana nimiafanausa marunnanara naqi fee ifaqee misa qiniara Yisufa niqiqoo fasiqafee qida fee, sia qinee misa nimana maridaqa.

<sup>10</sup> Anutufa sia qini ureeqaranara irinoo kaqi nari afauaranannai qini mareeqeenoo nari niqiqoo fasiqausaki quqaqiseenoo ufa qimannimiannee afeeka qimufanoo sia qiniki mandaikinau. Qinee aiqama niqiqoo fasiqausa urinaaqaramasee faiqi aanaaseeki maqusa maqusa kadaapiriqa, sia qeeqa kaifau miqidau Anutufa qimu afeekafa qiniki kasinara miqidafa.

<sup>11</sup> Yisufa maasara kuqinoo findifunara qimannimunnufana akaqa niqiqoo fasiqausa nookinaanee iridee qini dookinaanee iridee, mi ufana kai maasa qimannimisaafanaqa minasaa inni irirafa rusinoo maridanoo.

*Maasa kuqiranakinaana findifuannanara qidanoo.*

<sup>12</sup> Maasa asauku mundirafa kuqiranakiqari findifunara maasa qimannimiafanaqa innikiqari akaqausa naqimasee kuqirausara sia findiffaranoo fee qida fee.

<sup>13</sup> Kuqirausa kasooqaqee sia kuqiranakiqari findifiririfanoofau asauku mundirafa miqi kai inoofau sia findifu.

<sup>14</sup> Ooqai asauku mundirafa kuqiranakiqari sia findifinaqau maasa qimannimira ufafa sia marinaqau sia qimannimunaiqini, innee inneeqa irirana rusimari ainainafa sia mariqini.

<sup>15</sup> Kuqirausa kuqiranakiqari sia findiffanoofau asauku mundirafa faqa sia findi fiqini. Anutunara asauku mundirana kuqiranakiqari uqeeree maqi qiafannanara kuqirausa kuqiranakiqari sia findiffaqau maasa qimannimiafanna ufanara unna ufa fee qini.

<sup>16</sup> Kuqirausa sia findi fifaqau asauku mundirafa faqa sia findifiqini.

<sup>17</sup> Asauku mundirafa kuqiranakiqari sia findifinaqau inniqa saqarikirafa kai fifau ainainara foora sia mari ainainnaki faqa innee inneeqa mandainainnaki kaqi auiamakifau furufarammiqini.

<sup>18</sup> Kuqirausa kuqiranakiqari sia findiffaqau moomoosa asauku mundiranasaa irirana rusisaida kuqimariasa sia innaarunai fini auiamakifau furufariqini.

<sup>19</sup> Maasa maaqoo marunna kamuqoora kai iriseefau asauku mundirana minasaa irirana rusidau, maasa mandainaina firaafa mariqini, aiqama maqannaasa maqa afaaqasasa mariasakiqari maasa dinee teeroo uriqaranoo mariqini.

<sup>20</sup> Anoona ufa maaqimminoo maridanoo. Doo kuqaa asauku mundirafa kuqiranakiqari findi finau, mina findifirafa maasa kuqirausa findifirana qima afeekaikidanoo mapukidanoo. Doo kuqaa maridanoo.

<sup>21</sup> Ooqai indaaruu moodaa fasiqannai kai kuqirana kambiqanau, miqi kai inoo moodaa fasiqannai kuqiranakiqari findifirafa kambiqanau.

<sup>22</sup> Maasa aiqama fasiqa anaasee Adamana faiqi namu marunnanara kuqidaqa, miqikai inoo asauku mundirana faiqi namu marianara Anutufa misa kuqiranakinaana uqeera quqaannoo.

<sup>23</sup> Sia dapi dapi Anutufa kuqiranaki uqeeraannoo andeeqaseenoo mara findifuannoo, asauku mundirana naaree doo mara findifumaqoofanoo maridanoo miqooqari mifa quminna aukuaana mina aiku asauku mareeqee findifuma nimaqaannoo.

<sup>25</sup> Anutufa nari asauku mundirana mapuku amaqaaseenoo qimaminau. Anee aiqama ainainasaa rakisimaree fimarinaqa qinee Anutusa aiqama namuqa afaannainaina mareeqeeqa ani asauku mundirana aramandunnai quqasaanana anee maqa mammaaqai radamusainafa kaifaa rakisianauranoo.

<sup>26</sup> Inaqaiana radamuaninna namuqaafa kuqirafa maridanoo mina faqa radamuananoo.

<sup>24</sup> Miqoo taikarafa kambiqaanoo Asauku mundirafa afaannauqa uriqararusa faqa misa faiqi firaasa faqa misa afeeka fasiqauqa aiqama mareeqeenoo nari aramandunnai quqaseenoo radamuseenoo nari ququsakinaasa aiqamausa mareeqeenoo nari akoona amiannoo.

<sup>27</sup> Tamummaqara fasiqausa akarakinaafa minara maaqimminoo maridanoo.

Anutufa aiqama ainaina mina aramandunnai kai quqaannoo fee qidanoo.

Tamummaqara fasiqa minara miqi qimasoofaqa qinee minara maaqi qidaqa. Anutufa aiqama ainaina mina aramandunnai quqararee qidanoo sia nariarau mina aramandunnai quqararee qidaqinoofau.

<sup>28</sup> Anutufa aiqama ainaina mareegeenoo asauku mundirana rakisirana ameemaanai quqasainanoo asauku mundirafa mina amaaku fannoo quandaki Anutuna aramandunnai nari keeqaannoo, aiqama ainaina quqoona aramandunnai keeqafinanoo miqooqari Anutufa aiqama ainainatia uqanna uriqararafa mariannoo.

(Pauroofa maru aukuanna faiqi moo fannoo Yisuna ufa irimarufa sia nammari mararai kuqufufanoo moo fannoo qaara kari nammari maree marinau. Mifa nariara faqa kuqunara faqa maree marinau. Mi aukuanna mi oosannara Pauroofa qimannimirara maaqi qinai.)

<sup>29</sup> Inni Koorinti maqannaasaki kuqirausara nammari maree marusara misara naqi fee qianauree. Kuqirausa kuqiranaki sia findifuafaqa innee nanaree fifau misaree qimasaida fifau nammari maraidee. Innee yanee dadaaqidee miqidee.

<sup>30</sup> Maasara faqa iriaqa maasa Yisuna ufa saara aiqama faasaana moomoo kari apurarana narirana eerairirana maraidaqa.

<sup>31</sup> Qini qikaqaafasaa, qinee aiqama kuqiranara aniraannoo qidaqa eerairidaqa. Qinee sia kaiqeesa maana kooroidaqa. Innee maasa karaambaifaqa asauku mundirana Yisunaki fimarianara nimooidaqa minara kai kooroomannimidaqa.

(Pauroona aukuan Roomma maqannaasa sia Yisuna ufa irimariasa nari oosana maraidaqa faiqi anaasee qafaifanoo adiafaa ianifee qimasee ooni faandamuraki faiqi faqa kaasau aandaufaqa mara quqasoofaqa rakimariqau. Yisuna ufa irimaru ufafa taikaanifeera mara quqasoofofanoo kaasau aandaufa naru neemarinau. Pauroofa minara iriseenoo Koorinti maqannaasa qimannimidanoo mina kikiqusimarinau. Koorinti maqusanaasa maa ufana qimanniminoo qinai.)

<sup>32</sup> Qinee Pauroosa Efeesusa maqusai kaasau aandaufa foora marufaqa misa faqa rakimariqafana. Kuqirausa sia kuqiranakiqari findiffafaqau qinee maaqoo Efeesusa maqusai mi fasiqausa faqa rakidaqa nana ainainee maraanauree qimasee misa faqa rakiqafana, fifau maaqoo maria fasiqaanaaseesa qiqafaqee qimasee fee rakiqafana. Oo sia miqi qiafana. Kuqaa kuqiranakiqari findi fuanaree qidaqa miqi qiafana. Faiqi firaasa unna ufa moo minara maaqimminoo maridanoo. Duna maasa kuquannanara maqee narana nammari moomoo naa. Qinee Pauroosa minara maaqi qidaqa. Kuqirausa kuqiranakiqari sia findiffafaqa anoonammifooqini, findiffaranoo unna qimariafanoo.

<sup>33</sup> Innee sia mi unna ufana iriaqa, Moo amaana ufa minara maaqi qidanoo, Mandoosana maree maria agoondisa inni marirana putaamma nimaqeeffaranoo.

<sup>34</sup> Innee Koorinti maqannaasaki akaqausa kuqirausa sia findifi maria ufana qimariasa inni putaamma nimaqifaqa innee misa mandoosana maraseeqa furufarirana maree mariafanoo. Innee mina minnisee kafa andeeqara irirana marasee inneeqa mandoosana quqasee andeeqaramau fuaqa. Inneeqa nisauruqa innikiqari akaqausa Anutuna afeekara sia amiqimasee iri marifanoo kaqi meeramau irirana irimariafanoo.

*Maasa kuqiranakiqari findifuanna qifaaqanara qidanoo.*

<sup>35</sup> Inniki moo fannoo kuqirausa findi firanara maaqi qianoo, kuqirausa doo putaaminoo maridanoo naqimasee fee findi fifaree, nana afaaqee findi fuannoo fee.

<sup>36</sup> Anee furufarimarianafa mi ufana qimariananoo. Anee nandi ummaqusainanoo sia aaqee kambiqaanoo mifa putaa mambinanoo mina uapaqi fannoo inaaqiana kambiqaanoo.

<sup>37</sup> Innee sakuma qaqama fee moo narana qaqama fee ummaqidaqa sia narana faqa amanee faqa ummaqi mariafanoo qaqama kai ummaqi mariafanoo. Ummaqusaafanoo sia qaqama kai kambiqaidanoo narana anoona namufaqa amanee namufaqa kambiqifaqa qafee mariafanoo.

<sup>38</sup> Anutufa nari iriranannai aiqama aadu aadu qaqama nari aadu aadu kambiqaaninana anoona namufaqa amanee namufaqa nimidanoo. Anutufa aiqama qaqama andeeqasee nari kai anoona amidanoo.

<sup>39</sup> Kasimari ainaina nimaqi miqi kai idanoo sia aiqama moodaa nimaqi faqaasa maridaqa. Faiqi moo nimaqi faqaasa maridaqa aandaufa moo nimaqi faqaasa maridaqa, ufina moo nimaqi faqaasa maridaqa, noodaanna moo nimaqi faqaasa maridaqa.

<sup>40</sup> Innaarunaindaraa nifaafa faqaasa faqa maqasaqarara nifaafa faqaasa faqa aaduma maridaqa. Innaarunaindaraa nifaafa areenarafa moo maridanoo maqasaa qaraasa nifaafa areenarafa moo maridanoo.



<sup>41</sup> Suani afu nari areenarafa aaduma moo maridanoo, quqoona nari areenarafa aaduma moo maridanoo, fasau misaki faqa aadu aadu areenarafa maridaqa.

<sup>42</sup> Kasooqagee kuqirausa kuqiranakiqari findififanoo miqiminoo mariannoo. Faiqi anaasee kuquffifanoo mina iri akundee mariafa maqasaagaraafa maqa maridanoo. Kuqiranakiqari Anutufa uqeerasainanoo mi afaaqafa naaru naaru marira afaaqa mariannoo.

<sup>43</sup> Nikundee mari nifaagafa ummooqukidanoo mandaikidanoo, kasooqagee kuqiranakiqari Anutufa uqeerasainanoo afu qafainanoo idaaqirafa amiqirafa afeeka mariannoo.

<sup>44</sup> Nikundee maria nifaagafa maqasaagaraa nifaaga ufaasu marifa maridanoo. Anutufa uqeerasainanoo naaru marianinna innaarunai nifaaga mariannoo. Maqasaa nifaaga ufaasu nifaaga maaqoo mariana amana kai marifa maridanoo. Mifa marinanoo innaaruna naaruara marira nifaaga amana kai marifa kuqaa mariannoo.

<sup>45</sup> Tamummaqara fasiqauqa akara minara maaqimminoo maridanoo.

Indaarugaa fasiqa Adamafa kasimaruna auquqoofa marinau.

Qinee Pauroosa minara maaqi qidaqa. Adamana aanaaqiannaa fasiqa Yisufa maqee marirana faqa naaru marirana faqa nimimari maraqunafa maridanoo.

<sup>46</sup> Sia naaru marirafa naaru kambiqaiddanoo maqasaagaraafa naaree kambiqaiddanoo, miqooqari kai naaru marirafa kambiqaiddanoo.

<sup>47</sup> Indaarugaa Adamafa maqasaagaraa kookoomannai auqirafa marinau. Inaaqianna Adamafa Yisufa innaarunaindari quminau.

<sup>48</sup> Maqasaagaraasa nari nikoona Adamana fooqaasa maqa nifaagafaqaasa maridaqa. Innaarunai fimariasa innaarunaindaraa fasiqa Yisuna afaaqaikirausa marifarannoo.

<sup>49</sup> Maqee maasa maqannai auqira fasiqa afaaga afisiqa moodaa karammiqa maridaqa kasooqagee maasa miqikai masee innaarunaindaraa fasiqa afaaga afisusee miqi kai iqa moodaa karakaimmianaura.

<sup>50</sup> Oo qini qikaqaafasaa qini Pauroosa ufa anoona maaqimminoo maridanoo. Faiqi nimaqi faqaasa faqa fidika faqaasa faqa sia Anutuna ququsaki keeqafifanoo naida nimianoo. Ufaasu maqasaa ainaina faqa sia amana naaru marirana maraannoo.

<sup>51</sup> Innee amiqimmandee iriaqa, kukeeqara ufa qimannimianaura, maasa sia aiqama kuqanaura. Qusasaa uqanna Anutufa tautumaqimaqaseenoo maasa moo kamaakamma qimaqaannoo.

<sup>52</sup> Nifu tasunduna tasunduna kaqi kaqi idanoo miqirafa kai inaaqianna ufreena fannoo fuaqainanoo Anutufa maasa moo kamaakamma qimaqaannoo. Mi ufreena fuaqasainanoo kuqirausa minakiqari naaru marira nifaaga faqaasa findififanoo maasa aiqama moo kamma qimaqaannoo.

<sup>53</sup> Ufaasu maqasaa nifaaga faqa sia kaqi ooru fifaranoo naaru marirana naaree afisumareeqa ooru fifaranoo. Kaqi mariasa kuqifandinausa misa afeeka nipata naaree afisumaree amana innaarunai ooru fifaranoo.

<sup>54</sup> Ufaasu maqasaagaraa nipata faqaasa kuqifandinausa naaru marira nifaaga sia kuqimaria nifaagana afisumareeqa doo miqoo ooqeenaasa akara anoona kambiqaannoo. Misa maaqi qiqau.

Anutufa doo kuqirana aiqama nambiqama taikaseenoo mina uraaqaranoo maridanoo.

Kuqirana rafaqaqafirafa doo taikkeenoo.

Kafaa moo akarakinaa ufa minara maaqi qidanoo.

<sup>55</sup> Oo kuqirafa maasa rafaqaqafimarianafa ani uriqarara afeeka yaifee maridanoo. Doo taikkeenoo.

Oo kuqirafa ani aupurara afeeka maasa qimimarianafa yaifee maridanoo. Doo taikkeenoo.

<sup>56</sup> Akara miqinoo marifaqa qinee Pauroosa minara maaqi qidaqa. Maasa aiqamausa mandoosana fannoo kai aupurara afeeka kuqirana amifanoo doo kuqirafa maasa daridanoo. Kafaa mandainaina fannoo mina narira afeeka Anutuna nimaarusira sandufakiqari kambiqaiddanoo.

<sup>57</sup> Oo Anutufinnai dufi dufi qidaqa. Maasa inni saimbaqa karaambaiga asauku mundirana Yisunannai kuqirana faqa mandainaina faqa maasa uriqaraqa maridaqa.

<sup>58</sup> Oo qini qikaqaafasaa doo minara iriseeqa sia kasi kasiaqa mapukuseeqa atukaraqa mariaqa. Karaambaiga marirana nirana mariana maqee maqee minaki kai noori runusee mariaqa. Karaambaiga marirana niranaki marianara aiqama saika naaru marira anoona marifa maridanoo karaambaiga marirana nirana sia moo fannoo anoona siaifa maridanoo. Anoona marifa kai maridanoo.

## 16

*Anutuna ufa irimariasa sarauqinana dadaaqiranara qidanoo.*

<sup>1</sup> Oo Koorinti maqannaasa innee Yudeea maqa maaqaki Anutuna saika maree mariasa narana sarauqi marianara munnimma kaqi nimiranara qini irafaqa minara inni qimannimidaqa. Qinee Karatia maqa maaqaki Yisuna ufara suqimarusa qimannimifannaqoo miqoo kai fuaqa.

<sup>2</sup> Aiqama amaana faasaanasaa aiqama fasiqa anaasee akaqa munnimma aaduma raina quqaaga. Nari ainainirana akiqara munnimma firaana marainafa mina amana kai kaqikaana quqaani kaqikaana marainafa doo nari maraina amana kai kaqikaana quqaani, qambaana amana marainafa doo mina amana kai quqaani, innee aiqama amaanasaa amaanasaa miqikai idaqa raina quqeesaifanoo innooqafinaqa qinee inni maqasai oonuraana kari munnimma suqirana sia mariani doo faasai suqinoo mariani.

<sup>3</sup> Innee maqee andeeqara fasiqauqa mara quqasaifaqa qinee oonuraanaqa mi munnimmana faqa pasakina akara rumasaanaqa misa mi pasana faqa mi munnimmana faqa mareeqa Yeerusareenni muru kaqi nimiaqa.

<sup>4</sup> Innee qiniara faqa ooru fuannee qifaqa qini faqammooru fifaranoo.

*Pauroofa nari fuaninnanara tipundaaridanoo qimannimidanoo.*

<sup>5</sup> Qinee maaqooqari Maseedoonia maqa maaqakina oonuree aniree iqa ninii taikasee innee mariannai fuanaura.

<sup>6</sup> Inni maqasai oonureeqa kaqi kaaqoo kisaqaasaa inni faqa marianauree, aukuaana aiqaramafinaqa qambaanasaaqaa suara aukuaana qaaramoo quqoona inni faqa marianauree. Doo miqooqari moosaa fuanaura yaifee fuanaturee maqee sia iridaqa.

<sup>7</sup> Karaambaifa eedoo qinnanara kaqikaqoo kisaqaasaa inni faqa marianauree qidaqa. Miqoo inni fi inni nindafee firanara qidaqa.

<sup>8</sup> Qinee maqee Efeesusa maqasai kaqi marianauree. Yeerusareenni Yuda maqannaasa qoomaqa suqanee maru quqoonafa anirainafa qinee minasaa Efeesusa maqusaindari Maseedoonia maqa maaqaki ooree minni oonuree aniree masee miqooqari innee iannai Koorinti maqasai fuanaturee qidaqa.

<sup>9</sup> Maqee Efeesusa maqasai maaqoo fira saika anoona saika maridanoo, moomoosa qini ufa ititee mariasa mariafaqa saikidaqa.

<sup>10</sup> Qinee Timootinara qimannimianauree, mifa inni maqasai oonurainafa innee mina amiqi amiqimmasaifanoo afaqa quqaani, mifa qini daanna ree marifa karaambaifa ainainiranaki marifa maridanoo.

<sup>11</sup> Timootifa Yisuna ufa irimariasa qini qikaqaafasaaqaa saimbaqa mootinai aiqauqaki mai aniree qimasee inni maqasai naaree anireeno mai qinee minara rakisi marunnannai Efeesusa maqasai anianifeera qidaqa. Innee Timootinara kumaaraa fee qimaseeqa sia minara nikoo nikaqaa iqa amiqimmandee dadaaqifanoo asoaranakiqari findifinoo mai aniani.

<sup>12</sup> Doo maqee maasa qikaqa Apooroosanara qianauroo. Qinee innee iannai qikaqaafasaaqaa faqa namummaqee fiqa anianneera qidaqa fuki faaki qunanoo sia fidanoo ititammasee kaqi maridanoo maqee sia fuanaturee sia andeeqara aukuanee qidanoo. Kasooqaaqee andeeqara aukuaana kambiqafinanoo fuanno.

*Pauroona taikarana ufa.*

<sup>13</sup> Inni Koorinti maqusanaasa maqee maa ufana qimannimianauree. Innee maqee maqee aifarida mariafa, innee Yisuna saqarikiranaki minaki mapukufina kikiqammambaqa innee maqee maqee paasoosida mariafa, afeekaikiqa mariafa.

<sup>14</sup> Inneeqa maridaqa aiqama nirana marirana nimuqusi marinaqa nari dadaaqi nari dadaaqi qiqaanaqa.

<sup>15-16</sup> Innee Sateefanasana faiqi anaasee aiku asaukuara irimariafanoo, misa Akaia maqa maaqakiqari oosanasaaqee Yisuna saqarikusa mariasa maridaqa. Misa Anutuna ufa irimariasa ainainamma nisee mariasa maridaqa, nari faiqi anaasee faqa nari marirana minaki kai nifaqa quqasee auqaidaqa. Oo qini qikaqaafasaaqaa inni qimannimidaqa. Miqinna fasiqana aanna reeqa mina ufamau fuaqa, akaqausa misa dadaaqimariasa misa ufamau faqa fuaqa.

<sup>17</sup> Mi fasiqafa Sateefanasafa faqa Fooratunatusafa faqa Akaikusafa faqa misa mai aniroofaqa nindafaida asasiqifana, misara inni Koorinti maqusanaasa ani ani anireera foora qufaqa asasiqifana.

<sup>18</sup> Misa inni asasirana nimimariandee kai iqa qini qimiqa. Miqira fasiqauqara aiqamausa iriaqana.

<sup>19</sup> Asia maqa maaqaki Yisuna ufara suqimariasa misa inni nimandaidaga. Maaqoo Akuirafa faqa nari anaaga Pirisikira nammarifa faqa nari maaqaki Yisuna ufara suqimariasa faqa inni firaaqoo amiqimmandee Yisuna ufa irimariasara foora inni nimandaidaga.

<sup>20</sup> Maaqoo mariasa Yisuna ufa irimaria qikaqaafasaauga faqa inni nimandaidaga. Innee nariara nariara nikaqafasaa fee qimasee nari amooqee nari amooqee iaqa.

<sup>21</sup> Faiqi moo fannoo qini dookinaana iriseenoo maa pasana akara rinau, maa qusa ufana atisaa qeeqa qisaukunnai akara ruanaura. Qinee Pauroosa inni nimandaidaga.

<sup>22</sup> Karaambaiqara sia amuqusimarinafa aqurarara ufa minasaa mariannoo. Nari ufakiqari maranata, maasa ufakiqari maasa karaambaiqa qumuannee qidaqa.

<sup>23</sup> Karaambaiqa Yisufa nari afaarira oosana inni faqa nimiani.

<sup>24</sup> Maasa aiqamausa asauku mundirana Yisunaki mariasara irisee qini qimuqusirafa inniki mariani.

## 2 KOORINTI

### Pauroofa Koorinti maqannaa inaaqiannaa ufa akara rumannimaqoo ufafa.

<sup>1</sup> Anutufa qufaqa qinee Pauroosa asauku mundirana Yisufa niqiqoo fasiqausaika-mambi marunausa maridaqa. Qinee qeeqa qikaqaafasaa Timootisandiri maa akarana rumannimaqeeqa. Innee Koorinti maqannaa Anutuna ufara sugimariasa faqa aiqama Akaia maqa maaqaki Anutuna ufa irimariasa faqa inni aiqama nimandaidaqa.

<sup>2</sup> Anutuna asauku mundirana maasa karaambaiqa Yisuna faqa nari akoonaa Anutuna faqa miqanda amiqi amiqira afaarirana faqa naundura asoosana faqa inniki mariani.

*Pauroofa Anutuna dufi dufi qimamaqaidano.*

<sup>3</sup> Asauku mundirana innisaimbaqa karaambaiqa Yisuna akoofa Anutufa minara maasa aiqamausa dufi dufi qimamaqaaqa, innisaimbaqara amuqsimari qikoofa innisaimbaqa qifaueemarifa maridano, aiqama dadaaqirafa mifinnaindari qumimarifa maridano innisaimbaqa mina kai dufi dufi qimamaqaaqa.

<sup>4</sup> Innisaimbaqa qeeqa daundura ummaarakki marunnana Anutufa mi ummaaranaki dadaaidano. Innisaimbaqa oosana oosana ummaarakki mariasa Anutufa innisaimbaqara misa dadaaqiaqee qimaseenoo innisaimbaqa naaree dadaaqinau. Misa dadaaqidaqa Anutufa innisaimbaqa dadaaqirana qimuna mina kai maasa qumaree quandaki minannai dadaaqidaqa.

<sup>5</sup> Asauku mundirana moomoo aupuraranaki marufaqa maasa faqa minaki marunano aupurana maasa faqa naida qiminoo. Miqi kai inoo asauku mundirafa nari dadaaqirana faqa firaqoo maasa naida qimifaqa.

<sup>6</sup> Maasa Yisuna ufasaara aupurana maraiddaqa sia fifaufau maraidau, inni dadaaqirana faqa innaarunai asumu marirana maraaqera aupurana maraiddaqa. Asauku mundirafa maasa dadaaqifaqa maasa minasaqaraana qumaree inni faqa dadaaqidaqa. Innee maasa maroo aupurana maraseeqa minaki ubiqafiqa maraqa fuaqera dadaaqidaqa.

<sup>7</sup> Innee maasa aupurana ati maroondee kai iqa maasa Yisufinnaindaraa dadaaqirana ati faqa mareefarano. Maasa minara iriseeqa maasa irirafa innisaa mundinoo maridano sia minnisaanano maqasaa aqufuano.

<sup>8</sup> Maasa Asia maqa maaqaki fiqii fiqii imariafanano firaa aupurana qimufaqa minara inni naaqoo aqaida qimannimidaqa. Mi aupurara firaqoo ummaara qimufaqa maasa doo maqee kuqirammidaqee qiafannana.

<sup>9</sup> Maasa misara kuqa darira ufa doo qima afeekaikiaafoo qunaqa sia daria. Mi qimaarusirafa sia fifau kambiqeenoo Anutufa qumee dadaaqunara miqimmasoofaqa sia qinee qeeqara afeeka fasiqafee qianaara qeeqa iriranara Anutunasaa kai munduanifee qimaseenoo qumee mi qimaarusiranara kambiqaanifee qufanoo kambiqanau, kuqiranakinaana uqereee marifa dadaaqufaqa minaqiqari maridaqa.

<sup>10</sup> Mifa firaa qimeekaranakinaana maasa uqereeqee qisaiifaqa maridaqa kafa miqi kaimmiannoo. Mifa kafa maasa minakinaana uqereeqeenoo quqaqisaiifaqa sia rufida minara irirafa minasaa rusinoo maridano.

<sup>11</sup> Miqi marinara innee moomoosa maasara innaaru qifanoo Anutufa maasa amiqi amiqima qisainaaqaa moomoosa mina qafamasee quandaki Anutufinnai dufi dufi qifanoo.

*Pauroofa Koorinti maqusai fuanee qimasee tipundaaramaseenoo minnisana.*

<sup>12</sup> Oo Koorinti maqannaasa maasa maqusa maqusa nidaqa inni faqa mariafanano qini daakirafa irirafa maaqimandee qimaqimidano. Maasa inni faqa mariafanano sia faiqii irirafa maasa uqaqifiqanau. Anutufa dadaaqufaqa narikinaana akooqoo anoona ufa faqa noori runusee auqarafa faqa, Anutuna afaarira amiqi amiqira afeeka faqa mifauqa kai rakisigimaqee marifaqa inni faqa maridaqa minara maasa irisee nasuridaqa.

<sup>13</sup> Maasa innee asaana rimariana faqa irimariana faqa amana kai akara rumanni-maqaidaqa.

<sup>14</sup> Maqee innee akaqainaina innee sia amiqimmasee irimariafanano. Mi ainainausara amiqimasee iriaqera dididano. Innee mi ainainausara amiqimasee iriseeqa, karaambaiqa Yisufa qumuaninna faasaannasaa maasa inniara nasurifandinandee kai iqa innee maasara nasurifaranoo.

<sup>15</sup> Qinee minara iriseeqa kuqaa kambiqannoommifoo qimasee qaara kari inni maqusai oonuree qaara kari idaaqamannisararee qimasee sia fiqa.

<sup>16</sup> Qinee maidari Maseedoonia maqa maaqai fidaqa innee iannai fi ninda fee firaree qiqa kafa mindari anidaqa ai nindafararee qimaseeqa sia fiqa sia nindafeeqa. Yudeea maqa maaqai ooru fidaqa inni dadaaqirana maraanauree qimaseeqa innee iannai sia fiqa.

<sup>17</sup> Qinee firara qunnanara innee qiniara furufarirafee fee qidee, innee qiniara narí aidiramau kai fidanoofee fee qidee qinee innee iannai firara qunnanara innee qiniara qaaraiki marifee fee qidee.

<sup>18</sup> Anutuna afusaa marida innee iannai firara sia qaara irirafa qiniki maridanoo.

<sup>19</sup> Asauku mundirafa Yisufa Anutuna amaakuara Sirasifa faqa Timootifa faqa qinee Pauroosa faqa qimannimimarunnana sia mifa qaara irirana faqaafa maridanoo, mifa Yisufa maqasaa fasiqa maasara sia qaara ufa qimarifa eedoo kai qimarifa maridanoo.

<sup>20</sup> Mifa kai Anutuna moomoo ufa maasara qima afeekaikamasee mapukirafa maridanoo. Minara faiqí anaasee Anutunara amooqida innaaru qidaqa asauku mundirana Yisunannai maasa Yisuna ufa irimariasa aiqamausa eedoo qimasee inni dadaaqidaqa.

<sup>21-22</sup> Anutufa narí uqanna inni saimbaqa asauku mundiranaki marinara dadaaqifaqa innisaimbaqa minara kuqaa anoonee qidaqa. Mifa innisaimbaqa narí saikaki mara quqararee qimaseenoo narí asauku innisaimbaqasaa munduseenoo utaaqamaseenoo naríndi fee qimaseenoo narí naaquqara andeeqara maraquna maasa qimuqusa ooki quqaseenoo kasooqaqee innaarunai nimira ainaina ati kai maqee uqannifiqaidanoo kasooqaqee innaarunai anoona fraana nimiannoo.

<sup>23</sup> Qinee Anutuna afusaa maridaqa mifa qini qimuqusaki irimarifa marifaqa sia unna qimasee maaqi qimasee qimannimianaura. Qinee Asia maqa maaqai oonuree aniree masee inni Koorinti maqannaasaki sia fiqa. Nisaurirana nimianoo qimasee qeeqa kai sia fiqa.

<sup>24</sup> Maasa sia inniara miqimmasee maaqimmasee qiaqee qidaqa doo innee mapukusee Yisuna saqarikiranaki mariafanoo, innee sia nisaurirana maraaqeeera asasiranaki mariaqeeera dadaaqidaqa.

## 2

### *Pauroofa Koorinti maqannaasa noori runifoo qimasee sia finau.*

<sup>1</sup> Qeeqa irirana maaqi qimasee iriqa. Sia qinee nisaurirana nimiqa misiannai kaifaa fuannee qiqa.

<sup>2</sup> Qinee nisaurirana nimiananoo yafee quandaifi asasirana qini qimiannoo fee sia moo fannoo asasirana qimiannoo qiqa ufasaara noori runimariasa kai maridaqa aiqama noori runusee marifoora.

<sup>3</sup> Minara qinee mi pasana akara rumannimaqeeqa. Qinee qini asasamma qisainausianai oonureeqa noori runirana nimianoo qimasee pasa kai akara rumannimaqasanaqa innee inneeqa aqara oosana andeeqasaifaqa qinee ooruranaqa innee asasiranaki marifanoo innee qini qifaqa faqa asasifaranoo.

<sup>4</sup> Qini qimuqusa fraaqqoo uqanna inniara qimuqusifaqa ikiraqaidadaqa akara rumanimaqeeqa, sia inni nifaqa rumbaaniifeera akara rumannimaqeeqa qeeqa fraaqqoo inniara qimuqusinara iriaqeeera akara rumannimaqeeqa.

*Koorinti maqusai Yisuna ufara suqimariasaki moo fannoo fraaqqoo mandoosana maroonara Pauroofa mina mandainaina numoo minnisaanee qinau.*

<sup>5</sup> Inni Yisuna ufa irimariasakiqari faiqí moo fannoo narí aqaranannai inniki moomoosa nifaqa rumbarana nimirau sia qifaqa rumbarana qini qiminoo inni nifaqa rumbarana nimiqaifaqa qinee nisaurirana fraana nimianoora minara sia nifaqa ritianaaranoo.

<sup>6-7</sup> Doo innee moomoosa aqamaqqoo fasiqana Yisuna ufara suqiranakiqari aqiqama-soona arirafa doo amanai kamambinoo doo narí mandainaina minniseenoo doo innee mina mandainaina akiqara minni aisasee idaaqamamaqaaqa, innee sia miqifanoo fraaqqoo akooqainanoo Yisuna ufa minni uqannaseenoo kaasau uqaandoora.

<sup>8</sup> Inneeqa mi fasiqanara kuqaa nimuqusianara oonu qimamifanoo iriani.

<sup>9</sup> Minara kai qinee mi akarana rumannimaqeeqa. Qinee inniara naamua qunna ufana irifaree sia fee irifaree qimasee nimanamandee qafarara pasa akara rumannimaqeeqa.

<sup>10</sup> Innee Koorinti maqannaasa mi fasiqana mandainaina akiqara minnisee moodaanaki kifafa qinee faqa mina mandainaina minnisee mina faqa moodaanaki kianaura. Innee moo mandainaina mandaikamma qimaqoonara qinee inni minniseeqa, mikari moo mandaikamma qimaqaaqau fee sia fee miqimma qimaqaaqau fee minara qinee asauku mundirana afusaa marunausa inniara irisee minnisisaadaqa.

<sup>11</sup> Maasa Sadannana mandiriranara iridaqa mifa maasa uridaaqaraandoora mandainaina maraana akiaqara mininniseega kafaa moodaanaki kiaqa.

*Pauroofa Tarooasa maqasai Titusanara oonu mafi iridanoo afeesimarinau.*

<sup>12</sup> Qinee Pauroosa Asia maqa maaqaki fiq ufa idaqqa Tarooasa maqasai oonureega asauku mundirana amiqira fasaasa ufa qimannimiraree qiafanano Karaambaiqa faasai kooqi atuqeenora maqi inoo marufaqa mi maqusanaki saika amiqimasee firaqoo uqeraqiafana.

<sup>13</sup> Miqoo maridaqa maasa qikaqaafasaa Titusafa inni maqusaindari ani ifoo qimaseega randaidaqa sia paquriafannanara qimuqusa mandaikufaqa miqooqaraasa nimandamasee Maseedoonia maqa maaqaki minara randarara fiqiafana.

*Asauku mundiranannai maasa rakiranara foora uriqararawsa maridaqa.*

<sup>14</sup> Oo Anutunara dufi dufi qiaqa. Innisaimbaqa asauku mundirana faqa moodaanaki kamambi maridaqa minakiqari Anutufa nari narunakinaana Anutuna asumu firira foora innisaimbaqa nifiqee asauku mundirana kaanina mareega idireega maree maqusaira foora miniqaasa rakiranara foora uriqararawsa maridaqa. Miqooqari innisaimbaqa Anutufa mareeqeenoo asauku mundirana ufa amiqira afundara foora nimifaqa aiqama aanaamurunni daraaniqa qimannimiqa nidaqa.

(Ooqai Pauroona aukwana Roomma maqannaasa sundiauga faqa misa karaambaiqauqa faqa namuqaa maqasai oonureega misa naruseega misa ainaina faqa faiqi kaakadi narirawsa rumbamareega nariqa maqasai nifiqamaree fiqau. Nariqa maqusa adeedi oonureega padi mafufaqa nari indaaru fiqa rumbaqaosa ootupa ootupa rumbara rumbaseega nifiqee narirara maqusa qambaana narirara nifiqee fiqau. Rumbarawsa ninaaqiana afundi maru ainaina ida muquru mareega fimarufanoo mi afundafa misa qambaanamma afundi marinau. Mina anaqiana sundia firaafa Karaambaiqa misa sufafaqa maree finau. Rumbaqaosa mi afundanara maasa kuqunna afundafa qidanoo fee qiqau. Sundiauga faqa kaiqeasa faqa mi afundiranara amiqira afunda fee qiqau.)

<sup>15</sup> Pauroofa minara iriseenoo Koorinti maqannaasa nariara maaqi qimasee qimanniminau. Maasa faiqi anaasee qambaana fidaqa asauku mundirana ufa amiqira afundara foora uqirawsa nidaqa akaqausa mi ufana irimariasa asumu mariranaki fifaranoo, akaqausa mi ufana sia irimariasa kuridiranaki fifaranoo.

<sup>16</sup> Kuridiranaki fifandinausa mi ufana mi afundirana udiramasee faiqi kuqa narimaria manda afundanafee qidaqa. Asumu mariranaki fifandinausa mi afundana udiramasee naaru marirana maree maria afundane qidaqa. Minara irisee nana irirana faqa fee maa saikana amanaikiannoo fee.

<sup>17</sup> Maasa amana mi saikana maraanaura. Akaqausa Anutuna ufara fifau oorudupira ainanee qimasee minasaqaraana manda munnimma maraidaqa. Miqi qimariasa sia mi saikana amana mareefaranoo. Maasa sia misa naanna raidaqa. Anutufa maasa mi saikanaki diqiqaosa marunannara mina afusaara foora maridaqa asauku mundirana ainainira faiqi maridaqa noori runusee faiqi anaasee qimannimidaqa.

### 3

*Pauroofa Koorinti maqannaasara nari papiqa akarara foora mariafanoo.*

(Ooqai Pauroona aukwana Yisuna ufara suqimaru fasiqafa mootinai suqimarunni firarinoo fufaqa misa akara ruumbeegee amufanoo mara maree moo atinai suqimarunni oonuree munu nimufaqa misa qafeega mina mareega nari suqimarunni quqasoofanoo maridanoo misa faqa Yisuna ufara suqimariqau. Akaqausa unna amaana ufa qimarusa nariqa kai unnaqira pasa akara rumammaree moo atinai fiqa mi pasanannai fifau narana maaqa ueeqasee maraqau. Pauroofa minara iriseenoo Koorinti maqannaasa maaqi qimasee qimanniminau.)

<sup>1</sup> Maasa sia qeeqa qimooqidaqa anoona ufa kai qimannimidaqa. Maasa innee inannai fiqa sia akaqausa naanna reeqa moona akara mara maree inni munu uqannifiqasee inni faqa suqanaura. Maasa inni maqusaindari moosaa fiqa sia inniara pasa akara rumaqimifaqa maree fuanauree qianaura.

<sup>2</sup> Innee Koorinti maqannaasa maasa akarara foora sia papiqasaa akara rinoo maasa qimuqusasaa akara riara foora iqa mariafanoo, aiqamausa asaana rumasee iriaqera akara rinou akoqoo maridanoo.

<sup>3</sup> Asauku mundirafa nari uqanna mi pasana akara ruumbeegee maasa qisaukuki quqasaifaqa inni nimiqa. Sia Moosefa maru kamuqoo iundee kai idaqqa sia kirifinnai oonisaa akara rinoo maridanoo. Kaqi marira Anutufa nari maraqunannai faiqi faiqi maasa qimuqusasaa akara rinoo maridanoo.

<sup>4</sup> Maasa irirafa asauku mundiranasaaqari Anutunasaa mundinoo marinara mi ufana qiga.

*Pauroofa maasara faqa Anutunara faqa moodaanakikira ufara qidanoo.*

<sup>5</sup> Sia maasaki moo afeeka marifaqa maasa maa saikana amana maridaqa, maasa afeeka Anutufinnaindari kai qumuree maasa uqeeraidanoo.

<sup>6</sup> Mifa mi ainainirana amanaikirana qimifaqa kai nari fuka moodaanaki kira ufa mi saikanaki maridaqa. Mina fuka moodaanaki kira ufa sia nimaarusira ufa akara riranasaa mundinoo maridanoo. Anutuna naaquqara andeeqara marauna faiqi naunduraki marina minasaa mundinoo maridanoo. Mooseena sandufa akararufa mifa kuqirana kai nimidanoo, Anutuna marauna fannoo kaqi marirana nimidanoo.

<sup>7-8</sup> Ooqai Anutufa Sinai aaganasaa nari sandufa Mooseena qimamidanoo qaara oni marasee minasaa akara rumaminau. Akara rumamidanoo nari Anutuna kaaqa areenarana kooroomambufanoo Mooseena oori afiri faqa kaaqa qamafufaqa Isaraee maqannaasa mina oori qafoofanoo nifu daroo daraa ufaqa rufiaqau. Marinoo Mooseena ooriki kaaqa qarafa kasooqagee taikamaree muqufi taikanau. Ooqai Mooseena sandufa faiqi kuqirana nimimarifa kaaqa areenaranakina ani ufa marufanoo maqee kamu Anutuna naaquqara andeeqara marauna fannoo kaqi marirana nimimarifa mina kaaqa areenarafa firaqoo uriqararafa maridanoo.

<sup>9</sup> Narira ufa ameemaani quceemariafa fira kaaqa areenaranaki ani ufa marinanoo Anutuna andeeqaranaki quqee marifa mina kaaqa areenarana amana kai fee mariannoo fee sia amana kai firaqoo uriqaranoo maridanoo.

<sup>10</sup> Maqee maasa Mooseena sandufara maaqi qidaqa. Maqee maria kaaqa areenara ainaina fannoo firaqoo daroo daraa idanoo doo nauraa areenarana rafaqafusaifanoo doo mifa aiqareenoo.

<sup>11</sup> Mooseena sandufa qusasaa maru ainainafa mina areenarafa firaafa marinanoo naaru naaru marira ainaina areenarafa firaqoo uriqaranoo maridanoo.

<sup>12-13</sup> Maasa mi naaru marirafa anianinnanara asasamandee afeesidaqa paasosamandee Yisuna ufa qimannimidaqa. Maasa sia Mooseena aana reeqa qamunna qummaree nikiqasaa afisusee oorisa areenarana rafaqafidaqa. Mooseefa qamunna qumareenoo Isaraee maqannaara nari ooriki takukandaa rimarina mina taikee marina qafeefoo qimasee qamunna oori afisinau.

<sup>14</sup> Mi aukuanna Isaraee maqanna irirafa doo ititanoo marufaqa sia Anutuna ufa oosana iriqau. Mi kamuqooqari ani ani ufaqa maqee kamuqoo kaqi mi qamunnafara foora misa irirafa ititanoo marifaqa ooqeenaa moodaanaki kira ufa asaana ridaqa sia mina oosana iridaqa. Faiqi asauku mundiranasaa atooqafinanoo kai miqoo kai mi qamunnana fooqaana rafaqaa iannoo.

<sup>15</sup> Isaraee maqanna doo maqee kai Mooseena sandufa asaana ruafanoo mi qamunnafa kai misa irirana ititannimaqaidanoo.

<sup>16</sup> Mi qamunnana rafaqairafa tamummaqara fasiqa ufamau kai kambiqaidanoo. (Ooqai Mooseefa Isaraee maqannaasa Isipa maqusaindari nifiqamaree Sinai aqana ameemaani oonureenoo Anutuna uiqaana maqa usakanau. Mooseefa mi uiqaana maqana usakanau. Mooseefa mi uiqaana maqanaki keeqafinoo Anutuna faqa ufa qi qiufanoo rafudamafufanoo maqusai faiqi anaasee maruqoo misa faqa ufa qirara ufannoo ooriki qafoofanoo oori takukandaari marinau. Ufa takaseenoo kaqinni fufanoo ooriki takukandaarirafa ireeda kai rukeemarinau. Faiqi anaasee mina rukarana qafee maqi qimasee qamunna oori akuamaqee marinau. Kaifaa uiqaana maqaki Anutuna faqa ufa qirara keeqafinoo rafaqaa imarinau.) Mi tamummaqara fasiqafa minara maaqi qinau. Mooseefa kaqinni marufanoo qamunna oori rafaqafinoo marinau. Anutuna uiqaana maqaki keeqeenoo karaambaiqa innai oori ubeekenenoo mi qamunnana rafaqaa inau.

<sup>17</sup> Akara fannoo karaambaiqara qidanoo Anutuna maraunara karaambaiqee qidanoo. Karaambaiqa marauna mariqoo sia ititarafa maridanoo idukirafa maridanoo.

<sup>18</sup> Doo maasa aiqamausa doorisaa qamunna rafaqaa irausara foora maridaqa karaambaiqa kaaqa qareenarafa innisaimbaqa doorisaara foora kaaqa gameeqeenoo aiqamai daroo daraa idanoo. Innisaimbaqa miqimammaree fidaqa Anutuna marauna fannoo innisaimbaqa karaambaiqa fooqaanaikamma qimaqanoo fidanoo fimarifanoo innisaimbaqa areenarafa firaanaikinoo fidanoo. Karaambaiqa Anutuna marauna saika maridanoo.

## 4

*Anutufe nari amiqira ufa maqannoo auqira fasiqaki qaqanau.*

<sup>1</sup> Anutufa maasa mandoosana akiaqara dariraru sianoo narí nifauarana qimisaifanoo marinara maasa namu Yisuna aufakiana qimannimiranaki quqaqisaifaqa nidaqa sia nikoonikaa idaqa sia kudoosaapaidaqa.

<sup>2</sup> Maasa namu asukunaki nimaria oosana nisaurira oosana faqa doo mareeqee ninaaqiannai aqusee nimeesugusee sia unnamaanna qidaqa sia nikaruqiranaki nidaqa kaqi akoomau faiqi nifusaa nidaqa. Maasa Anutuna ufa qumaree sia munu eendi mini eendidaqa anoona ufa qirana kai uqeereeqee akooqoo nifusaa quqaidafa. Maasa miqi kaimmaseeqa qeeqa nirana marirana Anutuna afusaara foora miqi kaimmaseeqa aigama maqannaasa nifusaa andeeqaanaqa misa naakirafa qiqafamasee sia qaoo qifarannoo.

<sup>3-4</sup> Maasa amiqira fasaasa ufa qimannimunaqa akaqausa sia iriasa innaaruna aanara randaidaqa auqgeera foora iasa marianara naaqooki ooni ititanoo maridanoo. Mi naaqoonaki ooni ititarausa maa maqanasaa manda afaanna Sadannafa misa naaqoo nifu ititaqaifanoo Anutufara foora moodaa karirafa asaku mundirafa mina kaaqa areenarana amiqira fasaasa ufa qoomara foora aninaqa misara sia qafaaqee qimasee naaqoo nifu ititeenoo.

<sup>5</sup> Maasa namu sia qeeqara qidaqa faiqi anaasee qimannimidaqa, maasa asaku mundirana karaambaiqa Yisuna minara kai kooroomannimidaqa. Maasa namu Yisuna auqu uqeeraidaqa Yisunara inni qimannimidaqa inniki rumbara fasiqara foora ainaina mannisaidaqa.

<sup>6</sup> Ooqai indaaruu Anutufa asukunakiqari kaaqa qaranara qaani fee qufa mi moodaa Anutufa kai narí areenarana maqee maasa qitikuraki qoomara foora qeenoo. Anutuna areenarafa narí asaku mundirana oorisa areenaidanoo mi areenarana aufakiana innisaimbaqa iriaqee qimasee Anutufa innisaimba maasa qitikuraki qoomara foora qaidanoo.

<sup>7</sup> Mi areenarana aufakiana firaa munnimma aqimari ainaina fara foora marifa maasaki fifau maqannai auqira qafeera foora maasaki quqaqaiifaqa sia faiqi faiqi ainainimariana amanasaa ainainidaqa, fiqararafa marunara ainainidaqa. Anutufa mi fiqaramasee ainainirana narindikai marinara akooroo ianifeera narí areenara aufakiana maasaki fifau maqannai auqimaria ainainaki quqanau.

<sup>8-9</sup> Maasa Yisunara qimannimimarunaqa minara nikooqee mariasa dindari dindari fuseidaqa sia amiqimandee ititaafanoo Anutufa sandara apootaana quqasaifaqa miqoo quqasee sandeeqa maasa yaiffee fuanau yaiffee fuanau qimasee sia kaaqa quqasee minniseeqa, misa maasa qifaqamaree fiqa sia Anutufa kuqaa minniqiseenoo. Misa daru quqasaafaqa sia kaaqa kuqia.

<sup>10</sup> Yisuna arundee dari dari isooafa qini qifaafa ufaanakuru moomoo marifaqa maraqa nidaqa maaqi qidaqa. Mi ufaana kurunannai Yisuna marirana maasa qifaqasaa aigamausa nifusaa kooroo ianifeera mina kuqirafa faqa ufaanakuru fannoo maasa qifaqasaa marina mina kuqirana akooroo ianifeera maridanoo.

<sup>11</sup> Maasa kaqi marunaqa Yisuna naaru marirana maasa faiqi faiqi qifaqasaa koorooianifeera mina ufasara kuqiranaki maqee fidaqa.

<sup>12</sup> Minara maasaki kuqirafa kasinara inni Koorinti maqanaaki naaru marirafa kasi-danoo.

<sup>13</sup> Tamummaqara fasiqa minara maaqi qimasee akara rinau.

Qinee qeeqa irirana Anutuna ufasa rusisaafannanara qimannimiqiafana.

Qinee Pauroosa mi mau fidaqa qinee minara maaqi qidaqa. Maasa faqa irirana rusirafa marinara qimannimidaqa.

<sup>14</sup> Maasa maana faqa iridaqa, karaambaiqa Yisuna kuqiranakinaana uqeeroofa maasa innisaimbaqa Yisuna faqa uqeera narí oorisa quqaqisaannoo.

<sup>15</sup> Maa aigama ainainausa inni dadaaqirafa kambiqaidanoo Anutuna afaarirafa moomoo fasiqa anaasee iannai fifaqa iriseeqa misa dufi Anutunara qirafa firaqoo kambiqafinoo mina amooqirafa firaanaikiannoo.

*Maasa maqee uiqaana maqakiara foora maridaqa.*

<sup>16</sup> Maasa minara iriseeqa sia kudoosaapaidaqa minnisaidaqa. Maasa faiqi qifaqa kuqaa qumidaqa doo kuqirannai ubeekaidaqa daundurakinaafa faasaambaasaana fukaikakai iqa maridaqa.

<sup>17</sup> Kuqaa maasa maqee marunnanaki ufaasu unmaara darirafa maridanoo doo mifa kai firaa areenarana naaru marira areenarana sia amaniaqaairana doo kaaqa firaatia qimiannoo.



<sup>18</sup> Sia maasa maqee qafee marunna ainainasaa maasa irirafa mundidanoo, maasa sia qafee marunna ainainara kai iridaqa. Akooqoo qafee maria ainainafa qusasaa taikaidanoo, sia akooqoo qafee mari ainainafa naaru naaru mariannoo.

## 5

<sup>1</sup> Maasa maqee maa maqanasaa marunna qifaaqafa uigaana maaqa miqirafa rapeemambinanoo Anutufa innaarunnai maaqara foora nari moo usakaannoo, naaru marira maqa usakaqisaannoo.

<sup>2</sup> Doo maqee kamuqoo maasa qifaaqa uigaana maaqara foora afisinoo marifaqa maridaqa innaarunai mari maqana afisiranara firaqoo ridaqa ikiraqaidaqa.

<sup>3</sup> Innaarunai mari maqana afisiqa sia kaqisamu akooqoora foora marianaara.

<sup>4</sup> Maasa qeeqa uigaana maaqakiara foora qeeqa qifaaqaki maridaqa maasa qeeqa ummaara ameemaanai maridaqa faaqaridaqa. Maasa sia qeeqa maqasaa qifaaqa minnisararee qidaqa, maaqoo marunna qifaaqafa kaqi marinaqa naaru marira qifaaqa mina amuaaqa afisunaaree qidaqa. Miqimmasainanoo ufaasu marinna ainaina naaru mariranakina keeqeenoo kukeeqafuanifeera qidaqa.

<sup>5</sup> Anutufa kai maasa deedaqamaqiseenoo mi ainainna kambigainaqa maasa deedaqamaseenoo innaarunai oosana oosana aiqama ainaina qimianinnana mina ati maqee maria kamuqoo nari maraquina qimidanoo.

<sup>6</sup> Maasa maqee maqee paasoosirafa maasaki qumbiqanoo maridanoo, maana maasa maqee iridaqa, maasa maa uigaana maqanaki maqee maridaqa sia karaambaiqa maaqaki mirinni maridaqa.

<sup>7</sup> Maasa maqee marunafa sia qafee marunna aanafa maridanoo kaqi Yisunasaa kaqi mundufi sia qafarai fidaqa.

<sup>8</sup> Paasoosirafa maasaki qumbiqanoo maridanoo maa uigaana maqafa maasa qifaaqa minnisee karaambaiqa faqa nari maaqara faqa minni f irinara faqa minara kai iridaqa ridaqa.

<sup>9</sup> Maasa moo uriqarara ainainara dididanoo maaqoo maaqaki fee maridee, meerai maaqaki fee marianauree, mina aidiramau firanara firaqoo ridaqa.

<sup>10</sup> Asauku mundirafa ufa qiminna faasaana maasa aiqamausa mina afusaa kikiqianaara. Kikiqamambuananoo nari kai maasa maa maqanasaa marunnana akiaqara amiqira ainainee mandainainee mina akiaqara aadu aadu qimiannoo.

*Asauku mundiranannai maasa Anutuna faqa moodaanaki kidaqa.*

<sup>11</sup> Maasa karaambaiqara rufiaranara iridaqa faiqi anaasee aaquqimannimaqaidaqa. Anutufa maasa anoona mariranara akooqoo iridanoo innee Koorinti maqannaasa maasa anoona marirana faqa amiqimasee abee iridee sia fee iridee.

<sup>12</sup> Maasa sia maa ufanannai maasa nuqu uqeeraidaqa maasa innee maasara nifaaqa amiqianifeera qimannimidaqa. Akaqausa faiqi afaaqa qafeemarianara kai asasimariasaa sia aundurakinana ainaina asasimariasaa misa maasa diqifaqa innee irisee mi ufanannai rafaqa fuqaqa.

<sup>13</sup> Akaqausa maasara furufarirausa maridammiafoo qiafaqa, mi furufariara foora qiranannai maasa Anutuna auqu uqeeraidaqa miqidaqa. Akaqausa maasara sia furufarirausa andeeqarausa maridammiafoo qiafaqa mi andeeqaranannai inni dadaaqiqanidaqa.

<sup>14</sup> Asauku mundirana amuqusirafa maasa rakisi qimaqaidanoo. Maqee maasa maanara iridaqa moodaa fasiqa fannoo aiqama fasiqa anaaseera kuquqimaqanau, minara faqa maasa maaqi qidaqa aiqama fasiqa anaasee mandoosana mariranakiqari kuqiara foora iqa maridaqa.

<sup>15</sup> Mifa aiqamausara kuqunnimaqasoonara kaqi mariasa minara irisee sia nariaraa kai irisee mana mana ifaranoo minara iriseeqa mina ufamau fidaqa andeeqeeqaranoo. Misara irisee kuqunnimaqeenoo findifunara mina ufamau fidaqa andeeqasee marifaranoo.

<sup>16-17</sup> Doo maqee maaqooqari maasa sia faiqi faiqi iriranannai faiqi anaaseera iri-  
 anauranoo maqee maaqooqari oosanasaseeqa misara qimuqusianaauranoo. Ooqai maasa asauku mundiranara faqa faiqi faiqi iriranannai minara iriafannana doo maqee sia miqidaqa doo maqee minara uriqarara fee qidaqa. Faiqi anaasee moo fannoo asauku mundiranaki atooqanoo marinanoo Anutufa mi fasiqa anaaseena ooqeenaa manda irirana doo taikeenoo fuka irirana aqoonna fasiqa anaaseera amuqusirana niminoo. Doo minannai Anutufa faiqi anaasee fukaikamaqaiifaqa maridaqa.

<sup>18</sup> Mi aiqama anainausa Anutufinaindari kai anidanoo, maasa namuqaakiqa mariafanana nari asauku mundiranannai maasa mareeqeenoo nari faqa moodaanaki quqeenoo

kafaa maasara innee quandaki faiqi anaasee oonu mareeqee qini faqa moodaanaki quqaaqee qinoo.

<sup>19</sup> Maasa qimannimira ufa maaqimminoo maridanoo Anutufa nari asauku mundirananni aiqama maa maqa maqana afaaqasasa mariasa oonu mareeqee nari aqoondikiranaki quqanau. Anutufa faiqi anaasee aqarana sia qafaida sia irida mara quqannimiqaiddano. Mifa nari moodaanaki kira ufa maasasa quqaseenoo innee faiqi anaasee mareeqee qini faqa moodaanakikirananni nimida fee qinoo.

<sup>20</sup> Doo maqee maasa asauku mundirana aanaiqikirausara foora maridaqa maasasaqari Anutufa aiqamausara nameera qidanoo. Maasa asauku mundirana ufa inni Koorinti maqusanaasa fuki faaki qidaqa innee Anutunara eedoo qifanoo mifa inni namuqaakiranakiqari quandakinoo inni aqoondikamma nimaqaani.

<sup>21</sup> Anutufa nari andeeqarana innisaimbaqa naida qimianifeera nari amaaku qimamiseenoo maasa mandainaina aiqama qumareeqeenoo minasaa quqasoofanoo mina akiaqara kuqinoo taikannimaqanau. Asauku mundirafa mandoosana siaifa miqinuu.

## 6

<sup>1</sup> Qinee Pauroosa qini faqa maria namusa maasa Anutuna aanaiqikirausara foora maridaqa Anutuna faqa moodaanaki ainainidaqa inni Koorinti maqannaasa fuki faaki idaqa doo innee Anutuna kaaqa afaarira anoona doo maraafanoo sia quqasaifanoo maqasaa aqufi rairaaiani.

<sup>2</sup> Anutufa minara maaqi qimasee tamummaqara fasiqa qimannimufaqa akara riqau. Qinee qeeqa didira aukuaana innee qiniara dadaqianifee qinna nameeraqirana iriqa. Qinee asumu marirana nimira aukuaana inni ufa irisee dadaaqa.

Qinee Pauroosa minara maaqi qidaqa. Maa kamuqoo kai Anutuna dadaaqirana maree maria kamuqoo maridanoo. Maqee faasaana Anutufa innaaruna asumu nimifaqa mareemaria faasaana maridanoo.

<sup>3</sup> Akaqausa maasa inniki saikiranara aqeeaafoo qifoora maasa qeeqa rakisidaqa inni niku nimaarusirafa mariandoo qimasee eerairidaqa.

<sup>4</sup> Maasa qeeqa aiqama ainainaki maasa Anutuna ainainira faiqi namu marunnanara kooroo iaqee qimasee firaqoo reendenamandee ummaara faqa kadaapirirana faqa tooqaamu darirana faqa apurarana oosana oosana maraiddaqa.

<sup>5</sup> Maasa maa namusa darirana faqa karabusaki rumbaqaqarana faqa moomoo fasiqa aanoomandee aniree dari dariisoonaa faqa maqee miqidaqa. Maasa daararee marifaqa sia faiqarana mareeqa kisaqasaa kadaapiriri ifaqa nifaqa ummooqukamandee maridaqa ainainidaqa.

<sup>6-7</sup> Maasa qisakadiki qikairi siaisa amiqimandee andeeqasee marunnanannai faqa maasa iriranannai faqa reendenamasee ubiasee mariranannai faqa qimuqusi-faqa dadaaqunnanannai faqa maasa qeeqara Anutuna ainainira faiqi marunnanara kooroidaqa. Maasa Anutuna naaqaqara maraqaunannai faqa maasa anoona ufa kai qimarunnanannai faqa Anutuna afeekannai faqa maasa qeeqara Anutuna ainainira faiqi marunnanara kooroidaqa. Andeeqara oosana nimirafa maasa duru saamuara foora marifaqa akaqausa maasa daruafaqa misamunannai qeeqasaa rukiqasee misa naruani qimasee misamunannai misa narirara foora idaqa.

<sup>8</sup> Akaqausa maasara amiqira ufa qidaqa akaqausa manda ufa qidaqa, akaqausa maasara sukufa qidaqa akaqausa qimooqidaqa akaqausa maasara unnufa qidammiafoo qimariafaqa maasa anoona ufa kai qidaqa.

<sup>9</sup> Faiqi anaasee maasara fifau fasiqee qimariafaqa akaqausa maasara Anutuna ufa maraqa nuasee qimasee amiqimmasee maasara iridaqa. Akaqausa maasara kuqirausara foora mariaa maqi qiafaqa innee qiqafaidee maasa kaqi maridaqa sia kuqira maridaqa. Misa daruafaqa maasa sia kuqidaqa kaqi maridaqa.

<sup>10</sup> Maasa maqee maqee qifaqa kudoosaapanoo marifaqa Anutunara oonu mafi irisaidafa maqee maqee asasidaqa. Maasa kudi fasiqara foora maridaqa moomoo fasiqa anaasee innaarunai ainaina faqaasaikamma nisaidafa. Maasa maa maqanasaa ainaina siaisa maridaqa aiqama innaarunaindaraa ainaina maasaindi maridanoo. Mi aiqama ainainnannoo maasa Anutuna amiqira ainainira faiqiuqaindi marunnanara akooroidaqa.

<sup>11</sup> Oo qini qiqoondiqa Koorinti maqusai mariasa. Maasa inni akooqoo koorommasee inni qimannimiqa qimuqusa oo raqafimarufaqa qeeqa daunurakinaana nimuqusira irirana inni qimannimiqa.

<sup>12</sup> Maasa inniara sia qeeqa qimuqusa rafaqa fusee kaqikaqoo ummeereeqa akooqoo aiqama qimannimiqa innee inneeqa kai inneeqa nimuqusa mandaikammida rafaqa-fusee sia maasara nimuqusi mariafanoo.

<sup>13</sup> Innee qini faiqinamuara foora mariafaqa maqee qimannimianaura. Innee maasa daanna reeqa innee maasara nimuqusinaga akooqoo maasa faqa ufa qiaqa.

*Sia Anutuna ufara nikooqee mariasa namufaqa moodaanaki ainainiaqa.*

<sup>14</sup> Oo Koorinti maqusanaasa innee Yisuna ufa irimariasa faqa sia irimariasa faqa sia moodaanaki qaindusira saqariara foora ainainiaqa, sia amana amana kai inni faqa fifaranoo. Naqimmasee andeeqarana faqa aqaqara faqa naqimandee moodaanaki qaindusu maree fifaree, sia amana. Naqimmasee kaaqa qarafa faqa asukuna faqa moodaanaki mariannoo, sia amana.

<sup>15</sup> Naqimmasee asaku mundirafa faqa kudi fasiqa Sadannafa faqa moodaa ufara eedoo qifaree sia amana, namuqaa maridanoo. Yisuna ufa irimarifa faqa sia Yisuna ufa irimarifa faqa naqimmasee fee moodaanaki kifaree.

<sup>16</sup> Naqimmasee Anutuna amaana maqaki mariasa faqa tumunnai auqira afaanna faqaasa faqa moodaanaki kifaree, sia amana. Maasa kaqi marira Anutuna amaana maqara foora maridaqa. Anutufa minara maa anoonufana tamummaqara fasiqa qimamufanoo akara rinau.

Qinee qeeqa maaqa misaki usakasee mariana. Qinee misa Anutusa marianaqa misa qini qiku qisauku marifaranoo.

<sup>17-18</sup> Minara karaambaiqa maaqi qimasee qimannimidanoo.

Mandoosana maree mariasa faqa moodaa maqusaki maridaqa misa mandoosanara eerairiaqa.

Innee mandainaina maree mariasa mandoosanara rufiasee sia mina umaraaqa. Innee miqidaqa anukaranaki marifaqa qinee aiqama ainaina uriqarara karaambaiqa fannoo inniara qinindi fee qinaqa innee qini faiqinamu qini qiraamummaaka marifaranoo.

## 7

<sup>1</sup> Oo qini qiqaondiuqa, mi qimafeekaikira ufausa tamummaqarausannai qimaqoo ufausa maasara qinau. Minara irisee innisaimbaqa oosana oosana qikairi qifaaqasaqaraanee daunuraandaraanee aiqama findaukamaqusee Anutunara rufiada daaqqeeqee marinaqa andeeqasee anukaranaki mariaqa.

*Pauroofa Koorinti maqannaasara asaidanoo.*

<sup>2</sup> Oo Koorinti maqusanaasa qini qiqaondiuqa, innikinaana maasa siamma moo fasiqa mandaikamma amaqaafanausa, maasa sia moo fasiqa mandoosanaki quqaafanausa maasa sia moona rafaqaqafu amaqaasee mooainaina umaraafanausa, innee minara nimuqusinaga maasa umaraaqa.

<sup>3</sup> Qinee sia inni niqirara miqidaqa oqai qimannimianandee kai qidaqa qimannimidaqa. Maasa inni Koorinti maqannaara kaaqa qimuqusidanoo nididanoo innisaimbaqa kaqi maridee innisaimbaqa Yisuna ufasaara kuqi fee inni faqa moodaanaki mariana. <sup>4</sup> Qinee inniara kuqaa Yisuna ufa irimariasee qidaqa qinee inniara nimoqidaqa asaidaga. Maasa oosana oosana ummaarakiki maridaqa inniara iriseeqa paasoosidaqa asasirafa qumbiqeenoo rairaidanoo.

(Pauroofa Koorinti maqannaasa akara ruma Titusana amufanoo munu nimisee oonurandee Pauroofinai aninau. Pauroofa Koorinti maqannaara qini akarakinaa ufara nanee fee qiaafoo qimasee maa ufana akara rumannimaqanau.)

<sup>5</sup> Maasa Maseedoonia maqa maaqai oonu Titusafa inni maqusaindari aniranara afeesida maridaqa sia qifaaqa quqeeqa. Yisuna ufa qimannimi marunaqa moomoosa dindari dindari anireeqa aanooqidaqa kaukaata qimarufaqa qeeqa daundurari rufarafa marifaqa innee Koorinti maqannaasara maasa akarakinaa ufara faqa maasara rufieefoo qifora qinee rufiadaqa.

<sup>6</sup> Maasa miqi mariafananoo Titusafa inni maqusaindari mai aniree maasa paqurinau. Mifa anunnai qifaaqa rumboosa amiqimarufa Anutufa maasa qifaaqa amiqinau.

<sup>7</sup> Sia Titusafa anirafa kai maasa qifaaqa amiqinau. Mifa inni maqusai oonuroofaqa innee mina idaaqammamaqoonara qimaqimufaqa firaa dufi dufi qifa qifaqa asasinu. Titusafa inni Koorinti maqannaasara qini Pauroosara kaaqa qafaqaqa imariasee qinau. Mifa inniara nari mandainainara kuqaa mandainainee qimasee noori runusee amiqira qoo fidaqa qiniara manda ufa qimariasara saaqee qimasee qini dadaaqidaqa. Doo mi ufana iriseeqa qinee Pauroosa firaaqoo inniara asaidaga.

<sup>8</sup> Qinee moo akara rumannimaqaafanafa mi ufafa inni qumaroofaqa innee mina qafamasee innee noori runusee inniqa mandoosana minnisaqau. Qinee iriseeqa sia inni noori runiranara qaara daundura iriqa. Qinee inni noori runiranara iriseeqa sia kisaqaasaa qimudaao qifa qusasaa kai qimudaao qifa.

<sup>9</sup> Doo maqee qinee firaqoo asasiidaqa qeeqa akara rumma inni nimiafannana minarau asasiidau. Inni nifaaqa ummaara reemarifa inni mandainainakinaana mareeqeenoo amiqirannai ubeekainara minara qinee asasiidaqa. Inni nifaaqa ummaara rarana sia inni narinoo Anutufa mina mareenoo inni dadaaqinoo.

<sup>10</sup> Nifaaqa ummaara rarafa Anutufa minannai inni maramareenoo faiqi nimuqusakinaana mara quandeeqeenoo innaaruna asumu mariranaki quqemarifa mi nifaaqa ummaara rarafa amiqirafa maridanoo kai fifau maqasaa nifaaqa ummaara rarafa mifa kuqimariafa maridanoo.

<sup>11</sup> Qinee Pauroosa pasa akara rumasee inni mandoosanara akooroo qiafanaqa noori runiusa mariafanoo. Inni noori runirana Anutufa qumareenoo minannai oosana oosana amiqira oosanauqa inniki auqinau. Maqee innee sia furufari mariafanoo noori runusee amiqimandee fimariafanoo. Innee inneeqa andeeqaranara koorooianifeera kaaqa andeeqasee fimariafanoo. Innee mandoosanara maqee firaqoo nikoqaidanoo. Qinee Pauroosa inniki mandoosana kikiqusunaga innee kaqi kaqi oonu qaoq qimasee afiqee mariafanoo. Ooqai qinee minara qimannimiafanaqa innee sia maroofanoo mi nifaaqa ummaarararafa inni nisakadiki sia ikairi marina kooroo idanoo.

<sup>12</sup> Qinee akaraki afeeka ufa rumaqaafannana sia inniki aaqee mari fasiqanara qimasee akara riqiafana, sia nari mandaikammamaqoonara qimasee akarariqiafanoo. Qinee Anutuna afusaa maridaqa, maa ufanara akara riqa, innee maasasaa atooarana faqa rirana faqa mina firaafa inni nifusaa akoorooianifeera akara riqa.

<sup>13</sup> Minara maasa Titusana ufa irunanoo nifaaqa amiqimminoo. Sia maasa qifaafa kaifau amiqinoofau Titusana afaaqa faqa amiqikaimminoo. Innee Koorinti maqusanaasa idaaqamasoofanoo mina afaaqa inniara amiqufaqa maasa qafamasee asasiqiafana.

<sup>14</sup> Qinee inniara firaqoo inni nuqu uqeereeqa Titusana qimamiafannana, innee miqoo kai mina amana kai mariafanoo. Titusafa nidafammaseenoo asasinoo. Maasa maqee maqee ooqai anoona ufa kai inni qimannimi mariqiafana. Miqi kai iqa inniara Titusana qimamiafannufafa doo anoonaikinoo.

<sup>15</sup> Titusafa inni maqusai oonuroofaqa innee inneeqa mandoosanara irisee Pauroofa ufa fraana qiandoo qimasee rufiaaqa rufiaaqa iranannai faqa naindiriranannai faqa afteeqee inneeqa maqusai quqasee qini ufa minasaaqaraana irisee eedoo qimasee maroonaara Titusafa qafamaseenoo qimaqimidanoo inniara rirafa maqee maqee fraanaikidanoo.

<sup>16</sup> Doo maqee qinee Pauroosa mina iridaqa maaqi qidaqa. Qinee sia inniara maqee qaara daundura marifaqa qinee qeeqa qifaafa firaqoo innisaa quqaidaqa asasiidaqa.

## 8

*Yisuna ufa irimariasa akaqausa dadaaqira oosanara qidanoo.*

<sup>1</sup> Oo Koorinti maqusai maasa qikaqaafasaa mariasa. Yisuna ufara suqimariasa Maseedoonia maqa maaqaki mariasa Anutuna amiqi amiqirafa misaki saikinara innee iriaqeera qimannimidaqa.

<sup>2</sup> Firaq ummaarararafa misa kadaapi rirana nimirana. Marufanoo mi kadaapirirafa Yisunasaa atooqee marusa firaqoo nimanamandee qafanau. Misa miqiga maridaqa minakigari firaqoo asamandee nariqa munnimma afaaramandee Yudeea maqannaasa Anutuna ufara suqimarusa dadaaqi naida nimiqau. Misa nari kudikiranara siamma iriqau kaqi nimiqau.

<sup>3</sup> Qinee maa ainainnara amiqimandee iridaqa qimannimidaqa, misa nari munnimma marunna amanakai nimiqau sia mina amana kai nimiqau kai fiqarammasee aabaa faqa nimiqau.

<sup>4</sup> Misa nari iriranannai aniree aranaiqi afeekaikamasee maasa irammiriqa qiqau. Amanee maasa faqa Yudeea maqa maaqaki Anutuna ufara suqimariasa naararee mariasa maasa munnimma nimeeqe dadaaqianauree. Nariqa mi dadaaqiranara sia ummaara fee qiqau adiafaairana qimimarianara maasa nimianauree qiqau.

<sup>5</sup> Maasa mi ufana iriseeqa asamasee tautiqa oo sia mi amiqira irirafa kammbiqeefoo qunaqa misaki kambiqeenoo. Maseedooni maqannaasa nariqa naundura irirana faqa nari ainaina faqa karaambaiqa naaree amisee quandaki Anutuna iriranamau nari marirana maasa faqa qimiqa.

<sup>6</sup> Maseedoonia maqannaasa oosana miqinoo marinara innee Koorinti maqannaasa faqa miqiaqeera Titusana fuki faaki qiafanoo inni qimannimidanoo. Ooqai Titusafa

inni faqa maridanoo Yudeea maqanna nimianinna munnimmanara oosana arasee qimanniminu. Doo maqee Titusafa mi nimuqusira saikana kaifaa uqeerarara fuki faaki qidaqa.

<sup>7</sup> Innee Koorinti maqannaasa oosana oosana ainaina moomoo faqaasa mariafanoo. Innee Anutuna saqarikirafa faqa Anutuna ufa qimannimirana faqa irirafa faqa oosana oosana dadaqira saika eedoo qimasee kasida uqeerer mariana faqa maasara faqa nimuqusimariana faqa mi ainainausa innindi moomoo maridanoo. Doo maasa inniara Yudeea maqannaasa nimaqeeera faqa qidaqa inni afaararifa minaki faqa moomoo mariani, mi nimuqusira saikafa mariannoo.

<sup>8</sup> Qinee Pauroosa sia naamuqira ufa inni qimannimidaqa naakapara ufa inni qimannimidaqa. Anaamuru dadaaqiranara naakapaidaga minannai inniqa nikaqaafasara nimuqusirana nimanamandee qafaidaga inni Koorinti maqannaasa nimuqusirafa Maseedoonia maqannaasa nimuqusirana amanafee maridanoo fee qimaseeqa nimanamandee qafaidaga.

<sup>9</sup> Innee asaku mundirana Yisuna maasa karaambaiga amuqusira dadaaqiranara amiqimandee irimariafanoo mifa innaarunai ainainafaqaafa uriqararafa marinoo inniara irisee maa maqanasaa qumu ainaina siaifara maqi mafinoo marinou. Yisufa nari ainaina siaifara maqi iranannai innaarunai ainaina faqaasa mariaqeeera miqi marinou.

<sup>10</sup> Yudeea maqannaasa narana feefaurira munnimma nimirana qinee Pauroosa qini irirafa minara maaqi qidanoo. Innee ooqai aiqaqoo aukuanu Yudeea maqannaasa munnimma nimiraree qimasee suququqoo munnimmana narana feefauru maraaqee qimasee suqu quqasee minnisoonu maqee kaifaa uqeerasaifanoo fiifi inanoo taikaannoo. Innee aiqama maqanaasakiqari innee naaree iriseeqa mi saikana oosana uqeerer mariasa mariafanoo.

<sup>11</sup> Doo maqee findifiqa mi saikana auqaifanoo taikaani. Indaaru innee minara ufa suqusee nimudaanai qimasee ufa qiaq fifiaana maqee miqi kai iqa nimudaanai qimasee munnimma nimirafa taikafuani sia kisaqaasaa mariani. Innee aiqama munnimma nimiseeqa inneeqa kuridifaara, qinee sia minarau inni qimannimidau. Innee inni munnimma aabaa marina mina nimiaqa sia marinafa sia aquaqa.

<sup>12</sup> Inni munnimma amanaikinaqa nimisainanoo Anutufa narindiara foora dufi dufi qiannoo. Sia amanaikina aquasainanoo Anutufa sia minara dufi dufi qiannoo. Sia amanaikina sia aqua.

<sup>13-14</sup> Qinee sia moo maqannaasa aufadarana nimirara inni Koorinti maqanna ummaara firaana nimidaqa, sia miqidaqa. Maqee aukuanu inni narana firaafa mari kamuqoo narana siaisa dadaqiaqa, kasoqaqee moo aukuanu innee mandainainaki marifaqa misa inni dadaqifaranoo. Miqidaqa aiqama amana kai mariaqa.

<sup>15</sup> Ooqai tamummaqara fasiqauqa minara maaqi qimasee akara riqau, Ooqai maqasaa narana moomoo suqimaru fasiqausa sia rairaa iqau. Maqasaa narana oodaa suqimaru fasiqausa sia naaree marinou, nimana kai marinou.

*Pauroofa Titusana faqa nari aqoonausara faqa qidanoo.*

<sup>16</sup> Qinee Pauroosa Titusana oosana qafamasee Anutunara dufi dufi qidaqa, maasa daanna raidanoo firaqoo inni Koorinti maqasanaasa dadaaqiraree qidanoo.

<sup>17</sup> Maasa minara Koorinti maqusai inni maqusai funnee qunanoo mifa sia kai eedoo kai qinoo nari iriranannai asasammaseenoo innee iannai kafa fuannoo.

<sup>18</sup> Maasa moo fasiqa faqa mina faqa aqigaanuranoo mi moo fasiqafa aiqamai Yisuna amiqira fasaasa ufa qimanniminoonufa marunara Yisuna ufara suqimariasa minara amiqira fasiqafee qidaqa.

<sup>19</sup> Sia mifa kai, aiqama Yisuna ufara suqimariasa mi fasiqanara inni Yuda maqannaasa nimianinna narana feefaurira munnimmana utaaqammasee anee Koorinti maqannaasa munnimma faqa akaqa maqannaasa munnimma faqa mara maree Pauroona saimbaqa Yudeea maqannaasa muru nimia. Miqinnanannai maasa nimuqusira saika marasee karaambaiga areenarana faqa maasa eedoo qimasee dadaaqirana faqa kooroomambuannoo.

<sup>20</sup> Akaqausa raiqara ufa qifoora maasa amiqimandee inni moomoo afaaramandee nimifandinna munnimmana maasa rakisianaura.

<sup>21</sup> Maasa irirafa minara maaqimminoo maridanoo. Maasa Karaambaiga Anutuna afusaa faqa maqasaa fasiqa nifusaa faqa andeeqaramau fidaqa rakisianaura.

<sup>22</sup> Titusana faqa moo fasiqa faqa indaaru fuaqee qiaqa maqee maasa qikaqa moo faqa miqandasaa mara quqaanura miqanda faqa fuannoo, maasa moomoo kari mina amanamandee qafaunanoo amiqimarifa maqee maqee eedoo qimasee dadaaqimarifa

maridanoo. Doo maqee mifa inni Koorinti maqannaasara irisee mina irirafa inniki mundinoo marinara firaqoo اساسمasee inni faqa dadaaqiannoo.

<sup>23</sup> Titusafa qini faqa moodaanaki inniara dadaaqimarifa maridanoo. Maasa qikaqaafasaa Titusana faqa innee iannai fimariaqanda maridaqa Yisuna ufara suqimariasa miqanda utaaqamaqaqanda maridaqa, asaku mundirana areenarana maree mariaqanda maridaqa.

<sup>24</sup> Minamusa oonu raifaqa innee misara nimuqusimarinaga rakisinnimaqaqa. Miqin-nanara Yisuna ufara maqusa maqusa suqimarinausa Pauroofa Koorinti maqusanaasa nimoogiranara anoona ufa fee qiaqeera.

## 9

*Pauroofa Koorinti maqannaara narana mareefandinna munnimmana suquaqee qi-maqoofa maridanoo.*

<sup>1</sup> Anutuna ufa irimariasa Yudeea maqannaasa munnimma nimirara qianara innee doo irimariafanoo qinee fifau akara rumannimaqeeqa.

<sup>2</sup> Innee eedoo qimasee dadaaqimariasa mariafaqa qinee iridaqa, qinee inni nimoogimasee Maseedoonia maqannaasa qimannimiqa. Qinee inniara maaqi qimasee qimannimiqa, Kirisa maqa maaqaki mariasa Koorinti maqusanaasa misa naaree maa eenda aiqarai aukwana eedoo qimasee deedaqiaqau. Qinee miqi qimasee Maseedoonia maqannaasa inni Koorinti maqannaasara qimannimifanaqa doo misa faqa mi ufana irisee maasa faqa dadaaqiraree qimasee findifia akaqa maqannaasa kai sia findi fia.

<sup>3</sup> Qinee inniara ufa qiafannana fifau ufa kai qianoora qeeqa qikaqaafasaa uqa mareeqee inniki quqeeqa misa onuree inni munnimma suqu moodaaqoo quqaqee qini ufa anoonaikianifeera inniki quqaqee qidaqa.

<sup>4</sup> Qinee faqa Maseedoonia maqannaakaqausa qini faqa inni Koorinti maqusai oquraifaqa sia deedaqiranaki maasa oquraana innee nisaurifaqa maasa faqa Maseedoonia maqannaasa qini faqa oogu fifandinausa nisaurifoora qinee inniara qifaqa quqasee inniara ufa qiaqa.

<sup>5</sup> Qinee minara iriseeqa qeeqa qikaqaafasaa uqa niqiqamasanaqa indaaru oqureeqa inni nimifandinna munnimara deedaqamandaifaqa qinee inaaqianna oquraanaqa innee inneeqa iriranannai kai nimira oosana koorooiaqa sia qinee qimannimiana nimaqa inniqa nidirafa kai qinaqa kaqi nimaqa. Ooqeenaa irirafa maaqimminoo maridanoo.

<sup>6</sup> Moodaa asumu ummaqimarifa moodaa kai aiqunoo moomoo ummaqimarifa moomoo aiqunoo. Qinee Pauroosa minasaqari inni dadaaqira oosanara maaqi qidaqa.

<sup>7</sup> Innee minara irisee inneeqa iriranannai kai munnimma aquaqa, sia mina aqusee ufaqirafa mariani sia moonara daakapaifaqa aqi fee qia Anutufa اساسمmandee aqimari fasiqanara aididanoo minara اساسمasee aquaqa.

<sup>8</sup> Inniqa nimana kai narana maraaqee munnimma Anutufa amana nimiannoo sia inni munnimma amana kaifau nimmiannoo aabaa faqa niminaqa minannai nana ainainaree dadaaqirafa kambiqaannoo fee innee faqa amana minannai dadaaqiaqa.

<sup>9</sup> Ooqai tamummaqara fasiqauqa minara maaqi qimasee akara rumaqoofa maridanoo. Amiqira fasiqauqaindi kudi fasiqauqa afaaridaqa nimidaqa.

Misa amiqi amiqirafa sia taikaannoo naaru naaru mariannoo.

<sup>10</sup> Anutufa inni Koorinti maqannaaka faqa dadaaqammiannoo. Mifa asumu faqa neemaria narana faqa nimimarifa maridanoo inni nimana asumu inni nimisainaqa ummaqusaifanoo Anutufa kambiqaarana nimiannoo innee afaaramandee moo maqannaaka narana dadaaqifanoo innee kafaa kafaa miqiaqee qimasee inni Anutufa irairairana nimiannoo.

<sup>11</sup> Anutufa maqee maqee narana ainaina moomoo niminaqa innee mina qafeeqa amana maqee maqee akaqausa dadaaqiaqa. Innee maasasaqari dadaaqimariasa maqannaasa inni dadaaqiranara quandaki Anutunara dufi dufi firaqoo qifaranoo.

<sup>12</sup> Inni dadaaqira saika fannoo sia Anutuna ufara suqimariasa kai dadaaqidanoo Anutunara dufi dufi qirana faqa oondainni nammariara foora aqufidanoo.

<sup>13</sup> Inni dadaaqira ainainirafa innee Anutuna ufamau firana kooroo iannoo. Moomoosa mina qafammasee Anutuna amooqifaranoo misa inni afaaramasee naida nimirana qafammasee kafaa innee asaku mundirana fasaasa ufasaa atooqafi mudiqa marinana faqa qafammasee sia ufa kai qimasee anoonee qimasee Anutuna amooqifaranoo.

<sup>14</sup> Innee dadaaqimariasa inniara nidimarinaqa inni amiqi amiqiranara innaaru qifaranoo. Anutufa mookira afaarirana inni nimunara Anutufinnai inniara nidimarinaqa inni amiqi amiqiranara innaaru qifaranoo.

<sup>15</sup> Anutufa nari afaarinoo maasa qimunara mina uriqararafa aiqama ainaina arusee firaafa maridanoo minara maasa aiqamausa dufi dufi qimamaqaqa.

## 10

*Akaqausa Pauroona saikara ufa qufanoo ititoo ufafa.*

<sup>1-2</sup> Qinee Pauroosa maa ufana reendenamandee qimannimidaqa. Akaqausa qiniara nianai maridanoo aanoo ufa kai qimari fee inni faqa maridanoo reendenidanoo fee qidaqa. Qinee miqi qianara maaqi qidaqa. Qinee asauku mundirana amiqi amiqirana faqa ireeda marira oosana faqa mina afusaa maridaqa reendenamasee qimannimidaqa qinee innee iannai oonuraanaqa sia qini qirana fundakuqa maasara maqasaqarara irirana irisee qimariaafoo qimariasa amana aanoomannimaqaanaura, sia sia amana mariannoo, amana mariannoo.

<sup>3</sup> Kuqaa maasa maa maqa maaqanaki maridaqa sia minakinaa irirana marasee rakiara foora idaqa.

<sup>4</sup> Maasa rakimaria duru saamu sia maa maqa maaqanakinaa duru saamuara ufa qidaqa. Maasa Anutuna afeeka ufa marina minannai duru saamuara foora rakidaqa. Minannai maasa Sadannana faandaamura rapeepamma aqidaqa.

<sup>5</sup> Maasa mi duru saamunnai unnuqa qimariana doo kuqaridaqa. Minannai faqa Anutunara kooroo ira ufara qaoo qimasee noori uqeerasee maasa minara uriqararausee qimariasa minannai misa faqa naridanoo. Maasa mi unna ufana qimariasa uriqaranoo marina Anutuna duru saamuara foora qumareeqa ooru rarisameeqe maqasaa muqafi rudammiiq quqaidaqa. Maasa qeeqa qitikurakinaa mandirirana aiqama oosana oosana mandirirana rakiranannai naruseeqa aiqama oonu qumaree ani qumareemmeeqee karaambaiga asauku mundirana aramandunnai quqasainaqa qeeqa qitikurakinaa irirana mina ufamau fuaqera.

<sup>6</sup> Innee Koorinti maqusanasa miqiraua mariafanoo maasa inni mareeqee asauku mundirana aramandunnai quqasoofaqa mina iriranaki fimariafanoo innee minakiqari kaqi runnai fifaqa qini qirana fundakusaifaqa maasa inni nariara fooramasee rarisameeqe quqasaanaura, sia misa qiandee reendeena kai ianaura aanoommasee qianaura.

<sup>7</sup> Innee faiqi nifusaa akooqoo ainaina faiqi nipata kai qafamasee eedoo qimariasa aaqee mariasa mariafanoo sia naunduraki qafee mariasa mariafanoo. Inniki moo fannoo asauku mundirana ainainira fasiqee qimarifa sia nariara kai miqi marunausee qiannoo maasara nipata mandaikirausee qimariana maasa faqa asauku mundirana ainainira fasiqa maridaqa.

<sup>8</sup> Asauku mundirafa maasara qinee niqiaafanna fasiqausee qimasee mi uriqarara afeekana qimufaqa minara firaqoo ufa qufaqa innee irisee qiniara firaqoo nari amooqimari fee qiafaqa iriseeqa sia minara qisauridaqa, sia qini afeeka inni rakeemma aqirafa maridanoo inni dadaaqirafa pooduqammannisarafa maridanoo.

<sup>9</sup> Qinee sia qeeqa pasannai inni rufiarana nimiraree qidaqa.

<sup>10</sup> Akaqausa maaqi qifaranoo Pauroofa nari akara riranaki afeekaikamandee qimaqimidanoo, nari uqanna anireenoo reendenidanoo nari ufa faqa fifau mariannoo.

<sup>11</sup> Miqi qimariasa maa ufana iriaqa, maasa nianai maridaqa akaraki qianna ufafa faqa naaqaqari marida qimariannufafa faqa amanamana kai mariannoo.

<sup>12</sup> Miqi qimaria fasiqausa nariara uriqararausee qidaqa miqi qimariafanoo. Maasa sia miqi qimariasaa qeeqa qimarianaura. Misa furufari mariasa maridaqa. Misa nanasaa fee nari amani nari amani idee nari iriranannai kai nariqa uriqarara ainainee qimasee minannai kai nari nimanidaqa. Sia Yisuna iriranannai nari amani nari amanidaqa.

<sup>13</sup> Maasa qeeqara qianaura maasa qeeqa qimooqira oosirana sia fiaikataanaura miqooqari kai oourandannoo mariannoo. Qinee sia akaqausa naanna ree moona oosiranaki mariasara qeeqa qimooqianauranoo qiqa qoosuki marinausara kai qeeqa qimooqianaura. Anutufa maasa saika maree marunna oosirana nari kai quqaqai fanoo maridanoo minaki kai maridaqa innee faqa minaki kai mariafanoo.

<sup>14</sup> Innee minaki marianara iriseeqa inniki oonureeqa sia finnaaqaraidafa. Maasa asauku mundirana amiqira fasaasa ufa mara mareeqa sia mi oosirana fiaikateeqa minaki kai maridaqa innisaimbaqa mariqifana.

<sup>15</sup> Maasa Anutufa qimu oosiranaki kai inniki ainainidaqa, akaqausa fiaikatammasee ainainidaqa maasa sia misa fuaqoo fidaqa qeeqa ainainiranara qeeqa qimooqidaqa.

Maasa Anutufa qimu oosiranaki maqee maqee miqoo kai minaki kai ainainidaqa maasa inniara maaqi qidaqa, Koorinti maqannaasa Anutunasaa atoofara firaanaikinoo maasa saika mi oosiranaki firaanaikiannoo.

<sup>16</sup> Inniki ainainirana taikasee miqooqari kai inni finnaaqareeqa moo atinai moo fannoo sia ainainimarinaki oonuree minaki amiqira fasaasa ufa qimannimianauro. Miqimmasee sia qinee akaqausa naanna reeqa misa moosaa afuqaki ainainamasee nári nimooqidaqa. Qinee sia miqianauro qeeqara fukasaa moo afuqakiara foora ainainianauro.

<sup>17</sup> Ooqeenaa tamummaqara fasiqauqa minara maaqi qimasee akara riqau.

Faiqi moo fannoo sia nári amooqirafa mariani.

Karaambaiqa auquqoo ainainara kai amooqiaqa.

<sup>18</sup> Qinee Pauroosa minara maaqi qidaqa. Karaambaiqa fannoo moo fasiqara amiqira fee qinafa kai amiqira fasiqa mariannoo, nári kai nariara amiqira fasiqee qinafa sia anoona marina fifau mariannoo.

## 11

*Pauroofa unna amaana ufa qimariasara aaquqima nimaqidanoo.*

<sup>1</sup> Inni Koorinti maqusanaasa qinee Pauroosa furufaramandee qimannimianaqa irisee sia minnisaaqa kaqi minara irisee sia minnisaaqa kaqi minara irisee mariaqa.

<sup>2</sup> Qinee inni Koorinti maqannaasara qeeqa qiraamunara foora mareeqeeqa asaku mundirana utaaqama amaqaqaunanoo minaindikiqa mariaqee minara rairaiqiidaqa. Innee andeqara maanaqara foommafiqa mina faqa mariaqa. Maqasaa qaraa rairaiqiranau nimidau. Anutuinandaraa rairaiqirana nimidau.

<sup>3</sup> Ooqai sakani fannoo nári kaaqa irira unnufannai Eeuana akaru qundee kai inni irirafa faqa iandoora. Asaku mundiranasaa kai inni irirafa amiqimandee andeeqasee mundinoo mari inanoo kaqi runna fifoora minara qinee inniara rufiidaqa.

<sup>4</sup> Ooqai indaaruu maasa Yisunara qimannimiafanaqa. Miqooqari maasa fuafanaqa akaqausa innee unnai oonurandee inniki aniree inni unna amaana ufa qimannimiqa. Akaqausa dapi fasiqauqa anireeqa Yisunara moomau qimannimufaqa innee aqa-maseeqa asasammasee misa mara quqaseeqa misa manda ufamau fimariafanoo. Misa maraquna faqa misa unna fasaasa ufa faqa sia maasa qiafannamau qimannimiafaqa náriara moomau qimannimiafaqa innee kaqi maraafanoo.

<sup>5</sup> Mi unnaqira fasiqausa náriara Yisufa niqiqoo fasiqausa uriqararasee qidaqa. Qinee Pauroosa sia misa ureeqarasau maridau misa uriqararausa maridaqa.

<sup>6</sup> Misa ufa akoofasauqa mariafaqa sia qinee amiqimandee misa naanna raunaua mammaqidaqa kasoofaqee ufa qimannimidaqa, iriranara amiqimandee iriseeqa misa oorinaaqaramasee qimannimiqiafana. Maasa aiqama kari oosana oosana ufannai maasa amiqira irirana akooqoo kooroommasee qimannimiqiafana.

<sup>7</sup> Qinee sia unnaqi maria fasiqausa naanna reeqa qinee Anutuna amiqira fasaasa ufa inni qimannimidaqa kaqi kaaqoo mina akiaqara munnimma moodaa faqa sia uqanna maraqiafana. Innee Anutuna afusaa uriqararausa mariaqee qimasee qinee reendeenamafiqa oorudupi mafifaqa qeeqa ainainiranannai qeeqa narana ainaina mara naidaqa sia inni narana mareeqa. Qinee aaqaidee miqi mari qiafana.

<sup>8</sup> Qinee inniki ainaini marunaqa moo maqannaasa Yisuna ufara suqimariasaa misa nári narana marara munnimma qimifaqa qeeqa narainaina minannai maraqiafana. Qinee inni dadaaqidaqa misa munnimma ummuariara foora maraqiafana.

<sup>9</sup> Qinee inniki mariafanna kamuqoo qeeqa narana munnimma sia marufaqa sia inni munnimma moodaa marasee narana mara naqiafana. Qini qikaqaafasaaqaa Maseedoonia maqannaasa nariqa munnimma mareeqee qini qimana kai qimufaqa marasee narana mara nee mariqiafana. Ooqai miqi mariafannana kafaqa maqee maaqoo marunnaqooqari sia innindi maraanauro. Innee aaqarana marasaifaqa naqimmasee fee inni aaqara ufannai andeeqannisaanauree inni narana munnimma qimunara irisee qisauruanoora. Qinee Pauroosa minara inni qimannimidaqa.

<sup>10</sup> Qinee asaku mundirana anoona ufa oorisa maridaqa qima afeekaikira ufa qimannimidaqa sia uqanna inni narana ainaina maraanauroo aiqama Kirisa maqa maaqaki mariasa narana ainaina sia uqanna maraanauroo, sia moo fannoo qini ufa aruannoo.

<sup>11</sup> Qinee nanaree maa ufana inni qimannimidee. Qinee inniara qimuqusirana siaisee maridee maa ufana qimannimidee. Qinee inniara qimuqusimarunnana Anutufa doo iridanoo.



<sup>12</sup> Ooqai iafanandee kai iqa maqee sia inni narana munnimma maraanaura. Unnaqira niqiqoo fasiqausa inniki ani mariasa inni narana munnimma maraidaqa náriara Pau-roona ainaini marina aana raidee qimasee maasa faqa niqiqoo fasiqausa maridee qifoora sia qinee misa naanna ramasee inni narana munnimma maraanaura. Sia qinee nári nifaaga mara maree urimaria oosana dadaaqianaura.

<sup>13</sup> Mi fasiqausa sia kuqa niqiqoo fasiqausau maridau misa nikaru qira niqiqoo fasiqausa maridaqa, nariqa ainainiranara unna ufa qimasee asauku mundirafa anoona niqiqoo fasiqausara foora quandakiqa misa nimamma usufiqa nikaru qidaqa.

<sup>14</sup> Sia minara tautiaqa, Sadannafa faqa miqi kai imarifa maridanoo, mina aanandaidaqa miqidaqa, mifa kaaqa qara qangiroo nimamma usufinoo marifa marifaqa misa mina aannandaidaqa miqidaqa.

<sup>15</sup> Sadannana ainaini maria fasiqausa andeeqara fasiqauqa nimamma usufiqa ainainirafa sia firaq ainaina, náringi maridanoo. Kasooqagee taikara aukua andeeqasee mi manda oosana amana kai mareefaranoo.

*Pauroofa Yisuna ufasaara aupurarana maree marunara kooroo inau.*

<sup>16</sup> Qinee kafa inni qimannimidaqa sia moo fannoo qiniara furufarira fasiqee qianno. Inniki unna ufa qimaria fasiqausa furufarirau firaqoo nári nuqu uqeeraidaqa nári nimoofimariasa maridaqa. Innee qiniara furufarira fasiqee qifaqa qinee faqa furufaramasee misa naanna raanaura.

<sup>17</sup> Karaambaiqa sia maasara miqiaqee qifaqa qinee kaqikaqoo furufaramasee misa naannaree qeeqa qimooqianaqa innee mi unna qimaria fasiqausa ufa iriandee iqa qini ufa faqa iriaqera.

<sup>18</sup> Moomoo unna ufa qimariasa faiqi faiqi irirana marasee nári nuqu uqeeraidaqa nári nimoofidaqa. Doo qinee faqa miqimmianaura.

<sup>19</sup> Innee Koorinti maqannaasa inni irirafa firaqoo marisa mariafanoo furufarira fasiqauqa ufa qimariasa innee asamamasee misa marasee misa ufa irimariafanoo.

<sup>20</sup> Misa inni nikaruqimasee inni ainaina ummuari mariasa maridaqa, misa innikinaa uriqararusa foora maridaqa inniara miqiaqa maaqiaqa qimariafaqa misa ufaanara foora fufusee inni rarisameegee minaki mara aridaqa. Misa náriara uriqararusee qidaqa inniara ureeqarusee qidaqa. Misa nisaukusamu inni noori rukamidaqa. Misa miqi mandee inni nimiafaqa innee aqamasee kaqi misa mareeqee inneeqa ufa suqiranaki quqasee innee misa ufa amiqimmasee irimariafanoo.

<sup>21</sup> Qinee Pauroosa innikina mariafannaqoo misa oosana maraqaana qinee qisauridaqa qimannimidaqa qinee maparaa imarunaua sia misa oosana maraqiafana. Inniki unnaqira niqiqoo fasiqausa nariqa nuqu uqeerasee nári nimoofidaqa qinee misa furufarirana amana kai qeeqa furufariannana qimooqianaqa iriaqa.

<sup>22</sup> Misa náriara sia Kirisa maqannaasa ufa kai qidaqa maasa qikeeku qikaaku Heeburu ufa qimarunausee qiafaqa qinee faqa miqi kai qimarunaua maridaqa. Misa náriara Isaraee maqannaasa Anutuna utaaqa maqoosa maridee qiafaqa qinee faqa misa kai maridaqa. Misa náriara Abarahaamana aiku asauku Anutuna qima afeekaikira ainaina maraanausee qiafaqa, qinee faqa misa kai maridaqa.

<sup>23</sup> Misa náriara asauku mundirana aiku asauku maridee qiafaqa qinee faqa furufarira fasiqara foora qidaqa qinee misaki misa uriqararusa maridaqa. Qini asauku mundirana mi ainainnara irunnana misaindi ooraqaranoo maridanoo. Qinee Yisuna ufa saara karabusaki misa urinnaaqaramasee moomoo kari rumbeeqa. Raitasamunna qifaqa ateekeuufa moomoo kari misa narirana urinnaaqaramasee qini qifaqa ateekaqau. Qinee kuqirara madikikiqari moomoo kari misa narirana urinnaaqaramasee findi fiqa.

<sup>24</sup> Moodaannai qisaukunamu kari Yuda maqannaasa raitasamu darimariqau, moodaa fasiqa aiku asauku taikasee moo fasiqa qisaukuqara faqa moodaannai qiku faqa dinni qiku eera kai nuqu quqasee kari minannai dariqau. Sia moodaannai miqimandee dariqau, moodaannai qisauku amanasaa miqimandee daru qimaqau.

<sup>25</sup> Roomma maqannaasa faqa qaaramoo kari miqi uqannamandee dariqau. Moodaa kari misa oonisamu misa daru qimaqau. Qaaramoo kari ooruku nammariki sipaki moo maqasai Yisuna ufa qimannimirara fidaqa sipa fannoo mandaikufaqa ooruku nammariki ukunnaqa mariqafana sia kuqiafana. Moo kari miqi mambufaqa eendaki faqa faasaana faqa ooruku nammariki qambaannai qimmapiqqa afainni aniqiafana.

<sup>26</sup> Qinee Yisuna ufa qimannimiqqa nimariafanaqa moomoo aukua maqusa maqusa nuafannanakina qinee moomoo kari qimeekee mariqiafana nammariki aufunaki faqa nipuraraa fasiqauqaki faqa Yuda maqannaasaki faqa aanaamuru mariasaki faqa firaq taunaki faqa kaasau maqa maaqa oombura maqa maaqaki faqa ooruku nammariki

firaa farumaki faqa qikaru qimaru aqoondisa faqa misauqakina moomookari kuqirara qimeekeega.

<sup>27</sup> Qinee minaki fidaqa kadaapirirana faqa tooqaamu darirana faqa maraidaga moomoo kari sia faiqeeqa, qinee daararee marufaqa nammariara didimarufaqa nimiriqiafana, qinee moomoo kari qini maaqa faqa narana faqa qamunna faqa sia marufaqa kaqi qisukunni faiqaqa nimiriqiafana.

<sup>28</sup> Moomoo ainaina ummaara maraqa nuafannana kiqari moodaa ainainara kai qianaura. Maqusa maqusa Yisuna ufara suqimarianara kai qinee oonumafi iriqa nidaqa.

<sup>29</sup> Moo fannoo misakiqari ummooqukinoo kudoosaapaifaqa qinee faqa mina aanna raidaga kudoosaapidaqa. Moo fannoo misakiqari mandainainaki aqufifaqa qini daundura faqa rapikifaqa mi ummaarana maraidaga.

<sup>30</sup> Qinee qeeqa qimooqifa qeeqa ummooqukiranara qimooqianaura.

<sup>31</sup> Anutufa maasa karaambaifaqa Yisuna akoofa naaru naaru mina auqu amiqi amiqirafa kai mariani, mifa kai qiniara sia unnaqi mari fee qidanoo, iridanoo.

<sup>32</sup> Ooqai qinee Damasakusa maqusai mariafanoo misa karaambaifaqa mina auqu Areetasafa nari ureeqarana aqigoofanoo nari sundia namufaqa maqusa kooqiki ititafu-faqa qini qumaraanee qimasee maqusa kooqikiaqa rakisimariqau.

<sup>33</sup> Qini qigoondiuga minara irisee kaqitina qini mareeqee firaa pateeuqaki rumasee sanda minasaa qususee faandaamura meerai marufaqa miriqoo qambaanaqari kaqikaa kooqi auqiranakiqari qini ruqiaeeqeeqa quifa quifa qufaqa maqasaa aqufufaqa quqasee sanda qiafana.

## 12

*Pauroona afu pisipasamandee uqafiqoo ufa.*

<sup>1</sup> Qinee qeeqara qimooqianafa sia anoonaikiannoo, kaqi fifau qeeqa qimooqianaura. Karaambaifaqa qifu pisipasamandeenoo kukeeqara ainaina kooroomma qimunara qimannimianauranoo.

(Anutufa Pauroona uqeereenoo innaarunai quqasoofanoo innaaruna ququsakinaa ainaina qafoonara nari auqu kukeeqasee Koorinti maqannaasa qimannimidanoo moo fasiqa fee qidanoo.)

<sup>2</sup> Ooqai qinee Yisuna ufa irimaru fasiqanara iriqa. Karaambaifaqa Anutufa kaqi kai mina uqeereeqeenoo qaara innaaruna ooraagareenoo qaaramoo kiranaki Anutufa marunaki quqanau. Mifa kuqaa fee afiqa miqoo quqanoo fee inau kai afu pisipasamaseenoo mina amana mara uqeereeqeenoo innaarunai quqanau fee inau. Qinee sia iridaqa Anutufa kai iridanoo.

<sup>3</sup> Qinee kafa qimannimiqa mi fasiqana uqeereeqeenoo innaarunaki moo auqu Paradisee minaki quqanau. Kuqaa fee miqinoo fee afu kai fee pisipasinoo fee Anutufa kai iridanoo.

<sup>4</sup> Mi fasiqana miqoo quqasoofanoo maridanoo oosana oosana ainainara irinau sia faiqi ufa amana qimari ainaina irinau naaquqara ainainara Anutufa qaoo qinau sia faiqi minara qimannimianne qinau. Sia faiqi qira ainainara irinau.

<sup>5</sup> Miqinna fasiqanara qinee amooqianaura sia qeeqara qimooqianaura qeeqa ummooqukiannanara qimooqianauranoo.

<sup>6</sup> Qinee qeeqa qimooqifau sia furufarirafa mariqini kuqaa anoona ufa kai mariqini. Qinee sia qeeqara qeeqa qimooqianaura. Faiqi anaasee qini dooki qiqaamasee qini dookinaa ufa irisee nariqa kai qiniara iriqa. Qinee qeeqa duqu uqeeraranannai misa fifau qini duqu firaaqoo uqeereeqee foora.

<sup>7</sup> Qinee amiqira ainaina naaquqara amiqira ainaina qafaafannanara qiqa duquara firaaqoo uqeeraifaqa aaqaranaki fuanoora Anutufa Sadannanara kaqikaqoo eedoo qufanoo qifaagasaa moo aupurana qimiqoofanoo maqee maqee darimariafaqa sia qeeqa duqu uqeereeqa kaqi qunee kai andeeqasee marianifee qimasaida darimarifaqa maridaqa qidaqa.

<sup>8</sup> Qinee qaaramoo kari karaambaqinnai innaaru qiqa anee maa aurirana maraquisaannee qiafananoo mifa qaoo qimasee qinau. Qeeqa kaqi nimira dadaaqirana amiafanafa doo mifa kai doo ani amana marianno, qiqa afeeka fannoo kudoosaapee mariasaki amiqi mandee kambiqaidanoo.

<sup>9</sup> Qinee Pauroosa mina iriseeqa maaqi qidaqa qinee qeeqa kudoosaapee marunnanara asasammasee amooqidaqa. Asaku mundirana afeeka fannoo qini rafaqa fuanifeera qeeqa ummooqukiannanara amooqidaqa.

<sup>10</sup> Asaku mundirana ufasaara mandufa faqa kudoosaaparana faqa kadaapirirana faqa, Yisuna ufasaara darirana faqa tinoo taanoo rirana faqa tinaakurirana faqa

qiminaqa mareeqa doo amana amiqira fee qianaara. Qinee qeeqa kudoosaapee marunna kamuqoo mi kamuqoo kai afeekaikidaqa.

*Pauroofa narí urinaaqarara ufa qimaqoofa.*

<sup>11</sup> Qinee inniki ani maria fasiqausa unnaqira niqiqoo fasiqausa naannaraqa maridaqa furufarira fasiqara foora maa ufana qimannimidaqa. Inneeqa kai inni oosana fannoo qini mara furufariranaki quqaqisaidanoo. Innee Koorinti maqannaasa qiniara Yisuna anoona ufa qimaqimi mari fasiqa fee qiaqaana. Innee inniki ani maria unnaqira niqiqoo fasiqausara fifau unna qidaqa uriqararausee qimariafaqa misa qiniara ureeqara fasiqee qidaqa. Kuqaa qinee kaqi fifau fasiqa maridau qinee sia misa ureeqarusa marunaiqini, misa urinaaqarararusa maridaqa.

<sup>12</sup> Qinee kuqaa Yisufa diqiqoo fasiqausa maridaqa aiqama ainaina kooroomannimaqeeqee mariafaana qafee mariqau. Innee sia irufaqa qinee kaqi reendenamandee uqannifiqee mariqiafana. Faiqi sia amana auqaaqaaaira ainaina faqa naaqeetee maru ainaina faqa Anutunara faqa kooroomannimaqeeqee maru ainaina faqa reendenamandee uqannifiqaaafannana. Minannai kai qinee niqiaafanna fasiqausa marunannara kooroomma nimaqaaqiafana.

<sup>13</sup> Qinee maqusa maqusa Yisuna ufara suqimarusa faqa inni saimbaqa faqa amana amana kai inniki maridaqa qimannimafiafannana. Sia misa amiqimannimaqasee inni mandaikamma nimaqasee qimariqiafana. Moodaa ainaina kai inniki moo kiqiafanafa mifa kai qeeqa narana munnimma sia amanaikufaqa qinee sia inni narana munnimma irammirisee mareeqa. Mi moodaa ainainnara kai iridaqa qinee aaqeefee miqi fee qidaqa. Innee moo ainaina akiaqara minni qisaqa.

<sup>14</sup> Qinee ooqai inni maqusai qaara kari fuafanausa kafaqa maqee qaaramoo kifaqa doo qusasaa fuanauranoo, fidaqa sia inni narana munnimma ainaina maraanaura. Faiqi aanaaqiuqa sia narí ninaukoo narana munnimma ainaina nimidaqa, misa kai narí faiqi namu nimidaqa qinee inni nikausara foora maridaqa qeeqa narana munnimma aiqama faqa qeeqa marirana faqa inni asasammandee nimirarammidaqa.

<sup>15</sup> Qinee inni nikausara foora maridaqa firaqoo inniara qimuqusufaqa innee qini faiqira foora quandakina firaqoo qiniara faqa nimuqusiaqaana. Qinee kai inniara firaqoo qimuqusidanoo.

<sup>16</sup> Innee maa ufanara eedoo qifaranoo. Qinee inniki maridaqa sia narana munnimma mi ummaarana inni nimiqiafana. Innikiqari moo fannoo qiniara maaqi qiannoo Pauroofa nikaruuqimasee unnufannai maasa mara quqasooafaqa maasa mina ufaanakiara foora arufuananoo maasa narana munnimma maraandoo qifoora.

<sup>17</sup> Doo qinee naqifeemmasee fee inni miqi qiafana. Qinee maindari qeeqa ufa maraqa nuasa niqiaafanaqa sia inni maqusai ooqureeqa sia qini duqusaafau inni munnimma narana mara mareeqau muru qimifau.

<sup>18</sup> Qinee Titusana iraaafannoo eedoo qimasee innee unnai finau, moo fasiqa Yisuna ufa irimarufa qini qikaqaafasaa mina faqa aqiaafannoo Titusana faqa finau. Innee minara Titusafa maasa qikaru qimaseenoo fee maasa ainaina mareefoo qida fee. Sia fee qinee Pauroosa faqa Titusafa faqa moodaa irirana maraseeqara moodaamau fimarunannara irida fee.

<sup>19</sup> Innee mi ufana iriseeqa qiniara maaqi qifaranoo. Pauroofa narisaa faqa narí faqa marinausa faqa misasaa faqa ititaidanoo miqidanoo fee qifaranoo. Maasa sia miqianaara, asauku mundirafa maasara qundee kaimmidaqa. Qini qifaqaasaa qiqoondiuqa maasa Anutuna afusaa maridaqa aiqama ainaina auqeeqemaria ainaina inni dadaaqidee qidaqa auqaidaqa.

<sup>20</sup> Qinee inni maqusai oonureeqa moo ainainara rufiaanaura. Inni marirafa sia amiqirafa oorudupirafa mariandoora qinee qidaqa. Koorinti maqannaasa innee qiniara mookamaseenoo qieqa qimiifoo qifoora anee sia reendenamandee maasa qimaqiminannaranoo aanoommasee maasa qimaqimiifoo, qifoora. Qinee inni maqusai oonureeqa maa ainainausara rufiaidaqa, ufa rainarafa aanooqirafa mariandoora nariara nariara rairaiqifoora nariara nariara idara foora qeefoora, kaaqa ainainara rimariasa narifoora, nariara nariara mandufa qifoora munuqi miniqira ufa qifoora narí nuqu uqeerasee nimooqifoora dapi dapi qifoora.

<sup>21</sup> Qinee innee unnai oonu raananoo Anutufa qini mareeqeenoo qisauriranaki quqaanoo. Qinee inni mandoosanaki oorureeqa inni nifusaa ikiraqasee soofaariara foora iqa qisauranoora. Inniki moomoosa ooqaindari mandoosana marasee sia minara oonumafi irisee nisaurusee minnisagaau. Akaqausa faiqi faqa anaasee faqa narí ummuari narí ummuarirana minannai furufaridaqa akaqausa faiqi anaasee dapi maraqanua fasiqa

anaaseesa faqa akaqausa ufa rukiasee nári mandoosana manda iriranamau fimariasa mariafaqa sia minara oonumafi irisee nisaurusee minnisaqau.

## 13

*Pauroofa ufa taikenoos atisaa aaquqira ufa qimaqoona.*

<sup>1</sup> Doo maqee qaaramoo kifaqa inni Koorinti maqannaa nindafarara fuanaura. Qinee oonuraanaqa moodaa fasiqa aniree inniki mandoosana qinnana siamma iri-  
anaura tamummaqara fasiqa akara ufamau fiqa qaara fasiqafee qaaramoo fasiqafee  
mi mandainaina qafee marianara kooroo qifaqa qinee minara anoonee qimasee ufa  
qianaura.

<sup>2</sup> Qinee ooqai indaaruu innee unnai fiqiafana inaaqiana kafaa fiqa maa ainainara qiman-  
nimiqiafana, maqee moosaa marunannindari kafaa mi ufana kai qimannimianaura.  
Maqee oonureeqa sia qiafannandee ireeda qimannimianura, maqee sia moo fannoo  
qinee ufannai náriara foora qiananoo rufiaki sandaannoo.

<sup>3</sup> Innee qiniara randee mariafanoo. Asauku mundirafa Pauroonasaqari kuqaa fee  
ufa qidanoo fee unna qidanoo fee qiniara qimariafanoo. Qinee innee iannai oonuraana  
kari asauku mundirafa qinisaaqari qimannimianura firaqoo qimannimianoo. Asauku  
mundirafa inni ufa iridanoo sia kudoosaapaannoo narí afeeka inni uqannifiqaannoo.

<sup>4</sup> Mifa kudoosaapaaranaki aunirira saqarisaa kuqufa marifa Anutuna afeekannai  
findufumafinoo mi afeekaikiranaki maridanoo. Maasa Yisuna faqa moodaanaki mari-  
daqa kudoosaapaqa maridaqa maasa inni Koorinti maqannaasaki oonuree ufa qidaqa  
maasa Anutuna afeekannai asauku mundirana faqa kuqiranakiqari findifidaqara foora  
afeekaikamandee maridaqa qimannimianaura.

<sup>5</sup> Inneeqa kai inneeqa marirana nimanamandee qafaaqa, kuqaa fee Yisuna man-  
daaqara oosanamau fidee. Asauku mundirafa inni naunduraki marifaqa innee minara  
iridee sia fee iridee innee kaaqa uqanna kadiqaqa maridee.

<sup>6</sup> Maasa innee iannai oonuraanaqa innee maasa sia kadiqaqa maridee qifaranoo.

<sup>7</sup> Maasa inniara Anutunara innaaru qidaqa sia inniara mandoosanaki aqufuaqee  
qidaqa. Sia maasa saika inniki anoonaikianiffee qimasaidau innaaruqidaqau, inniara  
andeeqaramau fuaqee kai qimasee innaaru qimannisaidafa. Maasa kadiqarana amana,  
inni andeeqaranara kai iridaqa.

<sup>8</sup> Sia maasa amana Anutuna anoona ufa ititaanaura mina dadaaqirana kai amanaiki-  
rafa maridanoo.

<sup>9</sup> Maasa qeeqa kudoosaapaidaa inneeqa afeekaikifaqa maasa mina qafammasee  
asasianaura. Innee amiqimandee andeeqarusaikamambi mariaqeera innaaru qidaqa.

<sup>10</sup> Karaambaiqa afeeka uriqararana qimuna, sia inni rapeepamma aqira uriqararana  
qiminau, inni pooduqarana qiminau. Qinee innee iannai oonureeqa karaambaiqa  
uriqararana qimuna mara maree aanoomandee inni ufa sia nimianoo qimasee moo  
atinai marunaqooqari maa akarana rumannimaqaanaqa inneeqa kai andeeqasee mari-  
faqamma oonu nindafa.

<sup>11</sup> Qini qikaqaafasaa doo maqee akara taikaanaura. Innee kaaqa andeeqaranara  
afeekaikamasee marararee qimariasa mariafanoo, qini ufa qunnana amiqimasee iriaqa,  
sia nariara nariara rairaiqiaqa, moodaanaki maridaqa asoaranaki mariaqa. Faiqi  
aanaaseera nimuqusirana nimimari Anutufa faqa naundura asoaranana nimimari Anut-  
ufa faqa inni faqa mariani.

<sup>12</sup> Anutuna ufa irimaria fasiqa anaaseesa aiqama inni nimandaifaqa.

<sup>13</sup> Asauku mundirafa Yisufa maasa karaambaiqa mina asasamasee dadaaqira oosana  
faqa Anutufa faiqi aanaaseera nimuqusirana faqa naaquqara andeeqara maraquna  
moodaanaki kirana faqa inni aiqamausaki faqa mariani.

## **KARATIA**

### **Karatia maqusanaasa Pauroofa akara rumannimufa maridanoo.**

<sup>1</sup> Qinee Pauroosa Yisufa diqiqoo fasiqausa maridaqa maa pasana akara ruman-nimaqaidaqa. Sia faiqi faiqi moo fannoo qini mareeqee Yisufa niqiqoo saikanaki quqaqoosa maridaqa, sia Anutufa moo fasiqara qufanoo qini mara quqanau. Anutuna asauku mundirafa Yisufa faqa nari akoona Anutuna faqa Yisuna kuqiranakinaana uqera quqoofa miqandakai qini rafaqaqfusee mara quqaqoosa maridaqa maa saikanara qidaqa.

<sup>2</sup> Maaqoo maria nikaqaafasaasa dadaaqida inni Karatia maqannaasa nimandaidaqa, Karatia maqa maaqaki Yisuna ufara suqimariasa inni nimandaidaqa.

<sup>3</sup> Maasa aiqamausa qikoofa Anutufa faqa mina asauku mundirafa Yisufa maasa Karaambaifa faqa Anutuna idaaqira amiqi amiqirana faqa naundura asoarana faqa inni nimiani.

<sup>4</sup> Maasa qikoofa Anutufa qufanoo asauku mundirafa iriseenoo eedoo qimaseenoo mi mau finau maqee kamuqoo marunna mandainaina afeekaikiranakinaana maasa idukuqeera narafaqa maasa mandainaina akiaqara aunirira saqarisaa paasoosamasee quqanau.

<sup>5</sup> Anutuna areenarana faqa amooqirufa faqa naaru naaru amimariani, doo miqiani.

*Sia moo amiqira fasaasa ufa maridanoo moodaa kai.*

<sup>6</sup> Oo Karatia maqannaasa qinee inni oosanara tautummiqa. Innee dauni aaqee uqanna Anutuna minnisaafaqa qinee minara iriseeqa tautiqa, mifa narasauku mundirana idaaqirana kaqi nimirannai inni naarama quqasoofaqa innee aaqee uqanna quqasee sandeeqa moo amiqira fasaasa ufara foora randoofaqa iriseeqa tautiqa.

<sup>7</sup> Sia moo amiqira fasaasa ufa maridanoo moodaa kai maridanoo, faiqi anaasee akaqausa asauku mundirana amiqira fasaasa ufa qumaree mareeqee kaqinni ubeekkeeqa minannai furufarirana inni nimimariafanoo.

<sup>8</sup> Indaaruu maasa Yisuna amiqira fasaasa ufa inni qimannimafannana doo maqee maasee moo fannoo fee innaarunaindaraa qangiroo moo fannoo fee moo fuka aaqee maria fasaasa ufana qimannimufaqa Anutuna aqurarara ufa misasaa mariannoo.

<sup>9</sup> Maasa ooqai qimannimafannanasaa kafaa maqee qimannimidaqa, moo fannoo maasa ooqai qimannimafannana moosaa qimasee qimanniminafa mifa Anutuna aqurarara ufa ameemaanai mariannoo.

<sup>10</sup> Faiqi nifusaa qeeqa qimoofee qida fee nasurida fee miqi qidaqee oo sia uqanna qinee miqianaaura. Anutuna kuqaa eedoo qira ufara qinee randaidaqa. Qinee faiqi nifusaa fifau nasuridaqa miqi qidafau sia asauku mundirana ainainiranaki marini maqee maqee qini darirara kai qiafaqa moo ainainiranaki funaiqini.

*Pauroofa Yisufa niqiqoo fasiqausaikammafi oosana aroo ufafa.*

<sup>11</sup> Oo qini qikaqaafasaauqa qinee maa ainainnara qimannimianaaura. Qinee qimannimianna fasaasa ufana sia faiqi auquqoofa maridanoo.

<sup>12</sup> Sia faiqikinaana qinee mareeqa, sia moo fannoo qimaqimifaqa iriqa asauku mundirafa Yisufa nari uqanna kooroomambi qimaqiminau.

<sup>13-14</sup> Qinee ooqai kumaaraa mariafana Yuda maqannaamaana ufa amiqimandee firaqoo qimariqiafana. Qinee Yuda maqannaasa amaana ufara qeeqa qikiaqauqa urinnaaqaramasee mi ainainna qiqiafana. Qinee misa urinnaaarammasee firaqoo maasa qikeeku qikaaku oosana maraqiafana. Qinee minaki fidaqa Anutuna ufara faqa Yisuna ufara faqa suqimarusa sia nifauaqiafana afeekaikamandee misa mandaikamma nimaqaqiafana. Qinee minara amiqimandee taikaanee qidaqa mandaikamma nimaqaqiafana.

<sup>15</sup> Anutufa sia qini mandoosanara irinoo nari idaaqira amiqi amiqira mariranaki marinoo qini qinoofa sia qini maqoo kamuqoo nari ainainira saikaki marianifeera ooqai indaaruu qini daarama mi saikanaki quqaqisoofaqa kisaqaqasaa sia iriqaafana, mana mana kai qiqiafana.

<sup>16-17</sup> Anutufa qiniara nari amiqira fasaasa ufa aanaamuru qimannimianne qimaseenoo Damasakusa maqusai fimariafanna aanasaa nari amaaku qini uqaqifiqanau. Uqaqifiqasoofaqa sia moo fasiqunnai oonureeqa Yisuna aufakiana iriqa, nari amaaku

uqaqifiqaannee qimaseenoo sia Yisufa niqiqoo fasiqusakina ooqai marusakina Yeerusa-reenni sia ooruree iraašana qimaqimiqau. Sia qinee miqi qiafana qinee andee-qasee quandaki Arabia maqa maaqai oonu marikiqa oonu randeeqa anireeqa kafia Damasakusa maqasai fiqiafana.

<sup>18</sup> Yisufa indaaru kooroommaqqooqari qaaramoo aukuaana aiqarammafufaqa Yeerusaree maqasai ooruree Peetooroo funnai mina qafamasee aqoondikianaree qimaseeqa mina faqa qaara amaana maraqiafana.

<sup>19</sup> Mi kamuqoo sia Yisufa niqiqoo fasiqausa nindafaqiafana misa qiqari Yisuna akaqa Yameesana mina kai qafaqiafana.

<sup>20</sup> Qinee maa akaranakinaa ufa anoona kai qidaqa sia unna ufa qidaqa. Faiqi sia Yisuna fasaasa ufa qimaqimiqau, Yisufa nari kai qimaqiminau. Anutuna afusaa maridaqa anoona ufa kai qidaqa.

<sup>21</sup> Qinee Yeerusareenni qaara amaana maraseeqa Siria maqa maaqaki faqa Sirisia maqa maaqaki faqa oonu kisaqasaa mariqiafana.

<sup>22</sup> Mi akuuana mi kamuqoo Yudeea maqa maaqaki maridaqa Yisuna ufara suqimarusa sia qini qifaqau.

<sup>23</sup> Akaqausa qiniara qimannimunara irimarusa kai mariqau. Misa maaqimandee qiniara qimannimiqau. Maasa mandaikamma qimiqeemaru fasiqafa doo maqee quandaki nari naru taikee maru ufana qimannimidano.

<sup>24</sup> Misa mi ufana iriseeqa Anutufinnai qiniara dufi dufi qimariqau.

## 2

*Pauroofa niqiqoo fasiqausaki sia qinee oorudupiraasee qidanoo.*

<sup>1</sup> Qinee Pauroosa Siria maqa maaqaki faqa Sirisia maqa maaqaki faqa kisaqasaa qisaukuqara taikasee qikunni qaara faqa qaara faqa ooqu marasee aukuaana maraseeqa Baranabasina faqa Titusana faqa nifiqamareeqa Yeerusareenni ooru fiqiafana.

<sup>2</sup> Anutufa nari maraqunannai kukeeqasee qimaqimunara ooru fiqiafana. Miqoo ooruree Yisuna ufara suqimarusa misa uriqararusa faqa kai ufa qidaqa, aanaamuru Yisunara qimannimifannufana oosana oosana qimannimiqiafana. Misa sia irifaqa qini saika ooqai faqa maqee faqa sia amiqimandee qini dooki iriranaki qaoo qifoora minara qinee qimannimiqa.

<sup>3</sup> Qini qiqoondi Titusafa aanaamuru Kirisa maqusaindari qini faqa Yeerusaree maqasai ooru marufaqa Yuda maqannaasa Yisuna ufa irimarusa minara maasa sia Yuda maqanna-na naanna ramasee Titusana fainanduqaneera qiqau, kaqi mana mana imariqau.

<sup>4</sup> Faiqi akaqausa Yuda maqannaasa unna qimasee Yisuna ufara suqimarunausee qimasee maasaki umeq ani keeqafufaqa Titusana qafammasee mina fainanduqaquee qufaqa maasa qaoo qifaqana. Misa nipuraraa fasiqara foora kukeeqasee maasaki ani keeqee mariqau. Maasa Yuda maqannaasa faqa aanaamuru faqa asauku mundirana Yisunaki marunara sia nariara nariara rufiteeqa amiqi mandee moodaanaki Mooseena sandufak-igari idukiara foora marunara nipuraraa fasiqara foora minaki ani keeqafufaqa maasa mareeqee Mooseena sandufaki rumberanakiara foora kafia quqaaneera nipurau.

<sup>5</sup> Maasa sia misa ufara eedoo qifaqana. Inni aanaamuru mariasara iriseeqa sia eedoo qimasee Titusana fainanduqifaqana. Yisuna amiqira fasaasa ufa anoona ufara kai innee aanaamuru mapukusee maraaqee qimasee sia misa ufa fainanduqirufa irifaqana.

<sup>6</sup> Qinee Pauroosa Yeerusareenni ufa qimarunaki maridaqa Yisuna ufara suqimarusaki maridaqa faiqi misara uriqararausee qimarusa faqa ufa qimarufaqa iriafanaqa sia moomau fiqau qinee fimariafannamau mi mau kai fiqau. Qinee faiqi misara uriqararausee qifaqa, Anutufa sia faiqi nifaqa qafamaseenoo uriqararausee ureeqarausee qidanoo minara qinee sia uriqararausee qifaqa sia ureeqarausee qifaqa amana amana kai mariaa maqi qimasee qeeqa aanaamuru faiqi aanaaseeki saika maree marunnana kooroomasee paasoosamandee kaqi qimannimiqiafana. Qimannimifanaqa uriqararausee qimariasa sia qaoo qimasee moosaa fiaanoo qiqau.

<sup>7</sup> Misa qiniara maaqi qiqau, ooqai Yisuna amiqira fasaasa ufa Yuda maqannaasa qimannimirafa Peetooroonasaa Anutufa quqanau, doo maqee kamuqoo mifa aanaamuru mi ufanakai qimannimirafa qini Pauroonasaa quqee maqi qimasee maanara faqa irimariqau.

<sup>8</sup> Anutuna afeeka fannoo kai Peetooroonaa mara quqa amufanoo Yuda maqannaasaki fidanoo qimanniminau, miqi kai inoo Anutuna afeeka fannoo qini Pauroosa mareeqeenoo aanaamurukina mara quqasoofaqa fuafannaqa minara faqa irimariqau.

<sup>9-10</sup> Yisuna ufa irimariasa uriqarararusa foora mariasa Yameesafa faqa Peetooroonaa faqa Yoohaneefa faqa qini ufa iriseeqa maaqi qiqau. Oo kuqaa Anutufa ani mareeqeenoo

kuqaa aanaamuruki quqeenoo, anee aanaamuruki ainaininaqa maasa Yuda maqannaasaki ainainianauree qimasee qini faqa Baranabasina faqa nisauku ruqunnaseeqa doo fuaqee qimasee moodaa ufa kai maaqi kai qimasee qimaqimiqau. Inneeqara Pauroosa faqa Baranabasina faqa Yudeea maqa maaqaki maria kudi fasiqausara Yisuna ufa irimariasa maqee maqee iridaqa dadaaqaqaa. Miqi qufaqa qinee iriseeqa maaqi qiqiafana, qinee minara kai afeekaikianauranoo fee qiga. Mi ufa suqirana Yeerusareenni maridaqa qimaqimiqau.

*Pauroofa Antiooka maqusai maridanoo Peetooroona aqinau.*

<sup>11</sup> Doo miqooqari moo aukuaana ai randoofaqa Peetooroofa Antiooka maqusai qinee mariafannaqoo aniroofaqa qinee aiqamausa nifusaa Peetooroona afusaa aqiqiafana, akooqoo mifa aqamasoonara afusaa aqiqiafana.

<sup>12</sup> Yuda maqannaasa nari sandufa qiga aanaamuru mariasa faqa sia moodaanaki misa saimbaqa narana naanauree qiqau. Peetooroofa Antiooka maqusai maridanoo misa Yuda maqannaasa sandufa rukiaseenoo miqooqaraa aanaamuru Yisuna ufa irimariasee qimaseenoo maqee maqee misa saimbaqa moodaaqoo ooqu marifidanoo narana nee marinau. Miqinoo marufanoo Yameesafa Yeerusaree maqusai maridanoo akaqa Yuda maqannaasa niqiqoofaqa Antiooka maqusai ooqu fiqau. Misa ooqurofanoo Peetooroofa nindafamaseenoo rufiamareenoo aadumai nianasaa oonu ooqu marifufanoo qimminoo qinau. Maa fuka Yuda maqannaasa Yeerusareendari qumuraasa qiniara sia fainanduqiraua faqa narana naidanoommifoo qifoo qimasee rakeemasee aadumai ooqu marifinoo nari narana nanau. Yuda maqannaasa Yisuna ufa irimarusa misaikiqari akaqausa aanaamuru marusara maaqi qiqau.

<sup>13</sup> Yuda maqannaasa qikaqaafasaaqaa Peetooroona faqa miqoo marusa Peetooroona oosana qafamasee misa faqa miqi kai iqa Yeerusareendari qumusara rufiamareeqa Peetooroofa ooqu marutinai ooqu marifiqa nari narana naqau. Misa sandeeqa Baranabasina faqa firarisameeqee nari manda maparaa iranaki quqasoofanoo aadumai ooqu marifi nanau.

<sup>14</sup> Qinee misa miqiu oosanna qafamaseeqa maaqi qiqiafana, misa sia amiqira faasa ufa anoona ufamau andeeqasee fidaqa eendaandammida miqi mariafanoo, miqi qimasee Peetooroona aiqamausa nifusaa afusaa aqiqiafana, anee Yuda maqannaafa mariananoo aanaamuru oosana marasee aanaamuru faqa moodaanaki mariananoo, anee nanaree maqee aanaamuruara asaurusee rakeemasee aadumasaa ooqu marinanee. Anee miqianana aanaamuruara sia fee amanaikinanee miqinanee. Anee aanaamuru mareeqeenana Yuda maqannaasaki quqasainaqa innaarunai firana amanaikidee miqidanee.

*Yuda maqannaasa faqa aanaamuru faqa Yisunasaqaraana asumu mareefaranoo.*

<sup>15</sup> Qinee miqi qimasee Peetooroona aqisee maaqi qimasee aiqamausa qimannimiqa. Kuqaa maasa Yuda maqannaaki kambiqaarusa maridaqa. Maasa sia aanaamuru mariasa, misa Anutuna ufara sia irirai mana mana imariasa.

<sup>16</sup> Sia maasa Mooseena sandufasaaqari firanannai Anutuna innaarunai firana amanaikiranaki keeqaanaura, asauku mundirana Yisunasa rufiranannai kai Anutuna innaarunai firana amanaikiranaki keeqaanaura. Sia faiqi moo fannoo Yuda maqannaasa sandufannai Anutuna innaarunai amanaikiranaki keeqaannoo.

<sup>17</sup> Maasa Yuda maqannaasa Anutuna innaarunai amanaikiranaki keeqarasee qimasee asauku mundiranasaa atooqafiqa quandakiqa boo aanaamuru mariasa naanna ramafiqa mandoosana maree marunausee qianaauranoo. Maasa miqidaqa asauku mundira fee maasa mareeqee mandainainaki quqeenoo fee qianauree.

<sup>18</sup> Oo sia uqanna miqinoo maridanoo. Qinee Pauroosa Mooseena sandufannai Anutuna innaarunai amanaikiranaki keeqaranara qaoo qimarunasa maridaqa, qinee maqee quandaki minara eedoo qiga Mooseena sandufa rukiaanaura.

<sup>19-20</sup> Mooseena sandufara qinee maaqi qianaura doo mifa qini aaqarana qimaqiminoo darusaifaqa kuqiqa maridee qidaqa. Qinee Anutuna saikara findifi minaki mariaqeera qini darusaifaqa kuqiara foora iqa maridaqa. Asauku mundirafa auniriranasaa kuqinoo qinee faqa minandiri kuqiara foora iqa maridaqa doo maqee sia qeeqaraa kasida maridaqa, asauku mundirafa qini daundurari marinara kasida maridaqa. Qinee maa maqee kasira marirafa Anutuna amaaku maqee maqee saqarikidaqa maridaqa, mifa qiniara amuqusinoo nari marirana quqanau.

<sup>21</sup> Qinee Anutuna idaaqira kaqi nimirana qimifaqa sia qaoo qimasee minnisaanaura, faiqi moo fannoo Mooseena sandufasaaqari Anutuna innaarunai amanaikiranaki keeqanana asauku mundirafa fifau kuqinau maqi qidaqa.

## 3

*Nimaarusiranara faqa Yisunasaa rusiranara faqa Pauroofa mi ufa qandara qidanoo.*

<sup>1-2</sup> Oo Karatia maqannasa innee furufari mariasa yafee inni mandirirana naakuni-maageenoo fee Yisunasaa rusirana afaainoo fee. Qinee Pauroosa inni Karatia maqannaasa nifusaa asauku mundirafa aunirira saqarisaa kuqunara amiqimasee kooroomasee inni nifusaa qimannimafanaqa inni nifusaa kuqinoora fooqaana innee amiqimasee irimari-afanoo, doo maa moodaa ainainara kai irammirianaqa qimaqimiaga, innee Mooseena sandufa maraqa nuana minannai fee Anutuna maraqa maraqaee iqau, Yisuna amiqira fasaasa ufa irisee irirana minasaa rusiranannai fee Anutuna maraqa maraqaee iqau, minasaa irirana rusiranannai kai maraqa.

<sup>3</sup> Innee naqiaqooqari fee firaa furufariranaki fi fee, innee Anutuna maraqa naakusee minannai oosana arasee andeeqasee fidaqa kafa maqee mariaqooqari nanaree innee mina afaimma quqasee faiqi faiqi iriranamau maqee maaqooqari fidee.

<sup>4</sup> Indaaru Anutuna maraqa inni naakufufaqa amiqira oosana inniki kambiqafinuu doo maqee innee minara fifau ainainee fee qidaqee. Sia fee innee minara iriafanoo nimuqusidanoo fee.

<sup>5</sup> Anutufa nari maraqa afaaramasee inni maqee maqee nimidanoo faiqi sia auquaqa ira ainaina auqimarifaqa innee qafee mariafanoo. Innee Mooseena sandufamau fimarianara Anutufa nari maraqa inni nimidanoo fee amiqira fasaasa ufa iriqa irirana minasaa rusimarianara Anutufa nari maraqa inni nimidanoo fee. Minannai kai nari maraqa inni nimidanoo.

<sup>6</sup> Oosana aroo ufafa irirana rusimarianara maaqi qidanoo Abaraamana auqu ramasee mina kikiqusinoo maaqi qidanoo. Ooqai Anutufa Abaraamana nauraiqi marufanoo qimaminuu.

Abaraama anee faiqi siaifa mariananoo anee moomoo maqusanaasa nikoofa marinaranoo.

Abaraamafa mina iriseenoo oo kuqaa kambiqaanoo qimaseenoo nari irirana Anutuna ufasa rusisee afaaqa quqasee marinau. Anutufa Abaraamafa nari irirana Anutunasaa rusisoonaa qafamaseenoo minara maaqi qinau. Oo doo Abaraamafa qini Anutufa innaarunai firana amana kai mari fasiqafa maridanoo fee qinau.

<sup>7</sup> Qinee Pauroosa minara maaqi qidaqa innee Karatia maqannaasa amiqimandee maana iriqa. Kuqaa Yuda maqannaasa Abaraamana maqasaagaraa ati mina moodaa maqannaasa mariafanoo Anutufa Abaraamana atiara moosee qidanoo maaqi qidanoo. Abaraamana aanna reemariasa Anutuna ufasa irirana rusimariasa misa kai Abaraamana aiku asauku anoona uqanna maridaqa.

<sup>8</sup> Anutufa ooqai indaaru aanaamuru maqannaara nari irirana Anutunasaa rusinausa Anutuna innaarunai firana amana keeqeefandiafoo qimasee akara rumaqooqa maaqi qinau.

Anutufa ani Abaraamanasaaqari aruruki akinanoo aiqama maa maqaa maqana afaaqasasa mariasa amiqi amiqimma nimaqaannoo fee qimaqooqa maridanoo.

<sup>9</sup> Anutufa qufanoo Abaraamafa mi ufana nariara irisee doo kuqaa fee qunara Anutufa Abaraamana amiqi amiqinau. Doo maqee aukuaa miqi kai iqa aiqama irirana Anutunasaa rusimariasa Abaraamanasaaqaraa amiqi amiqirana Anutufa raina nimidanoo.

<sup>10</sup> Aiqama maqannaasa Mooseena sandufamau fidaqa minannai Anutuna innaarunai firana amanaikidaqa keeqaanauree qimariasa aaqamaki Anutuna niqurararufa ni-maarusirufa ameemaanai maridaqa.

<sup>11</sup> Tamummaqara fasiqauqa akara minara maaqi qinoo maridanoo, Anutunasaa irirana rusimarianannai Anutuna innaarunai firana amanaikiranaki keeqemariasa misa kai maqee oosana arasee naaru marirana mareefaranoo.

Maasa mina irisee maa ufanara kooroo ifoo qidaqa sia faiqi moo fannoo Mooseena sandufa mararanannai Anutuna innaarunai amanaikiranaki keeqaanoo.

<sup>12</sup> Mooseena sandufa sia Anutuna saqarikirafa minasaa mundinoo maridanoo. Mooseena sandufa fannoo faiqi minasaa kaaqa andeeqasee firafa minasaa mundinoo maridanoo. Tamummaqarausa akara minara maaqi qidanoo,

Mooseena sandufamau kaaqa andeeqasee fimarifa kai naaru mariranaki keeqaanoo fee qimasooqaa maasa sia amanaikidaqa sia keeqaanaura.

<sup>13</sup> Asauku mundirafa Mooseena sandufamau fimariasa Anutuna niqurararufa ameemaanai rumbaqa marunara iriseenoo asauku mundirafa nari kai Anutuna niqurara ufaikambinoo maasa daaqa qumureenoo minaki rumbaqa marusa idukuqisanuu. Tamummaqara fasiqauqa akara minara maaqimminoo maridanoo.



Saqarisaa dirifi kuqimariasa aiqamausa Anutuna niqurararufa ameemaanai mariasa maridaqee qidanoo.

<sup>14</sup> Asauku mundirafa saqarisaa dirifi kuqinuu. Anutufa ooqai Abarahaamanasaaqarara amiqi amiqirana aanaamuru mariasa nimianifee qimasoofofanoo asauku mundirafa saqarisaa dirifi kuqinuu. Asauku mundirana Yisunannai aanaamuru mariasa Anutufa Abarahaamanasaa qima afeekaikira amiqi amiqirana misa faqa raina mareefaranoo. Maasa faqa qeeqa Yisuna saqarikiranannai Anutufa nari maraquna nimiraree quna faqa maraanaura.

*Nimaarusira ufara faqa qima afeekaikira ufara faqa Pauroofa qidanoo.*

<sup>15</sup> Oo qini qikaqaafasaaqaa maasaki mari ainaina kikiqususee qianaaranoo. Faiqi gaaraqanda moo ainainara qimasee qima afeekaikamasee mi ainainna papiqasaa akara rumasee nariqara nuqu minasaa akara rumasee sia amana mi ufana minniseefara, mi mau kai fifaranoo.

<sup>16</sup> Miqi kaimmasee Anutufa nari qima afeekaikira ufa Abarahaamanasaa faqa mina atisaa faqa quqaseenoo akara rinuu. Ooqeenaa akara fannoo sia nari atiuqa moomoo fasiqa anaaseera qidanoo. Mifa maaqi qidanoo, ani ati kaimma qima afeekaikirana amianauree qidanoo asauku mundiranara moodaara qinuu.

<sup>17</sup> Qinee Pauroosa minara maaqi qidaqa Anutufa Abarahaamana narufa amiseenoo doo qinee mi mau kai fuanaureeqimasee qimafeekaikinau. Miqooqari (430 aukuaana) aukuaana moomoo uqanna aiqara mafufanoo Mooseena sandufa fannoo kasooqaaqee innaaqiana kambiqafinoo sia amana Abarahaamana qimamu ufana rafaqaafuannoo kaqi mariannoo.

<sup>18</sup> Anutufa Abarahaamanara Kannaa maqa maaqakinaa saqama namufaqa faiqi namufaqa aiku asauku namufaqa amiraree qimasee Anutufa mi maqa maaqa saqamana Abarahaamafa nari sandufamau funara sia irirai ooqai nari qima afeekaikammaqoo iriranasaa nari afaarinoo aminuu.

<sup>19</sup> Maasa minara irisee Anutufa naqiraree sandufa Mooseena aminoo fee inuu. Mooseenaiqari fifufufanoo Anutufa qima afeekaikira ufa qimamufa Abarahaamana ati anoona uqanna kambiqaaninanaki Mooseena sandufa taikaannoo. Mi qambaana kamusaqanna aagarana kooroomma nimaqaanifeera Anutufa mi sandufana quqanuu. Anutuna gangirooquqa mina sandufa Mooseena amufanoo Mooseefa Anutuna faqa maqasaa fasiqa faqa aanaiqikinoo maridanoo maqasaa nari aqoonausa nimiruu.

<sup>20</sup> Anutufa sandufa quqemarufa faqa faiqi anaasee mi ufamau fimariasa faqa marianara aanaiqikirafa Mooseefa mina qambaana maridanoo. Abarahaamana qima afeekaikirana amaukuanafa sia miqinoo maridanoo. Abarahaamafa sandufamau firafa sia marunara aanaiqikirafa faqa sia marinuu. Anutufa nariara qima afeekaikira ufannoo Abarahaamana qimaminuu. Maasa minara uriqarara oosanee qidaqa.

*Nimaarusira ufa oosana kooroo idanoo.*

<sup>21</sup> Maasa minara iridaqa Mooseena sandufa fannoo Anutuna ufara qima afeekaikirufa Abarahaamana amunafa rafaqaqafidanoo fee qianauree. Sia amana rafaqaq fuannoo. Mooseena sandufa oosana maaqimminoo maridanoo. Faiqi anaasee Mooseena sandufamau fidaqa mina akiqara sia amana naaru marirana mareefara. Miqira sandufa Anutufa sia nimiruu. Nimiraaqau mi sandufana mareefau innaarunai fini.

<sup>22</sup> Ooqeenaa akara fannoo aiqama maqannaasara nari mandoosana afeeka ameemaanai kuridiranaki maridaqee qidanoo. Qinee Pauroosa minara maaqi qidaqa Yisunasaa irirana rusimariasa Anutufa nari qima afeekaikamandee maqee oosana arasee naaru marirana nimiruu fee qidaqa, mi nimirafa asauku mundirana Yisunasaa rusimarianasaa mundinoo maridanoo. Aiqama ainaina nari mandoosana afeeka ameemaanai marianara Yisunasaa irirana rusimarianannoo kai aikaquannoo.

<sup>23</sup> Yisuna saqarikira aukuaana sia maruqoo Mooseena sandufa fannoo mina afeesidanoo maasa karabusara foora rumbaseenoo maramareenoo Yisuna saqarikira aukuaana kooroomambufanoo minaki quqaqisanuu.

<sup>24</sup> Asauku mundirafa qumuaninna aukuanasaa Mooseena sandufa fannoo maasa uqannifiqara fasiqara foora marinoo maasa Yisuna saqarikiranannai Anutuna finnai innaarunai firana amanaikiranaki keeqaaqeeera maasa nifiqamaree asauku mundirana aaga munu qisanuu.

<sup>25</sup> Doo maqee Yisunasaa rusirafa ani maridanoo ooqai uqaqifiqee marufa Mooseena sandufa sia maqee rakisi nimaqaidanoo.

<sup>26-27</sup> Innee aiqama Yisuna saqarikiranannai asauku mundiranaki keeqafi marianara Anutuna amaaku kamambi marianara innee inneeqa nammari maroonannai innee asauku mundirana andeeqara marirana qamunnara foora akumaree minaki fuaqa.

<sup>28</sup> Doo minakiqari sia Yuda maqannaasa faqa aanaamuru faqa naaduma moo kiqa maridaqa sia karabusa ainaini mariasa faqa idukiraua faqa moo kiqa mariafanoo sia faiqi faqa anaasee faqa mookiqa mariafanoo amana amana kai mariafanoo. Innee aiqama asauku mundirana Yisuna faqa moodaanaki maridaqa aiqamausa amana amana kai moodaa mariafanoo.

<sup>29</sup> Innee asauku mundiranaindi marianara Abarahaamana ati mariafanoo. Abarahaamana atiuqa marianara Anutufa Abarahaamana amiqi amiqirana qima afeekaikuna mi amiqi amiqira ainainna kasooqaqee innaarunai inni faqa nimianoo.

#### 4

(Ooqai Pauroofa maru aukuaana ainaina faqaasa faqa pisinisa faqaasa faqa munnimara ainainimariasa faqa kudiuqa faqa mariqau. Ainaina faqaasa faqa pisinisa faqaasa faqa nari ainainirana moomoo marifaqa sia amanaikifaqa akaqa fasiqauqa nifiqee nari ainainiranaki quqasee mina akiqara munnimma nimimariqau. Moo oosana faqa misaki marinau. Kudi fasiqauqa akaqausa kaaqa kudiki mariasa naararee marifaqa marianara ainaina faqaasiannai oonuree irafanoo ainaina faqaafa ainaina siaina karabusara foora ira saikiranaki quqaseenoo sia feefauru aminau. Kaqi narana faqa faiqarana faqa mina ainainirana akiqara amiseenoo feefauru uqanna sia aminau. Misa minara karabusa saika imarusee qimariqau. Mi karabusa saikanaki maru fasiqana ati mina ainaina kafaam i fasiqana idukiraree qimaseenoo munnimma firaatia aqusee idukumaree fimariqau.)

<sup>1</sup> Mi ufanasa ootupammasee maa ufana ainainafaqaafa faqa nari amaakuara faqa qimannimianaura. Faiqi moo fannoo kuqufinanoo mina faiqi mina aiqama ainaina maraanoo. Mina akoofa kaqi maru kamuqoo mina faiqi sia innooqanoo marufanoo kaqi nari akoona ainainira faiqiara foora maridanoo. Nari akoofa nari amaakuara nari ainainira faiqiara foora marifanoo saika ummaqirana dadaaqi marinara narana aandau amidanoo. Nari akoona aiqama ainaina maraaninafa maridanoo kaqi fifau ainainira faiqiara foora nari akoona faqa maridanoo.

<sup>2</sup> Mina faiqi kumaaraa marifaqa mina akoona ainainira faiqiuqa mi faiqina faqa mina akoona ainaina faqa rakisiqa fifi ifafa mina akoofa doo innooqee maqi qimasaifanoo mi faiqifa ainainasaa rakisidanoo.

<sup>3-5</sup> Miqi kai iqa maasa sia innooqera fooqaa ira kamuqoo maasa maa maqa maaqanasaaqaraa irira sandufa ameemaana mariqiafana. Anutufa maa aukuanara andeeqara aukane qimaseenoo nari amaaku aqiqanau. Aqiqamaseenoo maasa Mooseena sandufa ameemaana mina rumbaranaki mariusa minakiqari feefauru aquseenoo idukusoofaqa findifiqa Anutuna amaaku kamambi mariageera Yisufa maa maqa maaqanasaaqaraa anaasee aranandaki rumafufanoo maqasoofanoo Mooseena sandufa ameemaana maa maqanasaa kambiqafi marinau.

<sup>6</sup> Anutufa inniara mina amaaku fee qiaqera qimaseenoo nari amaaku maraquna inni nimuqusaki aqioofanoo keeqafi maridanoo, mi maraunafa inni dadaaqifaqa innee faiqi aanaaqiara fooqaana Anutunara qini qikoo fee qimariafanoo.

<sup>7</sup> Miqinara innee sia maqee fifau ainainira faiqi marifanoo, innee faiqi faqa anaasee faqa kuqaa Anutuna faiqi araamuqmaakaikammafi mariafanoo. Doo marifanoo nari amaaku amianinnana innaarunai mari saqamana mareefandinausa mariafanoo. Anutufa nari kai qifaqa innee mina amaaku araamuqmaaka mina innaarunai mareefandin- ausa mariafanoo.

#### *Pauroofa Karatia maqannaasara kaaqammimirinai.*

<sup>8</sup> Ooqai innee Karatia maqa maaqaki marusa sia Anutuna aqa oonuree amiqimasee irimariqau afaana ainaina sia Anutunaki maru ainaina innee mina rumbaranaki mariusa mariqau.

<sup>9</sup> Doo maqee uqanna Anutunara irimariafanoo, Anutufa faqa doo inniara faqa iridanoo. Doo nanaree innee miqooqari kafa quandaki kafa manda umooqukira kuquaqaaira maqasaa irirana innai faqa inniqa nauraa manda sandufa innai faqa quandee fee. Innee Anutuna faiqikiranakiqari quandaki fifau maqasaa irirana rumbaranaki fidee miqidaqee. Saina Yisunasaa rusirafa kai mariaqaana.

<sup>10</sup> Innee Karatia maqannaasa kaaqa Yuda maqannaasa oosana oosana sabata faasana rimariasa mariafanoo aqaaida miqi mariafanoo. Kaaqa inni moo quqoonara naaquqaiifaqa Anutunara iri maria quqoonaa fee qimasaida minara kai irimariasa mariafanoo. Aukuanara faqa qambaana saqannara faqa kaaqa minara ridaqa minannai innaaruna aana maraanaree qidaqa aqee mariasa mariafanoo.

<sup>11</sup> Qinee Pauroosa inniki marunasa inniara rufiidaqa. Inniki ainainiafanafa fifaunni maqasaa rairaa idanoommi maqi qidaqa.

<sup>12</sup> Oo qini qikaqaafasaa mariasa inniara afeekaikamandee qimannimidaqa. Qinee Pauroosa Yuda maqannaasa mariaafanausa maridaqa misa oosana faqa Mooseena sandufa faqa minnisee aanaamuru naanna ramasee Yisuna saqarikammasee mina ameemaanai maridaqa. Innee faqa miqi kai iqa qini daanna reeqa Mooseena faqa Yuda maqannaasa faqa sandufa minnisee Yisuna kai saqarikiaqa.

<sup>13</sup> Qinee aaqee indaaruu amiqira fasaasa ufa inni qimannimifanna oosannara irimariafanoo, qinee aurida mariafananara inni maqa maaqaki kisaqaasaa maridaqa qimannimiqaafana.

<sup>14</sup> Qinee auruafanaqa qiqafee sia qiniara nikoogoofaqa qini mandaikamaqisasee minniqisaqau. Qini aurirafa firaqoo inni narufaqa minniqisaaneerusa sia minniqisaqau. Idaaqa kai maqisee marufaqa mariqiafana. Innee qiniara Anutuna qangiroora foora mari ifoo qimasee qini qumaraqau. Innee asauku mundirana Yisuna qumaroondeemiqa qini qumarasee amiqi amiqimmaqisaqau.

<sup>15</sup> Mi fasannai innee firaqoo qiniara asasimariqau, maqee naqi fee ifaqee sia miqidee. Inni ooqai marinarana maaqi qidaqa innee firaqoo qiniara qimudao qimasee qini dadaaqianee qimasee inneeqa fira uqirarara ainaina kaqi qimuqini inneeqa nifu faqa pitaqimeeqee kaqi qini qimuqini.

<sup>16</sup> Doo maqee Yisuna anoona ufa qimannimunnannai fee qini namuqaa kamambi maridee. Oo sia miqifanoo andeeqaannoo.

<sup>17</sup> Akaqa fasiqa anaasee aaqee mariasa inni faqa ani maridaqa moo unna ufa qimannimi mariasa inniara unna qimasee firaqoo ridaqa amiqi amiqidaqa ueeqaidaqa sia amiqira iriranaruu miqidaqau, misa inni mara mareeqa qini Pauroosasaa qaraana rakee iaqera miqidaqa, misa irirafa innee iannai ubeekanoo marifaqa inni iriranara nari iannai ubeekamasee misa ufa iriaqera miqidaqa.

<sup>18</sup> Akaqausa inni rarisamaseeqa inneeqa irirana misasaa atooqara oosanafa qaaraikamminoo maridanoo. Moo mandoosana moo amiqira oosana maaqimminoo maridanoo. Misa inni rarisamasee misa manda oosana maraaqee qira oosanafa mandosana maridanoo. Misa inni rarisamasee amiqira oosana maraaqee qira oosanafa amiqira oosanafa maridanoo. Ooqai qinee Pauroosa inni faqa mariafanaqa inni irirafa qinisaa atooqafi innee qiniara ridaqa mariusa mariafanoo maqee nianai marunaqa innee qiniara minnisee unna ufa qimariasara kai misara kai rimariafanoo.

<sup>19</sup> Qini faiqi namu qini qimuqusimaria faiqi namusa mariafanoo. Anaasee moo fannoo faiqi aanaaqi maqaidanoo aupuraidanoo maqaidanoo. Qinee miqikaimmasee amiqira fasaasa ufa inni qimannimisee asauku mundirana andeeqara oosana marinarana niranainniki kambiqaanifeera inniara aupuraidaqa qimannimidaqa.

<sup>20</sup> Oo qinee maqee nianai maridaqa inni faqa mariaqaana nianai maridaqa inniara amiqira irirana iriaqaana kaaqa inniara daunduraki umaara raidanoo.

*Pauroofa Abarahaamana aanaaqaqara kikiqusufa.*

<sup>21</sup> Innee indaaruu Mooseena sandufakiqari idukufi Yisuna ufasaa atooqafi mariaasa maqee Mooseena sandufa ummaara ameemaanai munari minari kafa keeqararee qimariasaa mariafanoo. Innee sia fee mi sandufana iridaqee minaki kaifaa keeqaidee.

<sup>22</sup> Mifa maaqi qidanoo, Abarahaamafa qaara faiqi maqoofa maridanoo, moo indaaruuqaa faiqi anoofa ainainira anaasee rumbarafa marinuu, moo faiqi inaaqiannaana anoofa idukira anaasee Abarahaamana anaqa uqanna marinuu.

<sup>23</sup> Abarahaamana amaaku Isamaerafa rumbara anaasee faiqi marinuu, faiqi anaasee imarundee inoo kai faiqi maqanuu. Idukira anaasee Saraqana faiqi aadumasaa kambiqanuu Anutufa qima afeekaikamasoofanoo Saraqafa qaafa anaasee asooqa maridanoo Abarahaamana faiqi maqanuu.

<sup>24</sup> Mi anaasee qanda qaara irirana kikiqammusiqa maridaqa. Moo Qakaarafa Sinai aaqanasaa kambiqara anaasee marifa marifaqa mina faiqi namu Mooseena sandufa ameemaanai rumbaranaki kambiqarusa maridaqa.

<sup>25</sup> Qakaarafa Arabia maqa maaqaki mari aaqanna kikiqammusinoo maridanoo maqee maria Yeerusaree maqusa kikiqa faqa usinoo maridanoo mi maqusana faqa mi maqusanaki maria fasiqa anaaseesa faqa rumbaranaki Mooseena sandufa nimaarusira rumbaranaki maridaqa.

<sup>26</sup> Abarahaamana moo anaasee Saraqafa sia rumbara ainainira anaasee, sia Mooseena sandufa rumbaranaki marifa idukira anaasee marifa maasa Yisunasaa rusimariasaa ninoofa uqanna maridanoo. Mifa innaarunai fuka Yeerusaree maqusara foora Yisunasaa rusimariasaa fira maqusa misa ninoofa uqanna maridanoo.

<sup>27</sup> Ooqeenaa akarakinaa idi fannoo Saraqanara maaqi qidanoo,

Innee faiqi siai anaaseesa asasiaqa, faiqi siai anaaseeuqa sia aupurarana faaqarimariasa, doo maqee innee asasiranara kai faaqaruqa. Afaaqi minnisai asooqa adeedaana, nifaaqi faqaasa uraaqaramasee moomoo faiqi maqaannoo.

(Abaraamafa Isamaerana anoona mifinnai oori ukeekenoona nari anaaga uqanna Saraqarana mafi ameesuqusoofanoo mariufanoo mifa faqa asooqanamuki Abaraamaana faiqi uqanna Isakeena maqanau. Minara faiqi minnisainna anaaseefa faiqi moomoo maqeenooraa foora firaqoo asasiannoo fee qinuu.)

<sup>28</sup> Qinee Pauroosa minara maaqi qidaqa. Saraqana amaaku Isakeefa Anutuna qima afeekaikira ufasaa kambiqanoo marinau, doo maqee innee qini qikaqaafasaauga miqi kaimmasee Anutuna ufasaa mina faiqi namu kammambiqaa mariafanoo.

<sup>29</sup> Mi aukuanna Isakeena aukuanai faiqi anaasee undee mandoofanoo kambiqoofa Isamaerana quandakinoo Anutuna maraqunannai kambiqoona Isakeena mandaikammamaqanau, doo maqee faqa mi oosanafa miqikaimminoo maridanoo. Mooseena sandufa ameemaanai mariasa inni aana ititaidaqa.

<sup>30</sup> Ooqeenaa tamummaqara akara fannoo minara maaqi qidanoo, Rumbara anaasee faqa nari faiqi faqa aqiqamasaina moosaa fifuani. Rumbara anaasee amaaku Isamaerana idukira anaasee amaaku Isakeena faqa sia mina akoona ainaina moodaanaki maraani.

<sup>31</sup> Doo minara qini qikaqaafasaauga inniqasaimbaqa sia rumbara anaasee faiqi namu maridaqa idukira anaasee faiqi namu maridaqa, Yisuna idukiranaki maridaqa.

## 5

*Pauroofa idukiranaki mariasara amiqimasee rakisi qumaraaqee qufa.*

<sup>1</sup> Asaku mundirafa Mooseena sandufakinaana idukueeqee nari idukiranaki quqaqifaqa maasa minaki maridaqa, doo minara iriseeqa idukira fasiqara foora doo minaki mapukusee maridaqa sia kafa sandufa oosana oosana rumberanaki firaree qifaqa.

<sup>2</sup> Innee maana irifaqa qinee Pauroosa qimannimidaqa, indaaru innee asaku mundirana saqarikaqau. Kafa maqee moo fannoo inniara Yuda maqannaasa fainanduquseeqa Yisunasaa ookaammambiqaa innaarunai fuaqee qinaqa innee miqifanoo Yisufa sia amana inni dadaaqiannoo fifau ainainara foora mifa maridanoo.

<sup>3</sup> Qinee kafa qimannimianaara afeekaikammasee qimannimianaara moo fannoo inniara Yuda maqannaasa fainanduquseeqa qinaqa fainanduquseeqa Mooseena sandufa ameemaanai doo minaki oonuraafanoo sia Yisuna namufaqa fuaqa mi mau kai fuaqa.

<sup>4</sup> Mooseena sandufannai Anutuna innarunai amanaikiranaki firaree qimariasa doo Yisunasaaqaraana doo inneeqa atekaseeqa mariafanoo Anutuna kaqi afaarinoo nimiranasaaqaraana aqoosai mariafanoo.

<sup>5</sup> Maasa sia miqidaqa sia sandufasaa ookaaidaqa, maasa irirafa Anutunasaa kai mundiqa maridaqa mifa nari kai maasa mareeqeenoo nari innaaruna amanaikiranaki quqaqiseenoo fee qimasee irirana minasaa kai rusisee maridaqa. Inniqasaimbaqa Yisuna saqariki marunanoo Anutuna maraquna fannoo minasaaqari maasa dadaaqifaqa maasa Anutuna innaarunai keeqaannanara asasamandee afeesidaqa.

<sup>6</sup> Maasa asaku mundirana Yisuna faqa moodaanaki maridaqa Yuda maqannaasa fainanduqirana faqa sia fainanduqirana faqa miqanda fifau ainaina maridaqa. Anoona ainaina maqimminoo maridanoo. Nariara nariara uriqarara ainainee qimasee nariara nariara amuqusirafa inni Yisunasaa rusirana akooroo imarifa mi ainainafa anoona uqanna maridanoo.

<sup>7</sup> Oo Karatia maqa maaqaki mariasa innee amiqimasee mi mau fimarusa mariafanoo, nanaree innee maqee anoona ufa minnisee mandoosana maree fee.

<sup>8</sup> Anutufa inni naarammeeqee Yisunaki quqee marifa mifau inni mareeqee kaqi runna quqeenooofau.

<sup>9</sup> Faiqi moo fannoo adudu fooqaafa inni qambaanai moodaa mari ifa mifa kai aiqamausa radiqifinoo inni nifaaqai sukaqamannimaqifaqa aiqamausa kaqirunna firaridaqa.

<sup>10</sup> Qinee Pauroosa inni Karatia maqa maaqaki mariasara andeeqara aatata firanara iridaqa, maridaqa. Maasa inni faqa karaambaiqasaa atooqa marirafa qini qifaqa quqarana qimidanoo, inniara sia moo iriranamau fifaranoo fee qidaqa inni mara moo aatata ubeekee mari fasiqausara qinee sia iridaqa, Anutufa misa naruannoo fee qidaqa.

<sup>11</sup> Oo qini qikaqaafasaauga qeeqara qimannimianaaranoo qinee Yuda maqannaasa fainanduqira ufa asaku mundiranasaa ookaammasee minannai innaarunai firaree qimariana mi ufana maqusa maqusa qinee qimannimi marianaqau misa sia maqee

maḡee qini darimariaqini. Fainanduqira ufa Yisunasaa ookaairafa anoona marinoofau qinee asauku mundirana aunirira saqarisaa arunara qimannimianaqau sia daruqini. Yisunasaa mundirunara kai qimannimimarunaqa iridaqa darimariafanoo.

(Misa mi aukuanna faina kafaqianda uqidee qimasaida Yuda maḡannaasa maasa Anutuna faiqi namu fee qimariqau. Nifaandama itirausara inni nianasaa naadumasaa mariaqee qimariqau. Pauroofa minara irisee maa ufana qimanniminau.)

<sup>12</sup> Inni Karatia maḡannaasa mareeqee moo aatata quḡeemariasara qidaqa misa nari fainanduqiranara kai qidaqa nari nifaandama itirana faqa minaki ookaammaseeqa doo naadumasaqanna maridaqa sia aqaranaki inni fuki faaki qima quḡaaqeeera.

<sup>13</sup> Oo qini qikaqaafasaa uqa inniara qinee qianaara. Innee inneeqa mandainaina rumbaranaki mariafanoo Anutufa minakinaana inni naaremeeqeenoo Yisuna idukiranaki quḡeenoo. Doo innee minaki maridaqa inni nifaqa manda nidimari ainainafa sia quandakinoo innisaa rakisidanoo inni nikaruqiranannai minni ubeekamannimaqaani. Sia miqiaqa maḡiaqa inneeqa nariara nariara rirafa nimudaoo qirafa inni nifiqeeqeenoo nariara nariara dadaaqiranaki quqaani.

<sup>14</sup> Mooseena sandufa aiqamatia maa moodaa ufanaki anoona kambiqaidanoo, mi ufafa maaqimminoo maridanoo. Innee inneeqa niqoonausara inniqa nifaqara foora nidinaqa dadaaqiaqa.

<sup>15</sup> Innee aandaara foora nari aidafirana nari aidafirana nari ukaqami nari ukaqami irana nari ami nari ami idaqā rufiaqa qusaasa innee narinni narinni naru taikaseefaara, minara nariara nariara nidiranara qidaqa.

*Pauroofa maḡasaaqaraa irirana faqa maraquna irirana faqa miqandara qimaqoo ufa.*

<sup>16</sup> Qinee Pauroosa minara inni qimannimidaqa. Sia innee inniqa maḡasaa irirannai ubeekaqa. Anutuna maraquna fannoo inni naakinoo marifa maḡee maḡee inni naaqooki amiqira oosana maraqeeera qimaseenoo mandoosana aaquqidanoo. Innee mi ufamau fiqa sia uqanna inneeqa maḡasaa iriranamau fifaranoo.

<sup>17</sup> Maḡasaa fasiqa anaasee maḡasaa irirafa faqa Anutuna maraquna aidimari ainainafa faqa maasa naunduraki nari maḡauruamaqee nari maḡauruamaqee idaqā miqanda namuqaa marianara innee firaree qimariaqoo sia amana fifaranoo. Minara innee Anutuna maraquna ufamau fuqa.

<sup>18</sup> Anutuna maraquna fannoo inni rakisifaqa innee sia Mooseena sandufa ameemaanai mariafanoo.

<sup>19-21</sup> Faiqi faiqi maḡasaa irirana oosana kaqi akoqoo maridanoo. Mina oosana maaqimmasee kooroodanoo, faiqi anaasee nari ummuari nari ummuarirana faqa adi namufa qira oosana oosana faqa irirana siaisa furufarida kaqi mandainaina maraqanuna faqa saqarinnai unnaqira Anutuna amana auqusee irirana mina amimariana faqa aukainaina ufaqa afaannainaina maraqanuana faqa, faiqi anaasee namuqaa kirana faqa rakirana faqa rairaiqirana faqa qusufa qimasee aanooqirana faqa, aiqama ainaina nariara kai fatusimariana faqa, naadu naadu rakeekaammasee nariqa kai naadu naadu suqimariana faqa, nariara nariara rairai qimariana faqa nammari namasee furufarirana faqa, misa suqufifaqa oosana oosana mandoosana uqeeere mariana faqa oosana oosana mandoosana maridaqa. Qinee ooqai aaquqima nimaqaafanausa kafa maḡee faqa aaquqimannimaqidaqa, mi oosana maree mariasa sia uqanna Anutuna ququsaki keeqeefaranoo.

<sup>22-23</sup> Anutuna maraquna fannoo sia miqi maria mandoosanakina uqannifiqaidanoo. Innee mina ufamau fifanoo inni mareeqee amiqira saqari qaḡammara foora ireefaranoo. Maa amiqira oosanausa ireefaranoo, nariara nariara uriqarara ainaina maridee qimasee nariara nariara irirana faqa Anutunara asarirana faqa naunduraki asoarana faqa faiqi aanaaseera reendenira irirana faqa amiqimandee dadaaqi mariana faqa afaarirana faqa amiqira ainaina afaarirana faqa sia minnisee firafa miqookai marida auqainna ainaina auqaida marirana faqa fisoofisoommasee ufa qirana faqa nari mandoosana akoqamasee andeeqasee fimarina faqa Anutuna maraquna fannoo mi ainainausa kai uqannifiqaidanoo, sia moo sandufa fannoo mi amiqira ainainausara qaoo qiannoo.

<sup>24</sup> Asauku mundirana Yisunaindi mariasa misa nariqa faiqi faiqi irirana marirana faqa nari maḡasaa irirana faqa aunirira saqarisaa Yisuna namufaqa kuqa kai aru quḡee mariasa maridaqa.

<sup>25</sup> Anutuna maraquna fannoo maḡee oosana arasee naaru marirana qimimarifa marinara mifa kai maasa marirana nirana rakisiani.

<sup>26</sup> Sia maasa qeeqara doori uqeeraseeqa amiqirausee qimasee qeeqa qimooqia sia nariara nariara sukufa qia sia nariara nariara rairai qiaqa.

## 6

*Pauroofa nari dadaaqi nari dadaaqiaqee qimaqoo ufafa.*

<sup>1</sup> Qini qikaqaafasaauga inniki moo fannoo mandainainaki aqufinaqa qafeeqa Anutuna oosanara irimariasa mina mareeqee andeedqaranaki quqaaga, sia aanoomasee miqi iaqa reendeenamandee miqi iaqa anee mi fasiqana dadaaqidana aneenna marirana faqa rakisia, anee faqa minaki aqufinafaara.

<sup>2</sup> Innee nari ummaara nari ummaara dadaaqiaqa, miqiaqa innee asauku mundirana sandufamau kaaqa andeedqasee fimariafanoo.

<sup>3</sup> Faiqi moo fannoo ureeqarafa nariara uriqararausee qimasee sia qinee oorudupirauusa dadaaqianauroo fee qimarifa nari kai nari akaruqidanoo miqi qidanoo.

<sup>4</sup> Aiqama fasiqa anaasee nariqa kai nari marirana nirana nari kai amanamasee qafaaga, sia moo naindisaa amanamasee qafaaga narikai nari marirana auqarana amiqirafa marinanoo nari kai qafamasee asasiannoo.

<sup>5</sup> Aiqamausa nari umaara nari kai marasee quandaki aqoonausa faqa dadaaqiaqa.

<sup>6</sup> Akaqa fasiqauqa Yisuna ufa inni qimannimifaqa innee misa ufa irimariana akiqara quandaki narana munnimma, maaqa, ainaina naida nimiaqa. Miqidaqa innee misa ummaara dadaaqifaranoo.

<sup>7</sup> Innee sia inneeqa nikaru qiaqa, sia innee amana Anutuna afusaa ititasee furufariranaki quqeefaranoo, mifa maasa oosanara iridanoo. Anee narana asumu ummaqinana mina kai unakinnaranoo, anee nana mandoosana niminana anee mina kai mareennaranoo. <sup>8</sup> Faiqi moo fannoo nari faiqi faiqi manda nidiranannai manda maqaki ummaquseenoo minakinaana kuqirana kai unakuannoo. Mifa Anutuna maraquina oosana marasee Anutuna afuqaki ummaquseenoo minakinaana naaru marirana kai unakuannoo.

<sup>9</sup> Minara iriseeqa amiqira mariranara sia kudoosaapeeqa minnisaaga maasa sia minniseeqa kaqi mi mau fidaqa kasooqagee unnakirana paqurianauroa.

<sup>10</sup> Minara irisee maana qimannimidaqa maasa aiqamausa amiqira dadaaqirana dadaaqiaqa sia moodaakari kai, maqee maqee dadaaqirafa kambiqafinana dadaaqiaqa. Aiqamausa dadaaqidana niqoonausa Yisuna saqariki mariasa firaqoo dadaaqiaqa.

*Pauroofa taikara aaquqirufa faqa nimandara ufa faqa qimaqoo ufafa.*

<sup>11</sup> Doo qinee Pauroosa moo fasiqa qimami marunanoo mifa akara ridanoo doo maqee qeeqa kai kirifi qumaree ati rafaqaqifira ufa qeeqa kai firaqoo akara ridaqa.

<sup>12</sup> Inniki nipatasaa akooqoo mari ainainara kai darara qimasee nimooqimariasa nariqa nimooqiaqee qimasaidaqa inni fainanduqiranara sandanainai qida miqiaqee qimariasa maridaqa. Misa sia kuqaa anoonainainau auqaidau fainanduqaaqee qidau, misa asauku mundirana aunirira saqarisaa arunara qimannimifaqa mina akiqara Yuda maqannaasa darifoo qimasee fainanduqira oosana Yisuna kuqiranasaa ootupamasaifaqa Yuda maqannaasa niranaraqarafa asooaifanoo sia daruqaqee.

<sup>13</sup> Misa inniara Yuda maqanna fainanduqira oosana maraqaqee qimariasa nari sia Mooseena sandufamau fimariasa misa inni Karatia maqannaara fainanduqira oosanara eedoo qianara kai nari nimooqiaqee qimasaidaqa inni fuki faaki qidaqa.

<sup>14</sup> Qinee qeeqara qidaqa qinee maasa karaambaqa, asauku mundirafa, Yisufa aunirira saqarisaa kuqunara minara kai qinee uqeerasee amooqianauroo. Mi auniriranasa kuqunannai maa maqa maaqanasaqarara ainaina kuqinoo mari ifoo qidaqa sia kasidanoo minannai faqa qinee faqa kuqira foora qimarunausa marunanoo maa maqa maaqanakinna mandainaina sia qini qumaraidanoo.

<sup>15</sup> Fainanduqira fee, sia fainanduqira fee, sia mifa anoona ainaina maridanoo. Anoona ainaina faiqi anaasee kuqaa naundurakinaafa fukaikamambinaqa andeedqasee marirafa mifamma anoona maridanoo.

<sup>16</sup> Innee mi iriranamau fimariasa qimannimianauroa Anutufa naundurari asoosana faqa Anutufa aidira nifauarana inniki faqa aiqama Anutuna faiqi anaasee maqasaa mariasaki faqa mariani.

<sup>17</sup> Qini Pauroosa rafaqaqifira ufa maaqimminoo maridanoo. Sia moo fannoo kafa qiniara Yisuna ufara sia andeedqasee qimannimimari fee qifaranoo. Qinee kuqaa uqanna Yisuna karabusa ainainira fasiqa maridaqa Yisuna ufa andeedqasee qimannimifannana akiqara qini darufa qifaqasaa qufaanakuru aanaaqi marifa mifa qiniara kuqaa Yisunaindi fee qimasee akoooroidanoo. Misa qini darusaafaqa mi ufaanakurunara Yisuna akarara foora maridanoo, aiqamausa qini qiqafamasee Yisunaindi fee qiaqee.

<sup>18</sup> Maasa karaambaqa asauku mundirana Yisuna afaarirafa inniki mariani. Kuqaa.

## **EEFEESUSA**

### **Efeesusa maqusanaasa Pauroofa akara rumannimaqoo ufafa.**

<sup>1</sup> Qinee Pauroosa Anutuna iriranannai asauku mundirana Yisunaindi maridaqa, mifa diqiqoo fasiqausa maridaqa. Anutuna maqasaa fasiqa anaasee Efeesusa maqusai mariasa asauku mundirana Yisuna ufamau andeeqasee magee maqee fimariasa inni maa akarana rumannimaqaidaqa.

<sup>2</sup> Maasa qikoofa Anutufa faqa maasa karaambaiqa asauku mundirafa Yisufa faqa nari afaarirana faqa nari asooarana faqa inni nimiani.

*Pauroofa asauku mundiranaki mariasa innaarunai amiqi amiqirana mararufa.*

<sup>3</sup> Maasa dufi dufi qirana maasa qikoona Anutuna faqa maasa karaambaiqa Yisuna faqa nimiaqa. Maasa asauku mundiranaki keeqafufanoo mina akoofa Anutufa amiqi amiqirana maasa Yisuna namufaqa qiminau. Mifa innaarunaindaraa amiqira dadaaqirana qimaqaifanoo miqoo innaarunai maridanoo, minara maasa dufi dufi qimamaqaidaqa.

<sup>4</sup> Ooqai maa maqa maaqana sia auqu kamuqoo faiqi faqa sia maru kamuqoo Anutufa moomoosa kambiaqa marifandinausa kinaana maasa rusandeesamumandee marararee qimaqoosa maraqaisa maridaqa. Nari asauku mundirana Yisunannai maasa maraqoosa sia aaqarusa mariaqera noori kandamasee andeeqarusa mariaqee qimasee maasa rusandeesamumasee maraqoosa maridaqa.

<sup>5</sup> Sia faiqi maru kamuqoo Anutufa nari aidiranannai maasara maaqimminau, qeeqa qisauku mundiranannai misa qini faiqi namu qiraamuqmaakai kammambifaqa qeeqa unnannai misa mara quqaanauree qinai. Anutuna aidirafa fuaninnana miqiminoo maridanoo.

<sup>6</sup> Anutufa nari kaaqa qara areenara afaarirana nari amuqusira amaaku kaqi nimimari ainainnara foora kaqi niminai. Minara maasa qimuqusa ookiqari idaaqira ainaina uqannee qiaqera kaqi niminai.

<sup>7</sup> Anutufa nari asauku mundirana kuqiranannai maasa mandainainakinaana idukuqiseenoo maasa mandoosana akiaqara minniqisainaga marianaara. Maasa minara irisee Anutuna firaa afaarirana akooqoo uqanna marifaqa qafamasee irisee naqimasee maraanauree minara rufiida furufaridaqa.

<sup>8-9</sup> Anutufa nari irirana firaana faqa qafeemariana faqa maraseenoo minannai ooqai marararee qimaqoosa maraseenoo nari kukeeqara irirana asauku mundiranannai aiqama qimaqoo ainaina anoonaikianifeera qimasee mina maa kamuqoo kooroomasee nari faiqi namu araamuqmmaakai kiranara maasa qimaqiminai.

<sup>10</sup> Anutufa nari kai irinoo andeeqara aukuanee qimasee nari ooqai kambiqaaninna ainainara qimarufa taikaannoo minara qimarufa maaqimmiannoo Anutufa aiqama ainainna auquqoo ainainafa innaarunai mari ainaina faqa maaqoo mari ainaina faqa oonu maree ani mareeqeenoo moodaanaki quqaseenoo asauku mundirafa misa nikaqasaa mariannoo.

<sup>11</sup> Anutufa mi aiqama ainainna nari ooqai fuanee qimaqoomau fidanoo miqidanoo. Anutufa nari ooqai fuanee qimaqoomau fidanoo maasa nari aiku asauku mariaqee qimasee faiqi aanaaseeki rusandeesamumandee maasa maranau. Sia kaqi miqinai, asauku mundiranannai kai mina aiku asauku mariafanausa maridaqa. Ooqai indaaru oosana aroo aukuanna mi irirana maraqoomau fidanoo asauku mundiranannai maasa maraidanoo.

<sup>12</sup> Maasa asauku mundirana irirana naaree indaaru irisee minara afeesimariasa maasa Anutuna kaaqa areenaranara dufi dufi qidaqa.

<sup>13</sup> Innee Efeesusa maqannaasa faqa miqikai iqa mariafanoo. Amiqira fasaasa ufa innaaruna asumu marirana nimi maria ufana innee iriseeqa kuqaa anoonufee qufanoo Anutufa nari naaquqara maraquna nimiani qimasoofo inni niminoo minannai nariara utaaqanau.

<sup>14</sup> Anutuna maraquna nimirafa Anutufa innaarunai qimianinna ainainnara qima afeekaikamma utaaqamaqoofa maridanoo, mifa Anutufa kuqaa mandainaina akiaqara rumberanakinaana idukurana qimiannoo fee qimarifa maridanoo, maasa minara irisee Anutuna kuqaa areenaranara dufi dufi qidaqa.

*Pauroofa Efeesusa maqannaasara innaaru qidanoo.*

<sup>15-16</sup> Qinee Pauroosa minara iriseeqa innee Efeesusa maqannaasa Karaambaiga Yisuna saqarikiranara irisee faiqi aanaaseera Anutuna ufa irimariasara ridaqa dadaaqi-  
daqa minara iriseeqa iriafannaqooqari qinee Pauroosa inniara Anutufinnai dufi dufi  
qidaqa. Qinee maqee maqee inniara innaaru qidaqa, maasa karaambaiga asauku  
mundirana Yisuna kaaqa areenarana akoofa

<sup>17</sup> Anutufa narí maraqa inni nininanoo mifa irirana faqa Anutuna oosana faqa  
kooroomannimaqainaqa innee minara iriaqeera innaaru qidaqa.

<sup>18</sup> Anutufa inni naaramasee narí areenaranara afeesiaqee qimarianara innee iriaqee  
qimasee inniara innaaru qimasaanaqa inni nifu nitikura quandasainaqa areenarana  
nimianinnanara afeesiaqeera innaaru qidaqa. Naaquqara amiqi amigirafa idaaqirafa  
moomoo uqanna narí maqasaa fasiqa anaasee innaarunai nimirara qima afeekaikidanoo  
nimiannoo minauqara faqa inniara iriaqeera innaaru qidaqa.

<sup>19-20</sup> Maasaki mina ufasaq irirana rusimariaqooqari Anutuna afeeka fannoo maasaki  
ainaini marinara faqa innee iriaqeera qinee Pauroosa inniara innaaru qidaqa. Anutufa  
asauku mundirana kuqiranakinaana uqeerasee innaarunai narí aaga narí asauku  
uqannai ooqumaruqoo firaa afeeka faqa maasaki ainainimarifa faqa amana amana kai  
moodaa firaa afeeka maridanoo.

<sup>21</sup> Miqoo innaarunai asauku mundirafa aiqama ainainasaa uriqaramafi rakisidanoo,  
aiqama innaarunai uriqararasa faqa faiqi firaasa faqa afeekafaqasaa faqa karaam-  
baigauqa faqa misauqa faqa urinaaqaramafi rakisidanoo. Mifa aiqama afeeka nuqu  
faqaasa maa maqa maaqanaki mariasa faqa innaarunai mariasa faqa urinaaqaramafi  
rakisidanoo.

<sup>22</sup> Anutufa aiqama ainaina mareeqeenoo asauku mundirana aramandunnai  
quqaseenoo mina mareeqeenoo Yisuna ufara suqimariasaa nikiqasaa quqasaifanoo  
aiqama ainaina uriqarara karaambaiga maridanoo.

<sup>23</sup> Yisuna ufara suqimariasaa Yisuna adakara foora maridaqa, aiqamai mariainainafa  
qumbiqeemarifa narí adakaki Yisuna ufara suqimariasaki firaqoo maridanoo.

## 2

### *Ooqai kuqiranaki ubeekoofaqa maqee asumu mariranaki ubeekaqa maridaqa.*

<sup>1-2</sup> Qinee Pauroosa sia Yuda maqannaara qidaqa innee aanaamuru mariasara qidaqa,  
ooqai inniqa ufa rukiarana faqa aaqarana faqa miqiunna akiaqara kuqiranaki mariusa  
mariqau, mi aukuanna maa maqa maaqana mandoosanamau kai fimariqau. Anutuna  
ufa rukiee mariasa maqee rakisi mari afaannafa Anutuna innaaruna meerai marifanoo  
mina ameemaanaí marina, mina ufara eedoo kai qimarusa mariqau.

<sup>3</sup> Maasa faqa aiqamausa aanaamuru Anutuna ufa rukiee mariasa naanna ramasee  
maasa qeeqa faiqi faiqi mandiriranamau fidaqa qeeqa qifaqaa irirana afaariqa kaqi  
qeeqa manda didiramau kai fiqiafana. Maasa Yuda maqannaasa aanaamuru naanna  
ramasee qeeqa qifaqaa afaaramasee mina akiaqara Anutuna aranaqaranaki firaridaqa.

<sup>4-5</sup> Anutufa mina qafamaseenoo maasara amuqusirana faqa nifauarafa faqa firaatia  
marifanoo asauku mundirana saimbaqa maasa faqa kuqiranakinaana uqeera qiseenoo  
sia moo ainaina, Anutuna afaarirafa kai innaaruna asumu mariranaki quqanniseenoo.

<sup>6</sup> Anutufa maasa asauku mundirana Yisunasaa atooarana qafamaseenoo mina na-  
mufaqa kuqiranakinaana uqeeraqiseenoo Yisuna namufaqa Anutuna innaaruna mari-  
asasaa rakisi nimaqaaqee qifaqa miqoo rakisirusaikiqa marianaaura.

<sup>7</sup> Sia Anutufa fifau miqinuu, narí firaa afaarirana faqa, maasa asauku mundirana  
Yisunaki keeqarana qafamaseenoo narí firaa aidirana amuqusirana faqa naaru kam-  
biqainausa uqannifiqarara miqinuu.

<sup>8</sup> Sia moo ainainannai Anutufa narí afaariranannai kai inni innaarunai asumu mari-  
ranaki quqannisaidanoo, innee Yisuna saqarikiranannai afaaramma nimaqaidanoo.  
Inni asumu nimirafa sia innee andeeqasee fimarianasaaafau mundidanooafau, sia innee  
amiqira oosana marasaida kadaapiridee qimarianasaaafau mundidanooafau, Anutuna  
kaqi nimiranasaa kai innaarunai asumu marirana maasa qimirana uqeereenoo.

<sup>9</sup> Sia maasa qeeqa kadaapiriranannai innaaruna asumu maraanaura minara sia fifau  
maasa qeeqa qimooqira ufa mariannoo.

<sup>10</sup> Anutufa maasa auqufa maridanoo sia fifau maasa auqinuu, maasa asauku mundi-  
rana Yisunasaa atooqaranasaaqari andeeqasee nirana marirana mariaqee qimasee  
maasa auqinuu. Doo ooqai mi andeeqara nirana marirana maasara deedaqammaqoofoa  
maridanoo.

*Yuda maqannaasa faqa aanaamuru faqa asauku mundiranaki moodaanaki maridaqa.*



<sup>11</sup> Yuda maqannaasa ooqaindari nariara kai Yuda maqannaasa fainanduqirausa Anutunaindi maridee qimasaida inni aanaamuruara sia maasa fainanduqirausa marun-nanara agoosai mariasa maridee qimariqau. Misa fifau nari fainanduqiranara qidaqa miqi qimariqau. Innee aanaamuru mariasa innee ooqai mariunara iriaqa.

<sup>12</sup> Innee Efeesusa maqusanaasa asauku mundiranasaagari naaduma nianasaa mariusa mariafanoo, innee aanaamuru Anutufa maqasaagaraasaki sia rusandeesamumandee nariara maroosa mariafanoo, aanaamuru nianasaa mariusa mariafanoo. Anutufa Yuda maqannaasa faqa moodaanakikira ufa oosana oosana qima afeekaikiranasaa mundiqa mariusa mariafaqa innee aanaamuru sia minaki marusa naaduma nianasaa marusa mariafanoo. Innee Efeesusa maqusanaasa maa maqa maaqanaki maridaqa sia Anutunara faqa moo ainainara faqa irimariqau kaqi furufara kaimmiqaniqau, Anutuna siaisa mariqau.

<sup>13</sup> Doo maqee innee asauku mundirana Yisunasaa atooqaana akiaqara inni ooqaindari nianai mariusa maqee Anutufa inni rarisameegeenoo adeedi quqeenoo, asauku mundirafa aunirira saqarisaa kuqunannai kai miqinoo.

<sup>14</sup> Anaamuru faqa Yuda maqannaasa faqa namuqaara foora niana niana rakee iqa mariaasa asauku mundirafa nari kai mareeqee moodaanaki quqaseenoo asooarana maasa qiminuu. Yuda maqannaasa faqa aanaamuru faqa namuqaakiqa marufanoo qambaana faandamura ititanoo maruna asauku mundirafa nari afaaqannai faandaamura rakee mandoofaqa moodaanaki kiqau.

<sup>15</sup> Mooseena sandufakina oosanoosana ainainara nimaarusirana mifa faandaamurara foora Yuda maqannaasa faqa aanaamuru faqa aiqamaqara rakeemaqoofaqa mariqau. Asauku mundirafa doo mina ruka taikasooafaqa mi atiqanda oonu maree ani maree asauku mundirana faqa moodaanaki kiqa asooaranaki maridaqa.

<sup>16</sup> Asauku mundirafa nari aunirira saqarisaa kuqunannai Yuda maqannaasa faqa aanaamuru faqa nariara nariara fidiqaa imaruna aru taikanau, nari aunirira saqarisaa kuqunannai Yuda maqannaasa faqa aanaamuru faqa rakimaruna taikaseenoo Yisufa mareeqeenoo mafi moodaanaki quqaseenoo mareeqeenoo Anutuna aanooqirana taikaseenoo nari akoona Anutunaki asooaranaki quqanau.

<sup>17</sup> Miqi marunara asauku mundirafa nari amiqira asooara fasaasa ufa maree qumureenoo innee Anutunasaaqari nianai maria anaamurusa faqa Yuda maqannaasa Anutuna aaga mariasa faqa qimanniminuu.

<sup>18</sup> Maasa aiqamaqara Yuda maqannaasa faqa aanaamuru faqa asauku mundiranannai kai amana maasa moodaa maraqunaki anireeqa maasa qikoona Anutuna afusaa kikiqianaaura.

<sup>19</sup> Ooqai innee moo maqannaara foora aanaamuruara foora mariasa mariafanoo doo maqee sia miqiqa mariafanoo innee doo maqee Anutuna aiku asauku mariasa Yuda maqannaasaki moodaa maqannaasa kammambi innee mariafanoo.

<sup>20</sup> Doo maqee sia Yuda maqannaasa kai, innee faqa maaqara foora usakaffanoo asauku mundirafa Yisufa nari uqanna faakana miqirafa marinanoo Yisufa niqiqoo fasiqausa faqa Anutuna tamummaqara fasiqauqa faqa maaqa atunara foora marifanoo innee faqa maaqa asaanara foora misasaa faqa Yisunasaa faqa atukaramambiqa mariafanoo.

<sup>21</sup> Yisufa uqanna faakanara foora maridanoo aiqama maaqa asaana afapita qumarsaifaqa afeekaikiqa mariafanoo karaambaiqa naaquqara amaana maqara foora usakaidanoo fimaree aimaree innooqaidanoo.

<sup>22</sup> Innee aanaamuru asauku mundirana saqariki mariasa faqa aiqamausa Yisunaki mariasa faqa Anutufa inni qumareeqeenoo maaqara foora usakaseenoo nari maraqunannai mi maqanaki inniki mari maqafa maridanoo.

### 3

*Pauroofa nari aanaamuruki saikiranara qidanoo.*

<sup>1</sup> Qinee Pauroosa minara iriseeqa inni Efeesusa maqannara Anutufinnai innaaru qidaqa. Qinee inni aanaamuruara qimannimunnana akiaqara asauku mundirana Yisuna rumberanara foora Roomma maqannaasa rumberanaki marunaua maridaqa inni innaaru qidaqa.

<sup>2</sup> Anutufa nari afaariranannai inni aanaamuru dadaaqiaqee qimasee qimunara innee amiqimmandee minara irimariafanoo.

<sup>3-4</sup> Anutufa Yisunara ooqaindari kukeeqanoo marunara maqee aukuaana qini kooroomaqimaqeenoo. Qinee maa pasanaki kaqikaqoo minara inni qimannimiqa, innee mina asaana rumaseeqa iriqa qiniara asauku mundirana kukeeqara irirana amiqimmandee iridanooommifoo qifaranoo.

<sup>5</sup> Ooqai narí kukeeqara irirana Anutufa sia kooroo inau, doo maqee narí maraqunannai amiqira niqíqoo fasiqausa faqa tamummaqara fasiqauqasaa faqa qimanniminoo.

<sup>6</sup> Mina kukeeqara ufa maaqimminoo maridanoo. Yuda maqannaasa Anutuna amiqi amiqiranaki maridaqa, Yisuna amiqira fasaasa ufa fannoo inni aanaamuru faqa oonu mareeqeenoo Yuda maqannaasa amiqi amiqiranaki quqannisaidanoo. Innee aanaamuru mariasa maqee Yuda maqannaasa saimbaqa moodaa nifaaqara foora maridaqa asauku mundirana Yisunakiqari Yuda maqannaasa qima afeekaikammaqoofa innee aanaamuru misa saimbaqa minaki marida maree mariafanoo.

<sup>7</sup> Anutufa narí afeekannai naakaparana akoofasaikirana moo qimufaqa qinee minanai Yisuna amiqira fasaasa ufa saikira faiqikiqa maridaqa.

<sup>8</sup> Qinee Anutuna aiku asauku maqasaa fasiqaki oorudupiraua marunanoo Anutufa sia minara irinoo kaqi mi naakaparana qiminoo diqiqamaqimaqeenoo asauku mundirana, innaarunai nimira amiqi amiqira ainaina moomoo ainaina sia amana asaana rirana amana ufi ufanara aanaamuru qimannimiranaki qini quqaqisaiifaqa maridaqa.

<sup>9</sup> Anutuna ooqai kukeeqara irirafa maqee kooroommasee faiqi anaasee amiqimmandee iriaqeera faqa qini minaki faqa quqaqisaiifaqa maridaqa. Anutufa aiqama ainaina auquqoofanoo marufa miqooqari moomoo aukwana narí kukeeqara irirana Yisunara kisaqaqasaa rafaqaquqoofanoo marinau.

<sup>10</sup> Maqee aukwana kooroo ianifeera qimasee Yisuna ufara suqimariasa misannai Anutufa narí irirana quandaqaandidanoo uqannifiqaiifaqa qafaidaqa mina amiqi amiqiranara innaarunai ameemaanai mariasa misa uriqararusa faqa rakisirausa faqa maqee uqannifiqaanifeera Yisuna kooroo idanoo.

<sup>11</sup> Anutufa narí naaru naaru mariranaki maridanoo mi ainainna auquanauree qimaqoona maqee auqinuu, narí asauku mundirana Yisunannai mi ainainna, narí ufara suqimariasakina narí irirana kooroo ianifeera auqinuu.

<sup>12</sup> Maasa Yisunasaa atooqaq mariannai faqa maasa mina saqarikiranannai faqa sia maasa nisaaurida rufiaanura, paasoosamasee Anutuna afusaa fuannanara mi eedoo qirafa maasaindi maridanoo.

<sup>13</sup> Qinee Pauroosa minara irisee inni afeekaikamandaida qimannimidaqa. Qinee Yisuna ufa qimannimunaqa misa minara fifau qini karabusaki quqeeqa. Inni Efeesusa maqannaasa qinee karabusaki marunna aupuraranara iriseeqa sia Yisuna ufa miniseeqa kudoosaapaqa, innee minara maaqi qiaqa Pauroona karabusaki marirana maasa Efeesusa maqusanaasa amiqimaqimaqaidanoo fee qimasee asasiaqa.

*Innee nariara nariara nimuqusiranaki mariaqeera qidanoo.*

<sup>14</sup> Qinee minara iriqa maasa qikoona Anutunara iriseeqa qiqoori saunarafiqa kummara mafi inniara qeeqa qimuqusannoo innaaru qidaqa.

<sup>15</sup> Innaarunai mariasa faqa maqasaa mariasa faqa aiqamatia Anutunasaaqaraana nariqa nuqu uqanna maraidaqa.

<sup>16-18</sup> Mi Anutunara inniara innaaru qidaqa, asauku mundirana innee saqarikiranannai mifa anireenoo inni naunduraki maaqakiara foora ani keeqaanifeera. Mifa narí maraqunannai narí areenarana firaanakiqari inni naunduraki afeeka niminaqa mapukusee mariaqa. Qinee inniara maaqi qidaqa innaaru qidaqa, innee inneeqa atukara foora faqa faakanara foora faqa nariara nariara nimuqusiranaki mapukusaaqa, innee Efeesusa maqannaasa faqa Anutuna aiku asauku moo maqannaasa mariasa saimbaqa afeeka marinaga minannai asauku mundirana inniara amuqusinoo aidirana firaana iriaqeera innaaru qidaqa. Mifa inniara amuqusinoo aidirana mina kisaqaqasaa aidirana faqa mina gusa kamu faqa mina meerai sandaaqaira faqa mina meemai farumara foora marirana faqa mina firaatiara iriaqeera qinee innaaru qidaqa.

<sup>19</sup> Eeoo innee mina inniara amuqusinana firaanara iriaqeera innaaru qidaqa, sia amana moo fannoo firaqoo iriannoo, firaafa maridanoo, mina amuqusinana firaafa maridanoo, innee mina amuqusinana firaana iriseeqa Anutuna umbiqarafa innikina umbiqaanifeera inniara innaaru qidaqa.

<sup>20</sup> Anutuna afeeka fannoo maasaki saikiranannai naunduraki amiqi amiqirana nimanoo, mina naunduraki dadaaqirafa maasa sia amana minara iramasee qimianne qianaura sia amana maasa minara irianaura firaainainatia maridanoo.

<sup>21</sup> Yisuna ufara suqimariasa nariqa asauku mundiranasaa atoaranannai Anutuna amooqirafa maqee kamuqoo faqa naaru naaru faqa mariani.

## 4

*Maasa Yisuna adaka atiara foora maridaqa.*

<sup>1</sup> Qinee Pauroosa karaambaiqa Yisuna ainaini marunnana akiaqara Roomma maqanna karabusaki maridaqa. Qinee karabusaki maridaqa inniara afeekaikamandee qimannimidaqa. Anutufa inni naaramasoofaqa innee asauku mundirana saqariki maru kamuqooqari inneeqa nirana mariranara andeeqasee marianifee qimasee inni naarama minaki quqeenoo. Inneeqa marirafa mina amanaki marianifeera qinee qeeqa qimuqusa ookiqari afeekaikamandee qimannimidaqa.

<sup>2</sup> Sia Anutufa quqaqoo andeeqarana minnisee moomau fuaqa, innee maqee maqee sia urinaaqaraqa oorudupimasee mariaqa, sia aanooiaqa, ireeda kai piseopisoomandee mariaqa sia faiqi aanaaseera qusa ufa qimasee aanooiaqa kisaqaqasaa ireeda kai idaaqam-mannimaqaqa. Innee faiqi aanaaseera nimuqusinanoo nidimarinaga mifa kooroo ianifee qimasee narinni narinni dadaaqifanoo mifa kooroo iani.

<sup>3</sup> Anutuna maraquna fannoo inni moodaanaki mara quqasaifaqa mariafanoo innikina asoofara inni moodaanaki afapita qumaraifaqa mariafanoo innee mina moodaanaki marirana amiqimasee rakisia, rakee iani.

<sup>4</sup> Maasa Yisuna ufa irimariasa moodaa nifaaqara foora maridaqa, Anutuna maraquna faqa moodaa maridanoo Anutufa moodaa ainainara afeesiranaki inni rarisama quqeenoo.

<sup>5-6</sup> Karaambaiqa moodaa kai maridanoo, Yisuna saqarikirafa moodaa kai maridanoo, amaana nammari moodaa Yisuna auqusaa kai rumannimaqarafa maridanoo maasa aiqama maqa maaqakinaasa nikoofa Anutufa moodaa kai maridanoo, aiqamausa karaambaiqa mifa kai maridanoo mifa nari ufara suqimariasa aiqama naunduraki maridanoo aiqamausakiaqa ainainidanoo.

<sup>7</sup> Asauku mundirafa nimira dadaaqira afeeka maasa aiqamausa qiminau nari moomoo dadaaqiranakinaana qiminau. Moo dadaaqira afeeka moo fasiqa aminau, moo dadaaqira afeeka moo fasiqa anaasee niminau. Nimisoofaqa minannai Yisuna saika maraaqera niminau.

<sup>8</sup> Ooqeenaa tamummaqara fasiqa asauku mundirafa dadaaqira afeeka qimianinnanara maaqi qimasee akara rinau.

Mifa rakira karaambaiqara foora maridanoo namuqaa maqusaki ititasee misa narusee faiqi moomoo karabusa rumbasee misa ainaina faqa indaa mamaree nifqamaree meerai nari maqusai oorureenoo nari maqannaasa qimannimifaqa mina amooqifanoo ainaina raina niminau.

<sup>9</sup> Mi tamummaqara fasiqana ufa kooroo irafa Yisunara maaqimminoo maridanoo.

<sup>10</sup> Mifa nari maqusai meerai ooru funara maaqi qidanoo, mifa naaree meemai maqa ameemaanaai ooqureenoo miqooqari mifa kai innaaruna maarini aiqama innaaruna maarinni oorureenoo nari marirana nari auqu amana kai marianifeera aiqama atinai nari irirana nari auqu amana kai quqasanau.

<sup>11</sup> Mifa kaqi nimira dadaaqira afeeka faiqi anaasee niminau, mi dadaaqira afeekafa ainainirana akoofasaikiaqee qimasee akaqausee niqiqoo fasiqausa akoofasaikirana niminau, akaqausa faiqi anaasee qimannimirana akoofasaikirana niminau, akaqausa aamina maqannaasa qimannirana akoofasaikirana faqa paatoo saika akoofasaikirana faqa ufasaa rakisirana akoofasaikirana faqa niminau.

<sup>12</sup> Anutufa sia fifaufau mi dadaaqira afeekana niminau, faiqi anaasee Yisuna ufara suqimariasa Yisuna afaaqara foora afeekaikamasee mariaqee mi dadaaqira afeekana oosana oosana maasa qiminoo qinau, innee maa dadaaqira afeekana marasee minannai qini ufara suqimariasa afeekaikamannisaqee qinau.

<sup>13</sup> Maasa miqimamaree fidaqa maasa kasooqaqee moodaanaki kianura. Anutuna amaakuara irirana faqaa irirana minasaa rusirana faqa miqianannai mi moodaanaki kirafa amana kambiqaannoo, mikari maasa faiqi firaasa iriranara foora maanaauranoo maraseeqa asauku mundirana firaa irirana amana kai ooru mundufuanauranoo.

<sup>14</sup> Mikari maasa sia faiqi aanaaqiara foora aiqama oosana oosana amaana ufa iriseeqa munari minari ianura unna ufa qimaria fasiqausa nari nikaruqira finnai akaqausa aaqaranaki rarisama quqaidaqa maasa misa ufa iriseeqa sia ufaira foora aiqama saqari udammi udammianaura.

<sup>15</sup> Maasa sia miqiaqa, maaqiaqa, nariara nariara qimudao qimasee ridaqa minaki maridaqa nariara nariara sia unnufa qiaqa, anoona ufa kai qidaqa maasa miqianannai faiqi aanaaqiara foora asauku mundirana maasa qikiaqa amanaki innooqamaree ooru mundufuanaura.

<sup>16</sup> Asauku mundirafa nari ufa ameemaanaai mariasa rakisimarifaqa misa minara maasa qikiaqa fee qidaqa. Faiqi afaqa sia moodaa ainaina maridanoo oosana oosana afaqa ati fannoo aadu aadu ainaina akoofasaikirana moodaanaki ootupamafifanoo moodaa fasiqa maridanoo. Asauku mundirafa maasa qikiaqa marifa maasa rakisimarifaqa

maasa faqa miqi kai iqa faiqi afaaqa fooqaana aadu aadu akoofasaikirausa moodaanaki ootupanoo marifaqa maasa qikiyaq Yisunasaa atooqa maridaqa mina afaaqaikiq maridaqa. Maasaki aiqamausa naadu naadu nariqa saikirana andeeqasee maridaqa sia nariara nariara nikoogaani nariara nariara rinnanannai moodaanaki innooqafinoo amiqimmandee kambiqafi fuanno.

*Asauku mundiranaki mariasa asukunakinaa oosana taikafinanoo kaaqa qarafa aniani.*  
<sup>17</sup> Miqi marianara qinee Pauroosa Karaambaiqa auqusaa inni qimannimidaqa afeekaikamandee kafaa kafaa qimannimidaqa, sia Anutunara aamina maqannaasa naanna raaqa. Misa irirafa fifau fafaumminoo maridanoo. Innee andeeqasee mariaqa.

<sup>18</sup> Misa nitukurakinaa irirafa asukunaki maridanoo Anutufa nimimari marirana sia misa kaqikaago maraidaqa aanaamuruara foora sia maraidaqa, misa kaaqa irirana siaisa furufari mariasa nari qimaqaamau kai fimariasa, minara kai asukunaki maridaqa.

<sup>19</sup> Misa nisaurirana taikarasa maridaqa nari nifaaqa marirana mandoosana kai ubeekaidaqa oosana oosana nisaurimaria ainainna sia nisauridaqa fanandidaqa kaqi umaraidaqa.

<sup>20-21</sup> Innee Efeesusa maqannaasa miqira mandoosana sia asauku mundirana saaqaraana iriafanoo, innee minara irisee Yisuna aiku asauku kambiqafufaqa andeeqara irirana faqaasa inni mina anoona ufa inni qimannimifaqa irimariafanoo.

<sup>22</sup> Minara innee inneeqa ooqeenaa marirana nirana fatika aquusaqa inni ooqeenaa marirafa inniqa mareeqeenoo inniqa manda nikaruqira nidiranaki quqasoofaqa miqoo innee inneeqa kai kuridimariafanoo.

<sup>23</sup> Inni nimuqusaki manda nidira nidimarina faqa nitikura mandirira irimariana faqa taikasee innaarunaindaraana fuka amiqirafa kai mariani.

<sup>24</sup> Inni innaarunaindaraa fuka marirafa Anutuna nari miqirafa maridanoo, mina anoona ufaki andeeqasee marirana faqa Anutuna ufa ameemaana marirana faqa mina amooqirana faqa mi fuka marirafa anoona maridanoo, innee mi marirana kai qamunna foora afisusee minaki maraqa nuaqa.

<sup>25</sup> Doo minara maagoogari sia unna ufa kafaa mariani, taikaani, aiqama narinni narinni anoona ufa kai nari qimami nari qimami qiaqa, maasa aiqamausa moodaa nifaaqara foora kai marunnaara narindi narindi marunnaara unna ufa sia qiaqa anoona ufa kai qiaqa.

<sup>26-27</sup> Ani aanoorafa kambiqafinoo sia ani rarisameeqee mandainainaki quqaani, anee aanoo qinana doo mi faasaanasaa mi suanina keeqarana namufaqa taikaseena faiqaa sia kisaagasaa aanooida maria, dauni taikaa, Sadannafa minaki keekafinoo mandainaina ugeeraandoora.

<sup>28</sup> Ainaina ummuari mari fasiqafa ummuarirana taikaani, taikasee quandaki andeeqasee nari ainainamasee nari narana namasee kudi fasiqauqa faqa naida niminaqa naaqa.

<sup>29</sup> Sia putaa ainaina afunda ainainara ufa qiaqa, faiqi anaasee pooduqamannimaqaida dadaaqimaria ufana kai qimasaifaqa misa iriseeqa amiqirana adiafaairana mareefarano.

<sup>30</sup> Manda ufa qinanoo Anutuna naaqaqara maraqa fannoo iriseenoo akooqaano. Anutuna maraqa fannoo inni faqa marifa Anutuna akarara foora narindi fee qidanoo inniki akara rinoo maridanoo. Mi maraqa akara faqa maaqi qimasee inniara qima afeekaikidanoo kasooqaqee Anutufa qinanoo Yisufa qumuree inniara qinindi fee qimasee maraannoo.

<sup>31</sup> Doo maqee aukuna aiqama sukaqara ufa faqa qusufa qimasee darara qirafa faqa naunduraki mari aanoorafa faqa fatika aquaqa. Nariara nariara fira kari nameera ufasa niqimariafa faqa aguraree mariannana faqa sia kafaa mariani naundurakinaa nariara nariara fidiqaa ira irirafa faqa taikaani.

<sup>32</sup> Sia miqiaqa, maaqiaqa, nariara nariara ireeda kai nimuqusa reendeenirafa faqa dadaaqirafa faqa mariani, narinni narinni mandainaina minnisaqa. Maasa oosana oosana ainainannai Anutuna mandaikamma amaqaafanausa marifanoo Anutufa asauku mundiranannai maasa darirana minniqisanau. Doo innee minara iriseeqa mina amana kai doo inniqa niqoonausa mandaikamma nimaqarana nari minnisee nari minnisee iaqa.

## 5

*Anutufa maasara rirana ammeemmeriaqa kaaqa qarana maraqa.*

<sup>1-2</sup> Innee Efeesusa maqusanaasara Anutuna amuqusira aiku asauku marianara mina ammeemmeriaqa asauku mundirafa maasara rinoo amuqusinoo nari marirana maasa qimaaqa maqasee kuqiranaki quqasoofanoo tatufira aandau suqara fara foora

Anutuna aikiambu inau, innee faqa miqi kai iqa asauku mundirafa maasara rirana aameemmerida nariara nariara ruaqa. Inni nariara nariara rirafa maqee maqee inniqa marirana rakisinnimaqaani.

<sup>3</sup> Innee Anutuna maqasaa aiku asauku marianara inniki faiqi anaasee nari ummuari nari ummuari maria ufana faqa ikairi irirana faqa ainainara faqa aanaaseera faqa kaaqa fanandi mariana faqa sia mi oosana maraqa minara ufa qimariafa faqa doo taikaaqa.

<sup>4</sup> Ikairi putaa ufa faqa furufarira ufa faqa uteeti qimasee naainandara qimaria ufana faqa aiqama sia andeeqara ufa sia inniki amanakinoo maridanoo Anutuna maqasaa aiku asauku mariafanoo. Innee sia miqaa miqaa iaqa, maaqiaqa innee maqee maqee Anutunara dufi dufi qirafa kai inniki mariani.

<sup>5</sup> Innee maa moodaa ainainnara kai amiqimmandee iriaqa, faiqi anaasee nari ummuari nari ummuari mariasa faqa ikairi faqaasa faqa kaaqa ainainara rimariasa faqa miqaa qiganuasauqa, asauku mundirana ququsaki faqa Anutuna ququsaki faqa sia uqanna kaqikaqoo mareefaranoo. Kaaqa ainainara rimaria oosanafa mifa moo unna anutunara innaaru qimaria fara foora mina ufa iri maria fara foora maridanoo.

<sup>6</sup> Minara moo fannoo mi oosana oosana manda ainainnara aufadamasee ufa qimasee nari furufarira ufannai inni nikaruqimasee mandainainaki fuaqee qinaqa sia uqanna innee mina iriaqa.

<sup>7</sup> Maqee maqee Anutufa mi manda oosannara kai qaoo qimarifaqa sia irianannai kai Anutuna aanoo qirafa misasaa aqufidanoo. Minara qinee inni qimannimidaqa miqinna fasiqa anaaseesa sia misa faqa mariaqa, nianasaa rufiasee mariaqa. Minara qinee maaqi qimasee qimannimidaqa.

<sup>8</sup> Ooqai innee Eefeesusa maqusanaasa faqa asukunaki mariusa mariafanoo doo maqee karaambaiqa Anutuna faiqi anaasee aiku asauku kamambi mariafanoo kaaqa qarana fooqaasa mariafanoo, doo minara iriseeqa kaaqa qaranaki mariasara foora ida mariaqa.

<sup>9</sup> Kaaqa qarafa qafuqakinaa ainaina amiqi amiqifanoo kambiqaiddanoo Anutuna kaaqa qaranaki mariasa miqi kai iqa kaaqa qaranaki maridaqa misaki amiqirana faqa andeeqarana faqa anoona ufa qirana faqa misaki kambiqaiddanoo.

<sup>10</sup> Innee karaambaiqa aidi mari mariranara randasee maraqa.

<sup>12</sup> Asukunaki mariasa kukeeqaranaki maridaqa oosana oosana manda nisauri maria ainainna maraifaqa maasa misara qisauruanoo qimasee sia misa oosanara kaqikaqoo ufa qianaara.

<sup>11</sup> Minara innee furufarira marirana maree mariasara faqa asukunakinaa oosana maree mariasara faqa rufiasee innee nianasaa mariaqa innee misa manda asukuna mareeqee aiqamausa nifusaa kaaqa qara qoo quqasaifaqa mi manda asukunaki mariasa nisaurirana marasee minnisaqaqera.

<sup>13</sup> Mi manda ainainausa mareeqee aiqamausa nifusaa kaaqa qara qoo quqasaifanoo mi manda ainainausa oosana uqanna kaaqa kooroomambuanoo.

<sup>14</sup> Aiqama ainaina asukunakinaana mareeqe kaaqa qara qoo aiqamausa nifusaa quqasaifanoo mi ainainausa faqa kaaqa qaranaikiannoo. Minara maasa idi moo maaqi qinoo maridanoo.

Anee faiqee marianafa findi fua.

Kuqiranakiqari findi finanoo

asauku mundirafa suaniara foora anisaa qaani.

<sup>15</sup> Mi ufafa miqinoo marinara innee Eefeesusa maqannaasa inneeqa mariranasaa amiqimmandee rakisiaqa. Sia aamina fasiqara foora mariaqa irirana faqaasara foora mariaqa.

<sup>16</sup> Maa kamuqoo manda marira kamu marinara sia fifau suani afu afeesimarina kaqinni aiqaraani, aiqama faasaanara ainainira faasaanee qiaqa.

<sup>17</sup> Minara innee sia furufariaqa Karaambaiqa inniara fuaqee qinaqa fifandinanara faqa auqeeqandinnanara faqa ooqai iridanoo innee mi iriranara randasee paqurimandee mi mau afeekaikamandee fidaqa qafaqa.

<sup>18</sup> Innee nammari namasee furufarirana sia maraqa mifa inni kuridimarifa maridanoo Anutuna maraqauna fannoo kai inni naakufinoo naundurari qumbiqafinaqa mariaqa.

<sup>19</sup> Innee nari qimami nari qimamidaqa Anutunara amooqirafa inni naundurari qumbiqafina maridaqa Dafidina idi faqa amaana idi faqa Anutunara rara idi faqa mi idinannai nari qimami nari qimami qiaqa.

<sup>20</sup> Maasa karaambaiqa asauku mundirana Yisuna augusaa maqee maqee aiqama ainainara maasa qikoona Anutunara dufi dufi qiaqa.

*Faiqi aanaaseera qidanoo.*

<sup>21</sup> Innee asaku mundiranara naaquqee marinara nariara nariara ureeqafi maridaqa reendeena mandee mariaqa.

<sup>22</sup> Innee aanaaseeuqa faiqi ninaaqmaaka qimannimidaqa, innee faqa karaambaiqa aramandunnai maridaqara foora inneeqa nifaaqmaaka ufa ameemaanai miqimandee mariaqa.

<sup>23</sup> Asaku mundirafa nari ufara suqimariasa innaaruna asumu nimirifa maridanoo, misa uriqararafa maridanoo, anaasee nifaaqmaaka miqikai iqa nari ninaaqmaaka uriqara mafi marianara inneeqa nifaaqmaaka nimeemaanai ureeqaqa mariaqa.

<sup>24</sup> Asaku mundirana ufara suqimariasa eedoo qimasee mina aramandunnai ooqu mari fidaqa mariandee kai iqa aanaaseeuqa nari nifaaqmaaka aiqama ufa ameemaanai mariaqa.

<sup>25</sup> Faiqi inni faqa qimannimidaqa innee aanaaseeuqa nifaaqmaaka inni qimannimidaqa, innee faqa asaku mundirana aanna raaqa, Yisufa nari ufara suqimariasa nari aanaaqara foora misara kaaqa amuqusufanoo misa naaru mariaqera qimasee nari marirana misara kuqiranaki paasoosamandee quqanau. Innee inneeqa ninaaqmakara miqi kai iqa uriqarara ainainee qimasee nimuqusinaqa ruaqa.

<sup>26-27</sup> Fuka anaasee nari afaaqinnai fuanee qimaseenoo afaqa anukamaseenoo amiqira siara qamunna afisumareenoo nari afaqa akumbau fee namuana fee qikairi fee sia marifanoo andeeqa mareenoo nari afaaqinnai fidanoo. Asaku mundirafa nari ufara suqimariasa fuka anaaseera foora nammariara foora ruma nimaqaseenoo andeeqara amiqiranaki faqa nifaaqa idaaqiranaki faqa mareeqeenoo narinnai amiqiranaki quqaani fee qimaseenoo maasa nari ufannai nammariara foora ruma qimaqasaidanoo nariara kai mara quqeenoo, minara Yisufa nari ufara suqimariasara amuqusufanoo nari marirana misara kuqiranaki quqanau maqi qidaqa.

<sup>28</sup> Faiqi nari ninaaqmaakara miqi kai mandee nari nifaaqara foora nimuqusiani, nari aanaaqara uriqarara ainainee qimasee amuqusimariafa nari kai nariara faqa uriqarara ainainee qidanoo amuqusidanoo.

<sup>29-30</sup> Sia moo fannoo nari afaaqara akooqaidanoo amiqimmandee rakisidanoo narana amidanoo asaku mundirafa Yisufa nari ufa suqimariasara nari afaaqafee qimaseenoo rakisidanoo, innee faqa miqikai iqa inneeqa ninaaqmaakara qini qifaaqa fee qimasee amiqimasee rakisiaqa.

<sup>31</sup> Ooqeenaa tamummaqara fasiqauqa akara mina maaqimminoo maridanoo, Anutufa qunara faiqi moo fannoo nari anoofa akoona minniseenoo nari aanaaqasaa atooqafinoo miqanda moodaa kara mafifaranoo.

<sup>32</sup> Mi ufana maa ainainnara kikiqusidanoo anoona amiqirafa maridanoo asaku mundirafa faqa nari ufara suqimariasa faqa faiqi nari aanaaqara faqara foora inoo maridanoo moodaa kara mafuannoo.

<sup>33</sup> Mi ufana inni faiqira faqa qidanoo aiqama fasiqa nari ninaaqmaakara nari nifaaqara foora nari nimuqusiani, anaasee faqa nari nifaaqmaaka ufa ameemaanai eedoo qimasee mariaqa.

## 6

*Faiquqaindiara faqa nari ninaukoora faqa qidanoo.*

<sup>1</sup> Faiquqaindi inniara qidaqa, inneeqa ninausa nikausa ufara eedoo kai qiaqa. Innee Yisuna ufara suqimariasaki marianara andeeqarafa mifa maridanoo.

<sup>2</sup> Mooseena sandufara innee irimariafanoo minakinaafa aaquqira ufa qisaukuqara taikasee maridanoo. Minakinaana moo sandufa maasa mi mau funoo Anutufa moo ainaina maaqoo maa maqanasaa maasa qimirara qima afeekaikammaqoofa maaqimminoo maridanoo, inniqa ninausa nikausara naaquqaina misa ufamau fuaqa.

<sup>3</sup> Fifanoo Anutufa inniara kisaqasaa inneeqa maqa maaqaki maridaqa amiqiranaki mariaqee qimasee maasara qimafeekaikinau. Maasa mi ufanara uriqarara ufee qidaqa. Doo innee faiquuaindi mi mau fuaqa.

<sup>4</sup> Faiqi nikausamara inni qimannimidaqa sia inneeqa faiqi fifau nirana fundakifaqa aanoo iaqa, sia miqiaqa, maaqiaqa, Yisuna ufamau inni faiquqaa andeeqee andeeqasaiqa Yisuna ufasaa innooqaqa.

*Ainainimariasara faqa misa uriqararausa faqa misara qidanoo.*

<sup>5</sup> Qinee Pauroosa innee moosa ainainimariasa qimannimidaqa. Inneeqa feefauru marara saikaki keeqafinaqa amiqimasee mina ainainammaisaaqa. Sia nifaaqa quqasee mana mana iaqa. Innee naaquqee marinaqa ainaina akoona ainainammaisaaqa, innee asaku mundirana ainainidee qidaqa maqasaa ainaina akoona amiqimasee nimuqusannai ainainammaisaaqa.

<sup>6</sup> Sia misa eedoo qira ufara kai irisee misa nifusaa kai ainainiaqa, inneeqa nimuqusan-nai Anutuna ufamau asaku mundirana ainainidara foora amiqimasee ainainamanni-maqaaga.

<sup>7</sup> Sia fifau faiqi ainainamaiseera fooriaqa, karaambaiqa ainainammiidee qimasee amiqimasee ainainamaisaa.

<sup>8</sup> Innee miqidaqa maanara iriaqa, Karaambaiqa aiqama fasiqa amana amana kai nimidanoo moosa rumbara saikaki mariasee nari ainainira saikaki mariasee nari amiqira ainainirana akiaqara amana amana kai innaarunai nimiannoo.

<sup>9</sup> Qinee ainainimariasara innee inneeqa ainaina akoona amiqimasee ainainammaisaa gee qimaseega innee ainaina akaua faqa qimannimidaqa innee faqa miqikai mandee inniqa ainainimariasasaa amiqimmandee rakisiaqa, amiqimasee ainainiige qimasee aanoo irana faqa narirari mariana faqa taikaaqa. Innee faqa maanara iriaqa, innee faqa inni ainainimariasaa faqa moodaa rakisirafa innaarunai marifa, sia mifa ainainimariasara ureeqarausee qimasee kafia quandaki rakisi nimaqee mariasara uriqararausee qimasee qaara irirana maraidanoo, moodaa irirana marasee amana amana kai rakisi nimaqaidanoo.

*Roomma maqannaa sundiara foora afaaqa ititamareena Sadannana faqa rakuqa.*

<sup>10</sup> Maa ufana taikara ufa maqimminoo maridanoo, innee karaambaiqa faqa maridaqa moodaanaki nimarifaqa mina firaa afeekannai inni faqa moodaanakikirana firaqoo afeekaikamma mapukuqa.

<sup>11</sup> Sadannafa oosana oosana nari manda nikaru qiranannai inni naruannoo, innee minara rufiasee Anutufa niminna saqari duru saamunannai inneeqa nifaqaq ititaqa.

<sup>12</sup> Maasa Yisuna ufa irimariasaa sia faiqi faqa rakidaqa maasa meerai Anutuna innaaruna ameemaanai maria manda afaanausa faqa rakidaqa, maa asukunaki maria kamuqoo mirindari rakimariasaa faqa misa uriqararausa faqa misa faiqi firaasa faqa meeraindarii maasa daruafaqa maasa misa faqa rakidaqa.

<sup>13</sup> Innee minara iriseega Anutufa niminna duru saamu saqarina qumareega deedaqida mariaqa. Sadannafa mi manda faasaanna narirara anirainaga innee amanaikiqa mariafanoo nari faqa aruafaqaammasee miqoo kai eeraaramasee ititaqa mariaqa, sia amana ainnaqaraani.

<sup>14</sup> Minara qimannimidaqa. Innee findifi deedaqida mariaqa Sadannafa inni mandosana nimisee naruandoora. Roomma maqannaa sundia nifaqaq rafaqaqimarianaa kikiqisusee inniara qianauranoo. Inneeqa fausanda niranaaqumuki rumbee maria fara foora mifa inni anoona ufa kai qirafa mifa mariannoo. Inni nimuqusasaa ititee maria afeeka ainainara foora inni andeeqara oosana mariannoo.

<sup>15</sup> Inni niku ititee mariafa niku aanaamuara foora mifa Anutufa faqa mari asoora amiqira fasaasa ufa maqee maqee aamina maqannaa qimannimirafa mifa inni niku aanaamuara foora ititarafa mariannoo. Mi andeeqara oosannausa marasaifanoo Sadannafa sia amana inni naruani.

<sup>16</sup> Inniqa saqari ukeeqirira fara foora Yisuna saqarikirafa maridanoo. Innee Roomma maqannaa sundiara foora maqee maqee mi saqarina ukeeqirisee maraqa nifanoo Sadannafa nari feefa ida muquru qumaree inniara oosana oosana furufarira irirana minannai inni nifaqaq naqusee nariraree qimasee agusainaga innee Yisuna saqarikiranannai mina mafi ruki aquaqa.

<sup>17</sup> Roomma maqannaa sundiaqqa rakiranaki fidaqa qafee nikiagaq afisusee nikiagaq rukamifoora afisimariqau. Inneeqa nikiagaqi ititee maria qafeenara foora Anutufa innaarunai asumu marirana nimufa maridanoo. Sadannafa inni kuridiranaki maqee maqee mara quqararinaqa innee mi qafeena afisusee asumu mariaqa. Roomma maqannaa sundiaqqa rakira paipana dinni dinni afaifaqaanannai faiqi ateekeeqa raquru nimiqa imariqau. Inni raqara paipana aseema fooqaafa marina Anutuna ufa maridanoo mina maraqauna fannoo mi ufana nimu ufafa maridanoo. Sadannafa inni faqa rakinaqa mi samuna qumaree mina aruqa.

<sup>18</sup> Innee mi ainainausa maraidaqa innaaru qidaqa maqee maqee Anutuna dadaaqi-ranara faqa innaaru qiaqa. Anutuna maraqauna afeekannai maqee maqee eendaki faqa faasaana faqa Anutuna maqasaa fasiqa anaaseera Anutufa amiqi amiqimma nimaqaanifeera innaaruqiaqa. Sia kudoosaapaqaq afeekaikamandee innaaruqiaqa.

<sup>19</sup> Qini Pauroosara faqa innaaru qiaqa Anutufa oosana qimasainaga qinee faiqi anaasee Yisunara qimannimianauree qimasee paasoosamandee qimannimianauree, Yisuna amiqira fasaasa ufa ooqi kukeeqanoo marifa maqee aukuaana Anutufa faiqi anaasee kooroomannimaqeenoo.

<sup>20</sup> Qinee Pauroosa mi amiqira fasaasa ufana aanaiqikirausa maridaqa. Kuqaa Roomma maqanna karabusaki maridaqa kuqaa aanaiqikirausa maridaqa. Anutufa qiniara paasosamandee faiqi anaasee qimannimianne qifaqa innee qiniara innaaru qifaqa paasosamandee qimannimianauro.

*Pauroona akara taikara akara.*

<sup>21</sup> Qinee Tikikusana aqigaananoo qini daufakiana inni qimannimiannoo. Mifa maasa qimuqusi mari qikaqaafasaafa maridanoo, karaambaiqa saikaki amiqi amiqira ainainimarifa maridanoo. Mifa qini fasaasa ufa inni qimanniminaqa innee qini mariranara iriaqeera.

<sup>22</sup> Mina qimannimianifeera aqigaanaura inni nimuqusa pooduqaanifeera aqigaanauranoo.

<sup>23</sup> Maasa qikoofa Anutufa faqa maasa karaambaiqa asauku mundirana Yisuna faqa naunduraki asooarana faqa nariara nariara uriqarara ainainee qimasee nimuqusirana faqa Yisuna saqarikirana faqa inni aiqama qini qikaqaafasaauqa nimiani.

<sup>24</sup> Innee aiqamausa maasa karaambaiqa asauku mundirana Yisunara sia taikee maria rirana rimariasa, Anutuna afaarirafa inni faqa mariani.



## FIRIPI

### Firipi maqusanaasa Pauroofa akara rumannimaqoofa.

<sup>1</sup> Qinee Pauroosa Timootisandiri asauku mundirana Yisuna rumbara ainainira fasiqagara maridaqa maa akarana rumannimaqeeqa. Innee Firipi maqusai maria Anutuna aiku asauku maria fasiqa anaaseesa innee faqa innee ufa suqimariana rakisirausa faqa inni niqoonausa inni dadaaqi mariasa faqa, innee aiqamausa inneeqa irirana asauku mundirana Yisunasaa rusimariasa, inni akara rumannimaqaidaqa.

<sup>2</sup> Maasa qikoofa Anutufa faqa mina asauku mundirafa maasa karaambaiaqa Yisufa faqa nari afaarirana faqa nari naunduraki asoarana faqa nimiani.

*Pauroofa Firipi maqannaasara innaaru qu ufafa.*

<sup>3-4</sup> Qinee inni Firipi maqannaasara daaqoo irifaqa Anutufinnai dufi dufi qimasee asasammasee inniara innaaru qidaqa.

<sup>5</sup> Oogai indaaru inni maqusai anireeqa Yisuna amiqira fasaasa ufa qimannimifanaqa amiqimmandee dadaaqammamaree ani marufaqa nindafaafannanara inniara daaqoo iriseeqa Anutunara asasammamaqaidaqa.

<sup>6</sup> Qinee maa ainainnara amiqimasee iridaqa Anutufa inniki amiqira saika uqeerooqa kaqi inniki mi saikana kai uqeeranoo fifi inoo taikara aukuaana asauku mundirafa Yisufa quminna faasaana miqoo kai taikaannoo.

<sup>7</sup> Anutufa nari saika Yisunara qimannimira saika adiafaa imari saikana qimufaqa innee aiqama minaki marida dadaaqi marusa mariafanoo, minara inniara asasirafa andeeqarafa kai maridanoo. Oogai sia qinee karabusaki mariafanna kamu qoo qinee Yisuna aufakiana faiqi anaasee kaqi nidaqa qimannimiseeqa naunduraki mapuku nisasee mariqiafana, akaqausa minasaa ootupeeqa aaqaranaki quqasoofaqa qinee oonuree mina ateekaafanaqa innee faqa dadaaqi marusa mariqau. Doo maqee faqa Roomma maqannaar karabusaki maridaqa innee faiqi anaasee mapukunnisee mariana qini dadaaqi mariasa marianara inniara Anutufinnai asasirafa andeeqanoo maridanoo.

<sup>8</sup> Anutufa iridanoo qinee kuqaa anoona ufa inni qimannimidaqa. Inniara qini qimudaoo qirafa firaafa marina asauku mundirana Yisuna amuqusa ookiqari kambiqara qimudaoo qirafa maridanoo.

<sup>9</sup> Innee amiqira oosana kai irisee maraaqee qidaqa maaqi qimasee inniara Anutufinnai innaaru qidaqa, Oo Anutu Firipi maqusanaasa nariara nariara rirafa maqee maqee innooqaidanoo kambiqaaani mina sia aqara irirafa anoona irirafa faqa rainasee akoofa-saikira irirana faqa maasaki innooqeenoo uqannifiqainaqa uriqarara aana kai umaree fuaqeeqa qidaqa.

<sup>10-11</sup> Anutufa miqinoo inni dadaaqinaqa asauku mundirafa qumira faasaanasaa innee ikairi siaisa, ufa siaisa maridaqa asauku mundirafa nimira amiqira anoonaikira marirafa inniki marifanoo aiqamausa mina qafammasee Anutunara dufi dufi qimasee amooqifaranoo.

*Pauroofa kuqirane kaqi marirane asauku mundiranaindi marianauree qinau.*

<sup>12</sup> Qinee Pauroosa Yisuna ufa maqusa maqusa qimannimi marunnana akiaqara karabusa rumbasaafaqa maridaqa. Nariqa qini rumbaqaafanoo Yisuna ufa aru rafaqaq firaree qimasee qinee rumbaqa maruna sia misa Yisuna ufa rafaqaq fia, qini rumbaranannai misa sia irirai mina muru pooduqaafanoo.

<sup>13</sup> Qinee Roomma maqusai firaa uriqarara kiapana maaqa amiqira maaqa aqa rumbara maqaki maridaqa mi firaa maqanasaa rakisi maria sundiauaqa faqa rumkatasaa faqa qinisaa faqa rakisimaria poorisaua faqa aiqama maaqoo mariasa faqa qinee asauku mundirana ainainira faiqi mina ufasaara rumbaqa marunnanara irimarusa maridaqa sia qinee moo mandoosana maraafannanara iridaqa.

<sup>14</sup> Qini qikaqaafasaauqa, maqusa maqusa Yisuna ufa irimariasa qinee karabusaki marunnanara iriseeqa misa paasoosirafa firaqoo innooqamaree fidaqa faiqi anaasee Yisunara qimannimidaqa sia rufiidaqa.

<sup>15</sup> Misakiqari akaqausa nariara nariara rairaiqidaqa raiqaidaqa asauku mundirana auqu uqeeraidaqa, akaqausa moomoosa sia miqidaqa amiqira irirana iridaqa qimannimidaqa.

<sup>16</sup> Miqi mariasa nimuqusa ookiqari qini Pauroosara ridaqa Yisunara amiqimaseeqa faiqi anaasee qimannimidaqa. Akaqausa Yisuna ufara kaukaata qidaqa mareeqee kaqirunna ubeekaidaqa, Anutufa qiniara anee minasaa ititaannee qifaqa ititaidaqa, qini

dadaaƙi mariasa miƙi marunausa marunnanara irisee amiqimmandee qiniara ridaƙa dadaaƙidaƙa.

<sup>17</sup> Akaƙausa rairaiƙidaƙa qimannimi mariasa sia nimumƙusa ookiƙarifaƙu asauku mundirana saikara qimannimidau náriara nári nuƙu uƙeerararee qimasee miƙi qidaƙa. Misa Yisunara miƙi qimasee qimannimifaƙa Roomma maƙannaasa mina irisee kafaƙa kafaƙa qini karabusaki amiqimma daruƙeera miƙi qidaƙa.

<sup>18</sup> Qinee misa oosanara iridaƙa sia firaƙoo misa oosanara oonumafi iridaƙa. Qinee minara maƙi qidaƙa. Akaƙausa amiqira irirana marasee asauku mundiranara kooroo iafaƙa asasiƙaƙa, akaƙausa aƙara irirana marasee asauku mundiranara qimannimifaƙa minara faƙa asasiƙaƙa, misa oosana oosana iriranannai asauku mundiranara kooroo ida fee qidaƙamma asasiƙaƙa. Sia qinee maƙee kai asasianaura naaru naaru asasianaura.

<sup>19</sup> Inni innaaru qirafa faƙa asauku mundirana Yisuna maraƙuna faƙa Roomma maƙannaasa gumee dadaaƙinaƙa nári karabusakinaana qini iduku qimaƙeefaranoo, qinee minara iriseeƙa maƙee maƙee asasiƙaƙa.

<sup>20</sup> Qeeƙa qimuƙusa ookinaa didira irirafa maƙqimminoo maridanoo. Qinee qeeƙa saika Anutufa qimu saikana sia kudoosaapee minnisaanuranoo aƙama aukuaana faƙa maƙee Roomma maƙannaasa karabusaki marunnanara faƙa qiniki qini paasoosirafa qumbiqafinaƙa qeeƙa Roomma maƙannaasa darifaƙa kuqiranannai fee qeeƙa kaƙi mariranannai fee qeeƙa marirana aƙamannai asauku mundirana auƙu uƙeerana qiniki marianifeera dididanoo.

<sup>21</sup> Kaƙi marirafa nana ainanee maridanoo fee, qini marirafa asauku mundiranara kooroo imarifa kai maridanoo, Roomma maƙannaasa darifaƙa kuqira amiqiranaki uriqararanaki marianuranoo fee qimasee minara dididanoo.

<sup>22</sup> Qinee minara iridaƙa kafaƙa maƙi qidaƙa qinee sia darifaƙa kaƙi maridaƙa amiqira anoonna saika amana maraanaree qimasee minara faƙa dididanoo.

<sup>23</sup> Qaara irirafa qini daundurairi maridanoo dinni dinni oonurarisee ani rarisee imarifaƙa maridaƙa. Roomma maƙannaasa qini kuƙa kai darifaƙa qinee maa marirana minisee asauku mundirafa marinnai firara firaƙoo dididanoo amiqira ainaina maridanoo.

<sup>24</sup> Misa sia qini darifaƙa kaƙi marida qinee inni Firipi maƙannaasa dadaaƙirana uriqarara ainaina mariannoo.

<sup>25</sup> Qinee minara iridaƙa kaƙi marianaree qidaƙa. Qinee inni faƙa maridaƙa inni dadaaƙinaƙa inneeƙa saƙarikiranaki nidaƙa inneeƙa saƙarikirana firaanaikidaƙa inni asarifa faƙa firaanaikianifeera kaƙi maridaƙa dadaaƙinaura.

<sup>26</sup> Qinee Pauroosa karabusaki maridaƙa inni qiniara irisee asasiƙaƙa nasunasu rida mariaƙa. Misa qini karabusakinaana idukifaƙa innee iannai fuaƙa qini qiqafamasee asauku mundirana Yisunaki fidaƙa qiniara fiƙaramasee asasiƙaƙa qimooqifaranoo.

<sup>27</sup> Misa qini darifaree idukifaree inni irirana moodaa maƙqimminoo mariani, innikina narinni narinni rirafa asauku mundirana amiqira fasaasa ufa irimariasa misa naanna ramafi mariaƙa. Innee miqidaƙa marifaƙa qinee inni oonu nindafaanauree sia fee oonu nindafaanauree miqidaƙa inni amiqira oosanara nianaindari irianaura, inni irirafa Yisuna amiqira fasaasa ufa saƙarikirana faƙa mi mau firana faƙa minara kai iridaƙa aƙama innee moodaa irirana faƙa moodaa firanamau faƙa moodaanaki ruumbakiƙa maridaƙa rakimariasa naanna ramasee mapukiƙa marifaƙa irianaura.

<sup>28</sup> Yisuna ufara namuƙaƙi mariasara sia rufiaƙa, paasoosiaƙa. Innee sia rufiaƙaƙa misa nári kuridifandinanara irifaranoo. Inni innaarunai asumu marifandinanara faƙa irifaranoo. Anutufa nari kai uƙannifiƙaannoo.

<sup>29</sup> Anutufa inni firaƙoo adiafaairanaki quƙanniseenoo asauku mundirana ainainiranaki quƙannisaiƙaƙa innee minaki maridaƙa sia inni irirana minasaa rusiranara kaifau inni niminoofau mina ufasaara nidafirana maree fandinnanara faƙa inni niminoo.

<sup>30</sup> Doo maƙee innee Firipi maƙannaasa qini Pauroosa rakimariasa naanna ramasee dadaaƙiaƙa. Ooƙai innee qini qifaƙoonakinaa rakirafara foora faƙa maƙee kaƙi mari rakirafara foora faƙa innee minara qiqafamasee irimariafaƙa amana maƙee dadaaƙiaƙeera qimannimidaƙa.

## 2

*Asauku mundirana reendeenirana ammeemmeeriaƙa.*

<sup>1</sup> Innee asauku mundiranaki nimariafanoo inni pooduƙara afeekaikirana nimidanoo fee. Asauku mundirafa inniara rirana naunduraki amiqi amiqirana nimidanoo, innee Anutuna maraƙuna faƙa moodaanaki maridaƙa quandaƙi nariara nariara rirana naunduraki amiqi amiqirana nimidanoo, innee Anutuna maraƙuna faƙa moodaanaki

maridaqa quandafi nariara nariara idaaqidaaqida mariafanoo. Innee nariara nariara nimuqusi marifaqa idaaqidaaqida mariafanoo.

<sup>2</sup> Qinee inni fuki faaki qidaqa afeekaikidaqa innee maaqimasaifaqa qinee amiqimasee inniara asasianaura. Innee moodaa irirana maraqa, innee moodaa nidirana narí ami narí ami iaqa. Innee moodaa amiqira irirana faqa maraqauna faqa maraqa.

<sup>3</sup> Sia moo ainaina qimianifee qimasee aundurai oonu mafi irisee aqoonnana oonu dadaaqaqa. Sia manda fifau nifaaqa mara maree ooru firafa maraanifee qimasee aundurai oonumafi irisee aqoonnana dadaaqaqa, innee sia miqiaqa, maaqiaqa, narinni narinni reendenida mariaqa. Sia anee moosara mandaikira fee qimasee aneennara amiqira fee qia. Maqee maqee aqoonausara qini uriqararausee qimasee qinee misa ureeqarausa maridee qiaqa.

<sup>4</sup> Sia innee inneeqa ainainara kai irimaree fuaqa, niqoonausa faqa amiqiranaki mariaqeera minara faqa iri maree fuaqa.

<sup>5</sup> Innee iniqa nariara nariara irirafa asaku mundirana Yisunaindi miqirafa reendeenirafa amiqirafa marindee kai iaqa. Mina irirafa maaqimminoo marinau.

<sup>6</sup> Mifa ooqindari Anutufara foora marufa maridanoo. Sia narí afeekannai rakirara maqi mandee Anutuna amana ooru fuanauree qinau.

<sup>7</sup> Narí kai iriseenoo narí uriqararana minniseenoo ureeqara ainainira faiqi irirana marasee marinau.

Mifa faiqira fooqaana mambinoo faiqi afaaqaki maa maqanasaa kooroomafinoo marinau.

<sup>8</sup> Mifa reendeenirafa marinoo Anutuna ufara eedoo qimammaree finoo doo kuqiranara faqa eedoo qimasee kuqinau, manda kuqirana aunirira saqarisaa kuqinau.

<sup>9</sup> Anutufa mina qafoofanoo afaqa asasinoo aidufanoo mina akiaqara kuqiranakinaana uqeereqeenoo innaaruna maarinni uriqararanaki quqaseenoo aiqama nuqu uriqarara auqu faqaana quqana.

<sup>10-11</sup> Aiqamausa uqanna innaarunaindaraasa faqa maqasaaqaraasa faqa maqa ameemaaindaraasa kuqirausa faqa Yisuna auquara naaquqainaga reendeenamasee niqoori saunarafiga aiqamausa akooqoo asaku mundirana Yisunara maasa karaambaiqee qimasee mina akoona Anutuna amooqifaranoo.

Minara qinee Pauroosa inni Firipi maqannaasa qimannimidaqa inni irirafa asaku mundirana Yisuna aanna kai reeqa nariara nariara fifimmaseeqa idaaqiaqa.

*Innee aaqee mariasaki maridaqa andeeqarausa mariaqeera qinau.*

<sup>12</sup> Oo qini qiqoondiqa Firipi maqannaasa qinee ooqai inni faqa mariafanaga innee qini ufa irisee eedoo kai imariqau. Doo qinee maqee innikiqari nianai maridaqa innee qini ufa irisee eedoo qinafa uriqarara ainaina mariannoo innee innaaruna asumu marirana doo marasee mariafanoo aagamaki saamuruanoo qimasee rufiaqa rufiaqa irirana faqa naindiri naindirirana faqa mara maree fidaqa anoonaikirana mareefara.

<sup>13</sup> Anutufa minara irisee inni naunduraki mina ufara eedoo qira aidirana faqa mi mau fira afeeka faqa inni naunduraki kambaqaanifeera maqee maqee ainainidanoo.

<sup>14-16</sup> Innee maa maqa maaqanaki eendaandirausa faqa aaqee mariasa faqa qambaana mariafanoo Anutuna andeeqara faiqi namu qikairi slaisa anukarausa mariaqeera qidaqa innee aiqama ainainirana idaga sia nikoo nikaa idaga ninunuridaga raigaaqa, miqidaqa sia Anutuna andeeqara faiqi namu marifaranoo. Kaqi eedoo qimasee kadaapirirana maraqa. Innee mi eendaandira fasiqa anaaseesaki maridaqa inni andeeqara nirana marirana fasau innaarunaki eendaki qeemarindee idaga kaqa qaida maridaqa naaru naaru marira fasaasa ufa qimannimiaqa. Innee miqida marifanoo asaku mundirafa qumuaninna faasaana qinee inniara qini saika anoonaiki ifoo qimasee asasianaura qini kadaapi faqa tooqaamu faqa sia fifau irairainoo mariannoo anoonaikinaga asasianaura.

<sup>17</sup> Innee Yisunasaa irirana rusimariafa Anutuna tatufira aandau miqirafa maridanoo. Roomma maqannaasa qini qusasa darusaifanoo qini fidika fannoo inni tatufira aandausaara foora adia finoo aiqamaqara moodaanaki Anutuna amaqaifanoo eedoo qimasee asasammasee maraannoo. Misa darifandinnanara qinee maqee asasammidaqa qinee asasammasee qeeqa nasurirana inni faqa naida nimianauranoo.

<sup>18</sup> Innee faqa miqi kai iqa asasiqa qini asisirana dadaaqaqa.

*Pauroofa Timootinara faqa Eepafarooditusanara faqa qidanoo.*

<sup>19</sup> Qinee qusasa Timootina aqiaqaanoo innee Firipi maqanna iannai fuanifee qidaqa karaambaiqa Yisufa dadaaqinaqa aqiaqaanura. Mifa innee iannai oonuree aniree qimaqiminanoo inni ufa fannoo qini daundurakii pooduqama qimaqaanoo.

<sup>20</sup> Timootifa kai qini daanna reenoo moodaa irirana inniara iridanoo amiqimasee inniara amuqusidanoo.

<sup>21</sup> Maaqanna maaqanna moodaa modaa Yisuna saikara iridaqa. Aiqamatia sia asauku mundirana Yisuna saikara iridaqa nariqa ainainiranara kai iridaqa.

<sup>22</sup> Timootifa nari ainainiranara nari amiqira oosana kooroo ifaqa innee minara irimariafanoo mifa faqa qinee faqa nariqa qisakoosara foora maridaqa moodaanaki Yisuna amiqira fasaasa ufa saikaki marunusa maridaqa.

<sup>23-24</sup> Roomma maqannaasa qiniara naqi fee ifaree qinee minara iriseeqa innee iannai Timootina aqigaananoo fuannoo. Qini qiqa irirafa karaambaiqasaa mundinoo maridanoo mifa dadaqinaqa qini idukusaifaqa qinee faqa innee iannai fuaananoo.

<sup>25</sup> Maa akara rirana Eepafarooditusanasaa rumasaanoo maree innee iannai fuannoo mi fasiqafa qini daaqa ainainida dadaaqidanoo rakiranara foora dadaaqimarifa oogai innee oogai qini dadaaqira munnimma minasaa quqasee aqigoofanoo mai anireenoo mai qini faqa ani maridanoo amiqimasee qini dadaaqidanoo.

<sup>26</sup> Mifa firaqoo inniara ridanoo inni nindafaqaa idanoo innee mifa anunara aiaaee qunara mifa irufanoo amuqusunara innee iannai kaifaa fuannoo.

<sup>27</sup> Kuqaa mifa firaqoo aurinoo kuqirara ameekamaseenoo Anutufa minara amuqusufanoo dadaaqufanoo findifinuu, sia minara kaifau amuqusinuu, qini Pauroosara faqa amuqusufanoo Eepafarooditusana firaq auriranakinaana mara findifinoo firaq ikiraqarana sia qiminuu.

<sup>28</sup> Minara qinee innee iannai firaqoo aqiqararee qidaqa, innee mina qafamasee asasiaqeera aqiqaidaqa innee miqifanoo qini ikiraqarafa faqa taikaannoo.

<sup>29</sup> Innee mina qafamaseeqa karaambaiqaki maru qikaqaafasaa fee qimasee asamasee mina amiqi amiqiaqa, innee miqirausara aiqama naaquqamasee dadaaqiaqa.

<sup>30</sup> Qinee asauku mundirana saikaki marufaqa Roomma maqannaasa Poorisauqa qini qumareeqa rumbaranaki quqaqisaafaqa innee nianai marida sia amana dadaaqufanoo Eepafarooditusafa qini daadaaqiraree qimasee nari marunara paasoosamandeenoo kuqirana ameekeenoo, minara qinee miqirausara naaquqamasee dadaaqiaqee qidaqa.

### 3

#### *Anoona andeeqaranara qidanoo.*

<sup>1</sup> Qini ufa taikarafa maaqimminoo maridanoo. Oo qini qikaqaafasaa uqa Karaambaiqa asasirana firaana inni nimiani. Oogai qinee akara rumannimaqaafanna ufanara sia rufaiidaqa mi ufafa inni ititannimaqee mari ufana kafa qimannimidaqa minara maaqi qianaaura.

<sup>2</sup> Innee mandoosana maree mariasara eerairida aufariaqa misa kaasau fainiara foora maridaqa misa Yuda maqannaasa oosana marida fainanduqiranara afeekaiki mariasa maridaqa. Misa fainanduqiranara nariqa faina kafaqianda uqiranara anoona ainainee qimasaidaqa miqidaqa aqaqidaqa miqidaqa, maasa kai anoona faina kafaqianda uqimarunausara foora maree marunusa maridaqa.

<sup>3</sup> Maasa Anutuna maraqunannai Anutunara innaaru qidaqa minannai kai maasa asauku mundirana Yisunaki marunannara asaidaqa, maasa sia misa naanna ramasee nifaaqasaa akooqoo mari ainainnara anoonee qidaqa.

<sup>4</sup> Akaqausa akooqoo faiqi nifusaa mari ainainnasaa mundusee minaki nifaaqa quqaida aqaqidaqa. Qini akooqoo qifaaqasaa amooqira ainaina moomoo maridanoo qinee minara fifau ainainee qidaqa minasaa mundufiqa qifaaqa quqarafa sia mariannoo.

<sup>5</sup> Qini akooqoo qifaaqasaa amooqira ainaina maaqimminoo maridanoo qini Pauroosa maqooqooqari qisauku dinni ani qaara marasee qaaramooku faasaana marasooqafa qini faina kafaqianduqi mariqau. Qinee Isaraee maqannaasa kambiqarusa maridaqa Yakooboona amaaku Beensaminna ati maridaqa, Qeeburu maqannaasa uqanna mara maqarusa maridaqa.

<sup>6</sup> Qinee firaqoo Yuda maqannaasa sandufamau fimariafanausa marunannara firaqoo sandanainai qimasee Yisuna ufara suqimarusa nari mariafanausa maridaqa. Mooseena sandufannai Anutuna andeeqarana amanaikirafa sia amanaikiannoo. Mooseena sandufannai andeeqarana marararee qimarusakiqari qinee misa uriqararusa Farisai amaana ufa qimarunusa mariafannana.

<sup>7</sup> Oogai qinee Yuda maqannaasa Anutufinnai firaree qimaru ainainausara uriqarara ainaina anoona ainainee qimariqafana doo maqee asauku mundiranara irisee mi aiqama ainainausara aqarafa fifau ainainee qidaqa.

<sup>8-9</sup> Sia mi ainainausara kai miqi qidaqa aiqama ainainara kaaqa fifau sia mari ainainnee qimasee quandaki anoona ainaina tia firaq ainaina, asauku mundirana Yisuna maasa karaambaiqara irimariana minara kai anoona ainaina fee qimasee minakai qumareeqa. Minara maraanee qimasee aiqama ainaina doo aquseeqa asauku mundirana maraani

qimaseeqa mina faqa moodaanaki marianauree qimaseeqa aiqama ainainara fifau madaapee ainainee qimasee aquseeqa quandaki Yisuna qumareeqa. Doo maqee qinee sia qeeqa andeeqarana maraqa nidaqa sia Mooseena sandufannai mi andeeqarana maraqa nidaqa. Qinee maqee moo andeeqarana asauku mundirana saqarikiafannanannai Anutufa andeeqarana qimuna mina kai maqee maraqa nidaqa. Mi andeeqarafa Anutunaindari anifa Yisuna saqarikiranasaa mundinoo marifa marifaqa maraqa nidaqa.

<sup>10</sup> Qinee sia moo ainainara irianauree qidaqa, asauku mundiranara faqa Anutufa mifa kuqiranakiqari findifu afeekanara faqa iriraree qidaqa.

<sup>11</sup> Yisufa kuqiranaki keeqafinoo minakiqari findifufaqa qinee faqa kuqiranakiqari findifiqa naaru mariranaki funee qimasee maqee kamuqoo Yisuna aupurarana faqa mifa kuqu aidafirana faqa qinee faqa qeeqa qifaaqasaa maraidaqa.

*Pauroofa innaarunai feefauru marararee qimaseenoo sandaidanoora foora qinau.*

<sup>12</sup> Yisuna aupurarana faqa kuqu aidafirana faqa qeeqa qifaaqasaa maree marunnana qinee sia minannai amanakiqa sia minannai kaaqa andeeqaidaqa. Qinee maqee maqee andeeqarana marararee qimasee sandaidara maqi qiara maqi idaga. Asauku mundirafa Yisufa qiniara andeeqarafa marianifee qimaseenoo qini qumareeqeenoo narindi kammaqifaqa maridaqa.

<sup>13</sup> Oo qini qikaqaafasaaqaa qinee sia anoonaikamandee maridaqee qidaqa, sia amana miqianauro. Qinee maa moodaa ainainna kaimmidaga qinee aiqaree inaaqiannai mari ainainara qeeqa aaqeeafanna ainainnara aunumasee doorinni mari ainainna andeeqara oosana marirana kai qifu munduseeqa qumarararee qimasee fidaqa sandaidaqa.

<sup>14</sup> Qinee narí amani narí amanira sandaranara foora taikaranasaa kai doori munduseeqa mi runna kai andeeqasee fidaqa miqoo feefauru marararee qimasaida sandaidaqa qini feefauru mararafa maaqimminoo maridanoo. Anutufa narí asauku mundirana Yisunannai maasa daarama sandaranara foora quqaqiseenoo maaqoo narí andeeqara mariranaki faqa naaru marirana faqa mariaqeera qifaqa mina mararara kai sandaidara foora masee fidaqa.

<sup>15</sup> Maasa aiqamausa Yisuna ufa akoofasaikirausa mi irirana kai maraqa nuqa. Innikiqari akaqausa moo irirafa marinanoo Anutufa inni minara qimannimiannoo.

<sup>16</sup> Saina miqinoo mariani innisaimbaqa sia moo ufa irisee mi mau fuanaura maasa ooqai fuafannamau kai fuanaura.

<sup>17</sup> Oo qini qikaqaafasaaqaa innee aiqamausa qini kai qifaqee qini qimeemmeeriga, maasa inniara iriqa andeeqara aana uqannifiqaafanaqa doo maqee innee akaqausa innikiqari mi mau fimariasa niqafamasee innee faqa nifaqee mi mau fuaqa.

<sup>18</sup> Qinee Pauroosa maa ufana ooqai moomoo kari inni qimannimifanaqa doo maqee daukunu ree marifaqa inni qimannimidaga, moomoosa asauku mundirana kuqirana mandaqasee andeeqara oosana marasee fimarufaqa doo maqee quandaki mandoosana maraidaqa minannai asauku mundirafa aunarira saqarisaa kuqirana namuqaa kiqa mina kuqirana namuqaa kammamaqaidaqa.

<sup>19</sup> Miqi mariasa maaqiga fifi iqa idaki kai fifaranoo, nariqa aqeeqee maria nidirafa mifa misa Anutufara foora maridanoo, misa nisauri maria ainainnara kai amooqimasee noori uqeeraida nasuridaqa, misa maa maqanasaaqaraa ainainara kai iri mariasa maridaqa.

<sup>20</sup> Innisaimbaqa sia miqirasa maridaqa maasa moo maqannaasara foora maridaqa innaaruna maqusanaasa marunnanara maasa karaambaqaa asauku mundirana Yisuna maasa asumu marirana qimimarifaqa innaarunaindari qumuaninnanara asasammasee afeesida maridaqa.

<sup>21</sup> Mifa miqoo maasa ummooqukira maqasaaqaraa qifaaqa mareeqeenoo quandaseenoo narí kaaqa areenara afaaqa fooqaanaikammianoo. Mifa aiqama ainaina mareeqeenoo narí aramandunnai quqara afeekannai maasa maqasaa qifaaqa mara quandaqisaannoo.

## 4

*Pauroofa amiqira oosanara naamuqaidanoo.*

<sup>1</sup> Oo qini qikaqaafasaa Firipi maqannaasa firaqoo inniara qini qimuqusifaga inniara daundurannoo oonu mafi iridaqa inniara dididanoo. Innee firaqoo asisirana qimi mariasa mariafaqa innee qini moodaa fidikara foora marida qini asisirana qimimari-afano. Minara inni qimannimidaga Yisufa innaarunaindari qumuaninnanara asasammasee afeesida mariaqeera faasai qimannimiqa inni marifa miqimandee karaambaqaki mapukusee mariaqa.

<sup>2</sup> Oo aanaaseeqara Eeuoodiasa nammarifa faqa Sindikeesa nammarifa faqa inneeqara maqee maqee rairaiqirana minniseeqa aneenna aunannaasandirira foora maridaqara karaambaiqaki amiqi amiqimasee moodaanaki mariaqa.

<sup>3</sup> Oo qini Firipi maqanna qifaagasaa qiifoondi moodaanaki qini qifaagasaa ainaini marianafa ani faqa qimamidaqa anee mi anaaseeqanda andeeqasafaqa moodaanaki mariaqeera. Miqanda ooqai Yisuna fasaasa ufa maqusa maqusa nidaqa qini dadaaqidaqa qimannimi maruqanda maridaqarammia anee miqanda andeeqannisaa. Miqanda faqa Kareemeendana faqa aiqamausa qini faqa moodaanaki ainainimariasaa faqa misauqa aiqamausa nuqu Anutuna naaru mariranaki fimariana bukaki misauqa nuqu maridanoo.

<sup>4</sup> Innee Karaambaiqaki marianara maqee maqee اساسida kai mariaqa, kafaa qiman-nimidaqa, asasiaqa.

<sup>5</sup> Innee aiqamausa sia ramoo ramaaiqaq ireeda kai nirana marirana aiqamausa nimiaqa. Karaambaiqa qasasa qumuannoommi.

<sup>6</sup> Inneeqa oosana oosana sarauqira ainainara sia oonumafi irifanoo nimuqusiani, innee Anutunara innaaru qidaqa miqoo kai inneeqa sarauqi maria oosana oosana ainainara innaaruqiaqa. Innaaru qidaqa Anutunara dufi dufi qirana namufaqa innaaru qiaqa.

<sup>7</sup> Innee miqifanoo Anutuna aundura asooarafa firaa ainaina tia maridanoo faiqi faiqi irirafa sia mina amana maridanoo, mi asooarafa inni nimuqusa faqa irirana faqa asaaku mundirana Yisunakina mariafanoo miqoo inni rakisinnimaqaannoo.

<sup>8</sup> Oo qini qikaqaafasaaqqa qini taikara ufa maaqimminoo maridanoo, inni iriranara qimannimidaqa, innee inneeqa kai amiqira ainainara irirafa faqa uriqarara ainaina faiqi amooqimaria ainainnara irirafa faqa minauqara kai maqee maqee naaqoo nitikuraki inni irirafa qumbigaani. Kuqaa qimaria ufana faqa naaquqara amiqira ainaina faqa andeeqarana faqa anukara ainaina irirana faqa idaaqira ainainara irirana faqa amiqira oosana ainaina Anutufa amana iriaqaa ira ainaina faqa mi ainainausara kai nitikuraki qumbiqanoo mariani.

<sup>9</sup> Innee qini Pauroosasaqaraa amiqira oosana qafeeusa mariafanoo minauqa maqee maqee qinee iafanandee kai iaqa. Qini ufakinaana faqa qinee iafanandee inafa mi mau kai fimarifanoo Anutufa naundura asooarana nimimarifa inni faqa nuani.

*Pauroofa Firipi maqannaasa munnimma amunara dufi dufi qidanoo.*

<sup>10</sup> Qinee Pauroosa karaambaiqaki fidaqa maqee maqee firaaoq inniara oonumafi iridaqa asisida maridaqa. Innee Firipi maqusanaasa ooqai narana feefaurira munnimma dadaaqiqa qimiqa. Doo miqoo kisaagasaa marikiqa doo maqee kafaa qiniara iridaqa dadaaqi mariafanoo. Innee sia qiniara kaaqa aunusee mana mana imariafaqa minara qidaqa inneeqa maqusaindari nianaindari dadaaqirana sia amana maree animariafaqa minara innee sia qini dadaaqusa mariaasa maqee kaifaa dadaaqimariafanoo.

<sup>11</sup> Sia qinee qeeqa daunduraki inniara minniqiseeaafoo qimasee ikiraqidaqa, qeeqa marunnanaki marunnanara doo marida fee qimasee qifaqa quqaidaqa doo mi ainainara akoofasaikammidaqa.

<sup>12</sup> Qinee sarauqiranaki marunnanara doo akoofasaikammiga maridaqa, rairaa irinaki marunnanara faqa akoofasaikammiga maridaqa. Qinee mi oosanna iridaqa doo irimarunausa maridaqa, qinee yai yai fee yaqoo aukuanee qimuqa qumbiqanoo fee maridanoo fee daararee maridee, rairaa iranaki fee maridee sarauqiranaki fee maridee mi aiqama ainainausaki maridaqa sia munari minari idaqa doo qifaqa quqasee mariranara akoofasaikammiga maridaqa.

<sup>13</sup> Asauku mundirafa narí afeeka qimufaqa minannai amiqiranee mandaikiranee kaqi maridaqa.

<sup>14</sup> Innee Firipi maqannaasa qini dadaaqianara dufi dufi qidaqa.

<sup>15</sup> Ooqai indaaru inni maqa maaqa Maseedoonia minnisee amiqira fasaasa ufa maqusa maqusa qimannimiga niniufaqa innee Firipi maqanna Yisuna ufara suqimarusa kai sia moo maqannaasa inneeqa kai dadaaqiusa mariafanoo. Inneeqa kai narana munnimma qimufaqa minannai qeeqa narana aina maraseeqa namasaida ainainiqafana.

<sup>16</sup> Qinee Teesaroonika maqusai mariafanaqa innee moomoo kari qinee mandainainaki mariafanaqa innee dadaaqidaqa narana maree maria munnimmana qimaqee mariqa.

<sup>17</sup> Qinee sia narana maree maria munnimma moo faqa moo faqa maraanauree qidaqa maa ufana qimannimidaqa, qinee inni nuqara afeedira ainaina innaarunai nimaqaanifee qidaqa maaqoo munnimma qimianara qidaqa.

<sup>18</sup> Eepafarooditusafa inni maqusaindari inni maqannaafa maqee qunnanara inneeqa narana maree maria munnimmana minasaa soofanoo mini qimifaqa doo aiqama maraunannara inni qimannimidaqa doo qini qimana kai maridanoo fiqaramasee faqa

maridanoo. Mi munnimmana qimaqaafa tatufira aanda Anutuna suqa ami mariafara foora amiqira afunda aikiambu imarifara foora Anutufa اساسammasee maree mari ainainna maridanoo.

<sup>19</sup> Sia meerai kai inni afeedamma nimaqaannoo maaqoo faqa innee sarauqi maria ainainna inni nimana kai nimiannoo, narí innaarunai mari qumiasana moomoo marina narí asaku mundirana Yisunaki marina innee sarauqi maria narana ainainna inni nimana kai nimiannoo.

<sup>20</sup> Maasa Anutufa maasa qikoofa mina amooqirafa naaru naaru mariani. Kuqaa.

*Pauroofa nimandaidanoo.*

<sup>21</sup> Anutuna faiqi namu mina ufa irimariasa asaku mundirana Yisunaindi mariasa Firipi maqannaasa inni aiqamausa nimandaidafa. Yisuna ufa iri maria qikaqafasaasa qini faqa mariasa inni nimandaidafa.

<sup>22</sup> Maaqoo Anutuna ufa irimariasa aiqamausa inni Firipi maqannaasa nimandaidafa, Roomma maqannaasa uriqarara fasiqa Sisaana maaqaki ainainimariasa misakiqari akaqausa Yisuna ufa irimariasa misa faqa inni firaqoo nimandaidafa.

<sup>23</sup> Asaku mundirana Yisuna maasa karaambaiqa afaarirafa inniki aiqamausaki mariani.

## **KOOROOSSE**

### **Kooroosee maqusanaasa Pauroofa akara rumannimaqoofa.**

<sup>1-2</sup> Innee Kooroosee maqannaakiqari akaqausa Anutuna faiqinamu mariafanoo innee faqa maasa faqa asauku mundiranaki maridaqa mina ufa iridaqa moodaa fidikara foora maridaqa asauku mundiranasaa atooqarusa mariafanoo qinee Pauroosa qeeqa qikaqaafasaa Timootinandiri inni Kooroosee maqannaa nimandaidaqa.

Anutufa qufanoo asauku mundirana Yisufa diqiqamaqaiifaqa faiqi faiqi maridaqa inni nimandaidaqa. Maasa qikoofa Anutufa nari amaaku maasara afaarinu mi afaarirana faqa inni naundura asooarana faqa inni nimianifeera qimannimidaqa.

*Pauroofa Kooroosee maqannaasara dufi dufi qidanoo.*

<sup>3</sup> Maaqanda inniara innaaru qidaqa maqee maqee maasa karaambaiqa Yisuna asauku mundirana akoona maa maqanasaaqari innaaru qunafa Anutuna afusaa inniara dufi dufi qidaqa innaaru qimannisaidaqa.

<sup>4</sup> Maaqanda innee Kooroosee maqanaa akaqausa Anutuna asauku mundiranasaa atooqafa marianara iriseeqa innee Anutuna ufa irimaria fasiqa anaaseesa aiqamausara nidimarifaqa dadaaqi marianara minara faqa iriseeqa Anutuna dufi dufi qimamaqaidaqa.

<sup>5</sup> Anutuna anoona ufa amiqira fasaasa ufa faiqi moo fannoo indaaru inni maqusa qimannimufaqa mi ufana naaru kambiqaaninna oosana irimariafanoo. Innee naaru mareefandinna ainaina Anutufa innaarunai quqasee afeedidanoo. Innee mina innaarunai mararree qimasee اساسammasee afeesidaqa Yisuna saqarikidaqa mina aidimariafanoo.

<sup>6</sup> Innee indaaru Anutufa nari amaaku maasara afaarino arunara innee mi afaarirana iriseeqa kai mi fasaasa ufana aiqama maqa maqaai daraanidanoo naundurakinaa amiqi amiqirana faiqi aanaaseeki kambiqaaidanoo.

<sup>7</sup> Eepafaraasafa maasa moodaa saikimarifa asauku mundirana amiqira saikimarifa qini qimanasaa inniki fimarufa maridanoo mifa kai mi fasaasa ufana inni Kooroosee maqannaasa qimannimufaqa iriqau.

<sup>8</sup> Mifa inniara Anutuna maraquna fannoo aiqamausara aidirana inni nimufanoo qimaqimifaqa iriqa.

*Pauroofa Kooroosee maqannaasara Anutuna iriranamau fuaqeera qimannimidanoo.*

<sup>9</sup> Maasa indaaru mi ufana iriseeqa miqooqari inniara innaaru qidaqa. Maasa inniara Anutuna iriranamau fifandinanara inni naundurai qumbiqaanifeera innaaru qidaqa. Anutuna maraquna fannoo nimi irirana faqa iriranamau fira irirana faqa inni naundurai qumbiqaanifeera minara faqa innaaru qimannisaidaqa.

<sup>10</sup> Innee miqi marifaqa Karaambaiqa undee kai imarifaranoo mifa maqee maqee inni marirafa amiqira marira maridaqa amiqisaa kambiqaqeera Anutuna irirafa faqa firaqoo inniki kambiqaannoo.

<sup>11</sup> Anutuna idaaqira eeraarirafa minasaqari aninna afeekafa aiqama inni faqa afeeka niminaqa innee oosana oosana mandainaina ummaara fannoo innisaa kambiqaainaga ubiqafi reendeenidaqa اساسammasee maraaqeera.

<sup>12</sup> Anutufa nari arenara maqusaki innaarunai nari nimianinna ainaina afeedimarina quqaseenoo innee ooru marasee miqoo mariaqeera inni mandainaina doo afaqaseenoo innee minara faqa iriseeqa innaarunai nikoona اساسammasee dufi dufi qimamaqaaqa.

<sup>13</sup> Maasa manda marira asukunaki marunanoo maasa rafaqafuqisaiifaqa marunanoo Anutufa qumareeqeenoo nari faiqi uqanna ququsaki quqannisaiifaqa amiqiranaki maridaqa.

<sup>14</sup> Mi faiqinannai uqanna maasa mandainaina numoo minniqiseenoo minakinaana mara idukuqiseenoo.

*Yisufa Anutunara mudukatia kooroomanniminu.*

<sup>15</sup> Anutufa kukeeqarafa marifanoo asauku mundirafa mina amaaku mina amamma ususeenoo maridanoo nari akoona oori afiri marasee mina nirana mina marirana mina maraquna maasaki doo andeeqasee nari akoonara kooroo idanoo. Mi asauku mundirafa aiqama ainaina Anutufa auquqoona urinaaqararafa maridanoo.

<sup>16</sup> Mina asauku mundiranasaa Anutufa aiqama ainaina innaarunai marina faqa maqasaa marina faqa akooqoo maria ainainausa faqa kukeeqara ainainauqa faqa Anutuna amiqira qangirooqa faqa misa namuqaa afaanauqa faqa nari rakisirausa faqa



nári uriqararausa faqa nári faiqí firaasa faqa mi aigama ainainausa asauku mundiranannai Anutufa auquseenoo mina aummooki mara quqanau. Mina amooqimasee minaindikiaqeera Anutufa minannai auqusee nári aminau.

<sup>17</sup> Asauku mundirafa sia maqee kaifau marida ooqai marufa maa maqanasaa ainaina sia maruqoo marufa marinau. Doo maqa faqa minasaa mari ainainausa faqa innaaruna faqa minakinaa ainainauqa faqa asauku mundiranaki kai ookaamambida maridanoo.

<sup>18</sup> Asauku mundirafa nári ufa irimariasasaa rakisidanoo qimannimidanoo. Mifa misara nári adakee qidanoo nariara misa nikiqafee qidanoo rakisinnimaqaidanoo. Mifa aigama ainaina uriqararafaikirara kuqirausa findifimari aana afisufa maridanoo nári mina ufa iri mariasara nári adakee qimarisara misa kafaa minasaaqaraana aigama kaqi marira kasirana maridaqa minara aigama ainaina uriqararafa maridanoo.

<sup>19</sup> Anutufa nari kai nári amaakuara اساسامaseenoo qini daanna ramafi urinaaqaramafi mariannee qufanoo maridanoo.

<sup>20</sup> Anutufa qufanoo nári amaaku fannoo aigama ainaina maqasaa qaraana faqa innaarunaindaraana faqa maramareenoo nári akoona aaqa munu moodaaqoo quqasoofanoo aqoondikamma nimaqanau. Nári amaaku asauku mundirafa nári fidika adioonannai asoosana quqasoofaqa moodaanaki kiqa maridaqa. Miqunara asauku mundirafa aigama ainaina uriqararafa maridanoo.

<sup>21</sup> Ooqai indaaruu innee Anutuna namuqaakama amaqaqau. Inni oosana fannoo manda marira marufanoo inni irirafa manda irirana kai irimarunara Anutufa inni futee auquseenoo namuqaakamma nimaqanau.

<sup>22</sup> Innee minni marufanoo Anutufa maqee inni mareeqeenoo nári aaqa quqaseenoo moodaanaki kinau. Nári amaaku nári afaaqa uqanna kuqiranannai kai inni moodaanaki aqoondikamma nimaqanau. Anutufa sia fifaufau miqinai. Inni marirafa nirafa amiqira marira andeeqara nira nuaqeera miqinai. Yisufa inni mareeqeenoo Anutuna afusaa kooroomasinaqa inniki sia moo nifasaasa ufa marianifeera nuqu siaisa mariaqeera minara Anutufa inni aqoondikamma nimaqanau.

<sup>23</sup> Ooqai indaaruu Yisuna amiqira fasaasa ufa iriseeqa naaquqarana taikaseeqa innaarunai firara asasida maridaqa. Miqida mi nimugusa idaaqirana sia kaifaa rufiarana maraqa. Inni irirafa maqee maqee Yisuna mapukusee mina faakanara maqi masee mundiqa mari iaqa. Mi amiqira fasaasa ufana aigama maqa maaqai qimannimisoofoqa qinee Pauroosa mina rumbara faiqi maridaqa mina saika faiqi maridaqa.

*Pauroofa nariara Yisuna aiku asuaku ainainamannisee mari fee qidanoo.*

<sup>24</sup> Qinee Yisuna aurfakiana qimannimunnara minara qinee Roomma maqanna rumberanaki maridaqa, innisaara faqa rumbaqa maridaqa. Qinee sia minara doori runidaqa, doori quqasee asasida maridaqa. Yisufa nari aiku oosana mariasara aunirira saqarisaa aupurarana maranau. Mina aupuraranaki qinee faqa keeqeeqa ookaamambiqqa rumbaqa maridaqa aupuraidaqa Yisunaindi fee qimasee kaqi asasidaqa.

<sup>25</sup> Yisufa nari aiku oosana mariasara Anutuna adakara foora mariaafoo qida nuqu raidanoo. Anutufa qufaqa qinee Pauroosa mi nidaka saikiranu saikimaruna fasiqausa maridaqa inni dadaaqiaqeera aigama maqannai ooqai Anutuna ufa kukeeqara ufa amiqimmandee kooroo iaqeera mi saikanaki Anutufa qini quqaqisaiifaqa maridaqa.

<sup>26-27</sup> Anutuna ufa kukeeqara ufa maaqi qinoo maridanoo. Anutuna asauku mundirafa Yisufa inni faiqi faiqi naundurai maridanoo. Mina oosana maaqimminoo maridanoo kasooqafee innee faqa innaarunai ooruree Anutuna ainaina adiafaa ira ainaina mina uriqararana afaaqa areenarana kaqa qarana mareefaranoo. Anutuna kukeeqara ufa doo miqinoo maridanoo. Mifa mi ufanara maaqi qinoo. Maa qini amiqira kukeeqara ufa uriqarara kukeeqara ufa aigama maqannaasa iriaqeera qini qiku qisauku mariasa kooroomannisaanaaree qinoo. Anutuna asauku mundirafa faiqi faiqi naundurai mariranara faqa innaarunai mina faqa ooru mariranara faqa mi ufaqandara ooqindari kukeeqeena maqee kamuqoo doo kooroomasee nari aiku asauku qimannimino.

<sup>28</sup> Maasa maa namusa asauku mundiranara aigamausa qimannidaqa. Maasa aigama fasiqa anaasee aaquqimannimaqaidaqa naamuaqidaqa amiqira iriranannai asauku mundiranasa aatoqemariasaa sia faiqi aanaaqiara foora iaqeera faiqi firaasara foora mafiqqa Yisunaki mapukusee mariaqeera qimannimidaqa.

<sup>29</sup> Maa namusakiqari qinee Pauroosa firaqoo kadaapiridaqa qimudaanaiqidaqa fuki faaki qidaqa qimannimidaqa. Sia qeeqa afeekannaifau miqidaqau Yisuna afeekannai miqidaqa faiqi firaasara foora mariaqeera miqidaqa.

## 2

<sup>1</sup> Qinee Pauroosa inniara kadaapi rimarunnana iriaqeera inni qimannimidaqa sia inni Kooroosee maqannaara kaifau kadaapiridaqau Raodiseea maqusanaasa akaqausa Yisuna ufa irimariasa faqa innee aiqama sia qini doori qiqafee mariasa inniara kadaapiridaqa.

<sup>2</sup> Minara inni nimuqusa sia iani paasoosammasee mariaqeera innee moodaanaki kammafi nariara nariara ridaqa innee Anutuna ufa amiqimasee iriseeqa innee nifaaqa quqasee Anutunaki mapukuqeera inniara kadaapi ridaqa. Innee amiqimasee Anutuna afeeka kukeeqara ufa uqeerasee iriaqeera. Mi kukeeqara afeeka ufafa asauku mundirafa nari uqanna maridanoo.

<sup>3</sup> Asauku mundirafa Anutufinnai fimaria irira kooqiara foora maridanoo. Anutuna aiqama irirafa oosana oosana adiafaaira irirafa anoona qira irirafa firaa qumiasanara foora Yisunaki mandaaganoo maridanoo. Sia maa maqanasaqaraa munnimma ainaina mararara iranau qidau innaarunai fimaria irirana faqa maaqoo nariara nariara nimuqusira nidiranara minara kai qidaqa. Innee faqa mina maraaqeera kadaapiridaqa.

<sup>4</sup> Kuqaa anoona afeeka irirana asauku mundiranasaa maridanoo. Qinee minara irisee maa ufana inni qimannimidaqa. Innee rakisidaqa qafaqa sia moo fannoo innaarunai fimaria aanaa unna qimaseenoo inni nikaru qiandoora mifa amiqimasee naakapainaga kuqaammifoo qimasee fifoor qimannimidaqa.

<sup>5</sup> Qinee kaqi maaqoo maridaqa inni mariranara اساساننماقيداقا. Inni marirana amiqira marira maridaqa ufa qaindusi mariasa mariafanoo اساساننماقيداقا inni irirafa asauku mundiranasaa amiqimasee mapukinoo marirana اساساننماقيداقا. Qinee Pauroosa nianai marunanoo qini maraquina fannoo inni faqa maridanoo. Qinee inni faqa maridaqara foora qinee maqee maqee inniara iridaqa rakisinnimaqidaqa.

*Asauku mundirafa aiqama ainaina tia uriqararafa uqanna maridanoo.*

<sup>6</sup> Inni Kooroosee maqannaasa akaqausa Anutuna asauku mundirana Yisunara maasa karaambaigee qimasee umaraafanoo doo innee maqee minasaa mundaqa maridaqa nuaga.

<sup>7</sup> Innee saqari atukara foora mapukusee Yisunaki mariaqa, sia rafauraki aqufuaqa afeekaikamasee aaku aakumafi Yisuna faakanasaa mundaqa mariaqa. Maasa qimannimafannamau kai inni irirafa Yisunaki maqee maqee afeekaikiqa. Inni irirafa maqee maqee Anutunara dufi dufi qimarifanoo inni naundurai qumbiqafi irairaaiani. Innee miqi kai iqa Yisunasaa mundaqa maridaqa nuaga.

<sup>8</sup> Innee amiqimasee eerairiaqa faiqi moo fannoo unna ufa qira iriranannai inni rarisameeqee nari aiku oosanaiki quqaandoora. Miqira fasiqa mina ufa fannoo irirana faqaa fasiqara foora ufa qiannoo. Mi ufafa faiqi anaasee nikaru qira ufa oosana siai ufafa fifau maqasaa ufa afaanna manika fannoo innaaruna faqa maqa faqa rakisidaqee qimari ufana. Sia asauku mundiranasaa oosana areemari ufafa maridanoo. Miqira ufara amiqimasee eerairiaqa.

<sup>9</sup> Sia asauku mundirafa fifau afaannafau maridanoofau. Anutuna aiqama afeeka marira irirafa muduka tia uqanna Yisunaki maqasaa qumu marinau.

<sup>10</sup> Innee minasaa maridaqa sia Yisuna marirana kai maree mariafanoo Anutuna marirafa minaki marina mina faqa maree mariafanoo. Afaannau rakisirausa uriqararasa mariafanoo faiqi moo fannoo misara anoonee qinaqa sia misara iridaqa rufiaaqa Yisufa kai misoo maasoo uriqararafa maridanoo misa faqa maasa faqa uriqaranoo maridanoo rakisinnimaqaidanoo.

<sup>11</sup> Yuda maqannaasa fainanduqirana oosana aanaaqi faiqi akoonaiqi fainanduqu nimaqasee misara Isaraee maqannaasaki maridaqa Anutuna faiqinamukiaqeera qimarusa maridaqa. Qinee Pauroosa mi oosanna kikiqa usidaqa maaqi qianaura. Innee Kooroosee maqannaasa asauku mundirana ufa irisee sia faiqi moo nisaukukoo innee fainanduqusee minaindikiaqeera qidaqa. Asauku mundirafa inni faiqi faiqi marirana manda marirana nirana aiqama uqanna nari maraqusoofaqa minaindikiaqa mariafanoo. Asauku mundirafa maa manda maqanasaqaraa nifaaqa qikairi faqa uturuqu aqiara foora masoofaqa doo mina turuqiara foora yanannai asauku mundiranaindi kammambi mariafanoo.

(Yuda maqannaasa oosana maaqimminoo maridanoo. Faiqi moo fannoo misa amaana maqaki keeqararee qimaseenoo anirainaga misa mina qumaree nammariki keeqammamaqidaqa. Keeqammamaqidaqa maaqi qidaqa. Maa fasiqafa kuqiranara foora keeqafinoo kuqiarafuora mafinoo findifinoo. Doo miqooqari amaana maqaki maqee fidaqa.)

<sup>12</sup> Qinee Pauroosa minara inni Kooroosee maqannaasara maaqi qidaqa Yisufa aunirira saqarisaa kuqufufaqa inneeqa nifaqa namufaqa kuqirana ameeraameeriqā Yisufa kuqiranakiqari findifufaqa innee faqa kuqirana ameeraa meeriranaki qari findifiqa fuka marirana mara maree findifi mariafanoo. Inni irirafa Yisunasaa mundunara mi ainaina kambiqafi maridanoo.

<sup>13</sup> Anutufa narī ufa Isaraee maqannaasa Mooseena sandufa qimanniminau. Innee nianai maridaqa sia Anutuna ufa irimariafanoo innee faiqī faiqi mariafanoo manda iri-ramau fimariafanoo. Innee inneeqa irirana Yisunasaa mundusoofanoo Anutufa minara inniara narī amaakusaimbaqa kuqiqau maqi qidanoo kaifaa inniara narī amaakusaim- baqa kuqiranakiqari findi fiqa minasaa mundufiqa marifaranoo fee qimaseenoo maasa maqasaa mandainaina taikaqiseenoo sia naruanauree qinau.

<sup>14</sup> Anutuna aaquqira ufa papiqaki marifaqa maasa mina irisee rukiasaida kaqi fimariafanoo Anutufa maasa darira ufa sia maasasaa qinau. Asauku mundirafa aunirira saqarisaa kuqirari marufanoo Anutufa maasa darira ufa oosana oosana qimaseenoo mara mareenoo Yisuna afaaqai munuseenoo aunirira saqarisaa pirimmannai aru atukaranau. Miqunara Anutufa maasara ufa siasee qidanoo Mooseena sandufa nimaarusirafa fannoo sia amana inni naruannoo fee qidanoo.

<sup>15</sup> Anutuna asauku mundirafa kuqufinoo mi kuqiranannai afaannauga rakisirausa uriqararasa misa aiqama misa afeeka qumooqumaseenoo aiqamausa nifusaa nisaurirana nimiseenoo ufoonaridanoo narī amooqimaseenoo maridanoo.

<sup>16</sup> Faiqī akaqausa inni Kooroosee maqannaasa maaqi qimasee qimannimifaqa siammiriqa. Misa maaqi qifaqa. Innee Mooseena sandufa maree akaqa narana nammari siamma naaqa. Innee aukana idooaranara sia irimariafanoo fuka quqoona idooaranara faqa sia irimariafanoo Yuda maqannaasa amaanasaa idooarana mina faqa sia irimariafanoo mandaikammi mariafanoo sia Yisuna aiku oosanaki andeeqasee mariafanoo. Misa mi ufanannai inni rafaqa fifaqa siamma iriaqa.

<sup>17</sup> Mi ainainnausa fifau nimanirafa maridanoo sia kuqaa anoonau. Sia moo ainaina kikiqa usuaqa. Asauku mundirafa mifa kuqaa anooa uqanna maridanoo innee mina faqa moodaanaki ootupamafi mariafanoo miqoo kai mariaqa.

<sup>18</sup> Faiqī akaqausa qummaararara ufannai inni rafaqa firaree qifaqa sia mi ufana iriaqa. Misa fifau inniara unna qimasee maasa daanna reeqa kaaqa nisaunaasauriqa nuaqee qiqa misa inniara unna qimaseeqa qangiroouqara nimooqiaqee qidaqa miqi qifaranoo. Misa qainamasee nariara Anutuna ufa iriseeqee qimasee inni rafaqaqifara. Miqira fasiqauqa fifau nari nifaqa nimooqi mariasa maridaqa. Misa nari manda marirana fannoo nari uqannifiqee marifaqa miqimariafanoo.

<sup>19</sup> Misa asauku mundirana minniseeqa nari aatata nifiqee firaree qidaqa mi ufanannai inni rafaqaqifaranoo. Asauku mundirafa maasa qikiaqa maridanoo mina adaka maasa maridaqa. Mifa maasa rakisinara amiqimasee moodaanaki maridaqa narī dadaaqi narī dadaaqidaqa Anutuna ufasaa innooqafi afeekaikidaqa. Mi fasiqausa nari qummaarannai inni rafaqaqimariasa maasa qikiaqa Yisuna minniseeqa nari aatata fidaqa mi ufanannai inni rafaqaqifidaqa.

*Maasa asauku mundirana namufaqa kuqiqā mina namufaqa findifiqa.*

<sup>20</sup> Innee Yisuna aiku oosana mariasa mifa kuqufaqa innee faqa inneeqa irirana namufaqa kuqiarafoo mafi mariafanoo. Doo innee nanaree afaannauga karaamba- baiqauqa misa ufa irisee rufiadee kuqira fasiqa fannoo sia mi ainainausara iridanoo doo taikanoo maridanoo doo innee minara iriseeqa faiqī faiqi sandufa oosana oosanannai rafaqaqifafaqā sia ooqai undee iqa eedoo qimasee mi mau fuaqa.

<sup>21</sup> Misa maa unnufanannai inni rafaqaqifidaqa. Innee akaqa narana nammari sia naaqa innaarunai fira aana ititeefoora. Innee akaqa narainaina sia uqanna nifaurusaa quqaaqee qidaqa. Akaqa ainaina sia auqaaqa mi manda ainainafa inni naakuandooree qidaqa. Innee miqira unna sandufa sia iriaqa.

<sup>22</sup> Fifau maqasaqaraa fasiqa sandufa inni naakapaidaqa. Maasa mi naranna namasaanoo sia niranandaki kasooiannoo kaqi aiqaraannoo sia innaaruna aana faqa ititaannoo kaqi aiqaraannoo.

<sup>23</sup> Innee mi fasiqausa sandufa iriseeqa unna qimasee irirana faqaasee qifaranoo. Misa maa ufana uqeeraidaqa. Innee qangiroouqa nimooqiaqee qidaqa innee inneeqa nifaqa fira aupurarana nimisee minannoo innaarunai fuaqee qidaqa unna qimari- afanoo. Mi unna fasiqausa mi naamuaqira ufana sia amana maasa daundurakinnaa manda nidirana rafaqa fuannoo, Yisuna saqarikirafa kai amana mina rafaqa fuannoo.

## 3

<sup>1</sup> Asauku mundirafa kuqiranakiqari findifufaqa innee mina faqa findifiga minara iridaqa inneeqa marira irirana innaarunai asauku mundirafa marinnai ubeeekaida mari-aqa. Migoo Anutufa asauku mundirana firaa afeeka amufanoo mina aqa maridanoo.

<sup>2</sup> Minara inneeqa irirana mirinni mari ainainnasaa rusisee iridaqa maagoo maqasaa manda ainanara sia iriaqa.

<sup>3</sup> Innee kuqirana aannareeqa sia mandainainara iriaqa kuqira foora iqa mariaqa.

<sup>4</sup> Inni marirafa Yisunasaa mundinoo marifanoo minaindi fannoo Anutunasaa mundinoo maridanoo. Asauku mundirafa innee maa maqanasaa anoona marirafa faqa marianara mifa nari kooroomasainaga innee mina namufaqa ooru raifanoo nari afeeka kaaqa qara areenarana naida nimiannoo.

*Ooqeenaa marirana faqa fuka marirana faqa doo maqee mi ufafa kooroo inoo.*

<sup>5</sup> Inneeqa maa maqanasaaqaraa nifaaqa ainaina adiafaairana arusaifanoo sia inni kaifaa mandoosana uqannifiqaani faiqi fannoo anaasee qummuarimarana faqa anaasee fannoo faiqi qummuarimarina taikaani. Inneeqa nifaaqa sia kooroo iaqa. Innee sia inneeqa mandoosana maraidaqa maanaaqa anaaseera indee indee qiqaanuqa adiafaa qiqa nuaqa doo mi iriraua taikafuani. Oosana oosana mandainaina marararee qimari-afa mifa faqa taikafuani. Innee aiqama ainainara nimukee marina mi irirafa taikaani. Anutuna minniseeqa moo Anutunara foora innaaru qidee qimariasa faqa ainainara rimariasa faqa moodaanaki unna aatata fimariafanoo.

<sup>6</sup> Mi ainainausa moomoo maree mariasa Anutuna ufa rukiaida miqidaqa.

<sup>7</sup> Innee misa faqa mi mandirirana maree marusa mariafanoo.

<sup>8-9</sup> Doo maqee afaimma quqaaqa. Maa ainainausa faqa afaimma quqaaqa. Aanooqi-rana faqa kaukaataqirana faqa aqoonausa nifasaasa qirana faqa aqoonausa niqura-maara rirana faqa maqee maqee faiqi fannoo aanaaseera amarauqirana faqa anaasee fannoo faiqira amarauqirana faqa unna ufa qimasaida nari afaasa nari afaasa qira ufa faqa mi ufaua aiqama afaimma quqaaqa.

<sup>10</sup> Mi manda iriraua ooqeenaa irirana marirana afaimma quqasee fuka andeeqara marirana marasee qammunnara foora afisuaqa. Mi fuka marirana Anutufa auqusee nimuna Anutufa kaifaa aiqama kari fukara foora kai mannimidanoo. Miqinanoo maasa marirafa mina amanaikinaqa maasa minara amiqimasee iriaqeera miqidanoo.

<sup>11</sup> Fuka mi andeeqara marirana maree mariasa nariara uriqararausee ureeqarausee qimiranara sia minara iridaqa, Yuda maqannaafee aanaamuru fee fainanduqirausee sia fainanduqirausee irirana faqaasee fuka aamina maqanaa fee anoona akoona faqa fee faiqi faiqi fee fuka andeeqara marirana maree mariasa sia mi ufauasara iridaqa. Asauku mundiranara kai kuqaa anoona maridanoo fee qidaqa.

<sup>12</sup> Innee Asauku mundiranara karaambaqee qimariasa. Anutufa innee rusandeesa-mumaseenoo nari andeeqara marira iriranaki quqanniseenoo inniara rakisidanoo amuqusidanoo. Anutufa miqimarinaqa innee maa reendeenira marira ufana kaqi maraaqa. Nariara nariara qimudao qiaqa. Ufa qirana faqa nirana faqa ireeda kai qimannimiaqa. Fisoo fisoo imariasa naannaraqa mariaqa. Reendenamafi ubiqasee mariasa naannaraqa mariaqa.

<sup>13</sup> Faqiqi anaasee inni ritifaqa kaqi irisee nimaqaqa. Asauku mundirafa inni mandainaina doo mininnisanau. Inniqiqari nariara nariara ufa qiraree qimasee asauku mundirana aanna reeqa nariara nariara ufa qirana minnisee aunusaa.

<sup>14</sup> Mi andeeqara aiqama ainainna nariqa kai sia amanaikifanoo nariara nariara nimuqusinafa mifa mi aiqama amiqira ainainausa uriqararafa maridanoo moodaanaki suqu quqaseenoo adiafaa irana nimidanoo.

<sup>15</sup> Innee asauku mundiranaki mariasa moodaara foora marianara nariara nariara farafara qirana minnisee asauku mundirana asooarafa inni naundurai rakisimarinaqa moodaanaki kiqa mariaqa. Innee miqiaqee qimaseenoo Anutufa inni rusandeesa-masee mareeqee asauku mundiranaki quqanau. Doo Anutunara faqa maqee maqee dufi dufi qiaqa.

<sup>16</sup> Asauku mundirafa nimu ufana innee iriseeqa maqee maqee eedoo qidaqa mi mau kai fimarifanoo inni naunduraki mi adiafaairafa qumbiqaani. Innee mi marinasaa fidaqa iriranannai kai nari andeeqee nari andeeqee iaqa. Firaa iriranannai aiqama nari aaquqimamaqaina nari aaquqimamaqaina iaqa. Anutuna maraquna fannoo amaana idi nimuna mi idina maqee maqee raqa nuaqa. Idi roona auqu Dafidifa mina idi faqa ooqeenasaa amaana idi faqa mi idisa maqee maqee raqa nuaqa. Raqa nidaqa Anutunara asasiidaqa dufi dufi qidaqa mi idi namusa raqa nuaqa.

<sup>17</sup> Innee inneeqara karaambaïqa Yisuna faiqi namu maridee qimasaidaga mina aanandaidee qidaqa ufa qimariana ainainimariana andeeqasee mina kai afaqaaga. Innee karaambaïqa Yisuna maa maqanasaa koorooiraua maridaqa mifa innandee innandee kai idaga mariaqa aigama ainaina nari qinnaqoo kai fidaqa ufa qinana auqeenana qafeeqa mina aanna raidee qiaqa. Sia noori runusee miqiaqa inneeqa nikoona Anutuna asasamamaqaidaqa susummamaqaaqa. Anutuna asauku mundirana minannai Anutufa aana ruqiqasaiifaqa asasirana Anutuna amiaqa.

*Faiqi anaasee, faiqi naakaparufa.*

<sup>18</sup> Faiqi ninaaqmaaka innee inneeqa nifaaqmaaka ooreeqa mariaqa. Karaambaïqa niraamummaaka mina ufa irimaria anaaseesa nari nifaammaaka ooreeqa maridaqa andeeqasee karaambaïqa aatata fidaqa miqimariafanoo.

<sup>19</sup> Anaasee nifaaqmaaka innee inneeqa ninaaqmaakara ridaqa nimuqusi marinaqa sia afeeka rakisira rakisinnimaqaaqa sia sukufa qimannimaqaaqa.

<sup>20</sup> Faiqiuqa inniqa ninausa nikausa ufa qinnana aigama kari sia rukiaaqa eedoo kai qiaqa. Karaambaïqa faiqi namu inneeqa ninausa nikausa ufara eedoo qidaqa andeeqasee karaambaïqa aatata fidaqa miqi mariafanoo.

<sup>21</sup> Innee ninausa nikausa inneeqa faiqi namu sia maqee maqee nifairida niqiaqa. Miqifaqa misa quandafi inniara firaqoo fidaqaafaranoo.

<sup>22</sup> Innee ainainira faiqiuqa mariasa innaarunai inni rakisirafa maridanoo inni saika oosana qafaidanoo. Innee maa maqanasaaqaraa rakisirausara faqa iriaqa aigama kari misa ufara faqa eedoo qiaqa. Sia nari niqafainnaqoo kai andeeqasee ainainiqa, kaqiqoo kaqiqoo faqa amiqimasee ainainiqa fuaqa. Miqi kai iqa sia faiqi anaasee nifusaa, inni nimoqqiranara kai irisee ainainiqa. Innee inneeqa nimuqusa ookiqari karaambaïqara naaquqainaqa minara irisee amiqimasee ainainiqa fuaqa.

<sup>23</sup> Inneeqa rakisirana ainainirana inneeqa nidiranannai kai auqaida mariaqa mi ainainna idaga sia maqasaa fasiqa ainainirane qiaqa.

<sup>24</sup> Kasooaqee maasa innaarunai ooruraananoo minni maasa qeeqa kadaapiriri unana akiaqara Karaambaïqa fannoo nari ooqai qimaqoo ufanasaa kai feefauru nimiannoo. Kaifaa innisaimbaqa aigama rakisirausa ainainidaqa asasammasee auqaaqa. Asauku mundirafa mifa anoona rakisirafa maridanoo mina saikakaimmifoo qimasee sanaasamasee amiqimasee auqaaqa.

<sup>25</sup> Innee oosana oosana ainainidaqa mandainainira ainainifanoo Anutufa inni ufa nimiannoo. Sia inniara kaqi fifau saika faiqi fee qimasee minninnisaannoo. Inni mandainainirana niqafamaseenoo mina amana kai ufa nimiannoo.

## 4

*Pauroofa naakaparufa qimannimidanoo.*

<sup>1</sup> Innee faiqisaa rakisirausa inni ainainira fasiqauqa innee andeeqasee amana amana kai misasaa rakisinnisaaga. Innee faiqisaa rakisirausa maa ufana iriaqa, inni rakisirafa innaarunai marifa inneeqa ainainira faiqi mandaikamma nimaqaifanoo inni faqa ufa nimiannoo.

<sup>2</sup> Innee Kooroosee maqannaa asauku mundirana Yisuna aiku oosana mariasa innee inneeqa ainainidaqa Anutuna ufamau fimarianara minara Anutuna maqee maqee innaaru qimamaqaaqa. Sia nifaurunnai kai unna innaaru qiaqa amiqimasee naunduran-nai innaaru qiaqa. Innaaru qidaqa maqee maqee Anutunara dufi dufi qimamaqaaqa.

<sup>3</sup> Innee innaaru qidaqa mai qini Pauroosa saimbaqa maqoo rumbaqa qini faqa mariasara faqa innaaru qimannisaaga. Ooqai asauku mundirafa kukeeqanoo marufanoo maqee kari akooroo inoo marifanoo Anutufa maasa dadaqinaqa mina ufa aigamai kooroomannimaqaannee qimaseeqa minara faqa innaaruqiaqa. Doo qinee maqee Roomma maqannaa rumberanaki fifau maridaqa. Asauku mundiranara maqusa maqusa qimannimafannanara Roomma maqannaasa sia maasa amaana ufafau qifoo qimaseeqa qini rumberanaki quqaqaafaqa maridaqa. Innee minara iriseeqa qiniara faqa innaaruqimaqisaaga.

<sup>4</sup> Ooqai tamummaqara fasiqauqa Anutuna asauku mundiranara sia amiqimasee irimariqau ati kai irimarufanoo maqee kamuqoo doo kambiqeenoo kooroo inoo maridanoo. Anutufa qiniara aigama maqusa maqusa qimannimiannee qifaqa minara innee qiniara innaaru qimaqisee mariafaqa qinee miqimannisa.

<sup>5</sup> Innee Kooroosee maqannaa Yisuna aiku oosana mariasa innee Yisuna ufara nikoo nika imariasa faqa moodaa maqusaki mariafanoo. Innee misa nifusaa reendenamasee irirana faqaasa naanna ramasee nuaqa. Innee misa faqa maridaqa innee sia fifau

nifaurunnai kai ufa qiaqa, Yisunara qimannimiraree qidaqa deedaqammaqaiifanoo mariani, iraiifaqa dauni qimannimiaqa.

<sup>6</sup> Innee Yisuna ufa irimariasa sia misa rauqisee qimannimiaqa, kasooqaqee fifimmasee adiafaaira ufa qimanniminaqa irifaranoo. Innee miqimarifaqa faiqi anaasee inni iraiifaqa andeeqasee anoona ufa kai qimannimiaqa.

*Pauroofa Kooroosee maqannaa nimandoo ufafa.*

<sup>7</sup> Qini Pauroosa Tikikusafa qini daufakiana inni qimannimiannoo Tikikusanara qini dididanoo mifa karaambaiqaindi maridanoo mina ainainira faiqi maridanoo amiqimaseenoo maasa dadaaqidanoo.

<sup>8</sup> Qinee Tikikusana maindari aqiqaananoo maasa daufakiana qimanniminanoo inni nifeegaranoo mariannoo.

<sup>9</sup> Qinee Ooneesimusana faqa Tikikusana faqa miqanda innee mariannai niqiaqanaura. Ooneesimusafa mifa Kooroosee maqannaa maridanoo mifa faqa maasa qikaqaafasaa amiqirafa marifanoo maasa minara faqa nididanoo. Miqanda maaqoo oosana oosana ainaina koorooiranara inni qimannimifaranoo.

<sup>10</sup> Aristarakusafa mifa faqa mai qini faqa Roomma maqanaa rumbaranaki maridanoo nimandaidanoo. Baranabasina akaqaafasaa uqanna Marikoofa mai marifa mifa faqa inni nimandaidanoo. Qinee moo akaraki Marikoonara qimannimifannana mifa oonurainaga innee mina amiqimasee rakisi aisaaga.

<sup>11</sup> Yusatusafa mifa faqa mai maridanoo mina auqu moo Yisuna auqu amaranaikirafa mifa faqa inni nimandaidanoo. Yuda maqannaa amaana ufa irimarusa misaqiqari Yusatusafa faqa Marikoofa faqa Aristarakusafa faqa mi namusa kai qini faqa moodaa karida ainainimariasa maridaqa maa maqanasaa Anutuna ququsa firaafaikianifeera mi namusa kai maasa dadaaqidaqa. Misa miqi mariafaqa qinee rumbaranaki marunanoo qimuqusa isooaidanoo.

<sup>12</sup> Eepafaraasafa inni Kooroosee maqannaafa mai maridanoo inni nimandaidanoo. Mifa faqa asaku mundirana Yisuna ainainira faiqi maridanoo, mifa inni Kooroosee maqannaasara andeeqasee Anutuna ufa nimandakusee irisee mi mau andeeqasee fuaqeer afeekaikamasee innaaru qidanoo. Innee kooroosee maqannaasa faiqi fraasara maqi mafi amiqimasee Yisuna aiku oosanaki ooqumarifi afeekaikiqa mariaqeer innaaru qidanoo. Innee miqiaqeer afeekaikamasee inniara maqee maqee afeekaikamasee innaaru qidanoo.

<sup>13</sup> Qinee Pauroosa mi fasiqana Eepafaraasana kadaapirirana qafaidaqa qimannimidaqa. Sia inni Kooroosee maqannaara kaifau qidanoofau, Raoodiseea maqannaa faqa Qieerapoorisa maqannaa faqara innaaru qimannisaidanoo.

<sup>14</sup> Rukaafa tutaqa saikimarifa maasa nidimarifa maridanoo mifa faqa inni nimandaidanoo. Deemasafa mifa faqa inni nimandaidanoo.

<sup>15</sup> Innee maa akarana iriseeqa quandafi Yisuna ufa irimariasa Raoodiseea maqanaa faqa nimandaaqa. Yisuna ufa irimariasa faiqi moo auqu Nimafana maaqaki suqimariasa mi nimandarufana mareeqeeqa misa faqa nimifaqa iriaqa.

<sup>16</sup> Maa akara ufana innee Kooroosee maqannaa nimaqeeqa. Innee mina asaana rumaseeqa iriseeqa faiqi moo fannoo mina mara mareenoo munu Raoodiseea maqannaa Yisuna ufa irimariasa qambaana asaana rinaqa iriaqa irisee mee nari Raoodiseea maqannaa nimu akarufana kaifaa mi fasiqafa misaindi mareenoo anireenoo inniqa maqannaaki asaana rinaqa misa nimaqaunna ufana faqa iriaqa.

<sup>17</sup> Arakipusafa karaambaiqa ufa irimarifa maridanoo. Innee afeekaikamasee qimamia. Anee sia qumooqukidana aunduarua. Afeekaikamasee auqa. Innee miqi qimaseeqa Arakipusana qimamiaqa.

<sup>18</sup> Faiqi moo fannoo ufa qunnana akararumasaiifaqa qeeqa Pauroosa kaqi qeeqa duqu kai akara ridaqa maa akarana rafaqaqidaqa. Qinee inni nimandaidaga. Qinee Roomma maqanna karabusaki kaqi marunnanara innee maqee maqee innaaru qimaqisaaga. Anutufa nari marirana inni niminaqa innee amiqi amiqiaqeer nimianoo mina maraqa.

## 1 TEESARONIKA Teesaronika Maqanna Indaaru Nimu Akarafa.

<sup>1</sup> Innee Teesaroonika maqannaasa Anutunaki mariasa karaambaiqa Yisuna asauku mundiranaki faqa mariasa, innee Teesaroonika maqannaasa Yisuna ufara suqimariasa qinee Pauroosa faqa Sirasifa faqa Timootifa faqa inni nimandaidaga, akara rumanni-maqaidaga. Anutuna kaqi nimira afaarirana faqa asoosana nari aundura faqa inni faqa mariani.

*Pauroofa Teesaroonika maqannaasa Anutuna ufamau fimarunara nimooqidanoo.*

<sup>2</sup> Maasa maaqoo marunna namusa inniara iriseeqa maqee maqee Anutufinnai dufi dufi qidaqa, maqee maqee inniara innaaru qimannimaqaidaga.

<sup>3</sup> Maasa inniara maqee maqee maasa qikoona Anutuna aaqoo auqaidaga. Innee Yisuna saqarikidaqa miqianara Anutuna ufirira ainainirana maqee maqee imariafanoo. Innee Anutunara faqa faiqi aanaaseera faqa nimuqusa imarinara Anutufinnai kadaapiri mariafanoo. Innee Yisunara asasammasee afeesira irirafa karaambaiqa asauku mundirana Yisunaki atukaramasee marianara minauqara faqa maasa irisee Anutuna aaqoo auqaidaga inniara innaaru qimannimaqaidaga.

<sup>4</sup> Teesaroonika maqusanaasa qini qikaqaafasaa Anutufa inniara amuqusimarifa inni rusandeesamumasee maroonara maasa iridaqa.

<sup>5</sup> Maasa Yisuna aafakiana sia noonnai kaifau inni qimannimidau, Anutuna afeekannai faqa mina naaquqara andeeqara maraqunannai faqa qeeqa faqa mi iriranamau fidaqa minannai faqa inni qimannimafannana minara Anutufa inni rusandeesamunara iridaqa kuqaa fee qidaqa. Maasa inni faqa Teesaroonika maqusai mariafana qifafoosa maridaqa inni dadaqirara andeeqaseeqa mariafanausa maridaqa innee minara irimariafanoo.

<sup>6</sup> Innee maasa andeeqarana qafamasee karaambaiqa faqa maasa faqa andeeqarana ameeraameerirana faqa maasa faqa andeeqarana ameeraameeri mariafanoo, inni maqannaasa Yisuna ufa irunara mina akiqara inni aupurarana fraaqoo nimufaqa innee sia minara iriqau naaquqara maraquna nimiru asarirana asasammasee karaambaiqa ufa kai maroosa.

<sup>7</sup> Innee Teesaroonika maqannaasa miqiga aiqama aanaamuru Yisuna ufa irimarusa innee andeeqara oosana uqannifiqoonara innee Maseedoonia maqa maaqakina marusa faqa Kirisa maqa maaqakina marusa faqa uqannifiqoosa mariafanoo.

<sup>8</sup> Sia mi maqa maaqa qanda kaifau karaambaiqa ufa iriqau, aiqama maqa maaqai innee Teesaroonika maqannaasa Anutuna ufa irufa, mi ufafa aiqamai daraaninoo fifaininuu. Maasa fifau inniara mi maqannaasa fiq fiq idaga qimannimiqa nimariafanaqa misa oqai iriseeqa qimaqimiqa.

<sup>9</sup> Ooqai maasa inni Teesaroonika maqusai oonuraafanaqa innee maasa asasamandee oonu qifiqasee amiqimasee maasa ufa irunara faasai mi anaamurusa irimariqau. Innee inneeqa dapi saqari Anutunara foora innaaru qimaruna minnisee quandaki kuqaa anoona kasi mari Anutufinnai ubeekaranara faqa faasai mi anaamurusa iriseeqa minara aiqamausa qimannimariqau.

<sup>10</sup> Innee mifunnai ubeekamafi mina amaaku innaarunaindari qumiranara afeesu afeesirafa kaqi afeesida marunara faasai aanaamuru minara faqa irimariqau. Anutuna amaaku Yisufa kuqiranakinaana mara findifufa, maasa Anutufa kasoqaaqee naruanin-nanakinaana Yisufa maasa asumu qumaree marifa innee mifa qumuaninnanara afeesida marunara aiqama aanaamuru faasaimma irisee qimaqimafanoo.

## 2

*Pauroofa Teesaroonika maqusai maridanoo nari ainaini marunara qimanniminuu.*

<sup>1</sup> Oo Teesaroonika maqannaasa qini qikaqaafasaa uqa. Maasa namu inni maqusai fuafannakari sia kadiqamannisaiqafana, innee minara irimariafanoo.

<sup>2</sup> Maasa namu Teesaroonika maqusai fuaneera Firipi maqusai oonuraafanaqa mandaikamma nimaqeeqa manda ufa qimunara irimariafanoo. Maasa inni maqusai oonuraafanaqa moomoosa aanoqima nimaqoofoqa oonumafi iriafanoo Anutufa paasoosirana nimufaqa mina ufa inni Teesaroonika maqannaasa qimannimiqaafana.

<sup>3</sup> Maasa qimannimirafa faqa sia aqaranasaa mundinoo maridanoo sia maasa mandainaina maraannanasaa mundinoo maridanoo, sia maasa ufa akaruqiranasaa mundinoo maridanoo.

<sup>4</sup> Anutufa maasa nimanamasee inni qimannimiranara eedoo qimasee narí amiqira fasaasa ufa maasasaa quqasainaqá maasa maqee maqee Anutuna aidiramau kai inni qimannimidaqa. Anutufa maasa firana amanamasee qafeemarifa marifaqa minara irisee andeeqasee qimannimidaqa. Sia faiqi maasa ufa irisee eedoo qiaqeerau qimannimidau. Anutufa irisee eedoo qianinnamau kai inni qimannimidaqa.

<sup>5</sup> Maasa Anutuna afusaa maridaqa sia nimooqira ufannaifau inni qimannimiqiafana. Maasa Yisuna ufa qimannimidaqa sia maqandanai oosana oosana ainaina ummuariraree qimasee Yisuna ufa firaqoo qimannimifanausa, andeeqemariafanausa innee minara faqa irimariafanoo.

<sup>6</sup> Maasa inni faqa maridaqa inni fee akaqausee sia misa nimooqira ufara randaqiafana.

<sup>7</sup> Kuqaa maasa asauku mundirafa niqiqoo fasiqausa maqasaa fasiqauqa maridaqa, maasa minara irisee sia inniara qimooqirane, ainainee qimiaqee qimariqiafana. Nin-  
ausa faiqi aanaaqi ireeda rakisi mariandee maasa miqikai mandee ireeda kai inni faqa maridaqa qimannimifanausa sia inni moo ainaina maraqiafana.

<sup>8</sup> Maasa inni Teesaroonika maqannaasara firaqoo nimuqusimarunara sia Anutunaindaraa amiqira fasaasa ufa kai naida nimiqa, maasa qeeqa dariranara sia rufiqarai irirana faqa qimuqusa faqa kaqi marirana faqa nimiaqaaida mariqiafana.

<sup>9</sup> Oo qini qikaqaafasaa maasa inni maqusai inni faqa mariafanaqa innee maasa oosana qafamasee irimariafanoo. Maasa narana maree maria saikana kadaapiriqa tooqaamu maraafana qafaqau. Maasa Anutufinnaindaraa amiqira fasaasa ufa qimannimiqa fifi inaqa innisaa oonu munduanaga innee maasa naranara mamaraida miqidammiafoo qifoora faasaana faqa eendaki faqa qeeqa kai narana maree maria ainainirana kadaapiri mariafanaqa qafaqau.

<sup>10</sup> Maasa innee Teesaroonika maqanna faqa mariafana kamugoo sia Anutufa kai maasa marirana qafana, innee faqa qifafoofanoo. Maasa inni Yisunara rimarusa faqa maridaqa maasa anukarana faqa andeeqarana faqa pisoopisoirana faqa sia aaqarana faqa mariafanaqa qifafee marusa maridaqa.

<sup>11</sup> Faiqi nikausa amiqimmandee faiqi rakisidaqa maasa miqi kai iqa inni rakisimariqiafana.

<sup>12</sup> Maasa innee mandainaina maroofaga reendenamma nimaqeeafanausa maridaqa. Anutufa inni naaraidanoo kasooqagee innaarunai ooruree narí areenarana faqa narí ququsara faqa mina faqa marasee narí faqa mariaqee qidanoo. Maasa inniara minara iriseeqa innee maqee mariaqooqari Anutuna aidiramau kai fuaqa, minara fuki faaki qimariqiafana.

<sup>13</sup> Anutuna aufakiana maasasaa quqasoona inni qimannimifaqa innee irisee umaraqau. Innee minara sia faiqi ufafee qimariqau. Anutuna ufafee qimasee umaraqau. Miquna qafamasee maasa Anutunara dufi dufi qidaqa. Kuqaa Anutuna ufa maridanoo innee mina ufa irimariasakina saikidanoo.

<sup>14</sup> Ooqai Yuda maqannaasa nári niqoonausa asauku mundirana Yisuna ufa irimarusa irisoona akiaqara kadaapirirana nidafrana nimiqau. Innee Teesaroonika maqannaasa faqa asauku mundirana Yisuna ufa irisooafaqa inniqa niqoonausa nikoqooafaqa miqi undee kai iqa nidafrana aupurarana inni nimiqau.

<sup>15</sup> Yuda maqannaasa ooqai Anutuna tamummaqara fasiqauqa kuqa nariqau, kafa ma kamugoo karaambaiqa Yisuna kuqamma arusaqau. Doo kafa maqee maasa mandaikamma qimaqaidaqa. Misa Anutuna afusaa firaqoo mandaikidaqa misa kaqa faiqi narimarias maridaqa.

<sup>16</sup> Maasa Anutuna ufa faiqi asumu marararufa aanaamuru qimannimimarunaqa misa nikooqaiqa maasa rafaqafirara amanidaqa. Miqidaqa Yuda maqannaasa aaqarafa doo firaafa uriqaranoo maridanoo, doo maqee mandainaina akiaqara Anutuna aranaqarafa doo misasaa aqufinoo maridanoo.

*Pauroofa kaifaa Teesaroonika maqusai fuaneerusia minnisanau.*

<sup>17</sup> Anutufa misara miqi qimarifaqa qinee Pauroosa maasa qeeqara maaqi qidaqa. Yuda maqanna nifaqasaifaqa qusasaa maasa nianai rakeeiqa maridaqa, qifaaqa kai nianai rakeeiqa maridanoo. Maasa irirafa inniki marifaqa fuaneera firaqoo amanunanoo sia amanaikifaqa kaqi maridaqa.

<sup>18</sup> Qinee Pauroosa faqa qini faqa mariasa Teesaroonika maqusai innee iannai fuaneera amanunanoo sia ifaqa qinee qeeqa kai moomoo kari amanunanoo Sadannafa qini faqa ititaifaqa minniseeqa kaqi Ateensa maqusai maridaqa.

<sup>19</sup> Yisufa quminna aukuaana innee Teesaroonika maqannaasa faqa aanaamuru qimanniminausa faqa innee inni andeeqaranannai marifaqa qinee inniara Yisuna afusaa qeeqa faiqiara foora inniara asiasanauranoo.



<sup>20</sup> Maasa qeeqa qifaaqa amooqirana faqa اساسirana faqa inniki marinara innee maqee marianara firaqoo iridaqa kumaaraa Timootina aqiqeeqa.

### 3

<sup>1-3</sup> Maasa inni Teesaroonika maqannaasara kisaqasaa munari minari firirafanaisia doo maqee minnisee rakeemasee Ateensa maqusai maasa namu kaqi maridaqa maasa qikaqa Timootifa maasa faqa Anutuna saikaki marifa amiqira fasaasa ufa asauku mundiranara qimannimi noonifa maasa mina aqiqeeqa innee iannai inni pooduaanifeera innee Yisuna saqarikirana dadaaqianifeera, akaqausa inni nidafirana nimifaqa sia quandaki fuageera Timootina innee iannai aqiqeeqa. Aqiqamasee maasa kaqi Ateensa maqusai maridaqa. Maasa Yisuna ufasaara narirafa marianinnanara Anutufa ooqai maasara minaki fuagee qimaqoo ufafa maridanoo. Innee minara faqa irimariafanoo.

<sup>4</sup> Maasa Teesaroonika maqusaki maridaqa inni qimannimiqa Yisuna ufa saara narirafa kambiqaanoo fee qifannana doo mifa kambiqaidanoo innee minara faqa irimariafanoo.

<sup>5</sup> Qinee Pauroosa minara iriseeqa innee iannai Timootina aqiqeeqa. Qinee inni naufakiana sia uqanna iriqa kisaqasaa mariranara qikooqafaqa munari minariqa Timootina aqiqeeqa. Mifa oonureenoo Yisunasaa mundiranara irianifeera aqiqeeqa, Sadannafa inni nikarimaqasee qafaifanoo qini saika kadiqaanoo fee sia fee kadiqaanoo.

<sup>6</sup> Doo maqee Timootifa oonurandee anireenoo inni adiafaaira naufakiana qifaqa iriqa. Mifa innee Yisuna saqarikirana faqa nariara nariara nimuqusirana faqa qimaqimino. Mifa innee maasara maqee maqee irimarianara faqa maasa inni niqafaqaaairana amana amana kai innee maasa qifafaqaa imarianara Timootifa qimaqimifaqa iriqa. Ooqai maasa qifaaqa rumbanoo marifaqa mariunasa.

<sup>7</sup> Innee Yisuna saqarikirafa kaqi marinara maqee iriseeqa qifaaqa اساسifanoo kadaapirirana faqa apurarana faqa doo aufadeenoo.

<sup>8</sup> Inneeqa marirana mapukuseeqa karaambaiqa afusaa findiffafa maasa qifaaqa amiqiannoo.

<sup>9</sup> Doo maqee maasa innee mapukusee marianara Anutuna afusaa dufi dufi qianaura. Maasa inniara Anutuna afusaa اساسidaqa minara faqa dufi dufi qimamaqaida.

<sup>10</sup> Maasa faasaana eendaki inniara Anutufinnai innaaru qidaqa, Anutufa dadaaqinaqa inni noori nindafamasee inneeqa Anutuna ufamau firana andeeqa nimifaranoo.

<sup>11</sup> Maasa Anutufa maasa qikoofa nari uqanna, maasa karaambaiqa Yisufa faqa maasa aana afisusainaqa innee iannai fuanaura.

<sup>12</sup> Karaambaiqa fannoo innee nariara nariara rirana firaanaikamma nimaqaani, inni aiqamausara nidirafa faqa maqee maqee firaanaikiani. Maasa inniara didirafa maqee maqee firaafaikidanoo. Innindi faqa miqi kai inoo maqee maqee firaafaikiani.

<sup>13</sup> Miqifanoo Anutufa inni nimuqusa mapukusee afeekaikamma nimiannoo. Innisaimbaqa karaambaiqa Yisufa nari aiku asauku faqa kafa qumureenoo inni mareegeenoo andeeqarasa naaquarusaikama nisainaqa maasa qikoona Anutuna afusaa kikiqifaranoo.

### 4

*Pauroofa Teesaroonika maqannaasara Anutuna aidiramau fuaqeera naakapaidanoo.*

<sup>1</sup> Oo Teesaroonika maqannaasa qini qikaqafasaaauqa qeeqa ufa maa ufana ati qimannimianaura. Maasa inni faqa mariafanna kamuqoo Anutuna aidiramau firanara qimannimifanaqa mi mau fiffusa doo maqee kaqi mi mau fimariafaqa qinee iridaqa. Karaambaiqa Yisufa qimaqimiqoonara doo maqee inni fuki faaki qidaqa sia ooqai undee kai kaqikaqoo Anutuna iriranamau fuaqa, moo faqa moo faqa afeekaikamasee mi mau fuaqa.

<sup>2</sup> Inni faqa marianna kamuqoo Karaambaiqa Yisuna ufamau fuaqeera naamuqira ufa oosana oosana naakapaafannana innee irimariafanoo.

<sup>3</sup> Anutuna irirafa inniara maaqimminoo maridanoo inni andeeqara naaquarafa marinaga faiqi anaasee nari ummuari nari ummuarirafa sia inni rumbanoo mariani mandainainakiqari idukirausa naanna ramasee mariaqee qiaqa.

<sup>4</sup> Anutufa inniara maaqiaqee qidanoo. Innee aiqamausa inneeqa nifaaqara naaquqara uriqarara ainainee qimasee rakisidaqa andeeqara oosana marararee qidaqa nari ummuari nari ummuarirana taika uqanna fuani.

<sup>5</sup> Innee sia aamina maqannaasa sia Anutunara irimariasaa naanna raaqa misa mandainaina fanandiranaki maridaqa innee sia misa naanna raaqa.

<sup>6</sup> Sia inniki moo fannoo miqinoo narí aqoonausee moo maqannaasee mandaikamma nimaqaani. Ooqai maasa inni qimannimifannana maqee kafia aaquqimannimaqaidaqa Karaambaiqa fannoo mi umuarira oosannara narirafa maridanoo.

<sup>7</sup> Anutufa sia maasara narí ummuari narí ummuariranaki mariaqeera maasa daarama narí ququsaki quqeenoofo. Maasa kaaqa andeeqaranaki mariaqeera maasa daarama quqanau.

<sup>8-9</sup> Faiqí fee anaasee fee moo fannoo maa qínee qunnuvana minnisainafa sia faiqí ufafau minniseefara Anutufa narí naaquqara andeeqara maraquna niminna ufana rukieefaranoo. Innee Teesaroonika maqannaasa Yisuna ufa irimariasa nariara nariara nidiranara innee irimariafaqa fifau qimannimidaqa. Anutufa nari kai narí aidi nari aidiranara qimannimifaqa irimariafanoo.

<sup>10</sup> Innee Teesaroonika maqusanaasa Yisuna ufa irimariasa Maseedoonia maqa maaqaki maria nikaqaafasaasa mi amiqira oosanna nimiqoosa mariafanoo. Sia maqee iandee kai kaqikaqoo nariara nariara nidiani moo faqa moo faqa firaqoo nariara nariara nidiani.

<sup>11</sup> Maasa ooqai inni faqa maridaqa qimannimiaafanandee kai qidaqa kafia qimannimidaqa. Maa ainainausasaa nimana mundusaafanoo miqoo kai fuaqa. Aiqausa inneeqa ainainirasasaa inneeqa rakisiaqa, aiqausa inneeqa narana inneeqa ainaina inneeqa kai maraaqa.

<sup>12</sup> Innee Yisuna ufa irimariasa miqí faqa mina ufara nikooqee mariasa inni nimooqíqa andeeqeeafoo qifaranoo. Innee faqa miqidaqa sia moo ainainara sarauqinana moonasaa oonu mundua.

*Yisufa kafia qumuaninna ufafa.*

<sup>13</sup> Qini qikaqaafasaa ufa anoona ufa siaisa kuqufíqa sia findifidammiafoo qimasee ikifaafau qimariana. Innee faqa misa naanna reefoo qimasee kuqirausara anoona ufa iriaqee qimasee inni qimannimidaqa.

<sup>14</sup> Maasa maaqí qidaqa inni qimannimidaqa. Yisufa kuqufinoo kafia minakiqari findifinuu. Miqunara maasa maaqí qidaqa Yisuna saqariki mariasa kuqufifanoo Anutufa Yisuna mara findifundee kai inoo misa faqa marafindifumma nimaqaannoo. Yisufa qumuaninna aukuaana Yisuna faqa moodaanaki mariaqeera Anutufa marafindifumma nimaqaannoo.

<sup>15</sup> Karaambaiqa naamuqimaaqoo ufafa maaqimminoo marifaqa qimannimidaqa. Karaambaiqa qumuaninna faasaanasaa maasa kaqí marianausa sia kuqirausa noorisaa ooru fuaauranoo.

<sup>16-17</sup> Mi faasaanasaa innaarunaindari Anutuna daambeenda firaqoo ruannoo, qangi-rooqua uriqararafa ufa qiannoo, Anutuna ukeena fuaqaannoo doo miqoo innaarunaindari karaambaiqa narí uqanna qumuanoo. Qumurainaga kuqirausa kaqí maru kamuqoo asauku mundirana saqarikida mariusa misa naaree kuqiranakiqari findififaqa doo miqoo maasa mikari kaqí mariasa faqa kuqirausa faqa Anutufa moodaanaki afapita qumareenoo uqeerannisainaga asurukina keeqakinaga aanai ooru karaambaiqa paqurimasee mikari mina faqa naaru naaru marianaura.

<sup>18</sup> Miqiannanara innee faiqí anaasee faiqí kuqufuafaqa nifaqa rumbee marifaqa ikiraqee mariana mi ufana qimannimifanoo nifaqa aufadaani.

## 5

*Yisufa tautumasee qumuaninnanara faasanara foora mariaqa.*

<sup>1-2</sup> Mi ainainna kambiqaaninna aukuanara maasa fifau akara rumasee qimannimianaura, ooqai doo innee irimariafanoo maaqimminoo mariannoo, karaambaiqa qumuaninna kari ummuara fasiqara foora kukeeqakinoo qumuanoo.

<sup>3</sup> Faiqí anaasee maa aukuanara amiqiranaki asoaranaki maridee qimasee kaqí mana manida marifanoo doo miqoo kai rakeemasee fira narirafa tautumannimaqaannoo. Sia moo amekamasaannoo, anaasee innaamunai fimariandee iannoo sia aupurarafa sia mariannoo, mariannoo.

<sup>4</sup> Innee Teesaroonika maqannaasa qini qikaqaafasaa ufa, innee sia asukunakiara foora nimariasa mariafanoo. Yisufa qumira faasaana ummuarira fasiqara foora kambiqafi naqa innee sia tautumasee nisaurifaranoo.

<sup>5</sup> Innee aiqausa kaaqa qaranaki nimariasa faasanara foora nimariasa mariafanoo sia maasa innisaimbaqa eendakiara foora nimarunausa sia asukunakiara foora nimariasa foora maridaqa.

<sup>6</sup> Miqunara maasa innisaimbaqa sia faiqeemariasa naanna raaqa nifu maqasee mari-aqa. Maasa innee faqa sia nammari neemariasa naanna ree furufariqa kaqi amiqimasee marianauro.

<sup>7</sup> Eendaki faiqi anaasee faiqidaqa eendaki nammari namasee furufaridaqa.

<sup>8</sup> Maasa sia miqimarunaua maridaqa kaaqa qaranaindi maridaqa maasa sia nammari namasee furufariqa nuaqaana kaqi mariaqaana. Maasa qeeqa Yisuna saqarikirana faqa qeeqa nariara nariara rirana faqa mi ainainaqandannai saqari kammandee ukee iriqa. Maasa asumu marianafa kasooqaaqee kambiqaaninnanara asasidaqa rakisida maridaqa. Mi asasira afeesiranara pateeuqara foora qikiaqaki afisusee rakiranakiara foora maria.

(Ooqai nikiaga itairiraua suani qikiaqaki daruandoo qimasee pateeuqa nariqa nikiaga itairiranasaa afisimariqau. Ooqai Yisuna aukuaana Roomma maqasee rakira fasiqauqa ainna qafee afisusee rakiranaki nimariqau. Aiqama ainaina samu sia qikiaqa daruani fee qimasee afisiqau.)

<sup>9</sup> Anutufa sia maasa rusandeesamumasee nari aranaqaranaki quqarareefau qinuu. Asauku mundirana karaambaqa Yisunannai asumu marirana maraaqee qimaseenoo maasa rusandeesamumasee maranau.

<sup>10</sup> Mi asauku mundirafa minasaimbaqa maasara moodaanaki mariaqera maasa darirana qimaaga maqasee kuqufa findifinoo maridanoo nari kaifaa qumurainaqa kuqiqee kaqi maridee nari faqa mariaqera maasa qimaaga maqasee kuqinuu.

<sup>11</sup> Innee mi irirana iriseeqa soofaari mariasa mi iriranannai nari dadaaqi nari dadaaqidaqa nari amana nari amana mapukuaqa.

*Pauroofa ufa taikaidanoo nimandaidanoo.*

<sup>12</sup> Oo maasa qikaqaafasaa maasa qeeqa qimuqusa ookiqari inni qimannimidaqa. Inniki Anutuna ufa saiki maria fasiqausa Anutufa mareeqeenoo mi saikanaki uqannisoosara qidaqa, misa inni naamuqaira ufa qimannimiafaqa amiqira fasiqafee qimasee naaquqamasee iriaqa.

<sup>13</sup> Misa nari amiqira saikara irisee firaqoo noosaa qiranara rufiada misara nidaqa. Innee nariara nariara nidimarinaqa asoaranaki mariaqa.

<sup>14</sup> Qinee inni naamuqai maruna fasiqausa qimannimidaqa, inni kudi fasiqauqara afeekaikamasee naakapaifaqa misa ainainiaqa, rufiee maria fasiqa anaaseesa nimana mapukunimaqaaqa, irirana ooreeqarousa innee dadaaqiaqa, innee aiqamausa qambaana reendeenidaqa asoomasee qimannimiqa fuaqa.

<sup>15</sup> Innee maa ainainnara faqa rakisiaqa, moo fannoo ani mandaikammamaqainana akiaqara sia nari mandaikammamaqaa sia mi oosana mariani. Innee aiqama kari narinni narinni amiqira oosana kai nari ami nari amiaqa sia inneeqaki kai miqiaqa. Innee aiqama maqannaasaki maridaqa miqimannimaqaaqa. Inneeqa irirana nimana mi amiqira oosannasaa kai quqaaqa.

<sup>16-18</sup> Innee aiqama kari Yisuna ufa irimariasa asasida kai mariaqa, aiqama eendaki faasaana innaaru qiqa fuaqa. Aiqama ainaina tiaki Anutunara dufi dufi kai qiqa. Innee mi ufamau fidaqa asauku mundirana Yisunaki fidaqa Anutufa inniara fuaqee qimaqoomau fifaranoo.

<sup>19</sup> Naaquqara andeeqara maraquna fannoo inni afeeka niminaqa sia mina rafaqa-fuaqa.

<sup>20</sup> Anutuna maraquna fannoo faiqi dadaaqinaqa sia nikoo nikaa iaqa, amiqimasee iriaqa.

<sup>21</sup> Innee aiqama amaana ufa sia kaqi iriaqa aiqama ufa aiqumumasee iriseeqa anoona ufa kai iriaqa.

<sup>22</sup> Oosana oosana mandainainara eerairiaqa.

<sup>23</sup> Anutufa maasa naundurui asoarana nimimarifa inni mariranaki naaquqara andeeqara oosana firaqoo nimiani. Mifa kai inni aiqama marirana nipatasaa faqa nimana faqa maraquna faqa aaqarafa sia mariani anukarafa kai mari mari inanoo asauku mundirafa karaambaqa Yisufa miqiqa marinnanaki qumuani.

<sup>24</sup> Innee inneeqa mandainainakiqari aniaqera naaree marifa Yisufa sia akoo akaa imarifa maqee maqee dadaaqimarifa maridannoora anukara oosana nimiannoo.

<sup>25</sup> Oo Teesaroonika maqannaasa maasa qikaqaafasaa, innee maasara maqee maqee innaaru qiqa.

<sup>26</sup> Innee aiqama inneeqa nikaqaafasaa nimandaidaga moodaa fidikara foora niman-daqa.

<sup>27</sup> Qinee Pauroosa Karaambaqa ufa irisee inniara afeekaikida qimannimida innee maa papiqana maraseeqa minakinaa akara ufa aiqama Yisuna ufa irimariasa asaana rumasee qimannimiaqa.

<sup>28</sup> Asaku mundirana Karaambaiga Yisuna afaarirafa inniki mariani.

## 2 TEESARONNIKA

### Teesaroonika Maqanna Inaaqianna Nimu Akarafa.

<sup>1</sup> Innee Teesaroonika maqannaasa Anutuna ufa irimariasa innee maasa qikoona Anutuna aiku asauku maqasaa fasiqa anaasee mariasa Anutuna asauku mundirana karaambaiqa Yisunaindi faqa mariasa qinee Pauroosa inni akara rumannimaqaidaqa, qaara fasiqa Sirasisa Timootisa faqa inni akara rumannimaqaidaqa.

<sup>2</sup> Innaarunai nikoona Anutuna faqa Anutuna asauku mundirana karaambaiqa Yisuna miqanda kaqi nári afaarirana faqa nári naundura asoarana faqa inni nimiani.

*Yisufa kafia qumureenoo Anutuna ufa rukiee mariasa naruannoo.*

<sup>3</sup> Oo qini qikaqafasaa ufa maasa inniara maqee maqee Anutufinai dufi dufi qima-maqaidaqa. Innee Yisuna saqarikirafa firaqoo kambiqainara iriseeqa sia minara dufi dufi qiana aqaannoo. Inniara Anutufinnai dufi dufi qimarunafa andeedqaidano.

<sup>4</sup> Innee Teesaroonika maqusanaasa Yisuna ufa irimarianasaara narirana faqa oosana oosana aupurarana faqa kaqi maraqa fimariana faqa Yisuna ufa kaqi iriqa fimarianara faqa iriseeqa maqanna maqanna fidaqa inni amiqira oosana amaana maqaki keeqee mariasa qimannimidaqa qeeqa qimooqidaqa.

<sup>5</sup> Anutuna andeeqara narira ufa anoona kasooqaqee maaqi qimasee kambiqaanoo, innee maqee Yisuna ufaasara aupurarana maraqa fimariana akiaqara kasooqaqee maaqimminoo mariannoo. Mi aupurarafa Anutuna marira ququsaki keeqarana amanaikamma nimaqaannoo.

<sup>6</sup> Anutufa narí andeeqara oosana maraseenoo inni aupurararana nimimariasa mina akiaqara nári faqa aupurarana nimiannoo, innee mina ufaasara aupurarana mareemariasa asoarana nimidanoo maasa faqa nimiannoo.

<sup>7</sup> Karaambaiqa Yisufa innaarunaindari narí afeekafaqaa qangiroo namufaqa ida aurunamu faqa koorooira faasaana asoarana maasa nimiseenoo aupurarana misa nimiannoo.

<sup>8</sup> Miqimmandee kooroomafinoo Yisufa Anutunara sia irimariasa faqa maasa karaambaiqa Yisuna amiqira fasaasa ufara nikoo imariasa narirana nimiannoo.

<sup>9</sup> Yisufa naaru naaru taikarana misa niminaqa naaru naaru karaambaiqa mariqooqari nianai naadumasaa maridaqa sia mina areenara afeeka qafeefarano.

<sup>10</sup> Mi faasaannasaa Yisufa maasa faqa aiqama narí aiku asauku amooqirana irirara qumuannoo, aiqama mina ufa irimariasa naaqqarana faqa mararara qumuannoo.

<sup>11</sup> Maasa mi ainainafa kambiqaaninnanara iriseeqa maqee maqee inni Teesaroonika maqusanaasara innaaru qidaqa Anutufa inni naundurari naakapaifaqa mina ufamau uqeerara aatata fimariafanoo minara qidaqa. Anutufa inni dadaaqinaqa inni marirafa nirafa uqeerara aana amana kai fuaqera innaaru qidaqa. Anutufa narí afeekannai innee Anutuna ufamau firanara amiqiranee qimariana anoonaikiani, innee mina saqarikira saika faqa anoonaikiani.

<sup>12</sup> Innee miqifaqa aiqamausa inni andeeqarana qafamasee Yisuna auqu areenara amooqifanoo Yisufa quandafi inni nimooqiannoo, Anutufa faqa Anutuna asauku mundirafa karaambaiqa Yisuna faqa kaqi afaariranannai maa ainainafa mariannoo.

## 2

*Manda fasiqa kambiqafinoo moomoosa nikaruqiannoo.*

<sup>1</sup> Doo maqee qinee Pauroosa Anutuna asauku mundirafa karaambaiqa Yisufa innaarunaindari kafia qumiranara faqa maasa mina faqa moodaanaki suqu quqaranara faqa qimannimianaara. Akaqausa minara doo qumi ifoo qiafaqa innee minara irisee furufariqa munari minari imariafanoo.

<sup>2</sup> Karaambaiqa qumira faasaanara doo aiqaqanau maqi qifaqa unna ufa qiaafoo qimasee sia dauni munuqi miniqira ufa irisee naundura dapikinaqa ninunuruqa. Yafee moo fannoo mi ufana qimanniminoo fee, faiqi moo fannoo aqara ufa tamummaqasee qimanniminoo fee, amaana ufa qimannimimari fasiqafa unna qimasee qimanniminoo fee, faiqi moo fannoo unna qimasee maasara pasaki akara rumasee qimaqimi ifoo qinoo fee.

<sup>3</sup> Innee sia moo fannoo nikaru qinna ufana iriaqa. Yisufa qumira faasaana sia kaqi aniannoo maa ainainausa naaree kambiqafifanoo qumuannoo. Taikara aukwana adeedi rainaqa aiqama atinaindari faiqi anaasee firaqoo Anutuna ufa rukiasee nariqa aatata fifarano. Mi aukunna maqasaa manda fasiqa fannoo idaki fuaninafa kambiqaanoo.

<sup>4</sup> Mi manda fasiqafa aiqama maaqanna maaqanna nariqa Anutunee qimaria ainainna faqa aiqama nariqa Anutunara innaaru qimamaqee mariana faqa kuqaa qimariana faqa unna qimariana faqa aiqama namuqaakama nimaqeenoo qaoo qiannoo.

<sup>5</sup> Qinee Pauroosa inni Teesaroonika maqusanaasa faqa maridaqa mi ainainasara inni qimannimifannana sia iridee auni fee.

<sup>6</sup> Mandoosana maree mari fasiqanara maqee mi manda fasiqafa faqa nari mandoosana faqa kambigaaqaa idanoo moo ainainara innee minara irimarianara maqee kari rafaqaqafidanoo nari aukuanasaa mi manda fasiqafa kooroo iannoo.

<sup>7</sup> Mi manda fasiqana mandainaina fannoo doo maqee maqasaa fasiqa anaaseeki oosana arasee qumee saikidanoo sia maqee anoonakiannoo minasaa rafaqaqafimari ainaina Anutufa uqeraa marainanoo kooroo iannoo.

<sup>8</sup> Kooroo inanoo karaambaiqa Yisuna oosunda fannoo mi manda fasiqana kuqammaruannoo nari areenarana kooroo iranannai faqa nari qumira faasaana mi fasiqana rakekaamasainanoo taikaannoo.

<sup>9</sup> Mi manda oosana maree mari fasiqana oosana maaqimminoo mariannoo, mifa Sadannana firaa afeeka namufaqa anireenoo oosana oosana ainainna faiqi sia auqaaqaa ira ainaina faqa unna qimasee nari auqu uqereee mari ainaina faqa naaquqara ainaina faqa uqerasee anoonara foora uqannifiqaannoo.

<sup>10</sup> Mi manda oosana nikaaruqira mandainaina uqannifiqainaqa naaru idaki taikeefandinausa minara kuqaa fee qimasee irifara, misa innaarunai asumu marira anoona ufara sia nidimarifaqa sia oonu irianara mina akiaqara taikeefaranoo.

<sup>11-12</sup> Minara Anutufa kuqaa anoona ufara sia iri mariasa mandainainara asasi mariasa naruaninnaqoo mareeqee quqararee qimaseenoo moo maraquina aqara maraquina naakunnimaqainaqa mi maraquinafa misa naundurai saikinaqa unna ufara kuqaa anoona ufee qifaranoo.

*Innee Anutuna areenaranaki mariaqera rusandeesamumaseenoo maranau.*

<sup>13</sup> Innee Teesaroonika maqusanaasa sia miqimariasa karaambaiqa inniara aidimarisa maasa doo inniara maqee maqee Anutufinnai dufi dufi qidaqammu. Anutufa nari maraquina afeekannai faqa innee anoona ufasaa mandaqaranannai faqa inni Teesaroonika maqusanaasa innaarunai asumu marirana faqa Anutuna nari faiqi anaasee kammafi mariaqera faqa oosana arooqooqari rusandeesamumasee inni maraanauree qimaqoofa maqee mareenoo.

<sup>14</sup> Sia fifau inni mareenoo maasa amiqira fasaasa ufa inni qimannimifannana minannai innee Anutuna asauku mundirana karaambaiqa Yisuna areenarana raina nimiraree qimaseenoo inni maranau.

<sup>15</sup> Oo qini qikaqaafasaa qinee minara irisee qimannimidaqa maasa ooqai inni faqa maridaqa nooqi qari qimannimifanna anoona ufana faqa maaqooqari pasaki akara rumannimifannana mi anoona ufana faqa innee mi anoona ufanaki mapukufinaqa afeekaikamasee kikiqammafi nisaukuki uaqee iaqa. Sia moo unna ufa iriaqa.

<sup>16-17</sup> Anutuna asauku mundirafa karaambaiqa Yisufa faqa maasa qikoofa Anutufa maasara aidi marifa nari kaqi afaarira oosanakiqari naaru naaru paasoosirana faqa naaru kambigaaqanina ainainara asasammasee afeesirana faqa nimuqanda miqanda fannoo inni afeeka niminaqa andeeqara nirana marirana ufaqirana maraqa, inni nimuqusaki sia Yisuna ufamau firanara naaquqarafa mariani paasoosirana kai umbiqa nimiani.

### 3

*Pauroofa Teesaroonika maqannaasara nariara innaaruqiaqee qinuu.*

<sup>1</sup> Qinee ufa qimannimiseeqa maa ufanannai taikaanaura. Innee Teesaroonika maqusanaasa maasara maaqi qimasee innaaru qiaqa. Maasa karaambaiqa ufa qimannimifanaqa inniki anoona kambiqoondede kai aiqama anaamurunni miqi kai mafinoo dauni daraaninoo anoonaikiani.

<sup>2</sup> Kafa maaqi qimasee maasara innaaru qiaqa, Anutufa maasa manda fasiqauqa nisaukukinaana rafiqaani sia aiqama maqannaasa Yisuna ufa iridammia.

<sup>3</sup> Karaambaiqa fannoo sia miqi marifa qimannimisee rakisimarifa afeeka mapukirana nimiseenoo aakaqaqindaraa fasiqasaa ititannimaqaannoo.

<sup>4</sup> Karaambaiqa fannoo inniara maasa nimuna asoosirana nimidanoo innee maqee faqa kasooqagee faqa sia manda iriramau fifaranoo maasa qimannimira ufamau kai andeeqasee fifaranoo.

<sup>5</sup> Karaambaiqa fannoo Anutunara nidirana inni nimuqusaki quqaani. Anutuna ufamau nimandakufi maqee maqee firana Anutuna asauku mundirafa inni naunduraki quqaani.

*Kadaapi rumasee inneeqa narainaina maraaqee qu ufafa.*

<sup>6</sup> Oo maasa qikaqaafasaaqu maasa Anutuna asauku mundirana karaambaiqa Yisuna auqu ramasee inni naaquqama nimaqaidaqa, inniki kudoosaapee mariasa innee sia misa naaqa mariaga rufiasee nianai mariaga misa sia maasa naamuqaqira ufamau fimariasa maridaqammia.

<sup>7</sup> Innee maasa oosana qafeeusa mariafanoo, maasa inni faqa maridaqa sia kudoosaa-parausa mariqiafana innee maasa oosanamau kai fuaqaana innee minara irimariafanoo.

<sup>8</sup> Maasa inni faqa maridaqa sia moona narana maaqa marirana kaqi maree mariqau, feefaurumasaidaqa maree mariqiafana. Maasa inni narainaina kaqi naanoo qimasee eendaki faqa faasaana faqa kadaapi rimariafana tooqaamu darusoofaqa mi narainaina akiaqara imariqau.

<sup>9</sup> Maasa inniara iriseeqa miqi qiqiafana, innee mi oosanna qafamasee mi mau kai fuaqeera kadaapiriqiafana, innee narainaina kaqi qimifanoofau amana kai andeeqanoo mariqini, maasa Yisuna ufa qimannimifannana akiaqara marini, innee maasa funna-mau fuaqeera kadaapiriqiafana.

<sup>10</sup> Maasa inni faqa maridaqa maa ufana qimannimifannana kafa kafa qimannimidaqa, faiqi moo fannoo sia ainainifa narana faqa sia naanoo.

<sup>11</sup> Maasa sia fifau inni qimannimidaqa inniki fooroopi mariasa marianara iriseeqa qimannimidaqa misa sia nariqa ainaina imariasa kaqi moosa ainaina deedeepi mariasa marianara iridaqa.

<sup>12</sup> Anutuna asauku mundirana karaambaiqa Yisuna auqu ramasee mi fasiqausa fooroopi mariasa naaquqama nimaqaidaqa misa andeeqara mariramau fidaqa nariqa narainaina kadaapirumasee maraaqa.

<sup>13</sup> Qini qikaqaafasaa innee andeeqasee nimariasa faqa qimannimidaqa. Innee inneeqa amiqira nira marira oosana maree mariana sia nikoo nikaamasee minnisaaqa kaqi kai fuaqa.

<sup>14</sup> Innee maa akarana asaana rimarifaqa akaqausa mi ufana rukiee mariasa marifaqa innee rufiasee nianai marifaqa misa nisaurirana maraaqa.

<sup>15</sup> Sia misa namuqaakama nimaqaaqa nikaqaafaasaara foora naaquqama nimaqaaqa.

*Pauroofa doo taikarufa qimaqoofa.*

<sup>16</sup> Karaambaiqa nari kai naundurari asoarana oosana marifa aiqama kari oosana oosana mariranaki inni faqa naundura asoarana nimiannoo. Karaambaiqa inni aigamausa faqa mariani.

<sup>17</sup> Faiqi moo fannoo qini maa ufana akara rumasaifaqa qinee qeeqa qisaukunnai maaqi qimasee rafaqafidaqa. Qinee Pauroosa inni nimandaqidaqa. Innee maa akarana moonaindi fee qifoora aiqama papiqa akara rumasee qeeqa qisaukunnai rafaqafidaqa.

<sup>18</sup> Anutuna asauku mundirana karaambaiqa Yisuna afaarirafa inniki mariani.

## 1 TIMOOTI

### Timootina indaaru rumamaqoo akarafa.

<sup>1</sup> Oo Timooti anee kumaaraa marianafa anee qini qimaakuara foora mariananoo. Qinee oogai ani qimamafannana aninna irirafa qufana Yisufinnai quandoona Anutufa faqa nari asauku mundirafa Yisufa faqa maasa asumu maroofa maasa minasaa mundi marunafa mifa qini mara quqaqoosa minara asauku mundirafa Yisufa nari ainainia-neera maqasaa fasiqa diqiqoosa maa papiqana qinee Pauroosa ani akara rumamaqeeqa.

<sup>2</sup> Oo Timooti maasa qikoofa Anutufa faqa maasa karaambaifa asauku mundirafa Yisufa faqa ani dadaaqaifa, misa nariqa nifauarana ani amiaqa. Misa ani aundura asoarana faqa amiaqa.

*Pauroofa unna amaana ufa qimariasara Timootina aaquqimamaqoo ufafa.*

<sup>3</sup> Oogai qinee Maseedoonia maaqa maqai fiqa aniara Eefeesusa maqusaki mariannee qiafannana maqee faqa miqi kai iqa miqoo mariannee qidaqa. Eefeesusa maqusaki mariasa akaqausa fuka unna amaana qimari ufana faiqi anaasee qimannimi mariasa mariafaqa minara anee qaoo qianneera miqoo mariannee qidaqa.

<sup>4</sup> Anee maaqi qimasee qaoo qia. Misa nari uriuqa minnisaaqa misa nari nikeeku nikaaku nifaqnausa nifasaasa qimammaree kisaqasaa fimariana minnisaaqa. Miqi qimaria ufafa ufa rainarana tinoorirana kai uqeeraidanoo sia Anutuna marirafa nirafa maasaki marina dadaaqidanoo. Anutufa maasara maaqoo fuannaanna sia mi manda dapi ufanannai paqurianaaura maasa nari irirana Yisunasaa rusiranannai kai fuanna aanna paqurianaaura.

<sup>5</sup> Sia fifau mi unnana qimariasara qaoo qiannee qidaqa faiqi anaasee miqooqaraasa Yisunasaa rusirana sia unna qiaqa kuqaa kai qiaqa, kuqaa anoona uqannasaa mundusee fiqa nari nifaqa qumaararana siaisa aufadamasee nidaqa nari naunduraki ikairi siaisa nidaqa mi qaaramoo ainainakiqari faiqi anaaseera nimuqusirana rirafa kam-biqaidanoo.

<sup>6</sup> Faiqi anaasee akaqausa mi anoonna ainainakiqari quandakiqa fifau faafau qira ufa nari qimami nari qimami qianannai nariqa ninaakusamarara kaqi runna fimariafanoo.

<sup>7</sup> Mi unna amaanna qimariasara paasoosamandee nari faqa sia irimaria ainainnara faqa ufara faqa kaqi paasoosamasee kaqi qimannimidaqa kafaa nariara Anutuna sandufa qimannimi marunausee qidaqa aqaqidaqa.

<sup>8</sup> Anutuna sandufa Mooseenasaaqari qimannimu ufafa amiqira ainaina maridanoo. Faiqi anaasee mina andeeqasee irifanoo amiqira ainaina mariannoo.

<sup>9-10</sup> Maasa oosana oosana sandufara maaqi qimiridaqa. Sia amiqira fasiqa anaaseeruu maridau, ufa rukiee mariasara maridanoo Kaamanna ufa rukiee mariasa faqa Anutuna siaisa faqa Anutuna ufa rukiee mariasa faqa sia Anutunara irimariasara maqasaa ainainara kai irimariasara nari ninausa nikausa kuqa narimariasara faqa faiqi anaasee kuqa nari mariasa faqa faiqi anaasee narinni narinni qummuari mariasa faqa faiqi fannoo aqoonna fasiqa aafeeqara oosana faqa anaasee fannoo aqoonna anaasee aafeeqara oosana faqa faiqi aanaaqi qummuari mariasa faqa unna ufa qimariasara faqa siaasa ufa irimarinaki mafi nari kai raqaseenoo moonara unna ufa qimariasara faqa aiqama anoona ufa rukiee mariasa faqa mi aiqama mandoosanna maraqa nuasara misara kai Anutufa nari sandufa misa qaoo qimaseenoo quqasoofanoo maridanoo. Misa nimaarusira sandufa quqasoofanoo maridanoo, sia mi aqara oosanaqa maree mariasa kaifau nimaarusidanoofau oosana oosana ainaina Anutuna mapukira ufa rukiee mariasa faqa nimaarusidanoo.

<sup>11</sup> Mee Anutuna mapukira ufa qunnana mifa maasa Anutuna amiqirana mina areenarana kooroo idanoo. Mina amiqira fasaasa ufa amana kai mi ufafa maridanoo. Mi fasaasa ufana Anutufa qinisaa quqasee anee Timooti qimannimiannee qu ufafa maridanoo.

*Pauroofa Yisunara nari mandoosanara afauoonara dufi dufi qu ufafa.*

<sup>12</sup> Qinee mi saikanaki nimariafananoo maasa karaambaifa asauku mundirafa qini ainainirana amana kai qimunara dufi dufi qidaqa. Mifa qiniara mi ainainirana amanaikammi ifoo qimaseenoo mara quqaqaisa maridaqa minara faqa maasa karaambaifa asauku mundirana Yisunara dufi dufi qidaqa.

<sup>13-14</sup> Oogai indaaru qinee Pauroosa Yisunara mandufa qimariafanausa mina ainainimaru fasiqausa naru nifaqaa iqa niniaafanausa Yisuna faqa aquraraafanausa maridaqa. Anutufa qiniara sia Yisunara iridanoo fee qimasee sia nari mandoosanara iridanoo fee



qimaseenoo sia qini darinoo, qini qifauamaseenoo narí afaarirana qinisaa nammariara foora adiasenoo minasaa qeeqa irirana Yisunasaa rusirana faqa faiqí aanaaseera qimuqusirana faqa qiminau. Maasa aiqamausa asauku mundirana Yisunaki keeque mariasa mi nimimaria ainainnaqanda Yisunasaa irirana rusirana faqa faiqí aanaaseera qimuqusirana faqa mi qaara ainainnaqanda qiminau.

<sup>15-16</sup> Maa ufana anoona ufa maridanoo qumaree iri maria ufafa maridanoo asauku mundirafa Yisufa manda oosana maree mariasa asumu maraane qimasee quminau. Qinee Pauroosa mi mandoosanna uriqararasa mariafananoo Anutufa sia qini darinoo qifauanau. Asauku mundirafa Yisufa narí kasoomambi qini qifiqaranara firaana firaqoo kooroianifeera mandoosana uriqararasa qini qifauanau. Miqimaseenoo Yisufa qini mareeqeenoo akooqoo quqasoofaqa naaru kasooqagee Yisuna mandaqasee naaru marirana maree mariasa qini kikiqususaidanoo qini mandoosana uriqaranoo maruna ririmma qifauamaseenoo minni qisanau. Innindi oorudupinoo maridanoo mina mandaqasaifanoo kaqi inni faqa maraanauree qinau. Qinee minara irisee amooqira ufa maaqi qimasee qianaara.

<sup>17</sup> Naaru naaru mari karaambaiqafa sia kuquaninafa maasa sia mina qafee marunafa moodaa Anutufa sia moo fannoo marifa uriqararana faqa areenarana faqa naaru naaru minaindi marianno.

<sup>18</sup> Oo Timooti anee qini qimaakuara foora marianafa. Qinee maa ufana anisaa quqaidaga. Ooqai tamummaqara fasiqauqa qimaqoofa ani qimamira ufa mi mau fidanoo. Ani ainainirafa andeeqara rakiara foora imariannana qini ufa fannoo ani duru feefara foora inoo marianno.

<sup>19</sup> Amiqira rakirana rakidana ani Yisuna saqarikirana uaqeeia, afaaqa qumaara rarana siaina mina faqa uaqeeia. Faiqí akaqausa nári naaqoo irirafa qimannimifaqa andeeqasee fidaqa misa nári Yisuna saqarikira irirana munu furufarammaseeqa kurididaqa.

<sup>20</sup> Qaara fasiqa Qimeenaeusafa faqa Areekisandeerafa faqa miqandaqara miqi maru-faqa qinee mareeqee Sadanna asaukuki quqaafanaqa misa Anutunara mandufa qirana taikaaqera quqaqafana.

## 2

*Pauroofa Yisuna ufara suqinnanaki maaqi qimasee innaaru qiaqee qinau.*

<sup>1-2</sup> Maa ainainna naaree ani aamuqimamisaanana anee faqa Yisuna ufara suqimari-asa faqa suqidaqa innaaru qidaqa maaqimasee innaaru qiaqa. Maa maqanasaa faiqí aanaaseesaa rakisinnimaqee marisara misa amiqimasee rakisinnimaqaaqera innaaru qiaqa. Innee kaqi qeesa reendeenamasee asooaranaki mariaqera misara innaaruqiaqa. Anutuna ufamau fidaqa andeeqara mariranaki mariaqera aupuraranaki sia mariaqera misara innaaruqiaqa, innee maqee aiqama fasiqauqara faqa maa maqanasaa firaqoo uriqararasa faqa kaamanna uriqarararasara faqa Anutuna afusaa Anutufa misa dadaaqianifeera innaaruna qiaqa. Misara faqa dufi dufi qirana qiaqera qidaqa.

<sup>3-4</sup> Misara innaaru qirafa amiqira oosana maridanoo Anutufa maasa asumu maree marifa minara aididanoo. Mifa aiqama fasiqa anaasee asumu mariranaki ani mariaqera qidanoo anoona ufamau fuaqera qidanoo misara innaaruqira oosannara Anutufa aididanoo.

<sup>5-6</sup> Moodaa Anutufa kai maridanoo moodaa fannoo kai narí Anutuna faqa faiqí anaasee faqa mara moodaanakikamma nimaqaidanoo. Mi fasiqafa Anutuna asauku mundirafa Yisufa maridanoo faiqí anaasee oonu kafa marasee nariki quqaanifeera narí afaaqa kuqiranaki quqanau. Maasa mina qafamaseeqa maaqi qidaqa. Oo Anutuna narí aukuaana maridanoo. Oo mifa kuqaa aiqama fasiqa aanaaseera asumu mariranaki mariaqera miqidanoo.

<sup>7</sup> Minara faqa qini Pauroosa qeeqa maqusaindari diqiqamasoofaqa qinee aanaamuru aiqama uqannifiqaidaqa Yisunasaa irirana rusirana anoona ufa faqa qimannimidaqa. Qinee sia unna qidaqa anoona ufa kai qimannimidaqa.

<sup>8</sup> Yisuna ufara suqimarianaki faiqira qinee maaqi qimasee naamuqidaqa. Aiqamai maria fasiqausa aanooqirana siaina, ufa rainarana siaina, nári nisauku anukarasa uqeerasee innaaru qimariasa nári marirana nári nirana minauqara Anutunaindi fee qiaqera, aiqama fasiqara miqi mariasee innaaru qiaqera qidaqa.

<sup>9</sup> Anaaseera qinee maaqi qidaqa. Aiqama nári nifaaqai mari siara qamunnana amiqimasee nári nifaaqa aanaamususee irirana faqaasaikamambi mariaqee qidaqa. Sia kaaqa firaqoo oosana oosana ainaina nifaaqa auquqa.

<sup>10</sup> Niqoonausa dadaaqirafa mifa inni nifaaqa auqirafara foora mariani. Anutuna ufa irimaria anaaseera andeeqara oosana miqiminoo maridanoo.

<sup>11</sup> Yisuna ufara suqimaria maqanaki keeqaifaqa anaasee ufa siaina reendeenamandee Anutuna ufa iriaqa.

<sup>12</sup> Yisuna ufara suqimaria maqanaki aanaaseeuqa sia kikiqa mafiqa Anutuna ufa qimannimiaqa. Misa sia faiqi urinaaqaramafi mariaqa qinee mina qaoo qidaqa misa ufa siainausa mariaqee qidaqa Yisuna ufara suqimaria maqanaki miqiaqee qidaqa.

<sup>13</sup> Anutufa Adamana naaree auquseenoo doo mina inaaqianna Eeuna auqinau.

<sup>14</sup> Sadannafa sia faiqi akaruqinau, anaasee kai akaru qimasoofoano Anutuna ufa rukianau.

<sup>15</sup> Doo maqee Anutufa sia aiqama aanaaseeuqa mina akiqara naru taikaannoo faiqi maqaranasaa marifaranoo. Misa nari nifaqa amiqimmandee aanaamususee maridaqa Yisunasaa irirana rusiseeqa mariaqa faiqi aanaaseera amuqusamasee mariaqa qikairi siaisa anukarasa mariaqa. Miqidaqa noori kandamasee maridaqa kaqi marifaranoo.

### 3

#### *Pauroofa Yisuna ufara suqimarinasasaa rakisirusara naakapamaqoofa.*

<sup>1</sup> Maa ufana anoona ufa kai qinee Pauroosa qimannimianauro. Faiqi moo fannoo Yisuna ufara suqimariasasaa rakisiraree qimarifa amiqira ainainammiannoo.

<sup>2</sup> Yisuna ufara suqimariasasaa rakisimari papatarafa nari nirana marirana sia aaqarafa mariannoo andeeqarafa marida andeeqasee rakisianoo. Miqimarinna fasiqafa moodaa anaasee faqaafa kai mariannoo. Mifa oori runusee marifa mariannoo. Nari aki-ranara iri marifa mariannoo. Nari qumiasana aina faqa marirana faqa andeeqasee quqemarifa. Mi fasiqafa Yisuna ufara suqimariasasaa rakisiranaiki mari fasiqafa aanaamuru maqee maqee mina maqusaki aniraafanoo amiqi amiqidanoo nifiqa nari maaqaki quqasaida narana firidanoo. Mi fasiqafa Anutuna akarakinaa ufa andeeqasee qimannimi marifa mi oosanausa maree marifa Yisuna ufara suqimariasasaa rakisirafa amanaikiannoo.

<sup>3</sup> Mifa sia nammari namasee furufaridanoo marifa faiqi anaasee sia nari marifa mariannoo. Mifa fifira oosanara reendeenira oosanara kai rimarifa mariannoo. Mi fasiqafa sia kaaqa munnimmara rimari fasiqafa mariannoo.

<sup>4</sup> Mifa nari faiqi aanaaseera amiqimasee rakisinnimaqee marifa maridanoo. Mi fasiqafa nari faiqi namuara qimannimifaqa eedoo qimasee reendeenamandee auqee marinausa mariaqa.

<sup>5</sup> Mi fasiqafa nari faiqi anaasee sia amiqimasee rakisinoo naqimaseenoo fee Yisuna ufara suqimaria maqanaki keeqee mariasasaa rakisianoo fee.

<sup>6</sup> Yisuna ufara suqimariasasaa rakisiranaiki mari fasiqafa sia fukasaa Yisunasaa irirana rusimarina mara quqaa. Miqimari fasiqafa dauni nari oori uqeerasee nari afaafa mara maree uridanoo amooqinoo dauni aaqaranaki aqufuandoora. Ooqai Sadannafa innaarunai miqimarunara Anutufa ateekanau. Maa fuka fasiqafa Yisuna mandaqarana miqi kai inoo Anutufa ateekaandoora.

<sup>7</sup> Yisuna ufara suqimariasasaa rakisiranaiki mari fasiqanara Yisuna ufara sia iri-mariasaa faqa minara amiqira fasiqee qimariafa mariannoo. Miqi qimaria fasiqafa sia Sadannana namufaqa moodaa madikaki aqufinoo asuruannoo. Doo Yisuna ufara suqimariasasaa rakisimaria fasiqausa oosana doo miqiminoo mariani.

#### *Pauroofa amaanufasaa rakisimarusaa dadaaqimariasara qinau.*

<sup>8</sup> Doo qinee Pauroosa amaana maqasaa rakisirusara qimasee doo maqee misa ooreeqara dadaaqirusara qianauro. Amaanufasaa rakisirusaa dadaaqimariasara misa marirana nirana andeeqasee noori runusee mariasa mariaqa. Misa faqa sia nammari namasee furufariaqa. Misa faqa sia kaaqa ainainara rimarinausa mariaqa.

<sup>9</sup> Misa akarakinaa Anutuna ufa qumareeqa mi mau fidaqa sia nifaqa umaararaani-feera aufadaqa mariaqee mariaqa.

<sup>10</sup> Dadaaqimaria fasiqausa sia kaqi mareeqee dadaaqiranaki quqarafa mariaqa. Misa amanamasee qafeenana kai mareeqee dadaaqira saikaki quqaa.

<sup>11</sup> Dadaaqi maria fasiqausa ninaaqmaaka faqa marirana nirana andeeqasee maridaqa sia munuqi miniqi qimariasaa marifaranoo. Mi anaaseesa noori runusee maridaqa anoona ufa kai qimariasaa mariaqa.

<sup>12</sup> Yisuna ufara suqimariasaa amaanufasaa rakisirusaa dadaaqimarifa moodaa anaasee faqaafa mariani nari faiqi anaasee amiqimmandee rakisi marifa mi saikanaki mariani.

<sup>13</sup> Amiqimasee kisaaqasaa papatara saika auqaqa fimariasaa aiqamausa nifusaa uriqararana maraidaqa miqidaqa, misa asaku mundirana Yisunasaa irirana rusirana atukarasee mapukirana maraidaqa.

*Anutuna kukeeqara ufa anoona Yisufa firaafa maridanoo.*

<sup>14</sup> Qinee Pauroosa maa papiqana akara ridaqa qusasaa inni oonu nindafarree qidaqa.  
<sup>15</sup> Moo ainaina fannoo qini rafaqaqafimarifaqa maridaqa maa papiqanakinaafa inni Anutuna aiku asaukuki nirana marirana naamuaqiannoo. Anutuna ufara suqiranaki keegee mariasa misa Anutuna amaana maqara foora maridaqa. Anutuna anoona ufa faakana maridaqa.

<sup>16</sup> Maasa Yisuna ufa irirana anoona ooqaindari kukeeqara ufa marifa Yisufa idaaqirafa firaafa maridanoo, sia amana moo fannoo minara qaoo qirafa.

Yisufa maqasaa fasiqa nifiri kammafinoo koorooinau. Anutuna maraquina fannoo minara andeeqarafa maridanoo fee qinau. Qangiroouqa mina qafaqau. Faiqi moomoosa maaqanna maaqanna minara qimannimiqau. Maa maqa maaqanaki marusa minara kuqaammifoo qiqau. Anutufa mina mareeqeenoo innaarunai quqaqoofanoo maridanoo.

## 4

*Pauroofa kasooqaqee aaqarufa kambijaannoo fee qimaqoo ufafa.*

<sup>1</sup> Anutuna kaaqa andeeqara maraquina fannoo kasooqaqee kambijaaninna aukuanara maaqi qimasee akooqoo firaqoo koorooidanoo. Mi kamuqoo akaqausa Yisunasaa irirana rusiranasaqari rakeemaki unna qira afaanna ufa irifaranoo akaqausa afaanna uqanna ufamau fifaranoo.

<sup>2</sup> Unna qimaria fasiqausa kai mi unna ufausa faiqi anaasee Yisuna ufana suqimariasaa qimannimiqa nifaranoo. Mi unna qira fasiqausa nari mandoosanaa sia qumaara naridanoo nariqa naaqoo irirana doo ida fannoo narinoora foora inoo marifaqa sia ummaara narifaqa nisaurifara.

<sup>3</sup> Miqi maria fasiqausa unna qimasee anaasee mararanara mandoosanee qimasee akaqa naranara manda narana sia naaqee qifaranoo. Anutufa mi oosana oosana narannara faiqi anaasee naaqeera auqu quqaqoofa maridanoo. Mina ufa irimariasaa mina anoona irimariasaa dufi dufi qimasee naaqeera quqaqoofa.

<sup>4</sup> Anutuna aiqama auqu quqaqoo ainainna aiqama amiqirafa kai maridanoo sia amana moo naranara mandaikira fee qianaara. Aiqama ainaina innaaru qimasee dufi dufi qimasee naaqa.

<sup>5</sup> Anutuna ufa faqa maasa innaaru qirana faqa mi naranna anukamasainanoo amiqinoo mariannoo, Anutufa amiqiranee qiannoo.

*Pauroofa Timootina aakapeenoo andeeqasee fuanee qu ufafa.*

<sup>6</sup> Oo Timooti anee asauku mundirafa Yisuna amiqira ainainira faiqi maridana mina ufa irimariasaa ani akaqaafasaauga qini maa ufausa qimannimia. Yisunasaa mundira ufa faqa mina anoona ufa faqa ani ooqai mi ufanasaa fidana innooqana marianafa mariananoo. Miqidana qini maa ufausa aneenna akaqaafasaauga qimannimia.

<sup>7</sup> Fifau uri qirana maa maqanasaaqararaa uriuqaki sia minaki aqufusa nianai tatiaaqa, fifau ufa. Anee Anutuna dadaaqidana rakiranakiara foora mariananoo minara maqee maqee aununu rakisiara foommasee amanamasee qafamasee afeekaikaa.

<sup>8</sup> Maa maqanasaaqararaa amudaani maqee maqee afeekaikamasee amanamasee qafarana kaqikaqoo maa maaqanasaa kai amana maridanoo aneenna aundurakinaana maqee maqee afeekaikamasee amanamasee qafarana firaqoo amiqirafa maridanoo, mifa maqee marirana faqa naaru marirana faqa amidanoo.

<sup>9</sup> Mi ufafa anoona ufa maridanoo minasaa mundimariafa maridanoo.

<sup>10</sup> Minara kai maasa kadaapirida nimudaanai qidaqa. Maasa qiqa qimuqusakinaa irirafa kaqi marira Anutunasaa mafi munduseeqa. Mifa aiqama fasiqa anaasee asumu maree marifa maridanoo, mina ufasaa rusimariasaa kuqaa misa asumu maree marifa maridanoo.

<sup>11</sup> Mi ufausa amiqimasee faiqi anaasee naamuaqi.

<sup>12</sup> Oo Timooti anee kumaaraa mariananoo minara faiqi anaasee irisee sia ani ufa iri-foora maa ufana ani qimamidaqa. Aneenna ufa faqa aneenna nirana faqa aneenna faiqi aanaaseera amuqisirana faqa aneenna Yisuna saqarikirana faqa aneenna andeeqasee marirana faqa amiqimasee andeeqasee akooqoo marinaqa qafeeqa faiqi anaasee Yisuna ufa irimariasaa ani afaqaidaga ani aanna raaqeera.

<sup>13</sup> Oo Timooti qinee anee ianannai kasooqaqee fuanaura. Anee qini qifeesidana maqee maqee faiqi anaasee aiqamausa nifusaa Anutuna akarakinaa ufa asaana rumasee mina oosana kooroomannimisee mi mau fuaqee qimasee fuki faaki qia.

<sup>14-15</sup> Ooqai Yisuna ufara suqimarusasaa rakisirausa ani sindimeera foora quqamaqeeqa nisauku ani afaaqai quqasee ani afaaqooqa qiqa Anutuna maraquina fannoo afeeka moo

amuna afeekaikamasee amanamasee qafamasainaqa aiqamausa aniki doo maridanoo fee qiaqa.

<sup>16</sup> Aneenna nirana mariranasaa faqa aneenna faiqi anaasee ufa qimannimiranasaa faqa rakisia. Qinee qimamunna ufamau andeeqasee finana ani nirafa marirafa andeeqasee marinana anee aneenna faqa ani ufa irimariasa faqa asumu mareennaranoo.

## 5

*Pauroofa Timootina aakapeenoo faiqi anaasee firaasa adeedaana anaaseeuqa faqa andeeqannisaannee qu ufafa.*

<sup>1-2</sup> Oo Timooti anee Yisuna ufa irimariasa faqa maridana sia faiqi firaasa ufa arua. Faiqi firaasa ani akausara foora marifana reendeenamandee ufa qimannimia. Kumaaraauqa faqa aneenna akaqaafasara foora kai ufa qimannimia anaasee firaasa faqa aneenna anausara foora amiqimasee kai ufa qimannimia. Maanaaqa aanaaseeuqa faqa aneenna asooqmaakara foora andeeqaseenaa kai misa faqa ufa qia.

<sup>3</sup> Adeedaana aanaaseeuqa misasaa rakisi mariasa sia marifana anee Yisuna ufara suqimariasa qimanniminaqa miqira adeedaanauqasaa andeeqara rakisira rakisinni-maqaaga.

<sup>4</sup> Adeedaana aanaaseeuqa marifanoo nari ninaiqimara faqa faiqi namufaqa marifana anee qimanniminaqa misa quandafi nari ninausa nitaatoosamara amiqimmandee rakisinnimaqaaga. Anee miqidana maana faqa qimannimia, misa Anutuna ufamau fidaqa indaaruaqa ainaina mifa mariannoo. Misasaa dadaaqamannisaidaqa nari ninaukoo kadaapi akiaqara nimimariafanoo. Anutufa faqa mi oosannara aqaara raidanoo.

<sup>5</sup> Adeedaana anaasee moo fannoo maridanoo minasaa rakisirafa moo fannoo sia marifa mifa kaaqa adeedaana uqanna maridanoo. Miqira adeedaana nari irirafa Anutunasaa mundirafa maridanoo eendaki faasaana Anutunara dufi dufi qidanoo maridanoo minara kai dadaaqiannee qidanoo innauru qidanoo.

<sup>6</sup> Adeedaana aanaaseeuqa oosana moo aaqaidaqa maridaqa nariqa nidimari ainainara kai qiganuasauqa maridaqa misa doo kuqiqa maridaqa miqiqa nidaqa.

<sup>7</sup> Anee mi adeedaana anaaseesara qimanniminaqa andeeqasee mariaqa munuqi miniqi qigani foora.

<sup>8</sup> Mi ufana aiqamausa qimannimia. Maa ufana faqa qimannimia. Moo fannoo Yisuna ufa irimarifa nari aiku asauku faqa nari afaaqasaa aiku asauku faqa narana faqa qamunnaina faqa sia rakisinoo sia dadaaqinannai nari miqinnannai Yisufa saqarikirana nari ateekeenoo aamina fasiqa mandoosana finnaaqaramasee mareenoo miqidanoo.

<sup>9</sup> Oo Timooti ani Yisuna ufara suqimariasasaa rakisirausa mariasa maridana adeedaana anaasee asooqauqa misa nariara naaduma aanaaseesaa rakisiranaikiqa mariaqa. Sia kaqi qee adeedaanauqa mi saikanaki mara quqaa, qaara moo fasiqa niku nisauku taikasee aukwana (60) maraqaasa adeedaanaikiada asooqaqee mariasa kai mi saikanaki quqasaina maria. Moodaa fasiqasaa amundoo adeedaanafa kai minaki mariani.

<sup>10</sup> Mi anaaseefa ooqai afaari marufa marinnana mifa kai minaki mariani nari faiqi namu amiqimasee firimaru aanaaseefa marufa mifa kai mariani, aanaamuru dapi aanaamuru amiqimmandee rakisimarufa faqa Anutuna ufa maqusa maqusa nida qimannimimarusaa faqa narana maaqa nimimarufa oosana oosana mandainainaki aqumfmarusa dadaaqimarufa, oosana oosana amiqira ainaina eedoo qimasaida auqee marufa miqi maru anaasee asooqausa kai rakisirausaikiqa.

(Mi asooqa adeedaanauqa saika Timootina aukwana maaqimminoo marinau. Misa fuka anaasee nari nifaaqmaaka faiqi namu rakisiaqee qimannimidaqa naakapee mariqau. Aqaqamaki kaqirunna fusa andeeqeeqeenoo Anutuna aanai ubeekee mariqau. Mandainainaki aqufusa andeeqasee Anutuna ufa naakapee mariqau.)

<sup>11</sup> Oo Timooti sia kumaaraa adeedaana anaasee maramaree anaasee rakisiranaikia. Kumaaraa anaasee kaifaa faiqira riqa asauku mundirana saika nimina minnisee foora.

<sup>12</sup> Misa asauku mundirana saikaki marianauree qima afeekaikamasoona ateekeefoora.

<sup>13</sup> Kumaaraa adeedaana anaasee moomoo suanisaa maaqakiqa fifau nimariafanoo ainainira aukwana ainnaaqaree marisa mariafanoo. Misa miqiqa nidaqa manda uriqarara irirana marasee unnufa munuqi miniqi qiqa nidaqa sia qiaqaa ufa qiqa nidaqa.

<sup>14</sup> Oo Timooti qinee Pauroosa kumaaraa adeedaana aanaaseera maaqi qidaqa, misa andeeqasee mariaqee. Misa kaifaa moo fasiqa marasee faiqi minasaa maqasee nariqa faiqisaa rakisida andeeqasee mariaqa. Misa miqi marifanoo maasa namuqaa

Yisuna ufara nikooqee marisa maasaki randasee sia mandoosana paqurimasee mandufa uqeeraaqa.

<sup>15</sup> Akaqa adeedaana aanaaseeuqa Anutuna ufakiqari rakeemaki Sadannana afaqee doo fla.

<sup>16-18</sup> Yisuna ufara suqimariasaa misa rakisirausa akaqa adeedaana anaasee naunannaasaa siiasasaa rakisifaranoo, akaqa adeedaana aanaaseera naunannaasaa faqaasasaa sia rakisiraree qidaqa. Mi adeedaanausa nári naunannaasamara nifiqa quqasee rakisifaranoo. Miqifanoo Yisuna ufa suqimariasasaa rakisimaria rakisirausa sia mi umaarana maraaqera.

Doo adeedaana anaasee ufa taikasee kaifaa Yisuna ufara suqimariasara qianauro. Anutuna tamummaqara fasiqa ooqai marusa akaraki ainaini mariasara qidanoo purimakau kikiqusidanoo maaqi qidanoo.

Innee inneeqa purimakau mara maree raisa adi fooqaana nári aikunnai rafarimarinaqa sia naani fee qimasee oori aanaamususaifanoo kaqi nuannoo, innee sia miqiaqa akaqana naidanoo afaqa اساسimarinanoo rafariani fee qimariqau.

Mi tamummaqara fasiqausa akara minara kafaa maaqi qidanoo.

Ainaini mari fasiqafa nári ainainimarina akiaqara feefauru maraannoo fee qidanoo.

Timooti Yisuna ufara suqimaria maqanaki keeqee mariasa miqi kai iaqera qidaqa.

Yisuna ufara suqimariasasaa rakisirausa amiqimasee Anutuna saika uqeeree mariasa Anutuna ufa kadaapi rumasee asaana rumasee fuki faaki imariasaa Yisuna ufara suqimariasaa sia amana kai feefauru nimia fiqaramasee aabaara faqa nimia.

<sup>19</sup> Faiqi moo fannoo Yisuna ufara suqimariasasaa rakisiranara anireenoo mi rakisiranara aaqaidanoommifoo qinaqa sia mi moodaa fasiqana ufa iriaqa, naríara qidaqinoo. Faiqi qaraqanda fee qaaramoo fee aniree minara qifaqa mina irisee andeeqaaqa.

<sup>20</sup> Yisuna ufara suqimaria maqanaki keeqee marifa manda oosana marainaqa aiqamausa nifusaa minara qaoo qidaqa ufa qiaqa. Miqimasaiqa aiqamausa rufiasee sia miqifaranoo.

<sup>21</sup> Oo Timooti qínee Pauroosa Anutuna faqa asauku mundirana faqa naaquqara qangi-roouqa faqa misauqa nifusaa qínee doori kandamaseeqa ufa ani qimamianauro. Qínee maqee maa papiqanakinaa ufa qimamunnana amiqimmandee mi mau kai fidana Yisuna ufara suqimariasasaa rakirausa nariqa saika amanakai feefauru nimisee andeeqasee nári aaqarana aiqamausa nifusaa koorooia. Sia moonara qiqoondifee qimasee mina aaqarana kukeeqaisaa, sia moonara aamoondi fee qimasee minaindi akooroo maisa. Aiqaama misoo maasoo moodaanaki kammasee rakisinnimaqaa.

<sup>22</sup> Anee sia dauni faiqi moo mareeqee Yisuna ufara suqimariasasaa rakisira saikaki quqasee sindimeera foora quqamaqaa. Anee sia moosa mandainainaki aqufua, aninna marirafa aninna afaqa anukarafa kai mariani.

<sup>23</sup> Timooti anee aranandaki maqee maqee aurimariananoo qínee minara irisee ani qimamidaqa, anee nammari uqanna kai maqee maqee neemariananoo anee sia mina kai naa, maasa maqee maqee neemaruannana uainna nammarina reendeenimarina mina kaqikaqqoo namasainanoo aurirafa taikaani.

<sup>24</sup> Faiqi akaqausa misa mandainaina fannoo aiqamausa nifusaa akooqoo maridanoo. Miqira mandoosana fannoo nári nifusaa akooqoo misa rarisameeqeenoo mandainainaki quqaidanoo. Faiqi akaqausa mandoosana sia dauni qafeefara kasooqaqee akooqoo kambiqainaqa qafeefaranoo.

<sup>25</sup> Miqi kai inoo amiqira oosana fannoo aiqamausa faiqi nifusaa akooqoo maridanoo. Kukeeqara amiqira oosana faqa sia kisaqasaa kukeeqanoo mariannoo kasooqaqee mifa faqa akooqoo mariannoo.

## 6

<sup>1</sup> Faiqi moo fannoo Anutuna auquara faqa maasa naamuaqira ufara faqa mandainainee qifoora maa ufana ani qimamianana anee Yisuna ufara suqimaria maqanaki keeqee marisa qimannimia. Ainainafaqaasa maa maqanasaa feefauruaree qimasaida ainaini mariasa anee maaqi qimasee misa naamuaqia, misa aiqama amiqimasee naaquqama nimaqainaqa nári rakisirausa ainainamannimaqaaqa.

<sup>2</sup> Akaqausa ainainafaqaasa misa faqa Yisuna ufa iri mariasa mariafaqa innee misa ainainira faiqi mariasa sia misara faqa moodaa irirana maree marunaasee qimasee mandufa nimiaqa. Innee minara iriseeqa andeeqasee fiqaramasee misa ainainamanisaqa. Innee misasaqaraa narana qamunnaina maree mariafanoo misara faqa Yisuna ufa irimariasee qimasee maasa misara didimariasee qimasee amiqimasee misa ainainamannisaqa. Oo Timooti anee mi ufausa Yisuna ufara suqimaria maqanaki keeqee mariasa naamuaqimasee fuki faaki qia.

*Pauroofa unna amaanufa qimariasara aaquqimannimaqoo ufafa.*

<sup>3</sup> Faiqí moo fannoo maa qínee gunna ufana moo mau kaqirunna fidanoo karaambaíqa asauku mundirana Yisuna anoona ufara qaoo qídanoo Anutuna mapukira ufa siaífa maridanoo kaqirunna ubeekaidanoo, miqí qimari fasiqafa sia moo ainaina qafaidanoo kaqí narí afaaqa kai amooqídanoo miqídanoo.

<sup>4</sup> Miqí qimari fasiqafa narí manda irirananaí kaaqa kaqíkaa ufa oosana oosana ufara fifau rainaidanoo tínoo taanoo ridanoo. Miqíra oosana fannoo faiqí aanaaseekina nariara nariara rairaiqirana uqeeraidanoo ufa rukiarana faqa naraqí naraqíra ufa faqa nariara nariara mandirirana irimariana faqa maqee maqee tinoori maria ufa rainee mariana faqa uqeeraidanoo.

<sup>5</sup> Faiqí akaqausa aaqee mariasa nári nifaurunnoo unna qídaqa. Misa Anutuna ufamau fidaqa fíraa munnimma aina maa maqanasaa marararee qimariasaa. Miqí qimariasaa anoona ufa siaisa, irirafa taikaraura mi ufana qídaqa.

<sup>6</sup> Doo kuqaa Anutuna ufa fannoo faiqí ainaina faqasara foora mannisaidanoo. Faiqí moo fannoo kaiqeefa Anutuna ufa maree marifa qandaki narí maqee maree mari ainainnara doo qini qimana fee qimari fasiqafa ainainafaqaa fara foora maridanoo. Miqí qimarunara Anutuna ufa fannoo ainainafaqaa faikammamaqeeera foora idanoo.

<sup>7</sup> Maasa maa maqa maqanaki faiqí aanaaqisaa nane maree aniqiafana kaqí samu aniqiafana. Maasa maa maqa maqanasaaqari fiqa nane maree fuanaaree, kaqí samumbuanura.

<sup>8</sup> Maasa qamunna faqa narana faqa maasa qimana kai doo maridanoo, doo fee qimasee nifaqa quqaqa.

<sup>9</sup> Moomoo ainaina munnimmarandaemariasaa manda nimaniranaki aqufidaqa. Nári moomoo ainainara munnimmararimariafa nariqa furufariranara nidimarifa mifa mareeqeenoo nári ufaanaki nári naridaqa.

<sup>10</sup> Munnimmararimariafa mandainaina oosana oosana mandainaina oosana areemariifa maridanoo. Akaqausa ooqai Anutuna ufa irimarusa munnimmararidaqa Yisuna ufa minnisee nariqa ummaara oosana oosana marasaafanoo mi ummaarafa nári nimuqusa radamidanoo.

*Pauroofa Timootinara amudaanaí qimasee andeeqaramau fuannee qu ufafa.*

<sup>11</sup> Oo Timooti anee Anutuna ufa irimarianafa mariananoo, anee munnimma ainainara randee maria iriranamau fimariasara faqa mi manda ainainausara faqa eerairiaqa. Innee nimudaanaí qimasee andeeqaranara faqa Anutufara foora irirana faqa Yisunasaa mundirana faqa faiqí aanaaseera nimuqusirana faqa kisaqaasaa Anutuna aanara afeekaikirana faqa faiqí anaasee ireeda reendeenamandee kai qimannimirana faqa mi ainainausara nimudaanaí qimasee maraaqa.

<sup>12</sup> Timooti anee Yisuna ufamau fidana narí amani narí amaniara foora amudaanaí qimasee rakiranakiara foora urinaaqareenana naaru naaru marirana marasainanoo anindi mariani, mi andeeqara marira niranara Anutufa ani aarameeqee minaki quqeenoo. Ooqai anee Yisunasaa mundufunafa anee moomoosa nifusaa amiqimmandee Yisunara kooroounafa mariananoo mikari Anutufa mi amanirana ani amufa mari-ananoo.

<sup>13-14</sup> Oo Timooti aiqama ainaina aidoo nimimarina Anutuna afusaa faqa, Piratoona oorisa kooroounafa asauku mundirana Yisuna afusaa faqa qínee aaquqimasee qimami-daqa. Yisuna ufa asaana rumaseenana aiqama eedoo qimasee maraa, mi mau finana ani nirafa marirafa anukarafa sia aaqarafa mariani. Miqí kai ina fifi inana karaambaíqa Yisufa narí qumira aukuaana paquria.

<sup>15</sup> Anutufa amiqirafa moodaa rakisirafa aiqama uriqararaura urinaaqararafa aiqama karaambaíqauqa karaambaíqa mifa narí kai irisee andeeqara aukuanee qimaseenoo mi aukuanna kai Yisuna aqíqainanoo mai kafa kooroomannimaqaanno.

<sup>16</sup> Anutufa mifa kai sia faiqí undee irafa aaduma marifa, mifa kai sia faiqí amana qafaqaaira kaaqa qararaki marifa, sia moo fannoo mina qafaida sia moo fannoo amana qafaanno. Mina aaru uqeerarana faqa naaru naaru afeeka marirana faqa minaindi kai maridanoo. Kuqaa.

<sup>17</sup> Oo Timooti anee ainainafaqaasa maaqí qimasee qimannimia. Innee ainainafaqaasa sia inneeqa nifaqa nimooqiaqa. Sia innee taikemaria munnimmanasaa inneeqa irirana mundaqa. Inni Anutunasaa kai inneeqa irirana mundaqa. Mifa aiqama ainaina afaaramasee maasa qíqara raanifee ainaina qimimarinasaa kai inneeqa irirana mundaqa.

<sup>18</sup> Oo Timooti anee ainainafaqaasa mi ufana qimannimisee maa ufana faqa qiman-nimia. Sia moomoo munnimma ainaina mararara kai iriaqa. Innee faiqí anaasee

dadaaqiqa amiqira dadaaqirana dadaaqiqa mi dadaaqirana nimimariananaki aniki ainaina moomoora foora mariannoo. Innee afaariaqa inneeqa ainaina naida nimiaqa.

<sup>19</sup> Innee miqiga moomoo innaarunai qumiasana moomoo suqusee marasee naaru kambiqainna aukwana inni faakanaikiannoo. Miqoo innee kuqaa amiqira marirana marasee marifaranoo.

<sup>20</sup> Oo Timooti qinee moomoo fasiqa anaasee ani asaukuki quqasaanana anee amiqimasee afapita qumaraa. Dapi ufa Anutuna andeeqarufa sia minaki mari ufafa furufarira ufa raiqara ufa faqa akaqausa moo aqara ufara unna qimasee irirana faqaasa ufa fee qidaqa mi ufausara aiqama anee faqa misa faqa eerairiqa.

<sup>21</sup> Akaqausa mi unna irirana faqaasa ufara doo iridaqee qinausa Yisuna ufasaa fimariaqooqari quqasee auiaidaqa. Doo.

Anutuna afaarirafa inni aiqamausaki mariani.

## 2 TIMOOTI

### Timootina inaaqianna rumamaqoo akarafa.

<sup>1</sup> Anutuna ufasaa asauku mundirana Yisufa nari ufara diqiqoosa maqasaa fasiqa Pauroosa maridaqa. Yisufa naaru naaru marirana qima afeekaikammandee qimiraree qimaqoona mifa nariki asauku mundirana Yisunaki maridanoo maasa minaki oonu maridaqa mi naaru marirana maraanaura.

<sup>2</sup> Oo Timooti anee qini qifaaqasaa qimaakuara foora marianafa qinee maa akarana ani rumamaqaidaqa. Maasa aiqamausa faqa aiqama ainaina faqa nikoofa Anutufa faqa maasa karaambaiqa asauku mundirafa Yisufa faqa nari afaarirana faqa amuqusifanoo nifauarana faqa aundurai asooarana faqa ani amiani.

*Pauroofa Timootinara dufi dufi qidanoo pooduamamaqanau.*

<sup>3</sup> Qini qiikeeku qikaaku sia moo ainaina rafaafaqafinau Anutuna sandufamau amiqimasee fidaqa maqee maqee Anutunara innaaru qimarigau. Qinee faqa miqi kai masee misa naanna ramasee maqee maqee innaaru qidaqa aniara Timootinara dufi dufi qidaqa. Oo Timooti ani anoofa Eeunisa nammarifa faqa ani ataatoofa Rooisa nammarifa faqa miqanda noori kandamasee Yisunasaa amiqimasee mundiqi mariqau. Maqee anee faqa miqanda naanna ramasee mi oosanna kai maree mariana qinee iridaqa qafaidaqa. Mi irirafa kaqi aniki marifaqa qinee iridaqa.

<sup>4</sup> Qinee ani quqasee fuafannana qiniara anee ikiraqoonnana qinee minara iridaqa qinee faqa aniara didimarifaqa kasooqaqee ani qafamaseeqa firaqoo asasianaurannoo.

<sup>5</sup> Qinee aniara firaqoo eendaki faqa faasaana faqa innaaru qimamaqaidaqa aniara dufi dufi qidaqa.

<sup>6</sup> Minara qinee maana qimamidaqa ooqai qinee sindimeera foora ani quqa-maqaafanano Anutufa ani amu afaaqooqana anee amiqimasee rakisiinana kuqaa.

<sup>7</sup> Anutuna maraqana maasa qimufa sia maparaairana rufiarana qimidanoo, mina maraquna fannoo afeekaikirana faqa faiqi aanaaseera amuqusirana faqa qeeqa daunduradi qimanasaa andeeqasee rakisirana faqa maasa qimidanoo.

<sup>8</sup> Minara irisee maasa karaambaiqara sia asaurua. Qinee Pauroosa minasaara karabusaki marunnaana faqa sia asaurua kaqi paasoosamasee qimannimia. Anee faqa miqi kai inana Anutufa afeeka amiqaina anee faqa Yisuna amiqira fasaasa ufara kaqi aupuraranaki keeqaa.

<sup>9-10</sup> Anutufa maasa asumu mareenoo maasa daaramasee mai aniannee qimasee qini faiqi anaasee uqanna mariafaqee qidanoo. Sia maasa oosana moo ainaina amiqirana qafeenoofau maasa asumu mareenoofau. Nari irirana nari afaarirana minannai kai miqinoo. Ooqai maa maqa maaqana faqa innaaruna faqa sia maru aukuanna nari mi afaarirana maasara nari asauku mundirana Yisunasaa quqaqoofanoo maqee maa aukuanna maasa asumu maree marifa asauku mundirafa Yisufa maa maqanasaa kooroomafinoo mi afaarirana maasa faiqi faiqi qiminuu. Asauku mundirafa Yisufa kuqirana aru taikaseenoo nari amiqira fasaasa ufannai kaqi marirana faqa naaru naaru marirana faqa koorooinoo marifaqa maridaqa.

<sup>11-12</sup> Qinee sia fifau oosana oosana aupurana karabusaki maridaqau maraidau, Anutufa diqiqoofaqa maa maqanasaa qinee mina ufa faiqi anaasee naamua qidaqa Yisuna amiqira fasaasa ufa kooroomannimidaqa qimannimunnana aupurana qeeqa qifaaqasaa maraidaqa. Sia qinee minara qisauridaqa. Qinee qeeqa irirana irira fasiqasaa mundusauna maridanoo, qinee minara maana amiqimasee iridaqa, Yisufa nari afaaqooqa qimuna sia kadigaannoo mifa amiqimasee dadaaqinoo fifi inoo nari qumira aukuana paquriannoo.

<sup>13</sup> Oo Timooti qini kuqaa anoona ufauqa anee karaambaiqa ufara foora mina afaqamaree fua. Maasa asauku mundirana Yisunaki keeqafi marifanoo mifa Anutuna saqarikirana faqa faiqi aanaaseera nimuqusirana faqa maasa qimidanoo anee minaki maria.

<sup>14</sup> Anutufa oosana oosana amiqira irirana anisaa quqaqoona mina naaquqara maraquna fannoo aniki marina mi afeekanannai mi oosana oosana irirana amiqimasee rakisia.

<sup>15</sup> Oo Timooti anee maanara irimarianano. Misa qini Roomma maqanna ruum-beeqee karabusaki quqasoofaqa aiqama Asia maqa maaqakina qini qiqoondiuqa qini minnisee quqasee sandamafiqau. Fikeerusafa faqa Qeeramookeeneesafa faqa miqanda faqa quqasee sandaqa.



16-17 Ooneesifoorusafa mifa kai sia qinee karabusaki mariafannanara asaurináu. Roomma maqusaí fíraa taunna marufanoo qini sia dauni paqurinau anireenoo qiníara fíqú faíqú fumandee randaseenoo paqurimandee moomoo kari qini dadaaqimarinau. Qínee karaambaíqara mi fasiqana aiku asaukuara amiqí amiqí mannisaannee qidaqa.

<sup>18</sup> Qínee karaambaíqara nári qumira faasaanasaa mi fasiqanara afauaannee qidaqa innaaru qidaqa. Qínee Efeesusa maqusaí mariafananoo mi fasiqafa Ooneesifoorusafa fíraaqoo qini dadaaqiufa marifana anee Timooti anee minara irimariananoo.

## 2

*Pauroofa Timootinara anee Yisuna amiqira sundiara maqí mariannee qinau.*

<sup>1</sup> Anutuna afaarirana dadaaqirana asauku mundirana Yisunaki mariainainafa mari-naqa maasa minaki mariananoo maasaindi mariannoo. Oo Timooti mi afaarirana maraseenana minasaa mapukina maria.

<sup>2</sup> Qínee moomoo fasiqa anaasee nifusaa ufa nimiafannana anee faqa mina iri-mariananoo. Mi ufasa maramareenana andeeqara fasiqauqasaa quqasainaqa misa qumareeqa quandafi niqoonausa faíqí anaasee qimannimíaqeera.

<sup>3</sup> Anee faqa asauku mundirana Yisuna rakira faíqíara foora maridana aupuraidana anee faqa kadaapirina fua. Timooti anee rakira fasiqa oosana iria.

<sup>4</sup> Sundaíuqa rakiranaki fidaqa sia kaiqeesa maria marirana maridaqa nariqa aiqama ainaina minniseeqa doo rakira ainainara kai noori faqa irirana minni kai ubeekamasee nári karaambaíqá afusaa afeekaikamaseenoo rakirara kai iridaqa. Timooti anee faqa Anutuna saikaki fidana misa naanna raa.

<sup>5</sup> Kafa sandee maria fasiqausa oosana irimariana sia ufamau sandeenana taikara goo oonu kasoomafinana sia feefauru mareennaranoo Timooti anee faqa mi ufamau sandeera foora amanamasee qafa.

<sup>6</sup> Sia moo fannoo fukasaa narana unakusee naannoo. Narana ummaqí mari fasiqafa mifa kai indaaru unakusee naannoo mina kadaapirirana akiqa mariannoo. Anee faqa Anutuna saikaki kadaapirina fífi inana naaru unakuseena suqaseenana neera foora innaranoo.

<sup>7</sup> Anee mi ufana qunnana irisainanoo karaambaíqá fannoo dadaaqinana mi oosanna irinnaranoo.

<sup>8</sup> Aneenna aaqooki asauku mundirana Yisunara iria, mifa Dafidina ati kuqíranakiqari findifufa maridanoo. Mina amiqira fasaasa ufa qínee qimannimi marunnana mina koorooidanoo.

<sup>9</sup> Qínee mi amiqira fasaasa ufana qimannimunnanara aupuraidaga. Misa qiniara mandoošana maree mari fee qimaseeqa qini qumareeqa sainandannai rumba quqeega. Kuqaa qínee sainandannai rumbaqa marida Anutuna ufa fannoo sia rumbanoo maridanoo kaqí idukinoo maridanoo.

<sup>10</sup> Qínee minara iriseeqa, Anutufa rusandeesamumasee mareefandinna fasiqa anaaseesara irisee misa Yisunara iriaqeera oosana oosana mandainaina aiqama ainaina maraídaqa. Misa faqa asumu mariaqeera faqa naaru areenarana maraaqeera faqa mandainaina kaqí qeeqa qipatasaa maraídaqa. Mi asumu marirana faqa naaru areenarana faqa asauku mundirana Yisunaki kai maridanoo.

<sup>11</sup> Maa ufafa kuqaa maridanoo. Maasa Yisuna faqa kuqíqa mina faqa findifuanauranoo.

<sup>12</sup> Maasa mina faqa afeekaikamandee fífi inaqa maasa kasooqaqee mina faqa rakisír-usa marianaúra. Maasa minara qaoo qiananoo mifa maasara faqa qaoo qianoo.

<sup>13</sup> Maasa mina akaru qiananoo mifa kai amana kai andeeqasee mariannoo. Mifa sia amana nári oosana minnisee maasa mandoosanamau fuannoo, andeeqarafa kai maridanoo.

*Pauroofa Timootina aakapanau, amiqimasee ainainiannee qinau.*

<sup>14</sup> Timooti mi ufasa ani Yisuna ufara suqímaria maqanaki keeqee mariasa qimannim-ídana maa ufana faqa Anutuna afusaa oori kandamasee aaquqimannimaqa. Misa sia kai fífau ufara tinoo taanoo ríqa rairaiqíaqá. Mi oosanafa sia anoonaikídanoo faíqí anaasee kurídi maríafa mi oosanafa maridanoo

<sup>15</sup> Anee aneennara Anutuna afusaa anee afeekaikamandee maridana saika maree mariananoo Anutufa aniara maaqí qianifeera oo maa fasiqafa amiqimmandee qini saika uqeeraidanoo qini anoona ufa amiqimasee andeeqasee qimannimimarifa sia nári saikara oonumafi irinoo asauruanifeera.

<sup>16</sup> Akaqausa ooqai Yisuna ufaki mariusa oosana oosana fífau faafau ufa uqeeree maríafaqa anee minara eeríria. Anutuna andeeqarufa sia minaki mari ufana dapi

ufa narí qimami narí qimamira fee qinnufana faqa furufarira ufara faqa anee minara rufasee nianasaa fua. Mi ufafa faiqí anaasee Anutufinnaindaraana mareeqee kaqirunna ubeekemarifa maridanoo.

<sup>17-18</sup> Mi dapi ufana qimannimimariasaa ufa fannoo fidika namuanara foora firaqoo amaqi naidanoo firaqoo qaidanoo mi dapi ufana miqi qifanoo firaanaikiandoora. Miqira ufa qimariasaa nuqu Qimeenaiusafa faqa Fireetusafa faqa miqanda anoona ufa qimaria aana minnisee unna qimasee aiqamausa kuqiranaiqari findifirafa ooqai taikanoo maridanoo fee qidaqa. Miqira ufannai Yisuna ufamau fimariasaa akaqausa nikumannimiafaqa saamuridaqa.

<sup>19</sup> Misa miqira ufa fannoo sia amana Anutuna ufa aruannoo, faakanara foora arufinoo sia kasiannoo. Mi faakannasaa maa ufana akara rinoo maridanoo Karaambaiqa narí faiqí aanaaseera iridanoo. Ya faiqí anaasee fee nariara karaambaiqaindi fee qinafa mifa mandoosana ameesuquseenoo andeeqara oosana maraannoo. Anutuna ufa faakanara foora marina oosana miqi mminoo maridanoo.

<sup>20</sup> Ainaina faqaasa maaqaki qafee disa kaafaina piritaina oosana oosana maridanoo. Akaqana siruaannai auqirafa maridanoo akaqafa koorannai auqirafa maridanoo akaqafa saqarinnai auqirafa maridanoo akaqafa maqannai auqirafa maridanoo. Akaqana amiqira difaaniki narana saka faiqí nimimariafa maridanoo. Akaqausa mandaikirafa kai madaapeenni marifa maridanoo.

<sup>21</sup> Faiqí moo fannoo madaapeenni mari difaanifara foora marifa narí anukama-sainanoo ainaina saka neemaria difaanifara foora amiqirafa mariannoo. Miqinanoo mina akoofa mareeqee amiqira saikaki quqaannoo.

<sup>22</sup> Nimuqusa anukarausa maqee maqee karaambaiqa aaraidaqa dadaaqiannee qidaqa anee misa faqa misa naanna raidana kumaaraa mandainainara nidiranara eerairiaqa andeeqaranara afeekaikamasee afaqaqa, Yisunasaa irirana rusirana faqa faiqí aanaaseera nimuqusirana faqa naunduraki asoosana faqa afeekaikamasee afaqaqa.

<sup>23</sup> Furufarira ufa, dapi ufa rainarafa minauqara eerairiaqa. Miqi qimariasaa aiqama kari aanooqiranaki aqufidaqa.

<sup>24</sup> Anutuna ainainira fasiqa fannoo sia ufa rainainnanaki keeqaani. Mifa aiqamausara reendeenamandee ireeda kai qimannimiani mifa amiqimasee ireeda kai fifimmasee Anutuna ufa naamuqiani.

<sup>25</sup> Mifa ireeda kai mina ufara qaoo qimariasaa andeeqannimaqaani. Mifa miqinanoo abee Anutufa dadaaqiannoo fee misa quandaki anoona ufai ubeekkeefaranoo fee.

<sup>26</sup> Sadannafa narí ufaanaki mara arinoo narí iriranamau quqasoofaqa fimarufaqa misa anoona ufasaa ubeekaiifanoo nári irirafa kambiqaqinaqa Sadannana ufaanaiqari aruruduku fifaranoo.

### 3

*Pauroofa taikara aukuanara Timootina qimaminau.*

<sup>1</sup> Oo Timooti anee maa ufana aaqoo iria. Taikara aukuaana manda aukuaana afeeka aukuaana mariannoo.

<sup>2</sup> Mi aukuanna mi kamuqoo faiqí náriara kai irifaranoo kaaqa ainainara rimarifaranoo, náriara firaqoo ufa qimarifaranoo, firaqoo náriara nári nimooqimarifaranoo, misa mandufa faiqí anaasee qimannimi marifaranoo, misa nári ninausa nikausa ufa rukieefaranoo, misa nimira ainainara sia dufi dufi qifaranoo kai mareefaranoo, sia Anutunara irifaranoo mana mana kaimmifaranoo.

<sup>3-4</sup> Sia faiqí anaasee reendeenama nimaqeeefaranoo. Sia faiqí anaasee nifaueefaranoo. Misa moosara munuqi miniqifaranoo. Kaaqa faiqí narimarisa kaasau fainiara foora kaaqa faiqí narimarifaranoo. Misa andeeqarausara fidiqaammifaranoo. Misa kaaqa faiqirara ueeqee mariasaa misa irirana siaisa kaqi minaki rakeemasee fimariasaa misa kaaqa nári nimooqiga nári nuqu uqeeree mariasaa. Misa niqaara ree mari ainainnara kai riqa Anutunara sia rifaranoo.

<sup>5</sup> Misa amaana ufa sia irifaranoo nipatakai qumareefaranoo, anoona amuqusakinaana sia qumareefaranoo. Timooti anee miqi mariasara eerairamandee nianai maria.

<sup>6</sup> Misakiqari akaqa fasiqauqa nariqa unna amaana ufa qianeera furufari maria anaaseesa mandoosana maree maru anaaseesa maaqaki oonureeqa unna amaana ufa qimannimiseenoo misa afapita qumareenoo misa firaafalkinoo marifaqa mi irirana siai anaaseesa nári oosana oosana mandainaina nidudusaa aruqaafanoo innee doo mi mau kai fuaqee qifaqa mi mau kai fidaqa.

<sup>7</sup> Miqimari anaaseesa Anutuna ufa anoonara maqee maqee oosana oosana amaana ufaki randaidaqa sia anoona paquridaqa.

<sup>8</sup> Ooqai Mooseefa Isipa maqasai Faraona asaukukinaana Isaraee maqannaasa idukumaree fuanera qufanoo Faraona afunee fasiqaqanda nuqu Yaneesafa faqa Yambareesafa faqa miqanda Mooseena itita amaqaqau. Maa maqee maria unna amaana ufana qimariasa misa miqanda naanna raidaqa, Anutuna anoona ufa ititaidaqa. Misa Anutuna anoona iriranara kadiqaidaqa oorudupidaqa misa mi irirafa kuqiara foora inoo maridanoo sia kasidanoo.

<sup>9</sup> Ooqai Mooseena aukuaana Yaneesasa Yambareesasa miqanda furufarirana aiqamausa qafamasee misa ufa minnisaqau. Maa maqee maria unna amaana ufana qimariasa aiqama sia misa ufa irifara, misa furufarirafa akooqoo marifaqa minniseefara akaqausa kai irifaranoo.

*Pauroofa taikara naamuqaira ufa Timootina qimaminau.*

<sup>10</sup> Oo Timooti anee sia miqi marianafa anee qini naamuqaira ufamau kai fimarianafa qini oosana maree marianafa qinee fimarunnaqoo kai anee fimariananoo qinee Yisuna anoona ufamau fimariafannana anee qiqafoonafa mariananoo Anutuna saikasaara daruafaqa sia rakeemasee minniseeqa reendenamandee kaqi miqoo marunana anee qiqaafananoo. Qinee faiqi aanaaseera qimuqusi mariafannana anee mina faqa qiqafoonafa mariananoo. Qinee kisaqaqasaa Anutuna aanara afeekaikirana anee qafaananoo.

<sup>11</sup> Qinee Anutuna ufasaara darirana faqa apurarana faqa mareemarunana anee qafaananoo. Qinee Antiooka maqusa faqa Ikooniumma maqusa faqa Ristara maqusa faqa ni maqusanakiqafa fimariafanaq misa dariqa fimarfafaq firaqoo apurafaq fimariqiafana. Anee minara faqa irimariananoo. Karaambaiqa fannoo mi ainainnakinana qini asumu mara quqasoofaqa maridaqa.

<sup>12</sup> Aiqama maqasaa qaraasa asaku mundiranasaa irirana rusiseeqa miqooqari Anutuna andeeqara oosana marifaqa narirana apurarana mareefaranoo.

<sup>13</sup> Mandoosana maree mariasa faqa iriafa qini maria fasiqausa faqa nari mandoosana maraqa fidaqa ootupaqa fidaqa miqiqqa fifi ifaqa firaanaikifaranoo. Misa akaqausa nikaru qiafaqa kafa misa quandaki nari faqa nikaru qifaranoo.

<sup>14</sup> Oo Timooti anee sia misa naanna reemariananoo. Qinee Anutuna anoona ufa ani aamuqiafannana amiqimmandee qumaroonnana mi mau kai amiqimasee fua. Anee yanasaqari fee Anutunaindaraa ufa irira oosana mareenane. Doo miqikaimmasee mi fasiqafa indee kai inana naaru naaru miqi kai ia.

<sup>15</sup> Oo Timooti anee aanaaqisaa Anutuna naaqqara akarakinaa ufa irimarianafa mariananoo anee minara faqa iriafa qini ufa aunu. Mi naaqqara akararufafa asumu marira irirana ani amiannoo. Mi asumu marirafa asaku mundiranaki maridanoo.

<sup>16-17</sup> Anutufa qimannimufafa akara rumaqoo ufafa maridanoo Anutuna ufa qimannimimaria fasiqausa mina qumaraifanoo minakinaa ufa fannoo nari naamuqiafannoo nari aqaranara qaoo qiannoo, nari eendaandirana andeeqaannoo nari andeeqasee firana naamuqiafannoo. Miqi qimasee Anutuna ufa qimannimimaria fasiqausa andeeqasee amanaikinaqa Anutuna saika oosana oosana uqeeraga.

## 4

*Pauroofa faiqi anaasee qimannimira oosana Timootina qimaminau.*

<sup>1</sup> Oo Timooti qinee Pauroosa Anutuna afusaa faqa asaku mundirana kuqiraua faqa kaqi mariasa faqa aaquqimannimaqee marina afusaa faqa doori kandamasee ani faqa aaquqimamaqaidaqa. Yisufa kaifaa kooroomafi aiqamausa rakisianinnanara iriseeqa ani aaquqimamaqaidaqa.

<sup>2</sup> Anee Yisuna amiqira fasaasa ufara faiqi anaasee qimannimia, nari qanaa fee kaqiqoo fee sandanainai qimasee qimannimia, anee misa iriaqaa iaqee qimasee qimanniminaqa misa iriaqa anee mandoosana maree mariasara qaoo qia, anee faiqi aanaaseera nifeeqaraidana poodua. Anee ubiqafi sanaasamasee faiqi anaasee qimannimia.

<sup>3</sup> Qusasaa sia anoona ufa naamuqirana irifaranoo misa nari manda nidimari ainainna kai afaqee fidaqa nari naaqookinaa manda irirana naamuqimariasa misauqa kai moomoo nifiqasee innee mi manda iriraua kai qimaqimiaqee qifaranoo.

<sup>4</sup> Misa anoona ufara nimeesuqusee kai fifau uriara kai naaqoo rammatini imariasa.

<sup>5</sup> Timooti misa miqimarifana anee aneenna kasoomambi ubiqafinana misa ani irirane apurarane amimarifana kaqi kai fua. Amiqira fasaasa ufa naamuqaira saika maqee maqee marana fua, anee aneenna aiqama saikaki maridana Anutuna ainainra faiqi maridaqee qimasaidana marana fua.

<sup>6</sup> Oo Timooti anee iria doo qini fidika ruqiga qimaqee fandinnafa doo ani maridanoo. Doo qusasaa misa qini darifaqa qinee maa mariranakiqari doo taikasee fifuauranoo.

<sup>7</sup> Doo qinee amiqira rakiranakiara foora rakumaree uriqaramafiara foora mafiqa. Doo nari amani nari amanira sandaranaki qimudaanaiqimaseeqa sandaqa aniifaqa doo taikarana paquriqa. Qinee Anutuna ufa faqa marirana faqa andeeqasee qumaree sandeeqa taikarana aniree paquriqa.

<sup>8</sup> Doo maqee sandaida uriqareemariasa feefauru qiniara deedaqinoo maridanoo. Karaambaiqa andeeqasee ufa nimirifa qumira faasaana andeeqemariasa qafee qini qikiaaqa afisuanoo. Mikari sia qini kai qimiannoo, moomoosa minara nidimarisa mina koorooiranara afeesidaqa nidimarifaqa afeesimariasa misa faqa nimiannoo.

*Pauroofa Timootina qimaminau, qini qamunna papiqaq maree mini qimia.*

<sup>9</sup> Oo Timooti anee kaqi kaqi mindari aniree qiqaqaa.

<sup>10</sup> Deemasafa maa maqa maaqanakinaa ainainara kaaqa ridanoo qini minniqiseenoo doo Teesaronika maqusai finoo Kareeseenasa doo Karatia maqa maaqai finoo, Titusafa Daramatia maqa maaqai finoo.

<sup>11</sup> Rukaafa sia rumberanaki marifa kaqi marifa mifa kai qini faqa maridanoo. Anee Marikona afiqee minisainanoo Anutuna saika qini dadaqiani.

<sup>12</sup> Tikikusafa qini faqa marina qinee doo aqiqaunanoo Efeesusa maqusai finoo.

<sup>13</sup> Qini suara qamunna Tarooasa maqusai faiqi moo auqu Karapoosana maaqaki quqaqafannana anee aninana aimaree ania. Qini papiqauqa faqa qini akara papiqa faqa aimaree mini qimia.

<sup>14-15</sup> Areesandeerafa mifa qainna faqa koopaa faqa auqimarifa mifa nari mandoosana mareenoo qini firaqoo mandaikamaqimaqeenoo, mifa firaqoo maasa qimannimira ufara akooqaidanoo anee faqa firaqoo minara eerairia. Anutufa miqimarina akiaqara arirana mina amiannoo.

<sup>16</sup> Qinee Roomma maqannaa kootaki indaaru kamu mariafananoo sia moo fannoo qini dadaqinau aiqamausa qini quqaqisee sandamafufuqa qeeqaraa kai kooti mariqifana. Qinee Anutunara sia mina akiaqara nimiannee qidaqa.

<sup>17</sup> Misa fufanoo Karaambaiqa kai qumee qini pooduqee marufaqa qinee kootaki kikiqamafi Yisuna ufa aiqama amiqimasee aanaamuru aiqama qimannimiafanaqa iriqau. Miqimasaafananoo Anutufa kaasau aandau ookinaanara foora qini rafteenoora foora inau.

<sup>18</sup> Karaambaiqa fannoo oosana oosana mandainainakinaana qini mareeqeenoo nari innaaruna ququsaki amiqimasee quqaqisaannoo. Mina areenarafa naaru naaru mari-ani, kuqaa.

*Pauroofa nimandoo ufafa.*

<sup>19</sup> Anee Piriskira nammarifa faqa nari afaaqi Akuraana faqa nimandaa, Ooneesi-foorusafa faqa nari faiqi anaasee faqa nimandaa.

<sup>20</sup> Erasatusafa Koorinti maqusai miqoo kasooinoo marinau Tarooofimusafa aurimaru-faqa Mireetusa maqusaki quqaqifana.

<sup>21</sup> Suara aukwana aniannoo anee naaree amanamasee qafeenana ania. Eeuburusafa faqa Pudeenasafa faqa Rinusafa faqa Karaudiafa faqa maaqoo maria qikaqaafasaasa faqa aiqamausa Timooti ani amandaidaqa.

<sup>22</sup> Karaambaiqa maraquna fannoo ani faqa mariani Anutuna afaarirafa inni aiqamausa faqa mariani.

## **TITUSA**

### **Pauroofa Titusana akara rumamaqoo ufafa.**

<sup>1</sup> Qinee maqasaa fasiqa Pauroosa Anutuna ainainirannai diqigoosa maridaqa. Asauku mundirana Yisuna ufa anindiri irimarunausa maridaqa Titusa animma akara rumamaqaidaqa.

Rusandeesamumasee Anutufa qini qumareegeenoo narisaa mundimariasara mapuku nimaqaaneera qifaqa ufa nimidaqa. Anutufa qiniara misa mareegee Yisuna kuqaa anoona firaa iriranaki mara quqaannee qifaqa miqidaqa.

<sup>2</sup> Mi kuqaa irirafa naaru naaru mariranaki fifandinnanasa mundinoo mari irirafa maridanoo. Anutufa sia unna qimarifa anoona ufa qimarifa naaru marirana maasa qimirree qinau. Ooqai maa maqa maqafa sia maru kamuqoo mi kamuqoo kasoogaqee maasa qimirree qima afeekaikinau.

<sup>3</sup> Mifa ooqai naaru marirana kasoogaqee qimirree qunara doo maqee maa fasannai andeeqara aukuannee qimaqoofa mina anoona Yisufa maa fasannai doo kooroo inoo maridanoo. Anutufa maasa mandainainakinaana qumaree marifa firaqoo qimaqimina mi ufana qimannimidaqa.

<sup>4</sup> Titusa qinee ani qimamifannana anee aneenna irirana Yisunaki quqoonafa mariannanara qinee aniara qini qimaaku fee qidaqa anindiri Yisuna iriranamau fimarunnanaki keegee marunnanara maa akarana ani rumamaqaidaqa. Yisufa asauku mundirafa maasa asumu maree marifa maridanoo. Mifa faqa mina akoofa Anutufa faqa nari afaarirana faqa nari asoosana faqa ani aaku amaqaani.

*Pauroofa Titusana ainainianeera oosana aakapanau.*

<sup>5</sup> Qinee ufaasu Kareetee afumaki ani Titusana mafi aiseeqa fiqa. Anindiri miqoo maridaqa moomoo ainaina sia andeeqaranaki ani mafi aiseeqa anee mina andeeqaa. Anee maqusa maqusa Yisuna ufa irimariasasaa rakisirausa paqurimasee misa rakisirausaikia. Miqianneera faqa ani mafi quqeeqa.

<sup>6</sup> Qinee Pauroosa aamuqira ufa indaaru qimamifannana Titusa anee sia aunua doo miqoo kai fua. Qinee maqi qimasee qimamifannana anee faqa maa ufana qimanniminaqa misa iriseeqa maraaqa. Yisuna ufa irimariasasaa rakisirausa sia moo aagarafa misaki mariani. Andeeqarasa kai mariaqa, moodaa anaasee faqaafa mariannoo. Mina faiqi namu Yisuna ufa irimarinausa mariaqa sia kaukaata qimarinausa mariaqa, sia ufa rukiee marinausa mariaqa.

<sup>7</sup> Yisuna ufa irimariasasaa rakisirausa Anutuna ainainiranasaa rakisirausa mariannara sia moo aagarafa misaki mariaqera qidaqa. Misa sia aanooqirausa mariaqa. Sia qusasaa rakimarinausa mariaqa. Sia nammari namasee furufari mariasa mariaqa, sia dauni rakirana uqeerarasa mariaqa, sia ainaina munnimmara kaaqa nimuqusirausa mariaqa.

<sup>8</sup> Yisuna ufa irimariasasaa rakisirausa afaarimariasa faqa kasimariasa faqa mi marirana marinausa kai mariaqa. Misa andeeqaranara kai rimariasa mariaqa. Misa nari naundura faqa nimanara faqa irimarinausa mariaqa. Misa andeeqarasa faqa anukarasa faqa nari marirana andeeqasee marifaqa mariaqa.

<sup>9</sup> Yisuna ufa irimariasasaa rakisirausa misa amiqimasee Anutuna ufa anindiri qimannimifannana irisee qumaree marinausa mariaqa. Misa Anutuna anoona ufannai pooduqainaqa akaqausa aqara ufa qinausa iriseeqa quandafi andeeqasee nari manda oosanara qimannimiaqa.

<sup>10</sup> Titusa anee saiki marianna maqusanakinaa fasiqa anaasee moomoosa Yisuna ufa irisee quandakifaqa noori rumbara andaama aanna ree mariasa marifaqa maqanda ufa rukiasee moomoosa faqa nifiqeeqeenoo kaqirunna ubeekaidaqa nariqa mandoosanara qimannimiaqee qidaqa. Yuda maqanaasa kaaqa miqi mariasa maridaqa nari ufakiqari Yisuna ufasaa munduseeqa quandaki nari faqa akaqausa faqa nifiqamaree kaaqa kaqirunna ubeekke mariasa maridaqa.

<sup>11</sup> Misa ufa taikaani fee qidaqa. Misa faiqi nari anaqa faqa nari faiqi namufaqa mareeqeeqa munnimmara kai iriseeqa nisauruqaana oosana oosana mandainainaki quqeeemariasa maridaqa.

<sup>12</sup> Moo Kareetee maqanna fasiqa fannoo nariqa ufa qidanoo akara rimaru fasiqa fannoo ooqai kuqufa maqi qimasee nari maqannaasara qimasee akara rinau. Kareetee maqannaasa maqee maqee unna ufa qimariasa maridaqa, kaaqa mandoosana maraidaqa fainiara foora imariasa maridaqa. Kudiki mariasa kaaqa narana moomoo neemariasa maridaqa.

<sup>13</sup> Qinee Pauroosa minara maaqi qidaqa. Mi fasiqafa nari maqannaasara doo kuqaa miqi mariasee qinau. Titusa anee faqa minara irisee kooroomasee rakeemasee nimambaina qimasee aranaiqi qimannimia. Miqi qimasainaqa Kareetee maqannaasa sia kaqirunna fuaqa Anutunasaa saqarikirafa afeekaikamafi maridaqa anona ufasaqari quandaki unna ufa qimariasa naakapaifaqa sia misa naakaparana iriaqeera.

<sup>14</sup> Yuda maqannaa uri ufa faqa anona ufa minisee mariasa sanda ufa faqa sia iriaqeera nimambaina qimasee qimannimianneera qimamidaqa unna ufa minnisaqeera.

<sup>15</sup> Qikairi siaisa aiqama ainaina qafamaseenoo minakinaa manda oosana sia irirai minakinaa amiqira oosana kai qafamasee minara asaidanoo. Nari maraquina kuqiraua nari marirana irirana putaa irausa anona ufara sia fee qimasee aiqama ainainara mandaikinoo maridanoo fee qidaqa. Misa nariara maasa Anutunara iridaqee qimariasa.

<sup>16</sup> Amiqi mariasa anirarisameegee mandaki quqemariasa misa nari nookiqari maasa Anutunara iridee qimasaidaqa quandaki nari auqee maria ainainafa moomau fimarifaqa maasa qafamasee unna qidammiafoo qidaqa. Faiqi aanaaseera fdiqaaimariasa ufa rukiee mariasa mi manda fasiqausa maridaqa. Amiqira saikara sia amanaiki mariasa maridaqa.

## 2

### *Pauroofa faiqi anaasee fraasa naakapaaqee ufa qimannimiau.*

<sup>1</sup> Titusa doo misara qiqa maqee aniara qianaara. Anee Anutuna ufa amana kai qimannimidana mina marirana amana kai Kareetee maqannaa fasiqa anaasee qimannimia.

<sup>2</sup> Faiqi fraasa maaqi qimasee qimannimia. Irirana faqaasa mariaqa, noori kandamasee mariaqa nari naundura nimanara oonumafi irimarinausa mariaqa. Nari Yisuna saqarikiranasa mundufi mariaqa. Nariara nariara uriqarara ainanee qimasee nimuqusirafa mariani. Sia tipuqi mariasa naanna ramasee mariaqa reendenamandee ubiqasee mariasa naanna raqa mariaqa.

<sup>3-5</sup> Anaasee fraasa faqa miqi kai masee maaqi qimasee qimannimianaqa, misa marirana anukara anaasee kammambiqa mariaqa, misa moosara nifai sanduri mariana sia miqiaqa, sia manda nammarrinnai nidudusaa aruaqa. Misa fuka aanaaseeuqa amiqira oosana uqannifiqasee naakapamasaiifaqa misa nari nifaqia ruqaqee nari faiqi namuara faqa ruqaqee. Misa nari naundura nimanara iridaqa mariaqeera. Misa anukara anaasee mariaqeera misa amiqimmandee nari nifaqai faiqi namu qumiasana ainainasaa rakisirausa mariaqeera. Misa afaaridaqa amiqi marinausa mariaqa. Misa nari nifaqmaaka ufara eedoo qimarinausa mariaqeera Titusa anee qimannimia. Misa miqiaqa marifanoo akaqausa ani nindafeeqa sia Anutuna ufara mandainanee qiaqeera.

<sup>6</sup> Titusa anee miqi kai mandee kumaaraa faqa maa ufana qimanniminaqa, misa faqa nari naundura nimuqusa amiqimasee mariaqa.

<sup>7</sup> Anee aneennara faqa aiqama ainaina amiqimmandee marinaqa misa ani qafeeqa miqimmandee mariaqa. Anee kuqaa uqanna oori runusee maridana misa naakapamasee qimannimia.

<sup>8</sup> Anee mapukirufa kai qimanniminaqa sia quandafi aniara fifau faafau ufa qiifoo qifaranoo. Anee mapukira ufa qimanniminaqa aniara nikooqee mariasa ani namuqaa faqa kaukaataqira ufa qianneera mina oosanara randeeqa nisaurifaranoo.

<sup>9</sup> Doo aniara qiqa maqee feefauruara ainaini mariasara qianaara. Feefauruara ainainimaria fasiqausa anee maaqi qimasee qimannimia. Misa nari rakisirausa ufara sia rukiaaqa eedoo kai qiaqa. Nari rakisirausa asasiaqee ainainakaimmiaqa. Misa nari rakisiruasa ufa sia ati raqannimiaqa.

<sup>10-11</sup> Misa sia nari rakisirausa ainaina qummuariaqa. Maqee maqee amiqira oosana kai maree mariaqa ainainira faiqiqa andeeqasee marifanoo misasaa rakisirafa misaki afaqa quqasee mariani. Ainaini maria faiqisa miqimmandee amiqimmandee maridaqa aiqamausa Anutunara maasa innaarunai asumu marirana nimirafa mina naakaparana amiqirane qimasee maasa faqa marararee qiaqa. Miqinoo marinara maa kamuqoo Anutuna afaarirana kooroomminoo maridanoo. Minannai aiqama maqannaasa innaarunai asumu marirana nimirafa doo kooroomminoo maridanoo.

<sup>12</sup> Anutuna afaarirafa maanara daakapaidanoo. Oosana oosana ainaina sia Anutufinnai ubeekanoo mari ainainara minnisaqee qidanoo. Maa maqanasaaqaraa ainainara kaqa rimariana nimuqusirana doo quqaaqee qidanoo. Maasa maa maqanasaa marunnaqoo qeeqa qimanara qeeqa daundurara iriseeqa aiqama ainaina sia maraa qee qidanoo. Anutuna afaarirafa maa maqanasaa marunnaqoo maasa nirana marirana kuqaa kai qiaqee qidanoo. Maasa maa maqanasaa maridaqa Anutuna fooqaa marirana qiaqee qidanoo.

<sup>13</sup> Maasa miqiga fifi iqa Yisuna innaarunaindari koorooira faasaanara asasammasee maqoo afeesida mariaqee qidanoo. Mi faasaanna maasa Anutufa, maasa mandainaina numoo arusee innaaruna asumu marirana nimianinafa, Yisufa, Anutuna asauku mundirafa, fira qaaqa qaranakiqari, quriqararanakiqari koorooianoo.

<sup>14</sup> Mifa maasa kuqirana nariara maraseenoo maasa sia maraaqera maasa kuqiranaki mifa keeqanau. Sia fifaufau kuqinau. Maasa qeeqa mandainainakinaana mareeqeenoo maqee kamuqoo nari kaaqa qara andeeqara fasiqa anaasee kammannimaqaaneera kuqinau. Maasa minaindikuqanna iaqera, maqee maria kamuqoo amiqira ainaina kai maasa aruqarara rimariasaikamma fuaqera kuqinau.

<sup>15</sup> Titusa anee mi ainainna maqee qinee qunna ainainna faiqi anaasee naakapaa. Anutufa ani qimaminara sia rufiaa. Afeekaikamasee qimannimia. Aneenna afeekaikamambinana fuki faaki qidana amiqira oosana andeeqara oosana maraaqera qimannimia akaqausa mandoosana mareefoora qaoo qia. Aniara manda faiqi fee kaqikaa faiqi fee qifoora, Anutuna ufasaa afeekaikamafinana andeeqasee qimanniminaqa sia miqiaqa.

### 3

#### *Pauroofa Yisuna ufa irimarusa andeeqara mariranara naakapanau.*

<sup>1</sup> Titusa anee maa ainainnara faqa maqee maqee Kareete maqannaasa naaqoo auqaina iriaqa. Misa kaamanna rakisirusara maasa uriqararausee qimasee eedoo kai qiaqa. Aiqama misa amiqira ainainiranara qifaqa kasi kasi kai iaqa.

<sup>2</sup> Maa ainainnara faqa qimannimia. Misa sia mandufa moonara qiaqa. Misa reendeenira oosana faqa aqoondikira oosana faqa kai maraqa nuaqa. Misa aiqama fasiqa aanaaseera reendeenamandee kai aiqama ainaina iaqa.

<sup>3</sup> Ooqai maasa faqa misa naanna raidaqa, furufariaafanausa maridaqa, ufa rukiee mariafanausa maridaqa, maasa kaqiruna ubeekaaafanausa maridaqa, maasa faqa daundurakina qidudusaa arirafa qiaqa qifaqa rumbeeusa idukuqoosa maridaqa, maa maqanasaa amiqi amiqira ainaina fannoo maasa rumbeeusa maasa faqa aiqama aukuaana qifai sanduriaafanausa maridaqa, moonana ainaina qafaafananoo qimuqusidanoo qimukeeusa maridaqa, maasa faqa moosa nindafaafananoo fidiqaamma nimaqee mariafanausa maridaqa, misa faqa maasa qifafoofanoo miqikai inoo fidiqaamma qimaqemariqau.

<sup>4</sup> Anutuna maasa asumu maraaninafa nari afaarirana faqa nari amuqusiranannai faqa akooroomaseenoo miqoo mifa maasa unnaqira manda ainainakinaana mareeqeenoo kaqinni quqannisanau, manda ququsaki mariafannana.

<sup>5</sup> Sia maasa amiqira saikafau Anutufa qafamaseenoo mina akiqararu maasa asumu maranau nari amuqusiranannai kai maasa asumu maranau. Kaifaa aanaaqi aanaaqi kammafirana mifa nammariara foora maasa findaukamannisanau. Minannai Anutufa maasa asumu maranau.

<sup>6</sup> Anutuna naaquqara andeeqara maraquna fannoo Yisunannai maasa asumu maraaninnanasaqari maasa unnannai anidanoo firaqoo maasa daaquqimaqaidanoo.

<sup>7</sup> Miqunara Yisuna afaariranannai kai maasa Anutuna afusaa andeeqarusaikiqa maridaqa naaru naaru marirana maridaqa, اساسidaqa afeesidaqa maridaqa.

<sup>8</sup> Mi ufana anoona ufa kai qimamidana ainna irirafa minasaa rusimari ufafa maridanoo. Titusa qinee Pauroosa maa ufana faqa ani qimamianana anee Anutuna ufa irimariasa qimannimia. Misa sia fifau faafau ufa kai ida mariaqa. Misa aiqama kari andeeqara ainainiranaki maridaqa auqaaqera qimanniminaqa maqee maqee minaki kai mariaqa. Mi ainainirafa aiqama fasiqa anaasee dadaaqi marifa maridanoo, anee mina uqeerasee afeekaika.

<sup>9</sup> Anee Anutuna ufa nimidana narafumau narafumau qinnanaki sia minaki aqufua. Saina aaduma mariani. Moo fannoo nari akeeku akaaku oosana oosana ufa qinafa sia anee minaki aqufuan, anee kaqinni maria. Mooseena sandufasaara tinoo taanoo riqa rakinausakina minaki faqa anee sia aqufua. Maa ainainna auqeamarinakina sia anoona faina fifau dapi ainaina auqee marinnanaki sia minaki aqufua.

<sup>10</sup> Anutuna ufa qimariasakiqari moo fannoo mandoosanara sandanainai qimarinnana qaara kari kai aaquqira ufa qimamia. Kafa fee qinana doo mina ameesa uqamaqa.

<sup>11</sup> Miqi mari fasiqana irirafa furufarirafa maridanoo. Mina mandoosana fannoo mina aaqarana kooroidanoo nari faqa nari aaqaranara faqa iridanoo.

#### *Pauroona akara ati rafaqaqira ufa.*

<sup>12</sup> Qinee Pauroosa Arateemasana fee Tikikusana fee anee mariannaqoo niqigaana ani saikasaa oonu rakisifana anee Nikoopoorisa maqusai kaqi kaqi fua. Suara uqi mari

aukuana qinee Nikoopoorisa maqusa oonu marianauree qidaqa. Anee amanaikinana miqoo oonuree qini paquria.

<sup>13</sup> Anee Kareetee maqa maaqai kaqi maridana Seenaasifa irirana akoofasa marufa faqa Apoorosifa faqa nári finnannai fifana anee faqa miqanda dadaqia. Moo ainainara miqanda sarauqifana kaqi mara nimisee dadaqinaqa amiqimasee fuaqa.

<sup>14</sup> Maasa niqoondi Kareetee maqannaauqa sia nisauku raqandaamasee mariaqera naamuaqiaqa. Misa maqee maqee maqasaa anoona ainainirana kasi kasida niqoonausa faqa dadaqi marinanaki maridaqa nári anoona ainaina auqee marianaki faqa maridaqa akaqausa niqoonausa naida nimiaqera qimannimia. Miqimasainaqa misa saika sia fifau irairaaiani anoona kai kambiqaani.

<sup>15</sup> Aiqamausa qini faqa maria fasiqausa ani Titusana amandaidaqa. Yisunasaa mundimariasa anee marianannai mariasa maasara rimariasa anee misa faqa nimandaa. Anutuna kaqi nimirafa innisaa faqa mariani.



## **FIREEMOONA**

### **Fireemoona Pauroofa akara rumeeqee Fireemoona amaqoo pasafa maridanoo.**

(Fireemoonafa ainaina faqaafa Yisuna ufa irimarufa marinau. Mifa nári miqoogaraasa oosana maraseena faiqí akaqa kudi fasiqauqa feefaurumasee narí ainainiranaki quqaqoosa mariqau. Misakiqari moo fannoo mina auqu Ooneesimusafa mariufanoo moo deedeepamaseenoo darifoo qimaseenoo quqasee Roomma maqusai sandanau. Pauroofa karabusaki Roomma maqusai marunnai finau. Oonuroofanoo Pauroofa mina paqurimandeenoo Yisuna fasaasa ufa qimamufanoo irisoofofano Pauroofa pasa akara rumamisee aqiqoofanoo kafaannai Fireemoonafa narí uriqararafa marunnai finau. Pauroofa Ooneesimusana dadaaqidanoo maaqi Fireemoona akara rumamaqanau.)

<sup>1-2</sup> Oo Fireemoona qinee Pauroosa Yisuna saika ufasaara Roomma maqannaa karabusaki marinausa maridaqa Timootifa maasa qikaqa sia rumberanaki marifa kaqi marifa qini dadaaqifaqa ani Fireemoona pasa akara rumamaqaidafa.

Maasa qiqoondi moodaa ainainiranaki marianafa Fireemoona ani faqa Yisuna ufara ani maaqaki suqi mariasa faqa maasa qisookifa Afiaa nammariifa faqa maasa Yisuna ufasaara moodaa rakiranara fooraki marifa Arakipusafa faqa inni aiqamausa akara rumannimaqaidafa.

<sup>3</sup> Anutufa maasa qikoofa faqa karaambaiqa asaku mundirafa Yisufa faqa Anutuna afaarirana faqa narí naundura asoarana faqa inniki nimiani.

*Pauroofa Fireemoona andeeqara oosana amooqidanoo asaidanoo.*

<sup>4</sup> Oo Fireemoona qini qikaqa qinee aiqama kari aniara Anutufinnai innaaru qidaqa dufi dufi qidaqa.

<sup>5</sup> Anee karaambaiqa Yisuna saqarikiranara faqa Anutuna ufa iri mariasara aidimariananara faqa maqee maqee iridaqa aniara dufi dufi qidaqa.

<sup>6</sup> Qinee aniara maaqi qimasee innaaru qidaqa. Maasa asaku mundirana faqa moodaa aanna fimariasa amiqi amiqirafa firaafa maridanoo, anee maqee maqee akaqausa faqa Yisuna ufa naida nimiseenana anee maqee maqee mi amiqi amiqirana anoonara irianeera aniara innaaru qidaqa.

<sup>7</sup> Oo qini qiqoondi qinee ani oosana iriqa, anee Anutuna ufa irimariasara amuqusi-marifana amiqi amiqidana asarirana nimimariannanara qinee minara iriseeqa qinee faqa asarirana firaana faqa pooduqarana faqa mareeqa.

*Pauroofa Ooneesimusanara qimudao qimaseenoo Fireemoona akara aminau.*

<sup>8-9</sup> Asaku mundiranaki maaqanda maridaqa qinee ani afasausa maridaqa paasoosamasee aniara andeeqara oosana maranneera qimamianee qidaqa sia miqianaura nariara nariara rirafa didimariifaqa kaqimma iraanaura. Qinee Pauroosa asaku mundirana Yisuna aanaiqikirausa mina ufa akiaqara Roomma maqannaasa rumberanaki marinausa sia qimamianaura kaqimma Ooneesimusanara iraanaura.

<sup>10</sup> Qinee maaqoo rumberanaki marunanoo ani ainainira faiqi Ooneesimusafa aniroofaqa Yisuna aufakiana qimamunanoo Yisuna saqarikifaqa qinee minara qini qimaaku fee qimaseeqa mina akausee qidaqa. Mi fasiqanara aniara iraanaura.

<sup>11</sup> Mina auqu Ooneesimusafa mi auquna oosana maaqi qinoo maridanoo amiqimasee ainainira fee qinoo maridanoo. Ani ainainiranaki sia ainainifa doo maqee qini ainainiranaki narí auqu oosana uqeereenoo kaaqa ainainidanoo ani ainainiranaki faqa kaaqa ainainiannoo.

<sup>12</sup> Doo qinee maqee anee ianannai aqiqeeqa narí faqa qeeqa qimuqusa namufaqa aqiaqanoo finoo.

<sup>13</sup> Anee Fireemoonafa maaqoo maridanau qini aqoondiuqa aniraifanau narana aina dadaaqini. Anee sia mariannanara Ooneesimusana rafaqa fuanee runaisia anee ianannai aqiqaidafa.

<sup>14</sup> Sia qinee mina rafaqaqafirannai ani dadaaqirana oonu rarisaanaura anee anienna kai iriseenana Ooneesimusana aqiqainanoo oonurandee qinee unnannai aniani. Anee eedoo qina kai kafa maraanaura sia eedoo qinaqa kaqi marianaura.

<sup>15</sup> Nanaree Ooneesimusafa ani saikakiqari quqasee sandanau fee. Anutufa qumeenni fuki faaki qufanoo fee ani saikakiqari aqamasee quqasee maaqoo Roomma maqusai anireenoo irirana mara maree anirandeenoo naaruara amiqimasee ani faqa mariani-feera Anutufa qumee mina aundurai kai saikinoofeinau.

<sup>16</sup> Sia maaqooqari fifau ainainiranaki marifa mariannoo maasa qifaaqasaa qikaqa qimuqusimarifa asauku mundiranaki marifa mariannoo. Qinee minara uriqarara ainaina firaafee qidaqa. Doo maqee ani ainainirana faqa ani karaambaiqaki mari akaqaafasaafa faqa marinara ani uriqarara ainaina firaq ainaina mariannoo.

<sup>17</sup> Oo Fireemoona anee qiniara ani faqa moodaannaana fimarunaasee qinana qiniara foora Ooneesimusana oonu mareeqee kafaa aneenna saikaki quqaa.

<sup>18</sup> Indaaruu mifa ani mandaikammamaqeenoo fee mifa ani munnimma mareenoo fee mina akiaqara qinee mina amianaaura.

<sup>19</sup> Qinee qeeqa qisaukunnai maa akarana ridaqa qimamidaqa qinee Pauroosa mi munnimmana akiaqara ani amianaaura. Qinee fifau ani qimamida anee irimariananoo. Qinee marunnanara anee mariananoo. (Anee ooqai idaki fimarunaqa qinee ani mareeqee kaqi asumu mariranaki mara quqa amaqaafanausa maridaqa.)

<sup>20</sup> Oo qini qikaqaafasaa karaambaiqara irisee amiqi amiqimmaqimaqa, anee asauku mundiranaki marianna qikaqaafasaana aanna ramasee Ooneesimusana kaifaa mareeqee aneenna saikaki quqaa.

<sup>21</sup> Qinee maa pasana akara ridaqa aniara sia qinee iraunna ainainna kai qimiannoo fee qidaqa moo faqa moo faqa qimiannoo fee qidaqa.

<sup>22</sup> Anee maa pasanakinaa ufa irisee Ooneesimusana kafaa quqaidana maaqa deedaqia, qusasaa Anutufa inni innaaru qirana irisee qini idukusainaqa anee innanna fuanaura.

*Pauroofa ati rafaqaqfira ufa.*

<sup>23-24</sup> Eepafaraasafa asauku mundirana Yisuna ufa akiaqara qini faqa Roomma maqannaasa rumbaranaki marifa mifa faqa inni nimandaianoo qini faqa moodaannaana ainaini mariasa Mareekoofa faqa Aristarakusafa faqa Deemasafa faqa Rukaafa faqa misauqa faqa inni nimandaidaqa.

<sup>25</sup> Asauku mundirafa Yisufa karaambaiqa mifa kaqi afaarirafa inni aiqamausaki mariani.

## HEEBURU MAQANNAASA

### Heeburu maqannaasa moo maqasai marusa Yisuna ufa irimarusa qimannimira ufa qimaqoona.

*Anutufa nari amaakunnai misa qimanniminai.*

<sup>1</sup> Ooqai Anutufa nari marunara moomoo kari moomoo oosanannai faqa nari tamum-maqara fasiqauqannai faqa maasa Isaraee maqanna qikeeku qikaaku nari marunara naamua qimannimimarinai.

<sup>2</sup> Maa maqee inaaqianna kamu nari amaakunnai maasa qimaqiminoo. Minannai kai Anutufa maqa faqa innaaruna faqa minakinaa ainainauqa faqa auquseenoo nari amaaku aiqamausakinaana marasee rusandeesamumasee amianauree guna taikara aukuaana aiqama ainaina saqama anindi kammianoo fee qimaqoofa maridanoo.

<sup>3</sup> Mifa nari akoona Anutunasaqarara areenarana firaaqoo rupannooidanoo mifa Anutuna oori afiri amudaani nari akoofara foora mina amanakai uqanna maridanoo, nari afeekufannai innaaruna faqa maqa faqa aiqama ainaina uqeera afeekaikamaqoofanoo maridanoo. Mifa Anutuna amaaku fannoo faiqi faiqi mandainaina maqasaa qumu anukama rukaseenoo nari akoona aqa innaarunai aiqama ainaina uriqararana asauku uqannai ooru ooqumarinau.

*Yisufa Anutuna amaaku uqanna qangiroo urinnaaqararafa maridanoo.*

<sup>4</sup> Anutufa qangiroo firaa nuqu ramaseenoo, nari amaaku auqu firaa auqu misa uriqarara auqu ranau. Mina amana kai nari amaaku qangiroo firaaqoo urinnaaqararafa maridanoo.

<sup>5</sup> Anutufa maaqi qimasee nari amaakuara qinau.

Anee qini qimaaku mariananoo.

Maqee qinee ani akausaikiqqa maridaqa.

Anutufa sia qangiroora mi ufana qinau nari amaakuara kai miqi qinau. Anutufa nari amaakuara moo ufa maaqi qimasee qinau.

Qinee mina akausa marianaara.

Mifa qini qimaaku uqanna mariannoo.

Sia qangiroorau miqi qinoofau nari amaaku Yisunara kai miqi qinau.

<sup>6-7</sup> Anutufa nari ooqa faiqi maa maqa maaqanaki quqarara maaqi qinau.

Qini qangiroouqa aiqama mina amooqifandia foo qinau.

Anutufa qangiroouqara maaqi qinau.

Anutufa nari qangiroouqara ufaira foora auquqai faqa maridaqa.

Mifa nari ainainira faiqi idauru miqirana qangiroouqa auqusai faqa maridaqa.

<sup>8</sup> Anutufa qangiroouqara miqiaqee qinau nari amaakuara maaqi qinau.

Oo Anutu ani ufa irira qaari naaru naaru mariannoo.

Andeeqarana namu faqa ani ququsaki mariasa rakisida marianafa mariananoo.

<sup>9</sup> Anee andeeqara oosana rimarianafa mariananoo. Anee mandainainara fidiqaa imarianafa mariananoo.

Minara kai ani Anutufa ani aqoonausakinaana rusandeesamumasee maraseenoo firaa naaikamandoofa maridana asasimariananoo.

<sup>10</sup> Anutufa kafa nari amaakuara maaqi qinau.

Anee karaambaiqa mariananoo oosana aroo aukuaana maa maqa maaqana oosana arasee auqunafa mariananoo.

Anee aneenna asaukunnai innaaruna faqa minaki mari ainainna faqa auqunafa marianafa mariananoo.

<sup>11</sup> Mi ainainausa doo taikafuannoo aneenna kai kaqi marinnaranoo mi ainainausa ooqai mariu qamunnara

foora ooqeenaafaikamafinoo afauqagaannoo.

<sup>12</sup> Ai qama qamunna fuka mari ifanoo nauraanaikidanoo faiqi mina raqandaamma quqasee fuka akidaqa. Maa maqa maaqana faqa innaaruna faqa anee auquqoonafa miqi kai inoo qamunnara foora nauraanaikinana raqandaama quqasee fuka mareennaranoo.

Anee sia qamunnara foora sia nauraanaikinnaranoo anee naaru naaru marianandee kai ina marinnaranoo.

<sup>13</sup> Anutufa nari amaakuara kafa maaqi qinau.

Anee maaqoo qiqa daaqa qisauku uqannai oqumari finaqa ani namuqaa narusee oonumafi ani aramandunnai quqaanaura.

Sia qangirooma miqi qinau. Nari amaakuara kai miqi qinau.

<sup>14</sup> Qangirooma naqi fee iqa maridee. Misa aiqama maraquna kai maridaqa Anutuna ainainira ainaina maridaqa. Mifa innaarunaindari niqiqainaqa faiqi anaasee innaarunai fifandinausa dadaaqaqeeera niqiqaidanoo.

## 2

*Asumu maree fandinna ufana amiqimmandee rakisi qumaraaqa.*

<sup>1</sup> Minara maasa anoona ufa irimariafannufana qumareeqa amiqimma rakisi qumaraanauranoo. Sia miqifanoo maasa nammariara foora aufigoo maasa maree fuandoora.

<sup>2</sup> Ooqai qangirooma qimannimu ufafa kuqaa anoonaiki marinau. Qangirooma ririmma innaarunai ureeqaransa maridaqa faiqi moo fannoo misa ufa irisee rukiasoofanoo Anutufa mina akiaqara narinau.

<sup>3</sup> Maqee innaarunai firaafa uriqararafa maasaki ani maridanoo. Mifa maasa qumareeqe asumu marirana qimiraree qidanoo. Maasa mi firaa ainainnara iriseeqa minniseeqa naqi fee mandee Anutunara rufiasee yaifee fuanauree. Sia amana, kaqi darirafa kai firaafa mariannoo. Karaambaqaa nari uqanna oosana arasee nari innaarunaindaraa asumu qimiranara nari faiqi namu qimannimisoofoqa irisee quandaki maasa qimaqimi-afaqa kuqaa fee qimasee iridaqa.

<sup>4</sup> Maasa sia misa ufa kai irisee kuqaa fee qidaqa Anutufa misa ufa dadaaqammasoofoqa faiqi sia amana auqaqaa ira ainainna firaa ainaina oosana oosana faiqi anaasee dadaaqimaru ainainna auqusofoqa maasa mina qafeeqa kuqaa fee qidaqa. Anutufa nari iriranannai kai nari maraqunannai kai oosana oosana fasiqa anaasee dadaaqira akoofasaikirana faiqi anaasee niminau. Miqunnannai faqa maasa innaarunaindaraa asumu marirana qimianinnana kuqaa fee qidaqa.

*Maasa asumu qimimaruna oosana qu ufafa.*

<sup>5</sup> Maasa naaru fuka anianinna maqa maaqanara qidaqa. Anutufa sia qangirooma innee minasaa rakisiaqee qinau. Faiqi faiqi maaqoo qaraasa kai minara rakisiaqee qinau.

<sup>6</sup> Ooqeenaa tamummaqaransa akara minara maaqi qidanoo.

Oo Anutu, faiqi nane mariafane anee misara iridane, kaqi fifau fasiqara minaree ani amuqusidanoo fee.

<sup>7</sup> Anee faiqi auqeeqeenana qangirooma ameemaanai qusa aukuaana qusa kamu quqaananoo. Anee kaaqa qarana faqa uriqararana faqa Karaambaqara foora marirana nimiananoo. Maa maqanasaa ainaina aiqama uqanna uriqararanaikirana Anutufa nimiananoo.

Tamummaqara fasiqa ufa miqi qimaqoofa maridanoo.

<sup>8</sup> Mi tamummaqara fasiqana ufa maaqi qidanoo.

Anutufa maa maqanasaaqaraa fasiqara innee aiqama ainaina uriqararansa mariaqee qinau.

Sia akaqa ainainara kaifau qinoofau. Aiqama ainainara qinoo. Maasa maqee qafaidaqa sia maqasaa fasiqa faiqifau aiqama ainainara uriqaraidaqau.

<sup>9</sup> Maasa quandaki Yisuna kai qafaidaqa. Anutuna afaariranannai kai Yisufa naaru asumu marirana qimiraree qimaseenoo maasa faiqi faiqi kuqirana nari faqa maraani qimaseenoo qangirooma nimeemaanai qusakamuqoo qumu maridanoo kuqunnimaqanau. Maqee mifa kaaqa qara qafee faqaafa, kuqaa firaqoo uriqararafa maridanoo. Mifa kuquna faqa aupuroona faqa mina akiaqara innaarunai firaafa maridanoo.

<sup>10</sup> Anutufa aiqama ainaina auqufa rakisinoo fimarifa maridanoo. Mifa aupurarana aidafirana Yisuna afaaqasaa quqoofa sia manda oosana quqanau. Amiqira oosana andeeqara oosana mareenoo miqinau. Anutufa Yisunara andeeqara anoona marianifeera quandafinoo faiqi nari uriqararana naida nimianifeera aunirira saqarisaa aupurarana Anutufa aminau. Nari Yisufa mifa kai faiqi faiqi innaarunai asumu mariaqee aana afisufa maridanoo.

<sup>11</sup> Yisufa faiqi faiqi maraseenoo nari mandainaina findaukamaseenoo anukaranaki quqannisee marifa maridanoo. Mifa faqa ninukamaqaisa faqa moodaa nikoona faqaasa marianara Yisufa misara sia asauridanoo qini qikaqaafasaa fee qidanoo.

<sup>12</sup> Yisufa minara maaqi qimaqoofa akaraki maridanoo.

Oo Anutu aniara qeeqa qikaqaafasaa qimannimianaura.

Qinee faiqi suquseeqa misa nifusaa ani amooqianaura.

<sup>13</sup> Kafa moo akaraki maaqi qidanoo.

Qinee qeeqa irirana Anutunasaa rusianaura.

Kafaa moo akaraki maaqi qidanoo.

Doo qinee maaqoo maridaqa Anutufa qimu faiqi anaaciisa misa saimbaqa maridaqa.

Akarakinaa ufa miqiminoo maridanoo.

<sup>14</sup> Yisufa maqasaa fasiqa anaaseera nari faiqi aanaaqi fee qidanoo. Mi faiqi anaaciisa nimaqi faqaasa fidika faqaasa maa maqanasaaqaraasara Yisufa qidanoo. Yisufa nari uqanna qumureenoo faiqi aanaaqi Mariana aranandaki maasa faiqi faiqi fidika qimaqi mareenoo innooqanau. Mifa sia fifaufau miqinuu. Nari kuqiranannai kuqirana rakisirana Sadannana rafaqaafuanifeera maasa qimaqi faqa fidika faqa maranau.

<sup>15</sup> Yisufa kuqirana rakisirafa Sadannana rafaqaafuseenoo aanaaciisaqari kuqiranara rufiasee rumbaqa maria fasiqa anaaseesa idukunnisaaneera kuqunnimaqanau.

<sup>16</sup> Sia Yisufa qangirooquqa dadaaqidanoo. Faiqi faiqi dadaaqidanoo mifa akooqoo maridanoo. Moo akara fannoo minara maaqi qidanoo.

Mifa Abarahaamana aiku asauku dadaaqimarifa maridanoo.

<sup>17</sup> Yisufa nari akaqaafasaauqa maa maqanasaaqaraasaa dadaaqianee qimasee amiqimmandee misara maqi qiara mambiqa amiqimmandee misa aanaaciikianeera miqinuu. Sia fifau Anutuna ainainira aanaaciikirafa mariannoo maqee maqee nari akaqaafasaa nifauee marianinafa oori runusee miqoo kai marianinna aanaaciikira uriqararafa mariannoo. Anutufa faiqi anaasee mandainaina minnisaanifeera Yisufa miqinuu.

<sup>18</sup> Indaaru Yisufa aupurarana aidafirana Sadannafa nimanamandee qafarana faqa doo amanamandee qafamaseenoo uriqaroofoa maridanoo. Maqee minara maasa amiqimmandee dadaaqidanoo mifa doo mina oosana qafoofoa irufa maridanoo.

### 3

*Yisufa Mooseena uraaqararafa maridanoo.*

<sup>1</sup> Qini qikaqaafasaa innisaimbaqa Karaambaqa aiku oosana marunaua maridaqa innee faqa qinee faqa Anutufa daarama quqasaifaqa ani mariasa maridaqa. Innee Yisuna qafaqa qafaidaqa oonumafi iriaqa Anutufa aqiqaamaqoofoa maridanoo. Maasa qimarunna amaana ufana aanaaciikira uriqararafa marianifeera aqiqaamaqoofoa maridanoo.

<sup>2</sup> Ooqai Mooseefa Anutuna aiku asauku Isaraee maqannaasaki aiqama ainaina auqeamaruna miqoo kai maridanoo oori runusee andeeqanoo kai marinuu. Yisufa miqikai maseenoo nari asauku mundusee aqiqaoofoa Anutunara iriseenoo mina ainainirana andeeqaidanoo aidimarufanoo marinuu.

<sup>3</sup> Faiqi misa fuka maaqa qafamasee sia maaqa amooqidaqa faiqi maaqa usakai fasiqana kai amooqidaqa. Miqikai iqa, sia Mooseena amooqiaqa. Mifa fifau maaqa maridanoo Yisuna kai amiqimasee firaaqoo amooqiaqa. Mifa maaqa usakee marifa anoona uqanna maridanoo.

<sup>4</sup> Sia maaqa moo fifau kambiqaidanoo. Aiqama maaqa usakeemarifa kai usakaidanoo. Anutufa mifa aiqama ainaina auqeamarifa marifanoo Yisufa Anutuna ameemaanai maaqa usakee marifa marinara Mooseena uraaqaranoo maridanoo.

<sup>5</sup> Mooseefa Anutuna aiku asauku Isaraee maqannaasaki maqee maqee miqoo kai maridanoo oori runuseenoo andeeqanoo kai marinuu. Mifa Anutuna ainainira faiqi maridanoo. Anutufa qimannimianinna ainainara faiqi anaasee qimannimimarufaaq irimariqau.

<sup>6</sup> Yisufa sia kaqi ainainira faiqi maridanoo. Isaraee maqanaasa nikoofa amaaku uqanna maridanoo. Mifa Anutuna aiku asauku maqasaa mariasa rakisinnimaqee marifa miqoo kai mi saikanaki marifa andeeqasee misasaa rakisimarifa maridanoo. Maasa naaru naaru Yisuna saqarikidaqa minara asasidaqa paasoosidaqa miqidaqa maasa Anutuna faiqi namu mina aiku oosana marunaua maridaqa sia miqidaqa sia mina aiku asauku marunaiqini.

*Anutuna ufa irimariasa idooaranara naakapaidanoo.*

<sup>7-8</sup> Anutuna naaquqara andeeqara maraquna fannoo maaqi qidanoo.

Innee maqee Anutuna ufa iriaqa inni saimbaqa Isaraee maqanna ninausa nikausa ooqai aadana maqa maaqaki fidaqa ititammasee ufa rukioondee innee siammiaqa. Misa Sinai aadana maqasaa Masaa maqasaa faqa Meeribaa maqasaa faqa nammari sia marunara Anutuna amanamandee qafaida naundaufa naundaufa qiqau.

<sup>9</sup> Minara Anutufa maaqi qinuu.

Inni nikausa ninaakusa qini qimanammasee qafararee qimasaida munari minari idaqa qini qimaniiqau.

Qaara fasiqa aiku asauku taikasee aukuaana aiqama amiqira ainaina quqannifiqaafanaqa qafeeqa mina minniseeqa quandaki moo ainaina kai mareemariqau.

<sup>10</sup> Qinee minara iriseeqa qafamaseeqa maa Isaraee maqannaara qiranaqaidanoo.  
Qinee maaqi qimasee niqidaqa.

Misa irirafa fifau faafau qidanoo aqaaidanoo.

Misa kisaqaasaa qini faqa anidaqa sia qini oosana qafeeusa.

<sup>11</sup> Qinee minara iranaqaifaqa maaqi qimasee qimafeekaikiqiafana.

Sia uqanna misa qini faqa anusufiqa adoeeefaranoo.

Anutuna ufa miqiminoo marifaqa qinee minara maaqi qidaqa.

<sup>12</sup> Qini qikaqaafasaauqa, innee amiqimandee rakisiaqa. Moo fannoo nari mandiranannai faqa nari ufa rukiee marinannai faqa nari amuqusaki marinara kaqi marira Anutuna nimeesa uqamaqeefoora.

<sup>13</sup> Maa aukuanasaaqaa innisaimbaqa kaqikai maridaqa maa ainainnara rakisiaqa, faasaambaasaana nari pooduge nari pooduge imariana. Innikina moo fannoo nari mandoosana fannoo rarisameeqee Anutuna ufara sia irianaki quqaandoora eerairiaqa.

<sup>14</sup> Maasa indaaru paasoosamandee Yisuna qumareeqa. Maqendari maqeesaa paasoosamasee Yisuna qumareeqa mina kai afaqaqa fifi inaqa taikainna aukuaana qumarainaga maasa mina faqa moodaanaki ainaini marunausara maqi mafiqqa mina qumaraanaura.

<sup>15</sup> Anutuna akara maaqi qidanoo,

Innee maqee Anutuna ufa iridee sia fee iridee iriqa sia ooqai undee iaqa.

Ooqai inni saimbaqa ninausa nikausa aadana maqa maaqaki Anutuna ufa irisee aanoo qidaqa mandufa qima rukiassee naaqoo siaisa mariundee sia maqee innee miqiaqa.

Anutuna akara miqiminoo marifaqa qinee minara maaqi qidaqa.

<sup>16</sup> Yau yausee Anutuna ufa irisee ufa rukiassee nimeesa uqiqa. Mooseefa Isipa maqanaindari nifiqee anusa misa kai miqiqau.

<sup>17</sup> Yausaree qaara fasiqa niku nisauku taikasee aukuaana Anutufa aanoomannimaqaano fee inau. Faiqi anaasee ufa rukiassee mandoosana maree marusa aadana maqasaa oonuree kuqu taikoosara misara kai aanoo qinau.

<sup>18</sup> Anutufa misara maaqi qinau,

Qini faqa anusufinausa sia uqanna qini faqa adoeeefaranoo.

Anutufa miqi qimasooafaqa qinee minara maaqi qidaqa. Mifa yausaree miqi qinoo fee. Mifa narufa iriseenoo rukiee marusara miqi qinau.

<sup>19</sup> Maqee maasa mina qafamasee maaqi qidaqa. Sia naundura nimuqusa Anutuna ufasaa rusunara minara misa sia fuka maqa maaqaki Kannaa maqa maaqaki adoaranaki fiqau. Kaqi aadana maqa maaqaki kuqiqau.

## 4

<sup>1</sup> Maqee maa aukuaana Anutufa maaqi qimasee qima afeekaikamma maasara qinau, Amana innee qinisaimbaqa qini amiqira adoqaranaki ani keeqafiqa qinisaimbaqa qidooaaqee qinau. Doo innisaimbaqa Anutufa aniaqee qimaqoo ufafa taikaandoora doo kaqi mariqoo amiqimasee rakisi qumaraaqa, sia keeqaanoo qimasee minara rufiaaqa maasaki moo mandainaina fannoo maasa qumarainaga maasa sia mina adoaranaki keeqaanoora.

<sup>2</sup> Ooqai inni saimbaqa Isaraee maqanna ninausa nikausa Anutuna ufa iriqa. Maasa maqee doo irimmaseeqa amiqira fasaasa ufa maridanoo. Indaaru misa mi ufana iriseeqa aqummasaqau. Misa mi ufana naaqoonnai iriseeqa sia naundura nimuqusannai mi ufana qumaraqau. Sia minara kuqaa fee qimasee minasaa irirana rusiqau.

<sup>3</sup> Maasa mi fasaasa ufana Anutufa qimafeekaikunara kuqaa fee qimasee minasaa rusiqqa marunannara maasa kuqaa Anutuna faqa keeqaidaqa mina adoaranaki adooida adoaaanura. Mifa minara maaqi qimasee akaraki qinau.

Qinee Anutusa maaqi qimasee aanoo qima afeekaikafannana.

Naaru naaru misa sia uqanna qini idoaranaki qini faqa keeqafi idooeeefaranoo.

Anutuna ufa miqiminoo maridanoo qinee minara maaqi qidaqa. Ooqai oosana aroo aukuaana Anutufa kuqaa aiqama ainaina doo auqu taikasee adooamasee nari adoarana faqa quqannimaqasooafaqa irirana rukiassee sia keeqee sia iriqa. Anutufa minara iriseenoo sia kaqi fuaqee qinau, kaqi mifa maridanoo sia uqanna amana misa keeqeeefaranoo kaqi kai qafa.

<sup>4</sup> Akarakinnaa ufa moo qisauku taikasee dinni ani qaara marasee faasaanara maaqi qidanoo.

Anutufa nari kadaapirirana oosana oosana mi faasaana quqasee adooanau.

<sup>5</sup> Akarakinnaa ufa moo idoaranara Anutufa maaqi qinau.

Misa naaru naaru qinee maqa maaqa nimiannanaki, idoarana nimiannanaki sia qini faqa keeqafi idooeeefaranoo.

Anutuna ufa miqinoo marifaqa qinee minara maaqi qidaqa.

<sup>6</sup> Indaaru marusa misa Anutuna amiqira fasaasa ufa irisee sia mina idooaranaki keeqaqau. Nariqa ufa sia irunnannai sia idooaranaki keeqaqau. Akaqausa Anutuna faqa keeqeefandinausa marianara moo keeqaaninna faasaana quqasee maqee kamuqoo fee qinau.

<sup>7</sup> Indaaru aukuanasaqari mi kamuqoo sia Anutuna ufa iriqau. Dafidifa kambiqoo aukuanai Anutufa Dafidina qimamufanoo maaqi qimasee akara rinau.

Maqee maa faasaana innee Anutuna ufa iriseeqa sia ititiaqa sia mana mana irirana iriaqa.

Dafidifa mi ufana akara rinau.

<sup>8</sup> Yoosuafa Isaraee maqannaasa nifeeqeenoo Yooradanna nammari taqamareenoo nari fuka maqaki idooaranaki quqannisanau. Anutufa sia mi idooaranarau qinau, moora qinau, Yoosuafa Anutuna adooaranaki quqannisainanoofau Anutufa sia moo faasaanara qini.

<sup>9</sup> Mi moo faasaanafa kaqi maridanoo, Anutuna ufa irimaria fasiqa anaaseesa maqasaagaraasa minaki keeqeefaranoo. Ooqai indaaru Anutufa aiqama ainaina auquseenoo qisauku dinni ani qaara maraseenoo amiqimasee idooanau. Mina fooqaa idooarafa kaqi marinaki Anutuna ufa iri maria fasiqanaaseesa keeqeefaranoo.

<sup>10</sup> Faiqi anaasee moo fannoo Anutufa mariqoo keeqafinoo idooainafa mi fasiqa anaaseesa nari ummaara afaimma quqaseenoo amiqimma adooeefaranoo. Anutufa nari kadaapirirana minniseenoo idoo oondee mi fasiqa anaaseesa faqa miqikai iqa nari kadaapirirana afaimma quqaseeqa amiqimasee adooeqa Anutufa undee ifaranoo.

<sup>11</sup> Minara maasa sia ufa rukiasee manoo manaa iqanuaqa nimudaanai qimasee Anutuna faqa nari adooeemarinaki keeqaqaa. Sia moo fannoo maasaki ufa rukiasee innisaimbaqa Isaraee maqanna ninausa nikausa naanna ree kaqinni aqufuaqa.

<sup>12</sup> Anutuna ufa sia fifau ainaina maridanoo, afu maqee marifa kasimarifa maridanoo. Aseema miqirafa kaqa dinni dinni firaqqoo raiqarafa naundururai ateekeemarifa maridanoo. Faiqi nimana faqa marauna faqa moodaanaki marinaki miqoo faqa fimarifa. Nimudaani aqumu faqa akikimana faqa ruqiasee miqoo faqa fimarifa maridanoo. Faiqi naunduraki faqa nimuqusaki faqa nidimarina faqa oonumafi irimariana faqa minauqa faqa qafeenoo rainee marifa maridanoo.

<sup>13</sup> Sia Anutuna afusaa moo ainaina kukeeqarana amana, sia amana miqiannoo. Aiqaama ainaina faiqi anaasee Anutufa auquqoo ainainausa kai marinara nari afusaa akoosaqa akoqqoo uqanna maridanoo. Maasa mi Anutuna afusaa qeeqa marunnana andeeqaranara faqa aaqaranara faqa ufa qianaura.

*Aiqama aanaiqikirausakiqari Yisufa firaqqoo uriqararafa.*

<sup>14</sup> Maasa aanaiqiki maria fasiqausa uriqararafa Anutufa nari mariqoo uqanna keeqafi maridanoo. Mi fasiqafa Yisufa Anutuna amaaku marinara maasa Anutuna amaana ufa qumaraunnana amiqimasee qumaraaqee qidaqa.

<sup>15</sup> Maasa aanaiqiki maria fasiqausa uriqararafa maasa daunduraki ummaararee marifaqa maasa kudoosaapee marunnana sia sia qafee marifa maridanoofau, qafee marifa maridanoo. Sadannafa aiqama ainaina amanamasai fanoo sia mina qumaraifa qafamaqaifa kai maridanoo, minara kai maasara qimudaoo qimasee amuqusidanoo.

<sup>16</sup> Minara maasa mifa daruaninnanara faqa sia rufia rufiaqiga paasoosamasee mifa mari qarinasa oonu reera fora nari nifaeenoo amuqusianinnanara faqa qimiannee qiaqa. Miqoo kaqi nimirafa kaqi dadaaqirafa miqoo maridanoo. Maasa miqoo oonuraanoo Anutuna afuarafa amuqusirafa maasara mariannoo. Maasa ummaara faqa sarauqirana faqa darinnanara mifa dadaaqiannoo.

## 5

<sup>1</sup> Maasa Heeburu maqannaasa faiqi misa aanaiqiki maru fasiqausa uriqararara randasee paqurimneegee faiqi anaaseesaaroo qianifeera Anutuna ainainiranaki quqaidaga. Miqqoqari mi fasiqafa faiqi anaasee mandainaina rukasainanoo Anutufa sia naruaninnanara iriseenoo maqee maqee amirainaina faqa aandau aruseenoo Anutuna tatufu suqa amirana faqa amidanoo.

<sup>2</sup> Mi aanaiqikira fasiqafa faiqi faiqi maridanoo nari faqa amanna marinara faiqi anaasee furufammasee aqee marianara amuqusinanoo amana dadaaqiannoo.

<sup>3</sup> Mi aanaiqikira fasiqafa mifa faqa faiqi kai maridanoo aqee marifa marinara, sia faiqi anaaseera kai aandau arusee tatufidanoo nari mandainainara faqa rukaanifeera nariara faqa Anutuna tatufuamidanoo.

<sup>4</sup> Sia faiqi moo fannoo nariara uriqarara saikaki keeqaanauree qimasee nariara aanaiqiki mariasa uriqararafa maridanoo. Anutufa qifa kai aanaiqiki mariasa uriqararafa maridanoo. Mooseena afasaafa Aaroonafa ooqai miqi kai inau. Anutufa Aaroonaa aaroofoano aanaiqikinau.

<sup>5</sup> Yisufa asauku mundirafa miqi kai masee sia nari kai nariara uriqarara aanaiqikinau. Anutufa qunara kai miqinuu. Mifa maaqi qimasee qimaminuu. Anee qini qimaaku mariananoo.

Maqee faasaana qinee ani akausaikammiqa maridaqa.

<sup>6</sup> Miqi qimasee Anutufa kafa maaqi qinuu.

Anee naaru naaru marinafa aanaiqikirafa mariananoo.

Anee Meerakiseedeekana atiara foora marianafa mifara foora naaru naaru marinnanoo.

(Ooqai Meerakiseedeekafa Sareema maqusaanaasa Anutuna faqa faiqi anaasee faqa aanaiqikirafa marinuu.)

<sup>7</sup> Yisufa maa maqanasaa Keetaseemane saqamaki maridanoo aunirira saqarisaa kuquaninnanara Anutunara innaaru qidanoo qao qimirinuu. Innaaru qidanoo firaqoo faqa rumaseenoo ikiraqaseenoo kuquaninnanara qao qimirinoo innaaru qinuu. Anutufa mina reendeenirana qafamaseenoo mina aundura Anutufinnai ubekearanara iriseenoo mina innaaruqirana iriseenoo dadaaqinuu.

<sup>8</sup> Yisufa nariara sia Anutuna amaaku fee qimasee mana maninuu. Oosana oosana aupuraranannai Anutuna ufara aqee kai eedoo qira oosana irinuu.

<sup>9</sup> Mifa aupuraranakiqari amiqiranaikamambinoo quandafi nari ufara eedoo qimarusa naaru naaru marirana oosanasenoo niminuu.

<sup>10</sup> Miqimasoofoano Anutufa minara maaqi qinuu.

Anee aanaiqiki mariasa uriqararafa marianafa mariananoo. Anee Meerakiseedeekana fooqaafakamambinana marinnaranoo.

*Innee faiqi irirana maraqaana faiqi aanaaqiara maqi qimariafanoo.*

<sup>11</sup> Anutuna ufa nari amaakuara miqiminoo marifaqa qinee maa ufana inni qimannimidaqa. Maa ainainna afeeka ainaina maridanoo oosana oosana ainaina faqa inni qimannimianee qimasauunaqa innee anuqimariasa mariafanoo.

<sup>12</sup> Innee faqa maqee faiqi uqannifiqaqaana. Innee Anutuna akarakinna ufa oosana ainaina faqa sia amiqimasee iri mariafanoo. Innee moosa qimannimiqaaqoo sia amanaiki mariafaqa moosa inni qimannimidaqa. Innee ooqai narana uqanna naaqaana mariafanoo innee naamma naidara maqi kaimmimariafanoo sia innooqarusara foora mariafanoo.

<sup>13</sup> Naamma neemariasa faiqi aanaaqi kai mariafanoo sia anoona ainaina manda ainainara rainasee iriaqamminoo maridanoo.

<sup>14</sup> Narana uqanna faiqi anaasee narana maridanoo. Misa doo akoofasa mariafanoo nimaakirisaa quqasee qafaidaqa mandaikinnana qafeeqa amiqirana qafeeqa miqidaqa akoofasa maridaqa. Innee faqa miqiaqaana. Qinee narana kikiqusidaqa amaana ufa qimannimira oosana miqiminoo maridanoo. Akoofasa fannoo iriseenoo rainaidanoo amiqirana iridanoo mandaikiranara minnisaidanoo. Faiqi aanaaqi fooqaa fasiqa mifa mandaikirana faqa amiqirana faqa kaqi naannoo.

## 6

*Anutuna ufara irimariasa kaqi runna franara aaquqimannimaqara ufa.*

<sup>1-3</sup> Maasa sia maqee marunnaqoo oosana kai maria, maqee doori mundusaannaqoo qambaanaira foora fua. Yisuna ufaki oosana ainaina aanaaqi kimarunnana inaaqiannai mafi quqasee doo maqee oorisaa fuaaura. Maasa qeeqa fifau aqara oosana kadaapiriranannai innaarunai firaree qimarunnana mina minniseeqa Anutunasaa mundufuafannana doo maasa minara irimarunafa maridanoo. Nammari nimirana faqa asaku nikiaaqa mundusee nifaaqooqa qirana faqa kuqiranakiqari findifirana faqa naaru naaru idaki fimariana faqa doo irimariafanoo. Sia kafa kafa aanaaqiara foora naamma kai naidara foora ooqai iri maru ainainara kai kaifaa kaifaa minara kai iriaqa. Anutufa dadaaqimarinaga maasa noorisaa findifinaqa indaarua foora fidaqa maqee maqee Anutuna ufakinaana fuka iriseeqa mi mau fuaaura.

<sup>4</sup> Anutuna ufamau fimariasa quandaki kaqinni aqufiqa naqi fee mandee aupuramasee quandakinaqa kafa fifaree. Sia amana miqifara. Misa ooqai Anutuna qoomasaa fimariasa, misa innaarunaindaraa narana naidara foora imariasa maridaqa Anutuna naaqqara andeeqara maraquina mareemariasa.



<sup>5</sup> Misa Anutuna ufa amanamandee qafamasee amiqira ainainara irimariafa maridanoo. Kasooqagee Yisufa kafaa qumuaninna aukuanaki kambiqaaninna afeeka atiara irimariasaa maridaqa.

<sup>6</sup> Misa mi ainainausara nikooqaifaqa kaqirunna fidaqa sia amana misa kafaa aupuramasee quandakinaqa kafaa Anutuna aanai ubeekkeefaranoo. Misa miqimariasaa Anutuna amaaku kafaa aunnirira saqarisaa quqasee pirimma aridaqa miqidaqa aiqamausa nifusaa asaurirana amidaqa miqi mariafanoo.

<sup>7</sup> Anutufa maqa dadaaqidanoo aaku quqasaifanoo ridanoo maqasaa ainaini mariasa dadaaqidanoo narana minakiqari kambiqaifaqa neemariafanoo. Miqi kai masee faiqi anaasee Anutuna ufamau fimariasaa misa Anutufa misa amiqi amiqiannoo.

<sup>8</sup> Nimmuru faqa mandainaina amuka faqa mi maqanasaa kambiqafinanoo Anutufa qafamaseenoo fifau maqa maridanoo, qusasaa qinee mi maqana aquraraseeqa idakikai aqunauree qinau. Anutuna ufa minnisee mariasa miqi kai masee ida kai qamataikkeefaranoo.

<sup>9</sup> Maasa qiqaondi maasa inniara iridaqa, innee sia mina ufa minnisee mariasa mariafanoo. Innee Anutuna saqarikidaqa innaarunai asumu maree mariasa mariafanoo minakinaa amiqi amiqirana uriqararana innindi miqoo nifeedamma nimaqaqaifanoo maridanoo.

<sup>10</sup> Anutufa sia qaaraiki marifa maridanoo, andeeqasee amana amana kai nimirifa maridanoo. Mifa sia innee kadaapirinnana akiaqara aunuannoo, iridanoo. Innee Anutunara nidinara quandaki inneeqa niqoonausa Yisuna ufa irimariasara amiqimaseenoo nimuqusinaqa kaqi dadaaqifanoo Anutufa minara faqa sia aunidanoo, iridanoo mina akiaqara inni nimiannoo.

<sup>11</sup> Maasa inniara maaqiageera inniara ridaqa. Inni Anutunara nidirafa اساسirafa kasirafa miqiga fifi inaqa taikainna aukuanaka kai mafi taikaqa. Innee miqifanoo inni naundurakinaa nidirafa kuqaa anoonaikiannoo.

<sup>12</sup> Maasa innee kudoosaapee foora qikooqaidanoo. Akaqausa nari irirana Yisunasaa rusiranannai faqa ubiqasee reendeenamasee marirana niranannai faqa oqai Anutufa qima afeekaikammasee nimira naundura qumiasana doo maree mariafanoo. Maasa inniara misa naanna ramasee maridaqa naundura qumiasana maraageera qidaqa.

*Anutufa qima afeekaikamaqoo ufafa afeeka naaruara marianinnufafa.*

<sup>13</sup> Ooqai Anutufa Abarahaamanasaa qima afeekaikammaqoona asauku uqeeraseenoo kuqaa miqianauree qimaqoona. Sia mina uriqararafa marunara nari asauku uqeeraseenoo yana auqu fee raanauree qusia nari auqu kai ramafeekaikinau.

<sup>14</sup> Mifa maaqi qimasee Abarahaamana qimaminoo qinau.

Qinee qima afeekaikammasee kuqaa amiqi amiqianara.

Ani aiku asauku akeeku akaaku faiqi maqannimaqaifaqa moomoo kambiqafi maa maqanasaa amanaiqiqa marifaranoo.

<sup>15</sup> Anutufa miqi qimasoo fanoo Abarahaamafa mi ufana anoonara kisaqasaa reendeenamasee afeesida marufanoo kasooqagee uqanna Anutufa qimamu ainainafa koorooinau.

<sup>16</sup> Faiqi moo fannoo qima afeekaikianee qimaseenoo asauku innaarunai uqeeraseenoo nariara urinaaqarara auqu ramaseenoo qima afeekaika maseenoo doo ufa qimaqoofa taikaidanoo.

<sup>17</sup> Inaaqianna kambiqee mariasaki Anutuna qima afeekaikira marirana anoona mareefandinausa sia qini Anutusara qeeqa qima afeekaikiranara minnisee maqi qiaqera misa qiniara kuqaa uqannee qimasee qiaqera kooroomasee sia kai fifau qimafeekaikinau, nari auqu faqa ramaseenoo qimafeekaikinau.

<sup>18</sup> Doo minara iriseeqa qaara ainaina, afeeka ainaina innikina kaqi mariannoo sia taikaannoo. Mi ainaina qanda moo ainaina Anutuna qima afeekaikirafa maridanoo. Moo ainaina Anutuna asauku uqeerarafa maridanoo. Mi ainaina qandara Anutufa sia amana unna qirafa mariannoo. Maasa Anutuna saqarikidaqa mina asumu mariranaki mariasa Anutufa maasa aranaiqi fuki faaki qidanoo maasa daikisaa marianinna innaarunai mariranara اساسidaqa afeesidaqa mariaqera qidanoo.

<sup>19</sup> Maasa Yisunara اساسira afeesirafa maasa qimuqusa sandara foora rakisiquumarainaqa mapukufi marifara. Yisunara اساسira afeesirafa afeeka sandara foora sia rakeeirafa amiqirafa maridanoo. Maasa maa maqanasaa maaqoo marunnaqooqari mi sandafa firafa Anutuna naaquqara amaana maqaki firaa ititara qammunna tapooqaidanoo Anutufa innaarunai mariqoo kukeeqara maqaki miqoo dinni ati rumbanoo maridanoo dinni ati maasa maqasaa rumbanoo maridanoo maasa atukaramma qimaqaidanoo.

<sup>20</sup> Yisufa miqoo maasasaa roo qimasee maasa doorinni indaaru ooru fufa maridanoo. Mifa miqoo aanaaiqikirafa fira uriqararafa naaru naaru marifa Meerakiseedeekana aanna rarafa maridanoo maasa kaqi dadaaqidanoo.

## 7

*Ooqai aanaaiqiki maru fasiqa Meerakiseedeekanara qira ufa.*

<sup>1</sup> Meerakiseedeekafa Sareema maqanna karaambaiga marinau. Innaarunai uriqarara Anutuna karaambaiga aanaaiqikirafa faqa marinau.

(Indaaru namuqaa karaambaiga moomoo qumuree Soodooma maqannaasa faqa Koomoora maqannaasa faqa misaqa marusa naruseeqa misa ainaina sipsipa burimakau faiqi anaasee aiqama rumbaidaqa Rootana faqa rumbamaree nifiqee fiqau. Abara-haamafa minara iriseenoo nari ainaini marusa nifiqeenoo nifaqeeufanoo aanai ooru-mara naru nifaqaaqammamareenoo oonu paqurimaseenoo naru taikkeenoo maindaraasa rumbee ooru fusa faqa misa ainaina burimakau sipsipaina Rootana faqa mareenoo oorurandee quminau.)

Qumimarufanoo aanai Meerakiseedeekafa Abaraamana paqurimandeenoo afaaqooqa qinai.

<sup>2</sup> Qimasoo fanoo Abaraamafa rakiranaki maraqoo ainaina raineeqeenoo kaqikaana Anutuna amidee qimaseenoo mina aanaaiqikirana Meerakiseedeekafa marufanoo aminau, Anutunara dufi dufi qida fee qimasee Meerakiseedeekana kaqikaana aminau. Meerakiseedeekana auqu oosana andeeqara karaambaigee qiqau. Mina maqusa auqu Sareema maqusa mi auquna oosana asoora maqusafee qiqau. Minara mi fasiqafa andeeqarana faqa asoarana faqa karaambaiga marinau.

<sup>3</sup> Meerakiseedeekana aanaakuna akoona anoona misa oosana sia maasa minara iridaqa, sia akara rumaqoo maridanoo. Mina maqoo aukuaana faqa sia iridaqa mina kuqira aukuanara faqa sia iridaqa. Miqinoo marifaqa maasa Yuda maqannaasa oosana marasee minara Anutuna amaakummi maqi qidaqa naaru naaru marufa maridanoo fee maasa qidaqa. Mifa naaru naaru Anutuna aanaaiqikirafa marufa maridanoo fee qidaqa.

<sup>4</sup> Doo Meerakiseedeekana qafaqa, faiqi uriqararafa faiqi firaafa marufanoo Abara-haamafa maasa qikeeku qikaaku fannoo rakiranaki maroo ainainna mina aminau. Abaraamana uriqararafa marunara miqinoo rainaminau.

<sup>5</sup> Anutufa minara iriseenoo Reefina aiku asauku mareeqeenoo Isaraee maqanna faqa Anutunara faqa aanaaiqikiranaki qugaseenoo maaqi qimasee qimanniminai. Innee inneeqa nikaqaafasaa Isaraee maqanna qimannimifaqa aukuaana aukuaana nari narana ainaina kaqikaana raina nimiaqee qinai. Reefina aiku asauku Isaraee maqannaasa aanaaiqikimarusa Abaraamana aiku asauku maridaqa. Nari niqoonausa Isaraee maqannaasa misa faqa Abaraamana aiku asauku kai maridaqa nari narana ainaina rainasee kaqikaana Reefina aiku asauku nimiqau.

<sup>6</sup> Abaraamafa Anutufa qima afeekaikamaqoo ufana irimarufa marufanoo uriqararafa marufanoo. Meerakiseedeekafa Anutuna aanaaiqikirafa sia Reefina ati marufa maridanoo Abaraamana uriqararafa maridanoo mina afaaqooqa qinai. Miqi qufanoo rakiranaki maraqoo ainaina kaqikaana raineeqee mina faqa aminau.

<sup>7</sup> Nifaqooqa qimaria fasiqausa sia manda fasiqa fannoo nifaqooqa qidanoo. Faiqi uriqararafa auqu faqaafa akooqoo marifa mifa kai nifaqooqa qidanoo, ureeqarusa nifaqooqa qimannimaqaidaga. Minara Meerakiseedeekafa Abaraamana uriqararafa marinai.

<sup>8</sup> Abaraamana amaaku moo mina auqu Reefifa marinai. Reefina aiku asauku aanaaiqikirausa faiqi faiqi misa faqa kuqimariasa maridaqa niqoonausa narana ainaina nimufafa maraqau. Meerakiseedeekafa sia kuqirafa akarakinaa ufa marinara minara naaru naaru maru fee qimarufa maridanoo Abaraamana narana ainaina amufanoo maranau.

<sup>9</sup> Indaaru Abaraamafa nari narana ainaina kaqikaana rainasee Meerakiseedeekana aminai.

<sup>10</sup> Reefifa mi kamuqoo sia kambiqaanau nari akoona aranandaki maridanoo nari akoona faqa qumee Meerakiseedeekana aminai. Doo maqee aukuaana Meerakiseedeekana amu fasiqana Reefina aiku asauku quandaki nari niqoonausunnai narana ainaina maraiddaga.

<sup>11</sup> Mooseena sandufa faqa Anutuna sandufa faqa miqandufa moodaa ufa marinai. Mi ufafa Reefina aiku asaukusaa aanaaiqiki marusakina moodaanaki kusinoo maridanoo aiqama sandufa fannoo misasaqari Isaraee maqannaasaki amanainai. Reefina aiku asauku aanaaiqikira oosana fannoo faiqi anaasee Anutuna afusaa kaaqa andeeqara anukarana niminoofau sia moo aanaaiqikirafa inaaqianna Meerakiseedeekana fooqaafa

kambiqaiqini. Sia Aaroonu aiku asauku Reefina aiku asaukukiqari fuka moo quqeenoo Meerakiseedeekana mina aannaree marina naaru naaru marirana Yisuna kai quqanau.

<sup>12</sup> Anutufa ooqeenaa aanaiqikirausa Reefina aiku asauku minniseenoo fuka aanaiqikirana quqararee qidanoo ooqeenaa sandufara Mooseena sandufara faqa sia amanaikianoo, fuka sandufa mina amaaqaki quqasee miqoo kai fuka aanaiqikirana quqaannoo.

<sup>13-14</sup> Maasa karaambaiqa Yisunara fuka aanaiqikiranara qidanoo fuka karaambaiqee qidanoo. Mooseefa Reefina aiku asaukuara qufaqa aanaiqikiqau. Yisufa sia Reefina ati marinau. Yudana ati marinau. Yudana aiku asauku moo fannoo sia aanaiqikira ainainiranaki mariqau, sia uqanna mariqau. Mooseefa faqa sia Yudana aiku asaukuara moora qufanoo misaikana maraqau sia uqanna qinau.

*Fuka aanaiqikirafa Meerakiseedeekana fooqaafa doo ani maridanoo.*

<sup>15</sup> Doo fuka aanaiqikirafa kooroo irana namufaqa fuka sandufa faqa aanaiqikirausa oosana faqa mariannoo. Mifa akooqoo kooroo inoo maridanoo. Mi fuka aanaiqikirafa Meerakiseedeekana fooqaafa animaridanoo.

<sup>16</sup> Isaraee maqannaa sandufa fannoo Reefina aiku asaukuara qufaqa aanaiqikiqau. Yisufa sia faiqi faiqi sandufa ameemaanaifau maridanoofau aanaiqikinai. Mifa naaru marifa sia taikarafa, mi afeekafa kai mina afeeqasoofanoo fuka aanaiqikinai.

<sup>17</sup> Tamummaqara akara fannoo minara maaqi qidanoo. Anee aanaiqikirafa naaru naaru marinafa marinnaranoo, Meerakiseedeekana fooqaafa marinnaranoo.

Mi tamummaqara ufafa miqiminoo maridanoo.

<sup>18</sup> Indaaruaqa sandufa oosana doo mafi Anutufa quqeenoo mina afeeka fannoo sia amanaikifanoo kai fifau marunara mafi quqanau.

<sup>19</sup> Mooseena sandufa fannoo moona kaaqa amiqira andeqarana Anutuna afusaa sia amiaqaaufanoo mi sandufana mafi quqanau. Quqaseenoo doo maqee fuka ainaina firaaqoo uriqarara ainaina Yisunara asasira afeesirana maree mini quqasoofaqa minannai kai Anutuna aqa uqanna fuanaura.

<sup>20</sup> Doo kafa Anutufa fuka aanaiqikiranara qimafeekaikinai. Ooqeenaa aanaiqikirausara sia miqinoo qimafeekaikinai.

<sup>21</sup> Qimafeekaikira ufasaa Yisufa aanaiqikirafa kambiqanau. Miqimma afeekaikiranara Anutufa maaqi qimasee qinau.

Qinee karaambaiqa Anutusa qima afeekaikira ufa doo quqeeqa.

Sia qinee qeeqa iriranannai moosaa fuanaura.

Anee naaru naaru aanaiqikirafa marinnaranoo.

<sup>22</sup> Mi qima afeekaikira ufafa Yisuna mareeqeenoo sia ooqeenaa Anutuna faqa faiqi faqa moodaanaki qima afeekaikiranaki quqanau, aaduma uriqarara moodaanakikira ufa rakisirafaikamambi marinai.

<sup>23</sup> Yisunara moo irirafa kaqi maridanoo. Indaaruaqa aanaiqikira fasiqauqa moomoo mariqau. Misakina kuqufimarufanoo moo fannoo kai aanaiqiki mariqau.

<sup>24</sup> Yisufa sia misa naanna ree kuquannoo sia mina aanaiqikirafa moonasaa mariannoo, nari naaru naaru marinara nariki kai naaru naaru mariannoo.

<sup>25</sup> Doo minara maqee faqa naaru faqa minannai Anutufa mariqoo fimarinausa Yisufa amana mareeqee nari akoona aqa quqaannoo. Mifa naaru naaru marinara mifa nari akoona aqa quqaseenoo naaru naaru misara nari akoona faqa ufa qinoo dadaaquiannoo.

<sup>26</sup> Yisufa mifa maasa aanaiqikira uriqarafa maridanoo. Maasa mandainaina oosana oosana manda ainaina akiaqara amana kai Yisufa maridanoo. Mifa andeqarana naaquqarafa maridanoo. Minaki sia moo aaqarafa mandaikirafa maridanoo. Mina manda maqasaa mariasakinaana aadumasaa Anutufa quqararee qimasee mareeqeenoo innaarunai uqeeera uriqararanaki quqaqafanoo maridanoo.

<sup>27</sup> Yisufa maqasaa fasiqa aanaiqikirausa uriqararaisa naanna sia raidanoo. Misa maqee maqee faasaambaasaana aandau tatufirana nari mandainaina taikaanifeera tatufirana suqee mariqau. Nari ndi naaree tatufusaida quandaifi faiqi anaasee mandainaina numoo taikaanifeera aukwana aukwana tatufusee Anutuna ami mariqau. Yisufa sia misa naanna raidanoo, Mifa moodaa kari uqanna nari afaqa Anutuna aru aminau. Doo sia kafa kafa Anutuna aru amiannoo, doo moodaa kari aru aminoo aiqamausa numoo taikanau.

<sup>28</sup> Mooseena sandufa fannoo fifau faiqi faiqi mareeqeenoo aanaiqikirausa uriqararaisaki quqanau. Anutuna qima afeekaikirafa nari auqu ramasee qima afeekaikirafa Mooseena sandufa naaree ani marifanoo Anutuna mi qimafeekaikirufafa Mooseena sandufa rafaqafuamaqeenoo Anutuna amaaku uqanna mareeqeenoo aanaiqikira uriqararanaki quqanau, naaru naaru andeqarafa marianinnana quqanau.

## 8

*Yisufa maasa aanaiqikirausaki uriqararafa maridanoo.*

<sup>1</sup> Maasa maa ufana akiaga maaqimminoo maridanoo. Maasa aanaiqikira uriqararafa innaaruna uriqararana Anutufa mariqoo mina aaq mina asauku uqannai maridanoo.

<sup>2</sup> Mifa sia Mooseena aanna raidanoo sia faiqi usakaqaa uqiqaana maaqakifau ainainidanooofau. Anutufa usakaqoo maqana uqannakina ainainidanoo. Mi maqanaki innaarunai Anutufa mari oosiranaki aanaiqikirausa uriqararana ainainirana maraidanoo.

<sup>3</sup> Aiqama aanaiqikira uriqararasa maqee maqee narana aanda uqasida Anutuna tatufu amidaqa. Mooseefa mi ainainiranaki misa quqanau. Doo maasa aanaiqikira uriqararafa Yisufa mifa faqa Anutuna tatufirana amirafa mariannoo.

<sup>4</sup> Yisufa maa maqanasaa marinanooofau sia aanaiqikirafa mariqini. Maaqoo moomoo aanaiqikirausa aanda Anutuna aanda tatufida suqa amidaqa. Mooseena sandufamau fidaqa miqidaqa.

<sup>5</sup> Mi aanaiqisa ainainirafa sia anoona maridaqa fifau amananda kai maridanoo. Innaarunai mari ainaina fifau amananda kai maridanoo. Mooseefa Sinai maqa maaqaki uqiqaana maqa usakaranea qufanoo Anutufa maaqi qimasee qimaminoo qinau. Qinee aaqanasaa uqafiqanoo maqana amana kai andeeqasee usakaa.

<sup>6</sup> Indaaru maru aanaiqikirausa miqiga marufanoo Anutufa maqee Yisuna firaqoo uriqarara aanaiqikira ainainiranaki quqanau. Anutufa faqa faiqi faqa moodaanakikirafa Yisunaindi uriqararafa maridanoo, Mooseena moodaanakikira ufa sandufamau firanasaa mundinoo marunara ureeqararafa maridanoo. Yisunaindi uriqarara qima afeekaikiranasa mundinoo marunara uriqararafa maridanoo.

<sup>7</sup> Indaaru moodaanakikirafa anoonaikinanoofau Anutufa sia moo mara quqaiqini.

<sup>8</sup> Anutufa Isaraee maqannaara maaqi qimasee akaraki niqira ufa qinau.

Qinee karaambaiga maaqi qidaqa, Doo qusasaa qinee fuka moodaanakikira ufa Isaraee maqanna faqa Yudana aiku asauku faqa qianauro.

<sup>9</sup> Ooqai misa nikeeku nikaaku faqa moodaanaki kira ufa quqaafannana. Sia miqifau ianaurau, moo kammianauro.

Mi aukunnai misa Isaraee maqanna nisauku qumaree Isipa maqasaqari nifiqee fimariafanaqa misa qini moodaanaki kira ufara nikooqoofaqa qini minni qisaqau. Minara misa qini qimaqimufaqa qinee minniseeqa sia iriqifana.

<sup>10</sup> Doo maqee ooqeenaa moodaanaki kira ufa minnisee Isaraee maqanna faqa fuka moodaanaki kira ufa maaqi qimasee quqaidaqa. Qini fuka moodaanaki kira ufa maaqimminoo maridanoo.

Qinee karaambaiga qidaqa. Qinee qusasaa qeeqa sandufa misa nitukuraki quqaanaura, quqaseeqa misa nimuqusasaa akara rumaqaanaqa sia aunuaqeeera. Qinee misa Anutusa marianauro misa qini faiqi namu marifaranoo.

<sup>11</sup> Sia moo fannoo nari aqoonnana fuki faaki qiannoo. Sia moo fannoo nari aqoonnana Anutunara iriannee qiannoo. Misa aiqamausa uriqararasa faqa ureeqarasa faqa qiniara irifaranoo.

<sup>12</sup> Qinee misa aaqinnanara nifuaanauro. Qinee misa numoora siammirianauro aunuauro.

<sup>13</sup> Anutufa mi fuka moodaanaki kiranara qidanoo indaaruaanara ooqeenaa fee qidanoo. Ooqeenaa ainaina minnisaifa doo afauqaqeenoo qusasaa taikafuannoo.

## 9

*Ooqeenaa amaana maqara faqa fuka amaana maqa Yisunara qinoo maridanoo.*

(Ooqai indaaru Anutufa nari faqa maqasaqarasa faqa moodaanaki kira ufa Mooseena sandufaki quqaqoofanoo marinoo maqee Yisunasaa fuka moodaanaki kira ufa quqaqafanoo maridanoo.)

<sup>1</sup> Indaaruaa moodaanaki kira ufa maru kamuqoo Anutunara innaaruqira sandufa oosana oosana marinau. Faiqi nisaukunnai auqara uqiqaana maqa Anutunara amooqimaria maaqafa faqa marinau.

<sup>2</sup> Mikamuqoo misa uqiqaana maqa usakaseeqa mina aundurai oosuseeqa, dinni oosirafa faiqi aanaiqikirausa keeqeemaru maqafa kooqi maqa naaquqara fee qiqau. Qoomauqa faqa Anutuna uqafiqee maru feemu faqa minasaa quqeemaru qainda faqa minaki marinau. Dinni oosirafa fiqaramasee naaquqara maqa faiqi minaki sia keeqe mariqau.

<sup>3</sup> Fira qamunna mi oosiranasaa ititanoo marinau. Mina dinni kooqi maqa marinau. Mina dinnatinai kukeeqaranaki firaqoo naaquqara oosirafa mi atinai marinau.

<sup>4</sup> Koora auqimaru qaindafa minaki marinau. Minasaa amiqundimaru ainainna suqee marufa marinau. Moodaanaki kira bookisa minaki faqa marinau. Mifa koora qannunnai rafaqaqafirafa marinau. Mi bookisanaki koora auqimaru qafeefa marinau. Mi qafee auduranaki manna fee qimaru ainainafa innaarunaindaraa feemu quqasoofanoo Isaraee maqannaasa aadana maqa maqaki maridaqa naararoofaqa randasee neemaru feemufa marinau. Ooqai Aaroonafa faqa Isaraee maqannaasa faiqi firaasa faqa nari saunu uqiqaana maqaki quqasoofanoo Aaroonaa saunusaa kai auqmara ururamafinoo misaindisaa sia ururanau. Mi saunufa faqa moodaanaki kira bookisaki quqasoofanoo marinau. Mooseefa Sinai aaganasaa Anutuna moodaanaki kira ufa qaara oonisaa akara rinau. Mi akara rira ooniqanda faqa mi bookisanaki faqa quqasoofanoo marinau. Mi aiqama ainainausa moodaanaki kira bookisa moo auqu Anutufa nifauara bookisaki mariqau.

<sup>5</sup> Mi bookisana afusaa dinni dinni Anutuna qangiroo nimanaqara maridanoo Anutuna areenarana kooroimaru qangirooqanda mariqau. Miqanda niqoosaqara dinni dinni mi qaindana dinni dinni rafaqaqafinoo marinau. Mi qambaannasaa Anutufa faiqi anaasee mandainainara nifauenenoo minniseenoo imariqoo ititaidafa. Doo maqee sia mi ainainausara qianaura.

<sup>6</sup> Aanaiqikirausa maaqimasee ooqeenaa uqiqaana maqaki ainaini mariqau. Aanaiqiki marusa kooqi maqaki faasaambaasaana keeqafi nari ainainimariqau.

<sup>7</sup> Aanaiqikirausa uriqararafa firaqoo naaquqara maqa aunduraki aukuaana aukuaana moodaa kari kai mi naaquqara maqanaki keeqee marinau. Aiqama aukuaana aukuaana miqikaimma moodaa faasaana kai keeqee marinau. Mifa aandau fidika mara maree minaki Anutuna ami marinau. Nari numoora faqa faiqi anaasee numoora faqa mina akiqara mi fidikana ami marinau. Mandainaina sia irirai marainnana akiqara naruando qimasee miqi marinau.

<sup>8</sup> Maaqira ainainana kai Anutuna naaquqara maraquna fannoo maasa moo ufa qimaqimidanoo. Minara maaqi qidanoo, kooqi maqa mifa mariannoo. Mee firaqoo naaquqara oosirannai sia miqoo faiqi fimariaqoo sia miqoo aana maridanoo fee qidanoo.

<sup>9</sup> Mi kooqi maqafa maa maqee maria kamuqoora kikiqa usidanoo, mina amananda maridanoo, maaqimminoo maridanoo. Anutuna ami maria ainainafa faqa aandau tatufusee ami mariafa faqa sia amana ami mari fasiqana amuqusa findaukamasainanoo anoonaikiannoo.

<sup>10</sup> Anutuna ami maria ainainna faqa aandau tatufusee ami mariafa faqa mi namusa naranara faqa nammariara faqa nammairinnai findaukarana oosana oosana faqa qidaqa. Nipatasaaqaraa ainaina mi ainainafa ufaasu maridanoo. Anutufa fuka ainaina quqararara minara afeesidanoo ufaasu maridanoo.

<sup>11</sup> Asauku mundirafa doo ani maridanoo. Innarunai marira ainaina asumu faqa doo ani maridanoo. Mi amiqira ainainausa aanaiqikirafa uriqararafa asauku mundirafa doo ani maridanoo. Mooseena ainainimaru uqiqaana maaqafa ureeqaradfa marinau, maqee asauku mundirafa fuka fira anoona uqiqaana maqaki innarunai ainaini marifa uriqararafa anoona uqanna ani maridanoo. Sia faiqi nisaukunnai auqi maria amaana maqafa maridanoo sia maa maqa maaqanasaaqaraa ainainau maridanoofau.

<sup>12</sup> Asauku mundirafa innaruna kooqi maqaki ooru keeqakufanoo firaqoo naaquqaranaki ooru keeqafinoo sia mimmi fidikafau burimakau aanaaqi fidikafau mandainaina akiqara Anutuna amisee keeqanau. Nari kai nari fidika qumareenoo niqoo Anutufa maruqoo maasara aranaqarafa taikaanifeera amiseenoo minannai kai naaru asumu marirana maasa qimiannee qimasee maranau.

<sup>13</sup> Mooseena uqiqaana maqakinaa sandufara aandau fidikara maaqi qidanoo. Faiqi anaasee mandainaina maraasara ikairifaqaasee qimasee mimmi fidika faqa burimakau akoona fidika faqa ikairi faqaasa akunnimaqaidaqa mi idanasaa danda faqa misa nifaaqasasa akusoofanoo Anutufa misara anukarausara maqi qirausa maridammiafoo qidanoo.

<sup>14</sup> Fifau aandau fidika fannoo ririmma faiqi ikairi findaukaidanoo Anutuna asauku mundirana fidikara naqi fee qianauree. Mifa naaru naaru marira maraquna fannoo dadaaqifanoo nari uqanna anoona tatufirana amiranara foora Anutuna aminau. Mina fidika fannoo sia maasa ikairi kai findaukaannoo. Maasa qimana maraquna faqa mina faqa findaukaidanoo maasa mandoosana maree mariana faqa maasa kuqiranaki rarisama quqee mariana faqa Yisuna fidika fannoo mina faqa findaukaidanoo. Miqi mandainafa maasa amana kaqi marira Anutuna ainainamminaura.

<sup>15</sup> Miqimandaifanoo asauku mundirafa Anutufa faqa faiqi faqa moodaanaki kira ufa fuka ufa qima andeeqeeqeenoo quqaidanoo. Anutufa nuqu rainausa misa aniree maraaqeeera. Naaru naaru afeedimari amiqira qumiasana saqama ainainara kasooqaqee

innaarunai maraageera qidanoo. Indaarugaa moodaanaki kira aukuaana sia amana mi amiqira afeedira gumiasana saqamana maree mariqau. Misa mi aukuaana kaqi nári mandainaina fannoo faiqí nifaaqa rumbanoo marinau. Maqee asaku mundirana kuqirafa doo mi rumberana nimirara idukinau.

<sup>16</sup> Faiqí moo fannoo afaaqooqa qinafa faiqí mifa kuqinanoo mina afaaqooqa qirafa anoona kooroo iannoo.

<sup>17</sup> Mi fasiqafa kaqi marinanoo mi ufafa kaqi miqinoo mariannoo kuqinanoo kai koorooiannoo.

<sup>18</sup> Minara Mooseena moodaanaki kira ufa fannoo aandaau kuqufanoo miqiman-doo fanoo doo mi ufana anoona koorooiannoo.

<sup>19</sup> Mooseefa indaarugaa moodaanaki kira ufa mina sandufa oosana oosana faiqí anaasee qimannimiseenoo burimakau mimmi fidika nammari namufaqa mareenoo naneeka amanee faqa taatuqee arira sipsip asaasi faqa qumareenoo fidikaki raaramma qumareenoo sandufa bukamau faqa faiqí anaasee nifaaqasasa faqa akuseenoo maaqi qimasee qimanniminau.

<sup>20</sup> Maa aandauna kuqina fidika fannoo inni faqa Anutuna faqa moodaanaki kirana mapuku nimaqaidanoo, Anutufa inniara maa moodaanaki kira ufamau fuaqee qidanoo.

<sup>21</sup> Miqikai inoo Mooseefa uqiqaana maqa afaaqasasa fidika mi aandaau fidikana akinau. Akuseenoo maaqakina Anutufinnai innaaru qimaria ainainnasaa faqa aiqama akinau.

<sup>22</sup> Miqidanoo Mooseena sandufamau aandaau fidikannai kai aiqama ainaina anukee marinau. Faiqí mandainaina faqa fidika teeqiranannai mi manda ainainna anukee marinau.

*Asaku mundirafa kuqina maasa mandainaina maraqunnisanau.*

<sup>23</sup> Uqiqaana maaqaki auqeemaru ainainafa innaarunai maru ainainna fooqaafa mina amananda maqasaa marinau. Anutufa minara kai iriseenoo qufaqa misa aandaau fidikannai aiqama ainaina anukee mariqau. Anoona ainaina innarunai maru anoona ainaina findaukarana sia aandaau fidika amana maridanoo, moo uriqarara ainaina marasee arirafa kai amana maridanoo. Asaku mundirana arirafa mifa kai amana mariannoo.

<sup>24</sup> Asaku mundirafa uqiqaana maqa faiqí nisaukunnai auqamaqoonaki innaarunai marina fooqaanaki miqiranaki sia keeqanau, mi maqanaki naaqqara oosiranaki sia keeqanau. Mifa andeeqasee innaaruna maqa maaqaki Anutufa maruqoo uqanna keeqafinoo kooroomafinoo maridanoo maasa dadaaqidanoo.

<sup>25</sup> Yuda maqanna aanaiqikirausa misa uriqararafa aandaau fidika mara mareenoo naaqqara oosiranaki keeqee marinau, aukuaana aukuaana keeqee marinau. Asaku mundirafa sia moomoo kari nari afaqa Anutuna aru aminau.

<sup>26</sup> Miqiga moomoo kari arifanoofau maqa maaqa oosana aroonaiqari aupuraida marini. Ooqeenaa aukuaana taikarara adeedirama fufanoo maqee aukuaana kai asaku mundirafa moodaa kari kai kooroo mafinoo nari afaqa Anutuna aru amiseenoo minannai maasa mandainaina rukannisanau.

<sup>27</sup> Aiqamausa moodaa kari kuquannana amana kai Yisufa moodaa kari kuqinau, aiqamausa moodaa kari kai kuqufiqa miqooqari Anutuna faqa ufa qiranaki fifaranoo.

<sup>28</sup> Yisufa mi mau kai finoo moomoosa numoo maraqunnisaanifeera nari afaqa tatufirafara foora moodaannai Anutuna aru aminau. Mifa kafaa koorooiannoo. Sia kafaa numoo undarau qumannoofau. Nari afeesara mariasara qumree asumu mariranaki quqannisarara qumuannoo.

## 10

<sup>1</sup> Yuda maqanna Mooseena sandufa faqa uqiqaana maqa ainaina faqa innaarunai mari ainainna mina amananda kai maridanoo siara foora inoo maridanoo. Naaru kambiqaaninna ainaina amananda oorudupirana amananda kai maridanoo. Mooseena uqiqaana maqaki Mooseena sandufamau fidaqa moodaa tatufira oosana kai aukuaana aukuaana aandaau kai suqa amu mariqau. Doo miqidaqa naqimasee mi sandufana Anutufinnai ani mariasa anoonaikamma nimaqaannoo fee, sia amana.

<sup>2</sup> Mooseena sandufasaa Anutunara amooqiqa innaaru qimariasaa kuqaa anukamma nimaqasainaaqau misa nári numoora nisaurirana taikaseefau marini, aandaau maqee maqee qaindasaa tatufi mariafa faqa sia marini.

<sup>3</sup> Aukuana aukuaana aandaau tatufirafa mifa faiqí anaasee nári numoora naaqqoo auqaifaqa maqee maqee aandaau tatufidaqa.

<sup>4</sup> Burimakau fidika faqa mimmi fidika faqa mifa sia amana uqanna faiqí anaasee mandainaina numoo maraqunnisaannoo.

<sup>5</sup> Miqi marunara asauku mundirafa maa maqanasaa qumiraree qimasee maaqi qimasee Anutuna qimaminau.

Anee aandau arusee qaindasaa tatufiranara, akooqaidanoo,

Anee faiqi qifaaqa deedaqamma qimaqainanoo.

<sup>6</sup> Anee aandau arusee qaindasaa muduka tatufiranara akooqaidanoo, numoo maraquaninna aandau suqaranara akooqaidanoo Yisufa miqi qimasee Anutuna qimaminau.

<sup>7</sup> Minara Yisufa maaqi qimasee kaifaa Anutuna qimaminau.

Oo Anutu doo qinee maaqoo maridaqa.

Aneenna iriranannai kai qiniara ia.

Mooseena sandufaki qiniara akara rinau. Doo mi mau kai qiniara ia. Yisufa miqi qinoo.

<sup>8</sup> Yisufa miqi qimaqoonara qinee inni maaqi qimasee qimannimianaura. Yisuna indaaruga ufa maaqimminoo maridanoo.

Oo Anutu anee aandau arusee suqa amiranara akooqaidanoo sia maraaqaaidana, faiqi numoo rukaranara aandau qaindasaa tatufiranara akooqaidanoo.

Yisufa mi aandausa tatufimarunara irinoo sandufamau fidaqa miqimariaafoo qimaseenoo kaqi Anutufa minara akoo akaa imarunara qinuu.

<sup>9</sup> Yisuna inaaqianna ufa maaqi qidanoo,

Oo, Anutu, doo qinee maaqoo maridaqa.

Aneenna iriranannai kai qiniara ia.

Asauku mundirafa mi ufamau fidanoo. Ooqai aandau tatufimaruna mara aqum taikaseenoo fuka narí amaqi fidika mina amaaqaki quqaseenoo maasara kuqu qimaqanau.

<sup>10</sup> Yisufa asauku mundirafa Anutuna aidiramau kai fidanoo narí afaaqa aandauro foora Anutuna moodaa kari kai aru aminau. Miqunara kai maasa numoo ikairi findaukama qumaqanau.

<sup>11</sup> Yuda maqannaa aanaiqikirausa faasaambaasaana aiqama faasaana moomoo aandau tatufimariqau. Moo faasaana tatufuna miqikai imariqau, moomoo aandau tatufimaruna faiqi numoo rukarana amana sia maruna fifau kadaapirida tatufimariqau.

<sup>12</sup> Asauku mundirafa sia miqinuu. Mifa moodaa kari kai moodaa amira aminau. Naaru naaru faiqi numoo taikaaninnana akiqara aru aminau. Aru amiseenoo innaarunai Anutuna aaqa mina asauku uqannai ooru oqumarinoo maridanoo.

<sup>13</sup> Miqoo maridanoo Yisufa Anutunara narí namuqaa mareeqee aramandunna quqaaninnanara afeesida maridanoo.

<sup>14</sup> Moodaa kari aru amiranannai Yisufa mandainaina ooqai faqa maqee faqa rukanni-maqee mariasa naaru naaru kuqaa andeeqarana niminuu.

<sup>15</sup> Anutuna naaquqara andeeqara maraquna fannoo asauku mundirana dadaaqida maaqi qidanoo.

<sup>16</sup> Qinee misa faqa moodaanaki kira ufa maaqi qidaqa.

Mi faasaannafa qinee qeeqa qifaaqa aru amianna faasaanna aiqarainafa qeeqa sandufa misa nimuqusaki quqasaanaqa misa mi mau kai fida mariaqera. Misa nitikuraki faqa akara rumasaanaqa sia uqanna aunuqeeera.

<sup>17</sup> Miqi qimaseenoo Anutuna maraquna fannoo maaqi qidanoo.

Qinee maaqooqari sia kafa misa aaqarana faqa misa mandainaina ikairi faqa siamma irianaura aunuqannamma nimaqasaanaura.

<sup>18</sup> Maasa mi ufana irisee minara maaqi. Anutufa maasa mandainaina minnisainna kamuqoo fifau aandau arusaida tatufi mariafa doo taikkeenoo.

*Maasa Anutuna aaqa aniaqeeera qidanoo.*

<sup>19</sup> Qini qikaqafasaa Yisufa kuqinoo narí fidika adioonannai maasa sia rufiidaqa kaqi mana mana nifaqa quqasee Anutuna naaquqara oosiranaki keeqaanaura.

<sup>20</sup> Mifa fuka aana maasara afisinoo. Kaqi marira aana Anutunasaa ititara qamunna anaqiseenoo afisinoo, narí afaaqara qamunna kikiqa usidanoo.

<sup>21</sup> Maasa aanaiqikirafa firaafa mifa Anutuna maaqasaa rakisirafa maridanoo.

<sup>22</sup> Doo maasa minara iriseeqa Anutuna aaqa adeedi aniaqa. Kuqaa aneenna amuqusakiqari Anutunara ridana doo Anutuna aaqa adeedi aniaqa. Aneenna irirana

mapukusee minasaa rusirafa doo adeedi ania. Ooqeenaa mandainaina ani aakirana afaimma quqaseenana anukarafa ania. Aneenna afaaqa amiqira nammarrinnaira foora findaukamasee Anutuna aaga adeedi ania.

<sup>23</sup> Maasa innaarunai mariranara asasiidaqa afeesidaqa kooroo idaqa. Maasa mi asasira afeesirana amiqimmandee qumaraaqa. Anutufa narí qima afeekaikira ufa sia minnisaannoo mifa qumaraannoo minara amiqimmandee rakisi qumaraaqa.

<sup>24</sup> Maasa nariara nariara uriqarara ainainee qimasee nimuqusirafa marianinnanara fuki faaki qimasee nisaukukoo dadaaqira dadaaqirafa kambigaaani. Nari amiqi amiqirana faqa fuki faaki qimasee narí dadaaqi narí dadaaqiaqa.

<sup>25</sup> Akaqausa amaana maqaki maqee suqiranara nikooqaidanoo. Innee sia miqiaqa maqee maqee suqaqa. Karaambaifa qumira faasaanara qusararanara irisee narí fuki faaki narí fuki faaki qimasee Anutuna ufara suqaqa.

<sup>26</sup> Maasa Anutuna anoona ufa iridaqa kaqi iridaqa mandainaina maraqa fifi inaqa moo amiqira ainaina Anutuna amimarinafa sia mi numoona rukaannoo naaru naaru mariannoo.

<sup>27</sup> Miqinna fasiqafa naaru kambigaaaninna ufa iriranara rufiasee afeesianno. Mikari mi fasiqafa ufa qirana iriseenoo firaa idaqeemari idanaki qamataikaannoo. Miqimasee Anutuna ufara sia fee qimariasa aiqamausa minaki aupureefaranoo.

<sup>28</sup> Mooseena sandufa maru kamuqoo faiqi moo fannoo mi sandufana ameesuqirafa qaara fasiqee qaaramoo fasiqee qafamasee ufa qufanoo sia mina afauee mariqau. Doo mifa kuqimiranau.

<sup>29</sup> Faiqi moo fannoo Anutuna amaakuara akooqainafa mina arirafa firaqoo fiqaranoo mariannoo. Mi fasiqafa Anutuna moodaanaki kira ufa fidikara narí mi fasiqana numoo rukasainnanara qikoo fee qinafa faqa Anutuna afaari mari maraqunara faqa mandufa qinafa, mi fasiqana arirafa sia Mooseena aanna raannoo, fiqaranoo mariannoo.

<sup>30</sup> Maasa Anutunara faqa mina ufa iridaqa mifa maaqi qinau. Faiqi mandainaina akiqara narirafa qinindi maridanoo fee qinau. Mifa kaifaa maaqi qinau. Karaambaifa narí aiku asauku ufa irisee mandoosana marinanoo naruanoo sia marina sia naruannoo.

<sup>31</sup> Mifa miqi qidanoo qinee minara maaqi qidaqa, kaqi marira Anutuna asaukuki aqufinafa firaa narirafa kaaqa naaqqe marifa maridanoo.

<sup>32</sup> Indaaruu innee Anutuna ufa iru aukuanna mi aukuannara maqee inni naqoo auqaidafa. Mi fasannai Anutunara asasirafa qoomara foora kaaqa qamannimaqoofafa qafamasee kadaapi rumasee nidafimarufafa Anutuna ufamau fifiufafa sia kudoosaa-paqau.

<sup>33</sup> Akaqa faasaana faiqi anaasee aiqamausa nifusaa ataasa inni qimannimaqee mandaikamma nimaqaqau. Moo kari faiqi anaasee Yisuna ufa irimariasa narí mariafaqa innee faqa misa ummaara dadaaqifa akooqoo oonuree misa nisaukunnai dadaaqifa amiqimma nimaqaqau.

<sup>34</sup> Innee karabusaki mariasa dadaaqidaqa narana munu nimirannai misa aupurarana inne faqa maree mariafanoo. Faiqi anaasee aniree aanoomasee inni maqakinna ainaina aiqama animaree fifuufafa sia innee minara noori runuafanoo, innee asaa kai mandee mariafanoo. Innee inneeqa maa maqanasaqaraa qumiasanara fifau oorudupira ainainee qimasee innaarunai uriqarara naaru marira ainainara maridanoo fee qimasee sia ikiraqaafanoo, innee asasiariafanoo.

<sup>35-36</sup> Doo maqee faqa inneeqa paasoosirana sia quqaqa. Mifa marifanoo mina feefauru naaru marirana nimiannoo ubiqafi marirafa inniki mariani. Innee sia ubiqafinaqa sia amana Anutuna iriranamau fifaranoo, sia mina qima afeekaikira marira innaaruna qumiasana mareefaranoo.

<sup>37</sup> Anutuna akara ubiqafi mariranara maaqi qidanoo.

Kaqlikaaqoo qumirafa qusasaa qumuannoo.

Sia kisaqasaa fifau mariannoo doo qumuannoo.

<sup>38</sup> Qini qiku qisauku andeeqarasa mariasa maqee maqee

qinisaa irirana rusisee mariqa fifi inaqa mi mariranara kai qini didiannoo. Misa minara nikooqee marinausa misara qini faqa qikooqaannoo.

Anutuna akara maasara miqi qinoo maridanoo.

<sup>39</sup> Faiqi akaqausa Anutufinnai fuani qimasee fifi ifafa aanai oonuree maparaamaki oonurandee quandaki ida aqufidaqa. Maasa sia misa naanna ridaqa. Maasa amiqim-mandeeqa Anutuna mandaqaifanoo doo Anutufa maasa asumu maraannoo.



# 11

*Anutunasaa irirana rusimarunara qimaqoo ufafa.*

<sup>1</sup> Anutunasaa irirana rusimarinausa misa innaarunai kambiqaaninna ainainara asasamandee afeesidaqa. Misa minara kuqaa anoona maridanoo innaarunai maraanauree qida afeesida maridaqa. Misa sia qafeemari ainainnara anoonee qidaqa nifaqaq quqasee afeesidaqa.

<sup>2</sup> Ooqa marusa miqimmi mariqau. Misa Anutunasaa irirana rusiranannai Anutuna eedoo qirafa misaki marinau.

<sup>3</sup> Ooqai Anutufa nari ufannai maqa faqa innaaruna faqa auqusoofanoo maridanoo. Maasa Anutunasaa irirana rusiranannai mi ufanara kuqaa anoonee qidaqa. Mifa sia akoogoo maru ainainna qumareenoo maqee qafee marunna ainaina auqinau.

<sup>4</sup> Kainafa Anutuna tatufirana suqa amiraree qimaseenoo ureeqarana suqa aminau. Abeerafa Anutunasaa irirana rusi marunanoo nari afasaana Kainana tatufirana uraaqaranau. Abeerafa Anutuna saqariki marunara Anutufa Abeeranara andeeqara fasiqafee qimaseenoo mifa amu ainainara asasinau. Abeerafa ooqai kuqinoo maridanoo mina ufa fannoo kaqi maasa qimaqimidanoo. Innee faqa miqikai mandee Anutuna saqarikiqa. Miqi qidanoo Abeerafa naamua qidanoo.

<sup>5</sup> Faiqi moo auqu Eenookafa Anutuna saqarikiranannai kai sia kuqufufanoo kaqi marufanoo Anutufa mara muru nari unnai quqanau. Misa miqooqaraasa Eenookana iriara randoosia minnisagaqau. Anutufa kaqimma afiqa quqanau. Anutuna akarakinaa ufa Eenookanara maaqi qinoo maridanoo. Eenookafa andeeqara fasiqa marunara qini qigaara ree marifaqa asasidaqa.

<sup>6</sup> Sia faiqi moo fannoo dapi marirana niranannai Anutuna asasinana maraannoo, minara nari Anutunasaa irirana rusiranannai kai mina asasinana maraannoo. Faiqi anaasee moo fannoo faasa Anutunara kuqaa maridanoommifoo qimarinafa, Anutufa nari andeeqara oosanara randeemariisa amiqira ainaina innaarunai niimiannoommifoo qimarinafa mi ufaqanda qimaria fasiqa aanaaseesa kai Anutufinnai fifaranoo.

<sup>7</sup> Anutufa kasooqafee kambiqaaninna ainainara Nooafa sia qafee marunara aaquqimasoofanoo Nooafa nari irirana Anutunasaa rusimarunara irisee eedoo qimaseenoo firaa sipa auquseenoo nari faqa nari aiku asauku faqa minakimma asumu marinau. Auquseenoo Nooafa minannai aiqamausa maa maqanasaaqaraasa aiqama niqiseenoo rafaqaqafunnimaqanau. Noofa Anutuna mandaaqaranannai kai Anutufunnaindaraa andeeqarana maraseenoo asumu marinau.

<sup>8</sup> Abarahaamafa faqa Anutunasaa irirana rusi marufa marinau. Anutufa Abarahaamana aaramaseenoo qimaminau. Anee anirainaga fuka maqa maaqa anindi kianinnana uqafiqaanaura, anee miqoo fua. Miqi qufanoo Abarahaamafa iriseenoo nari irirana Anutunasaa rusiranannai eedoo qimasee nari maqa maaqa minnisee sia qafee maru maqa maaqanaki kaqimbinau.

<sup>9</sup> Abarahaamafa miqooqari aanaamuruara foora Anutufa qima afeekaikammaqoo maqa maaqanaki oonu marinau, Anutunasaa irirana rusiranannai kai miqinau. Nari maaqa uqanna ooqai maruna maaqa uqannaki marinau. Mi maqa maaqana minnisee fuka maqasaa nari faqa Yakooboona faqa Isakeena faqa uqiqaana maaqaki kai marusa mariqau. Aandau apatannai auqira uqiqaana maqaki mariqau. Miqanda faqa Anutuna qima afeekaikirana maree marusa mariqau. Miqanda faqa Anutuna qima afeekaikirana ufa irisee mariqau.

<sup>10</sup> Anutufa amiqira maqusa naaruara marira maaqa tuna rakiqasee auqusee amiraree qufanoo Abarahaamafa uqiqaana maaqaki maridanoo afeesida marinau.

<sup>11</sup> Abarahaamafa nari anaqa Saraqanaandiri asooqa nauaraiqi mariqau. Saraqana faiqi maqara kamu doo taikafufaqa faiqi siaiqanda mariqau. Mi kamuqoo Anutunasaa irirana rusimarunannai kai ooqa faiqi Isakeena maqaqau. Ooqai Anutuna mandaaqee marunnannai kai faiqi maqaqau. Ooqai Anutufa faiqi amianauree qufaqa iriseeqa eedoo qimaseeqa nifaqaq quqasee kisaqaqasaa mariuna maqaqau.

<sup>12</sup> Abarahaamafa kuqinoora foora inoo marufaqa mina faiqi namu kambiqeeqa fasau nukuda miqirausa kambiqaqau.

<sup>13</sup> Abarahaamafa nari faiqi namu moomoosa faqa Anutuna mandaaqaranaki mariufaqa kuqigau. Misa sia Anutuna qima afeekaikirana anoona qafaqau. Nianaindariaa foora naaqoo kai irisee asasammasee kasooqafee kuqigau. Nariaraa oo maasa maa maqanasaa aanaamuruara foora iqa mariafaqa asaqaafaikiqa maridaqee qigau.

<sup>14</sup> Miqira ufa qimariaa moo maqara nariara mararara randaidaqa kooroo idaqa miqi qidaqa.

<sup>15</sup> Misa irirafa sia nári ooqeenaa maqa maaqai ubeekaidaqa. Miqinaqau kafaa miqoo fuaqini.

<sup>16</sup> Misa uriqarara maqara innaarunai maqara randaidaqa ani asaquiraafoora foora maridaqa. Miqi marunara maasa Anutu fee qimasoofoano sia mifa asaurinau. Faasai innaaruna maqusa miqimariana akiqara nimirara deedaqinoo maridanoo.

<sup>17</sup> Anutufa Abarahaamana amanamandee qafaanee qufanoo Abarahaamafa Anutunasaa irirana rusirafa marunara Anutuna ufa iriseenoo eedoo kai qimaseenoo nari moodaa faiqi nari amugusuganna Isakeena kaqi rumbaseenoo qaindasaa quqasee arirarufanoo qaoo qinau. Anutufa faiqi ani aiku asauku moo amiraree qima afeekaikamaqoonara Abarahaamana amuna. Sia minara Abarahaamafa amugusufanoo nari amaaku rafaqaq finau. Kaqi eedoo kai qimasee nari faiqi afiqeenoo arirarinau.

<sup>18</sup> Anutufa ooqai Abarahaamana qimamu ufafa maaqimminoo maridanoo. Ani amaaku Isakeenasaaqari ani aruakinausa moomoo qinee qima afeekaikiranara kambiqeefaranoo.

<sup>19</sup> Abarahaamafa sia minara iriseenoo nari faiqiara amugusinau. Mifa kuqufinanoo Anutufa uqeeraannoommifoo qimaseenoo Anutuna ufamau arirarinau. Doo kuqaa Abarahaamafa nari faiqi Isakeena kuqiranakinaanara foora maranau.

<sup>20</sup> Abarahaamana amaaku Isakeefa innooqafinoo Anutuna ufa iriseenoo mina saqariki marunara quandaki Yakoooboosa Eesausa naaru kambiqaaninnanara amiqi amiqira ainainara nifaaqooqa qimannimaqanau.

<sup>21</sup> Isakeena amaaku Yakoooboofa innooqeenoo Anutuna saqariki marunara quandaki Isipa maqa maaqaki kisaqaqasaa marinoo kuqiraridanoo nari amaaku Yooseefaana faiqiara nifaaqooqa qimannimaqanau. Nari saunusaa aqini munduseenoo Anutunara innaaru qinau.

<sup>22</sup> Yakoooboona amaaku Yooseefaafa faqa Anutuna saqariki marunara kuqiraridanoo Isaraee maqannasa Isipa maqasaaqari moosaa fifandinnanara qimannimidanoo qimanniminau. Moosaa fiqa qini qimudaani faqa maree fuaqa.

<sup>23</sup> Mooseena anaukoo misa faqa Anutuna saqariki marusa maridaqa sia Faraoonara rufiasee mina ufa rukiasee Mooseena maqasee kaaqa idaaqira faiqi anaqimmifoo qimasee qaaramoo quqoonasaa kukeeqaqoofanoo marinoo nammari afainni kukeeqasoofanoo Faraona araamuna paqurimaseenoo nari faiqiara foora firinau.

<sup>24</sup> Mooseefa faqa innooqeenoo Anutuna mandaqara fasiqa marinau. Minara mifa faiqi kammaminoo Faraona araamuna faiqikiranara akooqoofanoo Isipa maqasanaasa minnisanau.

<sup>25</sup> Mifa Faraona maaqaki mariasa nari oosana oosana adiafaaira irira ainainee qimarunara mandainainee qimasee minnisee Anutuna faiqi namu Isaraee maqannaasa faqa aupuraanauree qimasee misa faqa finau.

<sup>26</sup> Mooseena afu fannoo innaarunai qumiasana ainainasaa afu munduseenoo minara kai rimarufa marufanoo Isipa maqannaasa munnimma ainana oosana oosana minnimasanau. Mooseefa Isipa maqannaasa faqa nari aaqara adiafaairanaki keeqarara akooqoofanoo misa minnisee asauku mundirana kasoqqaqee kambiqaaninnanara irisee mi aupuraranaki keeqeera maqi mafinau Isaraee maqannaasa misa aupuraranaki dadaaqinoo keeqanau.

<sup>27-28</sup> Mooseefa Anutuna mandaqarafa marunara naneeka fooqaa saqari amanee mara-maree sipsipa fidikaki raaraamma qumaree maaqa kooqimau akusoofanoo gangirooqqa faiqi narimarufa qumureenoo mina qafamaseenoo Isaraee maqanna faiqi nifauamaseenoo sia narinau. Isipa maqanna faiqiuqa kai narinau. Moosefa nari Anutuna mandaqaranannai minara iriseenoo ainnaaqarara oosana kuradanau. Mooseefa Anutuna mandaqarafa maridanoo miqinau. Minara kai Mooseefa Faraona aanooqiranara sia rufianau paasoosamandee Isaraee maqanna Isipa maqasaa marusakinaana nifiqee finau. Nifiqee fimarufaqa misa dapi ufa qimarufanoo Mooseefa kafaa oonurandee aniranara qaoo qimasee nifiqee fimarinau, Anutufa mina oorinni akooqoo maridanoora foora qufanoo andeeqasee nifiqee fimarinau.

<sup>29</sup> Isaraee maqannaasa Anutuna mandaqaranannai Taatuqee nammari fannoo qambaana raineenoo aadanusufufaqa aadana maqasaara foora taqaqau. Isipa maqannaasa misa naruannee qimasee misa ninaaqiana nammari qambaana aadana maqasaa oonu roofanoo nammari fannoo oonu maree ani maree maseenoo aigama narutaikanau.

<sup>30</sup> Isaraee maqanna Anutuna mandaqaranannai Yeerikoo maqusa ooni faandaamura rakeemasee ooru rameeqaqee aqufiqa nariqau. Misa qisauku dinni taikasee dinni ani qaara marasee faasaana mi faandaamurana fiqum fiqum masoofanoo mi faandaamurana rapeemasoofaqa oorureeqa aqufiqa nariqau.

<sup>31</sup> Yeerikoo maqusaendaraa anaasee dapi maraḡanu aanaaseefa mina auḡu Raḡaba nammariḡa mifa faḡa Anutuna mandaḡaranannai sia nari maḡannaasa faḡa kuḡinai. Mi anaaseefa Isaraee maḡannaa nipuraraa fasiḡaḡara amiḡimmandee narana aina niminoo nari maḡa ataufakaḡa kukeḡannisanau. Maanara mi anaaseefa narana aina niminoo, nári maḡannaasa naridaḡa qini faḡa dari maḡi ḡimasee kukeḡannisanau. Minara mi anaaseefa sia Anutuna ufa rukiee marusa faḡa kuḡinai. Kaḡi asumu marinai.

<sup>32</sup> Moomoosara sia ḡianaúra akara kisaḡaḡaikiandoora. Akaḡausa maaḡimasee mari-afaḡa Kideeoonafa faḡa Barakafa faḡa Samasoonafa faḡa Yeefataafa faḡa Dafidifa faḡa Samueerafa faḡa Anutuna tamummaḡara fasiḡauḡa moomoosa faḡa misara minniseeḡa misa uḡara sia ufa ḡianaúra.

<sup>33</sup> Anutuna saḡarikiranannai akaḡausa akaḡa maḡannaasa maḡusa maḡusa naru taikaseeḡa uriḡaraḡa mariḡau. Akaḡausa Anutuna saḡarikiranannai kai andeeḡara ḡoo fiḡa Anutuna ḡima afeekaikira asumu marirana faḡa innaarunaindaraa ḡumiasana kuḡiḡa oorú maraḡau. Faiḡi akaḡausa kaasau kusinara foora firaaḡa mina auḡu raioona misa marunaki namuḡaaḡa naruani fee ḡimasee rafuseeḡee maramaaḡinni raioona marunaki aḡufufanoo Anutufa mi andauna oori rafaḡaḡafusoofaḡa sia nariḡau. Misa mi kaasau kusinara auḡu raioonee ḡimariḡau.

<sup>34</sup> Faiḡi akaḡausa Anutuna ufa iri mariasa namuḡaa nisaukuki soofaḡa misa mareeḡee ida firana arasee minaki aḡunnisoofaḡa misa Anutuna saḡarikiranannoo mi idana imbasee sia kuḡiḡau. Namuḡaa fannoo aseemannai akaḡausa naruaneerufaḡa Anutuna saḡarikiranannai ḡuḡasee sandaḡau.

Faiḡi akaḡausa sia afeekaikusa Anutuna saḡarikiranannai afeekaikamasee moomoo maḡannaa rakira fasiḡauḡa aiḡama naru taikasee náriaraa kaḡi mariḡau.

<sup>35</sup> Anaasee akaḡausa nári faiḡi namu kuḡufufaḡa Anutuna saḡarikiranannai Anutuna tamummaḡara fasiḡauḡa mara findifumasooḡa mariḡau. Faiḡi akaḡausara namuḡaa innee Anutunara minnisaifaḡa maasa sia inni naruanaúra, sia inni ataasa ataasa ḡima-saida nifaḡa rakee inaauranoo fee ḡufaḡa Anutuna saḡarikiḡa mina minnisaranara ḡaoo ḡufaḡa ataasa ataasa idaḡa narimariḡau. Kuḡu fasiḡausa maaḡi ḡiḡau Anutufa maasa ḡumareeḡeenoo uriḡarara mariranaki ḡuḡaanifeera marida saina kuḡa.

<sup>36</sup> Faiḡi akaḡausa Anutuna ufamau fimariasa minasaara ataasa ataasa ufa ḡimaruna maree mariḡau. Mandoosana maree mariasa akaḡausa ḡumaraseeḡa nári sanda ḡain-nainaina atisa rumbaḡoo sandasamu kaifaa kaifaa naridaḡa nifaḡa ateekaateekamma ummooḡuki mariḡau. Akaḡausa sainandannai rumbamaree karabusaki ḡuḡemariḡau.

<sup>37</sup> Misa akaḡausa Anutuna ufasaara maramaree oonisamu kuḡa nariḡau. Misa akaḡausa ḡumaree keedainnai ḡambaana tuḡu raḡaḡau. Misa akaḡausa ḡumaree aseemannai nári mariḡau. Anutuna ufamau fimarusa minasaara narimariafaḡa akaḡausa rufiasee nári maḡa minnisee ḡamunnara randeeḡa mimmi apata fee sipsipa apata fee minauḡa afisusaidaḡa munnimma ainaina siaisa nariranara rufiasee kaḡi dapi nimariḡau. Faiḡi anaasee fifau narusaida mandoosana mandoosana nimirariḡau.

<sup>38</sup> Maa maḡanasaaḡaraa irirana faḡaasa marirafa mandaikamminoo maridanoo oorudupinoo maridanoo Anutuna ufa irimarusa narunnifaḡaa ufaḡa misa sandoosa misa irirafa urinaaḡaranoo maridanoo. Innaarunai fifandinnanara urinaaḡaraḡa mariasa naridaḡa. Minara misa kukeeḡaḡa nidaḡa manda maḡa maaḡaki aaḡana maḡa maaḡaki ooni aamaraki maḡa aamaraki keeḡafi rafudamaki iḡa nidaḡa maaḡooḡaraasa nariranara rufiaidaḡa.

<sup>39</sup> Mi fasiḡa anaaseesa moodaanaki suḡufi maridara foora iḡa naridaḡa ufa ḡidaḡa. Misa aiḡamausa Anutuna saḡariki marianannai nuḡufaḡasaa naridaḡa, misa maa maḡanasaa naridaḡa sia Anutuna ḡima afeekaikira ainaina afeeka ainaina mareeḡa.

<sup>40</sup> Anutufa maasara moo firaa irirana iridanoo. Indaaruuḡaasa maasa ḡifeesammidaḡa. Sia misa náriara anoonaikifaranoo. Misa faḡa maasa faḡa moodaa kari innaarunai mareefandia maḡi ḡidanoo.

## 12

*Innee nifu Yisunasaa mundusee miḡoo kai fuaḡa.*

<sup>1</sup> Indaarú marusa Anutuna saḡarikiusauḡaindi maḡee maasa ḡiḡafaidaḡara foora naridaḡa. Maasa maa marirana misa nifusaa nári amani nári amani iḡa maridanoo sandeera foora idaḡa. Maasa indaaruuḡaasa nifusaa nári amani nári amanidaḡa sandaidaḡa moomoosa nifu ḡiḡafaranara iriseeḡa ḡinee uriḡararaisai kianee ḡi-masee aiḡama ainaina ḡumaararai ainainnara foora maasa mandainaina amiḡimasee maasa rakisi ḡumaree marina afaieeḡee maḡasaa ḡuḡasee doo oori runusee doo oori munduḡaannana kai raḡuramisee doo miḡoo kai sanda maḡaraasammasee fua.

<sup>2</sup> Oosana arooqooqari fifi inaqa maasa saqarikirafa Yisufa kai maridanoo minasaa kai nifu mundusee fua. Yisufa maa maqanasaa maridanoo aunirira saqarisaa arirara qufanoo sia rufiasee minnisanau. Sia uqanna minnisanau. Kasooqaqee kuqiranakiqari findifi innaarunai ququsaki Anutuna aaqa marianinnanara iriseenoo mi asahiranra iriseenoo aunirira saqarisaa kuqiranara asauriranara siamma irinau fifau ainainee qimasee kaqi finau. Doo minara maqee Anutufa mariqoo mina aaqa asaukuqannai ooqumarifi maridanoo.

<sup>3</sup> Doo maasa Yisuna aupuraranara iriaqa. Moomoo manda fasiqa anaasee Yisunara fidiqaa imarufanoo sia kaukaata qinai kaqi mi umaarana mara maree fimarinai. Maasa mi oosannara iriseeqa sia nifaaqa kudoosaapamasee Yisuna aanai ubeekaranara minnisaaga.

<sup>4</sup> Mandainaina fannoo maasa maqee maqee darimarifaqa mina faqa quandaki rakuqaammidaqa. Mi rakirafa sia inni fidika ruqieenoo kaqi mariafanoo kaqi fuaqa, sia minara kudoosaapaaqa.

<sup>5</sup> Anutufa inni nari faiqi namuara pooduara ufa qimannimusa aunidee sia fee aunidee. Anutuna akaraki minara maaqi qimaseenoo anoonufa akara ridanoo.

Qini qimaaku, Anutufa ummaara oosana oosanannai ariara foora ani inana sia minara rufiaa amiqimasee iria.

Ani oosana uqafiqaidanoo amiqiraqoo fuanneera miqidanoo. Mifa aniara qaoo qinana sia anee minara kudoosaapaa sia oori runua.

<sup>6</sup> Karaambaiqa fannoo mina amuqusi marisa kai naridanoo foora idanoo. Nariara qini faiqi fee qisa kai naridanoo foora idanoo.

Akarakinaa ufa miqiminoo marifaqa qinee minara maaqi qidaqa.

<sup>7</sup> Aneenna aidafira ummaarara qini qikoofa Anutufa dariara maqi qidanoo fee qia. Aneenna aidafiranara aupuraranannai Anutunara mina amaaku daridanoo fee qia. Aiqa ma faiqi nikausa aikannai qumaree nari faiqi namu mandoosana akiaqara naridaqa. Aiqamausa nari faiqi namu mandoosana akiaqara naridaqa.

<sup>8</sup> Innee Anutuna fiqi namu faqa sia arirana mareenana sia mina faiqi marinnaranoo, dapi faiqi marinnaranoo.

<sup>9</sup> Maa maqanasaa maasa qikoofa aikannai qumarasee mandoosana akiaqara darifaqa maasa minara rufiidaqa mina aaqa maridaqa. Innaarunai qikoofa miqi kai masee dariara foora inaqa firaqoo mina aaqa maridaqa naaru naaru marianaara.

<sup>10</sup> Maa maqanasaaqaraa qikausa nari iriranannai maasa andeeqa qimaqaidaqa aikannai qumaree daridaqa. Anutufa maasa andeeqara oosana maraaqera oosana oosana ummaarannai maasa dariara foora idanoo. Mifa nari andeeqarana naida qimiraree qidanoo maasa daridanoo.

<sup>11</sup> Anutufa maasa ummaarannai dariara maqi ifaqa maasa sia minara asasiidaqa doori runidaqa doo maasa miqoo qeeqa mandainaina akiaqara darirana taikasee andeeqasee marirana asoarana maraidaqa asasiidaqa.

*Oosana oosana naakaparafa faqa aaquqirafa faqa mari ufafa.*

<sup>12</sup> Innee nisauku kudoosaapafaqa raqandaamasee mariasa nisauku uqusee afeekaika-aqa. Aiku aqoori qumooquki mariannana indindi mariannana minnisee mapukufinana aiku ramaseenana kikiqia.

<sup>13</sup> Innee andeeqara aatata kai fifanoo aiku arinafa unufuannoo. Unufinana andeeqasee finnaranoo. Anee manda aatata afigee finanoo anaiku firaqoo mandaikiannoo. Anee andeeqara qoo afigee finanoo ani aiku aidafimarifa taikafinanoo andeeqasee anee finnaranoo.

<sup>14</sup> Innee aiqamausa mariasa namufaqa amiqimmandee asoaranaki marirana amani-aqa. Inni mariranakina amiqirafa andeeqarafa kai mariaqa. Sia miqiqqa karaambaiqa sia qafeefaranoo.

<sup>15</sup> Innee amiqimmandee rakisia, innee Anutuna afaariranaki fuanakiqari quandaki kaqinni ubeekke foora. Innee amiqimmandee rakisiaqa sia moo fannoo inniki saakunananda inniki kambiqafinoo aiqamausa sukaqarana nimiani.

<sup>16</sup> Innee rakisiaqa. Sia inniki moo fannoo Esauna aanna raaqa. Mifa andeeqarana minnisee Anutuna ufa rukiasae moodaa naranannai kai afasaafa nari qumiasana nari akaqa doo aminau.

<sup>17</sup> Amiseenoo miqoo kasooqaqee aupuranau. Aupureenoo nari akoo finnai anireenoo afaaqooqara qufanoo mina akoofa qinai. Sia, doo ani akaqa amiqa qufanoo Eesaufa

ikiraqoofanoo aukunu qumimarufanoo randoo randoo sianoo sia paqurinau, doo taikambinai. Innee sia Eesauna aanna raaga sia andeeqarana minnisaaga.

<sup>18</sup> Maqee aukuaana innee sia Isaraee maqannaasa naanna raidaqa. Maa maqanasaa Sinai aagana ameemaana Anutuna ufa iriqau. Innee innaarunai mari Sinai aaganara foora maridaqa Anutuna afusaa kikiqiga mariafanoo. Ooqai Isaraee maqannaasa Sinai aagana ameemaana anireeqa sia ufa kai nifu qafoona mi aagannasaa ida firaafa qoofaqa qafoona oonamu namufaqa aakuusaa namufaqa asukuna namufaqa rafaafufafaq aigamausa qafamaseeqa rufiaqau.

<sup>19</sup> Miqunakina ukeena qunaki faiqi ufa moo iriqau. Iriqa rufisee qiqau. Maasa sia moo kaqikaa ufa irianauro, maasa daaquqaiqau rufieeqa.

<sup>20</sup> Mi ufana qidanoo maqi qinai. Faiqi moo fannoo fee aandau fee maa aaganna auqamasaiqau oonisamu qumaree kuqamma arusaaga. Misa mi ufana irufanoo kaaqa naaquqoofaqa maparaaiqau.

<sup>21</sup> Mooseefa faqa Sinai aaganasaa kambiqoo ainainna qafamasoofanoo kaaqa aaquqoofanoo aindiri aindirufanoo qinai. Qinee faqa qafaunanoo kaaqa daaquqeenoo daindiri reenoo.

<sup>22</sup> Mi aukuaana Isaraee maqannaasa mi naaquqara ainainna nifu qafamasoofanoo nifaaga ramasoofaqa rufiaqau. Maqee innee sia miqiranaki anifaqa ani maridaqa. Innee Sioona aagana uqanna kaqi marira Anutuna maqusaki ani mariafanoo. Innaarunai marira Yeerusaree maqusa qangiroo moomoo andandara foora marianaki innee ani mariafanoo.

<sup>23</sup> Innee Anutuna ooqa faiqi innaarunai bukaki akara rirausa kai kaaqa firaqoo suqimarianaki asasimarianaki ani mariafanoo. Innee Anutuqoo ari mariafanoo. Mifa aigamausa ufa irisee andeeqannisee marifa maridanoo. Andeeqara fasiqa kuqufusa innaarunai ooruree anoonaikamambiqa innee misa nimana namufaqa andeeqaranaki asairanaki ani mariafanoo.

<sup>24</sup> Ooqai Kainafa nari akaqa Abeerana arufanoo mina fidika teeqinai. Abeerana fidika fannoo Anutunara qini fidika akiaqara anee qiannee qidanoo. Maqee innee Yisuna fidika Abeerana ooriqararana teeqiraqoo ani mariafanoo. Yisuna fidika fannoo Anutunara maasa numoo akiaqara minniqisaannee qidanoo uriqaranoo maridanoo. Innee maqee fuka moodaanaki kira ufa quqee marianaki Yisunaki ani mariafanoo.

<sup>25</sup> Minara innee Yisuna ufa sia sia iriaqa. Amiqimmandee rakisimaree iriaqa. Ooqai Mooseefa maa maqanasaaqaraafa qimannimimarufaqa sia iridaqa kuqimariqau. Maqee innaarunaindaraa fasiqa ufa rukiaanafa anee yaiffee finnaree mina ariranakiqari rukisee naqi fee innaree.

<sup>26</sup> Ooqai Mooseefa maru aukuaana Anutufa qufanoo Sinai aaganasaa maqa kasinai. Anutufa minara maqi qimafeekaikinai. Qinee ooqai maqa kasiafannana, kafia qinee sia maqa kai kasianauro. Innaaruna faqa kasianauro.

<sup>27</sup> Miqunnara maasa maqi qidaqa iridaqa Anutufa nari aigama ainaina auqu quqaqoona kafia aigama kasimmasenoo doo mara aqu taikaannoo. Sia kasimari ainainafa mifa kai kaqi mariannoo.

<sup>28</sup> Doo maasa sia kasira ququsaki maridaqa minara maasa susuia. Maasa minara quandakiga Anutuna aidiranamau kai nari amooqia. Oori kandamasee rufiaqa rufiaqa qiranannai nari amooqia.

<sup>29</sup> Maasa Anutufa sia fifau ainaina maridanoo. Ida qamataikannimaqee marifa maridanoo, minara aqara oosana rufiaqa, ani faqa ida qamataikaandora.

## 13

### *Anutuna aidiranamau fra naakarufa.*

<sup>1</sup> Innee asaku mundiranaki marianara nariara nariara moodaa fasiqa anaasee faiqara foora uriqarara ainainee qimasee sia fifau noonoo kai nimuqusi marinaqa nariara nariara ruaqa asaukunoo auqaidana nariara nariara ruaqa. Miqi kai ida sia taikaaqa.

<sup>2</sup> Anaamuru sia oori qafainna maqannaana amiqi mandee narana amiqi maqa amiaqa. Akaqusa miqidaqa sia irirai qangiroo amiqi amiqiqau.

<sup>3</sup> Innee karabusaki mariasara misa faqa karabusaki maridara foora amiqimmandee rakisinnimaqaaqa. Asaku mundirana ufasaara aupuree mariasa sia aunuaqa. Innee misa faqa moodaanaki aupuraranara foora nimuqusi marinaqa rakisinnimaqaaqa.

<sup>4</sup> Innee aigamausa faiqi anaasee nimundanara uriqarara ainainee qiaqa. Faiqi aneesee aqumummasainafa sia moonaindi quandaki qumaraa. Aigamausa inneeqa

nammari kai neeqa andeeqasee mariaqa. Faiqí anaasee dapi narí maree narí maree qíqa nuasa faqa qummuariqa nuasa faqa Anutufa ufa iriseenoo naruannoo.

<sup>5</sup> Inni irirafa marirafa munnimma ainainara sia kaaqa rida mariaqa, maqee maree maria ainainnara doo amana maridee qimasee afaaqa quqasee maria. Anutufa minara maaqi qinau.

Qinee sia inni minnisee moosaa fuanaura. Inni faqa naaru marianauree qinau minara afaaqa quqasee maria.

<sup>6</sup> Maasa mi ufana iriseeqa paasoosamaseeqa maridaqa maaqi qianauro.

Karaambaqa maasa dadaaqimarifa maridanoo

Minara maasa sia rufiaanaura,

Naqimasee maa maqanasaa qaraasa maasa darifaree. Sia amana darifaranoo.

<sup>7</sup> Ooqai indaaruu Anutuna ufa qimannimusara sia aunuaqa. Misa amiqi mariranara faqa misa kuqiranara faqa misa Anutuna saqarikiranara faqa iriseeqa misa nimeer-aameera kai ida mariaqa.

<sup>8</sup> Yisufa asauku mundirafa sia minaki oosana oosana irirafa marifa. Eenda faqa maqee faqa naaru naaru faqa amanamana kai andeeqara irira oosana marifa maridanoo. Innee faqa miqiaqa.

<sup>9</sup> Akaqausa Anutuna ufara oosana oosana irirana uqeeridaqa. Innee sia misa naanna reeqa oonuree anireeaiqa. Anutuna afaariranara mi irirafa kai inni nimana mapuku nimaqainaqa mariaqa, mifa andeeqarafa amiqirafa maridanoo. Oosana oosana sandufa moo narana neeqa moo narana sia neeqa mi ufana qimaqoonannai sia inneeqa nimana mapukusee marifaranoo, mi ufana maroosa sia mi ufafa misa nimana mapuku nimaqanau, sia misa dadaaqinau minara innee Anutuna afaariranara iriaqa.

<sup>10</sup> Ooqai Yuda maqanaa aanaiqikirausa Anutuna uqíqaana maqa rakisimarusu Anutuna ufamau fidaqa qaindasaa qaraa aandau tatufirana suqee maruna akaqana marasee naqau. Maasa aandau tatufi maria qaindara foora moo maridanoo. Ooqeenaa uqíqaana maqakinaasa sia amana minasaqaraana marasee nooqini.

<sup>11</sup> Ooqeenaa uqíqaana maqaki moodaa faasaana moodaanaki kira faasaanasaa misa uriqararafa aandau fidika mareenoo firaa naaquqara maaqaki oonureenoo qaindasaa teeqimaseenoo raudamakai mi andauna apata amudaani amaqi aiqama sia naqau, mara mareeqa faiqi naambeeqai munu ida aree mariqau.

<sup>12</sup> Mina amanakai Yisufa Yeerusaree maqusa naambeeqai kuqinau. Narí fidikannai faiqi anaasee mandainaina findaukama nisaanifeera miqinau.

<sup>13</sup> Maasa faqa Yisuna dadaaqíqa ooqeenaa maaqa naambeeqaira foora Yisufa mariqoo mina asaurirana dadaaqi maraanauranoo.

<sup>14</sup> Maasa kasooqaqee uqanna maa maqanasaa sia maridanoo. Maasa kasooqaqee kambíqaaninna maqusara innaarunaindaraanara rakisidaqa.

<sup>15</sup> Doo minara maqee maasa maa maqanasaa maridaqa Yisunannai Anutuna dufi dufi qimamaqaidaqa. Maasa aandau tatufirana fooqaafa dufi dufi qirafa maridanoo. Maasa Anutunara kuqaa anoonnee qimaria noonakiqari minara dufi dufi qirafa maqee maqee kambíqaidanoo.

<sup>16</sup> Maa ainainna faqa sia aunuaqa, narí amiqi narí amiqiaqa, inneeqa ainaina innee iriranannoo kai raineeqee niqoonausa narí ami narí amiaqa. Anutufa miqira ainainara amiqira tatufira aandaara foora maridanoo fee qidanoo qaqaara raidanoo.

<sup>17</sup> Innee inneeqa uriqararawsa qinnandee kai iaqa. Misa Anutuna saika maraídaqa inni nimanara maqee maqee rakisidaqa. Anutufa kasooqaqee misa innisaa rakisiranara iraanoo. Innee misa ufara eedoo qífaqa misa asasammasee mi ainainnammifaranoo. Innee misa ufa rukiaifaqa misa nifaaqa qumooqukidaqa nikoo nika ifaranoo. Misa nikoo nika idafa sia inni dadaaqifaranoo.

<sup>18</sup> Innee maasara maqee maqee innaaru qíafa. Maasa qimana sia moo ainainara iridaqa andeeqaraqoo kai firanara ridaqa inni qimannimidaqa. Innee minara maasara faqa innaaru qíafa.

<sup>19</sup> Qinee qeeqara faqa inni qimannimidaqa. Innee qiniara faqa innaaru qifanoo Anutufa qini dadaa qinaqa innee innannai kaqi kaqi fua.

*Anutufa amiqi amiqimma nimaqaaninnufana.*

<sup>20</sup> Naaru naaru moodaanaki kirana Yisufa asauku mundirafa kuqiranannai mina fidikannai doo mapukuseenoo maridanoo. Anutufa mina kuqiranakinaana uqereeqeenoo faiqi anaasee rakisirana firanaikamaqaifanoo maridanoo. Narí kuqiranannai faiqi aanaaseesaa rakisirafa maridanoo.

<sup>21</sup> Anutufa asooarana faqaafa innee mina iriranamau fifandinna oosana akoofasaikirana inni niminaqa fuaqeera. Anutufa asauku mundiranannai maasa faqa mareegeenoo nari aidira oosanaki nari iriranamau firanaki quqannisaani. Aiqama amooqirafa faqa kaaqa areenarafa faqa asauku mundiranaindi naaru naaru mariannoo. Kuqaa.

*Ati ufa.*

<sup>22</sup> Oo qini qikaqaafasaa innee maa ufana amiqimasee asaana ruaqa. Dadaaqira ufa maridanoo sia kisaqa akara riqa minara qimannimidaqa.

<sup>23</sup> Qinee maa ainainnara faqa qimannimidaqa. Maasa qikaqa Timootifa doo Roomma maqanna karabusaki Yisuna ufasaara rumbaqafoofa idukinoo maridanoo. Mifa dauni dauni mai anirainaqa afiqee innee marinnaqoo oonureeqa maaqanda inni niqafaanaura.

<sup>24</sup> Innee maasa qimandarana inni uriqararausa faqa aiqama Anutuna ufa irimariasa faqa qimannimiaqa. Itari maqannaasa maaqooqaraasaki mariasa inni nikaqaafasaa mariasa inni nimandaidaga.

<sup>25</sup> Anutuna afaarirafa inni faqa mariani.

## **YAMEESA**

### **Yameesafa daraanimariasa akara rumannimaqanau.**

<sup>1</sup> Anutuna aiku asauku maaqa maaqa daraaniqa mariasa qinee Yameesasa inni nimandaidaqa. Qinee Anutuna eedoo qira rumbara saikara foora marunna fasiqausa maridaqa. Asauku mundirana Yisuna maasa karaambaiqa mina faqa eedoo qira rumbara ainainira fasiqara foora maridaqa nimandaidaqa.

*Nimanira ainaina faqa iriranara innaaruqirana faqa mi ufana qimaqoona.*

<sup>2-3</sup> Qini qikaqaafasaaqa oosana oosana ummaara ainaina nimanamasee qafarafa innisaa aqufinaqa sia minara maparaaiqa dufi dufi qimasee Anutufa sia minannai daridanoo, afeekaikamma qimaqaidanoo qimidanoo fee qimasee asasiaqa. Mi nimanira ainainafa inni firaqoo narinaqa inni Anutuna saqarikirafa kaqi kai marinanoo inni mi saqarikirafa mifa inniki sabeenara foora afeekaikamasee mariaqeera marianno.

<sup>4</sup> Innee miqiqa maridaqa Anutuna ufamau kisaagasaa fimarifanoo inni marirafa nirafa muduka kaqi mariaqa sia kaqikaqaqo sia amanaikiaqa kaqi amana kai muduka marianifeera miqiqa mariaqa.

<sup>5</sup> Inniki akaqausa irirafa sia amanaikinausa Anutunai innaaru qifanoo nimiani. Anutufa paapaa imarifa amiqimasee irirana kaqi nimimarifa maridanoo.

<sup>6</sup> Innee iriranara innaaru qidaqa sia oonumafi qaara irira iriaqa, oonumafi qaara irira irimariasa ufaira foora uqimariafanoo.

<sup>7-8</sup> Miqinna fasiqausa sia karaambaiqaindaraana aundurai dadaaqirana mareefaranoo misa yaiffee fuanau yaiffee fuanau qinausa sia moo ainaina mareefaranoo.

*Ainaina faqaasara faqa kudifasiqauqara faqa qimaqoo ufafa.*

<sup>9</sup> Innee Yisuna ufara suqimariasaki Anutuna saqariki mariafanoo innikinaana kudi fasiqauqa nisaurimariasa Anutufa inni mara uqeerasee innarunai fuagee qimaqainara noori uqeerasee asasiaqa. Inniki ainaina faqaasa kookuna qaamara foora ufa fuaga aqusainaqa taikafifaranoo.

<sup>10-11</sup> Suani qeenoo firaqoo aiqaiqinanoo kookuna aadanusinanoo afufeenaarirana kakasinanoo afu qafainanoo amiqi amiqirafa taikafuanno. Miqi kai inoo ainaina faqaasa oonauqee ani auqee idaqa miqidaqa doo taikafifaranoo. Miqunara Anutufa ainaina faqaasa sandaaqaindaraana mareeqee maqasaa quqasainaqa misa faqa kudi-fasiqauqa faqa asasiaqa.

*Nimaniranaki andeeqasee kaqikai fimariasara qimaqoo ufafa.*

<sup>12</sup> Faiqi akaqausa nimanamasee qafee mari ainainafa kisaagasaa narimarifaqa Anutuna faqa kaqikai fidaqa miqimaria fasiqa anaaseesa amiqiranaki mariasa mariadaqa. Miqinna fasiqa anaaseesa mi nimanirana taikasaifanoo Anutufa ooqai qima afeekaikira feefauru naaru marirana nimianno nari Anutunara rimariasa kai nimianno.

<sup>13</sup> Nimanira ainaina fannoo faiqi anaasee moo nifaagasaa aqufinanoo sia Anutunaindari maa mandainainafa anianno fee qimasee oonumafi irianno. Mandainaina fannoo sia amana Anutuna amanamasee qafaanno Anutufa faqa sia moo mandainainannai nimanamasee qafaanno, sia miqidanoo.

<sup>14</sup> Faiqi anaasee nari mandainainara nidirafa nari rarisameeqeenoo nari ufaanaki naridanoo.

<sup>15</sup> Nari mi manda nidirafa innooqeenoo radiqiffanoo mandoosana kambiqaidanoo. Mandoosana kambiqeenoo innoqafinoo kuqiranaki aqufidanoo.

<sup>16-17</sup> Oo qini qikaqaafasaa maa maqa maaqanaki mariasa, sia Sadannafa nikaru qinnana iriaqa. Aiqama amiqira nimira ainaina idaaqirana kaqi nimira afeeka ainaina innaarunaindari qumidanoo. Anutufa innaarunaindaraa qoomauqaindi auquqoofauqa mindari mi amiqira ainainausa qumidanoo. Anutufa sia suani quqoonara foora oonuree aniree ifa moodaamau kai fimarifa.

<sup>18</sup> Anutufa nari iriranannai kai nari anoona ufannai kai maasa nari fukasaa aanaaqi aanaaqikiranaki quqaqiseenoo maasa nari ufini aanda auqama ainaina uriqararausai kamafi mariaqeera auquqisanau.

*Anutuna ufa sia naaqoo kai iriaqa nisaukunoo qumaraaqa.*

<sup>19</sup> Oo qini didimari qikaqaafasaaqa maa ufana naaqoonoo iriaqa. Innee dauni moonufa irisee kasooqafee aneenna ufa qiaqa, sia qusufa qimasee aanooqiaqa.

<sup>20</sup> Faiqi anaasee aanooqirafa sia Anutuna andeeqara oosana dadaaqi uqeeraidanoo.



<sup>21</sup> Innee inneeqa aiqama manda kudimakira oosana faqa manda nira oosana faqa fatika aqusee mariaqa. Innee inneeqa afeeka minnisee Anutuna aramandunnai madoo-  
doonaqa mariaqa, maridaqa Anutufa narí ufa inni nimuqusaki quqemarina maraaqa. Mi ufananoo inni asumu maraannoo.

<sup>22</sup> Sia anutuna ufa naaqoo kai irisee minnisee oo qinee. Anutuna ufa irimarunausee qiaqa. Miqi qidaqa nariqa nikaru qidaqa. Naaqoo iriseeqa nisaukukoo qumaraaqa.

<sup>23-24</sup> Anutuna ufa irisee sia qumaree marifa tanukaki qafee mari fasiqafara foora maridanoo moodaannai qafamaseenoo quandaki oori kaqinni ubeekaidanoo narí oori qafai oosanara aunimarifa. Anutuna ufa irisee sia qumaree marifa miqirafa maridanoo.

<sup>25</sup> Anutuna idaaqira aaquqira ufa faiqi nifaaqa idukirafa maridanoo. Faiqi anaasee moo fannoo maqee maqee amiqimmandee minaki qafee marifa sia kaqi fifau irisee aunimarifa irisee qumaree marifa mi fasiqafa nana ainainee auqainanoo Anutufa dadaaqinoo amiqi amiqimmiannoo.

<sup>26</sup> Faiqi anaasee moo fannoo nariara Anutuna ufa irimarunausee qimasaidanoo sia narí afauruara amaakiriara oonumafi iridanoo kaqi oosana oosana mandufa urirara kai qimarifa mi fasiqafa Anutuna saqarikirafa sia maridanoo kaqi fifau marifa maridanoo narí afauru fannoo narí akaru qidanoo.

<sup>27</sup> Maasa qikoofa Anutufa maa qaaramoo ainainausa maraanara kuqaa anoona qini saqarikirusammiafoo qidanoo. Moo oosana faiqi faiqi rakisirana faqa moo oosana adeedaana aanaaseeqa nariqa aupuraranaki mariasa rakisirafa faqa moo oosana maa manda maqa maaqanakina mandoosanauqa qifaaqai aqufundoos qimasee eerairinafa faqa mi ainainna namuna maree mariasara kuqaa anoona qini saqariki mariasee qidanoo.

## 2

*Qamunna afaaqainainara sia faiqi raina amana kai amiqi amiqia.*

<sup>1</sup> Qini qikaqaafasaa mariasa. Asauku mundirafa Yisufa maasa karaambaiqa Anutuna kaaqa qarana uriqararafa maridanoo. Innee mina ufa iridaqa sia faiqi amiqira nifaaqa qafainnanara amiqira qamunna qafainnanara rainasee amiqira fasiqa fee qimasee minara amiqi amiqia, kafaa sia moona afaaqara manda fasiqa fee qimasee minara akoo akaa iaqa.

<sup>2-4</sup> Innee amaana maqaki suqufi keeqaifanoo moo fasiqa ainaina faqaafa amiqira afaqa qamunna afisirafa asaukuki rinna marinafa keeqaannoo moo fasiqa qamunna anaqanaqirafa keeqaannoo, innee amiqira afaqa qamunna faqaanara amiqira fee qimasee amiqira qoo mara quqasaifanoo ooqu mariannoo manda afaqa qamunna faqaanara kaqi kikiannee qifanoo kaqi kikiqinoo mariannoo fee maqasaa fee ooqu mariannoo fee. Innee miqidaqa manda iriranannai faiqi rainee mariafanoo.

<sup>5</sup> Qini qikaqaafasaa mariasa qini ufa iriaqa. Anutufa ainaina siaisara rusanandesamu mandeenoo qafamaseenoo qumareeqeenoo narí saqariki mariasaki uriqararanaki mariaqeera narí innaaruna ququsa maraaqeera ainaina siaisa utaaqamannisaidanoo. Anutufa faasa nariara rimariasara niqafamasee qima afeekalkammasee innaaruna maqa maaqa nimiraree qimaqoofa maridanoo.

<sup>6-7</sup> Anutufa miqimasee ainaina siaisa uqeerifaqa inneeqa ufannai rainannimaqaidaqa unnaqimasee misara maqasaa ooqu mariaqee qimariafanoo. Yafa yafee inni Yisuna ufa irimariasara mareeqee ufaki siaasinnai quqaida fee, ainaina faqaasa kai miqidaqa innee aaqaidaqa misara amiqira qoo ooqu mariaqee qimariafanoo. Anutufa inniara narí amaakundi fee qimaqoofa marifaqa ainaina faqaasa kai miqiasara manda fasiqee qidaqa Yisuna uriqararana aquraraidaqa fidiqaammamaqaidaqa.

<sup>8-9</sup> Anutuna ququsakinaa ufa maaqi qimasee akara rinoo maridanoo, inneeqa niqoonausara inniqa nifaaqara foora nidianinani. Innee mi ufanamau fidaqa andeeqasee fifaranoo. Innee faiqi nifaaqa qamunna qafamasee rainee mariana mandoosana mareemariafanoo miqimarianara Anutuna sandufa fannoo inni rafaqaqfidanoo.

<sup>10</sup> Faiqi moo fannoo Anutuna sandufa aiqama qumaree marinafa moodaa kai aaqama-sainafa mifa Mooseena sandufa rukiee marifa maridanoo.

<sup>11</sup> Anutufa qinau sia innee faiqi anaasee narí qummuari narí qummuari iaqanani. Mifa kai innee sia faiqi anaasee kuqa naruqee qinau. Anee sia anaasee qummuarinana kafaa quandaki faiqi arinana Anutuna sandufa rukiee marianafa mariananoo.

<sup>12</sup> Anutuna sandufa sia faiqi rumbee marifa maridanoo faiqi iduki marifa maridanoo Anutufa mi sandufanasaa kasooqagee inni ufa iriannoo minara mandainainakiqari idukira kasiqa naanna ramasee andeeqasee maridaqa ufa qiaqa.

<sup>13</sup> Innee inneeqa niqoonausara sia nimuqusirana nimifanoo Anutufa faqa inniara faqa sia amuqusirana nimiannoo. Nariqa niqoonausara nimuqusidaqa dadaqimariasa sia Anutuna ufara rufieefaranoo, amiqimasee marifaranoo.

*Yisuna saqarikirana fifau ufannoo faqa asaukunoo qumararanannai faqa mifa rainaidanoo.*

<sup>14</sup> Qini qikaqaafasaa mariasa, faiqi anaasee moo fannoo nariara Yisuna saqariki marunausee qidanoo sia nari marirana akooroo idanoo mi fasiqana saqarikirafa fifau maridanoo. Miqi mandee saqarikinafa amanee naaru naaru marirana amiannoo fee, sia amana amiannoo.

<sup>15-16</sup> Qinee minara iridaqa moo ainaina kikiqa usuanaura. Inni nikaqaafasaa fee nisoqmaakee kuqaa sarauqimariasara qidaqa misa innee innannai aniree naranaree qamunnaree innaaru qifaqa innee sia nimiqa fifau nifaurukoo kai maaqi qia Anutufa inni amiqi amiqiannoo innee oonu qamunna afisusaifanoo inni nifaqa tootoo qinaqa narana suqasee naaqa. Miqira ufa sia anoona maridanoo fifau ufa maridanoo. Anee kaqi kasinana nipatasaa sarauqi maria ainaina andeeqasee nimiaqaana.

<sup>17</sup> Yisuna saqarikirafa miqi kaimminoo maridanoo fifau afaurunoo akaqaafasaa aanee oonu qamunna afisusee narana naa. Miqira ufa sia akaqaafasaa dadaidanoo. Miqi kai inoo fifau afaurunoo Yisuna saqarikidee qinafa sia asaukunoo Anutuna ufa qumarasee inafa marinana ani Yisuna saqarikirafa kuqinoo maridanoo.

<sup>18</sup> Faiqi anaasee moo fannoo minara qiannoo, anee Yisuna saqarikirana qumaree marianafa mariananoo qinee qisaukunna Anutuna ufa qumaree marunausee maridaqa. Qinee Yameesasa minara maaqi qidaqa. Qinee naqimasee ani Yisuna saqarikirana qafaanauree asaukunoo qumararafa sia marinaqa sia qafaanaura. Qinee Yameesasa qeeqa Yisuna saqarikirana qisaukunna qumararana miqiga inni uqannifqaanaura.

<sup>19</sup> Anee fee aneennaraa kai fee Anutufa moodaa mari fee qimasee mi iriranannai kai anee amiqiranaki maridee qidane. Oo amana innee afaannaqa ufa moodaamau aamasee qimariasa mariafanoo. Afaannaqa faqa Anutunara moodaa mari fee qidaqa nariqa mandainaina akiaqara narifandinnanara iriafanoo naaquqaidanoo naindiri raidanoo.

<sup>20</sup> Oo furufarira fasiqa anaasee asaukunna dadaqi qumararafa sia maridanoo Yisuna saqarikirafa nari kai miqoo marida fifau ainainara foora maridanoo. Qinee mi oosannara kafaa koorooianaura.

<sup>21</sup> Maasa qifaqnafa Abarahaamafa naqimaseenoo fee Anutuna faqa moodaanaki kinau. Nari asaukunna nari faiqi Isakeena qumareegeenoo qaindasaa tatufira aandau suqa amianeera quqoonannai Anutuna faqa moodaanaki kinau.

<sup>22</sup> Sia fee innee iridee. Abarahaamafa nari Anutuna saqarikirana faqa nari asaukunna qumararana faqa miqandannoo nari dadaqi nari dadaqinau. Nari asaukunna qumararafa nari saqarikirana dadaaqufanoo anoonaikinoo amiqinau.

<sup>23</sup> Minara akarakina kuqaa maaqi qinau, Abarahaamafa Anutuna aamuaqira ufa irisee kuqaa fee qimasee saqarikufanoo Anutufa mina qafamaseenoo oo andeeqara fasiqa mareenoo qinau. Miqi qimaseenoo Anutufa Abarahaamanara qini qiqoondi fee qinau.

<sup>24</sup> Doo innee Abarahaamana oosana qafamasee iriaqa, faiqi sia nari saqarikiranannai kaifau Anutuna faqa moodaanaki kidanoofau asaukunna qumararanannai faqa moodaanaki kidanoo.

<sup>25</sup> Yeerikoo anaasee moo Raqaba nammarifa dapi nuaanaaseefa marinau. Mifa miqi kai inoo nari asaukunna qumarasee iranannai Anutuna faqa moodaanaki kinau. Mifa Anutunara irisee Yuda maqanna qaraqanda nipuraraa fasiqagara nari maaqaki mara kukeeqaseenoo kafaa mareegeenoo moo aatata quqasoofaqa fiqau.

<sup>26</sup> Maa ufausa ati minara maaqi qinoo maridanoo. Faiqi amana sia marinanoo apata kai doo iri maridanoo kuqinoo mariannoo. Anutuna saqarikirafa nariara maridanoo miqinoo maridanoo asaku qumarasee inafa sia marinara doo kuqinoo maridanoo.

### 3

*Maasa qifauru idati miqirafa minara qimaqoofa.*

<sup>1-2</sup> Qini qikaqaafasaa Yisuna ufara suqimariasakiqari innikiqari sia moomoosa ufasaa rakisirausaiqiqa mariaqa. Maasa ufasaa rakisirausa afeeka ufa Anutufa kasooqaqee qimiannoo, kaqi qeesa oorudupinoo nimiannoo. Maasa aiqama aqgeemariasa maridaqa. Faiqi anaasee moo fannoo nari ookiqari sia aaqainafa doo mifa anoona paqurimaseenoo doo nari afaqa ainaina marirana faqa andeeqasee rakisida mariannoo.

<sup>3-4</sup> Maasa qainnannai qoosa ooki aaku amaqaaseeqa mina uqiraua fidaqa quanda quanda imarifanoo aatata fidanoo. Sipa minara faqa iriaqa firaa ainaina tia maridanoo

ooruku nammariki fidanoo ufaí firaafa fuagee marifanoo fidanoo minaki mari kiateenafa kaqíkaa sítiaqa quandee marifanoo fidanoo.

<sup>5</sup> Maasa qífauru ririmma kaqíkaa ainaina maridanoo fíraa ufa tia ririmma uqeeraidanoo. Kaqí idatiara foorá fíraa qúsau nanda utauridanoo.

<sup>6</sup> Maasa qífauru idati miqírafa maridanoo narí mariqooqari aígama mandainaina oosana oosana aígama maasa qífaaqasasa daraanidanoo. Mi idatifa Sadanna idati qumbisee quandakinoo maasa aígama marirana nirana qumbiqaraidanoo.

<sup>7</sup> Faiqí ooqai faqa maqee faqa amana kaasau ainaina oosana oosana aandau fee ufíni fee noodaanna fee maqamau nimari ainainnee firifanoo reendeeniannoo.

<sup>8</sup> Nári nifauru kai faiqí ooqaindaraí sia reendenimariafa maridanoo. Sia amana faiqí rafaqaqífrana amana maridanoo sukufa minaki qumbiqanoo maridanoo.

<sup>9</sup> Maasa minaqíqari maasa qíkooná maasa karaambaqíqara minaqíqari dufi dufi qidaqa kafaá quandaki Anutufa narí amana kai maasa qíqoonausa auquqoosa níquraraidaqa.

<sup>10</sup> Dufi dufi qírafa faqa níqurararafa faqa moodaa dooqíqari kaimma ururaidanoo. Oo qini qíkaqaafasaa mariaa mi ainainafa sia andeeqanoo maridanoo.

<sup>11</sup> Maqáqíqari ururee mari nammarifa sia moodaa aamaraindaraí sukaqee marifa faqa amiqímarifa faqa ururaidanoo.

<sup>12</sup> Sia faafisa namufaqa keefaadi iraanoo. Sia kamukamuna sanda fannoo faafisa iraanoo. Sia ooruku nammarí fannoo faqa nammarí uqanna fabaqa iannoo. Maasa nifauru fannoo kai qaaraikidanoo.

(Maaqoo mísa saqari sia marifaqa kaqí maaqooqaraa saqari auquraidaqa. Faafisa maaqooqaraasaindi Yuda maqannaasaindi mína fooqaafa asumu faafis maridanoo. Keefaadiara oorifa saqari fee qimariqau. Kamukamunara kareepa fee qimariqau.)

*Sandaaqaindaraa irirana faqa maqasaaqaraa irirana faqa mi irirannara qímaqoo ufafa.*

<sup>13</sup> Inniki moo fannoo nariara irirana faqaasee aígama ufa oosanara irimarunausee qimarifa doo mi fasiqafa narí amiqíra mariranannai faqa amiqíra qumararanannai faqa reendeenirana namufaqa narí irirana namufaqa koorooianifeera.

<sup>14</sup> Anee aneenna amuqusa ookíqari sukaqarafa faqa rairaiqírafa faqa ainainara kaaqa rirafa faqa urinana anee unna qimariananoo sia aneenna iriranara uríqarar fee qia.

<sup>15</sup> Mi irirafa sia innaarunainadaraí qumidanoo maa maqa maaqanasaaqaraafa maridanoo sia innaarunaindaraafa, afaannaindi maridanoo.

<sup>16</sup> Rairaiqírafa faqa ooníttee aníttee irafa faqa mariqoo miqoo dapi marirafa faqa mandainaina oosana oosana faqa mariqoo maridanoo.

<sup>17</sup> Innaarunaindaraa irirafa indaarugaafa sia ikairi faifa amiqírafa mífa naaree indaaru doo mína miqooqari asoaranana nimirafa faqa físoo físooirafa faqa aígamausara aqoondikirana faqa miqímarifa faiqíqara qímudaoo qírafa qumbiqanoo maridanoo mi innaarunaindaraa irirafa mífa amiqíra narana unakuseenoo afaarídanoo foorá amiqíra oosana nimirifa mífa sia qaara ufa qírafa marifa. Mína marirana faqa sia qaaraikinoo maridanoo. Innaarunaindaraa irirafa miqíminoo maridanoo.

<sup>18</sup> Asooemariasa nári amiqíra marirana qaamara fooqíqara asoaranaki ummaqusaafanoo minaqíqari amiqímmadee andeeqarafa kambíqaidanoo.

## 4

*Innee ainainara qoofana qeemariafa sia Anutunasaqaraa irirafau maridanoo.*

<sup>1</sup> Inniki rakirafa faqa tinoorirafa faqa marifa yaindaraí fee kambíqaidanoo fee. Inniqa naundurakínaa amiqíra ainainara rirana faqa mandainainara rirana faqa oosana oosana ainainara naunduraki qoofana qaidaqa rakidanoo.

<sup>2</sup> Innee akaqainainara rumammareeqa sia amana maraanaura moonaindi maridanoo qímasaidaqa faiqí narusee maraidaqa. Innee akaqainainara nimukee marifaqa sia amana maraanauree qímasee ufa rainaidaqa rakimariafanoo. Inneeqa rimaria amiqíra ainainara Anutunara sia ireeqa sia maree mariafanoo.

<sup>3</sup> Innee Anutunara irafanoo inni manda iriranara iridammunoo qímaseenoo sia nimidanoo. Innee inneeqa nífaaqaroo qíra nídirafa marifaqa mi nídiranasaa taikaanifeera Anutunara ireemariafanoo sia nimidanoo.

<sup>4</sup> Innee ummuari mari anaaseena aanna raidaqa innee maanara sia fee irídee, innee Anutuna aqoondi fee qímasaida maa maqa maaqanasaaqaraasa ainaina aqoondíkidaqa Anutuna namuqaaki mariafanoo sia fee mínara irídee. Faiqí anaasee moo fannoo maa maqa maaqanakínaa ainaina aqoondíkiannee qímaseenoo mínara kai inoo Anutuna namuqaakidanoo.

<sup>5</sup> Anutuna tamummaqara fasiqa akara moo maaqi qimasee anoonufa qidanoo, Anutufa maasaki quqoo maraqunafa maasara narindi kai fee qimaseenoo rairaiqidanoo fee qimaseenoo akara rinau.

<sup>6</sup> Sia rairaiqirana kai Anutufa sia qaara irirana iriaqeera minaindika kai iaqeera maqee maqee dadaaqirana qimidanoo. Anutuna akara minara kaifaa maaqi qidanoo, Anutufa nari nuqu uqeeraida nari nimoqimariasa rafaafidanoo qaoo qidanoo kafa quandaki reendeeni mariasa afaarimariana faqa fisoo fisoo imariana faqa nimidanoo.

<sup>7</sup> Innee mi ufana irisee inneeqa afeekaikirana minnisee Anutuna aramandunnai ooqumariaqa. Miqi mambiqa Sadannana naakaparana rafaafufusee qaoo qifanoo sandaani.

<sup>8</sup> Anutufa marinnai aaga anifanoo mifa quandaki inni naaqa aniannoo. Innee mandoosana maree mariasa inneeqa ikairi nisaukusaa marina nammari uquuqa. Innee qaara ufa qimarisa inneeqa naundura anukaaga.

<sup>9</sup> Inneeqa naanaindara qirana minnisee ikiraqaaqa innee inneeqa asasirana minniseeqa noori runuqa, innee noori kandamasee ikiraqeeqa ikifaafau iaqa.

<sup>10</sup> Miqidaqa Anutuna afusa ureeqafifanoo Anutufa inni uqeeraani.

*Yisuna ufa irimariasa sia nari aquraree nari aquraree qiaqa.*

<sup>11</sup> Qini qikaqaafasaa sia narinni narinni naraquraree naraquraree qiaqa. Faiqi anaasee moo fannoo nari akaqaafasaa aqurarara ufa qinafa Anutuna sandufa aqidanoo mina uriqararafaika midanoo. Anee anutuna sandufa aqinana anee sia mi ufana ameemaanai marianafa anee mi ufana uriqararausee qimariananoo.

<sup>12</sup> Anutufa kai sandufa nimimarifa sandufa uriqararafa maridanoo. Mifa nari kai faiqi asumu araannoo fee nari kai naru taikaannoo fee. Innee yausee marida fee inneeqa nikaqaafasaa niqida fee urinaaqaraidee.

*Duna moonna auqaaninna ainainnara sia inneeqa nimoqiaqa.*

<sup>13</sup> Innee maaqi qimariafanoo. Maqee fee duna fee qinee moo maqasaa oonureeqa bisinisamasee fee saikamasee fee firaa narana ummaquseeqa moo aukwana narana moomoo afuqai marinaqa mina akiaqara munnimma moomoo maraanaura. Innee miqi qimariasa qini ufa iriaqa.

<sup>14</sup> Innee sia duna faasaana kambiqaaninnanara irimariafanoo. Innee nari nimoqiidaqa sanapaaruna miqirausa maqa maaqa ititai qafauna dauni rakee idanoo.

<sup>15</sup> Innee minara irisee duna moonara maaqi qiaqa Karaambaiqa irirafa miqinoo marinaqa maasa miqianauree maaqianauree qiaqaana. Mina irirafa sia miqinoo marinaqa sia mina maraanaura.

<sup>16</sup> Innee sia miqi qimariafanoo maaqi qimariafanoo innee inneeqa nifaaqa nimoqi-mariafanoo firaaqoo inneeqa nuqu uqeeree mariafanoo. Miqi maria ufafa aqeeemariafa maridanoo.

<sup>17</sup> Doo qinee maqee andeeqara aana uqannifiqeeqa sia mi mau fiqa aqeeefaranoo.

## 5

*Ainaina faqaasa aaquqimannimaqoo ufafa.*

<sup>1</sup> Doo innee kaaqa firaaqoo ainainafaqaasa qimannimidaga qini ufa iriaqa. Innee dinee quqaida noori runimariafa qusasaa innisaa aqufuannoo aqufuaninnanara irisee ikiraqaaqa, ikiraqeeqa ikifaafau iaqa.

<sup>2-3</sup> Inni moomoo ainaina doo putaamma taikkeenoo inni qamunna amiqirana doo qooqoosa qumura neenee taikaseenoo inni kooru munnimma moomoo faqa siuraa moomoo faqa doo taafi aiqama aru finoo mi taafi arirafa quandaki inni mandoosana kooroo inoo inni nimaqi ida kai qamataikaannoo. Innee maa maqee kamuqoo taikainna kamuqoo moomoo munnimma ainaina afeedi mariafanoo amuaaqa amuaaqa faqa rusimariafanoo.

<sup>4</sup> Inneeqa munnimmara nimugusinaqa ainainira faiqiuqa feefauru sia andeeqasee nimimariafanoo. Misa minara faaqari mariafaqa innee sia fee minara iridee. Misa inniara feefaururara faaqarirafa mifa firaaqoo ooru fimarifanoo karaambaiqa Anutufa uriqararafa innaarunai mariqoo ooru fifanoo iridanoo.

<sup>5</sup> Innee maa maqanasaa maria kamuqoo aiqama ainainna amiqiranaki faqa nari nidimari ainaina moomoo maree marianaki faqa mariafanoo. Rakirafa anidanoo ani aqoonausa kuqa narimariafanoo innee inneeqa nifaaqa afeedidaqa narana moomoo naidaqa nainooki mariafanoo.

<sup>6</sup> Innee moomoo munnimma faqaasa innee andeeqara fasiqauqa unnufannai kootaki narira ufa nimiseeqa kuqa nári mariafaqa misa sia amana qaoo qiafaqa innee kaqi naruafaqa kuqidaqa.

*Karaambaiqa kafaa qumiranara ubiqafi marida afeesara mariaqa.*

<sup>7</sup> Oo qini qikaqaafasaa Yisuna ufa irimariasa, karaambaiqa kafaa qumiranara ubiqafi kasoomambi marida afeesara mariaqa. Ququsa akoofa narana ummaqusee sia munari minari idanoo ubiqafi maridanoo moomoo narana ummaquqaina kambiqaaranara ubiqafi afeesida maridanoo mifa aaku afeesara maridanoo aaku maqasaa quminanoo narana kambiqaannoo.

<sup>8</sup> Innee miqi kai iqa karaambaiqa qumuaninnanara afeesiaqa, mifa qusasaa qumuananoo minara inneeqa nimana mapukusee maridaqa ubiqafi afeesiaqa.

<sup>9</sup> Oo qini qikaqaafasaa sia nariara nariara munuqi miniqiaqa, miqifanoo Anutufa faqa inni faqa ufa nimiannoo. Maasa ufa andeeqaaninafa Anutufa adeediranoo maridanoo maasaki keeqarara deedaqida maridanoo. Minara nariara nariara sia munuqi miniqiaqa.

<sup>10</sup> Qini qikaqaafasaa uqa innee ooqai Anutuna tamummaqara fasiqauqa oosana irimariafanoo. Miqoo mikamuqoo marusa oosana narirana nimufaqa misa qafeeqa ubiqafiqi kasoomambi maraqau. Innee misa naanna raaqa narifaqa miqiaqa.

<sup>11</sup> Anutuna tamummaqara fasiqausa ubiqafi maroonara amiqira fasiqauqee qidaqa. Innee Yoobannara irimariafanoo, kisaagasaa ubiqafi mariunara mina aanna raaqa. Yoobanna aidafirafa taikoofanoo mina ainainira faiquqa faqa ufai faqa maqa kasirana faqa mina ainaina mara furufammasee taikaqoofanoo Anutufa quandaki firaqoo amiqi amiqi maisanau. Karaambaiqa Anutufa amuqusirana faqa nifauarana faqa qumbiqarafa marunara amiqi amiqi maisanau.

<sup>12</sup> Qini qikaqaafasaa qini ufa akiaqa maafa maridanoo. Sia inneeqa nimana niqiqaida ufa qiaqa sia innaarunai nisauku uqeerasaida ufa qiaqa sia moo ainaina kikiqususaida ufa qiaqa. Innee andeeqasee eedoo kai qiaqa andeeqasee qaoo kai qiaqa. Innee sia miqifanoo Anutuna ufa innisaa aqufuandoora.

<sup>13</sup> Innikiqari moo fannoo mandainainaki maridanoo fee Anutunara innaaruqiani. Moo fannoo asasidanoo Anutuna amooqira idi raani.

<sup>14</sup> Innikiqari moo fannoo auridanoo aurimaria fasiqa anaaseesa amaana maqasaa rakisirasa naarai faqa misa aniree mi fasiqa anaaseena auriranara innaaru qimasee sauna anoona fooqaana akiaqa amoondunna karaambaiqa auqusaa qimasee adieefaranoo.

<sup>15</sup> Misa naundura Yisunasaa mundusee innaaru qidaqa mi innaaruqirafa aurira fasiqa anaasee mara findifuanoo. Karaambaiqa fannoo marafindifidanoo mina aqarafa marinanoo karambaiqa minnisaannoo.

<sup>16</sup> Inni nariara nariara manda irira irimariannana akooroomaseenana nariara nariara amiqiaqa. Inni aurirana taikaanifeera nariara nariara innaaru qiaqa. Andeeqara fasiqa innaaruqirafa afeeka ainaina maridanoo.

<sup>17</sup> Eeriana oosana ririmma maasara foora faiqi faiqi Anutuna tamummaqara fasiqa fannoo, mifa afeekaikamandee aaku sia ruanifeera innaaru qimasoofoanoo qaara faqa qaara faqa aukuaana faqa moo ati faqa aaku sia rinau.

<sup>18</sup> Kafaa innaaru qimasoofoanoo inaarunaindari aaku maqasaa qumufannoo narana kambiqaanau.

<sup>19-20</sup> Qini qikaqaafasaa innikiqari moo fannoo anoona ufara minnisee kaqirunna mandainainaki finanoo moo fannoo andeeqara fasiqa fannoo oonu mina qumareeqeenoo amiqira aanai ubeekainafa mi fasiqafa mandoosana marai fasiqana maraquna kuqiranakinaana uqeerreeqeenoo kaqi mariraqoo quqaannoo. Mi andeeqara fasiqafa miqinannai moomoo mandoosana akiaqara faqa Anutuna afusaa rafaafafu aisaseenoo aminau.

## 1 PEETOOROO

### Peetooroofa indaaru akara rumannimu ufafa.

<sup>1</sup> Qinee Peetooroosa Anutuna asauku mundirafa Yisufa nari faiqi namuqiğari maa maqanasaa diqiqamağai fasiğausa maa ufana inni akara rumannimağaidağa.

Innee Anutufa inni rusandeesamumasee qumaroo fasiğa anaaseesa mariafanoo. Innee maaqooğari asaquakida Isaraee mağa maaqakiğari daraanimafusa Poontusa mağa maaqaki fusa fağa Karatia mağa maaqaki fusa fağa Kapadoosia mağasaa fusa fağa Asia mağasaa fusa fağa Pitinia mağa maaqaki fusa fağa inni aiqamausa maa akarana rumannimağaidağa.

<sup>2</sup> Maasa qikoofa Anutufa maqee maa kari nari ianinnanara iriseenoo inni rusandeesa-mumağoosa mariafanoo. Sia fifaufau rusandeesamuinuu.

Asauku mundirana Yisuna fidikannai findaukarausai kiaqeera fağa Yisuna ufara eedoo qimasee mi mau fuaqeera fağa Yisuna marağunannai kaağa andeegara fasiğa anaasee kammafi mariaqeera inni rusandeesamumasee maranau. Anutuna afaarirafa fağa asooarana fağa inni naundurui qumbiqağfinoo irairaaaminoo mariani.

*Naaru kambiqaaninna ainainara asasammasee afeesiranara qidanoo.*

<sup>3</sup> Karaambaığa Yisufa Anutuna asauku mundirana akoonara Anutunara maasa aığa-mausa dufi dufi qımamağaidağa. Maasa aaqarana akiğa nıfauarafa fıraafa marınara nari asauku mundirafa kuqıranakiğari findifınoo fukasaa aanaaqi kammafi marırana maasa pağurımıma qımınau. Naaru kambiqaaninnanara maqee asasığa doo mi marırafa maasa qumbiqağımagaıdanoo.

<sup>4</sup> Amıqi amıqıra ainaina Anutufa nari aiku asauku maasaree qımasee innaarunai rafaqağafımari ainaina maasa mına marararee qıdağa maasa mınasaa kai qıfu mundusee fıdağa. Mi amıqi amıqıra ainainausa Anutufa inniara innaarunai quqagağee rakısidanoo sia putaa imariqoo sia nauranaıki mariqoo sia taıkeemariqoo marıdanoo inniara rakısidanoo.

<sup>5</sup> Mi ainainausa innindi marıdanoo Anutuna afeeka fınnoo inneeğa Yisuna mandaağaranannai inni fağa mara afeedamma nımaqee marıasa mi ainainausa innindi marıdanoo. Innee taıkainna aukuanı innaarunai fındifi ooru fıranara afeesara mariafanoo Anutuna afeeka fınnoo innisaa rakısidanoo.

<sup>6</sup> Maa maqee maria kamuqoo oosana oosana inni nımanırafa aupurarafa marıannoo (Anutufa qınanoo marıannoo) mınarı innee kaqi kaaqoo noori runıranaki marıfaranoo. Mi nımanıra ainainnausara irıseeğa asasığa.

<sup>7</sup> Mi nımanıra ainainausa inni Yisuna sağarıkırana nımanıdanoo anoonaikınno marıanifeera koorooıdanoo. Faıqi maa maqanasaa marıasa koorı mıfa inaaqıanna kasooqağee taıkeemari ainainafa qumareeğa idaki quqasee tasırısırı masaida apaapu aığama uğanna aığaree marıfanoo nari idaaqırafa kai suqufıfağa doo mınarı amığıranee qıdağa. Doo inniara Anutufa mıqıkai inoo nımanırakıqi quğeeınarınara inni Yisuna sağarıkırafa sabeenara foora marıanifeera inni idakiara foora nımanıdanoo. Inni Yisuna sağarıkırana mi nımanırakı fıqa afeekaıkiğa marınafa sia fıfau koorı munnımıma inaaqıanna taıkee marı ainaina kıkıqi usırafau marıannoofau kaağa uğanna urıqarara ainaina marıannoo. Innee Yisuna sağarıkırana afeekaıkiğa marıfanoo asauku mundırafa Yisufa innaarunaindari koorooınna faasaana innee amooqıra ufa fağa areenarafa fağa ugeerarana fağa mıkarı nımınağa mareefaranoo.

<sup>8</sup> Innee sia Yisuna qafoosa kaqi nımuqusi marıfağa mınarı rırıaasa. Innee sia Yisuna qafoosa kaqi inneeğa ırırafa mınasaa rusımıarıasa mariafanoo mına ufamau fıfıaasa. Mıqımıarınara innee fıraaqoo kaağa areenarana namufağa asasımarıafanoo. Mi asıaranara faıqi sia amana mınarı ufa qıfaranoo urıqararafa marıdanoo.

<sup>9</sup> Sia fıfau asasıdağa marıafanoo Innee inneeğa Yisuna sağarıkırana anoonı nımana qumareeğeenoo innaarunai asumu marıranakı quğaranara asasıdağa marıafanoo.

<sup>10</sup> Ooqai Anutuna tamummağara fısiğauğa maa inni nımana asumu marıranakı mara quqaaninnanara irısee fıraaqoo amıqımasee queeqaaeeqamasee randağau. Mısaığa kaqi tamummağasee kasooqağee Anutufa mısa mandainaina mınnınnısee amıqi amıqıra afeeka innaarunai mareefandınna ainaina kaqi nımıanınnanara onumafı irısee akara rumasee mi ufana anoonara randağau.

<sup>11</sup> Mısa Anutunara yıree fee mıqıannoo fee nağımasaıfanoo fee mıqıannoo fee ya fısiqanannai fee mıqıannoo fee qımasee randaıdağa onumafı ırıqau. Asauku mundırana marağunı fınnoo mi tamummağara fısiğausa naakuufıfağa maa maqee aukuanara

faqa asauku mundirafa firaa aupurarana maraaninnanara faqa mina taikaranaki firaa areenarana maraaninnanara faqa akoroomasee akara riqau. Ooqai sia kambiqoo kamuqoo akara rumasoofanoo maridanoo.

<sup>12</sup> Anutufa sia mi tamummaqara fasiqausa maru kamuqoorau qimannimianau. Maa maqee maria kamuqoora inniara qimannimufaqa irisee akara rumaqoofa maridanoo. Mi tamummaqara fasiqausa minara iridaqa ainainiqau. Misa maa maqee innee irimaria anoona ufanara minara qimasee akara riqau. Mi anoonufana tamummaqara fasiqauqa ooqai akara rumaqoofa doo maa maqee maria aukwana amiqira fasaasa ufa Yisunara qimannimimariasaa doo qimannimisaafaqa irimariafanoo. Anutuna naaqqara maraquna fannoo dadaaqifaqa inni maqusa maqusa mariasa daraanimambifaqa qimannimifaqa irimariafanoo. Tamummaqara fasiqauqa ooqai akara rumaqoo anoona ufausa mina maqee irimariafanoo innaarunaindaraa qangirooouqa mi ufana misa iriafanoo iriaqaa kai imarifafa firaqoo Anutufa Yisuna maa maqanasaa arusee aqiqoonara randaidaqa. Maasa faqa maa maqanasaa marunasa faqa sia mi ainainnana amana maridaqa.

*Yisuna ufamau fimariasaa kaaqa andeeqasee mariaqa.*

<sup>13</sup> Inneeqa nitikurakinaa irirana deedaqammasee mariaqa. Asauku mundirafa Yisufa koorooinna aukwana amiqi amiqirana nimiannoo. Inneeqa naundurairirana mi amiqi amiqiranasaa munduqarasamaseeqa maridaqa rakisidaqa aufaridaqa mariaqa.

<sup>14-15</sup> Innee Anutuna ufara eedoo kai qimasee qumaraqa. Ooqai innee aamina maru kamusaqa maridaqa manda nidimaru ainainna sia maqee kamu kafa minara ootupaqa, innee aiqama marirana andeeqasee mariaqa, Anutufa inni naaree marifa kaaqa andeeqarafa maridanoo mifa indee kai iqa kaaqa andeeqaa mariaqa.

<sup>16</sup> Ooqeenaa Anutuna tamummaqarasa ufa minara maaqimminoo maridanoo. Anutufa qinoo qinee kaaqa andeeqarasa maridaqara qiga innee faqa miqi kai masee kaaqa andeeqarasaikida mariaqa.

Tamummaqarasa ufa miqimminoo marufaqa akara rumaqoofa maridanoo.

<sup>17</sup> Anutufa faiqi anaasee aiqamausa irirana qafee marifa maridanoo. Sia manda irirana iriseenoo moo dadaqammamaqeenoo moo firaqoo mandaikamamaqaidanoo nari maraana amana kai andeeqasee nimidanoo. Miqi mari Anutunara innaaru qidaqa maasa qikoo fee qidaqa maa mariaqoo noori runusee maridaqa aqaranara rufaidaqa mariaqa.

<sup>18</sup> Inni nikeeku nikaaku fifau fafau mandirirana maqeeuna minakinaana inni idukusee mareeqee quqasainara mina akiaqara firaa ainaina maridanoo innee irimariafanoo. Mi feefaurirafa sia kooro siruaa miqirafa maridanoo mifa taikee marifa maridanoo.

<sup>19</sup> Inni idukirana akiaqara feefauri firaafa fiqararafa asauku mundirana fidika maridanoo. Sia teeroo namuana faina kaaqa amiqirana Anutuna aanda tatufimaruna fooqaana amiqirana mina kuqiranannai maasa idukinau. Maasa nikeeku nikaaku mandiriranakinaana idukinau.

<sup>20</sup> Ooqai indaaru Anutufa sia maa maqa maaqana auqiraqoo asauku mundirana kaqi utaaqama nimaqaoqofanoo marinoo maa maqee taikara kamu maasaki doo kooroo inoo maasara aunirira saqarisaa kuqufanoo

<sup>21</sup> Anutufa mina kuqiranakinaana uqereeqeenoo areenaranaki quqanau. Innee minannai Yisunannai Anutunasaa mudiqa mariafanoo kafa minannai kai inneeqa irirana minasaa rusirana faqa naaru innaarunai kambiqaaninna ainainara nidirana faqa minasaa ootupanoo maridanoo.

<sup>22</sup> Maqee innee Anutuna anoona ufa irisee maraafanoo mi ufanannai inni ninukama findaukamaseenoo. Innee inneeqa niqoonausa mi ufana irimariasara kuqaa nimuqusidanoo nidimarifaqa minara kaifaa qinee qimannimidaqa inneeqa nimuqusa ookiqari noori kandamasee nariara nariara nimuqusidanoo nidiani.

<sup>23</sup> Anutuna akarakinaa ufa fannoo ooqai kaqi marufa maqee marifa naaru naaru kaqi marianinafa innee minannai kafa oorudupi mafi kafa fukasaa aanaaqi kammafi mariafanoo. Sia maaqoo kuqimaria nikoona faiqi namu mariafanoo, Anutuna kasimari akarakinaa ufannai naaru naaru marianinna nikoona faiqi kammafi fukasaa aanaaqi kammambi mariafanoo.

<sup>24</sup> Ooqeenaa tamummaqara fasiqa mina akara maaqimminoo marufa maridanoo. Aiqaqa faiqi faiqi taatuqee andanda miqiraua mariafanoo, taatuqee andanda qusau aadanusifanoo afufeenaarirafa kakasidanoo. Faiqi areenarafa miqimminoo maridanoo.

<sup>25</sup> Anutuna karaambaiqa ufa fannoo sia miqinoo maridanoo naaru naaru mariannoo.

Mi tamummaqara fasiqana ufa miqinoo marifaqa qinee Peetooroosa minara maaqi qidaqa.

Mi amiqira fasaasa ufafa naaru naaru marira ufa maridanoo mina qimannimimari-afafa irimariafanoo. Tamummaqara fasiqana ufa miqiminoo maridanoo.

## 2

*Anutuna ufa naamma anoona miqirafa marinara mina naqafuqa.*

<sup>1</sup> Innee minara iriseeqa inneeqa mandoosana aiqama fatika agusaaqa. Unnaqira ufa faqa nikaru qimasee maree mariana faqa qaaraikimari ufana faqa nariara nariara rairaiqimaria ufana faqa aasaandaana qimaria ufana faqa faiqi anaasee niqimaria ufana faqa mi ufausa sia maqee kamu inniki mariani.

<sup>2</sup> Fuka faiqi anaqiara foora naamma anoona kai naidanoo innee faqa miqikai iqa fuka faiqi aanaaqiara foora Anutuna andeeqara ufa naamma anoonara fooqaana minara kai kaaqa ruaqa. Mina naqa fifi iqa innooqeera foora iqa asumu mariranaki oonuree marifaranoo.

<sup>3</sup> Miqiqqa karaambaiqinnai oonuree mina aaqa mariaqa. Innee karaambaiqa amiqi amiqirana doo namasee qafee mariafanoo adiafaa idanoo dadaaqirafa maridanoo.

<sup>4</sup> Faiqi faiqi misa Anutuna amaana maqa usakee maru faakanara foora Yisunara nikoqoofaqa aunniranasaa arusee minnisagaqau. Minnisooфанoo Anutufa qafamaseenoo qinee ooga maa faakannara qutaaqamaqaafannana idaaqirafa maridanoo fee qimaseenoo maraseenoo amaana maqa usakararee qimaseenoo marasee kafa rakiqanau.

<sup>5</sup> Inneeqa eedoo qimasee Anutuna asaukuki inneeqa nifaaqa quqasaifanoo faakana namufaqa rakiqasee usakasainanoo faiqi naunduraki anoona amaana maqa kambigaani. Kambiqainaqa innee minaki Anutuna aanaiqi kirausaikamambi marifaranoo. Maridaqa Anutuna aidirana tatufirana suqa amidara foora amiqira irirana marirana amooqirana amifaranoo. Asauku mundirana Yisunannai miqifaranoo.

<sup>6</sup> Ooqeenaa tamummaqara fasiqa moo fannoo faakanara maaqi qimasee akara rumaqoofa maridanoo.

Qinee Anutusa rusandeesamumasee utaaqamamaqaafanna faakana idaaqirana maraseeqa Isaraee maqasaa oosanarasee rakiqeeqa. Ya fasiqa anaasee fee irisee mina saqarikinafa sia kadiqaannoo anoonaikiannoo.

Tamummaqara fasiqa ufa miqinoo maridanoo.

<sup>7</sup> Innee Yisuna saqariki mariasa oo Anutuna faakana amiqira qoonda fee qinausa mariafanoo. Sia Yisuna saqariki mariasa Anutuna tamummaqara fasiqa inniara maaqi qidanoo.

Innee maaqa usakaidaqa manda faakanee qimasee mareeqee agusoofanoo fiqumaree kafa amiqira faakana uriqararafai kammambi maridanoo.

<sup>8</sup> Ooqeenaa tamummaqara fasiqa akra moo maaqimminoo maridanoo.

Maa faakanasaa faiqi moomoosa niku qamaki saamurifaranoo Mi saqarifa misa niku amanniminaqa saamurifaranoo.

Tamummaqaraura ufa miqimminoo maridanoo. Minara moomoosa Anutuna ufa irisee sia maroonara niku amaki saamuriqau. Anutufa misara mi iriranasaa saamurifandiafoo qimaqoona miqiqau.

<sup>9</sup> Innee sia miqi mariasa mariafanoo. Innee Anutufa rusandeesamumasee maree marisa mariafanoo. Innee karaambaiqa Anutuna uriqararana aanaiqiki mariasa. Innee naaduma kaaqa andeeqara maqanna mariafanoo. Innee Anutuna nari maqannaasa mariafanoo. Mifa inni asukunakinaana naaramasee mareeqee nari idaaqira kaaqa qara andeeqaranaki inni quqasaifaqa mariafanoo. Sia fifau minaki mara quqeenoo innee Anutuna idaaqira afeeka ainaina imarianara aiqamausa nifusaa koorooiaqee qimaseenoo inni mara nari kaaqa qara andeeqaranaki quqaidanoo.

<sup>10</sup> Oogaq sia Anutuna maqannaasa marusa maqee minaindi mariafanoo. Oogaq innee Anutufa maasa qifauaranara qifauaranara qimudao qiranara innee sia irimariafanoo maqee innee mina maraafanoo inni faqa kukeeqafinoo qumee maridanoo.

*Innee asaqiraafaira foora maridaqa sia mandoosana maraqa.*

<sup>11</sup> Oo qini qiqaonduqa, qinee Peetooroosa qeeqa qimuqusa ookiqari naamua qidaqa. Innee Yisunara irimariasa maa maqa maaqanaki maridaqa aanaamuruara



foora asaƣiraafaira foora mariafanoo. Miƣiƣa maridaƣa maaƣoo faiƣi faiƣi manda nidimari ainainafa inniara ƣini maraaƣee ƣinaƣa sia eedoo ƣimasee ƣinaƣa. Mi manda ainainausa inni maraƣuna arimarifa maridanoo innee moo maƣannaasara foora mariafanoo sia maraaƣa.

<sup>12</sup> Innee aamina maƣannaaki nidaƣa maridaƣa inneeƣa nirana marirana amiƣimasee nifaƣa misa inniara mandoosana mareemariasee ƣimasee inni nindafeeƣa oo amiƣimasee mariaasa ƣimasee misa faƣa ƣandafi Anutuna amooƣiƣa Yisufa innaarunaindari ƣumuraifaƣa amooƣifaranoo.

<sup>13-14</sup> Ƣinee Peetooroosa maanara faƣa ƣimannimidaƣa. Maƣasaa kaamanna firaa uriƣararafa faƣa maaƣa uriƣararausa faƣa karaambaifa Anutufa misa ƣuƣanau, mandoosana mareemariaasa narifaƣa iriaƣeera faƣa amiƣira oosana maree marisa nimooƣira ufa nimiaƣeera faƣa mi uriƣararausa karaambaifa maƣasaa ƣuƣanau. Innee inneeƣara innaarunai karaambaifa faiƣi namu maridee ƣimasee aiƣama maƣasaa fasiƣa anaaseesaa rakisi mariaasa ureeaƣa maridaƣa misa ufara eedoo kai ƣiaƣa.

<sup>15</sup> Furufari mariaasa inni Yisuna ufa irimariaasa minara manda dapi ufa inni nimifaƣa sia aanooƣirana nariranannai rafaƣaƣuƣaƣa. Anutufa inniara inneeƣa amiƣira nira mariranannai mi furufarirana ƣiƣanuusa ufa rafaƣaƣuƣaƣeera ƣidanoo.

<sup>16</sup> Innee mandainainaki rumbara fasiƣara foora sia nuaƣa mandainainakiƣari idukira fasiƣara foora kaƣi nifaƣa ƣuƣasee andeeƣara oosanaki asasida fuaƣa. Sia inniƣa mandoosana kaifaa maraaƣee ƣimaseenoo unna ƣimasee faiƣi anaasee nifusaa mafi rafaƣaƣufusee mandoosanakiƣari idukirafara foora nuaƣa. Anutuna rumbara fasiƣa naanna ramasee kaƣi nuaƣa.

<sup>17</sup> Innee sia aiƣamausara ƣini ƣimana fee ƣimasee furufariaƣa, aiƣamausa nári uriƣararana amanasaa mina afusaa rufiaƣa. Aiƣama Yisuna ufa irimariaasa niƣoonausa Yisuna ufa irimariasara nimuƣusinoo nidiani. Innee Anutunara naaƣuƣaani. Kaamanna firaa uriƣararanara faƣa naaƣuƣaani.

*Innee Yisuna aanna ramaseeƣa aupurarana nimifaƣa kaƣi maraaƣa.*

<sup>18</sup> Ƣinee Peetooroosa kafia ƣimannimidaƣa. Innee maƣasaa feefauruara ainaini mariaasa inni rakisimariaasa ufara eedoo ƣimaseeƣa misa ureeaƣa maridaƣa misara naaƣuƣamasee andeeƣaseeƣa misa ufamau fuaƣa. Sia reendeeni maria rakisirausara kai miƣiaƣa aanoo ƣimarinausara faƣa miƣi kai iaƣa.

<sup>19</sup> Innee miƣifanoo Anutuna eedoo ƣira ufa innisaa mariannoo. Inni rakisirausa fifau aanoomasee inni narifee ummaara nimifee ifaƣa innee inneeƣara Anutuna iriranamau fida fee ƣimasee reendeeniƣa. Reendeenifanoo Anutufa inni amiƣi amiƣimmannimaƣaani.

<sup>20-21</sup> Innee mandoosana maraifanoo inni rakisirausa mina akiƣara narifaƣa reendeenamasee maraifanoo Anutufa mi reendeenirana akiƣara sia inni nimianoo inniƣa mandoosana akiƣara maridanoo. Innee amiƣimasee marifanoo inni rakisirausa fifau narifaƣa fifimmandee maraifanoo Anutufa inniara eedoo ƣiannoo. Fifau narirana fifimmandee marainnana minara kai Anutufa inni naarameeƣeenoo nari ufa irimariasaki ƣuƣeenoo. Asauku mundirafa nári kai fifau aupurarana inniara maranau. Yisufa fifau aupurarana maranau. Doo innee mina afaƣamareeƣa mina aanna ramasee miƣiaƣa.

<sup>22</sup> Mifa sia moo mandoosana maranau. Sia moo unna ufa mina afaurusaa marinau.

<sup>23</sup> Misa aƣurara ufa amufanoo sia mifa ƣandafi mina akiƣara nári niminau. Misa aupurarana mina apatasaa ƣuƣoofanoo sia mifa misa aanoo ufa niminau kaƣi nári irirana Anutunasaa andeeƣara ufa nimimarunasaa nári irirana ƣuƣasee kuƣinau.

<sup>24</sup> Asauku mundirafa nári kai maasa mandainaina aƣarana nári apatasaa mara ƣuƣaseenoo doo aunirira saƣarisaa kuƣirana maree finau. Maasa kuƣirausara foora sia mandoosana maraaƣeera kuƣinau, amiƣira oosana kuƣira foora iƣa marida maraaƣeera kuƣinau. Mina afaƣa aateƣaƣoonannai maasa daundura uninoo maridanoo.

<sup>25</sup> Innee sipsipa aandaara foora furufariƣa auiaƣa nuafanoo doo maƣee Anutufa inni nimanasaa rakisimari finnai inni aandaara foora rakisimari finnai ƣuƣasaifaƣa mina afaƣe fimariafanoo.

### 3

*Ninaaƣmaakara ƣinoo nifaƣaƣmaakara ƣinoo.*

<sup>1-3</sup> Ƣinee Peetooroosa ainaini mariausara nári rakisirausa ureeaƣa mariaƣee ƣunnana innee faiƣi ninaaƣmaka faƣa miƣi kai iƣa inneeƣa nifaƣaƣmaakara eedoo ƣimasee ureeƣarusaikamambi mariaƣa. Innee miƣifaƣa inni nifaƣaƣmaaka akaƣausa Anutuna ufara sia fee ƣimariaasa maridaƣa sia inni ufa fannoo misa dadaaƣiannoo inni andeeƣara marirafa kai uƣannifiƣaannoo. Innee inneeƣa nifaƣaƣmaaka faƣa maridaƣa andeeƣara

marirana marasee noori kandamasee marirana faqa marifaqa misa nári nifunnai inni andeeqarana qafeefaranoo. Sia afaaqa auqimari ainainnara irisee afaaqa amiqi amiqiaqa, akiaqaki afaaqa auqimariannana faqa afaaqa auqimaria oondana faqa siarara faqa qamunnara faqa sia minauqara irisee nifaqa amiqi amiqiaqa.

<sup>4</sup> Inni nifaqa amiqi amiqirafa inniqa nimuqusa ookiqari amiqira marira marirafa minannoo kai nifaqa amiqi amiqiani. Inni nifaqa mari inanoo asooqaaaninafa maridanoo, fisoo fisoomasee kasooqagee aqumurira oosana fannoo mifa sia asooqagee mariafa maridanoo minannai kai mara nifaqa auqaaqa. Mi oosannafa Anutuna afusaa amiqira oonda uqanna maridanoo.

<sup>5</sup> Ooqai Anutuna ufa irimaru anaaseesa Anutufa innaarunai nimirree quna minara asammassee afeesidaqa maaqimasee nári nifaqa auqimariqau. Misa nári nifaq-maakara eedoo qimasee ureeaqa maridaqa minannai nári nifaqa auqidara foora imariqau.

<sup>6</sup> Saraqafa miqimaru anaaseefa marinau. Mifa nari afaaqi Abarahaamana ufara eedoo qimasee qini uriqarara fee qimarinau. Innee miqimandee amiqira oosana mareeqa sia oosana oosana ainainara rufieeqa Saraqana araamummaakai kamambiqa marifaranoo.

<sup>7</sup> Qinee Peetooroosa doo aanaaseeuqara qiqa doo maqee anaasee nifaqmaqkara qianaura. Anutufa kaqi marirana kaqi nimidanoo aneenna anaqa faqa aneenna faqa mi mariranaki mariafanoo minara aneenna aanaaqara amanna fee qimasee amandakusee mina faqa maria. Innee miqimasee inneeqa ninaaqmaaka faqa marifanoo moo ainaina fannoo sia innee Anutunara innaaru qirana ititaannoo.

*Andeeqara marira akiaqara mandufa aminana amiqira ufa kai naramia.*

<sup>8</sup> Mi ufana atisaa maaqimminoo marifaqa qimannimianaura. Innee Yisuna ufa iri-mariasa aiqama ainainara moodaa irirafa mariani aiqamausa moodaanaki kai nimuqusa quandaqa. Innee nariara nariara nikaqaafasaara foora nimuqusidaqa aiqamausa nariara nariara ruaqa. Innee nariara nariara fifimmasee reendeenamasee miqidaqa nariara nariara qimudaoo qimasee nari dadaaqi nari dadaaqiaqa.

<sup>9</sup> Mandoosana aminana sia quandakinana kafaa mandoosana amia. Aqurararufa aminana sia kafaa quandafi nari aquraraa. Mi manda oosanna akiaqara quandaki amiqi amiqirana kai amia. Anutufa amiqi amiqirana kai nimirree qimasee inni naarama nari ququsaki quqaseenoo innee miqi kai iqa amiqi amiqirana kai mandoosana nimimariasaa nimiaqa.

<sup>10-11</sup> Ooqeenaa tamummaqara fasiqausa akara maaqimminoo maridanoo.

Faiqi moo fannoo maa maria mariranaki amiqiranaki asasiranaki marianee qimaseenoo doo mi fasiqafa manda nirana taikaseenoo unnufa taikaseenoo manda marirana ameesa uqaseenoo amiqira marirannai ubeekaannoo. Miqinna fasiqafa asoosara-nara randamareenoo afaqee fidanoo miqinoo fidanoo amiqirana paquriannoo.

<sup>12</sup> Maqasaa fasiqa moo fannoo andeeqasee fimarifanoo Anutufa nari afu minasaa quqaseenoo rakisidanoo mina innaaruqirana maqee maqee iridanoo mariannoo, mandoosana maree mariasara ameesuqunnisaidanoo.

Tamummaqaraura ufa miqiminoo maridanoo.

<sup>13</sup> Qinee Peetooroosa kaifaa qimannimidaqa. Anee amiqira mariranara minara rumammaree marainanoo ya fasiqa fee manda marirana ani amiannoo fee sia ani amiannoo.

<sup>14</sup> Faiqi moo fannoo ani andeeqarana akiaqara ani mandaikamamaqainanoo ani asasir-afa firaafa mariannoo. Innee sia faiqiara rufiaqa sia aiqama ainainara amandirinoo aindiri raani.

<sup>15</sup> Innee maqee maqee inneeqa nimuqusaki asauku mundiranara naaquqainaqa mina mareeqee inneeqa karaambaigaiqiaqa. Akaqausa inni innaarunai ainainara asam-masee afeesimarianara iraiifaqa innee faasai Yisuna saqarikiranara deedaqammaqain-nana misa qimannimiaqa.

<sup>16</sup> Sia raiqasee qimannimia, ireeda nimandakusee qimannimia. Inni nisakadiki anukarafa kai mariani. Faiqi akaqausa inniara asauku mundirana afaqee mariasee qimasee mandufa nimiseeqa inni amiqi marirana nindafamasee nisaaurifanoo.

<sup>17</sup> Innee mandoosana maree marifaqa narifanoo amanaikammianoo. Anutufa eedoo qinaqa amiqira oosana akiaqara fifau narifanoo uriqaraannoo.

<sup>18</sup> Asauku mundirafa nari uqanna inniara kuqinau. Moodaa suanisaa moodaa kari kai aiqamausa mandoosanara kuqinau. Inni nisauku qumareeqeenoo Anutufinnai quqaaneera amiqirafa maasa manda fasiqa anaaseera kuqunnimaqanau.

<sup>19</sup> Mifa asuku mundirafa mina afaaqa kuqufufanoo mina amana fannoo findifinoo kaqi mariranaki finoo kafaa miqooqari ooqai kuqusa nimana rumbaranaki marunaki ooqureenoo Anutuna ufa qimanniminau.

<sup>20</sup> Ooqai Nooafa sipa fraana auqidanoo nammari anianinnanara faiqi anaasee minara faqa qimannimimarufaqa siammirimariqau. Anutufa faiqi anaasee Nooana ufa iriseeqa mandoosana minniseeqa sipaki keeqaaqeeera nifeesusia doo kooqi ititaseenoo nammari-nai narinau. Nammari narusa nimana marunaki asauku mundirafa kuqiranakiqari findifinoo ooquree qimanniminau. Naru nammari dinni qisauku taikasee dinni ani qaaramoo marasee oodaa fasiqa anaasee asumu mara akoonnai quqanau.

<sup>21</sup> Nooafa sipaki asumu mariunara maasa faqa maqee kamuqoo mina amana kai amaana nammari marasee asumu mariaqee qidaqa. Sia fifau nammari maraanannai nifaqaqindaraa qikairi rukarafa anoona maridanoo. Nammari maree mariana anoona maaqimminoo maridanoo. Aneenna aakirana amuqusa ookiqari Anutunara kuqaa qima afeekaikirafa kamasee nimirafa mifa anoona maridanoo. Mifa kai kuqaa nammari maree mariafa maridanoo. Mifa kai Yisuna kuqiranakinaana findifunannai inni asumu marirana nimidanoo.

<sup>22</sup> Yisufa kuqiranakiqari findifinoo innaarunai oorufinoo Anutuna aaga mina asauku uqannai ooqu marifufanoo Anutufa aiqama innaarunai nari qangirooqaa faqa Sadanana afaanauqa faqa misa oosana oosana afeekauqa faqa mareeqeenoo Yisuna araman-dunnai quqaqoofanoo maridanoo.

## 4

*Ooqeenaa mandoosana minniseeqa fuka marirana maree mariafanoo.*

<sup>1</sup> Asauku mundirafa afaaqasaa aupurarana nari apatasaa maranau. Innee miqiannee qimasee afeekaikamandee deedaqammasee mariaqa. Yisuna ufasaara nipatasaa nidafirana mareemariasa miqooqari sia mandoosanna maree mariannai ubeekkeefaranoo nikoogaina amiqira aanai ubeekkeefaranoo.

<sup>2</sup> Nipatasaa nidafirana naruqooqari innee maa maqanasaa maridaqa inniqa nidira mandainaina fannoo sia inni mara quqaannoo, Anutuna irirafa kai inni mareeqee quqaani.

<sup>3</sup> Ooqai inni marirafa maaqimminoo marinau. Nari nifaqa kooroo kooroo iranara faqa, faiqi anaasee nariara nariara kaaqa rirana faqa nammari namasee furufarimariana faqa faiqi anaasee suqufi manda oosana maree mariana faqa moomoosa suquffaqa nammari neemariana faqa unnaqira anutunara innaaru qimasee mina auqusaa mandoosana maree mariana faqa innee minauqaki kai indaaru mariqau. Doo innee ooqaindari kisaaqasaa minaki kai mariusa mariafanoo doo saqa amanaikiga mariafanoo maqee sia minaki mariaqa.

<sup>4</sup> Ooqai innee faqa misa faqa mandoosana qambaana aiqufiqa mariusa mariafanoo doo maqee sia misa faqa fuafaqa misa tautiqa aanooqiqa aasaandaana mandufa inni qimannimaqaidafa.

<sup>5</sup> Kasooqaqee misa faqa Anutuna afusaa nari mandoosanara kooroomasee mina akiqara mareefaranoo. Anutufa kaqi mariasara faqa kuqirusara faqa ufa iriseenoo rainaranara deedaqammasee maridanoo.

<sup>6</sup> Minara kai amiqira fasaasa ufa Yisufa kuqirusa qimannimisoofaqa iriqa. Mi kuqirusa kaqi maaqoo marufanoo Anutufa aiqama faiqi anaasee imariandee kai inoo rainannimaqasoofaqa kuqiqu. Mi kuqirusa nimana Anutufara foora naaru naaru mariranaki mariaqee amiqira fasaasa ufa qimanniminau.

*Nariara nariara andeeqasee riqa inneeqa nimana kai dadaaqiaqa.*

<sup>7</sup> Doo aiqama ainaina taikarafa adeediranoo maridanoo. Innee maqee maqee Anutunara innaaru qiraree qimasee inneeqa nimanara irisaida kai fuafa maqee maqee aufaridaqa mariaqa. Innee sia miqiga aqara oosana mareeqa naqimasee Anutunara innaaruqifaree. Sia amanaikifara.

<sup>8</sup> Aiqama amiqira ainaina ninaaqararafa maafa maridanoo, sia nifaurunoo kai unna qimasee nariara nariara ruaqa, nisaukunoo dadaaqirana faqa nimuqusannai faqa nariara nariara ruaqa. Nariara nariara nimuqusirafa moomoo manda oosana rafaqaqidanoo.

<sup>9</sup> Innee nari maaqaki nari maaqaki keeqafi narana suqasee naraaree naraareemasaida naa. Anaamuru faqa paqurimandee miqi kai iaqa. Sia aundura rumbee marinana miqia aundura idukinoo marinana miqia.

<sup>10</sup> Anutufa afaarinoo oosana oosana ainaina akoofasaikirana niminnana aqoonnana dadaaqianera niminoo sia inneeqara kai maqeeiaqeeera niminoo. Innee Anutufa

nimimari ainainnasaa amiqira rakisiranara foora rakisidaqa naadu naadu niminna ainaina akoofasaiikiranara marasee minannai niqoonausa dadaačiaqa.

<sup>11</sup> Amaana ufa qimannimimari fasiqafa Anutuna ufa kai qimannimiani. Faiqi dadaaqimariasa Anutufa nimimari afeekanannai afeekaikamasee niqoonausa dadaačiaqa. Miqinanoo aiqama ainainiranaki asauku mundirana Yisunannai Anutuna amooqira ainaina kambiqaifuannoo aiqama areenarafa faqa afeeka faqa naaru naaru marianinafa minaindi Yisunaindi kai maridanoo. Kuqa.

*Yisuna ufamau firanara akiaqara aupurarana mareefandinna oosanara qimaqoofa.*

<sup>12</sup> Oo qini qifaagasaa qiçoondiqa, qinee Peetooroosa qimannimidaqa. Innee Yisuna ufara aupurarana maree mariasa sia tautiaqa nanee moo manda ainaina maasaki kambiqeenoo fee qimasee munari minari sia iaqa.

<sup>13</sup> Kaqi asasa kai iaqa. Maasa asauku mundirana aupurarana naida qimina maraidee kai qimasee asasiaqa. Miqifanoo innaarunaindari mina kaaqa areenarafa faqa koroomambinaqa maasa asasirana qumbiqarusa marianauro.

<sup>14</sup> Oo qini qifaagasaa qiçoondiqa, qinee Peetooroosa qimannimidaqa. Innee Yisuna ufasaara aupurarana maree mariasa asasiaqa kaaqa areenarana maraquna Anutuna maraquna maasa naakinoo maridanoo fee qimasee asasiaqa.

<sup>15</sup> Yisuna auqusaara aupurarana nimifaqa asasiaqa, mandoosana akiaqara aupurarana nimiranara eeraiqaga. Innee Yisuna ufa irimariasa innikiqari sia moo fannoo fidika ruqiasainanoo kuquani sandufa rukiarafa faqa sia mariani, ummuarirafa faqa sia mariani, moosa mandainainaki keeqaranara innikiqari moo fannoo sia uqanna mi mandoosanna marasee mina akiaqara aupurarana maraqa.

<sup>16</sup> Innee Yisuna ufara aupurarana maraseeqa sia minara nisauruaqa, Yisuna auqu maasasa marinarana Anutunara dufi dufi qiaqa.

<sup>17</sup> Anutufa aiqamausa ufa irira aukuaana doo ani maridanoo. Anutufa narí faiqi namu ufa naaree iriannoo. Iridanoo misa faqa aupurarana nimiannoo. Miqi qimasee nimiranoo Anutuna ufara nikooqee marisa naqi fee iannoo fee firaqoo uqanna misa ufa nimiannoo.

<sup>18</sup> Ooqeenaa tamummaqarusa akara minara maaqimminoo maridanoo.

Andeeqara fasiqauqa nimeekamakida asumu mariranaki keeqaidaqa, Anutunara nikooqee marisa faqa mandoosana mareemariasa faqa naqi fee ifaree, firaqoo mandaikifaranoo.

Tamummaqara fasiqa ufa miqi qimaqoofa maridanoo.

<sup>19</sup> Minara iriseeqa Anutuna iriranasaa aupurarana maree mariasa nári amiqira mariranannai nári nifaqa nári auquqoo fasiqanasaa nári nifaqa amiqimasee quqasee marifaranoo. Inni auqufa ooqai qima afeekaikammaqoofa marifanoo doo miqoo kai fuannoo sia rakeeiannoo.

## 5

*Yisuna ufara suqimariasasaa rakisirausa misa oosanara qimaqoo ufafa.*

<sup>1</sup> Minara inni amaana maqasaa rakisimariasa qimannimidaqa. Qinee Peetooroosa amaana maqasaa rakisimarunausa maridaqa inni qimannimidaqa. Qinee asauku mundirana aupurarana qeeqa qifunnai qafaafanausa maridaqa, kasooqaqee innaarunaindaraa kaaqa qarafa akooroo inaqa qinee faqa akaqana marararee qidaqa inni qimannimidaqa.

<sup>2</sup> Innee amaana maqasaa rakisirausa faqa amiqira asumu aandau rakisidara foora mariaqa Anutufa innee faiqi aanaaseera asumu aandauro foora rakisiaqee qidanoo. Sia nikoo nikaamasee rakisinnimaqaaqa Anutuna iriranamau kai asasammasee rakisinni-maqaaqa. Sia feefaurara kai irisee mi rakisira saikana maraqa naundurakinaana dadaaqianee qimasee maraqa.

<sup>3</sup> Innee amaana maqasaa rakisimaria fasiqausa sia inneeqara uriqararasee qimasee fuki faaki qiaqa, innee fidaqa quandafi ireeda kai faiqi anaasee nifiqee andeeqaramau kai fuaqa.

<sup>4</sup> Innee miqimasee faiqi anaasee rakisifanoo aandauro foora rakisirafa firaafa Yisufa innaarunaindari akooroomafinoo kaaqa areenara qafee inni nikiqasaa quqasee nimianoo sia areenarafa taikaaninafa naaru naaru kaqi marianinafa.

<sup>5</sup> Miqi kai iqa innee kumaaraauqa faqa inneeqa faiqi firaasa nimeemaanai miqi kai masee ureeqa mariaqa. Innee aiqamausa oorudupi oorudupimafinaqa qamunnara foora afisusee mariaqa. Tamummaqarusa akara minara maaqi qidanoo. Anutufa faiqi anaasee nári nuqu uqeere mariasa rafaqafidanoo fifimariasa adifaairana faqa amiqirana faqa nimidanoo.

<sup>6</sup> Tamummaqara fasiqa ufa miqinoo marinara innee minara irisee Anutuna afeeka asauku ameemaanai uqeeqaq marifanoo narí aukwana qumureenoo inni uqera uriqararanaki quqannisaannoo.

<sup>7</sup> Mifa Anutufa inniara amuqusimarifanoo rakisidanoo. Minara inniqa aiqama ainainara naundurakinaa ummaara rufiarana nimukee marina naindiri ree mariana minauqa moodaanaki uqeeqeeqe Yisuna minasaa kai aqusaifanoo dadaaqiannoo.

<sup>8</sup> Innee inneeqa nimanara irisee aifarida mariaqa inni namuqaa Sadannafa kaasau fainiara foora fiq u faiq idanoo yanee nambiqaanau yanee nambiqaanau qidanoo.

<sup>9</sup> Aiqama maqa maaqaki inni niqoonausa Yisuna ufa irimariasa moodaa karammida aupuree mariafanoo. Minara irisee innee inneeqa Yisuna saqarikamma mapukusee maridaqa Sadannafa aninaqa ititaidaqa mariaqa.

<sup>10</sup> Innee maaqoo maqasaa maridaqa kaqikaqoo nidaqirafa mariannoo. Marifanoo kaqi afaarirana akoofa Anutufa inni naaraidanoo narí naaru naaru kaaqa areenarana asauku mundirana namufaqa narí namufaqa inni nimiannoo. Innee maaqoo marifanoo mifa kai inni anoonaikama nimaqaannoo mifa kai naunduraki mapukirana nimiseenoo afeeka faqa afeeka maaqa atuna fooqaana nimiannoo.

<sup>11</sup> Aiqaama afeeka rakisinnimaqarafa naaru naaru minaindi mariannoo. Kuqaa.

*Atisaa nimandoo ufa.*

<sup>12</sup> Qini amiqira qikaqafasaa Sirafanusafa dadaaqifaqa maa kaqikaakarana rumanni-maqeeqa. Innee Yisuna ufaki mariafaqa qinee qimannimidaqa nifeeqaraidaqa, innee minaki maridaqa kuqaa Anutuna afaariranaki mariafanoo. Innee minaki mapukufi kikiqiaqa.

<sup>13</sup> Yisuna ufa irimariasa Babiroonia maqusa mariasa faqa maridaqa Anutufa misa faqa rusandeesamumasee maroosa maa papiqanaki inni nimandaqidaqa. Qini qimaaku Marikoofa mifa faqa inni nimandaqidanoo.

<sup>14</sup> Innee Yisuna ufa irimariasa imariandee narí amooqee narí amooqee iaqa.

Innee asauku mundirana araamuqmaaka faiqinamu inni naundurari asoarafa mari-ani.

## 2 PEETOOROO

### Peetooroona inaaqianna akara.

<sup>1</sup> Qini Simoona moo duqu Peetooroosa qinee asauku mundirana Yisuna ainainira faiqi Yisufa maa maqanasaa diqiqamaqoo fasiqausa marunausa maa akarana inni rumannimaqaida. Maasa Anutufa maasa asumu maree marifa asauku mundirafa Yisufa nari andeeqaranannai amiqira oondara fooqaana nari saqarikirana maasa qiminau, inni faqa mi amiqira ainainna niminau.

<sup>2</sup> Innee Anutuna faqa Yisuna maasa karaambaiqara faqa iridaqa mi iriranannai Anutufa nari kaqi nimirana faqa nari asooarana faqa inniki qumbiqafinaqa mariaqa.

*Peetooroofa maasa oosana oosana andeeqara mariranara qimaqoofa.*

<sup>3</sup> Anutufa nari kaaqa qara amiqiranannai maasa daaree marina Yisunara irianara eedoo qinoo doo minannai nari innaarunaindaraa afeeka maasa qimanakai qimifaqa minannai Anutuna andeeqara marirana maa maqanasaa maraanaura.

<sup>4</sup> Mi innaarunaindaraa afeekanannai nari kaaqa idaaqira amiqi amiqirana nari qima afeekaikammaqoona maasa qiminau. Mifa qima afeekaikammaqoo kaaqa amiqira ainainannai maasa maa maqanasaa mariafanna mandainainara fanandirana faqa putaairana faqa qima afeekaikammaqoo afeekana mara mareega fi ruqiqaki fidaqa Anutuna aunduraindaraa irirana andeeqara mariranaki mariraree qidaqa miqidaqa.

<sup>5-6</sup> Innee innaarunaidaraa andeeqara marirana maridaqa minara kai innee inneeqa Yisuna mandaqaqaranasaa minasaa afeekaikamasee inneeqa andeeqara marirana minasaa ootupaaqa. Ootupamaseeqa Anutuna ufa asaana rumasee amiqimasee irirana faqa minasaa afeekaikamasee ootupaaqa. Kafaa miqooqari innee inneeqa nimanara iriseeqa mina faqa afeekaikamasee ootupaaqa. Kafaa miqooqari noori kandamasee maridaqa ainainirana faqa afeekaikamasee mina faqa ootupaaqa. Kafaa miqooqari Anutuna aannararana faqa afeekaikamasee ootupaaqa.

<sup>7</sup> Kafaa miqooqari nari nikaqaafasara foora nariara nariara aidirana mina faqa afeekaikamasee ootupaaqa. Kafaa miqooqari nariara nariara nimuqusirana mina faqa afeekaikamasee ootupaaqa.

<sup>8</sup> Mi amiqira ainainausara innee sarauci mariafanoo. Innee mi ainainausa moo faqa moo faqa maree marifanoo mifauga inni dadaaqifaqa innee karaambaiqa asauku mundirana Yisuna iriranaki maridaqa sia fifau marifaranoo sia kadiqarasa marifaranoo innee kasi kasidaqa anonaikimariasa marifaranoo.

<sup>9</sup> Faiqi moo fannoo mi amiqira ainainausa sia marainafa mina afu dimbarafa sia qafaidanoo nari mandainaina findaukamaisoonara aunuseenoo miqidanoo.

<sup>10</sup> Innee aiqamausa nifusaa maqee maqee moo faqa moo faqa afeekaikamasee Anutufa inni rusaandesamumasee maroonara kooroo iaqa.

<sup>11</sup> Innee mi amiqira ainainausa afeekaikamasee inni Yisuna saqarikirana ootupamasaifanoo maasa karaambaiqa asauku mundirafa asumu maree marifa Yisufa mina qafamaseenoo nari naaru marira ququsaki firaa qoo kooqi atu aguseenoo inni naarameeqee minaki quqaanoo.

<sup>12-13</sup> Qinee minara iriseeqa maa ainainausara maqee maqee naaqoo auqemariana iriqa maraaqera. Innee sia aunimariafanoo irimariafanoo anoona ufasa afeekaikamafi atooqafi irimariafaqa kaifaa qimannimidaqa. Qinee maqoo sia kuqidaqa kaqi maridaqa inni kafaa kafaa naaqoo auqaranara andeeqanoo mari ifoo qidaqa.

<sup>14</sup> Qinee maa maqanasaa kuqiqqa qipata qusasaa quqaanauree qidaqa iridaqa. Maasa karaambaiqa asauku mundirafa Yisufa akooqoo daamua qimaqooqoo kai qusasaa quqaanaura.

<sup>15</sup> Qinee kaqi maridaqa afeekaikamasee qimannimidaqa kasoogaqee kuqufuanaqa moo ainaina kambiqaanaqa amiqimasee irisaida narimau fuaqera qimannimidaqa.

*Sia Peetooroofa uri ufafau qimanniminau. Qinee qeeqa qifukoo qafaafannanara qidaqee qinau.*

<sup>16</sup> Sia maasa faiqi uri ufafau iriseefau asauku mundirana

<sup>17-18</sup> Yisunara maa maqanasaa firafa innaarunaindarii qumunara qidafau maasa qeeqa qifunnai mina uriqaranara qafaafannanara qimannimidaqa. Maasa qeeqa kai mina faqa naaquqara aqanasaa mariafanoo firaa kaaqa qaranakiqari Anutuna ufa qumufaqa maasa iriqaifana, maafa qini didira qimaaku marifaqa qinee minara ridaqa asasidaqa. Mi ufanannai Yisuna auqu firanaikinoo kaaqa areenarana aakuumaqooafaqa maasa miqoo marida qafeeqa iriqaifana.

<sup>19</sup> Maqee maasa mina qafamaseeqa ooqueenaa tamummaqara fasiqauqa akarara kuqaa fee qimariafannana, maqee anoona qafamaseeqa doo kuqaa uqanna anoona fee qidaqa. Innee tamummaqara fasiqauqa ufa amiqimasee irifanoo naaqooki keeqainaga amiqamandee marifanoo. Misa ufa asukunaki qoomara foora kaaqa qaida maridanoo iqqarana afeesianoo duqudeeqiara foora Yisufa inni nimuqusaki kaaqa qaannoo.

<sup>20-21</sup> Innee maa ainainna naaree iriaqa. Innee tamummaqara fasiqauqa ufa irimariana sia minakinaa moo ufa fannoo nariara aaduma anoona maridanoo. Si tamummaqara ufa moo fannoo faiqi iriranasaa kambiqaanau. Naaquqara marauna fannoo mi tamummaqara fasiqausa uqeereeqeenoo Anutuna iriranaki quqasoofaqa qafamasee nari maqanna qimannimisee akara rumaqoofa maridanoo sia nari kai iriqau.

## 2

### *Peetooroofa unna amaana ufa qifandinausara aaquqimaqoo ufafa.*

<sup>1</sup> Ooqai Isaraee maqannaasaki unnaqira tamummaqara fasiqauqa aniree kaqiruna mara ubeekke mariqau. Maqee maa aukuanna misa undee kai iqa unnaqira amaana ufa qimanniminausa inniki kambiqeefaranoo. Mi fasiqausa Yisuna ufa iriisa rakeemaki kaqinni oonuraasauqa maridaqa qumee faiqi kuridinnisee maria unna amaanafana inniki uqeereefaranoo. Yisufa nari kuqu fidikanannai misa kuqiranakinaana feefauru fasiqanara sia irirai nikooqainaga nari kuridirana nari kai mareeqee nari nifaaqai quqeefaranoo.

<sup>2</sup> Miqifaqa inniqiqari akaqausa misa ufa iriseeqa mi manda fasiqausa naanna ramasee faiqi anaasee qummuarira oosana mandoosana mareefaranoo. Miqifaqa faiqi anaasee akaqausa misauqa niqafamaseeqa quandaki anoona aanara manda aana fee qifaranoo.

<sup>3</sup> Unna qida uqannifiqemariasaa kaaqa ainainara rimariasaa maridaqa misa unnufa inni qimannimi marifaqa mi unnufanannai munnimma aina maree marifaranoo. Ooqaindari naaru kisaagasaa misa ufa nimimarifa kuqira ufa misasaa quqasaifanoo mi kuqirafa misara nifeesidanoo. Misa kuridi nimaqee marifa Anutufa sia faiqaidanoo afu maqasee deedaqinoo maridanoo.

<sup>4</sup> Ooqai innaarunaindaraa qangirooqqa akaqausa mandoosana marasoofanoo Anutufa sia nifauanau mareeqee idaki aquseenoo sainandannai rumbaqaosa ufa aukuanara afeesida kaqi maridaqa.

<sup>5</sup> Ooqai indaaruu maru fasiqausa mandoosana marasoofanoo Anutufa sia nifauanau nammari aufiranannai naruseenoo Nooona andeeqara oosana qimannimi maruna faqa nari faiqi namu dinni qisauku taikasee dinni ani qaaraqanda maraseenoo misa namufaqa asumu akoonnai quqanau.

<sup>6</sup> Soodooma maqusa faqa Koomoora maqusa faqa Anutufa idannai aiqamausa naru taikanau. Maasa aiqamausa mandoosana akiaqa qafamasee rufiaaqeera naru taikanau.

<sup>7</sup> Rootafa nariara andeeqarafa marinuu misa nariara nariara qummuarirana faqa ufa rukiarana faqa Rootafa qafamaseenoo akooqee marufanoo Anutufa mina kai asumu akoonnai mara quqanau.

<sup>8</sup> Mi andeeqara fasiqafa misa qambaana marida faasaambaasaana misa mandufa irinoo misa mandoosana qafee marufanoo amuqusa mandaiki marinuu.

<sup>9</sup> Qinee Peetooroosa minara irisee maaqi qidaqa Anutuna ufa irimaria fasiqausa oosana oosana nimaniranaki aquqifanoo Karaambaiqa misa mi nimaniranaki dadaaqira oosana iridanoo dadaaqiannoo. Mandoosana maree mariasa narirana ameemaana qaquqai faqa maridaqa ufirira faasaanara afeesida rakisira oosanara Anutufa iridanoo maridanoo.

<sup>10</sup> Anutuna ufara fidiqaammasee nari manda nipata manda nidiramau fimariasaa misa narira oosanara faqa Anutufa firaqoo iridanoo. Unnaqira amaana ufa uqannifiqee mariasa misa inniki paasoosida aanooqidaqa maridaqa. Innaarunai kaaqa qee mariasara faqa sia naaquqai faqa rufiidaqa mandufa kai qangirooqqa faqa nimidaqa.

<sup>11</sup> Mi qangiroosa afeeka mi manda fasiqausa afeeka urinaqaranoo maridaqa mi fasiqausa ufa iriqa sia aanoomasee Anutuna afusaa oonuree misa nariranara qimamidaqa. Anutufa nari kai andeeqaannoo fee qimasee minnisaidaqa.

<sup>12</sup> Unna qira amaana ufa uqannifiqee mariasaa nariqa kuara fuseena iriranamuu fidaqa innaarunai mari ainainnara sia irimaria ainainnara mandufa qimasaida kaasau aandaara foora ufaanaki narifandinausa kambiqaida miqidaqa. Miqi mariasaa Anutufa kaasau aandaara foora kaqi naruannoo.

<sup>13</sup> Misa kuridirana moomoosa nimifanoo Anutufa mina ati quandeeqee nariqa nimianoo. Nari manda ainainnara nidimarina faasaanasaa kaimma asasamandee maridaqa. Innee Yisuna ufa irimariasaa qoomaqa inni faqa moodaanaki qoomaqaquqidaqa nari

nikaruqira oosana maridaqa inni andeeqee mariasa nisaurirana manduqarana nimi-daqa kudimakidaqa miqidaqa.

<sup>14</sup> Unna qira amaana ufa uqannifiqee mariasa ummuari mari anaaseena mararee qimasaidaqa randaidaqa. Misa manda oosanara naararee marisa sia nimuquq idanoo. Unna qira aana uqannifiqee mariasa misa furufari mariasa oonu rarisameeqee ufaana fainnai ubeekamasai faqa ufaana aridaqa. Mi unnaqirana uqannifiqee mariasa naranara faqa ainainara faqa fanandirana akoofasa maridaqa. Misa Anutuna niqurarara ufa ameemaanai mariasa maridaqa.

<sup>15</sup> Unna qida amaana ufa uqannifiqee mariasa misa andeeqara aana minniseeqa fifau dapi fukasaa fidaqa. Ooqai Baraamafa Boosorana amaaku mandoosanna maree maria munnimmanara rumammaraidanoo kaaqa ridanoo namuqaa ufa irisee Isaraee maqannaasa nupuka narwaneera doonkisa fimarinau.

<sup>16</sup> Mina doonki fannoo faiqiara maqi ufa qidanoo akoono furufarira oosana rafaqaqafimarinau. Minannai Anutufa Baraamana mandoosana qaoo qinuu. Inniki unna qira amaana ufa uqannifiqee mariasa Baraamana aatata fidaqa miqidaqa.

<sup>17</sup> Unna qira amaana ufa uqannifiqee mariasa aadaturu nammari miqiraua maridaqa asuru miqirana ufai fannoo kaqinni sufafaa quqaidanoo. Anutufa fira asukuna misa afeedama nimaqaidanoo.

<sup>18</sup> Mi manda fasiqausa nari nifaaga amooqimariana faqa furufari marianara faqa ufa qidaqa. Faiqi anaasee akaqausa nari mandoosanakiqari findifi aqee kai aanai ubeekarariafaqa mi mandoosanna maree mariasa misa mareeqee nari ufaanaki mara naridaqa. Mi fasiqausa nari mandainainara nidiranannai ufaana fufuseeqa minaki mara naridaqa.

<sup>19</sup> Unna qira amaana ufa uqannifiqee mariasa aqee kai andeeqara aanai ubeekke mariasara unna qida uneemaana qimasee maasa manda oosanakinaana idukira oosana uqannifiqanauree qimasaida nari kai faiqi kuridi maria oosana fannoo nari rumbannimaqaidanoo. Nana ainaina moo mandainaina fannoo faiqi afaaga rumbasainafa doo mi ainainafa kai mina rafaqaqafimari ainainafa maridanoo.

<sup>20</sup> Miqi mariasa akaqausa asaku mundirana, Yisufa asumu maree marifa maasa karaambaiga, misa akaqausa minara irimarianannai minannai maa maqanasaa kuridira mandainaina rafaqaqafiranaakinaana idukunnisaidanoo andeeqara aanai ubeekkeeqa kafaa quandaki kafaa manda ainainaki aqufinausa mi fasiqa anaaseesa indaaru mandainainaki ida afaisaa mariaasa maqee doo firaqoo uqanna ida qambaanaki mandainainaki aqufuafanoo.

<sup>21</sup> Miqimari fasiqa anaaseesa andeeqara aana sia qafaifanoofau amana marini. Misa kaqikaqoo qafamaseeqa innaarunaindaraa ufa rukiaidaqa kafaa quandaki fimarifaano firaqoo mandaikidanoo.

<sup>22</sup> Misa ooqeenasaa ufamuu fidaqa faini nari fidirana kafaa nari naidanoo, kuarara foora afaaga nammari uqusainanoo kafaa oonu dikoomaki doona reeree mareenoo anidanoo misa miqimmidaga.

### 3

*Peetooroofa Yisufa kafaa qumuaninna ufana faqa maa maqa maaqana idaqaaninna ufana qimaqoofa.*

<sup>1-2</sup> Oo qini qifaagasaa qiqoondiuga qinee indaaru pasa akara rumasee inni nimaqaqafana kaifaa maa maqee inaaqianna akara rumannimaqaidaqa. Aiqama akaraqaraki amiqira ufa inni nitikuraki quqarara nikaru qimaria fasiqausara inni naaqoo auqeeqa ooqeenana naaquqara tamummaqara fasiqausa ufa qianaqa iriaqeeera. Asumu maree marifa maasa karaambaiga mina aaquqira ufa nari niqiqoo fasiqausannai inni qimannimu aaquqirufana iridaqa sia aunuqa, irida mariaqa. Minara faqa inni naaqoo auqaida akara ridaqa.

<sup>3</sup> Innee maa indaaruga ainaina iriaqa, sia iriqa furufari foora. Taikara aukuaana akaqausa nari mandainainara nidirana mara quqemariasaa miqimariasaa kambiqaqifiqa inniara ataasa atasaida maaqi qifaranoo.

<sup>4</sup> Yisufa kafaa qumiraree fee qinoo fee. Yaqoo fee maridanoo fee sia kafaa qumuannoo. Doo maasa qikeeku qikaaku doo kambiqafi kuqigau. Oosana aroo aukuanasaaqari aiqama ainaina amana kai fidanoo.

<sup>5-6</sup> Qinee Peetooroosa minara maaqi qidaqa. Mi aaqara ufana qimariasaa maa ainainara qikoomma irirara qaiqaqee qidaqa unnaqimasaida sia iridaqa. Ooqai Anutufa maa maqa maaqana nammari aafirannai kuridinau. Ooqai indaaru Anutufa qufanoo sia maru ainainnai maa maqa maaqana auqusoofanoo kambiqanau. Maa maqa maaqana



nammarinnai auqusoofanoo nammarikiqari kambiqaanau. Kafaa miqooqari nammari aufiranannai maa maqa maaqana ooqeenana amiqimmandee kuridinau.

<sup>7</sup> Maa maria maqa maaqana faqa innaaruna faqa Anutufa nari ufannai afeedidanoo idannai qamataikaanifeera afeedidanoo. Innaaruna faqa maqa faqa manda oosana maree mariasa faqa Anutufa afeeda maqaifaqa marida moodaa kari idaqama taikaannoo fee qidanoo. Minauqara faqa misa qikooqafaqee qimasee unnaqidaqa sia iridaqee qidaqa.

<sup>8</sup> Qini qigoondiuga maa ainainna sia aunuaqa amiqimasee iriaqa. Karaambaiqa irirafa maaqimminoo maridanoo moodaa faasaana faqa moomoo aukuaana faqa (wan tauseenna aukuaana faqa) amanamana kai fee qinoo maridanoo. Akaqausa karaambaiqa ufa anoonara sia dauni kambiqa qimaqaidanoo fee qidaqa noori runidaqa.

<sup>9</sup> Karaambaiqa sia anuqidanoo, maa maqa maaqanakinnaa fasiqa anaasee moodaa nariranara akooqaidanoo misa aiqama nari mandainaina nimeesuqusee noori Anutufinnai ubeekamafi minni kai fuuqeeru minara amiqimasee kisaaqasaa aiqamaasaa nifeesidanoo. Kisaqa aukuanara faqa qusa aukuanara faqa amanamana kai fee qidanoo amiqimasee nifeesidanoo.

<sup>10</sup> Karaambaiqa kafaa qumira faasaana qumuara fasiqara foora tautumasee kambiqaanoo. Mi faasaannasaa innaaruna firaqoo darara qirana namufaqa doo taikafuannoo. Innaarunaki mari ainainna qugoona faqa suani faqa fasau faqa aiqama ida qama taikafuannoo, maa maqa maaqana faqa minaki mari ainainafa faqa aiqama qama taikafuannoo.

<sup>11</sup> Miqinoo aiqama ainaina idaqama taikaaninnanara irisee innee minara nana oosana faqaasa marifaree fee qidee. Inneeqa rufaseeqa mariranara naaquqara andeeqara marirana maridaqa Anutuna ufamau fidaqa faiqi anaaseeki andeeqasee mariaqa.

<sup>12</sup> Innee Yisufa koorooianinna faasaanara afeesidaqa inneeqa andeeqara mariranannai mi faasaannara kaqi kaqi marirana maraqqeera kisaaqasaa innaaruna faqa innaarunai maria fasau namufaqa aiqama ida firaannai tasirisirimma taikafuannoo.

<sup>13</sup> Anutufa fuka innaaruna faqa maqa faqa kuqaa auqu quqannimaqaanaaree qima afeekaikammaqoofa maridanoo. Mi fuka maqanasaa andeeqarasa kai mi fuka maqanasaa maridaqa nifaqa quqasee maasa maqusa uqannee qifaranoo. Maasa mi fuka maqusanara kai afeesida maridaqa.

<sup>14</sup> Qini qigoondiuga innee mi faasaannara afeesida maridaqa Anutuna afusaa maridaqa nisakadiki qikaiiri siaisa mandainaina siaisa mariaqa innee faqa Anutuna faqa noori runirafa sia mi qambaanna mariani asooarana kai mariani.

<sup>15</sup> Anutufa maasa qikaqafasaa Pauroona nari irirana amufanoo maa akarana rumaqoomau qinee faqa mi mau kai fidaqa. Mifa maaqimandee akara rinau. Karaambaiqa sia dauni qumi marina sia fifau kisaaqasaa maridanoo, maasa nariranara akooqafanoo maasa innaarunai asumu marirana maraqqeera kisaaqasaa nifeesidanoo. Pauroofa qinnaqoo miqoo kai inni irirafa miqoo kai fuani.

<sup>16</sup> Pauroofa nari pasauqaki mi ufanara qidanoo miqi qimasee qimannimidanoo. Mina pasauqaki faiqi irisee sia dadi anoona iriaqaa ira afeeka ufa akaqafa maridanoo. Akaqausa irirana siaisa munuree miniree imariasa mi afeekufana iriqa mara saaeemeeqee uqiqqammeeqee kaqi runna ubeekaidaqa. Sia Pauroonaindi kaifau miqidau aiqama Anutuna ufa akarakinnaa miqi kaimmidaqa nariqa kai nari kuridirana mara naakida miqidaqa.

<sup>17</sup> Qini qigoondiuga qinee mi ainainnara aaquqimannimaqaunaqa irimariafanoo. Minara aufarida rakisida mariaqa. Ufa rukiee mariasa nari aaqaranannai inni rarisameeqee kaqirunna quqaidaqa. Miqifaqa innee ooqai mariu mariranaki fiqa saamurifaara.

<sup>18</sup> Maasa Karaambaiqa maasa asumu maree marifa asaku mundirafa Yisufa mina amiqira marirana irirana minaki kai fidaqa maqee innooqaqa. Maqee faqa naaru naaru faqa mina amooqira ufa mariani. Kuqaa.

## 1 YOOHANEE

### Yoothaneefa indaaruaa akara rumannimaqoo ufafa.

*Yoothaneefa Yisuna faqa nidanoo aiqummasenoo akara rumaqoo ufafa.*

<sup>1</sup> Qinee kaqi marira ufa anoonara Yisunara akara rumasee qimannimidaqa. Mi kaqi marira ufana Yisufa ooga maa maqa maaqafa sia marunakina marufa maridanoo qinee mi ufanara qimannimidaqa. Maasa mi ufana anoona qifunnai qafeeqa daaqoonnai iriqafana. Maasa qifu qafamasee qisaukunnai akooqoo kaqi marirana anoona marufafa auqamasee qafeeqa qimannimidaqa.

<sup>2-3</sup> Yisufa mi kaqi marira anoonafa kooroomafufaqa maasa mina qafeeqaramma inni qimannimidaqa. Mifa naaru naaru marirana anoona nari akoona Anutuna faqa marufa maasaki maa maqanasaa kooroomafunara minara inni qimannimidaqa. Maasa mina qafaafana ainainara iriafana ainainnara inni faqa qimannimidaqa. Maasa faqa mina akoona Anutufa faqa amaaku asaku mundirana faqa moodaanaki innisaimbaqa mariraree qimasee inni qimannimidaqa.

<sup>4</sup> Innee faqa maasa faqa innisaimbaqa naundurai asasirafa qumbiqaanifeera inni maa ufana akara rumannimaqaidaqa.

*Anutufa kaaqa qarafa maridanoo.*

<sup>5-6</sup> Anutuna amaaku ufa moo maasa qimaqimufaqa maasa mina akooroomasee inni qimannimidaqa. Mi ufana maaqi qinoo Anutufa kaaqa qarafa qoomara foora sia kaqikaa asukuna marifa maridanoo. Mi ufana qimaqiminou. Maasa qeeqara Anutuna faqa aqoondi fee qimasee quandaki asukunaki keeqafidaqa maasa ufa faqa marirana faqa unna qidaqa, sia anoonamau fidaqa.

<sup>7</sup> Maasa Anutuna aanna reeqa suanisaa rakeeiraqoo nunausa moodaanaki marunasa maridaqa nariara nariara aqoondi kammiqa maridaqa. Maasa Anutuna aanna reeqa kaaqa qara qoo fimarunanoo nari amaaku Yisuna fidika fannoo maasa aaqarana numoo aiqama findaukaidanoo.

<sup>8</sup> Maasa nariara sia mandainaina marifaqee qidaqa narakaru narakaru qidaqa Anutuna anoona ufa sia maasaki maridanoo unna ufa kai maasaki maridanoo.

<sup>9</sup> Maasa nari mandainaina oosana oosana Anutuna akooroomma nisainanoo mifa andeeqee marifa maridanoo andeeqa qimaqaannoo mifa maasa numoo taika qiseenoo maasa mandainaina aiqama anukama qisaannoo nari ufamau andeeqasee fimarifa maridanoo mi mau fuannoo.

<sup>10</sup> Anutufa maasa aiqamausara aaqee mariasee kai qidanoo. Maasa nariara sia aaqee marunausee qimariana Anutunara unna qimari fee qidaqa miqi qidaqa mina ufa anoona sia maasaki marifaqa miqi qidaqa.

## 2

*Yisufa maasa aaqarana andeeqarufa qimaqoo ufafa.*

<sup>1</sup> Qini faiqi namu sia innee aqaqaqeeera maa ufana akara ridaqa. Yisufa asaku mundirafa andeeqarafa Anutuna afusaa maasufa dadaaqa fasiqafa maridanoo faiqi faqa anaasee faqa moo fannoo aqaifanoo Yisufa minara iriseenoo maasa qikoofinnai oonureenoo maasa aaqarana andeeqa taikaannoo.

<sup>2</sup> Anutuna asaku mundirafa mifa kai aandau tatufirafara foora maridanoo. Minannai maqasaa fasiqa anaasee mandainaina akiaqara taikanniseenoo doo maasa Anutufinnai mafi qisaidanoo. Sia maasaindi kai aiqama anaamurundi minannai kai taikannisaaninafa maridanoo.

<sup>3</sup> Maasa Anutuna ufa iriseeqa mi mau fidaqa kuqaa Anutunara iridee qianauro.

<sup>4</sup> Faiqi faqa anaasee faqa moo fannoo Anutuna aqoondi fee qimasee sia Anutuna ufamau finafa mifa unna qimarifa sia anoona ufa minaki marifa maridanoo.

<sup>5</sup> Anutuna ufara eedoo qimasee mi mau finafa kuqaa Anutunara rimarifa mifa anoonaikinoo mariannoo. Maasa maaqi qimaseeqa maridaqa kuqaa Anutunaki maridee qianauro.

<sup>6</sup> Faiqi faqa anaasee faqa moo fannoo qinee kuqaa Anutunaki maridee qimasee mifa asaku mundirana aanna ranoo marinaqa kuqaa Anutunaki marifa maridanoo, sia asaku mundirana aanna rainafa unna qimarifa maridanoo.

*Yoothaneefa fuka naakaparufa qimaqoofa.*

<sup>7</sup> Qini qifaagasaa qiqoondiuga. Maa ufana sia fuka ufa maridanoo innee oosaindarii iri maria ufafa maridanoo. Ooqeenaa ufa irimariafa maridanoo.

<sup>8</sup> Maa fuka ufafa ooqeenanasaa ootupamasee inni qimannimidaqa akara ridaqa. Maa fuka ufana anoona asaku mundiranaki kooroo inoo maridanoo inniki faqa koorooma nimaqaidanoo, doo asukuna afaqaidanoo fuka kaaqa qarafa qoomara foora inni qambaanai qaidanoo.

<sup>9</sup> Mi fukufana maaqimminoo maridanoo. Moo fannoo nariara Yisuna kaaqa qaranaki maridee qidanoo quandafi nari akaqaafasaara fidiqaa inafa mifa sia kaaqa qaranaki maridanoo asukunaki kaqi maridanoo.

<sup>10</sup> Moo fannoo nari akaqaafasaara rinafa mifa faasaana miqiranasaa maridanoo, sia minaki aiku amaki aqufirafa mariannoo.

<sup>11</sup> Nari akaqaafasaara fidiqaa imaria fasiqa anaaseesa asukunakiara foora maridaqa, asukunaki nidaqa firannai anirannaira randaidaqa mikimakanidaqa asukuna fannoo misa nifusaa ititanoo marifaqa miqidaqa.

<sup>12</sup> Qini faiqi namu, qinee inniara akara ridaqa. Inni mandoosana Anutufa nari asaku mundiranara iriseenoo doo inni mandoosana aqiqaara mininnisoonara qinee inni akara rumannimaqaidaqa.

<sup>13</sup> Innee faiqi fraasa indaaru Yisuna ufa irusa inni akara rumannimaqaidaqa. Innee Yisunara ooqai oosana arooqooqari marinara irimariasa mariafaqa minara inni akara rumannimaqaidaqa. Qinee inni kumaaraauqa faiqi namuara akara rumannimaqaidaqa. Innee aakaqaqindaraa fasiqa uraaqaramafuanara inni akara rumannimidaqa.

<sup>14</sup> Qinee inni faiqi namu faqa akara rumannimaqaidaqa. Innee inneeqa nikoona Anutunara irimariafaqara akara rumannimaqaidaqa. Innee faiqi fraasa innee Yisunara oosana arooqooqari marinara irimariasa mariafaqa minara inni akara rumannimaqaidaqa. Qinee inni kumaaraauqa faqa akara rumannimaqaidaqa. Innee nimudaanai qimariasa mariafaqa Anutuna ufa inni mariranaki marifa maridanoo innee aakaqaqindaraa fasiqa uraaqaramafuusa marianara inni akara rumannimaqaidaqa.

<sup>15</sup> Innee sia maa maqa maaqanasaaqaraa mandirana mariranara ruaqa. Minaki mari ainainnara faqa sia ruaqa. Innee maa maqa maaqanasaaqaraa manda iriranara rimarifanoo Anutunara rirafa sia inniki mariannoo.

<sup>16</sup> Maa maqanasaaqaraa mandainaina oosana maaqimminoo maridanoo. Maasa manda daundurakiqari oosana oosana ainainnara randeemarunannara faqa maasa oosana oosana ainaina qafamasee marararee qimarunannara faqa maasa nifaqa amooqimariana faqa maa ainainausa aiqama sia maasa qikoofinaindari qumu mari ainainafa maridanoo aiqama maa maqanasaaqaraa ainaina kai maridanoo.

<sup>17</sup> Maa maqa maaqanaki maria mandirana marina ainainausa faqa faiqi nidimari mandainainausa faqa doo taikanoo qumidanoo kasooqanee fraaqoo taikaannoo. Faiqi fee anaasee fee moo fannoo Anutuna iriranamau fimarifa sia maa maqa maaqana namuqaqa taikaanno, kaqi naaru naaru mariannoo.

*Asaku mundirana namuqaara qimaqoo ufafa.*

<sup>18</sup> Qini faiqi namu, taikara aukuna adeediranoo maridanoo. Ooqai asaku mundirana namuqaqa uriqararafa aniannoo fee qimasee qimannimiafannana doo maqee mina namuqaqa moomoo kooroomafi maridaqa. Maasa mina qafeeqa taikara aukuna adeediranoo maridanoo fee qidaqa.

<sup>19</sup> Mi namuqaasa maasaki mariusa rakeemaki namuqaakiqau. Misa maasaki maridaqa sia maasa irirana amiqimasee maroosa marusa. Misa kuqaa maasaindi maridau maasaki kaqi marini. Anutufa maasa dadaaqianee qimasee misa qumeenni niqiqoofaqa maasakiqari rakeemakufaqa fufanoo Anutufa minannoo misa mandoosana kooroo inau.

<sup>20</sup> Innee sia misa naanna ree mariasa mariafanoo asaku mundirafa kuqaa nari naaquqara andeeqara maraqunna inni naakunnimaqee marifaqa mariafanoo innee Yisuna anoonufara irimariafanoo.

<sup>21</sup> Innee Yisuna anoona ufa sia irifaqau sia akara rini irimarianara akara rumannimaqaidaqa. Sia unna ufa moo fannoo anoona ufakiqari kambiqaidanoo. Innee minara faqa irimariasa mariafanoo.

<sup>22</sup> Yafee unnufa qimarifa maridanoo Yisunara sia Anutuna asaku mundira fee qimarifa mifa unna ufa qidanoo asaku mundirana namuqaqa maridanoo.

<sup>23</sup> Miqi qimarifa sia mina amaakuara kaifau qaoo qidanoofau mina akoona Anutunara faqa qaoo qimarifa maridanoo. Faiqi fee anaasee fee moo fannoo mina amaaku marainafa mina akoona Anutuna faqa maraannoo.

<sup>24</sup> Ooqai indaaruu Yisuna ufa iriisa mifa inni naunduraki marinara amiqimasee rakisiya. Yisuna ufa irufa inni naunduraki marinaa doo innee minannai amaaku faqa nari akoona faqa atukarasee miqandaki marifaranoo.

<sup>25</sup> Marifanoo asauku mundirafa nari uqanna moo ainaina maa ainainna nauru marirana qimirree qinuu.

<sup>26</sup> Akaqausa inni ueeqasee nikaru qimarifaqa maana minara qimannimidaqa akara rumannimaqaidaqa.

<sup>27</sup> Qinee inniara iridaqa asauku mundirafa nari ufa inni naakunnimaqoofanoo maridanoo. Mina ufa fannoo inniki maridanoo sia fifau moo fannoo aana inni uqannifiqaannoo. Mina ufa fannoo nari kai aiqama ainaina anoona ainaina faqa unna ainaina faqa rainasee qimannimidanoo sia moo unna qidanoo. Innee Yisuna ufa irisee eedoo kai qiaqa. Miqidaqa asauku mundiranaki kaqi mariaqeeera qidaqa.

<sup>28</sup> Oo qini faiqinamu Yisunaki mariafanoo kaqi minaki kai mariaqa. Miqi marifanoo nari innaarunaidari quminaqa sia innee nisaurusee kukeeqaaqa kaqi nifaqa quqasee qafaqa.

<sup>29</sup> Innee asauku mundiranara irimariafanoo mifa andeeqemarifa maridanoo. Innee maanara faqa doo iriaqa, faiqi fee anaasee fee moo fannoo andeeqara oosana marainafa mifa faqa Anutuna faiqiara foora maridanoo.

### 3

*Yoothaneefa maasa Anutuna faiqi namuara qimaqoo ufafa.*

<sup>1</sup> Innee qafaqa maasa qikoofa Anutufa firaqoo maasara amuqusifanoo rimarifa maridanoo. Maasara firaqoo amuqusifanoo maasara nari faiqi namu fee qidanoo. Maa maqa maaqanasaaqaraasa Anutunara sia irunnanara mina faiqi namu maasara faqa sia iridaqa.

<sup>2</sup> Qini qifaqasaa qiqoondiuqa, maqee maria aukuaana Anutuna faiqi namu maridaqa. Kasooqagee innaarunai mina faiqi namu maridaqa nana amiqira ainaina fee moo faqa ootupamma qimiannoo fee maasa sia minara iridaqa sia akooqoo maridanoo. Moodaa ainaina kai maasa iridaqa. Asauku mundirafa innaarunaidari koorooinaqa maasa mifara foora mariana. Maasa mina nari uqanna raquramisee qafamasee minara nari foogaanaikammiana.

<sup>3</sup> Maqee maria kamuqoo asauku mundirana asasammasee afeesara mariaasa minara indee indee idaga nariqa mandoosana findaukaqa fidaqa.

<sup>4</sup> Moo fannoo aqee marifa Anutuna ufa rukiaidanoo aqaqaidanoo. Qaqaqarana oosana oosana fannoo Anutuna ufa rukiarafa maridanoo.

<sup>5</sup> Asauku mundirafa sia fifau koorooinau, maasa aqee marunnana mara aquaneera koorooinau, minaki sia aqarafa maridanoo innee minara irimariafanoo.

<sup>6</sup> Minara maasa asauku mundiranaki mariaasa sia kaqi mandainainaki nidaqa. Yafa yafee kaqi mandainainaki nida fee mifa asauku mundiranara sia irifa sia uqanna minara irimarifa maridanoo.

<sup>7</sup> Qini faiqinamu nikaru qimari fasiqafa anireenoo inni ueeqaandoo qimasee maana inni qimannimidaqa aufariaqee qidaqa andeeqara qoo nimariaasa andeeqarasa maridaqa asauku mundirana aanna rarausa andeeqarasa mariaqa.

<sup>8</sup> Yafa yafee mandaikiraqoo kaqi nimarifa mifa Sadannanainidi maridanoo, Sadannafa nikaruqirafa maridanoo nikaruqiannoo. Ooqai oosana arooqooqari mandainainaki nimarifa Sadannafa maridanoo Anutufa nari amaaku maa ainainnara maa maqanasaa koorooinau, Sadannana mandainainirana arutaikaanifeera maa maqanasaa koorooinau.

<sup>9</sup> Yafa yafee Anutuna faiqi maridanoo fee sia mi fasiqafa mandaikiraqoo nidanoo. Anutuna oosana anoona uqanna minaki maridanoo, Anutufa mina akoofa marinara sia amana mandaikiraqoo fimariannoo.

<sup>10</sup> Doo qinee maqee Anutuna faiqi namuafa Sadannana faiqi namuafa akooroomasee qimannimidaqa. Faiqi anaasee moo fannoo sia andeeqara qoo nimarifa sia Anutuna faiqi maridanoo, nari akaqaafasara faqa sia uriqarara ainainee qimaseenoo minara sia amuqusimarifa mifa sia Anutuna faiqi maridanoo.

*Yoothaneefa maasara nariara nariara nimuqusiaqee qimaqoo ufafa.*

<sup>11</sup> Ooqai indaaruu maa ufana innee irimarusa mariafanoo mi ufana oosana maaqimminoo maridanoo maasa nariara nariara uriqarara ainainee qimasee nimuqusiani.

<sup>12</sup> Maasa sia Kaina aanna raa, mifa Sadannana faiqi maridanoo nari akaqa arinau. Kainafa nanaree nari akaqa arinoo fee inau. Nari auqoo ainaina mandaikufanoo, mina marirafa nirafa eendaandinoo marunara nari akaqa nirafa marirafa andeeqanoo marunara minasaara aanoomaseenoo arinau.

<sup>13</sup> Qini qikaqaafasaa uqa maa maqa maaqanakinnaasa inniara fidiqaafafaqaa siamma innee minara tautiaqa. Kaina oosana maraifaqa misa inniara fidiqaammifaranoo.

<sup>14</sup> Maasa kuqirana minniseeqa kaqi mariranaki ani maridaqa. Maasa nariara nariara andeeqasee qimuqusunnanara minara maasa kaqi mariranaki animaridaqee qidaqa. Yafa yafee nariara nariara sia andeeqasee amuqusinafa kaqi kuqiranaki maridanoo sia anikeegaidanoo.

<sup>15</sup> Yafee faiqi moo fannoo nari akaqaafasaa fidiqaa imarinafa mifa doo kuqa nari marifa maridanoo. Innee maana iridaqa faiqi kuqa nari mariasa sia naaru marirafa misaki maridanoo.

<sup>16</sup> Maasa nariara nariara uriqarara ainanee qimasee nimuqusira oosana maaqimminoo maridanoo. Asauku mundirafa maasara amuqusidanoo nari marirana maasara aunirira saqarisaa quqasee kuqinau. Doo maasa faqa miqi kai iqa maasa qeeqa qikaqaafasaa Yisuna ufa irimariasa mina ufasaara kuqiranaki firariifaqa maasa misa rafaafunnimaqasee kaqi mariaqee qimasee misa nimaqa maqasee kuquanaura.

<sup>17</sup> Moo fannoo ainaina nari amanasaa maqeeifa nari akaqaafasaa saraqirananaki marina qafamasee qimudaoo qimasee amiraree qimasee nari amuqusirana amuqusinanoo nari amuqusa muqufi rafaafuseenoo sia dadaaqinoo, naqimasee miqinna fasiqafa Anutunara qini qimuqusaki maridanoommifoo qiannoo fee. Sia amana maridanoo.

<sup>18</sup> Qini faiqi namu, maasa nariara nariara uriqarara ainanee qimasee rirana sia afaurunnai kai qia. Asaukunnai anoona ainaina kai nari ami nari ami iranannai kai mina anoona kooroo inoo kambiqannoo.

*Yoohaneefa maasara Anutuna afusaa paasoosiaqee qimaqoo ufafa.*

<sup>19</sup> Maasa miqiannanannai kuqaa anoonasaa atooqa maridee qianaura. Maasa miqiannanara maaqoo nidaqa maridaqa Anutuna afusaa mirinni maridanoo maasa qiqafainafa paasoosianaaura.

<sup>20</sup> Maasa aqaamasanaanoo maasa qimuqusa darinanoo Anutufa qimuqusa uriqararafa maridanoo maasa aiqama ainainara irimarifa maasara amuqusinoo sia daruannoo.

<sup>21</sup> Maasa qimuqusirafa sia darinaqa Anutuna afusaa paasoosammianaaura.

<sup>22</sup> Paasoosidaqa maasa nana ainainaree sarau ianna ainainnara innaaru qiananoo Anutufa maasa qimiannoo. Maasa mina ufara qimuqusannoo eedoo qimasee Anutuna aidimari oosana maridaqa iraanna ainainara qiananoo mifa qimiannoo.

<sup>23</sup> Anutufa maa naakaparufana maasa qimaqiminu. Innee qini qimaaku Yisuna qini qisauku mundiranara inneeqa irirana minasaa rusisee quandaki nari mina ufamau fiqa nariara nariara uriqarara ainanee qimasee nimuqusiaqee qinau.

<sup>24</sup> Yau yausee Anutuna naakapara ufamau fimarinausa misa Anutunaki marifanoo kafaa Anutufa misaki maridanoo. Anutufa nari maraquina nimiqoona minara Anutufa maasa daunduraki maridanoo fee qidaqa.

## 4

*Unna maraqunara faqa kuqaa maraqunara faqa rainaaninnanara qimaqoo ufafa.*

<sup>1</sup> Qini qifaagasaa qiqoondiuga. Moomoosa nariara Anutuna maraquina maasaki marisee qimariana sia mina irisee aiqamausara kuqaammifoo qiaqa. Innee misa nimanamasee qafaafa kuqaa Anutuna maraquina fee moona maraquina fee misaki maridanoo fee. Unna qimaria tamummaqarasa aiqamai daraanammiaqaa marianara qimannimidaqa.

<sup>2</sup> Innee maaqimasee nimanamasee qafaafa, kuqaa fee Anutuna maraquina misaki maridanoo fee. Ooqai maa maqa maaqafa sia maruqoo Anutufa innaarunai Yisunasaa asauku munduseenoo kasooqaqee anee aiqama maqasaaqarasa asumu mareena fee qimaseenoo mina qimaminu. Doo maqee inniki moo fannoo maa akooqooqaraanara Yisunara mifammifoo qinafa mifa Anutuna maraquina faqaafa mariannoo.

<sup>3</sup> Moo fannoo aqara ufa qinafa asauku mundiranara sia miqi marifa maqasaa fasiqa faiqi fee qinafa mi fasiqanaki sia Anutuna maraquina marifa maridanoo. Mi fasiqafa asauku mundirana namuqaa maridanoo. Ooqai maasa mi fasiqanara aniannoo mifoo qiafanaqa iriusa mariafanoo maqee doo kooroo mandee ani maridanoo.

<sup>4</sup> Qini faiqi namu innee Anutuna faiqi namu mariafanoo. Unna qira tamummaqara fasiqauqa innee misa urinaaqaramafi mariasa, inniki mari maraquina uriqaranoo maridanoo maa maqa maaqanakinnaasa maraquina Sadannanaindi ureeqanoo maridanoo.

<sup>5</sup> Misa maa maqa maaqanakinnaa iriranamau ufa qimariafaqa maa maqa maaqanakinnaasa misa ufa iridaqa moodaa maqannaasa maridaqa.

<sup>6</sup> Maasa Anutunaindi maridaqa Anutunara irimari fasiqafa maasa ufa iridanoo. Yau yausee sia Anutunaindi mariasa misa sia maasa ufa iridaqa. Doo maasa miqimandee anoona maraquna faqa unna qira maraquna faqa rainasee iridaqa.

*Maasa nariara nariara nimuqusirana anoona Anutufa maridanoo.*

<sup>7</sup> Oo qini qigoondiqa, maasa andeeqasee nariara nariara uriqarara ainainee qimasee ruaqa. Nariara nariara nimuqusirafa Anutunasaqari animari ainainafa maridanoo. Nariara nariara andeeqara amuqusimarifa Anutuna faiqi maridanoo minara irimarifa maridanoo.

<sup>8</sup> Faiqi moo fannoo sia andeeqasee amuqusinafa sia Anutunara iridanoo. Nimuqusirana anoona uqanna Anutufa maridanoo.

<sup>9</sup> Anutufa nari amuqusira oosana maasa uqaqifiqeenoo. Mifa nari amaaku moodaa faiqi maa maqa maqanaki aqigamasoofanoo maasara kaqi marirana mina Yisunannai maraaqee qimasee aqigoofanoo quminau.

<sup>10</sup> Andeeqara amuqusirana anoona maaqimminoo maridanoo. Sia maasa Anutunara uriqarara ainaina fee qimasee rimariqiafana. Anutufa naaree maasara amuqusufanoo nari amaaku aqigeenoo minannai maasa mandainaina akiaqara dariraree quna mina mara aquanifeera aqigoofanoo quminau.

<sup>11</sup> Qini qifaqasaa qigoondiqa. Anutufa maasara miqimasee firaqoo amuqusunara maasa miqi kai iqa quandaki nariara nariara uriqarara ainainee qimasee qimuqusiani.

<sup>12</sup> Sia moo fannoo Anutuna qafoose maridaqa maasa nariara nariara riranannai Anutufa maasaki maridanoo mina amuqusirana anoona doo maasaki anoonaikinoo maridanoo.

<sup>13</sup> Maasa maaqi qimaseeqa Anutunara kuqaa maasaki marifaqa maasa minaki maridee qianauranoo. Mifa nari maraquna maasa qimunara maasa minaramma irianaara.

<sup>14</sup> Maasa maa ainainna qafeeqa aqama qimannimidaqa maasa qikoofa nari amaaku aqigeenoo maa maqa maaqanasaaqaraasa mandainainaki mariasa qumareeqee uqeer- aani fee qimasee aqiqanau.

<sup>15</sup> Ya fasiqa anaasee fee maa maqanasaaqari Yisunara kuqaa Anutuna faiqi fee qinafa Anutufa minaki maridanoo mifa faqa nariki maridanoo.

<sup>16</sup> Anutufa maasara amuqusirana maasa qeeqa minara iridaqa kuqaa fee qimasee minasaa mundidaqa. Anutufa nimuqusirana anoona marinara yafa yafee nariara nariara andeeqara amuqusiranaki marifa mifa Anutunaki faqa marifa maridanoo, kaifaa Anutufa minaki maridanoo.

<sup>17</sup> Anutuna amuqusirafa sia fifau maasaki anoonaikidanoo. Anutuna ufa irira faasaana sia nari afusaa rufiaaqeera paasoosiaqeera mina amuqusirafa maasaki anoonaikidanoo. Maaqoo maria kamuqoo maasa marirafa Yisunaindi miqirafa maridanoo nariara nariara andeeqara nimuqusiranaki anoonaikinoo maridanoo. Nariara nariara andeeqara nimuqusira oosana sia maparaairafa minaki maridanoo.

<sup>18</sup> Moonara rufiarafa sia kaqi kambiqaidanoo maasa manda ainaina akiqara daruandoo qimasaida rufiidaqa. Maasa maqasaa didimari fasiqanara sia rufiidaqa maasa didirafa rufiarana afaqasaifanoo didirafa kai maridanoo. Anutufa maasara amuqumarifanoo maasara ridanoo. Maasa Anutunara rufiidaqa Anutufa maasara rimarina sia iridaqara miqidaqa, Anutufa maasa dari marifaqara foora minara rufiidaqa.

<sup>19</sup> Anutufa indaaruu maasara amuqusunara maasa minara irisee kuqaa fee qimasee quandaki Anutunara faqa nariara nariara faqa uriqarara ainainee qimasee ridaqa nimuqusidaqa.

<sup>20</sup> Moo fannoo qinee Anutunara uriqarara ainainara rida fee qimasee quandaki nari akaqaafasaa fidiqaa inafa unna qirafa mariannoo. Mifa nari afu qafee marina nari akaqaafasaa ririmma sia amuqusidanoo minau Anutuna sia qafee marina naqimandee fifau amuqusiraree sia amana.

<sup>21</sup> Doo minara qinee qidaqa. Asauku mundirafa maa naakaparufana maasa qimaqimiqoona inni qimannimidaqa. Ya fasiqa anaasee fee Anutunara uriqarara ainainee qimasee rinafa mifa quandakinoo nari akaqaafasaa uriqarara ainainee qimasee faqa ruannoo.

## 5

*Maa maqa maaqanasaaqaraa mandainaina uriqarara ufa.*

<sup>1</sup> Yafa yafee Yisunara Anutuna asauku mundira fee qinafa mifa Anutuna faiqi marian- noo. Moo fannoo akoonara rinafa mifa mi fasiqana faiqiara faqa ruannoo.

<sup>2</sup> Maasa maaqiannanara Anutuna faiqi namuara ridaqee qianaara. Anutunara nimuqusinaga mina ufamau andeeqasee fuannanara Anutuna faiqi namuara ridaqee qianaara.

<sup>3</sup> Maasa Anutunara ruannana anoona maaqimminoo maridanoo. Mifa naakapainna ufara eedoo qimasee asaukunna qumaraannanara doo mifa anoona maridanoo. Anutuna naakapara ufa sia firaa qumaara tia maridanoo aufadaidanoo.

<sup>4</sup> Maasa Anutuna faiqi namu maa maqa maaqanasaaqaraa mandainaina amana maasa mina uraaqaraanaura. Maa ainainannai maasa maa maqa maaqanasaaqaraa mandainaina uraaqaraidaqa, Yisuna saqarikiranannai uraaqaraidaqa.

<sup>5</sup> Yafasiqa anaasee fee maa maqa maaqanakinaa mandainaina uraaqaraannoo fee. Akoqooqaraana Yisunara Anutuna amaaku fee qinafa mifa maa maaqanasaaqaraa mandainaina uraaqaranoo mariannoo.

*Yisunara Anutufa mina amaaku marunara kooroo ufa.*

<sup>6</sup> Maa Yisufa asaku mundirafa nari anoona aranandakiqari fidika nammariisaqari kambiganau sia nammari kaifau nammari namufaqa fidika namufaqa apirirafa kambiganau.

<sup>7</sup> Anutuna maraquna fannoo kuqaa anoona ufa imarufa maridanoo mina kooroinau.

<sup>8</sup> Qaaramoo ainaina kooroo imarifa maridanoo. Mi qaaramoo namufa moodaa ainainara kai qidaqa, mi namusa maraquna faqa nammari faqa fidika faqa maridaqa.

<sup>9</sup> Maaqoo kootaki ufa qimariasa ufa iridaqa kuqaa fee qidaqa. Faiqi ufa marinanoo Anutuna ufa fannoo faiqi ufa uriqaranoo marinara mifa akoqooqaraana Yisunara qini qimaaku uqannee qimaqoofa marinara maasa minara kuqaa anoonee qimasee irianaara.

<sup>10</sup> Yafa yafee Yisunara Anutuna amaaku fee qinafa nari aundurakinaafa faqa dadaqinanoo kuqaa anoonee qiannoo. Yafa yafee Yisunara sia Anutuna faiqi fee qinafa mifa Anutunara unna qimari fasiqafee qidanoo Anutufa nari amaakuara qu ufanara unna fee qidanoo miqi qidanoo.

<sup>11</sup> Anutufa nari amaakuara qu ufafa maaqimminoo maridanoo Anutufa naaru naaru kuqaa marirana maasa qiminau, mi marirafa maasaindi mina amaakuki marifa maridanoo.

<sup>12</sup> Yafa yafee Anutuna amaaku qumarainafa doo mifa mi marirana namufaqa qumareenoo. Yau yausee sia Anutuna amaaku qumarainausa sia mi marirana faqa qumaraidaqa.

*Sarau inna ainaina Anutuna innaaru qinanoo amiannoo.*

<sup>13</sup> Innee Anutuna amaakuara irirana rusimariasa innee doo naaru marirana doo maree fee qiaqeera maa ufana akara rumannimaqaidaqa.

<sup>14</sup> Maasa Anutuna iriranasaa maaqoo moo ainainara innaaru qinanoo kuqaa maasa qimiannoo maasa iridaqa, miqiannanara maasa Anutuna afusaa sia rufiidaqa paasoosamasee innaaru qidaqa.

<sup>15</sup> Maasa Anutunara moo ainainara innaaru qinanoo mifa iriannoo. Maasa minara iridaqa irianna ainainna kuqaa qimiannoo fee qidaqa.

<sup>16</sup> Faiqi moo fannoo moo mandoosana mareemarina sia andeeqasee kuqiranaki fimaria mandoosana marasainanoo mina akaqaafasaa fannoo qafamaseenoo Anutunara innaaru qinanoo mina mandainaina ateesa rukaiseenoo nari marirana amiannoo. Qinee kuqiranaki sia andeeqasee fimaria mandoosannara qidaqa. Andeeqasee kuqiranaki fimaria mandoosana maridanoo moo fannoo mi mandoosanna marinaqa innee sia minara innaaru qiaqa.

<sup>17</sup> Aiqaama aqarafa mandoosana maridanoo akaqausa moo mandoosana sia kuqiranaki fimariafa maridanoo.

<sup>18</sup> Maasa maana iridaqa sia Anutuna faiqi namu mandoosana maqee maqee maraqa fidaqa. Anutuna amaaku ititasaifanoo manda fasiqa fannoo sia amana mina mandaikamamaqannoo.

<sup>19</sup> Maasa maana iridaqa maasa Anutuna ainaina maridaqa. Maa maqa maaqanaki mariasa aiqama manda fasiqa aakaqakinaa fasiqa aramandunnai maridaqa.

<sup>20</sup> Maasa maanara iridaqa asaku mundirafa Anutuna amaaku uqanna maasa Anutunara iriaqeera mina irirana qiminau. Doo maqee maasa Anutuna amaaku asaku mundirana Yisunaki marianara moodaanaki kuqaa anoona Anutunaki maridee qidaqa. Miqiga maasa anoona Anutunaki faqa anoona asumu mariranaki faqa maridaqee qidaqa.

<sup>21</sup>Qini faiqi namu unna qira Anutufara fooqaa qira ainainara nianasaa rufiaaqa, kuqaa Anutuna inni nimuqusakinaana mara amaaramaseenoo mina amaaqa maqaandoora minara rufiaaqa.



## 2 YOOHANE

### Yoohaneefa qambaana akara rumannimaqoo ufafa.

<sup>1-2</sup> Oo maa anaasee aneenna faiqi namufaqa qinee faiqi firaasa akara rumanni-maqaidaqa. Qinee faqa Yisuna anoona ufa irimariasa saimbaqa ani aninna faiqi namuara faqa uriqarara ainainee qimasee qimuqusifaqa ridaqa Anutuna kuqaa anoona ufa maqee maasa daundurari maridanoo naaru naaru marianinafa marifaqa minara maasa aniara uriqarara ainainee qimasee qimuqusidanoo.

<sup>3</sup> Maasa qikoofa Anutufa mina amaaku asauku mundirafa Yisufa faqa nari amuqusir-anakiqari nari afaairana faqa nari nifauarana faqa nari asooarana faqa innisaimbaqa qimiannoo.

*Anooufara faqa nariara nariara nimuqusirana qimaqoo ufafa.*

<sup>4</sup> Oo maa anaasee ani faiqi namu akaqausa Anutuna naakaparufamau fimariafaqa qinee minara irunanoo qifaqa asacidanoo.

<sup>5</sup> Minara qinee ani afeekaikamasee qimamidaqa maasa aiqamausa Yisuna ufa irisee nariara nariara uriqarara ainainee qimasee nimuqusiramau kai fuuqa. Doo mi ufana ani qimamidaqa sia fuka aakaparufau, ooqai oosana irimarunnufana ani qimamidaqa.

<sup>6</sup> Mi nimuqusirana qinee qunandee mina oosana maaqimminoo maridanoo. Maasa aiqamausa Anutuna naakapara iriramau fuuqee qinuu. Mi naakaparufafa ooqai oosanaindari irimariafa maaqi qidanoo, innee aiqamausa nariara nariara uriqarara ainainee qimasee nimuqusiranaki mariaqa.

<sup>7</sup> Moomoo nikaru qimariasa ueeqee mariasa maaqanna maaqanna daraaniqa maridaqa. Misa Yisunara asauku mundiranara sia faiqi faiqi kambiqaanau foo qidaqa. Miqi maria fasiqausa ueeqee mariasa maridaqa asauku mundirana namuqaa kammidaqa.

<sup>8</sup> Innee inneeqa nifaaqasaa rakisiqa. Maasa ufa ooqai anoonaikimarifa sia maqee inniki taikaannoo aneenna maaqoo ainainirana akiqara naaru innaarunai oorufinana amiqimasee maraanneera qimamidaqa.

<sup>9</sup> Faiqi moo fannoo asauku mundirana ufamau sia fimarifa flaikatee fimarifa mifa sia Anutuna faiqi mariannoo. Asauku mundirana ufamau kai fimarianafa sia asauku mundirafa kai minaki maridanoo, mina akoofa faqa minaki maridanoo.

<sup>10</sup> Oo maa anaasee faiqi moo fannoo maa qinee qunnufana sia qimarinafa anirainana sia aneenna maaqaki mara quqaa. Sia minara amiqi amiqia.

<sup>11</sup> Anee miqimarinna fasiqana amiqi amiqirufa qinana doo mina mandoosana dadaaqi-dana miqimariananoo.

*Akara taikarufa qimaqoofa.*

<sup>12</sup> Qinee ufa oosana oosana ani qimamiraree qimaseeqa sia papiqasaa rirana amana marifaqa. Ani maqusai kasooqaqee firara iridaqa. Minni oonureeqa dooqi qari ani qimamiseeqa nari qimami nari qimamimasee asasifaranoo.

<sup>13</sup> Ani auna faiqi namu mai mariasa maa qini pasaki inni nimandaidaqa.

### **3 YOOHANE**

#### **Yoothaneefa inaaqianna akara rumannimaqoo ufafa.**

<sup>1</sup> Oo Kaiusafa anindiri Yisuna anoona ufa qimarianaki marunannara qinee faiqí fraasa aniara qimuqusimarifaqa maa akarana ani amaqaídaqa.

<sup>2</sup> Qini qifaqasaa qiqoondi. Ani maraḡuna amiqiranaki doo maridanoo, ani afaaqa faqa aurirana dinee sia marianifeera aneenna aiqama ainaina faqa mina amana kai amiqiranaki marianifeera Anutunara innaaru qídaqa.

<sup>3</sup> Oo Kaiusafa ani akaqaafasaa mai anireeqa aniara Yisuna anoona ufamau maqee maqee fimarianaga qimaqimiafaqa mina iriseeqa asasídaqa. Kuqaa anoona maree mariannanara ani oosana kooroofaqa qinee qafeeqa.

<sup>4</sup> Qini faiqí namukammafi mariasa kuqaa anoona aatata fimarianara minara kai irisee firaa asasirana qimídaqa. Sia moo ainaina mi asasirana amana kai maridanoo.

*Yoothaneefa Kaiusana oosanara amooqu ufafa.*

<sup>5</sup> Oo Kaiusafa qini qiqoondi, Yisuna ufa maqusa maqusa qimannimiḡanuusa ani maqusaai oonuraafana oosana oosana dadaaqirana amiqimasaida nimimariananoo. Anee sia moo maḡannaa fee qimasee minnisaanafa mariananoo.

<sup>6</sup> Anee dadaaqimarianausa misa ani aufakiana qimaqimiafaqa irídaqa. Misa aniara maasa maaqooqaraasa amaana maaqaki keeqee mariasa nifusaa anee misara amuqusi mariannanara kooroo ida qiafaqa irídaqa. Anutufa afaarimarifa maridanoo anee faqa mina aanna reenana mi fasiqausa dadaaqinana anee Anutuna ainainira faiqí amana kai maria.

<sup>7</sup> Yisuna ufa qimannimiḡanuusa innee sia misa niqafuosa moo maḡannaa mari-afanoo sia aamina maḡannaa maqusa maqusa fidaqa misa munnimmaina marasaida naqa fimariḡau. Yisuna auḡusaa mina ufa kai maree fimariḡau, misa maasa Yisuna ufa irimariasa faiqara maaḡaina kai maraseeqa Anutuna ainainirausaika mafiqá nidaqa misaikana maraídaqa.

<sup>8</sup> Maasa Yisuna ufa irimarunausa misa kadaapiriranara iriseeqa misa miqimasee anoona ufa saikimariasa moodaanaki dadaaqiqa maasa saika faqee qimasee maraaqeerá ani qimamídaqa.

*Yoothaneefa Diotareefeesana mandoosanara qimaqoo ufafa.*

<sup>9-10</sup> Qinee qusa akara riqa inni miqooqaraasa amaana maqaki keeqee mariasa nimi-aqeerá. Nimaḡaunanoo Diotareefeesafa narí kai naríara uriḡararasee qimarifa qini akarakináa ufa sia irimarifa, kasooqaqee inniki qinee oonureeqa mina oosana inniki marina unna ufa mandufa maasara qimarina unnufa oosana oosana qimarina kooroo ianaura. Mifa sia minara kai idanoo Yisuna ufa qimannimiḡanuusa miqoo oonuraafanoo sia misa dadaaqidanoo misa ititannimaqaidanoo. Miqooqaraasa amaana maqaki keeqee mariasa quandaki misa dadaaqiraree qiafanoo misara faqa quqasee doo fuaqee qidanoo.

<sup>11</sup> Oo Kaiusa qini qifaqasaa qiqoondi, anee manda ainaina qafamasee sia mina ammeemmeerá amiqira oosana qafamaseenana mina ammeemmeerina mina aanna rainanoo amana mariannoo. Andeeqara oosana maree mariasa misa Anutunaindi marídaqa. Mandainaina maree mariasa misa sia Anutunara irimariasa marídaqa.

<sup>12</sup> Inniki faiqí moo marifa mina auqu Deemeetariusafa minara aiqamausa kuqaa andeeqara fasiqa fee qídaqa. Anoona ufa faqa mi fasiqanara andeeqara fasiqa fee qidanoo. Maasa kuqaa anoona ufa kai qimaruna innee irimariasa mariafanoo sia mi fasiqanara unna qídaqa. Maasa minara amiqira fasiqa fee qídaqa.

*Akara atinni mafi taikaruḡa.*

<sup>13</sup> Qinee moomoo ufa ani qimamiani qimaseeqa sia amana papiqasaa akara riqa.

<sup>14</sup> Kaḡikaqoo anee ianannai qinee firaree qídaqa. Oonureeqa amiqimmandee narí qimami narí qimami qianauranoo.

<sup>15</sup> Yisuna asoorarafa anifaqa mariani. Ani aqoondiḡa maaqoo qaraasa aiqamausa ani amandaídaqa. Maasa qiqoondiḡa miqoo mariasa nuqu ramasee qimannimia. Maasa misa nimandaídaqa.

## YUDEESA Yudeesafa akara rumaqoo ufa.

<sup>1</sup> Qinee Yudeesa maa pasana akara ridaqa. Qinee Yisuna ainainira faiqi Yameesana akaqa maridaqa. Qinee qeeqa qifasaanara Anutuna asauku mundirana Yisuna eedoo qimasee rumbara faiqiara foora ainaini marunna faiqisa maridaqa akara ridaqa.

<sup>2</sup> Anutufa naaramasee qinee unnannai aniaqee qufaqa eedoo qimariasa inni akara rumannimaqaidaqa. Innee Yisuna asauku mundirana mandaqee mariasa maa pasana akara rumannimaqaidaqa. Innee maasa qikoona Anutuna amuqusiranaki mariasa inni akara rumannimaqaidaqa. Anutuna nifauarafa faqa aundurakinaa asoarana faqa firaqoo inniara amuqusirana faqa firaqoo inni naunduraki maridanoo irairaaiani.

*Unna amaanufa qimannimariasara qimaqoo ufa.*

<sup>3</sup> Oo qini qifaaqasaa qiqaondiufa. Anutufa maasa innaaruna asumu marirana moodaa qimiqaifaqa minaki quqaqaisinara akara ruani qimaseeqa minniseeqa moo ufa akara ruanaura. Anutufa moodaa kari nimu ufana maasa qimuna mi ufana rakira ufara foora afeekaikamasee uqeera aindusuaqa minara inni afeekaikamandee akara rumannimaqaidaqa.

<sup>4</sup> Faiqi akaqausa Anutunara sia fee qimariasa qumee inniki keeqafiga dapikidaqa. Misa Anutuna afaariranara kaqi nimiranara faqa iriseeqa quandakiqa mi ufana eendaandi iseeqa minannai faiqi aanaaseeki nari ummuari nari ummuari mariana faqa oosana oosana mandainaina faqa unna qimasee Yisunufa fee qimasaidaqa uqeerasee. Misa maasa asauku mundirana Yisunara maasa uriqaranana maasa karaambaigara qaoo qidaqa rukiidaqa. Ooqai tamummaqara fasiqara akarakinaa ufa misa fira mandainaina akiqa arirana aqufuaqee qufaqa doo maqee aqufidaqa.

<sup>5</sup> Inni moo ainainara naaqoo auqaidaqa. Ooqai Anutufa Isaraee maqanna Isipa maqusaindaraana rafiamareenoo aadana maqa maaqaki quqanau. Quqasoofaqa akaqausa quandaki Anutuna ufa rukiasee kaqirunna ubeekaqa. Miqiuqanoo Anutufa sia nifauanau kaqi narinau.

<sup>6</sup> Innee Anutuna qangirooqara faqa sia fee iridee. Ooqai misa fira uriqaranaki marufaqa mina minnisee nari qimaqoomau akaqausa fufanoo Anutufa sia nifauanau kaqi qumaraseenoo sainandannai ruumbeeqeenoo naaru rumberanaki maqa ameemaanai asukunaki quqaqifaqa maridaqa muanni Anutuna ufa irira faasaanara afeesida maridaqa. Mi faasaannasaa narira ufa qimannimiannoo minara afeesidaqa.

<sup>7</sup> Innee Soodooma maqusa faqa Koomoora maqusa faqa misaqa maru maqusanaasa faqa innee iridee. Misa manda qangiroo naanna reeqa nari qimaqoomau fiqa faiqi anaasee nari ummuari nari ummuari iqa faiqi nari aqoonna fasiqa ummuariqa oosana oosana mandainaina faqa maroofanoo Anutufa aiqamausa mi oosanna qafeeqa rufaaqee qimasee naaru marira idaki misa quqanau.

<sup>8</sup> Miqikai masee maa maqee inniki mandoosana uqeeree mariasa ooqeenasaa naanna raidaqa. Maqee inniki mariasa qainamaseeqa Anutuna ufammifoo qimasee mi mau fiqa aaqamaki nariqa naridaqa. Misa Anutuna aanoora sia rufiidaqa mina ufa rukiaseeqa nari qimaqaa aatata fidaqa. Mi mandoosanna maree mariasa innaarunai amiqiraua marianara mandufa qimannimaqaidaqa.

<sup>9</sup> Anutuna amiqira qangirooqara ririmma ooqai Mooseefa kuqufufanoo Sadannafa mina iri qumaraanee qufanoo amiqira qangirooqakiqari uriqararafa moo fannoo mina auqu Mikaraafa mifa Sadanna faqa ufa rainanau. Ufa rainaidanoo sia inniki ani mariasa naanna ranau. Sia aqira ufa mandufa Sadannara qinau. Anutuna ufara iriseenoo kaqi maaqi qimasee reendenamasee qimaminau. Oo Sadanna Anutufa aniara qaoo qidanoo.

<sup>10</sup> Maa inniki mandoosana uqeeree mariasa sia amiqira qangiroo aanna raidaqa niranagarufa oonumafi irisee kaqi qidaqa. Nari sia qafee maria ainainnara qimasaidaqa niqidaqa. Misa kaasau aandau aanna raidaqa. Misa nari irirana irisee aandau oosanamau fidaqa. Mi mau fimariafanoo nari mandoosana fannoo nari naridanoo.

<sup>11</sup> Misa narirafa firaqoo mariannoo. Minara irifanoo naaqaqani. Misa Kaina aatata fidaqa. Kainafa Anutuna ufa rukiie marufa maridanoo nari akaqa arinau. Misa kafa Baraamana manda aatata fidaqa minaki keeqararee qimaseeqa nari rarisee nari rarisee mamaree fidaqa. Baraamafa munnimara rumammareenoo unna qimasee Isaraee maqannaasa rarisameeqee mandainainaki quqee marinau. Misa moo fasiqa ooqeenaa fasiqa Koorana aanna raidee qimasee Mooseenasaaqari rakeemaku aadumarunna nariara moo karaambaqee qimasee fufanoo Anutufa mina faqa mina aiku asauku mina

faqa fusa faqa narinau. Maa inniki mandoosana uqeeree mariasa nariqa kai nári narirana mareeqee Anutuna nariranaki quqaseeqa minaki maridaqa.

<sup>12</sup> Innee Anutunara qoomaqa sakasee naidaqa neemarifaqa mee inniki mandoosana uqeeree mariasa nári mandainaina namufaqa anireeqa sia moosara oonumafi iridaqa nifaafa quqaseeqa kaqi náriaraa kai firaqoo narana naidaqa.

Misa ufidaina aukuna aandaroo aukuna onamuaara foora aniraifaqa oo aaku asoora ainaina aniannoommifoo qimariafanoo kaqi aiqareenoo fifanoo ufai fannoo misa mareeqeenoo aqidanoo aaku sia marisa maridaqa, sia andeeqara oosana uqaqi-fiqeenoo aupurarana kai uqaqifiqeenoo. Mi fasiqausa sia qaqamma irai saqari fara foora maridaqa, irai aukunna oosana rarakusee qafaafanoo aadana kai maridanoo sia nammari nammariidanoo.

<sup>13</sup> Mi fasiqausa mandainaina fannoo nammari qaqaarara foora nári mandainaina akooqoo mandinoo marifaqa sia nisauridaqa eekara arinoo akooqoo maridanoo. Misa mee sandee mari fasauna aanna raidaqa, sandammaree asukunaki munu qim-baidaqa. Anutufa mi fasiqausa maqa maaqa miqi kai masee firaa asukunaki meemai afeedama nimaqaifanoo maridanoo.

<sup>14-15</sup> Ooqai Eenookafa mi manda fasiqausara tamummaqaseenoo akara rumaqoofa maridaqa. Adanasaqari moodannai qisauku oosana taikafufanoo dinni ani moodaa mareenoo qaaraikinoo Eenookafa kambiqaanu. Mi Eenookafa maaqi qimasee tamum-maqaseenoo akara rinau. Innee iriaqa Anutufa nári naaquqara andeeqara qan-giroouqa moomoosa faqa qumureenoo aiqama maqasaa qaraasa suqusee ufa nimiannoo, mandoosana maree mariasa Anutunara sia irimariasa misa Anutuna ufa rukiasee mandainaina oosana oosana maree marianara Anutufa faqa nári qangiroouqa faqa narirara qumuannoo. Mi manda fasiqausa Anutunara mandufa oosana oosana qiranara Anutufa narirara qumuannoo. Doo Eenookana tamummaqara ufa miqiminoo mari-danoo. Eenookafa misara miqi qimasoofaqa qinee maa inniki mandoosana uqeeree mariasara mi mau fimariafaqa maaqi qidaqa.

<sup>16</sup> Mi fasiqausa maqee maqee aiqama ainainara naundaufa naundaufa qida maridaqa. Misa aiqama ainainara amiqira ainainara faqa sia maasa didifaqa mandainaina fee kai qidaqa. Misa nári mandoosanara nidirana aandi asuseeqa nariqa mi mau fidaqa. Misa firaqoo nariara nariara nimooqimariasa maridaqa. Misa nári mandoosanara nidirannai ubeekarara faiqi akaqausa marasee nimooqaidafa amiqi amiqidaqa misa maasa mandoosanamau fidaqa maasa duqu uqeereefaree qidaqa miqidaqa.

*Aaquqimannimaqarufa faqa naakaparufa faqa qimaqoo ufafa.*

<sup>17</sup> Oo qini qiqoondiuqa karaambaifaqa Yisufa asauku mundirana mina faiqi namu ufa qimannimiqoona sia aunuqa.

<sup>18</sup> Misa maaqi qimasee inni qimannimiqau. Taikara aukuna anirainafa faiqi moomoo kooroomaifiqa nári mandoosanara nidiramau fidaqa inniara naanaidara qifaranoo.

<sup>19</sup> Mi fasiqausa faiqi qambaana anireeqa rainee mariasa. Miqi mariasa sia Anutuna maraquina naakiraua maridaqa nariqa faiqi faiqi nidiramau kai fimariasa maridaqa.

<sup>20</sup> Innee qini qiqoondiuqa sia miqimariasa mariafanoo. Innee Yisuna naaquqara ufaki mariasa mariafanoo maaqara foora auqiqa fifi inaqa minaki afeekaikiaqa. Innee Anutuna naaquqara maraquinannai maqee maqee innaaru qiaqa.

<sup>21</sup> Maasa karaambaifaqa Yisufa asauku mundirafa nári nifauarana firaanakiqari maasa sia daruannoo naaru naaru marirana maasa qimiannoo. Innee Yisuna qumiranara afeesidaqa Anutufa inniara nidimarinaki minaki kai mariaqa sia moosaa finana kuridia.

<sup>22-23</sup> Inniki faiqi akaqausa Yisuna mandaqaranara marammara ridaqa qaara irirana maree mariasa, sia innee miqimariasa aanoomannimaqaqa nifauamasaifaqa mariaqa. Naaru marira idakinaana Yisuna ufannai kari qinaqa qumareeqee Anutuna afeeka ququsaki quqaqa. Akaqausa mandoosana maree mariasa faqa nifauarana faqa rufiara ufa faqa qimannimisee qumareeqee Anutuna ququsaki quqaqa. Innee miqi marifaqa misa mandoosana qafamasee sia minara ruaqa innee faqa minaki fifaara. Misa mandoosana ikairiara rufiasee fidiqaa iaqa.

*Anutunara kai asasiaqee ufa qimaqoofa.*

<sup>24</sup> Anutufa innee mandainainaki aqufirarifanoo mifa amana inni ititannisainafa sia aqufiraranoo. Mifa amana inni mareeqeenoo amiqimmandee ninukamasee asasirana inni nimisee nári afaafa areenaranaki naroorisaa amana quqaaninafa.

<sup>25</sup> Moodaa Anutufa maasa asumu maree marifa. Maasa karaambaifaqa Yisufa ani asauku mundirafa minannai maasa amooqirana qimamidaqa afaafa areenarana faqa uriqararana faqa afeeka faqa aiqamausa aniara naaquqarana faqa anindi maridanoo

fee qidaqa amooqidaqa. Ooqai indaaru anindi marinau maqee anindi maridanoo naaru naaru anindi mariani. Kuqaa.

## UQAFIQOO UFABA

### Naaru kambigaaninnainaina Yoohaneena uqafiqoo ufafa.

<sup>1</sup> Dauni kambigaaninna ainainara Anutufa nari asauku mundirana Yisuna akooroom-mamufanoo mifa quandakinoo nari faiqi namu qimannimianifeera Yoohaneena kooroomma aminau. Asauku mundirafa maa ainainausara nari qangiroo aqiyoofanoo qumureenoo Yisuna ainainira faiqi Yoohaneena kooroomma aminau.

<sup>2</sup> Yoohaneefa aigama ainaina qafeemaruna faqa irimaruna faqa qangiroo fannoo qimamuna aigama maa papiqanaki kooroo inau. Maa ufana Yisufa asauku mundirafa nari akoona Anutuna anoona ufa Yoohaneena qimamufanoo akara rumaqoo ufafa maa akarafa maridanoo.

<sup>3</sup> Faiqi moo fannoo maa akarana asaana rinafa asasiannoo. Maa tamummaqara ufana irisee eedoo qinausa misa asasifaranoo. Maa ufanakinaa ainaina koorooinausa qusasaa kambiqanara maa ufana asaana rimariasa faqa eedoo qimariasa faqa asasifaranoo.

*Qisauku dinni taikasee dinni ani qaara marasee maqusakinaasa amaana maqaki keeqee mariasa misa Yoohaneefa nimandoo ufafa.*

<sup>4</sup> Asia maqa maaqaki mariasa amaana maqa qisauku dinni taikasee dinni ani qaara mararanaki keeqee mariasa qinee Yoohaneesa akara rumannimaqaidaqa.

Anutufa ooqai marufa maqee faqa kaqi marifa kasoogaqee naaru faqa marianinafa nari afaarirana faqa nari asoosarana faqa inni nimidanoo. Anutuna ufa irira qaari oorinni Anutuna maraquina namu qisauku dinni taikasee dinni qaara marasee mariasa miqi kai mandee Anutuna afaarirana faqa asoosarana faqa inni nimidaqa.

<sup>5-6</sup> Yisufa asauku mundirafa andeeqasee kooroo imarifa Anutuna ooqa faiqi kuqiranakiqari findifufa maa maqa maaqanakinnaasa karaambaqauqa uriqararafa marifa mifa faqa nari afaarirana faqa asoosarana faqa inni nimidanoo. Mifa maasara amuqusam-midanoo. Mifa nari kuqiranannai maasa mandainainakinnaasa idukunniseenoo maasa qumareeqeenoo nari akoona Anutuna aanaiqikirausa mariaqee qimaseenoo quqaqi-saifaqa maridaqa. Anutuna asauku mundirana Yisuna afaaqa areenarana faqa afeeka faqa firaqoo minaindi marianifeera.

<sup>7</sup> Qafaafa, mifa Yisufa asuruki qumidanoo. Mina faaqaana raquramusa misa faqa kuqiranakiqari findifi qafeefaranoo. Maa maqa maaqanakinnaa maqusa maqusa mariasa aigama minara ikiraqeeqa soofaarifaranoo. Doo kuqaa uqanna miqifaranoo.

<sup>8</sup> Anutufa uriqararafa karaambaqaa ooqai marufa maqee faqa kaqi marifa naaru faqa kaqi marianinafa nariara maaqi qidanoo. Qinee oosana aroo aukuaana mariafanusa naaru taikara aukuaana faqa kaqi marianausa maridaqa.

*Yoohaneena afu pispasamandoofanoo asauku mundirana Yisuna qafanau.*

<sup>9</sup> Yoohaneefa nari qafoo ainainna maaqi qimasee akara rinau. Qinee Yoohaneesa inni nifasausa nauraiqi maridaqa. Qinee innisaimbaqa Yisuna anoonufa qimannimunaqa nari unna Anutufa marifaqa kuqaa qira Anutunara nikoogaifaqa aupurarana faqa narirana faqa innisaimbaqa qimimariafaqa maridaqa. Qinee faqa inne faqa Yisuna ququsaki marunausa maridaqa, maasa mina teeroo quqaranaki maridaqa sia minara aupureeqa mina minniseeqa kaqi minaki doori runusee maraqa fidaqa, qinee Yoohaneesa Anutuna ufa faqa Yisuna koorooira anoonufa faqa qimannimianifannanara Roomma maqannaasa qini karabusa rumbaranaki qisoofaqa maridaqa. Ooruku nammari qambaana Patamoosa afumaki Roomma maqannaasa karabusaki mariafananoo Yisufa oosana oosana ainaina kambigaaninnanara qimaqiminau.

<sup>10</sup> Karaambaqaa qimaqoo faasaana karabusaki mariafananoo amaanasaa Anutuna maraquina fannoo daakufufanoo inaaqianaindari firaafireena miqirafa faiqiara foora ufa qinau.

<sup>11</sup> Mi ufafa maaqi qimasee qimaqiminau. Yoohane maqee uqafiqaanina ainaina anee papiqaki akara rumasee dinni qisauku taikasee dinni ani qaara marasee maqusanaasa nari amaana maqaki qeeqee mariasa akara rumannimaqaa. Efeesusa maqusa amaana maqaki keeqee mariasa faqa Samirana maqusa amaana maqaki keeqee mariasa faqa Peerakamumma maqusa amaana maqaki keeqee mariasa faqa Tiatira maqusa amaana maqaki keeqee mariasa faqa Firadeerafia maqusa amaana maqaki keeqee mariasa faqa Raoodiseea maqusa amaana maqaki keeqee mariasa faqa miqimasee amaana maqanamuara akara rumannimia.

<sup>12</sup> Mi ufana qimaqimisooafa qinee yafee inaaqiannaindari qimaqimidanoo fee qimasee quandaki qafaafananoo rambi kuradee mari ainainausa qisauku dinni taikasee dinni ani qaara marasee marufanoo rambi aiqamasaa marida qeemarinau.

<sup>13</sup> Mi rambisa qambainai faiqiara foora kikiqinoo marufaqa qinee qafaqiafana. Mi fasiqana qamunna kisaafa karaambaifa qamunna maqasaa qumumarufaqa qafaqiafana kooru auqira raitanda karaambaifaqaindi mina aradauqana rumbanoo marinau.

<sup>14</sup> Mina akiqa asaasi qafeeqa eekara asaasiara foora kaaqa eekara arinoo marinau. Mina afu fannoo idauru miqirafa qeemarinau.

<sup>15</sup> Mina aiku fannoo anukara barasara foora tandi tandimarinau. Mina ufa fannoo oondainni nammariara foora aiqanaiqana imarinau.

<sup>16</sup> Mina asaukuqannai asaukuki qisauku dinni taikasee dinni ani qaara marasee fasaunamu uaqee inau. Mina ookiqari qaseema miqirafa raiqarafa afaidarafa animarinau. Mina oori afiri suani qambaana ururee firaqoo qaindee imarinau.

<sup>17</sup> Qinee mina qafamasee kaaqa rufisee mina aramandunna maqasaa aqufiqa kuqiara foora iqa mariafananoo nari asauku uqannai qinisaa munduseenoo qimaqiminoo qinuu. Oo maa fasiqa sia rufiaa. Qinee indaarufaasa faqa inaaqianaasa faqa maridaqa.

<sup>18</sup> Qinee ooqai kaqi mariafananoo maridaqa, qinee kuqafanausa maridaqa doo qiqafa kaqi marunausa maridaqa naaru naaru marianara. Qinee kuqiranara rakisirausa uriqararansa maridaqa mina kooqi kiqa uaqeeiunausa maridaqa kuqiranaki mariasa mandoosana mareeusa misa mariaqoo faqa uriqararansa maridaqa mina kooqi kiqa faqa uaqeeidaqa.

<sup>19</sup> Yoohanee anee qafa qafeemarianna ainainna irimarianna ainainna aiqama papiqaki akara rua. Maqee qafeemarianna ainainna faqa kasoqaqee kambiqaaninna ainainna faqa akara rua.

<sup>20</sup> Qini qisauku uqannai qisaukukinaa fasau qisauku dinni taikasee dinni ani qaraqanda marasee fasau mina kukeeqarana oosana maaqimminoo maridanoo. Qisauku dinni taikasee dinni ani qaraqanda marasee amaana maqasaa rakisimaria Paatoosa fasau maridaqa. Qisauku dinni taikasee dinni ani qaara marasee rambi kuradee maria ainainna mina kukeeqarana oosana maaqimminoo maridanoo. Maqusa maqusa amaana maqa mifa maridanoo. Qisauku dinni taikasee dinni ani qaraqanda marasee amaana maqara qidaqa.

## 2

*Efeesusa maqasanaasara ufa Yisufa Yoohaneenasaa qimaqoo ufafa maridanoo.*

<sup>1</sup> Yoohanee anee Efeesusa amaana maqasaa rakisimari paatoona maaqi qimasee akara rumasee qimamia.

<sup>2</sup> Oo Efeesusa maqanna Paatoo dinni taikasee dinni ani qaara marasee fasau nari asaukuki uqirafa ni fasiqafa ani qimamidanoo. Qisauku dinni taikasee dinni ani qaara marasee rambi kuradee mari ainainna qambaana nimari fasiqafa Efeesusa amaana maqasaa rakisimari paatoo maaqi qimasee qimamidanoo. Qinee anee auqee marianna saikana iridaqa anee kadaapiri mariannanara iridaqa anee sia feefauruara irisaidana maqee maqee kadaapiri marianaqa iridaqa. Anee mandoosana maree mariasara akooqee mariannanara qinee minara faqa iridaqa eedoo qidaqa. Akaqausa nariara unna qimasee Yisufa diqiqoo fasiqausee qufana anee misa faqa amanamasee qafoonanoo misa unna qirana anee paqurunafa mariananoo.

<sup>3</sup> Anee reendeenamasee miqoo kai fimarianafa mariananoo. Anee qiniara oosana oosana kadaapirirana marasee sia minnisaananoo kaqi marana fimariananoo.

<sup>4</sup> Akaqa ainainara kai aniara aaqeefoo qidaqa. Anee ooqai indaaruu unandee sia qiniara amuqusidanoo.

<sup>5</sup> Ooqai muruqoo amiqiranaki mariunafa doo miaqoo qumuananoo. Inneeqa oosana quandaki ooqai undee kai iaqaana. Sia miqifaqa qinee innee marinannai inni rambi mariqooqaraana maraanaqa innee doo imbeefara.

<sup>6</sup> Inniki moo oosana qinee amiqira fee qidaqa. Nikooraita unna amaana ufara innee qini daanna raidaqa fidiqaammi mariafanoo. Nikooraita amaana ufa qimariasaa aiqama faiqi faqa anaasee faqa moodaanaki maraqa nuafaqa innee misa ninda fee qini daanna ree fidiqaa imariasaa mariafanoo.

<sup>7</sup> Anutuna maraquna fannoo amaana maqaki keeqee mariasaa aiqamai qimannimidanoo. Naaqoo faqaasa mina ufa kai iriaqa. Mandainainaki afeekaikamasee rakiranara foora maraqa fifi inaqa uriqaree mariasaa qinee misa qimannimianaqa misa Anutuna innaaruna ququsaki keeqafi innaarunai asumu marirana nimira saqari qaamma neefaranoo.

*Samirana maqusanaasara ufa Yisufa Yoohaneenasaa quqoo ufafa maridanoo.*

<sup>8</sup> Miqi qimaseenoo Eefeesusa amaana maqa Paatoonara ufa qimaseenoo quandakufanoo Samirana amaana maqasa Paatoonara Yoohaneena qimaminau. Yoohanee anee Samirana amaana maqasaa rakisimari Paatoona maaqi qimasee akara rumamia. Ooqai indaarugaafa faqa inaaqiianaafa faqa ooqai kuqufa findifi kaqi marifa Yisufa maa ufana ani qimamidanoo.

<sup>9</sup> Qinee inni kadaapiriranara iridaqa innee maa maqanasaa ainaina siaisa kudi mariafanoo innaarunai ainaina faqaasa mariafanoo qinee iridaqa. Sadannana faiqi namu akaqausa náriara unna qimasee Yuda maqannaa fee qimariasa inniara mandufa oosana oosana qimariana qinee iridaqa.

<sup>10</sup> Qini ufasaara kaqikaa qoo innee aupurarana mareefaranoo innee sia minara rufaaqa. Innee iriaqa Sadannafa inni nimanamasee qafaaneera karabusaki akaqausa quqaanoo. Inni nidafirafa maa maqanasaa qusasaa mariannoo. Innee kaqi maraqa fifi inaqa kuqirana paqurinna aukwana qinee naaru marira qafee afisunnimaqaanaura.

<sup>11</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa mi ufana iriaqa. Andeeqara oosana kaqi maraqa fifi inaqa Sadannana nimanirana uriqararusaiki mariasa inaaqianna kuqirafa sia misa naruannoo.

*Peerakamumma maqusanaasara ufa Yisufa Yoohaneenasaa quqoo ufafa maridanoo.*

<sup>12</sup> Yisufa miqi qimasee Samirana amaana maqa rakisiranara Yoohaneena qimamiseenoo quandakinoo Peerakamumma amaana maqasaa Paatoona maaqi qimasee qimaminau. Yoohanee anee Peerakamumma amaana maqasaa rakisimari Paatoona maaqi qimasee mina faqa akara rumamia. Qaseema dinni dinni raifarafa ookiqari animari fasiqafa Yisufa maa ufana ani faqa qimamidanoo.

<sup>13</sup> Innee Peerakamumma maqusanaasa Sadannana amaana maqa mariaqoo mariasa mariafanoo qinee iridaqa. Innee kuqaa qinisaa atooqee mariasa mariafanoo. Inni maqasai Sadannana amaana maqa mariqoo miqooqaraasa qini qigoondi moo fasiqa qini Yisusara andeeqasee kooroo qimarina akiaqara mina auqu Antipasana kuqa arufaqa innee sia minara rufioosa kaqi kai qini saqariki mariasa mariafanoo.

<sup>14</sup> Akaqa ainainara kai inniara aqaaidammiafoo qidaqa. Inniki maqee Baraamafa ooqai mariu fasiqana aanna ree mariafanoo mi fasiqafa Baraamafa marufaqa inniki akaqausa mi oosanna maraidaqa. Ooqai Mooaba maqusanaasa karaambaifa fannoo Barakafa Anutuna tamummaqara fasiqa moo auqu Baraamana munnimma amiseenoo anee naukarara ufa Isaraee maqannaa nimisainaga kuqaaqa. Miqi qufanoo Anutufa Baraamanara qaoo qufanoo quandakinoo Barakana qimamufanoo Isaraee maqanaasa mindaraasa unna Anutuna oorisasa naranara dufi dufi qimasee narana naidaqa mindaraa anaasee naafeeqee mariqau. Innee Peerakamumma amaana maqaki mariasa akaqausa Baraamana oosana maree mariafanoo.

<sup>15</sup> Miqi kai masee inniki Nikooraita amaana ufa irimariasa akaqausa mariafanoo.

<sup>16</sup> Innee inneeqa mandoosana kafaqa quandaqa. Sia quandaifaqa qinee innee mariaqoo anireeqa qeeqa dookiqari qaseemanna mi mandoosana maree mariasa naruanauranoo.

<sup>17</sup> Anutuna maraquina fannoo aiqama maqusa amaana maqaki keeqee mariasa qimannimidanoo naaqoo faqaasa iriaqa. Ooqai Isaraee maqannaasa aadana maqa maaqakinai nimarufaqa kananaana kananaana innaarunaindaraa feemu nimiaafanausa maridaqa. Maa maqee mariaqoo mandainaina faqa rakiraridaqa mina uriaaqararasa qinee kukeqara feemu innaarunai misa nimianaura. Eekara oonisaa nári fuka nuqu akara rirana moodaa kai moodaa kai nimianaura. Mi fuka auquna sia moo fannoo misa oosana iriannoo narí kai mina oosana iriannoo. Doo mi ufana Yisufa Peerakamumma amaana maqasaa Paatoonara Yoohaneena qimaminau.

*Tiatira maqusanaasara ufa Yisufa Yoohaneenasaa quqoo ufafa maridanoo.*

<sup>18</sup> Rambi kuradee maria saqarina qambaanaí marifa Yisufa miqi qimaseenoo quandaki Yoohaneena kafaqa maaqi qimasee qimaminau. Yoohanee anee Tiatira amaana maqasaa Paatoona faqa maaqi qimasee akara rumamaqaa. Anutuna amaaku afu idara foora qeemarifa mina aiku faqa anukanoo mari barasara foora tandi tandi mari aikunannoo mandainaina radamimarifa Yisufa maa ufana inni qimannimidanoo.

<sup>19</sup> Innee Tiatira maqusanaasa qini Yisusara nimuqsidanoo qinee iridaqa, innee maqee maqee iriqa kai fimarianara faqa qinee iridaqa, innee qiniara iriseeqa inneeqa maqannaasa dadaaqimariafanoo. Innee sia kadaapi dari maqi qimasee minnisee mariafanoo kaqi maraqa fimarianara minara faqa iridaqa. Ooqai innee qini saika oodaa maree mariqau, maqee kamu firaqoo maree mariafanoo qinee minara faqa iridaqa.



<sup>20</sup> Qinee inni moodaa ainainara kai inni niqidaqa. Innee mi manda anaaseena Yeesebeera nammarinara saina kaqi marianifee qimariana. Mifa unna qimasee nariara Anutuna ufa maree marunaasee qidanoo. Mi anaaseefa naakapaidanoo qini ufa irimariasa rarisameeqeenoo faiqi faqa anaasee faqa nari ummuari nari ummuariranaki quqaidanoo. Moo unna anutunara innaaru qimasaida narana neemarianaki faqa quqaidanoo.

<sup>21</sup> Qinee mi anaaseenara aneenna ummuariranakiqari quandaanee qimasee afeesunaisia maridaqa.

<sup>22</sup> Minara mina mareeqee nari rarisaqanua fasiqausa saimbaqa manda gaarisaa quqasaanura minaki maridaqa teeroo fraana maraida marifaranoo. Misa nari mandosana sia aupuramasee quandaifaqa qinee dauni miqianaaura.

<sup>23</sup> Qinee mi anaaseena ufa irimariasa faqa kuqa narusaanaqa amaana maqaki keeqee mariasa qini oosana irifaranoo. Misa qiniara kukeeqara ainainara irimari fee qiaqeera naruanauranoo. Qinee aqamausa nari nisaukunnai auqainnana akiaqara kai nimianaaura.

<sup>24</sup> Innee Tiatira maqusanaasa sia mi manda anaaseena oosanna maroosa mariafanoo. Mina oosana mareemariasa Sadannana meemaqoo kukeeqara irirana irimariasa nariara qimasee akoofasa fee qidaqa. Qinee sia ummaara moo faqa innisaa quqaanura.

<sup>25</sup> Maana kai qimannimidaqa. Inneeqa amiqira oosana uaqeeiana mina kai maramaree fuaqa, fifi inaqqa qinee qumuanna aukuanna mina akiaqara maraqa.

<sup>26</sup> Rakiranara foora iqa mandainaina uraaqarararee imariasa qini ufamau fimariasa mi mau fifi inaqqa taikara aukuana paquriqa qini qikoofa afeeka qimuna quandaki misa nimianaaura.

<sup>27-28</sup> Niminaqa kasooqagee naaru misa moo maqannaasa urinaaqaramasee ainna faaqaanannai misa qafeera foora rukamifaranoo. Qinee iqaqara duqudeeqi faqa nimianaaura.

<sup>29</sup> Anutuna maraqa fannoo amaana maqaki keeqee mariasa qimannimidanoo naaqoo faqaasa mi ufana iriaqa.

### 3

*Saradisa maqusanaasara ufa Yisufa Yoohaneenasaa quqoo ufafa maridanoo.*

<sup>1</sup> Yisufa miqi qimasee Tiatira amaana maqasaa rakisirana qimamiseenoo quandakinoo Saradisa amaana maqasaa Paatoonara Yoohaneena qimaminau. Yoohanee anee maa ufana akara rumeeqeenana Saradisa amaana maqasaa rakisira Paatoona amaqa. Anutuna maraqa dinni taikasee dinni ani qaaramarasee maraqa qumaree marifa dinni taikasee dinni ani qaaraqanda fasau qumaree marifa Yisufa inni Saradisa maqusanaasa qimannimidaqa. Qinee innee auqemarianara iridaqa. Misa unna qimasee inniara kasimariasee qifaqa qinee inniara kuqimariasee qidaqa.

<sup>2</sup> Innee minara iriseeqa tauti findifuaqa nimuqusa kaqikaqoo kasimariqoo kaaqa kuqifoora dauni findi fuaqa. Inneeqa Anutuna saika mareemariana Anutufa qafaidanoo mina afusaa sia anoonaikidanoo minara qinee inniara tauti findifi fuaqee qidaqa.

<sup>3</sup> Innee ooqai qini ufa irimaria oosannara naaqoo irisee qini ufara faqa irisee eedoo qimasee mi mau fifanoo inneeqa mandoosana quandaqa. Innee sia faiqaranakiqari tauti findififaqa qinee ummuari mari fasiqafara foora tautumannimaqasee anireeqa naruanura.

<sup>4</sup> Inniki Saradisa maqusanaasa akaqausa sia qikairi faisa maridaqa. Innee qikairi siaisa qini faqa nifaranoo. Inni amiqira marirana amana kai eekara qamunna afisunnimaqasaanaqa qini faqa fifaranoo.

<sup>5</sup> Mandainaina fannoo inni maqee maqee rafaqaqafimarifaqa mi manda ainainna uriqararawsa inni naanna ramasee eekara qamunna afisunnimaqarara qidaqa inni nuqu faqa naaru kaqi marira papiqakinaana sia atekaanaura kaqi marianifeera qidaqa. Qinee qeeqa qikoona oorisa faqa mina qangiroo misa noorisaa faqa innee qikairi siaisara qini faiqi namu fee qianaaura.

<sup>6</sup> Anutuna maraqa fannoo aqama maqusa amaana maqaki keeqee mariasa qimannimidanoo naaqoo faqaasa mi ufana iriaqa.

*Firadeerafia maqusanaasara ufa Yisufa Yoohaneenasaa quqoo ufafa maridanoo.*

<sup>7</sup> Yisufa miqi qimasee Saradisa amaana maqa Paatoona qimamiseenoo quandaki Firadeerafia amaana maqasaa rakisimarunara Yoohaneena qimaminoo qinuu. Yoohanee anee maa ufana akara rumeeqeenana Firadeerafia amaana maqasaa rakisira Paatoona maaqi qimasee amaqa. Ooqai Dafidifa kooqi kiqa uaqeeuna qinee Yisusa maqee mina uaqeidaqa ani qimannimidaqa. Qinee naaquqara andeeqarawsa kuqaa anona

oosana oosana mareemarunausa maa ufana inni qimannimidaqa. Qinee kiqannai kooqi ititasaana sia amana moo fannoo atuarana amana maridanoo, kaifaa qinee kooqi atuusaananoo moo fannoo sia amana ititaannoo.

<sup>8</sup> Innee Firadeerafia maqusanaasara qinee inni aiqamausara amiqimasee iridaqa. Inni noorrinni kooqi atuarana quqasaananoo moo fannoo sia amana mina ititaannoo. Inni afeeka kaqikaafa maridanoo innee qini naakapara ufamau fimariasa mariafanoo. Innee maqee maqee qiniara kai iridaqa mariasa mariafanoo.

<sup>9</sup> Iriaqa, Sadanna faiqi namu akaqausa mariasa nariara unna qimasee Yuda maqanna fee qimasee qimariasa qinee misa mareeqee inni niramandunna quqasaanaura. Aiqa-mausa mina qafeeqa oo Yisufa inniara amuqusifanoo miqidanoo fee qiaqeera.

<sup>10</sup> Qinee inniara reendenamandee mariaqee qiafaana qinee miqi mariasa mariafanoo. Miqi mariana akiaqara firaa teeroo maaqanna maaqanna nimanamasee qafaanaura miqianna aukuanqa qinee inni mareeqee kaqi atinnai quqasaana asumu marifanoo.

<sup>11</sup> Qinee qusasaa qumuanaura. Innee uriqaraqa mariana amiqimmandee rakisi qumaraqa moo fannoo qumaraandoora.

<sup>12</sup> Maa maqanasaa mandainaina qambaana uriqararana qinee mina qumareeqee qeeqa qikoona amaana maqaki quqasaananoo mifa faakanaikino mariannoo. Qinee mina afaaqasaa qeeqa qikoona Anutuna auqu quqaanaura, qeeqa Anutuna firaa maqusa fuka Yeerusaree auqu faqa mina afaaqai quqaanaura. Mi maqusafa innaarunaindari qini Anutufinnainadari kasooqaqee qumuannoo. Qinee qeeqa fuka duqu faqa mi fasiqana afaaqai quqaanaura.

<sup>13</sup> Anutuna maraquna fannoo aiqama maqusa amaana maqaki keeqee mariasa qiman-nimidanoo. Naaqoo faqaasa mi ufana iriaqa.

*Raodiseea maqusanaasara ufa Yisufa Yoohaneenasaa quqoo ufaa maridanoo.*

<sup>14</sup> Yisufa miqi qimasee Firadeerafia amaana maqasaa Paatoonara Yoohaneena qimamiseenoo quandaki Raodiseea amaana maqasaa rakisiranara qimaminoo qinuu. Yoohane anee Raodiseea amaana maqa rakisira Paatoora faqa maaqi qimasee akara rumamia. Qinee mapukusee marunna fasiqausa Yisusa inni qimannimidaqa. Qinee naaru naaru kuqaa anoona ainaina kai qimarunausa inni qimannimidaqa. Anutufa aiqama ainaina auqimaruna oosana qinee marunausa inni qimannimidaqa.

<sup>15</sup> Qinee innee auqee maru ainainnara iridaqa. Innee sia suaru qiqa mariafanoo innee sia idaidiqa mariafanoo Inni oosana amiqirafa marinaqau kaifaa minara faqa irini.

<sup>16</sup> Inni oosana suanisaa nammariara foora naunanoo ididi marifaqa fiddaqa.

<sup>17</sup> Innee unna qimasee inneeqara aiqama ainaina oosana oosana faqaasee qimari-afanoo. Inni nifaqa rumbanoo marifaqa mandaikidaqa kudoosaapaqa maridaqa innee sia minara irimariafanoo. Innee kudi mariafanoo nifu qimbarausara foora mariafanoo kaqisamuara foora mariafanoo.

<sup>18</sup> Qinee maaqi qimasee inni naamua qidaqa, innee qini koora munnimara foora feefaurumaseeqa minannai naundurakinaa qumiasana moomoo maraqa. Innee qinisaaqaraa andeeqarana feefaurumasee eekara qamunnara foora marasee inneeqa nisaurirana manda nifaqasaa afisuaqa. Inneeqa nifu marasinna minniseeqa qini marasinnara foora feefaurumasee inneeqa nifusanara foora narimarinaki akusaifanoo inni nifu amiqiani.

<sup>19</sup> Qinee nimugusi maria fasiqa anaaseera kai mandainainaki keeqaafaqa qaoo qimasee naridaqa. Innee minara irisee kuqaa noori runusee inneeqa marirana quandaqa.

<sup>20</sup> Iriaqa qinee Yisufa faiqi nimugusa kooqi afaisaa kikiqammambiqa kooqi atuuan-nee qimasee kukusidaqa. Faiqi moo fannoo qinee kukusiannana irinoo nari kooqi atuqainaqa qinee mina amuqusa ooki keeqafiqa mina faqa naanaura mifa qini faqa naannoo.

<sup>21</sup> Qinee maa maqanasaa mandainainakiqari uriqararausa maridaqa qeeqa qikoosandiri nari rakisira qaarisaa ooqufaaqee idaga. Maa maqanasaa mandainainakiqari rakirara foora uriqarainafa mifa miqi kai inoo qinee rakisira qaarisaa innaaruna ququsaki qini faqa ooqufaaqee mariannoo.

<sup>22</sup> Anutuna maraquna fannoo aiqama maqusa amaana maqaki keeqee mariasa qiman-nimidanoo. Naaqoo faqaasa mi ufana iriaqa.

<sup>1</sup> Qinee Yoohaneesa mi ufana irunanoo qifu pisipasifaqa moo ainaina qafeeqa. Innaarunai kooqiara foora atuanoo marifaqa qafeeqa. Minakiqari moo fannoo qimaqimifaqa iriqa mina ufa fannoo qufireena miqirana fuaqaidanoo miqidanoo qimaqimino anee mai ururainaqa kasooqagee kambiqaaninna ainainna uqafiqaanaura.

<sup>2</sup> Miqi qimasoofoano Anutuna maraḡuna daakufufaqa kooqiki keeqaki innaarunai ooru fiqiafana. Ooruree qafaafananoo ufa irira qaari ufiqiranasaa moo fasiqa marufaqa qafaḡia. Mi fasiqafa Anutufa marinau. Mi qaarifa sia kaiqeesa qaari Anutuna nari rakisimari qaarina marinau.

<sup>3</sup> Mi fasiqafa Anutuna oori afiri pupu ooniara foora ooriki takunasoosa imarinau. Oondanda amiqirafa rakisimari qaarina ufiqirana fiḡu fiḡu inoo marinau.

<sup>4</sup> Mi qaarina ufiqirana atiqara moodaa fasiqa aiku asauku taikasee moo fasiqa asauku qaara faḡa qaara faḡa oonu marasee fasiqauḡa nariḡa rakisimari qaarinasaa fiḡu fiḡumma ooḡu mariḡa mariḡau. Misa aiḡama uriqararasa koorannai auḡira qafee faḡaasa eekara qamunna afisirasa nariḡa qaarisa Anutuna fiḡu fiḡu mafi ooḡu marifi mariḡau.

<sup>5</sup> Anutuna rakisimari qaarina qambaaindandi aakuasaa faḡa innaarunai qirana faḡa darara qirana faḡa ruruqirana faḡa qaari qambaanaqari ururoofaqa qafaḡiafana Anutuna oorinni qisauku dinni taikasee dinni ani qaara marasee qoomanam Anutuna oorinni qeemarufaḡa qafaḡiafana. Mi qoomausa Anutuna maraḡunauḡa marufaḡa qafaḡiafana.

<sup>6</sup> Anutuna oorinni ooruku nammari miqirafa tanukara foora mandinoo marinau. Mi nammarinasa sia kaḡikaooḡo dumuna qaisoora marinau amiqirafa uḡanna marinau. Anutuna rakisira qaari dinni qaraḡanda dinni qaraḡanda aandaḡu marinau. Noorinni faḡa nitaufakai faḡa aiḡama nifaaḡasasa nifu moomoo marinau.

<sup>7</sup> Moo fannoo raiiona kaasau pusina fooḡaafa firaatia marinau moo aandaḡu burimakau aanaaqi miqirafa marinau moo aandaḡu faiqi noorikira aandaḡu marinau moo aandaḡu quḡaumu miqirafa aḡoosa faḡaafa marinau.

<sup>8</sup> Mi aandaḡu namusa qisauku dinni taikasee dinni ani moodaa marasee niḡoosa faḡasaa mariḡau. Mi namusa nifaaḡasasa faḡa naunduraki faḡa nifu moomoo marinau. Mi namusa eendaki faḡa faasaana faḡa idi raida kai mariḡau. Misa maaqi qimasee idi ree mariḡau.

Anutufa karaambaiḡa afeeka uriqararafa naaḡuḡarafa naaḡuḡarafa naaḡuḡarafa.

Ooḡai marufa maḡee marifa kasooqagee marianinafa maridanoo.

<sup>9</sup> Mi qaara faḡa qaara faḡa aandaḡu namusa qambaana Anutuna rakisinnimaḡee maru qaarinasaa dinni dinni mariasa maḡee maḡee Anutunara idi ree marusa mariḡau. Misa qaari qambaana maruna Anutunara naaru naaru marianinnanara dufi dufi qira idi faḡa mina auḡu uḡeerara idi faḡa mina areenaranara faḡa idi ree marusa mariḡau.

<sup>10</sup> Mi aandaunamusa idi ramasoofaḡa fiḡu fiḡumma marusa moodaa fasiqa aiku asauku taikasee moo fasiḡa oonu qaara faḡa qaara faḡa marasee uriqararasa nari kooru auḡira qafee uturuḡu quḡasee noorindari maḡasaa Anutuna oorinni kummarammafaḡa faḡa mina amooḡimasee maaqi qimasee qimamiḡau.

<sup>11</sup> Oo Karaambaiḡa Anutufa anee amiqirafa.

Anee amana areenarana faḡa amooqirafa faḡa afeeka faḡa amana mareennaranoo.

Anee aiḡama ainaina auḡunafa.

Aneenna iriranannai marirana faḡa kasirana faḡa nimunafa marianafa mariananoo.

## 5

*Rumbarauru papiḡa faḡa Anutufa aruaninna sipsipa anaaiqara faḡa qu ufafa.*

<sup>1</sup> Misa idi ramasoofaḡa rakisinnimaḡee maru qaarina qambaana marunna Anutuna asaukuki mifa papiḡa kukuqirana asauku uḡannai marufaḡa qafaḡiafana. Mi papiḡana aunduraki faḡa adisaa faḡa akara marufaḡa qafaḡiafana. Sanda rumbarafa qisauku dinni taikaseenoo dinni ani qaara maraseenoo mi papiḡana qambaana qambaana rumbanoo marufaḡa qafaḡiafana.

<sup>2</sup> Qinee miḡoo qangiroo moo qafaḡia amudaanai qimarufa afeeka qafamasaafoananoo firaa kari nameera qinoo qinau. Yafee moo fannoo andeeqarafa marianafa maa sandausa rakeemaseenoo fee papiḡa qairisee asaana ruannoo fee.

<sup>3</sup> Misa innaarunai faḡa maḡasaa faḡa maḡa ameemaanai kuqirusaki faḡa randaafanoo sia moo fannoo amanaikinoo mi papiḡana sanda rakeemaseenoo qairisee asaana ruaḡaainoo marufaḡa qafaḡiafana.

<sup>4</sup> Qinee Yoohaneesa mi papiḡana qafammasee ikiraqeeḡa sia moo fannoo andeeqarasa amana mariafaḡa qinee qafeeqa firaqoo ikiraqiafana.

<sup>5</sup> Ikiraqee mariafananoo uriqararausakiqari moo fannoo qimaqiminoo qinau. Sia ikiraqaa afu qafaa Yakooboona faiqi namukiqari Yudana aiku asaukukiqari moo fannoo raioonara foora aiqama mandainaina urinaaqararafa Dafidina ati firaa auqu faqaafa mifa amana mi sandausa rakeemasee qairisee asaana ruannoo.

<sup>6</sup> Miqi qimasoofaqa qinee qafaafananoo sipsipa aanaaqi fooqaafa Yisufa Anutuna qaarisaa kikiqinoo marufaqa qaara faqa qaara faqa qaara faqa moodaa fasiqa taikasee moo fasiqa qaara faqa qaara faqa marasee uriqarara fasiqauqa faqa Anutuna qaari atiara figu figu iqa marufaqa qafaafananoo. Sipsipa aanaaqi qambaana marinau. Mi sipsipa anaaqifa kuqufa kuqiranakiqari findifinoo marufaqa qafaqiafana mina aanai dinni qisauku taikasee dinni ani qaara marasee aanai kambiganoo marufaqa qafaqiafana mina afu qisauku dinni taikasee dinni ani qaara marasee marufaqa mi afunamusa Anutuna maraquna namu aiqama maqa maaqai Anutufa niqiqoofaqa nimarusa nindafaqiafana.

<sup>7-8</sup> Mi sipsipa anaaqifa Yisufa qambaana qaarisaa Anutuna asauku uqannai uaqeeu papiqana marasoofaqa aandau namu faqa uriqararusa fiqumma marusa faqa aiqamausa mina aramandunnai noorindari aqufufaqa idi moo fuka raqau. Idi raidaqa piripuna arimarufa dinni nisaukuki marinau kooa auqimaru qafeesa dinni nisaukuki marinau amiqira afundi maru ainainausa mi qafeesaki marinau, maaqanna maaqanna Anutuna ufa irimariasa innaaruqirafa mi qafeesaki mi amiqafundi maru ainainausa kikiqa usinoo marinau.

<sup>9</sup> Misa fuka idi maaqi qimasee raqau.

Oo Yisufa sia moo fannoo amanaikiannoo anee aneenna andeeqaranannai kai aneenna akoona asaukukinaana papiqa marasee idukinnaranoo.

Misa ani arusoofana aneenna kuqiranannai faiqi feefaurummeeqeenana Anutuna asaukuki quqanau.

<sup>10</sup> Aiqaama kaqikaa maqannaa faqa firaa maqannaa faqa akaqausa aneenna fidikan-nai feefaurummeeqee Anutuna asaukuki aanaiqikiranaki quqoonafa kasooqaqee miqooqari misa maa maqanasaa uriqararausai kifaranoo.

<sup>11</sup> Qinee Yoohaneesa mi idina roofaqa irisee uqeerafi nindafaafanaqa qangiroo moomoo nukudara foora kikiqiga mariqau. Aandau namufaqa uriqararausa namufaqa Anutuna rakisira qaari fiqumma kikiqiga marusa ninaaqiannai nukudara foora qangiroomuqa moomoosa fiqumma fiqum mambufaqa miqoo marusa aiqamausa idi moo raqau, firaa kari maaqi qimasee raqau.

<sup>12</sup> Oo sipsipa aanaaqi anee faiqi arunaki reendeenamasee keeqoonafa ani andeeqarafa kai amanaikinoo marinara

Anutufa uriqararana faqa ainaina moomoo faqa irirana firaana faqa afeeka faqa auqu uqeerarana faqa areenarana faqa ani amooqirana faqa ani Yisuna amiannoo.

<sup>13</sup> Misa mi idina ramasoofaqa kafaa iriseeqa aiqama innaarunaindaraa ainaina faqa maqasaa ainaina faqa ooruku nammarikinaa ainaina faqa maqa ameemaaindaraana faqa aiqamai Anutufa auquqoo ainainausa moodaanakikammambiqa maaqi qimasee idi raqau.

Qaarisaa ooqu marinoo marifa sipsipa aanaaqi faqa inniqara nimooqirana faqa nuqu uqeerarana faqa areenarana faqa afeeka faqa naaru naaru innindi marianiffee qidaqa idi raidaqa.

<sup>14</sup> Misa miqi qimasee idi roofanoo qaara faqa qaara faqa aandau namu misa roo idina irisee kuqaa fee qufaqa miqoo uriqararausa marusa noorindari maqasaa rupaitamafu-faqa Yisuna amooqimamaqaqau.

## 6

*Papiqa rumberauru idukunara qu ufaa.*

<sup>1-2</sup> Miqi qimasoofanoo sipsipa aanaaqi fannoo mi papiqana kukuqirana qumareenoo moo sanda rumbaqaona idukinau. Idukusoofanoo Anutuna aaga qaara faqa qaara faqa aandau mariunakiqari moo mina ufa fannoo innaarunai miqirafa darara qimaseenoo qimaqiminu. Anee anianne qufaqa qinee Yoohaneesa miqoo oonuraafananoo qoosa moo eekara arirafa marinau. Faiqi minasaa ooqufaaqeeu fasiqafa duru faqaafa marinau. Miqooqaraasa qafee afisuamaqasoofanoo maaqanna maaqanna rakiranannai nari aramandunnai quqararee qimasee finau.

<sup>3</sup> Mifa fufanoo sipsipa aanaaqi mi papiqana sanda moo rumberana idukinau. Idukusoofanoo Anutuna aagaqari aandau moo qiniara aniree qafaannee qinau.

<sup>4</sup> Qinee oonu qafaafananoo qoosa moo taatuqee arirafa animarinau. Miqooqaraasa qaseema firaana raiqarana mi qoosanasaa maruna amisee qimamiqau. Anee ooqu

maḡasaaqaraasaki maa qaseemanannai nirana fundakinaḡa rakirana uqeera niminaḡa narí ari nári ariḡaḡa.

<sup>5-6</sup> Mifa fufanoo mi papiḡana rumbarana sipsipa aanaaḡi fannoo moo sanda idukinau. Idukusoofanoo Anutuna aḡaḡari aandau moo findifinoo qiniara aniannee qufaḡa oonu qafaafanoo qoosa moo runduḡarirafa marinau. Mi goosanasa a marufa sikeera uḡusee marufanoo Anutuna aḡaḡari aandau moo ookiḡari ufara foora mi faḡana ḡimaminau. Aandaroo aukuna maridanoo moodaa faasaana saikiana amana kai raisa nimia. Raisa sia marinaḡa kamaa miḡi kaimmasee rainasee nimia. Misa fadameena faḡa nammari faḡa sia anee mina arua saina kaḡi nimia, narana ainaina kai aandaroo naruannoo.

<sup>7</sup> Miḡi ḡimasoofanoo sipsipa aanaaḡi mi papiḡana rumbarana moo idukusoofanoo Anutuna aḡaḡari aandau moo fannoo qiniara aniree qafaannee qinau.

<sup>8</sup> Qinee Yoohaneesa irisee oonuraafanoo qoosa moo afaḡa eeḡaku arirafa marinau. Mina ataufakaḡa maruna auḡu Kuḡirafa marinau. Faiḡi nimana madikakinaasa faiḡiara fooḡiara mi faḡana faḡa fidanoo narí dadaḡi narí dadaḡi mariḡu. Miḡoo innaarunai marusa maaḡi ḡimasee ḡimamiḡau. Innee qoosa faḡa faiḡi faḡa faiḡi nimana madikakinaasa faḡa maḡasaa faḡiḡaki ooḡuree duru feefannai faḡa aandaroonnai faḡa auriranannai faḡa kaasau aandaunnai faḡa moomoo faḡiḡa anaasee maḡusa maḡusa mariasa narida mariaḡa.

<sup>9</sup> Misa fufanoo sipsipa aanaaḡi mi papiḡanasaa rumbarana moo sanda idukinau. Idukusoofaḡa qinee miḡoo aandau tatufimaru ḡaindana marufaḡa qafaḡiafana. Mi ḡaindana ameemaanaí kuḡirasa nimana moomoo marufaḡa qafaḡiafana. Sia fifau kuḡirasa mariḡau. Maḡasaa maridaḡa Anutuna ufa andeeḡasee faiḡi anaasee ḡiman-nimunara mina akiaḡara narusoosa kuḡiḡa mariḡau. Misa oosana Anutuna ufamau kai fimarunara minara narusoofanoo Anutufa misa nimana mareeḡeenoo innaaruna ḡainda ameemaanaí quḡanau.

<sup>10</sup> Qinee Yoohaneesa qafeemariafanaḡa firaakari mindari Anutunara nameera ḡiḡau. Oo uriḡarara karaambaḡaḡa anee andeeḡarafa naaḡuḡarafa anoona ufa kai ḡimarianafa mariananoo. Yairee fee maḡasaaqaraasa ufa iriseenee maasa daruana akiaḡara nári narinnaree.

<sup>11</sup> Miḡi ḡimasoofaḡa innaarunai marusa eekara ḡamunna marasee aiḡama nimisee ḡimannimiḡau. Innee maana afisusee kafa a miḡoo kaḡikaḡoo idooaḡa. Inni nikaḡaḡasaa maḡasaaqaraasa inni naanna reeḡa Anutuna ufaasara kuḡifanoo Anutufa mikari inni ufa faḡa misa ufa faḡa iriannoo.

<sup>12</sup> Miḡi ḡimasoofanoo sipsipa aanaaḡi mi papiḡana rumbarana moo sanda idukinau. Idukusoofanoo maḡa firaḡoo uḡanna kasinoo suani afu arusoofanoo runduḡarira ḡamunnaikinoo marinau. Quḡoona faḡa aiḡama taatuḡee arinoo fidikandandinau.

<sup>13</sup> Fasau saḡari ḡaḡamma miḡirafa ufai uḡifanoo adusa aiḡama maḡasaa kakasidanoo aiḡama fasau maḡasaa kakasinau.

<sup>14</sup> Innaaruna kudimanda fannoo papiḡa fooḡaana atindari raḡandaamamaree mafi aiḡama raḡandaamma taikanau. Aaḡana aaḡana nári maruḡooḡari nári maruḡooḡari moosa minifi mafi quḡaidanoo ooruku nammariki afumaḡa faḡa miḡi kaimminau.

<sup>15-16</sup> Miḡimarufa maḡasaaqaraa karaambaḡiḡaḡa faḡa uriḡararasa faḡa sundiaki kia-teenauḡa faḡa ainaina faḡaasa faḡa nimudaanaí ḡimarusa faḡa faiḡi aiḡama karabusara fooḡaana ainaini mariasa faḡa kaiḡeesa faḡa aaḡanasaa maru ooni aamaranaki keeḡafi kukeeḡafiḡa aaḡanara faḡa oonira faḡa nameera ḡimasee ḡiḡau. Innee maasasaa aḡifiḡa maasa dariḡa kukeeḡaḡiḡaḡaḡa. Qaarisa ooḡumarinoo marina afusaara ruffaidaḡa ititaḡiḡaḡa. Sipsipa aanaaḡi aanooḡiranasaa faḡa ititaḡiḡaḡa.

<sup>17</sup> Miḡanda firaa aanooḡira faasaana doo animaridanoo, sia moo fannoo amana misa nifusaa kikiḡiḡannoo.

## 7

*Isaraee maḡannaa faiḡi oosana oosanakiḡara Anutuna akara niḡinisaa quḡararasa qu ufaḡa.*

<sup>1</sup> Qinee Yoohaneesa mi ainainna qafammasaafanausa kafa maa ainainna qafeeḡa. Qangiḡoo qaara faḡa qaara faḡa safasa ati atisaa kikiḡiḡee maridaḡa miḡiḡa maridaḡa ufai maḡasaa maḡee maḡee uḡimari ufaina maḡa maaḡa mandaikianifee ḡimaseeḡa ufai rafaḡafiisee maridaḡa. Miḡiḡa mariafanoo sia ufai moo fannoo ooruku nammariasa fee maḡasaa fee saḡarisa fee sia fuḡeenoo.

<sup>2-3</sup> Misa miḡiḡa marufaḡa qinee qangiḡoo moo qafaḡiafana. Qangiḡoo moo fannoo suani oosana ḡaanaindari kaḡi marira Anutuna akarainaina uḡirafa anireenoo ufai rafaḡaḡimaru qangiḡoosa naaramasee ḡimanniminoo qinau. Anutufa inniara ufainnai

maqa faqa ooruku nammari faqa mandaikamma nimaqaannee qifaqa eekaa kaqikaa qoo kaqi marifaqa qinee Anutuna ainainira faiqiuqa niqinaaqa Anutuna akara rumasaanaqa miqoo maqa faqa ooruku nammari faqa saqariuqa faqa ufai quqasaifanoo firaqoo uqinoo mandaikamannimaqaani. Mi qangiroofa miqi qimasooafaqa Anutuna faiqi namu maqasaaqaraasa niqinaaqa akara rumasoofanoo moo fannoo asaana rumasee kooroomasee qimaqiminoo qinau.

<sup>4</sup> Isaraeena aiku asaukukiqari aiqama moodaanaki quqaseenoo wan handareeta faqa footi maqi tauseenna faqa (144,000) fifau nukudara foorammaqa mariqau. Miqimasee marunaki mi namusa kai niqinaaqa akara rumannimaqaseenoo Anutunaindi marifanoo ufai fannoo sia naruanifeera rumannimaqanau.

<sup>5</sup> Isaraee maqaanna faiqi namu niqinaaqa akara rumannimaqaqoosa misa naadu naadu oosaa oosaa kai mariqau. Yudana aiku asaukukiqari (12,000) tuerufa tauseenna moomoo Anutuna akara niqinaaqa rumannimaqanau.

Reebeenana aiku asaukukiqari (12,000) tuerufa tauseenna moomoo Anutuna akara niqinaaqa rumannimaqanau.

Kadana aiku asaukikiqari miqi kai maseenoo 12,000 rumannimaqanau.

<sup>6</sup> Aseerana aiku asaukukiqari miqi kai masee 12,000 akara rumannimaqanau.

Napatarina atiuqa marusa miqi kai masee 12,000 akara rumannimaqanau.

Mannaseena aiku asauku marusa miqi kai masee 12,000 akara rumannimaqanau.

<sup>7</sup> Simeeona atiuqa marusa miqi kai masee 12,000 akara rumannimaqanau.

Reefina aiku asauku marusa miqi kai masee 12,000 akara rumannimaqanau.

Isakeena atiuqa marusa miqi kai masee 12,000 akara rumannimaqanau.

<sup>8</sup> Seeburuna atiuqa marusa miqi kai masee 12,000 akara rumannimaqanau.

Yooseefaana aiku asauku marusa miqi kai masee 12,000 akara rumannimaqanau.

Beensaminna aiku asauku marusa miqi kai masee 12,000 akara rumannimaqanau.

Miqimasee mi qangiroofa Isaraeena aiku asaukukiqari moodaanaki mara ruqau-maseenoo 144,000 fifau nukudara foora Anutuna akara niqinaaqa akara rumannimaqanau.

*Aiqama aanaamuru Anutuna oorisaa suqu ufafa.*

<sup>9</sup> Qinee Yoohaneesa mina qafamaseeqa quandaki qafaafana moo suqirafa marinai faiqi anaasee firaqoo qusimariqau. Sia faiqi moo fannoo nisaanarirana amana moomoo uqanna mariqau. Misa aiqama firaa maqannaasakiqari faqa kaqikaa maqannaasakiqari faqa aiqama fasiqa anaaseekiqari faqa aiqama ufakiqari faqa Anutuna qaari oorinni sipsipa aanaaqi oorisaa aiqama ufa qimarusa kikiqammafiqau. Misa qamunna eekara afisirausa aufaqa saqari asaana uqirausa Anutuna oorisaa kikiqiqau.

<sup>10</sup> Miqoo kikiqiqi maridaqa maqi qimasee Anutunara firaa kari qimamiqa qiqau. Maasa Anutufa rakisira qaarisaa ooqumarifuananoo sipsipa aanaaqi faqa anisaqaraana kai maasa naaru marirana maraidaqee qiqau.

<sup>11</sup> Miqi qimasooafa uriqararasa Anutuna rakisira qaari atimau fiq ufiq iqa marusa faqa qaara faqa qaara faqa aanda marusa faqa marufaqa misa fiq ufiq iqa maru qangiroosa misa kai maqasaa noorindari aqufufaqa Anutuna amooqifa qiqau.

<sup>12</sup> Kuqaa amooqirana faqa areenarana faqa irirana faqa dufi dufi qirana faqa auqu uqeerana faqa uriqararana faqa afeeka faqa naaru naaru maasa Anutunaindi kai maridaqa. Kuqaa fee qiqau.

<sup>13</sup> Qaari fiq ufiq qiranakiqari uriqarasaqikiqari moo fannoo quandaki qini Yoohaneesa irammirino qinau. Maa fasiqa anaaseesa yaindaraasee eekara qamunna afisirausa aiqama ufa qimarusaqikiqari ani maridee qufaqa qinee qiaqifana.

<sup>14</sup> Sia qinee iridaqa anee qimaqimia qiafananoo mifa kooroo qimasee qimaqiminanau. Maa fasiqa anaaseesa Anutuna ufamau fimarusa minasaara narirana maree marusa minakiqari amiqimasee ani marusa maridaqa. Misa nari ikairi aanaaqi qamunna sipsipa aanaaqi Yisuna fidikaki nari qamunna nammaruqusee eekara arufifaqa afisusee maridaqa.

<sup>15</sup> Minara misa faasaana faqa eendaki faqa Anutuna naaquqara maqaki nari rakisin-nimaqee maru qaarina oorisaa kikiqammambi eendaki faqa faasaana faqa amooqidaqa. Qaarisaa marifa Anutufa nari kai misa ititannimaqaannoo.

<sup>16</sup> Ititannimaqaidanoo sia kafaa misa naara raannoo, sia nammariara nidiannoo, sia suani ididirafa nifaqaqi naruannoo.

<sup>17</sup> Sipsipa aanaaqi rakisira qaari qambaana marifa mifa misa rakisirafa marinoo misa nifiqee munusainaqa kaqi marira nammari maqakiqari radiqisee ururee mariqoo neefaranoo. Anutufa misa naukunu rukasaina misa ikiraqarafa taikaannoo.

## 8

*Papiqa moodaa sanda doo iduku ufafa.*

<sup>1</sup> Sipsipa aanaaqi fannoo mi papiqanasaa rumbara sanda inaaqianaana idukusoofanoo innaarunai qiqi ufa daiqimafinoo kaqikaqqoo kasoomafinuu.

<sup>2</sup> Ufa sia qirafa taikasoofaqa kaffaa qinee Yoohaneesa qafaafananoo qangiroo Anutuna afusaa kikiqammambi marusa dinni qisauku taikasee dinni ani qaara marasee miqimandee qangiroo ukeena moodaa kai moodaa kai amana kai misa nimiruu.

<sup>3-4</sup> Nimisoofanoo qangiroo moo fannoo kooraa auqimaru qafeena uqirafa anireenoo Anutuna aandau tatufimaru qaindana oorissaa kikiqammambinuu. Faiqi anaasee innaaru qirafa mi qafeenaki maruna maree aniroofaqa misa amiqira afundimaru ainainna moomoo mi qafeenaki innaaru qirana namufaqa quqasoofanoo Anutuna oorinni maru qaindanasaa kooraa auqimarunasaa idara qoonaki teeqimasooofanoo idaqqeenoo amiqira afundimaru ainainna faqa faiqi anaasee Anutuna ufamuu fimariisa innaaruqirana faqa idaqqoofanoo amiqira afunda fannoo Anutuna aikiambuunuu.

<sup>5</sup> Qangiroo mi qafeena qumareenoo mi qaindanasaaqaraa ida auri maru qafeenaki afeeriqi quqaseenoo innaarunaindari maqasaa teeqimmaqqinuu. Teeqimmaqusoofanoo innaarunai qirana namufaqa aakuusaa uqirana namufaqa maqa kasirana namufaqa kambiqanuu.

*Dinni ani qaraqanda marasee ukeena fuaqqoo ufafa.*

<sup>6</sup> Miqqooqari qangiroo qisauku dinni taikasee dinni ani qaara marasee ufireena faqaasa fuaqqarara deedaqqau.

<sup>7</sup> Fuaqqasoofanoo pupusamu faqa ida namufaqa fidika namufaqa moodaanakikirafa innaarunaindari maqasaa teeqinuu. Teeqimasooofanoo maa maqa maaqqanaki qaaramooki oosuseenoo moodaaki idaqqama taikanuu, saqari faqa miqqoo marinauqa moomoo qamataikanuu. Aiqaama andanda faqa miqqoo marinauqa qamataikaseenoo qaraqqandaki kaqi marinauu.

<sup>8</sup> Qamataikasoofanoo doo mina inaaqianna qangiroo narí ufireena fuaqqasoofanoo firaa aqaanara foora ida auri maruna rafaurinoo innaarunaindari ooruku nammariki aqufinuu.

<sup>9</sup> Aqufufanoo ooruku nammariki qaaramooki oosuseenoo qaraqqandaki kaqi marinoo moodaaki fidikaikamafinoo minakinaa noodaannaina kuqu taikafinoo sipauqa faqa qaara oosiranaki kaqi marinauu, moodaa oosiranaki kuridifinuu.

<sup>10-11</sup> Kuridifufanoo misa ninaaqiana qangiroo moo fannoo narí ufireena fuaqqanuu. Fuaqqasoofanoo fasau firaafa mina auqu sukaqara fasau fee qiqau, mifa qoomara foora aurimaruna fuka nammariki maqasaa aqufufanoo qaraqqandaki quqaseenoo nammariki amiqirafa, moodaaki faiqi anaasee mina namasoofanoo suka narufaqa moomoo kuqimariqau.

<sup>12</sup> Qinee Yoohaneesa mina qafamasaafananoo inaaqianna qangiroo moo fannoo narí ukeena fuaqqanuu. Fuaqqasoofanoo suani afu qaaramooki oosuseenoo moodaaki amannauna arinoo qaraqqandaki kaqi mariqau. Quqoona faqa fasau faqa moodaanaki amannauna arinoo qaraqqandaki kaqi qee marinauu. Suani faasaanasaqqari dinni ati qeemarinuu, dinni ati sia qeemarinuu eendaki quqoona faqa miqi kai inuu.

<sup>13</sup> Qinee mina qafamasaafananoo quqaumu sandaaqqi qaqqamaree fidanoo firaa kari faiqiara maqi ufa qufaqa iriqaafana. Mifa qinuu mandoosana naaqqarafa kambiqaanoo qangiroo qaaramoo namu ufireena fuaqqefandinuusaa misa fuaqqafandinna kamuqqoo maqasaaqaraasa firaa mandainaina naaqqararanaki marifaranoo fee qinuu.

## 9

<sup>1-2</sup> Quqaumu miqi qimasooofanoo qangiroo moo fannoo narí ufireena fuaqqanuu. Fuaqqasoofaqa qinee Yoohaneesa qafaafananoo fasau moo innaarunaindari maqasaa aqufufa findifufanoo moo fannoo maqa ameemaanaa madika mina kooqi kiqa amufanoo mi fasau faiqiara foora findifinoo madika kooqi atuusoofanoo idamuna moomoo firaa idamunara foora minakiqari ururanuu. Urureenoo innaaruna faqa suani afu faqa aiqama ititifinuu.

<sup>3</sup> Mi idamunnanakiqari pandaqa moomoo qumureenoo maqasaa aqufiqau. Misa farukara foora naruaqera Anutufa quqanuu.

<sup>4</sup> Pandaqa kaaqa andanda saqari amanee neemarusaa marufanoo Anutufa minara qaoo qimaseenoo faiqi kai naruaqee qufaqa miqimiqaau. Sia aiqama faisaa anaasee naruaqee qinuu. Anutuna akara niqinaaqa marinausa sia naruaqee qinuu.

<sup>5</sup> Mi pandaagausara faiqi kuqa nariranara qaoo qinau, kaqi aupurarana kai moodaannai qisauku quqoonasaa aupurarana firaana nimiaqee qinau. Mi pandaagausa narirafa faruka naruqoofanoora foora nidafi marinau.

<sup>6</sup> Moodaannai qisauku quqoonasaa pandaaga marinnakamuqoo faiqi anaasee kuqirana randaida sia kuqifara aupuree marifanoo kuqirafa adeediramafinanoo doo miqoo taikasee fuannoo.

<sup>7</sup> Mi pandaagausa rakiranaki namaru qoosausara foora mariqau. Misa nikiaga kooru auqira qafera foora marinau, misa noori faiqi noori fooqaasa mariqau.

<sup>8-9</sup> Misa nikiaga asausi misisaua nikiagara foora kisaagandauga marinau, misa nifai raionara foora firaa nifai kisaaga marinau. Misa nimuqusa rafaagafirafa qainnara foora marinau, misa niqoosa ufa fannoo faiqi moomoosa sandaafanoo maqa ririqindee qimarinau.

<sup>10</sup> Misa nimeesa ati fannoo farukara foora faiqi raquru nimimarinau. Doo minannai faiqi anaasee moodaannai qisauku quqoonasaa aupurarana nimifaranoo.

<sup>11</sup> Misa saideenna uriqararafa maqa ameemaanai madika rakisirafa uriqararafa maridanoo. Yuda maqannaasa ufakiqari moo nuqu Heeburu ufakiqari mina auqu Abadoonnee qimariqau. Kirusa ufakiqari Apoorioonee qimariqau. Mi auquna oosana aiqama ainaina kuridi marinee qimariqau.

<sup>12</sup> Doo miqinoo indaaruga mandainaina taikanau. Qaaraqanda kaqi maridanoo.

<sup>13-14</sup> Pandaaga taikafufanoo qangiroo moo fannoo nari ufireena fuaqanau. Fuaqasoofaqa qinee Yoohaneesa iriafananoo kooru auqira qainda Anutuna afusaa marunakiqari ufa moo qufaqa iriqiafana. Mi ufaqa kooru auqira qainda aannai qaara faqa qaara faqa marunakiqari kambiqaqafinoo ufireena fuaqoo qangiroona qimaminoo qinau. Eufarateesa nammariki qangiroo qaara faqa qaara faqa faqa faiqi kuridi maria qangiroo namusa rumbaqa mariasa idukunnisaa.

<sup>15</sup> Idukunnisoofaqa maqasaqaraa fasiqa anaasee qaaramoosaa oosuseenoo qaaraqandaki kaqi quqasee moodaaki aiqama naru taikaquru dinni ati firaqoo kaqi quqanau. Anutufa oqaindari misa deedaqamma nimufaqa mi aukuanna mi quqoona suaninasaa deedaqamma nimiqoosa nari rakira faiqiuga faqa mi qangiroo namusa faiqi anaasee moomoo uqanna naru taikaqau.

<sup>16</sup> Mi qangiroo namu marusa rakira faiqiuga tu handareta mirioona marufaqa nindafaqiafana (200,000,000). Fifau saqari amaneera foora moomoo uqanna qafaqiafana.

<sup>17</sup> Qinee Yoohaneesa qifu pispasinoo marufaqa misa qoosauqa faqa misasaa mariasa faqa nindafaqiafana. Qoosasaa mariasa nimuqusa ititarafa akaqafa taatuqee idauruara foora mariqau akaqafa dirindaasi arirafa mariqau akaqafa tumana arirausa mariqau. Misa qoosauqa nikiqa raioona akiaga miqirausa mariqau, misa nookiqari idauru namufaqa muna namufaqa nookiqari urimarinau.

<sup>18-19</sup> Misa qoosauqa nooki qinee nimeesaki faqa faiqi narira afeeka maridanoo. Misa nookiqari idauru namufaqa idamuna namufaqa maa maqana afaaqasasa mariasakiqari faiqi anaasee moomoo uqanna narutaikanau. Mi qoosausa nimeesa sakaniara foora faiqi ukaqannimidanoo faiqi aupurarana firaana maraidaqa.

<sup>20</sup> Mi narimaru ainainausa maqasaqaraa fasiqa anaasee moomoo naru taikasooofaqa kaqi mariasa mina qafamasee sia rufieeqa sia nari mandainaina minniseeqa Anutu finnai ubekeeqa. Kaqi maqeeidaqa. Misa kaqi kai afaannauqara innaaru qimariqau. Misa koorannai siruaannai booroosannai ooninnai saqarinnai Anutunara foora sia faiqi qafeemaria ainainna sia ufa irimaria ainainna sia nimaria ainaina, nisaukukoo auqusaidaqa minara innaaru qimariqau.

<sup>21</sup> Mi kaqimaria fasiqa anaaseesa sia nari ari nari arirana minniseeqa, sia aukainaina minniseeqa, sia faiqi anaasee qummuarirana minniseeqa, sia ainaina qumuarirana minniseeqa kaqi kai maridanoo.

## 10

*Qangiroo moo papiqa kaqikaana rumberana uqirafa quminau.*

<sup>1</sup> Miqimarufaqa qinee nindafaafananoo qangiroo moo amudaanai qimarufa innaarunaindari quminau. Mina qamunna sia qafaqiafana qoonnamu qamunnara foora kai afisirafa marinau, mina akiqa oondanda fiq inoo marinau, mina oori afiri suani afu miqirafa daroo daraa imarinau, mina aikuqara saqari aadana kikiqinoo marifaqa idaree mariandee imariqau.

<sup>2-3</sup> Mina asaukuki papiqa kaqikaana asaana ruanifeera airiqoofanoo marinau. Mi qangiroofa qumureenoo asauku uqanna aiku ooruku nammarisaa ramaseenoo asaaqai



aiku maqasaa ramaseenoo raioonara foora firaqoo faaqaarufanoo innaarunai qirafa dinni qisauku taikasee dinni ani qaara marasoofanoo innaarunai firaqoo darara qimasee faiqira maqi ufa moo qimaminau.

<sup>4</sup> Qinee Yoohaneesa innaarunai qira ufa irisee akara ruaneeriefananoo innaarunaidari gaoo qinoo qisauku dinni taikasee dinni ani qaarqanda marasee innaarunai qira ufa sia akara rua, amiqimasee kukeeqaa qufaqa kukeeqaafafana.

<sup>5-6</sup> Mi qangirooma aiku ooruku nammariki faqa maqasaa faqa roofa asauku innaarunai uqeeraseenoo nari amana aqiqamaseenoo qinau. Anutufa naaru naaru marianafa innaaruna faqa maqa faqa ooruku nammari faqa quqoonafa minaki maru ainainausa auqunafa marianafa ani auqu ramasee maa ufana qidaqa. Sia moo kari faqa Anutufa nifeesida mariannoo.

<sup>7</sup> Inaqaqianna qangiroom nari ufireena fuaqasainanoo Anutufa nari oqai kukeeqaqai doo quqaannoo, oqai nari tamummaqara fasiqauqa amiqira ufa qimannimuna doo miqoo taikkeenoo miqiannoo.

<sup>8-9</sup> Miqi qimasooofanoo innaarunaindaraa ufa faasai qimaqimufa kafia qimaqiminau. Anee qangiroom innai aiku ooruku nammariki faqa maqasaa faqa ramaqai finnai papiqa airirana maqeeina maraa qufaqa qinee Yoohaneesa mifunnai oonuree mi papiqana qimianne qiafananoo qimaqiminoo qinau. Doo maraseenana namasainanoo aranandaki oquree aseundammianoo, ookinaa ookasaasa anoonara foora adiafaammianoo.

<sup>10</sup> Miqi qimasooofaqa qinee mina asaukukinaa papiqa marasee namasaafananoo dooki ookasaasara foora adiafaainau, qiranandaki oqureenoo aseundinau.

(Ookasaasa anoona naaru kambigaaninna ainainara irirana adiafaa irafa maridanoo. Oosana oosana mandainaina aupurana narirana kambigaaninafa aseundirafa maridanoo.)

<sup>11</sup> Miqi masaafananoo qimaqiminoo qinau, anee Yoohaneefa anee kaifaa Anutuna ufa moomoosaa quqa moomoo faiqi anaasee faqa moomoo maqusanasa faqa moomoo ufa qimariasa faqa karaambaiqa faqa amiqimasee Anutuna amiqira nifaqooqa faqa manda nifaqooqa faqa misa naaku nimaqainanoo misasaa kambigaani.

## 11

### *Anutuna marirana qafamasee qu fasiqaqanda.*

<sup>1</sup> Miqi qimasooofanoo moo fannoo anireenoo nimanimaru kannapuna qiminoo qinau. Anee maana maree ooruree Yeerusareenni mari maqana Anutuna naaquqara amaana maqa faqa tatufira qainda faqa amanamasee qafamasee akara rua. Mi amaana maqanaki innaaru qimariasa Yisuna ufamau fimariasa minaindi marianara misa faqa nisaana rumasee akara rua.

<sup>2</sup> Amaana maqa naambeeqai sia amanamandee akara rua mina aamina maqannaasaindi aanaamurundi maridanoo. Misa qaara fasiqa niku nisauku taikasee quqoona faqa qaara quqoona faqa naaquqara maqusa Yeerusaree maqusa aniree nikunnai rafaqafuseefaranoo.

<sup>3</sup> Mi kamuqoo mi aukuanne qinee Anutusa qini ufa kooroo qimaria fasiqaqanda soofaara qamunna afisiraqanda niqqaanaqa qini ufa maqasaa mariasaki kooroo ifaranoo. Miqanda nuqu kooroo imariaqandee qinoo maridanoo.

<sup>4</sup> Miqanda aiqama maqa maaqasaa karaambaiqa Yisuna oorisaqaara qooma miqiraqanda maridaqa.

<sup>5</sup> Faiqi akaqausa miqanda naruannee qimasaafanoo miqanda nookinaa ida fannoo naru taikaidanoo doo miqimasai fanoo miqanda naruanee qinausa kuqu taikafeefaranoo.

<sup>6</sup> Anutufa mi kooroo ira fasiqaqanda afeeka nimaqana Anutuna ufa maqasaaqaraasa qimannimi marinna kamuqoo innaaruna ititasaifanoo aaku sia ruannoo. Mi kamuqoo Anutufa afeeka nimaqana aiqama nammari maa maqa maaqana afaaqasasa mari nammarisa nari nidiranannai nari iriseeqa arusaifanoo fidikaika kaimmianoo. Mi afeekanannai nari kai irisee maqa aukarasai fanoo mandainaina oosana oosana kambiqeenoo faiqi anaasee nipatasaa narinoo aupurana nimaannoo.

<sup>7-9</sup> Mi koorooira fasiqaqanda Anutuna ufa maqasaa fasiqa aiqama qimannimi taikasaifanoo maqa ameemaana madikasaa rakisirafa kaasau aanda fannoo madikakiqari ururee doo miqanda faqa rakuannoo. Rakidanoo miqanda kuqa narusainaga miqanda iri Yeerusaree maqusa qambaana akoqoo marifaranoo. Ooqai miqoo kai mi maqusanaki karaambaiqa aunirira saqarisaa pirimmannai ariqau. Mi maqusanau auqu Yeerusaree marinau. Mandoosana maree maru maqusanau kikiqammusidaqa Soodooma faqa Isipa faqee qidaqa. Mi kooroo ira fasiqaqanda iri Yeerusaree maqusa qambaana marifaqa aiqama firaa maqannaasa faqa kaqikaa maqannaasa faqa aiqama aanaamuru mariasa

faqa aiqama ufa qimariasa faqa miqanda iri qaaramoo faasaana faqa moo faasaana atisaa faqa miqanda iri qafaifanoo nikundarara qaoo qimasai fanoo kaqi mariannoo.

<sup>10</sup> Aiqama maqasaaqaraasa miqanda kuqiranara irisee asasammasee qoomaqa suqasee namasee susu imarifanoo ainaina nari ami nari amidaqa miqandara maaqi qifaranoo miqandara maasa maqasaaqaraasa aupurarana qimimariaqanda doo kuqiqee qimasee asasifaranoo.

<sup>11</sup> Qaaramoo faasaana aiqaramafinanoo Anutufinnaindari kasimari aidooqa qumureenoo miqanda iriki keeqafinaqa kasiqa findififaqa aiqamausa miqanda niqafeeinausa nindafeeqa kaqa rufieefaranoo.

<sup>12</sup> Mi tamummaqara fasiqaqanda findi fifaqa innaarunaindaraa ufa moo fannoo maaqi qimasee miqanda qimannimiannoo innee qara doo mai innaarunai uruqa qifanoo asuru fannoo miqanda namuqa aiqamausa nifusaa mara uqereeqeenoo innaarunai quqaannoo.

<sup>13</sup> Miqanda muru quqasainanoo miqoo kai maqa firaqqoo uqanna kasinoo Yeerusaree maqusaki mari maqausa moomoo rambairinoo aqufuannoo. Faiqi seefeena tauseenna (7,000) moomoo uqanna minaki kuqifaranoo. Moomoo uqanna nukudara foora faiqi anaasee kuqifaranoo, moomoo kaqi marifaranoo. Kaqi marinausa mina qafamaseeqa quandakiqa innaarunai mari Anutuna afeeka amooqifaranoo. (Qinee Yoohaneesa mi aiqama ainainna innaarunai maridaqa qafaafannana.)

<sup>14</sup> Doo indaaruaqanda mandainaina doo aru taikeenoo, moodaa kai dauni aniraannoo.

*Ukeena fuaqammaree dinni taikasee dinni ani moodaa fuaqasee doo dinni ani qaaraik-ufa.*

<sup>15</sup> Qinee Yoohaneesa qifu pisipasamandoofaqa innaarunai maridaqa qafaafananoo qangiroo moo fannoo inaaqianaafa nari ukeena fuaqanau. Fuaqasoofanoo innaarunai mari ufafa maaqi qimasee firaq kari kooroo inau. Doo maqee maaqooqari maqasaa rakisira afeeka maasa karaambaiqa faqa nari asauku mundiranaindi faqa maridanoo mifa naaru naaru mina rakisida mariannoo.

<sup>16</sup> Mi ufana qima taikasoofanoo faiqi uriqararaua Anutuna ufa irira qaari fiq fiq iqa marusa noorindari maqasaa aqufufaqa Anutuna amooqifa qiqau.

<sup>17</sup> Oo Karaambaiqa Anutu aiqamausa uriqararafa firaafa anee maridana ooqai marunafa maqee marianafa. Doo anee aneenna firaq afeeka kooroomasee maqasaaqaraasa rakisi nimaqee mariannanara maasa minara ani dufi dufi qimamaqaidafa.

<sup>18</sup> Ania nikoqqee mari maqannaasa ania aanooqirafa qumbiqaraua mariafana ani Anutuna aanooqira aukuaana nimirafa doo ani maridanoo. Kuqiraua findifu masee mandufa nimira aukuaana doo ani maridanoo.

Ani ainainira fasiqa tamummaqaraua misa kadaapirirana akiaqara nimira aukuaana doo animaridanoo.

Aiqama fasiqa anaasee uriqararaua faqa kaiqeesa faqa ani ufara rufiida naaquqaida mi mau fimarisa faqa misa kadaapirirana amiqira akiaqara nimira aukuaana doo animaridanoo.

Maa maqa maqana mariasa kuridi mariasa misa kuridira aukuaana doo animaridanoo.

<sup>19</sup> Miqi qimasee uriqararaua Anutuna amooqimasooqafa qinee quandaki qafaafananoo Anutuna amaana maqa innaarunai marufa kooqi atuafufaqa qafaqiafana. Mi amaana maqanaki Anutuna faqa faiqi faqa moodaanakikira ufa bookisara foora auquooqafa marufaqa qafaqiafana. Mi bookisanaki Anutuna ufa oonisaa akararirafa Mooseena ooqai amufa maru bookisana qafaqiafana. Qinee qafaafananoo aakuusaa uqinoo innaarunai qinoo maqa kasinoo firaq pupusamu aqufinuu.

## 12

*Aareena fannoo anaasee faiqi nambiqarara qu ufafa.*

<sup>1</sup> Qinee Yoohaneesa miquna qafamaseeqa quandaki moo ainaina qafaqiafana. Innaarunai firaqqoo kooroo ira ainaina kikiqusirafa kambiqooqafa qafaqiafana, anaasee moo fannoo suani afu miqira kurusa afisusee maru qafaqiafana aikuqara quqoonasaa ranoo marufaqa qafaqiafana mina akiaqaki afisira qafeesaa qisaukuqara taikasee qiku ooqu qaaraqanda marasee fasaunumu mina qafeesaa qeemaru qafaqiafana.

<sup>2</sup> Mi anaaseefa amuaqu uqaikinoo marufa innaamunara aurinoo aupureenoo faaqa rinuu.

<sup>3</sup> Faaqa rimarufaqa qinee quandafi moo ainaina innaarunai mari ainainna kooroo ianinnana qafaqiafana. Qaareena qinaakuna qafaqiafana mina afaqa aiqama taatuqee

arinoo marinau mina akiaqa aambumanamu qisauku dinni taikasee dinni ani qaara marasee akiaqafaqaafa marinau. Aiqama akiaqasaa qafee afisinoo marinau, mina akiaqaqaqa aanai qisaukuqara taikasee marinau.

<sup>4</sup> Mina ameesa fannoo innaarunaidaraa fasau moomoo nukudara foora rarisamee-qeenoo maqai aqimarinau. Mi qaareenafa amuaqu uqaikira anaasee oorisa kikinoo maridanoo faiqi maqasainoo nambiqaarara rakisidanoo.

<sup>5</sup> Mi anaaseefa akoonaiqi maqasoofanoo findifinoo qainna auqira samu qumareenoo aiqama aanaamurusaa rakisi nimaqaaninnana maqanau. Mi anaaseefa akoonaiqi maqasoofanoo Anutufa qaareena naandoo qimasee aranaiqi rafusueeqeenoo innaarunai nari ufa irira qaarisa qugafoofanoo marinau.

<sup>6</sup> Miqifufanoo mi anaaseefa quqasee qaareenara rufiasee sandee aadana maqa maaqaki Anutufa deedaqammaqoonaki oonu marinau. Qaaramoo aukuaana faqa moo aukuaana atisaa faqa Anutufa miqoo rakisinau.

<sup>7</sup> Qinee Yoohaneesa qafeemariafananoo rakirafa innaarunai kambiqanau. Dinni qangi-roo karaambaiga mina auqu Mikaraafa Anutuna qangi-roo namufaqa dinni qaareena nari manda qangi-roo namufaqa maridaqa innaarunai rakimariqau.

<sup>8-9</sup> Mikaraafa Anutuna qangi-roo namufaqa afeekaikamasee qaareena rafaqaqfuseenoo nari faqa nari qangi-roo namufaqa rafuseeqeenoo innaarunaidari maqasaa aqusanau. Anutufa anira sia maaqooqari maaqoo marianne qifaqa ani maqasaa rafusueeqee aqida fee qimasee aqusanau. Mi qinaakuna qaareenafa ooqai sakani marufa aiqama maa maqanasaaqaraasa ueeqee marufa marinau. Mina auquara Afaanna firaafa Sadannee qinau.

<sup>10</sup> Mikaraafa Sadanna maqasaa aqusoofaqa qinee Yoohaneesa qifu pisipasamasoofaqa innaarunai maridara fooqaana qafaafananoo ufa moo firaa kari nameera qinau, Anutuna asumu maree marifa doo animaridanoo. Doo maqee Anutufa nari Karaambaiga afeeka kooroomaseenoo. Doo maqee mina asauku mundirafa nari aanoo doo uqan-nifiqeenoo. Doo maqee maasa qikaqaafasaaqaa maqasaaqaraasa nikaruqirafa eendaki faqa faasaana faqa Anutuna afusaa munuqi miniqi marifa Sadannafa innaarunaiqari aranaiqi futeeqa rafusueeqeenoo maqasaa doo aquseenoo.

<sup>11</sup> Maasa qikaqaafasaaqaa maqasaa fasiqauqa Anutuna sipsipa aanaaqi kuqu fidikanannai doo Sadannana uraaqareenoo nari Anutuna anoona ufara kuqunannai faqa mina uraaqareenoo misa mi ufanara nari mariranara sia anoonee qimasee kaqi kuqiraree qimariasa maridaqa.

<sup>12</sup> Ufa firaqoo kai qidanoo qinau. Innaarunaki mari ainainausa innee aiqama asiasaqa Sadannafa inniki marifa doo maqai aqufinoo. Innee maqasaa mariasa faqa ooruku nammari mari ainainna faqa innee rufiada mariaqa. Afaanna firaafa inniki ooqu finoo mina aanoo firaafa mariannoo nari qusasaa marianinnanara iriseenoo mina aanoo firaafa mariannoo fee qinoo.

<sup>13-14</sup> Qinee Yoohaneesa mi ufana iriseeqa quandaki qaareena maqasaa qafeeqa. Qaa-reena qinaakufa doo maqasaa aqufinoo maridano qafeenoo aanoomaseenoo quandaki faiqi maqoo aanaaseena arunaaneera afaqanoo fufanoo Anutufa firaa ququumu aqoosa qaaraaqanda amufanoo qaqaamareenoo aadana maqasaa Anutufa deedaqammaqoo maqanasaa aqufinoo asumu marinau. Qaaramoo aukuaana faqa moo atikai mara-soofanoo Anutufa rakisimarufanoo qaareena fannoo mi anaaseena ariranasaa Anutufa ititeemarinau.

<sup>15-16</sup> Qaareena fannoo mi anaaseena qafamasee aanoo qufanoo mina ookiqari nammari moomoo aufinau. Nammari aqufinoo mi anaaseena mi samuna aruanifeera fufanoo maqa fannoo mi anaaseena soodaqinoo maqa oo raqafufanoo nammari minaki kai keeqanau.

<sup>17-18</sup> Qaareena fannoo mina qafoofanoo firaqoo uqanna aranaqoofanoo quandakinoo mi anaaseena ati aiku asauku marusa aiqama Anutuna auqira sandufamau fimariasa Yisuna kooroo ira anoona ufamau fimariasa faqa naruanee qimasee fufa ooruku nammari afainni kikiqinoo marinau.

## 13

*Maa maqanasaaqaraa kaasau aandaqara qu ufafa.*

<sup>1</sup> Qinee Yoohaneesa qifu pisipasamandoo innaarunai maridaqara foora qaareena ooruku nammari afainni kikiqinoo marufaqa qafamasee akara rumaqaafananoo. Mifa miqoo kikiqinoo marufanoo ooruku nammariqari kaasau aanda moo fannoo ururoofaqa qafaqafana. Mi kaasau aandauna aanai qisaukuqara taikasee marinau mina akiaqa dinni qisauku taikasee dinni ani qaara marasee akiaqafaqaafa marinau. Aiqaama

aanaisaa karaambaiga qafee afisinoo marinoo aiqama akiaqamau narí Anutunara fidiqaaira manda nuquqa akararinoo marinau.

<sup>2</sup> Mi kaasau aandaufa firaa kusina fooqaatia faiqí narimarifa marinau. Mina aiku firaa samaada aikuura foora marinau. Mina oo aamara raioona oo aamara fooqaafa marinau. Mifa ooruku nammariqigari ururoofanoo qafamaseenoo qaareena fannoo narí afaaqai maru ainainna mi kaasau andauna ooruku nammarikinaana aminau. Nari rakisira qaari faqa aiqama maqannaasa rakisirana faqa mi kaasau andauna amisoofanoo rakisinnimaqana.

<sup>3</sup> Mi kaasau aandaufa marufanoo moo fannoo mina akiaqaki moo arufanoo kuqinoora fooqaana maseenoo aru afaaqana ateeqaqoofa unufufanoo kaifaa findifinoo nammariqigari ururoofaqa qafaqafana. Aiqama maa maqana afaaqasasa mariasa mifa findifuna qafamasoofanoo naaqqoofaqa aiqama mina ufamau kaimbaqau.

<sup>4</sup> Qaareena fannoo firaa uriqarara afeekana kaasau andau amunara minara aqee maria fasiqa anaaseesa qaareenara innaaru qidaqa amooqi mariqau. Misa kaasau andau oorinni faqa innaaru qimasee amooqifa qiqau. Yafee maa kaasau andauna amana maridanee. Sia uqanna. Yafee mina ariraramasee aruannoo fee, sia moo fannoo amana arifara.

<sup>5</sup> Mi manda kaasau aandaufa aiqamai rakisidanoo mandufa uqanna oosana oosana ufa qimarufanoo Anutufa sia qaoo qinau, qaara fasiqa niku nisauku taikasee moo fasiqa oonu qaara marasee quqoonasaa kaqi maridanoo mina kai qafee marinau.

<sup>6</sup> Mi kaasau aandaufa Anutuna faqa mina auqu faqa manda niqurarara niquraree marinau.

<sup>7</sup> Mifa Anutuna aiku asauku faqa rakinoo rafaafinau. Mifa kaqikaa maqanna faqa firaa maqanna faqa aiqama ufa qimariasa faqa aiqama maqusanaasa faqa rakisimarufanoo Anutufa sia qaoo qinau kaqi kai qafana.

<sup>8</sup> Aiqama maa maqa maaqana afaaqasasa mariasa mi kaasau andaunara Anutufara foora innaaru qimasee amooqifaranoo. Misa nári nuqu kaqi marifandinausa Yisuna bukaki akara rimariasa misa kai sia amooqifaranoo. Ooqai maa maqa maaqana sia maruqoo Anutuna sipsipa aanaaqi kuquna bukaki nuqu marisa kai sia kaasau andau amooqifaranoo.

<sup>9</sup> Aiqama naaqqoo faqaasa ufa iriaqa.

<sup>10</sup> Kasooqagee kaasau andau Yisuna ufasaara naruaninausara Anutufa ooqai irinau. Kaasau andau fannoo rumbaaninausara faqa ooqai irinau. Mi narira aukuanai Anutuna ufa iri mariasa sia rufiasee minnisaqa afeekaikamasee uaqee iaqa minasaa mundufi firana faqa kaqi kai fuaqa.

<sup>11</sup> Qinee Yoohaneesa mi kaasau andauna qafamaseeqa quandakufaqa moo kaasau andau maqakiqari ururoona qafaqafana. Mina aanai qaaraqanda sipsipa aanaira foora ururanoo marinau. Mina ufa fannoo qaareena ufa qimarinau.

<sup>12</sup> Sipsipa aanakirafa indaarugaa kaasau andau oorisa kikiqammambi mina afeeka firaatia maranau. Mifa aiqama maqa afaaqasasa mariasara indaarugaa kaasau andauna amooqiaqee sia amooqifaqa naruanauree qinau. Mi indaarugaafa kuqiraramasee afaaq aatekarafa qunufunara innaaru qida amooqiaqee qinau.

<sup>13</sup> Sipsipa aanakirafa inaaqianna andau fannoo aiqamausa nifusaa faiqí sia auqaaqaa ira ainaina auqinau, aiqamausa nifusaa innaarunaindari ida fannoo maqasaa aqu fuannee qufanoo aqufinau.

<sup>14</sup> Mifa indaarugaa kaasau andau oorisa faiqí sia auqaaqaa ira ainaina auqusoofanoo minannai maqasaaqaraasa aiqama nikaruqinau. Miqidanoo mifa aiqama maqasaaqaraasa qimannimino qinau, Innee afaaq aatekasooofanoo kuqiraramandee findifuna amana auqaqa.

<sup>15</sup> Misa auqusoofanoo sipsipa Anutufa uqeeqararee qimasee narí namuqa qumee afeeka amufanoo aanaikira andau fannoo unnaqimasee narí afeeka fee qimasee aidoo indaarugaa kaasau andau amana auquqoonaki aidoo fuqasoofanoo mina amana fannoo faiqira foora ufa qinoo nariara sia innaaru qimasee amooqusa kuqa narinau.

<sup>16</sup> Sipsipa aanaikira andau fannoo narirufafa aiqama maqannaasa kaiqeese faqa uriqararasa faqa ainaina faqaasa faqa kudifasiqa faqa rumbee mariasa faqa idukimariasa faqa aiqama narí akara nári nisauku uqannai fee niqinaaqafee akara rumannisanau.

<sup>17</sup> Mi akarana sia marinausa sia ainaina nimisee mina akiaqara feefauru mareefaranoo, ainaina faqa sia amana munnimma aqusee mareefara. Mi akarana oosana kaasau andau mina auqu nambaqa mariannoo.

<sup>18</sup> Irirana faqaasa maa ufana iriaqa. Irirana faqaasa mi nambaqana kaasau aandau nambaqa oosana irifaranoo. Mi nambaqafa faiqi auqu kikiqammusidanoo. Mi nambaqafa maaqimminoo maridanoo. Sikisa handareeta faqa sikisti sikisa faqa maridanoo, (666).

## 14

### *Maqasaaqaraasa moomoosa fuka idiroofaqa qafaafanna ufafa.*

<sup>1</sup> Qinee mi ainainausa qafamaseeqa quandakufaqa qafaafananoo sipsipa aanaaqi kuqufa Yisufa Oorifa aaqanasaa moo auqu Sioona aaqana minasaa kikiqinoo marinau. Oorifa aaqana Yeerusaree maqusa aaqa maridanoo. Mina saimbaqa faiqi moomoo mariqau. Yisuna auqu faqa mina akoona auqu faqa niqinaaqa akara rirausa kai mariqau. Mi fasiqausa nisaanaruafanaqa wan handareeta faqa footi maqi tauseenna faqa Yisuna faqa mariqau, (144,000). Faiqi ooni saqari uqanna auqufiqau.

<sup>2</sup> Qinee mina qafaidaqa innaarunaindaraa ufa moo iriqiafana. Firaa kari innaarunai qiara foora qinoo firaa oondaindari nammariara foora aqufidanoora foora qufaqa iriqiafana. Miqimarunakina innaarunaindari piripunna ariufaqa iriqiafana.

<sup>3</sup> Yisuna saimbaqa Oorifa aaqanasaa mariusa wan handareeta faqa footi maqi tauseenna faqa misa aiqama Anutuna qaari oorisaa faqa qaara faqa qaara faqa qaara faqa aandau faqa uriqararausa faqa misauqa noorinni ubeekaqau. Noori ubeekaidaqa fuka idi moo raqau sia moo fannoo mi idina irifaranoo Yisuna faqa maru fasiqausa wan handareeta faqa footi maqi tauseenna faqa misa kai mi idina amana reefaranoo Yisuna fidikannoo feefaurirausa kai mi fasiqausa marufaqa qafaqiafana.

<sup>4</sup> Mi fasiqausa sia anaasee qummuari marusa amiqira maanaaqara foora andeeqarausa kai maridaqa. Misa sipsipa aanaaqi kuquna Yisuna faqa aiqamai fimarusa misa maqasaa fasiqa nandafiana neera fooridaqa misa Anutunaindi faqa Yisunaindi faqa maridaqa miqidaqa.

<sup>5</sup> Sia unna ufa misaki marusa sia aaqarafa misaki marusa.

### *Qaararoo qangiroo qu ufafa.*

<sup>6</sup> Qinee Yoohaneesa miqimaruna qafamasee quandaqi qafaafananoo qangiroo moo fannoo innaarunai sandaaqai qaqamaree fufaqa qafaqiafana. Mifa amiqira fasaasa ufa naaru naaru marira ufa aiqama maa maqanasaaqaraasa firaa maqanaasa faqa kaqikaa maqannaasa faqa aiqama ufa qimariasa faqa aiqama maqannaasa faqa qimannimirara qaqamaree finoo firaa kari qinau.

<sup>7</sup> Innee Anutunara rufasee mina afeeka uriqararanara amooqiaqa, doo mifa maqasaa mariasa ufa irirafa doo ani maridanoo. Mifa innaaruna faqa maqa faqa ooruku nammari faqa kaqi nammariuqa faqa minauqa auqufa maridanoo, mina oorisaa kumaramafi amooqiaqa.

<sup>8</sup> Mi qangiroofa miqi qimasoofofano qangiroo moo fannoo mina aanaaqianna qaqamaree fidano Babiroonia maqusa doo maqasaa aqufinoo maqusa naakundu kai saaeemaseenoo. Mi maqannaasa nari deedeepirana faiqi anaasee qummuarirana moomoo uainna nammariara foora aiqama maqannaasa nimufaqa namaseera foora aiqama maqannaasa nimufaqa namaseeqa furufarammidammia.

<sup>9-10</sup> Doo mi qangiroofa miqi qimasoofofano mina aanaaqianna moo qangiroo fannoo qaqamaree finoo firaa kari nameera qimasee aiqamausa qimanniminoo qinau. Kaasau aandau fee nari amana auqiranaree amooqidaqa innaaru qimariasa mina akara niqinaaqa faqa nisaukusaa faqa akara rirausa misa Anutuna aanooqirana uainna nammariara foora nambiqeefaranoo. Anutuna aanooqiranara qidanoo ididimari uainnana kikiqa usidanoo. Sia nammari namufaqa uainna namufaqa asooarana nimifaranoo kaqi uainna kai ididi marina kai nari manda oosana akiaqara aanooqirana idara foora qeemarina nimianoo. Aiqama kaasau aandau amooqimariasa faqa mina akara maree mariasa faqa misa aiqama Anutuna naaqurara andeeqara qangirooqau noorisaa faqa sipsipa aanaaqi oorisaa faqa firaa idaqqee marinaki aupuraranaki fifaranoo.

<sup>11</sup> Misa aupuraranana nimimari mi idauru munafa naaru naaru ururaidanoo marianno. Faasaana faqa eendaki faqa sia asooarana mareefaranoo kaqi miqi kai minoo marianno. Kaasau aandau fee mina amana auqiranara innaaruqimariasee mina akara maree mariasee misa aiqama miqi kai mifaranoo.

<sup>12</sup> Mi akuuannai maqasaa Anutuna aiku asauku marianausa mi aupuraranaki reen-deenamafi fifimafi marirana faqa Yisunasaa kaqi kai mundufi marirana faqa miqimandee mi akuuanna Yisuna ufamau fimariasa miqiaqa.

<sup>13</sup> Mi qangiroofa miqi qimasoofofa qini qifu pisipasamasoofofa qinee innaarunaira foora mariafanoo ufa moo qimaqiminau, Yoohanee anee maa ufana akara rua. Maa aukuanasaaqari karaambaiqaki keeqafiga kuqifandinausa misa asasifaranoo. Anutuna maraquna fannoo mi ufana irisee dadaaqinoo qinau. Eeoo kuqaa nariqa kadaapi fraana ririseeqa kuqiga adooaidaqa asasifaranoo. Nári kadaapirirana anoona kuqiranaki fiqa doo maree fidaqa asasifaranoo.

*Anutufa maa maqa maaqanakinaasa nifiqaseenoo nari ufa irimariasa maraaninna ufafa.*

<sup>14</sup> Qinee Yoohaneesa mi ufana iriseeqa quandafi qafaafanoo eekara asurusaa faiqi moo fannoo faiqi nimaakuara fooqaana ooqufaaqee idanoo koorra auqira qafee afisirafa asaukuki paipana afai raigarana asaukuki uaqeeufaqa qafaqiafana.

<sup>15</sup> Mi fasiqafa asurusaa ooqumarifi marufanoo Anutuna innaarunai naaquqara amaana maqakiqari qangiroo moo fannoo raudee qumuree mi fasiqana firaa kari aaramaseenoo qinau. Doo narana qanaa marida aneenna paipanannai atekasee maree ania. Doo maqasaa naranara foora akuqanoo maridanoo.

<sup>16</sup> Asurusaa marufa mina iriseenoo eedoo qimaseenoo doo nari paipana rauqima-reenoo maqasaa aquseenoo narana atekasee maree urinau.

<sup>17</sup> Maroofanoo qangiroo moo fannoo Anutuna naaquqara amaana maqaki innaarunai marunakiqari raudamaki anireenoo nari asaukuki paipana afai raigarana uqirafa raudofofaqa qafaqiafana.

<sup>18</sup> Anutuna tatufira qaindasaa rakisimarufa qumureenoo paipana uqirafa qumuna aaramasee qimaminau. Anee doo uainna tatimaria sandafa maqasaaqaraasa mandoonsana doo akuqanoo maridanoo, atekamaree murusee misa fidika saunara foora tatia.

<sup>19</sup> Mina iriseenoo paipanafaqaafa nari paipana maqasaa uainna sanda ateeka mareenoo Anutuna aanooqirana tatimarunaki maqasai murusee naambeeqai aqinau.

<sup>20</sup> Aqusoofofa misa tatisoofanoo fidika kai nammariara foora aufinoo faiqi ninuka kai ururufanoo nianai uqanaa maree finau.

## 15

*Maa maqafa taikainna aukuaana dinni ani qaara marasee qangiroo aupurarana maree anifara.*

<sup>1</sup> Qinee innaarunai mariafana moo innaarunai koorooira ainaina naaquqara ainaina kambiqoo qafaqiafana maaqimasee kambiqanau. Qisauku dinni taikasee dinni ani qaara marasee qangiroo namu nari nisaukuki Anutuna taikaranaki aupurarana uqirausa aniqau. Mi aupurarana maqasaaqaraasa Anutuna ufa sia irimariasa nimisaifanoo Anutuna aranaqarafa taikaannoo.

<sup>2</sup> Qinee mina qafamasee quandaki ooruku nammariara foora tanuka minasaa maridanoo foora idauru namufaqa marufaqa qafaqiafana. Miqoo ooruku nammari afaisaa faiqi anaasee moomoo Anutuna ufa irimarusa usimariqau. Misa kaasau aandau akarara qaoo qimarusa misa kaasau aandau faqa mina amana auqirana faqa rakiara foora mina uriqararausa mariqau. Anutufa misa piriipunna nimufaqa misa

<sup>3</sup> Anutuna ainainira faiqi Mooseena faqa sipsipa aanaaqi kuqufa faqa miqanda idi ree mariqau. Maaqi qimasee idi raqau.

Oo Karaambaiqa aiqama afeekafaqaa Anutufa, Anee aiqamausa rakisi marianna oosanafa faqa anee imarianna oosana faqa idaaqirafa fraafa maridanoo.

Anee aiqama maqusanaasa Karaambaiqa marianafa, Anee niniunafa andeeqarafa kuqaa marunafa marianafa.

<sup>4</sup> Oo Karaambaiqa yafasiqa fee sia aniara rufiaidanoo.

Yafasiqa fee ani uriqararana sia koorooiannoo,

Aneennaraa kai naaquqarafa mariananoo.

Ani andeeqara ainainirafa aiqamausa qafamasee minara aiqama maqannaa aniree ani oorisa aniree ani amooqifaranoo.

<sup>5</sup> Misa mi idina ramasoofofa qinee Yoohaneesa qafaafanoo Anutuna amaana maqa innaarunai atuasofofa qafaafanoo minaki ooqai Mooseefa Anutuna uqaana maqa usakaqoofa mina aundurari marufaqa qinee qafaqiafana.

<sup>6</sup> Dinni taikasee dinni ani qaara marasee qangiroouqa Anutufa faiqi anaasee nimaninna aupurarana uqirausa faasai nindafaafanusa misa Anutuna naaquqara amaana maqakiqari raudaqau. Misa qamunna anukarafa eekara arirafa marinau. Misa koorra auqira raitanda naamma ameemaana rumberausa animariqau.

<sup>7</sup> Ani marufanoo Anutuna aaga aanda qaara faqa qaara faqa marunakiqari moo fannoo kooro auqimaru qafeesa dinni taikasee dinni ani qaaraganda marasee qafeesa naaru naaru marira Anutuna aanooqirafa qumbiqara qafeeuqa aiqama qangirooqaa nisaukuki moodaa moodaa quqasanau.

<sup>8</sup> Quqasoofanoo innaarunai amaana maqa idamuna qumbiqanau. Anutuna afeeka faqa Anutuna areenarana faqa minasaqari idamuna fannoo mi amaana maqanaki qumbiqanau, sia keeqarana amana marinau. Nisauku dinni taikasee dinni ani qaara marasee qangiroo misa aupurarana taikasooofanoo miqoo kai amana keeqaaqainau.

## 16

*Naaru kambiqaaninna ainainna kukeeqarana koorooirafa Yisufa Yoohaneena koorooqimamufanoo akara rinau.*

<sup>1</sup> Amaana maqakinaa idamuna qafamaseeqa iriqaafana ufa moo innaarunai maru amaana maqakiqari ufa moo firaa qoo nameera qimaseenoo aupurarana maroo qangiroosa qimannimainau. Doo innee qisauku dinni taikasee dinni ani qaara marasee qafee Anutuna aanooqira qafee maraasa doo innaarunaindari maqasaa muqu teeqiaqa.

<sup>2</sup> Miqi qufanoo indaaruuqaa qangiroo nari qafee mara maree innaarunaindari maqasaa muqu teeqinuu. Teeqimasooofaqa maqasaa fasiqi anaasee kaasau aandauro innaaru qimarusa mina akara maree marusa misa nifaaqasasa kaaqa nidafidanoo afundidanoo eefeeda namuana fooqaafa moomoo narinau.

<sup>3</sup> Narusoofanoo kafaa mina aanaaqianna qangiroo moo fannoo nari qafee mareenoo muqu ooruku nammariki teeqimaqusoofanoo kuqira fasiqa fidikara foora kai mandifufanoo kuqira fasiqa fidikara foora maqufufanoo ooruku nammariki marida kasi maria ainainafa aiqama kuqu taikafinuu.

<sup>4</sup> Kuqutaikafufanoo miqanda ninaaqiana moo qangiroo fannoo nari qafee mareenoo innaarunaindari nammariki uqannaki muqu teeqimasooofanoo fidika kai qumbiqafinuu.

<sup>5</sup> Qumbiqafufanoo nammarisaa rakisimaru qangiroo fannoo nameera qinuu. Oo Anutufa naaqqarafa anukarafa ooqai marunafa maqee marianafa anee fidika naaqee qimasee nimiannanara andeeqarafa mariananoo.

<sup>6</sup> Misa maqasaa fasiqa Anutuna ufa irimaria fasiqanaaseesa faqa tamummaqara fasiqauqa faqa fidika ruqtee marianara anee fidika nimianaqa naidaqa. Nari oosanara saanara mina akiaqara fidika nidaqamiafoo qinuu.

<sup>7</sup> Miqimandooofanoo Anutuna tatufira qaindasaaqari ufa moo qinuu. Oo Karaambaiqa Anutufa uriqararafa aninna narirafa kuqaa andeeqarafa kai marifa mariananoo.

<sup>8</sup> Mi namusa miqimasooofanoo innaaqianna moo qangiroo fannoo suanisaa nari qafeekinaana muqu teeqimasooofanoo suani fannoo firaaqoo ididinoo faiqi anaasee firaaqoo idara foora nitakuqinuu.

<sup>9</sup> Nitakuqufafa aanoomasee quandaki Anutuna auqu ramasee aquraraqau. Mi oosana oosana aupurarana marasee mi oosannana akoonaa aqurarasee sia nari mandainaina minnisee Anutuna amooqiquu. Kaqi maraqa fimariqau.

<sup>10-11</sup> Mi namusa miqi masooofanoo qangiroo moo fannoo nari qafeekinaana kaasau aanda qaarisaa teeqimasanaa. Teeqimandooofanoo asukuna fannoo kaasau aanda ququsakinaasa ititannimaqasoofaqa nipatara aupuraidafa naridaqa nidafirana faqa namuanara faqa aupuraidafa nifai riqidaqa innaarunai Anutuna aqurara ufa kai qidaqa kaqi furufaramasee nari mandainaina kaqi mara maree fimariqau.

<sup>12</sup> Mi namusa miqimasooofanoo qangiroo moo fannoo nari qafeekinaana Eeufarateesa nammariki teeqimaqusoofanoo mi nammarifa aiqama aadanusinuu. Suani oosanaindaraa karaambaiqauqa nari rakira fasiqauqa faqa rakiraramasee aniaqeera aadanusinuu.

<sup>13</sup> Qinee Yoohaneesa mina qafaafananoo afaanna qaaramoo taka fooqaana mandaikirana qafaqiafana. Moo fannoo ooqai maru qaareena ookiqari ururanau moo fannoo indaaruuqaa kaasau aandauna ookiqari ururanau, moo fannoo unna qira tamummaqara fasiqa ookiqari ururanau.

<sup>14</sup> Mi qaaramoo takusa oosana oosana ainaina sia faiqi auqaqaaqaa ira ainaina auqeamaru afaannausa faiqi rakisirausaikiqa mariqau. Mi qaaramoo afaanna namusa aiqama maqa maaqakina karaambaiqauqa nari sundia namuqaqaa nifteeqee rakiranaki quqee mariasa mariqau. Misa Anutuna faqa rakirara masaifanoo Anutufa uriqararafa misa aiqama naru taikaannoo.

<sup>15</sup> Miqimarufanoo Yisufa miqoo qini qimaqiminoo qinuu. Qini ufa iria, qinee umuarira fasiqara foora ireeda kai innaarunaindari qumuanaura. Nifu maqee marusa

faqa qamunna deedaqirauusa faqa asasifaranoo, sia kaqisamu fiqa faiqí nifusaa faqa Anutuna afusaa faqa sia nisaurifaranoo.

<sup>16</sup> Yisufa miqí qimaqimisoofofanoo mi taka namusa aiqama karaambaiqa faqa nári sundia namufaqa nifeeqeenoo Isaraee maqasaa quqasanau. Mi maqa maaqana auqu Heeburu ufakiqari moo auqu Isaraee maqannaasa ufakiqari Aramakeedoona maqa maaqee qimariqau.

<sup>17-18</sup> Miqoo suqu quqasoofanoo inaaqianna qangiroo fannoo nari qafeekinaana ufaissaa muqu teeqinau. Teeqimasoofofanoo Anutuna qaarisaaqari amaana maqaki marufa ufa moo firaa kari qinau. Doo taikeefoo qimasoofofanoo aakuusaa uqinoo innaarunai qinoo oosana oosana ufa qinoo maqa naaquqarafa firaafa uqanna kasinau. Ooqai oosana arooqooqari sia maqa maaqimasee kasidanoo maana firaafa uqanna uriqararafa kasiannoo.

<sup>19</sup> Yeerusaree maqusa qaaramoo kamu afoomakinoo aiqama maqusanaasa taunna faqa kuridiannoo. Mikari Anutufa Babiroonia maqusara sia aunninau. Nari kaafakinaa aanoo qirana idagee mari nammariara foora adiasee Babiroonia maqannaasa nimisoofofa namasee kuqiqau.

<sup>20</sup> Aiqaama ooruku nammariiki mari afumausa aiqama nammariiki ukuqnama taikanau, aiqama aaqana faqa taikanau.

<sup>21</sup> Pupusamu innaarunaindarii faiqisaa aqufinau firaa pupusamu moodaa moodaa fifti kiroogaram qaara fasiqa niku nisauku taikasee moo fasiqa asaukuqara taikasee sikeera akara kamu aqufufaqa faiqí anaasee mi firaa pupusamuna qafamasee quandaki Anutuna aqurara ufa kai amiqau.

## 17

*Firaaqoo ummuari maria anaaseesa ninoona aru ufafa.*

<sup>1</sup> Pupusamu taikafufanoo qafee teeqiusakiqari moo qangiroo fannoo qini daareenoo qinau, Yoohanee anee mai anirainaqa firaaqoo ummuari mari anaaseena kuridirana oosana uqafiqa. Mi anaaseefa firaa taunna kikiqa usidanoo, moomoo nammari mina aqa maridanoo. Mi moomoo nammariina kikiqa usirafa maridanoo faiqí anaasee moomoo maqusanaasara qidanoo.

<sup>2</sup> Maa maqanasaqarara karaambaiqauqa mi manda anaaseena aafeeqee mariafa maridanoo aiqama maqannaaf fasiqa anaasee faqa maa anaaseena ummuarirana uainna nammariara foora neeneesaidaqa furufaridaqa.

<sup>3</sup> Miqí qimasee qimaqimisoofofanoo Anutuna maraquna fannoo daakufufanoo mi qangiroofa qini mareeqeenoo innaarunaindarii maqasaa muqu aadana maqasaa quqaseenoo mi anaaseena uqaqifiqanau. Mi anaaseefa taatuqee aandau kaasau aandau ataufakaafa ooqu faaqee marinau. Mi kaasau andauna afaaqasasa Anutunara fidiqaa ira auqu moomoo mina afaaqasasa akararinoo marinau. Mi andaufa dinni qisauku taikasee dinni ani qaara marasee akiqa faqaafa marinau, mina aanai qisaukuqara taikasee marinau.

<sup>4</sup> Mi anaaseena qamunna sia kaiqeesa afisimariana uriqararauusa afisimaru qamunnanda saasaakoona arirana faqa taatuqee arirana faqa afisimarufa aiqama ainaina koorannai auqirana kai afaaqa auqirafa marinau. Firaa feefauru aqimari ooninna pupu ooni fooqaana faqa maranoo ninau. Mi anaaseena asaukuki koora auqira kaafa uqusee marinau. Mi kaafanaki ikairifaqaa ainaina faqa faiqí anaasee nari ummuari nari ummuarirana aiqama mi ainainafa mi anaaseenasaa aniqusirafa mi kaafanaki qumbiqanoo maridanoo. (Faiqí anaasee kikiqa usidanoo kuqaa qira Anutuna minniseeqa unna qira Anutuna amooqimarianara qidanoo.)

<sup>5</sup> Mi anaaseena aqinisaa mina auqu akara rinoo maridanoo auqu akoogoo maridanoo oosana kukeeqanoo maridanoo. Mina auqu maaqí qinoo maridanoo Firaa Babiroonia aiqamausa nári naumoosaa feefauru maree mariafa ninoofa faqa kaaqa anaaseera rimariasa ninoofa faqa maridanoo.

<sup>6</sup> Qinee Yoohaneesa mina akara qafeeqa mi anaaseena oosana qafaunanoo furufaramminoo marifaqa qafeeqa. Mifa Anutuna maqasaqarara faiqí anaasee fidika faqa Yisuna ufara afeekaiiki mariafa fidika faqa uainna nammariara foora misa narusee misa fidika neeneeseenoora foora furufarinoo nimari anaaseefa. Qinee mina qafamasauunanoo firaaqoo daaquqeenoo. Qangiroo fannoo miqiafanoo qiqafeenoo qinau.

<sup>7</sup> Anee nanaree aaquqaidanoo fee qinee mi anaaseena faqa mi andauna faqa oosana kooroo qianamma iria.



<sup>8</sup> Anee kaasau aandau qafaanafa ooqai marufa maqee sia maridanoo, mifa qusasaa maqa ameemaanai madikakiqari urureenoo taikaranaki fuannoo. Naaru naaru mariranaki fimariasa Anutuna bukaki nuqu akara rinoo maridanoo, ooqai maa maqafa sia maru kamuqoo mi bukanaki misa nuqu akara rumaqoofa maridanoo. Maa maqanasaa mariasa sia mi bukanaki nuqu akara rumaqoosa misa mi manda kaasau aandauna qafeeqa kaaqa naaqqainaqa mina ufamau fifaranoo. Ooqai marinoo maqee sia maridanoo kafaa kasooqaaqee kooroo ianinnanara tautumasee mina ufamau fifaranoo.

<sup>9</sup> Maa ufana irirana faqaasa kai irifaranoo. Mi kaasau taatuqee aandauna akiaqa dinni qisauku taikasee dinni ani qaara marasee akiaqafaqaafa maridanoo. Mi akiaqa namuna faqa dinni qisauku taikasee dinni ani qaara marasee aaqana namu kikiqa usinoo maridanoo mi anaaseefa minauqasaa oofuqaqee maridanoo, karaambaiguuqaindi faqa miqimasee namu maridaqa.

<sup>10</sup> Moodaannai qisauku karaambaiga doo taikafiqau, moodaa kaqi rakisidanoo maridanoo moo fannoo aniraannoo anirainnoota qusasaa taikaannoo.

<sup>11</sup> Mi kaasau aandaufa anaasee minasaa ooqumariufa ooqai marufa maqee sia maridanoo kasooqaaqee kafaa kambiqaannoo. Ooqai indaaruu mifa dinni taikasee dinni ani qaaramarasee karaambaiga marunaki mariufa taikafufanoo kaifaa kambiqaafinoo dinni ani qaaramoo kinanoo mifa qusasaa kuridiranaki fuannoo.

<sup>12</sup> Manda kaasau aandau aanai qisaukuqara taikarafa miqimandee kai kasooqaaqee karaambaiguuqa maqasaa moodaa kari kambiqaafi maridaqa faiqi anaasee rakisi nimaqeeafaranoo. Mi namusa nari afeeka manda kaasau aandau naida amisaifanoo mifa misa faqa qusasaa faiqi anaasee rakisi nimaqaannoo.

<sup>13</sup> Mi karaambaiguusa qisaukuqara taikarasa moodaa irirana mariranasaa maridaqa nari afeeka faqa nari uriqararana faqa mi manda kaasau aandauna pooduqaqida amimarifaranoo.

<sup>14</sup> Mi karaambaiguusa sipsipa aanaaqi Yisuna aruannee qimasee mina faqa raki-fara. Yisufa nari rusandeesamumasee naaramaqaisa afeekaikamandee Yisuna faqa fimariasa misa saimbaqa mi karaambaiguusa naru taikafaranoo. Mifa Yisufa aiqama karaambaiga maridanoo aiqama uriqararasa urinaaqararafa maridanoo minara Yisufa quandaki misa faqa naru taikaannoo.

<sup>15</sup> Mi qangiroofa kafaa mi anaaseenara qimaqiminoo qinuu. Mi anaaseefa nammari amuaqasaa ooqumaruna anee qafaananoo. Mi nammariifa moomoosa maqusa mariasa moomoo fasiqa anaasee ufa oosana oosana qimariasa kikiqamusinoo mi nammariinasaa maridanoo.

<sup>16</sup> Mi qisaukuqarana taikasee aanai nimanasaa karaambaiguuqa mariasa faqa manda kaasau aandau faqa mi umuari mari anaaseenara fidiqaammidaqa mina aiqama ainaina marasaifanoo mifa kaqi samu mariannoo. Misa miqoo mina amaqi nama-saifanoo doo idaqaama taikafuannoo.

<sup>17</sup> Mi karaambaiguusa sia nariqa kai miqifaranoo. Anutufa qumee fuki faaki qinaqa misa sia irirainni misa nari iriranammifoo qimasee nari afeeka manda kaasau aandau amifaranoo. Anutufa nari ufa anoonaikianinna aukuanara afeesidanoo miqiannoo.

<sup>18</sup> Mi anaaseena anee qafaanafa mifa aiqama maaqa maaqa karaambaiguusa rakisi nimaqemari maqusafa maridanoo.

## 18

### *Babiroonia maqusa Anutufa naru taikoo ufafa.*

<sup>1</sup> Qinee Yoohaneesa mi ainainausa qafamasee moo qangiroo qafaqafana. Anutufa nari afeeka firaana amufanoo innaarunaindari maqasaa qumuroofanoo mina areenarafa firaqoo aiqama maqa maqasaa areeneenoo kaaqa qamaqinuu.

<sup>2</sup> Mifa firaqa kari maaqi qimasee nameera qinuu. Mifa doo kuridinoo firaqa Babiroonia maqusa doo aqufinoo kuridinoo. Mi nakundunaki afaannauqa faqa nimanauqaindi qikairi faqaasauqa faqa ufiniuqa afaanna ufini kai fidiqaqaa irafauqa kai maridanoo.

<sup>3</sup> Mi maqusaanaasa nari ummuarirana faiqi anaasee nari deedeepa nari deedeepi-rana uainna nammariara fooraa aanaamuru mariasa niminoo innee naaqee qima-soofaqa neeneeusa maridaqa. Maqasaaqaraasa aanaamuru karaambaiguuqa Babiroonia faqa ummuaridaqa naafeeqeusa maridaqa. Aiqaama maaqa maaqa pisinisa uqeeere mariasa Babiroonia maqannaasa kaaqa ainaina moomoo irairaimarinanoo minannai munnimma moomoo maree mariasa maridaqa.

<sup>4</sup> Mi qangiroofa miqi qimasoofanoo innaarunaindaraa ufa qinee Yoohaneesa moo iriqafana. Mifa maaqi qimasee Anutuna ufa irimariasa qimanniminoo qinuu.

Oo qini qiku qisauku innee mi maqusanakiqari doo aniaqa. Innee sia misa mandosanaki keeqaqa miqiqqa sia misa nariranaki faqa keeqaqa.

<sup>5</sup> Mi maqusaanaasa mandainaina fannoo naramuaaqa naramuaaqa inoo oorufiifanoo meerai innaarunai ooru maridanoo. Anutufa misa mandoosana qafaidanoo iridanoo.

<sup>6</sup> Misa inni mandaikamma nimaqoondee kai innee quandaki nári nimiaqa. Misa inni mandaikamannimaqoona akiaqara innee quandaki qaaraikamandee nimiaqa. Misa manda nammari inni nimunara innee quandaki mi kaafanaki kai idaqainna nammarina firaqoo nimifaqa naqa.

<sup>7</sup> Babiroonia maqannaasa nári nifaqa areenarana faqa nári moomoo amiqira ainaina faqa nariqa maraqau. Mi ainaina amana kai innee aupurarana faqa ikifaafau qirana faqa misa nimiaqa. Misa náriara uriqararasee qimariana sia maasa keekoopau maridau. Maasa sia ikifaafau qianauree qimariana akiaqara aupurarana faqa ikifaafau qirana faqa nimiaqa.

<sup>8</sup> Misa miqi qimaria mandainaina akiaqara misa firaqoo nidafrana faqa namuana faqa aurirana faqa ikifaafau qirana faqa aandaroo narirana faqa aiqama ainaina moodaa kari misa nifaqa quqasaqa. Misa mi maqusafa ida qama taikaanoo. Karaambaiaqa Anutufa misa ufa irimarifa afeeka uriqararafa marifa maridanoo.

<sup>9</sup> Mi qangiroofa Babiroonia maqusara kaqi qinoo qinau. Maa maqa maaqanasaaqaraa karaambaiaqa Babiroonia maqusaindaraa mandainaina maree mariasa mi maqusana idaqainna idamuna qafamasee firaqoo ikiraqeeffaranoo.

<sup>10</sup> Misa mi maqusana aupurarana qafamasee rufiasee nianai tatiqa maridaqa maaqi qimasee faiqira foora mi maqa maaqana qimamifaranoo. Oo mandainaina, Oo naaquqara ainaina maa firaa afeeka maqusa Babiroonia moodaa faasaana kai ani mandosana akiaqara kuridi taikaanoo.

<sup>11</sup> Maqasaa pisinisa fasiqauqa faqa mi maqusanara ikiraqaida maaqi qifaranoo, sia mi maqannaasa kafaa maasa amiqira ainaina marasee feefauru qimifaranoo.

<sup>12</sup> Sia kafaa moo fannoo maasa kooraa faqa siruaa faqa firaa feefauru aqimaria oosana oosana ooniuaqa faqa marasee feefauru qimifaranoo. Sia kafaa moo fannoo maasa amiqira qamunna oosana oosana saasaakoona arirana faqa fidika arirana faqa marasee feefauru qimifaranoo. Sia moo fannoo maasa amiqira saqari faqa eereefanta aanainnai auqimaria ainainna faqa firaa feefauru aqimaria saqarinannai auqimaria ainainna faqa booroosannai faqa qainnannai faqa amiqira ooninnai faqa auqimaria ainainna sia kafaa marasee feefauru qimifaranoo.

<sup>13</sup> Sia moo fannoo ooruku oosana oosana faqa amiqimasee afundimaru ainainna faqa makaqa nammari faqa fadameena faqa parauaqa faqa raisa faqa burimakau faqa sipsipa faqa qoosa faqa qoosa rarisee mari karana faqa karabusa ainainna faiqi faqa faiqi nimana faqa sia moo fannoo kaifaa mi ainainausa marasee munnimma qimifaranoo.

<sup>14</sup> Pisinisa imaria fasiqausa Babiroonia maqusara maaqi qimasee qifaranoo. Babiroonia maqannaasa innee niqaararee marifaqa adiafaa imarifaqa maree maria ainainausa doo kukeeqafinoo, ani munnimma moomoo faqa ani adiafaairafa kaaqa qaranasaa marina doo taikkeenoo sia kafaa paqurinnaranoo.

<sup>15</sup> Pisinisaiki maria fasiqausa Babiroonia maqannaasa amiqira ainaina feefaurumasee minannai firaa munnimma maree marusa mi maqusana aupurarana qafamasee rufiasee nianai tatiqa marida ikiraqeesee soofaaramaseeqa maaqi qifaranoo.

<sup>16</sup> Oo maa firaa maqusa mandainaina naaquqarafa kambiqanoo maridanoo. Mi maqusafa aanaaseera foora saasaakoona arirana faqa fidika arirana faqa afisirafa kooraa auqimaria oondana faqa firaa feefauru aqimaria ooniuaqa faqa afaaqa auqirafa doo maqee dadi taikafinoo.

<sup>17-18</sup> Miqi qimaseenoo mi qangiroofa sipa kiateenara maaqi qinau. Aiqama sipa kiateenauqa faqa nári pooskurauqa faqa nári pasindiauqa faqa aiqama ooruku nammari amuaqumau nidaqa ainaini marusa Babiroonia idamuna qafeeqa nianai tatieeqa ikiraqeeqa maaqi qifaranoo. Sia moo maqusa maa firaa maqusa auqu faqaafa miqirafa maridanoo.

<sup>19</sup> Miqi qimaseeqa kookooma afaqa qumaree nikiyaqamoondunna kukupamaseeqa maaqi qifaranoo. Oo mandainaina naaquqarafa firaa maqusa auqu faqaafa kukeeqeenoo. Aiqama sipaki nusa ooruku nammari amuaqumau nusa maa maqusanakinaasa ainaina moomoo nimisaida firaa munnimma maree marunasa doo dauni mi aiqama ainainafa qama taikkeenoo.

<sup>20</sup> Mi qangiroofa miqi qimaseenoo quandakufanoo Anutuna aiku asauku Babiroonia maqusara qimannimau. Innee innaarunai mariasa faqa Anutuna aiku asauku faqa Yisufa niqiqoo fasiqausa faqa Anutuna tamummaqara fasiqauqa faqa innee aiqama

asasiyaq. Mi maqusaafa inni nári ifa mina akiaqara Anutufa maqee mi maqusana arifanoo kuridinoo asasiyaq.

<sup>21</sup> Miqí qimasoofoanoo qangiroo moo amudaanai qimarufa ooni firaatia minannai mi aukuanu maru fasiqanaaseesa sakuma andaana andaana rimariqau. Mi ooninna fooqaa tia rafusu qumareenoo ooruku namariki aranaiqi aqinoo qinau. Mi firaa maqusana auqu faqaana Babiroonia maqusa ooni aqunnana amana kai aqusainanoo kukeeqafinaqaa sia kaifaa qafeefaranoo.

<sup>22</sup> Minaki piripunna arimariasa faqa kaqikaa ufireena fuaqee mariasa faqa firaa ufireena kookaanauru fuaqee mariasa faqa aiqama musika fuaqee mariasa faqa sia kaifaa mi maqusanaki qafeefaranoo. Oosana oosana ainaini mariasa misa kukusi mariafa sia kafa irifaranoo, qaindi afai faqa siammirifaranoo.

<sup>23</sup> Sia minaki qooma qaannoo sia kafa nimundarana tutuqirafa mariannoo. Babiroonia maqusi pisinisa imarusa faqa aiqama maqanna pisinisa imarusa faqa urinaaqararusa mariqau. Inni aukainaina maraqa nuasa nariqa unnaqira aukainainannai aiqama maqannaasa nikaruqidaqa.

<sup>24</sup> Anutufa nári aiku asaku fidika faqa nári tamummaqara fasiqauqa fidika faqa aiqama maqasaa kuqimarusa faqa Babiroonia maqusaki paqurunara narirana nimianoo.

## 19

<sup>1</sup> Mi qangiroofa Babiroonia maqusara ufa qimasoofofa quandafi ufa firaana innaarunai qifu pisipasamasoonaki maridaqa iriqaifana. Mi ufafa faiqi moomoo suqiga maridara foora qinoo maqi qiqau. Anutuna amooqiaqa. Faiqi asumu maree mariana faqa kaaqa qarana faqa firaa afeeka faqa maasa Anutunaindi maridanoo.

<sup>2</sup> Mifa mi umuari mari anaaseefa maqasaagaraasa putaamannimaqee marunna akiaqara Anutufa mina arinau. Miqunara mina ufa nimirafa kuqaa andeeqarafa maridanoo. Mi anaaseefa Anutuna ainainira fasiqauqa kuqa narunara Anutufa arinau.

<sup>3</sup> Misa kafa faaqariqa qiqau. Anutuna amooqiaqa. Mi maqusana, Babiroonia maqusa idamuna fannoo naaru naaru ooru fimariannoo.

<sup>4</sup> Miqí qimasoofofa faiqi firaasa moodaa fasiqa faqa qaara faqa qaara faqa Anutuna qaari figu figu iqa marusa faqa aandau qaara faqa qaara faqa marusa faqa Anutuna oorisa noorindari maqasaa aqufidaqa Anutuna amooqidaqa qiqau, misa kuqaa qidaqia, Anutuna amooqiaqa.

*Sipsipa aanaaqi Yisuna amundara qoomaqa ufa.*

<sup>5</sup> Miqí qimasoofoanoo ufa moo Anutuna qaarisaaqari qufaqa iriqaifana. Aiqama Anutuna ainainimarusa minara rufieemarusa, kaqiqaesea faqa uriqararusa faqa aiqama maasa Anutunara amooqiaqa.

<sup>6</sup> Miqí qimasoofoanoo ufa moo faiqi moomoosa suqidara foora firaa oondainni nammari aqufidanoora foora innaarunai qinoora foora miqira ufa fannoo maqi qinau. Innee aiqamaasa Anutuna amooqiaqa. Karaambaiqa maasa uriqarara Anutufa afeeka uqanna mifa nári aiqamai rakisinnimaqarana doo oosana araseenoo uriqaranoo maridanoo.

<sup>7-8</sup> Tatufirana aruaninna sipsipa anaqifa Yisuna amundarafara foora doo animaridanoo, minara maasa susuiqa asasiyaq mina uriqararana amooqiaqa. Mina aanaaqara foora Anutufa fuka siara eekara arimaruna aminoo maa siarana iraanee qufanoo irasee deedaqinoo maridanoo. Mi eekara siarafa Anutuna maqasaa fasiqa anaasee andeeqara oosana kikiqamusinoo maridanoo.

<sup>9</sup> Mi ufana qimasoofoanoo mi qangiroofa qini Yoohaneesa qimaqiminoo qinau. Yoohane maa ufana akara rua. Maa ufausa Anutuna kuqaa anoona ufa maridanoo. Anutufa sipsipa aanaaqi amundara qoomaqa naaree marisa susuida asasimariasa maridaqa.

<sup>10</sup> Miqí qimasoofofa qini daaquqoofofa mi qangiroona aikuki doorindari aqufumafi amooqianeeriafananoo mifa qaoo qimaseenoo qinau. Oo anee sia miqia. Aiqama Yisufa kooroo ira anoona ufa qumaree mariasa ani faqa ani akaqafasaaqaa faqa moodaa ainainimarunusa maridaqara anee sia qini qimooqia Anutuna kai amooqia. Yisufa nári maru aukuna nári anoona ufa koorooinau. Mi ufafa kai Yisufa sia kambiqaoo aukuna tamummaqara fasiqauqa naakufufaqa qimannimufaqa akara riqau.

*Eekara qoosasaa marufa nári andeeqaranannai aiqamausa uriqararafaikinau.*

<sup>11</sup> Mi qangiroofa miqí qimasoofofa innaarunai marida qafaafananoo innaaruna ra-keemambufafa akoqoo mariqau. Qinee minaki qoosa moo eekara arirana qafaqafana. Mina ataufakaaqa Yisufa ooqufaaqee maridanoo mina auqu qaara auqu faqaafa. Moo auqu amiqirafa mapukusee miqoo kai mari fusiqaanee qinau. Moo auqu kuqaa ufa qimari

fasiqanee qiqau. Nari andeeqara iriranannai kai faiqi anaasee ufa rainannimaqaidanoo minannai kai mandosana maree mariasa rakirana marannimidanoo.

<sup>12</sup> Mina afu idauru miqirafa qeemarinau. Mina akiagasaa karaambaiga qafee moomoo afisinoo marinau. Mi fasiqana auqu nari afaaqai akara rinoo maridanoo sia moo fannoo qafaidanoo nari kai qafaidanoo.

<sup>13</sup> Mina qamunna afisimarufa fidika aanaaqi marinau. Misa mina auquara Anutuna ufafee qimariqau.

<sup>14</sup> Mifa nari qoosasaa aiqaroofanoo mina aanaaqianna Anutuna innaarunaindaraa rakira ammiuqa aiqama nari eekara qoosasaa nariqa qamunna eekara qamunna anukara qamunna afisirausa mina aanaaqianna mina afafee fiqau.

<sup>15</sup> Mina ookiqari aseema raiqarafa ani marinau. Minannai aiqama maqannaa rafaafuannoo, qainna samu uqirafa nidanoo rakisinnimaqaannoo. Mifa uriqarara afeeka Anutuna aanooqirafa aranandaki idara foora aiqama maa maqanasaaqaraasa mina ufa sia irimariasa afapita qumareenoo moodaanaki afapita rapidau inanoo faiqi fidika fannoo sauna tatira fara foommiannoo.

<sup>16</sup> Mina qamunnasaa faqa mina aikusaa faqa mina auqu moo maaqi qimasee akara rirafa Karaambaiguqa karaambaiga uriqararasa uriqararafa maridanoo.

<sup>17</sup> Qinee Yoohaneesa mina qafamaseeqa quandaki qangiroo moo suanisaa kikiqinoo marina qafeeqa. Mifa aiqama ufini innaaruna ameemaana ni mariasa firaa kari nameera qimasee qimanniminoo qinau. Innee suqufiqa Anutuna firaa qoomaqa sakasee naaqa.

<sup>18</sup> Innee suqufiqa karaambaiguqa faqa sundiauqa faqa misa kiateenauqa faqa goosauqa faqa minasaa akaraqa mariasa faqa aiqama fasiqa rumbee mariasa faqa iduki mariasa faqa kaiqeesa faqa uriqararasa faqa Anutufa misa aiqama narusainaqqa misa nimaqi anireeqa Anutufa qoomaqa sakaseenoo misa nimaqi aniree naaqa.

<sup>19</sup> Suanisaa maru qangiroofa miqi qimasoo faqa quandaki firaa rakirana qafaqiafana. Manda kaasau aandau faqa maa maqa maaqanasaa karaambaiguqa faqa nari rakira sundiauqa moomoo faqa suqufi eekara qoosasaa marufa nari ammi sundia namu faqa naruannee qimasoo faqa rakirana uqeeraga.

<sup>20</sup> Qoosasaa marufa manda kaasau aandau uraaqaramafinoo rumba quqaseenoo inaaqianna kaasau aandau namu faqa rumba quqanau. Mi inaaqianaa kaasau aandaana moo auqu unna qira tamummaqara fasiqa. Mi unna qira tamummaqarafa indaaruaqa kaasau aandau oorisa faiqi sia auqaqaa ira ainaina auquqoofa mi ainainannai mifa faiqi anaasee nikaru qufaqa akaqausa niqinaaqa faqa nisauku uqannai faqa manda kaasau aandau akara maraqa. Akaqausa mi kaasau aandaunara innaaru qimariqau. Eekara qoosasaa nimarufa mifa kaasau aandau mareeqee unna qira tamummaqara fasiqa faqa kaqi kasi mariafaqa qumareeqee ida farumaki aqinau. Mi idafa firaaqoo aurukandaa kandaa idanoo afunda mandaikammimarinau.

<sup>21</sup> Eekara qoosasaa nimarufa nari ookiqari ani maru qaseemafa kaasau aandau ammi sundiauqa faqa maa maqa maaqana karaambaiga ammi sundiauqa faqa aiqama naru taikasoo faqa innaarunai ufiniuqa qumuree aiqama misa nimaqi noofanoo nimuauqufaqa minnisaga.

## 20

*Wan tauseenna aukuaana Yisufa rakisiu ufa.*

<sup>1</sup> Qinee Yoohaneesa miqimaruna qafamasee quandaki innaarunaindara qangiroo moo fannoo maqa ameemaana kiqa faqa kisaqa sainanda faqa asaukuki uqirafa maqai quminau.

<sup>2-3</sup> Qumureenoo qaareena qumaranau. Mi qaareenna moo auqu ooqeenaa sakani moo auqu Sadannafa moo auqu afaanna. Mi qangiroofa qumareenoo sainandanai rumbaseenoo maqa ameemaana madikaki afeeqa aquseenoo rookamandeenoo amusaraseenoo wan tauseenna aukuaana minaki marianne qimasee quqanau. Mi kamuuqoo sia maa maqa maaqanasaaqaraasa nikaruqianoo. Mi wan tauseenna aukuaana taikasainanoo Anutufa kafa idukusainanoo kaqikaqoo kafa nikaruqianoo.

<sup>4</sup> Qaareena rumbasoo faqa qaari moomoo innaarunai ufiqinoo maru qafaqiafana. Minasaa oogu mariqa marusara Anutufa innee faiqi anaasee ufa iriaqee qinau. Qinee miquna qafeeqa quandaqufa faiqi nimana moomoo qafaqiafana. Misa Yisuna anoona ufa faqa Anutuna ufa faqa kooroonara narusa nimana maru faqa nindafaqiafana. Misa sia manda kaasau aandau fee mina amanaree innaaru qimarusa mariqau. Misa manda kaasau aandau akara niqinaaqa faqa nisaukusaa faqa qaoo qimarusa mariqau. Misa kuqiranakiqari findi fiqa asauku mundirana saimbaqa karaambaika mambaqa faiqi

anaasee rakisifaranoo. Mi uan tauseenna aukuanna minasaimbaqa rakisifaranoo qinee qafaqiafana.

<sup>5</sup> Akaqausa kasooqagee wan tauseenna aukuana aiqarammafufanoo Anutufa inaaqian-naasa mara findifuannoo.

<sup>6</sup> Indaaru findifiraua Anutufa firaa asasirana niminaqa asasifaranoo. Inaaqianna findi firafa moo auqu inaaqianna kuqirafa mariannoo. Sia indaaru findifiraua urinaaqareefaranoo. Indaaru findifiraua Anutunaindi faqa asauku mundirana aanaiqikirausa maridaqa wan tauseenna aukuana Yisuna faqa faiqi aanaaseesaa rakisifaranoo.

*Sadannana nari aiku asauku faqa idaki aquaninna ufafa.*

<sup>7-9</sup> Mi uan tauseenna aukuanna aiqarainanoo Anutufa Sadanna nari rumberanaki-naana idukusainanoo raudamakinoo aiqama maqasaa mariasa kafaa nikaruqiannoo. Nikaruqimaseenoo naarainaqa moomoosa uqanna anireeqa nukudara foora qumbiqa aquffifanoo Anutufa aidimari maqasana Yeerusaree maqusa faqa Anutunara rimaria fasiqa anaaseesa faqa aiqama firaaqoo rafusu quqarumasee nariraree qiannoo. Aiqama maqannaasa suqimarusera Kookana maqannaasa faqa Makookana maqannaasa faqee qimarifaranoo. Rakuane qimarufanoo innaarunaindari ida firafa qumureenoo aiqama naru taikasoo faqa eendaki faqa apupurana maraidaqa naaru naaru marifaranoo.

<sup>10</sup> Naru taikasoo fanoo Anutufa faiqi anaasee nikaru qimaru afaannana rafuseeqeenoo ida farumaki afunda manda marunaki aqinau. Sia nari kai, ooqai manda kaasau aanda faqa unna qira tamummaqara fasiqa faqa marunaki afaanna rafusu aqinau. Miqoo misa maridaqa faasaana faqa eendaki faqa apupurana maraidaqa naaru naaru marifaranoo.

*Anutufa taikara faasaana ufa qianinna ufafa.*

<sup>11</sup> Qinee Yoohaneesa miqiqufaqa qafamaseeqa quandaki qafaafananoo firaa qaari ufiqirafa eekara arimarusasaa minasaa ooqumaru fasiqana faqa qafaqiafana. Mifa kooroo mafufanoo innaaruna faqa maqa faqa mina afusaaqari doo taikkeenoo taikafinau.

<sup>12</sup> Qinee miqoo qafaafananoo kuqiraua aiqama kuqiranakiqari findi fiqa Anutuna qaari aaga ufa qiraree qimasee kikiqiaqari mariqau. Uriqararaua faqa oordupiraua faqa amana amana kai Anutuna oorisa kikiqiaqau. Innaarunai mariasa mi kuqiraua akara papiqa qairiseenoo nisaana riqau. Papiqa moo kaqi mariasa nuqu papiqa faqa qairisee qafanau. Anutufa mi papiqanakinanaa misa manda marirana nirana auqarana qafamaseenoo ufa mina amana kai nimirau.

<sup>13</sup> Anutufa qufanoo ooruku nammari fannoo kuqiraua minaki marusa mareeqeenoo Anutuna afusaa quqasoo fanoo kuqirana faqa maqa ameemaana kuqirana faqa nariki maria kuqiraua mareeqee Anutuna afusaa quqaqau. Quqasoo fanoo Anutufa aiqama nari mandainaina auqoona akiaqara ufa nimirau.

<sup>14</sup> Kuqiranaki mariasa faqa maqa ameemaana kuqiranaki mariasa faqa aiqama mareeqeenoo ida farumaki aqinau. Mi ida farumanaki aqimarianara inaaqianna kuqirane qinau.

<sup>15</sup> Aiqaмаusa asumu maraaninausa papiqaki nuqu marisa misa kaqi marifaranoo mi papiqanaki nuqu sia marinausa misa aiqama mareeqee kaqi kasi marufanoo ida farumaki aiqama aqinau.

## 21

*Fuka innaaruna faqa maqa faqa auquaninna ufafa.*

<sup>1</sup> Maa nauraa maqafa faqa innaaruna faqa ooruku nammari faqa doo taikanau. Taikafufanoo fuka innaaruna faqa maqa faqa ooqeenana amaaqa maqasoofaqa qafaqiafana.

<sup>2</sup> Qinee qafaafananoo Anutufa qufanoo fuka naaquqara maqusa fuka Yeerusaree innaarunaindari qumureenoo ooqeenaa Yeerusaree amaaqa maqafufaqa qafaqiafana. Fuka anaasee amundanarana foora afaaqa auqirafa fuka maqasaa quminau.

<sup>3</sup> Qumuroofanoo ufa moo fannoo Anutuna innaaruna qaarisaaqari maaqi qimasee firaa kari qinau. Doo maqee Anutuna maqusa faiqiki qumu maridanoo. Mifa misa faqa marinaqa misa mina faiqi anaasee marifaranoo. Anutufa nari uqanna misa faqa marinoo misa Anutufa mariannoo.

<sup>4</sup> Mifa aiqamausa naukunu rukaannoo. Sia kafaa kuqirafa faqa ikifaafau qirafa faqa ikiraqarafa faqa nidaqirafa faqa sia kafaa mifauqa mariannoo. Mi ooqeenaa ainainafa doo taikafinoo.

<sup>5</sup> Mi ufafa taikoofanoo qarisaa marufa qini qimaqiminoo qinau. Doo qinee maqee aiqama ainaina fuka kai auqu quqaanaura. Maa ufausa akara rua, kuqaa anoona ufa maridanoo minasaa mundimaria ufafa maridanoo.

<sup>6</sup> Kafa qimaqimino qinau. Doo aiqama ainaina taikeno. Qinee oosana araafanausa maridaqa taikaaninna aukwana faqaasa maridaqa. Nammariara nidimariasa fuka maqak-iqari ururee mari nammari, kaqi marira nammari asoarafa sia feefaurirafa kaqi nimianauroo.

<sup>7</sup> Mandainaina rafaqafusee uriaaqararause qinee maa ainainna nimianauro. Qinee misa Anutusa marianauro misa qini qimaakumara marifaranoo.

<sup>8</sup> Maparaa imariasa faqa ueeqee mariasa faqa kaaqa ufa rukiee mariasa faqa faiqi anaasee kuqa narimariasa faqa kaaqa faiqi aanaaseera rimariasa faqa aukainaina maraqa nuasa faqa tumunnai faiqi nimana auqusaida minara rufiasaida innaaru qimari-asa faqa aiqama oosana oosana unna ufa qimariasa faqa mi mandoosanna maraqa nuasa misa maqusai ida farumaki marifaranoo. Miqoo ida firaafa fasafasainoo mandundi marifa mariannoo. Mi idana auqu inaaqiannaa kuqirafa maridanoo.

*Fuka Yeerusaree anianinna ufafa.*

<sup>9</sup> Miqi qimasee qimaqimisoofanoo qangiroo moo fannoo qisauku dinni taikasee dinni ani qaara marasee marusakiqari aupurarana maqasaa teeqimariasiqari moo fannoo aniree qimaqimino qinau. Yoohanee anee mai anirainaga auniranasaa kuqu sipsipa anaagina mina anaaga amundarana ani uqafiqaanana qafa.

<sup>10</sup> Miqi qimasooofanoo Anutuna maraquina fannoo qini daakufufanoo qangiroo fannoo rafusueeqeenoo kisaaga aaganasaa quqaqisanau. Miqooqari naaquqara maqusa fuka Yeerusaree maqusa innaarunaindari Anutufinnaindari qumuna uqafiqanau.

<sup>11</sup> Qumimarufanoo faqa qumu marinanoo faqa minakiqari Anutuna kaaqa areenarafa minakiqari takunasoosa imarinau. Mi fuka maqusafa pupu ooni tanukaidara foora qeemarinau.

<sup>12</sup> Mi fuka maqusana faandaamurafa ooninnai auquqoofa marinau kisaaga amatooki kamminoo marinau minaki qisaukuqara taikasee qiku ooqu qaraqanda marasee kooqi marinau, aiqama kooqisaa qangiroo moo fannoo rakisimarinau. Mi kooqisasaa Isaraeena aiku asauku marusa qisaukuqara taikasee qikunni ooqu qaara marasee nuqu mi kooqisasaa akara rinoo marinau.

<sup>13</sup> Suani oosana ururee maruqaannai faandaamurasaa qaaramoo kooqi mi qaannai marinau. Suani keeqee maru qaannai qaaramoo kooqi marinau. Suani dinni ataaqee qaannai qaaramoo kooqi marinau. Suani dinni ataaqee qaannai qaaramoo kooqi faandaamurasaa marinau.

<sup>14</sup> Mi ooni faandaamurana oosanaki qisauku qara taikasee qikunni ooqu qaara marasee fira ooniuga marinau. Mi oonisasaa sipsipa aanaaqi Yisuna aiku asauku qisaukuqara taikasee qikunni ooqu qaara marasee marusa nuqu mi oonisasaa akara rinoo marinau.

<sup>15</sup> Mi qangiroofa qini qimaqimimaruna asaukuki ruraa kooru auqimaruna uqusee mariunannai mi fuka maqusana faqa faandaamura faqa kooqiuga faqa amanamasee qafanau.

<sup>16</sup> Mi fuka maqusana ataaqeeni faqa mina sandaaqai faqa amana amana kai marinau. Aiqama tu tauseenna faqa maqi handareeta faqa (2,400 kilometer) mina kisaaga miqimaseenoo kisaaga uqanna mi maqusana ati faqa marinau.

<sup>17</sup> Mi fuka maqusa faandaamurafa faina maqa qufisara foora auqirafa marinau. Mi qangiroofa faandaamura maqasaaqari ammuqunni amanamasee qafamaseenoo sikisti metera amana maridanoo fee qinau. Kisaaga uqanna marinau.

<sup>18</sup> Mi faandaamura pupu ooninnai auqirafa marinau, mi maqusanaki maaqauqa koorannai karasakiara foora ruqiaki qafee marufa idaaqirafa uqanna marinau.

<sup>19</sup> Faandaamura oosanasa fira ooniuga marufa fira feefauru auqusaida maree maria ooniuga mi fira oonisasaa afaaga auqiiee mariqau. Faandaamura fira ooniuga qisaukuqara taikasee qikunni ooqu qaraqanda marara ooni mapukira ooni nifaaga auqira ooniuga maridaqa, nuqa faqaa ooniuga mariqau.

Moo ooni afaaga moo auqirafa mina auqu yasapeera marinau. Mifa saqari amanee arirafa amananda tanukaida qeemarufa marinau.

Moo ooni afaaga auqirafa mina auqu akafata marinau. Mifa dirindaasi ariranasaa indiri ooni arirafa marinau.

Moo ooni auqu eemrarada marinau. Mifa pupu ooni moo saqari amanee arirafa marinau.

<sup>20</sup> Moo ooni auqu saradonikisa marinau. Mifa pupu ooni moo eekara faqa saapaani ooniaro foora irafa faqa marinau.

Moo ooni auqu kananeeriana marinau. Mifa taatuqee saapaani marinau.

Moo ooni auqu koosa marinau. Mifa pupu ooni moo tumana arirafa marinau.

Moo ooni auqu beerira marinau. Mifa arooqa ooni fooqaafa saqari amanee arirafa marinau.

Moo ooni auqu toopasa marinau. Mifa pupu ooni miqirafa tumana arirafa marinau.

Moo ooni auqu karaseedooni moo ooni marinau. Mifa pupu ooni miqirafa saqari amanee arirafa marinau.

Moo ooni auqu tookueesa marinau. Mifa ooni moo saqari amanee arirafa marinau.

Moo ooni auqu ametisa marinau. Mifa arooqa ooni miqirafa pannoona arirafa amananda qafee marufa marinau.

Faandaamura firaa ooniugara mapukira ooni fee qiqau misa nuqu miqiminoo maridanoo. Qisaukuqara taikasee qikunni ooqu qaaraqanda marasee marinau.

<sup>21</sup> Fuka Yeerusaree maqusa qikunni ooqu qaara marasee kooqi marinau. Aiqama kooqi faandaamurasaa maaqa kooqara foora auqinoo marinau. Ooni firaana gumaree minaki ititee maru oonisa feefauru aqimari oonisa firaa ooniuga oonda firaana fooqaafa marufaga qafaqafana. Maqusa qambaana faqa naambeeqi faqa aiqama amiqira koorannai auqirafa amananda qafee marufa marinau.

<sup>22</sup> Qinee Yoohaneesa fuka maqusa Yeerusaree qafamaseeqa naaquqara amaana maqara randeeqa sia marifaqa qafeeqa. Amaana maqa marinoofau fifau mariqini. Karaambaiqa Anutufa uriqararafa sipsipa aanaaqi Yisufa faqa miqoo akooqoo marunara amaana maqa sia marinau.

<sup>23</sup> Suani faqa quqoona faqa marinaqau qafani. Sia mari qafeeqa. Maridanoofau fifau mariqini Anutuna nari firaa areenarafa firaaqoo kaaqa qamaqinoo maridanoo, sipsipa aanaaqi mi maqusana qoomara foora maridanoo.

<sup>24</sup> Aiqama maa maqa maaqanasaaqarasa mi maqusana kaaqa qaranasaa nifaranoo. Misa karaambaiqauqa nari amiqira ainainauqa mi maqusanaki munu quqeeffaranoo.

<sup>25</sup> Mi maqusa kooqisa aiqama faasaana atuanoo kai mariannoo eendaki faqa sia ititeffaranoo, sia eenda mariannoo kaaqa qarafa kai mariannoo, minara kooqi sia ititaidaga.

<sup>26</sup> Aiqama maqa maaqasaa mariasa misa amiqira ainaina faqa misa uriqarara ainaina faqa maree aniree mi maqusanaki fuka Yeerusaree maqusaki kai quqeeffaranoo.

<sup>27</sup> Sia moo manda ainaina fannoo mi maqusanaki keeqaannoo. Sia moo asaurira ainaina auqee mari fee unna ufa qimari fee sia mi maqusanaki keeqeeffaranoo. Sipsipa aanaaqi fannoo maqasaaqarasa nari papiqaki nuqu akara rumaqaisa misa kai mi maqusanaki keeqeeffaranoo.

## 22

### *Kaqi marira nammariara qimaqoo ufafa.*

<sup>1</sup> Mi qangiroofa fuka Yeerusaree maqusa uqaqifiqaseenoo nammari miqoo maruna uqaqifiqanau. Mi nammari fa Anutuna faqa sipsipa aanaaqi Yisuna faqa maru qaarinakiqari gumuree fuka maqusa qambaana ooqu fimarinau. Mi nammariina auqu kaqi marira nammari fee qiqau. Amiqira nammari sia dumuna maqa maru nammari fa mi nammari mookoofa amanee kai randaida qumidanoo.

<sup>2</sup> Mi nammari dinni dinni afai saqari kambiqaanoo maridanoo. Mi saqarisaa aiqama quqoonasaa qagamma iraidanoo kai maridanoo. Mina amanee aiqama maqannaasa aurirana teeroo taikannisee marifa mi saqari amaneeffa maridanoo.

<sup>3</sup> Moo ainainara Anutufa aqurarainna ainaina sia mi fuka maqusanaki mariannoo, doo taikafuannoo. Anutuna qaari faqa sipsipa aanaaqi qaari faqa mi fuka maqusanaki maridanoo mina aiku asaku mi maqusanaki mariasa mina amooqifaranoo.

<sup>4</sup> Misa mina oori qafeffaranoo misa niqinaaqa mina auqu akara rinoo mariannoo.

<sup>5</sup> Mi maqusanaki asukuna taikanoo maridanoo sia kafia mariannoo. Misa sia qoomara suaniara iridaqa fifau maridaqa, Karaambaiqa Anutufa misa qooma marinaqa miqooqarasa karaambaiqara foora naaru naaru rakisi nimaqeeffaranoo.

### *Yisufa doo qumuaninna ufafa.*

<sup>6</sup> Mi qangiroofa mi ainainausa uqaqifiqaseenoo qimaqiminoo qinau. Mi ufausa aiqama qimamunafa kuqaa minasaa mundimariafa marifaqa qimamiqa. Karaambaiqa Anutufa nari maraquna tamummaqara fasiqauqa nimimari fa nari qangiroo niqiqai faqa mina ainainira fasiqa aanaaseesa qusasaa kambiqaaninna ainainausa uqannifiqaanifeera mi ainainausa ani uqafiqeeqa.

<sup>7</sup> Yisufa inniara maqasaa mariasara maaqi qidanoo, qinee qusasaa kafia ooqu fua-naura. Maa papiqanakinaa ufa irisee mi mau fimariasa misa asafifaranoo.

<sup>8</sup> Qinee Yoohaneesa mi ainainna aiqama qafamasee iriseeqa daaquqoofaqa uqaqifiqee mari qangiroona aikuki maqasaa aqufiqa amooqianeeriafananoo mifa qaoo qimasee qinau.

<sup>9</sup> Oo sia miqia Anutuna kai amooqia. Qinee ani faqa moodaa ainaini marunausa maridaqa ani afasausa tamummaqara fasiqauqa faqa moodaa ainaini marunausa maridaqa. Maa papiqanakinna ufamau fimariasa misa faqa moodaa ainaini marunausa maridaqa. Sia qini qimooqia Anutuna kai amooqia.

<sup>10</sup> Mi qangiroofa kafaa qimaqiminoo qinau. Yoohanee anee maa papiqanakinna ufa tamummaqara ufa maridanoo sia qumeeraa, qimannimia. Aiqama maa ainainausa qusasaa kambiqaanoo sia amana quandasee kaifaa kisaqasaa fuanno, qusasaa doo kambiqaanoo.

<sup>11</sup> Anaaseera fanandirana, faiqira fanandirana, miqida nariara nariara rimariasa saina miqidaqa mariaqa, mandoosana mandoosana maree mariasa saina miqidaqa mariaqa. Amiqira oosana maree mariasa saina miqidaqa mariaqa. Maparammasee amiqira oosana firaqoo maree mariasa saina miqidaqa mariaqa.

<sup>12</sup> Doo iriaqa Yisufa inniara qidanoo. Qinee qusasaa ooqufuanaura. Innee maree marianna akiqara uqirausa doo ooqu fiqa muqu nimianauranoo.

<sup>13</sup> Qinee oosana aroonakiqari marunausa maridaqa. Qinee taikaaninna aukuanna faqaasa maridaqa.

<sup>14</sup> Nari qamunanda nammari uqusee anukara qamunna faqaasa misa kai amana fuka Yeerusaree maqusa kooqiki keeqafiqa kaqi naaru marira saqari qaqamma amana diqisee neefaranoo. Miqimariasa asafifaranoo.

<sup>15</sup> Mi maqusana aqoosai kaaqa ufa rukiee mariasa faqa aukainaina maraqa nuasa faqa faiqi anaasee nariara nariara fanandi mariasa faqa faiqi anaasee kuqa nari mariasa faqa saqarinnai faiqi nimana auqusaida innaaru qimariasa faqa unna oosana auqimariasa faqa unna ufa qimariasa faqa misa aiqama aqoosai marifaranoo.

<sup>16</sup> Qinee Yisufa maa ufausa amaana maqaki keeqee mariasa qimannimiaqee qimasee qeeqa qangiroo aqiqeeqa. Qinee Dafidina oosanakiqari minati maridaqa. Qinee kananaana duqudeeqiara maqi kaaqa qeemarunausa maridaqa.

(Yisuna saqariki mariasa aiqama mina aqoonausara fooro mariafanoo misara Yoohaneefa moodaanaki sipsipa aanaaqi Yisuna anaqa fee qidanoo maa papiqanaki qidanoo.)

<sup>17</sup> Anutuna maraquina faqa sipsipa aanaaqi Yisuna anaqa faqa aiqamausara mai aniaqee qidaqa. Aiqama maa ufana irimariasa innee faqa quandafi niqoonausa naaraqa aniaqee qiaqa. Yisufa naaru marira nammari nimianee qidanoo. Aiqama nammariara nidimarisa doo aniree naaqa. Sia feefaurifaranoo, nidimarinausa kaqi naaqa.

#### *Taikara ufa.*

<sup>18</sup> Qinee Yoohaneesa aiqamausa maa papiqanakinna tamummaqara ufa irimariasa doori kandamasee aaquqimannimaqaidaqa faiqi moo fannoo maa papiqanakinna ufa moo nari ufa minasaa ootupamasee qinafa mina akiqara Anutufa maa papiqanakinna aupurarana narirana mara mi fasiqana ariranasaa ootupainanoo firaanaikiannoo.

<sup>19</sup> Kafaa faiqi moo fannoo maa papiqanakinna tamummaqara ufa ati rafaqafinanoo minara mi fasiqafa naaru marira saqari qaqama neemariana Anutufa rafaqafuanno sia naannee qiannoo mina naaqqara fuka maqusaki keeqaranara faqa Anutufa rafaqafufusee qaoo qiannoo. Maa papiqanakinna ufamau sia fuanara qaoo qiannoo.

<sup>20</sup> Qinee maa papiqanakinna ufa qima afeekaikammannimi marunausa Yisusa maaqi qimasee qimannimidaqa kuqaa uqanna qinee qusasaa innee iannai kaifaa ooqu fuanaura. Qinee Yoohaneesa minara maaqi qidaqa. Oo karaambaiqa Yisu doo qumuannee qidaqa.

<sup>21</sup> Karaambaiqa Yisuna amiqira afaarirafa inni aiqamausaki mariani.